

1370/B/1

L x 18/f



Digitized by the Internet Archive
in 2018 with funding from
Wellcome Library

https://archive.org/details/b30529797_0003

TRACTATUS
DE

MATERIA MEDICA

SIVE DE

MEDICAMENTORUM SIMPLICIUM

Historia, virtute, delectu, & usu;

Auctore STEPHANO FRANCISCO GEOFFROY

quondam Doctore Medico Parisiensi, &c.

TOMUS TERTIUS

DE REGNO ANIMALI.

Auctoribus ARNAULT DE NOBLEVILLE & SALERNE,

M. D. Aurelianensibus,

Gallice conscriptus, nunc Latine redditus.



VENETIIS

Typis & impensis NICOLAI PEZZANA

M D C C L X.

SUPERIORUM PERMISSU, AC PRIVILEGIO.

207 A T O A A T

WATSON MEDICAL



WATSON MEDICAL

WATSON MEDICAL

WATSON MEDICAL

WATSON MEDICAL

WATSON MEDICAL

WATSON MEDICAL

WATSON MEDICAL



WATSON MEDICAL

Lectori Typographus.



N! tibi, L. B. expectatam Viri quondam Celeberrimi Geoffroy Materiam Medicam continuatam, & Gallice conscriptam, nunc Latine redditam. Non est, quod multis Tibi eam commendemus, nam commendatione nostra non egent, quæ suametipsa se virtute commendant. Imo, vel a trita via quidni parum recedere liceat? Alias enim & Tuam in illa accipienda benignitatem imploraremus; & errores, si qui forsitan inter vertendum irrepserunt, excusando, jam exponeremus humanæ naturæ rationem, ac vel ex vero in errorem prolabendi facilitatem, jam temporis, quod impendere licuit, spatiolum, jam ad sexcenta alia negligentiae vel ignorantiae asyla confugeremus; nec tamen publicis hisce verbis quidpiam imperfecti detrabendo, aut perfectionis addendo, Tibi qualiacumque fuerint, relicta traderemus. Mittimus superflua; ne illo quidem Horatiano: Ubi plura nitent &c. ceu clypeo, contra criticorum fulmina, tamquam conscii sibi suæ imbecillitatis, supplicesque obtegimur: Aliorum potius, quæ ad rem pertinent, rationem, Tibi reddimus. Sex scilicet volumina Gallica in duo redegimus, ut & molis, & argumenti ratio habeatur. Sic enim, quæ tribus illorum prioribus, de insectis, de piscibus, de amphibis & avibus dicta fuere, nos parte prima, secunda autem ea complectimur, quæ tribus posterioribus, de quadrupedibus & de homine exposita leguntur. Quod adtinet ad scribendi rationem, quam stylum dicunt, variis varia adponenda fuerunt. Et quidem historiae naturalis cultoribus, cultiorem exhibemus; cum Anatomiae studiosis, satis quidem clare, nec adeo eleganter, cum pharmacopolis denique suo modo loquimur, & ne his quidpiam claritatis deesset, suis auribus accommodatam loquendi rationem sequi, ac minus castæ latinitatis vocabula adhibere maluimus, quam intempestivo elegantiae studio obscuriores esse iis, quibus lucem adfundendi animus erat. Probe equidem novimus, libri fata & pretium, hodie sæpius, a concinnitate styli atque verborum pendere; nos autem hujusmodi fuco haud indigere ducimus Materiam Medicam Geoffroyanam. Illis relinquitor externæ pulchritudinis cura, quibus valor internus deest. Graves viros, sic est in proverbio, forma neglecta decet. Et in primis, ubi de artibus dicendum fuit, artis vocabula, quam-

quam Latinis auribus ingrata, adhibuimus; nec elegantiae pruritu, jam artis instrumenta, iam alia, Romanorum temporibus ignota, comitis verborum ambagibus & nimia prolixitate circumscripsimus. Puerile id studium pueros spectat, nos cum viris loquimur; artis cupidis artem tradimus; absit ergo nimia leviorum cura. Hodie enim suum est idioma stabulis, suum venatoribus, suum equitibus; nos autem fontes latinitatis equestris, venatoris & stabulorum, limpidos quidem, ignoramus, imo deesse novimus. Sufficiant; interim & nos aliquid dixisse videmur. Tu autem L. B. nobis conatibusque nostris fave; Vale.



Proœmium .



UO feliciores stadium nostrum decurramus , & illum sequamur ordinem , quem in contexenda sua Materia Medica sibi præfixerat Vir quondam Cel. *Geoffroy* ; illa nunc medicamenta describendo pertractabimus , quæ ex regno animali proficiuntur . Hæc igitur pars nobis nunc discutienda , minoris sane est extensionis , quam plantarum tractatio . Omnis ævi homines enim plura in his , quæ simplicia audiunt , quam in animalibus , contra morbos facientia detexere . Horum conformatio scilicet nimis congruit cum nostra , nimis est analoga , quam ut humores degeneratos , plurimum contrariis atque e diametro , (ut ajunt) oppositis curandos , emendare valeat ac commutare . Abundantissimus etiam sale volatili & sulphure succus ex animalibus proveniens , putrefactionem , cujus maxima est corporis dispositio in morbis inflammatoriis , adauget ; hinc in periculosiori morborum genere , ne quidem adhibendus venit .

Quæ quum ita sint , parcissima media illa esse cognoscis , quæ ex animalium regno depromimus . Imo , si nulla nisi hæc tractatione attingendi animus fuisset , quæ familiari omnium usui veniunt ; paucissima sane adponenda forent . Ast vel in ampliorem tractationem opus nostrum sese diffundere posse existimavimus . Quid enim Materia Medica ? nisi artis sanandi armamentarium ; eo igitur referenda omnia , quotquot sunt , quibus artem uti posse repertum est . Quo autem media incedamus via , nec nimia prolixitate Lectoribus moveatur tædium : minoris momenti capita rejecimus , illa saltem retinendo , quæ tutiori & frequentiori usui cedentia , Medicorum adtentione digniora judicavimus .

Quod ad ordinem in continuando opere observatum adtinet , illum sequi maluimus , quem Celeberr. quondam *Geoffroy* sibi proposuisse videtur . Hic enim Tom. I. Materiæ Medicæ Regni Animalis tractationem ab insectorum historia sese inchoaturum , tum vero ad pisces , deinde ad aves , tandem ad quadrupeda progressurum ; ultimo de homine , Medicæ artis fine pariter ac medio , tractaturum pollicetur . Qui quidem tractationis ordo , quum optime dispositus , nobis saltem videatur , illum & servandum esse duximus . Quamvis enim alii magni nominis viri , alium sequuti fuerint : vix diversus dici meretur , si quidem singula ejus puncta eadem plane ratione pertractantur .

Classẽm quamvis subdividendo, ordinẽ alphabeticum, naturæ convenientissimum, & ubi de plantis actum fuit indigenis, observatum, præoptavimus. Quæ igitur de animalibus dicuntur, quinque classibus pertractabuntur, quarum prima de insectis, secunda de piscibus, tertia de amphibiiis, quarta de avibus, quinta tandem de quadrupedibus scitu digna exponet.

Cæterum quum nulla circa Zoologiam observata nobis reliquerit Cel. *Geoffroy*, nisi illa, quæ in primis voluminibus de Coralliis, Corallinis, Kermes & Cocinilia perscripta leguntur; nunc autem oculis ac imitationi nostræ ereptum sit exemplar tam perfectum ac præstantissimum: veniam, quæsumus, dabis L. B. imitantibus, nec tanti Viri laborem cum nostro æquiparabis. Numquam enim eo usque audacia processimus, ut vices ejus explere, vel ejus in locum subrogari posse crediderimus. Sufficit, si animus promovendæ publicæ utilitatis cupidus aliqualem nobis conciliare possit veniam; sufficit, quod ultra posse nec nos teneamur.

Nec finem procæmio imponere licet, nisi palam hic repetitas gratias egerimus Vobis, Experientissimi Medici Parisienses, quorum studio & labore, in conficiendo hoc opere adjuti fuimus. Te namque compellamus, Vir Cel. *Bernard de Jussieu*, qui, quæ Tua experientia comperta habuisti, benignissime nobiscum communicasti; compellamus & Vos, Viri Cell. *Falconet*, *Chomel* & *Lorry*, qui liberaliter vestrarum regni animalis disquisitionum copiam nobis facere voluistis. Gratias vobis, & felicia quævis. Valete!



GENERALIORA QUÆDAM DE ANIMALIBUS,

quæ in usum Medicinæ veniunt.



Mnia, quotquot sunt in natura rerum, corpora, lustrando disquiras, & maxima nobiscum cognatione animalia contineri videbis. Hæc enim nobiscum communes habent qualitates illas, quibus a reliquis corporum generibus distinguimur; hæc nobis exhibent multum cognitionis ac lucis, magistræ functionum cognoscendarum; hæc hominum industriæ instrumenta, hæc necessitati vestimenta, hæc corpori alimenta suppeditant; hæc naturæ tramitem, si quod periculum eodem aberrandi imminet, commonstrant; hæc tandem arti Medicæ efficacissima contra morbos media præbent.

Variæ autem sunt animalium qualitates. Aliæ, quas cum ente quovis, Physici sollertis objecto, cum omni materia communes habent; ut: leges mechanicæ, universi reâtrices, basis ac fundamentum actionis corporum universi quorumvis. Alias non nisi cum vegetabilibus communes, alias denique sibi proprias habent, iisque a quovis alio mundi corpore distinguuntur.

Cum vegetabilibus communes habent proprietates illas, quas corporum organicorum, immensæ providentiæ divinæ speculorum, notas características constituere novimus. Legibus constantibus immutabilibusque subsistunt, ac fere quotidie renovantur; & partium suarum dispositione ac compage aptissima, effectus sibi proprios edunt. Quæ quidem symmetria organica quamdiu conservatur; agit vigetque corpus necessario; turbatur concensus; turbantur, cessant effectus. Magnam vero partem organisationis vegetabilium pariter ac animalium constituit canaliculorum structura, numerus, & ad se invicem, & ad liquores quibus explentur, relatio. Hi nempe liquores, in intimo corporis nati sunt qualitates, speciei, id est: origini suæ convenientes: hinc quoque exactissime canaliculos implent, nec diametrum illorum nimis justo cogunt, premuntque; imo ad producendas, quibus destinati sunt, actiones, vellicationem expectant, a principio & origine sui motus proficiscentem.

En igitur idem illud activitatis principium, & causam esse quarumvis suarum actionum; quo deficiente nec canaliculorum structura, nec dispositio, nec liquorum qualitas ipsa quidquam prodesset. Adtamen pro vario usu corporum quibus inservire debet, varium est & activitatis principium; in his quidem rapidius, in illis lentius, limitibusque naturæ circumscriptum, ac sive nimia rapiditate impellatur, sive impedimentis retardetur, æque nocivum. Hinc igitur omnis pendet naturæ fecunditas; hoc nempe liquorum in canaliculis suis motu, illa relatione inter diametrum vasculorum, & particulas eo receptas, his, inquam, corpuscula ex ipsis elementis sibi circumfufis, (ut ita loquar) particulas suo alimento convenientes eligunt. Eadem etiam lege motus, particulae inutiles & nocivæ, quæ vel compositionem eorum ingredi nequeunt, vel si ingrederen-

tur, dispositionis suæ ordinem perturbarent, illæ, inquam, particulæ longe a centro circulationis repelluntur, abiguntur. Sic suis quodammodo viribus, totum aliquod articulum sustinetur; sic imperceptibiles incrementi gradus transiens, destinatam sibi perfectionem attingit; sic varios, & fini, cui cedere deberet, respondentes producit effectus; sic suppeditata plus minusve numerosa posteritate, præceps sua sponte se dat termino illi, quo quævis sua principia dissolvuntur. Nec ullam ejus partem reperies, quæ pro explendo suo fine suum non conferat; etenim ex perfectione organi cujusvis, perfectio compositi totius resultat.

Vegetabilium organismus, (sic enim artis vocabulo dicunt) facultate duplici, scilicet: sese nutriendi, & posteritatem numerosam relinquendi, absolvitur. Simplici quidem atque satis mirando mechanismo utraque facultas operatur; qui quidem in animalibus eo mirabilior, & jure dicitur, quo majoris erit extensionis, quoque magis diversas, ac infinite variantes effectus, ex causa tam simplici, qualis in vegetabilibus agit, proficisci videmus.

Multiplici discrimine interim a regno vegetabili, animale regnum differre constat. Sic enim facultas sentiendi, sive impressiones externas recipiendi, receptas autem ad commune aliquod sensationis centrum transmittendi, exinde tandem sese determinandi, hæc, inquam, facultas nulla competit Regno vegetabili. Quam quidem animalium prærogativam, vel hebetioris ingenii homines in illis observant; nec tamen exinde determinare licet, quænam præcise differentia intercedat usum facultatis hujusce in illis, & in nobis; num sensatio illorum debiliior causæ veniat organisationi varianti, dum in motum fluidorum agit, & actionem solidorum. Consideranda igitur veniunt animalia tamquam corpora eximiis hisce proprietatibus destituta, ad summum, tamquam machinæ motu fortiori vel debiliiori agitata, ac qualitatibus exaugendo vel imminuendo huic motui sufficientibus, donata.

Hoc igitur ex puncto visus considerata animalia in quamdam corporum classem redibunt, quæ simpliciiori nutrimento, quam vegetabilia, alitur; quæ motus quantitatem majorem sibi impressam recipit; quæque in excernendis partibus heterogeneis adcuratior subtiliorque procedit, quam vegetabilia. Simplicius dicendum est animalium nutrimentum, hoc enim ex plantis hauritur, ut ex terra plantarum, novum vero alterationis gradum suo nutrimento addunt animalia.

Motus animalium major, nempe continuus est, evidens, nec ab efficiente causa externa pendet, imo in omnibus, (pluribus saltem) satis eximium calorem producit; haud ita in vegetabilibus.

Exquisitior denique & magis conspicuus est organorum sensus in animalibus; etenim vel a minimo corpore heterogeneo, (sive illius activitas sensus adficere valet, sive suæ imbecillitatis ergo impressionem sensibilem elicere nequit) secretio illorum exaugetur, qua pars irritans extrinsecus protrahitur, & quivis sui effectus reprimuntur, præscinduntur. Triplici ergo hoc discrimine, omnis differentia, inter partes animalium vegetabiliumque obvia, absolvitur.

Primo enim simpliciiori nutrimento aluntur; & quamvis vegetabilia, animalium nutrimenta, similitudinis inter utraque obviæ nexum quemdam

constituere videantur : adtamen vel illa ipsa nutrimenta diversitatis fontibus cedunt atque origini. Nutrimentum suum vegetabilia ex terra recipiunt , ast nutrimento animalium terra est insufficiens. Quæ enim a terra plantæ hauriunt, principia essentialia , non sunt , nisi terra proprie sic dicta , & aqua elementaris; quidquod vel solam aquam plantis incrementum , haud adeo exiguum, suppeditare posse constat. Principii utriusvis combinatio in interiore plantarum parte perficitur ; eaque primo quidem aquæ unioni cum terra, deinde autem & superabundantiæ alteriusutrius ex hisce principiiis , tribuenda venit . Sic igitur efformantur mixta magis composita , quæ novum ordinem principiiis inducere valent ; ipsa principia tandem plantarum omnium generalia elementa producant, quæ igne accedente separantur ; quæque si regnum vegetabilium respicias , in uno quodam corpore unita continebantur, cujus partes levissime cohærentes, aqua solvuntur, degenerant, fermentant, & varios fermentationis gradus , (quos determinare Chymici opus est) adtingendo, tandem putrescunt , penitus dissolvuntur .

Hoc corpus igitur per omnes in universum plantas dispersum, *mucilaginem* nuncupant, quæ si comparata fuerit, nutritionis animalium basi venit ac fundamento; quæque non nisi principiiis dissolutis , penitus decomponitur ; (ut cum Chymicis loquar .) Differt autem mucilago animalium & vegetabilium in eo : quod in ipsis vegetabilium organis demum efformetur, ast jam efformata animalium corpora ingrediatur. Vegetabilia igitur partes crassiores, animalia autem subtiliores & magis sublimatas continent . Illorum organa pro efformanda mucilagine constructa sunt ; ast organa horum formatam recipiunt , sibi adpropriant , adtenuant , & novum mutationis genus ipsi impertiuntur, quo a principio formationis magis recedens, solutionis termino propior accedit. Hinc etiam plantæ, tempore quodam inter se simillimæ , nulla fere differentia specifica inter se distinguuntur, v. g. dum totæ sunt aquosæ . Ast numquam in animalibus ejusmodi similitudinis periodum observamus; sed potius speciei suæ magis accedens atque conforme nutrimentum a natura recipere videntur , quo propiora sint formationis suæ origini . Quo quidem tempore , quum organa eorum commutandæ plantarum mucilagini nondum sufficiant pro debilitate : fructum operantium matris suæ organorum , mutuum accipiunt . Primum itaque gradum in ordine nutritionis vegetabilia , secundum vero animalia constituunt ; horum enim organa mucilaginem a vegetabilibus formatam subigunt, & perfectiorem reddunt.

Motus præterea animalium internus , ac ex illis ipsis proficiscens , fortior, æqualior, aliisque circumstantiis junctus est, quam ille, quem in vegetabilibus observabis. Hæ enim nullum ipsæ calorem producant, sed suum ex atmospheræ calore hauriunt , illumque ob densitatem suæ substantiæ & segnius adquirunt , & diutius retinent . Animalia e contrario fortio rem calorem producant, illumque viribus agentium, & motus excitantium respondentem; imo desinente motu desinentem, debilitato debilitatum. Nec ullum ex animalibus hoc calore prorsus destitutum reperiess, quidquod vel frigidissima quævis calorem continebunt, atmospheræ calorem duobus tribusve gradibus superantem.

Plantis non est motus circulationis propriæ sic dictæ , & quamvis justo pro-

procedere videatur conclusio, ab analogia & motu animalium ad vegetabilia traducta : attamen Viri Cel. *Hales* observationibus & demonstrationibus evicta res est : medullæ motum, & quamcumque vegetationem aeris externi calori exacte esse adæquatum, & pro variatione hujus caloris, motum eundem in iisdem vasis posse retardari. At causa motus animalium in illis ipsis continetur ; illa enim liquores, canalibus (plenis & reagentibus contra vim liquorum transeuntium) detentos, hos inquam violentissime agit, protrudit. Vigilantis seu corporis exercitio occupati motus sunt majores, reactio fortior, liquorum pressio major, adfrictio vehementior. Dormientis autem seu torpescientis liquores minorem pressionem experiuntur, minor est vasorum reactio, minor adfrictio ; hinc etiam calor vehementior in illo, quam in hoc statu animalis. Animalia agilia, & ad exercitia edenda proniora, majorem generant calorem præ his, quæ segniora sunt, & natura torpescientia.

Binæ præter ea alterationum causæ in animalibus adsunt, quibus vegetabilia destituuntur. Altera motus violentior, & qui exinde pendent, effectus : pressio, adfrictio, contusio partium ; altera vero calor, qui quamvis sit effectus a motu pedens, causa tamen evadit denuo alius ac novæ alterationis in motu, qui numquam suo effectui destituitur, quique eo semper tendit, ut magis immutatas reddat partes ipsas.

Calor igitur, motus principium, omnes plantarum humores commovet ; omnia in vegetabilibus operatur, formam partibus illorum ac essentiam largitur ; actu tandem secundo, eadem omnia perficit & in animalibus. Quorum canaliculi tenuissimi quanto transeuntis caloris obstaculo venire videantur, tanto veniunt & in vegetabilibus sui, & illi quidem tenuissimi. Hinc absque erroris timore est, quod teneas : calorem novos alterationis gradus imprimere mucilagini vegetabilium, corpora animalium dum intraverit. Et licet varia sit caloris hujusce causa, eidem tamen sunt ejus effectus, iisdem enim semper motibus illa producitur. At multo vehementiores sunt isti effectus in animalibus, quippe quæ non solum multum caloris ipsa producant, sed etiam omnes atmosphæræ mutationes experiuntur. Motus celeritas atque rapiditas eandem in vegetabilibus, quam in animalibus attenuationem producit ; attamen pressio canalium angustorum magis in his, quam in vegetabilibus, partes alias aliis appropinquat, magis easdem attenuando magisque consolidando, ita ut tenuissima quamvis sint principia liquorum in animalibus, tantam hi denique densitatem adquirant, quantam numquam reperies in vegetabilibus ; vel si forsan in ponderosioribus Indiæ lignis existat, calori eximio, principia horum exsiccanti, eademque condensanti, tribuenda est. Qui quidem effectus, in quovis animalium magis minusve obvi, exactissime duplici causæ, motui scilicet atque calori, exacte etiam sibimetipsis, proportionem, respondent. Sic enim sanguinem, animalibus creberrimo exercitio defatigatis, densissimum esse observavit Cel. *Boerhaave*, horumque humores putrefactionis termino esse propinquiores.

Collige, quæ de differentiis istis hætenus dicta sunt, & adparebit : animalium corpora magis attenuata esse quam vegetabilium ; illorumque principia motu & calore continuo agitata, brevibus fore degeneratura, nisi, nutrimento novo atque continuo, abeuntibus alia substituerentur ; nisi

stillicidia hiantia, five vasa excretoria, materiam quamvis, ex essentia sua degeneratam, extra corpus deportarent. Qua quidem renovatione continua, tertium inter animalia & vegetabilia discrimen absolvitur.

Considerantes saporem, qualitatesque externas, quibus sensus nostri adficiuntur carne ferocissimorum, atque substantia sua a nobis remotissimorum animalium: has proprietates nihilominus sensibus nostris haud adeo repugnare reperiemus, quam saporem plantarum vel maxime communium. Quod si autem vita decesserint animalia, & humores eorum stagnare cœperint: tunc illi omnes in liquidum heterogeneousum commutantur, & penetrantissimum, ac nobis ingratissimum foetorem nanciscuntur; haud ita in plantis, vel si accidit, non nisi diutissime postquam motus vitalis cessaverit. Ast supra dictum est: animalium principia magis attenuata & solutionis termino propiora esse; & hæc quidem phænomenis nunc expositis contradicere videntur. Quo propior enim est substantia (exceptis tamen corporibus viventibus & animatis) solutionis suæ termino: eo pluribus instructa est qualitatibus sensus nostros incurrentibus. Quæ igitur ratio contradictionis adparentis? In machanismo vitæ animalis facillima reperietur.

Interiora plantarum, scilicet, partium heterogenearum præsentia haud irritantur. Corpori animali autem tam exquisita est sensatio, quæ nullam partem heterogeneam ad interiora sua admittit, quæ sese exonerare, illamque foras eiicere non contendat.

Et hanc qualitatem admirabilem, *sensibilitatem* dicimus. In quavis autem materia alimenta constituyente, maxima adest copia partium heterogenearum. Hæ igitur intestinorum sensibilitate expelluntur, quæ motum illarum peristalticum adauget, si vasa lactea sese corrugando, illas admittere renuunt. Quod si autem, per qualitatem suam, vasa ingressæ fuerint, statim vel urinæ meatibus, vel transpiratione eiiciuntur. Imo non solum materiæ heterogenæ hac ratione expelluntur; sed etiam hæ, quæ postquam suo officio in massa sanguinis functæ sunt, inutiles, deinde autem perniciosæ evaderent, & illæ inquam, suo tempore & ordine expelluntur. Sic igitur totum animalis corpus continuo renovatur, sicque omnes illius humores, quam tenues atque subtiles eos supposueris, dulcedinem suam conservant, quovis corruptionis periculo carent.

Hanc igitur sensibilitatem, præcipuum criterium animalium, imo originem notarum eorum caracteristicarum, antiqui *Naturæ* nomine, denotarunt, ac in providentia & sapientia ejus laudibus evehenda, nescio quanti, fuerunt. Et hoc quidem machanismo, animalium corpora non solum conservantur, & a quavis læsione, (ab externi cujusdam agentis adgressu repentino pendente) defenduntur; sed etiam sibimetipsis medentur, & corpora heterogenea, internum ejus ordinem turbantia, expellunt. Ex hac proprietate & cœtio pendet & crisis. Nec est, quod præter triplicem hanc causam, alium quæras fontem variæ tamque diversæ secretionis in animalibus, quæ vel proxima vel remotior pendet a nutritione; in secretionem autem, materiam nutrientem nunc vix immutatam, nunc in majorem perfectionis gradum evectam, nunc nimis acrem & prorsus excrementitiam redditam esse videbis.

Simul sumta igitur hac causa triplici, principia animalium a principiis
vege-

vegetabilium differunt. Differunt autem & materiæ nutritivæ respectu ; & respectu partium suarum heterogenearum. Eiusdem licet naturæ sit utrorumque materia nutritiva : diversum tamen perfectionis gradum obtinet in utrisque. In plantis enim materiæ heterogeneæ minus subactæ, hinc frequentiores; in animalibus autem tenuiores, & magis activæ sunt. Quæ omnia non solum causarum, sed quoque effectuum examine demonstrari possunt. Corpora tuo examini decomponendo subiicias, & productus aliorum, signa crassitudinis¹, aliorum vero, adtenuationis notas certissimas retinebunt. Hinc illi scholarum termini generales, imo plus justo generales, ideoque fallaces. Vegetabilia ad acescentiam, animalia autem ad alcalescentiam tendunt. Negari interim non potest, quod, si vegetabilia, plurima saltem, solvere velis & motui spontaneo, principiisque suis proprio, eadem relinquere : antequam putrescant, fermentatione ac acrimonia adficiantur; in animalibus autem citior putrefactio succedat; ac aciditas, si qua forsan liquida eorum adfecerit, non sit, nisi momentanea ac foetore maximo juncta. Ut autem in vegetabilibus momenta degenerationis jam citiora adveniunt, jam vero segniora, prout nempe vel majorem vel minorem adtenuationis gradum jam conscenderint: ita & animalia jam præcociora, jam tardiora putrescunt, pro diverso gradualterationis principiorum; saltem æqualibus caloris ac humiditatis circumstantiis reliquis. Præter ea vegetabilibus æque ac animalibus commune est, quod aqua accedente solvantur atque degenerent; modo tamen diverso id accidere solet. Partes enim heterogeneæ ex plantis exhalatæ, plerumque secum gerunt qualitates putredini contrarias, eamque retardantes, ac effectibus ejusdem obstantes; at partes illæ, quæ insensibili fere expiratione animalium corpora egrediuntur, quo, quæso non pertingunt; etenim quosvis morbos contagiosos putredinis qualitatem secum gerere constat.

Pro confirmanda dicti hujus veritate venit & plantarum & animalium analysis communis, quam dubia cæterum sit & habeatur. Quosenim plantæ suppeditant, productus volatiles, illos maxima ex parte, in planta ipsa detentos fuisse constat. Vegetabilia parciore præbent substantias activas, majorem copiam residui salibus fixis abundantissimi; animalia e contrario, oleum abundantius, salem volatilem, & terram leviolem, residuum parcius, atque subtilius. Adeas præcepta Chymica Viri Celeb. *Boerhaave*, & productus omnes ex analysi animalium eliciendos reperiēs, & eo quidem ordine dispositos, prout humores analysi expositi, vel majorem vel minorem adtenuationis gradum in vasis suis experti sunt. Signa quædam ineuntis hujus adtenuationis animalis, in caseosa lactis parte videbis, integram vero in sanguine. Bilis constat partibus magis adhuc adtenuatis magisque volatilifatis. Urina ex omnibus animalium productibus maxime adtenuata est, & quamvis sit unus humorum naturalium, retentio tamen ejus, vel in partibus ipsi destinatis, symptomata violentissima & putrefactionis signa certissima producit.

Hujus igitur differentiæ respectum habeat, quicumque usum animalium instituere velit; imo quæ hætenus principiorum loco dicta sunt, cognoscendæ animalis cujusque naturæ sufficerent, si exacte determinare posses quemnam immutationis gradum mucilagini, a plantis vel mediate, vel immediate receptæ, impertiatur? quibusnam alimentis sibi homogeneis vivat?

vat? & quemnam usum instituat particularum heterogenearum, alimentis suis plerumque admixtarum. At tam varia est animalium structura, tam diversæ sunt illorum actiones, tam diversas a cælo sub quo vivunt, impressiones recipiunt: ut in cognitionem naturæ eorum ulterius penetraturo necesse sit, qui & mutationes phyficas, a causis adeo diversis pendentes, numquam non ante oculos sibi positas habeat.

Discrimina, quibus inter se animalia distinguuntur, sunt veessentialia, vel mere accidentalia. Ex accidentalibus pendet specierum variatio, vel ipsæ individuorum notæ caracteristicæ. Iisdem enim accidentalibus, nec nisi hisce, & homines inter se differunt, nonnunquam vel adeo diversi, ut in varias classes referendi videantur; interdum adeo sibi similes, ut vix inter se possint distingui. Tam eximia aliquoties adest accidentalium diversitas, ut bina individua vix ad eandem speciem referenda videantur; nonnunquam vero adeo exigua, ut vel acutissimus oculus eam vix adtingere possit. Accidentalibus igitur, modo existunt, modo absunt, modo abeunt atque delentur. Haud tamen ita differentia essentialia.

Harum prima & reliquis principalior est animantium structura varians. Sic quædam novimus, quibus nihil est commune cum aliis entibus animatis, præter motum humorum a causa interna proficiscentem, & sensum quendam, inæqualiter organis distributum. Imo vix sagacissimi Physicorum, limites regni animalis & vegetabilis adcurate determinare ausi sunt: interim plurimorum animalium structuram hodie habemus cognitam, eamque cum nostrametipsum structuram comparando, adhuc tutiore via, in cognitione illius procedere possumus. Quale ipsis nutrimentum destinatum sit, quæris; en horum dentes, & pro structura sua & dispositione, secundo ac conterendo graminis adaptatos; adspice illorum organa, comminuendis frumenti granis destinata; en aliorum capita & dentes pro capta & retinenda præda, mirifice conformatos; tot tantaque Naturæ sollertis artificia, aliis pro explenda celeritate aufugientis prædæ donata, aliis pro exfugendo & extrahendo succo plantarum. Sciscitaris denique quam mutatione adfici possint nutrimenta, respectu structuræ organorum? respice ad acrimoniam humorum, in canalem intestinale egestorum; respice ad organa ibidem obvia; experimenta, a Physico inter nostrates maximo instituta, repete, ac varia ipsis corpora deglutienda exhibe, & edoceberis.

Quidquod vel mutationis peractæ signa, in excrementis obvia, disquisitioni huic multum lucis adfundunt. Alia enim foetentia, & liquida, humorum acrimoniam, & ad putredinem dispositionem indicant; alia autem odorem a putredine remotissimum exhibent, & principium aliquod in humoribus activum, reliquisque animantibus negatum, loquuntur; rursus alia, sicca sunt & solida, quæ tum ex siccitate alimentorum, tum ex vi & robore organorum, tum ex lenitate humorum per canalem intestinale diffusorum pendent.

Nonnunquam de violentia circulationis & effectibus exinde pendentibus, jam ex vehementi & frequenti pulsu cordis atque arteriarum, jam ex calore, illius effectum, judicare valemus. Exinde autem concludimus quales sint illi effectus, quos agentia producere debent in materia, organorum internis (ibi enim commutanda venit) commissa. Et quamvis ipsa actionum violentia, ac motus celerrimi & rapidi pendeant ex activitate sensuum

suum exteriorum , & ex impressione objectorum in cerebrum : sæpius tamen & illi circulationis frequentioris , & vehementiæ sanguinem protrudentis , signa sunt evidentissima . Eadem obtinent circa appetitus vehementiores , amorem , famem , sitim , & externa animi adfectuum signa , plerumque a gradu motus & caloris producti pendentia . De siccitate humorum , ex quantitate excrementorum vel sensibilibum , vel imperceptibilium , ex densitate pellis , ex violentia exercitii judicandum . Imo analogia ista , qua ex similitudine actionum & organorum animalis cogniti , ad statum incogniti concludendo progredimur : hæc inquam , eximio cognitionis fundamento cedit illi , qui de statu partium animalis , respectu vel hominis , vel animalium homini utilium , constans iudicium ferre velit , ac solidum .

Quidquod , & sensus nostri suum conferunt ad disquisitionem istam rite instituendam . Animalia enim illa , quæ eminus sui odorem spargunt , qualitate magis attenuata , principiisque magis exaltatis gaudent , quam hæc , quæ nullum sui odoris vestigium post se relinquunt . Adtende canis odoratum , & persuadeberis , omnia fere animalia sui odorem , in aere , post se relinquere , qui tamen odoratum nostrum crassiores tangere nequit ; attamen vel alium quemdam odorem nosmetipsi detegimus in animali jam unico , jam in pluribus , agmen sive societatem suam constituentibus . Jam igitur , si structuræ rationem nesciamus , ex violentia , lenitate , & quantitate harum exhalationum , de natura principiorum structuræ animalis edocemur . Imo & sanguinis , & urinæ inspectio , merito in censum vocari merentur .

Cessante tandem vita , omnes animalis partes citissime solvi atque corrumpi videbis , documento , de ratione principiorum ejus , indubitato . Hoc enim , si aridioris constitutionis fuerit , & principiis minus adtenuatis , diutius corruptioni resistit . Quod si autem vel magis adtenuata , vel humiditate abundante irrigata fuerint ejus principia , contrarium observabis .

Præter structuram animalium , quam basin esse diximus varietatum essentialium inter illas obviarum , multiplex adhuc est origo differentiarum , & accidentalium & essentialium , illaque jam ex structura pendet , jam ex coactione , jam ex consuetudine illis inducta , variasque illis qualitates conciliante , ad quæ omnia , usum eorum instituens , probe adtendas , necesse est . Huc pertinet : primo , nutrimenti qualitas , hæc enim in quasvis eorum functiones , ut ita dicam , influit , hæc vel celeritatis , vel segnitiei eorum causa evadit , hæc & carnis & humorum qualitatem constituit . Quo quidem respectu , binas animalium quorumvis classes constituit Vir Celeb. *Boerhaave* ; alia enim vegetabilibus nutriuntur ; alia autem , non nisi ex animalibus aliis ut vivant , destinata esse videntur . Hæc tamen & vegetabilibus nutriri possunt . At , quæ plantas sibi pro nutrimento destinatas habent , naturæ mitioris ergo , animalium carnem abhorrent . Illorum igitur , & fortior est activitas , & principia magis sunt alterata ; rarius illa nutrimento nostro sufficiunt , & si quando corpus humanum ingrediuntur , huic vel veneno , vel morborum medicamentis veniunt . Altera autem animalium species , vastissimam materiæ nutritivæ classem constituit ; nec tamen partibus heterogeneis , iisque si rite adhibeantur , nobis salutaribus , prorsus carent . Luxus & gula saporis præstantiam , ars Me-

dica

dica autem carnis illorum virtutes cognoscere valet atque distinguere. Plantæ scilicet, quamvis animalium corpora ingressæ, haud tamen omnes suas proprietates amittunt. Sic turdos, plantis purgativis nutritos, purgandi virtutem acquirere constat. Sic optimorum Medicorum experimentis comprobatum est, lac caprarum, ex herbis, quibus vescuntur, suam qualitatem induere. Quamvis autem lac nondum summum perfectionis animalis gradum pertigerit; & coctio, repetitam vasorum actionem partibus ejus impertiens, hanc quasi tincturam vegetabilem debilitet: attamen veram semper differentiam in partibus fluidis, parte præsertim volatili, spiritum rectorem animalium constituyente, producit.

Pro diversitate exercitii, varia etiam est concoctio, illaque vel in animalibus specie iisdem, maximæ varietatis causa evadit. Animalia enim continuo labore exercitata, sunt alacria, impetuosa, celeria; ast quæ otio detinentur, illa torpidiora, & neglectis cursu ac delectatione, ad somnum proclivia esse solent. Idem illud exercitium efficit, ut hæc in classem adtenuationis multo majoris, illa autem admodum inferioris referenda sint. Adtenuationis consequentiæ necessariae sunt: motus, calor, fibrarum ficitas & robur. Est autem exercitium, status quidam præternaturalis, respectu animalium ad quietem creatorum. Quies e contrario, & otium, statum præternaturalem, illorum respectu constituunt, quæ ad exercitium destinata sunt. Hinc exsurgit ens aliquod compositum, proprietatibus alienis, seu adscititiis donatum. Exercitium vero, motum atque calorem producendo, multum utique facit ad concitandas, & evolvendas multas partium subtilissimarum. Hinc forsan, tot tantisque variorum consiliis, usum internum sanguinis animalis, ex motu violentissimo enecati, commendatum videmus. Hunc enim pro sudorifero præstantissimo habebant, nec ullam ipsi virtutem adsignabant, si ex animali quiescente proveniisset.

Adfectus, vel potius analogum illud adfectuum in animalibus obvium, relationis nexu cum exercitio eorum jungitur. Adfectuum vero effectus est: tensio partium solidarum eximior, cordis arteriarumque motus exauctus, motus liquorum animatus, calor exauctus, omnium denique effectuum illorum productio, quæ duplicatam agentium horum actionem comitantur. En, tibi recensitos effectus passionum rapidiorum, seu fortiorum, animalium ex natura pendentium. Passiones vero lentæ seu segniores sunt mere accidentales, nec nisi causæ heterogeneæ effectus. Sic & passionum immutatio multum sane confert ad constituendas differentias illas maximas, quas inter animalia castrata, & non castrata observamus: licet pro certiore earundem causa jure habeamus privationem spermatis, eo magis nobis ignoti, quia qualitates ejus eodem momento pereunt, quo organa, sui receptacula, egreditur.

Fons igitur caloris animalium, in interno eorum quærat; attamen & calor a sole profectus, & mutationes in atmosphæra enatæ, ut in corpora quævis, sic quoque in animalia, mechanice operantur. Absorbentia eorum vasa, humiditatem corporis aquosi exantlare possunt; vasa transpirantia autem, quo aridior atmosphæra fuerit, eo plus humiditatis istius, atmosphæra suppeditant. Hinc igitur discrimen illud ingens, in animalibus diverso sub cælo viventibus. Quæ aerem ardentem & aridum pro respira-

tione sibi destinatum à natura habent: illa magis sicca sunt & densiora; principiisque ex altera parte magis attenuatis, ex altera autem magis condensatis constant. Quæ sub calido humidoque cœlo vivunt, facile putredine corripuntur, climatis calor enim & humiditas, mucilagini dispositionem ad putrescentiam inducunt. Ariditate agilia, levia, & ad motus edendos proniora; humiditate autem torpidiora, segniora, & hebetiora redduntur animalia. Frigus violentius torporem conciliat, lenius e contrario tensionem exauget, actus corporis corroborat. Calor nimius debilitat, moderatior expurgat; ille enim iusto plures particulas essentielles humoribus subtrahit; hic humoribus facultatem superfluas vel inutiles separandi suppeditat.

Et hæc quidem principia adeo simplicia, causis veniunt effectuum mirabilium, quos in animalia, ex cœli, sub quo vivunt, diversitate, redundare videmus. Etenim non solum quidam cœli tractus, quibusdam animalium generibus adpropriati seu destinati videntur, ita ut sub alias cœli plagas deportari nequeant; sed & illa, quæ vitam conservando, cœlo permutato paria videntur, multum præstantiæ suæ sensim amittere constat.

Sic enim multa ex ferventioribus Africæ regionibus, dum nostras adierint, generandi facultatem, multa coitus desiderium amittere videmus. Sensim sensimque degenerant, & novæ patriæ accommodatas qualitates recipiunt. Sic itineraria omnia, canes ex Europa, ad oras Nigritiæ deportatos, & pilos, & latratum amittere, nec nisi ejulatus edere posse, docent. Imo, si tantam jam externorum permutationem experiuntur: quantæ quæso mutationes insensibiles, in partibus eorum mutationi magis adaptatis, & in se mobilioribus? Teste Viro Cel. *Homborg*, mulieres Europææ, Bataviæ commorantes, lac infantum nutritioni sufficiens generare nequeunt, matres Indæ autem, infantibus suis, lac saluberrimum & sapore præstantissimum suppeditant. Sic & Medici, mutationum illarum, (quarum cognitionem multum facere tenent ad Medicinam) Observatores diligentissimi, differentiam humorum in nobis, ex variato cœlo (nisi per gradus fiat) pendentem jam dudum intellexere. Et in primis Cel. *Sydenham*, adcurate, ut solet, & in disquirendo acutissimus, depuratio, ait, in nobis oritur, febris causa, hac autem illis, quorum climate fruimur, accedimus & adæquamur. Quis est, qui nesciat, quantis morbis adficiatur Europæ incola, si neglecta cautione, Colonias Europæorum in America adierit?

Atmospharæ varietates non solum in temperaturam mucilaginis, qua nutrimur, sed & in partes alienas, cum mucilagine evolutas, in quantitatem & qualitatem secretionum, operantur. In sensibus nostris obtusioribus culpa est, si differentiam ex climatis diversitate, individuus ejusdem speciei impressam, sensibus percipere nequimus. Quam tamen realitatis quidpiam secum gerere constat, siquidem in eodem animali, ex alio climate in aliud translato, & instinctus alios, & salutis statum variantem, & actiones diversas, observare licet. Hinc quoque Ars Medica ex animali, vario sub cœlo vivente, varios effectus expectet, necesse est. Et hanc quidem varietatem distinctius in odore atque sapore plantarum percipimus. Minor vero est saporis variatio in animalibus, ob horum sensibilitatem, quippe cujus auxilio, multum materiæ heterogeneæ, corpori eorum exclu-

excluditur. Imo odor vegetabilium, sensus nostros fortior adficit ideo quia horum crassitie magis adæquatus est, quam quidem odor animalium tenuior. Cave exinde concludas: minus partium heterogenearum esse in animalibus, nec totidem, quot in vegetabilibus, climate evolvi. Cujus rei contrarium facillima opera demonstrari potest.

Collige in animali quodam, differentias præcipuas structuræ, nutrimenti & climatis; & respectu animalium speciei alius, omnia erunt aliena, exceptis saltem partibus mucilaginosi & nutritivi, hisque quæ basin corporis & structuram constituunt; quas quidem partes salutare reddere poterit usus earum legitime institutus. Quum enim subtilissima venena ex animalibus præparantur: ex iisdem illis & saluberrima medicamenta proveniant, necesse est. Viperæ venenum & odore & sapore caret, at violentissimos effectus edendo, agit in nervos animalium; venenum ex colubro tintinnabulum gerente, qui non est nisi species viperæ major (sic enim constat examine Anatomico capitis ejus, a Cel. Viro *Nicholls*, D. instituto) brevissimo temporis spatio, hominem vel robustissimum quemque enecat, nec externam qualitatis suæ notam gerit. Quorum venenorum effectus licet fortiores videantur, externe si adhibita fuerint; vulneribusque immissa, quam si stomachum ingrediantur: adtamen qualitatem venenosam, quamvis debiliorem, in stomacho retinent, testibus experimentis Viri Cel. *Mead*, D. Imo vix ullum venenum subtilius, penetrantius, fortiusque excogitari potest quam pestis, quippe quæ ex corpore vivo alio, in aliud, non solum proximum, transit; sed etiam mercibus incorporata, miasmata impura vel in remotissimas terras secum deportare potest. Nec tamen venenum illud quemquam sensum incurrit; nec, nisi effectibus suis funestissimis, præsentiam ejus percipimus. Quæ autem de venenis exposuimus, illa etiam de medicamentis valent. Venena investigari posse sæpius sensibus negatur; & de remediis judicium ferre posse, hoc proprium est experientiæ.

Nec tamen prorsus exulant in regno animali partes odoriferæ, sensus nostros actione forti, effectus sui nuntia, adficientes, quales plerumque reperies in vegetabilibus. Infrequentiores quidem adsunt, numquam vero illa virtute, attenuatione & activitate animalibus propria, destitutæ. Quippe quæ potius odorem magis repandunt, illumque diutius corporibus inhærentem. Aromata ex animalibus elicitæ, minoris quidem sunt voluminis; sed odorem fortiolem, diutiusque inhærentem repandunt. Ex quo non solum soliditas & virtus partium odoriferarum; sed etiam attenuatio & subtilitas partium animalium liquido apparet. Totum nonnullorum corpus est odoriferum; nec ideo, quia partibus odoriferis nutriuntur (nutritionis namque cujusvis principium non est, nisi mucilago, per se ipsam insipida) sed partes eorum excrementitiæ, corpus egredientes, illum ad attenuationis gradum nactæ sunt, qui aromáticas constituere solet. Quare ex Observatoribus, & edoceberis: hominum aliorum sudorem esse fragrantissimum; aliorum exhalationes, pro circumstantiarum diversitate, fuisse singularissimas.

Rursus aliis in animalibus centrum odoris in folliculis singularibus reperies. Succus enim odore præditus, sive ex folliculis istis retractus, machinæ usibus adproprietur, sive merum excrementum constituat; ille ta-

men in folliculis istis colligitur, ita ut quosvis corporis animati humores, in glandulis sibi destinatis colligi videmus ac separari. Ibi exaltatur, & renovatur, exinde etiam foras spargitur. Huc pertinent: Animal Moschiferum, Civetta, alia. Quorum tamen partes odoriferæ ex interna vasorum operatione, & organorum effectu, functiones producente, pendent.

Quidnam igitur censendum sit de partibus animalium alienis, quas tanti aestimabant antiquiores, easque jam antidota habebant, jam variis hominum morbis pro medicamento, ob analogiam, commendabant; id, inquam, ex animalibus odoriferis edocere, ex illorum effectibus, ex singulari eorum efficacia circa affectiones nervorum; tunc enim præstantiori lenienti & temperanti cedunt, quam reliqua, ex quovis alio Regno deprompta.

Originem virtutis illorum, ut & medicamentorum omnium, ex ratione ac experientia quæras. Experientia, vel exulante ratione duce, nil absurdi, nil adversi huic iudiciorum omnium regulæ, admittit.

Quid, quæso est medicamentum, nisi corpus aliquod sufficiens immutandæ dispositioni vitiosæ entis organici, qua functiones hujus & œconomia turbantur; pro quo fine qualitatem contrariam illi inducat medicamentum, necesse est. Quamvis igitur animalium corpora majori similitudinis nexu, inter se continentur, ac reliqua naturæ corpora; attamen non solum partes eorum utiles, sed etiam alienæ medicamentorum classem ingredi possunt. Si enim animal ex qualitate principiorum ejus, & constitutione materiæ nutritivæ consideraveris: succi illius magis attenuati, ac termino solutionis propiores esse possunt, quam quidem humani; hinc humoribus animalis alius plus justo crassioribus mixti, totum aliquod moderatius constituunt, vasorum actionem impellunt, ac sub forma cujusdam fermenti, principia reducant in statum naturalem. Quod si autem animalis principia multa crassitie superaverint principia alius, admodum adtenuati; tunc crassiora illa, evolutiones nimias principiorum acrium & attenuatorum compescunt, motus retardant, partium solidarum tensionem impediunt, sensibilitatem moderantur. En principia bina, quibustamquam cardinibus, tota diætâ Medicinalis ex Animalibus deprompta, innititur. Hæc consideratio eo magis observanda venit, ubi æger vel succo carnis animalium soli accipiendo par judicabitur, vel ubi quotidianum & diutiorum usum ejusmodi carnis convenientem putaveris.

Præter hunc usum animalium generaliore, specialiores supersunt, ex omni eorum humore eliciendi. Quodsi enim partes solidas ab humoribus separatas consideraveris, eandem semper basin reperiēs. Imo usus illi, quibus natura ipsa humores istos inservire voluit, illi quibusnam usibus Medicinæ adpropriari possint, loquuntur.

Sic humores animalis sufficiunt explendo defectui secretionum, in alio quodam, obvio. Sic v. g. si bilis haud canalem intestinale, exuberando, ingreditur, & ex defectu saponis hujusce stimulantis alimentorum digestio nulla perficitur: tuo jure, ad bilem animalium eorum, pro medicamento, confugas, quæ maxima similitudine homini accedunt. Si principia acria, per sanguinem diffusa impediunt, quo minus liquor dulcis, elementa ac originem sanguini largiturus, præparetur: tunc vel dulcissimam ex mucilaginibus animalium, vel lac eorum mutuum accipias. Hinc quoque qui-


quidam seculi elapsi auctores, sanguinis ex animale in aliud transfusionem somniavere; ast distincta cognitione Oeconomiae Animalis carentes, falso existimabant: sanguinem hujus animalis perfectum constituentia, & illius sanguinem componere. Principia quidem sunt eadem, variae autem formae, attenuationes & condensationes; hinc igitur principia maxime nutritiva, ut praecise talia reddantur, egent actione stomachi, misceantur omnibus agentibus in canalem intestinalem redundantibus, ut, successiva saltem, vasa ingrediantur. Alias enim confusionem ac perturbationem producerent; quum quietem & salutem subministraret alimentum, restituat medicamentum.

Maximum interim hujus regni mediorum adparatum constituunt partes heterogeneae in eodem abundantes. Illae autem in quovis genere, in quavis specie, in omni individuo variant. Corpora, quibus inhaerent, egrediuntur; ast successivo temporis intervallo, tamquam alterationis incapacia, imo corpori, (si diutius remanerent) alterationem adferentia, eiciuntur; nec nutritivis adnumerandae sunt. Saepius originis ratione sunt heterogeneae, ut haec, quae a vegetalibus aromaticis proficiscuntur, interdum vero & in ipso animalium sinu enascuntur. Regulae generaliores interim circa usum earum observandae, eadem sunt, quas circa vegetabilium usum observatas dedimus. Interim frustra quaereres in regno Animalium media crassitudine partium suarum, ut adstringentia atque austera, agentia; omnia volatili qualitate gaudent; & medicamentum ex animalibus profectum, partium suarum penetrabilitate eximia distinguitur.

Quae autem hucusque de qualitatibus animalium exposita sunt, ea omnia & de corporibus atque medicamentis valent, quae Chymica arte accedente, eliciuntur. His enim nexus essentialis est, cum sua origine, imo adtenuationi sibi naturali illam, quam ex igne mutuam accepere, jungunt; ignis enim calorem excitat rapidum, qui novum motum principis addit, novas ejusdem combinationes constituit.

Hanc igitur utilitatem ex corporibus animalium sperandam habemus, si alii usui quam nutrimento adaptantur. In recensendis animalium qualitatibus multi quidem fuerunt antiqui; seculo suo nondum ad nostri sollicitudinem producti; ast plurima illorum experientia destruxit. Alia enim sua dogmata, fundamenti loco, relationem inter figuram, conformationem externam, colorem &c. obviam; alia autem, & magis absurda, ideas superstitutione plenas habebant, quas hodie, emerita rationis luce, vel prorsus evanescere, vel illis saltem imperare videmus, qui rationis ac judicii usum instituere nequeunt.

Finis generaliorum de animalibus.



EXPLICATIO

Auctorum in Opere præsentis per abbreviationem citatorum.

A

- A**ct. Med. THOMÆ BARTHOLINI *Acta Medica & Philosophica Hafniensia*, figuris æneis illustrata. Hafniæ 1673.
- Act. Ups. Acta Societatis Regiæ Scientiarum Upsaliensis. Stockolmiæ. 1744.
- Agricol. JOHANNES GEORGIUS AGRICOLA *de Cervi natura & proprietatibus*. Ambergæ, 1617. Germanice.
- Albin. Ornith. ELEAZAR ALBINUS, *Pictor*, *Natural. History of Birds*, sive *Ornithologia*, vel *Avium Historia Naturalis*. Anglice. Londini, 1740.
- Aldrov. Exang. de Inf. de Pisc. Hist. Serp. Ornith. de Quadr. solid. bisulc. digit. ULYSSES ALDROVANDUS, *Philosophus ac Medicus Bononiensis*, de Animalibus Exanguibus. Bononiæ 1642. De Insectis 1638. de Piscibus 1638. Historia Serpentum, 1640. Ornithologia sive de Avibus 1640. De Quadrupedibus Solidipedibus, 1643. de Quadrupedibus bisulcis 1642. de Quadrupedibus digitatis, 1645.
- Alior. Aliorum (Auctorum.)
- Amph. Gyllenb. Hæst (BARTHOLOMÆUS RUDOLPHUS) *Amphibia Gyllenborgiana*, *dissertatio Academica*, Præside CAROLO LINNÆO. Upsaliæ, 1745.
- Arted. Ichth. Gen. Syn. PETRUS ARTEDI, Suecus Medicus, *Ichthyologia*, sive *Opera Piscibus*; scilicet *Genera Piscium*, *synonyma specierum* &c. Edente CAROLO LINNÆO. Lugduni Batavorum, 1738.
- Auson. Decii Magni Ausonii Burdigalensis *Opera*. Amstelodami, 1629.

B

- B**ellon. Obs. ed. Clus. PETRI BELLONII Cenomani *Observationes ex editione CAROLI CLUSII*, Atrebatibus, 1605. Bellon. de Aquat. PETRUS BELLONIUS *de Aquatilibus Parisiis* 1553. Belon. des Oys. L'histoi-

histoire de la Nature des Oyseaux par PIERRE BELON du Mans ,
à Paris, 1555.

Blas. GERARDI BLASII Amstelodamensis, Medic. Doct. & Præf. Ord.
Anatome Animalium, figuris variis illustrata. Amstelodami 1681.

Bonann. PHILIPPI BONANNI *Recreatio mentis & oculi in observatione
animalium testaceorum.* Romæ, 1684.

Bont. JACOBI BONTII, *Historia Naturalis & Medica Indiæ Orientalis*, a
GUILIELMO PISONE edita. Amstelodami, 1658.

Bosch. GUILIELMI VAN DEN BOSSCHE, *Leodii historia Medica
de Animalium natura*, Bruxellæ, 1639.

Bradl. RICHARDUS BRADLEY *Philosophical account of VVorks of
Natur.* Londini, 1721.

C

Castell. PETRI CASTELLI ROMANI *Hyææ odorifera.* Messa-
næ, 1638.

Charlet. Exer. & Onom. GUALTERI CHARLETONI *Exercitationes de
differentiis & nominibus Animalium.* Oxonii, 1677. & *Onomasticon Zoicon.*
Londini, 1668.

Clus. Exot. CAROLI CLUSII ATREBATIS *Exoticorum Libri decem*,
1605.

D

Dal. Pharm. SAMUELIS DALEI, M. L. *Pharmacologia*, Lugduni
Batavorum, 1739.

E

Ephemerid. Nat. Curios. seu Germ. Ephemerides Medico-Physicæ Academiæ
Naturæ Curiosorum seu Germaniæ. Francofurti & Lipsiæ, 1684.

F

Frish. JOHANN. LEONHARD FRISCH, *Beschreibung von
Insecten in Teutschland, sive descriptio insectorum.* Germanice, Berolini,
1720.

G

Az. ARISTOTELIS *Historia Animalium ex versione THEODORI
GAZÆ.* Parisiis, 1524.

Gesn. de Serp. de Aquat. de Quadr. Ovip. de Avibus, de Quad. Vivipar. CON-
RADI GESNERI, Medici Tigurini, *Historia Animalium; scilicet: de
Serpentibus, de Aquatilibus, de Quadrupedibus Oviparis, de Avibus, de Qua-
drupedibus Viviparis.* Tiguri, 1551.

Goedart. JOHANNES GOEDARTIUS *de insectis, in methodum reda-
ctus, Opera MARTINI LISTERI.* Londini, 1685.

Geoffroy. Tom. III. Pars I.

b 3

Grab.

Grab. Elaph. JOANNES ANDREAS GRABA, Collegii Naturæ Curioforum Collega, *Elaphographia, sive Cervi descriptio Physico-Medico-Chymica.* Jenæ, 1668.

Gyll. de vi & natura animalium Lib. XVI. ex ÆLIANO, PORPHYRIO, HELIODORO & OPPIANO, per PETRUM GYLLIUM Latini facti & aucti; nec non ejusdem GYLLII de Gallicis & Latinis Piscium nominibus Liber unus. Lugduni, 1535.

H

Hartenf. Eleph. GEORGII CHRISTOPHORI PETRI ab HARTENFELS, *Elephantographia Curiosa, seu Elephanti Descriptio.* Erfordiæ, 1715.

Herman. PAULI HERMANI, Medicinæ Doctoris & Professoris Lugduno-Batavi, Cynosura Matericæ Medicæ, aucta curante JOHANNÉ BOECLERO. Argentorati, 1726.

Hern. Medic. FRANCISCUS HERNANDEZ, *Nova Plantarum, Animalium & Mineralium Mexicanorum Historia, a NARDO ANTONIO RECCHO digesta.* Romæ, 1651.

I

Ind. Med. Index Medicamentorum simplicium. Parisiis, 1732.

Isidor. ISIDORI, Hispalensis Episcopi, *Originum, sive Etymologiarum Libri viginti.* Parisiis, 1602.

It. Oel. Itinerarium Oelandicum; ou Voyage de Scanie par M. LINNÆUS. a Stockholm, 1750.

J

Jam. Dictionnaire universel de Médecine, traduit de l'Anglois de M. James, a Paris, 1746.

Jonst. JOHANNES JONSTONIUS, Medicinæ Doctor, *Historia Naturalis de Exanguibus aquaticis, de Insectis, de Serpentibus, de Piscibus & Cetis, de Avibus, de Quadrupedibus.* Amstelodami, 1657.

Jov. PAULI JOVII de Romanis Piscibus Libellus. Basileæ, 1531.

K

Koempf. ENGELBERTI KOEMPFERI *Amœnitates Exoticæ.* Lemgovia, 1712.

Klein. JACOBI THEODORI KLEIN *Historiæ Avium Prodrômus, cum Historiâ Muris Alpini.* Lubecæ, 1750.

L

Lang. CAROLI NICOLAI LANGII *Methodus nova & facilis Testacea Marina in suas debitas & distinctas classes, genera & species distribuendi & nuncupandi.* Lucernæ, 1722.

Leeuwenb. ANTONIUS VAN LEEUVVENHOECK, *Arcana Naturæ detecta ope Microscopiorum, variisque experimentis confirmata; ex Belgico Latine versa.* Delphis. 1695.

Lemer. NICOLAUS LEMERY, Doctor Medicus, *Dictionnaire universel des Drogues simples.* a Paris, 1733.

Linn. Syst. Nat. Faun. Suec. Mat. Med. CAROLI LINNÆI *Systema Naturæ.* Parisiis, 1744. *Fauna Suecica, sive Animalia Sueciæ.* Stockolmiæ. 1746. *Specimen Materiæ Medicæ in regno animali.* Ibid.

List. MARTINUS LISTER *Historia Animalium Angliæ, 1. de Araneis, 2. de Cochleis tum terrestribus, tum fluviatilibus; 3. de Cochleis marinis.* Londini, 1678.

M

Marfil. Danub. ALOYSII FERDINANDI Comitiss Marfilii *Danubius Pannonico-Myficus.* Amstelodami, 1724.

Matth. PETRUS ANDREAS MATTHIOLUS, *Commentarium in sex libros Pedacii Dioscoridis Anazarbei de Medica Materia.* Venetiis, 1565.

Mer. Europ. MARIA SYBILLA MERIAN, *Erucarum ortus, & paradoxa Metamorphosis Insectorum tum Surinamensium, tum Europæorum.* Amstelodami. 1705.

Merr. Pin. CHRISTOPHORUS MERRET, *Pinax rerum Naturalium Brittannicarum continens vegetabilia, Animalia & fossilia in hac insula reperta, inchoatus.* Londini, 1667.

Mont: Exot. JOSEPHUS MONTI, *index Exoticorum simplicium medicamentorum.* Bononiæ, 1724.

Mouff. THOMÆ MOUFETI *Insectorum, sive Minimorum Animalium Theatrum.* Londini, 1634.

N

Nonnull. Nonnullorum. (Austorum)

O

Ofic. Officinarum. (Pharmacopœorum)

Olear. ADAMUS OLEARIUS, *Gottorfische Kunst-Kammer.* Slesvvick 1666.

Olin. Uccelliera, ovvero discorso della Natura: e proprietà di diversi Uccelli Opera di GIOVANNI PIETRO OLINA. in Roma, 1622.

P

Paracels. THEOPHRASTI PARACELSI *Opera Medico-Chymica.* Francofurti 1603.

Park. Theatr. JOHANNES PARKINSONIUS Londinensis, *Pharmacopœus Regius, Theatrum Botanicum.* Londini, 1640.

Paullin. CHRISTIANI FRANCISCI PAULLINI, *de Lumbrico terrestri Schediasma, variis memorabilibus, curiositatibus & observationibus illustratum,* Francofurti. 1703. *Cœnarum Helena, seu Anguilla descripta, ad normam Academiæ Curiosorum.* Ibid. 1689. *Bufo breviter descriptus.* Norimbergæ 1686.

Cynographia curiosa, seu Canis descriptio. Norimbergæ. 1685. *Lycographia curiosa, seu de natura & usu lupi.* Francofurti. 1694. *Onographia curiosa, seu de Asino.* Ibid. 1695. *Talpa descripta.* Ibid. 1689. *Lagographia curiosa, seu Leporis descriptio.* Augustæ Vindelicorum. 1691.

Petiv. Mus. JACOBUS PETIVERIUS, *Musei Centuriæ decem* Londini. 1695.

Pison. GUILLIELMI PISONIS, Medici Amstelodamensis, *de Indiæ utriusque re naturali & Medica libri quatuordecim.* Amstelodami. 1685.

Q

Quorumd. *Quorumdam.* (Auctorum)

R

R*Aii Inf. Synop. Method. Pis. & Av. Ejusd. Syn. Anim. Quadr.* JOANNES RAJUS, Societatis Regiæ Londinensis Socius, *Historia Insectorum.* Londini, 1710. *Synopsis Methodica Piscium & Avium.* Ibid. 1713. *Ejusd. Synopsis Methodica Animalium Quadrupedum & Serpentine Generis.* Ibid. 1693.

Red. FRANCISCI REDI *Experimenta circa generationem insectorum, ex Italico Latine.* Amstelodami, 1671.

Rondel. de Pisc. GUILLIELMI RONDELETII *Libri xxvi. de piscibus marinis, aliisque universis, in quibus veræ piscium effigies expressæ sunt.* Lugduni, 1554.

Rumph. GEORGII EVERARDI RUMPHII *Thesaurus Cochlearum, Concharum & Conchyliorum Musæi Amboinici.* Lugduni Batavorum. 1705.

S

S*Alv. de Aquat.* HIPPOLYTIS SALVIANI *Aquatilium Animalium Historiæ Liber primus, cum eorum figuris aere incis.* Romæ, 1557.

Scalig. ARISTOTELIS *Historia de Animalibus, Græco-Latina, JULIO CÆSARE SCALIGERO interprete, cum ejusdem commentariis.* Toloſæ, 1619.

Schonev. Ichth. STEPHANI SCHONEVELDE *Ichtyologia.* Hamburgi, 1624.

Schrod. JOHANNIS SCHRODERI, *Pharmacopœia, sive Thesaurus Pharmacologicus.* Ulmæ Suevorum, 1649.

Schwenckf. Insect. Rept. Pisc. Av. Quadr. GASPARI SCHWENCKFELD *Theriotropheum Silesiæ, in quo Animalium, hoc est: Quadrupedum, Reptilium, Avium, Piscium, Insectorum natura, vis & usus sex libris perstringuntur.* Lignicii, 1603.

Scill. AUGUSTINUS SCILLA *de Corporibus Marinis Lapidescentibus, quæ defossa reperiuntur.* Romæ, 1747.

Scott. Phys. GASPARI SCOTTI *Physica Curiosa, sive mirabilia Naturæ & artis Libris xii. comprehensa.* Herbipoli, 1662.

Seb. Thes. ALBERTUS SEBA *Thesauri rerum naturalium.* Amstelodami, 1734.

Sever. Zoot. MARCI AURELII SEVERINI, Philosophi Medici, *Zootomia Democritæa, id est, Anatome Generalis totius Animantium Opificii.* Norimbergæ, 1645.

Sibbald. ROBERTI SIBBALDI Scotia illustrata, sive Prodrromus Historiæ naturalis. Edimburgæ, 1648. Ejusdem Phalaenologia nova, sive Observationes de Balenis. Ibid. 1692.

Sloan. JOANNIS SLOANE Historiæ Naturalis Insularum Jamaicae, Madeiræ, Barbadis Nievis; Sancti Christophori, &c. Anglice. Londini, 1707.

Svammerd. JOANNIS SVAMMERDAMMI Biblia Naturæ, seu historia insectorum, in certas classes redacta, & exemplis æneisque tabulis illustrata; Belgice & Latine. Leydæ, 1737.

T

Turn. GUILIELMI TURNERI Historia Avium præcipuarum, quæ apud PLINIUM & ARISTOTELEM mentio est. Coloniae, 1544.

V

Valent. Amph. MICHAEL BERNARDUS VALENTINI, Amphitheatrum Zootomicum, sive Historia Animalium Anatomica. Francofurti ad Moenum, 1720.

W

Willughb. Ichth. & Ornith. FRANCISCI VVILLUGHBEII Armigeri, Ichthyologia, sive de Historia piscium libri quatuor. Oxonii, 1686. Ejusd. Ornithologia, sive de historia avium libri tres. Londini, 1676.

VVorm. MUSEUM VVORMIANUM; seu Historia rerum rariorum tam naturalium, quam artificialium, tam domesticarum, quam exoticarum, quæ Hafniæ Danorum in ædibus Auctoris servantur, adornata ab Olao VVormio. Lugduni Batavorum, 1655. Ejusd. Historia Animalis e Norvegia. Hafniæ, 1653.

Finis nominum Auctorum, quæ abbreviata sunt, explicitorum.

NOI RIFORMATORI

Dello Studio di Padova.

A Vendo veduto per la Fede di Revisione, ed Approvazione del P. F. Paolo Zapparella Inquisitor General del Santo Ufficio di Venezia nel Libro intitolato : *Geoffroy Continuatio de Materia Medica Historia Animalium* tradotto dal Francese MS. non v' esser cosa alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni costumi concediamo Licenza a Niccolò Pezzana, che possi esser stampato, osservando gli ordini in materia di Stampe, e presentando le solite Copie alle Publiche Librerie di Venezia, e di Padova.

Dat. li 2. Gennaro 1758. M. V.

{ Gio: Emo Proc. Rif.

{ Z. Alvise Mocenigo 2.^o Rif.

{

Registrato in Libro a Carte 58. al Num. 462.

Gio: Girolamo Zuccato Segr.

Adi 20. Gennaro 1758. M. V.

Registrato in Libro del Magistrato Eccellentiss. de' Signori Esecutori
contro la Bestemmia.

Gio: Pietro Dolfin Segr.

MATERIÆ MEDICÆ
GEOFFROYANÆ
TOMI TERTII

PARS PRIOR

De INSECTIS, PISCIBUS, AMPHIBIIS
& AVIBUS.

INDEX ANIMALIUM

Quorum descriptio hac parte prima traditur.

CLASSIS I. DE INSECTIS.

Generalia quaedam de insectis.

pag. I

Nom. LATIN.	GALLIC.	ITAL.
C Ochlea		Chiocciola
Limax terrestris	Limaçon	2
Limax ruber	Limace rouge	7
Umbilicus marinus	Limaçon de mer	15
Concha	Huitre	Ostrica
Ostreum	Huitre commune	12
Mater Perlarum	Nacre de Perles	Madre di Perla
Dentalium & Entalium	Dentale & Entale	21
Hirudo	Sangfue	Mignata
Lumbricus	Lombric, feu Achée	Lombrico
Mytulus	Moule	Muscolo
Sepia	Sèche	Sepia
Apis	Abeille, feu Mouche-à-Miel	Ape
Aranea	Araignée	Ragno
Bombyx	Ver-à-Soye	Bacco da Seta
Cancer		
Cancer marinus	Crabe	Granciporo
Cancer fluviatilis	Ecreviffe	Granchio
Cantharis	Cantharide	Cantarella
Cicada	Cicade	Cicala
Cimex	Punaife	Cimice
Formica	Fourmi	Formica
Gryllus	Grillon	Grillo
Locusta	Sauterelle	Cavalletta, Saltarella
Oniscus	Cloporte	Millepiedi
Pediculus	Pou	Pidocchio
Scarabæus	Scarabée	Scaravaggio
Scarabæus cornutus	Cerf-volant	Cervo volante
Scarabæus stridulus	le gros Hanneton	
Scarabæus pilularis	Fouille-merde	
Proscarabæus	Proscarabée	
Scorpio	Scorpion	Scorpione

CLASSIS II. DE PISCIBUS.

De piscibus generalia.

pag. 185

Nom. LATIN.

GALLIC.

ITAL.

A Cipenser	Esturgeon	Storione	
Sturio	l' Esturgeon commun		187
Ichtycolla	le grand Esturgeon	Copfo, Colpesce	191
Anguilla	Anguille	Anguilla	193
Afellus			
Morhua	Morue	Mollua	199
Oniscus	Merlan		204
Balæna	Baleine	Balena	
Balæna	Baleine ordinaire		206
Cetus	Cachalot		216
Monoceros	Narhval		225
Canis Carcharias	Requin	Pesce Cane	230
Clupea			
Alofa	Alofe	Clupea	235
Halec	Hareng	Arenga	239
Cyprinus			
Carpio	Carpe	Carpione	249
Tinca	Tenche	Tenca	266
Lucius	Brochet	Luccio	269
Perca	Perche	Perfega	275
Salmo			
Salmo vulgaris	Saumon	Salmonc	278
Trutta	Truite	Trotta	289

CLASSIS III. DE AMPHIBIIS.

De amphibiiis generalia.

293

C Oluber	Vipere	Vipera	293
Vipera	Serpent-à-Collier	Maraffo d' Aqua	312
Serpens			
Lacertus	Lézard	Lucertone	316
Lacertus vulgaris	Lézard verd.	Ramarro	319
Lacertus viridis	Scinque	Scinco	321
Scincus			
Rana	Raine, Grenouille	Rana	325
Rana	commune		
Bufo	Crapaud	Rospo, Botto	337
Salamandra			
Salamandra terrestris	Salamandre terrestre	Salamandra	349
Salamandra aquatica	Salamandre aquatique	Marafandola	355

Nom.

Testudo	Tortue	Testudine, Tartaruga	
Testudo terrestris	Tortue de terre		363
Testudo marina	Tortue de mer		371
Testudo palustris	Tortue d'eau douce		381

CLASSIS IV. DE AVIBUS.

Generalia de avibus. 385

A Accipiter	Epervier	Sparviere	386
Nisus			
Alauda	Alouette	Lodola	389
Alcedo	Martin-Pescheur	Piombino, Uccello di S. Maria	392
Anas	Canard	Anitra	395
Anser	Oye	Occa	400
Aquila	Aigle	Aquila	403
Ardea	Heron		
Ardea cinerea	Heron gris	Airone	413
Ciconia	Cigogne	Cigogna	416
Grus	Grue	Grù	421
Carduelis	Chardonneret	Carduello, Cardellino	424
Columba			
Columba domestica	Pigeon domestique	Colombo domestico	426
Turtur	Tourterelle	Tortora	430
Corvus	Corbeau	Corvo	433
Coturnix	Caille	Quaglia	436
Cuculus	Coucou	Cucculo, Cucco	440
Cygnus	Cygne	Cigno	445
Gallus, Gallina, & Capo	Coq, Poule, & Chapon	Gallo, Gallina, & Capone	448
Hirundo	Hirondelle	Rondine, Rondinella	473
Merula	Merle	Merlo, Merla, Merula	480
Motacilla	Hoche-queue	Codatremola, Ballarina	482
Noctua	Fresaye	Strige	484
Otis	Otarde	Starda, Ottarde	487
Parus major	Grosse Mefange	Varifola, Paruffola maggiore	494
Passer			
Passer vulgaris	Moineau domestique	Passera domestica	497
Passer Troglodytes	Roitelet	Reatino	500
Pavo	Paon	Pavone	502
Perdix	Perdrix	Pernice	508
Phasianus	Faisan	Fagiano	511
Pica	Pie	Gazza, Putta	515

Picus viridis
Struthio
Turdus
Vanellus
Upupa


Piverd
Autruche
Grive
Vanneau
Huppe, Puput

Pico verde 518
Struzzo 525
Turdo 548
Pavoncello 552
Upupa, Bubbola 555

L. S.

Quantum studii in erroribus Typographiæ emendandis adhibuerimus, varios tamen vel attentionem nostram effugisse, vel incuria aliorum irrepsisse observamus. Numquid enim hominibus data est ab omni errore immunitas? At errores nostros vel in ipsa operis fronte profiteri, quam vel prorsus silentio illos præterire, vel in calce demum adponendo, Lectori rædium creare, dictis obscuritatem adferre malumus. Ignosce igitur L. B., corrige, tum vero lege. Vale!

Pag. 1. lin. 9. pro:	pulchritudinis; lege	pulchritudinis.	43	morfulis	morfuli
4 22	Tam	Jam	404 9	lanaris	lanatis
6 26	succedente	succedentem	12	externo	extremo
7 11	contudere	contuderis	47	Ita leg. Ungulæ, quibus munitus erat dexter, calcaris &c.	
13 33	mytulum	mytulum	405 24	post columbarum inseratur: commixtæ	
16 1	ostrea	ostreas	406 41	instituta	
34 31	paludorum	paludum	408 12	Perenopteros	
40 25	or	ori	32	Haliarto	
48 42	conciuntur	corripiuntur	409 20	Imo	
48 34	crabronibus	crabrones	410 37	acies	
48 46	protractos	protractos	411 10	Uvæ	
106 16	post coemantur: inseratur	lucri	412 18	pernices	
128 ult.	illinas	illinas	413 6	ubi	
132 36	quanto	quanta	414 19	musculorum	
165 9	proprietatem	proprietatum	415 40	ardentum	
345 47	Batesii	Batesii	416 21	deleatur: ardea	
352 29	longæ	longe	416 8	deportabant	
369 7	profecto	profecto	31	Ardeæ	
401 1	eodem	eadem	464 21	alios plane humores	
402 36	post domesticus: inseratur	reddi	476 21	protraheret	
402 32	assatos	assato	528 4	&	
402 37	fovere	foveri	542 40	Hac	
403 12	lipitudines	lippitudines	553 29	tq̃	
403 32	anser q.	anferin			
403 43	q̃	&			



G E O F F R O Y
M A T E R I A M E D I C A
C O N T I N U A T A.

R E G N U M A N I M A L E.

C L A S S I S P R I M A.

D E I N S E C T I S.

Rerum creatarum seriem vago atque festinanti oculo pererrantibus, vilia quidem vixque consideratu digna videntur insecta; ea tamen & præstantissima naturæ opera, & specula divinæ magnitudinis luculentissima esse cognoscit ac veneratur, quisquis acrius intenta mentis acie eadem contemplatur, & paullo diutius eorum disquisitioni inhæret. Natura etenim, quoties vastiora efformat, rudiore quadam arte procedere videtur, ob copiam præsentis materiæ; in effingendis minoribus autem, eo major conspicitur, quo minor campus operandi adest, quoque minus pulchritudinis, ordinis ac perfectionis capere ducuntur minima. Exemplis quæris? respice insecta; horum enim singulæ partes non solum disquirentis oculo mirabilia exhibent, sed & scopo suo adprime accommodata subministrant. Nec tamen vastissimum hujus argumenti campum ingrediendi animus nobis est, in eo enim Virum Cel. de Réaumur æque strenuum ac indefessum conspeximus. Nos in excutiendis insectorum qualitatibus illis subsistimus, quas in suos usus ars Medica vertit; & vel hæc meditando, innumera munificentiae divinæ documenta venerabimur, quippe quæ egestati nostræ subventura, tanto adparatu mediorum pro morbis nos voluit esse locupletatos.

Classis hujus binæ sectiones sunt, quarum prior de vermibus, insectorum simplicioribus, posterior autem de insectis proprie sic dictis, pertractanda exponet.

De Vermibus

C O C H L E A.

Variæ sunt cochlearum species, aliæ terrestres, aliæ fluviatiles, aliæ maritimæ. Nos tamen de istis saltem verba facimus, quæ artis Medicæ usui cedunt. Hæ sunt 1. Cochlea communis, 2. Cochlea rubra, 3. Cochlea maritima, quam *umbilicum marinum* appellant.

Cochles seu Limax terrestris, Offic. *Cochlea*. Schrod. 283. *Cochlea hortensis*, Dal. 394. *Cochlea cinerea*, maxima, edulis, cujus os operculo crasso, velut gypseo, per hyemem clauditur. List. III. *Cochlea pomatia*. Gesn. 255. *Cochlea terrestris*, gypso obserata. Aldrovand. 389. *Cochlea testa ovata quinque spirarum*, *Pomatia dicta*. Linn. Faun. Svec. 1293. *Cochlea cinereo-rufescens*, fasciata, leviter umbilicata; *Cochlea dompota* vulgarior; *Cochlea operculo testæ adhærente se operiens*, sive *Opercularis*. Nonnull.

Ast ordinis ratio habenda est in discutienda Cochleæ sive limacis historia. Hinc primo quidem de structura ejus interna atque externa, post de generatione, tum de ratione vivendi, tandem de qualitatibus eidem propriis.

Cochlea terrestris, testaceis adnumeranda, est insectum aliquod oblongum, pedibus & ossibus carens; collo, dorso, ventre ac quadam cauda constans; testa tandem unica atque continua reconditum, quam pro lubitu jam ex parte egreditur, jam sese recipit. Cutim ejus texturam tendinosam diceres, ac ubi ventrem tegit, læviorem nitidioremque, in dorso autem magis opacam, & rugis granulisque prominentibus obsitam esse deteges, extensu pariter ac constrictu facilem, ac fimbriis crispis & rugarum plenis circumdatam. Hæ autem utrinque quasdam quasi alas effingunt, quibus pro pedibus, dum humi serpit cochlea, utitur; motu enim vermibus proprio, & aquæ profluenti æquiparando, incedit. Cogites tibi vestis crumenam extrahendam sive evertendam, & motum illum cognosces, quo cochlea, testa sua egressura caput sensim sensimque protrahit. Quod, si *Alberto M.* fides est, nulla prorsus similitudine capiti accedit, quodque *Plinius* equino, alii bovino simile voluerunt. Constat cornubus, labiis & ore. Cornuum quatuor numerabis, ac bina illorum majora, superioraque, coni seu pyramidis figura esse cognosces, & 9. lineis longa, & sulcata, & parum pellucida, & in globulum aliquem desinentia, qui liquore flavescente repletus, nigrum in medio sui punctum, pupillæ instar, ostendit.

Bina vero cornua minora, inferiora & ori magis vicina, spatio quidem ab istis differunt, ast figura conveniunt, illorum crassitudinis longitudinisque partem vix tertiam pertingunt, globulo tamen in fine gaudent, nigro licet punctulo destituto; imo, illorum instar perforata, setæ ingressui patent. Quisnam vero cornuum usus sit, si quæris ex variis, varia respondebunt. Sic *Albertus M.*, *Aldrovandus*, *Peyerus*, *Listerus*, *Harderus*, aliique censent, majora cornua oculorum vices explere, & minora antennarum sive bacillorum, terram explorantium & pertingentium. Rursus alii perhibent,

bent, quatuor cochleæ cornua totidem tubis opticis ei cedere, quibus circumposita objecta quævis, ad desiderium naturæ providæ, eo facilius tutiusque detergere valet. *Plinius* e contrario & *Scaliger*, prorsus oculis carere cochleam edocent, & quatuor ipsius cornua, tum explorationi terræ qua incedit, tum gressibus suis dirigendis inservire censent. Consentiunt plurimi virorum vel maximorum in *Physicis*. Cæterum cornubus istis eximiam sensationem inesse constat, eosque dum vel levissimo digito, præsertim in apice tetigeris, cochleam mira promptitudine recipere; nullum igitur incessus sui obstaculum tam exiguum esse potest, quin illud & cognoscere & evitare valeat.

Cornua autem excipit os, satis magnum, hians, robustum, dentibus munitum, & duabus maxillis constans, quas animale irritato, ægre ac ne vix quidem divellere poteris; binis præter ea labris circumdatum altero superiore, altero inferiore, utroque molli, lævi, & ab externa quavis injuriâ maxillas tuenti. Tum dentes, ex observatione *Cel. Boecleri*, quinque, & colorem cinnaberis referentes, sedem habent os superioris maxillæ; dentibus posterior cavitas cartilaginea adest, larynx a *Cel. Murali*, *D.*, ab aliis vero guttur seu œsophagus appellata. Hanc excipit stomachus & venter, quo fistula intestinalis continetur, illaque continua, simplex, longa & aliquoties circumvoluta. Inflato aere turgescens stomachus membranosus apparet, & innumeris fere fibris, rectis transversisque contextus; materiam quoque viridem arena mixtam continet, cujus causam in herbis & terra, cochleæ nutrimentis, quærendam esse censemus. In fine tandem canalis intestinalis excrementa densiora, majuscula & nigrida obveniunt, & foramine quodam ampliori, semper fere hiante, ac ex dextera sito emittuntur. Nec non jecur ejus conspicuum, & fulvi coloris, & pluribus vasis intertextum, & glandulosæ substantiæ, tribusque ad quatuor lobis compositum est. Immo cor cochleæ palpitare, & motu communi systoles atque diastoles agitari observaverunt *Johannes de Muralto*, *D.* & *Boeclerus*, ut ipsi fatentur. Cor illud substantia est flavescente, ac pericardio membranaceo, & instar vesicæ aqua plenæ, pellucido, circumdatur. In infima tandem parte ventris substantia quædam adipea, viscosa, lubrica, digitis fortiter adhærens, flavescentis & intestinis quasi adglutinata detegitur; hanc adipis loco cochleæ venire censemus, & calori, intestinis conciliando, conservandoque adaptatam cognovimus; cæterum illa pro conficiendo *pomato cochlearum* utuntur, cujus usus est contra gemmas & maculas faciei. Natura etiam commodo & conservationi cochleæ consulens, membranis ligamentis, pluribusque vasis lymphaticis instructam illam voluit, quæ omnia microscopio adjutus cognosces, ut & poros ductusque excretorios, qui mucum a glandulis subministratum, & contractione fibrarum vicinarum continua expressum, undequaque repandunt. Hunc limax serpendo spargit, qui quum arefactus fuerit, argenteum splendorem exhibet. Ex omni autem corporis sui parte & in primis sua basi, tantum humoris cochlea effundit, ut procedendo eidem innatare potius videretur, quam reptando promoveri. Hujus etiam pinguis atque viscosi liquoris tenacitas, aeris compressione accedente, non solum a lapsu cochleam defendit, sed etiam transituræ obstat humiditati, dum omnes cutis suæ poros occludit. Quem quidem liquorem adeo pretiosum conservatura cochlea, solis ardo-

rem studiosa evitat, & refrigerata humidaque loca quærit. Exspatiatur autem duas appendices musculosas extendit, quas *alas reptantes* adpellant, hæ quoque plicas suas anteriores contrahendo, statim & posteriores, & domum sive testam illis superstructam post se trahunt; collo ac dorso infecti paullulum elevatis in gibbum. Sic domum suam undecumque secum deportat cochlea, ita levem ac solidam. Imo corpus suum, quam molle videatur, quodammodo durum est, nec *Swammerdamio* teste, sale, ut quidam volunt, consumitur; sale tantum insperso enecatur, ac muscoli visceraque ejus adeo contrahuntur, ut expulso mucos corporis omni, aliam prorsus figuram corpori induat. Quæret quispiam, qui fiat, ut cochlea instrumentis necessariis (ita enim videtur) destituta, commodam sibi domum construere valeat? Respondet Cel. *de Réaumur* in scripto de formatione & incremento testarum: ovo animal quidem, nec tamen testa ejus, originem debet. Indubia enim loquitur experientia, testam limacis hortensis a materia viscosa & petrosa, corpus suum expiratione egrediente efformari, deinde aeris accedentis ope indurescere. Quamvis interim pro posse veniat testa, nulla tamen ossis instar succrescit, seu vegetationis principio, id est: succo quodam in eadem circulanti; sed potius, ut lapides efformari creduntur, externa quadam additione partium, aliarum aliis superaccedentium; *juxtapositione*, ut scholæ termino utar, nec *intusceptione*. Caput limacis ad aperturam testæ, caudam vero in apice spirali constitutam esse constat. Tam animalis recentis exclusi corpus quantulacumque exhalatione egrediuntur, illa statim indurescunt, & involucrum, moli congruum efformant. Nimis exiguum corpus est, quam ut in spiralem verti possent, hinc primæ exhalationes non nisi centrum constituunt. Sensim animali incrementum accedit, testæ autem augmentum incremento respondens; cuius animalis circumvolutioni accedenti, accedens testæ circumvolutio, & animalis longitudini latitudinique succedenti, successiva testæ longitudo & latitudo respondet. Sic circumvolutionum aliæ alias excipiunt, quarum ad quatuor & dimidiam usque in limacibus hortorum majoribus interdum numerabis. Nec tamen accedente ætate majores evadunt primæ circumvolutiones testæ; perfecta etenim quomodo adaugeantur? Longitudini saltem nova strata accedunt, pro soliditate testæ. Hujus in superficie duos tresve radios observabis, alios latiores, alios strictiores, colore varios, pluribusque lineis tranversis decussatos, quarum nonnullæ in pinnas jam huc jam illuc excurrando, jucundissimum oculis spectaculum exhibent. Multo tamen elegantiores sunt testæ quarundam maris cochlearum, quas naturam, suæ delectationis ergo, exornasse crederes. In primis tamen cochleæ collo, non solum succrescentes testæ circumvolutiones tribuantur, sed radii etiam & lineæ in superficie ejus conspicui. Substantia enim collo exsudans, varios ejusdem poros, sua forma imitatur. Interior testæ facies contigua & nitens, exterior autem striata est. Quo minor cochleæ ætas, eo plus mollitiei & teneritatis in testa detegitur; hanc si vel levissimis digitis comprimas, statim conteritur, at cochleæ penitus excretæ testam, nisi pluvia emollita fuerit, pede vix contundere valebis. Crescentis adhuc testæ pelliculas facillimo negotio separabis, prorsus excretæ non, nisi ignem illam projicias, hujus namque ope gluten cum salibus, strata ejus varia continentes, auferuntur & desiccantur adeo, ut singula sigillatim adpa-

adpareant. Pro ultimo autem incremento testæ accedit, margo quidam sive labellum, unius fere lineæ latus, nec, ut reliqua pars testæ inclinans; sed extus respiciens; immo ubi aperturam obtegit, candidus ac nitens. Hoc igitur efformato, nullum amplius incrementum testæ accedit.

Ingruente hyeme autem in terram vel aliud quoddam foramen sese recipit cochlea, interdum sola, plerumque aliis socia; testæ aperturam operculo quodam orbiculari & albido, ex saliva sua constructo occludit, ac seipsam testa sua totam recondit. Operculi materiam gypso similem esse observavimus, & condensata dum fuerit, solidam quidem atque duriusculam, porosam tamen, & transeunti aeri accommodatam. Hoc igitur, a frigoris injuria tutum animal, sex ad septem per menses, absque motu & nutrimento commoratur. Vere tandem accedente, operculum reteggit, testa egreditur, & pro fame alimenta quærit. Sunt, qui pro respiratione cochleæ reclusæ illud foraminulum inservire volunt, quod ex sinistra testæ parte, prope ad basin operculi, aliquoties detegimus, falso tamen; illud enim in plurimis deest; & dum adest, nulla communione cum corpore animalis nectitur, nec ad interiores ejus partes penetrat.

Idem ille Cel. *de Réaumur* in alia suarum dissertationum, insecti cujusdam mentionem facit, quod jam cochleæ intestina ingreditur, jam in externa superficie alicujus ex partibus sui corporis commoratur, quodque *cochlearum insectum* adpellat. Facilius illud observare contigit, eo tempore, quo in testa sua latitat cochlea tota. Vel nudis oculis magna cum alacritate discurrens, nec unquam fere quiescens observabis; nec tanta ejus est parvitas, ut in ipsa corporis cochleæ superficie obambulare possit, vetat enim nimis arcta cohæsiō corporis cum testa; alias igitur corporis regiones quærit. Anum scilicet in crassissimo collo constitutum, quoties cochlea aperit, facilis insecto patet ingressus. Nunquam vero testa sua egreditur, quin anum aperiat, aperit & alias sæpenumero. Huic momento igitur studere videtur insectum, & ano vixdum patente, margini ejusdem accurrit, intestinum intrat, & parietibus illius obambulat. Intestina cochleæ igitur maxime accommodatum domicilium pediculo huic esse patet; & cochleam eundem una cum excrementis, omne prorsus intestini spatium occupantibus, ejicere, & in collum protrudere. Aridiore cœlo studeas illius inventioni, hoc enim suæ generationi maxime favet. Laudatus *de Réaumur* est, qui viginti sæpius pluresve pediculos in una cochlea sese numerasse perhibet; hi autem cochleæ in corpore saltem, nec in testa, nisi vi accedente in illam protrusi fuerint, reperiuntur, ac nudo oculo plerumque candidissimi, majores fordido-albidi, alii tandem, rubicundo-albidi videntur. Aeriore microscopio opus est illi, qui singulas eorum partes distincte cognoscere velit. Fidem vero lectori facimus, quod, quæ illustris Academia Sodalit observationes loquuntur, ea omnia nostrametipsum experientia sæpius comprobaverit. Jam de generatione cochleæ.

Obsolevit autem tempore nostro rudis ille antiquorum error, quo cochleas vel ex limo terræ, vel aquis tabidis, vel rore enasci putabant. Hodie enim constat, naturam & in cochlea effingenda tantum laboris impendere, quantum in efformandis belluarum maximis. Cochleam hortorum cineream, præterlapso coitus sui tempore, quam adtente fieri potest, disseces, studioseque disquiras, nullam tamen partem deteges, quæ generationi

inservire videretur. At androgyne seu hermaphrodita est; hincque plura habebit ad generationem facientia, quam quidem reliqua animalia, studiosius jam disquisita & notiora. Foramen illud ex dextro colli latere situm, cujus mentionem supra injecimus, illud non solum pro conductu respirationis, sed etiam pro ano & vulva venire scito, & variis cavitatibus, & præsertim intestinis quibusdam valde contortis, ac in stomacho animalis fluctuantibus inferi. Jam coitus tempore omnibus hisce alia forma inducitur, intestina scilicet ex fundo ventris collum versus protrusa, tumescunt, adeoque invertuntur, ut ad ani aperturam hiantem, jam sub forma maris jam foemellæ genitalium conspiciantur, utraque pro munere suo obeundo parata. Coitus autem ipse tum demum perficitur, quum alia cochlea, alii obvia, (præmissis alternis motibus variis, illisque violentioribus, quam in specie tam frigida cogitares,) ad eandem dispositionem sese invicem perduxerint, imo perduxisse noverint. En aliud blanditiarum genus illis commune ac curiosissimum. Istam scilicet colli aperturam non solum genitalia masculina & feminina egrediuntur, sed quoque quidam aculeus, hastam sive lanceam quadrilateram referens, & cuspide durissima quidem ac acutissima, mutuae confriktioni tamen adaptata, terminatus. Jam binæ cochleæ rimas colli sui sibi obvertunt, alteri qui est aculeus, alterius aculeum tangit, imo tangendo alterum avellitur, sicque vel in terram prolabitur, vel istæ cochleæ inhæret; hæc primo quidem paulum retrocedit, statim vero revertitur, ictum retribuit, & suo aculeo prius tangentem percutit; his tandem peractis, quotiescumque peragantur, coitus ipse adimpletur; & tribus plerumque vicibus subsequentibus, interjecto quindecim dierum spatio repetitur; aculeumque novum, amisso succedente, in omni cochlea, quoties coitum repetit, observabis. Quam quidem ejus regenerationem, reproductioni cornuum cervi æquiparat *Cel. du Verney*, etenim, dummodo proportionis rationem conservaveris, analoga, quæ cornubus cervi, quæque aculeo cochlearum materia est. Ad ultimum cochleæ sibi invicem connectuntur, & 10. ad 12. horarum spatio, inter se cohærent; quo quidem tempore, torpescentium instar, immobiles nullum vitæ sensusque signum edunt. Nec liquidam materiam spermaticam, sed ceræ consistentiæ similem, ac figuræ canaliculorum quos transit, respondentem, tali fere motu protrudunt, quali intestina ea expellere conantur, quæ continent. Egreditur autem canales longiores vasculo partis femininæ, quo statim ab initio recipitur, atque in eodem crassitudinem ac densitatem majorem accipit. Exinde tandem alia quædam vasa, sexui feminino propria intrat, ac in illis fecundationis evadit ratio, nec tamen primo sive secundo, sed demum tertio coitu peracto. Decem & octo exinde diebus, cochleæ ex foraminulo colli sua ova emittunt, multaque cum cura ac studio in terram reponunt, hinc eadem excludere dicuntur a nonnullis. Horum magnus est numerus, & figura spherica, & color albus, & cortex mollis atque membranofus, & magnitudo piso minori, seu vicinæ respondens, omnia glutinis subtilissimi ope, racemi instar, inter se continentur. Cochlearum coeundi rationem exacte si disquirere cupias, sic *Le-mery*, aceto illas immergas suadeo; cohærendo enim emoriuntur, & partium quarumvis dispositionem facili negotio detegere valebis.

Si tandem de ratione vivendi cochlearum quæris; omne hyemis tempus somno

sonno sopitæ terunt, vere ineunte expergiscuntur, & cellula aperta egrediuntur. Diutioris jejunii ergo vehementiore fame exstimulantur, alimenta quæritant, & ab initio quidem quævis obvia adpetunt; exceptis tamen nonnullis plantarum speciebus, quas vel maxima fame incitatæ abhorrent. Sunt qui docuere, aqua tantum & rore cochleas vitam sustentare; alia sane docuissent, si ex hortulanis nostris quærिताissent. Hi probe norunt, quantum detrimenti plantis fructibusque, imprimis pluviae ac noctis tempore, cochleæ inferant. Et varia quidem media pro extirpatione illarum Viri Cell. *Charles Estienne* & *Johannes Liebault*, in libro cui titulus est: *domus rustica*, præscribunt, easque jam amurca recenti, jam fuligine conspersas perire docent; ast expeditior foret labor, si illas vel contudere, vel in aquam foveamve projeceris; interim quantum proficies? ne exiguo quidem spatio eas prorsus exterminare valebis. Nec tantum foliis plantarum fructibusque adhærent cochleæ, sed vitibus etiam, pisis, fabis, lentibus, atque viciis; immo tanta nonnunquam copia earum annus abundat, ut rustica gens magiæ præstigiis productas censeat. Magnum denique cochlearum numerum lacertæ ac vanelli prædæ venire docent nonnulli; est autem vanellus, avis cicuratu facilis, & acuto suo clamore feles ardet. Uterque tamen plus ex lumbricis aliisque insectis minoribus, quam ex cochleis vivit. Testudo e contrario admodum multas devorat.

Quod ad qualitates cochlearum adtinet, quum suas cum qualitatibus limacis rubri fere æquales habeant de omnibus infra dicemus.

Limax ruber Offic. Schrod. 284. Dal. 383. *Limax quartus*, *subrufus*, *montanus*, List. 6. *Limax magna* Germanis colore rufo. Aldrov. 702. Jonst. 138. *Limax subrufus*. Linn. Faun. Svec. 1277. *Limax major rubicunda terrestris*. Ephemer. Germ. Dec. II. Anni I. 147. *Limax nuda*, *limax rubra*, *limax*, *cochlea seu tectia carens rufa*. Nonnull.

Plures sunt limacum species, aliæ nigrae, aliæ cinereæ, illæque jam maculis conspersæ, jam destitutæ, aliæ flavidæ maculisque candidis confitæ, aliæ tandem rufæ. Rufæ tantum medicinæ usibus veniunt, & sequentibus describuntur.

Cornubus quatuor, ut cochlea hortensis, minoribus tamen instructa est limax rufa, quibus tamquam fulcris obvia tangendo exploratur, & gressus dirigit suos. Caput ejus, ut cochleæ, forma fixa destitutum pro lubitu animalis totum recipi potest in corpus; radius vero niger alius caput a collo, alius a pectore ventrem distinguit. Oris aperturæ pro margine cedunt labia bina, & in maxilla superiore dens quidam, subalaris fulcri forma indutus, & quindecim pinnis sive cuspidibus munitus conspicitur. Intus vero stomachum, œsophagum, venas lacteas, lacteo succo repletas, canalem intestinorum cum suis circumvolutionibus, & cor pericardio suo indutum, & auriculam ejus corde majorem deteges, hanc enim magnitudinis suæ rationem esse cognovit *Joannes de Muraltò*, additque, cutim animalis sulcatam esse & duplicem, exteriorem scilicet corticis substantiæ accedere, interiorem vero fibrosam, albidam, & cribri instar, pluribus foraminulis perforatam esse; nec statim, extracto corde limacis, vitam ejus terminari, sed vel dissectam in frustula limacem totam diutius vitam producere. *Plinius* binorum officulorum sive calculorum mentionem iniicit, alterius in dorso, alterius autem in capite limacis obviorum, quorum hic

cranium habetur. *Listerus* est, qui humeros limacis seu medium sui dorsi, pallio quodam vel cucullo obtectum esse dicit; hic ipsi testæ loco venit, & caput, collum, imo ventrem sub cucullum istum recipit; præter hunc denique, alio adhuc officulo lato & parum convexo dorsum ejus munitur. Facta incisione levissima, ex centro pallii hujus bina officula sese protraxisse addit laudatus auctor, ejusdem & figuræ & magnitudinis, alterum Martio, alterum Augusto, mensibus. *Aldrovandus*, varia in vanum sese tentasse ait, ultimo tamen limacis in capite calculum quendam albidum reperiisse, fabæ magnitudinem fere pertingentem, ast magis depressum, parum pellucidum, inæqualem, ex altera parte planum, ex altera eminentem, & dentis adfrictu facile conterendum, imo in saburram abeuntem. Confirmat dicta *Vormius*, & tantæ levitatis esse addit calculos prædictos, ut tres illi, quos ipse conservaverat, pondere suo ne unum quidem scrupulum adtingant; & partem eorum convexam testæ, concavam vero cretæ substantiam referre.

Cæterum, ut cochleæ sic etiam limaces sunt hermaphroditæ, & alia jam aliam fœcundat, jam ab illa fœcundatur; quamvis Physicorum varii sint, qui hermaphroditas dari negant. Pars mari propria quæ generationi inservit, quæque lividi est coloris, in coïtu turgescit, & magnum illud foramen egreditur, quod ex dextero colli latere, prope ad cornua reperitur. Quo in actu sæpe limaces in aere suspensi, & capite terram respiciente, & caudis inter se junctis, arboris vel trunco vel ramo adhaerentes conspiciuntur, & quidem auxiliante quodam funiculo, ex sua ipsorum saliva comparato. Ova earum sphaeræ figuram, & colorem albidum, & piperis grani magnitudinem ostendunt; vicino autem tempore, quo excludantur, flavescentem induunt colorem.

Limaces rufæ herbis, fungis, imo madefacta charta vescuntur. Planities peramant, prata & subterranea loca, solis radiorum ignara; interdum & montes silvasque opacas; brevibus, omnia refrigerata, tecta, humida, & rorem diutius conservantia loca. Noctu in primis, & cœlo pluviam minante obambulant. Et sui vestigium, radium glutinis splendentis in terra, parietibus, arboribusque relinquunt. Lentissimo autem gradu incedunt, cujus ergo & hominem graviter ac lente progredientem, limacis instar ambulare per proverbium dicere solent. Ea omnia & de cochlea valent.

Gallica autem nomina utriusque, quibus *limacon*, seu *limace*, audiunt, ex latino limax, hoc vero a limo derivandum videtur, limo etenim delectantur, & ipsi limo quasi obducti videntur. Vulgo: *Licoche* dicuntur, vocabulo ex nominibus: cochleæ & limacis contracto. Nuncupantur & *Escar-gots*, a græcis: *Eschara*, domus, &: *ago*, porto deducendis, ac si domum portantes dicerentur.

Quotquot interim sunt cochlearum species, quæ vel testa teguntur, vel illa careant, eæ omnes phlegmate oleoque multo abundant, parciores vero terram ac salem continent. Frequentissimo cibo Romanis cedebant & Græcis, quorum illi, piscinis fossisque arte factis easdem immittebant, ac pro deliciis mensæ saginabant. Sic & Silesiam tenentes, cochleas certis herbis studio saginare, deinde autem comedere, scribunt; & quibusdam in hortis Brunsvicensibus, cochleas per æstatem collectas in fossis aliquibus quadratis (quarum latera buxo vestiuntur, apertura autem reticulo ex filo

filo ferri constructio tegitur) adservari , hyeme tandem pro cibo venire dicunt. Apud nos e contrario vix plebis alimento cedunt ; attamen in aliis Galliae provinciis, verno in primo tempore ac jejunii quadragesimalis, paullo frequentius comeduntur. Substantia earum lubrica & viscosa, quantum illas ablueris, quotuplici aqua illas excoquas, quantumque illas jam pipere, jam sale, jam vino, jam oleo, jam aromatibus variis condias, humores tamen crassos producit, & melancholicos, & sanguinis circulationem retardantes, & præcipua viscera obstructionibus adficientes. Minus nocivæ tamen illæ habeantur, quæ in arbutis, vineis atque hortis reperiuntur, quæque ex serpillo, pulegio, origano, aliisque herbis aromaticis vivunt, & saporem minus ingratum induunt. Sant, qui tabidis & atrophia laborantibus, pro recipienda sua pinguedine, cochleas pro cibo commendant, imo experimenta quædam consilium adprobare videntur ; ast eventus singulares & forsan fortuiti, nulli regulam generalem constituunt ; & cochlearum, digestu difficillimarum, usum omnibus in universum dissuadendum esse censemus. Succus autem nutrientis iniquitatem, medica sua virtute rependunt. Ars sanandi enim easdem ad dissipandam pectoris acrimoniam, ad condensandos humores nimium attenuatos, & ad sedandam tussim vehementiorem, multum conferre docet ; & jam decoctiones ex iisdem extrahi, jam addito fero aquam aliquam ex illis elici suadet, pro morbis istis optima. Cujus ergo tres libras limacum ex hortis sive vineis accipias, & bis aqua calida abluas, ac probe mundes ; post una cum testis leviter contundas, cucurbitæ vitreæ immittas, quatuor libras feri recentis suprafundas, & tandem balneo maris, ad remanentiam dimidiæ partis destilles. Quidam additis aliis adhuc herbis pectoralibus aquæ hujus virtutem adaugere student ; qua si ægrotans tamquam ptisana pectorali dulcificanti usus fuerit, plerumque exoptatum finem attingit. Sic Cel. *Ettmuller* est, qui docet, jus coactum sive gelatum, ex cochleis proficiscens, multo sale volatili temperatissimo, (& huic simili, quem plantæ refrigerantes ac temperantes continent,) imprægnatum esse ; hinc etiam feбри hæctica & Pthisi magno opere subvenire, dummodo ad modum Itali cujusdam præparetur, qui unico hoc medio, ex limacibus montium hausto, omnibus pectoris morbis medebatur. Hic autem illos per aliquot dies farina & saccharo nutritos, biduo vel triduo peracto, primo quidem in aqua parum aceti mixto, post autem cum jusculo ex carne vervecina seu volatili, excoquebat. Testem habemus & Cel. *Boeclerum*, qui, ut ipse refert, quum tabe adeo confectus esset, ut cutis ossibus cohæreret, vel marasmo laboraret, ut loquar cum medicis ; pinguedinem suam receperit, dummodo jusculo ex limacibus, & gelato ex avena confusa uteretur. En, qua ratione in præparando eodem procedebat :

Rx. Partem mucosam octo vel decem limacum probe coctorum, & binos tresve cancos fluviaticos, quorum capita cum intestinis rejiciantur ; hos contunde, & jusculo quodam eo usque excoque, quo cancri rubescant ; tum decoctionem percola, iterum igni admove, & dum ebulliverit, cochleariæ & nasturtii aquatici, ana. pug. ij. adde. Vas denique ab igne remove, & exacte occlude. Imo ovi vitellum in alia quadam portione jusculi solve, & priori, paullulum refrigerato admisce ; adde etiam parum salis, vel butyri, vel florum nucis myristicæ.

stica. Quæ quidem decoctio, matutino tempore, jejuno stomacho per aliquot hebdomades præbeatur.

Conficias & syrupum, cui eadem est virtus, sequentem in modum:

℞. Cochlearum hortensium, ante solis ortum collectarum libram j. easque a testa separabis, in frustula dissecabis, & sex unciiis sacchari candidi, in pulverem redacti, consperges. Post eas in cellam deportabis, in cribro expandes, & patinam argillaceam suppones, qua syrupus distillans excipiat, ejusque quantitatem, quam cochleare unum capere potest, tussi ferina, Pthisi & Atrophia laboranti, singulis horis exhibebis.

Cochlearum testæ optimo diuretico contra suppressionem urinæ veniunt, dummodo in pulverem subtilissimum reducantur, & pulveris hujus portionem duplicem, uni chelarum canceri præparatarum commisceas; pro dosi autem ℥j. ter in die accipias, cum aquæ parietariæ ℥ij. pro vehiculo; & aliquot dies medii hujus usum continues. Sic Cel. *Michaelis Adolph, D.* in *Ephemerid. Germ. Centur. VII. Obs. 33. pag. 80.*, pulveris hujus ℥s. ad ℥j., cum vehiculo quodam conveniente acceptam, singulari virtute contra glaucomam, saburram atque calculum vesicæ & renum agere, & cum urina magnam saburræ copiam, continuato per dies usu, expellere docet. Imo remedium lithontripticum, a virgine *Stephens* inventum, pulvis limacum calcinatarum, alia inter, ingreditur.

Quibusdam quoque in regionibus Galliæ pro coercenda alvo cita, pro cohibendis dejectionibus cruentis, & pro levanda dysenteria, pulverem limacum rubrarum in clibano arefactarum, dosi ℥j. ad ℥ij., cum cyatho vini, ptisani, aut juris, pro vehiculo, adhiberi novimus. Multiplici etiam experientia comprobatum medium contra hernias, sequens exhibet *Ambrosius Paré*, dum scilicet limaces rubræ vasi argillaceo immissæ, clibani igne, calcinentur, & pulverem hunc, adultis potu, infantibus autem pulte mixtum, præbueris.

Exterius adhibitæ limaces, discutiente & resolvente virtute gaudent. Una cum testis suis contundantur, & ealide, cataplasmatibus in modum applicentur tumoribus & articulis nimia serositate ac acrimonia falsa turgentibus, qua & motus eorum ærumniosior redditur, & doloribus ipsæ adficiuntur. Ope igitur cataplasmatibus hujus serositates articuli condensatæ liquefcunt, transpirando expelluntur, & statim dolor recedit. Tres homines varios medio huic salutem recuperatam debuisse recenset *D. Vagnerus*, ut *Ephemer. Germ. Dec. II. pag. 201.* loquuntur. Alii sunt, qui feбри maligno laborantis plantæ idem illud cataplasma supponi jubent, cujus effectus exoptatos sese observasse profitentur. Nec non pro detergendis lichenibus exiguis aliisve maculis faciei, cochleis atque limacibus utuntur. Cochleam enim ex testa correptam evocant, & licheni ut obambulet, adigunt, saliva autem cochleæ dum lichenem tetigerit, ille brevibus exinde evanescit. Alii etiam pro vehementiore ani prolapsu balneum cochlearum commendant, limacum scilicet quantoscumque velis, aqua excoquendos esse, agrotantem vero per aliquot tempus eidem insedere jubent, ut emollito intestino, facilis reprimi queat anus. Imo *Hippocrates*, sanato prolapsu, anirrimam saliva cochlearum rubrarum perungendam suadet. Calculi tandem limacum ex corpore protracti pluris habentur ab Italis, iisque febres intermittentes omnes, & in primis quartanam facile depelli posse censent,

dum

dummodo amuleti instar ex collo suspendantur ita, ut cordis regionem pertingant. Redit tandem ex limacibus liquor aliquis, qui linimenti instar adhibitus multum facit ad leniendos dolores arthriticos. Hunc tibi comparaturus accipe limaces plures, ac testa subtracta, eos cribro setaceo, vel patinæ argillaceæ foraminulis perforatæ impone, post pulvere salis communis adsperge, in cellam reporta, & vasculum aliquod subde pro recipiendo liquore, qui destillabit.

Limaces tandem una cum fero lactis vaccarum aquam pectoralem Pharmacopoeæ Parisiensis ingrediuntur. Testulas denique limacum hortensium minorum flavido & nigro variegatorum, collyria quædam, hodie obsoleta intraſſe novimus.

℞. Cochlearum hortensium, sive ex vineis q. v. easque primo aliquantulum contunde, post ter aqua communi ablue, usque dum a limo exacte purgentur. Exinde bull. in libr. ijs. aquæ communis ad remanentiam tertiæ partis. Col. & exprim. residuoque addatur lactis vaccini quantitas æqualis. Mixtura tandem in duas doses dividatur, quarum altera, mane jejuno stomacho; altera, hora quinta pomeridiana, utraque tepida hauriatur. Decoctionis hujus usum, per mensem integrum continuabis, & singulari virtute pro tussi sedanda, pro asthmæ levando, & phtysi nascente avertenda, sese commendabit.

℞. Cochlear. hortens. q. vis, & una cum testis suis contusas, super patina argillacea probe calefacias. Post super linteum extendas, & ad modum cataplasmatum tumoribus, & doloribus articulorum applies, exactis autem quatuor & viginti horis repetas.

Quod si pro sanandis tumoribus adhibeatur, prius tumorem exacte abstergas, necesse est, cum decoctione foliorum salviæ, in optimo vino rubro factæ, quod reiterabitur, quoties cataplasma renovare oportebit.

Umbilicus marinus. Offic. *Cochlea cælata.* Aldrov. 393. Jonst. 12. Gesner. 240. Rondel. 98. Charlet. 62. Dal. 394. *Cochlea cælata antonomastice dicta*, Bonam. 114. *Cochlea triformis, striata, rugosa, papillosa*, Lang. 51. *Operculum, officinis Umbilicus marinus dictum.* Bellon. 430. Mont. 6. *Cochlea marina umbilicata, Bellivicus seu Belliculus marinus, Concha venerea, Lapis Margarethæ, Oculus Lucæ vel marinus, Faba marina.* Nonnull.

Frequentissima hæc cochleæ species in mari Mediterraneo reperitur. Testula illa oblonga, qua inclusum est animal, Hispanis: *Caragolo* & *Scaragolo* audit, ex quo forsan: *Escargot* Gallorum, originem duxit. Ipsa autem testa extus striata atque cælata, intus lævis & expolitâ detegitur. Operculum ejus substantiam profitetur calculosam, oboli latitudinem, rotundum insuper, nec crassitudinis haud adeo exiguæ, circulare, cochlearis instar excavatum, umbilicum fere efformans, & supra læve, splendens, tactu molle, ac rufum, infra autem jam rubicundum jam candidissimum, hoc, inquam, operculum, alteri cochleæ extremitati innatum adhæret. Nutrimento inhians insectum operculum suum protrudendo aperit, & accepto quantum sufficit, operculum recipiendo, testam suam exacte occludit, ita, ut ne quidem maris aqua penetrare valeat.

Caro ejus nullius est usus in Medicina; ast operculum, saporis quod est terreni, & testa ejus, pro diureticis, absorbentibus ac solventibus habentur. Eadem ratione & quantitate, quibus pulvis testæ cochlearum ad-

hibentur , quædam etiam unguenta adstringentia ingrediuntur . Cæterum vix ulli usui cedunt.

C O N C H A .

Variæ sunt Concharum species , sive piscium bivaluorum , id est duplici testa reconditorum ; ex quorum numero , quum nulli , nisi ostrea vulgaris & mater perlarum , materiæ medicæ adparatum ingrediantur , hæ saltem disquisitione nostra pertractabuntur . At pertexendo utriusque historiam , eodem ordine incedemus , quem limacis historiam exponendo sequuti sumus .

Ostreum . Offic. *Ostrea* . Schrod. 531. Rondelet. 37. Gesn. 645. Jonst. 44. Charlet. 66. Schonev. 54. Merr. 193. Dal. 397. *Ostrea Rondeletii marina* Aldrov. 482. *Concha satis nota in cœnis* , *Ostrea Latinis dicta* , non *ostreum* , Bonnan. 108. *Ostrea vulgaris esculenta* . Petiv. 822. *Ostreum striatum striis peculiaribus* . Lang. 82. *Ostreum vulgare maximum* , intus argenteo quodam splendore albescent . List. 176. *Concha testa subrotunda , rugosa substriata : valvis inæqualibus , cardine oblitterato* . Linn. Faun. Svec. 1338. *Ostrea major sulcata* , *Ostrea vulgarior* . Quorund.

Auctorum varii sunt , qui ostream , quam generis mixti seu æquivoci habuere , inter Zoophytas retulerunt ; & *Aristoteles plantæ aquatilis* nomen ipsi indidit , siquidem omni caret motu progressivo . Est autem ostrea , concha aliqua , satis nota , crassa , robusta , gravis , interdum maxima , fere rotunda , scabrosa plerumque & inæqualis , valvis autem inæqualibus , extus rudibus & asperis , intus lævibus atque argenteis , altera parum excavata , altera magis plana , ambabus tandem cardine oblitterato , cohærentibus , instructa .

Ovo autem & ostrea & testa ejus suam debent originem ; ab initio mollis , pro succrescente volumine sensim durefcit . Fibræ cardinis sive ligamenti medii contractæ , valvas exacte occludunt , relaxatæ aperiunt . De teges primo , branchiis suis intermediam oris aperturam , tum œsophagum , post stomachum sive ventriculum amplissimum , & foraminulis mesenterio & hepatis respondentibus perforatum ; denique canalem intestinale , qui efformatis circumvolutionibus variis , tandem terminatur in ano . Longior autem est circuitus intestini ostreæ , quam cujusvis animalis alius , ut eo diutius sua excrementa retinere valeat ; etenim dum extra aquam vivit , excrementa injusto tempore reddita , aquam testa contentam infectarent . Ostreæ in dorso corpus quoddam duriusculum ac fere rotundum observamus , quod medullæ spinali accedere videtur pro similitudine situs . Sub ventriculo autem cor albidum adparet , magno auriculo nigrido instructum , pericardio suo involutum , & systoles atque diastoles motu alterno agitatum , & humorem vitalem aortæ intrudens , qui mille canaliculos transcurrendo , ad varias corporis partes , in primis verò intimos branchiarum circuitus deportatur . Branchiæ autem reliqua viscera omnia volumine superant , quo eo facilior evadat respiratio . Videlicet ope muscutorum circularium , alternis sese contrahentium & relaxantium , uno haustu , plura corpuscula nitrosa aeris in aqua detenti recipiuntur . Cæterum ostreas ex aqua protractas , multum aquæ valvis suis inclusæ retinere constat ; quapropter & illæ ,

& illæ, & pisces testacei omnes, mari relicto diutius ac reliqui, extra aquam vivere possunt.

Genitalia, sexus differentiam constituentia, ne summo quidem studio in conchis reperire evenit, imo sexus differentiam nescire videntur. Majo mense attamen sperma suum emittunt, quod figura lentem, substantia autem sebi guttulam refert. Imo acutiori microscopio instructus, innumera ovula lacteæ huic substantiæ innatantia, in ipsis vero ovulis ostreas exiguas prorsus efformatas detegit. Sperma ostrearum rupibus adhæret, lapidibus, ligni frustulis, testis antiquioribus, aliisque fundum maris explentibus. Ovis autem viginti quatuor horis primis testas jam accedere ducimus. Statim ex quo sperma suum ostreæ ejecerunt, pinguedinem amittunt, & ægrotant, Junio autem Julioque salutem recipiunt, Augusto tandem nullum amplius superest ægritudinis vestigium. Cel. *Lister*, duce Cel. *Willis*, pro signo morbi in masculo ponit materiam quandam nigram in branchiis, in foemella vero albam. Majo mense, omnis speciei conchas captare licet piscatoribus, minores autem, vixenis sæpe majorum singulis adhærentes ut rursus mari committant, pro conservanda specie, legibus sancitum est. Elapso tandem Majo, non nisi maximas captare permissum est. Sperma autem ex rupibus rescissum, ostreasque tenellas, certis quibusdam regionibus maris immittunt, in his & magnitudinem & pinguedinem perfectam triennio vel biennio consequuntur. Viridem colorem ostreis conciliaturi, ad ripam maris fossas 3 pedum altas effodiunt, quas mare ipsum non nisi abundantiore fluxu excrevens, novilunio & plenilunio implet, easque cratibus quibusdam eum in modum muniunt, ut dimidiæ aquæ parti refluxus pateat, fossæ autem ad dimidium saltem expletæ remaneant. His igitur & fundi qualitas & solis radii, brevibus superficiem viridem conciliant, ostreæ autem biduo vel triduo, coloris istius participes fiunt; sex quoque hebdomadam spatio vel duorum mensium, summam viriditatem induunt. *Listeri* observationibus debemus, quod durante maris fluxu, concavam valvarum suarum terræ obvertant ostreæ, refluxu autem alteram; nec unquam loco suo moveantur, nisi tempore frigido, quo limo maris sese obtegere solent.

Hostes habent cancrum marinum, stellam marinam, ranam piscatricem seu bufonem marinum, petunculum, & mystulum. Alga marina autem, & limus aggestus recenter exclusis mortem adferunt.

Veterum nonnulli sunt, qui ostreas ac concharum omnes cum phasibus lunæ jam crescere, jam decrescere censuerunt. Multi ex recentioribus opinionem istam refutavere, varii autem, rationibus undecumque petitis comprobavere; talis est, ut alios taceam, Cel. *Mead*, Medicus Londinensis, in tractatu suo: *de imperio solis ac lunæ in corpora humana, & morbis inde oriundis*. Plurimi hominum piscibus testaceis omnibus præstantiores esse volunt ostreas, aut provido selectu opus est. Romanis quondam optimæ videbantur illæ, quas lacus Lucrinus, hodie autem quas Anglia præbet, illæ & Gallicis, Germanis atque Italicis anteferuntur. *Apicius*, cui librum de arte coquinaria debemus, *Trajano*, Imperatori, apud Persas degenti ex Italia ostreas transmisit, quas artificio singulari, aliisque ignoto, ita conservaverat, ac si tum demum maris aquam egressæ fuissent. Cel. *Baco*, Cancellarius adserit: ostreas in *Colcestra* captas & magnitudine & pinguedine adaugeri, dummodo in puteos quosdam, aquam dulcem præbentes, aut

maris

maris fluxus refluxusque participes reponantur. P. R. *Martini*, Societatis Jesu, in historia Sinensi, aliique referunt: Sinensium usui cedere, ut ostreas contendant, & sperma earum expressum per guttas paludibus instillent, copiam ostrearum exinde recepturi. Sed *Rosinus Lentilius*. D. testibus *Ephemerid. Germ. Centur. VII. & VIII. Anni 1719. pag. 450.*, impostores dicit peregrinantium illos, qui nobis persuadere contendunt, quod vel apud Sinenses, vel alibi, ostreae contusæ paludibus, velut grana terræ injectæ, alias producere possint. Aliis vero in regionibus, ut: prope Byzantium, quotannis Pontum Euxinum, haud quidem ostreis contusis, sed integris ac viventibus Græci præsertim, implent. Cymbas enim earum plenas eo abducunt, ac acervatim ostreas in mare projiciunt, quo fit, ut quotidie, in primis vero jejunii quadragesimalis tempore, magnam earum copiam venum venientem ibi reperiās. Adferit P. R. *du Tertre* in historia generali insularum Antillarum, sese in insula quadam exigua, Guadalupiae vicina, plures observasse arbores, ostreis onustas atque exuberantes, præcipue arborem, quam *Paletuvier* adpellant, maris ripæ vicinam, cui & aliæ concharum species adhærere solent. Facto sua veritas constat; teste enim Cel. *Childerey* in historia singularium Physicorum, quæ Anglia exhibet, idem illud prope *Plimouth*, conspiciere licet. Singularis rei ratio in promptu est. Arbores istæ nimirum, prope ad ripam constitutæ; ramos suos inferiores eo usque demittunt, quo accedentibus fluctibus maris altioribus facile irrigentur; aqua autem sperma ostreorum adportat, quod ramis adhæret, & tempore tandem excluditur. Alimentum ostreolis hisce præbet aqua maris, dum testarum pondere onustos ramos eo usque deprimunt, ut duplici maris fluxu quotidiano, aqua tangantur, imo submergantur. Ostreae igitur arboribus adhærentes, testas quidem reliquis minores atque subtiliores, ast saporem ita gratum & jucundum, quam illæ, exhibent. Cæterum varii coloris variæque magnitudinis sunt, pro varietate locorum. Maximas in quibusdam Indarum fluviis reperiri docent. Medias magnitudine præbet Europa, mare Hispanicum rubras, aliæ regiones & testis & carne nigras.

Aliæ ostrearum sunt fœcundæ, aliæ steriles. Illas ex fimbria quadam nigra cognoscēs. Et qui gulæ student, illas palato gratiores, & magis succo plenas esse censent. Quum autem ova sua emittunt ostreae, tunc flaccidiores sunt & ingrati saporis, & salutis adversæ. Quicquid passim, ut in Hispania, legibus vetitum est, ut eo tempore vel capiantur, vel venum exponantur, ne morbos adferant helluonibus. Imo quod singulare est, magno vermiculorum rubrorum numero tunc, nec alio tempore, nisi rarissime, ut vult Cel. *Deslandes*, repletæ videntur. Subjungit Cel. *Lemery*, quod, dum magnos ostrearum acervos, noctis in tenebris obvertendo seu obvolvendo occupatus fueris, punctula quædam, cœruleo splendore nitentia, stellarum instar observare contingat; & hunc splendorem ex vermiculis nitentibus, testæ qui adhærent, eamque rodunt, proficisci, & faciles vel microscopii vel lentis opticae ope detegi; & plures piscium alios lucem in tenebris exhibere, cujus causam haud semper in vermiculis talibus latere judicat. Omnes scilicet conchas bivalvas majores, addit Cel. *Deslandes*, & in primis mytulos magnos, carinæ navium Oceanum transcendentium adhærentes, lumen præbere observavi, dummodo in tenebris adfrictu violentior^{ri} conquassentur. Repetita etenim conquassatione, particulæ salino-sulphure^æ quibus^x,

quibus imprægnatæ sunt testæ , excitantur , commoventur , & testis ipsis Phosphori naturam induunt.

Quæres autem: quid vermes isti rubicundi in ostreis fœcundis? quare eo tantum anni tempore adsunt , quo fœcunditatis signa alia conspiciuntur? Obstetricum munere illos fungi , censet Cel. *Deslandes* , & ratione nobis ignota, organa generationi inservientia excitare. Cujus ergo sequens experimentum instituit sæpe numero . Sub Majum , mensem varias accepit ostreas fœcundatas, vasi, maris aqua pleno eas commisit, & magnum plerumque ostrearum numerum ab hisce relictum reperit . Aliis e contrario , iisque fœcundatis, magna cum dexteritate vermiculos inclusos subtraxit , & denuo aliam in aquam maris projecit; & nullos harum productus, sterilitatem universalem observavit. Præter hos vero vermes, obstetricis officio fungentes, alios adhuc, diversissimos, albos atque splendentes in ostreis detexit primus Cel. *de la Voye* , præfectus castra metantium Brestiæ ; & quidem in anno 1666. Hi autem acum figura , & 5. ad 8. lineas longitudine referunt; ac disquisitu sunt difficillimi, siquidem vel levissimo digito correpti, in materiam glutinosam, aquosam, digitisque adhærentem abeunt. Jam, ostreas dum manibus volvis, varios vermiculorum illorum auferes , & hujus ergo digitos tuos ita nitentes observabis, ac si quædam Phosphori granula, in charta albida contererentur. Nec tamen ostrearum quævis experimento eidem sufficiunt.

Inter ducentas ad trecentas vix viginti reperiēs , quæ nitentibus gaudeant vermibus ; nec omni tempore anni , imo ne quidem quovis anno aliquot illarum vermes illos exhibent . Cæterum mole majores minoribus antecellere & majori splendore scintillare observat idem ille Vir Celeber.

Nomen Gallicum: *Huitre* , ex latino: *ostrea* seu *ostreum* ; hoc autem ex Græco: *ostreon* vel: *ostracon* deducendum judicamus . Ab initio enim: *Oestre* , *Oestre* , *Oistre* audiebat, post: *Ouistre* , tandem vero: *Huistre* , seu *Huitre* , ut *Huis* , quod januam denotat, ab *ostium* exsurrexit.

Ostrea abundat oleo, phlegmate, & sale tum volatili, tum fixo. Quotquot autem sunt ostreæ specie diversissimæ, illæ omnes & cibo, & nunquam non palati deliciis venierunt; dummodo recentes, & magnitudinis mediæ sint, teneræ, humidæ, & grati saporis, nec in paludosis sive cœno repletis, sed limpidis purisque aquis, fluminum ostia respicientibus capiuntur. Aqua dulci enim detentæ admodum pinguescunt, & saporem induunt gratissimum; illæ autem, quæ longissime a fluviis distant, ac aqua dulci destituuntur, carnem exhibent duram, & ingratum saporē, & amaritudinem. Omnibus reliquis sine dubio anteferendæ sunt hæ, quas in Anglia, ad maris littora capiunt; præsertim, dum Santoniam deportatæ, & paludibus falsis commissæ, carnis colorem subviridem, & saporis præstantiam majorem acceperint. Ast supra fraudis periculum, quæ quæso merx est? En, quæ de ostreis subjungit Vir supra laudatus, *Rosinus Lentilius*, D. Hagæ Comitum commorans Principis cujusdam Orator, lautum quondam convivium instituit, & ne quicquam sumtuosi deesset, accumbentibus ostreas virides, quas ex Anglia allatas habuit, adposuit. Quotquot autem ex illis comederant, hi statim violentiori morbo, & anxietatibus, & magno vomendi conatu correpti fuerunt; imo vix ac ægre salutem recuperaverunt.

verunt. Quæ autem mali origo? ostreae communes æruginè tinxerat, a quæ emtæ erant, impostor, ut Anglicæ viderentur.

Magna igitur & antiquiorum & recentiorum turba, ostreas inter delicias refert, alii tamen illas contemnunt, aliis nullæ arrident. Alii eas, nescio quanto opere vituperant, alii summo opere laudant. Istis enim nauseam movent, & adspectu adeo ingratum animal, qui primus ori suo admovit, hunc vel animo acerrimo, vel fame instinctum fuisse perhibent; deinde autem gulam, novitatis pruritu, idem adpetiisse, quod fames tentaverat; & animalia viventia devorare, naturæ esse contrarium. Imo sæpius accidit, ut qui in ostreas averfatione ferebantur, dum vel aliorum desiderio, vel suæ ipsorum curiositati satisfacturi, quasdam comederant, post multos exinde dies, illas vomitu rejecerint.

Fert autem communis plurimorum opinio, quod adpetitum excitent ostreae, urinamque expellant; parum vero nutrimenti præbent, & digestionem earum dissolutionem potius diceret; stomacho conservatæ consumuntur, chylum producunt parcissimum; omnes fere in aquam abeunt, illamque, aquæ ostrearum testa detentarum nutrimento venienti similem, sive subacrem, & stomachi ac intestinorum fibras leniter irritantem; hinc brevissimum per tempus in stomacho remanent, & magnum ostrearum numerum absque ullo ejus incommodo comedere poteris, præcipue si vini loco, cerevisiam pro potu subdideris. Vino enim indurescunt & digestu difficiliore evadunt. Tot enim ostrearum helluones, matutino tempore ac vespertino tantam earum copiam devorant, nec ægritudine adficiuntur. Crudæ cæterum saluti magis convenire censentur, si quidem igne sive calore dissipatur quem continent, sal volatilis.

Stomacho igitur robusto crudas magis convenire ducimus; ast stomacho debiliore laborantibus haud ita, quippe partes earum viscosæ & lubricæ facillime degenerant in cruditates: Saluti etiam & cuivis stomacho accommodatæ habeantur, dum vel in valvis suis relictæ, addito butyro ac panis mica, super prunis parum excoquantur; vel valvis extractæ cum butyro, aliisve condimentis levioribus præparentur. Quas vero quomodocumque frixas adponunt, illas saluti admodum contrarias esse teneto. Brevibus, quotuplici modo cibo adpropriantur, illis tantum earum usum consulimus, qui biliosi sunt temperamenti, & fortioris stomachi. Accedit consilio huic & Medicorum Celebriorum consensus, subscribit & experientia.

Carni ostrearum nullus quidem locus debetur inter adparatus materiæ medicæ; alii tamen salis volatilis ac olei ergo, quibus abundat, contra scorbutum & podagram, usum ejus commendant; ast quum facilis cruditatum causa evadat, consultius habemus, ut usu ejus abstineat ægrotans, & voluptati gulæ easdem relinquat. Ast testæ ostrearum pro præstantioribus mediis veniunt Medicinæ, dum circa absorbendam & corrigendam stomachi acrimoniam versatur, ac functiones ejus, prædominante quodam acido interruptas, reparare studet. De indubitato medii hujus effectum non est quod plura addamus, suffragante in dies experimentorum cumulo; sufficit optimum illas præparandi modum subnectere, quem ex *Actis Regiæ Accademiæ Scientiarum*, anni 1700. pag. 70., auctore Celeb. *Hombert* haurire liceat.

Rx. Concavam valvarum ostreae, altera, sive plana rejecta. Illam frequenti

quenti lotionē a sordibus externis purgatam & solis ope probe exsiccatam in mortario marmoreo contundas, usque dum in pulvemabeat, hanc iterum soli exponas, ejusque ope denuo arefactam, iterum conteras, pulverem denique cribro rariori transmittas.

Dosis sit gr. xx. ad xxx. , quæ mane jejuno stomacho , cum v. ad vj. cochlearibus vini candidi , seu aquæ Melissæ diluta haurias , & per tres hebdomades , vel integrum mensem usum eorum continues . Et quidem præcipue infantibus exhiberi solent , qui lac sugendo frequenti stomachi acrimoniæ subjacent. Sic enim Vir Cel. *Harris*, Medicus apud Anglos, in tractatu de morbis acutis infantum , illos fere omnes , causæ quam diximus, originem debere ostendit, nec nisi pulverum absorbentium usu, quos inter eminet pulvis testarum ostreæ , posse depelli . Pharmacopolarum varii sunt, qui pulveri huic simpliciter contrito, calcinatum substituunt, male quidem , nil enim remanet nisi calx adusta ; quæ nulla prorsus facultate digestiva gaudet, sed potius ardorem stomachi & morbum exauget ; imò calcinando sal ille digestivus , præcipuam pulveris hujus virtutem constituens, abit. Nec non pro sudoribus & menstruis mulierum promovendis , ac profligandis febribus intermittentibus ℥s. ad ℥j. , pulveris prædicti, cum cyatho optimi vini rubri ante paroxysmum febris commendant ; præmissis tamen mediis generalioribus, sanguinis emissionē scilicet , & purgatione ; proveniente etenim sudore ægotans plerumque salutem recipit . Adipi suillo insulso tandem pulverem huncce admiscant , quo fiat unguentum præstantissimum pro hemorrhoidibus, quod resolvendi, emolliendi, ac dolores brevibus sedandi facultate sese commendat.

℞. Nitri purificati ℥ij.

Tartari Vitriolati

Concharum ex ostreis præpar... ana ℥j.

Cinnabaris factitii ℥j.

M. & fiat omnium pulvis subtilis , contra effervescentiam sanguinis & acrimoniam stomachi. Dosis sit ℥j., ter de die pro adultis, & gr. xij. bis de die in infantibus, per aliquot dies continuanda, & circa finem temporis usu ejus triti , corpus purgandum esse memento.

℞. Cretæ præpar.

Oculor. Canc. præpar.

Pulveris Concharum ex ostreis præpar. ana ℥j.

Nucis Myristic. ℥s.

M. & fiat omnium pulvis, cujus dosis sit ℥j. secunda post prandium & cœnam hora; Pulveres hosce syrupo rosarum siccarum subigendo, opiatam confici posse observes . Est autem pulveris memorati usus , contra vomitum violentiorem, contra diarrheam ab acrimonia primarum viarum pendentem, & ad promovendam lactis digestionem , dum metuis ut acescat in stomacho debiliore.

℞. Adipis seu lardi porcini insulsi. ℥j.

Concham ostreæ unam calcinatam & in pulverem redactam.

M. exacte , & per aliquot dies , cubitum iturus hemorrhoides unguento hocce perungas.

Mater Perlarum. Offic. Schrod. 530. Dal. 397. *Concha Margaritifera*. Mont. 6. Jonst. 13. Bellon. 402. Aldrov. 418. Charlet. 64. *Concha*, *Mater unio-*
Geoffroy. Tom. III. Pars I. B num.

num. Rondel. 33. *Concha, Mater unionum dicta, aut Margaritifera*. Bonan. 93. *Concha Margaritifera plerisque, Berberis antiquis Indis dicta*. List. 56. *Convalvis æqualibus, mediocriter vel leviter umbonata*. Lang. 69. *Concha quæ Margaritas fert, Ostrea Margaritarum Mater, seu Margaritigena*. Quorumd.

Mater perlarum, magnitudinis diversæ in maribus Orientis plagas alluentibus, est concha quædam bivalva, robusta, ponderosa, extra cinerea rugosa & aspera, nec tamen striata, intus candida seu argentea, lævis, nitens; ac margaritis, quæ in illa nascuntur ipsis durior; subviridis, figuræ planæ ac circularis, saporis terrestris, & in centro suo ostreæ avulsæ vestigium exhibens.

Sunt autem margaritæ substantiæ lapideæ, jam rotundæ, jam angulares, granosæ, transparentes, & saporis ejusdem, cujus concha illarum, id est, terrestris.

De origine Margaritarum varia disputantur. Alii, cum *Plinio* sunt, qui ex rore cœli, a concha in superficiem maris proveniente excepto, unius mensis spatio illas generari docent; alii eas lepram fere, seu excrementum ostrearum credunt; alii concretionem succi nutritii in ostreis vel vetustioribus vel ægrotantibus eadem ratione enatam, qua calculus hominis in vesica & renibus saburræ congestæ originem debet. Quæ quidem novissima opinio, cui & *Cel. Samuel Dale*, & alii magni nominis Physici subscripserunt, nobis etiam maxime ad veritatem accedere videtur. Succus etenim sive gluten, cujus transpiratione rudimenta testarum ostreæ & pinnae marinæ efformantur, succus ille, inquam, aliquoties receptaculum suum exuberando egreditur, per guttas coagulatur, & in globulos testæ colorem referentes, condensatur, in margaritam. Color vero margaritæ & matris quum sit simillimus, & materiam producendæ utrique eandem sufficere creditum est. Unicam vix margaritam in ipso ostreæ corpore reperies; quum mille jam deprehenderis testæ, verrucarum instar, adhærentes. Plurimæ autem ostrearum nullas unquam margaritas continent, hinc illas totidem ostrearum defectus seu vitia, & quidem infrequentiora habeas. Oras quoque margaritis abundantes, aerem saluti obnoxium transpirare constat testimoniis peregrinantium; ex quo concludimus ægrotantibus ostreis tantum margaritas inesse; imo has quæ continent, ostreæ, illas ne infima quidem plebs pro cibo capere solet; at quo præstantior ostreæ caro, eo minor remanet spes margaritas in eadem reperiendi. Ex quo quid pronius nisi hoc: quod aquæ margaritis abundantes, haud salubres; quodque ostreæ puriori aqua & probo succo nutritæ, nec temperamenti vitio ullo laborent, nec nisi paucissimas margaritas interdum exhibeant. Sæpius etiam margaritæ in tantam magnitudinem excrescunt, quæ obstat quo minus valvas occludere possit ostrea, tunc huic moriendum est. Nec determinatus est locus margaritarum, quavis enim ostreæ in parte conspiciuntur, attamen vel inter plures in omni ostrea obvias, singulæ binæve, reliquis magis perfectæ atque majores observantur. Teste tandem *Cel. Lemery* ostrea, perlarum mater, ut reliquæ, edulis est; excipe tamen has, quibus margaritæ insunt, quas duras carne ac sapore ingratas esse constat.

Exoticis in regionibus margaritæ reperiuntur, & ad nostras deportantur. *Cel. Tavernier* est, qui quatuor in primis regiones Orientis margaritis abundare docet: insulam Bahereneam, in Sinu Persico; vicinitatem urbis

urbis Carifæ, ex opposito Bahereneæ insulæ, in oris Arabiæ felicis; insulam, quam Ceylon dicunt, in mari, Manaar, castellum alluente; & in oris Japoniæ, ibi autem rariores quærentur, quas haud ita magni æstimant incolæ. Et si Occidentem versus tendas, quinque alia loca, in sinu Mexicano ad oram Hispaniæ novæ, margaritas exhibentia reperies. Nec non Mare Mediterraneum, ut oræ Scotiæ aliæque, uniones præbent; etenim non solum conchæ margaritiferae Orientales & Occidentales, sed & alia animalia testacea margaritas continent; talia sunt mytuli in Mari Baltico, in Norvegia, Lappia, & Silësia obvii, hæ margaritæ itaque plurimum scabrosæ sunt, nec Orientis Occidentisque unionibus pulchritudine accedunt, quamvis aliquoties quædam satis exquisito sint candore & splendore & figura spherica. Ostreae igitur in fundo maris, rupibus plerumque adhærent, & piscatores cistam intrant, cui adnexus est lapis 30. circiter librarum pondere; sic fundum petunt, & cultro vel quodam alio ferro ostreas avellunt, & in cistam reponunt, quæ quum expleta fuerit, fune fociis signum edunt, & ab his fune protrahuntur. Urinatores isti, quamvis sæpius ad altitudinem 60. pedum sub aquam descendant: tantum tamen lucis vel in imo fundo maris, quantum in terra affulgere dicunt. Quam primum itaque fundum adtigerint, quam celerrime possunt, ostreas hinc inde avellunt; est enim periculum in mora. Validissimi quivis haud ultra horæ dimidiam, plurimi vix quartam horæ partem sub aqua degere valent. Et alii quidem spongiam oleo plenam & brachio adhærentem iteratis naso & ori admovendo respirant; alii a teneris adsueta, halitum tamdiu retinent. Juvenes sint & robustiores necesse est. Multiplex autem periculum subeunt, faciles enim maris fundum petendo jam hic jam illic alliduntur, & rupium asperitate eminente jam membrum aliquod mutilant, jam se ipsos enecant; faciles timore oppleti via aberrant, faciles aeris defectu suffocantur, faciles etiam in prædam abeunt piscium rapacium & in primis, illius, quem Requiem dicunt, seu Canem Carchariam. Mari extractas denique ostreas soli exponunt, quo sese ipsas aperiant, quod si enim ostrearum vulgarium more, vi aperirentur, sæpius læsio quædam margaritis ipsis adferretur; dehiscantibus igitur ostreae valvis denudatæ colliguntur, eximuntur.

Coloris sunt jam candidi, jam flavidi, jam subviridis, jam livei, jam plumbei. Sex margaritas sibi esse ait *Tavernier*, perfecte quidem sphericas, aut nigras ut gagates. Natura album colorem margaritis largitur; flavidum vero seu subviridem tunc induunt, quum acervatim accumulatae ostreae adhuc occlusæ, aqua sua interim consumpta, putrescunt; flavidus viridisque color igitur ex corruptione deducendus est; quotquot enim aquam conservasse reperiuntur ostreae sole apertæ, eæ omnes candidas exhibent margaritas. Quæ plumbeum seu nigrum colorem ostendunt, illæ vix alibi nisi in America obveniunt, hujus maria enim magis limosa sunt, quam Orientis; limus vero maris causa est nigredinis unionum.

Nec tamen quævis concha margaritifera margaritas continet, plures etenim hisce carent. Annus pluvia copiosus harum generationi favet, prævia scilicet pluvia abundanti & ostreae margaritis abundare observatum est. Sæpius quoque ostreae nostrates, ut supra monuimus, margaritas continent easque margaritas Scotienses adpellant; quas mytuli secum gerunt, illas Eotharingicas dicunt; imo & pinnae marinæ aliquoties uniones exhibent,

quos ex magnitudine sua facile cognosces . Alios quoque in aliis concharum speciebus videre licebit . Undecumque autem proveniant , omnes in universum margaritæ constant laminis sive stratis tenuissimis ac pellucidis , naturæ opera sensim sibi superadditis , ceparum more , post vero indurescentibus & petrefactis ; eademque illis est materia , quæ matri perlarum ac reliquis testis concharum .

Vir Cel. *Michael Bernard Valentini* in *historia simplicium reformata* , expositis variis variorum sententiis de generatione margaritarum , illi tandem ipse accedit , qua margaritas totidem ovula habent , ex conchis fœmellis coitu fœcundatis , tantum provenientia , & producendis ostreolis destinata ; omnia autem quæ pro stabilienda opinione subnectit , illi quidem satis accurate observata & a testibus fide dignis comprobata ; nobis e contrario fabulas redolere videntur , imo risum movent .

Omniū vero margaritarum pretiosissimæ habentur Orientales , & primum locum vel hæc inter illæ tenent , quæ magnitudine eximia , & sphaerica figura perfecta , & candore , & pelluciditate , & splendore , nomen margaritarum aquæ pulchræ , (ut artis dictione utar) sibi adquirunt . Quo magis completus est numerus perfectionum enumeratarum , eo majus illarum pretium , quæ armillaribus & monilibus mulierum conficiendis veniunt . Minimæ autem , margaritarum semen dictæ , artis medicæ usibus cedunt , eadem scilicet virtute , qua majores gaudent , & minori pretio comparantur . Sint Orientales necesse est , sint candidæ , pellucidæ , immaculatæ , & super porphyrite in pulverem subtilissimum reducuntur . En illas præparandi rationem . Ex matribus perlarum sive testis optimas & splendidissimas seligunt , & alias ex illis dissecant , ac anfas cochlearium , cultrorumque & sexcenta alia exinde conficiunt , nonnunquam satis magnifica & artificiosa ; alias autem super porphyrite in pulverem subtilissimum reducunt , & huic nomen est : *matris perlarum præparatæ* ; qua mulieres quoque pro componendo fuco suo utuntur .

Uniones olim dicebantur margaritæ , singulis enim ostreis singulas tantum contineri censebant ; falso tamen , ostrearum singulæ etenim vel septenas exhibent margaritas , quæ humore quodam glutinoso , salino , & hinc inde condensato seu petrefacto , sic Physici nostrates , enascuntur .

Matrem perlarum itaque pro absorbente iisdem in morbis adhibet Medicina , quibus ostrearum conchas convenire expositum est . Chymia accedente salem & magisterium præbet , illiusque gr. x. ad xx , hujus vero gr. xx. ad xxx. pro dosi commendantur , ubi vomitus & alvi profluvium , ab acido quodam dominante in viis primis proficiscentia , reprimantur necesse est . Consultius autem putamus , si mater perlarum in porphyrite , ut diximus , comminuta exhibeatur ; etenim aceti ope & sal & magisterium illud provenit , at acidum hocce virtutem matris perlarum absorbentem enervat , ac efficaciam ejus contra acida stomachi agentem debilitat ; subscribit experientia , & vix ullum effectum vel salis istius , vel magisterii observare licet . Pastilli etiam absorbentes , in eisdem usus ex matre perlarum comparantur , quorum dosis est ℥j. ad ℥ij.

Ingreditur mater perlarum & pulverem pectoralem , & Emplastrum Stypticum Pharmacopœæ Parisiensis .

Rx. Coral. rubr. præpar.

Matr. perl. præpar.

Oculor. Cancr. præpar. ana ʒj.

Santal. rubr. ʒs.

M. & fiat pulvis absorbens, uno haustu cum cyatho aquæ, dum lectum te conferes, accipiendus.

Rx. Matris perlar. præpar.

Coral. rubr. præpar. ana ʒij.

Extract. Opii, gr. iiij.

M. exacte, & fiat pulvis subigendus sacchari candidi, aqua cinnam. soluti ʒijs. Tunc fiant pastilli f. a.; qui si anodynus esse debent, addantur olei cinnam. guttæ iiij., & contra dolores partum excipientes dosi ʒij., binis horis quibuscumque, accipiantur, majori tamen temporis interstitio observato, prout dolores decreverint.

Si verum quæris, quanti scilicet usus in Medicina sint margaritæ? illas quidem multum pretii & ostentationis, ast parum utilitatis adferre dicimus. Eadem nempe & illis ipsis, & testis earum inest virtus, absorbentium & alkaliorum omnium instar, acida extinguendi & profligandi. Faciunt itaque contra acida stomachi, contra diarrheam, contra hemorrhages, & boulimiam, dosi gr. xv. ad ʒs., receptæ. Sic quoque potiones cordiales pro reprimenda humorum malignitate, & restaurandas corporis vires, ingrediuntur. Verum virtus illarum ultima, nobis quidem videtur non nisi alcalo earum tribuenda. Quod quum & stomachi acida, Cardialgiæ & Lipothymia causas, absorbeat; & plexum nervorum stomachi irritet; & symptomata ista statim compescat: margaritas ipsa inter cordialia retulerunt, licet casu tantum, ut corallia, oculique cancerorum, sese commonstrent cordiales. Imo, quas pretiosas esse voluit hominum arbitrium, illas & miris qualitatibus instructas voluit opinio; quæ pharmacopolis lucro, & ægrotantibus solatio cedit. Isti enim pro margaritis medicamina ingredientibus, quamvis vilioribus, idem exposcunt, quo maximæ & præstantissimæ quævis venirent; ægrotans vero vix a se impetrare potest, quin credat, medii magni venientis magnos atque optimos fore effectus. Qua de Charlataneria (ut cum nostratibus loquar) multi fuerunt celeberrimorum in Medicina virorum plurimi, ita ut nihil nobis supersit, quod addamus. Quid enim? si mediorum optima illa forent, quæ magni veniunt, nonne pauperes eorum usu destituerentur? quid ergo? divites tantum spectat? neutiquam; provida enim Numinis ac benigna voluntas, cujusvis hominis infirmitatibus subventura, in illa, quæ vilioris pretii, non dicam, contemnenda videntur, optima quævis media contulit ac generaliora.

D E N T A L I U M.

Dentalium. Offic. Schrod. 328. Charl. 63. Mont. 6. Dal. 393. Dentales. Gesn. 345. Scyll. 136. *Tubulus dentalis lævis* Rondel. 110. Lang. 5. *Dentales alii ejusdem formæ minores*. Bonan. 91. *Dentale læve, album, altera extremitate rufescens*. List. 4. *Dentalium testa subcylindræa lævi obliqua vel arcuata, hinc angustiore*, Linn. Faun. Svec. 1327. *Dentale arcuatum, Tubulus marinus, Syringites*. Nonnull.

Geoffroy. Tom. III. Pars I.

Dentalium est conchula univalva, conï figura, oblonga, 3. fere digitorum longa, alba, denti canis simillima, gracilis, in altera extremitate calami caulem crassitudine æquiparans, post sensim decrescens, aliquantulum curvata, extra aspera, intus lævis, tota tubi instar excavata, levis, lineis transversim ductis per spatia distincta, & vermiculum marinum continens, qui victum quæsiturus illam ex parte egreditur. In Angliæ oris, rupibus, lapidibus vel conchis antiquioribus nexum reperitur dentalium.

Antalium vero seu Entalium, alia est concharum species cylindrica, seu in tubum efformata, dentalio longior, & crassior, cæterum vero simillima, nisi quod strias profundiores ac plerumque subvirides exhibeat; hinc Dactylus *Plinii* habetur, & quendam vermiculum marinum continet, & ex India Orientali ad nos deportatur. Præeunte Cel. *Listero*, docent Viri Cel. *Samuel Dale* & *James*, quod lapides, lignum ac metalla incisa seu striata, ab Italis: *Entaglia* dicantur, ex quo vocabulo Italarum, Cel. *James*, nomen Latinum: *Antalium* vel *Entalium* deducit, eo potius, quum multa similitudine accedat: *Dentalio*.

Dentalium pariter ac Entalium, parum salis volatilis continentia, alcali sui ergo acida temperant & absorbent, ac alvi profluvii exinde provenientibus medentur. In pulverem reducantur necesse est, cujus vel nudi, vel aliis pulveribus absorbentibus mixti ℞j. pro dosi, cum aqua communi pro vehiculo, mane jejunus haurito. Interdum quoque extrinsecus pro desiccandis quibusque adhibetur. Rarior tamen utriusque usus est, quippe quæ in apparatu curiosorum potius, quam in Pharmacopœis reperiuntur; sunt enim infrequentiora, & quæ eadem imo potentiore virtute gaudent alia, ut oculi cancerorum testæque ostrearum, illis plerumque substituuntur.

Dentalium & Entalium ingrediuntur Unguentum Citrinum *Mirepsi*, *Alexandrini*.

H I R U D O.

Hirudo, *Sanguisuga*. Offic. Charlet. 62. Merr. 207. *Hirudo*, sive *Sanguisuga*. Mont. 323. Bossch. 431. *Hirulo*. Gesn. 424. Schonev. 40. Dal. 383. Lemer. 425. *Hirudo aquarum dulcium*. Aldrov. 721. *Hirudo lacustris*, Jonst. 143. *Hirudo maxime apud nos vulgaris*. Raii 3. *Hirudo major equina*. Schrod. 343. *Hirudo depressa fusca: margine laterali flavo*. Linn. Faun. Svec. 1272. *Hirudines, animal Sanguisugum*. Nonnull.

Hirudinis nomine nobis venit insectum illud aquaticum, nigrum, pedibus pinnis spinisque destitutum, quod figuram vermis crassioris, & digiti articularis longitudinem & linearum punctorumque maculas refert, & anguillæ instar lubricum atque viviparum paludosa atque udosa loca inhabitat. Annuli cutim ejus componentis illi sunt, quorum ope & aquæ innatat, & extra aquam constituta digitoque tacta in seipsam se recipit adeo, ut digitum unum haud superet longitudine, & tubercula ac eminentiæ cutis appareant. Dorsum ejus fulvo-nigrum, ex utroque suo latere lineam albo-flavescentem, nigridis punctis conspersam ostendit. Venter maculis flavido-albis obsitus est. In capite ejus est oris foramen duobus labiis intermedium, fibrisque constat flexilibus & ori formas convenientes, ac usui animalis respondentes, conciliantibus. Foramen illud triangulare & tribus instructum est dentibus acutissimis, fortissimis, ac humanæ imo bovis & equi

equi pelli perforandæ sufficientibus . Tria namque læsionis vestigia simul carni imprimit, quæ triduo vel quatrinduo ex morfu, evanescente tumore distincte satis conspiciuntur . Cel. *Morand*, Vir magnus in Chirurgia, & Regiæ Scientiarum Academiæ Socius, oris in fundo mammillam quandam distincte perspexit, carne solidissima conflata, & fluctuantem; huic linguæ officium, sanguinem ex triplici vulnere, emboli instar, exsugentis, tribuit; at oris partem labiis contiguam, antliæ corpori ipsi æquiparat . Exinde autem apparet pharynx, cujus fibræ circulares canalem constringendo, sanguinem haustum stomachum versus deducunt . Tum sanguis iste sacculum quendam membranofum, pro stomacho & intestinis hirudini venientem, & magnam corporis reliqui partem occupantem, ingreditur . Cui si aerem hirudinis ore, immiseris, statim ille tubulum rectum, in centro situm, & utrinque in sacculos seu cellulas, tubo principali ampliores, sese egerentem, hunc, inquam, tubulum statim ille aer intrabit . Cæterum quæ totum illud organon componit, membrana tenuissima est, & ad caudam usque procurrit, ibi autem fibris circularibus, & aliis quidem spirali- bus corroboratur . Sacculos istos si totidem stomachos habueris, in hiru- dine maxima ad quatuor & viginti numerabis; sanguis vero ab hirudine suctus in reservatoriis illis diu detineri, & pro nutrimento ejusdem cedere videtur . Hoc saltem constat, plures per menses sanguinem, fere prorsus coagulatum, nigridiorem quam sua natura esse solet, nullo foetore acce- dente in reservatoriis prædictis adservari . Jam quum sanguis omnium ex nutrimento concocto resultet; hirudinem, sanguine viventem, haud adeo notabili depuratione nutrimenti sui egere concludimus . Nec enim anum, vel foramen ani officio fungens observamus in illa; & si quadam opus est secretionem heterogeneorum, illam transpiratione continua perfici videtur; pelli etenim hirudinis materia quædam viscosa exsudansque stratorum in- star accedit, & in aqua, qua detinetur emollita, tandem per fila separatur & abit; quæ quum per totidem segmenta rescissa segregantur, Vir Cel. *Morand*, quem loquentem inducimus, alias hirudinum oleo immisit, & per dies in eodem reliquit, post viventes aquæ reddidit, & pelliculam istam integram, ut anguillæ exuvias deposuerunt . Ex quo vides quod quantum- que diversæ sint hirudines a lumbricis, qui tracheas in exteriori cutis su- perficie exhibent . Ore respirare creduntur, at quænam pars pro pulmoni- bus veniat, incertum . Nec enim quidquam observari potuit, nisi quod motum aliquem respirationi respondentem edant, alternantem scilicet & isochronon, id est: eadem temporis ac interstitii dimensione absolutum; licet jam celeriores jam tardiores, pro majori vel minori atmospheræ, qua detinentur, calore.

Nec tamen omnia a Cel. *Morand* observata, nostrismetipsis experimentis comprobare obtigit; nostras igitur quantulascumque observationes de hi- rudinibus subnectere liceat.

Hirudo igitur os suum dum aperit, pertundendæ corporis regioni cu- curbitæ instar idem adplicat; post instrumento quodam cuspidis triplicis ac supra descripto, triplex vulnus infligit . Emanat vulnere sanguis, & ab ore ad stomachum defertur, sphincter autem in extremitate stomachi obvius aperitur, quo sanguini canalem intestinale intranti transitus pateat . Ca- nalis ille binis partibus, illisque substantia diversis constat; pars enim prior

intestinum tenue, posterior autem crassum & in ano desinens effingit. Imo alio quodam sphinctere intermedio binæ partes a se invicem separantur, adeo, ut & stomachus & utraque pars intestini canalem continuum, recta ab ore ad anum procurrentem, & duplici sphinctere intersectum constituent. Denique juxta longitudinem canalisi intestinalis, corpus quoddam vesiculare, utrinque situm, & duodenis vesiculis constans videbis. Illæ igitur vesiculæ in hirudinibus vel aqua conservatis, vel recenter captis, plenæ sunt aqua, sanguine autem, postquam sanguinem exfluxere hirudines; nec constat, quibus vasibus vesiculas sanguis ingrediatur & exeat.

Vir Cel. *Lemery* & hirudines, & reptilium reliqua ossibus carentia, hermaphroditas esse docet. Præter hirudines nostrates, aqua dulci viventes, aliæ maribus detentæ, nec Medicinæ utilitati venientes, occurrunt. Priorum varias, colore, figura & crassitie differentes videbis. Omnium maximas, *equi hirudines* dicunt, ac novem ex illis integro vel equi sanguine exsugendo, itaque enecando equo sufficere volunt. Quævis cæterum hirudines, plures per menses, vel nutrimento carentes, in aqua dulci vel pluviali, vel fluminis, vel paludis, vitam conservare possunt; at sola aqua viventes, multum ex alacritate sua amittunt. Male se habent, ubi terra omni carent, vel ideo quia quadam ejus portione nutriuntur, vel quia muco suo exsudante, magis commode terra mundari possunt. Stupore autem & merito quidem adficimur, dum hirudines in frustra dissectas, per plures hebdomades & menses vitam traducere, nec quidquam ex alacritate sua amittere, nec rescissarum partium motus cessare videmus. Hirudo igitur pellem & carnem animalis seu hominis, exsugendi sanguinis ergo, perforatura, caudæ innitur, ventrem elevatum tenet ac suspensum, & oris sui foramen triangulare, triplicis cuspidis receptaculum, tam alte infigit, ut vel maxima vi ægre possit avelli. Nimia tamen violentia rescissa, cuspides suas carni infixas relinquit; exinde inflammationes cum suppuratione, quarum causam in qualitate animalis venenosa, injusto tamen, quærunt. Vulnus cæterum si membro in aqua detento infligunt, minus acutum est, minoresque causatur dolores, quam si membrum extra aquam degens fauciatur; vix enim sub aqua tantum doloris percipies, quantum ex pulicis morfu proficiscitur, quamvis copiosior effluat sanguis, nec vasa ampliora pateant. Nec, ut quidam volunt, arterias in primis petunt, purissimo sanguine inhiantes, sed seu fame exstimulentur, sin minus, quævis vasa sanguinea feriunt. Sanguis quoque ab ictu hirudinis elicited, sæpe sex imo quatuor & viginti per horas subsequentes profluit, præsertim dum tepida stagni, fossæ aut paludis aqua, pedes incaluerint. Hinc quosdam in foveas hirudinum plenas, noctu prolapsos, vitam cum sanguine omni amisisse constat. Hirudo sanguine plena tres drachmas, & quod excurrit, pondere explebit, quæ antea scrupulum unum, vel semidrachmam suo pondere exæquabat. *Dillenius* est, qui refert: hirudinem in frustra dissectam, aqua dum detinetur, moveri, & vulnera ejus coire seu consolidari; partes quoque caudam spectantes citius emori & vel quinque post hebdomades putredine corripri; quum illæ, quæ capiti accedunt, quinque per menses ad minimum vitam, si dicere fas est, & motus suos conservant. Idem Vir Cel. hirudines amphibiiis potius, quam aquatilibus adnumerandas censet, quippe quæ vel extra aquam constitutæ satis longam vivunt vitam.

Sal hirudini cedit veneno, illo enim conspersa, semihoræ spatio inter motus convulsivos enecatur. Naturæ ejus contraria sunt: spiritus cornu cervi, cinis communis, spiritus oleumque Vitrioli, oleum tartari per deliquium, & piper, & quivis liquores acidi. Plurimum denique piscium infidiis premitur, volucrum prædæ venit, hostes enim habet, anguillas, murænas, murænas fluviatiles, hirudines maris, aliaque fluminum seu paludum volatilia.

Nomen *hirudinis* latinum ab *hærendo* venit, siquidem corporibus animantium inhæret; *Sanguisuga* dicitur, quia sanguinem fugit; hinc quoque Galilis: *Sangſue*, & quasi: *Succe-sang* audit.

Dubio procul ab hirudinibus edocti antiquiores, sanguinis emittendinecessitatem cognoverunt, & artem didicerunt. Equis enim est, quem fugit, equos progerminantem veris herbam depascendi desiderio, jam paludes jam fluviis intrare; tum vero hirudines magnæ, quas equinas supra diximus, crura & latera equorum petunt, illis adhærent, ex venis aliquam pertundunt, & sic provocata hemorrhagine abundanti, alacritatem & vigorem pristino majorem equis conciliant. *Themison* primus ex Medicis facti hujus mentionem injicit; *Hippocrates* idem tacet, ut & *Cælius Aurelianus* in epitome sua scriptorum, a Medicis ab *Hippocrate* ad *Themisonem* celebrioribus, conditorum. Qui *Themisonem* sectabantur, illi frequentissimum usum hirudinum instituebant, imo pro elicienda majori sanguinis quantitate, recedentibus hirudinibus cucurbitulas substituebant. *Galienus* medicus hujus ne mentionem quidem injicit; cujus repertoires, ruricolos jure habemus.

Hodie autem, ut omnes norunt, sanguinem corporis exfugendo, Medicinæ usibus inserviunt. Quod quo eo satius procedat, per aliquot dies antecedentes aqua limpida detentæ, evomant atque jejulent, sic enim fame exstimulatæ irruunt in destinatas corporis partes, ac celeriores easdem adgrediuntur. Sanguine exsucto repletæ sponte sua plerumque desistunt, aut quum justo diutius apertæ venæ adhærerent, salem communem contritum illis inspergito, hoc enim irritatæ & convulsionibus correptæ remittunt.

Finis vero Medicinæ hirudines adhibentis hic est, ut sanguis in parte quadam, vel vicinia ejus nimium accumulatus atque congestus diminuat, fluxus ejusdem in aliam partem deflectatur, & congestionem illius obviam eatur. Quæ quum ita sint, eximio medio cedunt pro hemorrhoidibus inflatis atque turgentibus, vasa ista sanguine spisso eadem exuberante, exonerando, dum hemorrhoidibus ipsis applicentur; dum fronti, pro hemicraniis obstinationibus; dum gingivis, pro acutioribus dentium doloribus, catarrhi effectibus; immo & orificio matricis interno, pro evocando mēstruorum suppressorum vel diminutorum profluvio. De quibus ea conferantur, quæ in *Ephem. Germ. Dec. 2. Anni 4. pag. 51. a Samuele Ledelio, D.* perscripta & observata leguntur. Addit *Cel. Langelot, D. ibid. Dec. 1. Anni VI. & VII. pag. 19.*, quod duos cognoverit ipse, atrocissimis doloribus capitis laborantes, qui tandem, adhibitis in vanum omnibus, cruciatibus extemplo liberati fuere, dum arteriis temporalibus hirudines applicarentur. Quorum alter quum paullo post adeo violenti linguæ catarrho corripere, ut linguæ tumescentis ergo, tantum non suffocaretur; & ille applicando hirudines linguæ, hanc suæ integritati restituerit. Quid ergo plura?

plura? satis jam constat de utilitate hirudinum. Varia interim circa illarum usum veniunt observanda. Et primo quidem sollicite discernenda ac feligenda sunt, quædam scilicet species illarum venenosæ habentur, dum morsus earum excipit inflammatio fistulæ, gangræna, similia. Seligantur itaque minores, & capite exili, & dorso viridibus flavidisque radiis notato, & ventre rubicundo instructæ, & in aquis limpidis ac prono alveo profluentibus captæ. Cautione opus est etiam eas applicanti, qui quum pro more digitis intermediis contineat, caveat necesse est, ne lubricitatis suæ ergo, digitos erumpendo, vel anum, vel œsophagum ingrediantur, dum vel hemorrhoidibus, vel linguæ atque gingivis applicantur. Consultius foret si tubulo ligneo seu ex canna confecto, & utrinque aperto, includerentur. Sæpius enim rectum intrando, funestissimæ evaserunt. Alii quoque quibusdam casu deglutitis, vehementius excruciatii fuerunt; nec nisi vomendo rejectis, salutem recuperavere; illæ etenim venis stomachi adhærendo, & morsu suo continuo istum irritando, cardialgiam producant. Quod si forsan contigerit, Vir. Celeber. *Lemery* in *lexico pharmacopœorum simplicium*, vult ut statim aquæ falsæ copiam hauriat ægrotans, quum sale hirudines irritari & desistere compertum sit, post autem mercurio dulci, vel alio præparato Mercuriali, sese expurget. Et hanc quidem medendi rationem nos quoque comprobamus. Aliam exponit *Cel. Zovinger*, D. in *Ephem. Germ. Centur. VII. & VIII. pag. 59*. Is enim cuidam, qui in itinere, aquam hirudinibus minimis plenam ex palude hauserat, primo hematicum præbuit, cujus ope ægrotans magnam hirudinum valde excrementorum (erant enim menses, ex quo tempore illas inter atrocissimos dolores, stomacho continebat) quantitatem evomuit; post decoctionis vulnerariæ usum diutiorem substituit, & secedentibus doloribus quibusvis, abdomen rediit ægrotanti. Varia habemus, quæ eadem loquuntur, & hinc est, quod cautum te esse jubeamus L. B., in haurienda camporum aqua, quæ variis plerumque scatet infectis. Sic mulierem novimus, quæ magno æstatis calore dum herbas colligeret, siti exstimulata, aquam ex palude hauserat. Aliquot diebus exinde peractis, summis corripiebatur doloribus, & exeunte tandem mense una cum excrementis, multas taniæ partes ejicere coepit; jam viginti anni præterierunt, illa autem dum taniæ frustula ejicere pergit, nec tot mediis haustis, taniæ reliqua extirpari posse obtigit. Immo canis quidam, & itineris & potus illius socius, per multum tempus & iste taniæ particulas ejecit; ex quo patet, morbi in utroque eandem fuisse originem, aquam scilicet vermiculis illis seu spermate eorundem, stomachi calore exclusis ac excrecentibus, plenam.

Quod si igitur casu quodam funesto hemorrhoidibus applicatæ hirudines in anum penetraverint; statim clysteribus falsis succurrito, & ad penetriorem earum expulsionem usque pergito. Notatum denique volumus, quod vel receptis, quæ adplicatæ fuerant, sanguifugis, provocati sanguinis profluvium, per tempus quoddam continuare soleat. Jam si sanguis iste linthea tela excipiat, illam totam invadit, & justo copiosior videtur. Exinde sæpius terror infirmi, adstantiumque timor, ne abundantiore hemorrhagine ægrotanti vel deliquium, vel mors ipsa superveniat. Panico huic terrori subventurus, vel compressione, vel addito quodam styptico, sanguinem extemplo sistas memento. Ast multo frequentius habes, quod partem

faucia-

sauciata tepida aqua calefacias; dum nempe effluens sanguinis quantitas, nec desiderio nec fini medentis respondet.

L U M B R I C U S .

Lumbricus, seu vermis terrestris. Offic. Lumbricus terrestris. Jonst. 137. Aldrov. 693. Charlet. 59. Mous. 278. Dal. 385. Raii I. Lumbricus terreus. Schrod. 343. Vermes terrestres majores. Merr. 206. Vermes sive lumbrici terreni. Bossch. 415. Lumbrici terrestres. Herm. 53. Lumbricus laevis. Linn. Faun. Svec. 1271. Lumbrici seu vermes terræ, intestina terræ, Vermes sive Lumbricus terris. Nonnull.

Lumbricum dicimus insectum illud repens, pedibus, ossibus, oculis, auribusque carens, quod digitum longitudine, & calami caulem crassitudine explendo, & rotundum, molle, carnosum, annulisque interstinctum, colorem præbet rubicundum, saporem terrestrem, ac nullum prorsus odorem.

Franciscus Redi, Vir & in observando adcuratissimus, & in dijudicando acutissimus, varias lumbricorum species esse docet. Alios scilicet zonam eminentem, ac fellæ equi absque arcu simillimam, in dorso, juxta caput exhibentes; alios eadem zona carentes; imo & illorum alios rotunditate continua gaudentes; alios vero cauda depressa, lata, & in olivarum folii figuram exeunte instructos. Eadem differentia & inter posteriores, sive zona carentes, observata. Quos omnes valde agiles ac motu facillimos esse subnectit. Imo quintam addit lumbricorum speciem, illosque torpidiores, crassissimos, zona dorsi carentes, nec cauda in olivarum folium exeunte instructos dicit. Hi ultra cubiti unius longitudinem aliquoties extenduntur, alii caudam reliquis crassiore exhibent. Alii molis exiguitatem conservant, alii autem excrescendo digiti auricularis crassitudinem adtingunt. Pellis colorem exteriorum varium esse constat, pro varietate terræ, qua vivunt & nutriuntur.

Jure suo Cel. Willis in Tractatu de animabus brutorum, quam vilis, inquit, lumbricus videatur & contemnendus; omnibus tamen organis instructus est necessariis. Mirabili quodam artificio & articulationes & intestina ejus constructa sunt. Et totum ejus corpus merito diceres catenam musculorum annularium, quorum fibræ circulares contractæ singulos annulos antea dilatatos & ampliores, strictiores reddant & longiores. Lumbrici repentis motum intelleturus, cogites tibi filum extensum, cujus alteram extremitatem dum remiseris, altera, quam manus tenes relaxatam adtrahit. Idem est lumbrici repentis motus. Is enim jam extenditur, jam contrahitur mediantibus partis anterioris eminentiis, quæ totidem aduncos sive pedunculos referunt; pars autem ejus posterior desistens puncto cui adhæserat, anteriori admovetur, lumbricus corripitur.

Annulorum singuli etiam pilis exiguis, iisque hirsutis ac cuspidatis, tanquam uncis muniti sunt, eosque corpus quoddam arrepturus vel corpori admoturus, pro lubitu aperit. Annulis interjacentia foraminula varia observavimus, quæ liquor glutinosus sub pelle ejus detentus, nonnunquam egreditur. Hic corpori suo, quo facilius terram penetrare possit, humectando lævigandoque venit. His omnibus adjutus facilis, alacer atque securus

curus terram ingreditur atque transcendit; cui hæc, quæ alia animalium tegunt, ut pili, pennæ, testæ, similia, obstarent.

Si structuram lumbrici internam disquisiveris; canalem intestinorum duplici, eaque varia ratione constructum videbis. Lumbrici enim torpidiores & crassiores, triplici stomacho, primo quidem intuitu, gaudere videntur. Nec tamen sunt, nisi tres tunicæ, vel zonæ profilientes longæ atque rotundæ, œsophagum cingendo extra corroborantes, extensionibus tendinosæ pectori & dorso adhærentes, & œsophagum ipsum vel constringentes vel dilatantes, prout animalis commodum fert seu desiderium. In reliquis vero lumbricis omnibus statim œsophagum longum, & membrana concava terminatum videbis. Membrana autem non est nisi stomachus, cordis forma indutus, ac parietibus durioribus crassioribusque gaudens quam tunicæ sunt intestini & œsophagi. Intestinum vero ex stomacho proficiscens, rectum procedit, & undecumque musculis circularibus adhæret. His igitur constrictum, rugosum videtur ac in cellulas distinctum; & in extrema tandem cuspide caudæ desinit. Quo quidem differt a vermibus animalium corpora inhabitantibus; his scilicet quod est intestinum, extra ventrem desinit, paullo antequam caudæ apicem adtigerit. Intestinum præter ea lumbrici terra subtilissima, & vix sub tactum cadente, solo eorum nutrimento, repletissimum invenies, nunquam enim ille vel radicibus, vel herbis, vel aliis terræ fructibus vescitur. Quod si igitur intestinum ab ano usque ad stomachum dissectum, ab omni terra diligens mundaveris: in cavitate illius alium videbis canalem, integram fere ejus longitudinem percurrentem, & iv. transversis digitis ante ani aperturam, desinentem; imo tunica primi intestini perforata, illam inter & dorsum animalis, anum versus, procurrentem. Ast superior ejus extremitas, postquam stomachum tetigerit, tunicam transit, & decresciente diametro, recta pergit ad caput. Nec tamen omnibus lumbricis pari ratione conformatum est intestinum, de quo agitur; etenim hi, qui cauda gaudent in folium olivæ exeunte, intestini crassitudinem ubivis fere eandem, & partem ejus a stomacho usque ad medium, parietibus externis lævibus, reliquam rugis transversalibus subtilissimis distinctam ostendunt; illi autem, qui cauda gaudent rotunda & zona dorsi carent, intestinum prope stomachum crassissimum; tum ad medium usque, per longitudinem striatum; tandem vero striis evanescentibus, valde decrescens diametri exhibent.

Cel. *Villis* est, qui in lumbricis nonnullis xiiij. corpuscula albida ac globosa; utrinque septena; ad longitudinem pectoris, linea recta disposita; lactei liquoris plena; imo præter hæc, octo adhuc alios globulos, cordi viciniore, vicinæ granis majores, & materia repletos observavit lactea, ovulisque rotundis plena. Sæpius materiæ lacteæ nulla insunt ova, sæpius sacculorum unicus saltem vel duo, ovula continent; sæpius etiam (& in primis ab exeunte Martio mense, ad finem Maii) sacculi quivis, vicena, imo quina & vicena includunt ovula, quæ foramina hiantia, in margine ani conspicienda, egrediuntur. Imo Cel. *Redi* ducenta nonnunquam ovula, per cavitatem ventris dispersa, & præsertim caudam versus, circa intestinum numeravit, nec ullum tunc vidit sacculis inhærens. Quos ovulorum loco spuma quædam albida explebat, albumini probe acto, vel saponi macerato simillima. Nec tamen lumbrici omnes sacculis ovorum instructi sunt;

sunt; laudatus enim auctor eos non nisi in his reperit, qui caudam olivarum folii instar definentem habebant. Reliquos omnes & xiiij. corpusculis albidis, & viij. sacculis ovorum carentes vidit; attamen pauca alia corpuscula albida circa cor & œsophagum, materiæ lacteæ plena, ast ovulis destituta observavit. Et in primis in lumbricis torpidioribus, quorum cauda tota interne, variis interstincta est canaliculis transparentibus, & aqua limpidissima plenis. Ipsos tandem ovorum sacculos pluries ambit circumvolutus canalis sanguine plenus, primo intuitu varicosus, maculis frequentibus confusus, & totam intestini (cui usque ad caudam adhæret) longitudinem percurrrens.

Jam ante Cel. Redi, ex quo hucusque hausimus, Cel. Willis, de anatomia lumbricorum doctissime scripserat, illosque animalibus sanguineis frigidis adnumerat. Audiamus ergo & illum.

Lumbrico, ait, supra oris foramen proboscis quædam est, cujus ope terram perforat elevatque. Cerebrum ejus exiguum & albidum aquæ bullulam refert. Hoc excipit œsophagus cum suis musculis, recte procedens ad ventriculum. Oesophago vicinum est cor palpitans, ac ut in perfectissimo quovis, motu systoles & diastoles alternante agitatum. Ex utroque cordis latere constituta sunt corpuscula albida, parum sphærica, & in tres lobos divisa, quorum bini superiores minores, albidioresque, inferior autem duplo major, & tomaculi forma, oblongus est. Corporibus albidis intermedii & parum posteriores alii conspiciuntur globuli, tanquam ex carunculis albidis, flavidis, & duplici ordine, jam quaternis, jam quinis, jam pluribus, dispositis, conflati. Per media hæc corpora transeunt sanguinis vasa notabiliora, imo & in his, ut in cordis vicinitate, sanguinis circulantis pulsus observare licet. Quibus in partibus quum nullam prorsus cavitationem detexerim, sic ille pergit, diutius de officio usuque earum dubitavi. Accidit, ut globulorum aliqui aperti & digitis compressi, lacteum quendam humorem ederent. Quo inductus vasa spermatica illos habui, eo potius, quum variæ sint conformationis, in variis. Constat enim vermes coituros, haud reliquorum animalium instar, directe, caudam versus, conjungi; sed prope ad caput. Perrexerunt igitur experimenta instituendo, & probabilitati certitudo tandem successit. Vermem scilicet fœcundatam casu dissecans, corpora albida pluribus ovulis expleta, & his appositas duas vidi mammillas, ejusdem coloris, & pluribus foraminulis perforatas; has pro genitalibus habui. His inferior situs est ventriculus amplissimus & in tres regiones divisus, ex quarum ultima egreditur intestinum, recta ad caudam pergens, & interstitiis musculorum annularium ubicumque ita compressum, ut in varias cellulas, more coli perfectissimorum, distinctum videatur. Dissecta ad longitudinem intestinum, remove excrementa, & in fundo ejus vasculum flavidum, a cauda ad ventriculum proficiscens, & juxta parietes stomachi usque ad caput procurrendo, ventriculo insertum videbis. Vasculum illud tubum esse cognovimus, aere etenim inflato amplissimam exhibet cavitationem; imo quum analogus sit vasculis illis, quæ ex observatione Malpighii, super ventriculum ac intestina insectorum extenduntur: inferre liceat, quod hepatis mesenterique officio fungatur. Nonnunquam vero ex utroque intestini latere caudam versus, plura in lumbricis ova reperi, brevibus excludenda, quæ ex partibus genitalibus eo devoluta videbantur, & median-

mediantibus ductibus in anum sese egerentibus, ex corpore egrediebantur. En quæ in lumbrico dissecto & supino observabis; qui quum pronus examini subjiçitur, foraminula quædam, in dorso, juxta marginem annuli cujusvis a capite fere ad caudam usque reperies. Aerem foraminulis immitte, & partes iisdem inferiores statim turgescunt, & intestini excrementa in motum concitata jam adscendent, jam descendunt. Comprime foraminula, & elicietur humor albidus, viscosus, interdum lacteus, quem mucum irrigandis & ab aere defendendis cavitatibus destinatum habemus. Foraminula hæc, dubio procul totidem sunt tracheæ, in lumbricis, ut in reliquis insectis exsanguibus, pulmonum loco fungentes, & frequentissimæ corpori toto intersparsæ, quo inspirationi expirationique inserviant. Objicis: minima autem respiratio sufficit lumbricis; hos enim vel tres per menses integros, terra, in qua delitescunt, obtegi, & tamen vitam conservare videmus; nec, insectorum exsanguium more, dum oleo adfrictæ trachearum foraminula obturantur, extemplo moriuntur; quidquod vel in oleum projecti, diutius vitam conservant, quam admissi, vel parciore calore statim amittunt. Idem in piscibus, & præsertim testaceis crustaceisque observabis; qui aquæ aerisve absentiam potius, quam ignis & caloris præsentiam perferre possunt.

En, quo omnia redeunt, quæ circa internam æque ac externam lumbricorum structuram, Phisicus uterque Cel. perscripta reliquit; quæque nobis & satis curiosa, & digna videntur adtentione eorum, qui eadem vel examini subjiçere, vel repetito experimento ipsimet experiri voluerint.

Lumbrici sunt hermaphroditæ; & observante Cel. *Linnaco*, in superficie terræ, per monile suum coeunt. Coitus ergo terram egressuri, passim suffodiunt, colliculosque, noxæ hortorum ambulacris producunt. Talpæ autem lumbricis nutriuntur, quarum timore, terram, vel levissimo pede proculcatam extemplo egrediuntur. Quo quidem artificio a piscatoribus eliciuntur, quibus pro esca piscium cedunt. Coitus eorum rationem jam *Aldrovandus* observaverat, & experientia edoceberis, quod circa mediam partem corporis tunc turgescientis sibi invicem cohæreant adeo, ut contundi potius, quam divelli possint. Per hyemem terra latent, vere autem, æstate atque autumnò acervatim progrediuntur, in primis pluvioso tempore, seu nocte roris abundante; etenim non nisi uliginosis pinguibusque terris delectantur; ast aridas viasque stratas fugiunt. Quos si ex terra elicere cupis, decoctionem fortem foliorum cannabis, seu corticis viridis nucium eidem suprafundas. Lixivia ac quavis aqua amara enecantur. Prædæ veniunt piscibus, avibus, lacertis, salamandræ, aliis. Et teste Cel. *Anderson* in *historia Islandiæ naturali*, agri sæpius ibi lumbricis obtekti videntur; qui quum pluvia sese irrigaturi terram aridam egrediantur, a plebe tamen una cum pluvia delapsi creduntur.

Gallicum lumbrici nomen, quo *Ver*, sive *Verm* de terre audit, ex Latino: Vermis; *Lombric* ex Lumbrico; *Achè* autem forsan ex Græcorum: *Achen* seu *Achès* pauper, nudus, inops, derivetur; quid enim pauperius lumbrico? quid magis nudum? Pro *Achè* Galli dicunt & *Achè*; oleum enim Pharmacopolarum de *Blois*, Galliæ urbis, *Huile d' Achè*, oleum lumbricorum vocatur.

Analysi lumbricorum chymica, multum olei & salis volatilis elicitur.

Hos

Hos ore receptos, Ars Medica dicit, aperiendi, diuretica, & sudorifera virtute gaudere; quamobrem pulveris eorum ℥j. ad ℥s. in bolis & jusculis, contra obstructions & icterum præscribit. Pulverem hunc præparaturus accipe lumbricorum maximos, vivacissimos; optimeque nutritos; immitte illos vasi argillaceo, quo terram evomant; quo facto aqua eosdem lava; iterum ut evomant vasi committe, denuo lava; totiesque repete, usque dum nullam amplius terram evomant. Tum vino candido q. s. immisos per xxiii. horas macera; post vel solis modico calore, vel furni igne parciore, sensim exsicca, reduc in pulverem, & serva ad usum. Alii sunt, qui pro vermibus stomachi, pulverem vermium illorum commendant, quos sæpius cum excrementis ejiciunt ægrotantes; ejusque ℥s. infantibus cum pulte sua lactea, præberi volunt. Nonnulla experimenta equidem medii hujus utilitati favere videntur; nos tamen alia, virtutis contra vermes indubiæ, anteponimus. Observatum enim est, pulverem ex vermibus per menses adservatum, novis vermibus dedisse originem. Imo, teste *Sigismundo Grassio*, D. in *Ephemerid. Germ. Dec. II. Anni VII.* accidit; ut dum ex lumbricis cucurbitæ immisiss, modico calore, liquorem sui usus ergo, extraxisset; & peracta operatione, fæces vermium in laboratorii angulum reposuisset; temporis intervallo peracto, copiam vermiculorum regenitorum in ipsa cucurbita reperiret. Vides ergo, quam dubium sit medium; nec tutum ejus usum censemus, nisi addideris purgantia, saburram verminosam omnem abripiantia; pulvis etenim nudus si recipiatur, facilis intestinorum rugis inhæret, & accedente loci calore, excludendis denuo vermiculis materiam subministrat, sicque morbum exauget, quem profligare deberet.

Vir *Cel. Redi* est, qui experimentorum circa lumbricos institutorum plurima, ad vermes sive lumbricos intestinorum ob analogiam inter utrosque obviam, adplicari posse; & omnia fere media, quibus occurrere volunt ultimo memoratis, vel inutilia vel noxia esse docet. Multum v. g. contra vermes facere credunt aloen, Corallinam, Theriacam, aliaque gustus inamœni; mel e contrario, saccharum & fructus perniciose esse his, qui vermibus infestantur. Negat *Redi*, nec quidquam magis contrarium dicit vermibus, quam saccharum, mel, fructus. Varia enim experimenta cum lumbricis terrestribus instituta refert, & quæ his contraria reperit, vermibus etiam intestinorum contraria esse concludit. Nobis autem & ille errasse, & consequentia vacillare videtur. Missa enim differentia, quam anatomia constituit inter has vermium species, quæque media eadem diverso modo agere facit: quidni ea, quibus si vermes immiseris, hi non moriuntur, nec excruciantur, vermes stomacho detentos & excruciare valent & enecare? succo enim stomachi vel intestinorum commixta, hoc ipso facile qualitatem vermibus adversantem induere possunt. Nonne vinum lacte mixtum pluribus stomachum movet? qui tamen & lac, & vinum, separata, peramant. Pari ratione etiam aqua portulacæ & alia, quibus immissi vermes haud statim enecantur, mixta fluidis stomachi & intestinorum, noxia evadere possunt vermibus. Imo fluidorum, quæ separata nequaquam sunt contraria vermibus, illorum inquam, commixtione fermentatio excitari potest, quæ sufficiat vermibus enecandis seu propellendis. Oleum calci superfundas & nulla ebullitio, aquam substituas, & violenta exorietur ferment-

fermentatio. Imo plura illorum quæ deglutita ingrediuntur intestina, hæcce variorum motuum capacia reddunt, novorum prorsus & insolitorum. Quidni motuum alii tales esse possunt, qui vermes intestinorum membranis adhærentes avellant, certiusque cruciant quam purgantium quorundam irritamentum, quæ sæpius ex corpore vermium plenissimo, nec unumprofligant, humores saltem & excrementa purgant. Stomachi dissolventia insuper ita agunt in medicamina hausta, ut substantias ex iisdem eliciant, fontibus suis, id est medicamentis prorsus contraria. Aloes solutioni lumbricos immitte, & diutius vitam conservabunt; aquæ eosdem immitte, ac guttulam ex oleo aloes adde, & statim contorsionibus violentissimis correpti, latera binis corporis suis extremitatibus percutient, paullo post enecati fundum petent. Constat experimento veritas, & Cel. *Andry in tractatu de generatione Vermium*, sexcenties illud instituisse testatur. Quæ quum ita sint, mirum non est, quod si quædam aloes portio, aqua soluta, non sufficit ad enecandos sive excruciantes vermes eidem injectos; eadem illa tamen ore recepta & profligare vermes & enecare valeat. Quæ ut clariora evadant, supponas rem verisimillimam, scilicet quod oleum istud, seu alia quædam substantia æquivalens, ope stomachi dissolventium (vi sua vel optimas quasque Chymicæ operationes superantium) ab aloë separentur. Melle autem & saccharo in aqua soluto, ideo vermes perire constat, quia iisdem inebriantur. Quum vero jam mel, jam aliud quoddam acceperis, haud tantum haurire soles quantum pro inebriandis submergendisque vermibus sufficit; modica hac quantitate nutriuntur. Ast dicet quispiam: hauriatur ergo quantitas major. Expediret, si de enecandis & profligandis vermibus tantum dispiciendum foret; sed salutis quoque ratio habenda est, cui illa mellis & sacchari quantitas officeret. En, quæ circa observationes Cel. *Redi* observanda esse duximus. Cæterum quum non solum ex mente ejus, & mercurius crudus, & absynthium, & Semen Contra, efficacissima sint contra vermes media; sed nos etiam in eandem sententiam descendamus: præ aliis hisce mediis utaris, suademus.

Redeamus ad proprietates lumbricorum, de quibus secessimus.

Lumbrici igitur destillatione spiritum & salem volatilem exhibent, utrumque pro unguento contra spasmus, rheuma, aliasque nervorum adfectiones, optimum. Huc pertinent, quæ in *Ephem. Germ. Dec. II. Anni VI. pag. 180.* refert Cel. *Ledelius, D.* Nec tamen quæ argumentum hocce tangunt omnia, exponi possunt atque enumerari; sufficiat indicare fontes, ad quos recurrendum, undeque haurienda sunt illa, quæ forsitan omisimus.

Oleum ex lumbricis inter præstantissima Medicæ artis media locum tenet. Quod præparaturus, accipe lumbricorum, quos habere potes, maximorum libr. j., eosque aqua lavatos olei olivarum optimi libr. j. addito vini candidi cyatho affundas. Fiat infusio per 24. horas, quibus peractis pariori igni admoveatur, & usque ad remanentiam partis dimidiæ ebulliat; tunc expressione percoletur, & oleum ad usum servetur. Est autem ei singularis virtus pro corroborandis nervis atque articulis, contra Rachitin, Paralyzin & Spasmodum; omnesque adfectiones, quæ nervorum debilitati & laxitati originem debent. Etenim vel nudum vel aliis Balsamis nervorum tonum restituentibus, & vulneribus medentibus, admixtum, linimenti calidi instar, læsæ parti adplicandum venit. Virtutem vero olei abun-

abundantiæ salis volatilis tribuas, quam lumbrici, præparationis tempore effundunt. Nec non interne, dosi xij. ad xv. guttarum, bis quotidie portiones, contra vulnera, adustiones, rupturas, & contusiones vehementiores, ingrediatur; anodynæ enim suæ virtutis ope brevi lenit dolores, & salutem integram adfert. Sunt, qui nascenti gangrænæ sequens cataplasma mederi docent:

℞. pugillum lumbricorum, eosque lava & in mortario contunde. Post q. v. lintæ telæ superponas, eamque patinæ argillacæ, cui prunæ subdantur, supersternas; lumbricos ipsos dimidio cyatho aquæ vitæ irrigando. Hoc unguentum parti læsæ adplicetur, adplicatum restet per 24. horas; his effluxis denuo renovetur, quousque omne tandem malum secesserit.

Contra paronychiam accipe lumbricum, binas ejus extremitates filo circumda, ægrotantis digito obvolve, nodo stringe, & lintei subtilioris fasciæ tege, sic brevi paronychia sanabitur.

Lumbricos & *Vefferianum* pulverem contra Spasmodum, & Emplastrum *Ranisianum*; oleum eorum autem emplastrum *Diabotinum*, Officinæ Parisiensis ingrediuntur.

℞. Olei Lumbricorum terrestr. ℥iij.

Spiritus Vini camphor. ℥j.

Olei Therebyntin. ℥s.

Spirit. Sal. Ammoniac. ℥j.

M. & fiat linimentum contra paralyfin, & nervorum debilitatem.

℞. Medullæ Bovinæ

Urinæ hominis sani

Vini rubri. ana ℥ij.

Parciori igne ebulliant, ad consumptionem omnis fere humiditatis. Tum colentur, & ferventi adhuc mixturæ addantur

Olei Lumbricor. ℥s.

Spermatis Ceti recentis ℥ij.

Olei nucis myristicæ ℥j.

M. & habebis linimentum contra Rachitim, quo spinam dorsi, juxta longitudinem adfricabis.

℞. Conservæ Cynorrhod. ℥j.

Rhoob. Sambuci ℥vj.

Seminis Ebuli ℥is.

Pulveris lumbric. præpar.

Tartar. Vitriol. ana ℥j.

M. & cum f. q. Syrupi Capil. Vener. f. opiatum; cujus quantitatem nucis magnitudini respondentem, ter in die, contra hydropem & urinæ retentionem sumito.

℞. Pulver. Lumbric.

Seminis Ebuli ana ℥ij.

Arcani Duplicat. ℥j.

Salis Ammonis ℥s.

M. & fiat pulvis incidens & diureticus, contra obstructions hydropem minantes, ejusque ℥j. pro dosi, ter quavis die repetenda, accipiatur.

R̄. Lumbric. terrestr. præpar.

Oculor. Cancrī præpar. ana ʒj.

Nitri purific.

Succini præpar. ana ʒs.

Cinnabar. antimon. ʒj.

M. & fiat pulvis tonicus & temperans, contra tremores & convulsiones, cujus gran. xvij., bis terve per diem hauriuntor.

M Y T U L U S.

Mytulus. Offic. Schonev. 54. Bellon. 397. Gesn. 277. Rondel. 118. Dal. 398. *Mytulus Rondeletii*, Aldrov. 512. *Mytuli*. Merr. 193. *Mytulus*. Bon. 102. *Mytulus marinus vulgaris edulis*, Petiv. 84. *Musculus ex cœruleo niger*, List. 182. *Concha soleniformis lævis*. Lang. 24. *Concha testa oblonga, lævi, subviolacea*. Linn. Faun. Svec. 1333. *Musculus subcœruleus fere virgatus*, *Concha Mytulus dicta*, *Deltoides*. Quorumd.

Mytulus est pisciculus quidam notissimus, oblongus, fabam magnitudine, musculum minorem figura referens, (unde nomen ipsi venit) tener, albidus, margine fimbriato ornatus, aquæ maris immorans, palato jucundissimus, & testa bivalvi reconditus. Hæc autem tenuissima est, & extra convexa, ac cœruleo-nigra, intus concava cœruleoque albida, plurimum utrinque lævis, interdum excretionibus hispidis & scabiosis confita, quæ vel a vermibus tubiformibus vel aliis marium insectis illi adhærentibus, procreantur; lineolis sive venis cœruleis transacta, quas transeunte die facilis observabis; $2\frac{1}{2}$. digiti longa, digiti unius lata, parum cuspidata in basi, magis rotunda in parte superiore, ibidem vero ligamento quodam seu claustro, binas valvas connectente, instructa, amplissima & rhomboidalis figuræ.

Docet Vir Cel. de Reaumur, in scripto suo, de motu progressivo concharum, quod mytuli facultate sese movendi gaudeant, licet plerumque vel rupibus adhæreant, vel fibris alii aliis nexi contineantur. Cujus rei in testimonium, adfert sequentia: Illo anni tempore, quo moderatior jam soliscalor ulterius non sufficit sali ex paludorum aqua stagnante excoquendo; piscatorum usui venit, ut iisdem illis paludibus mytulos, maris in ora captos, immittant, existimando, quod aqua minus salsa nutriti, delicatorem induant carnem. Pluviæ enim aqua, excepta hisce paludibus (ab omni communicatione cum mari rescissis) dum falsæ, quam mytuli continent, admiscetur, multum ex falsedini sua amittit, & dulcior redditur. Pari autem artificio viridem colorem ostrearum carni induci supra ostendimus. Jam mytuli a piscatoribus sparsim ac spatio inter se distantes paludibus injiciuntur, post autem cumulatim inter se cohærentes reperiuntur. Ast aqua stagnanti nec fluxu agitata detinentur; hinc absque motu quodam proprio coire ac cohærere nequeunt. Quæ igitur pars corporis motui huic producendo inservit? Aperias mytuli testam illa ex parte, quam sua sponte interdum aperit, & partem corporis aliquam nigram seu fuscam, basi in medio partium reliquarum, ast cuspidè summitatem testæ respiciente, 6. ad 7. linearum insuper longam videbis. Linguam animalis tibi co-

gites,

gites, & habebis imaginem ejus. Dicas illam crus vel pedem mytuli, ejus enim ope repit potius, quam progreditur. Jam mytulus dum suo se loco movere cupit, testam subaperit, pedis istius extremitas in margine testæ adparet, pedem mytulus ulterius protendit ita, ut aliquoties $1\frac{1}{2}$. digitorum longitudinem referat; tunc ejus ope terram dextrorsum & sinistrorsum tangit; post pedis carnosum, flexuque facilis extremitate corpus quoddam arripit eidemque quomodocumque adhæret; tandem vero pedem recipit, & primam ipsi longitudinem denuo reconciliando, nec a corpore arrepto desistendo, huic testam ac se ipsum admovet. Qui quidem motus simillimus est motui hominis, humi proni, qui brachii solius ope loco cuidam accedere contendit. Hunc videbis brachio, quam longissime potest extenso, corpus manu arripere remotissimum, contracto deinceps brachio, corpus ut brachio accedat adigere, sicque modo mytulorum de loco in locum sese movere. Et hujus quidem similitudinis ergo, huicce mytuli parti, brachii nomen tribuimus, extremitas enim illius subit manus officium; mytulus tamen brachium contrahit, homo autem suum incurvando contrahere videtur. Parcissime tamen hac sua se movendi facultate utuntur mytuli, plurimum scilicet vel inter se cohærent, vel quorundam filorum ope aliis corporibus junguntur; filis denique ruptis brachii sui usum faciunt.

Sic & Cel. *Poupart*, ejusdem Academiae Sodalis observaverat: mytulos fluminum planæ parti suarum testarum superjacentes, aliquod sui brachium seu crus exserere; & ope illius arenam suppositam excavare, sicque sensim in alteram partem sese dimittere, usque dum acutiori testæ parti innitantur; post brachium suum, quantum fieri potest protendere, & extremitati ejus innixos, per medium quasi sulcum arenæ impressum sese promoverè, ita ut utrinque recta detineatur testa.

Naturam ex quacumque parte spectaveris, mirandam esse videbis. Nec enim cujusvis adtentionem effugisse credimus crus illud seu brachium, in mytulo subaperto; illudque in mytulo maximo 5. ad 6. linearum longum, $2\frac{1}{2}$. vero latum. Hujus autem ex radice innumera fila exsurgunt, quæ corporibus vicinis infixæ, ut vel moveri possit concha vel abripi, impediunt. Singula filorum capilli fortioris seu setæ porcinae crassitudinem exæquant; & digiti unius sive duplicis longa, extremitate sua jam lapides, jam testarum fragmenta, plerumque aliorum mytulorum testas amplectuntur. Unde tanti plerumque mytuli cumulatim cohærentes reperiuntur. Tantum vero inter se distant fila prædicta, quantum fieri potest per longitudinem numerumque illorum. Et alia quidem testæ ex summitate, alia ex basi, alia ex dextera, alia ex sinistra, brevibus, ex quacumque mytuli parte progredientia fila circumpositis corporibus adhærent; imo Cel. *de Reaumur* 150. sæpius pro uno mytulo numeravit, quorum ope, ut totidem funibus nauticis, mytulus, ac navis, jactis ancoris detinetur. Quæres: quonam artificio hisce suis filiis sese adhæret mytulus? quanam ratione extremitates illorum infigunt atque adglutinant? vel potius, quum extremitas hæc fortior crassiorque sit parte reliqua, nonne hæc manus, illa brachium quasi videtur?

Concha sua subaperta mytulus hanc sui partem (quam linguæ supra æquiparavimus) exserit, sensim extendit, post contrahit, & altera jam

productione jam corréptione, 2. digitorum longitudinem interdum ei conciliat. Hac igitur operatione sua multoties repetita, jam remotioribus jam propinquioribus locis sese adhærere potest, prout vel propinquius vel remotius linguæ extremitatem contulerit ac collocaverit. Ex quo patet, quod non solum terra contineat nentia, bombycem, araneam, erucam, sed mare etiam, nempe mytulum. Imo eandem corporis sui partem ad varia obeunda paratam; jam cruris vel brachii ad incedendum, jam coli officio ad producenda fila fungi, adparet. Quatuor sunt ligamenta musculosa præcipua, quorum ope ex parte quavis movetur. Quiescentis autem coli cuspis, apicem testæ respicit, extremitas animalis ori vicina est. Ab origine usque ad cuspidem, rima satis profunda, ad longum in binas partes æquales dividitur. Rima autem ipsa est quidam canalis, quem materia filorum transit, & in quo efformantur. Et tubi, a colo efficti orificium $\frac{1}{2}$ lineæ latum, medium vero tendini rotunda, seu filo quodam homogeneo, ast crassiore, instructum est; illoque si mytulos maximos respicias, pro crassitudine, filo serico quo consuimus, pro longitudine autem jam uni digito, æquiparando, jam vel una cum reliquis filis subapertam mytuli testam egrediente. Huic igitur tendini seu filo fortiori & quidem toti, adhærentes videre licet extremitates filorum omnium, quæ affigendo seu retinendo mytulo inservire diximus, ita fere, ut in fune navis majori plures terminantur minores. Tubulus enim ex quo proficiscitur, exiguus, impar foret capiendis tot filis, quot in mytulo majori invenies. Idem ille tubus pluribus variis cingitur corpusculis glandulosis, liquorem lubricum, compositioni filorum destinatum percolantibus. Magna autem est mytulo (ut aquatilibus omnibus esse solet) liquoris hujus copia; & si digitum colo leniter admotum retrahas, innumera eidem adhærentia fila percipies, ut in erucis, bombycibus atque araneis. Quamvis autem ars fila nendi communis sit mytulo cum aliis, singuli tamen suo modo, & peculiari quodam artificio in conficiendis illis procedunt. Bombyx enim eruca & aranea, fila protrahunt ex corpore ad lubitum longa, eademque quasi laminam perforatam transire cogunt, ut artifices, quos auri atque argenti fila nentes, Gallico vocabulo: *Tireurs d' Or*, nuncupant; mytuli autem illos imitantur, qui metalla liquefacta formis infundendo quælibet effingunt; memoratus enim tubulus mytulo pro forma venit, in qua & figura & longitudo determinata filo inducitur.

Consulas: Collectionem dissertationum prælectarum in Regia A. A. L. L. Academia quæ Rupellæ est; & alia inter reperies scriptum cui titulus: *Mémoire sur les Bouchots à Moules*, de M. Mercier. Sunt autem *bouchots*, palii quidam congesti ac perticis intertexti, qui quasi cratem fortissimam constituendo undarum vi ac fluctuum resistere valent. His igitur mytuli copiosissimi adhærent, sperma suum deposituri. Profert autem Vir Cel. & observationes & argumenta, lectu dignissima, iisque non solum motum mytulorum progressivum pernegat, sed etiam, byssum sive fila, quorum ope corporibus vicinis cohærent, neutiquam nendo ab illis perfici, sed potius ut essentia suæ partes, uno cum mytulo crescere ac produci, contendit. Ast nostrum non est, adeo diversas sententias dijudicare; judicet Lector, doctrina & integritate instructus.

Mentionem faciunt *Plinius* & *Aristoteles* conchæ cujusdam, Latinis: *Pinna*

marina dictæ, quam, mytuli instar pluribus filis, in corpora vicina collocatis, fixam in situ suo detineri docent.

Concha animalis hujus æque ac mytuli binis aut multo majoribus partibus constat, pinnae marinae etenim, Provinciae in oris obviae, fere integrum pedem longitudine sua adtingunt; & quæ Italiae in oris reperiuntur, vel binos superant. Magis tamen subtilitate & quantitate filorum, quam molis magnitudine a mytulis differunt. *Rondelet* enim pinnarum fila, linteo subtilissimo, & comparatione pergente, mytulorum fila stupæ equiparat; imo ne hoc quidem satis dictum videtur, siquidem fila pinnarum haud multum inferiora sunt filis sericis, quæ nentur a bombyce. Quicquod mytulorum fila nonne vario adhibentur? Pulchrioris byssi speciem apud antiquos ex illis concinnatam fuisse refert idem *Cel. Rondelet*. Certum quoque novimus, quod vel hodie, Panormi, quæ Siciliae urbs est, panni serici ex filis hisce contexantur. Quæ quum sint tenuissima, singula quidem parciore, aut tam copiosa, sufficiente virtute ad retinendam pinnam marinam pollent. Pinnam marinam igitur bombyci maris equipares, aut mytulos erucis aquaticis. In utroque autem jam unum, jam duos, jam tres canculos exiguos videbis; id quod sinistrae huic opinioni ansam dedisse censemus; quo statuunt: pinnam maris pisciculis nutriri, quorum aliquem dum cancer suus, *Pinophylax*, seu *pinnae custos* dictus, testam intrasse observaverit, illum, ut testam claudat pinna, eandem admonere, post autem prædam communis inter utrumque juris evadere.

Restant adhuc alia circa mytulum observanda. Sic zonam quandam videbis, marginem testæ interioris obvolvuntem, & materia quasi cornea constantem, & corpus animalis cingendo adglutinatam. Canalis vero excrementis ejiciendis destinatus, in aperturam aquæ respirationi inservientem egeritur; excrementa ipsa terræ seu argillæ speciem exhibent, & rimam ad longitudinem productam, ita ut tubi concavi segmenta videantur. Patet ergo aperturam ani, quam transeunt, haud reliquorum more, esse rotundam. Præter claustrum denique occludendæ & recludendæ mytuli testæ veniens, ac apicem illius respiciens, innumeras adhuc alias particulas carnosas, gallorum cristæ instar dentatas, tum demum observabis, quum aquam respirat mytulus,

Magna autem differentia est inter mytulos marinos & fluviatiles seu stagnis inhærentes. De his lectu dignissimum illud *Viri in Anatomicis Cel. Mery* scriptum commendamus. Qui quidem mytulum stagni piscem dicit hermaphroditam & singularem, quippe qui absque coitu ullo multiplicatur; testa ejus, sic Auctor *Cel.* pergit, ope claustri fortissimi aperitur, & contractione duorum musculorum validissimorum occluditur; aquæ piscis hic innatat, admodum rarus in superficie ejus conspicitur, plurimum in cœno maris obrepit, vel immotus quiescit; os ejus binis labris carnosus cingitur; intestinum oris in fundo exortum, cerebrum transit, & quasvis sui circumvolutiones in hepate absolvit; linea recta egreditur, cor intrat, transit, & definit tandem in ano; generationi inserviunt duo ovaria, totidemque vesiculæ spermaticæ; singulis suis est canalis, & quatuor canales hosce transeundo ova mytuli ac sperma anum ingrediuntur, hunc exeundo autem commiscentur; quod quidem pro generatione sufficit. Mytuli ovaria etiam, quod hic loci notandum venit, ova sua non nisi veris tempore

emittunt, nec nisi autumnō, ovis expleantur; hinc hyeme iis plena, æstate autem vacua reperiuntur.

Cor etiam immediate sub dorso testarum pulmonibus superjacens basin suam ano mytuli, apicem vero capiti obvertit, & uno tantum ventriculo atque binis auriculis instructum, venis, arteriis valvulisque caret; & una cum auriculis pericardio aquæ pleno detinetur; & alternis systoles atque diastoles motibus, ut cor testudinis agitur; hoc saltem discrimine, quod in testudine sanguis ex auriculis ad ventriculum cordis, in mytulo autem aqua ex ventriculo ad cordis auriculas deferatur, modo cordis hujus structuræ tribuendo; etenim auriculæ mytuli venis aquam adportantibus carent, atque quæ testudini sunt, illæ venis pro adferendo sanguine gaudent. Pulmonum denique conformatio singularis est mytulo, via scilicet respirationis e diametro opposita conspicitur viæ respirationis piscium reliquorum. Carpio nimirum & lucius ore vel naso, mytulus autem ano aerem ducit, qui anum transeundo pulmones ingreditur; eosque pericardio & genitalibus interjacentes, alterum ex dextra, ex sinistra alterum, & humore nigro tinctos & irrigatos. Jam quum nullus sit canalis mytulo, ab ore ad pulmones productus, ani ope ut respiret necesse est.

Frequentissimus cæterum mytulus marinus (de hoc enim præcipue dictum est) ad oras marium nostrorum invenitur; & quam parvus sit, variorum tamen hostium insidiis premitur. Hunc enim pro esca ad alliciendo piscis, quæritant piscatores. Huic conchula quædam ex genere trochorum, teste Cel. de Reaumur, insidiatur. Trochi autem Latinis, & Gallicis: *Turbes* audiunt, quia testa univalvi, & cochleæ instar spirali, teguntur. Conchula igitur ista mytulo sese adhæret; testam ejus foramine orbiculari, i. e. lineæ diametro perforat; foraminique proboscidem, sive intestinum cylindricum, 6. ad 7. linearum longum, transmittit; idque terebelli instar, in spiralem, circumagendo mytulum exfugit. Imo plura uno sæpius foraminula mytuli in testa sese observasse addit idem Vir Cel., & omnes mytulorum testas vacuas, foraminulis perforatas reperiisse; ex quo infert: conchulam istam multum utique ad extirpandam mytulorum facere copiam.

Nonnullis Brasiliæ in locis, sic referunt, tantæ molis mytuli reperiuntur, ut testa sua pulcherrima subtracta, octo adhuc uncias, pondere, expleant. Lancastræ regionum incolas, mytulos, per plaustra in agros conducere, hosque illis stercore docet *Lister*. Addit *Linnaeus*, quod territorium seu solum *Helsingiæ*, quæ Sveciæ provincia est, maxima ex parte, hisce conchis compositum sit; & quod Sueci esui mytulorum abstineant, Batavia autem & Angli iisdem vescantur.

Nomen mytuli Gallicum: *Moule* vel *Moucle* ex Latino: Musculus, descendere patet. Quæ autem alterius, quo: *Cayen* dicitur, origo? Forsan Italorum: *Caglio*, *Cal*, *Calus*, quod callum denotat; siquidem tot excretiones quasi callosas, in externa atque interna testæ ejus superficie observamus; & quidem interiores adeo læves, ut uniones arte facti videantur; id quod in transcurso dictum sit.

Multum vero olei, phlegmatis & salis volatilis cuiusvis mytulo inest. Maritimus autem præ fluviali & stagnis detento & saluti convenientior, & palato jucundior est, magisque æstimatur. Cæterum mytulorum selectum instituturus illos respice, qui reliquis teneriores, delicatiores & pinguioribus sunt;

sunt; & carnem eorum ventrem laxare scito, ast parum alimenti subministrare, nec nisi illis saltem esse convenientem, qui biliosæ sunt corporis temperaturæ, stomachique robusti. Imo vel his parciolem mytulorum usum commendamus, etenim & digestu sunt difficillimi, & humores suppeditant phlegmaticos atque viscosos; & febrim excitare & alvum conspirare creduntur. Auctore Cel. *Moehring*, *D. testibus Ephem. Germ. Vol. 7. Anni 1744. pag. 115.*, novimus: mytulos variis morbis esse obnoxios, quibus qualitates venenosas, & naturam saluti contrariam induunt. Sic quosdam, ex mytulis pro cibo sumtis, anxietatibus, convulsionibusque correptos fuisse refert, quas quæ excipiebant cutis exanthemata, præsentis veneni signa edere luculentissima. Nec ægrotantibus rediit salus, nisi dum receptis hæmæticis alexipharmaca subnecterent. Cautione igitur maxima opus est circa usum mytulorum, aliorumve testaceorum, præsertim si rigidior præcesserit hyems; hac namque plures ex piscibus vi frigoris enecati aquam suam putredine infectant, qua si mytuli aliique testacei repleantur, qualitatem homini noxiam induunt sæpe numero.

Multiplici ratione mensæ præparari solent mytuli; quarum præstantissimam illam esse dicimus, qua cum butyro recenti, petroselino, cepis, & pane trito, palato destinantur ac adponuntur. Variis etiam jusculis immittuntur, sicque juvenibus, calidi qui sunt & biliosi temperamenti, optime conveniunt. Omnibus autem, qui vel ætatis ergo vel ex debilitate, fegniore stomacho laborant, omnem prorsus mytulorum usum prorsus interdictum esse volumus.

Quid autem Medicinæ usibus ex mytulo? testa; ex illa enim pulverem præpare docet, contra febrim tertianam optimam. R. ergo testarum mytuli q. v., acetum illis affunde; quo per integram noctem macerentur. Subduc postridie lutum, ab aceto illas rodente congestum, tum calcina, reduc in pulverem, serva ad usum; & pro febris dosin ℥ss. cum aqua cardui benedicti seu vino præscribe sub paroxysmi initium. Lenem scilicet sudorem eliciendo interdum febrim depellit. Alias quoque testæ mytuli simpliciter ablutæ, arefactæ & super porphyrite in pulverem redactæ, dosi ℥j. ad ℥ss. ad provocandam urinam, & compescendum alvi profluvium ab hypercatharsi pendens, adhibentur; quum enim pulvis iste absorbendi, & evacuationes leniter adstringendi virtute gaudeat: pulveri testarum ostreæ & cochleæ, ob virtutis convenientiam, commode substituitur. Et qui equorum morbis mederi student, illi, collyrii aridi instar, pulverem huncce oculis equorum inflant, quo facto maculæ & tunicæ in illis obortæ, brevi detergantur, consumuntur.

R. pulveris præpar. conchar. mytuli

Arcani duplicati

Salis genistæ

Oculor. Cancr. præpar. ana ℥ij.

M. & fiat pulvis diureticus, dividendus in vj. partes æquales, biduo consumendas, cum vehiculo unius cyathi infusi herbæ parietariæ.

R. Pulveris conchar. mytuli

Conchar. ostrear.

) præpar.

Salis mirabil. Glauberi

Nitri purificati. ana ℥j.

M. & habebis pulverem temperantem, cuius usus esto in febrî, dosi ʒss. fenis quibusvis horis accipiendum; & cuius dosi guttæ aliquot succi citreæ expressi addendas esse memento.

S E P I A.

Sepia Offic. Salv. 165. Mont. 6. Aldrovand. 44. Charlet. 51. Jonst. 7. Bellon. 336. Rondel. 498. Gesn. 857. Matth. 244. Dal. 392. Lemer. 808. Schrod. 332. Jam. 1480. Herm. 17. Linn. Faun. Svec. 1281. *Loligo-Sepia*. Merr. 191. *Aranea marina*. Nonnull.

Est autem sepia ex genere piscium mollium, qui quamvis carne admodum dura instructi, nec testaceis, nec crustaceis, nec squamas gerentibus adnumerari possunt. Est scilicet piscis quidam maritimus, unius vel duorum pedum longus, interdum & duorum cubitorum, & cute solida quidem sed tenuissima indutus, teter & deformis adspectu, polypo & loligini similis sed latior; & corpus suum extra carnosum, intus vero in dorsi regione squama admodum solida, seu ossæ manus magnitudinem referente, i. digiti alto in media sui parte, subtiliore in marginibus, albido, opaco, levi, continuo, & supra duriusculo, infra autem tenero, spongioso & subaspero, utrinque turgescente, radiis seu venis intertexto, saporem subsalsum sive subacrem nullumque odorem exhibente, plerumque tandem: Os *Sepiæ* dicto, instructum est. Capiti *sepia* adfixos perspicies 8. pedunculos seu brachia, æqualiter inter se distantes, rotundos, ab origine crassiores, deinde crassitudine sensim decrecentes, & in apicem exeuntes, & intus, seu ex parte quæ os respicit, parum convexos, variisque confitos uncis, iisque per series dispositis, mobilibus, & pro arripienda retinendaque præda, & natanti, & alimenta ori admoventi inservientibus, ac ori vicinis. Post binas proboscides, vel brachia prioribus longiora, subtiliora, rotunda, undique lævia, ast in extremitate sua uncis confita videbis iisque uncis brachiorum breviorum magnitudine superantibus, & remotiora objecta pertingentibus, ac jactarum ancorarum instar, ut maris fluctibus agitatam animal abripiatur, impredientibus. Brachiorum materia, materiæ tendinum in terrestribus animalibus simillima, ipsaque brachia prædicta tanta sunt elasticitate, ut, si transversim illa diffecueris, diffectæ partis extremitas, sua sponte conglomeretur, & convexitatem nanciscatur, quæ obstat, quo minus liquor destillare possit aliquis. Extensi brachiorum unci, glandis calycem exacte referunt; & mechanismus actioque illorum non solum ex sua figura pendent, sed quoque ex annulo quodam cartilagineo, exiguis uncis munito, & subtiliore quadam membrana, parum pellucida ad dimidiam sui partem circumdato atque retento, cui quidem membranæ haud sine violentia extrahi potest. Quivis vero uncus, pedunculi tendinosi ope, brachio animalis adhæret; pedunculus iste autem una cum membrana descripta elevatur, & unci pro actione sua contracti cavitatem explet. Quæcumque tetigerit, illa uncis annuli concipiuntur; post, quæ prædam arreptam fortius retinere possit, pedunculum cum inferiore membranæ prædictæ parte retrahit. Eadem igitur ratione arripienda adtrahit; qua, si corium madefactum calculo superposueris, elato corio, calculum adtolli conspicias. Vi etiam prædæ qua effugere tentat, superior est vis omnium.

omnium uncorum sibi simillimorum, quos, bracchia sua jungendo, iisque corpus arripiendum amplectendo, una agere jubet mytilus. In brachio enim minore vel centenos, in extremitate longioris autem ad centum & viginti uncos numeravimus. Ast numerum eorum determinare, & in primis illorum, qui octo brachiis minoribus adhærent, impossibile dicimus; maximi enim & primi vicesimam digiti unius partem pro longitudine habent, sequentes sensim decrescunt, & qui extremitatem brachii occupant, illi exiguitatis ergo vix oculos incurrunt, nedum ad mensuram exigi vel enumerando percenseri possunt. Brachii in centro os sepia observabis, illudque quasi corneum, substantia, seu binis cartilaginibus duris, aduncis & sibi invicem interpositis, constans. Membrana scilicet carnosae ac crassae, annuli instar seu labri fortissimi, circularis atque rugosae, cartilaginea cingit, constringit, ac ne loco suo secedant, impedit; imo maximam earum partem obtegit. Rostrum sepia autem & figura & colore, rostrum avis rapacis sive psittaci refert. Oculi ejus ex utroque capitis latere, intervallo certo distantes, sub radice brachii animalis, & majusculi; oculis autem intermedia cartilago quaedam, parum cerebri continens, inveniuntur. Rostrum cavitatem, si *Rondeletio* fides est, caro spongiosa, si *Needhamio*, membrana, pluribus dentium seriebus confita, explet; Dentium alii, ut microscopii ope observabis, obtusiores sunt, molaresque referunt; alii longiores, conici, & in cuspidem acutissimam exeuntes, comminuendisque sepia alimentis inservientes, figura sua, falcatos apri dentes repræsentant. Membrana cæterum supra dilatata infra autem constricta, linguam gulamque effingit; pars scilicet latior, cujus latera ligamento tenuiore continentur, linguæ fungitur officio; strictior autem inferiorque, ac constricta fungi figuram imitans, laterum suorum contactu gulam, sensim sensimque strictiorem constituit. Quæ quidem gula in conductum quendam alium, longum, angustum, pro œsophago venientem, & in ventriculo desinentem sese egerit. Descendentia alimenta itaque nulla detinentur in interstitiis dentium, sed potius dum dentibus comminuuntur, directione continua sensim avelluntur, & ad aperturam, quam transire debent, diriguntur. Ventriculum excipit intestinum aliquod tenue, œsophago ad partes superiores adscendente, amplius. In ventriculo etiam juxta Cœcum vesicula conspicitur, nigro turgida humore, quem atramenti nomine *Cicero* adpellat; vesiculam ipsam fellis vesiculæ, & quem continet liquorem, bili æquiparabis. Jam & fellei & intestinalis canalium extremitates coeunt, ac in ano desinunt, ita ut & nigro humori egredienti, & excrementis, & ovis, & spermatis piscis ejiciendis non nisi una veniat foraminis apertura. Niger etiam ille humor, aliis: *Sanies* dictus, si vel reservatorio suo, per excretorium conductum expulsus, vel reservatorio ipso corpori extracto, aeri fuerit expositus: statim condensabitur, & substantiam duram quidem & fragilem ac carboni similem, aqua tamen facile dissolvendam, induet. Tandem vero sepia in corpore utrinque plurima vasa, substantia adipea & oleosa intermixta, eidemque inhærentia, nec non materia quadam nigra atque opaca repleta observabis, quæ branchias piscis vult esse *Cel. Swammerdam*.

Sexus differentiam facile dignosces. Sepia, masculus, enim frequentiorum colorum exhibet varietatem, & dorsum nigrius, & corpus asperius, & caudam acutior. Fœmella autem binis mammillis instructa, masculus
iisdem.

isdem destitutus est. Cœuntes sepia, loliginum polyporumque more, mutuis amplexibus junguntur; & veris tempore, pone rivulos, ova sua jam in alga, jam in arundine, jam in fasciculis sarmentorum, a piscatoribus eo projectos, recondunt. Quindecim dierum spatium, reiteratisque interval-
lis, quasi vires novas haustum, foemella eadem emittit, masculus foemel-
lam insequitur, & ova vixdum emissa spermate suo adspersit. Ova hæc, acini, seu baccæ myrti majoris crassitudinem, & ab initio quidem album colorem, grandinis instar exigua, præbent; at lique de quo diximus, nigro, irrigata nigrescunt, mole augentur, & racemi instar accumuluntur. Membrana insuper crassior quodvis ovulum tegit, ligamentum vero, trans-
versi digiti unius longum, illud sustinet. Aperias ovulum adhuc madens, & vel nullo microscopio adjutus, sepiam integre efformatam videbis; imo oculos, corpus, os duriusculum quo tegitur, vesiculam, liquoris nigri re-
ceptaculum, aliaque ejus membra distinguere poteris. Cæterum madida ova, nullum odorem nullum saporem præbere videntur; arefcentia autem flaccida, levia, & vesiculæ similia evadunt.

Plinius, & qui eum sequuti sunt, Physicorum varii, liquorem nigrum, copiosorem sepia quam loligini, sanguinis locum explere censuerunt. *Cel. Rondelet* e contrario, bilis qualitati magis accedere judicat illum; haud enim, ait, adeo prodigam credas naturam, ut vel minimo quovis terrore tantam vitæ thesauri quantitatem profundi permittat; imo nec in vesicula illa vas ullum deteges, quod distribuendo per corpus totum vitæ humori inservire possit. Quæres: quanam causa impulsæ sepia cum loligine, urgente necessitate atramentum suum ejiciat? en, Physici abeunt in diversa. Et antiquorum fere omnes animalis calliditatem adferunt, quod piscato-
rum insidias evitatum, atramento suo mari nigredinem, sibi velum quasi obducere velit; ut Dei apud *Homerum*, quos periculo subtrahere volunt, densiore nube obvolvunt. Alii rationem in timiditate animalis quærunt, & timoris suborti effectui tribuunt, quod sphinctere vesiculæ atramentum continentis relaxato, horum liquor nigridus eliciatur ita, ut timidos ex hominibus, repentino terrore correptos, fæces & urinam involuntarie emit-
tere videmus. Denuo alii sunt, qui perturbandæ aquæ ergo illud fieri ducunt, nec tamen ut animal piscatoribus, sed potius ne animali sua præda, conspecto prædatore, effugiat. Constat autem, sic scilicet quæ loliginis & sepia in stomacho interdum supersunt, loquuntur, constat inquam, ani-
malibus utrumque piscem nutriri; & thunnos juniores, squillas, locustas marinas, pisciculosque alios pro præda captare, qui illos evitatum fun-
dum maris petere solent. Hostes sepia habet varios, ut lupos maris, alios-
que pisces rapaces, acriter illi inhiantes. Succus tandem sepia niger com-
mode atramenti locum explere valet, & pingendis Romanorum literis olim venit, teste *Persio* in Satyris suis. Imo si *Cel. Hermann* fides est, ille in materia Medica sua refert: quod compositum illud quod ex Sina, re-
gno, deportatum, atramenti *Sinensis* nomine venit; non sit, nisi liquor se-
pia niger, juscule oryzae seu alius herbæ admixto, condensatus.

Capiunt sepias in oris Oceani Marisque Mediterranei, quas frequentiores in Gallia ac in Italia reperiri docet *Gesnerus*. Magno autem instinctu, so-
cietatisque desiderio fertur in foemellam masculus; imo illius ex præsentia
animum acriorem induit; & læsa succurrit, illa tamen læsum socium fugit.

Binis incedere solent. Et *Oppianus* in *Halientico* absque hamo acrete sepias captari dicit, dummodo sepiam foemellam ex funiculo ligatam in aqua protraxeris; hanc enim vel ex longinquo conspectam illico infectatur masculus, & facilis prædæ cedit piscatori.

Confirmat dicta *Petrus Gilles*, cujus plagiarium fuisse volunt *Cel. Belonius*, qui addit: quod veris tempore piscatores Massilienses, ope nassarum, retiumque quæ specula dicunt, frequentes captent sepias. Testibus *Aristotele* & *Athenæo*, haud ultra biennium, vitam producit sepia, loligo & polypus. Ast, ait *Matthiolus*, si vera sunt quæ *Plinius* refert, *Lucullo* scilicet polypum fuisse exhibitum, qui dolii peripheriam & 30. pedum longitudinem exæquabat imo superabat: pisces hosce vel octavum & decimum vitæ annum pertingere constat. Quidni igitur & sepiam & loliginem eo usque pervenire credas? ipse enim *Plinius* & sepias & loligines; pisces, polypi istius molem referentes, in oras maris Hispanici, ab undarum fluctibus provolutos esse exponit. Regeri posset adversus *Matthiolum*: ex magnitudine & mole corporis ad annorum copiam tuto concludi nequit; quidquod quum polypus ille maximus, inter portenta naturæ sit referendus; a particulari ad universale non valet consequentia. Nec *Aristoteles* hic loci, nisi de piscibus Maris Mediterranei mollibus loquitur.

In masculis autem piscium, de quibus sermo est, vermiculos quosdam albidos, pellucidos, 4. ad 6. digitorum transversorum longos, & involucri suo extractos, motum fere imperceptibilem edentes observavit *Celeb. Redi*. Hos autem vasa spermatica, in spiram contorta, & pro maturitatis gradu jam exiliora jam crassiora habemus, de quibus prolixior disseruit *Cel. Needham* in historia loliginis. Falso interim, ait *Redi*, piscatorum turba anguillas a sepiis, polypis & loliginibus enasci credit; & opinionis suæ monstrum ratione demonstratura, neglecta sexus piscium horum differentia, ad sacculum quendam vermiculis, quos anguillulas dicunt repletum, ac in illis obvium, provocant.

Cel. Lyonnet in *Observationibus ad Lesseri Theologiam Insectorum*, dum de *Linnæi Systemate Naturæ* tractat, multa adhuc, ait, demonstratione opus est adferenti: quod insectorum aliqua adsint, quibus nomen: *Zoophytorum membris instructorum*, jure conveniat; id saltem nec hystrici, nec sepiæ, nec stellæ urticæque maris tribuendum est; hæc enim animalia quamquam figura gaudeant singulariori, omnibus attamen animalium functionibus & motu progressivo funguntur, nec similitudine ulla plantis accedunt. Rationi optime consentanea nobis quidem videtur *Cel. Lyonnet* opinio, nec dubitamus, omnibus seculi nostri Physicis eandem illam fore arrisuram.

Nomen sepiæ Latinum & Græcum, Gallico: *Seiche* vel *Seche* originem dedit. Gallis præter ea: *Boufron* audit, vocabulo mere Græco, quod valde prudentem denotat, qualem sepiam ab omnibus habitam fuisse novimus. Sic quoque *Oppianus*, sepiæ *Dolophron*, seu astutæ cognomen tribuit. *Boufron* autem obsoletum esse memento.

Nihil adeo pessimi est saporis, quod vel fami non arrideat, vel gulam non alliciat. Sic & sepia, foeditate sua neglecta, variorum alimento cedit. Neque enim ex nutrimento suo, pisciculis præstantioribus, fardineis v. g. aliisque, meliorem sibi qualitatem conciliat, sed carnem duriorē, coriaceam, saponi ingratissimam & digestu difficillimam conservat. Imo loliginis

ginis carne difficilior concoquitur, licet eandem fere quam ille salis & olei, minorem phlegmatis, majorem vero terræ quantitatem contineat. Sepia cæterum elixa affatæ antefertur, in primis Januario, Febuario & Martio, mensibus, quo quidem tempore ovis plena est. Parisiis ejus esu abstinemus. Ast Lugduni, Nanneti & Burdegalæ, nec non aliis Galliæ in locis eadem pro cibo utuntur. Præ primis vero sepiam cibo adpropriaturus, lixivie, ex aqua salsa, calce viva & cinere compositæ immittito ac emolito; post autem in frustula dissectam butyro recenti, allio, cepis, petroselino, & pipere modico præparato, additis sub finem guttulis aliquot acetis. Hac ratione condita robustiori stomacho veniat. Lugduni autem lixivie conficiendæ tartari cinerem admiscent. Et qui carnem ejus digerendi robore, seu stomacho gaudent, multum nutrimenti exinde recipient. Verum sepia, teste *Hippocrate*, alvum constringit, sanguinem crassum reddit & tardigradum, sicque gravitatem capiti, oculis læsionem adfert. Juscula illius tamen alvum laxare solent.

Ars Medica tandem nigrum sepiae liquorem, ova & os suum, in sui usum vertit. Et liquorem nigrum, ore haustum, ventrem laxare, ova quoque renes & urethram detergere, & urinam ac menstrua provocare docet. Præcipuus autem usus est ossis sepiae. Quod dummodo probæ qualitatis signa, candorem scilicet, levitatem, crassitudinemque exhibuerit, & facile adfrictui cedat; pro aperiente, detergente & exsiccante; & in pulverem redactum, ad provocandam urinam, calculosque expellendos optimum habetur. Pro dosi commendantur gr. xx. ad ℥s. cum cyathis infusionis parietariæ herbæ, aut cichoris silvestris. Admisceatur etiam opiatis diureticis & anti-nephriticis. Sunt, qui pro menstruorum suppressione, vel lentiore profluvio ossis sepiae usum præstare dicunt; ast cum huic medendo efficaciora sufficiant alia; infrequentius, hujus causa, adhiberi solet. Multum facit in Gonorrhæa & menstruis albis pro compescendo effluvio Balsamo Copaviæ scilicet admixtum, boli instar exhibeatur, qui rarissime ut exoptato scopo respondeat, negat.

Usus ossis sepiae externum quod adtinet, omnia fere dentifricia intrare solet, ingreditur etiam collyria sicca, quibus inspersis maculas, in cornea nascentes depellere student.

Aurifices ossibus sepiae frequenter utuntur, & formas cochlearium, anulorum, similiumve effigendo ea potissimum seligunt, siquidem pars ejus spongiosa infusa metalla liquefacta exacte recipit, & cælata adcuratissime refert.

Pillulas denique adstringentes & dentifricium Pharmacopœæ Parisiensis ossa sepiae intrare memento.

℞. Ossis Sep. pulveris. ℥ij.

Balsami Copaviensis ℥j.

Pulv. ex cortic. mal. aurant. ficcatur. gr. vj.

M. & fiant boli duo, circa finem gonorrhææ convenientes, quos bis per diem capias usque ad salutem penitus restitutam.

℞. Ossis Sepiae ℥j.

CrySTALL. mont. præpar. ℥ss.

Vitrioli albi gr. xv.

Irid. Florent. ℥ss.

Sacchari candidi. ℥j.

Reducantur in pulverem subtilissimum, quem ope caulis calami, ter quaterve per diem, oculo inflabis, si quis tunica vel unguicula in cornea nascentibus laborat; oculumque dimidiam post horam ab operatione, aqua quadam ophthalmica lavabis. Vel.

R̄. Offis Sep. pulv. ℥ss.

Vitrioli albi ℥j.

Sacchar. Saturni gr. xij.

Sacchar. Candid. ℥j.

M. & reduc in pulverem subtilissimum, & modo quem diximus, eodem, pulvere hoc utere.

R̄. Conserv. rosar. rubr. ℥ss.


Offis sep. præpar. ℥ij.

Sanguin. Dracon.

Cortic. Granat. ana ℥ij.

Aluminis adusti ℥ij.

Reduc in pulverem subtilissimum omnia: & subige cum melle rosaceo, ut habeas opiatum pro dentibus purificandis & in alveolis suis corroborandis, quo eosdem post prandium & cœnam adfrices, os deinde vino eluas, scito.



S E C T I O P O S T E R I O R.

De INSECTIS, proprie sic dictis.

A P I S.

A Pis seu Apes. Offic. Schrod. 334. Dal. 386. *Apis gregaria*. Linn. Faun. Svec. 1003. *Apis*. Mouff. 2. Mer. Europ. 19. Aldrov. Inf. 20. Jonst. Inf. 1. Charlet. Inf. 36. Raii Inf. 240. *Apis domestica seu vulgaris alvearium*. Merr. Pinn. 106. *Apis proprie dicta, sive mellificans, Melissa Græcis* Quorumd.

Quæ olim silvestribus adnumeranda erat, apis gregaria, nunc inter domestica animalia locum occupat. Olim scilicet non nisi vastissima Polonia, Moscoviæ, aliaque Septentrionis nemora occupans, jam arborum crenis profundioribus, jam rupibus excavatis, jam terræ foveis detinebatur.

Ecquid autem insectorum, Physicis cognitorum, ape mirabilius est? Ubi locorum propagari nequit? Imo quotnam fuerunt Philosophi, qui vel maximum ætatis suæ tempus, apis studio & disquisitione consumserunt? Quanti etiam ab *Aristotele* ad nostra tempora usque de eadem scripserunt? Interim si varia, eaque certa ac curiosa hodie detecta velis comperta; adeas, necesse est ea, quæ Celli *Svammerdam*, & *Maraldi* & de *Reaumur*, Illustres Regiæ Scientiarum Academiæ Sodales, de apibus observata reliquere.

Apum historiam pertexturis, quinque vel sex capita generaliora discutienda veniunt. Hinc primo de illarum structura; tum de modo quo curam illarum gerere oportet; post de labore earum industrioso; deinde de

ratio-

ratione multiplicationis suæ; tandem de regiminis sui forma; denique de laboris sui utilitate.

Quod igitur primam tractationis nostræ partem adtinet, rem ponimus, experimentis reiteratis comprobatum atque certissimam: quodam scilicet anni tempore, triplicis ejusque diversi generis apes reperiri. Alias enim, quarum numerus maximus est; mellis ac ceræ colligendæ labor spectat. Has *apes communes, operantes, seu mulas* dicunt; ac sexus differentia carere constat. Alii, & quidem masculi, *susurrum edentes*, sive *susurratores* audiunt; & Gallico idiomate: *Bourdons* nuncupantur; mallemus: *Faux-Bourdons*, quos scilicet evitata omni verborum ambiguitate, commode a crabronibus, Gallis: *bourdons* dictis, (ob susurrum, *bourdonnement*, quem volando edunt) distingui possint. Tertiæ tandem generis unica saltem adesse solet, *regina* audiens, *scemella*, & posteritati numerosæ procreandæ mater destinata.

Eminent autem partes inter exteriores apis communis: caput, thorax seu pectus, & corpus seu venter. Ex utraque capitis parte, oculos quasi reticulo obductos videbis; & binas antennis, particulis, articulorum more sibi junctis constantes; & duos dentes, vel si mavis: scias aut maxillas, forcipem effingentes; & proboscidis seu linguæ speciem, duplici vagina, quæ substantia tantum non cornu seu testam refert, inclusam; & os quoddam hians, cujus situs est linguæ origo. Tum collum brevissimum cum capite necit thoracem, & huic supra adhærentes quatuor alas, subditaque sex crura observabis. Crurum vero bina postrema, & reliquis longiora, in parte sua media & exteriori (quam *patellam triangularem* dicit Cel. de Reaumur) crenam exhibent sive cavitatem, cochlearibus nostris simillimam, & pilis hirsutis asperisque fimbriatam. Extrema tandem pars cruris, quam *pedis* nomine designabimus, in extremitate sua quandam quasi scopulam refert, & quinque constat articulis, quorum ope, manus officio præstando sufficit. Mediante filo denique corpus proprie sic dictum, thoraci cohæret, & senis constat annulis testaceis, & vel nudo oculo totum valde hirsutum apparet. Cæterum nec coloris nec magnitudinis ratione, magnum discrimen est inter apes quascunque.

Respice apis interiora, & duas tresve partes præcipue eminentes observabis. Primo nimirum vesiculam, pisi minoris magnitudine, & dum melleo liquore turget, pellucidam. Post aculeum, in extremitate corporis situm, 2. fere lineis longum, in origine crassius, in fine vero cuspidem acutissima terminatum. Tandem vesiculam eximiæ soliditatis ac pelluciditatis, basin aculei respicientem, olivæ instar oblongam, limpidissimo liquore plenam, & in vas aliquod excretorium desinentem. Inservit vero vasculum illud, veneno ex reservatorio in aculeum deportando; ipseque aculeus, musculorum auxilio, pari cum agilitate exseritur atque retrahitur.

Magno opere ab his differunt masculi, seu susurratores. Differunt & oculis, & dentibus, & proboscide, in primis autem thorace hirsutius, annulisque ventris lævioribus. Nec non pilos, crurum posteriorum scopas obtegentes, frequentiores habent & breviores. Et corpus ex parte tertia crassius longiusque, & caput magis rotundum, & frequentioribus pilis obtectum. Imo nonnunquam in posteriore corporis parte eminent duo cornua carnosæ, jam tertiam, jam dimidiam corporis partem, longitudine exæquantia; hisque interjacens corpusculum adparet carnosum, ultra animum

prominens, arcusque more contortum. Et si interiora respicias, aculeo carent, & totam fere corporis capacitatem, vasa quædam explent albida, contorta, solida & lacteum liquorem continentia.

Regina tandem omnibus longior, at fusurratoribus gracilior, alas, corporis respectu, habet brevissimas, quæ quidem vix ejus dimidium obtegunt. Proboscidem ostendit subtiliorem breviorque quam apes communis, longiorem tamen & fortior, quam masculus. Thorax reginæ fuscus, & annuli ventris castanei fortioris sunt coloris. Quo tandem anus illius munitur, aculeus, ille aculeo communium multo quidem longior, nec tamen rectus, sed parum ventrem versus, inflexus procedit. Eadem ratio est vesiculæ, veneni receptaculo. Nec scopis obsita crura ostendit. Intus denique ova sua in bina ovaria, alterum ex dextra, alterum ex sinistra, reposita deteges. Quodvis etiam ovarium non est nisi congeries vasculorum, in canali quodam communi desinentium, & ovis repletorum eo tempore, quo sua ova emittere solet.

Jam vero, id quod secundo loco ponimus, si apum abundantiam desideras, curam earum habeas, necesse est. Ante omnia autem commodam illis sedem eligas. Et alvearia quidem, quibus detinentur, pro regionum varietate, variæ sunt figuræ, variæque rationis. Plurimum vero canistra, conifiguræ, illis veniunt. Et qui apibus conservandis student, illa anteferenda esse volunt, quæ ex aruncæ stramine comparantur; quippe quæ & a frigoris vehementia, & a caloris æstu apes optime defendere ducunt. Crusta quadam obtegantur, quæ num ex gypso composita sit, num ex argilla, num ex cinere, admixto stercore vaccino, perinde est. Sic a pluvia tuta detinentur alvearia; crustam vero, ut ingressus aeri pateat, pluribus foraminulis perforandam esse memento.

Nec non alveus, sive locus adservandis alvearibus destinatus, plurimum quam fieri potest, soli expositus esto. Nec Septentrionem respicito, sed Meridiem, & ita quidem, ut & matutino & adhuc vespertino sole incalcescat. Modicus igitur solis calor apibus confert, at nimius nocet; etenim incalcescente alvearii parte interiore, apes infestantur, cera liquefit. Tectulum illis superstitas; & a nimio solis ardore pariter ac pluvia tuta erunt. Tectum commune si deficit, singula alvearia singulis teguminibus vel operculis stramineis obtegit sufficiat.

Vitrea etiam alvearia hodie inventa sunt, quorum ope, quæ intus eveniunt, spectaculum sane curiosum & varium, observare licet. Vidimus apes, hyemis frigore, adeo torpescere, ut timore procul quosvis alvearium recessus disquirere, imo summis ima obvertere possis. Videbis apes acervatim congestas, alias aliis coherentes, & valde exiguum spatium explentes; plerumque placentis intermediis, & jam in centro, jam in fundo alvearis collectas. Recedente frigoris vehementia, clementiore cœlo, ac solis radiorum calore, incalcescunt apes ac expergiscuntur. Calorem, conservationi suæ necessarium vel ipsæ jam motu, jam alarum agitatione adaugent. Pro copia apum alveari detentarum, major ipsis calor; & quam primum agendi facultatem receperint; fame exstimulantur, nutrimento egent; quod dum in agris & campis reperire nequeant, suametipsum adeunt, melle placentiarum interiorum vescuntur. Quo mitior hyems, eo majorem mellis copiam apes consumunt. Imo nimium retardantibus veris
flori-

floribus, periculum est, ut confumto mellis adparatu, vel fame emorian-
tur. Nimia igitur hyemis & vehementia & lenitate offenduntur. Frigus
autem ac fames alvearibus sunt funestissima.

Ficus cinere apes in vitam revocari docuerunt. Vitam scilicet, quam
torpescentes per hyemem, amiserunt. Frigore vehementiore nimirum per-
acto, vitæ expertes videntur, pugilliseas accipe, nec est quod timeas. Ast
favillæ eas superpone, vel potius, parciori ignis calori admove; & statim
redibunt in vitam.

Alii sunt, qui, verno præsertim tempore, apes, dum nimis corni, ul-
mi, & tilia floribus sese explent, alvi profluvio laborare contendunt. Ast
nunquam excrementa illarum adeo solida dicere possumus. Et profluvii
causam, in nimio melle, exeunte hyeme, accepto, quærendam esse
censemus.

Nec frigore tantum & fame enecantur, sed & provectiore ætate mor-
bisque pereunt apes. Quibus quidem morbis magis obnoxia sunt hæ, quæ
per hyemem, in alvearibus probe obturatis & loco temperato detentis,
conservantur, quam illæ, quas una cum alvearibus aeri exposueris, reli-
cto ejus foramine, ut & aeri transitus, & apibus in die sereno egressuris,
exitus pateat. Hinc quoque alii, neglecto mortis periculo, cui subjacent
apes hyemis frigori expositæ, satius ducunt, eidem illas committere. Ast
media via incedamus, qua tutissime itur; & alvearia fortiora, sive apium
multitudine plena, relinquenda, debiliora autem, sive apibus infrequen-
tiora, recipienda esse & adservanda suademus. Cel. *de Reaumur* est, qui com-
modum pro ultimis receptaculum commendaturus, dolii fundum superio-
rem extrahi; alvearia singula singulis doliis immitti; in basi inferiore aeri
introitum relinqui, interstitia alveare inter doliique parietes, stramine con-
ciso, fœno, arena vel terra arida expleri, & tectum pro pluvia superstrui
docet. Experientia & frequentiori usu comprobata res est, felices hac ra-
tione apes, transigere hyemem; nec adeo magnos sumtus requirit, eadem
enim dolia varios per annos usui eidem veniunt; & canistra ex falicibus
contexta commode substitui possunt.

Aculeum api voluit esse natura pro armis, nec ideo ut lædat, sed po-
tius, ut ab hostium suorum copia, quo se defendere valeat, quidquam ha-
beat. Vespæ & crabronibus ventrem apis acerrime dilacerant, & quæ eo-
dem continentur omnia, exsugunt. Hostes, ast leviores sunt araneæ, for-
micæ melle saltem inhiant. Lacertæ, bufones & ranæ, si quas captare
possunt, devorant, captant vero parcissimas. Pseudotineæ, quas in papi-
liones transformari novimus, longiorem cellularum seriem perforando ce-
ram, quam adpetunt, quærunt. Ætate provectiores, nec juniores quadam
pulicum specie exeruciantur, parum tamen morfu præsentiaque illorum ad-
fici videntur. Acerrimos sibi hostes cognoscunt aves, muresque subterra-
neos. Horum enim vel unus, una torporis hyemalis nocte, copiosissimum
quodvis alveare extirpare valet, quamvis Cel. *de Reaumur* teste, præter
caput & thoracem vix quidquam devorare solet. Imo eadem ratione avi-
culas tractare videtur, sæpius enim alaudæ communis pullos in nido, ene-
catos, & rescissis capite & collo ex nido in marginem ejus protactos ob-
servavimus. Ex avium numero, apiestra, hirundo & parus acerrimi apum
hostes habentur. Acerrimus omnium sine dubio passer est, hic enim solus
major

majorem earum quantitatem in die devorat, ac reliquæ aves omnes; imo ut totidem tritici granula eas deglutit.

Tribus sæpe apibus onustum passerem nido suo accedentem, & prædam suis adportaturum vidimus, unam scilicet rostro, singulisque unguis, singulas detinebat captas.

Faciles cæterum apes mansuetum induunt animum in hos, quos curam sui gerentes, frequenter conspiciunt. Hi non habent, quod timeant, dummodo ipsi apes irritare nolint. Alias enim subitanea pœna temeritati succedit. Et apes faciem præsertim petere solent. Apes irritata igitur aculeum suum hominis carni infigit, quam si digitis compressam, ut avolet, adigas, aculeum cum illis quæ adhærent, carni intrusa relinquit, brevi exinde ipsa moritur. Æstate autem majorem apis ictus dolorem excitat, quam quidem hyeme, doloris vehementia ex veneni quantitate, faucianisque apis vigore, pendente. Qui quidem ictus alios vix lædere videntur, alios nescio quanto opere adficiunt. Ictum plurimo excipit pruritus, inflammatio, tumor, & dolor urens. Imo ictis oculis, palpebræ sæpius per dies occluduntur, facies deformis redditur, ac si lacte tithymali, seu herbæ, Gallis: *reveille-matin* dictæ, oculos abluisses. Et varii ex auctoribus pro ictu apis varios herbarum succos commendant, & urinam, & acetum, & cultri laminam, & olivarum oleum, aquam recenter haustam & stercur vaccinum. Varia autem, & omnia fere in vanum adhibuit Cel. de Reaumur, & ille quidem petroselinum contusum reliqua media, virtute superare censet. Pro generaliore æque ac certissimo medio, lutum & salviæ recentem commendant *Ephem. Germ. Dec. III. Anni 7. & 8.*; forsan nec illis major efficacia inest. Quod si autem vix ictu fauciatus, relictum apis aculeum extraxeris, & vulneri inflicto acetum sive aquam adplicueris, dolor recedet; elapso tamen temporis momento redibit.

Nec adeo contrarii apibus sunt, ut vulgo perhibentur, fœtores. Illas enim vinum acrius, urinam, & aquam præsepibus infusam, vel ex fimeto defluentem sæpius adpetere, rivuli vero limpidam & profluentem negligere videbis. Fumo stupefcunt, inebriantur, abiguntur. Placentarum alvearis partem subtrahunt, vel, ut artis vocabulo dicunt, alveare castraturi, excitato fumo suo domicilio prius expellere solent apes. Id quod pro regionis varietate, vario anni tempore instituitur. Et in primis sub diei initium fiat, etenim vix elapsæ noctis frigore adhuc torpescentes, fere sine fumo expelli possunt. Si alvearia castrare nolis, in die serena veris exalveari, mellis & ceræ pleno evocas, in vacuum transferas. Sic autem pereunt, quæ in pleno alveari detinebantur, posteritatis stamina, ova nempe, & nymphæ, & vermes brevi in nympha transformandi. Alvearia denique castrando, quo & æquitati obtemperes, & necessitati consulas, dimidiam partem ad minimum, intactam relinquito.

Quum nimia æstatis siccitate omnia in campis ac pratis exarescant, vix pauculas ceræ vilioris sphaerulas collectas domum reportare possunt. Longe melius sane tum temporis illæ se habent, quæ regiones tenent pratis viva aqua irrigatis abundantes, floribusque continuo novis ornatas; vel alias, illasque silvarum ac arboretorum umbra opacas, humidam, refrigeratas, & vel inter maximos æstatis æstus, tot plantis succrescentibus confitas. Sic Ægypti, more apud illos antiquo, alvearia sua cymbis, Nilum jam ascen-

dentibus jam descendentes committunt, quo apes iisdem vectæ eo citius copia florum Ægypti superioris frui valeant. Sæpius cymbæ cursu suo desistunt, & metendi tempus apibus relinquunt, messe tandem sua in spatio duorum triumve milliarium peracta, ulterius progrediuntur, denuo iter sistunt, iterum continuant, tandem dominis restituntur. Similis fere est cura quorundam Italarum, Eridani littora colentium. Quidni & nostro, cum Gallis loquor, usui veniunt eadem? Nec aqua tantum hinc inde proficisci, apibus confert; sed vel Græciæ incolæ quotannis sua alvearia ex Achaja in Atticam deportasse docet *Columella*. Idem vel hodie in regione Juliacensi fieri novimus. Sic & in Galliæ desertis, prope Pictavium quidam erat industrius apum cultor, qui peracta symphiti messe, alvearia sua in regionem Bellovacensem, meliloto abundantem, exinde autem in Soloniam sive Bituricum, Aquitaniam provinciam trans mittebat, ubi ad exeuntem usque Septembris mensem, aristolochii floribus frui possunt apes. Multiplici autem cautione opus est, dum curribus rectas trans mittere velis apes, curru enim haud ita leniter transportari possunt, quam in cymbis, Nilum seu Eridanum ascendentes.

Dubium est, utrum uno tantum anno vitæ earum spatium absolva-
tur, an pluribus. Sunt qui huic potius sententiæ accedentes, ad spatium illud, & anno uno diutius provocant, quo alveare idem apibus expletum remanet. Claudicat consequentia. Alii septenos, alii denos, pluresve ætatis annos apibus adsignant. Fortissimis quibusque duodenos tribuit *Cardanus*. Rursus alii tertiam alvearia opplentium partem autumnò, & totidem veris tempore emoriri adserunt, exinde autem eliciunt; vitam apum non esse, nisi annuam. Multum veritati accedere videtur horum opinio, qua omnes alvearis apes, singulis, ad summum, secundo quovis anno renovari credunt.

Ast quantus mirabilium campus illi patet, qui industriam diligentiamque apis communis considerare velit. Hæ quum domicilio probe obturato ante omnia egeant: statim, ex quo alveare novum ingrediuntur, de occludendis ejus crenis sive fissuris sollicitæ sunt. Cui quidem scopo adtingendo gummi aliquod resinofum, cera tenacius, eique dissimillimum, *Propolis* dictum, adhibent. Hoc temporis tractu indurefcit, licet calore accedente semper liquefcit, & variæ est soliditatis, varii coloris atque odoris. Incalescens aromaticum & aliquoties adeo gratum præbet odorem, ut thuris species videatur. Extrinsecus fulvo-rubicundum, intus vero flavidiorem ac ceræ similiorem exhibet colorem. Et mollem adhuc Propolim tractant apes, sensim vero duritiem cera majorem acquirit. Hanc apes cruribus posterioribus, ut ceram viliorem adportant; & obturandis conglutinandisque alvearium fissuris eadem utuntur, quam non, nisi ex populo, arbore, & betula & salice colligere creduntur. Ast & aliæ arbores eandem illam supeditant. Fortius illa arboribus, quam pulvisculus ille plantarum foliis inhæret, & tractatu difficillima est. Eadem propoli & bacillo transversales, alvearia ex parte sustinentes, imo magnam interdum partem parietum sui alvearis interiorum, obducunt.

Qui autem, quæso, placentas sive radios, ex alveolis seu cellulis figuræ adeo regularis, & inter se cohærentibus compositas construunt? Binorum radiorum dorfa sibi invicem obversa, facies igitur externæ sibi similes sunt. Et in harum constructione omnia adeo accurate concinnata, tam perfecte elabo-

elaborata videntur, ut primo quidem intuitu, huic, præ reliquis industriæ insectorum documentis, palmam adjudices. Jam *Pappus* Alexandrinus, qui seculo secundo, Geometria floruit, figuram alveolorum hexagonam admiratus est, quæ & maximæ capacitatis, & minorem omnibus locum exigit. In eandem admirationem vel hodie rapiuntur Archimedes nostri, dum architecturam apum & perfectissimam, & adeo parum extensam respiciunt. Quo diutius hujus disquisitioni inhæseris, eo potius summam magistri sui sapientiam cognosces, veneraberis. Et varium modum in inclinandis & incurvandis radiis suis, prout usus postulat, observant; imo si quæ forsan erraverint, defectum explere, errorem emendare norunt. Et has quidem a regula generali exceptiones, tot testes habeas apum & ingenii, & cognitionis geometricæ, vel potius, naturæ instinctus, qui locum explet illius.

Nec facilis operandi rationem spectabis; tanto enim ardore opus adgrediuntur, tanta operantium copia concurrit, tantum quod sibi ferunt auxilium mutuum, ut dum operi acrius insistant, sive pro construendis novæ placentæ fundamentis, sive pro extendenda & amplificanda basi antiquæ occupantur; nil præter tumultum & confusionem spectaveris. Ad tamen observare datur, quod dentes earum pro instrumentis, ad conciliandam formam ac figuram placentarum veniant. Statim constituta ædificii basi, erigendis utrinque cellulis sese accingunt. Quod si vero temporis spatium perficiendæ operis moli non respondeat, nondum ad destinatam profunditatem usque alveolos excavant, cœptos relinquunt, nec perficiunt, nisi dum omnes quotquot sunt, alveolorum extruendorum, adumbraverint. Placentarum constructio autem multo difficiliore opera perficitur, nec enim has priusquam extruere oriantur, prius delineant sive adumbrant. Interim maxima pars operantium eliminandis, expoliendis atque componendis, quæ rudiora seu defectuosa supersunt cellularum interiora, occupatur. Duplici autem usui cedunt cellulae, scilicet & pro mellis receptaculo, & pro domicilio vermis, qui in eodem enascetur, & excrescet, & tandem in apem transformabitur. Cellula autem vermi in susurratorem abituro destinata, pro eximio hujus magnitudine, major sit necesse est cellula, apis communis domicilio. Hinc cellularum hexagonarum diameter est diversus. Quæ autem recipiendis operariis destinatae sunt, illarum quantitas longe superat numerum harum, quæ maribus adsignabuntur. Imo alveoli, vermium domicilia, alio tempore & mellis reservatoriis veniunt; illi autem, qui non nisi melli recondendo inserviunt, multo profundiores sunt reliquis. Quod si autem congesti mellis quantitatem receptaculorum numerus capere nequit; apes vel alveolos ipsos producant, vel novos dum extruunt, solito majorem longitudinem iis tribuunt. Sic enim effingendæ bases labori supersedere possunt. Imo vel extruendis tribus placentis uno eodemque tempore occupantur, quo plures enim adsunt, ut ita dicam officinae, eo major operariorum quantitas simul operam impendere potest, nec multitudo laboris ordinem turbat. Plerumque vero sibi invicem parallelæ sunt placentæ, & singulae superiori alvearis parti, non nisi quodam pede brevissimo jungitur. Binis insuper placentis intermedium est spatium, plateæ instar, quo brevior via quævis adire valeant; cujusque latitudo haud pluribus, quam binis incedentibus, patet. Et quamvis ceræ laminis tenuissimis constent alveoli, melle tamen probe expletæ placentæ, satis magnum

præbent pondus. Has variis in locis ac quot fieri potest alvearis parietibus apes adglutinant; hinc alveare præparaturus, ac apum laborem sublevaturus, bacillos quosdam, placentarum pro fulcris, decussatim constituas, necesse est.

Materiam vero placentis venientem, five ceram ex florum superficie apes colligere constat. Nec nisi ex floribus saltem illam colligi posse scito; nec tamen ceram, ut alii sinistre putant, sed materiam in ceram abeuntem, pulvisculos seu stamina florum in foliis obvios. Hos globulorum instar perfecte imperfectiusve sphaericorum conferunt. En materiam ceræ destinatam. Respice apem in flore residentem, & corpus ejus totum, pulvisculo conspersum videbis, ac unde hic nisi ex flore? staminum enim pulvisculi, uncis pilorum apem obtegentium inhærent; sæpiusque adeo frequentes, ut vel prorsus aliam figuram api conciliari, & flavidus videatur suus color. Plures etiam apes, ope scoparum pedibus subnexarum, pulvisculis illis corpus suum expurgare observabis, & materiam sibi adeo pretiosam in binos cogere globulos, figura lenticularum, eosque triangularibus crurum posteriorum patellis amplectendo exacte firmiterque retinere. Imo aliquoties globulus iste piperis granum depressum, magnitudine refert. Subapertis autem floribus, staminum summitates, pulvisculorum grana recludentes, dentibus suis, velut forfice, pro eliciendis granulis comprimunt apes atque constringunt. Peracta igitur hac ceræ messe, si ita loqui liceret, alveari suo accurrunt apes, aliæ rubris, aliæ flavidis, aliæ viridibus, aliæ albis-flavescentibus globulis, pro vario florum colore onustæ. Et quidem Martio, Aprile & Majo mensibus, totum per diem colligenda ceræ materia occupantur; ast calidiore Junio atque Julio, matutino præsertim tempore, usque ad decimam ante meridianam horam, messi suæ student, tunc enim staminum pulvisculi, vel noctis rore irrigati, vel liquore suo expirato madentes, faciliores subigi, & in massam possunt coire unam.

Ast pulvisculi non nisi materiam ceræ constituunt, hinc dispiciendum, quam ratione præparati in veram abeant ceram.

Secundo scilicet in stomacho vel intestinis forsan, ceræ materia immutata, & digesta in ceram vertitur. Eademque oris apertura, quam ceræ materia intraverat, cera jam præparata & adhibenda egreditur. Hunc enim liquorem viscosum, vel si mavis, pultem, vel massam humidam evomendo, suas construunt perficiuntque placentas; qui dum exarescat, ceram exhibet perfectissimam. Et quidem statim ab initio quævis placenta candidissima est, prodeunte tempore nitorem amittit, diutius protracto flavescit, tandem fulvescentem, ac fere fuligini similem colorem induit. Cujus causæ veniunt, & mel, & vermes atque exhalationes alvearis internæ. Nec cuivis ceræ idem est candor, & qui dealbandæ eidem student, artifices, probe norunt, aliam ceræ speciem, ne adhibito quidem summo studio candidam ac candore nitentem reddi posse.

Imo quum magna materiæ ceræ quantitas præsens apibus sit conveniens & necessaria, plures alvearis placentas, non nisi cera expletas invenies. Quæ totidem reservatoriis cedunt, & accurentibus apum pluribus, sua se sarcinula ibidem exonerantibus, implentur, dum aliæ præsentium, recipiendis, comprimendis & disponendis ceræ globulis occupantur.

Exspatiationis suæ initium, aliquoties circa quartam horam matutinam, finis.

finis autem , octava saltem vespertina imminet . Singulae enim apes quaternis , quinis , pluribusve per diem vicibus , pro itineris longitudine , & deportandi oneris mole variantibus exspatiantur .

Multa interim ex materia cerae , non nisi satis modica quantitas redit cerae perfectae maxima ejus pars nutrimento apibus venit , reliqua cum excrementis ejicitur . Susurratores autem , masculi , conficiendae & tranctandae cerae nulli occupantur , nec nisi melle tantum nutriuntur .

Altera autem mellis earum species illa est , qua mellis colligendi ergo desudant . Cel. *Linnaeus* , omnes qui eum antecesserant , observationum acritate superando , in imis florum calicibus , glandulas quasdam detexit , melleo liquore plenas , quem *Nectariam* dicit . Ex his igitur glandulis liquorem melli destinatum exsugunt apes ; quem dum proboscide collegerint , in superiore proboscidis parte profluentem , & sic ore receptum esse videbis . Nec tamen cerae materia saltem , sed melle etiam apes nutriuntur . Melleus nempe liquor ex oesophago deportatur ad stomachum primum , qui melle turgidus , oblongae vesicae figuram refert . Rus abeas , & pueros ibi in apibus , praesertim susurrantibus captis , statim vesiculam illam , mellis ea detenti desiderio , quærere videbis . Repleto igitur stomacho suo primo redit ad alveare apis , & in cellulam unam mel , evomendo , reponit . Nec eandem esse naturam mellis egredientis , quae intranti fuerat , videtur , sed quodammodo digestionem praeparatam . Stomachus vero apis primus , ruminantium more , contractionum capax est . Saepius quoque apis , mel suum ad cellulam deportandum , ad officinas deportat , & operariis offert , tanquam impeditum , ut operi moram adferant , sibi mel pro alimento quærendo . Et alveolorum alii sunt , quorum mel , usui quasi omnium quotidiano expositum relinquitur , sunt enim apertissimi . Alii e contrario & plures quidem , occlusi , necessitatis temporis destinati videntur , ac totidem pyxides syrupo seu conservis repletæ , ac suo quæque operculo , solidissimo , materiae homogeneae , & hermetice sigillato , obtectæ . Constat enim operculum ex cera compressa . Et hac ratione adservato melli ea semper inhæret liquiditas , quam in illo apes desiderant .

Quod ad originem apum spectat , illam hodie quidem satis distincte novimus . Antiquiores enim eo perducere nequibant , ut crederent insectorum & beluarum generationem simili ratione procedere ; imo vel eo usque errore abducebantur , ut statuerent , putrefactioni originem debere insecta . Curiosorum varii fuere , qui adhibito artificio , cujus auctor est *Virgilius* in fine libri IV. Georgicorum , ubi fabula de Aristæo pastore , qui , inquam eadem ratione , apes procreaturi , nares tauri bimuli obturaverunt , tum vero iteratis illis ictibus cadendo , violentiore tandem morte enecaverunt , ast quid accidit ? Apum expectata examina nec enim provenire poterant , nulla , ast vermium millia ex putredine oborta . Transeamus reliquas de generatione apum fabulas .

Per plurimum anni spatium cuivis alveari non nisi unica inest regina , forma corporis sui distincte satis eminens , ast rarior , imo vix unquam conspicienda . Susurratores enim sive masculi , centenis , unius tamen foemellæ focii , omnem peragunt vitam . Qui quum fere nunquam alveare egrediantur , pro parasitis ac helluonibus habiti sunt , qui prorsus otiosi , melle , reliquarum laboris fructu , immerito pascerentur . Cave autem cre-

das, quod nulli cedant utilitati, etenim non perficiendo labori sed fecundandis foemellæ ovis eos destinavit natura.

Ad stuporem usque fecunda mater est regina. Uni enim quotquot sunt alvearis apes, suum debent originem. Hinc etiam summo, quem excogitare potes, adfectu, in illam feruntur. Matre destitutæ apes, a quovis opere desistunt, temporis venturi immemores videntur atque incuriæ. Ast ovis repletior mater, laboris desiderium in reliquis excitare sufficit. Quamcumque illis tradas foemellam, suam reginam agnoscent, dummodo procreando posteritatis cumulo par sit. Nihili reputant vitas sociorum apumque omnium, dummodo reginæ vita conservetur. Huic obsequium, huic officia, huic quæ imperanti debentur, præstant omnia. Hanc enim quasi iussa ejus expectatum, magna parentium turba continuo circumdat, quocumque abeat, sectatur, & quiescentem alterna proboscide delambent. Regina caret alvearis populus, & otium omnibus, quies perpetua desideribus. Redde matrem, & statim ad laborem provolabunt, eique jam segniores jam acriores insistent, prout major sit vel minor matris fecunditas. Quicquod spe brevi enaturæ matris ad laborem incitantur. Populi totius vita enim pendet ex vita matris. Regina moritur, populus paucis exinde diebus, fame sibi mortem conciliat.

Sic & apes operariæ, sui laboris quidpiam conferunt in ova matres futuras continentia. Pro hisce enim singulares construunt alveolos, & vel schema architecturæ aliud sibi præfigunt. Alveolos scilicet componunt solidissimos, rotundos & oblongos, ceram in effigendis illis profundunt adeo, ut vere regii adpellari possint. Et situ ab aliis differunt. Et pauciores sunt reliquis. Notum enim videtur operariis, quod matris suæ inter ova vix ultra quinque & decem, ad summum viginti reginas enaturas continentia reperiantur, quamquam centena mares, millena operantes contineant. Accidit interdum, quod non nisi duæ tresve, alias etiam, quod ne unica quidem mater enascatur. Hoc si evenit, apes non examinantur. Mater autem tanta est fecunditate, ut 7. ad 8. hebdomadam spatio, vel duodena millia apum producere valeat. Cuivis plerumque cellulæ unum saltem ovulum immittit, etenim non nisi uni, ad summum duobus vermibus excrecentibus sufficit cellula una. Biduo triduove peracto, ex quo ovulum in cellulam reposuit mater pro majore vel minore calore, vermem in fundo cellæ exclusum videbis, illumque longum, album, semper eundem, id est: annuli modo circumvolutum, molliter strato superjacentem, ex pulte quadam albida, suo nutrimento, conflato. Apes cæterum communes nutricibus veniunt recentibus natis. Vehementiore adfectu in hosce vermes illæ feruntur, quam inter homines observabis, qui infantum nutrices mercede conducunt. Quanta enim cum cura alveolum respiciunt, visitant, disquirunt; quam sollicitè observant, num satis commode & molliter vermis recumbat. Mel autem & cera in corpore apum præparata, vermi sunt nutrimento; qui sexta vitæ die, omne suum incrementum adsequutus est. Quem quum alimento & cibo ulterius haud egere cognoverint apes, suæ illum cellulæ includunt, aperturam cera exacte obturant. Tum vermis hætenus continua quiete detentus, evolvitur & producit, post serico quodam cellulæ parietes obtegit, etenim ante transformationem, coli ope erucarum instar, fila producere nescit. Nec tamen abun-

abundantiora alimenta, quæ consumere nequiret, reliquæ ipsi subministrant. Antequam autem nendo suo cortici sese accingit, omnem liquoris, strati sui quantitatem consumit, fundum itaque suæ cellulæ ab omnibus, imo excrementis probe purgatum & siccum reperies. Omnis extensus per diem, biduumve remanet vermis, post sua se pelle exuit: en nympham. In fufurratores autem transformandi vermes, non nisi magnitudine illos superant, quos in apes communes abire videbis. Quæ quum & hosce vermes summo cum studio curant: elicias quantum pro vermibus, quos reginas fore cognoscunt, impendant; imo vel prodigæ sunt nutrimentum hisce præbendo.

Quum denique omnes nymphæ partes soliditatem adquisiverint, apis partibus convenientem, apis ipsa egressui parata, primo quidem dentibus suis adjuta ceræ suum operculum medium perforat, post madida adhuc & undecumque stillans carcere egreditur. Statim concurrunt reliquæ, & recenti natæ optima quævis officia exhibendo, quasi congratulantur; duæ vel tres sua proboscide illam delambendo sensim desiccant, aliæ mel in proboscidem protrusum, proboscide offerunt. Aliæ ad cellulam relictam sese conferunt, illam expurgant, ac sordes ibi relictas extra alveare deportant. Via arefacta sunt, antea quæ madebant membra apiculæ, & scientia per omnem vitam agendorum magistra, hæc aerem captat liberum, sociarum instar alveare egreditur, flores quærit, sola oberrat, sola reverti novit. Primæ autem messis suæ fructus, aliquantula ceræ solet esse materia. Et *Cel. Maraldi* vel in ipsa nativitatis suæ die, apiculam ad alveare redeuntem, duobus globulis materiæ istius onustam observavit. Quavis die exinde apes vel centum & plures, cellulas suas relinquunt; & exaucto in dies earum numero, brevi in tantam copiam excrescunt, quantæ alvearis spatium haud amplius sufficit. En examinis causam & originem. Juniores apum fulviores, pilos albos, provectiores autem annulos haud adeo fulvos, pilos vero ferrugineos gerunt.

Quum igitur alvearis capacitas impar sit continendæ apum quantitati: pars populi hujus, sive examen, egrediatur necesse est, aliud domicilium quæsitura. Dux opus est examini, sive regina, pro stabiliendo perpetuandoque imperio, cujus jam fundamenta jaciuntur. Sufficit autem examini conducendo una regina. Et quarto vel quinto die ex depositis nymphæ exuviis, recens illa mater fœcunda ova emittere valet. Quæ quidem sufficiunt pro determinando sectantium numero, ut hanc reginam, quocumque abierit, comitentur. Tempus vero examini veniens varium est, & pro terrarum, & pro cœli varietate. Cui enim apibus frequentius est alveare, matri, illa majori per hyemem calore fovetur, citiusque pro illa advenit vernum tempus, citior reliquis ova emittere incipit. Signa autem examinis brevibus egressuri varia sunt, quæ inter certissimum hoc est, si cœlo quamvis sereno, apes operantes infrequentiores suum alveare egredi videris. A decima vel undecima hora matutina ad tertiam pomeridianam, nec alio diei tempore, apes examinaturæ exeunt. Eximio solis splendore ad festinandum incitantur, ille enim calorem a copia habitantium proficiscentem exauget. Quotquot igitur examen constituunt, apes, vixdum unius minutæ spatii, alveare relinquunt, aerem implent, eique nivis instar, innatare videntur. Nec reginæ suæ jussis vel selectu, locum, sui conciliabulum, destinari crederes; plures apum etenim, obvio cuidam arboris ramo accur-

runt, insident, has imitantur aliæ. Tum & regina accedit, quum scilicet locum hunc apibus frequentiore conspexerit; regina accessit, succedit festatorum turba, vix effluit quarta pars horæ, & apibus abundans ac quasi confita videtur loci vicinia. Interdum vero examinando adeo elewantur in aere, ut visum effugiant atque oculos; tum autem, quo descendere cogantur, pugnis plenis arenam in aerem projicito; cujus granula quibus tanguntur, totidem pluviae guttulas credere videntur; alii sunt, qui quo momento examen egreditur, athena percutiendo susurrum eliciunt, quo audito, tamquam tonitru perterritæ apes, in proximum quodvis asylum sese recipiunt. Apes igitur loco quodam residentes, alveari, Melissæ foliis vel exiguo melle, illito, immittas. Egredientibus autem sæpe sunt plures, una, reginæ. Si duæ adfuerint, ab initio quidem apum exercitus in bina agmina abit; at alterum plerumque exilius est numero, & apes copiosæ societatis desiderio, & reginæ voluntati obsequuntur, (illa autem numerosam sequentium turbam exoptat;) debilius agmen sensim relinquunt, copiosiori accedunt. Duæ igitur matres sunt alveari, tres interdum pluresve. En factum singulare: examen recens, alveari immisum, non nisi unam conservat, reliquas enecat. Quod nisi præcesserit, ne labori quidem serio sese accingunt apes. Nec tantum novi examinis reginas mors violenta expectat, sed & illas, quæ alveari in quo natæ sunt immansere; & harum multitudinem aliquoties morte adfectam videbis. Suo igitur tempore, plures una matres, apibus haud arridere constat. Quæ autem ex variis superstes? Illa forsan, cui major inest physica virtus, tam grata cæteris apibus, fecunditas nempe eximior. Forsan & natu maxima, vel ova brevissime repositura. Forsan & binæ matres inter se æmulæ certamen ingrediuntur, in quo succumbendum est debiliori. Forsan & sceptrum tenens regina ipsa, reliquas vigore ac robore inferiores enecat. Etenim & fœmellis aculeus est, nec tamen alius quisquam sui aculei usus. Cæterum apes, ne quidpiam omittant eorum, quæ rei publicæ suæ commodum atque salutem promovere possint, & quævis optima laudeque digna, & barbara crudeliaque (sic nobis videntur) committunt, prout societatis postulat utilitas. Nec enim fecunditati reginarum sufficientia opera possent componere, nec vermium ex illis provenientium curam agere, nec domicilia comparare. Quid consilii? pereat ex reginis alterutra. At laboris sui fructibus numerum illarum excedentibus, & placentarum pluribus melle materiaque ceræ abundantibus, non est quod timeant, plures matres sibi molestiæ fore. Tunc summa cum cura & observantia matrem colunt eandem, quam alias, scilicet, novo domicilio apparatus copia nondum instructo, barbara morte confecissent. Vel, si id quod magis ad veritatem accedere videtur, statuas, quod scilicet matrem aliam, mater æmula enecare soleat, dicendum, quod hæc, dum omnes alvearis placentas, easque plenissimas, sibi soli destinatas viderit, copia divitiarum contenta sit, & quadam quasi liberalitate, nec alii illarum usum invideat. Verum, si quæ apes operantes agunt, leviter observaveris, & statim dijudicaveris, adeo aliena tibi videbuntur, quam ille vesparum nonnunquam agendi modus. Succedente scilicet tempore, quo recentes natæ alvearis fœmellæ haud amplius egent masculis; apes operantes maribus accerrimum bellum indicunt. Per triduum seu quatrimum, horrendam adferunt cædem, cladem. Loca alveari vicina cadaveribus unde-

quaque.

quaque constipata. Ne illis quidem parcetur, qui sub forma vermium seu nympharum latent. Quibuscumque maribus moriendum. Nec tempus stragi destinatum constans est, jam Junius, jam Julius, jam Augustus, menses. Sufficit, foemellæ præfens foecunditas; hæc enim, semel foecunda, si vel Junio mense, maribus privata fuerit, multa tamen ova foecunda, per reliquum æstatis spatium initiumque autumnii excludet. Maximam vero ovorum copiam, pro constituendo examine novo, verno tempore anni sequentis reponet; quorum alia apes communes, alia masculos, alia foemellas continebunt; hæc ovula igitur novem ad decem menses antequam emitterentur, dum parvitatibus ergo vix percipi possent, foecundata fuisse adparet.

Quod si autem, etenim & hoc accidit, plura, uno, examina alveare quoddam in anno egrediuntur, primum reliquis anteferendum esto. Hoc enim & majori constat apum numero; & propitiori tempore anni, dum mellis ceræque materia campi abundant, laboris initia capit; & diutius temporis spatium, antequam ingruat hyems, labori impendere potest. Ætatis vero cujusvis apes aliæ examen constituunt, cujusvis aliæ in alveari remanent. Vix quoque tot hominum in urbe spatiosiore omni, quot apum in examine. Hic enim sæpius quadraginta millia numerabis. Adspice quanta cum industria examen, novum alveare ingressum, laborem adgreditur, & miraberis. Vix quatuor & viginti horæ effluxerunt, & placentas 20. digitorum longas, & 7. ad 8. latas jam constructas videbis. Imo mediam alvearis partem, quinto jam die, cera repletam. Quam enim primos per xv. dies recens examen componit, ceræ quantitas, illam quam per reliquum anni congeret, longe superat. Quidquod vel idem illud examen, si copiosum ac præcocius fuerit, aliud examen eodem anno emittit.

Collige dicta, & adparebit, quod quidem quinto ponimus, quantum veritatis insit eis, quæ de societate apum, præstantissimo regiminis Monarchici exemplari, perscripta fuere. Monarchiæ equidem non obstat, quod non regi, ut olim credebant, sed reginæ ut diximus, pareant. Ast vos compello, qui factorum (sic enim loquimini,) cognitione adacti, intellectum & ratiocinandi facultatem apibus inesse contenditis. Vos igitur, quænam, non dicam, quanta observare potestis, quæ loquantur, quod, uti olim credebant, apum societas legibus, humanas imitantibus, contineatur? Quidnam, quæso, actionum earum principium certum constat, nisi amor in suam reginam, vel potius, suam posteritatem? Hic animam, si dicere fas est, alvearis constituit. Felix Monarchia, licet legibus carens, dummodo omnes ejus subditi actionum suarum principium unicum illud cognoscerent, ex quo apes agere videntur! Harum enim quælibet vel publicæ utilitati vel posteritatis commodo consulens, quævis agenda suscipit lubens. Solo in posteros amore incitantur, adiguntur, sublevantur. Reliqua autem omnia, quæ de legibus, regina jubente observatis dicta sunt, non nisi ingenii foetus habentor. Sic *Plinius* apum regiminis formam elegantissime describendo, se ipsum, ut ita dicam, superasse videtur. Sic *Aldrovandus* omnia, quæ ante eum dicta fuerant, nescio quanto opere locupletavit. Nec quemquam librorum, hodie, sub titulo: *domus rusticæ*, *Gallicis: Maison rustique* editorum reperies, quin de apibus & regimine illarum longe lateque differat. Quod si & antiquiorum & recentiorum Physicorum omnes,

omnes, nulla de apibus perscripissent, quæ vel ipsi non observaverant, vel nondum satis comprobata habuerant. Sed hæc optanda solum. Missis scilicet jure admirandis verisque, a nobis hucusque expositis, falsa & fictitia substituere. Leges excogitare, regiminis imperiique regulas. Quid opus est legibus? ubi parentium singuli, quantum possunt ad salutem publicam conferunt? ubi nemo suum ipsius commodum respicit, nisi tum, quum ex privata utilitate pendeat publica? ubi omnis eadem ac sufficiente cognitione eorum instructus est, quæ saluti cedunt rei publicæ? ubi status hic felix? apud homines quidem nec est, nec fuit, nec erit unquam; inter apes ergo quærat, aliaque insecta, quæ hominum turbæ vilia videntur atque contemnenda.

Quod si tandem, idque pro sexto tractationis momento ponimus, quod si, inquam, apum studiosus nihil eorum omiseris quæ ad conservandas multiplicandasve apes, conferunt, quæ ad amplificandam earum messem faciunt, similia; fructus sui laboris, & merito quidem, cum illis divides. Nec tamen, aliorum instar, pro recipiendo alvearis melle ceraque, eas sulphuris aliove fumo expellas ac morti tradas crudelissimæ. Sed media hæc apes abigendi vel potius extirpandi, avidioribus ceræ marcatoribus, & rei suæ male consulentibus relinquito. Mos sane execrabilis est, & omnibus merito interdicens, ut in Etruria interdictus dicitur. Sic enim quotannis magnus alvearium numerus ab interitu conservaretur, & ubi nunc vel paucissimæ sunt apes, ibidem brevibus abundantiam illarum reperires. Nec enim est delectationis ergo tantum, ut apium multiplicationi studeamus, sed etiam nostrimetipsum commodi atque utilitatis ratione habita. Apes etenim his adnumerandæ veniunt, quarum labor nobis evadit utilissimus. Mel scilicet, cujus tantam copiam, quotannis subministrant, quamvis ex inventione sacchari, multum pretii & æstimationis suæ amiserit, multiplici tamen utilitati, imo ampliori quam saccharum gaudet; sic v. g. pro condiendis fructibus melli saccharum substitui nequit. At si nobis laborum suorum fructus ipsæ apes destinarent, quantum est quod illis deberemus, dum vel ceræ molem, quotidie a nobis consumtam, imo nunc profusam, cogitamus? Illi saltem multa debemus, qui primus industrias apes ex silvis collegit; inter domestica retulit, conservarique docuit; & sic ea quæ olim non nisi apibus erant, nunc nostra faciendi consilium dedit, rationem instituit. Omnes insuper quotquot de cura circa villas prædiaque scripserunt, illi studium de apibus inter prima objecta ad attentionis collocaverunt. Apud nos quidem alveare seu examen, biennio conservatum, ceræ 2½., & mellis 25. ad 30. libras exhibet. Proventui huic addatur examen, quotannis egrediens; & adparebit: quantæ utilitati sit numerus alvearium, licet nullos fere sumtus exigat. Imo apes illo sub cælo degentes, ubi plurima pars anni novos præbet flores, satis majorem sui fructum reddunt. Sic in Hispania, Peruvia, & Mexica, regnis, nimii caloris ergo, candelæ ex sebo factæ, usui venire nequeunt, iis igitur ceræ substituendæ veniunt.

In Moscoviæ atque Indarum regionibus nonnunquam globuli quidam ceræ nigræ, nucem myristicam magnitudine referentes, & vetustiorum arborum in crenis reconditi inveniuntur. Hi apiculis nonnullis originem debent, quæ placentas suas in crenis illis construunt, eoque mel aliquod colore citreum, sapore gratissimum conferunt. Cera autem, de qua agitur nigra, apud

apud Gallos, summo in pretio habetur, & calefacta Balsamum odore suo refert; Indiam tenentibus pro conficiendis bacillis cereis, & pro componendis cedit vasculis, quibus ex arbore sua destillans balsamum Toluviense, excipiunt.

Nomen vero Gallicum, quo: *Abeille*, *Avette* seu *Apette* audit, Latino: *Apicula*, ex *Apis*, originem debet. Dicitur & *Mouche-a-Miel*, musca mellis, quia reliquis muscis longe præstantior est. Dicitur tandem & *Mere du Miel*, mellis mater, & jure quidem, & *Fille du Taureau*, tauri filia, sed immerito.

Jam de usibus agendum erit, quos mel, cera & propolis, sanandi arti subministrat.

Apes ipsæ arefactæ & in pulverem redactæ excellentissimo diuretico cedunt. Hujus autem pulveris ℥s., matutino tempore, jejuno, boli instar, dum cum Extracto Juniperi incorporetur, seu potionis instar, cum cyatho vini diurectici exhibeatur. Imo si pulverem istum capiti insperferis, comam elicies ac copiosiore reddes.

Multum vero utilitatis & Medicinæ & reliquis artibus, ex melle ac cera adfertur. Utriusque enim, sive externe adplicentur, sive ore hauriantur, usus amplissimus est. Antequam vero media ipsa ex illis proficiscentia exponamus, generaliora quædam præmittenda esse judicamus.

Duplicem mellis speciem videbis, flavum scilicet & candidum. Hoc, nullo igne accedente, ex placentis recentioribus recipies, dummodo illas alveari extractas cratibus ex salice factis, vel linteis expansis, & fimbriis suis ex quatuor columnis affixis, superposueris, post autem subditis vasis probe mundatis defluens mel album exceperis; quod dum indurescendo spissifacatum sit, ollis argillaceis vernice obductis immittatur. En! quod *Mel Virginis*, sive *Virgineum* dicunt. Imo ex placentis illis, defluxo melle, torcularis ope denuo aliud mel Virginis exprimitur, nec tamen odoris suavitatem, priori accedit, sed ceræ saporem, quem torcularis violentiæ debet, secum gerere solet.

Mel album cæteris omnibus præstantius, pulchrius visu, gustuque suavius illud est, quod ex Occitania regione, sub nomine: *Mellis Narbonnensis* provenit; quodque dum sua præstantia gaudet, recens sit, necesse est, sit crassum, granosum, candidum, pellucidumque, odoris grati & aromata referentis, saporis dulcis ac acutioris; imo probe si expurgatum fuerit, saccharum candidum sua duritie referat. Cujus quidem excellentiæ causa hæc est, quod, quibus regiones Narbonnenses abundant, thymus, serpyllum, lilium convallium, origanum, rosmarinum, reliqua, ob solis ardorem ac cæli serenitatem fragrantia, illa apibus nutrimento, & melli materiæ cedunt. Sic quoque mel apum, montes apricos inhabitantium longe præstantius cognoscimus illo, quod ex planitiibus depresso, nec solis accessui multum patentibus provenit. Cæterum mel de quo agitur, Narbonnæ urbi, suum quidem nomen debet, nec tamen originem, hanc enim villæ cui-dam rusticæ, *la Courbiere* dictæ, tribus milliariis a Narbonna distant, habet acceptam, exinde autem in magnam Europæ partem deportatur. Cæterum & Occitaniæ & Delfinati, & Tractus Vastinii loca varia, mel satis album, nec Narbonnensi excellentia inferius, exhibent.

Præstat vero mel verno tempore congestum illi, quod autumnus suppe-ditat,

ditat, quia major inest virtus veris floribus. Præstat & mel examinis recentis huic, quod in alveari antiquiore componitur.

Mel flavum e contrario ex quibusque placentis, five recentibus, five antiquioribus, five his quæ mel Virginum, apumque lustra subministrarunt, provenit. Has enim frangunt, & addita modica aqua pelvibus vel ahenis iniiciunt, tum inter continuam agitationem calefaciunt, post sacculis ex rariori linteo immittunt, tandem torculari, quo mel exprimatur, subdunt. Effluit istud, cera remanet, ast parum & ex illa una cum melle transit; hoc enim destillando, frustula ceræ cum spiritu ejus adscendentia recipies.

Inter qualitates vero mellis flavidı sequentia referas, nempe quod soliditate, & colore flavo pulchriore, & saporis suavitate sese commendet. Præstantissimum Campaniense ducunt, hoc enim & ob ariditatem regionis terræque, & herbas delicatiores ac aromaticas; multo sale essentiali seu acido & phlegmate abundat, olei vero & terræ parum continet. Imo mel candidum iisdem ex principiis constat, minus tamen salis complectitur.

Jam quum rosmarini substantiam melli Narbonnensi detineri credunt; mercatores fraudis cupidi, & mel album commune, minori pretio comparandum, Narbonnensi quod pluris emitur, substituturi, ramusculos rosmarini per dies aliquot in illo relinquunt, sic odorem melli communi tribuunt. Facilis vero fraus detegi potest, dummodo mel illud probe commiscendo disquisiveris; nec enim, vel adhibito studio summo, quævis frustula ex rosmarino abeuntia recipere possunt atque retrahere, quæ dum inveniveris, en fraudem apertam. Quidquod vel gens rustica, majorem melli candorem conciliatura, florem farinæ triticæ vel amyli admiscere solet.

Olim vero, deficiente vel infrequentiore adhuc saccharo, frequentior erat, ut diximus, mellis usus. Imo vel hodie, vario in casu, & jure quidem, saccharo antefertur. Sic, ut quædam adferam, clysteres ingrediendo ventrem laxat, haud ita saccharum. Digestiva media mel intrat, quia satius saccharo vulnera detergit. Viscositatis suæ ergo, composita quæ ingreditur, saccharo fortius compingit atque conservat; hinc Theriacæ & Mithridato conficiendis mel adhibetur. Quid plura? mellis originem respice, & videbis quanto opere sit præstantius saccharo; illud enim ex substantia florum intima ab apibus hauritur, & quintam ut dicunt, essentiam plantarum aromaticarum recondit.

Mel igitur in substantia receptum pectori convenit, & laxandi ac detergendi virtute gaudet; respirationem liberam reddit, & pulmonum morbis, ex pituita crassiore bronchia pulmonum obstruente proficiscentibus, convenientissimum judicatur. Hanc enim pituitam diluendo & attenuando, sputum excitat, & expectorationi favet. Ventrem laxandi facultate præditum frequens clysteres intrat. Et dum ore hauriendus erit, album potius & in primis Narbonnense præoptes, quippe quod odoris suavitate & saporis amœnitate præ cæteris sese commendat. Mel flavidum vero, albo acrius, & majore virtute laxandi, detergendi, & diluendi præditum, melius convenit clysteribus, suppositoriis, remediisque externis. Constat tandem experientia, quod pani aculeato ex fecali composito, ne sinistros corpori effectus adferat, obviam eatur, dummodo melle eum illeveris.

Nec nimia gravitate stomachum exonerat, cujus ergo & optimo remedio & eximio nutrimento illorum venit, qui nimio & diutiori jejunio nimiam

fecerunt.

fecerunt jacturam virium corporis; facillimum scilicet per vasa quævis distribuitur, & quasi balsamum vitæ recens suppeditat. Hinc *Democritus*: quicumque longævus esse vult, ille intus melle se irriget, extrinsecus oleo unget. Nihilo tamen fecius vel mellis usum omnibus illis interdiciamus, qui corporis temperatura sicca ac biliosa gaudent, facile enim mel bili jungitur, huic fermentationem conciliat, imo in ipsam ejus substantiam abire videtur. Constat enim & mel, & saccharum, & dulcia quævis, coctione nimia commutari in amara. Hinc creditu facilis res est, quod nimius calor in biliosis prædominans, eadem prorsus ratione, fermentatione scilicet nimium explanata, melli acrimoniam, & inflammationes producendi propensionem inducere possit? Imo conjecturæ subscribit experientia, dummodo multi sunt, quibus quæ admixto melle præparantur, neutiquam arrident. Satiùs ergo ducimus, ut omni prorsus mellis usu abstineant biliosi. Subnectas tandem ea, quæ auctore Cel. *Lanzoni*, D. in *Ephemer. Germ. Dec. III. Anni 2. pag. 39.* relata leguntur, etenim & hæc opinioni favere videntur, quod quædam melli dispositio insit, qua facilis in primis viis fermentando, vapores capitis officia disturbantes, ad caput transmittit. Puellæ quædam, sic Vir Cel., rustica, ex melle copiosius hausto, ebrietate correpta non solum integram diem somno trivit, sed vel postera die ebrietatis indicium, rationis animique confusionem retinuit. Imo Cel. *Paullini*, D. *ibid. Dec. II. Anni 5. append. pag. 25.* felem quandam, mellis gulosissimam, toties insultibus epilepticis correptam fuisse refert, quoties mellis quidpiam hauserat. Cave autem exinde concludas, eosdem mellis effectus in homine epileptico pronaturos fore: interim & hic analogiæ locus esse potest; prudens saltem Medicus epilepsia laborantem ab omni mellis usu conservet, suadeo, id enim fermentationes in visceribus producendo, multum conferre potest, quo paroxysmus epilepticus redeat.

Varias præterea qualitates melli esse constat; pro varietate plantarum, quibus suam id debet originem. Forfan & plantæ eadem vario sub cœlo natæ, succum melleum magis minusve perfectum, pro qualitate soli, exhibent. Succus etenim plantarum, vini instar, ex ratione soli participat. Magis attamen coloris, quam saporis respectu mel aliud ab alio differt; etenim vel candidissimum quodvis temporis tractu flavescit; aliud autem statim ab initio flavet. Sic parum in pretio habetur mel flavidissimum, ex floribus tamarisci congestum; ut id quod ex regione Bituriensi provenit. In alio suorum alvearium Vir Cel. *de Reaumur* mel viride detexit, illique saporem communi admodum præstantiorem inesse expertus est. Coloris rarissimi causam, internæ alvearis hujus apum dispositioni tribuendam ducit Vir Cel. Si de qualitate mellis dispicias, aliud saluti obnoxium reperiēs. *Xenophon* inter alios, ubi de receptu illo decem mille militum, satis omnibus noto, recenset: milites ad Trapezum abundantia mellis accepta, brevi exinde vomitu ac profluvio alvi correptos, tum delirio affectos fuisse, & alios ebrietatem, alios furorem, alios moribundorum speciem incessisse. Terra, tamquam ex prælio, corporibus confita; nulli tamen mors ex infirmitate, & subsequenti diei eadem fere hora morbi erat finis, qua hodie fuerat initium; triduo tandem seu quatruiduo præterlapso vigor aliquis militibus rediit, sed talis fere, qualem ex hausto vehementius purgante superesse videbis. Olim in maximo pretio erat mel ex Monte Hyme-

Hymeto, juxta Athenas, & ex Monte Hybla in Sicania, proveniens, quia multo thymio atque serpillo mons uterque abundat. At, quod ex Colchide, Sardinia & Corsica adportabatur, illud nihili imo nocivum æstimabant, siquidem enumeratas regiones, plantis venenosis & amaris confertas habebant. Cæterum dignum est, quo nomina ipsi adjudicemus illa, quibus, jam doni coelestis, jam Syrupi vitalis, jam Nectaris Divini titulis ab aliis compellatum, superbit.

Inter frequentiora ex melle præparata, *Melicratum*, aqua *Mulsa*, seu *Apomeli* antiquorum, hodie hydromel vinosum quod dicitur, primum est atque notissimum. Olim & *Oenomeli*, seu vinum melle mixtum, imo refrigerationis ergo, *Oxymeli*, seu mel cum aceto, multa in aqua dilutum, pro potu adhibebant. Ex quo autem saccharum reperire, ac hujus ope liquores alios saporis magis gratos composuere, omnia ista potus genera obsoleverunt; nec enim hodie eorum quidpiam, nisi hydromel vinosum pro gulæ delitiis mensæ adponitur, siquidem vino Hispanico, & suavitate & qualitate sua multum accedit.

Hydromel simplex præparaturus accipe aquæ communis pintam unam, & quum coquendo ebulliverit, adde mellis candidi ℥js. bis terve spumam oborientem subtrahe, post liquorem linteo transfunde, & pro potu communi adserva. Hoc igitur hydromel vetustioribus, tussi ac difficili expectoratione laborantibus, eximie proficit. Imo & pro detergenda putredine ulcerum in pulmonibus & abdomine oborientium commendatur.

Pro conficiendo hydromele vinoso tibi veniant aquæ communis libræ viginti, & quatuor mellis candidi; has in aheno cupreo, stanno obducto misceas, tum lentioris ignis auxilio ad consumptionem tertiæ partis ex humiditate, seu eo usque excoquas, quo ovum, liquori paullulum jam densiori supernatare conspexeris. Spumam interea oborientem, sollicitus subducas, post liquorem dolio commissum solis calori vel hypocaufti, per quadraginta dies, id est: usque dum omnis fermentatio cessaverit, exposnas, dolio interdum agitato. Post dolium probe obtures, & in cella ad usum conserves; stomachum scilicet corroborandi virtutem, junctam habet suo saporis, quo vinum Hispanicum imitatur. Exiguus cyathus pro dosi conveniente cedat.

Variæ adhuc aliæ hydromelis species componuntur. Sic v. g. plantas vulnerarias eidem admiscant, singulas totidem indicationibus morborum pulmonis seu abdominis, destinatas. De quibus infra.

Pharmacopoeæ aliæ, bina adhuc alia ex melle præparata adservant, nempe oxymel simplex, & scylliticum. Illud scilicet præparatur, dum portioni aceti candidi duplo major mellis quantitas addatur, & omnia eo usque ebulliant, quo syrupi consistentiam adquisiverint. Ex hoc igitur si mudum accipiatur, quantum dimidia pars cochleari capere potest; & ℥ij. pro dosi tunc commendantur, quum decoctionis convenientis pintæ uni addantur. Faciunt ad incidendos resolvendosque humores viscidos & pituitosos, asthmate laborantium pulmonis bronchiis adhærentes. Eadem qualitas, est major virtus oxymeli scyllitico inest, cujus ℥s. ad ℥j. pro dosi, gargarismos, potiones bechicas, & Loochos incidentes intrare solent.

Chymica arte ministra, mel & aquam destillatam, & spiritum, & oleum, & parum salis fixi suppeditat.

Aqua mellis, odore gratissima, sapore subacida, cordialis, pectoralis atque aperitiva, dosi ℥ij., ter quavis die hausta, lac mulieris lactantis rarefacit. Coma elici dicitur, si spongia, hujus aquæ plena, caput quotidie irrigaveris.

Spiritus mellis aperitiva virtute præditus, julapiis suavem acrimoniam conciliat.

Oleum contra cariem ossium adhibetur, & sal fixus, acer & penetrans ad liquandos & attenuandos humores viscidos, dosi ℥j. ad ℥ij. veniat. Nec tamen adeo frequenti Medicinæ usui cedunt mellis præparata Chymica posteriora; Galenica potius & supra exposita, aliaque quædam præferuntur; qualia sunt: mel violaceum, mel rosaceum, mel mercuriale, cætera; hæc enim gargarismos & clysteres quosdam emollientes, laxantes & refrigerantes, Pharmacopoeis omnibus communes, ingrediuntur.

Vinum melle mixtum, seu vinum melleum, si de externo mellis usu quæras, optimum est ad purificanda ulcera, & cicatrices brevi obducendas: Idem illud calcinatum, dentifricium pro abigendo tartaro excellentissimum evadit.

Aqua mellis pro collyrio adhibita, videndi facultatem exacuat, & maculas in cornea subortas profligat. Imo, quam *aquam mellis regiam odoriferam* dicunt, lichenes aliasque cutis maculas feliciter depellendi virtute gaudet.

Fæces apum, sive reliquum illud quod melle placentis expresso, remanet, pro præstantiore resolvente contra pleuritim, & inveteratos laterum dolores, æstimatur; dummodo fæces illæ in aceto segnius excoctæ sive frixæ, duplici linteo rariori interpositæ, cataplasmatismore, lateri doloribus vexato applicentur, eidemque continuo inhærentes interdum aceto calido irrigentur. Tumoribus frigidis, œdematosis, & resolutu difficilibus applicatæ, tumores dissipant, & parti læsæ tonum ac pristinum vigorem conciliant. Illis tandem, qui equorum morbos curant, frequens earum fæcium usus est, contra contusiones equorum, ac illas præsertim, quas nervorum paralyses dicunt.

℞. radicis enulæ minutim concisæ ℥ij. Bul. cum aquæ communis sextariis tribus, ad remanentiam pintæ unius. Circa finem bullitionis add.

Folior. hyssopi

hederæ terrestris, ana pugill. j.

Mellis candidi ℥js:

Denuo igni admove, quo parum ebulliant, & semel mellis spumam subducere possis. Post col. & habebis hydromel pro astmathe humido, & renum atque vesicæ incommodis. Pro dosi inter prandium veniant cyathi ampliores, num. iiij.

℞. Florum & summitat. recent. & mundat. Bethoniæ

perforatæ

verbasci albi

veronicæ maris ana pug. js.

vel pugill. j. si duos saltem species elegeris. Affunde omnibus aquæ calidæ pintam unam, quo in vasi probe clauso, per dimidiam horam conserventur. Post adde mellis albi Narbonnensis ℥js.

Col. liquor, & erit hydromel, pro potu continuo in Phtisi pulmonaria, si cum

si cum spūto excretionēs purulentæ ejiciantur, & ægrotans lac vel aversetur, vel perferre nequeat.

Rx. Avenæ optimæ lotæ & mundat. ℥ij.

Radic. chicor. silv. rec. & concis. ℥js.

Bul. cum tribus sextariis aquæ fluviatilis, per dimidiam horam. Sub finem coctionis adde

Cryſtall. mineral. ℥ij.

Mellis albi ℥ij.

Bul. denuo, aſt parum, quo ſemel mellis ſpumam retrahere poſſis. Tandem vero col. & vaſi argillaceo ad refrigerandum immittas. Cujus doſis ſunto quaterni quotidie cyathi, tepidi hauriendi, bini ante-meridiano, bini pomeridiano tempore; continuato per xv. dies, ptiſanæ hujus uſu; ineſt ſcilicet ipſi virtus temperans atque aperitiva, cujus ergo mirifice confert ad expellendos flatus, ad ſedandam ſanguinis efferveſcentiam, ad incidendam denique & proſtigandam materiam viſcidam, pulmones confarciendam.

Rx. Furfuris loti.

Folior. malvæ ana manipul. j.

Ebulliant in q. ſ. aquæ communis ad remanentiam ſextarii unius. Col. & addas mellis violacei ℥ij., ut habeas clyſterem emollientem & refrigerantem, contra æſtus & conſtipationes inteſtinorum.

Rx. Sanguin. Dracon.

Santal.

Corall. rubr. præp.

Gran. Kerm.

Alumin. rupium ana ℥ij.

Abeant in pulverem omnia, & additis mellis roſacei clarif. ℥iij., bull. ad conſiſtentiam electuarii ſolidi; & habebis linimentum antiſcorbuticum, cujus portiunculam lintæ telæ rarioris, crudæ, & tenuiſſimæ fruſtulis illinas, & cubitum iturus gingivis adplices, uſu per tempus continuato.

Rx. Ficus pingues num. vj.

Bul. in ſextario lactis, & ſeptiario aquæ communis, ad remanentiam ſextarii unius. Add. poſtea mellis communis ℥j., & habebis gargarisma leniens, leviterque detergens, pro aphthis & carcinomatibus, os & guttur infeſtantibus.

Compoſita autem, quæ ſingula admixto melle conficiuntur, nimia ſunt, quam ut hic loci omnia percenſeri poſſint. En tibi quædam, reliquiſque notabilia. Spiritus ardens ceraſorum nigrorum, juniperi, cochleariæ, roſmarini, aliorumque officinæ Pariſienſis. Electuarium Diaphenicum, Electuarium Caryocoſtinum, Benedictæ laxativum, Hyera Picra, confectio Hammech, Orvietanum vulgare, Philonium Romanum, Unguentum Ægyptiacum, reliqua, Pharmacopoeæ ejusdem. Mel denique Narbonnenſe, Rori Solis, Theriacæ, Mithridato, & Dentifricio officinæ ejusdem, ineſt.

Cera tandem, cujus ſoliditatem ac duritiem nemo non habet cognitam, duobus liquoribus, inter ſe mixtis conſtat, phlegmate nimirum copioſo, ac acidum ſolutum ſecum gerente; tum vero oleo. Cera ergo dum igni nutrimentum præbet; habes, quod dicas, aquam parciſſimo quodam ſulphure animatam ardere. Quæ quum ceræ ex analyſi a Cel. Lemery inſtituta, comperta habeamus, en tibi L. expoſita ceræ principia, quibus vis
ejus

ejus emolliens, leniens atque resolvens tribuenda venit. Præoptanda interim cera esto illa, quæ recens, dura, compacta, & tactu parum glutinosa, colorem præbet flavum pulchriorem, & odorem amœnum, mel quodammodo referentem, ori tandem insipida videtur. Procedente tempore duritiem induit, & odoris pariter ac saporis partem amittit.

Ceram virginem, seu *virginum* illam ejus speciem dicunt, quæ nullo igne accedente præparatur. Cel. *Lemery* nullam esse existimat ceram virginem, præter *Propolim*; sive speciem *Masticæ* rubicundam seu flavam, multum olei, at parum salis volatilis acidi continentem. Errat sane, nec enim nisi improprie, *Propolis* ceræ virginis nomine adpellari potest.

Cera candida, artis ope accedente, ex flava comparatur. Hanc enim ignis calore liquefaciunt, sæpius aqua lavant, in strata subtiliora dividunt, eaque asseribus seu tabulis ligneis superstruendo per vj. ad viij. hebdomades soli exponunt, quo facto colori flavo candidus succedit. Imo quo excellentior fiat ejus candor, liquefactæ tartarum vel crySTALLUM tartari admiscent, hujus enim ope faeces quædam abeunt, cera autem clarescit. Candidissimam nobis ex *Brittania* & regione *Andigavenfi* adportant, quæ si nitenti suo candori, & pelluciditatem & claritatem junxerit, si dura fuerit & sapore insipida, si fragilis, si manducantis dentibus haud adeo tenax inhæserit, optima judicanda esto. Flavæ instar, emolliendi & leniendi, parciore tamen resolvendi facultate gaudet; salis enim sui pars maxima lotione abiit. Alia superest ceræ species, granulis constans, eaque non est, nisi cera alba liquefacta, ac dum aquam frigidam illi addunt, virgis cæsim agitata. Ita autem rarefacta & candidior & pommatibus magis adaptata redditur.

Ut autem pro apum varietate varia mellis genera reperiri diximus, sic & variantes ceræ species videbis; & quod maxime miratu venit, alia cera præ alia difficilior albescit. Sic integræ sunt regiones, & in illis congestæ ceræ eximium candorem nulla ars unquam conciliare potuit. Sic aliæ sunt terræ, quarum alvearia varia, variæ qualitatis ceram continent, aliam scilicet, quæ facile, aliam vero quæ ægerrime, imo numquam fere dealbescit. Dictis exempla subjungam. Apud Gallos etenim cera *Solonienfis*, *Bellovacensi* & *Vastiniensi* satis longe antefertur, ut in proverbio est: *mel Bellovacense, cera Solonienfis*.

Cera ipsa denique quum tenacitatis suæ ergo & glutinis sui causa obstructionibus facile originem suppeditat, admodum rare intus recipitur. Sic enim mulieres virginesque malacia incitatas, ex cera comesta faciei pallore, intestinorum obstructionibus aliisque adfectas fuisse novimus. Interdum vero & ceram medio satis certo cedere constat. Huc dysenteriam referas. Pro illa scilicet accipias malum cotoneum, vel quodvis dulce, illudque transversim dissecando dividas in binas partes inæquales; post partem alteram, majorem scilicet, excaves, excavatæ ʒij. circiter ceræ flavidæ seu albæ immittas; tum huic alteram partem superponas, & pomum in favilla coctum, quo liquefscens cera omnem ejus substantiam penetrare possit, ægrotanti, ut comedat, exhibeas: Quo accepto. statim plerumque dolores recedere, & cita alvus sisti solet. Qui quidem dysenteriam curandi modus nec antiquis ignotus, jam *Dioscoridis* auctoritate nititur.

Distillatione facta butyrum ex cera redibit, quod linimenti instar parti

læsæ adplicatum, tumores, humores frigidos & articulorum dolores resolvit, Paralyfi etiam, pernionibus & mammarum fissuris medetur. Imo oleo ex cera elicito, quod non est nisi butyrum rectificatum, antepositur. Olei hujus gutt. iiij. ad x. cum aqua naparum seu parietariæ ore recipiendas suadent; quod quum summa virtute diuretica gaudeat, multum facit contra retentionem urinæ, & ad dissolvendam renum ac vesicæ saburram, colicæ nephriticæ causam.

Amplissimus, ut brevis sim, usus est ceræ in Chirurgia; illa enim pro basi quorumvis ceratorum, emplastrorum, pommatorum, unguentorumque fere omnium Chirurgiæ venientium venit.

Nec non Propolis, virtutis suæ digestivæ, attenuantis & resolventis ergo, ad promovendam abscessus maturitatem & ulcera maligna, jam unguentis ac emplastris additur; jam prunis imponitur, & vaporem ascendentem, tussi ferina & inveterata laborantem, infundibuli ope excipere jubent.

Passim etiam cera quædam, pallium seu citreum malum colore referens, prostat. Hæc autem originem debet frustulis ceræ albidæ hinc inde collectis, post liquefactis, & terræ meritæ contusæ infusis; post colato & refrigerato liquore bacillis cereis conficiendis venit.

Varia cæterum sunt, quæ varium colorem ceræ conciliaturi admiscunt. En v. g. ceram viridem, dum albam addito terebinthino emolliunt, post autem ærugine contusa tingunt; hæc cera emplastri instar adhibita, pedum callos emollire solet. Tum cera rubra, quæ ex alba, terebinthino mollescens, deinde cum radice anchusæ seu minio tincta, componitur, hæc inquam, externe adhibita, resolvendi virtute pollet, imo & sigillis majoribus exprimendis infervit. Tandem cera gommea, seu ex cera liquefacta, & pice pinguiori conflata, qua aulæis splendorem conciliaturi artifices utuntur. Nec tamen ceram sigillatoriam cum cera ex apibus proveniente confundas, utrique enim nulla est nisi nominis saltem cognatio.

℞. Spermat. cet. ℥ss.

Ceræ candidæ ℥j.

Galbani cum aceto præp. ℥ss.

Olei juniperi q. s.

Fiat emplastrum s. a. contra tumores mammarum ex coagulatione lactis proficiscentes.

℞. Olei olivarum ℔j.

Ceræ recentis ℔ss.

Cinnabar.

Minii ana ℥j.

Et primo quidem oleum & cera, ignis ope liquecant, tum igne subducto cinnabarum miniumque addantur, omniaque continua spatulæ ligneæ agitatione commisceantur, usque dum refrigescant. Tandem vero in vase argillaceo adserventur. Et cerati hujus excellentissimus est pro ulceribus crurum, si scilicet emplastri, quotidie renovandi instar, adplicetur.

℞. Olei olivarum ℥j.

Ceræ virgin. ℥ij.

Favillæ superposita liquecant, & s. a. u. ut habeas linimentum contra adustiones præstantissimum, quo partem læsam adfricabis, post charta bibula

bula obteges, & usque ad salutem integram, brevi plerumque succedentem, eadem illa reiterabis.

Rx. Olei olivarum ℥.iiij.

Aquæ rosar. septiar. ℥.

Ceræ recentis ℥.℥.

Terebint. Veneti ℥.j.

Santal. rubr. in pulver. ℥.ij.

Ollæ fictili recenti immittantur omnia, tum vini rubri septiariis js. affusis bul. per dimidiam horam, post recepta ab igne olla refrigescat, & unguentum a vino & pulvere fundum vasis petente separetur. Ut habeas unguentum contra plagas & gangrænas ulcerosas seu cariosas optimum, quo tepefacto partem ungito, post charta bibula tegito, & ad salutem perfectam parti redeuntem continuato.

Cera flava inest Balsamo Leucatellii, unguento mundificativo Apii, Styraçis, Althææ, Matricariæ aliisque, quæ in officina Parisiensi reperiens.

Cera alba ingreditur Unguentum desiccans rubrum, Diapompholix, album Rasis, Unguentum pomatum, Emplastrum Minii, cerussæ & spermat. ceti, & alia officinæ ejusdem.

A R A N E A .

SEX in primis araneorum genera sunt, quæ Cel. *Homberg*, Reg. Scient. Academ. Sodalis observationibus de araneis, descripta referimus. Ille enim sequentia enumerat: 1. araneam domesticam, domuum in angulis suam telam quæ conficit, 2. araneam hortensem, quæ in aere libero telam rotundam exiguum, densiorisque texturæ componit, & ipsa in centro ejus per diem residet, 3. araneam cellarum nigram, rimas cujusvis muri vetustioris inhabitantem, 4. araneam vagam, haud uni nido, cæterarum more inhærentem, 5. araneam campestem, pedibus prælongis instructam, & fœniseçis nomine venientem, 6. araneam rabiosam, seu Tarantulam apud Italos, & in primis prope Tarentum, Apuliæ urbem, notissimam. Ast neutiquam omnis araneorum varietas sex speciebus earum enumeratis absoluitur, etenim & figuræ, & magnitudinis, & coloris, & locorum sibi frequentium diversitate multo magis inter se differunt. Sic Cel. *Linnaeus* unam & triginta varii generis araneas in Suecia, *Listerus* vero octo & triginta in Anglia sibi metipsis visas recensent. Imo paucis abhinc scriptum aliquod satis curiosum prodiit, quod in fronte gerit: *Observata quædam ad historiam araneorum aquatilium inservientia*.

Nos autem, quum ex aranea domestica præcipua Medicæ arti utilitas redeat, nullius, nisi ejus descriptioni inhærendum esse statuimus.

Araneus. Offic. Schrod. 337. Merr. 203. Dal. 384. *Araneus telarius*, quibusdam *Araneus domesticus*. Mouff. 132. Jonst. 99. *Araneus subflavus*, hirsutus, prælongis pedibus, domesticus. List. 59. Raii 27. *Aranea fusca*, dorso maculis quinque longitudinalibus subcontiguis nigris, anterioribus longioribus. Linn. Faun. Svec. 1215. *Aranea muscaria*, seu muscatrix, domestica; *Araneus retarius*, in fenestris degens. Nonnull.

Est autem aranea domestica, corporis magnitudinem si quæris, mediæ, si qualitatem, hirsutæ, si colorem, flavidi seu fulvi debilioris, ac maculis

undecumque obsita. Corpus ejus totum commode abit in partem anteriorem, in posteriorem & in crura. Pars anterior dura, testacea, pellucida caput & pectus continet; posterior autem, tenuiore pelle obteſta, & venter audit. Utraque contigua quadam continuatione ſtrictiore, ſeu annulo exiguo, cohæret. Octo numerabis pedes, eoſque pectori ſeu thoraci infixos videbis, & in parte ſua anteriore duos, & ut chelæ cancrorum, articulationibus inſtructos, & in extremitate quavis, duplici ungula adunca ac articulis conſtructa munitos. Bini pedum poſtremi autem omnium longiſſimi ſunt, decreſcunt longitudine bini primi, primis breviores ſunt bini ſecundi, breviſſimi tertii. Necnon in pedis cujuſvis extremitate, duplici ungulæ intermedium faſciculum quendam ut ſpongiam ſubmadidam, pariter ac in apice pedum muſcæ obſervabis. Quem araneis & muſcis eundem uſum præſtare cenſemus, ut ſcilicet pedibus in altum obverſis, lævi cuius corpori obambulare poſſint, glutinofus enim faſciculi hujus liquor ſufficit, quo vel læviſſimo corpori adglutinari poſſint. Idem ille temporis tractu exareſcit, & nec muſcam nec araneam ætate provectiorem, tabulam ſuſpenſi ſpeculi vitream totam adſcendendo emetiri poſſe videbis, quidquod ſi vetuſtior quædam muſca ſive aranea, vaſi fictili intus vitreo, (noſtratibus: porcellaneo) profundiori, caſu illapſa fuerit, egredi amplius nequit, fame pereat, necesse eſt. Sic & materiã conſciendæ aranearum telæ venientem, tempore exareſcere conſtat. Aranea vetuſtior, ob defectum hujus materiæ telam ſuam ruptam, vel vento, ſcopis, aliavē ratione deportatam reficere nequit; aliam ergo ſui generis araneam, ſibi debiliorem quærit, hanc ſuo domicilio expellit, ſibi illud adpropiat. Forſan & liquor, ſpongia pedum detentus, vel prorſus idem vel ſimilis iſti eſt, qui telæ conſciendæ inſervit, utrumque ſcilicet, pari ratione, cum tempore exſiccari videmus.

Nec ſolum octo pedes ad incedendum, ſed etiam alios binos in aranea obſervavimus, capiti vicinioreſ, breviores, nec terram pertingentes, nec inceſſui inſervientes, ſed pro brachiis manibuſque, quarum auxilio prædam, ungulis detentam, pro lubitu reponit, obvertit, & ex omni parte ori ſuo exhibet. Os illud forcipes ſuos immediate ſubſequitur. Hoſ vero chelis cancrorum ſimileſ, & duos quaſi ramos parum depreſſos, cruſta duriori obteſtos, & frontis parti inferiori perpendiculariter adhærentes, (adhærent autem mediante pelle quadam flexili, tamquam cardine pro aperiendis & claudendis forcipibus) nec non in margine utroque ſeſe jungente, aculeis duriffimis conſitos eſſe conſtat. Hiſ igitur forcipibus adjuncta aranea prædam arripit, arreptam ori admovet, admotam pro nutrimento ſuo exſugit; cuius etiam extremitati illorum inferiori ungula quædam adunca, felis ungui ſimilis, data eſt; illaque dura, magna & articulis ita inſtructa, ut eam jam deſlectere jam erigere valeat animal, prout forcipes ipſi jam erigendi ſunt, jam deſlectendi. Iſtas vero ungulas pro conſtringendi forcipis cujuſvis extremitate, ac impedienda prædæ fuga cedere ducimus; mediantibus etenim ungulis forcipi figura trianguli undecumque occluſi accedit, cui, deficientibus ungulis, non niſi bina latera forent. Eadem quoque ungulæ articulationibus inſtructæ ad elevandam & deprimentem prædam forcipibus inhærentem facere poſſunt.

Octo ſunt araneæ domeſticae oculi, exigui, magnitudine fere eadem omnes,

omnes, satis conspicui, nigridi, & in fronte, in circuli oblongi figuram dispositi.

Ventre gaudet turgido, ubivis fere crassitudinis ejusdem, supra tandem duplici serie macularum flavescentium, ac lineolis obscurioribus interceptarum, confito. Anum circumdant sex papillæ musculosæ, in basi latiores, ubi exeunt acutiores; pro totidem colis venientes, etenim in illis glutinosus ille liquor efformatur ac continetur, qui tandem illos egressus & arefactus telam componet. Papillæ istæ libero motu in omnem partem moventur. Quatuor ex illis vel nudo oculo, aut reliquæ binæ non nisi lentis opticae ac microscopii ope innotescunt. Imo singulæ papillarum majorum, denuo aliis innumeris constant papillis minoribus, quibusvis suo sphinctere, quo aperiri & occludi possint, instructis; quorum auxilio, pro lubitu suo, jam crassiora, jam subtiliora fila construit aranea.

En fila sua componendi rationem. Cogites tibi araneam, in aliquo domus angulo telam constructuram, posito, quod omnia puncta ubi filorum extremitates adglutinabit, pertingere possit atque adire; hæc igitur sex suas papillas dilatat atque exserit, eodemque tempore in extremitatem coli prodeuntem videbis guttulam liquoris visceris, filorum materiæ, hanc guttulam violentius exprimendo parieti adfigit; tum recedendo primum telæ futuræ filum colo suo producit, emittit; & quum ad alterum punctum priori oppositum pervenerit, producti hucusque fili extremitatem alteram ani pressione muro adglutinat; tum $\frac{1}{2}$ lineæ intervallo a filo primo, secundum pari ratione, illi parallelum, sive spatio undecumque eodem distans producit, tandem ubi ad prioris extremitatem alteram pervenerit, eadem ratione adglutinat. Pergit, & totidem fila parallela addit, quanta telæ suæ latitudo futura est. Fila hæc catena telæ dici merentur. Post filis transversalibus parallela decussat, transversalium extremitatem alteram muro, alteram filo omnium primo perpendiculariter adglutinat, sicque aliud telæ latus apertum relinquit, quo muscis captandis liber pateat ingressus. Subtegminis nomine fila hæc decussatim ducta dicimus, quum parallela prima catenam nuncupavimus. Et quum recenter papillas egressa, omnibus quæ tangunt facile adglutinentur, in promptu ratio est, quod fila ista in punctis intersectionis suæ conglutinata, telæ suæ fortitudinem concilient; quum e contrario soliditas telarum nostrarum ex filis intertextis, id est (ut artis dictione utar) subtegmine catenam decussante, alternis eam subeunte, alternis eidem superjacente pendeat, modo ab ingenio profecto. Imo quo adhuc major vis cohesionis telæ suæ comparetur, aranea quævis puncta intersecantia transit, ani papillis comprimit, novum liquorem suprafundit; post exterioribus telæ fimbriis, seu extimis filis tripla vel quadrupla alia addit, quo accedente multiplicata fortitudine eo difficiliores rumpantur. Tanta autem quantitas liquoris inest araneæ omni, quanta sufficit duabus tribusve telis novis construendis, nisi forsan in construenda prima nimis magna, justo majorem liquoris quantitatem profuderit; quod dum accidit, deficiente deinceps tela alius telam vel derelictam querat, vel dominam expellat, & de domicilio certet. Juniores præsertim araneæ telas suas primas facile derelinquunt, dum novas exstruunt; quod si autem aranea construendæ telæ ipsamet impar, nullam alius reperiverit, pereat, necesse est, etenim extra telam aranea vivere nequit.

Telam plerumque magnam & spatiosam granariis & in angulis camerae, parum ab hominibus frequentatae, fenestris vicinam, contexere solet. Quotannis exuvias extrahit, & totum corpus, imo pedes nova pelle obteggit, quod araneae domesticae proprium esse docet Cel. *Homborg*. Longavrior esse solet, & Illustris Academiae Sodalis, per quatuor subsequentes annos quondam ejusdem araneae observationi studuit, & moli corporis vix ullum, cruribus autem multum incrementi accessisse detexit. Imo ætate prodeunte, sic *Listerus*, omnibus majorem magnitudinem pertingit aranea domestica, imo monstro videtur similis, nec tamen corporis sui moles admodum excrescit, sed pedes crassissimi atque longissimi, ac pilis proluxioribus obtekti, singularis magnitudinis speciem ei conciliant. Addit Vir Cel. quod non solum in ædibus, quarum parum habent curæ, sed etiam in ipsis silvis frequentissime reperiatur. Quovis mense, novam pellem araneas induere docet *Monffet*, experientia refragatur. *Listerus* vero, discrimine accuratiore aranearum juniores sapius, provectiores autem non nisi vere quovis redeunte, & hausto nutrimento novo, nova se pelle munire adserit.

Physicorum alii, dum & in araneis ovorum plenis signa marem indicantia viderint, Androgynen, seu Hermaphroditam quamvis araneam esse docuerunt. Facile autem, sic *Aristoteles*, araneum ab aranea dignoscere poteris, foemellæ corpus etenim masculino majus, & crura longiora, flexibilia, & edendo motui ac conficiendæ telæ aptiora conspiciuntur. Adsentitur Cel. *Homborg*, ac quemvis marem inter araneas, sui generis foemella minorem esse contendit. Etenim vel 5. ad 6. aranei hortenses vix unam aranearum pondere suo adæquabant, quum experimenta institueret Vir Cel. Res apud insecta frequens, ac quadrupedum proportioni contraria, horum mares nempe foemellas & magnitudine & robore superant. In generalioribus *Listeri* observatum leges, quod mas aranearum octo oculis instructarum in extremitate antennarum seu brachiorum quosdam quasi nodos exhibeat, foemella iis careat.

Tantum vero, sic ille pergit, de nodis in araneo octo oculis instructo, constat, quod coitus instrumentis quibuscumque veniant; quibus autem, hæreo. Alias partem mari propriam seu hujus vaginam, suo officio alternis fungentem habui. Lectoris esto dijudicare, si rem tetigerim. Confirmat eadem Cel. *Lyonnet* in observationibus egregiis ad *Lesseri Insecto-Theologiam*, ille enim ita: Sunt autem nodi prædicti notatu dignissimi. Vix crederes censeo, attamen hi instrumentis masculi generationi inservientibus destinati sunt; & meismetipsis ego oculis sapius observavi, araneas horum ope coivisse. Cæterum generis hujus mares corpore quidem parviore, ast pedibus longioribus quam foemellæ gaudent. Risum sane vel gravissimis movet coitus sui præambulum. Utraque enim graviter ac quasi cauta in marginem suæ telæ se confert, pedes parum protendit, telam commovet, & pedis tantum extremitate, ac si adpropinquandi animus deesset, altera alteram tangit. Terrore utraque subitaneo corripitur, præceps delabitur, & ex filo suspensa diutius hæret. Redit animus, redeunt ambæ, & quod coeperant opus, continuant. Diutius dubium alternis tactibus immanet, tum major vicinia & familiaritas succedit. Tandem amplexus mutui & frequentiores & audaciores; evanescit timor, & prodeunte tandem familiaritate, mas operis sui finem pertingere paratus, nodum alte-

alterum antennarum repentim & quasi elaterii opere aperit, reiectum apparet corpusculum albidum; tortuoso quodam motu antenna inflectitur, ac ventri tandem foemellæ, thorace paullulum inferius juncta, naturæ voluntati convenientia agit, perficitque. Quod quidem dubium coitus initium aranearum singulare videtur illi, qui nesciat, quanto alias inter se odio incitatae araneæ ac sibi vicinæ, excepto coitus tempore, se enecare solent. Cognito autem timiditatis suæ principio, haud aliena, sed provida potius & circumspecta videtur vel aranearum cura, in explenda cupiditate illa, quam incautius ei litando, sibi perniciosissimam redderent. Sint exemplo tibi, Lector amice.

Admodum singularis, & alias ab insectis alienissimus igitur est aranearum coeundi modus, num vero singularitatis suæ ergo negandus? neutiquam. Et quamvis *Aristoteles* cum sectatoribus araneas dorso invicem obverso, quamvis aliqui recentiorum ventre utriusque se tangente, coire doceant; nos tamen *Cell. Listeri* & *Lyonnetii* sententiæ accedimus, quos in observando adcuratissimos novimus. Imo nosmetipsi sæpius præludiorum inter araneas singularitatem, ac blandientem nodorum ope, masculum foemellæ admirati sumus, ast finem eorum observandi occasio defuit. Viro-rum *Cell.* auctoritate nixi certum habemus, quod genitalia maris in capite, foeminina in ventre sita sint. En interim aliud opinionis monstrum: *Paracelsus* nimirum & ideis & terminis singularissimus, adserere non erubescit: araneas pariter ac insecta reliqua, ope diaboli, ex menstruis mulierum generari. Contendunt alii, quod putridæ cuidam materiæ suam araneæ originem debeant. Ast & hæc sententia ex præjudiciorum hodie vel obsoletorum, vel plebi saltem arridentium adparatu, petita est.

Cæterum omnis generis araneas oviparas esse scito; & alias quidem, ut hortenses, & foenifeces dictas, plura, alias autem, ut domestica, pauca saltem ova excludere. Nec nisi coitus perficiendi ergo, sic *Listerius*, araneus araneæ vicinus, coitu peracto ab eadem separatur. Nec nisi annuæ vel bimulæ araneæ, dum magnitudinis destinatae terminum adtigerint, ova reponere solent, illaque perfecte sphaerica, cortice seu involucri molli, membranoso, pellucido, plerumque flavida, vel cœrulea, vel rubicunda, magnitudine papaveris granum referentia. Ova sua, ait *Cel. Homberg*, in partem telæ reponunt, post in acervos colligunt, in nidis tandem excludunt; imo dum ovis incubant nido expulsæ, forcipibus suis correpta secum deportant. Renuit *Listerius*, quod ovis incubent, & ait: pellem earum frigidam, ut serpentum, tactu ova haud posse fovere, sicut avium ova foveantur. Alias quidem ovis proximas residere vel secum ova deportare, nec tamen illa excludendi desiderio, sed conservandæ posteritatis cura. Unius & viginti dierum spatio exclusa araneola, conficiendis telis occupatur, & quasi oculis innotescens incrementum accipit, quamvis nil alimentorum adsumere videatur. Quod si interim quædam musca minor obvenerit, illam captant, & suo quasi nutrimento accommodant, si nulla obvenerit, eadem excretio succedit, vitæ sub initium enim quotidie duplo majorem molem adsequuntur, nec alimentum captant sensibile.

Sunt, qui auditu carere volunt araneas, quas vel strepitu excitato haud aufugere videmus; ast præstantioribus instructa est oculis, fixis, ast adamantino splendore fulgentibus, & in fronte capitis rotundi & collo desti-

tuti conspicuis. Quam quidem singularissimam, nec nisi araneæ propriam structuræ rationem mirare defines considerando, quod araneæ, collo, hinc capitis motu destitutæ, pro supplendo hocce defectu, oculorum multitudine opus erat; & quum ex præda tam agili ac vaga, musca scilicet, vivat, visu in quamvis partem respiciente, & prædam suam saltu adtingendi facultate (ne scilicet motu capitis araneæ prædam quærentis, musca tam timida perterreatur, aufugiat) instruenda fuerit.

Aranea ab omni tempore præstantissima netrix atque texitrix habita, & nendi pariter ac texendi artis magistra credita est. Fabulam diceres, quæ de ejus industria quotidie vides, nisi videres. Tactu in primis præstantissimo gaudet; etenim in centro suæ telæ quasi excubias agendo residens, muscam, si qua vel remotissimam telæ extremitatem tetigerit, statim percipit. Hinc illud antiquorum:

Nos aper auditu, lynx visu, simia gustu,

Vultur odoratu præcellit, aranea tactu.

Araneam igitur sua tela, eaque pro aptitudine loci, jam triangulari, jam oblonga, vel circulari, & angulo domus adfixa residentem, muscas, culices, papiliones, tineas, aliaque hujusmodi insecta, expectare videbis, quo filis istius irretita, prædæ & nutrimento suo veniant. Prædam igitur captam si exigua fuerit, forcipibus illa suis corripit, ad nidum deportat; aut prædam suæ ipsius respectu majorem, & alarum sive pedum agitatione victrici molestias facessentem admodum multis filis, ex ano suo protractis eo usque obvolvitur, quo omni motu libero interdicta fuerit capta, post undecumque vincitam in nidum reportat, & omnes corporis humores exsugendo, partibus vero solidis plerumque parcendo, in alimentum convertit. Accidit sæpe numero, ut tanta sit moles muscæ, cui ne irretiendæ quidem sufficit aranea; tunc illam libertati suæ restituit, vinculis liberat, seu telæ partem cui inhæserat, dilacerando, muscam ejicit; statim exinde autem vel reficiendæ telæ ruptæ, vel construendæ prorsus novæ sese accingit.

Aere araneas nutriri crederes, sic Cel. *Lyonnet*, nisi bini forcipes majores cornua reflexa referentes, & capiti infixi loquerentur, solidiore nutrimento illas egere. Illis itaque excavatis, & in extremitate sua fissis pro ore æque ac proboscide utuntur, illa insectorum corpori exsugendo intrudunt, illorum ope omnem insecti arrepti succum exsugunt. Quæ quum ita sint, errare vides Virum *Fridericum Garmann*, Acad. Natur. Curios. Sodalem, dum araneas solo aere nutriri, sua experientia comprobatum esse ducit. Sinistræ opinionis originem illa forsan dedit experientia, qua araneas, reliquis insectis diutiores, absque nutrimento vivere observavit. Et Cel. *Lyonnet* sapissime cerucas atque araneas vitris inclusas, nullo ipsis cibo subministrato per annos conservavit, aliasque non nisi elapso tandem biennio periisse vidit. Quondam & ego, sic *Joannes Francus*, in *Ephem. Germ.* araneam hortensem vitro cera obturato inclusi, illa autem hyemis frigori violentissime exposita, & omni prorsus alimento carens vitam conservavit. Peracto igitur xvij. hebdomadam jejuniis, ac Aprilis mense, viventem ipsi muscam præbui, quam avidissime arreptam in massam deformem, ac erucæ excrementis similem reduxit. Durante Julio mense, secundam ei muscam exhibui, qua consumpta suas deposuit exuvias; sic novem menses præterire, illa autem præter duas muscas, nil habuit quo nutriretur. Nec

tamen

tamen alacritatis five vigoris quidpiam amisit, imo tantam telam conficere pergit, quantam per spatium vitri facere licet.

Quæ interim de inimicitia araneam inter & serpentem vel bufonem obvia recensentur, nimis prodigiosa sonant, ut veris adnumerari possint. Omnes fere ubique narrant: quod dum araneæ telam subit bufo, aranea, bufonem hiantem ore qui inimicam exspectat, ictura descendat, certaminis eventu dubio; etenim araneam correptam bufo devorat; ictus autem ab aranea bufo veneno infectus est; tunc ille, si fides fabulæ, pro antidoto plantaginem, herbam quandam, quærit, comedit, post revertitur, certamen renovat; deficiente autem herba turgescit, statim emoritur. Quæ num vera sint, num falsa experturus, sæpius ego, sic *Cel. Lyonnet*, vel ex maximis araneis unam in bufonem demisi, vel bufonem araneæ telæ supposui, at numquam, ne quidem desiderium ineundi certaminis in alterutro observavi. Forsan vitro hostis uterque inclusus prælium iniret. Experimentum, si placet, instituas; nec tamen, nisi oculis tuis convictus, facti veritatem adferas.

En! quæ a Viro *Cel. Friderico Garmann* observata in *Ephem. Germ. Dec. I. Anni I. pag. 224.* de inimicitia bombycem & araneam inter obvia, leguntur: Musæo meo bombyces detinui, transformationes suas observatum, quondam illud intrando araneam bombycis dorso inhærentem animadverti; en causam mortis tot meorum vermium vel maximorum, plures etenim ex bombycibus perierant; nec coloris mutationem ullam, sed guttulam tantum liquoris albidum in dorso, vulneris regionem quæ indicabat, ostendebant. Aranea enim bombycem, suæ artis imitatore, odio habere, eidemque insidias struere videtur. Hanc conjecturam facit *Vir Cel.*, nos autem ficulneo satis fundamento superstructam ducimus.

Certiora autem sunt, quæ de odio araneæ in araneam exponenda habemus. Minimæ equidem vicinæ vinculo nonnunquam junguntur; at proVectiores, (coitus tamen tempore excepto) sibi socias nunquam, nunquam vicinas videbis; una detentæ ne suæ ipsius speciei quidem parcent, se invicem enecant, sæpius non devorant, saltem crudelitate quadam aliæ alias interficiunt. Multa cæterum ex animalibus sibi inimica habent. Etenim & simiæ deliciis, & hirundini, lucinæ, rubeculæ, aliisque aviculis rostri acutioris nutrimento quotidiano veniunt. Sic & pseudo-vespæ majores, *Cel. Reaumurio* Ichneumones-muscæ dictæ, erucas araneasque ex collo arreptas adeo constringunt, ut his nec aufugiendi nec resistendi locus supersit, post ad nidos suos, ovis plenos, deportant, ut pullis nutrimento cedant, imo si nimios adhuc infecti motus viderint, reiterato rostri ictu statim illud penitus conficiunt. Vespæ insuper & crabrones non solum dentibus suis araneas captas enervare consuevere, sed vel ipsas maximarum telas, referente *Lyonnet*, ingrediuntur, eas in terram proripiunt, & rescissis pedibus nido suo adportant.

Maxima pars hominum odio habet araneas. Mulieribus præsertim tanto solent esse horrore, ut vel sola araneæ repræsentatio morbum ipsis conciliare possit. Interim gustus, vel integros inter populos communis maxima est differentia. Sic qui Guineæ oras accolunt, culices, qui Ceylanum, apes, qui Mexicana littora, formices, qui promontorium bonæ spei, pediculos, alii tandem, si itinerariis fides, bombyces, pro deliciis habent. Sic *Alber-*
tus

tas *M. virginem* cognovit, *Coloniæ Agrippinæ* viventem, quæ araneas, in parietibus obambulantes, avidior quærebat, comedebat. Aliam, eamque trimulam vidit *Cardanus*, quæ sibi obtemperans magno cum studio araneas comestum quæritabat, nec salutis damnum, sed pinguedinem potius & abdomen corpori conciliasse subnectit. Adeas *Germaniæ Ephemerides*, & pluribus edoceberis, quod multis qui araneas pro cibo sumserant, quam macilentum fuerint, summa corporis pinguedo accesserit. Sic alios inter, quendam militum præfectum, tanto in araneas adpetitu latum fuisse leges, ut illas studiose in patinam collegerit, ac sine ulla salutis molestia, pro deliciis comederit; desiderii sui singularitatem a matre sua, tamquam hæreditate accepisse profitebatur. Huic simillimum alium quendam cognovit *Cel. Lyonnet*. Plura refert *Cel. Kundmann*. Hinc quoque *Celeb. Fridericus Hoffman* in *Medicina rationali* est, qui scribit: desunt exempla fide digna, quibus constet, internum viperarum, scorpionum, aranearum, aliorumque pro venenosis habitorum, usum, corpori sano vel incommodum gravius, nedum mortem adtulisse. Nec quidem inficior insectorum varia multum falis caustici, nervis inimici continere; aut incommodum, quod corporibus adferunt plerumque non nisi ex ictu seu fauciatione proficisci constat. Sic & *Joannes Ludovicus Hannemann*, D. in *Ephem. Germ. Dec. II. Anni V. pag. 231.* expositis, quibus comprobat, araneas absque periculo pro cibo accipi posse, cogitatum aliquod suum addit, quod si haud omnino solidum, pium tamen dici meretur. Ille autem sequentibus: imo nova adhuc superest utilitas aranearum, quippe quæ aeris venenum adtrahendo, multa a nobis mala non dicam, stragem, avertunt. Bufonem alias: capsulam magneticam veneni terrestris nuncupant; aranea autem capsula magnetica veneni in aere latentis vocanda esset, eo potius, quum hocce venenum multo subtilius sit terrestri. En igitur novam divinæ in nos benignitatis testimonium, animalium venenosorum ac insectorum creationem; etenim eodem momento omnibus moriendum foret, quo insecta ac plantas veneno plenas terræ adimeret Deus. Et *Cel. de Reaumur* in fine *Schediasmatis ad historiam insectorum facientis* ita: ex illorum insectorum numero est aranea, contra quæ vel odium majus mentes tenet occupatas, cuius in loco suæ enarrantur de illo & illa, aranea forsan accepta mortuis; interim ex *Cel. de la Hire*, filio, patris Astronomi in locum succedente habui: quod virgo quædam, satis sibi cognita, quoties in hortis obambulando araneas viderit, statim illas ceperit, dentibusque triverit.

Alios ingenii felicitis ad excogitanda nova fuisse novimus, qui aranearum telam eidem usui adpropriare tentarunt, cui bombycis fila serica cedere solent. Quos inter eminet *Vir Illustris Bon*, Præses *Camæræ redituum* regionum, quæ *Monspeli* est, ac *Regiæ Scientiarum Academiæ* ibidem florentis, *Membrum honorarium*. Ille enim singularem diligentiam eo usque produxit, ut ex filis araneæ varia, eaque adeo solida, ac fere adeo pulchra composuerit, quam alias ex serico contexta habemus. Testibus etiam *Actis Reg. Scientiar. Acad. Anni 1710.* tibialia & chirothecas ex novo hoc serici genere constructas, in anno 1709. *Academiæ* exhibuit. Quo impulsâ *Regiæ Scientiar. Academiæ*, curam ulterius progrediendi in disquisitione repertorum detulit in *Virum Cel. de Reaumur*, & alium quendam ejusdem Societatis Socium. Summo cum studio, ut solet *Vir Cel.* investi-

gationi sese accinxit, & en sagacissime disquisitorum & detectorum epitomen: telæ araneorum ipsæ nimis subtilitatis ergo, nullius erant usus, harum enim 90. ad conficiendum filum, bombycino æquiparandum, & 18000. ad componendum filum, serico quo ad consuendum utuntur, simile. Folliculi supererant, quibus ova sua araneæ obtegunt; hos igitur, num utilitatis quidpiam subministrare possent, disquirendo reperit: plurimarum araneorum folliculos, vel paucissima, vel usui insufficientia fila exhibere; utilitatisque aliquod non nisi illius araneæ folliculis inesse, cujus tela constat radiis, ex centro quodam communi, & filo (in spiralem ducto) circumdato, proficiscentibus. Jam dispiciendum erat, num sericum ex araneis proveniens vel minori pretio quam illud ex bombycibus comparari possit, vel illud & pulchritudine ut pretio superaret? Quod primum quæstionis momentum spectat, huic responsio facilis. Vir Cel. pro nutrimento araneorum & lumbricos, & substantiam mollem, cauli plumarum recentium adhærentem, reperit; hinc muscarum captu difficilium defectui consultum erat. Ast aliud supererat obstaculum, mutuum scilicet illarum odium, cujus ergo junctim elevari nequirent. Quantus vero labor, quantique sumtus requirerentur, si singulis sua receptacula destinanda forent? Etenim vel ipsa fila folliculorum araneæ non nisi $\frac{1}{2}$ ex crassitudine fili folliculorum bombycis adtingebant; & pro eadem serici quantitate suppeditanda, 12. plo major araneorum, quam bombycum numerus requirebatur. Pro una libra serici ex araneis igitur comparanda, fere 28000. folliculi venirent, his autem adquirendis necessaria erat adhuc major araneorum nutriendarum copia, etenim araneæ foemellæ saltem folliculos, ovorum involucra componunt. Sic itaque evictum erat: sericum ex araneis multo majori pretio comparari. Jam pulchritudinis & splendoris sui præstantia disquirenda supererat. Hanc vero frustra quæsit Vir Cel., imo ne tantam quidem, quantam in serico bombycino reperit, cujus causam in subtilitate filorum araneæ magis crispiorum ponit.

Ex his quum adpareat, araneas educando nullum serici sui fructum posse sperari; superest, sic pergit Cel. *Lyonnet*, ut, si suum laborem in nostram utilitatem vertere velimus, ut, inquam, observato tempore, quo extra suam telam suspensæ hærent, ruricolæ, mediantibus rastris, suastelas, ruri frequentes, colligere jubeamus. Et sane interdum paucissimis horis, magnam earum quantitatem congererent, etenim vel integra prata eisdem aliquoties obsita vidi. Operæ pretium esse videtur, ut easdem, lini instar, carminando & nendo, conficiendis quibuscumque adaptare quæras, num quidpiam valeant experturus.

Tandem pro fine observationum suarum de serico araneorum, sequentia subnectit Cel. *de Reaumur*: Dolendum sane, quod adeo parum utilitatis, ex re tam ingeniose excogitata sperandum supersit. Esset sperandi locus, si araneas copiosius sericum subministrantes invenire possemus. Americanas multo majores esse nostratibus loquuntur itineraria, harum folliculi igitur majores futuri videntur. Et quum bombyces, olim advenas ex America, nunc in Europa adeo frequentes habeamus; quidni & araneas alienigenas, sub cœlo nostro multiplicatas fore speremus? Quomodo cumque res se habeat, experimentis opus est; non enim nisi his curiosa quævis & utilia deteguntur.

En, sic pergit Cel. *Lemery*, quæ de araneis addit Cel. *de Reaumur*; & multum quidem illius spei præscindunt, quam ex inventione & studio Viri Illustris *Bon*, circa sericum earundem conceperamus; ast velut in transcurso notatum velim, quod quum Illustris *Bon*, circa sericum illarum aranearum sua instituit experimenta, quæ in Provincia, in Occitania, aliisque calidioribus Galliæ regionibus obveniunt; serico abundantiores forsan harum fuerint folliculi, quam illarum, quæ in nostris terris, cœlo magis temperato subjacentibus obviæ, Cel. *de Reaumur* experimentis suos folliculos suppeditaverunt.

Interim nec *Isidoro* adsentimur, qui vocabulum Gallicum. *Araignée*, *Aragne*, olim *Araigne*, *Aragne*, *Eraigne*, *Traigne*, seu *Traigne*, & Latinum: *Araneus*, *Aranea*, & Italicum: *Ragno*, & Hispanicum: *Arana*, ab aere; quo aranea nutritur, descendere docet; nec Cel. *Lemery*, qui Græcorum: *Arao*, ordior, ex quo, araneæ, telam suam multa cum industria conficientis nomini originem dedisse censet: sed Araneam, vocabulum, ex Græco ejus nomine: *Arachne*, seu *Arachnes* descendere dicimus.

Ufibus, sed internis tantum Medicinæ & aranea ipsa & sua tela cedit, utraque multo sale volatili ac oleo constans. Cæterum nisi frequentioribus ac certioribus experimentis de virtute earum Medica constabit, nos quidem pro morbis, quibus mederi dicuntur, ut eas commendemus, hærebimus, quamvis observationum cumuli sint, quibus constat, & ore receptas araneas nullo corporis & salutis incommôdo cedere, imo aliis venire pro delitiis, ut notissime illius *Annæ Mariæ de Schurmann*, quæ suum in araneas desiderium excusatura, sub signo scorpionis se natam esse, per jocum dicere solebat. Ambabus consentimur, quod intus acceptæ nullius noxæ sint; ast nec eximiam illarum utilitatem videmus; & quamvis Cel. *Martinius Lister*, D. in tractatu de araneis, varias eis tribuat qualitates Medicas, variaque ex eis hauriat medicamina: nos tamen alia anteferenda esse ducimus, de quorum virtute certiora constant. Morsum vero aranearum periculosissimum interdum quoque mortis causam evadere inter omnes certum est. Sic etiam *Reiselius*, D. in *Ephem. German. Dec. II. Anni IV. pag. 176.* aliquem, araneæ morfu ex collo vulneratum, statim pruritu eximio correptum fuisse docet, huic accessisse inflammationem, quæ pectus tandem invadendo, post sex dies, mortem ipsi adtulit. Sexcenta restant, quæ eadem confirmantia transeamus, tarantulæ morsus tantum mentionem injicimus, hic enim periculosissimus est, & certissimam mortem vulnerato conciliaret, nisi Musicæ soni, medio tam singulari quam certissimo cederent. Casu sane felicissimo, & inventori ipsi salutis cessit inventio medii adeo simplicis. Et Cel. *Velschius*, D. testibus *Ephem. Germ. Dec. I. Anni VIII. pag. 66.*, refert: seipsum statim ex morfu araneæ, regioni sauciatae salviæ folium adplicuisse, cujus virtutem contra ictus vesparum compertam habebat, & illico dolores recessisse, ac subortum tumorem cum inflammatione evanuisse. Jam quum tot quotidie insectorum ictibus funestis expositi simus, sufficit salviæ pro medio commendatam, ad manus habere; imo nec hortum facile invenies paullulum cultiorem, in quo salvia deficiat. *Sennerti Medicina Practica*, lacteum succum ficus, arboris, morsui instillandum esse præcipit. Alii tandem plantaginis folia, in mitiore aceto excoqui, & pro partis læsæ fomentatione adhiberi volunt.

Si externum aranæ usum respicias, febribus intermittentibus, & in primis quartanæ mederi dicitur. Cujus ergo araneam majorem contusam carpo febricitantis adplicari, vel araneam ipsam nucis putamini inclusam, sub initium paroxyfmi, ex collo febris laborantis suspendi jubent. Alii telæ ejusdem quantitatem moli ovi gallinæ respondentem p. æ. fuliginis admiscet, addunt modicum salis communis, & q. s. aceti, ut fiat cataplasma, binis carpis febricitantium adplicandum, & bis terve idem medium reiterari volunt. Rursus alii ipsius telæ tantum, quanta est pisi minoris magnitudo, cum cyatho vini candidi, ineunte paroxyfmo exhibent, sic sudor copiosus excitatur, salus interdum febricitanti redit. Adeas *Celeb. James Lexicon Universale Medicum*, & reperies modum prorsus singularem, ope telæ aranearum febrem quartanam expellendi. Ceterum si de reliquis aranearum qualitatibus quæris, si de mediis ex illis hauriendis, adeas *Martini Listeri, D. tractatum de araneis*, & quæcumque cupias, ibi reperies.

Tela aranearum igitur virtute vulneraria-adstringente & consolidante pollet, & vulneribus recentibus adplicata, sanguinis effluvium reprimit, medio apud omnes frequentissimo; vulnere recentissimo immissa suborienti tumori obstat. Nec non contra colicam flatulentam & hysterica, telæ hujus quantitas, ovo respondens, in aceto frixa & cataplasmatismatis more, calida, umbilico adplicata, flatus profligat, lenit dolorem.

℞. telæ aranear. manip. j.

In aceto macer. & umbilico impon. pro cataplasmate contra morbos hystericos.

℞. telæ aran. ad magnitud. pisi. Cyatho vini candidi immittatur, & sub initium paroxyfmi, febris intermittente detento exhibeatur.

B O M B Y X.

Bombyx. Offic. Schrod. 339. Goedart. 112. List. 41. Mouff. 181. Aldrov. 278. Jonst. 114. Dal. 388. *Papilio Bombycum*. Charlet. 40. Alb. 12. Bradl. 27. *Phalæna pectinicornis elinguis*, *Bombyx dicta*. Linn. Faun. Svec. 832. *Eruca*, *Bombyx in officinis dicta*. *Papilio Bombix*; *Vermis indus sive indicus*; *Vermis Lanificus vel Serificus*; *Eruca Bombyciworm*; *Ser seu Seres*. Quorumd.

Est autem bombyx, insectum, erucarum instar, magna corporis longitudine, ast exiguo diametro præditum. Corpus suum (addito scilicet ejus fine, ubi carnosio quodam exiguoque cucullo anus obtegatur) 12. annulis fere circularibus, vel si mavis, oblongis, & membranosis componitur. Caput ejus primo annulo connexum videtur, etenim collum adeo breve habet atque constrictum, ut nullum fere adpareat. Constat vero caput ipsum partibus duabus testaceis, & magnitudine & forma similibus, cavitas autem utrique intermedia os bombycis constituit, illudque binis labris munitum. Cuivis labro non nisi unicus dens est, ille tamen tam latus ac crassus, ut servata proportionis ratione, unicus ille, omnes illos expleat, quos in maxilla maximorum copiosos reperies. Alternò igitur motu dentium, jam recedentium, jam vero sibi admotorum, folia, sibi nutrimento venientia, frustatim dissecat bombyx; quo quidem labore dum occupatum videris, & aviditatem, & in procedendo agilitatem admiraberis. Motus igitur labri superioris, maxime tamen inferioris ad folia, dentibus jam disse-

dissecta, & ori immittenda & ulterius protrudenda confert. Hinc Cel. *Malpighi* labrum superius linguæ officio fere fungi docuit. Illud tamen in primis folio, prioribus pedibus adjuvantibus retinendo infervit; & majori cum jure linguæ nomen labro inferiori ut tribuas habes. In hoc igitur colum observabis, qui, ubi in papillam minimam exit, eamque carnosam ac pyramidis figuræ, perforatus, efformando venit liquori serico. In anteriore capitis parte, parum ex medio declinantia conspiciuntur sex granula nigra, fere in circulum disposita; quorum tria, quum reliquis majora, & convexa, & hemisphærica sint atque pellucida, oculos repræsentare videntur. Excipe annulorum secundum, tertium & ultimum, ac in reliquis novem duas maculas ovaes, utrinque unam, ventri quam dorso viciniore, & margine nigro fimbriatas observabis. His stigmatum nomina tribuit Cel. *Malpighi*, & totidem aperturis, pro aere pulmones ingrediente, eas cedere docuit. Homini igitur non nisi unus, bombyci autem decem & octo sunt aeris respirandi conductus; hinc & utrinque novem pulmones, & quidem singuli novem trachearum ad corporis longitudinem procurrentium cumulis compositi. Spectaculo sane æque vastissimo ac semper novo, nunquam observatorem defatiganti veniunt innumerabilium trachearum ramificationes, ac implicationes vel cogitationem hominis, non dicam oculorum aciem, longe superantes. Ut autem observanti *Malpighio* merito fides est, quod stigmata aeris respirandi introitu pateant; sic & Cel. *de Reaumur* demonstrationibus certi adserimus, exeunti aeri haud stigmata pro aperturis cedere, quippe quæ egressui aeris obstare videntur. Quibus præfultis adsumendum: quod respiratio bombycis completa, sive inspiratio & exspiratio, modo prorsus singulari, nec animalibus majoribus communi, perficiatur. Octo & decem stigmata scilicet totidem ora pro aere hauriendo & canales præcipuos crassissimos trachearum truncos, ingrediendo, constituunt; exinde varias illorum ramificationes transit, ex angustioribus canales in adhuc angustiores defertur, & quum ad ultimas horum extremitates, ejus egressui destinatas pervenerit, exit.

Corporis sui fulcra, sive pedum paria plura, diversæ inter se sunt rationis. Primo etenim sex adsunt *crura testacea*, ex utroque latere tria, & a tribus annulis prioribus proficiscentia, quæ ob cartilaginem lucentem, suum operculum, *testacea*, ab aliis & *anteriora* & *priora crura* dicuntur. Hæc alia octo crura excipiunt, quæ ex medio corpore enata, a sexto, septimo, octavo & nono annulo proficiscentia, *membranosa* audiunt, siquidem pelle quadam molli & flexili involvuntur; Hæc igitur, pro lubitu animalis jam producuntur, jam corripuntur, jam turgescunt, jam deprimuntur. Ast illa sive *testacea* quodammodo licet incurvari, nec tamen produci possunt, vel corripì. Ultimo denique annulo adhærentia crura, quæ *posteriora* dicas seu ultima; & medii, *intermedia* nuncupanda, una cum testaceis & membranosis decem & sex crura constituunt. Quodvis illorum in pedem pluribus unguibus sive aduncis munitum exit. Et, Cel. *Malpighio* teste, unguium aduncorum substantia est solida, ossea, flavida; numerus vero quadragenis plerumque, in omni pede absolvitur.

Et hætenus quidem bombycis descriptionem externam ex Cel. *de Reaumur* observationibus circa *erucas* & *papiliones* hausimus. Nec superest, quod addamus, nisi hoc, quod scilicet bombyx ex genere erucarum glabrarum sit.

fit, five illarum, quæ corpus nullo pilo, seu hujus vicem sustinente alio quodam, obtectum habent. Imo quod a reliquis erucis glabris cornu aliquo annulum undecimum obtegente distinguatur; cornu dicamus illam partem, quamvis nec huic, nisi figura sua & situ accedat; cæterum enim substantiæ carnosæ adeoque mollis est, ut pro armis, offendendis aliis, five se ipsum defendentibus cedere posse ne videatur quidem.

Hucusque igitur nullius partium interiorum, nisi trachearum, respirationi inservientium, mentionem injecimus. Jam de reliquis iisque notabilioribus, five figuram spectes, five usus. Eminent has inter canalis alimento recipiendo & digestionem ejus inserviens, ille scilicet canalis contiguus, qui recta ab ore ad anum proficiscendo, diversas distinctasque capacitates, œsophago, stomacho & intestinis respondentes complectitur. Hic scilicet, si *Malpighio* fides, quantumcumque est, binis componitur sacculis, altero alteri insertis, quamvis non nisi invicem adplicati videantur. Et quidem sacculus interior membrana tam tenui constat atque pellucida, ut ne quidem fibrarum ejus dispositionem conspiciere liceat, interdum species gelati videretur. Sacculus exterior e contrario substantia est solidiore atque carnosæ, ac ibidem distinctissimas fibras longitudinales, rotundas atque subtiliores, ab œsophago ad anum proficiscentes; imo & illas observare licebit alias, quæ totidem zonarum seu cingulorum instar, ventriculum cingunt atque constringunt. Statim insuper in bombyce aperto, corpusculum aliquod album, maximam capacitatis internæ partem explens, & jure *adipem corpus* dictum, reperiens. Stomacho & intestinis alimenta eisdem detenta, luce transeunte, viridem colorem conciliant. Haud ita multum ab ore, ubi finem œsophagi constituere mallet, canalis ille admodum dilatatur, eandem sui capacitatem per totam fere corporis longitudinem conservat, post repentina & maxima constrictione coarctatur; deinde paululum amplificatus, tertio constringitur, imo denuo dilatatus rectum efformat, tandem in ano definit. Ani foramen senis constare videtur partibus carnosis, ac totidem sulcis, rimarum interjacentium profunditate separatis; hinc fit, ut excrementa bombycis totidem prismata sexlateræ, eaque excavata referant.

Jam quum quarumvis bombycis actionum nobis utilissima sit fila componendi industria; vascula illa cognoscere & inquirere operæ pretium est, ubi liquor ille, serico destinatus, præparatur; quod colum supra descriptum egrediendo, hominum luxui & necessitati accommodatur. Satis conspicua vasa ista, maximam ventris capacitatem occupant, imo stomachum & intestina voluminis sui mole superant. Continendo scilicet serici liquori bina destinata sunt vasa similia, & in colo desinentia, quo antequam pervenerint, decrecente diametro, vix bina fila sibi parallela videntur. Horum vestigia si distinctius explorare velis, spiritui vini immixtus pereat bombyx, & biduo triduove illo detineatur. Cautionem hanc neglexisse videtur *Cel. Malpighi*, ille enim vasculorum adeo mollium inflexiones varias, satis accurate investigari se haud potuisse queritur. Jam vero si spiritu vini bombycem enecaveris, solidissima evadunt, de quibus agitur, vascula, liquori illis detento tanta accedit durities, ut vel fragilitatem induat; ita tandem quodvis vasculum integrum ac illæsum protrahendo, varias post inflexiones, in quodam quasi Cœco illud desinere adparebit. Singula igitur

igitur vascula liquore plena sunt viscido & glutinoso, ac pro vario serici egressuri colore, diversicolore; jam fulvo, jam subflavido, jam albescente. Imo altera sæpius pars vasculi ejusdem alio, rursus alio (quoad colorem) liquore altera turget. Causam vero coloris varii ex qualitate foliorum, bombycis alimenti, & ex dispositione ejus interna derivandam esse censemus. Nec ubivis enato serico eadem est pulchritudo; Sinense cæteris subtilius, aliud nonnunquam nimix crassitudinis est, id quod ex varietate nutrimenti, pro terrarum varietate varii, pendere videtur; eo potius quum pascui qualitatem, maximam butyro varietatem conciliare novimus. Imo observatum est, bombycum eodem sub cælo viventium illos, qui mori albæ foliis vescuntur, sericum conficere tenuius, quam qui ex foliis mori nigræ vivunt.

Frustra desudares, si in bombyce cor aliquod, figura reliquis communi quærere velles, sive massam aliquam carnosam ac pyramidalem, ex qua vasa sanguinem undequaque distribuentia proficiscuntur, & quo ab aliis denique reportatur. Sanguis etenim bombycis non est, nisi liquor pellucidus, subflavidus, vel omnis potius coloris expers; quamvis ad vitam conservandam tantum confert liquoris hujus circulatio, quantum sanguinis nostri pro continuanda facit vita hominum. Cor vero bombycis, principium circulationis, & figura sua & situ ab alio quovis corde alienissimum est. Vasculum scilicet longius, ad medium dorsi a capite ad anum procurrens, hoc inquam, nec, nisi hoc, cordis nomine dignum judicavit *Malpighi*, imo hoc solum cordis officiis fungi videtur. Hujus systolen atque diastolen, sive alternam contractionem & dilatationem, ob lævitatem ac pelluciditatem pellis bombycem tegentis, facillima opera observabis. Hoc igitur pro quadam corculorum serie habet *Vir Cel.*, & numerum eorum, annulorum quantitati respondere censet. Formam eorum coronæ precariæ, vulgo: rosarium dictæ, & ex globulis ovalibus compositæ, æquiparat; binis scilicet annulis intermediam constrictionem esse observat, & granum binis constrictionibus interjacens ac excavatum pro corde habet. Ex utroque autem cordis latere ad longitudinem procurrens, & eidem cohærens conspicitur corpus, de quo supra, adipeum. Quod quum opacum, cordis membranæ autem pellucidæ sint: cordis agitationem alternam satius interdum ex motu corporum adipeorum, quam ex ipsa cordis agitatione cognosces. Censet *Vir Cel. de Reaumur* vasculum illud pro corde seu cordium serie habuisse *Malpighium* ideo, quia aliæ corpusculorum adipeorum partes magis, aliæ minus corde obteguntur; ubi scilicet cor constrictum quodammodo videtur. Nos tamen hanc cordum seriem non nisi aliquam arteriam, seu vasculum ejusdem fere ubique diametri, putamus; nec cordis nomen denegabimus, etenim omnibus cordis officiis arteriam hanc fungi videmus.

Observatu etiam dignissimæ sunt pellis sive indumenti erucarum mutationes variæ; quadruplicem in bombyce observavit *Malpighi*. Decima, vel pro cæli temperatura, decima & prima vitæ suæ die primam; quinta vel sexta exinde die secundam; quinta & dimidia seu sexta & dimidia subsequente die, tertiam; & tandem denuo sexta & dimidia sive septima dimidiaque die quartam exuit pellem. Nec pellem tantum deponere videtur; sed exuvias suas adeo completas esse videbis, ut integrum bombycem, quoad externas partes referant, imo partes solidas atque duras, caput

obvolventes, five, ut cum *Malpighio* loquar, cranium, quidquod dentes nexos contineant. Jejunio autem & multiplici motu, exuviis suis seponendis bombyx sese accingit. Pellis scilicet dum ad aliquem arefactionis gradum pervenerit, dehiscere incipit; & prima quidem fissura in superficie dorsi, ejusque secundi & tertii annuli obtigit, qua dilatata pellem recentem, inferiorem, ac colore recentissimo conspicuam observare licet. Exortamitaque rimam facile dilatat insectum; partem corporis scilicet rimæ oppositam inflando, illam ultra margines rimæ protrudit, illaque trusi cunei instar, a primo annulo ad quartum fissuram producit. Sic igitur superior pars corporis prioribus quatuor annulis respondens resecta, satishianti apertura cedit vermi, suis se exuviis protracturo. Successivo deinde conatu pars reliqua denudatur; ac tanti laboris opus integrum minori, quam unius minuti spatio, absolvitur.

Res interim singularis videtur, quod quamvis prævio diutiore jejunio, in bombyce exuvias seponente, tantum incrementum tantillo tempore peractum appareat. Imo cranium prius a bombyce relictum, ait *Malpighi*, vix tertiam vel quartam cranii succedentis partem exæquat. Idem ille in bombyce, brevibus transformando dissecto, cranium primo annulo vicinum, & ab antiquo remotissimum observavit. Cranium recens scilicet, quum sub antiquo, tamquam nimis stricta vaginâ contineri nequeat; producit, formam oblongam induit, & vel primum annulum pristinae pellis subit. Sic igitur relictâ pelle, integrum adhuc diem cibo abstinet bombyx, cujus membra aere novo exposita, quiete indigent, ut consolidari possint ac corroborari; nec primis post mutationem horis tanta foret dentibus soliditas, quanta pro comminuendis foliis requireretur.

Quod si igitur tempus accesserit metamorphoseos bombycis, mori foliis nutriti, corpus ejus splendorem ac quasi pelluciditatem induit. Tum ille alimenti abstinentia corpus purgando, flexilis evadit atque relaxatus; post locum quærit, in quo procul impedimento, folliculo suo componendo occupari possit. Subtiliores quosdam scoparum ramusculos five chartæ folium contortum ipsi exhibeas, & eo se conferet, capiteque jam in dexteram, jam in sinistram obverso, undequaque sua filanectere ordietur. Deforme videtur laboris exordium, nec tamen sine suo destitutum. Nec fila sua ordine disponit, nec alia aliis superstruendo nectit, saltem pro avertenda pluvia, lanugine quadam remotiore, Gallis: *Araignée*, seu *Bourette* dicta, obtegit; quippe qui a natura, opifex, arbores in pleno aere, pro officinis destinatas habet, ne obtectus quidem suam operandi methodum invertit. Hoc itaque sericum rudius pro basi cedit folliculo suo, quem *Coucon*, sive *Coccon* nuncupant Galli. Pergit fila subtiliora nendo, & caput jam depri-mendo, jam adtollendo, jam ex aliolatore in aliud pergendo, ac fila undequaque decussando varios ductus angulares efformat; sensim decrescit spatium motibus patens; & tandem totus serico involutus oculis eripitur. Habitaculo finem conciliaturus ex fundo sacculi sui aliquod gomma protrahit, in filum inferioris qualitatis vertit, & hoc tandem, glutine quodam tenacissimo obducit, quo etiam ad glutinandas filorum series utitur. Triplici igitur, eoque vario involucro, a variis externæ injuriæ gradibus, munitur. Lanugine scilicet a pluvia; serico subtiliore ab aere transituro; serico tandem conglutinato, & folliculum, ipsum qui tangit vermem, con-

stituyente non solum ab aere & aqua, si quis forsan involucra priora penetraverit, sed etiam ab ipsa frigoris vehementia. Folliculus ille & figura & magnitudine ovum gallinæ æquiparat, jam album, jam citreum, jam fulvum colorem ostendit, & biduo ad summum triduo perficitur.

Duo sunt, ut supra diximus, materiæ serico destinatæ reservatoria, similia, æqualia, & ambo, fili tenuissimi instar, in colo desinentia. Ambo plerumque suum conferunt ad formationem fili serici; quod Microscopii auxilio depressum sive planum, majori saltem latitudine quam crassitudine conspicuum, & in media sui parte excavatum, seu potius ex duplici cylindro plano & sibi invicem conglutinato compositum videtur. Constat igitur, filum quodvis originem debere ramusculis binis, singulis ex suo materiæ sericæ reservatorio proficiscentibus. Imo ramusculos illos in filis quibusdam satis distincte separatos observabis. Summæ interim nostræ utilitati cedit, quod fila bombycis hinc inde ducti, vel glutinis ope, non, nisi levissime cohæreant. Quod si enim fortiore unione continerentur, dividi seu evolvi nequirent, ut nunc, tepida in primis aqua detenta inter se avelluntur. Teste *Malpighio*, sex stratis diversis bombycinus constat folliculus, & fili unius longitudo, 930. pedes mensuræ Bononiensis pertingit. *Cel. Boyle* matronam quandam folliculum bombycis unum divisisse, & fili longitudinem, 300. milliaria Anglica superare eandem supputasse refert. Error supputationem irrepsisse videtur. Et ego sæpius, sic *Cel. Lyonnet*, filum bombycis ad mensuram exigendo, longitudinem ejus septingentis & nongentis pedibus intermediam reperi.

Exhaustis igitur materia ac opera triplicis sui strati componendi, bombyx vermis figura cum quarta sua pelle se exuit. Tunc *fabæ* formam induit, sive ut alii dicunt: *Chrysalidis*, *Nymphæ*, *Aureliæ*, seu *Necidalis*. Posteriori fabæ parti conica figura est; & insectum, fabæ sub forma latens cruribus alisque destitutum, nec incedere, ne repere quidem, vix vitadonatum, & massam organis instructam referre videtur, nec alimenta recipit, nec ea haustum organis gaudet. Sola saltem pars ejus posterior animata videtur, hæc saltem motibus quibusdam, sive inflexionibus, in annulos quibus constat, incidentibus, agitur. Pellem sive involucrum exterius cartilaginofum, glabrum & lævigatum videbis; cui quum duplex sit superficies, altera scilicet dorsum, altera ventrem insecti obtegens; illam quidem colore fulvam, & contiguam & conglobatam; ast hujus in parte anteriore plures eminentias exiguas sive zonulas observabis, quæ & forma sua & dispositionis ratione, fasciis quibus mumiarum capita obvolvuntur, simillimæ sunt. Chrysalidem adtente observes, & papilionem reti quasi obtectum, sub eadem latere videbis. Nympha autem, deposita erucæ figura, tenera & mollis, tractu temporis tantam involucri exterioris durtiem acquirit, ut digitorum adfrictu conteri possit. Licet autem omnes papilionis partes erucæ sub vagina lateant, non nisi imminente metamorphoseos tempore facile deteguntur. Sic in bombycis chrysalide, ex triduo tantummodo tali, ova papilionis reperit *Cel. Malpighi*. Imo in ipsa eruca papilionis ova quærens *Cel. de Reaumur*, eadem probe rotunda, perfecta, & rosarii globulorum instar, in seriem disposita reperit. Reiteratis insuper Illustris Academiæ Socii experimentis constat res singularis; scilicet: aeris circulationem in eodem insecto, prout sub forma jam erucæ, jam chrysalidis

lidis varia latet, varia ratione peragi; imo magis singulare videbitur, quod circulatio sanguinis in utraque, prorsus opposito modo procedat. In eruca scilicet, vas illud amplius, quod *Malpighium* pro corde habuisse diximus, sive arteria magna, liquorem ex cauda caput versum; in nymphea autem a capite ad caudam protrudit. Id quod in nymphea, dum paullo post exuviarum depositionem, pellucida remanserit, observare poteris. Eadem etiam ratione liquor in papilione ex nymphea facto procurrit, circulatione scilicet erucæ contraria.

Quum igitur partibus papilionis robur & consistentia accesserit: minima quavis violentia, membrana tam tenuis, qua involutus est, finditur, qua fissa liber patet exitus papilioni. Licet enim involucrum bombycis, quo papilio chrysalidis sub forma latet, unum sit crassissimorum, optimeque illum obtegentium: viginti tamen dierum spatio vel itud egreditur. Egredurus autem ante omnia superfluo se liberat humoris istius, qui nymphea detento sibi pro efformandis ac corroborandis membris cesserat; tum & antennas, & caput, & crura versus apicem folliculi protendit, qui ibidem subapertus, sensim conatui suo cedit; reiteratis trudendo labori insistit, dilatatur foramen, papilio egreditur. In imo folliculi relicta reperiens status pristini monumenta; caput scilicet & integram vermis pellem, sordidi linteï sarcinulæ similem, una cum exuviis nympheæ. Egrediens vero papilio undecumque madet; & pro parvitate alarum, conformationis vitio quodam laborare videtur; vix transit horæ dimidium, & totæ evolutæ adparent, ac fibræ illarum, antea ut muscutorum & membranarum fibræ flexiles, tantæ durtiei evadunt, ut ossæ viderentur *Malpighio*.

Est autem Papilio, bombyx futurus, ex classe phalanarum pectinicornium elinguium, id est: papilionum noctis, quorum antennæ plumis barbatae sunt, qui autem proboscide notabiliore carent, nec alimento fruuntur. Abit insuper, papilionum omnium instar, in caput seu partem anteriorem, in thoracem, seu mediam, & in corpus, seu posteriorem. Corpus constat annulis, quorum pars superior vel nudo oculo cartilaginosa seu testacea videtur. Thoraci adhærent quatuor alæ & sena crura; qui quum omnes & crurum & alarum motus sustineat necesse: ex frustulis testaceis, crassioribus, & adeo inter se cohærentibus componitur, ut nulla ratione moveri possint, seu agitari. In capite ejus prominentia videbis duo corpuscula, sphaeræ segmentum referentia, & ex latere utrovis e diametro opposito egredientia; quorum tantam cum oculis animalium majorum similitudinem, respectu molis, formæ, soliditatis etiam splendoris & involucris observare datur, ut statim & illa habeas pro oculis. Microscopio adjutus autem, totam eorum superficiem externam reticulo, ex maculis (ut artis vocabulo utar) regularibus contexto, simillimam, corneam vero integram, sive exteriorem oculi partem, copiam crystallinorum sive lenticularum opticarum congestam habebis. Capitis summo bina cornua infixæ hærent, in basi sua mobilia, & particulis alterna articulatione sibi nexis constantia, antennæ dictæ. Constituit autem antennam quamvis quidam caulis, ab initio ad extremitatem crassitudine sensim decrescens; & ex utroque antennæ latere opposito fila, barbarum plumearum instar disposita, his tamen rariora, proficiscuntur, quarum ergo a *Cel. de Reaumur* antennæ plumatæ dicuntur. Papilio autem mas & fœmella album colorem, & maculas

alarum albo-fordidas seu flavescentes exhibet. Vitam nullo cum usu alarum, volando scilicet, peragit, volandi conatum vero masculus in primis ostendit, hic enim vel incedendo, crebriore motu alas agit. Utilis ergo, vel necessaria forsan, ad conservationem speciei suæ alarum erit agitatio. Papilio enim bombycis masculus, reliquorum instar dummodo natus, coitum adpetit. Vix arefcit, & inter continuam alarum agitationem incedendo, postremam ani partem reflexam tenet ac elevatam, sic suam quærit fœmellam. Quam dum invenerit, sui ani extremitatem ano illius obvertit, statim opus adgrediuntur. Coeuntes igitur ambo, capitibus in opposita respicientibus, rectam constituunt lineam. Et quidem durante coitu celerrime alas agitantem masculum observabis. Numerum agitationis motuum, sive alternam alarum elevationem & remissionem, curiositatis ergo percensuit Cel. *Malpighi*, & motuum, quamvis celerrime succedentium, centenos atque trigenos numeravit. His peractis, ac si mortuus esset, per quartam horæ partem quiescit, interdum etiam a fœmella separatur. Elapso quarto horæ spatio, si separatus fuerat, denuo nectitur, sin minus, novo tamquam vigore animatus, celer agit alas, ad summum 36. vicibus. Cæterum alacer videtur & robore vicens, alas enim elevatas tenet, quum suas fœmella deprefferit. Novum succedit quietis spatium, quo effluxo non nisi infrequentiore alarum agitatione edit. Et quidem eodem *Malpighio* teste, quatuor per dies subsequentes celebratur coitus, at quietis interstitia continuo longiora evadunt. Quo quidem tempore pili qui sunt in extremitate ani maris, extremitatem ani fœmellæ obtegunt.

Adeat, qui formam atque structuram genitalium utriusque cognoscere cupit, adeat, inquam, imagines & descriptiones in *Malpighii Dissertatione de bombycibus, Regiæ Anglicorum Societate dicata*, obvias. Qui maris genitalia perspecta velit habere, corpus ejus, prope ad annulorum ultimos digitis comprimatur. Modica etenim compressione partis posterioris extremitas producit, imo subaperitur. Statim scilicet ad longitudinem medii dorsi aduncus minor, testaceus & ventrem versus reflexus adparebit, cujus ope mas coiens ano fœmellæ sese adhæret. Tum ex latere quovis lamina quædam testacea, cochlearis forma conspicietur; utraque sibi adplicata autem, formam duplicis cochlearis, se invicem obtegentis imitatur; superficies utriusque interior sive concava lævis & glabra; exterior autem sive convexa pilis sive squamulis undecumque oblecta est. Ex interiore ergo hujus receptaculi parte, prope ad basin pars mari propria, seu vagina ejus egreditur; præterea obtegendo ano illud infervit. Plerumque igitur utramque laminam cum adunco penitus in corpus recepta & sub penultimo annulorum recondita; at coitum dum papilio adpetit, egressa videbis.

Comprimas fœmellæ ventrem, & bina foraminula in ano prodibunt; alterum superius, quod ano veniens, in primis ovorum, tum & parvis morum excrementorum egressui, alterum vero inferius, & recipiendæ maris parti destinatum est. Huic fulcri subalaris figuram esse observavit *Malpighius*. Brevibus: ventrem habet fœmella amplissimum, solidum atque extensum; qui apertus tanta copia ovorum, & forma & magnitudine satis conspicuorum ac coacervatorum expletus adparet, ut locus reliquis partibus haud superesse videatur. Hinc tanti plerumque ponderis est fœmella, & ovorum mole onusta tam lento gradu incedit. Imo dum illam leviter satis,

ne interiorum quidpiam suo loco moveatur, aperias, five ad longitudinem dorsi, five ventris, idem est; primo statim intuitu, ova innumerable ordine quodam, juxta posita scilicet serie, quarum vel numerum inire licebit, disposita adparebunt. Cogites tibi papilionem fœmellam, sectione medium dorsum mediumque ventrem transeunte in binas partes divisam, & in parte utraque quaternas ovorum series, totidem margaritarum filis, seu rosariis istis, quæ nostrates; *Chapelets a la Cavaliere* dicunt, similes observabis. Octo autem vascula, ovis efformandis ac excrescentibus continendis destinata, *Malpighio* jam tubarum, jam ramusculorum, jam brachiorum ovarii nominibus veniunt. Quodvis horum plura quam 64. ovula complectitur, hinc numerus ovorum a bombyce omnia ejaculante, repositorum 514. ad 516. absolvitur. Fœmella itaque ex quo ova emittere cœpit, alia aliis succedentia ano extrudit, horum in locum rursus alia substituantur, & derelicta ovarii loca occupant. Quæ prout ovarium transeunt, liquore in matrice eo usque conservato, & successive (sic enim videtur) canalibus communicantis auxilio in ovarium destillante fœcundantur. Vides ergo quantillum, imo vixdum momenti tempus fœcundandis ovis sufficiat; omnia enim quæ ovario papilionis ova nunc emittentis continentur, ova, brevissimo spatio egrediuntur.

Nec non Cel. *Malpighi* observationibus edoctus, quævis ova papilionis fœcundata a sterilibus, longe ante tempus quo ex illis eruca exit, discernere valebis. Primus namque ovorum color est flavus sulphureo accedens, ovaque ipsa perfecta sphærica sunt; quæ igitur sterilia, nullum erucæ succrescentem embryonem continent, illa servato flavido colore, partem sphæricæ figuræ amittunt, ex altera enim sui parte crenam seu rugam quandam ostendunt; fœcundata autem, retenta sphærica figura, colorem flavidum in violaceum mutant. Egredientia autem ova tanto glutine mudent, ut satis magna cum violentia demum a corporibus, quibus adhæserant, possint avelli. Solidi quidem & admodum fortes sunt cortices seu tegumenta ovorum, nec tamen ut avium, materia conchis analogâ constant; hanc cornu analogam esse ait Cel. *Malpighi*, solida est, nec adeo ut adfrictui conteratur, forfice autem dissecatur. Diutissime etiam bombycis ova ut excludantur, impedire potes, nec ovis ipsis damnum accedet ullum. Nos quidem, sic Cel. *de Reaumur*, pro initio vitæ animalis illud denique temporis momentum ponimus, ex quo nobis & utilitati nostræ vivere cœpit. Ast Physicorum omnes conveniunt, animalculum, statim ex ovo fœcundato, vel in hoc saltem exsistere. Jam, idem hoc animalculum, ovo, prout citiore vel segniore calore foveatur, diutius breviusve detineri, frequenti pariter ac communi experientia constat. Sic in terris illis, quibus educandis bombycibus student, mulierum more venit, ut pro accelerando eorum egressu, sinu suo foveant ova; hac ratione paucissimarum hebdomadarum spatio, perforandis & relinquendis folliculis par evadit bombyx, qui ovo, aeri exposito detentus, vix quinque vel sex mensium tempore, eodem pervenisset. Jam eadem illa ova, in frigidiori loco conserves, & per annos detinebuntur, nec excludentur.

Papilio masculus statim ex quo separatus fuerit a fœmella, moritur, fœmella autem, simulac ova omnia reposuerit. Fœcundata igitur suorum ovorum, subsequenter tempore veris excluduntur, & hac ratione tam pre-

tiosarum erucarum genus propagatur . Alia foret , si *Aldrovando* , *Hieronymum* *Vida* sequuto , fides ; hic enim bombyces sine ovis procreaturo , ut ita dicam , sequentia observanda tradit : Vaccam , sic ille , parturientem , per octo circiter dies , nullo pabulo , nisi mori foliis nutrito , vitulo recenti æque ac matri , per aliquot post partum dies , eadem folia , pro omni nutrimento subministrato ; post vitulum enecato , & frustula ejusfoli aerique , usque dum putrescant , exponito ; sic ex putredine nascentes habebis bombyces , illosque fortiores , ac si ovis deberent originem , nec nisi decimo tandem anno degenerantes .

Qui quidem modus producendi bombyces ad imitationem illius invenrus esse videtur , quo apes procreare docuit *Virgilius* . Uterque enim nullo , nisi fictitio saltem fundamento innititur . Satis superque enim Vir *Cel. de Reaumur* adversus R. R. P. P. *Kircherum* & *Bonnani* , Societatis Jesu , Viros singulari doctrina conspicuos , evictum dedit : nec fieri nedum concipi posse , quod insecta , tam apta ac mirabili membrorum compage concinnata , ex carne vel alia quavis materia putrida enascantur . Adtentus legas scripta Virorum in Physicis maximorum , ut *Cell. Redi* , *Swammerdamii* , *Malpighii* , *Leuwenhoekii* , *Vallisnieri* , *Linnei* & in primis *de Reaumur* , quibus tantum debet historia naturalis , & cognosces , omnia insectorum , quæ observare datum fuit , vel vivipara esse vel ovipara , imo convinceris , quod quorumvis insectorum origo æque minus ac belluarum , ipsiusque hominis , casui cuidam fortuito sit tribuenda .

Duplici tandem ratione in educandis bombycibus procedere potes . Etenim vel in arboribus , alimenta ipsis subministrantibus , crescant habitentque ; vel in loco separato ac illis tantum destinato adserventur , dummodo nova quotidie folia pro nutrimento suppeditaveris . Sunt , qui curiositatis ergo , methodum priorem , Sinensibus communem , & in primis *Tunchinæ* , *Cantonix* aliisque regionibus , sempiterno vere ubi arbores frondescunt , frequentem , felici cum successu sequuti sunt . Papiliones scilicet , ova egressi , locum in moro , arbore , pro ovis reponendis commodum eligunt , & ibidem suo glutine , infectis plurimis communi , adglutinant . Sic autumnus transit & hyems , nec ova læduntur , imo dispositionis ac cohæsionis ratione vel a grandine , ne quidem moris interdum parcente , muniuntur . Animalculum benignæ ac providæ Numinis curæ commendatum , tunc tandem ovulum egreditur , quum folia arboris frondescantis pullulantia , & illi alimenta præparaverint . Frondescit arbor , eruca folliculum perforat , in foliis exspatiatur , successivum capit incrementum , & aliis exinde mensibus eadem in arbore , cumulos fili ferici , tamquam aurea poma , viridibus foliis interjacentia , reponit . Et hæc quidem eos educandi methodus , salutis eorum convenientissima est , & laboris minimum postulat . Eadem illa nostro sub cœlo , vario ac inclementiore , foret inconvenientissima . Retia quidem arboribus prætendendo seu similia tentando , bombyces iisdem detentos ab avium insidiis tectos reddere posses ; ast frigus vehementius , veris serenitatem , repentina sæpe mutatione excipiens , & pluvix violentia , & vis ventorum , turbinumque suborientium omnia everterent , omnia perderent . Quid consilii ? sub tecto detineantur .

Conclave igitur feligas aeri & soli expositum , & ab aquilone & austro vel fenestris vitreis , vel valvis ligneis probe obturatis , munitum . Post
parie-

parietes & pavimenta consolidare studeas, ne aditus pateat felibus, gliribus, muribus, lacertis, aviculis sive insectis bombyces devoraturis. In medio quatuor exsurgant columnæ seu pali lignei, quadratam aream spatiofio-riorem determinantes. Tum ex altera columna ad alteram per gradus ducantur crates vimineæ, crati cuiusvis tabulæ ligneæ margine elevato munitæ supponantur. Scapis vero & crates & tabulæ superjaceant, quo ad libitum jam reponi possint, jam subtrahi. Aliæ ultra alias promineant, ne ex superiore delabentes sordes, inferioribus molestæ evadant. Vermiculis exclusis, teneriora quædam mori folia linteo vel chartæ convolutæ, in qua nascebantur, & maximo eorum numero continendo sufficienti imponantur. Accedunt vermibus vires; tunc illos in strata foliorum, quibus medium loci quadratum (circuitui libero patens) per gradus distinguitur, disponas. Bombyces primo quidem foliis, & hæc quum disposita fuerint, scoparum ramusculis adhærebunt. Et filo instructi, ex quo aranearum instar, lapsum rudiores evitaturi, sese suspendunt. Omni matutino tempore nova illis mori folia adportes, eademque æquali ubivis mole, leni manu reponas. Statim bombyces antiquiorum foliorum reliquias mittunt, has subtrahas, caveas autem, ne quem iis adhærentem bombycem recipias. Industriofo & prudente homine opus est, qui & suo tempore alimenta suppeditet, & cratibus continua expurgatione munditiem conciliet, humiditate enim & immunditie nil magis bombyci infestum. Morbis obnoxius est plurimis, a quibus eum si tueri velis, antea omnia arido cœli tempore folia colligas, arido in loco conserves, & provido pluvie imminentis timore, justo tempore folia decerpas, ne dum caloris ope exsiccantur, bombyci sit jejunandum. Brevissimum enim jejunium maximæ eis noxæ cedit. Brevis scilicet eis vita est, hinc tempori student, & continuam fere vitam, ad ultimam metamorphosin usque, comedendo terunt; metamorphosi peracta, breviorē adhuc vitam, sine cibo, vivunt. Pondus vero mori foliorum, quotidiano bombycis nutrimento venientium, teste *Malpighio*, ipsius bombycis pondus, interdum exæquat; aliis, iisque voracioribus suo ipsorum pondere duplex foliorum quantitas cibo quotidiano cedit. Deficientibus vero foliis mori, brassicæ seu lactuæ folia substituas; parum tamen hæc bombycum palato arrident; & quum non nisi necessitate coacti his denique vescantur, in serico tum ab illis profecto, qualitatem inferiorem, deficientis soliti nutrimenti signum, observabis. *Malpighi* varia bombycibus exhibuit pro cibo, ut folia lauri, vitis, ulmi, & acrifolii, sed vix biduo elapso, convulsionibus correpti omnes mortui sunt. Ab omni tempore enim, pergit ille, mori folia bombycum nutrimento venierunt, mori, olim Italici Latiique Scriptoribus ignotæ; mori nigræ folia substantiæ solidioris, albæ autem tenerioris sunt; & Bononiæ quidem & adjacentibus in regionibus albæ mori folia pro nutrimento bombycum communi, nigræ, non nisi deficientibus illis, & vermibus jam robustioribus exhibentur; etenim ex albæ mori foliis, pulchrius, subtilius & magis splendens sericum conficitur; ast in Sicilia aliisque Italiæ montibus moro nigra nutriti bombyces crassius nere solent sericum. *Aldrovandus* est, qui nigram albæ moro, hujus ergo anteferendam esse docet, quod & tenuius sericum suppeditat, & quod bombyces nigræ foliis hucusque nutriti, statim ex quo albæ comederint, pereunt. Parum valent argumenta. Siquidem non solum serici soliditati

pulchritudo anteferenda est; sed etiam mortis bombycum albæ mori foliis vescentium in eo latere constat, quod copia eorum palato suo gratissimorum tanta se ingurgitent, ut ex quantitate nec qualitate nutrimentorum pereant. Hodie enim satis notum est omnibus, quod verum optimumque bombycis nutrimentum albæ mori folia constituent; commodo sane nobis illa enim & citior nigra succrescit, nec frigoris violentia tam facilisquam nigra perit. Hinc etiam vel in terris Septemtrionalibus quotidie nova albarum mororum arboreta institui videmus atque exfurgere.

Romani æque ac Græci diutius cognitione bombycis caruerunt. Nec enim Galli, nisi tardius saltem illorum folliculos in hominum usus convertere coeperunt. *Cel. Mezeray*, unus ex primis nostratium Historicis, serici inventionem, Orientem tenentibus, præsertim Persis, voluptati atque magnificentiæ deditis, tribuit. Romani, sic pergit, nihili illud habebant, quod *Justiniani* tempore saltem in Asia minore & Græcia, a Romanis debellata, innotuit. Et *Roger Siculus*, quum circa annum 1130. terram Sanctam invaderet, expugnatis Athenis, Thebis atque Corintho, inter prædam, & serica tela conficientes in Siciliam ac Calabriam, primus deportavit. Sic a Siculis Calabriamque tenentibus Itali & Hispani bombycum curam & sericum contexendi rationem acceperunt, hos Galli viciniore & meridiem tenentes imitabantur, paullo ante *Franciscum I.* qui primus officinas serici, Turoni instui iussit. Quanta autem serici infrequentia tum fuerit, ex eo patet: quod *Henricus II.* Rex, primus tibialibus bombycinis indutus esset, quum sororis suæ nuptiæ celebrarentur.

Nobis autem errare videtur *Mezeray*, dum officinarum Turoniensium institutionem *Francisco I.* adtribuit. Has enim jam in anno 1470. a *Ludovico XI.* institutas esse constat. Primi scilicet earum artifices ex Genua, Venetiis, Florentia & Græcia ipsa evocati, a rege, tam simulandi quam regnandi artem probe callente, multis privilegiis ac immunitatibus, vel hodie ex parte vigentibus, donabantur. *Henricus IV.* regia fane cum cura salutis sibi subditorum consulens, animos operantium excitabat; & tandem divus Rex *Ludovicus XIV.* varia fangiendo, officinas Lugdunenses & Turonienses ad tantum perfectionis fastigium extulit. Sua autem vestigia tot Reges & Principes Germaniæ, quidquod Septemtrionis sceptrum tenentes, sequuntur. Olim panni serici infrequentes, non nisi Principum vestibis veniebant, auro expenso emebantur. Hodie autem copiosiores, omnium amictui cedunt.

Cæterum non solum ex uberrimis commercii fontibus unus est conficiendi serici labor: sed etiam novum benignæ Numinis providentiæ documentum, plerumque ab hominibus neglectum. Serico indueris; num vero & mentem cogitatio incidit: quot bombycum millia tui ergo occupata fuerint. Quodsi nobis utilia subministrasse sibi animalia gloriæ ducerent, hujus sine dubio summa in bombyces redundaret. Et jure quidem serici abusus, quem luxus facit, reprehendendus est; ast quum tanto nunc desiderio in superflua rapiamur: ubi terrarum, quæso, tanta foret copia lanæ, quanta, serico deficiente, pro explendo superfluum desiderio requireretur? Quanta superesset pro amictu hominum conditionis vilioris? Eximia interim pulchritudine ac excellentia vera sericum lanæ præstat.

Gallicum bombycis nomen, quo *Vér-a-Soye* nuncupatur, ob excellentiam
sui

fui ferici, ferico erucarum omnium longe præstantioris, ipsi inditum esse videtur. Latii vocabulis jam *Bombyx*, ex Græco: *Bombux*, jam *Ser* vel *Seres* audit; siquidem ex regione *Serum*, populi, quam hodie Sinenses, Siameses & Tartari tenent, ad nos deportatus est. In Occitania dicitur: *Magniau*, in Provincia autem & Comitatu Avenionensi: *Magnan*, vocatur; forsan magnificentiae suæ ergo, siquidem ferico, Regum, Principum, Nobilium divitumque amictu, quid splendidius, quid magis magnificum? nisi, id quod magis ad veritatem accedere videtur, ex nomine suo Italico: hoc enim: *Mignano* vel *Mignatto* nuncupatur.

Multum igitur phlegmatis & olei, ast parum salis volatilis bombycem continere, infrequentiori tamen Medicinæ usui venire scito. Illa enim non nisi pro vertigine, bombycem arefactum & in pulverem redactum, capiti pilis nudo inspergi jubet. Ast sui ipsorum sterilitatem bombyces laboris sui utilitate rependunt. Sericea fila etenim vel præstantissima artis Medicæ media suppeditant. Ex ferico crudo provenit spiritus ille volatilis, famosus quondam apud Anglos, & *guttarum Anglicarum* nomine donatus. Hodie autem quorumvis præstantissimorum medicaminum sortem & ille spiritus experitur; ex usu abiit, obsolevit. En interim, qua ratione præparatur:

Rx. Serici crudi q. s. ad explendam retortam vitream probe obturantur, subde ignem parciorem, & prodibit phlegma, sal volatilis, oleumque, butyri instar, coagulatum. Rx. igitur salis hujusce volatilis ℥iij; olei essentialis lavandul. ℥j. spirit. vini rectific. ℥ij; immitte omnia retortæ vitreæ minori, adapta recipientem, obtura fissuras, ut per xxiiij. horas digerantur. Post retortam igni arenæ committe; & sal statim in forma sicca abiit, tandem vero prodibit Spiritus ætherius lavandulæ & vini, sale volatili imprægnatus, quem *guttas Anglicanas* salutant.

Quarum auctor, Cel. Goddar, D. regio idcirco præmio a *Carolo II. Rege*, donatus est. Exinde magna turba Chymicorum compositioni & imitationi earum studuit. Ast verus easdem componendi modus eo usque latuit, quo divus ille Rex secretum ab auctore cœmeret. *Mylord Portland* idem cum Cel. de *Tournefort* communicavit, hic tandem in *Actis Reg. Scient. Acad. Anni 1700.* publici juris fecit. Comprobata autem ab experientia res est, quod & guttæ prædictæ, & ferici sal volatilis oleoque essentiali suffitus multum faciant contra affectiones soporosas, hystericas, febres malignas, morbosque alias ex sanguinis spissitudine & solidorum relaxatione provenientes; sive naso, pro recipiendo odore, admoveantur, sive dosi x. ad xx. guttarum, potionibus, julapiis & aquis Cephalicis ac Anti-hysterics admisceantur. Multiplici interim cautione opus est circa usum præstantissimi hujus medii; & ante omnia sollicitè dispiciendum, num ab omni prorsus inflammatione remotissimus fuerit ægrotans; quæ si adesset, veneno certo cederet, & morbum removendum exaugeret, dum spiritus excitandi, vires corroborandi, & sanguinis circulationem accelerandi virtute gaudet. Quæ quidem merito hic notanda duximus, siquidem alii, nimium sane iisdem guttis tribuendo, quosvis morbos earum usu depelli censent, & damnum sæpius pro utilitate adferunt.

Nec non fericum crudum coccineo colore tinctum ad reprimenda menstrua abundantia ad leniendas passiones hystericas, & ad impediendum abortus periculum egregie confert. Matutino scilicet æque ac vespertino

tempore ferici hujus minutim concisi grana xv. ad xx. vel ovo forbili, vel vino aqua mixto, vel cyatho ptisanæ adstringentis indita, per dies aliquot subsequentes recipiantur. Varia sunt quibus comprobatum est, quod mala hysterica obstinatiora, huic tandem medio cesserint. Sic Cel. *Bautzmann*, D. sequentia refert in *Ephem. Germ. Dec. III. Anni IX. pag. 418.* Mulier quondam ex diutiori malo hysterico seu suffocationibus uterinis tantam virium jacturam fecerat, ut lassitudine defluens continuo lecto detineretur. Hæc igitur, morti jam debilitatis ergo proxima, adhibitis in vanum variis, amici consilio obtemperans, quovis matutino & vespertino tempore, circiter ℥j. ferici coccineo tincti, & in frustula dissecti, cum aliqua cerevisiæ tepidæ portiuncula hausit, & brevibus exinde virium redintegrationem, ac secedente tandem mali origine, integram salutem recuperavit. Medii successu felici motus Medicus, variis deinde ejusdem medii virtutem, contra morbum eundem, pari cum eventu adhibuit. Latet effectus causa, nisi hanc ex cordiali & adstringente virtute granorum *Kermes*, quibus ferico colorem inducunt, derivare velis.

Cruda tandem ferici fila & Confectionem hyacinthinam Pharmacopoeiæ Parisiensis; & spiritus eorum cum sale volatili, guttas sic dictas Anglicanas Officinæ ejusdem ingrediuntur.

℞. Aquæ Melissæ simplicis

Cardui benedicti ana ℥ij.

Florum Aurant.

Cinnamon. Hordeac. ana ℥ij.

Sal. Ammon. ℥ss.

Spirit. volatil. ex feric. crud. rectific. gutt. xxv.

Syrup. Cariophyll. ℥j.

M. & fiat julapium, singulis horis, per cochlearia, Apoplexia serosa de-
rento, exhibendum.

℞. Aquæ stillat. Cerasor. nigror.

Cardui benedicti ana ℥ij.

Confection. Hyacinth. ℥j.

Aquæ Flor. Aurant. ℥ij.

Guttar. Anglicar. Cephalic. num. xx.

Syrup. Caryophyll. ℥j.

M. & fiat potio, per cochlearia accipienda, in febris maligna, in papulis & variolis segniter erumpentibus, seu ex infirmitate cordis secedentibus.

C A N C E R.

INter quævis animalia & pisces, *Malacostraca* Græcis, Latinis *Crustata*, vel *Crustacea* (id est: quæ crusta teguntur dura quidem, ast molli, dum testaceorum testæ petrosæ æquiparetur) dicta, eminent. 1. Cancer maritimus, cujus variæ species numerantur. 2. Locusta maris major, Gallis: *Langouste* dicta. 3. Cancer maris magnus, quem Normanni: *Homar*, Marfilienfes: *Lingumbauld* adpellant. 4. Cancer marinus minor, alias: *Chevrette*, *Grèvette*, *Squille*, *Boucquet*, vel *Sallicoque*. 5. Cancer fluviatilis. Jam quum illorum nullus, nisi primo & ultimo memoratus Medicinæ utilia exhibeat, horum descriptioni tantum inhærebimus.

Cancer. Offic. *Cancer Officinarum*. Schonev. 30. *Cancro marini maximi apicibus chelarum nigricantibus*. Ind. Med. 25. *Pagurus*. Bellon. 368. Aldrov. 186. Jonst. 21. Gesn. 155. Merr. 192. Charl. 57. *Cancer Meas* (seu *Grandior*) Rondel. 560. *Cancer marinus*, Dal. 400. *Cancer brachyurus*; *manuum digitis atris*. Linn. Faun. Svec. 1244. *Cancer rotundus*, *Pagurus dictus*, Nonnull.

Cancro corpus plus latitudinis quam longitudinis habere solet, illa enim plerumque 9. digitis, hæc autem dimidio pede absolvitur. Crusta, quæ tegitur, lævissima, variis interdum eminentiis ac excavationibus alternis, imo crustulis passim suprasparsis obsita est. Capitis humani magnitudinem excrecendo attingit, servata tamen figura depressa, ut *Belon* testatur. Crusta gaudet durissima, & crura ostendit utrinque quaterna, foras respicientia, pilis induta, ternis articulationibus instructa, ungulis vero longis, cuspidatis nec fissis; brachia bis articulata & in extremitate bifida in binas chelas separantur, quorum apices nigerrimi atque inflexi duritie suæ nec ossibus cedunt. Hinc piscatores deportandorum chelas fortiori ligamento obstringere & sacculo tamquam vagina obducere solent, ne alii aliorum chelas præscindere possint. Fortiorem, quæ *cancer* vivus est, colorem, mortuus amittit; ruboris etenim fere nigricantis esse solet, ast reliquorum instar elixus, & colorem commutat. Cauda carere dicitur, quam sub corpus reflexam parum videre licet; & branchiæ, utrinque senis seriebus, ad radicem crurum dispositæ, crusta obteguntur. Aperto autem *cancro* ore, tot ibi dentes, tot appendices, tot pelliculas, tot arcana alia videbis, ut vel ex horum contemplatione convictus, naturæ opificem summum esse fateberis. Illa insuper substantia interna, coloris flavo-rubicundi, saporis adeo dulcis, ac Græcis *Mutis* dicta, pro hepate cancro data esse videtur. Innumeris apophysibus exiguis ac flavidis ubique fimbriatus adparet stomachus; & intestina, pro gracilitate totidem quæ referunt fila, vario modo contorta sunt. Reliquæ partes internæ musculis, ad movendas partes externas destinatis, albis, & esui optimis constant. In brachiis majoribus novenos sulcos ductos videbis, & in utroque testæ margine novenas fissuras semicirculares. Breves sunt, corporis respectu, octo pedes, breviora duo brachia; & *Rondeletio* teste, brachium sinistrum dextro minus est, more apud cancos omnes, sic *Aristoteles*, communi. Quatuor antennæ prominent ultra oculos, binæ breviores ex medio frontis, binæ longiores autem ex regione oculis inferiore proficiscuntur. Oculos pro lubitu jam recipit, jam protrudit; eosque, si corporis molem respicias, sibi viciniore diceres. Caudam habet subtus latam, reliquorum cancorum caudis simillimam, ex variis, sive figuram sive latitudinem considerare velis, laminis seu testulis compositam, & parti ejus internæ ova rubra, per appendices, racemorum instar conformatas, nectuntur.

Monstrum piscis *cancer* hicce videtur, & ad spectu horribilis jam procedit, jam ex latere secedit, jam, timore, recedit. Amphibiis adnumeretur, quippe vel per tres menses aqua carens & cella detentus vitam conservat. Similitudinis ergo ægre, nec nisi per peritissimos, a cancro fluviali discernitur. Gallia equidem & Germania fluviorum cancris caret; qui tamen ab antiquioribus Medicis Græcorum ac Arabum reliquis præferebantur. Copiosi sunt, *Matthiolo* teste, in Etruria. Mas quoque rubrior, foemella magis pallida in cœruleum vergit, & pro adservandis ovibus latiori cauda instru-

instructa est. Crura sua incurvata procedendo ventrem versus inflectunt. Catulitionis tempore, masculi, arietum instar capita iteratis collidendo, conflictantur; quos receptura foemella supina jacet, sic venter ventri, cauda caudæ jungitur. Aspera plerumque loca & rupibus interjacentia tenent; maris recedentis refluxu autem in arido relictæ, adtractis sive receptis pedibus immobiles remanent. Alii fuerunt, qui & cancos & crustacea testaceaue omnia, lunæ phasæ imitari, & luna crescente vel plenilunio, succo pleniores atque majores esse statuerunt, quam novilunio seu luna decrescente. Ast experientia refragatur. Errant, qui cancos delectari dicunt Musicæ sonis, ac illis excitatis facile captari. Singulari autem facultate sua se crusta quotannis exuendi gaudet cancer, serpentum instar, testibus *Aristotele* & *Oppiano*, quamvis hic annuam exuviarum depositionem testaceis omnibus communem habere videtur. Erraret, si ita censuisset. Quum igitur vehementiores inter conatus sua se crusta exuerunt cancri, defatigati, lassitudine defluentes & semianimes super arena extensi remanent; timoris pleni haud progredi audent, quousque crusta recens tenera fuerit ac mollis; jejunium observare pergunt, nec nisi acquisitis tandem viribus, animus redit, tunc contra sepias, loligines, & polypos, suos aggressores, acriter sese defendunt. Vermibus, muscis, hirudinibus & ranis inhiant. Longævi sunt, *Plinio* teste. Orientis in regionibus, sic narrant itineraria, tanta est maximorum cancrorum copia, ut vel hominibus extimescenda veniat. Oceanus Occidentalis, ait *Albertus M.* tantæ molis nutrit cancos, ut vel homines chelis correptos aquæ submergant. Id quod in insulis Orcadibus frequentissime accidit, teste *Olae M.* Sic ex *Clusio* refert *Cel. Tebr D.* ac *Acad. Curios. Natur. Sodal.*, quod præclarus ille in mari heros, *Franciscus Drake*, ignobiliore morte vitam finierit; dum in anno 1605. *Insulas Cancrorum*, dux navium adiens, cancos captando, cancrorum monstris correptus ac devoratus fuerit. Cancri cujusdam mentionem iniicit *Cel. Rondelet*, latitudine, majorem palmam, & longitudine, dimidium cubitum superantis. Et *Belon*, rariore, id est: Physici vera loquentis fama præclarus, addit: captos in Oceano cancos interdum pedem integrum latitudine pertingere, imo alium quendam, sibi visum in Anglia, decem libras pondere exæquasse. Nanneti, Massiliæ, aliisque in portubus nostris, quotidie cancos eximia magnitudinis conspiciere licet.

Plures interim auctores gravissimi, pro demonstranda cancri dexteritate, sequentia narrant. Cancri, instar ranæ piscatricis, castello suo, id est caverna rupibus interjacente residentes, explorantur si quos conspiciere possunt mytilos & ostreas, suæ prædæ cedentes. Sed quum probe norunt, suis chelis haud sufficientes esse vires pro confringendis illorum testis; illos tamen pro recipiendo aere pluries per diem testas subaperire observaverunt: cancri calculos rotundos ex saburra colligunt, prædæ suæ sensim accedunt, & tanta cum dexteritate in medias subapertas valvas calculorum unum proiciunt, ut occludi amplius nequeant, quo facto faciles prædæ suæ cedere solent pisces. Hæc tamen nobis quidem fabulam, sive delectationis ergo excogitata atque fictitia redolere videntur.

Græcum ejus nomen: *Karkinos*, Latino: *Cancer*, hoc vero Gallico, quo: *le grand Cancre de Mer* audit, originem dedisse constat. Nomen ejus Gallicum: *Crabe*, *Crabble*, seu *Crable*, *Menage* in Etymologia Gallica, ex Belgico:

gico: *Krab*, vel Anglicorum: *Crabbe*, utroque ex Germanico: *Krebs* descende, deducit. Nos omnia ista ex Latino: *Carabus*, & Græco: *Karabos* derivare malle, nomine alias locustæ marinæ, proprio. *Belonius* Paguro: *Grape* vel: *Chabre*, nomina tribuit. Idem ille docet, eum a Normanis adpellari: *Roussseau*, coloris sui rubicundi ergo; ab aliis: *Tourteau* seu artocreatem, quia suo jusculo instructus, absque aqua in furno excoqui potest; a Massiliensibus: *Crabasse* seu *Fagouille*; a Venetis: *Granciporo*, a Gallis tandem Mare Mediterraneum accolentibus: *Pagull*.

Nec ipse cancer maritimus Medicæ artis mediorum adparatum intrat, sed plebis nutrimento saltem venire solet. Multum quidem carnis continet & succi; at succi ejus visciditate & crassitudine, digestu difficillimus est, & satis diu excoquendus, & multis aromatibus condiendus, dummodo ex duritie sua paullulum remittere debeat. Varia ratione ori accommodatur, plerumque tamen, fluviatilium instar, at diutius, aqua elixus adponitur. Sic eadem virtute, eodem quo illi, sapore gaudet. Illi autem quum frequentiores reperiantur, & Medicinæ usibus & cibo frequentiores veniunt. Nec nisi chelæ cancerorum, siue apices brachiorum nigræ, pulverem simplicem & compositum, utrinque eximie virtutis, suppeditant. Simplicem præparaturus accipe chelarum canceri q. v. & extracta carne illis contenta, easdem arefactas in pollinem super porphyrite reduc. Ille igitur aperitiva, absorbente, acida stomachi leniendi, & citam alvum ac scorbutum sedandi virtute gaudet. Pro dosi veniant gr. xij. ad 3ß. cum liquore conveniente pro vehiculo.

Pulvis chelarum canceri compositus, siue: *Pulvis Comitissæ de Kent*, ab inventrice dictus, non est, nisi pulvis de quo diximus, simplex, additis aliis absorbentibus & alexipharmacis, ut infra enumerabimus. Is igitur ad expellendos variolos, contra pestem aliosque morbos epidemicos, ubi deficientes vires sustinendæ, vel virus sanguinem infectans, cutim versus propellendum erit, egregie confert. Pro dosi sint gr. xv. ad 3ß. haustibus & potionibus cordialibus & corrigentibus immiscenda.

Chelas Canceri, pulverem chelarum canceri, officinæ Parisiensis, ingredi scito.

℞. Chelarum canceri ʒiij.

Oculorum cancer. fluviatil. ꝑ.

Succini albi ꝑ.

Corall. rubr. ꝑ.

Cornu cerv. philosoph. ꝑ. ana ʒj.

Perlar. ꝑ.

Bezoar. Oriental. ana 3ß.

Reducantur in pulverem omnia, & cum gelatin. viperæ subigantur, ut in massam abeant; exinde formentur trochisci, qui umbra expositi arecant, & pro usu in pulverem reducantur; quem *Pulverem Comitissæ de Kent*, seu *pulverem chelarum canceri compositum* dicunt.

Alius simplicior, sed facultatis ejusdem.

℞. Bezoar. animal.

Sacchar. candid.

Corall.

Corall. rubr. ꝑ.

Perlar. ꝑ. ana. ℥j.

Oculor. cancr. fluviatil.

Chelar. cancr. ana. ℥ij.

Reducantur in pollinem omnia, & f. a. u.

℞. Aquæ Scab.

Cardui bened. ana. ℥iiij.

Antimon. diaphoret.

Pulver. chelar. cancr. simpl. ana. gr. xxx.

Spirit. volatilis. Salis ammon. gut. xx.

Syrupi Papaver. rubri. ℥ss.

M. & fiat potio diaphoretica, duplici haustu, interjecto quatuor horarum intervallo recipienda contra febres malignas, & seigniores variolorum eruptionem.

℞. Pulv. chelar. cancr. compos.

Corn. cerv. adust. ana. ℥ss.

Cochenil. gr. ij.

Sacchar. cand. ℥j.

Fiat pulvis subtilissimus, & dividatur in x. ꝑ. æ. senis horis accipiendus, cui pro vehiculo veniant terna cochlearia julapii sequentis:

℞. Aquæ cerafor. nigr.

Lactis alexiter. ana. ℥iiij.

Syrupi citr. ℥j.

M. & fiat julapium, pro vehiculo pulveris supra descripti, contra variolos, papulas & febrim malignam.

Cancer fluviatilis. Offic. Dal. 400. Jonst. 23. Charlet. 57. Bellon. 365. Rondel. 208. Gesn. 137. Matth. 307. *Cancer fluviatilis Matthioli*. Aldr. 207. *Gammarus, sive Astacus fluviatilis*. Worm. 248. *Astacus fluviatilis*. Schonev. 24. Merr. 192. *Cancer macrourus*, rostro supra serrato, basi utrinque dente simplici. Linn. Faun. Svec. 1249. *Gammarus seu Gammarus verus Antiquorum*; *Gammarus caudatus vulgaris*; *Astacus fluvialis seu rivalis*. Quorumd.

Est autem cancer fluviatilis Insecto-Piscis, crustaceus, oblongus ac fere rotundus, magnitudine, pro varietate loci atque ætatis, varians, cauda parum lata & conspicua præditus, amphibius, adspectu teter, incessu horridus, colore, dum vivit, seu crudus, subviridi & in livido-fulvum vergente, elixus autem rubro pulchriore; omnibus bene notus, & a cancro maris magnitudine tantum diversus; & sanguine, propriè sic dicto carens, rarius natans, plurimum jam progrediens, jam dextrorsum jam sinistrorsum secedens, jam retrocedens, & terræ cavernas seu foramina ad ripas fluminum seu rivulorum, pro domicilio, tenens. Corpus suum crusta tenuiore, quæ ipsi & pellis, & testæ, & ossium loco venit, obtegitur. *Galienus* illum capite & collo carere docet; ast capite, quamvis exiguo, ad tamen a pectore seu thorace distincto gaudet; ubi enim oculi & frons & antennæ, ibi & caput. Cancer vero oculis anteriores habet duas antenas, in origine articulatas, longas, tenues, & decrescente sensim crassitudine, in cuspidem acutissimam exeuntes, quæ pili instar seu fili in omnem partem flecti possunt atque converti. His inferiores quatuor aliæ conspiciuntur, illis figura similes, ast tenuissimæ atque brevissimæ; harum ope,

sic.

fic alii volunt, pisciculos adtrahit, dum adjuvantibus illis, viam explorat. Ex medio frontis denuo alia antenna minor, latior & utrinque dentata egreditur. Frons aspera & cuspidata, aculei instar; oculi antennis superiores, substantiæ corneæ, & profilientes, & oblique moveri possunt, & palpebris carent, & ex latere siti sunt. Oris exigui ex latere quovis binæ appendices pilosæ, pro retinenda præda inservientes occurrunt. Et quamvis odoratus ope suam prædam investigatur: nec tamen nares nec aures in illo reperies. Manuum bracchiorumque vices explent sui pedes bifidi, & chelis, sive forcipibus dentatis muniti, quibus non solum prædam arripit & ori admovet, sed quoque tamquam armis se ipsum defendere, alios lædere solet. Ex toto igitur thorace decem, utrinque scilicet quini pedes, oblique inflexi egrediuntur, quorum bini primi, omnium maximi & fortissimi, extremitatem forcipe majori dentata munitam ostendunt; subsequencia duo crurum paria, bifida, in chelas minores illasque læves, & rostro avis similes exeunt, pars enim superior inferiori ac immobili admovetur; bina ultima tandem contigua, nec bifida, in cuspides acutiores exeunt. Casu alteram chelarum alteri nonnunquam majorem esse censet *Aristoteles*, refragatur experientia constans, etenim numquam fere exacte similes videbis ambas. Quos Eridanus continet, cancros, & majore corporis rotunditate nostros in Sequana captos superare, & pedem sinistrum dextro crassiorē exhibere observat *Cel. Belon*. Cancri crura extrinsecus ossea, intus carne repleta sunt.

Thoraci contigua pars cancri, *collum* seu *cauda* vocata, lævis & continua dentibus, quibus margines thoracis fimbriati sunt, destituta, & quinque testulis seu tabulis constans, totidem in pinnulas definit, extremitatibus villosis præditas, & natanti cancro, remorum instar, inservientes. Hic igitur omnis corporis virtus residet. Caudæ subditas utrinque quaternas appendices observabis, & pinnulas villosas, duplices & majores in foemellis, ut ova sua eo reponere ac conservare possit, in maribus autem simplices & breviores. Imo pro sexus differentia mari data sunt quædam calcaria prominencia & cuspidata, superiori caudæ parti & postremis cruribus intermedia; quæ minora & læviora adparent in foemella.

Partes vero internas cancri disquisiturus, subtrahe crustam & mucum rubrum una cum membrana, crustæ inferiores, & adparebit capitis infummitate cerebrum haud adeo amplum, subviride, & quasi in binos lobos separatum, exinde autem proficiscentes nervi optici, & medulla producta in longum. Oris ex imo, (ubi bini adsunt dentes depressi ac magni, & caruncula linguam referens) brevior exit Oesophagus, & recta ad ventriculum proficiscitur. Iste autem ventriculus amplus, & membrana fortiori crassaque constans, cavitati suæ inclusa continet tria ova pro comminuendis alimentis; auxilium ferentibus duobus muscutorum paribus, & binis corpusculis glandulosis cum stomacho connexis, & ex parietibus hujus enatis. Corpuscula glandulosa plena sunt vasculorum varicosorum, intestina minora repræsentantium, ac in uno tandem trunco coeuntium. His vulgo hepatis nomen in piscibus crustacæis atque testacæis tribuunt; hepatis quoque & mesenterii officiis partes illæ fungi videntur, etenim purissimam chyli partem, a ventriculo recenter præparatam recipiunt, deinde autem, si *Cel. Willis* fides est, defæcatam humori vitali adportant. Et

teste

teste Cel. *Sachs*, *D.* in *Grammarologia* sua, unum intestinum simplex, stomacho contiguum, ex latere hujus exortum, & ejusdem ubique capacitatis, & in cauda desinens, hoc intestinum, inquam, non solum ejiciendis cancri excrementis, sed etiam ovis reponendis inservit. Anus itaque in extremitate caudæ sub pinnula situs est; & intestinum cum stomacho continuo cohærere si spectaculo satis lepido comprobare velis, cannulam tenuiorem intestini extremitati adplices, & vehementius inflando aerem immittas, & quid? aeris intrusi violentia adactus cancer, quidquid nutrimento stomacho continet, statim evomet.

Vasa spermatica maris ex utroque œsophagi latere enata, truncum versus descendunt, post tamquam epididymum, magis compacta evadunt, & in duas tandem partes genitales exeunt. In foemella item duo ovaria, ex utraque parte œsophagi & stomachi unum, in totidem denique matrices, trunci in imo fitas, desinunt. Quos igitur reliquis animalibus fecundiores esse voluit natura, cancos, illos & duplicibus & solito majoribus partibus generationi destinatis donavisse videtur.

Pericardium, ventriculo & reliquis visceribus inferius, ac in imo dorsi constitutum, cor palpitans, & motibus systoles atque diastoles alternis, tam vehementibus atque celeribus, ut in animali sanguineo, agitatum, amplectitur. Hoc autem non est, nisi musculus conicus, albidus, & cavitatem suam multas fibras seu columnas robustiores striatasque continens. Statim ex quo cordis apicem egreditur aorta, in binos ramos, ad branchias proficiscentes dividitur. Trunci autem venæ-cavæ tam adscendentis, quam descendens, posteriores cordi coeunt, deinde auriculam ejus ingrediuntur. Cor igitur dilatatum humorem vitalem a vena recipit, contractum vero aortæ illum intrudit.

Multis insuper branchiis latis, pulmonum loco venientibus, & horum in loco utrinque sub crusta sitis, piscium crustaceorum & testaceorum more, gaudet. Harum pars inferior lata & mollis sterno, pedunculorum ope adhæret, superior libera est. Branchiarum cuiusvis terni sinus, & bini quidem recipiendo & reddendo humori vitali destinati sunt. Etenim si liquorem nigrum cordi intruseris, ille statim ad branchias deportabitur, post finuum alterum penetrabit, per alterum vero redibit. Tertius denique sinus ex apice ad basin procurrit, & in canali omnibus branchiis lateris ejusdem communi desinit. Is autem canalus aquæ exuberanti recipiendæ reddendæque destinatus, foramine quodam amplo prope ad insertionem branchiæ superioris, motu perpetuo vibratæ, foramine inquam illo aperitur. Jam vero aqua, cum humore vitali communicans, in cavitatibus trunci reclusa immanet; & hac ratione respiratio cancri, extra aquam degentis sustinetur continuatur; quæ causa subest, quod cancrum non solum aeri expositum, sed & spatio aeris vacuo detentum, diutius vitam conservare vides. Quum vero omnis piscis crustaceus costis & musculis pectoris careat; adeo liberæ hærent ejus branchiæ, ut pedunculi ossei, cujusvis fasciculi basi qui nectuntur, cum musculis cavitatibus suis inclusis, totidem costas prolongatas, seu in aere suspensas repræsentare possint, vel si mavis, totidem perpendiculara distincta, quæ mediantibus musculis mota, ad continuum systoles atque diastoles motum, pro expiratione & respiratione, branchias ipsas excitant.

Antequam vero ab anatomica canceri disquisitione recedamus, ea subnectendi animus est, quæ *Cel. Geoffroy*, junior, de oculis seu calculis, & *Cel. de Keaumur*, de tempore vernationi eorum destinato, perscripserunt.

Calculis cancerorum, sic vulgo perhibent, figuræ suæ ergo, oculorum nomen accessit, nec nisi in cerebro cancerorum fluviatilium reperiuntur. Sic *Gesner*, *Agricola* & *Belon*. Nec tamen in cerebro, sed potius circa stomachum inveniuntur. *Vanhelmont* primus veri observator fuisse videtur; ast quum alias suspectæ fuerit fidei; quid mirum, quod vel sua veritas, opinionioni tunc temporis receptæ cesserit. Paucissimi igitur, experientia convicti in suam sententiam abierunt. Observat interim Vir *Cel.* quod medio circiter Junio, vernationi eorum destinato, canceri ægrotent, & per novem imo plures dies, languescantis salutis signa secum portent; quo quidem intervallo membranam recentem, & stomachum obvolvendentem enasci, & utrique interfluentem liquorem lacteum, ex lateribus descendere, tandem vero calculi duritiem induere docet. Membranam recentem ex pellicula liquoris lactei, (ut florem in lacte calido suboriri videmus,) natam, in novum stomachum transformari addit, priorem vero cum calculis, & liquore reliquo sensim solutum, nutrimento canceri per 27. dies (hos enim calculi perdurant) cedere; hoc temporis spatio namque nil cibi sumere cancerum, imo dissecti in stomacho, nil præter illa obvia videbis.

Varia, eaque *Vanhelmontii* observationibus respondentia observat *Celeb. Geoffroy*, junior, Reg. Scientiar. Acad. Sodalis. Ex quibus constat: 1. calculos cancerorum haud in cerebro, sed in stomacho, illi inferiore, contineri, 2. nec ex illis crustam novam, ut alii volunt, enasci; etenim perfecta jam crusta recenti, calculi adhuc supersunt, 3. cancras exuvias sive crustam seponendo, & stomachum, nec alias partes, nisi intestinum, renovare, 4. nec nisi vernationis tempore ipso calculos reperiri, deinde autem recenti stomacho obvolutos sensim mole sua decrescere & prorsus tandem evanescere, 5. quod & lapides ipsi & prioris stomachi membrana, canceris, vernationis ergo ægrotanti, pro nutrimento venire videatur. Coloris lividi, nonnullis lapidibus proprii causam alii volunt esse morbum singularem, vernationis tempore quosdam cancerorum adficientem. Rationi num veritas constet, an minus, perinde est. Pro certo interim habeas, quod & calculi lividi, dum excoquantur, carnis colorem induant. Imo solo splendore solis rubescunt. Hinc alios lividos, alios rubicundos, ac inter se mixtos reperiēs. Sunt, qui maximam partem nostro usui venientium arte factam esse volunt; siquidem tanta eorum ubivis copia est. Regero: quid artis imitatione opus est, quum abundantissima ubique terrarum sit quantitas cancerorum. Accedit, quod Bezoaris instar, stratis sive laminis juxta positis consent lapides, quæ strata imitandi labor, maxima difficultate, non dicam, impossibilitate premeretur. Quidquod calcinati nigrescunt, decorticantur, urinam olent, totidem signis, quod regno animali originem debeant. Imo analysi sua Spiritum urinosum, & parum salis volatilis reddunt. Nos igitur, lapides cancerorum quibus utimur, ex vivis, lividos vero seu rubicundos ex mortuis seu ægrotantibus provenire, censemus.

Ast *Cel. Lemery* paullulum aliter, & sequentem in modum: Bis enim in anno calculos seponunt canceri, verno scilicet, & autumnii tempore, coitu

perfecto, depositaque crusta priori, cui recens, illaque ab initio mollis, post sensim indurefcens, succedit. Rariores tamen calculos in fœmellis, in maribus vero minoribus dum viverent alios, figura quidem reliquis similes, ast magnitudine vicæ grano simili, & substantia teneri, & colore externo livido, donatos reperi. Nec omnes tamen masculi, nec semper calculos secum gerunt, maximo plerumque æstatis æstu iis destituuntur. Nec tamen canceruli mares, calculos, de quibus dixi, reponunt, nisi tum demum, quum debitam sibi perfectionem atque duritiem pertigerint. Maxima autem copia illorum, quæ nostris quotidie usibus inserviunt, ex India Orientali deportantur, ubi pro quantitate aliquoties per pugillos in oris fluminum colliguntur. Indiam Occidentalem inhabitantes cancri, hisce similes, minores tamen calculos præbent, qui aqua loti mundantur, deinde soli expositi arefcunt. Alii sunt, qui illos, quo melius conserventur, calcinari dicunt ab Indis. Quæ si forent, non solum inutilia, sed & calculis noxia reputanda sunt; etenim sole tantum arefacti, bene satis conservantur, & calcinatione sal ille volatilis, aperitivam facultatem iis concilians, abiret. Selectum eorum instituens seligat maximos, integros, candidos, & ne factitii intersint, caveat. Etenim vel mihi tanta arte factos obtulerunt, ut a genuinis vix summo studio discerni possent. Pondere saltem majori erant quam veri, contusi autem plus terreæ seu argillaceæ materiæ videbantur, nec nisi absorbente & alkalina virtute gaudebant, aperitiva enim omni carebant. Hos ego ex conchiliis, aliave materia argillacea in pollinem redactis, post gommeo quodam liquore, v. g. mucilagine gom-matis tragacanthi in massam subactis, tum forma seu sigillo adaptato tamquam excusis, & in clibano arefactis, compositos esse censeo. A quibus eo præsertim tempore tibi caveas velim, quo solito majori pretio cancerorum lapides venire videris.

Veram interim lapides hosce colligendi rationem, Cel. Godesfredus David Mayer D. acceptam relatione mercatorum, ex finibus Moscoviæ & Tartariæ redeuntium, publici juris fecit in *Ephem. Germ. Cent. VII. & VIII. Anni 1719. pag. 417.* Ibi autem sequentibus: maxima calculorum cancri quantitas colligitur in Bessarabia & Ucraina, fluminibus irrigatis, quæ cancris abundant. Harum regionum incolæ cancerorum conservationi studentes, & utilitati, num publicæ an privatæ nescio, consulentes illorum esu abstinere, calculos solos quærunt. Observato igitur mense, quo optimæ qualitatis esse ducitur cancer, in vasto deserto fossas, 60. vel 70. pedum profundas, ac 10. vel 15. vel 20. pedum latas effodiunt. Huc cancerorum quantos colligere possunt, proiciunt, & ut nos vindemiarum tempore uvas, pedibus, imo fustibus seu malleis utrinque ligneis, conterunt, contritos relinquunt, & aeri & hyemis violentiæ, ut putrescant, exponunt. Redeunte tempore veris ad fossas redeunt, & cribro macerata transmittendo, oculos cancri, suas divitias colligunt. Magna scilicet eorum copia in quascumque regiones externas deportatur.

Jam ea lustrabimus, quæ de variis in cancro reproductionibus circumferuntur. Populi scilicet maris vel fluminum oras colentes adserunt, cancro cuivis, si quis casu brachiorum alterum perdiderit, aliud deperditi in locum succedere atque renasci. Dictis favere videtur experientia, qua sæpius alterum cancri brachium altero admodum minus conspiciere licet. Quanta
autem

autem hisce sit species veri, omnis tamen temporis Physici saniores, inter fabulas dicta retulerunt, & conformationis vitio, nec succrescenti alterutro cruri, binorum magnitudinem variam constanter adtribuerunt. Faten- dum, quod quo satius perspectam habueris structuram partis corporum, eo minus ad credendum induci poteris, naturæ conatu novum amissio succe- dere posse. Eodem sane cum artificio crus & brachium, quo reliquæ par- tes, efformatum; imoratio conformationis distincta, æque in parte, quam in toto animali, plerumque latet. Jam pedum brachiorumque loco can- cris data sunt crura magna, & eadem industria, qua reliqua omnia effi- cta, & venis, arteriis, fibris, tendinibus, musculis sane admirandis, arti- culationibusque variis composita. Hinc natura brachiorum alterutrum re- productura, totum illum variorum adparatum atque eundem præparet, ne- cesse est, quem alias pro formatione totius animalis adhibuisset. Ubi au- tem quædam, origini crurum cancri majorum similia saltem, recondita adfunt? Jam igitur, verumne videtur, quod amissa cancrorum brachia reproducantur? Fateor, magnum probabilitatis pondus negandi rationibus inest. En autem Virum Cel. *de Réaumur*; hic sua experientia convictus sta- tuit: errare hic quidem loci sapientum rationem, & veritatem esse ex parte plebis. Quæ enim recenset facta, talia sunt, ut de certitudine eo- rum dubitare non possis, sed potius facta verisimillimis ratiociniis oblo- quentia admiranda habeas. Reseca crurum cancri vel unum, vel plura, conserva mutilatum in vita, nec deficiat ipsi nutrimentum; & quosdam post menses, nova crura, resectorum loco succrescentia, observabis. Talis autem fons reproductionis nos & admiratione merito quidem adficit, & similium desiderium inducit; faciliores sane ad exercendam belli artem re- periremur, si loco membri amissi aliud & nobis sperandum foret. Quid autem? naturam in animalia tam vilia benigniorem ac in nos se præsti- tisse queramus? Absit, providam potius curam ejus admiremur. Cancris enim cujuscvis speciei, longa voluit esse crura, ut manuum vicibus ex- plendis cederent, eademque tenuia in origine, crassiora in extremitate, ac crusta obtecta; cujus eorum conformationis ergo ac tegumenti, quum juxta articulationes sæpius ac facillime possint frangi, en quare illos instructos voluit facultate recuperandi ea, quæ sibi convenientes motus edendo fa- cillime perdunt. Nos e contrario, ab ejusmodi periculo liberi sumus atque immunes.

Nec stabile est tempus crurum recentium productioni destinatum; ete- nim & hoc intervallo incerto a conformatione foetus differt. Pro cœlo mitiore vel inclementiore, plantarum instar, citius segniusque succrescunt; & quo calidius sit cœlum, eo plura ac citiora incrementa capiunt. Sic & aliæ sunt rerum rationes, reproductionem vel accelerantes, vel retardan- tes. Quas inter eminet locus rupturæ crurum. Quæ ut clariora evadant, revocanda in mentem sunt, quod crura cancrorum variis (nec tamen re- liquarum partium instar, crusta obductis) plicaturis atque articulationibus gaudentia, digitorum nostrorum more, in varias partes flecti possint ac verti; articulationes autem pelle quadam tenuiore teguntur; quæ substan- tia sua membranam (vulgo: chartam Pergaminam) referunt, at crassitu- dine nondum adtingunt. Cuivis autem cruri majori quinæ sunt articula- tiones æquales. Jam si primam dixeris illam, quæ cruris extremitati pro-

xima est, vel cui articulatim cohæret pars major binis constans chelis, & substantiæ carnosæ saporique gratissimæ plena: tunc quartam articulationem illam esse pronuntio, cui si proximum crus resecetur, facillime renascitur; quidquod casu confracta crura, ibi, nec nisi dato studio alia in parte illa confregeris, non nisi ibidem rumpuntur. Nec tamen ipsa articulatio, hæc enim membrana æque flexili ac solida obtegatur; sed testula quartæ articulationi vicina, & huic tertiæque interjacens, variis ex frustulis composita est, testibus duabus tribusve futuris admodum distincte conspiciendis. In istis futuris igitur, & præsertim in media crus frangi videbis. Ibi scilicet levissime cohærent testæ frustula, nec nudo oculo innotescentem cæsuram exhibent. Hinc etiam vel minima vi accedente pes ibi rumpitur. Cancrum, si vel marinus fuerit, ex crure arreptum teneas, aufugiendi nisu sæpius illud corpori extractum, manu retinebis, & hoc relicto, cæterorum ope cancer abibit. Hinc satis lepidum istud dictum R.P. *du Tertre*: optanda foret furibus, quos crumenæfeces dicunt, eadem brachiorum conformatio; ut scilicet in furto deprehensi alterum brachiorum impune relinquere possent. Reliquis articulationibus vicinas ejusmodi futuras haud reperiēs, & crus ibidem fortius obstat rupturæ. Quod si autem alibi, nec in futura ista, fractu facili, pedem resecueris, succrescet, æst longiore temporis tractu. Nec tamen in tali reproductione quidpiam, nisi pars deperditæ æqualis renascitur; natura enim animali omne quod perdidit, nec præter hoc quidquam restituit. Interim si ex cruribus majoribus unum, in prima, secunda, tertiave junctura præscideris: rarius aliud, totidem juncturis constans succrescere animadvertes.

Mutilatum cancerum aliquot diebus post vulnus inflictum adeas, & obstupescens videbis, pedem quem juxta primam, secundam, tertiamve juncturam præcideras, in futura quartæ vicina nunc esse ruptum; ac si cancer probe noscens, quod ibidem fractus pes facilius citiorque succrescat, suo studio eundem frangere perrexerit.

De reproductione majorum crurum hucusque verba fecimus, eandem & in minoribus obtinere scito. Cæterum quum nec chelis adeo magnis terminentur, nec adeo frequenti ruptionis periculo subjaceant, & rariora, & quod notatu dignum est, segniora reproducuntur. Imo, quod si cruris loco, non nisi chelam, seu chelæ partem, seu antennam vel hujus partem præscideris, omnia crurum instar, renasci videbis.

Quum igitur tanta sit canceris dispositio reproductionis, Cel. *de Reaumur* in cauda eorum eadem experturus, quæ in pedibus observaverat, caudas nonnullorum rescidit; æst nullas unquam renasci, sed cancos ipsos brevibus exinde perire vidit. Et quid caudæ opus erat hac renascendi facultate, illa enim fortis ac solida, nec fractionis periculo exposita est.

Nec est in rerum natura reproductio alia huic æquiparanda, nisi illa propullantium arboris ramusculorum, amputatis succedentium. Quæ utriusque analogia multum militare videtur pro illis, qui tantam regni animalis atque vegetabilium cognationem esse volunt. Utriusque tamen magna differentia adest. Etenim propullulans ramusculus omnis est quædam planta nova succrescens; æst cancro non nisi pars resectæ æqualis redditur, & in ipsum resectæ locum secedit, æst arboris ramusculus, prope ad locum ubi amputatus fuerat, propullulat. Imo non solum lubrica sunt ratiocinia ab

analogia petita, hanc enim ubique reperire & eruere poteris; sed etiam conceptu difficilior est efformatio partis, motibus pro lubitu edendis capax, quam quidem plantarum. Utrique commune interim hoc est, quod alio anni tempore citior, alio segnior perficiatur. Quod si enim nativitas cruris momentum illud dicere velis, quo a membrana, suo involucro separatur; æstatis tempore, 5. hebdomadam spatio, tantum incrementi cruribus accedere scito, quantum alio anni tempore vix 8. ad 9. mensibus accederet.

Cujus rationem facilius reddere valebis, quam quidem ipsius reproductionis. Quæcumque enim fuerit causa formatrix (si termino tam obscuro uti liceret) illa in producendo crure novo operari nequit, nisi præsentæ materiæ copia sufficiente. Jam vero cancri, quamvis voraces & carni inhiantes, per septem ad octo anni menses parum nutrimenti capiunt; & tunc quidem vix ad vitam sustinendam, nedum ad producenda nova necessarios secum gerunt succos. Hyemis tempore cohortim in unum foramen sese recipiunt, nec ante veris initium illud relinquere solent. Tunc exspatiantur; non autem nisi exoriente solis æstu tandem, insecta aquatica & pisces, pro nutrimento, diligentius quærunt. Forsan crustæ suæ soliditas fortiori transpirationi obstat. Nutrimentum parcius haustum, aquæ sæpius acceptæ copia rependunt; acceptis tandem alimentis solidioribus, succo gaudent & nutrimento ac incremento, & productionibus novis sufficiente. Formandæ autem novæ quotannis crustæ, succi nutritii superfluum inservire videtur. Omnes etenim sua se testa exuunt, hi quidem citiores, illi segniores, nullus tamen ante Majum, nullus peracto mense Septembris; id est: postquam alimenta sumere cœperint. Antequam vero exuvias suas subtrahant cancri, per dies aliquot solido nutrimento abstinere solent; ac si pristina sua testa onerentur; vel ac si noverint, quod aliquot dierum jejuniò observato, corporis sui volumen decrescat, & crusta antiquior a recentiore, tunc non nisi membrana crassiore & molli, separetur. Totus vero hic exuvias seponendi labor ægerrimus & animali difficillimus est; ipsæ exuviæ interim adeo completæ sunt, ut perfectum sceletum representare videantur.

Crustæ duræ igitur, communi tegumento cancrorum, substituta adparet membrana crassior, flexilis, & tactui ubique cedens; quodammodo exossis, etenim omne quodcumque secum habebat, testacei vel cartilaginosi seposuit. Nec diu statum hunc sibi periculosissimum conservat crusta recens; hac enim qui latet cancer, crusta sua tamquam scuto destitutus, facilis cuivis obvio cancro prædæ cedit. Hinc est cancer crustam depositurus infrequentiora fluminum ac remotissima loca quærere; tunc enim hos situs tenere solet quos alias piscatores, cancris captatum rarius, adire solent. Biduo interim seu triduo crusta recens antiquioris duritiem omnem induit. Lapides vero seu oculos cancrorum Viri Cell. de Reaumur & Vanbelmont materiam quandam, pro concilianda crustæ recentis duritie destinatam, & tamquam repositam credunt. Etenim quo major illorum moles, eo magis vicinum est tempus commutandæ crustæ cancrorum. Imo vix peracta mutatione eosdem in cancro dissecto adhuc reperiens; ast die subsequente magnitudine decrescunt, & simulac crusta induerit, prorsus evanescunt. Len- tum interim dici potest cancri incrementum, etenim piscatorum ex testi-

monio, cancer vel sextum vel septimum vitæ annum agens non est nisi magnitudinis mediæ. Cæterum cancri cum infectis pluribus communem quotannis subeunt exuviarum sepositionem; & si vera sunt, quæ Anatomix cultores profitentur, primam scilicet cutim, sive epidermidem animalium organisationis omnis expertem, non esse nisi succumquendam condensatum; sequitur; epidermidem ipsam incrementi, proprie sic dicti, esse inhabilem; neque enim nosmetipsi, nisi seposita epidermide excrecere possumus in magnitudinem. Nostra autem tenuior atque fragilior, haud illius animalium instar, integra, sed sensim, & per frustula abit. Quæ enim ex cute nostra successive decidunt crustulæ, non sunt, nisi epidermidis hujus particulæ. Recentior quoque cancrorum crusta albida est, temporis successu fortiores colorem induit; aliorum rubicunda est, nempe horum, qui meridiano tempore calidiorum æstatis dierum, & in loco parum aquoso sua se crusta exuerunt. Aquæ ferventis calore, cutis quædam livida, crustæ subjacens, ruberrima evadit; calore moderatiore autem rubicunda; cancro tandem recenti crusta induto vel aqua vitæ eundem, quem ignis calor, conciliat colorem.

Majores equidem ac minores, Galliam qui scindunt, fluvii, cancos alunt, alii tamen præ reliquis, magna cancrorum copia abundant. Frequentissime etiam sunt in fluminibus Germaniam ac Poloniam transeuntibus. Rapacium nomen merentur, etenim non solum ranis avidissime inhiant, sed & canum atque equorum cadavera quærunt, immo alii alios devorare solent. Interdum vero, si piscatoribus fides est, herbam teneriorem depascunt. Mares lascivi singuli, vel tres fœmellas foramine suo detentas habent, & pugna acerrima a corrivali, vel crura ejus præscindendo defendunt. Nec nostrum esto illas nunc recensere rationes varias, quibus cancos captare quærunt. Harum curiosus adeat librum, cui titulus est: *nova domus rustica*, & alios, qui de re rustica tractaverunt.

Quod si cancris vivarium, Gallice: *Ecrevissiere*, destinare velis, locum ante omnia humilem, uliginosum, scaturiginibus plenum; & satis spatiosum feligas; totum muris circumdes & cæspitibus obducas; tum canaliculos aqua profluente irrigandos effodias, eosque ne cancri aufugere possint, bacillis in terram defixis, aut aquæ transeunti patentibus, munias. Sic virum novimus curiositatis studiosum, qui vivarium cancris destinatum, ad exemplare prædictum construxit, nec in constructione vel sumptibus, vel studio pepercit. Huic jam sua cura maximæ delectationi cedit, etenim magna optimorum cancrorum copia vel sub oculis nascitur, & mensæ delicias, imo si vellet, haud exiguos redditus subministraret.

Græci cancrum dicunt: *Astacos* vel *Cammaros*, Latini: *Astacus*, *Cammarus*, *Gammarus*; Itali: *Gammarella* seu *Gambaro*, quia multis pedibus gaudet; hanc rationem reddit *Belinius*; alias: *Cammaro*, vel *Gammaro*; Germani eum nuncupant; *Krebs*, Belgii: *Krevits*, Angli: *Crevise*; Galli tandem: *Ecrevisse*, *Escrevisse*, *Escrevise*, nomine, sic censet *Menagius*, ex Latino: *Scarabisca*, descendente; hoc autem ex *Carabus*, falso: *Scarabus* derivandum esse docet.

Multum cancro inest oleum, & sal volatilis & phlegma. Qui sal quum sit temperatissimus; cancro ipsi diuretica, vulneraria atque confortativa virtus accedit.

Cæterum ubivis frequentes cancri, ubivis habentur in delitiis. Gratissimi esse saporis fatemur, dummodo multa carne instructos & teneros & sano alimento nutritos selegeris. Quidquod carni eorum inest succus oleosus atque balsamicus, optime nutriens, & pectoris acrimoniam humectando edulcorans (ut loquar cum Medicis,) & sanguinem purificans, & fermenta vitiosa eidem commixta, ac sanguinem corrumpentia per viam urinæ expellens. Notandum vero, quod caro cancri, ob viscidam suam naturam, segnior atque difficilior digeratur; hinc junioribus saltem, qui biliosi & calidioris temperamenti esse solent, usum eorum permittimus; ast provectiores ætate, ac stomacho debiliore laborantes, haud gulæ indulgeant, & nimio cancerorum cibo abstineant. Exemplis enim variis edocemur, quod, qui pro cœna illos acceperant, atrocissimis stomachi doloribus corriperebantur. Quum vero ipse cancerorum usus corporis temperaturæ contrarius non est: tunc præstissimam humoribus acribus purificationem, & corpori optimum adfert nutrimentum; ætate in primis, qui morbo calido infestantur, maximam utilitatem ex usu cancerorum percipient. Nec salutem tantum sed & palati delectationem cedunt juscula aliave cancerorum præparata.

Ars Medica itaque cancris inesse docet virtutem contra Pthysin, & Asthma; nec non efficaciam vires deperditas restaurandi, & urinam provocandi, & saburræ glareamque expellendi, & ante omnia, sanguinem expurgandi. Quibus producendis convenientissima habentur juscula ex cancris præparata. Quæ præparaturus accipiat cancris viventes, in aqua eos agitando probe lavet, post in mortario conterat, & addito jusculo carnis seu volatilium, usque dum rubor illis inducatur, excoquat. Tum jusculum vel cribro vel linteo transmittat, & pro lubitu aliquam butyri, salis, nucis myristicæ, similium, portionem addat. Deinde jusculum illud ægrotanti per 15. dies subsequentes exhibeatur, & si mavis, additione plantarum convenientium medica ejus efficacia exaugeatur. Talia igitur juscula virtute sua restaurante eximie prosunt pthysicis & marasmo laborantibus; quum vero & humorum acrimoniam spissitudinemque attenuandi facultate gaudeant, lichenes aliave cutis vitia, ex lymphâ acriore & densiore proficiscentia, depellere possunt. Nec non contra dysenteriam, ubi ex intestinorum majorum offensione, gangrænæ supervenientis periculum est, singulari virtute sese commendant, concomitantibus clysteribus, admixto succo cancerorum præparatis. Imo pro vomitu habituali cancris contusos & lacte excoctos præcipiunt, & jusculi hujus quinas in die portiunculas, inter prandium & cœnam accipi volunt. Eidem usui aquam cancerorum destillatam inservire docet Cel. *Lemery* in *Pharmacopœia*. Nobis interim valde exilior aquæ ac jusculorum virtus videtur; distillatione enim præter phlegma aliquod insipidum, ac cujuslibet virtutis expers, nil plane elicitur. Merito igitur juscula anteferantur, quippe quæ & simplicioris sunt compositionis; & omnem cancri qualitatem continent.

Contra ulcera in renibus & vesica oborientia, & ad resolvendum sanguinem in his cavitatibus sæpius coagulatum, sequentem pulverem commendat *Ettmuller*:

R. Cancerorum q. v. Eosque vasi argillaceo, vernice non obducto inditos, in ore furni constituas, quo ab adustionis periculo immunes exarescant. Deinde in mortario lapide contundantur, & in pulverem abeant,

cujus dosi sit ℥ij. ad ℥ss. cum aqua quadam conveniente. Insignis quoque est utilitas pulveris hujus contra morsum canis rabidi, sequentem in modum adhibiti : ℞. Pulveris hujus partes duas , myrrhæ unam , & radicis gentinianæ totidem ; abeant in pulverem omnia , & pro dosi ℥ss. ad ℥j. per quadraginta dies exhibeatur.

Quod exteriorem cancerorum usum adtinet , vel pro cataplasmate contunduntur, vel succus eorum expressione elicitus , fotibus conficiendis interservit ; egregie autem profunt topica ista contra febres ardentes , si quæ focios habent capitis dolores , cum imminente delirii seu phrenetidis periculo . Et *Celeb. Rolandus* sequens frontale , experientia sua comprobatum præcipit .

℞. Cancerorum viventium num. xx.

Aceti rosati ℥v.

Contundantur in mortario omnia, quo fiat epithema , cui & camphora, vel opium, vel semen papaveris, prout rerum ratio postulaverit, addatur.

Præterea cancri contusi , & pro cataplasmate , lateri doloribus vexato , adplicati pro excellentiori medio , contra dolores & ardores renum , nephritidis & calculi habentur. *Ettmuller* pro optimo gargarismo contra anginam commendat succum cancris expressum, deinde succo sempervivi admixtum. Eundem & pro fotu contra adustiones & faciei rubores adhiberi suadet . Decoctiones vulnerarias ingrediuntur cancri , ex quarum numero sequentem præstantiorem esse dicit *Poterius* :

℞. Cancr. fluviat. num. xx.

Aristolochiæ rotund.

Radicis consolid. majoris ana ℥ss.

Foliorum Buglossæ

Leucopodii

Saniculæ

Agrimoniæ

Bethoniæ ana pugill. j.

Ebulliant in æquali portione vini & aquæ. Decoctio expressa contra vulnera externe adhibeatur , dum fasciæ & ligaturæ eadem irrigantur ; nec non ægrotanti, bis in die, ℥vj. pro dosi, addita syrupi citrei seu capillorum Veneris ℥j., quarta ante prandium, & secunda hora ante coenam exhibeatur. Vir supra laudatus, mirabilia huic decoctioni tribuit contra vulnera vel desperata, quidquod si ossium fracturas, nervorum scissiones & juncturarum luxationes sibi focias haberent.

Nimii essemus , si & in describendis cancerorum præparationibus singulis, & in enumerandis omnibus virtutibus, quas cancris inesse volunt, diutius immoraremur . Harum cupidus adeas *Philippi Sachs* , *D. Grammarologiam* , ubi fusius expositas legere poteris omnes . Nos quædam ab *Vanhelmontio* observata, & singularissima subnectamus. Tanta, sic ille, aversatione in porcos feruntur cancri, ut porco saltem cominus transeunte moriantur. Hinc aurigæ Brandenburgenses , provinciæ cancris abundantissimæ , can-cros ex alio loco in alium deportantes, nocte tota solliciti excubias agunt, ne quis porcus currum subiens cancris omnibus mortem, aurigis damnum adferat. Nostrum non est de certitudine facti nunc judicare, cui si veritas sua constaret, locum inter mirabilia adsignaremus.

Aquæ

Aquæ Cancrorum , in Pharmacopœia *Lemeryana* obviæ basin constituunt cancri.

℞. Pullum gallinaceum , & plumis subtractis , intestina protrahas ; substituas si placet carnis agninae frustum ; bull. per horas duas in iij. sextariis aquæ fluviatilis ad remanentiam juscul. ij. Tunc add.

Radic. Enul. camp. } lot. & incif. ana ʒß.
Polyp. querc. }

Bul. denuo per dimidiam horam, qua elapsa iterum add.

Cancr. fluviat. aq. calid. lot. & in mortar. contrit. num. vj.

Iterum ebull. per semihor. tandem add.

Fol. cychor. silvestr.

Borraginis ana pugill. j.

Levi expressione col. omnia , & dividuntur in duo jufcula, quorum alterum mane , stomacho jejuno , alterum quinta post meridiem hora , per xv. dies , contra scabiem , lichenes , erysipelatem , aliosque morbos cutaneos haurito.

℞. Cancror. fluviatil. num. iij. , eosque per vj. horas aqua limpida detineas . Post inter binas patinas contusos , cyatho vini candidi affuso per noctem integram relinquas . Postridie fortiore expressione liquorem colabis , & per tres dies subsequentes , mane , jejuno exhibeas , ac si effectus medio non respondeat , effluxo aliquot dierum intervallo reiterabis . Positionis usus est contra icterum ex suppressione menstruum profectum ; & contra febres intermittentes , si sub initium paroxysmi hauriatur .

℞. Succu recentis cancror. fluviatil.

Nicotianæ ana ʒij.

M. additis Mercurii dulcis gr. xij. & fiat liquor pro iniectione contra ulcera fordida & fistulas.

℞. Cancror. fluviatil. q. v.

Contund. & bull. cum oleo linei q. f. Deinde fortiore expressione col. & f. a. u. Habebis oleum contra adustiones & dolores optimum.

Chymica arte accedente cancrorum oculos ex iisdem principiis constare patebit , quibus alias partes animalium reliquorum componuntur . Per retortam destillati nimirum phlegma , spiritum urinosum , & exiguum salis volatilis quantitatem exhibent . Reddunt & oleum aliquod foetidissimum . Caput mortuum denique , præsertim recens , affusa aqua , pari ratione ac calx viva effervesce solet .

Adeas experimenta a Viro Cel. *Homberg* de oculis cancrorum aliisque alcalis terrestribus, instituta, & in *Actis Acad. Scient. anni 1700.* relata & adparebit : quod spiritus vini ʒj. oculorum cancri ʒiij., & spiritus nitri ʒj., oculorum cancri ʒiij. & gr. viij. dissolvere possit . Ex quibus liquet , oculos cancrorum inter illas substantias terrestres locum tenere , quas *alcala* seu *absorbentia* nuncupant , quæ acidorum additione statim dissolvuntur , nec , nisi ignis ope immutata , præsentis salis volatilis signa exhibent . Alcalinam eorum naturam plerumque causam esse volunt motus progressivi eorum , qui dum aceto illos inieceris seu irrigaveris , observatur . Menstruis alcalinis enim acida recipiendi & absorbendi virtus inest . Impostorum varii genuinos cancrorum oculos interdum imitando , arte factos & ex terra argillacea , (alias efformandis tubulis , quibus fumum tabaci fugere solent , cedente) compositos substituant . Facilis

frau-

fraudem deteges, observando, quod nec stratorum juxtapositione consent, ut genuini, id quod calcinatione experieris; & ponderis gravitate eximio illos superent. Alio experimento, testibus *Actis Academiæ Litterariæ Sueciensis*, aliquem spiritum acidum mineralem illis suprafundito, ut nitri, seu salis communis, & si veri fuerint, vehementior ebullitio, qua peracta omnis liquoris aciditas abibit; si fictitii, ebullitio exigua, spiritus aciditatem conservat; & addita portiuncula pulveris oculorum cancri genuinorum, effervescentia violentissima denuo excitatur. Quem quidem illos explorandi modum, additione spirituum acidorum fallacem pronuntiat *Bernardus Valentini*, si ex testis conchiliorum fictitii lapides præparati fuerint. Etenim ad tantum jam fastigium fraudis pervenit hominum sollertia, ut in disquirendis cancri oculis vel studio maximo, ægre a natura artem distinguere poteris. En aliud fraudis genus, illudque saluti valde obnoxium. Quum enim ex numero genuinorum illi qui in cœruleum vergunt, albidioribus præferantur, & sub nomine, oculorum cancri viventis, majori pretio coemantur: avidiorem quemdam Ratisbonæ fuisse novimus, qui cœruleum colorem comparaturus encausto, terra Cadmia, veneno fortiori, admixto illos illeverat. Ex quibus quum mulier quædam dosim unam haurisset, intra triginta horas, *Buchnero* teste, expiravit.

Genuinos vero cancrorum lapides ars Medica pro absorbentibus, adstringentibus, exsiccantibus, & ad leniendam humorum acrimoniam, ad compefcendum fluxum ventris & hemorrhoides & vomitum egregie conferentibus, nec non urinam provocantibus & sanguinem purificantibus habet. Pro dosi gr. xij. ad ℥ij., vel tabellarum, addito saccharo ex illis compositarum ℥j. ad ℥ij. præscribit. Hos autem, si in pulverem subtiliorem redacti & addita aqua communi vel rosarum, formam trochiscorum nacti fuerint: *oculos cancrorum præparatos* dicunt; eosque omnibus opiatis atque pulveribus temperantibus & absorbentibus, pro avertendo primarum viarum acido cedentibus addunt. Cautione opus est, ab initio enim vel minori dosi vel aliis stomachicis & aromaticis, v. g. cinnamomi seu nucis myristicæ pulveribus mixti exhibeantur. Sic faciliores transeunt, alias autem parietibus stomachi adhærendo, pondere suo eidem molesti evadunt. Sal præter ea & Magisterium aceti distillati ope, ex oculis cancri præparare, & illius gr. v. ad xv. hujus vero gr. x. ad xxx. exhibere solent, ubi humores coagulati vehementius resolvendi, & urina sudorque copiosus excitandi sunt, ut in febribus, pleuriti, peripneumonia, in peste & aliis generis inflammationibus. Teste *Cel. Hoffmann* tanta est virtus medii sequentis contra morbos acutos & chronicos omnes, & in primis, calori nimio junctos, qualem in adfectionibus hypochondriacis & scorbuticis variis, item in Soda observamus: ut vel ℥j. sufficiat ad producendos quosvis optimos effectus. Medium illud non est, nisi pulvis oculorum cancri vel nudus, vel cortici ovorum mixtus, addita quarta parte Nitri. Nos igitur virtutem ejus singularem in facultate sua, primarum viarum acida absorbente quærendam esse ducimus; acido enim mixtus, qualitate quadam omnibus absorbentibus seu alcalinis communi, in salem neutrum sive medium transformatur, ille autem aperientis vel solventis instar agendo, transpirationem excitat, evacuationes promovet, & hac ratione multiplicem usum variis in morbis adfert, ubi absorbentia ipsa nullius utilitatis esse videntur.

Patet.

Patet igitur, quo sensu tot adeoque diversas virtutes oculis cancerorum tribuere possint, & qui fiat, ut *Etmuller* ℞. ocul. cancr. præstantissimum dixerit præservativum vino sese ingurgitantibus, nec non his, qui arthriticis & nephriticis morbis obnoxii sunt. Vini acidum scilicet superando & corrigendo, sinistris ejus effectibus obstat. Sæpius etiam illi, quorum viæ primæ saburra acida constipatae erant, continuato per dies usu ocul. cancri, superveniente diarrhoea salubri eadem liberati fuerunt. Ut igitur in evehendis laude cancerorum oculis, limites haud excedamus, concedimus, præcipuam ac fere unicam eorum virtutem esse illam acida primarum viarum absorbendi ac detergendi; ex hac igitur & adsumta salis neutri natura varii effectus salubres, variorum morborum medela. Nec quidem negabimus, quasdam eorum particulas in massam sanguinis penetrare posse; aut vel nullius ibi erunt effectus, vel adeo singularis saltem ac rari, ut hic singulari temperaturæ constitutioni, nec medio tribuendus sit. Vir *Cel. Geoffroy*, junior in *Observationibus de cancris*, sequentia refert: Vir quidam stomachi acrimoniam profligaturus potum hauserat, cui alia inter & oculi cancerorum admixti fuerant; statim vero medio sumto, quandam erysipelatis speciem in facie, hujus turgescientiam, & pruritus continuos experiebatur. Ingravescens tumor ad jugulum usque protendebatur, & deglutiendi facilitati obstabat. Causam symptomatum primo quidem in noxia mixtorum, seu in mortario cupreo contusorum, cancri oculorum qualitate quærentes, ex aliis cancri oculis eandem potionem præparabant; aut idem effectus. Tandem ægrotans, quum cancri oculos potioni inesse cognoverit: rationem Medico patefecit, & quoties ex cancris comederit, toties eadem sese expertum fuisse recensuit. Sublato igitur oculorum cancri usu, symptomata recesserunt. Imo eadem & in filio suo accidisse observatum est. Hæc hisque similia comprobant, variæ indolis esse temperamenta, & aliis quidem eadem remedia sinistros, aliis autem & pluribus exoptatos adferre effectus. Talia igitur facta totidem sunt exceptiones a regula generali, observandæ, nec tamen illius veritatem infringentes. Oculi cancerorum itaque, ut brevibus complectar omnia, eo saltem respectu, dum primarum viarum acidis mixti varias modificationes experiuntur, ad profligandos morborum quosdam apti redduntur, quibus aliter, naturæ ac essentia suæ respectu, utilitatem eximiam adferre nequirent.

Ingrediuntur pulverem chelarum Cancris, pulverem absorbentem, pulverem *Ari* compositum, & tabellas adstringentes & corroborantes Pharmacopoeiæ Parisiensis.

℞. Nitri purific. ℥ij.

Tartar. vitriolat.

Oculor. cancr. p. ana ℥j.

Cinnaber. factit. ℥j.

Reducantur in pulverem omnia, & misceantur exacte; cujus dosis sit ℥j., ter in die, pro adultis, & gr. xij. bis in die, pro infantibus, cum cochleari aquæ seu ptisanæ, pro vehiculo. Insignis est usus pulveris hujus ad temperandam sanguinis effervescentiam, ad provocandam urinam, & ad inducendam ventri dispositionem pro purgatione.

℞. Oculor. cancr. p.

Testæ ostrear. p.

Cretæ p. ana ℥j.

Nucis myristic. ℥ss.

Abeant in pulverem omnia, & misceantur exacte; qui quidem pulvis acida stomachi absorbet atque detergit; vomitum compescit, & lactis digestionem opitulatur. Pro dosi veniat ℥j. bis in die, secunda postprandium & cœnam hora.

℞. Aqu. papaver. rubr. stillat. ℥iiij.

Aceti ex vino ℥vj.

Oculor. cancr. p. ℥j.

Syrup. rosar. sicc. ℥j.

M. & fiat potio vulneraria, in binas partes æquales dividenda, quarum alteram mane, stomacho jejuno; alteram quinta post meridiem hora, contra fracturas & contusiones accipito.

℞. Rheobarbar. pulver.

Oculor. cancr. p. ana gr. x.

Cinnamom. in pulver. gr. v.

M. & div. in ij. p. æ. per varios dies reiterandas, pro visciditatibus; in primis infantum viis.

℞. Oculor. cancr. p.

Spermat. ceti ana ℥jss.

Gommat. Arabic.

Flor. sulphur. lot. ana ℥ij.

Panaceæ mercurial. ℥ij.

Extract. Gentianæ ℥ss.

Pillular. Starkejan. ℥j.

Cum s. q. Syrupi Diacodii subig. & f. opiata, phtisin tuberculofam attenuans. Cujus dosis esto quantitas nucis myristicæ moli respondens, cum pane oblato, mane & vespertino tempore haurienda.

Alia opiata deterfiva & sedans pro morbo eodem.

℞. Pulp. cassiæ ℥ss.

Oculor. cancr. p.

Spermat. ceti ana ℥j.

Pillular. de cynogloss. ℥ij.

Balsami copaviensis. gutt. xx.

Subig. cum Syrupo de Althæa, & f. Opiata, cujus ℥ij. ad ℥j., cubitum iturus accipito.

℞. Oculor. cancr. p. ℥j.

Nitri purific.

Pulver. Simaroub. ana ℥ss.

M. & f. pulvis temperans & adstringens, contra diarrhœas, febris socias. Dosi veniat ℥j. ter, in die quovis.

Pulvis digestivus & stomachicus alius.

℞. Rheobarbar. optimi

Tartar. vitriolat. ana ℥ij.

Oculor. cancr. p.

Cortic. aurant. amar.

Folior. cardui bened. ana ʒj.

Fiat pulvis, ex quo ante prandium & coenam ʒß. accipito.

C A N T H A R I S.

C*antharides*. Offic. Schrod. 339. Mouff. 144. Dal. 389. *Cantharides Dioscoridis*. Charlet. 47. *Cantharis major*. Aldrov. 276. Jonst. 76. *Cantharides vulgares Officinarum*. Raii 101. *Cantharis coeruleo-viridis, thorace teretiusculo*. Linn. Mater. Medic. *Cantharides*, vulgo *Musca Hispanica dictæ*. Nonnull.

Cantharidis nomine nobis venit musca illa, seu scarabæus oblongus, parvus, atque alatus, cujus alæ vaginis obteguntur, illisque colore auratis, sapore statim ab initio, nullo, deinde autem acerrimo, picis saporem referenti, caustico; odore tandem, si vivus fuerit ac recens foetidissimo. Cantharidum plures, easque & figura, & magnitudine, & colore differentes, Physicorum varii descripserunt. Sic & species illa, quæ nostris in officinis adservatur magnitudinis colorisque varii est. Maximæ autem ex nostratibus, vix digitum unum longitudine & crassitudine superant. Aliæ 9. fere lineas pro magnitudine habent. Aliæ non nisi coeruleum, aliæ aureum, aliæ utrumque colorem exhibent, aliæ tandem coeruleo subviridi-aureum. Omnes vero splendoris sunt eximii & pulchritudinis summæ.

Quatuor sunt ejus partes præcipuæ, nempe caput, collum, aliis thorax dictum, corpus denique & venter. Caput, corporis respectu exiguum, os satis magnum, & binis forcipibus articulatis, pro alimento accipiendo & ori admovendo instructum, exhibet. In fronte binos oculos proilientes, colore aureos; sub oculis autem duas antennis, setis similes, satis longas, & ope duodecim articulationum similium (quarum ultima in cuspidem acutiorem definit) mobiles, observabis. Vertex, gibboris instar, elevatus, & in binâ hemisphæria æqualia admodum lævia divisus, mentum vero barbatus adparet. Pectus non nisi unica tantum parte constat, illaque antèrius strictiore, posterius latiore; cæterum tracheis pro respiratione intervientibus expletum, subnexa sibi habet binâ crura priora, singula ternis particulis, longitudine fere eadem, constantia. Particularum ultimæ autem quini sunt nodi cohærentes, & crura ipsa duos in extremitate sua aduncos ungues ostendunt. Sic & vaginæ alarum membranifarum punctulis elevatis confitæ, plus longitudinis quam latitudinis exhibentes, parum splendentes, supra convexæ, intra concavæ, tenues & solidæ pectori adhærent, dorsum obtegunt; inferiori autem corporis parti duo ultima crurum paria, priorum instar conformata, & ex tribus juncturis composita nectuntur. Ventrem constituunt sex annuli magni, in marginibus rugosi; & nudo oculo quidem glabri; microscopio autem parum villosi, infra præsertim videntur. Corpus e contrario, proprie sic dictum, octo annulis constat mobilibus, & lineola quædam totos transeunte, sulcatis. In fœmella igitur, ex ultimo ventris annulo, ubi & anus, ova plurima, candidissima, & ovario membranoso ac pellucido detenta, egrediuntur. Ventriculus & intestina simplicia atque nigridis excrementis plena, recta proficiscuntur ad anum. Admirandus autem præsertim in cantharide venit ordo & con-

formatio singularis trachearum, seu vasculorum aeris recepturi destinatorum, cum suis valvulis; his enim, auxilio aeris, vitam & movendi facultatem debet animal; tum annulus sive os pectoris triangulare, quod, ut in crabrone volante, seu scarabeo, fulcrum exhibet carni cuidam filamentis compositæ, compactæ, ac innumeris tracheis transectæ ac animatæ. Cantharides igitur inter illa animalia crustacea referantur, quorum crustæ seu squamæ, chalybis splendentis instar, nitidæ, exterius tegumentum, musculos, tracheas, viscera, nervos, venas, arterias, brevibus: quascunque partes molles obtegens, constituunt.

Aldrovandus est, qui *Aristotelis* vestigia premendo coitum cantharidis vehementiorem æque ac diuturnum esse observavit. Eadem & nos nostra experientia edocuit; cantharides etenim vel maximo solis æstu in ramis arborum coeunt; & foemellas vel repletissimas ovorum copia, masculorum dorso adscendentes, actione, quamvis indecentior videatur, haud prorsus nova in historia insectorum, observavimus ipsi. Ortum suum cantharides debent vermibus quibusdam, sua figura, haud prorsus ab erucis alienis. *Hagendorn* in *Cynobatologia* sua, cantharides originem ducere censet ex vermibus in spongiis cynosbatonis obviis. Negat *Longius*, easque ex terris exteris agminatim in Germaniam atque Helvetiam transmigrare docet; quamvis enim, sic ille pergit, vel Septemtrionem tenendo coitum celebrare soleant; ibidem tamen nec sua ova reponunt nec unquam excludunt, omnes scilicet, quas videris, eadem magnitudine esse cognosces. Ast graviter errat *Vir Cel.* quod pace ejus dictum esto.

Negari quidem non potest, cantharides esse frequentiores in terris calidis, v. g. in Hispania, Italia & regionibus Galliae meridionalibus; in terris Septemtrionem spectantibus autem rariores: interim certo quodam tempore anni per totam Europam reperiuntur; nihilo tamen minus infrequentissimæ sunt apud Germanos, aliosque Septemtrionis incolas. Nullam prorsus earum mentionem iniicit *Cel. Linnaeus* in *Faunis Suevicis*; ast in *Tentamine Materiæ Medicæ ex Regno Animalis*, illas in fraxinis & ligustris Scandiniae meridionalis vivere refert.

Teste *Cel. Lemery*, æstate præsertim copiosæ in vicinitate Parisiorum & alibi, folia fraxini, papuli, prata ac campos occupantes reperiuntur; sunt qui addunt, quod præsertim in cynoglossam, sambucum, ulmum, nucem arborem, ilicem & olivam silvestrem ferantur. Fraxinum in primis sedem sibi eligunt, & præsentiae signum, arborem foliis denudatam post se relinquunt, cui frondis deprædatio, teste *Paulo Hermann* mortem aliquoties adfert. Idem ille herbis odorem spargentibus admodum delectari docet cantharides. Nos quidem experientia novimus, quod avidæ inhient foliis caprifolii, colluteæ communis, colluteæ Persicæ ligustri folio, & cerasi septorum pumilæ, quam *Caspar Bauhinus*: *Chamæcerasum Dumetorum*, fructu gemino rubro adpellat. Ast frustra illas ex foliis sambuci, nucis & tritici vespentes quærivimus. Interim *Nicander*, Medicus apud Græcos in *Alexipharmacis* suis, cantharides dicit: *tritico devorantes*; & *Dioscorides* est, qui cantharides in tritico obvias, pro usibus Medicorum, summa cum cura adservandas esse suadet; optimas tamen esse illas, quæ diversicolores radios flavos, alas transcendentes, & corpus longum, crassum & bene nutritum, ut onisci exhibent, unicolores vero nullius esse utilitatis. Jam, cantharides de quibus

bus hic *Nicander* & *Dioscorides*, cantharides Sinenses, aliarumque regionum calidarum esse constat.

Cæterum quamvis rarissimæ sint cantharides apud Germanos & in Septentrione, sequentia tamen in *Ephem. Germ.* leges. Referente enim *Friederico Lachmund*, D. in anno 1667. mense Junio, tanta cantharidum copia, juxta Hildesiam reperta est, ut omnes ibidem salices illis quasi consitæ viderentur. Et teste *Theodoro Carolo*, D. mense Majo anni 1685., cœlo sereno & miti, in regionem sibi vicinam, magnus cantharidum numerus, instar nubis, delapsus, non nisi ligustris adhæsit, easque omnibus prorsus foliis denudavit, flores autem illius ne tetigit quidem. Teste Viro Celeb. utroque Germanicæ plebis opinio fert communis, quod septimus quisque annus cantharidum copia abundet. Constat interim tanta nonnunquam agmina illas componere, ut aeri inhærentes apum examen vento agitatum referant. Adventum earum e longinquo præcedens fœtor nuntiat, sole in primis ad occasum vergente; ille autem fœtor, illas captaturis pro duce inservire solet. Captæ exsiccantur, ex tunc tantum ex pondere suo amittunt, ut earum quinquaginta vix drachmæ unius pondus expleant.

Vox Gallica: *Cantharide*, dubio procul Latino & Græco: *Cantharis*, quod Scarabæum denotat, originem debet, & hujus diminutivum esse videtur. Idem & de nomine ejus Italico, quo: *Cantarella* audit, dicendum. Nuncupatur alias: *Mouche d'Espagne*, musca Hispanica, vel quia aliqua similitudine muscæ illi majori, alias vespæ, accedit, vel quia cantharides, ad minimum, maximas ex Hispania deportari credunt.

Cantharidum selectum instituens ad illas respicito, quæ probe arefactæ, recentes, & integræ sunt; antiquiores enim vel sua sponte in pulverem levissimum leucophæo fulvum abeundo, nil præter alas conservant, quibus haud tanta inest virtus ac corpori. Easdem præparaturus linteo collectas involvito, nodo munito, deinde vaporiaceti calidi, ut enecentur, exponito, post sole siccato, tandem ampullæ vitreæ indito, & in aridiori loco conservato.

Cantharides arefactæ igitur per analysin Chymicam multum salis volatilis acris & caustici, exiguo oleo, phlegmate & terra mixti exhibent. Cantharides ipsæ natura sua sunt penetrantes & corrosivæ, cuti etenim adplicatæ vesicas excitant, ex quibus magna serositatis copia effluere solet. Ars Medica igitur & externis & internis usibus easdem accommodat.

Multi equidem Medicorum cantharides interne acceptas pro veneno periculoso habent, ac quovis illarum usu quemvis interdicunt. Nec enim inter media Pharmacopœia Parisiensis locum tenent, sed ibidem pro emplastro saltem seu unguento præscribuntur. Magnus quoque experimentorum cumulus adest, quo comprobatur, quod interne receptæ jam vesicam corrodant, jam inflammationes, & hisce socia ulcera mortalia producant; jam sanguinis mictum, nulla ratione suppressendum provocent. *Lanzoni* ex *Parè* haustum recenset factum sequens: Meretrix quondam juvenem, qui cum illa consueverat, ad cœnam vocabat, & edulia ipsi exhibita cantharidum pulvere inspergebat; ast miser ille postridie violentiori priapismo & diarrhœa cruenta correptus, adhibitis in vanum optimis quibuscvis mediis, obiit. Sic testibus *Ephem. Germ. Dec. II. Anni X. Append.* Medicus quidam Electuarii Aphrodisiaci, quod & cantharides ingrediebantur, virtutem

tutem experturus, magni sane curiositatem coemit; etenim electuarii tantum, quanta est castanea major accipiens, vehementissime virgæ ardore & continua micturitione cum atrocissimis doloribus adfectus fuit. Potione autem ex Terebinto, syrupo Diacodio & Althææ comparata feliciter morbum depulit. Sic eadem illæ *Ephem. Dec. I. Anni 9. Obs. 148.* loquuntur: Virum quendam excelsæ conditionis ab agyrta acceptum medium pro excitanda Venere, funestissimo cum successu hausisse. Etenim & priapismus, & scroti tumor, & sanguinis micturitio superveniens, mortis, undecima die ex medio accepto subsequenter nuntii erant. Medium vero Cantharidum ℥ij., cum pulvere viperarum & radice satyrionis commixtis constabat. Sic tandem, teste Cel. *Lyonnæ* alius, qui præscriptam ipsi pro emplastro cantharidum dosin, ore hauserat, ex veneno latente tantum non mortem sibi conciliavit; mediorum vehementia scilicet, vitam conservavit, ast omnem rationis usum perdidit. Adeas si plura quæris, ea, quæ de funestissimis effectibus cantharidum usum internum excipientibus perscripta reliquit *Nicander*. Sic de alio quodam scribit *Lyonnæ*, qui sub arboreto, in quo residerant cantharides, somno correptus, & odorem illarum respirando, febris adfectus fuit. Imo rem singularem recenset *Boyle*, & fide dignissimorum testimoniis comprobata, quod scilicet varii nudis manibus cantharides aridas contrectando, eximium dolorem circa collum vesicæ, & partium secretioni urinæ destinatarum læsionem sibi conciliaverint. Sic nosmetipsi gravi satis testimonio comprobatum tenemus: quod pedissequi quidam, cœlo sereno plures cantharides ex fraxino nudis cum manibus colligentes, urinæ ardore & sanguinis mictu tandem neglectæ cautionis poenasluerint.

Jam quoque pharmacopolæ suo periculo edocti cautiores procedunt; varios enim cantharides contrectando & pulverem ex illis abeuntem respirando urinæ ardore correptos fuisse norunt. Hinc Cel. *Ramazzini* cantharides tractantem frequentibus emulsionibus, pro involvendo & emolliendo caustico earum sale, ita jubet. Quæ quum ita sint, patet cantharides virtute corrosiva, fibras dilacerante, humores colliquante & putrefaciente, & natura adeo volatili pollere, ut vel minima quantitas producendo effectui sufficiat. Hinc etiam summa cautione opus est usum cantharidum instituenti; & regia sane providentia, *Pometio* teste, pharmacopolis Gallicis interdictum est, ut cuivis ignoto cantharides vendant; nec enim nisi tunc illas vendere licet, quum & de emtoris integritate, & de instituendo externo eorum usu certum constet pharmacopolæ.

Quum vero vesica & urinæ meatus admodum nervosi exquisitissimo gaudeant sensu: & illi præsertim cantharidum virtute adficiuntur. Harum sal causticus enim statim in partibus sanguinis aquosioribus solutus immediate ad vesicam penetrat, nec reiterata circulatione modificatus, dolorosis & corrosivis impressionibus eandem adficit. Eadem ratione vel ipsa intestina adficeret, nisi mucus canalis intestinalis tegumento veniens, vim & operationem caustici salis infringeret; adtamen majore quantitate exhibitæ cantharides mucum ipsum corrodere valent, teste sanguine illo, quem in exemplo supra adductorum primo, ex ano ægrotantis profluxisse animadvertimus. Interim quum veneni nomine quamvis substantiam insignire moris sit, cujus portiuncula corpus intrans, partes nervosas internas æque ac externas violentius corripit, & in iis mutationem quandam, principii sui

sui activi & penetrantis ergo periculosam producit . Habito respectu temperaturæ corporis nostri , veneni titulo cantharides jure veniunt . Tanta ergo est cumulus mediorum , quibus sinistro earum usui occurrendum esse docuerunt . Quo referas oleum olivarum , oleum amygdalorum dulcium , lactis copiam , emulsiones cum oleo amygdalorum dulcium præparatas , semina frigida & syrupum Diacodium , vel Altheæ , vel ptisanam lenientem , ex radice Altheæ & lini granis compositam ; vel semicupium aquæ tepidæ , & si fieri potest , injectionem decoctionis ex radice Altheæ , nymphaea , & granis lini , vesicæ iniiciendam ; horum ope & mucilagine sal causticus cantharidum involutus , actionis suæ violentiam amittit ; salutis recuperandæ spes erit ægrotanti .

Suo igitur jure tot celeberrimorum Medicorum omnem cantharidum usum interiorem ex praxi artis Medicæ proscribendum judicarunt , eliminarunt . Adtamen quum singulari virtute ad vellicanda irritandaque vasa , ad diluendam lymphæ visciditatem , & ad exaugendam urinæ secretionem eas polere compertum sit : usum illarum in morbis istis convenientem esse duxerunt , ubi ferositatis evacuatio , medio cedit morbo depellendo ; tales sunt hydropes & suppressiones urinæ . His igitur morbis exigua illarum dosi , eaque mediis , vesicam a læsione tuentibus admixta , mederi studuerunt . Subscripsit expectationi effectus . Et varios morbos , in desperatis habitos cantharidum usu recessisse constat .

Sic Cel. *Worlhofius* , ischuria perfecta detentum curando , quum in vanum adhibuisset omnia , & mortis proximæ indicia aessent , ut delirium continuum , tendinum motus tractusque convulsivi , sudores frigidi , abdominis turgescencia , pulsus debilior , irregularis & creber ; quarta quavis hora pulveris cantharidum gr. j. ; emulsiōi additum exhibuit . Tertia igitur dosi adsumta , aliquantulum urinæ coagulata ac cruenta , postea urinam pituitosam , tandem vero limpidam cum dysuria emisit . Decrescentibus symptomatibus incitatus Vir Cel. continuato cantharidum usu , vel nonam dosin præbuit , & urinæ limpiditas & copia excrescebat , ægrotans plures urinæ pintas per diem reddebat , cessabant symptomata , ægrotanti tandem solo hujus medii usu , salus integra redibat . Nec non idem ille Vir laudatus in gonorrhea inveterata , cantharidum in substantia gr. j. ad gr. ij. ossis sepiæ ʒj. mixtarum , per varios dies subsequentes exhibuit , & prout rerum ratio postulabat , continuavit .

Pro præstantissimo cantharidum correctivo camphoram commendat Cel. *Joannes Groenevelt D.* in *Tractatu suo de tuto usu interno cantharidum* ; illam enim singulari quadam ratione atque certissima , ardorem urinæ ex interno cantharidum usu profectum restinguere docet . Sequens igitur ille medium pro ulceribus in vesica obortis , pro suppressione urinæ & hydrope , maxime in mulieribus præscribebat :

℞. Cantharid. in pulv. redact. gr. xij.

Camphor. solut. cum ol. amygdal. dulc. gr. xv.

F. duo tresve boli , quarta quavis hora accipiendi , præmissi tamen evacuationibus morbo convenientibus .

Noctu quoque pro leniente ægrotanti exhibeantur : pillularum *Matthieu* ʒss. cum camphoræ gr. viij. ; frequentes etiam hauriat emulsiones , & juscūla ex pullis gallinaceis seu lacte , & decoctiones , addito gommate Arabico comparatas .

Contra morbos renum & saburram medium sequens, alias secretum, cum felici successu sæpius adhibitum esse testatur Cel. *Homborg* in *Actis Academiæ Scientiar. Anni 1709. pag. 358.*

Rx. Cantharid. subtract. alis ʒj.

Cardamomi minor. absque folliculis ʒj.

Fiat pulvis, cui suprafundatur

Spiritus Vini rectific. ʒj.

Nitri ʒss.

Sic frigide infusa per 5. ad 6. dies conserventur, sæpius reiterata vasis agitatione.

Dosi cedant gutt. iiij. ad xv. vel xx. cum cyatho vini vel cerevisiæ, mane post haustum aliquod jusculum accipiendæ, continuato per tres quatuorve dies medii usu.

Ut vero exacte occludas phiolam caveto, ne continua fermentatione infusionis, rumpatur.

Sexcenta alia addere possemus, nisi hæcenus adducta sufficerent ad demonstrandum: quod cantharides, haud obstante venenosa sua qualitate, optimo nonnullorum morborum medio cederent. Regulas vero constantes circa internum earum usum constituere vix licet, alii enim integras, alii autem non nisi rescissis alis, pedibus & capite, (præcipuis, ut illi volunt, veneni sedibus) adhibendas esse jubent. Alii non nisi noxia earum qualitate emendata; alii contraria ratione adhibitas volunt, ne quidquam ex virtute medii detrahatur; omnes ad experientiam, jam hujus, jam illius amicam, provocant. Nos tamen tutissima via incedere malle, & correctivis admixtas, quam nudas præscribere. Imo numquam fere, nisi addito quodam acido vel oleoso, virus earum corrigente exhibentur, qua cautione licet adhibita, si sinistros quosdam effectus producant, horum rationes vel in nimia ægrotantis infirmitate, vel in excedente medii quantitate, quærito. Hinc Medici prudentis esto, ut satis exigua cantharidum cum quantitate v. g. gr. ss. medii usum exordiat, post autem, pro variarum ratione, dosin earum sensim exaugeat. Quidquod recentiores majori agendi virtute gaudent, quam vetustiores, etenim sal volatilis eisdem detentus, temporis tractu abit & dissipatur.

Quod tandem externum earum usum spectat, nemine hodie contradicente, cujusvis vesicatorii basin constituunt cantharides; & pro componendo eodem vel fermento panis vel alii unguento convenienti admiscuntur. Quum præter ea & virtus vasa irritandi, & lympham crassiorem diluendi, & humores resolvendi, iisdem insit; singulari sese efficacia commendant in febribus malignis ex glutinosa qualitate lymphæ cerebrum infestantis profectis, in adfectionibus soporosis, ut Apoplexia & Lethargia; in adfectionibus catarrhalibus, pulmonibus periculosis, vel oculos, aures, jugulum infestantibus; in doloribus fixis, & rheumaticis, ex sero acri, fibras carnosas seu membranosas corrode, orientibus; in pluribus aliis morbis cutaneis; in quovis tandem casu illo, ubi vel partis cujusdam sensatio excitanda, vel humores infestum sedimentum minantes, deflectendi, vel impuritas quædam sanguinis massam infectans effluvio externo elicienda venit. His, inquam, in casibus, optima quævis præstant vesicatoria, jam in regione post aures, vel in cervice, vel in medio humerorum, vel

in lumbis & cruribus, pro situ partis liberandæ, adplicanda. Dosis interim cantharidum addendarum, pro morbo, jam fortius jam mitius topicum exigente, prudentis Medici dispositioni determinanda relinquitur. Addantur etiam emulsionum vel ptisanæ lenientis usus siquidem vel extrinsecus adhibitæ cantharides ad vesicam usque penetrant, & nisi potione prædicta leniantur, dolores ac urinæ ardores producant. Cavendum denique, ne inflammationem quandam sibi sociam habeant morbi; ne nimis agitated & quodammodo ad delirium dispositus sit ægrotans, tunc enim caustica medii natura erethismum & irritationem exaugendo, facilis convulsionum imo mortis origo evaderet.

Unguenti & emplastri vesicatorii Officinæ Parisiensis basin constituunt cantharides.

℞. Cantharid. gr. vj.

Oculor. cancr. ꝑ.

Tartari vitriolat.

Salis acutellæ ana ℥j.

M. & f. pulvis, in ꝑ. æ. dosis gr. viij., dividendus, earum tres scilicet in die, hydropes laboranti exhibeas, & pro vehiculo cyathum exinfusione granorum lini præcipias.

℞. Cantharid. ℥ij.

Spirit. vini rectific. ℥. β.

Diger. leni ignis calore per biduum. Tum col. & add.

Balsami Copaviensis ℥j.

Gummat. guajaci ℥β.

Cochinel. ℥β.

Per quatuor ad quinque dies ut diger. in arenam reponantur omnia. Tum denuo colat. & add.

Camphor. ℥ij.

Olei juniper. stillat. ℥j.

Et habebis medium pro gonorrhæa optimum, cujus gutt. viij. ad x. mane, cum aqua granorum lini, ægrotanti præbeas.

℞. Picis Burgundic. ℥j.

Terebint. Venet.

Pulveris Cantharid. ana ℥iij.

M. & f. emplastrum vesicatorium, febri maligna laborantis humeris, per 24. horas adplicandum. Vel:

℞. Cantharid. in pulv. subtil. red. ℥β.

Fermenti in aceto macerat. ℥x.

M. exacte & sup. alut. extend. ut f. emplastr. quod humeris intermedium adplicabis, & per 24. horas, sive eo usque relinques, quo vesicas in epididyme obortas videris.

℞. Emplastr. cerussæ ℥x.

Emplastr. vesicator. commun. ℥vj.

M. exacte, & fiat emplastrum lenit. in locum vesicator. communis substituendum, & quovis biduo renovandum, pro continuando lymphæ effluvio.

℞. Unguenti basilici, vel suppurat. ℥. β.

Ceræ flavæ recent. ℥vj.

In olla fictili & vernice obducta liquecant leniore igne; post igne subtracto, refrigeratæ fere materiæ add.

Cantharid. ℥j.

Euphorb. ℥ij.

Piper long. ℥j.

Granor. sinap. ℥ss.

} pulverifat.

Continua mixturæ agitatione, omnia ista unguento probe incorporato, tum ollæ fictili alii immissa s. a. u. Qui quidem usus esto contra fluxiones & dolores oculorum vehementiores, pro quibus unguenti portio in regione humeris intermedia adplicitor.

Cataplasma pro dentium doloribus.

℞. Cantharid. num. v.

Capita allii num. iiij.

Theriac. ℥ss.

Conter. tum linteo tenuiori involuta brachii sinui, ubi venam scindere solent, ex latere doloribus adfecto, adplicentur. Adplicata eo usque maneant, quo in pelle oboriantur vesicæ, & eodem illo momento dolore evanescet.

Confer. *Ephem. Germ. Dec. II. Anni 5. Observat. 140. pag. 333.*

C I C A D A.

C*icada*. Offic. Schrod. 340. Dal. 388. Aldrov. 304. Jonst. 22. Mouff. 124. Charlet. 39. *Cicada vulgaris*, *Tettix Græcis*. Quorumd.

Cicadam, illam muscæ majoris speciem, diu est, quod cantus sui ergo, omnes cognoscunt. Illa autem primo quidem intuitu rudioris conformationis esse videtur; caput enim profert breve ac latum, nec more insectorum, proportionis cognatione reliquis membris connexum. Oculorum reticulo obductorum dexter æque ac sinister, proximi ad extremitatem posteriorem siti adparent. Anterior pars capitis obtusa, & oculi reticulares, oblonga sua figura cancrinis paullulum accedunt, nec horum instar in orbita sua moveri possunt. Oculis hisce, (ob subtilitatem reticuli in innumera fila divis) intermedi, & in capite per triangulum dispositi sunt tres alii illorum, quos oculos lævigatos adpellare solent.

Cæterum generi muscarum thorace duplici, seu ex binis partibus composito instructarum adnumeranda est. Mediante collo brevissimo & semper latente cum thorace anteriori nexum cohæret caput. Anterior posteriori junctus & suprapositus libero motu agitari, ac pro deprimendo capite elevari potest. Imo figuræ ejus quædam ruditatis species vel ex eo accedit, quod thoracis cujusque diameter, a latere ad latus fere idem, quidquod ipsi capitis diametro æqualis est. In thorace anteriore etiam exsculptum triangulum, latera ejus exalata, & totidem sulcis, trianguli lateribus parallelis ac profundioribus exornata sunt. Thorax posterior læviorem & magis nitidam exhibet superficiem, nisi quod in medio extremitatis suæ posterioris funiculum parum elevatum conspici licet. Margo tandem superioris partis æque ac posterioris, ultra sulcum proxime præcedentem elevatus eminet.

Quatuor ex alis cicadæ pellucidis superiores, inferioribus majores, & nervis opacis, fortissimis, ac pro textura tenui intervalla explente sustinenda sufficientissimis instructæ sunt. Alæ anteriores itaque thoraci secundo, juxta conjunctionem ejus cum primo adhærent; inferiores autem prope ad juncturam thoracis primi cum primo corporis annulo connectuntur. Tecti instar quatuor alæ componuntur, & alteram corporis partem obtegunt, alteram vero resectam relinquunt.

Octo autem numerabis annulos, si numero illorum inferere velis & partem oblongam & conicam, corpus terminantem, licet non duabus partibus, reliquorum more, constet in fœmellis. Omnium amplissimus est annulus primus; primo strictior, ast tertio, quarto, quinto & sexto amplior secundus; septimus tandem amplitudine tantum non superat secundum. Transiens quinque primorum diameter fere æqualis, sexti diameter multo minor est diametro quinti, sexti diameter diametrum septimi, hic autem denuo diametrum octavi superat. Utriusque corpus igitur sensim decrescente crassitudine in cuspidem definit, ast longiorem cuspidem fœmella quam masculus, pro corporis fine exhibet. Cæterum annuli omnes testacei ac pilis destituti sunt; nec horum aliquos nisi circa oculos reticulares, sub capite ac thoracibus, illosque lentis opticae auxilio cognosces.

Superest caput cicadæ descripturis, ut ea exponamus, quæ eidem inferiora occurrunt; nec duas antennas, vel exiguitatis suæ ergo (paucarum linearum longitudine enim circumscribuntur) prætereamus. Has vel caput deorsum spectando prominentes, ast originem earum non nisi capite inferiori spectato observabis. Singulæ earum prope ad oculorum reticularium singulos positæ, & ex parte infima laminulæ cujusdam cartilaginosa proficiscuntur. Laminula autem in illo margine occurrit, cujus ope pars superior ab inferiore separatur. Lentis optimæ auxilio adjutus cognosces omnem antennam ex quinque ad sex articulationibus immediate cohærentibus, & sensim crassitudine decrescentibus compositam; harumque extremam vix capillo æquiparandam, primam vero, quæ basin constituit eximioris crassitudinis esse.

Ab anteriore capitis extremitate pars alia, triangulari forma induta, tamquam mentum maximum, pro obtegenda inferiore capitis parte incurvatum, ulteriusque productum, egreditur. Hujus ab apice tandem proboscis illa proficiscitur, cujus auxilio alia fane nutrimenta, quam rorem, ut antiqui censebant, accipit. Ope enim illius succum vasculis foliorum atque ramorum inhærentem exantlat. Et vel ante periodum metamorphoseos suæ, nondum musca, simili tamen proboscide gaudens, ex radicibus & plantis succum pro alimento hauriebat. Quum igitur transmutatio ejus proboscidem intactam relinquat atque eandem, eisdem quoque usibus illam peracta metamorphosi cedere videtur, quibus explendis antea fuerat destinata; id est: cicadæ ad exantlandum foliorum atque ramorum, vermi autem seu nymphae in cicadam transformandis, ad hauriendum ex radicibus succum. Ex apice menti igitur proficiscens proboscis, pro vagina habet canaliculum solidissimum, & magna ex parte cartilaginosa, & microscopio si uti velis, pluribus pilis obtectum. Proboscis ipsa tribus componitur filis testaceis seu corneis, longitudine sibi similibus, & colorem castaneum præ se ferentibus. Bina exteriora, superficies foras respi-

cientem habent convexam, aut tertium quæ tangit, planam. Microscopio illa disquiras, vel lenti optica, foci vicinioris admoveas, & videbis extremitatem eorum cuspidem rotunda, seu ut cochleare oblongum efformata terminari; ipsamque cuspidis rotunditatem mollem ac dentibus sibi vicinis confitam esse. Hæc igitur bina fila, conscindendis plantis destinata esse vides. Tertium vero, seu interius apicem, in cuspidem fixam ac aduncam desinentem ostendit. Imo & quarta pars adest, ad proboscidem quæ pertinere videtur, & ipsi proboscidi innixa, in basi latissima, sensim decrescens, in cuspidem acutissimam desinens, & stillicidii instar, excavata. Huic linguæ nomen convenire, & succum a proboscide deportatum hujus præcise auxilio ad mentum deferri censet Vir in disquirendo sagacissimus, *Cel. de Reaumur*, cui hanc cicadæ anatomiam debemus.

Aristoteles & sectatores ejus antiqui, binas cicadæ species, magnitudine præ primis diversas, constituunt. Majores dicunt: *Achètes*, minores vero: *Tettigones*. Addatur interim species tertia, magnitudinis intermediæ, & variis differentiis adhuc aliis distinguenda. Nec magnitudo varians saltem, tres cicadarum species constituit varias; sed & colorum diversitate faciles inter se distinguuntur. Sic species prima superficiem reliquis fulviorē exhibet. Corpus enim & thoraces tantum non fulvo-nigricantes; sed thorax prior marginem posteriorem fulvo-flavido colore fimbriatum; & præter ea lineam ejusdem coloris ad caput procurrentem, caput per medium dividens, & binis tribusve punctulis flavidis interdum distinctam ostendit. Sic flavidæ etiam sunt partes eminentiores marginis posterioris, qui thoracem cingit secundum. Alia ratione dispositum videbis colorem flavum in cicadis speciei secundæ, imo octo ad decem punctula primæ speciei cicadis ignota, in alis earum superioribus. Tertia tandem cicadarum, Gallis: *Cigalons* dictarum, minimarumque species, juxta Avignon, Galliæ urbem, reperta, plus flavidi quam species prima, aut minus, quam secunda exhibet.

Cujuscumque autem speciei sint cicadæ, masculus tantum canere novit, fœmella nescit. Communi quidem errore in regionibus cicadarum copia abundantibus, ut in Provincia & Occitania, fœmella pro cantrice, imo pro masculo habetur. Ignoscendum est errantium turbæ, etenim vel *Malpighius* ipse in eundem errorem incidisse fatetur; dum illud fœmellæ instrumentum, quo ramusculos, quibus ova sua reponere quærit, perforat, pro parte masculina & ovis fœcundandis destinata habuit. Rudiore autem errore detinentur illi, qui cantus cicadæ causam, in frequentissima alarum ejus agitatione, & adfritu superiorum cum inferioribus quæsi verunt. Forsan grillos & locustas cognoscendo in hunc errorem delapsi sunt, & ne quidem spectato masculo cicadæ, dicta sua adseruere; etenim vel adspectus nudus rusticis sufficit ad distinguendas cicadas cantantes & mutas. Temporibus *Aldrovandi*, imo ante eum, discrimen illud rura colentibus notum fuisse constat.

Quod si igitur vocis nomen illi saltem strepitui tribuere velis, qui producit ab aere pulmonibus extruso, quique ubi laryngem egreditur, laryngis ope modificatur: tunc insecta voce carere constat; quod si vero vocabulum: vocis, latius patere velis, illudque omni sono & strepitui convenire iudices, quibus excitatis alia sui generis ad suscipiendas quasdam
actio-

actiones determinare cupiunt; tunc non solum insectis vocem inesse; sed & in primis organa cicadæ cantui destinata tam mirabili ratione constructa cognosces, ut quamvis haud in gutture, sed in cavitate ventris adpareant, numquam satis admirando artificio composita esse confiteberis.

Cognita quidem fuerunt organa ista *Aristoteli*, & qui eum sequuti sunt, *Physicis*, adtamen nec illis adcurate satis perspecta fuisse videntur. Multis enim erroribus scatet quæ ad nos pervenit eorum descriptio, imo varia ex illis detectu & cognitu difficillima esse constat. Quod si igitur masculum speciei primæ supinum lustraveris, statim laminas duas, easque testaceas, nec foemellæ proprias observabis. Cuivis laminæ est latus aliquod recta linea procurrens, reliqua extensionis suæ parte rotunda. Ex latere suo recto autem, nulla articulatione mediante, cum secundo thorace necitur, & quidem immediate sub insertione tertii crurum paris, seu prope ad regionem illam, ubi corpus & thorax secundus invicem cohærent. Cæterum quævis laminarum dimidiam ventris magnitudinem superat; ita ut invicem sibi juxtapositæ non solum totam ventris partem ipsis respondentem obtegant, sed etiam ex aliqua sui parte sibi superpositæ conspiciantur. Plus longitudinis habent quam latitudinis, & extremitate sua rotunda tertium fere annulum pertingunt; non nisi thoraci tantum adhærent, & licet eidem immediate, nec mediante articulatione quadam jungantur, aliquali violentia sublevari possunt; tunc autem ad punctum adhæSIONIS proximum recedunt; interdum & motui cedunt ventris, qui infra se compliendo thoraci adpropinquat. Ad impediendum vero ne justo magis attollantur, vel si sublata fuerint, delabantur, adsunt bini cuneoli solidiores & spinei, cuivis laminæ se elevanti innitentes, ac ex natibus cicadæ, seu parte cruris, quæ thoraci juncta est, proficiscentes.

Adparatum sane mirabilem deteges, si neglecta cuneolorum resistantia, laminas sublatas, obvolutasque in thoracem reposueris, & partes sub laminis detentas, in situ suo naturali contemplatus fueris. Disquire singulas, respice omnes in universum, & cantui destinatas esse adparebit. Imo organa gutturis humani, cum organis ad edendos sonos cicadæ, (nobis adeo ingratos, & ex ventre ejus profectos) destinatis conferas; & paricum studio ac arte, utraque composita esse cognosces. Statim conspicias cavitationem, singulari ratione in anteriore ventris parte efformatam, pro illa enim annulus primus conscissus, secundus vero constrictus est. Margo extremitatis suæ (de cavitate loquimur) fortior est ac crassior, quam annuli ipsi, & quod formam extremitatis spectat, ex lateribus rotunda, in centro autem lingula quadam, caput, seu interiorem cavitatis partem respiciente, instructa est. Cæterum duas in cellulas præcipuas separatur cavitas illa, & quidem mediante quodam triangulo testaceo, solidissimo, & ex parte sua oculos incurrente, convexo. Hujus basin ex latere thoracis, apicem vero anguli, basi oppositi sub lingula, de qua diximus, constitutum videbis. In triangulo tandem quædam spina exsurgit, in ipsa lingula definit, & pro septo cedit divisionis, qua ipsa cavitas, ad sui partem annulis fere subadjacentem usque separatur.

Fundus vero cellulae cujusvis puerorum delectamento, & gravium virorum admirationi venit. Illi scilicet speculum semicirculare videre sibi videntur; cellulae fundi pars altera enim, alio trianguli testacei latere cir-

cumscripta, reliqua autem pars circumferentiæ, cavitatis peripheriæ accommodata est. In fundo tandem cellula omnis, membranula quædam extensa tantæ est pelluciditatis, ut frustulum vitri subtilissimi ac transparentis, seu laminam tenuissimam talci optimi (quem & lapidem speculari dicunt) exacte referat, imo oblique spectata quosvis iridis colores ostendat. Binis insuper fenestris vitreis, oculo corpus inspicienti patentibus, instructa esse videtur cicada. Ast binæ plerumvis fenestræ totidem valvulis, sive particulis crustaceis, magnam cavitatem obtegentibus, occluduntur. Quum ergo cicadæ sonos ex inferiore valvularum & laminarum crustacearum parte egredi noveris: binas cellulas cum membranis adeo tensis non nisi modificandis cicadæ tonis, quo foemellæ saltem, cui destinati sunt, jucundiores evadant, inservire constabit. Duorum cuneolorum mentio superius facta est, quibus ut nimis elevari seu adtolli possint valvulae, impediuntur. Tertius adest, qui obstat, quo minus in cavitatem ipsam descendant; & hic ponticulum seu canthariolum refert, qui ab extremitate thoracis proficiscens, directione horizontali, fere usque ad basin trianguli testacei procurrat; hic autem in angulum rectum flexus, fulcrum sibi constituit, basi de qua nunc dicimus, superstructum & adhærens. Idem ille etiam pro retinendo corpore venit & ad impediendum ne vel nimium a thorace recedat, vel nimium possit elevari.

Nec tamen, nisi posteriorem cavitatis partem, in bina dividit triangulum testaceum. Ast anteriorem, membrana candidissima, tenuis, & solidissima explet, & ex altero suo latere vasi trianguli testacei, ex altero autem, oræ posteriori thoracis nectitur. Imo binæ ejus extremitates cohærent thoracis partibus, illis respondentibus. Nec tamen eadem ratione membrana hæc albida, & illa splendens in fundo cellula obvia extensa est. Albida enim non nisi erecto cicadæ corpore tenditur; infra reflexo autem v. g. dum capiti propius admovetur, tum membrana rugis, quæ annulis animalis sunt parallelæ, obortis, complicatur.

Magnum igitur apparatus vides esse organorum cantui cicadæ destinatorum. Physici alii, hujus ergo, aliquibus ex hisce soni productionem adscribere. Alii enim ex adfritu annulorum & valvularum seu laminarum testacearum illum exoriri duxerunt; dum scilicet venter infra inflexus thoraci admovetur, extemplo autem denuo reflexus recedit. Quem motum quum in cicada mortua excitarem, adfritum fere nullum, nedum edendo strepitui sufficientem observavi. Aliis membranæ binæ speculorum instar splendentes, totidem tympanorum membranæ visæ sunt, quæ tactæ sonum ederent, ast bacilli, quorum percussione eliceretur, deerant. Denuo alii statuerunt: membranam albidam jam in rugas coactam, jam explanatam producendis sufficere sonis; ast nimis humida & flexilis est, ut strepitum vel minimum, sese complicando & extendendo producere possit.

Nullam igitur hætenus descriptarum partium cicadæ sonis producendis cedere constat. His aliæ veniunt, quas in cicada vivente, si vel observantis manu detenta caneret, frustra quæreres. Dissectione facta innotescunt. In dorso quasdam dissecuit Cel. de Reaumur, & resecta parte interiore, quæ respondet, cavitati specula continenti statim, duos conspexit musculos maximos. Hi non sunt nisi fasciculi innumerabilium fibrarum, rectæ rectis juxtapositarum, & facillima opera separandarum. Adprime exæquant fibras muscu-

musculorum, qui in thorace quarumvis muscarum, pro agitandis harum alis, observantur. Nec enim illis qui agitationi alarum inserviunt, nec crassitudine nec viribus cedunt, imo longitudine eosdem superant. Musculi igitur adeo validi, & in ventre constituti, agitandis partibus istis destinati videntur, quarum ex motu cantus vel sonus oritur. Accidit enim, ut, dum Illustris Academiae Sodalis musculum alium disquirendo, eum acus ope paululum ex situ suo protraheret, ut sua sponte in eundem recederet, accidit inquam, ut motu hoc excitato, in cicada, jam ex mensibus mortua, cantum produceret, debiliorem quidem, adtamen pro investigatione organi cantus veri sufficientem, musculi tractum insequebatur, & partem in qua desinit, detegebat.

In omni scilicet cavitate majori, ubi alia inter & specula ista reperiri diximus, bini videntur recessus similes atque æquales, ac cognitu dignissimi. Quivis igitur recessus seu cellula circumscribitur septo quodam solido & testaceo ac parte aliqua annuli primi. Septum tantillum in cavitatem magnam recedendo, cellulae capacitatem exauget; apertura cellulae cujusvis ventri perpendiculariter subjacet. In binis hisce cavitatibus ergo bina cantus organa quæras. Harum aperturæ enim voci cicadae usui cedunt eidem, cui larynx humanae. Licet enim inflexibiles ipsæ modificandis sonis haud sufficiant; aliæ tamen adsunt partes, sonos quæ modificant, imo magis, quam qui a glotide nostra efformantur. Pro perficiendis nimirum sonis humanis necessarii sunt fornices palati & oris cum cavitate nasi; at modificandis cicadae sonis inservire possunt & laminæ testaceæ, & cavitates specula continentes, & specula ipsa, & variae partes aliæ ex cavitatem majore.

Quod si tandem verum cantus cicadae organon cognitum habere velis, cellularum unam, de quibus dictum est, aperias, & instrumentum sonorum ea detentum videbis. Ex utroque parte annuli primi in masculo eminentiam quandam triangularem observare licebit. Haud item in foemella, eminentiæ enim masculo datae sunt, pro amplificando receptaculo instrumentorum soni. Si igitur cellularum unam absque læsione instrumenti eadem latentis aperire velis, hanc eminentiam annuli gibbosam scalpello quasi abradas. Hac præscissa, & interiore cavitatis parte resecta, maximam hujus partem occupare videbis, quid? membranam, tympani forma convolutam, & latus suum convexum exhibentem. Nec lævis est hæc tympani species, sed innumeris rugis ac plicaturis crispata. Hanc autem vix dum tetigeris, sonum admodum acutum, instar membranæ (quam chartam Pergaminam dicunt) aridissimæ atque expansæ. Addas: quod plures tendines exiguae, concavae tympani superficiei nectantur; quodque harum auxilio, musculus agitando tympano destinatus, tympano movendo sufficiat: & explicatione ulteriore haud opus est. Constat enim: quod dum musculus alternis citissime contrahitur & relaxatur, portio partis convexæ tympani fiat concava, post autem portio ista, suo ipsius elaterio pristinam recipiat convexitatem. En soni momentum & originem. Diu fatemur in explicandis organis sonum producentibus versati sumus; nec tamen justo diutius inhæsisse censemus; siquidem non nisi concurrentibus his omnibus cicadae vocem elicere placuit illi, quem nil superflui, nec inutilis quidpiam efformasse constat, Deo. Eandem insuper organorum dispositionem in cicadis

cadis mediæ & minimæ speciei, æst aliquantulum diversam in his, quæ maximam speciem constituunt, observavit Cel. *de Reaumur*.

Cantus organis fœmella destituta est, nec sonum edere potest; alio tamen instrumento sibi proprio ac admiratu dignissimo gaudet. Quum enim ova earum in foraminula longe producta quibus frustula ligni perforant, ferie ac arte reponantur; instrumento quodam pro terebrandis foraminulis gaudeant necesse est. Hoc igitur instrumentum, corneæ seu testaceæ vel durioris est materiæ, quam omnes reliquæ partes insecti, more insectis communi. Æst magnitudine sua superat quævis reliquorum instrumenta, quibus pro usu quodam analogo eadem destinata voluit natura. Conformationis suæ singularia vel nudo oculo innotescunt; & in cicada speciei majoris 5. lineas longitudine attingit. Conicæ figuræ enim est annulus ultimus æque maris ac fœmellæ, in fœmella tamen longior ac crassior ad basin videtur, & hisce majoris longitudinis speciem induit. Constat etiam annulus illè, si fœmellam respicias parte unica, si masculum, duabus, altera nimirum subtus accedente. Totus insuper ad longum finditur, quo exitus pateat terebræ, de qua inferius. Annulus itaque primo venit terebræ involucro. Interim sua, & alia quædam vagina est terebræ, ambæ autem canale ultimi annuli continentur. Jam cicadæ ventrem vel levissime comprimās, & terebra, vaginis suis expressa, resecta adparebit. Primo statim intuitu de officio ejus judicare valebis, & vel nudo oculo cognoscēs, quod sit corpus longum, testaceum, crassitudine ubivis eadem, nisi prope ad extremitatem cuspidatam, ibi enim paullo crassior evadit. Cuspis autem angularis, sive jaculi figuræ est. Cæterum per totam longitudinem laterum duorum, quorum unione efformatur, dentata est cuspis. Vagina terebræ proxima, egredientem ex annulo terebram haud comitatur, & duabus partibus constat, quarum utraque ab origine usque ad mediam longitudinem fixa adhæret carni, fundum canaliculi qui annulo est, constituenti. Ubi adhæisionis finis, qua scilicet dimidium vaginæ cum carne fundi nequitur; ibi articulatio; & pars articulationem excipiens cochleare oblongum sua figuræ refert. Binis his cochlearibus igitur contineri atque includi scito apicem terebræ in situ naturali constitutæ. Quod ad colorem adtinet, illum & in parte articulationem excipiente, & in terebra ipsa, & in parte, quæ basin dimidiæ cujusvis vaginæ efformat, illum inquam, fulvum atque splendentem, substantiam vero testaceam esse scito. Terebra ipsa haud rectissima procurrit, sed incurvata convexitatem ex incurvatura nascentem, in illa parte exhibet, quam cicada inferius spectata videbis. Magis curva est in basi, quam in reliqua sua parte, & hujus conformationis ergo non solum facilius canaliculo recipitur, sed etiam sua sponte & quiescens, eodem recedit. Superficiem ejus alteram convexam, alteram concavam adpellabimus. Lentis opticæ ope, apicis latera dentibus per series parallelas dispositis atque fortissimis confita observabis. Novenas in utroque latere numerabis, & prout apici propinquiore sunt, eo exiliores & densiores conspicias. Ubi autem ultimæ maximæque desinunt, ibi ternas quaternasve alias, parvissimas reperiēs.

Simplex quidem primo intuitu instrumentum illud videtur, æst diutius protracto examine mirifice compositum & arte constructum adparebit. Prima scilicet ad longitudinem convexæ superficiæ procedens, partibus illud

constare confirmat, & tribus præcise compositum esse observabis. Sæpius etiam nondum dissectum, sed manibus perscrutantis saltem contrectatum, apicem ex binis particulis constantem ostendet. Quam acutissimus enim sit, concurrenti apice duplici efformatur, & pars utraque dentata est. Sic pro constituenda terebra duas cedere vides limas, conformatione singulares, & alterno motu agitandas. Dum vero agunt, eandem inter se distantiam conservant, ita ut agitata sive progrediens quiescenti sit parallela. Quod quidem a parte illa tertia pendet, quam fulcri nomine dicere liceat, qua inter se continentur. Fulcrum igitur seu basis per maximam sui partem, quadrilaterum, duplo latius quam crassum, & cuspidem ejusdem fere crassitudinis, sed in hastam vel jaculum desinentem, ostendit. Modus etiam cohesionis omnium, actionem terebræ facilem reddit. Nec tamen miramur organa visum fere effugientia tanta cum arte & studio summo esse elaborata, dummodo artificis manum, cui originem debent, respicimus.

Alternata igitur limarum suarum agitatione, cicada lignum pro reponendis ovis perforat; & quidem muscæ ramusculos arborum & arbustorum viventes & succi plenos, cicada autem non nisi aridos mortuosque perterebrat. Quam varia est natura, vel ibi, ubi nobis eadem videatur. Ova muscarum scilicet succo ramusculorum, pro humore & alimento egent, ast ova cicadæ omnibus necessariis instructa sunt. Hinc succus ramusculorum viventium noxæ cederet ovis, hæc mater novit, vel nosse videtur. Faciles interim ramusculos, ova cicadæ continentes distinguere valebis; hi enim quasdam eminentias, ab elevata ligni parte proficiscentes, & serie dispositas ostendunt. Nec nisi ramusculos medullam continentes perforat cicada, & simulac illam adtigerit, ulterius a perforando desistit. In his foraminulis igitur jam 4. ad 5. jam 8. ad 10. ova; alba, oblonga, & utrinque cuspidata reperiuntur. Ut autem angusti spatii rationem habeat, haud per fila seu series ova reponit, sed ita, ut cuspis posterior antecedentis juxtaposita sit cuspidi anteriori subsequenti. Pluribus interim ovis seponendis sufficit cicada una. Bina etenim sunt ei ovaria, & *Cel. de Reaumur* 150. & plura ova in quovis ovario foemellæ, quæ alia jam seposuisse videbatur, numeravit; etenim hæc minus quam reliquæ turgescencia exhibebat ovaria. Huic igitur 300. adhuc ova ovariiis detenta, supererant. Teste *Pontedera* cicadæ 500. 600. ad 700. ova seponere solent. Nec glutinis pro obturando foramine vestigium ullum, sed provida cicadæ cura, ligni fibras pro tegumento substituit. Etenim perforando foramini dum cicada sese accingit, fibras in orificio foraminis obvias non nisi sublevat, ex altera parte adhærentes relinquit, & extracta tandem terebra, iisdem illis foraminis orificium obturat.

Plenissimum igitur corpus foemellæ est ovis, plenissimum masculi vasis, quibus liquor pro vivificandis ovis, præparatur. Vasorum cumulos plures, five vascula hinc inde contorta, & inter se adplicata adparent in corpore maris dissecto. Quod, si digitis tantum externe compresseris, prosiliens annulorum ultimus subaperitur, & ex inferiore sui parte stillicidium, lamina crustacea obtectum efformat. Tum, pressione continuata ex stillicidio progredietur aduncus major fulvus, testaceus, ventrem versus inflexus, & molli cuspidе donatus. Hic non solum pro foemella ex ano corripienda, inservit, sed etiam pro defendendo & superne obtegendo tubulo breviori,

cujus

cujus orificium apertum, fimbriatum, testaceum, ac coloris pallidioris esse solet quam ipse aduncus. Vehementiore tandem compressione ex eadem extremitate tubuli pars quædam egreditur carnosa, albida, oblonga, & in mammillam definens, prævio quodam globulo. Masculis secundæ & tertiæ, id est: minoris minimæque speciei duplex esse solet aduncus extrunco eodem profectus.

Cicadæ ex ovis autem vermiculi candidissimi, sex pedibus instructi, & figura sua pulci multum accedentes, id est: capite ventrem versus incurvato, enascuntur. Extremitas capitis bifida duos dentes longiores effingit. Nec non bifidæ sunt extremitates crurum priorum. Eandem vero nidi seu foraminis aperturam, qua intraverant, egredientes terram quærunt, & eadem sese intrudunt. Ibi sub forma vermis hexapodis crescunt, amisso scilicet capite bifido, cui proboscis successit, denique in nympham abeunt generis illius, quod & nutrimentum accipit, & incedit, & destinatum sibi habet incrementum majus. Quas quidem Nymphas antiquioribus notissimas, & ab *Aristotele*: *Tettigometres*, *cicadarum matres*, dictas fuisse constat. Nympa igitur, fordido-albida, capitis figuram habet eandem, quam sub forma cicadæ conservabit, nempe munitam proboscide, & structuræ, & situs, & vaginæ ratione, eadem. Nymphæ pariter ac cicadæ thorax duplex est, ex quo alarum vaginæ proficiscuntur. Octo annulos in corpore utriusque numerabis, ast in nympa nondum genitalia sexus, differentiam constitutura observabis. Nec in nymphis masculorum organon cantus, nec in nymphis fœmellarum terebram detegere licebit.

Majori interim observatione digna videntur bina prima crura in nympa pariter ac cicada. Hæc illis data videntur, ut terram suffodiendo viam sibi sternere possint. Primo statim intuitu cancrorum cruribus similia videntur, siquidem in extremitate illorum pedem quemdam, id est: partem reliqua latiore & crassiore ostendunt. Cætera autem nymphæ pariter ac cicadæ crura quatuor, nil singularis, nec pedem in prioribus obvium continent; in acutiorem quemdam unguiculum exeunt, & prope ad varias suas articulationes, multas alias cuspides testaceas exhibent.

Nymphis necessaria erat talis conformatio crurum anteriorum, siquidem & illæ nonnunquam ad profunditatem 3. pedum terram penetrant. Observationibus omnium constat, quod ad radices arborum vicinæ degant. Et teste *Pontedera* non nisi anno subsequente formam nymphæ deponit insectum. Quantumque autem sit terminus omni nymphæ incremento destinatus; hoc si attigerint, persentito æstatis calore, terram egrediuntur, arbores adrepant, & jam truncum, jam ramusculos, jam folios uncis amplectendo tenent. Pedes enim pluribus cuspidibus hirsutis, munitos esse diximus. Tunc metamorphosis illarum more insectis communi perficitur. *Aldrovandus* enim suis ac reiteratis experimentis, certus, nec, ut solet, auctoritate antiquorum fretus, rationem exponit, qua cicadæ nympharum exuvias deponunt. Recenter egredientem scilicet viridissimam esse ait, postea in superficie corporis nubeculas, colore castaneo suboriri, vergente tandem diè totum corpus, fulvo-nigrum colorem induisse.

Cicada apud Italos & Galliam Meridionalem tenentes frequentissima, Angliam & Germaniam nulla inhabitare solet. *Albertus M.* grillum, alii locustam viridem majorem pro cicada habuerunt. *Cel. James* Virum *Cel.*

Dale sequutus refert, ineffabilem cicadarum quantitatem, in Regno Neapolitano, in fraxino pumila cum foliis rotundis, ex qua Mannam Calabrensem, incisione facta elicere solent, reperiri. Rariores fatemur, in regionibus vel temperatioribus cicadæ. Adtamen quotannis cicadæ speciei majoris in tractu Vastinio, prope ad Pictaviam obviæ ab ruricolis: *Birnelles* vocantur. Imo hi cicadarum cantu delectantur, quem, si acutior & continuus fuerit, pro nuntio æstatis sereni, & messis abundantis habere solent. Ex quo enim cicadæ cantus inceperit, ulterioris frigoris inclementiam haud amplius pertimescendam esse observaverunt.

Plures vero ex avibus cicadarum sunt gulosissimæ. Sic teste *Belonio, Lib. I. Observat.* pueri Cretenfes, apiestras, aves pulchriores, & hirundines majores, *Martinets* dictas, cicadis pro esca, captare annuntur. Acu scilicet, in aduncum contorto, corpus cicadæ perforant, & filum cui adhæret ex altera extremitate manu tenent. Sic in aere obvolitantem cicadam dum conspexerit apiestra, advolat, deglutit, & fili nexi ope capitur. Nec non canes varii & nymphas & cicadas adpetunt. Sic *Aldrovando* fuit canis, quæ non solum cicadas a domino acceptas omnes acriter devorabat, sed etiam exspatiantium vestigia premens, si arborem transieret, in qua residebant cicadæ, in radice ejus constituta, caudam agitando & supplices ejulatus edendo, suum in cicadas desiderium commonstrabat.

Nomen cicadæ Gallicum, quo *Cigale* audit, ex Latino: *Cicadula*, ut & Italorum: *Cicala*, & Hispanorum: *Cigarra*, deducendum esse videtur.

Cicada multum olei & salis volatilis continet, ac pro aperitiva, item pro colica & morbis vesicæ conveniens habetur. Pro colica tres vel sex cicadas arefacias, totidem grana piperis addas, in pulverem omnia reduces, & boli instar, cum pane oblato exhibeas. Pro morbis vesicæ frixæ comedantur. Cinis cicadæ diuretica, dosi gr. vj. ad gr. xij. bolos & potiones, qui profligandis calculis ac saburra destinati sunt, ingredi solet.

Nostrium ciborum adparatum equidem cicadæ non exaugent, ast quo auribus nostris parcatur, optandum foret, ut hodie cibo, quæ Græcorum delitiis olim, cederent. Illi enim nymphis cicadarum saporem nescio quanto opere exquisitum inesse credebant. Hoc enim excellentiæ earum tempus determinat *Aristoteles*. Teste eodem alii cicadis ipsis vescebantur, ante coitum scilicet masculis, coitu peracto foemellis, plenis ovorum, saporis gratissimorum, & tanto in pretio tunc temporis habitorum, quanto hodie ova cancrorum. Sic Indiam Occidentalem tenentes, cistas, cicadis locustis ac grillis plenas, pro commutandis mercibus ad Hispanos advenas, deportabant. Imo ex testimonio *Cel. Lemery* vel hodie Orientem tenentibus pro cibo veniunt cicadæ; nostro tamen palato nullæ arrident.

Observante tandem *Cel. Hieronymo Mercuriali*, annus, ubi infrequentior auditur cantus cicadæ, morbis epidemicis vel periculosissimis infestatur. Cujus rei rationem in eo positam voluerunt alii: quod annus, humido calore & pluvia abundans, nec frequenti sole collustratus, cicadæ cantum excitare haud valeat. Teste autem *Hippocrate* aer calido-humidus, putredinis dispositionem humoribus inducit, & febres malignas epidemicas generat.

C I M E X.

Nomine cimicis generico plures eorum species comprehenduntur, illæque jam figura, jam magnitudine, jam colore inter se variantes. Aliæ enim in agris, aliæ in hortis ac herbariis, aliæ in viridariis, aliæ in arboribus, aliæ in parietibus reperiuntur. Omnes autem Cel. *Swammerdam* nomine *cimicium terrestrium volantium*, insignivit, & in xvj. classes versicolores distribuit; spectaculo oculos demulcente, quamvis foetore odoratui ingratiſſimo; ne quidem additis cimicibus aquarum & volantibus, qui aculeum, ictus acerrimos edentem, gerunt in ore. *Linnaeus* 43. species diversas in Suecia obviorum enumerat, omnibusque, præter Cimicem domesticum, alas esse subnectit. Nos autem hujus descriptioni tantum inhærebimus, quem solum Medicæ materiæ adparatum intrare constat.

Cimex. Offic. Schrod. 341. Raii 7. Charlet. 52. Aldrov. 534. Jonst. 89. Dal. 384. *Cimex domesticus*, Mouff. 269. *Cimices domestici impennes*. Merr. 202. *Cimex apterus*. Linn. Faun. Svec. 646. *Cimices lectularii*, Matth. 257. *Cimex lectularius seu lectorum*: *Cimices*, qui in cubilibus nascuntur. Nonnulli.

Cimex domesticus, nimis notus, est insectum, lenticulæ figura & magnitudine, breve, depressum, fere rotundum seu rhomboidale, vel digitorum levissima compressione contritum, rubicundum, ac foetentissimum. Corpus ejusdem externe spectatum, capite, pectore seu thorace, & ventre seu corpore, proprie sic dicto, constat. In utroque capitis latere adparet oculus exiguus, fulvus & profiliens; oculis anteriores sunt binæ antennæ, ternis articulationibus compositæ, & crassitudine sensim decreſcentes; inferior proboscis, dum quiescit, reflexa, crassior in medio quam in origine & cuspide, cuspis autem inter duo crura priora reconditur. Thoracem unicuſ saltem efformat annulus, parum latus, capiti constrictione mediante connexus; & inferiori hujus annuli parti adhærentia videbis crura duo priora. Corpus vero sensim dilatatum, novem constat annulis, quorum prior, mediante quadam excavatione, in medio divisus videtur. Excavatio autem ipsa a particula quadam triangulari, corpus cum thorace neſtente, proficiſcitur. Inferiori primi annuli parti secundum tertiumque par crurum connectitur, non enim nisi sex crura in universum sunt cimici. Singula autem crura ternis articulationibus absolvuntur; quarum prior lumbum, secunda crus, proprie sic dictum, tertia pedem, adunco acuto tamquam hamo munitum constituit. Secundi paris crura paullulum majora sunt primis, tertiique secundis. Cæterum corpus cimicis totum lævigatum, non nisi rariores quosdam pilos exhibet anum & margines ultimorum annulorum circumdantes, ac Microscopii ope innotescentes. Vivus cimex & sanguine plenus dorsum turgescens ac conglobatum ostendit, ventrem vero continuo depressum conservat.

In corpore cimicis arteria major cordis officio fungens, tum ex dextera pariter ac sinistra, trachæ, pro respiratione, observantur. Oesophagus, ventriculus & intestina recta procedunt ad anum ab ore. Peraſto autem jejuno diutiori, sanguinis loco ac excrementorum rubicundorum, non nisi humorem mucosum, albumini similem intestina explentem videbis. Foemellæ ovarium ovis exiguis plenum est, iisque in cumulum collectis,

ctis, oblongis, fere cylindricis, albidis atque diaphanis. Coitum celebrantes, alternis caudis junguntur. Et fœcundata ova eo reponit fœmella, ubi commodè possint excludi, eorumque extremitatem cimices exigui, ac vix oculis percipiendi, maxima tamen cum celeritate hinc inde discurrentes egrediuntur.

Cœlo sub frigidiorè omnes fere cimices hyemis tempore, obeunt. Provida posteritatis fœmella autem ingruente hyeme, ova innumera, in calidiora loca reponit, quæ accedente æstate maximæ animalculorum copiam vitam largiuntur. Summæ enim fœcunditatis sunt cimices, & favente materia putrida, exhalatione corpora animata egrediente, copiosissimæ multiplicantur. Hinc agmina eorum reperies in ædibus vetustis, in locis ad stabula gallinacea, columbarum, seu furnos vergentibus, in cubilibus præsertim ex ligno abietino constructis, & stramine vetustiore, vel linteo fordido repletis; vel parietibus gypso obductis, vel libris vetustioribus vicinis. Frequentiores cimices inhabitant cubicula domuum summa, loca arida & soli exposita, & in primis in urbibus incolarum frequentia claris, & ædibus excelsis. Tantæ interim voracitatis sunt cimices, ut aranearum, cancrorum, aliorumque insectorum more, ne quidem suæ ipsorum speciei parcant. Opinio illorum, ait *Cel. de Reaumur*, qui, non nisi hominem homini bellum inferre, aut animalia vel voracia suæ speciei parcere dicunt, illa inquam, ignorantia & neglecto insectorum studio, originem debet. Historiam eorum pertexendo frequentiora testimonia subministrabimus, quod voraciora, vel focia, dum possunt, devorent. Imo, quod magis admirandum videtur, varias erucarum esse cognosces, quæ quamvis folia arborum comedant, ac illa pro nutrimento sibi destinato habere videantur; tam acres carni sociarum inhient, tanto opere eadem delectentur. Aut non nisi partes interiores devorare, corpus autem & crura cum pelle integra intacta relinquere solent; ita ut totum corpus in molem exiguam reductum videatur. Sic etiam cimicis corpus, aliis proboscide perforatum atque exsuctum, exuvias illas refert, quibus quotannis cimices se exuere solent.

Flagellis istis, quibus hominum vanitatem atque mollitiem punire solet, providentia Dei vindicativa, merito adnumeramus cimices; quos *Matthiolus* suo jure, acerrimos dicit inimicos nocturnæ quietis. Etenim non solum corpori ictus dolorosos inferunt, sed etiam odoratui fœtorem, vim ictus superantem. Diu est, ex quo tempore censent: monachos Chartusianos haud infestari cimicibus, cujus rationem *Cardanus* quæsit in eo: quod hi carnis esu abstineant. Hanc opinionem refutans *Scaliger*, ejusmodi fabulam, inquit, subtilitatibus vestris inferere audetis; & fictitiam historiam adeo ficulnea ratione sustentare. Dolendum, quod *Pythagoras* eorum cognitione caruerit. Quid? obliviscimini nec cimices esse canibus, nec pulices equis; rattorum pellis autem tota pulicibus confita esse videtur. Nec inficiar: Cartusianos haud infestari cimicibus? aut, num & in cubilibus eorum nulli enascantur videndum; cubilia Tolosensia haud carne vescuntur, sed cimicibus scatent. Abstinentia Chartusianorum cimices profligaridicis, quid mirum? nonne apud Marfos viperæ sunt, quæ illos neutiquam lædunt, licet serpentum sint hostes acerrimi. Accedit *Scaligero* & *Aldrovandus*, ac hanc a cimicibus immunitatem, Chartusianis propriam, fabulis merito adnumerat; & primo quidem facti veritatem constantem, tum demum ratio-

nem ejus disquirendam esse, prudens fane præcipit. Fatemur, factum negando, statim conscinditur nodus difficultatis, circa explicandam ejus rationem seu causam. Ast res singularis, singularitatis ergo neganda non venit. Nos igitur disquirenda disquisivimus. Et rarissimos esse cimices apud Chartusianos constat, nec nisi illos, qui foras egrediuntur eisdem infestari. Cave autem credas cum plebe, hanc illorum a cimicibus immunitatem ex privilegio a S. Brunone, fundatore ordinis impetrato, pendere; nec enim ex illorum abstinencia a carne provenit, quippe quam cum Benedictinis, Bernardinis Reformatis, vulgo: *della Trappa* adpellatis, cum Camaldulensibus, & Carmelitis communem habent, quos eadem prærogativa gaudere nemo adferit. Veram igitur rationem in eo latere scito: quod Chartusienses nec foras egrediuntur, sed vestimenta sua & cellulas, sollicito cum studio ac frequenti expurgare solent. Certum enim est, quosdam ex illorum domesticis servis magna interdum cimicium copia laborare, dum ne unicus quidem Monachis ipsis adhæserit. Quæ nos a Viro quodam integerrimo, nec fraudis capace, Ordinis Inspectori, relata habemus.

Cimices lucis atque diei hostes, per diem delitescunt, obortis tenebris autem, & nocturno silentio, vela lectum circumdantia, aliaque sua latibula diurna relinquunt, in illum, qui somni dulcedinem quærit, agminatim irruunt, accruciatibus extorquent; faciem, & ubi pellis subtilior corpus obtegit, loca petunt, ac quo diutiori jejunio fameque violentiori exstimulentur, eo avidiores, eo crudeliores evadunt. Infelix fane conditio est illius, quem necessitas æstate, terras calidiores peragrarè jubet. Nulla cautionis ratio superest, nisi, ut vel totam pervigilet noctem, vel vestimentis indutus cubitum eat, vel rhedam pro cubili eligat, nisi vel invulnerabilis vel sensu omni sit destitutus. Ut enim culices sic & cimices, sanguinis humani sunt avidissimi; sic aliorum caro vel numquam vel admodum læviter experitur culicis ictum; aliorum vero cutis delicatior, seu ictus perferendi minus capax esse videtur; culicis ictum scilicet pruritus ineffabilis, & si unguium adfrictu irritatus fuerit, vel maximus tumor excipit. Eadem ratione & alios videbis, qui nullum cimicis ictum experiuntur, dum vel pellem duriorè illius aculeus profundior penetrare nequit, vel sudoris gustu, & transpirationis odore, cimicibus contrario, illi abiguntur; hos enim vel in medio cimicium agmine placidos dormire, nec fœtore nec ictibus illorum infestari conspicias; alii autem a cimicibus tantum non devorantur, nec somnum capere possunt. Aliis vel unicus cimex maximo supplicio cedit.

Ad expellenda igitur insecta tam vilia, ac quietis nostræ tam inimica, magnum mediorum adparatum a variis expositum, & sub forma unguentorum, lotionum, & suffituum commendatum habemus. Oleo vel immissa vel adfricta insecta omnia perire constat. Et Cel. *Mouffet* in *Theatro Insectorum*, fæces ex butyro cocto abeuntes, cimicium latibulis adspergi jubet, sic enim illos repletionem perire docet. Forsan hæ fæces idem ille sunt adeps, de quo *Cardanus* ita: Adipis genus me ipsum vidisse memini, sed qualis fuerit, nescio, quo si patinam ligneam illeveris, statim illa maximo accurrentium cimicium numero obtegebatur. Plura sunt unguenta contra cimices excogitata; quorum effectus si experiri velis, cubilis parietes, spondam, cervical, fissuras ac crenas omnes, cimicium nidos, iisdem illinias necesse est.

est. Dolendum, quod nec adeo eximius, nec diutior effectus mediis respondet. Etenim nisi omnia, vel ipsa lectum circumdantia vela, probe irrigata fuerint ac penetrata, statim cimices renascuntur; aut quantum damnum accederet lecti tegumentis. *Plinio* teste, hirundinum fumo cimices, & cimicium hirundines pereunt. Auctoribus *Aldrovando* & *Jonstonio* suffitu stercoreis bovini, & stercoreis humani *Avicennæ* ex testimonio, enecantur cimices. Alii sunt, qui fumum vitrioli, cinnabaris, nicotianæ, cicutæ, cupressi & sulphuris commendant, dummodo maxima qua fieri potest, cura, horum fumorum evaporatio impediatur. *Democrito* si fidem habes, pedem leporis seu cervi ex pede lecti suspende, & aufugient cimices; cornu cervinum seu crines caballinos portæ adpendas, & nullus cimex cubiculum intrare poterit. Nec non folia absynthii, abrotani, cannabis, rutæ, ebuli, sambuci, fructuum alkakengi, filicis maris & foemellæ, & siquæ communis & genistæ; hedera, cuminum, botris, & præsertim illa, quam *Theam* seu: *Ambrosium Mexicanum* dicunt, sexcenta alia, pulvinari subiecta, vel cubili substrata, cimices abigere censentur. Sunt, qui situlam aqua frigida plenam, vel corium, quod *Moscoviticum* audit, lecto supponi suadent. Nec non fel bovis admixto aceto, succus elaterii, tinctura sulphuris, pix liquefacta, aqua calcis addito argento vivo, sulphure, oleo olivarum, & staphide agria, una cocta, & ferventia omnia lecto illita, cimices profligare dicuntur. Plurima autem eorum quæ recensuimus, nociva, & malo pejora sunt media. Aqua sublimati, adipe commixta pediculos & cimices enecat. *Cel. James* contra morsus cimicium pro medio commendat linimentum ex oleo olivarum seu spiritu vini; & *Aetium*, Græcorum quondam Medicum Celebrionem sequutus, addit: progeniem eorum extirpari, ad minimum generationem impediri, si lecti spondam lavaveris cum decoctione cameleontis nigri, carthami speciei, folio *Carlinae* simili, & flore duplici. Omnium consensu pharmaca odoris acutioris contraria sunt cimicibus, qui rarissimi & fere numquam in ædibus pharmacopolarum, similibus, reperiuntur. *Silesiam* colentes, teste *Philippo Sachs*, D. in *Grammarologia*, pro optimo contra cimices medio habent decoctionem ex cancris, qua cimicium latibula abluunt; illa enim cimices, ac sublimato, fugari constat.

Quantum vero circa excogitanda media pro extirpatione insectorum antiquiores defudaverint, ac quantum virtutis tribuerint amuletis, *Talismannibus*, similibus per sympathiam operantibus, quis est, qui nesciat? Hodie autem, sprete magiæ vulgo: nigrae virtute, ad media externa recurrimus, quorum veri effectus, ex legibus mechanicis intelligi possunt & explicari. Haud ita pridem nosmetipsi medium aliquod prophylacticum contra cimices, apud nonnullos usitatissimum, & sub nomine: *Amuleti Sinenfis* circumlatum accepimus; aut suspectam atque incertam ejus virtutem experti sumus.

In xenodochiis quibusdam, ligno ad construendos lectos ferrum substituendo, cimices arceri posse crediderunt. Hi autem ferrei lecti, longiori usu, nec immunitate a cimicibus sese commendant. Cimices enim præter spondas lectorum ligneas, plura alia latibula tenent. Nos sæpius felici cum successu, folia villosa & spinosa, ut buglossæ, borraginis & consolidæ majoris adhibuimus. Etenim his foliis in cervicali per noctem extensis,

postridie cimices quasi petrefactos inhæsisse vidimus. *Aldrovando* teste, optimo usui cedunt stragula ex juncis seu stramine confecta, seu crates vimineæ lectis superpositæ, his enim, præsertim si vetustiores fuerint, cimices odore allekti adcurrunt, inhærent, & collecti facili opera expelli possunt ac enecari. Araneæ cimices, quos capere possunt, devorant. *Linnæus* interim, in fine tractatus sui de cimicibus, cogitatum singularissimum exponit: operæ pretium foret, sic ille, ut inquiramus, num forsan adsit quædam species inter cimices campestres, quæ in ædes deportata, domesticos extirpare valeat.

Græcorum idiomate cimex dicitur: *Coris*, ab Italis: *Cimice*, quod a Latino descendit. Gallicum ejus nomen: *Punaise*, *Cel. Menage* primo quidem, a Latino: *Punicea* derivabat, & ab initio non nisi cimices rubicundos, postea autem omnes hoc nomine insignitos fuisse ducebat; jam vero verbum: putere, Gallice, *puer* nomini originem dedisse, & exinde: *Punais*, *Putoir*, *Putois*, provenisse censet; merito quidem, imo optandum, ut quodvis nominum etymon pari certitudine constaret.

Multum salis volatilis & olei continent cimices. Et pro suppressione urinæ, ad provocandum ejus effluvium adhibentur. *Dioscorides* eosdem exsicari, post in pulverem reduci, & urethræ iniici suadet; ast more apud nos recepto, vivi urethræ immittuntur, quo titillatione excitata, sphincter vesicæ relaxetur, urinæ effluvium pateat. *Schrodero* teste, tres cimices majores recepti, secundinarum & foetus exitum provocaverunt. Alii septenos ad octenos sub paroxysmum febris intermittentis commendant; nec comprobata satis experientia suffragatur, ut insecta adeo foetentia aliis mediis ac certioribus anteferre velit quispiam; nisi tunc, quum nullum adsit aliorum.

F O R M I C A.

Variæ sunt & formicarum species, & quinque præsertim sequentes, in Suecia obvias, ac coloris magnitudinisque ratione diversas, a *Cel. Linnæo* enumeratas habemus, 1. formicam majorem, Græcis & Latinis: *Hippomyrmex* dictam, 2. formicam rubicundam, mediæ magnitudinis, ac reliquis communiorem, 3. formicam rufo-nigricantem, 4. formicam minorem rubicundam, 5. formicam nigram. *Cel. James*, Virum *Cel. Dale* sequutus, binas priores Medicinæ usibus cedere docet; nos autem non nisi secundæ, ac apud nos frequentissimæ historiam pertexamus; subnectendo quædam de nonnullis Indarum formicis.

Formica. Offic. *Aldrov.* 517. *Jonst.* 85. *Mouff.* 238. *Charlet.* 57. *Merr.* 202. *Raii* 69. *Dal.* 387. *Formica minor*. *Schrod.* 341. *Formica rufa*. *Linn. Faun. Suec.* 1020. *Formica media rubra*, *Myrmex Græcis dicta*. Nonnull.

Formica, insectum illud oblongum, & apud omnes notissimum, *Svammerdamii*, Viri in observando perspicacissimi, & in diiudicando acutissimi vestigia prementes, in caput, pectus & ventrem dividimus. In capite observamus duos oculos nigerrimos, & his inferiores duas antennis, coloris castanei, & duodecim ex articulationibus, (quarum extremitates alternæ cohærent) compositas. Articulationum prima omnium longissima, singulæ autem pilis setosis, tenuissimis atque exiguis, consistæ sunt. Antennas excipit os, illudque duabus maxillis reflexis & foras eminentibus, imo singulis septenas incisiones, ac totidem dentes præ se ferentibus, munitum. Pectus deni-

denique variis ex juncturis conflatum est, quarum omnes senis pinnulis, lumbos versus acutioribus, fimbriatæ adparent: Lumbi ipsi ternis constant ex nodis, vertebrae referentibus, & pilorum quantitate confitis. Sub pectore autem sex crura fortia adparent, villosa, quaternis juncturis absoluta, imo junctura ultima, pedem proprie sic dictum constituens, quaternis denuo aliis & minoribus juncturis componitur, harumque extrema duabus unguiculis munitur. Caput & pectus, pelle, præ duritie cornea, striata atque sulcata tegitur; quæ dispositionem fibrarum pini silvestris imitatur, quam ligno in regione nodorum confisso, observabis. Venter tandem obscuriore colore, quam corpus reliquum, & speculi instar nitidus, ac totus pilis confitus adparet.

En tibi L. B. partes externas formicæ operantis, quam apum more, nec marem esse constat, neque foemellam, quamque summus omnium opifex pro labore suscipiendo, pro nutriendis insuper, educandis & deportandis formiculis destinasse videtur.

Masculum examinaturus, dentes ejus atque antennis, antennis dentibusque formicæ operantis fere similes esse cognosces. Dentes adtamen paullo minores, foemellæ instar, ac more apum maribus proprio, exhibet masculus. Oculorum magnitudine autem reliquas formicas longe superat, id quod & in ape masculo, in ephemeridibus, sive diurnis, aliisque insectis observatu venit. Nec non pro nota characteristica in capite maris apum, muscarum & formicarum, tria punctula, tamquam margaritæ, totidem scilicet oculi eidem proprii, adparent. Maxime tamen pectoris differentia a reliquis dignoscitur, hoc enim non solum structura & colore varium est, sed & quatuor alas singulares exhibet, earumque binæ priores, duplo majores ac solidiores sunt binis posterioribus. Nec non lumborum color & constructio varians est. Cæterum ut apes, masculus, corpus præbet majus, ac nigridiore tinctum colore. Masculi igitur formicarum, de quibus agitur, quique vel nymphæ suæ respectu a formicis reliquis differunt, haudquamquam omni tempore anni, formicarum acervos inhabitant. Conjecturam facimus, quod apum more, formicæ operantes, recedente coitus æstu, masculis mortem inferant. Cæterum mares non nisi speciei propagationi destinati sunt, & ut apes, cum quibus multiplici similitudine junguntur, nulla gaudent prærogativa in re publica formicarum, nisi virtute speciem propagandi. Hujus rei publicæ clavem amor, morte ipsa fortior, tenet, & quivis ejusdem cives vinculo amoris, verè fraterni, inter se continentur.

Formica foemella & operantes & masculos tam magnitudine, quam crassitudine superat. Et Anatomix studioso ova sua, quamvis parvissima, albidâ tamen & oblonga ostendit. Cæterum & dentes, & oculos, & antennis priorum similes, imo post caput tres oculos, mari convenientes qui referunt, exhibet. His enim sibi cum masculo communibus, ab operaria differt. At structuram & colorem ab utroque, mare scilicet & operaria diversum præbet, obscuriorem nempe quam operaria, pallidiorem ac foemella. In cruribus, lumbis & ventre nulla fere differentia adest, nisi hujus capacitas, pro conservandis ovis, multo amplior.

Ova formicæ lævia, nitentia, & nulla prorsus incisione distincta, ac tantæ sunt parvitatæ, ut ovulum unum, basi nigræ superpositum, vix quidem incurrat in oculos. Quod qui egreditur vermis, microscopii auxilio,

caput pectus versus reflexum, & os, & corpus ex duodecim annulis compositum exhibet. Vermiculus ille a plurimis ovulum formicæ nuncupatur: ast immerito, est enim animalculum, vita & motibus præditum, pedibus carens, ovo dissimillimum, & ipsam formicam plerumque magnitudine superans. Hos enim vermiculos, sub nomine ovorum, pro delitiis avicularum, & præsertim lusciniæ, quærunt homines. Quum vero omne sibi competens incrementum ceperit vermiculus, pectus sensim humoribus expletum turgescit; pelle sua se exuit; omnem movendi facultatem amittit. Tum membra hætenus occulta evolvuntur, accedit forma nymphæ, sub qua omnes formicæ partes, immobiles tamen ac quasi irretitas adparere videbis. Denuo animali liquiditas accedit, aquæ instar diffuit, ut tempore illo, quo ovo detinebatur, membra quævis, candoris ergo lac coactum sive coagulatum referre videntur. Sic secundam quasi infantiam nanciscitur, in prima quidem non nisi vermis, nunc autem animali perfectio similior, ut in papilione, ex eruca in Chrysalidem transformato, observamus. Nec tamen nymphæ partes, sub pelle uniformi conglutinatæ latent, ut papilionis Chrysalide detenti; sed membrana tenui, jam crassiore jam subtiliore involutæ sunt. Brevibus: nulla est differentia partium nymphæ atque formicæ, nisi hæc: quod in formica pariter ac verme (cujus membra sub pelle latent) distinctiores conspiciantur. Constat enim, & ovulum, & vermem, & nympham, & formicam non esse nisi animal idem, forma per accidens varia, detentum. Peractis tandem statibus & transformationibus sibi destinatis; & prodeunte ætate, viribus quas attingere potest, auctum animal, exuviarum ultimas reponit, formam sibi constanter ac perpetuo immanentem induit. Sic remotis obstaculis omnibus, verum conspici licet formicam. Transpiratione vix perceptibili igitur, pellem, paucis antea præ mollitie diffluentem, brevi dierum spatio ariditatem & duritiem fere corneam acquirere vides.

Educandarum formicularum curam operarias spectare diximus. Et sane summa cum cura & adplicatione officio suo funguntur, nec quidquam studii negligunt, & ne periculo recentes natæ subiaceant, ore acceptas & inter dentes repositas leniter ac caute ex loco deportant in locum. Sic ego metipse, (sunt verba auctoris) sæpius formicas operarias, una cum ovis seu vermiculis in vasi vitreo, terræ pleno, oclusas detinui, & pro arefcente superficie terræ una cum ovis penitus penetrabant in terram; aqua illam irrigavi, & quanto cum cura & diligentia, non dicam adfectu amoris, curæ suæ commissa ex humido in aridiorem locum deportabant. Sæpius etiam terræ per dies exsiccata aliquantulum aquæ adpersi, & nutrices illæ proferebant in superficiem formiculas, quæ varios inter motus aquam exfugebant. Interdum & ego formiculas istas educare tentavi, ast spes mea me fefellit; etenim jam in nymphas transformatas, & a formicis separatas, nec alimento ulteriore indigentes, numquam calore quodam artificiali easdem exclusas videre datum fuit.

Vir Nobilis *Eduard King*, qui multum studii in disquirenda formicarum generatione impendit, *Derhamio* teste, observat sequentia: 1. summam formicarum curam versari circa ovula, substantiæ tenuissimæ, & sacchari instar, candidæ, illa enim, si forsan dispersa fuerint, maximo cum studio colligunt, coacervant, & acervis, tamquam fovendis insident, 2. æstivo

tempore matutino quovis formiculas suæ educationi commissas in superficiem terræ deportare, & a decima antemeridiana usque ad quintam sextamve pomeridianam ibidem relinquere, plerumque etiam in parte meridionali sui agminis easdem constituere; septima tandem hora irruente, seu cœlo pluviam minante, & aere refrigerato, vel ad pedis integri profunditatem in terram recedere. Sic & Cel. *Swammerdam* observat: formicas sibi commissas minores soli exponendo, solis cursum insequi, illasque ex loco in locum, pluribus solis radiis incalescentem, deportare.

Summo fane formicarum honori & gloriæ cederent ea, quæ de eximiis earum adtributis circumferuntur, si tantum de certitudine illorum constaret, quantum de amore in formiculas compertum habemus. Reliqua fecundioris ingenii figmenta ducantur. Quæ inter referas providam curam, qua æstatis tempore granaria sua, pro alimento hyeme consumendo, explere, & grana quævis, ne progerminare possint, utrinque corrodere dicuntur. Etenim nulla in agminibus illarum granaria, nulla grana ex utroque apice corrofa; imo per hyemem ne accipiendi quidem nutrimenti capaces inveniuntur. Cui quidem rei accedunt Virorum in Physicis maximorum testimonia, subscribit experientia. Sic aperte Cel. *Swammerdam*, numquam granaria ista, ad regulas architecturæ composita, ut alii volunt, nec adparatum pro hyeme, æstatis tempore congestum, se observasse profitetur, imo ad credendum inducitur: formicas, insectorum plurium & apum more, maximo hyemis frigore, omni prorsus alimento abstinere. Fusior de hac re Cel. *de Reaumur*, plures, ait, quadrupedum species, ut: urfos, mures Alpinoꝝ sive: Marmotas, & glires campestres, Gallice: *Loirs*, hyemis partem absque cibo hausto, terere constat; tunc enim dormire dicuntur, ast somno ducimus, a nostro diverso. Experimentis *Sanctorii* enim edocti novimus: hominis profundo somno sopiti transpirationem insensibilem alias, copiosiore evadere. Etenim quamvis corporis nostri moles quiete detenta somno fruitur; liquorum interiorum circulatio, eadem, (quantum percipi datur) celeritate perficitur. In animalibus autem, quæ menses totos somno ducunt, liquorum circulatio retardatur. Lethargia quadam correpta tunc vix vitam conservasse videntur. Hinc quoque quamdiu in eodem statu permanferit, quantus ille videatur, nullus, vel admodum brevis est, ratione vitæ activæ. Omnia fere insecta per hyemem in vita conservata, somno hyemem terunt, nutrimento abstinere, mortua referunt, & quadam quasi resurrectione, subsequente verno tempore, in vitam activam revocantur. Hujusmodi insectum igitur, accepto omni incremento ac mole, annum integrum præfixum vitæ terminum habet; quatuor autem vel quinque menses somno sopitum absque nutrimento peraget. Somnum ejus diutiorem reddas, sive integrum per annum aeri frigido expositum detineas, ut nos chrysalides quondam, & status ille quietis seu somni, parum imo nihil ex vita sua activa detrahet. Quidquid aliorum insectorum somnus eo usque forsan prolongari potest, ut spatium illud æquiparet, quod dormiente cane septem dormientium Muhammedis affeclatum transiisse dicunt. Hæc quidem mea ipsius experientia nondum satis comprobata habeo; ast certum est, quod adponam, de insecto illo tam industrioso, quod mensium jejunium perferre posse vix crederes; cujus exemplo ad labores suscipiendos, ad providam futuri temporis curam ex-

citamur, de formica, illa scilicet exponam, quæ meis experimentis edoctus teneo. Etenim licet unanimis omnium consensus, formicæ providentiam, nescio quantis laudibus efferat; licet tanta sit copia fabularum jucundissimarum de cura formicis; tanta colloquia inter illam & cicadam excogitata; tot alia, quibus docent: formicam æstate sua granaria frumento, hyemis cibo, explere; nos tamen granaria ista non nisi in mentis fictione existere adferimus. Sexcenta experimenta ipsi instituimus, nec eas unquam ciborum adparatus congerere constat. Frumentaliaque grana equidem suo domicilio adportant, ast non nisi pro materia, ramusculorum instar, extruendo eidem inserviente; ut inferius, ubi de historia earum agemus, fusius demonstrabitur. Et quantæ quæso utilitati sibi sua foret provida cura? labor esset superfluus; maximam enim hyemis partem profundissimo somno sopitæ terunt; immobiles inter se cohærent, mortuæ videntur; ne quidem sese movendi, nedum grana manducandi facultate gaudent, quid ergo adparatus copia? Novum tibi L. B. documentum, quanta vel hodie adhuc ex historia naturali exterminanda supersunt fictitia. Eo enim omnis formicarum prudentia redit, ut quantum fieri potest, frigoris vehementiam arcere studeant; frigore enim vel mitiore ab omni prorsus motu privantur. Ineunte Martio mense, ac redeunte veris calore & formicæ reanimantur, exspatiantur, nutrimenta quærunt. Sæpius ego per hyemem millia formicarum maximarum conservavi; producto quoque, artis ope, frigoris gradu, pro continuando illarum somno sufficiente, easdem illas per totum Martium, Aprilem, & Majum, menses, somno sopitas detinui; ast calidiori aeri expositæ eandem alacritatem statim induere, quam illæ, quæ vix dimidium tempus somno triverant. Nunc alias formicas aliaque insecta diutiori jam somno fructas detineo, & per annum, si fieri potest integrum, somnum earum producere constitutum habeo; imo spes mihi affulget, quod instituendæ experientiæ sufficientes, hyemem diutiorem sustinere valuerint. Experimentis præsentibus inserviunt erucæ alias cibo per hyemem abstinentes, papiliones diurni, hyeme in truncis arborum immoti delitescentes, muscæ pariter ac scarabei. Qualis autem experimentorum finis erit, tecum L. B. communicabo. Agite & Vos, rei naturalis studiosi, & experimenta haud magni venientia & Vos institute.

Franciscus Carre, in *Dissertatione de politica formicarum regiminis forma*, quam in Mercurio Gallico ann. 1749. mens. Maii reperies, per triginta annos ad studium formicarum mentem adplicuisse docet, & sententiæ Cel. *de Reaumur*, circa somnum formicarum per hyemem, accedit. Quum igitur cœlum Occitanix mitius sit nostro, ac formicæ ibi frequentiores, varia, sic ille inquit, formicarum agmina, jam æstate, jam hyeme, jam autumno, jam veris tempore disquiri & obvolvi jussi; nec unquam granaria, ut alii volunt, in latitudinem extensis reservatoriis, numquam receptacula illa subterranea detexi, quæ ex variis cellulis inter se cohærentibus composita, & adeo profunde excavata esse dicunt, ut, (si cum Cel. *Rollin*, Physicorum alios sequuto, loqui liceret,) nec nix nec pluvia formices eorum pertingere valeat. Opinionem igitur quamvis communem pro erronea habeo. Verum, quod si aræ vicinum fuerit agmen formicarum, hæc continuo labore grana eo deportare conspicias. Et si tunc agmen obverte-
ris, grana, cibi reliquias invenies, alio tamen tempore prorsus nulla. Quæ
qui-

quidem grana raptim collecta, si accedente fermentatione putrescunt, eadem cum celeritate a formicis deportantur, qua adportata fuerant. Imo septum aliquod pro avertenda aqua, in introitu domiciliorum subterraneorum, $\frac{1}{2}$ pedis altum, ex ramusculis arboretorum tenuissimis, filisque ligni seu plantarum construunt, & in parte ejus summa varios sibi tramites, quibus incedere possint, sulcorum instar, ducunt. Terras compactas & probe tritas peramant, sæpius vero suffossas ac perscissas infrequentiores inhabitant. Pro situ ac natura soli, vel majorem vel minorem laborem impendunt. Aquam ante omnia extimescunt. Pro cœli aerisque clementia, vel Majo vel Junio, mensibus, suum laborem adgrediuntur, & haud interrupta opera, usque ad autumnii reditum continuant. Pro causa autem laboris sui atque industriæ nil venit nisi in formiculas amor eximius, hac enim calidiore æstatis tempore nascuntur; & quum infirmitatis ac infantix suæ ergo, aerem perferre nequeunt, en totam rem publicam labores communes in privatam earum utilitatem impendentem. Errant, qui conjecturam faciunt: formicas extra receptacula sua subterranea degentes, alimentorum quidpiam capere. Duplex tamen rerum ratio esse potest, qua permotæ vel extra domicilia constitutæ quidquam cibi accipiunt. Dum enim fructus syrupo vel saccharo conditos reperierint: fructum si syrupo haud submersus sed siccus fuerit, divellunt, & deportant. Si autem syrupo innataverit; omnia experiuntur, ut ad fructum syrupo circumdatum pervenire possint, at copia ejus suffocata tandem pereunt; siquidem syrupi visciditas pedibus adglutinata, omnes horum usum intercipit. Sic & liquores saccharo confectos, si quos invenerint, hauriunt, nec tamen pro cibo sed pro onere tamquam, quod ad domicilium commune deportant. Si loca suo agmini vicina sterilia fuerint, satis longinque abeunt, hinc inde oberant, & odoratu tactuque eximio sane adjunctæ, nil prætereunt, quod non disquisiverint. Si quidpiam molis ponderisque majoris detexerint, plures uni operi perficiendo se accingunt, aliæ impellunt; aliæ protrahunt; & si nec junctis viribus cesserit prædæ moles, in particulas divisam suo denique receptaculo adportant. Quod si cohortis socia una novi quidquam, detexerit, statim nuntio ad suos deportato, totam rem publicam opus adgredientem videbis; duplex sternitur via, altera, qua abeant omnes, altera, qua revertantur. Mortuas satis longe deportant. Redeunte cœli & hyemis inclementia, incurvatæ sopitæ dormiunt, & revertente tandem aere calidiore, resuscitantur. Quum ad ætatem, quam determinare non audeo, pervenerit formica, dormienti accedunt duæ alæ majores, cum alis inclinatio nova. Sole calefactus aer tandem vitam formicis reddit, serenitate diei evocantur. Unica hac anni die, sic ego censeo, omnes quotquot agmine continentur, exeunt, nec tamen longinquiore abeunt, etenim non nisi respirandi novi aeris ergo exspatiantur, quo vires jejuniæ exhaustas aeris puri respiratione reparare possint. Tunc autem alatæ, sive mares sint sive foemellæ, tamquam odio in reliquas, citissime avolant, murum, lapidem, plantam seu arborem petunt, ibi resident, & agitatæ alis, in aerem se elevare conantur. Aliæ delabuntur, exercitii novi expertes, tum vires colligunt, denuo volatum tentant, reiterato tandem tentamine avolant, numquam agmen revisuræ. Quarta fere pars agminis alata conspicitur. Nec ulla unquam formica primo statim tentamine usum ala-

rum acquirit. Vetustioribus tantum, quartum quintumve annum agentibus alæ accedunt. Conjecturam facio: quod formicæ uncis pedum majorum somno detentarum inhærentes, non nisi aeris externi clementia accedente, expergiscantur. Jam antiquiores alatæ agmine egrediuntur, juniores illarum uncis sese expediunt, illæ avolant. Nec a quodam observatum esse memini, quod uncis pedum posteriorum uniuscujusvis formicæ alatæ, domicilium egredientis, una vel duæ formicæ adhæreant. Hinc formiculas dormientes, uncas majorum, pro tecto, contra frigoris austeritatem quærere duco. Imo calor ex corpore antiquiorum (quarum sub ventre detinentur) expirans ad conservationem harum conducit. Ut autem juvenes, fortiores & longiores ducere solent somnos; formicæ somnum haud prius excutiunt, quam dum ab antiquioribus agmen egressis aeri fuerint admoti, & aer externus accedens, reliquam lethargiæ speciem prorsus discusserit. Varia sunt formicarum agmina, sic pergit Cel. *Carre*, quæ, nescio quo anni tempore, anni præcedentis examen emittunt. Plura etiam examina nova, vetustiore haud opem ferente, novum sibi domicilium construxisse observavi. Imo quousque pro construendo habitaculo novo terram vel murum excavando, & particulas ejus efferendo occupantur, nec alimenta quærere videntur, nec capere cibum. Quum autem incrementi quidpiam novo domicilio accesserit, pars formicularum prædatum abit. Et quævis obvia adpetunt, suumque delibant ex arboribus, ex arbutis, ex plantis, herbis, pane, carne, infectis vel mortuis, vel moribundis, imo araneis pedibus majoribus, cimicibusque lignorum. Nec ciborum congesto adparatu egent formicæ, etenim maximam partem autumnii, hyemem totam, & verni temporis aliquid somno sopitæ terunt, ut reptilia, insecta fere omnia, plura ex quadrupedibus, & aves nocturnæ. Figmenta igitur ingenii fecundi habeas, quæ de urbe formicarum longiore quam latiore, de plateis ejusdem, ad regulas architecturæ dispositis, de arcubus quos aqua penetrare nequeat, de trabibus, quibus sustentantur, de tigillis quibusteguntur, de porticis tandem & horreis narrantur. Spatium, horrei nomine quod condecorare placuit Phisicis, non est, nisi intervallum a formicis relictum, quo somno sopitæ omnes continentur. Eo etiam alimenta quotidiana conferunt, idem illud spatium pro cœnaculo, pro aula, pro conciliabulo venit, & ad summum pedis r. profunditate est. Nulla in hac re publica mensa est separata, omnia sunt publici juris. Quod si locum quo se formicæ receperint, vel suffodiendo, vel quavis alia ratione conquassaveris, statim egressæ in varias partes abeunt. Dubio procul continendis formiculis, ultimam formam induentibus, remotior quidam locus destinatus est, quibus & alimenta debilitati illarum convenientia exhibent. Granorum copia collata si necessitatis præsentis usum superaverit, illam in ramos (in quos divisum domicilium abit) deportant; hi horreorum ordinariorum & extraordinariorum vices explent, ast non nisi infrequentius eosdem adeunt. Quotidiano cibo venientia exinde depromunt, & fermentatione correpta grana efferunt, relinquunt. Si collectorum copia non nisi quotidiano usui sufficit, omnia in commune illud spatium conferunt. Si ciborum infrequentia adsit, formiculis tantum necessaria præbent, pars reliqua rei publicæ cibo abstinet. Aprile mense agmen formicarum subvertendo disquisivi; & vix pedis r. profunditate latentes, omnes profundissimo somno sopi-

sopitos reperi. Paucissimæ autem agminis formicæ prædatum egredi solent. Quod si autem numerosas cohortes evocare velis, panem bene contritum seu grana frumenti comminuta 1. ad 3. pedum distantia ab agmine expandas. Sæpius etiam nova sibi domicilia suffodiunt, pristina relinquunt, vel quia convenientior ipsis est soliditas & situs domus novæ, vel quia aqua ad antiquiorem deducta infestantur. Sæpissime etiam sarcinulas suas obvenientium dorso imponere, seu tractui aliorum committere videmus formicas. Quæ onus cesserat, illa statim aliud quæsitura revertitur. Si præda fuerit eximior, totius rei publicæ opem convocant. Paucula autem grana reperta solæ ad agmen deportant, nisi focia in itinere obvia facta sit. Omnes vero agminis ejusdem sodales sese cognoscunt, aliena illis sese miscere non audet. Binæ alienæ quum sibi sint obviæ, utraque plurimum revertitur, interdum vero conflictantur.

Et hætenus quidem Cel. *Carre*. Nos autem alia ex dictis lubentes concedimus. De aliis autem, pace Viri Cel. judicium suspendimus, usque dum restantia & expectata de insectis sua, publici juris fecerit Cel. *de Reaumur*. Nonnulla enim a Cel. *Carre* exposita non solum dubia, sed & aliorum observationibus sunt contraria. Cel. *Pluche* in *Spectaculo Naturæ*, digno sane, ut magni habeatur, sibi visum fuisse refert quod omnes agmen constituentes formicæ acceptis alis domicilium relinquat. Plura addit Cel. *Carre*; omnes etenim agminis formicas, has quidem citiores, illas vero segniores, effluxo determinatorum annorum spatio, alas acquirere adfirmat. Ast Viri Cell. *Swammerdam* & *Linnaeus*, suis observationibus fulti, masculis quidem & fœmellis, nec formicis operantibus alas accedere docent.

Nimii sane antiquiores fuerunt in extollenda laudibus formica. *Plinius* illam animalium fortissimum dicit, nec aliud quidpiam (habito magnitudinis respectu) tantæ molis oneri portando sufficere putat. Alii illam virtutum omnium exemplar habuerunt, quidquod *Cicero*, & intellectum, & judicium, & memoriam, & rationem fere divinam ipsi adscribit. In primis providentiam ei, nescio quantam tribuunt, & tritissimo hodie proverbio: ut formica industrius dicitur. Nec inficias ire possumus, formicam omnia animalia industria laboris superare; & suo jure *Salomon* desides formicam imitari jubet. Tanta enim frequentia vias terunt, tam acri ac constanti ardore suo labori insistent, ut vel lapides obvii vestigiis earum cecidisse & pedum signa conservasse videantur. Carni inhiant; & non solum thoracibus scarabæorum omnium adhærent; sed etiam, si ranam, lacertam, serpentem vel avem in agmen formicarum proieceris, aliquot exinde diebus prorsus dissectam & comminutam reperies. Hac etiam methodo illi utuntur, qui sceletra prædictorum animalium accuratius subtiliusque præparata cupiunt, quam ab Anatomie studioso præstantissimo carne denudari possent. Cæterum formicas irritare noli, cholericæ enim sunt. Nec tamen morfu quemvis illas petere ducito, sed aculeo isto, quem in ano gerunt ictus inferre solent, quos qui subsequitur dolor, ille non ex fauciatione ipsa, sed potius ex liquore acri & penetranti, quem vulnerifaculo immittunt, deducendus est. Ille autem liquor tumores exiguos prurientes excitat.

Multa ex animalibus inimica sibi formicæ habent. Picus tam martius, quam reliqui, magnam earum copiam devorant. Omnes hodie noscunt:

formi-

formicaleonem, Gallis: *fourmilion*, formicarum hostem acerrimum, & quasi leonem. Formicæ hortenses ac viridariorum, fructibus multum damni adferre creduntur. Hinc varii varia pro enecandis vel profligandis formicis commendarunt, ut: cinerem, fuliginem, calcem vivam, fel bovinum, scobem ligni, excrementa porcina humanis mixta, cretam, oleum nardi, gluten, fimum vaccinum, sulphuris fumum, suffitum formicarum adustarum; elaterium, origanum, amurcam, succum portulacæ aceto mixtum seu facibus vini, lupinum contusum, decoctionem tithymali, alia. Immerito autem persequutione premuntur. Etenim pulices virides, florum prædatores, & folia mali persicæ & pyri contorquentes, corporis sui extremitati liquorem melleum eiiciunt, cui acriter inhærent formicæ, illæ enim nec arborem, nec folia, ut pulices, petunt. Hi arboribus nostris illud damnum inferunt, quod formicis tribuimus, & persequutione illarum punire contendimus.

Teste Cel. *Bontio* in terris Indarum alatae quædam formicæ reperiuntur, herbis ac arboribus obvolitantes, & ex iisdem materiam gommatis laccæ venientem eadem ratione, qua apes nostræ florum stamina pro componenda sua cera colligentes. At dum de origine gommatis laccæ quæras, dum de arbore, ex qua provenit, in diversa abeuntes videbis auctores. Auctore Cel. *Dale*, *Tancredum Robinson*, D. sequuto, formicæ arborem, zizyphi speciem perforant, ex qua gomma lacca destillat. Teste Cel. *James* gomma lacca ex Asia ad nos deportata, non est nisi resinæ species, quam formicæ, pro comparando suo nido, ex arboribus insulæ Ceylan, patriæ gommatis laccæ præstantioris, recipiunt. En tibi L. epitomen *Observationum* Cel. *Geoffroy junioris* de gommate lacca, quæ in *Actis Reg. Scient. Acad. Anni 1714*. leguntur:

Animalibus, quorum industriam in construendis alvearibus admiramur, & illa insecta adnumeranda veniunt Indarum, quorum opera gomma lacca præparatur. Cujus usus licet sit frequentior, (etenim & tinctoribus, aliisque infervit) de origine ejus parum certi constat, vel ex infrequentia observatorum apud Indas; vel quia insecta ex quibus proficiscitur, silvestria, nec ut apes nostræ, domestica, examini specialiori subiici nequiverunt. Nec gommatis nomen mereri videtur, est enim species ceræ. *Lacca* nomen, potius: *Lac*, vel *Loc* dicendum, ab Arabibus ad Indas pervenit. In Regno Peguano & Martabano, alio vocabulo: *Trec*, adpellatur. Præcipua autem *Lacca* species, de qua nunc agimus: *Lacca in bacillis*, vocatur, etenim una cum ramusculis, quibus nexa hæret, ad nos deportatur. Disquirendum videtur ante omnia, num forsan ex ramusculis ipsis, quibus adhæret, proveniat. Negationis ratio adesse videtur, etenim si laccam a bacillis subtraxeris, nullam in ramusculis fissuram, qua effluere potuisset, deteges. Accedit, quod magna sæpius gommatis abundantia, ramusculis minimis adhæreat. Ex ramusculis ipsis igitur haud provenit. Opinioni nostræ accedentem habemus P. R. *Tachard*; qui subnectit, quod ex arboribus istis, incisione facta, aliud gomma, & naturæ penitus diversæ destillet. Insecti cujusdam opus esse gomma laccam constat; & alii quidem a formicis alatis idem in ramusculos arboris: *Ber* dictæ, conferri dicunt; alii a formicis communibus, alii tandem a muscis. Quidquod denuo alii bacillos laccæ habent pro ramusculis, incolarum studio in terram defixis, pro suffulciendo insectorum opere.

Quod

Quod operis hujusce naturam spectat, in tenebris oberramus. Et laudatus Auctor summo cum studio illud disquirendo, alvearis speciem, ut in apibus, aliisque insectis detexisse credidit. Dicto accedit experientia, frangas laccæ bacillum, & in plures alveolos seu cellulas, fere uniformes divisum reperiens, documento indubio, quod gomma seu resina ex arbore defluens esse nequeat. Alii enim alveolorum oblongi & multiplicis frontis, alii prorsus rotundi sunt, prout scilicet liquida adhuc materia, varia ratione defluendo, ramusculum circumdederit. Septa alveolorum tenuissima, ac septis alveolorum apum similia; ast quum nulla arte externa ab injuriis aeris & coeli tueantur, strato quodam ex eadem cera confecto, duro & solido obteguntur. Insectis hisce itaque merito eandem laboris industriam, imo commoditate destitutis majorem, quam apibus adscribere non dubitamus. Alveolos illos pro receptaculo animalculi cujusdam, nec ut alii voverunt, excrementis continendis tantum destinatos esse constat; hinc varia corpuscula, plus minusve turgescunt, ac iisdem impressa videbis. Quæ quidem alas depositas formicarum, laccam præparantium, primi observatores habuere. Et quidem colorem rubrum fortiolem vel debiliolem ostendunt, & digitis contrita in pulverem abeunt, qui coloris pulchritudine nec coccineo cedit. Nec partes tantum animalculorum laccam constituere videntur. Alveolos potius, ut apum sui, sic & hos animalculis ipsis destinatos, corpuscula autem embryones esse censemus insectorum egressurorum; vel depositæ egressorum exuvie, ut in Kermes, seu Ormini granis, in gallis, aliisque excretionibus, ab insectorum ictu proficiscentibus. Sunt autem corpuscula ipsa oblonga, striata seu punctis, cochinnellæ instar, obsita, ex altera parte in unam, ex altera autem jam in duplicem, jam triplicem cuspidem exeuntia. Aquæ immissa, cochinnellæ instar, turgescunt, eodem fere colore aquam tingunt, eandem fere figuram induunt; & vel primo statim intuitu insectorum corpuscula qualiacumque referunt. Hac igitur gommæ laccæ rubedinem largiuntur; illis enim destituta lacca debilissimum, ac fere nullum exhibet ruborem. Lacca igitur ceræ species quædam; alvearis corpus efformans esse videtur. Et adusta gratissimum, ast corpuscula in eadem contenta inamœnum odorem, igni admota edunt; ut reliquæ animalium partes. Ultimum vero pondus sententiæ *Geoffroyanæ*, gomma laccam pro alveari habentis, addit examen laccæ ex Madagascar, insula, deportatæ, & colorem æque ac odorem ceræ referentis. Hujus frustula laccam communem crassitudine superant. Colore suo Ambarum vel succinum album imitatur. Cæterum Indicæ instar, arborum ramusculos circumdat, & in alveolos divisa adparet. Nec tamen ut Peguviensis, lacca ex Madagascar proveniens adhibetur, nec tinctorum, nec ceram vel laccam sigillatoriam conficientium utilitati venit; hinc quoque ignotior est. Addas denique similitudinem inter utramque laccæ, alias diversæ, speciem, obviam; & clare satis adparebit: ambas originem, haud arboribus, quibus adhærent, debere; sed potius ab insectis eodem deportari. Hæc autem non nisi formicas esse, easque ut apes nostræ ceram eo conferre nuntiatum est *R. P. Tachard*. Constat autem res, *Cel. Maraldi* dissertatione de apibus, comprobata, quod nec apes nostræ ceram ipsæ conficiant, sed ex floribus saltem colligant, ita, ut apibus deficientibus, nulla cera adesset; etenim vel summa hominum industria vel diutiori temporis spatio tantam

ex foliis molem ceræ colligere nequiret, quanta duarum lenticularum magnitudinem exæquet, seu onus apīs unicæ.

Pergente igitur comparatione, ceræ apum & laccæ formicarum, deficientibus hisce, nullum fore gomme laccam, pronuntiamus. In hoc enim colligendo, præparando & conformando, per octo integros anni menses, formicæ allaborant; eamque non solum suo usui, formicularum conservationi scilicet & propagationi destinant; sed & hominum utilitati exhibent; Orientem tenentes enim coccineum colorem exinde eliciunt, nos autem pro cera sigillatoria & vernice conficiendis eodem utimur.

Nec tamen prorsus negabo, sic pergit Cel. *Geoffroy*, gomme laccam & ex arborum foliis destillare; forsan & eadem formicæ, quas P. R. *Tachard* gomme ex floribus colligere dicit, abundantius in arboribus reperiunt, ex quibus absque illarum ope colligi posset. Et qui huic opinioni favent, laccam in massa ad nos pervenientem, ubi nec alveoli, nec rubra corpuscula reperiuntur, hujus originis esse credunt. Nos e contrario & hanc a formicis collectam, ab Indis autem a facibus separatam, & extracto colore rubro in massam coactam esse ducimus. Eadem enim vel apud nos eveniunt; dum artifices, colorem gomme laccæ extrahentes, in aliam prorsus laccæ speciem, granosa dictam commutare videmus. Abit enim colore extracto, in granula, & non solum alii adhuc usui sufficit, sed vel laccæ in massa præstantior habetur.

Pro confirmanda tandem comparatione ceræ apum & laccæ, ad hujus analysin provocare liceat, qua, teste Cel. *Lemery*, eadem fere principia, nimirum spiritus acidus & butyrum eliciuntur.

Teste *Aldrovando*, Brasilia nutrit formicas quasdam majores, alatas, saporis gratissimas, & odoris citrei, easque adeo copiosas, ut agminatim volitando densissimam nubem referre videantur. Sic *Carolus Rayger*, D. refert in *Ephem. Germ. Dec. III. Anni 11. pag. 27.* quod die 18. va Julii mensis, Anni 1679. cœlo calidissimo & nubiloso, circa secundam pomeridianam horam, agmen formicarum alatarum maximarumque, nubis instar, ex Cauro in Eurum, Danubium versus directo tractu, volitaverit. Mox tota Posnania, urbs Poloniæ, magna earum copia plena fuit. Ex volantium agmine scilicet, forsan defatigatæ plures in terram delapsæ, forum adeo oppleverunt, ut singulo incedentium passu tricenæ imo plures contererentur. Quarta autem horæ unius parte totus exercitus transiit. In terram prolapsæ statim alas amittebant, nec nisi lente reptando procedebant. Duabus exinde horis ad unam omnes evanuerant, nec unde abierint quisquam investigari potuit. Alias tamen ex illis, sic ait Auctor, collegi, & vitreo vasi conservavi; illæ autem amissis extemplo alis, octavo exinde die moriebantur. Cæterum formicas communes figura quidem exæquabant, ast magnitudine aliquantulum superabant, duabus insuper alis diaphanis erant instructæ. Quarum adventum alii pestis, alii belli nuntium esse voluerunt.

Sic & Cel. *Gleditsch* in *Actis Regiæ Scientiar. et. L. L. A. A. Societ. Berolinensis*, agminis numerosi formicarum alis instructarum mentionem iniicit, quod aere detentum Borealis Auroræ speciem representavit.

Nec non P. R. *Ludovicus le Conte*, Societatis Jesu, in *relatione novissima de præsentis Regni Sinensis statu*, ubi de insectis Indicis agit, formicas candidas,

didas, quanto cum studio illas extirpare contendant, ubivis tamen reperiri. Hac autem, sic ille, & molestiæ ergo, quam hominibus adferunt, & qualitatibus sibi propriarum fama innotescunt omnibus. Exiguæ, molles substantia, plerumque candidæ, interdum rubicundæ, in prodigiosam quantitatem multiplicantur; & si in possessum domus seu receptaculi ejus pervenerint, nulla arte, nisi formicis nigris expelli possunt. Dentibus suis acutissimis, vel unius noctis spatio, altissimas pannorum, lanæ, similium sarcinas, imo armaria pluteosque perforant, quæ quod constituit lignum paucis exinde diebus cariosum evadit. Imo cuprum, ferrum & argentum corrumpunt, ac dentium vestigia sæpius metallis hisce impressa relinquunt. Quem quidem effectum ego potius qualitati dissolventi salivæ ibidem relicte, ac ut aqua fortis in metalla nostra agentis, adscribere mallet.

Testibus aliis itinerariis alia quædam formicarum species reperitur in Paramaribo, Batavorum Colonia, in Provincia: Surinam, adpellata. Hæ formicæ, a Lusitanis: *formicæ visitantes seu transmigrantes*, dictæ, agminatim incedunt. Quas dum advenire viderint incolæ, statim armaria & pluteos suos aperiunt, hos illæ intrant, glires, mures, similia extirpant. Gratissimus foret adventus earum vel mense quovis repetitus; illæ autem aliquoties non nisi quarto demum anno redeunt; quod si quis ingratus molestiam adferre vellet, hunc statim aggrediuntur, & tibia calceosque suos comminuunt.

Omnium insectorum, quæ receptaculis subterraneis sibi effossis obrepant & detinentur, omnium inquam, & singularissimæ & maximum damnum adferentes habeantur, illæ Indarum formicæ, quæ si fides itinerariis, numquam in terræ superficie exspatiantur, sed vias tectas pro adtingendo loco, quem destinatum habent, construunt. Et huic operi insistentes, si corpus aliquod solidum, duritiei tamen penetrabilis, reperierint, illud perfodiendo transitum sibi parant. Quidquod in fastigium columnæ nitentes, haud in externa ejus superficie obambulando adscendunt; sed basin ejus perforant, columnam intrant, sensim perfodiunt, sic tandem in apicem ejus evehuntur. Quod si autem durius, ac ipsis impenetrabile fuerit obstaculum, v. g. paries, pavimentum marmoreum, similia, ad longitudinem parietis, cæterorum, viam arcubus instructam, tamquam porticum, ex terra, humore viscido conglutinata construunt, & sic quo libet perveniunt. Difficilius evadit opus, si cumulum ex partibus haud cohærentibus coacervatum transire contendunt. Quod si enim tecto saltem munitam viam construerunt, inferius nimia spatia vacua remanerent, & aspera via. Hinc immenso cum labore tubum seu conductum cylindricum construunt, cujus auxilio undequaque tectæ agmen congestum transeunt. Quæ quidem nos ex Cel. *Lyonnet* hausimus, ille autem ex teste fide digno ac oculato accepta habere refert. Hic testis suis metipsis oculis viderat, quod hujus generis formicæ reservatorium aliquod vastum (vulgo: Magazinum) mercibus Societatis Indicæ plenum, intrando, receptacula terram vergentia, ac cariophyllis usque ad trabes seu pavimentum superius, repleta, illæsa reliquerint, sed conductu quodam anfractuoso, & cumulum cariophyllorum superante pavimentum superius tandem adtigerint, perforaverint, & hac ratione in receptacula superiora penetrando, paucas per horas insigne damnum adtulerint, & plures pannos Sericos Indarum perciderint. In

construendis vero ejusmodi viis, minus temporis impendunt, quam quidem crederes. Ordinis etenim dispositio copiarum laborantium, laborem accelerat. Binæ scilicet formicæ majores, vel mares, vel foemellæ, (utrique enim magnitudine superant operarias) laborem dirigunt, viam designant. Has duplex operantium series sequitur, altera terram, altera aquam viscidam portat. Priorum altera igitur frustulum terræ, suum onus, oræ formicis seu tubuli coepti adplicat, altera frustulum irrigat, tum utraque illud subigendo oræ adaptat. Post ambæ recedunt, aliam materiam quæsituræ abeunt, revertuntur, ac extremitate seriei sese jungunt. Interim par secundum eadem ratione procedit; post tertium, quartum, reliquæ. Itaque centena formarum in angustissimo quovis spatio laborem perficiunt, nec sibi impedimentum, operi autem incrementum adferunt citissimum.

Herodotus, Plinius, Solinus, Pomponius Mela, Philostratus, aliique recentiores pariter ac antiqui formarum genus apud Indas reperiri dicunt, quod mediam inter canem & vulpem magnitudinem tenent. Has aurum in cumulos colligere & magna cum cura adservare dicunt, ita, ut aurum erepturus, nisi calidissimum diei tempus, quo terra delitescunt, elegerit, vel ab illis devoretur; addunt: quod, dum furtum cognoverint, prædatoris vestigia sæpius insequantur, & arreptum dilacerent. *Strabo* suo jure factum hocce anili fabulæ originem debere ducit. Et nescio qui fiat, ut *Busbeq* suismetipsis oculis apud Turcas formicam Indicam sese vidisse narret, quæ magnitudine canem mediocrem æquiparabat. Gratias illi persolveremus, si quædam ex monstris hisce in Europam transmisisset. Faciliores enim Physici, rem adeo mirandam, ac visam sibi fabulam, concederent.

Latino nomine formicæ non solum Gallicum: *Fourmi*, olim: *Formi*, sed etiam Italicum: *Formica*, & Hispanicum: *Hormica*, originem debent.

Spiritu acido, sale volatili & oleo abundans formica, & ova sua, & agmen, Medicæ Materiæ adparatum adauget. Refert *Cel. Homberg* in *Actis Reg. Sci. nt. Academ. Anni 1712.*, quod, quum formarum lb. j. aqua fervente suprafusas, destillationis operationi subjecisset, liquor destillans statim ab initio, modico calore accedente, heliotropii, quem habebat colorem, cum igneo permutaverit, & aciditatem aceto distillato similem denique adquisiverit; imo solutioni vitrioli mixtus, illi colorem vini Burgundici æqualem induerit, signo acidi abundantissimi; quidquod in nullo unquam animali tantum acidi, quantum in formica ipse reperierit. Subscribunt auctorum omnium testimonia. Spiritus acidi præsentiam vel absque destillatione reperire poteris. Baculo agmen suffodiendo si formicas irritaveris, liquore illud irrigabunt, quem si naribus admoveas, ut spiritus vitrioli recens distillatus, odoratum feriet. Acidi hujus generationem aliquæ in arboribus resinosis, formicis alimenta præbentibus, quarum in radice suum agmen plerumque construunt. Hæ arbores acrem exhalant odorem, & acidum continent, quod dum in formicas transferit, ex illorum sententia, inter vegetabilia potius, quam ex regno animali proficiencia referri meretur. Ad experientiam provocant, dum subtracto spiritu primo, si fortiori calore distillatio urgeatur, spiritus urinosus, ut ex insectis reliquis, sic etiam ex formica elicitur. Obiici posset: aut omnes formicæ, sive sub arbore resinosa, sive in planitie degant, spiritum acidum

reddunt. Quocumque modo res se habeat, idem est, acidum hunc spiritum excellenti medio ad corroborandum corpus humanum, & restaurandas deperditas vires cedere constat. Quem recepturi formicas cum spiritu vini destillare, & liquore proveniente: *aquæ magnanimitatis* nomine, salutare solent. Intus recipiatur, & pro dosi ℥j. ad ℥ij., cum aquæ Cordialis seu Cephalicæ ℥ij. ad ℥iij. veniant, contra morbos cerebri, ut Apoplexiam ferocem, vertiginem, Paralyfin, & præsertim morbos provectorum ætate; dum Cordialis diuretici virtute, serositatem superabundantem & pituitosam in senioribus prædominantem, per urinas expellit, & hac ratione catarrhos suffocativos, aliasque humorum stases avertit. *Ettmuller* stomachicam & prolificam virtutem ei inesse, eumque mares natura frigidiores calefacere, fœminas autem ad fœcunditatem disponere docet.

Nec tantum ratione hætenus exposita formicarum spiritus destillatur, sed etiam per Balneum Maris, absque additione externa spiritus & aqua elicitur. Contritæ scilicet formicæ putrescant, & sic spiritum volatilem penetrantissimum destillabis.

Quod ad externum formicarum usum adtinet, oleum infusione eliciunt, oleo etenim communi infusæ, & in primis alatæ, per 40. dies soli expnuntur. Huic oleo virtutem spiritus vivificandi, flatus expellendi, & si regioni perinæi & rerum adfrictum fuerit, ad generationem excitandi, imo, linimenti instar adhibito, contra ulcera phagædenica & maligna, efficaciam eximiam tribuunt. Hujus olei, spiritus formicarum, & spiritus lumbricorum partibus æqualibus, si gossypii partem irrigatam auribus immiseris, medium pro surditate præstantissimum experieris. Eadem virtute gaudent & ova formicæ contrita. Teste Cel. *Ettmuller*, ovorum internus nullus esse solet usus, quia nulla, quantum norunt, virtute nisi flatus frequentiores expellendi, gaudet. Addit, quod quum nucis myristicæ odorem referant, pulveri hujus admixta, & illis exhiberi possint, si quos forsan delectationis ergo, ad crebriores flatus emittendos incitare velis. Sic circumforaneum quemdam vidimus, qui pulverem huncce *pulveris Patipatæ* nomine donatum, copiosum vendidit curiosis. Spiritus lumbricorum cum spiritu formicarum mixtus, & pro linimento adhibitus, malo ischiatico, Rheumatismis, Paralyfi, membrorum tremori, & Atrophicæ juncturarum (vulnera & plagas læscipienti) multum solatii adfert. Addatur spiritus aliquis Cephalicus, & ante medii adplicationem partes læsæ adfrictione sicca ad sensationem excitentur, ut penetraturo medio facilior via sternatur. Formicarum agmen, id est: nidus cum formicis & ovis leviter aqua bullita, & semicupii instar adhibita ad fortificandas partes nervosas faciunt & musculosas. Omnia sacco linteo majori includantur, & huic infideat ægrotans. Usitatissimum medium pro Paralyfi, Arthritide vaga & fixa, membrorum tremore, & similibus nervorum adfectionibus. Imo & mulieribus sterilibus semicupium hocce commendatissimum esse volumus, sive formicarum agmen solum, sive cum ovis ac formicis ipsisebulliverit; eadem sese virtute & in scorbuto commendat, ab acido prædominante exorto, qui salibus acutis penetrantibus & subtilibus pro medio eget.

Formicæ aquam magnanimitatis & oleum formicarum Pharmacopœiæ *Lemeryanæ* ingrediuntur; & basin constituunt olei Acustici *Mynsichtiani*, ac spiritus Acustici *Mindeneriani*.

℞. Olei formicarum

Chamemel.

Hyperic. ana ℥ss.

Spiritus vini camphorat. ℥vj.

M. f. linimentum in rheumatismis & arthritide ischiatica adhibendum.

℞. Olei formicar.

lumbric. terrestr. ana ℥ij.

Spirit. vini camphorat. ℥ss.

Olei terebinthin. ℥ij.

Spirit. fal. ammoniac. ℥j.

M. f. linimentum contra paralyfin & debilitatem nervorum.

℞. Spirit. formic. ℥vj.

Olei Rosat.

Laurin. ana ℥j.

M. f. linimentum contra contusiones & atrophiam articulationum.

Jam ad gommatis laccæ disquisitionem, etenim & hujus aliquis usus est in Medicina.

Multum vero olei, parum falis volatilis, terræ & phlegmatis continet. Mixti hujus analysin Cel. *Lemery* debemus, quam in *Actis Acad. Scientiar. Anni 1710.* expositam dedit. Quæstionis punctum in eo versabatur, utrum gommatis, vel, secundum alios, resinæ nomen ipsi competeret. Utraque enim multum sibi æqualia, in hoc tamen differentia esse constat, quod in resina sulphur, in gommate autem fal vel aqua prædominetur. Experimenta autem Viri Cel. loquebantur, laccam non dissolvi oleo olivarum, nec hujus ope tincturam ex illa extrahi; & oleo æthereo terebinthinæ, & spiritu vini, debilem tantum ruborem elici. Liquet ergo haud adeo resinofam esse laccam, nec multo sulphure abundare; & quum liquor subacidus, v. g. aqua aluminosa, tincturam fortiolem extraheret, laccæ quamvis non nisi levissimam solutionem adferret, oleum tartari autem fortiolem effectum produceret: partes salinas sibi admixtas habere laccam patet, & imperfecte gommeam esse, nec non inter gommea-resinosa referendam, ut mixtum, binis hisce substantiis intermedium. Denuo exinde Cel. *Geoffroy junior* laccæ analysin instituit, & productus ejus cum *Lemeryanis* congruentes reperit.

Laccæ virtutem adtenuandi, discutiendi & obstructions hepatis & lienis tollendi tribuunt. Contra hydropem icterumque commendatur; & urinam elicere, sudores provocare, & sanguinem purificare dicitur. En qua ratione tincturam ex illa eliciunt.

℞. Gommat. lac. a bacillis separat. ℥j.

Aluminis adusti ℥j.

Spirit. cochleariæ ardentis ℥viii.

M. & diger. in baln. aren. usque dum liquori coccineus color accedat. Col. tinctur. & serv. a. u.

Præcipuus tincturæ usus est contra morbos gingivarum, oris & dentium, & scorbutum ex lentiore humorum motu orientem. Quibus ut obviam eatur, frequenti adfrictione cum liquore prædicto, seu linteolis eodem irrigatis, & gingivæ superpositis, medendum. Interne recepta eosdem præstat usus, & sola pro scorbuto penitus profligando sufficit; ne autem calor nimius

nimius adsit, cavendum. Insigni insuper utilitati cedit contra arthritidem, rheumatismos, leucophlegmatiam, hydropem, similia. Ter scilicet in die x. ad xv. guttas tincturæ prædictæ, cum vino Hispanico seu Canariensi, tertia vel quarta hora post prandium accipito. Odorem illa amœnum, & saporem amarum, adstringentis suæ virtutis testem, exhibet. Cujus ergo & contra menstrua albida, corroborante atque salutari efficacia pollet.

Olim etiam variæ *dialacæ* species contra cachexiam adhibebantur; hodie autem, quum de virtute tincturæ prædictæ efficaciore constet, omnia ista composita obsoleti sunt usus.

Gomma laccam denique Trochiscis Karabæis, Dentifricio & Pastillis odoriferis Pharmacopœiæ Parisiensis inesse scito.

℞. Gommatis laccæ ʒjß.

Alumin. adust. ʒj.

Reduc. in pulverem, & subig. cum mellis rosacei ʒvj., ut f. linimentum Anti-Scorbuticum, quo sæpius per diem gingivæ adfricentur ope penicilli, vel bacilli linteo obvoluti. Vel:

℞. Tinctur. gomm. lacc.

Flor. aquileg. ana ʒß.

Mastices ʒij.

M. & f. linimentum anti-scorbuticum.

G R I L L U S.

Duplicis sunt generis grilli, alius enim domesticus, fumi ductus focorum inhabitat, alius autem silvestris in campis oberrat. Primus est, cujus historiam perteximus, ille enim frequentiori Medicinæ usui venit.

Gryllus. Offic. *Gryllus domesticus*. Aldrov. 442. Jonst. 65. Mouff. 135. Charlet. 44. Merr. 200. Schrod. 342. Raii Insect. 63. Dal. 388. Lemer. 398. *Gryllus cauda bifida*, alis inferioribus acuminatis, longioribus, pedibus simplicibus. Linn. Faun. Suec. 620. *Gryllus in domibus habitans & cantillans*. Nonnull.

Gryllus domesticus, insectum & a cicada & a locusta participans, est coloris fulvo-castanei, oblongus, tener, mollis, & ex pluribus annulis compositus. Caput ille præbet rotundum, splendens, utrinque oculis nigris & profluentibus munitum. Ex anteriore capitis parte conspiciuntur binæ antennæ exiguæ, tenues, nervosæ, simplices, & ob magnum quibus constant articulationum adparatum, unde quaque flexiles; postea os largiusculum, duabus maxillis, dentes ostendentibus munitum, dentes autem pro arripienda & retinenda sua præda veniunt. Thorax ex altera parte capiti, ex altera corpori satis arcte cohæret, & margines fulcatos, pilosque, quibus obfitus est, exhibet. Corpus denique duodecim annulis contiguis & articulatim cohærentibus constat; sibi superiores habet quatuor alas albas, ad longum complicatas, quarum binæ infimæ strictiores sunt & longiores supremis. Sub pectore & ventre sex crura videntur villosa, quorum bina postrema robusta, ac triplo longiora sunt reliquis; quodvis denique crurum in extremitate sua quinque in articulos flexum, ad unco hamum referente, terminatur. Cauda tandem, bifida ex binis composita est setis, ex utroque ani latere proficiscentibus, spinosis atque villosis.

Geoffroy. Tom. III. Pars I.

K

Inte-

Interiores grylli partes disquisituro statim obvenit œsophagus membranaceus amplus, tum stomachus extrinsecus lævis, intus vero rugosus, & huic aliquis ventriculus secundus, cum intestinis continuus, necitur. Hæc intestina autem adhærent cuidam mesenterio flavo, ac excrementis oblongis, ac muscerdam exæquantibus repleto. Ad longitudinem viscerum dispersas conspiciamus tracheas, in ramusculos divisas, & instar arteriarum, aerem per corpus diffundentium, alterno pulsu, ut videtur, agitata. Tum in masculo, ex utraque parte canalus intestinalis glans rotunda & albida detegitur, seu bini testiculi eminentiores, & in corpore quodam mucoso, ubi genitale masculinum, terminati. Generationi inserviens pars maris rubicunda, longitudini vaginæ fœmellæ respondet. Vagina autem ad glandulam rotundam, striatam, & albedine sua granum lithospermatis referentem vergit; & latera ejus ovariis oblongis, flavidis, ac ovorum nitentium, figuraque cumini granum æquiparantium, sed multo minorum, copia expletis, circumdantur.

Cantus grylli, quem plerumque alterna alarum ejus agitationi tribuunt, ex mente *Scaligeri*, motui organorum summa cum arte compositorum, & ventre ejus detentorum, originem debet. Masculus saltem, ut apud cicadas atque locustas, canere novit. Veritati accedere videtur; sic *Lyonnet*, quod natura animalibus, quæ voce, seu sonos quosdam edendi facultate donavit, & auditum largita fuerit. Aures externum quidem nullum in ipsis detegimus, aut concludi nequit: quod illo careant prorsus. Forsan loci quem occupant, & conformationis singularitatis ergo difficiliore cognoscuntur. Nonne aliorum voces haud gutturis ope efformantur? Nonne alia per thoracem, alia per anum respirare videmus? nonne alia oculos in dorso, & genitalia in capite gerunt? Quid igitur mirum, si & auris situm singularem in aliis videremus? Nec enim quorumvis insectorum membrorum usum distincte satis novimus; forsan igitur ignotorum aliquod ad recipiendas soni impressiones destinatum est. Imo, quidni auribus internis gaudere possunt, qui si adessent, tam tenues sane forent atque subtiles, ut illos vel intuendo dignoscere nequiremus. Constat igitur, nos pro cognoscendo insectorum aures, satis clara eorum cognitione carere; nec temere adferamus: absque auxilio aurium audiendi facultate eadem esse instructa.

Gryllus silvestris & præsertim fœmella, domestico nigrior est. Fœmella enim ventre ampliore, & cauda in tridentem efformata gaudet. Vorax non solum tenera herbarum folia devorat, sed & carni inhians, fame incitatus, ne sociis quidem parcat. Sæpius etiam zelotypi mares acerrimum certamen ingrediuntur, ad mortem usque conflictantur, & pugna durante prælio, devicto hoste victoriam canunt. Formicas præsertim pro delitiis habent. *Plinius* gryllos captaturum, docet: formicem ex medio corpore, crinis ope alligare, post ad marginem foraminis reponere, sufflata tamen arena omni qua delitescere posset formica. Quam quum gryllus amplexus fuerit, retracto crine facilis captabitur. Nec non ramusculo herbæ reiteratis foraminibus ejus intruso, gryllum elicere poteris, unde proverbium: *grylli instar fatuus*. Alii captando pro esca exhibent micam panis triti. Grylli silvestres vero latibula sua in acclivi collis apice construere peramant. Aut, quod probe observatum velim, haud directione perpendiculari, a summo ad

ad inum petente, (alias enim humiditati ingressus pateret) sed horizontali, seu terræ superficiei parallela. Imo angustiore fundo ampliorem ingressum parant masculi, pro foemellis, coitus tempore, capiendis. Pro construendo suo foramine autem locum herba nudum & apricum seligunt; interdum & prata ac planities; quondam enim ego, ait *Swammerdam*, agrum integrum eis oblitum vidi, singuli fossulam fere 2. digitorum profundam sibi effoderant, & in ora ejus constituti, alarum agitatione, ingratiſſimum strepitum excitabant; alii minimo rei cujuscvis motu observato statim in suam se recipiebant fossulam.

Clamore suo gryllus vel gaudii vel iræ signum edere solet. Coitus tempore præsertim, foemellas, quæ solitarie degunt, clamore, tamquam fistula, alliciunt; quæ prout accedit, vox maris evadit debilior, quum adsit, prorsus evanescit. Ut autem homines suis se brachiis defendere solent, sic & animalia & insecta cruribus. Sic quoque gryllos campeſtres obvientia sibi obstacula, pedibus, quasi equorum instar, recalcitrando, amovent. In *Physio-Theologia* sua Cel. *Derham* locustis æque ac gryllis lumbos esse observat robustos & crassiores; crura autem longa, gracilia ac fortia; quorum ergo fortes sunt agilesque ad cursum. Rapidum quidem cursum in gryllis haud observamus; imo lentiores incedere videntur; plerumque enim subsiliunt, & dum volitant, (id autem rarius accidit) per saltus & interstitia volatum complent. Singularem quadam facilitate & sibi propria retrocedere & progredi callent. Sunt, qui nullo veritatis fundamento nixi, cuculos a gryllis enecari scripserunt. Quo pertinent, quæ de antipathia animalium, neglecto examine admissa, sequentibus scribit Cel. *Lyonnet*: Historiam naturalem tractaturus sibi caveat, ut, nisi prævio examine accuratiore, mirabilia facta ab aliis saltem recensita adnittat; caveat etiam, ut mirabilia omnia neget ideo, quia veritatis specie carent: examini diligentiori subiicienda est natura; & mirabilium fundamenta sollicitè discutiantur. Ego enim, si quem observandi artis ignarum, exponentem audirem: caput caudamque lupi profligare muscas, cuculos enecari a gryllis, & similia; nec tamen experimentorum rationem & adhibitas cautiones subnectentem; tunc ego, inquam, & jure quidem, dubito; eo potius quum fabulam redolere videantur ejusmodi historiae, & intellectu difficile sit, qui fiat, ut caput ac cauda lupi abigat muscas, cum caro ejus & reliquorum eas alliciat; vel ut gryllus, cui est levissimus morsus, nec altior volatus, cuculum, avem adeo magnum, tam rapidè volantem, & plerumque in arboribus residentem enecare possit. Quod si e contrario Auctor ingenuus & fide dignus singularis quidpiam retulerit, v. g. cancro cruris mutilati in locum succrescere aliud; si adnexerit, quod rem ipse disquisiturus, plures cancos mutilatos vasi inclusos, conservaverit, studiosus observaverit; si tandem gradus ac tempus incrementi successivi subjunxerit, circumstantias addiderit; tunc ego rei, quamvis singulari & novæ, fidem adiicio libens; integritas sua ut imponere vellet & observationum circumstantiæ, ut in errorem ipse prolapsus fuerit, impediunt.

Jam ad gryllum domesticum revertamur; hic autem caminos nostros tenens sollicitè distinguendus venit a blatta, insecto depresso, coloris ferruginei, cujus mari tantum alæ sunt, nec cantandi facultas, quamque alii gryllum pistorum, sed immerito, nuncupant; distinguendus item a scarabeo

farina nigro, a popinatoribus: *bestia nigra*, Gallice: *bete noire*, dicto; distinguendus denique a *talpa-grillo*, Gallice: *Taupe-Grillon*, vel *Courtilliere*, insecto hirsuto, hortulanis & florum studiosis exoso, grilli instar cantante, & more talpæ terram suffodiente. Crura enim habet terræ suffodiendæ aptissima, vix cancrorum cruribus duritie inferiora, & articulatione anteriore in extremitate rotunda & dentata, tamquam rotulæ quibus artocreatum pistores utuntur, instructa; & conformationis suæ ergo facile insectum jam ex utroque latere jam superiorem, jam sibi subjacentem terræ partem percutere valet atque effodere.

Gryllus domesticus ædibus detinetur, & parietes, intra lateres, fissuras fumi ductuum, ac furnorum viciniam & quævis alia loca, igne continuo calefacta, pro nido quærit. Hoc residens continuo fere cantu aures nostros infestat, vespertino in primis & nocturno tempore cantum extollit, nec nisi maximo hyemis frigore tacet. Silvestris, ex quo minimum strepitum perceperit, vocem sistit, suo se nido abscondit; domesticus autem strepitui adsuetus hunc quidem non curat, sed lucem fugit. Quidquid obvenierit, palato suo arridet, farina, caro, panis, fructus, adeps, reliqua. Cantus ejus acutior aliis quidem ingratiſſimus, quietem eorum turbat ac somnum; aliis autem imo populis integris adeo jucundus est, ut tamquam harmonico musicæ concentu aures suos eodem delectari credant. Tanta est opinionum differentia. Sic refert *Emmanuel Koenig D. in Ephem. Germ. Dec. II. Anni IV. pag. 84.* testibus Physicorum variis, apud incolas Africæ gryllos, caveis ferreis inclusos, magni coemi, siquidem suo cantu quietum incolis somnum inducunt; & Fez, Regnum tenentibus, tanta delectatione gryllorum cantus, quanta Vallenſibus & Hibernis fidium sonos cedere. Verum denique cantus grylli organon esse membranam, ut flabella mulierum complicatam; cui sub ala nequitur longior muscoli tendo, qui contractus, membranam illam aridiorem complicat; hoc modo autem sonus grylli excitatur, & tendinem vel in gryllo mortuo vellicando, sonum elicere valebis. Hinc etiam gryllum, licet capite reſecto, diutius vivere & cantum continuare observatum est. *Scaligerum* adeo delectatum fuisse novimus cantu gryllorum, ut illo exaudito placido somno demulceretur. Hos autem pyxidibus inclusos adſervabat, & quum sine aeris libera respiratione vivere nequeant, pyxides cribri instar perforare solebat.

Cæterum plebis delectamentum, quo fertur in cantum grylli, nonnunquam limites excedendo, in superstitionem vertitur. Maxima pars ejus delicto sibi duceret, gryllos lædere, eosque Dei *equuleos* adpellando, pro fortunæ nuntiis habent. Ita a parentibus edocti pueri, gryllos campeſtres captant, domum reportant, in fumi ductus reponunt, & domesticos reddere student; spe excidunt, campeſtres enim numquam cicurabuntur, imo domesticos, quantum possunt, extirpare annituntur. En, quæ *Cel. Samueli Ledelio D. in Ephem. Germ. Dec. II. Anni VII. pag. 90.* relata, debemus: Mater familias cantu plurium gryllorum diutius infestata, casu tandem felici, a hospitibus sibi exosis liberabatur. Epulas quondam inter sonos tubarum & tympanorum celebrando, poſtridie omnes gryllos, strepitus impressione mortuos, reperiēbat. *Jonſton* addit; quod tinctura Vitrioli vitro immiſſa, omnes grylli domo expellantur. Fortiori autem sulphuris vapore, ut quævis insecta enecantur.

Nomen grylli Italicum & Hispanicum: *Grillo*, ut & Germanicum: *Gryll*, Latino, hoc autem Græco: *Grullos*, originem debet. Galli eum dicunt: *Grillon*, *Grillot*, *Grillet*, *Grille*, *Gresillon*, *Crignon*, *Crinon*, *Gricon*, vel *Criquet*; nominibus, cantum suum imitantibus; ex Gallico tandem & Anglicum: *Cricket*, haustum esse videtur.

Sale volatili & oleo abundans gryllus pro diuretico ac aperitivo habetur; imo aliquantulum ex natura cantharidum mutuatum habet. Hinc absque periculo pro expurgandis urinæ meatibus, & profliganda saburra ibidem collecta adhibeatur. Vasi occluso immissi grylli, furni ope arefcant, & in pulverem reducantur, cujus gr. xij. ad ℥j., cum aqua conveniente exhibentur. Sic testibus *Ephem. Germ. Dec. I. Anni IX. & X. Cel. Hagendorn*, D. sæpius felici cum successu, pro affectionibus renum & vesicæ, unum duosve gryllos, subtractis pedibus, alis & capite, aqua petroselini vel saxifragæ destillat, eo usque maceratos, quo liquor lacteus evaserit, tandem vero fortiori expressione colatos, ægrotantibus se exhibuisse refert; quorum ope copiosissimum urinæ profluvium elicit. Ibidem refert *Cel. Samuel Ledelius*, D. ruricolam quemdam, sibi cognitum, sæpius febrim tertianam, gryllo in cyatho cerivisæ soluto, depulisse. Denuo aliud subnectamus, nobis quidem suspectæ fidei, ast deficiente ampliori gryllorum usu, qualecumque fuerit, adponendum: In *Ephem. Germ. Dec. III. Anni I. Obs. 131.* scilicet, *Cel. Gerbesius* D. sequentibus: Amicorum unus, Medicæ artis Doctor præclarus, quondam ad ægrotantem vocabatur, qui octo per dies, nullam prorsus urinam emiserat; varia præscripsit Medicus, in vanum omnia. Vetula tandem gryllos collectos adtulit, & laxiori nodo, quo motum liberum conservarent, indidit, post gubus ægrotantis subligavit; ille autem statim fremitu insolito correptus, paucis momentis elapsis copiosissimam urinam reddebat. Qui quidem medendi modus, si sua ipsi veritas constat, singularissimus; nec medium, Medicis rationem quærentibus arridebit; ast qualia reperimus, tibi exhibuimus L. B. Interim & pro hocce pugnare potest, quod alias obtinet: Physica ars nimium complicata satis explicare nequit.

Quod denique exteriorum gryllorum usum adtinet, illi contriti & oculis adplicati exacuandæ oculorum aciei inserviunt. Habentur & pro resolutivis, optimisque ad profligandas parotides & alios hujus generis tumores.

L O C U S T A.

Variæ sunt locustarum species, quæ & figura, & colore, & magnitudine inter se differunt. Maximarum, frequentissimarum & in Arte Medica usitatissimarum una est, illa quam nostra descriptione jam pertractamus.

Locusta. Offic. Aldrov. 404. Jonst. 62. Mouff. 117. Charlet. 44. Merr. 200. Schrod. 343. Dal. 388. Lemer. 515. *Locusta viridis major*. Raii Insect. 61. Ephemer. Natur. Cur. Decur. 2. Anni 2. Observ. 15. pag. 40. *Locusta major viridis*. Frisch. 3. *Gryllus cauda ensifera recta, corpore subviridi*. Linn. Faun. Suec. 621. *Locusta major vulgaris*. Quorumd.

Locusta igitur hæc tota, viridem, colorem herbarum referentem exhibet, excepta tamen linea fusca, superne dorsum, pectus, & verticem transeunte;

exceptis etiam lineis duabus pallidioribus, sub ventre & binis cruribus postremis quæ conspiciuntur. Abit in caput, thoracem seu pectus, & corpus. Caput oblongum, equino simillimum, & terram respiciens; os quodam scuto rotundo, profilienti, mobili, munitum, & ex duabus maxillis instructum est. Dentes maxillis inhærentes, flavi, acuti & in apice aduncifunt. Ori inhæret lingua, eaque magna, rubicunda, & maxillæ inferiori, latæ & rotundæ adnexa. Maxillis vicina adparet barba virescens, villosa, & mediante triplici articulatione, complicanda. Tum antennæ ex nodis comparatæ, longiusculæ, sensim crassitudine decrescentes, pallidæ, ex summitate corporis proficiscentes; post oculi hemisphærici, profiliente & bina punctula nigra referentes. Thorax elevatus, angustus, supra subtusque binis dentatis spinis munitur. Dorso superjacet scutum oblongum, cui musculi crurum anteriorum fortissime adhærent; musculi autem circumdati conspiciuntur vasculis aereis, seu tracheis niveis, ac adeo artificiose comparatis, ut easdem disquirendo in maximam Numinis, quod omnia condidit, admirationem venerabundi trahamur. Bina crurum priora omnibus brevissima sunt; lumbi granulis aliquantulum obsiti, & profundissimis peracti sunt sulcis; crura proprie sic dicta, spinosa; & eorum extremitates, sive pedes, duplici hamo muniti. Eadem plane est conformatio crurum paris secundi. Tertium vero omnium longissimum, spinosum, saltibus aptissimum, granulis & sulcis distinctum, ac robustissimis tendinibus corroboratum. Deinde quatuor alæ, latissima quadam zona viridi decussatæ, quarum anteriores ex secundo, posteriores ex tertio crurum pari enascuntur. Posteriores insuper ab anterioribus diversissimæ, non solum tenuitate, & amplitudine anteriores excellunt, sed quoque rugosæ sunt, albidæ, & lineis albidis decussatæ quidem, sed plexu reticulari omni carentes. Ventrem amplissimum octo annuli constituunt, & binæ caudæ, rattorum instar, villosæ terminant, quibus intermediæ adfunt tres papillæ villosæ & mobiles. Ventris fœminini extremitatem duplex cuspis duriuscula, longa, & gladium referens egreditur. Per totam ventris capacitatem dispersæ sunt trachæ, & magna cum arte inter annulos & intestina conglomeratæ.

Locustæ in interiore statim ab initio œsophagus; post ventriculus; tum stomachus secundus, ut in grillo, illeque ex interiore sua parte sulcatus atque dentatus; deinde duæ intestini appendices, vel cavitates ventriculi tertii; tandem intestinum rectum. Imo tracheis intersita vascula coloris smaragdini satis conspicua; & in pectore sex officula musculis cohærentia ad crura corroboranda.

Observationibus Cel. *Swammerdamii* edocemur, magnam esse similitudinem triplicis stomachi locustæ, & animalium ruminantium; partem in stomacho locustæ reservandis alimentis destinatam, detectu esse facilem, & locustas ruminari vix extra dubium esse positum.

Vix alæ locustis accesserunt, & illæ coeunt, dum masculus dentibus suis fœmellam ex cervice corripit, priori crurum pari terra jacentem detinet, illiusque vaginæ aculeum, ventris in extremitate obvium, intrudit. Diutius hac ratione cohærent, & vix adhibita violentia separari possunt. Exeunte tandem autumnio fœmella ovis se exoneratura, terram, suo gladiolo, quantum fieri potest, perfodit, ova eo reponit, moritur & exarescit.

scit. Nec diutiores masculi foemellis supersunt. Ova autem usque ad reditum veris terra delitescent, tum vero solis radiis calefunt. Figura oblonga, longiora quam crassiora, anneti granis quoad magnitudinem æqualia, albida, & membranæ ex filis subtilioribus albis constructæ involuta sunt. Fila ista non sunt, nisi arteriæ & venæ ovarii in ventre foemellæ obviæ, constant autem pelle tenuissima atque pellucida, quæ digitis compressa strepitum quemdam edit. Humor ibidem detentus albidus, viscidus & diaphanus est. Quum igitur hyems recesserit, ac terra solis radiis incaluerit, incalescent ova, & exeunte tandem Aprile mense, vel tardius citiusve vermis enascitur, ab initio quidem vix pulicem magnitudine adtingens, colore albidus, post nigrus, denique fulvus, forma etiam locustæ indutus, & saltus edens, quamvis nondum nymphæ statum adtigerit. Notatur digna res est, sic Cel. *Svammerdam*, quanta sit locustæ, & nymphæ ex qua provenit, similitudo. Nulla enim proffus ratione variant, nisi hac: quod alæ in locustis extensæ & ad longitudinem corporis repositæ; in nymphis vero complicatæ & quasi contortæ, ac quatuor quasi globulis inclusæ sint. Hinc etiam *Aldrovandus*, *Mouffet*, *Fonston*, alii, vermes ex quibus nascuntur locustæ, non esse dicunt, nisi locustas alis destitutas, his autem accedentibus aliud nomen iis tribui; crassius denique volunt esse corpus foemellæ. Verum etiam, nisi qualvis insecti transformationes successivas cognoveris, idem illud insectum sapius pro duobus iisque diversis habebis. Hinc & nymphas puellarum cicadas aquaticas esse credidit Cel. *Rondelet*, locustas & pulices aquaticos Cel. *Mouffet*, Scorpiones aquaticos Cel. *Redi*, alijs generis animalia *Fonston*. Hinc etiam locustam in triplici suo statu consideratam, triplex animal, specie diversum, crediderunt varii. Nympha igitur vicesimo & quarto vel quinto die seponendis suis exuviis sese accingit, cibo abstinere incipit, tum locum adaptatum quærit, plerumque scilicet carduum seu spinam, cui seipsam adhæret. Post colli & capitis tumefactione & agitatione pellem collum obtegentem dirumpit. Caput primum difficiliorque hanc fissuram egreditur, tum reiterata agitatione & tumefactione corpus totum cum sex cruribus sensim exprimitur, exuviæ autem spinæ adhærentes relinquuntur. Et sane vix mente concipimus, sic pergit Cel. *Svammerdam*, qui fiat ut cum dentibus duris, unguibusque adeo acutis, & se ipsas, & antennis tam longas, tamque tenues adeo subtili ac molli membrana exuere valeant. Qua quidem seposita, adeo tenuem corporis substantiam profitentur locustæ, & crura earum ceræ haud cedant molliæ & flexibilitate. Exuviis itaque seu prima sua pelle denudata locusta, pristini coloris fulvi loco, nunc albidum seu viridem debiliorem ostendit. Adhibitis insuper seu potius effusis viribus defatigata, & aeris impressioni perferendæ impar, in terram semianimis prolabitur; per horam integram remanet. Vix pelle sua egreditur, & alas ejus evolvendo sensim crurum posteriorum longitudinem superare, spectaculo sane singulari videbis. Statim longitudo major ipsi accedit, recedit paululum deformitas. Quamvis omnes in universum locustas merito horribiles adspectu atque deformes dicere possis; os enim habent, quasi squamis confutum, & capiti posteriorem quemdam cucillum, qui in principio alarum terminatur. Auctori cuidam Arabo, a Cel. *Samuele Bochart* citato, si fidem adhibere velis, decem animalium diversorum natura inest locustæ: nempe

caput equi, oculi elephantis, collum tauri, cornua cervi, pectus leonis, venter scorpii, alæ aquilæ, lumbi cameli, crura struthii, caudaque serpentis. Quantum compositionis monstrum! Locustarum aliæ tamen alas cœruleas, aliæ rubras, aliæ versicolores exhibent. Plurimæ autem plerumque saltus edunt, rariores volant. Saltus cujuscvis altitudo ducentuplo corporis ipsius longitudinem superat. Omnium vero maxima & singularissima illa est, quam: *Mantis*, nomine Græco, seu prophetam adpellant; denominationis rationem vel ex eo deducunt, quod adventu suo veris initium nuntiat; vel quod adventu suo, ut reliquæ, annonæ caritatem prædicat; vel quod in situ suo maxime proprio constituta, junctis quasi manibus Deum adorare videtur, more Prophetarum veteris fœderis. Hinc & in Provincia, vulgo: *Pregue-Dieu*, Deum adorans, dicitur; & tamquam insectum devotum, quadam quasi veneratione colitur. Amore benevolo præsertim in infantes ferri dicitur ibidem; ac si quis eorum, viam ex illa sciscitetur, sublato pede illam commonstrare, nec unquam fere fallere.

Cantum quoque haud adeo ingratum locusta, de qua agitur, edit, & in regionibus frigidis, ubi cicadæ deficiunt, plerumque hujus nomine, immerito tamen donatur. Masculus tantum, locustarum more canere novit, fœmella muta est. Ast circa determinandum organon cantus in masculo varii solent esse auctores. *Swammerdam* illorum sententiæ accedit, qui volunt, quod locustæ, nymphæ exuvias seponendo, alarum agitatione strepitum istum eliciant; alias autem non nisi alis, alias alis pedibusque in subsidium vocatis, cantus edere idem ille adferit. Cel. *Linnaeus*, quem potius ducem sequimur, mari in basi vaginæ alarum foramen esse ait, membrana diaphana, instrumento cantus sui obductum. Nec tamen per diem sonum edit ullum, sole ad occasum vergente autem, ut canere cœpit, sic cauli herbæ, aristæ, vel arboreti impositus, & in pratis, in campis atque dumetis, cantui per totam noctem insistit. Herbis vivit; & vel levissima digitorum pressione coactus venter, succum viridissimum ex ore evomet. Et quam segnis sit ac lentis ad volandum tempore præsertim frigido vel humido: satis longum tractum volando sæpius emetiri solet. Ex alterutro crure posteriore arrepta locusta, crus in origine sua avulsum deperdit, quo amisso, ulteriori volatui haud amplius sufficit, posteriorum crurum ope enim in aerem adtollitur. Manu constricta, tam vehementi illam petit morfu, ut doloris ergo, diutius eam retinere nequeas. Volitans alis aliquantum elicit strepitum.

Numerosissima interim quantitate locustæ multiplicantur. Teste Cel. *Le-mery* interdum agmina maximarum locustarum accedere, & vento agitata hinc inde delata terra residere, terræ superficiem omnem obtegere, ac flores, fructus pullulantes atque semina penitus depascere constat. Teste Cel. *Scaliger* vix transit annus, quo locustæ terræ vel Meridionali vel Septentrionali cuidam, illam deprædando non adferant damnum. Interdum etiam tantus terror populum invadit, ut ex regione remotiore adportatas credant, quas sua terra produxit, locustas; & figura horrendas & clamorem lugubrem edentes, quamvis præter multitudinem vix habeant quidpiam singularis. Nec tamen negabo, locustam esse animal generi humano infestissimum. Maxima interim ovorum copia plerumque vel hyemis inclementia perit, vel cum herba a pascentibus deglutitur. Observante Cel. *Lyonnet*, locustæ transmi-

transmigrantes, campos quæ depascuntur & agros, cauda nimis brevi instructæ sunt, quam ut sua ova penitus in terram reponere possint; hinc & avium rostris & aeris inclementia, magna illorum copia perit; provida sane Dei benignitate, ut animalium tam perniciosorum multitudo nimia impediatur. Physicorum varii sunt, qui locustas trium flagellorum insignium nuntias habuere. *Annonæ caritatis*, ob herbam depastam; pestis, ob infectionem & foetorem ex corporibus earum putrescentibus exhalantem; belli, ob ordinem, qua tamquam instructa acies incedunt. Sic locustæ quondam octavo veniebant flagello vindictivæ Dei justitiæ, Pharaonem & Ægyptios adficiendo, ac quibus grando pepercerat, ea omnia devorabant. Plenæ sunt historiæ omnes, & devastaciones a locustis cuivis tempori regionique illatas recensent; nos autem ne justo prolixiori advertitatum recensione, tedium L. creemus, non nisi sequentia, ex scriptoribus nostri ævi & fide dignissimis adferamus:

Cel. *Mezeray*, expositis consequentiis tristissimis, tempestatem violentiorem regnante *Luovico XIII.*, anni 1613. Januario mense, Galliam passim affligentem, excipientibus; quanta, pergit, fuerit jactura, ex ventorum ac tonitruum violentia proficiscens, ab illa tamen superabatur, quam in regione Arelatensi & Provincia, circa Majum mensem, locustarum agmina producebant. Ibi enim tanta locustarum quantitas enascebatur, ut brevissimo, id est: septem vel octo horarum intervallo, herbarum atque granorum, xv. mille jugerorum spatio detentarum, vel radices devorarent. Vel horrea intrabant atque granaria, & quidquid frumenti coacervati aderat, consumebant. In aerem evolantes densissimam nubem efformasse dicuntur. Devastato igitur tractu Arelatensi, Rhodanum transmigrabant, & Belloquardam perveniebant, ibi autem pariori gramine reperto, herbam & hortense trifolium devorabant. Tum Borboniam, Valabergam, Montemfrinum & Agramontium adibant, pari ratione & ibidem quævis devastando. Maxima tandem earum pars sturni, aliusque avis candidæ, Gallis: *Gabian*, prædæ cessit. Reliquæ terram, in primis arenosam tubulo quodam suffodiebant, hosque tanta cum quantitate ovorum explebant, ut integro regno desolationem exclusæ locustæ adtulissent. Ast provida gubernantium cura brevibus ccc. millia librarum, ovorum istorum collecta in Rodanum projecta, vel in terra abscondita sunt. Supputando autem numerum locustarum exinde nascendarum; nec nisi 25. cuivis tubulo tribuendo: quamvis libram 17500. locustis producendis suffecisse repertum est.

Sæpius etiam, sic Cel. *Lesser* in *Insecto-Theologia*, locustarum agmina, frondescentem spem agricolæ præscindunt. Voraces enim sæpius ex remotissimis terris adveniunt, maria transeunt, agminatim campos florescentes occupant, & vix horarum spatio, quidquid viridis adfuerit, devorant. Qua de re Cel. *Lyonnet* sequentibus: En hujus exemplum singularissimum, in *historia Caroli XII. in ciæ Regis*, *Tom. IV. pag. 160.*, obvium. Ibi enim regem hunc in Bessarabia degentem, locustis admodum infestatum fuisse describitur; horrenda, sic verba sonant, locustarum quantitas ex meridionali maritima plaga proveniens, primo minoribus cumulis, mox nubium instar, cælum obtenebrantem, offerebatur, ut solis defectus spectantium oculis videretur. Neque vicinæ ac depressæ humo volitabant, sed eadem, qua hirundines, elevatione, usque dum campum, in quo consistere possent, obser-

observarunt. Sæpius in via nonnullis occurrimus, quæ strepitu quodam, decidenti grandini, non absimili edito, rursus adtollebantur in altum. Tum instar turbinis super nos prolabebantur, in illa ipsa planitie, ubi castra posueramus, commorantes, neque equorum pedes, quibus conculcari possent, pertimescentes, ex terra elevata, faciem oculosque nostros impudenter adeo operiebant, ut viam, qua ab illarum incursum evadere possemus, dignoscere non valeremus. Continuato tamen itinere ex illis evasimus. Quocumque residerant, herbam & gramina ad radicem usque decerpserant, ita ut viridis antea campus, quo oculi nostri modice oblectabantur, in arenosum desertum abierat. Vix fidem meretur, adeo exiguum insectum, mare transmigrare posse, nisi propria experientia hæ gentes edoctæ forent. Præter ea transeuntes locustæ parvum Euxini Ponti sinum, terras insulasque adjacentes, vastissimas licet peragrantur, deprædantur, & quod magis admirationi venit, ipsorum ædificiorum portas corrodunt; adeo crudeles sunt, ut nulli rei parcant. Hactenus ille.

Pro enecandis & abigendis locustis media varia varii tradiderunt. Ast fidem vix facimus. Suo enim jure *Aldrovandus*, plerumque, ait, ad profigendas locustas nil valet hominum cura, nec superest nisi Dei auxilium, ferventioribus iisque publicis precibus implorandum. Locustæ etiam fortiores debiliores enecare, sicque se ipsas si non extirpare, saltem adtemnuare solent.

Nomen locustæ Gallicum: *sauterelle*, ex verbo *sauter*, saltare deducatur. Itali illam dicunt: *Cavalletta* seu *Saltarella*. Angli: *Locusts*, Græci *Akris*. Alii sunt qui locustas majores: *logustes*, minores autem: *Samereaux* nuncupant. Quibusdam quoque in regionibus Galliæ locustam viridem magnam, de qua diximus, *Feudi*, a cantu suo; in aliis: *Aoutron* seu: *Aoutrelle*, a mense Augusto, Gallis: *Aout* dicto, siquidem hoc mense, & messe perfecta, stipulis inhærere solet.

Multo autem sale volatili & oleo abundant locustæ. Historiæ narrant, locustas esse Orientales, carnis suæ candore & sapore cancrorum carnem imitantes; easque jam elixas, jam ollæ immixtas atque affatas adponi; hac enim ratione caput & alæ abeunt, corpori cancrorum rubor, & gratissimus sapor induitur. Aliis frixæ cum butyro, aliis pipere, sale & aceto conditæ magis arridere dicuntur. Et hanc illas condiendi rationem inter populos istos vel hodie frequentissimam esse ait: *Dampier* in itineribus. Teste *Diodoro Siculo*, Æthiopes ob locustas sibi cibo cedentes: *Acridophages* adpellantur. Ubi igitur mensarum adparatum exaugent, ibi ut *Aristophane* teste, olim Athenis, in forum deportatæ, ut apud nos aviculæ, prostant. Locustas quondam pro nutrimento Judæam & adjacentes regiones colentium cessisse videtur; Judæis enim terram promissionis inhabitantibus, in Levitico enumeratæ quatuor locustarum species, pro alimento veniebant; imo *S. Joannes Baptista*, locustis & melle silvestri vitam sustentabat. Teste enim *Aldrovando* & *Samuele Bochart*, ridiculum foret, si in explicando textu, alio tenderemus. Europæorum palato nullæ arrident, & Orientis incolarum frugalitatem ad summum miramur, nec imitari contendimus.

Nec nisi parcissimus in Medicina est locustarum usus. Teste *Dioscoride* fumigatio locustarum retentam urinam præsertim in mulieribus excitat. Alii eandem pro adfectionibus hystericis commendant. Cujus ergo are-

factæ in pulverem abeant, cujus gr. xij. ad xx. cum liquore quodam conveniente, ut decoctione herbæ parietariæ, similia, exhibeantur. Teste Cel. *Linneo* Succorum more cedit, ut verrucas manuum morsibus locustæ nostræ exponant, quæ inter morsus liquorem quemdam evomit, cujus auxilio verrucæ exarescunt.

O N I S C U S.

A selli, *Millepedes & Onisci*. Offic. *Aselli*, Schrod. 338. Jonst. 126. *Asellus*. Mouff. 202. Charlet. 57. Merr. 203. Dal. 385. *Oniscus sive Asellus* Aldrov. 632. *Asellus Asininus seu vulgaris*. Raii Insect. 41. *Millepedæ*. Matth. 257. *Millepedæ, sive Aselli*. Boffch. 409. *Oniscus cauda obtusa, bifurca*, Linn. Faun. Suec. 1257. *Millepeda, Centipeda, Multipeda, Porcellio seu Cutio*. Quorumd.

Oniscus, insectum parvum, quod omnes norunt, terrestre, alis destitutum, depressum, atque aliquantum globatum, unguem digiti auricularis longitudine refert, sive digitum transversum, dimidium latitudine, figuram rhomboidis, colorem plerumque cinereum, interdum lividum seu nigrum, præsertim in dorso & lateribus, albidum sub ventre, & admodum multis pedibus gaudet. Dividitur in caput, corpus & caudam. Caput exiguum, & conglobatum, nigrido eoque vix conspiciendo ore infra sito munitur, & superne duas antennis prominentes & quinque articulationibus constantes exhibet; harum brevissimæ & nodis similes sunt, capiti proximæ, extremæ in cuspidem terminantur. Harum auxilio animal viam suam dextrorsum & sinistrorsum exploratur. Corporis tegumento venit pellis lævis & nitens, solida ac quasi testacea, octo annulis, magnitudinis variæ composita, horum secundum omnium maximus est; sex denuo aliis annulis minoribus, caudam versus accedentibus. Bina latera ubi pedes spectant, ferræ instar dentata; & sub ventre septeni ex quavis parte pedes illique quaternis articulationibus compositi, & spinas quasdam brevissimas continentes adparent. Ultimi prioribus paullo sunt longiores. Cauda autem bifida, longiuscula & cuspidata. Nonnunquam in ipso insecti dorso nigræ vel flavæ maculæ dispersæ conspiciuntur.

Viviparis oniscos adnumerari jubet experientia; quamvis *Jonston* alique illos inter ovipara referant, & peracto coitu, magnam copiam ovorum, albidorum, nitentium, margaritis similia, accumulatorum, vermesque albos diu immobiles continentium, reponere doceant. Hæc Cel. *Lemery* sua experientia comprobata refert. Fœmellas enim plures fœtus utero gestare docet, qui illam egrediendo in gyrum dispersi, alacres agitant suas alas; licet vix pulices magnitudine attingant. Sic Cel. *Philippus Fraendorffer*, D. testibus *Germ. Ephem. Dec. III. Anni III. pag. 3.* observatione sua certus, oniscos viviparis adnumerat. Hic enim quum oniscum supinum quondam microscopio exploraret, circa primum par crurum rem aliquam motu agitatam detexit; post animalculum, ut minimus pulex magnum, gradu citato incedens, tum secundum, tertium, & sic brevissimo temporis intervallo, septem & triginta numeravit. Jam quum onisculi penitus efformati, ac inter se similes, locum adeo singularem corporis mortuæ matris egrederentur; in his rediviva videtur obsoleta illa fabula de vipe-

viperis, cujus foetus non nisi mortuæ matris ventrem egredi creduntur. Communis fert sententia, verba sunt Cel. *Langii*, oniscorum ova loco humido reposita demum excludi; ego autem onisculos ventri matris eadem ratione adhærentes vidi, ut sua ova alias cancri fluviatiles secum gerunt.

Oniscorum differentia, vel a magnitudinis, vel coloris, vel loci quo degunt, varietate petenda est; alii enim majores, alii minores; alii fulvi, alii cinerei; alii albidii; alii domestici, alii autem silvestres sunt. Domestici inhabitant tecta, parietum fissuras, cellas, sub fundis vasorum aqua plenorum, sub lapidibus degunt. Fimetis, sterquiliniis, locisque refrigeratis & nitro plenis detinentur. Silvestres e contrario peramant frumentum, silvas ac arbuſta, & in crenis sub cortice arborum vetustarum deliteſcunt. Et hi quidem ultimo memorati prioribus minores, & in Medicina sunt infrequentiores. Anteferuntur illi, qui quidem sale nitroso, quo nutriuntur, abundantiores habentur. Ambobus vero sensatio eximia inest, etenim vel levissimo digito tacti, caudam capiti nectendo conglomerantur adeo exacte ut pillulæ vel globuli videantur. Nec nisi secedente tandem timore evolvuntur, & cum pristina figura, motum, quo hucusque caruerant, recipiunt. Hyemis violentia vel somno corripuntur vel prorsus enecantur. Cibo veniunt avibus, lacertis, araneis. Olim exuvias sive pellem annuam seponere haud credebantur; hodie autem non solum subtractam sæpius pellem, veritatis testimonium reperivimus; sed etiam annuam pellis depositionem insectis omnibus communem esse novimus.

Cave autem ne confundas cum *Plinio* oniscos & scolopendros terrestres vel aquaticos; nec oniscos & julos, hi enim potius millepedum nomine forent donandi, siquidem *Cardano* teste, quadraginta & quatuor pedes ostendunt. Incessus millepedum, ut scolopendrorum atque julorum mirabili sane mechanica lege perficitur, sic Cel. *Derham*. Ex utraque corporis parte seriem crurum, per totum corporis distributorum conspicias. Cuius cruri suus est motus, & modo mirabili, at descriptu difficiliore aliud ab alio excipitur. Undulatione quadam, seu motu profluentem aquam referente, moventur, & quidem tanta cum rapiditate, quantam impossibilem duceres, cogitando: quanti crurum adeo exiguorum passus, pro cursu tam rapido requirerentur.

Latinum onisci nomen: *Asellus*, cui & Græcum: *Onos* sive *Oniscus* respondet, inditum ipsi videtur, vel ob colorem cinereum qui asino est, vel ob incessus sui tarditatem; quantumvis maximo instructus sit numero pedum. Vox Gallica: *Cloporte*, *Closporte*, *Clausporte* ex *Clausporque*, quasi a *Clausi-porca*, vel *Clusilis-porca* descendit; hinc quoque vulgo: *Cloporte des Truys*, oniscus porcarum, dicitur. Campaniam tenentes illos dicunt: *Pourcelets* vel *Porcelets de S. Antoine*, Porcellos S. Antonii, Itali: *Porcelletti* vel *Porcellioni*, siquidem hosce similitudine quadam porcellis accedere crediderunt.

Testibus *Actis Acad. Scient. Anni 1709*. Celeb. *Lemery* chymicam oniscorum analysin instituendo, distillatione non solum abundantissimum salem volatilem, & spiritum volatilem, (qui non est, nisi sal ille volatilis phlegmati involutus) ex oniscis elicuit, sed etiam oleum nigrum & foetens, sale volatili imprægnatum; & in fundo cornuæ desidentem carbonem, qui calcinatus ferri parum exhibet, quale in cinere animalium reperies. Hæc igitur onisco-

oniscorum principia, & in primis sal eorum volatilis nitrosus, omnem eorum virtutem constituunt. Ex sale enim aperientem & resolventem efficaciam accipiunt, cujus ergo pro asthma, ictero, strumis, morbis oculorum ex spissitudine lymphæ provenientiibus, & viscerum obstructionibus conferunt. Diureticorum instar contra adfectiones vesicæ & renum faciunt; & quum qualitate sua salina ac detergente subtilissima corporis vasa, & strictissimos ejus conductus penetrare valent; nervorum visciditates, & alia, quibus constipari possent, profligant. Hinc pro Paralyfi, pro Epilepsia, aliisque nervorum adfectionibus conveniunt. Eadem subest ratio, quod obstructionibus medeantur, & tumores scrophulosos solvant, & ulcera inveterata. Hinc etiam frequentiori & felicissimo medio contra hujusmodi morbos, diu continuatus oniscorum venit usus.

Plerumque oniscos in substantia nudos, vel parum contusos, & in vino candido maceratos, sic scilicet plurimum, recipiunt. Sub initium senos, deinde succrescente sensim numero vel denos, imo duodenos præscribunt. Alii etiam simpliciter vino maceratos commendant; alii autem contritos & fortiori expressione colatos statim præbent, antequam sedimentum salinum, liquoris virtus præcipua, fundum depositione petierit. Jusculis aperitivis commixti præcipuo usui veniunt; in morbis hucusque expositis. Quum vero copia oniscorum haud quovis tempore ad manus esse possit, in officinis nostris pulvis oniscorum prostat. Quem præparatur oniscos captos candido vino lavant, post solis ope arefaciunt, tandem vero in pulverem reducunt; cujus gr. xij. ad ðij. bolis & opiatís morbo adpropriatis misceri solent. Contra asthma, aliasque pulmonis adfectiones ex visciditate lymphæ & pulmonum tuberculis provenientes, pro opiato præstantissimo commendat Cel. *Et muller*, pulverem oniscorum gommatis Ammoniaci & melli commixtum. Anglorum mori venit, ut oniscos cerevisiæ suæ, ante fermentationem iniiciant, & illa pro preservativo contra calculum utantur. *Lindanus* testis est, plurimos calculo laborantes, decoctione pisorum rubrorum, pulvere oniscorum mixta, calculo fuisse liberatos; & *Mynsicht* pulverem oniscorum cum Nitro purificato ad excitandam urinam mirifice facere docet. Conf. *Riverii Observ.* 89. Cent. IV. Ibi enim Vir in Medicina clarissimus ulcus aliquod eximium, interno pulveris oniscorum usu sanatum fuisse testatur.

Destillatione provenientium, salis volatilis scilicet gr. vj. ad xvj., spiritus vero gutt. xv. ad xxx. cum liquoribus adpropriatis, contra arthritidem & rheumatismos, ardore & febre immunes, commendantur. Satius autem ducimus; si onisci in substantia, dum fieri potest, adhibeantur, dummodo a dosi minima sensim exaugenda, medelæ initium capiatur. Illis enim, qui debilioris sunt corporis temperaturæ, respirationis difficultatem, ex acri & salina qualitate in oniscis prædominante, accessisse constat. Hinc usus eorum multum cautionis exigit, præsertim in his, qui pectore sunt debiliore, & Pthisis periculo obnoxii.

Quod ad exteriorem oniscorum usum adtinet, contusi cataplasmati instar, gutturi, pro angina, interdum melle commixti adplicantur. *Schroderus* est, qui oniscos viventes ulceribus phagædenicis adplicatos leniendi & sanandi facultate præditos esse docet. Imo oleum, cui infusi erant, pro linimento contra hemorrhoides commendat.

Rx. Radic. Lapathi silvestr.

Cichorii silvestr. ana ʒß.

Enulæ ʒj.

Bul. omnia addito frustulo carnis vervecinæ cum jß. septiariis aquæ fontis ad remanentiam jusculi unius. Circa finem coctionis, add.

Folior. Cichor. silv.

Nasturt. aquat. ana pugill. ß.

Ultimo autem cancror. fluviatil. aqua calida suffocatorum, & in mortario marmoreo contritorum num. ij., & oniscorum viventium, vino suffocatorum & contritorum num. xij. Expressione col. & f. jusculum præstantissimum pro lichenibus, strumis, & abdominis constipationibus, si qua pituita glareosa primas occupat vias.

Rx. Pulver. Oniscor. ʒj.

Terebinth. Veneti ʒß.

F. bolus, contra glaream renum atque vesicæ.

Rx. Extract. Fumaræ

Enulæ Campanæ ana gr. xx.

Antimon. diaphoret. non loti

Oniscor. p.

Gomm. ammoniac. ana gr. viij.

Tartar. vitriolat. gr. vj.

Mercur. dulc. gr. iij.

Subigantur cum f. q. syrupi cichor. cum rheobarbaro, & f. bolus contra strumas, ter per hebdomadem, cubitum ituro exhibendus.

Rx. Florum sulphur. ʒvj.

Spermat. cet. ʒij.

Pulver. oniscor.

Gommat. ammoniac. ana ʒjß.

Irid. Florent. ʒj.

Subig. cum f. q. mellis candidi, ut f. opiatum anti-asthmaticum, cujus, quantum nuci myristicæ respondet, cum pane oblato, mane, jejunus haurito.

Rx. Extract. Enul. Campan.

Absinthii

Croci Martis aperitiv. ana ʒij.

Pulv. Oniscor.

Gommat. ammon.

Mercur. dulc. ana ʒjß.

Ocul. cancr. p.

Antimon. diaphoret. illoti

Arcani duplicat. ana ʒj.

Salis absinthii

Tamarisci ana ʒij.

Subig. omnia cum f. q. syrupi pomor. comp. & f. opiata adtenuans, contra obstructions infimi ventris. Pro dosi veniant ʒiiij., mane jejunus stomacho, per xij. dies capiendi, cum vehiculo infusionis herbæ Veronicæ, decoctionis Cichor. silvestr. & jusculo carnis vitulini mixtæ.

P E D I C U L U S.

PLura sunt infecta, eaque vel dictu horrenda, quorum ictu & moribus homo excrucietur. Hæc inter eminent pulices, cimices & pediculi. Pediculorum vero tot fere species esse quot animalium varia, Physicorum observationibus constat. Alii enim sunt pediculi quadrupedum, alii avium, alii piscium. Avium pediculi apud omnes notissimi, hominibus non adhærent, experientia teste. Transeamus igitur variorum animalium pediculos, colore & magnitudine varios, quorum sanguinem mordendo exsugunt; nec nisi de illis agamus, qui in hominum corporibus reperiuntur.

Pediculus. Offic. Schrod. 345. Dal. 384. Aldrov. 542. Jonst. 89. Mouff. 259. Charlet. 52. Merr. 202. Svammerd. 169. Bonnann. 55. *Pediculus ordinarius*. Red. 18. *Pediculus humanus*. Linn. Faun. Suec. 1153. *Pediculi vulgati*, seu communes, qui nascuntur in homine; *Pediculus corporeus maculatus*; *Pedunculus vulgaris in capite*. Nonnull.

Pediculum, insectum illud ex familia vermium, præeunte Cel. Svammerdamio, in caput, ventrem & pectus distinguimus. Caput ejus ex parte anteriore oblongum, ex posteriore autem rotundum, pelle obtegitur dura, membranam referente, pellucida & pilis setosis obsita. In anteriore ejus extremitate adparet aculeus, plerumque reconditus. Ex utroque capitis latere progreditur antenna, eadem pelle qua caput, obtecta, & quinque articulationibus, pilos exiguos ostendentibus, composita; imo pellucida, & vasculis albis repleta. Post antennis obveniunt oculi nigridi, profilientes, nec ut insectorum oculi alias, divisionibus hexagonis obducti; rarioribus tamen pilis cincti. Collo brevissimo sustinetur caput. Et pectus collo unitum, in tres quasi partes divisum abit, quarum in medio inferius quoddam scutum adparet. Utrique lateri inferiores sunt seni pedes, pectori adhærentes, senis articulationibus inæqualibus constantes, pilis tenuissimis ornati, & pelluciditatis suæ ergo, transeunte die varia vasa albida ostendentes. Pedis cujusque extremitas duplici ungula, forcipem constituyente munitur, cujus ope capillos arripit, arreptisque mira celeritate obambulat pediculus. In centro articulationum illarum, quarum auxilio cum pectore pedes cohærent, brevissimum videbis canaliculum, albidum, & desinentem in parte quadam fulviore, per transversos ventris annulos conspicienda, & motu fortissimo agitata. Ex utroque autem latere canaliculi, duas alias particulas pellucas, præcedenti similes, & magnam pectoris partem intrantes observabis. Venter ipse in sex partes divisus, ex inferiore sua parte, in quadam cauda bifida desinit. Imo in medio ventre particula quædam albida, ceu punctum, pellucida, & motu descendente agitata occurrit; in marginibus ventris ubique villosi autem conspiciuntur corpuscula quædam diaphana & rubicunda, præter hæc etiam plurima vasa candida, diffusa, & per totum ventrem æque ac pectus obvia. Pellis autem, ventrem quæ tegit, ut apices digitorum in homine, exiguis ex tubulis contexta, est in marginibus solidior, pellucida ac membranæ instar, fortius compressa, cum strepitu diffilit.

Interiores pediculi partes disquisiturus, pellem ventris superiorem leviter findas, & profluet sanguis, quem si vitreo tubulo exceptum, ope Micro-

scopii lustrare velis, lactis vaccini instar, ex globulis transparentibus compositum reperies. Sic quoque sanguinem humanum ex globulis rubicundis, limpido liquori innatantibus constare, paucis abhinc annis, detectum est. Dubio foret locus, num sanguis, suis adhuc vasis detentus iisdem globulis constet, quos venam egressus commonstrat. Extra receptacula sua constitutus, & præsertim pars ejus rubra facilis globulorum accipit figuram. Hinc & ego, sic pergit Cel. *Swammerdam*, tubulum vitreum apertæ canis arteriæ intrusi, ac hujus ope sanguinem circulantem meo examini subjeci; ita enim, ratiocinio ab analogia petito, cum quodam certitudinis fundamento dijudicari posse censeo: num sanguis humanus, vasis adhuc detentus iisdem globulis constet, an minus. Hactenus dubitavi, etenim globulis minora vasa quædam in corpore detexi. Eadem quoque ratione, veram differentiam sanguinis venarum atque arteriarum inquirere possemus; hactenus enim non nisi in examine sanguinis venarum versatus sum, & in hoc saltem dictos globulos observavi. Neque vel sanguinem pediculi ex globulis istis compositum esse statuam; forsan adipis vel intestinorum læsorum particulæ quædam illi immixtæ sunt. Intestina autem ejus, quasi ex cumulo partium globosarum composita sunt.

Pro movendis vero annulis ventris plures muscoli sub pelle ejus reperiuntur; illorumque alii latiores, alii strictiores, alii breviores, alii autem longiores ab annulo ad annulum pertingentes. In margine ventris maxima adest copia musculorum; ibi etiam motus fortissimi, & tracheæ, seu vasa aëria, respirationi inservientia, ibidem sita sunt. Tracheæ ipsæ cum musculis adipi subjacent, ast nullum cordis vestigium in superiore ventris parte detexi; & quamvis industria summa quæsierim, cor in aliis insectis majoribus, ut in taone parvissimum, in pediculo adhuc minus reperire negatum fuit. Eo potius, quum ventriculus motu continuo agitato, cordis, si quod adest, intuitum impediat.

Frequentissimæ insuper sunt particulæ illæ quibus adipis nomen tribui, aliæ majores, & figura magis irregulari, aliæ minores & fere sphericæ. Juris coacti instar in omni pediculi parte, transparentes videntur.

Maximam interim hujus insecti partem constituunt trachearum ramificationes, quarum numerus eximior in capite, pectore, ventre, pedibus atque antennis occurrit. Tracheæ istæ adipis ope, hinc inde conglutinantur, ubi scilicet, luce corpus transeunte vascula albida adparent. Cujus quidem transparentiæ trachearum causam, in colore earum argenteo, & matri perlarum simili quæras. Vivens animal jucundissimum sane spectaculum exhibet. Imo corpori extractæ eundem semper colorem conservant; etenim numquam deprimuntur, sed structuræ suæ ergo hiantes remanent. Ex duplici materia autem constructæ sunt, partem alteram nimirum componunt annuli, cartilaginibus Tracheæ-arteriæ humanæ similes; hos annulos vero pluries circumvolutos, canalem quemdam hiantem componere vidimus microscopio adjuti, ast quum breviores sint ac in animalibus reliquis, paucioribus circumvolutionibus absolvuntur. Ubi autem Trachea-arteria in ramos dividitur, ibi annuli maximi, sequentes vero magnitudinis sensim decrefcentis. Altera pars trachearum membranosa, annulorum interstitiis interjacet, qui ope illius faciles incurvantur & complicantur, in primis dum ventriculus adeo multis tracheis circumdatus, hinc inde mirifico modo flecti.

nectitur. Nec aliud quoddam insectum novi, sic Cel. *Swammerdam*, cujus tracheæ, vel absque dissectione tam distincte innotescant. Summa sane cum admiratione & gaudio, situm & circulationem vasorum pulmonarium, in pediculo observabis; eaque Cel. *Hooke* in *Micrographia* sua elegantissime depinxit, quamvis non nisi per transversum animalis corpus transparentia viderit. Anatomia edoctus teneo, quod non solum in capite, pectore ac ventre, sed etiam in ovario, intestinis, medulla spinæ, cerebro, ac quibusvis partibus insecti interioribus conspiciantur. Hæc omnia non solum egometipse meis oculis, microscopii ope vidi, sed etiam cuilibet curioso exhibenda habeo, si quis est qui mirabilia creatoris cognoscere cupit.

Pediculo nec rostrum est, nec dentes, nec os cum gutture nexum, sed tantum proboscis, sive potius aculeus concavus & acutus, cujus ope cutim perforare & sanguinem pro nutrimento, exsugere valet. Ast tantæ idem ille aculeus est subtilitatis, ut vix, nisi casu quodam, reperiat. In apice capitis enim eminentiam obtusam observabis, quæ quum per medium sit excavata, intus convolvit fimbriam utramque, nec tamen corpus ipsum ingreditur. Ex hac eminentia igitur, egredientem nonnumquam videmus aculeum, ut jam protrusa jam recepta cochleæ cornua.

Oesophagus est canaliculus quidam tenuis, nec nisi eo tempore conspiciendus, quo sanguis aculei ope exantlatus ventriculum ingreditur. Ad hunc enim, tamquam filum tenue & diaphanum procurrere videtur. Maxima pars ventriculi in ventre, pars reliqua in pectore & dorso sita est. Sanguine turgens, per transversam pellem, fulvidissimi coloris esse videtur. Pars ventriculi quæ pectus occupat, bifidæ furcæ, ob binas suas appendices cæcales, similis videtur; ast pars in ventre sita præ primis notanda, sacculum oblongum refert, & alterna contractione & dilatatione continua jam huc jam illuc movetur. Ventriculus vacuus cum appendicibus, diaphana sunt & omni colore carent. Ille autem ex duabus tunicis constat, exteriori crassiore, interiori autem, ut in insectis omnibus, magis tenui. Tertiam quoque, & illam musculosam adesse censemus. Exterior innumeris obsita est tracheis, quarum rami majores satis conspiciendi veniunt; interior tenuissima; tertia tandem, quam utrique intermediam esse censeo, fibras ventriculi musculosas, dubio procul, complectitur, quarum ope singulares ventriculi motus perficiuntur.

In fundo ventriculi pylorem videbis, & quod illam excipit, intestinum tenue, similis structuræ quæ ventriculus, per intervalla dilatatum, fere ut S, Romanorum litera, contortum, & in fine quatuor alia vascula, rectiora quam in bombyce, satis longa, & eadem structura, qua intestina. Quæ quidem quatuor vasa sunt totidem cæca, in omnibus insectis obvia, & cum intestino tenui per anastomosis juncta. Succedit colon, quod dilatatio amplior sive cloaca, excrementis figuram concilians, excipit. Excrementa enim admodum irregularem, nec aliorum insectorum excrementis similem habent figuram. Huic dilatationi subjacet intestinum rectum, quod intra divisionem caudæ, anum exhibet in ventre. Sub ano tandem pellis quædam setosis pilis confita adparet.

Motum ventriculi & agitationem admirandum diximus; imo ille vehementioris suæ agitationis, contractionis, evolutionis & complicationis ergo, viscus animale in animali dici meretur. Illæ enim variæ ac multipli-

ces agitationes præsertim stomacho pleno, vel sanguine novo eum ingrediente, observari poterunt. Concludere hinc licet, quam varia & infueta ratione, tracheæ stomacho superjacentes adficientur, & quotuplici modo aer easdem transiens, comprimatur, agitetur, trudatur, depuretur, attenuetur & commutetur. Quos quidem motus varios præsertim in Pancrea observabis, hac enim ventriculo unitæ, omnibus ejus motibus ut obsequatur, adigitur. Motus vero alternis cessant & reiterantur, ac infinita ratione perficiuntur.

Pro exsugendo & ad stomachum deportando sanguine autem pediculus aculeo suo utitur. In primis scilicet prævio jejuni diei unius sive bidui, manui adfrictione rubefactæ illum imponas, & statim alimenta quærentem videbis. Videbis, qua ratione caput suum binis pedibus primis interpositum deprimet, & porum aliquem quæret, quem si invenerit, aculeum intrudet; ac sanguinem mira cum celeritate adscendentem ac caput explentem, microscopio adjutus videbis. Exinde sanguis per jugulum ad Oesophagum adscendit, tum ventriculum intrat; ille autem cum appendicibus, quas bisulcas esse diximus, eodem repletur. Statim ventriculi motus exaugentur, & partes ejus musculosæ distentæ, iterum contrahuntur; excrementa in intestinis amplioribus residua eodem motu adficiuntur, imo momento sæpius redduntur a pediculo. Alimentum stomacho receptum mille modis agitur, ima summis obvertuntur, & contractionis ac dilatationis violentia, tamquam cribro transmittitur. Et primo quidem intuitu sanguis ventriculi, mediantibus variis vasis, per reliquum corpus distributum videtur; at causa in pelle jam magis, jam minus pellucida, imo sanguine versicolore quærenda est. Paucis exinde horis obscuriorem colorem nutrimento accedere, imo segnius idem consumi videbis; intestina excrementis sensim dilatantur, hæcque nonnumquam in globulos dividuntur, siquidem intestina excrementis transeuntibus per intervalla comprimuntur, sicque excrementa haud uno impetu ejaculantur.

Transeamus musculos movendo capiti & pedibus venientes; & medullam spinalem, ex tribus gangliis notabilioribus compositam; & nervos exinde proficiscentes, tum musculis pedum ac viscerum quorumvis communicantes, vitam motum sensumque adportantes; & cerebrum duræ matri involutum; & nervos opticos, similia, detectu ærumnosiora, non dicam, impossibilia.

Nec sexus differentiam in pediculis distinguere licuit. Sæpius quidem alios conscendere vidialios, sed dissectione facta verum detegere nequivi. Quadraginta circiter dissecai, & omnibus ovarium aliquod inesse observavi, hinc & pediculos, cochlearum instar, pro hermaphroditis habui. Ovarium per omnem ventris capacitatem extenditur, & exitum, ab exitu intestinorum diversum ostendit. Appendices oviductus sunt tamquam tubuli bini, in unum punctum denique coeuntes. Ipse oviductus ova tam perfecta, quam imperfecta continet, & decem majora cum 44. minoribus in uno oviductu numeravi. Quidquod in utero ovum perfectum, & egressui proximum reperi. Duplex vero est cujusvis pediculi ovarium, & pars ejus quævis in quinos oviductus subdividitur, qui omnes canali communi inferuntur; tum uterus, ubi ultimus perfectionis gradus ovo accedit. Uterum sequitur sacculus glutine plenus, & utero insertus, gluten vero con-

glutinandis successive egredientibus cedit ovis. Ova ista tam arcte coherent oviductibus, ut ne quidem ab hisce diversa videantur; nec nisi summo cum labore separari possint, siquidem sacculi adipei plures exinde abeuntes, visum disturbant. Hinc oviductus ejusdem, qua ventriculus & intestina structuræ, quamvis teniores esse cognovi.

Pellis structura adtentione dignissima est, & membranæ diaphanæ similis. Hinc inde enim canaliculis, quales digitorum nostrorum apices tegunt, contexta est, quos si fortiori microscopio disquiras, totidem divisiones vasorum pulmonarium esse cognosces. In aliis vero locis, ut in marginibus ventris, aliam esse cognosces pellis structuram.

Subnectit tandem auctor clarissimus, cui anatomicam pediculi descriptionem debemus, quod ova pediculorum non sint, nisi lentes Latinis, *lentes* Gallis dictæ.

Lens igitur seu ovulum ipse est pediculus, qui membranam suam, humore superfluo evaporato statim egreditur, extemplo autem ad generandum aptus est. Hinc etiam alii per jocum dicere solent, tantam esse pediculi fecunditatem, ut 24. horarum spatio proavus fieri possit. Brevissimo equidem tempore in prodigiosam quantitatem multiplicantur, ast humido & calido loco ova detineantur, necesse est, alias enim pereunt. Hinc quoque qui per noctem in capillis calidioribus nati fuerunt, postridie aëri refrigerato expositi moriuntur, imo si per aliquot menses capillis adglutinati remanserint, omnem denique formam exterioram amittunt.

Quascumque corporis humani partes, in primis vero infantum capita pro nido sibi eligunt pediculi, & frequentissimi sunt in vestibis mendicorum, nautarum, militum, sordide & squalide incedentium. Cutim enim perforando sanguinem exsugunt, hinc sæpius pustulæ, in scabiem & tinea interdu degeneratinges. Cel. *Linnaeus* maximos, quos vidit, pediculos in cavernis calidis fodinæ Faluhniensis, in Dalecarlia, Sueciæ provincia reperit. Imo pediculos indumentorum & capillorum varietate saltem, nec specie differre addit.

Sæpius etiam homines Pthiriasi, seu morbo pediculari adfectos esse novimus, id est, morbo quodam lethali, ex innumera pediculorum in carne enatorum & corpus totum plagis (ad ossa penetrantibus) fauciantium copia exorto. Plures recenset *Aldrovandus*, qui poenam criminum luendo, a pediculorum millibus, historia teste, devorati fuerunt; ut Herodes, Antiochus Epiphanes, Alcmann Poeta, Pherecydes, Cassander, Callisthenes, Sylla. Et teste Scriptura S. pediculorum copia tertium fuit Ægypti flagellum; quos Magi frustra imitaturi, Dei digito productos esse confitebantur. *Franciscus Paullini D.* refert in *Ephem. Germ. Dec. II. Anni IV. Append. pag. 22.*, se ipsum quondam, in quodam Vestphaliæ pago, gregis porcini pastorem vidisse, qui vestibis sepositis, ad dumetum residens, magno cum ejulatu caput & corpus unguibus perarabat. Causam ejulatus quærenti ille respondebat, sic pergit Auctor: en quantum agmen animalium caput obvolitat. Tum ego accedens, quædam ex istis, quamvis acerrimo morfu sanguinem ex manibus meis provocarent, cepi, disquisivi, & pediculos nigros, sex pedibus instructos, alatos, magnitudine pediculis porcorum communibus similes, & volitando susurrum edentes esse observavi. Hos ex grege porcorum proficisci edocebar, & porcos hosce in fossa lutosa, pro

more suo se obvolvunt, ejusmodi agmen secum deportare. Ibi millia eorum & ego reperi, nec ex rusticis elicere potui, numquottanniseodem tempore, scilicet exeunte Julio redirent. Quo referantur ea, quæ de Acridophagis, seu locustas comedentibus refert *Diodorus Siculus*, scilicet, quod senescentes, pediculis alatis & adspectu horrendis infestari solent, qui primo quidem ventrem, tum pedes, denique corpus devorant.

Quam vile interim atque horrendum insectum videatur pediculus, varii sunt, qui illos pro delitiis habent, ac dentibus, tamquam delectationis ergo, conterunt. His ex animalibus adnumeres simias, ex hominibus autem Tartariam & Caput Bonæ Spei colentes, quos *Pthiophages*, ex Græco, *Ptheir*, pediculus, dicunt. En, quæ in *Ephem. Germ. Dec. II. Anni VI. pag. 355. a Cel. Gabriele Claudero, D.* relata leguntur, de homine quodam, pediculos vivos avidissime devorante. Diu est, ex quo tempore mundum opinione regi ac sustentari dicunt, & fane, vix maximi libri moles describendis sufficeret humanæ imaginationis fœtib, & gustibus depravatis. Sexcenta adferre possemus. Sed sequens documentum æque rarum ac nauseam movens sufficiat: Homo quidam, sexaginta annorum, furente novissimo Germaniæ bello natus, parentes habuit rusticos, qui militum omnia prædantium sævitiam evitaturi in silvis latitabant, & miserrimam vivebant vitam. Hanc ille defunctis parentibus continuavit, & maximam vitæ partem in remotissima silvæ obscuritate peregit, nonnunquam vero & villam hominumque societatem intravit. Sic sensim deposito rationis usu, ferinæ melancholiæ signa edidit, imo pediculos, deliciarum instar, dentibus contrivit, nec consiliis aliorum nec admonitionibus obtemperans. Res ad præfectum regionis delata est, qui blanditiis eum accerferi, & lautius pasci jussit, quo fero animo seposito, vel animæ nulla religione imbutæ consuleretur. Paucis autem exinde diebus, hujus vivendi rationis pertæsus, de novo fuga silvam petiit. Hunc ipse ego pediculos pro deliciis, ut nosturdos, lepores seu ostreas, devorasse vidi. Facilis scilicet deglutitu cibus est, nec ossibus nec spinis repletus; ast inhorrescit natura, dum hominem, viventia corporis sui excrementa comedere videt. Tanta vis est consuetudinis, quæ sensim natura evadit. Rariora tamen gustus depravati exempla in viris, quam in fœminis reperiuntur.

Varii sunt, qui a pediculis sibi cauturo suadent, ut alimenta comedat, probum succum & salutarem præbentia, ut salutaribus utatur potionibus, ut corpus, præsertim lana indutum a squalore & fordibus custodiat. Morbo ipso ut medeatur, *Hieronymus Mercurialis*, frequentiore purgationem, pro præstantissimo medio commendat. Obstinator autem esse solet morbus, mediaque tam externa quam interna spernit. Hæc inter eminent alium, sinapis, theriaca, cornu cervi, alimenta falsa, acida, acria & acerbata; illis adnumerentur fœtus, balnea aquæ dulcis, marinæ etiam magis deterisivæ quam dulcis, decoctio lupini, succus betæ, pulvis pyrethri & nucis gallæ mixtus; acetum aquæ marinæ mixtum; lixivium ex cinere stechas confecta pro capite lavando; sandaraca calci & oleo commixta, sexcenta alia linimenta, unguenta, cataplasmata. Pro enecandis pediculis optima sunt: semen staphidis agriæ, coccus Orientalis, sulphur, radix lappathi silvestris & Enulæ campanæ, Nicotiana, Mercurius, Cinnabaris, Aë viride & acetum scylliticum. Teste *Mappo in Historia plantarum Alsatiæ*, pulvis grano-

granorum apii palustris cubitum ituri capiti adpersus omnes pediculos profligare valet, si mitra strictius caput coerceatur, etenim in vanum quæsito quo effugerent loco, postridie mortui mitræ inhærebunt.

Nomina Gallica: *Pou*, *Pouil*, seu *Poul* Latino: pediculus, originem debent. Dicitur & *Pedunculus*, *Pedis* seu *Pedes*, *Pes*, *Sexcupes*, *Vermis*, seu *Serpens Sextipes*, quia pluribus pedibus gaudet.

Cæterum multum salis volatilis oleique continet pediculus. Quem, dum parciore usus arti Medicæ subministrat, non nisi brevissimis pertractabimus. Nec tamen Medicos proprietatem ejus disquisitionem neglexisse credas, etenim vel ærumnosissimum quemvis laborem sollicita eorum cura circa hominum salutem, superavit. Nos igitur causam infrequentioris pediculorum usus in nausea & averfatione ægrotantium quærendam esse ducimus. Medicinam pedicularem exerciturus Africam adeat, ibi enim illi studiosius conquiruntur, & pro delitiis incolarum veniunt. Voluptatis generi cedit nigris, Africæ oras Occidentales inhabitantibus, si suæ mulieres pediculos collectos ipsis offerunt, quos dentibus conterere solent. Hos igitur ad subeunda quævis experimenta paratissimos fore censemus; ast quum a suo gustu noster sit diversissimus, ea tantum subnectamus, quæ de qualitatibus pediculorum hætenus comperta habemus.

Hos enim non solum pro pallore faciei, sed quoque pro febre profliganda, & ubi vis eorum aperitiva usibus cedere potest, adhibent. Quinos enim, fenos, plures paucioresve, sub initium paroxysmi deglutiat ægrotans. Forfan & nausea illa, sic Cel. *Lemery*, qua febricitans eosdem accipiendo adficitur, plus confert ad expellendam febrim, quam remedium. Contra icterum totidem mane, a jejuno, cum ovo sorbili, tribus subsequenti vicibus, ac interjecto aliquot dierum spatio, recipiuntur.

Quod tandem ad exteriorem pediculorum usum adtinet, pro suppressione urinæ in recentibus natis, vivum pediculum urethræ immittere solent, qui canalis titillatione sphincterem relaxat, quo urinæ pateat effluvium. Eidem usui & cimices inservire supra dictum est, sed pediculus ille minor, facilior infantum urethræ introducitur. Testibus tandem *Ephem. Germ. Dec. II. Anni IV. Append. pag. 197.* homo quidam magno capitis tumore, pus tenax & ichorosum stillante, infestabatur. Hic igitur consilio aliorum obtemperans, vivos pediculos eidem imposuit, ac ne abire possent, faculo tumorem circumdedit; aliquamdiu morsus pediculorum pertulit, tandem vero omne tumoris pus probe a pediculis exsuctum, nec ullum ejus vestigium relictum est.

S C A R A B Œ U S.

CLassi scarabæorum vastissimæ & genera plura, & innumerabiles fere eorum species adnumerantur. Ars Medica autem quatuor tantum hujus agminis species diversas suis usibus accommodat, scilicet: scarabæum cornutum, scarabæum stridulum, scarabæum pilularem & proscarabæum.

Scarabæus cornutus. Offic. Schrod. 345. Dal. 389. Vvorm. 242. Hermann. 519. *Scarabæus major cornutus*. Mouff. 148. Jonst. 67. *Cervus volans*. Aldrov. 457. Charlet. 46. *Scarabæus Cervus volans dictus*, Merr. 201. *Taurus volans*. Geoffroy. Tom. III. Pars I.

Olear. 27. *Scarabæus maximus platyceros*, *Taurus volans*. Raii Insect. 74. *Scarabæus cornibus duobus mobilibus æqualibus*, apice bifurcis, introsum ramo denticulisque instructis. Linn. Faun. Suec. 337. *Scarabelaphus seu Scarabæus Cervus*, *Lucanus seu Cervus volatilis*, *Scarabæus bicornis seu Corniger*, *Hippocantharus*, *Bos lignivorus*. Quorumd.

Scarabæum huncce, ut cum Scarabæo Nasicorni, quem & Unicornem, Licornem vel Rhinocerontem dicunt, confundas, probe caveto. Ille enim omnium nostratum maximus, & 5. ad 6. digitorum longus est. Dividitur in caput, pectus & ventrem. Caput ejus quadratum, pectore latius, durissimum, & in anterioribus pariter ac posterioribus oris angulare, anterius exhibet duo cornua rubra, lævia, vitri instar splendentia, longa, æqualia, mobilia, in ramos abeuntia, dentata, & in extremitate bifida, ramusculo quodam in medio, & intus supra & infra ramusculum istum dentata, per dimidiam partem anteriorem depressa, & tamquam crura cancrorum, ad retinenda obvia quævis, ope musculi fibrosi & albidii constringenda. His cornibus intermedium adparet os magnum, ex quo quatuor progrediuntur plumæ flavescentes, earumque binæ superiores ac longiores, linguam seu proboscidem constituunt. Ex utraque oris parte, barba nigra quatuor articulationum & longior, & plumis superioribus vicinior; imo altera inferioribus vicina & brevior, & quatuor ex articulationibus composita est. Maxilla inferior hederæ folium æquiparat. In basi cornuum & super oculis duæ antennæ, ut gagates nigrae, longæ, complicandæ, & in extremitate senis nodis seu juncturis compositæ, nec nisi ex altero latere tantum in quatuor fimbrias exeuntes, (quarum erga duplicem cristam referre videntur) conspiciuntur. Bini oculi tandem ex latere cornuum siti, rotundi sunt, parvi, nigri seu potius fulvo-nigricantes, nitidi, proilientes, convexi & æquales.

Pectus vero quadratum altera ex parte capiti, ex altera jungitur ventri, mediantibus musculis flavidis, & crusta tegitur dura. Huic inferius adhæret par primum ex cruribus, reliquis crassius longiusque, cujus lumbi quadam plumarum flavidarum specie obteguntur; crus proprie sic dictum, ex posteriore sua parte, ferræ instar dentatum; & pedum extremitas, sive pes proprie dictus, quatuor nodis seu articulationibus constat, & in binos aduncos, spinamque brevioris illis intermediam definit; hinc quasi tridentem efformat.

Ventrem denique componunt sex annuli longitudine sensim decrescen-tes, quorum primo tetragono & maximo par crurum secundum, secundo item annulo par crurum tertium adhæret. In dorso autem veræ alæ spuriiis subjacent, sive duabus vaginis, duris, crustaceis, fulvo-nigridis, longitudine sibi corporique æqualibus, & ex medio pectore exorientibus. Alæ autem latæ, ac nervis rubicundis atque fortissimis sustentæ subtus complicantur.

Venter insuper & pectus non solum carnem fibrosam, sed quoque plures tracheas seu vasa pulmonaria, mirum in modum constructa continet. Oesophagus transiens per medium pectus, ventriculus insuper & intestina, simplici canali recta proficiscuntur ad anum, ac flavescente succo abundant, siquidem succus vitrioli, ex ilice, tilia, aliisque arboribus haustus animalis nutrimento venit. Pars mari propria quatuor foliis exiguis involuta, si ventris extremitatem comprimas, cuspidem egredietur.

Viro Clar. Joanni de Muralto debemus anatomiam Scarabæi cornuti, maris ac foemellæ, in *Ephem. Germ.* obviam. Hic igitur foemellæ corpus nigrum & granulis oblitum esse docet; caput ejus magis rotundum, & duæ cornua cuspidata, fortissima, tribusque ramusculis munita; duas præter ea barbas, earumque anteriorem ac longiorem ternis articulationibus compositam; duas linguas plumeas, flavidas & ex ore procedentes; antennas senis ex nodis conflatas, quarum extremitas pluma quadam, quatuor foliorum sese complicantium ornatur; oculos profilientes, oblongos, ut gaggates splendentes; os infra supraque scuto ex foliis composito munitum; alas sub vaginis structura singularibus reconditas, quarum nervus præcipuus striatus, & tamquam sulcatus adparet; sex pedes, quorum bini primi scuto thoracis, articulatione coherent, sequentes vero ventri, ut in mafculo; carnem denique fibrosam, ossi pectoris quadrangulâ artificiosè subordinatam, & innumeris tracheis vesiculisque pulmonaribus intertextam, quarum auxilio venter agitât alas, animal conservat vitam. Cordis ne vestigium quidem hucusque observare licuit, aut ovarium in ventre absconditum, ac ovis fere viginti, turgescens, pallidis & viscido liquore plenis præditum, deteximus.

Nec quidquam eorum quæ in Scarabæo cornuto observavit Cel. *Svammerdam*, adeo mirabile ipsi visum, quam proboscis illa seu lingula, quæ pro instrumento ad accipiendâ nutrimenta utitur; hæc vero humore quodam, ex ilice destillante & mellis substantiæ accedente absolvuntur. Admirandas dicit Auctor Cel. & insecti alas, singulari ratione complicatas & sub crustis suis reconditas. Imo in extremitate alarum juncturas quasdam, & musculos exiguos illas moventes reperiri docet; hinc quoque ex alis insecti læsis humiditatis quidquam effluere videbis; quod in alis substantiæ membranosæ integris nunquam observare poteris.

Nec, ut quidam volunt, scarabæorum cornutorum plurimi ex ligno arido & a vermibus in pulverem redacti nascuntur, sed quilibet coitui suam debet originem. Nec, quamvis tauri volantis nomen gerat, cornibus suis tauri instar, ictus infligit, iis saltem aggredientem corripit, stringit; hinc quoque Germanorum idiomate: *vellicans vermis* audit. Quamcumque corporis sui partem tetigeris, ille statim erectus, suo se hosti obvertit, cornua pro defensione exhibet; & si forsan digitum apicibus cornuum, forcipis instar dispositorum, arripiat, eum constringendo vel sanguinem interdolores eliciet. Majo mense præsertim & æstate in silvis iliceis frequens est. Per diem vero sub lapide, vel radice, vel arboris trunco delitescit, recesso sole egreditur, avolat. Volans etiam corporis situm perpendicularem conservat; vaginæ, alarum opercula apertæ, alarum agitationi patient, subveniunt, nec durante volatu, ullo motu moventur. Volatu haud adeo elevato, ac lentiore potius quam rapido incedit. Imo si a trunco caput separaveris, diutissimam vitam pars utraque conservat, caput tamen diutiorē, quidquod vel diebus aliquot elapsis, tangentem digitum fauciat. Multum ei virium inesse constat, & pyxidi inclusus strepitum atque susurrum majorem edet, quam ab animali tam exiguo sperares; pro deficientibus autem viribus & nutrimento, sensim debilior evadit susurrus.

Nomina ejus, Latinum scilicet: *Cervus volans*, Italicum: *Cervo volante*, & Gallicum: *Cerf-volant*, a cornubus ejus ramosis, & cervina quodammodo

referentibus derivantur. Generico etiam nomine Latino: *Scarabæus*, Gallicum: *Escarbot*, seu *Scarabée* originem debet.

Multum ipsi inest salis volatilis & olei. Omnes enim, quotquot sunt, scarabæi, & externi & interni eorum usus ratione, pluris habent ex natura Cantharidum. Quæ quum sale volatili caustico abundant, & sui virtutis ergo externe vesicas, interne autem urinam provocent: eandem, sed mitiorem virtutem & scarabæis inesse scito, hinc nec tanta cautione opus esse usum eorum instituenti. Diuretica virtute instructus scarabæus cornutus, contra illos exhibeatur morbos, ubi ferositates expurgandæ erunt, ut contra hydropem, rheumatismos, arthritidem atque nephritim. Quod si casu in meatibus urinariis causa irritationis evaderet: ad emulsiones recurrendum. In pulverem redactus, dosi gr. jv. ad gr. viij., cum aquæ parietariæ vel saxifragæ ℥iij. vel ℥jv. exhibeatur. Optimus vero modus pulverem huncce præparandi ex sententia Cel. *Hartmann* sequens est: dum scilicet Scarabæos cornutos vasi fictili probe obturato immittis, tum soli ut exarescant, exponis, tandem vero in pulverem reducis. Nec non contusi & parti læsæ adplicati, seu in unguento convenienti satis bene cocti ad leniendos nervorum dolores, & convulsiones commendantur. Sic teste *Schrodero*, oleum infusione ex illis receptum & auri instillatum, dolores aurium ac surditatem profligat. Imo docente *Etimullero*, oleum Scarabæi & Scorpionis mixtum ad sanandam infantum epilepsiam, & ad facilitandum partum confert. Sunt, qui ad profligandam febrim quartanam Scarabæum vivum ex collo, amuleti instar, suspensum facere volunt. Alii ad corroborandam in infantibus virtutem retinendi urinam cornua Scarabæi collo eorum adpendunt; nos tamen amuletorum efficaciam prorsus reiicimus, vel si qua forsan adesse videtur, illam ægrotantis imaginationi potius, quam virtuti singulari amuletorum in morbum agenti, tribuimus.

Scarabæus stridulus. Offic. *Scarabæus arboræus* Jonst. 70. Charlet. 46. *Scarabæus arboreus vulgaris*. Mouff. 160. *Scarabæus maximus rufus*, vropygio deorsum inflexo. List. 379. *Scarabæus arboreus major Castaneus*. Petiv. 29. *Scarabæus arboreus vulgaris major*. Raii Insect. 104. *Molitor*. Leuvenh. 14. *Scarabæus Majalis foliaceus*. Joh. de Muralt. Germ. Ephem. Dec. II. Ann. I. pag. 48. *Scarabæus testaceus*, thorace villosa, abdominis incisuris lateralibus albis, cauda inflexa. Linn. Faun. Suec. 345. *Scarabæus strepitans*. Nonnull.

Scarabæus stridulus, rubro-obscurus seu colore castaneus, longitudine suæ fabam, crassitudine pollicem exæquat; & caput scuto latiore munitum, barba ornatum, ac binis cornibus sive antennis in fine cristatis, pectinis instar exeuntibus, & quatuor nodos sive juncturas complectentibus instructum habet. Barba e contrario quinis constat juncturis, quarum ultima oblonga in cuspide convexa terminatur. Caput & os antèrius villosa sunt, illudque sub scutum pectoris recipi potest, & ad oculos usque speculi nitorem exhibet. Oculi convexi parvissimis constant speculis rhomboidibus. Et collum splendente crusta obtectum, sub pectus recipitur. Annulum pectoris nigrum masculus, rubicundum foemella, uterque asperum & in marginibus villosum exhibet. Sub annulo autem seu in origine alarum alia adhuc particula nigra, triangularis, nitens atque villosa adparet. Ex latere utrovis duæ sunt alæ, quarum inferior, membranosa & complicata quinis sustinetur nervis obscuro-fulvis. Alæ superiores seu spuriae, id est vagi-

vaginæ verarum, crustaceæ, duræ, fulvæ, diaphanæ, læves & senis lineis seu sulcis ornatae, in dorso, ex annulis novem & margine albo instructis composito, ordine dispositæ eum obtegunt. Uropygium definit in cuspidem deorsum inflexam. Ventrem constituunt septem plicaturæ seu annuli contigui, & cujuscvis segmenti margo uterque lineola alba notatur. Sex eisdem sunt crura hirsuta, ac spinis tamquam aduncis confita, quorum anteriora breviora & parciore carne instructa, posteriora autem musculosa sunt ac fortiora. Ori ipsi venit foramen rotundum ad œsophagum conducent, ac labro duro obtusoque reductum. In pectore autem quædam particulae carnosæ, porosæ, conglobatæ, & rubicundæ adparent, quas pulmones credimus; per medium descendit œsophagus nigrus, & huic superius cor, tamquam punctulum rubicundum videbis. Uterus foemellæ dua cornua, ac duodecim ova sibi adhærentia ostendit. Intestina tandem mirum in modum contorta tracheisque aerem ad viscera deportantibus, intertexta sunt, stomachus vero mediis intestinis interjacet.

Cave interim confundas scarabæum, de quo sermo est, cum alio quodam illi simillimo sed minore, magis villosa, flavido-cinereo, tribus lineis per longum ductis distincto, & satis apud omnes cognito, quem æstate vespertino tempore terram agminatim egredi, & vel incedentium gressus impedire novimus.

Scarabæus stridulus noster enim tempore æstivo, & in primis Majo, Junioque mensibus in arbutis reperitur, recentibus foliis ilicis, fagi & præsertim nucis adhæret, folia floresque corrodit, imo plures sæpius in arbore scarabæos, quam folia numerabis. His igitur duos per menses inhærent, quibus peractis terram petunt, eandem ad 3. pedum profunditatem perfodiunt, ac nutrimento ac motu omni abstinentes, singulis, per 9. menses eadem delitescunt. Quiete autem peracta reviviscunt, vigorem recipiunt. Sic varios per annos vitam conservant; coitum, more cantharidum in ramis arborum celebrant, ex quo foecundatæ foemellæ sua ova fimetis aliisve locis similibus recondunt. Teste Joanne Goedart, Viro & in observando adcuratissimo, & in designandi arte peritissimo, ova ista (sic vult in *historia insectorum* naturali) origini cedunt vermium speciei a rusticis, leguminum vermes, dictæ; hi vermes in hortis, viretis ac agris frequentissimi fructuum radices corrodingo haud mediocriter damnum adferunt; albi esse solent, crassi, ac pluribus fortissimisque dentibus muniti; debitam in magnitudinem quum vermes isti excreverint, arida loca & elevata petere solent, ut arboreta vel margines terrarum aratarum; ibi enim deposita sensim sua figura in scarabæos, ut erucæ in papiliones transmutantur. Id quod quarto demum anno fieri solet. Ex eodem Vir. Clar. edocemur, scarabæos hosce Batavorum idiomate: molitores audire, siquidem omnia recentis cerasi, mali Persici, similium folia tenera, tamquam in farinam comminuere solent vel molere. Pueri nostri eadem denominatione illos donavere. Æstate enim delectationi suæ scarabæi veniunt, dum illos ex filo longiori suspensos in gyrum celeriter circumagunt, ope frustuli chartæ tamquam lingula complicatæ, acui lumbos scarabæi transeunti connexæ, & calamo seu bacillo quodam læviori subdito. Anteferunt vero hos, quos corporis albidum & quasi farina conspersi vident, & molitores adpellant, reliquis, qui ob colorem corporis rubicundum seu sinapi similem: *Montardiers* a Gallis nuncupantur.

Pro extirpandis igitur scarabæis stridulis, teste *nova domo rustica*, nil superest, nisi, ut ramos quibus insident, scia reseces & hac ratione depromtos scarabæos contundas. Quod si ab undecima matutina ad secundam pomeridianam fiat, caloris vehementia sopitos eo facilius captare poteris. Hyemis tempore recentiorum arborum ac leguminum radices corrodere dicuntur, hinc ingruente hyeme solum ad radices subigendum, & quidquid vel vermium vel scarabæorum reperieris, omni cum studio extirpandum; quidquid vero radices corrodere coeperint, amputandum esto. Ab arboribus arcentur, si terram stercore bovino oppleveris, vel cratibus vetustis vel cornu cervino. Pæoniam fugere dicuntur, quam ob causam & hanc in vineis plantandam esse volunt. Sic scarabæi, quos: *Tures* seu *Matis* dicunt, quosque Pictavienses: *Hannetons* adpellant, profligantur, etenim & hi denique in scarabæos stridulos volantes abeunt. Hi in primis arborum radices corrodunt, suam sibi viam inter truncum arboris ac corticem sternunt, & nec leguminibus nec altissimis arboribus parcent. Nec superest, nisi hoc, ut terram frequentissime suffodiendo subigas, arboremque expurges vel cortices exuas eo usque quo scarabæos sub eodem delitescerent reperieris, eosque vel protrahas, vel quomodocumque fieri potest, eneces. Hinc etiam copiosior scarabæorum proventus fructuum ubertatis nuntius haberi solet, siquidem minor quantitas hostium radicibus infesta, sub terra latet. Vulgaris est Normannorum sententia, tertium quemvis annum, ab illis: *annum scarabæorum stridulorum* nuncupatum eximia eorum copia abundare.

En, quæ teste *Diario exotico* circa historiam Scarabæi striduli, Vir Clar. *Augustus Joannes Roessel*, Pictor Norimbergensis, in *amœnitatibus Physicis de insectis*, scribit.

Vix est, qui nesciat inter nostrates, quis sit scarabæus stridulus Majalis, ad tamen circa ejus ortum, propagationem, modum crescendi & metamorphosin, parum certi habemus. Vix observatum est, alio anno eum colli laminam rubram, alio nigram exhibere. Annus ipsi propitius arboribus fructiferis, imo illicibus infestissimus est, omnia enim folia & flores omnes depascitur. Hinc arbores adeo denudatæ vel prorsus exarescunt, vel proximo anno non nisi serius gemmas suas producant. Elapsis denique mensibus duobus, prorsus evanescere constat scarabæos, vel quia terminus suæ vitæ exspiraverit, vel alia animalia eos devorando citiorem illis mortem adtulerint. Hæc omnia num observata sint, nescio. Observata esse novi sequentia: Ova deponunt, ex quibus vermes efformantur, qui quartum post annum in Scarabæos transmutantur; & prædici potest, num annus subsequens iisdem fertilior an sterilior futurus erit, & quam corporis laminam induti fuerint. En quæ de illis observavi:

Duæ sunt eorum species, alterutra secundo quovis anno adparet. Nec tantum ex colore laminæ jam nigro, jam rubicundo alias sibi simillimi distinguuntur, sed etiam ex cuspide recurvato, corpore terminante, illa enim in scarabæis laminæ rubræ brevior, in scarabæis laminæ nigræ autem longior fortiorque est, imo horum aliqui & in pedibus laminæ colorem gerunt.

Facilis tamen sexus in utroque genere distinguitur; etenim vel pueris notum, quod quæ in extremitate antennarum obveniunt fimbriæ, si longiores fuerint, marem, si breviores autem, foemellam denotent. Minor tamen crista illa fimbriata est in scarabæo quiescente, ac volante; etenim

vel volatui sese accingens eandem explicat. Antennæ super oculos nigros reflectuntur. Et in inferiore oris parte duæ aliæ antennæ exiguæ & cuspidatæ adparent. Præsertim vero maculis illis lateralibus, triangularibus, & albis, quas Majo mense in ventre ejus observare poteris, ab omnibus reliquis satis superque distinguitur.

Insectorum more, in parte corporis posteriore, ex utroque segmenti latere sita conspiciuntur in scarabæo stridulo foraminula respirationi infervientia; præter hæc autem bina alia sub lamina colli, pilisque frequentibus corpus suum obtegentibus reperiuntur. Quiescente scarabæo omnia foraminula alarum vaginis teguntur. Bini pedes anteriores a quatuor reliquis non solum brevitate sua, sed etiam eo distinguuntur, quod mediam sui partem fortiolem & latiolem, hujusque marginem acutum ac binistribusve cuspidibus munitum habeant. Qui quum ita sint conformati, terram quam dura sit, facilis scarabæus suffodit; quatuor pedes reliqui inter se simillimi sunt. In extremitate inferiore partis mediæ & flexilis, cuspides duæ acutissimæ adparent, ac his vicina incipit pars inferior subtilissimaque pedis, totus qui quatuor vel quinque segmentis constat, & in binos exit aduncos, quorum ope rectum se tenet in superficie verticali scarabæus. Spatium denique pedibus dextris atque sinistris interjacens, pluribus pilis flavo-cinereis tegitur, his similes sed breviores caput operiunt, imo Microscopio adjutus aliquos & in superficie vaginæ alarum reperies, qui nudo oculo pulvisculus videbantur.

Coitum celebrantes scarabæi striduli longissime inter se nexi remanent. Fœcundata fœmella terra foveam $\frac{1}{2}$ pedis altam effodit, ibi sua ova recondit. Hæ colorem flavo-diaphanum ostendunt, ordine disposita sunt, nec ut quidam censent, terræ globulis obvolvuntur. Onere suo deposito fœmella iterum egrediens, per aliquod tempus ex foliis arborum vivit. Utrum non nisi semel, an pluries per annum coeant, pluriesque ova reponant, indagari hæcenus non licuit. Interim non nisi unum in anno coitum celebrari ab illis duco. En quo mea experimenta redeunt. Plures scarabæorum istorum, coitu peracto, vitris majoribus & ad dimidium cæspitibus expletis indidi. Vix 15. dies transierant, & vitrorum alia multis eorum ovis jam plena conspexi; reliqua, ne quidpiam eorum periret, non tetigi, in cellam deportavi.

Exeunte æstate ovorum vice vermiculos reperi. Et cæspiti flaccescenti recentem substitui, aeri exposui vitra. Durante autumno multum incrementi vermibus accessit; circa initium hyemis iterum in cellam ablegavi, vere ineunte, mense Majo peracto, vermes jam annum agentes ex cella evocavi. Adquisitarum virium quantitas, quovis triduo biduove recentem cæspitem postulabat. Jam nec hi desiderio vermium sufficiebant. Tunc pisca, lentes, lactucam, similia, pluribus vasis terræ plenis inspersi, & propullantibus herbis vermes iis commisi, quos radicibus plantarum recentibus nutriri constabat. Hac vitæ ratione continuata secundum cœperant annum, quo quidem tempore exhibebant figuram, *vermium alborum* ab hortulanis dictorum, & plantarum radices corrodentium figuræ similem. Tum quo certior evaderem, num vermes hi scarabæorum veri sint vermes albi, maximos illorum selegi, quo si quam destinatam sibi haberent in scarabæos transformationem, citissime eodem transirent. Hos igitur conservavi,

quo

quo destinatum suæ metamorphoseos tempus, & spatium scarabæi reptui nec volatui datum eo potius cognoscerem. Ast plures eorum peribant, reliqui totum annum tertium absque transformatione degebant, eximio-rem vero crassitudinem consequabantur.

En notabiliorem ætatis suæ periodum. Hinc, quales præcise eo tempore esse soleant, adcuratius describendum ducimus. Ad minimum $1\frac{1}{2}$. digito- rum longi sunt, ast quum plerumque parum recurvati detineantur, haud adeo longi videntur. Corporis colorum communiter albo-flavidum, & luce solis corpus transeunte, rugas quasdam obscuriores in eodem observabis. Pars corporis inferior unita, superior globata ac convexa est; segmentum ultimum ex omnibus maximum atque crassissimum; quo quum non solum alimenta, sed excrementa etiam colligantur, & per transversum corpus adpareant, color ipsi nitens fusco-violaceus accedit. Corpus vermis nostri, ut cujusvis erucæ duodenis segmentis, haud in censum vocato capite, consistit. Et in parte dorsi globata, cuius segmento proximus adest rugarum cumulus, quibus producitur, & terram dum libet, subit. Ex utroque corporis latere segmentis omnibus superjacens quædam lingula adparet, novem punctulis nitentibus confita. Novem igitur sunt foraminula vermis respirationi inservientia ac totidem segmentis respondentia. Tribus prioribus subjacent sex pedes flavido-rubicundi, & quaternis seu quinis articulationibus compositi, harum ultima, præsertim in pedibus posterioribus, obtusa est. Nullos quidem in pedibus hisce aduncos, ast omnes eorum partes pilo subtilissimo, colorem pedum exæquante, & hinc inde in corpore obvio, confitas observavi. Caput, corporis respectu, magnum est, figura rotunda depressa, & colore flavido-fulvo splendente; & anterieus forcipe fulva-obscuriore, obtusa ac in extremitatibus dentata munitum. Utrique parti forcipem constituenti intermedium est quoddam labrum semicirculare. Et hujus præcise forcipis ope radices plantarum dissecat vermis, & succo earum pro nutrimento utitur. Nec tamen ullum oculi vestigium in capite observare licuit, sed utrinque forcipi posteriorem antennam, quinque ex segmentis, iisque flavo-fulvidis compositam. Et quam facilis ipsius Scarabæi sexus distinguatur, in vermibus hisce nullam utique sexus differentiam detegere potui. Nec sua sponte terram egredi solet vermis, imo ex eadem protractus, quam citissime fieri potest, in eandem redit. Siquidem non solum aves avidissime eum quærunt, sed & oculorum suorum acies nimium debilis est, quam ut solis radios perferre queat.

Quotannis sua se exuit pelle, quum nimia ejus angustia offenditur. Ut vero facilius suas exuvias seponere possit, exiguum sibi cavernam in terra effodit; quæ quum duritiei & rotunditatis suæ ergo, pillulis a quibusdam æquiparetur; physicorum alii *Scarabæum pillularem* dixere scarabæum varium, licet nomen hocce plurimum non nisi uni tantum speciei tribuatur. Deposita igitur pelle vermis alimenta quærens, (quamdiu per clementiam aeris fieri potest) egreditur; irruente frigore autem tam profunde in terram descendit, ut nihil habeat, quod timeat a vehementia frigoris, sic terra eo usque detinetur, quo rediens veris calor denuo illum in superficiem terræ evocaverit.

Vergente tandem quarto vitæ suæ anno transformatur. Et si quod dubium tibi remanet, Majo mense terram suffodias, & non solum scarabæos, stridu-

stridulos penitus efformatos, sed etiam vermes, magnitudine varios reperies. En! quam ratione transformatio ejus perficiatur. Autumni tempore vermis terram, nonnunquam ad ulnæ i. profunditatem penetrat, cavernam effodit, eamque & excrementis aliisque humoribus in subsidium vocatis tam lævem reddit & solidam, ut commodus atque securus eadem habitare possit. Sic domicilio exstructo statim jam corripitur, jam turgescit, & continua agitatione, ante finem autumnii ultimam vermis pellem, in nympham transiturus, reponit. Multæ equidem ex nymphis meis, anno quovis periere, multas tamen & adservare contigit. Statim ab initio illæ flavescentes videntur, sensim vero flavus color augetur, & tandem vergit in rubicundum. Vel figura externa scarabæi inclusi qualitatem loquitur. Caput nempe cum lamina colli, versus interiorem ventris superficiem spectant. Distinctissimi adparent seni pedes, & antennæ, & vaginæ alarum, at dimidios fere pedes posteriores adhuc tégunt vaginæ. In superiore ventris parte puncta nitentia obscura conspiciuntur. In ultimo tandem acuminimo corporis segmento, cuspidem observare licet, dorsum versus reflexam, & pro vagina cuspidi scarabæi datam. Irritatum chrysalidem satis perceptibili motu, ac sese obvertendi facultate præditam esse cognosces.

Formam suam, exeunte Januario, seu ineunte Februario seponere solet. En tibi scarabæum albidum seu flavidum, ab initio mollem, nec nisi x. ad xii. diebus præterlapsis, duritiem cum colore induentem. Jam vero quum non nisi destinato tempore terram egrediatur, & præfultis quæ diximus, vel duos tresve menses, postquam formatus fuerit, eadem detineatur: alii, repertis in terra scarabæis stridulis, hos terram, qua a frigore tueantur ingredi, per hyemem totam eadem detineri, & verno saltem tempore exire docuerunt. Faciles erroris sui arguentur, dummodo ad duplicem scarabæorum stridulorum speciem adtendant, quorum altera primo, altera autem subsequente anno occurrit. Dominanti quidem speciei & alteriusutrius nonnulli immiscentur, at hi non sunt nisi reliquis præterlapsi anni segniores exclusi.

Sic postquam quatuor per annos sub terra, ac plerumque vermis forma indutum degerit insectum: Majo mense, jam citius segniusve, pro varietate cœli, egreditur. Tunc igitur, & in primis vespertino tempore, habitacula ejus pristina commode perscrutari poteris; hinc etiam eodem mense, anni scarabæis stridulis copiosi, vias & semitas sole arefactas, foraminulis, tamquam cribrum perforatas esse videbis.

Quum igitur alternis annis alterutra scarabæorum stridulorum species dominetur; & quatuor annorum spatium cuivis opus esse constet, pro adquirenda ipsi debita forma: prædicere audeo, quod anno qui volvitur, scilicet 1744. pauciores saltem, & quidem dominantis speciei, lamina colli nigra instructæ reperientur. Annus enim 1740. eorum adventui destinatus, nimia & insolita frigoris vehementia, vel ad finem Maii mensis agros nive obtectos detinuit. Quidquod ejusdem anni media æstate passim glaciem & nivem vidimus. Hinc plures eorum vi frigoris enecatos, superstites autem non nisi admodum tardos egressuros fore censeo.

Ego quidem, quum observationes de scarabæis in anno 1739. cœpisssem, nec ultra anni unius spatium insecti incremento opus esse ratus, in perditis habebam omnia, quum nec vermibus meis alas accedere, imo ne agros

agros quidem scarabæos subministrare viderim . Non nisi duos Julio , & tertium Augusto mense colligere potui . Et præjudicio illo detentus , quod alterno anno alterutra scarabæorum species adpareat , quum deficientes in anno 1740. scarabæi , laminam nigram ostendere debuissent ; anno sequente parcissimum quidem eorum numerum , sed lamina nigra instructos sperabam . Fefellit expectatio , copiosissimi enim , iique lamina rubra donati adveniebant . Idem & anno 1743. accidit . Jam igitur meliora edoctus causam infrequentia scarabæorum cum lamina nigra in anno 1740. hanc esse censeo : quod maxima pars eorum licet efformata , antequam terram egrederetur , perierit . Quum autem ante egressum coitum celebrare nequiverint , (nec enim adeo præcoces , nec sub terra coeunt) nulli adesse poterant vermes in anno 1740. , & paucissimi & fere nulli erunt scarabæi lamina nigra instructi in anno 1744. , ut e contrario in anno 1743. maxima fuit copia scarabæorum laminæ rubræ , eandem & in anno 1747. sperandam habemus , nisi , quod productioni eorum obesse posset quidpiam accedet .

Cæterum & calorem & frigus nimium iis contrarium esse scito . Maximo enim æstatis æstu in arboribus delitescunt , nec nisi vespertino tempore elevantur , per agmina incedunt , obvolitant & vento vehementiore ex regione in regionem deportantur .

Sunt , qui nomen Gallicum : *Hanneton* , seu *Haneton* ex *Alleton* sive Latino : *Alitenans* , ob susurrum , quem volando scarabæus stridulus edit , derivare volunt . Hinc & Latinis : stridulus audit . Cel. *Menage* per ambages , ut solet : *Hanneton* ex *Asilus* deducit ; nobis autem Etymologia prior magis arridet , magis comprobata videtur .

Multo sale volatili & oleo abundans ubique communis , æst qualitatum ejus ignorantia maxima , & parcissimus usus est . Novimus , quod reliquorum scarabæorum instar , diuretica ac aperitiva virtute gaudeat , æst plura non curant . Imo quum tantum damni inferat arboribus , ex damna adferente nil utilitatis proficisci posse censent . Errant , si vera sunt , quæ in *Ephem. Germ. Anni 1742. pag. 325.* Cel. *Hartmann* , D. sequentibus . Specificum inest scarabæis stridulis contra morsum canis rabidi . Nec unquam effectus medio defuit , dummodo quam citissime fieri potest , exhibeatur , concomitantibus mediis externis pro vulnere . Nec mea saltem & reiterata experientia fretus adfero , sed & matronam quamdam nobilem novi , quæ pretiosissimum contra morsum canis rabidi medium , diu est , pluribus humanissime distribuit . Hæc enim mihi aperuit , secretum suum esse scarabæos stridulos , imo quosvis subnectit , qui medio suo usi fuerunt , feliciter cum successu idem adhibuisse , nec quemvis eorum unquam Hydrophobia esse correptum . Modus medium præparandi sequens est :

Rx. Scarabæorum stridulorum num. v. pro adulto , pro infante autem num. iij. , eosque melli injectos enecabis , tum caput subtrahes reiciesque . Post probe contusos morfu læso homini , mane jejuno , cum cochleari mellis , quo scarabæi enecati fuerant , exhibebis . Primam vero ejus dosin , quam citissime fieri potest , post morsum præbeas . Deinde per vij. dies ut diximus continues , & periculum evadet ægrotans . Maxima tamen celeritate opus est , ne venenum , ante medium exhibitum , vasa ipsa ingrediantur ; diutius enim intermisso medii usu , si vel aquæ aversio ægrotantem

incefferit, vix quædam superest spes salutis. Suo igitur tempore scarabæos colligas, & vel melli, vel oleo olivarum immisos s. a. u.

Scarabæus pilularis. Offic. Schrod. 345. Dal. 389. Jonst. 70. Charlet. 47. Aldrov. 449. Mouff. 153. *Scarabæus pilularis melanocyaneus*, Merr. 201. *Scarabæus magnus*, ex purpura niger, tibiis omnium pedum serratis. List. 17. *Scarabæus stercorarius niger major*. Frisch. 13. *Scarabæus major niger vulgatissimus*, antennis globosis, elystris lævibus. Raii Inf. 90. *Scarabæus ater*, dorso glabro, elystris sulcatis, Capitis clypeo rhomboide, Centro prominulo. Linn. Faun. Suec. 349. *Scarabæus stercorum seu fimarius*, *Scarabæus solaris sive Equinus*, Fodi-merda vulgo dictus. Quorumd.

Fodimerda capite infra depresso, supra parum fornicato, & pluribus eminentiis confito, seu, ut cum Cel. Linnæo loquar, clypeo rhomboide & centro prominulo, instructo gaudet. Ex utroque ejus latere, egrediuntur antennæ breviusculæ, cauli rubicundo, & ubi desinunt, in plura fila divisæ. Pectus lævigatum sulcum profundiorē in medio sui ostendit.

Vaginæ alarum læves, nigrae atque striatae sunt. Corpus totum conglobatum, solidum, latum, nigro-cæruleum, & ex inferiore sua parte nitidum. Crura antè scia instar dentata sunt; & in parte anteriore lumborum, primi paris crurum, pectori medio nexorum, macula magna pilis confita ac versicolor adparet. Os tandem insecti duplici maxilla reflexa, ac plumis subtilioribus obtecta, munitum est.

Cæterum plures sunt species fodimerdæ, illæque vel magnitudine vel alia ratione diversæ. Antiquiores ut solent, historiarum adparatum & de fodimerda adposuerunt. Quo pertinet, quod nulla sit inter illas foemella; quod integro 28. dierum spatio; ope pedum posteriorum conformationi pilularum maximarum studeant; quod in rosas tanta aversatione ferantur, ut vel solo eorum odore pereant. Interim in fimum ac stercus, bovinum præcipue atque equorum tanto desiderio easdem ferri constat, ut odore ejus vel e longinquo advocentur, & crepusculo vespertino præsertim rapidissimo volatu eo ferantur. Etenim plurium scarabæorum instar nyctalopibus adnumeranda venit, & solis splendore occæcatur. Facilis volatus ac agilis, sed lentior est fodimerdæ incessus; ast circa propagationem speciei continuo pariter ac strenuo labore defudat. Sæpius etiam pilulis seu globulis stercoris, suo onere onustæ, ventorum vehementia in terram prolantur, sed statim novis viribus collectis resurgunt. Ova sua in globulis stercoreis recondunt, ac ibi fovēt; nec tamen masculos vel illas inter deesse concludas. Etenim & sanioris doctrinæ Physici docent, & experientia subscribit, quod mediante coitu, insectorum instar multiplicentur. Delitiis igitur & nutrimento fodimerdæ venit stercus animalium, ipsa tamen, quantocumque amore in fimum feratur, pura semper, imo nitens conspicitur. Pediculis tantum cruribus suis inhærentibus infestari, imo devorari dicitur.

Fodimerda nomen, Gallice: *Fouille-merde*, ex suo in stercus amore, trahit. *Scarabæus pilularis*, Gallis: *Scarabée pilulaire* dicitur, siquidem ex fimo pilulas, sive quædam receptacula cava & sphaerica, pro reponendis ovīs efformat.

Sale volatili & oleo abundat fodimerda. Nec solum diuretica sua reliquisque communi virtute interne recepta, ferositates nimias evacuat, &

renum

renum ac vesicæ glaream detergit; sed quoque variæ ipsi propriæ sunt virtutes, eæque scitu dignissimæ. Pulvis ejus protuberantiam seu staphyloma oculorum lenit; & Recto inspersus, reiteratum ejus prolapsus impedit. Quod si autem Recti prolapsus ex inflammatione & turgescencia hemorrhoidum ortus sit, tunc fodimerdas cum oleo mastices ebullias, & lini-menti instar læsæ parti adplices. Nec non aliud oleum per infusionem, aliud per decoctionem ex fodimerdis præparatur. Pro conficiendo illo fodimerdas oleo optimo adfundunt, ampullæ probe obturatæ immittunt, & per 4. ad 6. hebdomades soli exponunt. Oleum vero per decoctionem præparaturus accipiat fodimerdarum viventium lb. j. & olei lini lb. ij. omnia deinde vasi argillaceo immittat, & mitiori igne lentius liquorem ebulliri curet; tum vero consumpta humiditate oleum expressione colet & f. a. u. His olei generibus resolvendi, leniendi & corroborandi virtus inest; pro linimento veniant, & aliquantulam gossypii portionem iisdem irriges, pro resolvendis hemorrhoidibus, & leniendis earum doloribus.

Basin item constituunt olei Scarabæorum Officinæ Parisiensis.

Proscarabæus. Offic. Mouff. 162. Jonst. 74. Merr. 201. Dal. 391. *Scarabæus unctuosus*. Schrod. 345. *Proscarabæus*, sive *Anti-Cantharus*, Charlet. 46. *Scarabæus mollis*, ex nigro viola nitens. List. 292. *Pinguiculum*. Agricola. *Meloe*, Paracels. *Meloe*, Linn. Faun. Suec. 596. *Proscarabæi fœmina*, seu *Cantharus unctuosus*; *Vermis*, sive *Vermiculus Majalis Germanorum*; *Elæoscantharus*. Nonnull.

Proscarabæus, scarabæis maximis adnumerandus, digitum hominis crassitudine, & auricularem vel totum, vel binas ejusdem phalanges priores, longitudine exæquat. Totus niger dici potest ac mollis, adtamen corpus & collum, imo antennis monilis forma compositas violaceas, seu purpureas ostendit. Os suum clypeo, parum reflexo, ac bini maxillis, forcipes referentibus, munitur. Terna utriusque lateris crura, eundem, quem venter, collum, caput & antennæ colorem exhibent. Venter ejus crassior, splendens, adipeus, sua longitudine vaginas alarum superat. Vaginæ ipsæ corio molli atque rugoso accedunt pro similitudine, nec tamen alas sibi subjacentes habent. Corpus tandem varii passim circuli cœrulei flavidi & virides, nubeculas qui referunt, cingunt. Stomachus ejus amplior, intestina autem longa sunt atque gracilia.

Caudis inter se cohærentes proscarabæi coeunt; & marem graciliorem atque minorem fortior fœmella protrahit. Prona fœmella haud adeo inepte hominis faciem refert. Tantillum olei proscarabæo adfundas, & illico convulsionibus correptus, brevi morietur. Vix eum tetigeris, & liquor adipeus, flavidus; oleoque limpidissimo similis, ex quibusvis crurum juncturis egrediens, manus colore tinget. Majo præprimis, nec nisi rarissime tardior in viis, arboretis, campis, locis apricis & herbarum plenis, pratis udosis, & fossulis ad fruticeta jacentibus reperietur. Contritus suavem spargit odorem. Vermibus, præsertim vero violis & tenera herba nutritur, ac gravi lentissimoque gradu incedit.

Proscarabæi nomen scarabæum spurium denotat. *Scarabæus unctuosus* dicitur, quia corpus ejus totum destillante tamquam oleo unctum videtur.

Cæterum sale volatili oleoque multo abundans, primum inter scarabæos occupat locum. Et teste *Glaubero*, liquor ille unctuosus, acer & fragrans,

contrectati ex corpore qui emanat, morbis chronicis medetur, & contra nephritim & arthritidem præservativo cedit; plerumque urinam, nonnunquam vomitum & excrementa ciere solet. Violentia ac natura caustica mediæ hujus, Cantharidum qualitati accedentis exigit, ut initium ejus non nisi a paucissimis guttulis capiatur. Insectum ipsum vapore aceti calidi enecatam reducas in pulverem, scarabæorum more, eisdemque illum usibus, eadem ratione adhibeas. Quem pro morfu canis rabidi & arthritide vaga commendat *VVierus*. Sic *Cel. Roesler, D.* in *Ephem. Germ. Dec. I. Anni III. pag. 302.* pueros binos ex morfu canis rabidi laborantes, binis proscarabæis, capite rescisso acceptis, salutis suæ restitutos fuisse confirmat. Multum quidem a violentia mediæ adficiebantur, imo sanguinis mictus accessit, at tandem integram sanitatem consequiebantur. Ex quo & mediæ præstantiam & violentiam cognoscere licet, cujus ergo maxima cautione circa usum illius opus esse concludimus. Pro topico contra plagas eximio unctuosum proscarabæi liquorem cedere dicunt; qui & emplastra contra bubones & carbunculos pestiferos intrare solet. Nec non antidotis quibusdam admiscetur. Et oleum ex hisce insectis proveniens per infusionem, contra ictum scorpionis singulari virtute gaudere dicitur.

S C O R P I O.

Scorpio. *Offic. Schrod. 346. Dal. 384. Jonst. 95. Charlet. 54. Scorpio sive Scorpis terrestris. Matth. 142. Scorpis. Mouff. 204. Aldrov. 577. Raii Insect. 9. Joh. de Muralt. Ephem. Germ. Dec. II. Anni I. pag. 166. Scorpio pectinum denticulis xxx. S. N. Linn. Mater. Med. Nepa Ciceron. & alior. Scorpio vulgaris niger, sive scorpio niger e silvis Regionum calidarum. Quorumd.*

Scorpio, mediæ magnitudinis insectum, & cancro minori æqualis, albidus, nigridus ac flavidus est. Quatuor ejus partes reliquis notabiliores sunt: caput, venter, pectus & cauda. Caput aliquantulum latum & profiliens, thoraci junctum videtur atque contiguum. Statim adparent oculi bini, anteriorem capitis partem respicientes. Deinde duo alii in centro capitis seu prope ad pectus, at parvitatibus suæ ergo vix sunt conspicui.

Os ejus duabus maxillis munitur, inferiore bisulca, & duabus forcipibus dentatis excepta, quæ dentium loco pro comminuendis nutrimentis inferre videntur; quas fere totas recipere, & ab oculis spectantis abscondere potest animal. Ex utroque capitis latere duo brachia egrediuntur, quaternis ex articulationibus conflata; quarum ultima maxima, ex musculis fortissimis constat, & tamquam crura canceri, in extremitate bifida est. Pectori inferiores quaterni sunt utrinque pedes, senes articulationes exhibentes. Imo & harum extrema bifida, aduncis exiguis instructa, ac brevissimis pilis confita est.

Venter in annulos septem dividitur, ex quorum ultimo proficiscitur cauda, longa, nodis, seu senis globulis villosis, per extremitates rosarii instar, sibi nexis, mobilibus & excavatis composita. Ultimus nodorum non solum aculeo acutissimo, longo, duro, recurvato, & cavo munitus est; sed etiam in basi sua foraminulum aliquod ostendit, quod quidem, postquam scorpionis ictus præcesserit, guttula liquoris albidi, venenosi,

virulenti, acris, & corrodentis egreditur. Reservatorio liquoris venit vesicula in extremitate caudæ obvia.

Scorpio mas longiusculus & gracilis, rubrum, foemella major & magis rotunda nigridum exhibet colorem; nec non, testibus *Aristotele* & *Redi* vivipara est. Addit Vir Cel. quod quum plures foemellas, vasis vitreis, separatas tamen, immisisset, quasdam earum non solum undecim (ut antiquiores docebant) sed vel octo & triginta scorpiones probe efformatos, & ab initio quidem candidissimos, deinde autem sensim obscuriore colore indutos, produxisse observaverit ipse. Alia ex hisce septem & viginti edidit, hosque illorum instar, ventri ac dorso matris adhærentes. Varias etiam, antequam partus effuderant, dissecut; & horum varios, nec unquam pauciores quam 26., nec plures quam 40., ex longiori filo suspensos, & membrana tenuissima omnes quidem inclusos, adtamen septo quodam intermedio ac subtilissimo inter se distinctos reperit. Quum igitur in foetu magis conspiciendi esse soleant oculi, ac in adulto; & in foetibus scorpionis, oculorum vestigia, bina punctula nigra, & caudam sub ventrem reflexam, & brachia sub caput depressa, corporique adglutinata, vel nudus oculus intueri valebit.

Scorpiones calidiores terras inhabitant, ut: Italiam, Hispaniam, Provinciam, Occitaniam, Asiam, Africam & Americam, in regionibus frigidis non nisi nomine noti sunt, & *Scaligero* teste, ne in Vasconia quidem reperiuntur. Humida loca & frigida, parietum rimæ, terræ foramina, ac foveæ lapidibus tectæ pro habitaculo; pro alimento autem vermes, muscæ, culices & herbæ veniunt. Variæ interim sunt species eorum. Et Tunetani quidem flavidi, Italicis majores ac magis infesti sunt. Quo magis temperato sub cælo vivunt, eo minus nocivæ qualitatis esse solent, quidquod alias regiones inhabitantes omni prorsus veneno carent. Alatos etiam reperiri novimus, eosque lacertis, serpentibus & araneis mortem adferre. *Aldrovandus* numquam sibi visum fuisse docet scorpionem alatum. *Cardanus* autem, in Patavino territorio obambulans quondam, alatum vidit scorpionem, & timore quidem maximo oppletus, nullatenus tamen ab eo læsus fuit.

Antiquiores scorpii originem ex planta Basilicon dicta, vel cancris maritimis contusis, fluviatilibusve mutilatis & sepultis deduxere. Et P. R. *Kircher* existimans, quamcumque infecti partem idem insectum cujus illa pars est, reproducere posse, scorpiones sequentem in modum produci docet: R. Scorpionum cadavera, eaque contundas & vasi vitreo immittas; post irriges cum aqua in qua Basilicæ folia macerata fuerunt; & solia statis diurno exponas. Lentem mixturæ admove, & illam in innumeros scorpiones abiisse videbis. Experientiæ suæ certus Vir. P. R. lectorem ad reiterandum experimentum provocat. Ast quem latet, sic Cel. *de Reaumur*, quænam sint, quæ in errorem huncce abduxerunt Cel. Virum *Kircher*. Ille enim infecta in liquore oborta pro scorpionibus enatis habuit. Ille tamen haud in explicanda productorum scorpionum quantitate, sed potius in reperienda sympathia inter scorpium & Basilicon herbam desudare videtur. Nec habes, ut ad ipsam experimenti repetitionem descendas, falsissimum enim esse hunc scorpios producendi modum, tibi L. spondemus. Et ne prorsus intactum relinquamus adparatum historiuncularum de scorpione,

en tibi quædam . Sic enim referunt , 1. numquam corporis partem pilis confitam fauciari ictu scorpionis , qui suum aculeum oblique semper intrudit , 2. magis nocivos esse illos , qui caudam septem , quam qui sex nodis compositam ostendunt , 3. magis periclitari illum qui jejunos , quam qui repleto stomacho ab illo ictus fuerit , 4. quod si quis eodem die , quo Basilicon , herbam comedit , a scorpioni fauciatus fuerit , nullo unquam medio possit sanari , 5. quod scorpio mater , foetus , uno excepto , omnes devoret ; qui reliquis agilior dorsum sive lumbos matris conscendens , & ab aculei ejus ictibus immunis , patri matrique mortem , fratres vindicaturus , adferat , 6. omnes Italiæ scorpiones venenosa qualitate carere . His omnibus quantum certitudinis insit , dijudicare nostrum non est . Hoc autem pro certo novimus , quod periculosior æstate & in primis , diebus canicularibus , sit scorpium ictus ; qui solis calore & siti excruciatum est , in primis si digitorum compressione , vel alio quovis modo irritetur . Hyeme autem non est , quod ictum ejus extimescas , tunc enim frigoris vehementia torpescunt ac rigent . Inclusi scorpiones diutius vitam absque nutrimento conservant ; numquam , viperarum more , cicurari possunt ; per transversum incedunt , & sua se pelle , cancrorum instar , exuunt .

Ut autem satius dijudicare possis , quanta insit veritas illis , quæ de morsu scorpionis a variis perscripta sunt ; en tibi L. experimenta Viri Cel. de *Maupertuis* , quem non solum merita sua in rempublicam literariam , laudibus nostris superiora ; sed & excelsus dignitatis locus quem tenet in Academia Scientiarum ex celeberrimis una , satis cognitum reddunt omnibus . Ille igitur in *Actis Reg. Scient. Acad. Anni 1731. pag. 223.* sequentibus :

Duas Monspeliæ scorpionum species vidi , alteram in domibus frequentem , ruri degentem alteram . Illi autem hisce minores ; fabæ , nostratibus Coffeæ frixæ colorem exhibent , nec ullis experimentis meis venierunt . Scorpiones campestres , e contrario , extensi 2. digitorum longitudinem , & albo-flavescentem colorem præbent ; ac in pago quodam , *Souviagnargues* dicto , 5. milliaribus a Monspelio , sito , adeo frequentes occurrunt , ut rusticis pro mercis & negotii genere cedant . Hi enim illos sub lapidibus quærunt , & repertos deportant ad officinas , quarum compositiones quasdam , contra ictum scorpionis ingrediuntur . Hanc igitur speciem meo examini subjeci . Et primo quidem scorpioni irritato fauciandum canem exhibui , quem ille triplici vel quadruplici vulnere , in parte ventris glabra fauciabat . Hora peracta canis tumescens vacillando incedebat ; & quidquid stomacho & intestinis continebatur , evomebat , ac per tres horas subsequentes , viscidam salivam per interstitia eiciebat . Post vomitum quemvis stomachi turgidi moles admodum decrefcebat , statim turgescebat , denuo vomitu diminuebatur . Sic alternis inflatione & vomitu , per tres horas continuatis , convulsionibus tandem correptus , terram mordicus petebat , anterioribus pedibus insistens protrahebatur , & tandem , quinta post morsum hora , expirabat . Nec tamen fauciata in parte tumor singularis aderat , qualis apum vel vesparum ictus excipere solet . Tumor enim per totum corpus dispersus , & ictus cujusque vestigia , totidem scilicet punctula rubra , seu foraminula ab aculeo effossa , ac sanguine profluente tincta aderant . Idem & in reliquis , scorpium moribus subjectis , nec unquam pellem in tumorem elevatam observavi .

Aliquot exinde diebus, alium canem senis septenisque scorpii ictibus eodem in loco exposui; & quadrihorio post ipsum elapso quum in cane nulla prorsus morbi seu potius symptomatum signa deprehenderem; ictus reiterari permisi. Plures igitur scorpiones irritati vel denis imo duodenis ictibus illum petiebant, aculeos profundissime pelli infigebant, vel eadem in hærentes relinquebant, sed nulla veneni signa in cane, doloris saltem ex fauciatione, id est: clamores acutissimos. Famem ac sitim pro more conservabat; & ab omni sumti veneni indicio remotissimum tandem libertate donavi. Canis ille dominum habebat vicinorum meorum quemdam, & forsan apud me lautior pastus, spreto periculo sæpius ad me rediit, iteratis experimentis meis sese subiiciens. Ego autem, quum scorpiones meos, forsan exhausti sui veneni ergo, mortales ictus infligere nequire censerem, alios ex pago prædicto accerferi jussi, & horum ictibus septem canes alios exposui. Ast quanti fuerint ictus scorpii vel furentis, haud ullus unquam canis sinistro quodam accidente infestabatur. Tandem quoque pullorum gallinaceorum pectus & regiones subalares scorpionum ictibus exposui, nec hi quidem sinistri quidpiam experti sunt.

Quibus in unum collectis infero: non nisi rarissime mortem scorpionis ictus excipere; & quidem concurrentibus circumstantiarum variis, quas ægre determinare valemus. Forsan vel ad promovendum, vel reprimendum mortis periculum ex ictu, facit qualitas vasorum percussorum, vel alimenta scorpionem hucusque nutrientia, vel jejunium diutius prævium. Forsan quoque haud semper cædens scorpio venenosum emittit liquorem, &c. Sic enim Cel. *Redi* viperas non nisi determinatam veneni quantitatem secum gerere docet, quæ dum consumpta fuerit, non nisi interjecto temporis spatio restituatur, ita ut haud omnia animalia a viperis, quarum ictus periculosissimus esse solet, icta, moriantur, & viperæ, aliquot saltem exinde diebus venenosam qualitatem pristinam induant. Ast nec huic causæ exiguum veneni in scorpionibus meis effectum tribuere potui; ultimi enim recentissime capti nullum adhuc venenum effuderant. Masculus item æque ac foemella experimentis meis suffecere; hinc nec differentia sexus, diversi morsuum effectus ratio esse potest.

Exiguæ igitur malignitatis suæ ergo, antidota in Occitania præclara, magni haberi censeo. Scorpiones ipsos oleo immergunt, illudque fauciatæ parti adplicatum præstantius medium habent. Ego autem antidotorum virtutem ex inefficacia veneni deducere mallem. Forsan igitur quidam scorpionis ictu læsus, & cordis anxietate vel deliquio adfectus, scorpii contusi oleo usus fuit pro antidoto; morbum ex timore profectum fiducia medii curavit, ille autem huic saltem recuperatam salutem tribuit.

Jam, quum ex tanta animalium copia, neglecto insuper antidoto, non nisi unicum perierit: & homines, antidotis felici cum successu contra mortuum scorpionis usos, veneno nullo adfectos fuisse concludo. Imo singulare quoddam de hoc antidoto sæpius mihi expositum fuit ab aliis. Murem, sic illi narrabant, una cum scorpione ampullæ vitreæ inclusum vidimus, hunc scorpio ictu petiit, mus extemplo peribat. Alius e contrario mus eidem ampullæ immixtus, & a scorpione ictus, hostem devorando, & sibi pro morte medium, & socio vindictam paravit. Cui factum quum indubia veritas constet: naturali quodam instinctu morbi sui medium cognoscere & quæ-

& querere patet murem. Ego igitur, ne quidquam inexpertum relinquerem ampullæ murem & tres scorpiones immisi. Ille igitur, variis illorum ictibus excitatos clamores edidit, post vero, defensionis ergo dentibus scorpiones petiit, imo tandem enecavit; nec tamen illorum quidpiam devoravit, nec nisi ut animal omne sibi ictus infligans, scorpiones morsibus petiit; nec peracto suo certamine morbi cujusdam signa edidit, postridie tandem alii mortis generi illum subjeci.

Præfultis igitur istis, quæ ipsemet ego mea experientia comprobata habeo; facti rationem, si veritas ei constat, sequentem in modum explicabo: mus prior lethali vulnere, posterior autem, vel ob venenum omne in priorem effusum, vel ob circumstantias alias, inefficaci adfectus fuit; mus vero scorpionem enecans & devorans, vel defensionem meditabatur, vel fami satisfacere quærebat. Nec video, quare vel antidotum, vel instinctum, pro explicanda rei ratione supponere velis.

Physici interim omnes, observatis qui scorpionis ictum sæpius excipiunt, effectibus, in eo conveniunt, quod vulnere ab aculeo suo proficiscenti liquorem quemdam scorpio immittat. Pro cuius egressu foraminulum aliquod in extremitate aculei adesse censent. Cel. *Redi* vel præstantissimo Microscopio adjutus, illud detegere nequivit. Ast quum in extremitate aculei scorpionis irritati quondam guttulam observasset, aperturam aliquam in eodem obviam esse concludit. Felicior autem in detegendo Cel. *Leuwenhoek*, non unum, ut *Redi* aliique supposuerant, sed duplex reperit. Figure & descriptioni suæ dissimilia ego vidi eadem, cuius causam in varietate scorpionum nostro examini venientium quærendam teneo. En! qualia in Scorpione quodam ex *Souvignargues*, pago, proveniente, fuerant foraminula.

Ultimus caudæ scorpionis nodus, est quædam phiola cornea, in collum nigrum, durissimum & acutissimum, seu aculeum, terminata. Jam igitur ex utroque aculei latere, satis remota ab ejus extremitate, duo foraminula, longitudine latitudinem admodum superante, microscopii ope observavi. Nonnunquam quoque variantem foraminulorum situm, extremitate scilicet viciniorem conspexi. Nec microscopio objecta valde exaugente opus est. Lens sufficit, cuius focus sit 2. vel 3. linearum. Fortassis Cel. *Redi*, extremitati, cui non insunt, adhærens, frustra eadem quæsit, & microscopio suo extremitatem obvertendo, foraminula in lateribus sita conspiciere nequivit. Quidquod vel absque microscopio quodammodo deteguntur, phiola scilicet, de qua dixi, parum digitis compressa, ex dextera pariter ac sinistra promanantem ostendet liquorem.

Expositis igitur hucusque utilibus, jucunda nunc subnectantur. Scorpio carbonum circulo inditus, suo se ictu enecari dicitur. Experimentum institui, & scorpio a carbonibus proficiscentem calorem persentiens, undequaque evadere studebat; & quum pars nulla pateret egressui, per medios carbones transiens fere consumebatur; denuo illum circulo suo restitui, ast quum carbones iterum transeundi vires deessent, statim peribat, ast nullum autocheirias ne tentamen quidem edebat. Sæpius reiterato experimento idem successus respondidit.

Forfan pro origine historiunculæ venire sequentia: Statim ex quo se infestatum esse sentiat scorpio, defensionis statum intrando caudam in dorsum reflectit, ad ictum paratam; imo aculeum ubivis defigere tentat. Sic

& carbonum calore adfectus in eandem positionem se recipit, qua, nisi admodum vicinus consideretur, se ipsum ictu percutere videtur. Ast difficillimum foret, non dicam, impossibile, siquidem corpus ejus totum, ut cancri, crusta obtectum conspicitur.

Transeamus interim fabulas *Plinii & Aeliani* de scorpionibus. Observationes quasdam tantummodo subnectere liceat, ab observationibus Celeb. *Redi* diversas, quem inter omnes adcuratissimum scorpionis observatorem novimus.

Aristoteles, *Plinius & Aelianus*, undenos foetus plerumque edere docent foemellam; *Redi* autem 26. ad 40. Nos autem in quibusdam nostratium, ex pago *Souvignargues* deportatarum, 27. ad 65. foetus observavimus.

Interim eadem crudelitate, qua araneæ, scorpiones matres, in foetus suos sæviunt. Aliam enim, ampulla detentam, prout illos edebat, & devorare vidimus. Jam *Plinius* de hac sævitie matris verba facit; ille tamen subnectit, quod ex omnibus superstes unus, dorsum matris conscendendo, mortem effugiat, ac matrem enecando, fratrum ultor evadat. Nec satius societatis quam naturæ leges observant. Ego enim centenos circiter uno vasi commiseram; ast cædes continua, nulla vel ætatis vel sexus ratio habita, alii alios devorabant; & paucos post dies decem & quatuor, reliquorum carne pasti supererant; quos si excusare vellem, deficientis nutrimenti alius causam prætenderem. Diutius enim, quidnam palato eorum arrideret ignorabam; ast muscas sibi exhibitas, haud neglecta tamen sua in suos ferocitate, comedebant. Nec non oniscos adpetebant; ast quum araneam majorem illis exhiberem, hanc delitiis illorum cedere vidi; etenim tres quatuorve scorpiones avidissime araneam adgrediebantur, & diutissime eidem nexi adhærebant.

Multum vero animi & roboris contra araneas ostendunt. Sæpius enim scorpionem parvum, araneam sibi majorem corripere vidi & enecare. Illam enim jam alterutra, jam utraque forcipe majori stringit; sibi autem justo fortiores visas araneas, aculeo capiti infixis enecat. Deinde ex forcipibus majoribus ad binas minores & capiti anteriores reponit, nec nisi penitus devoratas, mittit. Nec alios in eo dentes, præter forcipes minores, manducando alimento inservientes observavi. Os ejus pilis exiguis confitum, & pellis ejus, quamvis vera sit testa, variis tamen in locis, ut in forcipibus, in cruribus & ultimo caudæ nodo, hirsuta est.

Nomen ejus Gallicum: *Scorpion*, cui & Anglicum & Germanicum respondent, æque ac Italicum: *Scorpione*, Hispanicum & Vasconicum: *Escorpion*, imo Belgicum: *Schorpioen*, Latino: *Scorpio* seu *Scorpius*, hoc tandem Græco: *Scorpios*, originem debent. Jure igitur Cel. *Aldrovandus*, idem scorpionem per totam fere Europam nomen esse adserit. Dicitur autem *Scorpio terrestris*, quo non solum ab insecto quodam minori, cui *Swammerdam* *scorpionis volantis seu aquatici* nomen tribuit; sed etiam a pisce marino, aliis *Scorpio marinus*, Massiliensibus autem: *Scorpeno* seu *Rascasse* dicto distinguatur.

Multum salis volatilis & olei scorpionem quum insit, Medica ars eum ad excitandam urinam, ad profligandam renum atque vesicæ saburram, ad eliciendum sudorem, & ad reprimendam humorum malignitatem conferre docet. Simplicior eum præparandi modus hic est: quo rescisso apice caudæ folis ope arefactus in pulverem reducitur; cujus gr. vj. ad ℥j. ad deter-

gēdos renum calculos & glaream præscribunt. Cui quamvis sua sit virtus, is tamen infrequentiori usui venit. Frequentiores utuntur oleo scorpionis vel simplici vel composito officinarum. Illud infusione simplici scorpionum cum oleo amygdalorum amarorum elicatur. Accipiunt enim scorpionum maximorum viventium num. xx., illosque ollæ fictili indunt; tum olei amygdalorum amarorum ℞. j. suprafundunt, ollam probe occludunt, Balneo Maris excoquunt, fortiore tandem expressione percolant, & ad usum servant. Hujus vero ℥℥. ad ℥ij. cum jusculo seu alia potione oleosa contra retentionem urinæ & colicam nephriticam exhibent; addito tamen linimento ejusdem olei in regione vesicæ ac renum, & adplicato eisdem regionibus cataplasmate ex allio candido & parietaria, composito. Eximior autem virtus inesse creditur oleo composito, quod & oleum scorpionum *Matthioli* dicunt, quodque quæ ingrediuntur varia, in omnibus dispensatoriis perscripta & recensita videbis. Pro dosi hujus gutt. iij. ad vj. interne accipiuntur, contra venena, ad evocandos variolos, contra febres malignas, Paralyfin, Epilepsiam, aliosque cerebri adfectiones, ubi & nervi corroborandi, & pituita frigida & crassa cerebrum constipans attenuanda venit. Nec nisi in terris scorpionum copia abundantibus, ut in Occitania, Provincia & Italia, oleum Scorpionum præparatur; etenim si vel viventes hosce alio deportare velles, multum illi vigoris sui, & oleum virtutis amitteret. Optime tamen, ut supra diximus, in Balneo Maris, oleum hocce præparatur, ita enim omnis eorum sal volatilis, virtus præcipua, conservatur. Sunt, qui vinum addere solent, male quidem; tunc enim excoquendus venit liquor, & salis volatilis partem coctione amittit.

Satis cognita interim est venenosa scorpionis qualitas, & ictum ejus, nisi citiora media adferantur, mortis causam evadere constat. Ictum vero dolor læsæ partis violentior excipit, & frigor, tensiones, torpor, sudor frigidus in regione vulneris & corpore toto; imo inguinum tumor, si qua pars inferior ictu percussa fuerit; sin vero superior non nisi leviori ictu fauciata sit, tumor sub axillis; si graviore, pars læsa ardore, quantus ex adustionibus proficiscitur, & livore corripitur, concomitante pruritu labrorum vulneris corporisque totius, ut grandine percussus sibi videatur ægro-tans. Facies torquetur, materia glutinosa circa oculos colligitur, lacrymæ viscidæ exsudent, articulorum motus difficilior evadit; ani prolapsus & perpetuum desidendi desiderium sequuntur, spuma circa os oboritur, vomitio, singultus & convulsiones ex Opisthotono participantes superveniunt.

His igitur sinistris effectibus ut obviam eatur, tutissimum medium est ipsa mali origo, sive scorpio, ex quo ictus processerat. Hunc si fieri potest, arripias, & citissime contritum vulneri adplices. Vel si illum habere nequeas, oleum scorpionis vulneri imponas; cujus effectus quum sit incertus, salis viperæ volatilis, vel cornu cervini gr. x. ad xij. cum aqua cordiali, ut melissæ simplicis, vel cardui benedicti, vel si defunt, theriacæ seu Orvietani portiunculam cum optimo vino haurias; ut ope mediorum, quæ ultima recensuimus, si qua veneni pars sanguinem intraverit, illa absorbeatur.

Quod ad usum scorpionis externum adtinet, contusus, uti diximus, vulneri ex ictu suo proficiscenti, adplicetur. Sunt, qui contra febres malignas contagiosas scorpionem contusum carpo adplicari suadent. Oleum

simplex, pro linimento regionis vesicæ & renum, ad expellendam glaream ac calculos, ad excitandam etiam quæ suppressa fuerat, urinam commendatur. Pro aurium dolore olei hujus ℥j. cum olei amygdal. dulc. ℥ss. misceas, & per guttas auribus ægrotantis instilles.

Oleum denique scorpionis compositum *Matthioli* præcipue contra morbos malignos, & pestilenciales, ac ad enecandos vermes adhibetur; unctione, tertia quavis hora repetenda regiones cordis & stomachi, carpi, templa, nares & pedes ungantur. Nec non malaxandis veni emplastris ac unguentis contra bubones pestilenciales, & animalium venenosorum morsus.

Basin constituunt scorpiones olei scorpionum simplicis ac compositi *Officinæ Parisiensis*; olei Scorpionum *Zuvelpheriani*, & essentiæ Scorpionum *Ageli Salæ*.

Rx. Unguent. alth. ℥ss.

Olei scorpion. simpl. ℥ij.

M. f. linimentum, in regione vesicæ, contra suppressionem urinæ adplicandum.

Rx. Unguent. alth. ℥iij.

Olei scorpion. ℥ij.

Olei terebinth. destillat. ℥j.

M. f. linimentum, renibus adplicandum, contra dolores nephriticos.

Rx. Cornu cerv. absque igne ℥j.

Bezoart. mineral. gr. xij.

Sal. volatil. corn. cerv. gr. vj.

Subig. omnia cum syrupo Caryophyllorum pariori, & f. bolus, bis in die contra morsum scorpionis accipiendus.

Rx. Aquæ cardui bened. ℥ij.

Pulver. viper. ℥j.

Sal. volat. viper. gr. jv.

Syrup. Cariophyllor. ℥ij.

M. f. potio.



CLASSIS SECUNDA.

DE PISCIBUS.

Generalia quædam de Piscibus.

Varia quidem pisces, quorum descriptioni jam accingimur, varia, inquam, illi, ac multa alimentorum genera nobis, æst Medicinæ non nisi parcissima media pro morbis suppeditant. Hinc quatenus cibo veniunt, quædam de illis hic loci præfabimur; æst virtutes eorum Medicas, prout capituli cujusvis occasio tulerit, pertractabimus.

Pisces sunt vel aquæ dulcis, vel maris, & illi quidem vel lacubus, vel stagnis, vel fluviis immorantur. Et qui in lacubus reperiuntur, aqua plerumque cœnosa & stagnante nutriti, salutis obnoxii ac adversi habeantur. Minus nocivæ qualitatis sunt fluviatiles, dummodo fluvios, rapido alveo profluentes, ut: Rhodanum, Ligerim, Garumnam, alios, inhabitent; qui enim lentiore alveo ac fegniore provolvuntur, ut Sequana & Araris, multum inferioris præstantiæ pisces continent. Haud quidem ignoramus, carpiones ex his fluminibus captos, pinguedinis suæ ergo, haberi in delitiis; æst vel pretii sui ratio, adeps, salutis eosdem reddit infestissimos. Consentientibus etenim quibusque Medicis, adeps piscium reliquo majus detrimentum hominis salutis adfert. Pisces denique prope ad urbes, flumen quasi alluit, captos sequiores esse memento, ob colluviem sordesque ibidem contractas, quæ ipsis fuerant alimento.

Omniū præstantissimus igitur ducendus esto piscis marinus, quippe cujus humores maris falsedo emendavit. Maxime autem sanitati conveniunt vel inter hos illi, qui in locis rupium plenis, nutriuntur. His inferiores habeantur, qui maris in fundo degunt; Ultimum locum teneant, qui in oris ac littore viventes, aqua impuriore detinentur. Experientia docet: quod pisces maris alii fluvios nonnunquam ingrediantur, & si aliquamdiu illis inhæserint, gratioris evadant saporis. Num vero & salubriores fiant? dispiciendum. Et quidem *Galenus*, teste *Nonnio*, multum suæ præstantiæ ac qualitatis salubris amittere docet piscem maris flumina ingressum, imo addit: maria illa in quæ pauciores fluvii egeruntur, optimos continere pisces. Alii volunt: quod piscis maris flumina intrans, palato quidem jucundior, & pinguior, æst concoctu reddatur difficilior. Numquam vero tantum suæ præstantiæ, si vel in flumen deferatur, amittit, ut pisci fluviatili inferior sit judicandus.

Caro recens, piscis autem sit vetustior, sic sonat proverbium, cujus veritatis rationes obstare censemus. Piscis enim vetustus coriaciosior esse solet illo, qui mediam habet ætatem. Hinc nec illis qui delicatioris palati sunt, proverbium arridebit, his forsan comprobatum erit, quos helluonum, seu voracitatis vitio laborantium nomine salutamus. Vetusti enim piscis moles major, frequentior caro, infrequentiores autem sunt spinæ; squamarum durities & magnitudo piscis ætatem loquitur. Quæris: mas an fœmella

præstantior ? hominum opinio & usus marem, ob pulpam lactariam, lac communiter dictam, quam continet, præoptare solet; at caro foemellæ, & in primis anguillæ, carni maris saporis excellentia præstat.

Mensæ jam frixus, jam assatus, jam elixus adponitur piscis. Et vel oleo vel butyro frixus, difficilis erit concoctu; etenim butyro oleove ex igne accedens qualitas, acria eadem reddit ac adurentia. In craticula vel veru assatus itaque salubrior est. Elixus tandem, sive prunis lente sit coctus, sive parciore jusculo coctus, exfulante saltem condimentorum abundantia, valetudinariis ac stomacho debiliori laborantibus convenientior est. Qui, diu conservandus vel sale adspargitur, vel fumo exsiccatur, stomacho debili & delicato nimium difficilis est concoctu. At corpora robustiora, & visceribus fortioribus gaudentia, non solum non offenduntur alimentis sale conditis seu fumo arefactis; sed potius, quum alimenta ad vires viscerum proportionem habere debeant, in illis ipsis quidpiam reperiunt, quo & vires reparare, & salutem conservare valeant; At nutrimenta leviora ac molliter educatis convenientia haud sufficerent rusticis, aliisque laborum perferendorum adfuetis, & exercitiorum corporis violentiorum æque ac defatigantium consuetudine indurescentibus.

Generatim spectatus piscis parum nutrimenti præbet, facilisque corrumpitur. Imo quum oleo crasso & aqua abundet, parum vero volatilis contineat; eo minus in substantiam nostram facilis transire valet ac commutari. Quod enim principiis activis & volatilibus, nec non commixtione partium aquosarum & oleosarum modica temperatis principiis constat, illud alimentum, inquam, corpori nostro convenientissimum est. Hæc principia enim ad conservandam faciunt fermentationem lenem & modicam, a fermento stomachi excitatam, & ad completam ac perfectam digestionem, sua conferentem. Hujus generis nutrimento quadrupedum aviumque caro, nec pisces præbent; hi enim nimii sui olei ergo & aquæ, fermenta stomachi involvunt, debilitant; quæ quum concoctioni probæ insufficientia reddantur, nutrimentum producant, cui nimis exigua est substantia ac soliditas, quam ut corpori succum & vires subministrare valeat. Brevibus: piscis est naturæ humidæ & frigidæ, nullos igitur, nisi humidos & frigidos succos producere poterit seu aquosos, quos corpori nutriendo numquam sufficere posse constat. Aliis tamen convenientior judicandus est piscis, scilicet his, qui succo corporis nutritio abundant, & nimium chylum & sanguinem præparant; imo morbi sunt, in quibus piscis usum non solum permittendum, sed vel commendandum esse censemus, ubi scilicet periculum adest, ut alimenta succulenta inflammationes producant. Rarissimi casus ejusmodi apud nos esse solent; qui si obvenerint, juscula carnis refrigerantia levissima præoptanda esse ducimus, hæc enim eodem redeunt, eadem ratione sanguinem temperare valent. Colligas: piscium caro corpori nostro inconveniens nutrimentum præbet, caro quadrupedum vero & avium jure anteferatur, quippe quæ substantiæ nostræ magis analogæ, facilius in nostram vertitur substantiam.

A C I P E N S E R.

Piscis est animal pedibus carens, pinnis instructum, branchiarum seu pulmonum ope respirans, aquæ plurimum innatans. Alius est *cetaceus*, alius *cartilaginosus*, alius *spinofus*. *Cetaceus* dicitur, qui viviparus est, & magnitudine eximia, & pulmonibus veris, caudaque horizonti parallela instructus. *Cartilaginosus* ille est, qui pinnae cartilaginibus sustentat, & intrinsecus pro spinis cartilagines continet. *Spinofus* tandem, cujus pinnae spinis sustentantur, cujus cauda horizontalem naturam habet situm, quique spinis instructum habet corpus.

In numerum piscium cartilaginosorum igitur referatur & acipenser, cujus notæ characteristicae generales sunt: foramen ex utroque latere unicum pro branchiis; os illis inferius, tubi instar formatum, nec dentibus instructum, corpus tandem oblongum, & septem plerumque pinnis munitum. Duas saltem ejus species descriptione nostra pertractabimus, quarum frequentior est usus in Medicina.

Sturio. Offic. Schrod. 333. Bellon. *de Aquat.* 101. Gesn. *de Aquat.* 931. Aldrov. *de pisc.* 517. Jonst. *de pisc.* 75. Willughb. *Ichth.* 239. Raii *Synop. Pisc.* 112. Dal. 405. Lemer. 843. *Acipenser*. Rondel. *de pisc.* 40. Charlet. *de pisc.* 34. *Acipenser sive Sturio*, Schonev. *Ichth.* 9. *Acipenser, sturio*. Merr. *Pin.* 188. *Sturio sive Silurus*. Salv. *de Aquat.* 113. *Acipenser, corpore tuberculis spinosis aspero*. Artedio *Gen.* 65. *Syn.* 91. Linn. *Faun. Suec.* 271. *Galeus Rhodius* Athencei; *Jus* Isidori, *Oniscus* Dorionis; *Galaxias* Galeni; *Sturio minor*, seu *Oxyrrynchus*, *Piscis scrutator*, *Acipenser sive Aquipenser*, *sturio verus Auctorum*, & ut *Helops*; *sturio primus*, *sturio vel stora*. Nonnull.

Corporis figuram acipenser habet longam, pentagonam, & quidem totidem ordines squamarum seu colliculorum osseorum, quinque illa latera constituunt. Venter ejus depressus, & squamæ ordinis primi, præ reliquis elevati, & dorsi in medio constituti, reliquas magnitudine superant. Nec tamen constanti absolvitur numero squamarum, jam enim 11., jam 12., jam 13. numeravimus. Hic igitur ordo ad dorsi pinnam protenditur, illamque unicam, & piscis caudam versus respicientem. Ordines laterales, quorum singuli 30. vel 31. spinas continent, a capite ad caudam proficiscuntur. Ordines inferiores tandem, & ex latere partem ventris depressam terminantes in primo pinnarum pari exoriuntur, in secundo desinunt, & singuli, jam 11., jam 12., jam 13. squamis absolvuntur. Squamæ autem ordinis cujusque singulæ, in summitate sua spinam brevem, fortem & posticus reflexam ostendunt. Præter quinque, de quibus diximus, ordines, duæ adhuc squamæ, sub ano, in medio ventris reperiuntur. Caput sturioni est mediæ magnitudinis; corpus intra ordines spinarum ita ut caput, tuberculis seu aculeis exiguis consitum; linea ex spinarum ultima exoriens, & apicem caudæ pertingens; & oculi, corporis respectu, exigui, irideque argentea donati conspiciuntur. Rostrum sturionis est longum, latum, tenue, & in cuspidem desinit. Nares ejus prope ad oculos utrinque duplices sive binis foraminibus perforatas videbis. Tum quatuor barbæ, recta linea procurrentes (quæ tamen rostri respectu transversalis est) & ex inferiore superficie rostri depressi, in mediam ejus longitudinem, ultra

os prominentem, pendentes. Os ipsum exiguum est, dentibus destitutum; oculorum regioni fere oppositum, instar tubi jam producendi, jam recipiendi, efformatum. Maxillis sturio caret, &, quod satis clare exinde patet, sugendo nutrimentum recipit. Quatuor habet branchias, quarum spinæ duplici ordine dispositæ, exiguæ, nec suis operculis penitus obtectæ sunt. In quovis operculo autem unica lamina seu squama conspicitur. Pinnae par primum branchiis proximum, ut in pluribus, & pinna quævis radium fortissimum ac osseum in anteriore sua parte ostendit. Par vero secundum ano vicinum, & ab extremitate caudæ $\frac{1}{2}$ fere suæ longitudinis distans; tum ano & caudæ origini intermedia pinna; cauda ipsa talis, qualis in cane marino esse solet, id est ita bifida, ut pars superior cum corpore attenuato connexa, longe satis promineat ultra inferiorem. Corporis superficies suprema coloris oleagini, seu cœruleo-nigridi; infima autem argentea; & squamæ mediæ albidæ sunt. Stomachus ab initio recta descendens, post recurvatus adscendit, tandem vero arcus instar denuo descendit. In pyloro ejus conspicitur cumulus appendicium brevissimarum & tenuissimarum conglomeratus; & hepar pallidum; & fellis vesicula aperitissimo ductu ad duodenum, instructa; & vesicula aeris simplex, membranosa & a dorso facilis separanda alio ductu ad Oesophagum conducente gaudet; compressa enim vesicula statim stomachus ipse turgescit; & lien oblongus, sanguinis instar rubicundus; & intestina unica tantum circumvolutione inflexa. Vir Cel. *VVillughby*, in observando adcuratissimus, dux autem nobis, & in hac descriptione, & in posterum, ille inquam, est, qui addit: sese in binis, quos dissecuit, sturionibus, abdominis cavitatem vermibus albis, oniscos nostros referentibus repletam vidisse.

Quum Venetiis commoraremur & Romæ (sic pergit Auctor Clarissimus) quotidie fere sturiones sed exiguos, venum expositos vidimus, indicio, quod frequentiores Adriaticum quam Tyrrhenum mare teneant. Observante Cel. *Kondelet*, sturio mari detentus vix ultra ulnam unam excrescit, fluvio autem immorans cetacei piscis magnitudinem pertingit. *Gesneri* amicus, teste seipso, Antverpiæ sturionem 14. pedibus longum vidit. Pro diversitate terram, ait Cel. *Belon*, varia est magnitudo sturionis, & qui in Mari Adriatico, Mediterraneo, Oceano & Ponto Euxino capiuntur, varii, imo quos Ligeris alit, illi interdum 3. ulnarum longitudinem adtingunt. Sic *Francisco* I. Regi ac literarum restauratori, quum Montis Agri degeret, sturio 18. pedum longus exhibebatur. Referente *Schonevelde* difficillime sibi debitum incrementum capit sturio, nisi alterna maris & dulci aqua fruatur. Subscribit experientia, & ad sturiones juniores, ex mari in piscinas seu lacus deportatos provocat. Hac ratione igitur aliquoties in magnitudinem tauri excrescit; & *Cardanus* sæpius sturiones vidit, qui 180. librarum pondus separabant. Albis, fluvius, alios præbet, qui vel 200. libras pondere explent. Et *Joannes Fridericus*, Elector, sturionem 260. librarum cepisse dicitur. Libenter, sic *Paulus Jovius*, fluvios magnos intrat sturio; hinc frequens in Nilo, Danubio, Tanai, & Eridano capitur, Maximos quoque sturiones, prope Montem *S. Gertrudis* in Belgio captos vidit Cel. *VVillughby*. Haud minoris notæ utilitatem, sic *Belon*, sturiones, & præsertim in Ponto Euxino subministrant. Mare enim exspatiantes Paludem Mæotidem intrant, & in ostio Tanais, fluminis, copiosi reperiuntur. Præsentif-
simo

fimo sale piscatores ova ejus & carnem conspergunt, doliis immittunt, & magni vendunt. Hæc ova sale condita, suo idiomate: *Caviari* audiunt. Sale conspersos sturiones ad longum findunt, super perticas soli exponunt, arefactis naves implent, & in Græciam revertentes civibus vendunt. Idiomate Græcorum vulgari: sturio recens: *Xivichi*, sale conditus autem *Moronna* dicitur. Sale condita caro ad Italos deportata: *Spinalia* & *Schenalia* vocatur, siquidem ex spina dorsi desumpta est. Ibi locorum adeo frequens est hujus cibi genus, ac apud nos haleces, & apud Italos thunnus salitus; nobis vero plane incognitum. Jam, quum & illi, & qui in Eridano degunt, sturiones, nulla ne vestigia quidem squamarum, nec cutim, nostratium instar, asperam exhibent: Judæi nec *Moronnæ* nec *Caviar* comedunt, quippe quorum legibus, usus piscium squamis carentium interdictus est. *Caviar* ipsum, seu ova ex fœmellis tantum proveniunt, masculis suum lac est. Nec nisi unica sturionum species, conficiendo Caviari, ut unica mullorum, præparando Botargo sufficit. Præter ea autem ex vesicis albis, ad longum sturionis dorsum sitis, varieque a variis nuncupatis ichthyocollam conficiunt. Ne plebs quidem Constantinopoli degens Græca, sturiones recentes tantis ac nos in delitiis habet, nos enim falsa opinio tenet occupatos, quod piscium omnium delicatissimus sit sturio recens.

Caviaris, quod Galli: *Caviar*, *Caviare*, *Casiar*, *Cavia*, *Kavia* *Caviac*, *Cavial*, *Caviat*, dicunt, hujus, inquam, præparationem *Gesnerus*, ex *Plotino* hauriens, ita exponit: Accipe ova sturionis, & nervis quibusdam, qui intertexti erant, retractis, aceto vel candido vino illa lava, deinde ut exarescant, in tabula expande. Tum vasi immitte; sale consperge; solius manus auxilio contunde; sacculo telæ rarioris, quo humor destillet, inde; imo vasi in fundo perforato, ut vel residuus liquor defluere possit, committe; vasis ligneis immitte & probe comprime. Hac ratione præparatum per totam Europam deportatur.

Quam Belgi in frustula dissecant, tum sale & muria condiunt, sturionis carnem, magni habere solent Angli. Frustula ejus majora carnem apri nam quodammodo referunt.

Numquam fere, *Paulo Jovio* teste, in pelago capitur sturio. In marina scitur, in fluviis autem nobilitatur, ibi enim deposito inamæno maris sapore, saporem gratissimum & pinguedinem induit. Terram, sub aqua, sic ait *Gesnerus*, rostro, tamquam fues, suffodit, sic vitam quærit & alimenta. Hinc etiam Germanorum idiomate: *Stoer*, adpellatur; vox Germanica, enim, *Stoeren*, lutum suffodere significat.

Sturiones, & præ primis ii, qui ulnæ longitudinem excedunt, retis, non hami ope, capiuntur; & referentibus piscatoribus sæpissime retium maculas lacerant; ac quum ore ad corripiendam escam apto careant, nec devorando, sed sugendo potius vivant; hami auxilio captari nequeunt. Hinc etiam in ventre eorum nihil alimenti crassioris, nec præter humorem viscidum seu glareosum, quidquam reperies. Exinde quoque sinistra opinio, quod tantum aere vivat, cujus ergo apud Germanos, per proverbium dicunt: *sturionis instar sobrius*.

Nec mediocri robore gaudet, sive aquæ insit, sive ventre suo terræ innitatur. Hominem fortissimum quemvis dum vix tetigerit, uno caudæ ictu prosternere, & perticas maximas confringere potest. Vel ex lapidibus, suo ictu,

ictu, ignem elicit. Hinc & piscatores illum tractando multum cautionis adhibeant, necesse est, ne vel crura eorum frangat, vel retia dilaceret. Horum dexteriores eum oram versus adigunt, reti, ex latere prætento, & quum ripam adtigerint, caput ejus elevando in altum, terra depresso detinere quærunt, sic enim violentior ejus motus impeditur. Alii ad reprimendos caudæ ictus, extremitatem caudæ capiti in circulum colligant, sic absque ullo periculo currubus, equis vel bajulorum humeris imponatur, quolibet deportetur. Funiculo cymbæ adhærenti nectatur, sic per octo dies aqua detentus vitam conservabit. Danubii piscatores harpagone sturiones in arena dormientes, teste *Alberto M.* feriunt. Et qui in Eridano piscantur, sequentem in modum eum capere solent: tres quatuorve ex illis cymbam conscendunt, ac si quem sturionem detexerint, insequuntur, tandem oram versus adigunt. Quum vado proximus sit sturio, repentinum illi tumultum movent, quo ille perterritus vadum intrat, facilis prædæ venit, deest enim aquæ profunditas, cui innatare possit, sufficiens.

Nec in stagnis reperitur, ibi enim diu vivere nequiret. In Garumna frequentissimus, communi Burdigalensium cibo venit. Amicus salmonis habetur, imo dux ejus a piscatoribus dicitur. Caro dorsi vitulinam, & ventris porcina sapore refert. Nec lacte ejus delicatius quidquam novimus.

Quod ad denominationem hujus piscis adtinet, varia disputarunt *Salvianus*, *Rondelet*, *Belon*, *Gesner*, & *Aldrovandus*. Nos autem in hanc controversiam descendere nolumus, adserimus tamen quod sturio, nec *silurus*, nec *lupus* antiquorum, nec Italicorum *Adono*, nec Plinii *Tursio*, nec *Hycca* nobis videatur, nec *Delphinus*.

Quod ad etymologiam, si fidem habeamus *Cel. Lemery*, patri, sturio acceptum refert nomen suum proboscidi cuspidatæ, cujus forma est similis aquæ glaciali, hyemis tempore ex tectis domuum pendenti, cui nomen Latinum est: *Stiria*. Ast ex mente *Julii Scaligeri*, & *Jonstonii*, vox *Sturia* est Gothica. Alii nomen ex Asturia, quæ Hispaniæ est provincia, derivant. Interim notandum venit, quod fere in omnibus Europæ linguis analogo insigniatur nomine. Sic dicunt Itali: *Sturione* vel *Storione*; Hispani: *Solbo*, vel *Sulio*; Germani: *Stoer*, vel *Stur*; Angli: *Sturgeon*; Sueci: *Stoer*; Dani: *Store*; Belgi: *Steur*; Provinciales & Occitaniæ incolæ: *Sturium*; quæ nomina omnia Latino: *Sturio*, originem debere videntur. Vox Gallica: *Esturgeon* seu *Estourgeon* ex Ablativo: *Sturione* formatur, mutata namque in vocali, in *j* consonantem (*Sturjone*;) olim *Estourgeon*, jam *Esturgeon* rectius dicitur. Burdigalenses dicunt: *Creac*, ex Græco: *Kreas*, caro; ex mente namque auctoris cujusdam recentioris, caro ejus carni quadrupedis similior est, quam carni piscis.

Continet autem acipenser multum olei & salis volatilis. Summo olim erat in pretio apud Romanos, qui pro mensæ delitiis illum habebant. Seligendus interim est junior, bene nutritus, & quam reperiri potest, delicatissimus. Sunt, qui volunt, quod aqua dulci captus sit præstantior; ast eximior est, qui captatur in mari, præsertim quum longe a ripa captetur, alias enim, quod hic notamus, gustus sui ergo multo est inferior illi, qui flumina intravit. Jure tamen inter delicias mensæ referatur, ast nutrimentum nimium præbet & adeo crassum, ut ex mente Medicorum quorundam idem inter pisces sit sturio, quod inter quadrupedia, porcellus. Carne

Scilicet est duriuscula, pingui & concoctu difficillima. Qui igitur stomachi sunt debilioris, ut: qui in urbibus vivunt, & literarum cultores, imo & ex morbo revalescentes, omni ejus usu abstineant; ast juniores, robusti & fortiores, qui stomacho quævis probe concoquente gaudent, illo pro lubitu utantur; siquidem nutrimentum abundantius, solidum æque ac durum, & corporis horum constitutioni conveniens exhibet. Mas plerumque foemella est præstantior, ast quum ova secum gerat, tunc non solum horum, sed & carnis delicatioris ergo hæc illi antefertur. Mensis nostris sturio vel in craticula assatus, vel paucio juscule elixus, inservit. Et quum coctione multum adipis ac visciditatis suæ amittat, merito saluticonvenientior habendus est. Adeps sturionis ille est, qui fibras stomachi & intestinorum relaxando & debilitando, ventrem laxandi facultatem sturioni inducit. Cartilago illa tenera ac crassior, quæ a capite ad caudam usque protenditur, exempta & sole arefacta pro cibo delicatissimo, jure quidem, habetur.

Ars Medica ossa ejus seu spinas, & Caviar ex illo proveniens in suos usus convertit. Est autem Caviar massa quædam Saponi viridi Hamburgenfi, quoad colorem & substantiam similis, & ex Moscovia, Italia, aliunde frequens ad nos deportatur. Maxima sturionum copia in ostio Rhæ, aliorumque fluminum, Mare Caspium intrantium capitur, & mercatoribus Italicis in Moscovia degentibus frequentissimum Caviar, mercem amplissimi emolumenti, præbet. Illi enim Caviar sale conditum & exsiccatum, eodem in flumine ad Moscoviam, Regni caput, transmittunt, exinde autem per omnes provintias deportatur. Moscoviæ incolis utilitati maximæ cedit, siquidem triplex sibi præceptum quadragesimale jejunium exactissime observant. Italis frequentissimo cibo venit, imo hodie & Gallorum palato arridere incipit, procerum menfas jam explet. *Belonio* teste, aliud Caviaris genus, hoc ignobilius, & Judæorum cibo accommodatum ex ovis carpionum præparatur.

Ossa sturionis aperitiva, contra rheumatismos, arthritidem, ischiaticam & calculum adhibentur. In pulverem redacta, dosi ℥j. ad 3j., vel in bolo, vel potioni diureticæ mixta accipiantur. Caviar autem, teste *Cel. Dale*, substantia succulenta & solida, sperma auget, & ad generationem disponit.

Sturio tandem & ichtyocollæ speciem cinereo flavidam suppeditat, quæ in foliis, nec convoluta, prostat; illa igitur solutu difficilior est, ast soluta, eandem, quam alia, virtutem præbet.

Ichtyocolla. *Offic. Bellon. de pisc.* 104. *Rondel. de pisc.* 177. *Dal.* 405. *Huso Ichtyocolla*. *Schrod.* 329. *Huso*. *Jonst. de pisc.* 77. *Huso Germanorum* *Gesnero* & *Aldrovando*. *Willughb. Ichth.* 243. *Raii Syn. Pisc.* 113. *Acipenser tuberculis carens*. *Art. Ichth. Gen.* 65. *Syn.* 92. *Eso* maximus, *Mario* forte *Plinio*. *Ichthyocolla Piscis; Piscis exos, sive exossis; Piscis major Danubii. Quorumd.*

Ichtyocolla rostrum præbet longissimum; huic inferiores 4. vel 8. barbulas; pinnam dorsi unicam, caudæ vicinam; duo pinnarum ventris paria; figuram lucio accedentem; ventrem, carpionis instar, flavidum; dorsum nigrum; corpus squamis destitutum, ossium loco cartilagine; os hians atque amplissimum; oculos tandem, corporis respectu, exiguos.

Albertus M. illum acipenseris speciem dicit, cute albida & leni obtectum, spi-

spinis, squamis, ossibusque carentem, excepto tamen capite; & pro spina dorsi, cartilaginem tamquam terebra perforatam, ut magnum foramen a capite pertingens ad caudam, ostendentem. Sturio communis libenter huic se adfricat, ac pro delectatione, interdum vero & ventrem ejus acutissimis dorsi sui spinis, pungit, fauciat. Ichthyocolla autem animi mitioris & adeo timidus est, ut vel pisciculum quemvis, tamquam hostem, fuga evitare studeat. Nec tempore quovis, sed transmigrationis suæ periodo tantum capitur. Quotannis enim mare egrediens, Danubium intrat, quo quidem tempore, & præsertim ab autumno usque ad Januarium, mensem, in Dacia alpestri, Danubiique ostiis, Octobre & Novembre, mensibus, frequentissimus obvenit. Et Viennæ, quæ Austriæ caput est, omni Veneris die 50. 60. imo & 100. ichthyollæ coemuntur. *Gesnerus* est, qui refert: ichthyollas agminatim natando incedere, & tubarum sono exaudito adcurrere; quem piscatores excitare norunt, & retibus suis irretitos, aduncorum ope in oras protrahunt. Quousque aqua detinentur, vi summa gaudent acrobore, imo vel uno caudæ ictu, cymbam piscatoris evertere valent; ast capite extra aquam prominente, abeunt vires, vix vitam conservasse videntur. Minimi illorum 50., plurimi jam 100., jam 200., jam 300., imo 400. libras suo pondere explent. *Albertus M.* ichthyocollam, si omne sibi destinatum incrementum cum ætate adtigerit, 24. pedibus longum, & tanti ponderis esse testatur, ut trigis imo quadrigis vix protrahi possit.

Notat *Villoughby*, quod nec descriptiones, nec figuræ Ichthyocollæ *Rondeletii* & *Belonis*, huic nostro Ichthyocollæ competant. Et *Cel. Raii* censet, quod non solum in Danubio, & in aliis fluminibus in Danubium egestis, hic piscis reperiatur; sed etiam in Eridano & Boristhene; etenim hujus Antaceum, & Eridani Adano, Ichthyocollam esse putat.

Germanice dicitur: *Huso*, *Husen*, vel *Hausen*, siquidem magnitudinis suæ vastissimæ ergo, domui, Germanice: *Haus*, similis est. Orientales eum nuncupant: *Barbota*, id est Barba prolixa, ob barbas suas; alias: *Moronna*, vel *Collano*: Italice vocatur: *Copso*, seu *Colpesce*, per Metonymiam partis pro toto, id esset: piscis ex quo gluten seu Ichthyocolla præparatur. Hoc ex testimonio *Belonis* Gallice: *Husblalich*, seu *Husblac* nuncupatur, cui respondet: *Hausen Plosen*, nomen Austriacum, seu potius: *Haus-Blase*, castius Germanicum; quod Ichthyocollæ vesicam denotat; respondet & Græcum atque Latinum: *Ichthyocolla*.

Multum olei & aquæ, ast parum salis volatilis ichthyocollæ inest. Caro ejus vix frequentiori venit usui, quippe quæ subdulcis, viscida, & insipida est, nec saporis jucunditate carnem sturionis attingit. Quidquod nisi sale condita, ne quidem esui est, sale etenim corrigitur, sale ut salmo rubescit, sed indurefcit. Hinc antequam ebullienda erit, diutius aqua maceretur; deinde eodem modo, quo apud nos asellus, cibo præparetur. Medicinæ autem æque ac artibus utilissimum gluten, seu ichthyocollam piscis hic præbet. Hæc non est, nisi substantia albida-flavescent, viscida, odore carens, & spirali forma induta; ac sequentem in modum præparatur: Pellem, viscera, stomachum, pinnas, caudam & aeris vesiculam piscis in frustula dissecant, tum aqua calida macerant, denique parcius ignis ope ebulliunt, usque dum partes omnes solutæ in pulvem abierint. Hanc formis, hujus ergo effectis infundunt, quo arefciendo membranæ formam induat;

duat; & antequam prorsus exsiccata fuerit, in funiculos seu quamlibet aliam figuram contorquent.

Quam Galli adhibent Ichthyocollam, ex Belgio accipiunt, quo ex Moscovia deportatur; ibidem enim maxima ejus componitur quantitas. Seligenda venit illa, quæ in funiculis seu lineis minoribus præparata, albida, clara, pellucida est, ac nullius odoris; quæ in funiculis reperitur majoribus nonnunquam flava, arida, & mali esse solet odoris. Capsulis autem, arido in loco conservandis, reponatur; nam aeri exposita facile humiditate adficitur.

Ichthyocollam igitur, gelatinam mediante aqua calida ex piscibus extractam esse vides. *Schroder* est, qui eidem & exsiccativam, & epuleticam, & anodynā, emollientem ac sanguinem spissiore reddendi virtutem inesse censet. Hinc egregie confert pro ulceribus gutturis & pulmonum, nec non dysenteria, si loochibus lenitivis ac morbo convenientibus admisceatur. *Nicolai Myrepsi* Trochisci ac Pastilli contra hæmoptysin ex ichthyocolla præparabantur. Alii eandem contra menstrua mulierum albida, plurimi tamen pro componendis emplastris conglutinantibus adhibent.

Vino turbido limpiditatem conciliant ichthyocollæ auxilio. Oenopolæ enim sufficientem ejus quantitatem in vino solvunt, & hanc mixturam dolio immittunt; sic pellis crassior in superficie liquoris oboritur, eaque sensim fundum petendo, omnes vini particulas crassiores secum deportat, ut vinum haud percolatum, sed colans vinum transiisse dicendum sit. Nec tamen nocivam qualitatem exinde contrahit vinum, imo optandum foret, si nullo alio, tamque innoxio modo, suum vinum corrigere studerent omnes.

Venit tandem ichthyocolla conciliando splendori vittarum sericarum; venit candori, telæ rariori, quam nostrates: *Gaze* dicunt, induendo; inservit etiam ad effingendos uniones arte factos; variosque artium usus alios. Liquefacta saccharo mixta, & denuo excocta, præbet gluten flavidum ac pellucidum, quod oris saliva irrigatum, conglutinandæ sufficit chartæ; quoque delineatores, sub nomine: *glutinis oris*, utuntur.

Ingreditur etiam Emplastrum *Diachylon magnum* Pharmacopœiæ Parisiensis.

℞. Ichthyocoll. in f. q. aquæ plantagin. solut. ℥j.

Sanguin. Dracon.

Boli Armeniac. ana ℥j.

Olei amygdal. dul. rec.

Syrupi consolid. major.

Alcacæ ana ℥j.

M. f. Looch, per cochlearia exhibendum, contra ulcera gutturis & sanguinis sputum.

A N G U I L L A.

Anguilla. Offic. Schrod. 325. Merr. Pinn. 188. Aldrov. de Pisc. 544. Gesn. de Aquat. 40. Rondel. de Pisc. 198. Charlet. de Pisc. 34. Salv. de Aquat. 295. Jonst. de Pisc. 81. Dal. 402. Willughb. Ichth. 409. *Anguilla omnium auctorum, ἄγχελις* Græcis, Raii Synop. de Pisc. 37. *Muræna unicolor*, maxilla inferiore longiore. *Artedio*. Gen. 24. Syn. 39. Spec. 66. Linn. Faun. Suec. 290. *Helena cænarum*, *Regina gustus seu voluptatis*. Nonnull.

Geoffroy. Tom. III. Pars I.

N

Ca-

Caput, corporis respectu exiguum habet anguilla, antèrius depressum, posterius autem conglobatum; corpus longum, ex lateribus, & in primis ab ano ad caudam, parum depressum, lubricum, & ut videtur, squamis destitutum; illæ enim non nisi in arefacta cute adparent. Maxillam superiorem ultra inferiorem prominentem. Quatuor in universum foramina; eorumque duo anteriora, ex quovis latere unum, in extremitate rostri; & duo posteriora, oculos immediate antecedentia, quæ non sunt nisi nares ipsæ. Tum oculos ex quavis capitis parte, rotundos, exiguos, pelle solidissima & parum diaphana tectos; iridem obscuro-rubicundam; pupulam nigridam, exiguam, rotundam; 16. foraminula in inferiore, ast plura in superiore maxilla; branchiarum membranam ope 10. utrinque officulorum sustentatam, seu potius totidem spinarum gracilium atque reflexarum, difficile tamen, ob crassitudinem pellis conspiciendarum; & varios in utraque maxilla denticulorum ordines; in anteriore palati parte officulum dentatum, reliquam vero ejus partem lævem, ad longum sitam, & dentibus maxillæ contiguam; tum superne jugulum versus, duo officula oblonga & dentata; totidem etiam inferius, versum branchias, hæc tamen magis oblonga & minus dentata; linguam lævem, inferius parum liberam, ast immobilem, in media enim sua parte osse quodam duriore suffulcitur; vaginas branchiarum, quas nec infra nec supra apertas, sed ex latere anteriore saltem, prope ad pinnas pectorales, foraminulo 3. ad 4. linearum longo, & perpendiculari instructas videbis; lineam lateralem rectam dorso antèrius viciniorem, & corpus ipsum ab ano ad caudam in duo separantem, nec non inferius serie punctorum sive pinnarum ornatam; dorsum, latera, & pinnas cinereo-nigridas, in aliis & pinguioribus præsertim, virescentes; ventrem flavo-albidum; anum capiti magis vicinum quam caudæ; tres pinnas in universum, pectoralium scilicet utrinque unam, branchiis vicinam, exiguam, nigridam, 18. ad 19. ex spinis conflata, quarum extremæ minores, mediæ autem longiores & apicis bifidæ sunt; dorsi pinnam unicam, satis longe a capite exortam, & totum fere corpus circumagentem, ad anum a cauda extensam, 3. 4. ad 5. lineis altam, & ex plurimis spinis apice bifida, ac tam multitudinis suæ ergo, quam ob crassitudinem membranæ ægre computandis, compositam; caudam, sive extremitatem pinnae dorsalis nec rotundam nec quadratam, sed potius acutioris apicem exhibentem; 4. branchias ex latere quovis, quæ in parte sua convexa, vasa sanguineis similia ostendunt, nec tuberculos seu apophyses in concava; cor quadrangulare, & quasi conicum; aortam albidam; hepar pallidum, rubicundum ac in duos lobos divisum, quorum sinister maximus est; Bilis vesiculam magnam, ab hepate, suo spatio distantem. Oesophagum longum. Stomachum sub hepate, haud adeo longum, in altum reflexum, tum vero productione longa & crassa, usque ad anum, & intestinum rectissime ab hepate eo usque descendens, inferius recurvatum. Nullam in pyloro appendicem cœcalem. Lienem oblongum & triangularem sub stomacho. Vesicam aeris oblongam, simplicem, spinæ dorsali adhærentem, & in parte sua superiore conductum pneumaticum majorem, ab aliis habitum pro altera parte vesicæ, natatui piscis venienti. Renes magnos, ad longum spinæ dorsalis productos, infra & anum versus crassiores, & cuidam quasi pelvi impositos. Vertebrae 116. in universum, easque

in lateribus depresso, debiles, & ubi caudam vergunt, exiguas. Costas brevissimas, apophysis lateralibus leviter adhaerentes. Spinastandem minimas, per omnem carnem dispersas. Omnis anguillae longitudo, 20. digitis & 1. linea absolvitur.

Quae quidem ex *Petri Arredi* historia piscium, quam *Cel. Linnæo* publici juris factam debemus, hausta sunt; imo fontem adeo limpidum atque exuberantem saepius & in posterum adeundi propositum tenemus.

Anguillarum, sic teste *Gesnero* ac *Rondeletio*, *Aldrovandus*, duplex genus est, alterum majus, minus alterum. Illud praestantius, & capite brevior, crassiore atque latiore, corporis vero colore castaneo est, in fundo aquarum degit, & deficiente aqua, coenum quaerit quo delitescat. Huic autem longius caput est ac acutius; hoc, teste *Gesnero*, cadaveribus in aquam projectis, delectatur, & suo pectore diversum, id est, flavescentem ostendit colorem. Nec tamen sua ipsius experientia, sed aliorum relationibus fretus, duplex anguillarum genus statuit apud Batavos. Quas sexus ob diversitatem varias esse censent Occitanienses, *Rondeletio* auctore. Nos autem *Cel. Willoughby* accedimus, & pro varietate loci, nutrimenti, similium, tum magnitudine, tum colore, tum figura externa inter se quod anguillae differant credimus; at specie easdem diversas esse negamus. Potiori jure *Salviemus*, anguillas, ventrem candidiorem imo nitentem ostendere docet, quae limpida, & pleno alveo vecta in aqua vivunt; has Angli majori in pretio habent, & anguillas dicunt *argenteas*.

Omnem vero anguillam in aqua dulci enasci vult *Cel. Rondelet*, nec ullum ex piscibus nisi hunc, mare ingredi, seu stagna ex mari orientia, ceterum in lacubus, in fluviis & stagnis aquae dulcis degit. Quamvis igitur non nisi in aqua dulci enascantur anguillae, lacus interdum salios seu amaros intrant, paludes sulphureas, alumen olentes, & sic loco vivunt diversissimo ab hoc ubi fuerant nati; interdum & puteos, fontes, cisternas, lacus salios ingrediuntur, ibidem crescunt, vivunt, pinguescunt. Rarissime ipsum mare, ex quo lacus oriuntur intrant, quo facto, sic piscatores loquuntur, carnem imo brevibus vitam amittunt. Cuidam Occitaniae lacui, anguillas 3. ad 4. ulnarum longas immorari docet idem ille *Rondelet*, Italicas autem vel 20. librarum pondus pertingere refert *Aldrovandus*. Branchiis angustis ac pelle relictis quum anguillae gaudeant, faciles suffocantur in aquis turbidis seu vento agitatis, at diutius extra aquam vivere possunt. Aquam dulcem, limpidam & claram peramant. Quam ob rem & piscatores illas captatum, vel peracta pluvia vel studio agitata & turbefacta aqua illis insidiantur, unde proverbium: *piscari in turbido*. Multum autem requirunt aquae, alias namque moriuntur; id quod accidit & variis piscibus aliis. Sunt qui censent, quod anni temporum mutationem notabilior perferre nequeant; quodque aetatis tempore immixtae aquae calidiori quam illa cui inerant, extemplo moriantur. Adserunt alii, quod ad sextum usque diem vivere possint extra aquam flante borea. Nec sola vivunt aqua, ut quidam perhibere, sed & herbis, radicibus, praesertim pisciculis, ranis, ac ejusmodi insectis ut vermes sunt terrestres, vermes aquatici, brevi: omnibus quae in fluminis fundo inveniunt, siquidem haud in superficiem aquae sese adtollunt. *Atheneus* est, qui sese in quibusdam terris vidisse refert anguillas adeo domesticas, ut manu oblatum cibum acceperint.

ex manu. Et *Derham* in *Theologia Physica* sequentia profert, inter reptilia, quæ mirabili quadam facultate victum sibi acquirendi gaudent, merito referantur & anguillæ, quæ licet aquatiles, tamen & in terra repere, & ex uno stagno, vel piscina in aliam migrare possunt. Cel. *Mosely* observavit anguillas in pratis serpentum instar, ex fovea in foveam, repentes; id quod non solum ob domicilii locum mutandum, sed & limaces in herba latentes reperiendi gratia, fieri censet. Anno 1125. ob frigoris vehementiam anguillæ aqua egressæ, in pratis frigore enecabantur.

Tenacioris vitæ est anguilla; etenim vel subtractis exuviis, in frustula dissecta, præsertim vero cor ejus, per aliquod tempus movetur, & palpitat. Communiter 7. vel 8. per annos vivit. Testis est *Albertus M.*, quod nec in Danubio, nec aliis fluviis, in illum exeuntibus reperiantur anguillæ, imo iisdem immissæ, statim moriantur. Dicitur, quod adeo tonitrua extimescant, ut ex aquæ imo in superficiem innatent. Victum præcipue quarunt noctu, interdium vero profundissime latent.

Circa generationem anguillarum in varias sententias abeunt auctores. *Aristoteles*, dux ille, & princeps Physicorum, in nullis, quas dissecuit, anguillis, quandam sexus differentiam sese observasse, testatus est; addit, quod careant & semine, & ovis, matrice, vasibusque spermaticis, hinc nec sese generatione possint multiplicare; itaque coniicit quod nec coeundo, nec ex ovis, sed ex cœno calefacto per putrefactionem juxta stagnorum & fluminum ripam, enascantur. Et *Plinius* ait, inter anguillas sexus, haud esse differentiam, sed scobes, ex corpore earum abrasas, dum rupibus se adfricant, sensim animari, & tandem in totidem abire anguillulas. Dissentiunt ab illo *Atheneus*, & *Oppianus*; statuunt enim, quod cumulatim collectæ, omnes invicem coeant, ex quo viscositas quædam defluxa, & in luto retenta mirabili anguillarum quantitati vitam largitur. Dicunt ex piscatoribus quidam, quod cum serpentibus coeant anguillæ, id quod *Aldrovando*, jure suo, fabulam redolere videtur. Alii credunt, quod præcipue ex equorum cadaveribus progignantur. *Rondelet*, quem pro Physico, & fide digno, & curiosissimo merito habemus, adserit: sese vidisse anguillas cohærendo coivisse; nec partes genitales ipsis denegare, siquidem in parte ventris inferiore, vulva in foemellis; in masculis reperiatur sperma quamvis omnes hæ partes adeo involutæ sunt adipi, ut ægre, ac vix quidem detegi possint, atque videri. Minus nobis arridet, quod idem ille *Rondelet* statuatur: haud omnes eodem modo generari anguillas, sed quasdam nasci ex putredine, seu luto, reliquas coitu maris, & foemellæ. Eadem *Sebizio* est sententia. Notissimum est (sic iste inquit) glires, ac varia insecta alia, modo ex spermate oriri, modo ex corruptione, id quod in plantis adparet. Ast pace *Sebizii* observamus: quod prædictæ plantarum, æque ac animalium productiones spontaneæ, sint fictitiæ. Interim *Abrahamus Mylius* sequens commendat arcanum ad producendas anguillas. Maii tempore, quum ros fuerit copiosior, ante solis ortum rescindas duos cæspites æquales, hos decussatos reponas supra herbam, quæ in ora est piscinæ, Septemtrionem versus sitæ, ubi radii solares refrangantur. Paucis abhinc horis, copiam anguillarum minutarum exinde pullulantem videbis. Ast nobis videtur *Mylius*, vermium forsan cumulum pro anguillulis habuisse; concessio autem, quod revera fuerint anguillæ, nonne a foemella eo depositæ

litæ esse potuissent? Majori adtentione dignum est, quæ de Alosa refert *Schwenkfeldt*; testes sunt (sic ille) piscatores, suffragatur & experientia, non solum Alosas, sed & anguillas progigni ab Alosa; Aprile etenim sub ejus branchiis 4. vel 5. nata conspiciuntur animalcula, forma vermium induta, ac fili instar albidii conglomerata; hæc, statim ex eo, quum movendi obtineant facultatem, aquæ innatant, citissime crescunt, & anguillarum figuram accipiunt. Nec minus miranda veniunt ea, quæ de generatione anguillarum a *Schoneveldio* relata leguntur, quod nimirum pisces inter illos, quos patria ejus aqua subministrat, varii veras producant anguillas, illasque æstate sub cute partium carnosarum nutrant; recenset hos pisces auctor, qui sunt: alosa, saperda, muræna, asellus, perca. Æstate igitur minori in pretio habentur pisces. Communis hæc est omnium (sic laudatus pergit auctor) opinio; cui & nos nostrum quin adiiciamus calculum, nulli dubitamus. Ast hæc omnia non nisi fictitia sunt; pro certo habeas illud: quod diu generatio anguillarum fuerit incognita. Ex *Francisco Redi*, Florentino, interim edocemur, quod, quæ fluvio Arno insunt anguillæ, quovis Augusto, mare intrent, in eodem vero anguillulas excludant, ascendentes ac revertentes ex mari in flumen, Februarii plerumque Martio & Aprile. Alii de omnibus anguillis idem adserunt; ast quam ratione progignuntur, tacent. Imo nec *Villughby*, nec *Rai* quidquam certi se adferre posse profitentur.

Boeclerus interim opinioni antiquiorum hodiernam anteferendam judicat, qua anguillas piscium instar coire, & ovis originem suam debere volunt. Animalcula enim ab anguillis viviparis producta, originem ex ovis habere possunt. En hujus rei testimonium, verba *Jochimi Georgii Elsneri D.* in *Ephem. Germ. Dec. I. Anni I. pag. 242.* anguillas esse viviparas, una vel duplex observatio mea in Belgio degens quam institui, me edocuit: quondam enim fœminam vidi anguillas assandas præparantem, ex quarum corpore quum substantiam crassiorē protrahi viderem; & quidnam sit, me nescire profiterer, matricem anguillæ dixit esse mulier, ac multas anguillulas membrana involutas ac matrice detentas ostendit.

Imo & aliorum observationibus eadem comprobantur. Ast *Cel. Vallisnieri*, Medicinæ Professor P. Pataviensis in *Dissertatione sua de anguillis*, quam iisdem in *Ephemerid.* leges, refert, quod & ipse quondam anguillarum in ventre maximam reperierit copiam vermium subtilissimorum, vix capillos adtingentium, quos statim ab initio anguillulas ducendo, anguillas viviparas esse concludit; deinde autem meliora edoctus vermes istos cum *Cel. Redi* insectorum corpus omne vivens inhabitantium in classem, retulerit. Hic loci *Cel. Leuvenhoek* refutat, & microscopium ejus ipsi imposuisse judicat; imo anguillas oviparas esse, nec viviparas, cum *Cel. Paullini D.* concludit. Pace Viri *Cel. Vallisnieri* dictum sit, lubricum est observationis suæ fundamentum; hodie enim inter omnes, nemine dubitante confirmata res est: anguillas esse viviparas.

Anguillæ denominatio Italica, æque ac Hispanica respondet Latinæ: *Anguilla*. Germani illam dicunt: *Ahl*, five *Aal*, Belgi: *Ael*; Angli: *Eel*, Sueci: *Al*. Derivatur autem *Anguilla* ab *Anguiculo*, siquidem non solum figura, sed & reptu, tortuose hinc inde deflectente, anguem æquiparat. *Fidiam Jovis* quidam auctores illam nuncuparunt, sic refert *Athenæus*; quemad-

modum *filios Deorum* fungos & tuberes appellarunt, ignotæ eorum originis ergo. Occitaniam inhabitantem anguillam marem: *Margaignon*, fœmellam *Anguille fine*, adpellant. Anguilla minor alias dicitur: *Anguillote*.

Abundat autem oleo, phlegmate crassiori, ac viscoso, & sale volatili anguilla. Reliquis præstantiores sunt majores, teneræ, & probe nutritæ, captæ præterea in aqua limpida, puraque. Gratissima quum sit palato, usus ejusdem est frequentissimus. Carne etenim gaudet tenera, molli, nutrimentum præbenti, & ori jucunda, ob particulas oleosas, quibus abundat, & balsamicas. Nihilo minus corporis sanitati contrariam dijudicamus eandem, ob partes suas crassiores, lentas ac viscosas, quarum ergo concoctu evadit difficillima. Quinimo suffragante experientia ægre concoquitur, flatus producit, & borborysmos, ac noxia est iis, qui debiliori laborant stomacho; hinc præ piscibus reliquis omnibus, condimentis probe est emendanda. Hæ, quæ sale sunt aspersæ, minus sunt noxiæ; abiit etenim pars phlegmatis altera; altera sale attenuata est, & suppressa.

Mensis nostris inserviunt, vel assatæ, vel elixæ. Salubriores vero dijudicamus assatas, siquidem assando major phlegmatis expellitur quantitas, quam coctione, seu ebullitione. Nihilominus multa requirunt condimenta, & vinum pro potu, fortius, facientia ad phlegmatis sui concoctionem. Nec tamen, nisi juvenibus, qui temperaturæ corporis sunt calidæ, ac biliosæ, qui humoribus abundant acrioribus, tenuibusque, dummodo faciles digerant omnia, modicum anguillæ permittendum esse ducimus usum; omnem vero interdiciamus, macris, gracilibus, delicatis, arthritide, & calculo laborantibus, vel ventris constipationibus obnoxiiis. Alias anguillæ partes externo, alias interno suo usui accommodat Medicina.

In partu difficili eximius est usus hepatis anguillæ, & fellis, mixtorum, exsiccatorum, ac reductorum in pulverem, ad promovendam vel foetus, vel partis placentæ in matrice detentæ excretionem. Pro dosi accipiatur ℥j. vel ℥ij., cum portiuncula vini, vel portione adpropriata. Virtutem pulveris hujus notissimam, omnes cognoscunt, & laudant Medici; ast non nisi per duos ad summum annos suam conservat efficaciam, his elapsis ex virtute sua multum demittit, & renovanda venit. Relatum legimus in *Ephem. Germ. Dec. II. Anni VI. pag. 41.* fœminam juvenem, peracto partu difficili, incidisse in *Nyctalopiam*; qua profligata, usu hepatis ex anguilla assati, sumti quotidie ante prandium, haud elapso adhuc mense toto, videndi facultas restituta fuit integra. Nec non contra urinæ retentionem cutis anguilla exsiccata, & in pulverem redacta, adhibetur. En! quæ refert *D. Grugerus* in *Ephem. Germ. Dec. III. Anni II. pag. 307.* Tertius jam erat dies, ex quo quædam, quam bene novi, matrona, retentione urinæ laboraverat, adhibitis in vanum mediis, quæ communiter adhiberi solent, ut balneis, potionibus oleosis, aliisque, consilio amicæ obtemperans, anguillæ cutim frustatim conscindi, & vasi ferreo probe tecto immissam, exsiccari jussit, & reduci in pulverem, quem cum vino Hispanico quum accepisset, paucis exinde horis, admodum multam emisit urinam, saburra mixtam, & calculis, quo facto morbus recessit penitus.

Equorum podici, *Boeclerus* testis est, mangones intrudunt anguillam, quo alacriores videantur, & pinguiore. Et qui morbis equorum mederi student, equo asthmatico anguillam viventem deglutiendam exhibent, quæ tran-

secundo intestina expurgat, absque ullo vitæ periculo. Vidit *Gesnerus*, nau-
tam quendam sibi cognitum, anguillam viventem integram, ore degluti-
tam, excrementorum instar, integram excrevisse. Imiteris illum, si libet.
Interim simillimum aliquod factum Ornithologi quidam; referunt de ave
aquatica *mergo*, quæ anguillam eandem novies deglutitam, totidem pro-
anum excrevit.

De usu anguillæ externo hæc teneas: quod cutis, de qua supra diximus,
pro medio habeatur tutissimo, in uteri, vaginæque prolapsu si nempe fu-
mus ejus, infundibuli ope, hac parte excipiat. Contra arthritidem sunt
alii, qui cutem anguillæ recentem supra genu aliquoties circumvolvendam
præcipiunt; & addunt, quod arthritici dolores brevi decrecentes, mador
sequatur universalis, infirmitatem depellens. Adeps anguillæ contra surdi-
tatem auri immittitur, xylo, vel gossypio instillatus; adhibetur & ad de-
menda variolarum stigmata; ad sanandas hemorrhoides; & eliciendos cri-
nes. Humorem denique viscosum præparant ex pelle macerata, & cocta
in aqua; qui tumoribus emolliendis inservit, & resolvendis; prodest &
contra hernias.

R. Aqu. flor. sambuc. ℥ij.

Pulver. hepatis anguillæ ℥ß.

Syrup. arthemif. ℥j.

M. pro dosi unica, in partu difficili, ad expellendam secundinarum
partem adhibenda.

R. Adipis anguillæ

Olei Balsamin. ana ℥ij.

M. & habebis linimentum contra hemorrhoides.

A S E L L U S.

VArii sunt, ac multi piscium maris, quibus asellorum nomen tribuunt.
Physici, coloris sui cinerei ergo, quem communem habent cum asi-
nis, tineisque. Ast notissimæ ex omnibus, ac usitatiores in Medicina bi-
næ sunt species hic pertractandæ; alterius descriptionem *VVilloughby*, *Ar-*
tedi alterius subministrantibus.

Asellus major, seu *Morbua*, Offic. Charlet. Onom. 121. Schonev. Ichth.
38. Dal. 404. *Asellus*, *Merluccius*, *Cabeliau*, Merr. Pin. 184. *Gesn. de Aquat.*
84. *Morbua vulgaris*, (maxima asellorum species) *Bellon. de Pisc.* 118. *Molva*,
Rondel. de Pisc. 280. *Morbua vel Molva altera*. *Aldrov. de Pisc.* 289. *Mol-*
va, *Morbua*. *Jonst. de Pisc.* 1. *Asellus major vulgaris*, Belgis: *Cabiliu*,
VVilloughb. Ichth. 165. *Asellus major vulgaris*, *Raii Synop. Pisc.* 53. *Gadus*
dorso tripterygio, ore cirrato, cauda subæquali, radio primo spinoso, *Artedio Syn.*
37. *Linn. Faun. Suec.* 295. *Asellus vulgator*, *Bos Quadragesimalis dictus*; *Pi-*
scis fustuaris seu salpa, *Nonnull. Gallice: Morue, Morhue, vel Molve*.

Est autem asellus trium, vel quatuor pedum longus, novem, vel duo-
decim digitorum latus. Corpore instructus crassiori, & globoso, ventrem
habet admodum prominentem; dorsum ejus, & latera, colore oliveo-
fusco, dispersis hinc inde maculis flavidis notantur. Ex utraque parte de-
regitur linea alba, latior ab angulo branchiarum superiore ad caudam us-
que producitur, arcus in forma incurvata, eo usque, quo cavitas abdo-

minis extenſi pertingit; poſtea autem recta progrediens ad caudam, latera per media. Squamæ, quibus gaudet, minores, cuti adhærent fortiffime. Oculi ejus magni, membrana teguntur molli, & perſpicua. Iris oculorum albida eſt. Barba unica longa unius digiti, pendet ab angulo maxillæ inferioris. Lingua conſpicitur lata, rotunda, mollis, ac dentibus carens. Varii dentium in maxillis reperiuntur ordines, quorum unus conſtat dentibus multum longioribus, ac reliqui. Dentibus vero fixis multi interjacent mobiles, idem quod in lucio obſervamus. Denticulos detegere licet compreſſos, & in ſuperiore palati parte & in inferiore, prope ſtomachi orificium, & branchias intra poſtrema. Tres in dorſo adparent pinnae, quarum anterior xiv. binæ poſteriores vero xix. componuntur radiis. Singulæ branchiarum pinnae xviii. conſtant radiis, ſex radiis tantum ventris, aut potius pectoris pinnae; (in hoc enim piſcium genere ſitum præcedentibus multo occupant anteriorem.) Binarum tandem, quæ poſt anum ſitæ ſunt pinnarum altera, anterior, viginti eſt radiorum, altera poſterior, xvi. Cauda fere depreſſa neſtquam diffinditur. Brevis eſt ac ſpinofus primus, primæ ani pinnae radius. Prægrandis ſtomachus halecibus plerumque repletus conſpicitur. Circumdatur inteſtinum, & appendicibus ſub Pyloro apparentibus, & his, quæ ex altero ejus latere, ut in alofa exeuntes, ſex dividuntur in truncos; quorum ſinguli in varios ſeſe diffundunt ramos in circulos interſtinctos. Fellis veſicula magna. Sub appendicibus, inteſtinum ingreditur canalis cyſticus. In tres hepar dividitur lobos. Reſes per totam dorſi longitudinem, imo & partem abdominis obverſam producuntur. Veſica aeris, cujus auxilio natare valet piſcis, dorſo adhærens, craſſa, lubrica, ultra cavitatem abdominis protenſa & ani, ab omnibus, qui palati ſunt delicatioris, ex teſtimonio *Turneri*, reliquis piſcis partibus antefertur. Cute tandem tegitur molli, & craſſiore. Sex vero hi ductus Pancreatis excretorii, qui huic piſci inſunt, ita ut in reliquis piſcibus fere omnibus admodum hiantes, vel aperti, ductus vero excretorii fellis valde reperiuntur conſtricti. Succus pancreaticus autem & ſaporis & coloris ratione quodammodo refert ſperma ex veſiculis tauri ſpermaticis, ſive proſtatis canum proficiſcens. Saporem rancidum, aliquoties ſubamarum, & colorem exhibet flavum.

Cel. *Rondelet* eſt, qui aſellum excreſcendo cubiti i. & quod excurrit, longitudinem, & pedis i. latitudinem adtingere docet. Oculis licet maximis, haud tamen adeo acribus gaudet; unde & apud Gallos: *aſilli oculi illi* dicuntur, qui obtuſioris ſunt aciei, quo pertinent proſilientes, & latiori pupula inſtructi. Cæterum quamvis apud nos ſatis bene cognitus ſit aſellus & frequens, nullam tamen ejus mentionem faciunt ſcriptores Græci, nec enim Pontum Euxinum, nec Mediterraneum Mare inhabitat. Magnam interim eorum copiam in Mari Baltico captant quotannis Angli Belgique, quos Sole arefactos per totam Europæ venum deportant. Jure meritoque inter primaria commercii objecta, verba ſunt *Schoneveldii*, referendum eſſe duco, qui circa aſellos captandos verſatur labor; documento interim providæ divinæ benignitatis certiffimo, copioſa in regionibus Septentrionalibus, ut Dania, Norvegia, Suecia, Islandia, Inſulisque Orca-dibus, quantitas eſt aſellorum; hæ etenim regiones, quum ob frigoris vehementiam, ac aeris rigiditatem nullum producant frumentum; ſi vel par-

cissimus piscationis labori responderit fructus, tantus tamen est, ut non solum incolis panis loco, vel ficci, vel recentes aselli alimentum; sed & mercem præbeant, mercatoribus ejus ergo eodem confluentibus, acceptissimam.

Lubentes interim profiteamur cum Cel. *Pluche*, quod in nostris maribus infrequentiores sint aselli. Cumulativè confluunt ad molem arenariam, in Terra nova, Canadam versus, obviam. Tanta etenim ibidem eorum adest copia, ut piscatores nationum omnium congregati, a mane usque ad vespèram, modo retibus emittendis, modo retrahendis, modo eviscerandis asellis captis occupentur, modo pro captandis ulterioribus, viscera captorum pro esca, hamis studiosi nectant. Unicus interdum piscator trecentis imò quadringentis per diem capiendis sufficit. Consumto autem, quo huc alliciebantur alimento, in varias abeunt partes, apud, quibus inhiant, bellum illaturi. Apud quum eorum timore captæ aufugiant, frequentes ad nostras oras descendunt. Venerabundus hanc Dei mirare providentiam, in conservandis piscibus, nostro oblatis alimento, conspicuam. Hos rapaces vi reliquis superiore instruxit, illos timore replevit provido, ambos autem adeo mirando multiplicat numero, ut fœcunditati inferior sit maneatque semper devorandi ardor; rapaciumque quantitati superior sit copia horum, qui nobis inservituri, renascuntur. Quanticumque etenim singulis annis, vel nutrimento veniant hominibus, vel a monstris devorentur aselli; sufficiens producendo numero eodem semper tamen remanet quantitas. *Leuwenhoekii* experimentis detectum numerum ovorum in asello determinare licet: scilicet 9344000.

En! quæ de asello notabiliora tradit auctor ex nostratibus merito æstimandus, *Anderson* in *historia Islandiæ naturali*: *Cabeliau* (sic enim qui Septentrionem tenent, asellum dicere solent) præcipuo & quasi unico nutrimento incolis venit. Belgæ & Saxoniam inferiorem inhabitantes illum adpellant, *Kabeliau*, Germani reliqui: *Bolch*, Dani: *Kablæg*, seu *Torsk*, generico nomine; Angli: *Cod*, vel *Cod-fisch*, alii: *Kee-ling*. Qui quum satis notus sit inter omnes, fusiore mea descriptione haud eget; ast carnem ejus saporis gratissimam, omnium palato arridere constat. Omnibus piscium ex speciebus vivit, & in primis, ex halecibus, & cancris marinis vel maximis, quales quotidie in stomacho asellorum ad Hilgeland, Albis in ostio conspiciere datur. Mirabili sane quævis concoquendi facultate gaudet; siquidem, teste experientia, pisciculus, quem deglutiit, omnis, minori quam 6. horarum spatio penitus erit concoctus. Piscatores enim Hilgelandienses, *schellfisch* capturi (aselli minoris squamosi speciem, Anglis: *Haddock*, seu *Haddocke*; Gallis vero dictam: *Hadou*, *Aiglesin*, *Aigresin*, *Capelan*,) hamos suos per 6. horas mari immittunt, relinquunt, tot scilicet horas fluxus, totidemque refluxus exigit. Jam, si statim ex hamo jacto asellus sive: *Cabeliau*, captum antea *Schellfisch* deglutiit, & redeunte maris statione hamum retrahas cum asello, *schellfisch* concoctum, & hamum asello inhaerentem reperies. Si autem brevi ante hamum receptum deglutitus fuerit *Schellfisch*, asellus pro retinenda sua præda una cum hamo ex aqua protrahetur, ast simulac aerem pertigerit, relicto *Schellfisch*, ipse mari denuo immergetur. Major adhuc vis digestiva aselli in cancris, si quos devoravit, marinis conspicitur, & quamvis accurate satis determinare nequeam utrum crusta cancrorum diutiori tempore dige-

digeratur: adtamen experientia ac relatione piscatorum optimorum habeo compertum, quod crustam omnium primam concoquens stomachus adgrediatur, & ab initio quidem ruborem ipsi inducat, qualem cancro elixo ab aqua accedere videmus, deinde in pulvem spissiore abeat, denique autem eadem prorsus ratione concoquatur, qua testudines maris in stomacho crocodili, referente P. R. *Feuillee* in *Continuato Diario Observationum Physicarum*. Aliud etiam & singulare donum naturæ in asellum, hominibus gulosis gratum foret & acceptissimum. Quoties enim ille ex ciborum aviditate lignum aliave haud digerenda devoraverit, stomachum ipsum evomit, ac ex ore egressum evertit, evacuat, aqua maris probe eluit, tum vero recipit, & qua coeperat aviditate devorare pergit. Cujus rei testem alios inter & Clar. *Denis* in *descriptione orarum America Septentrionalis* habemus, ubi & modum pisces captandi præparandique apud hos qui oras Terræ Novæ accolunt, & observatum reperies, eundem esse piscem, qui varia ratione præparatus, apud nos, jam asellus viridis seu candidus, jam asellus arefactus, seu *Merlangus* audit. Notandum scilicet, quod asellus viridis, quem Hamburgi: *Labberdan* dicimus, non sit nisi asellus sale conditus, quem statim ex quo dissectus fuerit, non doliis, sed cymbis iniiciunt, nec in navibus quidem vel vasis ligneis cum muria condiendum per strata disponunt. Asellus arefactus autem, *Klippfisch* nostro multum accedens, viridique minor, sale maris in littore conditus demum cymbis committatur, post in ipsa maris aqua ablutus, & cratibus, quo defluat aqua, superpositus primo singulis, deinde in acervum congestus soli exponatur atque arefact. Substratis tandem fascibus virgultorum, in naves proicitur, & in Galliam deportatur.

Hamis, sic pergit *Anderson*, asellos captant Islandiam qui tenent, & pro esca vel parte mytuli vel maxillæ recentis ac rubicundæ aselli utuntur; quamvis acrior frustulo carnis crudæ & calidæ, seu cordi avis v. g. gaviæ recenter enecata, inhiat. Quo si quis piscatorum pro esca fuerit usus, citior capiet asellos vigenos, quam unum ceperit ille, qui escam communem adhibuerit. Hinc etiam tempore piscationis universalis, expresso Regis mandato, usus artificii hujus interdictus est. Quod quidem tempus antequam irruerit, præ eximia asellorum copia vel dorsa eorum in superficie aquæ prominentia videbis; & hamo esca carente illi inhiabunt. Tempus ipsum piscationi destinatum circa lustralia B. Virginis incipit, & circa festum SS. Philippi & Jacobi terminatur. Tunc enim nimius jam est calor æstatis, quam ut tanta piscium captorum copia præparari posset. Piscis autem, id quod in universum notandum venit, alveo aquæ contrarius adscendit. Per diem in pelago finibusque profundis quæritur, noctu autem vel in illis locis, ubi aqua haud excedat 6. orgyiarum altitudinem; vel ubi fluctus, contra ripam & rupes cum violentia adacti, pisces obstant fugienti. Optimus tamen & palato gratissimus in mari, 40. ad 50. orgyiarum alto capitur, ibi enim maxime sibi conveniens alimentum reperit. Quem vero vel in oris, vel sinibus minus profundis ceperis, hic nec saporis nec qualitatis illius præstantiam e longinquo pertinget. Islandiæ incolæ duplici modo præparando asellum, bina *Stockfisch* genera comparant. Vocem interim *Stockfisch* generatim hic acceptam volumus, ut accipitur in Germania superiore, locisque aliis, ibi enim omnis piscis arefactus

Etus hoc nomine, quod originem debet modo, quo antiquius exsiccabantur, denotatur. Septemtrionem namque inhabitantes olim jam pisces, nutrimento sibi præcipuo, conservaturi, arefacere consueverant. Vox Germanica autem Stockfisch, civitate dein donata ab omnibus nationibus, vi vocis suæ, & originis, *piscem baculi*, seu *bacularem* (venia sit voci barbaræ) denotans ortum trahere videtur, vel ex duritie piscis arefacti, vel forma ejus rotunda, quam exarescendo circumvolutus nanciscitur. Primum dubio procul Norvegia, plurimum & adhuc præbet Stockfisch; cujus copiosiores sunt species: *Cabeliau* & *Dorsch*. Adeat, qui rationem qua capitur, qua præparatur, quaque exsiccatur, cognoscere cupit, *Norvegiæ Topographiam*. Dolia prægrandia eodem repleta *Drontheimium* incolæ Norvegiæ deportant, & *Bergam*, exinde in totam devehitur Europam. Variæ autem ut sunt & *Cabeliau* species minori in pretio habitæ; minus saltem desideratæ, ac illa præcedens: sic & *Stockfisch* varia sunt genera, vel gratiosiora palato vel minus. Brevibus ut me expediam, vix recenseri potest, omnis quam *Cabeliau* præbet utilitas; imo nil in ipso est quam vilissimi videatur pretii, quod in sui lucrum convertere nequeant mercatores Septemtrionis adtenti. Maxima etenim cura intestina ovaque aselli, convertendi in Stockfisch, adservant Norvegienses, & *Drontheimium* portant ac *Bergam*. Ibi dem coemta a mercatoribus alienis, illis præsertim qui societatum in urbibus Hanseaticis constitutarum commodum respiciunt ac utilitatem, doliis infarcita, Nannetum transmittuntur. Maximo deinde Nannetenfibus, fardas capturis sunt usui. Frustratim namque eadem conscissa, pro esca conii ciunt loca in illa, ubi retia sua tendunt, quo facto maxima fardarum copia undecumque conflua, præmio venit labori sollicito.

Quorundam ex sententia, origine Gallice voces *Morue*, *Molve* vel *Morbue*, derivandæ sunt ex insularum, ubi capiuntur, nominibus. Elegantioris olim usus erat: *Molve*, hodie: *Morue*. Dicunt Angli: *Morbuel*, Sueci: *Cabeliao*, Belgi: *Cabeljaav*, & ex Belgico idiomate derivanda veniunt nomina: *Cabeliau*, *Cabelliau*, *Cabiliau*, *Cabilliau*, *Cabliau*, *Cabillaud*, seu *Cabillot*. Vox autem *Merluche*, pro qua & *Merluce*, *Merlue*, *Merlu*, *Merlus*, *Merluz* seu *Merlut* dicitur, Latine: *Merlucius*, *Merlucius*, ex *Maris lucius* deducenda videtur. Nomen Germanicum: *Stockfisch* ortum videtur exinde, quod asellus arefactus duritie ossea contracta, non nisi probe contusus, diuque maceratus aqua ebulliri possit.

Olei interim ac salis volatilis copia abundat. Reliquis anteponeendus hic est, qui albus, tener & recens, gratiorem habet saporem. Recens interim cibo inservit, inservit & arefactus. Recentem Galli dicunt: *Morue* seu *Molve*, aut arefactum: *Merluche*. Illum quasi jejunii quadragesimalis bovem, id est, cibum frequentissimum dicas, & recentior optimo sane cibo venit; & hunc quidem varia ratione mensæ adpropriant. Sale conditum vero aquæ dulci immittas necesse est, ut maximam salis sui partem amittat; alias enim nimium calorem & corporis alterationem producit. Ceterum cujuscumque ætatis sive temperamenti hominibus saluber habeatur. Cutis ejus adipea, & in primis hepar in summis est delitiis. Imo teste *Villughby*, capita asellorum majora gulosis gratissima, & vel procerum mensas onerare refert.

Parcissimus autem est usus aselli in Medicina. Dentibus suis absorbendi, & hæ-

& hæmoptysin sistendi virtutem adsignant, eosdem super porphyrite in pollinem reducunt, & dosi gr. x. ad 3ß. commendant. Calculis in capite aselli obviis eadem tribuitur virtus, idem est illorum usus. Muria tandem externe adplicata pro resolvente & exsiccante habetur. Clysteres etiam intrat, ast virtus sua laxativa, non nisi ex sale abundantissimo, intestinorum glandulas irritante & stimulante, hinc majorem ex illis liquorem eliciente, petenda est.

Asellus denique arefactus, durus est, coriacius, concoctu difficillimus, & nutrimento pessimus; nec nisi validissimo stomacho quodammodo inservit. Ast probe contusus, & multo oleo seu butyro unctus, comunem cum asello communi qualitatem habet, & peramatur a pluribus.

Oniscus. Offic. Dal. de Pisc. 404. Asellus marinus, sive Merlangius, Ind. Med. xv. Merlanus, secunda Asellorum species, Rondel. de Pisc. 276. Secunda Asellorum species, Merlanus Rondeletii, Gesn. de Aquat. 85. Merlangus, altera Asellorum species, Bellon. de Aquat. 124. Asello minor & mollis, Charlet. de Pisc. 3. Asellus mollis. Merr. Pinn. 784. Asellus minor alter. Aldrov. de Pisc. 287. Asellus mollis, seu Merlangius. Jonst. de Pisc. 1. Asellus candidus primus, Schonev. Ichth. 17. Asellus mollis major, seu albus, an Merlanus Rondeletii Gesnero? VVillughb. Ichth. 170. Raii Synop. Pisc. 55. Gadus dorso tripterygio, ore imberbi, corpore albo, maxilla superiore longiore, Arted. Ichth. Gen. 19. Synon. 34. Spec. 62. Linn. Faun. Suec. 294. Merlangius, sive asellus minor albus. Quorumd.

Onisco caput est & corpus ex lateribus depressum, anterior tamen pars capitis, ore clauso, superne magis depressa; dorsum convexum; anus capiti proximus, a cauda autem remotissimus; argenteo-albidus corporis, ast dorsi color nigridior; squamæ parvæ, rotundæ, albidæ; maxilla superior ultra inferiorem adeo prominens, ut ore clauso dentes inferiorem superantes conspiciantur; nares conspicuæ binis utrinque foraminibus instructæ, oculis viciniore quam extremitati rostri. Oculos habet ex utroque capitis latere sitos, magnos, membrana leviori & diaphana tectos, iride argentea & pupilla magna subcœrulea; branchiarum membranam septenis utrinque spinis conflata; varios dentium ordines in maxilla superiore, quorum maximus ultimus est seu extimus, dentes vero ordinis primi magnitudine sunt inæquales. Præter ea & in maxilla inferiore observabis seriem denticulorum magnitudine inæqualium; & palati in parte anteriore officulum dentatum, bina trianguli in gutture latera efformans; bina superne officula rotunda, bina inferius oblonga atque dentata; linguam & palatum in medio læves; 9. puncta ad minimum ex utraque inferioris maxillæ parte; ast barbulam nullam; lineam lateralem nigridam, curvam, ac dorso quam ventri viciniorem; maculam nigridam ex latere quovis, ubi pinnae pectorales exoriuntur. Pinnae pectorales sunt subnigridæ, ex 21. spinis conflatae, quarum mediæ, reliquis longiores, cuspidē bifida gaudent, qua quidem utraque prima, & utraque ultima carent. Ventris pinnae pectoralibus anteriores, albæ & senis compositæ spinis, quarum secunda longior, mediæ autem sunt bifidæ. Tres porro dorsales, quarum prima triangularis 21. spinis constat, spinarum primæ longissimæ, mediæ autem in extremitate sua bifidæ sunt. Binæ tandem pinnae ano proximæ & albidæ, quarum prima longior 33. ex spinis constat, & quidem mediis

bifi-

bifidis in cuspide, utrinque extremis autem exiguis; pinnarum altera, minor, non nisi 23. spinas ostendit, medias in apice bisulcas. Cauda æqualis & in fine nigrida 31. ex spinis longis componitur, excipe ultimas breviores scilicet, & ubi desinunt, bifidas. Hepar albidum in binos abit lobos majores, quorum dexter brevis & exiguus, sinister autem longissimus per totum abdomen extenditur. Lien triangularis adparet sub stomacho; duo in foemellis ovaria longa, ovis flavidis repleta; vesica aeris oblonga, lubrica, simplex, spinæ dorsali adhærens, & canalis pneumaticus, ex parte ejus superiore enatus, ac œsophago tandem insertus. Cor ipsum quatuor iisque valde obtusis angulis conspicuum, magna auricula magnaue aorta instructum; stomachus oblongus, amplissimus, infra reflexus, & plures in pyloro appendices, coronam quasi constituentes; intestinum statim ab initio versus diaphragma, post versus anum, denique versus œsophagum reflexum, recta tandem ad anum descendit. Amplissima est inferior pars intestini, ita ut intestinum cum stomacho extensum, ipsam pisces longitudinem paullulum superet. Fellis vesicula mediante conductu, hepatis adhæret; & mediante tubo majori, intestino prope ad appendices nequitur. Renes insuper sanguinolenti, longique ad longitudinem spinæ dorsalis procurrunt. Duæ vesiculæ urinariæ & oblongæ nec non aqua limpida plenæ anum versus conspiciuntur. Omnium denique vertebrarum numerus 54. absolvitur.

Quod si cum reliquis hujus generis piscibus Merlanum comparare velis, parvus dici meretur, ex mente Cel. *Villughby*, haud enim pedis 1. longitudinem multum superat, & magnitudinis respectu habito, præsertim caudam versus spectatus, gracilis est. Hic idem *Rondeletii* Merlanus esse videtur, sic pergit *Villughby*, inique tamen una saltem pinna in ano representatur. Jure quidem suo Cel. *Rondelet*, hunc, de quo agitur Merlanum, a pisce, quem Veneti: *Pesce molle* dicunt, distinguit; alii generis alius esse hunc Venetorum: *Pesce molle* ac nostrum Merlanum, nos quidem negamus, adserit Cel. *Rondelet*. Quamvis tanta sit utriusque similitudo, ut & Celeber. *Belon* & nosmetipsi diutius utrumque confundendo, eundem credidimus.

Copiosus autem Merlanus in freto Brittanico & Mari Balthico capitur, imo hostium acerrimorum insidiis fuga se erepturus, pelago relicta, agminatim sæpius ad illas confluit oras, ubi piscatorum expectationi cedit ac prædæ. Etenim & per totam Galliam notissimus, & ubicumque pisces venum veniunt, frequentissimus est. Disseca stomachum & cognosces nutrimento ejus cedere: apuas, gobios marinos, aliosque pisciculos, quos integros deglutire solet; etenim sui dentes non comminuendo & in frustula dissecando, sed retinendo saltem alimento inserviunt. Adtamen vel in stomacho ejus, sic *Rondelet*, pisciculorum frustula deteges, calor enim stomachi naturalis sensim sensimque digerenda comminuit. Teste Cel. *Lemery* in amplissima seu crassissima capitis sui parte, cerebro proximos videbis calculos binos, unum ex latere quovis, transversus digiti longos, 4. lineis latos, ex altera cuspide cuspidatos, ex altera obtusos, læves, candidissimos, teneros, fragiles, & si in pollinem reducantur, saporis parum falsi, substantiæque alcalinæ & absorbentis. Nec tamen extremitatis in medio, sed ex latere sita ex cuspis, reliqua etiam pars extremitatis excavata videtur.

Nec

Nec non inter merlanos, ut alias inter carpiones & lucios, hermaproditas reperies, qui ex altera interiore parte lac, ex altera autem ova gerunt.

Nomen ejus Gallicum: *Merlan*, seu *Merlane*, item *Merlang*, ab aliis quidem origine Gallicum habetur; ut & illud: *Merluce*. *Menage* autem cenfet: ex *Maris lucius Merlus*, ex *Merlus* denique *Merlan* deducendum esse. Quem nos *Morue* nuncupamus, Occitanienses dicunt: *Merluce*, quemque nos: *Merlan*, illi *Merlus*. Angli illum nuncupant: *Whiting*, Sueci: *Hvitling*, id est: piscis candidus, coloris sui ergo. *Belon* est, qui Merlanum Venetiis: *Pesce molle* audire docet, Byzantii: *Muzo* vel *Mazo*, Romæ: *Fico*, Massiliæ tandem: *Servantin*. Errat autem testibus: *Villughby* & *Rondeletio*, eo potius, quum Merlanus noster piscibus Oceani, nec Maris Mediterranei sit adnumerandus.

Multum olei & falis volatilis Merlano inesse constat. Præoptandus est ille, qui carne molli & abundante, levi item ac tenera gaudet. Nec pisce hoc quisquam salubrior est, consentientibus omnibus populis. Caro ejus levior, nec viscidis succis abundans, nisi immodica copia accipiatur, nec stomachum exonerare, nec succo viscido explere potest. Nutrimentum quidem suppeditat, succum optimum producit, ast adeo levem & transeuntem, ut vix naturæ tempus superfit, quo nutrimentum hocce corpori sustentando adpropriare, sive accommodare possit. Hinc omnibus, cujuscunque fuerint ætatis & temperamenti, imo vel ægrotantibus & ex morbo convalescentibus amplissimum ejus usum moderatum concedimus. Hinc, ut *Belon* & *Rondelet* referunt, in proverbio est: Merlanus tanti, imo majoris ponderis est in manu, quanti in stomacho; & ut *Richelet* observavit & illud: optimus cursorum & pedisequorum cibus est merlanus; siquidem sua levitate illorum cursum non impedit. Nec non in quibusdam Angliæ & Belgii locis, sic *Villughby* ex *Tancredo Robinson*, D. Merlanum exenterari, sale condiri & tunc exsiccari vidi; & ita præparatum optimo cibo cedere ori delicatiorum. Idem ille subnectit: Germanos, Polonos, Belgas, aliosque adhibita radice *Curcumæ*, saporis gratiam & flavum colorem ei conciliare.

Observante Cel. *Lemery* duos calculos oblongos in capite merlani reperies, qui falis sui ergo, licet exigui, aperitiva gaudent facultate, imo contra colicam nephriticam, ad expellendam renum & vesicæ saburram, ad sistendam quæ cita fuit, alvum, & ad absorbendam stomachi aciditatem, haud adeo parum conferunt. In porphyrite in pulverem reducuntur, & pro dosi gr. xij. ad ʒss. exhibent.

B A L Æ N A.

Primus, dubio procul, inter pisces cetaceos locus adsignetur balænæ, consentientibus omnibus maris reginæ. Variæ sunt ejusdem species, quarum quum plurimæ nullam artibus, nullam Medicinæ utilitatem adferant; nos tria saltem ejus genera, artibus utilia, descriptione pertractabimus, Balænam scilicet, Cetum, & Monocerotem.

Balæna. Offic. Recch. Hist. Mex. 568. Dal. 414. *Balæna* vulgo dicta, sive *Musculus*, Rondel. de Pisc. 475. *Balæna* vulgo dicta, sive *Mysticetus Aristotelis*, *Muscu*.

Musculus Plinii, Gesn. de Aquat. 132. *Balæna vulgaris*, Aldrov. de Pisc. 688. Jonst. de Pisc. 152. Charlet. Onom. 46. *Balæna Bellonii*, Schonev. Ichth. 24. *Balæna major laminas corneas in superiore maxilla habens, fistula donata, bipennis*, Sibbald. Phal. 24. *Balæna Rondeletii*, Gesneri & aliorum, Willughb. Ichth. 35. *Balæna vulgaris edentula, dorso non pinnato*, Raii Synop. Pisc. 6. *Balæna fistula in medio capite, dorso caudam versus acuminato*. Arted. Genn. 76. Syn. 106. Linn. *Balæna Grœlandica*, *Balæna vulgaris Septentrionalis*, seu *Balæna vulgi*; *Balæna belluarum marinarum maxima*. Quorumd.

Vera igitur balæna Groenlandica seu Spitzbergenensis capite per transversum parum depresso gaudet. Maxilla ejus inferior multa latitudine superiorem præcellit, & partes inferioris laterales maximam tegunt partem superioris, quæ strictior est, & oblonga. Lingua ejus maxima dicatur. Edentulo rictu est, ast pro dentibus veniunt laminæ corneæ, eæque in adultis, palato adhærentes. Pinnis in dorso caret. Ast duæ sunt ex lateribus pinnae pectorales, inferiori laterum parti viciniore, haud multum sub oculis, sed si corporis moli æquiparentur, exiguæ. Nec non oculi, respectu corporis parvi, & fere in lateribus capitis siti, satis longo invicem spatio distant. Duo in media capitis parte superiore eminent tubi contigui, rostro & oculis interjacentes, oculis tamen viciniore. Bina sunt scæmellæ ubera, sibi proxima, nec tamen in pectore, sed in abdomine sub partibus generationi inservientibus conspicienda. Anus partibus iisdem inferiorem tenet situm. Cauda insuper horizontaliter sita, & bifida ac lata scombri caudam haud incongrue refert. Angulum denique subacutum & brevem ex media cauda orientem, & per medium dorfi procurrentem observabis. Corpus ipsum conglobatæ seu tantum non cylindricæ est figuræ.

Quam brevem atque exactam balænae descriptionem, tibi L. hucusque expositam dedimus, Viro Cel. Artedi acceptam referimus, is enim suis oculis & examini ipse balænam, Londini, mense Novembris anni 1734. subjecit. Raii & Willughby numquam ipsi balænam vidisse videntur. Omnium tamen balænae descriptionibus *Andersonianam* anteferendam esse judicamus, quam in *Historia sua Groenlandiæ naturali* sequentibus expositam legimus:

Quindecim sunt ad minimum balænarum species diversæ, quas alii, nec immerito, in balænas tubis & naribus, alii in balænas barbulis & dentibus instructas dividunt. Nobis tamen illa potius divisio arridet, magis naturæ adptata atque fatius adparens, qua in balænas dorso aspero, & lævi donatas distinguuntur. Magnam igitur balænam Groenlandicam, vulgo: *Sandhual*, Islandi: *Slettibakr*, reliqui Septentrionis incolæ: *Slettibakker*, id est: *dorsum læve*, seu *depressum* adpellant, siquidem nullam prorsus pinnam gerit in dorso. Hic igitur piscis, cujus in primis captandi ergo Groenlandiam visitant, maximus & informis, capite tertiam suæ molis partem constituyente gaudet. Excrescendo 60. ad 70. pedum longitudinem adtingit. Et molis suæ vastissimæ ob causam infrequentior oras petit, sed instinctui sibi salutari obtemperans, inaccessibiles Spitzbergiæ abyssos tenet, & quæ Polo subjacent, plagas. Laterum suorum pinnae 5. ad 8. pedum longæ sunt; & cauda horizontaliter sita, ast in apice utriusque extremitatis parum recurvata in altum, ac quasi duplicem lunam falcatam efformans, 3. ad quatuor ulnarum lata, pisce lateri innixo, terribiles edere potest ictus. Pelle tegitur lævi & nigrida, ac passim, & in primis in cauda & pin-

& pinnis, albidis flavidisque maculis conspersa; ast ventrem ostendit candidum. Mediante sua cauda tamquam remo progreditur; & miranda fane cum celeritate vasta hæc moles & ponderosa natando aquas percindit. Masculi pinnæ non nisi ipsi in aqua obvertendo inserviunt; ast foemella hostem fugiens earum ope suos secum deportat foetus; pinnas etenim suas, proficientibus caudæ foetuum alis interponit. Detracta superiore ejus cute seu epidermide, membranæ crassitudinem haud superante, vera pisciscutis adparet, i. digiti crassa, & adipi immediate superjacens. Qui quidem adeps 8. ad 10. digitorum altus, & in pisce sano flavi pulcherrimi est coloris. Caro adipem excipiens, macilenta seu pinguedine destituta ruberrimum præbet colorem. Et maxilla superior ex parte utraque barbulis ornata est, inferiori oblique respondentibus, tamquam vaginæ, & linguam ex utraque parte quasi amplectentibus. Barbulae autem ex parte sua acuminata variis fimbriatae sunt appendicibus, quæ non solum labris contra insultum barbarum & ictus muniendis, sed etiam insectis, tamquam retis ope, captandis ac retinendis inserviunt, eo usque, quo inter folia barbæ satis contrita deglutiantur. Eadem insuper barbarum in maxilla, quæ fistularum in organo dispositio est, maximæ enim medium, minores latera utrumque occupant. Maximarum longitudo, 6. 8. & pluribus absolvitur pedibus. Lingua fere integra adnexa, non est nisi frustum adipis maximum, quod explendis sufficit doliis quam pluribus. Oculorum, bovinos magnitudine exæquantium liquor crystallinus arefactus, vix pisum majus mole superat. Oculi autem in posteriore capitis parte siti, ubi latissimum est, & cum corpore coarctari incipit. Nec aptior sane foret locus oculis & ante & post se respicientibus, imo & præcipue ex alto perpendiculariter imminencia objecta percipientibus. Necessaria, & frequentissimo balænæ usui cedens oculorum suorum qualitas ac dispositio. Instinctui enim naturali & securitatem promoventi obtemperantes, plerumque sub glacie delitescunt. Quum vero diutius respiratione aeris carere nequeant, loca sibi superiora eligunt ea, ubi glaciem transiens lumen illius tenuitatem prodit. Hac vires suas conferunt, & glaciem 2. ad 3. pedibus crassam, capitis auxilio perforant, aerem liberum captant. Alias enim quotiescumque glaciem egrederentur, (egrediuntur autem sæpissime) hostium furori expositæ forent. Nec non oculi balænæ palpebris ciliisque muniti sunt, more terrestribus quidem animalibus communi, ast piscibus insueto. Acutissimo gaudet auditu, & periculum imminens, quam sit remotissimum, percipit. Quo quidem singulari ac piscibus reliquis negato naturæ dono ideo ornata esse videtur, ne tam exiguo numero multiplicata & continuis hominum, belluarumque maris insidiis infestata, prorsus extirparetur. Nul- lum quidem vestigium lorum vel aurium exterius adparet, illo enim natando saltem impediretur, plurimisque sibi sinistris, quæ accidere possent, subjaceret; ast subtracta capitis epidermide statim oculum, exinde autem maculam aliquam nigram, ibidemque conductum quemdam deteges, cujus auxilio sonum usque ad tympanum penetrare putamus. Et huic quidem conductui piscatores suos aduncos intrudere solent, qui quum ad 4. pedum profunditatem transierint, concham sive ossiculum, auditui inservi- ens, ipsis balænæ auris dictum, adtingunt. In officinis nostris: *Lapidum Tiburonis*, seu *Lapidum Manati*, nomina gerunt. Immerito quidem; etenim

Tiburo & *piscis*, alias: *lupus marinus*, seu *magnus canis marinus* dictus. *Manati* autem seu *vacca marina* amphibiiis adnumeranda venit, & descriptionem ejus in *Itinerario insularum Americanarum* Auct. Clar. *Labat* legimus. Nec ulla est offibus hisce balænæ similitudo, cum calculis piscium; & vel ipsi Groenlandiæ piscatores emptoribus illorum situm exponent. Novum documentum, quanta obscuritate vel hodie obnubilata laboret Materia Medica. Ex piscibus mortuis & putredine jam correptis officula ista, licet plerumque parum læsa protrahunt, ac pharmacopolis vendunt. Ast recentē enecatæ balænæ nimis arctæ adhærent, quam ut possint evelli. Nec tamen, quantum studii adhibuerim, reliquarum partium, & in primis structuræ capitis cognitionem completam, comparare potui. Anatomiam colentes enim rarissimi terras istas adeunt; hinc nec de partibus corporis internis, nec de intestinis certi quid habeo, quod proferam; nisi de illo aeris conductu majori, cujus mentio supra facta est. Piscatores interdum, si quam mortuam, & putredine dissilientem reperiant, intestinorum situm ac dispositionem observant. Hi sunt, qui referunt, quod novenis ex tunicis diversis, facile divellendis, ac exiguo adipe separatis constent intestina; ast quantum fiduciæ vis ut tribuamus piscatoribus, artem observandi nescientibus? Alii etiam balænæ excrementa studiosi colligunt, quæ cinnaberi humidæ tantum non similia, haud ingratum odorem exhibendo, ruberrimum colorem, in linteo præsertim diutius perdurantem præbent.

Quod si de partibus generationi inservientibus quæras: masculi virga 6. pedum longa est, talis etiam ratione capacitatis amplissimi ventris esse debebat. Diametro 7. ad 8. digitorum est in origine, & in cuspide digiti 1. crassa. Hanc ille plerumque in corpore recondit, & continendæ vagina destinata esse videtur, cujus orificium musculis, sphincterem effingentibus circumdatur, occluditur, ut ab omni injuria externa tuta sit virga. Pars fœmellæ propria, conformatione sua quadrupedum vulvam refert, & plerumque occluditur. Ex utraque ejus parte uber adest, ventri quasi adhærens, quod ex quo fœtus effuderit, mater, vel ad 8. digitos propellere & 10. vel 12. digitorum diametrum ipsi conciliare potest. Consuetudinem piscatoribus Groenlandiæ hic est coeundi modus: balæna utraque caudæ perpendiculariter innixa, sive erecta altera alteri adpropinquat, junguntur, & pinnis mutuis sese amplectuntur. Aliam coeundi rationem *Celeb. Dudley* in *Transactionibus Philosophicis* exponit, alii forsan balænarum speciei proprium. Fœmella, ait ille, supina caudam reflectit, mas illam conscendit, statim mutuis sese pinnis amplectuntur, cohærent. Nec nisi redeunte secundo anno quovis coitum celebrant. Fœtus fœmella per 9. ad 10. menses utero gestat, & majorem corporis molem, præsentim parturiens ostendit. Embryon 17. digitorum longum, penitus jam efformatum esse & album perhibent, ast fœtus maturus niger & 10. fere pedum longus esse solet. Plerumque unum, rarius binos utero gestat fœtus balæna. Lac suum, vaccino simillimum fœtibus præbens mater in superficiem aquæ enatat, ex latere accumbit, & fœtus uberi inhiat. Nec dici potest quanta cum cura eundem tueatur, aufugiens pinnis strictissime amplectitur, undecumque secum deportat. Nec ictu læsa illum relinquit, sed vel inum aquæ ex vulnere accepto petens, quamvis semihora & diutius eodem permanere posset, sine novi aeris haustu; spreto tamen periculo imminente, & fœtus sui

amore perducta citius in superficiem aquæ redit, ille enim tamdiu sub aqua remanere nequit. Integrum per annum matris uberibus nutriuntur foetus, annuosque Angli suo idiomate: *brevi capite* instructos dicunt. Hi tam eximie esse solent pinguedinis, ut vel 50. dolia, Gallis: *tonneaux* dicta, suo adipe expleant. Matres vero, quamdiu ubera foetibus præbent, carne & adipe omni carent. Duos quum adimpleverint annos, *Bestiæ* dicuntur, derelicto etenim matris lacte, quasi hebescent. Nec plura, quam xxiv. ad summum xxviii. adipe tunc dolia explent. Varia provectionibus sunt quæ tribuuntur nomina, nec nisi barbarum longitudine anni earumdem dijudicari possunt. Singulæ autem balænarum species inter se coeunt; nec variæ miscentur. Licet variarum specierum quædam agmen constituent, atque catervatim iter suum faciant. Miraberis inter ea tuo jure, pro alimento non solum, sed & conciliando tanto balænæ adipe, insecta quædam sufficere, pisciculosque, quibus gula belluæ strictior permittit transitum. Ex hisce insectis quædam examinatum, atque descriptum, spiritu vini adservata, quamvis sæpissime adportare curaverim, negligentia tamen, quæ vix condonanda venit, nautarum totidem spem meam frustravit. *Ch. Bullen* in *Diario Itineris sui in Groenlandiam*, sequentem vermiculorum agminatim mari innatantium, qui alimentum constituunt balænæ, tradit descriptionem: colorem illi habent nigrum, longitudine autem, magnitudineque pisum exæquant, limaces rotunditate; alis insuper ad natandum instructi sunt parvis, mirifice constructis, adeoque tenuibus ut digitis prehendi nequeant. Nomen his inditur: *VValfisch-Aas*, escam denotans, seu nutrimentum Balænæ; sapore conchis crudis, odore autem sacchari mellagini sunt similes. Magnam ex his vermiculis copiam gula sua fugit, seu barbæ potius ope comminutos molit, quæ eisdem consita semper conspicitur, & constipata.

Novum jam divinæ providentiæ venerare documentum, hoc scilicet: quod nempe in Groenlandia, aliisque polum versus magis elevatis mari-bus, hoc præparaverit balænæ alimentum, quæ, quum contigua adipis massa suum constituat dorsum, in cœli tractu calidiori degere non potest, radiis namque solaribus liquecendi periculo adeps ille foret obnoxius. Piscium pinnas componunt aliter spinæ pelliculis subtilioribus junctæ; balænis autem pinnarum loco ossa sunt articulata, manuum, seu digitorum humanorum ut ossa efformata, musculis multaque carne tendinosa induta, tecta tandem pelle crassiore, similis quæ est corporis reliqui tegumento. In apparatibus naturæ curiosorum communiter pro manibus venditantur hominum marinorum. Alio interim divinæ in belluas hæc providentiæ documento veniunt, haud namque suffecissent pinnae communes obvertendo sustinendo corporis descendens ponderi, evitandoque lapsui.

Aliam hic addendi animus est observationem, a nullo adhuc, quantum ego quidem scio, adnotatam, quam piscatoribus Groenlandicis acceptam refero. Maximo scilicet, illoque latissimo balæna donata est intestino, *intestinum principale* a piscatoribus dicto; hoc (iisdem referentibus) ex imago gula per longum corporis spatium producit, at nec longitudinem ejus exacte determinare valent, nec situm, siquidem intestinum piscis incuriosi, raro admodum piscem aperiunt. Parietibus interim adeo fortibus gaudens ac tantæ capacitatis est hoc intestinum, ut hominem facile transmittat integrum. Frustrulo illius protracto, nec excrementorum, nec ali-

menti,

menti, ut in reliquorum intestinis vestigium ullum, glareæ saltem aliquid, similis glareæ in stomacho repertæ, inesse detexerunt. Paullulum ex eo, quum mortua fuerit balæna, admodum prominens elevatur supra aquam, piscatores autem, quo ad illam usque deprimatur elevationem, quam operationibus suis judicant aptiorem, lancea ex pinnæ latere intrusa, intestinum, de quo diximus, ut percutiant, student. Magna exinde quum effluat aeris copia, profundior aquis submergitur piscis. Nec a me impetrare possum, quin intestinum hoc pro magno aeris habeam reservatorio, quo, vel compresso, vel relaxato, vel pondus sibi addere majus, vel quod habet, diminueret, ac sic aut descendere valet, aut ascendere sub aqua; destinato hinc usui eidem, cui piscibus reliquis ampulla venit aeris. Sententiæ huic pondus addere visum est intestinum aliquod simile, dorso adhærens, aereque plenum, ab imo gulæ anum ulterius proficiscens, eundem dubio procul, usum præbens pisci, in quo illud deteximus, qui Germanico vocabulo: *Dorsch* adpellatur. Est autem asellus nigridis maculis conspersus, Gallico idiomate: *Muschebout* seu *Leopard*, salutat.

Piscis interim illius, quem Groenlandici piscatores: *Maris Gladium* dicunt, nemo adhuc quantum ego quidem scio, tradidit descriptionem. Hunc merito nuncupandam esse censeo: *Balænam minorem, utraque maxilla dentata, pinnam gladio curvo similem in dorso gerentem*; Balænae instar gutture instructa horizontali proiicit aquam; & gladium curvum, ex quo nomen sibi habet inditum, gerit in inferiore dorsi regione. Trium ille quatuorve pedem longus, & pedis unius vel x. digitorum latus corpori ubi jungitur, ascendendo evadit gracilior, caudamque versus inflexus; palo cæterum incurvato & aliquantulum acuminato similior quam gladio curvo, & maxima ex parte eadem indutus pelle qua piscis; balænae aliive pisci percutiendo seu lædendo insufficientissimus est. Gula potius aliquod minatur periculum. Acervatim scilicet plerumque incedit, balænam undecumque adgreditur, ac hinc inde ex corpore ejus magna carnis frustra decerpendo eo usque irritat, quo linguam balæna exserit. Huic soli quum hostes inhient, gulam ingressi, evellunt integram. Hinc & nautæ nostrates sæpissime balænas mortuas vident elingues; reperiunt item in Spitzberga ac tractu *Davis* dicto, gladiatorum ex his quosdam x. vel xii. pedum longos. Summæ autem agilitatis suæ ergo non nisi sclopeto enecatus captari potest hic piscis. Vi cæterum donatus tanta, ut solus par retinendæ sit balæna mortuæ ac submergendæ, una cum pluribus cymbis illam post se trahentibus. Multo interim gaudent adipe, oleumque præbent optimum.

Tractus ille *Davis*, seu fretum alias dictum Davidicum, illud est conciliabulum, ubi magnam balænarum confluxarum copiam. Februario capiunt ac Martio Groenlandiæ incolæ. Expleto hoc tempore, derelictis his oris, occidentem versus pergendo, oras tendunt Americæ. Centum fere sunt & quinquaginta anni, ex quibus Belgii, Hamburgenses aliique tractum *Davis* visitando quasi exhausserunt. Omnes namque fere Europæ nationes Spitzberga expulere balænas, continuo illas conatu investigando. Sunt interim in Belgio fœderato quidam, qui instructis victu per novem menses sufficiente navibus ad oras usque Americæ vel mense Augusto adhuc capiendis inhærent balænis.

Hæc sunt, quæ de balæna notatu digniora refert Cel. *Anderson*.

Quæ autem in *Speſtaculo naturæ* de balæna exponit Cel. *Pluche* huc redeunt: Piſcium illorum ex numero, quorum caro eſui haud infervit, dubio procul, utiliffimum eſſe pronuntiamus: balænam, belluam 130. 160. nonnunquam 200. pedum, longam. Modum quo capitur, curioſiſſimum brevibus hiſce habeas deſcriptum: in partibus Europæ Septentrionem verſus remotiſſimis plures idcirco confluunt cymbæ. Balænam, ſi qua promineat in aqua, fortiſſimus nautarum & audaciſſimus ſtudet ut percutiat harpagine, ſeu jaculo multo chalybe præparato, ſex longo vel quinque pedum, cujus fini funis plurium ac centum orgyarum longus nexus adhæret. Quod ſi jaculum lardum tranſierit & carnem, capta dicenda eſt præda; balæna etenim iſta occultatum, imum petit, & ſecum abripit funem quem piſcatores citiſſime relaxatum, continuo remittunt. Quod ſi inſequuturus piſcem longiſſime abeuntem pro brevitate non ſufficiat funis, extremitatem illius cucurbita muniunt evacuata, & probe obturata; cujus ex motu ac ſitu, locum ubi reperienda ſit balæna, cognoscunt. Quæ ſanguine effluſo vel ſponte in aquæ ſuperficiem redit, vel fune adtrahitur. Tunc prorſus enecata, vel ad navim terramve conducitur, & in fruſta diſſecatur. Replet nonnunquam balænae minoris adeps, 60. vel 70. pedum longæ, centum dolia parva (*barriques* Gallice dicta,) oleo, 16. vero quidquod 20. ex doliis majoribus (Gallice: *tonneaux*,) 200. pedum balænae adeps oleo. Cujus quum frequentior ſit uſus, infervit etenim & præparando quodam corio, & reddendo craſſiori, quo naves tinguntur, unguento, & lanam intexendam perficiendo, conciliando demum formam ſaponi; deſideratiſſimæ omnibus hinc & utiliffimæ mercium ſpeciei hoc venit oleum. Quod & Medica item ac pingendi ars in ſuos convertit uſus. Maximo eſt in terris Septentrionalibus commodo, noctes etenim per longas, parciſſimis illuminat ſumtibus. Balænam interim, quam noſtri nobis vendunt mercatores ex hoc ipſo derivanda venit piſce. Edentulus namque barbis prægrandibus, (quarum menſura 12. vel 15. pedes longitudine explet,) ac maxillis interjacentibus eſt inſtructus. Hæ, ſic putant alii, pinnarum ſeu pulmonis in balænam ſuſtinent vicem, alii eas habent pro totidem quaſi raſtellis; quorum auxilio pro nutrimento colligit herbam, quam in illius ſtomacho detegunt. Hæ igitur barbæ ſagittarum modo fiſſæ, coſtam ſic dictam balænae præbent, quam apud nos balænae ſub nomine venundant. Parciſſiſſimus ejus eſt uſus ex eo tempore, quum depoſito, quo olim corpus adigendo conſtringebant matronæ noſtrates, thorace (Gallico nomen venit: *le corps*, Italico: *busto*,) hoc ſaltem, etenim & huic ineſt balæna, & jucunditate carens, & uſu rationali deſtitutum retinent veſtimentorum fulcrum, quod triplicis ordinis caniſtrum dici meretur, Italice vero: *cerchio*, audit.

Reſert cæterum *Linnaeus*, quod Mari Atlantico immorans, pulmonibus communiter marinis nutriatur, illa, de qua jam agimus, balæna. Quæ de balænis in Indiæ Maribus repertis, ac 300. 600. imo 900. pedes longitudine exæquantibus, recenset *Plinius*, nobis exſuperare videntur veriſimilitudinem. Balænam, ſic *Pomet*, in *hiſtoria pharmacorum generali*, pro maximo piſces inter Maris Septentrionalis qui habeam, eo inducor balænae ſceletro, publicæ curioſorum contemplationi anno 1658. Pariſiis expoſito, cujus cranium 16. ad 17. pedum erat menſura, 4600. librarum, pondere; cujus maxillæ 10. pedum ſpatio divaricari poterant, 14. pedum longitudinem æqua.

æquabant, 1100. librarum singulæ pondus; pinnæ, manibus similes 12. pedum longitudinem adtingebant, ponderatæ autem singulæ 600. libras; costarum singulæ 12½. pedum, 24. explebant libras; spinæ nodorum a capite ad caudæ finem per 45. pedes productorum anteriores 50. habebant libras, pondere sensim decrescebant subsequentes. Ex adipe autem balænarum illud præparatur oleum, quod balænæ dicunt, cujus magna, pacis tempore, quantitas deportatur in Galliam, etenim non solum luci lampadum adhibetur, sed & purgando sulphuri, ac cuidam corii præparandi speciei accedat necessario. Duarum vero, quæ Parisiis venum veniunt, olei hujus specierum optima dici meretur illa, quæ sub nomine *Olei Sinus magni* (*Huile de Grande Baye*) a Gallis ex recenti coquitur adipe balænæ; hinc & oleum Gallicum minoris est fœtoris, quam illud, quod in Belgio coquunt, Belgæ namque haud statim, retracto ex balæna adipe, oleum excoquunt, sed domum prius deportant adipem. Hinc & quod, ex Gallia venit oleum, Belgico ut anteferatur, meretur; distinguitur autem Belgicum rubedine sua, & fœtore, quamvis limpidum sit, & fœcibus pene careat. Maxima cæterum olei ex balæna quantitas (præcipue Belgici) ex mari provenit glaciali, ibi enim copiosior balænarum est numerus.

Substantia adeo molli est lingua balænæ, ut gula animalis extracta, retrudi amplius nequeat. Primas autem, quas in regionibus Septentrionales cœperunt balænas, hodiernis multo fuisse majores asserunt, erant enim, dubio procul, vetustiores. Quamvis cæterum, balæna quam adtingit, ætatem, adcurate determinare haud valeamus, valde tamen longævæ videntur. Recenset R. P. *Johannes Eusebius Nieremberg*, quod dorsum balænæ antiquioris tectum aliquoties adpareat herbis, adeo, ut aliquamdiu superficiei Maris inhærens, insulam nautis mentiatur præsentem, cui anchoris velut fundo injectis, in monstri dorsum, quasi in terram aliquam descendentes, igne, super eodem, accenso, piscem ex somno suo expergefactum, in profundum abigunt. R. P. *Kircher* addit: quod balæna viscositatibus, ob adipis abundantiam, multis repleta, certo quodam tempore algæ, aliisque herbis marinis quæ sunt in fundo maris, sese adfricans (sive amore stimulata, sive pruritu) ex loco conchis, ostreisque saburra commixtis pleno, corpora hæc dura recipiat, quæ, falsedine Maris operante, in cutis viscositatem lutosam infixæ crescunt, ac indurescunt, ita ut nonnunquam integer piscis arboribus, plantis, conchis animalibusque testaceis tectus videatur. Difficiliora quæ credantur hæc, hisque similia erunt, credo, lectorum plurimis; teste autem Cel. *Anderson*, Piscis-Jovis, qui ex numero balænarum a piscatoribus Xaintongiensibus *Gibbar* dicitur, gibboris ergo prominentis in dorso prope pinnam; piscis hujus, inquam, dorsum, collum, & pinna ipsa admodum multis confita sunt glandibus marinis, carni imo adipi funditus infixis. Ex Piscatoribus Groenlandicis (sic ille pergit) acceptum habeo, quod non nisi vetustissimis piscibus ejusmodi conchæ adhæreant; observamus & nos conchas anatiferas ligno saltem vetustiori, inhærere, quod diu aquæ infuit; generatim namque non nisi arbores vetustissimas, ac semimortuas acervatim adgrediuntur insecta.

Merito interim asserit Cel. *Willoughby*, quod ea, quæ de quodam pisce, balænæ duce, perhibuere antiquiores, quum omni ex observationibus hodiernis derivando fundamento sint destituta, meram redoleant fabulam.

Determinaturi namque antiqui naturam magnitudinemque hujus piscis, in diversissima abeunt. Forſan matrem ſuam ſemper præcedentem ejus pullum, habuerunt pro matris duce, hunc enim uſque dum adoleverit ſemper inſequitur mater.

Paucis adhinc annis prodiit Cel. *Deslandes Collectio tractatuum variorum, Phyſicam & hiftoriam naturalem ſpectantium*, quos inter tractatus quidam, de modo balænas capiendi apud Cantabros, ſequentia tradit:

Piſcationum, quæ vel in Oceano, vel in Mari Mediterraneo peraguntur, omnium, periculoſiſſima pariter ac difficillima eſt piſcatio balænæ. Et Cantabri præſertim Lapurdienſes primi ſunt, qui ſpreta aſperitate marium Septentrionis montiumque glaciæ illam tentando, aliis Europæ populis, præcipue Belgis præivere, & commercii præſentis objectum præcipuum ſubminiſtrare. Hodie enim 300. ad 400. naves, duo item vel tria millia nautarum, hac piſcatione quotannis occupantur. Taceam de fructu ipsis exinde redeunte, etenim unici fere oleum & palearia balænæ Europæ univerſæ ſubminiſtrant. Oleum vel præparando corio, vel materiæ, qua naves illinuntur, liquefaciendæ inſervit. Palearium uſus autem variis in artibus continuus eſt. Cantabri igitur primi fuerunt auctores piſcationis balænarum, hos vero Belgæ, aſperrima navigationis incommoda callentes, imitati ſunt. Hodie autem hunc laborem miſſum feciſſe videntur. Cantabri etenim, quem ſibi elegerant tractum Davidicum, per tres ultimos, quibus eo iverant, annos, balænis quaſi denudatum reperiendo, magnam fecerunt jacturam ſumtuum. Jam autem pax Aquisgranæ inita, redeuntem priſtinum rerum ſtatum præſagire videtur; qui ſi redierit, nec unicis Belgis balænas captare licebit.

Temporibus igitur magis opportunis, 30. circiter naves eo tranſmittebant Cantabri, ſingulas 250. doliis (Gallice: *tonneaux*) ferendis capaces, ac quinquagenis nautis ſelectis, quibus aliquos addebant novarchi ſamulos, victu inſuper, vino ſcilicet, aqua, pane bis cocto, cidre, ſeu potu confectio ex pomis, leguminibus ac hælecibus ſale conſperſis, per ſex menſes integros ſufficientibus, inſtructas. Addebant cuiſvis navi quinque, ſexve cymbas, in loco piſcationes tantum demittendas in mare, varia tandem, quæ neceſſaria ſunt, utenſilia. Quum loco illi, ubi permeant balænæ, navis advenerit, primæ omnibus curæ eſt furnus, excoquendo, & in oleum convertendo adipe deſtinatus, ut exædificetur. Cautiore hic opus eſt attentione. Vela ſemper navis diſtenta, atque expanſa remanent, cujus ex lateribus ſuſpenſæ cymbæ omnibus neceſſariis inſtructæ ſunt adparatibus. In mali corbe ſimulac balænam detexerit excubias agens nauta, idiomate clamat Cantabrico: *Balia, Balia*. Quo exaudito omne navis præſidium in cymbas proſiliens, remo adacto balænam detectam inſequitur. Magno autem periculo expoſitus ille eſt nauta, qui jaculo percuſſurus balænam in anteriore cymbæ parte conſtitutus eſt. Icta enim balæna, repetitis caudæ pinnarumque iſtibus nautam enecat ſæpiſſime, cymbamque evertit; hinc arte opus eſt, ut præciſe corporis parte ſenſibiliſſiori percutiatur, ſic enim aufugiens ſeſe abdit in undis. Tum relaxatis funiculis, extremitates extremitatibus neſtendo, balænam undecumque ſequitur cymba. Quæ quum communiter redeat in ſuperficiem aquæ, ſanguinis partem egurgitando, crebrioribus lancearum iſtibus eam ut prorsus enecent, allaborant, cymba eamdem

dem sequentes, cautiores tamen pinnarum evitant & caudæ ictus periculosos. Cymbam, cui balæna cohæret, reliquæ sequuntur, ut sensim protrahant sensimque balænam, cui recipiendæ præsens quo sit navis, nec visum ejus effugiant cymbæ, extensis has illa comitatur velis.

Quod si quando mortua jam balæna, antequam ex navis latere suspensa sit, maris fundo immergitur, funes præscindantur necesse est, ne inimum abripiantur & cymbæ; balæna interim prorsus deperditur. Quod ut impediant, statim ex eo quum mortuam esse cognoscunt, funibus in altum retractis suspensam ad navim conducunt, ex cujus latere alterutro catenis prægrandibus ex aqua prominens suspenditur. Tunc operarii ocreis, dentibus ferreis, ne vestigia fallant, munitis, induti; imo fune per transversum corpus ducto, navi adhærentes, cultris, ansa instructis lignea, adipem balænae rescindunt, navi immittunt, ibidem diffecant in frustula, & ahenis, quo liquefiat, iniiciunt. Quo autem acceleretur liquefactio, bini baculis eundem circumagunt ferreis. Ligno ignis primus, posterior nutritur adipe, qui maxima olei sui parte excocta vehementiorem præbet ignem. Retracto deinde balænae undequaque obversæ adipe omni, barbæ, seu palearia in gula ejus latentes, nec, ut falso perhibent alii, foras eminentes, retrahuntur. Media autem olei pars propria est navis præsidio, navarchæ item, nauclero, & operariis ex pretio barbarum aliqua adhuc credit portio.

Belgæ, incendii timore justo, numquam balænae adipem in navibus excoquunt, sed doliis immissum, excoctum domum inferunt. Cantabri, his audaciores, triplo majorem pro audaciæ suæ præmio habent usum. Trium enim adipe repleta dolia, unum ad summum reddunt olei. Olim in mari glaciali, & oris Groenlandiæ pisces suos quærebant Cantabri, reperientes ibidem balænas reliquis majores, pinguiioresque, de quibus supra, sub nomine balænarum freti magni egimus. Hæ & purius oleum, & palearia meliora, atque læviora præcipue præbent. Ast glacie adhærente naves ibidem confringendi periculo neutiquam vacant. Cujus rei testimonia quotannis repetita, Belgis experientia tristis suppeditat.

Sensim igitur, sensimque relictis Groenlandiæ oris, balænas in pelago quæsituri Insulam Finlandiæ, versus regionem Sarda dictam, media abibant in vada Cantabri. Quæ ibi reperiuntur balænae, minores quidem, quam Groenlandicæ, sed & alacriores, & captu sunt difficiliiores, alternatim namque aqua submerguntur, & emerguntur. Cantabri & hinc depulsi, tractum *Davis* versus ad insulam *Inseo* dictam, glacie tenuiori quamvis frequenti stipatum, sese contulere. Duas hic balænarum species, quæ sub nomine balænarum freti magni, Sardavæ veniunt, reperiere.

Duram interim, (sic Cel. pergit *Deslandes*) balænae cutim, ægre quidem jaculum pertransit; ast infecto quodam marino, pediculo ceti communiter dicto, illa infestatur. Conferas de infecto citato, *Martinum Lister* in *historia Conchyliorum*, & *Johannem Boccone* in *Disquisitionibus*, & *Observationibus naturalibus*. Instructum conspicitur hoc infectum concha triplicis frontis, extremitatum binarum reclusarum, quas egrediuntur bracchia longissimis prædita oneribus, quorum auxilio, & balænam ictu ferit, & adipe, quo circumfusa est, nutritur. Quam violento interim motu, ac crebrius repetito hoc infectum quo abigat, annitatur balæna, depellere tamen nequit, pinnis præcipue inhærens & membri genitalis regionibus. *Roberto Sibbaldus*,

qui ad oras Scotiæ delatas interdum examini subjecit balænas, qui & hæc observavit infecta, acceptam referimus eorum descriptionem. Contactu namque duriora, digitis compressa, liquorem emittebant nigrum, balænæ, ut videtur, infectum. Longitudine quamvis modicum septem excedant digitos, brachia ex concha sua protendentia multo adparent majora. In hoc situ constituta, polypos referunt exacte figura. Nec caput unquam monstrant resectum, sed latens continuo sub crusta quadam ossea, qua contegitur.

Varii, præter hæc infecta, ex testimonio Cel. *Deslandes* balænæ adhuc extimescendi sunt hostes; & inter cæteros piscis, qui *gladium gerens* dicitur, quem Galli nuncupant: *Espadon*, *grand Espadas*, *Heron de Mer*, Genuenses: *Pesce Spada*; Massilienses: *Emperador*, vel *Poisson-Empereur*, gladii ergo longissimi, ac parte ex utraque dentati, quem gerit in capite: Diffimillimus interim hic piscis est ab illo, quem piscatores Groenlandici *gladium maris* dicunt, quique est balænæ species. Addit Cel. *Anderson*, quod conspecto hoc pisce *Espadon*, balæna, quamvis mole sit adeo superiore, fremens, atque modo insolito exagitata, præceps in fugam, inque latus oppositum irruat.

Italicum vero nomen ejus: *Balæna*, Hispanicum: *Ballena*, seu *Balaina*, Latinum item *Balæna*, ex Græco: *Phalaina*, seu *Balaina* derivatur. Anglice dicitur: *Whale*, Germanice: *Walfisch*, Suevico idiomate: *Groenlands Walfisk*. Gallico sermone pullum balænæ *Baleinon* nuncupamus vel *Baleinon*, & membrum genitale maris: *Balenas*.

Ejus balænæ (verba sunt Cel. *Lemery* in tractatu de alimentis) licet carnis suæ foetidæ, ac concoctu difficilioris ergo haud instituatur, nam adipem ejus solummodo desideramus: multi tamen, Æthiopes qui Promontorium bonæ Spei inhabitant, avidiores eidem inhiant; cibo sane convenienti pro stomachis eorum robustissimis, ac intestina cruda, & foetentia cibi tenerrimi instar, ut concoquant, adsuefactis. Linguam balænæ saporis optimi esse testantur *Rondelet*, & *Belon*.

Plura autem artium, quam quidem Medicinæ usui inservientia, præbet balæna. Commendant interim *Ettmuller*, alique priapum ejus limatum, in dosi ʒʒ. usque ad ʒj. cum aqua aliqua adpropriata contra fluorem album, & dysenteriam; imo & contra pleuritim aliquis ejus est usus. Verum mandibulæ lucii semper præferendæ erunt. Ex mente *Schroderi* adeps ejus pro optimo contra scabiem faciente remedio, secundum *Lemery* autem, oleum balænæ emolliente virtute, & resolvente præditum habetur. Parcissimus nihilo tamen minus omnium, quæ recensuimus remediorum usus est in arte Medica, cui pauciora præbet convertenda in suam utilitatem, quam artibus mechanicis.

Cetus. Offic. *Cete*, Dal. Pharm. 413. Jonst. de Pisc. 42. *Cete admirabile aliud*, Clus. Exot. 131. *Cetus dentatus*, Charlet. 167. *Balæna*, Merr. Pinn. 190. *Trompa*, Park. Theatr. 1607. *Cete Clusio descriptum*, Pot-Walfisch *Batavis maris accolis dictum*, Villoughb. Ichth. 41. Raii Syn. Pisc. 11. *Catodon fistula in cervice*, Arted. Gen. 79. Syn. 108. *Balæna minor*, *Sperma Ceti falso dicta*. Quorumd. Gallice: *Cachalot*, seu *petite Baleine*.

Anno 1598. ex hac balænarum specie, una, ut docet ex *Clusio Villoughby*, exorta maris tempestate impetuosissima, in oras Belgii Occidentales rejecta,

æta, per decem horas adhuc vivens, per septem vel octo dies, mortua a plurimis ex urbibus, pagisque vicinis eo concurrentibus, est spectata. Cetus hic 52. ad 53. pedum longus, 30. pedum circumferentiam excedens, parte rostri superiore, ab extremitate ad oculos usque 15. pedum longa, erat donatus; palato instructo 42. alveolis, dentes mandibulæ inferioris, digiti unius magnitudinem fere excrecentes recipientibus; fistula in capite dorsum versus 3. circiter pedum, qua proiciebat aquam; mandibula præterea duobus dentium ordinibus instructa, 7. tantummodo pedum longa, & mali fragmentum effingente; linguæ extremitate cerevisiæ dolium exaquantem; oculis autem pro corporis ratione, parvis; 4. pedum spatio distantibus a pinnis, quæ 4. pedum, & 4. digitorum longæ, pedis ferme unius crassitie mensuram æquabant; umbilico, a mandibulis 16. a pene autem 3. pedibus distante; membro genitali 6. pedum longo, 3. vero cum dimidio longinquo ab ano; Spatium denique 13. pedum, cum dimidio, ano interjectum erat, & caudæ, crassissimæ, & 13. pedum latæ. Aliquot exinde diebus exactis mercatoribus nonnullis vendebatur, sub ea conditione, ut maxima ejusdem ossa, raritatis ergo, Hagæ Comitum adservanda, eo deferri curarent. Caput ejus tantam spermatis ceti subministrasse dicunt materiam, quantum quarta pars dolii, cui communiter insunt haleces, capere posset; corpus autem totum 40. circiter olei dolia majora (Gallice: *barriques*) reddidit. Dorsi corium, veluti Delfinus, & thunnus, nigrum, ventrem habebat albidum.

Exeunte anni 1607. Decembre, simile monstrum aliud in oras Belgii meridionales advehebatur, longitudine prius adhuc superans 60. etenim pedum longum erat, 14. altum. Corporis circumferentia 30. latitudine cauda 14. gula 12. pedes explebat. In mandibula inferiore saltem dentibus per ordines dispositis, in superiore autem totidem gaudebat alveolis, dentes, gula clausa, recipientibus. Colore præcedens imitabatur, habebatur autem pro mare.

Quæ de differentibus inter se specie cetis Celeber. addit *Anderson* huc fere redeunt:

Sunt balænarum (sic ille inquit) aliquæ, quarum maxilla inferior dentibus munita, superior vel nullis planis, vel paucissimis maxillaribus est donata; his adnumerandus est cetus, Gallice dictus *Cachelot*, (vox a Cantabris, primis balænarum piscatoribus deducenda,) Belgice: *Cazilot*, seu *Pot-Fisch*, item *Pot-Walfisch*, & *Nord-Caper*, siquidem centenis conspiciuntur, in Promontorio Septentrionis, Norvegiensi, tanta ibidem eorum est copia. Et hoc eodem tractu primi capti fuerunt ceti. Quorum alii dentibus prægrandibus, conglobatis, & superne depresso; alii tenuioribus, & falcis in modum reflexis, præditi sunt. Alii brevioribus, longioribus alii dentibus gaudent inter illos, qui prægrandibus sunt instructi. Notatu autem dignior evadit cetus, ob duo præstantissima, quæ Medicinæ exhibet medicamina, sperma ceti scilicet, & ambarum. In Tractu Davis, & Spitzbergia non nisi illa cetorum reperitur species, quæ dentibus prægrandibus, atque depresso, sed brevioribus est ornata. Capitis interim sunt magni; ex latere duabus pinnis longis, elevata in dorso ala exigua muniuntur, & cauda 12. vel 15. pedum lata. *Sibbaldus* ita eum describendo distinguit; est, inquit, *Balæna macrocephala iripennis*, quæ in mandibula inferiore

dentes

dentes habet minus inflexos, & in planum desinentes. Agminatim vero iter suum peragit; & ex quodam navarcho me accepisse memini, qui advenientem ex oris Groenlandiæ quodam die, cetorum cumulum, suum insequi ipse vidit regem, seu ducem agminis, 100. ad minimum pedibus longum. Hic conspecta navi, quum aquam violentius inflando, strepitum excitasset, campanarum fusurro, similem, navim vero percussione tremefacientem; omne agmen insequens præcepit sese dedit in fugam. Et quamvis Promontorium Septemtrionis, & Finniæ oræ iisdem abundant, raro tamen ibidem capiuntur, quia admodum efferati sunt, nec nisi in uno, vel duobus in locis prope pinnam, transitus jaculo patet. Cæterum illorum adeps, cum pluribus interstinctus sit tendinibus, olei haud reddit multum. Etenim & minoris molis est, & ponderis ac balæna Groenlandica, hinc & multo hac agilior; & diutius morari potest sub aqua; asperior tandem, ossiumque fortiorum; nec tam crebro repetitos, nec adeo vehementes caudæ ictus edere valet. Binas eorundem esse species, docent nautæ, corporis figura, dentibusque simillimas, dissimiles autem eo, quod hi virides, cranio, seu operculo duro, osseoque cerebrum retegente; illi autem in dorso glauci, ac sub ventre albi, instructi sint membrana digiti unius crassa, pro cerebri operculo. Alius ex navium gubernatoribus Hamburgensibus retulit; quod ceto, quem anno 1727. ceperat, speciei novissime memoratæ, unica saltem fuerit prominens in capite fistula, aerem efflans; adeps, rostrum contegens, duobus pedibus altior; at in capitis parte superiore trium saltem digitorum, membranam cerebri immediate tegens; cerebrum, sic referendo perrexit, 28. in cellulas successive sese aperientibus & evacuantibus, quod fuerit divisum; quod sperma ceti, illo contentum, albidum quidem, & spiritus vini instar fuerit limpidum, at exemptum, illico in globulos nivi similes abierit; quod per omnem piscis adipem grana spermatis hujus hinc inde dispersa, ac variis in locis cavitates eodem repletæ inveniantur; quod tres in fine dorsi caudam versus habeat globulos piscis, quorum prima 18. secunda 6. tertia 3. digitorum sit elevata; quod tandem sese submergiturus, lateri dextro impositus sensim delabatur in imum. Statim in hanc abiit sententiam, quod juniores saltem prædicta membrana tectum habeant cerebrum, quæ crescentibus annis indurefcens in cranium denique osseum abeat. Navarchus autem addidit, quod in destinatam sibi longitudinem jam excreverit piscis, 60. etenim pedum longus erat; imo alius, ex viridium specie, a navarcho quodam Belgico captus cranio jam gaudebat osseo, quamvis 40. pedum longitudinem vix adtingeret. Ex suo item pisce 36. ad minimum habuit adipis dolia majora. Observat denique: ceto suo linguam fuisse crassiores gula occlusa; aperta autem, linguam adeo retrocessisse, ut nulla amplius adpareret. Unum præterea navarchus ex anterioribus, & alterum ex posterioribus dentibus mihi largitus est. Similis speciei piscem haud ita pridem alius cepit nauta Belgus; ex cujus relatione pauca adhuc depromamus, quo magis completa cetorum reddatur historia. Caput (hæc verba ejus sunt) medium constituit cetum, figura sua singulari, sclopeti fulcrum, seu pedem, effingentem. Unica in superiore rostri parte constituta fistula, aquam reiecit, & quem in dorso habet gibbus, pinnae est similis. (Neglecto forsan examine adcuratiore duæ inferiores, & caudam versus elongatæ obser-

observationem ejus effugerunt.) Prominent in mandibulæ superioris parte utraque 3. vel 4. dentes molares, pars ejus reliqua crenis, seu vaginis, recipientibus mandibulæ inferioris dentes, confita est. Maximi anteriores, minores vero dentes, (tota etenim mandibula inferior illis repletur,) sunt posteriores, evulsi autem totidem repræsentant cucumeres. Interiorem vero capitis partem, principaliorem sane in pisce, quum nemo, quantum ego quidem sciam, hoc novarcho, adcuratior disquisiverit, quædam ex ejusdem observationibus delibandi animus est. Habeas igitur sequentia:

Retracta verticis pelle, adipe, manus unius alto, inferior membrana crassa, ac nervosa, pro cranio inserviens, detegitur. Hanc secundum excipit discrimen, similis nempe textura nervorum prægrandium, quæ quatuor circiter digitorum alta, a rostro recta per caput progreditur usque ad cervicem, quam in duas dividit partes. Interjacens itaque duabus hisce membranis camera prima, Belgice: *Klapmuiz*, seu mitra, dicta, cerebrum continet, quod præstantiæ suæ ergo vel Cerebellum dici mereatur, & conficiendo venit spermati ceti. Quæ autem parietes cellularum camerae illius efformat, materia, illa texto nostro serici crispi, quod vernaculo: *Crêpe* nuncupamus, simillima est; & 7. doliola pretiosi hujus olei nautæ rediere ex cerebello; limpidum erat ac albidum, & aquæ in stillatum casci instar coagulabatur, ast aqua subtracta pristinae suæ fluiditati restituebatur. Huic camerae inferior altera aderat, juguli palato innixa, & pro varia piscis magnitudine 4. ad 7½. pedum alta; nec non spermatico cerebro, quod Cerebrum proprie sic dictum adpellare liceat, expleta. Hoc igitur mellis instar in alveari per cellulas dispositum est, quarum parietes internæ ovi pelliculæ similes reperiuntur. Prout cerebrum hujus camerae subtraxeris, alio succedente, & ex corpore toto, amplioris venæ auxilio adportato adimplebitur; ita ut vel 11. doliola, hac ratione exhaurire poteris. Singulæ autem cellulae utriusvis camerae cuticulis tenuissimis obductæ sunt, quarum pori subtiliores cerebro transeunti, & in oculos, aures, partes reliquas influenti patent. Nec vas illud maximum obliviscaris, de quo paullo ante dictum est, quod ubi capiti vicinum, hominis lumbum crassitudine exæquat, post autem ad longitudinem spinæ dorsalis procurrens ad caudam, ibi vix digiti unius crassitudinem refert.

Summa tamen cautione opus est, ne adipem balænæ rescindendo, vel minima cælura illud lædas, alias enim sperma omne efflueret. Quamquidem venam ejus spermaticam, sedem præcipuam mirandi roboris balænæ, innumera vascula minora egredi vidimus, quæ succum cerebri totum per corpus abducunt, quæque non solum adipi balænæ & carni, sed vel ipso oleo exinde præparato spermaticæ virtutis quidquam communicant. Novarchus quidam in observando adcuratissimus, ac in referendo fide dignissimus (sic ex illo acceptum habeo) varios in piscibus dissectis sacculos membranosos, spermate plenos, per massam carnis dispersos, suis ipse oculis vidit, suis manibus contrectavit. Linguam vero corporis respectu, exiguam præbet balæna; ast rictum spatiosissimum, & vel bovi transeunti patentem. Quidquod in stomacho alius ossa sceletraque piscium 7. pluribusque pedibus longorum, fere concocta reperierunt. Ex alio quodam 40. dolia adipis piscatoribus rediisse novimus. Caro ejus durissima filis ex crassissimis constat, & multis admodum nervis ac tendinibus crassis durisque inter-

intertexta est. Paucissima corporis loca jaculo permittunt transitum. Et marem pariter ac foemellam spermatico cerebro gaudere adfero, quod quidem foemellæ varii Physicorum denegavere. Nonne naturæ consilio ac intentioni conforme est cerebrum in sexu utroque? nonne utrique necessarium? & quodnam quæso animalium sexus differentiam ostendit in cerebro?

Quem vero Novæ Angliæ in oris captant, cetum, & specie ab illo diversum, & dentibus fortioribus latioribusque instructum esse constat. Hunc Angli dicunt: *Sperma-Ceti-VVhala*, & insularum Dæmonum incolæ: *Trumpe*. Dentes ejus sua forma dentes rotæ molaris imitantur, & bracchii, ubi manui proximum est, crassitudinem referunt. Teste *Dudley* leucophæum colorem, & in dorso gibbum, in maxilla inferiore tandem seriem dentium eburneorum 5. ad 6. digitorum ostendunt. Idem ille ceti alius mentionem iniicit, 49. pedum longi, ex quo 12. dolia spermatis ceti proveniunt. Oleum ex horum adipe rediens reliquorum oleum & limpiditate & dulcedine superare addit; eosque reliquis agiliores, si quo vulnere se ictosperferant, dorso suo superjacentes sese defendere. Ex his igitur Ambarum griseum & Sperma Ceti redit, quorum originem quum hodie clare satis cognitam habeamus, non est, quod fabulas antiquorum eo spectantes vel recenseamus. En quæ huc spectantia in *Transactionibus Philosophicis* leguntur:

Ambarum griseum non nisi in cetis reperitur, quod globulis 3. ad 12. digitorum diametri, $1\frac{1}{2}$. ad 20. librarum ponderis, & vesicula ovali 3. ad 4. pedibus longa, 2. ad 3. pedibus lata, bovinæ simili, sed acutioribus extremitatibus donata, hac inquam detinetur, nec tamen nexum adhæret. Vesica ipsa in binos definit tubos, quorum alter amplitudine ad vesicam, quam transit, continuo decrescit; alter autem ex renibus proveniens in orificio suo ex altera sacculi extremitate definit. Testiculis superior & reatissimus superhæret; testiculi autem 1. pedis longi, ad longum siti, virgæ radicem 4. ad 5. pedibus sub umbilico, & 3. ad 4. ab ano pertingunt; sacculus ipse liquore aurantii-obscurioris coloris, nec olei spissitatem attingente, cæterum ambari eidem innatantis odorem sed fortiolem referente plenus est. Pars ejus interior, ut & interior virgæ canalus liquoris colore tingitur. Globuli ipsi in pisce vivente durissimi videntur, imo sacculum dissecando sæpius globulorum frustula sphærica abrafa, duritie ac coloris ejusdem reperiuntur. Variis enim ex cuticulis constant, cæparum more, sibi invicem superstratis. Numquam plures quam 4. globulos in vesica una deteguntur, & maximus, quem unquam invenire, quum 20. esset librarum, solus sua vesica detinebatur. Hos autem non nisi in cetis vetustioribus, bene conformatis, & quidem maribus tantum obvenire credunt. Cetus igitur ambari auctor est sine dubio, ast quam ex materia & ubi formetur, incertum. Vir ex doctissimis unus, sacculum pro vesica urinæ, & globulos pro concretione particularum oleosarum atque foetentium fluidi eadem contenti habet, siquidem recentes protracti, humidi, ac foetentissimi sint odoris. Aliud quoddam momenti minoris, plurimis olim eruditorum contentionebus anam præbuit. In Ambari frustulis enim persæpe exigua quædam frustula nigra, cuspidata, vitri vel concharum frustulis similia reperiuntur, quæ Physicorum alii avicularum pro rostris habendo, nescio quanta de origine ambari fabulati sunt. Sic enim Cel. *Dudley* coram Regia Societate Londinensi, hæc frustula, rostra pisciculorum, *Squid* dicto-

dictorum, & præcipuum balænæ nutrimentum constituentium declaravit. Sic in *historia Japonensi Kämpfer* duplicis generis balænæ mentionem iniicit, in oris Japoniæ captæ, & in intestinis suis ambarum gerentis; alteram *Fianfiro*, alteram vero dicit: *Mokos*; nec earum descriptionem subnectit, & quæcumque alia de illis subnectit, nobis quidem suspectæ fidei videntur.

Ultimo anni 1720. die sæviens maris tempestas violentior, magna Albi, fluvii inundatione excipiebatur. Fluxu igitur insolito cetus in Albim delatus, recedenti mari in oris fluvii remansit. Diu ille cum fluctibus conflictabatur, tandem exspiravit; & ruricolæ eum in fluvio usque ad *Vischaven*, oppidulum milliari 1. a Stada distans protraxere; ibidem subtrahendo ejus adipi sese accinxere. Quamvis itaque occasione tam rara tamque opportuna neglecta, nullus curiosorum naturæ vel observationibus vel anatomia ejus instituta, naturæ historiam ditaverit: nos tamen ea subministravimus, quantulacumque sunt, quæ vel ex aliorum vel ex nostrametipsum contemplatione (nec tamen, nisi frustula quædam, Hamburgum deportata nobis disquirere licuit) vel accepta, vel collecta habemus:

Longitudine sua 60. ad 70. & altitudine 30. ad 40. pedes explebat. Figuram ejus in *Jonstonii historia piscium Lib. V. tab. 42.* satis bene expressam videbis. Caput ejus immensum, pars sua superior, inferiori haud probe satis respondere videbatur; sane respondebat, si sapientissimum summi Creatoris finem consideres; ille enim capite tam immenso donatum esse voluit cetum, ut vasta ejusdem cavitas cerebro continendo sufficeret tanto, quantum & animalis usus & utilitas hominum exigit. Eximio etenim medio cedit cerebrum & in terris Septentrionalibus eo magis necessario, quo frequentiores ibidem sunt pectoris morbi. Ruricolæ arcani hujus nescii, repetitis ascie ictibus caput perforaverunt, & statim magna cerebri spermatici copia effluxit. Nec nisi tantillum conservaverant, quod dum pharmacopolis vendiderint, excellentissimum Sperma ceti, præparatum præbuit. Inferior maxilla utrinque 25. dentes, spithama una inter se distantes, ac pronos inclinando continebat. Frustulum ego maxillæ ferra resectum coemi, & 1. pedis longum latumque reperi. Gingivæ & palatum nivei coloris & compagis tam solidæ erant ac duræ, quantæ est ungula equi, imo extrinsecus cortice striato ac saxi instar, duro obtectæ, cujus frustula vel hodie in spiritu vini conservata habeo. Quo facilior dentes retrahere possem, aqua excoquendum jussi illud mandibulæ frustulum, & vix continuata per 12. horas coctione illam mollitiem induit, quæ transeunti cultro cederet. Denuo continuata ebullitione palati bovini qualitatem nactum est, nec ori contrariam, imo sale addito esculentam. Duos igitur dentes protraxi, alterum $6\frac{1}{2}$. digitis longum, & 8. digitorum circumferentiæ, alterum 7. fere digitis longum & circumferentiæ similis, altitudinis tamen minoris. Latitudinem supra satis magnam, ast nimis irregularem exhibent, quam ut mensuram illorum inire possemus. Biennio exinde alius mihi dens ceti adportatus est, 7. & quod excedit digitorum longus, & $8\frac{1}{2}$. digitorum circumferentiæ, magis depressus, & ut censeo, ex pisce multo majori profectus. Quod ad nostrum adtinet, num & mandibula ejus superior dentibus instructa fuerit, nullius observatione exceptum fuit. Negabant quidem piscatores, ast supra dicta colligas & adparebit, dentibus & hanc esse instructam oportuisse, qui quum maxillares fuerint, quod piscatorum ob-

serva-

servationes effugerint, quid mirum? Totidem vero crenas in maxilla superiore, quot in inferiore dentes conspeximus, & hi, rictu sese occludente, in illas, tamquam vaginas recipiebantur. Oculorum parvorum liquor crystallinus arefactus vix liquorem balænæ Groenlandicæ, seu globulum sclopeti minoris, quali venatores utuntur, superabat. Carni & pelli intermedium erat stratum adipis 6. digitis altum, & quum ampliolem piscis utilitatem rusticolæ ignorarent, maximam adipis partem, ob oleitunc temporis caritatem, avidissimi colligebant. Nemo inter omnes stomachum vel intestina ejus disquirendi curiositate permotus piscem disseccuit, sic in prædam fluctuum abiere ossa ejus cum carne. Caudam tamen integram, prope ad dorsum resectam, Hamburgi conspiciere licuit. Hujus figura fere triangularis erat, & extremitas ejus in medio parum recedens, falcatam lunam concavam haud incongrue referebat. Extremitas caudæ latissima 8. pedes explebat; & longitudinis 5. pedes & 8. digitos, aut circumferentiæ 16. pedes & 4. digitos habebat, ubi a ventre fuerat resecta. Figura ejus globo depresso respondebat. Si colorem pellis quæras; prior erat cinerei, secunda autem valde tenuior illa, quam in balænâ Groenlandica observabis. Prima contactu mollis, ut sericum, quod villosum dicunt; secunda, ex parte illa, qua adipem contingebat, hispida, & tendinosa. Caro recens, rubra, filis majoribus constans; & plurimis nervis intertexta, firmissima. Cujus necessitatem dijudicavi ex eo, quod nullo prorsus osse instructa erat, nisi spinæ dorsî extremitate; hujus pars 3. circiter pedum longa, caudam ingressa, vertebrae fere quadratas efformabat, hæ autem sensim, sensimque decrescentes, minime, sic ego censeo, producendo, ac sustinendo sufficiebant motui caudæ violentiori. Firmitatis vero, soliditatisque, quæ carni ejus fuit, singularis documentum ex eo hausimus, quia coelo licet admodum humido, per aliquot attamen hebdomades, nec putredine fuerit correpta, nec fœtore, ne cocta quidem, infecta. Oleum etenim, quod posset, omne, retracturi, una cum adipe, multa coctione ebulliri eam curavimus. Quo quum pro lampadis nutrimento uteremur, flammam præbuit, ceræ instar, purissimam, clarissimamque, aut odorem nullum edidit. Inquisiturus interim, num cerebrum oleosum per totum piscem sese diffundens, aliqualem ipsi impertiatur qualitatem spermaticam; frustula quædam extremitatis caudæ, artis tractandi methodo subiecta esse volui; & parcissima, quamvis optima spermatis ceti portio exinde ad me rediit. Imo ichthyocollam præstantissimam præbuit massæ residuum, quod *Griesen* nuncupant nautæ, quodque dicitur de quibusvis facibus glutinosis, ab adipe excocto relictis.

Omniùm hætenus observationem, sic pergit *Cel. Anderson*, dentes illi effugierunt molares, 5. digitorum longi, quibus, præter caninos, & cuspidatos, instructos esse cetos compertum habeo. Situm vero obtinent in fundo gutturis; aliquantulum recurvati; circumferentia sua media 5. superiore 3. superant digitos; nec in unam, sed plures exeunt cuspides; quibus magis comminuendo nutrimento apti redduntur. Caninis autem breviores dentes sunt molares, & mandibulam vix tangunt superiorem; hæc igitur instructa sit, coniiciendum, dentibus similibus, ac superantibus longitudine reliquos, ut vim subministrare possint, manducationi sufficientem.

Varios præter hunc cetum vulgarem descriptos dedit Cel. *Anderson*, cetos rariores, quorum alii præstantissimum præbent Sperma ceti.

Cantabris cetus: *Cachalot* seu *Byaris* audit; cave tamen, ne hunc cum magno *Maršovino Gesneri*, id est: Anglorum: *Grampu*, Belonii & Rondeletii: *Orca*, & Santonienſium *Espanitar* confundas; nec cum *Physestre* id est *susflatore*, quemque Occitanienſes: *Mular*, & Santonienſes: *Senedette* adpellant. Ex cerebro ceti tandem materia illa præparatur, quam alias, *sinistre* tamen: *naturam seu sperma ceti*, vel *ambarum album* nuncupant,

Bina scilicet, illaque pretii singularis media, cetus suppeditat Medicinæ, ambarum griseum & sperma ceti. Prætereamus interim ambari grisei qualitates, in quibus enumerandis multus fuit Vir quondam Cel. *Geoffroy* in Tomo I. *Materiæ Medicæ* pag. 284. seqq. quamvis de origine ejus vera dubitaverit. Sperma ceti autem pro eximio Medicinæ medio jam usui externo venit, jam interno.

Magnam enim olei, aut parciorem salis volatilis quantitatem continet. *Bajonnæ* enim & *Luisii* in *Vasconia*, exinde enim plerumque ad nos deportatur, sequenti ratione præparari solet. Cerebrum ceti parciore igne liquefactum, formis idcirco effictis infundunt, in his quum oleo defluxo refrigeratum fuerit, denuo liquefaciunt, iterum formis committunt, alterna liquefactione & infusione toties repetita, quo probe purificatum sit, & candorem adquisiverit. Tunc cultri singulari ope in laminas subtiliores conscindunt, sic enim plerumque venum venit. Seligendum esto illud, quod laminis constat albis, diaphanis ac clavis, quod odoris est ferini nec cera candida commixtum; sic enim sæpius adulterari solet. Ut fraudem detegas odorem ceræ investigeris, adtendas quoque ad colorem, qui admixta cera albido-debiliores redditur, & ad gracilitatem insolitam. Temporis tractu ac aere accedente flavescit & rancidum saporem induit, hinc vasis vitreis, iisque probe ab ingressu aeris munitis, conservetur necesse est.

Amplissimus autem spermatis ceti usus est in arte Medica. Balsamicæ virtutis ergo morbis pectoralibus convenit, & ad demulcendam pectoris acrimoniam, ac detergenda consolidandaque ejus ulcera mirifice facit. Tutissimum pariter ac efficax medium contra tussim ex catarrho contumaciori & inveterato, imo ex ulceribus pulmonum proveniente, contra pleuritim & apostemata interna, suppeditat. Consolidanti eximio cedit, ubi intestinorum mucositas, ab acrimonia bilis absorpta fuerit, ut in dysenteria & diarrhœa. Hinc & pro exulceratione renum & sanguinis mictu commendatur. Fibras etiam emollit atque relaxat, & meatus dilatando sæpius ad profligandum & expellendum calculum facit. Nec non ad resolvendum cruorem in contusionibus internis, seu livoribus, item ad leniendos post partum supervenientes dolores adhibetur. Recensitis igitur in casibus, oleo amygdalorum dulcium solutum, vel sub forma loochis potionisve oleosæ syrupis dulcificantibus admixtum, vel denique instar electuarii, conservis convenientibus subactum, exhibeatur. Nudi seu oleo amygdal. dulci, vel ovo sorbili soluti dosis sit gr. xij. ad ℥j., aliis pharmacis admixti autem ℥ss. ad ℥j. Ne autem labiis vel palato ægrotantis adhærendo nauseam ipsi moveat, exacte & penitus ut solvatur, curandum.

Externe adhibito vim lenitivam, emollientem & consolidantem inesse con-

constat . Hinc frequentissimus ejus usus est in variolis ; admixto scilicet oleo amygdalorum dulcium pustulas indurescentes ungunt . Has emolliendo cicatrices profligat , quas post se relinquere solent variolæ . Haud ita pridem est , ex quo hoc medio contra variolas utuntur , quamvis ad delendas scabiei & pustularum fissuras jam diu est , quod illo fuerant usi . Sperma ceti tandem & emplastra , ad resolvendos mammarum tumores , ex coagulatione lactis provenientes , ingreditur ; quæ inter Mynsichtianum eminet , omnium consensu eximium . Clysteribus anti-dysentericis item & injectionibus , matricis ulcera lenientibus inditur . Imo & pro Cosmetico habitum , fucis & pommatibus miscetur , quibus pro cute læviganda utuntur mulieres . Ingreditur etiam emplastrum spermatis ceti Officinæ Parisiensis .

℞. Olei amygdal. dulc.

Syrupi alth. ana ℥j.

Sperm. cet. solut. in ol. amygdal. dulc. ℥j.

M. f. Looch , per cochlearia hauriendum in pleuritide , in catarrho pulmonum & colica infantum .

℞. Anti-hectici *Boterii* ℥ss.

Olei amygdal. dulc. ℥ij.

Spermat. ceti ℥j.

Syrupi arthemis. ℥j.

Aq. flor. tilia ℥iiij.

M. f. potio anti-hysterica , cochleatim sumenda .

℞. Sperm. cet. ℥j.

Flor. sulphur. ℥ij.

Zingiberis ℥ss.

Ambar. gris. gr. x.

Sacchar. cand. ℥j.

M. & cum mellis candidi ℥ss. f. opiata anti-asthmatica , cujus ℥ss. ad ℥j. cum pane oblato recipias .

℞. Conserv. tussilag. ℥ss.

Pillular. Balsamic. *Mortoni* ℥iiij.

Flor. sulphur.

Sperm. cet. ana ℥jss.

Panaceæ mercurial. ℥j.

Oculor. cancr. præp. ℥ij.

M. & cum f. q. balsami sulphuris anisati f. opiata in tuberculis pulmonum adhibenda , cujus dosis ℥j. mane & vespera cum pane oblato ægrotanti præbeatur .

℞. Oculor. cancr. præp. ℥j.

Pulpæ cassiæ ℥ss.

Sperm. ceti ℥j.

Pilular. cynoglos. ℥ij.

Balsami copaviensis gutt. xx.

M. c. f. q. syrupi Althææ , & f. opiata detergens & leniens contra phtisin suppuratoriam , illiusque ℥ij. ad ℥j. cubitum iturus æger recipiat .

℞. Pulpæ cassiæ ℥ss.

Spermatis ceti

Pulver. millepedum p. ana ℥ij.

Balsami Peruvian.

Gommat. Arabic. ana ℥j.

M. & add. f. q. Syrupi Erysimi f. opiata detergens & consolidans, cujus ℥ss. ad ℥j. cum pane oblato mane ac vespera accipiat Pthisi laborans.

Rx. Cerae candid. ℥iiij.

Sperm. cet. ℥ij.

Galbani acet. solut. colat. atque ebulliti ℥j.

Olei sambuci q. f.

M. f. emplastrum præstantissimum contra tumores mammarum, ex coagulatione lactis provenientes.

Monoceros, sive unicornu, Offic. Park. Theat. 1611. Dal. Pharm. 415. *Monoceros, unicornu marinum*, Charlet. Pisc. 47. *Cetus marinus, Narval dictus*. Mont. Exot. 6. *Unicornu, vel Monoceros* Ind. Medic. cxxv. *Balænae decimum genus, Narhval dictum*, Schonev. Ichth. 28. *Monoceros Piscis, qui de genere Cetaceo esse fertur*. VVillughb. Ichth. 42. *Monoceros Piscis e genere Cetaceo, Narhual Islandis*, Raii Synop. Pisc. 11. *Monodon*, Arted. Ichth. Gen. 70. Syn. 108. Linn. Faun. Suec. 263. *Balæna, quam Narhval vocant*, Nonnull.

En! quæ de unicornu refert *Thomas Bartholinus*: figuram habet ac magnitudinem balænae magnitudini atque figuræ æqualem; ab incolis Islandiæ dicitur *Narhval*, cadaverum, sui nutrimenti, ergo; frequens est in regionibus, quæ Islandiam, Groenlandiam, aliasque insulas Septentrioni viciniores, adiacent. Superioris maxillæ in parte sinistra unicum exhibet dentem, longissimum, crassissimum, striis ac rugis in origine fortioribus, ast cuspidem versus sensim deletis, circumdatum; rarius autem eisdem destitutum. Quæ passim venum veniunt, cornua Monocerontis vera, aliquoties 3. cubitorum longa, ejusdem sine dubio sunt originis.

Tulpius in observationibus sequentem exhibet descriptionem Monocerontis, in anno 1648. ad Majam, insulam Maris Septentrionalis, deportati: pinguisissimus 22. pedum longus, & 12. latus caput quasi cyprini referebat. Gula ejus sub cornu quodam profiliente latebat, quod inter ossa maxillæ superioris, fere eadem in regione, ex qua gladium suum protrudit, egrediebatur. Hunc sub nomine: *Espadon*, supra descriptum dedimus. Nec tamen exacte in maxilla media, sed dextram versus, nec ullum aliud cornu vestigium in sinistro cranii latere. Corio tectus erat fulvo, & copiosus huic inferior adeps, multum, sed foetentissimum exhibuit oleum. Spinam dorso, in caudam bisulcam exeuntem fortissimæ componebant vertebrae, & pinna utrinque una comitabatur. Cornu ejus recta procedens, durum, album, a basi ad cuspidem profundioribus striis ornatum, ebori præstantissimo simile & 9. pedibus longum erat; $7\frac{1}{2}$. pedes nimirum extra cranium prominebant, $1\frac{1}{2}$. pedes cranio occlusi detinebantur; & superficies partis occlusæ asperior minoris erat splendoris, quam quidem partis prominentis superficies. Reliquarum balænarum instar, duo in vertice foramina gerit, quorum auxilio aquam antea contractam ejaculatur. Quod si forsan sub glaciei cumulo detentus seu irretitus liberum exitum sibi comparare velit ac spatium, tunc gladio suo utitur; hinc quoque totidem gladios Monocerontis fractos vel mutilatos, præsertim in oris Groenlandiæ, Islandiæ, Freti Davidici, aliarumque regionum Septentrionis reperimus.

Quod in *Musæo VVormiano* descriptum videmus Unicornu maris, illud 12. cubitis erat longum, pinnis & cauda sua balænæ simile, cutim habebat lævem, pallidam ac squamis carentem, duos in medio dorso gibbos carnosos, multum sub cute adipem, spiraculum in cervice, duos in fronte oculos bovinis minores; caput corporis respectu, valde exiguum; nullas, quas conspiciere licuit, nares; dentem ex sinistra proboscidis parte egredientem, 3 $\frac{1}{4}$. cubitis longum, cuspide tamen rupta; nullos præter ea dentes, & maxillam superiorem ultra inferiorem prominentem. Segmentum corii a cranio avulsum, nigrum erat, tenue, ac fibris constabat.

Qualia interim sint, & quantacumque, quæ de Monoceronte commemorata leguntur a *Bartholino*, *VVormio*, *Tulpio*, & *D. Paulo Ludovico Sachs*, qui libro quodam singulari monocerontis descriptionem dedit exhibitam, omnia insuper ea, quæ nostræ ætatis auctores scripta de eodem prodidere, in censum vocari nequeunt, si his, quæ *Cel. Anderson* posteritati reliquit, æquiparare velis. *VVillughby* omnia sua *D. Tancredo Robinson* debere, nec suis metipsis oculis unquam vidisse monocerontem profitetur aperte. *Rayus* non nisi relata sibi tradit. En igitur ea, quæ in *Andersonii* historia naturali de monoceronte leguntur:

Est autem ex balænarum genere *Narhval*, *Monodous*, dictus & *Monoceros*, seu *Licornu marinum*, a Groenlandis: *Touvack*. Unico illum dente instructum esse perhibeo, aliorum jam ante me demonstrationibus evictum quum sit, quod denti illius prominenti, dentis, non cornu nomen competat & essentia. Cujus rei, si novum quæris documentum, novum exigis testimonium, ad tento subiicias examini similitudinem obviam hunc inter dentem, dentesque ceti, vaccarum maris, elephantum, præprimis vero animalis, quod *Babi-Ronsa* dicitur, bini etenim hujus dentes ex mandibula superiore egressi, & reflexi in posticum, bina cornua adcuratissime effingunt. Animal istud tutum noctu quærens somnum, ut tigridum, aliarumque ferarum insultus arceat, asylum quærens, summos arborum ramos contendit, ex quorum uni dentibus sese suspendet: Redeamus vero ad piscem nostrum, dubio procul omni balænis adnumerandum, easdem etenim cum balænis pinnae habet, & caudam, easdem fistulas respirationi inservientes, conspiciendas in cervice, eodem adipe corpus involutum, & præterea viviparus est, instar balænarum. Qui quidem quum adeo infrequens videatur, hoc etenim nostri testantur nautæ, artis adcurate observandi alias imperitiores: quid mirum: si veram ejusdem figuram exacte satis hucusque determinaverit nemo? Ex quodam interim navarcho compertum habeo, quod admodum tenui corpore monoceros gaudeat, cujus figura sturionis accedit corpori, differt saltem capite minus cuspidato. Pelle circumdatus est lævi, & nigrida, nonnunquam cinerea, ut *Cel.* refert *Martens*, ventre autem albo. Nec nisi duabus instructus pinnis, dorso item lævi, ac adipe parciore, oleum præbet balænæ oleo liquidius, minorisque quod est fœtoris. Unum ex illis, 40. pedum longum, dentem vero 7. pedum gerentem, haud ultra unum & dimidium dolium adipis præbuisse memini. Dentem prælongum, quodammodo contortum, qui ex sinistra rictus parte egreditur, quousque aquis inhæret monoceros plurimis immunditiei sordibus velut vagina tectum esse adeo, ut viridis interdum videatur, acceptum habeo. Proboscidem habet amputatam, depressam, & clausam dextera parte.

Pisces autem 60. pedum longo, dentem adsignat 14. pedum, Islandiæ Episcopus, in descriptione Monocerontis ad D. *Vormium* transmissa, exactæ dimensionis, si fidem habeamus auctori. Qui autem justo minori perspicacia inducti dentem habuere pro cornu, fœmellas monocerontum, capreolorum instar, eodem destitutas esse perhibuere; idem & adhuc plurimi censent ex navarchis nostratibus Groenlandiam invisentibus. Imo & hic error, fons alius evasit erroris, quo abrepti *Phocœnam*, seu *Delphinum Septemtrionalem* pro monocerontis fœmella habuerunt; quamvis huic speciei piscium singulari suus sit mas, sua fœmella, ut reliquis omnibus. Instructus vero eodem dente monoceros, & mas, & fœmella, quod & in vacca marina, & in elephante observabis. Præterea & duo cernebantur in capite illius, quem navarchus, cui nomen *Dirck Petersen*, cuiusque curæ confisa erat navis, quam *Leonem* dicebant *aureum*, anno cepit 1684. Deportata ab illo Hamburgum capitis ossa, adhærentibus adhuc binis dentibus, ad hodiernum usque diem in privato quodam adservantur rerum curiosarum adparatu. Recta autem bini dentes ex anteriore capitis parte egressi, ubi capiti cohærent, duobus inter se digitis distant, at sensim sensimque divaricantes eo procedunt, ut extremitatum distantia demum 13. digitos expleat. Denti, qui in sinistro situs est latere, longitudinem 7. pedum, & 5. digitorum, circumferentiam prope caput 9. digitorum; illi, qui in dextero est, 7. pedum longitudinem, crassitiem 7. digitorum adjudicamus. Capiti infixæ hæret pars illorum pedis unius, uniusque digiti longa, os vero capitis 2. habet pro longitudine pedes, & 18. pro latitudine digitos. Hic autem, velut in transcurso attingere liceat ea dubia, quæ & adhuc foveo, & fovenda mihi videntur semper, infringentia quorundam Physicorum sententiam, qua omnem a natura duobus dentibus instructum esse monocerontem, reliquos autem, qui non nisi unicum præbent, alterum casu perdidisse, contendunt. Primo itaque loco ad raritatem duobus dentibus munitorum provoco, quippe præter hoc, de quo verba fecimus, unum modo, & fando quidem noscimus cranium, Amstelodami obvium. Deinde nec in altero capitis latere, sæpissime ad nos deportati, & penitus occlusi, nullum, ne minimum quidem confracti dentis vestigium detegere licet. Alacritate autem natando monoceros protruditur admirabili, caudam pro remo adhibens; & quæ justo minores videntur pinnae, nihilominus pro gubernaculo inserviunt, pisces sese vertenti, ac cursum suum dirigenti. Caperentur autem infrequentiores, nisi agminatim incederent. Vix illos adgrederis, & alii aliorum dorso dentes suos imponendo, constipantur, præcipites invicem confluent, & quo submergentes fugam arripere possent, ipsi impediunt, sic ex ultimis plerumque nonnulli in prædam abeunt capientium.

Sorte tandem propitia unicornu integrum, Februario anni 1736. quod navi deportabatur Hamburgum, examini meo ut subiicere possem, accidit. Hoc furiosa maris tempestate Albim ingressum, relictum autem refluxus tempore in ora, debilitatum denique ictibus vehementioribus, vitam efflaverat in arena. In magnam proceritatem corpus illius haud efferebatur, majore crassitie, quam par videretur potius conspicuum, & capite quodammodo amputato, ut crumenæ, quæ peregrinantium usui plerumque infervit, lateri depresso, posset exæquari. Ex parte ejus sinistra dens egredie-

batur, five cornu. Duabus pinnis exiguis, ac cauda latissima & aquæ horizontali instructus erat. Pellis ejus nivis instar albida, maculis nigris per totam suam crassitiem interstincta conspiciebatur. Venter autem ubique lucente tinctus candore, tactu sericum mentiebatur villosus. Ab extremitate rostri ad oram usque caudæ x., & dimidii pedum Parisiensium, quibus xi. pedes, & octo digiti Hamburgenses respondent, longitudinem habebat, dente ejusdem, seu cornu 5. pedum, ac 4. digitorum mensuræ Parisiensis longitudinem implente. Pinnarum singulæ longitudine digitos novem, latitudine palmas duas haud excedebant. Cauda vero constituta in situ horizontali, lata erat 3. pedum, & 2½. digitorum. Dens ejus contortus ex sinistra mandibulæ superioris parte, & labri superficie prodibat. Latus autem rostri dextrum clausum, ac pelle, ibidem integra, indutum erat, nec capitis os eidem substratum, minimam ostendebat cavitatem. Rostrum pariter valde depressum, labrum prodebat inferius tenue, & breve. Gulæ ipsius apertura volæ unius latitudinem nequaquam excrecebat; nec dentis ulteriores vestigium adparebat ullum. Cæterum rostri margines aliquantulum duri, & hirsuti erant, lingua exæquante rictus latitudinem. In vertice capitis duplex quasi prominebat fistula carnea, operculo quodam alternatim sese occludente, ac aperiente instructa, (*animella* dicunt Itali) cujus ope aerem adtractum expellens, aquam ejaculabatur. Oculi inferiorem in capite situm obtinentes, haud rostro superiores elevabantur. Circumdati cæterum aliqua palpebrarum specie, circumferentiæ erant minimæ. Virga ejusdem, (erat enim masculus,) haud egrediebatur ex corpore.

Varia autem sunt, quibus, ut varias Monocerontis species esse perhibeam, compellor. Sic quosdam dentes haudquaquam contortos, ut reliqui, Hamburgum deportatos esse memini, quos ego specie diversis monoceronibus inhæsisse, judicavi. Erant, qui eosdem pro dentibus aut cornubus embryonis, seu monocerontis nondum nati reputabant; quorum quidem opinioni obstat, quod nullum, quantum ego scio, animal, cornubus instructum nascatur. Imo ex quodam novarcho fide dignissimo compertum habeo; quod quum utero gerentem dissecare jussisset monocerontem, embryonem utero inclusum cornu vero, seu dente destitutum suis ipse oculis viderit. Nec non ipsa rei, quam perhibent incongruentis, pro me militat impossibilitas; corpus etenim adeo longum, ac cuspidatum, qui? quæso, absque insigni matricis læsione, eadem vel detineri, vel eandem egredi posset? Imo nec ullum dentis vestigium detegi poterat in illo monocerontis foetu, qui anno 1684. captus in mari, Hamburgum delatus fuit; mihi tandem dens quidam monocerontis brevissimus quidem est, sed contortus, ex quo dentes statim contortos in junioribus his animalibus enasci patet.

Ultimo addere mihi liceat, quod pro balænarum nuntiis, ac quasi præcursoribus, monocerontes habeant Groenlandi, quos simulac viderint, quævis necessaria pro balænarum piscatione comparant, diuturna experientia edocti, quod ibidem, ubi commorantur balænæ, vel in locis saltem circumjacentibus, & monocerontes reperiantur; cujus causam exinde derivare libet, quod eodem probabiliter nutrimento utrique viventes, in iisdem locis illud quæsituri, in unum atque eundem locum conveniant. Quamvis etenim diversissima ratione balænæ, & monocerontis rostrum sit efforma-

tum;

tum; utrumque attamen in eo congruit, quod ob dentium defectum, nec captandis piscibus, nec manducando nutrimento duriori sufficiat; nec alius utrique relinquitur nutrimentum capiendi modus, nisi ut insecta sugat superius descripta. Jam quum gutturis sui angustia reditum illorum intercipiat, quæ semel idem sunt ingressa; nec illis eget barbis, ac appendicibus, quibus prædam arreptam immenso gutture suo balæna, ut retineat, instructa sit, necesse.

Et hætenus quidem Cel. *Anderson*.

Referunt nautarum aliqui, quod in pleno maris constituti trementem sæpius navis fundum, magno intermixto fragore perceperint, cujus rationem, ingressi denique portum quærentes, dentem monocerontis navi ad $\frac{1}{2}$ pedem intrasum, deinde autem confractum detexerint. Sic & piscem illum, quem sub nomine *Espadon* supra descriptum dedimus, gladio suo durissimo navium perforare sentinam, refert *Rondelet*; additque piscatoribus eundem maximum adferre damnum, captus etenim eorum retibus, omnia dilacerat, omnia conscindit, majori tandem pretio adquisitam ipsis cedit in prædam.

Mare Athlanticum pro habitaculo monoceronti adsignans *Linnaeus*, nullum unquam quatuor pedibus instructum extitisse observat; cornu etenim, quod ex quadrupede quodam derivabant antiquiores, ac *monocerontis cornu* salutabant, nil nisi nostri, quem descripsimus, monocerontis dentem esse demonstrat. Et quamquam ex *Samuelis Dale* testimonio, ebori sit æquiparandus, nihilo tamen minus & fibris subtilioribus, & majori suo pondere, ac soliditate ab ebore differt. Cornu, inquit *Lemery*, hoc in pisce obvium, alias *monocerontis cornu* dictum, natum esse alias crediderunt in capite cujusdam quadrupedis, dicti *Monoceros*, ac equo similis, ast nusquam reperiri potuit, ne ab illis quidem, qui in eodem describendo multi fuerunt. Rarissimum priscis temporibus habebatur, testimonio sit illud, quod S. Dionysii in Gallia thesaurus recludit; ignotus etenim tunc noster erat *monoceros*, ex quo autem plures interdum cœperunt, minus infrequens occurrit, ac hinc inde frustatim dissectum venumdatur. Curiositatis ergo si integrum adservare velis, eligas quod habere poteris longissimum, fortissimum, & ponderosissimum.

Paulus Ammann sæpissime, imo semper fere pro frustis ex cornu monocerontis venditari perhibet ossa balænae, equi marini, seu dentium elephantis, quibus, teste *Cardano*, accedente arte, figuram, qua gaudent tribuere.

Nomen denique ejus Græcum audit: *Monoceros*, Latinum: *Unicornis* seu *Unicornu*, Germanicum: *Einhorn*, Belgicum: *Eenhoorn*, Anglicum: *Unicorn*, Islandicum: *Narhval*, a cadaveribus, quibus nutritur, vox etenim Islandica: *Nar*, cadaver designat. Usu tritissimum est: *Narhval*, seu *Narval*, infrequentius scribitur *Nervval* seu *Nervval*. Dicitur & *Robar*, *Robart*, *Rhoar*. Alii hunc cum *Valrus*, pisce, qui est *Lamantin* ille, seu *Manati* dictus, & *vacca marina*, confundunt. Nuncupantur & *Rosmarus*, ex quo nomen monocerontis Islandicum, *Rhoar*, quum derivetur; originem forsan dedit confusio.

Magna autem & olei, & spiritus, salisque volatilis portio redit monocerontis ex cornu, seu potius dente, qui quidem solus, ex hoc pisce, usum Medicinæ aliqualem præbet. Frequentiorem vero Germanis, quam nostra-

tibus; illis pro Alexipharmaco venit & Cordiali præstantissimo, quod veneno obstat, morbis contagiosis, & Epilepsiæ infantum. Pro dosi gr. vj. ad ℥j. ex illo recipiunt, postquam redactus in pulverem, liquori convenienti admisceatur. Vi gaudet sudorifera, absorbente item, & aliquantulum adstringente, hujus ergo, tabe, dysenteria, hæmophysi & fluore albo laborantibus, singulari sese commendat utilitate. Ubi gelatinam ab illo extrahendi sit animus, multa coctione ebulliat cum aqua, usque dum pars cornu glutinosa, emollita, dissolvatur. Saporem ipsi quodammodo gratiosorem conciliant, saccharum, cinnamomum, seu malum citreum addendo. Et hæc gelatina in morbis jam enumeratis sua se utilitate commendabit. Destillatum denique, eadem, quæ cornu cervinum, quum præbeat principia, eidem fini obtinendo præparatum, eadem quoque præstabit. Hinc ex spiritu ejus gutt. x. ad xxx. ex sale gr. vj. ad xvj. cum aqua aliqua adpropriata, qualis est cardui benedicti, seu scabiosæ herbæ, utiliter præscribuntur. Nostrates autem cornu cervinum frequentius, & virtute æquipollens, substituere solent. Pro amuleto, pestis tempore conveniente, commendat *Andreas Baccius* (in tractatu de Monoceronte, ubi vero Monocerontem docet esse Rhinocerontem) frustula ex dente monocerontis, vel annulis inclusa, vel argento circumdata, & cutem immediate contingentia; nos vero, quidni & hoc inter frivola referamus, & anilia?

Ingreditur interim, & pulverem *Marchionis* epilepticum, & pulverem *Pannonicum* *Officinæ Parisiensis*.

CANIS CARCHARIAS.

Eminent inter pisces cartilagineos longos, & paullulum conglobatos, canes sic dicti maris, quorum notabilior præ reliquis merito censetur ille, cui describendo nos jam accingimus.

Canis Carcharias, Offic. *Bellon. de Aquat.* 60. *Aldrov. de Pisc.* 383. *Charlet. Pisc.* 7. *Dal. Pharm.* 412. *Canis Carcharias*, seu *Lamia*, *Gesn. de Aquat.* 173. *Canis Aristotelis*, seu *Carcharias*. *Jonst. de Pisc.* 13. *Canis Galeus*, *Salv. de Aquat.* 132. *Lamia*, *Rondel. de Pisc.* 390. *Canis Carcharias*, seu *Lamia Rondeletii*, *Gesneri*, *Aldrovandi*, *Tiburonus Recentiorum*, *Raii Synop. Pisc.* 18. *Squalus dorso plano, dentibus plurimis ad latera serratis*. *Arted. Gen.* 70. *Syn.* 98. *Canis Cetaceus*, seu *Galeorum omnium maximus*; *Canis marinus vel Mustelus voracissimus*; *Tiburo Autorum*; *Piscis Fona*, sive *Anthropophagus*, *Quorumd. Gallice: Requiem, Requier, Requin*, grand Chien de Mer, seu Marin, Poisson a deux cens dents, Lamie, seu Poisson Anthropophage, item Tiburon.

Jam recensentem audiamus *Cel. Villughby*, qui lamiae adscribit caput latissimum, rictum immensum, quem, ut in reliquis canibus marinis inferius situm, sex circumdant fila dentium durissimorum, acutissimorum, triangularium, & utrinque ferratorum; & primi quidem fili dentes extensi foras inclinant; secundi, recti eriguntur; tertii autem, quarti, quinti, & sexti plerumque intus resupinati, in utraque mandibula, carne reteguntur molli, atque fungosa. Quamvis interim 72. dentes quævis contineat mandibula; numerus tamen eorum, pro varia piscis ætate, varius est; testibus etenim comprobata res est fide dignissimis, quod singulis vitæ suæ annis novi huicce pisci enascantur dentes. Si reliquis maris canibus lamiam com-

parare velis, dorso instructa dici meretur brevi, & latissimo, pinnis insuper laterum & dorfi multo majoribus. Pinnarum binæ caudæ adjacent viciniores, altera superior, inferior altera; binæ branchiis, binæ ano, & unica adhuc in dorso fere medio. Cauda, corporis respectu tenuior, depressa ex lateribus, cubiti unius longa, & conflata ex duabus pinnis, cauda hæc inquam, hoc habet commune cum cauda vulpis marinæ, dictæ alias porcus marinus, quod pars ejus superior vertebriis munita altior elata sit, quam quidem inferior, crucis figuram effingens, binæ inferiores anum tegunt. Corpus cute munitur hirsuta. Oculorum maximorum, & rotundorum muscoli, quorum ope, & superne, & inferne, dextrorsum, ac sinistrorsum moventur, & contorquentur, apertissimi conspiciuntur. Musculi autem illi, quibus mediantibus oculos in se receptos, immobiles objecto adcuratius considerando infigit, hi, inquam, muscoli, nervorum optico- rum radicem, undequaque haud cingunt, sed nati ex parte orbitæ superiore, in longum procedunt. Notatu interim digna res est, quod nervo- rum optico- rum, & in homine, & reliquis animalibus concurrentium, vi- cem, sustineat substantia quædam cartilaginosa, & continuo dura; nec non cornea, utrinque dura, & ex parte anteriore lævissima. Distinctiores cæ- terum lamia, quam quidem bovis oculorum humores conspiciuntur, & tu- nica omnes, illa præsertim, qua crystallinus involvitur, licet admodum pellucida, & tenuior sit aranæ tela. Vastissimo tandem stomacho, & gutture, nec non hepate prægrandi, & in duos lobos magnos diviso, in- structus reperitur.

Voracissimus vero canes inter marinos, & ferocissimus, maximus item, & carni humanæ acrior inhians Canis hic Carcharias, copiosus & in O- ceano occurrit, & in Mari Mediterraneo; quem currum impositum, bini in- terdum equi, præ magnitudine, protrahere nequeunt. Quem ex testimonio suo viderat *Rondelet*, quamvis magnitudinis foret mediæ, mille librarum pondus nihilominus explebat. Imo *Petrus Gyllius* est qui refert: lamiam aliquando ab incolis Nicææ captam, 4. mille librarum pondus explevisse, & ventre suo hominem quem deglutierat, integrum continuisse. Ab Mas- filiensibus simile factum audiverat. Et Cel. *Rondelet* conspecta lamia alia, ejus & guttur & rictus homini pinguisimo quovis capiendi sufficiebant, in hanc, nec temere, sententiam abiit: quod fuerit lamia, cujus ventrem ingressus quondam Jonas, Propheta, peracto triduo, salvus tandem divi- na providentia egressus est, atque illæsus. Nec huic suæ opinioni contra- rias habet paginas sacras, quæ *Cete* nomine piscem hunc designando, sub denominatione generica, & pisces cetaceos omnes, seu balænas, & reliquos maximæ molis pisces complectuntur.

Quæ autem Cel. *Villughby*, ut huic sententiæ accedat, impellunt, hæc sunt; siquidem, ut ipse exponit 1. nimium stricti sui gutturis ergo, ba- lania hominem integrum deglutire nequit; cujuscumque enim molis sit, te- ste tamen *Scaligero*, adeo angusto gutture gaudet, ut dimidium pedem vix ac ne vix quidem expleat ejus apertura. Addit *Samuel Bochart*, in omni- bus animantibus, quæ pulmonum ope respirant, guttur, ut tubus in folle, constrictum, quadam necessitate requiri, ut aer canalem angustiores in- grediens, eo vehementior ex gutture possit expelli. 2. Suadet & balæna- rum in Mari Mediterraneo, ubi in aquam fuerat projectus, infrequentia;

3. Suadent & quæ de *Hercule* referunt antiquiores, quod scilicet a lamia deglutitus, in ventre ejus triduum peregerit.

Cæterum *Tiburonus* five *Tiburo*, quem *Gesnerus* *Xiphiam*, & *Rondeletius* ex genere vitulorum maris unum esse credunt, non est nisi canis noster *Carcharias*; sic enim ex *Maregravio*, cui probe notus fuit, edocemur, addit a Lusitanis lamiam adpellari: *Tiberaon* five: *Tuberaon*. Facile autem & *Rondelet* & *Gesner* erroris veniam impetrabunt; ille enim historiæ Indiarum auctor, ex quo sua *Rondeletius* hausit, falsa nescio quanta pisci huic tribuit, sic v. g. illum sæpius mari relicto, in terram exspatiantem animalibus sibi obviis omnibus funestam cladem inferre, fabulatur; eum in ora soporatum stertere; foemellam multis præditam esse mammis, esse viviparam, suosque foetus lactare. *Gesnerus* vero in errorem prolapsus est, quum ex *Petro Martyre* edoceretur, quod uno dentis ictu medium hominem conscindat *Tiburonus*, accepto igitur pro gladio, dentis vocabulo, *Xiphiam* cum *Phoca* confudit. Nos interim, sic pergit *Villughby*, qui *Phocam*, quem & *Petrus Martyr* describit, & historiæ Indiarum auctor, pro lamia reputemus, nulli dubitamus. Idem postulare videntur plura enumerata in his descriptionibus criteria, criteriis lamia nostræ exacte respondentia; etiamsi inficias ire nequeamus, varia, quæ eidem adtribuuntur, falsa, quæque derivanda veniunt ex vitioso illo auctorum levium pruritu, mirabilia intexendi illis quæ in itinere forsan occurrere. Quæ tandem ab *Francisco Hermander* relicta legitur descriptio, omne ulterius dubium rescindit.

Quod si lamia caput descriptum cupis, adeas tractatum illum, quem *Stenonis Myologia* insertum reperiēs. Cutis suæ vasa observatu dignissima sunt, ex his enim, tamquam fontibus, humor provenit iste, quo totam corporis superficiem unctam videbis, quique pro motu ejus, dum aquæ inhæret, faciliori reddendo tam necessarius, quam pro navibus pix requiritur.

Recensentem nunc *Abbatem Prevost* audiamus in *historia itinerum universalis*. Canes marini (sic ille inquit) dicti: *Tuberones* a Lusitanis; *Requins* a Gallis, cœlo plerumque miti ac quieto conspiciuntur. Horum gula, quum ad medium usque collum producat: quidpiam deglutituri, multo sese vertant labore necesse est. Capite gaudent depresso ac contiguo. Maximum vero robur suum caudæ, & dentibus inest; caudæ, cujus ictus sunt vehementissimi, & dentibus, quos ferras acutissimas dicere possumus, quibus hominis, vel crus, vel brachium, velut ascia conscindunt. Continua autem fame extimulati, quidquid obvenerit, devorant, unci etenim, aliaque instrumenta ferrea sæpissime intestinis eorum inhaerent. Imo pro voracissimo ex belluis marinis habetur canis *carcharias*. Frequentissimus est in oris Africae, cujus & flumina aliquoties intrat. Interdum xxv. pedes, longitudine, iv. autem diametro attingit, pelle tectus haud adeo crassa, quamvis forti, & aspera. Capite est longo; oculis magnis, rotundis, hiantibus, & flammæ instar, rubris; gula ampla, quavis ejusdem mandibula tribus instructa ordinibus dentium, vel triangularium, vel planorum, vel cuspidatorum, constipatorum insuper, ac firmissimorum adeo, ut vana sit vis contraria omnis, insufficiens resistentia. Cæterum integro fere pede ab extremitate rostri distat gula terribilis, felicissima sane dispositione pro præda, hanc enim antequam dentibus corripiat, rostro tangit, protrudit, sicque imminens periculum quasi nuntiat. Sunt, qui perhibent, alii, quod resu-

refupinus fuam devoret prædam . At eadem premeretur difficultate , si ventri innatans , qua , si dorso superjacens , ut quidpiam deglutiat , conaretur . Hinc situm eligit commodiorem , lateri dum sese imponit . Pinnarum interea , quibus gaudet , maximarum , binæ ex quovis latere , alia in dorso , alia , minor caudæ propinqua , duæ tandem magnitudinis mediæ sub ventre conspiciuntur . Cauda instructus est latissima , fortissimæque . Prædæ autem acer adeo inhiat , ut , eandem persequendo effluat interdum in ripam . Nec deesset , qui brevi temporis spatio , omnem Oceani piscem extirparet , nisi deglutiendi difficultate , qua laborat , detineretur . Quantulumcumque etenim sese verterit , fugæ tamen sufficiens piscibus relinquit tempus . Hoc ipso temporis momento callidi Æthiopes eum percutiunt ; quem aquis submergentes inferius urgent , ac ventrem dirumpunt . Cuius igitur escarum generi inhians , voracitatis ergo , facilis decipitur . Mediante plerumque unco capitur , qui catenæ cohæret , cui adipis , seu alius carnis frustum adfixerunt . Hinc nec minoris momenti periculum innatantes fluminibus Lamias alentibus incurrunt . Et si quis forte prolabatur in mare , pro perduto illum habeas , nisi (quod fere numquam accidere solet) nulla navis vicinior adsit lamia . Si quod mortuum , inquit *Bosmann* in *Descriptione Guineæ* , in mare proiciebant mancipium , quaternis , quinifve , belluæ terribiles dictæ corpus arrepturæ proruebant in fundum , adhuc descendens adtingebant , unico temporis momento dilaniabant . Quovis morfu , vel brachium , vel pedem a trunco separabant , & uno ictu oculi totum devorabant . Illæ , quæ nimium retardantes , prædæ aliqua parte carebant , reliquas devorandi periculum minabantur ; acerrima etenim vehementia congressæ , capite , ac medio corpore ultra aquam exporrecto , ictibus inter se invehebantur adeo vehementibus , ut totum tremere videretur mare . Ne captæ quidem lamia adpropinquare audet nautarum audacissimus quisque , etenim non solum morfu quovis aliquam corporis partem rescindit ; sed & ictibus & brachia confringit , & crura , & quævis , quæ adtigerit , membra .

Fœmellæ viviparæ matricem , canis matrici , partes reliquas piscium partibus similes esse , compertum habemus .

Nec non ea prætereamus , quæ lamiam describendo *Celeb. Barbot* addit sequentibus : Oculis lamia gaudet , corporis respectu , exiguis , rotundis insuper , & valde exandefcentibus . Claustro quodam singulari instructum conspicitur os mandibulæ , ut pro prædæ magnitudine , rictum suum ad amplitudinem immensam distendere valeat . Quod si escam , cui inhiat , non adtigerit , tribus interdum iteratis vicibus redit ; unco ferreo , qui hamo cohæret , quamquam dilaceratus , & undecumque sanguine defluens . Pelle partes ejus omnes reteguntur fulva obscura , albida autem venter . Squamis omnibus destitutam aliquod vestit involucrium durum , crassum , punctis distinctum , corii instar illius , cui *chagrini* nomen est ; radiis tandem , seu lineis transversim sese secantibus divisum . Tenacissimæ ceterum vitæ , reliquis animalibus difficilior enecatur . Etenim frustra , in quæ conscissa fuerat , omnia , motum edebant continuum . Quem vero focium sibi habet , seu potius præcursores , sardæ magnitudine piscem , aut illa rotundior , nulla unquam læsione , nullo morfu infestat . Nomen *nautæ* , cui gallicum ; *Pilote* , respondet , huic pisci indidere , qui , ex quo-

eundem testimonio, lamia captæ dorso, frequens inhærere solet: Hic autem mentionem facere liceat remoræ, Gallice: *Sucet*, seu *Arrête-Nef*; Anglice autem: *Sucking-Fish*, & *Lamproye de Mer* audientis. Capitis partem superiorem planissimam duodecim futuræ decussatim dissecant, quarum ope, totidem velut dentibus, murænarum instar ligno seu rupibus ita adhæret ut inde reliquum corpus quasi suspensum pendeat. Mandibulam inferiorem, superiore parum longiorem habet. Tres circiter pedes, sua plerumque longitudine explet. Navibus per Guineæ sinum iter suum facientibus copiosæ adhærent, excrementa hominum colligendi ergo, & catervatim naves sequuntur illas, quibus coemta deportantur mancipia. Nomen illud, quo insignitas easdem volunt Belgæ, quodque *Sordium piscem* designat, exinde accepisse videntur, quia illa, quam naves reiiciunt, colluvie ac immunditie, nutriuntur. Mediante autem quadam membrana, lata trium, longa octo digitorum, quam in capite gerunt, navium basi adeo forte ne-stuntur, ut adhibita vi hominis omni, ne moveri quidem, nedum avelli queant.

Subjungamus denique, quam Cel. *Anderson* tradit, lamia descriptionem quæ licet brevis sit, ac succincta, singularia tamen nonnulla exhibet. Adcuratissime, sic *Anderson*, descriptum legimus hunc piscem in *Diario observationum physicarum*, auctore *R. P. Feuillee*. Noctu frequentior hamo inhiare solet, hinc & Decembre, quo longissimæ sunt noctes, illius capiendi labor præcipuus instituitur. Ne autem, qui hamo alias cohæreret, funem, dentibus conscindere possit, huic catenam, duorum cubitorum longam, substituunt. Hepate instructus est tanto, ut duodecim libræ olei, in terris Septemtrionalibus *Thran* dicti, exinde redeant. Ovarium illius magnum, palato optimas subministrat placentas, quas *Haakage* dicunt Norvegi. Et quum in oris Islandiæ sit frequentissimus, non nisi maximæ insidiantur speciei, & huic quidem, hepatis ergo, & olei. Habet autem hoc singulare lamia adeps, quod diutissime perdurando, exsicicans indurescat, ut adeps porcinus, hinc, & lardi instar, a fello suo eundem admiscent Islandi; plerumque autem oleum ejus coctione extrahitur. Jecur autem præ magnitudine eximia, doliolo, aliquot pintarum capaci, replendo sufficit. Et Cel. *Martin* testimonio unicum lamia majoris jecur, pintam reddidit olei Scotticam unam, cui quatuor respondent Anglicæ. Inmittitur nempe ollæ aqua ad dimidium plenæ, & ebulliendo sensim supernatans oleum subtrahitur, doliis deinde infunditur. Alii carnem ventriculi in frustula tenuia conficissam, per annum, & quod excurrit, suspensam tenent, & defluxo denique adipe omni exsiccant; quæ suo modo præparata, teste mercatore quodam Hafniensi, qui variis Islandiam visitaverat, palati bovini saporem imitatur.

Lamiam igitur, quia vivipara tantæque molis est, piscibus testaceis, improprie sic dictis adnumerant; suis, ut ipse ait *Belon*, oculis vidit, lamiam foemellam, undecim fœtus una effundentem, eosque haud tunicis involutos, sed saltem funiculi umbilicalis ope matris matrici cohærentes.

Græcum & Latinum, quod gerit nomen: *Carcharias*, accepisse videtur ob gulam, qua conspicuus est, dentibus fortibus, ac acutis constipatam, teste enim *Aldrovando*, vox Græca: *Carcharos*: acutum denotat, rudem, asperum, cadentem. *Lamia*, ex Græco: *Laimos*, *fames*, *ingluvies*, derivanda, nun-

nuncupatur, ob continuam, qua stimuletur ingluviem, voracitatem. Vox autem *Tiburon*, seu *Tuberon*, pro qua male dicunt alii: *Phiburon*, Hispanica est, seu Lusitana. *Anthropophagos* nuncupatur ab *Archestrato* in *Atheneo*, ob gulam, qua in carnem fertur humanam. Anglicum ejus nomen: *White Shark*, Belgicum: *Haye*. Suevicum: *Haj*; Danicum: *Haafisk*, seu *Havvkall*; Islandicum denique *Haackal*, omnia respondent Gallico, quo *Canis marinus*, seu *Canis* dicitur *maris*, quodque ipsi, vel ob capitis figuram, capiti canis similem; vel voracitatis ergo, qua canum instar dentibus omnia comminuit, omnia dilacerat, fuit inditum. *Requiem* vero, *Requien*, seu *Requin*, primi eum vocasse dicuntur Normanni, quia, quem devorat, homini, dici vult: *Requiem*.

Paucissimas autem Medicæ arti quæ utilitatem præbeant, partes habet *Canis Carcharias*. Carnem ejus duram, coriaceam, pinguedine carentem, insipidam, & concoctu difficilem, alia quum desit, comedunt nautæ, horum nempe stomacho tantum, & vix quidem, convenit. Nec nisi venter, per quatuor & viginti horas sale aspersus, aqua deinde elixus, addita olei portione esui venit. Quod si foemellam utero gerentem capiant, exempti statim foetus, & aqua dulci per biduum injecti, carnem præbent meliorem. Et quidnam est ciborum genus, quod respuant, aliorum inopia adacti nautæ nostrates? At *Æthiopum* palato optimus est ex omnibus piscibus, hinc & esui venit frequentissimus. Etenim carnem, quam duritiei ergo reiciunt nautæ, æthiopes per octo vel decem dies adservant, sicque licet corruptione foetidam, teneriorem tamen, inter delicias referunt; imo commercii partem, in *Guinea*, oris præsertim sic dictis, auri, præcipuam constituit. *Cerebri* interea albissimi uncia quædam in piscis capite reperiuntur, quod exsiccatum, redactum in pulverem, & a gr. xij. ad 3j. cum vini albi cyatho, receptum, eximia sese commendat utilitate, calculo, doloribusve colicis, imo & partu difficiliore laborantibus. Perhibent alii, quod igne admotum, sive assatum, lapidis duritiem illud ipsum cerebrum induat. Dentibus lamiaë redactis in pulverem alkalina virtutem, & aperitivam attribuunt, hinc calculo, hæmorrhagia, & alvi profluvio detentis a ʒss. ad ʒij. commendantur. Argento circumdati infantibus porriguntur pro crepitaculis, quo dentes suos exacuare possint. Et teste *Rondeletio* dentifricium præbent, & dealbandis, & corroborandis dentibus optimum. Pellem ejus opificum varii, ad retegendas pretiosorum vaginas adhibent. Jecur tandem oleum subministrat, quod optimum est lampadis nutrimentum. Quæ autem *Serpentum linguarum*, seu *Glossopetrarum* nomen mentientes, ex insula *Melite*, ad nos deportantur, dentes, fraude, nostris nunc temporibus detecta, nec sunt, nec habentur, nisi vel canum marinorum, vel aliorum piscium majorum dentes, qui fluctibus in insulam hanc deportati, orisque sepulti, per longissimum tempus in terra detenti, abierunt in lapides.

C L U P E A.

Clupearum generi varios adnumerat *Artedi* in *Ichthyologia*, pisces, ut: *Alofam*, *halecem*, *sardam*, apuamque. Ex quorum numero, quum duo priores præcipuo in Medicina usui veniant, horum saltem descriptioni inhæreamus.

Alofa, Offic. Aufon. 127. Salvian. 104. Jonst. 27. Lemer. 29. *Thrissa*, Rondel. de Pisc. 220. *Clupea seu Alofa*, Bellon. de Aquat. 309. *Thrissa Rondeletii*, Aldrov. de Pisc. 500. *Alofa major*, Charlet. de Pisc. 150. *Alaufa Clupea, vel Thrissa*, Gesn. de Pisc. 199. *Alofa vel Alaufa aut Thrissa*, Schon. Ichth. *Alaufa Clupea vel Thrissa Rondeletii & Gesneri*, Willughb. Ichth. 227. Raii Syn. Pisc. 105. *Thrissa*, Schwenck. de Pisc. Siles 447. *Clupea* 447. *Clupea apice maxillæ superioris bifido, maculis nigris utrinque*. Arted. Ichth. Gen. 7. Syn. 15. Spec. 34. *Aristotus*. Albert. *Verith*, alias *Verich*, Isidor. *Alofa fluviatilis; Clupea seu Chipea*. Nonnull.

Capite suo alofa, sic Cel. Artedi, & corpore, & ore, naribus, oculis, branchiarum valvulis, atque membrana ex 8. spinis composita, & squamis, omnibusque præcipuis sui corporis partibus, halecem refert. Maxillam inferiorem parum, nec adeo ut halec prominentem ostendit ultra superiorem. Hanc vero bifidam sive bisulcam in extremitate; cranii partem diaphanam; & in extremitate superioris maxillæ, ac ossis lateralis margine seriem denticulorum minimorum, maxillam inferiorem pariter ac linguam subacuminatam & nigridam imo palatum dentibus prorsus destitutam; tum vero ex utroque gutturis latere, superne prope branchias, alios quosdam denticulos; & nares oculis & rostro intermedias, binis utrinque foraminibus perforatas, posteriori scilicet ampliori atque rotundo, anteriori autem, quod posteriori vicinum est, exiguo atque occluso, ita ut nisi seta vel quovis alio instrumento aperiatur, conspici nequeat; hinc etiam nullius, quantum ego quidem novi, observatione detectum fuit hucusque. Iridem præter ea habet argenteam, & pellicula communi obtectam; pupillam nigridam, apertam, nec pellicula tectam; magnam maculam nigram, rotundam ex parte utraque sub operculis branchiarum, dorso valde vicinam, & hanc excipientes 4. 5. vel 6. alias maculas minores, recta linea dispositas, paullulum supra lineam lateralem caudam versus constitutas; lineam corporis lateralem, parum conspicuam & rectam; dorsi colorem cœruleo-viridi-argenteum, verticis flavum, reliqui corporis vero argenteum.

Caput alofæ & corpus reliquum squamis magnis, fere rotundis, albis, mollibus, ac avulso facillimis tegitur. Squamæ ventris ad anum usque acutissimæ & fortissimæ, (quarum numerus haud constans, jam 35. jam 36. jam 37. absolvitur) singularioris sunt figuræ; etenim erectæ, parte sua superiore longam quamdam spinam efformant, parte sua inferiore autem & antè & postè in brevissimam exeunt cuspidem, ita tamen, ut aculeus posterior sit brevior, ac totam ventris carinam ferræ instar dentatam reddat atque acuminatam. Albidæ sunt pinnae omnes excepta illa, 19. spinarum, quæ in dorso est. Pectoris pinnae 14. ad 15. ventris 9. ani tandem 22. ad 23. spinis (duabus primis minoribus) constant. Caudam probe bisulcam 19. spinæ longissimæ efformant, quarum ultimæ sunt breviores. Imo squamam aliam, singularem, oblongam, pectoris ventrisque pinnae proximam observare licet. Corporis figura in majorem latitudinem quam halecis diffunditur. Dorsum & ante & post pinnam dorsi convexum dici meretur, acutius tamen ante quam post illam videtur. Corporis latitudinem quadruplo superat longitudo. Quem vero magnitudine multum superat, halecem, branchiarum figura prorsus imitatur ita, ut in parte concava apophyses sint osseæ, candidæ atque fortissimæ; imitatur & inte-

stina halecis, quamvis plures pyloro adherentes, longas, striatas & numero fere 80. exhibeat. Peritonæum albidum est, 30. ex utrovis latere costæ, & 55. vertebræ, quarum ultimæ utrinque nectitur & quidem oblique acuta quædam apophysis, ast anteriores vertebræ dorsi præter costas, quinque alios ostendunt ordines apophysium. Coitui ejus destinatum tempus est vel Maii finis vel initium Junii, tunc enim agminatim flumina ingreditur. Multos, sic *Artedi*, in stomacho ejus detexi vermes albos atque viventes.

Alosa, sic *Willoughby* capitis corporisque figura halecem refert, latior saltem & ex lateribus magis depressa conspicitur; longitudine sua vel curvatum 1. & latitudine 4. digitos attingit. Capite gaudet mediocri; oculis majoribus; ore amplo; pinnis, corporis respectu, exiguis; stomacho figuram stomachi halecis referente; intestino simplici, & neutiquam reflexo, recta etiam a Pyloro ad anum procurrente; aeris vesica longa, nec interrupta, cum tubo quodam, qui ex fundo stomachi profectus, mediam ejus partem ingreditur; fellis vesicula & liene oblongis, musculis tandem, qui costis superjacent, rubicundis. Ventrículo dissecto pulices marinos inesse deteximus. Pingues, atque ovis plenæ Martio, atque Aprile Vabrinam Angliæ flumen alosæ ingrediuntur, quod Majo relinquentes, macilentæ, atque ovis vacuæ revertuntur in mare. Dubia autem mihi videntur semper ea, quæ addere solent alii, quod scilicet ascendentes nullis musculos interjacentibus spinis sint instructæ, descendentes autem iisdem abundant. *Rondelet* contrariæ favet sententiæ, perhibendo: quod in aqua dulci degentes, & pinguiore evadant, & palato delicates, imo, quo remotiores a mari capiantur, eo exquisitioris reperiantur saporis. *Paulo Jovio* teste, Tiberim, verno tempore, ingredientiæ alosæ maris falsedine exsiccata, haud grati sunt saporis; in aquis vero Tiberis cito mirum in modum pinguescentes, ineunte æstate revertuntur in mare, nec nisi rarissimæ, per integrum, quod superest, annum conspiciuntur. Magna spinarum copia scatens alosæ caro, hujus ergo, multum gratiæ suæ amittit. Audito tympanorum, campanarum, & buccinarum sono, copiosas alosas confluere docet *Albertus M.* hinc & piscatoribus usui venisse censet, quod retibus suis filum nectant, tintinnabulis consitum. Id quod sua experientia edoctus comprobatur *Rondelet*. Morinnæ, quæ Alvernæ villa est, commoratus, inquit, exspatiando sæpius Eleveris in oris, alosas fidium sono convocatas saltare observavi; noctis præsertim tempore. Qui fluvius quum tanta exoneretur & salmonum, & alosarum abundantia, mirum non est, si 1200., & plures, uno retis tractu captas, viderim. Quæ quum ita sint, quid est, quod pisces audiendi facultate gaudere dubitemus. Aprilismense Rhenum intrantes alosas, ut in MS. quodam refert *Ludovicus Baltner*, antequam ova posuerint sua, exquisitissimi saporis esse tenemus. Sepositis autem, Majo exeunte, ovis, agminatim summæ supernatant aquæ, pinnae dorsales prodendo, & grunnitum quemdam, porcorum instar, edendo. Nec nisi Julio nostras relinquunt regiones. Maximæ inter illas non nisi quatuor libras suo pondere explent.

Quem interim verno tempore, *Pucelle* nomine venientem, Parisiis venum exponunt piscem, parvi plerumque æstimatum, & communis omnium opinio pro alosa minori habet, cui & sententia *Belonis* favet; hic enim abundan-

dantia, inquit, spinarum in *Pucelle* obviarum, eandem esse qui cogitemus jubet, quam *Trichis*, seu *Trichias* dixere antiquiores. *Pucelle* seu *Puella* nomen accepisse videtur vel ex eo, quod veris tempore, ovis adhuc carens, advenit; vel ideo quia scombro excipit. Denotat autem vox Gallica: *Maquerau*, & scombrum, piscem; denotat & lenonem. Capitur interim in multis fluminibus, sed præsertim in Ligeri, alveo tamen semper contrario. Quam, donec parva est, *Schade* dicunt Angli, majorem vero: *Alosam*. Difficillimus interim labor est refutandi illos, qui *alosam*, & *puellam* duplicis speciei, ac differentis esse, perhibent. Aliæ sunt Galliæ regiones, in quibus *feintes*, simulatrices, nuncupantur puellæ. Andegavenfes easdem *Convers*, Valmurenfes, *Converos*, Bajonnenfes autem, *guattes*, adpellant. Magna est, quæ halecem inter, & puellam intercedit affinitas.

Cæterum nomen, quo Græci designatam esse voluerunt *alosam*, *Thrissa* est, quod piscem denotat, spinis, ac capillis minutis instructum. Latinum: *Alosa*, seu *Alausa* ab *alendo* descendit, siquidem multum alimenti illius caro præbet; vel potius a vocabulo Gallico *Alose*, quod civitate donavit *Ausonius*. Africani, teste *Scaligero*, dicunt: *Jarrasa*, Romani: *Lacchia* vel *Lacæia*; Veneti & Etrusci: *Chipea*, *Chiepa*, seu *Glupea*; Hispani: *Saboga*, *Sacolos*, *Savalum*; Burdigalenses: *Caulac*, *Coulac*, *Colac*; Massilienses: *Halachia*; Germani: *Alsen*, seu *Elsen*; Belgæ: *Meyvisch* vel *Meyfisch*, quasi Maii piscis; quod quidem nomen, vel ex eo acceptum habere videtur, quod Maio occurrit frequentior, vel ex eo, quod tunc pinguior est, delicatiorisque saporis; Angli denique, *Shad*, seu *The Mother of Herrings*, matrem halecorum, magnitudinis suæ causa, eandem salutant.

Multum vero olei, salisque volatilis in se recludit *alosā*. Et quamvis nunc nobis notissima, magnatum quibuscvis mensis inserviat; viliori tamen in pretio habebatur ab antiquioribus. Imo *Ausonii* tempore, sic ille refert, nullo, nisi plebis victui veniebat. De gustibus, ut est in proverbio, non disputandum; nobis interim, semper, *alosā* recens, benenutrita ac tenera, inter cibos delicatiores locum merere videtur. Studio dicimus: recens, hac nimirum qualitate destituta, succum aliquem secum gerit acrem, qui & gingivam, dentesque inamœno sapore afficit, & stomacho, dentibusque nocivus evadit. Et quum mare egressa, sicca, macilenta, & injucundi sit saporis, quem non, nisi fluvio per aliquot dies immorata, dimittit; si pinguem cupias, si carne multa instructam, & grati saporis, hanc seligas, quæ aquæ dulci aliquantum inhæsit. Hinc ortum mihi videtur proverbium, tritum Aureliæ, aliisque in locis ad Ligerim fitis: *numquam dives bonam alosam, numquam edit pauper bonam murænam*. Variis interim modis præparata cibo inservit *alosā*; sic pauco juscule elixa, & sicca, multo tamen petroselino addito; sic parco igne tecta ebulliens; sic tandem, vel in craticula, vel veru affata, cibum præbet, & jucundum, & salubrem. Brevibus ut me expediam, cuiuscvis temperamenti, ac ætatis hominibus conveniens est usus moderatus *alosæ*.

Parcissima interim est, quam Medicinæ præbet, utilitas. Os saltem illud petrosum, quod in capite ejusdem detegimus, ad propellendum calculum, & arenam, imo virtutis suæ alkalinae ergo, ad absorbenda primarum viarum acida utilissimum judicatur; pro dosi a ℥ss. usque ad ℥j. præscribere solent. Sic & stomachum ejus exsiccatum, & in pulve-

rem redactum , intus sumptum pro eximio stomachum corroborante censetur .

Halec , Offic. Schrod. 329. Charlet. de Pisc. 4. Lemer. 406. *Harengus* , Rondel. de Pisc. 222. Gesn. de Aquat. 402. Jonst. de Pisc. 2. Schoneveld. Ichth. 36. Merr. Pinn. 185. Dal. Pharm. 305. *Harengus Flandricus* ; Aldrov. de Pisc. 294. *Harengus Chalcidis species* , Bellon. de Aquat. 271. *Aringa Cimblicorum littorum* , Jov. 143. *Harengus Rondeletii* , Gesneri , & *Aldrovandi* , Willughb. Ichth. 219. Raii Syn. Pisc. 103. *Clupea maxilla inferiore longiore* , maculis nigris carens , Arted. Gen. 7. Syn. 14. Spec. 37. Linn. Faun. Suec. 315. *Erica vel Aericia* , Gaz. Chalcis Græcorum ; *Halec* , *Halecus* , *Harencus* , sive *Harengus vulgaris* , vel *major* . Quorund. Gallice : *Hareng* , *Haran* , seu *Harang* .

Est autem halecis , (referente *Artedi*) caput , ex lateribus depressum , anterius aliquantulum cuspidatum ; vertex capitis in rostri regione , oculi item quasi intus insculpti , ac dorsum quodammodo excavatum ; oris hiatus , corporis respectu , magnus ; quod quum aperiat , rostrum aliquantulum elevatur , os autem maxillare superioris mandibulæ , quod undequaque maxillam inferiorem reteggit , multum protruditur ; maxilla item inferior valde prominet ultra superiorem , & ore clauso , tegitur pars ejus utraque , osse quod maxillæ superiori est , maxillari . Cæterum nares , quæ ipsi sunt , valde conspicuas bina perfodiunt foramina , quæ situm obtinent rostro quam oculis viciniorem , horum autem anterius nudo oculo deteginequit . Oculis gaudet ex parte capitis utraque , magnis , & iride , cui color est argenteus , instructis . Qui in extremitate maxillæ inferioris conspiciuntur dentes , parvissimi sunt , & tenues ; obvii autem in extremitate maxillæ superioris , observationes instituentium oculos , adeo exigui sunt , interdum effugiunt ; nec non in oris suis quodammodo , ast leviter dentatum , os laterale adparet maxillæ superioris , inferiorem undequaque tegentis . Nec non aream deprehendimus oblongam , denticulis confitam in media palati parte anteriore ; vel duos denticulorum ordines recta ad longitudinem productos , in ea palati parte quæ rostro proxima est . Linguam ejus quodammodo acutam , inferius vero liberam & nigridam denticulis intus reflexis constipatam videbis ; & in latere quovis vaginarum quæ branchiis sunt , extremo maculam rubri seu violacei pulchrioris coloris . Has vero branchiarum vaginas , sive opercula , argenteas , ex parte quavis inferiore 3. ad 4. laminæ osseæ , octo item spinæ parumper reflexæ ac membrana quadam cohærentes constituunt . Linea lateralis dorso magis vicina & recta procedens , haud multum conspicienda venit . Squamæ , corporis respectu , magnæ , & coloris argentei , & avulsu faciles , laterculorum instar dispositæ sunt . Dorsum cœruleo-obscurum , verno tempore autem debiliorem ostendit colorem ; latera autem & venter argenteum exhibent . Ventrem ejus a branchiis usque ad anum asperum figuræ acutioris ergo , navis carinæ simillimum , dorsum vero convexum videbis . Quatuor ex quovis latere gerit branchias halec , quarum 3. exteriores seu maximæ , efformatæ ex uno apophysium ordine , pectinis instar compositarum , & in branchiarum superiore longissimarum , hæ inquam , pro similitudine sua barbæ accedunt , quas in pennis avium observamus . Ast branchiarum infima seu minima duplici instructa est apophysium serie , asperimarum æque ac brevium .

Alia

Alia adhuc in medio dorso conspicitur pinna, unica, albida, 19. radiis constans, quorum primus ad quartum simplices, reliqui autem cuspidate ramosa terminati sunt; brevis item est primus atque secundus. Nec non pectoris pinnae ventri vicinæ & albidæ 18. componuntur radiis, quorum primus simplex, reliqui parum bifidi, primi etiam majores, ultimi autem minores esse solent. Albæ sunt & exiguæ pinnae ventris, quas 9. radii, illorumque primus simplex, reliqui autem quadruplici cuspidate terminati constituunt; magnus insuper est radiorum primus, minimus vero ultimus. Ani pinna alba est & cauda vicina, & ex 18. vel 19. radiis composita, si nempe duos extremos, inter se contiguos, pro duobus numerare vellis; duo horum tresve priores simplices sunt, at reliquorum extremitas in ramos finditur, minimi sunt primus & ultimi. Cauda halecis bisulca est & cinerea, & 18. ex radiis longis & duobus bifidis composita, excipetamen ultimos minores, ac medios in extremitate sua bisulcos. Cor ejus quatuor acutis, si formam quæris, angulis effingitur. Jecur autem rubrum, exiguum & angulare, felle vesiculæ superjacet. Duo sunt ovaria magna, simplicia, lata, per totum abdomen extensa, inferius inter se coherentia, & eximio ovorum albidorum numero repleta. Stomachus quasi duplex sub Oesophago divisus, adparet; ex latere dextero autem Pylorum circumdantes ad sunt 16. vel 17. appendices oblongæ, ex alterutra intestini parte ac inferius sitæ, intestinum denique recta pergit ad anum. Sinistra pars stomachi mediante quadam membrana rectæ jungitur, & suo conductu in vesiculam aeris, quæ ad natandum facit, inferitur. Lien exiguus & oblongus pone principium intestini situs est. Aeris vesicula longa, coarctata, per totum abdomen extensa & colore argentea facilis a dorso avellitur. Peritonæi color est nigridus, renis vero cruori similis, hicque per totam spinæ dorsalis longitudinem eidem adhæret, 35. utrinque costas & 55. ad 57. vertebrae in universum numerabis. Tota halecis longitudo 5. digitis & 3. lineis absolvitur, qui patriam habet Oceanum, Sueciæ aliasque oras aluentem.

Halec, sic Cel. *Willughby*, piscis inter omnes notissimus longitudine 9. digitos ad pedem integrum, latitudine autem 2. ad 3. digitos pertingit. Vix aqua extractus moritur. Nec, ut censet *Schonevelde* aqua simplici tantum vivere videtur, siquidem & stomacho & appendicibus intestinorum & Pylori semper inhærentem reperies materiam quamdam chylosam. Aves marinæ interim mari obvolitantes præsentia sua loca indicant piscatoribus, ubi halecum agmina reperiantur. Illæ enim continua persequutione infestant haleces, suam prædam, & quemvis eorum motum observant, sequuntur. Etenim agminatim semper incedunt, & maris littora frequentant. Nec nisi semel in anno, circa æquinoctium autumnii ova sua ponunt; & ut pisces reliqui eo tempore majori in pretio ac delicatiores creduntur, quo corpus ovis seu lacte plenum habent, teste Cel. *Schwenckfeld*.

Plerumque autem, teste *Linnaeo*, Harengus ille magnus, quem Sueci dicunt: *Sill*, Occidentis mare inhabitat, minor autem: *Stroamming* adpellatus *Sinum Bothnicum*. Nos igitur hujus, sive minoris descriptionem ex *Arledi* hausimus, hinc & quoddam inter hanc & *Willughbyanam* discrimen observabis. At parum facit ad rem, siquidem halécem minorem; Gallice: *Celerin*, & a Massiliensibus: *Harengades* nuncupatum, magnitudine tantum

tum nec specie a majori sive communi differre judicarunt varii vel primi ordinis Physicorum.

Vix frequentior, sic *Lemery* in *tractatu de alimentis*, in Gallia piscis est halece; abundantior enim in maribus Hiberniæ, Scotiæ, Angliæ, Daniae ac Norvegiæ capitur; imo tanta nonnunquam copia confluit & constipatur, ut vel navibus transituris obstet. Hinc & quoties illius capiendi ergo laborant, maximam ejus quantitatem ex aqua protrahunt, nec mirum, quod sit notissimus. Deficiente aqua vix brevissimam vivit vitam. Noctis in tenebris lucem quamdam præbere videtur, & in aqua, cui inhæret, fulguris speciem mentitur. Noctu igitur faciliores captantur haleces, faciliores enim a piscatoribus conspiciuntur.

Sic referente *Martino Schookio* in *dissertatione sua de halecibus*, Romæ haleces *flandrici* dicuntur, errat autem *Bellonius*, qui Romæ qui prostant haleces ex Mediterraneo captos esse judicat. *Aldrovandus* eum ex errore liberavit; nulli enim haleces in Mari Mediterraneo reperiuntur. Originem huic errori dedisse videtur, magna inter haleces atque alosas minores similitudo, cujus ergo ab Gallis faciles pro iisdem habentur; alosa autem ventre suo, asperioribus quam halec spinis confito facilis distinguitur. En! quam ob causam harengi diutius adservati venter diffilit, intestina prorumpunt. Spinæ etiam halecis subtiliores quam alosæ, minorem inter comedendum faceffunt molestiam. Alosæ tandem maculis confitæ sunt, quibus carent haleces. *Schookius* harengum regem piscium salutat, utilitatis suæ ergo & excellentiæ. Nomen illud, quo plerumque *piscis coronatus* audit, exinde derivare annititur, quod in Belgii urbibus, pro signo prostantis harengi recentis coronam ex hædera confectam, ex janua suspendendimos fit, excitat enim vini sitim. Sic & *Paulus Neuvrant* D. postquam incognitum Græcis olim atque Latinis harengum demonstraverit, addit: in hunc solum natura omnia ista conferre voluisse videtur, quæ inter reliquos dividerat; ac antiquioribus jam temporibus dignus qui gerat coronam æstimatus est.

Nos autem, (sic eleganter, ut solet, *Cel. Pluche*) quæ de piscium transmigratione tenenda sunt, & jure quidem ab halece ediscamus. Horum metropolis regio illa esse videtur, quæ inter Scotiam, Norvegiam & Daniaam continetur. Numerosa quotannis eorum agmina exinde egrediuntur, fretum Brittanicum cohortim peragrantur, Flandriam denique & Belgium transeunt, & Normandiam nostram adtingunt. Etenim non nisi circumvagantium catervæ jam huc jam illuc instabili cursu tendunt. Tempus adventui ac recessui præfixum in Junium cadit atque Augustum. Via, qua incedendum, præscripta, ratio itineris determinata est. Una omnes proficiscuntur. Nec ex segnitie cunctatores, nec castra relinquentes videbis. Sic per stativa continuato suo itinere, non nisi in loco sibi præfixo castra ponunt. Quam spatiosus interim & longus sit, copiarum ergo, itineris tractus, simulac transierit exercitus, nullum amplius, nisi subsequente demum anno videbis. Migrationis hujus causam piscatores nostri ac Belgæ sequentem reddunt: tempore æstivo per totum fretum Brittanicum innumera quantitas enascitur vermiculorum & pisciculorum, cibi halecum. Hic ergo confluunt, hos tamquam manna colligendi causa concurrunt. His tandem per æstatis spatium atque autumnii consumtis, ex partibus Europæ Septem-

trionalibus meridiem versus tendunt, alio quodam & novo cibo allecti. Deficiente autem illo, alibi vitam quærunt, citiores transeunt, minor copia piscatorum retia explet.

Ast recensentem nunc ex hodiernis audiamus unum, qui merito est instar omnium, Cel. scilicet *Anderson*, ex cujus *historia Islandiæ naturali* sequentia transcribamus, lectori, ut censemus, gratissima atque accepta:

Reliquis dubio procul omnibus, qui anteferatur, dignus est halec, quem piscatores nostri *piscem coronatum* salutant, siquidem maximam, nunc fere omnibus adfert utilitatem. Qui quum sit notissimus, nemo facile erit, qui a reliquis illum distinguere nequeat, quamvis fusiore ejus descriptione supersedeamus. Multa tamen & observanda veniunt, & notanda, si omnes diversas ejus species, haud sufficienti studio hactenus disquisitas, vel cognoscere velimus, vel in suas reponere classes. Islandiæ sinus pinguissimorum halecum tantam subministrare copiam, compertum habeo, quod, si vel frequentiores forent, vel aptiores, ac ingenii acutioris Islandiæ incolæ, brevi efflorescens instituere commercium possent. Nec nisi hæc ex referentibus accipere potui; quod frequentes sibi conspiciantur haleces duorum fere pedum longi, lati autem trium, & quod excedit, digitorum. Hi forsan ex illa halecum specie fuerunt, quam *Reges halecum* adpellant; agmini etenim halecum pro ducibus eisdem esse, communis vult opinio. Et *Martin* in *Descriptione Insularum Scotiæ Occidentalium*: piscatores (inquit) & alii quidam sunt, quibus refero acceptum: quod duplo major reliquis quidam halec, reliquas speciei suæ omnes undequaque, ducis instar, conducit. Hunc & *halecum regis* nomine, designant piscatores, & si casu vivum cepissent, statim in mare reiiciunt, *læsæ majestatis crimen* abhorrendo.

Species inter illas, quæ communiores, minori habentur in pretio, referendæ veniunt: Sardinæ maris Septemtrionalis, quas *Belon* nominat: *Chalcides*, Angli: *Pilchards*, Galli: *Celerins*; simillimæ piscibus istis, quos *Sardinas*, Venetiis autem: *Sardellas* nuncupant *Maris Mediterranei*. Iisdem adnumerantur & illi, quos: *Sprott* seu *Spratt* Angli vocare solent, hi enim ex genere halecum minorum sunt vel sardinarum, & fumo arefacti gratissimum præbent ori cibum.

Communi interim piscatorum opinioni, qua haleces non nisi ex maris luto vivere censent, dentes illi obstant rostra eorum munientes, quique si nil nisi aquam reciperent, nullius plane forent utilitatis. Hos enim arripiendis & retinendis vel pisciculis vel aliis corporibus solidis, suo nutrimento, ac sui partem in stomacho eorum relinquentibus destinatos esse censeo. Sic enim *Neucrantz* in *tractatu de halecibus* 60. interdum cancerculos marinos fere concoctos in stomacho halecum sese reperiisse testatur; & *Leuvenhoek* coitus tempore anatomiam eorum instituendo, intestina ovis repletissima detexit.

Nec inutilis sive superflui laboris nos incusatos iri censemus, si & locum unde quotannis tanta halecum agmina prodeunt, & viam qua mare permeantes incedunt fusiori disquisitioni subiiciamus. Quod interim ad locum, ex quo proveniunt, nulla nisi admodum dubia sunt atque incerta, quibus edocemur, quod ex Septemtrione descendentes, catervatim jam has, jam illas oras attingant. Nec ultra insulas *Shetlandiæ*, vulgo: *Hilandiæ*, illarumque partes, *Fayrhill* & *Bockeness* adjacentes, viam eorum investigan-

figando illos insequuti sumus . Huc autem quotannis , brevi ante festum *S. Joannis* , Belgæ plurimas naves minores , *Busas* seu *Buysen* dictas , transmittunt , easque agminibus halecum ex Septemtrione adventantium opponendo , uno retis tractu maximam illorum copiam captant , suo statim modo condiunt , tum domum deportant , exinde per totam Europam transmittunt . En , qua ratione in captandis halecibus procedunt Belgæ . *Busæ* , de quibus diximus , circa *Hitlandiam* confluentes , cauri regionem petendo mare intrans , & prope *Fayrhill* , audita media nocte diei 25. Junii primum rete eiiciunt . Nocturno tempore saltem piscando occupantur , etenim non solum in tenebris distinctior conspicitur halec , ob lucem squamarum atque oculorum , sed etiam emissis passim laternis allicitur , iisdem vicinus cæcutit , & retia extensa incurrit . Eodem artificio & pisces *Dalmatiæ* sardas capiendas decipere solent . Longissima interim sunt , quibus haleces capiuntur , retia , & per expressam legem ex cannabe fortiori , ac maculis fortissimis constructa , quo accedens piscis statim ex branchiis iisdem inhæreat . Contexta sunt , quibus hodie utuntur , fere omnia , ex filo triplici serici cujusdam *Perfici* , talia enim triennium perdurare compertum habent . Adhuc recentia fumo ex scobe ilicis elicto obfuscantur , (quod egometipse meis oculis *Amstelodami* vidi) sic enim ægre conspiciuntur sub aqua . Ut autem ante quintum & vigesimum Junii diem sua retia eiiciant pisces , expressa lege interdictum est , ne piscis deportandus putredine adficiatur ; etenim non nisi peracta tandem die prædicta , sibi destinatam perfectionem excrecendo attingit . Terminum temporis piscationi præfixi , si *Scotiæ* oris inhærere velint pisces , *December* , mensis constituit ex lege prædicta . Haleces igitur a 25. Junii die ad 15. Julii captos promiscue doliis immittunt ; tum navibus (quas velocitatis ergo : *Venatores* adpellant) in *Belgium* deportant , & *venatorum* haleces nuncupant . Quos vero post 15. Julii diem captant , illos in tres classes sollicite distinguunt , & branchiis statim retractis , singulis sale conspergunt , singulis dolio reponunt . Hinc alii haleces *virgines* , alii *pleni* , alii autem *vacuæ* dicuntur . *Halecem virginem* , Belgice : *Voll-Hiring* , lacte seu ovis plenum , *vacuum* vero illum nominant , qui vel peracto coitu , vel paullo ante coitus tempus fuit captus . Hic autem pleno inferior habitus est , citiorque putrescit . Conferas quæ de piscatione halecum *Happelins* , & in *Promptuario Mercatorum Marperger* tradidere . Optimæ conditionis interim ex halecibus , *Hamburgi* prostantibus , *Belgicus* est . In promptu ratio est , ob quam omnes ab omnibus aliis captos atque conditos & præstantia & sapore delicatiori superet , majorem enim diligentiam in præparando ac condiendo eodem adhibent Belgæ ; vix capti branchias rescindunt , summo cum studio præparant , quidquid per noctem ceperint omne ante finem diei subsequenteris recondunt , doliis iliceis haleces immittunt , summo cum ordine interjectis stratis *Hispanici* salis seu *Lusitanici* disponunt . Quum autem populi alii haud tam sollertes sint & studiosi halecem præparando , quid mirum si *Belgicus* omnium longe præstantissimus est .

Ulterius interim disquirendo Septemtrionem versus progrediens , easdem halecum catervas non solum circa *Islandiam* , sed & ulterius , imo sub polo ipso detexi . Disquisitionum mearum fundamento venire non solum variorum relationes fide digniores ac inter se congruentes , sed etiam axio-

ma illud, mihi quidem ut videtur, exceptione omni majus: quod scilicet, ubi & majorum & minorum specierum pisces reperiuntur frequentes, ac pinguiissimi, ibidem & halecum, eorumque delicatissimorum habebis copiam. Etenim ut majoribus saltem piscium generibus inhæreamus, qualia sunt: Canis Carcharias, Marsovinus, & ex balænis illæ, quas Septemtrionem inhabitantes *Sildhual* nuncupant, seu *Sildqual*, quod *Harengi-Balænam* denotat dictas, nonnunquam & *Nord-Caper*, hi omnes, inquam, halecibus nutriuntur; aperi illorum stomachum, & halecibus plenum semper reperiēs.

Hic loci addere liceat: quod hic *Nord-Caper* ex illa, ubi præ aliis commoratur, regione, nomen suum ferat acceptum; commoratur autem circa extremam Norvegiæ oram Septemtrionalem, quam *Promontorium Septemtrionale*, Gallice: *Cap du Nord*, dicere consueverunt. Quam quidem domicilii regionem reliquis præferre videtur, ob halecum, hæc oras ex Septemtrione descendendo, adtingentium, agmina. Eadem illa ratione commotus, Islandiam ambire solet, imo exstimulatus fame, (id quod pro certissimo tradere possum,) haleces hinc inde per sinus prædictæ insulæ dispersos, valet redigere in unum, valet oram versus adigere. Et en! qua arte vesfra animal gulosum utitur; coacta nimirum arctiorem in locum, halecum, quas potuit, quantitate, opportuno, quamvis unico caudæ ictu, aquam in rapidissimum concitare vorticem potest, imo cymbas piscatorum aliquando absorbentem; quo quidem haleces perterriti agminatim ritum ejus, tunc apertum, subeundo, aqua, quam adtrahit, ac aere abrepti, recta in stomachum ac voraginem, devehuntur. Nec non in *Descriptione Insularum Scotiæ Occidentalium*, quam Cel. *Martin*, auctori, debemus, relatum legitur: quod multis admodum balænis pleni sint sinus, quibus immorari solent haleces. Et si vadosa molibusque arenæ consita esse cogites hæc loca, quasnam hac dices esse balænas? nisi: *Nord-Capers*, *Marsovinos*, simileve. Imo inter recensitas, in *Transactiombus Philosophicis*, balænarum species in oris Angliæ novæ obvias, quædam adfertur, quam *Fin-Back-VVhale* appellant, pinnae ergo magnæ, ac tendinosæ, seu carneæ, quæ in illius dorso $2\frac{1}{2}$. ad 4. pedum prominens conspicitur. Quem quidem piscem, eodem, quo *Nord-Caper* artificio utentem, uno sæpius haustu aliquot centena halecum, murænarum, aliorumque pisciculorum deglutire testantur *Transactiões Philosophicæ*.

Forſan autem animo tibi ſiſtere nequis, qui fiat, quod nec haleces nec alii piſciculorum penitus ſint extirpati, quum tanta guloliſſimarum maris belluarum copia numquam interruptas eiſdem ſtruat inſidias. Aſt vel leviſſimæ conſiderationi datum eſſe cenſeo, ut intelligat, providæ divinæ ſapientiæ hanc eſſe teſtem, hanc legem, ut utrorumque multiplicatio ea ſemper ratione & proportione procedat, qua illi quidem ineffabili gignuntur numero, hæ autem, belluæ ſcilicet, unam, ad ſummum duas, quotannis producant. Imo maximæ inter illas, & nominatis belluis duplo majores, alius generis nutrimento aluntur: Sic, ut dictis exemplum ſubjungam, balæna Spitzbergenſis, tum ob appendices gulæ frequentes, *Baarten* ſeu *Barbas* dictas, & ob gulæ ſuæ anguſtiam piſces deglutire nequit; hinc nil niſi quædam cancrorum ſpecies, ac nonnulla aquæ infecta ipſi nutrimento ſuperſunt. Sic & ſpecies illa, cui *Tang-Hual* nomen eſt, ea dumtaxat herba vivit, quam *Tang*, Anglice: *Tangle*, Latine tandem *fucum mari-*

marinum adpellant . Sic aliæ tandem belluæ marinæ varia alia præter pisciculos, habent pro cibo . Eandem Dei sapientissimam dispositionem , & inter animalia rapacia terræ invenies , hæc enim reliquis infrequentiora nascuntur, multiplicantur . Quæ scilicet pro mole sua devastandis sylvarum regionumque tractibus destinata esse videntur , ut : Elephas , Rhinoceros , alia, quid quæso, adpetunt nisi herbam, arborumque ramusculos . Collige dicta , & adparebit : innumerabilem halecum copiam in poli Septemtrionalis regione contineri . Quod autem ad pisces minores halecibus inhiantes spectat, Asellum & quasvis ejus species iisdem adnumeramus; imo piscatores nostri experientia edocti probe norunt (dum eos captum *Hilgeland*, insulam adeunt) quod nulla esca faciliores, quam halecibus alliciantur . Nec mari glaciali ; ubi Asiæ alluit oras , haleces deesse comprobant balænæ plures hisce oris inhærentes, comprobant & testimonium *Isbrandii*, Moscoviæ Legati; hic enim in *itinerario suo Sinenfi*, multos optimosque haleces , & alios hujus generis pisces in *Salazia*, fluvio, ultro *Kamschatka*, regionem, obvium, captari docet .

Jam igitur quum in regionibus Polo tam vicinis semper detineantur halecēs; remotissimas Septemtrionis abyssos pro certo halecum domicilio haberi posse censeo , aliorumque variæ speciei pisciculorum , illos in itinere plerumque concomitantium , quales sunt : murænæ, passeris marini, alique ; conjecturæ huic fidem majorem conciliant glaciei cumuli fere immensi, ibidem obvii, qui numquam prorsus diffilientes, sed quovis potius anno in majorem excrecentes & altitudinem, & extensionem, locum præbent , & coitui opportunum , & conservandis foetibus opportunum , & a Phocænis, & Morhuis immunem, qui respirationis ibidem difficilioris ergo eo haud penetrare possunt ; immunem, rationis ergo ejusdem, & a balænis, pisciculis alias funestissimis, hæc scilicet , & similibus , ac animalia terrestria, pulmonibus instructæ, puro semper , & recenti quem respirent , aere, indigent; immunem denique & a piscatoribus , & hinc undecumque tutissimum . Ex quo prona deducitur consequentia, quod nec hominum infidiis , nec belluarum gula diminutus pisciculorum prodigiosa quantitate sese multiplicantium numerus, in tantam denique excrecat copiam, ut deficiente nutrimenti adparatu , tot tantisque eorum catervis abeundum , & victus quærendus aliunde sit . Ex his forsan aliqui, qui supersunt , vel ex progenie eorum saltem, peracto tandem spatioso itinere, polum versus redeunt ad speciei totius conservationem, & suum contribuentes . Et quanta quæso detegenda adhuc restant circa œconomiam animalium hætenus abscondita, quæ interiori studio erui facillime possent; & summæ sane mihi ducerem laudi, si hisce meis, quantulacumque sint, eorum excitare valerem diligentiam, quibus nova investigandi data est opportunitas?

Instinctus interim naturalis ille, quo incitati pisciculi omnes agminatim incedere solent, eximio piscatoribus commodo cedit, ac laboris allevamento . Singuli quippe infidiarum , quas ipsis struunt piscatores, timore perculsi , securitatem in medio agmine quarunt , huc singuli conflunt, & montem quasi moventem sese in aqua constituunt . Peracto autem coitus sui tempore, suo statim se accingunt amplo itineri haleces, imo eodem instinctu adacti , & juniores, receptis saltem sufficientibus itineri viribus, eandem viam ingrediuntur ; illi tandem , qui retia piscatorum effugere , con-

tinuato citissime cursu eo tendunt, quo explendo naturæ fini avocantur.

Jam, insequendo halecum migrantium quotannis vestigia, agmen eorundem anno ineunte ex Septemtrione progrediens binas in alas divisum videbis. Dexterâ Occidentem petens, Martio mense, Islandiæ insulam attingit. Et hic quidem exercitus præ copia extensionis, & plenitudinis suæ, dici meretur constipatissimus. Hic, & belluarum maris, & avium ex oris irruentium quantitas acriter ipsis inhians, undecumque in medium illas adeo coercent, ut eminus mare nubibus pene obtenebratum appareat, & aqua exagitata, hanc etenim periculi memores perturbant modo elevati in superficiem aquæ, modo elati in aerem ipsum. Num vero aliquam in Terræ novæ moles arenarias ableget hic tractus catervam, antequam accedat Islandiam; imo quo tendat denique pars reliqua, juxta ripam hujus insulæ Occidentalem progrediens, ignoramus, fatemur. Hoc saltem pro certo habemus, quod omnia tunc hujus insulæ vada, sinus, & tractus magna scateant, & halecum quantitate, & piscium majorum æque ac mediorum, palato jucundissimorum, & commercio utilissimorum, haleci captandi ergo ibidem commorantium; eminet inter illos, quem supra diximus: *Nord-Caper*, qui abeuntes in vada haleces ut insequatur detrectans molis suæ ergo, hic illos expectare solet.

Satius interim alam sinistram cognoscimus, quæ Orientem petendo, & ablegata, quæ orientales & occidentales Islandiæ oras tangit, quadam caterva, recta descendit in mare Septemtrionale, quamque semper & Morrhæ persequutione infestant, & Phocænæ. Quum ad determinatam perventum sit altitudinem, iterum in binas abeunt; & ala quidem Orientalis Septemtrionis Promontorium, *Cap du Nord*, versus tendens, exinde ad oras Norvegiæ descendendo, catervatim denique Mare Balticum intrat. Pars vero altera, & nunc quidem major, Occidentem versus deflectens, quam Phocænæ, Canes marini & Morrhæ continuo comitantur, haud interrupto cursu Orcades abit, & Hitlandiæ insulas, ubi piscatores Belgæ, ut supra notatum dedimus, qui illam expectent, nulli defunt, exinde autem Scotiam versus suum dirigit iter; ibidem in duas denuo dividitur catervas, quarum altera, emensis Scotiæ oris Orientalibus, Angliam petit, ablegando tamen quædam ex se agmina, Frisiam versus, Hollandiam, Zelandiam, Brabantum, & Galliam. Altera autem Scotiam ex parte sua Occidentale, & totam Hiberniam peragrando, utriusque insulæ habitantium in prædam abeunt, hi autem vel recentibus illis vescuntur, vel quosdam ex majoribus piscibus haleces insequentibus, ut captent, quærunt; nullam ulteriorem ex iis utilitatem quærendo. Confluentes tandem in unum omnes alæ majoris secundæ divisiones, fretum Britannicum adeunt; & quæ ultimo, vel piscatorum retia, vel piscium rapacium gulam effugit, caterva adhuc numerosa, Oceanum Atlanticum ingressa, perit, ut vulgo dicitur, vel potius in oris haud porro conspicitur, fugiens, ut verisimile est, regiones calidiores, & Septemtrionem versus, patriam suam, illico revertitur.

En evidentissima, quæ summam, Creatoris omnium, & Conservatoris sapientiam, quæ summam ejus benignitatem eloquuntur, documenta. Hunc etenim pisciculum, quam vili æstimandus videatur, tot beneficiorum voluit esse instrumentum. Piscibus majoribus, & avibus, utriusque innume-

rabilibus, alimentum; centenis hominum millibus cibum; millibus aliis lucrum, occupationem, commercium.

Varios ab omni tempore magna Brittania habuit auctores, qui patriæ amore incitati, & in scriptis, & dictis, civibus suis opprobavere, quod negligendo turpiter donum naturæ beneficæ, emolumentum ex halecum piscatione proveniens non sibi vindicent, sed Belgis relinquunt. Ipsi item Angliæ reges, illo præsertim tempore, quo de jungendo Angliæ & Scotiæ sceptro erant solliciti, omni, quo poterant studio circa promovendum in Scotia halecum captorum ac sale consperforum, negotium allaboravere. Sic diva Anna, Regina, sic divus Georgius I. Rex, accedentibus ambo- bus Parliamentis de eo cum urbe Hamburgensi conveniebant, quod qui in eadem civitate commorabantur, Scoti, illos constituere possent, ac juramento obstringere qui vel transmittendis, vel dijudicandis ex Scotia ad- vectis halecibus occupabantur; imo nec aliud quidquam, quod promovendo huicce negotio prodesse possit, præteriere. Ast exiguus hucusque tenta- minibus respondit usus; cujus culpam in Scotis ipsis quæras; qui nimis juvenem halecem, antequam suam adtigerit perfectionem; captant, qui- que parvis saltem in eodem capiendo cymbis utentes, ripas dumtaxat tentant, mare autem adire nequeunt. Nec statim, ex quo illum cœperint, enecant, ac sale conspergunt, Batavorum more; sed nisi ad summum re- pletis cymbis terram petunt, ac rescissis tunc demum branchiis, sale con- diunt. Et quoniam in hac haleces præparandi methodo, plus quam 24. elabantur horæ, quid mirum, si magnam qualitatis suæ delicatioris partem amittat? scilicet si condimentum mors ejus antecesserit, nec saporis præ- stantia amplius gaudet, nec perdurandi facultate. Aliquot vero nunc anni elapsi sunt, ex quo vel hunc defectum explevisse videntur.

Belgas, primos certe omnium haleces expiscandi artis auctores, & con- diendi regularum inventores fuisse constat. Ast supervenientia religionis ergo, bella, ac conditiones illa excipientes, tantum suo commercio detri- mentum adtulere, ut hodie extra ipsum mare tamquam exterminati vi- deantur. Imo, qui nunc locum eorum occupant, Batavi, suo labore, quo occupabantur, illos depulere; etenim halec a Batavis captus & præpara- tus nomen: halecis Flandrici vel Belgici hodie adhuc apud Germanos inferioris Germaniæ conservat.

Quæcumque autem sit halecum patria (sic *Atlas maris & Commercii, Lon- dini* prodiens anno 1728. *idiomate Anglico*) tanta ovorum copia fecundæ il- lam relinquunt, ut halecum singulis denos mille, quos secum deportant, tutus adsignare possis. Ova interim sua in mari Angliæ oras alluente, re- ponere concludimus, quia eisdem plenæ advenientes, longe antequam abeant, iisdem destitutæ, reperiantur. Numerum eorum merito dicas infi- nitum, id est omnes, quos hactenus novimus, numeros, multum exsupe- rantem; ipsisque stellis admodum superiorem. Locum scilicet ubi confluant, incipientem ibi conspiciamus, quo mare videtur latissimum, & latitudinem ejus extensam, integra Magnæ Britanniæ & Hiberniæ longitudo, ad mi- nimum, exæquat.

Quamvis interim, & Americæ Septemtrionalis oras adeat, neutiquam tamen adeo frequens, ac in Europa ibidem reperitur, & si meridiem ver- sus perrexeris, nullum amplius, trans Carolinæ fluvios, deteges. Et quan-

tum mihi quidem investigandi data occasio fuit, reperi, quod numquam, frequens saltem, in terris meridionalibus, occurrat, ut: in Hispania, Lusitania, oris Galliæ meridionalibus, nec in oris Oceani, nec Africæ, nec tandem in Mediterraneo; quas ut adeat regiones quasi interdictum ipsi videtur, quo illius accipiendi ergo, ad Anglos sit recurrendum.

Diceret quispiam: si tanta ubique per annum capitur copia halecum, nullus in mari amplius supererit, nec in oris, quas pertingit, reperietur. Ast conspice copiosum illud agmen, quod constituunt, dum catervatim abeundo ex oris Angliæ & Hiberniæ, mare Sabrinense ingrediuntur; vix enim aliquam numeri jacturam fecisse videntur. Quidquod ex millies millibus a Septemtrione advenientibus ad summum, unum captari supputant alii; quidquod belluas marinas, ut: Morhuæ, Phocænæ, canes maris, aliasque majorem adhuc halecum quantitatem devorare censemus, quam quidem omnia captant piscatorum retia.

Unicum adhuc, sic pergit *Anderson*, circa modum haleces præparandi apud Anglos Jarmuthi in oris, addere liceat. In binas species illos separant; quarum alteram dicunt: *Red-Herring*, id est: *rubicundum* seu *fumigatum*, ob colorem quem ex fumo induit; alteram *White-Herring* seu *halecem album*, coloris sui argentei ergo & naturalis, quem retinet. Statim igitur ex quo halecum captorum quantitas explendæ sufficit cymbæ, ad littora illos deportant, & resectis branchiis ac protractis intestinis sale Hispanico conspergunt, tum doliis immittunt, ac interdum inter se miscent. Effluxo 16. vel 24. horarum spatio ex doliis illos protrahunt, aqua dulci abluunt, ex bacillis suspendunt, qui perticis superponuntur, in tuguriis quibusdam huic soli usui destinatis. Ignem denique ex ramusculis construunt, accendunt, quaternis horis renovant, & ut probe fumum imbibant pisces, summo cum studio tugurium obturant. Halecem igitur extra limites regni transmittendum per sex hebdomades eodem fumo tingunt, ac probe confitatum ligneis doliis iniiciunt. Conf. *Villughby historia piscium*.

Vocabula tandem, quibus Gallis venit, sequentia sunt: *Hareng*, *Hareno*, *Haran*, vel *Harang*. Latinis dicitur: *Halec*, a Græco *Hals*, *sal*, quia sale communiter seu muria conditus adservatur. Nomen ejus Italicum est: *Aringa*, *Arenga*, seu *Harengo*; Germanicum: *Hering*, *Haring*, ex quo Gallicum: *Hareng*, & Latinum: *Harengus*, originem traxisse videntur; Belgicum: *Haaring*; Anglicum: *Herring*; Danicum: *Sild*; Suevicum: *Sill*. *Halecem recentem*, seu *candidum*, Gallice: *Hareng frais*, seu: *Hareng blanc* illum nuncupare solent, qui recens ex aquis captus est; *Hareng Pek* Galli vocant hunc, quem sale tanto Belgæ obruunt, ut crudus cibo inservire possit; *Hareng* tandem *Sor*, *Saur*, *Sorè*, *Saurè*, *Soret*, *Sauret*, hunc, qui primum sale conspergitur, fumo deinde exsiccatur. Teste autem *Scaligero* vox: *Sor*, sive *Soret*, Gothica est origine, & *rubicundum* denotat; antiquiores autem pisces fumo exsiccatos: *Chalcides* dicebant, lucentis sui cuprei ergo coloris. Quæ quidem etymologia magis mihi arridet, quam illa, qua *Rondeletius* illas *Sorès*, seu *Nocturnos* nominatos esse censet, vel ob eorundem nigredinem, vel, quia nocturno tempore expeditior easdem captandi labor procedit.

Multo autem oleo saleque volatili halec abundat, quo communem orem vix noscimus piscem. Quodsi ex aqua protractum recentem comedere velles,

pinguissimum feligas, multa carne instructum & coloris albi & saporis gratissimi. Hic igitur, omnibus, cujuscumque sint ætatis vel temperaturæ corporis saluber est & optimus. Sale autem quomodocumque conditus salutis nocivus dici meretur, succus etenim dulcis & mollis sale consumptus abit. Minus salutis infestus ille est, quem sale suo denuo exutum comeditus, cui tamen quum semper quædam pristini salis portio inhæreat, nec prior succus restitui queat; haleci recenti inferior erit, nec carnis mollietie & sapore illum adtinget. Halec fumo arefactus, quamvis plebi frequentissimo venit cibo, & *halec appetitus* dicatur, durior, aridus, concoctus difficilis, nec corporis salutis conveniens est. Juniores præ primis, qui biliosi ac calidi sunt temperamenti corporis suo usu omni abstineant. Quamdam enim putrefactionem alkalina in stomacho producit, & causam morborum ab acrimonia alkalina orientium evadit.

Artis Medicæ usui vel integer, vel partes ejus interserviunt. Cinis ex halece, dosi ʒʒ. ad ʒj. cyatho vini candidi admixtus pro solvendo renum calculo commendatur. Vesiculæ halecis, quas *Animas* dicunt, interne receptæ urinam excitare dicuntur. Sic & febricitantium plantæ ad deducendos capitis humores, & sedandum febris ardorem, halecem adplicant. Et Cel. *Andry* in tractatu de alimentis jejunii quadragesimalis sua sæpissime experientia comprobatum habere refert: quod halec sale conditas ad longum dissecus doloribus arthriticis medeatur, si membro adplicatus fuerit. Muria halecis clysteres malo ischiatico & hydropi convenientes ingreditur; extrinsecus adhibita autem progredienti obstat gangrænæ, ulcera foetentia detergit profligatque tumores scrophulosos. Linimenti instar, mellique mixta gutturi adplicata, multa contra anginam scrophulosam virtute sese commendat.

℞. Halec. sale condit. num. ij.

Folior. rutæ

chelidonii ana pugill. j.

Radic. ex raphan. silvestr. ʒij.

M. contund. omnia; add. q. f. fermenti panis aceto irrigati, ut f. cataplasma, pedum plantæ febris maligna, putrida & lethargica laborantis adplicandum.

℞. Halec. sale condit. num. j.

Probe contusum pro cataplasmate adhibeas, pro distorsione & obliuione tendinum.

C Y P R I N U S.

Variarum specierum pisces sunt, quos sub *Cyprini*, nomine generico complectitur *Artedi*, nos autem ex his omnibus, de carpione saltem, & tinca ex sequentibus sumus dicturi.

Carpio, Offic. Dal. Pharm. 406. *Carpio vel Carpo*, Schrod. 326. *Cyprinus*, Rondel. de Pisc. 150. Bellon. de Aquat. 91. Aldrov. de Pisc. 635. Jonst. de Pisc. 111. Charlet. de Pisc. 43. Merr. Pin. 190. *Cyprinus nobilis*, *Cyprianus*, *Carpa*, Schon. Ichth. 32. *Cyprinus Rondeletii*, *Gesneri & aliorum*, Willughby Ichth. 245. Raii Synop. Pisc. 115. *Cyprinus Cirrhis* quatuor officulo tertio pinnarum dorsi anique uncinatis, Arted. Gen. 4. Syn. 3. Spec. 25. Linn. Faun. Suec. 317. *Lepidotus Dorioni*, Aiken *Cyprinus seu Cyprianus vel Cyperius Veterum*;

rum; *Carpus*, *Carpanus* seu *Carpena*; *Regina*; *Bulbulus*, *Bulbarus*, *Burbarus*, Nonnull. Le Carpe Gal.

Sunt autem carpioni, ut Cel. testatur *Artesi*, eadem, ac reliquis cypri-
nis omnibus, nares, iidem dentes, iidem oculi, idem os, idem caput, &
corpus, eadem branchiarum membrana, eadem branchiæ. Dorsum ejus
capite paullulum elatius, & quodammodo acutum conspicitur illud ejus-
dem spatium, quod caput interjacet, pinnamque dorsi primam. Ventre
autem valde depresso, ac latissimo, corpore item crassiori, & magis con-
globato gaudet, ac reliqui ejusdem generis pisces. Maxilla ejus superior,
una cum inferiore, quam, ore occluso, prominente superat longitudine,
colorem in extremitatibus suis profitentur flavidum. Exæquat interim, os
apertum, unius digiti latitudinem. Quatuor in mandibula superiore, binæ
quidem ex quavis parte conspiciuntur barbæ, quarum inferior, maxima,
digiti unius interdum, interdum & dimidii longa, & flava colore, situm
obtinet in angulis oris clausi; quarum denique superior brevior, & nigri-
da, in oris mandibulæ superioris sita distinguitur. Pupilla instructus est ro-
tunda, & cœrulea; iride, colorem argenteum aureo-fulvo mixtum, red-
dente; striatis, fulvisque branchiarum operculis; squamis vero admodum
magnis, fere pentagonis, vel quadratis, vel formæ denique irregularis.
Quæ inter has sitæ sunt in medio, quæque ex utraque parte lineam con-
stituunt lateralem, foramine quodam oblongo perforantur in suo centro;
reliquæ autem, id quod neminem hactenus observatione adtigisse memini,
pro varia piscis ætate, varii sunt coloris, argenteo, aureo, viridi, nigri-
doque, inter se mixti, ac tigillorum instar in tecto dispositæ. Linea late-
ralis autem tantum non recta procurrens, branchiarum opercula versus
aliquantisper deflectens, dorso, quam ventri, est vicinior. Quam in dorso
conspicimus, pinna, nigrida est; quas in pectore, & ventre, rubra, sed
debilis, quam tandem ani dicimus pinnam una cum cauda, rubrum aut in
nigrum vergentem profitentur colorem. Spinarum, quæ pectoris consti-
tuunt pinnas, numerabis 16. quæ ventris, 9. & harum quidem ultima in
fine est bisulca. Dorsi pinnam longiorem 24. aliquoties & 23. componunt
spinæ, quarum tres priores fortes, ac simplices, cæteras autem bisulcas re-
peries, trisulcas interdum, imo quadrisulcas. Veniam concedas L.B. voci
interdum barbaræ, quum claritatis potior, quam quidem elegantiae ratio
nobis habenda sit. Nec non tertiam spinam robustam, asperam, indivi-
sam, ac ex posteriore sua parte duobus spinarum deorsum deflexarum or-
dinibus instructam, duæ componunt spinæ asperiores. Binæ autem priores
brevissimæ sunt, ac minutæ. Quod si de his 9. quæras spinis, quæ ani
pinnam effingunt, tres earundem primas simplices esse scito; reliquas in
extremitatibus suis bifidas; parvas item binas priores, tertiam vero mayo-
rem, fortem, asperam, & ex postera sua parte duobus spinarum obliqua-
rum ordinibus confitam, nec tamen simplicem, sed duabus spinis, iisque
strictissime cohærentibus, compositam; Novendecim sunt; ex quibus cau-
da, admodum bifida, conflatur spinæ prælongæ, exceptis ultimis, brevio-
ribus. Illum interim quo compositæ adparent, modum, cum reliquis pi-
scibus generis ejusdem omnibus habent communem. Cordis figuram ro-
tundo-angularem adpellare liceat. Duo, quæ ipsi sunt, ovaria magna,
ovisque ex virido-albidis repleta, inferius juncta reperiuntur. Totidem
habet

habet vesiculas feminales. Splen ejus admodum depressus conspicitur, & angulis constipatur. Jecur item in tres lobos divisum. Fellis vesicula magna, cœrulea, & jecinoris partem superiorem versus sita, mediante canale quodam magno, stomachi ingreditur orificium. Intestinum longitudine sua bis totum piscis corpus superat, quod sexies in gyros reflectitur, ternempe inferiores, & ter partes versum superiores. Duæ sunt, in quas vesicula aeris divisa conspicitur partes, & amplior ex illis est anterior, ductus autem aereus & medio, seu orificio ejus interno progreditur. Qui tandem ad spinam dorsii vergentem obtinent situm, bini renes, duarum urethrarum ope sese egerunt in vesicam urinariam, quæ sita est finem versus intestini. Vertebrarum numerus integer 37. costarum vero 13. ad 14. absolvitur. Longitudine sua cubitum plerumque unum, aliquoties & duos carpio explet. Imò, & aqua, elemento suo, extractus, reliquis sui generis piscibus tenaciorem habet vitam, probe namque obturata sunt, ac reclusa quibus gaudet, ampla branchiarum opercula.

Cel. *Du Verney*, Regiæ Scientiarum Academiæ Sodalis, ille est, cui fusiorem de corde carpionis descriptionem debemus. Quæ etenim in *Observationibus suis de circulatione sanguinis in fœtu*, relata leguntur, sequentibus continentur verbis: situm cor hujus piscis conspicitur sub mandibulis, quæ branchiis inferiores in gutturi fundo reperiuntur, quasque *mandibulas internas* adpellare mihi liceat, quo faciliores a superioribus, gutturi introitum efformantibus dignoscantur. Cavitatem illam, cui inclusum cor ejus reperitur, membrana quædam lævissima contegit, quam quum in reliquis piscibus pericardii vices gerere sciamus, carpionis tamen respectu, ita nominare nequimus, siquidem suo ipsius pericardio cor illius includitur; ita scilicet & merito, dicimus sacculum hunc ex pellicula quadam tenuissima conflatum, ac cor ejus undequaque circumdantem. Fundum prædictæ cavitationis alia quædam membrana occludit, quæ præcedentis continuatio nominari meretur, cujusque ope cor ab omnibus visceribus reliquis separatur. Corde inferius quoddam conspicitur receptaculum ex plurimis eo concurrentibus venis efformatum. Tres sunt ex earum numero, quæ ex hepate proficiscentes, sanguini ex vena-porta, & ovariorum parte deportando inserviunt; duæ ex his tribus, quum receptaculi fundum utrinque adtigerint, aperiuntur; tertia autem ostio quodam latissimo mediante, in idem illud egeritur. Duæ præter has, venæ aliæ ex utroque spinæ dorsii latere proficiscentes, ac Aortam concomitantes, in utraque receptaculi parte venis hisce neſtuntur, quæ utrumque latus hepatis egrediuntur. Hinc bina vasa nominata non nisi unum hic habent, idemque ex parte utravis ostium. Truncus autem venæ sanguinem deferentis a branchiis, Aorta superior, ex latere cordis dextero descendens, parietibus insuper cavitatis cor complectentis, adglutinatus, ac semel circumvolutus in parte receptaculi dextra tandem aperitur. Illud vero receptaculum superius apertum conspicitur, versus mediam auriculæ partem inferiorem; & duabus valvulis, palpebrarum instar efformatis in ostio suo est munitum. Una saltem, aut capacitatis magnæ valvula cordis sinistra, & hujus quidem valvulæ pars superior, ex utroque suo latere, bina quasi efformat cornua, quorum finistrum dextro majus reperimus. Ingreditur autem finistrum cordis latus ex parte ejus superiore. Duæ præter ea ubi cordi jungitur auricula, inven-

niuntur valvulæ, superne altera, altera inferne; utraque autem per totum, quem effingunt semicirculum, undequaque cohærens, & aperta, ex parte cordis ad cuspidem vergente; & hujus suæ structuræ ergo, sanguine cordis contractione refluxo, sublevantur, &, ut in rana observare poteris, junguntur inter se ambæ. Figuram denique cordis semicircularem dicimus, & castaneæ marinæ, planitieï ergo, fere similem. Situm, quem obtinet, respectu capitis obliquum nominabis; inseritur autem basis ejus Aortæ, mediante quadam ginglymi specie, & alternis eminentiis, & cavitatibus, sese invicem recipientibus, ambæ hæ partes instructæ sunt. Cæterum cordis parietes, quum & voluminis sui ratione sint fortissimi, & fibrarum ejus textura admodum compacta & solida: liquet circulationem ejus violentissima actione perfici.

Nemo facile erit, qui, quid branchiæ sint nesciat; ast quis est, qui pulmonum vices in piscibus easdem subire compertum habeat. Ex quacumque interim parte moveantur, sive sese aperiant, sive occludant; sive fulcris suis (quorum bina sunt, alterum superius, inferius alterum) fiant propiores, sive recedendo longinquiores, semper attamen struem, quaternis partibus conflata, profitentur. Oras autem partis convexæ utrinque duæ cingunt species foliorum, quarum utramque ordo laminarum dispositarum, & inter se constipatarum effingit, quas barbis, seu fimbriis æquiparare poteris istis, quæ calamo adhærent; & his proprie fimbriis, pulmonum nomen debemus. Insolitam sane, ac singularissimam ecce partium positionem. Ori etenim, & pectus inest, & pulmo; pulmonem portant costæ, aquam respirat piscis.

Movendis vero his costis 46. destinati sunt muscoli, ex quorum numero octo sunt, qui dilatando, & sedecim, qui constringendo earum intervallo sufficiunt; sex amplificando, duodecim vero contrahendo cujusvis costæ fornici, deprimendo insuper & ossi sterni inserviunt; quatuor tandem sese attollunt. Branchiarum latam quantisper aperturam operculum aliquod reteggit ex variis partibus constructum, eidem usui inserviens cui pellis venit in folliculo. Tanto autem artificio quodvis operculum efformatum conspicitur, ut ab apertura recedens, foras sese excavando, id est superficiem suam, quæ plana erat, conglobando, majorem ori conciliet capacitatem; alia vero operculorum pars aliquod quasi genu interdum tangendo, branchiarum aperturas tenet occlusas, nec nisi transeunti aeri recepto sese aperit, transit autem eodem momento, quo operculum delabens occluditur, cui quidem ejus operationi bini alii muscoli inserviunt.

Quæ interim in reliquis animalibus, a centro per totum corpus diffundendum sanguinem deportat, aorta, in carpine a corde saltem ad branchiarum usque extremitatem producta, ibidem terminatur. Jam, quum adeo exigua sit nostra, de circulatione, ac vasis eidem inservientibus cognitio, difficillimo sane negotio reliqua determinare valemus vasa, quorum ope & nutritum & animatum reliquum corpus, (ab extremitate branchiarum inferiore, ad caudæ usque extremitatem,) dicendum veniat. Sanguinem itaque hujus generis piscium, ex arteriis sui pulmonis in venas eorundem deferri scito, nec ibi tantum, ubi immediate incidendo connexæ adparent earum extremitates, sed & per totam, quam peragit, viam. Arterias autem (quippe quæ & deportando sanguine funguntur, &

corporis sui structura arteriis sunt simillimæ) merito dicimus veras. Veras itidem venas, & officii sui ergo, quo ab arteriis recipiunt sanguinem, & substantiæ suæ causa, quam dicas tenuissimam. Et hæc quidem omnia congruentia sunt œconomiae animalibus communi. Inter singularia vero referimus primo ostium illud, cujus ope venæ immediate coherant cum arteriis, quod quum & in pulmonibus reliquorum animalium, ranarum præsertim atque testudinum reperiatur, in carpionum tamen branchiis admodum magis conspicuum apparet. Singularis secundo dici meretur & ille dispositionis ordo, cujus ope facilius conspiciendum sese præbet ostium prædictum; omnes etenim Arteriæ rami recti, juxta longitudinem laminarum in costis erectarum procedentes, eadem, inter se differunt distantia, qua quidem laminæ; nec non rami transversim ducti, quos capillares dicunt, & rectos angulos efformando, ex ramis præcedentibus egredientes, eodem semper inter se spatio distant; ita quidem, ut si vel nudo oculo, vel vocato in subsidium microscopio, & directionem, & intervalla utrorumque vasorum contempleris, illam ad regulam productam, hæc circino dimensa esse confessus fueris. Ex quo videre est; quod transversales arteriæ immediate in venâ descendente terminentur, quodque venarum descendentium singulæ, recepto arteriarum capillarium transversalium sanguine ex utraque laminæ parte, perpendiculariter suum jungant orificium trunco venæ illius, quæ sita est in stillicidio.

Hi igitur venarum trunci, arteriarum sanguine pleni, exeuntes insuper utrinque extremitate sua basin cranii respiciente; accepta arteriarum soliditate, & fortitudine, binis tandem, ex quavis parte, uniuntur. Quæ itaque primæ costæ est arteria, illa antequam uniatur, in varios abit ramos, & organis sensoriis, & cerebro, & partibus huic vicinis sanguinem distribuentes; & illis eo ipso fungitur officiis, quibus perficiendis aorta ascendens inservit in quadrupedibus; deinde autem secundæ costæ arteria necitur hunc in modum, ut nullum nisi unum truncum ambæ constituent, cui, juxta cranii basin procedenti, alius denuo utrinque inditur ramus; quem reunitæ tandem venæ quarti, tertiique costarum paris efformant, omnia denique unicum effingunt truncum.

Truncus itaque hicce, (cujus radices non sunt nisi venæ pulmonis,) & tunicis, & officio suo jam in Arteriam abiens, cursu juxta vertebrae continuato, sanguinem arteriarum reliquis partibus omnibus distribuendo, Aortæ descendenti fungitur vicibus. Sic sanguis ejus arteriarum ope partibus omnibus æqualiter communis, alendis, animandisque iisdem sufficit. Ubivis autem obvias sibi reperit venarum radices, quæ receptum, qui superfluous est, sanguinem, per multos tandem truncos (unitis radicibus his omnibus efformatos) ad receptaculum commune deportant, ex hoc tandem cordi redditur. En, qua ratione in carpionibus sanguinis circulatio perficitur.

Hoc igitur, quem descripsimus, modo, pulmonum venæ abeunt in arterias, animando, nutriendoque capiti, ac reliquo corpori, sufficientes. Majori interim adtentione dignum est, & singularius, quod hæ ipsæ pulmonum venæ, extremitate sua guttur respiciente, stillicidium costarum egredientes, tunicam, & officium venarum retinentes, portionem quandam sanguinis arteriarum, ex pulmonum arteriis recepti, in illud promptuarium

rium commune deportent, quod continendo omni venarum sanguini est destinatum.

Cæterum quum maxillarum motus faciat quid ad respirationem piscium, dignum ut observetur esse judicamus, quod earundem superior mobilis, ex variis partibus constet ita inter se junctis, ut ab invicem recedendo amplificare possint maxillam, & dilatare. Omnes interim quæ carpionis respirationi inserviunt partes, quum mirandum quemyis excedant numerum, haud prorsus alienum a re nostra dijudicamus, si enumerando easdem percenseamus.

Partium igitur ossæarum numerus 4386. absolvitur; musculorum 69. Branchiarum arteriæ, præter octo suos ramos præcipuos, in 4320. alios, horum vero singuli in tot abeunt arterias transversales capillares, in parte laminæ cujusvis depressa conspicuas, ut earundem numerus, si disquireretur, præcedentes simul sumtos omnes, facile superaret. Quot autem arteriæ, totidem reperiuntur & nervi, illarum etenim ramificationi horum ramificatio exacte respondet; & quamquam, uti arteriæ, sic & venæ, præter octo suos principales ramos in 4320. ramos alios dispergantur, seu tubos simplices: hi tamen, (& eo quidem ab arteriarum ramis differunt,) in alia haud denuo abeunt vasa capillaria transversalia. Jam usui, quem recensita vasa præstant, disquirendo nos accingamus.

Sanguis igitur ex omni corporis parte advectus, ex reservatorio, ubi omnes venæ exonerabantur, primo auriculam, deinde autem cor ingreditur, cujus contractione non solum in aortam, sed & in omnes ramificationes reliquas, ex aorta provenientes, & laminis branchiarum superjacentes, protruditur. Quum vero aorta in origine sua multis constipata sit columnis carnosis, primo quidem amplioribus, immediate autem exinde constrictis: hinc compressione sua cordis actionem sublevat, adjuvatur, qua magna cum vehementia sanguis in ramusculos capillares transversales, utrinque, & in primis branchiarum laminis superjacentes intruditur.

Quum vero (id quod experientia constat) & arteria ipsa & ejus rami a corde ad extremitates branchiarum, nec ulterius procurrant: duplicatus emboli ictus sufficit pro sanguine infinitis istis arteriis regularibus & rectis, cum impetu intrudendo. In illis enim præter contactum simplicem, nullum aliud impedimentum sanguini obstat. In reliquis animalibus autem, quorum arteriæ mille variis ramificationibus contorquentur, ac præsertim in novissimis earum subdivisionibus, impulsu & repulsu alterno sanguis præpeditur.

Et hæc quidem de sanguinis ingressu in pulmones. Jam autem quam ratione sanguis præparetur, dispiciendum.

Supposito igitur axioma: quod particule aeris, in aqua (ita detentæ, ut in spongia continetur aqua) varia ratione separari possint atque abire, scilicet 1. calore, ut in aqua ebulliente observamus, 2. debilitata elasticitate aeris, aquam aereis particulis plenam premente, id quod in vacuo adparebit, 3. congelatione & eximia aquæ divisione, præsertim si maximum antea caloris gradum adtigerit aqua: his inquam, præstructis, dubium non est, magnam copiam aeris piscibus admodum necessari per omne eorum corpus dispersum contineri. In vacuo demonstrari potest utrumque. Imo alia experimenta loquuntur, quod aquæ, cui aerem subtraxere, im-

missus piscis, haud diu immanere possit vivus. Quod interim aqua, qui mixtus est aer, multum imo plurimum faciat ad respirationem piscium, præter ea, quæ in vacuo instituuntur, & sequentia comprobant experimenta. Piscis etenim vasi vitreo, aqua pleno immissus, dummodo recentem interdum substituas aquam, per aliquod tempus vivus conservatur; occluso autem vitro, & ab ingressu aeris probe munito, illico suffocabitur. Ex quo lucide adparet, quod aqua, nisi aere sese replere possit, & imprægnare, piscis respirationi neutiquam inserviat. Plures item piscium si vasi haud penitus aqua pleno immittas, alacres primo hinc inde natitare observabis; ast vase occluso, valde exagitatos omnes summum petere, & illam qui respirent aquæ partem anhelare, quæ aeri proxima est. Nec non qui stagnis immorantur pisces, superficie stagni glacie obducta, vel citius emoriuntur, vel segnius, prout vel major, vel minor stagni est ambitus, & profunditas. Imo disrupta hinc vel inde glacie agminatim eo confluunt pisces, novo aere imprægnatam capturi aquam. Quibus quam necessarius aer sit piscium respirationi, quum dubio procul adpareat: nunc ipsum respirandi modum describendi animus est.

Capturus itaque aerem piscis, os apertum & labra foras extensa, oris cavitationem reddit longiorem, & guttur inflatum; tum branchiarum opercula, (motu suo pellem folliculi exæquantia) a se invicem recedentia parte sua exteriori sese excavando, conglobantur, alia interim ex eorum partibus quamdam genu speciem tangendo, opercula branchiarum retinet occlusa, & quamvis aliquoties ab hoc genu paullulum recedat, aquæ tamen ingressum impedit; pellicula etenim quæ singulorum operculorum fimbriam constituit, branchiarum aperturam exacte occludit. Omnibus hisce, adaucta undecumque & amplificata oris capacitate, ut illius cavitationem ingrediatur aqua, efficitur; ita ut pectoris dilatatione aerem intrare videmus Tracheam-arteriam, & pulmones, per os pariter ac nares. Eodem tempore branchiarum costæ ab invicem recedentes aperiuntur; fornix earumdem dilatatur, sterni os a palato secedens, removetur; omniaque uno nisu eo contendunt, ut maxima, quæ possit, os ingrediatur quantitas aquæ. Et sic quidem piscis perficitur inspiratio. Deinde autem os recluditur, labia prius extensa sese recipiunt, maxime superius, quod flabelli instar, (quod Galli: *evantail*, Itali: *ventola* dicunt) complicatur. Labrum vero inferius superiori adglutinatur mediante quadam pellicula, crescentis lunæ instar efformata, & velo simili ex alto in imum delabente, exitum aquæ impediens. Operculum branchiarum aperturæ sinui superjacens deprimitur. Eodem tempore costæ sese invicem stringentes coeunt, fornix earumdem contrahitur, atque os sterni ad palatum se demittit. Quæ omnia quum ad comprimendam per os ingressam aquam concurrant; ad quævis illico costarum, laminarumque intervalla delata, eadem quasi totidem stillicidia egreditur; hoc autem motu, quum & fimbria operculorum membranosa elevetur, aqua compressa hanc aperturam, effluit. Et hac ratione piscium exspiratio absolvitur. Aquam itaque in os ingredientem, peracta quasi quadam circulatione, branchias egredi patet; modo penitus huic contrario, quo in quadrupedibus aerem per eandem Tracheæ Arteriæ aperturam, & intrare videmus, & exire.

De autem de motu ad respirationem piscis faciente, sufficient. Jam
inse-

insequuturi viam sanguinis, branchias transeuntis, quam ratione ibidem præparetur, disquiramus.

Egressus scilicet ex carpionis corde sanguis, super omnes, ex quibus branchiæ constant, laminas adeo diffunditur, ut valde exigua sanguinis copia tantum, aquæ sub maxima sese exhibeat superficie, ut quævis sanguinis pars eo facilior, citiorque particulis impleri possit aereis, quæ extrema ejus inter laminas peracta divisione, ab aqua sunt separatæ. Et hujus ergo necessaria & tanta in quovis folio laminarum erat quantitas, necessarii & tot rami capillares transversales Aortæ, qui omnes laminarum superficies obtegerent.

Eadem quodammodo, & in reliquorum animalium pulmonibus leges motus reperiuntur; compositi etenim quum sint innumeris vesiculis membranosis, laminarum vices sustinentibus, & intertexti pluribus vasis minoribus; sanguis per totam pulmonum substantiam ita diffunditur, ut in maximam superficiem dispersus, aeri sese misceat. Quum vero vasorum pulmonis in vesiculis contentorum numerus multo sit inferior numero vasorum conspiciendorum in laminis: multo difficilior ex aqua recipitur, protrahiturque aer, quam quidem aer purus, qualis pulmones ingreditur vesiculares, respiratione hauritur. Considerantem interim quantam aquæ congelantis particulæ, expirationis intervallo, patiantur divisionem, faciles in hanc descendimus opinionem: quod tunc temporis vasa branchiarum capillaria aer ingrediatur. Nec minori probabilitate adserimus; quod & in aliorum animalium pulmonibus idem eveniat; etenim quum aer, quo vasa intrare possit, quadam vi instructus sit necesse est: inspirationis tempore, id est tum, quum naturaliter pulmones ingreditur, vasa hæc qui ingrediatur nequire videtur. Qui potius expiratione repulsus undecumque abire tentat; & superatis, quæ obveniunt, impedimentis omnibus, transit membranas exiles, tenuesque vasa constituentes, usque dum maxima tandem pars hujus aeris per Tracheam-Arteriam egeratur. Nisi etenim validiore poros vasorum intrantes hæc aeris particulæ, comprimunt eorundem elaterium; ingressæ autem quum sint, magna cum vehementia explosum contra sanguinis particulas hoc elaterium, particulæ sanguinis exagitata, conquassata, & undecumque inter se confricata, novum exinde motum recipiunt, pro conciliando ipsis calore, & liquiditate necessarium. Quæ quum ita se habeant in animalibus aerem respirantibus; eo potius in his, quæ aquam ducunt, ita sit, necesse est, siquidem, quem hæc capiunt, aer, longe alio modo comprimitur, ac liber iste aer, quem illa hauriunt; sicque magnum aeris particularum spatium adeo compressum, minorem supplet aeris branchiarum vasa ingredientis quantitatem.

Reliquum venarum in branchiis conspicuarum sanguis, quum debiliorem rubedinem præ se ferat, ac aortæ sanguis; hunc aliquibus aeris particulis admixtum esse, merito concludimus. Eandem & in cæteris animalibus sanguinis differentiam observare licet; sanguis nempe arteriæ pulmonari inclusus obscuri est ruboris, ille autem, quem pulmonis vena continet, debilioris, & magis perspicui. Sanguis itaque particulis aereis imprægnatus, & hinc arterialis redditus branchiarum venas ingreditur quæ extremitate sua, cranii basin respiciente stillicidium costarum egressæ, arteriarum denique consistentiam nactæ, omnibus sanguinem partibus distribuunt, quem

quem tandem venæ ad cor deportantes recipiunt. Arteria autem ex corde progrediens uno pulsu instructa adparet, quo prorsus, (perceptibili saltem) destituta sunt vasa, Aortæ officiis fungentia; tum, quia nullus horum cum corde nexus immediatus ac communicatio intercedit, tum, quia ex tubo minori in maiorem ibi defertur sanguis. Ast neutiquam necessarius ad nutriendas partes requiritur sanguinis impulsus; sufficit, quod sedato cursu easdem percurrat; nec necessarius est ad distributionem & circulationem, in iis præsertim animalibus, quorum sanguis lentior profluit, quæque hinc inde parciore sunt transpirationis, atque diutissime absque ullo nutrimento vitam protrahere possunt.

Pronissimam ex dictis elicere poteris consequentiam; quod situs quem pulmones obtinent, quod forma, qua sunt constructi, quod denique commercium intercedens inter illos cum corde, pro varia animalium specie valde inter se differant; ejus rei testem habemus Cel. *Malpighi*. Sic v.g. in piscibus, sanguis omnis ex corde egrediens, transit pulmonem; & ibi partibus aeris activis defumtis, per totum corpus distribuitur; & hætenus quidem circulationis modus in piscibus, circulationi in homine congruens est, ac similis. Quum vero unicus saltem piscibus sit ventriculus; circulationis adeo singularis causam derivamus ex eo, quod & aorta arteriæ pulmonaris fungatur vicibus, & pulmonis venæ, postquam in arterias degeneraverunt, aortæ officium peragant.

Et hætenus quidem, quantum fieri potuit coarctando observationes Cel. *Du Verney* senioris, de circulatione sanguinis in fœtu, ea tradidimus: quæ in *Schediasmate* suo: *de circulatione sanguinis, & respiratione piscium branchiis instructum*, relata leguntur, ubi pro exemplo loquitur de Carpione. Hic figere possemus pedem, ast ignoscat L. B. si nimium multi in hac re, alia quædam tam jucunda, quam gravia addamus, haurienda ex Cel. *Petit*, *Medici historia carpionis*, quam in *Actis Regiæ Academiæ Scientiarum Anni 1733. pag. 197.* sequentibus expositam legimus:

Omnes, sic laudatus Auctor, sive maria inhabitent, & fluvios, sive stagnis detineantur, & lacubus, vel pelle, vel squamis induti sunt pisces. Carpioni autem, quæ sunt, squamas, habita magnitudinis suæ ratione, reliquorum omnium squamis majores esse judicamus. Varius est color quem piscium squamæ ostendunt. Sic, & in carpione aliæ sunt: coloris fulvi, flavi aliæ, aliæ albi. In squamis maximis fulvus, in mediis flavus, seu aureus, in minimis vero albus, seu argenteus prædominatur. Interius annotatum dabimus, quod unaquæque squamarum tribus hisce gaudeat coloribus. Nunc aliquod examen instituamus squamarum, obviarum in carpionibus, qui plurimum occurrunt, his nempe qui 16. ad 18. integra sua longitudine, & si caudæ & capiti interjacens spatium ad mensuram exigere velis, 9. ad 10. digitos adtingunt.

Quo majores interim ipsi sunt carpiones: eo magis fuscæ eorundem squamæ conspiciuntur. Referente autem Cel. *Rondelet*, juniorum squamæ magis fuscum, provectorum, flavidiorem colorem profitentur. Squamarum maximas in media carpionis parte, si longitudinis rationem habeas, easdemque eo majores reperies, quo viciniore sunt capiti. Mediæ, quæ sunt magnitudinis, caudam versus, minimæ tandem sub ventre adparent, eo quidem minores, quo propinquiorem capiti situm occupant. Maxima-

rum longitudo $7\frac{1}{2}$. ad 8. latitudo 6. ad $6\frac{1}{2}$. lineas implet. Interdum latitudine & longitudine sunt eadem. Craffitie sua quintam plerumque, vel sextam lineæ partem adtingunt, & quo minores, eo magis in longum protractæ. Imo aliæ 3. lineas longitudine, & 2. latitudine, haud excedunt. Quæ quamdiu carpionem tegunt, tertiam, ad summum, suam produnt partem, eamque colore, flavo plurimum fusco, tinctam. Et hic quidem color earum substantiæ inhærere videtur; nec, nisi in illa squamæ parte, ubi maxime obscurus adparet, penitus abradi potest, nisi aliqua simul squamæ portiuncula auferatur. Adparent autem in hac parte interiore, lineæ quædam, radiorum instar, a circumferentia ductæ, & in centro communi confluentes. Pars squamæ inferior, parti huic externæ opposita argenteum præbet colorem, mediante quadam membrana tenuissima, eundem præ se ferente colorem, qui una cum membrana subtractus, (avellitur autem facillime) albedinis vestigia in hac squamæ parte relinquit. Et quamvis membranarum ope, quibus involutæ sunt, inter se squamæ cohæreant: liberam tamen sese movendi ad invicem retinent facultatem, quæ si deesset, latera versus incurvari nequiret carpio, id quod accidit, in omnibus, quoscumque ederit, motibus. Membranæ autem tendinosæ corpus integrum involventi, admodum firmiter cohærent dictæ squamarum membranæ, ac partes illius continuatæ dici merentur.

Adcuratori examini si partem carpionis externam subiicias, lineam ex parte utraque observabis fuscā, a capite ad caudam usque protensam. Colorem, (quem interdum & rubrum animadverti) conspiciendum quem præbet, fuscum, membranæ, inferiorem squamarum partem necenti acceptum debere videtur. Hæc enim in parte sua media admodum fusca reperitur. Ubi autem in ipsa squamarum substantia, & linea prædicta adparet; ibi & canaliculus adest 2. vel $2\frac{1}{2}$. lineis longus & $\frac{1}{4}$ lineæ diametri. Eiusdem diametri acum enim intrudere poteris, faciliorem tamen ex parte squamæ interna & inferiore, quam externa & superiore. Ex alto idem ille canalis ducitur in imum, seu ex imo in altum, oblique item a parte exteriori in internam; alii squamæ post aliam successive communicatus a capite usque ad caudam. Connectitur autem mediante aliquo canaliculo membranoso, squamarum singulis interjacente.

Lustratis hætenus partibus carpionis externis, nunc ad interiores pergendum esse ducimus.

Quatuor hinc constituamus ejusdem partes: caput, nimirum, pectus, abdomen, & caudam. Caput autem a rostro ad extrema usque branchiarum procurrit opercula, & horum e regione conspicuum est pectus. Nullum namque collum caput carpionis interest, & truncum. Pectus diaphragmate separatum ab abdomine, nil nisi cor in se continet & majorem renum partem. In abdomine continentur viscera propria; cauda tandem, quæ tota est musculosa, ab ano incipit.

Abdomen communi omnium consensu cavitatem corporis adpellamus illam, quæ a diaphragmate ad anum usque continuatur. Jam, qua ratione in homine efformatum sit abdomen, qua ratione in quadrupedibus, anatomix cultor nullus facile erit, qui nesciat; at quanam in carpione effictum sit, nemo est, quantum ego quidem sciam, qui disquisiverit. Cavitatem ergo sui abdominis compositam videbis ex dorsi vertebra, & muscu-
lis,

lis, qui magno discrimine distinguuntur a musculis, hominum & quadrupedum in corporibus obviis; spinis denique aliquibus, costarum in formam effictis. Harum 16. numerantur utrinque; singulae autem ex singulis vertebrae egredientes, a Diaphragmate, ad anum usque, ubi terminatur abdomen, in conum exeundo, producuntur. Abdominis sui pars interior peritonæo, ut in reliquis animalibus, tecta conspicitur.

Imo & in ano, cui *Umbilici* nomen piscatores imponunt, seu fundamento, quædam singularia occurrunt. Et quidem pars ejus extra prominens haud una saltem absolvitur apertura, qua intestinorum excrementa eiiciuntur; sed & alia duo complectitur foramina, quorum alterum transeundis inservit foemellæ ovis, & spermatis maris; alterum permeandæ ex vesica sufficit urinæ; tres hi ductus omnes in hac regione terminantur. Primus itaque non est nisi extremitas *recti*, seu anus proprie sic dictus, latitudine sua, qua reliquos binos superat, $2\frac{1}{2}$. explet lineas; at dilatatus quinque interdum, imo sex lineas attingit. Secundus est extremitas binarum capsularum ova involventium, quæ in unum canalem coeunt, cujus extremitas non nisi 1. ad $1\frac{1}{2}$. lineæ, pro carpionis magnitudine, lata reperitur. Quæ quum admodum dilatari queat, *vulvæ* nomine haud immerito insignitur. In masculis multo strictior adparens, non est nisi binarum, lac involventium membranarum extremitas. Est enim lactis exitus, canalis quidam hoc loco conspicuus, cujus diameter lineam mensura unam attingit. Tertius denique ductus ostium est vesicæ, dimidiæ, seu $\frac{1}{2}$ lineæ latum. Ex omnibus his aperturis nulla nisi tertia quodammodo dici mereatur rotunda, reliquæ compressæ sibi invicem superjacent, membrana tamen, vix $\frac{1}{4}$ lineæ crassa, separantur. Omnia hæc constituunt partem illam anteriorem, cui *Podicis* nomen imposuit Cel. *Rondelet*; quæque in carpionibus lac habentibus figuram quodammodo triangularem exhibet, magis quidem quam in his, qui ovis gaudent. Quatuor, vel quinque linearum hujus partis est diameter. Quam quum in carpione vivo acū pingeremus nullo licet motu edito, dimidio coarctabatur.

Gutturis in fundo originem accipit stomachus, seu ventriculus, qui per medium Diaphragmatis centrum transiens, figura sua intestinum sex digitorum, & aliquot linearum longum representans; juxta abdominis longitudinem productus; ex diaphragmatis latere 4. ad 5., decrescente vero sensim diametro, 3. ad 4. linearum in extremitate anum versus sita, primum intestinum efformaturus, ibidem complicatur. Undecumque autem ab intestinis & hepate circumvolutus stomachus, 1. vel $1\frac{1}{2}$. digito ab illa regione, ubi primum intestinum efficturus denuo complicatur, ibi, inquam ex hisce involucris egreditur; hæc igitur complicatio ano proxima est, nulla tamen huic valvula, nullus pylorus, ut & in lucio & in aliis observaveram. Nec aliquod observare licuit discrimen stomachum inter, & intestinum primum, in hac prima plicatura, duobus ab ano digitis, exoriens; imo ipsum stomachum hanc plicaturam efformare diceres. Pars ejus interior plurimis striis ad longum ductis distinguitur; & quum nullam aliam reperire possim partem, quæ stomachi fungatur officio, huic stomachi nomen eo lubentior tribuo. Duabus a diaphragmate lineis, situs est ductus choledocus, qui in parte stomachi interna, ubi orificium ejus conspicitur, mamillam aliqualem efformat. Primum, de quo diximus, intesti-

num $3\frac{1}{2}$. digitorum longum, & 3. linearum diametro Diaphragma versus adscendit. Secundum, prioris plicatura efformatum, 3. præterea digitorum longum, $2\frac{1}{2}$. linearum diametro ex summo descendit in anum. Tertium denique ex imo adscendit in altum, duarum linearum diametrum, & 4. ad 5. digitorum longitudinem profitetur, comprehensa scilicet hac sua parte a dextera ad sinistram, diaphragma versus inflexa, qua, una cum intestini quarti portione aliqua, quemdam quasi angulum hepatis partem complectentem effingit. Quartum 2. habet diametro lineas, 4. autem ad $4\frac{1}{2}$. digitos longitudine, si medium, quem cum intestino præcedente constituit, addere velis anulum; ac anum versus descendit. Quod 2. linearum diametri, & 4. digitorum longitudinis est intestinum quintum, diaphragma versus ascendens, uno, & dimidio digito a diaphragmate inflexum, sequens efformat intestinum. Sextum vero omnium longissimum; 6. longitudine sua digitos, & $1\frac{1}{2}$. 2. imo 3. nonnunquam, vel 4. lineas diametro explet; in ani regione terminatur, ex parte aliis intestinis, & hepati obvolvitur; in illis tandem carpionibus, qui lacte sunt instructi, quoad maximam partem stillicidio quodam lac transeunte, inhæret. Quæ autem mesenterio destituta conspiciuntur hæc intestina, partibus hepatis inter se junguntur hisce, interstitia circumvolutorum intestinorum interjacentibus, iisdemque cohærentibus.

In varias cæterum hepar dividitur partes, quasi per totidem appendices crassitie mediæ. Partes igitur hepatis intestinis cohærentes relicta inter se sua spatia explent, aliæ contra superato suo intestino ad replendum aliud interstitium progrediuntur. Omnia interim hepatis, & intestinorum ligamenta quemdam efformant cumulum, cumulis, seu ovorum, seu lactis, levissime adhærentem. Intestinorum cumulum sua hepar longitudine exæquat, imo prope ad diaphragma, (ibi enim incipit) & quandam latitudinem exæquat. Imo quidam, ast valde exiguus, hepatis lobus conspicitur, alicui interdum canali diaphragmatis insitus. Dictus interim canalus magnæ vesiculæ aeræ tubo superjacet. Deinde autem sensim latitudine sua decrescens hepar, cuspide, in quam exit, coni admodum irregularis formam repræsentant, ex hujus coni extremitate autem per 15. vel 18. linearum longitudinem ad anum usque producitur *Rectum*. Carnis musculo-sæ rubori similem habet hepar colorem, in quibusdam vero, qui lacte gaudent, carpionibus, coloris est debilioris, & parcioris crassitie, in tota sua extensione.

In aliis rursus, qui lacte gaudebant, coloris haud ita debilis, & multo tenuius, ast appendices ejus & intestina tales reperi, quales in carpionibus ovorum plenis. Situm una cum intestinis medium tenet inter utramque pulpam lacteam. Et dimidiam fere aeris vesiculam majorem obtegit, cum qua non nisi levissime cohæret, imo magnæ ibidem est extensionis. Ex lateribus suis ovorum cumulis tegitur, atque ope membranarum tenuissimarum, æque illis adhæret ac Peritonæo.

Mediæ præter ea hepatis parti præcipuæ, per totam longitudinem superioris stomachi partis intrusa conspicitur fellis vesicula. Huic & stomacho intermedium videbis stratum aliquod hepatis 1. lineæ altum. Hac igitur in regione, mediantibus plurimis vasis sanguineis & biliariis, in canale cystico desinentibus, necitur fellis vesicula. Vasorum unum, & præ reliquis

liquis eminentius conspexi, quod 2. lineis a vesicula, cystico canali nectitur, nec immerito nomine: *Canalis Hepatici* denotatur, imo $\frac{1}{2}$ lineam fere diametro suo explet; interdum 2. reperi. Nec non tres alios canales biliares in uno ejusdem canalis puncto reunitos conspexi, ex latere opposito lateri huic, in quo præcedens inferebatur. Cysticus interim canal, & Choledocus unum effingunt, continuumque, ejusdem diametri, $1\frac{1}{2}$. scilicet lineæ, canalem; cujus longitudo tres aliquoties pertingit lineas. Duabus a diaphragmatis egressu lineis, parti stomachi superiori inseritur, inseritur autem oblique. Membranas interea nequaquam transit canal, sed parum modo deflectere videtur ab illis. Et quamvis acum quam subtilis esset, mamillæ, in parte stomachi interna efformatæ, intrudere nequirem; vel levissima tamen vesiculæ compressione, bilem exeuntem conspexi; quum vero evacuatam vesiculam, per exiguam quæ in mamilla est, aperturam, inflarem, aere ingresso, turgescerent eandem vidi. Carpionis, qui 18. erat tota longitudine, digitorum, vesicula fellis, 15. longitudine, 6. autem ad 7. diametro lineas exæquabat; carpionis autem alii, 14. digitorum longi, unius digiti longitudinem & 6. linearum diametrum profitebatur. Bilem continebant viridem, & fluidam, in alio autem carpione bilem solidioris paululum, quam butyri consistentiæ, granis item conspersam, & subviridem observare licuit.

Lien autem qui 5. , vel sex a diaphragmate lineis, stomachi principio nexus conspicitur, intestinorum cumulo, & magnæ aeris vesiculæ ex parte sinistra interjacentem situm tenet; ac 3. vel quatuor pro longitudine digitos habet. Pars ejus principalior, quæ inter partem stomachi superiorem adparet & hepar, dimidium latitudine digitum, & 2. crassitie lineas excedendo, modo has, modo illas, admodum tamen varias semper dimensiones præbendo; colorem proficitur rubrum, cruori similem.

Duos ex utraque abdominis parte cumulos constituunt carpionis ova, a Diaphragmate ad anum extensa, ex parte item utraque intestinis, & hepate efformatum cumulum tegentia, hunc inter cumulum & aeris vesiculam sese protendunt, & eam utrinque, a media aeris vesicula magna, ad anum usque, contegunt. Membrana insuper reteguntur tenuissima, & pellucida, capsulam effingente, ova, quibus levissime adhæret, involventem. Hanc capsulam si inflaveris, facilis ab ovis separata, turgescet. Binæ tandem capsulæ coeunt in unum canalem, in parte ani posteriore exeuntem. Levissime interea & peritonæo, & cumulo hepatis ac intestinorum prædicta cohæret capsula. Verum ova, quæ continet, adhæsiōe inter se juncta, & quasi rotunda, dimidiam, seu $\frac{3}{4}$ lineæ pro diametro habent. Examinatorum quanta ovorum carpioni insit copia, accuratissimæ bilancis ope 71. ad 72. ova, unius grani pondus exæquare quum comperissem, binorum pondus cumulorum 8. unciarum, & 2. drachmarum, seu 3752. granorum esse reperi, quæ si multiplicabis cum numero ovorum quovis grano contentorum, 72. quantitate ovorum hoc carpione contentorum habebis; 342144. Longitudo ejus integra 18. erat digitorum. Alius cujusdam, 16. digitorum longi, cumuli bini 7. unciarum, 2. drachmarum, & 42. granorum pondere, 303552. ova; & denuo alius, 14. digitorum longi, cumuli 6. unciarum, 4. drachmarum, & 42. granorum pondere 262224.

ova saltem complecti dijudicavi. Ejusdem vero singulorum ova, mihi quidem, videbantur magnitudinis.

Quo majores autem ipsi sunt carpiones, eo pluribus illos instructos esse ovis, ex dictis adparet. Numerum tamen eorundem ad quædam centena usque adcurate determinandi sagacitate quis quæso valere potest? Sic *Cel. Leuwenhoeck* 211629. tantum carpionibus, quadruplo autem majorem a fello adsignat ovorum quantitatem; alio autem in loco 9344000. in a fello numerans, annum agentis piscis ova magnitudine adtingere docet ova piscis, qui 25. complevit annos. Cæterum ova naturali suo colore gaudentia, quæ sunt flavida, quum ebullire jussissem, alba reperi, frigefacta vero flavum alia, alia aurantium induerunt colorem.

Lac vero, Gallice; *laite*, seu *lantance* dictum, illa in carpione obvia pars appellatur, quam bina componunt corpora candida, valde irregularia, quæ non sunt, nisi testiculi, destillando spermati destinati; longitudinem tantum non præ se ferunt eandem, quam profitetur abdomen. Cæterum pars dextera longior sinistra aliquoties conspicitur, etenim diaphragmati proxima incipit; & partibus suis intestinorum cumulum, vesicam aeris, & vesicam urinæ contegit. Ambas interdum in diaphragmate exortas, ad anum usque continuatas reperi, ibidem vero in quemdam exeuntes canalem, qui vesicam inter & rectum constitutus erat, omnia tandem membrana involvebantur tenuissima. Lac interim per transversum dissectum, si digitis paullulum comprimam, materia quædam albida, & spissa prodibit, jusculo in vesiculis contento haud dissimilis. Quemvis vero testiculum, seu corpus albidum duæ constituunt partes, quarum prima originem prope diaphragma ducens, ipsum testiculi est corpus, unita, lævaque superficie conspicuum; alteram vero ejus partem vesiculæ seminales ano viciniore componunt. Tota interim pars prima, quam *testiculi corpus* nominare visum fuit, variis constat lobis, magnitudine æque ac figura inter se diversissimis, quos pro continuata testiculi parte præcipua tuo jure habebis; interim mediante membrana, cui omne involutum est, nexi sibi invicem cohærent lobi omnes. Per totam insuper testiculi cujusvis longitudinem, aliquod conspicitur interstitiolum, in hoc autem quidam quasi canalis, materiam continens albidam, quæ non nisi ipsum est sperma. Secundæ autem lactis parti, quum ostio suo jungatur hicce canalis, *canalis deferentis* nomine veniat. Partem denique, de qua dixi, secundam, *vesiculam* adpellare liceat *seminalem*, quæ quidem vesiculis minutis, ac inter se distinctis, efformata videtur. Quam porro, & in carpione, variisque aliis piscibus aere plenam reperimus vesiculam; dicimus *vesiculam aeream*, dicunt alii: *vesiculam pneumaticam*, *urriculum* item *natatorium*. Pisces etenim, prout vel majore, vel minore aeris quantitate turget vesicula prædicta, eo vel faciliori, vel difficiliori negotio in superficiem aquæ sese elevare videntur. Situm renes inter & ova, seu lacteam pulpam medium obtinet. Cæterum a diaphragmate ad vesicam urinæ usque extensa, leviter eundem omnibus, quas tangit partibus, mediantibus fibris necitur & vasis; firmissima autem basi adhæret officuli, quod mitrale dicimus, siquidem mitræ partem anteriorem sua repræsentat figura. Ast duæ sunt, quibus illa componitur, vesiculæ, & prior quidem, maxima, ac diaphragmati proxima, ovum insuper sua forma effingens, 3. circiter digitorum longitudine,

18. vero, & 20. linearum, ubi maxima est, diametro, gaudet. Altera, præcedente minor quidem, est 2. vel 3. lineis longitudine illam superando, 12. saltem linearum, vel maximus est ejus diameter. Vesicularum ejus unaquæque duabus instructa est membranis, externa altera, altera interna, binæ autem, & duplices quidem diversæ directionis fibræ gaudent. Binarum denique vesicularum nexum, atque communicationem, canaliculus constituit valvula carens.

Adeo autem singulari modo renes piscium squamis tectorum constructi videntur, ut ipse *Rondelet*, qui piscibus squamosis & cartilaginosis & renes denegaverit, & vesicam, illis autem qui respiratione pollent, saltem ut tribuerit, induceretur. Alii sunt, qui has in piscibus partes detexere; est nemo, quantum ego quidem sciam, carpionum renes aliqua pertractavit descriptione.

Colorem autem præ se ferunt rubro fuscum, substantiæ sunt mollis, & cruori similis. Pectoris maximam occupantes partem, juxta totum pro longitudine sua abdomen ad vesicam usque producuntur. Quæ vero pectori inest magnitudine sua observanda venit pars renum, quippe quæ integrum fere diaphragma obtegit, maximam vero cordis partem circumdat. Binæ interim illæ, quibus componitur partes, in hac regione coeunt, superantes denique os mitrale, ubi statim abbreviantur, foramen intrant, 3. circiter linearum longum, unius vero, & dimidiæ latum, id quod tertia spinæ vertebra cum osse mitrali unita, effingit. Exinde autem abdomen ingressæ, sensimque dilatatæ in media ejus cavitate binæ efformant, (ex quovis latere unum,) corpora, valde irregularis figuræ, & hæc partes renum præcipuas quasi constituunt. Quod binas aeris vesiculas interest spatium explendo, figuram nanciscuntur fere triangularem; renes interea sensim decrecentes, inter ambas urethras ad vesicam usque procurrunt. Urina tandem immediate ex substantia renum in urethras transit mediantibus vasis excretoriis ibidem sese egerentibus.

Quam interim capsula quædam oblonga, & conglobata constituit, urinæ vesicam; quæque, aere immisso, cucurbitæ obversæ, ostio strictiore instructæ, pro similitudine sua respondet; quæ tandem 10. ad 11. longitudine, 3. item lineas explet diametro, unica saltem, sed tenuissima constare videtur membrana. Urethra autem hæc vesica, quum careat omni, os illius, si de carpionibus ovis gaudentibus quæris, proximum videbis ori *Recti*, in posteriore; parte in illis vero, qui lacte sunt instructi, extrinsecus os adparebit nullum, est in canali, quem vesiculæ seminales communem habent, reperietur.

Et hæc quidem, quæ ex *Cel. Petit* historia carpionis hausimus, si *Cel. Du Verney* observationibus jungantur, sufficientia judicamus pro subministranda carpionis idea completa.

Cæterum sequutus *Rondeletium* *Cel. Willoughby* addit: quod nonnulli carpionum trium interdum cubitorum longitudinem excrecendo attingant. Linguae autem, qua destituti sunt, locum tenet pro organo gustus, palatum carnosum adeo, ut summæ cum lingua similitudinis ergo, a doctis pariter ac indoctis, vera credatur & adpelletur lingua. Ventrem ejus ovis semper plenum reperies, etenim quinquies sexiesve per annum, teste *Aristotele*, eadem deponit, lentius tamen crescendo suam magnitudinem ad-

tingunt. Positorum vero a foemella ovorum, si fidem adhibeamus piscatoribus, hæc saltem masculus conservat, quæ in cumulum coacervata reperit, reliqua pereunt omnia. Loca etenim, quibus ova sua conferat, vadosa, quærentem carpionem foemellam, 13. interdum ad 14. sequuntur masculi. Natando ista sua emittit ova, insequentes vero masculi suo eadem spermati conspergunt. Magnam igitur eorum partem perire vides. Qui huc referri posset gravior *Rondeletii* error, quod nempe, & absque prævio coitu ex semetipsis nascantur aliquando carpiones, haud dignus est, copiosius qui refutetur. Præparando interim Caviari rubro inservire docet *Cel. Belon* ova carpionis; & hoc quidem Judæorum, qui & Sturione abstinent, & pisce quocumque squamis carente, usui destinatum esse. Primus in Angliam centum ab hinc annis deportasse carpiones sese gloriatur *Leonardus Marscall*, in libro suo de piscatione, hodie ibidem frequentissimos. Quum vero ova sua emittunt, & hoc quidem Majo, & Augusto fieri solet, tunc plerorumque piscium instar, adipe suo destituti, nil habent, quo adlicere possint palatum. Aprilis spatio æstimandi veniunt. Nec 20. librarum pondus maximi ex illis superant.

Carpionem igitur habes, piscem aqua dulci commorantem, & notissimum omnibus, fluvios item, lacus, stagna, & paludes inhabitantem, numquam vero (quod tamen *Plinius* adferit) mari detentum; & ubique copiosissimum. Nutrimento ipsi venit: frumentum, herbæ, coenum, & lutum. Annorum, quos aliquando attingit numerum, magnum sane, hi loquuntur eximiæ magnitudinis carpiones, quos in vivariis passim adservatos reperimus. Sic *Gesnerus* acceptum ex teste fide dignissimo refert: quod in fossa, arcem quandam munitam Palatinati circumdante, carpiones centesimum annum agentes, inveniantur. Et referente *D. Samuele Ledelio* in *Ephem. Germ.* aliqui insunt quibusdam Lusatiae vivariis carpiones, qui longitudine binos, latitudine dimidium cubitum excrecentes, ducentos, imo trecentos annos explevisse dicuntur.

Carpiones, secundum *Derham*, per longum tempus in aere, & extra aquam, vitam producere posse, ille clare satis loquitur modus; quo & Batavi & Angli, pro conciliando ipsis majori adipe, uti plerumque solent. Reticulo nempe inditum carpionem ita, ut caput ejus saltem promineat, in cella, seu alia quodam loco, dummodo transeunte aere refrigeretur, suspendent, muscum humidum substernunt, & panem triticeum lacte maceratum pro nutrimento præbent. Et hoc quidem de respiratione piscium exemplum singulare, gratum tibi *L. B.* acceptumque fore speramus; quum prodeat a viro & fide dignissimo, & adeo conspicuo, ut, si indicare possemus, quod reticendum est ejus nomen, pro extirpando penitus dubio omni, illud protulisse sufficeret.

Carpiones mares lacte, foemellas autem ovis instructos esse quis, quæso, est, qui nesciat? at & hermaphroditas reperire inter illos, hoc est quod a plurimis ignorari censemus. Magnitudinis vero & coloris varietate inter se distinguuntur. Sic, qui in quibusdam fluviis captantur; externa licet sua figura reliquis sint simillimi, pinguiori tamen carne, duriori, delicatiori, & salmonum instar, rubicunda, (cujus ergo *carpiones* dicuntur *salmonici*) reliquos antecellunt. Et quamvis carpionibus in fluvio captis longe postponantur illi, quos stagna præbere solent; sunt tamen quædam stagna

stagna ob carpionum suorum præstantiam conspicua. Sic, quod prope Bononiam in Picardia, stagnum Camiers appellatum & juxta mare situm est, multos, magnos, optimosque carpiones, quorum præcipui 24. ad 30. libris, monetæ Gallicæ, venum veniunt, continere celebratur.

Carpionibus autem præ primis destinata esse videntur stagna, & hi quidem pisces inter omnes illi sunt, quibus, pro spatii, & fundiratione tota explenda judicamus. Nutrimiento etenim abundante eximiam nanciscitur longitudinem, & prodeuntibus annis solidioris, delicatiorisque carnis evadit; tertius quem agit annus, unius pedis longitudinem, si spatium capiti, & caudæ interjacens consideres, ipsi conciliare solet. Optimus autem, dubio procul, jejunii quadragesimalis tempore est habendus. Cæterum quem cum carpione nonnulli confundere solent Cyprinum latum, vel bremam, piscem, carpioni quidem simillimum, ast diversum esse scito. Hinc usui venisse censeo, quod *Bremes*, bræmæ dicantur carpiones steriles, (Gallice: *Carpes brebaignes*) ovis pariter, ac lacte carentes, adipe cæterum multo instructi, & saporis exquisitissimi, carpionibus denique hermaphroditis longe frequentiores. Observatu dignam rem addit, quæ huc pertinet, *Boeclerus*: progerminante scilicet frumento, & in primis, arinca ex Lotharingia in Alsatiam seu Argentoratum transportari nequeunt carpiones; etenim juxta agros hoc frumento confitos procedendo omnes emoriuntur. Sit facti fides penes auctorem. In Aureliæ regionibus saltem instituto sæpius experimento eodem numquam illè respondit effectus.

Græcum vero, & Latinum carpionis nomen: *Cyprinus*, quod Cypridis, seu Veneris amicum denotat, fecunditatis suæ ergo, nobis quidem, ille accepisse videtur; ast ex sententia *Lepidoti*, majorum, quæ ipsi sunt, squamarum causa; Venetiis *Rana*, dicitur seu *Reina*, quasi piscium regina; in aliis Italiæ partibus: *Carpano*, *Carpione*, vel *Carpena*; quam vero *Carpione* nuncupat *Rondeletius* piscem, a carpione nostro diversissimum esse scito. Romæ cyprinus adpellatur: *Burbura*, Græci pariter, ac Turcæ dicunt: *Sa-san*, Aetoliam inhabitantes: *Kiprinos*; Hispani: *Carpa*; Germani: *Karpse*, *Carper*, *Carperen*; Belgi: *Carpel*, *Kerper*; Batavi: *Corper*; Poloni: *Karp*; Angli tandem & Sueci: *Carp*. Hinc, ut acutioris ingenii quidam jam ante nos observaverat, haud particulari aliqua illuminatus revelatione *Ménagius*, quem ad eruendam etymologiam inspiratum perhibet Cel. *Balzac*, nomen cyprini Gallicum: *Carpe*, ex Latino: *Carpa*, quod in *Cassiodoro* legimus, derivavit. Consistentes equidem nos habet vir acutissimus, nos interim etymologiam, quæ simplex est, & naturalis, hujus ergo haud inferiorem, & reiiciendam esse censemus. Cyprinus minor: *Carpeau* dicitur, *Carpillon*, *Carpette*.

Magna autem olei & salis volatilis quantitate abundat carpio. Præoptandi veniunt reliquis, illi, qui multo adipe, & carne instructi, in fluviis commorantur. Hos inter optimi sunt, quos Ligeris, Araris, & in primis Sequana alunt, puriori profluens alveo, & rapidiori. Cæterum concoctu facillimus carpio satis multum probi nutrimenti suppeditat. Sunt, qui carnem ejus viscidis ac crassioribus succis abundantem esse volunt; ast usui ejus tam communi nullos effectuum sinistrorum respondere videmus. Omnibus potius, cujuscumque sint corporis temperaturæ, eum convenire censemus, nisi his saltem, qui podagra infestantur; hujus namque accessus re-

fuscitare compertum habemus . Pulpam ejus lacteam , & palato optimam esse novimus, & multis tabe laborantibus sanitatem redidisse, & hinc infirmitate detentis, pro carne eandem, qui commendamus, nulli hæremus . Ova denique illius, quamvis & hisce suum maneat pretium , nec saporis gratia , nec qualitate salubri longe adtingunt pulpam lacteam . Reliquis ejus partibus merito anteferatur caput, & hoc quidem palati ergo, vulgo *lingua dicti Carpionis* , hoc enim præstantissimi est saporis . Nec valde recentes, nec admodum provectiores ætate appetendi sunt . Ultimo memorati namque immensæ magnitudinis ergo licet habeantur in pretio, carne attamen gaudent dura, coriacea, & saluti infestissima .

Os tandem petrosum , quod in suprema palati parte reperimus latum , depressum, triangulare, & albidum, ut & bini calculi, formæ ovalis , tenentes superiorem oculis situm; hæc, inquam , mirifice faciunt ad provocandam urinam, ad depellendam saburram, ad constringendam , quæ cita erat, alvum; ad absorbendos humores acidos , & acres , imo contra epilepsiam . Pro dosi accipiantur, in pulverem quum fuerint redacta, ℞. usque ad ℥ss. Et Cel. *Ludovicus* fel carpionum pro specifico habet, linimenti instar adhibitum contra erysipelata ; dummodo , nimis si sit liquidum , condensetur; si nimis spissum & acre , cum aliqua portione aquæ spermatis ranarum, seu florum sambuci diluatur . Imo & virtutis suæ temperantis, & minoris acrimoniæ ergo , contra oculorum morbos commendatur ; quum scilicet tunicas , maculasque in oculis suborientes detergere velis , seu præpedire; exortas namque, & penitus jamjam efformatas adhibito propellas animalis cujusdam terrestris felle, quippe quod acrius, magis volatile , & penetrantius judicandum, quam quidem fel piscium .

Jam Tinæ descriptionem adgrediamur .

Tinca, Offic. Schrod. 334. Dal. Pharm. 406. Rondel. *de Pisc.* 157. Bellon. *de Aquat.* 324. Gesn. *de Aquat.* 984. Aldrov. *de Pisc.* 645. Jonst. *de Pisc.* 114. Charlet. *de Pisc.* 43. Merr. Pinn. 190. Salv. *de Aquat.* 90. Schon. Ichth. 76. Schvenckf. *de Pisc. Sil.* 448. *Tinca omnium fere auctorum* , Willughby Ichth. 257. Raii Synop. *Pisc.* 117. *Cyprinus mucosus totus nigrescens , extremitate caudæ æquali* . Arted. Gen. 27. *Cyprinus pinna ani officulis undecim, cauda integra* Linn. Faun. Suec. 321. *Phycis vel Merula fluviatilis seu lacustris; Tinca, Tinha, Tenca sive Tencha vulgaris* . Quorumd. Gallice : *Tenche* , seu *Tanche* .

Jam si Cel. *Artedi* pro duce habeamus , caput tinæ deprehendemus & rostrum, corporis lati, crassi, ac brevissimi respectu, valde exiguum; oris aperturam hujus fere magnitudinis, ut eidem explendæ medius respondeat digitus; maxillas dentibus carentes, ast quinque ex quovis gutturis latere dentes ; branchiarum opercula quatuor utrinque laminis , ac tribus spinis reflexis, composita; lineam videbimus corporis lateralem , curvam , & ac in reliquis ejusdem generis piscibus, ventri viciniorem; nec non oculis superiora quædam in capite foramina , seu ductus exiguos, ex quavis parte unum, lineam quasi efformantia ; oculis inferiores item duas adhuc foraminum lineas, seu ordines, quarum altera branchiarum operculis vicinum, altera inferiorem, mandibulæ scilicet inferiori proximum , situm obtinet ; oculorum exiguorum & ex utroque capitis latere conspicuorum , iridem , rubro colore gaudentem . Porro foramina operculorum, quæ branchias te-

gunt,

gunt', angustiora observantur ac in reliquis hujus generis piscibus; nec non quatuor utrinque branchias, & harum quidem singulæ duplici gaudent ordine nodorum, pectinis instar efformatorum, & quantum tribus inhaerent branchiis interioribus, utrinque finillimorum; qui vero in ultima branchiarum reperiuntur nodi interiores, fere æquales sunt inter se, exteriores autem in parte superiore interioribus longiores, in parte inferiore, breviores; omnes denique, quotcumque sint, admodum molles. Dorsum tincae, ultra caput elevatum, est crassum, neutiquam acie aliqua videbis instructum; ventrem ubivis planum, atque latissimum; squamas præter ea oblongas, reliquorum ejusdem generis piscium respectu, exiguas; fortiter pisci adhærentes, nigras in dorso, in lateribus nigridas fulvo, seu viridiflavido colore mixtas; in ventre albidas ita tamen, ut totum ejus corpus aliqua tinctum videatur nigredine; has interim squamas quum viscoso quodam muco extus adveniente videas obductas, rationem habes in promptu, cujus ergo anguillæ lubricitatem tinca imitetur. Quem porro, & pinnae ejus profitentur colorem, & cauda, vel niger est, vel nigridus, vel cinereus obscurus. Quas pectoris pinnas dicimus, nigridas esse videmus, rotundas, & ex xvii. radiis compositas; horum sextus circiter longior reliquis, primus autem fortis conspicitur, ac robustus, reliqui omnes bifidi, ultimi tandem admodum parvi. Ventris itidem pinnae nigridæ, in fine rotundæ, & ex undecim radiis conflatae videntur, quorum primus minimus, secundus crassus, atque fortis, reliqui omnes cuspidem sunt admodum bifida. Quæ tandem dorsi est pinna unica, nigra adparet, & duodecim conflatur radiis, quorum primus brevissimus, secundus aliquantum longior, (adtingit enim reliquorum partem mediam,) tertius magnitudine reliquis, forma autem simplici duobus primis similis; reliqui tandem omnes in cuspidem exeunt bifidam. Ani denique pinnam, quæ nigra est, undecim constituunt radii, & horum quidem primus, minimus; secundus haud ita exiguus, tertius longus, & duorum præcedentium instar simplex, reliqui vero in cuspidem exeunt bifidam, quartus, & quintus longissimi deteguntur; caudam habet nigridam, nec bifidam, sed quadratam potius, xviii. insuper radiis, quorum numerum difficillimo inire poteris negotio, compositam. Hepar ejus longum, quodque juxta stomachum, atque intestinum situm est, in varios lobos dividitur; nec in stomacho ejus longo, ac prægrandi, nec in illius intestinis quidquam, nisi succum, seu chylum aliquem viscosum reperire valui. Intestinum semel pyloro, atque diaphragmati circumvolutum, recta deinde ad anum usque producit. Lien ejus oblongus, ac rubro-nigridus, figuram, quam exhibet angularem, ex parte sinistra situm suum obtinet. Vesica tandem aerea magna, filo quasi media constringitur, & parti ejus inferiori, statim ubi incipit, illius canalus inferitur. Peritonæum ejus albidum, & in argenteum vergentis est coloris. Tota interim sua longitudine 9. digitos, ac 3. lineas explet. Figura ejus exterior truttam quodammodo imitatur salmonicam. Nascitur in lacubus, stagnis, & paludibus. Imo in utrovis sui oris angulo aliquam appendicem, seu barbæ speciem jam *Hyppolitus Salvienus* observaverat.

Antiquioribus interim illis, qui *Ausonii* tempora antecessere, ignota prorsus tinca fuisse videtur, ex mente Cel. *VVilloughby*. Ubivis fere quædam ex earum classe reperies, quæ 5. habent, vel 6. librarum pondus, imo,

imo, ut refert *Salvienus*, 20. interdum libras suo pondere explent. Pellis, qua induta conspiciuntur, inter delicias a gulosis refertur. Palatum ejus multa, ut carpionis, carne gaudet, in imo autem officulum aliquod triangulare detegimus. Fellis item vesiculam æque, ac urinariam, ita ut reliqui pisces fere omnes, efformatam habet. Facilis vero tinca distinguitur sexus, siquidem, quæ masculo sunt ventris pinnae, & multo majores, & instructæ adparent radio primo magno, forti, deorsum reflexo, & striis per transversum ductis, conspicuo. Sic & illa, ex quibus pinnae istæ egrediuntur, ossa, in masculo quidem, magna, crassioraque branchias fere pertingunt; haud ita vero in foemella. Aquas peramare tincam paludosas, atque stagnantes, & his dilectari, qui lentiori alveo vehuntur, fluviis, testis est *Cel. Rondelet*. Ex lacubus autem, & stagnis, sic *Salvienus*, quovis tempore frequentes quum capiantur, illas, quas in Tiberi inveniunt, aliisque fluminibus, ex lacu quodam forsan vicino eo fuisse delatos, cum *Salvi*no & nos censemus. Lucius interim tinca habetur amicus, qui quidem sua, si quæ habet vulnera, tinca mucositati affricando, sanare studet. Cujus ergo omnium piscium medicus dici solet a nonnullis tinca. Vermiculis vero terrestribus avidiores inhiare tincas, si nempe pro esca adhibeantur; imo quæ illarum maximæ sunt, scarabæis, quos *Maii* dicunt, unctis, allici posse frequentiores nostra nos sæpius experientia edocuit. Teste tandem *Cel. Schevenkfeldt* ova emittere solet verno tempore, ac æstivo, quo in spicas abire frumentum solet. Brevi autem justam excrescit in longitudinem; quo etenim nutritur, coeno, & luto, plena sunt, quæ inhabitare loca solet.

Tenacissimæ interim vitæ tincam esse observavit *Cel. Lemery*, quam in frustra dissectam, & semielixam hinc inde se movere videmus. Nec non *Cel. Liger*, in libro suo cui titulus est: *nova domus rustica*, tincam absque ullo detrimento transportari posse vehendo, adserit. Notissimum denique est apud omnes, quod quæ copiosior multiplicari solet tinca, stagni cui inest fundum adeo deperditum reddere solet, ut, quod quingentis carpionibus pinguefaciendis sufficit, spatium, vix par sit nutriendis centum tincis. Hinc, ex communi omnium consilio, nec stagnis immittenda judicatur; quamvis haud ita infrequens in iisdem reperiatur, præsertim quum per plurium annorum decursus stagna non fuerint exsiccata. Pro lucii tandem præda, & alburnus inservit, &, parcior tamen tinca, quam lucii vocant amicam.

Regiæ Scientiarum Academiæ examini, sic in ejusdem *Academici historia de anno 1710*. relatum legimus, Vir *Cel. Geoffroy junior* teniam subjecit, quam in tinca pinguiori, & sanissima invenerat. Et hæc quidem teniæ, quam in hominum corpore aliquando deprehendimus simillima erat, diversa saltem in eo, quod nullis interstincta conspiceretur annulis. Rugæ tantum adparebant ad longitudinem ejus productæ, quarum præcipua a capite procurrens usque ad caudam, totum ejus corpus in duas partes æquales dividebat $2\frac{1}{2}$. pedes integra, sua explebat longitudine. Cæterum, sic pergit auctor, in piscibus tenias unquam esse repertas, ignoramus.

Nomen, quod gerit Gallicum: *Tenche* seu *Tanche*, ex Latino: *Tinca* vel *Tincha*, hoc autem ex: *Tincta* derivandum esse videtur, siquidem colore conspicitur ab aliis piscibus diversissimo, & viridi-flavido, seu nigrido,

do, tincto. Itali illam dicunt, & Hispani: *Tenca*, seu *Tinca*, Germani: *Schley* five *Schleyen*, Belgi & Saxoniae habitatores: *Schomaker*; Dani: *Sydere*; Sueci: *Linnare*, *Sutare*, *Skomakare*; Angli denique *Tench*. Nec Græci interim scriptores neque Romani, ullam tincae mentionem iniicere, quippe qui de piscibus tractaturi saltem præstantioribus, inter ignobiliores retulere tincam; quam *plebis solatium* seu *nutrimentum* dicit *Ausonius*.

Multo interim tinca abundat oleo, multo sale volatili, multo tandem phlegmate. Præoptanda inter reliquas venit illa, quæ tenera carne gaudet, pinguiori, & probe nutrita. Pro diversitate autem illius, quæ alitur, aquæ, vel magis, minusve grati erit saporis. Et hujus quidem ergo habetur in delitiis. Nutrimentum præbet haud adeo parcum, ast sanitati obnoxium; succus etenim, quo abundat, viscosior crassiorque & ventris producit constipationem, & alimentum febri præbet. Plurimi hinc medicorum usu illius, qui prorsus abstinenceamus, jubent; non enim, nisi aromatum & condimentorum copia, saluti redditur minus infesta. Brevibus, nullis, nisi his, qui temperamenti sunt biliosi, stomachique robusti, parcissimum ejus usum concedendum esse judicamus.

Quos tandem in capite illius deprehendimus calculos binos, quum absorbentium, detergentium, & diureticorum instar adhibeantur in Medicina; ad domandum acidum in primis viis prædominans, ad reprimendum alvi profluvium, ad corroborandum stomachum, ad urinam ciendam, ad depellendam denique renum ac vesicæ glaream & saburram, dosi gr. xij. ad ℥ij. commendare solent.

Quod ad exteriorem tincae adtinet usum, vel frustatim dissecta, vel juxta longitudinem suam divisa, manuum carpis, seu pedum plantæ adplicari solet ad sedandum febris ardorem, & ad retrahendos, qui cerebrum opplent, humores malignos; nec non dolores capitis acutiores. Imo ad depellendos arthritidis cruciatus, articulationibus dicta adplicetur ratione. Insignior contra icterum tincae est usus; regioni scilicet hepatis, & umbilici si successive adplicetur tinca vivens, & relinquatur ibidem, usque dum emoriatur; & flavidam reperies illam turgidamque ex ea parte, quæ corpori fuerat admota. Quamvis cæterum huic remedio exoptatus haud semper respondeat, ut quidam perhibent, effectus; respondet attamen nonnunquam, & nisi in pejus abeat ægrotantis status, tuto semper adhibeatur. Teste tandem *Schrodero*, tinca, præsertim pellis ejusdem redacta in cinerem, & intus recepta contra fluorem album in mulieribus sua sese utilitate commendat. Aurium denique morbos, felle ejusdem si tincta aliqua gossypii portio iisdem immittatur, depelli dicunt, atque sanari.

L U C I U S.

Lucius. Offic. Schrod. 129. Dal. Pharm. 406. Rondel. de Pisc. 188. Bellon. de Aquat. 297. Gesn. de Aquat. 500. Salv. de Aquat. 90. Charl. de Pisc. 42. Merr. Pin. 190. Aldrov. de Pisc. 630. Jonst. de Pisc. 109. Schon. Ichth. 44. Marsigl. Danub. 63. Schvvenckfeld. de Pisc. Sil. 434. Lemer. 517. *Lucius Rondeletii, Belloni & aliorum*, Willubghb. Ichth. 236. Raii Syn. Pisc. 112. *Esox rostro plagioplateo* Arted. Gen. 14. Syn. 26. Spec. 53. Linn. Faun. Suec. 304. *Esox Plinii*; *Lupus fluviatilis*; seu *Tyrannus aquarum*. Nonnull.

Lon-

Longum pariter ac singulari ratione efformatum, ait Cel. *Artesius*, est caput lucii; quippe cujus pars anterior ab oculis ad rostri extremitatem, transversim plana, posterior autem, illa longior, ab oculis usque ad os ex lateribus depressa conspicitur. Corpus ejus oblongum quadrati figuram quodammodo refert; etenim ad capite usque ad pinnam, quæ in extremitate dorsi, caudam versus conspicitur, dorsum est planum & rectum, costæ item cum ventre a branchiis usque ad anum fere planæ. Maxilla ejus inferior ultra superiorem prominet. Ore instructus est magno, ad oculos usque diffisso, naribusque magnis, hiantibus, & duplici utrinque apertura perforatis, immediate ante oculos sitis, ac magno inter se spatio distantibus. Oculi ex quavis capitis parte dispositi & plani, iridem jam flavidam, jam albo, flavo & nigro mixtam, jam viridem; pupillam vero figura ovalem, colore cœruleam exhibent. Duodecim capitis foramina autem ita sunt disposita, ut 6. oculis posteriorem, 2. iisdem intermedium, 2. naribus interjacentem, 2. denique hisce anteriorem situm in ipso rostro obtineant. In utroque præter ea inferioris maxillæ margine 13. fere alia foraminula, collo proxima obveniunt. Branchiarum membranam 14. utrinque constituunt spinæ. Unicus tantum ordo dentium in maxilla inferiore, eorumque anteriores minimi, posteriores vero robusti ac majores, omnes tandem alternatim fixi sunt & mobiles. Nec in lateribus marginis maxillæ superioris ullum reperies dentem; ast rostrum, utrinque uno dentium minimorum ordine cingitur. Trium, qui palato sunt, dentium ordinum, ad longitudinem ejus procurrentium & inter se parallelorum medius, denticulis acutis, bini reliqui autem magnis, intus reflexis, & præcedentium instar mobilibus dentibus constant. Lingua ejus in extremitate bifida, ut & partes linguam excipientes denticulis consistæ sunt. Quidquod ipsum gutturis fundum tendentia officula similibus obteguntur denticulis; bina scilicet officulorum eaque oblonga inferius sita sunt prope ad minimam branchiarum, superius autem quatuor officula denticulis instructa conspiciuntur. Lateralis linea corporis recta producit. Squamæ rotundæ sunt atque oblongæ. Dorsum nigrigo tingitur colore; pinnae dorsales, anus & cauda fulvo flavido, & nigris maculis interstincto; ventris tandem pinnae & pectoris eodem, albo scilicet, in flavum seu fulvum vergente. Nec nisi unica adest pinna dorsi, eaque in extremitate ejus, caudam versus constituta, ani pinnae opposita & ex 21. spinis composita, quarum tres priores cum ultima minimæ, mediæ autem majores sunt & longiores, sex primæ simplices, reliquæ omnes cum ultima autem bifidæ, omnes tandem in origine duplices, & ex duobus officulis arctissime coherentibus compositæ sunt. Pectoris pinnae oblongæ 15. absolvuntur officulis, ultimis exiguis, medium locum occupantibus vero longioribus; primo & extremo simplicibus, reliquis in fine bisulcis, omnibus in origine duplicibus. Undecim numerabis radios, qui ventris pinnas componunt, quorum ultimi minimi, medii longiores, primus tandem fortissimus, & ultimi instar cuspide gaudet simplici, reliqui omnes bisulca, seu trifulca. Ani pinnas 18. constituunt spinæ, tres priores cum tribus ultimis minimæ sunt, quinta vero, sexta, septima, octava, & nona longissimæ; quinque priores, ut ultima, simplices, reliquæ cuspide sua, vel bifidæ, vel trifidæ, omnes in originis loco, duplices. Caudam porro bisulcam 19. longiores componunt spinæ, qua-

quarum ambæ extremæ simplices, intermediæ omnes bifidæ, penultima tandem, utrinque cum media, cuspide saltem bifidula, instructa adparet. Ex caudæ lateribus insuper quasdam, & adhuc deteges, ast ægre numerabis, nec interest, spinas breves, & exiguas. Quatuor præter ea ex quovis latere conspiciuntur branchiæ, quarum partem concavam frequentioribus aculeis, dentium instar effictis, videre licet consitam. Cordi oblongo, quadrato, & basi plana, (quintam constituyente superficiem) instructo, aorta adhæret ventriculo oblongo gaudens, & candido. Auricula autem basin versus illud ingreditur. Hepar, quod simplex est, atque oblongum, planum deinde, & ad medium protenditur abdomen, læve tandem, & omni carens utrinque prominentia, situm est ex parte sinistra. Fellis vesicula inferius, partemque hepatis superiorem versus sita est. Stomachus deinde angustus & longus ad medium usque abdomen descendit, ibi autem Pylorus absque ulla appendice incipit; huic intestinum adhæret statim ad Diaphragma adscendens, deinde autem recta descendens ad anum. Bina in fœmellis adsunt ovaria, ex utroque latere vesiculæ aeris unum, eaque per totum abdomen extensa; in masculis autem duæ vesiculæ spermaticæ, situm tenentes eundem. Pyloro vicinus est lien, triangularis & tantum non æquilateralis, coloris rubri-obscuri. Aeris vesicula simplex, oblonga, solida & per totum abdomen extensa dorso equidem adhæret, facillima opera tamen separari potest atque avelli. Ductus seu canalis aereus, ex parte superiore stomachi orificium intrat. Renes sanguinolenti ad longitudinem spinæ dorsalis producuntur. In inferiore abdominis parte vesicam urinariam oblongam videbis; peritonæum splendens est & candidum. Vertebrarum 61. numerabis in Lucio, & costas utrinque 39. Carne insuper gaudet candida, duriuscula, saporis grata, nec saluti obnoxia. Pro nutrimento ejus (est enim voracissimus) præter alosas minores, omnis fere generis pisces ipsi veniunt, imo lucii minores, serpentes, glires aquatici & aves; quidquod scorpionem marinum aliquando in lucii stomacho me reperiisse memini.

Eximiam sæpius, sic *VVillughby*, magnitudinem excrecendo attingit lucius, imo vel 32. libras suo pondere explet. Rostrum præ se fert, anseris instar, longum, corpus totum vero maculis conspersum flavidis; magis virides sunt juniores. Lumini dum admovetur, aureo colore splendente dorsum ejus & latera fulgescere videbis. Frequentissima exhibet puncta nitentia candida in ventre, & maculas fulvas rubris lineis interstinctas in cauda & præsertim angulos versus. Oculi ejus orbitis profundiores inhaerent, quam piscium reliquorum, ita ut, si pollicem alteri, alteri autem indicem immiseris, commode ac tuto arripi possit lucius & retineri. Intestina ejus multo adipe obvolvuntur, & stomachus plurimis interne rugis obductus est. Pro adfirmanda eximia fœcunditate lucii sufficiat, me ipsum in quodam mediæ magnitudinis lucio, fœmella, 148000. ova numerasse. Martio & Aprile, mensibus, sua ova eiicit, quo quidem tempore, teste *Leonardo Baltner*, ut Argentorati capiatur, per leges non licet. Stagnis plerumque immoratur, piscinis ac fluviis; & apud Anglos frequentissimus, ast referente *Amato Lusitano*, nullus omnino in Hispania reperitur. Nec piscibus marinis adnumerandus venit, ne quidem ostiis fluminum adeo frequens inest, quæ si forsan fuga delatus vel aquarum impetu propulsus in-

traverit, omnem & carnem & adipem ibi amittit. Piscatores sunt qui referunt, quod lucius fere omnis, statim ex quo captus fuerit, quidquid, & in primis quod luciorum aliorum in stomacho habet, omne, evomat. Acrioris gulæ ergo, qua piscibus inhiat, vomitu interdum stomachum exonerare solet; imo si alium piscem, longitudine suametipsum longitudinem fere exæquantem deglutierit (deglutit autem caput primum) altera parte piscis prominente adhuc ex gula, alteram jam concoquit; qua sensim sensimque concocta, prominentem adtrahit. Sic *Cel. Rondelet* ex teste fide dignissimo acceptum refert: quod dum iter faciens, mulum suum aquatum duceret in Rhodanum, lucius flumine latens dentibus ex maxilla inferiore corripuerit mulum, qui & timore perculsus, & dolore excruciatu aufugit, iteratis tandem vicibus caput terræ adfricando & quatiendo lucium vivum in terram projecit. Lucium carni inhiare constat, etenim vel feles & catulos in flumina projectos devorat. Imo sæpius vel binas aviculas, vel gallinam aquaticam in stomacho ejus deteximus. Nec tamen, ut quidam volunt, bufonibus vescitur; huic enim nostrametipsum experientia refragatur. Ranam scilicet, filo adnexam in piscinam luciorum projecit, & statim deglutitam vidi, imo vix adhibita vi omni ex stomacho ejus retrahere potui. Rana substitui bufonem, quem gulosissime quidem lucius deglutiit, at statim exinde evomit. Deficiente autem nutrimento alio vix sui generis aliis parcat lucius. Percas interim, & in primis majores securas degere dicunt in medio luciorum agmine, ob aculeos, quibus muniuntur. Meis autem oculis, sic *Albertus M.*, sæpius observavi lucium, qui percam captam, diutissime ore detinuit, tandem vero crebris dentium ictibus enecatam deglutiit. Facillime insuper procedit luciorum multiplicatio, etenim si fides est piscatoribus, vel ova ejus devorata ab ardea arbori piscinæ proximæ insidente, si una cum excrementis ardeæ, piscinam intraverint, statim abeunt in lucios viventes. Fœmella tamen sua ova ejectura locum sibi quærit, ab hoc quo degere solebat, remotissimum, ne a maribus ova devorentur; hi enim, aliorum piscium more, ova emissuram fœmellam insequuntur, & missis recentibus ovis avidissimi inhiant. Cæterum quæ de aliis quibusdam piscibus refert *Encelius*, quos lucios recentes exclusos branchiis excipere atque fovere, lucios item omnes, pisces illos beneficos, tamquam gratitudine motos, intactos relinquere, hæc omnia ne ad probabilitatem quidem accedere videntur. Eadem judicamus & de hac aliorum opinione, qua ex spermate luciorum anguillas enasci perhibent, ideo, quia anguillulæ interdum reperiuntur ibi, ubi ova sua reposituere lucii. *Ausonii* temporibus viliori in pretio habebantur, hodie autem vel inter præstantissimos pisces fluviatiles tenent locum. Lucius enim pinguis & carne abundans vel 20. solidis Gallis coemitur, minor autem vix 3. ad 4. obolis. Ex teste oculato accepta sequentia refert *Gesnerus*: Anglorum piscatores pro commonstranda luciorum pinguedine eorum ventrem ad profunditatem 2. digitorum dissecant, eosque ut vendant, si nulla occasio tulerit, vulnere confuto tincarum piscinæ immittunt, quarum mucositati viscidæ adfricti lucii obducta cicatrice, cito penitusque ex vulnere suo sanantur. Consentiunt *Paulus Jovius*, *Rondelet* atque *Cardanus*. Nostro autem usui venit, ut lucii arcis ligneis ubicumque perforatis & probe occlusis immissi, porrecto nutrimento saginentur. Cantabrigiæ præsertim plu-

plures ejusmodi arcas catenis ripæ nexas & flumini supernatantes vidimus.

Callidi nomen jure tribuatur lucio. Hunc enim immobilem adverso flumine sese continere, ac simulac ranam sive pisciculum observaverit, rapidissimum ferri videbis in suam prædam. Cujus ergo ab his, qui cibi præparandi curam gerunt in aula, teste *Belonio*: *lanceron* dicitur; *lancia* enim, seu jaculi instar, in prædam irruit. Imo tam acer est in persequutione piscium, ut vel extra aquam interdum elatus, in cymbas, si quæ adsunt, profiliat. Lupus, sive tyrannus aquarum dici solet, crudelitatis suæ ergo & gulæ. Quidquid reperierit, avidissime devorat, imo maris castaneas, quas tribulos dicunt, durissimas atque aculeatas in stomacho ejus deteximus. Longissimam vero vivit vitam, teste lucio illo, quem stagno immitti jusserat *Fridericus II.* Imperator, adnexo annulo æreo, cui inscripta legebantur hæc: *me primum suis ipse manibus stagno huic immisit Fridericus II. Germanorum Imperator, quinto Octobris die*; hunc ipsum igitur elapsis 262. annis, eodem adhuc annulo instructum & viventem reperire. Quod si interim luciis parvis, haleces magnitudine vel exæquantibus vel nondum adtingentibus implere velles piscinam, elapso biennio vix seni ex centenis supererunt, alius enim devorat alium. Coitus tempore tantum, Martio nempe, & Julio mensibus, bella inter illos silent, insidiæ componuntur, succedente inter illos amore mutuo, in alios tamen continuato bello rapaci. Sumtus interim domini exigit lucius, & suo ipsius valore majori pretio comparatur, attamen piscinis detinetur. Ast cautione maxima opus est, etenim omnia carpionis ova devorabit, si præsens fuerit, dum emitantur. Hinc etiam passim moris esse audimus, quod piscinæ piscibus implendæ nullum unquam lucium minorem iniiciant. Ubique locorum satis magna est eorum copia.

Dentes lucii, teste *Scaligero* cum maxilla continui, ex hac sua conformatione fortitudinem ac robur recipiunt eximiam. Ipsemet ego, sic ille pergit, lucium minorem quemdam in stomacho majoris reperi. Nec saltem tincæ adfrictus sua vulnera sanat, sufficit pro sanandis hisce mucus ille viscidus, ac digitis adhærens, quo corpus obducitur, hic ipsi medicamentum evadit. Ventre gaudet dolii instar, convexo atque amplissimo; & *Cel. Jonston* in ventre lucii ab alio lucio deglutiti, glirem reperit aquaticum. Pro varietate annorum, atque quibus degunt, locorum, varii & coloris & magnitudinis sunt lucii; 2. ad 3. cubitos longitudine aliquoties explent. *Schwenckfeldio* teste, & tincæ prorsus nigræ & lucii penitus candidi reperiuntur. Præter ea merlanos inter & carpiones æque ac lucios invenies hermaphroditos; quosdam aliquando & monoculos. Sunt, qui varias capitis ejus spinas, passionis nostri Salvatoris instrumenta, e. g. crucem, lanceam, uncus, reliqua, effingere censent.

Legimus in *Ephem. Germ. Dec. III. Anni 2. pag. 196. seqq.* Dissertationem circa *Dissectionem Epileptici*, cui *Scholion* aliquod subnectens *D. Johannes Jacobus VVepfer*, lucios majores ex Danubii scaturigine captos (aqua ibidem admodum lutosa est,) dissecurisse refert, variasque in iisdem Tenias, plerumque hirudinum instar intestinis, cui *Ileen*, & illi cui nomen est *Jejunum*, fortiter inhæsisse. Rostra earumdem, seu capita, vix acum globulos magnitudine superantia, profundius conspiciebantur infixæ intestinorum nervosæ. Collum eorum duos, tresve digitos longitudine quod

habebat, pro gracilitate duplex haud superabat filum. Eadem semper, & latitudine, & crassitie a colli principio procurrebant ad extremitatem; nec ab excrementis, sed succo animalis nutriente suum alimentum sumere videbantur.

Antiquiores autem Græci nullam lucii mentionem fecere, & suo *Gefnerus* censent jure, ac *Rondeletius*, quod voce Latina: *Lucius*, primus fuerit usus *Ausonius*. Nec tamen ex Græco: *Lucos*, *lupum* denotante, sed a *lucendo* derivanda venit; etenim & oculi ejus viridi aureo colore sunt similes, & exsiccatus Phosphori instar nocturno tempore lucet. Italice: *Luccio* audit, seu *Luzzo*; Germanice: *Hecht*, Belgice: *Snoock*, Anglice: *Pike*, cujus diminutivum est *Pickerell*; Danice: *Gedde*; Suevice: *Giadda*; Græce: *Luczo*. Turcæ illum dicunt: *Turna*, seu *Turnes*; Burdigalenses: *Lucz*; Andegavenfes, & Moeni accolæ: *Bechet*, vel *Becquet*, rostri quod habet longioris ergo; per totam fere Galliam nuncupatur: *Brochet*, siquidem corporis longi, atque rotundi figura, veru, Gallice: *broche*, dictum, sic censet *Scaliger*, effingit. *Menagius* vero *brochet*, ex *brochetto*, quod *brochi* diminutivum est, deducendum esse ducit, designat autem brochus illum, qui ore est protenso, labio crasso, dentibusque profilientibus. Alii sunt qui lucium minorem *lanceron* dicunt, seu *lançon*; illum, qui mediæ est magnitudinis: *Brochet*, vel *Poignard*; illum denique, qui oculum inter, & caudæ exordium 18. ultra digitos excrescit: *Brochet Carreau*.

Multo autem lucius abundat oleo, & sale volatili, at parum phlegmatis continet. Saporis exquisitissimi illum reperies, qui major, adipem multo instructus, carne insuper duriori, & albida, captus est in fluminibus; hic enim anteferendus venit illi, qui stagnis inest, aquisque cœnosis. Sunt, qui perhibere, quod concoctu difficilior, stomachum exoneret, nec nisi improbum succum præbeat; his tamen de illo, qui stagnis inhærens coeno vivit & luto, sermonem fuisse censemus; hic enim, quem captamus in fluviis nullius sinistri effectus causa unquam evadit, sed omnibus convenit, cujuscumque vel ætatis sint, vel temperaturæ; exceptos tamen volumus infirmos, siquidem carnem ejus duriusculam, qui concoquat validus ac robustus sit stomachus necesse est. Quovis præter ea tempore, hyberno præfertim, bonum dijudicamus, quem, & *Paulus Jovius*, & *Ausonius*, plebis saltem palato gratum pronuntiavere. Fortasse gratioris in Gallia, quam in Italia est saporis, pro terræ etenim diversitate, diversi saporis esse scimus, quæ uniuscujusque est animalis, carnem. Hepar ejusdem inter delicias mensæ reponitur, at ova ejusdem nullius sunt pretii, etenim & nauseam movent, & alvum cient, nonnunquam violentius; hinc plebi interdum pro purgante inservire solent.

Ars vero medica, adipem, cum felle, mandibulum insuper, & ossicula in capite ejus obvia, in suos vertere solet usus. Maxilla lucii inferior quum virtute gaudeat absorbente, alkalina, & detergente, pro specifico contra pleuritim adhiberi solet, & anginam. Etenim ex Cel. *Etmuller* sententia, alkalina sua virtute, & diaphoretica acidum illud absorbere valet coagulatum, quod effervescentiæ causa morbis recensitis evadere solet. Nobis interim nimium debile medium esse videtur, quam ut tantis mederi possit infirmitatibus, nec in Gallia adeo frequens contra pleuritim ejus est usus, quam apud Germanos. Lucii mandibula in porphyrite contrita

dosi gr. xij. ad ʒss. , additis aliquot ʒ. aquæ papaveris rubri vel florum sambuci, adhiberi solet. Nec non in calculo renum atque vesicæ, in fluoribus mulierum albidis, & partu difficili sua se virtute commendat. Ejusdem maxillæ calcinata cinis, extrinsecus adplicatus, ulcera inveterata mundare solet, & detergere hemorrhoides. Adipem lucii pro resolvente habent ac leniente, & si vel infantum catarrhos fugare velis, vel tussim vehementiorem sedare, vel conciliare somnum, pectus eorum prædicto ungas adipe, seu pedum plantas. Contra morbos frigidos, in quibus aliqua bilis segnities adest vel inertia, contra febrim intermittentem, 7. ad 8. ejus guttæ sub initium paroxysmi accipiendæ præscribuntur. Destillatione tandem aqua redit contra morbos oculorum optima, majori attamen virtute ad depellendas oculorum maculas & unguiculas ipsum fel esse instructum constat. Quo interim si uti velis, ut vehementiorem ejus activitatem moderes, aqua spermatis ranarum primo illud diluas, necesse est. Contra aurium tinnitus aliquam gossypii portionem hoc felle irrigatam, iisdem immittere solent. Ad accelerandum denique partum, ad purificandum sanguinem, ad provocanda mulierum menstrua, ad excitandam urinam, ad profligandos renum & vesicæ calculos, imo contra Epilepsiam utilissimi habentur, quos in capite lucii videmus, calculi seu officula. Pro dosi ʒj. ad ʒij. cum liquore quodam conveniente accipiantur.

Maxilla lucii tandem Pulverem Anti-pleuriticum Officinæ Batefianæ ingreditur.

Rx. Officulor. ex capite lucii ʒij.

Sanguin. hiruin. p.

Florum sulphuris ana ʒj.

M. f. pulvis diaphoreticus, cujus ʒj. ad ʒss. pro dosi, in ʒiij. aq. still. cardui benedict. Pleuritide detento ad ciendum sudorem exhibentur. Vel

Rx. Aq. papav. erratic. ʒiij.

Off. ex maxill. lucii in pulv. red. ʒj.

Sal. volat. ex cornu cerv. gr. x.

Laudani gr. jss.

Syrupi papav. errat. ʒiij.

M. D. in iij. partes æquales.

P E R C A.

Perca, Offic. Schrod. 331. Dal. Pharm. 408. Lemer. 666. Rondel. de Pisc. 196. Merr. Pinn. 190. Perca fluviatilis, Bellon. de Aquat. 295. Gesn. de Aquat. 698. Salv. de Aquat. 296. Perca fluviatilis major. Aldrov. de Pisc. 622. Perca major. Charlet. de Pisc. 41. Jonst. de Pisc. 107. Schonev. Ichth. 55. Schwenkfeld. de Pisc. Siles. 440. Perca fluviatilis Rondeletii, Bellonii, Gesnerii & aliorum, Villughb. Ichth. 291. Raii Syn. Pisc. 97. Perca lineis utrinque sex transversis nigris, pinnis ventralibus rubris. Arted. Gen. 39. Syn. 66. Spec. 74. Perca pinnis dorsalibus distinctis, secunda radiis sedecim, Linn. Faun. Suec. 284. Perca fluvialis vulgarior; Percecus, sive Persicinus; Perdix aquarum. Nonnull.

Perca, teste Artedio, 7. digitis & 5. lineis longa, dorso gaudet ultra caput elato, & aliquantulum acuminato; ventre toto plano, & a capite

ad caudam depressò; capite ex lateribus plano; maxillis, si longitudinem respicias, fere æqualibus, occluso etenim ore, maxilla superior parum ultra inferiorem prominere videtur; oris apertura tandem amplissima. Plures denticulos utriusque maxillæ ossi maxillari adhærentes, in palato autem tres observabis denticulorum hispidorum ordines, quorum medius triangularis & minimus, duo laterales vero oblongi sunt. Præter ea 4. in gutture ejus adsunt officula, dentibus minimis obducta, quorum bina inferiora superioribus minora sunt ac quasi inter se cohærentia. Lingua ejus lævis infra fere rescissa videtur & libera. Nares præter ea magnæ, oculis quam rostro magis vicinæ, & duplici utrinque apertura satis longe inter se distante instructæ sunt; valvula enim exigua obtegatur apertura anterior. Quaterni ex utroque capitis latere adsunt ductus, deducendo forsan & separando muco cuidam destinati. Oculorum iridem obscuro-flavus, seu flavo & nigrido mixtus color distinguit; pupillas vero ovales, viridis. Branchiarum opercula utrinque 2. seu 4. laminis osseis, 7. præter ea spinis, depressis, recurvatis, mediante membrana junctis, & inter se cohærentibus constant, quarum superior omnium maxima est; lamina superior fimbriam ubique dentatam ostendit, inferior autem in apophysin cuspidatam exit; exiguis insuper squamis obtectæ sunt laminæ prædictæ. Utriusque lateris claviculi, 4. ossiculis componuntur, & situ suo pectoris pinnas superant, primum vero tertiumque ex ossiculis margine parum dentato muniuntur, 4. itidem ex utroque latere branchias observamus, duplici serie instructas tuberculorum, illorumque in 3. branchiis inferioribus fere inter se similium, nisi quod exteriores aliquantulum majores videantur; ast in branchiarum superiore sive maxima, nodi interiores triplo imo quadruplo majores sunt exterioribus, acuti & ossei, superiusque siti; nodi tandem minimæ inter branchias, vix oculos incurrunt præ parvitate. Nec nudum est per hæc pectus, ut Physici alii sinistre docent, sed squamis minimis obtectum. Corporis linea lateralis, curva, dorso proxima, ex latere dorsi flexa, musculorum interstitia situ suo admodum superans & recta, dorso & ventri intermedium occupat locum. Sex etiam lineas transversales ac nigridas numerabis ex lateribus, quarum minima est illa, quæ caudæ proximum obtinet situm. Squamæ magnitudinis sunt mediæ, durissimæ, arctissime adhærentes, albidæ plerumque in ventre, in lateribus flavidæ, vel cinereæ vel albidæ, antè rectæ detentæ & læves, postè vero atque ex lateribus semicirculares, ac margine spinulis posticis reflexis fimbriato instructæ; quo fit, si retrogrediente manu anteriorem partem petieris, ut ruditatis & asperitatis signa, ictuum dolores, percipias. Altera insuper ac prior pinnarum dorsi 14. raro 15. ex radiis aculeatis, constat, ultimo eorum minimo, & in fine membranæ hujus pinnae macula maxima adest nigra, reliqua pars membranæ griseo-cœruleum sive obscurum præ se gerit colorem. Altera pinnarum dorsi, illaque postèrior ex 16. radiis componitur, quorum primus & secundus, ultimus item, penultimus atque antepenultimus exigui & acuminati, reliqui omnes longiores & bisulca extremitate instructi, tenuissima insuper membrana inter se juncti sunt. Ventris pinnae ruberrimæ senis constant radiis, primo nimirum simplice & acuto, reliquis in extremitate bisulcis, ac vel in 6. ad 8. ramos, ubi oriuntur robustissimos, exeuntibus. Nec perpendiculariter adtollit

nequi-

nequirent, nisi spinarum ultima, membranæ auxilio, ventri cohæreret: Pinnam ani, rubro-obscuram 11. plerumque 12. radii efformant, eorumque primus & secundus acuti, subsequentes in cuspide bifidi, ultimi minimi, tertius vero & quartus longissimi sunt. Cauda parum bifida, & in extremitatibus rubicunda, 17. longis constat radiis, quorum utrinque ultimus simplicem, medii autem valde bisulcam cuspidem exhibent. Ovarium fœmellæ longum, simplex & cylindricum, totam fere abdominis cavitationem adimplet; ast vesicula maris spermatica duplex est, sive binis partibus infra inter se junctis composita. Hepar rubro-pallidum in duos dividitur lobos, quorum sinister dextro major est. Peritonæum est argentei coloris, & stomachus amplissimus ac satis bene ab intestinis distinctus, sub Pyloro etiam 3. appendicibus magnis vermiformibus instructus; intestinum non nisi semel reflexum & adipe involutum, nec non lienem oblongum & rubrum habet sibi nexum; vesica aeris magna simplex, & dorso ad totam abdominis longitudinem adhærens. Utrunque autem 19. costas, naturali suo motu a vertebrae abeuntes, & 41. vertebrae in universum numerabis.

Percae fluviatilis longitudo, sic Cel. *Villughby*, jam 9. digitis, jam pede integro, jam 15. digitis absolvitur, & referente *Gesnero*, nonnunquam cubitum integrum pertingit. Lineam corporis lateralem dorso propinquiorem habet, quam reliqui fere omnes, & squamæ ejus citiores arescunt quam fluviatilium reliquorum. Gulosior etiam lumbricis inhiat, & hamis, quibus capitur, jam lumbricos, jam gobios, jam varios, pisces varii coloris ergo quem gerunt, sic dictos, jam ranas minores, hamis, inquam, pro esca necere solent piscatores. Nec tamen nisi temperato anni æstu capitur, nec hamum adpetit, nisi provectiore jam verno tempore, dum nulla amplius pruina noctis extimescenda superfit. Judice interim palato meo, nulla cedit saporis excellentia percae maritimæ, quantacumque adversus me exponant *Rondelet* atque *Gesnerus*, & suo jure *Ausonius* deliciarum mensæ nomen ipsi tribuisse censeo. *Lonicero* teste, masculus tantum pinnis instructus est rubris; reclamitat experientia nostra; forsitan veromaris pinnae fortiolem, & debiliolem fœmellæ ruborem exhibent. Percae ovarium, ait *Swammerdam*, matricis & cornuum ejus locum tenet, & bene disquisitis pulpis percae lacteis, easdem vesiculis simillimas judicabis, deficientibus testiculis ac prostaticis. Frequentiores interim lacus & flumina Angliæ inhabitant, nec vitam piscinis atque vivariis circumscriptam vivere renuunt.

Nec non in Suecia frequentiolem esse percam, eamque lacubus & fluviis inhærare, imo in stagnis *Fahluniensibus* sæpius percas, spina arcuata & dorso gibboso distinctas reperiri, docet *Linnaeus*.

Cæterum eadem alacritate, qua lucius, natando incedit; spinis præter ea munitur acutis atque acuminatis, & ictum ab his profectum, sanatio difficilis ac periculum excipit. His igitur tamquam armis, vel se ipsa majores & fortiores pisces, si qui illam aggredi tentaverint, fauciat, abigit. Accedit lucius; erigit aculeos perca, lucius adpropinquare non audet; percas at tamen minores & peramat & devorat lucius: siquidem pinnae harum exiguae ac molles nil habent, quod gulam suam lædere possit. Teste *Schwenckfeldio* perca est ichthyophaga, etenim non solum pisciculos alios, sed vel

suae speciei alios devorat. Sunt, qui censent, quod piscinæ nimis angustæ immissa, dorso aculeos, ut præ ira facere solet, erigendo, reliquis omnibus vulnera, & tandem mortem inferat. Ova sua Martio & Aprile, mensibus, eiicit. Nec unquam perca fluviatilis mare, numquam flumen intrat maritima. Haud adeo profundas & rapidiore alveo latas peramat aquas. Errat *Gesnerus*, dum percis carere censet Rhenum, vel illo Germanorum proverbio, teste: *perca Rhenana præ cæteris sana*. Percas vero minores anguillarum atque truttarum prædæ ac cibo venire docet idem ille Vir Cel., & expresso placito in Helvetia sancito, anguillas non nisi lumbricis vel percis, hamo pro esca nexis, posse captari. Auctore tandem *Schwenckfeldio*, quamvis angustissimo ore instructa est perca, vel cancos fluviaticos adgreditur, quorum vel integros in ventre illius repertos esse constat. Verno tempore & autumnali sua ova emittit, profundis voraginibus dentata; per fila inter se cohærentia, tamquam ranarum ova conspiciuntur, & vel inter arundinem sæpius a piscatoribus colliguntur.

Gallicum ejus nomen: *Perche*, a Latino: *Perca*, hoc autem ex Græco: *Perkè*, seu *Perkis* derivandum est. Huic vero originem dedisse censemus vocabulum: *percos*, niger, & perca tandem adtributum ideo, quia maculis nigridis conspersa est. Italis audit: *Persega*, *Persego*, *Persico*, Germanis: *Persich*, *Beersing*, *Beersisch*, *Peerke*, vel *Bars*; Batavis: *Baers* seu *Baars*, Saxonibus: *Barse*; Anglis: *Pearch*, Danis: *Aborn*, Suecis: *Aborre* seu *Aborn*. Vulgo perca minor; *perchette* dicitur.

Binæ sunt species percarum fluviatilium, altera major, minor altera, utraque palato optima. Cæteris præoptanda venit perca illa, quæ ætatis mediæ, carne & adipe abundans, & carne duriuscula quidem sed tenera, & ex aqua limpida & pura fuerit capta. Perca igitur copiosior nutrit, facilis est digestu, & succum præbet optimum. Ova ejus in craticula assata satis probo cibo veniunt. Multo abundat oleo & sale volatili, omnibus, cujuscumque vel ætatis fuerint vel temperamenti convenit; ast senescens carnem duram ac coriaceam, & salutis infestam induit qualitatem.

Ars Medica tandem nihil ex perca, præter ossicula in capite ejus circa originem spinæ dorsalis obvia, & in Pharmacopeiis: *lapides percarum* dicta, in suos usus convertit. His eadem virtus inest, quam in aliis pulveribus, ex conchis sive testis piscium proficiscentibus reperiunt, absorbendi scilicet, aperiendi, & calculum dissolvendi renesque expurgandi. In porphyrite reducuntur in pulverem subtilissimum, cujus gr. xij. ad ℥ij. pro dosi, cum aliquot ʒ. aquæ Saxifragæ seu Sonci præscribunt. Admischentur etiam opiatibus absorbentibus, ad emendanda primarum viarum acida, & ad tollendam colicam ex illis exortam. Medicorum alii lapides hosce, maxillis lucci substituendo contra Pleuritidem adhibent, nos tamen de virtute illarum dubitamus.

Exterior eorum usus is est, quod dentifricia quædam pro dentibus dealbandis ingrediantur, & ulceribus desiccandis inspergantur.

S A L M O.

SAlmonis sub nomine generico, novem ad decem variorum piscium species ab *Arredio* & *Linneo* enumeratas reperimus; quum vero plurium
ex

ex illis nullus sit usus in Medicina, nos de salmone vulgari tantum & trutta fluviatili agamus.

Salmo. Offic. Rondel. *de Pisc.* 167. Gesn. *de Aquat.* 824. Salv. *de Aquat.* 100. Jonst. *de Pisc.* 106. Charlet. Onom. 150. Raii Synop. *Pisc.* 63. *Salmo vel Sulmo*; Bellon. *de Aquat.* 177. *Salmo vulgaris*. Aldrov. *de Pisc.* 483. *Salmo nobilis*. Schon. Ichth. 64. *Salmo omnium auctorum*. Willughb. Ichth. 189. *Salmo rostrum ultra inferiorem maxillam saepe prominente*. Arted. Gen. 11. Syn. 22. Spec. 48. Linn. Faun. Suec. 306. *Anchorago, Eriox, vel Erox*. Quorumd.

Flumina pariter ac maria, *Artedio* teste, inhabitat salmo, qui capite gaudet acuto, corporis respectu exiguo, & ore clauso quodammodo conico. Oris apertura amplissima est, quo occluso rostrum ultra maxillam inferiorem prominet. Nares autem binis foraminibus, oculis quam rostro vicinioribus perforantur. Oculi rotundi ac ex lateribus capitis conspicui, iridem argenteam subviridi mixtam, pupillam vero nigridam, & posterius rotundam, anteriùs autem in angulum subacutum definentem exhibent. Branchiarum opercula argentea, 2. vel 4. utrinque laminis osseis, 12. insuper officulis parum latis, reflexis, & mediante membrana cum laminis coherentibus constant; & maculis, forma sua irregularibus, interstita conspiciuntur. Linea corporis lateralis rectissima dorso propior est quam ventri, quam supra ut infra variae maculae nigrae, irregulares, & rarius dispersae adparent. Squamae non nisi mediae magnitudinis & tigillatim dispositae sunt, maximae & nigridae ventrem, reliquum corpus tegunt argenteae; dorsum convexum atque venter depressus est. Quod ad dentes salmonis adtinet 1. in ora utriusque maxillae ordinem unicum invenies dentium acutorum, his autem intersitos quosdam denticulos mobiles, plures vero, (quod hic notatum volumus) in maxilla superiori dentes. 2. duos praeterea dentium robustissimorum ordines, ex lateribus palati recta ad longitudinem linea dispositos, quorum in interstitio 2. 3. ad 4. obveniunt dentes minores; reliqua pars palati media omnis laevis est. At gutturis in principio partem superiorem versus, & inferiorem, ubi scilicet minimae sunt branchiarum, alii adhuc observantur dentes acuti, intusque reflexi. Lingua crassior duobus confita est ordinibus dentium acutorum, ac inflexorum, quorum 4. 5. 6. vel 7. numerabis in utroque ordinum. Ex parte quavis 4. adparent branchiae, harumque singulae duplici tuberculorum filo, dentium instar efformatorum, ex parte sua concava munitae videntur. Jam qui in parte interna sunt tuberculi, minores, qui autem in externa, majores; sic & branchiarum ultimae, maximaeque, tuberculi exteriores longi sunt, & cuspidati, interiores, & pauciores, & subtiliores. Pinnae autem in parte branchiarum omnium convexa, duplices. Binarum quae in dorso sunt, pinnarum primam, 15. constituunt radii, quorum 3. priores exigui sunt, & simplices, reliqui in extremitate bifidi, quartus insuper, & quintus ceteros longitudine superat, bini tandem ultimi, admodum vicini sibi coherent. Pinna autem dorsi posterior, nigra, pinguis, & membranosa, spinis caret omnibus. At pectoris pinnas nigridas in extremitate 14. componunt spinae; harum prima, & maxima est simplex, reliquae omnes in fine bifidae, ultima tandem omnium minima. Ventris vero pinnas nigrido-albidas 9. alias, alias 10. efformant spinae, ex quibus prima & secunda longissimae, reliquae omnes bifidae sunt & robustae, omnium minima ha-

beatur ultima , prima item ubi exsurgit , simplex , nec cuspide gaudens acuminata . Apophysin vero quandam squamosam , magnam , albidamque his pinnis majorem observabis semper . Ani tandem pinnam , quæ albida est , ac aliquo prædita adipe , 12. vel 13. componunt spinæ , quarum binæ ternæve priores , parvæ sunt , & simplices , longissimæ omnium quarta , & quinta , ac cuspide gaudentes , reliquarum instar , bifida . Caudam denique nigridam & parum bisulcam , seu ut circuli segmentum efformatam , 19. spinæ longiores constituunt , quarum ultimæ reliquis sunt breviores . Cor est salmoni quadratum , & hepar magnum , rubrum , simplex , ex sinistra situm , supra convexum & læve , infra autem figuræ irregularis , & in aliquas tantum apophyses dividitur . Sub hepate occurrit vesicula fellis , obscuro-viridis . Tum stomachus , recta fere per medium ventrem descendens , & tantum non ad Diaphragma usque reflexus . In media autem parte ejus reflexa , ubi Pylorus adest , plurimæ adsunt appendices adipe obvolutæ , & ad finem partis hujusce procurrentes . A diaphragmate tandem usque ad anum , Rectum quod dicunt intestinum , in media sua parte inferiore amplius atque rugosum , producitur . Bina sunt ovaria , simplicia , ac ovis majoribus rubrisque expleta ; alterum ex hac , alterum ex illa parte obvium ; utrumque autem primo in parte sua anteriore prope Diaphragma , & sic deinceps ovis adimpletur . Diaphragma ipsum solidum est ; Peritonæum carnis colore ; aeris vesica longa , per totam abdominis capacitatem , ad longum spinæ dorsi procurrentis , non nisi levissime huic adhæret . Nec non bini renes magni & longi juxta spinam dorsi producuntur . Vertebrae 36. adsunt in universum , & 33. costæ in latere quovis . Integra salmonis longitudo 28. digitis & 7. lineis absolvitur . Patriam habet Mare Balticum , ac quæcumque in illud sese egerunt , flumina quævis majora .

Salmo , inquit *Wallughby* , est piscis oblongus , squamis minimis tectus , capite insuper exiguo , rostro acuto , cauda bisulca , dorso cœruleo , reliquo corpore candido jam maculis interstincto jam carente , instructus . Maxillam inferiorem , testibus *Rondeletio* atque *Belonio* , foemella præsertim , testibus aliis , masculus , imo denuo aliis , illi salmones reflexam sive aduncam ostendunt , qui ova excludendi labore defatigati macrescunt . Errant profecto , etenim sanis pariter ac ægrotantibus commune est rostrum aduncum : Nemo autem , quantum nos quidem novimus , in eo discutiendo versatus est : quam ob causam recurvetur ? & num formam recipiat pristinam ? Quomodocumque res se habeat , salmonem crassiori pelle gaudere scito , & carne intus rubicunda & adipe intertexta , nec non pinnis lubricis pinguioribusque . Fluminibus natus in mare exspatiatur , at ova depositurus in patria loca redit , mare relinquit . Cel. *Gesnerus* interim , duce *Hectore Boethio* , est , qui refert : salmones junctis inter se ventribus , autumnus , sua ova in rivulos seu loca vadosa deponere , postea autem arena obtegere . Quo quidem tempore & masculus lacte carens , & ovis foemella carnem perdit atque pinguedinem . Ex his ovis igitur , arena tectis (sic ille pergit) vere ineunte pisciculi adeo molles nascuntur , ut vix gelatinas superent soliditate . Deinde autem naturæ instinctui obtemperantes mare intrant , eidemque vix 20. per dies immorando , sibi destinatam magnitudinem & incrementum capiunt quodvis . Quæ tamen omnia no-

bis quidem ab omni veritatis specie , imo possibilitate aliena videntur .

Certo tamen constat : salmones verno tempore acervatim Rhenum ingredi , relicto Oceano , & Majo , mense circiter , prope Basileam , magnam eorum copiam reperiri , lubenter enim , & præsertim excretis fluminibus atque turbulentis revertuntur . Ova sua emittens salmo non solum colorem , saporis præstantiam , figuram item pristinam , verum etiam , maciei ergo , nomen suum amittit . Ex solstitio æstivo macescere incipit , & sensim exinde plus suæ pinguedinis abit . Exeunte Novembre ad flumina properat ova emissurus , & peracto statim solstitio , toto autumnio ac hyeme , imo nonnunquam ineunte vere adhuc ejaculatur eadem . Locum iis commodum seligit , scilicet arenosum , & aqua rapidius profluente testum . Ibidem fossam , 3. ad 4. pedibus longam , & 4. fere latam effodiunt , fœmella sua ova pisorum magnitudine emittit , masculus emissa lacte seu spermate irrigat ; ac ne alvei vehementia abluantur , congestis calculis , tamquam muro , circumdat . Sic igitur ad vernum tempus munita remanent , tum vero cœli solisque calore animata in totidem salmones minores abeunt . Imo , quod admirationem merito movet , vel hi masculi recentes exclusi , cum fœmellis adultioribus coeunt ; at in fœmellis minusculis nulla unquam ova videbis . Deponendis ovis autem fluvios minores præoptant , nec Rhenum , nisi aquæ ejus decreverint , intrant , vel pinguedine ejus vel dulcedine allècti . Emissis tandem ovis omnibus , & masculi & fœmellæ Rhenum adscendunt , maxima ex parte in mare revertuntur . Ovorum tamen in fossas depositorum pars fluminum exuberantia perit , pars undarum fluctibus abluitur , pars devoratur a piscibus . Nec penitior aquæ fossarum defectu (etenim vel hic nonnunquam accidit) ova pereunt , sed redeunte aqua reanimantur , excluduntur .

Imo ex paritate vel abundantia aquarum , salmonum anni proxime venturi vel copiam vel paritatem dijudicare solent in antecessum . Nec tamen duos tresve per annos Rheno inhærent salmones juniores ; sed primumque primo adhuc vitæ suo anno ex aliis fluminibus in Rhenum confluant , & quum 4. ad 5. digitorum longitudinem adtigerint , ex Rheno Oceanum ingrediuntur , etenim nullos fere seu rarissimos in Rheno reperies illos , qui 8. vel 9. digitos tota sua longitudine implent . In Oceano igitur sibi destinatam magnitudinem excrescendo nanciscuntur , tum vero ex illo revertuntur in Rhenum .

Maximis etiam piscibus fluviatilibus , quos quidem novimus , adnumerandus est salmo , quippe qui *Belonio* teste , sæpius femoris crassitudinem , & 3. cubitorum longitudinem attingit , imo referente *Rondeletio* , vel thunnus æquiparat magnitudine . Pluries salmonum captorum alios 24. alios 30. alios plurium librarum pondus explere novimus . Cæterum caro salmonis cruda , albida , cocta autem sive sale condita , rubra est , & multo adipe , præsertim in regione ventris instructa , facultate exsatiandi magna gaudet . Auctori cuidem fidem adhibens *Gesnerus* , salmonem continuo nisu contrarium fluminis alveum eluctari docet , & obveniente cursus sui impedimento , corpore in circulum flexo caudam dentibus arripere , post eadem remissa , magno factus impetu superiora petere . Idem & nos a variis piscatoribus sæpenumero acceptum habemus . Quamvis igitur experientia edocti concedamus : salmonem maxima agilitate præditum esse ad saltandum ;

nobis

nobis tamen illud veritati haud consentaneum videtur, quod facilitandi saltus ergo caudæ mordicus inhæreat. Nec illa ad veritatem accedere, nobis quidem, videntur: quod scilicet miranda quasi celeritate salmones juniores, mari inhærentes excrescant; etenim adcuratissimæ piscatorum observationes, 6. annos integros pro termino ponunt, salmonum incremento omni destinato. Sunt, qui salmones ab hirudinibus infestatos, ad saltum sæpius cogi dicunt & incitari. Quidnam denique sit nutrimentum salmonis determinaturi auctores, in diversissima abeunt; ast experientia magistra novimus, quod lumbricis æque ac gobiis aliisque pisciculis, pro esca sibi oblatis avidissimi inhient. Errant igitur, qui nil præter aquam puram salmonis alimento venire existimant, ideo, quia nil alimenti solidioris in stomacho ejus occurrit; quamvis deficiente nutrimento alio, & nudam aquam salmonis (nec alius cujusdam ex piscibus) nutrimento sufficere posse, si adferis, nos nulli negabimus. Conf. *VVillughby* l. c.

Maxima Sueciæ flumina, sic *Cel. Linnæus*, salmonem inhabitare censeo, ac ova deponendi ergo eodem reverti, citius quidem in plagis meridionalibus, quam, (ubi abundat) in septentrionalibus, ut in Torna, fluvio in extremitate Sinus Bothnici. Quod si autem (id quod rarissime fieri solet) quodam Sueciæ lacu verbi gratia Siliano, in Dalecarlia, detentus hyemem peragit salmo: tunc pristina sua figura deposita plane aliam induit atque diversam. Cæterum quum gaudeat maxilla inferiore adunca, & digiti instar in altum reflexa, (ubi scilicet in superioris sinum incidit) nostratium aliqui sunt, qui eandem pro nota speciei diversæ habuere; ego autem, dissectis salmonum pluribus, masculos esse detexi omnes, quotquot maxilla præditi erant adunca, qui autem ea carebant, fœmellas.

Quæ quum ita esse satis superque constet; gravis sane est *Bellonii* error, qui caput salmonis fœmellæ, rarissimum, ut ait, sequentem in modum describit: differt enim salmo, fœmella (*Gallis: Portiere*, ovorum ergo, item: *Beccard*, ob rostrum diverso modo effectum, quæ dicitur) a salmone mare, isto adunco, qui in maxilla inferiore obvius in superiorem incidit; quamvis in mare, & plures, & magis variantes, & fortiore colore conspicuæ maculæ observantur, quam in fœmella; eadem vero pelle uterque tegitur.

Maria pariter ac fluvios, ut supra jam diximus, inhabitat salmo; etenim vere ineunte plerumque mare relinquit, flumina intrat, &, alosæ instar, ad finem Julii, mensis, imo ulterius, retia piscatorum, 60. ad 80. miliaribus a mari extensa incurrit, explet. Statim ex quo fluminum aquam dulcem hauserit, adipe exaugetur, & carnem magis succulentam, palatoque gratiorem acquirit. Ast, si ultra spatium anni fluvio inhæserit, carni suæ & pallor induitur, & ariditas, & macies, abit & saporis præstantia. Longævus est, & diu extra aquam vivere potest. Sunt, qui salmonem minorem, Latinis: *Salmeronem* seu *Salmerinum* dictum, ætate saltem a salmone diversum esse, & excrescendo hujus magnitudinem adtingere docent. Ast non solum *Cel. Jonston* specie diversum judicat utrumque, sed & *Cel. Gesnerus* ex piscatore quodam peritissimo ac fide digne acceptum refert: numquam salmerinum, ne multos quidem per annos fluvio inhærentem evehi ad magnitudinem salmonis. Contrarium agmen ducit *Cel. Linnæus*. *Salvierno* teste, nullus in Mediterraneo reperitur salmo. Rapidissimus interim, adverso fluminis alveo, citiorque telo misso provehitur. Naves, quæ
salis

salis deportandi causa flumina nostra intrant, itineris sub initium insequi solet. Pro diversitate locorum, quæ tenet, variæ & magnitudinis est & præstantiæ. Pro eximiis habentur omnes, quos Tamesis alit, quos Rhenus, Mosella, Ligeris, Garumna, Dordonia atque Elever. Hos vero, quos in Lappia captant pro optimis inter Europæos habet Cel. *Rondelet*. *Aldrovandus* autem pro demonstranda salmonis excellentia adfert, quod apud Belgas, quibus magna est piscium delicatissimorum copia, hujus solius, quum venditur, pretium, exigatur ad pondus, ac si omnibus reliquis anteferendus, & procerum saltem mensis, qui inserviat, dignus sit. Piscatoribus, qui Londini sunt, teste *Belonio*, moris est, ut salmones ad longitudinem venumdent dissectos, nostrates transversim conscindunt in orbes, seu frustula rotunda. Recentem denique frequentiore esse addit verno, & jejunii quadragesimalis, sale conspersum vero, quovis tempore.

Testibus piscatoribus, non solum hirudinum moribus infestatur, sed etiam vermes ut in intestinis suis alat, obnoxius est salmo. Anni sunt, quum nosmetipsi in stomacho salmonis, 25. librarum ponderis, teniam longissimam & candidissimam, imo per 4. dies ipsi salmoni superstitem reperiiebamus. Consentit nobiscum Cel. *Joannes Conradus Peyer D. in Ephem. Germ.*, ibi enim, dum de intestinis salmonum tractat, seipsum reperiisse ait, unum duosve vermes depresso, pylori appendicibus adhærentes; ac vermibus hisce valde obnoxios esse salmones subnectit.

Illa autem salmonum species, quæ *Tacon* audit Alvernienfibus, tanta similitudine accedit truttæ fluviatili, ut, ne a peritissimis quidem, facilis queat distingui. Quidquod Cel. *Belon*, adcuratam ejus descriptionem exhibiturus, nullum reperire potuit discrimen inter utramque, nisi magnitudinem truttæ fluviatilis eximiozem.

Nec injucundam fore L. censemus fusiozem descriptionem modi illius, quo salmones captare solent prope Castellum, Gallis: *Châteaulin*, dictum, in Brittania inferiore; quod nomen accepisse videtur, ex Castello antiquissimo *Alani II. Britannia Comitis vel Ducis*. Habeas ergo sequentia:

Est autem, sic Cel. *Deslandes in tractatu suo de piscatione salmonum*, magnus ille numerus salmonum, quotannis ibi captorum, ac vel 400. superans, cujus ergo dictum oppidulum celebratur. Et quamvis tanta Physicorum turba, varia de piscibus tam fluviatilibus quam maritimis tradita ac perscripta reliquit; numquam tamen de hac salmonum piscatione, & quidem curiosissima, quidpiam recensitum esse memini. Hanc enim & mihi casu feliciore detegere licuit & investigari. Ast quanta quæso latent regionum ignobiliorum in obscuritate, latent vero observatorum negligentia; quamvis dignissima, ut eruantur.

Interim generaliora quædam præmittenda ducimus. Salmones, piscium genus singularissimum, in fluviis nati, post mare intrant, quotannis tamen ad eosdem fluvios redeunt, reiterato singulis annis, suo itinere, usque dum vel moriantur, vel, ut plerumque accidit, piscatorum prædæ veniant. Quum igitur flumen ingressi fuerint, strenue continuato itinere, ad 100. miliaria interdum, ab ostio fluvii penetrant, sicque vel in oppidulis a mari remotissimis frequentissimi, in pleno maris autem rariores captantur. Sic enim in fluvio, Castellum alluente, quamvis in mare Brestia egeratur, nullum unquam salmonem captum esse memini, quamvis magna
piscium

piscium aliorum copia ibidem occurrat . Rationem infra subnectamus , eamque singularissimam .

Numquam vero singulis , sed agminatim semper adveniunt salmones . Sunt , qui eodem modo incedunt , & alii , ut : haleces , thunni , scombri , sardinæ . Ast itineris ratio seu causa alia est salmonibus , alia illis , quos enumeravimus . Quid enim est , quo haleces alliciantur , nisi vermiculimaria tunc obtegentes ; quorum in descriptione accuratissimus est Cel. *Rondelet* , eosque *bruchos maritimos* dicit , quos Junio , Julio & Augusto , mensibus , frequentissimos esse constat . Scombri ob algam quamdam marinam , cui avidiores inhiant , eo conflunt ineunte vere , & vel frequentiores vel infrequentiores , prout major minorve hujus algæ quantitas reperitur in oris . Thunni tandem , oras Provinciæ , Occitanicæque , pro asylo petere videntur , quo ab hostis sui insultibus fuga , qua sola patet securitas , sese possint tueri . Hostem enim habent piscem , quem *Imperatorem* dicunt ; quique ab hoc quem alias : *Xiphias* , quem Galli Orientem petentes : *Epee* , Itali autem : *Pesce spada* nuncupant , probe est distinguendus . Tantus enim Imperatoris timor captos tenet thunnos , natura timidos , ut illo accedente , præcipientes in semetipsos irruendo , primam quamque terram incurrant . Nec in oris Britannicæ inferioris adessent sardæ ; nisi composita quadam & in Norvegia præparata esca tunc rectum mare eas alliceret . Præparatur autem ex interioribus partibus piscium majorum quorumvis in mari Septentrionali captorum , & hodie non solum præcipuum aliquod commercii objectum constituit , sed etiam Britannicæ incolis sardas capturis necessaria evadit . Huic enim piscationi quot , quæso , retia inserviunt , quot naves , quot nautæ ? & quanta tandem in populum exinde redundat utilitas ? Etenim partibus suis oleosis exutæ , & aceto conditæ sardinæ , cuiuscumque terræ maritimæ gratæ sunt atque acceptissimæ .

Salmones e contrario in agmina ac societatem cogit ille instinctus fortissimus æque ac nobilissimus , quem *Lucretius* in versibus suis ad Venerem Deam , delineavit . Salmones fœminæ etenim fluvios intrando præcedunt , has vero mares varia cum alacritate insequuntur . Alacriores , vehementiori amoris stimulo incitati videntur . Jam sua ova fœmella ejaculatur , masculi junctis eadem viribus , juncto studio ac indefesso fœcundant . Salmones autem in seligendis , quæ ingrediantur fluminibus delectum facere comprobant , fluvii bini fere æquales & paralleli procurrentes , qui in Sinum Bresticæ egeruntur , horum etenim alteruter tantummodo salmones alit . Ideo forsitan (alia enim ratio in promptu non est) quia alter præ altero salmonibus gratius alimentum præbet magisque conveniens .

Ubi enim scombrorum , thunnorum , halecum & sardarum piscatio solet institui , tanto adipe repletum mare videmus , ut superficiei ejus oleum suprafusum videatur , imo , præsertim si aqua remorum acie percussa transcenditur , lux adfulgeat & fulgoris species adpareat . Particulæ ignis enim materiam oleosam aquæ supernatantem explentes , ictibus remorum secretæ concitantur . Nihil tamen horum in istis fluviis observamus , qui vel innumerablem salmonum copiam , varios per menses piscatoribus exhibent ; aquam scilicet , hi numquam turbulentam reddunt , numquam concitatam .

Imo , (id quod denuo observatum velim) pisces , quos recensui , omnes , foetidum aliquod oleum copiosius interdum emittunt , ac hujus ergo , haud
quo-

quovis anno nutrimentum saluti conveniens subministrant. Nec non contractæ interdum noxiæ suæ qualitatis ob causam, ut publice venum veniant, aliquoties interdicitur. Interdicti hujus immemores pruritu & scabie fere universali adficiuntur. Ast salmonum caro magis compacta ac solida numquam abit in oleum, hinc nec est, quod sinistros timeas salmonum effectus.

Supereft alius quidam salmonis instinctus, dignus sane cujuscvis Physici & adtentione, & admiratione. Aquam nemque fluvii cujuscvis haud eadem, sed varia rapiditate in superficie & prope fundum profluere novimus. Etenim fundo proxima aqua jam lapidibus, jam herbis, jam aliis inæqualitatibus obviis præpedita, lentior profluit; ast quæ in superficie continetur, continuo, haud interrupto & citiore alveo fertur; & si qua corpora heterogenea ac irregularis figuræ superficiiei innatant, quum motui continuo atque æquali sint ineptiora quam aqua, oram versus adiguntur. Primus tamen hæc observavit Cel. *Mariotte*, in tractatu de motu aquæ & corporum fluidorum. Eadem & mea me experientia edocuit: aquam nempe fluvii, Castellum alluentis quum i. secundæ tempore, circiter 24. pedum spatium procurrendo emetiri animadverterim; salmones flumen ascendendo, quantum fieri potuit, fundum petere observavi; ast descendendo eluctari in superficiem. Ascendendo enim contra fluminis alveum iis est obluendum, ast descendendo pleno alveo deferuntur, faciliores citioresque procurrunt. Nec sane excogitare ingeniosius, nec explere posset aptius quisquam. Hæc autem particularis Cel. *Mariotte* observatio, ansam præbuit, fateor, huic meæ generaliori: sinus, quibus plenæ sunt fluviorum ripæ, eminentias, inflexiones, curvaturas & præcipitia hunc in finem efformata voluit esse natura, quo rapiditas aquæ decrescens, ubi cum vehementia ripas alluit, in medio flumine adaugeatur. Duplex autem exinde provenit utilitas, eamque sequenti modo, illi suam faciunt, qui fluviiis vehuntur; adscensuri scilicet cymbam adigunt ad ripam, sicque cum leniori aquæ alveo conflictantur; descensuri autem medium petunt flumen, rapiditas alvei cymbam protrudit vehementius; ærumnosior remos ducendi labor sublevatur; nil superest, quam gubernacula tenendi officium. En! naturam in homines adeo beneficam, ut non solum ea exhibeat, quæ tantistamque variis eorum usibus inserviunt; sed & hæc suppeditat, quæ ad sublevandos vitæ labores, quæ ad diminuendas laborum molestias pertinent. Quantis, quæso, fruimur commodis, quæ aut prorsus ignoramus, aut confuse saltem noscimus.

His præstructis igitur recensenda veniunt ea, quæ salmones capiendi ergo, Castelli sunt instituta. Duplex scilicet palorum series ex ripa ad oppositam continuata, flumen transversim secat, & aggerem, in quo obambulare possis, constituit. Corroborandis autem continendisque his palis inter se proximis, alii quidam veniunt, longiores, & clavis ferreis infra supraque aquam muniti. Pergente deinde fluvio, ex parte ejus sinistra, arca quædam, craticulæ instar efformata conspicitur: cujus latera quævis sunt 15. pedibus longa; fluvius autem hac mole neutiquam interceptus seu retardatus, vehementior invehitur. In media illa arca foramen adest aquæ superficiiei quasi æquum, 18. vel 20. digitorum diametri, & laminis ferreis, trianguli isoscelis formam referentibus, facillime tandem sese aperientibus

& occludentibus circumdatum. Jam salmo, fluminis alveo abreptus arcam versus conducitur, & laminas (bases enim laminarum tangunt foraminis oram) adtingendo facilis ingreditur arcam. Laminæ sibi invicem adpropinquantur, primo conicam, post autem magis deductæ, cylindricam adquirunt figuram. Arcam denique egrediens salmo reservatorium aliquod intrat, ex illo autem mediante rete, perticæ nexu, præda fit piscatorum. Hi enim, ut ipse ego vidi, singulari quodam artificio & facillime, quemcumque elegerint, retrahere sciunt.

Nec eadem semper copia salmones adveniunt; quī quum rariores proficiscendos incedunt, omnes fere arcam, & ex arca reservatorium intrare solent, relicto itinere ulteriore. Quum vero copiosiores confluerint, v. g. si vehementiori cum ardore masculi foemellas sectantur; tunc & arcam, & palos ipsos, tanta cum alacritate transire solent, ut vix oculis illos insequi possis. Piscatores igitur, ne maximam eorum partem amittant, cymbis exiguis atque depressis juxta seriem palorum illos expectare, ac prætentis retibus captare solent. Omnem vero salmonem, quem ceperunt, ad reservatorium deportant, quo nutrimento emisso præstantiorem induant saporem. Ut enim terrestria animalia, pro acquirendo gratiori sapore, lautiori alimento indigent & copiosiori: sic pisces e contrario non, nisi jejunando ac procurrente aqua detenti præstantiorem induunt saporem. Interim salmones transire diximus palos istos, quam sint vicini invicem; scilicet pingui quodam involuero & oleoso pisces maris æque ac fluviorum omnes obducti sunt; hinc eximia eorum mollities, qua mediante strictissima quævis loca pertranseunt. Hoc involucrium insuper, quovis momento renovatur; quod vasa quædam excretoria minima, cum interstitiis vix oculos incurrentibus, & squamas interjacentibus cohærentia, subministrant. Quæ quidem vasa succum quemdam singularem, ad nutriendas & diversimodo tingendas squamas facientem, conducere adportareque videntur. Etenim variæ squamarum tanto nitent splendore, quantum vel maximum artis studium imitando effingere nequiret. Sunt, qui involucrium, de quo diximus, oleosum, aliis adhuc usibus destinatum esse volunt; ut, jam ad defendendos pisces ab aquæ frigore, sanguinem eorum transeunte; jam ad calorem naturalem reflexione vel exhalationum remissione, exaugendum; alias enim piscibus in Oceano Septemtrionali degentibus infestissimum foret frigus.

Missum denique facimus salmonem vulgarem, Physicorum tractatione satis superque descriptum; & *salmonem cursorem*, nullius descriptione, quantum novimus, cognitum, delineabimus. Tres sunt, quibus a vulgari differt, notæ characteristicæ; nempe corpus longius, gracilius & ad fluctus transcendendos aptius; & caro ejus adeo glareosa, ut nec illis, quī tritissimo alias vilissimoque cibo nutriuntur, inserviat pro nutrimento; cauda denique latissima ac valde flexibilis, qua summa cum arte utitur. Etenim aquæ in superficiem enatans, plana sua cauda eandem pertundit, tantaque eam vi & celeritate percutit, ut quasi cursu suo desistens aqua, sui respectu, abeat in corpus solidum, cujus ope 12. ad 15. pedum effertur in altitudinem. Eadem virtute & alios, & in primis balænam gaudere novimus, quæ unico saltu interdum ad 20. pedum altitudinem e mari sese extollere, maximo postea strepitu atque terribili ruere solet in fundum. Qui quidem

effectus mechanicus, magna, ut cenſeo, ſimilitudine, accedit avium volatui; quamvis ſua differentia uterque diſtinguatur. Avis enim extenſis, quæ complicatæ erant, alis atque depreſſis, aerem eo momento, ac tanta cum celeritate deprimit, ut impedita ejus circulatione & adſcenſu repentino ſolidum quodammodo corpus evadat, ac alæ ſibi innixæ reſiſtere valeat; ſpectaculo ſane mirando & ſingulari.

Et hæc quidem denuo alio cogitato meo anſam præbuere; quod tuo nunc L. B. judicio, tuæque diſquiſitioni ſubiicere liceat. Mari ſcilicet ex littoribus redeunte, magna vermiculorum rubicundorum copia quaſi obſita videntur littora; vermiculi autem forſan aeris captandi ergo ſenſim arenam egrediuntur. His igitur gulofiſſimi inhiant piſces omnes, & illi quidem, qui ſupra aquam ſeſe extollere valent, hac ſua facultate uſi, oras ſæpius adeunt, vermiculos iſtos captare quærunt. Jam quum Philoſophorum ex principio: nil faciat natura abſque ratione ſufficiente: quid quaſo prodeſſent tot millia vermiculorum, alias ſub arena deliteſcentium, & mari recedente tantum conſpiciendorum, niſi eoſdem captandi facilitate ac devorandi deſiderio piſces natura donaffet?

Miſſis nunc omnibus, quas tamen ſuo loco poſitas eſſe cenſemus, obſervationibus, ad contexendam hiftoriam piſcationis ſalmonum pergimus. In medium Octobrem incidit principium piſcationis, tunc enim fluvios intrant ſalmones; & tunc ex ſuis criteriis futuram vel copiam vel infrequentiam ſalmonum dijudicant piſcatores. Nec tamen iſta criteria principio cuidam firmo, ſed meræ conjecturæ ſunt ſuperſtructa; uti cujuſcumque ſint ſtatus, vitæ ſeu generis homines fere omnes quaſdam obſervationes ſuas pro regulis gloriantur; quæ tamen adcuratius diſquiſitæ non ſunt niſi vel aniles, vel imaginariæ, nec rationi conſentientes.

Quum igitur ex ſalmonibus primi tranſierint, major eorum numerus ſenſim confluit, ac frequentiores captantur. Copioſiſſimi ſunt exeunte Januario ad finem Aprilis, & incredibilis eorum quantitas piſcatorum prædæ cedit. Maii ſub initium ova deponere incipit fœmella, maſculi hanc inſequentes ſuo ſpermate eadem irrigant atque fœcundant. Tunc in ſuperficie maris innumeri adparent ſalmones parvi, patriamque communem quærendo ad mare feſtinant. Statim exinde infrequentior ſalmo retia intrat, & ſi quis forſan intraverit, ille languoris ſigna, atque ſaporem inſuſum ſecum gerit. Julio tandem omnes prorſus evaneſcunt; tunc enim finita cannabis meſſe, cannabim, ut maceretur, profluenti aquæ immitunt. Jam quum omnes inter aquas aliquis ſit communicationis nexus: omnes, brevi tempore, fluvii, qualitatem noxiam nanciſcuntur; & piſces, qui vel in rivulis vel fluminibus, Brittaniam inferiorem alluentibus detinebantur, proſtigantur. Nec tamen hujus ergo cannabis maceratio interdenda venit, eſt enim neceſſaria æque ac utiliſſima. Cannabis namque funes ſubminiſtrat navibus, telam incolis, & carbafa nautis. Navium vero ſalus pendet ex proba carbaſorum qualitate.

Statim vero, ex quo flumina deferunt ſalmones, aggerem removeant, piſcium deſcenſus redditur facilior, laxantur machinæ, valvis molæ aqua actæ ſimillimæ. Quæ dum aperiuntur, maxima cum violentia irruens fluvius, colorem flavidum a cannabe mutuum accipit.

Duo adhuc monenda ſuperſunt, quæ grata ſint velim L. Salmo integer elixus

elixus rubrum induit colorem, ast in frustra dissectus & parum frixus omnem fere perdit ruborem. Pro detegenda rubedinis origine, quosdammodo protractos ex aqua dissecui, & corpusculum rubrum, racemo baccarum uvæ spinæ simillimum, tactuque molle in stomacho eorum reperi. Hoc aquæ tepidæ immisi, eamque statim rubore tinctam vidi. Corpusculum illud itaque, quum totum ebullias salmonem, dissilire censeo, & partes ejus omnes rubedine adficere. Septem vero seu octo per dies, (etenim vel diutius corruptioni resistit) adservatum corpusculum, in pus quoddam subtilissimum, iisdem effectibus conspicuum, iisdem proprietatibus præditum commutatur.

Supra autem diximus: salmonem quemvis, flumen in quo natus fuerit, semel quotannis invisere. Jam igitur exponendum esse censeo: quomodo res antiquioribus diutius incognita, nobis hodie innotuerit. Piscatoribus Castellum illud inhabitantibus præceperamus, ut 12. ex salmonibus flumen descendantibus retinerent, post annulo cupreo in caudæ regione munitos fluvio redderent, id quod per 3. annos factum est. Jam salmonum annulos gerentium alio anno, quinque, alio tres, alio duos captos ad me retulerunt. Huic simile quoddam alibi me legisse memini. Asiæ principes enim, qui eodem desiderio, non dicam furore, in piscationem feruntur, quo in venationem Principes nostri, pisces, si quos singulares capiunt, exiguis ornare jubent catenis jam aureis, jam argenteis, experturi, num remissi in aquam, eadem retia denuo sint incursum. Incurrunt autem sæpissime. Imo hi sunt, quibus nexum Maris Caspii cum Nigro detectum referimus; nec huic obstat, quam cum Sinu Persico habet, communicatio, cujus quidem documenta alii ducunt plantas aquaticas, veris tempore in mare Caspio natas, quasque ductibus subterraneis, ut videtur, eo abreptas, exeunte autumnno flaccidas observabis in Sinu Persico.

His omnibus a Cel. *Deslandes* expositis calculum adiicit Cel. *Anderson* in *historia Islandiæ naturali*; ille enim, ibi, ait, salmones reperiuntur, qui vel rapidissimis catarractis in occursum natando, admirandam sæpius in altitudinem sese extollunt. Quos captandi ergo, arcam quamdam ex cratibus constructam, media piscium via constituunt, sicque adscensum eorum ex mari liberum relinquunt, ast descensum in mare intercipiunt, præpediunt. Eo insuper tempore, quo summa pinguedine gaudet salmo, retibus a ripa ad oppositam prætentis, flumen ascendentes propellunt salmones, qui recessu impedito, nunc dexteram, nunc sinistram oram petendo, piscatorum retia adeo frequentes incurrunt, ut vel 200. imo plures, uno retis tractu capiantur.

Pro diversa sua ætate autem diversis nominibus plerumque adpellatur: Omnia equidem recensendi locus non est. Sufficiat pauca adferre. Ætate maximum *Ausonius* dicit: *Salmo*; ætate medium: *Sario*, seu *Fario*; juvenem denique: *Salar*. Plinius Latino eum nomine: *Salmo*, salutatur. Græcum enim frustra quæritur; nec nisi in Oceano, fluviiisque in illum exeuntibus, quo numquam penetravere Græci antiquiores, reperitur. Sunt, qui salmonis nomen, a *sale* descendere dicunt, siquidem plerumque sale conditus adservatur; alii autem a *saliendo*, quippe qui magna & agilitate & vehementia salit. Iterum alii ex Germanico: *Salm*; Itali autem dicunt: *Salmon*; Hispani, Angli, imo teste *Nicotio*, & Galli: *Salmon*, pro quo hodie fre-

frequentius: *Saulmon* seu; *Saumon*. Belgi tandem: *Saelim*, & Sueci: *Lax*; sive: *Blanklax*.

Oleo autem & sale volatili abundat. Gratissimi est saporis, ac vel principum mensis inservit, dummodo bene nutritus, pinguis, ætate medius, carnis teneræ & rubicundæ, nec non in aqua pura captus fuerit ac profluente. Recentior ori est gravior, at corruptioni magis obnoxius, quam si sale fuerit ante conditus. Hinc etiam, quem vel diutius conservare volunt, vel in alia loca deportare, sale ante omnia condiunt. Partium suarum præstantissima est caput, secundus locus venit ventri, saluti quamvis infestissimo, sui adipis ergo. Cæterum sale volatili, & principiis oleosis atque balsamicis abundat; hinc bene nutriendi facultate gaudet, & corroborandi & restaurandi, & urinam provocat, & pectori est convenientissimus. Nimius tamen, sui adipis ergo, vomendi conatus & indigestiones causatur. Vetustior tandem, carne sua arida & duriore, stomachum onerare solet.

Brevibus, sunt, qui salmonem nimio alimento, nimiaque satietate stomachum opplere censent; nos tamen omnibus, cujuscumque sint vel ætatis vel corporis temperaturæ, usum salmonis modicum, bonum esse judicamus atque convenientem.

Felle salmonis, linimenti instar adhibito, maculæ, quæ in cornea nascuntur, profligari solent, ac dissipari; imo, aliquam gossypii portionem felle tinctam, auribusque inditam, tinnitui mederi scimus.

Jam, quæ de trutta restant dicenda, subjungamus:

Trutta, Offic. Schrod. 334. Dal. Pharm. 408. Bellon. de Aquat. 181. Merr. Pinn. 188. *Trutta fluviatilis*, Rondel. de Pisc. 169. Gesn. de Aquat. 1005. Salv. de Aquat. 96. Aldrov. de Pisc. 585. Jonst. de Pisc. 85. *Trutta fluviatilis vulgaris*, Charlet. Onom. 155. *Truta* vel *Trutta* vulgo, *Forina* vel *Forio*, Schonev. Ichth. 77. *Trutta fluviatilis Gesneri*, *Rondeletii*, *Bellonii* & *aliorum*, Villughb. Ichth. 199. Raii Syn. Pisc. 65. *Salmo maxilla inferiore paullo longiore*, *maculis rubris*. Arted. Gesn. 12. Synon. 23. Spec. 51. Linn. Faun. Suec. 309. *Thedo*, *salar varius* seu *guttatus*, *Fario* & *Forella*, *Trocta* vel *Trotta*; *Lupus varius*; *variola*; *vario*, *variolus*, sive *Aurata fluviatilis*. Quorumd.

Longitudine magis (sic Villughby) quam crassitie sua conspicua est trutta, cæterum salmoni simillima. Capite illa gaudet brevi atque rotundo; rostro molliore; corpore crasso, ac in latam caudam exeunte; ore ampliori; maxillis uno saltem denticulorum ordine, in marginibus earum conspicuendis; tribus dentium minorum seriebus in palato, quæ ad extremitatem rostri angulum efformando, terminantur. Tum lingua, 16. vel pluribus denticulis reflexis munita & oculi adparent majusculi, quorum pupilla circulo rubicundo circumdatur, iris reliqua autem coloris est flavo-albidi seu argentei. Duplices vero nares. Squamis obtectum corpus exiguis, cute insuper facile corruganda, ac teste *Rondeletio*, leviter carni adhærente. Dorsum truttæ provectoris fuscum, frequentibus maculis nigris confersum; interdum & maculæ nigræ rubris intermixtæ; nonnumquam branchiarum opercula, & vertex, & iris oculorum maculis notata; latera insuper rubris maculis ornata, & sub lineis lateralibus (quæ a branchiis ad mediam usque caudam procurrunt) flavidis. Prima sive anterior pinnarum

dorsalium, versus medium sita, 12. ad 13. radiis constat, plurimisque distinguitur maculis nigris; posterior autem, caudæ vicina, exigua, pinguis, radiisque carens, margine, cinnabaris instar, rubro gaudet. Caudæ latæ, parum bifidæ & maculis carentis anguli radiique exteriores rubicundum plerumque colorem profitentur. Duo sunt piscium more, pinnarum paria, in inferiore corporis parte, alterum branchiis proximum, alterum in medio ventris conspicuum. Branchiarum pinnae 13. & ventris pinnae 9. ex radiis componuntur; appendix cartilaginosa insuper ex utraque parte inferiore pinnarum ventris conspicitur; quæ quidem appendix in exteriori parte pinnae enata, ac intus reflexa, respectu radiorum pinnae constituentium, transversalem obtinet situm. Pinnae cæterum omnes vel flavidum colorem habent, vel rubicundum. Pinna ano proxima, albidaque in margine anteriore, 10. nervis sustentatur. Cor præter ea triangulare, lien nigrus, hepar indivisum est simplex, fellis vesicula ampla, stomachus denique longus est atque exiguus, ac dissectus copiam ostendit vermiculorum, aliorumque animalculorum aquaticorum. Plurimæ insuper apophyses, utrique lateri intestini, Pyloro proximi nexæ, & ex alterutra tantum Pylori parte enatæ; 1. vel 1½. digitorum spatium, ubi facilis chylus deferitur in intestinum; quod quum reflexum fuerit, recta tandem a Pyloro procedit ad anum. In trutta 19½. digitorum, 8½. longitudine sua, ab extremo rostro usque ad originem pinnae dorsi anterioris, 15. vero digitos usque ad pinnam pinguem, seu ex adipe conflata, 4½. ad pinnas usque branchiarum, 10. usque ad pinnas ventris, 12. denique usque ad pinnam ano vicinam, explebat. Cauda tandem in pinnae radice, (ibi autem terminabatur) 2. fere digitorum latitudinem præ se ferebat.

Brevissima est *Artediana* truttæ descriptio, 60. in universum, sic ille, sunt vertebrarum truttæ, & 30. utrinque costæ; 3. insuper dentium ordines in palato, omnes fere paralleli & recti, excepto tamen medio, hic enim haud adeo recta linea procurrat; tum dentium in utroque maxillarum latere series una; maxilla inferior parum prominens ultra superiorem; cauda haud bifurca, sed circuli segmentum sua extremitate referens; sub linea corporis laterali, macula rubra, in laminis autem, quæ oculis sunt inferiores, nigrae.

Magna interim est truttæ atque salmonis similitudo, sive formam externam spectes, sive interiora. Carne enim rubicunda gaudet uterque, & squamis exiguis, & corpore maculis conspicuo, & rostro reflexo, & ad saltandum, imo fluminis alveo oblectandum, agilitate, & præstantissimi saporis excellentia. Nec nisi cauda sua salmo a trutta & salmonem minore, Gallis: *Tacon* dicto, differt; hujus enim cauda gracilis, truttæ autem lata, salmonis denique longa est ac bifurca, ut alosæ; imo, auctore *Rondeletio*, truttæ cauda brevis est & parum divisa. Fluvios autem exiguos, glacie interdum obductos, frigidissimos, glareosos, & vehementius profluentes, seu aquis frequenter inter rupes prolabantibus concitados, truttæ pro patriis locis inhabitant; mirabili etenim ac vel avium volatum exæquante celeritate, alveo fluminis obvehuntur, & 3. ad 4. cubitorum ad altitudinem extolluntur; quas sæpius, sic *Villughby* manibus sui captant nostrates; etenimalni & salicis sub radicibus delitescunt; easque caute accedens piscator, dum ventrem leniter digitis adfricat, sopitas, ex branchiis arripe-

ripere & capere valet. Cæterum muscis fluviaticis, vermibus ac insectis aquaticis, percis minoribus, pisciculisque aliis, ut apuis & gobiis vivit trutta. Imo tanta gula fertur in muscas, ut vel arte effictis pro esca capiatur. Incunte tandem Decembre in arenosis fluminum fundis foveas sibi effodiunt truttæ, quibus *Belonio* teste, sua ova recondunt. Minori tamen in pretio habentur, dum vel ova gerant vel proximæ sunt emissuræ. Julio tandem atque Augusto pinguescentes delicatiores habentur.

Variae sunt, ut in *tract. de alimentis* Cel. *Lemery junior*, truttarum species, eæque & coloris, & magnitudinis, & loci, quo commorantur, varietate diversæ. Aliæ namque fluvios profundos, & rapidos, aliæ lacus inhabitant. Aliæ sunt coloris nigræ, aliæ rubicundi seu aurei, unde & *Aurata* Latinis audiunt. Aliam denique earum speciem: *truttam salmonicam* (*truite Saummonnée*) dicunt; quæ vulgari major, cæterum multa similitudine salmonem adtingit; nec tamen magnitudine penitus illum exæquat; quamvis reliquas truttas omnes saporis præstantia superet. Summa cum celeritate natando procedit, & exaudito tonitru, (si fides historiæ) tanto timore percellitur, ut immobilis detineatur. Vermibus tandem vescitur, aliisque insectis, & spuma maris & pisciculis, quos tanta cum aviditate ex imo ad superficiem aquæ insequitur, ut vel in cymbas sibi obvias interdum profiliat.

Varii sunt, teste *Gesnero*, Galliæ fluvii, in quibus truttas antiquiores; magnitudine lacuum truttas (aliis salmonicas) exæquantes invenere; & harum quidem carnem, tempore æstivo, ex rubore suo aliquid demittere idem ille laudatus docet auctor. Ast contrarius ipsi *Linnaeus*, truttam vulgarem, unum longitudine pedem raro pertingere, salmonicam vero in duos plerumque excrecere, & carnem ejus, hiemis potius tempore, quam æstivo albescere, seu pallefcere, perhibet. Falso interim truttas ex fluminibus ad mare descendentes in salmones abire traditur. Est enim piscis aqua dulci detentus, ac squamis exiguis, quas maculae nigridæ plurimum distinguunt; obtectus. Raræ inveniuntur nigridæ, adhuc rariores flavidæ. Pro varietate locorum vero varius est truttarum color, & varii coloris truttæ eundem sæpe fluvium inhabitant, teste illa, quam in Normannia sub nomine: *Rille*, noscimus; observante *Belonio*.

Num & antiquioribus nota fuerit trutta, ignoramus. Truttam fluviatilem hodie Itali dicunt: *Trotta*; Germani: *Forel*, *Fobren*, *Forenen*. Angli: *Trout*, Sueci: *Forell*, *Stenbit*, *Boëckrô*, *Rosisk*. Nomen ejus Latinum a *trudendo* derivantes ad illam vim provocant & violentiam, qua alveo fluvii obluctans, fluctus repellit atque protrudit. *Gesnerus* illud ex: *Trutt* Germanico, quod *juundum*, seu *exquisitum* denotat; *Artedius* autem ex Gallico: *truite*, deducit, cui & nos assentimur. Reliqua ejus nomina ex vario suo colore ipsi venisse constat.

Phlegmate, oleo & sale volatili abundans trutta fluviatilis, tunc optima dici meretur, quum adipe multo, carne duriuscula ac rubicunda gaudens, ex aqua limpida atque perenni capta fuerit. Laudem reliquis & æstimationem præripit illa, quæ suæ cum salmone similitudinis ergo: truttæ salmonicæ nomine venit. Statim ex aqua protracta si mensæ inserviat, optimum præbet succum & digestu facillimum; ast caro ejus delicatior, pinguis ac tenera repentinæ subjacet corruptioni. Gratum suum saporem

æstate conservat, & hyeme amittit, illius enim ergo inter delicias mensæ refertur. Sale tandem, halecis instar, condita, multam suæ præstantiæ partem perdit, & saluti evadit infesta, cui recens, nullo, ne minimo quidem detrimento cedit. Omnibus enim, quacumque sint constitutione corporis, quidquod & ægrotantibus, & reconvalescentibus convenit; imo bonitate sua vix carni inferior est.

Maxillas denique & dentes truttæ absorbente & diuretica virtute præditos esse censent. Hos igitur in porphyrite conterunt, & in pulverem reducunt, cujus ℥j. ad ℥ij. pro dosi, aqua alkekengi mixta, ad excernendum calculum atque saburram, item ad impediendam, si qua imminet, colicam nephriticam, præscribunt. Adeps truttæ resolvendi suæ virtutis ergo & lenientis, linimenti instar, contra hemorrhoides, & alias ani affectiones, sinus item ulcera, & fistulas mammarum adhibetur.

Supereft alia quædam truttæ species, ab illa, quam descripsimus, exiguo saltem discrimine varia. Hanc Galli: *Ombre*, Latini: *Thymallum* dicunt, a thymi odore. Caro ejus & saporis optimi est, & concoctu facillima, & salutaris suæ qualitatis ergo, ne ægrotantibus quidem interdicenda. Figuram ejus truttæ vulgaris figuræ esse simillimam; easdem illam aquas puras ac limpidas inhabitare, iisdem, ac vulgares alimentis nutriri, imo passim, saporis eximii ergo, reliquis eam anteferri scito. Adeps ejus ad delendas variolarum maculas, ad depellendam sordiditatem, ad sedandos aurium tinnitus, ad consumendas denique maculas & cuticulas oculorum, eximia sese utilitate commendat.



C L A S S I S T E R T I A .

D E A M P H I B I I S .

De amphibiiis generaliora quedam.

Medium inter pisces animaliaque terrestria locum tenent, quæ ex natura utrorumque participant, amphibia. Hæc enim quum non solum in aqua vivere possint, sed etiam in terra; & amphibiorum nomen accepisse, & modo huic, modo illi animalium classi adnumerata videntur. Alii enim ex Physicis, spectata tantum facultate in aqua pariter vivendi ac in terra; quæcumque eadem polere viderint, in numerum amphibiorum retulerunt. Alii autem, respectu vel majoris vel minoris horum ad quadrupeda relatione: quadrupedibus perfecte similia ex numero amphibiorum præscribere, & jure quidem, quippe quæ haud adeo multum per tempus sub aqua degunt, eo peracto autem vel in terram exspatiantur, vel in superficiem aquæ enatant. Qui enim aqua mixtus est aer, ille pro respiratione eorum non sufficit, periculum est ut suffocentur. Sic igitur & ob illam de qua diximus, cum animalibus terrestribus similitudinem, & ob corpus suum, quadrupedum more, vel rarioribus, vel densioribus pilis obtectum, his quidem locum inter amphibia denegavere Physici; ac quadrupedum classem illis adsignaverunt, quæ & forma sua & conditione iisdem propiora accedunt. Quorum methodum & nos imitaturi, ad classem quadrupedum, infra pertractandam ea omnia ablegamus, quæ aliis hic loci recensenda viderentur.

C O L U B E R .

EX præcipuis serpentum sive natantium, sive repentium speciebus, viperæ est & coluber. Hæ enim & reliquis notiores, & frequentioris sunt usus in Medicina.

Vipera. Offic. Schrod. 309. Dal. Pharm. 430. Schvenckf. Rept. Siles. 166. Bellon. Obs. Ed. Clus. 123. Gesn. de Serp. 124. Aldrov. Hist. Serp. 108. Jonst. de Serp. 7. Charlet. Exerc. 32. Merr. Pinn. 208. Raii de Serp. 285. *Vipera nostras.* ind. med. cxxiii. *Vipera Anglica fusca*, dorso linea undulata nigricante conspicua. Petiv. Mus. 17. n. 103. *Anguis cinerea*, macula dorsi fusca longitudinali dentata. Act. Ups. 1736. p. 2. n. 4. *Anguis scutis abdominalibus* 144. *squamis caudæ* 39. Amph. Gyllenb. Linn. Faun. Suec. 260. *Vipera vulgaris.* Nonnull.

Viperæ, mares æque ac foemellæ in Gallia obviæ, teste Cæl. Charas, sibi destinatam magnitudinem nactæ, pollicis majoris crassitiem, medio suo corpore explent. Crassius tamen est corpus foemellæ parturientis, 2. pedum longitudinem plerumque explent, nonnunquam & superant. Caput earum depressum marginem ostendit in extremitatibus partis suæ superioris; quo quidem margine vipera a colubro differt, hic enim depressas atque reflexas habet extremitates illas; habet & caput, corporis respectu,

strictius atque acutius. Viperæ caput totum 1. digito longum, & verticem versus, 7. ad 8. lineis latum, latitudine sensim decrescente, in regione oculorum, 4. vel 5. & versus extremitatem rostri, 2. digitorum latitudinem profitetur. Altum seu crassum est $2\frac{1}{2}$. linearum. Collum ejus in origine, digiti auricularis instar crassum, ac quod mari est, collum fœmellæ crassitie superat. Prægnans vero fœmella crassiori collo quam masculus gaudere videtur. Sic & cauda maris longior & crassior est, quam fœmellarum; illa enim 4. harum cauda vero 3. digitos longitudine, exæquat. Crassities tandem maris caudæ, ubi nascitur, colli crassitudinem æquiparat, & pari ratione ac fœmellarum in cuspidem desinit. Cæterum utraque nec ictus edit, nec secum gerit venenum.

Cutis, viperam quæ vestit, maculis conspersa, jam albidum, jam rubicundum, jam griseum, jam flavidum, jam fulvum exhibet colorem. Ad tamen vel ipse fundus maculis nigris depictus est, quæ & spatii & relationis similitudine characteres studio ac arte efformatos referunt, præsertim in superficie lateribusque corporis. Nec caput illis destitutum, binas in primis, duo cornua effingentes, in regione oculis intermedia exortas, post vero divaricatas & ex utroque capitis latere procurrentes, vel 4. ad 5. lineis interdum longas, ac $\frac{1}{2}$ linea latas ostendit. Medio harum rursus alia opposita est, magnitudine lenticulam, & figura jaculi ferrum referens, quæ omnium macularum prima, reliquas ad longitudinem spinæ dorsalis procurrentes conducere videtur. Squamis cutis integra tegitur, quarum fortissimas toto sub corpore videbis; fortitudinis magnitudinisque tantæ sint, necesse est, etenim non solum debilissimæ parti viperæ robur, sed & ipsi viperæ fulcra suppeditant, his enim tamquam pedibus adjuncta reptat, & corpus suum undecumque deportat. Colore suo chalybeo autem a squamis colubri flavidis maculis plerumque obstitis differunt. Prout igitur vipera jam retrocedere, jam gradum sistere desiderat, squamæ nunc distendantur, nunc coeunt. Squamarum majorum extremitas autem infra aliis squamulis, corpus totum obtegentibus nexa adhæret. Squamulæ autem mirum in modum ordinemque dispositæ sunt, ac eadem fere ratione aliæ aliis superstratæ, qua latrunculi illi cœrulei & semicirculares, quibus domuum tecta passim munita videmus. Sex tantummodo apertura in tota viperæ cute reperiuntur; maxima inter illas gula est; tum binæ nares, & foramen abdominis, caudæ origini proximum, quo non solum apertura intestini, ad eiicienda excrementa inserviens, sed etiam utriusque sexus genitalia continentur. Pro operculo hujus foraminis venit ultima squamarum majorum prominens & semicircularis, quæque sese deprimendo foramen aperit, idque vel coitus vel partus tempore, item pro emittendis viperæ excrementis fieri solet. Gula ejus pro lubitu nunc aperitur, nunc occluditur; nares continuo hiant; & oculi palpebris gaudent. Nec ullum in cute ejus adest foramen, auditui inserviens; huic ipsæ veniunt nares. Bis autem plerumque quotannis pelle hac squamosa se exeunt viperæ, sub qua nova quædam penitus efformata latet, & priori recedente, viperam vestit; pulchrioris fortiorisque coloris est ab initio cutis ista succedens. Statim exinde alia efformatur ac paullatim succrescit, & hæc, suo tandem tempore succedit. Hinc omni tempore, duplici cute viperam esse tectam cognoscis; utraque tamen dum lux transierit, diaphana.

Rostrum ejus osse componitur, cujus pars quædam cartilaginosa est, & squamosa tegitur pelle. Binus utrinque habet conductus, nares qui constituunt, singulos foraminulo rotundo, & suo nervo, odoratui inservienti, instructos. Idem illi conductus recipiendis adhuc duobus nervis exiguis inserviunt, quorum uterque partem cranii lateralem egradiens, naribus audiendi facultatem adportat. Omne autem cranium substantiæ est admodum compactæ & solidæ. Tres sunt futurae præcipuæ in parte ejus superiore, cujus non solum in medio cordis forma satis adcurate delineata adparet, sed etiam denuo alia futura major, inferiores cranii partes laterales undecumque circumdans. Cæterum adeo exacta unionem cranii futurae coherent, ut & difficillime cognosci possint, nec, nisi partibus fractis, separari, excipe, si in liquore quodam ebulliverit antea cranium. Ipsa tandem cranii substantia in 5 corpora potiora dividitur, quorum primum atque secundum, rotunda & oblonga, binis oculis media interjacent; ex his igitur odoratus nervi proficiscuntur. Reliqua autem in media cranii parte sita sunt. Duo scilicet, alterum juxta alterum, & superne; tertium vero paullulum minus, infra, atque in medio præcedentium conspicitur, ac Cerebelli nomen meretur. Cum hoc juncta spinalis medulla unum corpus constituere videtur, quamvis sibi proprium locum occupat in posteriore cranii parte. Substantiæ autem est albidioris & mollioris, quam corpuscula de quibus dictum est, crassitie insuper exiguum adæquat frumenti granum; nec non alii corpusculo, substantiæ ejusdem, ad longum procurrenti, & recta omnes vertebrae spinæ dorsalis transcurrendo, in extremitate caudæ desinenti, huic inquam, largitur originem. Tunica illa fortissima, ac corpusculis cerebri, (quæ obtegit) arctissime coherens, & nigra, Duræ Matris nomen meretur. Hinc physicorum error, qui cerebrum viperæ nigrum adscripserunt, neglecta scilicet tunicæ elevatione & disquisitione adcuratiori. Sub hac Dura-Matre aliam adhuc membranam exiguan, separatim quodvis corpusculum involventem, nec immerito Pia-Mater dictam, observare licet.

Oculis viperæ gaudet scintillantibus & acriter, imo, si dicere fas est, imperterritis, objecto intentis. Nervis, musculis, arteriis, venis, pupilla, crystallino, uvea, cornea, palpebris, aliisque aliorum animalium oculos constituentibus partibus, & viperarum oculi sunt instructi. Maxilla ejus superior parte sua anteriore in duas partes dividitur, ac osse rostri cartilaginosa, (binis ejus extremitatibus utrinque articulatis) separatur. Dentes autem extra seriem in utrovis latere siti, defensionis ergo ipsi dati videntur. Mediante interim musculo quodam pars ambarum anterior coheret, & ejusdem musculi auxilio pro lubitu animalis, maxillæ vel aperiantur, vel ocluduntur. Dentium magnorum, quibus viperæ gaudet, numerum determinaturi antiquiores abierunt in diversissima. Et licet alii dentium multitudine foemellam a mare distinguendam esse putarunt, plures adtamen jam in mare deteges, jam in foemellam. Et quamvis in utroque duos ex quovis latere dentes fixos detegisse nonnunquam contigerit; plerumque tamen in utrovis non nisi unum invenies, cujus altitudinis² tunica seu vesicula crassissima, succo flavido, pellucido, nec adeo liquido expleta tegit. In medio tandem succo prædicto, denti majori proximos 7. alios fere denticulos, aduncos, nec ordine dispositos deteges. Dentis illi

maiores in parte superiore tantum conspici, ac extra maxillas vallorum instar, lateraliter constituti, 2. fere digitorum longi, adunci, albi, necnon excavati sunt & fere ad cuspidem tenuissimam, & acutissimam usque pellucidi. Variis radicem versus, rimis obtekti videntur, seu crenis, & his immixti sunt dentes reliqui. Hi autem juxta longitudinem maxillæ plerumque delitescunt, eo saltem momento conspiciuntur, quo vipera morsura illos erigit, ac junctos cum maxilla superiore, offis ope (cujus altera extremitas media articulata, altera magni dentis radici proxima est) protrudit. Succus autem flavus, qui vesicula continetur, & ad humectanda inservit ligamenta, ac dentium flexioni adaptanda. Inservit, & pro nutrimento dentibus succrescentibus, in antiquiorum locum, si ve erumpantur, si ve suo tempore excidant, substituendis. Cæterum maxilla superior æque ac inferior, munita est dentibus aduncis, cujus, pellucidis, ac tenuibus, ejusdem crassitie ac canini sunt, at in longitudine minoribus. Varius interim eorum est numerus, si ve a natura variatus, si ve fragilitate sua inconstans sit. Idem fere superiorum, qui inferiorum esse solet numerus. Octo plerumque in maxillarum quavis, interdum & novem, decem, aliquando undecim numerabis. At hi, qui reliquis sunt prominentiores, aliquantula magnitudine superant profundiores. Magna interim inter dentes viperæ atque colubri intercedit differentia. Caninis nempe coluber carens, dentium atque maxillarum numero viperam superat. Coluber etenim quatuor maxillas superiores habet, duas inferiores; in qualibet maxilla superiore externa tredecim dentes, totidemque in quacumque inferiore numerantur. Viginti item in quacumque superiorum internarum. Ita ut numerus dentium colubri omnium sit 92. cuncti autem adunci, tenues, excavati, pellucidi & albi sunt, ut dentes viperarum.

Nobilis ille Florentinus, Cel. *Redi*, cui, quantum orbis literarius debeat, eruditi saltem æstimare valent, observationibus suis, nostra sane attentione, æstimationeque dignis, diu est, ex quo hanc antiquiorum opinionem refutavit, qua & veneno viperarum, fel pro sede adsignaverunt, & a vasculis quibusdam imaginariis, ad gingivas, præfatum venenum ex felle deportari crediderunt: quibus observationibus fretus Cel. *Charas*, & ipsum viperæ fel, & succum flavum, quem gingivarum vesiculæ continent, gustare nullus unquam dubitavit, & observationibus Cel. *Redi* respondentem reperit magnam fellis amaritiam, atque acrimoniam. Succus insuper gingivæ flavidi saporem valde insipidum & amygdalorum dulcium oleo accedentem. Ulteriori autem studio, & glandulas salivales detexit, succo huic componendo, & ad gingivam deferendo inservientes. Quæ æque in capite maris, ac feminae obviæ, utrumque cranii latus, in parte cujusvis orbitæ posteriore, pro situ suo occupant. Cuivis glandulæ suum est vasculum lymphaticum, quod in aliud quoddam vasculum majus, gingivæ vesiculam ingrediens, exoneratur. Nec non in colubri capite salivales glandulæ detegi facile possunt.

Amplissimus interim ossium in viperæ corpore, (missis jam capitis ossibus) obviæ numerus, vertebrae, ac costis absolvitur. Vertebrarum prima parti cranii posteriori articulata cohæret; reliquæ omnes, ordine dispositæ, ac fortibus inter se articulationibus junctæ, ad caudæ extremitatem usque producuntur. In quavis igitur vipera, si ve mas sit, si ve fœmella

mella 145. vertebrae ab ortu capitis ad caudæ initium, 290. vero costas numerabis, duplo vertebrae superantes, siquidem singulis vertebrarum binæ articulatione nectuntur costæ, ex quovis latere una. Præter has aliæ 25. ab initio ad extremitatem caudæ conspiciuntur vertebrae, nec costis adhærentes, sed exiguis quibusdam apophysibus, magnitudine una cum vertebra, sensim, sensimque versus caudæ apicem decrefcentibus. Excavatae insuper in centro vertebrae medullam ex posteriore capitis parte profectam recipiunt, totidem nervorum paria subministrantem, quot vertebrae numerabis, & ad exeuntem caudam usque continuatam. Verum inter quatuor ex iis musculis, qui in occipite exorti, ex utroque spinosarum apophysium latere descendunt, primus nectitur spinæ; alter, sub primo situs, hunc comitatur ad caudæ extremitatem; tertius vero, & quartus, longitudine sibi similes, parti vertebrarum interiori connexi, easdem ab alia extremitate ad aliam sequuntur. Utrinque tandem quot vertebrae, totidem observabis musculos, costas inter constitutos, quorum ope a cuspide ad radicem usque costæ inter se dividuntur, similiter ac in cæteris animalibus usuvenit. Musculi vero isti neque arteriis, neque venis destituuntur.

Jam vero partes viperæ internas lustraturis, omnium prima obvenit lingua, quam summa quidem agilitate, & ejaculari solet, & retrahere sæpissime. Hæc binis maxillis inferioribus media interjacens, duobus constat corporibus carnosissimis, longis, globosis, & in cuspides subtilissimas exeuntibus, imo ab origine ad $\frac{2}{3}$. suæ longitudinis arctissime cohærentibus, pro dimidia sua parte intus carneo colore gaudet, exterius autem, qua gulam respicit, nigricante. Tota linguae longitudo $\frac{1}{2}$. digito absolvitur. Imo viperarum aliquarum lingua tribus, quatuorve interdum cuspibus munita conspicitur; quæ quidem cuspides ejectæ (ut fieri solet) quamvis nec ictu feriant nec lædant, timore sæpius ignaros replent. Capiendis vero præsertim animalculis inferviunt, quibus gulosissima vipera inhiat. Aliqua interim vaginæ specie tota obvolvitur lingua.

Initium Tracheæ-Arteriæ in principio gutturis conspicuum, foramen præsentat ovale, superne elevatum, & rostro quodam exiguo infra munitum. Constat autem in origine sua ex variis annulis cartilagineis, ac inter se junctis, qui in unius digiti longitudinem producti, dextero tandem viperæ lateri, in regione pulmonis junguntur. Octo interim ad novem digitos integra sua longitudine perficit Trachea-Arteria. Pulmo denique retis in formam effectus, lobis carens, coloris insuper rubri, substantiæ tenuis, pellucidæ, & rugosæ; septem ad octo digitos longitudine, transversum vero digitum latitudine attingit, ac venis, arteriisque totus confusus est.

Inferiorem pulmomi locum in dextra viperæ latere cor cum hepate obtinent. Cordi interim, magnitudine fabam attingenti minorem, oblongo, carnoso, ac pericardio suo (hoc autem tunica quædam crassior componit) circumdato, alter est ex parte dextra, ex sinistra alter ventriculus. Sanguis igitur ex vena cava delatus ventriculum dextrum ingreditur, deinde effusus in sinistrum per Arteriam-Aortam egreditur. Hæc vero statim in duos ramos majores dividitur, quorum alter ad partes superiores ascendit, alter vero sub Oesophago procurrens, in plures deinde ramusculos, quæ omnes partes ad caudæ usque extremitatem pertingentes, dividitur.

He-

Hepar denique non est nisi corpus carnosum coloris rubro-fulvi, ac aliquantulum sub corde constitutum. Cæterum longitudine & magnitudine varia gaudet, maxima a quinque ad sex digitos, explere solet, & dimidium latitudine. Bini autem sunt, quibus componitur, lobi majores, quorum dexter digito profundior est sinistro.

Diaphragmate carentis viperæ, vesicula fellis, digito transverso sub hepate sita est, & figura sua, & magnitudine fabam minorem æquiparat, depresso suo lateri superjacentem. Fel ipsum vero coloris est viridissimi, saporis acerrimi, & amarissimi, substantiæ tandem syrupo haud probe cocto, similis. Omni cæterum veneno carens, qualitatem quamdam continet balsamicam. Sic & pancreas, cui splenis nomen omnes fere tribuunt auctores, aliquantulum sub felle, in parte dextra viperæ reperitur. Pisi magnitudinem habet, & substantiam glandulosam, licet ad spectum carnosum adpareat.

Tum exortus in basi gutturis Oesophagus, atque in sinistra faucium parte constitutus, rectissimus ex pulmonis hepatisque latere procurrens, stomachi tandem orificio jungitur. Unica dumtaxat membrana eaque mollissima, æque ac dilatatu facillima constat. Hic igitur primus ea recipit animalia, quæ dentibus enecata majoribus, tota deglutierat viperæ. Et capacitatis amplissimæ, pedemque integrum longitudine emetitur. Quem, qui excipit stomachus, multo fortior, & duabus tunicis fortissimis invicem cohærentibus compositus: trium, quatuorve digitorum longitudine, tum orificio æque, ac medio amplissimo, fundo denique coarctato, nec nisi excrementis in intestina eiiciendis sese aperiente, est conspicuus. In horum intestinorum lateribus sitos videbis, & testiculos, & duo matricis corpuscula, & renes cum vasibus suis. Renes insuper, qui colorem præ se ferunt rubrum aut dilutum, varia constituunt corpora glandulosa, & contigua, renum vero dexter, tam maris, quam foemellæ sinistro altior situs adparet. Omnia interim intestina, ut & testiculi, ac renes adipe quodam candidissimo, & albidissimo, qui liquefactione olei naturam induit, sunt obvoluta.

At bini, qui masculo sunt, testiculi, formam ostendunt longam, & conglobatam, colorem albidum, substantiamque glandulosam. Colorem vero diversum habent: dexter præterea digiti unius longitudinem implet, quo & brevior, & tenuior est sinister. Nec non duæ sunt masculo partes naturales, sibi invicem simillimæ, caudæ inferiores, ac inter se proximæ; quarum quævis duobus corporibus longis, excavatis, & in summitate sua connexis, composita, multis interne repleta est aculeis albis, duris, acuminatis, cuspidatisque, qui substantiæ ejus infixi, cuspidem suam nunc huc, nunc illud obvertunt.

Foemellæ vero testiculi, forma masculi testiculos æquiparant, longitudine autem, & magnitudine superant. Duorum matricis corporum a latere siti sunt. Hæc vero corpora, & Epididymides, & vasa spermatica sunt, eaque breviora, quam masculi sint Epididymes, vasaque prædicta. Est autem, quod matricis initium constituit, corpus aliquod crassum, ex duabus tunicis fortioribus constans, intestino superius, ibidem vero orificio latissimo, ac coitus tempore recipiendis una ambabus masculi partibus genitalibus dilatatione sese accommodanti, instructum. Idem illud statim ex initio duas abit in crumenas, in fundo perforatas, ac tunica interiore dura, atque

que rugosa munitas. Matrix igitur, quæ duabus hisce crumenis statim ab initio in duo corpora dividebatur; duobus iisdem juxta renes ad stomachi fundum utrinque procurrentibus, continuata divisione, distincta adparet. Duabus interea tunicis mollibus, tenuibus, ac pellucidis composita duo corpora, magnam foetuum copiam, (usque dum perfectionem adtingant sibi destinata,) quo continere possint, facillime dilatantur. Nec viperæ tantum, sed & colubri matricem in duo corpora similia, & æqualia, ac sita ex utrovis latere intestinorum, quibus separantur, divisam reperimus.

Ova igitur in duobus matricis corporibus efformata primo quidem, singula sua reteguntur cuticula; tum, quæ eodem corpore continentur, omnia, communi quadam membrana, quam ovarium diceres, involvuntur; hæc igitur loco venit illi, quo & ova excresecendo augentur, quo foetus efformantur, ac sibi convenientem perfectionem adquirunt; ex quo etiam eandem per viam, qua masculi sperma ingressum fuerat, successivi egrediuntur, & plurium animalium instar, vivi; nec necessario (ut quidam perhibent) foetus effundens mater moritur. Cæterum observationibus constat: quod & dextrum matricis corpus plures plerumque foetus contineat ac ova, quam sinistrum; quod admodum varians sit ovorum numerus, etenim modo 25., modo 20., modo 10. numerabis; quod & formam suam & perfectionem ovo adhuc detenti foetus pertingant, eoque jam hæc, jam alia ratione tortuose inflexi contineantur; quod ovo quoad inhærent, mediantibus quibusdam secundinis, umbilico nexis, suum recipiant alimentum, & uterum egredientes post se trahant easdem; quod ex parte iisdem involvantur, & matre, eos postquam editi fuerint delambente, iisdem exuantur. Quæ interim de viperis tradidere antiquiores, cuinam veritatis seu observationum fundamento superstructa sint, hodie quidem ignoramus. Docebant enim: quod coitus tempore, caput suum masculus in gulam foemellæ immittat, ac semine ibidem emisso, tum in matricem delapso, primo quidem ova, deinde foetus efformentur; quod foemella, seminis emissionem quasi titillata, caput masculi morfu abripiat; quod tandem foetus nativitatis suæ tempori proximi, matricem ac latera suæ matris perforando, suum sibi exitum parent, sicque matri mortem adferendo, patrem ab illa enecatam ulciscantur; aliaque hujus generis plura.

Vipera lentissime rependo incedit; nec ullo unquam saltu effertur in altum; quæ quamvis irritata seu læsa, acerrimo petit ictu morfuque; numquam tamen, nisi ad iram commota, vel bestias, vel homines adgreditur. Quæ autem suo ipsi nutrimento veniunt, animalia, ut: cantharides, scorpiones, ranæ, talpæ, lacertæ, ac ejus generis alia, quæque dentibus suis magnis enecata, tota deglutit, hæc, inquam, adgreditur, hæc enecat. Stomachum minoribus replet, majoribus autem ex parte stomachum, ex parte œsophagum. Duo sunt, quibus ad credendum inducimur, quod perfecta horum omnium digestio in stomacho viperæ confici nequeat; quoniam nec sufficientem habet calorem, ob aperturam magnam in orificio ejus cum Oesophago cohærente obviam; nec humiditas alimentorum fermentationi & concoctioni debita adest. Nihilo tamen secius succus ille & pars subtilior alimentorum, nutriendis corporis partibus destinatus iisdem adportatur; quod quum non, nisi plurium dierum spatio possit perfici, excre-

menta interim ad intestina ablegantur, crassissimæque partes gutture eiiciuntur: Per multos interim menses nutrimento carere valent viperae, imo, ex quo captæ fuerint, nullum amplius alimentum adpetunt, aere, quem ducunt, conservantur. Viscosæ suæ substantiæ ergo atque compactæ difficilior divellitur vipera, & cute sua squamosa non solum ab aeris inclementia defenditur, sed & spiritus sui tam arcte corpori nectuntur, ut tenacissimi inhæreant, nec nisi multas demum post horas expellantur, quamquam vipera & cute fuerit exuta, & in frustra dissecta, & exenterata. Hinc & motum diutissime continuantem observabis, & caput, quamvis resectum, mor sui tamen sufficiens, illique adeo infecto, ac si ab integra vipera profectus esset, videbis & cor corpore extractum vel per horas palpitans. Pauca sunt, nec foetentia viperae excrementa; colubri autem multa & urinæ corruptæ foetorem præ se ferentia. Nec reliquorum serpentum instar, foraminibus sub terra effossis delitescunt viperae; sed sub lapidibus plerumque & ruinis accumulatae, ac tortu se invicem inflexæ reperiuntur. Sereno coelo sub rubetis ac fruticibus ramosis degere solent. Bis autem quotannis coeunt, & Martio circiter imprægnatae 4. ad 5. menses, foetus in utero gerunt. Quovis vere, interdum & autumno sua se pelle exuunt:

Ea interim (sic pergit Cel. *Charas*) quæ de effectu essentiaë Nicotianæ in viperas scripta reliquit Cel. *Redi*, & nostrametipsum experientia comprobata habemus. Etenim, quum acus ope, filum hac essentia tinctum cuti ejus infingeremus, vix ¼. horæ transiit, & vipera emoriens statim aeris duriem nacta, tanta deinceps flacciditate diffuebat, ut jam ex biduo decessisse videretur. Eosdem effectus, quamvis tardiores, & frustula herbæ ejusdem, gula ejus detenta, & fumum nicotianæ gutturi inflatum excepisse vidimus, convulsiones scilicet, & insolitas corporis contractiones, quas vipera mors repentina subsequebatur. Motu autem membrorum jam ex dimidia hora desinente, cordis palpitationem adhuc continuatam observabis. Cæterum essentiam tabaci, vel ipsam herbam & viperae & colubro interitum adferre experti sumus. In spiritum vini projecta vipera vix horæ spatio effluxo suffocabitur. Nec tamen saliva hominis, ne jejuni quidem, vipera evadit infesta. Quæ de odio ejus in fraxinum fabulati sunt antiquiores, quod scilicet: si circulo medio, cujus dimidiam partem fraxini folia, dimidiamque prunæ constituunt, immissa fuerit vipera vivens, adeo abhorreat folia, ut prunis nimis adpropinquando aduri malit, quam foliis esse vicina; omnia hæc, inquam, fabulas redolent, siquidem ex foliis prædictis, quum construeremus circulum 3. pedum diametri, statim foliis adrepens iisdem se vipera texit.

Adversarium in Physicis habeo Cel. *Redi*. En disceptationis nostræ cardinem: adferit Vir Cel. succum hunc flavidum in vesiculis gingivarum contentum, solam esse & unicam veneni sedem; eumque ore haustum esse innoxium, ast venenosam qualitatem induere, dum viperae viventis vel mortuæ morsum comitetur; succum illum vel ex vivente vel mortua vipera profectum, & vel liquidum, vel exsiccatum atque in pulverem redactum, dummodo vulnera intrans sanguini animalis vulnerati admisceatur, semper esse venenosum; eumque omnibus animalibus, quorum vulnera quomodocumque intrat, mortem conciliare. Hæc sunt, quæ Cel. *Redi* docet. Ego autem, concessa saltem succi ore recepti innocentia, reliqua omnia

pernego, & viperæ venenum non nisi in spiritibus irritatis consistere censeo, & viperæ sive viventis ac vel maxime irritatæ, vel brevibus ante vel diutius jam mortuæ succum nullius esse qualitatis venenosæ, vel in se, vel morsus tempore emissum, vel intus receptum, vel vulneri injectum, vel sanguini mixtum, vel quocumque alio modo id fieri potest, adhibitum; nec quidpiam ex animalibus inficere posse atque enecare; siquidem non est, nisi saliva quædam innoxia & purissima. Est igitur viperæ venenum invisibile & spirituale, nec crassius seu materiale.

Et hætenus quidem, quæ de anatomica viperæ descriptione, adcurata sane & curiosa retulimus, ex *Cel. Charas* hausimus. Nec satis omnibus notam quæstionem, de veneni sede in vipera, ab his auctoribus sua laude conspicuis ventilatam nunc adtingendi animus est, ne repetitione inutili tedium moveamus. Adeat interim, si quis velit, ea, quæ de hac contentione literaria inter utrumque disceptata, in publicum emanarunt. Nos ea tantum, quæ *Cel. James, Meadii tractatum de venenis* sequutus, de vipera profert, brevibus exponamus:

Duplicis generis sunt viperæ dentes; alii namque majores & veneni sedes, alii autem minores. Et quidem priores maxillæ superioris ossi adhærent, ac, ut dentes canini reliquorum animalium carni inhiantium, incurvati adparent atque adunci, multum conspicua insuper cavitate instructi, cuspidis extremitatem durissimam acutissimamque fere pertingente, ac in parte dentis convexa in crenam, calami crenæ simillimam exeunte, qua veneno exitus patet. Adcuratissimam dentium structuræ descriptionem *Galenus* tradidit, additque, quod, quum pro extollenda antidoti sui virtute, Medici impostores, vulgo Ciarlatani, manus suas viperarum moribus obiciant: massa farinacea rimas istas sive crenas sollicito cum studio obturent. Aduncam vero formam dentibus hisce tribuit natura, ut mordendo perpendiculariter fauciare possint partem; quum enim per structuram suam vipera morsura caput adtollat, si dens maxillæ adhærens rectus fuerit, vipera situs sui obliqui ergo, nec vehementer, nec profunde carnem penetrare posset.

Præter hos vero dentes, quos jure venenosos dicimus, quorumque vel unus, vel duo, vel tres cuivis lateri ossis primi superioris maxillæ perpendiculariter infixi sunt, alios adhuc eidem ossi inhærentes, ast minores deteximus. Cuspidibus hi instructi erant durioribus, & reliquorum instar, fissis; radicibus autem mollibus, & ut radices dentium, qui sunt infantibus, viscosis; imo juxta longitudinem maxillæ procurrentibus. Et quum vel lenissimo contactu ab osse avellantur, musculis seu tendinibus illos esse adnexos *Anatomici* quidam perhibuere. Quum vero in locum majorum, (si qui casu quodam excidunt) succedent, sensim sensimque indurescendo, eo usque tandem excrescunt, ut ossi perpendicularem situm adtingant. Pro comprobanda autem succrescente sensim illorum perfectione, ad hoc provocare sufficiat: quod alii duritie omni careant, alii autem eodem tempore, cuspidem saltem dura & duriusculi reperiantur.

Quod ad numerum viperæ dentium adtinet; in diversa abierunt antiquiores, ex eo, quo 6. vel 7. nonnumquam in quovis maxillæ latere, interdum & pauciores conspiciantur, variante semper eorum numero atque inconstante. Pars autem interior radicis dentium venenosorum exiguis forami-

raminulis instructa est, eaque vasibus necessarium nutrimentum adportantibus ingressum permittunt. Nec tamen vim ac robur horum dentium ex ætate viperæ pendere voluit provida natura, quos potius, vel ipso quonascuntur momento, sufficiente ad enecandam prædam virtute donavit. Qui autem classem secundam constituunt, dentes exigui, forma quidem adunca & reflexa priores æquiparant; ast nec crena gaudent, nec foraminulo; binos ex utroque gutturis latere constituunt ordines, & tertio maxillæ superioris, inferiorisque secundo ossibus adhærent. Interveniunt interim retinendæ prædæ eo tempore, quo dentium majorum moribus illam vipera petit, ne prædæ renitentis agitatione dentes majores avellantur.

Hactenus ergo de instrumentis viperæ venenum ejaculantibus; nunc vero de illis, quæ præparando ac continendo eidem veniunt, brevibus agamus:

Auxiliante scilicet glandula, utrinque in parte sincipitis anteriore & laterali, directe post orbitam oculi, sita, a sanguine separatur liquor ille venenosus. Immediatum vero sub musculo, deprimendæ superiori maxillæ inservienti, obtinet situm, ita, ut quavis sua actione musculus glandulam tangens ac premens, liquoris, quo repleta est, secretionem promoveat. Conglomerata insuper, seu aliis glandulis minoribus composita est glandula prædicta; & glandulæ minores communi licet membrana inclusæ, singulæ tamen vasculo quodam excretorio gaudent, illoque in aliud rursus vasculum, majus sese exonerante, ex quo tandem in vesiculam gingivarum egeritur. Et hæc quidem vesicula, & basi primi, & extremitati ossis secundi maxillæ superioris cohærens, radicem obtegit dentium majorum; alia rursus radice gaudet in summitate, cujus pars anterior exitum præbet dentibus, venenum efficientibus. Multis præter ea constat fibris longitudinalibus, circularibusque, quarum ope, dentibus in altum elatis, occluditur; & hac quidem contractione venenum, illud, foraminulum quod in radice dentis videmus, ingressum; hoc, quod in cuspide ejus adparet, egreditur. Quæ quanto veritatis fundamento superstructa sint, ut habeas quod scias, teneto sequentia. Plurimum ego viperarum viventium capita rescidi, colli compressione, ut gulam aperirent, effeci; & venenum ex illa, velut ex syphone, profiliit. Gula igitur occlusa, quum vipera quiescit, dentes vesicula exteriori resecti, & repositi conspiciuntur; morsura autem magno opere gulam dilatat; extremitas ossis, secundi ex communibus, inferior, ope musculorum sibi propriorum, protruditur, & quasi centro insistens, acta in gyrum, duas itidem maxillas, extremitatibus suis nexas, protrudit. Quo quum pars inferior primi ossis maxillæ superioris protrudatur, altera extremitas redit in articulationis suæ cavitatem, ibi vero ligamenti quibusdam necitur. Hoc igitur mechanismo redeuntibus ad suum locum dentibus; vesiculæ, quibus tegebantur, contractione fibrarum longitudinalium retrahuntur; circularium vero, venenum crumena interiore compressa, ut dentem ingrediatur, adigitur. Quum denique quemvis viperæ morsum comitetur dentium ad radicem usque insertio, eadem hac vesiculæ comprimuntur, & facilius veneno exitus patet. Viperam vero alterum sæpius maxillæ latus altero quiescente movere observabis, facultate reliquis animalibus denegata; articulatione etenim extremitates maxillarum viperæ carent, id quod eximio ei usui venit in deglutiendo; alterius namque partis dentes dum infixi inhærent retinendæ prædæ, dentes alterius ulte-

ulteriori adtractioni inserviunt, & eo usque continuandæ, quo & priores eandem adtingere possint; & hoc quidem suo actu successivo animal integrum (caret enim quibus illud comminuat & incidentibus & molaribus dentibus vipera) intrudit Oesophago, cujus quidem fibræ musculares ad agendum, pro debilitate sua, neutiquam valent.

Antequam vero & ad ipsam veneni naturam, & ad modum, quo operatur, descendamus, monendum esse censemus in antecessum: quod naturæ viperam veneno donando, haud habuerit pro fine hominis læsionem, seu damnum, sed ad conservandam individui hujus incolumitatem, illamque solam respexerit, hæc enim, absente veneno conservari nequiret. Præcipuum scilicet viperarum nutrimentum constituunt: bufones, lacertæ, ranæ, talpæ, ac ejusmodi alia, quæ tota nec manducata, omnia deglutiunt, & demittunt in stomachum. Ponas igitur hunc continendis, quæ deglutita fuerant, justo minorem, & altera eorum pars stomachum opplebit, altera Oesophagum, (membranosum, ac magnæ distensionis capacem) usque dum omnia, succis salivalibus partium harum, (quas & sua actione fibræ ventriculi, & abdominis muscoli sua contractione sublevant,) dissoluta in substantiam abeant fluidam & nutrimento idoneam. Quæ omnia multum, quum requirant temporis; animalia hæc per tres, quatuorve menses, absque nutrimento hausto, vitam quomodo producere possint, intelliges. Imo sanguis eorum multo crassior quum sit, & viscosior, ac reliquorum; & parcius transpiratione abit, & parcius eget renovatione. Hæc vero, quæ ratiocinando erimus adprime respondent iis, quæ Microscopii ope institutæ observationes loquuntur. Stomachi etenim muscoli quum & comminuendis & in chylum convertendis nutrimentis, pro debilitate, haud sufficient: sanguinis consistentia ut crassior sit, & viscosior, necesse est. Cæterum cordi, viperæ, nonnisi unus est ventriculus; & eadem ratione, qua in rana, & testudine, ea & in vipera sanguinis circulatio procedit, hujus enim vix tertia pars pulmones quum transeat, pauciori, quam animantium aliorum aere adtenuata esse potest. Præterea hæc nutritionis ratio exegit, ut, simulac capta sit præda, enecetur, quo ad stomachum usque descendere queat; nec enim sola vis stomachi ad enecandum facit animal, repugnat nempe, & animalis subtilitas, & debilitas fibrarum. Imo viventia sæpius animalia in horum stomacho reperimus, quæ ea devoraverant. Huic igitur fini, enecandæ scilicet, quam vipera arripuit, suæ prædæ, destinatum est & viperæ venenum, destinati sunt & dentes. Nec mireris, si vipera irritata, vel quovis modo ad mordendum incitata, naturæ donum in damnum hominis transferat. Etenim tantilla veneni hujus adest copia, ut guttula, ad summum, una, mortis causa evadat; & hujus quidem ergo auctores varii in experiendo morsuræ effectus in animalibus variis subsistere, nec veram liquoris naturam, contexturamque perquisivere. Cujus causa viperæ studio irritatæ venenum emissum in corpus quoddam durum, partes ejus, quam exactissime fieri potuit, Microscopii ope disquisivi. Et primo quidem aliquas detexi particulas salinas rapidissime liquori innatantes, quæ præterlapso quodam tempore, in totidem abibant crystallæ cuspidatæ, subtilia, & nodis variis in extremitate sua munita. Telam araneæ tantum non omnia effingebant, sed magis subtilia reperiiebantur; quamvis tanta fuerit durities cuspidibus istis pellucidis, ut vitro, observationibus meis accom-

modato, plures per menses inhærendo, nullam prorsus alterationem perpeſſæ ſint. Perrexi experimenta inſtituendo, quo cognoscerem: ad quamnam ſalium claſſem cryſtalla prædicta referenda forent, & multa tandem difficultate, ab exigua liquoris portione deducenda, detexi: quod acidorum inſtar, tincturam heliotropii rubram reddant. Quum vero liquorem illum ſyrupo violato admiscuerim, haud probe experimentum ſucceſſit; interim rubicundo quodam colore tinctus videbatur liquor, nec tamen viridi, quem induxiſſet, ſi vel minima alkali parte commixtus fuiſſet. Hæc igitur pro evertendo iudicio eorum ſatiſfaciant, qui neglecto examine accuratori, frivole arreptam ſuam opinionem pertinaces deſenſuri: viperam alkalina natura gaudere, & huic, acidorum ope, medendum eſſe, adſeruere. Aſt quanti ſunt, qui falſum aliquem conceptum ſubreptitiæ concluſioni ſuperſtruere malunt, quam experientias ſollicite inſtituere, & ex his tandem juſtas legitimæque conſequentias deducere! Eadem illa, quæ hac experientia fretus teneo, adprime conveniunt hiſce, quæ Cel. D. Tyſon, (aſt quantæ auctoritatis vir!) in *Transactionibus Philoſophicis* perſcripta reliquit. Quum commoraremur (ſic Cel. Auctor) inquit, in India, incolarum quidam, varias ſerpentum ſpecies oſtendit, ac quanta cujuſvis veneni foret efficacia, ſua nobis experientia demonſtraturum promiſit. Hic protracto quodam ex majoribus, quem innoxium adſeruit; ligatum brachium ea ratione, qua ſanguinem emiſſuri utimur, viperæ irritatæ nudum obiecit; & ſanguinem ex vulnere profluentem, digitoque exceptum femori illinens, alium accepit minorem, quem *Cobra de Capelo* dictum, multo magis venenofum eſſe perhibuit. Hunc igitur ex cauda arreptum, ad emittendum ex gingivarum veſicula ſuccum quum adegiſſet, aliquam hujus liquoris portionem ſanguini, femori illito, miſcuit. Quo factò violentiſſimam quandam fermentationem in ſanguine exortam animadverti, qui velut cereviſiæ facibus excitatus in colorem abiit flavidum.

Quæ igitur experientia comprobata hic adduximus, iis, quæ de natura hujus ſucci ſupra diximus, accuratiſſime reſpondentia vides. Etenim quum & Cel. Boyle hominis ſanguinem omni aciditate carere demonſtraverit, & Cel. Pitcarnii argumentis edoceamur: quod vegetabilium ſubſtantiæ acidæ, & actione ſtomachi, quo recipiuntur, & cordis atque pulmonum, poſtquam vaſa ſanguinea intraverint, alkalinam qualitatem adipiſcantur: fluidum arteriarum ex alkali participans, & liquori cuidam mixtum, qui ejuſdem eſt naturæ, qua viperæ virus, per principia chymica effectum ſupra deſcriptum neceſſario producendum eſſe, conſtat.

Nec tamen ulteriorem pedem noſtrum, (ſic pergit Cel. James) hiſce controverſiis immiſceamus; ſufficit, collectis hiſ omnibus, lucem quandam afferre poſſe, & naturæ, & cauſæ ſymptomatum, viperæ morſum comitantium. Faciamus periculum. Salis igitur, qui veneno eſt, partes pungentes, ſeu acriores, vi quadam vulnere injectas, totidem aculeorum inſtar, & irritare notamus, & lacerare membranas ſenſibiles. Hinc convocata eodem, ac delata frequentiori ſpirituum animalium copia, (ſic docet *Bellini de ſtimulis*) partem vulnere læſam inflari, inflammari, & liveſcere neceſſe eſt. Eaſdemque partes acriores, ſanguinis partes, quibus miſcentur, ſeparare adeo, ac divellere, ut alterata penitus ejus craſi, globulorum coheſione exinde proveniente diverſiſſima, gradibus

tandem, & fluiditatis, & impulsione in partes nunc, quam ante, alias; variantibus, penitus suam exuant immutentque naturam oportet.

Hæc sunt, quæ *Cel. James*, hausta, ut ipse fatetur ex *Cel. Mead* scriptis, tradidit.

Variis interim est in diversis regionibus Galliae viperarum numerus. Copiosior in Delphinatu, & in tractibus Pictaviensi, atque Lugdunensi. Ast quamvis viperæ adeo communes sint, attamen juxta *Acta Academiae Regiæ Scientiarum*, veram veneni earum naturam, & adhuc ignoramus; nec mirum, siquidem qui & dentes viperæ, & gingivas lustraturus, manibus triverit, hunc multo periculo subjacere frequens docuit experientia. Sic *Ambrosius Paræ*, primus ex Chirurgis Caroli IX., & Henrici III., Franciæ Regum, Operum suorum Tomo 21. recenset; quod Monspelim Regem sequutus, quum dentes viperæ, ac maxillæ superioris membranas, habitas pro sede veneni, contemplaretur, a vipera unguem inter, & carnem digiti morfu læsus fuerit. Sic eques quidam Germanus, adolescens, experimentis a *Cel. Charas* circa viperæ venenum institutis, quum interesset, summum expertus est vitæ periculum. Sic alius quidam curiositate permotus, quum biennio exinde repetiti Viri *Cel. Charas* circa viperas experimentis interesset, viperæ morfu in digito vulnerabatur; & ipse *Cel. Charas*, quum præsentē Academia Regia Scientiarum quædam cum viperis experimenta institueret, non impedire potuit, quo minus viperæ morfu læderetur, quanta ipsi fuerit easdem tractandi agilitas, & aptitudo.

Viperarum nigerrimæ autem, plure, quam reliquæ, veneno abundare censentur. Sunt qui viperæ, in circulum sese contorquendi, ut serpentes solent, facultatem denegant. His autem nostra refragatur experientia. Sæpius etenim viperas Solis calorem excipientes, & capiti, quod centri locum tenebat, circumvolutas vidimus, harum aliqua, mediæ quæ erat magnitudinis, lacertæ magnæ, viridisque (cujus caput saltem concoxerat) alteram partem stomacho, alteram Oesophago continebat. Motu autem ex omni parte serpentes gaudent liberrime, & facilitate ex quocumque latere corpus vertendi. *Cel. Derham* hanc caput suum hinc illinc deflectendi facilitatem ex apophysibus vertebrarum, in capite præsertim brevioribus derivavit. Cæterum apophyses istæ pluribus musculis teguntur exiguis, quorum iidem tendines, & adtrahendis, & separandis inter se apophysibus spinosis, & vertebris in varias partes deflectendis inserviunt. Ex quo admirabilis ista profluit; qua viperæ corpus gaudet, agilitas; siquidem, ut cum *Aristotele* loquar, mater illa omnibus provida, omnibus benigna, natura, productionibus cartilaginosis vertebrae donando, flexiles easdem esse voluit; effinxit & musculos, totidem instrumenta, motui in locum ex loco inservientia. Omnibus attamen serpentibus lentiolem reptando progredi viperam, nulla agilitatis suæ ratione habita, constat. Quum, teste *Linneo*, in Suecia frequentiolem, numquam in Germania se reperisse testatur *Gordus*. Ast Malta, seu Melite, insula, & Græcia, Ægyptus, Asia, Italia, Hispania, Lusitania, Angliaque magnum earum numerum alunt. Montium, & lapidum plena, siccaque loca peramantes, nulla unquam maritima inhabitare solent. Quæ autem de coitu viperæ cum muræna docuerunt antiquiores, meram redolent fabulam. Nec inter amphibia, jure quidem, referenda venit vipera, quam naturæ instinctus numquam deportat ad

aquam. Nos vero amphibiorum classi eamdem adscripsimus, etenim aptior rem aliam ignoramus. Idem & de lacerta, bufone, salamandra, testudineque terrestri, quæ omnia amphibiorum numero adscribimus, confitendum venit ingenuis. Duabus interdum caudis, duobus nonnunquam capitibus instructas vipersas reperiri scribitur. Marfos vero, *Galen* ævo qui celebrabantur, immunitate a moribus viperæ quam gloriabantur, destitutos, plebis saltem credulitate confisos, fraude sibi fidem conciliare, idem ille adferit *Galenus*. Id quod & de his Ciarlatanis refert *Matthiolus*, qui S. Pauli stirpe oriundos dum sese gloriantur, vario artificio plebi imponunt, & spectatorum admirationem aucupant. Plura interim, quam de animalium ullo unquam, de vipera effictas hinc inde recensent fabulas; de quibus si libet, *Cel. Redi* observationes, adeas.

Græci viperam interdum dicere solent: *Ophis*, id est: *serpentem*, in excellentia, tritior tamen maris denominatio: *Echis*, & foemellæ: *Echidna*: Itali illam Latinorum instar *Vipera*, dicunt, Hispani: *Buvara*, Germani: *Natter*, *Otter*, *Brandt*, *Schlange*; Belgæ: *Adderslange*; Angli: *Viper*, *Adder*, Sueci tandem: *Hugg-Orm*. Viperæ autem nomen exinde accepisse docuerunt alii, quod magna vi, & ægritudine foetus suos pariat; alii vero *Vipera* ex *Vivipara*, contracte *Vipara* deducere student, est enim vivipara. Ast & *Cerastes*, sive bicornis, in Lybia communis, atque Arabia; & ille, quem Latini: *Cæcilia*, Galli autem: *Orvet*, *Anvoye*, *Anvot* nuncupant, viviparis sunt adnumerandi. Turoniam inhabitantes, & Moeni accolæ, *Aspic* nomen, viperæ tribuere *Cel. Belon* est, qui observavit. Foetus viperæ tandem: *Vipereaux*, *Viperillons* Galli dicere solent, cui denominationi Latina vox: *viperula* responderet.

Multo autem sale volatili, oleoque, exigua vero phlegmatis portione instructa est vipera. Medicæ interim arti eximia quædam remedia subministrat; quæ quidem interiori viperæ usum, ad sanguinis purificationem, ad reprimendas veneni vires, ad profligandam lepram, scabiem, strumam, item contra lichenes, & febres malignas, ac pestiferas, commendare solet. Virtus igitur viperæ principalior in acceleranda sanguinis circulatione conspicitur, in expedienda ejusdem mixtione, in dissolvendis lympharum concretionibus, & detergendis humoribus crassis atque glandulas constipantibus; etenim humores illi glandulis inhærentes, contracta acrimonia, variorum cutis morborum, quos scrophulosos dicimus seu leprosos, causa evadunt. Sali interim penetranti, quod ex lacertis ac talpis, quibus nutriuntur viperæ, accipiunt, prædictos feliciores debemus effectus; lacertæ etenim, & talpæ magnam, si in stomacho dissolutæ fuerint, particularum volatilium quantitatem subministrando, hanc viperæ carni qualitatem conciliant, cujus ergo & Medicinæ utilis est, & proprietatibus, quas in reliquis serpentibus herba viventibus, frustra quæsieris, conspicua.

Optima interim, quamvis simplicissima, quæ ex vipera præparari solent, sunt: juscula, gelatina, syrapi, & vinum viperæ. Jusculum præparaturus, viperam sua cute exutam, (rejectis, & capite, & cauda & intestinis, reservato tamen corde, hepate, & sanguine) in frusta conscindas, tum addito aquæ communis vitro, addito & pro lubitu herbarum convenientium pugillo, & quarta volatilis alicujus parte; vasi insuper massa farinacea probe obturato, immissam pro conservando, & spiritu, & sale vo-

latili,

latili, hi enim jusculi præstantiam constituunt, quinque per horas in balneo Mariæ ebullire sinas. Gelatinam præparandi ergo: accipias viperarum quotquot lubet, has vero eadem ratione, qua jusculo inserviebant, præparatas, addita aqua sufficiente, quinque per horas in balneo Maris ebullire, tum expressione fortiori colari, decoctionem denique in Maris balneo evaporari sinas, & loco frigidiori, ut gelati consistentiam accipiat, exponas. Et hanc quidem, quum illo uteris, per cochlearia recipias. Syrupi autem conficiendi modus, omnibus in Officinis notissimus est, atque communis, cujus ℥ij. ad ℥j. dosim præscribere solent. Vinum denique viperæ, ex musto, viperis frustatim dissectis infuso, constat. Peracta etenim utriusque fermentatione, vinum colabis, & servabis ad usum. Cujus vitrum deinde unum mane, jejuno stomacho per aliquod tempus continuando, accipias. Omnia, quæ recensuimus, quæque ex vipera proficiuntur, remedia, simili virtute gaudentia, deperditas ex morbo pertinaciori, vires restaurare, & massam sanguinis, fermento quodam maligno si infecta fuerit, purificare valent.

Bina in officinis alia ex vipera reperiuntur composita, his, quæ recensuimus æquivalentia, pulvis nimirum viperæ, ac trochisci. Pulverem igitur præparaturus, caput viperæ, & caudam refecet, cuti, si placet relicta, etenim & huic sal volatilis inest; tum rejectis tantummodo intestinis, viscera probe abluat, reliqua conscindat in frustula, & cucurbitæ immissa, per balneum maris exsiccat; seu calido ex loco, & umbroso suspendat viperam, usque dum penitus arefacta, amisso suo phlegmate omni, nil nisi salem volatilem, oleum, & reliquas partes sibi essentielles retineat. Tunc una cum visceribus, probe exsiccatis, in mortario marmoreo conteratur, & inter conterendum spiritu vini, camphora, seu myrrha, imprægnato irrigetur, additis circa finem aliquot guttis olei caryophyllorum destillati, in pulverem reducatur; & vasi probe obturato immissa omnia, viperæ pulverem præbebunt. Qua cautione adhibita, nec vermes quod extimescas, habes, nec corruptionem. Pro dosi veniant gr. xij. ad ℥ij. Trochiscis vero viperæ præparandis, trunci, jecinora, & corda viperarum, prædictum in modum exsiccata inserviunt; ex quibus, si in pulverem fuerint redacta, addito, quod tragacantinum dicunt, gummi, vino Hispanico dissoluto, trochisci formantur, quos Balsami Peruviani aliquot guttis unctos, illitosque a vermibus præmunire solent. Horum dosis esto ℥ss. ad ℥j. Hi interim trochisci multo præstantiores habeantur illis, quos micis ex pane admixtis, & antiquiores, & ex officinis hodiernis quidam præparare solent. Prædominans scilicet in iisdem panis, facit, ut arefacti, nullius porro sint saporis, nullius efficacæ, imo coctione, (etenim ebulliuntur) viperæ omnem evaporatione amittunt salem, quo gaudent, volatilem. Cujus ergo, & recentiorum aliqui, theriacam componendo, hisce viperæ trochiscis, Bezoar Animale substituere solent.

Compositorum, quæ descripsimus optima interim habeantur priora, his enim potiore virtutem adsignamus, atque efficaciam, quæ quidem plura ex principiis viperæ conservarunt. Longe autem continuatus eorum requiritur usus, quum de expellendo, ac extirpando fermento massam sanguinis inficiente agatur. Parcius namque adhibita, malum leniendo, diminuent saltem, nec, quo minus brevi fortius redeat, impedient. Quo co-

gnito Medicorum antiquioribus usui venisse censemus, quod diutinum vel viperarum in craticula assatarum, vel vini ex viperis usum præceperint ægrotantibus, ac morbos vel pertinacissimos hoc medio depellere valuerint. Sic *Antonium Musam*, Augusti Medicum, ulcera, quorum sanatio impossibilis credebatur, viperarum decoctionibus sanasse refert *Plinius*. Imo feminam sterilem atque leprosam, adhibitis viperæ jusculis, & a lepra sanatam, & filiorum probe sanorum matrem exinde factam esse *Helidæus Patavinus* docet in *Observationibus*.

Cor tandem viperæ & hepar arefacta pulverem præbent, qui *Bezoar-Animalis* nomine venit, quique iisdem, quibus viperæ corpus virtutibus gaudet, & jusculo seu liquori convenienti, dosi gr. viij. ad ℥j. admisceri solet.

En igitur simpliciora viperæ præparata ac usui interno venientia; jam illa exponamus, quæ eadem quidem virtute, at forma diversa ars Chymica subministrat, quæ sunt: aqua distillata, spiritus, sal volatilis & oleum viperæ. Aquam destillatam recepturus: accipe viperas viventes, easque cucurbitæ vitreæ immittas, adapta ac probe obtura recipientem cum stillicidio, deinde per B. M. extrahe, quantum humiditatis educi potest. Cujus aquæ, sale volatili abundantis ℥j. ad ℥ss. pro dosi, cum alia quadam aqua adpropriata si exhibueris, numquam non sudorem elicies. Reliquis usitiora ex his, quæ destillatio viperæ præbet, sunt: spiritus & sal volatilis. His enim, nec nisi his, maxime essentielles viperæ virtutes insunt; hinc contra febres malignas, contra variolos, Apoplexiam, Epilepsiam, Paralyfin, adfectiones hystericas, & cujuscumque animalis venenosi morsus, frequentissima adhibentur, dummodo omni prorsus inflammatione careat morbus; etenim quum sanguinis motum accelerent media ista, cautione circa usum eorum opus est maxima, at exfulante inflammationis periculo omni, nil habes, quod timeas. Spiritus viperæ gutt. x. ad xxx. salis autem gr. vj. ad xvj. cum jusculo, potione seu syrupo conveniente præscribuntur. Oleum fœtens distillatione elicitedum, ad profligandas mulierum adfectiones hystericas, odoratum illis exhibetur, quod & linimenti instar, partibus Paralyfi adfectis adplicetur, dummodo maximum ejus fœtorem perferre possit ægrotans.

Quod ad externum viperæ usum spectat, adeps ejus eximio cedit auxilio contra nervosarum partium adfectiones, & in primis articulorum, a causa quadam externa proficiscentes, quo referas: contusiones, plagas, ictus, similia. Opitulatur & pustulis, plagis, ulceribusque oculorum, quidquod Ophthalmiæ; penicillo enim subtiliore si leniter obleveris oculum; hunc adipem solum, instar præstantissimorum collyriorum esse experieris. Teste *Etymullero* ad delendas confert faciei rugas, & pulchriorem ipsi colorem conciliandum, si vel in substantia, vel Balsamo Peruviano mixtus adplicetur. Illum comparaturus, primo sollicitè ab intestinis separabis, tum subdito lentiori igne, in patina argillacea, liquefacies, post fortiori expressione per linteum densius percolabis (quo membranæ omnes abeant) refrigeratum denique vitreo vasi immissum servabis ad usum. Oleum viperæ simplex præparaturus, viperas ollæ fictili vernice obductæ, & orificio angustiore ac probe obturato instructo immittas, parciore igne eo usque excoquas, quo caro omnis ab ossibus abierit. Refrigerata omnia fortiori

expressione colabis & f. a. u. Cujus eximia virtus est contra morsus serpentum, aliorumque animalium venenosorum; imo linimenti instar adhibitur, lichenes, scabiem, aliosque cutaneos morbos depellere valet.

Monilia etiam ex capitibus viperarum composita, contra anginam spuriam magni aestimantur.

Quam periculosus interim sit viperæ morsus, quodque, nisi citiori medio caveatur, & tempus supersit veneno, ut vasa sanguinea ingressum, sanguinem coagulare valeat, hæc inquam, neminem latent.

Morsum concomitantia symptomata sunt: dolor in parte læsa acutior, tumor ab initio rubicundus, post lividus, & sensim partes adjacentes invadens. Tum syncopæ vehementiores, pulsus celer, profundus, nonnunquam & intercisus, stomachi nausea, vomitus biliosus ac convulsivus, sudores frigidi, interdum & dolores in regione umbilicali, imo, nisi citissima media adferantur, mors ipsa; rarius enim naturæ vires superandis veneni viribus sufficiunt, quod si fuerit, tumor hic cum inflammatione diutior perdurat; quidquod fortior sæpius est decrescantibus symptomatibus, quam quidem ineuntibus. Interdum & materiam purulentam reddit vulnus, pustulis exiguis circa illud oborientibus, & cute tota tamquam ab ictero profectum colorem flavum induente. Interim pro varietate climatis, & caloris, & anni temporis, & vehementiæ iræ viperæ, & ejus magnitudinis, & quantitatis veneni, aliarumque circumstantiarum, diversa equidem est symptomatum violentia; at eadem semper fere ratione in objecto conspicienda veniunt, dummodo veneni effusio, symptomatum causa, morsum comitata fuerit.

Morsui viperæ subventurus igitur eo studeat, ut venenum vulnere immissum enervetur. Hinc ad externa æque ac interna remedia confugiunt. Quod ad illa spectat, ante omnia partem fauciatam vulnere superius fortissime constricto ligamento cingunt, quo penetraturi veneni transitus intercipiatur; quod si autem ligari nequeat pars læsa, caput, vel viperæ fauciantis, vel si desit, alius, illudque probe contritum vulnere adplicetur; vel cultrum aliamve laminam ferream candescentem, quam proxime fieri potest, vulnere admoveas, ut quantum caloris perferre valet agrotans, experiatur; vel vulnere inspersum pulverem nitratum accendas; vel scarificato vulnere theriacam, sive allium cum Sale Ammoniaco contusum adplices. Cel. James in *Lexico Medico*, axungia viperæ vulnus recens probe adfricandum esse suadet; mediumque hocce unicum non solum sufficiens, sed & Anglis, qui viperas captando occupantur, usitatissimum esse docet. Axungia etenim illa quum viscidis constet partibus atque tenacibus, magis activis magisque penetrantibus, quam plurimæ substantiarum oleosarum reliquæ; probabile est: hac sua essentia illam salia veneni volatilia involvere, & evolutionem eorum impedire. Qui quidem veneno viperæ occurrendi modus, & natura sua simplicior est, & majori facilitate sese agrotanti commendat; quem copia Antidotorum & theriacæ intus sumpta excruciare, superfluum est; sufficiunt aliquæ doses salis viperæ volatilis, prout necessitas postulaverit, reiterandæ, quibus copiosior statim sudor eliciatur. Sali viperæ, si libet, substituatur sal cornu cervini, sal urinæ, sal cranii humani, vel theriaca vetustior: Opium enim, theriacæ quod inest, in recentiore nondum sufficiente fermentatione rarefactum, ad retinendum

potius venenum facit & condensandos humores, quam ad rarefaciendos, ac virus per sudores expellendum.

Aliquot anni sunt, ex quo tempore Anglus quidam oleum olivarum pro medio contra morsum viperæ commendavit, eoque partem fauciatam ablui docuit; si autem profundior fuerit plaga, membrum integrum cerato, ex oleo prædicto & cerussa composito involvi; ast virtuti hujus medii obstant experimenta a Viris Cell. *Geoffroy* & *Hunauld*, testibus *Actis Reg. Scientiar. Academiæ*, anni 1737. instituta. Hinc superius exposita, tamquam tutiora commendamus. Quacumque interim medela externa utaris, nec internum mediorum usum negligas; etenim viperæ venenum subtilissimum, vel quavis cautione adhibita, vel quocumque modo foras adtractum, sanguinem ingreditur. Hinc remedia sanguinem veneno coagulatum dissolventia, circulationem ejus promoventia, & transpiratione pariter ac urinæ per viam omne id expellentia adhibentur, quod forsan veneni in massa humorum remanserit. His indicationibus salia animalium volatilia sufficiunt, hæc enim alkalina, & admodum volatili, attenuante, sudorifera & aperitiva virtute gaudent; ut sunt: sal viperæ, cornu cervini, cranii humani, urinæ, theriaca vetustior, aliaque antidota, quorum præcipuam virtutem sal eorum volatilis constituit. Horum igitur auxilio, & usu interno, pro necessitate reiterato, viperæ venenum certissime enervare valebis, sudores & transpirationem copiosam provocabis, venenum elicies. De quo, si quod tibi superest dubium, illud, quæ ex *Actis Reg. Scient. Acad. anni 1747.* descripta nunc subnectimus, hæc inquam, illud omne præscindent.

Die ix. ante Kal. Augusti 1747. Vir Nobil. *de Jussieu*, junior, in collibus Montmorancii herbas colligebat, discipulosque habebat socios. Horum unus viperam, quam colubrum credidit, manu arripiebat. Et statim viperæ irritata, tribus eum moribus, alio in pollice, alio in indice manus dextræ, alio tandem in pollice sinistræ, fauciat. Statim exinde digitorum torpor, tum tumor subsequabatur. Celerrime progrediens tumor manum totam invasit, digitos haud amplius flectere valebat. Talis Magistro suo, Cel. *de Jussieu*, aliquot centum passibus remoto adportabatur. Hic conspecta cognitaque viperæ vigente ac maxima, læsionis causa, perterritum juvenis animum, spe salutis brevi recuperandæ erigebat. Tum ille, & ratione & experientia sæpius reiterata certus, quod alkali volatile, exemplo suppeditatum certissimo veniat medio in hujusmodi morbis: aquæ Lussæ, (sive præparati cujusdam ex alkali volatili, quod oleo succini jungitur) hanc enim casu ad manus habebat, gutt. vj. cum cyatho aquæ ægrotanti exhibebat, quodvis vulnus eadem irrigabat, lavabat; hæc omnia 1. hora pomeridiana, Solis æstu fervente, gerebantur; hora 2. pomeridiana cordis doloribus ac deliquio corripiebatur ægrotans, cui quum alii ligando brachium dextrum valde turgescens occurrere vellent, Vir Cel. removeri jussit ligaturam, & secundam dosin medii ejusdem cum vino præbuit, cessavit deliquium. Tum bini discipulorum ægrotantem, quo pernoctare possit, conducebant; his sui cura injuncta erat a Viro Cel. imo, ut redeunte deliquio medii usum continuarent, jussi erant. Bina succedere, & lecto detentus delirii signa quædam edidit, ac quidquid cibi inter prandium ceperat, evomit. Aliquot doses alkali volatilis ministrabantur, symptomata evanescere. Cessante vomitu, quieto somno fruebatur.

Octava tandem vespertina accedens Cel. de Jussieu, statum ejus meliorem, nec nisi copioso sudore valde debilitatum reperit ægrotantem; Noctem transegit placidam; postridie manus adhuc turgescences, oleo olivarum admixto aliquantulo alkali volatili, ungebantur. Citissimus effectus medio respondit; vix $\frac{1}{2}$. hora effluxo, digitos quomodocumque flectere valebat ægrotans, ipse suis se vestimentis induebat, jentaculoque abundantiore pascuus Parisios revertebatur; deinde confirmata in dies sua salute, elapsis 8. diebus integram recepit. Nec non tumor, torporque manuum, & color flavidus, a tertia ex vulnere die in brachiis oborti, eodem illo remedio profligabantur, cujus gutt. ij. ter in die, cum cyatho sui potus accipiebat.

Viperæ pulvis & Orvietanum commune, & Theriacam Cœlestem; & pulverem & salem volatilem, qui Orvietano nobili Officinæ Parisiensis insunt, ingreditur. Gelatina Viperæ pulverem chelarum cancri, & trochiscos theriacæ communis ejusdem Pharmacopoeiæ intrant.

Rx. Pullum gallinaceum exenteratum & plumis exutum, num. j.

Ebull. per bihorium cum s. q. aquæ fluviatilis ad remanentiam duorum jusculorum. Tum add.

Viperar. pelle exutar. num. ij. & rejecto capite, felle & cauda, conserves cor, pulmonem & hepar, omniaque frustratim conscind. Post add.

Borragin.

Cheræfol. ana pugill. j.

Bull. omnia per 3. horas cum jusculo prædicto in olla tecta, & massa farinacea probe obturata. Col. & divid. in 2. juscula, quorum alterum mane, jejuno stomacho, alterum quinta pomeridiana hora per mensem integrum exhibeas.

Hæc juscula ad purificandam sanguinis massam, contra scabiem, lichenes, strumas, aliosque cutaneos morbos, inflammatione carentes, faciunt.

Rx. Aquæ Bardanæ

cardui bened. ana ℥iij.

Pulver. oculor. cancr. ꝑ.

Antimonii diaphoret. ana ʒj.

Sal. viper. volatil. gr. xij.

Syrupi capil. vener. ℥j.

M. f. syrupus, pro diarrhœa serosa conveniens.

Rx. Conservæ fumaris ʒj.

Syrupi cariophyllor. q. f.

M. f. bolus, pane oblato obducendus, cujus ope scabies retrocessa, sudore, denuo expellitur.

Rx. Aquæ scabiosæ

cardui bened. ana ℥iij.

Syrupi papaver. rubr. ℥j.

Diascordii

Theriacæ veteris

Pulver. viper. ana ʒj.

Spirit. viper. volatil. gutt. xxx.

M. f. haustus anthelminticus atque alexiterius, per cochlearia sumendus.

Rx. Theriacæ veteris gr. xij.

Flor. papaver. rubr. pulverisat.

Pulver. viper. ana gr. x.

Antimon. diaphoret. gr. viij.

Salis viper. volatil. gr. v.

M. & cum f. q. syrupi cariophyllorum f. bolus, ad sudorem ciendum idoneus.

Rx. Tutia p. ℥j.

Lapid. hæmatit. ℥ij.

Aloes optim. p. gr. xij.

Margarit. p. gr. jv.

M. & cum f. q. adipis viperæ in mortario marmoreo vel vitreo agitur, donec abeat massa in perfectum collyrium, quod linimenti instar contra quoscunque oculorum morbos veniat, & matutino tempore æque ac vespertino, per aliquod tempus, adhibeatur. Quod collyrium, a Celeb. *Hansloane*, D. & Medico Londinensi Experientissimo publici juris factum, pluris æstimatur, contra presbiopiam, lippitudinem atque ruborem oculorum.

Serpens. Offic. Schrod. 305. Dal. Pharm. 413. *Anguis*. Gosa. de Serp. 43. *Anguis*, *Coluber* Merr. Pinn. 204. *Serpens*, *Anguis*. Schvenkfeld. Rept. Sil. 137. *Natrix torquata*. Aldrov. Hist. Serp. 287. Jonst. de Serp. 29. Raii de Serp. 334. Charlet. Exerc. 35. *Anguis vulgaris fuscus*, collo flavescente, ventri albis maculis distincto. Petiv Mus. 17. *Anguis scutis abdominalibus* 177. *Squamis caudæ* 85. Amph. Gyllenb. Linn. Faun. Suec. 259. *Anguis seu serpens torquatus*; *Myagrus veterum*; *Hydrus*, *chæsydrus*, sive *Enchydris minor*, *Coluber aquaticus vel stagnorum incola*. Nonnull.

Colubri crassities media, longitudo eximia, magnitudo interdum notabilis est. Capite gaudet paullulum lato atque depresso, cujus extremitas rotunda esse solet ac mollis. Gulam ejus probe fissam & amplissimam denticuli adunci & guttur versus inclinantes muniunt. Collum vero, prope ad caput gracile, ex superiore sua parte plures maculas flavidas seu albidas, dimidium monilis partem constituentes ostendit. Hoc autem monile, huic præcise serpenti proprium, & nomen Gallicum: *Serpent a Collier*, sive: *serpens monili instructus*, ipsi conciliaffe videtur. Tum macula magna & triangularis, apice caudam respiciente, in utraque basi monilis adparet. Et squamæ verticis amplissimæ, reliquis obscuriore colore conspicuæ. Maxilla superior ex lateribus albida, ac 5. vel 6. lineis perpendicularibus nigris ornata. Corpus ventrem versus crassissimum, tum crassitie paullatim decrescens, tandem vero in caudam subtilissimam desinens. Dorsum nigrum seu cinereo fuscum præbet colorem; pars corporis inferior prope caput, candidissimum, maculis tamen aliquot nigris conspersum in lateribus; venter denique, albidum cœruleum & nigrum inter se mixtos, ita quidem, ut maculæ nigræ & numero & magnitudine usque ad anum ac caudæ apicem sensim exaugeantur, ibi autem, præter binas extremitates albido-cœruleas, reliquæ squamæ omnes nigræ sunt. Squamæ simplices, longæ & transversales obtegunt ventrem; squamæ exiguæ, lineisque nigris, in extremitatibus squamarum ventris exortis, & per intervalla dorsi medium versus adscendentibus variegatæ, hæc inquam, squamæ sunt superfici corporis. Numerus igitur linearum 80. utrinque excedit; imo duæ præter ea series sunt macularum nigrarum minorum haud facile cognoscendarum,

darum, quæ caput superne transeundo ad caudam procurrunt. Colore igitur serpens vario est, teste *Linneo*; nec lingua, visceribus & intestinis multum a colubro differt, nec hujus instar, fœtorem edit. Cæterum, quum in maxillis ejus non reperierimus dentes longos sive caninos, acutos, inflexos, & venenum vulneri, morsum excipienti, instillantes, quales in vipera observavimus; nec nisi duplicem seriem denticulorum, ferræ instar efformatam & utrique maxillæ inhærentem: serpentem impune manibus contrectari posse censemus. Accedit *Vormius*, & plures, ait, nudis manibus serpentes tractasse, imo vel in sinu portasse, nec tamen molestia ulla adfectos fuisse, constat. Adsentitur & *Cel. James*, ac, innoxius est, inquit, serpens ille, quam infestus plerumque habeatur; nec morsus suos periculum excipit; viperæ culpa sæpius in illum redundat. Sic quoque coluber veneno caret.

Nec viviparis adnumerandus est serpens torquatus, sed in foveis meridiem respicientibus, ac in littore stagnorum obviis, plerumque in sterquiliniis sua ova deponit, quæ dum vel solis vel fineti calore incalescunt, excluduntur. Glutinis cujusdam ope cohærentia ova 18. ad 20. racemum oblongum ac quadratum constituunt. Ova ipsa oblonga sunt, albida, picæ ovorum magnitudinem exæquantia, alia diaphana, quæ aquæ supernatant, alia autem opaca & plena, quæ fundum petere solent; singula autem membranæ tenui, compactæ tamen ac densioris texturæ involuta; singula serpentulum sibi ipsi circumvolutum, humore glareoso ac albumini simili circumdatum, placenta tandem (cujus funiculus umbilicalis nectitur abdomini, pollicis intervallo ab ano) instructum, continent. Aperi ovum, & animalculum prodibit primo quidem immobile, deinde sese extendet, motus quosdam producet, nec reptandi facultate pollebit. Collum in fœtibus, proportionis ratione, crassius esse, quam in serpentibus ipsis, observat *Gesnerus*.

Aliis quidem in terris copiosus, in aliis autem infrequentior Serpens, de quo agimus, humida loca peramat, & paludosa; prata & arbuta æstate, hyeme autem foveas in pede arborum vetustiorum, vel terram congestam, sæpium fundamenta, torpidus ac delitescens tenere solet. *Vormio* teste, ex herba, insectis, & quodcumque obvenerit, alio vivit; vescitur & muribus, gliribus, lacertis ranisque. Ruriculæ sunt, qui narrant, quod vasa lactis, quod peramat, plena, sæpius adrepat, lac hauriat; quod vacarum cruribus circumvolvatur, & ubera exsugat tanta cum aviditate, ut sanguinem denique pro lacte eliciat; id quod antiquiores de serpente aquatico: *Bua* dicto, & a nostro diversissimo, prædicavere. Addunt: quod si, ut sæpius accidit, os apertum hominis, prope fluminis ripam dormientis, ingressus fuerit, lactis ebullientis vapore elici possit atque evocari.

Vel exiguus magna tamen gutturis apertura, magno gaudet jugulo, & œsophago amplissimo, nec non magnæ dilatationis capaci; hinc mirum non est, quod mures, glires, imo majora animalia integra deglutire valeat. Maximum ranarum exstirpat numerum; quarum si quam ceperit, nec captæ renitentia cogitur, nec clamore lamentabili flectitur, integram deglutit, nec manducando comminuit; unde nonnunquam accidisse novimus, ut rana, brevi ante a serpente deglutita & semimortua, deinceps autem liberata, recollectis viribus, ad aquam profilierit. Alacer jam
aqua

aquæ innatat, jam repit in terra. Adcuratissimi sunt, (sic *Derham* in *Physio Theologia* sua) & tantum non geometrice determinati tortuose deflectentes motus serpentis qui repit. Singulari etiam ratione conformatæ sunt squamæ annulares, repenti inservientes. Ventræ squamæ enim situm transversalem, & squamis dorſi corporisque reliqui contrarium, tenent. Imo squamarum a capite ad caudam omnium singulæ superiores, singulas subjacentium margine suo obtegunt, aſt margines harum ea ratione prominent, ut squama omni vel retracta, vel musculi ſui ope quomodocumque converſa, margo ejus exterior paullulum recedat a corpore, & pro pede veniat, corpori ſuſtinendo, promovendo, ac repentis motui facilitando. Hanc squamarum constructionem, nullo negotio, in exuviis, ſeu ventre serpentis cujuſcumque obſervabis. Aliud ſuperest ſtructuræ serpentis admirabile, quod ut adcuratius diſquiram illa obſtitit averſatio, qua ex natura feror in animalia iſta. *Cel. Tyſon* D. ſcilicet, quum in serpente tinnitum edente obſervaverit: quod ſingulæ squamarum ſuo musculo gaudeant, cujus altera extremitas ſquamæ ipſius medio, altera autem margini ſuperiori ſquamæ ſequentis cohæreat; ego autem non habeo, quod dubitem, ea & reliquorum ſerpentum ſquamis eſſe communia.

Peculiari etiam apud Latinos nomine: *Natrix*, quaſi *Natatrix*, ob natan-di facultatem dicitur. Græcis audit: *Hydrus*, *Cherſydrus*, *Enbydris*, ſiquidem in terra pariter ac aqua vivit; imo & *Myagrus*, quia mures captat & glires; Itali illum dicunt: *Maraffo d'acqua*, Germani: *Natter*; Belgii: *Schnaecten*; Angli: *Watter-Adder*, Sueci: *Tomt-Orm*, ſeu *Ring-Orm*. Gallice dicitur: *Serpent a Collier*, *Couleuvre d'eau*, *d'étang*, *de Marais*, *Couleuvre ſerpentine*, imo: *Anguille de haye*, anguillam arbuſtorum. Alii igitur illum tamquam anguillam pro cibo adpetunt; alii autem, quamvis immerito, morſus ejus venenofos atque adeo infeſtos eſſe perhibent, quam quidem viperæ.

Multum natrix continet olei & ſalis volatilis. Caro ejus, & hepar cum corde ſudorifera gaudet virtute, ac humorum malignitati obſtat, febres intermittentes proſtigat, ſanguinem expurgat, urinam provocat. Quæ omnia in fruſtula diſſecta, deinde autem in B. M. lenioris ope ignis exſiccata reducuntur in pulverem, cujus ꝑſ. ad ʒſ. ſeu ꝑij. pro doſi commendantur. Pulvis hic, tamquam ſpecies Bezoar-Animalis, ex viperæ proſecto ſubſtitui poteſt, eiſdem enim qualitatibus, virtute tamen debiliore gaudet. Aliquantula Theriaca vel Confectione Hyacinthi admixta, fiat bolus; vel potioni cuidam Diaphoreticæ admiſceatur, & ægrotanti exhibeatur. Quæ autem de natrice diximus, cadunt & in colubrum, apud nos communem; iſdem uterque conſtat principiis, iſdem gaudet virtutibus, idem ſit utriuſque uſus. Serpens vero integer, pelle exutus, & capite, cauda ac inteſtinis rejectis, contra atrophiam, lepram, ſcabiem, lichenes inveteratos, alioſque hujus generis morbos commendatur, ubi ſcilicet a fermento heterogeneo ſanguinis maſſa purificanda, & tranſpiratio lenis excitanda, & vires reſtaurandæ, & ſterilitas removenda erit. Hujus ergo vel in craticula aſſatus cibo veniat; ſeu ollæ probe occluſæ immittatur, & per B. M. juſcula eliciantur. Vas autem, quam diligentiffime fieri poteſt, obturandum eſſe memento, ne quid abeat ſpiritus & ſalis volatilis, præcipuam ejus virtutem conſtituentium.

Venenofam ſerpenti qualitatem plerique, aſt immerito, tribuunt. Adta-
men

men hoc commune habet cum animalibus aliis, quod, si ad iram concitatus fuerit, morsus ejus, alias innoxius, fiat infestissimus. Contra morsum ejus optima sunt: Bethonica, Caryophyllata silvestris, agrimonium, Pastinaca aquatica, similia. Unius vel duarum plantarum ex recensitis folia contusa vulnere imponas, & succum ejus vino mixtum haurias. Vel si plura addere velis, salis viperæ vel theriacæ dosim, item cor serpentis cum hepate, pro cibo exhibeas.

More apud Italos communi & alimento veniunt serpentes, & præparando vino prophylactico; magni ducuntur, etenim & ad stabiliendam corporis salutem, & ad vitam prorogandam illos facere censent. *Lotichius* in *Observationibus* pag. 425. exemplum adfert alicujus, qui continuo carnis serpentum usu, longæva & provecta ætate vixit. Et quemdam Baviaræ Ducem sobolis procreandi facultatem adquisivisse referunt, quum pullis gallinaceis, quos serpentibus saginaverant, nutriretur. Destillatione tandem spiritum saleinque volatilem ex serpentibus eliciunt, & hujusquidem gr. vj. ad xv. illius autem gutt. x. ad xxx. pro dosi, contra febres purpuratas, malignas atque pestilentes, arthritidem vagam insuper commendant. Potionibus sudoriferis, morbis istis adpropriandis adduntur, si qua indicatio promovendi sudoris adest. Hepar serpentis arefactum cum aqua cinnamomi, partu difficiliore laborantibus præbent, dummodo exfulante erethismo & inflammatione matricis omni, sola partium imbecillitas & atonia partus difficilioris causa fuerit; alias etenim inflammatio adaugeretur, malum in pejus abiret. Vertebris ejus arefactis & in pulverem reductis virtus absorbens ac diurética inest; usus vero pulveris est infrequentissimus.

Externum quod spectat serpentis usum, Ars Medica adipem ejus & exuvias adhiberi docet. Adeps scilicet, linimento veniens, tumores scrophulosos emollit, ruborem oculorum profligat, aciemque eorum exacuat, & arthritidis sedat dolores. Hunc præparaturus adipem intestinis adhærentem liquefacias, tum vero coles, ut a membranis separatus olei limpiditatem adsequatur. Exuvias serpentis vino excoquendas, & decoctionem auribus, ad leniendos eorum dolores, instillandam esse, docet *Dioscorides*, quæ gargarismi instar adhibita, dentium adfectionibus mederi dicitur; pro quibus tamen *Aëtius* exuvias comburendas, & pulverem exinde proveniente, oleo admiscendum, tum vero denti excavato immittendum esse suadet, quo brevibus dolor recedat omnis. Teste *Schrodero*, exuviis sua sponte abeuntibus magna inest virtus ad partum faciliorem reddendum, si cinguli instar, ventrem & femora parturientis cinxerint; imo eadem ratione hydropicis adplicatæ lympham per urinas propellere dicuntur. Quarum pulverem, *Horstius*, contra effluvium capillorum, & ad eliciendam comam commendat; imo pulveri cancerorum mixtum, nervorum ac tendinum vulneribus inspergendum esse docet, quo facto vulnera recentia, præsertim oculorum, brevi temporis spatio sanata fore promittit.

℞. Carnem Serpentis, exuviis ejus subtractis, ac capite, cauda & intestinis rejectis, cor cum hepate conserves. Conscindas per frustula, & additis, quarta parte pulli junioris, atque cherefolii manip. j. bull. omnia in B. M. per quinque horas in vase optime clauso. Tandem fortiore expressione col. ut habeas jusculum contra scabiem, lichenes.

inve-

inveteratos, aliosque cutaneos morbos qui sanguinis purificationem exposcunt, optimum.

℞. Pulveris Serpentum ℥ij.

Radicis Valerianæ

Angelicæ

Pimpinellæ

Folior. rutæ ana ℥j.

F. omnium pulvis subtilissimus, cujus ℥j. ad ℥ij. pro dosi, cum vehiculo aquæ cardui benedicti, febris purpurata, maligna & pestilenti detentus accipiat.

L A C E R T U S.

Variæ sunt lacertorum species. Reliquis autem notiores ac præcipuo Medicinæ usui venientes esse scito: 1. lacertum vulgarem, 2. lacertum viridem, utrumque nostratem, 3. Scincum, quem ex aliis terris ad nos deportant.

Lacertus. Offic. *Lacertus terrestris*. Schrod. 342. *Lacerta*. Dal. Pharm. 432. *Lacertus cinereus*, Schvenckf. Rept. Sil. 149. *Lacertus vulgaris*, Gesn. de Quad. Ovip. 32. Aldrov. de Quadrup. Ovip. 627. Jonst. de Quadrup. 133. Charlet. Exerc. 28. Raii Syn. Animal. Quadr. 264. *Lacerta vulgaris velox*, Petiv. Mus. 19. n. 116. *Lacerta pedibus inermibus, manibus tetradactylis, palmis pentadactylis, corpore livido, linea dorsali fusca duplici*, Linn. Faun. Suec. 254. *Lacertus parvus nostras, seu Lacertus communis in hortis degens; Lacerta Heliaca, vel Solaris minor*, Quorumd.

Lacertus, quem alii, immerito tamen, insectis adnumeravere, varius est colore, varius magnitudine. Corporis longitudo plerumque 5. ad 6. latitudo autem $\frac{1}{2}$. digito absolvitur. Capite instructus est triangulari, plano, ac magnis squamis obtecto; rostro gaudet ovali & molli; oculis scintillantibus, quos suæ palpebræ tegunt; auribus tandem in posteriore capitis parte obviis, rotundis, ac probe apertis. Rictum lacerti magnum duæ maxillæ efformant, utraque longitudine eadem, utraque denticulis parum aduncis, & rictum versus inflexis, munita. Quatuor lacerto sunt pedes, anteriores breviores posterioribus, singuli autem exeuntes in manum, 5. digitis tenuissimis, longitudinis diversæ, (longissimus enim est qui tenet indicis locum) & unguiculos, instar hamorum aduncos ostendentibus, instructam. Corporis pars superior omnis cinereo plerumque colore conspicuus, & vario in lateribus, pelle tamen squamosa obductus est. Ast pars inferior gutturis, cuculli instar efformata & fulvido colore prædita. Varii sunt qui ventrem viridi-cœruleum obtegunt, squamarum ordines quadratarum, ac multa magnitudine illas superantium, quæ partem corporis superiorem muniebant. Anus satis magnus paullulum sub pedibus posterioribus situs est; & cauda rotunda corporis longitudinem exæquat, ast crassitie sensim decrescit, nec nisi unum atque eundem præbet colorem. Lingua rubicunda, longissima atque depressa extremitatem exhibet bifidam. Pulmo, cor, lien, renes exigui & testiculi lumbis adhærentes, his avium partibus respondent. Hepar vero magnum & coccinei coloris immediatum sub Diaphragmate tenet situm. Stomachus denique haud adeo magnus est, & intestina gracilia paucis circumvolutionibus absolvuntur.

Duplex, (inquit Cel. *Ridi*) interdum & bifidum genitale membrum, serpentum more, est lacerto masculo omni; nec tamen aculeos in vipera, mare obvios, reperi in lacerto. Sæpius duplici imo triplici cauda gaudent, qualibus plebs credula semper & ignara, virtutes nescio quantas, tribuere solet. Cæterum testudines terrestres per 18. vyperas per 10. & lacertos 8. per menses, vitam absque nutrimento sumto conservasse observavi; hæc animalia igitur vel nihil prorsus, vel parum cibi hyeme capere concludo.

Vir Cel. *Needham*, Reg. Soc. Londinens. Sodalis est, cui *Novas Observationes Microscopicas* debemus. Has inter capitulum de lingua lacerti exstat, in quo sequentibus sese exprimit:

Lacertus in Lusitania, forsan etiam in reliquis terris calidioribus non solum frequentissimus, sed & magnæ utilitatis auctor habendus est. Infinitum enim numerum muscarum aliorumque insectorum extirpat, quorum, si hostibus carerent, nimia quantitate obrueremur. Figura ejus omnibus notissima, mea nunc descriptione non eget. Exposuisse sufficiat, quod, quæ corpus totum obtegunt, squamæ, Microscopio observatæ jucundissimum spectaculum exhibeant oculis. Oviparum animal est lacerta, ovaque sua in ruinis deponere, eoque se ipsam, hyeme recipere solet; aeris calor ad excludenda ova sufficit. Nec *Plinius* tantum & alii ex antiquioribus, sed etiam Cel. *Marchant*, (ut *Acta Reg. Scient. Acad. anni 1718.* loquuntur) observavere, duplici aliquoties cauda instructum esse lacertum. In Lusitania præsertim frequentissimi tales reperiuntur; quum autem nil ibi copiosius, nil magis commune, quam quod pueros videas, qui variis modis lacertos excruciant; & caudam, puerorum petulantia, secundum longitudinem fissam esse, deinde autem, sanato utriusque partis vulnere, in caudam duplicem abiisse possibile est; in locum, scilicet, caudæ vel integræ vel ex parte deperditæ, aliam sæpius succrescere constat. Exemplorum cumulus mihi est. Et huic quidem caudæ jacturæ, vel inter se colludentes lacerti, magno opere subjacent; vertebræ enim osseæ minores, caudam eorum constituentes, summæ sunt fragilitatis, & faciles inter se separantur. Quo fit, ut in pluribus lacertis magnitudine sibi similibus, caudam alius longiorem, alius vero breviorē observare poteris. Quam quidem caudæ reproductionem quum suis experimentis comprobare vellet Celeb. *Marchant*, numquam expectatum successum illis respondidisse fatetur, nec causam denegati exitus indagari licuit. Caudam vero succrescentem, tendinis speciem esse perhibet, nec pristinae instar, ex vertebra cartilaginosis compositam.

Quæ quamvis aliena fuerint a scopo nostro, quo de lingua lacerti nos verba facturos promissimus; lubentes tamen ea tetigimus, siquidem illa quodammodo analogæ esse censemus huic Polypi virtuti reproductrici, in cuius discussione, jam diu est, quod eruditi versantur, quamque unico hoc exemplo analogo, in animali terrestri quærendo, dilucidari posse censemus.

Linguam suam bifidam lacertus incredibili agilitate ejaculatur, & structura ejus prædæ suæ arripiendæ convenientissima est. Hanc enim marginibus, tamquam ferra, dentatis munitam, & sulcis in convexa sua superficie transcissam ostendit Microscopium; eamque ad retinendam, ne avolet, alatham prædam inservire concludimus. Nec fusiore descriptione opus est;

est; adeat, si quis velit, subnexam ejus figuram, & adcuratiora observabit, quam descriptione ediscere potuisset. Monendum vero censeo, quod delineanti lingua exemplari fuerit aliqua, quam, quo dentes prodirent, & quo magis transpareret, duabus vitri orbitis compressam exsiccaveram; alias etenim, mortuo animale marginibus adplicati remanent dentes; quos dum vivit, pro lubitu jam exserere, jam recipere posse videtur. Cæterum jam recensita ratione linguam observationibus meis adaptando factum est, ut deletis fere fulcis linguam transcendentes, vix leviora eorum vestigia remanserint. Quæ ut hic loci observata tradamus, ut adcuratior tibi mente sistere possis statum ejus naturalem, necessarium duximus.

Lubentiores etiam plenam fidem adhibeamus linguæ lacerti descriptioni, quam tradidit Cel. *Needham*, vel si nullam ejus delineationem subjunxisset; quæ autem de origine duplicis triplicisve caudæ ejus addidit, pace Viri Clarissimi, leviora pronuntiamus. Nobismetipsis enim vivus quondam fuit lacertus, duplici ac crassitie longitudinisque eadem cauda instructus; nullum tamen læsionis vel cicatricis vestigium præbuit, nec captus erat, ubi puerorum petulantia mutilari potuisset. Illi, cujus imaginem expressit Cel. *Redi*, tres erant caudæ inæquales & diversissimæ. Hos igitur monstra naturæ potius esse dicamus, quam centenis variata ratione quotidie operari videmus. En autem, quæ ex *Actis Reg. Acad. Scient.* hausit Cel. *Needham*, a Viro Clar. *Marchant* observata:

In horto suo, quum Cel. *Marchant* lacertum cinereum duplici cauda instructum observasset, quo adcuratiori examini eum disquirere posset, encavit; nec, præter caudam duplicem, singularis quidpiam in eo reperit. Et quidem altera, quæ ex sua directione videbatur sola adesse debere, alteram crassitie superabat, nec longitudine adtingebat. Hinc quoque prope extremitatem amputata videbatur. Quum enim lacerti cauda 3. digitos plerumque & quod excurrit, sua longitudine adtingat, hæc 16. lineis in universum absolvebatur. Superiore sua parte parum depressa, reliqua autem rectissima conspiciebatur. Altera cauda e contrario, ex dextra prioris parte enata, dextram versus foras deflectebat. Longitudine 32. diametro autem in origine sua 2. lineas exæquabat, supra pariter ac infra erat rotunda & in apicem cuspidatum definebat. Cingula insuper lacertum a pedibus posterioribus usque ad apicem caudæ obvia sunt, quæ, quamvis separata & ex squamis composita videantur, observante Cel. *Marchant*, non sunt, nisi pellis continua hunc in modum corrugata, ut rugarum altera alteram obtegat, quibus cingula illa effinguntur. Ex margine autem cinguli postremi, in lacerto, Cel. *Marchant* observationibus inservientis, duplex illa cauda enascebatur. Imo appendix quædam 2. lineis longa & $\frac{1}{2}$. diametro, nec non 2. lineis supra locum bifurcationis (sit venia verbo) sita, hæc inquam, caudæ tertiæ initium videbatur. Dissecto tandem hoc lacerto caudam duplicem præ se ferente, caudam utramque, ut & initium tertiæ, cartilaginosa, nec, ut in lacertis vulgaribus, valde fragilem deteximus, quippe quæ ex vertebrae osseis exiguis composita esse solet. Quæ interim de cauda lacerti seu serpentis *Aristoteles*, cui scilicet aliam succrescere docet; ea, quum superius crurum canceri reproductionem evictam dedimus, faciliores admittimus. Sic Cel. *Perrault* in *Tentaminibus Physicis* resectæ caudæ lacerti viridis in locum, aliam succrescere adserit, eique pro

pro vertebris, cartilagine acui crassiori æqualem inesse. Eadem experimenta & cum lacertis aliis, cinereis nempe instituens *Gel. Marchant*, numquam finem sibi præfixum adtigit, nec causam negati successus reperit. Cæterum cum *Plinio* in hoc consentit: quod lacertorum aliqui cauda duplici gaudeant. Idem & *Jonston* aliique adferunt, ast circumstantiarum præcipuas omittunt. Habeas igitur L. B. quæ retulimus, experientia comprobata. Reliqua tempus docebit.

Radiis solaribus expositus calore frui peramat lacertus, & frequens quidem calidiores, rarior autem terras frigidas inhabitare solet. Hinc quoque hyemis frigore torpescens foveis suis delitescit; verno tempore aerem novum captat; Martio autem vel Aprile, mensibus, coitum adpetit. Coituri ambo ita inter se contorquentur, ut serpentum instar, corpus unum capite duplici repræsentent; tum foemella ova sua emissura, parietum solem meridiano spectantium pedi, foveisque ibidem repertis eadem committit, solis calore tandem foetus excluduntur. Cavernas lacerti inhabitant, muros vetustate delapsos, & ædium ruinas; ex muscis vivunt, formicis, gryllis, locustis & præsertim lumbricis. Exaucto Solis calore, exaugetur lacerti agilitas, tanta enim sæpius rapiditate procurrat, ut avium instar, volare videatur. Homini amicus, si quem viderit, quadam quasi urbanitate contemplatur. Puerorum salivæ acriter inhiant lacerti, illorum oblectamento seu lusus instrumento veniunt, dum vel pyxidibus furfure plenis illos recondunt, vel mutuo certamini committunt. Absque ullo periculo, tutus illos manibus tractare poteris. Imo antiqui, securitatis hominum custodes & a serpentibus defensores habendo lacertos, eos *hominum amicos*, *serpentum inimicos* dixere. Viridi lacerto hæc virtutes tribuendas esse judicant & *Gesnerus* & in *Colloquio de Amicitia*, *Erasmus*. Ast aliquantulo pulvere *Nicotianæ* gutturi suo immisso statim convulsionibus & morte corripiuntur. Serpentum more, verno tempore ac autumnali, sua se pelle exuunt.

Nomina quæris. En Græcum: *Sauros* vel *Saura*; Italicum: *Lucertone* seu *Lucertola*; Germanicum: *Graue* seu *Gemeine Eydechs*, Anglicum: *Common Est*, *Lisard*, seu: *Swift*. Vox Gallica, hodie: *Lesard* seu *Lezard*, olim: *Laisard*, *Laiyard*, *Laisarde*, *Lizarde* corrupte: *Lisarde* vel *Lysarde*, ex Latino: *Lacertus* seu *Lacerta* descendit. Alii ad innuendam sexus differentiam, masculum: *Lèzard*, foemellam: *Lèzarde*, nec incongrue, scribunt. Foetus denique *Lèzardaux* seu *Lèzardins* audiunt.

Lacerta viridis. Offic. Ind. Med. 64. Dal. Pharm. 432. *Lacertus viridis*. Gesn. de Quadr. Ovipar. 633. Jonst. de Quadr. 134. Charlet. Exerc. 28. Schvenckf. Rept. Siles. 148. Raii Syn. Anim. Quadr. 264. Linn. Faun. Suec. 255. *Lacertus Hybernicus*. Merr. Pinn. 169. *Lacertus* seu *Lacerta major*, quæ & *viridis* dicitur. Quorumd.

Lacertum communem, de quo hucusque diximus & exteriori sua forma, & structura æquiparat, ast magnitudine dupla vel tripla superat lacertus viridis. Pedum suorum brevitatem, nequidquam alacritati suæ derogat. Tota corporis superficies viridem splendorem, oculis jucundissimum, præsertim in pelle, veris tempore, recenti, exhibet, interdum enim viridem pallidum colorem præbet, ut venter albidum. Terras calidiores inhabitat, & frequens est apud Italos, & in regionibus Galliarum meridionalibus, rarissimus autem apud Helvetos atque Germanos. Gatinensis tractus & Solonia maxi-

maximam ejus copiam alit. *Linnaeo* teste, & in Meridionalibus Sueciæ regionibus, & referente *Raio*, in Hibernia reperitur. Vepretis atque rubetis constipata loca plerumque tenet; & folia arida velocissimo cursu transeundo, strepitum, & timorem peregrinantium excitat; tum vero repentim pedem figit, & hominem quasi admirabundus contemplatur. Ictum baculi imminuentem, altiori saltu evitare solet; nec tamen ullum umquam hominem lædit, siquidem caret omni veneno. Venatores quidam venenosæ qualitatis illum insimulaturi ad canes suos provocant, qui lacerti morfibuscum icti, mortem vix effugerant. Hos autem viperæ morfu adfectos fuisse censemus. Acerrima tamen est sua ira; & arrepto canis naso, spretis & agitatione violentiori, & pedum canis eum avellendi conatu, non, nisi mortuus desistit; nec tamen ullum umquam effectum finistrum ex morfu ejus provenisse novimus. Avium ova, avidissimum, ut cuculus solet, adpetere, & horum ergo lacertum arbores adrepere, narrant venatores. Ast testibus fide dignioribus opus est.

Ut inter lacertos communes, sic & inter virides, aliquos duplici cauda instructos reperies; qualem *Aldrovandus* delineatum reliquit. Imo si lacerti viridis caudam vel integram, vel partem ejus resecueris, alia succrescet, ut supra dictum est. En quæ in *Actis Reg. Scient. Acad. anni 1686.* circa hanc reproductionem leguntur:

Vir Cel. *Thevenot*, quum viridis lacerti caudam resecuisset, aliam, nescio, num caudam veram, num callum, succrescere animadvertit. Duodecim diebus octo lineis longitudinis aucta est. Alios denuo post 20. dies, denuo adaugebatur. Cel. *du Verney* idem experimentum instituit, sed cartilago quædam cava, pelle quadam obducta, nec cauda, succrevit. Cel. *Perrault* hujus reproductionis rationem investigaturus, lacerti 7. digitorum longi, caudæ tantum quanta est digiti 1. longitudo, resecuit, & 15. post dies pars resectæ similis, quoad colorem & exteriora, intus vero vertebris musculisque, quales resectæ fuerant, carens successit; nec erat nisi cartilago, acus crassitiem exæquans, pelle fibris vasibusque prioris instar, instructa, ac squamis, ut reliquum animalis corpus, obtecta, hac inquam, pelle induta. Quæ quidem reproductionis ratio Viro Cel. *Perrault* penitus diversa videtur, ab illa, qua plumas in avibus, in cervis cornua, & dentes in animalibus reproduci videmus. Hæc enim penitus jam efformata, quamvis minima, suis quasi matricibus involuta continentur, hæcque, vel exigente animalis usu, vel nullo excretionis impedimento obvius, egrediuntur, erumpunt. Sic & vacillantes crocodili minoris dentes quum protraxisset, alios, quamvis exiguos, accurate tamen effictos, & priorum in locum substituendos, in alveolis detexit Vir Cel. Varia ejusdem naturæ alia experimenta instituit; ast caudæ in lacerto reproductio ab eodem principio derivari nequit. Multa idcirco accurate considerat, & erudite recenset Cel. *Perrault*; ac supponendo omnia, quibus vita aliquando est destinata, jam in ovo efformata contineri, nec non partes alias post alias successive evolvi ac sibi destinatum perfectionis gradum conscendere: eadem partium evolutione caudæ lacerti reproductionem fieri concludit, quemadmodum sanatis corporis nostri ulceribus, carnem vasaque, quasi nova succrescere videmus.

Observante Celeber. *du Verney*, pellis interior femoris lacerti partem obte-

obtegens, 10. vel 12. foraminulis, quibus totidem glandulæ respondent, perforata est.

Dicitur autem viridis seu magnus, coloris sui ergo ac magnitudinis. Græcis plerumque *Chlorosaura*, pro *Saura Chlora*, audit, nomine latino respondente. Adpellatur & : *Ophiomachos*, siquidem frequentissima cum serpentibus certamina init, quamvis plerumque horum prædæ veniat. Itali illum vocant: *Ramarro*, Germani: *Grüne Eydechs*, Angli: *Green Lizard*; Gallicis: *Lèzard verd* seu *grand*, vulgo: *Lèzarde verte* nuncupatur.

Multo autem oleo, multo abundat sale volatili. Referente *Cælio Aureliano*, Africæ populis pro cibo venit. Imo Americam tenentes alio quodam lacerto viridi, majori & versicolore, quem *Iwana*, *Iguana*, *Senembi* item *Ouâyamaca* dicunt, pro cibo utuntur. Hujus ova jusculis indita, ovis gallinaceis nulla inferiora esse perhibent. Europæorum palato autem nulla lacertorum species arridere videtur.

Corroborandi æque ac resolvendi est, sic Medicina docet, lacertorum virtus, usus vero parcissimus. Exteriori saltem artis medio venit, ubi de poris aperiendis, de corroborandis partibus & resolvendis, qui ibi detinentur, humoribus agitur. Et quidem lacertus viridis, reliquis præstantior habetur ac antefertur, ubi autem infrequentior est, sui loco lacertum communem substituunt. Aliud ex illo oleum per infusionem, aliud autem coctione elicitur. Illud, dum 10. ad 12. lacerti viventes semilibra olei communis infunduntur, quod pro linimento, ad depellendos rubores, maculas faciei, cutis etiam lichenes leviores seu farinosos venit. Oleum vero per coctionem præparaturus accipe 15. ad 20. prout vel majores fuerint vel minores, lacertos; eosque, additis olei olivarum libr. ij. & vini candidi optimi ℥iij., parcius ignis ope excoque, usque dum maxima pars humiditatis aquosæ consumpta fuerit; tum fortiori expressione col. & f. a. u. Quod quum resolvende & corroborante virtute gaudeat, pro linimento veniat contra hernias redeuntes, dummodo adplicata compressione ad integram usque restorationem usus ejus reiteretur. Facit & ad eliciendos capillos. Sunt, qui pro exaltanda olei hujus virtute, pulverem thuris, myrrhæ, mastichæ, sarcocollæ & resinæ pini addere solent. Ast, teste *Cel. Lemery* in *Pharmacopœia sua*, Spiritus vini optimi ℥ij. refrigerato addere sufficit, his enim, omne accedit quantum virtutis addipotest. *Schwenkfeld* est, qui docet: lacertum viridem, sacco inclusum, & icterico corpori, usque dum moriatur superligatum, omnem adtrahere ex corpore icterum. *Sereni Sammonici* aliorumque Medicorum fide constat, sanguinem lacerti verrucis adfricatum, illas depellendi facultate pollere. Teste *Galeno* & *Platero*, pulvis lacerti denti doloribus adfecto adplicatus, evulsu facilem reddit dentem; & sanguis ejus carioso denti injectus illum adeo consumit, ut absque dolore sensim per frustula abeat. Excrementa lacerti tandem in aqua quadam Ophthalmica soluta, aciem oculorum exacuere, cuticulas insuper, ruborem & pruritum eorum profligare cognovimus.

Nec non basin Olei lacertorum Pharmacopœiæ Parisiensis constituit lacertus viridis.

Scincus. Offic. Schrod. 346. Dal. Pharm. 432. Lemer. 792. Rondel. de Piscib. 231. Bellon. de Aquat. 47. Aldrov. de Quadr. Ovip. 658. Jonst. de Quadr. 138. *Scincus lacerti species*, Ind. Med. CVII. *Scincus marinus*. Mont. Geoffroy. Tom. III. Pars I.

Exot. 6. *Scincus*, quem & *Crocodylum terrestrem* vocant, Gesn. de Quadr. Ovip. 24. *Scineus seu Crocodilus terrestris*. Raii Syn. Anim. Quadr. 271. *Lacerta Scincus*. Hasselq. Soc. Reg. Upsl. 30. *Lacerta cauda supreme Cylindrica*, apice attenuata compressa, pedibus pendactylis, digitis lobato-squamosis, Ejusd. Ibid. *Lacerta cauda tereti*, collo crassitie capitis, pedibus pentadactylis marginatis. Linn. Mat. Med. *Stincus*, seu *Crocodylus minor*. Quorumd. Gallice: *Scinc*, vel *Scinque Marin*.

Jam si recensentem audias Cel. *Fridericum Hasselquist*, Medicinæ Doctorem, & Regiæ Societatis Scientiarum Upsaliensis Sodalem, capite scincum gaudere scito prominente, corpore contiguo, oblongo, brevi, imperceptibili fere diminutione ad apicem suum decrescente, superne convexo, ex lateribus autem depresso, sinu latissimo, binas capitis partes a basi percurrente ad cuspidem, conspicuo. Maxilla ejus superior, inferiore longior, depressa, tenuis, mollis, inferius plana, ac integra, rostrum, seu capitis extremitatem efformando, margines reteggit inferioris; quæ triangulari forma, & extremitate molliori gaudet. Nares ipsi sunt ex lateribus capitis, in margine rostri rotundæ, & amplæ. Lingua, cordis in formam efficta, cuspide gaudens acuta, basi autem dentata, substantiæ crassioris est & carnosæ, nec nisi mediæ magnitudinis gulæ apertura. Dentibus maxillarum utraque, brevibus, æqualibus, mollibus insuper in cuspide, & ex lateribus, contiguus, planisque munitur. Oculorum, qui basin capitis versus, prope summitatis marginem vergunt, orbita, jaculum sua forma effingit; iris fulva, pupilla autem nigrida est. Collo scincus caret, nisi illam pro collo habeas corporis partem, quæ caput, pedesque anteriores interjacens, nec crassitie differt a corpore, nec figura. Corpus vero ex ovali-oblongam, æqualemque habet figuram, quæ tamen in dorsi regione angularis evadit, angulo quodam longitudinali, convexo, & elevato, qui paullo post caput exortus, prope pedes posteriores terminatur. Cauda ejus corpori contigua, cylindrica, crassissimaque, sensim decrescente crassitie a pedibus posterioribus ad extremitatem suam producitur, ubi crassitie decrescens est, atque depressa. Quatuor, quos habet pedum æqualium, anteriores, digito distant a basi capitis, posteriores autem 2. digitis sub extremitate caudæ, ex utroque abdominis latere sunt constituti. Crura tunc depressa, æqualia, in medio genibus flexa, externe convexa, interne autem sulcis longitudinalibus sunt instructa. Quinque, pedum singulis inhærentes digitos numerabis, illosque distinctos, subtiles, superne convexos, infra autem planiores, articulatos præter ea, & successive decrescentis, (ab exteriori ad interiorem,) longitudinis; posteriores longitudine superant anteriores; omnes interim superiore sua parte aliquibus obteguntur squamis, lobi instar utrinque extensis, tecti tigillorum ratione sibi superstructis, & sinuositate quadam triangulari, conspicuis in margine; ex quo lobi inferioris figuram omnibusque in digitis, semicircularem esse adparet, situm vero horizontalem; reliquorum autem loborum figuram triangularem & subacutam, situm denique oblique cuspidem versus respicientem. Apex tandem digitorum nudus, mollis, supra convexus, infra autem concavus, loco ungularum ipsi venit. Caput, pedes, ac integrum corpus squamis obteguntur. Paucae sunt, quibus caput munitur, illæque amplæ, & irregulares. Quæ autem maxillæ superioris marginem vestiunt, quinque perpendiculares, latiores, ali-

aliquantulum sibi superpositæ sunt, & oris instructæ excavatis. Corpus quæ vestiunt squamæ tigillorum seu latrunculorum tecti instar, dispositæ, rhomboidales, & parte sua opposita latiores conspiciuntur. Eiusdem figuræ, ac eundem in modum constitutæ sunt, abdomen & pedes quæ muniunt squamæ; eo saltem differentes, quod & minores, splendentes, & latiores sint atque tenues. Annulis interim nigridis flavidisque alternis, dorsum, in medio laterum abdominis, componitur. Pars autem reliqua laterum, ut & abdomen cum pedibus, albidum præ se ferunt colorem. Spithamæ plerumque unius, uniusque digiti longitudinem, duos vero in medio abdominis, crassitie, explere solet. Montes inhabitat Ægypti & colles, ibi a rusticis captus Cairum, exinde autem, Alexandriam transiens Marsiliam deportatus & Venetias, ad Officinas Pharmacopolarum pervenit. Falso autem a quibusdam pro pisce habetur.

Stinci Marini nomen ipsi tribuit Cel. *Pomet*, quem descriptione, illi, quam tradidimus simillimæ, innuit. Teste igitur eo, magna stincorum adhuc exiguum copia, Nilo capta, rejectis tamen intestinis & caudæ extremitate, Marsiliam deportatur. Reliquos inter seligendi sunt hi, qui crassiores, longi, lati, ponderosi, sicci, ac integri, paucioribus vermibus (his enim subjacent) fuerint arrosi. R. P. *du Tertre*, non solum in insula, cui Guadalupæ nomen est, sed & in aliis America insulis, stincos se reperisse testatur, his quidem Ægyptiacis simillimos. Et hæc Lacertorum species ab incolis Guadalupæ: *Mabuja*, aliarum vero insularum habitatoribus: *lucius terrestris* dicitur. Hi autem stinci & plures, ac reliqui lacertorum carne abundant, & cauda fortiore, cruribusque adeo brevibus instructi sunt, ut reptando, terram ventre pertingere videantur. Cute teguntur, innumeris quæ confita est squamis exiguis, colubrorum squamas æquiparantibus, colore cæterum argenteo, &, ac si adipe obductæ forent, lucente, conspicuis. Carnem eorum auxilium adferre censent iis, qui telis venenatis læsi sunt; parciolem attamen ejus usum commendant, quæ quidem majori, quam caro aliorum lacertorum, humores exsiccandi facultate prædita est.

Prosper Alpinus in *historia Ægypti naturali* de his, quæ tractamus, sequentem scribit in modum: Frequentiores sunt apud Ægyptios, hujus generis Scinci, quos *Dioscorides*, alique, Crocodilorum terrestrium nomine insigniverunt. Qui autem ex Ægypto Venetias deportantur, multa quidem similitudine nostris accedunt lacertis; at hisce majores, crassiores, flavido insuper colore, maculisque in dorso nigridis, conspicui sunt. *Serapion* eos pro aliqua lacerti aquatilis stellati specie venditat. Amphibiis adnumeretur scincus, siquidem in Nilo pariter, ac in terra vivit. Quamvis attamen hæc lacerti species, ab omnibus fere pro vero & habeatur & adhibeatur stinco: mihi tamen ille, quem Venetæ officinæ præbent, stincus, falso pro antiquiorum stinco haberi videtur. Etenim ex *Dioscoride*, Scincum esse docemur, Crocodilum terrestrem sale induratum. Jam, qualis quæso stincum communem inter & crocodilum vel figuræ, vel magnitudinis convenientia? Quoad magnitudinem glis mihi videtur elephantis respectu. Quis umquam scincum 2. longitudine cubitos explentem vidit? ut scribit *Pausanias*. Nec *Herodoto* de scinco, sermo fuisse videtur, dum de crocodilis terrestribus, apud Nomadas obviis, 3. imo plurium cubitorum

longis, & nostros lacertos similitudine referentibus scribit. Imo nec tanta inest renibus scinci aphrodisiaca virtus, quantam jactitant Arabes. Mihi igitur, pro vero antiquorum scinco ille habendus videtur lacertus terrestris, qui cubiti i. longus, squamulis rotundis, ac pelle tenui & candidissima tectus, cauda est rotunda & brevi, & animo placido, nec neminem morfu lædit. Hunc ego esse censeo scincum illum, cujus renes ad restituendum calorem & ætate provectis & complexionis frigida viris, tanto opere commendabant Medici antiquiores. Hos igitur lacertos, ultra Memphim, aridis in locis copiosissimos, amphibii adnumerandos esse censeo.

Ex generaliore item plerorumque auctorum sententia scincum pro amphibio, ad aquatilia tamen magis inclinante, habuerunt plurimi; nec non illos, qui ex Oriente Venetias deportari solent, captos esse credunt vel in Nilo, vel mari rubro. Referente autem in *notis ad Solinum*, Doctissimo *Saumaïse*, scincus quamvis Nili ripas, ac maris rubri vicina loca teneat, attamen, ex aquatiliū classe proscribendus venit. Cum quo exacte congruens Cel. *Hasselquist*, & nos, ut sententiæ suæ accedamus, facit.

Nomen ejus Gallicum: *Scinque*, olim: *Scince*, & corrupte: *Stinc*, *Stinque*, ex Latino: *Scincus*, hoc iterum ex Græco: *Skingos*, *Skincos* descendisse videtur. Italum ipsius nomen est: *Scinco*, Germanicum: *Erd-Crocodill*, Anglicum: *Scindk*. Dicitur & *Crocodilus minor*, seu *terrestris*, quo scilicet a vero Nili Crocodilo distinguatur, qui lacertorum omnium maximus, maximeque extimescendus est; hic enim 30. cubitos, sua longitudine, explens, & hominum & animalium quidquid obvenerit, voracitatis vehementiæ satisfactorius, devorat omne.

Cæterum multo oleo & sale volatili abundat, ac totus Medicinæ usibus venit. Illum enim pro alexipharmaco, & corroborante ac calefaciente habent illos, qui ob temperamentum corporis nimis frigidum, sobolis procreandi facultate carent. Ut alexipharmacum, Theriacam intrat, & ab Italis, virtutis prolifica ergo, magni æstimatur. Nos tamen virtutem utramque, si adest, debilissimam tantum credimus inesse huic præsertim, qui Venetiis venum expositus Theriacam ingreditur. Testibus enim *Prospero Alpino*, *Schrodero*, aliisque magni nominis Medicis, Scincus noster, nec verus est antiquorum scincus, nec iisdem sese effectibus commendat. *Galenus* ex vero scinco nil, præter carnem renum adhibendum esset docet. *Plinius* autem & *Matthiolus* caput & pedes scinci anteferenda perhibent. Nos tamen, cum Cel. *Linneo* omnibus sui partibus eandem adsignamus virtutem. Sole, lacertorum instar, exsiccari, tum vero in pulverem reduci solet scincus præparandus. Et pulveris hujus ʒj. vel cum cyatho vini, vel conserva quadam subactam recipi jubent. Caveas tamen, ne pharmacopola ignarus, salamandram aquaticam, vel lacertum duplici cauda instructum, (ut fieri solet,) scinco substituat.

Frequentissimo interim usui Arabum, atque Ægyptiorum, nulli tamen Europæorum venire scincum, pro aphrodisiaco, docet Cel. *Hasselquist*. Arabum more jam ex pulvere scinci arefacti, alii cuidam stimulantis subacti, electuarium, jam ex carne scinci recentis, juscula præparari subjungit.

Cæterum & Theriacam Venetam, & Electuarium Diasatyron, & Mithridatum Pharmacopoeiæ Parisiensis ingreditur Scincus.

R A N A.

Ranarum aliæ sunt aquaticæ, aliæ terrestres. Nos igitur ex aquaticis, ranam communem, ex terrestribus autem, bufonem, utrumque Medicinæ usibus frequentiore, nostra nunc descriptione pertractabimus.

Rana. Offic. Dal. Pharm. 434. Rodel. de *Aquat.* 218. Bellon. de *Aquat.* 54. Aldrov. de *Quadrup.* Ovip. 89. Charlet. Exer. 27. Schonev. Ichth. 59. Merr. Pinn. 169. *Rana nostras viridis*, Ind. Med. 96. *Rana aquatica*. Schrod. 331. Jonst. de *Quadrup.* 130. Schvenckf. *Rept. Siles.* 155. Raii Syn. Anim. *Quadr.* 247. *Rana aquatica & innoxia*. Gesn. de *Quadr.* Ovip. 46. *Rana temporaria*. It. Oel. 154. *Rana manibus tetradactylis fissis, plantis hexadactylis palmatis, pollice longiore*, Linn. Faun. Suec. 250. *Rana viridis, amphibia, edulis; Rana vulgaris, remigans, in aquis degens, seu paludum incola*. Nonnull. Gallice: *Raine, seu Grenouille aquatique, vaste, commune*.

Rana, inter amphibia animalia referenda, magis in aqua degit, quam quidem in terra; summæ insuper est alacritatis; & corpus ejus $2\frac{1}{2}$. digitis longum, $1\frac{1}{4}$. autem in medio latum, pelle tegitur lævi, dura, hinc inde ad longum corrugata, supra viridi, punctisque fulvis, nigris, ac lividis, nec non maculis flavidis ornata, infra autem albida. Dorsum ejus est depressum & quasi contusum; venter amplus & turgidus; caput crassum ac parum planum; oculi magni sunt, profilientes, & aperti, quorum pupillæ nigra, iris flavo-fulva, membrana insuper, avium more, est nictitans, diaphana, cœruleaque. Nares exiguæ, rotundæ, ac finem versus maxillæ superioris sitæ. Aures præter ea, pelle semicirculi forma continuata obtecti. Os magnum, & eximia hians fissura. Maxilla superior serie denticulorum munita; insuper duo dentes magni in palato, alter ex dextera, alter ex sinistra situs, uterque tribus eminentiis acutis, intus reflexis, oculo nudo imperceptibilibus, sed in tactum cadentibus, donatus. Tum lingua longa, latissima, maxillæ inferioris extremitati fortiter adhærens, ast gutturis fundum versus libera, conformatione piscibus communi, ut probe observat cum *Plinio Aristoteles*. Exigua pars cerebri cranio continetur. Quatuor deinde habet pedes, binos anteriores breviores, nec digiti 1. longitudinem exsuperantes, & manu quaternis digitis haud cohærentibus instructa, terminatos; binos posteriores autem majores, longiores, majori carnis copia donatos, ac quinque munitos digitis, illisque membranarum nitentium, cinerearum, & flavidarum, nec non fulvis punctulis conspersarum auxilio, cohærentibus, qui natatum ejus faciliorem reddunt. Tum anus, superne ac lumbis intermedius situs; & Oesophagus amplus, ac Scarabæis aliisque insectis integris sufficiens; stomachus haud adeo magnus videtur, ast maximæ extensionis capax est; intestina gracilia multoties circumvoluta, ac aliquantulo adipe obducta sunt. Rectum amplissimum tempore æstivo excrementa nigrida & parum fluida continet. Pulmones, utrinque cordi adhærentes, in binos abeunt lobos, pini pomo simillimos, & innumeris ex vesiculis, seu cellulis membranosis, (recipiendo aeri destinatis, & fere tamquam alveoli apum efformatis,) compositos. Hinc etiam pulmones, haud aliorum instar, repente deprimuntur, sed pro lubitu ranae, extensi remanent & turgescunt. Cordi exiguo, rubicundo, fuscis pun-

culis consperso, Pericardio suo involuto, & diaphragmatis ope ab intestinis abdominis separato, unicus tantum est ventriculus, ut cordi testudinis aliorumque amphibiorum. Hepar magnum, rubro-flavidum & stomacho superjacens, tribus ex lobis majoribus, & quarto minore componitur. Vena cava antequam hepar ingrediatur in binos divisa abit ramos. Felle vesicula, pyri in formam efficta & viridi-cœrulea, in medio hepatis sita est. Canalis Choledocus medium pancreas transit, tandem vero intestino inferitur. Lien exiguus, atque ovalis, ex latere sinistro situs, ast parum inclinatus est dextrum versus. Renes, piscium renibus similes, pluribus sacculis oblongis, adipeis, & substantiæ oleosæ plenis, epiploi loco, circumdati sunt. Maris testiculi, renibus proximi, sacculis adipeis arctissime cohærent; nec membri genitalis ullum vestigium. In fœmella autem, duo ovaria, ut in serpente, in lacerta, & Salamandra, cum punctis nigris in centro substantiæ albidæ, fœtus ranæ constituentibus. Tum tuba *Fallopiana*, intestinorum instar, vario involvitur modo. Spina dorsalis, quousque procurrit, semper eandem retinet crassitiem quamvis admodum multis nervorum filis largiatur originem. Post in quavis spinæ parte, juxta vertebra, corpuscula quædam ovalia, matrem perlarum candore referentia, & gangliorum forma efficta adparent. Tres vero nervorum rami ab inferiore spinæ extremitate profecti, sub femoris ingressum coeunt, deinde autem musculis pedum posteriorum distribuuntur; quique irritati vel scalpello agitati, varium in musculis motum, (vel bihorio postquam caput ranæ rescideris, ac cor protraxeris) producere valent; id quod nostrametipsum experientia comprobatum novimus. Sic & Cel. *du Verney*, coram Regia Scientiarum Academia, arreptis in ventre ranæ nervis, ad lumbos & crura proficiscentibus, iisdemque scalpello irritatis frequentem in his partibus tremorem, ac quasi convulsiones produxit. Tum resectos in ventre eosdem nervos, ac manu tensos, ad motus eosdem scalpello concitavit. Quæ quum in rana diutius jam mortua haud accidissent; liquores in nervis hisce relictos, undulatione sua tremorem partium, quibus respondebant, effecisse censemus; ac nervos pro tubis seu canaliculis inservire, quorum effectus omnis, ex liquore iisdem incluso, dependet.

En! quæ ejusdem Academiæ in *Actis circa pellem & linguam ranæ observata* legimus:

Vir Cel. *Mery*, ventrem ranæ majoris ab osse pubis ad medium usque sternum incisione aperiens, pellem ejus nec musculis ventris, nec anterioris pectoris cohære vidit. Pelli & musculis anterioribus interjacens aderat cavitas quædam ovalis; nec pellis, nisi membranarum tenuissimarum atque diaphanarum ope, inguinum rugis, & partibus lateralibus musculorum ventris, & mediæ sterni parti adhærebat, hic autem tres cellulas exiguas interne efformabat. Nec musculis ventris lateralibus alia ratione, quam mediantibus fibris exiguis, musculos egredientibus, & nervulos, capillorum crassitie repræsentantibus, neciebatur. Cutis insuper saccum utrinque effingebat, a ruga femoris superiore ad aurem usque productum. Eadem & in pelle dorsi observavit, hæc enim per totam corporis partem posteriorem carni neciebatur, mediantibus quibusdam filamentis exiguis, quorum plurima ex spina dorsi oriri, & venis, arteriis nervisque inter se junctis composita esse videbantur. Hinc integra pellis ranæ in quatuor quasi

quasi faccos, (membranis tenuissimis separatos, ex altera parte, pelli, ex altera autem corporis musculis nexos,) divisa videtur, quorum alius corpori anterior, alius posterior, bini reliqui tandem ex binis lateribus corporis siti sunt. Femorum cutis non nisi in plicaturis articularum, musculis suis adhærebat, & duos constituebat facculos, alterum anterius, alterum vero posterius situm. Idem & in cute crurum pedumque observatu venit. Pellem igitur, quum a media sterni parte usque ad extremitatem inferioris maxillæ dissecuisset Vir Cel. duplicem ibi ab illa cavitationem efformatam reperit, alteram in superiore sterni parte, quæ ad brachium descendebat; alteram in maxilla, cavitatibus, ventris in lateribus obviis, respondentem. In superiore sterni parte foramen aliquod detexit Cel. *Mery*, illudque ad tertiam quamdam cavitationem conducens, quam musculi maxillæ inferiores efformabant. Cutis autem brachiorum facculos aliquot, facculis pedum similes constituebat. Linguam denique singulari, nec aliis animalibus communi ratione constructam reperit. Etenim ex basi sua symphisi duplicis maxillæ ossis (mentum dicimus in homine) cohærebat. Infra autem fibris, ut ipse docebat adspectus, carnosis, & ex altera parte cartilagini, (crucis formam repræsentanti, & ante introitum laryngis constitutæ) nexis obtegebatur, cuspide insuper bifurca, & ad imum pharyngis descendente gaudebat. In media sua parte inferiore foramen obveniebat, ex quo proficiscens cavitas quædam alia, ad cartilaginem, paucis ante descriptam usque procurrebat. Mediantibus itaque fibris carnosis, linguam infra obtegentibus, eam pro lubitu ranae jam ex ore exferi, jam in fundum Pharyngis retrahi censet Cel. *Mery*, ulteriore tamen adhuc experientia reiteratisque observationibus opus esse docet; siquidem non nisi unicam ranam hisce suis tentaminibus subiecerat.

Graviter (sic *Swammerdam*) errant Physicorum plurimi, ubi de constituendis sexus ranae criteriis agitur. Bina sunt certissima, quibus a foemella mafeulus differt. Scilicet 1. duæ vesiculæ minores, diaphanæ, in capite prominentes, mari propriae, 2. interna pars pedum anteriorum, musculo pollicis in manu humana respondens; hæc enim in mare, quadruplo major est, quam in foemella.

Singularis generis animal rana dicenda est, in primis spectata ejus generatione; cum piscibus oviparis convenire videtur, ad tamen aliqua differentia ab illis distinguitur. Ovum ranae sub forma nigri puncti, liquore albido & viscido circumdatum, & tenuissima membrana indutum adparet. *Oligerus Jacobæus* vero ranae ovum esse censet: omnem illum liquorem, qui punctulum nigrum, sui centrum, circumdat; punctum vero pro ipso foetu, & liquorem pro alimento ejus habet. Nos tamen cum Cel. *Swammerdam* punctum hoc nigrum esse censemus ovum, quo foetus ranae, sub forma gyrini egressurus, continetur. Gyrinus autem recens natus, liquore isto viscido, seu potius parte illius, per aliquot tempus nutriri videtur; quum enim aqua sensim liquori huic immisceatur, partes hujus separantur, & liquor, nubeculae instar aquæ supernatans, ac foetui amplius nutriendo haud sufficiens, pro loco tantum inservit, ubi natando defatigatus gyrinus requiescere possit. Nigrum illud punctum igitur ovo piscis, seu potius infecti responderet. Nec enim piscium more, sub forma ranae ovum egreditur ranicula, sed bombycis seu erucæ instar, gyrini sub for-

ma egrediens sensim sensimque ranæ formam induit. Eo tandem humore viscido, quo & ovum undequaque circumdatur, & foetus recens natus pro nutrimento utitur; hoc inquam, ab omni & insecti & piscis ovo, ranæ ovum distinguitur.

Superfunt alia quædam, curiosa fane & lectu dignissima, quæ circa coitum ranarum in *Transact. Philosoph.* a Cel. *Richard VValler* observata, leguntur. Hic docet: 1. punctum illud nigrum duplici liquore esse circumdatum, interiore scilicet, quo immediate tangitur, limpido, diaphano, membranæ involuto, nutriendo gyrino diutius inserviente, & ovorum avium albumini respondente; tum exteriori, turbidiore & magis mucoso. Docet 2. gyrinos exclusos, ore suo, arctissime, cohærere cum exteriori ovorum (quæ egressuri perforaverunt) superficie, quam si missam fecerint, statim ad fundum aquæ prolabi, nec eluctari posse in superficiem, 3. ranam cum piscibus spinosis hoc commune habere: quod pro foecundandis foemellæ ovis haud coeat cum illa masculus, sed piscium more, ova emissâ suo spermate irriget. Obiicis: at masculus foemellam adscendit, eamque veris tempore, per 40. dies arctissime amplexus tenet. Respondebit: ovorum, simulac emissâ fuerint, irrigandorum ergo, id fieri solet. Nos tamen aliam ob causam tamdiu utramque ranam cohærere censemus; imo, quum observante Cel. *Needham*, ovorum detentorum ovario color candidus in nigrum commutetur: ad credendum inducimur, quod foetus tunc jam efformatus in ovo, per transversum corticis conspici possit; ut ova erucarum, masculi spermate foecundata, suum colorem commutare videmus, die enim corticem transeunte, erucam minorem detegere licet, testibus ovis bombycum, quæ albidum qua gaudent, colorem, accedente foecundatione in coeruleum commutant.

Longum insuper ranæ ovarium, sic pergit Cel. *Needham*, sub Diaphragmate situm est, ibique exoritur; tum variis circumvolutionibus peractis, versus inferiorem abdominis partem descendit. Primo igitur ova sacculum quemdam griseum intrant, ubi prima accidit immutatio coloris, deinde autem aliquod corpus nigrum ingrediuntur, ubi cortices nigro jam fortiore tincti, & glutini tenacissimo involuti conspiciuntur. Per seriem denique ex vagina duplici egrediuntur, & glutinis ope, quod vulgo, male quidem: *sperma ranarum* dicitur, cohærent. Sæpius parturienti ranæ opem tulisse mihi contigit, filum hocce ultra cubiti r. longitudinem, manu, protrahendo. Sic igitur egressa ova in acervum accumuluntur, & in hoc, tamquam nido, ex mucositatibus constructo, accedente solis calore, sensim sensimque gyrini excluduntur.

Cel. *du Verney* est, qui docet: materiam glutinosam, ranarum spermate contentam, prius oviductui infuisse; parcissimam insuper hujus liquoris quantitatem, gommatis tragacanthi instar, in aqua diffuere, & necandis inter se ovis sufficere.

Nec tamen a nobis impetrare possumus, qui & nostram faciamus sententiam Cel. *Georgi Ent*, quam sua experientia comprobata esse adserit, quaque, ranas ore coire & foetus effundere docet.

Ineunte autem Martio, mense, ova sua plerumque soluta in oras aquarum stagnantium confert, sæpius & ramis ulni vel salicis aquæ immerfis adnexa, deponit. Horum numerus, teste Cel. *Svammerdam* 100. absolvi-
tur.

tur. Jam, si partem eorum vitro aqua pleno immiseris, post radiis solaribus exposueris; puncta rotunda & nigrida, brevi temporis spatio intumescere, post immutata figura in totidem animalcula abire observabis, vermibus similia, capite insuper magno, oculis maximis, ore rotundo, pelle maculis distincta, caudaque longiore gaudentia, remi instar plana, & crassitie sensim decrefcentis. Tunc animalcula ista, quibus nomen apud Gallos peculiare: *Têtards*, Latinum: *gyrini*, inservit, crescente in dies sua mole, primo posterioribus, deinde & anterioribus pedibus egressa, formam lacertorum tantum non profitentur, nec, nisi cauda per gradus decedente, perfectam suam formam adquirunt. Nimio tamen calore pereunt, nec nisi 4. ad 5. mensium spatio (etenim si vitro inclusa detinentur, debito sibi nutrimento carent) in perfectionem sibi destinatam excrescunt. Seposita tandem, qua induta erant, membrana, aliquid cibi, pro nutrimento, ore capiunt, & excrementa eorum subviridia, vermibus contortis, seu intestinis exilibus similia videntur.

Hac ratione igitur ranarum generatio procedit. Quæ enim alii, mente ab opinionibus vulgi præoccupata, de momentanea ranarum productione ex luto, ex arena pluvia irrigata, vel ex nube prægnante, somniavere: haud cadere posse censemus in animalia illa, quæ tanta demum arte, tantoque tempore perficere studet natura effectrix. Sole meridiano clarior res est, ut loquar cum Cel. *Derham in Physio-Theologia*, animalia animalibus, vegetabilia vegetabilibus aliis suam debere originem; nec satis admirari possum antiquiorum vel credulitatem, vel præjudicium, quæ *Aristotelis*, seu potius, *Ægyptiorum* opinioni, de generationibus spontaneis, tam faciles suum calculum adjecere. Qui, quæso, muscarum, ranarum, pulicum, aliorumque originem, non dicam, motui cuidam spontaneo, ut ajebant, sed rationi adeo fictitiæ, qualis erat generatio in nubibus, tribuere poterant? quum mares inter illa, ad generandum, quum foemellas, ova ponentes, detexerint. Ranas vero præ aliis, in nubibus generatas una cum pluvia vehementiore in terram delabi adserebant. Quæ quidem doctrina ex scholis *Ægyptiorum* emanasse mihi videtur. Huc quoque confugiebant, pro comprobanda hominum animaliumque productione ex sinu terræ. Quæ, ut autumabant, accedente tandem solis calore perfecta erat. Imo pro comprobanda sua hypothese, teste *Diodoro Siculo*, provocabant ad illam murium copiam, quam superveniente Solis splendore ex terris Thebas adjacentibus, & a Nilo, littora egrediente, irrigatis, exortam esse perhibebant. Hinc igitur *Diodorus* infert: animalia omnia pari ratione, vel in origine sua prima ex terra provenire potuisse. Et Doctiss. ille *Stillingleat*, Episcopus, ex *Diodoro* & *Melam*, & *Ovidium*, & *Plinium*, aliosque, neglecto veritatis examine, sua hausisse putat.

Nec ea adducere pigeat, quæ Physicorum maximorum unus, Cel. *Raius*, in tractatu de existentia & sapientia divina, in operibus creationis manifestata, huc spectantia, scribit sequentibus:

Quæ de ranis pluvia productis & in nubibus generatis, varii, nec infirmi ordinis Physicorum scripsere, mihi quidem anilia videntur & a recta ratione absõna. Si enim ranæ in nubibus generantur, quidni & equi Hispanici vento? Ranas descendere credis cum pluvia? quidni & vitulos speras? Errant autem & illi, qui ranas, peracta pluvia vehementiore, frequen-

quenter obvias; ex arena seu pulvere; aqua pluviali mixto & fermentato progenitas esse censent. Huic tamen hypothese accedit *Fromondus*, facto sua experientia comprobato innixus. Ad portas enim *Tornaci*, Belgii urbis; quum spectaculum aliquod singulare suis se oculis obtulisset, amicos convocavit, & ad observandum invitavit; & vehementiore, sic ille, pluvia; terram alias arenosam, paullo exinde irrigatam, copia ranarum undequaque profilientem obtectam vidimus. Omnes ejusdem magnitudinis erant atque coloris, nec disquirendi locus fuit, undenam tanta ranarum copia; terram alias aridam & arenosam obtegens, uno temporis momento vel egredi potuisset, vel provenire?

Nos interim, quod pace tanti Viri dictum sit, ranas istas, ex foraminibus, ubi delitescabant, amœno, quem pluvia sparserat, odore eo allectas fuisse credimus. Propensior saltem ad veritatem hæc opinio est, quam sua, de invisibili earum procreatione ex pulvere pluvia mixto. Imo nemiscendi quidem tempus relinqueretur, si recensitam Cell. Viri admittis hypothese. Nostram e contrario, & illa ranarum copia confirmare videtur, quam post occasum æstivi solis, in viis publicis & tramitibus ad tuguria tendentibus, quam in hortis & sentibus cohortim exspatiari videmus, nec tamen, ubi vel die, vel hyeme delitescant, investigari valemus. Cel. *Perrault*, aliquas ex his dissecando, stomachum alimentis & excrementis plena reperit intestina, exinde autem, suo jure deducit, quod haud eo temporis momento atque recentes enascantur, sed saltem adpareant. Quæ si forsitan creditu difficiliora videntur, respicias velim ad illam lumbricorum, & scarabæorum quantitatem, quam desinente pluvia vehementiore, præsertim si magnam illa terræ ariditatem exceperit, solum undecumque egredi videbis.

His igitur, quæ de spontanea productione ranarum, ex nubium vaporibus, & commixtione pulveris cum pluvia, illaque fictitia diximus, ut majus adhuc pondus addatur, ea subnectamus, quæ ex epistola Cel. *Guillemi Derham* ad nos missa, huc pertinent. Est autem hic Vir fide dignissimus & in observando accuratissimus, Rector Clar. Upminsteræ, prope Rumford, in Provincia Essexiæ. Peracta enim pluvia vehementiore, & ille innumeram ranarum quantitatem observavit, quæ viam, multo ante pulvere, multaque arena obsitam contegebat. Addit deinde & generationis probabilis, & egressus locum. Suis ipsius utamur verbis: anni sunt, quum in Provincia Bercheria equo vectus, magnam ranarum copiam, viam publicam transeuntium conspexi. Duabus antea horis pluvia modica, terram alias arenosam ac pulverulentam irrigaverat. Succurrebant ea, quæ de ranis, una cum pluvia delapsis legeram. Nec scripta esse mirabar, omnia enim, quæ videbam, me ad credendum invitabant, imo adigebant. Præconcepta autem opinio contrarii quam fovebam, me ad investigandum locum, ex quo provenerant, incitabat. Duo igitur seu tria detexi jugera, ranis fere obsita, iisque arbuta & fossas, quas spatiosa stagna excipiebant, petentibus. Vestigia earum insequutus stagnorum unum adtigi. Hæc coitus ranarum tempore magno earum numero abundare solent, ego enim frequentissimum earum coaxatum ibi sæpius perceperam, sperma copiosum reperieram. Hinc & ranas ipsas in stagno illo generatas fuisse concludi; easque peracto tempore incubationis (si dicere fas est) ab ardore solis de-

rivandæ, nec non omnes incrementi gradus expertas, usque ad metamorphoseos periodum, aquam seu potius juncos & arbuta ripæ inhabitasse; pluvia tandem irrigatam, ac incessui earum magis accommodatam terram, eas invitasse, & ut domicilium prius, alimentis inops forsan, relinquerent, ac alimenta aliunde quærerent, adegisse. Quæ quum & rationi adeo consentanea sint, ac detectu adeo facilia, miror sane, qui fieri potuerit, ut *Aristoteles*, *Plinius*, aliique Physicorum nominis magni apud antiquos, ranas jam ex nubibus in terram delabi crediderint, jam motu spontaneo, uno temporis momento generari, eo potius, quum ante oculos omnium coeant, quum ova sua emittant, quum ex his ovis animalcula pedibus destituta, denuo ex his raniculæ enascantur. Eundem igitur modum generationis constantem & determinatum, præter ranas, in pulicibus etiam, in muscis carni inhiantibus, in bombycibus, papilionibusque aliis observare datur. Gravissimorum ergo præjudiciorum, credulitatis saltem & negligentia vix excusabilis insimulanda veniunt, quæ *Aristotelis* tempora exceperunt, sæcula.

Eadem, certo, detexisset *Fromundus*, locum scilicet, ex quo provenerant ranæ, ante portas Tornaci frequentes, si eadem in disquirendo usus fuisset diligentia.

Ranam, quæ vitæ est tenacissimæ, alii quidem, duce *Aristotele*, ob aeris penuriam, haud diu sub aqua degere adserunt, nos tamen diutissime, imo per hebdomades, ibidem commorari posse experti sumus. Quidquod vel corde protracto capiteque recisso, aliquot exinde horis ranas & vitam conservasse & natasse observavimus. Vidimus & cordis pulmonumque retractorum continuatam systolen atque diastolen, vel per horæ spatium productam. Miranda sane res est, quum animal dissectum, ac omnibus abdominis pectorisque visceribus carens, eadem agilitate, ac si incolume foret, diutius saltare videris. Quod si vero nervum, qui ad pedem proficiscitur, præscideris, statim motus omnis pedis cessabit. Ex corpore lucii anguillam mortuam protractam fuisse memini, anguillæ hujus in corpore autem ranam adeo vigentem esse repertam, ut aperto anguillæ ventre, in tabulam profiliret. Aqua tamen quam terra frequentior detinetur rana vulgaris, & ad scaturigines tepidas, rivulos, fossas, stagna atque paludes habitat, ubi vermes, hirudines, cochleas minores, scarabæos, aliaque insecta pro nutrimento, quærit. Vivit & herbis aquaticis: ut ranunculis, nymphæis, morsus ranarum dictis, & lenticulis, ut alii volunt. Nec sui generis minoribus parcat, raniculas enim in ore stomachoque majorum vidimus. Frigidam aquam extimescit, calidam vero peramat; hinc tanto, æstate, perfunditur gaudio, ut jam e longinquo coaxatum ejus audire possis, calidioribus præsertim noctibus Maii, tunc enim amoris stimulo excitatur. Vehementiorem ejus coaxatum imminentis pluviae signum esse docet *Plinius*, nec tamen omnem ejus clamorem frequentiore pluvia comitari docet experientia. Flante borea, frigidoque cælo profundissimum observare solet silentium. Varios vidimus, qui ranarum coaxatu magno opere delectabantur, quamquam plurimorum auribus vix perferendus videatur. Facilis tamen, si vera sunt, quæ alii narrant, aures tuas strepitu inamœno perstringentibus silentium imponitur; sufficit candelam accensam in ora fluminis collocare, vel ollam, qua serpens aquatilis supra descri-

pius, inclusus lateat, in aquam proicere. Hortis etiam herbariis, insectorum quantitatem extirpando, haud exiguam utilitatem adferunt ranæ. Natura autem timidiores, nocturno tempore saltem, victus quærendi causa exspatiantur; saltando, & quidem levissime, incedunt, ast magna agilitate natando vehuntur; hyemis frigore torpescentes, quasi emortuæ, aquæ in imo delitescunt. Verno autem tempore, locum, quo commorabantur, relinquunt, novam agilitatem recipiunt, novum vigorem.

Hostibus ranarum adnumeramus: hydras, anguillas, lucios, cygnum atque ciconiam, & teste *Alberto M.* talpam; his omnibus enim prædæ veniunt & nutrimento. Imo feles sylvestres iisdem inhiare, & collectas, annonæ instar, in arborum crenas congerere dicunt. Maximo autem obletamento, dum ruri fueris, captatio tibi cedit ranarum. Etenim vel retibus, ut pisces, vel hamis, nexis pro esca vermibus, scarabæis, muscis, papilionibus, ranarum intestinis, panni rubri frustulis, vel aliquantula lanæ rubræ parte, capiuntur. Gulositatis suæ eximiæ ergo, omni, quidquid obvenerit, acerrime inhiant, nec quod captarunt, missum faciunt umquam. Hominem pertimescunt, & si quem viderint, auribus saltem perceperint, præcipites in aquam irruunt. Hinc illas captaturus profundissimum silentium observes, necesse est. Sonum, quem edunt, *Brekekex-Coax, Coax*, secundum *Aristophanem*, vocabulo Latino: *coaxare*, originem dedisse censemus.

Reliquas ranarum terrestrium seu sylvestrium species transeamus, ut: fulvas, rubicundo-ferrugineas, flavis nigridisque maculis variegatas; quas cum bufonibus coire, & venenosæ qualitatibus esse, immerito censent. Arbusta inhabitare solent, vepreta, aliaque loca humida & opaca. Quales sunt: 1. *rana mingens*, quæ quoties saltat, toties mingit: 2. *rana*, quam *Gesnerus gibbosam* dicit, duorum ergo ossium, quæ instar gibboris, conspiciuntur in dorso; quamque alii mutam esse censent, nos tamen, si vel ictu læsa fuerit, vel imminente periculo perterrita, vehementiorem clamorem edere experti sumus. Nos tamen utramque ejusdem esse speciei ducimus: 3. *ranula viridis* seu *S. Martini*, quæ quum aliquali Medicinæ usui veniat, brevissima descriptione nostra nunc pertractanda esto.

Rana arborea, dicta & *ranula* seu *ranunculus viridis*, Gallis vero: *Grenouille de S. Martin*, viridem pulchriorem in dorso, & albidum in ventre exhibet colorem. Tacta eximiam profitetur frigiditatem, & omnibus reliquis multo minor est. Extremitates digitorum, qui pedibus sunt, tuberculis muniuntur rotundis; Pulmones habet valde exiguos, cordis colorem albidum, ast auriculæ sinistræ ruberrimum; hepar rubicundum ac quatuor in lobos distinctum; fellis vesiculam lividam, & testiculos adipe involutos. Differt autem a reliquis & parvitate corporis, & colore, quo tegitur, viridissimo, nec non eo, quod arbores atque arbusta conscendens, immobilis & visco suo quasi adglutinata, teste *Schwenckfeldio*, muscis, rore, & tenerrimis arborum foliis vivat. Hyeme delitescit in terra, ast veris tempore illam egreditur. Nec, ut alii volunt, coaxandi facultate caret; quamvis enim & vere & æstate, haud multa sit in coaxando, autumnus tamen vespertino tempore & nocturno, frequentissimo nos clamore defatigat. Quo sæpius repetito imminentem pluviam annuntiare solet. Sæpius suo: *Brex Brex*, clamore, hic elato, illic repetito, haud adeo absonum

sonum formant concentum, ut totidem aviculas in arbuſtis canentes audire tibi videaris. Olim, buſonum inſtar, venenofæ qualitatis habebantur, ac tantam veneno ſuo vim inefſe credebant, ut, ſi quam ejus partem cum gramine boſ forſan manducaſſet, ſtatim dentes ejus effluere dixerint. Hinc quoque, (ſic in *Obſervationibus ſuis circa ranas, Oligerus Jacobæus*) gingivam adipe ranæ viridis adfricandam eſſe docebant, ſi dentem abſque dolore elicere velis.

Digna ſunt, ut huc transferantur, ea, quæ in *Ephem. Germ. Dec. II. anni VI. pag. 320.* a *Godofredo Schultz, D.* obſervata leguntur ſequentibus: Principum munificentia incitati jam antiquiores naturæ ſcrutatores, in perficienda hiſtoria animalium naturali, ſtudioſi deſudaverunt, ut: *Ariſtoteles, Alexandri M., & Gyllius & Belon*, Franciſci I. Regum liberalitate exſtimulatus. Adtamen vel hanc ipſam Phyſices partem, ſi adire velis, multoties mancā videbis & imperfectā. Qui autem ſatis perfici potuit, magiſque ditari? Etenim, quæ eo pertinent, facta, quibus, quaſo, niſi operariis, venatoribus, piſcatoribus, aliisq; hujus generis ruſticis, mox imperitis, mox in obſervando negligentibus, mox fabularum atque traditionum mole præoccupatis, mox ad mendacium & aliis imponendum proclivibus, debemus? Curioſus autem naturæ ſcrutator, avidus omnem, & merito quidem occaſionem quærit, arripit, vel obſervationes adcuratas ipſe inſtituendi, vel illas referendi, quas teſtium fide dignum auctoritate conſtare, & ad ditandam, cui ſtudet, ſcientiam facere novit. Ea igitur recenſere & mihi liceat, quæ circa ranulam viridem, arbores conſcendentem, Græce: *Dendrobates*, Germanice: *Laub-Froſch* dictam, mea me docuit experientia. Chirurgiæ cultor VVratiſlaviensis, per octo annos ſubſequentes ranulam viridem in vitro cylindrico, caſpite obtecto conſervavit, & æſtate eam herba recenti nutrit, hyeme autem fœno madida, ac muſcas, quas magna oris agilitate captas devorabat. Hyeme igitur, quum deficiente muſcarum copia, vix unam duaſve acciperet quatrIduo quovis, multum pinguedinis ſuæ abibat, aſt redeunte æſtatis tempore, redeunte & muſcarum frequentia, redibat & caro ejus atque pinguedo? Adtamen vel ipſo hyemis tempore alacris agilique prædam ſuam captabat, etenim hypocauſto detenta ab omni frigoris vehementia tuta erat. Sæpius æſtatis pluvioſo cœlo, ſolito fortiores extollebat clamores, & nutrimenti copia ergo, pinguedine quaſi turgebat. Nonnunquam & neceſſitati ſuæ ſubveniēns, pedibus ſuis poſterioribus, hypochondria, ſi dicere fas eſt, conſtringens, vomitum excitabat, & mucum quemdam albidum viſcidumque vomendo eiiciebat. Libertati ſuæ interdum reſtituebatur, & tunc huc illic ſaltando, limpidum quemdam humorem per poſteriora reddebat, alias autem excrementa nigrida, & granulis ſimilia. Octavo tandem redeunte hyeme, deficientibus muſcis omnibus, fame perit. Conſtat igitur, vides, & ranas, & reliqua ex animantibus, quæ hyemem ſomno in cavernis foveisq; ducere ſolent, haud quidem naturæ ſuæ legibus obtemperantia, ſed ob defectum nutrimenti eo ſe recipere, & frigoris vehementia motu privari. Longæva item dicenda eſt ranula viridis, etenim vel exquadripedibus quædam vix ejus annos pertingunt; imo diutius vitam producere potuiſſe videtur, niſi fame ipſi pereundum fuiſſet. Addunt alii, quod vel hyemis tempore ranas in ſcaturiginibus tepidis viventes viderint. Alii

Physicorum ranulam hanc animalibus parum venenosis adnumeravere, ast quanam sint sui veneni signa, nemo hucusque exposuit. Forsan liquorem per posteriora ejectum habent pro sede veneni; ego autem quocumque experimento destitutus, nec adfirmare quidpiam, nec negare valeo.

Ranæ vulgaris nomen Græcum est: *Batrakos*, Italicum & Hispanicum: *Rana*, Germanicum: *VVasser-Frosch*, Anglicum: *Common Frog*, seu *Frosh*, Suevicum: *Groda*, *Fro*, *Klassa*. Vox Gallica: *Grenouille*, olim *Renouille*, ex *ranula*, *ranella*, seu *ranunculus*; *raine* tandem ex *rana* derivat *Ménage*. Fœtum ranarum Græci adpellant: *Gurinos*; Latini: *gyrinus*, *rana gyrina*, *Moluris*; Galli: *Têtards*, eximii sui capitis ergo; vel *Queue de Poêle*, ob longiorem, qua gaudet, caudam. Locum ranis plenum Galli dicunt: *Grenouillère*; ranam viridem verò: *Grenouille de S. Martin*, vel *Martinolle*. Hanc Itali nuncupant: *Ranella*, Allobroges: *Ragnole*, Angli: *Small-Trec-Frog*, vel *Green-Frog*; Galli alias &: *Ranette*, *Grenouillette*, & teste Petro Borellio, *Raine verte*, *Grenouille de Buisson*, *Gresset*, *Graisset*, forsan ex Latino: *Agredula*, campestris, vel ex coaxatu suo. Alii eandem ob causam illam: *Croisset*, alii, viridis sui coloris ergo: *Verdier*, adpellant.

Ranas vulgares inter selectum instituendo, illas seligendas esse scito, quæ multo adipe & carne abundant, quæ coloris sunt viridis ac in aqua limpida & pura captæ. Ranis igitur multum phlegmatis ac olei, ast parum salis volatilis inesse constat. Frequentiori veniunt cibo, ast concoctu difficiles, succique visceri & crassioris causæ, haud cuicumque usum earum permittendum ducimus. Nullus igitur, nisi parcissimus sit ætate provectis & pituita abundantibus; his autem, qui fortiori stomacho gaudent atque robusto, multum alimenti præbent. Hinc juvenes, qui biliosæ sunt temperaturæ, non habent, quod de usu earum timeant. Sunt, qui frequentiore faciei palloris ac febrium causam dicunt; nos tamen sinistro hosce effectus numquam evenisse novimus, qui si forsan acciderint, ex qualitate ranarum, in paludibus, stagnisque viventium, derivandi sunt. Hæ enim salutis infestioris qualitatem secum gerere dicuntur; ast fluviatiles, succum optimum suppeditant, nec corporis salutis contrarium.

Ars Medica igitur jam externe, jam interne utitur ranis. Interne acceptas humectandi, piuguefaciendi, & pectoris acritates leniendi virtute docet. Hinc juscula ex illis provenientia, contra tussim inveteratam, contra siccitatem pectoris, contra pthysin & atrophiam commendat, quippe quæ humectare, lenire & somnum conciliare solent. Nec non intestinorum ardore, guttis faciei rosaceis ac quibuscumque pustulis detento profunt. Omnis autem eorum virtus pendet ex principiis oleosis atque balsamicis, quæ dominantur in ranis. Ex hepate ranarum præstantissimum contra epilepsiam medium præparatur, dum Maio, seu Junio, vel Julio, mensibus, 40. circiter ranas, quas reperire potes, viridissimas, retracto hepate, lentiore igne exsiccaveris, tum verò pulverem exinde provenientem in vj. partes æquales diviseris, & unam, mane jejuno, cum vino vel aqua tiliaæ florum exhibueris, & antequam duæ exinde horæ elabantur ut cibi quidpiam capiat ægrotans, ei interdixeris; alteram vero dosin cubitum ituro præbeas; ac eadem ratione per triduum pergas. Imo, prout necessitas postulaverit, reiteres. Eodem medio Fridericum IV. Electorem Palatinum, salutem pristinam recuperasse novimus. Satis præstanti febrifugo

fugo venit fel & hepar ranæ in cinerem redacta, & dosi ℥j. cum vini candidi portione, ægrotanti exhibita, dummodo præmissis generalioribus, pro accipienda febrifugi virtute, dispositus fuerit. Imo cineris ranæ ℥j., intus recepta, gonorrhæam, teste *Schrodero*, sistit.

Ratione usus ranarum externi, *sperma* earum, quod & *sperniola* dicitur, frequentissimum adhibetur; quippe quod optimum est refrigerantium totius regni animalis. Topici instar, contra inflammationes arthritidis, contra combustiones, erysipelatem, & faciei ruborem veniat. Linteum duplicatum eidem immittatur, deinde autem parti læsæ adplicetur. Cautione tamen maxima opus est, nec medium nisi sub inflammationis initium, adhibendum; etenim aliquantula repericente virtute gaudet; hinc malo jam ingravescente humores facile condensaret, & quos discutiendo depellere debuisset, eodem figeret. Pro exaltanda ejus virtute parum camphoræ addas. Sic & aceto rosato, mixto spermati ranarum spongiam immergunt, eamque ad coercendam hæmorrhaginem narium, matricis, seu hemorrhoidum, partibus læsis adplicant. Quod quum facile putredine corrumpitur; vasi solis æstivi radiis exposito reconditum adservari solet. Sic enim alkali volatile exaltatur suboriente putrefactione; liquor exurgit per deliquium, qui sua sponte depuratus sedimentum præcipitat in fundum; aqua igitur filtratione peracta, annum imo biennium perdurat. Idem quoque sperma ranarum distillatione aquam præbet, quod iisdem virtutibus præditum, adhuc plures per annos conservare poteris. Ne autem temporis tractu, foetorem induat aqua, diebus aliquot ante novilunium, illam destillari suadet *Ettmuller*, alias vel centies rectificatam, tempore foetidam reddi adserit. Sunt, qui sperma ranarum cum oleo communi excoquunt, oleumque leniens & resolvens, pro inflammationibus eliciunt. Infrequentior vero est hujus olei usus, eique oleum ex ranis integris, vel coctione, vel infusione præparatum, substituunt. Hoc igitur compositurus recipe ranarum viventium num. xij., illasque in frustula conscinde, tum ollæ fictili vernice obductæ immitte, statim exinde olei lini ℔. jß. adfunde, ollam exactissime obtura, & in B. M. per 7. ad 8. horas destilla; post fortiori expressione percola, iterum ut fæces fundum petere possint, repone; tandem vero vas inclinando paullatim alii infundendo committe. Oleum hocce anodyna sua & leniente virtute, linimenti instar adhibitur, inflammationes temperare, & arthritidis dolores lenire valet. Præoptanda tamen venit aqua spermatis ranarum, siquidem olea pingua, cujuscumque sint essentiæ, haud sine periculo in inflammationibus adhibentur. Duo etiam emplastra ex ranis composita, & ab auctore, *Joannis a Vigo* dicta, in pharmacopoeiis prostant, alterum simplex, alterum vero Mercurio mixtum; hoc illi præferunt, ob virtutem Mercurii penetrantem. Contra dolores chronicos, tumores in collo, nodos & tumores Venereos usui venire solet. Nec non contra Cephalalgiam rebellem, tumoresque lienis inveteratos. Sunt, qui pro sananda lue Venerea, salivam excitaturi, totum corpus hoc emplastro obtegendi fecerunt periculum, ast medio insufficiente non respondit effectus, siquidem nec Mercurius emplastro adeo involutus, abire, nec tanta ejus copia sanguinis massam intrare valet, quanta ad salutem perfecte restituendam exigeretur.

Imo ad profligandos bubones & apostemata, ranæ viventes, seu frusta-

stratim dissectæ tumoribus adplicantur, quo adtracto veneno citior suppurationo succedat.

In aqua aceto admixta ranas excoquunt, illaque ad profligandos dentium dolores, os eluere solent. Cui quidem remedio, ut in *tractatu suo de alimentis jejunii quadragesimalis* Cel. Andry, Medicus Parisiensis, testatur, fere semper suus respondet effectus. Fel ranæ tandem inter præstantiora media ophthalmica referendum est. Adeps ejus, cum quadam gossypii portione auribus inditus profligat illorum dolores, & cinis ejus calcinatus, teste Schrodero, hæmorrhâgines sistit, si vasis apertis fuerit inspersus.

Coronidis loco veniat sequens Schroderi observatio: quod si ranas vel sperma earum, quod si cochleas, lumbricos, aliaque hujus generis insecta destillare velis, linteo omnia inclusas, & in media cucurbita suspendas, necesse est, quo solius ope vaporis destillentur; alias enim maximi erunt fœtoris ea, quæ recipientem ingredientur.

Rana viridis vulgaris Emplastrum ranarum cum Mercurio præparatum, Pharmacopœiæ Parisiensis ingreditur.

℞. Carnis vitulinæ macræ ℥. ss. lumbos ranarum exenteratar. & contusar. num. vj.

Bul. in aquæ fluviatil. lib. iiij. ad remanentiam jusculi unius. Circa finem add.

Folior. borragin.

cichor. alb. ana pugil. ss.

Tum levi expressione col. & f. jusculum pro tussi sicca, contra ardores intestinorum & atrophiam.

℞. Aq. hyosciam.

menuphar.

plantagin. ana ℥j.

Spermat. ranar. ℥iiij.

Sacchar. saturn.

Camphor. in spirit. vin. solut. ana ℥j.

Sal. prunell. ℥ss.

M. f. Epithema, hepatis inflammato conveniens, & regioni ejus adplicandum, ac quotiescumque exaruerit, renovandum.

℞. Aq. Solani

spermat. ranar. ana ℥j.

Pulv. tutiæ p. gr. xx.

Sal. saturn. gr. xij.

M. f. omnium collyrium refrigerans, contra rubedinem & pruritus oculorum.

Ranulam viridem integram, & sanguinem ejus Ars Medica in suos usus convertit. Iisdem, quibus rana vulgaris virtutibus gaudet, & cinis ejus vulneribus inspersus, hæmorrhagiam illorum promptissime sistit. Sanguini suo efficaciam tribuunt contra plagas recentes singularissimam. Sunt, qui ranulæ integræ calcinatæ cineris tantum, quantum cultri cuspis capit, infantibus recentibus natis, antequam nutrimenti quidpiam hauserint, matris cum lacte, ad arcendam Epilepsiam exhibent. Alii tandem pro febrifugo ranulam viridem, in ipso paroxysmo febris intermittens, carpo febricitantis adplicari solent. Nos quidem relata referimus. Quantum vir-

tutis cuius medio insit, tuæ L. experientiæ relinquimus. Nos omnia ista absque periculo quidem tentari posse censemus, nec tamen remedia magis comprobata negligenda suademus.

Bufo. Offic. Schrod. 272. Dal. Pharm. 433. Rondel. de *Aquat.* 221. Aldrov. de *Aquat.* Ovip. 609. Jonst. de *Quadr.* 131. Charlet. Ex. 27. Merr. Pinn. 169. *Bufo*, sive *Rubeta*, Ind. Med. 23. Raii Syn. *Anim. Quadr.* 252. *Rana rubeta*, tum *palustris*; tum *terrestris*. Gesn. de *Quadr.* Ovip. 64. *Bufo terrestris major*. Schvenckf. Rept. Sil. 159. *Rana manibus tetradactylis fissis, plantis hexadactylis palmatis, pollice brevior*. Linn. Faun. Suec. 253. *Rana terrestris omnium maxima, Borax seu Bufo dicta; Rana Lurida Varronis; Rubeta terrestris vulgaris; Rana turbis, exitiosa, & venenosa*. Quorumd.

Bufo, animal illud deforme, tetrum & abominandum, quod magnitudine ranam superat, pugnum exæquat, capite gaudet majusculo, oculis scintillantibus, rictu magno, & gingivis hispidis, nec præda arrepta desistentibus, confito; pedibus anterioribus brevibus, ac in manum, quatuor digitis fere æqualibus munitam, exeuntibus; posterioribus vero, seu plantis, ut cum *Linnaeo* loquar, hexadactylis palmatis, pollice brevior, digitisque membrana omnibus intergerina coherentibus; dorso insuper plano ac lato; ventre turgido, amplo & maculis consperso; gutture debili-flavido; pelle tandem dura, crassiore, perforatu difficillima, cinereo-fulvo-flavida, maculis etiam nigris seu lividis, tamquam tuberculis obsita. Oesophagum, stomachum & intestina habet ranæ simillima, pulmones autem nigriores, duriores, nec adeo multis vesiculis constipatos. Cor ejus albidum, & punctulis nigris notatum, hepati, hepar pulmonibus superjacet. Cordis auricula dextra, teste *Oligero Jacobæo* pallida, sinistra autem, ut in lacerto communi magis est rubicunda. Hepar ex tribus componitur lobis. Lien exiguus est; & adipis sacculi oblongi, renibus, ut in rana aquatili adhærent; testiculorum oblongorum dexter, albo-cinereus punctulisque nigris conspersus, sinister e contrario candidissimus est.

Multa circa historiam bufonis & reliquorum naturalem dicta sunt, plura tamen desiderantur. Inexhaustum dicas, naturæ historiam, fontem, ex hoc quotidie nova, numquam hauriuntur omnia. Alias enim docebant: bufonem marem, ranæ instar, foemellam per 40. dies subsequentes amplexum tenere. Nunc autem Cel. *Demours*, Vir de Republica literaria optime meritus, Schediasma aliquod: de *bufone masculo, obstetricis vices subeunte* orbi literario communicatum dedit, quod in *Actis Reg. Scient. Acad. anni 1741. pag. 28. seqq.* hisce legitur:

Optarent, fateor, lectorum plures, ut ad columbas potius sive turtures dicenda spectarent, quam ad animal, de quo non nisi horrore & abominatione pleni cogitamus; ad bufonem. Ast Physici cogitationes & oculi, non eadem sunt mollitie, adsuæti potius ut videant, naturæ opera a præjudiciis ac desiderio nostro alienissima, imo animalia pro vilioribus habita ac deformibus, eximiis naturæ dotibus condecorata. Bufones igitur, amphibii adnumerandi, in aquaticos & terrestres abeunt; terrestres in majores rursus atque minores. Ambo tamen in aqua nascuntur, eidemque per primas vitæ dies tantum immorantur. Jam de bufone terrestri minore sermo est Cel. *Demours*, in Schediasmate suo, Regiæ Scientiarum Academiæ in concione, prælecto. Occasionem scripto dedit casus quidam

fortuitus, qui, quanti sit æstimandus, nemo novit, præter sedulum naturæ studiosum. Ille enim vespera quadam æstiva regis in hortis obambulans, in margine foraminis, (cujus partem prægrandior lapis imminens constituebat) duos bufones coeundo inter se cohærentes observavit. Curiositate incitatus accessit, rationem conatus illorum quem detexerat, molestissimi, investigaturus. Statim & magnam in fœmella ova emittendi difficultatem vidit, quæ non nisi auxilio aliunde accedente provenire poterant; & masculum, adhibita qua potuit sua vi omni, ova pedibus posterioribus protrahentem, non sine stupore novi spectaculi, animadvertit. Quæ ut clarius innotescant, notes velim: 1. pedes bufonum anteriores æque ac posteriores in plurimos separari digitos, quorum ope ex fœmellæ posterioribus masculus protrahit ova. 2. Posteriora fœmellæ egredi ova, siquidem receptaculum, quo ad egressus sui momentum detinentur, in parte inferiore recti aperitur. 3. Bufones, ranarum instar, coire, mas enim uterque fœmellam conscendit, pedibusque anterioribus amplectitur. Rana autem masculus, pedibus anterioribus quum longissimis gaudeat, totam fœmellam amplectendo cingit, & utriusque pedis digitos sub corpore fœmellænectere aliosque aliis interponere valet; bufo autem pedibus brevioribus gaudens, latera fœmellæ saltem pertingit, ac tanta cum violentia eadem comprimit, ut vel inflammatione sæpius corripiantur, antequam cohærentes inter se ambo separentur: 4. ovorum singula cortici solidissimo & membranoso inclusa sunt, singula continent embryon, singula figuram oblongam, 2. linearum longitudinem profitentur, & filo breviori atque fortissimo inter se connectuntur. Coronam precariam, vulgo: rosarium, efformant, cujus globuli dimidia singulorum longitudine inter se distant. Quibus rite perpensis concludimus: fœmellam, eamque solam, circa exprimendum ovum primum allaborare, quod quum prodierit, reliqua masculum spectant. Ille enim obstetricis officio explendo sese accingit, idque tanta cum arte præstat ac agilitate, quantam animali tam torpido inesse vix crederes. Hic igitur, quem suo examini subjecit Cel. il *Demoirs*, protractis jam binis ovis, in extrahendo tertio versabatur. Fuit illud, quo primum ovum secundo cohærebat, duobus digitis mediis dextri pedum posteriorum, circumvolvebatur, & filum hocce producendo ex posterioribus fœmellæ extrahebat; hæc autem ne minimum quidem motum edebat. Nec non pede suo sinistro idem filum, frustrata sæpius opera, arripiebat. Observatoris præsentia impeditus videbatur, nunc enim repentinum operi suo finem imponebat, nunc vagos timidosque oculos in observatorem curiosum infigebat, nunc præceps opus readsumebat, nunc utrum continuandum, an ab opere desistendum hærebat. Impatiens moræ fœmella, variis quos edebat motibus, masculi conatus sæpissime impediēbat. Tandem masculus, vel silentio & quiete spectantis commotus, vel urgente necessitate coactus, eodem cum vigore, eodemque semper cum effectu conatibus respondente, relictum laborem reassumit. Summa interim, qua potuit, adtentione observabat Cel. *Demoirs*, num ova protracta suo spermate irrigaret masculus, ita enim ranarum, amphibiorum, pluriumque animalium aquaticorum ova fœcundari docent ex Phycis multi. Sic v. gr. *Swammerdam*, Vir magni sane nominis, ranam, marem, cum fœmella per 40. dies cohærendo, eo ipso momento ova spermate fœcundare docet, quo

quo eadem emittit foemella. Quæ ut accuratior discernere posset Cel. *Demours*, quum nimia loci umbra impediretur, bufones istos manu arreptos, volæ suæ imposuit. Ab initio interruptus labor statim exinde continuabatur, & quamvis per horæ quadrantem sua manu utrumque detinuerit Observator, nullum tamen spermatitis vestigium nec videre potuit, nec perferire. Sic & ranam marem, foemellæ parturienti opem ferre observaverat *Swammerdam*, sed imperfectiorem, inconstantiorē, nec ut in bufone, absolute necessariam. Forsan latera ejus tantum comprimendo, rana enim foemella, ut verbis ejus utar, ova sua uno impetu omnia ejaculatur. Et sane dolendum, quod nondum ad aures eorum recensita pervenerint, qui & artes mechanicas & liberales, scientias præter ea sublimiores, Geometriam, Dialecticam, Metaphysicam & Medicinam animalibus auctoribus nos debere contendunt. Artem obstetriciam, pronissimi certe, a bufone derivassent.

Monstruosa igitur aliorum opinio, qua vel ex luto fermentato, vel ex pulvere pluvia mixto bufones generari docuerunt, fabulæ anilis instar reiciatur, nec in censum veniat. Interim Cel. *Dodart*, Vir laude nostra superior, ad Regiam Scientiarum Academiam retulit: quod, quum 3. ante Kal. Julii, matutino tempore ex Versalio rediret, copiam bufonum adhuc exiguum, fossis vicinam in via regia detexerit; eamque fossis desinentibus desiisse, brevibus autem antea maximam pluviam esse delapsam. Hinc ille, suo jure, concludit: bufones Sole splendente delitescere, aut pluvia ex latebris suis evocari.

Spontaneæ ranarum generationi (ait Celeb. *Raius* in tractatu de existentia Dei) bufones viventes, in mediis sæpe arborum truncis & lapidibus, si finduntur, reperti, hi inquam, patrocinari videntur. Mihi quidem dubia res visa fuit, optime enim novi & plebis credulitatem, & aliorum mirabilia exponendi pruritum; hinc, nisi testibus fide dignissimis hæc comprobata habuero, nullus ad credendum inducar. His igitur perscriptis, alii, fateor, de quorum fide dubitandum non est, ea, quæ alii dixerant, confirmando, suis se oculis bufones in mediis lapidibus vidisse, suisque manibus protraxisse affirmarunt; & omnem de ipso facto dubitandi lapidem removerunt. Ast, nonne hi isti bufones, parviores adhuc, repertum aliquod lapidis foramen, (naturali suo instinctu receptaculum quærentes a frigore,) ingredi, tum vero in tantam magnitudinem excrescere poterant, ut, quo intraverant foramine, exitus intercluderetur? Frigiditatis suæ ergo, & torpedinis causa, minimus respirationi aer sufficere, & lapidis humor, nullo ejus motu exsiccatus, nutrimento cedere quidni poterat? Et sane, qui ejusmodi lapidibus inhærentes deprehendere bufones potuissent, ingressus eorum, si disquisivissent, vestigia detexissent. Quidni, & ipsam petrosam, quum nasceretur, materiam, vel bufo minor, vel ex spermate bufonis aliquid incidere potuit, & eo usque remanere, dum condensata fuerit materia, & petrefacta? Vel quomodocumque res demum se habeat, ego vero, motu illos spontaneo productos esse, qui credam, nullus unquam adducor. Hoc enim si velis, vel bufone producto jam prior, cavititas quædam, huic continendo sufficiens, concedenda erit, quod veri specie, & probatione omni eget; vel bufonem in lapide jam consolidato productum fuisse, statuendum; hoc vero magis absonum, etenim nec cor-

pus animalculi tenerum, hoc quasi carcere inclusum, extendi, nec lapidis moli, tam gravi, tamque solidæ resistere valet unquam.

Ambrosius Parè in libro suo de monstris, est, qui refert, solidos quondam in vinea sua quum cadere juberet lapides, eorundem in medio bufonem magnum sese reperisse, atque viventem, miratus sane, quomodo absque ullo aperturæ cujusdam vestigio, nasci, excrescere, & vitam producere potuisset animal. Exstinxit interim lapidicinæ præfectus admirationem, hic enim idem illud multoties sese observasse testabatur.

Retulimus, (verba sunt *Actorum Reg. Acad. Scient. de anno 1731.*) factum aliquod magna probabilitate, ac multorum testimonio constans; Anno jam præterlapso, 1719. quo nempe bufonem magnum viventem, vigentemque, ulni provectoris in trunco medio, occluso omni ingressu pariter, ac exitu, repertum esse docuimus. Jam, qui Nanneti commoratur Cel. *Seigne*, simillimi fere alterius facti historiam Academiae transmittit, ulni saltem loco, ilicem, (& hoc majorem excitat admirationem) substituit, habitaque ad ilicis diametrum ratione, 80. saltem ad 100. annos, bufonem ipsi inclusum, absque aere, seu nutrimento aliunde recepto, degisse concludit; cui quum prorsus ignotum illud de anno 1719. factum fuisse videtur; magis adhuc admirandus venit, exactus utriusque concentus.

Quæ quum tanto testimoniorum fundamento innitantur, ut, quam mirabilia videantur, in dubium vocari nequeant: injustus merito judicatur in Cel. *Raium*, *Rosinus Lentilius D.*, qui illum, nimia vel credulitate abreptum, vel in amicorum testimonia fide persuasum, agere, & scribere infimulat, ac si nihil, nisi id, quod nostris ipsimet oculis perspicimus, pro vero admittendum esset. Legitur autem in *Ephem. Germ. Cent. III. & IV. anni 1715. pag. 383. Lentilii Observatio in bufonem fœmellam Americanam, per dorsum parturientem*; cujus & figuram, & descriptionem in *Ruysschii Theatro Animalium* reperies. Lapidem interim molares, quibus Narbonnæ utuntur, atque Tolosæ, multum porosos, bufones interdum continere viventes, hosque, lapidibus incalcescentibus, suum semper venenum, farinæ communicare, varios inter, docet & *Georgius Agricola*; quibus tamen parum fidei præstandum esse judicamus.

Cæterum adeo terribilis, atque horrendi conspectus est bufo, ut vel fortissimi acerrimique animi cuivis, terrorem incutere possit, & tremorem. Tactu vel lenissimo laceffit, ira excandescit, pellem amplissime inflat, omnibusque resistit, quibus petitur, ictibus; nec quidquid maxillis semel tenet arreptum, linqvit unquam. Graviore, ac lento incedit gradu, nec ranæ instar, & ventre impeditus majore, & corpore ponderoso, pedibusque brevibus, saltare solet. Insequentem vero sese hostem extimescens, per posteriora liquorem quemdam limpidum, quem venenosum, & urinam ejus dicunt, hostis in faciem ejaculatur. *Christianus Franciscus Paullini*, in tractatu de bufonibus ex *Simone Paulli*, optimæ notæ viro, edoctum se esse profitetur, quod crumena quadam particulari, & vesiculæ simillima, liquor, de quo diximus, contineatur. Jam, si terras peragrantibus fides adhibenda est; bufones illos qui calidiores terras incolunt, his, qui frigidioris sub cœlo degunt, & majores esse, & magis venenosos, concedendum. Præterea Italiam aliquos interdum exhibere docent, qui caput hominis magnitudine exæquando, fœtus suos portant in dorso. Denuo alii ex omnibus

corporis sui partibus, lacteum quemdam exspirare docent humorem, quem ore emittunt; qui saliva junctus, herbas, fructusque quos transeunt, inficiendo, legumina, fraga, fungos, atque tubera, nisi prius aqua abluantur, periculosissima, quin comedantur, efficit.

Tenacioris autem, ut rana, vitæ est bufo, quem vel palo transfixum, aliquot adhuc dies vitam producere constat. Radios item solares perferre nequiens, fossas plerumque inhabitat, & antra, seu cavernas profundas, hortorum areas, ruinas, vepreta, lapidum acervos, loca umbrosa, obscura, humida, remota, atque foetentia. His vero toto die, nisi pluvia ad exspatiandum evocatus, & hieme cum aliis coacervatus, delitescit. Verno autem tempore, demisso quodam clamore, ejus adventum die nunciat, noctu autem, victum quæsiturus, hinc inde discurret. Et quamvis in terra reptando, gradum producere videatur, exiguo tamen aliquoties edit saltus.

Ranarum denique instar insectis nutritur, & muscis, vermibus, scarabæis, & lumbricis, nec non rore, & cœno terræ, salvia, cujus sub umbra delitescere peramat. Herbis tandem virulentis, & præsertim cicuta; quæ, testibus auctoribus, hanc ob causam, *bufonis apium* appellari solet. Quem igitur, ex Cel. *Linnei* testimonio *Stachys*, herba S. Christophori, & chamomylla foetida alliciunt; antipathia quadam naturali ferri censet in rutam, buteonem, lacertum, anatem, viperam, ac serpentum reliquos; feles insuper, formicas, talpas, araneas, mustelas, picem, & herbam *Nicotianam*, seu Tabacum. Aliquas ex enumeratis ejus antipathiis nostra nos experientia habere jubet pro confirmatis. Sic v. g. Tabacum in pulverem redactum, si dorso bufonis insperferis, statim ille convulsionibus correptus, emoriatur. Brevibus interim hic loci adtingendus venit ille, quem in capite bufonis obvium esse perhibent, lapis, *Bufonites* Latinis, Gallis, dictus: *Crapaudine*.

Naturam hujus bufonitæ determinaturi auctores in diversissima abeunt. Inventum illum esse a recentioribus; & *Boracis* nomine appellatum frustra autem quæri apud antiquiores, ut: *Plinium*, *Galenum*, & *Dioscoridem*, censet *Hermolaus Barbarus*. Varios sese bufones dissecurisse, *Johannes Baptista Porta*, nec prædictum in iis lapidem umquam reperiisse, refert; quem, ut alios, mineralibus adnumerandum esse credit. *Adrianus Spigelius*, & *Antonius-Musa Brassavolus*, officulum potius quoddam, quam lapidem in capite bufonis reperiri docent. *Aldrovandus* interim, sequenti ratione quæri vult bufonitem, & inveniri: Caveæ inclusum bufonem per aliquot dies subsequentes Solis calori exponas, usque dum siti excruciatum, bufonitem, qui evomendo proiciat, adigatur. Hunc vero, ne iterum deglutire queat, extemplo colligas, necesse est, & asserves. Adhibeat dictis fidem, qui velit, aut nostrum dare non est. Nos enim bufonem Soli expositum, vix horæ quadrante peracto, calore consumptum, emortuumque fuisse, experti sumus.

Adhuc aliam rationem inveniendi bufonitem docet *Mirauld*, bufonem viventem scilicet, ollæ fictili undecumque perforatæ immitti, & ollam formicarum in agmine recondi jubet; sic formicæ, devorata carne omni, nil præter ossa relinquunt & bufonitem. *Boeclerus* autem calculos, qui bufonitarum nomine plerumque veniunt, nil esse ait, nisi hystrices marinas, lapidea crusta obductas sive petrificatas.

En, quæ huc spectantia scribit Cel. *Thomas Brown in tentamine suo de erroribus popularibus*: Varia sunt, quæ de bufonis urina, de bufonite in capite ejus obvio, & de antipathia bufonis cum aranea dicuntur, digna sane, ut quantum veritatis iisdem insit, disquirantur: 1. igitur apud Anglos aliosque, bufonem mingendo venenum suum eiicere censent. Quamvis autem renibus urethrisque, aves, natura instruxerit, quadrupeda ovipara, atque serpentes, & plures piscium vesicis; locum tamen eundem non solum excrementis sed & urinæ eiiciendis destinatum esse, probabile est. Forsan hæc fuit erroris origo: quod bufones, præmisso quodam quasi excreationis strepitu, materiam nigram liquidamque per posteriora eiicere observaverint alii. Facto nos nulli obloquimur. Concedimus: forsan & venenosam; ast dubitandi locus est: num sit liquor ille urina; nec quidem ideo, quia uterque sexus eundem per posteriora eiicit, sed quia excrementis commixtus est; talis enim plerumque conspicitur, quamvis & ab excrementis separatus effundi potest nunquam. 2. Bufonitem, sive calculum quemdam in capite bufonis reperiri dicunt. Nil habeo, cur negem. Sic enim substantias quasdam calculosas in capite asellorum, percaræ & carpionum, imo in ipsis cochleis maioribus, testa carentibus, quam molli sint substantia atque exossi, reperimus. His enim natura, tamquam valvarum defectum retribuendo, calculum quemdam candidum atque depresso, vel potius concretionem testaceam largita est, & prope caput adposuit.

Rarissimus interim, sic plures scriptorum testantur, bufonites ille adest. Quidquod & de existentia ejus dubitandi campus est vastissimus. Quamvis enim lapidum venditores, & curiosi, illos qui colligunt, pro bufonitæ existentia militent, Physici tamen & de mineralibus scriptores contrariæ sententiæ accedunt; & concretiones quasdam ex mineralium regno profectas, nec in capite bufonum, sed in pratis repertas ac campis censent esse bufonitas. Pone autem, quod bufonis in capite inveniantur; nonne concretionem vel indurationem cranii ipsius potius, quam lapides habendi erunt mobiles. Quum enim testibus aliis, terra vivat & nutriatur bufo, quid mirum si frequentiores hujus generis concretionem enascuntur?

Mihi igitur & lapides, qui sub nomine bufonitarum circumferuntur, plerumque auctoritatis suspectæ, & quæ de bufone bufonitem deglutiente, ut homini noceat, fabulati sunt, nullius momenti historiunculæ videntur; imo Anatomix principiis obloquuntur. Media, & hic incedamus, via, aliosque bufonitarum mineralibus adnumeremus, alios autem bufonum in cranio petrefacto reperiri pronuntiabimus. Illorum copia apud Germanos occurrit. Horum vero pauci, ac oculis cancrorum fere similes. Plures tamen vel apud nos obviorum dentes esse deteximus lupi marini (piscis in maribus Septentrionis frequentissimi,) quibus artificio quodam singulari, formam suam tribuere; confirmat quæ diximus Cel. *Georgius Ent*, Medicus nostri temporis Experientissimus. Bufonitem igitur examinaturus, scabrosæ ejus parti candens admoveas ferrum, & si genuinus fuerit nullum, si spurius ingratisimum odorem exhalabit atque foetorem.

3. Odium acerrimum bufoni esse in araneam, & huic in bufonem, opinio fert adeo communis, ut in proverbium abierit. Certamina utriusque enumerantur, victoria autem aranæ plerumque tribuitur. Optandum foret, ut in determinanda horum animalium specie adcuratiores fuissent auctores.

stores. Phalangium nempe & araneæ venenosæ multum ab his differunt, quas videmus in Anglia. Nec tamen, si factò constaret veritas, antidoto destituti essemus. En! quæ nostra nos docuit experientia: Bufonem vitro inclusimus, socias adjunximus araneas plures, hæ igitur quietæ capiti ejus inhærebant, nec ille eas abigendi ne quidem desiderium indicabat; post per totum bufonis corpus obambulabant, ille autem suo tempore, alias post alias, magna cum dexteritate cepit, dentibusque omnes (erant vero septem) contrivit. Eadem fors & apes, bufoni vicinas, expectat. Nec magis solido veritatis fundamento superstructa videtur bufonis atque mustelæ inimicitia. *Franciscus Paullinus*, tantum esse scribit mustelæ horrorem in bufonem, ut hoc conspecto atrocissimis doloribus excrucietur, acutissimosque extollat clamores. Primo igitur, sic ille, fuga salutem quærens mustela, ruinas sive arbores rependo adscendere tentat; at tentatis in vanum omnibus, ac salute in desperatis habita, præceps irruit in bufonem, vel mortem, doloris finem, acceleratum, vel ultum illatos sibi dolores. Victoriâ quærit, mortem reperit. Eadem explicandi modus, quem in *Nova Osteologia* Cel. *Verdus* legimus, fecundissimi sane, ingenii fœtus dici meretur. Gulæ suæ amplioris ergo, sic ille, & bufones & serpentes aviculas integras facillime deglutiunt. At prorsus singulari ratione aviculas atque mustelas captare dicitur bufo. Illas enim quasi fascinatione incantatas, ut in gulam suam irruunt, adigit. Facti physicam, si poterimus, rationem quæramus, licet Physici plures causæ cuidam occultæ effectum tribuant. En, quæ mihi quidem arridet, rationem. Cæspite repositus bufo, hiantē gula atque amplissima aerem captat. Hanc transiens avicula seu mustela, pro fovea seu foramine suo nido conveniente habet, & vivacitate sua, & nidum quærendi instinctu incitata eo irruit, ac pro quietis loco reperit mortem, bufonis in stomacho.

Horrendus interim atque terribilis irritati bufonis adspectus, varios ad credendum induxit, quod per oculos potius, quam per anum, suum venenum eiiciat. Nobis experientia refragari videtur. Sunt, qui docent, alii: bufonem suo adspectu hominem enecare, hominis item adspectu interfici. Cujus rei testem habemus Cel. quondam Abbatem *Rousseau*, qui in libro suo *de remediis & secretis experientia comprobatis*, ubi de bufone, balsamum tranquillum ingrediente, ita scribit: Experimentum aliquod æque singulare ac curiosum me instituisse memini, quod pace L. huc referam. Docet Cel. *Vanbelmont*, quod si bufonem, vasi satis profundo, ut egredi nequeat, incluseris, ac acriter intentis oculis consideraveris, ille, tentatis in vanum saltibus & fuga in hominem præsentem oculos infigat, tum brevibus moriatur. Causam quærit Auctor Cel. in illo bufonis metu ac terrore eximio, quem hominis præsentia excitat, continuatus adspectus autem usque ad suffocationem bufonis exauget. Quater instituto experimento, quater effectus a *Vanbelmontio* descriptus respondidit. Lepidus sane casus experimentum tertium comitabatur. Hoc enim in Ægypto degens institui. Aderat ex Turcis unus, & bufonem quum expirantem viderit, in Sanctorum classem me referendum esse judicavit, quippe cui bestiam, a diabolo productam (sic enim cum Manichæis docent Turcæ) solo intuitu enecandi facultatem inesse credidit. Alio quodam tempore experimentum reiteravi, nec bufonem enecare valui, quamvis nec mihi sinistri quidpiam obtigerit. Denuo

& ultimo quidem, quum idem experimentum Lugduni commovans, repetere vellem, tantum abfuit, ut bufonem enecare valerem, quin potius ipse tantum non moriebar. Ille enim, quæsito in vanum egressu, in me conversus, solito magis inturgescens, quatuor pedibus, loco tamen defixus eodem, innixus, frequentissimos efflabat halitus, ac rubescentes & excandescentes in me figebat oculos. Tunc ego statim deliquio, mox syncope corripiebar, frigidus insuper sudore, frequentioribus tum alvi, tum urinæ ejectionibus adeo languebam, ut tantum non mortuus viderer. Nil, nisi theriaca & sal viperarum ad manus erant, horum igitur dosi majori hausta animus revocabatur, continuata deinceps per octo dies, altera dosi quovis matutino, altera quovis vespertino tempore, vires sensim recuperavi, redintegravi salutem. Hic forsan ille antiquorum basiliscus, quem intuitu homines enecare docebant, virtute saltem gaudet eadem. Nec omnes effectus singulares exponere licet, quorum capax esse teneo animal illud horrendum.

Superfunt alia, quæ de bufone scribuntur, v. g. 1. quod Græcum, quod dicitur nomen: *Geophagos*, idcirco gerat, quia terra (ad mensuram & pondus exacta) nutriatur. Ne enim nutrimenti copia umquam possit deesse, quotidie non nisi tantum, quantum pedum anteriorum alterutro capere potest, consumit: 2. quod cum rana coeat bufo: 3. quod cothurnices ætate provectiores abeant in bufones: 4. quod vel ex putrida anatum carne, vel ex menstruis mulierum, vel ex verme illo, spuma involuto, quem in plantis quibusdam reperies, nascatur: 5. quod bufonum frequentia certissima sit pestis imminens nuntia: 6. quod ovum galli gallinacei, nonnumquam agentis, a bufone incubatum reddat basiliscum. Hæc, hisque similia opinionum monstra, dum vel recenseantur, penitus refutata esse censeo.

Supereft bufo aquatilis, illeque adspectu horribilis, paludum cœnosarum, fossarumque stagnantis aquæ plenarum incola. Hunc *Schwenckfeldius* dicit: *bufonem palustrem majorem*, *Linnaeus*: *ranam abdomine fulvo*, & qui captandis ranis occupantur: ranam sudantem, siquidem cutis ejus tuberculis ac eminentiis obsita, continuo tincta videtur sudore. Veneni minus huic, quam terrestri, inesse credunt, & de hoc præcise bufone *Cel. Viro Vallisnieri*, Medicinæ Prof. Patavino, sermonem fuisse censemus, dum ita scribit: Germanorum exercitus, anno 1692. prope *Arceti*, Castellum, hiberna posuerat; & quum milites, ruricularum nonnullos ranas æstate captas in fossis, pro cibo adponere vidissent, hos imitaturi, magnam bufonum copiam iisdem ex fossis depromptam comedere. Nec ab incolis admonebantur, qui milites sibi molestos, brevibus sic enecatos fore sperabant. Ast spes sua exciderunt, militesque levissima saltem excoriatione in labiis, gutture, palato & lingua, ac micturitione frequente adficiebantur. Ex quo, quamvis *Vallisnieri*, carnem bufonis, veneno expertem esse concludat; & ad anates, impune bufonibus vescentes provocet; nobis tamen nulla arridet sua consequentia; quod, quum bufo, pro cibo veniens, nullum comedenti adferat damnum, nec venenum ejus externe adplicatum, perniciosum evadere possit. Carnem viperæ innoxiam esse docuimus, quidquod vel succum ejus flavidum stomacho mandare poteris, nec habes, quod timeas, teste *Cel. Raio*, ast idem ille, vulnus, vel corporis partem ictu viperæ sauciatam ingrediens, mortem adferre potest. Cæterum bufo aquaticus

antequam sibi debitam perfectionem adtigerit ; ranæ instar , gyrini sub forma detinetur , nec voce caret , ut alii volunt , sed teste *Linnaeo* , cuculi cantum voce sua effingit . Sæpius & nos gyrinorum clamores pro cuculi voce habuimus ; Imo concentum bufonum & longinquo exaudiens , canum venando latratum percipere tibi videberis .

Græcum bufonis nomen est : *Phrunè* , vel *Phusalos* ; Italicum : *Rospo* vel *Botto* ; Germanicum : *Kroete* , *Tasche* , *Botte* ; Belgicum : *Padde* ; Anglicum : *Toad* ; Suevicum : *Padda* , *Taossa* ; Gallicum obsoletum : *Boterel* , *Botterol* , teste *Cotgravio* ; Hodiernum vero : *Crapaud* , *Crapauld* , *Crapault* , *Crapaut* , *Crapau* ; quod ex *crepare* derivandum judicat *Cel. Menage* , siquidem eo usque inflari solet bufo , dum diffiliat , Galli autem pro diffilire dicunt : *crever* ; seu ex *repere* , quippe qui rependo potius , quam saltando incedere videtur . Vel ex *Crispaldus* , crispæ diminutivo , quia pelle tegitur crispa ac rugosa . Bufonem minorem dicunt : *Crapaudeau* , bufonem foemellam vero : *Crapaude* .

Multum olei bufo continet , multum salis volatilis , ac interno pariter ac externo artis Medicæ usui venit . Præsertim vero , quod internum ejus usum adtinet , sequentem in modum pro evacuanda hydropicorum aqua adhibeatur :

℞. Bufones integros , eosque vel Solis calore , vel ollæ argillaceæ immisos , furni ope arefacias , tum reduces in pulverem , & hujus gr. xij. ad ʒss. cum aliquot unciis aquæ parietariæ , vel s. q. syrupi quinque radicum aperientium subacta , boli instar hydropico exhibeas , & magnam elicies quantitatem urinæ . Quæ quidem diuretica pulveris hujus virtus , casu fortuito , si fides *Solenandro* , detecta fuit . Romæ commorans quidam hydropice corripiebatur , & uxor , sumtus pro salute recuperanda extimescens , veneno occidere maritum destinavit . Hac mente pulverem bufonum , ut diximus , calcinatorum præbuit , maximam ille urinæ copiam effudit . Reiteravit , moræ impatiens mulier , pulveris dosin , quo a marito inutili , ac sumtus exigente liberaretur , ille autem , quod reliquum erat lymphæ , copiosissima urina evacuavit , ac sanitati integræ restitutus est . En miram Dei providentiam ; quæ ea , quibus tenax mulier & impudica mortem marito parabat , salutis recuperandæ media esse voluit .

Effectus igitur cineris pulverisque bufonum , resolventi & alkalinae eorum virtuti tribuendos esse censemus ; imo muscis & vermibus , alkali-volatili abundantibus , bufonum nutrimento , ex parte tribuendos . Hinc pro regimine ægrotantis , ac varia corporis temperatura , jam urinam copiosissimam , jam sudorem provocant abundantem . Quam ob rem Medicorum varii in morbis pestiferis , dysenteriiis epidemicis , papulisque usum commendant pulveris bufonum . Imo pulvis *Balesii* Æthiopicus , cujus ʒss. summam in papulis seu variolis efficaciam tribuit Auctor , non est , nisi cinis bufonum calcinatus . Sic & alii , illique probæ fidei & scientiæ profundæ auctores , eundem pro eximio habent antidoto . *Helvetius* nomen ipsi tribuit : *pulveris sudoriferi* . Quam quidem virtutem si pulveri huic inesse dubites , sequentibus convinceris . Rusticus erat , qui peste sese infectum esse timuit , & bufonem integrum cum intestinis elixum comedit , jusculumque ebibit . Quod medium , quamvis alienissimum , ipsi tamen felicissimum evasit . Copiosissimum scilicet & per diem integrum continuans sudoris ac

urinæ profluvium subsequebatur, quo contagionis causa profligata, salus rustico restituta est. Dolores arthriticos tandem, & hos præsertim qui vulnera & plagas concomitantur, gr. xv. ad xx. pulveris hujus lenire novimus.

Aliorum usibus venisse constat, ut spiritu vini suffocatos bufones retortæ immittant, tum vero reperiunt, ac per gradus exaucto igne, spiritum extrahant cum sale volatili. Utriusque insignis est usus in Medicina, quæ diuretica illos & sudorifera virtute gaudere docet. Salis gr. vj. ad xij. liquori adpropriato mixti, spiritus autem gutt. xx. ad xxx. pro dosi, veniant. Nec non sal fixus, parcius tamen, ex bufone vivente calcinato elicitur, cujus gr. jv. in febribus intermittentibus præscribunt; tunc enim alkalina sua virtute operatur. Imo aliud contra easdem febres medium, pro certissimo venditant *Ephem. Germ. Dec. II. anni 8. obs. 104.*, lac scilicet hauriri volunt, quo cum bufo arefactus ebulliverit, illudque materiam febrilem per vomitus, sudores atque urinas expellere adserunt.

Quod ad externum bufonis usum, illum arefacere, & jam ex collo suspendere, jam maxillis supponere, jam manu usque dum incaluerit, detinere solent, ad retinendum sanguinis profluvium, in febribus malignis, aliisque ejusmodi morbis superveniens. Sæpius aliquis effectus respondet medio. Nec non bufones pestiferis bubonibus adplicatos venenum omne adtrahere, & salutem ægrotanti certissimam conciliare constat, testimonio *Cel. Kramer*, Medici apud Germanos Experientissimi. Multos ego vidi, sic ille, ruri commorantium, qui aliis, peste infectis opem ferendo, & officia, omnes contractæ pestis signa ac notas ipsi experiebantur; carbunculos excipe atque bubones, nondum penitus proruptos. Nec aliis illi ad expellendum mediis utebantur, nisi bufonibus integris aere exsiccatis, eosque telis linteis involutos femoribus adplicabant & perinæo, scroto quod interjacet ac ano; tum autem validioribus sese stragulis obtegebant, & quidquid transpirationem intercipere possit, vel impedire, id omne summo cum studio evitabant. Nec nisi tunc demum bufones removebant, quum subsistente inflatione seu turgescencia ulteriore, omne jam venenum adtraxisse videbantur; primis secundos tertiosve, usque dum salus integra redierit, substituebant. Sic & *Cel. Vanhelmont*, bufones tumoribus inflatis sive bubonibus adplicatos numquam non dolores leniisse ac opem eximiam adtulisse sua testatur experientia. Idem ille, bufonem renibus adplicatum, magnam urinæ quantitatem expellere, & hydropi mederi docet.

Imo nostrismetipsis oculis humores quosdam strumosos adplicato bufone majore, adhuc spirante & eviscerato (cui per novem dies antecedentes subtractus fuerat cibus omnis) sanatos esse vidimus. Tumori Linteo obvoluto per 9. dies, spreto eximio suo fœtore, inhæreat; subtracto autem linteo avulsam plerumque pellem videbis, quæ quo renascatur, sufficit tela linteæ circumligata.

Sic & bufo calcinatus, seu ad eum usque gradum arefactus, ut facilis reducatur in pulverem, singularis, teste *Ettmullero*, est utilitatis, ad sanandas gangrænas, & in primis illas, quæ mammas mulierem adgrediendo, præsentibusque ulceribus, gravius minantur periculum. Num vero nudus parti adfectæ inspergatur, vel aurilythargirio & fuligine mixtus, ope pennulæ saliva tinctæ illinatur, perinde est. Os sem ex crure sinistro anteriore, quod brachium bufonis dicunt, deorsum, dolores ejus pro-

profligare docet Cel. *Charas*, *Vanbelmontium*, aliosque recentiorum sequutus.

Duplex redit oleum ex bufone, infusione alterum, alterum coctione. Illud præparaturus, adfunde olei olivarum lb. ij. duodecim fere bufonibus viventibus, & f. a. u. Hoc autem compositurus, accipe bufonum num. xij., illosque in frusta conscinde, & in olei olivarum lb. iij. & vini candidi ℥xij. paullatim excoque. Consumpta tandem omni fere humiditate bufonum aquosa, fortius exprimendo percola, & f. a. u. Hoc igitur anodynæ ac deterisivæ suæ virtutis ergo, non solum contra pustulas labiorum, sed & contra gangrænam mammarum & hydropem commendatur, & si regionem renum eodem illeveris, abundantissimam urinæ excretionem promovere solet. Idem, teste *Schultzio* in *prælectionibus*, contra vulnera facit ex armis veneno illitis proficiscentia; teste *Carolo Musitano*, contra effluviū aliasque adfectiones capillorum, (dummodo caput rasum sæpe eodem perungas, ac corpus expurges medicamentis;) teste tandem *Jacobæo*, ad detergenda ulcera, ad profligandos tumores scrophulosos, ad delendas faciei maculas. Quoscunque enim dolores, atque tumores, sedant, profligant olea dicta, dummodo pars adfecta iisdem ungatur. Virtutem spiritus ac salis bufonum volatilis, sudoriferam & diureticam, supra jam commendavimus. Hunc igitur spiritum, nondum rectificatum, bis terve quotidie, multoties complicato linteo, tepide, affusum, mammisque adplicatum, tamquam specificum, contra occultas mammarum gangrænas commendant *Ephem. Germ. Cent. IV. Obs. 179*. Imo subnexum legimus: varias, quibus operationem subeundum erat, hoc solo medio, penitus fuisse sanatas. Optandum sane, ut & omnia ista ita se habeant, & in nostris etiam regionibus usui veniant.

Teste Cel. *Lemery*, in capite bufonum vetustiorum maximorumque calculus quidam, jam albi, jam alius coloris, quem bufonitem dicunt, reperitur. Hunc annulis inferere solent, quibus digitos cingunt, & illum, cujus manui inhæret, ab omni veneno tutum esse pronuntiant. Nobis autem suspectæ fidei est amuletorum virtus, & bufonitæ si qua est efficacia, hanc non nisi ex interno ejus usu proficisci posse concludimus. Naturæ enim, quam habet, alkalinæ ergo, forsan ad absorbenda acida, ad sanandam diarrhœam & dysenteriam, sive provocandam urinam facere valet.

Venenum ut bufoni tribuas, tot exigunt variorum observationes, postulat experientia. Nec tamen corpori ejus inhæret venenum, sed salivæ potius & urinæ. Multos ego homines novi, qui & bufones familiariter tractavere, quidquod comedere, ac eundem illis, qui ranis inest, saporem tribuere; at urinæ bufonis atque saliva virulentæ sunt qualitatis, quæ si partes quasdam corporis tetigerint, hæ statim inflammatione turgescunt; & herbæ seu fructus illoti, si illis irrigati fuerint, comedentibus evadent infestissimi. Amicorum unus, sic recenset *Turnerus*, per jocum, caput bufonis diutius ore detinuit, at acerbus joci erant fructus, eadem nocte, tanta turgescencia labra ejus & linguam invasit (nescio ab ictu sive morfu bufonis, utrum a saliva ejus effusa proficiscens) ut varios per dies ne vocem quidem proferre valeret; quidquod vitæ periculum aderat; tumor enim & gulæ partes posteriores ac musculos tetigerat, ac deglutiendi facultatem interceperat. Cel. *Redi* varios nominat, qui impune bufones comederant, tangentibus tamen infestum evadere posse bufonem adserit; Sic

puerum quemdam, inter exspatiandum, bufonem lapidibus petiisse recenset, cujus urinæ aliquot guttæ, quum labra pueri irrigaverint, tumor 2. digitorum elevatus suboriebatur, & neglectis ab initio mediis, numquam prorsus depelli potuit. En! quæ *Ambrosius Parè* recenset, & caveto ut herbas, & præsertim fraga, bufonum delicias, illotas, comederis. Sæpius enim alii, hac cautione neglecta, inscii mortem sibi conciliaverunt; sæpius alii indigestionibus laborant, nec causam norunt, quæ in virulenta herbarum fructuumque qualitate latet. Mercatores duo, sic *Cel. Parè*, Tolosam accolantes, dum diversorii in horto obambulantes, prandii tempus expectarent, salviæ folia decerpere, & vino ipsis exhibito deinceps indidere. Statim inter prandium vertigine & convulsionibus corripiebantur, tum deliquio continuo, sudore frigido, vomitu assiduo, quæ omnia tandem mors ipsa excipiebat. Cadavera intumescencia venenum haustum loquebantur. Illico in iudicium vocati, quotquot aderant, mortis illorum fontes, iisdem se ipsos quibus isti, cibis, nec tamen salvia usos fuisse testabantur. Tunc Medicorum qui aderant, unus, salviæ urinæ seu saliva animalis venenosi, virulentam reddi posse profitebatur; & salviæ horti perquirendo, foramen bufonibus plenum salviæ vicinum reperit, bufonibus igitur aqua fervente expulsis, salviæ horum urinæ vel saliva infectam fuisse concludebat. Ut igitur fructus seu herbas recenter decerptos, atque illotas comedas, L. caveto!

Venenum bufonis comitantia symptomata sunt flavus in pelle color, tumor, rugositas, spirituum torpor, vertigo, convulsiones, deliquia, sudores frigidi, mortis, quæ sequitur, nuntii.

Bufonis veneno autem evacuatione, emeticis & clysteribus producta, medendum; tum antidota convenientia e. gr. doses aliquot salis volatilis bufonum vel cornu cervini, vel Theriacæ Venetæ exhibeantur, quibus, si qua adest, sanguis coagulatio omnis dissolvatur, sudoribusque excitatis, veneni eliciatur malignitas. Si pars exterior bufonis veneno adfecta fuerit, aqua vitæ, urinæ, vel aqua sale commixta, abluatur. Hæc enim apud nos sufficiant, quia minor animalium quæ inter nos occurrunt, venenosorum qualitas est virulenta, quam illorum, quæ calidioribus in terris reperiuntur.

Balsamum *Batesii* tranquillum, & pulverem Æthiopicum, bufones integri, capita vero eorum, Balsamum *Leitorianum* Pharmacopœiæ Parisiensis ingrediuntur.

℞. Bufonum quantum vis, eosque capite & intestinis rescissis, ac Sole exsiccatos reduc in pulverem. Hujus autem gr. x. ad xv. admixto sacchari ana, hydropisia ascitica laboranti, ter quaterve, redeunte quarta quavis die exhibe; violentioribus enim alvi secretionibus interdum expurgare solet.

℞. Bufonum ℥. β.

Olei olivarum ℥iiij.

Ceræ ℥j.

Ollæ fictili inclusa omnia ad consumptionem dimidiæ partis, vel ad consistentiam cerati adquisitam ebulliant, tum supra corium extensa renum regioni, si quo dolore adfecti fuerint, adplicentur.

S A L A M A N D R A.

DUæ sunt, ex communi Physicorum sententia, salamandarum species, illæque & forma, & colore, & magnitudine inter se differentes. Hinc primo quidem de Salamandra terrestri, tum & de aquatica.

Salamandra. Offic. Schrod. 345. Dal. Pharm. 433. Gefn. de Quadr. Ovip. 80. Aldrov. de Quadr. Ovip. 639. Schvenckf. Rept. Siles. 163. *Salamandra terrestris*, maculis luteis distincta, Charlet. Exer. 28. *Salamandra terrestris* Jonst. de Quadr. 137. Raii Syn. Anim. Quadr. 273. *Salamandra vera, terrestris, nigra, maculis luteis variegata*; *lacerta stellata venenosa*; *lacertus melanoxanthus*. Nonnul.

Recensentem nunc audiamus Cel. Joannem Paulum Wurfzbain, D. & Soc. Curiosor. Naturæ Sodalem. Reptile animal, sic ille, in *Salamandrologia sua*, est salamandra, & quadrupes, & lacerto viridi simillimum, capite saltem ac ventre crassioribus, cauda autem brevior donatum. Rostro molliore gaudet salamandra, oculis magnis, ac pedibus anterioribus 4. posterioribus 5. digitis, totidemque unguiculis instructis. Pelle tegitur nigra, maculis ut plurimum fulvidis conspersa, splendente, ac tamquam vernice obducta. Dissecto abdomine statim obvenit peritonæum, punctis nigris conspersum, & ad originem pedum anteriorum adscendens, cor ab intestinis abdomine contentis, pulmonibusque separat, ut in pluribus facit Diaphragma. Tum stomachus, sæpissime saburra & lumbricorum frustulis plenus. Hepar magnum, tribusque ex lobis compositum. Exinde fellis vesicula rotunda, livida, lobo hepatis dextro cohærens. Lien exiguus in sinistra stomachi parte. Renes oblongi. Intestina a Pyloro usque ad anum vario modo reflexa, sub hisce autem ovula plura rotunda; & matrix bisulca, cujus tubæ varios anfractus efformando adscendunt, utraque tandem extremitate junguntur. In masculo autem quatuor testiculi, modo globosi, modo pyri formam repræsentantes, & alia quædam corpuscula, mihi quidem epididymes visa. Sacculi tandem testiculis adhærentes, quos materiæ ergo, qua turgent, oleosæ, *oleosæ* dicere solent.

Residet in pectore cor exiguum, rubicundum ac punctulis nigris conspersum; tum pulmones, duobus sacculis oblongis, aeri recipiendo destinatis, pellucidis item ac transparentibus efformati; qui quousque pertinent, magna venarum tenuissimarum copia, (quæ ex principio œsophagi exortæ, usque ad ovarium, abdomen transeunt) distinguuntur.

Capitis in parte utraque, post oculos, glandulam observabis superficiali, & eminentiæ flavidæ, punctisque nigridis distinctæ, simillimam; quam si vel levissimo digito comprimas, succum quemdam lacteum reddet. Tum nares, binis foraminibus exiguis præditæ; & oculi exandescentes ac inconstantes, imo palpebris, supra flavidis & mobilibus, infra nigris & immobilibus muniti; triplici insuper humore suo instructi; nec crystallinus, ut solet, oblongæ, sed prorsus rotundæ propior accedit figuræ; & lingua ut ranis, crassior, mucosa, lata; nullum vero auris vestigium; exiguus tandem in cranio cerebri adparatus, quod figuram pyramidalem, aut rudius repræsentando, aliam quamdam vertebrae versus sibi junctam habet portionem, quam cerebellum constituere existimamus.

Skeleton salamandræ ex parte sua anteriore, ranæ potius, quam lacerti sce-

sceletō æquiparabis. Ossium capitis eadem fere est contextura, quæ ranæ. Sic nempe oculis destinata sunt foramina magna, strictissima autem cerebri sedes. Maxillarum utraque, & palatum denticulis quasi sciatis, & ordine dispositis confita; licet ranæ maxilla inferior dentibus carere dicatur. Pectus item duabus cartilaginibus contiguīs, latissimis, & prominentia exigua quadam, caput versus, conspicuis efformatur, & eo quidem paullulum a ranæ pectore differt. Sic pectoris cartilaginibus bracchia adhærent, & vertebrarum spinis superjacent, quas substantia pariter cartilaginosa, tenui, & ossi ex carpionis capite simili, constructas esse videbis. Sic crucra anteriora brachiis cohærentia, & duobus ossibus articulati inter se nexis, in fine autem leviori quadam divisione, nec penetranti semiapertis, composita. Sic carpum octo officulis exiguis, metacarpum quatuor oblongis constructum, quibus digiti nectuntur, (quatuor nempe ad pedes anteriores abeunt, quinque ad posteriores; & digitorum singuli tribus constant officulis.) Sic, vertebrae costis quidem carentes, sed harum loco spinis munitas; spinæ autem osse *Sacro* excavato, & utrique perforato terminatur. Et hic quidem duo per synchondrosin articulata accedunt officula, quæ superiore sua parte, duabus substantiæ cartilaginosa, eminentiis instructa, & ossium pubis, & ossium coxendicis, vices subeunt, propriis sibi suis ligamentis juncta; Et his posteriora crura nectuntur, non nisi digitorum numero ab anterioribus differentia. Cauda tandem, ossi quod *Sacrum* dicunt, cohærens, vertebrae primo latis, tum magnitudine sensim decrefcentibus, componitur.

Variis interim iisque pulcherrimis coloribus ornata salamandra terrestris, horribilem, si quem habet, adspæctum, in præconcepta hominum, de veneno ejus opinione potius, quam in ipsa ejus figura, quærendum esse censeo. Multos adspæctu ejus quidem timore percussos, post autem innoxia suæ qualitatis convictos, impune ac imperterritè manibus illam tractasse vidimus. Scatet enim præjudiciis mundus, ab aliis ad alios traducuntur. Ingenuus sæpe auctor, quæ videndi copia non fuit, ab errantibus transcribendo errat, & secum alios in errorem abducit. Quanta, quæso, *Plinio* duce, de succo lacteo, quem icta salamandra, toto ex corpore eiicit? quanta, de saliva, quam evomit? Quæ si pellem tetigerint & capillos omnes defluere docuerunt; & herbas, fructus, puteosque iisdem adeo infici, ut integræ familiæ aliquando emoriantur. Nos autem quoties quantumque salamandram ictibus irritaverimus, numquam tamen eo perducere potuimus, ut vel lacteum succum ex corpore emitteret, vel salivam evomeret. Quod si autem pelle eam exuas, vel caudam aliamve corporis partem compressione violentiore cogas, ex parte læsa tantum succi lactei guttulas quasdam destillare videbis. Male igitur intellecti *Aristotelis* auctoritate, qui, quæ refert traditionibus sese debere testatur, alii salamandram vel mediis in flammis vivere & nutriri docuerunt. Exinde tot hieroglyphica, tot emblemata, tot antiquorum pariter ac recentiorum proverbia. Tantæ enim est, testibus quibusdam frigiditatis, ut vel medias flammæ illæsa possit transire, ac prunas, glaciei instar, extinguere. Ast refragatur experientia; per breve quidem tempus, visciditate sua frigida humidaque parcioris ignis vires restringere valet. Quum vero nihil sit inanimatorum, nedum animalium quod ignis vi resistere queat: nec salamandra poterit. Vir Nobilis

bilis *Cervini*, sic *Trans. Philos.*, Romæ, salamandram ex India eo deportatam in ignem proiici iussit; quæ extemplo intumescens, multum materię crassioris atque viscidæ evomendo carbones exstinxit. Iterum accensum ignem denuo restinxit, sicque duas per horas irritam reddit ignis violentiam, ac novem exinde menses integros supravixit. Sit facta veritas; nos tamen vel Indiæ salamandras a nostris natura diversas, vel carbones parum accensos fuisse ducimus. Nostrates enim, humoris, quo obteguntur, viscidi ergo, aliquamdiu in igne quidem perdurare, & determinatam ejus vehementiam extinguere possunt; ut & ranæ, lacertæ, crudæ carnis frustula, albumen, reliquæ tenaces substantiæ atque viscidæ; at consumpta tandem humiditate omni vel salamandris est moriendum. Nec recentiorum igitur nec antiquiorum testimonia nobis ut persuadeant, sufficiunt, quod salamandra mediis in flammis illæsa degere possit. Et frustranea sane opera magici ignem atque incendia, salamandris eo projectis restinguere quærunt. Falso etiam salamandra dicitur acrior resistere adgredienti; lentior ejus ingressus mentitur renitentiam. Percussa caudam, quasi vindictam quærens adtollit, reflectit, tum ictibus iteratis mortuam sese fingit. Nec soni edendi capacem judicamus salamandram; nos saltem nullam unquam ejus vocem audivimus. Tenacissimæ est vitæ, ac lacertorum, ranarum, bufonum atque serpentum instar, vel extractis intestinis & corde, multas adhuc per horas vitam conservat. Viventem disseca, & pars ejus anterior adpropinquabit posteriori, hæc autem retrocedet. Sali, vel aceto integram iniicias, &, ut lacertus communis, ut lumbricus aliique convulsionibus frequentibus correpta enecabitur. Plurimos per dies salvam atque incolumem eam inhærere aquis experti sumus, atque tunc pellicula quadam tenuissima, cinerea ac subviridi sese exuere. Aliam ab aliis sex mensium tempore in aqua putei conservatam esse memini, dummodo aquæ turbulentæ limpida interdum substitueretur. Rursus aliam *Oligerus Jacobæus*, ut ipse testatur, per anni spatium in aqua limpida, absque ullo nutrimento alio adservavit. Aquæ autem immissa salamandra os suum cum naribus, ut extra illam retineat, annititur. Vulgaris equidem fert opinio, quod & audiendi facultate careat & differentia sexus. At experientia refragatur. Etenim, viperæ instar, teste *Belonio* vivipara est, & 50. ad 60. foetus simul edere solet. Sic *Mauritius Hoffmann* in Salamandra, foemella, Patavii dissecta, 13. foetus, auricularis digiti longitudinem adtingentes, nigros, maculis flavis destitutos, at puncto ruberrimo, cordique simillimo notatos in pectore, detexit. Imo & nos aliam quamdam salamandram foemellam, vitro inclusam, 34. foetus edidisse vidimus, eosque vivos, colore debiliore ac maculis nigris interstinctos, pro longitudine tandem ultimam digiti auricularis phalangem exæquantes. Sunt, qui salamandram, Chamaeleontis instar ex aere vivere volunt. Alii vaccarum ubera, exinde tabescentia, inter pascendum salamandram exsugere perhibent. Alii tandem apibus favisque mellis eam vesci scripserunt. Nobis quidem muscis, lumbricis, scarabæisque, quibus alias lacerti, & ranæ vivunt, vivere videtur. Verno autem, & autumnii tempore, humido præsertim, quæ pluviae nuntia est, salamandra, conspicitur. Sereno autem æstivo Cœlo, Solis ardore ut egrediatur, impedita; & hiemis frigore torpescens, delitescit. Crenas denique arborum inhabitans, & ruinas, & lapidum acervos, & vepreta, &

corylorum radices, frequens est in Italia, Germania, Helvetia, Normannia, & Picardia, nulla tamen in Suecia, teste *Linnaeo*, reperitur.

Et hæc quidem ex *Wurffbainii Salamandrologia* hausta, de Salamandra terrestri sufficerent; nisi alia adhuc, & singularia quidem, in *Actis Reg. Scient. Acad. de anno 1727. pag. 27. sub titulo: Observationes, & experimenta, circa Salamandræ aliquam speciem instituta a Cel. de Maupertuis*, legerentur. Leguntur autem sequentibus:

Nec multus ero, (sic Auctor illustris) in enumerandis variis salamandræ speciebus, nec recensendis, quæ ab aliis tradita sunt; sed ea saltem exponere sufficiat, quæ meis circa Salamandram, quam terrestrem adpellant, experimentis, comperta habeo.

Est autem illa lacerti aliqua species, quinque aut sex digitorum longitudine. Capite gaudet bufonis instar, lato ac plano, pedibus bufoni magis quam lacerto similibus; cæterum corpore, & cauda (majori tamen utroque) lacertum æquiparat. Nec in cuspidem acutam ejus cauda terminatur, sed unam fere, diametro, lineam habet in extremitate. Pars ejus superior nigra, maculisque flavis interstincta; venter fulvidi, interdum flavidi est coloris. Duæ insuper zonæ flavidæ ex utraque capitis parte, oculis superiores, profectæ, ad caudæ originem usque, parallelæ producuntur. In medio autem corpore plerumque desinunt, exinde continuantur; rarissime non interceptæ procurrunt. Reliquum animal omne, flavidis tingitur maculis, nec figura singulari, nec loco distinctis. Pelle obtegitur lævi, squamisque carente, in lateribus tamen parum hirsuta. Duo præter ea in dorso ejus conspiciuntur mammillarum seu papillarum ordines paralleli, ad totam spinæ dorsi longitudinem procurrentes. Pelle nonnunquam salamandra gaudet arida, ut lacertus, plerumque quadam roris specie obducta, cujus ergo, tacta præsertim, vernice illita videtur. Sic & lactis aliquam speciem sub pelle recludit, quod salamandra compressa, longæ fatis ejaculatur. Egreditur autem succus ille lacteus ex innumeris foraminulis, quorum plurima, vel absque microscopii ope, ea præsertim, quæ papillis respondent, detegere valebis. Idem ille quem primum adpellavimus animalis humorem, licet omni colore destitutus, & vernici transparenti similis, idem succus esse potest lacteus, ast guttularum raritate, & parciori quantitate, colore albido privatus. Succus hic illi plantarum succo perquam similis esse videtur, quem nonnullæ, latticinosa alias appellatæ, ubi rescissæ fuerint, exserunt. Acrimonix summæ, & stypticitatis est, linguæque applicitus nullum grave malum producit, præter cicatricem, seu rugam, quam ubi tetigerit, post se relinquit. Urticæ nomen pisces quidam, similitudinis sui ergo cum urtica, quum tangantur, accipere; salamandra titymali inter animalia nomen meretur. Contrita etenim, seu compressa, eximium foetorem edit. Neque tamen agilitate sua lacertam imitatur. Pigra potius, & fegnīs in locis humidis, atque frigidis degit, atque fundamentis parietum, nec foveam suam relinquit, nisi vel delabente pluvia allecta, vel aquam quæsitura, vel aquæ ad foramen suum penetrantis timore, vel insectorum, (quæ nisi ab aqua fere suffocata, captare nequit) captandorum gratia. Nec mirandam, medio in igne vivendi facultatem, antiquiores tantum, sed etiam infestissimi animalium, ac periculosissimi nomen recentiores Physici ipsi tribuere; imo teste *Plinio*

unius regionis hominibus interficiendis una salamandra sufficeret. Copiosior illa, quæ proximo Octobris mense delapsa fuerat pluvia, varias suis locis salamandras expulerat, quarum nonnullæ summa, qua par est, cautione adhibita, ad me deportabantur. Inter cætera primum, decantatum illud prodigium disquirere studebam, de salamandræ incombuſtibilitate. (Veniam dabis L. B. de prodigiis jam tractanti sermoni, ut & prodigiose efficto utatur vocabulo.) Nec incongruam fabulam verificandi me pudit studi; non enim, nisi vel ridicula interdum experimenta instituenti Physico, veterum auctoritate ac oraculis superstructa opinionum monstra destruere datur atque evertere. Plurimum igitur quas flammis commiseram, salamandarum plurimæ extemplo moriebantur. Quædam primo ex igne semicombuſtæ egressæ, secundo peribant. Statim vero ac flammis immititur, guttulis lactis, de quo diximus, undecumque obtegatur; quod ignis calore rarefactum ex promptuariis suis undequaque præsertim autem ex capite, papillisque profluit, & indureſcendo, margaritarum formam nonnunquam induit. En fabulæ originem. Nec tamen tanta est profluentis copia lactis, ut vel parcissimo igni exstinguendo sufficiat. Sufficiebant interim tanta temporibus antiquis, ut incombuſtibilis pronuntiaretur. Antiquiorum ergo vel credulitatem confiteare, vel si auctoritatem defendere malis, de alia illis salamandra sermonem fuisse, perhibeas. Utrum libet? Quæras ergo salamandram antiquiorum; nos interim hanc, proprietatem descriptam, probatamque, illorum fabulæ ansam dedisse, co usque tenebimus.

Quod ad salamandræ venenum attinet, duo constitueram: 1. etenim animal aliud salamandræ morsui exponere: 2. salamandram pro cibo, animali cuidam præbere decreveram. Jam vero, & animal salamandræ cibum non respuens, tum salamandra quærenda erat, alia mordendi cupida. Utrumque difficile. Sexcentis ego illam modis irritabam, numquam ut rictum aperiret, commovebam. Ast quum vi adhibita tandem aperuissem, quæ vidi? denticulos ſciatos, & æquales, ad conscindendum potius, (si tanta virtute valeret ac vi salamandra) quam ad mordendum aptos. Aperto itaque salamandræ rictui pullum gallinaceum, subtractis, ubi morsui exponebatur pennis, immisi, & compressis (majori sane, ac salamandræ, vel fortissimæ fuisset, vehementia,) ejus maxillis, dentes moveri potius, quam carnem pulli penetrare observavi. Subtracta deinde prope anum aliquantula ejus pelle, & hunc locum dentibus salamandræ percussi. Tum subtiliorem adhuc animalis cujusdam partem quærendo, canis linguam, labiaque, & linguam galli Indici dentibus salamandræ recentis captæ subjeci, ac variis morsibus lædi. Nullum unquam ex animalibus, sinistro quodam adſciebatur effectu. Jam licet animalia, quorum morsus est periculosissimus, integre deglutita innoxia esse tenebam; aliqua tamen vel timoris salamandarum communis, recordatione, & mihi in hærente, vel liquoris lactei sapore, quoniam ipsemet nescio adactus; salamandram aliis pro alimento præbui, utrum noceret experturus. Ast ne longissimo quidem jejunio, ad deglutiendam lacte adeo injucundo involutam ac quasi munitam, perducere quibat animal ullum; nec magnitudinis ergo, salamandra animali fraude decipiendi exhiberi poterat. Apertæ igitur violentia canis gulæ, salamandræ dissectæ frustra, plurima adhuc vi-

ventia inieci, & gulam canis per semihoram sequentem subligavi. Eodem tempore salamandram integram minorem gallo Indico deglutiendam præbui. Neuter tamen, ex alacritate sua quidquam amisit. Hora integratum, ex qua salamandram deglutierat canis, peracta, caudam evomit cum pedibus, concoctu ut videtur difficiliore. Suam vero Indiæ gallus totam concoxit salamandram. Uterque cibo deinde, & potu, pro solito usus, nullum unquam infirmitatis signum edidit. Lacte tandem salamandræ, ut nihil inexpertum omitterem, maceratum panem pullo gallinaceo obieci; & bacillos eodem lacte tinctos vulneribus indidi, quæ stomacho & femoribus, alius pulli studio intuleram. Et ne quidem exinde malum. Salamandra semper mansit innoxia. Dicit quispiam: alio forsantempore, aliis rerum rationibus, aliis venenosa animalibus evadit. Ego autem nec hisce conjecturis locum video, nec ad experiendum tutiores vias, ac faciliores.

Aliud experimentum lubet in medium afferre. Dissectis etenim pluribus salamandris, ova simul inesse detexi, & foetus, viviparorum instar, perfectos. Ova duos racemos effingentia, avium ovariiis, similitudine, accedebant; foetus autem duobus tubis prælongis inclusi conspiciebantur, ac texturæ tuborum tenuissimæ ergo, trans tunicas earum apparebant. Foetuum in alia 42. in alia autem 54. numeravi, omnes fere viventes, ac corporis efformati structura maximas salamandarum exæquantes, agilitate autem superantes. Aptissimas sane ad retegenda generationis mysteria, salamandras censeo; eisdem scilicet legibus naturam operari novimus semper, licet varia, atque diversa corpora edat. Quanta quæso diversorum inter se comparationi debet Anatome! Omnia etenim (id quod impossibile est) naturæ corpora disquirenti tandem, unius solida, plenaque cognitio, speranda alias foret.

Nihilo tamen secius, loquentes audibis ex plebe & doctis alios, quod veneni omnis pessimum sit salamandræ virus; quod salamandræ morfu icto totidem opus sit medicis, quot habet maculas animal; quodque, si auditu foret instructa, omne hominum genus brevi extirpatum foret. Passim errorem populi cum lacte capiunt infantes, salamandras esse hominum hostes, bufones vero amicos. Certamina amborum narrantur. Bufo plerumque victor decedere dicitur, dummodo verbascum seu plantaginem, pro adfricandis sanandisque vulneribus reperiat. Quæ quousque teste quodam Physico, illoque oculato probata fuerint, naturæ historiam dedecorantes inter fabulas reponantur.

Gallicum denique ejus nomen, quo *Salamandre*, *Salemandre*, item *Salamandre terrestre* audit, ex Græco & Latino: *Salamandra* derivandum venit. Ab Italis nuncupatur: *Salamandra*, vel *Salamandria*, ab Hispanis: *Salaman-tegua*; a Grisonibus, seu Rhetis: *Rosada*; a Sabaudis, & Delphinatum colentibus: *Pluvine*, a Vasconibus, Lemovicis, & Pictaviensibus: *Mintil*, ab Occitaniæ, & Provinciæ incolis: *Blande*, *Alebrenne*, *Arrassade*; a Lugdunensibus: *Laverne*; a Lugdunensibus *Sourd*; a Normannis: *Mouron Moron*, a Germanis: *Maal*, *Malen*, *Punter Maal*, *Mol*, *Mohl*, *Molle*, *Molch*, *Molck*, *Olm*, *Salemander*, *Salamander*, *Salamader*, sic & ab Anglis & Belgis. Salamandram minorem Galli dicunt: *Salamandreau*.

Lacertus aquatilis. Offic. Schrod. 343. *Salamandra aquatica*, Rondel. de Aquat. 230. Dal. Pharm. 433. Charlet. Exer. 28. Raii Syn. Anim. Quadr.

273. *Salamandra aquatilis*, Aldrov. de *Quadr. Ovip.* 647. *Salamandra aquatica*, aliis *Lacertus aquaticus*. Jonst. de *Quadr.* 133. *Lacertus aquaticus niger* Merr. Pinn. 169. *Lacerta aquatica major mas*, sive verrucis albis adspersis, membranula serrata in dorso exstante. Pet. Mus. 18. n. iii. *Lacerta pedibus inermibus fissis*, manibus *tetradactylis*, plantis *pentadactylis*, cauda ancipiti Linn. Faun. Suec. 256. *Scincus aquaticus* quibusdam, *Cordulus Bellonio*, Nonnull. Gallice: *Salamandre Aquatique*.

Ut erito hucusque tramite incedamus, hanc salamandram, septem integrâ longitudine digitos explere notamus. Corporis pars superior, fulvum, seu nigrum, inferior flavum, maculis tamen fulvis, seu albidis conspersum colorem exhibet. Pellis, quæ ipsi est, durior, læsa quum fuerit, lacteum undecumque humorem exserit. Caput ejus depressum est, ac rictus adprime occlusus, non nisi vi distractus, mordet unquam. Lingua brevissima, & parum lata; & maxillarum in margine denticuli, tantum non visum effugientes, deteguntur. Pedes anteriores in quatuor, posteriores in quinque digitos exeunt. Cauda in medio elevata, infra, supraque depressa, ac utrinque acuminata, extremitatem præbet perpendicularem. Partes tandem, teste *Linneo*, sexus utriusque genitales, aliquantulum eminentes, masculi dorsum præter ea, & cauda dentata, guttur nigrius, ac pedes posteriores margine quadam membranosa laterali, muniti sunt.

Licet amphibii salamandra aquatica adnumeretur, frequentior tamen aquam, rarius terram incolit. Cœno insuper, & albo præsertim, plena loca præoptat, & sub lapidibus, si quos reperit, delitescere. Rarissime in superficiem aquæ proveniens, fossis plerumque urbes cingentibus, & piscinis, & stagnis immoratur; hyeme locis latitans subterraneis, verno tempore egreditur. Gradu tandem lentiore incedit ad modum testudinis, atque tenacissimæ vitæ est. Vocis sonitu ranam imitatur. Hanc scinco vero pharmacopolas sæpius substituere, & *Matthiolus* redarguit, atque *Gesnerus*. Teste item *Deubam*, licet exigua sit lacerta aquatica, quatuor pinnis tamen gaudet artificiose efformatis; binis ex quovis corporis latere, & cruribus anterioribus, ubi enascuntur, aliquantum superioribus, quæ corpori erecto, atque in æquilibrio conservando inservientes, piscis exigui figuram ipsi conciliant. Cruribus autem debito excretis, abeunt pinnae, & delabuntur.

Toto interim, ut dicunt, cœlo aberrant Physicorum illi, qui a terrestri aquatilem salamandram, non nisi accidentaliter diversam, ac aqua relicta, colorem cum figura exuere, caudam insuper ejus depressam in rotundam abire perhibent.

Legimus in *Actis Reg. Scient. Acad. de anno 1729. pag. 135.* Scriptum aliquod Cel. quondam *du Fay*, cui titulus est: *Observationes Physicæ, & Anatomicæ, de pluribus Salamandarum speciebus, Parisiis vicinis in regionibus obviis.* Summa ejus huc fere redit:

Ex Cel. *Maupertuis* ultimo edocti, salamandram haud amplius adeo venenosam habemus, ut morsui ejus medendo nullum supersit medium, quam potius animal omnium fere timidissimum, patientissimum & ad mordendum ineptissimum esse cognovimus. Nec mediis nunc vivit flammis, sed vel igni admota, vel manu rudior contacta, pellem suam contrahendo, per poros illius liquorem lacteum, viscosum, ac restinguendis saltem carbonibus quibusdam parum accensis, sufficientem emittit. Suo

præcipue Cel. *Maupertuis*, quas Britannia in regionibus reperierat, salamandras terrestres, examini subiecit; nos nostro aquatiles, præsertim Parisiorum in regione obvias, minoris sane periculi opus. Quotquot enim de salamandris scripserant, perniciosius terrestri quam aquatili venenum tribuerant. Quantæ autem ejusdem species reperiantur, determinatu difficillimum reddit eximia & sexus & ætatis varietas. Studiosæ interim disquisitioni, plures quam ducentas, variis locis, variisque anni temporibus captas, quum subjecerim: tres illius classes diversas, cui omni est masculus a foemella distinctus, constituere visum est.

Ad primam igitur referenda venit: *Salamandra magna nigra*; quæ 5. digitorum longa, formam lacerti æmulatur, majori tamen, ac illius corpore, caudaque gaudet depressa; nec pelle, ut lacerti squamosa, sed verrucis confita, fulva in dorso, sub ventre flavida, maculis conspersa nigris, rotundis, ac unius lineæ circiter diametro. Distinctiores tamen in ventre, coloris sui flavidi ergo, quam quidem in dorso conspiciuntur. Per totam insuper corporis longitudinem, latera versus, & capiti præsertim vicina granula ista, plerumque albida, cutis texturam constituentia adparent. Caput, ut in rana, planum, atque latum est, gula amplissima, oculi hiantes & prominentes. Maxillæ superiori superiacentia bina conspicienda se exhibent foraminula exigua, nares constituentia. Pedes supra fulvido, infra flavido, ac maculis nigris interstincto colore tinguntur: Quatuor priores, posteriores quinque digitis muniti. Cauda dimidiam quasi corporis longitudinem explendo, gyrini caudæ similis est, nec nisi mole majore, majoreque carnis quantitate diversa. Difficilior interim partibus generationi inservientibus distinguitur sexus, in utroque similibus, ac si oculis ferendum esset judicium, omnes judicaretur foemellæ. Duæ autem sunt in altera corporis parte, notæ maris characteristicæ, ab aliis pro speciei diversæ notis acceptæ. Duarum circiter linearum lata pellicula, ferræ ad modum dentata, in dorso maris conspicua, in medio fere capite, oculis intermedia exoriens, & in caudæ extremitate terminata. Strictior equidem ubi caudam tegit, & rarioribus dentibus est confita; quæ caudæ maris eam latitudinem offert, ut duplo foemellæ caudam latitudine superare videatur. Magno opere autem in origine caudæ decrescens evanescere prorsus videtur. Deinde vero eandem, quam in dorso profitebatur, elevationem reassumit. Alteram maris notam, zona quædam argentea, ex utroque latere caudæ constituit, quæ in caudæ originem trium circiter linearum lata, deinde sensim decrescendo, ad ejusdem extremitatem usque præcurrit.

Quæ secundam salamandarum classem, constituunt, non nisi magnitudine a prima distinguuntur. Iisdem insuper notis characteristicis a foemella masculus discernendus venit. Hanc *Salamandram minorem nigram* salutare liceat.

Tertia denique species, secundam magnitudine tantum non exæquat, iisdem quoque sexus criteriis masculus a foemella distinguitur.

Alia scilicet sunt, quibus trium classium foemellæ a masculis distinguuntur, alia iterum, omnibus communia, quæ vel ex ætate animalis, aliisve circumstantiis pendent; alia tandem, quibusdam salamandris propria. Sic color, quem habent, fulvus, debiliior est in junioribus, ast maculæ magis conspicuæ, sic & quæ tertiam constituunt classem, debilissimo sunt, quum nascun-

nascuntur, flavido colore, sensim abeunte in fulvum. Alia est, quam sustinent, mutationis species, quamque in nullo, præter gyrinum, observaverant. Nuperrime elapso vere scilicet in ea salamandarum minorum corporis parte, quæ branchiarum regioni in piscibus respondet, floccos quosdam fimbriatos detexi, in aqua erectos, & auribus prælongis similes; nec in minoribus tantum, sed & in his, quæ 3. digitorum longitudinem jam adtigerant excrescendo. Duos insuper panniculos tenuissimos observavi, quibus branchiæ istæ, dum extra aquam animal commorabatur, tam exacte obtegebantur, ut vix ullum earum vestigium superesset. Qui quum temporis tractu prorsus occludantur, sensim & branchiæ abire videntur.

Omnes præter ea salamandræ aquatiles, cujuscumque sint vel ætatis vel speciei, quovis quarto vel quinto ætatis die ac veris, hyemis autem decimoquinto, sua se cute exuunt; tenuissimæ sunt exuviæ istæ, & aquæ sæpius supernatantes conspiciuntur. Interdum quoque, dum aliquam exuviarum partem, crurum uni adhærentem subtrahere nequeat salamandra, putrefactione accedente, crus ipsum infici, deinde autem decidere solet; nec idcirco salamandram perire novi, sed vel ipsemetego, diu viventem ex amisso crure aliquam adservavi. Eodem casu sæpius digitorum aliquem perdunt, facilius tamen ex anterioribus pedibus, quam ex posterioribus.

Corpus insuper quoddam rotundum, 1. lineæ diametro, & longitudine totam salamandram æquiparans, ex ano salamandræ egressum, quater quinquiesve observavi. Integræ diei spatium in illo emittendo consumebat salamandra, sæpius etiam gula pedibusque illud protrahere annitebatur. Quorum unum quum aqua ablutum examini subiecerim, aquæ turbidæ plenum reperi, & foraminulo isto, quod dum membranæ cohærebat, intervallendum oboriebatur, omnis aqua effluxit. Quod corpus quidnam sit quibusve usibus veniat, ne quater quinquiesve repetitis quidem observationibus detegere potui. Quum autem salamandram & ante & post evacuationem hujus corpusculi, sua incolumitate vigere observaverim: idem illud exutam membranam aliquam interiorem habui, quam rarissime salamandra deponere soleat.

Aprile & Majo, mensibus, 20. circiter ova, duas columnas inter se junctas effingentia, ac duplici corollæ filo respondentia, ponere solet salamandra. Ova ista mediante quadam materia viscida solidaque inter se cohærent; ipsa autem materia, tenuissimæ cuidam membranæ inhærere videtur, quippe quæ manibus contrectata, neququam digitis adhæret. Pari insuper modo, & corpusculum, de quo diximus, & ova sua ponunt salamandræ; hæc autem, prout egrediuntur, inferiori caudæ parti adglutinantur. Nec tamen, nisi ex salamandra tertiæ speciei egredientia ova detexi; ast alia prorsus ratione reliquas earum species sua ova ponere censeo; in his enim frequentissime vidi ovula separata, ac vasi, quo detinebantur, libere innatantia, quæque ob perfectissimam rotunditatem nunquam aliis cohæsisse videbantur. Variæ eadem aquæ inieci, varios subdidi caloris gradus, imo terræ nonnunquam commisi, nulla tamen umquam exclusa reperi, nullos umquam foetus provenire detexi. Hi enim, ut censeo, summæ exilitatis suæ ergo, & retia pertranseunt, & oculos effugiunt. Nec quod inter vivipara locum mereantur, mea umquam experientia comprobatum habui, quod *Vurffbainius* & *de Maupertuis* sibi contigisse testantur;

qui quum in salamandra terrestri & foetus viventes, & ovaria ovulis plena reperierint, illam viviparis pariter ac oviparis adnumerandam judicant. Locus igitur foret conjecturæ: terrestres esse viviparas, aquatiles autem oviparas, aut quum nulla earum quas vidimus, vel terrestribus tantum vel aquatilibus, sed amphibii omnes adnumerandæ veniant, quidni illas, dum aquæ immorantur, oviparas, dum in terra degunt, viviparas esse concludamus? Temeraria tibi L. B. forsan videtur conjectura; aut prorsus impossibilem eandem pronuntiare, adhuc major foret temeritas. Doceat futuri temporis experientia, quantum certitudinis huicce meæ, & levissimæ quidem conjecturæ sit tribuendum.

Salamandra autem aqua detenta non solum sæpius pro captando aere in superficiem enititur; sed & in fundo desidens aerem cum strepitu quodam submisso, ducit.

Sobrietate, si dicere fas est, reliqua animalia omnia superat salamandra hujus speciei. Aliquas harum, per sex menses & quod excurrit, absque ullo nutrimento adservavi, quidnam scilicet exhibendum esset, prorsus ignorabam. Aliæ, nec tamen omnes, muscas quasdam semianimes devorabant. Quinæ harum fami explendæ sufficere videbantur, aut nec deficientibus muscis omnibus, ex salute sua & agilitate quidquam demittebant. Tandem & sperma ranarum, quod peramare videbantur, præbui; haud quidem illud commune, sed hoc quod in fila longiora abiens granis constat exiguis, nigerrimis, ac viscido quodam & diaphano liquore circumdatis. Ex quo spermate nigridos nasci teneo gyrinos, qui lenticulæ magnitudinem vix adtingendo, superiore anno, ut ipse vidi, pedibus muniebantur. Hoc sperma igitur, nec tamen adeo avidiores, deglutiebant, vescebantur & lenticula aquatica, planta.

Novissima interim eaque vehementior hyems observationis inexpectatæ sortem mihi obtulit. Aqua scilicet, qua 18. salamandras majores diu detinueram, nocte 6. Januarii diei in glaciem abiit; glacie igitur obductas & motu destitutas reperi salamandras. Glaciem rupi, vas igni admovi, & primo quidem lentior motus, tum pristina rediit agilitas. Alia harum ex quo capta fuerat, vulnus sub alterutro pede anteriore gerebat; & lobum sacculis adipeis compositum, ex vulnere egredientem ostendebat. Sensim igitur lobus ille evanescebat, dilatabatur vulnus, & ubi glacie obturatum fuerat, ibi pars intestinorum egrediebatur; nec incommodum exinde ullum, sed toto vixit mense sequente. Prout regelabat aqua, solito plus aeris exspirabant. Frigore etenim aquam intrante, pulmonum sacculos omni, qua poterant, aeris quantitate repleverant. Ulterius experimentum producendi cupidus, unicam tantum aquæ frigorisque vehementiæ reliqui. Hæc autem per 36. circiter horas, glacie 2. digitorum alta circumcincta, nec nisi exigua aqua, in centro spatii, quod occupabat, relicta, fabæque magnitudinem exæquante, residua tandem satis exigua aeris bullula, vixit. Glaciem dissecui, & spatium ovo exiguo respondens sibi reservatum detexi, quod circumvoluta occupabat; vidi etiam canaliculum, crinis equini instar, glaciem transeuntem, & in summa ejus superficie terminatum, quo aer salamandræ adducebatur. Quæ quum magno opere torpescens, se ipsam evolvere vix posset, frigida aquæ immittebatur; quo facto sensim sese protendens, nondum hora elapsa, reliquas omnes agilitate

tate æquiparabat. Salamandram itaque, quam varii, falso tamen, in medio igne vitam producere docuerunt, glacie constipatam diutissime vixisse observavimus. Diutissime inquam, nec semper; etenim quum 7. per dies noctesque denuo aliam salamandram vehementissimo frigori exposuissem, omnis aqua in glaciem abiit, & quum nec spatium salamandram cingens, nec ullus cum aere externo communicationis nexus superesset, mortuam reperi; nec frigore enecatam, sed aeris defectu suffocatam judicavi. Nec justo diutiori temporis spatio; ranas etenim, æstate in mediis glaciei fructis conservatas, ac viventes fuisse repertas, a testibus fide dignissimis acceptum habemus.

Vita equidem tenacissima gaudet salamandra, ast sale conspersa, teste *Wurffbaino*, & nostrametipsum experientia, citissime perit. Ex majoribus quondam ego sale conspersi, & in vanum illum ut evitaret, quum quæsiisset, jam sinistram petens, jam dextram versus tendens, magnam lactei succi quantitatem (quem vel timore perculsa, vel dolore adfecta ex toto corpore effundere solet) ex omnibus corporis partibus, & in primis cauda, ejaculabatur, motus ac contorsiones reiterabat, per minuti unius spatium alternis jam ventri, jam dorso obvolvebatur, tandem vero motum cum vita amisit, tertio circiter minuto ex sale insperso.

Ad anatomicam nunc salamandræ descriptionem progrediamur. Nec tamen omnia accurate recensendi animus est, sed ea saltem referendi, quæ ab aliis singularia & notatu digna perscripta sunt. Pellis salamandræ, quæ quarta quintave die quavis sese exuunt, epidermidis vicem subire videtur. Quam si deposuerit salamandra, hanc disseca, & aliam subtrahere nequis; ast quum brevibus illam sepositura est, facillimo opere eam retrahere valebis. Hanc, microscopii ope lustratam, texturæ squamarum minimarum, vel tegumento corii verrucis confiti æquiparabis. Sub illa corium quoddam exiguis eminentiis obsitum, solidum, & fibrarum laxa um ope, ast leviter, musculis adhærens adparebit. Tres insuper in abdomine distincti musculi conspiciuntur, quorum dexter, rectus, regionem obtegit anteriorem; duo reliqui autem, sensu contrario obliqui, partes laterales constituunt. His rescissis, peritonæum punctis nigridis confitum, & ope ligamenti, recta ad hepatis longitudinem procurrentis, hepatis adhærens conspicietur. Pericardium a Peritonæo producto efformatum esse videtur.

Cor hepate superius, immediate œsophago necitur. Hepar magnum in duos lobos dividitur, quorum sub dextro fellis vesicula, conductu suo adhærens conspicitur, eaque pellucida ac viridis plena liquoris. Sub hepate tandem reliquæ intestinorum circumvolutiones, & adipei sacculi colore citrino, atque ovaria deteguntur in foemellis. In hypogastrio vesica urinaria, quæ mediante vasculo, uraci nomine non immerito donando, cum peritonæo necitur. Quæ, si vel ano, vel canali communi aerem inflando immiseris, turgescet, & cordis figuram nanciscetur. Duæ præter ea ex utroque hepatis latere, ad sacculorum adipeorum longitudinem procurrentes vesicæ aeris plenæ, longæ, tenuissimæ, ac in cuspidem exeuntes obveniunt.

Subtracto interim hepate, ac intestinis ab œsophago usque ad vesicam remotis, facillimi & sacculi adipei, utrique sexui communes, avelluntur. Hi varios in lobos distincti, & membrana tenuissima, vasisque sanguineis

intertexti sunt, quorum ope foemellarum ovariis cohærent ac tubis; testiculorum autem, qui masculo sunt, & deferentis canalis auxilio, involucri. Tum in mare bini, ad spinæ dorsalis longitudinem canales procurunt albidus, quos deferentes adpellare liceat; quique vario modo inflexi, ac reflexi, anum versus, in extremitate fasciculi cujusdam, ex filis albidis, vesicularum seminalium locum tenentibus, compositi, terminantur. Varios insuper animalis hujus reperi testiculos, interdum scilicet duos saltem detexi albo flavidos, longos, & fabam, figura sua, repræsentantes; interdum & quatuor vidi, inferiores duos superioribus minores. Duo præterea in mare corpora carnosæ, depressa, superiore sua parte rotunda, & ad vesicæ collum in cuspidem exeuntia reperi. Corpus insuper aliud cartilaginofum, duarum fere linearum longum, mitræ, summitatem erigentis forma effictum, in extremitate illius regionis adparet, ubi & Rectum, & vesica & canales deferentes una inferuntur; quod quidem corpus virgæ loco animali venire videtur; quum etenim viviparis adnumeranda sit salamandra; coire eandem concludimus, quamvis numquam coitum spectandi nobis fuit copia. *Wurffbainio* spectatore, alia quondam 34. foetus viventes effudit. Rursus alia, quam *Cel. de Maupertuis* acceptam refero, varios ac penitus jam efformatos ostendit in tubarum alterutra. Ast obiiceret quispiam: terrestres viviparæ sunt, hinc coeunt; aquatiles sunt oviparæ, hinc piscium more tantum foecundantur. Respondeo: ambæ iisdem gaudent coitus organis, ambas igitur eadem ratione coire ad veritatem accedit.

Magna interim masculi est & foemellæ differentia, hæcque organis magis conspicuis gaudet. Ventrem ejus retege, & ovaria statim cum sacculis adipeis adparebunt. Tolle sacculos, & ovaria multis ex lobis composita, lobos autem membrana, vasis sanguineis intertexta, detentos esse videbis. Nec ovariis innatantia ova, sed adhærentia; quæ avulsa quum fuerint, ovarii in cavitatem delabi, exinde autem in tubam penetrare videntur. Tum ovaria, totam animalis longitudinem, additis nempe & capite & cauda, exæquantia, post collum exorta, ac variis deinde inflexionibus peractis, in ano tandem desinentia. Quorum in extremitate superiore, foraminulum ingressuris ovis patens detexit *Cel. du Verney*, ova autem tubas ingressa, majorem in molem excrescunt, ultra hanc, quam in ovario detenta ostendebant, & quum inferiorem denique extremitatem pertigerint, communem canalem egrediuntur. Præcipuum vero denuo aliud discrimen reperi; ova scilicet in his, quas primæ ac secundæ classi adnumeravimus, inter se divulsa, in salamandris tertiæ classis autem, rosarii instar, inter se cohærentia. Quousque autem integras tubas percurrunt, liquore spissiore, turbido flavidoque explentur ova; cujus quum parcius tantum copia adsit, nec hæc canalem communem egrediatur: liquorem hunc & materiam viscidam, quæ ova circumdat efformare, & primo foetus exclusi nutrimento venire, censeo. Tubæ tandem, magis fulvidi coloris in extremitatibus suis, ac in parte reliqua, una cum recto & collo vesicæ in musculo quodam majori terminantur. Huic insuper renum adhæret extremitas, qui sex circiter lineis longi, per integram fere suam longitudinem tubis nectuntur. Ita fit, ut elevato, vel subtracto musculo, & renes, & tubas, & intestina cum vesica adtollas, subtrahasque. Matrice
inte-

interim caret, vicem ejus tubis subeuntibus, quibus foetus penitus interdum effictos inhærere videbis.

Et hætenus quidem Cel. *du Fay*. Nunc *Observationes circa fœcundationem salamandræ*, Auctore Cel. *Demours*, Medico Parisiensi, succedant.

Hucusque ignotum, sic ille, modum coitus salamandarum detecturus, biennio, fateor, in vanum quæsi. Sæpius illas sibi invicem adpropinquare, sese persequi, & si ita loqui liceret, joculari, observaveram; ast fœcundationi insufficientia judicavi hæc omnia, ac merum procœmium. Coitum ipsum expectavi, ast finitis hisce proludiis, campo utramque decedere vidi. Repetitis itaque semper iisdem, nec alia observare licuit; convictus insuper quod partibus, ad coeundum ut reliqua necessariis, salamandræ careant, disquirendi cupido animum invasit: num forsan hisce jam fœcundata sit fœmella. Vasi fictili faventino illam immisi, & ova ponere vidi, quorum embryones, peractis metamorphosis variis salamandræ formam denique induebant. His igitur edoctus salamandras singulari, nec reliquis animalibus communi ratione coire, & studio ulteriore, & casu quodam fortuito quem exponam, ea didici, quæ sequentibus docebo:

Monendum censeo in antecessum, quod non nisi de hac salamandræ specie mihi sermo sit & dicendi animus, quam in regionibus Parisiensibus, in hortis rarius cultis, in alveis eorum aquariis, quos Galli: *bassins* adpellant, & in paludibus nonnunquam reperies; nec de illa apud Normannos & Britannos obvia, quam hodie: *Sourd* vel *Mouron*, olim: *Pluvine* seu *Laverne* dicebant. Salamandra nostro examini subjecta, quadrupes, & hyeme terram, æstate autem aquam seu humida loca inhabitans, relicto sæpius suo domicilio, noctu præsertim, seu coelo pluvioso, nutrimentum quæsitura obambulat. Quæ quamvis lacerto sit simillima, ut experientia sæpius a variis instituta testatur, ad tamen & capite ab illo differt, magis scilicet depresso, magis rotundo; & oculis, magis scintillantibus; & pelle eminentiis obsita; & cauda, quæ depressa est ac pinnae officia subit; pigra insuper ac fere inepta solet esse ad motum. De mirabili salamandræ in igne conservatione, ac veneno perniciosissimo, sexcenta sunt, quæ & antiquiores, & recentiores suis fabulis pertractarunt; ast quemnam, non dicam, quotenum reperies, qui coitus historiam, vel digito tetigerit. Ova salamandram, ranæ instar, ponere quidem constat inter omnes, ast quomodo ista, masculi spermate irrigantur, quis est qui vidit? qui scripsit? Haud minoris difficultatis res est, fateor, etenim peracto demum biennio, & tunc quidem, casu quodam felici eam detexi, annuentibusque rerum rationibus, quas exponendas censeo, non idcirco quidem, ut recensendo ad longum laboris mei difficultates, atque molestias, aliqua ipsi præstantia ac dignitas accedat; sed ut via sternatur illis, qui eodem tramite forsan incedere, ac eadem illa mecum experiri cupiunt.

Primi aderant Aprilis anni 1731. dies, quum quarta post mediam noctem hora, matutina, ad alveum aquarium magnum (*bassin*), in horto Regio expositum accederem. Absentis nempe Celeber. *Noguez*, Demonstratoris, ac Custodis, cui conclavis historiæ naturalis cura est, vices subibam. Aqua alveo detenta erat limpidissima, flante autem per noctem borea omnem immunditiem ad latus oppositum devehendo, superficiem

aquæ expurgaverat. Multoties jam illum obambulando alveum emensus eram, quum duo in aqua sese insequentia animalcula (erant autem ambæ ex salamandris supra descriptis) observarem. Quæ ipsis foret mens, & intentio, jam subolebat nec quidquam verebar, nisi ut locum sordibus obtectum petendo, meis oculis surriperentur. Evanuit timor, continuata nempe per $\frac{1}{4}$. horæ adhuc sua persequutione, ibi subsistebant, ubi & aqua limpidissima, & exorti jam solis radiis illuminabatur. Statim ego prostratus humi, observando, quæ referam, accingebar.

Veris jucunditate plurimum allectæ, generis sui propagatione occupantur. Fœmellam quærens studiose masculus, modo, qui difficillime describitur, cum illa jocatur. Intercepta tandem ejus via, & crista allevata, duobus saltem unius lateris pedibus insistens, ac dorsum elevando, caput vero deprimendo, fornice, seu arcu testam porticum pene effingit, sub qua transiens fœmella, suum iter continuat. Tum relicto hoc suo situ, priorem recipit masculus; & oculis ad fœmellam converfis, quum illa cursum sistat, adcurrit, oculos eidem infigit, & denuo illum arcum effingit; repetitis sæpe omnibus iisdem, quæ proludiorum instar præcedunt. Exinde fœmella limo congesto residens, masculus autem vel illi superior, vel ex latere ejus, interjecto digiti unius spatium a fœmella, ac luto, detinetur. Et primo quidem anum aperit, duobus efformatum labiis, (quæ in statu naturali constituta, sese invicem obtegunt accuratissime,) operculo insuper resectum carnosum, intus replicatum, & margine dentato instructum. Hoc igitur operculum tunc devolutum admodum dilatatur, & dilatando aperituram, quantum conspiceret licuit, rotundam, nec non transituro liquori feminali sufficientem constituit. Tum magna cum vehementia testiculorum regionem comprimit, seu partes abdominis medias atque superiores; & maxima intestinorum quantitate in partem inferiorem recedente, duplo majorem crassitiem ei conciliat. Crista interim negligentius fluctuante, cauda sua fœmellam frequenter percutit, imo eidem sese obvolvens statim ad distantiam supra denotatam revertitur. Solito vehementius tunc se comprimendo, liquorem feminalem ejaculatur; quem uno impetu copiosissime extrusum, & aquam cui communicatur, albido quodam colore tinctam, latera immobilis tunc fœmellæ adluere vidi. Motum vero exinde in mare nullum observavi; pedum agitatione saltem distantiam eandem conservare annitebatur. Ast receptis denuo viribus, & sperma suum iterum ejaculatus, fœmellam prorsus reliquit.

Ex dictis interim colligere licet: salamandræ ova haud ita fœcunda reddi, quam quidem ranarum. Rana enim masculus fœmellæ dorsum conscendens, ac 40. per dies strictissime illam amplexus, ova, prout fœmellæ receptaculum egrediuntur, suo spermate irrigat, *Swammerdam* & *du Verney* testibus. Salamandræ autem ova in ipsa fœmella jam fœcundata, haud contactu demum immediato, seu adpropinquatione fœcunda redduntur.

Variis eadem vicibus denuo conspiceret quæsi, quo certior mea evaderet observatio. Variis vidi, haud tamen semper ita, ut sperabam; num aquæ nimis turbulentæ culpa inesset, an loco nimium obscuro, hæreo. Os interim fœmellæ semper occlusum, nec apertum ejus anum conspexi; ne igitur maris sperma aqua mixtum alterutram harum aperturarum ingressum fuisse, falso subsumas, caveto.

Foretne conjecturæ locus? quæro, quod spiritus seminalis, poros, in pelle foemellæ obvios, transeundo, vitam adferre possit, & motum embryonibus abdomini ejus inclusis? Tuum est, respondere. L. B.

Quam denique Gallico idiomate: *Salamandre aquatique*, *Petite Salamandre*, *Salamandre d'eau*, item *Lezard d'eau*, seu *aquatique* salutare solent, Italis: *Marasandola*, Germanis audit: *VVasser-Molch*, Belgis: *VVaater-Salamander*, Anglis: *VVater-Eft*, Suecis: *Skrot*, seu *Skratt-aborre*; variarum Galliæ provinciarum incolis: *Tbat*, *Tbassot*, *Tassot*, & Aurelianis: *Grenazelle*.

Sale tandem volatili caustico, & oleo, & phlegmate abundare scito salamandras. Quæ autem de venenosa earum qualitate; de saliva virulenta, acri, & lactea, quam mordendo ejaculari perhibebantur; de tanta tandem earum qualitate nociva, qua vel digitis contactæ summum adtraherent periculum in fabulis antiquiorum leguntur; ea omnia hodiernis experientiis confutantur, & reiiciuntur. Sic & nosmetipsi varias vario tempore salamandras, & nostris manibus tractavimus, nec tamen umquam sinistro quodam effectu correpti, nec ruri degentes earum moribus læsos fuisse comperimus. Præterea innoxio illos cibo venire, & Cel. D. *Theophilus Berlingius* in *Ephem. Germ. Dec. I. anni 2.* exemplo docet viri, cui pro veneno salamandram, cibi instar delicatioris præparatam exhibuerat uxor. Et Cel. *Borrellus Obs. 23. Cent. I.* puellam, quam noverat vomitu violentiori duas salamandras minores ejecisse, recenset. Sic & aliæ observationes adsunt, quibus, ranas, pisces, aliaque animalia viventia evomita interdum a nonnullis fuisse, edocemur. Hæc enim, si conjecturæ locus, aqua, ex qua illi biberant, inclusa, tum vita in stomacho conservata, ad illam ibi magnitudinem demum excreverant, cui capiendæ insufficiens intestinum, vomitu eadem violentiori expulit. Hæc saltem elice ex dictis, quod vel nullum prorsus, vel tantum inesse nequeat salamandræ venenum, quantum veteres perhibuisse constat.

Usui interim non nisi externo veniunt Medicinæ. Salamandræ etenim calcinatæ cinis exulceratis inspergi solet strumis, quo & faciliores detergentur, & citiori cicatrice obducantur. Alii tandem salamandras, unguentis, ad extirpandos capillos destinatis, indere solent, ac immiscere.

T E S T U D O.

TRia sunt, quæ in suos Medicina usus convertit, testudinum genera, terrestres nempe, marina, atque palustris testudo.

Testudo terrestris. Offic. Schrod. 333. Ind. Med. 116. Dal. Pharm. 433. Gesn. de *Quadr. Ovip.* 107. Bellon. de *Aquat.* 52. Aldrov. de *Quadr. Ovip.* 705. Jonst. de *Quadr.* 144. Charlet. Exer. 30. *Testudo terrestris*, vulgaris. Raii Syn. *Anim. Quadr.* 243. *Testudo terrestris variegata* nostras; *Testudo terrena communis*; *Testudo montana*, silvestris, campestris seu *Nemoralis*. Quorumd. Gallice: *Tortue de terre*.

Injucundum sane, atque horrendum testudo terrestris præbet aspectum, quippe quæ capite serpentem refert, cauda autem, pedibusque lacertum. Crista insuper amplissima tegitur, solida, excavata, scuti instar efformata, ac versicolori. Dorso gaudet nigris, flavidisque maculis consperso; palpebris caret superioribus, caret & foramine auditui inserviente, & dentibus

in maxillis, hæ tamen tanti sunt acuminis, tantæque aciei, ut cultro vix cedant. Musculi, quos cratophites appellant, in cranio reclives, amplissimique, tendine quodam fortissimo maxillæ inferiori inferuntur. Guttur ejus vastissimum, magnæ, ut in vipera, capax est dilatationis. Trachea-Arteria ubique æqualis, nullum laryngis præbet vestigium; pulmones antequam ingrediatur, in duas fistulas abit; & crenula quadam exigua, sub lingua, terminatur. Nullam in canale intestinali, ab ore usque ad anum procurrente, nullam in eo, pro stomacho, cavitatem reperies ampliore. Hepar ejus, avium instar, nigrido-rubrum exhibendo colorem, in duos lobos dividitur. Bellis vesiculam viridissimus liquor implet, viridissimoque chartam tingens colore & pulcherrimo. Multa tandem ova rotunda, flavida, rubrisque maculis conspersa, ovarium complectitur. Nec pondere tantum, marem plerumque superat foemella; sed & crusta inferiore plana ab eo differt, hæc enim, ubi media est, concava in mare conspicitur. Coeundi ergo masculus ascendit foemellam. Hæc autem ova, gallinarum ovis parviora, longioraque, vitello insuper, & albumine instructa, quum posuerit, haud excludit, sed foliis saltem, terraque obtecta, Solis calori excludenda committit. Frequentior cæterum in montibus, silvis, arbuſtis, agris, hortisque; fructibus vivit, herbis, & quidquid præbet terræ superficies, lumbricis, vermibus, aliisque insectis. Furfure illam domi nutriunt, atque farina. Lentior, quo ingreditur gradus, abiit in proverbium; adeo notus est omnibus. Hyeme in terræ foveis delitescens, omni interdum abstinet alimento, serpentum more, & lacertorum, aliorumque. Tenacissimæ cæterum est vitæ, atque longava, nec aquam peramando amphibii adnumerari meretur. Peregrinantibus si fidem habeamus, frequentior in Africa desertis, & Lybia Indiaque obvenit, imo frequentissimo incolis venit cibo. Nec reliquarum quamdam huic jam nostræ æquiparandam esse, carnis & sapore jucundo, & qualitate salubri; quamvis Muhammedanis pariter, ac Græcis, per leges suas, numquam alimento cedere docet *Belonius*. Frequentissimas, idem ille, & in Thracia, ac Macedonia, & Occitania, regione nostrate, obvenire refert testudines terrestres. Necumquam sua se exeunt crusta, quæ vel plauſtri supervecti vehementiæ resistere valet. Skeleton vero testudinis, quam simplex sit, magna tamen arte effectum, ac multa pollens agilitate videtur *Derhamio*; nam non solum crusta, scuti impenetrabilis instar, corpus animalis retegendo, minimum si imminet periculum, capiti, caudæ, pedibusque pro tutissimo venit receptaculo; sed & corporis ossium defectum explendo, (exceptis tamen extremitatum, capitis, colli, quatuor pedum, caudæque ossibus) suavissimam in admirationem abripit illum, qui integrum aliquod sceletum, tantillo saltem ossium numero constructum, obvenienti omni testudinis usui necessaria quævis continere videt.

Legimus in *Actis Academiæ Parisiensis ad historiam animalium naturalem inservientibus*; *Descriptionem Anatomicam magnæ testudinis Indicæ*, quam hisce tuam facimus, L. B.

Deportata ad nos ex India, de qua agitur, testudo, ac in oris Coromandelæ capta, $4\frac{1}{2}$. sua longitudine, pedes, a rostri ad caudæ extremitatem, latitudine insuper 14. digitos exæquabat. Duorum pedum latitudinem, trium longitudinem crusta habebat. Nec tamen magnitudine, ne longe

longe quidem illas pertingit testudines, quibus, *Aeliano* teste, & *Plinio* 15. cubitorum longitudo, & crusta est, tegendo quæ sufficit tugurio, plures capiendi capaci. At nos terrestrem, *Aelianus* cum *Plinio* describunt aquaticam; & ejusdem generis animalia, aquæ dum immorantur, majorem, ac illa, quæ in terra degunt, molem adtingere notum est. Maximas autem testudinum terrestrium, globalum terræ, facile aratro cedentis magnitudinem exæquare, idem ille est, qui docet, *Aelianus*. Maximarum vero, quæ ad Antillas capiuntur, testudines maris, haud duplo prorsus nostram superare, referunt peregrinantes. Eundem vero illum, cinereo fulvum scilicet colorem, & crusta, & reliqua pars animalis profitebatur. Variis, variæ, plerumque tamen quinquangularis figuræ frustis superiore sua parte constare videbatur. Omnia autem supraposita conspiciebantur, & adglutinata offi cuidam, quod cranii instar, omnia animalis intestina recludens, foramine anteriore instructum, capiti, bracchiis, cruribusque exitum dabat. Aliam vero per aperturam huic oppositam, cruribus posterioribus, & caudæ egressus patebat. Illud, cui omnia quasi adglutinata erant, os descriptum, ubi tenuissimum erat, lineam unam, & dimidiam, nonnullis in locis, digitum unum, & dimidium crassitie æquabat. Duplex autem plerumque; alterum nempe dorso superius, alterum ventre conspiciatur inferius, utraque autem clypeorum instar, fortioribus, durisque ligaminibus, (relicta tamen aliquanta motus facultate,) nectuntur. *Aelianus* testudines terrestres suo se scuto exuere docet; scutis dicendum, frustis scilicet offi, cranium referenti, adhærentibus; illo etenim osse, cui partes suæ præcipuæ omnes nectuntur, sese exuere testudinem ab omni veri specie abhorret; frustula interim dicta, quum crusta diutius adservata offi inducatur putredo aliqua, sua sponte ab osse abire, nostra experientia tenemus; alias autem & ignis calori admota facillime separantur. Præterea in magno foramine anteriori margo quædam supra elevata adparebat, quo eo facilius cum capite collum in altum adtolli queat; qua quidem colli inflexione, testudo supina sese obversura, mirabili utitur artificio; Testudinem quandam supinam, quum pedibus insistura, sese obvertere anniteretur, nec cruribus, (hæc enim ventrem versus inflecti nequeunt) illud perficere valeret, collum cum capite jam ex hac jam illa parte protrudere vidimus, & solo admoveere; quo suo conatu, quum incunabulorum instar, hinc inde jacta, illam denique partem detegisset, cujus altior eminentia, ac proclivitas aptior foret vertendæ suæ crustæ, omnem exinde suam vim, & activitatem huic saltem parti adplicavit.

Itaque in dorso anteriore tria maxima crustarum frustula conspiciebantur. Singulorum in medio prominens quoddam gibbus 3. ad quatuor linearum altum, & $1\frac{1}{2}$. digiti latum adparebat. Ventris autem pars inferior, quodammodo excavata videbatur. Quæ quidem excavatio, maribus, ut perhibent, est communis. Omnia autem, quæ crusta egrediebantur, caput, bracchia, cauda, nates, & crura, pelle quadam laxata, magnis rugis complicata, & punctis eminentibus, consita, tegebantur. Quæ quidem pellicis oræ cujusvis aperturæ nexa; haud una cum ipsis partibus, quæ egressas obtegebat, sub crusta sese recipiebat. In regione crurum interea, quæ adparet testudinum aquatilium pellis, exiguis quibusdam squamis, piscium instar, conspersa est. Majoribus insuper crustam, clypeo similem in capite tribuit

tribuit *Albertus*. Nostræ autem caput, membrana saltem, illaque subtiliori, quam aliis in partibus, muniebatur. Septem præterea longitudine, 5 digitos latitudine explendo, serpentis caput sua forma quodammodo effingebat. Maxilla inferior superioris crassitiem fere explebat. Aurium autem foramine omni destituebatur. Nares in rostri extremitate, ridentis instar efformata duo constituiebant foraminula rotunda. Oculi exigui erant, & horridi. Nec enim palpebra superiore instructi, inferiore saltem ad supercilia usque sese adtollente occludebantur. Id quod omnibus quadrupibus oviparis commune esse censet *Plinius*. Maxillarum porro in extremitatibus, ac labiorum regione, pellis, duritie sua cornu, acie autem reliquarum testudinum pellem referebat. Labia autem ipsa, scia instar dentata, ac duobus insuper dentium ordinibus intus munita erant, quamvis & lingua testudines carere, & dentibus *Plinius* doceat. Pedum singuli interim, anteriores scilicet, quinque digitis, seu potius ungulis, (etenim non nisi ungulis digiti discernebantur,) instructi, ac in extremitate, massa quadam rotunda, a qua ungulae egrediebantur, donati erant. Quatuor tantum ungulis pedes posteriores. Utrique brevissimi; anteriores nempe a brachiis ad ungularum extremitatem novem digitis absolvebantur, undecim posteriores a genu usque ad extremitates ungularum. Ungulae $1\frac{1}{2}$. digiti longæ, supra, ac infra rotundæ, ubi excavatæ erant, oblongam repræsentabant figuram, molles cæterum, & usu detritæ. Colore jam albo jam nigro inordinate conspersæ videbantur. Longiores cæterum, acutioresque aquatilium ungulas, (natando etenim illis non utuntur,) ac testudinem terrestrium, quæ incedendo illas adhibent, esse deteximus. In aliis item posteriores pedes, æque ac priores, quatuor saltem ungulis instructos vidimus. *Albertus* vero omnem cujusvis testudinis pedem quinque munitum esse contendit. Quamvis autem lentissimo gradu testudo incedat, illum, quo incedendo utitur, modum, ungulis suis adeo infestum esse observavimus, ac si citissime curreret. Equidem singulas aliam ex alia separatim in terram defigit; pedem igitur depositura, primo eundem primæ, tum secundæ, post reliquis ex ordine ungulis sustinendo, pedem rotundum, rotæ instar in curru, clavis munitæ, circumvolvitur. Crassior ejus cauda, in origine sex digitorum erat diametri, 14. autem longa in cuspidem abibat, cornu cervini instar exeuntem. Hanc *Cardanus* ungulam dicit, & postico gallorum ungui similem, imo callum esse censet alia in cauda testudinis resecta enatum; id quod a verisimilitudine alienum esse regularis hæc caudæ forma & rotunditas testatur, quam in callo numquam reperies. Mortua autem testudine, recurvata ejus cauda, inflexibilis evasit; nec ulla umquam vi adhibita reflecti potuit. Eandem & in maxillarum musculis inflexibilitatem deteximus, quas, nisi dissectis demum musculis, aperire potuimus. Maxillis cæterum testudinis, majorem vi omnium reliquorum animantium inesse virtutem, *Aristoteles* observavit; omnia etenim, quæcumque obvenerint, imo calculos durissimos, iisdem conscindere valet. Caput item testudinis minoris, dimidia ex qua resectum fuerat, a corpore hora, maxillarum ope, crepitum quemdam, grumatum (Gallice: *castagnettes*, Italis: *Nacchera*, dictorum) sono simillimum, excitasse, audivimus. Inflexibilitatis denique caudæ ergo multas eidem vires inesse censemus; cornu autem in ejus extremitate, armorum vices subire videtur.

Serra igitur resectis duobus lateribus ossis, quod cranii instar efformatum, cavitatem constituit intestina complectentem, resecta item membrana, parti hujus ossis inferiori & ventrem constituenti, circumducta: (membrana autem peritonæum, versus inferiorem, pleuram, versus superiorem partem effingit) ventriculus, hepar atque vesica, pro magnitudine sua, intestina obtegens, reliquasque abdominis partes, nostro sese obtulerunt conspectui. Ventriculus sub hepate situs, mediantibus vasis pluribus eidem necebat, & 9. digitos longitudine, 3. autem diametro, explebat. Tunicis præterea fortissimis, orificiis angustioribus, & membrana instructus erat, quasi ex serico, quod villosum dicunt, composita, & folia extensa ad longitudinem suam efformante figura cæterum, canis ventriculum repræsentabat; hominis, ut vult *Severinus*. Ventriculi in exitu, intestina, quæ *Duodenum* dicere posses, in superficie sua interiore, variis, ut ventriculus rugis distinguuntur. Et figuram quam retinebant, reticularis causa, haberi poterant pro secundo quodam ventriculo. Reliqua autem intestina, membranis constabant fortissimis. Tenuia intestina unum diametro suo digitum, at novem pedes longitudine exæquabant. Colon quatuor pedum longitudine, 2. digitorum diametro absolvebatur. Cujus valvulam ora quædam, circularis membranæ ilei internæ constituerebat. Quæ autem in pluribus animalium reliquorum deteximus, seu ilei, seu coli folia, in testudine frustra quærebat. Sic nec *Cæcum* reperire datum fuit, licet duplex, avium instar, *Severinus* ipsi tribuat. 9. ab ano digitorum distantia, in *Recto* coarctationem aliquam observabamus, cujus ergo gallinæ podici æquiparandum venit; hanc autem restrictionem cingentes tres præter ea appendices rotundæ, ac magnitudinis variæ, membrana *Recti* interna, ut videbatur, effictæ, fibrisque carnosæ, & ad longitudinem appendicium extensis, obtectæ aderant. Reliqua pars *Recti* ab hac restrictione ad anum usque percurrentes, vaginam virgæ eadem ratione efformare videbatur, ut in castore, in civetta, aliisque. Duas præter ea in his, quas dissecuimus, testudinibus aquatilibus parvis, vesiculas in *Recti* extremitate deteximus, quæ communicationis suæ ergo cum intestino, hoc turgescente, turgabant. Quas autem in testudine, de qua agimus, majore, reperiendi negata fuit facultas.

Hepar substantiam solidam, at colorem debilissimum habebat. Magnitudinis erat eximiæ, & duplex videbatur, quod quidem in partem sinistram dividebatur, ac dextram; non nisi Isthmo, digiti unius lato, & membranæ vasa partis sinistræ ad dextram devehentibus, utraque pars hepatis cohærebat. Utraque pariter, & vena cava instructa erat, egrediente convexitatem diaphragma respicientem; instructa erat & ramo venæ Hepaticæ, ex regione cava, procedente. Pars hepatis sinistra major, in quatuor, dextra in tres saltem lobos dividebatur, quorum quidem tertius, illeque minimus, mediam magni lobi cavitatem egrediens, vesiculam contegebat huic regioni adhærentem, & sinui cuidam immersam, cujus ergo, (id autem plerumque accidit) haud ex hepate prominebat. Vesicula felle 1½. digiti longa, & ½. lata, figura sua vesiculam felle in homine imitabatur. Canalis cysticus, quem, ut in corpore nostro collum vesiculæ continuatum constituit, 7. sua longitudine, digitos, crassitie, calamum adtingebat. Nullatenus interim hepatico communicatus, ostio quodam singulari

lari *Duodenum* ingrediebatur. Medius *Duodeno*, & *Colo* lien interjacebat, & forma renem repræsentando, vasa sua ex ostio quodam renum ostio simillimo, recipiebat.

Pancreas autem *Duodenum* omne amplectebatur, imo lieni, cujus partem obtegebat, neciebatur. Figura sua prisma aliquod triangulare repræsentando, duodeno ductum suum immittebat. Tum renes 4. digitorum longi, 3. lati, forma prismatis triangularis, colore rubro fortiori, in tria, quatuorve frustula, vasibus suis juncta, dissecti, membranæ exteriori involuebantur. Ex superiore urethræ parte egredientes, ad longitudinem superficiem, cui ut in aviculis cohærebant producebantur. Testiculi renibus superjacentes $2\frac{1}{2}$. digitorum longi, & decem linearum lati erant. Parastatæ autem structuræ singularissimæ, non nisi canaliculum, tantisque circumvolutionibus complicatum repræsentabant; & quum in hac positione quatuor, explicatæ quatuordecim digitos longitudinem exhibebant.

Eximie insuper magnitudinis, quæ erat vesica, 12. & plures urinæ claræ, ac limpidæ libras continebat. Quamvis igitur *Aristoteles* testudini maris maximam, terrestri exiguam vesicam adsignat: & illa de qua agitur, terrestris, magna, aliæ autem quas dissecuimus, aquatiles, exigua (habita proportionis ratione) vesica erant instructæ. Ast tam magnitudine, quam figura singularis erat, testudinis nostræ vesica. Etenim intestini formam repræsentando, neque collum in extremitate, sed in sui medio membranam Allantoidem imitata, plurium brutorum foetus effingebat, & ita a castaneæ figura, quem *Severinus* illi tribuit, maxime discrepabat. Duorum insuper pedum longa, transversum, a latere ad latus situm occupabat. Tunica exteriori membranosa gaudebat; interiore autem multis admodum fibris carnosiss, gibboris instar elevatis, ac, ut fibræ in cordis auricula obviæ, sibi invicem intertextis munita. Collum tandem vesicæ unius digiti longum, latumque medium *Rectum*, ingrediebatur, quo urina per exiguam rimam obliquam, 7. vel 8. digitis prope anum deferebatur. Virga ejus duobus ligamentis rotundis, nerveo-spongiosis, tenuissimæque membrana relectis constans 9. longitudine $1\frac{1}{2}$. latitudine digitos attingebat.

Cor ejus in summa pectoris regione, Pericardio fortissimo & inferius, membranæ hepar obtegenti cui adhærebat, inclusum conspiciebatur. Figura autem, cordis figuræ communi erat dissimillima. Nec enim ad extremitatem suam a basi allongatum, sed in latitudinem potius extensum, 3. latitudine, ad basin autem a cuspide $1\frac{1}{2}$. saltem digitos explebat. Duæ ex basi ejus quæ egrediebantur, auriculæ, admodum remotæ, & pendentes quasi adparebant, harum dextera $2\frac{1}{2}$. digitos longitudine, $1\frac{1}{2}$. latitudine, sinistra magnitudine paullo inferiorem habebat. Quarum utrique suus erat ventriculus, in parte cordis posteriore, spinam respiciens; & tertius insuper in parte anteriore conspicuus, dextram in partem paullulum inclinans. Tres interim isti ventriculi, pluribus inter se foraminibus communicabant; nec substantiam, ut animalium alia, solidam, & continuam, sed spongiosam ostendebant, fibris insuper, columnisque carnosiss, contiguiss, ac intertextis compositam. Duo autem ventriculi posteriores recipiendo, & ex duobus venæ cavæ truncis, & ex vena pulmonari profecto inserviebant sanguini. Duplex autem aderat pulmonis vena, ex utrovis latere alterutra. Hæ etenim venæ in quamvis axillarem sese egerentes, san-

sanguinem a pulmonibus receptum , illi , qui ex vena cava proficiscitur , mixtum , in ventriculum dextrum deportant , cujus deinde ex aorta egreditur . Ventriculus igitur anterior , nullo ulteriori vase , nisi pulmonis arteria , instructus erat . Et hæc arteria , pariter , ac aorta tribus muniebantur valvulis sygmoidibus , quæ sua actione , ne , corde egressus sanguis , idem in illud redeat , impediabant . Ventriculi interea recipiendo ex vena cava , atque pulmonari protecto sanguini , sese dilatabant . Aorta insuper ventriculum dextrum egrediendo , in duos abibat ramos , quos fulcris subalaribus ob similitudinem adsimilare poteris . Laryngem , pari , ac in avibus , modo , Arytenois & Cricois , articulatione sibi invicem junctæ constituebant . Glottidis rima angustior erat , & fere occlusa ; quæ quidem singularis glottidis structura , rhonchorum , quos dormiens ducit maris testudo , quosque vel e longinquo audire poteris , *Plinio* teste , causa forsan evadit . Etenim , quos fortiores rhonchos ducere phocas perhibent , angustiori glottide , atque epiglottide instructas esse novimus . Tum Aspera-Arteria integris suis annulis gaudens , ubi pectus intrabat , in duos abibat ramos sex digitis longos . Statim vero ex quo memorati rami pulmones ingrediebantur , relictis suis cartilaginibus , canales latissimos producebant , ac inæquales . Qui autem testudinis pulmonem sanguine carere perhibuerunt , delapsos in errorem credo , conspecto membranarum , quibus constat , candore , & pelluciditate ; quarum ergo , inflatus , totus membranofus videtur , quem in aliis carnosum conspiciamus . Nec tamen , si verum quæris , nisi gradu differt . Hominis nempe , & reliquorum animalium pulmones parvis constant vesiculis sibi superstructis , tanta insuper vasorum sanguineorum vesiculis intertextorum copia , ut quamdam quasi carnem , loborum instar bronchialium , canalibus adhærentium , constituent . Et his quidem lobis minoribus , lobi pulmonum majores componuntur . Jam , quum nec omni sanguinis circulationi destinatus videatur testudinis pulmo ; nec sonitui , ac voci (caret enim omni) efformandis ; nec refrigerandis partibus internis , nec evacuandis earum vaporibus ; quippe qui , assiduo , atque regulari motu in cæteris animalibus huic usui destinato , caret , nil superest , nisi partium interiorum coarctatio ; cujus utilitatem in præparandis alimentis , ac distribuendis sese exferere novimus . Alium interim adhuc ejus usum , & graviolem , & testudini aptiorem & pulmonum structuræ magis convenientem quærimus , & hunc esse credimus : quod scilicet , aeris vesiculæ quæ piscibus est , locum tenendo , & sustentandæ in superficie aquæ testudini , & inum petenti , succurrat . Testudines per longissimum tempus in summitate aquæ immobiles detineri observavimus . Pisces item diutissime , (aqua tamen tectos pariter , ac sustentatos) jam fundo , jam superficiei aquæ vicinos commorari animadvertimus . *Aristoteles* interim cum *Plinio* , testudines , tranquillo mari diutius summæ aquæ supernatantes , arefacta Solis calore sua crusta , quum amissi ponderis ergo , citiores mari sese immergere nequeunt , faciliores captari docent a piscatoribus .

Ex quo , quam adcurato æquilibrio egeant , vides , quod vel arefacta earum crusta , auferri potest . Quamvis autem nostra terrestris fuerit , nec aquatilis , aquatilibus tamen simili , & corde , & pulmonibus gaudebat . Ut avium plures , alis instructas quidem , nec iis ad volandum usas esse videmus .

Cerebri insuper parvissimam præbebat quantitatem. Maximam etenim partem capitis, respectu corporis exigui, vel os cranii occupabat, vel caro musculorum crotaphitorum illud obtegentium, & crassitie sua Leonis musculos exæquantium. In capitis summitate obvium os, crista aliqua, animalibus singulari fortitudine gaudentibus, communi, instructum, cerebrum insuper cum cerebello 16. sua longitudine, 9. latitudine, lineas habebat. Triplo autem minus illud in testudinibus ad Antillas captis, reperies. Etenim, si relata a peregrinantibus referre licet, quæ capitis magnitudine vel vitulum exæquant, vix fabæ quantitate cerebrum præbebunt. Cæterum membranas duarum partium, & earum substantiam, & plexum choroidem & glandulam pinealem, & pituitarium, & infundibulum, & nervorum plurimos, cum avibus communes habent. Nervi autem olfactui inservientes, eximia sua magnitudine, quartam fere totius cerebri partem constituebant, nervisque opticis suam largiebantur originem. Spinalem medullam communes membranæ obtegebant, vasaque plura, ad extremitatem usque eandem concomitantia, irrigabant. Totam vero vertebrarum cavitatem explendo, ex utroque suo latere varia distribuebat nervorum paria. Plurimæ ex his, crassissimæque, ad brachia, crura, collum, & caudam proficiscebantur. Oculi globus integrum, diametro, adtingebat digitum. Palpebra interior, quam vivente testudine nictitare vidimus, iisdem, quibus avium musculis erat instructa. Cornea ejus tenuissima; iris minio colore, variisque vasibus intercepta; humor aqueus præ spissitate vix diffuens; crystallinus, unius lineæ diametro, depressus, & lenticularis. Lingua figuram professa pyramidalem, digiti unius longitudinem, 4. linearum latitudinem, vix unius crassitiem, substantiæ erat carnosæ. Tunica magno verrucarum numero tecta, linguæ autem cum osse hyoide, decem in universum, quini utrinque, erant muscoli.

Aurium insuper nec in magna nostra, nec in aliis minoribus vestigium exterius ullum adparebat. Pellis ipsa, & tenuior, & huc magisquam alibi depressa ipsum os temporum in hac regione quodammodo excavatum, contegebat. Subtracta autem pelle, foramen aliquod, & magnitudine formæque oculi orbitam effingens, ac operculo quodam cartilaginoso, mobili & membrana tenuissima, margini foraminis undecumque adhærenti, obtectum, adparebat. Ex parte foraminis posteriore, caput versus, ductus quidam cartilaginosus, ad palatum adscendendo, longiore quadam crena ibidem distinctus conspiciebatur. Sub operculo autem cavitas magna, ovalis, longissima, longitudine bis latitudinem superante, & ex latere perforata, stilo cuidam subtilissimo transitum relinquebat. Hic oblique intrans altera extremitate operculum sustinebat; altera autem, denuo aliam cavitatem, majori inferiorem, ac paullulum ex latere ejus constitutam, postquam transierat, foraminulum aliquod perforando conficiebat, cujus ope cavitas secunda, tertiæ cuidam, illique anfractuosa, nec non auditus nervum recipienti, nectebatur. Hæc autem stili extremitas sensim sensimque, tubæ instar, dilatata procedens, membrana quadam tenuissima foraminis oræ nectebatur. Cæterum, qui in describendis Antillis Insulis, ubi maxima testudinum copia occurrit, versati fuerunt; auditu easdem destitutas esse, perhibuerunt. Nos vero, vocatis in mentem, quæ descripsimus, organis, ~~duo~~ esse locum censemus, nec, nisi oculorum judicio nisos, testudines, quum

quum auribus carere videantur, & auditu egere, falso quidem auctores judicasse putamus.

Recensitus ille modus, quo corpus suum obversura testudo, collum hinc inde vertere solet, ansam præbuit detegendi musculos illos, quibus flectitur, atque extenditur. Duplicem igitur in hoc collo observavimus motum, utrumque & flexione constantem, & extensione. Priori vel caput, vel corpus & intus recipit, & extus protrudit; Altero collum protrudit nunc hanc, nunc illam petit partem. Priori igitur ratione, musculis variæ colli extrusi flexioni inservientibus universis, ac eadem vi omnibus agentibus, collum elongatur; quod una cum capite duabus flexionibus, & extensionibus vertebrarum variis retrahitur, quarum alteram superne, inferne alteram videbis; quæque testudinis collo figuram tribuunt, collo cygni, caput dorsum versus retrahentis, similem. Præter hos igitur musculos collum extensum undecumque deflectentes, omnibusque colli motibus communes, quinque adhuc sunt ex quovis latere, singulares, qui ex apophysibus, lumbis, ac costarum ultimis enati, ad vertebrarum dorsum longitudinem procurrendo, quinque diversos locos, apophysium obliquarum, quæ sunt vertebris colli, ingrediuntur. Musculorum horum longissimus, prope caput, primæ vertebræ corpori nectitur. Qui autem muscoli separatim agendo, colli extus projecti flexionibus variis inserviunt, ex vertebris nati, & vertebris inferuntur. Caput vero intus receptum, sacculo quodam adservatur ex illa pelle, quam in brachiis conspicuam esse, supra docuimus. Et hæc quidem mediante musculo quodam latissimo & fortissimo eveniunt, qui pelli adhæret, quique apophysibus vertebrarum spinosis, ex quibus oriri videtur, adnexus, infraque deflexus Asperam-Arteriam involvit, & Oesophagum. Situs igitur differentes fibrarum hujus musculi, quorum ergo & plurimos refert musculos una collectos, diversas pellis suæ rugas constituunt, quæ, musculis diversum in modum agentibus, cuculli formam accipit.

Generaliori interim nomine Græcis testudo: *Chelonè*, Latinis: *testudo* venit, seu *testa*, quippe quæ testis obtegatur; Dicitur & *Domiporta*, quia domum secum portare videtur suam; vel *Tardigradu*, quæ tardiori, seu lento incedit gradu: Italis: *Testudine*, *Tartaruca*, seu *Tartaruga* audit; Hispanis: *Tartuga*. Testudo autem terrestris, peculiari nomine a Germanis: *Erd-Schild-Kroete*, Belgis: *Schild-Pat*, ab Anglis: *Common Land-Tortoise* insignitur.

Testudo marina. Offic. Schrod. 333. Rondel. de Pisc. 443. Bellon. de Aquat. 50. Gesn. de Quadr. Ovip. 113. Aldrov. de Quadrup. Ovip. 712. Jonst. de Quadr. 147. Schonev. Ichth. 74. Charlet. Exerc. 30. *Testudo marina vulgaris*. Raii Syn. Anim. Quadr. 254. *Testudo marina corticata seu Communis*. Nonnull. Gall. *Tortue de mer*.

Testudo interim marina, & eximiorum sua magnitudine, & testa molliore quidem, ast injucundior, & pedibus tandem ad natandum piscium pinnis similibus, a terrestri distinguitur. Secundum Cel. Ray. Magnitudinis, quam interdum adtingere datur, eximiæ, testes illas constituit o, quas in Brasilia ac Antillis Insulis, repertas, 80. ad 100. hominum vel prandio sufficere novimus. Aliarum, in Indiæ mari obviarum duas crustas præ magnitudine, construendis Indorum tuguriis, seu casis paria esse, *Salienus* testatur. *Elanus* incolis Tapobranæ, quæ insula est, pro tectis venire; & Cheleno-

phagis, Æthiopiæ finitimis ad navigandum pro cymbis infervire, *Diodorus Siculus* docent. Alii ex nostratibus, itinere peracto tantæ molis, testudines sibi obvenisse referunt, ut vel quatuordecim homines testa sua excipere possent; alii, decem pedum longas, latasque septem. Et quas testudines Cuba, insula nutrit, excretæ in magnitudinem, vel quinque homines portare in dorso, *Joannes de Laet* est, qui refert. Alii marem cum foemella, toto lunari mense, coitu nexum remanere scribunt. Vertendo autem, dorso illas suo iniiciunt, qui captare quærunt piscatores. Accedunt igitur, quam proxime possunt, aquæ in superficie dormientibus, tum obvertunt, manibusque ad cymbam propellunt. Supini, & suspiria eximio pectore protrahunt, & abundantes lacrimas spargunt. Dentium vices os continuum subit, adeoque durum, ut fortissimum quemque baculum uno conscindere morfu dicantur. Excavato quodam canaliculo, ad recipiendos maxillæ inferioris dentes gaudet superior, quæ prominentiam suam dentatam cum inferiore comprimendo, herbis pasturæ testudini infervit. Egrefas vero crusta sua in terram, herbæ committere sua ova, ad centum usque, & avium ovis similia, docet *Plinius*; quæ albida sunt & rotunda, nec oblonga, ut avium. Quæ autem de eorum exclusione apud antiquiores leguntur, tuo jure reiicias, siquidem omnium omnia ova, solis tantum calore accedente excluduntur. Nec tamen in pectore, sed abdomine fitos esse earum pulmones, *Joannes Faber Lynceus* est, qui adserit. Dissecta enim ex parte Trachea-Arteria, sic ille, ac tubi ope inflata duos statim in abdomine pulmones, ad extremitatem intestini recti usque pertingentes, & pectus versum, aucta sua latitudine elevatos, ac rubicundos detexi. Trachea-Arteria autem ex larynge ad pectus descendens, in duos ibidem dividitur ramos, qui, diaphragma transeuntes, pulmones ingrediuntur. Pulmones denique substantiæ tenuissimæ ergo, vesicarum rubrarum inflatarum speciem effingendo, verorum tamen pulmonum substantiam conservant, ac regioni dorsum spectanti ita adhærent, ut paullo post digitis tantum avelli queant, nec admoto scalpello.

R. P. *Feuillée*, Minoritæ, in *Observationum Diario*, anatomen præcipuarum testudinis marinæ partium debemus. Musculos igitur, eo duce, ex parte orbitæ oculum tegentes, materia quadam sabulosa, variisque glandulis albis in medio nigris maculis conspersis, & ex latere majoris anguli inter se nexis, tegi scimus, atque obvolvi. Membrana autem, seu conjunctiva immediate sub musculis sita, & globum integrum oculi obtegens, fortissima, corneæ adhæret; ac colorem lapidis pumicis undecumque, antè tamen albidum repræsentat. Cornea autem crassitie obolum excusum imitata, nec penitus sphærica, sed ante ac retro paululum complanata capacitæ gaudet. Duabus insuper constructa partibus, posteriore scilicet, seu sclerotica, & anteriore, seu cornea; hanc denuo partes componunt octo, sibi invicem, quasi futuris, junctæ; nec tamen, nisi in concava corneæ parte, futuræ conspiciuntur. Ast circum circa dentata, intus nigra, & membranula tenuissima, & si colorem quæris, minio fortiori obducta membrana tandem materiæ cuidam viscosæ involuta videtur. Cui quidem materiæ continendæ alia rursus destinata est pyxis, seu vesicula, membrana item constans tenuissima, limpidissima aqua repleta, cui crystallinus purissimus, valde pellucidus, & arachnoide involutus, innatat humor.

Ante-

Anteriore autem sua parte magis convexus est hic crySTALLINUS, ac quidem posteriore. Anterius alia denuo instructus est membrana, illaque tenuissima, & uveæ in homine instar, ac patefaciendum luminis transitum, perforata; nec non parti dentatæ, seu corneæ fundo adhærens, cujus mediam aperturam iterum alia constituit membrana, tympani instar, in aure, extensa.

Linguam testudo marina brevem habet, mollem, crassissimam, undecumque musculosam, duriusculam, superne rugosam, & interiori suæ substantiæ includentem cartilaginem exiguam, oblongam, rapæ instar effictam, quæ quidem cartilago cuspide superior ossi necitur cartilaginosa, thoracis corio simili, ipsum denique os alia utrinque terna concomitantur ossicula cartilaginosa, itaque disposita, ut ranæ crustis testæ figuram constituent. Quæ ossium unio, ossis hyoidis vices subeundo, & nomen meretur. Immediata igitur huic ossium connexioni adhæret lingua, ossa musculorum fortissimorum eandem comitantur, & ex ejus radice exorients aliqua fovea longior, hujus demum in initio enata conspicitur larynx. Tracheam-Arteriam quadraginta circiter annuli cartilaginosi constituunt, ovoides, & in extremitatibus suis, spatio inter segmenta relicto, forti membrana conjuncti. Exinde in duos ramos, totam pulmonis longitudinem percurrentes, dividitur. In alios item ramusculos subtiliores abeunt annuli, annulis ubique undatis, & in varias partes divisis, compositos.

Erat autem quem hucusque descripsimus testudinis masculus, 3. circiter pedum latitudinis. Producta autem ab ejus origine ad caudæ extremitatem usque intestina 45. pedes longitudine, explebant. Oesophagus insuper amplissimus, 16. digitorum longus, ab initio item ad medium confusus erat interne cuspidibus multis, mollibus, albidis, & his fimbriis similibus, quas in margine stragulorum ex lana observabis. Omnibus tamen ventriculum versus reflexis. Reliquam oesophagi partem rarioribus saltem, & brevioribus, iisdem alias, conspersam deteximus. Ventriculi longitudo 2. pedibus, latitudo 18. fere digitis absolvebatur. In medio autem ita constrictus est, ut duos ventriculos effingeret extremitatibus suis sibi nexos. Rugis interim plenus uterque conspiciebatur, at magis elevatis secundus, quam quidem primus. Pylorus duorum circiter digitorum longus adeo angustus erat, ut in cavitate sua vix minimo digito pateret ingressus. Præterea & internis rugis repletus apparebat. Reliqua autem a pyloro usque ad anum intestina, in duo viscera abibant, quorum alterum gracilius, alterum crassius erat, & hoc quidem amplius ab initio, residua ejus parte strictiore. Gracilius igitur ex intestinis a pyloro ad initium crassioris duodecim fere pedum longitudine absolvebatur. Sic & membranis, seu tunicis crassioribus, fortioribusque in initio gaudebat ac in extremitate. Intus vero quatuor circiter longitudine pedibus peractis, innumeris foraminibus, seu profunditatibus conscindebatur, reticulæ quas maculis jure æquiparabis. Cujusvis præterea spatium fundi aliis maculis minoribus distinguebatur, in denuo minores abeuntibus. Ita ut tria, vel quatuor retia sibi invicem superposita viderentur, maculis inferiorum minoribus, quam superiorum, seu magis eminentium. Reliqua autem intestinorum pars usque ad anum rugis quidem complicata, nullis tamen maculis interstincta conspiciebatur. Intus vero intestinum omne materia quadam adipea, &

glutinosa obductum, nec non ductus choledocus, duobus sub pyloro pedibus idem ingrediens, observabatur. Tum sphinctere crassiore, sed strictissimo transitui perforato, a graciliori intestino crassius discernebatur. Amplissimum erat quousque per $1\frac{1}{2}$. pedem producebatur intestinum crassius; eadem deinde crassitie ad anum usque procurrebat, quem antequam attingeret, tunicarum intestinum constituentium, ibidemque crassiorum ergo, crassius paullulum evadebat. Tres autem in universum tunicae erant, vel membranae, totum ab Oesophago usque ad anum, intestinum constituentes, interior, nimirum, media, & externa. Interiorem, quae tenuissima erat, plures ramusculi componebant, venae, & arteriae; mediam crassissimam, albidamque fibrae praesertim longitudinales, tenerae, ac carnosae constituebant; multis insuper, arteriis, venisque per totam membranam interiorem varios dispergentibus ramos, per spatia traducebatur. Externa tandem, quae tenuissima erat, ex mesenterio, pulmonibus, hepateque cohaerente, profecta, vel lenissimo tractu, pro subtilitate sua, lacerabatur; variis insuper venarum ramis, membrana fortissima mediante cohaerentibus contegebatur. Omnes insuper venarum ramos, alii arteriarum rami concomitabantur, & harum quidem membranae, venarum membranis multo subtiliores erant. Zonam tum adipeam, ac valde flavidam, ad longitudinem ramorum, tam venarum, quam arteriarum, procurrentem; omnes praeterea ramorum extremitates, intestina conscendentes, ac denuo in alios ramos, substantia intestinorum interna contentos, abire, observavimus.

Immediatum, cor, sub hepate situm, hepar supra pulmones, occupare scito. Pirum vero cor testudinis nostrae, & depressum parumper sua figura repraesentabat. Magnitudini testudinis, & sua moles respondebat; ast pericardio carens, membrana obtegebatur fortissima, ac arctissime adhaerente, nec non pericardii vices explente. Tum duarum auricularum majorum, substantiaeque membranosae crassioris, altera dextram occupabat, sinistram altera partem. Foris rugis obsitum, intus, innumeris repletur cavitatibus, magna fibrarum carnosarum quantitate, interstinctis. Utraque autem auricularum, utroque cordis ventriculo, ast singulari admodum ratione, respondere videbatur. In homine nimirum, sanguis primo auriculam, tum ventriculum ingreditur; in testudine autem motus sui directione, sanguis in ventriculorum cavitatem defertur, nec alio quodam usui, nisi recipiendo quo ventriculum ingredi amplius nequit, sanguini, destinatae videntur auriculae. Tres numerabis cordis cavitatum. Dexteranempe sanguinem ex vena cava, & auricula dextra profectum; sinistra, profluentem ex vena pulmonari, & auricula sinistra, recipit sanguinem. Ex cavitate autem sinistra in dextram sanguis transit, ope foraminis cujusdam huic communicationi destinati. Exinde vero duas ingreditur arterias, in cavitate dextera exortas, variasque exinde in corporis partes diffusas. Illam tamen sanguinis portionem excipito, quae, foramine quodam, in tertiam intrat cavitatem, illamque anteriorem, deducenda demum in pulmonis arteriam, ex tertia hac cavitate exorientem. Cavitationem sinistram itaque sanguinem pulmonaris venae saltem, & sinistrae auriculae; dextram vero illum recipere vides, sanguinem, qui ex cavitate sinistra, ex auricula dextra, & vena cava eo defertur. Duabus insuper arteriis, aortae vices tenentibus; & tertiae cavitati, minori ex qua proveniens sanguis arteriam

teriam pulmonarem intrat, his inquam, uno tempore, sanguinem subministrare vides, cavitatem dextram.

Tum hepar in media fere longitudine sua divisum, in duos lobos, etsi revera non nisi unicus sit, abire videtur. Major dextrum, finistrum latus occupat minor. Duo autem pulmonis lobi, rubicundi, ac spongiosi, membrana quadam coherent fortissima. Utrique autem ramum quemdam subministrat Trachea-Arteria, qui per totam eorum longitudinem transeundo, varios, denuo minores, per totam eorum substantiam dispergit. Sic & cor duo ablegat ad utrumvis pulmonem vasa eximia, quæ Tracheæ-Arteriæ ramis supraducta, eorum substantiam ingressa, una cum ramis producuntur. Reliqua duo in exteriori partis posterioris latere procurentia, ramos aliquos majores, in mesenterio extensos constituunt; paullo autem ante quam mesenterii ramos effingunt, alio quodam vase mediante, ut scalæ ligna transversalia, connectuntur.

Frequentes interim in Antillis insulis, cujuscumque generis testudines captari, in *historia sua naturali, insularum Americæ Antillarum*, Celeb. docet *Rocheport*. Tria constituit testudinum maris genera, ab insularum incolis, *Tortue Franche* (testudinis liberæ) *Caovanne*, & *Caret*, nominibus, distincta. Omnes horum generum testudines, forma sunt fere eadem. Prioris saltem caro, conveniens cibo, reliquarum, non nisi deficiente alimento alio omni, præterea testa & *Caret* nullius est pretii. Duæ priores, testa interdum 4½. pedes longitudine, 4. latitudine, æquiparante gaudent. Nec nisi ponendorum ovorum causa ex aqua terram ingrediuntur, & his quidem locum infrequentiore, mari vicinum, arena autem tenui, & rariore obsitum eligere solent. Insulam colentes, quotannis Cayemannæ Insulas adeunt, carnis testudinum, ibidem frequentissimarum, quærendæ ergo; & hi quidem, testudines vel centum interdum milliaribus a mari, spatio, ova sua reponere referunt; siquidem & parcior fluminis aqua transitum permittit, & terra, leviori arena oblecta, opportunissimum locum præbet. Tempore autem, quo aquam egredi testudines consueverunt, a Majo nempe mense ad Septembrem, magnam, sequenti ratione, earum captant copiam:

Ingruente noctis tempore varii hominum, ad aquæ oras, humi sese prosternunt, & strepitu studiosius evitato, magnam hi statim testudinum copiam, sua ova repositurarum, ex aqua proveniente, & in ripa obambulantem conspiciunt. Quæ a maris littore remotiores, terram suffodiendo, locum suis ovis dum præparant, ab hominibus obvertuntur, dorso imponuntur. Postridie autem (nec faciles enim sese obvolvere possunt) deportantur cymbis. Tum suspiria exserere, tum lacrimas fundere dicuntur. Expeditus autem iste labor procedit. Quinque etenim horarum spatio, obvertendis 40. ad 50. testudinibus, unus sufficit homo, 150. imo 200. libras singulæ pendunt. Quædam & duos in ventre sacculos, ovis repletos, habent. Hæc ova, rotunda, magnitudinis pilæ lusoriæ, vitello, & albumine velut gallinarum ova, cortice autem debiliore instructa sunt. Variis modis palato, & cibo inserviunt, ast ovorum gallinaceorum respectu, aridiora dici merentur. Unius interim testudinis caro, nutriendis per diem sexaginta hominibus sufficit. Cibo inservituræ subtrahenda venit crusta ventris, ab insulanis *emplastrum*, seu *scutum inferius*, dicta, quæ cartila-

ginibus, illisque ad refecandum facillimis, superiori adhæret. Quas igitur piscatores noctu ceperunt, die subsequente sale conspergunt. Duobus sic mensibus testudinum captione in insulis Cayemannæ, peractis, Antillas redeunt, ibidemque sale conditas, pro plebis, & servorum nutrimento vendere solent. Eluctatæ autem testudines insidiantium pericula, bis, terve sepositis suis ovis, quo venerant, revertuntur. Nec eorum intuitu, ut errante *Plinio* duce, falso alii perhibent, sed Solis ardore potius, levissima terra contacta, sex fere hebdomadam spatio, excluduntur ova. Fracta tunc, ovi crusta, & remota, qua obtegebantur arena, naturæ instinctu incitata testudines minores, mare petunt, & matribus vicinæ resident. Recentis igitur captæ testudinis caro, optimæ vitulinæ haud cedit, pro grato sapore. Cæterum adipe, in testudine elixa, viridi-flavido intermixta, & digestu est facillima. Hinc & rebellibus morbis detenti, has in Cayemannæ insulas deportari solent; quos hac testudinum carne expurgatos, ac refrigeratos, optima plerumque salute vigentes redire vidimus. Adeps ejus viride aliquod oleum subministrat, cuilibet recens usui inserviens; quod quum inveteraverit, lampadum nutrimento venit.

Illam, quam *Caouanne* nomine insigniunt, testudo, eadem, qua prior, figura, conspicua, capite saltem, paullo majore, ab ea differt. Hæc, quum hominem, illam obvertendi gratia accedentem, conspicit, sese defendere solet. Cæterum carne quum gaudeat nigra, filaminosa & gustus inamœni, nec nisi ad nutriendas lampades faciens præbeat oleum, minoris æstimari solet.

Tertia tandem, cui: *Caret* nomen est, species, reliquis duabus multo minor, ova sua non arenæ, sed lapidum cumulis, saburra mixtis imponere solet. Carnem injucundam, ast ova, præstantissimi, quæ sunt saporis, præbet. In primis autem crustæ suæ, præstantissimæ ergo magni habetur. Hanc autem quindecim folia componunt, alia majora, minora alia. Quorum decem depressa, 4. paullulum excavata, illum denique, quo collum obtegatur, triangularis excavatique scuti instar, efformatum, videbis. Subtracta ejus crusta integra 3. ad 4. librarum plerumque, interdum & 6. ad 7. pondere explet. Et hac quidem *Careti* ex testa, tot pyxides, capsulæ, ac sexcenta alia, quorum & usum nescio, & nomina, ab artificibus componuntur. Quam si retrahere cupias ex testudine, scuto illi superiori aliquantulum subdas ignem, cui folia omnia adhærere diximus, & transeunte statim calore, subjecta cultri cuspide, omnem elevare, ac subtrahere poteris testam.

Nec vero in terra solum, ut supra diximus, capiuntur testudines, sed & instrumenti cujusdam ope, cui *Varre* nomen est, sub aqua. Hoc vero pertica quadam constat, dimidiam hastæ longitudinem, referente, cujus extremitati clavus utrinque cuspidatus, in medio quadratus, & minimi digiti crassus, ad dimidiam sui, partem infigitur. Alii partem clavi prominentem incisionibus munire, sicque retinendæ, quam transiit, testudinis crustæ aptiorem reddere solent. Nocte igitur lunæ splendore illuminata, ac mari tranquillo, piscatorum primus: quem *Varreur*, salutare solent, exiguam cymbam, *Canot*, dictam conscendit. Duo alii adsunt, quorum alter, remis, cymbam ex quavis parte tanta agilitate, & dexteritate protrudere callet, quanta vel multorum remorum strepitus illam adigere ne-

qui-

quiret. Alter in media cymba constitutus, lineam tenet arreptam, cui clavus adhæret, quamque percussa testudine, celerrime relaxat, atque prudenter. Jam in prora constitutus, quem *Varreur* diximus, primus, quum egrediente in superficiem (testudinis motu efformata) maris spuma, præsentem esse detexerit testudinem, jaculi sui cuspide illum indicat, ac remum ducenti, ostendit locum, quo sit petendum. Eo autem, absque strepitu, cymbam quum adigerit, primus summa, qua pollet violentia, jaculum in testudinem defigit. Crustam perfodit, penetrat carnem & lignum aquæ supernatat. Dolorem ex vulnere sentiens testudo, fundum petit, & violentiore agitatione, altius ferrum infigit. Effluxis tandem cum sanguine viribus, vel in cymbam, vel terram facilis adtrahitur.

Quatuor sunt ad quinque, sic in *Spectaculo naturæ* Cel. *Pluche*, testudinum species, quarum duæ, vel *Tortue-franche*, vel *Caret*, reliquis anteferendæ veniunt. Prior crusta haud ita quidem pulchra, at excellentissima gaudet, carne, & ovis, nautis præsertim, longioris itineris molestiis, ac morbis correptis, & jucunda, & salubri. Testudo unica ad 200. carnis libras, & 300. ovorum præbere solet. *Carret* autem, altera ejus species, haud quidem carnis suæ, hæc enim palato est injucundior, sed crustæ ergo, magni quæ omnium æstimatione venit. Hæc enim aqua calida emolita, deinde autem molæ immissa, torcularis ferrei ope, quemlibet induit figuram, deinde expoliri, variisque ornatibus exarari solet aliis. Herbis autem sive aquæ insit, sive minus, testudo nutritur. Prata igitur nonnulla, quæ marium quasdam Americæ insulas alluentium, in fundis reperiuntur, inhabitare solet, & nutrimentum ex illis recipere. Aqua parciore, prædicta quum obtegantur loca, multi sunt ex peregrinantibus, qui mare quieto, ac Cœlo sereno, viridibus hisce aulæis obtecta eadem, iisdemque obambulantes testudines suis se oculis vidisse testantur. Accepto cibo, fluviorum aquæ dulcis ad ostia, potum quæsituræ, abeunt. Tunc aeris respirandi gratia, aquæ in superficiem enatant, post fundum denuo petunt. Nec, nisi vel comedant, vel hominem avemve rapacem viderint, caput suum aqua submergunt. Quotannis cæterum sua ova repositum in terram egrediuntur, eaque foveis ibi exstructis, ubi fluctuantes maris aquæ refringuntur, mandare solent; illaque, quo Solis calore calefacta tandem fœtus excludantur, levissima terrâ tegunt; sic sibi suæque familiæ laboris fructum præparant, redit autem hominum aviumque usibus. Testudines scilicet 15. dierum spatio vel ter, nonagena ova deponunt. Peractis aliis 24. ad 25. diebus arenam hinc inde egrediuntur pulli, & natura duce paullatim repunt ad aquam. Vix duos tresve dierum natos maris vehementia reiicit, nec contra violentiam fluctuum valent vires exiguæ. Advolant aves, eosque antequam denuo terram perfodere ac eo sese recipere valeant, ad unum omnes devorant. Sic ne trigessimus quidem conservatur.

En, quæ his accedentia in *Novo Itinerario suo*, scribit *Gulielmus Dampier*: Quatuor sunt species testudinum maris, scilicet: magnæ, testudines *Bahenses* dictæ; testudines capite maximo instructæ; testudines virides, & testudines rostro falconis donatæ. Primæ reliquas magnitudine superant, dorsum magis elevatum, magis conglobatum ostendunt, carnem quoque fœtentem & salutis obnoxiam præbent. Secundæ, maximo præ reliquis capite conspicuæ sunt, carnem exhibent valde fœtidam, nec nisi urgente neces-

necessitate cibo venientem. Musco, circa rupes nato, nutriuntur. Tertiæ, omnium minimæ, nomen suum a gutture suo longo, exiguo, & falconis rostrum quodammodo referente acceperunt, & dorsum crusta illa obtectum habent, quæ tot ac tam pulchris utensilibus minoribus conficiendis infervit. Maximarum testa $3\frac{1}{2}$. libras circiter pondere explet. Satis probo illæ cibo veniunt, attamen pro loci & nutrimenti differentia, jam improbæ, jam melioris sunt qualitatæ, imo sæpius vomitum ac violentem alvi fluxum excitant. Quæ enim herbis, viridum instar, vivunt, & crustæ pulchritudine, & carnis præstantia illas superant, quæ ad rupes degendo, musco seu herba silvestri nutriuntur. Carnem hæ adipemque flavidiorem continent. Variis Indarum Orientalium locis detinentur, singularibus atque remotis in regionibus sua ova deponunt, nec umquam fere reliquis commiscentur. Omnes sua ova Majo, Junio, & Julio mensibus, aliæ citius, aliæ segnius emittunt.

Ter octogena ad nonagena ova, gallinaceis quoad magnitudinem, æqualia, sphærica, & pelle tantum alba ac aspera obtecta reponunt. Ova autem repositura testudo dum ex mari terram petit, unius horæ spatium eadem commoratur. Loca enim aquæ profunda transeat, & si recedente aqua nec alta terram adtigerit, bis terve gradum sistendo quietem capiat, necesse est, antequam ad locum ovis commodum pervenerit. Quem ubi invenerit, pinnarum auxilio, amplissimum in arena foramen effodit. Ova eiicit, ac eadem arena protracta ad 2. pedum altitudinem obtegit, tum demum redit ad mare. Sæpius locum illum superiore nocte visitat, circumeundo designat, tum ad mare revertitur, subsequente nocte denuo redit, ac prope eundem sua ova recondit. Idem est testudinibus omnibus ova ponendi modus. Illas vero capturus totam per noctem in littore obambulet, & ut strepitum edat, sive lumen secum gerat, sibi caveat. Exspatiatam tum testudinem obvertat, & ex violentia fluctuum retractam, supinam relinquat. Tanta autem testudini viridi majori vis est ac pondus, ut duo homines eidem obvertendæ vix sufficiant. Virides dicuntur, ob testam suam viridiorem reliquis. Quæ quum aliis pulchior sit & tenuissima, obducendis utensilibus minoribus tantum infervit. Hæ igitur testudines quartæ speciei testudinibus majores, 200. ad 300. libras suo pondere exæquant, dorso etiam magis depresso, & capite magis rotundo gaudent atque exiguo. Reliquis jucundior palato saporem caro earum præbet. Monstrum testudinis viridis in Portu Regio in Sinu Campeciæ, captum fuisse audiui, 4. pedum a dorso ad ventrem, & 6. pedum ventris latitudine. Hujus testam, pro cymba conscendens Navarchi *Roch*, filius, $\frac{1}{4}$. milliaris partem emensus, ad navem patris vehebatur. Adeps ejus, olei 33. pintas mensuræ Parisiensis præbuit. Aliæ tamen testudinum insulas ex meridie Cubam spectantes tenentium majores, aliæ autem minores aliæ carne viridi, aliæ nigra, aliæ tandem flavida instructæ esse solent. Has numquam non in Portu Regio, in Jamaica reperies, illas enim retibus captant, & ad Portum Regium deportant naves idcirco eo ablegatæ. Viventes adhuc Jamaicam pertingunt, ibique, quo in vita conserventur, reservatoriis in mari constructis immittuntur. Hinc magnam earum copiam venum videbis expositam, siquidem frequentissimo, & præsertim plebis nutrimento veniunt.

Herba quadam nutritur testudo viridis, quæ in mari, ubi 3. ad 6. ulnarum

narum est aquæ profunditas, nascitur. Foliis conspicua est exiguis attamen 4. pollicis latitudine & 6. pollices longitudine attingit. Duas vero species testudinum ab omnibus diversissimas alit India Orientalis, siquidem mas pariter ac fœmella, medio die in terram exspatiantur & apricantur. Alias etenim fœmella tantum & quidem nocte, sua ova depositum in terram prodit. Iterum aliæ testudines exiguæ ast saporis gratissimæ, in plagis Mexicæ orientalibus reperiuntur. Res autem singularis est ac notatu dignissima, quod testudo ova depositura, loca ubi totum per annum degerat, relinquendo, in alium sua ova deportet. Omni cibo, hoc tempore abstinere creduntur, omnem scilicet tunc carnem cum pinguedine amittunt, masculus præsertim tam macilentus evadit, ut ne quidem plebis palato arrideat. Plerumque tamen & plurima sua ova in Insulam *Caimann*, Indiæ Occidentalis, & Insulam Ascensionis, in Oceano Septentrionali conferre dicuntur. Vix ova deposuerunt, & omnes revertuntur quo venerint. Longissimum forsan iter natando perficiunt, etenim eo tempore, prope insulam *Caimann*, omnis generis testudines repertæ fuere. Et insulæ Meridionales Cubæ, omnium ex quibus proficisci possent, proximæ, ad minimum 40. milliarium spatio distant; nec eodem loco tanta testudinum copia vivere posset, quantam ova ponendi tempore præsentem ibi videmus. Longius est iter illarum, quæ ova in insula Ascensionis deponunt, terra enim proxima 300. milliariibus distat; nec, quod ripas vicinæ teneant testudines, dubium est. Nec tamen ova ponendi ergo saltem, patria loca relinquunt; iter facientes enim magnam pisciculorum copiam, & præsertim gobios sibi socios habent. Quousque autem ad locum ovæ reponendis destinatum tendat fœmella, masculus illam comitatur, nec deserit umquam. Itineris sub initium adipe uterque abundat, ast reduces, masculi præsertim, ut supra diximus, prorsus omni carne carent. Aqua detentæ coire, & masculus fœmellæ per 9. dies inhærere dicitur. Amplexus autem masculus fœmellam numquam faciet missam. Metam attingendi artis haud multum ignarus, utrumque ictu perforare valebit. Masculus enim nil habet feri; ast fœmella, si respirationis ergo elata cymbam conspexerit, quacumque vi fugam captat, masculus eam duabus pinnis anterioribus constrictam tenet, & quo aufugiat, impedit. Coeundo igitur coherentium primam jaculo fœmellam transfigas, sic de masculo captando certior eris. Longævæ dicuntur testudines, & qui captatione illarum occupantur, Jamaicam tenentes, segnius illas sibi destinatum incrementum capere adferunt. Nec non in aliis Americæ insulis testudines virides palato optimæ, ast tantæ feritatis reperiuntur, ut captari nequeant prorsus. Septimo vel octavo, ad summo duodecimo quovis minuto, capite extra aquam protento, aerem captantes videbis, quotiescumque enim aquæ superficiem petunt & aerem, halitum, vel 40. perticis remoto innotescentem, edunt. Sic piscatores locum, ubi detinentur edocti, observato summo silentio vel die accedunt, facilesque captant, fortior enim in testudine est videndi, quam audiendi facultas. Alibi etiam retibus, quorum maculæ sint latiores, capiuntur.

Huc fere redeunt, quæ de testudinibus scripta reliquit *Dampier*. Recentiorum qui itinera fecerunt, alii, testudines in Mediterraneo obvias, 200. librarum pondus plerumque exæquare scribunt. Maximo illæ sæpius æstu diei,

diei, maris in superficie sopitæ conspiciuntur & fluctuantes. Tum illas captatum urinator expertus cymbæ proram conscendit, & quum prope ad testudinem accesserit, in aquam profilit, ita tamen, ut averso alveo, proximus fiat testudini. Post testam animalis prope caudam arripit, arreptæ innititur, & expergefacta testudo pedum posteriorum agitatione capienti resistere quærit. Hic vero ejus conatus sufficit pro testudine ac urinatore tamdiu sustinendo in superficie maris, usque dum adveniat cymba. Cæterum rarissimæ in Mari Baltico & Freto Brittannico capiuntur testudines; adtamen Nova Publica Gallica, die ante Kal. Novembr. anni 1752. emanata, recensent: alios inter pisces Reginæ mensæ destinatos, & testudinem, *Carvet* dictam, ac apud Europæos incognitam advenisse. Hujus caput, testa nigra tectum, testudinis communis capiti simile erat, rostrum vero psittaci rostro. Spatium capitis extremitati & corpori intermedium, 1. pedis longitudinem adæquabat, cartilagine & carne componebatur. Sic & testa dorsi nigra erat atque striata. Squamas ostendebat 2. anteriores, 2½. pedum longas, & reliquas duas in extremitate corporis sitas, 1. pedis longas. Cauda 1. pedis longa, arietis caudam repræsentabat. Ventrem testa rubra undata tectum, & quatuor pedes ea ratione efformatas habebat, ut pinnarum officia & locum subire possint, 6. pedum longitudinem, 4. pedes diametro, & pondere suo 800. libras explebat.

Inter Scripta in Academia Rovennensi anno 1753. prælecta, descriptionem testudinis, monstri, a fluctibus maris in portum Dieppæ conjectam, auctore Cel. *Des Groisilles*, ut Diaria literaria promittunt, legemus. Quæ eadem testudo est, de qua acta publica ut diximus, loquebantur.

En! quæ *Observationibus Anatomicis Historiæ Regiæ Scient. Acad. anni 1729.* inserta leguntur: Illustr. de la Font, Castra metantium Præfectus Nanneti, ad Cel. de Mairan retulit: die 4. Augusti circa ostium Ligeris, in loco, quem: *la Pierre percée* dicunt, 13. miliaribus a Nanneto, in retibus piscatorum captam fuisse testudinem singularissimam. Quæ quum retia intrasset, tanto cum impetu iisdem sese extricare contendit, ut multoties retia corpori obvolverit, eaque integra reliquerit, ast se ipsam magis irretiverit. Piscatores de conservandis retibus saltem solliciti, magno cum sudore illam protrahendo in terram, magnitudine ejus obstupefacti, clamoribus horrendis perterriti fuerunt. Hos enim quum caput ejus uncis ferreis confringerent, adaugebat, ita ut per ¼. miliaris spatium propagarentur; & irritata testudo, ex gutture cum spuma vaporem adeo foetidum exhalabat, ut vel piscatores deliquio corriperebantur, 7. pedum & 1. digiti longa erat, 3. pedum & 7. digitor. in humeris lata, & ubi crassissima, 2. pedum crassitudinem pertingebat. Incessu suo & adspectu testudinem communem referebat, testa ejus corium esset dicendum, quapropter a Viro Cel. de la Font, coriaceæ testudini *Rondeletii* atque *Gesneri* æquiparatur. *Aldrovandus* autem & *Jonstonius* nullam cujuscpiam huic similis mentionem iniiciunt. Caput tamen a capite testudinis *Rondeletii* atque *Gesneri* diversum ostendebat, & utramque maxillam dentibus confitam, quorum 2. anteriores, reliquos longitudine superabant, quamvis 1. maxillæ superioris dentes anteriores longiores erant illis, qui anteriorum locum occupabant in inferiore. Dentes minores duplici serie erant dispositi, & ut in Cane *Carcharia* aliis aliis curvati superjacent. Testudo *Rondeletii* autem rostrum marginibus acuminatis

natis instructum ostendit, & margo superior fissus inferiorem recipit insertione. Sic & quatuor pinnae testudinis *Rondeletii* fere æquales, partibus sibi superstratis constant, ut avium alæ, muniuntur insuper ungulis aduncis, quibus, dum terræ obambulat, utitur, ex mente auctoris. Ast quatuor pinnae in testudine, a *Cel. de la Font* descripta, inæquales reperiuntur, & anteriores magnitudine sua multum præcellunt posterioribus. Eandem fere, ac simplicem superficiem habent, nisi aliquas excipere velis rugas, parum elevatas. Pelle igitur teguntur eminentiis exiguis confita, ast ungulis destituta; quæ faciunt, ut animal, quod terræ incedat, haud destinatum esse videtur. Cauda tandem (qua testudini *Rondeletii* similis est) non est nisi corporis extremitas in cuspidem exiens, & adhærente crusta, seu corio tecta. Ista autem caudam, ut in quadrupedibus, a corpore diversissimam, ac 16. digitorum longam, nec corii ope adhærentem conspiciendam præbet. Quum interim Nannetum demum adportata jam quinque, vel sex diebus præterlapsis emortua fuerat, quid mirum? si temporis tunc calidissimi vehementia putrescens, præsummo foetore, Anatomicam dissectionem subire nequibat. Extractis igitur intestinis, caput cum pinnis, & cauda imprudentiores proiciebant in Ligerim. Nil igitur præter corium, & ventris pellem supererat. Sed ne hoc quidem foetoris sui ergo, nec piscatores perferre poterant. Pellis igitur sola, piscatorum in loco suspensa mansit. Nec quidquam exinde ex figura sua dimisit, & consistentia sua, corium vaccæ excoriatum exhibebat. Detegendæ fibrarum texturæ ergo, aliquas illius regiones perfricantes; cuspidibus denticulorum sibi invicem incidentium ac cranii futuris, similes fibras detexerunt. Alii, qui ex Galliis in Americam deportatis coloniis Nanneti tunc commorabantur, hanc testudinem, summa differentia, ab illis quas in Americæ maribus capiunt, distare, adferebant. Brevibus ante duæ societatis Indicæ naves ex China, Orientem, in Ligeris ostio erant advectæ; has igitur forsitan sequutam esse censet *Cel. de la Font*, quæ quidem mitioris tunc coeli causam, calidam satis sibi semper reperit aquam. In locum saltem ignotissimum, ac remotissimum quemvis proventus illius relegandus videtur.

Græcis: *Chelonè-Thalassia*, Germanis: *See-Schild-Kroete*, Belgis: *Zee-Schild-Pad*, Anglis: *Sea-Tortoise*, nominibus venit.

Testudo palustris. Offic. *Testudo nigra palustris*. Ind. Med. 116. *Testudo Lutaria*. Rondel. de Pisc. 229. Bellon. de Aquat. 51. *Testudo quæ in aqua dulci vivit* Gesn. de Quadr. Ovip. 110. *Testudo aquæ dulcis & lutaria*, Aldrov. de Quadr. Ovip. 710. *Testudo aquatica* Charlet. Exer. 30. *Testudo lutaria palustris* Schwenckf. Rept. Sil. 164. *Testudo aquarum dulcium & Lutaria*. Raii Syn. Anim. Quadr. 254. Jonst. de Quadr. 146. *Testudo fluviatilis, Lacustris seu palustris*. Quorumd.

Duabus autem illa, *Schwenckfeldio* teste, crustis tegitur nigris, ac osseis, quarum superior convexa, inferior plana, ac lata, variis utraque constat foliis. Quatuor insuper pedes, duos posteriores præbet, duosque anteriores, quorum hi quinque, quatuor illi ungulis aduncis, nigrisque, quas pro lubitu, ut & caput, & caudam, vel retrahere, vel extendere valet animal, instructi sunt. Corium ejus nigrum, rugosum, & hispidum, collo retracto, cassidis instar, contegit caput. Crura squamis, seu crustulis (nigris, splendentibus, punctis insuper flavidis constipatis) ocreis quasi induta videntur.

videntur . Caput ei est exiguum , est rostrum cuspidatum ; maxillæ dentibus carentes , sed oris acutis instructæ , ac probe occlusæ . Maxilla inferior quatuor , vel quinque radiis oblongis , flavidisque ornata . Duo insuper in maxilla superiore , nares repræsentantia foraminula apparent . Oculorum pupillæ nigridæ , lucentes , iride fulvo-rubicunda , & duobus , tribusve punctis exiguis flavidis conspicua cinctæ ; lingua imperfecta , maxillæ inferiori adhærens , paullulum profiliens . Tum duo pulmones magni , levissimi , fungosi , transparentes , ac tubulis fibrosis eum in modum intertexti , quo hyemis frigore fenestras vitreas variis congelationibus obtectas videbis . Venter simplex , & longior . Cor latius , & molle . Hepar flavidum , ac duos in lobos divisum . Fellis vesicula livida , lobo hepatis dextro adhærens . Lien exiguus , & rubicundus . Cauda 1¹/₂ palmi lata , rotunda , ac sensim exiens in cuspidem . Adeps flavidus , & ut in piscibus , fluidus . Interceptum vero hujus speciei testudines sibilum edere solent atque demissum . Omnibus quæcumque obvenerint , carne præsertim vescitur , & herbis . Viviparorum autem more , masculo nempe fœmella conscendente , coeunt . Fœmellæ insuper , quæ deponunt ova , cortice duro munita , & ut avium ova , albumine , & vitello instructa esse scito . Fossæ excavatæ eadem reponere solent , terra deinde obtegere . Frequentes hujus generis in Silesiæ flumine , *Bartha* , dicto , testudines piscatorum retibus inhærentes captantur . Et quamvis locis delitescere perament humidis , & cœnosis , in aridos tamen sua ova deportant . Cæterum nec prorsus aqua carendo , nec aere interdum libero , vitam producere possent .

Aristotelem vero , testudinem palustrem ab illa , quæ aqua dulci immoratur , haud probe distinxisse , *Cel. Raii* observat . Illa aquas inhabitat cœnosas , & fossas , oppida , vel castella cingentes , & dorso , pectoreque gaudet latiore , ac paullulum convexo . Adspectu est injucundo . Dicitur autem testudo aquatilis , quo a terrestri distinguatur ; ambæ etenim licet alias sibi sint simillimæ , longiore attamen sua cauda , & gliris aquatilis instar efficta , aquatica differt testudo a terrestri . Scutum ejus nigrum suprapositæ quædam effingunt particulæ . Et hac quidem pro lubitu , modo pedes , modo caput , modo caudam , vel exferit , vel recipit . Pulmonibus , renibus , vesica , brevibus , quibuscumque maritima gaudet testudo , instructa est partibus . Insectis alitur aquaticis , limacibus , lumbricis , herbis . Longæva interim , & tenacissimæ est vitæ , quam non solum per longum tempus alimento destitutam , sed & ipso capite resecto , vitam adhuc ducere cognovimus .

Resciso vel testudinis capite , illam objecta perspicendi , oculis nictitandi , palpebras occludendi , imo manum nimis admotam arripiendi , mordendique facultate gaudere , *Ælianus* est , qui docuit . Ex testibus , sic *Cel. Tyson* , D. fide dignissimis compertum habemus , quod 80. interdum , & plures , sua vita testudo attingat , annos . *Cel. Vir Mery* , maxillis testudinum duarum filo probe subligatis , naribus autem , & gula cera obturatis , alteram 31. , alteram 32. per dies vitam conservasse expertus est . Alia autem , subtracto illo scuto , quod pro sterno ipsi venire scimus , sicque intercepta omni respiratione , per septem adhuc dies spiritum cum vita retinuit . Nec in discutienda multi erimus oborta inter *Cel. du Verney* , & *Cel. Mery* contentione literaria ; qua nempe sanguinem in foetu huma-

humano, pari modo ac in testudinis corde, circulare; vel potius foramen ovale, & communicationis canaliculum, invicem sibi obvia, eodem in utroque, usui destinata esse *Mery* adfirmabat, *du Verney* negabat. Prætereundo eam tetigisse sufficiat.

Quamvis aqua potius, quam terra immorari præoptat, de qua jam dicimus, aquæ dulcis testudo; suum tamen inter amphibia locum meretur. Ad extirpanda insecta sæpius hortis immittitur; ast aqua ad natandum sufficiens adsit, necesse est. Quod si horto sit vivarium aliquod, seu alveus aquarius, asserem oræ admoveas, cujus ope vel ex aqua ascendere, vel in illam redire queat pro lubitu. Hyeme plerumque alimento abstinens, torpescens delitescit in terra. Præterea æstate plurimos absque cibo, degere potest dies. Domi adservatam denique, vel furfure, vel farina, vel scarabæis nutrito.

Nomen ejus Gallicum: *Tortue d'eau douce, de riviere, de lac, d'étang, de marais*, item: *Tortue commune*, vel: *petite Tortue de France* est. Occitanensibus: *Tortugue d'Aigue*, Anglis: *Water-Tortoise*, & secundum *Plinium*, *Belonio*: *Bourbiere*, seu *Fangearde*, audit, quippe quæ cœnosis, lutosisque immoratur locis.

Testudines vero præoptandas esse scito illas, quæ probe nutritæ, multa abundant carne, ac succulenta. Et his quidem, cujuscunque speciei sint, ac generis, magnam salis volatilis, & olei quantitatem inesse scito. Saporis sui jucundi ergo, carni bubulæ accedere teneas testudinis carnem, & abundantius nutrimentum præbere; ast qualitatis suæ crassioris ergo, & viscosæ, robustiore, qui illam digerere possit, opus esse stomacho, siquidem frequentiore earum usum, & torpedo, & hebescentia & virium relaxatio concomitari solet. Juscula autem testudinum, nec carnem, ut falso perhibent alii, tabe detentis optimo nutrimento venire habeas. Substantiæ nimium terrestris est testudinis caro, quam ut tabescentis stomachus ut debet illam concoquere possit. Hinc seniores, pituita abundantes, & stomachi debilitate adfecti omni ejus usu abstineant, nisi additis condimentis, crassiores ejus succi emendati fuerint. Junioribus autem, qui temperamenti sunt calidi atque biliosi convenit, ac qui multo corporis exercitio defatigati, stomacho gaudent robustiore. Corpus ejus pro cibo præoptandum est, ast caput, pedes & cauda nihili æstimantur. Varia quidem ratione mensæ adpropriatur, optima tamen est hæc, si sale vel aromatibus additis elixa comedatur. Multo abundat adipe, qui & diutius adservari & butyro substitui potest. Ova earum, sapore optima, alii quidem febris detentis commendant, & refrigerante ac somnum promovente virtute ea gaudere pollicentur. Magis autem vetustiora, quam recentia saluti convenire creduntur.

Ars Medica tandem testudine jam externe jam interne utitur. Juscula ex illis elicita contra morbos pectoris, contra febres hecticas & tabem commendat. Restaurandi etiam virtute gaudent, & his, qui in morbo diuturno virium fecerunt jacturam, conveniunt. Caro ejus syrupum contra phtisin imminuentem, contra rheumatismos, & tussim inveteratam optimum, præbet. Succus enim testudinis oleosus atque balsamicus, multum facit ad demulcendam pectoris acrimoniam, ad emendandam sanguinis falsedinem. Inter optima sane pro phtisi & morbis hecticis media locum obti-

obtinet. Dosi sit $\mathfrak{z}\beta$. ad $\mathfrak{z}\text{j}\beta$. Sanguis testudinis arefactus, dosi, gr. xij. ad $\mathfrak{D}\text{ij}$. cum aq. flor. tiliæ receptus, singulari contra Epilepsiam & matricis suffocationem utilitati cedit. Idem ille recens pro scabie, lichenibus, & lepra, linimenti instar, commendatur. Penis testudinis maritimæ arefactus & in pulverem redactus, dosi $\mathfrak{z}\beta$. ad $\mathfrak{D}\text{ij}$. contra saburram & calculum facere dicitur.

Qui quum arefactus fuerit, pedem i. longitudine, crassitudine autem exæquat pollicem, solidus est, substantiæ corneæ, coloris grisei, & materia quadam medullea albidaque plenus. Felli testudinis ophthalmica, & adipi seu oleo emolliens virtus inest atque resolvens; interdum & lampadis nutrimento inservit.

Basin quoque syrupi testudinum Pharmacopœiæ Parisiensis constituit.

Rx. Carnis vitulin. macræ \mathfrak{lb} . β . Hepar, cor, sanguinem & carnem unius testudinis mediæ magnitudinis.

Quæ omnia bull. cum aquæ libr. iiij. ad remanentiam libr. j. Sub finem coctionis add.

Flor. & summitatum perforatæ
althææ

tussilaginis ana pugill. j.

Expr. col. & div. in duas p. æ. quarum altera matutino tempore, altera vespertino, pthisi pulmonari detentis, per dies xx. exhibeatur.



C L A S S I S Q U A R T A .

D E A V I B U S .

De avibus generaliora quædam.

MAgis equidem ad amplificandum historiæ naturalis ambitum ; quam ad exaugendum Materiæ Medicæ adparatum facit cognitio alatorum ; quæ quum mensæ deliciis veniunt , si & plura remedia usibus Medicinæ subministrarent : animalium nescio quidnam præstantius foret , quid excellentius ? Jam autem vitæ alimentum uberius , ast morborum medicamina parciora præbent avium fere omnes . Quid enim morbus ? nisi status saluti contrarius ; morbo igitur subventura remedia contraria sunt alimentis sanorum . Medicamenta inamœnum , alimenta vero gratum excitant saporem ; imo remediorum & alimentorum , valetudinis statui diverso inservientium qualitates oppositæ sint , necesse est . Ex avibus igitur mensæ palatique delicias , ex mineralibus autem & plantis præcipua quæramus capita Medicinæ . Volucres interim , quum & communi nostrum usui veniant , & ad conservandam ac restaurandam salutem adhibeantur , & convalescentium regimen ingrediantur , & quædam haud contemnenda pro morbis remedia subministrent : dignas esse censeo , ut adcuratius cognoscantur . In hoc igitur studium nostrum , easdem pertractando , versabitur . Generaliora quædam præmittamus .

In terrestres & in aquatiles dividuntur aves ; utriusque speciei aliæ sunt silvestres , aliæ autem domesticæ . Hæ igitur , quæ frumenti granis , quæ herbis fructibusque nutriuntur , non solum concoctu sunt faciliores , sed & succum magis convenientem corpori subministrando , illas , quæ non nisi infectis , carne & piscibus vivunt , longe post se relinquunt . Instituta enim analysi edoceberis : carnem priorum medium tenere inter terrestrem qualitatem atque aquaticam ; nec non principia sua adeo inter se mixta esse & concentrata , ut nullum ei insit acris sive acerbi , ut hunc tantum saporem excitet in lingua , qui & salivam alimento in ore præparando necessariam solvere , & ad concoctionem optimam suam conferre potest . Carnem vero avium aquatiliū atque palustrium nocivæ qualitatis , ac totam fere excrementis constare experieris ; hæ enim piscibus vivunt ; pisces autem cœnum plerumque tenent & lutum , nullo fere motu exercitantur , & quum aquæ frigiditate pellis suæ poros constrictos habeant atque occlusos , excrementorum quantitate abundant . Terrestribus igitur utaris quamlibet frequentissime , posterioribus autem parcissime . Cæterum principia , quibus componuntur aves , ea omnia ex qualitate alimenti , quo utuntur , ex conditione loci quo degunt , ac cœli , sub quo vivunt , varietate petenda sunt atque dijudicanda . Hinc & illæ quæ libero aere fruuntur , cavea inclusas superant , & juniores præstantiores sunt antiquioribus , castrati non castratis . Imo pro vario anni tempore variæ sunt qualitatis atque præstantiæ . De his interim , prout argumenti cujuscvis occasio tulerit , seorsim agendum .

A C C I P I T E R.

NUllum est Gallico sermoni vocabulum, quod respondeat voci Latina: *accipiter*. Sub hac enim, tamquam generica, variae avium rapacium species, ut: *buteo*, *milvus*, *falco*, *asteridion*, *haluatus*, *tinnunculus*, *accipiter* *fringillarius*, *vultur* & *nifus*, comprehenduntur. Ex quibus omnibus *nifus* tantum aliquali Medicinæ usui venit; & ille solus nostra nunc descriptione pertractabitur.

Accipiter. Offic. Schrod. 13. Dal. Pharm. 429. Lemer. 7. *Fringillarius*. Belon. dec. Ois. 123. *Accipiter Fringillarius*. Gesn. de Avib. 51. Schvenckf. Aviar. Sil. 189. Jonst. de Avib. 10. Merr. Pinn. 170. *Fringillarius Accipiter*, vulgo *Nifus* dictus. Aldrov. Arnith. 1. 344. *Accipiter Fringillarius*, seu *Recentiorum Nifus*, Sparrov-Havvk Anglice dictus. Willughb. Ornith. 51. *Fringillarius Accipiter*, *Recentiorum Nifus* & *Sparverius*. Raii Syn. Method. Av. 18. *Falco cera viridi*, *pedibus flavis*, *pectore albo*, *undulis transversis fuscis*, *cauda fusca*, *fasciis nigricantibus*, Linn. Faun. Suec. 68. *Accipiter*, quem vulgo *Nifum*, *Sparverium* seu *Sperverium* vocant. Nonnull. Gallico idiomate: *Epervier*, *Eprevier*.

Columbæ magnitudinem adtingere solet *nifus*, & ab apice rostri ad caudæ extremitatem 14. digitorum longitudinem, volando autem, alis extensis 26. digitorum latitudinem explet. Rostri ejus brevioris, adunci, cœrulei, ac cuspidem versus nigri, pars superior, prope ad basin, pelle quadam, (artis vocabulo, *cera* dicunt) flavida viridi munitur; & huic quidem appendix angularis, sub naribus oblongis, utrinque nexa adparet. Palatum conspiciendum præbet cœruleum, linguam crassiorem, planam, nigridam ac parum bifidam. Oculos habet magnos, scintillantes, sub ciliis, umbraculorum instar prominentibus, latentes, & iride flavida instructos. Vertex coloris est fusci, seu obscurioris, plumis attamen albis in oculorum regione superiore, & capitis parte posteriore, conspersus. Eundem insuper colorem & in omni corporis parte superiore, & collo, & humeris, & dorso observabis, & alis; aliquot tamen alarum pennas dorso vicinas, maculis nigris interstinctas. In alio tamen caput & dorsum coloris cinerei-fortioris plumis tecta me vidisse memini. Corporis partem inferiorem, collum scilicet, pectus, & ventrem, latera, & aversam alarum faciem, albedo mixta vidi, & fulvo colore. Siquidem & totum pectus, & quævis insuper pluma, albidis, & fulvis seu rubro-nigridis alternantibus, frequentioribus, undatis, ac transversis lineis hunc in modum exornantur, ut latiores radii seu lineæ sint albidi, ac quidem fulvi. Albus est, quem & inferior pars menti, & maxillæ inferioris latera, præ se ferunt colorem; fulvum attamen plumarum medium ostendit, ac summitas. Breviores interim alas esse memento, quippe quæ complicatæ si fuerint, mediam vix caudam pertingunt. Exinde in utraque ala 24. pennæ majores numerantur, in inferiore seu caulis interna parte fulvidis lineis distinctæ. Caudam, quæ binas longitudine exæquat palmas, quinque ad sex radiis nigridis rectis, ac transversis ornatam, extremitate insuper albida conspicuam, 12. pennis compositam videbis. Lumbos *accipiter* habet robustos, ast crura longa, gracilia, & digitorum instar, flavida. Horum exterior, mediante membrana, medio,

dio, ad primam ejus articulationem usque cohæret, more inter accipitres communi. Ungues vero, seu falculas habet nigros. Quina ponere solet ova albida, & in extremitate obtusa, rubris, coronæ instar, maculis ornata. Cæterum avibus saltem, nec scarabæis unquam, aliisve insectis eum nutriri testantur aucupes; quem molis suæ ratione habita, acerrimum, & inter falcones venationi aptissimum novimus. Plerumque autem adpectu quasi protervo rectus insistere cruribus solet, & dorsum, gibboris instar, incurvare, ventrem vero quasi suspendere. Faciliori studio cicuratur, & nutrimentum quærit delicatius. Volatus est rapidioris, & perdicibus, alaudis atque passeribus infestus, præcipue autem fringillis, unde & fringillarius adpellatur. Ubicumque enim, ait *Belon*, commorantur fringillæ, transeunte accipitre, vocem illas & clamorem adtollere observamus, siquidem ex avicularum genere illis præsertim inhiat accipiter. Hyeme autem agminatim in planities descendendo, se ipsas pro præda offerunt fringillæ accipitribus, qui, si nostra non fallimus experientia & conjectura, nulli tunc nostras regiones relinquunt. Accipiter itaque quum falconibus instantior, nec semper easdem visitare soleat perticas, mirum non est si & infrequentior laqueis capiatur. Hyeme igitur gracilem proceramque in densis arbutis arborem, dummodo fruticeti cujusdam foliis, & umbra tegatur, quam altam nemoris arborem petere, ac ibidem residere mavult. Redit autem Sole plerumque occidente, & tunc contrario vento volatu perticam suam tendit. Medium, pro magnitudine, aves inter rapaces tenet locum accipiter, minore tamen sua magnitudine, nec alias masculus a fœmella discerni potest. Huic autem Gallico sermone suum suppetit vocabulum, adpellatur *Mouchet*; qui quum animo, & impetu fœmellæ, multum inferior habeatur, nec falconum venationi inserviturus cicurari solet atque nutriri.

Commorantes (sic pergit, quem quum de avibus agetur, sæpius recensentem audies, Celeber. *Belon*) in ostio Ponti Euxini, ubi Fretum Dardanellarum incipit, montium altissimum ascendimus, ac aucupem, singulari agilitate qui accipitribus captandis occupabatur ibi reperimus. Nobis quidem alienum videbatur, quod, quum nidis construendis reliquas tunc aves, (imminebat enim finis Aprilis,) intentas esse nosceremus; ex Oceani parte tot milvi adveherentur, tot accipitres. Auceps vero ad unum omnes, admiranda certo dexteritate, duodenos, ad minimum, quavis hora capiebat. Aream scilicet construxerat quadratam, 2. circiter pedum diametro, ac 2. ad 3. pedes ab illo dumeto, sub quo delitescibat ipse, remotam. Sex præterea perticis, digiti unius crassis, & viri altitudinem adtingentibus, ternis scilicet utrinque in terram defixis, cinxerat aream; singulæ autem ex parte sua aream respiciente, crena quadam erant instructæ, cujus ope viride aliquod rete extensum sustinebatur. In media tandem area palum cubiti unius altum constituerat, cujus fastigio funiculus ad dumetum productus cohærebat. Eidem aviculas aliquot nexerat, quæ grana areæ colligentes, aucupis pro lubitu, conspecto saltem e longinquo accipitre, hinc inde volitabant. Hic autem acriore pollens oculorum acie, vel 2. milliariis spatio remotus nexas conspiciebat aviculas, & distentis, quam latissime poterat, alis, aviculas capturus, præceps in rete irruebat. Tunc ab aucupe arreptus, ac sacculo linteo immissus ad plicaturam usque

alarum, ex pedibus, cauda, ac alis ligatus, ad terram demittebatur, ubi nec moveri, nec avolare poterat. Duarum horarum spatio plures quam triginta eodem modo captabat auceps, ac continuato per diem integram studio, facillime centum colligere poterat.

Continua autem famis vehementia exstimulatur, qui *Aldrovando* teste, sui ipsius excrementa interdum devorat, accipiter. Nec tamen pane accepto enecatur; laudatus etenim auctor varias ex avibus rapacibus, imo aquilam quondam, & frumenti grana, & panem absque ullo salutis incommodo deglutiisse suis oculis vidit. Nec cordibus parcere solent aliarum avium; & quamvis potu omni abstinere dicantur, sæpius tamen butyronem cavea inclusum, & carne bestiarum, aliisve ipsi porrectis alimentis aridioribus nec adeo succulentis sustentatum, bibisse observavimus. Alii sunt, qui hyemis nocte quavis, avem viventem sub ventre suo, calefcenti causa, fovere accipitrem perhibent, & subsequente die, & vitam, & libertatem, pro gratitudine, illi largiri. Nec tamen aliunde commodato calore indigere videtur accipiter, quippe qui temperamenti est calidioris, & omnia, per stomachum robustiorem, digerere valet. Plurima saltem, quæ de accipitre recensentur, nobis quidem fabulas subolent; quo referantur: quod pullos suos, artem captandi aves edocturus; primum ipse captet aviculas, tunc autem brevi libertate donatas, denuo capiendas pullis suis relinquat; item quod autumno in cuculum abeat, & hyeme delitescat. Cæterum frequens fere ubique in Gallia, Germania, Anglia, ac Suecia, quum frigidiores regiones inhabitet, nidum Julio, & Augusto in arboribus proceris, abietibus præsertim, nonnunquam & in rupibus, seu turribus antiquis construere solet. Quæ tandem ad venationem accipitris spectant, & modum, quo vel arte imbuendus est aucuparia, vel morbi, quibus subiacet, sanandi sunt, ea omnia ex Cel. *Aldrovando* edocebere fusius.

Græcum denique accipitris nomen est: *Spizias*, seu *Sipzites*, cui vox Latina: *Fringillarius* respondet. Ab Italis: *Sparviere*, a Germanis: *Sperwer*, vel *Sperber*, ab Anglis: *Sparrow-Havvk*, a Suecis denique: *Sparfbok* dicitur. Gallica vox antiquissima *Espervier*, *Esparvier*, *Epervier*, *Eprevier*, Latinæ, hodierno quæ usui venit, *Sparverius*, seu *Sperverius*, originem dedisse videtur. *Nisum* denique, nisus sui ergo quo majores semetipso aves alias captare solet, ac deportare, Latinos illum nuncupare docet *Schwenkfeldius*. Teste item Cel. *Aldrovando*, ex avibus rapacibus, quas Latini ab accipiendis avibus, accipitres, dicunt, masculus Gallice adpellatur: *Tiercelet*, siquidem, vel tertia sui parte minor est fœmella; vel tribus ex ovis, quæ ponere solent accipitres, duo plerumque fœmellas, tertium vero marem excludendum continere scimus. Masculus igitur nisi Gallis dicitur: *Mouchet*, vel *Emouchet*, Belgis: *Muschet*, Germanis: *Sprintz*, *Sprintzel*, *Sprintzling*.

Multum niso inest falis volatilis. Ille etiam annis tener, satis probum constituit cibum, quidquod Medici antiquiores contra Epilepsiam & ad corroborandum stomachum carnem ejus conferre judicabant. Ebræi olim ab esu nisi, omniumque rapacium, tamquam immundarum abstinebant. Ad tamen Spiritui S. mentem legislatoris dirigenti, crudelitatem inter abominanda relegandi animum fuisse censemus, dum avium rapacium usu Ebræos abstinere jusserit; rapaces etenim continuo conatu, viribus debiliores devorant, extirpant, ne suæ ipsarum speciei quidem parcant. Pul-

veris ungularum nisi ʒß. ad ʒj. pro dosi, contra dysenteriam commendant; & vel in aqua plantaginis solutam pro potu, vel syrupo consolidæ majoris aut arthemisiæ subactam, pro bolo exhibent. Excrementorum nisi ʒj., in aqua arthemisiæ solutus, partui difficiliori subvenit; sunt, qui illorum ʒj., pessarii instar, vaginæ intromittere malunt. Probe tamen caveo, ne partus difficilioris causa sit erethismus, vel inflammatio imminens, sed mera saltem partium laxitas atque debilitas; alias enim medium, vi sua emenagogica, majorem sanguinis quantitatem ad matricem deferendo, periculosum evaderet imo nocivum. Melle tandem soluta excrementa nisi linimento veniunt, cujus auxilio maculæ oculorum facillime profligantur. Adipi eandem virtutem inesse dicunt, & cutis deformitatibus medendi facultatem.

A L A U D A.

Variæ sunt alaudarum species, eæque Gallis vel notiores, vel infrequentiores, ut 1. alauda vulgaris non cristata, 2. alauda vulgaris cristata, *Cochevis* dicta, 3. alauda, quam Cel. *Belon*: *Calandre* adpellat, & linariam, sinistre, habet Cel. *VVilloughby*, 4. alauda, Gallis: *Cugelier*, seu *Cochelivier*, dicta, 5. alauda pratensis, *Farlouse*, seu *Falloppe* nuncupata. Nobis autem non nisi de prima sermo nunc erit atque tractatio.

Alauda. Offic. Dal. Pharm. 420. Lemer. 22. Merr. Pinn. 176. *Alauda non cristata*, Schrod. 314. *Belon. des Ois.* 269. Aldrov. Ornith. 2. 844. Jonst. de Avib. 70. *Alauda sine crista*. Gesn. de Avibus 78. *Alauda vertice plano*, Schvenckf. Aviar. Siles. 191. *Alauda vulgaris*. Willughb. Ornith. 149. Raii Syn. Method. AV. 69. Albin. Ornith. 39. *Alauda rectricibus extimis duabus extrorsum longitudinaliter albis, intermediis interiore latere ferrugineis*. Linn. Faun. Suec. 190. *Alauda campestris vulgaris, alauda gregalis, canora seu musica, cœlipeta; alauda terrena*. Nonnull. *Alouette ordinaire, ou commune*. Gallic.

Quotquot autem sunt, qui de avibus tractando egerunt, omnium, accuratissimum in describendo esse cognovimus Cel. *VVilloughby*. Hoc igitur duce, alaudam, de qua agitur, passerem domesticum magnitudine tantum non exæquare, aut longitudine exsuperare, edocemur. Pondere, unciam unam ac dimidiam; longitudine, si ab rostri extremitate ad ungularum seu caudæ extremitatem pergas, $6\frac{1}{4}$. attingit digitos; $10\frac{1}{4}$. alarum extensarum spatium; $\frac{3}{4}$. autem rostri longitudo, a cuspide ad oris angulos usque implet. Maxilla ejus inferior nigrum, aliquoties & corneum, inferior fere albidum colorem exhibet. Lingua latior, dura est, ac bisulca. Nares rotundæ, capiti color cinereus in rubrum vergens. Medias, quæ in capite sunt, plumas nigras, cristæ instar nonnunquam ad tollere solet alauda; Capitis partem posteriorem corona aliqua cinerea cingit, ab altero oculo proficiens ad alterum, magis flavida tamen, ac parcius conspicua, quam in alauda silvestri, quam nos *Cugelier*, *Olin* autem *Tottovilla*, dicit. Dorso idem est, qui capiti color; mento albidus; gutturi flavidus, fulvis maculis intermixtus; lateribus tandem rubro-flavidus. Decem & octo pennis majoribus quævis componitur ala; harum quatuor ad quinque priores margine albedo, sequentes rubicundo, corpori proximæ tandem cinereo ornatae conspiciuntur. Quæ autem sextam, ac decimam septimam interjacent, extremitatibus terminantur mollibus, excavatis, albidis. Exiguarum insu-

per alæ plumarum marginem rubro-cinereo colore distinctum videbis. Caudam, quæ 3. longitudine est digitorum, duodecim constituunt pennæ, (rectrices, artis vocabulo dicuntur) quarum extrema utraque, & albam partem dimidiam superiorem, & candidas offert barbas exteriores, ad tubi longitudinem procurrentes. Huic quæ proximæ accedunt, latere suo exteriore, albæ, interiore autem nigræ; tres subsequentes nigræ; ac duæ intermediae cuspidis sunt acutioris. Inferior tandem extremitatem versus cinerea, superior item extremitatem versus cinerea, & fundum versus nigrida est. Cruribus, digitisque alauda fulvis; ungulis vero gaudet nigris, quarum extremitates saltem sunt albidae, digitusque exterior medio, subtus cohæret. In duos hepar dividitur lobos, quorum sinister dextero minor, stomacho carnosio, & pro alaudæ magnitudine, eximio, locum relinquere videtur.

Cæterum, & pennæ fulviores masculo sunt, & calcar longius, quam quidem foemellæ. Calcar illud, seu unguis posterior, procedente avis ætate, magis magisque producitur, imo *Gelneus* quemdam, duos qui longitudine digitos exæquabat, vidisse refert. Et *Cel. Frisch* præcipuam alaudarum notam characteristicam calcar aliquod esse ait, calcaribus equitum antiquiorum, quæ in ocreis obvia erant, simillimum, cujus ope in terris conscissis fodiendo expeditior reddatur cursus, accedente scilicet baseos distantæ spatio. Nec incurvato calcare indigent, plurimæ etenim haud petere solent perticas; quas quæ petunt, aliquantulum adunco instructæ, fortiores plerumque arborum adeunt ramos, quos ut amplectantur, non habent. Nulla prorsus omnium alaudarum coloris est varietas, qui quum terræ glebis proximus accedat, avium rapacium oculos sæpissime effugiunt. Cæterum, coitus ergo foemellas quæsituræ alaudæ nostrates, altiori, ac sublimiori ferri solent volatu; quam ob causam circulum, pro regionis spatio, vel majorem, vel minorem, volando illas describere videbis. Volant autem cantando, ut conspici possint a foemellis, atque intelligi. Docilis reliquum & cicuratu facilis alauda campestris, jucundissimo cantu suo in primis est nuntia veris. Non nisi lingua ante gustatum cibum deglutit, & si cavea inclusa, semine tantum cannabino nutriatur, brevi nigerrimum induit colorem. In Germaniæ regionibus quæ commorantur, ante festum S. Michaelis congregari, ac alias tendere solent terras; & societatis amore, vel inter volandum, se invicem accersere, & vocitare. Nidos suos Aprile, in terra semine conspersa construunt, ac bis quotannis sua ova ponunt. Pulli autem præcocius ova egressi, quodam inter se spatio distantes ambulant, ut animalium, aviumve prædantium insidias faciliores evitare possint. Obvolans interim mater voces illorum, quamvis rarissimas, adtendit, quibus intellectis citissime advolat.

Nec tamen omnia, quæ ex *Cel. Frisch* hucusque adtulimus, firmissimo veritatis fundamento nituntur. Sic, ut dictis exemplum jungam, alaudarum plurimas perticis inhærere negat. Nos vero non solum alaudam, quam *Cochevis* diximus, sæpius in vitium pedamentis residere, ac domuum fastigiis; sed & has, quas *Cugelier & Farlouse* nuncupari notavimus, arborum summitati insidentes cantare novimus. Æstivo tempore binis easdem incedere scimus, autumno saltem & hyeme, reliquarum avium instar, agminatim volare. Solus autem est qui cantat, masculus; id quod in omnibus fere avibus observabis, Rectissimus enim, ad perpendiculum exacta in altum

tum sese elevat linea, nubesque transire videtur, cantando enim oculis furripitur, diutius ibi detentus sensim sensimque descendit, usque dum terræ proximus, lapidis ponderosi instar humum delabitur. Varii sunt, qui ternis quovis anno, Majo scilicet, Augusto ac Julio, mensibus, quaterna ad quina ova variegata ponere censent alaudam, quæ vel ex radicibus exilibus, vel herbis aridis, vel stramine sibi nidum construit. Et *Olinæ* teste, 8. ad 10. annos ætate adtingit. Cæterum in proverbio est, quod pro temporis ac cœli varietate, jam flante borea, ac nebula denfiore pinguescat; jam, vento scilicet Meridionali, seu australi flante macescat. Quamobrem Cel. *Belon*: quodsi corpori modo extenuando modo adaugendo esset ea, quæ vulgo dicitur, facilitas, prona etiam foret ratio eorum, quæ de alaudis perhibent; hæc enim hoc vento pinguescere, illo macrescere dicunt, vel potius fabulantur. Frigore tamen externo plus adipis acquirere solent, ac carnem teneriorem. Frigore etenim calor internus colligitur, & ne exhalationibus abeat, continetur; calor autem externus, nutrimentum exhalationibus abigendo, ac dissipando, ne in adipem vertatur, obstat.

Alaudæ item cristatæ, non cristatam anteferendam esse scito. Nec ex avium numero novimus aliquam, quæ tanta frequentia, tantaque copia multiplicetur. Quot, quæso, casse captantur die, quot tragula noctu, quot laqueis, quot reti sic dicto, quadrato? Decem millia alaudarum vulgariū citius, quam unam captabis cassitam, nec enim illis hæc immiscetur, & viis præsertim regiis commoratur. Pro nutrimento ipsis vel grana veniunt, vel vermiculi aliæve insecta.

P. R. *Liron* Ordinis Benedictini, vocem Gallicam: *Alouette*, ex Celtica: *Alaud*, seu *Alaude*, quam & Latinæ: *Alauda*, originem dedisse censet, derivandam esse perhibet. Ex *Alaude*, temporis tractu, *Aloue*, cujus diminutivum est *Alouette* efformaverunt. A quo discessum in *Etymologiis Gallicis* faciens Cel. *Menage*, *Alouette* ab *Alaudetta*, ex *Alouette* item *Aloue*; quod in antiquioribus Poetis nostratibus, quales sunt: *Villon*, & *Alain Chartier* reperitur, descendere dicit. Alauda de qua egimus, campestris, *Lodola* non capelluta ab Italis, *Cuguiada* ab Hispanis, *Feld-Lerche* a Germanis, *Common Field-Lark* ab Anglis, *Læka* a Suecis, a Provinciæ habitatoribus: *Coquillade*, a Parisiensibus: *Mauviette* dicitur.

Multo interim oleo ac sale volatili alauda abundat. Alauda, junior scilicet, & pinguis, non solum jucundissimam, sed etiam succi plenam, ac digestu facillimam carnem præbet; vetustior autem suo se exuit adipe, durior evadit, arida, & concoctu difficilis. Vel principum mensæ adponitur nunc affata, nunc artocreati infarta, quod cibi genus habetur delicatissimum. Cæterum omnibus, cujuscumque vel ætatis, vel corporis sint temperaturæ, autumnō præsertim, salubris judicanda est ac conveniens. Sæpius quidem & ab aliis edocti, & ipsi sumus experti, quod qui ex alaudis comederant, doloribus stomachi, & intestinorum colicis correpti, causam in ipsis illis alaudis quæsierint, quas digestu habebant difficillimas. Ast carnem alaudarum, quam concoctu facillimam demonstravimus, injuste habent pro causa dolorum, qui non nisi ex officulis rapidius deglutitis proveniunt, quæ quum sint tenuissima, stomachum ac intestina inter digerendum irritantia, ærumnosiores reddunt digestionem.

Ars tandem medica , sanguini alaudarum urinam provocandi , & colicam flatulentam , ac nephriticam profligandi virtutem adscribere solet . Cujus ergo , sanguinis hujus ℥j. ad ℥jss. cum vino candente , jejuno , per aliquot dies subsequentes , matutino tempore accipiendum commendat . Sunt , qui haud infelici cum successu , juscula ex alaudis provenientia , contra colicam adhibuere . Imo *Plinius* certissimum ejusdem morbi remedium esse docet : ℥ss. pulveris alaudarum una cum plumis calcinatarum , quovis matutino , aqua calida mixtam , ac jejuno stomacho haustam .

A L C E D O .

Antiquiorum relationibus celebrior alcyon quis fuerit ignoramus ; imo , variantibus adeo ejus descriptionibus , iisque tantum non incredilibus , faciles in hanc sententiam adducimur , quod fructuosi eorundem ingenii foetus saltem fuerit alcyon . Ex recentioribus quidam , variis , & diversissimis ab illo veterum alcyone avibus , alcyonis nomen indidere ; sic *Cel. Belon* , *Martinum Piscatorem* , quem nunc descriptione tangemus , *Halcedinem mutam* dixit ; & *Halcedinem cantatricem* , *lusciniam fluviatilem* , vel *Rousserolle* , aliam quamdam ex volucris , infrequentiore apud Gallos , & Aurelianensibus , cantus sui ergo : *Tire-Arrache* , dictam .

Ispida . *Offic. Dal. Pharm.* 420. *Gesn. de Avib.* 513. *Aldrov. Ornith.* 3. 518. *Jonst. de Avib.* 107. *Alcedo* . *Schrod.* 314. *Lemer.* 23. *Halcedo muta* . *Belon. de Avib.* 219. *Ispida* , *Alcyon fluviatilis* , vulgo *Piscator Regis* , *Charlet. Exerc. III. Alcedo fluviatilis* . *Schvenckf. Aviar. Siles.* 193. *Ispida* , an veterum *Alcyon* ? *Willoughb. Ornith.* 101. *Raii Syn. Method. Av.* 48. *Halcyon riparia* , *Martinus Piscator* , *Avis Paradisi seu Sanctæ Mariæ* . *Quorumd. Gallie : Martin* seu : *Martin-Pescheur* .

Alcedo pondere , $1\frac{1}{4}$. unciam ; longitudine , ab extremo rostro ad caudæ extremitatem 7 . digitos & quod excurrit , 11 . tandem digitos alarum extensarum spatio explet . Rostrum ejus 2 . fere digitorum longum , crassius , rectum , cuspidatum ac nigrum , oris in angulo albidum induere videtur colorem . Maxilla superior inferiori plerumque longior , interdum & brevior est . Lingua gaudet brevi , lata , cuspidata , & integra ; ore intus croceo colore tincto ; naribus oblongis ; mento albido rubroque mixto . Albidus est color & rubro distinctus , quem medium pectoris seu ventris præbet ; rubro-obscurus , quem in abdomine , & sub cauda , & in lateribus , & inferiore alarum parte videbis ; ruber , quem pectus ; cœruleo-viridis , fordidusque , quem plumarum extremitates ostendunt . Qui tandem a collo profectus , per dorsi medium ad caudam usque perducitur , cœruleus est , ac in album seu splendentem adeo vergens , ut acrior eidem infixus oculus , facilis suo splendore perstrictus aciem ammittat . Lineas præter ea quasdam transversales obscuras in cœrulea dorsi regione , observabis . Nec non verticem nigro-viridem maculis cœruleis transversalibus ; imo aliam naribus & oculis intermediam maculam rubram ; aliam ultra oculorum regionem ; aliam denique , quæ hanc excipit , albo-rubicundam videbis . Vingt & tribus pennis majoribus omnibus componitur ala , tertia ex illis longissima . Majores autem de quibus loquimur , pennæ , cum his , quæ proxime accedunt , foris cœruleum , intus fulvidum ; quæ tandem secundum

constituunt ordinem (iis saltem exceptis, quas basin seu plicaturam alæ componere videbis) cœruleum in extremitate profitentur colorem. Caudam brevissimam siquidem $1\frac{1}{2}$. digitum sua longitudine explet, duodecim constituunt pennæ, cœruleo fusco, ac nigro intersparso colore. Crura alcyon habet brevissima, antèrius nigra, posterius rubicunda, rubicundam & plantam pedum, & calcar. Pedum vero ratio & structura singularis est; etenim exterioris digiti articulationes ternæ digito medio cohærent, interior autem unica saltem articulatione necitur; & hic quidem omnium minimus, dimidiam tantum medii longitudinem exæquat, extimus vero medio fere æqualis; & posticus quem & calcar dicunt, parumper longitudine superat interiorem. Tertium denique, seu ultimum cruris ossiculum majus est breviusque, ac in aliis solet esse avibus. Cæterum digiti variis lineis transversalibus quasi articulati videntur. Linguae officula parviora sunt ac breviora quam avium reliquarum. Stomachum prægrandem reperies ac dilatatum, ut avium rapacium quarumvis, spinis præter ea ac squamis, piscium repletissimum. Intestina autem anum versus sunt graciliora. Quæ de rubro adipis ejus colore recenset *Gesnerus*, vera reperivimus. Idem ille (referentem audis Cel. *Villoughby*) novem sæpissime pullos in uno nido detegi docet, nos vero quinque in fovea quadam, dimidio cubiti alta, ad ripam rivuli cujusdam nos invenisse recordamur.

Omnes autem quascumque vidimus unquam, sic *Belon*, coloris pulchritudine superat *Martinus Piscator*, quem *Piscatorem* dicimus, quo ab illa hirundinis specie, cui nomen est *Martinet*, quæque oris vicinum construere solet nidum, distinguatur. Hic quum situm in ripis reperierit nido suo aptum, rostro terram ad 2. cubitorum profunditatem perfodit, aliam quamdam ex volucribus, quam *Merops* Latini, *Guepier* autem Gallidicunt, imitaturus. Cæterum magna quum piscium copia pullis veniat pro nutrimento: naturæ beneficio singulari, spinas concocta carne evomunt; has enim integras massæ cuidam rotundæ involutas, eodem modo reddere solent, quo ossa ac pennas avium eiiciunt aves rapaces. Hæc igitur squamarum spinarumque massa, in nido ejus una cum excrementis reperitur; ita ut studio congestæ, ac in nido dispositæ videantur; Videbantur enim primo nobismetipsis; usque dum detecto naturæ artificio, faciles firmiori accederemus fundamento. Nec tamen cibo nostro venire solet alcedo, quamvis alias flaviatiles aves, sine ullo discrimine, comedamus. Eas & rustici, si, ut sæpissime accidit, magnam earum copiam, detecto nido, reperierunt; vel puerorum lusui, & delectamento præbent, vel eximiæ suæ pulchritudinis ergo, arefactas adservant. Cæterum magnitudine sua passerem aliquantum superat. Numquam, ut & picus viridis, terra residet, cui crura ob brevitatem nulla esse videntur.

Adcuratissimum esse Cel. *Belon*, in omnibus quæ refert, adfirmamus, iidem tamen, (quod pace Viri Cel. fiat,) subnectimus: Martinum nostrum Piscatorem suo ipsius rostro ad tantam profunditatem terram perfodere nequire, ea potius occupare foramina, quæ vel a gliribus maritimis; vel a transeuntibus arborum radicibus, vel rupem alluentibus aquæ undis excavata reperit; brevi, ut nos expediamus, illum ipsum haud construere nidum credimus. Qui quum sibi accommodatum hac ratione semel reperierit locum, vel pullos ei surripias, semper tamen usque redibit. Fo-

mella interim pulchritudine est inferior masculo, atque crassitie. Ea item, quæ de turturum conjugali, si dicere fas est, amore & fidelitate recensentur, longe postponenda veniunt hisce, quæ de alcedinum inter se amore observavimus; aliquot nempe transierunt anni, ex quo capta quædam nostra fieret alcedo fœmella, quam ova sua incubantem, ac in foramini 2^o. pedum profundo, & horizontaliter (artis vocabulo quidni indulgeamus?) excavato, stagni in ora, reperierant. Quam peracto examine, quum libertate donarem, statim ad marem redire, & tertia, eo anno tunc vice sua ova ponere vidimus, septies autem ea deponit. Cæterum ex spinarum & squamarum, quæ nido detinentur copia, vel vetustioreni dijudicare poteris nidum, vel recentioreni. Nec tamen ordine dispositas, sed undecumque disiectas atque dispersas spinas & squamas vidimus, quum nidi fundum fodiendo perquireremus. Nec certum est, quidnam de nido alcedinis illo dicamus, quod tanta arte constructum, ac in *Ephem. Germ.* repræsentatum conspicitur. Nos cum Italorum proverbio: *se non è vero, è ben trovato*, id est: curiosius, quam verius. Meræ namque actoris imaginationi suprastratum est omne. Præcocior autem ova ponit fœmella, & ineunte interdum Aprile mense, suos jam pullos exclusos videbis. Quousque autem excludendis iisdem allaborat, (viginti vero diebus labor ille plerumque absolvitur,) magnam masculus adportat piscium quantitatem, nec, ut alias, strepitum & clamorem, vel exeundo movet, vel intrando.

Nec tamen omnibus eadem est vel pulchritudo, vel magnitudo. Aliæ etenim alcedinum eximix sunt pulchritudinis, reliquis tertio majores. Quod tamen haud singulare est alcedini, sed avibus commune. Nec tandem mortuus Martinus Piscator, ut immerito censent alii, splendorem, qui conspicuos reddit suos colores, amittit; siquidem nullius umquam volucris pennæ, si decesserit, colore immutantur. Barbis scilicet suis exutæ nutritium suctum haud amplius recipiunt, nec ex ave avulsæ sensibilem induunt ariditatem; & tunc quidem solus caulis, seu tubulus quidpiam perderet, nec tamen ille suis coloribus allectat oculos. Hæc interim, cum aliis multis, observationi Cel. *de Reaumur* debemus, cujus memoria omnibus qui litteras colent unquam, sempiterna inhærebit. Quem diutius ut fata relinquant, & commune omnium fert, & nostrum exoptat desiderium; quo, quæ de Viro in Physicis adeo versato, ad historiam avium in primis spectantia exigimus & exspectamus, conspiciere, illisque frui queamus. Hucusque nullum umquam Martinum Piscatorem cavea inclusum, & conservatum fuisse novimus; unicum saltem hypocausto detentum per quindecim dies muscis vitam sustentasse scimus. Cujus denique mentionem, Cel. *Linnaeus* in libro suo, quem *Fauna suecica* adpellat, quum prorsus nullum iniiciat; in Suecia illum reperiri dubitamus.

Ex India ad nos deportatas aves pennarum pulchritudine superare nostrates, aut cantu hisce esse inferiores, communis loquitur opinio. Nos autem nec pennarum pulchritudine Indicis Europæas cedere censemus. Nec de pavone dicam, volucrum phœnice, nec de avibus domesticis tantis. Adspice quæso: phasianum, perdicem rubram, querquedulam, aliasque anatum species, otidem, seu tardam, anatem crepitantem a *Belonio* dictam, attaginem, graculum vulgarem, graculum Argentoratensem, graculum Bohemicum, Upupam, galbulum, sturnum, pluvialem fulvā, vanellum, picam,

picam, fringillam, pyrrhulam, carduelem, & alcedinem nostram, quæ una est instar omnium. Adspice, & judicare poteris.

Alii tandem alcedinis carnem non solum corruptione nulla adfici posse, sed & alcedinem arefactam ac in vestimentorum medio suspensam, eadem ab omnis generis vermibus tueri, ac conservare recentem: nos vero, & vermium cumulum in medio alcedinis recentis enecata gutture, & columbam silvestrem, inter duas alcedines suspensam, tineis consumptam vidimus. Alii ex filo pendentem alcedinem pectus suum venti tunc flantis regioni obvertere dicunt: nos vero regulum, motacillam, omnemque aviculam leviolem, vel minima aura commoveri ac verti observavimus. Alii tandem alcedini mirabiles quasdam virtutes adtribuendo, domum, qua continetur, a fulminis ictibus, a lite & causis omnibus, præterea a penuria quavis tutam esse, imo alcedinem licet arefactam, quotannis novis sese plumis induere, fabulantur. Alii denique odorem musci gratissimum eidem adhærere scripserunt; nos fœtorem potius, pisces putrefactas imitantem, angustius præsertim occluso diutissime immanere experti sumus.

Nominum tandem sibi inditorum copia abundat; quam ex Græco: *Alcyon* dixere seu *Halcyon*, siquidem in maris superficie nidum construere existimavere. Itali illam nuncupant: *Piumbino*, *Uccello di Santa Maria*, *Pescatore del Rè*, *Vitriolo*; Germani: *Eys-Vogel*, id est: glaciei avem; Angli: *Kingfisher*, quod *Regis Piscatorem* denotat; Galli: *Martin*, *Martinet-Pescheur*, vel *Oiseau de Saint Martin*, Sanctorum enim nomina avibus tribuere visum fuit; *Drapier* item seu *Artre*, quam vestimenta ex lana, seu pellibus constructa (Gallice: *Draps*) a blattis tineisque, (Gallice: *artisans* dictis) conservare crediderunt. Nec non clamoris sui causa: *Tartarin*, *Mounier*, quia ad molas, (Gallice: *moulins*,) vicina commoratur, imo *Piverd d'eau*, *Pêcheveron*, *Merlebleu*, *Merlet-Pescheret*, *Virevent* & *Puant des Matelots* ab aliis dicitur.

Oleo cæterum, ac sale volatili quamvis abundet alcedo, parcissimum saltem Medicinæ præbet usum. Cor ejus arefactum, & sacculo inclusum amuleti instar infantum ex collo contra epilepsiam adpendere solent; ast rarior huic remedio quum respondeat effectus, substituendum ipsi censet Cel. *Lemery* pulverem ex alcedine arefacta, & hujus quidem ℥j. cum aliqua aquæ bethonicæ portione singulis diebus accipiendum mavult.

A N A S.

MUltæ sunt, quæ sub anatum genere comprehenduntur, & domesticarum, & silvestrium species. Harum vero aliæ aquam inhabitant dulcem stagnorum, lacuum, fluviorum, ut anas silvestris vulgaris, in qua pertractanda versabimur; anas rostro latiori alisque versicoloribus instructa anas muscarum captatrix; anas cauda jaculi instar cuspidata; querquedula, aliæque aliæ autem in aqua maris, ac regionibus mari adjacentibus commorantur, ut illa, quam *Tadorne* dicit *Belonius*; *Ederdon*, seu anas plumis mollioribus tecta; anas oculis auratis, anas rostro plano & rotundo, clypei instar, efficta; illa cui *Belon*: *Merillon* nomen tribuit; anas cristata; anas cauda hirundinis donata, &c. &c.

Anas sylvestris. Offic. Schrod, 314. *Anas fera torquata minor*. Gesn. de Avib.

Avib. 99. *Baschas major*, sive *anas torquata minor*. *Aldrov. Ornith.* 3. 284. *Anas fera*. *Charlet. Exer.* 104. *Merr. Pinn.* 180. *Anas fera prima seu torquata minor*. *Schvenckf. Aviar. Sil.* 197. *Baschas major*. *Jonst. de Avib.* 97. *Alb. Ornith.* 89. *VVillughb. Ornith.* 184. *Raii Syn. Method. Av.* 145. *Anas caudæ rectricibus intermediis recurvis*. *Linn. Faun. Suec.* 97. *Anas immansueta vulgaris*, *Anas sylvestris vera seu major*. *Nonnull.*

Pondere igitur suo *anas sylvestris* 36. ad 40. uncias, ab extremitate rostri ad caudæ finem 23. digitos longitudine; alarum distentiarum spatium, 35. digitos explere solet. Rostro instructa est viridi flavido, $2\frac{1}{2}$. digitorum longo, 7. fere digiti lato, & paullulum excavato. Appendice insuper, seu ungula rotunda in maxillæ superioris extremitate, quam in omnibus fere anatibus observabis. Palpebris gaudet inferioribus albidis, pedibus croceo colore conspicuis, ungulis fulvis, calcare fere albo, ungula digitorum interiore minima; membranis, quarum ope digiti continentur, flavidis; vase quodam, Labyrinthum dicto, in illa regione, ubi in duas fistulas exiens trachea dividitur, conspicuo; cruribus ad genua usque plumis obtectis. Quod ad colorem adtinet masculi, caput hujus, & colli summitatem viridi-pulchriori tinctam, tunc succedentem antèrè circulum albidum, nec tamen integrum, collum qui cingit; post reliquam colli partem usque ad pectus, colore notatam castaneo; ipsum vero pectus, & ventrem albedo-cinereo, & innumeris maculis nigris consperso, inferiorem denique caudæ partem nigram videbis. Superiorem colli partem color exornat rubicundo cinereus, punctisque nigris interstinctus. Medium, alas quod interjacet, dorsum rubrum est, inferius nigrum, nigrius tamen, maculisque purpureis conspersum, ubi vergit ad uropygium. Latera alarum superiora, & maximæ ex rectricibus caudam versus, lineis fulvis transversalibus ornata, album, cœruleumque intersparsum præbent colorem. Ordines vero plumarum minorum rubicundi sunt. Pennarum longissimæ ex humeris enatæ, argenteæ, ac lineis fulvis transversalibus ornata adparent. Quatuor sunt & viginti in universum utraque in ala pennarum, quarum 10. priores fulvum colorem, 10. quæ subsequuntur, extremitatem ostendunt candidam, tum maculam in exteriori tubi parte, purpureo-cœruleam; spatium denique nigrum, cœruleo interjacens, & albedo. Vigesima & prima extremitatem præ se ferre solet albidam, marginem vero anteriorem purpuream. Vigesima & secundæ medium parumper argenteum. Vigesima & tertia tota argentea, marginibus saltem nigris utrinque conspicua. Vigesima & quarta tandem argentei est coloris, nigri autem marginis exterioris. Quæ interim prædictas externe obtegunt pennæ, eodem gaudent, ac illæ colore; quæ autem purpureis superjacent, cuspidè primo nigra, tum macula albi-da ita ornantur, ut cœrulea (de qua diximus) macula, nigro ex altera, ex altera parte, albedo obtegatur spatium. Viginti illarum, quæ caudam componunt, pennarum cuspidatarum quatuor mediæ, in circulum flexæ, nigrum, purpureumque splendentem, octo autem subsequentes, ex parte quavis exteriores, in margine perspicue externo albidum colorem referunt; quo propiores autem plumis in circulum flexis accedunt, eo plus fulvidi habent. Quæ tandem inferiorem alæ retegunt partem æque ac spuriam inferiorem, album exhibent colorem. Hyeme igitur catervatim, verno autem tempore masculus cum foemella per paria, ince-

incedere solent. Nidos vero vel in juncis, ericisve aquæ adjacentibus, rarissime autem construere solent in arboribus. Duodecim ad quatuordecim, imò plura ova singulis reponunt vicibus, atque excludunt. Fœmella cæterum nec capite viridi, nec monili, maris instar, sed collo instructa est ac capite albo, fulvo, ac rubro nigrido coloribus variegato. Dorsum denique earundem quibus vestitur, plumæ in medio, fulvæ-nigridæ, in oris autem albæ-rubicundæ adparent.

Quotannis vero Lincolnix, Nortfolchiæ, aliarumque Angliæ regionum in paludibus, quum pennas suas deponere solent, admodum multas anatum, volandi facultate tunc egentes, retibus captari novimus, iis, quibus perdices capiuntur, simillimis. Quadringentæ sæpius cymbæ eo confluunt, & vel 4000. uno tractu cepisse dicuntur. Eo autem tempore, quo ova incubare cœperit fœmella, masculus se exuit pennis; at fœmellæ eo tempore saltem, quum pulli earundem debitam sibi magnitudinem, & volandi facultatem adquisiverint. Majo scilicet exeunte anates, masculi, at Junio vergente, (quo quidem anates plumis recentioribus instructæ, volitare queunt) suas anates fœmellæ pennas immutant. Querquedula mares, aliique anates silvestres concomitantur, & una cum ipsis suas pennas exuunt. Quarum quum fœmellæ segniores suas deponant; a medio Junii ad finem usque Augusti earum captationi destinatum est tempus. Unius interim hebdomadis spatio pennæ pristinæ excidunt omnes; recentes autem non nisi tribus tandem hebdomadibus debitam perfectionem adtingunt. Abit autem deciditibus plumis, omnis quo antea gaudebant, adeps cum carne, nec nisi perfecte tandem excretis pennis recentibus redit.

Locus hic foret quæstioni: cur quotannis suas plumas exuunt aves? Nobis quidem eadem videtur ratio, qua in hominibus, aliisque animalibus diutino morbo peractò, pilos effluere videmus. Amoris etenim stimulos, quibus tunc masculus incitatur, feбри vehementiori æquiparare poteris, & omnem verno tempore, eorum carnem abire videbis, quippe qui frequentiori coitu enervantur, atque debilitantur. Sic & quo tempore pullos excludunt, & educandis iisdem occupantur fœmellæ, illud, inquam tempus, morbo æquiparare valebis, quæ quidem continuo tunc labore, ac parciori quod sumunt nutrimento defatigantur. Jam, peractò hoc tempore largius uterque pascitur, cura desistit & labore; recipit, quam perdiderat carnem, pellis dilatata extenditur, pori aperiuntur, effluunt pennæ.

Hactenus *Villoughby*. Anas autem silvestris, *Belonio* teste, suum constanter retinet colorem, domestica vero suum, qui nonnunquam candidus est, interdum nigro mixtus, immutare solet. Sæpius & omnes anatis silvestris colores retinet. Masculus magnitudine semper fœmellam superat. Aqua autem egredientes, reliquarum avium fluviatiliū more, rectæ omnes elevatae, recto ad cœlum volatu tendunt. Anates silvestres aliquando nidos construunt in arboribus, & pullos nuperrime exclusos rostro arreptos ad aquam deportant. Adcuratior autem anatum in majores & minores, quam in silvestres, & domesticas procederet divisio, domesticæ etenim ovis anatum silvestrium, originem debent.

Cruribus cæterum brevibus, crassis, & post se reflexis quum anates gaudeant, natandi ipsis est facilitas, at difficiliores, segnioresque incedunt. Quæ quoniam aliarum avium fluviatiliū instar, magni sint ponderis, ac

motus ærumnosioris; volando edunt, quem observabis, strepitum. Lingua insuper, observante *Gesnero*, utrinque denticulis munita, & musculis interioribus exteriores candore superantibus gaudent; quos quum lividos esse viderint ruricolæ Helveti, benigniorem expectant æstatem.

Quotcumque sunt, sic *Cel. Clayton* in *Transact. Philosoph.*, quæ rostro depressio gaudentes, terram perfodiendo suum alimentum quærunt volucres, tribus nervorum ad rostrum usque tendentium paribus instructæ sunt. Et horum quidem ope, tanta cum cura, ac sagacitate, solius gustus, nec visus auxilio, quidnam alimentorum proficiat, quidve reiiciendum veniat, distinguere valent. Distinctiores cæteram anatis in capite ac rostro nervi conspiciuntur, quam in anseris, ulliusve avis cujus videnda facta sit umquam copia. Quippe quæ majore gaudet reliquis omnibus capite ac rostro, quæque aliis multo frequentior nutrimentum quæsitura, terram suffodere solet. Nec in aliqua avium rostro rotundo instructarum, hos nervos reperieram; ast varias exinde, quum ruri degerem, disseccando, in cornice, duos hisce simillimos invenire obtigit nervos, ex intermedia oculorum regione, ad rostri partem superiorem descendentes, minores certo his omnibus, quos in anatis rostro, majores tamen illis, quoscumque in omni avi, rostro instructa rotundo, videbis.

Vocis sonitu anas masculus debiliore & rauco, fœmellâ fortiori & acutiori percipitur. Trachæ-arteriæ anatomem *Cel. Aldrovando* sequentibus acceptam referimus: Duorum inquit, admiratione captus fui, clamoris, scilicet, quem anates edunt, fortissimi ac acutissimi, spatii insuper ac temporis diuturni, quo aquæ immersum detinent caput; utriusque causam in anate dissecta detexi; inveni autem in trachea, ab aliarum avium trachea, quoad figuram, diversissima; ubi enim ad pulmones descendendo in duo dividitur bracchia, vesicam præbet duram, cartilaginosa, concavam, & in dextrum latus proclivem.

Domicilium educandis anatibus accommodatum quæ exstruendum sit, *Varro* docet, & *Columella*. Sinenses, ut itineraria loquuntur, singulari quadam arte ac industria, eximiam anatum multitudinem, in tuguriis arte constructis super fluminibus alere solent. Liber iisdem in agros oryza confitos ingressus relinquitur, & omnes ex illis, herbas noxias extirpant, eradicant lolium, enecant devorantque insecta. Gulosæ porro & insatiabiles, quidquid rostro obvenerit, deglutiunt. Anates fœmellæ autem anserum instar, frequentissime ova monstrosa ponere solent, cujus rei causam in viva earum imaginatione, alii sunt, qui quæsivere. Silvestris insuper anatis ova, vel domesticæ, vel gallinæ ad excludendum supponas, idem est, pulli exclusi facillima opera cicurabuntur; difficiliore autem anatis silvestris pulli, nisi statim ex quo capti fuerint, alarum extremitates, segnius succrescentes, aduras, vel pullos ipsos in numerum, ac locum domesticorum reponas, & largissimo pabulo pascas. Stagnis domesticas immittere solent anates, quarum sonitu, ac clamore anates silvestres prætereuntes allectæ sclopetis enecantur. Nec non retibus & cassæ, laqueis, hamis, visco, & canibus venatoriis, iis insidiantur, quæ mediæ nonnunquam præ calliditate, atque versutia sua aquæ se submergendo, irritas reddunt persequentium insidias. Cæterum imminentis pluvie signa, clamore frequentissimo, alarum percussione reiterata, ac repetita in aquis nata-

natatione edunt, aqua dilectantur, nec sine illa vivere possunt. Transmigrantibus adnumerat Cel. *Schwenckfeld*, anates Silesiæ silvestres, quippe quæ ingruente hyeme, calidiores regiones petunt. Quas Gallia alit, per integrum anni spatium ibi commorantur.

Nomina ejus si quæris: Italum habeas: *Anitra salvatica*; Hispanum: *Ana de silvestris*, Germanicum: *Spiegel Endte*, *Mertz-Endte*, seu anas Martii, quæ Martio coire solet. Belgæ illam nuncupant: *Wilde-Eende*; Angli: *Common Wild-Duk*; Sueci: *Graes-and*, seu *Blaonake*; Gallico idiomate masculinum: *Malard*, foemellam salutamus: *Cane*. *Canard* autem maris nomen, ut & *Cane*, foemellæ quod tribuitur, cantus sui ergo, per Onomatopoeiam utrique inditum esse, cum *Belonio* censent *Franciscus Pithou*, & *Julius Scaliger*. *Malard*, vernaculo Britannia inferioris incolarum, teste *Huetio*, *Mail-lard* sonat, ut *Pica Margot*, aliæque avium aliis hominum nominibus insignitæ fuerunt. Latinum denique *anas* ex Græco: *Nessa* seu *Nessa*, a *natando*, teste *Varronio*, derivandum venit.

Cæterum quamvis utraque, silvestris scilicet anas atque domestica, multo abundet oleo, sale volatili & phlegmate: silvestris tamen, quum meliori utatur alimento, & majori corporis exercitio fungatur, majorem salis volatilis, parciorem phlegmatis copiam, quam quidem domestica continet. Quæ quum segnius ac infrequentius moveatur, quum lutum & cœnum inhabitet, quum vermibus, araneis, piscibus putredine correptis, ranis, bufonibus, ac ejusmodi immunditie plerumque vescatur: mirum non est, quod & palato ingratam & saluti infestam carnem exhibeat; succo enim humoribusque crassis, viscidis & digestu difficillimis abundat anas silvestris. Hinc omnibus, qui stomacho debiliore laborant, quemcumque ejus usum interdiciamus; his saltem concedimus, qui corporis viribus gaudent, & laboris exercitio vigent, & stomacho robustissimo pollent. Anatis silvestris selectum instituturus ad illam respice, quæ tenera sit ætate, carne delicatior & pinguis. Hanc, dummodo parcissimum ejus usum instituas, non habemus, cur noxiam pronuntiemus. Ova anatis gallinacea parum magnitudine superant, cortice teguntur solidiore, & satis bona sunt palato.

Si usum anatis in Medicina quæris: hepar ejus fluxum hepaticum sistendi, & adeps anodyna, emolliente atque resolvente virtute pollere dicitur. Hinc varia unguenta ingreditur, quibus, pro resolvendis leniendisque doloribus, partem, si qua læsa fuerit, adfricant. Sanguini ejus alexipharmacam virtutem contra virus viperarum, aliorumque animalium venenosorum tribuunt; & ejus ℥j. ad ℥ij. pro dosi, cum vini candentis portione, quoties visum fuerit, hauriendas exhibent. Sunt, qui pro colica flatulenta, anatem vivam, & plumis in ventre exutam, ægrotantis abdomini adplicari volunt; alii autem, ut Cel. *Lemery*, anatem dissecari, tunc vero abdomini adplicari malunt.

Adeps anatis ungento pectorali, & unguento corroboranti Pharmacopoeiæ *Lemeryanæ* inest.

℞. Boli Armen.

Myrrhæ

Cerussæ ana ℥ij.

M. f. omnium pulvis, & cum f. q. adipis anatum subigendo, f. unguentum, quod eximio sese effectū, contra fissuras mammarum labiorumque commendabit.

ANSER.

A N S E R.

MUltæ sunt ac variæ anserum species, ut: domesticus, silvestris communis, Hispanicus, seu ex Guinea advectus; ille, quem ex Gamba, regno; hic quem ex Canada deportant, ac improprie: *Outarde* nuncupant; anser Spitzbergenfis, anas monili instructa *Belonii*, potiori quippe quæ jure anserum numero adscribenda venit; aliique. Nostra autem jam descriptione domesticum præ aliis pertractabimus, quoniam præ cæteris artibus Medicæ usui venire solet.

Anser. Offic. Dal. Pharm. 409. Lemer. 50. Charlet. Exer. 103. Bellonides Ois. 157. *Anser domesticus*. Schrod. 314. Gesn. de Avib. 125. Aldrov. Ornith. 3. 102. Schvenckf. Aviar. Siles. 209. Jonst. de Avib. 92. Merr. Pin. 179. Villughb. Ornith. 273. Raii Syn. Meth. Av. 136. *Anas rostro semicylindrico, corpore supra cinereo, subtus alido, rectricibus margine albis*. Linn. Faun. Suec. 90. *Anser cicur vulgaris*. Nonnull. Gallice: *Oye domestique vel privée*.

Qui autem, sic Cel. Villoughby, cygno minor, anatem magnitudine superat, anser, saginatus 10. interdum libras suo pondere implet. Rostri ab extremitate ad pedum finem $37\frac{1}{2}$. digitos, $35\frac{1}{2}$. vero ad caudæ extremitatem sua exæquat longitudine, $60\frac{1}{2}$. digitorum spatium est alarum extensarum extremitatibus intermedium. Rostri longitudinem, si a cuspide ad oris angulos pergas, $2\frac{3}{4}$. digitos, si ad oculos usque progrediaris $3\frac{1}{2}$. digitos attingere edoceris. Caudam, $6\frac{1}{2}$. quæ longa est digitorum, 18. sunt, quæ componunt rectrices, quarum extimæ omnibus breviores, reliquæ autem succrescente sensim longitudine, ad mediam usque, quæ longissima est, producuntur. Septenis & vigenis utraque constat ala pennis majoribus. Color vero plumarum, ut in aliis avibus domesticis, varius est, jam fulvus, jam cinereus, jam albus, jam fulvo albidaque mixtus. Pedes cum rostro pullorum flavidi; adultorum, rubri sunt plerumque coloris. Ira autem incitatus, serpenti similem edere solet anser sibilum. Longævum illum esse & nostra nos edocuit experientia, & amici cujusdam fide dignissimi, sic Villoughby, testimonium, qui patris sui in ædibus anserem quemdam octogesimum jam annum agentem, nulla tamen senectutis infirmitate correptum, adhuc provectiorem ætatem promississe adserit, nisi crudelitatis suæ ergo in anseres succrescentes, morte adficienda fuisset.

Anatis instar amphibion dici meretur anser, siquidem jam in terra vivit, jam in aqua, omni quodcumque rostro obvenerit vescitur, herbistamen in primis, ac frumenti granis nutritur. Molis est majoris, rarior volat, & lentior incedit, adtamen copiosissimum aliquando anserum agmen, gallorum Indicorum instar per viam 15. pluriumve milliarum, adductum fuisse vidimus. Ubivis educari possunt ac propagari, dummodo vel flumen aliquod vicinum, vel rivulus, aut stagnum adsint, aut denique alveus aqua repletus, cui innatare possint. Sex ad septem foemellis bini suffiunt masculi, majori autem in pretio illi habentur, qui cinereum, quam hi, qui candidum colorem præ se ferunt. Ter quotannis dena ad duodena jova ponit anser foemella. Joannes Liebault est, qui in libro suo, cui titulus: *domus campestris, seu rustica*, nos edocet, quod si statim ex eo, quum
sua

sua ova anser posuerit, eodem subtrahas, ova interdum 200., interdum, usque pereat, ponendo pergat. Quod si autem ova in nido ejus relinquant, finito ea ponendi tempore, statim incubationi sese adcingat. Marti mense ova ponere incipiunt, Junio desinunt, per triginta autem dies eadem incubant. Iniuste autem stupidus plerumque creditur anser, qui potius vigilantis nomen meretur, nam non solum somni est levissimi, sed vel minimo strepitu a somno expergiscitur. Sunt, qui villæ custodiendæ, anseres pro canibus sufficere, imo his anteferendas esse censent, siquidem audito vel cujusdam motu, reiterato clamore periculum indicant, accersunt auxilium. Exemplum subjungunt, Romanorum ex historia depromptum, quum nempe ut a Gallis expugnaretur Capitolium, anseres clamore suo impedirent. Docilitatis denique anserum Cel. *Lemery*, testem adfert anserem, qui, canis instar, automato circumagendo inserviebat.

Quovis item autumnno ac verno tempore plumas eorum subtrahere solent; quorum excrementa pratis infesta, herbam omnem adurunt. Magnam insuper hortis, agrisque, nisi arceantur, jacturam adferunt. In aliis item Galliæ regionibus, messe peracta, copiosissima anserum agmina, cum gallis Indicis, ac gallinis pascentia in agris conspiciuntur. Tempore tandem autumnali, quindecim dierum spatio, excæcati oculis, massa farinacea faginantur, pinguescunt, & circa festum S. Martini ab omnibus fere coemuntur.

Pro veneno tandem anseribus, ut & anatibus, aliisque avibus, cedit hyosciamus, cicuta, & amygdalum amarum. Omnium vero frequentior anser pullos excludere solet monstrosos, hinc & monstris producendis destinata ova magnitudine, & figura sua cognoscunt reiiciuntque rustici. Cel. *Aldrovando* interim non solum Anatomicam partium anseris interiorum descriptionem, sed & plurimorum hujus generis monstrorum figuras debemus, anserem scilicet capite duplici, uno saltem collo, quatuor pedibus, totidemque alis instructum; alium duplici collo, duplicique corpore conspicuum; alium denique quatuor pedibus gaudentem, quem *Bononiæ*, aliquot jam annos peragentem sese vidisse laudatus auctor testatur.

Ceterum & magnitudine, & colore figuraque fere similis est anseri domestico, silvester vulgaris. Quamvis item ex silvestri factum esse domesticum, nemo sit, qui negare queat; graviter tamen errant, qui nonnullis in regionibus ipsum silvestrem, esse cicurem, eumque hyemis tempore, relictis regionibus istis nostras adire, verno autem rursus petere adserunt; hic enim nimium est silvester, ferus, quam ut domesticus possit umquam. Gruibus autem decedentibus, anseres silvestres, nos invisere solent, & omnem per hyemem apud nos commorari. Agminatim vel interdum, vel noctu, trianguli basi carentis forma, gruum instar, anatumque ferarum, volando incedunt. Clamoris quem edunt, sonum vel e longinquo percipies, & Tracheam-Arteriam ita ut in grue, tubæ forma inflexam esse observabis.

Græcum anseris nomen audit: *Kên*, Italicum; *Oca*, Hispanicum: *Ganzo*, Germanicum: *Gans*, Anglicum: *Goose*, Suecicum: *Goas*. Gallicum vero: *Oye* ex *Oge*, quo antiquiores utebantur, quodque ex *Aucha*, *Auca*, *Ocha*, vel *Oga* derivandum foret, descenderet censet Cel. *Menage*. Dicebant & *Oue* pro *Oye* olim; unde & platea quædam Parisiorum: *la rue aux Oues*, (platea anserum) post corrupte: *la rue aux Ours*, dicta videtur, ob anserum quantitatem, quam assatores, Gallice: *Oyers* dicti, & hanc præcipue

plateam , jam diu est , inhabitantes , nutriebant . Pulli anserum *Oyon* , *Oyson* , & *Oison* Gallico audiunt idiomate . In variis Galliæ regionibus , teste Cel. *Duchat* , *Sibilot* , a sibilando , & masculus : *Oyard* , *Fard* , *Far* , seu *Fars* adpellatur .

Multo ceterum oleo & sale volatili , & anser domesticus & silvester , pluri tamen ultimo nominatus abundat . Pro cibo interim , & palati deliciis silvester est anteponendus , quippe qui frequentiore motu sese exercitans , haud adeo viscosus , ac phlegmaticis succis abundantem , quam domesticus , præbet carnem . Jucundior tamen palato , quam saluticonveniens generatim considerata venit anserum caro ; siquidem succum continens viscosum crassiolemque , concoctu difficillima ; & alimentum robustius subministrans , ac solidum , his saltem , iisque parcissima permittenda est , qui & stomacho gaudent fortiori , & vehementiori corporis motu exercitantur . Omni autem ejus usu prorsus abstineant , qui ad studia , litterasque mentem adplicaturi , sedentariam vivunt vitam . Nec cibo inserviat , nisi mediæ sit ætatis , carnis teneræ , & puro ac sereno aere nutritus . Quum enim nimis teneræ sit ætatis , carnem præbet humores crassiores producentem , & abeuntem in excrementa , quum justo fuerit vetustior , ficcæ & aridæ , duræ insuper , & succum improbum subministrantis , febres item , & indigestiones generantis est carnis . Assatus plerumque , tum & artocreatibus immixtus , cibo nostro adpropriari solet . Anserum ova , gallinarum ovis inferiora , plebis saltem alimento cedunt .

Sanguinem vero anseris , adipem , excrementa & supremam , quæ pedes obtegit , pellem , artis Medicæ usibus venire novimus . Sanguis veneno resistendi virtute gaudet ; & in morbis melancholicis , ubi atra bilis prædominatur , & in gangræna , humores emendare malignos gaudet . Arefacti & in pulverem redacti ℥ij . , cum vehiculo quodam conveniente , seu syrupo quodam miscere solent . Exterius adplicatus , pruritus sanare creditur . Adeps ejus emolliendi , resolvendi , ac incidendi pollet virtute , atque interne sumptus ad laxandum ventrem conducit . Citius igitur alvi constitutionibus subventurus , nucem quæ exæquat ejus quantitatem , pomo affatos immittas & exhibeas . Infantum ventrem foris hoc adipe unxisse sufficit . Nec non subtilitatis suæ penetratissimæ ergo , in paralyti nervorum , ac membrorum convulsionibus , & contractionibus eximio venit effectu , quum nempe linimenti instar parti affictæ adplicatur . Imo contra paralytin scorbuticam , aqua ebullire sinunt adipem , & aquæ hujus vaporem membrum ægrotans fovere . Contra paralytin , & rheumatismos , qui frigida causæ debent originem , sequens in *Encyclopædia* sua Cel. *Bartolet* unguentum commendat . Accipias anserem pinguiorem , & protractis intestinis , variis illam confarcias herbis aromaticis nervos confortantibus , affixum denique veru affabis , & aqua vitæ interdum irrigabis . Distillans igitur tunc adeps , unguentum illud , de quo diximus , egregium constituit . Auribus præterea immixtum , tinnitui eorundem medetur ; adstringit hemorrhoides ; pellem humectat , & quo minus stigmata profundiora post se relinquere possint varioli , obstat . Excrementa tandem multo abundant sale ammoniaco , cujus ergo incidendi , penetrandi , humores attenuandi , urinam & menstrua provocandi & ictero in primis medendi facultate gaudent . In pulverem quum redacta fuerint , ℥j . cum syrupo quodam con-

venien-

veniente boli instar commendatur. Nec non contra hydropisiam faciunt & scorbutum.

Cel. Gruger, D. est, qui in *Ephemer. Germ. Dec. II. anni VI. pag. 102.* excrementa anseris, succo Cardui benedicti mixta ac destillata, mirifice ad profligandam facere docet febrim quartanam. Duabus ante paroxysmum horis ℥ij. ad ℥iiij. potionis instar receptas, abundantissimum provocare refert sudorem; & prout necessitas postulaverit bis, terve, reiterari vult medium. Excrementa anserum minorum, Aprile & Majo collecta si destillaveris; aquam habebis Ophthalmicam sic dictam Maximiliani, Imperatoris, cujus eximia prædicatur, ad exacuendam oculorum aciem, ad depellendas maculas & suffusiones globi oculorum, ad profligandas denique eorum lippitudines, virtus; bis terve, quotidie, quasdam guttas oculis inspergito.

Suprema tandem, pedes anserum quæ obtegit pellis, adstringendi virtute valens, hemorrhagines & menstrua abundantia retinet. Cujus arefactæ & in pulverem redactæ, ℥ss. pro dosi, præscribunt. Nec non contra perniones felici cum successu adplicant eandem.

Anserum plumæ denique lectorum stragula mollia subministrando, quietum defessis somnum, & pennæ majores, calamos præbent, utilissima orbi literario instrumenta.

Nec non unguento corroboranti, & pectorali Pharmacopoeiæ *Lemeryanæ* adeps anserum inest.

Rx. Mellis rosati ℥iiij.

Pulveris excrementorum anseris ℥ij.

Pulpæ cassiæ ℥j.

F. cataplasma, quod angina laborantis gutturi calidum adplicetur.

Rx. Pulveris excrementorum anseris ℥j.

Croci ℥ss.

Sanguinis draconis ℥jss.

Mellis rosati ℥ij.

M. & habebis cataplasma ad resolvendas faciens parotides.

Rx. Excrement. anser q. sole arefac. & pul. ℥ij.

Croci orient. ℥j.

Sacchar. cand. ℥ij.

M. & f. pulv. in ictero conveniens, cujus dosis sint ℥ij. mane jejuno stomacho in cyatho vini albi solutæ, accipiendæ.

Rx. Flor. sulphur. ℥j.

Fimi anserini arefac. ℥iiij.

Sanguin. dracon. ℥ij.

Ol. anis. stillat. gut. vj.

Sacchar. alb. ℥viiij.

F. omnium pul. ea c. f. q. gum. tragacanth. in mucilaginem redact. reform. pastil., vel morsulis pro aphthis & oris ulceribus adhibendi.

A Q U I L A.

Maxima, dubio procul pariter, ac nobilissima, omnes inter, quas noscit Europa, aves rapaces, sive diurnæ sint, sive nocturnæ, aquila

est *Belonis* regia; avium, & merito quidem, regina dicta. Quam ut plenius cognoscere possis, binas ejusdem suppeditabimus descriptiones, alteram ex *Cel. Willoughby*, alteram ex *Actis Regiæ Academiæ Parisiensis*, haustam.

Aquila. *Offic. Dal. Pharm.* 428. *Lemer.* 60. *Merr. Pin.* 170. *Aquila Germana*. *Gesn. de Avib.* 149. *Aquila regalis*. *Schvenckf. Aviar. Sil.* 214. *Aquila Gesneri*, sive *Chrysaetos Aquila*, *Jonst. de Avib.* 2. *Aquila stellaris*, *Chrysaetos*, *Belon. des Ois.* 89. *Chrysaethos* *Aldrov. Ornith.* 1. 110. *Charl. Exer.* 70. *Aquila fulva seu aurea* *VWillughb. Ornith.* 27. *Raii Syn. Method. Av.* 6. *Falco Ceratura*, *pedibus lanaris*, *corpore rufo*, *Linn. Faun. Suec.* 56. *Aquila Jovis*, *maxima*, *vera seu genuina*, *generosissima*, *nobilis*. *Quorumd. Gallice: Aigle Royale*.

Duodecim suo pondere libras, longitudine ab rostro externo ad caudæ finem 3. pedes ac 9. digitos, ad ungularum extremitatem $4\frac{1}{2}$. spithamas; alarum denique extensarum spatium 8. spithamas explet. Rostrum ejus palmam unam, digitumque unum sua longitudine attingit; etenim vel pars ejus adunca rostri in extremitate, ac ultra maxillam inferiorem prominens, digiti longa est integri. Medium ejus rostrum 2. digitorum latitudinem excedit.

Extrema pars rostri nigri adunca est, & corneum in cœruleum debilem vergentem, ac fulvis maculis conspersum colorem exhibet. Os ejus ad palmæ, digitique unius spatium distendi potest. Lingua aquilæ, humanæ similis, lata, rotunda insuper extremitate donata, ac radicem versus duabus munita est appendicibus corneis, ac utrinque parumper aduncis; membrana tandem subtilioris ope, maxillæ inferiori media cohæret. Palatum media sua parte conscissum; pars autem rostri inferior canalis instar excavata adparet, & prominentibus superioris marginibus utrinque obtecta. Membrana a fronte ultra nares usque procurrens, & oris anguli, flavum loquuntur colorem; quæ autem collum vestiunt pennæ, fulvidæ sunt, & hirsutæ. Occlusum oculum membrana crassior ex imo ascendens in altum obtegit, binæ insuper adsunt palpebræ; altera inferior, superior altera, quamvis inferior sola obtegendo sufficeret oculo. Superciliis, umbraculi instar prominentibus, inferiores oculi, profundæ quasi cavitati inhærentes, viridem, ac igneum præ se ferunt colorem, pupilla nigerrimum, alæ cum cauda fulvum, & fulviorem, pennæ majores. Reliquæ plumæ omnes castanei coloris, & albis hinc inde conspersæ sunt maculis, frequentioribus in ventre, rarissimis in dorso; radicibus tamen omnium albidis. Sex inter pennas longiore cujusvis alæ, 18. digitos, & palmam unam sua longitudine explent, & tubis gaudent durissimis & ad scribendum aptissimis, anserum licet pennis sint breviores. Plumis denique fulvidis ad pedes usque obteguntur crura. (Hic velut in transcurso falsam *Cel. Belonis* opinionem notatam esse velim, qui a vulture aquilam, non nisi cruribus, pennis quas habet vultur, carentibus, distingui posse docet.) Pedibus gaudet aquila flavidis, calcare pedis sinistri 6. digitorum longo, dextri, (de hac loquimur, quam examini nostro subjecimus, aquila) 4. saltem; ast mutilatum nobis videbatur pedis dexteri calcar. Primam tum in aquila nostra, sinistri pedis ungulam anteriorem, 5. digitos, mediam $3\frac{1}{2}$, minimam 2. longitudine attigisse vidimus. Dexter, quibus munitus erat ungulæ, calcaris ratione habita, longiores, ac sinistri, conspiciebantur.

tur. Singuli autem digitorum, ungularum ad extremitatem, quatuor obtegebantur annulis semicircularibus, nec nisi in maximo anteriore, tres saltem annulos deteximus. Reliqua pars omnis squamis munita erat exiguis, milii vix grana æquiparantibus. Mirabilis interim est ac singularis naturæ creatricis cura, qua oculos aquilæ, quibus nihil habet præstantius, conservare voluit, atque tueri, reliquis animalibus unicam, ast quatuor largita est aquilæ palpebras. Palpebrarum scilicet in homine vices, tunica nictitans in aquila sustinet, tum vero duabus adhuc donata est palpebris, quarum inferior, pro amplitudine, obtegendis, sola, sufficeret oculis.

Anatomicam si quæris partium aquilæ interiorum descriptionem, Celeb. *Aldrovandi* adeas Ornithologiam. Ibidem variis, laudatus ille auctor, argumentis, aquilam nostram, *chrysaeton*, seu aquilam auream esse demonstrat. Et sua est, quam nostram fecimus, exteriorum aquilæ partium descriptionem; transmissam sibi esse, addit, aquilam viventem jussu Ferdinandi Medicei Magni Hetruriæ Ducis, ac extrema ferocitate eandem animalia domestica, ut: canes, feles, & cætera, si quæ adpropinquabant caveæ, qua inclusa detinebatur, arripuisse, imo homines, vel ungulis, vel rostri ictibus aggressam fuisse; aliquando etiam acutissimos edidisse clamores ac ejulatus.

Multa sunt, quæ & ab antiquis, & a recentioribus de aquila recensita leguntur, eaque vel fictitia, & incerta, vel omnibus avibus rapacibus communia. Fictitia inter referenda esse ducimus, 1. quod pedum ejus dexter sinistrum superet magnitudine, 2. quod pennis aliarum, anserum in primis, & columbarum aquilæ pennæ, reliquas omnes consumant, 3. quod ipsa quum eximia oculorum gaudeat acie, examini cuidam suos pullos committat, & illos saltem, dignam nobilitatis suæ stirpem judicet atque conservet, quos acriter intentis oculis solem intueri viderit, reliquos autem, ut spurios reiiciat, quos solis splendore ac intuitu nictitare observaverit, 4. quod unum semper, eundemque nidum per omnes ætatis suæ annos visitet, 5. quod meridie saltem peracta, quum fora, atque compita sint hominum plena, & tempus prandii vicinum, nutrimentum quæsitura procedat, omne autem per tempus matutinum suo nido delitescat, 6. quod nulla unquam cadavera tangat, 7. quod binorum, quos plerumque excludit, pullorum alterum reiiciat, alterum conservet, atque educare soleat, 8. quod non nisi lapide, quem aquilæ lapidem dicunt, in nidum deportato, pulli ejus excludi possint, ac ova egredi, 9. quod alis potius insidentes, quam ungulis arreptos hinc inde deportet fœtus; idque ex loco quodam S. Codicis sinistre explicato, probare annituntur, 10. quod debilitate quadam detenti, ac solidiori nutrimento concoquendo imparis pulli in gulam, parentes illius sanguinem prædæ exutum destillare, atque intromittere consueverint, 11. quod admodum proVectæ quum evaserit ætatis, rostrum ejus siccitate recurvatum accipiendis ulterioribus nutrimentis insufficiens reddatur, aquila autem solo tunc potu vitam sustentet, 12. quod sæpius reiteratis parens uterque, simulac usum alarum adquisiverint pulli, eos ad volandum excitet, nec nisi forsan delassati in delabendi periculum incidant, dorso suo illos excipiat, 13. quod summam habeat ungularum curam, illasque, ne amittant aciem, plerumque ad se trahat incurvando, & nisi substrata prius animalium enecatorum pelle, rupibus incedat

asperis; imo, quum nec Sole, nec præda conspicienda occupatur, intentis oculis ungulas contempletur; easdem denique si forte amiserint aciem, vel rostri ope vel lapidis duri exacuat, 14. quod senectutis pondere onusta, altissimum, quod penetrare potest, nubium petat spatium volando, quo non solum solis calore oculorum tenebræ dissipentur, sed & ipsa probe calefacta, frigidissimis inde sese submergere possit aquis; peracto autem hoc balneo ad nidum revertatur, & media inter pullos, jam provectiores quadam quasi febris correpta, sudoris ope suis se exuat pennis, quarum in locum donec aliæ succreverint, & nutrimentum adportando, & sollicite fovendo, curam ejus habeant pulli, 15. quod, quum noctuam conspexerint avium plurimæ, vel spectaculi novitate commotæ, vel figura perterritæ, adgredi illam consueverint: aquila e contrario, majestate sua indignam judicando eandem, nulla umquam adspectu ejus commoveatur.

Nec alia quædam adduxisse pigeat, quorum pleraque cum reliquis avibus rapacibus communia habet aquila. Horum in numerum referendum est: 1. quod tanta gaudeat acie oculorum, ut vel summo, quod attingere potest, nubium spatio detenta, leporem tamen, densissimo in arbusto delitescentem & pisciculum quemvis, sub aquis natantem detegere valeat. Magnam quidem, & aquilæ, aliisque avibus ex raptu viventibus aciem visus tribuimus, aut tantam, jure nostro denegamus, 2. summæ aquilam indocilitatis accusant, nec ulla umquam violentia ferocitatem ejus domari posse censent. Immerito sane, aquilas enim, quamvis difficiliore opera, cicuratas, & falconum venationi adaptatas fuisse legimus, 3. alii adeo pestiferum oris halitum efflare docent aquilam, ut quæcumque corpora tingerit, statim putrefactione corrumpantur, 4. Rursus alii, gulosissimam, ac infatiabilem, deficiente per aliquot temporis spatium præda, magna sese alimentorum copia confarcire, & si quid nimis fuerit prædæ, avibus, hujus expectatione eam concomitantibus, illud relinquere perhibent, 5. avium fere omnium instar, rostro quæ gaudent adunco, numquam potius quidquam accipere dicunt aquilam, quippe cui, sanguis qui inest prædæ, sufficientem concoctioni subministrat humiditatem, 6. valde lascivam esse arguunt aquilam, siquidem vel vices in die, peracto coitu, iterum coeundi ergo redit ad masculum foemella, si fuerit revocata. Miranda sane res foret ac nova, quod quum brevioris alias vitæ sint aves lasciviores, aquila omnium fere lascivissima, adeoque longæva sit, 7. pullos suos quum ad victum sibi quærendum sufficientes nacti fuerint vires, non solum nido expellere, sed, ne eadem quam ipsa tenet, regione ut commorentur, perferre, & 8. ossibus fortissimis, durissimisque, ac exigua medulla repletis instructam esse volunt aquilam.

Et hætenus Cel. *VVilloughby*. Jam quæ in *Actis Regiæ Scientiarum Academiæ*, ad *Historiam animalium naturalem amplificandam institutæ*, legitur, trium aquilarum, descriptionem anatomicam, tecum L. B. communicabimus.

Magnitudine sua & figura, & pennis, omnes fere, sic acta loquuntur, tres aquilæ inter se conveniebant. Partium saltem interiorum differentiam quamdam observavimus, sexus etenim erant varii. Quarum maxima, quæ foemella erat, ab extremitate rostri ad caudæ finem 2. pedes, & 9. digitos longitudine exæquabat, spatium autem extensis alis interjacente $7\frac{1}{2}$. pedes. Rostri longitudo $2\frac{1}{2}$. digitis absolvebatur, accedente 9. quæ longa erat

erat linearum, parte ejus adunca. Caput ejus integrum una cum rostro $4\frac{1}{2}$., collum $5\frac{1}{2}$., crurum quodvis a lumbis ad ungularum extremitatem, 15. digitos longitudine adtingebat. Decem libris pondus illius absolvebatur. Castaneum, in nigrum, qui vergebat colorem, omnes fere plumæ exhibebant, his saltem exceptis, quæ colli extremitatem anteriorem, quæque ventrem obtegebant, hæ enim albidum præbebant, maculis cinereo-rubris conspersum. Pedes corporis respectu exigui colorem cinereo-cœruleum, rostrum vero nigerrimum ostendebant.

Reliquarum, (erat autem alter masculus, altera fœmella) paullulum minorum rostra, cuspide nigra, exordio flavo, ac medio cœruleo gaudebant. Pedes earum flavidi squamis quibusdam obtegebantur, quæ in inferiore eorum parte, majores, & tabulatæ, reliquæ omnes conspiciebantur minores. Ungulis instructæ erant nigris, aduncis, & prægrandibus, calcare insuper reliquis digitis fere duplo majori.

Triplicem plumæ earum colorem reddebant, castaneum scilicet, rubrum, & candidum. Capitis summitas castaneo, ac rubro mixta; guttur cum ventre, albo, castaneo, rubroque variegatum erat colore; alæ frequentissimo castaneo, exiguo rubro, & pariori adhuc albido distinctæ conspiciebantur. Novem ambitu suo lineas, maximarum alæ plumarum tubuli explebant seu caules. Quæ autem caudam componebant pennæ, extremitate admodum fulva, initio ornata erant albido. Lumbi vero, & crura ad digitorum usque originem plumis obtegebantur, quarum dimidia pars, spectans extremitatem, rubra; altera, quæ respiciebat originem, erat albida.

Crura aquilæ plumis ideo obtecta esse dicunt Physici, ut non solum ab ictibus rostri ac ungularum avium, sibi prædæ venientium, tueantur; sed etiam ut a frigore nivis ac gelu, dum montium cacumina tenent, muniuntur. Variarum Cel. *Belon*, aquilarum nobis reliquit descriptiones, omnes autem crurum pennis carere voluit.

Nec non ad radicem pennarum majorum corpus obtegentium, aliæ adhuc reperiuntur plumæ albidissimæ ac tenuissimæ, & 1. digito longæ. Et hæ, defendendæ, a frigore aquilæ, cujus est impatientissima, datæ esse videntur. Hinc & venatorum, vulgo qui falconarii dicuntur, usui venisse censemus; quod, nimis in altum ut ascendat aquila venando impedituri, omnes de quibus diximus, plumas minores, aliasque ventrem quæ muniunt pennas, subtrahant; quo frigore in media aeris regione obvia, ne nimis efferatur in altum, arceatur. Dorsi ventrisque pennæ, 4. ad 5. digitis, ac externam crurum partem obtegentes 6. fere digitis longæ erant, 3. digitis autem ultra talum prominebant. Masculi ventrem quæ ornabant & guttur, 7. digitis longæ, 3. latæ, molles erant, & ex utraque caulis parte, pluma tantum ad longitudinem caulis procurrente, munitæ, nec fibræ hujus ita inter se cohærebant, ut in plumis firmis, tabulatimque dispositis observavimus. Erant autem duplices, singuli enim earum caules, $2\frac{1}{2}$. lineis a pelle, in duos caules inæquales abibant, alterum altero duplo majorem. Idem & in pennis ventrem & collum psittaci, & in omnibus pennis istius avis observavimus, quam Galli: *Cazuel*, suo idiomate dicunt. Nec non in gallo *arbutorum*, quem *Tetrice* *Aristotelis* esse censet, eandem pennarum constructionem, nulli reliquarum communem, sese vidisse testatur *Celeb. Belon*.

Oculus orbita sua latens, & prominente quodam frontis officulo, tamquam supercilio protento obtectus, gilvum, Topazii instar, splendorem exhibebat. Cornea, magna convexitate ultra scleroticam elevata, hac, tamquam margine prominente, illoque duro & osseo cingebatur. Conjunctiva coloris erat ruberrimi, & palpebrarum ea capacitas, ut singulæ oculo integro obtegendo sufficerent. Præter palpebras superiores & inferiores alia adhuc aderat interna, quæ in majorem oculi angulum sese recipiebat, at minorem versus sese extendendo, totam corneam obtegebat.

Sex sunt, ut *Aristoteles* vult cum *Plinio*, aquilarum species: *Pygargus* nempe, *Morphnos*, *Perenopteros*, *Melanaetos*, *Haliaetos*, & *Chrysaetos*, quarum vel descriptiones tradendo, vel magnitudinem determinando, in diversissima abeunt. Cæterum nomina earum græca, quum distinguendis quodammodo variis aquilarum speciebus sufficiant: & nos eo faciliori negotio, respondentem cuivis classi aquilarum nostratium speciem reperisse credimus, colligendo & has notas characteristicas, quibus utraque inter se convenit, & illas, quibus altera saltem gaudet, altera destituitur. Minimas igitur aquilarum, de quibus sermo est, binas, ultimo recensitis adnumerandas esse censemus, seu his, quas *Regias Galli*, *Gnesios Aristoteles*, *Chrysaetos* autem, & *Asterias* dixit *Aelianus*. Designando etenim rubro earum colori, & quasi aureo: Græcum respondet *Chrysaetos*, denotandis autem ventris, ac crurum maculis, stellas repræsentantibus, vox Græca: *Asterias*, sufficit; convenientes nobiscum habemus interpretum omnes.

Etenim nec *Pygargis*, siue aquilis cauda candida donatis adnumerari possunt; nec *Morphnis*, siue plumis obscuris tectis; nec *Melanaetis*, vel nigris; nec *Perenopteris*, siue aquilis, quarum alæ nigris sunt conspersæ maculis; nec denique *Haliaetis*, siue maris in vicinia commorantibus, pedibusque cœruleis gaudentibus; duæ enim aquilæ nostræ nec cauda candida instructæ erant, nec pennæ omnibus nigris, nec obscuris, nec alis nigris maculis conspersis, nec pedibus cœruleis; Aquila autem nostrarum maxima pro *Haliarto* habenda esset, quippe cujus pedes erant cœrulei; nec pennæ, reliquarum instar aureæ; & alæ fulvidæ, quales *Ovidius* in *Metamorphosis* tribuit aquilæ, in quam *Nisus*, Rex, transformabatur; & guttur cum ventre candidum, quale est *Haliaeto*, teste Anonymo, cujus descriptionem *Haliaeti* refert *Aldrovandus*, pedes tandem fere toti squamis quadratis obrecti, nec tot tigillatim dispositis, quot reliquæ aquilarum; quod *Haliaeto* proprium esse dicit *Belon*; *Aristoteles* interim huic cum aliis aquilarum speciebus commune scribit, quod pullorum suorum illos reiiciat, qui fixis oculis ac immotis solem intueri nequeunt.

Obiiceret quispiam: ponderis & magnitudinis differentia obstat; aquilarum regiarum nostratium quævis, 6. librarum pondus saltem explebat; at *Chrysaetos*, cujus descriptionem *Belonius* tradidit, 10. libris, pondere, erat. At consideranda venit ætas nostrarum tenera; cujus documento erant pennæ colli, caudæ, & alarum albidæ, quæ non nisi procedentibus aquilæ annis castaneum induunt colorem, teste *Gesnero*. Tum & in censum vocari meretur, illud, quod *Plinium* inter, & *Aristotelem*, de aquilarum specie diversarum magnitudine intercedit discrimen, hic enim *Gnesium*, quæ *Chrysaetos* est *Aeliani*, & *Plinii*, omnium vult esse maximam; ille autem, *Plinium* intellige, *Chrysaetum* mediocris saltem, summæ autem magnitudinis dicit *Perenopteron*.

Epiploos aves carere docet *Plinius*; nos autem in utraque aquila regia membranam vidimus, sacci formam referentem, ac intestina, hepar atque ventriculum continentem, ut in avibus omnibus; qualem & *Cortesi*us, aquilam dissecando observaverat. Originem suam illis membranis debebat, quæ vesicas avium abdomine detentas, & respiratione turgentes, constituunt. Multo insuper adipe obducta erat, & in primis ex dextra ventriculi parte, adipem hunc itaque, ut in animalibus terrestribus, adjuvante suo calore, fovendo ventriculo inservire censemus. Animalia omnia saltem, quæ carne vescuntur, multo adipe obductum epiploon ostendere constat.

Oesophagus in dextro latere Asperæ Arteriæ constitutus, aere immisso turgescens $2\frac{1}{2}$. digitorum diametrum, 6. vero longitudinem referebat. Superiore sua parte, corpori quodam duro & glanduloso, pisi magnitudinem exæquantem, nec nisi saltem in unica aquilarum reperto, mediante membrana aliqua cohærebat. Ubi Aspera-Arteria in duas partes abibat ibi, Oesophagus coarctatus, subtus producebatur; deinde autem dilatatus, ventriculum, magnitudine, figura, & substantia sibi similem efformabat. Utrumque enim membranæ duræ, solidæ, albidæ, multisque vasis in externa parte intertextæ, constituebant. Interiore autem parte erant dissimiles. Imo etenim Oesophagi, ingluviem repræsentando, exiguis constabat glandulis, quæ rapæ seminis magnitudinem fundum versus exæquando, decrecente sensim mole oculos tandem, exiguitatis ergo, effugiebant. Ventriculus autem variis rugis confusus adparebat, quæ fundum versus multiplicatæ, majorem ipsi crassitiem conciliabant. Cæterum amplissimæ & ingluviei & ventriculi cavitates, decantatæ avis hujus voracitati respondebant. Omnia enim, ut Physici scribunt loca vicina sollicite perquirendo, ac deprædando, vix sibi sufficiens reperire valet nutrimentum. Hinc nec binas umquam aquilas, regiones valde vicinas inhabitare videbis. Teste *Aeliano* aquila non solum avibus majoribus, ut gruibus, anseribus, reliquis, sed vel cuniculis, leporibus & capris insidias struit, sæpius tollit ac secum abducit; imo singulari versutia tauros in præcipitia coactos, ossibusque fractis enecare, & devorare solet.

Intestina aquilarum nostrarum exigua erant, id quod in omnibus animalibus voracibus, & carni inhiantibus observabis. Quæ autem herbis vivunt, vel ruminantur, horum intestina quadruplo imo quintuplo longiora sunt & ampliora intestinis reliquorum. Aquilarum igitur nostrarum regiarum intestina exilia, breviora, nullum vero in masculo aderat *Cæcum*. Bina observavimus in fœmella, 2. digitis longa. Cæci locum in aquila, *Haliaeto*, bina subibant tubera, parum prominentia, binis tamen crumenis, valvularum instar, a membranis quæ erant effictæ, instructa. Rectum denique, prope anum, constrictum, crumenam quandam, ovi figura & magnitudine constituebat, cujus extremitatem ingrediebantur urethræ. Huic crumenæ inferior crumenula *Fabriciana* extat, quam in tabula ejus, otidem repræsentante, delineatam videbis.

Splen vero aquilarum regiarum foras convexus, intus vero planus, dextro ventriculi lateri immediate cohærebat, 8. linearum diametrum; colorem vero, hepatis ruberrimi colore fulviorem; vasa tandem ex Porta & Arteria-Coeliacâ accepta, fortiora, ac varicosa habebat. Splen aquilæ, *Haliaeti*,

Haliaeti, sub dextero hepatis lobo situs, tertiæ cohærebat intestinorum curvaturæ mediantibus ramis, venæ Portæ, & Arteriæ-Coeliacæ.

Pancreas ejus communem reliquis avibus situm, primæ scilicet intestinorum flexioni proximum, ast figuram singularissimam obtinebat. Extremitate scilicet inferiore rotunda, reliqua autem parte plana gaudebat, & graciliore. Extremitatem, de qua diximus, rotundam, canalis transibat hepaticus, & nulla prorsus canalibus pancreaticis communicatione nexus, intestino sese inferebat. Trium, qui aderant, canalium pancreaticorum, bini, canalem cysticum inter, & hepaticum, ingrediebantur intestinum; tertius autem, hepatico superior, idem illud intrabat. Duo observavimus circa hanc canalium insertionem, singularia; alterum: quod *Duodenum*, nec extremitatem primæ intestinorum circumvolutionis, ad jejunum referendæ, ut in aliis avibus ingrederetur; alterum, quod cuivis canalium ostio, sua esset verruca, pro operculo nec, ut alias, una tantum verruca omnibus, scilicet Pancreaticis, Cysticis atque Hepaticis canalibus communis. Pancreas duarum aquilarum regiarum, Pyloro proximum, mediante canale quodam brevissimo & exilitatis suæ ergo, fere oculos effugiente, cum intestino cohærebat; altera ejus extremitas spleni necebat, qui, ut supra diximus, parti superiori & lateri dextro ventriculi nexus conspicitur.

Hepar utriusque aquilæ regię, hepate tertiæ aquilarum majus, sinistrum ex lobis maximum ostendebat. Vesicula omnium & mole sua, & figura castaneam magnam referebat; nec nisi mediante suo collo, conductu $1\frac{1}{2}$ lineis amplo, cum dextero hepatis lobo cohærebat. Canalis Cysticus fundum, collo oppositum egrediebatur. Collum vero duplici ratione atque diversa hepati jungebatur; in duabus aquilis regiis etenim ex lobi dextri brevissimique extremitate pendeat, hinc quoque vesicula tota extra hepatis constituta erat; in *Haliaeto* autem, more communi, mediæ partem cavæ lobi dextri adhærebat.

Renes insuper aquilarum regiarum exigui, 8. linearum diametri, rotundi, depressi, & castanei-subrubicundi coloris, ast *Haliaeti*, avium more, id est: reliquorum animalium respectu maximi erant ac conformationis singularioris.

Testiculi aquilæ regię, maris, five corpuscula duo glandulosa, membranis involuta, & parum depressa, pisi magnitudinem exhibebant, colorem vero carneum ac in flavidum vergentem.

Fœmellæ ovarium, ovariique ductus, avibus fere communi ratione comparati erant, quales in figura Virginis Numidiensis, acies, videbis.

Lingua in apice cartilaginosa, in medio autem carnosa, duas in radice cuspidas duras, quales in extremo sagittæ ferro observamus, exhibebat. Latitudinem 5. linearum, & rima laryngis ad apicem $1\frac{2}{3}$. digitorum longitudinem profitebatur. Apex tamen haud cuspidatus erat, ut in pluribus avium, rostro recto gaudentium, sed quadratus, qualis esse solet psittaco.

Musculi exigui Asperam-Arteriam necentes, originem suam haud ex secunda clavicula, ut in pluribus avium, sed ex interna parte summitatis sterni ducebant.

Oculi globulus in fœmella, ubi latissimus $1\frac{1}{2}$. digitorum diametri erat, masculi autem 3. linearum minoris. Cornea convexitate sua ultra reliquum globi (anterius, more piscibus avibusque communi depressum, in reliquis

animalibus autem magis sphæricum) prominebat; in alterutro maris oculo tamen haud diaphana, sed albedine opaca erat obducta. In hoc etiam mare, humorem aqueum, corneæ & crySTALLINO intermedium, induratum ac quasi petrificatum, 2. fere linearum altum vidimus, iridi insuper, eique rubræ, & ut videbatur, parumper lævæ superjacentem. CrySTALLINI magis intus quam foris convexi, latitudo $4\frac{1}{2}$. lineis, crassitudo autem $3\frac{1}{2}$. lineis absolvebatur. Sic & alteruter fœmellæ oculus læsus, quosvis humores membranasque interiores corruptos, omnia in aquam rubicundam conversa, nec humoris crySTALLINI, nec aquosi, nec vitrei vestigium ullum ostendebat. Uvæ foramen membrana quadam tenui, diaphana & dura occludebatur; quam in illa aquilarum specie tantum inveniri docet *Cortesi*, quam *Ossifragam*, & *Aristoteles*, *Epargemon*: sive nubecula obductos oculos ostendentem, nuncupat. Multo tamen discrimine ab Ossifraga distabat aquila nostra; illa enim non aquila, sed vulturis species, & teste *Aristotele*, plumis cinereo-albidis instructa, & ab aquila nostra hinc diversissima est.

Magno opere relaxatum deteximus oculi hujus nervum opticum. Membrana autem avibus propria ac ex optico nervo egrediens, dum sacculum fere constituit, cujus altera extremitas ligamento ciliario nequitur, hæc membrana inquam, nigerrima, imo choroide nigrior erat. Membranam dicimus illam, corrugata enim membrana videbatur, nec tamen erat nisi congeries fibrarum nigrarum crassiorum, medio inclusis quibusdam rubicundis, quas vasa fuisse censemus. Nervus opticus, quo membrana ista egrediebatur, depressus, rimam 3. lineis longam repræsentabat.

Basis hujus membranæ figura erat triangulari, eadem latitudine & 5. linearum basi, in cuspide. Retina tandem crassissima erat & valde opaca, præsertim oculi in fundo, ibi enim rugis plena & complicata adparebat; nec choroidem hoc loco ullum tegumentum obtegebat.

Spinæ medullam quum conformationis singularis esse speraremus, in alterutra aquilarum disquisivimus, ast reliquis avibus communem deteximus. Pars scilicet medullæ exterior, versus medium dorso, fissa in duo, separatur, tum denuo coit in unum; pars interior autem integra remanet & dilatatur, sicque frondis figuram induit. Si dimensionem separationis in parte externa & dilatationis in parte interna quæras, longitudinem $1\frac{1}{2}$. digitis, latitudinem vero 8. lineis in aquila nostra fuisse teneas, servata eadem proportionis ratione in avibus reliquis. Cavitatem vero duabus partibus divaricatis intermediam, humore candido viscidoque, quem pro humore lymphatico spissifecto habemus, expletam vidimus semper.

Quod si porro præcipuus ventriculorum cerebri usus hic est, ut excrementa eorum recipiant: ad veritatem accedere videtur, quod cavitas ista, avibus propria quasi ventriculum constituat medullæ spinalis. Quæ quum ossi motu libero carenti inclusa sit, nec spinæ flexili, ut in reliquis animalibus, caret mediis ab agitatione illa proficiscentibus, quorum ope excrementa solvere posset & dissipare; receptaculo hinc eget ad recipienda excrementa. His præstructis, conductus, si qui adsunt, singulares, excernendis superfluis hisce destinatos investigemus.

En! tibi L. anatomicam aquilæ descriptionem, & quidem integram, quum ex fonte tam præclaro hausta fuerit atque deprompta.

Plerumque autem, *Belonio* teste, in cacumine rupis, vel in proceris silvæ arbo-

arboribus nidum construit aquila regia ; hinc ruricolæ , pullos aquilæ surrepturi , ne ictibus matris percutiantur , capite probe munito accedunt ; imo , si pullum nido exemptum ad arborem nido proximam adligaverint , mater , exaudita pulli voce , advolans , tantam ipsi cuniculorum , anserum , similibus copiam , pro nutrimento , quotidie adportat , quanta non solum pullo , sed etiam senis hominibus nutriendis sufficit . Teste Cel. *Pluche in Spectaculo Naturæ Tom. I.* aquilæ , in *Gevaudan* , regione montibus circumdata & omnium fertilissima , nidum suum in summis & accessu difficillimis rupium cacuminibus conficiunt ; quam quum pastores observaverint , tugurium in pede rupis construunt , quo a furore aquilæ , suis prædam adportantis tueantur . Per tres menses integros pater suos pullos maxima cum cura alit , tum mater , usque dum pullus vires ad exspatiandum sufficientes adquisiverit . Post nido illum expellunt , ad volandum adigunt , & lapsui proximum alis vel ungulis suis sustentant . Quousque autem aere suspensus hæret pullus , parens uterque circumjacentes regiones deprædatur . Villas visitat , & capones , gallinas , anseres , agnos , capras , porcellos , quidquid obvenerit arripit , ac pullo adportat . Tum campos apertos ambiadeunt , & feliciori cum successu , phasianos , pernice , anates silvestres , lepores & capreolos venantur . Vix parentes avolare conspiciunt pastores , & scalis admotis aquilæ prædam ex nido auferunt , ac intestina animalium substituunt . Delibata ab aquila & pullis solent esse omnia , ast saporis præstantia longe iis antecellunt , quæ alias venum exponuntur . Quum denique vires ad avolandum sufficientes pullo accesserint ; (id quod subtrahit nutrimenti præstantioris , & substituti deterioris ergo , tardius accidere solet) funibus sive catenis eum vinciunt pastores ; sic parentes diutius continuata cura prædam ipsi adferre pergunt ; usque dum filii , nil nisi curam ac molestiam facessentis , pertæsus primo pater , tum & mater illum relinquunt . Pater abit , & alibi suum construit nidum . Mater illum sequitur , ac amore in sobolem novam , pristina oblivionem induunt . Pullum vero captum pastores vel aeri expositum linquunt , ut pereat , vel domum deportant .

Eadem & sua experientia comprobata exposuit *Albertus M.* ; observationibus nempe per 6. ad 7. annos continuatis , bina quidem ova aquilam ponere , ast unum tantummodo pullum exclusum in nido ejus plerumque reperiri expertus est ; & teste fide dignissimo , in quodam aquilæ nido , plures quam 300. anates , quam 100. anseres , 40. lepores , & plures pisces majores repertos esse scribit .

Aquila regia , tyrannus potius quam Rex avium dicenda , ab Italis : *Aquila Reale* , a Germanis : *Gulden Adler* ; ab Anglis : *Golden Eagle* , sive : *Aquila aurata* , a Suecis tandem *Orn* dicitur , Vox Gallica : *Agle* , dubio procul a Latina : *aquila* descendit .

Multum salis volatilis ac olei aquilæ inest . Huic varias easque singulares virtutes tribuebant antiquiores , ast recentiores vocant in dubium ; forsan & aquilæ raritas experimentorum hodie repetendorum intermissionis , neglecta autem repetitio , evasit oblivionis ratio . Nos igitur ea tantum subnectamus , quæ & nostris temporibus repetita ; & a testibus fide dignis instituta sunt . Sic in *Ephem. Germ. Cent. I. & II. pag. 437. Thomafius* , M. D. apud Germanos Experientissimus , felle aquilæ amarissimo , ac
salis

salis lixivialis detergentis copiam secum gerente, ad exacuendam oculorum aciem & profligandas corneæ maculas, in viro octogesimum annum agente, felici cum successu, sese usum fuisse scribit; paucis enim exinde diebus fortiori ac acutiore viguit oculorum acie. Fellis hujus portiunculam in aqua Euphrasie solvit, & guttulas quasdam oculis instillavit. Nec quoties usum ejus reiteraverit, subjungit; hinc, ubi reliqua collyria, bis terve per diem, eundem instituendum esse judicamus. Teste eodem, adeps aquilæ emolliendi & resolvendi virtute pollens, linimento eximio venit contra luxationes nervorum, & dolores arthriticos. Dolores sedat, corroborat nervos, ac brevibus tumores, luxationum socios dissipat. Imo per nionibus exulceratis pruritum leniendo, & cicatricem citissimam obducendo, mederi solet. Excrementa aquilæ tandem, vi sua incidente ac penetrante, si melle rosato admixta cataplasmatibus instar adhibeantur, contra anginam; si melle communi commisceantur, pro linimento contra maculas oculorum faciunt. Veniunt & suffumigiis contra vapores hystericos ac retentionem menstruorum, dummodo (id quod supra, quum de accipitre dictum fuit, notavimus) nulla partium irritatio seu ad inflammationem dispositio adsit, tunc enim medium, suæ activitatis ergo, malum in pejus verteret.

A R D E A.

SEcedamus a tramite antiquiorum Ornithologorum, & Cel. *Linnei*, Viri in Physicis maximi, vestigia premendo, in classem ardeæ, non solum ardeam, sed & ciconiam & gruem referamus, ac describendo pertractemus.

Ardea. Offic. Schrod. 315. Lemer. 71. Dal. Pharm. 416. *Ardea cinerea*. Merr. Pinn. 181. *Pella* & *Ardea*. Belon. de Avib. 190. *Ardea pulla*, Gesn. de Avib. 187. *Ardea subcærulea*. Schvenckf. Aviar. Siles. 223. *Ardea cinerea major*. Aldrov. Ornith. 3. 377. Charlet. Exer. 109. Jonst. de Avib. 103. Mars. Danub. 8. Villughb. Ornith. 203. Raii Syn. Method. Av. 98. *Ardea cinerea major, sive pulla*. Alb. Ornith. 64. *Ardea crista dependente*. Linn. Faun. Suec. 133. *Tantalus isidoro*; *Ardea major vulgaris*. Quorumd. Gallice: *Heron gris, seu cendre ordinaire*.

Quatuor ardea suo pondere libras, quatuor, longitudine, pedes, ab rostri ad ungularum extremitatem; 3. denique pedes, ac $2\frac{1}{2}$. digitos ad caudæ finem usque, explere solet. Rostrum ejus fortius, magnum, rectum, decrescente sensim crassitie in cuspidem exeundo; a cuspidem ad oris angulos $5\frac{1}{2}$. digitorum longitudinem, & viridi-flavidum colorem exhibet. Maxilla ejus superior inferiorem aliquantula longitudine excedens, canaliculum, seu foveam a naribus ad cuspidem excavatam, margines autem demonstrat asperos, ac dentatos, quo magis inserviat retinendis piscibus lubricis. Maxilla illius inferior superiorem flavo colore antecellit. Oris aperturam præbet amplissimam; linguam cuspidatam, longam, neutiquam vero duram; nares crenis exiguis ac oblongis similes; palpebras & spatium oculis & rostro intermedium ac pennis destitutum, subvirides; plumas in anteriore capitis summitate, albidas; tum cristam, quæ istas excipit, nigram, $4\frac{1}{2}$. digitorum altam; mentum albidum; collum albido-cinereum, & in rubicundum vergens, guttur albidum, nigrisque maculis conspersum, cujus in fundo pennæ longiores, cuspidatæ, strictiores & albidæ decussatim constituta-

stituta videntur. Dorsum ardeæ lanuginosum longis obtegitur pennis cinereis, quæ ex humeris enatæ, lineis ornantur albis exiguis, ductisque deorsum. Pectoris medium, & pars inferior uropygii sub cauda sitæ, colore sunt flavescente. Tum macula nigrida major sub humeris obvenit, ex qua radius quidam niger profectus ad anum usque producit. Septem & viginti cujusvis alæ pennarum majorum ultimæ cinereum, reliquæ omnes nigrum profitentur colorem, oræ saltem undecimæ & duodecimæ exteriores paullulum vergunt in cinereum. Facies alarum averfa cinerei, alæ sic dictæ spuria plumæ nigridi coloris sunt, & macula quadam albida inferius notatæ; pennæ radices alæ spuria obtegentes, superius plumis indutæ sunt albidis, tum linea candida, per totam alæ basin ad humeros usque procurrente; decem ex plumis ordinis secundi, nigridæ, tum quatuor ad quinque marginibus albidis instructæ, reliquæ omnes cinereæ adparent. Caudam cineream, ac 7. digitorum longam, 12. pennæ componunt. Crura sunt ardeæ & pedes virides. Viridiores tamen plantæ, & pars posterior crurum. Digiti pedum longissimi, quorum exterior articulatione sua ultima, membranæ alicujus ope medio cohæret. Ungula insuper digiti medii, interiore sua parte dentata est; quod probe notandum. Stomachum ardeæ laxum & membranofum potius quam muscutorum, qualis in animalibus ex raptu viventibus esse solet, reperivimus, eodemque dissecto, lentes marinas, tribus cuspidibus instructas in illo deteximus. Intestina porro, anum versus, ubi sedes est appendix, magis relaxata vidimus, ac in quacunque avium reliquarum. Nec tamen duas ardea habet, avium instar plurimarum, appendices cœcales, sed unam saltem, velut quadrupeda, majorem tamen, & crassiolem. Oesophagum præterea, mento inferiorem, ac amplissimum; tum appendix in centro ossis thoracis; fellis vesiculam longam; 18. in collo vertebrae, quarum undecim saltem Cel. *Gesnerus* numeravit, ex quibus quinta contrarium reliquis situm, sursum nempe reflectentem habet.

Nutritamento ejus pisces, ranæ ac hujusmodi alia venire solent, & vel ipsos pisces majores lædere audet ac percutere ictibus, quamvis aqua illos protrahere, ac deportare nequeat. Pulli ejus vel intestinis avium, vel carne, aliisve similibus aluntur. Plerumque autem recondito sub alis capite, & reflexo collo constituto conspicitur. Bis Trachea-Arteria, ad lineam rectam, colli vertebrae transit, antequam pectus ingrediatur. Nidum ardea in altissimis arborum fastigiis, & sæpius variæ admodum vicinos inter se nidos construere solent. Locus foret quæstioni; num, ut *Polydoro* duce, vult *Aldrovandus*, & cornicum inhabitare soleant nidos. Ova ardeæ viridem debilem, & in cœruleum vergentem præ se ferunt colorem. Quales Gallorum usibus accommodatas ardentum habitationes describit, atque commendat *Belonius*, tales & in Anglia inveniri ille quidem negat, nos vero affirmamus, & magnum exinde quotannis lucrum, dominis redire novimus.

Quam vero ex Cel. *Villoughby* haustam hætenus tradidimus ardeæ descriptionem, ab ardea fœmella, tamquam exemplo, depromptam fuisse scito. Cel. *Schwenckfeld* masculum in vertice, tribus plerumque plumis cœruleis, novem digitorum longis, atque retro repositis nec non magni habitus a quocumque instructum, quum ovis excludendis occupatus fuerit, eas-

easdem deponere ; ac , ex sententia *Alberti M.* , masculum coeundo crura sua in dorso foemellæ incurvata detinere docet ita , ut pedes ejus foemellæ caput , & genua , hujus anum pertingant .

Pro mercede autem , sic *Belon* , nostris temporibus ardearum pulli , seu juniores venire solent ; qui hinc inde deportati haud exiguo venditoribus cedunt lucro . Receptacula scilicet quædam ad fluviorum ripas , altissima , ac leviter saltem oblecta , Gallis : *Heronnières* , barbaro vocabulo Latino : *ardearia* dicta , construxere recentiores , quibus cum nidos suos commiserint ardeæ , facillimo negotio ardeolis suis potiuntur . Recentiorum industria excogitatam rem dicimus , cujus quidem nullum apud antiquiores , nullum inter alias gentes vestigium detegimus . Frequentiores autem Britanniam inferiorem , aliasve provincias quæ inhabitant ardeæ , nidos suos in arborum fastigiis construunt ; & quum pullos suos piscibus plerumque nutrire solent , accidit , ut magna semper piscium copia ex arboribus defluat . En fabulæ originem quod in nonnullis regionibus , pisces ex arboribus delabentes , pinguescendorum porcorum pastui cedant . Cæterum inter delicias regias ardeam esse referendam docet proverbium , & Galliæ procerum mensis , ardeæ præsertim juniores , frequentissimo , exterorum palato autem infrequentiori cedunt cibo . Dubio procul saporis jucunditate , gruibus ardeæ anteferantur ; quas si aquila adgressa fuerit , acriter sese defendendo exspirare docet *Aristoteles* . Insidias enim quum sibi struere ardea aliquem observaverit ardea , volatu in sublime producto , nec fuga , hostem superare contendit ; tunc alis rostrum subdit , avium rapacium ictus extimescens , quamobrem plures harum pectore rostro confosso enecatas reperies . Solitudinis amica , ardea , sola pertica inhæret , sola victum sibi conquirat ; integram per diem in aqua degit , cruribus namque longissimis gaudet , itaque & avium rapacium & quadrupedum insidias effugiunt . Plures quoque ne quidem nocte perticas quærunt , arbori saltem insidentes somnum capeffunt . Cæterum ardea , grue quidem atque ciconia minor , ast rostro cruribusque longissimis instructa est , hinc etiam magnam devorat copiam pisciculorum ; ast cauda ejus brevissima vel pedibus brevior videtur volando . Cornices inter & ardeas societatis vinculum , vulpibus infestum esse volunt , amicas easdem credimus , etenim in eadem arbore inter se vicinos nidos utramque construere vidimus . Coitum ardearum ærumnosum esse dicit *Aristoteles* , masculum acutissimos tunc edere clamores , & vel sanguinem per oculos effundere ; foemellam vero ægre ac summos inter dolores sua ova ponere . Victus quærendi studiosissima , per diem magna cum cura illum colligere solet .

Elegantissime , ut solet , *Cel. Pluche* , circa usum rostri avium diversarum ; Nec , ut pica , breviores , sed longissimos lumbos & crura pennisque carentes , ostendit ardea , collum prælongum , rostrum longissimum , acutissimum & in apice dentatum . Quare autem ista , quæ tam aliena videntur ? Ranis nutritur ardea , conchis , & piscibus quos vel in paludibus , vel maris fluminumque ripis captare valet . Aquam igitur & cœnum transeunti , quid quæso pedum pennæ prodesse ? ast crura longissima expeditiori ejus cursui inserviunt , dum pisces , in ripis alimenta qui quærunt , capturus , jam profundior , jam parciorem aquam percurrat , necesse sit . Collum & rostrum longius habeat , quo citior faciliorque prædam arripiat .

Dentatum sit rostrum ejus, necesse, ac barbis sive uncis munitum, ut retinendo, qui lubricitatis suæ ergo, facilis aufugeret, pisci sufficiant. Alæ tandem quamvis, corporis sui exigui respectu nimia, videantur, comparandæ inserviunt tantæ aeris quantitati, quanta ut sustentari possit, præda sua onusta, postulat. Amicorum quidam in villa sua commorans, quam rivulus anguillarum plenus alluit, ardeam observavit, quæ arreptam ex fluvio anguillam, inter maximas unam, nulla hujus contorsionibus impedita, inter volandum, ad nidum deportabant. Quæ & de aliis avium speciebus, ardeæ similibus, valere scito.

Sunt, qui ejus pedibus pisces alliciendi facultatem inesse, & illam, descendendo se expectantes pisces deglutire potius, quam studio quæsitos captare censent; imo piscatores nostri, adipe ejus sapissime pro esca utuntur. Nostri vero hujus ergo institutis experimentis, numquam expectatus respondidit effectus. Difficillimo cum labore gignendis pullis, & masculum, & foemellam occupari, *Ligerus* est, qui in nova sua domo rustica docet. Nos autem non solum vocabuli novitate offendimur; sed & ipsam auctoris opinionem, redivivam *Jonstonii* sententiam saltem, judicamus. Nec tamen omni veritatis fundamento destitutam, neque illam pronuntiabimus, si cum *Schwenckfeldio*, marem, quousque ova excludit foemella, cristam deponere supponas. Alienum vero prorsus est a veritate, quod quum educandis pullis occupata fuerit ardea, numquam humi resideat; peracto autem educationis labore continuo terra residens detineatur. Sic & lubrico admodum fundamento superstructa illorum est sententia, qui per septem varias corporis ardeæ partes, fella disposita, & antequam cibo adpropriari possit, ea omnia sollicite retrahenda; hepar item ut lupi, totidem constructum esse lobis seu foliis, quot annos numerat avis.

Græci illam *Pellos*, seu *Herodios*, Itali: *Airone*, Germani: *Blaver-Reiger*, Angli: *Common Heron*, Sueci: *Hæger*, Allobroges: *Airon*, seu: *Heyron*, & Aurelianenses: *Aigron* nuncupare solent. Vox autem Gallica: *Hieron*, ex Cel. *Menage*. Sententia, a Latina: *Erodus*, quæ Græcæ est originis, descendit; *Ardeæ* tandem, nomen illius Latinum, teste Viro Nobili: *Columna*, in *historia sua naturali universi*, vel ardoris ergo, ac acritatis, quæ ab avibus rapacibus sese defendere solet; vel ferventium, & quasi ardentium excrementorum suorum causa, accepisse videtur, quæ deficientibus ad conflictandum viribus, podice hosti obverso tanta cum vehementia eiicit, ut ignis instar ardore consumptæ sint, & cito comburantur illius pennæ omnes.

Multo tandem oleo, multoque sale volatili repleta, tenerioris præsertim ætatis, carnem præbet saporis jucundissimam, & vel primatum mensæ adposita conspicitur ardea. Medica autem ars, nullo nisi adipe ejus, & illo quidem, resolventis suæ virtutis ergo ac emollientis, linimenti instar contra articulorum dolores; nonnunquam & pro exacuenda oculorum acie; rarius autem ad depellendam surditatem, auribus scilicet intromisso, utitur.

Ciconia. Offic. Schrod. 315. Dal. Pharm. 416. Belon. de Avib. 202. Gesn. de Avib. 232. Merr. Pin. 181. Aldrov. Ornith. 3. 292. Jonst. de Avib. 100. Charlet. Exerc. 108. Mars. Danub. 26. Schwenckf. Aviar. Siles. 234. *Ciconia alba*. Willughb. Ornith. 210. Raii Syn. Meth. Av. 97. Alb. Ornith. 59. *Ardea alba*, remigibus nigris. Linn. Faun. Suec. 136. *Ciconia vulgaris*. Nonnulli Gallice: *Cigogne blanche*; seu *commune*.

Quæ autem & magis cinereo ardeam superat colore, & fortiori, breviorique collo conspicienda venit ciconia, capite, collo, ac tota anteriore parte albida; ingluvie vero, & externa alarum superficie nigra gaudet; nigris alarum pennis majoribus; cauda candida; rostro longo, rubicundo, ac ardeæ rostro simili; cruribus longis, rubicundis, & supra genua pennis carentibus; digitis pedum ab origine ad primam usque articulationem membrana quadam cohærentibus; decem & quatuor colli vertebris; ungulis ut in homine latis, & his, quas Ibi Ægyptiorum candidæ tribuit *Herodotus*, similibus; nec tamen medio digitorum dentato. Rarior autem in Angliæ oris, nec nisi vento, vel alio quodam casu fortuito, allata conspicitur. Viro autem Cel. *Thomæ Brown*, sic pergit *Willoughby*, Viro & in *Materia Medica* eximio, & in historia naturali versatissimo, effigiem atque descriptionem succinctam debemus Ciconiæ captæ in maritimis Nortfolciæ oris. Hæc altitudine fere cubitum integrum adtingens, rostro cruribusque gaudebat cinnabarinis, unguibus, humanorum instar, latis; inferioribus partibus plumarum, quamvis alam obtegentium, nigris; ita ut alis complicatis nigrum videretur dorsum; cauda tandem, tota fere alis obtecta, albida & vix digiti 1. longa. Caules pennarum alæ majorum, quales in cygno conspiciebantur. Cæterum maxillam alteram alteri sæpius admovendo, rostro strepitum excitabat; ranas ac lumbricos avidissime devorabat, bufones vero, sibi exhibitos, abhorrebat. Rarissima autem nostris in oris conspicitur.

Italica infrequentior est ciconia albida, teste *Joanne Fabio Lynceo*, in *Annotationibus ad Recchium*. Quamvis etenim 28. per annos Romæ, sic ille, commoratus fuerim, unicam tantum vidi, eamque in fastigio turris, sic dictæ, Comitum, quo violentiore vento deportata fuisse videtur. *Aldrovandus*, natione Italus, brevi ante mortem scribit: nulla mihi umquam copia fuit videndi ciconiam, nullas enim Bononia nutrit. Mirum sane, etenim ingruente hyeme, Germaniam relinquunt ciconiæ, & calidiores terras adeunt, Italia autem Germaniæ proxima est. Sæpius ego testes fide dignissimos, quæ ipsi viderant referentes audivi, quod pavones & ciconiæ, quum sæpius deglutitas, totiesque anum viventes egressas serpentes denuo deglutiverint, anum eo usque parieti adplicaverint, usque dum deglutitas in corpore emortuas esse persentierint.

Ibim ciconia mole, aut ciconiam ibis colli pedumque longitudine superat, ut *Acta Regiæ Scientiarum Academiæ* loquuntur. Ab extremitate pedum ad apicem rostri pergas, & 4. pedum longitudinem reperies in ciconia. Collum ejus in origine crassissimum; alas, si a medio dorsi usque ad extremitatem alæ procedas, 2½. pedum longas. Collum ab origine, usque ad tertiam longitudinis suæ partem obtectum est plumis, 6. digitorum longis, 10. linearum latis, in cuspidem desinentibus, & radicem versus plumis pilosis intermixtis, iisque albidissimis, ac singulari modo constructis. Singulæ etenim harum, de quibus diximus, plumæ minores, tubulum conspiciendum exhibent, acus magnitudinem æquiparantem; hic vero denuo divisus in quinquaginta ad sexaginta tubulos adhuc minores abit, & capillos vix crassitie exæquantes, nec non utrinque fibris imperceptibilibus fere constipatos. Oculis circumjacens regio plumis carens nigerrima pelle obtegatur. Rostrum ejus rubri debilioris, ac in carneum vergentis est co-

loris rectissimum, nec inflexum, angulare, nec rotundum, cuspidatum, nec ut ibis, molle. Crura ciconiæ sunt ac pedes rubri, nec nisi digitorum extremitates squamis contabulatæ. Trium digitorum anteriorum initia, pelle quadam brevi nectantur atque fortissima. Calcar autem brevius est hisce ac crassius. Ungulæ tandem unguium in homine instar albidæ, latæ, & breves sunt. Avium, quæ herbis, ac seminum granis nutriuntur gutturi simillimum, guttur ciconiæ apparet. Tunica, quæ Oesophago est, interioris, glandulæ, majores sunt ac plures. Corpus vero glandulosum, gutturi superius, multis admodum glandulis majoribus confitum est, guttur item multo obtegatur adipe, & quadruplo ibis gutturi est crassius; cujus quidem muscoli digiti 1. & quod excurrit, crassitie absolvuntur. Tunica interior callosa, durissima est, ac viridis. Intestina 5. circiter pedum longa; quæ cæca appellantur 6. linearum longa, 2. lata; Binorum, in quos divisum est hepar, lorum, dexter 3. sinister 2. digitorum longus, uterque cumulo glandularum hexagonarum constat; Fellis vesicula, 10. fere linearum longa, 3. in medio lata, separata ex hepate pendet, cui & ligamenti cujusdam, & duorum alveolorum ope, velut radicem, nectitur. Pancreas, more avibus communi in prima intestinorum plicatura suum obtinet situm, 3. insuper digitorum longitudine, 4. linearum latitudine absolvitur. Unicus tantum adest ductus pancreaticus, qui hepatico nectitur. Splen ciconiæ exiguus; renes, ac urethræ, avium reliquarum renibus, urethrisque similes; testiculi tandem, magnitudine, columbæ ovum adtingentes, ex parte renum superiore, & a latere magnæ Arteriæ constituti, singuli insuper epididymo, quod parti eorundem inferiori saltem cohæret, obtecti sunt. Canaliculi deferentes extremitatem *Recti* versus inferuntur. Virga, ut in anseribus, constructa. Cor autem magnitudinis mediocris $1\frac{1}{2}$. fere digitorum longum, 5. linearum latum, fere rotundum, ventriculū sinistrum variis columnis carnosus instructum ostendit. Lingua cartilagine constat, carnosā atque fibrosā membrana obtegatur; 10. sua longitudine lineas, ac 8. latitudine ad basin explet, strictior præter ea est, ac extremitatem versus elongata. *Solinus* autem, & lingua, & voce carere ciconiam docet, nec nisi duarum rostri partium compressione vehementiore reiterata strepitum, quem edit, producere statuit. Oculi tandem globus maximus, ac 2. linearum diametri, cornea autem crassissima, pars scleroticæ anterior dura, ut in avibus fere omnibus, & cartilaginosa, crystallinus denique 4. ad 5. linearum diametri est.

Aliam ciconiæ descriptionem anatomicam, illamque expositæ multum accedentem *Christophorus Schellhammer*, D. in *Ephemeridibus Germaniæ* tradidit; idem subjungit: ossa ciconiæ ex laminis tenuissimis esse composita, & excavata, alia tamen spinæ dorsalis crassitiem exæquare, alia apum radios vix adtingere fortitudine, omnia autem tanto cum artificio, tantæque cum levitate esse comparata, ut summa naturæ industria admiranda veniat, qua adeo solida corpora atque robusta, tantæ levitatis ad volandum esse voluerit; ossa ciconiæ enim non solum duritie & soliditate quadrupedum ossa superant, sed & vitri instar, pellucida adparent. Sic & in tertia alæ articulatione, incomparabili sane cum artificio, duo ossa, radio & cubito respondentia aliis duobus ita junguntur, ut mediantibus duobus ossiculis, auris incudi æquiparandis, unum saltem constituent; Omnia au-

tem cartilaginibus adeo obteguntur, ut avis extensam alam, pro lubitu jam adtollere, jam complicare, hinc aere inhærens adscendere atque descendere possit. Admiranda fane arte effectum opus, quod nulla umquam descriptione attingere, intuitu saltem ipso, satis accurate percipere possumus.

Alia quadam D. *Conradi Peyer* observatione, iisdem *Ephemeridibus* inserta, stomachum ciconiæ, ruminantium stomacho quodammodo similem esse edoceberis.

Transmigrantibus vero avibus, & ciconias adnumerandas esse, quis quæso dubitat? Quæ quo tendant, & unde veniant, *Plinio* teste ignoratur, nec tamen, gruum instar, eminus illas advectas esse dubium superest. Destinato igitur itineris tempore, præfixa die, uno omnes loco congregatæ iter suscipiunt, abeunt, nec ullam, nisi captam forsan deferunt. Noctu plerumque suo itinere pergunt, hinc vel advectas, vel decessas, numquam vero advenientes, vel secedentes videbis. Suo ipsius testimonio, suaque edoctus experientia, *Belon*, hyemis tempore, Ægyptum ciconias inhabitare docet, & Africam, quippe qua plures, Septembre, atque Octobre mensibus, commorari vidit. Nec quidem, (sic ille pergit) & ante & post Nili ripas egredientis inundationem, nutrimento ibi carerent; sed potius intolerabili Solis æstivi calore, his regionibus expulsæ, magis temperatas adeunt nostrates; hyeme autem frigoris nostri vehementiam evitatum, illas petunt regiones, ubi nec frigori obnoxia nec nivi, iterum suos excludere valeant pullos. Nec nisi in sublimiore aere agminatim abeuntes ciconias conspicere poteris. Sic & nos Augusto mense, Abydos commorantes, magnam ciconiarum ex regionibus Septentrionalibus provenientium cateravam observavimus, quæ quum Mediterraneum adtigissent, repetitis hinc inde obvolvendo, in agmina minora subdividebantur. Advenientes autem oculos effugere ideo solent, quod nullo, ut anseres, vel grues, strepitu excitato advehantur. Juniores insuper, parentes ætate confectos, adlato ipsis alimento nutrire, vetustior fama loquitur; ex qua vocabulum illud Græcum: *Antipelargia* originem duxisse videtur, quod de illis dicitur, qui ingratitude labem abhorrendo, debitam parentibus opem, & auxilium, gruum instar fere solent. Nec non ciconiarum gratitudinem, & in seniores observantiam, sed castitatem etiam, fidem conjugalem, amorem paternum, sagacitatem, & in hospites suos comitatem laudibus extulere. Ex quibus multa quidem concedimus, multa tamen & rescindenda judicamus, ac tuæ, L. liberalitati ac æquitati relinquimus. Veris item venturæ nuntiæ, medio plerumque Martio nostras adeunt regiones, & vel domuum, vel caminorum, vel arborum in fastigiis nidum suum exstruunt, pristinum tamen ad nidum redire solent, quem & fordibus expurgant, & si hinc inde læsus fuerit, reficere student. Duo ad quatuor ova ponit fœmella, quæ & colore & magnitudine anserum ova exæquare videbis; quæque alterans cum fœmella masculus, hic autem, fœmella saltem victum quærente, incubat. Integri vero mensis spatium ovarum incubatus postulat. Exclusos tandem suos pullos, summa qua fieri potest, cura educant, nec nisi alternis alimenta quærentes ne igne quidem admoto, eosdem relinquunt, exorta autem cœli inclementia, vel pluvia studiose alis suis retegunt. Quæ quum extirpandis lacertis, ranis, serpentibusque inserviant,

ne ab ullo læderentur, Thessaliæ legibus, ex testimonio *Aristotelis*, interdictum. Imo & hodie, ab insultu omni immunes, ac tutæ in plateis Belgii urbium libere obambulare solent, ibi enim felicitatis ac securitatis civitatum testes habentur, & coluntur adeo, ut vel lapidibus a plebe obrueretur advena omnis, qui populi morum ignarus, quamdam ex ciconiis enecaret. Cæterum natandi facilitate destitutæ, aquas tamen inhabitare gestiunt, prata humida, paludes, stagna, silvas item aliquando, & montes. Nec non serpentibus, sed etiam piscibus, anguillis præsertim, aviculis, carne insuper vescuntur, & pane. Alternis, sive vigiles, sive dormientes insistere pedibus, & caput sub alas recipere solent. Recessui ciconiarum destinatum tempus in finem æstatis cadit, seu medium Augusti. Sunt, qui per hyemem illas in fundis paludum delitescere dicunt, & ad illos congestarum ciconiarum cumulos provocant, quos hyeme quondam, ex lacu quodam ad Dinodunum Mediomatricorum, Lotharingiæ urbem, vergente, protraxerant; illæ enim calori admotæ redierunt in vitam. Provocant & ad testimonium *Gaudentii Merulæ*, qui ciconias plures, alias rostro aliarum ano inhærentes ex Lacu Benacensi protractas, eademque ratione in vitam revocatas esse scribit. Quæ omnia quum parum probabilitatis, non dicam, veritatis prodeant, nos potius vel communi omnium, vel *Belonis* opinioni accedimus.

Hebræorum idiomate: *Chasida*, Græcorum: *Pelargos*, Italorum: *Cigogna*, vel *Cicogna*, Hispanorum: *Ciguenna*, Germanorum, Anglorum, Suecorumque lingua: *Storch*, seu *Storck*; Gallico tandem sermone: *Cigogne*, *Cicogne*, olim: *Cigogne*, *Cigoigne*, vocabulo ex Latino: *Ciconia* descendente, salutatur.

Antiquioribus autem temporibus, sale volatili & oleo quæ abundat ciconia, junior præsertim, & tenera, cibo nonnullorum venire solebat; quippe quæ nutrita serpentibus, lacertis, ranis, aliisque sale volatili multo instructis, sanguini purificando, & veneno profligando sufficiens habebatur. Jam vero detectis Medicorum studio, aliis, iisque efficacioribus remediis, in oblivionem ciconia abiit. Nec ulli porro mensæ apponitur, cujus quidem carnem durissimam, coriaceam, ac digestu difficillimam nullis condimentis emendari posse, experti sunt. Ars medica interim, saporis delectandi incuriosa remedia quædam, nec contemnenda prorsus haurire ex Ciconia solet. Ea scilicet, vel integra, vel sanguine illius, & adipe, & felle, & excrementis utitur.

Sic ciconiam integram, plumis exutam & intestinis, tum olivarum oleo excoctam, usque dum ab ossibus caro secedat, deinde contusam, & alio rursus oleo ebullitam, ac fortiori tandem expressione percolatam; optimum præbere docent oleum ad confortanda membra paralytica. Sic, & destillatione ciconiarum juniorum suffocatarum, & in frustula dissectarum aquam provenire edocemur antiepilepticam, illamque eximiam; quam summis laudibus *Cel. Gruger D.* in *Ephem. Germ. Dec. II. Anni IX. pag. 244.* elatam, sequenti ratione componendam esse docet:

℞. Ciconiam deplumatam & in frusta dissectam.

Radic. pæoniæ maris ℥vj.

Valerian. silvestr. ℥vj.

Picis ilicæ ℥v.

Rutæ pugill. v.

Verbenæ pugill. iiij.

Bethoniæ

Hyslopi

Salviæ ana pugill. iij.

Incisis herbis imittantur alembico omnia, & suprafuso vino candido ad eminentiam 2. digitorum, per horas aliquot macerentur, tandem vero ad remanentiam partis dimidiæ distillantur.

Pro dosi veniant 2. ad 3. cochlearia per diem contra Paralyfin, Catalepsin, & motus convulsivos.

Ciconiæ sanguini alexipharmacam, seu ad illos morbos facientem virtutem tribuunt, qui malignitatem præsentem testantur. Hinc basin constituit: *Paracelsi Antidoti de sanguine*; & *Crollio*. Electuarium debemus antipestiferum, ex ciconia, radice Anthoræ, mumia, Bezoare, Theriaca, aliisque cordialibus compositum. Cujus ℥ss. ad ℥ij. pro dosi commendat. *Burggravius*, multa sane promittendo, ex ciconiarum sanguine, remedium contra quodvis venenum præparari posse edocet. Nos autem, suum utique pretium eidem tribuentes, cum Viro Cel. *Ettmullero*, in commentario ad *Ludovicum*, omnibus, quæ ex ciconiæ sanguine conficiuntur, antidotis, illa quæ cornu cervinum ingreditur, longe esse anteponenda censemus. Hæreat in suspenso res. Quicumque autem avis hujus sanguine potiri velit, recentissimum eundem alembico immittat, Balneo deinde maris ad siccitatem usque destillatum ad usum conservet. Pro quantitate conveniente ℥j. ad ℥j. cedat.

Collyrii instar adhibitum fel ciconiarum, ad exacuendam oculorum aciem, ad profligandas item corneæ maculas, facere censent.

Teste tandem Cel. *Ettmullero*, & pavonis excrementa & ciconiæ, contra Epilepsiam sua se utilitate commendant. Quæ vel in substantia, vel infusione, vel clysteribus anti-epilepticis pro aculeo mixta adhibeantur. ℥jv. excrementorum ciconiæ, si totidem axungia suillæ addas præstantissimum unguentum habebis contra arthritidem; quod excellentiæ suæ causa secretis alii adnumerant. Nec non eidem morbo ut succurratur, gr. xij. ad ℥j. interne, sumi præcipiunt. Quod si tandem ova ciconiæ confracta, per dies aliquot vino maceraveris: unguentum habebis, quo nigrum capillis inducere possis colorem. Alii item capillos primo probe lotos, tum fortius colligatos, deinde oleo olivarum, apri vel ursi adipe commixto perunctos, & tunc demum supra laudato unguento illinendos esse volunt.

℞. Excrement. alb. cicon. arefac.

Radic. pæon. masc. ana ℥ij.

Valer. silves. ℥j.

Semin. pæon. decortic. ℥iiij.

Carui ℥ss.

Redigantur omnia in pulv. subtil., & c. f. q. mellis anthos. f. Elect. antiepilept., cujus ℥ij. bis in die sumantur.

Grus. Offic. Schrod. 319. Dal. Pharm. 416. Lemer. 397. Gesn. de avib. 424. Bellon. de avib. 188. Schvenckf. aviar. Siles. 284. Merr. Pinn. 185. Charlet. Exer. 114. Aldrov. Ornith. 3. 324. Jonst. de avib. 114. Mars. Dan. 6. VVillughb. Ornith. 200. Raii Syn. Meth. av. 95. Alb. Ornith. 60. *Ardea vertice papilloso*. Linn. Faun. Suec. 131. *Avis pia*; *Avis Palamedis*; seu *Palamedæa*. Nonnull. Gallice: *Grue ordinaire*.

Geoffroy. Tom. III. Pars I.

D d 3

Majo-

Majoris autem hanc avem esse molis dicimus, quam 10. aliquando libras suo pondere explere novimus. Ab extremitate rostri ad digitorum, 5. pedes longitudine explet. Collo instructa est cruribusque longissimis. Rostrum autem cuspidato, recto, viridi-nigrido, quatuor digitorum longo, ac oris depresso instructo. Capite lato, ac in extremitate cornu instar, duro. Vertice nigro, & ab rostro ad capitis finem plumis nigris mollioribus munito. Maculam deinde, seu calvitium ostendit capiti posteriorem rarissimis, iisque rubicundis, pilis confitam; huic item inferior macula quædam triangularis, cinereis composita pennis colli partem superiorem exornat. Tum bini radii albi ab oculis profecti, in posteriore colli parte maculæ triangularis summitatem versus coeundo, ad pectus usque producuntur. Quem guttur, & colli latera ostendunt color, niger est, seu obscurus; quem dorsum, humeri, pectus, venter, lumbi, & plumæ, alas obtegentes, exceptis tamen illis, quas in ultima articulatione videbis, quem inquam omnia hæc conspiciendum præbent, color est cinereus. Alarum amplissimarum singulas 24. componere scito, minores autem, & ordinis secundi, in extrema articulatione obviæ, nigre sunt, & in rubicundum vergunt. Caudam exiguum ac brevem, nigram in cuspide, & quam evoluta fuerit, rotundam; duodecim constituunt pennæ, coloris cinerei. Cruribus insuper gaudet nigris, & palmæ spatio super cruribus, calvis; digitis item nigris, & longissimis; digito exteriori, membranæ fortioris ac crassissimæ ope, medii articulatione extremæ juncto. Singulari autem modo, ac notatu dignissimo Trachea-Arteria constructa videtur quippe profundior foramine quodam particulari transiens postquam ingressa fuerit sternum, factis ibidem aliquot contorsionibus idem illud foramen pertransiens ad pulmones progreditur. Quinque, longitudine digitos explent appendices cæcales; stomachus insuper musculosus, & caro ejus admodum succulenta, haud piscibus, sed granis potius & herbis ciconiam nutririloquuntur. Romæ frequentissimas, ait *Willoughby*, venum expositas ciconias vidimus. Copiosiores interim nostras adire solent regiones, & copiosissimæ, æstatis tempore, in Lindi Coritanorum, atque Camporiti Scenorum paludibus reperiuntur. Nidos denique suos Angliæ in oris construere, ab Anglo quodam, qui pullos sese sæpius vidisse adfirmabat, edoctus refert *Cel. Aldrovandus*; nos, nostra experientia deficiente, ignoramus.

Ex loco cæterum in locum, ciconiarum instar permeare, & teste *Aristotele*, Septembri, suo se accingere solent itineri. Quo cum consentiens *Gesnerus*, alio anno, 11. Septembris, alio 17. Octobris nocte abiisse easteratur. Nos tandem, primis Octobris, anni 1753. diebus totis, multa ciconiarum millia, quinquagenis, sexagenis imo centenis ex Septemtrione Meridiem versus tendere conspeximus. Omnem vero agrum, seu campum semine conspersum, aliquo anni tempore, gruum pasturæ inservire docet *Cel. Belon*. Cæterum transmigrando clamorem extollunt, quem vario anni tempore, (etenim jam adveniunt, jam abeunt) percipere datur. Quum enim ob vehementiam frigoris, victum in regionibus Septemtrionalibus reperire nequeant, illas adeunt, quarum aqua nulla tunc glacie obducitur. Masculus ruberrimo capite a foemella dignoscitur. Apud nos autem, nisi cicurata fuerit, hyeme saltem obvenit. Duos plerumque pullos, alterum masculum alterum foemellam excludit mater, eosque simulac volandi facultas

cultas ipsis accesserit, abeundo relinquit. Aviculæ plures, aucuparia arte pollentes, gruem, sprete magnitudinis mole, adgredi audent, ac vel singulæ certamen ineunt; ast ob exaugendam spectantium delectationem, plures simul uni grui immittuntur. Etenim delectationis ergo tantum, nec utilitatis causa venationem instituunt principes. Æstate grues paludosa & mare glaciale tendentia loca quærunt, ibi enim sibi convenientes aquas reperiunt, paludibus nostris nimio sole exsiccatis. Fistula gruis pulmones ingrediens, modo singularissimo, nec avibus communi constructa est; etenim bifariam divisa, carnem os arcis pectoris, seu sternum obtegente utrinque ingreditur. Mirum igitur non est, quod voce sua acutissima, & satis longe remotis innotescente reliquas superat omnes. Grues insuper cum nanis atque pygmæis inire certamina, ordinem illas volando adcuratum observare, & percepta ducis voluntate, ac jussu maria transvolando trianguli formam construere *Aristoteles* & *Plinius* docent. Ducem earum, reliquis quiescentibus, ungula retento lapide excubias agere, alii subjungunt. Caudam denique aliis avibus simillimam exhibent; & hæ, quibus uropygium tegi videbis, pennæ, gallinacearum instar, excavatæ, seu fornicatæ, ex alis nec cauda, proficiscuntur. Pullis autem earum, seu gruibus junioribus peculiare aliquod nomen, quo *Vipiones* audiunt, tribuere Latini.

Gybert Longolius candidissimam sese gruem vidisse testatur. Polonorum nobilium usui venire solet, ut cicuratarum gruum caudæ pennas extrahendo, oleo deinde crenis infuso alias illasque candidissimas reproducant, quas magni habent, ac mîtris suis, pro ornamento immittunt. Vipionem, pennis adhuc carentem adeo citato cursu incedere docent, ut vel cursu velocissimus homo adtingere eos nequeat. Grues insuper altiori volatu elatas, pluviam, vel cœli inclementiam suborturam jam e longinquo conspicere, eaque conspecta, terra residere docent *Aelianus*, *Plinius*, & *Oppianus*. *Albertus M.* facile decipi refert gruem, quippe quæ exaudita hominis voce, gruis vocem imitante, gaudio exultat, & societatis amica, facile domestica redditur. Pygmæos autem, cum quibus certamina inire dicebantur, genus simiarum habemus. Tanto interdum furore conflictari inter se solent, ac in alteram altera acritate ferri, ut pugna desistere renuentes, captari malint, ac hominum in prædam abire. Teste iterum *Aristotele*, succrescente ætate, nigrescentibus pennis induere se solent. Longævitatæ testem, gruem cicuratam, ac quadragenariam sibi fuisse testatur *Leonicus Tomoeus*, referente *Aldrovando*. Democratici regiminis sapienter ordinati symbolum atque exemplar habentur, & transmigrantes, nunc veris nuntias constituunt, nunc vero hyemis. Proxime venturam annuntiare creduntur hyemem, si præcocios, & agminatim, si autem tardiores abeunt, ac catervatim, segniorem, atque retardantem. Capite in altum elato grus, hominis staturam longitudinemque exæquat; terra residens difficillima ad tollitur opera; & determinatam quamdam altitudinem postquam volando adtigerit, lentiori volatu pergit; tanta autem aliquoties altitudine effertur, ut vel nulla amplius, vel turdi magnitudine saltem videatur. Difficilior tamen cohortim terra desidentium, vel unam enecabis, quippe quæ summa cum diligentia excubias agendo, primo hostis intuitu avolant omnes. Facilior sane, tempore præsertim nubilo delassatis insidias struere poteris, si vel curru (hunc enim non extimescunt) insidens, vel eum inse-

quens, adpropinquaveris. Parentes gruum ætate confectos, sollicitè nutriri: a vipionibus *Plinius* testatur. Cui & *S. Ambrosius* in *Hexamerone*, seu *sex dierum opere*, & in *Historia Septemtrionali*, *Olaus Magnus* accedunt. Plumis ætate destitutas grues, ac terra detentas, sic *Olaus*, nullas umquam relinquere solent juniores, sed ex illarum latere constitutæ, fovant, alis obtegunt, nutrimentum subministrant, redeuntibus sensim viribus, sublevant, alis sustentant, & ad volandum assuescunt, usque dum membra quas reliquerunt functiones suas reassumant. Cujus ergo *Piæ* nomen grui tribuisse videntur. Quæ quidem nobis felicioris ingenii figmenta esse videntur, nec nisi tum denique pro veris reputanda, quum vel nostrismetipsis oculis perspecta, vel *Physici* cujusdam celebrioris testimonio comprobata fuerint. Lubrico pariter fundamento superstructa sunt ea, quæ de gruibus excubias agentibus, alterno pede insistentibus, & ne somno corripiantur, ungula lapidem amplexis, dicuntur. Quas tamen imitatum, *Ammiano Marcellino* si fides est, *Alexander M.* lecto suo vicinam constituebat pelvim æneam, manu autem globum argenteum tenebat, ut obrepente forsan somno, delabentis globi strepitu expergisceret.

Hebraicum gruis nomen est: *Ajur*, Græcum: *Geranos*, Italicum: *Grù*, seu *Grue*, Hispanicum: *Grulla*, Germanicum: *Kranich*, Anglicum: *Crane*, Suecum: *Trane*; nomina autem germanica Græcæ, reliqua Latinæ videntur originis. Utrumque vero, & Græcum scilicet, & Latinum ejus nomen, per Onomatopoeiam, seu cantus sui ergo accepisse videtur. Poetis avis *Palamedis* dicitur, quem bello Trojano, & quatuor literas Græcas, & aciem, & excubiarum vocabulum didicisse credunt a gruibus.

Multo tandem grus sale volatili, & oleo abundat, quam frequentiori olim principum cibo venisse, & caveis inclusam, occæcatis, vel confutis oculis, faginatam esse docet *Plurarchus*; hodie autem in defuetudinem abiit. Caro etenim ejus coriacea, solidior, & fibrosa, non nisi aceto macerata, & multis condimentis condita, & tunc quidem fortiori saltem stomacho & robusto valentibus, commendanda, vipionum vero, exiguis adhuc peninis instructorum ac tenerorum anteferenda venit.

Ars denique Medicorum, gruem quomodocumque cibo cedentem contra colicam ventosam, & ad corroboranda nervorum genera multum conferre censet. Adeps ejus incidente, penetrante, ac resolvente qualitate instructus, iisdem, quibus anserinus, virtutibus gaudet. Sic contra Paralyfin & Rheumatismos, ac auribus inditus, ad profligandam surditatem facere solet. Fellis ejus oculorum maculas profligandi pollet virtute; & caput cum oculis & gutture arefactum, & in pulverem reductum, fistulis, granæis, ulceribusque varicosis inspergitur.

C A R D U E L I S.

Carduelis. Offic. Dal. Pharm. 422. Lemer. 191. Gesn. de avib. 215. Schvenckf. aviar. files. 233. Belon. de avib. 353. Charlet. Exer. 87. Merr. Pin. 175. Aldrov. Ornith. 2. 798. Jonst. de avib. 68. Alb. Ornith. 61. Willughb. Ornith. 189. Raii Syn. Meth. av. 89. *Fringilla remigibus antvorsum luteis, extima immaculata, rectricibus duabus extimis toto, reliquisque apice albis.* Linn.

Linn. Faun. Suec. 195. *Carduelus*, *Carduellus*, seu *Cardella*, *Chrysomitres*, *Aurivittis*, *Zena sive avis Jovis*. Quorumd. Gallice: *Chardonneret*.

Carduelis, passere domestico minor, pondere suo 1½. unciam, longitudine, ab apice rostri usque ad extremitatem caudæ, 5½. digitos, latitudine tandem, seu spatio extensis alis interjacente, 9. digitos refert. Capite gaudet, corporis respectu, magno; collo breviori; rostro albedo, nigrida nonnunquam cuspide, exiguo, ac ½. fere digiti longo, crassiori ubi capiti nectitur, conii instar, ubi definit, cuspidato; lingua acuta; iride oculorum nucis colorem referente; basi rostri, circulo quodam ruberrimo circumdata, macula insuper utrinque nigrida ab oculis proficiscente ad rostrum. Maxillæ ejus conspiciuntur albidæ; vertex autem nigridus, linea insuper nigrida, latissimaque ad collum usque utrinque producta, & candoris terminum constituyente, ornatus. Occiput albidum. Collum ac pars anterior dorsi rubro-flavida, seu cinerea. Uropygium cum pectore, & lateribus eundem, at debiliorem colorem ostendunt. Venter albidum; alæ & cauda nigrum. Exteriorem insuper suam oram rectrices albidam; & pulcherrimam lineam transversalem flavidam, remiges. Adcuratiori interim examini subjectæ rectrices quum fuerint, prior quidem nigra, reliquæ alba quadam ora instructæ conspiciuntur. Imo (excepta tamen prima quæ nigra est) decem priorum ora exterior medii scilicet inferioris, flavido tincta pulcherrimo. Caudam 2. digitorum quæ longa est, duodecim constituunt plumæ, quarum binæ exteriores maculam candidam in extremitate, illamque magnam, subsequentes minorem, tertiæ nullam, quartæ denuo exiguam, quintæ tandem majorem ostendunt. Crura cardueli sunt brevissima, calcar fortissimum, omniumque longissimo ungue munitum. Inferior digiti exterioris junctura medii juncturæ nectitur; appendices tandem cæcales brevissimæ, & exiguæ, ac una saltem fellis vesicula apparet. Voce autem præ masculo fortiori, cantu longius producto, & plumis laterum cinereis, seu fulvis foemella, nigerrimis autem masculus gaudet. Quæ quidem sexus inter cardueles distinguendi criteria, constantia eidem, *Aldrovando* teste, inhærent. Cæterum societatis amica, & agminatim incedens, & cantus, & pennarum pulchritudine magni æstimatur ab omnibus. Animi, si dicere fas est, quum sit mansuetioris, facilis cicuratur, & statim ex quo captus fuerit, potum & cibum exhibitum captat, nec ulla vel hominis præsentia perturbatur, nec inquieto obvolatu, cavæ immissa, ut alii, terroris signa edere solet. Captivitatis perferendæ patiens, ejusdem *Aldrovandi* testimonio, vel cavea erepta libertatem fuga petere detrectat. Hyeme insuper carduorum, unde carduelis audit, & cannabis, lappæ, papaveris, ac rutæ granis, *Alberto M.* testante, nutritur. Quod si vasculum aliquod ex filo suspensum super vitrum aqua plenum constitueris, jucundissimo spectaculo, siti exstimulatam carduelem, (quarundam aliarum instar) pedibus arreptum sensim adtrahere filum, & sic restringere sitim videbis. Sic ægithum quoque & linariam, vascula bina alternis ascendentia ac descendentia, cibi, potusque sui receptacula, rostro suo admovendi facilitatem, dato studio acquirere posse, & quotidiana plurium experientia, & *Cel. Turneri* testimonium loquuntur. Quam denique in medio spinarum æque ac arboribus nidum construere scimus carduelem, foemellam, septenis ova ponere docet *Gesnerus*, octenis *Belon*; & pro sexus, ætatis, aliarumque circumstan-

tiarum varietate, variam esse pergit *VVillughby*. *Aldrovandus* tandem in Ornithologia, quadruplicem ejus ostendit differentiam.

Frischius *fringillæ carduorum* nomine salutatam, cavea inclusam vel hyeme medio acutissimo cantu ab omnibus posse distingui docet. Cæterum cum acanthide Canaria coire, & stirpem excludere mixtam peramat. Diutius quidem semen cannabinum, pro nutrimento eidem proficit, ast prodeuntibus annis, cannabi frequentiore ipsi adipem conciliante, & ad coitum excitulante, epilepsiæ obnoxia est. Cujus causæ aliquoties & quidam cedit vermiculus, lumbis illius inhærens, sæpius longissimus, angularis, & intercus; hic sæpius pelle perforata, sponte sua egreditur, sæpius illum rostro suo, quem si adtigerit, protrahit avis.

Aldrovandus est, qui primum inter aves locum pulchritudine, cantu autem secundum (primum scilicet lucinæ adsignat) carduelem tenere censet; ac si rarior inveniretur, majoris sane æstimatum fore, jam vero sua frequentia, fato rebus communi, viliorē haberi ducit. *Olinā* pro salutis vigore curaque habita vel 10. ad 16. numquam vero 20. annos carduelem adtingere scribit. Puer ego (sic *Justinus Goblerus*, in epistola ad *Gesnerum*) Moguntia carduelem, tertium & vigesimum annum agentem vidi, cujus rostrum & ungulas, ut cibum capere & perticam posset amplecti, quavis hebdomade a sordibus contractis expurgabant. Cavea sua extracta, nec viribus ad volandum instructa, quomodocumque reponeretur, jam prona, jam supina remanebat, debilis adeo, ut nec pedibus amplius insistere posset, canitie tota obtegebatur. Continuum cantum carduelis, adpropinquantibus aliis, quasi auxilium implorando, vehementius extollere solet, & eo usque producere, quo vel mille alias accersitas, aucupis expectationi obtulerit. *Belonius* illam fecundissimam dicit, nos autem quina tantum ova variegata, in nido suo, ex lana artificiose composito, vidimus. Quod si captos cum parentibus pullos caveæ incluseris, brevi carceris oblivionem induunt, & pullis suis educandis occupabuntur. Dubium non est, avem masculum fœmellam garrulitate superare, quum apud homines e contrario mulier virum loquacitate antecellat, sic *Aldrovandus*.

Græcis audit: *Acanthus*, *Chrysomitres*, *Poikilis*; Italis: *Cardello*, *Cardellino*, *Carduello*; Germanis: *Stieglitz*, seu: *Distel-Finck*; Anglis: *Gold-Finch*, Suecis: *Stiglitza*. Allobroges dicunt: *Charderaulat*, Provinciales: *Cardaline*; Vascōnes: *Carvinat*; Picardienses: *Cadoreau*.

Multo denique oleo quum abundat & sale volatili, non solum optimum stomacho succum, ac nutrimentum præbet digestu facillimum: sed & dolores colicos ex cruditatibus provenientes profligare solet; imo virtutis suæ sanguinem emendantis ergo, pro alimento contra scabiem, aliosque morbos cutaneos commendatur.

C O L U M B A.

V Astissimus est columbarum, specie diversissimarum numerus, quippe quibus qui delectantur, iisdem multiplicandis & sumtus profundere, & studium impendere solent, ac varias tandem, aliasque aliis pulchriores, singularioresque exsurgere vident species varias. Ex omnibus autem duæ sunt, præcipue Medicinæ, quæ cedunt usui, turtur scilicet, & colum.

Columba domestica; earumque descriptioni, Cel. *VVillughby* Ornithologiam; egregium fane opus, sequuti accingimur.

Columba. Offic. Lemer. 263. *Columba domestica*. Schrod. 316. Dal. Pharm. 426. Belon. de avib. 314. Aldrov. Ornith. 2. 462. Schvenckf. aviar. files. 237. Jonst. de avib. 62. *Columba*, sive *Columbus*. Ind. Med. 39. *Columba vulgaris*, Gefn. de avib. 245. Alb. Ornith. 39. *Columba domestica*, Livia. Charlet. Exer. 84. *Columba vulgaris*, Livia. Merr. Pinn. 174. *Columba domestica seu vulgaris*. *VVillughb.* Ornith. 131. Raii Syn. Meth. av. 59. *Columba cœrulescens*, collo nitido, macula duplici alarum nigricante. Linn. Faun. Suec. 174. *Columba cicut seu cellaris*. Nonnull. Gallice: *Pigeon domestique ordinaire seu commun*.

Tredecim suo pondere uncias *Columba*, ab extremitate rostri ad finem caudæ 13. longitudine, alarum extensarum ab alia extremitate ad aliam 26. latitudine, digitos attingit. Rostro donata est tenui, cuspidato, longo, vulturis simili, molli supra nares & quasi farina consperso; reliqua parte fulvido. Linguam habet nec duram nec bifidam, sed mollem, ac cuspidatam; Iridem oculorum flavo rubicundam; crura antè ad digitos usque plumis induta; pedes digitosque rubros; ungues nigros; caput cœruleo cinereum; collum nitidum, & pro lucis radiorum refractione varia, varios exhibens colores; ingluviem rubicundam; reliquam pectoris ventrisque partem cineream; dorsi extremitatem uropygio superiorem albam, ad humeros nigram, undulis tamen cinereis conspersam; rectrices 23. in quavis alarum, quarum exteriores fulvum; reliquæ, parte sua resecta, nigrum, obsecta autem pennæ secundi ordinis, cinereum præbent colorem; pennas, 10. priores rectrices, quæ obtegunt cinerei fortioris; cuspidæ reliquarum tantum non usque, ad corpus & barbas interiores prope ad caulem cinerei; exteriores nigri coloris. Inferiorem alarum partem, radices rectricium versus *Columba* ostendit albidissimam; caudam 12. pennæ 4½. digitorum longis, compositam; longioribus attamen mediis, quam extremis; quasvis pennarum apices nigros; earumque exteriorum binas, in externa tubuli parte albidas, cæterum nigras, ac infra obscuriores; plumas immediate caudam obtegentes, cinereas; ingluviem amplam ac lithospermæ granis nonnunquam repletam; appendices denique intestinorum brevissimas, ac ¼. vix digiti unius exæquantur. In album sæpius hoc columbarum genus, transmutare solet colorem suum. Cæterum non nisi duo ova ponunt, & *Aldrovando* teste, juniores ante coitum, fœmellas exosculantur, provectiores autem prima tantum vice suas. Fœmellæ vocis debilioris, masculi gravioris criterio, distinguuntur. *Aristoteles* cum *Plinio* & *Aeliano*, nec reflexo collo potum recipere, sed jumentorum instar, distento ore columbas bibere, docent. *Albertus M.* ad 20. annorum spatium columbarum ætatem protrahit. *Aldrovandus* ex teste fide dignissimo refert: patrem hujus, columbarum, aviumque curiosissimum, duos & viginti per annos columbam asservasse, quæ non nisi ultimorum 6. vitæ annorum tempore, fœmella sua relicta, pullos producere desiit. *Aristoteles* 40. iisdem ætatis annos adsignat. Excrementa vero columbina magnam feminibus, plantisque fertilitatem conciliare docet *Crescentiensis*; quæ vel cum semine, vel peracta feminandi labore terræ si injeceris, idem est, semper tamen una stercoreis columbini cista vel curru integro stercoreis ovini, pro virtute respondet. Id quod agricolis nostratibus usui venisse observamus.

Teste *Historia Regiæ Academiæ Scientiarum Tom. 1. pag. 140.* binarum columbarum dissectarum Oesophagus, majoris dilatationis capax erat, quam avis cujuscvis; & Aspera-Arteria inflata, turgescens adparebat ingluvies, nec tamen, quibusdam ductibus eo perducere potuisset aer, constabat. Adaptata autem nutrimento, quod deglutitum, suis denuo præbent pullis, singularis illa constructio videbatur. Quæ si angustior foret, atque strictior, vel concoctum prorsus, vel nimis variatum evaderet alimentum antequam nidum parentes peterent, compressionis namque motum plurimum facere ad digestionem, dilatatum vero Oesophagum, & aerem, qui ingluviem explet, ea qua ibi reconduntur, a concoctione præmunire novimus.

Binorum interim, singulis vicibus, quæ ponunt columbæ, ovorum alborum, alterum communiter fœmellam, masculum alterum, nonnunquam tamen vel binos masculos, binasve fœmellas continere scito. Producendo autem quovis ovo, repetito opus est coitu. Pomeridiano plerumque tempore ova sua emittit fœmella. Quæ, si emisit, excludendi sese labori accingit, ita tamen, ut triduo toto emittendis, tum quindecim diebus subsequens, excludendis occupata, ab 3. vel 4. hora pomeridiana, per totam noctem ad decimam matutinam diei subsequens, iisdem superseadeat, tum vero masculus ad quartam usque pomeridianam & suas vices expleat, fœmella autem cibum tunc sumat atque quietem. Quartam tandem pomeridiana iterum in masculi locum succedat; continuato semper usque dum exclusa fuerint, alterno utriusque studio. Quod si altera reditu segniori, tempus præscriptum absentia sua transgrediatur, altera nido relicto, alteram revocat, & ad officium adigit. Jam vero pulli recentes exclusi per tres, quatuorve dies vitæ primos, nullo vel cibo egent, vel potu, sed continuato tantum calore. Et hujus quidem cura fœmellæ relicta, siquidem non nisi per quædam momenta, cibum capiendi ergo, nidum relinquere solet. Per octo subsequentes fere dies, alimentis eosdem alit fere digestis, quæ bis, terve per diem gutturi eorum intromittere solet; masculus nempe fœmellæ, mater masculi recentis nati. Tum autem auge-scentibus tenerorum viribus, solidiorem sensim illis præbent victum. Duodecies, imo terdecies per annum columbæ fœcundiores, ova ponunt, pullos excludunt; & ne quicquam temporis in cassum abeat, ova simul & pullos suo nido detinent; quos, dum vires ad volandum accesserint, nido pater expellit, & ut ipsi sibi alimentum conquirant, adigit. Quod si cum mare quodam alio coiverit fœmella, ille moecham spernit, & vel prorsus relinquit, vel castigaturus revertitur. Duos etiam mares, suæ quemque fœmellæ pertæsum, facta conjugis permutatione, ac feliciori vinculo nexos, haud perturbati amoris consortio exinde gavisos fuisse vidimus.

Pulicibus pediculisque infestantur columbæ, easque profligaturæ sæpius se aqua abluunt, exinde autem arena obvolvunt. Columbariis detentæ, per æstatem, cibum sibi ipsæ conquirunt in campis & agris; hyeme autem, dum nive terra tegitur, hominum curam pabulumque expectant. Festinato plerumque volatu feruntur, citiori tamen, si milvum, vulturemque insidias sibi struere cognoverint. Auditum insuper, & visu gaudent acerrimo, nullis etenim armis, nisi hisce instructas easdem voluit natura. Hominum item, aviumque societatem peramant, quærunt, tinnunculi saltem præsentiam tremendo extimescunt, quippe quem nullis, quas arripuerit, parcere noscunt.

noscent. Felle illas carere docet proverbium, & physica veritate & morali destitum, quippe quæ ira excitata, ad mortem usque conflictari solent interdum. Hos item, qui fellis vesicula columbas carere docuerunt, merito, ac suo jure ridet *Galenus*.

Græcis: *Peristera Oikidia*, Italis: *Colombo domestico*, Germanis: *Haus Taube*, Anglis: *Common Pigeon*, seu *Dove*, Suecis: *Dufva*, nominibus, venire solet columba domestica. Vox Gallica: *Pigeon*, seu *Pigeonnau*, ex Latina: *Pipio*, derivanda videtur.

Multo sale volatili, & oleo, ac aliquibus particulis terrestribus, quæ gaudet columba, junior præsertim, frequentissimo omnium venit alimento. Tunc enim tenera carne gaudet, succi plena, concoctu facillima. Procedentibus autem annis, aridiorem, crassiorem, ac concoctu difficiliorem induit carnem, humoresque melancholicos & phlegmaticos subministrat. Hinc & alii omnem columbarum usum, tamquam saluti contrarium interdixere; inique autem, quippe juniorum præsertim, carnem, & saluti convenientem, & concoctu facillimam esse nemo umquam negabit. Omnibus enim, cujuscumque vel ætatis fuerint, vel corporis temperaturæ, & quovis tempore, quemlibet, aut parciorem earum usum illis commendabimus, qui biliosi seu melancholici sunt temperamenti; ventrem enim paullum adstringere solent.

Medicina tandem vel columba integra, vel sanguine ejus & stercore utitur. Columbam viventem ad dorsum longitudinem dissectam fumantem adhuc, Apoplexia, Lethargia, Phrenetide, ac febribus malignis laborantis capiti adplicare solent. Imo pedum plantis subditur ad retrahendos cerebrum, qui infestant humores, si Phrenetidi maligna febris accesserit. Nec non pleuritide excruciat lateribus adplicetur. Quæ omnia experientia nostra probata commendamus. Partibus etenim volatilibus poros qui cuti sunt, aperiendo, & transpirationem adaugendo, detentis exitum patefacit humoribus, eosque adtenuando, & discutiendo, ex parte adfecta in sanguinis circulantis massam reducit. Immerito sane neglectum ab hodiernis remedium; cui certior sapius, quam quidem tritis, effectum respondiisse experti sumus. Calidus adhuc sanguis columbæ, ad leniendas oculorum acrimonias, ac læsiones recentiores adhibetur. Masculinus autem, & regioni alis oblectæ subtractus, merito judicatur spirituosior. Sunt, qui cuticulam gutturis internam arefactam, & in pulverem redactam pro specifico contra dysenteriam commendant; hodie autem, quum de præstantiore Ipecacuanhæ efficacia ad compescendam dysenteriam constet: cuticulæ illius usus obsolevit.

Stercus columbinum nitri, vel salis ammoniaci copia abundans, calidæ, discutientis & resolventis est naturæ. Hanc, urinam promovendo exserit, ac eximiæ cedit utilitati, calculo laborantium & hydropicorum. Ex calcinato nimirum stercore isto, aquæ communis ope lixiviam comparant, illamque pro potu continuo præscribunt. Sunt, qui pro exaltanda ejus virtute, cinerem ex ilice, seu sarmento addere solent. Imo contra morbos eosdem, stercoreis columbini ℥j. ad ℥ij., in substantia, vel syrupo cuidam subacti, boli instar; vel vino optimo, per noctem infusi, deinde autem absque expressione colati, exhiberi solent. Circa externum stercoreis columbini usum ante omnia notatu venit, quod, quum ex abundantia Salis Am-

moniaci nitrosi, naturæ sit calidissimæ, pellem, si diutius inhæserit, adurat, & rubore adficiat. Sic *Ephem. Germ. Dec. II. anni V. Append. pag. 76.* testantur; puerum quemdam, ex stercore columbino, in oculos delapso, videnti facultatem amisisse; imo sterquilinium, ex stercore columbino congestum, & sole incalescentem abiisse in flammam. Ex quo quum de activitate stercoreis constet, quare emplastra ac cataplasmata caustica & rubificantia ingrediatur, vides. Contusum scilicet, cribroque transmissum, femini sinapis vel nasturtii admisceatur; sicque contra morbos chronicos, ut arthritidem frigidam, vertiginem, hemicraniam, dolores habituales colli, laterum atque lumborum, brevibus, ubi vesicatoria, ægrotantis molitiei parciturus, lenire studes. Teste *Ettmullero*, strumas profligandi virtute pollet, si farina, hordeo & aceto mixtum, iisdem adplicetur; imo oleo atque aceto commixtum, tumores serosos & œdomatosos, in articulationibus obortos citissime dissipare valet.

℞. Stercoris columb. calcinat. ʒj.

Croci orient. pulver. gr. xij.

M. & cum aliquantulo syrupi ʒ. radic. aperient. subig. f. bolus diureticus, cum pane oblato accipiendus.

℞. Stercoris columb.

Semin. anis. ana ʒiiij.

Cortic. aurant. recent. ʒij.

Infundas omnia in libr. iiij. optimi vini Burgundici, tum peracta 24. horar. maceratione, distilles per B. M. ad remanentiam $\frac{2}{3}$. ex liquore, & f. a. u. Cujus cochleare unum, vel nudi, vel aqua diluti, ad ciendam urinam, ad detergendos calculos glareamque renum, & contra colicam commendamus.

℞. Stercor. columb. pulver. ʒiiij.

Croci orient. ʒß.

Mithridat.

Theriac.

Semin. sinap. ana ʒj.

M. & add. f. q. Therebinth. f. cataplasma antipestiferum, bubonibus, ut citiores maturescant, adplicandum.

℞. Raphani filvestr.

Allii

Summitat. rutæ

Stercor. columb. ana ʒj.

Quæ omnia in mortario contundantur, ac aceto interdum irrorentur; circa finem addantur embammatis mustei ʒiiij. & f. cataplasma, contra arthritidem reascendentem, plantæ pedis adplicandum, & si inaruerit reiterandum.

Turtur. Offic. Schrod. 324. Dal. Pharm. 427. Lemer. 897. Merr. Pinn. 175. Belon. de avib. 310. Gesn. de avib. 267. Schvenckf. aviar. files. 362. Charlet. Exer. 85. Aldrov. Ornith. 2. 505. Jonst. de avib. 64. VVillughb. Ornith. 134. Raii Syn. Method. av. 61. Albin. Ornith. 43. Columba collo utrinque albo, pone macula fusca, Linn. Faun. Suec. 175. *Turtur vulgaris.* Quorumd. Gallice: *Tourterelle.*

Turturis si a rostri extremitate ad caudæ apicem perrexeris, longitudinem, 12. digitos, latitudinem ab altera ad alteram alarum extensarum,

21. explere scito. Rostro instructus est gracili, ab cuspide ad oris angulos 1. digiti longo, foris cœruleo-fulvo, intus rubicundo. Lingua insuper brevi, ac integra, iridi oculorum rubro-flavida; oculo, quem circulus glaber ruberque circumdat; pedibus rubris; ungulis nigris; digitis ad fundum usque fissis; digiti medii ungula, parte sua interiore, cuspide donata; capite præter ea, & dorso medio cœruleo, seu cinereo, ut solent columbæ; spatio humeris intermedio, ac uropygio rubro-sordido; gutture pulcherri-
 mum vinum suo colore, referente; colli lateribus, pennis in extremitate albidis, cæterum nigris, monile quoddam efformantibus, confitis; alarum rectricibus extimis fulvis, mediis cinereis, intimis in extremitate rubicundis; ordinis secundi pennis cinereis, ordinum inferiorum nigridis; cauda tandem duodecim pennis conflata quarum extrema utrinque extremitatem præbet albidam, albidum & barbæ exteriores cauli vicinæ, colorem, interiores autem cinereo-nigridum; in subsequenti-
 bus vero sensim, sensimque decrescens candor, binis in mediis prorsus evanescit. Caudam denique exhibet turtur 44. digitorum longam; testiculos magnos 1. digiti longos, intestina 26. digitorum longitudinem explentia; appendices cœcales brevissimas; ingluviem amplam, ac cannabe interdum repletam; ventriculum musculosum, & Oesophagum huic superiorem folli glandulosi instar turgescens.

Turtures, sic *Belon*, hyeme delitescere, & pennas se exuere, alii docuerunt; nos autem, quum oris Europæ relictis, hyeme, Ægyptum inhabitare observaverimus, nisi contrarium edoceamur, referendos esse inter transinigrantes turtures, nec ex omnibus unum, nisi captum fortassis, seu ægrotantem in Gallia remanere censemus. Si enim, quod dicitur, hyeme depositas suas comederent pennas, quis quæso contra frigoris vehementiam foret locus? & si omnes, quidni & hi, qui caveis inclusi detinentur? Quod vero aliquibus saltem accadat in regionibus, in Græcia forsitan, *Aristotelis* patria, rarius alibi, inter possibilia reponamus. Cæterum communis omnium fert opinio: & milvos, & hirundines, grues, aviumque alias, quodam anni tempore, quibusdam regionum locis absconditas delitescere, quas ex alia terra in aliam transmigrando abire, in itinere sæpius experti sumus. Corpus animalium quodvis eget nutrimento, nec deficiente eodem diutius sustentari potest; quæ autem foveis hyeme delitescunt, bestię terrestres, æstate colligunt alimenta quibus hyeme vivant. Serpentes vero, temperaturæ corporis ab avibus diversissimæ, diutius victu carere valent. Turturibus insuper castitatis laudem tribuunt, altera conjugum mortua, alteram solitariæ sese vitæ dicare adserendo; *Aristoteles* 8. annorum ætatem tribuit. Cæterum, & nutrimentorum, & potus similitudine multa columbæ, quam descriptam dedimus, turtur accedit, quem bis in anno ponere ova, primo scilicet nostris, tum calidioribus in terris, quidni concedamus? æstate etenim sola apud nos commorantur. Nidum arborum in summitate construunt, binosque simul pullos excludunt. Minor autem turtur palumbe, & columba silvestri, rapidiore tamen ac illæ, & volatu fertur, & facilius avium rapacium effugit insidias. Acutiori tandem voce instructi, non nisi amoris stimulo exagitati vocem edunt, ac cantum; caveis autem seclusi, insolito silvestribus more, sæpius in anno ova excludere, albidumque præ se ferre solent colorem.

Agminatim porro, & adveniando, & abeundo incedens turtur, veris adventu nuntius; locis delectatur campestribus, solitariis, montium ac arena plenis; nidum depresso, & ex gracilibus arborum ramusculis arefactis construit in arboribus; eoque bina reponit ova oblonga, & albida; sapius interim hortos & virgulta visitatum descendit, jam sibi jam pullis nutrimenta quærens; variis tandem generis varii granis, milii præsertim, vescitur. Columbarum instar, frequentius tamen, ac injucundius gemere solet. Cæterum castitatis suæ fama nunc abiit in proverbium; altera etenim ex conjugibus mortua, secundas alteram nuptias abhorrere, & sola per reliquum vitæ tempus volando, continuo gemitu conjugis mortem deflere; nullis porro arborum ramis frondescentibus insidere; numquam haurire aquam limpidam, ne conspecta sua imagine, tristior conjugis ablata redeat in memoriam recordatio. Omnibus tandem, quæcumque agit, non nisi luctum, viduitatem, & solitudinis mœrorem indicare; omnia hæc inquam ingeniose excogitata recensentur, aut omnium experientia refragatur. Variis admodum modis captantur, & qua ratione saginandi sint, ex *Columella*, *Varrone*, *Palladioque* edoceberis. *Scaliger* autem tantum illos interdum adipem contrahere docet, ut ejusdem copia suffocentur. Non autem, nisi inspectis partibus internis a fœmella masculum discerni posse vult *Aristoteles*. Frequentiores eosdem esse Germaniæ, quam Angliæ in regionibus ex *Turnero* edocemur; quos Sueciæ in campis frustra quæri novimus. Trimestrium nomine illos salutavit *Plinius*, quos semestres potius dicendos esse credimus, quippe qui sex, nec trium mensium spatio nobiscum commorantur.

Græcum vero ejus nomen, quo *Trugon* audit, cum Italico: *Tortora*, *Tortola*, & Germanicum: *Turtel-Taube*, & Anglicum: *Turtle-Dove*, imo Gallicum: *Tourterelle*, pro quo & *Tourtrelle*, *Tourtourelle*, *Tortorelle*, *Turturille*, *Turtrelle* dicunt, omnia inquam, quæ recensuimus nomina cum Latino, vocis suæ ergo ipsi indita esse videntur.

Qui tandem oleo abundat, & sale volatili turtur, inter præstantiora, ac merito quidem, nutrimenta refertur. Qui quum carne gaudeat tenera, & succum præbeat optimum, & concoctu sit facillimus, omnibus cujuscumque sint ætatis ac temperamenti, modicum ejus usum commendamus. Anteferendus esto junior, tener, & pinguis, vetustior enim carnem coriaceam, duram, & juscule excoquendo tantum sufficientem suppeditat.

Cæterum eodem modo, quo columba domestica, & turture nos uti jubet Medicina. Præcipuus ejus usus ad coercenda menstrua abundantia & compescendam dysenteriam esse solet. Extractum ex illo paratur, cujus gr. iiij. ad gr. vj. contra morbos recensitos exhibent. Sunt, qui contra dysenteriam, turturem exenteratum, & gummi masticæ ʒij. confartum, veru probe assandum, tum ollæ argillaceæ probe obturatæ, quo exarescat, immittendum, tandem in pulverem reducendum esse volunt; ac pulveris hujus ʒß. ad ʒj., quovis matutino tempore, cum conserva vel syrupo rosarum siccarum subactum commendant. Adeps tandem, qui defluit inter assandum, emolliente ac resolvente virtute pollens, pro linimento venit ad corroborandos nervos, contra colicam nephriticam, arthritidem & dolores rheumaticos.

C O R V U S.

Corvus. Offic. Schrod. 317. Dal. Pharm. 423. Lemer. 281. Belon. *de avib.* 280. Gesn. *de avib.* 294. Schvenckf. *Aviar. Siles.* 244. Jonst. *de avib.* 23. Charlet. Exerc. 75. Merr. Pin. 171. Aldrov. *Ornith.* 1. 694. Willughb. *Ornith.* 82. Raii Syn. *Method. Avi.* 93. Alb. *Ornith.* 19. *Corvus ater*, dorso *cœrulescente*. Linn. Faun. Suec. 69. *Corvus simpliciter*, seu *genuinus*. Nonnull.

Corvus pondere suo 34. uncias; longitudine, ab apice rostri ad finem caudæ 25. digitos; latitudine tandem extensarum alarum 4. pedes exæquat. Rostrum ipsi est robustum, crassum, cuspidatum ac nigerrimum. Maxilla superior aliquantulum adunca, nec adeo ut accipitris. Maxilla inferior recta. Lingua lata, bifida, hirsuta, subtus nigrida. Oculorum pupilla duplici tamquam circulo, exteriori cœruleo-cinereo, interiori cinereo fulvo circumdata. Nares a capite deorsum deflectentes, pilisque hirsutis constitutæ. Corpus totum nigerrimum, cœruleum quemdam splendorem, in cauda præsertim & alis conspicuum prodit. Ventris color debilius vergit in fulvidum. Medium dorsi plumis minoribus saltem obtectum, etenim pennæ humerorum longiores totum dorsum obtegunt. Viginti insuper sunt rectrices, quibus alarum quævis componitur, earumque secunda primam longitudine superat, tertia secundam, quarta denique omnium longissima, tertiam; tubi autem omnium a sexta ad decimam & octavam, ultra barbas cujuscunque plumæ prominent, & in acutam cuspidem exeunt. Caudam ejus 9. digitorum longam duodecim constituunt pennæ, quarum exteriores sensim decrescente brevitatem, breviores sunt interioribus. Ungulis corvus munitur aduncis, magnis, majoribusque calcaribus. Digitus exterior medii primæ articulationi nectitur. Hepar in duos divisum ab it lobos. Vesicula fellis amplior, intestinis adhæret. Intestinorum longitudo est 43. appendicum cœcalium vero, 1. tantum digiti. Guttur ejus sub rostro dilatatum aliquam efformat crumenam, qua pullis adferenda alimenta detinentur. Stomacho autem rugoso instructus, quidquid obvenerit rostro, corvus devorat; etenim & granis, & insectis, imo etiam quadrupedum, piscium, aviumque cadaveribus, præterea avibus viventibus vescitur, quas rapacis instar, arreptas dilaniat. Quondam unum, duosve corvos albos vidimus. Falso autem, ubi de corvis versicoloribus agit *Aldrovandus*, frequentiores eos esse ait apud Anglos, qui enim rarissimi apud nos conspiciuntur, ex aliis terræ oris, tamquam spectatu digni & miratu advehuntur. Lubentiores equidem regionibus septentrionalibus, sempiterna nive obtectis, & candidos adsignamus corvos. Exemplo etenim veniunt animalium reliqua, ut ursi, vulpes, lepores, pernice, turdique, suum ibidem colorem transmutantes in albidum. Causam vero vel in imaginationis vehementia, nivis candorem continuo cogitantis; vel in atmosphæra frigidior, colores immutante, quæras. Cæterum, quem & cecurari, & artem aucupariam edoceri posse referunt, corvum, ubique frequentissimum, & cujuscunque aeris permutati patientem, nec frigore, nec ardore confectum esse; ubi autem nutrimentum abundantius reperierit, diutius detineri, ac solitudinis, (ut dicunt) amicum, nidum suum, accedente *Aldrovandi* experientia, vel mediis in urbibus populo constipatis, exstruere novimus. Nidos autem jam arboribus

ribus proceris, jam turribus vetustis, in Anglia quidem ineunte Martio ; nonnunquam citius effingit ; quaterna ad fœna ova , viridia debiliora , & in cœruleum vergentia , nec non maculis radiisque nigridis distincta eo deponit .

Quæ de eximio, quod corvum vivere dicit, vitæ spatio recenset *Hesiodus*, meram quamvis redoleant fabulam: nos tamen avium quamque, hinc & corvum longævum esse diximus supra, nunc confirmamus.

Falso autem communis vulgi sententia corvi fœmellam fert esse cornicem . Corvorum ex genere, sic *Belon*, maximus sine dubio, corvus est, tum cornix frugivera, Gallis: *Freux*, seu *Grole* dicta, & hanc tandem cornix nigra, quam & corvulum nuncupant, excipit. Cæterum quum cadaveribus præsertim nutriatur corvus, rostro illum fortiori, cuspidato, parumper excavato, nigro, utrinque acuminato, & in radice barbato, instructum esse voluit natura; quem immunditiei genere omni viventem, solum sane ex avibus, cibo nostro judicamus indignum; pulli tamen ejusdem nonnullorum palato arrident. Aquilam fere magnitudine exæquat, & nigerrimo plumarum colore superbit corvus. Clamoris sui ergo horribilis, a Græcis *Corax* adpellabatur. *Colas* vocabulum cantu suo articulate proferre solet, cujus causa & *Golas* dicitur. Verba proferre addiscit. Et totam per Angliam, gravioribus pœnis, ne quis corvos lædat interdictum est, illos namque & cadavera, & pisces ex mari in oras dejectos devorando, aerem ut inficiant impedire credunt. Volandi jamjam facultate callentes & viribus, pullos nido expellunt parentes, ac tota, quam ipsi inhabitant regione profligant; sufficienti etenim nutrimentorum quantitate quasi constipati vivere cupiunt, & filiorum vicinia sibi metipsis fame tandem pereundum fore extimescunt. Hostem vero corvus habet milvum, suam sibi prædam surripientem, cum quo & acrius sæpiissime certamen inire solet. *Plinius* corvi mentionem facit, Romæ, Tiberio imperante, celeberrimi. Linguae autem cuspide lata ac forti instructæ, nec non in radice probe admodum rotundæ ergo, facilis articulate profert omnia. Pennæ ejus muniendis clavicordiorum lingulis tangentibus inserviunt.

Antiquiorum aliquis fœmellæ, dum sola pullorum exclusionem occupatur, masculum alimenta adportare docet. Imò incubationis tempore fœmellam multo pinguiorem esse masculo observatum est, quippe qui eximio adeo amore conjugali fertur in illam, ut neglecta sui ipsius cura, omnem alimenta quærendi ac adportandi diligentiam conferat in fœmellam. Alii rursus, ast frivole narrant, quod septem per dies primos, ex quo exclusi fuerunt pulli, a parentibus derelicti, ac omni alimento carentes, nigrescant; his vero peractis, copiosius adportato cibo a parentibus reficiantur. Vix refutatu digna est aliorum opinio: qua per rostra corvos coire docent. Originem fabulæ illam fuisse censemus, quod corvos, columbarum instar, ante coitum sese exosculantes viderint.

Corvus, furandi instinctu, quum vasa argentea, vel æs excusum reperierit, auferre solet atque abscondere. Animo acer, nondicam temerarius, pullos gallinaceos ex villis areisque rapit; rudior vero segniorque volans sæpius prædam negligeret; ast acerrimo gaudet odoratu, cujus ope cadavera e longinquo percipere valet. Imò si fides esset habenda superstitiosæ quorundam opinioni, qui corvum, tecta domus transvolantem, five iisdem fre-

frequenter residentem, nuntium esse statuunt imminentis mortis cujusdam ædibus istis detenti: facti rationem in cadaverosis corporis morti proximi exhalationibus, quærendam esse ducimus. Rudiori suæ vocis sonitu, vel terrorem iniicere potest. Ex *Linnaeo* docemur: corvum Suecis quasi sacrum venire, nec ab ullo eorum umquam lædi, imo cælo sereno, summam finire auram, & strepitum quemdam, qui: *Clong* audit, tunc edere. Gutturis amplissimi ergo, deglutita ossa evomendi facilitate gaudet. Per paria plerumque corvi incedunt & cohabitant, quorum bini si arbuſtum occupaverint, eidem accedere non audent cornices. In variis (ait *Anderson*) Islandiam quæ cingunt insulis, desertis præcipue, unum saltem par corvorum, illudque vetustissimum reperierunt; hoc regionis spatium violentia occupatum, violentia continuata tenet; corvos advenas adgreditur, debellat, ac aquilarum more, patrio solo expellit. Nec veritatis fundamento superstructa tenemus ea, quæ de admirandis corvorum qualitatibus scripta reliquit *Jonſton*, dum v. g. per 30. imo 40. annos conjugali societate junctos corvum marem atque fœmellam vivere, numquam fidem conjugalem lædere, & conjugæ mortuo, secundas nuptias abhorrere recenset.

Albi corvi ab omni tempore, singularissima naturæ phænomena habiti fuere. *Cel. Klein*, nostri temporis Physicus & scientia profunditate & integritatis fama conspicuus, corvum album videndi sortem sibi obtigisse refert in *Prodromo ad Historiam Avium*. Sic & *Joannes Cajus*, anno 1548. in Ducatu Cumbriæ, duos vidit corvos candidos, eodem nido captos, & accipitrum instar artem aucupariam edoctos. Curiosorum adtentione digna sunt, quæ in *Ephem. Germ. Dec. II. anni V. pag. 378.*, a *Gabriele Claudio*, D. relata leguntur: Corvum vidimus, curiosi cujusdam studio nutritum, qui primo quidem nigerrimus, aſt redeunte tempore verno, 3. ad 4. plumas niveas, in alis obortas ostendebat. Has sibi ingratas, ut videbatur, continuo roſtri conatu evellere quærebat, aſt quum altis jam radicibus essent defixæ, triduum ad quatrimum eradicanſis iisdem, multo quidem sanguine profluente, consumſit. Fruſtra deſudabat, redeunte proximo vere redierunt plumæ albidæ, rediit illas avellendi deſiderium & labor; redierunt varios per annos omnia; uſque dum mors violenta ſucceſſerit. Huc referas, quæ de corvis albis & nigris, quos *Fero*, insula nutrit, leguntur in *Actis Medicis Haſnienſibus*, Auſt. *Cel. Thoma Bartholino*.

Corvis albedinem induendi artificium ſequentibus docet *Franciſcus Paulini*, D. in *Ephem. Germ. Dec. II. Anni VI. pag. 68. App.*: Parens deſunctus, quum recutitum quemdam inter nundinas, Francofurti habitas, 8. corvos albidiffimos magni vendentem vidiffet; ſecretum ab illo coemit, ſtetitque promiſſis, nulli enim umquam ejusdem copiam fecit. Num ſuis experimentis comprobatum habuerit, fruſtra quæſivi in MSS.tis; ego autem ex illis depromptum nunc publici juris facio, eo potius, quum & *Celeb. Joh. Dan. Horſt*, in *Diſſertationibus ad Hippocratem*, ejusdem mentionem injeſſiſſe legerim. Quam recentiffime poſita corvi ova igitur adipe accerebro felis albi adfrica, tum gallinæ albidiffimæ, ac detentæ in loco cellæ proximo, aliove a ſole remotiſſimo & linteis albis obducto ad excludendum ſuppone. Num exſpectationi eventus reſpondeat, mea quidem experientia neutiquam conſtat. Inſtituas experimentum, ſi placet.

Corvum Itali dicunt: *Corvo*; Hiſpani: *Cuervo*, Germani: *Rabe*, Belgi:

Rave, Angli: *Raven*, Sueci: *Korp*. Gallica vox: *Corbeau*, dubio procul, ex Latina: *Corvus*, derivanda venit. Pulli ejus *Corbillarts*, *Corbillats*, ut cornicis, Gallice: *Corneille*, pulli: *Cornillarts*, *Cornillats*, *Cornillons*, *Corneilleaux*, dicuntur.

Multo fale volatili corvus abundat & oleo. Caro ejus, ut cornicis, nullius cibo venit, siquidem ex cadaveribus, piscibus mortuis, similibus, quibus vivunt, summum contrahit foetorem. Plebis tamen atque egentium palato ad corvum usque omnia arrident, hi igitur corvos teneriores pro cibo adpetunt; eorumque carnem cum cerebro vetustiorum contra Epilepsiam & arthritidem facere censent. *Ettmuller* pro specifico contra Epilepsiam commendat, cinerem corvi pullorum recenter exclusorum & calcinatorum, ejusque ℥j. bis in die, cum aqua Castorei destillata capiendam jubet. Testibus *Schrodero* & *Lemery*, adeps, sanguis & ova corvorum capillis nigrum colorem induunt. *Gabelkoverus* tandem, ovorum unum vel duo dysenteriam compescere, & sterco corvinum, sacculo inclusum, ac ex collo suspensum, dentium dolores profligare & tussim sedare docet.

℞. Corvum veterem, deplumatum, exenteratum, ac rescissis pedibus & rostro, ventrem ejus suo corde, pulmonibus & felle vesicula, paullo ante extractis, denuo confarcias, add. galangæ & semin. anis. ana ℥iij. Tum ollæ fictili, probe occlusæ immittas, ac furno, postquam panem jam coctum protraxeris, tradas. Exigente necessitate vel tribus hæc vicibus repetas, & ut adurat, caveas. Tum furno extrahas, & refrigerata reducas in pulverem, cujus ℥j. quotidie, per aliquod tempus, si placet syrupo papav. erratici subactam, boli instar, pani oblato involvendi, exhibeas epilepsia laboranti, & felicissimum remedium effectum experieris.

C O T U R N I X.

Coturnix. Offic. Schrod. 317. Dal. Pharm. 426. Lemer. 285. Belon. *des Ois*. 264. Gesn. *de avib*. 310. Schvenckf. *aviar. siles*. 247. Jonst. *de avib*. 47. Charl. Exer. 184. Merr. Pinn. 173. Aldrov. *Ornith*. 169. Villughb. *Ornith*. 121. Raii Syn. *Meth. av*. 50. Alb. *Ornith*. 28. *Tetrao pedibus nudis*, corpore griseo maculato, linea superciliarum alba. Linn. Faun. Suec. 173. *Perdrix nana* Theophrasto; *Quiscula*, *Quisquila*, *Ava'lea*, *Quaquila seu Currelius*. Quor.

Coturnicis figuram latiore atque in lateribus magis depressam esse scito, quam avis, Gallice: *Râle genistæ*. Ab apice rostri ad extremitatem caudæ 7½. digitorum longitudinem, & alarum extensarum spatium 14. digitorum latitudinem attingit. Rostrum ejus, ab angulo oris, i. fere digiti longum, magis depressam figuram præbet ac rostra aliarum. Maxillam inferiorem coturnix ostendit nigram, atq. superiorem albidam, in fulvum vergentem & cuspidatam. Iridem oculorum nucis colore conspicuam, membranam eorum nictitantem; ventrem, & pectus ex albido in flavum vergentem; ruborem aliquem in gutture intermixtum; radium quemdam longum, latum & nigrum, sub maxilla inferiore, subtusque tendentem; lineam albidam oculis superiorem, caput medium transeuntem; caput nigrum, fimbriis tamen pennarum rubris seu cinereis, ac in medio partis colli inferioris, plumarumque omnium dorsum obtegentium, linea albida-flava notatis;

tatis; reliquam plumæ partem nigro ac rubro-cinereo colore variegatam; radium quemdam sub alis longum, in medio album, exterius utrinque rubrum, nigroque mixtum; alarum rectrices fulvas, lineis transversalibus ruberrimis distinctas; ordines plumarum minorum quavis in ala ejusdem, rubicundi scilicet coloris; caudam breviorē, nempe vix binos longitudine digitos adtingentem, ac duodecim pennis nigris, lineasque rubicundas transversales ostendentibus, compositam; pedes pallidos, pelleque squamas potius, quam anulos referente, obtectos; pedum plantas flavidas; digitos exteriores, per membranam medio, ad primam ejus articulationem usque, junctos; fellis insuper vesiculam unam; testiculos, corporis respectu maximos; stomachum musculosum, & huic superiorem œsophagum videbis, ingluviei instar dilatatum, anteriùsque glandulosum. Coturnices captaturus sequenti utitur fraude: Retia sua summo mane extendens auceps, herbis delitescit, & fistula quadam coturnicis vocem imitatur. Masculus igitur fœmellam adesse credit se invitantem, & citius eo accurrit; tunc autem rete quum intraverit, prodiens sese exhibet auceps, cujus ad spectu perterritus fugam quærit, laqueum invenit, & capitur. Lasciviæ, obscœnitatisque suæ ergo, coturnix, perdicis instar, decantatur. Mare statim, animo acerrimi frequentia inire certamina, hinc & ab aliis captari, & ut galli, præliandi arti adaptari solent. Sic & *Aelianus*, Athenis quondam hujus generis certamina populo jucundissima, & vel ipsis ludis gladiatoris frequentiora fuisse; *Aldrovandus* autem hodie adhuc, in nonnullis Italiæ urbibus, Neapoli præsertim, aves, certandi ergo committendas nutrirî docent. Idem ille quomodo animum illis addere possis, atque fortitudinem recenset. Transmigrantes cæterum coturnices, ac frigoris impatientissimæ, ingruente hyeme, regiones calidiores adeundo, vel maria transire solent, ut *Belonii* observationibus edocemur. Hæc *VVilloughby*.

Coturnicem, sic *Belon*, omnibus notissimam, transmigrantibus adnumeramus, communi opinioni obloquentes, & validissimis observationibus fultim adserimus. Etenim nosmetipsi, & autumnò & vere, mari Mediterraneo inhærentes, tum advenire, tum avolare coturnices vidimus. Ex Rhodo quum Alexandriam peteremus, magnam conspeximus copiam coturnicum, ex Septemtrione meridiem versus tendentium; plures etiam nave, qua vehabamur captas. Proxime autem elapso vere, quum ex Zacyntho, insula, ad Peloponnesum & Eubœam pergeremus, coturnices ex meridie Septemtrionem adeuntes observaveramus. Imò & eo tempore multas avium transmigrantium à nautis nostris captas fuisse recordamur. Variæ illarum ciborum nobis veniebant, & ingluviem tritico adhuc intacto repletam, citissimi trans mare cursus testem, exhibebant. Nec tamen omnes decedere, cum *Aristotele* statuimus, remanent pauciores, fatemur. Alii, aut sinistre, ponderis sui ratione habita, inferunt: quod hyeme delitescant, & ex pennis suis vivant, nec alias regiones adeant. Naturæ igitur volandi donum debent, illaque conductrice, sine ullo aberrandi periculo & timore, noctu potius, quam interdiu, & quidem binis incedunt, summam aeris regionem volando findunt, sicque aves rapaces sibi inimicas, effugiunt. Jam, quum stipulis, aliisve, quibus delitescere possent, exuti sint agri nostrates, quum grana, earum nutrimentum deficient: tunc alias adeunt terras & remotissimas, ubi (sic censemus) tunc segetis tempus, quum nobis fuerit

hyems; antipodes visitatum abire videntur. Sic & antiqui scriptores Græci atque Latini, patria ipsis loca Syriam & Asiam totam, eadem ratione coturnices relinquere docent, ac regiones Septentrionales, Angliam, Sueciam, Hiberniam, Germaniam aliasque, hyeme missas facere consueverunt. Pro vario anni tempore, varias coturnici insidias struant aucupes. Advenientes scilicet, frondescentibus agris, mares quærunt foemellas, retibus capiuntur. Fistulas enim cupreas vel osseas excogitarunt homines, Gallis *Courcaillets* dictas, harum ope auceps foemellæ vocem imitatur, mas deceptus rete incurrit. Coitus tempore elapso, nullum amplius sonum edunt, inter stipulas detinentur, ex granis aristarum, inter metendum delapsis, vivunt. Tunc alia ratione captantur. Canis venaticus enim edoctus est, ut gradum sistat conspecta coturnice, quam quum gradum sistendo canis detexerit, venatores duo, rete latum, *Tirasse* Gallis, ex fimbriis arripiunt, expandunt, sicque & canem & coturnicem obregunt. Cavea autem angustiore detineas coturnices necesse est, alias enim continuis in altum saltibus, caveæ summitatem adtingendo, caput contunderent. Hinc cavea cubiti r. alta, & quinque ad senis ordinibus seu contabulationibus sibi invicem superstructis divisa, vel 300. coturnicibus continendis sufficit. Spatium binis ordinibus interjacens coturnicis altitudini respondeat, potumque & cibum contineat. Terra depressum suum nidum construit coturnix, & æstate, nutrimentorum copia abundans, pinguißima est. Hinc quoque *Aristoteles*, pinguiora esse infert animalia frigidis in locis commorantia, quam illa quæ calidioribus degunt; provocat ad coturnices Græciam tendentes, quæ verno tempore advenientes, exigua, aut abeuntes majori pinguedine gaudent. Addit, eo ardentiori desiderio eas tunc ferri in coitum, quippe quæ ex calidioribus cœli regionibus advehuntur.

Testis est *Aristoteles*: advenientium agmini haud esse ducem, aut decedentibus vel quatuor interdum duces præire, alterum in locum alterius, vel defatigati, vel itineris pertæsi, vel in via subsistentis, succedentem atque constantem. Aut quis est, qui duces illos viderit umquam? Sunt qui quater in anno, coturnices nidificare adserunt, bis scilicet in regione, ex qua venerint, bis in illa quam adeunt. Pullos itidem anni primos, proximo Augusto denuo alios excludere dicunt. Mirum igitur, ait *Jonston*, non est, quod tanta sit coturnicum copia, quodque cum foemella, Maio mense ova incubante, capta, numerosa pereat posteritas. Cantum, omnibus notissimum, Aprile, mense, exordiuntur, & probe observato concentu, ter: *Carcaillot*, ab initio cantus repetere solent. Molis ponderisque ob causam, humi depresso volatu incedunt, & ut aves fluviatiles, pendentibus pedibus volant. *Aldrovandus* est, qui coturnicem, aquam ex qua haurerit, turbidam reddere scribit; quum elephas atque camelus, antequam hauriant. Teste *Alberto M.* exiguus est foemellarum numerus, quapropter coitus tempore plures sæpe masculos unam foemellam insequentes videmus. Idem ille rudiores foemellæ quam masculo, vocem tribuit; errat, voce enim prorsus caret foemella. Nec non magnitudine paullulum inferior est masculo, nec macula nigra, ut ille, in mento, notata.

Dena & quina ova versicoloria deponit, pullosque exclusos spatium educit, imo ut perdix & gallina suas sæpius sub alas colligit & fovet. Difficilis rariorque est coturnicum volatus, aut cursu frequentissimo incedunt

dunt ac rapido. Rarissima sunt, quæ album præbent colorem, sed nimio adipe sæpius suffocantur.

Græcum coturnicis nomen est: *Ortux*, Italicum: *Quaglia*, Hispanicum: *Cuaderuiz*, Germanicum & Suevicum: *Wachtel*, Belgicum: *Quakkel*, Anglicum: *Quail*. Gallicum vero, quo: *Caille* audit, Vir Doctiss. *Huet*, Auberriæ Episcopus, ex pennis variegatis ac fere squamas representantibus, desumptum esse censet. Squamam scilicet Galli dicunt: *Ecaille*. Nos autem: *Caille*, ex Italico: *Quaglia*, (Latino hodierno: *Qualea*, originem debente) derivare mallemus. Pull coturnicum, vel, si dicere fas est, coturniculæ, Gallice dicuntur: *Cailleteaux*.

Multum olei & salis volatilis continens coturnix, ætate ac carne tenera & pinguis vel procerum mensæ, pro delitiis adponitur; adpetitum inducit, optimum suppeditat chylum, & cuiusvis vel ætatis vel temperamenti fueris, modica tamen, proficiet. Varii sunt auctores in determinanda coturnicis qualitate. Alii enim optimum illas succum producere, & infirmis pariter ac sanis salubres esse nobiscum contendunt. Etenim nec nostra experientia finistros coturnicum effectus comprobavit; & carnem illarum substantiæ tenerioris esse, ac haud adeo compactæ, imo debita commixtione principiorum oleosorum & salinorum volatilium constare videmus. Interdum etiam concoctu evadit difficilior, dum scilicet nimius ejus adeps stomacho inhæret, eumque exonerat. Ast modico ejus usu hæc omnia evitabis. Alii e contrario; ut: *Galenus*, *Plinius*, & *Avicenna*, coturnices alimentum saluti infensissimum præbere arguunt; imprimis enim *Galenus*, multos in Phocide, Bæotia & Doride, ex quo coturnices comederant, convulsionibus, aliisque motibus epilepticis correptos fuisse recenset, & rationem quærit in helleboro, coturnicum istarum nutrimento. Hinc igitur plantam illam acerrimam, summo opere irritantem, & systemati nervorum infestissimam, coturnicibus eandem qualitatem nocivam communicare infert. Illi insuper, qui huicce *Galen*i sententiæ accedunt, coturnices ipsas epilepsiæ obnoxias, epilepsiam his facile communicare censent, qui illis pro cibo utantur. Ast lepores, agnos, capones, turtures, cæterosque quibus utimur frequentius, quique testibus pluribus, epilepsiæ subjacent copiosissimi, quidni, inquam & hos epilepsiæ causas nobis evadere docet experientia? Conciliandi sententias locus est, dummodo ea quæ in *Ephem. Germ. Cent. IX. & X. pag. 146.* recensita leguntur, referamus. Docet ibidem *Nebelius D.*, conjuges quosdam accepta, pro cœna, coturnice, vix hora exinde effluxa, motibus spasmodicis, & cordis palpitatione, aliisque symptomatibus convulsivis correptos, media jam nocte accersivisse Medicum, qui adhibitis statim remediis nervos confortantibus, symptomatibus medebatur, remanente tamen per aliquot dies, eximia corporis debilitate. Causam mali in coturnicibus quærebant, quum filii, aliis pro cœnacibus, nec coturnicibus usi, nullo ex symptomatibus correpti fuissent. Diligenter tandem expensis omnibus, qualitatem infestam contraxisse concludebamus ex lolio, eo anno humidior, inter frumentum copiosissimo, frumento enim præ aliis delectantur, ac pinguescunt; lolio autem cerebrum irritandi, & convulsiones producendi facultas inhæret. Rarior tamen sinister ille effectus apud nos extimescendus erit, quippe captæ a nostratibus, coitus sui tempore coturnices, carne destitutæ, caveis plerumque inclusæ, milio,

frumentove pinguefactæ, deperdita qualitate nociva, & salubriore demum induta, nostro cedere solent alimento. Coturnices igitur recentes captæ num sint salutare dubitandi interdum locus est; ast caveis detentæ ac pinguescentes, delicatissimum æque ac saluberrimum alimentum præbere certo poteris esse certior.

Medicina tandem iuscula ex coturnicibus, emollientis eorum virtutis ergo, ad relaxandum ventrem constipatum; & adipem ad profligandas oculorum maculas; excrementa autem arefacta, ac in pulverem redacta dosi ʒss. contra Epilepsiam commendare solet.

C U C U L U S.

Cuculus. Offic. Schrod. 317. Dal. Pharm. 429. Lemer. 294. Bellon. de avib. 132. Gesn. de avib. 319. Charlet. Exer. 73. Schvenckf. av. fiesf. 249. Willughb. Ornith. 62. Raii Syn. Meth. av. 97. Cuculus alter, Aldrov. Ornith. I. 416. Cuculus minor, Jonst. de avib. 14. Cuculus rectricibus nigricantibus punctis albis. Linn. Faun. Suec. 77. Cuculus nostras seu vulgaris. Quor. Gallice: Coucou.

Frequentissimus in Anglia cuculus, in eo saltem a priori Aldrovandi cuculo differt, quod turdi, vel merulæ potius, quam palumbis rostro simile præbeat rostrum. A rostri ad caudæ extremitatem 12. digitorum exhibet longitudinem. Maxillam rostri superiorem aduncam, inferiore longiorem, maximaque sua parte fulvo-nigridam; inferiorem albo flavidam; internam oris partem cum lingua croci obscurioris colore; linguam integram, duriore, ac pellucida extremitate instructam; iridem oculorum, avellanam colore exæquantem; nares rotundas, latas, & rostri superficiem ultra prominentes, quales in nulla avium hucusque observavimus; palpebrarum inferiorem majorem; cilia flavida; guttur, pectus, & ventrem albidum; lineisque fulvis fere integris transversalibus distinctum, quas cum altero Aldrovandi cuculo, habet communes; lineas fuscas frequentiores, in gutture obvias; plumas vero capitis fulvas oris nigridis, ac unam, binasve maculas in capite albas; dorsi, colli medii, & humerorum pennas longiores, fulvas, oris albidis, ac exiguo quodam rubro, fulvido intersperso colore; uropygium cæcio-cinereum; alarum rectrices negras; singularum oras exteriores, (nisi primam excipias,) rubris maculis conspersas, oras autem priorum interiores maculis albis transversalibus distinctas; apices omnium nigros; pennas dorsum obtegentes ejusdem, quo hæ, quæ alis superjacent, coloris; caudam, corporis respectu, longam, decem compositam pennis, quæ maculis albis, cordis figuram representantibus, utrinque consistunt, & spatium unius digiti singulæ inter se distant; omnium insuper, nisi duarum, quæ sunt in medio, oras interiores, & extremitates maculis notatas albidis; pedes, & ungulas flavidos; calcaria bina, quorum interius minimum, digitorum minimo magnitudine accedit; ungulas media sua parte inferiore parum concavas; digitos tandem anteriores membranæ ope, ab angulo ad primam articulationem usque cohærentes. Dissecti quondam cuculi stomachum erucis, aliisque insectis plenum deteximus. Nec curruca saltem, quam teste Cotgrave: Moineau de Haye, Moucherolle, Bunette, Passe-Buse & Mary-Cocu nominibus Galli nuncupant, sed & alias ex aviculis, ut;

ut: alaudam, fringillam, aliasque, nutricis in cuculum partes supplere novimus. Ipsemet ego, adstantibus aliis, motacillam cuculo juniore alimenta præbentem observavi. Numquam sibi suum cuculus construit nidum, sed aviculæ cujusdam nido illius ova subtrahit, ac sua eo reponit. Quæ non solum excludit aviculæ, sed & exclusos pullos, suorum instar, sollicito studio, usque dum volandi facultatem adtulerint, nutrit. Res sane admiranda digna est, & singularior, quamque, nisi mea ipsius experientia cognoscerem, nullus umquam naturæ instinctui tribuisset. Naturam eadem semper ac immutabili, quam sapientem constituit, lege, incedere scimus, & agere. Hic igitur matrem si res postulaverit, nidum construere, & pullos excludere, & exclusos elevare vides. Hyemis tempore autem, utrum cuculus arboris crena, vel alio quodam loco delitescens, frigoreque torpescens, vere ingruente resuscitetur; an frigoris impatiens, alias, illasque calidiores regiones, hyemis sub initium, adeat, ignotum. *Aldrovandus* diutiori experientia edoctus refert, quod vel arborum fissuris, vel terræ, lapidumve cavitatibus cuculus abscondi soleat, cujus vocem aliquondam rusticæ Tigurense, atque Basileenses, truncum aliquem igni admoventes, exaudivisse recensent. Quum enim, teste *Aristotele*, adeo frigida sit natura, & hyeme suis se exuat, pennis: quid mirum si hyemis frigus evitatum, cavernis sese tegere quærat? Alii sunt, quos recensentes audivimus, vel medio hyeme, frigore tamen solito mitiori, & clementiori cœlo, voces edentem cuculum se ipsos percepisse. Jam, quum transmigrare novimus ex avium genere plures, & pro anni tempore vario, varias petere cœli regiones, quidni & cuculum hos inter referendum judicabimus? Ego saltem neminem hucusque habeo, qui cuculum, vel arbore, vel alio loco delitescentem, hyeme se reperisse testatus fuerit. Epistola tamen quadam *Cel. Johnson* ad me transmissa edoceor: cuculum cavea detentum hyeme durante, omnem alacritatem perdidisse, nec utrum nutrimento minus proprio, an alii rationi ignotæ causa infuerit, constituisse; scabie tandem, ac ulceribus in corporis superficie obtectum exspirasse. Antequam vero minores cuculi primas deposuerint pennas, pulcherrimis variisque coloribus ornati conspiciuntur. Ex aucupibus tandem Bononiensibus acceptum prodit *Aldrovandus*: alios cuculorum majores esse, minores alios; majorum vero binas species, vario saltem pennarum distingui colore; minores tandem a majoribus non nisi magnitudine differre. Nobis nullum cuculorum, de quibus dicunt minorum conspiciendi copia fuit hæc *Villoughby*.

Fusiores autem cuculi, & maris, & fœmellæ descriptionem ex *Linnaeo*, si placet, haurias. Is enim utrumque fere sibi similem visum fuisse, masculum tamen angulis oris flavidis, ut passeris juniores, capite porro & dorso & collo cinereo, albidoque, hoc quidem maculis fuscis destituto, ventre tandem obscuriore distinctum; fœmellam vero lineis in collo fulvis, præ mare ornata fuisse; brevibus: varium cuculi esse colorem dicit, qui num ex sexu vario petendus, num ex ætate, num ex specie, incertum. Pennis colore admodum singularibus instructam quondam vidimus cuculum fœmellam, merulæ instar, seu accipitris masculi variegatam; quæ quidem ejus maculæ vulgari rusticorum opinioni causam dedisse videntur; qua inducti in accipitrem, seu merulam cuculum abire credunt, & vice versa.

Picorum generi cuculum adnumerat Cel. *Frisch*, quem, ut pici, non solum vermibus nutriri, sed etiam duobus digitis anterioribus, totidemque posterioribus instructum esse constat. Attamen & alias ex avium numero, infectis arborum vesci, & digitorum structura psittacum cuculo similem esse, obiicit Cel. *Klein*. Sic &, quoad rostrum a psittaco pariter, ac pico differt cuculus, picus enim anguli instar efformatum ostendit rostrum. Fallax autem argumentatio habetur, qua ab eodem avium nutrimento ad idem genus proceditur. Suam vero experientiam sequutus, cuculi historiam describit *Frischius*, nos nostram addamus: Decimum & sextum agebam annum, quum in horto obambulans currucae nidum, ac ovum eidem inhærens detexerim, quod eximioris magnitudinis ergo aliunde profectum videbatur. Adveniens pater, cuculi ovum esse autumans, ut retrahere illud vetuit, cuculi erat, cuculus enim egrediebatur. Quem quum plumis deinde indueretur, in nido, eodemque horti loco relictum caveæ includebam. Aliquot exinde diebus, matutino tempore currucam caveæ cancellis inhærentem, & alas quidem ejus extra cancellos prominentes, caput autem, & collum cuculi ingluvie detentum reperi, quam dubio procul integram ille deglutiisset, nisi alis, & corpore, caveam egressis, impeditus fuisset. Ego autem cum avibus caveam in Academiam deportavi, ubi Cel. *Gottsched*, Physicam Experimentalem docentem audiveram. Vir igitur acutissimus currucam filio, unam, alteramve erucam pro nutrimento, adportare docebat, illum vero voracitate eo usque abduci, ut vix considerato nutrimento exili, quod adportavit, statim ipsi matris capiti avidissime inhians, imprudentia & gula potius, quam ingratitudine, patri matrique mortem adferat. En unicum quod compertum habeo, neutiquam tamen inter aniles fabulas ut *Frischius* ille credit, referendum.

Aliud adhuc ex teste fide dignissimo acceptum subjungamus: Junio mense ruri degens fœnifecas linariæ in nido cuculum nuperrime exclusum reperisse vidit, quorum præsentia quum nutrix impediretur, ut pullo cibum adferret, aliquot per horas nutrimento ille carebat. Tum inopia ejus commoti, paullulum a nido recedebant, quo liber matri relinqueretur accessus, quam statim exinde nido accurrere conspiciebant. Iterum redituram diutius expectabant, ast accedentes tandem suffocatam; devorantis eam filii rostro ac gutturi jam inhærentem conspiciebant.

Quomocumque autem res se habeat, cuculi fœmella, pro loco, quo ova reponat, avicularum infectis viventium nidos seligere videtur, tales sunt rubecula, chloris, alauda pratensis, Gallis: *Farlouse* dicta, aliæque. Nec non cuculum exclusum reliquos pullos simul exclusos ex nido proiicere in terram constat, ubi vel fame aut frigore pereunt; nutrimentum pariter per integros menses a parentibus expectare, & fame continua exstimulatum assiduo clamore eos insequi, nedum devorare. Tandem vero ab iis derelictum, sua sibi quærere alimenta, hæc omnia, inquam indubitata experientia constant. Præcipuo interim nutrimento villosæ ipsi veniunt erucæ. Nec singulis cuculis maribus singulas destinatas esse fœmellas credimus, quippe quos coturnicum instar, & fœmellarum quantitate superari, & coitus tempore agminatim unam fœmellam insequi, ac ejus causa frequentius certamen inire, videmus. Aliarum tandem avium ova deglutire cuculus dicitur, nos tamen, nisi experientia rei constabit veritas, non consentiemus.

Difficilior autem cavea inclusum nutrire poteris cuculum. Suum, quem conservabat *Frisch*, deficientibus aliis erucis, bombycibus, ac papilionibus, deinde hepate agnino, erucarum instar in frustula oblonga dissecto, & si aridum fuerit, aliquantulum aqua irrigato sustentavit. Erucas uno hausto deglutiebat, ex reliquis autem, quanto uno rostri ictu capere poterat, præbendum erat. Numquam sponte sua capiebat potum, sed si quæ cibo inhærebant humiditatis guttæ, omnes, antequam illum deglutiret, sollicite hauriebat. Viventes quos tortuose inflecti observabat, vermes, avidus arripiebat, mortuos tangere detrectabat. Quoties autem, nimis arido suo necessario cibo subjungendus erat potus, eum adeo inconcinno, ac ægerrimo modo hauriebat, ut quam contrarius suæ naturæ sit potus appareret. Tandem vero prorsus obmutescibat. Renes agninos præ aliis adpetebat. Et masculum saltem; hoc: *Cucu*, clamore proferendo sufficere *Frischius* docet. Idem ille, nec tamen, ait, pro accipitre habendus est cuculus; qui quamvis pedibus, ut accipiter, gaudet flavidis, nec ungulis avis instar rapacis, nec rostro adunco instructus est, nec aliis vim infert avibus, neque matrem, vel fratres devorat. Ego enim sæpius cuculus cum matre colludentem, illamque insequentem observavi, ex eo autem profluxisse censeo falsam aliorum sententiam: qua accipitrem esse voluerunt cuculum. Quod si ad ea accuratius oculos & mentem adplicassent, quæ matrem ejus inter, & cuculum intercedere videmus, saniolem certo conclusionem eliciissent. Quæ quæso avicula accipitrem, sibi inimicum, ita insequitur? quæ colludit? Corruunt igitur olim inventa de cuculo proverbialia, quum modo, cuculi instar ingrati illum dicerent, modo hunc ipsi compararent adulterum, foemella enim, nec masculus, alio nido sua ova committit. Eximia cæterum dissimilitudine ab antiquioribus juniores cuculi differunt, nec illum retinent, quem ex hibernis reportant, colorem. Qui quidem quum tanto hyemis diebus brevioribus, quanto æstivis longioribus, egeant nutrimento, & magnæ cederet difficultati, si nunc ante Solem tunc tardius exorientem, nunc post Solis occasum tunc citiorem, eadem ipsis suppeditanda forent alimenta, quæ sibi relictæ capere vellent: in alia sane regione hyems ipsis transeat necesse est, ac ea, ubi tantum per tempus cibum capere valeant, quanto longissimi æstatis dies apud nos absolvuntur.

Et hæc quidem *Frischii* opinio, variis adhuc contradictionum ventilationibus exposita, satis clare loquitur: quod nullus eorum partibus accedat, qui cuculum censent pennis se suis hyeme exuentem, crena arboris inclusum, & foliorum congestorum cumulo constipatum delitescere. Quæ tamen adeo communia sunt, ut ullam vix regionem invenias, qua vel pueris sint ignota, ex iis præsertim arborum truncis, quos sub finem Decembris cedere solent, igne si admoveantur, nudos cuculos, bufonum instar, egredi, & *Cucu*, clamorem edere. Si autem cuculi, ut hirundines, transmigrantibus adnumerandi veniunt, quid, quæso censendum de opinione *Kleinii*, qui cuculum, bufonem alatum seu cuculum rubrum, fulicam, coturnicem, ciconiam, aliasque, quas transmigrantes vulgo dicunt, erraticas esse docet, id est: nec Europam relinquere nec adire Africam, sed vel loca vepretis obsita, juxta fluvios, vel valles arboresque excavatas, prolatibulis, petere, ubi vel alimenta reperiunt, vel receptaculum calidum, sicque profundissimo somno sopitæ famis explendæ obliviscuntur; eo potius, quum

fulicæ & coturnices, molis suæ eximie ergo ac intercepti volatus, Africam penetraturæ, Alpes transire nequeant. Nos experientie inhærebimus; illa autem edocemur: relictis regionibus frigidioribus nostris calidiores easdem adire. Etenim non solum peregrinantes uno omnes ore, integras sæpe naves iisdem obiectas sese vidisse adfirmant; sed & ex epistola quadam nuperrime exarata, ab Equite quodam Meliteni, cui cum Regia Scientiarum Academia Parisiensi literarum commercium intercedit, ex illa, inquam, edocemur: magnam quotannis copiam transmigrantium, & in primis lusciniarum ac cuculorum, in Melite, insula, autumno captari.

Dictorum nonnulla confirmabunt literæ sequentes, a Viro Cel. *de Reaumur*, haud ita pridem ad nos transmissæ. En tibi L. descriptas: Variis horum (cuculorum) quos nutriebam, carni inhiantibus eos adnumerandos esse constabat. Etenim carne, & hac sola quidem vescuntur, rejectis granis, pane, ac quidquid aliorum exhibuerim. Insecta peramant, & in primis vermes farinæ, & erucas. Segniores tamen ad cibum sua sponte capiendum determinantur; alii etenim, quamvis reliquorum magnitudinem, jam ex mense adtigerant, non nisi frustatim sibi exhibita alimenta accipiebant. Num coloris differentia varii sexus criterio veniat, ignoramus. Varios ego magnitudinis atque ætatis ejusdem conservavi, eosque eodem dorsi colore conspicuos; alios iterum, qui undas in dorso, a colore fundi diversas ostendebant. Quibus ea concidunt, quæ alias de cuculo fabulantur; quod scilicet, hyeme, in crena arboris, granorum frumenti cumulo constipatus delitescat. Nullus ex meis granum aliquod tetigit unquam. Insecta nutrimento sibi destinato venire constat. Alium teneo, illumque annum, qui, quamvis jam toto ex mense, parentis magnitudinem referat, frustula carnis sibi objecta accipere detrectat, nisi singula rostro immittantur; alii vermes farinæ seu muscas, cavæ injectos devorat avidissime. Imò denuo alius cuculus ædibus meis detinetur, quem in nido picæ silvestris repertum esse dicunt.

Vir Cel. *Herissant*, *Reg. Scient. Acad. Sodalis*, vir & in Arte Anatomica eximius, & in Physicis acutissimus; ac, ut brevibus multa dicam: dignus Celeberrimi *de Reaumur* discipulus, peractis anni 1752. Academiæ feriis autumnalibus, Schediasma eidem exhibuit, quo, de cuculo observatu dignissima quædam tradit. Recensitis enim obiter omnibus, quæ vel inutilia vel risum moventia figmenta de cuculo circumferuntur, pro argumento schediasmatis præcipuo constituit amplissimam ejus stomachi, a sternone ad anum procurrentis, capacitatem. Ex parte musculosus, ex parte vero membranofus est. Tum omnia, quæ intestinis sunt, singularia fusiori descriptione pertractat Vir Cel., quæque omnia, eo præunte, & nostra deinceps observatione lustravimus.

Avi rapaci cæterum similis quidem videtur cuculus, alii omni rapacis vi atque animo caret. Nidis aliarum avium sua quum ova recondit, illis exosum sese cognoscit, debilis insuper viribus, animoque timidus, conspecta vel avicula acriter ipsi insistente, extensis quam latissime potest alis, fuga salutem quærit. Cantu suo veris est nuntius. Qui primus, (teste *Schwenckfeldio*) ex plebe Silesiaca, cantantem audiverit cuculum, superstitione ab antiquioribus traducta motus, quot sibi supersint vitæ anni interrogat; & tot se annos peracturum fore sperat, quoties ex quæstione: *Cucu*
vocem

vocem repetiverit cuculus. Plerumque autem primis Aprilis diebus cantum incipit, & ad Festum S. Joannis usque continuat; quem si ulterius produxerit, uvarum immaturitatem extimescunt ruricolæ. Idem cuculum a cantu desistere narrant, simul ac primam mergetem colligari viderit. Volatu autem brevi, sæpius intercepto, depresso, & incerto defertur; unde & alii fabulati sunt: milvum occulta quadam sympathia motum, non solum tueri cuculum, sed & humeris exceptum in remotissimas quasque regiones deportare. Reliquas de cuculo fabula transeamus.

Nomen ejus Hebraicum est: *Kaath*, Syriacum: *Coco*, Græcum: *Coccus*, Italicum: *Cucculo*, seu *Cucco*; Hispanicum: *Cuchillo*, Germanicum: *Kukuck*, Belgicum: *Koekoek*, Anglicum: *Cuckoo*, Suevicum: *Gioak*. Vox Gallica: *Coucou*, olim: *Cocou*, *Cocu*, *Coux*, ex cantu cuculi, suum ipsius nomen profitentis, dubio procul, est derivandum. Et huic quidem Etymologiæ, si reliquæ omnes, pro simplicitate responderent, conficiendo *Lexico Etymologico* superfedere potuisset doctissimus *Menage*.

Sale volatili & oleo multo instructus cuculus, ne rusticis quidem cibo venit. Etenim & infrequentior reperitur, & insipida gaudere dicitur carne. Juniores vero, volatus facultati proximum & nido extractum, saporis excellentia & carnis teneritate præstantissimam esse docet *Plinius*, nosmetipsi experti sumus. Itali eum magni æstiment, Germani autem, præjudicio potius quam ratione ducti, abhorrent. Ea & in bufonem alatum, Gallis *Tette-chèvre*, seu *Caprimulgum*, cadunt, quippe qui junior cibo cedit excellentiori.

Ars Medica tandem, cuculum & pullos in cinerem redactos, contra Epilepsiam, calculum, febres intermittentes ac dolores colicos commendat. Qui tamen illos præparandi modus, Viro Cel. *Lemery* in *Lexico Pharmaceutico*, minus arridet, siquidem calcinatione, omnes suæ essentiæ partes volatiles dissipari censet atque abire. Alium igitur substituit, & juscula exinde elicitæ ægrotanti præberi mavult. Excrementa cuculi interne recepta, eximii sunt usus contra rabiem, eorum scilicet ʒß. ad ʒj. in cyatho vini tepidi per noctem infundunt, postero mane autem colando exprimunt, & ægrotanti præbent. Teste tandem *Schrodero*, cuculi adeps, linimenti instar adhibitus, capillorum defluvio medetur.

C Y G N U S.

C*Ygnus*. Offic. Dal. Pharm. 419. Lemer. 303. Belon. *de avib.* 152. Gesn. *de avib.* 327. Aldrov. *Ornith.* 3. 8. Jonst. *de avib.* 90. Charlet. Exer. 103. Olor. Schrod. 321. *Cygnus mansuetus*. Villughb. *Ornith.* 271. Raii Syn. *Meth. Av.* 136. Merr. Pinn. 174. *Anas rostro semicylindrico, cera flava, corpore albo*, Linn. Faun. Suec. 88. *Cygnus seu Cynus cicur, aut vulgaris*. Quor. Maximus, procul dubio, inter palmipedes omnes, tribus digitis anterioribus instructos, est cygnus; hic enim ætate provectior 20. libras, pondere, explet. Ab apice rostri ad extremitatem caudæ 55., ad finem pedum vero 57. digitis longus est; & extensarum alarum spatium, 7. pedes ac 8. digitos latitudine adtingit.

Totum cygni corpus plumis tegitur mollibus ac tenuissimis, niveis antiqui, cinereis autem junioris. Caules alæ rectricium majores sunt in cygno

gno domestico, quam in silvestri. Annum primum agentes rostrum plumbei coloris ostendunt, unguem insuper rotundum in apice rostri, & radium nigrum utrinque a naribus usque ad caput procurrentem. Ab oculis ad rostrum, spatium aliquod triangulare, nudum, nigrum, & basin suam rostro, apicem vero oculis obvertens, observabis. Rostrum procedente cygni ætate rubescit, unguis in apice nigredinem conservat, & in basi tuber aliquod carnosum, majusculum, nigrum, jam sursum, jamque deorsum deflectens, exsurgit. Medium spatii oculis inferioris nigredinem conservat; Lingua denticulis obsita est. Pedes coloris plumbei sunt, & super genubus paullulum calvi. Digitus interior foris membrana munitur. Ungues nigridi; stomachus musculis fortissimis atque crassis instructus; intestina tandem majora octies pluriesve reflexa sunt. Cygni hujus larynx ne utquam ingreditur sternum. Et immerito *Aldrovandus* insinuat *Aristotelem*, neglectæ cygni dissectionis, examinisque adcuratioris; hic enim nullam nec *Asperæ-Arteriæ* sternum intrantis, nec admirandæ ejus figuræ mentionem iniicit; quam quidem conformationis rationem, cygno silvestri propriam in nullo umquam domestico videbis. *Aldrovandus* igitur, cognita saltem cygni specie, hujus singularia sinistre tribuit generi universo. Nos catenum, duos cygnos silvestres dissecando, in utroque tracheam-Arteriam sterni cavitate exceptam, ac ubi *Aldrovandus* replicatam esse adserit, delineatque, replicatam vidimus; at in domesticis pluribus, tracheam absque ulla sterni reflexione in fundo, dextra ad pulmones descendentem observavimus. Longævum esse cygnum constat, & vel 300. vitæ annos eidem adsignant; refragatur *Aldrovandus*. Mihi autem fidem faciunt & rationes, & experientia, qua anseres ultra centesimum annum vitam traducere teneo. Imo si vel experientia deesset, varia argumenta forent in promptu; e. g. maximus sui generis est cygnus; carne reliquis solidiore gaudet ac duriore; ova ejus diutiori incubatione egent: jam vero, teste *Plinio*, quæ diutius utero geruntur, diutioris vitæ sunt, animalia. Incubatu autem, spatium detenti foetus in matrice respondet; ovum enim est quasi matrix conspectui exposita, seu potius placenta cum foetu, hic scilicet in oviparis, matrice corpori inclusa, detentus ad perfectionis tempus usque fovetur; in oviparis autem e corpore egressus, calore incubatus demum perfectionem suam adtingit. Nec piscibus, sed herbis aquaticis, conchis, seminibus, vermibusque vivit cygnus. Suo jure *Albertus* cygni carnem duram esse ait & nigram. Et quum mole sua multum superet anserem, & carne nigriore instructus est, duriore, fibris abundante, solidiore, concoctu difficiliore, ac succum pessimum, & melancholicum suppeditante. Nihilo tamen minus, raritatis suæ ergo, principum mensis adponitur, pro pompa potius quam cibo. Quina ad fœna ova ponit, eaque per duos menses integros incubare pergit.

Cygni silvestris descriptionem nemo hactenus, nisi me nescio, tradidit. *Aspera-Arteria* in formam tubæ reflexa, vocis modulationi destinata esse videtur, & cygno silvestri potius quam domestico cantus ille adscribendus, antiquorum descriptionibus præclarus. Hi enim morti proximum cygnum suavissimo modulatu canere scribunt; nos tamen cum *Scaligero* aliisque recentiorum fabulis ista adnumeramus. *Aldrovandus* e contrario, expensis utriusque sententiæ argumentis, quum primus artificium illud Tracheæ-

cheæ-Arteriæ detexerit, adfirmativæ accedit. Veritatis speciem habere videtur argumentatio, alit convincendi virtute caret; etenim & gruis Tracheam sterni fundo insertam, ac pari modo reflexam deteximus; nemo tamen cantum sonorum grui tribuit. Quæres a nobis: cuinam usui ergo ejusmodi inflexio arteriæ & conformatio? ignoramus, fatemur ingenui. Alii tamen usus præter cantum adesse possent, v. gr. ille, quem ex *Aldrovando* addisces. Cygnus enim, sic iste, per $\frac{1}{2}$. horam, imo diutius, caput & collum aquæ immersa detinet, nutrimenta quærit, pedes autem elevatos cælo obvertit; tunc igitur pars Tracheæ-Arteriæ sterni in arce reclusa, receptaculo cedit aeris ad respirandum necessarii. Imo & ad exacuendam cygni vocem ejusmodi arteriæ structura confert; acutiori enim vocis sonitu cygnum silvestrem præ domestico instructum esse constat. Vides ergo, quam fallax plerumque sit conclusio a causa finali deducta; natura equidem certi cujusdam finis ergo operatur, nos autem verum plerumque ignoramus, alium diversissimumque excogitamus, & ubi certitudinem adtigisse remur, fallimur. Hæc *VVilloughby*.

Linnaeus autem cygnum domesticum varietate saltem, nec specie differre censet a silvestri; quem frequentissimum esse ait prope *Malmoe*, urbem Scandinaviæ, atque ripas Lapponiæ, tempore æstivo. Accedit *Kleinus* & leviter fundatam esse demonstrat differentiam specificam, quam inter cygnum domesticum atque silvestrem constituit *VVilloughby*. Cæterum pulcherrimus inter aves aquatiles dici meretur cygnus, quippe qui primo vitæ anno, cinereum & flavido undatum colorem ostendit; deinde autem tanto candore superbit, ut vel in proverbio sit: cygni instar candidus. Amphibiis adnumerandus est, quamvis frequentior aquæ inhæreat, quam in terra detineatur, inconcinno enim gradu incedit, magnifico tractu superbiens innatat aquis. *Albertus* ait: stagnorum aquas potius eum petere, quam fluminum, quia stagna vel frequentiores ipsi præbent herbas & lutum, vel placidis illorum aquis facilius supranatare valet. Summo tandem amore fertur in pullos, eosque defendit. Nec volatus agilitate silvestrem exæquat domesticus, molis enim ponderisque est majoris. Multos exigit sumtus, nec illos utilitate domino rependit. Captivitatis perferendæ impatiens, sordiumque inimicus, *Godard* vocatur, & exauditiæ vocitantis voci libenter accurrit. Ineunte vere, nec pluries in anno, ova ponit. Coitu peracto, iteratis uterque se aquæ submergit, & anatum, anserum, aliarumque aquatiliū instar, alterna persecutione delectatur. Pennæ cygni majores pro calamis, plumæ pro implendis lectorum stragulis principum, pellistandem plumis minoribus oblecta, pro armillis mulierum venit. Teste *Gesnero*, cygnus, hyeme lacui apud Helvetos innatans, hyemis vehementioris nuntius habetur. Nautæ illum felicitis ominis avem credebant, & in navibus repræsentare solebant; eo potius, quum cygni figuram navium structuræ perficiendæ ansam dedisse censebant; collo scilicet & pectori ejus navis pro-ram atque sentinam, ventri ac caudæ puppim cum gubernaculo, alis vela, pedibus tandem remos respondere ajebant. Naturali quodam odio fertur in aquilam, sibi hostem, cujus quidem prædæ & cygni veniunt, & ardeæ, & anseres, aliæque aves aquaticæ majores. *Belonius* inter exquisitissimas Gallorum delicias refert cygnum, & olim quam hodie ibi frequentiore pronuntiat. Totam namque Sequanam cygnis oblectam fuisse dicit, teste

Maquerella, infula, cygnorum infula adpellata, siquidem maximam ibi cygnorum copiam alebant. Imo & hodie passim, pro delectamento incolarum nutriuntur, ut in canali Versalii, in Isla, & Ambiano, Flandriæ urbibus. Quod ad cantum sonorum cygni, morti proximi, adtinet, *Aristoteles*, *Socrates*, *Plato*, *Aristophanes*, *Philostratus*, *Cicero*, *Seneca* & antiquiorum plurimi pro adfirmativa militant; ast *Lucianus*, *Plinius*, *Athenæus*, & *Julius Scaliger* contra *Cardanum* experientia edocti, fabulis illis eum adnumerant, quæ ex Græcia, figmentorum scaturigine, promanarunt.

Cygnum Galli dicunt: *Cygne*, seu *Cyne*, imo & *Godard*, viri nomine, salutant; ut corvo: *Colas*, graculo: *Richard*, Picæ: *Margot*, nomina hominibus propria, tribuerunt. Græci illum: *Cuenos*, Itali: *Cigno* vel *Cino*, Germani: *Schvan*, Angli tandem cum Suecis: *Svan* adpellare solent.

Sale volatili & oleo abundans cygnus, carnem, ut reliquæ aves aquaticæ majores, coriaceam præbet, digestu difficillimam, nec succum corpori convenientem, sed crassum & excrementis plenum, suppeditantem. Principum mensas tamen raritate sua exornat, & sumtus potius adaugere, quam saporis delectamento inservit. Cygni juniores ac teneri, haud prorsus contemnendi saporis esse dicuntur.

Medicina autem cygnum juniorem, in oleo olivarum, usque dum ossa caro relinquat, excoquendum, tum vero fortiori expressione colandum esse jubet; & oleum illud præstantissimum medium dicit contra rheumatismos, aliasque nervorum adfectiones a causa frigida profectas, cui pro exaltanda ejus virtute, pugilli aliquot herbarum nervos corroborantium addantur. Adeps cygni linimento venit pro cute læviganda, pro depellendis faciei vitiis, & leniendis hæmorrhoidibus. Cutem ejus regioni viscerum, adplicatam, & partibus rheumatismo adfectis, multum facere censent ad corroborandos nervos, ad restituendum & conservandum stomachi calorem, ad profligandos flatus & rheumatismos, imo ad promovendam digestionem. Leniorem scilicet transpirationem excitando, porosque partium aperiendo, iis detentos humores resolvit, ac suis officiis fungendi virtutem reddit.

G A L L U S.

Gallus & gallina. Offic. Schrod. 317. Lemer. 379. & 382. Gallus gallinaceus. Belon. des Ois. 243. Dal. Pharm. 424. Gesn. de avib. 348. Jonst. de avib. 49. Charlet. Exer. 84. Gallus Gallinaceus & Gallina; Aldrov. Ornith. 2. 183. Blas. Anat. 9. & 10. Gallus domesticus & Gallina villatica. Schvenckf. aviar. files. 264. & 266. Gallus gallinaceus & gallina domestica. Villughb. Ornith. 109. Raii Syn. Method. Av. 51. Gallus cauda compressa ascendente. Linn. Faun. Suec. 165. Gallinaceus; Gallus cristatus; Gallus & Gallina cohortalis, altilis seu vulgaris. Nonnull.

Prolixiori autem galli descriptione merito superfedemus, siquidem notissimus est inter omnes. Cauda sua ex pennis angularibus constructa ac surrecta; crista carnosæ, dentata, nuda, verticem exornante; barbis amento pendentibus, & calcaribus in longum productis statim ab omnibus ejusdem generis distinguitur. Nec aliam quamvis avem diurnam, nisi lusciniam, sociam habet cantus nocturni, quem bis terve per intervalla, peracta media nocte, ante diei ortum percipies. Rectricium alæ cujusvis

27. in universum numerabis . Caudam vero 14. pennæ constituunt ; numero , huic specie proprio ; reliquarum enim hujus generis avium cauda 16. ad 18. pennis constat . Binæ medium tenentes longissimæ sunt , ac decussatim sibi superjacent . Salacitatis nimix ergo , brevi senescit gallus , & coeundi facultatem amittit . Nimia venus enim spiritus debilitando , & humidum , quod veteribus radicale audiebat , exhaustiendo , corpori ariditatem inducit , & ardorem amoris exstinguit . Sic *Aldrovandus* , sua experientia edoctus , trimulos gallos coitum quidem celebrare , sed procreandi facultate destitutos esse refert . Nec non gallinæ , quotannis reposita ovarum copia , tertio vel quarto vitæ anno sterilescunt ; etenim quum ova omnia , ovario detenta , egressa fuerint , ova ulterius ponere nequit , nulla succrescunt . Difficilius autem vitæ terminum in illis determinari posse censeo , *Aldrovandus* quidem vel decem annorum spatium iis adsignat ; ast quum paucos post annos sterilescant , & utilitatis ergo plerumque nutriantur , quot quæso reperies , qui relicta utilitatis expectatione , curiositatis ergo saltem inutiles alere vellent ? Vitam breviorē tutus illis adsignare poteris , nimix enim salacitati , vitam brevissimam respondere constat .

Gallus insuper , quum ferox sit animo & imperterritus , Anglorum studio singulari certatum nutriri solet & adservari . Amplis illorum in urbibus enim jam tempus gallorum certamini destinatum annuntiare audies ; jam amphiteatra publica , pro arena certantium extrui videbis ; jam magnam pecuniam de alterutro vel victore vel devincendo , sponsonibus fortique commissam ; jam gallorum proelium , eosque aufugiendi ignominix nescios , & ut cedant , nimis generosos , mortem præoptare , si vincere nequeunt . Descriptionem anatomicam partium gallinæ naturalium ex *Aldrovando* haurias ; vel si fusiores quæris , adeas *Narvaei Exercitationes de generatione* , seu *Malpighii tractatum de ovo* , qui & observationibus , & descriptione , & subnexis figuris successivum pulli in ovo incrementum exposuit adcuratissime .

Leonem vero galli cantu imo adspectu perterreri non solum varii inter antiquos pariter ac recentiores scripserunt , sed & rei singularis rationem & causam varia ratione explicuerunt . Ast factō haud constat veritas ; gallum enim , quem cum leone committi jusserat *Jacobus* , Rex , statim leo corripuit , dilaniavit , & nisi memoria fallor , devoravit . Nullo saltem timore galli adficiebatur .

Sæpius nobis jucundo imo admirando spectaculo venit capo , pullos gallinaceos , gallinæ instar , sub alis fovens , glocitando convocans , nutriendumque ; eodem tamen artificio eo illum perductum fuisse edocebamur , quod in *Magia naturali* a *Joanne Baptista Porta* , sequentibus expositum leges : Depluma ventrem caponis , eumque vespere urticis ruditer adfrica ; tum pullos per unam duasve noctes suppone , & statim eorum amore capietur , quos suo calore , pruritum ex urticis proveniente lenire ducimus . Sic nutriticis officio adsuetus capo , haud amplius ab eo desistet , sed vel excretis prioribus , denuo alios recenter exclusos quæret & educabit .

Nimia sunt , quæ de gallo dicenda forent , quam ut tractatione nostra comprehendantur . *Aldrovandum* adeas L. B. ille enim , quæ ante eum dicta fuerant omnia , studiose collegit , nec quidquam eorum omisit , quæ sua sibi experientia constabant . Quinque ad sex variantes gallorum imagines

videbis in Ornithologia sua, illi enim pro varietate loci, pabuli, similitum, admodum varii sunt, colore, magnitudine & cristis. Imagines denique ab *Aldrovando* subnexas vel prorsus fictas, vel pro lubitu pictoris admodum defiguratas habeo. Hæc *Villughby*.

Insigne etiam, ait *Belon*, donum gallo indidit natura, ille enim rure degentibus, horologio cedit, tempus dimetienti. Cantu ejus edocti agricolæ, noctis horas computando & determinando vix umquam errabunt. Vigilantissimus noctis horas designat & ingruentem nuntiat diem, cujus ergo (id quod paucissimis notum esse censemus) exercitum & castra olim comitabatur, & a cantu suo excubiarum vigilias, primam, secundam ac tertiam dixerunt. Alarum agitatione se ipsum fuscitat, nec ante auroram cantu desistit. Longioribus quam ullas avium calcaribus gallum natura instruxit; crista insuper, quam in vertice gerit, & barbis ex mento pendentibus ornavit. Destinato quodam die in anno gallos certamini committere solebant Græci, testibus auctorum quibusdam; idem ille mos & hodie apud pueros obtinet, in Gallia quidem jejunii quadragesimali tempore. Antiqui de re rustica scriptores, gallum unum, dummodo viribus vigeat, quinque gallinis sufficere docent. Gallus igitur, gallinis præficiendus magnus esse debet, & cruribus longis; crista elevata, rubra, recta; nec pendente; oculis nigris; rostro brevi, adunco & crasso; barbis auriumque regione albo-rubicundis; crinibus, seu plumis collum cingentibus verticoloribus, rufis scilicet fulvis & aureis, ac per humeros sparsis; pectore lato; membris robustioribus; alis pennarum copia abundantibus; cauda tandem erecta, ac duplici pennarum deflexarum atque pendentium ordine instructa. Sit alacer, vigilans, & cantet frequentior; animo acer sit, nec periculum extimescat; gallinarum cohortem defendendo, & injuriam a quocumque illatam acerrime vindicando, animalia vel se ipso majora agrediatur. Cibum capeffendo, voce gallinas accerseat, pabulum cum illis communicaturus. Gallus autem ita comparatus, ubicumque fuerit, reliquos debellando, domini ac regis jus sibi potentiamque acquirit. Hic cum alio, vigore quidem inferiore, ast cedere nescio, pertinax vel ad mortem usque conflictatur, & quum ad latibulum aliquod victor debellatum depulerit, ille voce elata triumphum canit. Galli præsentia leonem perterriti scribunt antiquiores; ejusque causam in adpectu feroci galli, sæpius cœlum respicientis, in crista ejus elevata, cauda erecta, pennisque quasi falcatis composita, incessu tandem graviore posuerunt.

Acutissima oculorum acie gaudet gallus, & si quam avem rapacem, ut milvum, falconem, accipitrem in aere conspexerit, clamorem altum, providi timoris testem, extollit. Idem, teste *Cardano*, diem naturalem in octo partes, suo cantu dividit; *Julius Scaliger* autem, sua experientia de contrario sibi constare scribit, imo & nosmetipsi, alios frequentiore; alios rariorem cantum, die præsertim edere, nec regulam constantem cantando observare novimus. Vir in Anatomicis Cel. *du Verney* est, qui experimentis vivo cum gallo institutis demonstratum dedit; vocem ejus haud more reliquorum, versus laryngem, sed in fundo Tracheæ-Arteriæ, bifurcationem versus, efformari. Avium salacissimus dici meretur gallus, hic enim quotidie, quinquagies pluriesve coitum exercet. Singulari amore in suas fertur gallinas, summa cum cura easdem custodit; vel pabulum sibi sub-

trahit, illisque relinquit; sæpius & earum lateri proximus in nido residet, & ad ova ponenda invitat. Sæpius, sic Cel. *Lemery*, ovulum, columbinum magnitudine exæquans, gallinarum in nido videbis. Hoc a gallo positum credunt, & diutius conservatum crocodilo dare originem; hinc quoque ruricolæ summa cum cura illud contundunt. Erronea ista opinio, quamvis nulli veritatis fundamento sit superstructa, diu tamen animis plurimorum inhæsit; & ne quidem frustrata expectatione egressuri crocodili, penitus eradicari potuit. Varia ex ovulis istis & ego, per 30. jam annos adservata teneo, nihil umquam egressum est; ne quidem fissuram, egressuri nuntiam, nacta sunt. Nec a gallo, sed gallina eadem reposita esse teneo, & ut excludantur inepta, vitello enim carent, & albuminis in medio germinis exigui speciem, confuse repræsentatam exhibent.

Alii autem hoc galli (ut ajunt) ovum, sterquilini calore exclusum, basiliscum producere docent. Hinc *Menagius*, in *Lexico Etymologico* vocabulum: *Cocatrix*, basiliscum denotare scribit, siquidem ex ovo galli, (*Coq*) illum enasci perhibent. Hinc & plateam Parisiorum, *rue Cocatrix* dictam, ex imagine basilisci, domui forsan adpenſa, nomen accepisse censet. Tres ad quatuor observationes de gallis oviparis legimus in *Ephem. Germ.*, quorum alius octavum annum agens, 13. dierum spatio decem ova posuisse dicitur; eaque columbinis parum majora, vitello carentia, ac solidissimo cortice munita. Vita ille (sic ait auctor) pariter ac post mortem admiratione dignus fuit. Ejus enim dissectionem, testibus præsentibus institutam, tot adeoque terribilia comitabantur, ut incantationes dici mereantur. Salute ac alacritate, dum viveret, gaudebat; ast ova proxime positurus, multa ira correptus, gallinas ictibus reiteratis percussit. Dissecti in corpore nullum nec ovi, nec ovarii, nec singularis cujusquam vestigium; ast decem ova ista ab eo fuisse posita is demum negare poterit, qui coelo sereno, solem splendere renuit. Quanta vis præjudiciorum! Ea igitur, si fieri potest, eradicaturi en tibi, L. B. Cel. *de la Peyronie* *Observationes circa ovula gallinarum, vitello carentia, ac vulgo: galli ova adpellata ex Actis Reg. Scient. Acad. anni 1710.*

Tam altis radicibus infixæ sunt educationis originisque præjudicia, quæ vel facta concernunt, ut eadem extirpandi labor nec societates literarias dedeceat, quibus alias nova eruiendi & detegendi honor relictus est. Sic sapientum more, quæcumque relata audiunt, in suspensio relinquunt, usque dum experientia demum evicta constent. Multi sunt, qui cum plebe gallos ponere censent ova, quæ vel sterquilini vel alio calore exclusa serpentem alatum, seu basiliscum producant, eumque adpectu suo homines interficere. Quæ quum meræ fabulæ ab antiquis traditæ originem debeant, sequentium expositione, falsa demonstrabuntur.

Villicus quidam me quondam ovulis quibusdam donabat, columbina magnitudine exquantia, quæ a gallo suo, cum aliquot gallinis in villa degente, posita esse adfirmabat; singula serpentem (si exclusa fuerint) exhibitura fore; imo vitello destituta esse, & hujus loco serpentem exiguum continere adferebat. Ovorum igitur unum, præsentibus Viro Cel. *Bon*, Præsede supremo Camera Redituum Regionum, & Societatis Membro honorario, aliisque pluribus aperui; & nullum in eodem vitellum, sed ejus loco corpusculum aliquod, serpenti convoluto simillimum observavi. Hoc

ego spiritui vini aliquantulum corroboravi, tum vero facillime evolvi. Plura deinde ex reliquis aperta, primo simillima vidi, serpentillum saltem in aliis distinctius, in aliis vero confusius representatum. Plura ovorum Academiae exhibui; quorum alia in membrana cortici inferiore, maculam flavam, rotundam, i. lineæ diametri, crassitie omni carentem, & extremitati obtusæ respondentem observavi. Ab ovis communibus diversa aderat vitelli absentia; hinc eorum origini eruendæ accingebar, quam si gallo debuissent, tunc præter testiculos & virgas binas, ovario & tuba instructum, sive hermaphroditam fuisse concludebam. Galli hermaphroditæ possibilitatem concessimus, quum tot quotidie animalium monstra enascantur. Gallum ipsum denique alacerrimum, ast partibus ad ova ponenda necessariis destitutum reperi; dissectione enim non nisi duos testiculos magnos, & vasa seminalia ex illis profecta, singulaque ex sua parte, minore virgula in cloacam sese egerentia vidi. Ovorum alia, per mensem, ad excludendum supposui, illoque effluxo, nil mutationis animadverti, nisi albumen magis fluidum atque dilutum.

Mortuo igitur gallo, quum alia semper ovula, galli istius similia reperiret villicus, gallinam denique ex qua proveniebant, detexit, mihiq; adportavit. Hanc cantum, galli rauci vocem qui imitabatur, magna cum violentia edere observavi, & per cloacam sæpius materiam flavam, vitello diluto similem eiicere; ac ova minora, prioribusque similitudine accidentia ponere. Factorum certus causam quæsi in intestinis. Vesicam detexi & Societatis intuitui subjeci, pollicis crassitudine, aqua limpidissima plenam, & ex superiore colli sui radice, illo cum ligamento nexam, quod umbraculum oviductus, cum ovario nectit; ex inferiore autem radice, centro mesenterii, quod oviductui est, cohærebat. Sic binæ partes oviductus hac hydropis singularis specie admodum constringebantur, ita ut cavitate sua, aere immisso turgescente, vix 5. linearum diametrum ostenderet; & ovum magnitudinis communis, dum tubam ingreditur, cavitationem istam transire nequiret. Aliam denuo hydropis singularis speciem constituebat liquor quidam flavidus, ventrem qui opplebat, cui innatantia frustula, quasi condensati vitelli, observavi. Jam vero magna illa, de qua diximus, vesica aquæ plena, omnium causæ veniebat. Ovulum scilicet ab umbraculo arreptum, & jam oviductu detentum, primam constrictionem, quamvis difficiliter, transibat, nec secundam quomodocumque transire valens (quippe quæ 1. prima adhuc angustior erat, 2. quia ovo accedens albumen molem illius adauxerat, humore recepto a membranis canalis, quem transferat) duabus hisce constrictionibus intermediam, membranas irritabat canalis, qui sufficientibus ad propellendum illud viribus destitutus, reiteratis sui contractionibus, gallinam ad edendos violentiores motus coegit, quos clamore, galli rauci cantum, ut diximus, imitante exprimebat. Violentis hisce motibus vesica aquæ plena compressa, ligamentis suis adigebatur, sicque concurrentibus tot diversis agitationibus, ovulum tenuissimis adhuc membranis involutum, exiguo insuper albumine instructum, & cortice carens dissiliebat. Effluens vero vitellus, nunc in abdomen nunc in cloacam abibat, prout vel huic, vel illi loco, crena in ovo oborta responderebat; utrumque in gallina observatum fuisse supra edocuimus. Tunc, licet ovum ex molle sua, per vitelli jacturam perdiderat, nec constrictione

prorsus impeditum, descendendo, qua coeperat via, pergebat. Spongia autem albuminis vitellum cingentis iterum explebatur, quamvis crena, qua vitellus effluxerat, perforata fuerit, & sic ad exaugendam molem necessaria tensione careret; sponsia igitur, ab oviductus membranis advecto semper humore, excreſcebat; excreſcendo autem ſenſim, ſenſimque reſiduas vitelli particulas, per crenam iſtam exprimebat, qui omnis interdum effluebat, nonnunquam vero ſui veſtigium, maculam nempe flavidam in alterutro ovi angulo relinquebat. Sunt, qui in ovo efformando a vitello ſuppeditari cenſent albumen. Hæc autem quæ præfati ſumus, non ſolum albumen, ſuam vitello originem haud debere loquuntur; (qui enim, vitellus in oviductu decreſcens potius, quam adauctus, ſufficeret producendæ albuminis ſubſtantię omni, quod tamen majoris eſt, ac ipſe, molis, niſi aliunde derivaretur?) ſed & liquorem albumen efformantem, haud pertranſire docent vitellum, ſed penetrata ovi membrana exteriori, corpus ſtatim ſpongioſum ingredi, ac eodem detineri. Quæ niſi ita ſe haberent, albuminis ſane humor cum vitello effluxiſſet, nec adaucta fuiſſet ſpongia ejus.

Vitello igitur ſenſim egrediente, pro varia crenæ in ovo obortæ, regione, vario ordine diſponebantur *chalazæ*. Quæ ſi ex latere alterius *chalazæ* oboriebatur; cellulæ, *chalazæ* oppoſitæ regionem occupantes, ſucceſcendo, alterum eligebant latus, quod angulo ovi obtuſo, ac levius reſiſtenti adglutinabatur; ibi enim ſæpius, nonnunquam una cum macula flavida, adhærens idem reperi. Quum vero in regione vitelli pariter ab utraque *chalarum* diſtante, exſurgeret crena; tunc junctis ambæ ad expellendum vitellum viribus impenſis, ovi tandem in centro coibant, & quidem mediante conſtricta vitelli membrana, cujus extremitatibus adhærebant fortiffimæ; quo quidem ſerpentina ejus figura exoriebatur, & magis obvoluta, ac tortuoſa, quam ſi ex unica ſaltem *chalaza* effingeretur. Effluxo tandem vitello omni, cum albuminis parte fluidiore, crena iſta citiori obducebatur cicatrice, advecto ſcilicet albuminis viſco, quod corpori ſpongioſo includebatur, & materia iſta adipea, quæ interiorem obteggit partem oviductus; & materia corticis, in fundo ductus retenta. Quem ego humorem, modico calori expoſitum, in ſubſtantiam cortici ſimilem abiſſe vidi. Pars tamen, & albuminis quædam effluere videtur cum vitello; ſiquidem vix tertiam albuminis in ovo communi partem, ſingulis hiſ ovulis detexi. Nonnunquam & cicatricem crenæ, reſpondenti corticis parti adeo adhærentem reperi, ut, niſi laceraveris corticem, cicatrix ſubtrahi nequiret. Nec in reliqua circumferentiæ parte idem obſervare licuit.

Quum autem cortice deſtituta interdum ova gallinæ deponant, hujus cauſam quæras, vel in morbo tubam irritante, & præcocius ovum expellente; vel in ſœcunditate nimia, quæ ut maturitatem adſequantur omnia, impedit. Aliæ quædam, bina quotidie, alterum tamen cortice carens, deponunt. Cujus quidem rationi aliquoties & deficiens humoris dicti, quæ adeſſe debet, quantitas cedit. Sic & quædam ſæpius gallinas, ova quædam vitello deſtituta (effluxo nempe vel motu violenti, vel alia cauſa externa, vitello) deponere; aſt inſtantis, nec ſempiternæ rationis ergo, & alia, vitello inſtructa producere credimus. Quales vero compreſſiones, & conſtrictiones oviparorum fœtus prorsus deſtruunt, ſubtrahendo ſcilicet

nutrimento eorum inservientem materiam omnem; tales, viviparorum fœtus saltem monstrosos reddunt, (hi enim alimentum in matrice quærunt, nec secum portant,) dummodo vi illa externa, nulla pars animalculi ad vitam necessaria, læsa fuerit. Quæ quum ita sint, ratio adest; ob quam plura ex viviparorum, quam oviparorum numero, monstrea videamus.

His igitur Cel. *la Peyronie* studio, adeo prolixè, adcurateque expositis, alia adhuc addere velle, supervacaneum foret. Nec tamen junctis cum ratione experiētiis, vulgi præjudicio munitam opinionem, vel prorsus debellavit, vel profligare poterit. Nuperrime nostris ipsi oculis eximie pulchritudinis, ac summi vigoris gallum, qui quinque ovorum depositorum criminis (ast quantum facinus! dignum sane, ut terra quod & accidit, sepultum deleatur) incusatus, crudelissimo mactabatur supplicio; nos autem in reo dissecto, ut prævideramus, binos saltem testiculos turgescētes cum appendicibus, & reliqua ipsi debita intestina deteximus.

Quod si autem gallorum plurimos, radiis solaribus fulgentes adspexeris; & coloris pennarum varietatem, & splendorem eximium admiraberis. Nonnullis interdum vario quotannis sese induentes colore, novis plumis ornati, alii videntur, ac diversi. Monstrea inter illos sunt frequentiora, & *Aldrovando*, imaginem debemus galli bicipitis, alius duplici corpore, ac uno saltem capite instructi, rursus alius tres pedes exhibentis, alius tandem quadrupedis. Sic nosmetipsi quondam gallum quadrupedem per aliquot menses conservavimus, qui eximie erat alacritatis, & salutis optimæ, & vigoris, imo cantus frequentissimi; bini autem pedes superflui prope anum cohærentes, & liberi suspensi, incommodo potius, quam utilitati cedebant; sæpius enim per transversum ambulabat, nec cum gallinis, quarum societatem ambiebat, coire poterat; & sæpissime ex posterioribus pedibus, pallidioribus, brevioribus, ac præ binis aliis, gracilioribus sese suspendebat. Alii adhuc galli cornubus a natura, alii ab arte acceptis superbiunt. Quali autem artificio cornu donari possit, sequenti Cel. *du Hamel* scripto edocemur, quod in *Actis Regiæ Scient. Academ. de anno 1746.*, sequenti sub titulo legimus; *Disquisitiones de uniendis arborum fissuris, de modo unionis furculi cum trunco, de unione vulnerum in animalibus, & exempla quædam furculorum animalium insertorum.*

Galli cristam (sic vir in *Phyficis* magnus) capiti ejus, latiore quadam basi, a parte superiore ossis occipitalis ad rostri originem usque extensa, nexam esse constat. Quam si transversus digiti a cranii osse distante spatio resecaveris; parte sua posteriore fasciculum eandem efformare videbis rudiores, tum vero efformata quadam ansa, in medio vacuum relincente, bina latera antè coeuntia, non nisi textura quadam cellulari connecti. Jam igitur in vacuo isto, calcar aliquod ex pullo gallinaceo resectum, ac vix seminis cannabini magnitudinem æquiparans inditur. Pellem orbitis superiorem subleva, ac verticem versus adscendendo dissecas, & crista tibi videbitur nil nisi prolongatio pellis, hic loci crassioris; pellis etiam utriusque lateris capitis, efformata, de qua diximus, duplicatura, parum sub fimbriata cristæ parte, ubi deficit duplicaturæ vestigium, connectitur. Nihilominus tamen minus crista cranio arctissime cohæret, & substantia ejus cartilaginosa potius est, quam membranosa, hinc a substantia pellis diversissima. Crista galli, quum sæpius eximie sit magnitudinis, num ligamen-

tis retineatur disquisivi; nec ullum reperi; sed cranio adeo adhærentem detexi, ut ab eodem separari nequeat, nisi aliqua sua parte resecta.

Exposita igitur descriptione anatomica cristæ galli, de furculo, quem indidi, dicam.

Plurimum gallorum juniorum cristam resecui, & segmentum calcaris eorum cavitati dictæ indidi, quam in parte posteriore atque interna baseos cristæ obviā esse docui. Plura ex calcaribus capitum agitatione decedebant; reliqua autem 15. dierum vel 3. hebdomadam spatio arctissime juncta, quum Junio mense vix feminis cannabini molem æquipararent, exeunte Decembre, $\frac{1}{2}$. digiti in longitudinem excreverant. Imo alia tertio vel quarto anno, vel 4. digitorum longitudinem, (curva sua figura in rectam redacta) ostendebant. Caponis cujusdam in capite, cornu aliquod 9. digitis longum sese observasse scribit auctor alius. Quæ autem cornua hæc magna disseccando observavi, digna censeo, ut referantur. 1. Scilicet eminentiam callosam externe observavi, basin cornu amplectentem, & pellem disseccando, cornu in callo isto desinens vidi. 2. Subtracta pelle, & callo ex parte resecto, quoddam ligamentum capsulare occurrit, quod impedit, quo minus insertionem seu articulationem cornu cum cranio conspiciere possis, 3. cautius subtracto hoc ligamento capsulari, plures zonæ ligamentosæ obveniunt, quæ ex cornu provenientes desinunt ex parte in fossis nasalibus, aliis in parte orbitalium superiore, aliis tandem in variis partibus ossis occipitalis desinentibus. Nec tamen omnibus gallis totidem, nec omnia ligamenta eodem in loco, terminata sunt: ast in quibuscumque, cornu majori instructis, zonam ligamentosam fortiolem observavi, eamque ex altera extremitate corneæ rostri parti insertam, ex altera autem centro baseos cornu respondentem. 4. Subtractis ligamentis omnibus, excepto saltem illo, quod ad rostrum usque producit, cornu facile a cranio secedet; quod, si rostrum versus obverteris, cornu sub basi cavitates articulares, & in cranio eminentias cavitatibus respondentes videbis. Tum vero omnis substantia cornea, ex nucleo osseo, pyramidali, sæpius & in plures cuspides exeunte, & vel tunc zonæ ligamentosæ, (in rostro desinenti) coherente, abit. 5. Hic idem nucleus osseus, haud adeo compactus, membrana passim sanguinolenta, & Perioestio simillima obtegitur. 6. Pars cornea ex nucleo suo detracta, inferiore sua parte tenuis & excavata, superiore autem, per dimidiam & quod excurrit, longitudinem plena ac solida, elephantis dentem falcatum, figura, refert. Harum unam spiritui vini diutius immiseram, ac strata quibus componebatur, adeo inter se avulsa conspexi, ut magnus eorum numerus subtrahi posset.

Hæc sunt, quæ capita gallorum, magnis cornibus ornata disseccando, observavi; quousque enim parva sunt cornua, vix quidquam observare poteris. Nunc quasdam exinde consequentias deducere liceat:

1. En igitur partem organisatam ex pede galli secretam, quum vix feminis cannabini magnitudinem exæquaret; post capiti animalis ejusdem inditam, ac tanta connexionem cum illo junctam, ut vel in longitudinem digitorum excrecere possit; imo organisationem eandem quam in situ pristino ac naturali habebat, constanter retinentem, nisi quod eximior ipsi magnitudo accesserit. Surculum in animali hanc esse negabis? 2. En nucleum osseum perioestio circumdatum, & substantia cornea indutum, bre-

vibus : cornu bovino simillimum , eademque ratione excrescens , laminiſ ſcilicet interne ſucereſcentibus , deinde autem externas , ut amplificentur , adigentibus ; in fundo ſcilicet , qui annulo cartilagineo , ſeu zonis de quibus dixi , ligamentofis , cohæret . 3. Quod quidem cornu , quum & ſuæ molis ergo & ob continuam capitis galli agitationem , arctiſſime cum cranio coire nequiverit : remanſit tamen immobile ; imo quædam articulation , variaque ligamenta , pro ſuſtinendo tanto cornu ſufficientia excreverunt . Quæ omnia , quum nec ſub criſta galli , nec calcari ejus proxima (partibus hiſce in ſtatu naturali conſideratis) reperiantur , mea ſaltem diligentia repèriri haud potuerint : naturam vel novorum organorum productione , neceſſitati ſubvenire vides . Res ſingularis eſt , fateor ; aſt in diſſectione monſtrorum multa forſan , obſervatis analoga detegentur , ſi eorum anato-men inſtiturus , expoſita a nobis in memoriam revocaverit .

Tantum de gallo , nunc de gallina dicendum .

Omniū vero avium caudam quam conſtituunt pennæ , ad planum , horizonti parallelum , jam aliæ alis ſubjacent , jam adjacent . Gallinaceum vero genus , modo ſingulariſſimo , caudam ad planum verticale exactam , ac in binas partes æquales ita diviſam exhibet , ut pars inferior dimidii alterius , alterius parti inferiori ſit adplicata . Ex colore pennarum , ſic *Belon* , antiquiores Romani , qualitatem gallinarum dijudicabant , & rubicundas vel nigridas reliquis anteferendas , albas vero minoris æſtimandas eſſe cenſebant , quippe quæ facillime conſpiciuntur ab avibus rapacibus . Gallinarum aliæ aliis ſunt fœcundiores ; aliæ minores & communes , aliæ majores & infrequentiores . Illam antiquiores dixerunt *Hadrianam* , *cohortalem* , *villarem* ; hanc pinguem ſeu adipofam . Variæ inſuper gallinarum ſpecies diverſæ erant antiquis rei ruſticæ amatoribus , quas pro patriæ earum varietate alias Rhodiennes , alias Chalcedonenſes , alias Tanagricas , alias tandem Melicas adpellabant ſeu Medicas .

Quæ quidem nomina designandis hodie noſtris gallinis haud veniunt ; nos autem octo ad novem ſpecies gallinarum diverſas novimus : ut : 1. gallinas ex Caux , Bruges , & Mirebalais , provenientes , pedibusque proceras , 2. gallinas pedibus brevioribus inſtructas , imo paſſim hoc nomine venientes , 3. gallinas nanas , 4. gallinas criſpas , falſo *lanam portantes* dictas , quarum pennæ caput verſum reflectuntur , 5. gallinas nigras , ex Senagallia & Guinea deportatas , ac criſta & pelle nigra , offibus nigris , carne autem candida inſtructas , 6. gallinas cauda & uropygio carentes , ac nudi ani gallinæ nuncupatas , 7. gallinas quinque pedum digitis , ternis nempe anterioribus , binisque calcaribus inſtructas , 8. gallinas vel nullis prorſus , vel adeo parvis alis donatas , ut volatui haud ſufficiant . Harum aliæ ſunt frequentiffimæ , aliæ autem rariores ac fere ignotæ .

Quam eximia cæterum ſit gallinarum fœcunditas , vel ovorum quotidiano noſtro uſui venientium numerus loquitur . Optandum foret circa ova , 1. ut quovis anno tempore , eodem pretio coemerentur , nec exeunte autumno & hyeme pluris venirent , quam verno tempore atque æſtate , 2. ut ea ſemper qualitate forent , qua recentia gaudent . Quæ igitur ad conſervanda ova conferre poteſt , hominum cura , circa ova recenter poſita , quolibet adipe probe ungenda verſatur ; ovum enim ubique multo adipe oblitum , per plures menſes , imo annum integrum conſervari poteſt , nec

quam .

quampiam sui jacturam faciet. Plurimi sunt, qui nesciunt quam late pateat corticis usus, eumque non nisi capsulam esse credunt, pro continendo albumine, vitello & embryone, destinatam, quæque impediatur, quo minus ovum, totius gallinæ suprasedentis pondere onustum confringatur. Alius, & gravior quidem est usus corticis, ut scilicet nimix ac justo citiori ejus transpirationi obstat. Sæpius ova reperies, quæ permutata dicunt, eaque cortice destituta, quorum liquores non nisi membrana crassiore, & digitorum pressioni cedente, alias interiori corticis parti obducta, continentur. Prima gallinæ omnis ova admodum exigua esse constat inter quoscumque; ast pluribus ignotum censeo: quod gallinarum ova, secundo, tertio & quarto vitæ anno posita, multa magnitudine superent, illa quæ per anni primi spatium posuerant. Nec non fecunditate aliæ alias superant; hæ enim quovis tertio vel secundo, illæ autem omni die unum ovum deponunt; imo *Cel. de Reaumur*, ex quo hucusque hausimus, gallinam duototidie ova ponentem sese observasse testatur. Omnes interim per aliquod anni tempus a labore ova ponendi desistunt, aliæ præcocius, aliæ segnius; rursus aliæ diutius aliæ autem brevius otium habent.

Ova vel minimæ cujusque avis, ex ovo gallinaceo tutus dijudicare poteris, nec ullum nisi molis discrimen reperies. Videbis ergo in ovi centro vitellum, inde albumen, quo vitellus circumdatur; tum albumen secundum, cui massa media innatat; post ligamenta, vitellum versus centrum ovi sustententia; deinde membranas, alteram vitellum, alteram albumen primum obvolvunt; tertiam & quartam, omnia circumdantes; denique corticem, omne reliquum qui tuetur. Primo quidem interiora, ultimo efformatur cortex, & in dies durefcit. Conficitur autem effluxu plurium salium, ex matris humoribus expressorum, calore tandem fixorum ac indurescentium. Duplex est corticis usus, quippe quo & mater ovum eiiciendum illæsum protrudere potest, & embryon, usque dum penitus efformatum egredi queat, ab omni læsionis periculo conservatur. Imo pro lacte & matris ubere, si dicere fas est, ovum venit pullo; hic enim primo vivit ex albumine, succretis deinde viribus ex vitello. In membrana vitellum cingente cicatriculam seu maculam albam videbis; hanc pro sede habeas pulli, omnibus jamjam organis instructi, ast compressis, complicatis, & uni quasi puncto involutis. Minima igitur particula spiritus vitalis, ad animandum pullum destinata, modo, nescio quo, regumenta transit, ad cor usque penetrat; pullo vitam, motumque communicat. Quæris: quid spiritus vivificans? Haud mente concipio, verum; ast esse quidpiam, certum, hoc sufficit mihi. Hoc igitur vitæ principium, si nondum ad cicatriculam illam (quæ non solum adumbratum, sed omnibus membris jam instructum pullum continet) pervenerit, mater nonnunquam ovum, ast sterile emittere. Quod si autem vel minima particula spiritus vivificantis, poros membranarum qui varia jam nutrimentorum genera admiserunt, transierit: tunc illa vascula pulli dilatat, & calorem cum succo nutritio cordi adfert. Cor enim suæ structuræ ergo, recipiendo ea, quæ alteram ejus partem ingrediuntur, aperitur, dilatatur; tum sese occludit, & quæ receperat, ex altera parte emittit. Ex hac igitur cordis palpitatione, ut ex motu penduli in horologio, omnis totius machinæ motus pendet, pendet & vita animalis. Sic animal vita recepta, ope canalis umbilicalis filum succi nutritii recen-

centis accipit, qui omnia illa vasa ingreditur, quorum rami per corpus dispersi, succum tandem per totum corpus distribuunt. Canaliculi hactenus depressi amplificantur, turgescunt. Suum parti cuique nutrimentum suppeditatur, pullo incrementum accidit.

Vetant pullum undequaque circumdantes liquores, ut de successivo ejus incremento, ac mutationibus quotidianis, adcuratius dici possit. Ast circa situm cicatriculæ, ubi pullus efformatur, singularem pariter ac admirandam naturæ cautionem sequentem observare licet: macula nimirum rotunda in vitelli involucro obvia, plerumque in centro ovi, & versus supremam partem, qua matrem respicit, invenitur; quo necessarium sibi calorem accipere possit a matre. Ut enim ellychnium in lampade nautica, tubulorum mobilitate, & pondere vasis oleo pleni ac fundum petentis, (quantuscumque sit navis agitatae motus) continuo summam superficiem petit: sic & pullus, ovo licet agitato, numquam obvertitur. Vitellus mediantibus duobus ligamentis sustinetur, quæ ovum aperiendo statim reperies, & utrinque membranæ communi, cortici superne adglutinatae, adherent. Linea recta ex altero ligamento ad alterum ducta, centrum vitelli haud transiret, sed parum superaret, divideretque in binas partes inæquales; ita, ut pars vitelli minor, qua germen detinetur, necessario tenderet elevata versus centrum avis ovum incubantis; pars autem altera major & ponderosior, fundum peteret, quantum per ligamenta liceret. Quodsi igitur ovum vel suo de loco moveatur, nihil jacturæ exinde foetui accedit, quippe qui eodem semper calore fatus & agitato, sensim sese devolventes ac perficientes artus nanciscitur. Tunc vero, ut amplius descendat, impeditus, sibi quod proximum est, fluido & diluto nutritur, deinde autem ex vitello alimentum magis solidum recipit. Rostrum tandem durescente, carceris impatiens, corticem frangit, ac egrediens ventrem vitello repletissimum præbet. Hic vitellus eo usque ipsi nutrimento venit, quo contractis pedum viribus vel ipse sibi cibum quæsiturus exspatiari possit; vel parens uterque illum adferat.

Hæc sunt, quæ ex *Malpighio* aliisque in *Physicis* eximiis hausta, recenset *Cel. Pluche*, circa formationem pulli gallinacei. Ea omnia & *Cel. de Reaumur* observationibus & scriptis confirmantur. Gallinæ incubantes, sic ille, rostri ope, jam ova obvertunt, jam ex loco in locum reponunt, jam fragmenta corticis, quo pullus se exiit, nido eiiciunt. Pullo igitur, in ovo delitescenti, & soli quidem relictus est labor libertatem suam promovens; eumque vires ejus exsuperare crederes, nisi quotidie experiremur, illis eum instructum esse & uti; utitur, simulac admonente natura, nascendi necessitatem, & vitæ activæ cum quiete permutandi tempus adesse intellexerit. Perspecta partium ejus exteriorum complicatione ac situ, vix sperares, fore ut exsuperatis egressus sui obstaculis omnibus, domicilium, imo carcerem egrediatur. Totus enim conglomeratus, collum inflexum ex latere ventris descendens ostendit, caput vero versus medium ventrem, repositum. Rostrum, avis dormientis instar, sub ala dextra reconditum; pedes ventrem versus receptos, ut columbarum seu pullorum veru adfigendorum; digitos denique posticos aduncos, convexitate sua fere caput adtingunt. Pars pulli anterior plerumque in ampliori ovi extremitate, ubi vacuum videbis, detinetur. Quomodo igitur, hoc in situ constitutus, membra-

branam adeo crassam & fortissimam perforandi ac egrediendi vi ac motu gaudere crederetur? nec tamen immutato, quem descripsimus, situ, corticem confringere, & membranam solidam, involucro ipsi venientem & conatui ejus tantopere resistentem, quanto cortex durus quidem, sed frictui cedens, hanc inquam, membranam, lacerare valet.

Corticem, muri locum qui tenet, iteratis rostri ictibus perforare studet, hos non solum auribus percipere, sed diligenter observando vel conspiciere poteris; nihilo tamen minus sub ala reconditum caput remanet. Hoc non solum avis dormientis more, ut supra diximus, sed profundius sub ala reconditum esse scito, rostrum enim ex latere dorsi sub ala egreditur. Caput igitur motibus alternis, jam a dorso ventrem versus, jam a ventre dorsum versus agitatam, corticem pertingit, & pro motus celeritate jam fortius, jam lenius pertundit; motusque illos edendo ala & corpore, nea via deflectat, impeditur, ac, ut ita dicam, conducitur. Magni est ponderis & molis, corporis respectu, imo præ nimio ejus cum collo pondere, pullus recens exclusus, eadem recta tenere nequit; at idem illud pondus, dispositione partium (quousque ovo delitescit) complicatarum sublevatur, ac sustentu evadit facilius; qualiscumque enim fuerit positio ovi, caput jam ala, jam corpore, jam utroque sustinetur; imo quo eximior fuerit capitatis moles, eo fortiores ictus pulli rostrum vibrare valet.

Fusius autem distinctiusque ea omnia, quæ circa situm partium externarum, primis 14. diebus alia, aliaque ratione 4. ad 5. ultimis excubationis diebus comparatum, adhuc subnectenda forent, ea omnia, inquam, edoceberis, illas tabulas ære incisas perlustrando, quibus. Observatorum præstantium cura, successivam pulli in ovo conformationem intelligere valeamus. Nos igitur variam pulli in ovo perfectionem, ne acta agamus, nulla descriptione tangimus; hoc subnexisse sufficiat: quod partium primis diebus rectarum, extensarum, & a corpore remotissimarum aliarum, diebus ultimis in articulationum regione inflexarum, aliarum autem incurvarum, omnes tandem corpori magis vicinarum adpareant. Nec tamen partium exteriorum dispositio, integræ pulli massæ globuli formam conciliat; nec rostrum sub ala reconditur, nisi tum temporis saltem; quum tempus corticis perforandi accesserit. Imminente enim hoc tempore crurum & colli excreti tanta jam est longitudo, ut replicando locum sibi spatiumque concilient, necesse sit. En miranda naturæ opera, quæ sæpius necessitate fieri vult ea, quæ vel sponte & prævio studio meliora fieri nequirent.

Priores igitur rostri ictus, rimam jam simplicem, sive unicam, jam ex multis compositam producant, iisque radiorum instar ex communi quodam centro proficiscentibus. Quæ quidem fissura plerumque inter ovi medium & extremitatem obtusam, sive extremitati obtusæ quam acutæ propior oboritur. Pars pulli anterior suo situ, obtusæ, posterior autem acutæ respondet. Quosdam tamen ex tot millibus pullorum, quos excludi videram, imo & pullum Indicum, ovorum corticem prope ad extremitatem acutam perforasse observavi; vacuum tamen, ut solet, in extremitate opposita abortum erat; & pars anterior pulli alias magis dilatata, hic angustius spatium occupabat; exclusi tamen omnes, nullum perversi sui situs signum gerebant.

Rima tandem perceptibili, perforatum (Gallis *bêchè*) dicitur ovum. Pro
ite-

iteratis rostri ictibus amplior rima evadit, eorumque violentia sæpius frustula ex cortice abeunt, ita ut subjacentem membranam albidam conspiciere possis. Vel 3. ad 4. digitorum distantia ab ovo projecta fuisse vidi frustula, pro violentia ictuum. Membrana autem, vel ubi frustula abierunt, integerrima est, ne quidem lente optica munitus oculus rimulam in ea detegere valet. Hinc variorum error, quo gallinam rostro suo ova pertundere docuerunt. Membranam enim, pulli rostro proximam, primo, deinde autem corticem perforari debuisse credebant; nec ad flexibilitatem membranæ respexerunt, quippe quæ ictibus rostri cedere valet, quum rudior solidiorque corticis substantia iisdem resistere nequeat. Cyathum vitreum charta obtectum, baculi aliisve ictibus facile franges, charta non lacerabitur. Quod si autem membranæ loca cortice denudata rostrum tangeret, tum sane membrana justo ulterius extensa, perforaretur.

Nec tamen omnes pulli eodem temporis spatio corticem perforandi laborem perficiunt. Alii vix horam impendunt, alii duas tresve, alii diei dimidium, alii tandem per 24. horas operi insistendo, corticem perforare valent, ovumque egrediuntur. Alios biduo toto ovum confringendi studio intentos, & hos quidem labore continuo desudare, illos interposito quietis intervallo occupatos vidi. Nec eadem sunt omnibus vires, nec situs apti commodum. Sunt qui carceris impatientes, justo citius rostri ictibus corticem contundere tentant. Ex his aliquos observare posse contigit, quum corticem hinc inde confringendo, præcocios quosdam elicere anniterer. Antequam enim in lucem egredi possint, tantum nutrimenti adparatum collectum ventro detineant, quantus sufficit per 24. horas, ex quo nati erunt, primas nutriendis. Pro hoc adparatu igitur venit portio vitellirelictæ, per umbilicum, corpus ingrediens; pullus enim, si quis natus fuerit, antequam vitellus iste corpus intraverit, languescens vitam per paucissimos saltem dies producit. Varia autem ova admodum perforata aperui, & magnam in iis partem vitelli extra corpus pulli reperi.

Jam vero ovum egressuris nunc majora, nunc minora sunt impedimenta. Etenim nec cortex nec membrana solidior, totius ovi involucrum proximum, eadem semper est soliditate, & consistentia ubique æquali. Sic & variæ speciei avium ova corticem habent crassitie variantem, ac viribus pulli eundem perforaturi respondentem. Acanthis sane impar foret sui ovi cortici perforando, si gallinacei corticem crassitie æquipararet; & pullus suo, si struthionis, soliditate, accederet. Imo intellectu difficilis res est, quod struthio, proxime enaturus, ac pullo maximo forsan magnitudine æqualis, cortici tanto perforando sufficiat, qui crassitie sua & nitore imo duritie, vasis Sinensibus fictilibus (vulgo: *Porcellana* dictis) æquiparandus venit.

Perforando cortici aptius videtur illud variarum avium rostrum, quod gallinacei instar, apice cuspidato munitur, quam quidem extremitate molli donatum, quale est anatis. Nihilo tamen minus & anatis pulli eodem temporis spatio, eademque (sic enim videtur) facilitate, sua ova perforant; ita ut opus hocce minus ab instrumenti figura pendere videtur, quam a vi ictuum, illud dirigentis.

Alibi notatum dedimus: quidnam censendum de more rusticorum quorundam, qui die illo, quo incipit pulli perforantis labor, huic subveni-

turi,

turi, ovum aquæ ferventi per tempus brevissimum immittunt. Supervacaneus labor est; etenim, ne quidem aqua fervente haud adeo multum ex duritie corticis abire compertum habemus, & si vel aqua emollitus fuisset, externo aere accedente, desiccato cortici pristina durities omnis rediret.

Satis tandem diruta seu sublevata parte corticis anteriore; sicque extructa sibi porta, qua parti posteriori sese possit extrahere pullus; crura sua, (quæ & pro sua debilitate, & motuum suorum inconstantia, sustinendo corpori nulla sufficiunt) extendit, eaque extendendo paullulum antè ferretur; extensa crura vel tota vel ex parte corticem egrediuntur; caput hucusque sub ala latitans protrahit, collum producit, antè dirigit atque protrudit. Nec tamen viribus gaudet pro collo elevando necessariis, imò istis per aliquot horæ minutas interdum caret. Tum exhaustis quasi viribus proximus morti videtur. Brevi autem illas recipit, alius plane videtur, membris vires accedunt, & quum per aliquantulum tempus cruribus neglectis sese protraxerit, illis innititur, collum elevat, hinc inde reflectit, caput tandem tenet erectum. Plumis tegitur adeo exilibus, ut quamdiu madidæ fuerint, prorsus nudi speciem præ se ferat. Ita ut in ramusculis arbuistorum vides, qui irrigati ac inter se compacti, parum spatii occupant, at arescentes inter se separantur. Sic quoque plumarum omnium barbæ, quum vagina quadam continerentur, compressæ erant ac inter se junctæ. Hanc vero vaginam aliqua membrana constituit, quæ dum exaruerit, diffilire solet; accedente barbarum nisu, quo a caule easdem abire videbis. Sic tandem singulis barbarum dilatatis crescit plumæ, quam constituunt, moles; plumæ arescunt & suo loco disponuntur; pullus veste pulcherrima fovetur.

Et hæc quidem eorum in gratiam dicta sunt, quorum interest, ut cognoscant, quibusnam mediis, summus ille auctor naturæ vel hodie adhuc producta esse velit quæ generantur omnia, & in primis animata; qui scire cupiunt quomodo fiat, ut animalcula adeo imbecillia, & quorumvis objectorum extra se positorum nescia, actiones edere possint, suum nascendi desiderium loquentes, & ut videtur, a cognitione rerum proficiscentes, & vim atque agilitatem, haud actu repetito adquisitas, ostendentes. Eo potius autem omnia ista circa pullum gallinaceum explicanda fuerunt, quum nemo vel illorum, qui mutationum in ovo seriem, incubatus tempore, observaverunt, ea tetigerit, quæ nativitatis tempore, cum pullo eveniunt.

Jam vero cum illis loquimur, quibus curæ præcipuæ est pullorum suorum multiplicatio.

Ægyptii, plurimum artium inventores, singulari quadam arte, nec apud nos communi, ova haud a gallinis, sed furnorum ope excludi curabant. Furnis istis, a nostris diversissimis, longis item ac amplissimis, maximam ovorum copiam committebant, & subdito igne pariori, tanto caloris continui gradu eadem fovebant, quantus a gallina incubante alias proficiscitur. Sic totidem per dies ea in furno detinebant, quot gallina alias incubando traducit; ac fructus laboris, 30. & plura millia pullorum, ova egressorum, vita accepta ex furno provenientia, deinde excrescentia recipiebant. Hanc igitur Ægyptiorum scientiam ut nostram, imitando, faciamus, haud adeo magni laboris opus est; voluisse sufficit; imò illi gradum caloris necessarii conservaturi, diutiori & ærumnosa experientia egebant;

nos autem adjuvante thermometro, hodie invento, expeditiores certioresque erimus in conservando caloris gradu determinato. Hunc determinaturus, thermometri globulum in medio ovorum gallinæ suppositorum constitue; & trigessimum & secundum gradum thermometri, (cujus mensuram alibi exposui, Actisque Academia Illustris insertam dedi) tanto caloris gradui respondere videbis, quantus pro evolutione & incremento germinis ovo detenti requireretur. Cognito itaque tanto caloris gradu, calorem 32. circiter graduum, instrumenti de quo diximus, ope, determines, deinde autem in loco quodam, Ægyptiorum furnis quodammodo respondente conserves, & illorum instar pullos excludi videbis.

Eundem illum caloris gradum, qui sufficiente activitate gaudet pro pulis excludendis, eum, inquam, esse scito pelli omnium, quas novimus avium domesticarum, probabiliter & reliquarum; eundem fere & in cute hominum & quadrupedum reperiri.

Jam igitur, quum non solum aves generatim spectatæ, sed & in primis domesticæ, plura nobis alimentorum genera præbeant: dignæ sunt, ut de multiplicatione earum serio cogitemus. Gallinæ præsertim & carnem nobis salutarem palatoque optimam exhibent, & magnam ovorum copiam suppeditando, singulari utilitati nobis veniunt. Nonne immensam ovorum quantitatem nunc præcepto obtemperaturi, nunc palatum delectandi ergo consumimus? Pullos igitur, seu gallinas multiplicando, ovorum numerus adaugetur. Frumenti copiam & greges animalium amplificandi cura nec eos dedecet, qui regni gubernacula tenendo, prospero civium statui student. Avium domesticarum cura numne inferior? Nec a gallinarum incubatione sola amplior pullorum numerus erit expectandus. Etenim nec omnes quotannis ova incubandi desiderium incedit. Quidni & arte gallinarum segnitiem rependamus? Quidni imitemur Ægyptios? Nec tamen furni, Ægyptiacis similes in villis nostris, mihi quidem exstruendi videntur; etenim & quantitas ovorum satis recentium collectu difficillima; & sumtus pro exstruendis furnis effundendi; & deficiens hominum numerus ad perficiendum opus idoneorum, omnia ista, inquam, tot tantaque coepti laboris impedimenta forent, quanta remove posse vix ulli ex nobis datum esset. In votis habeo hæc: ut aliam quamdam rationem excogitent, qua pro lubitu major minorve pullorum multitudo simul possit excludi; quæ nullos antea effundendos sumtus requireret; cui explendæ vel rustica plebs ipsa sufficeret; quæque delectationi & utilitati eorum cederet, qui ex iis, quæ in villa accidunt, amœnitatis quidpiam percipere valent, ac sua prædia avium copia plena videre peramant; qui absque prævia meditatione intelligunt: hæud minori cedere honori laborem qui circa pullos multiplicandos versaretur, quam studium arbores frugiferas, legumina, & flores hortorum colendi; qui tandem, rite expensâ curæ istius utilitate, secum reputant: quod entia animata, qualia sunt volatilia, multiplicando, graviores quotidie observationes ac experimenta Physicam colenti sese offerant, quam si vegetabilium incremento tantum studuerit. Volatilium multiplicatio itaque, quam hodie vetularum rusticarum curæ commissam videmus, quum sit objectum Physicorum adtentione dignum: (quippe quos solos & observandi industrias, & modum, quo nova quotidie experimenta institui debeant, excogitandi facilitate, & coeptis insi-

stendi constantia præditos esse novimus) eorum studio & curæ perficienda relinquimus ea, quæ rudiori stylo delineata dedimus. Duo autem sunt argumenti expositi objecta; scilicet: pullorum productio & educatio. Ægyptii nimirum, quum per mitiorem cœli sui temperaturam curæ educandorum superfedere poterant, omne suum studium in productionem pullorum contulerunt; in qua quantum profecerint, supra expositum dedimus. Dispicendum igitur, num illos imitandi locus nobis relictus sit; an alia quædam, furnis eorum æquivalentia, aut statui nostro magis accommodata substituere valeamus.

Optarem igitur, ut ignis continui, & alii jam usui inservientis virtute nulla subtracta, aliquam ejus partem ad excludenda ova impendere possent. Varii fuerunt curiosorum ex illo vitæ genere, quod furnos semper fere calefactos exigit, ut pistorum, artocreatum confectores, alii, qui aliquam caloris hujus partem, excludendis anatum seu gallinarum pullis impenderunt. Experimentis successum respondidisse compertum habeo: illos tamen nec in facilitandis expoliendisque mediis satis industriosos, nec eximie productorum utilitatis certos convictosque fuisse censeo: siquidem & ipsi statim a labore destiterunt, nec alios in sui imitationem perduxerunt. Alii tamen furni supersunt, qui continuo igne calefacti, aliquam caloris partem hypocaustis ovorum plenius communicare possent; ut furni officinarum vitri, furni ubi ferrum aliave metalla funduntur, furni pistorum, popinarum &c. furni villarum, communi omnium usui patentes, & quotidie, panis excoquendis ergo, calefacti. Uxoribus tandem rusticorum illorum, qui circa furnos eorumque usus varios occupantur, istis inquam, ovorum excludendorum & pullorum educandorum cura injungenda foret.

Antequam vero furnorum hucusque recensitorum utilitas mentem incideret; pullos excludendi ergo ova commisi sterquilinio; contentus vel serius ea reperiendi, quæ multo citius invenire potuissem, imo debuissem. Quicumque enim vel fugitivo oculo, ut ajunt, scriptores de re rustica, & Ornithologos, aliosque libellos, secretorum plenos, lustraverit; hunc fugere nequit, ope sterquilinii pullos posse excludi. Cui quantum veritatis insit, ut disquirerem varia fuerunt quibus incitabar. Ad studium Ornithologiæ, anni sunt, quod animum adplicaverim, quum aves colligendi esset desiderium, cui quidem, maximus jam collectarum avium numerus, hodie respondet. Et sane, moleste tuli, quum scientiam adeo utilem atque jucundam prorsus fere neglectam viderim. Quis enim est, qui adparatum ejus adaugere studeat? qui utilitates ejus eruere velit? Et quamvis maxima pars hominum nulla curet, num infinite variantes, ac curiositate nostra dignas avium species cognoscat & enumerare valeat: nemo tamen est, quin desideret, ut volatilium species notiores & alimento nostro inservientes, quoquo modo multiplicentur. Meum igitur fuit ut disquirerem, num sterquilinia excludendis pullis gallinaceis sufficerent; deinde, num tanta esset virtus sterquilinii circa ova excludenda, quanta furnis Ægyptiorum fuisse dicitur. Gesneri & Aldrovandi studio collecta reperies loca antiquorum ac recentiorum omnia, quæ de pullis sterquilinii calore excludendis tractant; nec tamen aliquis illorum sua experientia comprobatum esse factum subjungit. Crederem, nullum ex istis vel pullum sterquilinii ope exclusum vidisse, imo ne quidem experimentum instituisse. Modum, quem

quem præscribunt, facillimum esse crederes legendo; ast adde manum, & videbis quanta cautione opus sit, circa ovum sterquilinio reponendum & 3. fere hebdomadam spatio ibidem conservandum. Furno e contrario ova excludendi artem, aliquali saltem instructione vel rusticum quemvis edocere poteris.

Sic igitur pullos, alimentum adeo salutare ac gratum, copiosissimos redderemus. Et mihi sane summæ laudi ducerem, si mea cura quomodocumque illa efficerentur, quæ Regum nostrorum unus, populique salutis cupidus, pro suo in subditos amore vere paterno, illis adprecabatur, ut scilicet singulis diebus Solis, rusticus quisque gallinam adponere posset. Possent sane omnes, si majori cum studio circa multiplicandos pullos allaborarent.

En tibi L. epitomen libri recentioris, cui titulus est: *Ars excludendi & educandi, quovis anni tempore, aves domesticas, omnis generis, vel sterquilinii, vel ignis communis calore*, Operis præstantissimi, & veritate, judicio, & publici usus præceptis repletissimi.

Ast quousque quæso, sic pergit Cel. *Pluche*, matris amor in filios procedit! Ille vel naturam matris immutat. Nova officiorum genera, novas menti adfectiones inducunt. En gallinam, quæ facta est mater; illa enim, & sola quidem, jam nutriat, jam custodiat, jam defendat, jam hostem arceat. Se ipsam exuit, plane alia facta est, & amicitiae stimulo jam agitata, alios plane humores induit, vitia sua deposuit. Antea enim gulæ litans, quidquid rostro obvenerit, devorabat; nunc nil sibi retinet; vix frumenti granum, vel micam panis, vel aliud quidpiam reperit, cujus copia & sibi suam partem permetteret; illa autem omnia intacta servat, singulari quadam voce pullos advocat, illisque inventa omnia tradit; ipsa autem parcissimo cibo vivit. Antehac natura timida, ac in fugam prona erat; ast simulac pullorum agmen duxerit, heroinam videbis, quæ periculi omnis immemor, vel canis fortissimi oculos saltu petit ac rostro. Tanta autem animi virtus, novo hoc dignitatis gradu ipsi accedit; ut nec leonem extimescere videtur. Jucundissimum aliquod spectaculum paucis abhinc diebus adspicere obtigit. Anatum ova ad excludendum huic supposueram, & quamvis anates nec pulli egrederentur, mater suos illas filios existimans, studiosa fovebat, custodiebat, & matris instar conducebat. Nec non anates illæ, gallinæ tamquam matri, obsequium & reverentiam quamvis præstiterant. Casu tandem matris dignitati infausto, inter exspatiandum rivulum vident anates; naturæ instinctui satisfactoriæ ad aquam ruunt. Ast quanta sollecitudine tunc agitabatur, quanto timore percellabatur mater. Hanc vidisses oculo suis inhærente per ripam discurrere; jam suos admonere, & temeritatis ergo reprehendere; jam prætereuntium auxilium glaucitando implorare; iterum ad ripam redire & incautos revocare; hæ autem elemento suo innatantes amplius non curabant matrem, nec ad illam redibant amplius. En aquæ desiderium anatum naturæ inditum! En opus Dei! En! insitam creatoris cognitionem & majorum regulas, imo vim educationis superantem!

Ceterum quæ minus ad argumentum nostrum spectant, quamvis eadem addendi locus foret, brevitatis ergo, prætereamus; nec de monstris ovorum, nec de modo pullos elevandi & saginandi, nec de morbis eorum alia subnectamus.

Caponem dicimus gallum, seu pullum gallinaceum marem, cujus testiculos binos, ut caro ejus saporis gratior evadit, exsecuerunt. Nec novi inventi res est; etenim jam in Deuteronomio caponum jam igne, jam adfrictu, jam testiculorum extractione vel totali vel aliquali, castratorum mentio facta est. Eadem & antiquorum Romæ incolarum usui veniebant, imo faginas gallinas juniores vel 16. librarum pondus adtigisse legimus. Quas ut exsecarent, quum legibus deinde interdiceretur, gallos juniores, legi illudendo, castrare cœperunt. Tertio plerumque vitæ mense, & Junio quidem, moderati sui caloris ergo, castrari solent. Dissecto scilicet abdomine, ubi est regio testiculorum, cum indice digito, quam lenissime fieri potest, illos protrahunt, dissectam cutim consuunt, & plagam vel butyro vel adipe vel testiculis protractis oblinunt, hos tandem pullo devorandos exhibent. Capo autem tristior ex operatione, & per dies aliquot subsequentes, animo abjectus, quantam jacturam fecerit, persentire videtur. *Columella* est, qui eodem cum successu gallum castrari docet, si ferro candenti admoto, calcaria ejus ad vivam carnem usque adurantur, deinde autem terra argillacea adfricentur. Quem vero ad dimidium saltem, sive alterutro testiculo tantum protracto castraverunt gallum: *Cocatre*, seu *Cocquatre* Gallico idiomate dicere solent. Risum movet, muliercularum opinio quod gallus protractos suos testiculos si statim devoraverit, vel galli vel semicaponis facultate denuo donetur, ac si avulsi testiculi ex stomacho ad suum locum redire possent.

Hebraicum galli nomen est: *Gaber*, Græcum: *Alcôr*, Italicum & Hispanicum: *Gallo*, Germanicum: *Hahn*; Anglicum: *Cock*, Suevicum: *Hoens*. Gallicum autem, quo *Coq* dicitur, *Menagius* ex obsoleto Latino: *Coccus*, alii autem a crista sua coccinea, alii tandem a clamore suo derivandum esse censent. Nec non: *Gau*, *Geau*, *Gal*, *Goq*, nominibus ex Latino: *Gallus*, derivandis, venire solet.

Gallina, olim & *Pulla* dicebatur, quod quidem ejus nomen, hodierno Gallorum: quo: *Poule* seu *Pouille* audit, ortum dedisse censet *Menagius*. Dicitur & *Geline*, *Gelline*. Ab Anglis vocatur: *Hen*, a Germanis: *Henne*. *Gelinette*, *Gelinotte*, vocabula Gallica, nunc denotando pullo gallinaceo, nunc gallinæ silvestri inserviunt.

Caponis nomen Latinum, vel Italicum: *Capone*, Gallico: *Chapon*, Germanico: *Kapaun*, & Anglico: *Capon*, originem dedisse constat. Caponem juniorem Galli dicunt: *Chaponneau*, dicunt & *Hestoudeau*, vel *Hutaudeau*.

Multo autem sale volatili & oleo abundans gallus, infrequentiori cibo venit his qui delicatioris sunt palati. Eximiae enim suæ lascivitatis ergo, spiritibus, humoribusque seminalibus abundans, & magno semper calore agitatus spirituumque eximiam jacturam patiens: carnem aridam præbet, succo & sapore carentem, imo concoctu difficillimam. Hinc nihil ex eo cibo nostro venit, nisi crista, quam edulia ista, Gallis: *ragôts* dicta, ingredi novimus. Præcipuus vero ejus usus est ad componenda juscula & gelata; his vetustissimus quisque gallus sufficit; & aperiente, detergente, ventrem parumper laxante, nutriente insuper & restaurante virtute gaudent. Jus igitur ex gallo recepturus, gallum quem habere potes, vetustissimum cursu excitato delassatum mactes, plumis deinde & intestinis separatis, B. M. per 7. ad 8. horas, in vase probe occluso illum excoquas,

usque dum caro ex ossibus abierit omnis . Tum forti expressione colabis & f. a. u. Cujus cochleare unum, cuius juscule ægrotantis addes . Sunt , qui pro exaltanda ejus virtute, carnem ex vipera addunt; & pro explendis indicationibus variis, ventrem galli medicamentis confarciunt; ut lignis sudoriferis contra rheumatismos, plantis anti-scorbuticis contra scorbutum, & bechicis quum tabi subveniendum. Quæ quidem multum faciunt ad restituendas morbo enervatorum vires, imo sæpius pro restauranda salute sufficiunt. Gelatinam præparaturus gallum vetustiore in frustula conscinde, & addito frusto carnis vitulinæ, agninæ seu bubulæ, ollæ fictili probe obturatæ omnia immittas, per 7. ad 8. horas in B. M. excoquas, tum fortiori expressione coles, vasque fictili vernice obducto immissa ad u. f. Insipidæ gelatinæ si saporem conciliare velles, addas cochleare unum sacchari vel succi citrei, seu guttulas quasdam aquæ cinnamomi, florumve aurantii. Hanc gelatinam, optime nutrientem & corroborantem, per cochlearia, post jusculum haustum accipias. Cerebrum galli cum vino receptum, ad compescendum alvi profluvium facere dicitur; & gingivas infantum pro eliciendis eorum dentibus eodem adfricant. Partes galli genitales, ut quidam volunt, sperma adaugere solent, & ad gignendum facilitatem inducere. Eas scilicet arefaciunt, in pulverem reducant, & hujus ℥j. pro dosi, cum vino generoso hauriunt. Hanc quoque virtutem sanguini, & spiritui volatili exinde destillato tribuunt. Tunica gutturis galli interior sole arefacta & in pulverem redacta, pro specifico habetur ad confortandum stomachum; imo ad coercendum vomitum, ad compescendum alvi profluvium, contra colicam nephriticam & menstruorum suppressionem facere dicitur. Eaque omnia principiis, quibus constat, tribuenda esse censet Cel. *Rivière*, quorum ope concretiones calculosas frangendo atque solvendo, menstruorum fluxum excitat. Dosi veniat ℥j. ad 3℥. cum aqua quadam adpropriata pro vehiculo. Nec non contra incontinentiam urinæ reputatur optima, & cum pulvere erinacei, *Bartholeti* specificum contra morbum huncce ingreditur; auctores fere omnes pulverem gutturis præstantiorem ducunt. Torrefactum scilicet galli guttur in pulverem reduci & cum vino recipi jubent. Quod quidem, ut diximus, optimo medio cedit contra incontinentiam urinæ sive diurna sit, sive nocturna, sive partum difficiliorem excipiat, curatu alias ærumnosior. Fel galli pro eximio linimento ad profligandas oculorum maculas; & adeps emolliente, anodyna, resolvente ac nervis conveniente virtute pollens, linimento contra fissuras labrorum, contra dolores aurium pustulasque oculorum, commendatur.

℞. Gallum vetustiore, eumque plumis exutum & exenteratum in frustula conscinde Add.

Cochleariæ

Becchabungæ

Nasturtii hortensis

Petroselini Macedonici ana pug. j.

Cortic. aurant. amar. arefact. & contus.

Salis absinth. ana ℥j.

Affund. aq. comm. lib. ij℥. bull. in vase optime clauso in B. M. per 8. horas, & cum refrigerata fuerint omnia vas aperi, col. per expressionem, & div. in iiij. p. æ. & habeas juscula biduo consumenda, quorum alterum mane,

mane , jejuno stomacho , alterum quinta hor. pom. hauriatur . Diluatur etiam, si videbitur, cum quarta parte aquæ fontis ferventis. Si alvo solvendæ adaptandum esset add. massæ toti Rheobarbar. contus. ʒj. Jusculorum insignis est usus contra scorbutum.

℞. Spirit. vini ℥. ijß.

Ejusque quartam partem vasi Sinensium fictili (seu Porcellaneo) committe. Tum jugulabis 7. gallos juniores, & sanguinem eodem vase excipiendum & destillantem probe agitando commisce. Inter continuam agitationem reliquum spiritus vini adfunde. Add.

Cinnamomi contus. ʒij.

Sacchar. candid. pulveris. ℥. ß.

Omnia immittantur ampullæ vitreæ probe occlusæ, eamque fimeto caballino tradas per 40. dies, tertio quovis die autem finum superiorem & frigefactum subtrahe, substituendo recentiore. Tum refrigerato saltem liquore ampullam aperi, & habebis: *Essentiam* quam dicunt: *galli*; cui eximia virtus restaurandi inesse creditur. Dosi cochlearis j. cum aqua quadam adpropriata pro vehiculo, accipiatur, quoties vel nimia virium profusione, vel morbo exhaustus fueris. Nec non impotentia ad venerem in viris subvenire dicitur.

Gallinæ partes omnes multo sale volatili & oleo abundant. Frequentissimo etiam alimento cedit. Caro ejus pectori convenit, facilis est digestu, succum præbet optimum, abundans nutrimentum suppeditat, humectat & refrigerat. Hinc omnibus convenit, qui morbo virium fecerunt jacturam. Junior præoptanda est, multa & tenera carne instructa, quæ nondum ova posuerit. Vetustior carnem duram, siccam & digestu difficillimam nanciscitur. Et quamvis semper cujusvis temperamenti ac ætatis hominibus commendanda sit, magis convenit his, qui exiguo corporis exercitio defatigati, sedentariam vitam vivunt, quam illis qui laborum pondere onusti, & stomacho fortiori vigentes solidius nutrimentum exigunt. Arthritidis originem quondam in gallinæ, pulli & caponis usu quærebant. En duplicem erroris scaturiginem: 1. Aves istas arthritidi obnoxias esse constat, hinc cibo nostro venientes, morbos suos nobiscum communicare credebantur. Ast experientia refragatur, nec enim morbos, quibus animalia subjacent, uno cum usu eorum, accipimus. 2. Illi potius qui vitam labore & corporis exercitio immunem vivunt, qui nutrimentis succo delictiori abundantibus, ut pullis atque caponibus nutriuntur, hi potius quam reliqui, arthritide laborare solent. Nec tamen ex gallinis atque caponibus, eorum alimentis, sed otio, ac quiete nimia potius, imo vita dissoluta seu inordinata, illam comitante, arthritidem horum exsurgere constat. Brevis: si adfertis sua constaret veritas: nemo foret quin arthritide laboraret, vix enim quemquam reperies cui non sit frequentissimus pullorum gallinaceorum usus.

Ars Medica autem gallinæ usum externum commendat & internum. Juscula & gelatinæ ex hac, ut ex gallo elicita, quum sint refrigerantes, humectantes, & optimo alimento pleuri, pthisi & tabe laborantibus, ac ex morbo convalescentibus optime prosunt. Singulare quoddam relatum legimus in *Ephem. Germ. Anni 1744. pag. 75.* a Viro Cel. Ovelgun, D. Tres erant, sic ille, hebdomades, quod Vir quidam conditionis excelsæ, obsti-

natori ventris constipatione, ac summis alvi terminibus laboraret. Vana erant balnea, potiones oleosæ & clysteres. In desperatis jam habebatur salus, quum amicorum consilio obtemperans, sequentis medii ope, salutem recuperaret. Pullum scilicet mactatum integrum, ne plumis quidem subtractis, addendo aquæ communis libr. ijß. in B. M. & vase probe obturato excoqui, deinde cum forti expressione colari iussit, tum omnia in 3. ad 4. p. æ. dividendo, successiva juscula hausit. Vix primum receperat, & alvus ciebatur, tum aliquot post dies salus integra accessit. Membranam gutturis interiorē exsiccatam & in pulverem redactam dosi 3ß. pro excitanda urina, ac comprimendo ventris profluvio, commendant. Alii quidem, falso tamen, pulverem istum ad stomachum corroborandum & promovendam digestionem facere docent. Errori originem dedisse videntur, calculi quidam, sæpius in stomacho pullorum obvii, quos ad comminenda grana interdum deglutire solent gallinæ. Hos igitur reperiendo crediderunt: quod gallinæ stomachus vel calculos concoquendi virtute polleat, & membrana ejus interior ad confortandum stomachum quidpiam possit conferre. Nec tamen calculos istos gallina concoquit, quippe qui contritionem granorum saltem adjuvant; imo, si vel stomacho ejus tanta virtus inesset, num stomacho gallinæ mortuæ exsiccatō & in pulverem redactō, eadem virtus constanter inhærere posset? Quidquod sæpius virtutem ejus experturi, spe sua exciderunt. Nimius jam est mediorum adparatus, quem solitis igitur communibusque inhærendo, coarctare potius studeamus, quam nova, incerta, & ut volunt sympathetice agentia eruendo, amplificare.

Virtus eadem aut debilior stercorei gallinaceo inest, quam columbino inesse supra diximus. Hinc contra colicam, icterum, calculum & urinæ suppressionem commendatur. Partis suæ albæ, sive optimæ 3ß. pro dosi; quovis matutino & vespertino tempore, per dies aliquot, vel boli instar, vel aqua conveniente solutam præscribunt. Gallina integra & adhuc calida capiti illius adplicetur, qui febre maligna vel cerebri affectionibus laborat, ut: Apoplexia, Lethargo, Phrenetide, & Delirio. Subtractis scilicet plumis, ventrem tegentibus vivens adplicetur cordis regioni febrimaligna petechiali laborantis, si anxietates & deliquia illam comitentur. Venenum, seu humorem malignum adtrahit, aut paullo post eodem correpta perit. Hinc & si validior fuerit malignitas morbi, quum eximio auxilio ægrotantem reficere velis, sæpius tribus gallinis successive adplicandis opus est. Et hæc quidem Cel. Grugeri D. Observationi debemus, quam in *Ephem. Germ. Dec. II. anni IX. pag. 240.* reperies. Adeps gallinæ medium inter anserinum & porcinum locum tenet, & minori est acrimonia & facultate penetrandi. Contra fissuras labiorum, contra dolores aurium, & pustulas in oculis subortas adhiberi solet.

Quod ad externum stercoreis gallinacei usum, calcinatur, & purulentæ capitis scabiei, quo citior arefcat, inspergitur. Schroderus est, qui partem ejus flavidam cum oleo olivarum vel butyro frixam, refrigeratam, & a fordibus fundum petentibus expurgatam, ad consolidanda ulcera vesicæ facere docet. Mangones contra colicam equorum violentissimam ac periculofam, quam: *Tranchées rouges*, sive dolores colicos rubros dicunt, stercoreis gallinacei partem albam seligunt, hujusque tantum, quantum cochleare unum capit, in lactis vaccini lib. ij. solutum & tepidum equo, pro potu, exhibent.

℞. Partis albidæ stercore. gallin. recent. ℥ij. Infund. in vini albid. ac frigido. lib. j. peractis 12. horis levi expressione col. & erit potio, per 9. dies subsequentes, mane, jejuno, in externis pro contusionibus præbenda, dummodo lecto detentus succedentem expectet sudorem.

℞. Partis albid. stercore. gall. rec. ℥iij.

Butyri recent. ℥vj.

Folior. salviæ

plantagin. ana pug. jß.

In mortario contusa omnia, fortiusque expressa & linteo transmissa, excellentissimo unguento cedent contra adustiones, si partem læsam eodem illeveris, exinde autem foliis betæ seu plantaginis obtexeris.

Jam de qualitate ovorum. Ovi partes præcipuæ sunt albumen atque vitellus. Vitellus multo oleo, & sale volatili acido constat. Albumen acido fortiori, oleo, & phlegmatis parte moderata. Vitelli principia magis exaltata sunt magisque divisa. Ova alimenta & sanorum & ægrotantium sunt frequentissima, imo arti Medicæ varia media componendo veniunt. Variaratione cibo adpropiantur, ac salutis vel magis vel minus convenienti. Ut breves simus in recensendo, notamus, quod ova forbilia, sive recentia & una cum cortice, aqua fervente ita elixa, ut nec albumini nec vitelloni-mia soliditas accesserit, reliquis anteferenda sint, & præ aliis salutis convenientia; digestu facillima, sanguinem dulcem ac lacteum generantia, nec non acritates omnes, irritationum causas involvendo tussim sedare & vocem reddere soleant sonoram. Respirationis ærumnam sublevant, spiritus confortant, humores expurgant, corroborant, & testibus Medicis optimum & levissimum alimentum evadunt stomacho ægrotantis. Medicorum testimonio subscribit experientia. Peccant alii, qui majorem nutriendi facultatem vitello, quam albumini tribuendo, hoc spreto illum saltem deglutiant. Vitellus enim nudus, in stomacho calidiori facilis inflammatur, & repertis ibidem humoribus impuris, brevi tempore corruptione adfici-tur. Albumine vero, tamquam fræno compescitur, atque corrigitur. Hinc suo jure, recentiorum Vir quidam doctissimus, admodum, ait temperata sunt ova, nec illos imiteris, caveto, qui calidioris eorum naturæ ergo, febris detentis usum eorum interdictum esse volunt. Ovis forbilibus subjun-gamus tremula, sive jusculis ex carne elicitis immissa; etenim & hæc optima sunt, & valetudinariis ægrotantibusque conveniunt. Cæterum quæ butyro injecta, excocta, frixa & placentarum sub forma præparantur, omnia salutis adversa habenda esse memento.

Ars Medica tandem ovi corticem, albumen, vitellum & membranam cortici inferiorem ac ovum obvolventem in suos usus convertit. Cortex ovorum, super porphyrita in pollinem reductus, & dosi ℥ß. vel boli instar, seu aqua convenienti admixtus, eximia est virtute ad ciendam urinam, ad detergendos renes, & ad profligandos calculos. Præcipuum pulvis iste eorum constituit, quibus pulvis Virginis Stephens, contra calculum, & pulvis Viri Cel. Botrou, contra strumas componitur. Albumen refrigerante, adstringente ac adglutinandi virtute præditum, collyria præfertim pro rubore & inflammatione oculorum ingreditur. Bolo pro adglutinandis plagis additur, frontalibusque miscetur. Depurandis syrupis, nemine nescio, facit, Hippocrates febricitantibus, tria vel quatuor albumina,

quo reficiantur & refrigerentur, commendat. Vitello est virtus anodyna, maturans; digestiva ac relaxans; hinc clysteres contra tenesnum, dysenteriam & colicam atrocem ingreditur. Exigua salis quantitate mixtus, & nucis putamini inclusus, tum vero infantum umbilico impositus, alvum eorum laxare solet. Alii autem fel bovinum sali substituunt. Notissimum illud contra rheumatismos & tussim inveteratum, quod *lactis gallinæ* nomine venit, non est, nisi vitellus recens calidæ aquæ injectus, & probe agitatus, cui aliquantulo Syrupi Capillorum Veneris saporem amœnum conciliare solent. Hoc cubitum iturus per tres quatuorve dies subsequentes accipiat. Oleum vitelli expressione elicited, cutim lævigare, variolorum stigmata delere, hæmorrhoidum dolores sedare, contra adustiones item & fissuras mammarum facere solet. Membrana tenuis, ovum sub cortice tegens diureticæ est virtutis; imo externo usui contra febres intermittentes venit. Ineunte scilicet paroxysmo apicem digiti auricularis eadem obvolvās, & magnum in eo dolorem, imo paronychia artificialem excitabis, quem salus recuperata excipit. Sunt, qui contra diarream obstinatiorē ovum durius excoctum, cum aceto rosatum comedendum suadent. Pulveris corticis ovorum calcinato magna vis inest, scabiei inveteratæ ac lepræ medendi. En quæ in *Ephem. Germ. Dec. III. anni IX. & X.* scripta leguntur:

Miles quidam totus lepra obiectus medium ex Medico aliquo exposcebat. Hic illum per aliquot tempus, mane ac vespere, corticis ovorum calcinati & in pulverem redacti ℥j. recipere, corpusque semel in mense, hausto medicamento expurgare iussit. Miles consilio obtemperans, quatuor mensium spatio a lepra liberabatur. Præstantissimo quoque remedio contra icterum venit albumen ovi sorbilis, aquæ graminis ℥xij. & aliquantulo saccharo admixtis; cuius usum mane ac vespere instituas, ac per aliquot tempus continues. Albumen ebulliēdo durefcens destillatione aquam fere inutilem præbet, ast expressione liquorem limpidum, qui præstantissimo ophthalmico, & contra vulnera oculorum & ulcera eximio medio cedit. Ex ovo coctione duritiem nacto vitellum protrahe, ac locum ejus vitriolo albo adimple, cavæ deinceps committe, & liquefient omnia, habebisque liquorem pro morbis iisdem optimum. Ovum durum si acu longiori perforaveris & in frigido loco conservaveris, liquor proveniet limpidus & albus, qui singulari virtute gaudet ad lævigandam cutim, ad profligandas item faciei maculas, & in primis, si quædam Camphoræ grana eodem dissolvantur. Albumen durum ingreditur oleum Myrrhæ per deliquium Pharmacopoeiæ Parisiensis. Albumen crudum, aquæ aluminosæ & unguento albo *Rhasiano*; vitellus denique unguento contra hæmorrhoides, Pharmacopoeiæ ejusdem inest.

℞. Cortic. ovor. q. l. illumque multa aqua ablutum, subtracta pellicula inharēte, sole exsiccatum contundas in super. porphyrite in pollinem reduces. Sic optime præparatum habebis corticem ovorum.

℞. Terebinth. Venet. limpidiss. ℥j.

Pulv. cortic. ovor. ℥ss.

Rheorbarb.

Trochisc. ambar. ana ℥ij.

Sacchari optimi ℥ij.

Pulverifatis pulverifandis cum f. q. olei amygd. dulc. in mortario marmoreo subigas omnia ; ut f. opiata , cujus ℥ss. ad ℥jss. mane & vespera , diutius continuato usu contra faburram & calculum vesicæ & renum commendamus .

℞. Cortic. ovar. p.

Testar. cochl. p. ana gr. xv.

Oculor. cancr. p. gr. x.

M. f. dosis una, quam per 9. dies subsequentes , mane , jejuno stomacho , cum aqua parietaria , pro vehiculo , contra calculum & ischuriam , haurias .

℞. Aq. Rosar.

Plantagin. ana ℥ij.

Add. ovi album. num. j. probe omnia agites , usque dum albumen penitus solutum in liquorem abierit, quem pro collyrio refrigerante & anodyno commendamus.

℞. Ol. ovar.

Unguent. Popul. ana ℥ij.

M. f. linimentum contra hemorrhoides turgescences & dolorosas.

℞. Furfuris tritic.

Fol. verbas. alba ana pug. j.

Semin. lini pug. ss.

Bull. omnia in aq. comm. lib. ss. ad consumptionem partis tertiæ . Col. & colaturæ addas vitellos num. ij. , ut f. clyster anodynus , pro colica , tenesmo & dysenteria.

℞. Therebintin. limpid.

Unguent. basilic. ana ℥ss.

Mellis rosar. ℥ij.

Ol. styperici ℥j.

Vitell. num. j.

M. f. digestivum.

℞. Ovor. recent. num. vj.

Fractis cum cortice add. aceti optimi q. f. macer. per 24. horas , ut cortex solvatur ; deinde subtracta & rejecta pellicula in superficie oborta , igni lentiori admoveas , usque dum mellis spissitudinem adquisiverit . Cujus pars pro cataplasmate contra tumores colli adhibeatur ; tumore tamen antea probe calefacto & emollito .

℞. Therebinthin. limpid. & pur. ℥j.

Borac. ℥ij.

Ovi vitell. num. iij.

M. in mortario marmoreo , irrigando sensim cum Aq. Flor. Fab. lib. jss. Col. & f. a. u. Qui quidem liquor præstantissimo cosmetico , cedit ad lævigandam cutim , & ad profligandas ejusdem deformitates .

Pullus gallinaceus multum continet olei & salis volatilis . Qui , quum junior , carne tener , pinguis ac bene nutritus , nondum trimulus estris fuerit : pro nutriente , humectante , corroborante & refrigerante habeatur ; carnem enim suppeditat succi optimi & digestu facillimam , gallinacæ similem , sed teneriorem , ac succo magis abundantem ; hinc & plerumque gallina affata , pullus gallinaceus autem elixus cibo venire solet . Optimus

itaque est pullus & ægrotantibus & salute vigentibus, omnibus item; cujuscumque sint ætatis vel temperamenti; iis tamen, qui laborum exercitio defatigati, solidiori alimento egent, & crassiore, ne gallinam quidem, nedum pro cibo pullum commendamus. Jusculum illud levissimum, quod sub nomine : *aquæ pulli* venire solet, ex pullo gallinaceo in aq. font. lib. viij. per 3. horas, sive ad consumptionem tertiæ partis elixo præparatur, deinde fortiori expressione colatur & potui ægrotantis usuali venit. Usus ejus præscribere solent illi, qui vel majori diætâ eget, vel febris ob causam, tenuissimo alimento utatur, vel qui alvi torminibus seu Cholera, morbo, detinetur. Uberior enim jusculi hujus usus ad temperandam conducit bilem, exuberando stomachum ingressam. Prout insuper varias virtutes jusculo communicare velis, corpus ejus jam hordeo mundato, jam 4. sem. maj. frigidis, jam herbis radicibusque aliis confarcias. Sanguinem fortius expurgaturus, lepra, lichenibus & scabie inveterata infestatus, pullum cum carne viperarum comminuta, & panis micæ admixta saginet, pullos exinde in cibum vertat, & pene mirificos effectus experietur. En quod in *Ephem. Germ. anni 1742. Append. pag. 91.* legitur, *Mariani Seguer, D.* apud Germanos Experientissimi studio excogitatum jusculum contra Lienteriam specificum.

℞. Pullum deplum. & exenterat. unum. Hujus ventrem expleas folior. rosar. aridar. ℥j. vel folior. ros. arid. & balaust. ana ℥ss. Addas pulver. Trochisc. Ramich. Mesue ℥iij. pro adultis, & ℥ij. pro infantibus. Quæ omnia mediis foliis immittantur. Tum confuto ventre pulli, add. aq. font. vel flum. lib. viij. bull. ad consumptionem quartæ partis. Post remotum vas ab igne, B. M. tradas, quo calorem suum retineat jusculum.

Hujus jusculi ℥xvj. secunda quavis hora ægrotanti exhibeas, paullulum antea vero unguento Comitissæ, vel balsamo Catholico, vel alio quodam unguento, stomachi regionem ungas, deinde cataplasmate, ex mica panis vino (cum quo absintium, menta, rosæ arefactæ & balaustia ebulliverint) irrigata, obtegas. Omnia autem bihorio quovis, ante haustum jusculi repetantur. Nec somnus ægrotanti obveniens medii ordinem intercipiat, qui si obrepserit, expergefiat; nec aliud quodvis jusculum, fortius nutriens, eidem exhibeatur. Quod si nimia debilitate adfectus sit, accipiat Conf. Alkerm. ℥ss. cum cochlear. ij. jusculi præfati; præbeantur & olfactoria spirituosâ. Quod si tandem penitus debellando morbo prima jusculi quantitas nondum sufficiat, præparetur secunda, ac alius jusculi magis nutrientis additione corroboretur. Varia adfert Cel. *Seguer, D.* quæ felicissimum jusculi hujus usum loquuntur.

℞. Rad. alth. ℥ss.

Fol. plantag.

Fol. millefol.

Burs. past.

Borrag. ana man. ℥.

Rosar. rubr. pug. j.

Una cum pullo gallinaceo bul. in aq. comm. lib. iij. ad reman. dimidiæ partis. Col. leni expressione, & divid. in ij. p. æ., quarum alteram mane, jejunus, alteram quinta hora pomeridiana haurias. In quacumque dosi solvatur Bol. Armen. & Terr. Sigill. ana ℥ss.

Quæ quidem contra hæmorrhagias mirifice faciunt.

Capo tandem, sale volatili & oleo abundans, pinguiorem, teneriorem ac delicatiorem carnem castratione nanciscitur. Ardoribus enim, quibus exæstuat gallus, haud torrefactus, partes sanguinis balsamicas & spirituosas conservat, sicque majorem carni succum, & saporem delicatiorem conciliat. Reliquis anteferendus est ille, qui junior, tener pinguis, & fereno sub cælo vivens, nondum 7. vel 8. annos ætatis peregerit. Hujus caro restaurandi & vires debilitatas colligendi virtute præstat, & concoctu facilis, ac succo exuberans, præcipuo tabidorum nutrimento veniat. Juscula ex capone provenientia pro corroborantibus & restaurantibus; carnem caponis denique omnibus, cujuscumque sint vel ætatis vel temperamenti, ars Medica commendat. Adeps caponis linimento venit contra per-
niones, arthritidem ac rheumatismos.

℞. Membrana interna caponis arefacta ℥iiij.

Nuc. moschat.

Macis

Semin. cumin.

aneti

coriandr. ana ℥iij.

Fol. menthae ℥j.

Glyzyrrhir. ℥ij.

Sacchar. rosat. ℥ij.

M. f. omnium pulv. contra colicam flatulentas & flatus stomachi. Cujus ℥ss. ad ℥j. cum vini haustu, peracto prandio accipias.

H I R U N D O.

QUINQUE sunt, quas Europa alit, hirundinum species, scilicet 1. hirundo domestica, 2. hirundo major, vulgo: *Martinus magnus*, 3. hirundo fenestrarum, seu uropygio albo instructa, quam & *Martinum minorem* adpellant, 4. hirundo fluviatilis, 5. hirundo, quam Galli *Tettechèvre*, seu Caprimulgam, Solonienses: *Chauche-branche*, vel *Crapaud-volant*, bufonem alatum nuncupant; quam Viri Cell. *Klein* & *Linnaeus*, suo jure inter hirundines referunt. Nos tamen non nisi domesticæ hirundinis descriptioni inhæremus, quippe quæ frequentiori Medicinæ usui venit.

Hirundo. Offic. Schrod. 320. Ind. Med. 59. Dal. Pharm. 422. Lemer. 426. Belon. des Ois. 379. Merr. Pin. 177. *Hirundo domestica*. Aldrov. Ornith. 2. 662. Gesn. de avib. 492. Schvenckf. Aviar. Siles. 286. Jonst. de avib. 83. Charlet. Exer. 95. Willughb. Ornith. 43. *Hirundo rectricibus*, excepto pari intimo, alba macula notatis. Linn. Faun. Suec. 244. *Hirundo urbana*, seu vulgaris; *Hirundo sanguinolento pectore nobilis*; *Progne Poetis dicta*. Nonnull.

Hirundo domestica, pondere suo vix unciam, longitudine ab apice rostri ad extremitatem caudæ 7. digitos, latitudine tandem alarum extensarum 12½. digitos explet. Rostrum ejus est breve, nigrum, prope caput latissimum, excavatum & compressum, in extremitate cuspidatum, intus vero nigrum. Lingua tandem cum palato flavida. Oris apertura amplissima, facile captandis muscis volantibus cedit. Lingua ejus est brevis, lata, bifida. Oculi magni, membrana nictitante, irideque cæsa instructi.

Pedes

Pedes breves & nigridi. Digitus externus, mediante membrana, medio nectitur. Color capitis, colli, dorfi, & uropygii, obscuro-cœruleo-rubicundus. Tum supra ac infra rostrum macula sanguineo-rubicunda, major tamen in mento. Pectoris ventrisque color albidus, rubedine intermixtus, idem & plumarum inferiorum alas obtegentium; Cauda hirundinis bifida 12. constat plumis, quarum extimæ 1. digiti longitudine præcedunt adjacentibus; cuspidibus enim longissimis illæ gaudent; interiores autem per gradus decrescunt. Singulæ autem quæ caudam constituunt, pennæ, macula transversali albida notatæ, & binis mediis exceptis, nigræ sunt. Cujusvis alæ pennas majores 18. numerabis, easque nigrida, ast aliis iisque cœruleis splendentibus obteguntur. Scarabæos in stomacho ejus deteximus, & in ventriculo calculos plures, transparentes, inæquales rubicundo colore tinctos, imo prope margines, vermiculos, 3. digitorum longos, ac in spiralem circumvolutos. Hirundo domestica nidum in caminis construere solet; & Juliæ Valentiniæ Ederanorum, plures exeunte Septembre, venum expositas vidimus. Quo autem hyeme tendant hirundines, & ubi delitescant, de eo disceptant Physici, nos ignoramus. Nos autem Æthiopiam, Ægyptum aliasque regiones calidiores illas adire censemus; nec ut vult *Olaus Magnus*, in fundo maris, sub glacie detineri, vel in rupium atque ruinarum foraminibus, arborumve rimis delitescere. Teste *Herodoto*, nunquam Ægyptum derelinquunt, id est, ut recte observat *Aldrovandus*, ibidem nascuntur, nostrates enim eo, hybernatum, abeunt.

Hirundines, ait *Petrus Martyr*, milvos, aliasque transmigrantium, hyeme ingruente ex Europæ regionibus decedentes, Alexandriam petere me me docuit experientia. Cæterum varias hirundinum vario colore notatas esse videbis. *Aldrovandus* etiam candidissimas sese vidisse refert hirundines domesticas, quas si producere velis, ova earum totum incubationis per tempus oleo olivarum adfrices. Hæc *VVilloughby*.

Mediæ magnitudinis, ait *Belon*, est hirundo domestica, etenim hanc, quam *Martinum minorem* dicunt, magnitudine superat, ast illam, quam *Martinum magnum*, seu *Mortardier* adpellant, nondum adtingit. Nec avem noscimus, quæ volatus sit celerioris. Fortissimis namque alis instructa illisque confisa, rapido volatu domos intrat, nidum in caminis vel pavimento construit. Nec capiendi cibi ergo in terram descendere vidimus, volando enim comedit. Calculos interdum pro expurgando stomacho deglutit. Bis in anno pullos excludere dicitur, imo & nobis videtur. Tandiu enim alibi quam nobiscum commoratur. Revertitur autem quum in flores abierit *Chelidonium*, hinc nomine hocce ab aliis insignita est. Jam quum *Chelidonio* virtutem oculis medendi inesse constet: alii sunt, qui hirundines nuperrime exclusas, ac fumo camini occæcatas, *chelidonio*, matris cura ad nidum deportato, visum recipere censent. Nidum suum canistri instar, supra apertum relinquit hirundo domestica, *Martinus minor* autem sphaericam illi figuram conciliat, infra supraque obtegit, nec nisi arctissimum aditum conservat.

Plerumque nidum, sic *Frischius*, domestica hirundo in domibus parum frequentatis construit, ubi ab incurso glirium, felium, aliorumve tuta esse possit. Ex fœno, stipulis & gramine componitur nidus, illumque extruendo singulis herbarum culmis, cœni quantum rostro capere potest, addit,

sic

sic tandem opus totum conglutinat, ex quo pendentes sæpe videbis herbarum stipites. Sic intus forti pavimento obductum nidum plumis, aliisve mollibus explet; ac bis in anno, primo quidem quina vel sena, secundo autem quaterna ad quina ova deponit. Quum tandem primo exclusis volandi facultas accesserit, vicinum sibi stagnum quærit seu paludem, frequentibus dumetis circumdatum, eo sese confert, ac pro nocturna securitate illum inhabitat. Arbuſtis a pluvia violentiore tuetur, rariorem non curat. Quod si animal nido accedens, seu avem rapacem aeri inhærentem mater conspexerit: singulari quadam voce pullos admonet, tum imperterritito volatu, avi rapaci obvolat. Vocem, vel si mavis, cantum reliquis hirundinibus jucundiores habet domestica, quem longioribus æstatis diebus præsertim sub auroram extollit, statim vero monotoniæ ergo, tædio cedit. Quod si in aere obvolitantia insecta deficient hirundini, proxima domibus transiens araneas telis inhærentes captat; vel si insecta quædam in aquis paludum stagnantibus conspexerit, aquarum superficiei advolans, nutrimentum quærit, vento alis excitato, insecta adigit, & caudam aquæ immergendo captare studet. Domestica hirundo reliquarum ultima abit, & prope stagnum, vel in vineis confluxæ sereno cœlo & summo mane, observato profundo silentio, iter suscipiunt.

Transmigrantium avium instar, & hirundines, peracto apud nos æstatis tempore, calidiores regiones hybernatum accedere, nos quidem ducimus, idque cum Physicis multis. Ast contraria nostræ sententia est *Aristotelis* ac aliorum in Physicis magnorum, quorum nonnullos adducere liceat.

Avium transmigrantium aliæ, (sic *Cel. Pluche*) frigidissimis, aliæ temperatis, aliæ tandem calidissimis regionibus detinentur. Aliæ nutrimenti vel aeris captandi ergo, regiones saltem permutant, aliæ autem maria transeundo longissima quævis itinera suscipiunt. Diversa videtur coturnicum & hirundinum itineris ratio. Harum plures maria transvolare creduntur. Ast testimoniis fide dignissimis Anglorum pariter ac Suevicorum constat, plurimas regionibus Septentrionis detentarum sæpius remanere in Europa, ac junctis inter se rostris ac pedibus delitescere in foveis terræ. Infrequentiora loca adeunt, coacervantur, imo sæpius aqua excreſcente corripuntur. Ast nec aqua inundatæ nec glacie obtectæ pereunt, dum provida sui cura, plumas suo oleo probe illeverint, & caput intus recipere, dorsum foras evertere consueverint. Sic torpore correptæ hyemem motu expertes peragunt. Cordis palpitatio continuatur, & accedente veris calore exspargiscuntur, ad suum quævis nidum, regionem, urbem, seu villam revertuntur.

Sic & *Cel. Klein* in *Dissertatione de avibus transmigrantibus* huic opinioni accedere videtur, quod scilicet hirundines aliæ in foveis terræ, aliæ sub aqua hyemem peragant. Eadem sententia est *P. P. R. R. du Tertre* & *Kircheri*, *Cell. Brubier*, *Ellis*, & Sodalibus Reg. Scient. Societatis Londinensis. *Olaus Magnus*, Archi-Episcopus Upsaliensis, indubitatam veritatem huic factò constare docet. *Frischius* autem, contrariam opinionem alens, foret exponendum, ait, quam ratione quæ adferuntur, fieri possent. Ego enim, variarum hirundinum ex cruribus, filum rubrum, aquæ colore tinctum, expendi, ut sic immutato colore, num aquæ infuerint, cognoscerem. Redeunte vere ad nidum suum revertentes, filum, uti fuerat, rubrum

brum adportabant. Imo hirundinem sub aqua detineri dicis, qui respirare potest, quæro. Etenim & branchiis & pulmonibus, quales sunt piscibus, caret. Regeris: uti foetus utero matris detentus; ast ubi foramen illud ovale, cujus ope sanguis, vel absque aeris externi accessu circulare valeat? Revertuntur ex loco ubi & victum necessarium & volandi commodum habuerant, plumas enim ordine dispositas secum adportant; nec famem expertæ sunt, nec quidquam ex mole sua perdiderunt, nec virium fecerunt jacturam, vix accedunt & nidum construunt, coeunt, numquam pullos secum adportant. Vides igitur, regionem, hybernis suis destinatam, semel bisve excludendis pullis haud suffecisse.

Tanta igitur opinionum diversitate detenti, judicium suspendimus, usque dum ex testimonio Cel. *de Reaumur*, veritas constabit. Prodromi instar subjunxisse sufficiat, quænam sint de hac re cogitata Viri adeo Illustris. Suo enim judicio subjecimus observationes amici cujusdam, circa acervos hirundinum, in lapidicinis Victorias Pertisum prope Parisios hyeme repertos. En igitur quæ respondidit: Optarem sane & ego vidisse, quæ amicum vidisse refers, nempe acervos hirundinum ex lapidicinis istis protractos; talia enim, ut denegare possim, testimoniorum cumulus vetat, ut credam, nimia facti novitas. Videndi desiderium superest. Nec adeo mirandum foret, si ex lapidicinis, quam si ex mari glacie obtecto, hirundinum cumulos protraheret. Supremus Polonorum castris Præfectus, se cumulos protractarum ad me transmissurum promisit, ast nondum transmissit, licet & ille promisso servandi, & ego rem novam videndi desiderio flagremus. Imo & Regis Sardiniae Legatus, cumulos, ut recenset, in Sabaudia obvios pollicetur; hos exspecto, & respondebo.

Veris redeuntis nuntia, hirundo domestica, quindecim plerumque diebus Martinorum majorum & minorum adventum anticipat. Quum vero, id quod sæpius accidit, ex adventus sui tempore, frigus aliquod vehemens & singulare supervenerit, multæ illarum fame & frigore enecantur. Nec enim muscas nec alia insecta, præ frigore, reperiunt. Huc ea pertinent, quæ in *Reaumurii Observationibus Thermometro*, anno 1740. & *Parisiis & alibi institutis*, leguntur: Quæ autem vere sequente reditura, ingruente hyeme regiones nostras relinquunt, aviculæ, nesciæ, ut videntur, status ac conditionis terrarum nostrarum, deficiente ubi commorabantur nutrimento, nostras regiones adeunt: Sic in anno 1740. status nostri ignaræ omnes, quæ primæ advenerant, fame peribant. Quum enim muscis plerumque & scarabæis in aere detentis nutriantur, frigoris ob vehementiam segniora tum insecta opplebant aerem, quorum pars maxima, hyeme sub forma nympharum latet. Calorem scilicet transformationem insectorum accelerare, ast frigus eandem retardare docuimus. Hinc anno eodem muscæ minores, solito tardiores aerem opplebant. Hirundines itaque frustra alimentum volando quærentes, defatigatæ & fame peribant. Majo mense, anni ejusdem epistola Viri Cel. *Bazin*, ex Argentorato ad me transmissa reddebatur, qua edocebar: quod hirundines, alias Aprile mense, Alsatiā adeuntes, deficientibus insectis, omnes fame enecatæ fuerint, & agminatim ex aere in plateas & hortos, morientes delaberentur. Varias & ego, in hortis Charentoni collegi, nec vim fugæ sufficientem inesse vidi. Plures jam mortuas, jam semianimes Parisiis & circumjacentibus in regionibus repe-

rierunt, imo tota in Gallia, pari morte illas decessisse audiui. Nec tamen longioris hyemis ergo, lusciniæ solito tardiores Parisiorum viciniam adire, multas enim jam diu est, quod cantantes audiverim. Primam ego idibus Aprilis, hortulanus autem meus biduo ante, jam aliam perceperat. Lusciniæ quidem, hirundinum instar, infectis vivunt, nec tamen his foliis, sed & in superficie terræ arborumque cortice, imo sub istis, vermes & nymphas pro cibo conquirunt, forsan & erucas peramant. Hinc nec muscarum inopia lusciniis adeo infesta fuit, quam hirundinibus.

Graviter vero & moleste tulimus, hirundinum nos visitantium fata, eo potius, quam nullum nobis detrimentum sive molestiam adferant, imo potius insectorum multiplicationem nimiam, nobis infestam, præpediant.

Rarior hirundo pedibus ad incedendum, & tunc quidem inconcinne utitur, quippe qui debiles sunt ac breves. Tortuoso & rapidissimo fertur volatu, difficilis cavea detenta cicuratur, difficilior nutritur. Quaterna plerumque ad quina ova, eaque albo cinerea & fulvis maculis conspersa deponit. *Aristoteles* est, qui docet, quod si hirundinum recenter exclusarum oculos occæcaveris, temporis tractu videndi facultas redeat. Idem refert & *Celsus*, additque: quod, quum oculorum humores facillime renascantur, fabulæ origo exorta sit, qua Chelidonii auxilio visum illas recipere scripserunt. Nec non, teste *Aeliano*, summa est utriusque parentis æquitas in educatione pullorum, prius nempe alimentum primum excluso, ætate minimo autem ultimum præbent, tum denuo a primo ad ultimum, haud interrupto ordine pergunt. Avium omnium masculos coeundo fœmellas ascendere, docet *Plinius*, hirundines autem caudis inter se junctis, more papilionum coire. De quo cum *Aldrovando* & nos dubitamus. Volatum hirundinum valde depressum pluvie imminentis signum esse teneas; eumque vel muscas & insecta alia, suum nutrimentum ut captent, vel ventum ut evitent pro ratione habere ducimus. Hominum societate tutas se habent, eaque delectantur; hinc *Aelianus* Penatibus & Veneri sacras easdem dicit. Similis quædam opinio, teste *Aldrovando*, mulierculas Bononienses invasit, quippe quæ pueros ut hirundinibus nil molestiæ, nedum mortem adferant, impedituræ, illas B. Virgini sacras esse docent. Observante *Gesnero*, plebis gaudio cedit hirundinum reditus, illas enim fausti bonique augurii testes habent, libentes hospitium concedunt, nec umquam nidis expellere audent.

Græcum ejus nomen est: *Kelidôn*, Latinum vero, seu potius diminutivum obsoletum: *Hirundinella*, teste *Menagio*, & Italico: *Rondine*, *Rondinella*, & Gallico: *Hirondelle*, originem dedisse videtur. Dicitur & *Herondelle*, *Harondelle*, *Arondelle*, *Aronde*, *Fronde*; pulli ejus apud Gallos: *Hirondeaux*, *Arondeaux*, *Arondelets*, *Hirondelleaux*, nuncupantur. Hirundo domestica Gallis audit: *Hirondelle domestique*, de maison, de cheminée, ordinaire seu commune; Germanis: *Haus-Schwalbe*; Anglis: *Common* seu *House-Swallow*, Suevis denique *Ladu-Svala*, nominibus idem denotantibus.

Hirundo oleo & multo sale volatili abundans, apud nos nullius, nisi forsan egeni, nutrimento venit. Ast ab Italis & præsertim Bononiensibus Martinum minorem, si pinguis fuerit, in deliciis haberi refert *Aldrovandus*. Carne enim & pinguedine parcissima gaudens, nemini arridet, ast arti Medicæ multa ac præstantiora medicamenta exhibet. Generatim spectata

hirun-

hirundo virtute singulari pollet contra Epilepsiam, anginam, aliasque gutturis inflammationes, imo ad exacuendam aciem oculorum. Vasi fictili hirundines juniores immittunt, igni admovent, arefaciunt, & in pulverem reducunt, cujus ℥j. pro dosi, vel nudi, vel aliis contra anti-epilepticis, anti-paraliticis, anti-hystericis, & anti-apoplecticis mixti, præcipiunt. Nec non aqua hirundinum composita, quæ in omni officina prostat, contra morbos istos mirifice facit. Cujus dosis est ℥ss. ad ℥iiij. Quum vero omnis hirundinum virtus ex sale earum volatili sit petenda, cautione opus est, ne facès, peracta destillatione in fundo Cucurbitæ defidentes, reiiciantur; sed potius sedimentum illud retortæ argillaceæ seu vitræ immittatur, (quæ acolipilæ deinde probe adglutinanda esto) tum vero igne per gradus subdito, phlegma, post spiritum, deinde oleum ac tandem salem volatilem elicias; refrigeratis vasis, ea quæ acolipilam ingressa sunt, agitatione continua cum adhærente sale volatili probe misceantur, tum per chartam bibulam filtrentur, ut separetur oleum, liquor denique in Lambico vitreo, ignis arenæ moderatioris auxilio rectificetur. Sic habebis aquam substantiis principalioribus mixtorum eorum imprægnatam, quæ compositionem aquæ hirundinum ingrediuntur. Imo spiritus hicce rectificatus & sali volatili abundans, priori destillationi admixtus, virtutem ejus summo opere exaltat. Unanimi omnium consensu eximia est virtus hirundinum juniorum contra anginam & debilitatem oculorum. Usus earum jam externus, jam internus commendatur. Cineris scilicet, modo, quo diximus, elicti, ℥ss. ad ℥j. pro dosi, ægrotanti cum cyatho aquæ exhibent. Cinis ille, melli admixtus linimento contra anginam si collo adplicetur, si oculis, contra debilitatem eorum venit. Stercus hirundinum calidissimum, acre & resolvens, gargarismos contra anginam ingreditur, & album græcum, pluries adhibitum, virtute, æquiparat. Facit & contra stranguriam, calculos & colicam nephriticam. Summa enim virtute incidente gaudet, & pro adtenuandis & detergendis calculis atque saburra, urinæ ductibus, qui inhærent, mirifice facit. Nidum hirundinis alii specificum credunt, contra anginam & inflammationem tonsillarum, & sequens cataplasma ex illo componunt:

℞. Nidum hirundinis, una cum pullis, eumque contunde, & aqua q. s. excoque, tum cribro trans mitte, & habebis cataplasma inflammationis regioni adplicandum.

Qui autem huicce remedio respondere solet, effectus, ille & ex stercore, nido detento, & ex substantia cœnosa, sive materia, derivandus venit. Stercus enim, sua natura, sale volatili vel ammoniaco gaudens, calidissimum, incidens atque resolvens, sanguinem retentum, inflammationis causam, dissolvere & adtenuare valet, imo motum sanguinis promovendo, abscessibus maturitatem adfert, suppurationem provocat. Nec non terra nidi cœnosa, naturæ suæ salinæ ergo, effectus recensitos promovet; sanguinem scilicet impedit, ne segnior profluendo stagnet, motum ejus adauget, facitque ad resolvendam partem adfectam. Habes igitur, ex quo derivare possis tantas cataplasmatibus virtutes, quantas *Amatus Lusitanus* Medicorumque alii eidem inesse docuerunt. Plerumque nudum, interdum vero oleis, aliisque mixtum adhibetur.

Calculus denique in stomacho quarundam hirundinum juniorum ob-

vium,

vium, lenticulam magnitudine exæquantem, ac *hirundinum calculi* nomine venientem, oculis immittunt, ad expellendas, si quæ forsan inciderint, fordes. Hic enim, alkalinae suæ naturæ ergo, oculorum ferositate imbuitur, mollescit, hinc & corpus heterogeneous præsens eidem adglutinatur, una cum calculo prolabitur. Alii tandem pro amuleto, hunc calculum, ex collo vel brachio infantum Epilepsia detentorum suspendunt, cui tamen parum virtutis inesse solet.

Hirundines basin constituunt aquæ *hirundinum compositæ Pharmacopœiæ Parisiensis*.

℞. Cineris pullor. *hirundin.*

Castorei ana ℥j.

Infundantur per noctem integram in aceti optimi ℥j. postridie expressione col. & colatura exhibeatur Epilepsia laboranti, vel ante, vel post accessum Epilepsiæ.

℞. Pulver. ex *hirund.* arefact. q.l.

Illumque cum f. q. mellis subigas, & habebis linimentum contra anginam & inflammationem tonsillarum.

℞. Nidor. *hirundin.* num. ij.

Eosque cum q. f. aquæ communis irrigando, in mortario contundas. Bul. omnia per semihoram, deinde autem cribro transmittantur.

Add. pulpæ huicce

Olei chamæmill.

lilior. ana ℥j.

Vitellum num. j.

F. omnium cataplasma, pro angina, gutturi adplicandum.

℞. Nidum *hirund.* unum

Florum sambuc. man. iij.

Bul. cum lacte vaccino ad consistentiam cataplasmatidis, cui inter agendum add.

Olei chamæmill. ℥j.

Deinde adplicetur gutturi, contra inflammationem tonsillarum.

Alii quidem in hisce cataplasmatibus conficiendis aquæ acetum substituant, quod tamen nobis nequitquam arridet, imo medii virtutem hac ratione imminutam esse ducimus; acidum enim aceti, sal illud volatile in nido *hirundinis* obvium figendo, multum detrahit ex facultate ejus penetrante & resolvente.

℞. *Hirundin.* in vita num. xxxx.

Castorei ℥j.

Vini candidi lib. iij.

Macér. omnia per 24. horas; exinde autem per B.M. ad exsiccationem usque destil. Tum sedimentum retorta iterum destil. & spiritus urinosus egrediens, igne pariori rectificetur, oleo in fundo relicto. Tandem vero spiritus hicce rectificatus priori aquæ admisceatur, & f. a. u. Hujus dosis esto ℥ss. ad ℥ij. contra Epilepsiam, & accessus hystericos.

M E R U L A.

M*erula*. Offic. Dal. Pharm. 427. Lemer. 568. Gesn. *de avib.* 542. Charl. Exer. 90. Merr. Pinn. 177. Aldrov. Ornith. 604. Jonst. *de avib.* 73. *Merula nigra*. Belon. *des Ois.* 320. Schvenckf. *aviar. files.* 300. *Merula vulgaris*. VVillughb. Ornith. 140. Raii Syn. *Method. Avi.* 65. *Turdus ater*, *rostro palpebrisque fulvis*. Linn. Faun. Suec. 184. *Turdus niger*, *Merulus*, *Nigrettus seu Nigretta*, *Collyrion*. Quorumd.

Merula & magnitudine sua & quatuor unciarum pondere illi turdorum speciei adnumerandus venit, cui *Litorne* nomen, *Belonius* tribuit. Longitudo ejus ab apice rostri ad extremitatem pedum $9\frac{1}{2}$. digitis, ad finem caudæ autem $10\frac{1}{2}$. ad 11. digitis absolvitur. Rostrum ejus, colore croceum digito 1. longum; fœmellæ vero rostri apex & pars superior nigrum, pars tandem oris interior in sexu utroque, & palpebrarum ambitus flavidum præbent colorem, 18. rectrices numerabis in omni ala, quarum quarta est longissima. Caudam $4\frac{1}{2}$. digitis longam, 12. pennæ, ejusdem fere longitudinis omnes componunt, extimæ tamen utrinque sunt paullulum minores. Pedes merulæ sunt nigri, digitus exterior posteriorem exæquat, primus ex parte inferiore cum medio cohæret. Hepar in duos lobos dividitur, quorum dexter maximus est. Fellis vesicula una, & stomachus minus musculosus, quam in reliquis hujus generis avibus conspicitur. Nul- lum vero vestigium appendicis intestinalis. Merula baccis plantarum æque ac insectis nutritur. Masculorum primum annum agentium rostrum nigrum, exeunte anno flavum pulcherrimum colorem induit. Ætate provectior tandem masculus totus nigerrimo est colore. Masculi autem & fœmellæ juniores fulvi potius sunt, quam nigri coloris, & pectore rubicundo, ventre subcinereo superbiunt; nec enim junior masculus a fœmella colorum varietate distinguitur. Multus est in cantando masculus. Fœmella quaterna ad quina ova cœrulescentia, fulvisque maculis conspersa ponit. In Panninis Alpibus, aliisque montibus excelsis sæpissime albas merulas reperiri novimus. Imo Romæ apud aucupem, merulam albo nigroque variegatam vidimus, casus fortuiti effectum, ut in corvo, cornice, aliisque videmus. Singulari interim artificio nidum merulæ constructum invenies; foris enim ex musco, ramusculorum & radicum festucis compositus, deinde autem cœno, tamquam glutine obductus est, quo & pars interior, pro pavimento induitur. Nec, turdi instar, merula nudo glutini sua ova committit, sed illi superstratis crinibus, vel fœno, musco, aliisque mollioribus, ut & confringendi periculo careant, & strato molliori pullus insidere possit. Cæterum aqua sæpius lavari solet merula, & pennis evellendis lubentior occupari; imo ex suo in solitudinem amore, nomen ejus Latinum *Festus* & *Varro* deducere studuerunt. Hæc *VVilloughby*.

Neminem nescire censeo, sic *Belon*, quod merula colore nigro gaudeat, & senescentis rostrum, ut sturni, flavescat. Sexus differentia quoque aper- tissima patet. Teste *Aristotele*, ubi de moribus merulæ dicitur, hyeme il- lam interceptos saltem sonos edere docet, æstate autem pleno gutture can- tus effundere, & nigriorem æstate colorem præ se ferre, quam hyeme. Bis per annum ova excludere dicitur, hinc etiam citior reliquis, scilicet statim

statim ab initio veris incubationi sese accingit . Varii generis carnem ; vermes , femina , & fructus comedit . Ubivis frequentissima obvenit , ac cantus sui acutioris ob causam cavea detinetur . Turdos atque merulas quodam amicitiae vinculo jungi credidere antiquiores . Hanc nigræ cognomine salutant , quo a merla monile gerenti , & in Sabaudia & Delphinato frequentissima , sapore huic simillima , ac iisdem cibi generibus utente , possit distingui . Merula alba numquam non rarissima habita est . Hanc , teste *Aristotele* , & magnitudine & cantus ratione nigram exæquare , nec nisi in Cyllene , Arcadiæ regione , nec alibi reperiri constat . Quod si autem qui Arcadiam tenebat , Alexander , & Sabaudia ac Averniæ imperasset ; *Aristoteles* autem suos eo aucupes ablegasset ; fane a ruricolis terrarum illarum alia edoctus , contrarium docuisset .

Merula foemella tantæ est differentiae a masculo , ut plane alius speciei avis crederetur . Hic enim , quum nix ultima liquecit , primum edit cantum , haud adeo ingratum , si valle detentus percussione iteratum ceperis ; feliciori insuper memoria gaudet , & quæ didicerit , retinet ; Docilitate eximia præditus hominum voces imitari addiscit , nec tamen psittaci instar , satis articulatas profert . Densis arbuſtis delitescere peramat , & nidum suum magnum , solidum , conglobatum ac pelvis instar excavatum in mediis spinis albis construit . Sic & ova incubando masculus nonnunquam vices foemellæ subit , reliquum vero tempus huic alimenta adportando , cantus modulatione illam exhilarando , & ab omni hostium incursione tuendo , transigit . Nec non caveis inclusæ ova sua incubant . Sic curiosus quondam , ut ipse testatur , par merularum receptaculo cuidam , in extremitate horti prope taxum in pyramidem efformatam , sito , inclusit . Et statim nidi basin ex musco construebant , huic deinde pulverem , ingluvie sua detentum , superjacebant , pedibusque aqua irrigatis proculcabant , sicque strata omnia paullatim perficiebant . Foemella cibum a masculo accipiebat , & ova incubare sollicito cum studio pergebat . Pulli tandem exclusis lumbricos in frustula conscissos præbebant , & excrementa a quovis pullo post acceptum lumbrici frustulum ejecta , sollicite expectabant , iisdemque pro parte nutrimenti utebantur . Sic quater in anno pullos excludabant , sed en ! tertia & quarta vice exclusos devorabant . Vel præſente Observationis auctore , masculus filios enecabat & matri præbebat ; hinc ille inopiam merularum adeo foecundarum deducere studet , quippe quæ turdis atque alaudis sunt infrequentiores . Ast facinus istud , naturæ legibus adeo adversum , plurium observatione comprobatum optamus . Testibus *Aristotele* & *Plinio* , merulæ , hyemis tempore vel alias terras adeunt , vel latibulo quodam delitescunt ; errant , nostrates saltem , more turdorum omne hyemis tempus in Gallia terunt . Brevioris vitæ , quam merla vivit , causam in eo quærunt alii , quod dormiens anum vento obvertat , nec reliquarum instar , caput , ut scilicet ventus pennas elevando , majori illas frigore adficere nequeat . Nos dubitamus , usque dum facta major constabit veritas .

Græcis merula dicitur : *Cossuphos* , seu *Cottuphos* ; Italis : *Merla* , *Merlo* , *Merula* , Hispanis : *Mierla* , Germanis : *Merle* , Belgis : *Meerl* , Anglis : *Blackbird* , seu *avis nigra* , Suecis : *Traſt* , Picardiensibus : *Normesle* , Vasconiensibus : *Merlat* , Gallis : *Merle* , nominibus a Latino derivandis . Merulam ,

foemellam Galli plerumque dicunt: *Merlesse*, vel *Merluce*, Lotharingi autem: *Merlette*.

Merula multo oleo & sale volatili prædita, cibo nostro venit, ac succum probum suppeditat. Romani antiquiores, & turdos & merulas caveis inclusos saginasse dicuntur. Merula enim multa similitudine turdo accedit, ast nec sapore, nec digestu facilitate ut alii volunt, æquiparanda est. Vindemiæ tempore, quum ex uvis vivant, satis probam carnem exhibent, ast amara redditur, si ex baccis juniperi, vel hederæ granis vivendum. Seligenda esto merula junior, tenera, & pinguis; etenim cum annis carnem duram, aridam ac digestu difficilem induit. Cæterum omnibus, cujuscumque sint status, ætatis ac temperamenti, accommodatum exhibent alimentum.

Ars Medica tandem merulas contra alvi profluvium & dysenteriam commendat. Hæmorrhoidibus seu ulcere quodam infestati ab usu earum sibi caveant. Oleum, in quo ebulliverint merulæ, contra malum ischiaticum commendatur; & stercus aceto solutum, linimento venit ad faciei ruborem & pellis maculas profligandas.

M O T A C I L L A.

Designando unico saltem avium generi, ab omni tempore destinata fuit vox Latina: *Motacilla*; teste Cel. *VVilloughby*. Sunt autem tres hujusce generis species, 1. motacilla alba & nigra, seu communis, 2. motacilla flava, 3. motacilla cinerea. Cel. *Linnaeus* autem, a trito tramite secedens, varias adhuc avium species, frequentius vel infrequentius caudam agitan-tes, huic generi subdidit. Nos motacillæ communis descriptioni inhæreamus, illa enim sola aliquod utilitatis Medicinæ adfert.

Motacilla. Offic. Schrod. 321. Dal. Pharm. 422. Lemer. 503. Merr. Pinn. 178. *Cnipologus*. Belon. des Ois. 356. *Motacilla*, quam nostri albam cognominant. Gesn. de avib. 618. *Motacilla alba*. Aldrov. Ornith. 2. 726. Schvenckf. aviar. siles. 306. Jonst. de avib. Charlet. Exer. 96. *VVillughb*. Ornith. 171. Raii Syn. Method. Aviar. 75. Aldrov. Ornith. 47. *Motacilla pectore nigro*. Linn. Faun. Suec. 214. *Motacilla vulgaris*, *Albicilla*, *Culicilega*, *Sufurrada*, *Passer aquaticus*, *Sisopygis*, *Cauda tremula*. Nonnull.

Motacilla omnibus notissima & ubivis frequentissima corpore gaudet oblongo, & pondere suo sex drachmas explet. Ab apice rostri ad extremitatem caudæ 8. fere digitorum, & spatium alarum extensarum 11. digitorum longitudinem continet. Rostrum ejus gracile, nigrum, cuspidatum, nondum digiti 1. longitudinem pertingit. Lingua est bifida & quasi lacerata, os intus nigrum. Iris oculorum nuceo colore; pedes, digiti, ungulæque oblongæ, fulvo; ungula calcaris, ut in alauda, longissima; digitus exterior in origine sua medio cohæret; maxilla superior oculique plumis albis fere ad utramque alam productis circumdati; vertex & collum infra supraque, usque ad sternum ac dorsum, nigri; venter cum pectore albus; medium dorsi nigro-cinereum; & uropygium nigrum. In alia quadam circulus niger inferiorem gutturis partem cingebat, ex quo duo cornua proficiscentia fere ad maxillas usque producebantur. Extensæ alæ semicirculum effingunt. Quælibet ala 18. ex rectricibus constat, quarum 3. pri-

primæ in cuspidem acutam exeunt, mediæ in molles & excavatas, ultimæ tandem frequentioribus lineis albis decussantur. Plumæ ex ordine primo, corpus obtegentes, nigræ, cuspidibus marginibusque albis ornatae sunt, æst ordinis secundi cuspidibus candidis saltem distinguuntur. Motacillæ nomen accepisse videtur ex continua caudæ suæ $3\frac{1}{2}$. digitorum longæ agitatione & motu. Cauda autem 12. pennis constat, earumque binæ mediæ reliquis longiores & cuspidatæ, reliquæ omnes inter se æquales, extimæ tandem fere omnes albidæ, nonnullæ nigræ esse solent. Plumarum color varius est, & jam nigro, jam autem cinereo propior accedit. Hepar pallidum præ se gerit colorem. Uliginosa loca inhabitat motacilla, & muscis ac insectis, ibi obviis vivit, imo aratrum terram conscindens sequitur, & vermes in glebis subactæ terræ obvios quærit. Sæviente hyeme, in meridionalibus Angliæ oris rarior conspicitur, nulla prorsus in Septemtrionalibus, quippe quæ vel frigori perferendo non sufficit, vel insecta, suum alimentum, ibidem reperire nequit. Ex stomacho alius motacillæ, quondam dissectæ, vermes, vermibus farinæ simillimos protraximus. Aucupum observatione constare docet *Gesnerus*: quod cuculi pullo nutrimenta præbeat motacilla. Subscribit *Albertus M.*, & nostra ipsorum experientia suffragatur. Hæc *Villughby*.

Lotricis nomen a Gallis motacillæ inditum esse censet *Belon*, idcirco, quia fluviorum & rivulorum accola, continua caudæ agitatione lotricem, telas linteas lavantem imitatur, vel quia lotricibus, flumina sæpius petentibus socia adest. Singulari autem nota characteristica suum sibi locum inter aves fluviatiles vindicat; scilicet extimis alarum pennis corpori proximis longitudine primas adtingentibus, quales & in reliquis avibus, ex lumbricis & muscis viventibus, ut in pluviali & vanello observamus. Motacilla, sextum vitæ mensem agens alium, & peracto anno primo denuo alium colorem ostendit. Omnium vero avicularum silvestrium maxime cicures esse scito motacillas nostras, & illas, quas *Bergerettes*, Galli nuncupant. Hæ enim homines imperterritæ adspiciunt, iis adcurrunt, & inter volandum acutissimo clamore sese adpellare solent. Imo lusciniarum instar, præsertim hyeme ingruente suavissimos concentus edunt.

Nec non agilitate singulari, & animo si dicere fas est, hilari donata motacilla, nidum ex herbis aridis, vel radicibus tenuissimis, sub lapidibus, in fossula seu sub quadam gleba construit, eoque quina ad fena ova exigua, albida, maculisque fulvidis conspersa recondit. Si hypocaulo illam nutrire velis, & muscas captando utilitati cedet, & micis ex pane obiectis vivendo, longæva evadet. Nonnunquam & aquam, ripas ubi tangit, victum quæsitura ingreditur. *Gesnerus* est, qui motacillam flavam, Gallis: *Bergeronnette* dictam, apud nos hybernare, albam vero, de qua agitur, exeunte autumnno, nostras regiones relinquere docet. Cui tamen experientia apud Gallos instituta refragatur, ibidem enim totum per annum, utramque reperies: Mentionem iniiciunt *Ephem. Germ.* motacillæ cujusdam, quæ ano carens excrementa sua ore eiiciebat, cæterum vero proba salute viguit.

Græci motacillam albam: *Cnipologos*, vel *Seisopugis* dicunt, Itali: *Ballarina*, *Bovarina*, *Dodinzingzola*, *Codatremola*, Germani: *Bach-Steltze* seu *Kloster-Fraulein*, Angli: *White-Water Wagtail*, Sueci: *Arla*, seu *Saedesarela*. Galli illam: *Lavandière*, *Hoche queue*, *Hoche-cul*, *Branle-queue*, *Guigne-queue*.

Hauffe-queue, Batte-queue, Batte-mare, Batte-lessive Batta-lessive, Bergonnerette, Vachère, Vachette & Semeur, nominibus, vel ex continua caudæ agitatione, (*branlement*) vel ex eo, quod agnos, vaccas, & aratrum insequitur, petendis, denotare solent.

Multo insuper sale volatili quum abundet, ac oleo, aperiendi, quæ pollet virtutis ergo, calculo, & saburra infestatis commendatur. Exsiccata nimirum, & in pulverem redacta a ℥j. ad ℥j. cum aqua Saxifragæ vel vini candidi cyatho exhiberi volunt.

N O C T U A.

NOctua, vocabulum Latinum, genericum est, ac omni competit avi noctuæ, seu noctis. Frequentiori tamen usu illa saltem noctuarum species minor, quam: *Chouette* Galli, Itali: *Civetta* nuncupant, hoc vocabulo denotatur. Nos autem de noctua nunc agamus, templis, seu turribus inhabitante, quæ *Fresaye* plerumque Gallis dicitur.

Noctua. Offic. Schrod. 321. Dal. Pharm. 429. Gesn. de avib. 561. Schven. av. files. 308. *Strix*, *Caprimulgus*, & *Fur nocturnus*. Belon. de avib. 143. *Strix*, Aldrov. Ornith. 1. 561. *Aluco*, Jonst. de avib. 32. Charlet. Exer. 78. *Aluco minor*, Willughb. Ornith. 67. Raii Syn. Method. aviar. 25. *Noctua templorum alba*; *Ulula flammeata*; *Avis mortis*. Quorumd. Gallice: *Fresaye*, *Effraye* seu *Orfraye*.

Noctua columbæ magnitudinem exæquando, $11\frac{1}{2}$. unciarum ponderis est, longitudinis, si a cuspide rostri ad finem caudæ perrexeris, 14. digitorum; latitudinis seu alarum distensarum spatii, ab altera ad alteram extremitatem producti, 3. pedum, & $1\frac{1}{2}$. digiti. Rostrum præbet a cuspide ad oris angulos $1\frac{1}{2}$. digito longum, album, ac apice adunco; linguam paullo bisulcam, nares oblongas; oculos, & mentum circulo, vel monili circumdatos, quod plumæ quædam molliores, albidæ, aliisque flavis & hirsutis cinctæ constituunt. Circulus ille utrinque ex naribus proficiscens mulierum velo similis, & oculi quasi cavitati profundiori, quam surrectæ circumjacentes plumæ constituunt, inhærentes, delitescunt. Flavus est fundus plumarum circumjacentium, & in angulis oculorum interioribus obviarum. Aures operculo ex parte anteriore prope oculos enatæ, & posticus dependente obteguntur. Circulus interior plumarum mollium & lanuginosarum de quibus diximus, operculum illud ad lineam rectam pertransit. Colorem si quæris; pectoris, ventris ac regionis alis subjæctæ, album esse scito, & maculis nigris, quadratis, rarioribusque conspersum; capitis, colli & dorsi usque ad alarum rectrices, varium, at reliquis avibus nocturnis pulchriorem. Singulæ plumarum flavi debilioris, in extremitate lineis ornantur flavis nigris undulatis alternis. In caule pennæ cujusvis maculas, alternis nigris & albis maculis minoribus compositas observabis; earumque majorum scilicet, jam ternas, jam binas, jam singulas in quovis caule videbis. Rectrices sunt cuiusvis alæ 24. quarum maximæ quaternis, minores vero ternis tantum maculis fulvis conspersæ sunt; at spatia his intermedia, flava, punctulisque nigris confita. Plumæ prioris barbæ exteriores in setas inter se divisas & pectinis dentes repræsentantes exeunt; complicatæ autem alæ, caudæ extremitatem jam pertingunt, jam superant.

Caudam denique 4½. digitis longam, 12. pennæ componunt fere æquales, colorem alarum referentes, & quatuor maculis transversalibus fulvis distinctæ. Margines interiores plumarum caudam & alas componentium, albi sunt. Crura ad pedes usque plumis densissimis obteguntur. In digitis non nisi rarissimos pilos reperies. Unguis digiti exterioris medii, ut in ardea, dentatus est. Uno saltem calcare prædatus est pedum quisque, æst digitorum anteriorum extimus, quodammodo reflecti potest ita, ut pro altero calcare veniat. Intestinorum longitudo est 12. digitorum. Duabus saltem prædita est appendicibus cæcalibus, & amplissima fellis vesicula, candida insuper ova deponit. *Aldrovandi* descriptio noctuæ, nostræ accuratissime respondet. Singularissima autem ratione constructus est oculus noctuæ hujus, & ut censeo, & reliquarum. Pars enim foras profiliens, quamvis amplissima sit, nil est nisi iris sola; & globo oculi penitus suæ orbitæ subtractus cassidem effingit, cujus parti caput tegenti, oculi iris seu pars prominens; marginibus autem, ex altera parte undecumque procurrens portio respondet. Oculi sunt fixi & immobiles, oræ palpebrarum interiorum flavidissimæ. Teste *Marcgravio*, & in Brasilia noctuas hasce reperiri novimus, ille autem sub titulo: *Tuidara*, eam dedit descriptam. Hæc *Villoughby*.

Nemo nostrum est, qui nesciat, ait *Belon*, avem illam, quam noctu volantem terribiles clamores edere audimus, Gallis: *Effraye* audire, seu *Fresaye*. Nec tamen, nominum affinitate inductus, *Orsraye*, avem diversissimam cum noctua confundas, caveto. Lugubri suo ejulatu omnibus terrorem iniicit, iisque præsertim, qui larvis spectrisve terrentur. Hinc etiam *Strigis* nomine venit. Hanc Græcorum *Agothelam*, Latinorum: *Caprimulgum*, & *Furem Nocturnum Plinii* esse censemus. *Aristoteles* illam noctis tempore stabula intrare, caprarum ubera exfugere, & nutrimenti noctu quæsi ergo: *Agothelam* Græcis audire refert. Illam vero, de qua dicimus, quæque lugubri suo ejulatu homines solet terrere, ab omnibus avibus nocturnis specie differre constat. Oculis gaudet rotundis ac exiguis, notatu dignum discrimen, quum reliquas aves nocturnas, eximia oculorum magnitudine conspiciendas esse constet. Corporis mole ululæ est inferior; iisdem tamen pennarum maculis ornata; color alarum & caudæ extremitatum nigrido-plumbeus, & punctulis variegatus est. Pedes ejus & crura pennis obteguntur, ungulis fortioribus, aduncis, acutis nigrisque muniantur. Capitis & rostri adspectu facilis dignoscitur; rostro enim fere recto ac corvi rostrum exæquantibus instructa est. Aurium foramina reliquis cum avibus nocturnis habet communia. *Agothelan* Græciæ in montibus commorari refert *Aristoteles*; noctua autem nostra planities nostras inhabitare solet, nec non in turribus vetustioribus, rupibus excavatis & arborum crenis suum nidum exstruere.

Jam vero Virum, alias Celeb. *Belon*, noctuam *Fresaye* dictam, & *Caprimulgum*, (*Tette-chevre*) seu (*Crapaud-volant*) bufonem alatum, neglecto utriusque discrimine, confundere omnis videt. Maxima tamen, & vel ad spectui fugitivo veniens, utriusque est differentia. Etenim, quem bufonem alatum diximus, illa & figura ac pennis diversissima, nec adeo terribilem seu injucundum clamorem extollit. *Gesnerus*, *Belonii* coævus, idem observaverat. Eo tamen deceptum esse credimus auctorem, quod Santones, in

Gallia, bufonem alatum, *Fresaye* nomine denotent, & mali ominis avem dicant; imo struthionis more, solo intuitu ova excludere censeant.

Veram autem noctuam ab Anglis: *ululam candidam* dici refert Celeber. *Raius*, propter colorem plumarum candidum, lineis tamen maculisque fulvis pulcherrime interstinctum. Nullam ejus mentionem *Linnæus* iniicit, forsan Suecia eadem caret. Apud Gallos vero frequentissima omnium odio habetur atque contemptu, quippe quam pessimi augurii, imo mortis avem esse credunt; nec tamen quemvis infestando molestiam, sed potius mures captandi facilitate vel feli præstantior, commodo venit atque utilitati. Altissimas plerumque & accessu difficiles inhabitat turrium cavitates, neculum ibi nidum exstruit, sed lapidi vel nudo, vel fordibus obtecto, ova sua albida, oblonga, & a rotundis aliarum ulularum ovis diversissima, committit. Foramine suo interdum latens, pedibus recta insistens, capite depresso, rostro plumis immerso, ac hominis instar rônchosducendo, dormire solet. Ingruente nocte, moræ impatiens, exitum meditatur, & vespere imminente, inter volandum, columbarum more, sese volutando, avolat. En erroris originem; Normanni, noctuam, pedibus cœlo obversis volare contendunt. Errant, etenim omnis avis, pedibus ad terram converfis volat, omnis piscis, bene se habens, ventri obnatat. Qui autem in nido ejus interdum reperiuntur globuli congesti, excrementa ducere posses, nisi sua excrementa, ut reliquarum avium rapacium, fluida essent & candida. Globuli illi non sunt, nisi nutrimenti sui residua, ut pili, plumæ, spinæ, ossa &c. omnia tamquam arte composita & sacculo involuta, quem peracta carnis concoctione evomit. Omni enim noctuarum speciei guttur est amplissimum, ita ut vel glires, mures, similia integra possit deglutire. Ut igitur alcedinem, Martinum-Piscatorem, & aves pisces integros deglutientes, spinas vertebraeque piscium concoctorum, rostro eiiciunt: sic & singulari naturæ industria, ossa ac alia digestu difficilia in stomacho noctuæ colliguntur, deinde autem vomitu abeunt. Nec tamen moli corporis suum pondus respondet. Transverso autem volatu, noctuarum omnium instar, defertur, tacito, facili & levissimo, ac secundo quasi vento portata. Sæpenumero vocem ejus hora mediam noctem præcedente, jam nubilato, jam sereno cœlo, nulla tamen unquam lucidissima nocte audivimus. Interdum & noctu per caminum delapsæ, die redeunte in hypocaustis reperiuntur.

Quam itaque Germani: *Kirche-Eule*, Itali: *Strige*, Angli: *Common Barn-Owl*, *Withe Owl* seu *Church Owl* nuncupant noctuam, illam Galli: *Fresaye*, *Effraye*, *Orfraye* olim, seu *Orfroye* dicunt. *Fresaye* autem, Vir Celeb. *Menage* ex Latino: *Præsaga* deducere studet, quippe quæ mali augurii, seu præfagii avis habetur; vel ex monili, Gallice *Fraise*, quo collum ejus ornatum esse diximus. Priori ejus Etymologiæ robur addere videtur, quod vel hodie Pictavienses *Presaye* pro *Fresaye* scribant, Vasconi: *Bresagne*. Dicitur & *Effraye* pro *Effrayante*, perterrente. *Orfraye* autem vel *Orfroye* ex corrupto: *Efraye* ortum, denotandæ saltem competit *Aquilæ maris*, seu *Piscatrici*, quam olim & *Ossifragam* adpellabant. Dicitur tandem & *Petit Châthuant plumbè*, (bubo minor plumbeus) macularum sub ventre plumbearum ergo; & *Chovart*, clamoris causa, & *Lucheran*, vocabulo, ex Latino: *Aluco*, derivando.

Multo sale vitaliti & oleo abundat noctua, & nullius quidem alimento venit, ad tamen pullos juniores haud adeo injucundi esse dicuntur palato, quidquod carnem eorum a variis, pro resolvente haberi, & contra paralysis initia commendari, scribunt. Sic testibus *Ephem. Germ. Dec. 11. anni VI. Paullini, D.* refert, quod adolescens quidam paralyticus variis in vanum tentatis, noctuam denique furni ope arefecerit, eamque plumis & intestinis subtractis ac sale conspersam in pulverem reduxerit; deinde Castoreo admiscendo unguentum confecerit, quo sese diutius ungenstandem morbo liberatus fuit. Nec non pro morbo eodem, pulveris hujus ℥j. ad 3j. interne accipiendum præbent. Imo melle addito unguentum præparant, pro tonsillis suppurationem exigentibus, præstantissimum. Eundem *Etmullerus* anginae laborantis gutturi, tubuli ope inflatum, abscessus in gutture abortos cum periculo suffocationis dirumpere docet. Fel noctuæ collyria pro delendis oculorum maculis ingreditur; & adeps ejus, summa emolliendi & resolvendi virtute præditus, linimento ad corroborandos nervos eximio cedit.

O T I S.

OTis. Offic. Lemer. 643. Gesn. de avib. 484. Otis *Tetraonis altera species; avis tarda*. Belon. des Ois. 236. Otis seu *Tarda avis*. Aldrov. Ornith. 2. 85. *Tarda recentiorum*. Schvenckf. Aviar. Siles. 355. Otis, sive *Tarda*. Jonst. de avib. 42. Otis, *Tarda & Bitarda*. Charlet. Onomast. Zoic. 73. Otis, *tarda avis*. Aldrovandi Villughb. Ornith. 129. Raii Syn. Meth. av. 58. *Erythrontaon, Tetraon, Trappus sive Anser-trappa* Nonnull.

Nec gallo Indico minor Otis, ab apice rostri usque ad extremitatem caudæ 60. digitorum longa, & extensarum alarum spatium 2½. cubitos latitudine explet. Rostrum ejus, gallinaceo simile, superiore maxillam parum aduncam exhibet. Caput & ventrem habet cinereum.

Ventrem album, dorsum denique fulvis & nigris lineis transversalibus variegatum. Nec calcare instructa est, ac ejus defectum, notam sibi singularem gerit, hac enim suaeque magnitudine a reliquis hujus generis omnibus distinguitur. Variis vivit grana frumenti atque herbarum, brassica, foliis dentis leonis &c. Messis tempore dissectæ in stomacho multam granorum cicutæ quantitatem, & tria ad quatuor grana hordei, illis immixta reperivimus. Otides apud nos in vastis atque amœnis planitiis, prope Nevmarket sitis, frequentissimæ obveniunt. Lento volatu incedunt, & ob summam corporis molem, non nisi ægerrime volatum sese adtolunt; hinc etiam tardæ nomine Latinis venire creduntur. Teste *Hectore Boetio*, Scotiæ in regionibus aves quædam reperiuntur, *Gustardes* adpellatæ ab incolis, & carne sua & plumis, perdici accedentes, mole autem cygnum superantes. Sunt, qui trappas manibus posse captari, & priusquam avolent arripi docent; ast nostrates segnes quidem e terra resurgunt, sed natura providæ timidæque vel homine e longinquo perspecto aufugiunt. Faciles canibus venaticis illas posse captari dicunt aucupes nostri. Nec in Italia, teste *Aldrovando*, nisi casu fortuito eo pervenerint, commorantur. Nos autem Italiam peragrantes, Mutinæ venum expositam trappam vidimus. Hæc *Villughby*.

Et hanc quidem Otidis descriptionem Ornithologiæ studiosis nimium

succinctam visam fore censemus. Hinc fusiores subnectamus, quam in *Actis Reg. Scient. Acad. ad historiam naturalem Animalium facientibus*, legimus: *Sex Trapparum descriptionem anatomicam*.

Illarum maxima, non nisi 3. pedum longitudinem ab extremitate rostri, ad finem pedum extensorum referebat. Longitudinem multo maiorem ei tribuit *Belon*, atque *Turnerus* trappam enim secundum locum, magnitudinem, struthionem primum tenere docent. Gryphus, pariter ac avis illa, quam *Casuel* Galli adpellant, nostrametipsum experientia teste, otidem multa magnitudine superant, cui nec alii auctorum adeo eximiam molem tribuunt. Quidquod *Aristoteles* in *Athenæo*, galli majoris magnitudinem ipsi adsignat. Miror sane, *Belonium* atque *Turnerum*, qui vel trappas, ut credo suis oculis viderant, *Plinium*, & sinistre quidem intellectum, sequuturos, dicta adseruisse. Avis enim, quam excepto struthione, maximam dicit *Plinius*, secunda est Tetraonis species, nec trappa nostra. Imo *Plinius* Otidem, quam trappam esse censemus, magnitudine tetraoni accedere scribit; nec tamen quis tetrao fuerit, novimus, nec quæ de illa dicuntur, in trappam cadunt. Tetraonem enim, corpore nigerrimo, at plumis oculos obtegentibus rubris instructam esse scribit *Plinius*, at trappa quasdam saltem plumas in corpore rubro-nigras, easque alia ratione dispositas exhibet.

Collum & pedes trapparum longiores reperivimus, quam *Gesnerus* & *Aldrovandus* eisdem tribuunt; cæterum vero horum descriptioni simillimas. Collo instructæ erant pedis 1. longo cruribus $1\frac{1}{2}$. Alæ haud multum longiores cruribus, extensæ 4. pedum spatium explebant, corporis moli incongruum. Hinc & trappam tam lento volatu ferri videmus, ut cursu homo illam adtingere possit, & exæquare. *Oppianus* autem nullam avem, nisi trappam canes extimescere scribit, quippe quæ lentior e terra resurgens & tardior incedens, facile canum prædæ cedit. Hinc Latinis: *Avis tarda*, & Gallis: *Otarde* dicitur. Quamvis Gallicum ejus nomen & ex Græco: *Otis* derivari possit. Otidem vero antiquiorem a trappa nostra ut diversissimam habeamus, diversæ postulant descriptiones auctorum. *Albertus* eam *Bistarda* dicit, & vocabulo, perperam ex *Avis tarda* derivato, deteriori adhuc Etymologiam tribuendo, ex duobus saltibus, quos ante volatum edere solet, illam ita nominatam esse scribit.

Sex varios colores in trappis nostris observavimus, album, scilicet, nigrum, cinereum, fuscum, fulvo-fuscum & rosaceum. Venter, lumbi, imo regio alis ac caudæ subjacens, albi erant coloris. Hinc & *Belon*, superficiem alis trappæ albam tribuendo, errasse videtur; omnes enim aves in univsum, fulvum, si quo gaudent, colorem, in alis & dorso, imo quadrupedes ventrem albidiorum ostendunt præ dorso. Anterior pars colli trapparum, & media alarum superficies, cinereo-fusco colore distinguebatur. Pars colli posterior, superior superficies alarum, & pars superior caudæ rubrum, & maculis nigris, longis, inæqualibus, ac perdicum instar, divisus ornatum præbebat. *Aeliano* de trappis dicendi animus fuisse videtur, dum perdices quasdam Indicas anserum magnitudinem adtingere docet. Alarum extremitates, cinereo-fulvum colorem ostendebant. Et omnes in univsum pennæ, exceptis saltem majoribus in extremitate caudæ obviis, prope cutim plumis lanuginosis ruberrimis ac in rosaceum vergentibus

bus circumdabantur. Nec non pars caulis inferior eundem colorem profitebatur. Aliæ ex plumis non solum lanugine prædicta, sed & denuo aliæ ex extremitatibus illarum, modo peculiari egrediente instructæ erant; mediam vero plumæ partem barbæ aliquot inter se arctissime cohærentes constituebant, quales in plumis ad volandum inservientibus observabis, pars reliqua autem admodum multis filis tenuissimis componebatur. Rostrum color fuscus obscurior erat quam capitis plumæ; & ab oculo ad apicem suum, 3. digitorum longitudinem pertingebat. Gallo Indico minori, nec aquilæ, ut censet *Gesnerus*, simile rostrum erat trappæ. Crura & pars lumborum dimidia squamis exiguis, hexagonis, ac ad summum lineæ 1. magnitudinem profitentibus obtegebantur. Et aliæ quædam squamæ contabulatae, oblongæ, atque haud adeo latæ, superiorem partem digitorum pedis obtegebant. Omnes autem cinereum colorem præ se ferebant, & pellicula quadam (qua ut serpens exuviis exui poterant) muniebantur. Pars denique inferior aliam pro tegumento pellem ostendebat, exiguis eminentiis consitam. Nec plures, quam 3. digitos observavimus, & deficientis ultimi locum callus, nucem magnitudine referens, sustinebat. Digitorum longissimus 2. digitis & 9. lineis absolvebatur. Ungulæ tandem latæ, brevès, parum aduncæ, figura ovals, & hominum ungues æquiparantes, supra subtusque convexæ, sectionem exhibebant lenticularem. Nec non aquilæ, Haliaeto, ejusmodi ungulas infra & supra rotundas esse ait *Belon*, conformatione singularissima, siquidem reliquorum animalium ungulæ infra excavatæ ad minimum depressæ esse solent atque quadratæ.

Quum vero arborum cacumina trappa volando attingere nequit, observante *Alberto*, numquam in arboribus nidum construit; credimus & ob calcaris defectum, & basin pedum conglobatam, magnoque callo repletam, quorum ergo ramos amplecti nequit. Otidem apud Scythas, more singularissimo ova sua incubare docet *Plinius*, eaque leporis vel vulpis pelli involuta ad pedem arboris abscondere, hujus fastigio insidere, & venatores accedentes, alarum agitatione ictibusque, more aquilarum depellere; Otidis vocabulum igitur apud antiquiores, jam trappam nostram, jam aliam avem ab illa diversissimam denotare vides, trappa enim nec arboris ramo inhærere, nec venatores alarum ictibus depellere potest.

Nec foramen aurium, quod eximiæ suæ magnitudinis ergo Otidi nomen dedisse censent, singularis magnitudinis esse vidimus. In aliis tamen plumis parum longioribus obtectum erat, nec tantam auribus longitudinem conciliabant, quanta est Virgini Numidiensi, avi; hanc vero Otum antiquorum fuisse, deinde autem cum Otide esse confusam, quæ omnia ubi de Virgine Numidiensi actum est, fusius demonstratum dedimus. Hepar maximum, & lobum ejus dextrum in nonnullis nostrarum 5. digitorum longum, atque ad fundum ventris pertingentem vidimus. Substantia hepatis solida, color autem rubicundus erat. Fellis vesicula, sub lobo dextero latens, non nisi parte sua superiore, seu collo, hepatis cohærebat; pars reliqua autem ab hepate separata pendebat, & ex infima sui parte intestino Jejuno neciebatur. Longitudinem $2\frac{1}{2}$. latitudinem 1. digiti, & figuram ovalem præ se ferebat. Canalis Cysticus in aliis quidem brevissimus, siquidem ex fundo vesiculæ proficiscens, superiori Jejuni parti inferebatur; in aliis autem longior, ex superiore vesiculæ parte prope collum egressus, eodem

eodem in loco, quo brevior, inferebatur. Canalis Hepaticus prope ad col-
lum vesiculæ, ex eadem proveniebat, & 2. digitis sub insertione Cystici,
Jejuno inferebatur, in his saltem, quarum Cysticus ex collo vesiculæ pro-
cedebat; in reliquis autem immediate sub cystico, avium more, infereba-
tur. Lien, substantiæ mollis & ferrugineo-fulvæ, renem animalium terre-
strium sua figura, 10. lineas longitudine, 6. autem latitudine referebat.
Pancreatis situs erat in primis intestinorum circumvolutione, inquam alias
descendere solet; substantiæ erat duræ & pallidæ rubicundæ; ex cauda te-
nuissima, ex capite autem, ubi suus canalis 5. lineis longus egrediebatur,
erat crassissima. Alia trapparum nostrarum duplici ductu Pancreatico, ex
eadem Pancreate progrediente gaudebat; alia rursus duplici pancreate, cui
suus cuique erat canalis. Qui quidem omnes prope ad cysticos, suo qui-
vis insertione inferebantur; omnes item eadem appendice, papillæformam
repræsentante, quamque ex interna intestini membrana reflexa ortam cre-
deres, illa inquam appendice, obtegebantur.

Ingluvie trappam carere docet *Aristoteles* in *Athenæo*. Nostrarum Oeso-
phagus totus erat angustior; per spatium vero 2. digitorum, antequam
gutturi neceretur, dilatatus paullulum crassescerebat. Ibi autem non solum
duæ membranæ Oesophagi, sed & maximus aderat cumulus glandularum
inclusarum. Glandulæ istæ tamquam alveoli in alveari dispositæ, singulæ
insuper ad longum parum excavatæ erant, & tubulum repræsentabant.
Totius glandis figura cono respondebat, ex altera extremitate 1. lineæ
crassa, & 2. longa, in cuspidem terminabatur. Glandularum aliæ aliis su-
perstructæ erant ita, ut extremitas saltem crassior, ad aperturam exigui
canalis conspici posset. Membrana Oesophagi interna, hisce glandulis su-
perjacens, tantæ erat subtilitatis ut vel glandulas transparentes conspiciere
possis, & compressæ liquorem ederent membranam transeuntem. Hæc tan-
dem membrana denuo alia obtegebatur, eaque per totam cavitatem in-
gluviei & Oesophagi dilatati, glandulas continentis, extensa. Ultimo au-
tem memorata membrana, tunicæ villosæ vicem gerit, qua alias ventri-
culum animalium obductum esse videmus. Quæ quidem conformatio infe-
rioris Oesophagi partis, & glandularum coacervatio, quamvis in pluribus
avium obveniat, neutiquam adeo distincte in illis, quam in trappa con-
spicitur. *Arantius*, instituta trappæ dissectione, glandulis hisce carunculo-
rum nomen tribuit, & figuram rotundam adsignat. Nec tamen nisi per
transversam membranam internam easdem vidisse videtur, ita enim non
nisi extremitatem cujusvis glandulæ majorem atque rotundam conspiciere
licet; pars enim reliqua, longiuscula & cuspidata, sub aliis glandulis te-
cta delitescit.

Guttur 4. digitorum longum & 3. latum antequam dissectione aperire-
tur, gallinaceo, ob duritiem suam, simillimum videbatur; quæ quidem du-
rities quum pro ratione in pullis habeat carnosæ partis crassitiem; in trap-
pis nostris pars carnosæ tenuissima & lineæ 1. saltem crassa erat. Sua igi-
tur durities ex membrana interna, crassiore, dura, plicis rugisque crispa-
tis plena, pendeat; cui color erat flavo-aureus, nec cum membrana alba
glandulas ingluviei obtegente neceretur; sed eadem ratione inter se se-
parabantur, qua vestimenti pannum superiorem ab inferiore, seu duplica-
tura, consutis licet fimbriis separari videmus. Facillima opera etiam a parte
inglu-

ingluviei carnosâ membrana flavida separari poterat . Ingluvies monetis excusis & calculis (quorum alii nucis magnitudinem referebant) repletissima erat. Alius ingluviei 90. & plures monetæ inerant, mutua & calculorum alterna adfrictione lævigatæ, exulante omni erosionis vestigio; etenim partes prominentes ac elevatæ saltem, nec profundiores seu excavatæ lævigatæ adparebant. Nec in prominentibus aliqua inæqualitatis seu asperitatis signa aderant . Alius stomachum multo fœno repletum vidimus . *Athenæus* ruminare otidem docet. In psittaco quidem, ut omnes norunt, ruminante, duos ventriculos, conductu longiore separatos deteximus; & hæc ventriculorum conformatio ad ruminationem facere videtur.

In trappa autem nihil prorsus horum observavimus, 4. pedum longa erant intestina, omissis Cœcis duobus, quorum dextrum 1. pedem, sinistrum vero 11. digitos longitudine, explebat, nec nimia sane, in animali, quod fœno vescitur. Bina Cœca, ut solent, ex illa regione, 7. digitis ab ano distante egrediebantur, ubi Colo Ileum jungitur. Nec ut *Arantius* dicit, ex summo in imum, sed ut in aliis avibus, ex imo tendebant in altum. Ilei tunica interna, ultimi ventriculi ruminantium instar, rugas ad longitudinem obortas ostendebat; attamen versus extremitatem quasdam transversales, valvulam coli præsentantes, observavimus. Digiti 1. distantia ab ano, intestinum primo constrictum, tum dilatatum, crumenam continendo ovo sufficientem constituebat. Huic binæ urethræ inferebantur. Fere ejus in medio foraminulum conspiciebatur, ad sacculum quemdam, seu tertium Cœcum, *bursa Fabriciana*, ab inventore nuncupatum, conducent. Hic vero sacculus 2. digitorum longus, 3. linearum latus in origine, & ibi parum strictior erat, quam in extremitate. Foraminulo superior aderat alia membranæ interioris sacculi plicatura; cujus usum fuisse credimus illum, ut cedat valvulæ sufficienti ad impediendum Recti adscensum, & ad facilitandum ejus ingressum in tertium Cœcum. Quæ autem hæcenus de tertio trapparum Cœco observata sunt, contraria esse scito opinioni *Aristotelis*; hic enim intestina earum paucioribus, quam avium reliquarum, appendicibus, in extremitate sua inferiore, gaudere docet.

Renes tandem, 3. digitis longi, & in 3. lobos, avium more, profundissima sectione divisi, vasa, reliquis avibus similia exhibebant; ast artiarum cruralium, plerumque duplicium, & sub rene, alias, transeuntium, harum, inquam, alteram supra, alteram sub rene procurentes, & tandem lumbum ingredientiæ observavimus.

Testiculi cujusque 6. linearum longi & 2. lati, figura, amygdalo minori similis, substantia autem solida erat & alba. Parastatæ 4. lineis longæ, 2. latæ atque nigerrimæ testiculorum figuræ exactissime respondebant. Tertium insuper testiculum, sive corpus aliquod glandulosum, 9. lineis longum 6. latum, & olivæ colorem referens deteximus. Canalis deferens ab extremitate epididymi, quod utrique testiculo genuino erat, egrediens, venam emulgentem, cui necebat adrepebat, tum vero ad longitudinem urethræ, renem superando, descendebat.

In superiore ani labio appendicem quamdam exiguam deteximus, virgæ vices suppletem. Nec tamen fœmellam dissectioni anatomicæ subicere licuit.

Nec lingua, ut vult in *Athenæo Aristoteles*, ossæa, sed foris carnosâ, intus

tus autem cartilagine, ossis Hyoidis basi cohærente instructa erat. Latera ejus aculeis quibusdam substantiæ inter cartilaginofam & membranofam mediæ, confipata; Annuli Asperæ-Arteriæ integri; in quibusdam verocaruncula utrinque aderat, seu glandula rubra, ope ramusculi acum exæquantis, (ut in avibus omnibus) Asperæ-Arteriæ, & Carotidibus immediate adhærens. Cor tandem $2\frac{1}{2}$. digitis latum; & 4. linearum profundus erat sacculus ille, qui valvulam carnosam, in ventriculo dextro cordis avium, ubi Vena-Cava intrat, obviam, constituit. Ventriculi sinistri caro, basin versus 5. cuspidem versus autem 1. lineam crassitie sua absolvebat.

Oculi membrana scelotica, antè fimbriam cartilaginofam, 1. lineæ longam, ac instar circuli, corneæ circumductam ostendebat. Uvea rubicunda multis nervis, arteriis & venis interstincta erat; iris gilva; Crystallinus 3. linearum diametrum, oculi globus autem 9. ostendebat. Nervus opticus oculum ingressus deprimebatur, & marginem album, longum, nec adeo latum efformabat, ex quo membrana nigra, ac sacculus referens, ex latere tandem, versus marginem crystallini, adnexa, egreditur.

Ampliolem membranæ hujus cognitionem, ex descriptione struthionis, alibi expositæ, haurias. In palato tandem & parte rostri inferiore, sub membrana partes illas obtegente, plura corpora glandulosa deteximus, quæ ope tubulorum plurium probe conspiciendorum in cavitatem oris egerebantur.

En tibi, L. B. trappæ descriptionem Anatomicam, adcuratam pariter ac observatu dignissimam, quippe quæ a tanto auctore proficiscitur. Alia restant, & nobis subnectenda videntur, quæ Cel. *Navier*, M. D. Viro suis honorum ac dignitatum titulis condecoratissimo, ac de republica literaria optime merito accepta debemus.

Æstate pariter ac hyeme, sic ille, Lotharingiam trappæ inhabitant, & hyeme præsertim in planitiebus hinc inde agminatim conspiciuntur. Quævisque autem humi resident, unam, vel plures, parum ab agminis fronte, ut excubias agant, constitutas, & capite elato periculum, si quod imminet, observare ac reliquis nuntiare videbis. Quum enim ægre ex terra elevantur, & antè volatum, longinquius currendo alasque agitando, volatui necessarias vires adquirant & dispositionem; recessum paullulum diutius ante meditantur. Hamis captantur, nexo pomo vel carnis frustulo pro esca; sclopetis enecantur, si post eminentiam, seu plaustrum fœno onustum delitescere callet venator, nec non canes venatici præstantiores easdem adringere interdum valent, antequam tempus fuerit avolandi. Media æstate coeunt, & masculus unus (*Gallis Rond* adpellatus) cuiusvis fœmellæ sufficit. Quod si autem masculis omnibus totidem agminis fœmellæ nondum respondeant, de obtinenda uxore certamen masculi ineunt, victoris præmio cedit uxor, devictus perit; sæpenumero enim hoc certamine mortuos in campis reperies. Steriles ac desertas terras parum suffodiunt, eaque bina ova reconducunt, interdum musci vel fœni vetustioris quidpiam addunt. Semel tantum in anno, exeunte scilicet Majo, vel ipso Junio ova ponunt, eaque cygni ovis, magnitudine, respondentia, albida, & in extremitate obtusa, fulvis maculis conspersa. Tempus incubandi, fere ut in *Gallis Indicis*, 5. hebdomadam spatium postulat. Vixdum exclusi pulli, gallinaceorum instar, discurrunt. Octobre mense in agmina ac societates coeunt, nec nisi exeunte Aprile, eam dissolvunt. Ranis vivunt, muribus, insectis, aviculis; carni

carni voracissime inhiant, aut hyeme, brassicæ, betæ & aliis hujusmodi foliis vescuntur, 15. plerumque annorum vitam vivere solent. Nec nisi rariores, vocem quamdam corvi cantui accedentem, edunt. Imo galli Indici instar, duplicis tantum generis carne instructæ sunt, altera scilicet alba, altera fulvida, ex fibris brevioribus composita, earumque causa delicatiori, & juxta lumbos & ossa obvia. Attamen, qui eam gustarunt omnes, haud adeo magnam saporis differentiam esse consentiunt. Nobis quidem galli Indici saporem referre, nec nisi artocreati immixta, haud ita magni æstimanda videtur.

Belon est, qui trappam, non nisi magnitudine, ab anate, quam pedentem dicunt, differre censet. *Villughby* anatem istam pro specie trappæ habet, & *Kleinus* in *Prodrōmo ad Historiam Avium*, illi *Tardæ nanæ* nomen tribuit. Trappa, sic idem pergit, avis pulcherrima, & apud nos frequentissima, multum damni leguminibus inferre solet hyeme atque autumnō. Coitus tempore, trappa, masculus, galli Indici instar, caudam in rotam evolvit. Fœmella bina plerumque ova, in agro avena obsito deponit, dummodo ovis insidendo, ob colli proceritatem ultra apices avenæ crescentis, caput extollere possit. Si autem ea ablatum insidias sibi strui extimescit, sub alis in alium quemdam locum deportat. Ira excandescens pellem ex rostro pendentem inflat. Trappæ nostrates autem ab illis, quas Gallia & Anglia alit, parum diversæ esse solent.

Nec Campaniam tantum, Galliæ provinciam, sed Pictaviam quoque trappas inhabitare a Pictaviensi quodam didicimus. Hujus enim fervorum unus hyemis die quadam, quum nix obtegeret campos, agmen trapparum, frigore fere enecatarum in agro reperit, easque gallinas Indicas, incuria custodum neglectas, reputans, domum abegit. Tum vero calore refocillatas in trappas abiisse lætus conspexit. Singularis quidem facti res est, sed experientia sæpius comprobata.

Teste *Historia Americana*, Auct. *Cel. Denis*, secundo quovis anno tantum ova ponit trappa, & anno otii pennis se exuit. Peractis 4. vitæ annis ova ponere incipit, & 15. ad 16. ova excludit, eaque locis paludosis, jam in terra, jam in arboribus recondit. Trappæ recenter exclusæ, sic ille pergit, patris dorso insidentes ad aquam deportantur, noctu autem a matre in terram deferuntur, atque foventur. Et primo quidem rei novitate percelleremur, aut abiit admiratio omnis, quum *Quebeciam* *Canadamque* colentes, trappæ nomen anseri illi albæ & nigræ tribuere edoceremur, quam *Raius* ac *Villughby* anserem *Canadæ* dicunt.

Rarissima enim plurimis in locis trappa genuina, non nisi patrio solo multa nive oblecto, & cibum ibi deficientem apud nos quæsitura, advenit, tanta plerumque fame & penuria extenuata, ut vel maxima quævis vix 12. ad 14. libras suo pondere expleat. *Petrus Gyllius*, *Oppianum* sequutus, trappam summo odio in canes, in equos autem amore ferri recenset; hinc illam captaturum equo uti videmus. Plumæ tandem trapparum, figuram infecti quodammodo repræsentando piscatorum hamis, pro esca, nectuntur, imo anserinarum instar, calamis venire solent.

Gallica trappæ nomina sunt: *Outarde*, *Otarde*, *Bitarde*, *Bitard*; Italica: *Starda*, *Ottarde*, Germanica: *Trappe*, *Trapp-Gans*; Anglicum denique: *Bustard*. *Outarde* Gallorum, vel ex avis tarda, ut diximus; vel ex anser tardus,

dus, derivandum videtur; siquidem pro *Oye* olim erat apud Gallos: *Oue*, anferem denotans; vel ex Græco *Otis* cum Latino: *Tarda*. Pullum ejus: *Otardeau*, *Outardeau* & *Bistardeau* nuncupare solent. Male interim, quod in transcurso dictum sit, *Belonius* *Oedicnemo* suo & *Ostardeau* nomen tribuit; *Oedicnemus* enim est Gallorum: *Courlis* communis, aridissimas Soloniæ, Campaniæ & tractus Bellovacensis planities inhabitans, hinc quoque *Raius* & *VVillughby* immerito hanc *Courlis* avibus aquaticis adnumeravere.

Multo oleo & sale volatili instructa trappa inter delicias mensarum, suo jure refertur, ast raritatis suæ ergo, non nisi principum mensis adponitur. Ætate junior, carne & modica pinguedine instructa, digestu facilis est, & optimum suppeditat succum; cuius quoque ætati & corporis temperamento convenit.

Ars Medica tandem adipem trappæ anodynum, resolventem, pro linimento ad corroborandos nervos, & leniendos hemorrhoidum dolores; ac auribus immixtum contra surditatem commendat. Stercus ejus resolvendi virtute præditum, ac contra scabiem facere dicitur.

P A R U S.

QUinque ad sex varias avis hujusce species cognoscimus, quæ sunt: 1. parus major, cujus solius descriptioni inhærebimus, quippe qui solus Medicinæ usui venit, 2. parus capite nigro instructus, 3. parus palustris, paucissimis notus, 4. parus cœruleus, omnium pulcherrimus, 5. parus cauda longa donatus, cujus nidum singularissima cum arte constructum miramur, quique teste *Raio*, omnibus aviculis plura ova uno incubatu fovet, 6. parus cristatus, omnium rarissimus, quem videndi facultatem numquam sibi datam fuisse testatur *VVillughby*.

Parus. Offic. Dal. Pharm. 422. Lemer. 638. *Fringillago* & *Parorum maxima*. Belon. des Ois. 367. *Parus major* Gesn. de avib. 578. Aldrov. Ornith. 2. 710. Jonst. de avib. 86. Charlet. Exer. 96. Merr. Pin. 178. *Parus Carbonarius*, Schvenckf. Aviar. Siles. 318. *Parus Carbonarius major*. Schrod. 322. *Fringillago seu Parus major*, Willughb. Ornith. 174. Raii Syn. Method. Avi. 73. Alb. Ornith. 44. *Parus capite nigro, temporibus albis, nucha lutea*. Linn. Faun. Suec. 238. *Parus fringillæ par*; *Parix*, *Parula seu Parulus*; *Ægithalus major*. Nonnull. Gallice: *Mésange grande seu grosse*.

Fringillæ simillimus, de quo nunc dicimus, parus, pondere suo vix unciam explens, ab rostri apice ad caudæ extremitatem pedis est dimidii longus, & binas inter alas extensas, 6. digitorum latus. Rostro donatus recto, nigro, $\frac{1}{2}$. digiti longo, & crassitie mediocri, binas ostendit maxillas longitudinis ejusdem; linguam latam, & in quatuor fibras exeuntem; pedes plumbeos, cæruleosve; digitos exteriores quadam ex parte medio junctos; caput, mentumque nigrum; tempora, macula alba ex angulis oris procedente, & posteriorem maxillarum partem occupante, distincta; aliam, pone caput, maculam albam, ex altero fine, capitis nigredine, ex altero, flavo colli colore terminatam; quam tamen inconstantem, nec cuivis paro propriam esse voluit ludens natura; collum, humeros, ac dorsi medium virentes, uropygium subcæruleum; pectus, cum ventre, & lumbis flavidum; abdomen denique albidum. Medium deinde pectus, & venter, linea

linea nigra, lata, ab gutture ad anum producta in duas partes dividitur. Alarum rectrices fulvæ, marginibusque, jam albis, jam albis & cœruleis ornatae, interdum & omni albedine destitutæ sunt. Trium pennarum corpori proximarum margines exteriores subviridem colorem ostendunt. Tum lineam albam transversalem efformatam videbis ex cuspidibus albis plumarum ordinis primi tigillatim sibi superstructarum, & secundam alæ juncturam occupantium; ordinum vero inferiorum plumæ cœruleæ sunt. Cauda $2\frac{1}{2}$, fere digitos longitudine adimplet, quam quæ constituunt pennæ omnes, excipe saltem exteriores, barbas suas exteriores cinereas, seu cœruleas, interiores autem offerunt nigras. Plumæ tandem in utraque extremitate conspicuæ, & in parte caulis exteriori, & in apicibus album colorem ostendunt. Cauda complicata, nec bisulca videtur. Alarum quamvis 18. rectrices magnæ constituunt, quarum extrema est reliquis brevior. In cauda tandem 12. pennas majores numerabis. Hæc *Villughby*.

Prima maximaque inter paros species, teste *Belonio*, in silvis ac arbuſtis commoratur, truncum arboris amplexa, picæ instar, arbores ascendit atque descendit; & autumnno frequentior quam æstate conspicitur, illo enim est copiosissima. Facillimo, quamvis puerili artificio paros captare solent. Nucem enim perforatam ex filo suspendunt, & laqueis ex crinibus equorum comparatis circumdant; sic pro nuce arripienda advolans parus, laqueis irretitus ex pedibus capitur. Galericulum in capite gerunt, qualem & in vertice anseris, Gallice: *Cravant* dicti, observamus, hinc utrumque Galli *Nonnettes* (Moniales) adpellant. Parus magnitudine, ait *Aristoteles*, fringillam exæquat, rostro insuper acuminato, rotundo, cuspidato, haud adeo longo & nigrescente præditus est. Galericali sui tanta est nigrities, ut & capiti, & superiori gutturis parti, & colli lateribus nigram inducat colorem, tempora tamen alba, & maculam in utroque capitis latere albam ostendit. Plumarum dorsum obtegentium color idem est, qui avi, quam *Chlorim* dicunt; ventri inferiorum hic, quem motacilla, *Bergeronnette* Gallis nuncupata, ostendit; alæ tandem eundem, quam motacillæ communis alæ præbent. Collum est cinereum. Alarum plicaturas virides, & alas transeuntem lineam viridis debilioris observabis. Maxima pars caudæ cinerea est. Et utriusque extremitatis pennæ binæ albidæ; lumbi item & pedes fortissimi. Et habita proportionis ratione, galbuli pedibus similes; etenim horum instar sunt plumbei, sunt ungulis fortissimis, & digitis magnis instructi; attamen crura sunt breviora. Reliquarum specierum parus infrequentior, parus de quo agitur, ex ramis sese suspendet; magnam pullorum copiam excludit, & 12. ad 15. sæpius uno continet nido. Omnes interim pari pennas adeo prominentes ostendunt in rostro, ut galeæ seu cristæ speciem gerere videantur.

Quod si paro cavea detento, nil præter semen cannabinum, pro cibo exhibueris, (sic *Frischius*) frequentioribus rostri ictibus femina dum confringere annititur, brevi oculos & visum amittet, hinc semen contusum illi exhibendum esse memento. Pari plures & carne vescuntur, cujus ergo frequentes cadaveribus adsunt. Domibus nostris detenti ex omnibus hominum alimentis vescuntur; præcipue autem nucibus inhiant, nucibusque captantur. Autumnno arbuſtis detinentur, & ex insectis volantibus repentibusve vivunt; quæ in corticibus & arborum crenis colligunt. Arborum

truncos, picarum instar, mira cum agilitate adrepunt, & alimenta, priusquam deglutiant, lingua explorantur, nec diutiorem vitam in caveis vivunt. Vermibus, limacibus, caseo recenti, & ovis formicarum sustentantur. Parorum maximus, sine dubio, est carbonarius, qui nomen a zonis & maculis nigris, corpus obtegentibus, accepisse videtur. Dicitur & Parus Fringillarius, ob vocis similitudinem. Masculus a foemella dignoscitur zona quadam nigra, longiore, & infra ad longitudinem ventris procurrente. Hinc quoque *Mesange brulée*, parus adustus, dicitur; frequentior tamen ac magis nota est denominatio prior, sive nomen: *Carbonarii*. Parus major igitur, jure meritoque avibus rapacibus adnumeratur; siquidem & carne vescitur, & cadaveribus aeri expositis frequens insidere conspicitur. Imo, quum sui generis alium debilioremque viderit, citato volatu in illum irruit, & reiteratis rostri ictibus omne suum cerebrum devorat.

Olin est, qui docet: parum huncce majorem, semel in anno, 8. ad 9. ova ponere, & arborum crenis eadem committere; omnes reliquarum specierum paros cantu suo exsuperare; 4. ad 5. annorum vitam agere; & cantu suo frequentiori audientium aures defatigare; & acerrimo animo pullos ab aliarum avium insultibus propugnare; imo per agmina, senis vel septenis incedere.

Circa numerum ovorum a paro depositorum *Olinam* a *Belonio* dissentire vides; ast *Zinnani* in *Tractatu de ovis & nidis avium*, profundissimo silentio illum transit. Nos autem plerumque 9. ova albo-cinerea, & punctis rubicundis iisque in extremitate quavis frequentioribus, conspersa, in nido pari depresso, atque ex tomento constructo reperivimus.

Pulcherrimo plumarum colore conspicuus parus major facilis cicuratur, & continui sui cantus ergo, aures delectatum, caveis detinetur. Sebo acriter inhiare solet; sebo igitur ei insidias strui, & ob cantum expeditiorem reddendum caveæ incluso sebum exhiberi, refert *Aldrovandus*. Numquam fere terra desidere solet. In describendo igitur paro *Belonium* ab *Aldrovando* dissentientem esse vides; nec tamen, ut recte *Aldrovandus*, quum naturam in productione varietatum foecundissimam cognoscamus: mirum est, si pro aeris, cœli, & regionum diversitate, vel ejusdem speciei aves plumarum colore diversas videmus.

Gallica pari majoris nomina sunt: *Grande* seu *Grosse Mesange*, *Mesenge*, *Mareng*, *Mesangère*, *Musangère*, *Mesengle*, *Lardere*, *Larderelle*, *Arderelle*, *Arderolle*, *Mesange-Nonnette*, *Charbonnière*, *Pinçonnière*, *Croque-Abeille*, *Cendrille*. Græci illum dicunt: *Aigithalos Spizites*; Itali: *Varisola*, *Parussola maggiore*; Germani: *Spiegel Meise*; Angli: *Great Titmouse*, seu: *Ox-eye*; Sueci: *Talg-Oxe*. Ruricolæ Bituriges & Solonienses illum nuncupant: *Patron des Marechaux*, (dominum fabrorum ferrariorum) siquidem cantu suo: *ti, ti, ti*, frigore vehementiore in primis repetito, mallei ictus super incudem imitatur; quapropter etiam apud Provinciales: *Serrurier* (faber ferrarius) dici videtur. Vocabulum vero *Mesange*, ex varietate, seu commixtione, (Gallice *Melange*) pennarum deducit R. P. *Labbe*. Infelicius desudavit, si *Mesnagio* fides, hic enim *Mesange*, ex Germanico: *Mesenke* derivare contendit. Teste *Cel. Fault*, *Wachterum* sequuto, Germani dicunt: *Meise*, Belgæ: *Mees*, Anglo-Saxones autem: *Mase*. Quæ quidem omnia Græco: *Meyos*, quod parvum denotat, originem debere, & parvitatibus suæ ergo, paro tributa esse videntur.

Sale volatili ac oleo abundans parus, autumnō præsertim, plebis nutrimento cedere solet. Epilepsiæ medendi facultatem ipsi tribuunt, & urinam excitandi, imo calculos & saburram in meatibus urinæ detentos detergendi virtutem. Hinc eum exsiccare solent, & in pulverem reducere, cujus ℥j. ad ʒj. pro dosi, vel vino candido vel aqua diuretica, ut parietariæ &c. mixtum recipi volunt.

P A S S E R.

Passeris nomine apud Physicos, non solum varii generis aves, sed & pisces quidam compressi denotantur. Nos autem passeribus proprie dictis adnumeramus: 1. passerem domesticum, ubique locorum frequentissimum, 2. passerem monili flavo instructum *Belonii*, illumque rarissimum, 3. passerulum, quem Parisienses: *Friquet*, Aurelianenses: *Petrat* adpellant, 4. passerem montanum, regionibus quibusdam proprium. Jam vero quum duæ saltem passerum species, illæque non nisi nomine sibi similes, aliquales Medicinæ usus exhibeant: de iis tantum, primo scilicet de passere domestico, tum de *Troglodyte*, vulgo: *Roitelet*, dicto agemus.

Passer vulgaris. Offic. Schr. 322. *Passer*. Belon. *des Ois*. 362. Gesn. *de avib*. 581. Dal. *Pharm*. 422. *Passer domesticus*. Aldrov. *Ornith*. 2. 543. Schvenckf. *aviar. siles*. 321. Jonst. *de avib*. 65. Merr. *Pinn*. 175. Alb. *Ornith*. 59. *Passer domesticus, vulgaris*. Charl. *Exer*. 86. *Passer domesticus, Aldrovandi* Villughb. *Ornith*. 182. *Passer domesticus Strouthos*. Raii *Syn. Meth. Av*. 86. *Fringilla remigibus, rectricibusque fuscis, gula nigra, temporibus ferrugineis*. Linn. *Faun. Suec*. 212. *Passer communis, seu vulgatissimus*. Quorumd.

Pondere suo uncia & quod excedit, longitudine autem a cuspide rostri ad apicem caudæ $6\frac{1}{2}$. digitorum, est passer domesticus, qui rostro gaudet crassiore, & si marem respicias, nigro, si fœmellam, fulvo, at in angulis oris sub oculis, flavido, vix $\frac{1}{2}$. digiti longo. Nuceum colorem exhibet iris oculorum; pedes carneum & in fulvum vergentem; & ungulæ nigræ; phalanx digiti exterioris medii phalangi necitur. Caput est fulvo-cinereum, mentum nigrum; utrinque sub oculis maculæ albæ minores; tum linea ferruginea, tempora ornans; plumæ minores, quibus aures teguntur, cinereæ; guttur albo-cinereum; sub utrovis aure macula major candida; venter cum pectore albus; plumæ collum a dorso separantes, caule foris rubicundo, intus vero nigro instructæ, quorum color ruber, ubi desinit, in album vergere videtur; dorsi pars reliqua; uropygium & ungulæ viridis & cinereo-fulvido mixti sunt coloris, 18 utrique alæ sunt rectrices fulvæ, marginibus rubicundis; tum linea candida & lata, ab alæ spuria ad articulum proximum producta; pennæ alæ (ubi lineæ huic est superior) obtegentes fulvæ, ex media sua parte inferiore nigræ, & in marginibus extimis rubicundæ; pennæ caudam constituentes omnes ferrugineo-nigræ, marginibus rubicundis ornatae; testiculi magni, lascivitatis suæ testes; intestina 9. digitis longa; appendices horum brevissimæ; ovarium fœmellæ magnum; stomachus multa carne instructus; una tandem fellis vesicula.

Granis frumenti, hordei, similibusve vivit passer, at quæ de brevissima ejus vita dictis circumferuntur, mihi quidem, in dubium vocari posse

videntur. Varius, more avium, solet esse colore, & *Aldrovandus*, cujus de passere relictas descriptiones atque imagines L. commendamus, alium album, alium vero flavum repræsentavit. Fœmella & barba nigra, & maculis albis oculorum carens, caput, collum ac uropygium colore sibi similia, inferiorem corporis partem albo-sordidam, plumas nigras marginibus rubicundis, & lineæ albæ vices sustinentibus, totius denique corporis colorem debiliorem ostendit. Hæc *Villughby*.

Ter quotannis, sic *Frischius*, pullos excludit passer domesticus. Juniori si alias aves socias junxeris, quidpiam cantus illarum addiscet. Notissimus est ex familia avium, siquidem reliquis frequentior urbes inhabitat, & in terra, vel homine præsentem, obambulat. Quo frequentior autem, eo majus damnum non solum agris, sed etiam hordeis atque granariis infert. Maximam enim in copiam, fœcunditatis suæ ergo, multiplicatur, & quæcumque in hortis obvia sint delibando prædatur. Eodem patre familias & hyeme & æstate nutritur, & ab initio veris usque ad hyemem cantu suo ingrato aures nostras perstringit. Fœmella multorum ex maribus persecutione oppressa, sectantium turbam rostri ictibus arcere solet, illisque sæpenumero tam violentis, ut in terram tamquam attoniti delabentes, felibus prædæ veniant. Varius autem est, pro circumstantiarum varietate, & clamor, non dicam, cantus, passerum; alio etenim pro coitu sociam ad-vocant; alio pullis silentium præcipiunt, si quod periculum imminens, ut felem, noctuam, vel avem rapacem conspexerint; rursus alium extollunt, quum volando campos agminatim transeunt; denuo alio doloris, alio iræ in socios signa edunt. Nonnullis in regionibus gens rustica superiorum jussu obtemperans, determinatam capitum passerum copiam dominis exhibet, quo nimius avium molestissimarum numerus extirpetur. Calliditate summa, quascumque illis insidias struxeris, observant; hinc eos decepturus, longum ante tractum retis silentium observet, necesse est. Sunt, quibus pro cibo, non arrident passeris, quos Epilepsiæ obnoxios esse adserunt; alii autem, capite saltem subtrahito, eos pro cibo adpetunt. Opinio rationis fundamento carens. Juniores, quos coitus desiderium nondum incepsit, multo plerumque adipe gaudent; ast coitus stimulis exagitati, nullum amplius incrementum corporis experiuntur. Passer silvester eo saltem a domestico differt, quod silvis immoratur atque arbuſtis. Nidum hic in excavatis silvarum atque frugiferis, sive hortorum arboribus construit; nec adeo copiosus multiplicatur; etenim & multitudini hostium, silvas occupantium, & frigoris vehementiæ subjacet, hoc enim sæpissime enecatus reperitur in crenis arborum. Monotoniam cantando observat, & vocem a passere domestico diversam edit. Cæterum qui producendis avibus spuris student, passerem cum acanthide Canariæ libenter coire adserunt.

Saltando plerumque incedit, & ab insidiis cautissimus, raro, nisi junior sit, vel laqueis, vel visco, vel retibus capitur. Fœcundissimus nidum jam in arborum crena, jam sub tecto & in foramine parietis, jam in deserto picæ nido, jam in ulmi seu mali fastigio, jam in puteis ipsis construit. Nonnunquam, & nidum hirundinis uropygio albo instructæ, quam *Martinum minorem* dicunt, prævio certamine acriori, occupat. Natura est calidissimus & falacissimus. Sic quemdam vices per horam cum fœmella sua coivisse, & abeunte illa, novum coeundi pruritum demonstrasse vidit *Al-*

drovandus. Biennium pro termino vitæ passerum masculorum posuerunt antiquiores; consentientem habent *Julium Scaligerum*, ille enim, haud ita multas, ait, insidias struunt passeribus, paucissimi captantur ab hominibus, eximie sunt fecunditatis, attamen haud ita magnum eorum numerum reperies. *Aldrovandus* autem quadriennium pro vitæ termino illis assignat, siquidem columbas, quamvis lasciviores, 16. per annos vitam producere constat. Cavea inclusos passeres, mares pariter ac fœmellas 8. per annos vitam traduxisse constat; & *Olinam* sequutus *Cel. Richalet*, passerem domesticum 9. ad 10. annos vivere scribit. Juniores facili negotio captantur, & maximæ hominum delectationi inserviunt. Cæterum maximam apum quantitatem, in primis pullos recenter exclusos nutritum devorat passer. Nec non columbas juniores in columbariis detentas, ingluviem earum, quo granis ea conservatis potiatur, rostro perfodiendo enecare dicitur. Rariores sunt passeres candidi; nos saltem inter quinque uno nido inhærentes duos tantum candidos viventes vidimus & conservavimus. Nonnunquam & ollæ huic usui destinatæ, & ollæ pro passeribus adpellatæ ex domibus suspenduntur, ut in iis nidos construant passeres. Eo sæpius, deficiente passere domestico, passerculus, *Friquet* dictus, suum conferre solet. De passere ita scribit *Zinnani*: nec nisi pro damno nobis & detrimento inferendo natus esse videtur; imo non nisi unica virtute, summo scilicet in suos amore, ornatus est. Magna enim cum cura pullos educare solet, & si quem granorum cumulum detexerit, clamore socios invitat, cum illis prædam dividere cupit. Nido suo ex herbis aridis ac plumis constructo quaterna ad quina ova committit, cortice tenuissimo circumdata, cinerea, & punctis nigris splendentibusque conspersa. Quidquid rostro suo ob venerit, passeris nutrimento venit; ut: muscæ, papiliones, apes, vespæ, scarabæi, formicæ, grylli, vermes, grana, fructus, ac legumina, hinc etiam in agris & campis hominis manu hastam tenentis figuram, passim collocare solent. Volatu plerumque depresso incedunt, & tam rapido, ut vel optimus quisque ex venatoribus sclopeti ictibus illos enecare nequeat.

Gallis audit: *Moineau domestique*, *de maison*, *Moineau franc*, *Franc-Moineau*, *Passe*, *Paisse*, *Passereau*, *Passerat*, *Passeteau*, *Paisseteau*, *Moucet*, *Moinet*, *Moisson*, *Pierru*, *Pierrot*, *Pillery* seu *Guillery*. Græcum ejus nomen est: *Strouthos*, *Strouthion*; Italum: *Passera domestica*; Germanicum: *Sperling* seu: *Haus-Spatz*; Anglicum: *House-Sparrow*, Suevicum: *Tætting* seu *Spinck*. Vocem Latinam: *Passer* a patiando deducit *Schwenckfeldius*, siquidem Epilepsiam patitur. Et *Laurentius Foubert* Occitanensium vernaculo Epilepsiam: *lou mau de las Passeras*, sive morbum passerum dici scribit. Alterum ejus nomen: *Moineau*, olim: *Moinel*, ex *Moine* (Monachus) derivari vult *Mennagius*, siquidem colore pennarum fulvo vel cinereo colorem vestimentorum multis Monachis proprium refert. *Petrus Borellius* est, qui & *Moine* & *Moineau*, ex Græco: *Monos*, solitarius, deducere studet, cui & *Prevost* in *Lexico manuali* accedit.

Multo insuper sale volatili & oleo abundans passer domesticus, carnem duram, aridam & macilentam secum gerit, hinc non nisi plebis cibo venire solet. Maximæ suæ salacitatis ergo, Epilepsiæ obnoxius est, imo eandem, si cibo venit, cum aliis communicare censetur. Quæ si forsan evenerint, exinde nata esse ducimus, quod quum Medicorum aliquis passerem

pro cibo tamquam Aphrodisiacum commendaverit, ille qui iisdem tamquam optimo medio fretus, immodicæ Veneri exinde litaverit, Epilepsia correptus fuerit. Hanc enim libidinis effrænata comitem esse constat. Legimus enim in *Ephem. Germ. Dec. II. Anni 3. pag. 372.* a Cel. Grugero, D. observatum: quod famula quædam, accepto multo passerum cerebro, quod mensæ pro deliciis adpositum fuerat, nocte subsequente epilepticis accessibus sit correpta. Et *ibid. Dec. 2. Anni VII. Append. pag. 133.* legimus, matrem quamdam, quo molliori stragulo frueretur filius adhuc infans, lectum ejus passerum plumis opplevisse, filium vero statim exinde convulsionibus epilepticis, mediorum omnium efficaciam spernentibus correptum, ac tum demum ab iisdem prorsus liberatum fuisse, quum amici consilio pennæ passerum stragulo extraherentur. Quomodocumque interim res se habeat: satius ducimus, ut carne passerum insipida, fortassis etiam maligna, abstineas.

Stercus passeris, muscerdæ instar, dosi gr. ij. ad gr. iij. pulte admixtum infantibus pro alvo cienda exhiberi solet. Axungia mixtum, & pro linimento capitis adhibitum, capillorum defluvio obstat, & incrementum eorum promovet. Aqua tepida solutum si pro lavandis manibus adhibueris, pellem lævigare & dealbare dicitur.

Passer Troglodytes. Offic. Schrod. 322. Dal. Pharm. 422. Gesn. de Avib. 588. Schvenckf. Aviar. Sil. 324. Jonst. de avib. 82. Merr. Pin. 177. Aldrov. Ornith. 2. 655. *Passer Troglodytes* Aldrovandi, Turnero & Bellonio *perperam Regulus*, VVillughb. Ornith. 164. Raii Syn. Method. av. 80. *Trochilus*, *Rex avium*, *Senator* & *Regulus*. Belon. des Ois. 343. *Motacilla grisea*, *alis nigro cinereoque undulatis*. Linn. Faun. Suec. 232. *Passerculus*, qui dicitur: *Troglodytes*, sive in cavernis degens; *Regulus apricus*, *Regaliolus*, seu *Basilicus Avis*. Nonnull.

Pondere suo trochilus 3. Drachmas, longitudine, dum scilicet ab apice rostri usque ad extremitatem caudæ perrexeris, 4½. digitos, & latitudine extensarum alarum 6½. digitos exæquat. Caput, collum & dorsum fulvo-obscurioris sunt coloris; uropygium & cauda adhuc obscurioris; dorsum, alæ & cauda lineis transversalibus nigris notatæ; guttur flavidum pallidioris; medium pectus albidum, & laterum instar, infra lineis transversalibus nigris ornati; abdomen fulvo-ferruginei; extremitates plumarum secundæ ordinis alarum, imo plumarum caudam obtegentium, tribus ad quatuor maculis albis notatæ, 18. sunt cujusvis alæ rectrices. Cauda, quamplernumque elevatam tenet, 12. componitur pennis. Rostrum ejus ½. digito longum, & tenue, infra fulvidum, supra rufum; palatum flavum; iridis color nuceus, & calcar cum ungue sua, solito longius est; digiti exteriores medio ad phalangem usque coherent. Dum meta plerumque & fossarum sive parietum foramina dum reptando transit, *Troglodytis* nomen exinde accepisse videtur. Frequentius intercepto, ac terra depresso fertur volatu. Juxta domus seu stabula stramine tecta, sæpius tamen in arbutis atque vepretis nidum construit, eumque foris musco obducit, intus vero crinibus plumisve explet, formam ipsi ovi, in apice erecti conciliat, & in medio portam, qua ingressus ipsi ac exitus pateat, relinquit. Cicuratus jucundissimam ac sonoram, imo vires corpusculi tantilli exsuperantem edit vocem, Majo mense imprimis, dum nido extruendo occupatur, frequen-

tissimam. Novena, dena, imo plura ova deponit. Omnes autem Ornithologi nostrates ante *Gesnerum*, passerum Troglodytem, perperam crediderunt regulum antiquiorum. Hæc *Villughby*.

Nec tamen, sic *Belon*, avium minimus est passer Troglodytes; passerculus cristatus scilicet, Gallis: *Poul*, *Sourcicle* & *Roitelet huppè*, Italis autem: *Fior rancio* dictus, ob cristam, qua gaudet, fulvidam; hic inquam Troglodyte minor est; & ubivis obvius, ubique cantans, inter omnes notissimus. Solitudinis amicus, ne quidem sui generis alium sibi socium perfert, & in primis masculi sibi obvii acerrimum certamen ineunt, nec nisi alterutro devicto velenecato desistunt. Nec tamen ultra fugam hostis, victoris desiderium extenditur. Hilaris & ad motum agilis, caudam, galli instar, elevatam gerit. Teste *Aristotele*, dumetis atque arbuſtis inhærendo, rarior ac difficilis capitur. Numquam tristitia captus, sed continua hilaritate perfusus, a mane usque ad vesperam, imprimis hyeme, cantat. Luscinia cantum acuta sua voce imitatur. Nidum ex stipulis in cavitate parietum construit, infra supraque obtegit, & foraminulum pro porta, conservat. Nunquam & silvas ac arbuſta inhabitat. Difficillimus est labor pullos cavea detentos educandi, & per aliquod tempus eadem nutriti omnes denique emoriuntur. Quod si autem quosdam ex illis in vita conservare poteris, cantus sui vel per hyemem producti suavitatem, summæ delectationi cedent. Rostro autem, motacillæ instar, quam *Bergeronette* dicunt, gracili instructus est tenuique, nec enim magna vi opus est ipsi, quippe vermibus mollibus, nec granis vescitur. Fortissima sunt sua crura, pedesque robusti. Sex plerumque ad octo pullos suo nido detinet.

Multa sunt, ait *Frischius*, quæ de avicula hacce fabulis condidere antiqui. Nomen Latinum: *Trochilus*, quod cursores denotat, naturæ suæ adprime respondet. Nomen reguli neutiquam illi competit, sed potius domestico tribuatur, quippe qui crista, ceu regio diademate ornatum caput ostendit. Quum vero regulus hicce cristatus & vepreta seu dumeta aliquoties ingrediatur, retineat reguli vepretorum denominationem. Illum vero, quem tota fere hyeme videmus, regulum hyemis non cristatum salutare liceat. Exeunte autumnò; & hyeme ingruente, vermes & araneas adhuc quærit in parietibus; imo prima jam nive delapsa videri solet & exaudiri, cujus causa ab aliis regulus nivis dicitur. Amœnissimus est atque suavissimus ei cantus, quem simul ac perceperis, diutius exaudire posse optabis. Nidum prorsus singulari ratione constructum videbis. Plures quam avicularum reliquæ, nec totidem quot parus, una excludit pullos. Ratione, qua parus eadem capitur, & camera vel hypocauſto detentus aliquamdiu vitam traducit, ast ultimo abit, nec fugæ vestigium investigari posse datur.

Secundum *Olinam* 3. vel 4. annos vitæ adtingit, & quina ad fena ova ponit, imò Augusto mense, denuo ovis ponendis sese accingit. Alios recensentes audivimus, eum vel 20. pullos una excludere, ast experientia refragatur adfertis. Parorum instar, plerumque semel in anno, Aprile scilicet, seu Majo, ova incubat; nec apud nos quidem Augusto, reiterato incubatu, secundo pullos excludit; ut *Olinam* docuisse diximus. Nec umquam in nido ejus tot ova vidimus, quot eo contineri scribit *Villughby*. *Zuani* autem nil prorsus de nido ejus, nil de nidis reliquorum passerum

scribit . Quarundam Galliæ regionum ruricolis moris esse novimus , ut passerem Troglodytem , sacrum habendo , nec nidum ejus destruant , nedum aviculam ipsam enecare audeant ; hinc & pueri , præjudicia ista majorum traditionibus hausta retinent , & trochili nidum , quum alios destruant , intactum relinquunt . *Aldrovando* teste , aliis Galliæ regionibus traditur : trochilum die festa Epiphaniæ seu Regum , omnes annuos pullorum convocare , ac juncto sic cantu diem celebrare . Alii tandem , quos inter emittit *Albertus M.* rem de regulo mirandam narrant , quod nempe verum , & in primis ex corylo facto adfixus , sua sponte se circumagat ad ignem . Nec est , quod inter mirabilia referas factum ; etenim & altera aviculæ parte jam assata , altera adhuc cruda graviorque descendit ac igni obvertitur ; & verum ignis calore contortum , speciem aviculæ sua sponte sese circumagentis mentitur .

Errat Vir Cel. *Belon* , Passeris Troglodytæ nomen curruæ fulvæ tribuendo , quam alias Galli dicunt : *Fauvette babillarde* , *Triplette* seu *Atriplette* .

Amicorum unus , & curiosorum studiosus multos trochilos cavea detentos pane ex papavere nigro , Argentorati cocto , nutrit , illi igitur vel hyemis medio , pariter ac si silvis detinerentur , acutissimo suo cantu dominum delectant .

Ab Italis dicitur : *Reatino* , Germanis audit : *Zaun-König* , *Winter-König* , Anglis : *Wren Common* . Variis Galliæ in terris vario nomine insignitur . Solonienses eum dicunt : *Roibery* , seu *Robery* ; Aurelianienses : *Ratillon* , *Roitillon* ; Perigordienenses : *Rebenet* ; Andegavenenses : *Beurricbon* , *Burricbon* , *Beurricbot* , *Berichot* , *Berichon* , *Beruchet* , *Roi-Bertauld* , *Boeuf de Dieu* ; Burgundienenses : *Roi de froidure* ; Normanni : *Rebete* , *Rebetrer* , *Rebetrin* ; Santongienenses : *Roybouti* , Guennenses : *Arrepit* , Pictavienses : *Kionkion* . Horum plurima Latino : *Regulus* originem debent , reliqua vel ex cantu , vel ex plumarum colore , vel ex moribus , vel denique cantus ratione derivanda veniunt .

Multo sale volatili & oleo abundans , pro specifico contra calculum sive imminens , sive præsentem , commendatur . Cujus ergo jam in substantia , pipere & sale conditus , pro cibo venit ; jam arefactus in pulverem reducitur , & cum cyatho vini candidi accipitur . Quomodocumque sumtus eximia facultate urinam ciendi pollet . Et teste , *Zacuto Lusitano* , Medico Celeberrimo , multi , quos ipse vidit , hoc medio a calculo liberati fuere . Nec non contra suppressionem urinæ , vel a præsentem calculo , vel quavis alia causa pendentem commendatur . Unus enim cum plumis arefactus , & ut diximus , in pulverem redactus , dosi pro conveniente accipitur .

P A V O .

Pavo . Offic. Schrod. 322. Dal. Pharm. 425. Lemer. 661. Gesn. de avib. 393. Schvenckf. *Aviar. Siles.* 325. Aldrov. *Ornith.* 2. 8. Jonst. de avib. 37. Charlet. Exer. 80. Merr. Pinn. 172. Villughb. *Ornith.* 112. Raii Syn. Meth. av. 51. *Pavus* & *Pavo* . Belon. des Ois. 234. *Pavo cauda longa* . Linn. Faun. Suec. 163. *Pavo nostras* , sive *vulgaris* ; *Avis Medica* ; seu *Persica* ; *Avis picta* , vel *Junonia* . Nonnull.

Qui , quum & magnitudine , & splendentibus caudæ oculis ab omnibus dignoscatur , & apud omnes sit frequentissimus , fusiori ejus descriptioni omni-

omnino superfedemus. *Aldrovando* teste, masculi caput, collum, & principium pectoris est cœrulei-obscurioris coloris; caput, corporis respectu, exiguum, & observante *Alberto M.*, serpentis capiti quodammodo accedens, duabus præterea maculis exornatum, iisque albis & longiusculis, quarum altera supra oculos extensa procurrit, altera autem brevior ac latior, & oculis inferior, ad tertiam quamdam maculam nigram vergit. Verticem crista ornatum exhibet, nec tamen contigua, seu integra, qualis esse solet avibus reliquis, sed composita, & constans caulibus aliquot nudis, tenuissimis, viridibus, & in apicem liliformem exeuntibus. Hinc *Plinius* pavonis cristam ex ramusculis capillaribus compositam esse docet. Verum, etenim non plumas, sed protuberantes herbarum caules videre tibi videberis. Rostrum pavo gerit albidum, probe fissum, parum in apice aduncum, quale esse solet avibus ex granis viventibus; nares habet amplissimas; collum longiusculum, & respectu molis sui corporis gracile. Dorsum albo-cinereum, ac frequentibus maculis nigris transversalibus oblitum. Alas, si complicatae fuerint, supra, ex parte dorsi, nigras; infra ex parte ventris & intus rufas. Caudam suæ dispositionis ergo, in binas quasi partes divisam; quam si in formam rotæ explicat, aliarum quædam pennarum minores fulvæ, nec hispidæ ut longissimæ, sed ut in reliquis avibus, extensæ, caudam totam componere videntur. Hinc alius musculus adfit, necesse est, cui longiores inferuntur, ac cujus auxilio elevari possint atque extendi. Has ex uropygio nasci *Bellonius* docet, priores autem has sustinendi gratia adesse. Uropygium ejus, colore viridi-obscuriore, quod una cum cauda sua longa pavo circumagitur, cujusque pennarum breves ita, ut draconis squamæ dispositæ sunt, dum aliquam longarum pennarum partem obtegunt; quæ dum extensæ fuerint, castaneum præ se ferunt colorem, lineis insuper aureis ascendentibusque exornantur, & in plumas bisulcas, viridissimas, ac hirundinum caudis simillimas terminantur. Maculæ tandem, vel ut cum *Plinio* loquar, oculi caudæ, Chrysolitheim splendorem, aureum insuper & Sapphireum colorem præbentes, quatuor circulis constant, quorum primus seu exterior aureum, secundus castaneum, tertius viridem, quartus denique seu intimus cœruleum vel sapphireum colorem, & fabæ minoris magnitudinem refert. Lumbi, crura & pedes cinerei, maculis nigris conspersi, ac calcaribus, galli instar, muniti sunt. Venter denique cœruleo-viridis, prope ad anum fulvidus, non dicam, nigrus est.

Fœmella haud adeo multa colorum varietate superbit; hujus enim alæ, dorsum, venter, crura & pedes fulvo-cinerei sunt, ut & vertex & crista, quamvis in vertice maculas quasdam seu puncta viridia passim dispersa observavimus; maculas albas in masculo obvias multo majores ostendit, iridem plumbeam, nec ut masculi, flavidam; mentum candidissimum; plumas colli tandem virides undulatas, & in extremitatibus prope pectus candidas.

Eodem pabulo, quo pulli & pavones vivunt, hordeum autem avidissimè adpetunt. *Alberto* teste serpentes devorant, hinc mirum non est serpentes clamore eorum terreri. Attamen originis exteræ, & ex India in Europam, ubi hodie sunt frequentissimi, deportati videntur. Gallum Indicum excipe, & solus ex avibus erit pavo, qui caudam rotandi facultate gaudet, quoties oculorum pulchritudinem exponere libet. Quæ autem alias

perhibent: quod nempe, quum se laudatum audiverit, caudam rotandi desiderio corripiatur, pedibus vero conspectis, tamquam ratione ductus, caudam complicit, deprimatque; ea omnia, nobis quidem, fabulas nimium redolere videntur, quam ut veritatis vel speciem ibi quæramus. Teste *Aristotele*, duodena ova simul pavo excludit, nostrates vero non nisi quina vel sena. Multum hortis damnum inferunt, & tegulas, domuum tecta constituentes, evertere solent. *Aldrovandus* pavonem oculos quidem jucundissimo spectaculo permulcere, aures tamen execrabili vocis sonitu perstringere docet, unde proverbium apud Italos: pavo angelum pennis, voce diabolum, incessu furem imitatur. Sunt, qui vel centesimum vitæ annum pavonem adtingere scribunt, nos non renuimus. Lubricitatis suæ ergo, teste *Columella*, pavo unus, quinque focias habet foemellas; quidquod foemellam ova incubantem, si alia cum qua coire possit, deficiat, adgreditur, & ne incubando tempus terat, ova confringit; cujus conscia foemella, nidum quam remotissime poterit, abscondere solet. Sordium inimicus dicitur, & colore interdum varius, imo nonnunquam, & in primis Septentrionis in regionibus, candidissimus conspicitur.

Carnem pavonis elixam, vel per annum & diutius posse conservari, nec putredine adfici perhibent. Hinc etiam *S. Augustinus de Civitate Dei Lib. 12. Cap. 2.* Quis quæso, ait, mortui pavonis carni immunitatem a putredine dedit? nisi Deus creator omnium; de quibus antequam convicti essemus, accidit Carthagine, ut pavo elixus adponeretur; nos igitur carnis ex pectore partem conservari, & peracto tempore tanto, quantum pro corruptione cujusvis elixæ carnis suffecisset, iterum mensæ adponi jussimus, nec ullo ne odore quidem putredinis percepto, denuo reponi, tum rursus elapsis triginta diebus, ac tandem integro anno, sanam semper, nec putredine confectam reperivimus. Decreverat tamen volumine, reddita enim erat aridior. Nobis autem mirum videtur nequaquam, quod caro pavonis, sua natura durissima ac solidissima, coctione exsiccata, ab humiditate omni sollicitè custodita, accedente tamen calidioris cœli beneficio, diutius corruptioni resistere valeat; idem enim & cum carne galli Indici, vel cujusvis pulli alius experieris, censeo. Hæc *VVilloughby*.

Pavoni, sic *Belon*, ex clamore suo nomen venisse videtur. Et quod in variis avibus nullum fere sexus discrimen, in pavone apertissimum est, & ut in gallo & gallina maximum; ut enim gallus & capo plumas caudæ atque monilis a foemella diversissimas gerit: sic etiam colla ac cauda imprimis, pavo masculus a foemella differt. Fusiori ejus descriptioni vix opus esse censeo, quum sit frequentissimus inter omnes. Pulchritudinis eximiæ ob causam Junoni sacer fuit. Maris alæ pennis rufis longioribus ornatae sunt; & pennæ longissimæ quamvis ex cauda enatæ videantur, ex superiore dorsi parte prope uropygium, crassum atque amplissimum egrediuntur, & plumis nigris brevioribus ac illis subjacentibus suffulciuntur. Nec nisi elegantiae ergo plumas cristæ elevatas, & ornatus causa pennas caudæ interdum effluentes addidit natura. Multos autem sumtus exigit pabulum pavonis, & difficillime pulli ejus nutriuntur. Candidissimos quoque pavones, mares æque ac foemellas reperiri novimus. Calcaribus, gallorum instar, muniti sunt, & ex gravitate horum aliquid secum gerunt. Pavonum ova gallinis ad incubandum supponendi mos est antiquissimus, cujus rationem

tionem reddit *Aristoteles*. Nec tamen illis accedere possum, quæ ab aliis adferta reperi, nempe marem hand coeundo, sed caudam, foemella præfente, in rotam evolvendo, hancce fœcundare. Quum igitur coitus galli Indici cum gallina testes sese fuisse scribant, quidni & pavones posse coire concedunt. Nec negati coitus rationem in longitudine caudæ quærant; hanc enim pavo elevare potest. Quum vero extollendæ corporis moli tantæ & alæ longiores respondeant: longissimas alas vel pavonibus junioribus natura largita est, quas, antequam incrementi multum ceperint, negligenter depresso post se trahere solent. Caudam rotans pavo, & imprimis, præfente foemella, superbit, ac sole sese obvertit, quo splendorem ejus cauda excipere, ac majori cum nitore conspici possit. Multum lucri *Marco Aufidio Lurconi*, qui primus saginatos pavones Romæ vendidit, ex illis rediisse scribit *Plinius*; & *Hortensium*, Oratorem primum in conviviis illos adhibuisse subnectit. Antea igitur Romani pavones non nisi pulchritudinis ergo pavones nutritivisse videntur. Teste *Aristoteles*, 25. annorum vitam plerumque vivunt pavones, & deciditibus arborum foliis, suas pennas amittunt, arboribus frondescentibus autem novis se plumis induunt. Imo Romanis olim ut nobis hodie, pavones viridariis inclusos delectamento celsisse ducimus.

Primum igitur locum inter aves domesticas, pavo, inter rapaces autem aquila tenet; hinc quoque illum Junoni, hanc vero Jovi sacrum dixere antiquiores, & Cæsarum apotheosi aquila, Imperatricium vero pavo veniebat. Tanti olim apud Græcos pavo æstimabatur, ut non solum Athenis, numerata pecunia, illius videndi copiam facerent, sed quoque pluri mi ex Sparta & Theffalia, pavonem visuri Athenas peterent. Ex quo quanti apud illos pavo habitus fuerit, & quanti venerit, concludere licet. Imo vel *Alexandro M.* tanta videbatur pulchritudo pavonis, ut conspecto apud Indas primo, ne quis pavonem enecaret, graviore poena interdixit. Sublimioribus in locis desidere peramat pavo, hinc quoque domuum in fastigiis frequens conspicitur. Gallinis per diem focius, ob pabulum commune, ingruente nocte, ad idem cum illis receptaculum petit. Sic sensim ex regionibus citramarinis in omnes Europæ terras deportatus, ac hodie frequentissimus ibi est, ubi olim vix principum in aulis conspiciebatur. In Suecia, sic *Olaus Magnus*, eximiæ suæ pulchritudinis ergo, frequentissimus nutritur. *Joannes Bruyer*, origine Gallus, suo tempore, in Normannia, integros pavonum greges educari scribit, & maximo lucro dominis venire, quippe qui saginatos, in conviviis Principum adponendos summo pretio vendebant. Teste *Paracelso*, clamore intempestivo pavo mortem alicujus, domum, qua detinetur inhabitantis, præfagire solet, siquidem vulturis instar, vel e longinquo cadaverum exhalationes percipere valet. Fac dictis fidem, si libet, nos numquam consentiemus. *Gybertus Longolius* in *Dialogo de avibus* primos pavones candidos ex Septentrione allatos & Colonia Agrippinæ spectatum expositos; & album eorum colorem ex imaginatione matris continuoque nivis adspectu ortum fuisse docet; siquidem candidos corvos, merlos, picas, accipitres & passeris, iisdem in regionibus frequentissime conspiciamus. Nec hæc quidem argumentatio nobis arridet, etenim vel apud nos aves istas candidissimas nasci videmus, nec tamen matres continua nive oblectos Septentrionis montes contemplantur. Artificio quodam

dam singulari, si pavones albos producere velis, matrem ova incubantem loco undecumque albis linteis oblecto detineas. Quod quidem ex homine cui cura avium Principis injuncta erat, acceptum refert *Antonius Mizauld*; & a variis descriptum, a nemine autem hucusque comprobatum esse, subjungit.

Pavonem fœmellam bis quotannis, ab initio Maii, octo ova cortici solidissimo, cinereo & punctulis consperso inclusa, ponere scribit *Zinnani*. Japonensium pavonem, masculum & fœmellam, aves pulcherrimas, sed a pavonibus nostris diversissimas ab *Aldrovando* delineatas ac descriptas reperies.

Delectationis gratia, pro fine adponere liceat ea, quæ in *Spectaculo Naturæ* de pavone leguntur: Quantum denique (sic eleganter, pro more suo *Cel. Pluche*) delectationis ex lusciniæ aures, tantum ex pavone oculi captant. Equidem & gallus, & anas silvestris, & alcyon, & carduelis, psittaci majores, phasianus, alii, haud exigua vestimentorum pulchritudine gaudent, & vario æque ac jucundissimo oculis spectaculo veniunt; ast prodeunte pavone, in illum omnium oculos conversos videbis. Quam apta capitis forma; quanta corporis agilitas; quam eximia colorum caudæ commixtio; quamcumque ejus partem adspexeris, aureo-cœruleum splendorem videbis; quantus caudam evolvendo superbit; quam gravis incessus, & studium in exponendis naturæ dotibus; hic tibi solus eximio & singulari prorsus spectaculo cedit. Tantis igitur pulchritudinum prærogativis instructus ut tædium moveat, num umquam accidere posse crederes? Ast tamen ille movet; nec enim linguæ affabilitate, nec cantus gratia pollet. Clamore suo injucundo aures perstringit, voce terrorem iniicit. Ast acanthis *Canaria*, *fringilla*, *linaria*, *psittacus*, minus splendentes, vel per annorum series nobiscum vivunt, nec tædio veniunt. Ingenio pollent, & societatem delectare norunt. Societatis leges addiscite homines. Etenim pro stabilienda ac diutissime conservanda societate non sufficit splendor externus.

Græcum pavonis nomen est: *Taos*, Italicum: *Pavone*, Hispanicum: *Pavon*, Germanicum: *Pau*, vel *Pfau*; Anglicum: *Peacock*, Suevicum, *Peafogel*. Vox gallica *Paon*, quam *Pân* proferendam esse scito, ex *Pavon*: vel Latino, vel Italico descendit; ut & fœmellam: *Paone* seu *Paonessa*, ex Italico: *Paena*, *Paonessa*, diximus; & pullum ejus: *Paoneau*, ex Italico: *Pavoncino*, *Pavonino*. Veteres illum *Avem Medicam* seu *Persicam* adpellabant, siquidem gallinæ instar, ex Media seu Persia in Græciam, ex Græcia autem in Italiam deportata fuerat, imo *Junonis avem* illum dicebant, siquidem centum oculos Argi, caudæ avis amatæ Junonem inseruisse loquebatur fabula.

Multo oleo & sale volatili abundat pavo; qui carnis suæ aridæ, durioris & concoctu difficilioris ergo, si principum mensis nonnunquam adponitur, pro ostentatione potius, quam pro cibo ori grato venit. *Sebizius*, centum abhinc annis, moris fuisse scribit, ut in nuptiis procerum, rariora fercula inter & pavonem, plumis superbientem rostro pedibusque auro obductis adponerent. Cutim scilicet cum plumis subtrahebant, tum illum additis aromatibus, ut: cinnamomo, caryophyllis, similibus, excoquebant, sicque denuo cute indutum, spectaculo oculorum jucundo, exhibebant. Hoc modo præparatus pavo multos per annos conservari poterat, nec putredine adficiebatur, quam a corruptione immunitatem carni pavonis propriam

priam & singularem habuerunt; ipsi *Aldrovando*, ut scribit, in anno 1598. frustulum pavonis jam anno 1592. elixi exhibebatur, illud tamen putredinem ne quidem olebat. Nec recentioris inventionis esse scribit *Aldrovandus*, hunc pavones conservandi modum a *Sebizio* conscriptum, sed jam *Platinum*, artis coquendi peritissimum, & secundum *Apicium* dicendum, rationem, qua pavo ita a putredine conservari debeat, scriptis reliquisse; imo quosdam delectationis ergo, ventrem pavonis hoc modo exornati, lana & camphora confarcire addit, quo mensæ adpositas ignem evomere videatur. Pavones juniores & carne teneros cibo delicatissimo venire constat.

Usus pavonis in Medicina sciscitaris? carnem ejus vertigine laborantibus opitulari, & juscula ex eadem elicitata Pleuritidem sanare, urinam provocare, renum ac vesicæ calculos eiicere dicunt; adipem ejus melle mixtum & succo rutæ, dolores colicos profligare; fel denique ophthalmica virtute donatum, ulcera oculorum detergere, aciemque exacuare. Præcipuus tamen ac frequentissimus usus est stercoreis ex pavone in Medicina, quod pro specifico contra Epilepsiam ac vertiginem commendatur. *Ludovicus* in tractatu de selectu medicamentorum, Vir & in determinando illorum numero accuratissimus, & in laudanda eorum virtute haud nimius, non potest, quin iteratis commendet stercois pavonis contra Epilepsiam; accedit sententiæ ejus Medicorum turba, subscribit & experientia. Illud autem in pulverem reducunt, cujus ℥j. ad ʒj. pro dosi, vel nudi, vel saccharo mixti, vel denique vino rubro infusi atque colati ægrotanti præbent. Sunt, qui pavonis excrementa recentia in aceti sambucini ʒij. vel ʒiij. infundi, & colaturam, mane, jejuno stomacho, per 9. dies subsequentes, a novilunio nempe ad plenilunium, exhiberi malunt. Nec non clysteribus anti epilepticis stercoreis hujus ʒß. ad ʒj. addunt. Tunc enim non solum stimulo venit, sed & medio fere certissimo, si viscido quodam calidoque humore aliquod abdominis viscus, ut: lien, mesenterium, seu pancreas obsidetur. Modus autem stercore isto contra vertiginem, Epilepsiæ affinem, imo sæpe ejus præcursores, utendi, hic est:

℞. Stercoris pavonis maris pro viro, pavonis foemellæ pro foemina, pug. j. Macer. per aliquot horas in q. f. optimi vini rubri, ad eminentiam 3. digitorum affusi. Col. leviori expressione, & colatura div. in 3. p. æ., quas per triduum, mane jejuno, ante novilunium ægrotanti exhibeas, & ut stragulis validioribus obtectus, sudorem expectet, præcipias. Medium hocce jure magni æstimatum, inventioni Comitissæ de Valdeck debetur.

Pennæ pavonis adustæ pro suffumigiis contra suffocationes hystericas, & ova ejus comesta pro arthritide vaga commendantur.

℞. Partis albæ ex sterc. pavon. arefac.

Radic. præoniæ maris ana ʒij.

Radic. valerianæ silvestr. ʒj.

Semin. præoniæ excorticat. ʒiij.

Semin. carvi ʒß.

M. f. omnium pulvis, deinde c. f. q. Mellis Anthos. subigat. f. opiata, cujus ʒij. pro dosi, mane & vespera, cum pane oblato, per mensem integrum accipito.

℞. Ster-

℞. Stercor. pavon. ʒj.

Sacchar. cand. ʒss.

Vini rubri optimi ʒiiij.

Fiat infusio per noctem, postero die cum express. col. & habebis potionem anti-epilepticam, quam per tres dies subsequentes, mane, jejuno, ante novilunium exhibeas, & ægrotantem, ut validissimis lecti stragulis obtectus sudorem patiatur, jubeas.

℞. Stercor. pavon. arefac. ʒij.

Radic. pæon. mar.

Lumbricor. terrestr. præp. ana ʒjss.

Cinnabar. antimon. ʒij.

F. omnium pulvis, anti-epileptici nomine salutandus, cujus ʒij. prodo-
fi, per triduum, mane, jejuno stomacho, sub initium novilunii, cum pane
oblato, ægrotanti præbeas.

P E R D I X.

Variæ sunt perdicum species, ut: 1. perdix cinerea vulgaris, in qua describenda nostra nunc versatur tractatio, 2. perdix cinerea minor, venatoribus nostris: *Roquette* dicta, 3. perdix rubra major in Delfinatu & Provincia frequens, quam: *Bertavelle* seu *Bartavelle* nuncupant, 4. perdix rubra vulgaris, colore & magnitudine varians, 5. perdix Damascena *Belonii*, & perdix alba Alpina vel Sabaudienfis; utraque autem attaginum speciei potius, quam perdicibus adnumeranda.

Perdix. Offic. Schrod. 323. Dal. Pharm. 426. Lemer. 667. *Perdix minor fulva*. Belon. des Ois. 258. *Perdix minor, seu cinerea*. Schvenckf. Aviar. Sil. 327. *Perdix cinerea*. Aldrov. Ornith. 2. 140. Jonst. de avib. Charlet. Exer. 83. *Perdix cinerea Aldrovandi*. Villughb. Ornith. 118. Raii Syn. Meth. av. 57. *Tetrao macula nuda coccinea pone oculos, rectricibus ferrugineis*. Linn. Faun. Suec. 172. *Perdix minor vulgaris nostras, sive Starna*. Quorumd.

Pondere suo perdix, mas 14 $\frac{1}{4}$. foemella autem 13 $\frac{1}{2}$. uncias explent. Longitudinem ab apice rostri ad extremitatem ungularum 14 $\frac{1}{4}$. digitorum, ad finem caudæ 12 $\frac{3}{4}$. digitorum, ad angulos oris $\frac{3}{4}$. digiti, latitudinem vero extensis alis interjacentem 20. digitorum profitetur. Rostrum perdicis junioris flavidum est, senescentis albescit. Iris oculorum flavida; pectus masculi macula rufa semicirculari, ac ferream equi soleam repræsentante ornatum; foemellæ eadem destitutum. Nec non regio sub oculis, pluribus eminentiis rubris confita. Mentum capitisque latera primo quidem crocea, tum cœruleo-cinerea, & lineis transversalibus nigris ad lineam semicircularem (de qua diximus) usque distincta; imo sub linea, eodem adhuc colore, in flavidum denique abeunte conspicua. Longissimæ laterum plumæ caulibus donatæ albis & macula magna ferruginea transversali ornatae sunt. Corporis superficies ferrugineum, nigrum & candidum colorem promiscue monstrat. Rectricium sunt 21. alæ cuius, earumque priores rufæ maculis ferrugineis seu flavo-albis, plumæ interiores exiguae & humerorum longissimæ caulibus flavido-candidis instructæ. Cauda 3 $\frac{1}{2}$. digitis longa, ex 12. pennis componitur, quarum 4. mediæ colorem corporis, 7. reliquæ autem in latere utroque flavido-fordidum colorem, & cuspi-

cuspides ostendunt cinereas. Crura sub articulationibus nuda, calcaris vestigium nullum, pedes virides junioribus, albescentes antiquioribus; digiti, ut in gallo sylvestri, mediante membrana coherentes; ingluvies amplissima; stomachus musculosus; fellis tandem vesicula una. Caro perdicis non solum saporis ob excellentiam, sed & qualitatis salubrioris ergo, omni reliquarum avium carni anteferenda venit. Plerumque formicis earumque ovis, seu potius Chrysalidibus, frumenti granis, foliisque frondescentibus vescitur; hyeme autem frumenti aliisque granorum foliis nutrita multum saporis sui, autumnus & hyeme caro ejus amittere creditur. Fœcundissima perdix, & in Anglia frequentissima, 16. ad 18. ova simul ponere solet. Apud Italos infrequentior, & pluris venit quam perdix rubra, & *Starna*, seu extera, vel *Pernice* adpellatur. Quum vero & corporis mole graviore, & exigua alarum extensione prædita sit perdix omnis, nec sublimiori volatu, nec diutius continuato fertur. Hyeme agminatim volant, habitantque. Quum enim, ut supra docuimus, 15. ad 16. pullos una excludant, pulli recentes exclusi, per hyemem omnem patris matrisque societate detinentur. Veris tempore, binis, coitus ergo incedunt, & pullos abigit parens uterque. Hæc *Belon*. Eaque non solum, de quavis perdicum specie, sed & de gallo sylvestri, Gallice: *Cocq de Bruyère*, dicto, censenda atque tenenda esse novimus. Idem ille *Belonius*, cantum perdicis, certissimum ait esse signum ingruentis diei. Nos illum sæpius, post solis recessum crepusculo vespertino intelleximus. Favet quodammodo experientia *Aristoteli* adferenti: quod perdix nido accedentem quum venatorem conspexerit, ante pedes ejus lentissimo reptatu procedat, tamquam captaturo se offerens, post vero repentino volatu elata avolet, & pullos ex nido evocet, qui intellecta matris voce nidum deferunt, matrem insequuntur.

Perdix omnis falacitatis summx notam gerit, imo commercii contra naturam stigma meretur atque opprobrium. Nec desunt antiquorum fabulæ circa perdices; masculos enim ova confringendo & fœmellas ab incubatu arcendo, libidinis explendæ ergo, iteratum coitum adpetere scripserunt; fœmellas igitur quam maximo studio nidum ac ova sua abscondere; deficientibus seu ob incubatum absentibus fœmellis, mares inter se præliari, & victos succumbere victorum libidini; duplicem illas nidum extruere, & in altero marem, in altero autem fœmellam suos pullos curare; fœmellas vel absque coitu fœcunda ova concipere, dummodo vento ex regione ubi mares detinentur, tangantur; cujus rei rationem vel ex recentioribus nonnulli, antequam de facti veritate constet, reddere desudarunt; fœmellas quoque salacissimas, ne quidem incubationis tempore, coitus desiderio abstinere; quæ omnia *Plinius*, graviter ut solet, ac constanter adferit. Marem prælio victum ut in fœmella conspectum veniat, haud amplius audere scribebant; perdicem, si vel fracta vel ablata fuerint sua ova, aliena furari, incubare, pullosque educare; hos vero cum annis veræ matris cognitionem adquirere, & cognita ejus voce, novercam deferere; imo sæpius aucupis insidias evitatum, supinam se humi reponere ac glebis terræ vel stramine sese perdicem obtegere fabulati sunt. Quæ quidem omnia fabulas redolent adeo, ut eadem exposuisse pro refutatione sufficiat. Hæc *VVillughby*.

Cæterum calidissima corporis constitutione sunt perdices, & masculos
veris

veris & coitus tempore, acerrima sæpe certamina, fœmellarum ergo, inire videbis, lubentissime arenæ sese obvolvunt; odoratur acutissimo gaudent, & quæcumque rostro obvenerint, comedunt.

Etenim & feminibus, & leguminibus, frumenti granis reliquis, & vermibus, lumbricis, & foliis viridibus, herbis, imo formicarum ovis seu nymphis vescuntur. Per totam fere Europam illas reperies, & vel casse, vel canibus venaticis vel sclopeti ictibus captabis. Faciles autem cicurata medias inter gallinas domesticas viverent, imo perdicem quamdam sese nutriisse refert *Gesnerus*, quæ hominum commercio adsueta, vel testibus præsentibus, nullo timore detenta, selem frequentissimis ictibus percutiebat. Maximorum quadrupedum societatem, sæpius sibi infestam quærunt perdices, ut: equorum, boum, cervorum, caprarum. Ubi autem perdices venari per leges non licet, gens rustica aliis modis eas captare student. Fœmellam scilicet, *Chanterelle*, Cantatricem dictam, ingruente nocte, obscuriore quodam loco detinent, cujus ad cantum, & in primis coitus tempore, adcurrentes masculus, facilis capitur. *Plinius* 16. *Aristoteles* autem 25. annorum vitam, fœmellis scilicet adsignat; quippe quas, si de avibus quæritur, masculo longæviores esse teneto. Perdix omnis magis cursu pollet quam volatu; nisi perdicem rubram minorem, Gallice: *Roquette* dictam excipias; hæc enim satis citato volatu fertur, & plerumque venatorum industriam eludit. Fortissimo autem nidore redolet perdix, illamque canis vel modico odoratu pollens detegere & investigari valet. Vix exclusi pulli matris cursum insequuntur, quæ illos artem alimenta quærendi edocet, & delassatos sub alis fovet; hi autem nulla vel imbecillitatis, vel ad volandum impossibilitatis ratione habita, tanta gaudent calliditate, ut vix ac ne vix quidem captari possint. Conculcari mallent a venatoribus, quam suo se loco & situ movere. Verno tempore ac æstivo, maristesticali bini, corporis respectu, magni, aut hyeme sunt exiliores ac fere deleti, id quod in plurimis avium observabis. Nec tamen nidum, propriè sic dictum construunt perdices, sed in quamvis obviam terræ cavitatem sua ova reponunt. Ova tandem earum, observante *Zinnani*, cortice durissimo & cinereo flavescente obteguntur. Numquam vero arboribus inhæret perdix, de qua agitur, cinerea, rubra autem arbores interdum petit, & canum venatorumque laborem exasperat.

Gallice tandem perdix cinerea, olim: *Perdrix griesche*, *grignette*, seu *gringette*, *Perdrix goache*, *gouasche*, *govesche*, & teste *Cotgravio*, circa Monspelium: *Rasclè*, plerumque: *Perdrix grise* seu *commune* dicitur. Italis audit: *Starna*, *Perdice*, seu: *Pernice minore*, item: *Cinericcia*. Hispanis: *Perdix*, Germanis; *Feld-Huhn*, seu *Wild-huhn*, Anglis: *Common Partridge*, Suecis: *Rapphena*. Ex generico Græcorum atque Latinorum: *Perdix*, Gallicum: *Perdis*, *Perdis*, *Perdrix*, ortum esse videtur. Pullus perdicis Gallice: *Perdreau*, & corrupte a *Cotgravio*: *Perdriau* dicitur.

Multo sale volatili, multoque oleo abundat perdrix, & optimi sui saporis ergo, in primis junior, frequentissimo alimento cedit. Cinereæ rubram, quamvis immerito, anteferunt, etenim gustandi arte periti, plus saporis silvestris, quem quærunt, cinereæ quam rubræ inesse perhibent. Gulæ litantes perdicem carne abundantem & teneram seligendam esse volunt, tum aeri per aliquot dies exponendam, ut fermentatione aliquan-

tula oborta, adhuc delicatioris saporis evadat. Cum annis duriores, aridiorem, & concoctu difficiliorem carnem induit perdix. Et tunc quidem multis aromatibus eget pro condimento, nec nisi artocreatibus immissa comeditur. Juscula tandem ex perdice elicit, facillime digeruntur, optimum insuper succum stomacho præbent; his præsertim, qui vel ex morbo salutem recuperant, vel pituitosa & melancholica corporis constitutione gaudent, convenientia.

Medicina tandem perdicem inter assandum succo pomi aurantii acris irrigatam contra diarrhæam, ex depravatione succi stomachici & intestinorum relaxatione ortam, commendat. Huic enim inesse docet vim stomachum corroborandi, & viscositates putridas ibi natas expellendi, & tonum fibris intestinorum restituendi. Nec non pro ulceribus & cataractis oculorum, sanguine & felle perdicis utuntur; utrumque enim humorem, vix animali subtractum & tepidum oculis instillant. Ad profligandum icterum, Schroderus medullam & cerebrum perdicis, pro cibo, commendat. Pennæ pro suffumigio, sub initium paroxysmi affectionum hysteriarum in mulieribus & Epilepsiæ, veniunt. Alii autem cum abrotano & menta excoctas perdicum pennas facculo immittunt, eumque pro sedandis alvi torminibus ventri infantum imponere solent.

P H A S I A N U S .

Phasiani nomen apud Gallos, avium pluribus est commune, quo quidem & Phasianus Brasiliensis, nostro paullulum major, & gallus silvester, (*Faisan-bruyant* dictus) & anas pedens Belonii insigniuntur, hæc enim: *Faisan de Beauce* seu *du Berry* dicitur.

Phasianus. Offic. Belon. *des Ois*. 254. Gesn. *de avib*. 683, Schvenckf. *av. fles*. 331. Aldrov. *Ornith*. 2. 45. Jonst. *de avib*. 40. Willughb. *Ornith*. 117. Raii Syn. *Method. Aviar*. 56. *Phasianus a Phaside Colchidis fluvio dictus. Ales Phasidis, seu Phasiacus; Scythica Volucris; Irys; Gallus Silvestris*. Nonnull.

Varium est phasiani pondus, illudque pro exilitate vel pinguedine corporis diversum. Maris scilicet uncia 45. ad 50. foemellæ autem 33. esse solent. A cuspide rostri ad extremitatem caudæ 36. ad extremitatem pedum 24. digitos longitudine explet. Spatium alis extensis interjacens est 33. digitorum. Rostrum ejus avibus grana comedentibus simile, ab apice ad angulos oris $1\frac{1}{4}$. digiti longum, prodeunte avis ætate albescit, & utrinque ubi capiti superius jungitur, membranam carnosam atque tuberosam ostendit, sub qua nares quasi delitescentes videbis. Oculorum iris flava est; & circulo quodam coccineo nigrisque punctis consperso cinguntur oculi, teste *Aldrovando*. In anteriore capitis parte, & basi superioris maxillæ plumas exiguas nigridas coccineo fortiori colore mixtas; verticem & superiorem colli partem splendente viridi-obscuriore, (debiliore tamen verticem,) tinctos videbis. *Aldrovandus* equidem, vertici cinereum pulcherimum colorem adsignat, lateribus & regioni rostro vicinæ viridem, & prout jam sole collustratur, jam umbra detinetur, variantem, imo totam colli partem superiorem exornantem. Nos vero verticem cœruleo splendentem & purpureo mixtum observavimus; & caput & partem colli superiorem nunc cœruleas, nunc virides; & in quovis latere capitis e regione oculorum

rum plumas prominentes, cornua *Plinio* dictas; & plumas nigras reliquis omnibus longiores, inferiori aurium angulo nexas; & latera colli cum gutture purpureo-splendentia. Nec tamen nisi margines plumarum variantem jam viridem, jam purpureum colorem ostendunt, reliqua pars plumarum in vertice fulvum, in collo vero nigrum. Margines seu fimbriæ plumarum nigridarum menti, orisque angulorum, sunt virides. Sub viridi autem, & reliquum colli, & pectus, & humeri, & medium dorsi, & latera plumis teguntur pulcherrimis, in fundo nigris, in marginibus autem, jam nigris jam purpureis, prout varia ratione a radiis solaribus collustrantur. Sub purpureo, macula quædam transversalis aurea, in omni pluma occurrit, hanc excipit color fulvus, ad fundum, de quo diximus, nigrum, procurrens. Omnes attamen colores, linea purpurea splendente, & parum lata inter se separantur. Extremities pennarum collum supra obtegunt maculam nigram, figuræ parabolicæ ostendunt. Caules pennarum omnium flavidi sunt; & pennæ ipsæ ad longum caulis macula quadam oblonga, nigro de quo diximus fundo, superjacente, notantur. Humeros autem & medium dorsi quæ obtegunt pennæ, in marginibus flavæ, primo quidem lineam purpuream conspiciendam exhibent, tum nigram latiore, plumarum extremitatibus parallelam, cui alia quædam linea alba, ovalis dicta ab *Aldrovando*, includitur; spatium vero interius, & pars plumarum, reliqua ad fundum usque sunt nigræ. Spatium medii dorsi fulvum nigroque mixtum, & caules plumarum flavidum præ se ferunt colorem. Has quæ excipiunt, dorsi pennæ omnes, rubicundo variegatæ, macula ista alba carentes & longiores, quasi fimbriis quibusdam terminantur; at reliquarum instar, luci expositæ, in medio suo eundem mentiuntur colorem viridem, nec tamen illo ornantur, sed caules fere aureos, cæterum fulvum colorem in radice ostendunt. Cauda ejus, si nempe rectrices illius longissimas, medium occupantes, ad mensuram exigere velis, 18. digitorum longitudinem profitetur. Figura sua dispositionem fistularum organi imitatur, longissimæ enim medium occupant, reliquæ autem utrinque procurunt longitudine sensim decrescente. Duæ scilicet de quibus diximus, longissimæ, & in medio constitutæ, octo ex parte utraque sibi junctas habent, longitudine inter se dissimiles, colore cinereas, in lateribus variegatas, & prope caules maculis nigris notatas, iisque in majoribus pennis ex utraque parte conspiciendis, in minoribus autem non nisi ex alterutra. Alæ complicatæ 9. digitorum, extensæ autem 18. digitorum extensionem profitentur; quarum plumæ, ubi corpus adtingunt, eisdem coloribus ornantur, quibus dorsi initium; pennæ subsequentes autem posterioribus dorsi pennis similitudine colorum accedunt. Latera tandem ut in perdice cinerea, & magnæ alarum plumæ, ut in illa, cinereo fulvæ, maculisque albidis obsitæ conspiciuntur. Pectus, & venter, in regione stomachi, & quæcumque alis teguntur, colorem colli, quamvis obscuriorem referunt, majoribus etiam plumis ornantur. Pennæ ano & lumbis vicinæ, castaneo-fulvum, at crura & pedes fulviorem, & digiti cum ungulis fuscum colorem produnt. In digitis phasiani membranam observabis majorem, qualem in nulla ex avibus, arenæ sese obvolvuntibus vidi, eamque natatui quodammodo inservire censeo. Crura ejus albida calcaribus brevioribus quidem quam galli, attamen acutis muniuntur & nigris. Fœmella, ex qua-

cum

cumque parte illam spectaveris, pulchritudinis masculi inferioris, & colore est tantum non coturnicis colorem referente. Silvas phasianus incolit, & glandibus, baccis, granis, seminibusque vivit. Teste *Longolio*, tantam carnis suæ præstantiam credunt esse homines, ut illam demum carnem silvestrium eximiam dicant, quæ aliqua saporis similitudini carni phasianæ accedit. Et *Aldrovandus* varia in medium producit, quibus comprobatur carnem phasianæ præstantiorem esse gallinacæ; imo raritatis æque ac excellentiæ suæ ergo, phasianum mensis principum destinatum videri subjungit. Phasianæ autem, ut coturnices, perdices & aliæ quædam casse capiuntur, adhibito cane venatico, ita edocto ut retia incurrentes neutiquam arceat, sed vel terra prostratus, vel caudam ventilando, tempus indicet reti contrahendo opportunum; sicque canis una cum avibus reti obtegatur. Sunt, qui avium plures, & in primis phasianos palato delictiorem exhibere docent saporem, si falconis seu accipitris ictibus enecentur, quam si retibus, aliave ratione capiantur. Concedimus lubentiores, quod ebullitione sanguinis cursu excitati, carni earum quædam ad putrefactionem dispositio induatur atque mollities; ast saporis præstantioris rationem ut ex mollitie carnis petant, haud omnes, mihi quidem, consentire videntur. Nec tamen disputandum de gustibus. Teste *Bortero*, nec perdices nec phasianæ in Hibernia reperiuntur. Hæc *VVillughby*.

Fœmellæ societatem peramans phasianus; reliquorum masculorum præsentiam spernit, & si quos illorum reperiverit, gallorum Indiæ instar, acerrimum cum illis certamen ingreditur, nec nisi vel victus, vel victor, eodem desistit. Duplicis sunt generis phasianæ, ut & perdices, utrique tamen plumæ in vertice, ex utroque aurium latere, sunt elevatæ, ac cornua exigua referentes, quas pro lubitu jam ad tollere, jam deprimere valet. Difficillimo autem labore phasianos, vel juniores cicurabis; cicuratis autem singulis maribus binæ fœmellæ pro sociis sufficiunt. Semel tantum in anno, aliquoties 20. ova ponunt. Nec tamen plura, quam 15. ad summum, ad excludendum supponas, reliqua subtrahas, necesse est. Tempus sui coitus ultra Martium & Aprilem, menses protrahitur. Difficillima est phasianorum silvestrium captatio, nec nisi hyeme multaque nive, felix procedit. Tunc enim nivis impressa eorum vestigia & excrementa, caponum vestigiis ac excrementis similia indagantur. Detectis itaque locorum regionibus, quibus detinentur, escam hinc inde disponere solent rustici, quo regiones illas invisendi cupiditatem induant ac consuetudinem. Post prope escam, lingulam cavæ superstructam, & lingulæ in fine speculum constituunt, quo escam devorando, suam imaginem in speculo animadvertens phasianus, zelotypia incitatus in imaginem suam, quam socium credit, irruendo, lingula recedente capiatur. Quæ autem pavonem marem a fœmella distinguunt, eadem fere & phasianum masculum & fœmellam intercedunt criteria. Noctu arborum ramis insidere solent phasianæ, & ex sylvis arbuistorum plenis recedere, ac cacumina arborum procerarum petere. Ex flumine *Phasi*, phasiano nomen venisse docent alii. Longæ solent esse ac hispida phasianæ pennæ, quibus loco pennarum struthionis, alii pileos suos exornare solent.

Vario cæterum atque eximio pennarum splendore & colore pavoni phasianus accedit, unde *Gybertus Longolius*, numquam, ait, phasiano pulchrius

quidpiam vidi. Quantus colorum infinite variantium splendor. Hunc ne Apellem quidem imitari potuisse censeo. Fidem superare videtur quod in hunc solum tantas elegantiae dotes ac pulchritudinis natura contulerit. Recte igitur *Solon*, Græciæ sapientum unus, *Croeso*, folio regio residenti, & diademate regio, auro, purpuraque onusto respondidit, quum numpulchrius quidpiam vidisset interrogaretur; pulchriores habeo, inquit, pavones & phasianos, sua, nec mutuata veste superbientes. Idem ille *Longo-lius*, in *Dialogo de avibus*, phasianum recenter captum, tantæ ferocitatis esse ait, ut nec gallinis, nec pavonibus parceat, sed iteratis rostri ictibus omnes dilaniet; ast summo cum studio cicuratum denique phasianum cum gallinis coire, & ova exinde provenientia punctulisque nigris conspersa, pullos continere, qui admodum multa similitudine phasianis accedunt; imo si foemellas ex istis provenientes cum patre suo sive phasiano coire curaveris, phasianos tandem perfectos produci. Quæ quum ita sint, mirum mihi videtur, (sic ille pergit) quod adeo infrequentiores apud nos sint phasiani, nec omnes villæ eorum plenæ, quibus ejusmodi experimenta instituendi, nec sumtus nec animus deest. Rariorem vero phasianum esse in Silesia, & Principum cura ibidem nutriri refert *Schwenckfeld*. Nec *Gesnerus*, quanta cum diligentia patrios montes perquisiverit, phasianos in Helvetia sese reperiisse testatur. Nec *Linnaeus* phasiani mentionem iniicit in *Faunis Suecicis*, quippe quem apud Suecos incognitum esse judicamus. Quamvis enim, teste *Olao Magno*, phasiani, seu galli silvestres, multos per menses, sub nive tecti, hyeme, delitescant; haudquaquam de phasiano nostro dicendi animus est auctori, sed de gallo silvestri, Gallis: *Coq de Bruyere*, dicto; hic enim & præsertim minor, in omni Septemtrionis regione frequentissimus, & mas foemellæ inferior est pulchritudine. Hujus insuper gallorum silvestrium speciei plures, magnus quondam ille Supremus Castrorum Exercitusque Præfectus, Comes de Saxonia, ex Suecia accerferi, ac Camboriti, inter aves exteras, sua cura nutritas, reponi jusserat.

Fatum vero dicere liceat phasianum, facilis enim, & in primis vespertino tempore ac crepusculo matutino, (tunc enim arbusta egreditur) vel laqueis, vel casso capitur. Tecto enim capite, totum corpus obtegisse putat, sapius etiam vana admiratione se ipsum contemplatur; incuriosus igitur sapius se captum vidit, antequam fugæ locus fuerit. Pluviam minante cælo, quo delitescere possit, locum quærit. Multo cum strepitu & lentus fertur volando; hinc facillime etiam venatorum insidiis decipitur. Annorum, quos vivit tractu, gallinas domesticas exæquat. Medio circiter Martio, nidum in vepretis ac dumetis densissimis, humi, ex foliis vel stramine, vel herbis aridis construit. Foemella ovorum fecunditate, vix perdice inferior est; & mirum videtur nobis, quod *Cel. Zinnani* eam non nisi 3. ad 5. ova simul, Majo exeunte, ponere doceat. Quum vero, ubi de multiplicatione phasianorum student, foemellam incubando inconstantem esse observaverint, ova eorum gallinis domesticis supponere solent. Tringinta dierum incubatione opus est; pullique vix ovum egressi, perdicum more, matrem sequuntur, ovisque formicarum, locustarum, similium insectorum vivunt. Pulicibus insuper aliufve generis insectis, obnoxii phasiani, avium more, si caveis detenti libertate sese in pulvere obvolvendo careant,

careant, facile pereunt. Nec tanta sunt salacitate, ut galli gallinacei, attamen coitus tempore, multos saepe mares, unius foemellæ ergo, ad necem usque præliantes vidimus. Gulæ & voracitatis vitio jure phasianum insimulabis; quidquod si plures uno circuitu detineantur, ægrum sive infirmum ex illis unum, reliqui ictibus rostri conficiunt, postea devorant. Hinc faciles fidem adhibemus istis, quæ ex venatore quondam audivimus; qui quum inter venandum, hyemis tempore & terra multa nive oblecta, cadaveri cuidam & cornices, & alias aves, sibi insolitas inhærere vidisset: sclopeto exploso totidem phasianos, quot cornices sese enecasse reperit. Dantur & phasiani candidissimi; rariores attamen, ac vix nisi in Regum aviariis reperiuntur.

Græci dicunt: *Phasianos*, Itali: *Fagiano*, Germani: *Fasan*, *Fasian*, Belgæ: *Fasaed*, Angli: *Pheasant*. Nomine fere per totam Europam eodem. Foemellam Galli nuncupant: *Faisande*, *Faisanne*, *Faise*; phasianum junio-rem: *Faisandeau*, *Faisanneau*, *Faiseau*.

Phasianus autem oleo & sale volatili multo abundans, quum vix parem habeat inter aves, saporis præstantia, primatum mensas frequens exornare solet. Sit junior, & carne multa, tenera, ac pingui instructus. Avium enim caro & multum optimumque succum, & alimentum permanens præbet ac solidum, nec non concoctu facillimum. Hinc & tabe correptis, & salutem ex morbo recipientibus, & omnibus, quacumque sint ætate vel corporis constitutione, convenit. Nimium tamen & immoderatum ut omnium sic & phasiani usum, noxium pronuntiamus, nec tamen raritatis suæ ergo, facile quamvis in illum delapsurum fore censemus. Ova phasiani sunt præstantissima.

Phasianum pro cibo, Epilepsia & convulsionibus infestatis, commendant. Fel ejus ad exacuendam oculorum aciem, & profligandas corneæ maculas; & adeps externe adplicatus nervos corroborandi, rheumaticos dolores leniendi, & tumores resolvendi virtute gaudet.

P I C A.

Pica. Offic. Schrod. 323. Dal. Pharm. 424. Lemer. 683. Belon. *des Ois.* 291. Schvenckf. *aviar. files.* 333. Merr. Pinn. 172. Charlet. Exer. 75. *Pica varia caudata*. Gesn. *de avib.* 628. Aldrov. *Ornith.* 1. 784. Jonst. *de avib.* 27. Willughb. *Ornith.* 87. Raii Syn. *Method. aviar.* 41. Albin. *Ornith.* 15. *Corvus cauda cunei-formi*. Linn. Faun. Suec. 76. *Pica Rusticorum vulgaris*. Klein. 60. *Pica varia longa cauda insignis*. Quorumd.

Pondere suo pica uncias 8. ad 9. explet; & ab apice rostri ad extremitatem pedum $12\frac{1}{2}$. ad extremitatem caudæ, 18. digitis longa; rostrum nigrum, durum, crassum & $1\frac{1}{2}$. digiti longum ostendit. Maxilla superior recurvata est, cuspidata atque prominens; lingua nigrida, bifida, & graculi linguæ similis; latera crenæ palati pilis obsita; nares rotundæ, fetisque reflexis constipatæ; iris oculorum coloris nucei debilioris; membranæ nictitantes, ac flavida macula notatæ. Niger est color capitis, colli, gutturis, dorfi, uropygii atque abdominis; pars vero dorfi inferior prope uropygium, cinereo notatur colore. Pectus, latera, & quæ primam alæ articulationem obtegunt pennæ, album ostendunt. Alæ picis sunt exiguæ, si cor-

poris molem respicias. Barbæ exteriores caudæ & rectricium alarum pulcherrimo viridi-cœruleo-purpureo colore variegatæ sunt. Pennarum 20. numerabis in omni ala, illarumque prima dimidio brevior est quam secunda, secunda brevior est quam tertia, & hæc quam quarta; longissimæ sunt quarta cum quinta. Undecim primæ autem in medio, & interiore caulis latere candidæ, candor tamen iste latior est in exterioribus, quam in interioribus, & sensim decrescendo procurrit, usque dum in pennarum decima desinat in macula quadam majuscula. Caudam componunt 12. pennæ, structuræ prorsus singularis, duæ enim mediæ omnium sunt longissimæ, & 9. fere digitos longitudine pertingunt; has quæ excipiunt, integro digito sunt breviores; sic omnes exteriores sunt interioribus breviores, eadem proportionis ratione servata. Pennarum caudæ mediæ binæ sive longissimæ, infra virides, deinde in purpureum vergentes, & in apicibus cœruleæ sunt. Pedes & ungulæ nigri. Ultimus digiti exterioris articulus medio digito junctus. Intestinorum longitudo 24. digitis, & appendix 1½. digitis absolvitur. Adest fellis vesicula una. Lien oblongus detegitur. Stomachus tandem musculis haud adeo fortibus instructus; & ingluvies conspicitur.

Excipe caudæ candorem & longitudinem, monedulæ proprium, & magnam quoad reliqua similitudinem, inter picam & illam obviam esse videbis. Satis accurate verba proferre addiscit pica; imo alias quondam voces & loquendi formulas adeo exacte pronuntiantes, ut hominem exaudire credidissemus, nisi vidissemus avem. Nidum in arboribus artificiose exstruit, supra & infra dumis spinisque constipat, & foraminulum, quo exeat ac intrare valeat, relinquit. Quem si exacte descriptum cupias, *Aldrovandum* adeas, etenim apud nos, in Anglia scilicet, frequentissimi sunt, adeoque communes, ut fusiori eorum descriptioni merito supersedeamus. Quina ad fena, rarius plura ova, eaque pallidiora corvinis atque minoribus, maculis vero punctisque frequentioribus confita ponit. Iisdem alimentis, quibus cornix nutritur, & paros aliasque aviculas, si captare valet, avidissime devorat. Imo merlos a pica captos ac dilaniatos vidimus. Rarissimæ quidem, at passim reperiuntur picæ albidæ, nos rubicundas seu ferrugineas in Aviaro Regio vidimus. Hæc *Villoughby*.

Picam, ait *Belonius*, ubicumque fuerit, ventre candidissimo, angulis alarum albis, reliquo autem corpore toto, dorso scilicet, capite, collo, pectore, cruribus, cauda & alis nigerrimis, totidem notis sibi propriis ab omnibus distinguere valebis. Cornicem pica refert corporis, rostri, crurum, pedum, oculorumque similitudine; & quodam candore saltem ab illa differt, etenim cornix omni prorsus albedine destituitur. Ab omni tempore picas hominum voces imitari edoctas esse ex *Plinio* patet. Capitis pennas quotannis deponendo calvitium induit pica, & quidem Augusto, mense, si *Gesnero* fides est ac *Aldrovando*. *Kleinus* autem Latinum *Picæ* nomen, ex *Picta* deducit, quippe quæ vario pennarum colore quasi picta videtur, addit idem ille Vir *Cel.* corvorum generi, pedum, rostri & ungularum similitudine multum accedit; nec immerito ad corvorum genus picam refert *Cel. Linnæus*; nec tamen cum cornicibus confundi debent picæ, his enim cauda longa & alæ breves; at corvis plerumque ac cornicibus alæ sunt longiores. Garrulitatis desiderio pica a natura donata, quascumque

que audiverit vel hominum, vel animalium voces imitando exprimere studet, & caveæ inclusa frequentior garrere solet. Pabuli satietate expleta, quæ remanserint, venturæ necessitati servat; vasa argentea furatur; carni inhiat, cuniculis & leporibus junioribus insidiatur; avium ova & in primis merulæ aufert, quippe quæ nidum negligentius obtegendo, ova sua furto exponit. Ubivis, imo & in Suecia frequens, nec Lapponiam, teste *Linnaeo*, inhabitare solet. Summa solet esse lascivitatis, præcocior ovapponit, & Februario, mense, jam coire incipit. Nidum suum omnium oculis expositum & magnum, eminus detegere valebis. Imo deficientibus arboribus proceris, trunco arboris cæcæ illum superstruere solet; plerumque tamen arborum in cacuminibus accessu difficillimis componit. Cornices, si quæ nido suo accesserint, adgreditur, profligat, & ne revertantur, quam longissime fieri potest, insequitur; nec avem rapacem extimescit. Quod si statim ex quo ova posuerit, eadem furripias, denuo alia ponet atque excludet; alias autem semel tantum in anno & ova & pullos producit. Sunt, qui duplicem nidum a pica extrui volunt, eamque detecto ab hostibus altero, in alterum sua ova conferre; imo picas juniores, decrepiti parentis curam gerere perhibuerunt, his tamen experientia refragatur. Difficilior masculus a fœmella, nec nisi vel pluribus vel paucioribus plumarum undis dignoscitur. Sunt enim, qui picam juniorem marem, lingua sua nigra a fœmella distingui posse dicunt. Fallax est criterium; huic enim confusus quidam quem novimus Ornithologum, picam marem sibi esse credebat, quam proximo vere ova ponere expertus est. Pica candidissima, corvi seu merulæ candidorum instar, ab omni tempore, inter rarissima naturæ portenta habita est. *Vormius* tamen candidissimam picam videndi copiam sibi fuisse testatur, & anni sunt, quum nosmetipsi picam candidam, unica tamen penna nigra in alarum alterutra notatam conspeximus. Saltando pica incedit, & continuo motu caudam agit, quæcumque rostro obvenerint, comedit, imo hyemis tempore vel porcorum pabulum in præsepibus delibat, nec porci dorso insidentem picam arcere curant.

Franciscus Paullini D. est, qui sua observatione, testibus *Ephem. Germ. Dec. II. Anni 4. Append. pag. 210.* recenset: picam quamdam fœmellam, optima salute vigentem cujusvis mensis novilunio per biduum triduumve, copiosissimum sanguinem alvo emisisse; nec non in aliis quadrupedibus, ut: scrofa & ove ejusmodi secretiones menstruas sese observasse; imo, teste alio quodam Societatis Curiosorum Naturæ Sodali, pavonem, decrefcente mensis cujusvis luna, cumulum glareosum, granulis arenæ cum cibo deglutitæ plenum ejecisse, quæ suo tempore sollers ac provida natura eiici curat.

Græcis pica audit: *Kitta*, seu *Kissa*; Italis: *Gazza* seu: *Putta*; Hispanis: *Pigazza*; Germanis: *Alster*, *Aglaster*; Anglis: *Magpie* *Pianet*, Suecis: *Skata*. Gallis autem *Pie* dicitur, varia insuper nomina gerit, pro varietate regionum: sic in Picardia, Aquitania & Burgundia dicitur: *Agace*, seu *Agasse*, in tractu Pictavio, Petricorio & Engolismensi: *Ajace*, in Brittania: *Agace*. *Petrus Borellus* vocem Gallicam: *Agacier*, vel *Agacer*, rixari seu infestare, nomini *Agache* seu *Agace* originem dedisse censet, ob garrulitatem picæ, & gulam qua fertur in cadavera. *Menagius* idem ex: *Acacier*, *Agasser*, *Agaser*, irritare, deducit, quia picæ pro iracundis atque cholericis habentur. *Samuel Bochart* ex Arabico: *Azaggo*, quod picam denotat: *Hue-*

tius autem: *Agasse* olim pro *Agathe* in usu fuisse docet ut: *Macieu*, pro: *Matibieu*, *Macè* pro *Matibias*. Jam ut graculum: *Richard*, asinum: *Henry*, *Martin*, *Baudet*, sturnum: *Sansonnet*, animalia scilicet hominum nominibus adpellavere: sic & picæ: *Agathe*, seu *Margot* nomen tribuere. Quidni potius ex clamore, quem incognito quodam animale perspecto cornices extollere solent, quidni? inquam, ex illo, similitudinis ergo, *Agasse* nomen derivetur, & Etymologia aliunde accersita relinquatur? Solonienses picam cineream: *Colouasse*, vel *Malouasse*; picam communem vero: *Ouasse* adpellant. Teste *Cotgravio* pica &: *Dame*, *Faquette*, *Fagnette*, dicitur.

Multo sale volatili & oleo abundans pica, carnem adeo duram ac coriaceam exhibet, ut nullibi fere alimento hominum veniat. Juscula tantum ex illa elicere solent, quæ optimo succo abundant, & multum alimenti suppeditant. Rustica plebs picas juniores nido exemptos: *Piats* seu: *Piots* dicit, ac inter delicias suas referre solet.

Ars Medica tandem picam pro Epilepsia, mania, & melancholia hypochondriaca commendat. Officinæ igitur aquam picarum compositam exhibent, cujus ℥j. ad ℥ij. contra morbos recensitos commendantur. Calcinatus picæ cinis, aqua cumini mixtus & oculo instillatus, optimo collyrio venit contra infirmitates oculorum. Alii autem picam vel assatam, vel elixam, in substantia accipiendam esse suadent, pro impotentia virorum, a maleficio seu ligula proficiscente. Nos quidem de virtute, quam jactant, dubitamus. Innoxium vero medium est, & facillima opera instituitur; periculum ergo facias, si libet.

Cæterum pica constituit basin aquæ picarum compositæ, in Pharmacopœia Lemeryana, Batefiana, aliisque obviæ.

P I C U S.

Picorum, Gallis &: *Grimpereaux*, sive aves repentines dictorum, septem ad octo species varias, Galliam inhabitare novimus; quo pertinet: 1. picus magnus niger, 2. picus Martius, de quo nunc nobis agendum, 3. picus, picæ instar, albo nigroque variegatus, sive major sit, sive minor, & Gallis: *Epeische*, audiens, 4. Picus, Gallis *Torcol* dictus, qui autumno multam pinguedinem induit, & saporis præstantia Ortolanum imitatur, 5. picus murorum, a *Belonio*: *Eschelette* nuncupatus, 6. picus macerarius, seu apud Gallos: *Torchepot*, qui in nidi sui ingressu, muraria arte maceriem construit, 7. picus adrepens, Gallice: *Grimpereau*, *Grimperet*, omnium minimus.

Picus. Offic. *Picus Martis*. Lemer. 684. *Picus Martius major*. Belon. des Ois. 299. *Picus viridis*, Gesn. de avib. 710. Schyenckf. av. fles. 338. Jonst. de avib. 79. Villughb. Ornith. 93. Raii Syn. Meth. aviar. 42. Alb. Ornith. 18. *Picus viridis nostras*. Aldrov. Ornith. 1. 34. *Picus viridis*, vertice coccineo. Linn. Faun. Suec. 80. *Picus arborarius*; sive arborum excavator; *Picus medius seu graminis*. Quorumd.

Pico Martis, mari, septem fere uncias, pondere tribuunt; & ab apice rostri ad extremitatem pedum, 12. digitorum, ad finem caudæ 13½. digitorum longitudinem; alarum vero extensarum latitudo est 21½. digitorum. Rostrum ejus nigrum, durum, crassum, triangulare ac molle in apice ac-

a cuspide usque ad angulos oris 2. fere digitis longum est. Pupillæ oculorum nigridæ duplici iride cinguntur, altera scilicet interiore rubro-ferruginea, altera autem, exteriori alba. Lingua ejus magnæ extensionis capax, ossea, dura, & in cuspide acuminata, infecta, tamquam jaculo transfigere valet. Capitis color coccineus nigris maculis intermixtus est. Oculi nigredine quadam circumdati. In utriusque maxillæ parte inferiore alia adhuc macula coccinea adest. Guttur, pectus & venter virescentem præbent colorem. Dorsum, collum & plumæ minores, alas obtegentes viridem. Uropygium flavescentem, seu, ut recte *Aldrovandus*, stramineum. Regionem caudæ subjacentem lineis fulvis transversalibus decussatam videbis. Rectricium 19. in quavis ala numerabis, quarum prima brevissima est. Barbæ exteriores plumarum corpori proximarum virides; interiores ferrugineæ, & maculis albis semicircularibus conspersæ sunt. Eundem præ se ferunt colorem barbæ interiores plumarum anteriorum, exteriores autem ferrugineum & maculis albis confitum. Plumæ tandem infra radices pennarum alæ majorum obtegentes, albido-virescentes & lineis ferrugineis transversalibus decussatæ sunt. Cauda $4\frac{1}{2}$. digitis longa, 10. ex pennis durioribus, intus reflexis, & ut videtur bifidis (caule scilicet citius quam in apice barbarum definente) componitur. Binarum medium occupantium, & trium immediate ultimas lateris utriusque excipientium, harum apices, inquam, nigridi sunt, cæterum maculis transversalibus ornantur, iisque supra viridibus, infra autem albescentibus. Binæ extremæ reliquis sunt molliores, earumque major maculis virescentibus & nigris variegata est; minor vero apicem virescentem, partem reliquam nigriorem exhibet. Pedes albido-virescentes, nonnunquam & plumbei; ungulæ ferrugineæ; duo digiti anteriores totidemque posteriores; ultimi anteriorum articuli coherentes; amplissima fells vesicula; testiculorum dexter rotundus, sinister oblongus & fere sphaericus; quod ne quis casu ita obvenire credat, ter repetita observatione in tribus picis diversis eadem nos observasse notamus.

Nec appendicum cæcalium vestigium, quarum loco intestinum ibi dilatatum conspicitur; ingluviem vero formicis, ovisque formicarum plenam vidimus. Picus Martis enim erucis & vermibus ligni vescitur, & sæpius ac pici reliqui, alimenta quæsitum, in terram descendit. Lingua ejus rotunda in spinam osseam, acutam, & utrinque dentatam terminatur, quam extendendo, ceu jaculo, infecta quibus nutritur, perforat. Eiiciendæ autem linguæ, duæ cartilaginee rotundæ inserviunt, quæque spinæ de qua diximus cohærendo, mediam linguam transeunt, tum ad aures procurrunt, tandem posticus, verticem versus reflexæ, parallelæ juxta futuram sagittalem procurrunt, exinde paullulum in partem dextram deflectendo super orbitam oculi dextri pergunt, denique autem foraminulum quoddam in parte dextra rostri obvium ingrediuntur, & ibidem desinunt; ex hoc autem foraminulo, nisi vi adhibita, protrahi possunt. Mediante insuper quodam ligamento vertici adhærent. Has vero cartilagineas undecumque circumdatas tenet caro vel musculosa substantia linguæ, vaginæ instar, atque ut lumbricus, jam extenditur, jam corripitur. Sic & pars cartilaginis illa, quæ ab extrema capitis parte usque ad apicem rostri extenditur, simili quodam carne, extensionis & contractionis capaci tegitur; hæc tamen caro

neutiquam, ut illa, quæ linguæ pro vagina venit, connectitur, sed cuius cartilagini sua est vagina musculosa. In interiore autem parte cartilaginum, ubi cubitum constituunt, hoc est: in radice linguæ, versus posteriorem capitis partem, ibi musculus latus atque tenuis pro contrahendis & exserendis cartilaginibus istis inserviens, exsurgit atque procurrit. Quoniam artificio autem linguæ picæ operatio perficiatur, id aliorum studio disquirendum relinquimus. *Aldrovandum* adeas L. B., & musculos ac cartilagine movendæ pici linguæ inservientes delineatos videbis, & descriptos reperies. Apices vero caulium pennarum quibus cauda componitur, usu consumti videntur atque detriti, quippe quibus avis reptando innititur. Semel tantum in anno, 5. ad 6. ova ponere, totidemque pullos educare solet picus.

En tibi L. B. *Observationes circa motum linguæ in pico*, Auctore Celeber. *Mery*, quales in *Actis Reg. Scient. Acad. Anni 1709. pag. 85.* leguntur:

Ut autem plenam & adcuratiorem, quam in scriptis Cell. Virorum *Borelliet & Perrault* legimus, descriptionem motuum linguæ in pico exhibeamus, partes a quibus motus isti pendent, fusiori tractatione percontemur: Quantumvis igitur maximæ extensionis esse videatur pici lingua: omnis tamen ejus longitudo tribus ad quatuor lineis absolvitur. Etenim ut corpus ossis hyoidis ipsum, ut apophyses ejus linguam esse dicamus, vetant anatomes adcuratioris regulæ.

Constat igitur pici lingua officulo quodam brevissimo, & zona quadam crustacea obtecto. Figuræ est pyramidalis, & basis ejus cum anteriore ossis hyoidis extremitate nectitur. Os hyoides, styli figuram, 2. fere digitorum longitudinem, & $\frac{1}{2}$. lineæ crassitiem habet, ac ex posteriore sua extremitate duobus ramis ossis, seipso exilioribus, articulatione nectitur. Omnis ramus duplici filamento osseo, longitudinis inæqualis, ac extremitatibus alternis inter se cohærentibus, componitur. Filamentum anterius non nisi $1\frac{1}{2}$. digitis longum; posterius autem, & Cel. Viro *Borelli* incognitum, ac cum cartilagine exigua, in quam terminatur, 5. fere digitis longum est; ex quo patet omnem ramusculum corpora: ossis hyoidis & linguæ simul sumpta, triplo superare longitudine. Hi igitur ramusculi ad os hyoides spectantes, & curvati arcum constituunt, cujus medium colli latera occupat; extremitates illorum anteriores rostrum subeunt, & in ipso ossis hyoidis corpore terminantur; extremitates vero posteriores caput superando procurrunt, & naso ex latere dextro inferuntur. Nec tamen articulatione mediante junguntur; qui quidem articulationis defectus, multum facit (ut infra docebimus) ad exsertionem linguæ. Os hyoides una cum filamento ramusculorum anteriore, vaginæ cuidam includuntur, quam membrana inferioris maxillæ partem internam obducens, constituit. Vaginæ extremitas orificio zonæ crustacæ, supra descriptæ jungitur; & lingua dum os egreditur, producit, lingua autem recedente, corripitur. Zona crustacea, officulum linguæ obtegens, supra convexa, infra depressa, intus concava, & senis utrinque aculeis, tenuissimis, diaphanis, inflexilibus, & extremitate parum reflexa versus guttur instructis, munita est. Hanc igitur zonam aculeis munitam, illud instrumentum esse censeo, quo prædam suam arripit picus; cui quo expeditior sit usus, zonam illam materia quadam viscida, & mediantibus duobus canalibus excretoriis, (qui ex binis

gland-

glandulis pyramidalibus, in lateribus internis partis hujusce sitis proficiuntur) extremitati inferioris rostri adportata, hac inquam, materia, zonam semper irrigatam atque madentem videbis.

Ut autem instrumenti hujus usum instituere queat picus, varios a natura acceptos habet musculos, quorum alii, ad ramos ossis hyoidis pertinentes, exferendæ, alii autem, ad vaginam supra descriptam referendi, recipiendæ linguæ inserviunt. Nec non linguæ sui sunt musculi, alii quibus elevatur, alii quibus deprimitur, alii quibus huc vel illuc transfertur. Cuivis ramo ossis hyoidis unus saltem musculus est, illeque solus totam exæquat longitudinem linguæ, ossis hyoidis, & unius brachiorum, simul sumtorum. Hi duo musculi igitur ex parte anteriore laterali interna maxillæ inferioris exorti, procedendo filamenta ramorum ossis hyoidis posteriora involvunt, tum procurrendo caput superant, tandem vero extremitatibus suis inferuntur; exinde duo ligamenta oriuntur, quæ postea coetundo tertium constituunt, ejusque auxilio nasi membranæ nectuntur. Brevissima sunt ligamenta prædicta, sed facillima opera & vel levissima distractione elongantur. Jam, quum musculorum contractio facile vincat ligamentorum resistantiam: patet, quod, dum corripuntur, extremitates posteriores ramorum ossis hyoidis, ex naso protrahant, easque ex latere, quo oriuntur, retrahendo, ipsum os hyoides, & filis anteriores ramusculorum ejus, & linguam ipsam ex ore protrudant. Nec tamen protrudendis hisce sufficerent, (licet rami ossis hyoidis natura sua facillimi flectantur) si rami isti, vel per articulationem, vel qualibet alia ratione, ossi nasi firmiter cohærerent; quamvis enim arcus isti, in quos flectuntur ramusculi, extensionis sint capaces, numquam tamen adeo possent prolongari, ut linguam ad longitudinem 4. digitorum protrudere possent ex ore; jam vero eo faciliores agunt, quum motu libero gaudeant in musculis, quibus tamquam canali includuntur, nec cum osse nasi, articulatione jungantur.

Pro recipienda pici lingua duo dati sunt musculi vaginæ, quam supra descripsimus. Quorum quum correptio & extensio æqualis sit, necesse, correptioni & productioni musculorum contrariorum; (lingua enim & rostrum egrediendo, & intrando idem spatium percurrit;) pro situ suo obtinent spatium, laryngis parti inferiori & extremitati rostri intermedium, sic enim uterque bis circumvolvitur parti superiori Tracheæ-Arteriæ, ex qua originem trahunt musculi prædicti; tum post laryngem decussantur, tandem vero interiorem vaginæ partem obtegentes coeunt. Jam cum extremitas vaginæ, orificio zonæ crustaceæ, quam linguæ esse diximus, juncta sit: accidit, ut musculi contracti vaginam retrahant, & in se ipsam recipiant, sicque linguam in rostrum conducendo, extremitates posteriores ramorum ossis hyoidis naso intrudant. Ramis hisce eo conducendis & tria ligamenta elaterio instructa (de quibus supra) inserviunt; hæc enim, postquam ope musculorum linguam rostro extrudentium allongata fuerint, musculis hisce relaxatis, statim corripuntur, & ramos ossis hyoidis (his enim adherent) in nasum conducunt. Cranio quædam excavatio superjacet, quæ cum pelle canaliculum efformat, & huic pars posterior ramorum ossis hyoidis cum musculis suis includitur, ita ut omnibus partibus hisce liber sit undecumque motus. Hoc igitur canali, rami ossis hyoidis impediuntur.

diuntur, quo minus, antèrius protracti, vel huc vel illuc nimium vagentur; imò, ut faciles in locum redeant, si posticus retracti fuerint, adiguntur.

Omnia itaque, quæ de longitudine linguæ, ossis hyoidis ipsius, & ramorum ejus simul sumtorum; quæ de origine & insertione determinata musculorum, linguam pici jam protrudentium, jam recipientium, dicta sunt, omnia hæc, inquam, si vel fugitivo mentis oculo contemplatus fueris; *Borellium* errasse videbis. Etenim quum lingua pici una cum osse hyoide & ramusculis 8. digitorum longitudinem expleant: 4. autem digiti hujus longitudinis, exserta lingua, egrediantur; & lingua egrediens idem, quod rediens, spatium emetiatur: facile patet, omnes musculos motui illius inservientes, 4. digitorum extensionis atque contractionis esse capaces, imò 4. digitorum longitudinem superare, quippe qui, dum contrahuntur, omnem suam longitudinem amittere nequeunt. Jam, quum *Borellius* motui linguæ destinatos esse ait quatuor musculos priores, binos scilicet in extremitate maxillæ inferioris, binos item in anteriore cranii parte exortos, omnes vero quatuor medio spatii 8. digitis longi insertos: sole clarius est, quod producendo huic effectui numquam sufficerent musculi, quorum singuli 4. digitorum longitudine ad summum absolverentur. Nec umquam Virum Cel. in hanc sententiam abiisse crederem: si observasset: musculos duos in rostro exortos, omnem & ossis hyoidis, & ramorum ejus extensionem percurrere. Erroris sui causam hanc esse censeo: quod musculorum quemvis in duas partes diviserit, nec cognoverit nisi fila anteriora ramorum ossis hyoidis, quorum in extremitate insertionem 4. musculorum priorum, quos descriptos dedit, constitutam esse voluit. Eorum vero, qui Tracheæ Arteriæ obvolvuntur, verum usum perspexit.

Gravius autem errat Cel. *Perrault*, qui nec ullam musculorum Tracheam-Arteriam circumdantium mentionem iniicit; attamen non nisi horum auxilio, ore detenta lingua movetur. Tum ex larynge profectos esse censet 4. priores *Borellii* musculos, eorumque binos in posteriores ramusculorum ossis hyoidis extremitates ablegat; binos alios autem in extremitates eorum anteriores deferri, & linguæ jam exserendæ, jam retrahendæ inservire docet. Sane gravius errat, siquidem nullus a larynge profectus musculus, ossis hyoidis musculis nequitur.

Omne tandem utriusque Viri Cell. studium in explicandis linguæ pici motibus, his saltem musculis absolvitur, quorum ope nunc os egreditur lingua, nunc recipitur. Hic pedem fixisse videntur, siquidem 4. musculos illos, qui ad elevandam & deprimendam, ex hac in illam partem vertendam vel rostro inhaerentem vel foras ejectam pici linguam faciunt, illos ne nominant quidem. Hi scilicet omnes ex parte anteriore ramusculorum ossis hyoidis, ex utrovis latere bini proficiscentes, tendine quadam longa gracilique terminantur singuli; & hæc 4. tendines os hyoides amplexæ, basi ossis linguæ minoris inseruntur. Omnibus itaque musculis agentibus recta detinetur lingua; eodem tempore si corripiantur musculi superiores, lingua adtollitur, si inferiores, deprimitur. Binis tandem musculis ejusdem lateris simul agentibus, in suam partem trahunt linguam. Jam quum omnibus ex musculis linguæ, motui ejus inservientibus, quatuor ultimo memorati saltem, nec alii, eidem ipsi inserantur: reliquos omnes

omnes haud proprie suos esse dicas, sed vaginae, & ramusculis ossis hyoidis proprios, cui, ut supra diximus, infertione junguntur. Ex quibus elicias, quod & motus linguae vel rostrum egredientis vel intrantis, his partibus tribuendi veniant, non autem linguae, quippe quae ingredi rostrum potest & egredi, nec tamen moveri.

En quae tradiderat Cel. *Mery*, intacta tibi, Anatomiae cultor!

Cæterum ex *Derhamio* edocemur; picum viridem artificiose comparato rostro gaudere, & ad perforandas arbores aptissimo, duro insuper, acuto, forti, & in apice quodam margine ornato, qui & roboris conciliandi, & sui exornandi gratia additus videtur. Lingua ejus singulari ratione constructa; & longitudo ejus eximia, cum ossibus & musculis; & pars ejus collo & capiti inclusa, qua quidem facilius cellulam suam se recipit & egreditur; & cuspis ejus acuta, infulae instar efficta; & materia viscida, qua indutam videbis ejus extremitatem; brevibus: omnia, diligentiori examine & admiratione digna sunt. Tanto autem instrumentorum adparatu ad perforanda, enecanda, & ex ligno eruenda insecta utitur. Opus erat pico, ait *Coyter*, ejusmodi lingua, qua vermiculos, insecta & formicas captare posset. Quum enim sagacitate sibi naturali arborem cariosam, perforatam, seu insectis plenam detexerit: eo statim se confert, & pedibus, calcaribusque fortissimis, imo caudae rectricibus crassissimis innixus, rostro suo acuto ac duriori arborem terebrat; tunc rostrum foramini intrudit, & quantum potest clamorem extollit, insecta passim delitescencia excitat, hinc inde ut discurrant, adigit, tum vero linguam exserit aculeis illius insecta transfigit, & suo rostro, pro cibo, admovet.

Quae omnia in *Spectaculo Naturae* a Cel. *Pluche*, egregia, ut solet, dicendi elegantia exposita leges. Cæterum quae diximus omnia, quibusvis picis communia esse docet *Aldrovandus*. Pici foemella colorum similitudine masculo accedit, omnes tamen debiliores exhibet. Testibus Cell. *Frischius* & *Kleinio*, masculus tantum verticem rubrum gerit; errat uterque, etenim pulli omnes vel nido detenti, verticem purpureum ostendunt. Addit *Frischius*: picum hyeme alvearia, & praesertim straminea devastari; & saltando volare, vel ab initio volatus efferri sublimius, quam pergere constituit, deinde autem parum descendere, iterum attolli, rursus deprimi, sicque arcus volando describere, nihilo tamen minus vastissimas planities volando emetiri. Lingua autem longior, sic pergit *Frischius*, pico haud adeo data est, ut eo altius arbores penetrare, & vermes ligni eisdem dententos protrahere possit. Scarabæus lignarius enim ovum suum in arbore vetustiori, vel cortice ejus putrefacto deponit, ex ovo illo vermis nascitur pedibus carens, & usque dum sibi debitum incrementum ceperit, lignum rodens. Instante autem vermis in scarabæum metamorphosi, corticem versus rodendo locum sibi sufficientem construit, ex hoc per foramen, foris conspiciendum egreditur; quid ergo ibi picus quærat? Pro accipiendo autem cibo ex agmine formicarum venit lingua prælonga. Hoc enim quibusdam rostri ictibus percutiendo, formicas eodem latentes ad motum concitat, linguam, quam longissime fieri potest, agmini immergit, ac formicis adhaerentibus obitam recipit, & eo usque eam exserendo & recipiendo pergit, quo formicarum quantitate famem expleverit. Vir Cel. *Deslandes* in *tentamine de re maritima antiquorum*: paucissimae sunt arbores,

res, ait, ligni perticam 40. pedum longam absque nodis, & sine foraminibus a pico terebratis, suppeditantes, qualis pro construendo remo esse deberet; & in margine addit: lingua sua picus, ceu terebra, crassissimas perforat arbores; linguam suam satis longe rostro exserit; illa autem ossi hyoidi cohæret, estque laminæ osseæ species, spiræ seu elaterii instar in horologio circumvolutæ, quæ dum evoluta fuerit, linguam satis longe extensam videbis. Pace tamen Viri alias in Physicis magni dictum sit; nos linguam pici arbores perforare posse dubitamus, rostrum potius easdem terebrare censemus, siquidem in silvis commorantes, rostri ictus, quibus & ilices vetustiores, aliasque mollioris ligni arbores, ut: fagos, populos, petit, audivimus. Sic enim temporis tractu foramina adeo rotunda perficit, ut vel ex circino Geometræ adcuratiora proficisci nequirent. Hæc igitur foramina in suos usus & nidos convertunt, pici, *Torchepots* dicti, & sturni, imo & vespertiliones; etenim nosmetipsi sæpius picorum nidos perscrutando, vespertilionibus plenos eosdem deteximus. Dicunt ruricolæ, quod picus quum nonnullis tantum rostri ictibus alterum arboris latus percussit, statim alteri adcurrat, num foramen arborem transierit, investigaturus. Errat, etenim colligendorum insectorum ergo, quæ rostri ictibus excitaverit, arborem undecumque circumire solet. Jure laudandus est *Plinius*, dum communem illam sententiam reiicit, qua docebant: picum ope cujusdam herbæ, quæcumque suo nido iniecta fuerint, magno cum fragore explodere. Hanc herbam alii volunt esse Lunariam majorem, alii Aethiopidem; quarum alicui si virtus illa inesset, maximo sane commodo cederet furibus, observante *Aldrovando*; hujus enim ope, faciles claustra quævis referare valerent. Ast experientia sæpius instituta renuit dictis. Falso itidem antipathiam turturem & picum intercedere, hunc vero, illo fortiorrem, adversarium enecare dicunt. Perperam quoque *Plinius* picum & corvum nocturna prælia inire docet, & alterum alterius ova confringere docet. Lento plerumque volatu fertur picus, ast sese insequentem accipitrem vel fringillarium si conspexerit, altissimos inter clamores ruit volatu præcipiti. *Julius Scaliger* & *Albertus M.* picum hominum voces imitari posse scribunt; nos dubitamus, imo auctores illos picum cum pica, sinistre, permutasse putamus. Cæterum, ut plures picorum, sic nec picus Martius nidum construit, sed ova sua in crenam arborum recondit, ac ligno carioso superponit. *Zinanni* nullam prorsus sui mentionem facit. Nec tamen tot ova ponere solet, quot Auctores varii & *Frischius* censent, sed 5. ad 6. magnitudinis mediocris, oblonga, & fere candidissima, picorum omnium more, excludit.

Gallica ejus nomina sunt: *Pic-verd*, *Pivert*, *Piverd*, & *Belonio*: *Pic-verd-jaune*; Græcum: *Colios*, *Druocolaptes*, *Dendrocolaptes*; Italicum & Hispanicum: *Pico verde*, Germanicum, *Grün-Specht*. Anglicum: *Wood-Pecker*. Suevicum: *Wiedkmarr*, *Groenspik*. Gallis autem & adhuc aliis nominibus venit, dicitur enim: *Pic-mart*, *Pimard*, *Pieumart*, id est: *Pic de Mars*, Marti enim sacer erat, Pictavienses illum dicunt: *Picosseau*, Petricorii: *Picotat*, Morini: *Becquebo*, Normanni: *Espec* vel *Pleu-pleu*. *Raius* picum Martis pro *Avi Pluvie* antiquiorum habet, & eandem ob causam apud Anglosum: *Rain fowl* nuncupari censet, quippe quem solito frequentius acriusque clamentem, pluvie imminentis nuntium credunt. Quapropter etiam a *Se-*
calau-

calaanis & Aurelianensibus plerumque : *Molitorum caussidicus* adpellatur :

Vix usui nostratium venit caro pici, quippe quæ dura est, coriacea & fibrarum plena. Bononiæ tamen, picum pinguiorem tota fere hyeme & autumnò publice venum expositum esse, testatur *Aldrovandus*.

Ossa pici arefacta & pulverisata, diuretica virtute gaudere dicuntur, ac contra calculum & saburram commendari solent. Horum scilicet ʒß. ad ʒj. pro dosi, cum cyathò vini candidi, per aliquot dies continuato usu recipi jubet ars Medica. Nec non contra morbos oculorum facere dicitur picus; & sive in substantia pro cibo accipiatur, sive juscula ex eodem eliciantur, vel oculis adplicitis, vel denique sanguis ejus tepidus oculis instillatus, oculorum aciem exacuere censetur.

S T R U T H I O.

Struthio. Offic. Schrod. 323. Dal. Pharm. 424. Lemer. 842. Charl. Exer. 79. *Struthio Africus*, *Struthiocamelus*, *Struthecamelus*, *Struthius*. Belon. des Ois. 232. *Struthocamelus*. Gesn. de avib. 739. Jonst. de avib. 35. *Struthiocamelus*. Schvenckf. Aviar. Siles. 350. Aldrov. Ornith. 104. Raii Syn. Meth. Aviar. 36. *Struthio Maurus*, *Poenus*, *Lybicus*, seu *grandis*; *Struthius Arabicus*; *Afra avis*; *Avis Lybica* seu *Cervina*. Nonnulli.

Alatorum maximus, est Struthio, excepta tamen avi : *Casouar*, Gallis dicta, quæ longitudine seu altitudine corporis struthioni cedit, ast mole hunc fere adtingit. Collum erigens struthio binarum ulnarum altitudinem explet, imò teste *Plinio*, hominem equo insidentem superat, scilicet, si collum, quam longissime fieri potest, extendat. Caput struthionis est exiguum, compressum, & ut suo jure notat *Aldrovandus*, anserino simile. Rostrum ejus compressum, corporis respectu exiguum, triangulare, coloris cornei, in apice nigrum, & pellis ejus versus nares, in semicirculum definit. Oris fissura tanta est, ut anguli ipsis oculis recti subjaceant. Oculi magni iridem nuceo colore conspiciendam exhibent; caput & collum usque ad pectus omnibus fere plumis carent, ut & lumbi usque ad genua. Caput ac collum plumis quibusdam exiguis seu pilis rarioribus obteguntur. Regio subalaris & pedes omnibus prorsus plumis destituuntur. Pars colli inferior, ubi primæ pennæ, alba; alæ autem exiguæ, & parvitatibus ergo, haud ad volandum dati, sed extensione sua pro facilitando avis cursu destinati. Plumæ dorsi in masculo, nigerrimæ, in fœmella fulviores, præ molliæ suæ lanam æquiparant. Eundem colorem ostendunt & pennæ alarum, sed albidissimæ sunt in parte sua superiore. Cauda ejus complicata est ac constricta, nec distenta seu lata, ut in aliis avibus. Constat autem pennis, si masculum quæras, albidis, si fœmellam, fulvidis, & pro ornatu galearum sæpe venientibus. Collum & crura struthionis longissima, nec tamen calcare nec digito interiore munita sunt. Digitus exterior 5 $\frac{1}{4}$. alter vero 8. pollicum longus est. Pedis totius longitudo ab extremitate tali. digitis absolvitur. Digitorum longissimus 24. squamis magnis tigillatim dispositis tegitur; ungue insuper magno, forti & nigro munitur. Digitus exterior ungue caret. Omnes vero digiti, mediante membrana crassa ac forti, ad primam articulationem usque nectuntur. Solus autem ex avibus struthio duplici palpebra, hominis instar, instructus est, teste

Plinio, quantum veritatis autem adserto infit, aliis disquirendum relinquimus.

Devorat struthio, quæcumque obvenerint omnia, ut: corium, herbam, panem, pilos, reliqua; nec ferrum vel alia solida concoquit, sed integra eiicit per anum. Quem enim Bruxellis vidimus, ille plerumque pane pilis commixto, vivebat. Africam pro patria habet, ejusque deserta tanta struthionum copia oppleta esse novimus, ut e longinquo equitum catervam tibi videre videberis. Nec non America atque Arabia frequentissimos alit struthiones, genere diversos. Ova sua vel infantis caput, mole, exæquant, pondere 15. libras, & arena oblecta solis calore radiisque excluduntur. Etenim unanimi Physicorum omnium consensu constat: struthionem fecundam sua ova relinquere. Teste *Plinio* frequentissimo galearum & pileorum ornamento apud antiquos, veniebant plumæ struthionis, veniunt & hodie nostratibus. Imo quoddam flabellorum genus ex pennis struthionis componunt, quibus pro aura sibi afflanda utuntur matronæ Anglæ & Italiæ. Hæc *VVilloughby*.

Struthio, sic Cel. *Pluche*, avium maximarum unus, frequentior Africam, quam alias terras inhabitat. Capite suo elato ac procero, hominem equo infidentem nonnumquam excellit. Corpus habet & rostrum anati simile; collum cygno, ast longius; corpus denique camelo, dorsum scilicet elevatum seu gibbosum, & collum longissimum. Alis suis fortissimis brevibusque haud ad volandum, sed pro velis seu remis ad findendum aerem utitur; dum cursu rapidissimo fertur. Crura habet ardæ similia, & pedem tribus digitis innixum, ac ex cornu acuto, incessus facilius ergo, comparatum. Ova, magnitudine vel caput infantis æquiparantia, cortice insuper lævi, nitente, atque variegato circumdata, levissima obtegere solet arena, & solis calori, ad excludendum committere fertur. Qua quidem incuriæ in pullos fama male audit apud omnes. Ubicumque enim struthionis nomen pervenerit, ibi matrem filios negligentem cum struthione æquiparare solent. Peregrinantium alii autem illam excusatum perhibent: quod magnam vermiculorum copiam, pulli exclusi pro nutrimento, colligere, & ovis vicinam relinquere soleat; imo alii judicium singulare & discernendi facultatem in struthione sese observasse docent, quippe quæ ova fecunda tantum calefieri studet, sterilia autem pro nutrimento pullorum recte exclusorum conservat. Nos tamen omnia ista fabulas redolere censemus; imo, quam in aliis animalibus admiramur, providam in suos curam, frustra in struthione quærimus. Ova sua mater incauta arenæ committit, & periculo, ut ab aliis animalibus conculcentur. En, incuriæ documentum. Imo alio stultitiæ testimonio, quum venatorum persequutione pressus fuerit struthio, caput & in primis oculos, post truncum arboris abscondit, corpus omne venanti exhibet; ac dum nihil ipse videt, nec videri nec periculo sese expositum credit. Ferri frustula, ut aliæ aves calculos, deglutiunt struthiones, nec tamen ea concoquunt. Imo nec pro alimento ex ferro vel cupro recipiendo, sed ad comminuenda facilius nutrimenta stomacho detenta, ad moderandam activitatem caloris nimii, & ad aperienda, suo pondere, intestinorum orificia, ad detergendos conductus, frustula ferri vel cupri facere censemus. Quem igitur male apud nos audientem hucusque descripsimus struthionem, laudandi periculum faciamus, si fieri potest.

potest. Laudem ei comparant pennæ quibus ornatur, pulcherrimæ, latæ, longæ, nunc nigræ, nunc albæ, imo arte accedente, variis imbutæ coloribus. Has usibus nostris suppeditat. His lectorum fastigia exornantur. His umbracula foliorum Regum superbiunt. His pilei equitum cinguntur. His matronæ Anglæ pro flabellis utuntur. His tandem Actores fabularum Tragici, nescio quantam magnitudinem sibi conciliant; quantum enim dignitatis Heroum scenicorum, subtractis struthii pennis, abiret?

Et multa quidem veritatis consentanea adlatis Cel. *Pluche* verbis inesse fatemur: adtamen, quo nil supersit, quod possis desiderare L. B., entibi: *Descriptionem Anathomica 8. struthionum*, haustam ex *Actis Regiæ Scientiarum Academiæ ad Historiam Naturalem Animalium spectantibus*:

Octo struthionum omnium, examini nostro subjectorum, sic Acta loquuntur, eadem fere magnitudo erat. Quinque erant masculi, tres fœmellæ. Altitudo eorum, a vertice ad terram $7\frac{1}{2}$. pedibus, a dorso ad verticem 3. totidemque pedibus a ventre ad terram usque absolvebatur. Corpus ad initium caudæ a stomacho 3. pedum extensionem, cauda 1. pedis longitudinem profitebatur. Ala, absque plumis $1\frac{1}{2}$. extensa autem & una cum plumis 3. pedibus longa erat. Pennæ omnium quodammodo sibi similes, plurimorum scilicet nigræ & candidæ, reliquorum cinereæ. Suo jure *Julius Scaliger* increpat *Cardanum*, quod ille rubrum, viridem, cœruleumque colorem tribuat pennis struthionis, quem si gerunt, arti debent atque tinctori. Pennarum maximæ ex alarum ac caudæ extremitate egrediebantur. Et majores quidem plerumque albidæ, ast quæ subsequentem ordinem constituebant, nigræ erant. Aliæ autem minores, hæ quidem nigræ, illæ albidæ, ventrem obtegebant & dorsum. Latera vero & lumbi, cum inferiore alarum parte, pennis omnibus carebant. Colli pars inferior, usque ad dimidiam, pennis adhuc minoribus, aliis nigris, aliis albis induta erat, cinereis tamen in uno ex masculis, & una fœmella. Omnes autem plumæ ejusdem erant speciei; quod quidem proprium est struthioni & singulare; aliis enim avibus aliæ sunt molles & lanuginosæ, quibus teguntur, aliæ autem solidæ & duræ quibus ad volandum utuntur, rursus aliæ in principio lanuginosæ, ast solidiores versus extremitatem, crustæ seu squamæ instar effictæ, ut ita dispositæ, & aliæ aliis superjacendo, imo aliæ sua extremitate solidiore, aliarum in radice obvias plumas lanuginosas obtegendo, duplicatam quasi avis vestem, pro arcendo vento & aqua, componere possint. Hæc igitur omnia in struthii pennis observare non datur; hæ enim omnes molles tenuesque lanuginosarum instar, nec volatui; nec avi ab injuria quavis externa tuendæ sufficiunt. Aliud quoddam struthii alarum pennis proprium hoc est: quod quum avium reliquarum rectrices ex altero latere sint latiores, ex altero strictiores: caulis pennam mediam transeat in struthione. Quam ob causam Ægyptios olim pro designanda justitia, pennam struthionis pro hieroglyphico adhibuisse censeo. Hinc quoque in libro Jobi, ubi artificia naturæ miranda recensentur, structuram alarum struthii inter prima relatam legimus. Ibi enim differentia inter alas struthii & falconis atque ardeæ, sive avium pennis ad volandum, aviumque pennis volatui haud sufficientibus instructarum, Jobi considerationi a Deo ipso exponitur. Et summum sane artis opus ac admiratione dignissimum est pennarum volatui destinatarum fabrica; in qua

qua tria præsertim notanda veniunt, scilicet: textura filorum atque fibrarum, barbas, quibus constant plumæ, componentium; & totius plumæ figura; & cuius plumæ proprius motus.

Quæ & satis perspicui possint, pleniusque disquiri, omnis fere generis plumam duabus partibus constare scito: nempe caule seu tubulo, cuius cauda sensim decrescendo procurrat usque ad apicem plumæ; tum barbis, tubuli caudæ utrinque adhærentibus, & plumæ latitudinem conciliantibus. Fila autem, quibus barbæ componuntur, compressa, latitudinem planam sibi invicem obvertunt, ac inclinationem obliquam, caulis respectu, obtinent; ita ut magna cum facilitate alia alii adpropinquare valeat, alii in partem adversam difficiliore flecti possint, sicque majorem firmitatem pennæ concilient. Imo adhuc major firmitas pennæ accedit ex insertionis ratione, qua fila, quibus barbæ componuntur, sibi invicem inseruntur, nempe fibrarum multarum auxilio, ex utrovis latere filorum proficiscuntur, & inter se cohærentium. Fibrillæ enim istæ varia ratione incurvatae sunt atque aduncæ; sic quæ ex fili parte extremitatem plumæ respiciente egrediuntur, illæ longiores, flexiliores, & deorsum recurvatae sunt sive reflexæ; quæ autem ex fili parte initium plumæ respiciente proficiscuntur, illæ breviores sunt, duriores, & sursum reflexæ. Omnes etenim fibras elaterio instructas esse memento; hinc longiores, flexiliores, & deorsum deflexæ, reliquas fibras tangendo, (dum alterum filum impingit in alterum) sursum flectuntur; tum, quum satis ultra reliquas hæ fibræ longiores protrusæ fuerint, pars earum adunca cavitati incidit illi, quam pars adunca fibrarum reliquarum effingit. Obicem portæ, seu pessulum tibi cogites portæ adfixum; qui, dum protruditur, ab illa auricula excipitur, quæ postea inhæret, & huic insertus portam ipsam auriculæ nectit; eademque ratione filorum aliorum aliis nexorum opus procedere scito. Quæ quidem admiranda & Microscopii ope distinguenda plumarum constructio, explendo naturæ scopo adeo exacte respondet, ut si vel vi externe filum aliud ab alio fuerit separatum seu avulsum, facillimo tamen negotio iterum ei necti possit, atque conjungi. Nec avibus ipsis incognita res esse videtur, quippe quas sæpius confusa inter se barbarum fila, rostro disponere ac in ordinem redigere observamus. Hoc enim pro plumis sejunctis atque divulsis, iterum quasi consuendis ac statui pristino restituendis sufficit. Imo majori avibus commodo cedit hæc constructionis ratio, qua facillima possunt divelli, quam si difficiliore lacerarentur, & difficiliore redintegrarentur. Qui quidem modus quo inter se pennæ nectuntur, incognitus plane videtur illis, qui gluten aliquod seu viscum pennis aviuna inesse somniarunt, cuius ope pennas laceratas iterum conglutinant; imo gluten aliquod ne quidem sufficeret continendis avium pennis, quippe quod accedente pluvia vel aqua omne abiret, nec adeo facile restitueretur, quam quidem disruptas plumas uncorum suorum auxilio coire atque redintegrari, si placet, ipse videbis.

Jam vero secundo notes velim, fila ista neutiquam recta, sed aliquantulum incurvata a caule procedere, & pennæ subtus cavitatem quamdam conciliare. Hinc duplex commodum. Barbæ etenim fortiores redduntur, nec adeo faciles sursum replicantur, dum pluma, citata agitatione, aerem findit seu deprimit. Tum & aer hac cavitatem detentus, fortior resistit alæ, sese

fese deprimendo aerem percutienti ; & alæ jam sese attollenti minus resistit, ob aerem sub cavitate alæ collectum , & fortius impellentem , quam si plana prorsus fuerit ala . Duo nimirum sunt ad volatum necessaria ; alterum : ut alarum agitationi fortior aer resistat , fortiusque sit illud quasi fulcrum , aer , cui volans avis innititur ; alterum : ut idem ille aer , alarum elevationi , quam minime fieri potest , resistat , ideo : 1. ne alam adtollendo , avis destruat ea , quæ alam deprimendo perfecit , 2. ut alam adtollendi labor parum sublevetur , nec in vanum volucris defatigetur .

Jam , id quod tertio notatum velim , duo sunt , quibus pro attingendo scopo isto duplici (scilicet pro aere , alæ eum deprimenti satis resistente , & alæ ascendenti statim cedente) utitur natura . Primo enim ascendentem alam strictiorem fieri voluit , descendentem vero sese dilatare . Id quod perficitur , 1. plumis sibi invicem subrepentibus , ita ut dimidia parte pennæ alius , alius dimidiæ parti subjacente , pennæ cujusvis dimidium tantum agere possit , 2. deinde autem alias pennarum aliis subtrahendo , ita ut suo loco disposita ac evoluta penna quævis , tota sua extensione agere possit . Quo quidem medio illas præsertim aves uti videmus , quæ longis ac cuspidatis alis instructæ sunt . Altero autem artificio , aves brevioribus alis gaudentes procedunt , & remiges imitantur , qui remum deprimendo , plana ejus superficie aquam scindunt ac quasi dilatant , remum vero ex aqua retrahendo & elevando , acie ejus aquam findere solent . Sic & plumæ quas in extremitate alæ videbis , ala descendente , plana sua parte aerem cædunt , at resurgente ala , acie sua transcendunt . Jam vero ut remex , remum adtollendo aliquantulum obvolvitur seu vertitur , sic & rectricium singulæ hunc sibi proprium habent motum , quo , ala ascendente , parum ex obliquo vertitur , ala descendente autem in pristinum situm seu horizontalem sese recipit . Et hæc quidem distinctius observare poteris eo tempore , quum alas diutius distentas detinet avis , actu quodam respondente motui hominis oscitanter sese distendentis . Tunc enim rectrices , præcipua volatus organa , inter se separatas videbis , situ suo obliquo ; & hæc interstitia , totidem quasi portis veniunt aeri facilius transituro . At ala descendente occluduntur interstitia , plumæ omnes priori situi sese restitunt , aliæ aliis superstruuntur ; ala autem in contiguam superficiem abit , & continendæ majori aeris quantitati sufficientem capacitatem acquirit .

Nec tamen , (& hoc est , quod quarto notabis) motum cujusvis plumæ obliquum in pennis caudæ , alii usui , quam pennæ alarum destinatis , observamus . Caudæ usus præcipuus duplex est . Primus , ut corpori avis pro gubernaculo veniat , ut recta , motum avis in corpore rectum conservet , ut depressa corpus deprimat , elata autem attollat . Secundus , ut procurrentis corpus parumper propellat , dum scilicet duplici illo motu alterno & repentino agitur , quem & in piscibus eundem effectum producere videmus .

Omnibus igitur hisce destitutas esse scito pennas alasque struthionis . Etenim nec fila barbarum , in cauda caulis rectricium utrinque obvia inter se adglutinata , sed fluctuantia sunt & flexilia , nec adunca , sed recta & æqua , imo dispositione omni , qua mediante in aliis avium plumis fila alia aliis inferuntur , destituta . Quapropter *Aristoteles* , struthii pennas locum pilorum in quadrupedibus explere censet , sive pro obtegendo corpore po-

tius, quam pro volatu inservire. Carent & motu illo obliquo pennæ struthionis, quo jam rectæ detinentur, jam obliquæ vertuntur. Inutilis ipsi foret constructio, etenim nec barbæ ad componendam texturam & superficiem contiguam (pro deprimendo aere sub ala collecto necessariam) junguntur. Hinc struthii alarum pennas, vexilla navium potius quam vela rerre censemus. Equidem *Aelianus*, easdem velorum in navi officia subire scribit, & struthionem, pro accelerando & sublevando cursu, expansalis ventum captare, eoque propelli. Ast vela navibus non solum pro obstaculo quodam veniunt, quod suo volumine dum vento resistit, eodem tantum modo protrudatur, ut ipsum navis corpus: sed & præcise tali obstaculo veniunt vela navis, quod figura gaudet aptissima ad recipiendum, (dummodo debita ratione dirigatur) ex aeris agitatione commodum pro motu navis maximum, & majus quam si alia figura instructum, alia ratione regeretur. Jam vero pennæ struthionis nec figura sua, nec motu, huic utilitati ejus cedunt. Quantum enim struthii cursum accelerarent, dum suas alas posticus reflectit; tantam ipsi cursus moram inferrent, dum alas antrorsum protrahit; imo difficultate premeretur illa, qua & vespertilionum, & papilionum & muscarum alæ laborarent, nisi peculiari quodam naturæ opificio cautum fuisset. Horum enim alas dum adtolluntur, constringi videmus, sicque minorem aeris quantitatem impellere, ast dum deprimuntur, dilatari, & majorem tunc aeris quantitatem captare. Constrictioni nimirum alarum vespertilionis inservit quædam series officulorum in alis, manuum suarum digitos quasi constituentium, quorum interstitia pelle explentur, alternæ coarctationis & dilatationis capaci. Muscarum ac papilionum in alis, fibrillæ quædam, digitorum in vespertilionibus vices explent, quarum auxilio alæ earum mira cum agilitate, imo susurro contrahuntur, quem non solum in majoribus, verum etiam in minimis, v.g. culicibus, jam e longinquo, ut tubæ sonum, percipere valebis.

Omnis igitur struthii alarum motus ad summum motui caudæ avium reliquarum ac piscium æquiparandus erit. Hic vero ad protrudendum piscem seu avem, & suum confert; ast struthii pennæ interstitiis distinctæ, exiles, & fluctuantes eidem commodo venire nequeunt; agitatio enim, quam effectus eximior comitetur, a plano vel superficie quadam solida, recta, continuaque proficiscatur, necesse est, qualis v. g. est gubernaculum, remus, ala molæ vento agitatæ &c. Horum omnium consideratio adcurata auctori libri *Jobi* ansam dedisse videtur; dum struthionem volandi facultate, & organis volatui sufficientibus, avique omni communibus carere scribit, illumque alas suas pro excipiendo venti impulsu, cursum accelerante extendere seu adtollere docet. Hinc quoque suo jure *Cardanus* struthioni oppositam dicit Avem Paradisi, cui olim pedes denegabant, quamque numquam in terram descendere, vel eadem incedere, ut struthionem numquam volare seu in aerem attolli adserebant.

Præter plumas struthii descriptas, alias adhuc collum & caput obtegentes, easque tenuissimas, candidas, raras, & setarum porci instar, nitentes, imo pilis potius quam plumis similes, vidimus. Per fasciculos plumæ istæ dispositæ erant, quorum singuli componebantur ex 12. pilis, 1. lineæ longis, (excepto medio, illoque 4. linearum longo) & ex communi quadam radice, seu tubulo acum tenuissimam exæquante, proficiscentibus.

Raræ

Raræ dispersæ erant in collo, adhuc rariores in capite, & nullæ prorsus in vertice; more, secundum *Plinium*, duabus avibus proprio, struthioni scilicet, & corvo aquatico, hujus ergo: *Phalacrocorax* dicto. In apice alæ cujusvis quædam quasi calcaria vidimus, eaque hystricis aculeos exæquantia, i. digiti longa, $1\frac{1}{2}$. lineæ crassa in basi, substantiæ fere corneæ, & excavata, cavitati autem inclusa erat cartilago membranæ ligamentisque induta, cum plurimis vasis multum sanguinem adportantibus. Hos vero *Aldrovandus*, quantum industriæ adhibuerit, detegere nequivisse fatetur; *Albertus* pro armis, quibus offendat, *Jonston* vero pro calcaribus habet, quibus ad cursum sese struthio excitet. Bina igitur in omni ala vidimus, majus scilicet in extremitate ossis ultimi alæ, minus autem $\frac{1}{2}$. pede inferius illo. Collum, plumis, ut diximus, nudum, gracilius videbatur, quam alias in avibus; & pelle tegebatur livido-rubicunda, vel ex sententia *Gyllii*, cœrulea. Nec non caput, nobis quidem, ob defectum pennarum, *Alberto* autem sui ipsius respectu, exiguum videtur. Jure suo *Scaliger* increpat *Cardanum*, adferentem: quod avibus caput molis exiguæ idcirco natura tribuerit, ne hujus gravitas facilitati volatus obstaret; multas enim videbis, capite præ reliquis minore instructas, infrequentius tamen volantes, v. gr. gallinas. *Cardanum* vero ad struthionem respexisse putamus, dum in illam opinionem inciderit; hunc enim capite, quamvis plumis destituatur, majori tamen præ reliquis esse instructum, & numquam volare constat. Rostrum ejus in origine $2\frac{1}{2}$. digitis latum, breve erat ac cuspidatum. Interim nec rostri nec reliqui capitis figura, anserem æquiparabat, ut illi sinistre judicant, qui illum *Ghenocameli*, seu *anseris-cameli* nomine salutarunt.

Oculus struthii, quoad formam exteriorem, multa similitudine humano accedebat, & ab aliarum avium oculis erat diversissimus. Avium oculi alias rima gaudent rotunda, palpebra superiore immobili ciliisque carente, linea tandem ab altero angulo ad alterum producta, obliqua. Struthionibus enim nostris rima oculorum erat oblonga; & palpebra superior magna atque descendens, inferior autem descendens; & cilia magna, eaque ut in homine, longiora in palpebra superiore, breviora in inferiore; & linea ab angulo ad angulum ducta, recta, seu rostri fissuræ parallela. Imo tertia aderat palpebra interna, more brutorum, seu membrana tenuissima, in angulum majorem rostrum qui respiciebat, sese recipiens. Hanc tertiam palpebram, avibus pro explenda palpebræ majoris nimia brevitate (quippe quæ vel descendens oculum obtegerit nequit, ut fit in homine) datam esse censet *Aldrovandus*. Alium tamen usum tertiæ huic avium palpebræ tribuendum esse ducimus, quippe qua ne struthio quidem caret, cujus tamen palpebra superior, extensione ad operiendum oculum, sui que descensum sufficiente, prædita est. Quidquod palpebra avium inferior & adscendens superiori tam propinqua accedit & jungitur, quam in homine superior inferiori. Lingua exigua, adhærens ut in piscibus, ex cartilaginibus, ligamentis atque membranæ intertextis composita; in aliis struthionum nostrorum i. digito longa & crassissima erat in regione rimæ laryngis; in aliis autem nondum $\frac{1}{2}$. digiti longa, basin versus i. digiti & quod excurrit crassa, in apice tandem bifida erat. Ultra rimam palati, pharyngem versus, duas vidimus glandulas salivares turgescentes.

Lumbi multa carne instructi ac fortissimi, plumis vero carentes, pelle candida, parum rubicunda, & retis figuram repræsentando, ex maculis vel digito transeunti patentibus composita, hac inquam pelle obtegebantur. In alio struthione mare sparsas vidimus plumas in lumbis, rarasque, ita fere, ut in imagine ejus quam *Gesnero* debemus. Alii autem & hisce plumis, & reticulo de quo diximus, destituti erant. Anterior pars crurum squamis tigillatim dispositis obtegebatur. Pedes fissi duobus saltem digitis maximis, iisque crurum instar, squamarum plenis constabant. Digitorum interior & major una cum ungula, (9. lineis longa, totidem fere lata, & quodammodo unguem in pollice pedis humani referente) 7. digitorum longus erat. Ast digitorum alter, ungue carens, & 4. pollicum longus apice saltem terram tangebatur. Major ex latere observatus haud inepte figuram pedis humani calceo induti, referebat; longitudine saltem & exilitate majore differebat. Cervinis pedibus similes esse dicit *Plinius*, pedes struthionis; & fallaci huic similitudini innixus *Diodorus Siculus*, struthionem dixit: *Cervum-Avem*. Gravior est *Suidæ* error, dum pedes struthii asininis æquiparat. Alii autem, nec haud ita male, struthioni nomen *Strutho-Cameli* tribuerunt, quod, secundum *Scaligerum* æque ac versionem Chaldaicam passus supra adducti ex Libro Jobi, *Gallo-Camelum* denotat. Etenim longitudinem crurum cum gallo atque camelo fere similem habet struthius. Communis quoque struthio est ratio fissuræ pedum cameli, alias singularissima, communis item conformatio unguis, ab ungue cervorum & caprarum diversissimi. Insuper struthiones nostri, more camelorum, calum in fundo sterni ostendebant, cui tamquam cameli, in genua procidentes, innitebantur. Prope anum unius ex struthionibus masculis terna utrinque foraminula $1\frac{1}{2}$. lineis diametro, & 2. linearum profunditate, vidimus. In superiore pectoris parte, sub pelle latentem deteximus adipem, 2. digitis altum; ventri toti prætentum, sebi instar durum, & passim vel $2\frac{1}{2}$. digitis altum; omnem vero duabus membranæ, peritonæi soliditati neutiquam cedentibus, inclusum. Quæ quidem membranæ adipem continentes non sunt, nisi aponevroses musculorum abdominis, nec antequam ad regionem laterum pervenerint, sed ibi saltem carnosæ evadunt, ast in anteriore abdominis parte, per pedis 1. extensionem, omni carne carent. Nec sternum usque ad abdomen descendit, siquidem musculis alasmoven-ribus & sterno nexis, haud adeo magnis ac reliquæ aves struthio eget.

Tum Oesophagus vertebrarum corpori innixus, aponevrosibus musculorum pulmonis, de quibus infra, cohærebat. Tunicæ ejus omnes, & in primis carnosæ, erant crassissimæ. Sensim ille sensimque dilatatus ad ultimum 6. digitorum latitudinem, ventriculo proximus scilicet explebat. Hinc quoque ægre ac ne vix quidem regio orificii superioris (Oesophagi) oculos incurrebat. Imo œsophagi extremitas ingluviem quamdam constituere, & partes hæ binæ unicum modo ventriculum componere videbantur. Singularis ista ingluviei conformatio, nec cuivis reliquarum avium communis, (in his enim ingluviæ constrictione quadam separatur a gutture) adhuc singulariorem positionem obtinebat. Etenim non solum pectus occupabat, sed & ipso gutture inferiorem situm, sub hoc enim primo quidem descendens, tum versus idem reascendebat, sicque gutturis ingressus erat in fundo; & orificium alias superius dictum, in struthione erat inferius.

Ingluviem quorundam ex struthionibus nostris, interna sua parte, in duas cavitates separatam vidimus, mediante quadam eminentia carnis suæ musculosæ, quippe quæ in medio vel 2. digitis crassior erat, quam alibi. Hac igitur eminentia interior ingluviei capacitas, in medio, coarctabatur, sicque in cavitatem dextram abibat atque sinistram. Sinistra minor, dextra autem major erat, & orificium inferius, seu *Pylorum* continebat. Nec tamen ab extra figuram duarum cavitatum distinguere licuit, etenim caro gutturis eandem ubivis altitudinem ostendebat; omnia vero simul sumpta ventriculi humani figuram, 15. digitorum longitudinem, & 8. longitudinem præ se ferbant. *Aelianum* struthioni plures uno ventriculos, ruminantium more, tribuisse ducimus, dum struthionem calculos in *Echino*, id est: secundo ruminantium ventriculo, concoquere scribit. *Echinos* dicitur (id quod in transcurso notatum velim) quia membrana ejus interior rugosa est & plena aculeorum, Erinacei, Græcis, *Echinos*, aculeis similium. Nos tamen in nullo ex struthionibus nostris ejusmodi ventriculum vidimus. Ventriculum quorundam ex struthiis nostris duplicem fuisse, nec tamen illos duobus ventriculis instructos dicere possumus, pars enim utraque ventriculi hujus duplicis eadem illa membrana operiebatur; at cuius ruminantium ventriculo, sua est propriaque membrana. Membrana scilicet ventriculi struthionis, multis confitæ erant glandulis, per series dispositis, orificia tot tubulorum referentibus, scilicet: rotundis & in centro, ex parte ventriculum respiciente, perforatis, ex altera autem hispidis, seu ex multis granis (ut glandulæ, quas conglomeratas dicunt) congestis. Quo quidem & a glandulis in ventriculis Virginis Numidiensis, Anatis, Anseris, aliarumque, obviis, discrepabant. In his scilicet prædictæ glandulæ, perforatæ quidem, ut in struthione, sed simplices sunt, & ex genere conglobatarum. Membrana intus ingluviem obtegens, & facillime ab eadem separabilis, in quibusdam struthionum 1½. linearum crassitiem exæquabat. Constabat autem tunica carnem ingluviei immediate obtegente; tum vero acervo corpusculorum glandulosorum, sericum villosum quodammodo referente. Quæ quidem corpuscula in aliquibus struthionum tantæ erant parvitas, ut fibræ potius, quam glandulæ viderentur; in aliis autem longitudine 1. lineam, crassitie acumi majorem referebant; cæterum tamquam ligni fibrillæ, alia aliis jungebantur & cohærebant. Passim & separata, ac crenis confita erant, perniones exulceratos haud inepte referentes. Eadem fere ratione constructum reperimus ventriculum corvi fluviatilis, seu nycticoracis. Struthionis ventriculos fœno, herbis, hordeo, fabis, ossibus, monetis excusis, imo calculis, vel ovum gallinaceum, mole, exæquantibus, repletissimos vidimus. In uno enim ad 70. monetas numeravimus, plurimas quidem consumtas, residua saltem quarta sua parte, nec tamen corrosioni ab acido quodam proficiscenti idtribuendum censeo, sed mutæ & cum calculis alternæ adfrictioni; etenim in quibusdam latus alterum convexum splendens atque prorsus deletum, at alterum concavum, quod cavitatis suæ ergo nullam calculorum adfrictionem expertum fuerat, intactum reperivimus. Omnia autem reliqua stomacho detenta ærugine tincta erant atque obducta. Sic & in Otidis stomacho quondam nonaginta obolos, adfrictu detritos, & fœno ibidem detento colorem viridem communicantes, observavimus.

Ex quo liquet: dissolutionem alimenti in avibus ac omnibus in genere, animalibus, non solum ope spirituum penetrantium subtiliumque produci, sed & organica illa ac mechanica actione ventriculi, qua eodem detenta omnia, continua compressione & subactione agitantur. Hinc etiam provida naturæ arte, ventriculus animalium, nutrimenta dura integra deglutientium nec manducantium, ut v. g. avium ex granis viventium, horum omnium ventriculus inquam, musculosus est, imo ejusdem naturæ instinctu illa & calculos deglutit, quorum ope nutrimenta in stomacho, ut alia in ore, cum dentibus, contere possint. Ad minimum, magis quid certi constat de hocce calculorum usu, quam illorum, quos ab aquila & ciconia nidos suis adportari ibique conservari videmus. *Cardanus* & Physicorum plures carnosum esse dicunt ventriculum avium & in primis struthii, quo plus caloris concoctioni sufficientis suppeditet. Adtamen carnem musculosam & fibrosam, minus temperamento, quam motu suo agere constat. Imo & ex præcipuis ac maxime necessariis actionibus cordis unam, hanc esse novimus contractionem & dilatationem, quæ tantum ad ebullitionem & alterationem, quantum ad distributionem sanguinis facit. Illam vero monetarum attritionem, in stomacho struthionis peractam, & æruginem omnibus eo detentis obductam, eorum adtentionem judiciumque effugisse censemus, qui perhibere: vi quadam singulari ac stomacho struthionis propria, ferrum & cuprum ab illo deglutitum dissolvi; eademque virtute alia animalia pisces, alia ossa, alia carnem crudam, concoqui posse. Quod si enim ventriculus struthii virtute metalla concoquendi polleret; eadem sane ratione, qua reliqua omnia, & metalla concoquerentur, liquecendo scilicet, albescendo forsan, nec tamen alia ratione, colorem suum immutando. Albedinis rationem quærendam esse teneas in multitudine & copia bullularum minimarum, ab ebullitione fermentationis enascentium. Agitationem scilicet ebullitionis, album agitata rei colorem conciliare, vel in atramento ebulliente, & spumam albam producente, observabis. Nec non experientia comprobata res est: substantiam, stomacho soluta, nec colorem alterare. Nonne cancos fere concoctos in piscium rapacium stomacho, haud rubros sed nigros videmus? Rubedinem vero ignis calore cocti & alterati induunt, ast stomachi calore, illi opposito, in eos agente, nigrum colorem constanter retinent. Hinc nec viridis color, quem cuprum struthii stomacho detentum induere vides, ex quadam sibi propria virtute metalla digerendi, provenire videtur; sed potius solutionem istam eodem modo procedere censemus, quo processisset, si cupro vel extra ventriculum collocata admiscerentur, vel cum eo contererentur quædam herbæ, seu liquor acidus vel salinus, vel quivis alius ab acido & salino diversissimus, brevi: quodcumque dissolvendi facultate instructum, quodcumque illorum, quæ nutrimento suppeditando sufficiunt. Hinc & struthium, natura voracem, duro quidem aliquo corpore, pro contundendis, quæ integra deglutiit, egere, attamen naturæ finibus contrarium agere, & instinctu suo abuti censemus, quum ferrum cuprumve devorat, in primis enim cuprum, hoc enim veneno cedit animali cujus stomacho continetur. Congruit ratiocinium experientiæ eorum, quibus aviarii Regii Versaliensis cura injecta est, hi enim observatum docent: quod quo plus ferri vel cupri devoraverit struthio, eo citius emoriatur.

Varia autem erat longitudo intestinorum in struthionibus nostris, quamvis mole corporis externa vix inter se differebant. Alius enim intestina 50. pedum longa erant, alius 42. alius 33. alius 29. Tria intestina tenuia, vix Coli & Recti simul sumtorum longitudinem superabant. Cœcum, ut in avibus omnibus duplex, utrumque 2. fere pedum longum erat, jam parum longius, jam brevius, pro reliquorum intestinorum longitudine vel brevitate.

Coli & Cœci superficies exterior, eminentiis quibusdam, in utroque aliis, cæterum regularibus, obsita erat. Ligamentis, foliorum instar, internam intestini partem occupantibus, qualia in tertio & quarto ventriculo ruminantium observabis, eminentiæ istæ componebantur. In colo igitur folia ista transversali suo situ, plus semicirculo constituebant, & alternis sic reposita, ut extremitates duorum semicirculorum alius semicirculi extremitatem ita reciperet, ut in duobus pectinibus, apicibus dentium eorum sese invicem intercipientibus, videre licet. Semicirculorum singuli $\frac{1}{2}$. digiti spatio inter se distabant, 3. linearum lati erant in medio, & in cuspidem definebant. Ad intestini longitudinem, in parte ejus posteriore procurrans vidimus ligamentum 2. lineis latum, quod quum tertio brevius esset intestino ipso, intestinum corripiebat, efficiebatque, ut ligamenta interiora & semicircularia rugas quasdam & eminentias componerent, quas satius adhuc conspiciere licebat eo tempore, quo intestinum turgescerebat, & tota membrana ligamentis haud retenta atque suffulta, venti impulsu extendebatur. Omnia autem vasa ex latere hujus ligamenti ingrediebantur, exinde in intestinum & folia prædicta distribuebantur. De hoc autem situ foliorum transversali in Colo, alias jam dictum est, ubi de Simia egimus, ibi etiam eadem folia in Jejuno humano nos detexisse scripsimus, quorum tamen delineationem, struthionis descriptioni nos subnexuros promissimus.

Nec non pars Cœci interior foliis, seu unico potius folio, cochleæ instar sibi obvoluto (qualem circumvolutionis rationem in lepore ac cuniculo videbis, & nos, de vulpe marino tractantes, descripsimus) 5. linearum, quousque procurrebat lato, at versus intestini extremitatem, prout illud coarctabatur, parum coarctato. Intestinum scilicet, more quadrupedum, in cuspidem terminabatur, nec ut in avibus reliquis, ubique eandem amplitudinem conservando, interdum & amplitudine sensim exaucta procurrebat; ut in descriptione avis, Gallice: *Peintade*, dictæ, notatum dedimus: in illa enim majorem ac in alia quavis omne intestini dilatationem observavimus.

In extremitate Recti magna adparebat vesica urinaria, duobus pugnis continendis sufficiens, & octo fere unciis urinæ repleta. Membranis, intestinorum membranis similibus, crassitie saltem diversis, componebatur. In una ex foemellis admodum multis vasis, ex communi quodam centro profectis, deinde autem per totam ejus capacitatem dispersis, nec in aliorum vesica distincte apparentibus intertexta erat. In centri hujus latere dextro foramen illud conspeximus, quo Rectum in vesicam sese exonerat, foramen scilicet angustissimum in centro tumoris, nucem magnitudine exquantis, & podicem gallinæ representantis. Tum vesicæ in fundo, duo alia foramina vidimus, seu orificia urethrarum, inter utramque tunicam, terrestrium animalium instar, prorepentium. Sub duobus hisce foraminibus

alia aderat apertura oblonga, 10. lineis longa, & margine membranoso instructa. Hujus marginis ope, urinæ pondere pressa, occludebatur. Tunc enim margo membranaceus, alii cuidam corpori rotundo, seu tuberi, pugnum magnitudine exæquant, substantiam cartilagini & ligamento intermediam profitenti, in medio, mali Perfici instar, fisso, & interne ossibus pubis cohærenti, huic inquam, tuberi innitebatur.

Hanc igitur aperturam oblongam alia vesica seu crumena intrabat, priore minor, nec continendis excrementis, sed transitui eorum tantum destinata, prout scilicet tunica ejus tuberositatem ipsi inclusam, fortius leviusque comprimeret, mediante actione quadam actioni membranosi marginis, in foramine ovali, perquam simili.

Virga in pluribus struthionum nostrorum duplici constabat substantia, primo scilicet membranis albis, crassis, nervosis & solidis, tum ligamentis, substantiæ & coloris ratione membranas referentibus, ast duritie & soliditate easdem superantibus. Neque in membranis seu ligamentis vasa quædam seu cavitates; fibris transversalibus potius valde compactis constare videbantur. Membrana exterior totam virgam obtegens erat crassissima; & interior immediate utrumque ligamentorum, inter se separatorum, nec nisi 2. ante finem digitis, coeuntium, obvolvebat. Alterum, altero longius 2. digitorum erat. Diameter utriusque 4. lineis in basi absolvebatur, & extremitatem versus, in cuspidem desinebant. Originem virgæ in tubere cartilaginoso, (quod internæ parti juncturæ ossis pubis, de qua supra dictum est, cohærebat) deteximus; deinde per breve spatium subtus reflexa, crumenulam intrabat, externam vero crumenulæ aperturam, seu anum egrediebatur. Hunc margo semicircularis cingebat, qui virgam, ubi exhibat, amplectebatur. Virga autem nec glande, nec præputio, nec conductu, nec cavitate egredienti materiæ spermaticæ sufficiente, instructa erat. In alio struthionum præter membranas ac ligamenta, omnibus communia, tertiam adhuc substantiam deteximus, illamque rubram, spongiosam, ligamentis cavernosis terrestrium animalium simillimam, & magna vasorum copia instructam. In fœmella autem, pro virga, non nisi tuber illud cartilaginosum vidimus, crumenam secundam, ut in mare, explens, ex ano ad magnitudinem avellanæ egrediens, & appendice 3. lineis longa, gracili ac reflexa instructum. Hoc clitoridem habemus. In crumenula ista secunda, ex sinistra foramen aderat in aliam quamdam cavitationem, conductus instar, penetrans; seu oviductus. Et hoc foramen 4. digitorum diametri, & ut orificium externum fœmellarum quadrupedum, totum erat rugosum. Conductus istius tunicæ crassissimæ, cavitas autem in alio struthione major, in alio minor erat in initio, ast 5. digitis ultra initium parum coarctata, alium quemdam conductum exiguum, 5. digitis longum; durum, nerveum nec immerito prorsus pro interno matricis orificio habendum, constituebat. Sub hoc conductu coarctato sacculus seu fossula, exitu carens, aderat, & profunditas ejus longitudinem conductus æquiparabat. In struthionibus tamen conductu hocce destitutus, oviductus sensim coarctabatur prout Ovario adpropinquabat, ita ut in extremitate 4 tantum lineis, ast in media sua parte 3½. digitis latus conspiceretur. Et in hac extremitate illud foramen efformabat, quod infundibulum Oviductus dicunt, & utrinque duas apophyses emittebat membranas, his quodam-

quodammodo similes, quas in extremitatibus Tubæ Falopianæ terrestrium animalium observare licet. Totus vero tractus canalis istius, qui matricem seu uterum proprie constituit, $1\frac{1}{2}$. longus erat, & ubi amplissimus, vel pugno continendo sufficiebat. Carnosus in origine, extremitatem versus, sensim in membranofum degenerabat. Primo igitur adscendens, tum ad sinistram, ventriculum versus, deflectebatur, tandem vero descendendo spinæ dorsali incurvatione, propior accedebat. Duplici membrana, ligamentum latius efformante, & utrinque 2. digitis prominente, continebatur. Pars hujus ligamenti posterior per totam spinæ longitudinem eidem adhærebat; anterior autem libera & fluctuans; utraque magna vasculorum copia intertexta erat. Major tamen horum quantitas in conductu Oviductus, quam in ligamento ipso adparebat. Hæc vero vasa ex duobus ramis magnis, qui Oviductus extremitatem, ovarium versus intrabat, oriebantur. Ramorum alter subtus, supra alter procurrebat, & ramusculi eorum anastomosibus inter se jungebantur, rami scilicet partis inferioris ligamenti cum illis, qui parti superiori erant. Totus vero canalis oviductus triplici constabat membrana, excepta tamen extremitate infundibulum constituyente, hæc scilicet una saltem membrana constare videbatur. Membrana interior admodum rugosa, seu potius foliis composita videbatur, ut tertius & quartus ruminantium ventriculus. In longum disposita folia, totam cavitatem explentia, tunica quadam tenuissima inter se continebantur. Membrana secunda, seu medium tenens carnosæ erat substantiæ. Tertia tandem tenuis & lævis, non erat nisi duplicata membrana qua ligamentum illud latum componebatur, quod, quo oviductus canalem amplecteretur, in duas partes separabatur. Binos utrinque musculos, ad anum & virgam pertinentes vidimus. Bini priores ex interna ossis Sacri parte exorti, ad longitudinem sinus intestini Recti per spatium 2. digitorum descendebant, & hunc in extremitate sua transforabant, deinde autem sub sphinctere ani procurentes, basin virgæ in masculis, clitoridis vero in foemellis, ingrediebantur. Bini tandem posteriores versus basin renum, ex parte interna ossis Ilei egredientes, & ex latere urethrarum descendentes, Rectumque transeuntes, virgæ & clitoridis lateribus necebantur.

In parte renum superiore ovarium ex adversa Aortæ & venæ-cavæ parte, constitutum, ac trunco utriusque fortissime erat adnexum. Substantiam habebat membranofam, cujusvis generis vasis oblitam, & pluribus ovis, calice, ut in gallinis, obductis, repletam. Alia ovorum pisi, alia avellanæ, alia his intermedia magnitudine erant. Membrana autem quodvis ovum includens, sive calix, quadam quasi cauda gaudebat, cujus ope, more communi, ova omnia inter se cohærebant, ac corpus illud quod ovarium dicimus, componebant. Quo minora erant ova, eo crassior eorum membrana, multis insuper vasis instructa, & mediantibus vasis admodum multis ovo, quod continebat, nexa, & aperta hiabat versus regionem caudæ oppositam. Ut in calice glandis videre licet, dummodo exigua & rotunda, calice suo fere tota obtegatur. Subtractum vero calici suo ovum, non erat nisi tunica tenuissima, vitellum complectens in illis, quæ nucis magnitudinem nondum superabant. In alia tamen struthionum ovum, duos mole sua, pugnos, referens vidimus; cujus tunica, humorem turbidæ aquæ similem, absque ullo vitelli vestigio, continebat.

Conje-

Conjecturam facimus, calorem struthii hujus, (ob cœli aerisque nostri varietatem) debilitatum, corruptionis ovi causam fuisse.

Struthio fœmella, in Septo Versalienfi detenta, plura quondam posuit ova, quorum alia nobis exhibita, & examini nostro subiecta sunt. Struthiones enim sua ova haud incubare constat, illa potius arenæ radiis solaribus calefactæ committunt; & ne pluvia irrigentur, arena congesta, tuentur. Hinc periculum fecimus, num subdito solis, vel ignis, vel fimi calore, aliquam in illis mutationem, seu ad generationem dispositionem producere valeremus. Ovorum unum itaque dimidia sua parte arenæ immisum, ac fimeto 3. pedum alto superpositum, pluvioso cœlo vitrea campana obtectum, radiis solaribus, per 5. hebdomades exposuimus. Aliud clybano, per totidem hebdomades detinuimus, ignem mitiorem conservavimus, & arena, pari modo obteximus. Et ova ista ponderis sui vel $\frac{4}{5}$. amisisse observavimus; vitellum pariter ac albumen illius, quod clybano immisum fuerat, parum spissifictos, nec tamen fœtoris quidpiam contraxisse; illud autem soli expositum, haud spissifictum sed maximo fœtore correptum, in neutro tamen aliquod generationis principium, ne dispositionem quidem deteximus. Supra ovarium duo alia corpuscula glandulosa, aortæ & venæ cavæ adhærentia, substantia sua testiculos maris referentia, & in superficie magnum vasorum numerum ostendentia, & coloris ruberrimi, singula tandem $1\frac{1}{2}$. digiti longa, & 4. linearum diametri observavimus. Testiculorum in maribus figura & magnitudo pro subsectorum varietate variabat. In alio enim exigui, 15. linearum longitudinem, & 5. linearum diametrum explebant. In alio autem longiores, nec adeo lati, $1\frac{1}{2}$. digito longi, & 4. linearum diametri erant. In alio tandem 4. digitorum longi, & $1\frac{1}{2}$. digitorum diametri erant in medio; & hi quidem altero apice obtusiore, altero autem acutiori instructi, haud inepti figuram ovi gallinacei repræsentabant. Omnes vero tegebantur membrana quadam nervosa, & innumeris vasis intertexta, quorum ex copia quemdam rubedinem mutabat. In uno struthionum testiculum, alii cuidam secundo atque minori, huic ex latere nexum, vidimus; qui quartam fere partem majoris explendo, non erat nisi epididymis a testiculo separata; & duobus in locis eisdem connexa, nimirum 1. ramo quodam vasis spermatici præparantis, quod ex medio testiculi egressum medium epididymidis ingrediebatur, 2. deferente, quod per inferiorem epididymis partem egrediendo, inferius testiculo jungebatur. Vasa præparantia emulgentibus proxima egrediebantur, & paullulum inferius testiculis, (qui renibus dextrorsum magis, quam sinistrorsum superjacebant) necebebantur. Antequam vero testiculo jungerentur, in tres ramusculos divisa abibant; qui ab initio cohærentes, tum vero divaricati juxta longitudinem testiculi procurrebant, cui per interstitia varios ramusculos minores inferebant. Hic loci autem adipe ac membranis multis involuta erant, quibus non obstantibus & constructionem, & nexum eorum satis distincte conspicere datum fuit; unum enim testiculorum aqua ebulliri jussimus, sicque omni adipe liquefacto, vasa omnia aperta conspeximus, & primo quidem connexa, tum separata, tandem de novo juncta esse vidimus. Vas deferens autem ad longum spinæ usque ad vesicam secundam descendens; & postquam dilatatum in membranam degeneraverat, vesicæ necebebatur. Qui quidem conductus, prout solet, solidus

lidus & ab initio, cavitare destitutus erat, ast circa finem dilatatus tandem in membranam abibat.

Hepar struthii rubrum, substantia durum & solidum, ac humani instar, in duos lobos major divisum erat. Horum sinister in duos alios subdivisus, imo alius quidam parvus in medio, & basi majorum (in uno saltem ex struthionibus nostris) vidimus. Fellis vesicula destituebatur; canalis hepaticus tantum ex media parte cava hepatis enatus, pyloro tandem inferebatur. Hunc canalem constituebant tres rami majores, qui per totam hepatis substantiam diffundebantur. In extremitate rami ex illis unus, prope insertionem canalis hepatici, sinus quidam avellanam exæquans occurrebat, nec tamen in oculos, siquidem hepatis parenchymate tegebatur. Duplex erat vena portæ, duobus etenim truncis inter se separatis instructa, & horum singuli suis radicibus ornati erant. Prior scilicet, illeque amplissimus, lobo dextro necebat, ubi alias fellis vesicula occurrit in avibus. Alter vero, illeque minor, ex inferiore parte lobi sinistri egrediebatur. Vena cava ad longitudinem diaphragmatis magni, juxta aortam, illi cohærebat. Pancreas 10. digitis longum, & 1. digito latum, more avium primæ intestinorum circumvolutioni (sinum longiorem efformanti) interjacebat. Colorem profitebatur carneum; & glandulæ, quibus constabat, inter se separatæ, non nisi membranarum ope cohærebant. Canalis pancreaticus supremæ Jejunii parti insertus ex medio pancreate egrediebatur, ubi rami bini (quos in utramque pancreatis partem, alterum supra, infra alterum emittebat) desinebant. In plurimis equidem avibus ductus pancreaticos prope choledocos inferi constat; ast in struthione pancreatici insertionem ab insertionem hepatici, 3. & quod excurrit, digitorum spatio distare vidimus. Nec non lien ventriculo necebat, mediante membrana fortissima, vasa splenetica continente & conducente. Formam exhibebat cylindricam, $2\frac{1}{2}$. digitorum longitudinem, 8. linearum diametrum, ast in basi parum tenuior erat, quam in apice; parenchymate insuper solido, & quadrupedum simili gaudebat. Renes 8. digitis longi, 2. lati, & in plurimis struthionum nostrorum varii, nec in lobos distincti erant, sed continui. Substantia eorum mollis, multis tamen glandulis composita, inæqualitatis speciem mentiebantur. Hos immediate tegebat membrana, hæc autem denuo alia, illaque fortiore, crassiore, & adiposæ vices explente, tegebatur. Glandularum color erat ferrugineus. In aliis tamen struthionum nostrorum renes, more avium, in tres lobos dividebantur, quorum superior & inferior pars mediam latitudine superabat. Urethra haud avium more, renibus superjacebat a summo in imum descendens, sed substantiæ eorum inclusa, ibique amplior erat quam ubi extus procurrebat; sicque pelvim, renis longitudini æqualem efformabat. Pelvis autem variis foraminibus perforata conspiciebatur, seu orificiis ramorum ceu canalium, ex pelvi per totam renis substantiam proficiscentium. Nec papillarum vestigium detegere licuit.

Annuli Asperam-Arteriam componentes integri erant, parum depressi, & hanc ob causam, quodammodo oblongi. Larynx Cricoide & Arytenoide constabat; & quidem Cricois humanæ similis, Arytenois autem duplici ex cartilagine depressa, lata, & ope muscutorum suorum cum Cricoide articulata, componebatur. Foramen iis intermedium, glottidem constituens,

6. lineis latum erat. Cartilagine ambæ musculo tegebantur, quem pro occludenda glottidis apertura, ambas jungendo inservire censemus.

Diaphragma reliquis animalibus unicum esse solet, quod septum constituit partes in pectore & abdomine contentas secernens. In struthione autem plura aderant diaphragmata, varia septa constituentia. Totam enim cavitatem trunci in sex alias cavitates subdividebant, mediantibus quinque septis, ceu totidem diaphragmatibus. Horum quatuor situm, a summo ad imum, rectum, aut quintum, transversalem obtinebat. Quatuor rectorum duo majora erant, duoque minora. Minora scilicet pulmones, ex lateribus nexos, obtegebant, illosque a 4. utriculis, pulmonibus superioribus, separabant. Majora autem & utriculos & pulmones obtegendo magnum in medio spatium relinquebant, quo hepar cum corde inclusum continebatur. Tum diaphragma quintum, situm transversalem obtinens (a centro scilicet alterius diaphragmatis majoris ad centrum alterius productum) cor cum hepate, ab ingluvie, intestinis ac reliquis partibus abdominis separabat; cui & duo inferiores utriculi pulmonis includebantur. Sic sex cavitatum, ut diximus, alia illaque major erat abdominis; alia major pectoris, & priori superior; duæ magnitudinis mediæ, quatuor vesicas superiores continentes; duæ tandem minores, ex lateribus mediarum, quibus pulmo dexter atque sinister includebantur. Quodvis autem diaphragma minus, quod musculum pulmonis adpellare liceat, (siquidem & substantiæ erat carnosæ, & pulmonem obtegebat) originis erat meræ carnosæ & in 6. capita divisæ. Capita ista versus extremitatem costarum majorum, & prope angulum, (quem cum reliquis costis exiguis sterni illa necessitatibus efformabant) adhærebant; sicque vices cartilaginum in animalibus terrestribus eodem officio fungentium, explebant. Quæ quidem 6. capita simul sumta latam tendinem, seu aponevrosin constituebant, pulmoni superjacentem, & postquam dorsi vertebrae, (aut his quoque arctissime cohærebat) superaverit, aponevrosi musculi antagonistiæ, connexum. Directio fibrarum hujus musculi obliqua erat, & deorsum tendens; ita ut actio ejus pectori coarctando destinata videretur, costas scilicet comprimendo & deprimendo. Diaphragma majus omne, quamvis non nisi membrana musculosa, carne destituta, actione igitur & motu proprio carente, nec nisi pro septo veniente, constaret: nobis tamen potiori jure diaphragmatis nomen mereri videtur, quam vel diaphragmata duo minora musculosa, vel diaphragma animalium terrestrium; hoc enim alii prorsus usui venit, nec separando ventri inferiori a superiore. Motu enim suo præprimis respirationi sic dictæ liberæ inservit, ut musculi pectoris ad respirationem coactam seu violentam, dilatatione & coarctatione pectoris productam, faciunt. Quodvis vero diaphragma ex superiore & anteriore parte cujuscunque costæ, juxta longitudinem sterni adhærebat; sternum vero, more avibus communi, latissimum erat in struthionibus nostris. Ex parte sua posteriore aponevrosi musculi pulmonaris, hac mediante autem, vertebrae dorsi necessitebatur. Ex parte inferiore musculis abdominis transversalibus. Diaphragma obliquum parum subjacebat basi sterni; & ex centro diaphragmatis majoris alius, & anteriore sua parte musculis transversalibus infimi ventris adnexum, posticus autem aponevrosibus musculorum pulmonis, alteri tandem diaphragmati majori necessitebatur. Infra adipe i. digiti alto obtegebatur.

Pulmo, medium inter costas & diaphragmata minora, nobis muscoli pulmonis dicta, situm obtinens, duobus corpusculis, avium more, rubris & spongiosis constabat; quorum quodvis 10. digitis longum, & $3\frac{1}{2}$. digitis latum esse deteximus. Uterque insuper Asperæ-Arteriæ ramus, pulmonem ingrediendo varios in ramusculos dividebatur, qui ut in terrestribus, per totum parenchyma dispergebantur, nec tamen ramusculi prædicti cartilaginibus instructi, sed simplices erant & membranosi. Aer hosce ramusculos transiens ad extimam parenchymatis superficiem usque deducebatur, quod plurimis foraminulis perforatum erat, quæ per transversam tunicam tenuissimam & totum pulmonem obvolvemtem, perspicere licuit. Hæc enim tunica aeri continendo inservit, nec exitus ei patet nisi per 5. foraminula, 4. linearum diametri, & secundum longitudinem pulmonis disposita, alia spinam dorsalem, alia sternum respicientia. Quæ sternum versus tendunt, partem carnosam muscoli pulmonaris penetrabant, quo vesicas ingrederentur; erant enim obliqua. Hoc autem ideo hac ratione constructum videbatur, quo aer vesiculas ingressus, facilis, in vesicis detineretur, agente musculo, qui contractus, foramen coarctare valet, ut infra docebimus. Quatuor utriculi in utraque superiore pectoris parte contenti, diaphragmati, ut diximus, & musculo pulmonum, quo obtegebantur, interjacebant. Tunica utriculi cujusvis lateribus diaphragmatis & musculo pulmonis adglutinabatur. Infra & subtus tunicis vesicarum vicinarum, quarum in medio constituta erat, jungebatur. Utriculus autem quintus, multa magnitudine reliquos superans, haud quidem diaphragmati & pulmonis musculo interjacebat, sed binis diaphragmatibus, una cum intestinis ac reliquis partibus abdominis; nec enim musculum pulmonis tangebatur, nisi ubi perforatus transitum præbebat aeri ex pulmone redeunti.

In aquilis, aliisve avibus vesicas, seu utriculos hosce infra adnexos vidimus membranæ cuidam, multo adipe obtectæ, ventriculum & intestina, sacculi instar, continenti, quam Epiploon credidimus. In reliquis avibus hæc omnia satis adcurate disquiri nequeunt, nimia enim est tunicarum vesicas constituentium exilitas; in struthione autem vel vesicam suillam, soliditate referunt, imo quadruplo crassiores vidimus vesicas abdominis in uno struthionum nostrorum, erant enim scirrhosæ. At reliquas aves dissecando vix fieri potest quin perforentur, nec tamen nisi turgescerent, & per Asperam-Arteriam immisso aere, probe conspici possunt & disquiri. Quæ omnia quum ad Societatem Regiam deferrentur, varia circa respirationem in genere, & in primis avium considerationibus suis perpendebat; quo satius constaret de usu organa adeo diversa in variis animalium. En tibi L. meditationum specimen:

Respiratio non solum refrigerationi cordis & voci inservit, sed vel concoquendo ac distribuendo nutrimento. Huic autem utilitati cedit continua thoracis agitatio atque constrictio. Thorax enim dum pulmones aere plenos, & idcirco pulvinari plumis confarto similes constringit, efficit: ut sanguinem vasculis suis detentum leniter exprimant, & cordi intrudant; imo, ut reliqua vasa pectori inclusa comprimendo, faciliorem reddant sanguinis distributionem; id quod in actionibus violentis adparet, quæ suspendenda seu retinenda egent respiratione; tunc enim rubor faciei suspenditur; adtende modum qua respirationis opus, inspiratio scilicet & ex-

spiratio, procedit, & illa, quæ diximus, in animalibus terrestribus obtinere videbis. Inspiratio enim fit tum, quum pectus dilatatum fuerit. Dilatatur autem permutata positione sterni atque costarum (capacitatem pectoris dilatante) ac extensione diaphragmatis compressi; exspiratio autem positione ossium pectoris contraria perficitur, (qua capacitas ejus coarctatur) & diaphragmatis relaxatione, pectoris aream diminuente, siquidem diaphragma in altum protruditur, & partem pectoris occupat. Hæc autem relaxatio passiva, nequiquam sufficit nisi tam valido, quantum exspiratio exigeret; aer etenim inclusus, & actione muscutorum pectoris (inter exspirandum) compressus, deprimendo sane par esset diaphragmati, nisi vi quadam, exspirationis momento fortissime agente, in altum protruderetur. Hæc igitur vis duplex est, altera nimirum mediastini, quod inspirationis tempore, & centro diaphragmatis descendente, tenditur, trahitur, deinde autem idem illud centrum attollit, elevat, (elaterii instar vi compressi, & vi recedente, pristinum situm recipientis,) mediante actione, quam naturalem adpellat *Galenus*, nec voluntaria, qualis est actio muscutorum; hinc quoque retractionem involuntariam ei tribuit, quam in partibus illis observare licet, quarum muscutorum antagonistæ resectæ sunt, musculis ipsis agentibus. Altera autem vis diaphragma in summum protrudens, est actio muscutorum abdominis, quos antagonistas diaphragmatis habere potes, dum quodcumque sub diaphragmate continetur, comprimunt. Hæc etiam actione hepar, ventriculum, & reliquas abdominis partes deprimendo, diaphragmatis centrum elevat, diaphragma exinde descendit; quum scilicet actione sibi propria, id est: extensione, illam receperit figuram rectam atque compressam, quam fibrarum suarum contractioni debebat. Tanta autem est compressio muscutorum abdominis in viscera, ut *Viri Cell. Parè, Sennertus* atque *Hildanus*, ventriculum sæpius vel thoracis cavitati intrusum conspexerint, si quod amplum vulnus diaphragmati illatum fuerat. Habito igitur respectu ad hæc actiones compressionis muscutorum in viscera, quibus in altum adiguntur; & ad actionem diaphragmatis, qua deprimuntur; & ad progressionem horum motuum alternantium; horum omnium respectu, inquam, dicere poteris: respirationem respectu humorum in abdomine contentorum idem esse, quod cordis pulsatio est, respectu sanguinis, in ventriculo ejus detenti; id est: hanc compressionem & agitationem non solum ad distribuendum chylum eadem ratione inservire, qua cordis agitatio sanguini in arterias protrudendo inservit, sed etiam inter causas præcipuas generationis ejusdem chyli referendam esse, nimirum: comminutione, adtenuatione & commixtione partium nutrimenti, quibus producendis continua ista agitatio sufficit.

Hæc igitur actiones omnes, ad vitam conservandam necessariae, hinc avibus pariter ac animalibus terrestribus communes, respiratione mediante perficiuntur, quamvis organorum diversorum auxilio. Licet enim diaphragma avium quarundam, in quibus scilicet est musculosum, vel saltem musculus pulmonis in struthione, tensione quadam ac relaxatione gaudeat, quarum ope pulmo & vesicæ comprimuntur: motu tamen in animalibus terrestribus obvio caret, quo nempe viscera jam sursum jam deorsum protruduntur; & muscoli abdominis parvissimi non nisi debiliorem compressionem exinde patiuntur, siquidem totum fere abdomen sterno obtegatur,

gitur , cui eximia est magnitudo , imo esse debebat , quo musculis majoribus aliam deorsum retrahentibus originem posset largiri . Imo si minores forent muscoli , vis eorum summo volatus nisi impar foret , nec sufficeret . Supplenda igitur erat infirmitas musculorum abdominis & diaphragmatis avium & quidem mediantibus vesiculis pulmonis , respirationis tempore , alternis sese explentibus atque evacuantibus . Talis præcise est mechanismus earum . Thorax enim actione musculorum pectoris dilatatur , aer pulmonem ingreditur , eodemque tempore ex pulmone in vesiculas abit . Notes vero velim , aerem non nisi pectori inclusas vesiculas ingredi , etenim si vesiculas abdomine detentas respicias , nil est , quod hasce dilatando aerem iis intrudere possit , imo potius deprimuntur , & aer iisdem detentus in pulmonem recedit . Post vero , quum thorax compressus fuerit atque contractus , quum aer vesiculis pectoris detentus , fuerit expressus , tunc altera pars laryngem egreditur , altera autem abdominis vesiculas intrat , easque eodem tempore inflat , quo vesiculæ superiores evacuantur . Deinde autem , quum mediante thoracis dilatatione vesiculæ superiores adimplentur , non solum aerem externum a larynge , sed & aerem vesicarum abdominis (tum temporis compressarum , quum superiores dilatantur) recipiunt . Causa duplex adest : 1. nimirum , siquidem tunica vesicularum , mediante suo elaterio , in pristinum statum sese recipiunt , 2. quia & viscera , vesicarum dilatatione compressa , adjuvantibus musculis minoribus abdominis illas adigunt . Hinc reciprocae & alternantes impulsiones , eaque , actionis violentioris musculorum maximorum abdominis in terrestribus , hujus inquam , vices & officia subeuntes . Viventem disseca avem , & aperte videbis actionem vesicarum , respirationi avis inservientium . Nos avium majorum , ut : anserum & gallorum Indicorum abdomen , illæsis vesicis , dissecando vidimus : quod thorace , inter expirandum depresso , inferiores vesicæ turgescerent ; at inter inspirandum dilatato , deprimerentur . Follem fabri ferrarii tibi cogites , & singularem in avibus respirationis modum intelliges . Duplex est cavitas folliis ; altera inferior , aeremque , folle aperto , recipiens , cui vesiculæ superiores pectori inclusæ respondent ; altera autem superior , & hanc vesicæ abdominis referunt . Jam folliis compressione capacitas inferior coarctatur , & aer receptus foramen terebratum transit , capacitatem superiorem ingreditur ; aer violenter protrusus capacitatem hancce dilatat , lingulam superiorem elevando . Foramen illud in media lingula obvium , quasi diaphragma constituit duabus capacitatibus follem componentibus intermedium ; illæ autem a capacitatibus vesicularum pulmonis in avibus , non nisi situs diversitate saltem , differunt . Etenim capacitas vesicularum primum aerem recipientium , partem superiorem in avibus , at inferiorem tenet in folliis . Hujus generis alias observationes instituit Incluta Societas Regia , quas cujusvis avis descriptioni subnexas reperiēs .

Cor struthionum nostrorum fere rotundum , ex basi sua ad pectus , 6. digitos , & 5. digitorum latitudinem ostendebat . In avibus reliquis , servata proportione , longius esse solet . Auriculæ illius exiguæ , magni erant ventriculi . Amplum erat ostium venæ cavæ , valvulis destitutæ & sacculo tantum instructæ , cujus sacculi latus , cavitati ejus & ostio venæ cavæ intermedium valvulæ officio fungebatur , quam Sigmoidæ carnosæ nomine dignam

dignam judicamus. Conformatio ista avibus quibuscumque communis est. Et valvulæ reliquæ, ut solent, cæteris erant vasis cordis. Aorta ex dextra parte, ut in reliquis avibus descendebat ad longum, & capsulæ (ab aponevrosi muscoli pulmonis effectæ) includebatur. Cranium erat tenerrium, & in uno ex struthionibus nostris, fracturam aliquam ostendebat. Testibus Physicis periculum extimescens struthio, caput abscondit, & tecto capite tutum se esse putat. Cerebrum cum cerebello $2\frac{1}{2}$. digitis longum, aut 20. lineis latum erat. Nec dura Mater, processu suo falciformi, in duas partes dividebat cerebrum magnum; sed in substantia cerebri radius quidam exiguus, eidemque insculptus, adparebat, & huic dura Mater parum crassescens, ac quamdam quasi futuram effingens superjacebat. Sinus longitudinalis, pro more, ex anteriore capitis parte ad posteriorem productus, in concursu sinuum lateralium, seu torculari, (qui, ubi dura mater a cerebello cerebrum separat, conspiciebantur) situs erat. Hi autem sinus ambo ex cranio, per duo foramina occipitis singularia, egressi, in jugulares internos egerebantur. Sinus tandem quartus, posteriorem præ reliquis animalibus situm obtinens, oblique descendebat, & in duos ramos divisus cerebri ventriculos intrabat. Subtracta dura matre, glandula pinealis detegebatur, pisi minoris magnitudinem adæquans, & regioni illi superjacens, qua cerebrum cerebello jungitur. Multis quoque ramusculis plexus choroidis obvolvebatur. Pia mater innumeris vasculis intertexta erat. Et cerebri superficies, quam obtegebat pia mater, haud in sinuositates & circumvolutiones divisa, sed avium more, plana erat atque æqualis. Anterior pars cerebri magni omnis, in duas partes subdividebatur, quæ non nisi fibris quibusdam tenuissimis continebantur. Harum partium separatio, in animalibus terrestribus usque ad corpus callosum, nec ulterius pertingens, in struthionibus totum cerebrum percurrerebat, nec nisi in posteriore parte, juxta cerebellum conjungebatur. Quæ quidem cerebri in duas partes divisio, avibus plerisque communis, nec circumforaneis ignota est, qui pro extollenda balsami sui virtute, cultro cerebrum gallinarum transcendentes, aut illum sinui huic immittendo, nullam cerebro læsionem inferentes, vulnus deinde balsamo suo oblinunt, illudque pro sanationis repentinae causa venditant. In utraque harum partium cavitas aderat seu ventriculus, tectus substantia quadam alba, medullea, $\frac{1}{2}$. lineæ alta, imo & illam regionem obtegente, cujus auxilio partes ambæ inter se junctæ, & duo ventriculi anteriores collecti tertium quemdam constituebant; in hoc fissura quædam adparebat, infundibulum & glandulam pituitariam adtingens; hæc autem glandula, ut solet, in sella ossis Sphenoidis sita exacte obturabat orificium infundibuli. In postica parte utriusque ventriculi anterioris, plexus adparebat choroides, ex ramo carotidis uno, unoque quarti sinus ramo compositus. Omnis fere cerebri substantia, colore cinerea, & parti corticali similis erat cerebri humani; hincque medullarem decupla mole & crassitie superabat. Decem paria nervorum eadem ratione, qua in animalibus terrestribus exorta, eadem etiam cranium egrediebantur. Spinalis medulla, (ex illa regione exorta, ubi binæ partes cerebri anterioris inter se & cum cerebello jungebantur,) utrinque sibi nexam habebat eminentiam rotundam, avellanam magnitudine referentem, quarum cuique cavitas erat amplissima, quæque duos tantum non ventriculos constitue-

stituebant, in conductum inferiorem (*pontem Sylvianum* dictum, quem & serositates cerebelli, infundibulum penetrantes transeunt) egerebantur. Cerebelli cortex pariter ac medulla, more animalibus terrestribus communi dispositi, ab extra per laminas juxta se positas, & lineis parallelis distinctis comparati videbantur. Duæ erant, ut in homine apophyses vermiformes; erat & ventriculus, calami figuram referens, ut in plurimis animalium terrestrium. Cerebelli pars interior, ut solet, substantia candida, ramos arborum effingente, tum alia quadam rubicunda & livida constabat.

Oculi figura, more avibus piscibusque communi, ex binis hemisphæriis componebatur, quorum maximum, a sclerotica efformatum, partem sui depressam antè exhibebat; alterum vero multo minus, compressæ parti scleroticæ superjacebat. Hoc autem hemisphærium minus erat ipsa cornea, margine prominente circumdata. Nervus opticus haud centrum transibat, sed ex latere, angulum spectante, quem pars scleroticæ convexa constituit cum depressa. Nucleo carebat crystallinus, & substantiæ erat uniformis, magis quoque intus quam foris convexus videbatur. Choroidem vidimus nigerrimam, nec in fundo ejus membranam versicolore illam, & quasi auream, quam tapetem adpellant. Nervus opticus scleroticam & choroidem transiens, tum amplificatus infundibulum aliquod ejusdem substantiæ efformabat. Nec tamen rotundum est in plurimis avium illud infundibulum, sed potius extremitatem nervi optici fere semper planam & oculo quasi intrusam conspeximus. Ex infundibulo autem membrana quædam rugosa egrediens, sacculum quasi efformabat, qui fundum crystallini versus, proxime ad nervi optici ingressum, desinebat in cuspidem. Hic sacculus, 6. lineis latæ baseos in exitu nervi optici, & in suprema sui parte in apicem exiens, ex hoc suo apice margini crystallini cohærebat, mediante scilicet membrana, qua ex parte humoris vitrei obtegebatur, quæque totum sacculum nigrum obtegebat. Nec tamen illa nigredo erat sacculo, quæ choroidi, obductæ quasi colore quodam diluto, & tangentibus digitis adhærente; sacculus enim erat membrana nigredine penetrata, & superficiei solidissimæ. Glans lacrymalis superior, plerumque in exteriori angulo orbitæ delitescens, occupabat cavitatem quamdam profundiorē, illi coronalis portioni insculptam, quæ superiorem orbitæ partem constituit; cæterum 8. linearum longitudinem, 4. linearum latitudinem, & tubos more communi dispositos exhibebat.

En ! L. B. descriptam Societatis Regiæ Schediasma; totum quidem; quippe quod prolixitatem suam, gravitate rerum quæ tradit, compensaturum, nec tædio Anatomiae Cultoribus fore censentes; nihil omnino ex eodem refecandum duximus.

Succedant quædam eorum quæ in *Reaumurii* Scripto, cui titulus est: *Ars domesticas aves omnis generis, omnique anni tempore, vel sterquilini, vel ignis communis auxilio, excludendi & educandi*, scripta leguntur:

Nec Physicis tantum, sic ille, sed vel cuivis gratissimum fore judicamus, si apud nos avem enasci videret, cujus pennæ & heroum ornamenta, & multiplici usui veniunt; quæ molis suæ ob causam tanta est fama,

quanta parvitas erga, Colubris, avis; quæ eundem inter aves locum tenet, quem inter quadrupedes elephas, inter pisces balæna. Quis quæso, struthii pullum, tantæ molis avem, in regionibus nostris excludi videret? nec summo novitatis gaudio perfunderetur. Varia sunt, quæ circa modum ova struthionum incubandi narrantur, quorum nisi omnia, plurima tamen falsa pronuntiamus, siquidem alia aliis plane contraria sunt atque opposita. Sic quidam referunt: fœmellam sua ova levissima arena obtegere, & solis radiis ad excludendum relinquere; alii e contrario nunc marem, nunc fœmellam, nunc utrumque curam eorum habere docent continuam, nec tamen, nisi solo adpectu eadem incubare, (si dicere fas est) imo adeo necessariam esse adpectus hujus continuationem, ut vel per momentulum interrupta, statim putredinem ovis induceret atque corruptionem. Iterum alii penitiorum oblivionem suorum ipsorum ovorum matres invadere referunt, illasque alia sibi obvia seu aliena, more communi incubare. Alii autem, quum pullorum proxime egredientium tempus accesserit, horum memoria matres revocari volunt, & ex decem ovis una positis, quatuor confringere, sicque brevi nascendis pullis alimentum præpare; hos scilicet vermibus, in ovis fractis enatis, eo usque pro nutrimento uti, quo accedentibus viribus ipsi alimenta quærere possint. Vix crederes his, aliisque ejus generis Observationes instituendi artis peritos suum calculum adjicere posse. Rationem, & sibi fonticam visam subdiderunt illi, qui ova incubari negaverunt, maximum nempe matris corpus, quo ova contunderentur. Ficulnea est ratio, etenim tanta est durities corticis, ut vel conficiendis vasis pluribus veniat, quorum usus idem est, qui vasis fictilibus, quæ Porcellanea dicunt. Nos potius Cel. *Kolbium* audiamus, & hic nobis unus est instar omnium, qui mirabilia exponendi pruritu, quæ ipsi non viderant, adserere non erubuerunt. Ille enim struthiones, more gallinarum & avium plurimarum, ova incubare docet. Ille summa cum cura & diligentia per decennium in Promontorio Bonæ Spei commorans, nil nisi observationes instituendi scopum sibi præfixum habuit. Ille igitur suismet-ipsis oculis, & sæpissime quidem, marem & fœmellam, alternos ova incubantes vidit; imo pullos, per aliquot dies ex quo nati fuerint, præ imbecillitate, currere nequire adserit, & usque dum vires pro cursu adquisiverint, utrumque parentem herbas adportare subnectit. Conciliare possent ea, quæ ab aliis de Sole ova struthionum excludente relata sunt, cum his, quæ suis se oculis observasse refert *Kolbius*. Aliæ sunt; sic ille, Africæ regiones, illæque calidiores, quam Promontorio Bonæ Spei adjacentes; quæ igitur his in terris arenæ commissa sunt struthionum ova, multo sane imo nimio Solis diurni calore exæstuantia, matris incubatu accalere non egent, sed potius caloris moderationem exigunt, ne (ut arena penitus tectis accidere posset) nimio sole excoquantur; hæc igitur quum mater corpore suo obtegit, refrigerandi, & calorem moderandi ergo id fieri credimus. In his terris itaque struthiones vel interdum sæpius ovis suis insidere censemus; noctes vero ibidem adeo frigida vel calidissimos dies excipiunt, ut matris incubatu, quo a frigore tueantur, vel per noctem necesse sit. In hac re conjecturis saltem fundata multum nos certitudinis expectabamus, quum

quum prima vice prelo hoc opus subjiceretur, & quidem ex industria & perspicacitate Viri juvenis Cel. *Adamson*, qui spretis, quæ per ætatem licerent, delectamentis juvenilibus, totum se dedit animalium & plantarum studio; imò quum 5. ante menses Senogalliam tetendisset, de struthionum incubatu certi quid transmissurum sese promiserat, ego autem illo nescio, accipienda publici juris me facturum spondebam.

Promissis stetit, vix enim opus prodierat, & facta mihi est epistola, quam Senagalliæ, ipsis Idibus Augusti, 1749. exaraverat. Ibi multus est in recensendis variis, iisque novis, quæ ad amplificandam historiam naturalem faciunt, nec tamen huc spectant; tandem vero struthiones noctutantum in regionibus Senogalliæ ova incubare scribit. Sic quæ antea mere conjecturæ innitebantur, nunc veritate comprobata teneas, & negligentia in suos, qua struthiones insimulabantur, labem deletam, imo vel honorem iis vindicatum, qui haud more reliquarum, anxia sollicitudine & continua opera egent, sed deficientem solem interdum supplere solent.

Africæ campos, *Belonio* teste, qui inhabitant struthiones, nulli forent nobis, nisi mare transirent. Lybiam & Africam colentes rustici, variis insidiis silvestres captant, & cicuratos vendunt his, qui navibus eosdem in Europam transmittunt; si autem vivos captare nequeunt, pellem enecatis exutum una cum plumis, mercatoribus vendunt. Hominum persecutione infestatus struthio aufugiendo magnam lapidum quantitatem pedibus post se rejicere, at ab adgressu animalis minoris, quod fuga evitare dedignatur, ictibus ungularum sese defendere solet. Tanta autem est cursus sui vehementia, ut hominem aufugientem corporis mole incurrere, ac humum prostrernere possit. Nido suo parum suffossa terra sufficit; nec avium aliquam novimus, quæ vel magnitudine, vel copia ovorum cum struthio sit æquiparanda. Humoribus libris iijß. continendis par est corticis eorum capacitas, ex quo, duritiei ergo, vel cyathos conficiunt. Magnam vero partem ovorum quæ in templis suspensa videbis, crocodili esse teneas, quamvis struthii habeantur.

Nimius est *Aelianus*, dum struthionem vel 24. ova interdum ponere, & quodvis eorum vel multorum hominum fami explendæ sufficere scribit. Testibus Arabibus, numquam potus quidpiam haurit struthio; stupidiore est aspectus, & quicquid obvenerit, omne devorat; nec tamen; ut alii volunt, audiendi facultate caret. Imo cameli instar, struthiones dorso sibi obverso coire docent alii, nos dubitamus. *Aldrovandus* avium maximus, ait, struthius est, imò tria sunt animalium, ab initio minima, quæ in magnam denique molem exsurgunt, crocodilus inter amphibia, inter aves struthio, inter quadrupedes elephas. *Laurentio Valle* interprete, *Herodotus* in Africæ regionibus Orientem spectantibus struthiones subterraneos commorari scribit. Difficillimus sane locus, & interpretum variatione vexatus. At culpa redundat in Traductorem, cui mens *Herodoti* vera haud subolevisse videtur; hic enim struthionem: *Strouthon Catagaion* dicit, nec ideo, quia sub terra commoratur, sed quia numquam ex terra effertur, nec in aere, avium instar, volare novit. *Gesnerus* annotationis

hujus auctor addit: *Horatium* dum de Africana ave, tamquam præstantissima, verba facit, haud de struthione dicere, sed de gallina Numidienfi, seu Guinenfi, quam Gallico idiomate: *Pintade* dicunt.

Struthionem Galli dicunt: *Autruche*, seu: *Cerf-Oiseau*, (Avium-Cervum) Græci autem: *Strouthocamêlos*; Itali: *Struzzo*, seu: *Struzzolo*, Hispani: *Avestruz*, Germani: *Straus*, Belgæ: *Struis*, Poloni: *Strus*, Angli tandem: *Ostriche*. Gallicum denique vocabulum: *Austruche*, hodie: *Autruche*, velut reliqua, a Græco: *Strouthocamêlos*, vel Latino: *Struthocamelus*, vel, si *Nicotio* fides est: *Struchocamelus* proveniunt.

Nostro equidem palato non arridet struthio, ast teste *Belonio*, Lybica plebs struthios ut nos anseres vel anates, comedunt: Qui autem ex illo gustarunt omnes adserunt: carnem ejus digestu difficillimam esse, & fere totam excrementorum plenam. Hinc & quidam populi Arabiæ *Strouthophages*, vel struthios comedentes dicti sunt. *Heliogabalus*, illud prodigalitatis monstrum, sexcenta quondam struthionum capita, cerebri comedendi ergo, jussit adponi. Ova struthionum palato gratissima, & multum alimenti suppeditantia habentur; attamen *Galeno* auctore, phasianorum atque gallinarum ova sunt optima, anserum vero & struthionum pessima.

Ars medica tandem, struthionis adipem, ova, & tunicam stomachi internam in suos usus convertit. Adeps ejus emolliente & resolvente virtute pollens, partes nervosas corroborare, lienis tumores emollire, & linimenti instar adhibitus, dolores nephriticos lenire, dicitur. Ova struthii eadem virtute, qua gallinacea, gaudent; & corticis eorum, super porphyrite in pollinem redacti ℥ss. pro dosi, ad expellendos calculos vesicæ & renum, ad excitandam urinam, veniat. Quæ enim supra de cortice ovorum gallinaceorum dicta sunt, ea omnia & ad ova struthii adplicari posse monemus, hinc inutili expositorum repetitione superfedemus. Membrana tandem stomachi struthionis interior, ad corroborandum stomachum conferre dicitur, illiusque arefactæ & in pulverem redactæ ℥j. pro dosi, per aliquot horas vino rubro infusi, mane, jejuno stomacho, hauriri volunt. Nos tamen de efficacia ejus, jure nostro, dubitamus.

T U R D U S.

Quatuor sunt turdorum, quos Gallia alit species, aliæ aliis infrequentiores; quo pertinent: 1. turdus major viscivorus, Gallico idiomate: *Sisferre*, *Jocasse*, *Fraye* & *Tourdelle* dictus: 2. turdus viscivorus minor, cujus descriptioni nunc inhærebimus. 3. Turdus juniperi, *Belonio*: *Litorne*, vel: *Oiseau de Nerte*, vulgo: *Chacha* adpellatus. 4. Turdus ruber, aliis: *Roselle* audiens. Quorum bini priores saltem permanentibus, posteriores autem transmigrantibus adnumerandi veniunt, hi enim apud nos haud nidificare solent.

Turdus. Offic. Dal. Pharm. 427. Lemer. 895. Charl. Exer. 89. *Turdus viscivorus minor*. Belon. des Ois. 326. *Turdus minor alter* Gesn. de avib. 690.

Tur-

Turdus musicus. Schvenckf. av. siles. 361. *Turdus simpliciter dictus*. Aldrov. Ornith. 2. 600. Jonst. de avib. 73. *Turdus vulgaris*. Merr. Pinn. 176. *Turdus simpliciter dictus*, seu *viscivorus minor*. Villughb. Ornith. 138. Raii Syn. Meth. aviar. 64. *Turdus alis subtus ferrugineis*, *linea supra oculos albicante*. Linn. Faun. Suec. 189. *Turdus minimus nostras Frischii*. Klein. Prodrom. Histor. av. 66. *Palara fortè seu Drosia* Autor. Philom. *Turdus vinearum*, *Turdus domesticus*, seu *Turdula domestica*. Nonnull.

Nomen suum Gallicum, quo *turdus visci* audit haud a baccis visci acceptum habet, iis enim non vescitur, sed potius similitudini debet, quia *turdo viscivoro majori*, Gallis: *turdus major visci dicto*, accedit. Minor est *turdo Juniperi*, quem *Litorne* nuncupant, & rubrum, *Roselle* dictum, vix magnitudine superat. Pondere suo tres uncias; & longitudine, ab apice rostri ad extremitatem caudæ vel pedum, 9. digitos; rostrum denique ferrugineum 1. digiti longum refert. Lingua acrius observanti, bifida videbitur. Os intus flavum; iris oculorum nucea; colores & maculæ pectoris ac ventris quales in *turdo viscivoro majori* conspiciuntur, maculæ scilicet ferrugineæ, venter albus, pectus flavidum; superficies dorsi ferruginea seu potius olivea, rufo tamen seu flavido alis intermixto; plumæ minores alas infra tegentes rubro flavidæ; plumæ corpus infra munientes, in cuspide flavidæ; plumæ tandem minores sub cauda albidæ; 18. sunt in quavis ala rectrices; cauda $3\frac{1}{4}$. digitorum longa, & 12. extrinsecus composita; crura ac pedes debili ferruginei; planta pedis flavida; ultimus digiti exterioris articulus digito medio cohærens; una fella vesicula; nec stomachus adeo musculosus, quam *turdorum reliquorum*. Ægre dignoscitur a *turdo rubro*, a quo non nisi frequentioribus minoribusque maculis in ventre & pectore differt. *Aldrovandus* maculas oculum circumdantes, notam ejus genericam esse ait. Insectis potius, quam baccis vivit, & limacibus, etenim & hos insectis adnumerandos esse judicamus. Nec colorum diversitas est sexui. *Turdus* hicce totius anni spatio apud nos commoratur, & nidum suum foris stramine & musco componit, intus luto obducit, sicque cæno 5. ad 6. ova committit, quæ subviridi-cæruleum, & maculis nigris rarioribus conspersum colorem exhibent. Vere jucundissimos cantus, arboribus inhærendo extollit, & *turdi viscivori majoris* instar, solus detinetur. Nidum vero in arbuſtis potius, quam proceris arboribus construit. Stupidus laqueos & retia facilis incurrit, & grati saporis præstantia omnes sui generis reliquos antecellit. Hæc Villughby.

Schvenckfeld *turdo* nostro eandem tribuit molem, qua *turdus*, Gallis: *Etourneau* audiens, gaudet. Totum per annum in Silesia commoratur, & Majo & Aprile, mensibus, nidum, in arbuſtorum ramis exstruit, ac 4. plerumque ova eidem committit. Aliis *turdorum* socius nutrimentum quaerit, & illorum more, vermibus insuper vescitur ac scarabæis. Vernotempore amœnissimum cantum extollit, & variantem, cujus causa sæpe cavea detinetur, & pane, carne, vel massa ex farina hordeacea ac lacte confecta, nutritur. Hiemis tempore magna *turdorum* copia e longinquo advenit, singulari Creatoris providentia; etenim qui in silvis ac montibus Si-

lesia eo tempore captantur turdi, non solum cibo per hyemem, sed vel per æstatem sequentem sufficiunt, semiaffatos enim aceto immitti, sicque conservari solent ab incolis. Laqueis autem ex crinibus equorum, vel albis, vel nigris, suffocantur, dum suspensas forbi silvestris baccas captare quærunt.

Belonium haud satis adcurate in distinguendis quatuor turdorum speciebus processisse, jam ab initio nobis subolebat, dum nomen: *Mauvis*, haud turdo nostro, sed rubro, quem *Roselle* diximus, tribuit. Turdus hic minor, sic ille, is est, quem agminatim plerumque incedere, & in planitiibus Gallia adeo frequentem commorari videmus. *Mauvis* autem apud nos *Touret* dicitur, quod diminutivum vocabuli: *Tours* esse censemus. Turdo viscivoro minori similis foret *Mauvis*, nisi & parum gracilior, & sub ventre, item in plicaturis alarum, aurantio obscuriorem colorem exhiberet, imo ex utraque colli parte aurantias maculas ostenderet. Sub ventre autem, instar *Litorne*, seu turdi juniperi, albus est, quo quidem a duobus illis viscivoris distinguitur, hi enim in regione ventris, maculis conspersi adparent. Cæterum uvis vescitur, & magnum vineis detrimentum infert; hinc & copiosior in iisdem, & varia quidem ratione, plurimum vero instrumento, Gallis: *Bret* dicto, capitur. Hoc vero aucupario seu instrumento pro captandis avibus accommodato, & ulula instructo simile est, qua deficiente parum, ac ne vix quidpiam proficere poteris. Imo & visco capiuntur, quo magno æstatis calore perticam ad longum rivuli, in planitiibus aquæ proximis, oblinunt, capiuntur & aliis modis variis, quos ne multi sumus, tacemus.

Ex quibus *Belonii* verbis clare satis adparet: eum quatuor recensitasturdorum species cognovisse; ast ea minus arrident nobis, quum calore æstatis summo glutine seu visco turdos hosce captari docet, siquidem æstate regiones nostras relinquunt, nec nisi autumnis & vindemiarum tempore tantum easdem adeunt. Dicuntur alias &: *Trasles*, seu *Tourets*. Communi ex sententia nidos suos in Bohemia, Hungaria, & Polonia construunt. Sic & *Celeb. Frisch* turdum vinearum nostratem cum rubro, seu *Mauvis* *Belonii* permutasse videtur; idem ille ex variis hisce speciebus inter se mixtis spurias enasci posse contendit. Quod quidem nec nobis impossibile videtur, adtamen ab orbe condito nondum accidisse, nec immerito, ducimus. Exeunte autem Aprile, & primis Maii diebus turdus noster æque ac merula, densissimis in arbuſtis præsertim pluvia imminente, acutissimos altissimosque edunt cantus; peracto autem incubatu turdus interdum cantum denuo exorditur, Julio nempe atque Augusto, etenim ter in anno ova ponere atque excludere dicitur; imo vel sub initium Septembris, mensis, turdi nidum, cum ovis nondum exclusis reperivimus; idem & aliarum avicularum; ut: passeris, morli, similium, respectu observavimus. Voracissimus est turdus, & uvis præsertim gulosissimus inhiat, hinc etiam vindemiarum tempore, multo adipe & carne instructus est. Erronea aliorum opinio, qua turdum auditu carere docent, teste *Jonstonio*, proverbio originem dedisse videtur, quo dicunt: *surdus instar turdi*, potiori jure obtineret ille in aliis Gallia regionibus usitator loquendi modus: *satur, ut*

turdus. Qua ratione interim turdi, caveis huic usui destinatis detenti saginandi sint, ex *Palladio*, *Varrone*, & *Columella* edoceberis. Teste *Olao M.* in regionibus Septemtrionis, & turdi candidi reperiuntur; imo *Aldrovando* debemus effigiem turdi capite candido instructi; & *Schvenckfeld* alius cujusdam mentionem iniicit, qui crista candida, cassitæ instar, & monili candido, tamquam merula, ornatus fuit.

Italisch audit *turdus viscivorus minor*: *Malviccio*, *Malvizzo*; Germanis: *Drüffel*; Anglis. *Mavis*, *Thrush*, *Throstle*, Suecis: *Klera*, *Klaedra*. Gallis: *petite Grive*, *Grivette*, *Grive de vigne commune*, *petit Tourd*, *Mauvis*, seu *Mauviette*. *Menagius* vocabuli: *Grive* etymologiam determinaturus, vel per Onomatopoeiam ex cantu turdi: *tri, tri*, seu *gri, gri*, illud exortum esse; seu potius ex pennarum colore griseo & variegato (Gallice: *grivele*) deducendum putat. Nomen: *Mauvis* seu *Mauviette*, ex semine malvæ, (Gallice: *Mauve*) quo vescitur, deducit *Cel. Lemery*. Sed nec hæc Etymologia satis firmo fundamento nititur. *Joannes Bruyerinus* in tractatu de alimentis, turdum majorem viscivorum: *Mauvis*, ex *Malviscus* adpellatum esse censet; errat, etenim turdo vinearum competit nomen: *Mauvis*. *Menagius* vero *Mauvis* ex Italicorum: *Malvigio* a *Malus* descendente, formatum esse dicit, siquidem turdus, uvas devorando, multum mali, seu damni vineis adfert. *Mauviette* non est nisi Diminutivum ex *Mauvis*, quod, quare a Parisiensibus alaudæ vulgari tribuatur, indagari nequimus.

Turdus multo fale volatili oleoque abundans, præstantissimi saporis ergo, ab omni tempore pro delitiis mensarum habitus est. Hinc & *Martialis*:

*Inter aves turdus, si quis me iudice certat,
Inter quadrupedes, gloria prima, lepus.*

Præoptandus autem & seligendus est turdus, qui ætate ac carne tener, multo adipe & carne instructus, & frigido cœlo captus fuerit. Adpetitum excitant, stomachum corroborant, optimum suppeditant succum, faciles concoquuntur, & salutem ex morbo recipientibus saluberrimi sunt. Modicum vero omnium, hinc & turdorum usum tibi *L.* commendamus. Alii interim stomachum eorum seu ingluviem antequam mensæ adponantur, reiiciunt, ob sinistros effectus, quos hyosciamus, turdorum stomachum plerumque explens, producere valet. Quam quidem cautionem & tu tibi *L. B.* commendatam habeas.

Turdum denique, si ex Medicis quæras, quomodocumque pro cibo præparatum optimum esse censent contra Epilepsiam; opinionem huic rationi superstruunt, quod ex visco ilicis præsertim nutrimentum suum capere soleat turdus, viscus autem iliceus, inter optima anti-epileptica referendus, & cum turdo suam virtutem communicare videatur.

V A N E L L U S.

Vanellus . Offic. Dal. Pharm. 417. Lemer. 902. Charlet. Exerc. 113. Merr. Pinn. 182. Gesn. de avib. 692. Schvenckf. aviar. fil. 365. Capella, seu Vanellus . Aldrov. Ornith. 3. 523. Capella & Parcus . Belon. des Ois. 210. Vanellus sive Capella . Jonst. de avib. 113. Capella sive Vanellus . VVillughb. Ornith. 228. Raii Syn. Method. av. 110. Alb. Ornith. 20. Tringa cristata dependente, pectore nigro. Linn. Faun. Suec. 148. Gavia vulgaris. Klein. Prodr. Hist. av. 19. Parva Plinii; Pavo sylvestris; Kyvitta Germanorum, Capra seu Capella cœlestis Quorumd.

Vanellus notissimus, ac ubique frequentissimus, magnitudine, columbam domesticam, pondere 8. uncias, longitudine ab apice rostri ad extremitatem pedum $13\frac{1}{2}$. digitos, latitudine autem 31. digitos explet. Verticem in eo observabis colore nigro ac nitente conspicuum; tum cristam in postica capitis parte enatam, & ex 23. plumis compositam, quarum tres quatuorve anteriores, & fere 4. digitis longæ, reliquas longitudine superant; deinde maxillam utrinque albam, & lineam nigridam sub oculis auresque transeuntem; guttur a rostro ad initium pectoris, nigerrium, nigredine ejus dimidium effingente monile, seu semilunam in colli lateribus, bina quasi in cornua desinentem; ventrem & pectus candidum; plumas inferiores, quibus alæ teguntur, candidas; colorem sub cauda ferrugineo-pulcherrimum, & hunc qui excipit, fulvus est. Medium dorsum & longissimæ pennarum in humeris obortarum, colore viridi-splendente tinguntur, & macula purpurea juxta utrumque alæ latus procurrente ornantur. Extimi apices pennarum longissimarum sunt candidi, collum est subcinereum, & ubi ad cristam vergit, rubro mixtum ac lineolis nigricantibus variegatum. Alæ rectricium prima ad tertiam vel quartam, nigrae & cuspidibus albis, subsequentes, usque ad undecimam nigrae, reliquæ omnes fundi sunt in album vergentis. Hunc vero colorem in ipsa alæ superficie non observabis, plumis etiam alam obtegentibus & color ille absconditur. Corpori propiores ex vigesima prima, subvirides sunt. Minimæ tandem pro tegumento venientes, purpureo, viridi, cœruleoque coloribus inter se mixtis splendent. Extima pennarum caudæ utrinque alba est, nisi maculam nigram in exteriori ejus margine excipias, cuspides autem reliquarum omnium albidæ sunt. Post cuspides dimidia pars superior nigra, inferior autem candida est. Rostrum nigrum, durum, subrotundum, digitum 1. longum; maxilla superior parum prominens; lingua integra, at latera ejus sursum reflexa, in medio canalem quemdam constituunt. Nares oblongæ quodam officulo flexili muniuntur. Aures, situm inferiorem, quam in avibus reliquis obtinent. Iris oculorum nucei est coloris. Pedes longi, & rubicundi; calcar exiguum; digitorum extimus medio, prope ad originem divisionis cohæret. Hepar amplissimum in duos lobos dividitur, fellis vesicula exinde dependet. Stomachus musculis minoribus instructus est, quam

quam in avibus ex grano viventibus, observabis, imo scarabæos, farinæ vermibus similes eidem inhærere vidimus. Galli sylvestris instar, vanellus pediculis multis infestatur. Fœmella cæterum mare hætenus descripto parvior, gutturis est ad monile usque candidissimi; & colores sub uropygio, quem ferrugineum diximus in masculo, debiliore; ultimæ tandem pennæ in cauda candidissimæ, nec macula fulva notatæ. Imo, ne mari quidem constantes sunt, quos expositos dedimus, colores, sed varii sæpius, pro varietate subjecti. Quaterna ad quina ova flavido-lutea, & multis magnisque maculis nigris conspersa ponere solet vanellus. Nidum suum terra, in medio agro, construit, & aliquot festucis straminis obtegit. Vix ovum egressi pulli, plumis teguntur tenuissimis, nidum relinquunt, & abeuntem matrem discurrendo sectantur. Sunt, qui perhibent: vanellum quo longinquius hominem a nido suo remotum observaverit, eo majorem clamorem attollere, & lugubres inter ejulatus, eidem regioni obvolvendo inhærere, sicque nidi sui situm mentiri; quo facilius curiosorum insidiis illudere possit. Hæc *Villughby*.

Vanellus, sic *Belon*, inter omnes notissimus, *Gazæ* Capella audit, quia clamore suo: *Aix, Aix*, balantem capram imitatur. Itali eum: *Paonchello* adpellant, seu pavonem minorem, siquidem multa cum pavone similia gerit; ast Galli, haud *Paonneau*, quod & *Paonchello* Italorum responderet, sed *Vanneau* dicunt. Pavonem sua crista refert vanellus, hæc enim 5. ad 6. pennæ nigræ, tenuissimæ & longiusculis constat, quarum binæ anteriores, 5. ad 6. digitis longæ, reliquas longitudine superant. Tum pavonis instar, collum, ubi capiti proximum est, tenuissimum; tandem pennas colorem instabilem ostendentes, habet. Muscis vanellus vivit, quas hircinæ *Hoematopi*, & *Crecis* more, inter volandum captare novit. Nec tamen illæ pro continuo alimento veniunt, sæpius enim & pardalum more, terram inflando, eadem delitescentes vermes expellit, deinde devorat. Solus æstate obvolat, hyeme autem tanto agmine continetur, ut nubem videre crederes, tandem vero omnes in quadam planitie spatiosa desident. Variis præter ea nominibus venit vanellus, alii illum dicunt: *Dixbuit* (quod numerum 18. Gallico sermone denotat) quem quidem sonum clamore suo referre videtur; alii autem: *Papechien*. Levissimo volatu deferatur, & magnum sæpius strepitum volando concitat alis. Magnitudine sua vix pardalem superat, ast saporis præstantiæ ergo, tanti interdum, quanti capo coemitur. Multis densissimisque tegitur pennæ, iisque in caule, corpori proximo, nigræ. Ast in parte sua exteriori longe alium exhibent colorem; etenim si supinum eum reponas & alas extendas, maximam earum partem ac plumas ventrem & lumbos obtegentes, candidissimas invenies. Inferior pars alarum nigerrima est, inferior caudæ autem pulcherrime variegata. Cruribus gaudet longiusculis, & lumbis agilibus, genuum colore ferrugineo. Radices pennarum cristam constituentium in vertice, nec, ut in alauda, quæras in fronte. Rarissimæ, quibus collum tegitur, plumæ, & capitis pennæ admodum retractæ, collo suo tantam gracilitatem comparare videntur. Alis autem, si molis rationem habeas, majoribus gaudet. Nec cristatas avium ullas cognoscimus, præter: vanellum;

pavo-

pavonem, alaudam, upupam, ardeam, & ardeam minorem, Gallis : *Aigrette* dictam; cujus ergo antiquos eum *Parci* nomine denotasse censemus. Variæ quidem plumas cristæ similes exhibent, ut: pelicanus, mergus, aliæ, nec tamen crista ornata dici merentur. Cæterum aves illæ, quas cibo nostro adpropriantes nec ingluvie, nec intestinis exuimus, præstantiores haberi solent, horum in numerum & vanellum referendum esse scito. Et jure quidem magni emitur, tanta enim adipis copia gaudet, ut totus adipe circumfusus videatur. Quæcumque autem in herbis reperierit, ut: limaces, scarabæi, locustæ, atque erucæ, ea omnia ipsi veniunt pro alimento, imo more avibus communi, & calcnlos candidos deglutit. Nec differentia, adeo magna masculus a fœmella distat, coloris saltem varietatem nullam reperies. Hepar vanelli magnum in duas partes dividitur. Fellis vesicula carere videbatur. Tenerrimæ sunt partes ejus internæ & caro omnis. Duo tandem, ut in reliquis omnibus, intestina longiora ex intestino adiposo proficiscentia, in vanello observare licet.

Quæ quidem vanelli descriptio exacta, & omnibus, ut ajunt, numeris absoluta, nobis videtur. Consentientem habemus *Aldrovandum*, qui descriptionibus *Gesneri* atque *Belonii* nihil se addi posse fatetur. Sunt qui scribunt: vanellum, dum hominem nido accedentem conspexerit, statim ex eodem egredi, clamoresque adtollere, sicque homini nidum indicare, quem ab eodem arcere cupit. Nec tamen fœmella, sed masculus nidum relinquit, & tamquam excubias agendo in regionibus, proxime adjacentibus, transeuntium conspectum audaciter subit, adgrediendi eos animum præceps irruendo commonstrat, & usque dum satis remotos credit ad nido, continuos inter clamores persequitur. Verno & æstivo tempore binis incedunt vanelli, autumno autem & hyeme, vel millenis proficiscuntur, cujus ergo & aucupes vel illicibus, vel vanellis viventium figuram representantibus, & palo transfixis, uno sæpe retis tractu vel 60. & plures captare valent. Pulcherrimarum quas noscimus avium est vanellus. Oculis, molis ratione habita, maximis gaudet, pardalum instar. Noctu præsertim, more aquaticarum, vel earum quæ paludosa loca, & margines fluviorum inhabitant, multum excitare solet clamorem. Citissimo insuper & aptissimo incessu procurrit; adspectu est protervo, & cicuratu facillimus. Et Angli, teste *Turnero*, upupam in hortis alere solent, quo a lumbricis & erucis nimis eosdem expurget. Idem quoque Gallorum usui venisse novimus. Feles non extimescere videtur, etenim conspecta fele statim acutissimum clamorem extollit, eoque illas abigit. Ova vanelli sunt versicoloria & columbinis majora, quorum ille quaterna ponere solet. Et ruricolæ Secalauni placentas ex illis, sibi delicias, conficiunt. Imo & Belgæ, qui vanellum habent frequentissimum, tanti ejus ova censent, ut par in anno primum, gulæ litantes, vel duobus nummis aureis emere nulli hæsitent.

Græcis vanellus audit: *Ayx* seu: *Taôs ævrios*, Italis: *Vanello*, seu *Pavoncello*, Germanis: *Kyvitt*, seu: *Feld-Pfau*, Anglis: *Pewit*, *Lapwing*, vel *Bastard Plover*, Suecis: *VVipa*, seu: *Kovipa*; Gallis: *Vannet*, *Vanereau*, *Vanelle* & *Jacobin*. Quorum Etymologiam vel in clamore suo, vel plumis, vel simi-

similitudine cum pavone , vel denique ratione volatus quæras . *Schwenckfeld* enim vanelli nomen ex strepitu , quem volando excitat , quique vanni strepitum haud inepte refert , deducere studet .

Abundat fale volatili & oleo , ac inter delicias referri solet . Adpetitum enim excitat , & concoctu est facillimus ; quum vero alimentum minus solidum præbeat , his qui multo corporis labore exercitantur , minus conveniens est . Junior , tener , & multa carne instructus , optimus ; cæterum omnibus , cujuscumque sint vel ætatis , vel temperamenti , convenientissimus habeatur .

Ars Medica tandem vanello sanguinem expurgandi , cerebrum corroborandi , per urinas eiiciendi , & Epilepsiæ medendi facultatem tribuit . Hinc vel assatum , sive elixum , cibo venire ; vel plumis interstinisque rejectis exsiccare , & in pulverem reduci jubet , cujus ℥ss. ad 3j. pro dosi , cum aliquanta aquæ cujusdam Cephalicæ portione accipiendam , & usum ejus , per tempus aliquod continuandum esse teneto .

U P U P A .

U *Pupa* . *Offic.* Schrod. 324. *Dal. Pharm.* 424. *Lemer.* 927. *Belon. des Ois.* 193. *Gesn. de avib.* 703. *Aldrov. Ornith.* 2. 704. *Schwenckf. av. files.* 368. *Jonst. de avib.* 85. *Charlet. Exerc.* 98. *Albin. Ornith.* 39. *Linn. Faun. Suec.* 85. *Upupa Aldrovandi & Gesneri.* *VVillughb. Ornith.* 100. *Raii Syn. Meth. Av.* 48. *Upupa simpliciter.* *Klein. Prodr. Histor. av.* 110. *Gallus sive Avis Paradisi* , *Gallus sylvestris* ; *Gallus lutosus* ; *Gallus stercoris* ; *Gallinaceus stercorarius* , *Arguata stercoraria* ; *Cucupha* . Nonnull.

Tres uncias , suo pondere , upupa explet , & ab apice rostri ad extremitatem caudæ $12\frac{1}{4}$. digitorum longa , inter alas expansas autem 19. digitis lata est . Rostrum præ se gerit $2\frac{1}{2}$. digitis longum , nigrum , cuspidatum , & parum excavatum . Linguam habet exiguam , ut recte observat *Aldrovandus* , profunde delitescentem , triangularem , ab initio latam , in extremitate acutam , brevibus : triangulum æquilaterum accuratissime effingentem . Corporis figura pardalis corpori multum accedit . Crista autem vertex ornatur , pulcherrima , 2. digitis longa , duplici ex serie exiguarum plumarum composita , a rostro usque ad extremitatem capitis posticam procedente , & pro lubitu avis jam elata , jam vero depressa . Pennarum , quibus componitur , numerus est 24. ad 26. quarum aliæ aliis minores , extremitates vero omnium , primo quidem nigridæ , post albidæ , reliqua sua parte , ferrugineo flavescentes sunt . Collum deinde rubro debiliorem præbet colorem , pectus albidum , radiisque nigris descendentibus interstinctum ; succrescentes tamen pulli maculis in pectore omnibus carent , nec nisi in lateribus quasdam ostendunt . Caudam , $4\frac{1}{2}$. digitorum (seu 6. referente *Aldrovando*) longam , nigram , in medio , macula quadam lata , crucis formam repræsentante , (cujus summitas plumarum radices , cornua autem plumarum extremitates respiciunt) ornatam , & ultra alas compli-

catas

catas prominentem, hanc, inquam, caudam, decem tantummodo pennæ constituunt; 18. rectrices numeramus in quavis alarum, & 10. priores nigrae, maculam quamdam transversalem albam, & in secunda, tertia, quarta, quinta, sexta, septimaque rectricium $\frac{1}{2}$. digito latiore, in reliquis autem strictiorem ostendebant; nec non in 7. subsequentibus 4. ad 5. radii conspiciuntur transversales albidæ, & oræ extimarum subrubicundæ. Uropygii color albus est; plumarum humeros tegentium, & ad longitudinem dorsi extensarum, maculis nigris & albidis, ut in alis, variegatus; iridis oculorum nuceus. Palpebra inferior superiorem magnitudine superat; crura sunt brevia; & digitus exterior, medio, absque membranæ auxilio, necitur. Nullæ tandem adsunt appendices cæcales. Aspera-Arteria, ex descriptione *Aldrovandi*, sub initium bifurcationis, (qua in pulmonibus definit) externe bina ostendit orificia, laryngis partes agentia, & tenuissima quadam pellicula, obtecta. Nostrametiporum experientia teste, annuli trachæe-arteriæ cartilaginei semicirculum tantum, peracta bifurcatione constituunt, ut in ardeis. Cæterum, quos in ventriculo ejus reperivimus, scarabæi, satis clare loquuntur, quod insecta ipsi pro nutrimento veniant; num & uvæ & baccaæ aliæ, ut quidam volunt, ignoramus. Formicis, inter alia, upupam nutriri scribit *Aldrovandus*. Quod autem numerum adtinet pennarum caudam constituentium, & appendices cæcales deficientes, & maculas alarum transversales, picus horum respectu accedit vanello. Frequentissimum illum vidimus apud Germanos, & in regionibus Coloniam Agrippinæ adjacentibus, ibi autem: *Videbuppe* dicitur. Plerumque terræ, rarior tamen salicibus insidere solet. *Turnero* teste, Magna Brittaniam prorsus upupis caret; errat autem ille, etenim ex testibus fide dignis acceptum referimus: varias, quamvis rariores upupas in Northumbria & Surria, Angliæ regionibus, inveniri. *Aristoteles* upupam ex stercore humano præsertim nidum construere, ac internam ejus partem totam illo obducere, scribit. Græcum & Latinum nomen, ex vocis suæ similitudine accepisse videtur. Cæterum, sic pergit *Turnerus*, qui literis operam navant fere omnes Anglorum, upupam hanc avem esse contendunt, cui Barbari, nomen: *Vanellus*, seu *Vanneau*, alarum strepitus ergo, tribuerunt, quemque Angli, suo idiomate: *Lapwing* adpellant. Qui quidem error antiquus ne hodie quidem obsolevit in scholis nostris. Marem vero a fœmella, magnitudine superari dicunt. Hæc *Villughby*.

Nec nisi tempore æstivo, ait *Belon*, upupam videndi copia nobis est, exclusis enim pullis, alias statim regiones, nostratibus calidiores, hybernatum adit. Gallici nominis, *Huppe*, originem, ex crista sua, quam: *huppe* Galli dicunt, Græcum vero: *Epops*, ex cantu suo derivamus. Dicitur & *Puput*, siquidem non solum ex stercore suum nidum construit, sed etiam cantando: *Puput* proferre videtur. Ut autem upupam pro cibo capiant, omnes ubique abhorrent, quamvis teste experientia, lardo multo obvoluta & probe aflata, merulæ saporem imitatur, nec qualitati cedit. Plumis induta columbam, illis vero exuta vix sturnum, magnitudine, exæquat. Nec adeo fera nobis visa est upupa, quippe quæ quamvis juxta vias publicas commoretur, ne quidem hominum transeuntium adpectu & præ-

& præsentia abigitur . Multis pennis constipata , leviori volatu defertur , & vanelli instar , alarum agitatione , aerem concitat . Pedibus instructa est magnis , at cruribus brevioribus . Crista ejus a crista aliis avibus propria differt , & 20. circiter ex pennis longis rubicundis , serieque dispositis , binis sibi cohererentibus , & in extremitate nigris componitur ; quam pro lubitu jam adtollere , jam demittere valet upupa . Linguam , rostri longioris respectu , habet exiguam . Vermibus , omnibusque quæ inter arbuta reperit , vescitur . Nidum suum in quadam arboris crena construit , nec quidquam pro concilianda sibi mollitie supponit , sed ova sua ligno putrido committit ; vel , ut *Aristoteles* scribit , stratum ex stercore humano eidem subdere solet . Vocem habet raucam , & vel satis longe remoto innotescentem , at distinctius exprimendæ voci lingua ejus brevissima non sufficit . *Aristophanes* , exemplar illud eximium diligentia in conscribendis operibus , upupæ vocem ita imitatur : *Epopoe , popopo , popoe , Io , io , ito , ito , ito , ito . Tereum* fabulis antiquorum , in upupam abiisse vel me non monente , LL. constare censeo .

Laus describenti *Belonio* debetur , & in exarando diligentia honor ; hinc & nos lubentissimi , quantum fieri potest , suametipsum verba transcribimus . Ubi autem a Cel. *VVillughbeio* dissentire videtur , huic , perspicacissimo pariter & accuratissimo , adsentiri malumus . Nec non *Schwenckfeldius* dignus est , ut multi æstimetur , quamvis multa hauriat ex *Gesnero* , nec tamen fontem indicet . Hic igitur de upupa ita : complexionis melancholicæ , & sordidissimam esse scito upupam , quæ avia silvarum loca , & accessu difficillima quærens , instar avium nocturnarum , tristis est , & lugubris , & tenebrarum amica . Vocis suæ sonuculum imitatur . Nidum in crenis arborum ex stercore humano componit , illoque obducit , ut foetore arceat accessuros . Et hæc quidem meametipsum experientia teneo . Puer adhuc , in ilice vetustiore & perforata upupæ nidum reperi , & pullis extrahendis occupatas manus stercore ac sordibus inquinatas retraxi . Quaterna plurimum ova ponit upupa , & vermes ex sterquiliniis conquirat , imo scarabæis , erucis , aliisve vermibus vescitur . Hyemis tempore in crenis arborum delitescit , nec nisi Æquinoctium vernum antecedente tempore , egreditur ; colorem denique & speciem hyeme æque ac æstate immutat . Carne gaudet dura , nec cibo sufficiente . Pulli autem senescentes , sub alis parentes fovere , & usque dum videndi facultas ipsis redierit , spiritum suum , seu halitum eorum oculis inflare dicuntur .

Quæ quidem a *Schwenckfeldio* observata admodum lubrico fundamento inniti videntur . At *Frischius* , nec immerito , & rostri longioris ratione habita , rusticularum generi upupam adnumerandam , & rusticulæ arborum nomine designandam esse putat . Idem ille upupam , æstate , vermes ex stercore animali atque humano colligere ; & Germanorum idiomate : *gallum foetentem* , seu *merdæ* adpellari ; nidum more picorum , in arboribus perforatis construere ; & facultate cortici inhærendi obambulantique gaudere ; & formicarum acervos , pro ovis earum , rostro suo lon-

longiſſimo extrahendis ſæpius inviſere ; & loca remota peramare , imo , ſuo ſuorumque foetore , nido ſuo accedentem quemvis abigere , hæc omnia , ut diximus , *Friſchius* ſcribit .

Aldrovandus autem , curioſitate motus , inſtrumentum illud indagatus quo criſtam ſuam upupa jam adtollat jam deprimat , muſculum reperit , qui unicus videbatur , illumque cuticularem , ac panniculi carnoſi inſtar , fibroſum , ex baſi cranii exortum , magis carnoſum ab initio in parte inferiore , verſus frontem , aſt magis membranolum , ex parte ſuperiore , verticem verſus , & huic quidem criſtam conſtituentes plumæ altiffimis radicibus infixæ adhærebant ; hic igitur muſculus verticem verſus adtractus , criſtam elevabat , roſtrum verſus adductus , deprimebat .

Terna plerumque ova upupam ponere ſibi relatum refert *Gefnerus* . Conſentientes habet *Jonſtonium* & *Aldrovandum* , & ille quidem ſubnectit : quod ova upupæ perdicum ovis ſimilia , ſed minora , duriora , figuræ vilioris ſint & fragrantiffima . Quæ de upupa *Aelianus* , dum herbæ cujuſdam ope , cœno obturatum nidum recludere eam dicit , pici viridis inſtar , ea dictu nimia eſſe , vel me tacente , notabis . Pulcherrimis interim Europæ avibus upupa adnumeranda venit ; & facilis cicuratur ; & carne in fila diſſecta delectatur , & jam ſterquilinia , vermium ergo , vel furfurem , genio ſuo ſatisfaciendi cauſa ipſi objectum , ſuffodere peramat . Libera hypocauſto detineatur , & alacrior erit , hilarior , magisque puritatis amica . Difficili cæterum & ærumnoſo , imo inepto gradu incedit , ob crurum brevitatem ; aſt volatu expeditiore , quamvis lento fertur atque depreſſo ; alis etiam majoribus inſtructa , majorem ſua magnitudinem mentitur . Cicurata autem jucundiſſimo tibi cedit ſpectaculo , & prope ignem extenſis deſidebit alis , frigoris enim impatientiſſima , igne incaleſcere quærit . Autumni inſuper & vindemiarum tempore multum adipis , ac ſaporem adeo gratum acquirit , ut venatorum nonnulli huic præ ruſticula palmam deferant , dummodo vix enecata , & calidæ adhuc caput reſcideris , alias enim nimium nidorem carni inhærare dicunt . *Aldrovandus* ſæpe in Italia upupas venum expoſitas ac coemptas ſeſe vidiffe refert . His autem , qui upupam ſœmellam , more inter aves rapaces tam diurnas quam nocturnas communi , maſculum magnitudine ſuperare ſcripſerunt , his , inquam , experientia refragatur . Quæ interim *Olaus Magnus* , de bellis inter upupam , & ſibi hoſtes : picum , hirundinem , monedulam ; item de nido ejus juxta paludes plerumque conſtituto recenſet , ea numquam noſtra experientia comprobata fuere . Quantum ad ſubſequentia , quibus gemitu ſuo , pici inſtar , pluviæ imminentem nuntiare , & quum cicurata fuerit , muſcis , muribusque captandis occupari dicitur : ea nec comprobare poſſumus , nec negare . Hæc certa ſunt : quod , quum upupæ nidum , murium ſubterraneorum ſeu talparum capitibus plenum , ſeles odoratu detexerint , ſtatim hæ nidum deprædentur . *Zinnani* interim , nec nidi nec ovorum upupæ mentionem facit . Ex plurimorum opinione communi , upupæ pro conſtruendo nido inſerviunt excrementa humana , vel ut alii volunt , leporum , equorum atque mulorum : nos tamen in nullo nidorum , quos diſqui-

disquisivimus , excrementorum quidpiam deteximus . Verum fatemur , quod in cumulo excrementorum ac sordium construere videatur nidum , siquidem & nidi ipsius , & matris , & ovorum , & pullorum summus est foetor ; nos tamen nihilominus nil nisi infecta , vermibus farinae similia , oniscos , & fullones , exiguosque scarabæos in eodem reperivimus . Nec tamen , ut adcuratior dicam , nidum upupa construit , sed ova sua crenæ arboris putridæ ac vermibus perforatæ committit . *Linnaeus* non nisi bina ova ; eaque cinerea , singulis vicibus upupam ponere adferit . Nos ad minimum quatuor , illaque oblonga , & pro magnitudine avis , admodum gracilia illam deponere novimus .

Nomina ejus Gallica sunt : *Huppe* , *Putput* , *Puput* ; *Pupu* , *Pepu* , *Pipu* , olim , sic *Calepu* , *Pupe* . Occitaniensium idiomate : *Lupoye* , seu *Lupege* . Græci illam dicunt : *Epops* , Itali : *Bubola* seu *Gallo di Paradiso* , item *Galletto di Maggio* ; Hispani : *Abubilla* . Lusitani : *Popa* , Germani : *Viedehopff* , Belgæ : *Hoppe* ; Angli : *Hoop* , seu *Hoopof* , Sueci : *Haerfoegel* seu *Popp* . *Ménagius* est , qui ex upupa crista donata , Gallis : *Huppe* , omnimodam avis cristam , hoc : *huppe* , nomine donatam ; nec ut *Belonius* censet , quem ille reprehendit , avem ex crista nomen accepisse docet . Plurima autem ex nominibus , quibus salutatur ab Europæis , vel per Onomatopoeiam , vel ex cantu suo communi efformata videntur .

Nec nisi unam tantum virtutem upupæ tribuunt , qui de re Medica scripserunt , auctores , illam scilicet multum ad depellendos dolores cholicos conferre docent , sive in substantia comedatur , sive juscula ex eo provenientia accipiantur . Sic *Cel. Franciscus Paullini* , *D. testibus Ephem. Germ. Dec. II. Anni 9. pag. 354.* rusticum quemdam atrocissimis doloribus colicis jam diu vexatum , ac in vanum adhibitis omnibus , sequentis tandem jusculi usu , doloribus liberatum fuisse scribit . Protractis upupæ intestinis , corpus ejus baccis juniperi & semine cumini confartum sufficienti cum quantitate aquæ excoxit , & bina quæ provenerant juscula , ex altero alterum hausit , & cessavere dolores . Relatis Vir *Cel.* subnectit cogitatum illud pronissimo exinde alveo profluens , quod & nostræ tractatione pro conclusione addamus : nihil , scilicet , in rerum natura adeo abjectum esse ac vile , ut nulla prorsus utilitate sese commendet hominibus , & summam Numinis in illos benignitatem satis aperte loquatur ; nostrum hinc esse , ut submissas agamus gratias munificentiae tantæ , quæ dona sua , nostris commodis subventura , vel in vilissima quæque , tam larga manu contulit , atque disposuit .

Finis Classis quartæ de Avibus & Partis Primæ.

MATERIÆ MEDICÆ
GEOFFROYANÆ
TOMI TERTII

PARS POSTERIOR

De QUADRUPEDIBUS, & HOMINE.

MEDICAL MEDIC

GEOFFREY

1875

1875

1875

SERIES ANIMALIUM

Quorum descriptio Tomo præsentì traditur:

CLASSIS V. DE QUADRUPEDIBUS.

De Quadrupedibus generalia.

565

Nom. LATIN.

GALLIC.

ITAL.

B OS	Boeuf	Bove	566
Camelus	Chameau	Camelo	600
Canis			
Canis	Chien	Cane	607
Lupus	Loup	Lupo	618
Vulpes	Renard	Volpe	624
Capra			
Capra	Chèvre commune	Capra	629
Rupicapra	Chamois	Capra Selvatica	637
Animal Moschiferum	Gazelle	Gazzella	642
Capra Bezoardica	Chèvre du Bezoard		
Orientalis	Oriental		651
Capricerva Occiden-	Chèvre du Bezoard		
talis	Occidental		653
Castor	Castor	Castore, Bevero	656
Cervus			
Cervus	Cerf	Cervo	742
Rangifer	Réenne	Rangifero	755
Alce	Elan		763
Echinus	Herisson	Riccio, Rizzo	772
Elephas	Elephant	Elephante	666
Equus			
Equus	Cheval	Cavallo	698
Asinus	Asne	Asino	726
Mulus	Mulet	Mulo	739
Felis	Chat	Gatto	776
Hippopotamus	Hippopotame	Ippopotamo	784
Leo	Lion	Leone	792
Lepus			
Lepus	Lièvre	Lepre, Lievora	804
Cuniculus	Lapin	Coniglio	813
Lutra	Loutre	Lutra, Lodra	816
Manati	Lamantin	Domna	823
Martes	Fouine	Foina	829


N n 2

Nom.

Meles		
Taxus	Blaireau	Taffo 833
Animal Zibethicum	Civette	Civetta 836
Mus		
Mus	Souris	Sorcio 840
Rattus	Rat	Ratto , Topo 845
Marmota	Marmotte	Marmota 848
Ovis	Brebis	Pecora 856
Phoca	Veau-Marin	Vecchio Marino 872
Rhinoceros	Rhinoceros	Rinoceronte 879
Simia	Singe	Simia 887
Sus		
Porcus	Cochon	Porco 899
Aper	Sanglier	Cingniale 909
Talpa	Taupe	Talpa , Topinara 915
Ursus	Ours	Orso 920
<hr/>		
Homo	Homme	Uomo 930

L. S.

Paucissima erunt eaque levissima Typothetae errata. Nos tamen vel horum veniam a Te rogamus, L. B.; ipsa autem perspicacitati Tuae inter legendum eruenda, & benignitati Tuae emendanda relinquere malumus, quam anxia leviorum expositione indignationem Tuam incurrere, & Tuae indulgentiae expectationem, gratissimam sane, nobis ipsi praescindere. Ignosce, vale, fave.



CLASSIS QUINTA & ULTIMA.

DE QUADRUPEDIBUS.

Amplissima, dubio procul, maximæque hominum utilitati cedunt animalia illa, quæ nunc nostra tractatione ut percenseamus, & ordinis ratio postulat, & instituti. Etenim, siue alimentorum adparatum respicias, siue pro morbis mediocum fontes; utrobique vel ipsa quadrupeda, vel partes eorum selectas videbis. Quadrupedum caro nimirum ob intimiorem suam analogiam cum nostra, & facilius hujus in substantiam transit, & explendis iis, quæ naturæ evacuationibus quotidie abeunt, potior sufficit, quam vel piscium caro, vel amphibiorum, vel avium. Palato equidem jucundiores esse volucres ac concoctu faciliores, nemo negabit; ast succum suppeditant leviores, minus solidum; magisque debilibus convenientem & ex morbo convalescentibus, quam quidem robustioribus, & laborum perferendorum exercitio vigentibus, quales sunt hominum plurimi. Quæ interim omnem fere quadrupedum carnis substantiam constituit, pars ejus musculosa, ea, sine dubio, & succum præbet optimum, & abundantius subministrat alimentum. Varia tamen eidem qualitas inducitur, pro vario quo animal vivit loco, pro variis quibus vescitur cibis; pro sexus, castrationis, imo rationis qua cibo adpropriatur, differentia. Sic & diversissima sunt, quæ variis ex quadrupedum partibus vario modo præparare docet ars Medica, quæque vel ex diverso artis methodo, vel varia animantis natura, vel variis ejusdem qualitatibus internis, Chymia ministra, perscrutanti Medicinæ innotescunt, suam recipiunt differentiam. Quæ omnia, quanta sint quantumque diversa, hic referendi & explicandi labore supersedemus, qui supra, quum Tomi tertii in fronte, generaliora quædam de regno animali traderemus, de omnibus hisce fusiores diximus. Repetitionis ergo inutilis atque exosæ vitium, imo speciem evitaturi, nihil ex istis hic quidem adponimus; ea tamen, quæ forsitan & adhuc addenda obvenient, suo quæque loco & ordine subnectemus.

B O S.

BOvis vocabulum, genericum apud Latinos, non solum denotando bovi inservit, quem taurum adpellant, vaccæ præterea, juvencæ & vitulo: sed etiam ad designandas boum species reliquas, domesticum scilicet atque silvestrem transfertur. Quorum quum prior saltem, communis inter omnes, aliquibus Medicinæ usibus veniat; & hic demum nostra nunc descriptione pertractabitur.

Bos. Offic. Schrod. 269. Lemer. 138. Dal. Pharm. 436. Schvenckf. *Quadr.* 63. Gesn. de *Quadr.* 25. Aldrov. de *Quadr. Bisulc.* 13. *Bos domesticus*, Jonst. de *Quadr.* 26. Charl. Exerc. 8. Raii Syn. *Anim. Quadr.* 70. *Bos cornibus teretibus flexis*; Linn. Faun. Suec. 44. *Taurus castratus*, sive *Bos*; *Bos mansuetus seu vulgaris*; Trio; *Cereris Minister*; Nonnull. Gallice: *Boeuf domestique*; *Taureau coupé*.

Bovem igitur, quum omnes norunt ac fissipedibus adnumerant, quoad externas atque internas ejus partes succincte describendo, Viros Cell. de *Buffon* & *Daubenton*, utrumque in Physicis versatissimum, duces, sequemur.

Fulvam plerumque conspicias & bovis pellem & tauri, nigro interdum & albo colore conspersam, jam candidam, jam nigram, jam flavam, jam fuscam, jam ferrugineam, jam maculis obsitam, qua qui gaudent, quibusdam Galliæ in partibus, peculiari hoc: *Gareaux*, quod ex: *bigarres* (versicolores) conflatum videtur, nomine, denotantur. Sunt, qui ex diversitate humorum, pro temperamento variantium, varium pellis colorem pendere censent, ex colore autem vel præstantiam vel inferiorem bovis ipsius qualitatem posse dijudicari. Mollior cæterum leniorque bovis pilus est, quam equi, hic enim durior est ac hirsutior.

Jam vero si longitudinis suæ mensuram exigendo, a rostro bovis, seu parte capitis sui inferiore, ad anum usque recta linea perrexeris; $7\frac{1}{2}$. circiter pedes reperies; pedum anteriorum in regione 4. pedes & $1\frac{1}{2}$. digitos, 4. tandem pedes & 3. digitos, ubi pedes ipsi sunt posteriores, altitudinem ejus exæquare videbis. Caput ejus ab extremitate labiorum, usque post cornua, 1. pedis & 9. digitorum longitudinem profitetur. Pellis suæ portio ex maxilla inferiore pendens, juxta gutturis longitudinem procurrat, deinde vero pedes anteriores pertransiens & ad genua usque producta, *palea* Latinis, Gallis: *fanon*, dicitur. Ab altera tandem labiorum commissura ad alteram, rictus aperti mensuram si ineas, integri pedis diametro eandem absolvi experieris.

Ruminantium instar omnium, bos maxillæ superioris dentibus incisoriis caret; quorum vices & officium sustinet globulus quidam, oris ex pelle interna, ibidem fortiori, efformatus. Inferioris tamen maxillæ pars anterior 8. munita est dentibus incisoriis, pro longitudine variantibus, & ita dispositis, ut longissimi latissimique medium, sensim vero decrescentes, subsequenter teneant locum. Nec infra, nec supra, caninos videbis, sed spatium quoddam amplissimum dentibusque destitutum, molaribus ac incisoriis intermedium. Maxillarum in utraque 12., 6. scilicet ex parte, reperiunt molares, quorum radices tribus plerumque uncis instructæ sunt. Et horum quidem basis, (in illa regione quærenda, qua manducando se tangunt.)

gunt,) aculeatis quibusdam confita est eminentiis, ac excavationibus alternis; quo fit, ut collidentibus dentibus superioribus ac inferioribus, hujus eminentiæ illius cavitatibus inferantur, ac liber motus maxillæ a dextera sinistrorsum relinquatur. Qui quidem dentes quum oblique resecti videantur, majorem exinde superficiem, & ad comminuendum facilitatem nanciscuntur. Cæterum maxilla inferior vix dimidiam superioris latitudinem exæquando, levior quidem & motu facilior, adtamen cibis comminuendis æque apta est, ac si latioris foret superficiem; quum enim hinc inde moveri queat, omnibus successive superioris maxillæ regionibus admoveri potest & adplicari; hujus vero dentes eum in finem latiores efformati videntur, ut latitudo eorum explendo motui illi cedere possit, quo maxilla ipsa destituitur. Ex dentibus autem & cornibus boum annos dijudicabis; decimum enim mensem quum agunt, dentes illorum anteriores effluunt, quorum in locum alii succedunt, candore primis inferiores, alt latitudine superiores; tum decimo sexto ætatis suæ mense, mediis vicini, qui lactis dicuntur, excidunt, succrescunt alii; tertium denique annum quum adtingerint, omnes renovantur, quotquot sunt, dentes incisorii, æquales, longi & candidissimi evadunt, deinde autem prodeuntibus animalis annis ac adfiduo eorum usu deteruntur, asperi redduntur & nigrescunt. Idem illud & in tauro observabis & in vacca. Nequidquam igitur, sive ad effluvium sive succretionem vel dentium vel cornuum castratio facit, seu sexus differentia, tertio etenim ætatis anno cornua sua æque taurus amittit & vacca, quibus quæ succedunt, succedentium instar dentium, constantia utrique inhaerent, nec decidunt amplius; secunda tamen vaccæ bovisque cornua, & longiora evadunt & fortiora, quam quidem tauri. Forma interim varia sese conspicienda exhibent cornua ista succrescendo; quartum scilicet ætatis annum bos dum agit, bina protuberant cornua exigua, cuspidata, æqua, & ubi capiti adhærent, in globulum quemdam desinentia; tum subsequente anno globulus iste a capite protrusus, cornu quodam, cylindrico, sensim sese conformante, ac denuo alio globulo excepto, terminatur, & sic porro; quousque etenim in vita remanet animal, eousque cornua ejus excrescunt. Globuli autem in nodos deinde abeunt circulares, quos facile in ipso cornu conspiciere, & annos quantos vixerit, hinc supputare poteris; apex etenim cornu, ad primum ex nodis, trium annorum loquitur spatium, & subsequencia binorum nodorum intervalla singula, totidem annos profitentur. Coloris plerumque sunt candidi vel pellucidi, vel turbidioris, & excavata, osse quodam conico, eodemque illo cavo, istorum cavitatem explente; ossis demum cavitas ad os frontale usque producta, sinibus frontalibus communicata est. Maxillis porro quum brevioribus bos gaudeat quam equus, & breviori ille capite instructus esse videtur. Posteriore tandem in superficie, occiput ejus reperies; parietesque minimi, sub cornibus latere videntur. Rostrum finem ipsum os frontale constituit, mediante margine quodam transversali, ex altero cornuum ad alterum pertingente, utrinque producto, tandem cornua ingrediente. Os frontale igitur superius dimidium rostri constituens, maximam illud ipsum ac præcipuam efficit equi bovisque capitis differentiam. Ossis frontalis ex lateribus, & apophysibus ejusdem inferiores videbis oculorum orbitas. Media autem altitudine superficiem superioris, superiorem reperies capitis cum

prima vertebrarum articulationem. Nec non in osse hyoide novem ossa, cartilaginibus inter se distincta numerabis. Tum septem colli vertebrae, quarum prior vertebrae equinae simillima, prima item & secunda multo longior est reliquis. Imo apophyses vertebrarum colli magnae, majorem bovis praequo fortitudinem loquitur ac virtutem. Quam interim vertebrae dorsales constituunt, columnae vertebralis portio, 2. pedum digitique unius longitudinem profitetur. Vertebrarum 13., totidemque numerabis costarum. Octo sunt costarum verae, & quinque spuriae; quarum longissimae sunt octava, nona, & decima, omnes vero graciles ac tenuissimae. Septem numerantur sternum quae componunt ossa, & cartilago xiphoidis officata, parte sua anteriore binos abit in ramos ultimo sterni ossi coherentes. Lumborum denique sex vertebrae observabis, quas, si formam respicias, si apophyses spinales latissimas; vertebrarum dorsalium ultimam exaequare videbis. Os, quod sacrum dicunt, vertebrarum columnam continuatam haberes; quatuor insuper utrinque foramina conspicienda exhibet, & quinque ex vertebrae spuriiis conflatum esse videbitur, quarum singulae sua gaudent apophysi spinosa; ac ultima excepta, omnes, ferruminatione, ut ajunt, penitus quasi, inter se connectuntur. Posticus reclinant quotquot sunt, apophysium omnes. Nec nisi decem & tres in cauda reperies vertebrae spurias, mole sua sensim sensimque decrecentes.

Tergum praeterea bovis & equi quamvis sit dissimillimum; nec posteriores pelvis partes, quoad situm atque figuram, inter se convenient: coxis tamen fere similibus uterque gaudet. Omnem vero bovis coxam aliquod triangulum constituit, basi, illaque anterieus convexa, in medio autem excavata, in altum obversa; angulo tandem exteriori tuber eximium representante, quod distinctius adparet in vaccis macilentis. In fila exit ipsum os coxae, quod infra supraque dilatatum est. Duorum quasi digitorum diametrum cavitas cotyloidea profitetur. Ossa ischia in bove, equina, crassitie superant. Ossa pubis in utroque sunt fere eadem. Pelvis vero latitudo & altitudo quinque absolvitur digitis. Magis autem bovinae scapulae figura, quam equinae, triangulo regulari accedit; latera enim illius haud adeo concava sunt, nec apophysis coracoidae adeo prominet. Humerum si respicias, 10 $\frac{1}{2}$. digitorum longum, 5. insuper digitorum circumferentiam seu peripheriam ejus esse cognosces, ubi minimus est; tres caput ejus cingunt apophyses, duae interiores, tertia vero exterior. Os, quod cubito est, radii ossi posterius nequitur, nec tamen nisi binas ejus extremitates tangit. Ipsum vero os radii, plus latitudinis habet, quam crassitudinis; & extremitatem inferiorem apophysi quadam styloidea utrinque terminatam ostendit. Omnis interim femoris longitudo, addito tamen magno trochantere, 13. digitis absolvitur. Genuum bovis patellae, inferiore sua parte, in cuspides exeunt, & 2 $\frac{1}{2}$. digitorum longitudinem profitentur; superficiem praeter ea externam valde inaequatam, nec latus interius, exterioris instar, in angulum efformatum ostendunt. Tibia bovis, equinae simillima, 13. digitorum longa est, ossis vero ipsius figura triangularis. Fibulam autem nullam reperies. Sex tantummodo sunt, quae carpum constituunt, ossa, binis disposita ordinibus, quorum prior quatuor, alter reliqua duo ossa completitur. In tarso bovis item, ut in equo, sex ossa videbis, alio vario modo in hoc, vario in illo adordinata. Ossa tibiæ fulcata sunt, etenim
stilli-

fillicidium quoddam siue canalis, eadem transit, & profundior quidem, in tibiis pedum posteriorum, quam anteriorum. Ossa phalangum priorum in digitis 1. digiti & XI. linearum longa, post suas cum tibiis articulationes, bina habent ossa sesamoidæa, illaque quoad figuram, admodum irregularia. Quatuor itaque ossibus sesamoidæis quemcumque pedem, duobus nimirum quemvis digitum instructum esse adparet. Binis tandem ossibus sesamoidæis posteriora sunt denuo alia officula bina, quorum alterum valde exiguum est.

Bovis in corde, sub valvula sigmoidæa, auriculam dextram excipiente, os aliquod oblongum, curvaturæ, qua mediante ventriculus sinister eidem inferitur, adaptatum, videbis; aliud iterum os minus, quoad figuram priori multum accedens, & in regione insertionis ventriculi constitutum, scilicet sub valvula sigmoidæa, post auriculam sinistram.

Partes vero bovis interiores disquisituro, abdomine aperto, epiploon sese offert ad vesicam usque omnibus intestinis supratensum. Quatuor præter ea, illique diversi conspiciendos sese exhibent stomachi. Primus nimirum, omnium maximus, in quem Oesophagus exit, quemque Gallico idiomate: *Panse*, *Herbier*, & *Double*, Latino ore: stomachum, Aristoteles autem: *Κοιλίαν μεγάλην*, dicunt. Secundus, qui, verum si quæris, non est, nisi continuatio primi, a Gallis: *Reseau*, *Bonnet* vel *Chaperon*, a Latinis: reticulum, ab Aristotele *Κεκύφαλος*, nuncupatus. Tertius a duobus istis probe distinctus, nec nisi orificio quodam angustissimo iisdem adhærens, Gallis: *Feuillet*, *Myre-feuillet*, *Millet*, *Pseaulier*, *Meulier*, *Mellier*; Latinis: *Obomasum*, & Aristoteli: *Ἐχίνος* audit, ac reticulo major, at quarto minor est, quem Galli: *Caillette*, seu *Franche-Mulle*, Latini: *Obomasum*, & Aristoteles: *Ἰνυσπον* adpellant. Duodenum insuper posticus, ad latus dextrum usque, procurrit; Jejunum cum Ileo post stomachum primum, ejusdemque ex latere dextro, sub Cæco, circumvolvuntur; Cæcum a dextra sinistrorsum, per transversum productum, iliacas regiones tangit atque hypogastricas. Dextram quod occupat, Colon, multotiesque circumvolutum, ovi figuram constituere videtur. Tenuium intestinorum longitudo, a Pyloro ad Cæcum 114. pedibus absolvitur. Colon cum Recto 34. pedum longa sunt, quibus si 114. pedes, gracilium scilicet longitudinem, addideris: Totam habebis canalis intestinalis longitudinem, habebis 148. pedes, excepto tamen Cæco, 2 $\frac{1}{2}$. pedum longo. Hepar nigridum, situmque ex dextra, in tres divisum adparet lobos, duos majores, unumque exiguum. Ad quinque digitos, ultra hepatis marginem, interdum prominet felle vesicula, quæ sacculum quendam, 7. digitorum longum, efformare videtur. Nec non qui pedem unum & 8. digitos longitudine sua explet, lien; sinistræ stomachi primi parti superjacet, & leucophæum in parte sua exteriori, rubro nigridum vero colorem, interiori, profitetur. Ope unius ex ramis suis, Pancreas, inferitur Duodeno. Renes insuper pluribus ex tuberculis compositi, & varias in partes divisi videntur. Medium nervosum diaphragmatis centrum, 1. pedis septemque digitorum latum, reperies, & ubi longissimum est, siue ex summo in imum descendere velis, siue ex parte anteriore in posteriorem pergas, 1 $\frac{1}{2}$. pedum invenies longitudinem. Quod vero partem ejus carnosam adtinet: latitudinem hujus, apici centri nervosi & sterno intermediam, 5. digitis absolvi scito.

Quatuor ex lobis istis, in quos pulmonum dexter divisus videtur, tres in seriem constituti invicem sese excipiunt, quartus vero omnium minimus est. Pulmonum sinister in binos tantummodo lobos abit, quorum anterior in duo quasi distinctus videtur; qui, ut lobus anterior lateris dextri, profundam in medio ostendit cavitatem. Medium pectoris cor suo sito occupat, & basi quidem obversa, apice imum spectante. Uno circiter pede digitisque tribus longitudo linguæ terminatur, ejusque partis anterioris in superficie suprema, cuspidata quædam deteges fila, durissima & posticus reflexa; quæ si inverso manus tractu transeas, limam tetigisse tibi videberis. Epiglottis post se reflexa adparet & recurvata, & cerebri longitudo integra 4 $\frac{1}{2}$. digitis absolvitur.

Cæterum ex cornigeris omnibus, summo in pretio bovem habemus, exiguis etenim sumtibus nutritur, ast utilitatem magnam præbet atque multiplicem. Bovem scilicet ovemque, non solum reliquis anteferendos esse, hominibusque, qui eos alunt, majorem utilitatem adferre: sed etiam minoribus sumtibus, quam alia animantia, sustentari & parcius vivere posse, quis est? quis negabit. Bos etenim, hoc respectu, excellentissimus omnium, non solum ea omnia terræ reddit, quæ accepit; sed potius meliorem pascuis suis qualitatem conciliat; quum equus & reliqua, paucissimorum annorum spatio, vel fertilissima prata depascendo consumant, & deteriora reddant. Quæ enim ex animalium numero, maxilla utraque dentibus incisoriis instructa gaudent, ut equus & asinus, citius illa penitusque breviores herbas depascunt, quam quæ incisoriis carent in superiore maxillarum. Idem illud & ab ove fieri novimus & capra; ast ratio alia est, dentibus nimirum instructi sunt exiguis, labiisque subtilioribus. Bovi autem labia quum sint crassiora, nihil ille nisi provectiorem herbam decerpendo, nullum pascuis detrimentum infert. Vix enim apices succrescentis graminis adtingendo, neutiquam vero ejusdem radices conquassando, parum, imo nihil moræ succretioni ejus adfert. Ovis e contrario & capra ad stipites usque gramina rescindendo, radices eorum deperdunt. Sic & equus, quæ tenuissima sunt ex graminibus, seligit, quæ autem majora & durioribus stipitibus fulcita, relinquit. Bos autem duriores stipites decerpendo, omnem sensim herbam duriores consumit. Quibus igitur equus pascitur, pascua, brevibus deteriora redduntur; quibus autem vixit bos, meliora efficiuntur; seu, ut artis vocabulo utar, sublimiora. Ast ulterius pergit bovis utilitas; tolle bovem, & dives æque ac pauper unde vivant? quis terræ cultor? quæ pratorum hortorumque fertilitas? Hunc merito dicas: laboris rustici fulcrum, utilissimum villarum incolam, hunc caput agriculturæ & auctorem. Hic quondam hominibus erat pro divitiis, hodie constituit opulentiae fundamentum. Ecquis enim status florebit, nisi ager colatur; [quæ respublica sustentabitur, nisi pecoris abundantia? His vera insunt pretia, his bona realia; reliqua enim omnia, immo vel aurum & argentum, nil habent valoris intrinseci, nil realitatis, nisi quantum ex arbitrio hominum & opinione pendet, quantum ex fructibus terræ recipiunt.

Jam vero si dorsi bovis figuram respicias, si tenum suorum conformationem; portandis equidem oneribus, præ equo, camelo, mulo, asinoque ineptiorem dijudicabis: sed si colli crassitudinem & vires, si humerorum

spatium consideres; protrahendis illum plaustris dices aptissimum, jugoque portando. Colli igitur ope facilior expeditiorque sufficit devehendo oneri cuivis; & mirum sane videtur, quod variis in terris, cornuum, nec colli auxilio, ad protrahendum adigatur. Rationem quærentibus nobis, nullam reddidere nisi hanc: quod ex cornibus vincitus faciliori ope conducipossit atque dirigi. Cæterum, quum & permagna vis insit suo capiti, vel ex cornibus plaustro nexus, illud protrahendi facilitate quadam gaudet, majori nihilo tamen minus, si ex humeris alligatus fuerit. Aratro præsertim destinatus esse videtur; etenim & corporis sui moles, & motus lentior, & crurum brevitās, & in laboribus perferendis perficiendisque patientia, eo tendere videntur omnia, ut colendis agris aptior, & superandæ semper novæ percindendi soli resistantiæ sit sufficiens. Ineptior sane foret equus, quamquam nec viribus minor, nimium scilicet elevatis innititur cruribus, motus edit nimis violentos, nimiumque feroces, & laboris ægri impatiens, statim recalcitrat. Omnem ipsi auferes agilitatem, & motuum suavitatem, & incessus ac alacritatis præstantiam, si ad ærumnosum huncce laborem, ipsum adigere velis. Hic enim plus constantiæ, quam ardoris requiritur, plus molis quam agilitatis, plus ponderis quam alacritatis.

Variis est, ut supra diximus, pili bovini color, omnium tamen frequentissimus, ruber, & quo rubrior, eo magis in pretio habitus. Nec non illi, qui nigro seu obscuriori pilo teguntur, pluris æstimantur, hos enim diutius perdurare posse censent; at haud adeo multis perferendis rufos sufficere credunt, & jugum citius detrectare; candidos tandem, leucophæos & maculis conspersos, oneribus impares, nec nisi saginandos esse perhibent. Qualiscumque interim coloris fuerit pilus bovinus, tactu sit mollis, splendens & copiosus; quum enim hispidus fuerit ac rarus, seu male dispositus, vel imbecillioris salutis, vel temperamenti debilioris signum cognoscas. Is tandem aratro aptissimus judicetur, qui nec nimia pinguedine abundat, nec adeo macilentus, capite brevior gaudet atque robusto, & auribus magnis, pilosis, compactis; & cornibus validis, lucentibus, mediis; fronte patente; & oculis magnis nigrisque; rostro præter ea fortiori ac adunco; naribus amplis; dentibus candidis ac æqualibus; labiis nigris; collo carnosio; humeris magnis & ponderosis; pectore lato; paleari genua pertingente, renibus latissimis; ventre amplissimo ac pendente; lateribus magnis; scapulis longis; tergo crassiori; cruribus lumbisque fortibus & nervosis; dorso recto & pleno; cauda ad terram usque producta, ac pilis copiosis subtilibusque confita; pedibus tandem firmis; corio fortiori, at palpabili; musculis elevatis; ungulis brevibus latisque. Cæterum facilis aculeum sentiat, & hominis voci obsequatur, & ad labores perficiendos usu adsuæfactus sit. Quum igitur perferendo jugo, & in magistrum suum obediendi adsuæfacere cupias bovem: a teneris ut incipias, necesse est, nec vi sed sensim sensimque condocere facere pergas. Peracto nimirum secundo & dimidio, ad summum tertio vitæ suæ anno, nisi mansuetum reddere ordiaris; indocilis redditur, nec domari amplius potest. Nec tamen aliis utare mediis, quam patientia, lenitate ac blanditiis, quippe qui vi atque austeritate efferaretur. Corpus igitur levi sæpius affricu permulceas, blandiaris, & hordeum aliquoties præbeas elixum, & fabas contritas, aliaque huiusmodi nutrimenta, sale præsertim commixta, his enim inhiat gulosis-

simus. Sæpius inter ea cornua sua ligamento quodam cingas; aliquot tandem exinde diebus, alteri cuidam bovi, sibi quoad fieri potest, simili, junctum, aratro committas, ambos eidem præseprio adnectas, in eadem pascua conducas, ut societatis vinculo uniti eosdem continuo motus edere discant. Omni præsertim stimuli usu abstineas in principio, eo enim ferociorem redderes bovem & intractabilem. Quum denique ipsum arandi opus adgressus fuerit, & largius eundem pascas, necesse est, & frequentia concedas interstitia laboris, laboris etenim adhuc insuetus, majores quam par est, vires profundere solet.

Quæ autem de longitudine sulci, quem uno halitu perficere bos possit, censuerunt antiquiores, huc redeunt: quod absolutis 120. passibus, temporis spatiolum, quo respirare possit, interponendum; hoc peracto demum, arationis opus denuo exordiendum sit. At antiquioribus ipsis agriculturæ studium delectamento cedebat, hinc & ea quæ adtulimus, magis ad agricolæ commodum spectare, quam ad bovis conservationem necessaria esse credimus. Nunc autem alia est facies rerum; & qui terram colendi artem minori in pretio habent, nec curant, nec promovent, illi sunt, in quos maxima agriculturæ emolumenta redundant.

Quum igitur a tertio ad decimum vitæ annum, scindendæ terræ atque aratro inservierit; satius est, si faginaturn tunc lanienæ destinetur, multum enim pretii sui amitteret caro, si diutius jugo subesset. Melius tamen tempus æstivum faginationi convenit, parciore enim tunc sumtibus, & si Majo, mense, seu Junio incipias, vergente jam Octobre, perficietur. Hunc igitur in finem, ab omni labore amoto, frequentiore præbeas potum, & succo abundantia illaque copiosa nutrimenta, parum salis ad excitandum appetitum nonnunquam admisceas; & quousque libet, ruminetur, maximoque solis calore, stabulo detentus quiescat. Vix 4. ad 5. menses præteribunt, & tantam jam nactus erit pinguedinem, ut ægre vel incedere, nec nisi brevissima itineris spatia, per dies conficere poterit. Summam tunc ponderis sui 500. ad 600. libræ constituunt, imo hos, quos Limosinensis regio & Pictaviensis inferior alit 900. libras interdum pertingere novimus.

Nec tamen illa animalia pinguedine ac mole reliquis anteferenda esse, quæ diutiores profundioresque somnos ducunt, vel bovis exemplo comprobari potest, is enim & brevi sese somno refocillat & levissimo, siquidem vel minimo strepitu excitatur. Lateri plerumque innititur sinistræ, & sinistrum ex renibus dextro semper majorem pinguioremque esse observamus. Sæpissime autem alterum ex renibus aqua plenum vidimus; alterutrum item aliquoties pueri caput, præ magnitudine, æquiparantem; alterutrum vero vix ovis renem referentem. Quidquid unum saltem nonnunquam deteximus, alterius locum cumulo, quodam adipis occupante.

Lentior equus per integram diem noctemque, bos vero citior, vix horæ unius spatio, omne quod sibi competit, alimentum, consumit, exinde autem ruminatur. Cujus causam varie conformato utriusque stomacho tribuas. Quum etenim primus bovis stomachus cum secundo non nisi unum constituent saccum, licet amplissimum; multæ idem herbæ simul capiendæ sufficit, quam sensim exinde inter ruminandum digerendi & tempus superest, & reservandi spatium. Equus autem multo minori stomacho instructus, non nisi exiguam herbæ quantitatem capere, & successive illum ex-
plere

plere potest, prout nimirum herbam sensim desidendo intestina ingredia-
tur; & quidem in his, quam nutrimentorum decompositionem dicunt,
conficitur. Examinando etenim, quanam ratione & in equo & in bove
digestio, & in primis fœni decompositio procedat, in bove observare da-
tum fuit: quod egrediens ex secundo stomacho fœnum, in massam quam-
dam transierit viridentem, contusæ & elixæ herbæ, quam ligulatam dicunt,
simillimam; quod eandem formam conservando, plicaturis seu foliis sto-
machi tertii inhæreat; quod tandem stomacho in quarto integra ejus de-
compositio conficiatur; quodque non nisi fœni fæces, ipsa intestina ingre-
diantur. Ast in equo vidimus, quod haud ita magna eveniat fœni decom-
positio, nec in stomacho, nec primis intestinis, sed mollius saltem flexi-
biliusque reddatur; liquore etenim activo cui innatat, penetratur ac ma-
ceratur; quod Cœcum & Colon usque, haud adeo alteratum perveniat;
quod in his præcipue duobus intestinis, (quorum capacitas amplissima, ca-
pacitati respondet stomachi primi in his, qui ruminantur) nutrimenti ejus
decompositio peragatur; quæ tamen hac, quam quarto bovis in stomacho
confici diximus, multo est imperfectior.

Quibus rite perpensis, si vel ipsas animantium partes respicias, facile &
ipsum ruminationis modum mente concipere, & rationem reddere vale-
bis, qui fiat, quod nec ruminetur, nec revomat equus; bos vero & reli-
qua, multiplici stomacho instructa, herbam, prout ruminantur saltem, di-
gerere videantur. Est enim ruminatio, vomitus quidam haud violentus,
stomachi primi reactione in alimenta quæ continet, productus. Primo ete-
nim & secundo bovis stomachis, ad summum repletis, extensa statim mem-
brana, in hanc, quam continet, herbam, reagit fortissime, quæque parum
comminuta, fermentatione accedente, in amplissimum exaugetur volumen.
Quæ quidem vis contractionis, liquidum si foret alimentum, in tertium
ex stomachis illud protruderet, hic enim non nisi conductu quodam angu-
stissimo alteri adhæret, imo conductus orificium, primi ex parte superiore
situm, situsque præ altitudine, œsophagi orificium fere pertingit. Quæ
quum ita sint, nulla alimenta sicca, ad summum, partes horum fluidiores,
conductum ipsum intrare posse vides. Ad œsophagum itaque, ampliori ori-
ficio instructum, adscendant necesse est, partes aridiores; quo quum per-
venerint, iterum dentibus animalis contritæ, & maceratæ, sensim fluidio-
res redduntur; liquefactæ tertii stomachi conductum ingrediuntur; ibique
antequam ad quartum devehantur, denuo macerantur; quarto tandem in
stomacho omnis fœni, jam reducti in mucilaginem, decompositio perfici-
tur. Quæ autem hanc nostram ruminationis explicationem comprobare vi-
dentur, hæc sunt: quod quamdiu vel lacte aliisve nutrimentis vivant flui-
dis ruminantia animalia, tamdiu non ruminantur; plus item hyeme, &
aridis alimentis nutrita, quam quidem æstate, succulentam herbam depa-
scendo. Equus autem stomacho valde exiguo gaudet, & Oesophagi orifi-
cio angustissimo, Pyloro vero amplissimo. Jam vel sola hæc partium con-
formatio ruminationis possibilitatem præscinderet, nutrimentum scilicet,
stomacho contentum exiguo, licet majori violentia compressum, quam
bovis in stomacho ampliori, nec adscendat necesse est, siquidem facilis
ipsi per Pylorum, amplissimum, transitus patet; nec fœnum, quo Pylorum

ingredi possit, adeo molle sit ac fluidum, requiritur; sed magna ista contractionis stomachi violentia, tantum non aridum adhuc alimentum, eo protruditur, nec per Oesophagum redire potest, cujus quidem conductus, si pylorus conductui illum æquiparare velis, valde exiguus est. En tibi generaliore bovum & equi differentiam, cujus ergo bos, nec equus, ruminatur. Aliud autem & adhuc in equo videbis, discrimen specialius, quod omnem removet & ruminationis, sive vomitus haud violenti possibilitatem, & vomitus plane omnis, si vel vires intenderet, quas potest, maximas. Oesophagi conductus scilicet equi in stomachum valde oblique inferitur, & stomachi membranas crassissimas transeundo, aliquod stillicidium adeo obliquum constituit, ut stomachi convulsionibus non dilatari, sed constringi saltem possit ulterius.

Alii sunt, qui quo segnius bovem manducare observant, eo diutius perferendo labori eum sufficere censent; & illum, qui aridis altioribusque vivat in terris, alacritate & salutis vigore, hunc, qui in humidis nutritur ac inferioribus, superare; & fœno arido vescentem fortiores esse illo, qui herba alitur molli; & ægrius, quam quidem equi, cœli sub quo vivat, commutationem perferre; bovem igitur iugo subdendum, non nisi ex regionibus admodum vicinis accersendum esse suadent.

Hyeme autem labore desistentem bovem, stramine ac pariori fœno sustentare sufficiat; æst agriculturæ officiis fungentem, majori fœni, quam straminis quantitate nutrias, furfure item seu avena, priusquam labori accedat, reficias. Sed æstate, deficientis fœni in locum, herba succedat recens refecta, propullulantes fraxini gemmæ seu folia, ilicis item, & ulmi, parcissimæ tamen; quarum scilicet abundantia, quas peramant, sanguinis mictum aliquoties causatur. Substituas si videbitur, luzernam, trifolii quæ species est, vel vicias, sive virides sint seu aridæ, vel consolidam majorem, hordeum elixum, lupinos, rapasve, quippe quæ omnia optimo bovis nutrimento cedunt. Nec est, quod nutrimenti ejus quantitatem determines, abundans præbeas potius, & accepto quantum sibi bos competere novit, reliquum omne intactum relinquet. Nec nisi idibus Maiis circiter, pascuo illum committas, præcociiores etenim herbæ, quum crudiores sint, multiplex saluti ejus incommodum adferunt. Peracta tandem omni æstate in pascuo, idibus Octobris ad stabulum conducas; nec tamen repentina mutatione pabulo sicco succedat viride seu recens, nec recenti siccum; sed gradatim, ut ajunt, alterum subtrahas, alterumque substituas.

Cæterum nimii caloris magis impatiens quam frigoris, oriente æstatis sole, opus suum adgrediatur, sole autem meridiano, vel stabulum, vel pascuum umbrosum ingrediatur; nec, nisi tertia vel quarta hora pomeridiana, ad novum laborem adigatur; veris, e contrario, tempore, hyemis & autumnii, haud interruptum, a quarta tertiave antemeridiana, ad quintam vel sextam pomeridianam, suum producat laborem. Minori quidem cura, quam equus, indigent boves, æst si sanos cupias, & vigentes, quotidiana opus est strigile, & lotionem, & cornuum, quæ pedes tegunt, seu solearum abrasione. Binis ad minimum, in die, potum præbeas; aquam vero limpidam & refrigeratam præoptant turbidæ tepidæque, qualem per-

amat

amat equus. Plena cæterum quiete fruente, delambere sese solent boves, quo quum pinguedinis incrementum præpedire credantur, omnes, quas pertingere possunt, corporis sui partes, stercore illorum oblinas necesse est. Alias etenim lingua sua asperrima, omnem defricant pilum, exinde autem deglutiunt. Hic concoqui nequit, residet in stomacho, & in globulos istos abit, quos *Egagropiles* Galli, *Tophos* vero Bovinos Latini dicunt. Hi molis suæ ergo, nonnunquam omnem alimenti concoctionem impediunt; hi sensim sensimque crassa quadam fulva ac solidissima obducuntur, quæ non est, nisi mucus condensatus, coctione & adfrictione induratus & splendens; nusquam tamen, nisi in stomacho primo *tophos* reperies, qui si reliquos ingrediantur, nec in his, nec intestinis remanent, sed una cum facibus alimentorum abire videntur.

Bovis igitur nostri species, quam & ab uro, & buffalo, & tauro silvestri probe distinctam habeas, temperatiores cœli tractus, patriam cognoscere creditur, etenim & caloris & frigoris nimii impatiens est. Quantumque autem ejus numerum Europæorum in regionibus videas; ne unum quidem trans regiones Meridiei, Armeniam, Persiamque, quoad Asiæ terras, (testis est *Chardin* in itinerrario) nec ultra Ægyptum & Barbariam, quoad Africæ provincias, ne unum, inquam, reperies.

Cæteris enim Africæ in partibus, ac ipsa in America tauros saltem silvestres, dorso gibbofo instructos reperies, quibus boum nomen indidere, qui eo peregrinati sunt. Quos vero Promontorium bonæ spei alit, quosque aliæ regiones Americæ, ex Europa, vel Belgarum studio vel Hispanorum, eo deportati sunt omnes. Magis autem bovis nostris cœli tractus aliquantum frigidior, quam calidior convenire; illique pro humidioris cœli temperatura, pro copiosioribus terræ, qua vivunt, pascuis, & mole & robore majore gaudere videntur. Omnium maximi hi sunt; quos Dania alit, & Podolia, Ucraina, Tartariæque regio a Calmucis habitata; qui in Hibernia nascuntur, & Anglia, Belgio & Hungaria, omnes, quos Persia producit, quos regnum Turcicum, quos Græcia, Italia, Hispania & Gallia, magnitudine superant; qui tandem Barbariam pro patria habent, omnium minimi sunt.

Cæterum nec tantæ bos molis est, nec adeo omni agilitate destitutus, qualis primo forsan intuitu videretur. Eadem enim providentia & cura, non dicam majori, quam equus, passum, si quo fefellerit, emendare, & gradum revocare novit. En, dictis subnectimus factum. Iter suum peragens illorum quidam, quos boum contrectatores seu palpitatores dicimus, prout sibi obvius, pascendi ergo, quum boves suos commisisset, supinus, ubi per septum introitus patet, laborum gravitate onustus, somno corripiebatur; quem quum profundissimo somno immersum brevi exinde adpropinquans ex bobus observaverit unus, tanta illum agilitate transibat, ut vix ac ne vix quidem tetigerit, quo conspecto, & secundus, tertius, quartus, ad unum denique omnes, idem illud iter ingrediebantur. Expergefactus tandem homo, & summo stupore correptus, nullum ibi amplius bovem reperiebat, ubi securissimos crediderat omnes. Sæpiissime autem tale quid accidisse novimus, præsertim, quum nec canis, domini in locum, fuerit pro excubiis. Quos Pictaviensis inferior regio alit, boves,

adi-

adipe plerumque flavido gaudent, & paucissimos adhuc annos dum agunt, faginari solent; mansueti cæterum & timidiores, facile efferantur, nisi noctu potius, quam interdiu, eosdem abigas & conducas. Sæpius etiam hominum in concursu, seu nundinis, terrore corripuntur, nec ullo modo ad obsequium redigi possunt, sed usque dum præ lassitudine spiritus deficiat, citissimo cursu & indomito vel in ipsos homines incurrunt, eosque jam lædunt, jam enecant. Quos lanienæ præbent, boves plurimi, uno, ad summum, duobus ictibus obmutescunt, & prosternuntur; alii e contrario, gravissimos mugitus edendo, vix centesimo ictui cedunt. Teste *historia Regiæ Scientiarum Academiæ anni 1703. pag. 26.* Vir Cel. du Verney junior, cerebrum bovis, omnibus suis partibus petrificatum, & præ duritie, calculum referens, Academiæ examini subjecit. Variis tamen ejusdem in locis, substantiæ mollis ac spongiosæ supererant portiunculæ. Spinæ medulla una cum nervis cranii, in base obviis, pristinum suum conservaverant statum. Cerebrum cum cerebello & pia mater petrificata, omnisque horum massa adeo defigurata erat, ut vix alias ab aliis partibus dignoscere posses. Cæterum tanta bos iste instructus erat salutis vigore, pinguedine multa, ac viribus tantis, ut vel quater repetita fuga, lanii ictus effugere tentaverit. Et hoc eo magis dignum notatu judicamus, quum unicum saltem, & quidem a Bartholino relatum, Cel. du Verney reperierit exemplum, bovis scilicet in Suecia enecati, macilenti tamen, & dum viveret, languescens, cujus post mortem, cerebrum petrefactum reperire. Facilis denique vel costa bovis vel crus fractum de se ipso, nec adplicato plasmate adstrictorio, sanatur; centum enim ex bobus, decem sæpius costa quadam fracta laborantes reperies, videbis autem & costam denuo connexam, & callo, ferri instar duro, obductam.

Jam vero morbos, quibus subjacent boves, omnes fere, nimio eorundem labori tribuendos esse teneas; tales sunt: nausea, languor, cordis dolores, colici, alvi tormina & profluvium, cordialgia, flatuum retentio, indigestio, sanguinis pro urina ejectio, maceries, phthisis, seu febris hæctica, quam Galli, vulgo: *le Cru*, nomine designant, epilepsia, quam: *Laurdelle* seu *Lourdine* dicunt, plagæ ex cute perstricta oriundæ, durities in cervice obortæ, luxationes, angina, oculorum adfectiones & scabies, aliique quorum descriptionem æque ac remedia ex libro, cui titulus est: *nova domus campestris*, si libet, haurire licebit. Infestissima tamen ex omnibus pestis est illa, quæ, devoratis tot armentorum millibus, apud Gallos, anni jam sunt, cessavit, nunc autem Belgii, Angliæque pascua devastatur. Medium, quo huic morbo obveniri possit, illudque singularissimum, acta publica nuperrime exhibuere, nos vero, publicæ utilitatis amore studioque incitati, hisce scriptum referemus:

Armentorum pesti, præsentis omnis fere Europæ flagello, subventuri varii, varia excogitarunt media ac commendarunt, quorum tamen nullum hætenus vel præpediendæ, vel profligandæ, jam infectorum pesti sufficisse, heu! novimus. Quidquod, animum jam perterritum atque depressum videmus in his, qui varia circa ægrotantes boves, experimenta instituere valerent; statim enim, ex quo pestis signa quædam in animantium aliquo observata fuerint, enecandum esse illud & reiciendum, magna mulcta, jussum est.

En,

En, quam ratione eques quidam, Eboracensem Ducatum, Angliæ provinciam, colens, contagionis ab effectibus præservare studuit sua armenta. Inoculatione nimirum, quam sequenti modo perficiendum esse docet: Sanguinem ante omnia armenti emittas; tum bis, terve, refrigerante quodam medio expurges; exinde palear incidas, glomera ex stupa confecta, humorique, quem ex naribus & oculis armenti ægrotantis destillare vides, immersa, vulnere palearis immittas, ac biduo triduoque, (hoc enim morbus sese manifestare solet) ibi relinquant; pascuo tandem, donec contagiei crisis transferit, armentum includas, nec sicca nutrimenta præbeas, sed vel furfur parumper elixum, vel variorum eduliorum farraginem tepidam.

Et hujus quidem medii successus felicissimus, Vir Cel. *Dobson*, sua ipsius experientia, vel maxime faviente contagie, instituta, comprobatos fuisse testatur. Inventioni autem ipsi ansam præbuisse videtur variolorum inoculatio, & in Anglia, & aliis regionibus jam frequentissima, de qua in schediasmate suo, Vir Cel. *de la Condamine*, Regiæ Scientiarum Societatis Socius, æque erudite, ac fusius tractavit.

Taurus interim, quem taurum non castratum, *Schwenckfeldius* nuncupat, non est, nisi masculus vaccæ. Hic enim propagandæ potius speciei destinatus, jugo quamvis interdum subdi possit, & subjugetur; facilis tamen jugum detrectat, obedientiam magistro renuit, & quibus gaudet, viribus abutitur. Quem enim ferum atque indocilem esse voluit natura, ætus Veneri, (seu ut artis vocabulo, Latinis auribus ingrato, utar: catulitionis) tempore, domari amplius nequit, sæpe in furorem abripitur. Castratione autem, furoris impetusque origine obturata, nec viribus tamen imminutis, fortior, ponderosior, & cui destinatus est, labori, aptior, mansuetior, dociliorque redditur. Cohors etenim taurorum nec hominis viribus domari, nec consilio regi posset. Antequam vero ipsum castrationis modum descriptione pertractemus; necesse est, ut de partibus ejus, generationi inservientibus, tam internis, quam externis, succincte saltem, agamus.

Pedum circiter duorum spatium anum interest & scrotum, quod ad dimidii pedis longitudinem, sub ventre, protenditur. Quatuor præter ea verrucas observabis prominentes, scroto anteriores, binas ex utraque virgæ parte, ac singulas unius digiti spatio inter se distantes; quæ quidem tauri verrucarum dispositio, ordini papillarum vaccæ, adcurate respondet. Virgæ ipsius longitudinem, si a bisulcatione corporis excavati ad insertionem præputii perrexeris, 2. pedibus, & 4. digitis absolvi videbis. Per omnem vero suam longitudinem, glandis instar, partem supremam aliquantulum planam exhibet, nec non eandem, qua & glandis basis conspicua est, & latitudinem & crassitudinem. Testiculi, ovi formam, 4. digitorum longitudinem, substantiam vero interiori flavidam profitentur, cujus in medio, nucleum quemdam longiusculum, illumque candidum, observare licebit. Tum epididymis, 2. digitorum per longitudinem producta, marginem testiculi inferiorem pertingit; posterior autem epididymidis extremitas, 9. linearum longitudine ultra finem testiculi prominendo, tuberculum quemdam, 9. fere linearum diametro, efformat. Canaliculorum deferentium diameter 9. circiter linearum capacitatem adimplet. Duo, præter ea conspicienda veniunt ligamenta, altera eorum extremitate primis caudæ vertebrae juncta, deinde autem sub ano, quem circumdant,

convergentia; depressa, ad virgæ longitudinem eousque procurrentia, ubi eidem cohærent, ubique virga duplici modo inflexa, S, romanorum litteram, effingere videtur; virgæ autem lateri utrivis, ad præputium usque superjacent, imò & huic bini adhuc sunt muscoli, sub abdomine producti, ac per partes tendinosas, ad ani regiones usque procurrentes, qui retrahendo præputio inservire censentur. Vesicam ejus ovalem reperies, urethram musculo fortiori atque crassissimo extus obductam, & sex digitorum longam, si a vesica, ad corporis concavi bifurcationem perrexeris. Vesiculæ tandem spermaticæ, 4. digitorum longæ, pariter ac humani, variis ex cellulis compositæ sunt, & prostratæ 15. linearum longæ; prope musculos denique accelerantes, duas observabis glandulas, in urethram evergentes, & liquore quodam flavido, prostratarum fluido simili, repletas.

Omniū vero, quæ a bove diversa habet taurus, rationem, non nisi ex castratione illius revocanda esse, nemo negabit; hunc enim vigoris, ardoris, imò ferocitatis plenum, istum stupidum, viliorē, timidumque cognosces. Castrationis tempus alii Majum, mensem, seu verem, alii autumnum constituunt; in eo tamen omnes conveniunt, quod matutinum feligant, antequam scilicet stabulum egressus fuerit taurus. Musculos igitur testiculorum, exiguis corripunt forcipibus, scrotum incisione aperiunt, testiculos extrahunt, nec nisi musculis cohærentem eorum portionem relinquunt; tum vulnus ipsum quodam vel balsamo, vel oleo adfricant; tandem aliquod emplastrum adplicant; parum in ipso operationis die, nutrimenti, nihil prorsus ipsi potus præbent; subsequētibz vero diebus, aquam parciorē, & pro succrescente animalis adpetitu, & herbam recentem, & abundantiorē potum subministrant.

Qui quidem castrationis modus, quamvis rusticorum vix ulli ignotus sit; varia tamen ratione, varii taurum castraturi, procedere solent, neglecta, ut censemus, diversorum effectuum, adcurata observatione. Quod igitur ætatem spectat, convenientissimam hanc, quæ pubertatem immediate præcedit, judicamus, decimum scilicet & octavum vitæ suæ mensem, vel secundum tauri annum; quos enim citius castrari vidimus, eos fere omnes periisse experti sumus. Quosdam interim vitulorum, brevi ex eo, quum nati fuerint, castratos, operationis hujus periculum pertulisse ac vitam conservasse novimus, & si excreverint, fortiores, pinguiorēque reliquis evasisse scimus his, qui secundo demum, vel tertio, quartove ætatis anno testiculos suos amiserant. His tamen major vis remanet atque agendi robur; imò, qui non nisi sexto, septimo & octavo vitæ anno resecantur, parum, imò nihil ex reliquis masculini sexus qualitatibus, perdere videntur; impetuosissimi etenim, ac reliquis docilitate inferiores, catulitionis tempore, furiosi vaccas sectantur. Cautione hinc opus est, & vaccarum remotione; tauri enim coitu, vel tactu saltem, vaccæ in vulva caruncula, vel verrucarum species enascuntur, quas ferro candenti aduras, necesse est. Et hujus rationem in eo quærendam esse censemus, quod boves isti, quorum testiculi saltem compressi, ac vasa deferentia, non nisi contorta sunt & occlusa, liquorem, subpurulentum forsan, eiiciant, qui talia vaccæ in vulva producit ulcera, quæ tandem in carunculas abire videmus.

Quem vero vaccis destinare cupis, taurum, equi instar, ex pulcerrimis quibusque feligas; hunc igitur quæras, qui eleganti membrorum conforma-

tione, & abundanti gaudeat carne; oculo nigro, adspectu feroci; fronte prominente; capite brevi; cornibus crassis, brevibus, nigris; & auribus longis atque villosis; rostro magno; naso brevi & recto; collo pinguiori & crasso; humeris & pectore latis; renibus fortissimis; dorso recto; cruribus crassibus, multaque carne obductis; cauda longa atque pilosa; gravi incessu atque sicuro, pilo tandem rubro. Mediam vitæ suæ agat ætatem, sive spatium tertio suo anno & nono intermedium; huic igitur 15. vaccas, ad summum, socias jungas. Nec ea cures, quæ ab aliis forsitan recensita tenebis, quod scilicet, vel decimum & quartum vitæ mensem agens taurus, 20. 40. imo 60. vaccis prægnandis suffecisset. Primo sæpius, interdum & secundo seu tertio tauri congressu, vaccæ imprægnari solent, quas, quum conceperint, nec taurus, ardore licet sufficiente instructus, ad ulteriorem coitum lacepsit; pluries tamen, tauri ardor, ex quo conceperint, refrigeratur, & vaccæ, redeuntem tunc taurum ferre recusant. Decimo & octavo vitæ suæ mense, vacca, secundo autem anno taurus, pubertatem & gignendi facultatem consequuntur; nec tamen, nisi tertio demum anno peracto, coitum illis permittere satius est; ab hoc enim, ut supra jam diximus, ad nonum usque annum, omnibus sibi destinatis viribus gaudent. Exinde autem, nec vacca nec taurus, nisi saginationi & lanienæ veniant. Quum igitur duobus plerumque annis, integram, quæ ipsis competit, molem, excretionem adtingant; lege, animalibus fere communi, vix septies binos superant ætatis annos, decimo quarto enim vel quinto moriuntur.

Vocem maris ex quadrupedibus omnis, voci fœmellæ graviores esse ac fortiores, sine ulla exceptione, censemus. Nec antiquiorum sententia obstat, qui vaccæ, vituli, & bovis vocem, tauri mugitum gravitate superare scripserunt; hunc quidem remotior præ illa percipere poteris, ast ratio hæc est: quod simplici quamvis unicoque sono, tauri mugitus absolvi videatur, duabus tamen tribusve octavis (sic enim sonum eundem, gravitate saltem ab acutiore diversum, adpellare docet ars Musica) componatur, quarum acutior saltem aurem adficit; ad quam si attenderis, acutiores simul sonum percipies & gravem, imo graviores ac diutius continuatum, quam vel vaccæ, vel bovis, vel vituli. Taurum non, nisi amoris pruritu incitatum mugitus edere audies, vaccam frequentiores, præ horrore atque terrore; vitulum denique præ dolore, & deficiente nutrimento, & matris desiderio.

Conspecto autem colore rubro, taurus in furorem rapitur, ast armenti agmen ducere, & pro defendendo illo, vel certamen ingredi numquam recusat. Binæ vero vaccarum cohortes si uno quodam pascuo continentur; utraque relicta, taurus uterque, alterius conspectum, mugiendo subit, per transversum respicit, vindictam spirat, terram pedibus proculcat, pulverem recalcitrando excitat, impetuosissimus tandem in alterum irruit, ac pertinacissima pugna conflictatur, eaque, non nisi vel devicto, vel remoto debiliore, desistit. Tunc tristitia ac pudore oppletus devictus recedit, victor autem elevato capite & victoria elatus, per triumphum, revertitur. Nullum umquam ex hostibus pertimescit, cuiusque potius, sive canis sit, sive lupus, imo leo & ursus, victoriæ fiducia fretus, imperterritus sese offert. Nec non in spectaculis publicis, atque privatis, ubi vel hominum

arti, vel animalium ferocitati expositus est, non solum pugnam acerrime sustentat, sed etiam eo usque conflictatur, quo vel innumeris vulneribus confossus, vel dentibus dilaniatus, cum vita, animum efflare cogatur.

Vaccam, seu tauri fœmellam, Latini alias: *Bovem fœminam* seu *lactariam*, *Tordam* item, seu *Hordam*; Galli: *Vache* adpellant, & quousque nullos adhuc fœtus utero gesserit, *Juvenecam* seu *Tauram*, Latini, *Genisse* seu *Tauve* nuncupant Galli. Quam si Anatomico examini subiicias, 2. circiter digitorum distantiam anum inter videbis & vulvam, quæ non nisi 3. longa est digitorum. Verrucarum quatuor numerabis, quadrati figura dispositas, singulasque duobus digitis elevatas, & 3. digitorum peripheriam, ad basin, profitentes; extremitatem vero earundem conglobatam videbis, & orificio quodam perforatam, quod non est nisi os cujusdam canalis, diametro suo unam fere lineam explentis, ast prout verrucæ adpropinquat, sensim dilatati. Pars tandem ejus inferior, excavata, cavitatem aliquam, cuius verrucæ superiorem, constituit. Et hac quidem cavitates unum circiter, profunditate, digitum, ab ipsa basi verrucæ, ad substantiam glandulosam, in fundo ejus obviam, explent. Hæc vero substantia, x. fere digitorum longa, in binas distinguitur partes æquales, textura quadam cellulari sibi junctas. Aliquantum profiliens glans Clitoridis est, vagina autem, pedis unius longa, variisque rugis, ad longitudinem procedentibus, instructa. Vesica insuper, fere rotunda, maris vesica amplior; urethra autem 4. digitorum longa est. Matricis denique orificium rotundum, majusculis constipatur tuberculis, ast corpus ejus, situ suo naturali constitutum, est valde exiguum. Cornua illius, invicem sibi juncta, 1. pedem & 8. digitos, longitudine, a matrice ad extremitatem illorum; & testiculus ovi formam exhibet. Tuba tandem in aliquod umbraculum exit.

Omniū vero animantium, quæ in greges colligendo, numerosa reddeere studuerunt homines, fœmellam & magis necessariam & masculo utiliore esse, omnis loquitur experientia. Quos enim vacca subministrat productus, nonne quovis momento succrescunt, adaugentur? Et quantis quæso, hodie fame esset pereundum, nisi vacca sua vitam sustentarent? Miseris enim, qui a mane usque ad vesperam, laborum molestiis defatigati, terram perfcindere desudant, miseris, inquam, quanti supersunt sudoris fructus, quanta molestiarum utilitas? panis, ad summum, aculeatus; aliis optimum frumenti sui cedant florem, nec nisi paleam sibi habeant. Iis, nec tamen iis abundant messes. Sic & qui pecoris in pascua abigendi, multiplicandi ac educandi cura continuo occupantur, nec laborum fructus ipsi percipere, nec pecoris quidem carne vesci, audent; obstat conditionis duræ necessitas, aliorumque vel gula vel austeritate coacti, hordeo & avena, equorum instar, vitam producant.

Vaccam, bove licet debiliorem, ad aratrum protrahendum aliquoties inservire novimus. Fiat, dummodo maxima, quæ haberi potest, habeatur ratio conformitatis, virium, magnitudinisque suæ, & bovis sibi focii; quo æqualior enim utriusque conatus, quo æqualiores utriusque vires; eo faciliior ac regulatior ipsa procedet aratio. Cæterum, sex interdum ad octo boves perfcindendæ duriori terræ & in glebas magnas abeunti, vix sufficiunt, quum perarando solo arenoso, binarum vaccarum vires respondeant.

Veris autem tempore, plerumque coitum adpetit vacca, & quæ nostris regio-

regionibus vivunt, ab idibus Aprilis ad idus Junii usque ascensurum ferunt taurum, & imprægnantur. Citius aliæ, aliæ tardius. Quem igitur novem per menses utero gesserunt, foetum, ineunte decimo edere solent. Hinc abundantissimam vitulorum copiam, ab idibus Januarii ad idus Aprilis, frequentem & æstate, parciorem vero autumnò, habemus. Nec indubia sunt signa, quibus suum coitus desiderium indicat vacca; tunc enim & frequentiores & vehementiores solito mugitus extollit; & in vaccas, boves, taurosque insilit, & vulvam turgescens præbet ac prominentem. Quo quidem tempore taurum admittere negligas caveto; refrigerato enim vaccæ ardore, ut ex tauri congressu nulla concipiat, verendum.

Frequentissimus præter ea est vaccarum abortus, si dum utero gerunt, vel aratro, vel plaustris subjungantur. Hoc igitur laborum genere tunc prorsus exemptas, & e longinquo subsequaris, necesse est, ne septa ac fossas transiliant; & in pascua conducas pinguissima, nec quidem valde humida seu paludosa, aut gramine abundantia; per binos item integros menses ante partum, lautius easdem nutrias, æstate nimirum, herbam recentem, hieme furfurem, consolidam majorem, similia, stabulo detentis præbeas. Nec lac tunc temporis subducas, foetus nutrimento necessarium. Variæ enim sunt, quarum lac omne, 4. ad 6. hebdomadibus ante partum, evanescit, non dicam, exarescit. Illas autem, quæ ad ultimos usque dies, partum antecedentes, lacte exuberant, optimas experieris & matres & nutrices; aut parcius plerumque, si minus haud probæ qualitatis lac subministrabunt. Eadem insuper cura ac providentia, foetum quæ edidit vaccam, qua equam, curabis; illa enim magis defatigata, majoremque virium jacturam fecisse videtur, quam quidem equa. Stabulo igitur probe contra frigus munito, & stramini copioso ac molli committas, largius pascas, & x. ad xii. per dies ex fabis farinam præbeas, seu frumentum & avenam, aqua sale mixta macerata, frequentior item luzernam, consolidam majorem aliamve herbam, bene maturam subministres. Quo quidem spatio, quum, ut fieri solet, deperditas recuperaverint vires, sensim solito suo pascuo easdem restituas, nec tamen per binos exinde menses lac subtrahas ullum, hoc enim & majori cedit vituli perfectioni, nec tuis ad commodari poterit usibus.

Quæ autem de nutrimento bovis, & cura circa eum, supra exposuimus; ea omnia, hic, circa vaccam lactariam, repetenda & observanda volumus. Cæterum, quæ circa vaccam & seligendam & conservandam notanda supersunt: sequentibus præceptis absolvamus. Vaccæ, quas niger pilus obtegit, optimum, quas vero candidus, plurimum lac præbere creduntur: quicumque interim pili sit color, perinde est, dummodo & carne gaudeat multa, & oculo vivo, & incessu agili, & ætate tenera, & lacte abundanti ac probæ qualitatis. Bis æstatis die omni, aut semel, hiemis, lacejus protrahas, cujus copiam si exaugere velis, vaccam nutrimentis, succo, præ herba abundantioribus, alere pergas.

Plures, & magnas, & macilentas vaccas ex Dania in Belgium quotannis accerferi, easque ibi plus lactis præbere dicunt, quam in Gallia. Illam ipsam vaccarum speciem & in Pictaviensem, aliasque Galliæ regiones deportatam esse credimus; quæ enim in his vaccarum Flandricarum nomine veniunt, non solum magnitudine, macieque reliquas superant, sed & majorem

rem lactis butyrique copiam exhibent, & majores solito ac fortiores vitulos edunt, & per integrum anni spatium, quidquod vel quintum diem, ante partum, lacte abundant; ast pascua his debent excellentia, licet vix plura pro alimento accipiant, quam vaccæ communes; omnis nimirum nutrimenti abundantia, quum macilentæ permaneant, in lac convertitur; vaccæ autem communes, pinguioribus dum vivunt pascuis, deficientesim lacte, carne & pinguedine abundare solent. Hujus igitur generis taurum, si vaccæ communi admiseris, illa exinde species proveniet, quæ spurriæ titulo veniens, reliquis item fecundior & lacte abundantior binos interdum vitulos, lac vero per omne anni spatium præbet. Hæc partem divitiarum Batavorum constituunt, qui tantam quotannis butyri caseique quantitatem transmittunt ad exteros. Hæ duplo majorem, quam vaccæ Gallicæ communes, sextuplo autem majorem lactis subministrant copiam, quam quas Barbaria alit.

Cœli tractum temperatiorem præ aliis vaccæ convenientem esse judicamus. Quas Lapponia nutrit, omnes parvissimas, plures albidas, & varias cornubus destitutas esse, in Itinerario suo de regionibus Septemtrionalibus refert Vir Cel. *Outhier*, Abbas, cui cum Regia Scientiarum Academia continuatum intercedit literarum commercium. Nec non *Ephem. Germ.* aliam lectoribus exhibent, *Michaelis Bernhardi Valentini*, D. observationem, circa vermes majores, vitulorum sub pelle natos, & Germanis: *Engerling*, dictos, quorum ille originem, ex insectorum ovis, una cum herbis deglutitis, deducere quærit, hæc scilicet, si cum nutrimentis ad pellem devecta fuerint, ibidem exclusa, in vermes tandem abire censet. Nos autem & nostrametipsorum experientia edocti, & Virorum Cel. *Valisnieri* & *de Rœumur* Observationibus certi novimus, quod singulis hisce tumoribus, quos animantium cornua gerentium in dorso observabis, vermis detineatur ex musca quadam proveniens, ac tandem in muscam, crabronis instar, transformatus. Cæterum varii sunt rura colentium, qui vaccas suas nonnunquam, echinulos semiefformatos, quos vaccarum echinos dicunt, foetuum instar edere, censent; quorum originem stagni seu paludis aquæ tribuunt, quam forsan, statim ex eo, quo sperma suum ipsi immiserat echinus, vacca imbibierit. Ast faciles opinionis tam absurdæ refutationi supersedemus. Quos enim echinos credunt, nil nisi cotyledones esse scito, secundinis adhærentes, dum vel ipsi ruricolæ adserunt, quod numquam, nisi post vituli partum, echinos istos vaccæ edere soleant. Rariores vaccas sibi metipsis lac suum protrahentes invenies, cujus quidem vitii desuetudinem quum ægre ac vix inducere possis, nihil superest, nisi ut prævia faginatione, lanienæ tradantur. Alias, serpentes seu colubros lac suum ex uberibus exsugentes, pertulisse novimus.

Coronidis loco ea addamus, quæ a Viro Cel. *Francisco Paullini*, D. in *Ephem. Germ. Dec. 2. Anni 5. Append. pag. 32.* observata, legimus. Hic enim parenti suo, Francofurti ad Mœnum commoranti, vaccam videndi copiam fuisse recenset, quæ 1. colore rubro & conformatione haud particulari gaudens, cauda equina, alba & aliquantulum crispata, 2. fex uberibus albis nigrisque maculis conspersis, 3. crucis figura flavidæ, in fronte candida, 4. cornubus fere caprinis, erat instructa.

Vaccæ pullum denique vitulum adpellant Latini. Hunc igitur, eodem modo,

modo, quo taurum, bovem & vaccam pertractavimus, Anatomice examinaturi, matris in utero, Amnio & Chorion involutum, ac Allantoide instructum esse observamus. Uracus cum vasis sanguineis ex umbilico procediens, in funiculo umbilicali productus, illam transcendit regionem, ubi Amnios dilatatur, & ad involvendum foetum undecumque extenditur. Ibidem, ille uracus prolongatus, Allantoidem constituit, quæ ex dextera atque sinistra, Amnium inter & Chorion producta, duo efformat cornua, seu sacculos longiusculos, basi sua binas Allantoidis extremitates, terminantes. Sacculi autem, uraci in regione uniti, liquorem ex illo defluentem recipiunt. Foetus proxime edendi Allantoidem, valde extensam, nisi disrumpere velis, haud penitus, pro omni sua capacitate, inflare poteris; expeditius procedet opus, si foetus immaturioris Allantoidem selegeris; eamque adeo pellucidam esse observabis; ut vel liquoris contenti sedimentum, per transversum distinguere possis. Allantoidis instar, & Chorion & Amnios prolongati, matricis cornua pertingunt, nec tamen huic, ut in equa, rugositatibus, sed placentulis, spatio distantibus ac invicem separatim, adhærent. Singulis embryonibus centum aliquoties placentularum destinatas numeravere, ac Cotyledonum nomine insigniverunt; quas depressas, ovi formam referentes, & ex matricis ac Chorion partibus compositas esse scito. Nec non interioribus matricis in parietibus, tuberculos quosdam ovaes ac prominentes, iterum aliis tuberculis, ejusdem figuræ, & Chorion in superficie exteriori obviis, respondentes, observare licebit. Horum tuberculorum alii alios circumdant, & tuberculum Matricis a tuberculo Chorionis circumdatum, Cotyledonem nuncupamus. Quovis igitur Cotyledone auxiliante, matrici nectitur Chorion. Quod si igitur, dum ad destinatam aliquam magnitudinem excreverit foetus, a matrice separaveris Chorion: Cotyledones in duo abire videbis; ipso enim disjunctionis momento, Chorion tuberculos, exiguis quibusdam productionibus quasi fimbriatos esse observabis; has item fimbrias seu fibras potius, ex totidem cavitatibus, matricis tuberculos penetrantibus, egredi conspicias. Vacca igitur foetum edente, tuberculorum alii ab aliis divelluntur, qui autem in matrice remanent, temporis tractu oblitterantur. Illam vero in embryone regionem, ubi cornua nascentur, macula rubicunda, & pelle parum ibi depressa, denotatam esse observavere. Vituli vesica formæ est cylindricæ; quatuor autem stomachi, foetus pro ratione, amplissimi; thymus, quem Galli: *ris de veau*, adpellant, adeo late patet, ut in hinnulo; quantum denique ejus stomachum, Gallico sermone, peculiari hoc: *Mulette*, nomine denotare solent.

Quinque autem ad sex per dies integros, ex quo natus fuit vitulus, matri relinquatur vicinus, ut & continuo calore foveatur, & quoties libet, lac, pro nutrimento sugere possit. Tantas vero, horum dierum spatium, vires acquirit, & eo usque excrevit, ut conservandæ sublevandæque matris ergo, septimo die ad summum ab eadem removendus veniat, nec nisi bis, terve per diem ubera sint concedenda. Quem, si citius saginatum esse cupias, & abundantiori nutrimento reficias, & ova præbeas cruda, lac elixum, & panis micam, similia. Vix quatuor transibunt hebdomades, & delicatissimo cibo tibi cedere poterit hujus vituli caro. Lanienæ hinc præparando 30. ad summum 40. per dies matris ubera concedas, quem

vero nutrire seu educare cupias huic, per duos menses, ad minimum, integros. Quo plure etenim matris lacte nutritus fuerit, eo major, eoque robustior futurus est. Hos autem præ reliquis educandos esse suademus, qui Aprile, Majo & Junio mensibus nascuntur. His enim sequiores, numquam fere vires contra frigus sufficientes acquirendo, pereunt. Secundo itaque, tertio vel quarto ætatis mense, lactis materni desuetudinem vitulo inducas; primo quidem aliquantam subtrahas lactis portionem, herbam succulentam & fœnum subtilius substituendo; tum penitus a matre separabis, alio stabulo includas, in aliud pascuum abducas, quo quidem, æstate, per diem integrum, irruente autem frigore, per calidissimas saltem horas meridiei, relinquo. Hieme tandem, cujus austeritati perferendæ prorsus sunt impares, stabulo contra frigus, obducto luto, munitissimo, retineas, & herbam communem, luzerna & consolida mixtam præbeas; nec nisi temperatissimo cœlo, stabulo emittas. Quum itaque hiemis primæ tempus, sibi periculosissimum, perduraverunt, tantas subsequente æstate, vires adquirunt, ut nihil amplius, ex frigore pertimescendum superfit.

Lactantis vituli in stomacho quarto & tertio, coagulati lactis portiunculas varias reperies, quas si aere arefeceris, pro coagulando lacte adhibere poteris; Et hujus quidem coaguli, temporis tractu, meliorem qualitatem nanciscentis, vel exigua portio ad conficiendam sufficit magnam casei quantitatem.

Cæterum & taurus & bos & vacca, vino, aceto ac fali avidissimi inhiant; & lactucam aceto conditam gulosi devorant. Hispani alique vituli præsepio lapidem immittere solent illum, quem *Salegre* dicimus, & in salifodinis reperimus. Hunc igitur lapidem, quousque pascuo detinetur mater, delambens vitulus, tantam exinde sibi sitim excitat, ut matris, vel stabulum pertingentis ad ubera, provolet, eaque avidissime exsugendo, citius incrementum nanciscatur atque adipem, quam qui nullum sal gustaverunt. Eadem subest ratio, quod bobus & vaccis, ciborum nausea laborantibus, herbam aceto maceratam, vel sale conspersam præbere moris sit; quod & ad excitandum sanorum adpetitum fieri novimus.

Germanorum Ephemerides sunt, quibus relatum legimus, vituli cujusdam sextum vitæ mensem agentis in stomacho, cumulum pilorum flavidorum & quasi arte dispositorum fuisse repertum. Hic figuram quasi rotundam, & magnitudine sua, caput infantis repræsentabat, cujus originem vituli alius pilis, quem stabulo detentus ille delamberat, tribui posse censemus. Qui quidem topi mortem vituli, nisi mactando acceleraretur, dubio procul, producerent. Frequentissima enim lanionum experientia comprobata res est, quod & taurorum & boum & vitulorum in stomachis, cumuli pilorum, jam ovi, jam pugni magnitudine, reperiantur. Tantus enim est, sic *Cardanus*, naturæ lusus, ut vel armenta interdum esse velit ovipara. Tophos igitur, ovorum formam imitantes, pro ovibus habuisse vides *Cardanum*.

Varia tandem sunt & vitulorum monstra. Sic enim jam bicipites, jam quinque vel sex pedibus instructos visos esse legimus, imo nosmetipsi quondam, vaccæ monstrum, in Galliæ provinciis, Parisiisque ubi exspiravit, spectatu expositum, vidisse recordamur. Hoc nimirum, præter quatuor suos pedes, quintum in dorsi parte superiore, Omoplatibus intermedium,

dium, & ligamentorum opē, anterioribus dorſi, & poſterioribus colli vertebris nexum, oſtendebat. Hic antèrius inclinans, poſteriori ſuæ extremitate vicinum oſtendebat tumorem, humani capitis magnitudinem æquantem, & pilis candidiſſimis breviſſimiſque obtectum; hunc itaque tumorem, hinc inde pilos ejus abradendo, hominis faciei quodammodo adſimilaverant, variis illius jam eminentiis, jam cavitatibus, oculos, naſum, os, reliqua, craſſiore quadam conformatione, repræſentantibus; id quod plebis turbam, mirabilium avidiſſimam, concitare ſufficiebat.

Ex Latino tandem bovis nomine, & Gallicum: *Boeuf*, & Italicum: *Bove*, Germanicum: *Ochs*, & Belgicum: *Os*, & Anglicum: *Ox*, Latinum vero ex Græco: *Bous*, derivandum eſſe videtur. Gallicum: *Taureau*, ex Latino: *Taurus*, & Græco: *Tauros*, *Vache* ex *Vacca*, & *Veau* ex *Vitulo*, ortum traxiſſe extra omne dubium eſt.

Quod vero uſum armenti in Medicina adtinet; bovis partes omnes multum olei, ſalis volatilis, phlegmatiſque contineri ſcito. Caro ejus, frequentiſſimum omnibus nutrimentum ac ſolidum, aliquantulum obſtringere ſolet alvum. *Galenus*, tertio Libro de facultatibus alimentorum, omnem ejus uſum diſſuadet, quæ quidem, ſua ex ſententia, digeſtu difficiliſ eſt, & humores lentiores producit ac melancholicos. Penitus autem hiſce noſtra experientia refragatur, & fere omnes, qui nulla, niſi bovina carne veſcuntur, optima ſalute, liberoque ſpiritu gaudere obſervamus. Hinc & *Galenum* omnem bovis carnem ex illa dijudicaſſe cenſemus, qua patriæ ejus boves inſtructos eſſe expertus erat, liberales enim concedimus, variam utique eſſe carnis bovinæ qualitatem atque ſaporem, pro cœli & paſcuorum varietate. Nec niſi junior bos ſaltem, pinguis, tener ac ſucculentis herbis nutritus, proba gaudere poteſt carne; alias etenim caro ejus durior & coriacea, viſcoſiorem ſuccum ſubminiſtrando facilis ventris conſtipationum cauſa evadit. Obſervatis interim, quæ diximus, ſaluberrimam præbet carnem, & junioribus, bilioſis, fortiori ſtomacho, & laborum corporis exercitio vigentibus, convenientiſſimam. Parciorem tamen illius uſum, & hiſ, qui ſedentariam vitam agunt, & ſtomacho debiliori laborant, infantibus item, ac multa ætate provectis, commendatum eſſe volumus.

Quæ autem ex bove proficiſcentium, vel externe vel interne adhiberi docet ars Medica, ſunt, adeps, medulla, tendines, fel, cornua, ungulæ, oſſa crurum ſeu tibiæ & excrementa. Adeps nimirum, quem & ſebum dicunt, emollienti & reſolvendi facultate gaudens, clyſteres contra inteſtinorum acrimoniam, tenefinum & dyſenteriam, ℥j. quantitate, ingreditur; nec non labiorum fiſſuris medetur. Medulla præter ea, vi ſua reſolutiva & corroborante, contra nervorum debilitatem, membrorum tremores, Rachitim & Scorbotum, ſingulari virtute ſeſe commendat, ſi vino mixta, linimenti inſtar, adhibeatur. Tendines ejus arefactæ, & in pulverem reductæ, contra febrem intermittentem faciunt, dummodo pulveris hujus ℥j. cum aquæ Cardui benedicti ℥iiij. peracto febris tremore, ſub paroxyſmi acceſſum, ægrotanti exhibeas, ſudoris enim abundantiam, febrem ſæpiſſime profligantem, excitabit. Fel bovinum, reliquorum animantium felli præſtantius, acrius ſcilicet, volatilius penetrantiuſque condenſatum, ℥j. quantitate, clyſteribus laxantibus additum, ſtimulo cedit ventri duro & conſti-

constipato. Idem ille exoptatus succedet effectus, si emplastrum ex felle bovis, aloe, myrrhis, & oleo colocynthidum, præparatum, umbilico applicaveris; id quod præcipuo illorum commodo cedit, qui vel summa in medicamenta omnia aversione feruntur, vel vermibus infestantur. Infantibus, eodem morbo laborantibus, linimenti instar, parum aloes, felle bovino solutæ, abdomini adplicare sufficit. Aliquantulam item gossypii partem, felle bovis irrigatam, ac reiteratis, auribus inditam, ad profligandum tinnitum & susurrationem, surditatem, aliasque aurium adfectiones, conferre novimus. Sunt, qui eadem ratione, & aqua ex felle destillata utentes, felle crudo illam anteferendam esse censent. Eadem insuper contra maculas & cuticulas in cornea obortas utuntur, penicillo scilicet, hac aqua irrigato, illas excretionem tangendo, brevissimo temporis spatio penitus profligant. Nec non tincturam fellis bovini pro optimo cosmetico, & jure quidem, habemus; quam ex felle, sole arefacto, & spiritu vini infuso, eliciunt. Cujus usum instituenti, opus est, ut probe lavatam illa faciem, per tres ad quatuor dies, & ab aeris accessu conservet, nec ullo umquam humore irriget; præterlapso autem triduo, vel aqua ex floribus fabarum, vel nymphæarum abluat, id quod splendentissimum candorem cuti conciliabit. Sic & antequam colore quodam fericum imbuant tinctores, felle idem bovino a maculis expurgare, & qui vestimentorum maculis detergendis occupantur, frequentissimum fellis ex bove usum instituere solent. Pictores ad pulchritudinem coloribus conciliandam, & purificandas picturas idem illud adhibent. Cornua autem & ungulæ bovis contra Epilepsiam commendantur, quarum pulveris ℥j. cum Syrupo Pæoniarum incorporatam, seu ℥jv. aquæ alicujus adpropriatæ immixtam, præscribunt; adustarum vapores insuper, mulieribus hysteris, ad profligandos paroxysmos conferre dicuntur. Sunt qui limaturam cornu bovini contra impotentiam præscribere solent; nos dubitamus, siquidem nullam nisi anti-acidam virtutem, ac salem alcalum volatilem ipsi tribuere possumus. Alii, fumigationem hoc cornu bovino, contagiei tempore instituendam esse suadent; nobis autem, alcali sui ergo, humoribus majorem proputrefactione dispositionem inducere videtur. Ossa tandem bovis, & in primis, crurum tibiæ, pro resolutivis, & nervos confortantibus habitæ, calcinatæ ac in pulverem redactæ ℥j. quantitate, ad corroboranda intestina, ad retinendum vehementius alvi profluvium, & ad profligandos intestinorum vermes, interne, recipiantur; dummodo morbus originem debeat abundanti cuidam humori acido, primis in viis detento; hic enim non nisi desiccantium & absorbentium instar agere patet. Emplastra denique & unguenta desiccantia & cicatrices promoventia ingrediuntur.

Stercus bovinum, virtute discutiente instructum, recens, cataplasmatibus instar, pro anodyno contra inflammationis & arthritidem venit. Medicorum alii, ad depellendos dolores colicos, ad discutiendos flatus, ad reprimendos item tumores & dissipandam, hydrope ascite laborantium lympham, stercus bovinum, lumbricis mixtum, abdomini adplicari jubent. Et Cel. *Ettmüller* insignem ejus usum esse docet contra tumores oedematosos. Alii contra urinæ retentionem, stercus bovinum, perinæo, ossisque pubis regioni, adplicatum esse volunt. Plebis usui succus stercore expressus contra colicos dolores venire solet, qui teste Viro supra laudato non so-

tum colicæ, sed & pleuritidis eximio remedio cedit; addit Vir Cel. quod digestionem ac sublimationem reiterata, ex stercore bovino pariter ac humano, *Zibethum* eliciatur *Occidentale*, ut dicit *Paracelsus*, siquidem odoris similitudine *zibethum* refert.

Juvenis quidem, Medicinæ studiosus, ut refert *Celeb. Cohausen*, D. in *Ephem. Germ. Anni 1744. pag. 259.* obstinatissima febris tertiana laborans, accepto stercore bovino recenti, cerevisiæ infuso & percolato, febris liberabatur. Tunc variis remedii sui copiam faciens, plures febris detentos eadem ratione sanatos fuisse, addit Vir Cel. Subjungit, quod ante paroxysmum, tepida, recipienda sit infusio, & ægrotans ab omni aeris accessu probe muniendus, quippe quæ sudorem abundantem elicit. Quod si autem semel accepta potione nondum recesserit febris, iterum, imo tertio reiteretur. *Valescus de Tarente* sterces bovinum, excellentissimum contra gangrænam ait esse medium, cujus ope intacta quæ supersunt membra, conservari possunt. *Sylvius* & *Barbette* adhibitum, quod ex illius institutione hauserant, medium, pro suo secreto venditabant. At si fidem adhibeamus *Heistero*, in Chirurgicis spectabilissimo: æque sordidum ac parum efficax medium hocce habebimus; cujus usum nullis nisi illis commendandum esse suadet, qui præstantiori medio, pro sua conditione, uti nequeunt.

Quæ olim ex hepate & liene bovis contra obstructions intestinorum præparabantur: ea omnia hodie plane in desuetudinem abierunt, & suam, si qua gaudebant, virtutem, ex illis repetiisse videntur, quibus erant admixta. Transeant igitur hæc. Adeat autem, quem forsan ea cognoscendi cupido quædam invadit, adeat, inquam, *Paracelsum*, *Vanhelmontium*, *Ettmullerum*, antiquorum reliquos, qui summam partes homonymas inter sympathiam credidere. Jure suo, jam *Ludovicus* in *tractatu de Medicamentis*, in imaginaria istiusmodi media invehitur; quæque nostro nunc seculo floret, Medicina, experientia edocta, & judicio conductæ, nullis nisi illis, quæ & recta ratione & experientia sunt comprobata, utitur; reliqua omnia ad Empiricorum adparatus relegavit.

Sæpiissime autem fellis bovini in vesicula fel quoddam petrificatum videbis, seu calculum tenerum, figura, magnitudine & colore vitellum induratum, exæquantem; crustis item sibi superstratis, Bezoarismodo, compositum. Hic ab aliis *Bezoar Bovis*, ab aliis: *Alcheron*, *Lapis*, ab Arabis autem: *Haraczi* nuncupatur. Qui quidem diu adservatus a vermibus, in illo enascentibus corroditur & in pulverem abit. Cæterum multo abundat sale volatile; & parum olei continet; sudorifera gaudet virtute, alexitera & aperitiva; cujus ergo ad constringendam, quæ cita est, alvum, contra epilepsiam item & venenum adhiberi solet. Pro dosi autem gr. vj. ad ℥j. veniant. Exterior ejus usus sternutationem provocat, oculorum aciem exacuat, & corroborando cerebro inservit. Probe tamen ab hoc Bezoare bovis, *Bulithe* seu *tophus* bovinus, & *Egagropile* dictus, distinguatur; hic enim, ut supra diximus non est nisi globulus quidam, pomum magnitudine referens, & paullulum depressus, cujus in medio foraminulum, digitorum minimo adaptatum, deteges; leucophæi seu fulvi coloris sui ergo pilo animalis respondet, nec nisi pilis, lambendo abrasis, in stomacho autem congestis, constat. Et hic quidem ad retinendum profluvium ventris facit atque hemorrhaginem; si scilicet in pulverem redacti gr. xij. ad ℥ss.

rece-

receperis ; nec non externe , spongii instar ad detergenda & desiccanda vulnera adhibeatur.

℞. Medullæ bovinæ

Urinæ hominis fani

Vini rubri ana ℥ij.

M. ebull. cum igne parciss. usque dum humidit. omnis evaporaverit .
Col. & mixtur. adhuc tepid. add.

Olei lumbric. ℥ss.

Spermat. cet. ℥ij.

Ol. nucis myristic. ℥j.

M. f. linimentum contra Rachitim , quo tota spina dorsi ad longum fricetur .

℞. Foliorum rutæ

camomillæ

thymii

hederæ ana pugill. j.

Quæ quum contusa fuerint , addas

Fellis bovini

Olei ex pedibus bovis ana lib. ss.

Aquæ vitæ ℥j.

Hæc igitur lentiori igni admota ; ad consumptam dimidiam humiditatis , partem , ebulliant , tum expressione percoles , & habebis balsamum præstantissimum , contra dolores lienicos , & omnes , qui causæ frigidæ originem debent. Linimenti instar adhibeatur.

℞. Stercoris bovini recentis lb. ij.

Baccarum lauri pulveris. lb. ss.

Radici recentis bryoniæ albæ lb. j.

Seminis cumini pulverisati

Florum sulphuris ana ℥jv.

Admixta tandem calida aqua fiat cataplasma , quod additis ℥jv. adipis porcini , adplicetur stomacho hydrope ascite laborantis.

℞. Medullæ bovinæ lb. j.

Butyri recentis ℥jv.

Ceræ candidæ lb. iij.

Aquæ rosarum ℥jv.

Olei virginis ℥j.

Omnia hæc quum fuerint liquefacta , (excipe oleum , circa finem infundendum) tum percolata , eo usque misceantur , quo in unguentum abeant. Massæ tandem , tantum non penitus refrigeratæ , lintea immittas , quæ in erisipelate & inflammationibus , juncturis itidem arthritide correptis , ulceribus habitualibus & cauteriis , felici cum successu , adplicabis.

Tauri autem partes , quotquot sunt , sale volatili & oleo abundant . Cujus caro , quum nec saporis , nec salutis adeo , ut caro bovis inserviat , fibris item compactioribus constet , durioribus & aridioribus ; nullorum fere nutrimento cedere solet.

Medicina interim , tauri sanguinem , adipem , medullam , fel , cornua , ungulas & priapum , suos in usus convertere sapit.

Sanguinem tauri interne receptum , ab omni tempore , pro veneno habitum

bitum esse constat. Ast *Matthiolus* in *Observationibus ad Dioscoridem*, modicam sanguinis quantitatem, calidam, dum venam egreditur, & nondum coagulata, vix ullo detrimento cedere posse adserit. Quidquod, quum nuperius circa tauri sanguinem instituta experimenta, ab omni qualitate venenosa liberum dijudicent: hodie, aceto mixtus, ℥j. dosi, cum potionibus vulnerariis adstringentibus, contra dysenteriam, sanguinis sputationem, abundantiam menstruorum, omnesque hemorrhagines internas, adhibetur. Exteriorem ejus usum quod spectat, qualitates habet reliquorum animantium sanguini communes, naturæ scilicet pinguioris ob causam, & caloris naturalis, dissolvendi & aperiendi virtute gaudet; cujus ergo, linimenti instar adhibeatur, ubi de discutiendis & emolliendis tumoribus agitur, ubi de maculis in cute delendis, & profligandis verrucis; præsertim vero sanando inservit membro debili & atrophiato. Hoc scilicet, gutturi bovis seu tauri, dum mactatus sanguinem egurgitat, insinues, & deperditas adquirit vires, & flexibilitatem, & movendi facultatem. Sunt, qui ad leniendos dolores arthriticos, aquam sanguinis bovini destillatam præcipiunt; ast nullus fere medii hujus hodie superest usus.

Adipis, medullæ, fellis ungularumque tauri & bovis eadem quum sint qualitates, iidem usus, repetitione inutili supersedeamus; adeas quæ supra de his diximus.

Priapum tauri denique pulverisatum, ℥ss. quantitate, vel decoctionem ex ℥j. limaturæ ejusdem inter certissima pro dysenteria & pleuriti, media exponimus, quæ *Vanhelmont* inter secreta sua reposuerat.

℞. Terebinthini Veneti ℥j.

Priapi tauri pulverisati ℥x.

Trochiscorum Gordon. ℥ij.

Trochiscorum ex terra lemnia seu sigillata ℥ijss.

Gommatis animati

Corall. rubr. p. ana ℥iij.

Cinnamomi in pulvere ℥ij.

M. f. omn. pulv. deinde c. f. q. syrupi consolid. major. subig. f. opiata, cujus ℥j. pro dosi, quovis mane ac vespera, cum pane oblato accipias, contra gonorrhæam, menstrua albida, & debilitatem renum; suprabibas cyathum infusionis Veronic. mar.

℞. Fol. absinth. comm.

menth.

rutæ

arthemis. ana pug. j.

Pulver. contra vermes ℥j.

aloes

colocynth. ana ℥ss.

Fellis tauri ℥iiij.

Contund. omnia. Tum add.

Butyri recent. insuls. lb. ij.

Vini albi lb. j.

Lentiori igne bull. ad consumt. dimidiæ humidit. Tum fortior. express. col. & fiat unguentum Anthelminticum, quo abdomen illinas, tum linteis pannis obtegas, per multos dies.

Fel tauri inest unguento *Arthenitæ* Pharmacopoeiæ Parisiensis, & unguento Anthelmintico Pharmacop. *Lemeryanæ*.

Vaccæ autem caro, tauri foemellæ, nec saporis jucunditate, nec qualitate salubri bovis carnem, quum exæquat, plebis saltem cibo venire solet; ast Medicæ artis usibus, variæ illius partes, & stercus in primis, & urina, cum lacte veniunt.

Stercus ex vacca, resolvendi virtute gaudet, refrigerante & anodyna, cujus ergo contra tumores inflammatos, gutturis dolores, Erysipelatem & adustiones adhibeatur. Nam Cataplasmatibus instar adplicatum, inflammationem lenire, & molestiores ejus consequentias præscindere potest. Topici instar, abdomini adplicatum, non solum alvi duritiem, obstructionibus imminuentibus, emollire, sed & dolores colicos profligare, & flatus propellere solet. Majo item mense, quo succo exuberant herbæ, B. M. destillatum, aquam præbet sic dictam *mille florum*, quæ insigni sese virtute ad emolliendam cutem & delendas faciei maculas commendat. *Poppius* in tractatu de *Hydrope* aquam hancce tumoribus hydropicorum aquosis adplicatam, illos sine dubio resolvere adserit. Nec non §ij. dosi, interne recepta, mirifice ad promovendam facit urinam, ad expurgandos renes, & ad depellendos eorum calculos; Quam quidem ejus virtutem, sale volatile nitro, quo abundat, tribuendam esse censemus; hujus ope, & contra nephritim præservandi, & calculos vesicæ ac renum expellendi facultate gaudet. Imo, si sole arefactum vaccæ stercus ab omni odore ingrato fuerit liberatum, tum vero aqua rosarum multoties irrigatum; eodem, pro pulvere Cyprico, quem pluris emunt, utere poteris.

Priscis jam temporibus urinæ vaccinæ usum frequentissimum fuisse constat. Dicitur autem: *aqua mille florum*, ne urinæ nomine, nausea moveatur ægrotanti. Convenientissimum usui illius spatium, Majus mensis est, quo floribus confita sunt prata, & herbæ succo abundant. Et hæc quidem urina, purgandi præsertim virtute sese commendat, omnes etenim serositates absque torminibus, evacuat, Astmathe laborantibus prodest, & Hydropi, Rheumatismis, Arthritidi, ischiatico & vaporibus medetur. Vaccæ prato pascentis urina, merito anteferatur urinæ hujus, quæ stabulo, herbis licet recentibus, nutritur. Etenim & purior pascui aer, & quem vacca instituit, herbarum selectum, multum utique faciunt ad constituendam urinæ ejus essentiam; & melior adhuc vaccæ per quælibet pascua exspatiantis, erit urina, quam hujus, quæ uno eodemque pascuo reclusa detinetur. Quam uno pascuo incluseris, urinam paullo acriorem, quam vero stabulo detines, acerrimam illa, & calidiorem præbebit urinam. Rationem vero quærendam esse censemus, in illis, quæ præter herbam recentem, eidem exhibere solent alimenta, talia sunt: furfur, avena, fæces cerevisiæ &c. Optima igitur erit urina recens vaccæ per apertos campos pascentis; ast cavendum, ne tauri congressum vel perpeffa sit, vel eidem exposita; tunc enim nocivæ qualitatis foret ejus urina. Quod ætatem ejus spectat, junior & pinguis, antiquiori præferenda est & macilentæ. Pilus sui color qualiscumque sit, perinde est. Tempus urinæ opportunissimum, vernum esse censemus, quo enascentis graminis cuspidibus armenta vescuntur. Nec tamen autumnii spatium prorsus inconveniens est. Jejunus igitur, quovis mane, duos cyathos, horæ quadrantis interstitio, ex hac urina percolata ebibas,

tum exspatiando movearis, & binis horis præterlapsis, jusculum aliquod recipias. Calidam vero urinam bibere memento, refrigerata enim ingratum saponem induit; imo ante eam vel aqua vitæ os eluas, vel caryophyllum manducando conteras. Quod si haud statim primo die virtutem ejus purgantem experiaris, prima adhuc vespere clysteris adplicandi opus est. Prima quidem & secunda die vaporibus caput opplere solet, exinde autem lenissime & abundantissime corpus purgando, 15. ad 20. sedes per diem, excitabit, quas quousque promoverit, eo usque usum ejus continuandum esse scito; quum autem 3. quatuorve saltem sedes, quotidie concitaverit, eo desistas, biduo tandem triduve exinde, communi quodam medicamento corpus expurges. Decem vero per dies subsequentes, ad minimum, illius usum producas, nisi nimiam virium jacturam experiaris, tunc enim vel octo ad novem dies sufficiant.

Lactis vaccarum usus, pro alimento, frequentissimus est, quod materia butyrofa (in stabulis L. B. versamur, & pascuis, nec pro rostris, veniam verbis concedas, iteratis a te petimus) abundans, spissum ac pinguisimum, subministrando nutrimento, restaurandisque partibus solidis aptissimum omnis cognoscit. Saporis insuper amœnitate quorumvis animantium lacte præstantius, multo constat oleo & phlegmate, est exigua salis aciditatis quantitate. Præstantissimo autem Medicinæ adminiculo variis cedit in morbis, sanguinis, verbi gratia, amissionibus, doloribus & fluxu hemorrhoidalibus, alvi profluviiis, cutis pruritu, scabie, lichenibus, pulmonis affectionibus, aliisque ubi leniendo sanguini acri & consolidando opus est. Nec non contra arthritidem & rheumatismos arthriticos, languores item & debilitatem, morborum scorbuticorum diutiorum pedissequam. Sæpius omnis nutrimenti locum subit, & tunc quidem nullam temporis rationem habere poteris. Satiùs tamen lac vernum atque autumnii, sive Maii mensis atque Septembris eliges; vacca, cujus lacte uteris, tertium, ad summum, agat annum, nec nisi tertius sit mensis, ex quo lac ipsi extrahere cœperint. Simulac autem Veneris ardore correptam esse vaccam observaveris, hujus lacte abstineas, alius quæras. Cæterum debet esse candidum, & grati saporis, nec valde fluidum, nec adeo spissum; calidum adhuc, & vix ubera egressum, sin minus aeris injuria facile corrumpitur, huic enim expositum brevi acefcit. Quovis autem acido, dum lacte uteris, abstineas, ne in stomacho coaguletur, cujus ergo & aliquantulum sacchari eidem admiscere, vel ante ejus usum ℞j. oculorum cancri, in pulverem redactorum accipere solent; coagulatio enim lactis in stomacho omnium ejus corruptio- num periculosissima est, quippe quæ & Choleram Morbum, & dolores colicos, Mesenterii constipationes, Cachexiam, aliaque producere valet.

Lacte si rite uti velis, quovis matutino tempore, jejunos, tantam ejus quantitatem, quantam chopina capit, accipias; duobus deinde tribusve horis præterlapsis, carnis jusculum haurias, & modicum corporis exercitium subeas; tribus item horis ante cœnam, iterum eandem ejus copiam ebibas, eodemque ordine per integrum pergas mensem. Sanguinem insuper, ante lactis usum, venarum incisione emittas, & corpus expurges; peracto item ejus usu iterum purges. Omni autem, dum lacte uteris, & potus & cibi acidi, & carnis fumo arefactæ vel sale conspersæ, & fructuum crudorum, & artocreatum, ciborumque multis aromatibus condito-
rum

rum usu profus abstinenceas; quæ quidem omnia, digestu difficillima, imo indigesta, non nisi lactis in stomacho corruptionem promoverent.

Quo certior autem exoptatus finis usui lactis succedat, quo minus finistri ejus effectus extimescendi veniant: Medici auspiciis & directione, vel consilio instituat, qui varia, pro variis rerum rationibus, vel addere, vel subtrahere possit. Etenim nec cuivis corpori, nec quocumque salutis in statu convenit. Noxium v. g. lac illis est, qui feбри vel continua, vel intermittente, seu alio quodam morbo laborant acuto; facillime etenim fermentatione corrumpitur, & in bilem abit, seu humores magis alcaliscentes reddit, & ad putredinem disponit, cui, febris ardore, jam adaptissimi sunt. Sic & his, qui capitis doloribus excruciantur, qui hemi-crania, vertigine & epilepsia laborant, magis infestum est, pariori etenim sero, pluribusque quam reliquum lac omne, partibus phlegmaticis constat. Nocivum denique omnibus, qui frequentiore vomitu, Cholera Morbo, & diarrhæa, laborant, dummodo adfectionum causa non sit stomachi irritatio, a præsentī quadam materia acri & corrosiva proficiens. Eadem cautione opus est, quum de obstructionibus hepatis, lienis & mesenterii agitur; crassioribus etenim suis partibus, si æquales reperit, numerum earum adauget, nec diminuit.

Exteriorem vero lactis usum si quæris, optimo illud anodyno ad leniendos dolores, ad resolvendos tumores inflammatos ac suppurantes, cedere edocearis. Hinc contra arthritidem, membrorum contractionem, & ubicumque adhibeatur, ubi de humectandis & emolliendis partibus, de excitanda transpiratione, curandum est. Una cum micis ex pane elixum, cataplasmati instar, partibus adfectis adplicetur. Contra Erysipelatem, frequentissime fomentationem, ex floribus sambuci, lacte ebullitis adhibere solent. Sic & optimum contra vermes, dicitur cataplasma, ex foliis absinthii, variisque alii capitibus, lacte elixis, compositum, & umbilico adplicatum, dummodo die antecedente clystere ex lacte usus fueris, cujus ope, vermes ad intestina majora contracti, cataplasmati amaritudine eiiciuntur.

Et hæc quidem de lacte generatim dicta sufficiunt. Jam de partibus ejusdem, sero nimirum, sale lactis seu saccharo, butyro & caseo agendum superest.

Quod si igitur per aliquod tempus, vel camerae calidæ repositum lac conservaveris, seu fulgura oboriantur & tonitrua; mediante occulta quadam fermentatione, partes oleosas a serosis separante, lac acescit. Nec non artis auxilio, addito scilicet acido, vel succo mali citri, cremore tartari, vino Rhenano, coagulo, aceto &c. partem ejus ferosam separare solent. Quæ quidem acida, serum lactis exprimendo, reliquas vero ejus partes in fundum deprimendo, nec alia ratione, lac coagulant. Cujus feri, quod Galli: *petit Lait*, seu lac parvum, adpellare solent, frequentissimus est ac comprobatus in Medicina usus; illo enim contra ardores intestinorum utimur, & pectoris ariditatem, sanguinis effervescentiam, tussim, dolores colicos, qualiscumque sint generis, constipationem, febres arden-tes & præsertim malignas, in quibus & succum citri vel baccarum uvæ spinæ interdum admiscent. Serum itaque quum non sit, nisi aqua, sale volatili nitro, & natura sua, sali ammoniaco accedente, imprægnata; salis hujus ope virtute leniter alvum ciendi, primas vias detergendi, &

stimuli instar, in aquam, ejus vehiculum operandi, gaudet. Hinc & prægnantibus, constipato ventre laborantibus, & cuivis ægrotanti, absque periculo præbeatur. Hypochondriacis, & qui intestinorum obstructionibus detinentur, lac quidem ipsum infestissimum, serum e contrario convenientissimum est, quippe quod obstructiones sale suo nitro aperit, temperat, & fibrarum rigiditatem emollit. Quum igitur non nisi refrigerando & leniendo opus est sanguine effervescente, 3. ad 4. scyphorum magnorum quantitate, quotidie accipiendum esse suademus serum, addita aliquantula violarum aliufve syrupi, seu sacchari portione. Ufu ejus, per mensem integrum, nisi nimiam stomacho debilitatem induxerit, continuato, corpus quum necessitas postulaverit, expurges, & succos impuriore, intestinis detentos, profligare studeas, ne sanguinis in massam redeant. Quum vero morbum, specialioribus symptomatibus comitatum, tractare velis; tunc variarum herbarum succos sero addas necesse est. Sic contra Scorbutum, succum nasturtii, Beccabungæ seu Cochleariæ admisceas. Pro purificanda sanguinis massa, pro scabie, pruritu, & humorum, vasa capillaria corrodentium, acrimonia: decoctionem seu infusionem fumariæ; aliisque pro morborum circumstantiis, alias herbarum infusiones sero adfocies. Quicæterum, antiquioribus fuerit, feri usus, & quanti ejus præstantiam haberint, ex *Hippocrate*, *Galeno*, *Aetio*, aliisque edoceberis. Hodie autem frequentissime adhibetur, quod optima inter, & naturæ amicissima media, locum tenere novimus. Junioribus tamen, quam ætate provectis convenientius habeatur; illi enim plerumque sanguinei, bile & ardore abundantes, temperatione indigent; ast seniores, quorum omnia fere incommoda ex indigestionibus proveniunt, haud iisdem, quibus juvenes, fructibus feri fruuntur. Nec superest, nisi, ut infusione feri & radice ex Enula Campana, ex Cichorea silvestri, foliorum fumariæ, nasturtii, Salseparillæ, aliorum stomachalium, nimiam stomachi eorum relaxationem & refrigerationem præpedire studeas. Sic omnibus conveniens esse serum vides.

Duo cæterum sunt, & Medicinæ usibus frequentissima, serum quæ ingreditur, præparata. Primum ex his, aquam Lactis alexiteram esse teneas quæ ex sero, multisque plantis cordialibus constat, has inter referes: ulmariam, carduum benedictum, mentham, absinthium, Angelicam, alias; quæ si omnia Balneo Maris destillata fuerint; aqua redibit alexitera, cujus 3j. ad vj ubi de fortificandis & reanimandis spiritibus agitur, vel de humoribus peccantibus, dulci transpiratione profligandis, præbeas. Interdum & potionibus cordialibus admiscetur, & hic quidem sui usus, apud Anglos est frequentissimus.

Alterum vero feri præparatum, aquæ lumbricorum pectoralis nomine, venit, & vel simplex est, vel composita. Simplicem compositurus, 3. accipe lumbricorum libras, illos aqua calida repetitis abluas, & paullulum contundas, tum cucurbitæ vitreæ iniicias, binas feri pintas suprafundas, & balneo Maris, ad dimidii liquoris remanentiam, destilles; aquam, si statim adhibere velis, lagenis vitreis probe obturatis recondas; sin minus, octo subsequentes per dies, lagenis obturatis adservatam, soli exponas; alias enim partium lumbricorum glutinosarum ergo, quas ex destillatione retinet, corrumpetur. Eadem fere ratione & aquam lumbricorum compositam præparabis, dummodo plantas quasdam pectorales addideris, pro

circumstantiis feligendas, ut: capillum Veneris, hederam terrestrem, flores malvæ & tussilaginis, zizyphas, scolopendrion, & prunum Indicum. Hæc igitur aqua, ad detergendam facit pectoris acrimoniam, facit contra tussim, variosque Pthisis gradus. Nec non in morbis tabiferis, sua se utilitate commendat, ubi nec lac vaccinum, nec asininum, ob acida in stomacho obvia, admitti potest. Quodammodo scilicet lactis locum subeundo, acria ferositatis sanguinis puncta involvit, ac emollit, hujus dissolutioni obstat, nec eidem periculo ipsa exposita est; minoribus etenim particulis sulphureis, humorum ebullitione facile inflammatis, quum constet, quam quidem lac ipsum; nec adeo facile acescere potest. Hujus igitur, quater in die, quaternas accipito uncias, & usum ejus per aliquod tempus continuato.

Saccharum, seu sal lactis præparaturus, quatuor ad quinque pintas ebullito, & inter ebulliendum, ℥j. cremoris tartari bene pulverisati addito; statim lac coagulari observabis; fluidam tunc partem ejus accipias, filtratione percolabis, addito albumine clarificabis, iterumque filtrabis; tum vero, si ad pelliculam obductam evaporaverit, in loco refrigerato, per duorum dierum spatium conservabis, & vasis in fundo, biduo peracto, salis candidi crySTALLA, fundo lateribusque vasis adhærentia videbis. Et his quidem salis lactei crySTALLIS, sacchari nomen, dulcedinis ergo, indidere. Iisdem, quibus lac gaudent, virtutibus instructa, iisdem, quibus illud, usibus veniunt, imo alii majorem hisce præ lacte, efficaciam tribuunt. Singulis plerumque libris decoctionum pectoralium, singulas ad ternas ejusdem Drachmas addunt. Et, quod Helvetia subministrat, pascuorum excellentiæ ergo, reliquis anteferri meretur.

Multus est in recensendis sacchari hujus virtutibus variisque effectibus Vir Cel. *Verloschnigg*, D. cujus observationes in *Ephemer. Germ. Dec. 3. Anni 9. & 10. pag. 280.* reperies. Is scilicet omnes morbos, ex acido acri & corrosivo, per humores disperso provenientes, ut arthritidem, calculum, colicam nephriticam, dissenteriam, gangrænam atque scorbutum, hoc sale profligare allaboravit. Ter quaterve in die ℥j. ad ℥ij. hujus salis, vel cum jusculo quodam, vel Theæ, Veronicæ &c. infusione, accipiendas præscribit. Imo Cel. *Gross*, magni nominis Medicum & Physicum Parisiensem, sacchari hujus usum summo opere commendantem audivimus. Quamvis autem medii hujus excellentissimi usus sit infrequentior; nos in describendis illius virtutibus, fusiores esse haud pœnitet.

Fermentatione sua interna, in tres partes diversas lac abire diximus, quæ sunt serum, butyrum & caseus. Pars igitur illa, quæ butyrum constituit, non est, nisi lactis flos, seu pars pinguißima; quam qui campestem vitam agunt, argillaceis vasis reconditam, pistillis quibusdam contundendo in butyrum denique ut abeat, adigunt. Hoc autem multo oleo, at pariori sale volatili abundat. Quod ex vaccino lacte provenit, reliquis omnibus frequentius adhibetur. Et recentissimum, dulcis atque grati saporis quæras, si optimum cupis. Medicinæ autem usus quum postulaverint butyrum Majo, mense confectum, si fieri potest, feligas; major etenim herbarum, tunc florentium, virtus, & huic inesse censetur.

Butyri, pro cibo usus, communissimus est inter omnes, vix enim ullum apud Gallos embamma gustabis, quod butyro non conditum sit. Frequentiore

tiore adhuc eodem & Belgi, & reliqui Septentrionis incolæ utuntur, ex quo faciei & cutis eorum vigorem deducere solent alii. Nimius tamen butyri usus, stomachum debilitat atque relaxat, ciborum appetitum restinguit, excitat nauseam & vomendi conatus, multum præterea, vetustius in primis, calorem. Quum enim partes, quibus abundat, oleosæ & pinguiorres, facillimæ inflammationi subjectæ sint: omnes, qui vel bilicopiosiori, vel stomacho debili instructi sunt, eodem non nisi parcissime utantur. Cæterum quovis tempore, quibusvis competit.

Virtutes butyri, quas Medicinæ exhibet, sequentibus intelliges. Pectorale est & leniendi ac emolliendi facultate prædium. Interne receptum & leniter alvum concitat, & aculeos veleni acres obvolvitur, cujus effectus producendi ergo, clysteribus laxantibus & antedysentericis admiscetur; liniamenti instar, melle addito, dentium eruptionem promovet, & pruritus aphtasque quibus infantum gingiva infestatur, profligat; dum dentes illorum proxime prorupturos, hoc unguento illinas. Pulveres item, qui collyria contra palpebrarum pustulas & pruritus facientia, intrant, illos butyro subigi scimus. Brevibus: substantiæ suæ adipeæ ergo & oleosæ, omnis generis acrimoniam temperare valet butyrum. Quam ob causam, qui Septentrionis in regionibus, Antimonio, cupro, Mercurio aliisque metallis pertractandis occupantur; panem, multo butyro illitum mane accipere solent, quo acidum corrosivum, metallorum fumo quod inest, absorbeatur, itaque involutum partes internas corrodere nequeat. En *Etmulleri* medium, excellentissimum, ut ipse censet, contra Pthisin & partium interiorum ulcera: butyrum recens cancris admisceas, quos lapideo seu marmoreo mortareo immixtos contundas, tum, expressa quæ fuerint, lentiori igne, & humiditate consumpta condensas. Et hujus butyri ℥ij. bis in die, per aliquod tempus recipiendas esse suadet.

Pars tandem lactis crassissima, reliquisque compactior, illa est, quæ caseum præbet. Caseum igitur, & multum & solidum nutrimentum subministrare vides, sed & digestu difficillimum, si abundantior ejus fuerit usus; aut moderatior concoctionem promovet. Multo constat oleo, pariori sale essentiali, & paucissimo phlegmate. Caseum vero, vel ex lacte, butyro adhuc imprægnato, vel butyro jam subducto, conficiunt; gratioris saporis, dubio procul, prior est, siquidem lactis butyrum pars est sublimior, principiisque oleosis, & sale volatili repletissima. Communior itaque caseus ex lacte vaccarum, saporem exhibet jucundissimum, & multum nutrimenti, digestu autem difficillimus est. Cui quidem alii, caseum ex ovino lacte formatum, digestu nempe faciliorem, nec adeo compactæ substantiæ, anteferunt; qui tamen parcius quum præbeat nutrimentum, infrequentiori nostratium usui cedit. Junioribus ergo, corporis exercitio & stomacho robustiori vigentibus, convenientem judicamus caseum; aut antiquioribus, & his qui debiliori gaudent salutis statu, & qui calculo & saburra laborant, vel frequentem, vel omnem penitus casei usum interdiciamus. *Lotichius*, in tractatu de nocivis casei qualitatibus, caseum corpori humano, arthritidis, colicæ nephreticæ, & intestinorum obstructionis dispositionem inducere demonstrat. Quod de immoderato ejus usu intelligendum esse scito.

Ars medica tandem caseo recente, pro cataplasmate, contra inflamma-

tiones oculorum, & dolores hæmorrhoidales utitur; illo autem, quem macilentum dicunt, ac ex lacte, flore ejus subtracto conficiunt, pro cataplasmate contra tumores inflammatos; quod leniter illos resolvi, ac cataplasmati ex mica panis, lacte elixa, substitui potest. Cæterum fidem adhibemus lubentiores his, quæ a *D. Ledelio* observata legimus, in *Ephem. Germ. Dec. 2. Anni 6. pag. 82.* ubi acutissimos dolores arthriticos, quendam, qui illis excruciabatur, adplicato caseo recenti leniisse refert; ast & ad ea respicientes, quæ a *Galeno* relata reperimus, quod scilicet, suis temporibus, caseo vetustiori, ad producendos eosdem effectus usi fuerint; sententiarum diversitas ægre conciliari posse videtur; nec superest, nisi, ut accessu arthritidis, eoque doloroso, recentem; progressu autem vetustior, acrior qui est, atque adtenuans, ad discutiendam & resolvendam Sinoviam spissèfactam, & articulationi inhærentem, substituendum esse censeamus.

Addamus tandem & ea, quæ ex *Boerhavio* hausta, his observanda sunt, caseum qui vetustior & saporis acrioris peramant. Hujus scilicet usum, labiorum, gingivæ, linguæ & gutturis inflammationes produxisse observat, exinde autem concludit, quod & stomachum & intestina acrimonia sua adficiendo, succum præter ea improbissimum producendo, multorum effectuum sinistrorum causa evadat; plane nullum itaque vel parcissimum saltem ejus usum & *Vir* Laudatissimus præcipit, & proverbium illud antiquius suadet:

Caseus ille bonus, quem dat avara manus.

Lac denique aquam lumbricorum pectoralem, officinæ Batefianæ; ferum, aquam alexiteram, & aquam lumbricorum simplicem, Officinæ Parisiensis; butyrum vero recens, unguenta: Arthanitæ, Tuthiæ, & fulvum seu Matris, ejusdem Officinæ, ingreditur.

℞. Lactis vaccini recentissimi, chopinam j.

Florescentium urticæ candidæ summitatum, pug. j.

Cinnamomi contusi ʒj.

Bul. ad reman. juscul. j. col. & fluore albo laboranti, jejuno stomacho, mane, per 9. dies exhibeatur.

℞. Senecion. q. v.

Cum lacte bul. pro cataplasmi. contra coagulationem lactis, mammis adplic.

℞. Foliorum absinthii pug. j.

Quæ quum additis duobus alii bulbulis, ad consistentiam cataplasmatidis ebulliverint, umbilico, ad profligandos intestinorum vermes, adplicantur.

℞. Florum rosarum sylvestrium, pug. β.

Additis 3. septiariis lactis lente ebulliant, ad chopinæ unius remanentiam. Tum percolatum liquorem, gargarismi instar, contra inflammationes tonsillarum adhibeas.

℞. Ficus pingues num. vj.

Additis 3. lactis chopinis & i. aquæ communis septiario, ad unius chopinæ remanentiam, ebulliant; & habebis gargarismum, contra ulcera in ore exorientia, seu aphthas.

℞. Folior. borrag.

nasturt. aquat.

cichor. silvestr.

buglofs. ana pug. j.

Contus. herb. macer. per 24. hor. Tum Lambico trad. & add. feri lib. x. Deinde destil. per B. M. ad consumptionem $\frac{1}{2}$. humiditatis, f. a. u. Quod quidem serum, temperandi atque aperiendi virtute instructum, contra intestinorum calorem, constipationum principia, & in affectionibus hypochondriacis, eximia sese virtute commendat; Pro dosi singulis integri mensis, diebus, tres tibi veniant scyphi majores; & circa medium & finem temporis, usui ejus destinati, corpus hausto medicamento expurgandum esse, teneto.

℞. Seri, chopinam j., cui per noctem integram

Foliorum fumarie pug. β.

Croci martis aperitivi ℥β.

Linteo rariori involuta, infundas; postero autem die percolata, ac tepefacta, uno haustu accipias, pro sero aperitivo, contra scabiem, lichenes, aliasque cutis adfectiones.

℞. Lactis pintam j. quod simulac ebulliverit, sinapi recenter præparato, quantum tria cochlearia capiunt, permisceas; iterum igni paullulum admoveas, deinde autem lintei densioris ope percoles, & habebis

Serum sinapifatum, quod uno haustu, per 3. ad 4. subsequentes dies, mane jejunos, & vespera, cubitum iturus recipias, si medium quæris excellentissimum pro tussi glareosa, pro Astmathe humido, & pulmonis adfectionibus, ab spissitudine humoris bronchialis proficiscentibus.

℞. Corticis Sambuci interioris & viridis pug. j.

Bull. in lactis vaccin. & aq. comm. ana chopina j. ad reman. $\frac{1}{2}$. partis tum expr. col. div. in iiij. p. æ. f. decoctio purgans contra hydropem ascitem, cujus singulas doses, singulis horis matutinis, jejuno præbeas, relicta tamen tertia, si binæ priores sufficientem jam evacuationem procuraverunt.

℞ Infusionis Theæ seu Veronicæ ℥xij.

Salis, seu sacchari lactis ℥β.

M. & divide in iiij. partes æquales, quas die una, quaternis horis interjectis, per multum tempus accipiat, quicumque vel arthritide, vel colica nephritica, vel pthisis initio detinetur.

℞. Florum sambuci

Foliorum hyosciami ana pug. j.

Quæ lacte ebullita, cataplasmatibus instar, contra colicam scorbuticam adhibeantur.

℞. Foliorum malvæ pug. j.

Quæ quum ij. libris aquæ communis admixta, ad dimidii consumptionem ebulliverint, & percolata fuerint, addas butyri recentis ℥β., & habebis clysterem emollientem, contra inertiam alvi.

℞. Butiri mense Majo confecti lib. j.

Hanc, additis quinque folii recentis foliis tantis, quanta, ut butyro subigi possint, sufficiunt, probe commisceas; tum vasi bene obturato committas, & per integrum mensem, soli exponas; tum bull. f. a. col. &

unguentum proveniens f. a. u. qui præstantissimus est , contra tumores & ulcera scrophulosa, dum linimenti instar adhibeatur.

Rx. Pulpæ recentis ex radice patientiæ silvestris

Enulæ Campanæ ana ℥ij.

Butyri recentis ℥jv.

Florum sulphuris ℥jss.

Salis communis ℥iiij.

M. f. a. & habebis unguentum contra scabiem.

Rx. Tutia præparata ℥ss.

Corall. rubr. ꝑ.

Camphoræ

Sacchari saturni ana gr. xviiij.

Pompholygis ℥j.

Æruginis gr. vj.

M. omnia, additis butyri, Majo præparati, nec loti ℥ij. & erit collyrium discutiens & temperans contra maculas & ungulas in cornea obortas, cujus portiunculam, pisi instar, cubitum iturus, usque dum oculorum morbus omnis recesserit, oculo immittas.

Vitulus tandem, oleo, phlegmate & sale volatili abundans, carnem, frequentissimo omnium usui exhibet, quam si optimam quæris, candidam seligas, succulentam, glutinosam & boni saporis. Qui ex Normannia ad nos conducti, saporis æque ac candoris excellentia summa sese commendant, *vituli fluviatiles* adpellari solent. Caro vitulina igitur, nutriendi, humectandi & refrigerandi facultatibus gaudens, alvum emollit excitatque & potiones refrigerantes omnes ingreditur; imo, qui irratione sanguinis seu inflammatione laborare timentur, recipiendæ corporis purgationi, mediante aqua vitulina, præparari solent, quam inter prandium accipendam, sic præparato: Unam carnis vitulinæ libram, 3. aquæ pintis, ad duarum remanentiam, ebullito, & quatuor in potiones æquales dividito, quarum alteram jejunus, alteram post prandium, haurito. Hæc enim intestina relaxando, corpus recipiendæ purgationi adaptat, impeditque quominus tormina & irritationes intestinorum excitentur. Quamvis cæterum vitulinæ carni, succo quodam temperatissimo repletæ, nullos tribuere possimus effectus sinistros: his tamen infestior est, qui frequenti laborant alvi profluvio, fibrarum intestinalium relaxatione originem debenti. Illis autem, qui vel debiliore vel delicatiore corporis temperatura gaudent, nec frequenti ac vehementiore exercitio desudant, illis, inquam, convenientissima, minus tamen adpropriata est, his, qui robustiore corpore instructi, ac laboribus perferendis vigentes, nutrimentum solidius requirunt.

Vituli pulmones pectorales esse cognovit Medicina, humectantes, & ad leniendam pectoris acrimoniam, & tussim, contra tabem itidem facientes. Gallicum aliquod nomen particulare, *moux de Veau*, iisdem designandis sufficit. Summo in pretio, cognitæ suæ utilitatis ergo habentur, si vel napis, vel brassica rubra additis elixi, adponuntur. Nec non pedes vitulini, humectantis & glutinosæ suorum qualitatis ergo pro pectoralibus æstimantur, & una cum poplitibus ejus gelatinas & potiones intrant, quæ ad moderandam abundantem sanguinis jacturam, & immodicum hemorrhoidum, seu menstruorum, fluxum, imo sanguinis sputationem præscribi solent.

Adeps ejus, si de usu externo quæris, & is præsertim, qui reni vicinus est, pommatis admiscetur; imo, virtutis suæ resolventis ac emollientis ergo, medullæ vitulinæ instar, ad emolliendas adhiberi solet scirrhas, muscutorum tendinumque durities, & accelerandam abscessus maturitatem. Coagulum denique vituli in stomacho, ut supra diximus, obvium, non est, nisi lac coagulatum, sale volatili acido abundans, quod fermento cedit nutrimentis vituli digerendis.

℞. Carnis ex femore vituli lib. β.

Bull. in aq. chopinis 3. ad remanent. jusc. 2. Circa finem add.

Fol. portulac.

betar.

cichor. alb. ana pug. β.

Lactucam transvers. dissect. num. j.

Col. expr. divid. in ij. p. æ. f. duæ portiones refrigerantes & humectantes. Quarum alteram mane, jejuno stomacho, alteram quinta hora pomeridiana, per 9. dies subsequentes haurias.

℞. Pulmonem Vituli unum

Napas minores num. xij.

Brassicæ rubræ foliorum

Foliorum pulmonariæ ana pug. ij.

Hæc quum 3. aquæ pintis, ad 4. potionum remanentiam ebulliverint, colabis & in jv. partes æquales divides, quarum xv. per dies, binas, singulis diebus, alteram mane, alteram quinta, post meridiem, hora, accipias. Utaris autem hac portione ad leniendam tussim, & ad detergendas pectoris ferositates acres.

℞. Rad. oxalis

Cichor. silvestr.

Dent. Leon.

Fragariæ ana ʒβ.

Lot. abraf. & dissect. omnib. add. carnis vitulin. ex femor. ʒβ. bull. in aqu. comm. chopin. iij. ad remanent. juscul. ij. Add. sub fin. coct.

Folior. borrag.

bugloss.

cichor. silvest.

agrimon. ana pug. β.

Col. expr. divid. in ij. p. æ. f. juscula temperantia & aperientia, quorum alterum quovis mane, alterum quinta pomeridiana hora, per mensem integrum haurias, admixta cuivis dosi salis Glauberiani ʒj.

℞. Ped. vitulin. contusor. num. vj.

Furfur. loti ʒvj.

Myrrh. pulveris. ʒiiijβ.

Vini

Lactis ana chopin. iij.

Lambic. destill. ʒ. liquoris, f. a. u. Habebis igitur aquam cosmeticam præstantissimam, qua faciem, frustulo aluminis dulcificati leniter fricando, lavabis.

C A M E L U S.

Camelus. Offic. Lemer. 167. Boffch. Dal. Pharm. 343. Aldrov. de Quadr. Bisulc. 880. Schvenckf. Quadr. Siles. 72. Jonst. de Quadr. 67. Camelus Dromos, Gefn. de Quadr. 59. Camelus Caspius. Charl. Exerc. 13. Camelus, unico in dorso, gibbo, seu Dromedarius, Raii Syn. Anim. Quadr. 143. Camelus omnium auctorum. Linn. Mat. Med. Camelus Bactrianus. Quorumd.

Unicum saltem cameli hujus in dorso, gibbum reperies. Dromedarii autem descriptionem anatomicam, ex Actis Regiæ Scientiarum Academia, ad amplificandum historiæ naturalis ambitum inservientibus, haustam, quid enim hoc fonte dignius? tibi, L. descriptam offeramus. Dromedarium autem de quo tractat, Camelum communem esse, descriptioni juncta loquitur imago.

Dromedarii nomen, sic acta loquuntur, animali huic tribuimus; quamvis ex communi usu loquendi, camelus dicatur ille, qui unum portat gibbum in dorso, qui autem duos, Dromedarius. Solinum sequimur, Aristotelem vero, Plinium, aliosque contrarios habemus; hi enim duas camelorum species constituent, quarum altera, retento generico nomine, duplici gibbo instructa, quum Asiæ partes orientales præsertim inhabitat, Camelus Bactrianus, nuncupatur, dromedarium vero mole, viribusque superat; altera autem camelorum species, minor & cursui aptior, imo agilitatis ergo, Dromedarii nomen gerens, unico saltem in dorso, gibbore prædita est, & partes Asiæ occidentales, Syriam scilicet & Arabiam tenet. Vir Arabs, Dipi, quo præsentem Dromedarii nostri dissectionem instituimus, sibi patrios camelos nostris simillimos esse adfirmabat.

A vertice ad pedes $7\frac{1}{2}$. pedum altitudinem profitebatur, ab altissima spinæ dorsalis incurvatæ eminentia, seu gibbo, $5\frac{1}{2}$. a cauda, (cujus vertebræ omnes simul sumtæ 14. erant digitorum) ad stomachum, $6\frac{1}{2}$. cauda una cum pilis $2\frac{1}{2}$. pedem; caput denique ab occipite ad rostrum 21. digitos, longitudine, ostendebant.

Pilo obtegebatur fulvo-cinereo, tactu lenissimo, haud adeo brevi; brevior tamen erat pilo bovino, ast in capite, sub gutture, & ante collum, longior. Longissimum vero dorsi in medio reperivimus, hic enim pedis integri longitudinem explebat; & mollis quamquam atque flexibilis, in altum tamen surrigebatur adeo, ut maximam gibboris partem constitueret; etenim si manu illud deprimebamus, vix altius videbatur, quam dorsum canis elevatum, porci, aliorumve quorundam, quæ prominente, nec, ut equus, vacca & cervus, excavato dorso, instructa sunt. Varii interim auctores, ex commixtione porci & cameli Dromedarium generari voluerunt. Contrariatur Aristoteles, & nullum aliud animal, præter camelum, gibbum in dorso portare adserit. Iterum alii, gibbum cameli pro quadam carnis portione habent, quam supra vertebrae dorsi eminentem, & deficiente cameli nutrimento, & carne decrescente, sensim evanescere dicunt. Nos vero nullum carnis hujus vestigium in Dromedario nostro, haud adeo macilentum deteximus, imo gibbus, non nisi pilis efformatus, adhuc multo magis elevatus conspiciebatur.

Tertii adhuc generis pilum in cauda ejus deteximus, leucophæum scilicet ac durissimum, & jubæ equinæ pilis simillimum.

Caput, corporis ratione, exiguum, rostrum leporis instar, bisulcum, dentes denique ruminantium dentibus æquales, profitebatur. Maxillarum superior & incisoriis & caninis carebat, & cornubus caput, quæ plurimis ruminantium alias natura donavit. *Cardanus* cornuum loco, pedes armatos camelo datos esse refert, quos boum instar, cornibus munitos esse, *Plinius* docet. At nec cornua, nec ungulæ pedum extimescendæ veniunt, inferiorem etenim partem pedis cujuscvis, duæ obtegunt ungulæ minores, superiorem vero, depressam, & latam ac multa carne instructam, pellis quadam vestit mollis crassa & callosa, necessaria tamen, Asiæ & Africæ solum lapidosum calcanti. Quam quidem pellem, soleæ viventis instar, nec continuo animalis cursu detritam esse observavimus, quod enim *Aristoteles*, de camelis, apparatus bellicos deportantibus, & pedibus illorum, sandaliis quibusdam indutis refert, id a vulneribus, quibus in bello expositi sunt, illos præmunitum, nec ob evitandas incedentium molestias, inventum esse censemus. Et ipsa pedis eorum mollities, viarum asperitati cedendo, ne adeo faciles deterantur, impedit; *Plinius* licet, camelum nisi pedum tegumento munitum, longiusculo itineri perferendo haud sufficere scribit. Duriora sunt genua ejus callosa, & præ soliditate, magis accedunt cornubus, reliquorum in pedibus obviis.

Aliud singulare quoddam, cameli in pede ab *Aristotele* observatum, frustra quævivimus. Hunc scilicet anteriùs quadrifidum, posticus vero bisulcum esse, & pelle quadam intermedia, anserum instar, cohærere dicit. Nostri dromedarii pedes, superne saltem, 4. seu 5. digitis ab extremitate, unicam fissuram ostendebant nec pellem fissuram connectentem; infra autem, pedem integrum, nec divisum reperivimus.

Sex præterea callos in gubus cameli numeravimus, unum scilicet in omni crurum anteriorum articulo, quorum prior, superior, & posticus respiciens, cubiti proprie sic dicti regionem occupabat, secundus autem, huic inferior, magisque anteriorem in partem conversus, in illa articulatione conspiciebatur, quæ pugni plicaturam constituit. Sic & utrumque ex cruribus posterioribus, unum exhibebat callum in prima, seu suprema juncturarum, verum genu componenti.

Quatuor saltem horum callorum, quos genua dicit, *Aristoteles* quum observaverit, immerito antiquiorem quemdam auctorem reprehendit, nempe *Herodotum*, qui sex illorum numeravit; imo in majorem adhuc errorem postea irruens, his saltem quatuor in regionibus genu cameli flecti posse adserit. Flectitur enim, ut reliquorum, octo in variis locis, & illæ saltem binæ plicaturæ crurum posteriorum, quæ talorum loco ipsis veniunt, his callis destituuntur. Quos quum dissectos disquireremus, substantiam omnium, carnis adipis & ligamentorum substantiæ intermediam esse, varios insuper materia purulenta crassissima repletos deteximus. Hinc, quæ ab aliis tradita recordabamur, succurrere; & quum arthritide sæpius infestatos esse camelos scripserint, nostrum Dromedarium, arthritide in suppurationem exeunte, laborasse, conclusimus.

Septimum præter ea callum, reliquis valde majorem, inferiore pectoris in parte, ac sterni fortissime adhærentem, hujus in regione, eminentia quadam conspicuum, & 8. digitorum longum, 6. latum, 2. altum invenimus; nec non multa materia purulenta impletum, cujus ergo, & hanc
ejus

ejus partem, ita ut articulationes, artrithidi obnoxiam esse judicavimus. Quin enim sola sustinendo corpori toti inservit, dum humi recumbenti camelo onera imponuntur, calore & debilitate adfecta, contrahendis humoribus iisdem, quibus articuli, subjacet. Cæterum quia camelum tantæ frugalitatis amicum, & tantas laborum molestias perferentem, artrithide laborare videmus: artrithidis causam haud semper ex inertia, voluptate & otio; sed etiam ex nimio labore interdum repetendam esse patet.

Antequam vero partium interiorum ad disquisitionem progredieremur, præputium ejus amplissimum ac molle, non solum omnem virgæ extremitatem obtegere, sed quoque ulterius prominendo, posticus reflecti, obvolvique notavimus. Hinc forsan opinionis origo: quod, leonis, leporis, castoris, aliorumque instar, quorum virga antrorsum incurvari nequit, & suam camelus urinam posticus eiiciat.

Partes insuper cameli internas equinis simillimas reperivimus. Hepar etenim in 3. lobos erat divisum, quorum binorum, eorumque majorum in medio, tertius adparebat minor, acutior illisque inferior. Hepar vero suspensum quod tenet ligamentum, haud Cartilagini Xiphoidi, sed Diaphragmatis centro cohærebat; illaque membranæ peritonæi portio, diaphragma quæ obtegebat, præ splendore, inaurata videbatur. Fel denique nulla vesicula inclusum, per omnes canales cholidocos & hepaticos erat dispersum.

Nec ventriculi, quatuor in partes, ut ruminantium omnium, divisi, eadem erat conformatio, quam in quatuor ventriculis, ab *Aristotele*: *Cœliâ*, *Echinos*, *Kekrûphalos*, & *Enistron* dictis, observamus. Nec nisi constrictionibus quibusdam separabantur, ita, ut primus, amplissimus, secundum produceret parvissimum, hunc tertius exciperet, primo angustior, at longior, hunc denique quartus, secundo similis.

In superiore parte ventriculi secundi varia foraminula quadrata, sive ostia viginti circiter cavitatum, vel sacculorum, duobus membranis, ventriculi substantiam constituentibus, intermediorum, conspiciebantur. Sacculos vero illa reservatoria esse censemus, in quibus *Plinio* teste, magnam repertæ abundantis aquæ copiam, venturam ejus inopiam provide evitaturi, recondere solent cameli. Qui enim per desertam Arabicam iter faciunt, sitis vehementiæ subventuri, nonnunquam camelos suos mactare, & in ventriculo eorum, aquam reperire dicuntur. Rationem reddere possemus, quare instinctu naturali inductus camelus, *Aristotele* & *Plinio* testibus, nullam nisi pedibus suis turbidatam hauriat aquam; quo scilicet, gravitate majori acquisita, diutiori temporis spatio extra stomachum detineatur.

Quatuor erant intestinorum genera. Primi enim generis, ex quarto ventriculo prodeuntia, haud adeo magnam crassitiem, & 6. pedum longitudinem profitebantur. Secunda crispata, variisque rugis constricta erant, ita fere, ut colon ligamento quodam illud complicante, & in varias quasi cellulas dividente, constringitur. Mediocre crassitudinem, & longitudine 20. pedes attingebant. Tertiæ ordinis intestina, omnibus amplissima 10. pedum longa; quarti tandem, præ reliquis graciliora, 56. pedes, longitudine sua explebant. Quæ undecim ulnarum longitudinem constituunt simul sumpta, & ad 13. usque adscenderet, si complicata atque crispata quævis, explicare velles & erugare.

Lien sinistro renum superjacens , 9. digitos longitudine , 4. latitudine , & dimidium altitudine sua referebat .

Virga , quæ conficiendis arcuum cordis adhiberi dicitur , 19. digitorum longa , extremitatem cuspidatam præ se ferebat , atque aduncum substantiæ cartilaginosa efformabat ; nec ullum balani vestigium aderat . Urethræ extremitatem membrana quædam tenuissima constituerebat .

Pulmones uno saltem , ex utraque sui parte , lobo constabant . Cor prægrande & acutissimum 9. digitorum longitudinem , 7. vero latitudinem præ se ferebat .

Linguae tandem conformatio singularis dici meretur . Alias enim , quamlibet linguam , si a radice ad cuspidem perrexeris , asperam reperiēs , eminentiis quibusdam , a cuspidem ad radicem tendentibus , asperitatem ipsi inducentibus : ast Dromedarii linguae pars dimidia extremitatem versus , & tenuissima quidem , solito modo , ab intus scilicet foras proficiscentibus , asperitatem ostendebat ; in altero autem ejus dimidio , prope ad radicem , & crassissimo , centrum aliquod , variis eminentiis linguam obtegentibus intermedium , conspiciebatur , & hæ quidem eminentiæ omnes , cuspidibus suis a centro obversis , manui , centrum versus procedenti , asperitatem obloquebantur . Imo & his eminentiis intermediæ videbantur , aliæ denuo , duplici ordine , in linea recta , quinque , dispositæ , quas umbilicis , variis rugis in gyrum circumactis constantibus , ac subtilissime constructis , æquiparare posses . Quæ omnia , figura distinctius conspiciuntur , quam descriptione & verbis explicantur .

Cerebrum cum cerebello $6\frac{1}{2}$. digitorum longitudine , & 4. digitorum latitudine absolvebatur . Nervi optici ad longitudinem varia foraminula , sanguinis plena , conspiciebantur . Apophysium mammillarium magnarum crispis etque singulae duobus gaudebant conductibus , quorum alter rotundus , alter vero sectione transversali , decussatus videbatur . Glans pinealis , magnitudine avellanam referens , tribus aliis constare & horum compositione , quamdam in medio cavitatem efformare adparebat .

Et hætenus quidem de Dromedario ex descriptione Virorum Cel. Academiae Sodalium , qui ut ipsi fatentur , a recepto vocabuli usu recedentes , Dromedarium , camelum uno saltem gibbo , camelum simpliciter autem , duobus instructum adpellant . Nos vero , in his quæ dicenda supersunt , communi loquendi usui nos conformare malumus .

Exeunte Januario anni 1752. nosmetipsi Dromedarium 14. annorum , & camelum foemellam , tertium annum agentem , Parisios utrumque tendentem , Aureliis , vidimus . Dromedarius itaque exceptis duobus gibbis , 6. pedum altus , & 10. pedum longus , primo quidem intuitu , haud adeo pulchre exstructus videbatur . Ast diutius structuræ suæ considerationi inhaerentibus , pulchrior & aptior conformatus adparuit . Quatuor in extremo rostro , nares præbebat , binas majores , utrinque perforatas , & freno capiendis aptissimas ; binas item inferiores , minores & respirationi infervientes . Oculos magnos atque profilientes ; frontem in medio paullulum depressam , latissimam & pilo truncato ac lanæ simillimo obsitam ; aures breves atque rotundos ; collum prælongum , supra subtusque pilo longiori & fulvo munitum , genua fortia , pedes antè magis fissos quam postè ; sub pectore item pellis frustum callosum , cui vel quiescens vel rumi-

minans innixus, sese reponit; binos in dorso gibbos quorum spatio intermedio, tamquam sellæ commodus insidere homo potest; tergum angustum; crura postica altissima sed tenuia; pedes posteriores bifidos, & bovinorum instar, productos; caudam breviorē, ac nisi in extremitate, paucissimis pilis ornatam. Cæterum labro superiori, ut lepus, ad nares usque fisso gaudet, dentibus tamen anterioribus maxillarum in superiore caret; nec nisi binis saltem, ex quovis latere, dentibus majoribus, medium versus constitutis gaudet, quorum posterior, longior & recurvatus, falcato apri denti similis, ferra nonnunquam rescindendus venit. Aliud item dentis frustulum nigrum, in fundo maxillæ hujus observavimus. Maxilla inferior autem, dentibus, equinis similibus, probe constipata ac repleta est. Lingua equinam, & palatum, asperitate sua, asinum refert. Virga, crassitudine calami haud exsuperans, & longissima, posticus quum recurvata sit; procurrens ejus urina, adscensu suo & lapsu, arcum efformat. Imo posticus, seu opposito tergo cum vel coire adfirmabat suus magister; cujus tamen contrarium, in quodam camelo alius generis, sese observasse refert *Matthiolus*; quem eo minus errasse censemus, dum, eadem facilitate & ante & post se inclinantem virgam, viderimus. Testiculos, verris instar, aliquantum sub cauda sitos, nec nisi catulitionis tempore valde adparentes, pilo tenuissimo obtektos conspeximus. Idibus Januarii, catulitionis suæ tempus exoritur, & duos vel tres per menses subsequentes continuatur. Tunc vero frequentissime oscitabit; & in vertice, pilis obtektis, madorem quasi ex sudore frequenti exortum ostendet, & frequentiores rugitus extollet ac acutiores; ciborum denique inappetentia laborabit, carnem, pinguedinem, pilos denique amittet. Peracto autem coitu tempore, & pinguedinem, & vigorem & ciborum desiderium, & pilum sensim recipit; præ fame, vel frumento, avena, hordeo, similibusque vescitur; ast nausea correptus, carduos, herbam recentem, frondes, &c. quærit, iisque appetitum excitare solet. Carduos in primis cuicumque nutrimento anteposit, infrequentior potum quærit, ast pro siti explenda, vel pintas aliquot uno haustu epotat; & 25. ad 30. libris fœni, quotidie devorandis sufficit.

Magnam præterea in camelo obedientiam erga magistrum, & eximiam docilitatem observavimus; hujus enim jussu repetitis in genua prolapsus, dorsum imponendis plaustris, & ascendenti rectori adaptat. Passu incedit longiori, & in viis probe stratis 25. ad 30. milliaria, cursu suo, per diem absolvit. Citato plurimum gradu, numquam fere cursu fertur, & tunc pælearis pilos longiores vento agitados, jucundissimo spectaculo, fluctuanter videbis. Leni plerumque motu, nec violento passus promovet, nec unquam recalcitrat, 1500. imo pluribus onerum libris deportandis sufficit. Aëstus Venerei tempore, interdum gibbi ejus bini (musculis quibus eriguntur tunc relaxatis) quasi flaccidi dependent, quos relevandos, & usque dum suam vim ac fortitudinem receperint, erectos retinendos curabis.

Cameli foemella, quam vidimus, vix dimidiam sibi destinatam altitudinem adtigerat. Capite gaudebat Dromedario simili, & pilo fulvo ac longiori, longissimo autem in dorso, ubi gibbum, ab humeris ad caudam extensum, ostendebat. Naribus, quas in Dromedario observavimus, perforatis & magnis carebat, maxillarum vero utraque dentibus erat instru-

æta. Uber ejus pedibus posterioribus intermedium, & vulva, caninæ accedebat. Urinam, leonis instar, interceptis ejaculabatur.

Tanta autem inter utrumque intercedebat societatis consuetudo & desiderium, ut Dromedario absente, fœmella nec cibos caperet nec potum, sed violentissimo mugitu, socium quæreretur. En desiderii & commercii fructum, quem in novis Publicis Parisiensibus, die Mercurii, 21. Februarii 1753. sequentibus descriptum legimus: Nundinæ, S. Germani in suburbio celebratæ, spectaculum aliquod Physicorum adtentione exhibuere. Annus est, quo Dromedarium & Cameli fœmellam spectatum ibi expositos videamus. Hoc anno redeunt, & Dromedarii pullum, decima & quarta mensis hujus die natum, commercii sui fructum, habent socium. Annum per integrum matris in utero gestus est. Num vero, cœli Arabici Gallicique ob differentiam, diutius vitam producere valebit, videndum. Addit sequens novorum folium: Pullus Dromedarii, de quo nuperrime verba fecimus, tertio vitæ suæ die mortuus est.

Patriam camelus cognoscit regiones Asiæ & Africæ calidas, frigidis vero, imo nostris, degere nequit. Deportandis interim inservit oneribus, & lac præbet cibo optimum. Persiam tenentes, Dromedariis, pro equis vehuntur, camelis autem communibus, tentorium superponunt, homini, pedibus decussatis sedenti sufficiens, & his camelorum vecturis mulieres Persicæ utuntur. Nec non curribus protrahendis nonnunquam adhibentur. Sunt enim dociles, & magistri voci obtemperant, quum nempe onus vel imponere vel subtrahere velit, vix vocis sono opus est, & in genua sese demittunt; nec nisi nimio pondere onusti, sese relevant, interdum & onerantem capite percutiunt, plurimum vero, uno clamore nimium se pondus sentire indicant. Nec nisi coitus tempore, ferocitatis signa edunt; tunc vero, magistro obedientiam renuunt, omnes mordicus petunt, pedibus dentibusque in animalia, imo in leonem feruntur. Tunc freno, naribus perforatis iniiciendo, opus est. Veneris æstus vere plerumque incedit fœmellam, quæ genibus prostrata masculo sese submittit, & unum saltem pullum utero gerit, quem subsequente vere effundit. Masculos, ut fortiores evadant, castrare, nec nisi unum intactum pro decem fœmellis relinquere, moris est. Dicunt alii, quod nisi a teneris adsuæfacti sint, nunquam genuum flexione, recipiendo oneri sese accommodarent, tertio autem vel quarto vitæ anno, nec prius, plaustris onerari solent. Nec strigile egent, dummodo virgula pulvere contractum excutias. Turcicis in terris viventium fimus sole arefactus, ipsis pro strato, & hominibus, per desertam peregrinantibus, pro ligno, igni admovendo, cedit. Nec lupato, quibus vehi velis, domare necesse; annulum naribus indere sufficit, cui frenumnectere possis. Nec ictibus, sed cantu & sibilo, gradum eorum accelerabis; acutiore enim voce quavis exaudita, alacriores incedent; excitandæ autem catervæ simul progredienti, tympanis opus est; & tintinnabula genibus illorumnectunt, vel pro conservanda illorum jucunditate; vel viæ cognitione, si præcipitia transeunt. Fortiori autem animo alacer progreditur camelus, nisi terra pinguior & lubrica calcanda sit, quam ut strenuus emetiatur, callus pedi subnexus impedit. Tunc ergo vel strata quædam substernenda, vel via aridior cum cœlo sereno expectanda. Cæterum frugalissimus, vix aliud quærit præter urticas, carduos, arborumque fron-

frondes, quos transeundo decerpit. Quum vero labori eximio diu fatigantur, hordeum, vel farinam ex hordeo & frumento compositam præbeas. Massæ scilicet ex hac farina compactæ frustum, quod pugnos binos magnitudine, seu, Persarum modo, 3. libras pondere refert, exhibeas. Huic & quædam gossypii grana, dactylos, & pisces arefactos admiscere consueverunt. Si enim herbis tantum inter ambulandum decerptis, vivendum esset camelo, ex itinere rediens, vix quidquam pinguedinis & carnis suæ reportaret; qui quidem nulla curæ ratione habita, domum revertens valde imminutum corporis volumen & dorsi gibbum ostendit. Multo adipe instructus quum iter ingrediatur, per 40. ad 50. dies hordeo carere potest. Quidquod nutrimento deficiente, 10. dierum famem perferre dicitur; certum est, quod 5. imo pluribus diebus, potu carere possit. Et herbis recentibus viventi, non nisi tertio quovis die, aquam præbere, moris est. Annorum vero, quos vivunt, spatium incertum, alii 50. alii 60. rursus alii 160. annis absolvi dicunt.

Arabibus pro parte divitiarum cedit camelus, quo aptius nullum reperies animal oneribus deportandis. Olim bellorum adparatibus devehendis, nunc vero omnibus Turcorum itineribus adhibetur. Fœmella insuper cursu citior habetur præ masculo. Et quam docilis sit, ictus, quem perpeffus est, memoriam diutissime conservat, & vindictam meditatur. Nec nisi iracundus, & tunc quidem rarior, recalcitrat. Contrarium sibi habet leonem & tygrum, quibus devoratur; camelus equum, equus, asinus & mulus camelum extimescunt, nisi diutissima societate consueverunt. Rariorem nostris in terris, camelum, nec umquam fere, nisi principum in stabulis, reperies.

Nomen ejus Gallicum, *Chameau*, olim *Chamel*, pro quo Hebræi: *Gamal*, Arabes autem: *Gemal* dicunt, una cum Germanico: *Cameel*, & Belgarum: *Kamel*, *Kameel*, Anglorum: *Camel*, & Italarum: *Camelo*, Latino: *Camelus*, seu Græco: *Camēlos*, originem debere videntur. Vox Gallica autem: *Dromedaire*, pro qua Germani: *Dromedar* vel *Dromedir*, Angli *Dromedary*, & Itali: *Dromedario* dicunt, ex Latino: *Dromedarius*, seu Græco: *Dromas*, cursorem denotante, oriundum esse patet.

Omnes insuper, quotquot sunt, partes cameli, multo abundant sale volatili, multo oleo. Rarior in regionibus nostris, nostro alimento cedere nequit, ast Africæ & Asiæ incolis, & lac & carnem, nutrimento, exhibet. Prosper *Alpinus* est, qui, in *Historia Ægypti naturali*, lac cameli, pro medio Arabibus frequentissimo, contra Hydropem, Asthma, ictum, alvi constipationes, &c. venire, refert. Neminem illorum vel scabie, lichenibus, lepra, aliisque cuticularibus morbis adfectum videbis, cujus causam Vir laudatus lactis cameli usui tribuit, quod aperitiva facultate gaudens, omnem sanguinis immunditiem, urina expellit. Addit idem ille, quod mulier quædam, aliquo quasi complexu morborum correpta, & febris, Hydrope ascite, hepatis & lienis obstructionibus inveteratis, variisque urinæ suppressionibus laborans; omnium mediorum instar, per diem 3. septiariis ex lacte cameli, per tempus continuato usu, adhibitis, ab omnibus infirmitatibus tandem liberata fuerit. Lacte itaque adipe, sanguine, felle, urina, & stercore cameli medicina nostra utitur. Adipe scilicet, resolvente & emolliente, linimenti seu suffumigii instar, ad sedandos Hemorrhoidum dolo-

dolores. Sanguinem ejus adhibet contra dysenteriam, & mulieribus concipiendi facultatem inducendam, regionem matricis, post menstrua, eodem fomentando. Fel cameli, æquali mellis portione admixtum, linimentum resolvens, pro angina, egregium exhibet. Urina, cujus sal ammoniacum olim præoptabant, ad dealbandos dentes facit. Et stercus, quod pro vulnerario, detergente & resolvente habent, arefactum & melle subactum, Cataplasmati cedit resolventi ad dissipandos tumores.

Pilus tandem, varios quibus utimur pannos, illum præsertim, quem: *Camelot* & Germani adpellant & Galli, ingreditur.

C A N I S.

JAM vero Vir Cel. *Linnaeus*, in *Systemate naturæ* imitantes, tria animalium genera, canem scilicet, lupum & vulpem, canis sub nomine comprehensa, describamus.

Canis. Offic. Schrod. 274. Boffich. 245. Lemer. 175. Ind. Med. 26. Dal. Pharm. 448. Gesn. de *Quadr. digit.* 213. Aldrov. de *Quadr. digit.* 482. Schvenckf. *Quadr. Siles.* 75. Jonst. de *Quadr.* 122. Charl. Exerc. 26. Merr. Pinn. 168. Raii Syn. *Anim. Quadr.* 175. *Canis cauda recurva*, Linn. Faun. Suec. 12. *Canis socius & fidelis; Canis domesticus*. Quorumd.

Pilus caninus plerumque versicolor, ubivis fere longitudine eadem, frequens, durior in dorso, ast sub ventre mollior est. Fissos canis exhibet pedes, & anteriores quinque, posteriores autem, ut lupus ac vulpes, quatuor digitis instructos. Maxillas præbet robustissimis musculis præditos; rostrum jam longius, jam brevius; 40. dentes in rictu dispositos, sex scilicet incisivos, 2. caninos longissimos & acutissimos, tum 12. molares, in utraque maxilla. Decem verrucas seu papillas, 4. in pectore, & 6. in abdomine numerabis. Oesophagum 6. constituunt tunicæ. Stomachus ejus amplissimus, & humano, præter exilitatem, similis, ac huic rubrior est. Duodenum binis perforatum videbis foraminibus, 2. transversis digitis a se invicem distantibus, ac Canalibus Choledoco & Pancreatico, ingressum præparantibus. Pancreas stomacho per transversum superstratum, Duodeno adhæret. Jejunum oblique, ad vertebrae, sinistrorsum adscendens, anteriùsque replicatum, ileon, omnibus valvulis carens, constituit. Quod ubi exit, renis dextri in regione Colon exoritur, ac præcedentibus amplius & crassius, sub valvula, cæcum transmittit, quod sacculum longum & crispatum repræsentat. Tum, colon sub hepate, stomacho per transversum superjacente, productum, lienì accedit, iterum replicatur & ad renem sinistrum progreditur, ibi autem prorsus terminari videtur, pauculum enim medium corpus versus inclinans, recti originem constituit. Cæcum insuper est oblongum, amplum, diversis modis complicatum, exitu destitutum, liquoribus semper repletum, ex ligamento quodam membranoso suspensum, & flatibus interdum valde distentum. Rectum in parte inferiore admodum rugosum, ligamento rotundo & caudæ ligamenti coherente, nectitur. Magnam glandularum copiam, intestinis tenuibus supersparsam videbis, quas tamen satius interdum extra, quam intra observare poteris, quæque compressæ, humorem glutinosum subalbum præbent. Hepar in quinque ad sex lobos dividitur. Vesicula felle duabus obtegatur mem-

membranis, crassitie sibi æqualibus. Lien longus & niger, mediante membrana intergerina latissima, diaphragmati, & epiploï ope, stomacho adhærens, & pedem quasi calceo indutum, figura repræsentans, lien inquam, parum essentialem vitæ animalis partem constituere videtur; siquidem & canes, extracto liene, salvos vixisse & incolumus, & canis fœmellam, eodem viscere carentem, imprægnatam, ac ter catulos effudisse novimus. Duos plerumque rarius vero tres canis numeravimus renes, in quibus rubros nonnunquam vermes deteximus, longiusculos, omnem eorum substantiam seu Parenchymum corro dentes, nec nisi tunicam renis externam relinquentes. Interdum & calculos in renibus enatos, vidimus, qui dum per urethram ad vesicam descendunt, mortis sui causa evadunt. In masculo tandem bini extus prominent testiculi, & membrum genitale, ossæ quod est substantiæ, ut in lupo, vulpe, aliisque; quo fit, ut generationi jam apti canes, urinam missuri, crurum alterum adtollant, canes fœminæ autem, dum urinam eiiciunt, fere omnes genua flectant. Ast, quæ subest ratio, quod canem plerumque contra parietem urinam eiicere vides? Quatuor pedibus quum incedant, respondet Cel. *Paullini*, D. præ timore, forsan, ne elevato posteriorum alterutro, in terram procidant, solidum corpus sibi vicinum quærunt, quo sustentari possint atque inniti. En, quæ de cane observata leguntur in *Celeb. Tysonis Anatomia Serpentis tinninabulum gerentis*; Animalia, masculi omnes, qui magna semper spermatis copia, vasis spermaticis contenta & præparata, instructi sunt, brevissimo spatio coitum perficiunt: cani autem, vesiculis spermaticis destituto, provida natura, & prolongandi coitus sollicita, membri genitalis radici vicinum esse voluit corpus magnum, pluribus ex cellulis vasculisque compositum, quod coitus tempore, dum sanguis spiritusque abundantes & vehementes eo deferuntur, dilatatum, & turgescens, eoque membrum reprimi, quo æstus refrigeratione & spermatis evacuatione, corpus illud relaxatum, recedenti membro cedere possit. Junioribus in canibus vix observabis testiculos. Fœmellarum uterus duo ostendit cornua, palmam latitudine, & spithamum longitudine, exæquantia, sibi similia, nec anfractibus vel cellulis instructa, extremitatibus renes usque pertingentibus; & venis, quæ ad uterum & testiculos adjacentes pergunt, membranæ cujusdam ope connexa. Uteri collum ubi inseritur, corpus aliquod observabis, quod & figura, & colore, & volumine, caput limacis, concha extracti refert. Quod si, resecto abdomine, venas uterinas subligaveris, continuo conatu uterum versus turgescant, ast cor versus debilitatæ ac decrecentes adparebunt. In arteriis autem contrarium observabis. Fœtum omnis & sua placenta & tribus involucris gaudet, Chorion scilicet, Allantoide & Amnio; ore aperto & lingua prominente, Amnii liquore inclusi sunt. Brevibus, majori canis gaudet cerebro, quam porcus, dextra cordis auricula duplo majore quam sinistra, & sanguine atro ac quasi adusto.

Omnium autem, quæ cognoscimus animalium, homini amicissimum obedientissimumque canem, experti sumus. Naturæ instinctu ad persequendas fertur feras, quem si silvis committeremus, nec domesticum redderemus, lupi, vulpisque mores imitaturum fore censemus, quippe quibus & externarum, magis tamen internarum partium conformatione respondet. Quum autem ex more communi, domestica educatione fruatur, virtutibus saltem

exponendis locus est, vitia delitescunt. Virtutum igitur prima, quam dum philautiam nostram demulcet, plurimi æstimamus, fides est canis in dominum suum constantissima, hunc ubicumque vestigia verterit, sequitur, hunc pro viribus defendit, hunc si perdiderit, vestigia ejus premendo, indefesse quærit. Alios dominorum ad tumulum resedisse, ac fame, præ mœstitia, periisse dicunt. Varia sunt & mirabilia, quæ de canum in dominos suos fidelitate recensentur; quos nisi enecaverint, semper sibi socios habebunt, quocumque enim sese receperint, canis, acerrimo suo odoratu ductus, multis exinde horis, non dicam diebus, domini vestigia investigare, imo nec cervi, adeo leniter terram prementis vestigia amittere valebit, dummodo nec aquam transierit, nec ex rupe in rupem saltu feratur. Quidquod in persequendo cervo vel lepore, flumina stagnaque transnantes sæpe vidimus canes. Innumerabilia sunt, sic in *Physico-Theologia* sua Cel. *Derham*, quæ de admirabili sagacitate, animalium venantium, & in primis, vel mea observatione, vel aliorum experientia edoctus, teneo. Sufficiat verbis uti Cel. *Boyle* in tractatu de natura determinata effluviorum; verba auctoris hæc sunt: „Vir quidam nobilis, mihi consanguineus, „narrabat mihi, se, ut exploraret, num catellus quidam sagax, bene esset „edoctus, jussit servum quemdam suum, qui non necaverat, quin ne quid- „dem tetigerat, Damarum suarum ullam, conferre se ad oppidum quod- „dam rurale, quatuor milliaria distans; exinde ad aliud oppidum mer- „catu instructum, 3. milliaria porro distans; quo facto, hic Nobilis, me- „diocri dehinc exacto temporis spatio, canem illum sagacem indagando „servo admovit, missis adhuc aliis servis, qui canem insequerentur, quin „& ipso domino, ut eventum cognosceret, eos omnes consecretante. Even- „tus hic erat, quod canis ille, numquam viso homine investigando, vi „odoratus ad supradicta loca illum insequeretur, nil quicquam obstante „hominum caterva, qui ad mercatum eadem via ibant, nec itinerantium „numero, qui eandem viam decussabant. Quumque canis ille ad præci- „puum oppidum mercatu florentem pervenisset, transivit per plateas, nil „quicquam eos curans, quos ibi offendit, nec quievit, donec ad domum „illam pervenisset, ubi vir ab eo vestigatus confederat, eumque in supe- „riori quodam conclavi invenisset, omnibus mirantibus, qui eum in- „quebantur. „ Hæc *Boyle*.

Est præter odoris subtilitatem, naturæ donum, alia adhuc miranda observabis, eaque ab educatione potius pendentia. Sic v. g. ex oculo, quo dominus illum intuetur, iram ejus dijudicare valebit, & omni tunc nutui ejus obtemperabit. Et quid quæso constantis suæ fidelitatis documentum, præter hoc, quod toti gregi conducendo & custodiendo præficiatur. Hunc, quasi jure sibi subordinatum administrat, hunc acerrime & constanter, vel a ferocissimo lupo defendit. Homo feras insequuturus canem sibi socium jungit, imo sui ipsius custodem constituit. Et quantus sit canis feras venantis ardor, non dicam ferocitas & astutia; tanta ejusdem in dominum docilitas est, tantæ, si illo delectatur, blanditiæ. Brevibus: miranda est canis docilitas, sagacitas ac fidelitas. Et harum ergo societatis humanæ dignus habetur, & hominum dapibus vescitur, & eodem tecto tegitur, & foras exspatiantes comitatur, & particeps est gaudii illorum & delectationis, quam pro viribus adaugere quærit, imo tantam quorundam

consequitur benevolentiam, ut ubivis illum secum deportent, & lecti socium habeant. Varios adtamen in amore erga canem suum nimios esse fatendum. Muhammedanorum in oppidis opulentioribus, domos publicis sumtibus exstructas, quibus canes ægrotantes aluntur, videbis, & Vir illustis de *Tournefort*, est qui adserit, quod Turcorum varii, magnam ipsis pecuniam, testamento adsignent, imo pecunia emtos testamenti ejusmodi exsecutores constituent. Heu dementiam! Nec non canes hominum vocem imitantes fuere. Sequentia enim leguntur in *Actis Regiæ Scientiarum Academiæ, Anni 1715. pag. 3.* Quæ autem nunc subnectimus, sic Acta, edere hæreremus, sibi Cel. *Leibnizium*, testem ocularem, referentem habuissimus, quod Ziziæ, quæ Misniæ urbs est, canem hominum voces proferentem viderit, & audiverit. Hic in villa natus, mediam magnitudinem & figuram canis præ se fert communis. Hunc, quum adolescentulus quidam sonos aliquos, vocibus Germanicis ut censebat, conjunctos, proferre observaret, linguam edocendi desiderio captus, nec graviore labore impeditus puer strenue cœpit, perrexit; aliquot tandem annis elapsis, triginta circiter vocabula germanica, origine Gallica, e. g. *Tbée, Caffee, Chocolat* &c. imitari edidicit, quæ tamen numquam sua sponte profert, sed præeunte saltem magistro, & tunc quidem invitatus, repetit. Tertium agebat annum, quum scholæ admoveretur. Iterum repeto: *Leibnizius* testis est. Lapponiæ in terris, canes quosdam, felum voces accuratissime referentes inveniri, Cel. *Outhier Abbas*, in *Itinerario Septentrionali*, recenset.

Proprium vero cani est, ut quæ revomit, iterum deglutiat, & lapidem, quo ictus fuit, mordicus petat, & blandiendo caudam ventilet, eamque pro ornamento, incrispatam gerat; canibus quidem & equis, hodierno ex usu, caudam decurtare solent; ast male faciunt ex sententia Celeber. *D. Paulini*, siquidem & ornamento, & fortitudinis testimonio, cauda utrique data est. Nec in censum venire merentur quæ de refecanda canum cauda *Plinius* & *Columella* docent, qui, quum cani, quadragesimum vitæ diem agenti, cauda fuerit refecta, numquam rabie eum correptum iri, referunt. Temperamenti est calidi aridique, proclivis ad iram, vorax, lubricus, & quovis anni tempore coitum adpetit. Fœminam vero, coitus cupidam, cujus vulvam tunc per xv. dies valde turgescens observabis, mas jam e longinquo, odoris ope, percipit; 60. vel 63. diebus utero gerit, & bis in anno Veneris æstum experitur. Coeuntes itaque, modo quodam, conformationi suæ respondentem, cohærent, nec illæsi divelli possunt; varii jam novo ætatis anno, plurimi duodecimo tandem sterilescunt. Nec nisi primo saltem anno peracto, nisi degenerantes eorum catulos desideres, eosdem committas; satius erit, si quartum annum uterque jam exceßerit. Quinque plurimum ad sex fœtus, interdum & xii. ad xix. canis communis utero gerit; alia quædam minorum species est, quæ unum, duos, ad summum vero quinque, una edere solet.

En, quæ in *Historia Academiæ Scientiarum Anni 1706. pag. 5.* notatu digna, observata leguntur: Rustica quadam ex villa, Parisios revertens dominus villæ, canem Danicam utero gerentem & partui proximam, ex incuria ibi relictam occluserat. Peractis autem 41. diebus, rus revertens, canem lecto insidentem, vivam quidem, ast præ debilitate haud amplius pedibus innitentem, nec ullum rabiei signum in eadem deprehendit. Nul-

lum nec excrementorum, nec foetuum, nec lactis sui vestigium supererat, quæ omnia nutrimento sibi cessisse credimus. Nec non straguli partem corroserat, & lanam, qua repletum fuerat, everserat. Subministrato autem nutrimento, deperditas vires acquirere coepit, eo tempore, quo Vir. Cel. Galois, Abbas, factum ad Academiam referret. Sic & Cel. du Hamel aliam canem, sex per hebdomades, occlusam, stramine ex sella, cui superjacebat, & parum aquæ vitam sustentasse, post vero sanitatem integram recuperasse, docet.

¶ Occlusis autem oculis canes nascuntur, quos nono demum die peracto aperiunt. Plurimi, 14. varii tamen 22. plurimumve annorum spatium vitæ terminum habent. Haud diu est, quum nosmetipsi 27. annum agentem, & 28. tandem emortuum vidimus canem villosum. Quinque jam erant anni, ex quibus & auditum & vocem, & visum, & pedum vires amiserat, vacillans enim & tremens progrediebatur, nec nisi jusculis aliisve fluidis vitam protraherat, & vix umquam ab igne & culcitra substrata recedebat. Dentes caterum canis & vocis suæ sonus, annorum, quos vixit, numerum indicant. Dentes enim cum annis flavescent, & vox rauca evadit. Odium licet implacabile lupum intercedat & canem; lupum tamen cum cane, agnorum gregem custodivisse legimus. Sic & canes venatici, summo qui furore cervos cervasque in silvis insectantur, nulli tangunt cervi pullum una cum illis educatum, qui cum illis colludere, nedum adspectu eorum terreri solet. Imo in castello Londinensi, canis quidam cum leone continua societate, a teneris, consuetus, leonem moribus interdum petere solebat, quos patientissimus pertulit. Tanta erat utriusque familiaritas. Tam superior naturæ est consuetudo. Sic & in feles acerbissimo odio quamvis feratur canis, tantam tamen consortium utriusque amicitiam constituit, ut feles minores sæpius ventri canis superjacentes altissimos ac tranquillos somnos ducant; quidquod nosmetipsi felem majorem, canis ubera exfluxisse vidimus, acerrimæ cujusvis felis alius, inimicæ. Sic & ex canis coitu cum lupo: lyciscas, cum vulpe: lacanas, & cum urso: urcanos, spurias animalium species, generari dicunt. Imo Hircadiæ incolæ canem tigro, & Arcadiam tenentes leoni canem admisisse legimus. Urcanum vero animal esse dicunt ferocissimum, adspectus terribilis, & pugna acerrimum, quod prædam dentibus correptam, ne frustatim quidem dissectum, cederet, nec taurum timet, nec leonem, nec ursum; quodque merito comparabis acerrimo illi Indorum cani, cujus admiratione vel Alexandrum M. inhæsisse legimus.

Cæterum omnes quanticumque ac quam varii sunt canes, uno eodemque ex genere oriuntur, variarum specierum varia permixtione autem, tot differentes canum formas casu enatas, hominum ex arbitrio conservatas ac multiplicatas esse constat. Jam enim hujus speciei canes reliquis anteferuntur, & studiose multiplicantur; jam alii exsurgunt, illorum locum occupant & oblivionem inducunt. Varietate enim vel in canibus, homines delectantur. Qui autem majori usui quam delectamento cedunt, ut venatici, de eorum propagatione solliciti homines, ne cum aliis permixti degenerent, studio impediunt. Curiositatis ergo præcipuas canum diversas species hic subjungamus. Tres vero eorum classes constituuntur, canes scilicet pilo brevi seu raso, & longiore obtekti, ac pilo omni destituti.

Pilo raso obductorum 15. numerabis diversos, 1. scilicet Anglicum, Gallice: *Boule Dogue*, speciei qui maximæ est, 2. Germanicum, Gallice: *Doguin d'Allemagne*, primo minorem, 3. hujus generis minimum, vix pugni magnitudinem adtingentem, 4. Danicum maximum, quem Galli: *Danois de Carrosse*, dicunt, 5. Danicum minorem, 6. Arlequinum, seu Danicum minorem variantem, 7. Danici speciem, *Roquet* Gallis dictum, brevi & recurvato naso insignem, 8. Danicum naso obtuso instructum, quem Galli: *Artois*, seu *Quatrevingt* dicunt, 9. Vertagum magnum, pilo raso, qui venandi arte instruitur, & visu acutissimo, ast nullo odoratu gaudet, 10. Vertagum magnum, pilo longo, paululum fortiori odoratu instructum, 11. Vertagum magnitudinis mediæ, 12. Vertagum minimum, infrequentiore, & omnibus pluris venientem, 13. indagatorem, Gallice: *Braque* adpellatum, 14. Sagacem, Gallis *Limier* dictum, 15. Sagacem, quem *Basset* vocant, quique vel pedibus rectis, vel inversis præditus est.

Pilo longo indutorum, 1. est: Hispanicus magnus, 2. Hispanicus minor, 3. Hispanicus niger, Gallis: *Gredin*, *Pyrames* autem illos ex hispanicis nigris adpellant, qui ciliis igneis distinguuntur, 4. Catellus histrio, Gallis: *bichon bouffe*, seu *Chien lion* dictus, ex hispanico & villoso oriundus, 5. Canis Sibericus, omnium, figura sua, singularissimus, 6. Villosus major, 7. Villosus minor, maxima cæterum villosorum in dominos suos fidelitas & obsequentia notissima est.

Pilo destitutum neminem nisi canem sic dictum: Turcicum cognoscimus; qui figura sua Danico minori accedit, & pelle oleoso, interdum unius coloris, interdum & maculis conspersa indutus est.

Media cæterum species superest canum, qui nec longo nec raso pilo obtecti, fortioris generis canes dictis, ac in villis communissimi sunt. Platearum denique canes, Gallice: *Matins*, eos dicere solent, qui ex duabus speciebus, casu commixtis oriuntur. Si officiorum suorum ratione canes distinguere velles, habebis canes villarum, venaticos, & pastorum.

Monstra cæterum, si qua edunt canes, statim illa plerumque emoriuntur. Sic paucis abhinc annis canem vidimus recentem natum, qui nulla deformitate laborabat, nisi quod unico saltem oculo, media in fronte, & rostro, elephantis proboscidi simili instructus erat.

Quibus autem criteriis optimos canum feligere possis, quibus cum morbus conflictentur, quibusve mediis illis succurrendum sit, brevitatæ studiosi transeamus. Adeat, qui illis erudiri velit, domum campestram utramvis, & *Gesnerum*, & *Aldrovandum*, in primis vero Cel. D. Paulini *Cynographiam*, opus multa eruditione conscriptum.

Ebraicum canis nomen est: *Keleb*, Chaldaicum: *Kalba*, Arabicum: *Kelebe*, Persicum: *Sag*, Græcum: *Cuôn*, Hispanicum: *Perro*, Germanicum: *Hund*, Italicum: *Cane*, Suecum: *Hund*, Belgicum: *Hondt*, Anglicum: *Dog*, seu *Dogge*, Gallicum vero *Chien*, seu *Chienne*, quod Normanni & Pictavienses: *Kien*, *Kienne* pronuntiant, ex Latino: *Canis*, a *Canendo*, seu Genitivo Græco: *Cunos*, derivandum esse videtur.

Multo insuper oleo & sale volatili quæ abundat carnem caninam, numquam, nisi inedia summa coacti, comedunt, quosquos novimus, Europæorum. Ast Sinenses, studio saginatos canes cohortim, ut apud nos oves, venum conducunt. Qui Senegalliam & Guineam tenent, ex proficiscentium testi-

monio, canes inter delicias mensæ referunt. De gustibus, sic est in proverbio, non disputandum, etenim & hi, omnium instar, ex usu hominum ac arbitrio pendent. Quos scilicet olim, carne canina admodum delectatos fuisse novimus, Romani ac Græci, hodie eandem prorsus abhorrent. Ad *Hippocratem* provocamus, qui variis operum suorum in locis canum carnem summo opere commendat. Sic, ubi secundo libro de *Dieta* circa animantium carnem versatur, caninam, calorem, siccitatem & roborem inducere aut difficillime digeri, carnem vero catuli irrigantem & statim pertranseuntem esse, docet. Idem ille in libro de *malo sacro*, epilepticis carnem caninam nocivam esse demonstrat, quippe quæ intestina spasmodis adficiat. Nec non in *tractatu de internis adfectibus*, carnem canis, leporis & volatiliū illis adnumerat, quæ levitatis suæ ergo, faciliores concoquuntur. Imo in libro de *Superfætatione*, carnem catulorum, foeminas ad conceptionem disponere posse declarat. Alia loca adessent, aut citatorum satis est, quibus Græcorum usui carnem caninam olim venisse comprobavimus. Eandem & Romanis antiquioribus, frequentissimi alimenti instar fuisse, *Plinius* cum *Galeno* testes sunt.

Spectata autem calida canis natura, & carne, communiori ejus nutrimento: carnem ejus solidius nutrimentum & magis alcalum subministrare concludes, quam vel avium vel quadrupedum usitatorum; & hujus ergo, illos facillime calidiores reddere posse, qui temperamenti frigidi ac phlegmatici, multo acido prædominante abundant.

Interdum etiam ad leniendos dolores colicos, catulos viventes abdomini adplicare usus est, quum scilicet ope caloris lenissimi, dolorum causas removeare posse censent. *Bartholinus* ille, in *Actis Medicis Hafniensibus Centuria 6. Historia 33.*, canem, abdomini hominis, colica excruciatum adplicatum, dummodo ægrotantis calorem persenserit, violentiori vomitu corripit, dolores autem cholicos secedere docet. Sic & *Borelli Centuria 3. Obs. 28.* pro leniendis doloribus arthriticis, optimum ac probatissimum medium esse ait, catulos, lecto ægrotantis detentos, quos arthritide exinde correptos, haud amplius incedere posse addit. Vera si forent, quæ subnectit, multum sane facerent ad amplificandam cognitionem medicam. Quum enim, sic ille pergit, dubiam morbi interioris causam vel sedem inquirere velis, varia animalia, & in primis catulos, ægrotanti admove-to. Qui quum per aliquot dies, suo lecto requieverint, suorum ciborum reliquias devoraverint, & suam salivam delamberint, eodem morbo quo homo ægrotans detinetur, adficiuntur. His ergo dissectis, mali sedem & rationem facile observabis. Sic & *Bartholino* teste, in *historia Anatomica, Centuria 3. Historia 66.* *Cel. Flud*, Anglorum Medicus, hominem quæ infestabat, arthritidem, in catulum, eodem lecto quiescentem, transferre callebat. Nec non in *Lexico Medinæ universali Cel. James*, sequentem Observationem, experientia editoris clarissimi constantem legimus: Vir quidam nobilis, vehementioribus articulorum doloribus excruciatum, hausto purgante aliquo mercuriali, glandularum salivariarum adfectione, frequentiore eiiciebat salivam. Hic, quum hospitis ob adventum, pelvim removeri jussisset, excipiendæ salivæ destinatam, bis terve salivam proiciebat in terram. Hanc canis Hispanicus minor, eadem camera degens, delinxit, & vix peracto dimidiæ horæ spatio convulsionibus violentioribus

correptis, decima exinde hora, spiritum efflavit. Mortis suæ causa nunc ex Mercurio, num ex materia quadam arthritica salivæ immixta, sit deducenda, perinde est; dummodo materiæ cuidam malignæ, una cum domini saliva ipsi communicata, tribuatur. *Ephem. Germ. Tom. II. Observat. 183.* canis mentionem iniiciunt, qui variolos, ab homine, lecti socio, sibi communicatos habuit; communicationis possibilitatem & nos concedimus. Ast, sicuti homo, alium suo morbo infestando, nullum exinde ipse percipit commodum, nullam utilitatem: sic & adplicatum ægrotanti canem, tum demum aliquid opis ferre censemus, ubi naturalis calor animalis, ipsum adgreditur morbum, & poros aperiendo, ac transpirationem facilitando, materiæ peccanti exitum parat. Quo quidem in casu facilis ab homine in canem morbus transire potest. Cæterum vulnera sua, sua lingua delambentes canes detergunt, expurgant, & cicatricem promovent. Hinc & hominus plagas, felici cum successu canibus ad delambendum exhibitas fuisse novimus. Quum vero materiam istam stomacho retinuerit canis, vasa nonnunquam ingreditur & fluidis admiscetur, quo facto morbo eodem ille adficiatur, necesse est. Et *Ephem. Germ. Anni 1. Observ. 4.* Scorbuto infectum hominem, cane illum delambente, sanatum, ast canem, morbo contracto, leprosum ac scabiosum evasisse, recensent. Haud ita pridem, quemdam & Parisiis commoratum fuisse scimus, qui ex dimoræ suæ loco: *Medius de Chaudrai* adpellabatur, quique varias plagas & ulcera inveterata, nullo medio, nisi admota canis easdem delambentis lingua sanavit.

Hydrophobiæ autem seu rabiei, præ aliis, canes obnoxios esse novimus. Hanc, febris cujusdem ardentis, & a sanguine nimis arido atque adusto provocatæ, speciem, judicamus; quæ plerumque ex inopia cibi & potus, per dies continuata, nonnunquam & ex putrefactorum nutrimentorum qualitate exoritur. Canis autem rabidi venenum facillime aliis communicatum, tristissimos, illosque interdum diu delitescentes effectus producere videmus, ut: ardorem, siccitatem, & tantam oris, gutturis & stomachi irritationem, ut deliquiis, & convulsionibus spasmodicis atrocissimis corripitur ægrotans. Nausea præter ea in quodvis fluidum, & summa illud deglutiendi difficultate, quæ, ut ægrotantes profitentur, haud doloris aliquis sensui, sed penitiori quidquam deglutiendi impossibilitati (quæ ex quodam solido, deglutiendi conatui contrario, & in gulam ex stomacho adscendenti oriri videtur ægrotanti) tribuenda est. Quod si ex naribus vel labiis a cane rabido vel morsus vel delinctus saltem fuerit homo, citius his symptomatibus corripitur, imo statim caninos quosdam actus edere incipit, latrat enim, ululat, & quoscumque vel ex amicis adstantibus pertingere potest, morsicus petit; imo, nisi citiore ac celeri medio sanatus, brevi exinde moritur.

Omnis autem temporis Medici rabiem istam pro morbo, ab initio, inflammatorio; & ab introducto in venas veneno hydrophobico, omnia funestissima ejus symptomata exorientia crediderunt. Hinc & alii inflammationi succurrendo balnea adhibenda esse voluerunt frigida, maris aqua submersionem, aliaque media antiphlogistica, quibus nullus plerumque effectus respondit. Alii autem, symptomatum citius medium postulantium violentia perterriti, varia sibi effinxerunt media empirica, casu interdum, felicissime respondentia, ast methodo ac determinatione omni destituta, & lu-

& lubrico semper & incerto fundamento superstructa . Horum in numerum, de quorum virtute scilicet dubitandum, referas, 1. pulverem *Paulmieranum*, cujus compositionem ex officina *Lemeryana* edoceberis, 2. remedium, cujus descriptionem Tomo II. ubi de rosa silvestri agebatur, tradidimus, 3. aliud medium, quod in tractatu *de Insectis*, quum scarabæum describeremus, exposuimus; & ipsa tandem maris balnea, quorum effectus admodum dubios cognovit *Boerhaave*, qui hominem, a cane rabido morsum, postea naufragum, & variis mari submersum, temporis spatio quodam peracto, hydrophobia correptum fuisse recenset. Iis tandem, quæ de Mercurii usu Medicorum nonnulli jactitant, nulla prorsus experientia suffragatur.

Quæ quum clare satis demonstrat, quod, quam late pateat Medicinæ mediorum adparatus, nullum adhuc hydrophibiæ ex morfu canis rabidi proficiscenti, sufficiat: nec tamen prætereamus quin L. commendemus *Cel. Christophori Nugent, D. & Medici Bathiensis, Dissertationem*, anno 1754. ex Anglico in Gallicum sermonem versam; hic enim hydrophobiæ cognitioni multum lucis adfert, & Aetiologiam ejus constituit naturalem, & indicationes sensibiles, imo mediorum successus exoptati dictis faciunt fidem. Nec inflammationem pro parte essentiali hydrophibiæ habet, quam ab initio, nulla symptomatum violentiorum ratione habita, non inflammatoriam, sed spasmodicam saltem esse ostendit, vaporum instar & vermium, qui quamvis communi omnium consensu spasmodici sint, omnes tamen morbos possibiles, quidquod summum inflammationis gradum imitantur. Hydrophobiam igitur manix speciem credit, spiritus alienatione & quibusdam corporis motibus inordinatis concomitatam, illisque ex spasmodicis irregularibus & contractionibus spasmodicis partis ex systemate nervorum, prodeuntibus; quum igitur ex mente Viri *Cel.* causa Hydrophobiæ immediata non sit, nisi agitationes nervosæ & contractiones spasmodicæ, prior omnino cura circa sedandas agitationes, & dissipandas contractiones versetur. Et huic quidem fini obtinendo, sedantibus, ut Opio, vel antispasmodicis, ut: Musco, Cinnabaro, Assa foetida, Camphora, Castoreo, cæteris, uti docet Vir *Cel.* Adeat ipsam ejus dissertationem, qui fusius de his omnibus edoceri cupiat; nos nulla nisi hæc, cum illo, addamus, quod adeo acutus ac celer iste sit morbus, ut neglectum in medendo illo vel momentum periculosissimum sit. Etenim nisi spasmodicis citissime succurreris, in inflammationem abibunt, quæ si accesserit, malum in pejus vertitur; etenim & spasmi priores, & hisce superaccedens inflammatio, nova producant symptomata, & inflammatio, hætenus effectus, in causam abit; causæ instar, priori juncta agit, & nova producit symptomata, nova pericula, omnem aliquoties spem salutis excedentia.

In *historia Regiæ Scientiarum Academiæ Anni 1723. pag. 29.* sequens ratio, ad investigandum, præscribitur, num canis, quo morsus fueris, (postea autem enecatus) rabidus fuerit an minus. Auctor ejus est Vir Experimentissimus in Chirurgicis, *Petit*, hic igitur gulam, dentes & gingivam mortui canis carnis frustulo adfricandos, postea vero frustulum cani viventi exhibendum jubet; quod quum hic magno clamore atque ululatu renuerit, (nec ullus in gutture mortui sanguis adfuerit) rabidum illum fuisse teneas; si autem avide receperit & devoraverit, non habes, quod timeas.

Magnam licet utilium copiam, mortuus canis Medicinæ exhibeat, nobis saltem de usitatioribus sermo esto, quibus catulum integrum, adipem, stercus & pellem adnumeramus.

Catuli igitur integri illud oleum seu balsamum constituunt, quod sub nomine: *Balsami catulorum*, in officinis venum prostat, & pro optimo linimento, contra contusiones & debilitatem nervorum, Paralyfin item atque Rachitim, jure habetur. Quod compositurus, accipe catulos, eosque in oleo olivarum, usque dum omnis caro liquerit ossa, elixos, percola; tum adde summitates origani, pulegii, serpilli, perforatæ & majoranæ, & soli per xv. dies omnia expone. Hujus balsami, ut diximus, felicissimi sunt, contra Paralyfin effectus. Officina Bruxellensis & *Lemeryana* catulis ebullientibus lumbricos addendos esse jubent, colaturæ autem Terebinthinum purum & vini spiritum, pro majori efficacia concilianda, admisceri volunt.

Adeps caninus vulnerarius, consolidans atque detergens, exteriori pariter ac interno usui cedit, quem alii contra Pthifin & Epilepsiam præstantissimum, vel pane illitum, vel cibus immixtum recipiendum esse volunt. A cane veru adfixo, & igne affato defluens colligatur. Quem quum adhibere velis, ne vetustior sit, cavendum, quippe qui penetrantis suæ qualitatis ergo, facile rancidus evadit, ac nocivus. Pro dosi ℥j. ad ʒjss. veniant. Nec non ex catulis, ad ossium dissolutionem usque aqua elixis, adipem, quum refrigerata fuerit, superficiei innatantem, colligere poteris. Quod si externo usui illum destinaveris, additis aliquot plantis nervinis ebulliant catuli: & balsamo quod descripsimus, & substantiæ & usus ratione similem habebis adipem.

Stercori tandem canino, quod Latini: *Album Græcum*, *Album Canis*, seu *Cynocoprurn* dicunt, detergendi, attenuandi & resolvendi vis inest; hinc interne, ℥ss. ad ℥iiij. dosi, vel simplex, vel potionibus vulnerariis admixtum, contra anginam, pleuritim & Colicam præscribitur. Melioris qualitatis æstate est, quam hieme, præsertim si varios per dies ossibus saltem, & parcissimo potu canem nutriveris, quo sal volatilis stercus ingrediens, eo sit abundantior. Sudorem igitur promovendo, ut stercus omne, agit; & discutiendi virtute gaudens, hemorrhagines matricis, ex stagnatione sanguinis, contractiones spasmodicas producentis, exortas, sedare solet; circulationis scilicet æqualitatem promovendo, constrictionem faciliorem reddit, & hemorrhaginis fontem obturat. Excrementa autem canina, quum aridiora sint & calidiora, quam reliquorum domesticorum excrementa: acrimonia quadam irritante, resolvente & aperiente operari vides; huic ergo acrimoniæ effectus supra descripti tribuantur omnes, tribuatur & hemorrhaginum internarum sanatio, quam solventibus sæpius tribuendam esse, compertum habemus. Nec non contra Dysenteriam, usum ejus commendat *Ettmuller*, nos dubitamus, siquidem a nemine adhuc adsertum novimus: quod in his infirmitatum generibus, acrioribus sit utendum. Verum quidem, quod saccharo & lacte commixtum Album Græcum, exuta sua acrimonia, & abstergentis naturam nactum, modice receptum, materiæ acris intestina irritantis evacuationem faciliorem reddat; imo medium aliquod oleosum, Albo Græco imprægnatum, obstructions tollendo, & sanguinis circulationem restabiliendo, illam Hemorrhaginis speciem, quam
Dysen-

Dysenteria junctam habet, sanare posse concedimus, ast omnibus in Dysenteriiis Albi Græci usum permittendum esse negamus; quum enim, v. c. sanguis, materia acri & putrida mixtus, nimium rarefactus sit, omnis, vel minima ejus irritatio, non nisi nociva foret. Nec causam proximam indagare quimus, ob quam angina laborantibus, albi græci usum commendant alii; forsan alia ex remotioribus aderit, quales v. g. sunt, quod canes ipsi frequenti angina corripiantur, quod ægrotantes gula hiant & lingua extus prominente canes imitentur, similia; quamvis enim in angina œdomatosa sua se utilitate commendat, noxium in inflammatoria idem judicamus, nec ullam ab auctoribus differentiam observatam seu constitutam esse notamus. Exteriorem ejus usum quod spectat, melle mixtum Loochi instar, tonsillis admoverit solet, seu abscessibus angina exortis, quorum rupturam promovendo faciliorem puri exitum parat. Cataplasmata etiam ac unguenta, gutturi angina detentorum adplicata ingreditur. Sale autem ammoniaco nitro, quod incidendo & penetrando, tumorem resolvit, abscessui prævenit, & inflammationem dissipat, illo inquam sale, cooperante, effectus suos edit Album Græcum. Pulverem ejus ad detergenda ulcera, sinistro oleosorum usu fordescentia ac maligna reddita, adhibere solent. Quem præparaturus, non habes, nisi quod sterces caninum recens, & sole post exsiccatum, in porphyrite comminues, & aqua bursæ pastoris irrigatum in trochiscos efformes.

Nec de cerebro canis, contra maniam, nec felle, contra Epilepsiam medio, ab aliis pro specifico commendato, hic verba facturi sumus; effectus enim horum exoptatos nec ab ipso medio, sed aliis potius, pro more admixtis pendere censemus. Quum enim medii cujusdam virtutem experiri velis, solo eodem ac nudo utaris necesse est, quod si aliis, eidem fini sufficientibus admiscueris, utrum his an illi effectus tribuatur, semper dubitandum erit.

Ex pelle canis autem chirotecas & tibialia conficiunt; & hæc ad leniendos pedum, iis indutorum dolores arthriticos, ad sananda ulcera & dissipandas eorum verrucas, facere, dicuntur. Gallis nucibus enim & alumine ab alutariis imbuta pellis canina, qualitatem desiccativam, ulceribus inveteratis convenientem nanciscitur. Chirothecæ autem manuum cuti molliem & lævitatem eximiam inducere creduntur; & mulieres, pulchritudinis suæ studiosæ, per noctem manus iisdem induere solent.

Adeps caninus Unguentum nervorum, Pharmacopoeiæ *Lemeryanæ*, & oleum catulorum, emplastrum Diabotanium Pharmacopoeiæ *Parisiensis* ingreditur.

Rx. Foliorum Veronicæ

Saniculæ

Bugulæ

Pyrolæ ana pug. j.

Quæ quum 3. aquæ chopinis, ad unius pintæ remanentiam ebulliverint, liquori percolato addas albi græci pulverisati ℥ij. & habebis potionem vulnerariam, contra plagas ac vulnera interna, cujus tepescentis terni scyphi per diem, accipiendi sunt. Si placet, eadem illa decoctio, & imbrocationi cedat.

℞. Nidi hirundinis ℥jv.

Albi Græci

Auriculæ Judæ, fungorum speciei ana ℥j.

Balsami tranquilli ℥ß.

Hæc omnia mortario conteras, tum vero aceti q. s. addas, ut exsurgat cataplasma, angina detenti collo adplicandum.

℞. Albi Græci pulverisati ℥j.

Conservæ rosarum rubrarum ℥ij.

Quæ in mortario una contundas, & syrupi Diacodis q. s. addas, ut fiat cataplasma, nunc descripta ratione adhibendum.

℞. Olei catulorum

Succi raphani ana ℥iiij.

Spiritus vini

Spiritus salis ammoniaci

Laudani liquidi ana ℥ij.

M. & habebis linimentum contra arthritidem, quo membra doloribus adfecta, & linteo calido, quo pellis pori aperiantur, probe adfricta, ungas.

Lupus. Offic. Schrod. 301. Boffch. 275. Lemer. 520. Schvenckf. *Quadr. Siles.* 106. Dal. Pharm. 448. Gesn. de *Quadr. digit.* 634. Aldrov. de *Quadr. digit.* 144. Jonst. de *Quadr.* 89. Charl. Exerc. 15. Raii Syn. *Anim. Quadr.* 173. *Canis cauda incurva*, Linn. Faun. Suec. 13. *Lupus vulgaris*; *lupus terrestris communis*, sive *vulgaris*; *Canis silvestris seu nocturnus*. Quorumd.

Lupus, omnium generis canini maximus, ferocissimus, robustus, vorax, ovium inimicus acerrimus, & magno pastoris cani simillimus est. Fœmelam ejus: *Louve*, pullum vero *Cheau*, seu *Louvetau* olim *Loupereau*, Galli nuncupant, & adspectu efferatus, acutissimo & odoratu & auditu gaudet. Ille, quem disquisitioni nostræ subjecimus, ex initio nasi ad originem caudæ, longæ, crassæ, ac, ceu vulpina, pilosæ, 4. pedum longitudinem profitebatur, pilum fulvo subcinereum; caput magnum, fere quadratum, frontem latiore ac leonis similem; ungularum anteriores posterioribus tertio longiores, quatuor unguibus nigridis, brevibus, fere rectis, mollibusque munitas, quorum medii binis inter se cohærebant, ultiores autem paulum averfi, & præter hos, calcar superius magisque recurvatum conspiciebatur. Pedis in planta 5. callos fulvos punctisque confitos, & sextum minorem, interius tendentem, ac 4. ab illis, digitorum spatio distantem vidimus. Sic & ungularum posteriores 4. unguibus & 5. callis instructas; tum in utrovis nasi atque genarum latere, multos barbæ pilos longos & hispidos, ut in apro. Oculos insuper magnos, scintillantes, ac iridem illorum rubram, nigro circulo circumdatam. Palpebras porro ciliis destitutas; aures arrectos, breves, latos, molles, & intus pilo longo & albido indutos. Rictum hiantem atque amplissimum. Decem & octo in maxilla superiore dentes, 6. scilicet incisivos, quorum quatuor medii erant brevissimi, bini exteriores autem longiores & adunci; tum duos caninos, digito longos, duos subsequentes parvissimos, hos vero qui excipiunt iterum duos longiores, denuo binos sequentes longissimos ac cuivis ossi frangendo sufficientes; reliquos tandem molarium omnes inæquales. Totidem in maxilla inferiore dentes, singulos maxillæ superioris singulis respondentes. Palatum sulcis conscissum. Linguam caninæ similem. Collum crassum ac fortissimum,

num, variis vertebriis compositum, quarum ergo & vulpe & canefacilior lupus collum flectere potest; nec, ut *Aristoteles* cum sectatoribus suis perhibent, uno saltem ex osse compositum collum. Apophyses autem transversales vertebrarum dorsi atque lumborum, articulatim inter se sibi junctæ, nec inflexibile collum facit, quod recto, nec incurvato collo sese obvertat.

Pectus ejus amplissimum vidimus, & duodecim utrobique costis, iisque latissimis, munitum.

Octo superiores costarum veræ, inferiores quatuor autem spuria erant; spatulum figura sua repræsentabat cartilago Xiphoidis; Trachea-Arteria præcipue ab initio valde dilatata, & pulmo duobus lobis, supra rubicundis, infra lividis, erat divisus, quorum dexter in quatuor, sinister vero in tres lobulos inæquales subdividebatur. Cor, fere rotundum, multis vas intertextum, & in basi sua multo adipe obductum, Diaphragma autem crassum erat ac durum. Oesophagus medius, ubivis eadem latitudine gaudebat. Stomachus vero longus, crassissimus, latus in imo, in medio angustus, vacuus & membrana quadam interna instructus, quæ rugis variis constans, liquore quodam, superne felli, in imo autem vitello, præ colore simili, erat oppleta. Intestinorum longitudo 15. pedibus absolvebatur; & Jejunum ac Ileum valde rubra, colon magni farciminis instar turgescens, cæcum breve & amplissimum, Rectum denique latum, conspeximus. Mesenterio obductas vidimus innumerabiles vasculorum ramificationes tenuissimas, glandulis duris nigris & intermixtas; Pancreas longum ac latum sub stomacho situm; & hepar marginibus decurtatis ac colore flavido-rubro conspicuum, in binos lobos erat divisum, (dextro, sinisterum longitudine superante,) eosque in novem lobulos minores subdivisos; ex quo venatores errare vides, qui numerum loborum lupi & vulpis in hepatibus, annorum utriusvis numero respondere censent. Fellis vesicula flavida, felle flavo seu fulvo erat repletum. Lien depressus & longus liveum ostendebat colorem. Renum majusculorum & rotundorum dexter livido-cæruleus, duos continebat vermes rubros, ex binis suis extremitatibus molles, qui multum jam ex interiore ejus parte consumserant, sinistro integro & sano; quem Parenchymum rubrum constituebat. Testiculorum singuli avellanam magnitudine, exæquabant, virga autem longissima & tenuis, ossea præter hæc & canina similis in radice parte cartilaginosa, in extremitate autem carnosa erat. Vasorum spermaticorum funiculi membrana pellucida obvolvabantur, & urinæ vesica maxima, ex dimidio urina flava-obscura repleta videbatur.

Ubivis cæterum voracitatis suæ vestigia relinquit lupus, ubivis illum insequuntur & extirpare quærunt. Qui Gallia provinciarum gubernacula tenent, lupi caput sibi adportatum omne, duplici nummo aureo redimunt; & Anglorum continuato studio factum est, ut nullum, nisi forsan spectatum eo deportatum lupum inter illos invenies. Et 26. abhinc annis, lupos Suecis fere ignotos fuisse, nunc autem frequentes silvis eorum inhærere docet Vir Cel. *Linnaeus*. Fulvo-cinereum plerumque pilum in dorso, & albidum sub ventre ostendit lupus; variis tamen Septemtrionis in regionibus, ut in Norvegia, Littuania, & Moscovia, non solum candidissimi lepores, ursi & vulpes, sed etiam lupi inveniri dicuntur. Varia etiam de

de lupo antiquiorum fabulis recensita hodie reiicimus, v. c. quod conspectus lupi homini periculosissimus, quum [scilicet] lupo hominem primus conspexerit, omnem ipsi vocis usum adimat. Nec non fabulas inter referendum, quod venatorum nonnulli, lupo deficiente nutrimento, argilla vesci censuerint; originem fabulæ subdidisse videtur, factum experientia constans, quod scilicet lupo, canum aliorumque more, prædæ residuum, expleta fame, terræ, reservandum, committit. Testis enim est Vir *Jean de Clamorgan*, ut in libro suo: *Venatio lupi*, dicto legimus, quod silvam S. Germani transiens, cervi pedem terra prominentem conspexerit, quem quum protrahi jussisset, integram habuerit cervi scapulam, superiore nocte eo repositam. Et majorem fidem huic facto adhibemus, quam iis, quæ idem ille alio in loco, de serpentibus, luporum antiquiorum in renibus nascentibus refert; id quod suis se oculis vidisse adfirmat, & pro varia magnitudine, jam digitum unum, jam pedem integrum serpentes istas exæquare, nec non temporis tractu, mortem & qualitatem venenosam lupo adferre, subjungit; ex quo adparere ipsi videtur, quod nulla fere arte a lupo venenoso morsum sanari possit animal, sed vel morte, vel membri læsi putredine corripiatur. Nos autem auctori alias Cel. pro serpentibus vermes illos rubros, in renibus vel stomacho canis, vulpis & lupi reperi- tos, venisse credimus, quibus alii, dolores renum & impotentiam, voracitatem, rabiem, & mortem animantium horum præcociorem, tamquam causis, adtribuere. Illi tamen & canes & lupi, quorum in renibus vermes istos reperivimus, eadem, qua reliqui, agilitate vigeant, nec ullum rabiei, ne quidem senectutis signa præ se ferebant. Voracissimus cæterum lupo, & tantum infatiabilis, quæcumque obvenerint, una cum pilis, corio & ossibus, devorat; hæc tamen, aliaque corpora solida, nec manducata quum deglutierit, integra nonnunquam eiicere solet. Omnium instar, quæ carne vivunt atque rapina, nec victus sibi parandi facilitate gaudent, (quum, quibus nutriuntur animalia, fuga eadem & latebris securitatem quarunt) & lupo, longum per tempus famem perferre potest; ast arrepta præda tridui subsequenti famem explere solet. Post mediam noctem plerumque & ante auroram, venatum exspatiatur, & cursu celerrimus non solum talpas, glires, anseres & porcellos, sed & capras, lepores, canes & cervorum pullos, sibi obvios, suos facit; ast caprarum, ovium & agnorum carne, præ alia, delectatur. Et quantam pro obtinendo suo fine astutiam adhibet? quanta utitur calliditate? sic v. g. stabulum petiturus, seu septum, quo delicias suas contineri cognoscit, adverso vento illud accedit, ne sui odorem, vento ad stabulum perlato canes persentiant, & latratu elato adventum ejus præpediant. Sic & villæ murum, ubi minimus est transeundo, & ovilis septum perforando, tantam ovium copiam, quanta pro pluribus diebus, imo mensibus sufficeret, enecat. Veram itaque lupo agnum antipathiam interesse nos nulli videmus. Ovisequidem se devorantem lupo extimescit, ast lupo summo in ovem desiderio, nec odio fertur, ut in columbam accipiter, in murem felis. Dicunt antipathiam probaturi, quod fides ex visceribus lupi constructæ & instrumento, cui fides ex intestinis ovinis, jam fuerint supertensa, fides ovinas brevibus corrodat. Addunt quod tympanum pelle ovina obductum, alteri, lupina, vicinum, nullum sonum edere soleat. Ast quid mirum? pellis enim

ovina, monente *Gesnero*, multo tenior, haud adeo acutum nec productum sonum edere valet, quam lupina, solidior duriorque. Alii censent, quod reposito in ovile, stercore lupi, oves tremant, equi autem viam transeuntes, ubi intestinorum lupi quidquam projectum fuit, repentinum gredum fi-
stant & cursum; quibus si fidem adhibere velis, rationem in corpusculis quibusdam, ex intestinis effluentibus, equis autem ovibusque contrariis, nec in antipathia, quarendam esse ducimus. Magna insuper maxillarum ac colli fortitudine gaudens lupus, dentibus correptam ovem eadem facilitate deportat, qua gallinam vulpes, nec hominem clamore territus suam prædam mittit, imo si persequutione prematur, rapinam adhuc vividam collo-
imponit, & citato cursu aufugit. Cornua quæ gerunt, ne illis pro defen-
sione utantur, ex posteriore eorum parte arripit. Socii plerumque præda-
tum exeunt, & alii summa velocitate prædam sectantur, alii in via con-
stituti, transituræ exitum impediunt. Occlusus autem lupus, deposita fe-
rocitate, tristissimus evadit ac timidus. Sic v. g. *Gesnerus*, eandem in
foveam noctu, fœminam, lupum & vulpem prolapsos, nec ullum suo loco
se amovisse, postero autem die una repertos, & animalia sclopetorum
ictibus enecata, mulierem vero, admota scala, protractam fuisse, recen-
set, hæc autem, præ timore & usum rationis, & capillorum nunc dealba-
torum colorem amiserat, imò omnem, quæ restabat vitam, languescen-
tem ducebat & melancholicam. Fame autem, frigoris præsertim vehemen-
tioris tempore, exstimulati lupi, montibus ac silvis relictis, campos in-
apertos descendunt, & in vias imò villas & domus irruentes, homines
& armenta devorant, carni præsertim humanæ, quam si semel gustave-
rint, relictis aliis, acerrime inhiantes.

Communis fere omnium animos terror bestię quam dicunt, opplevit,
quam animal aliquod alienum, singulare ac fascinatum esse dicunt;
invulnerabile & vel ab ictibus sclopeti tutum credunt. Ast nunc melius
edocti, animal hoc adeo extimescendum, non nisi lupum esse cognosci-
mus. Hinc & Gallice: *Loups Garoux* vel *encharnés*, lupi, a quibus sibi ca-
vendum (*se garer*) vel carni humanæ inhiantes, dicuntur. Et teste *Joan-
ne de Clamorgan*, tanta est eorum voracitas, ut ne suæ ipforum speciei aliis
parcant; ille enim duos lupos interdum enecatos, proxima nocte ab aliis
devorari vidit. Periculosissimus autem morborum quibus lupi pariter ac
canes subjacent, rabies est, cujus tot proh dolor, funesta vidimus exem-
pla. Unus enim lupus rabidus, innumerabilia integræ regioni damna ad-
ferre potest; & quibus vel homines vel bestias petierit, morsus fere om-
nes, jam morte, jam rabie excipiuntur. Utinam præparationum Mercuria-
lium, quibus his morbis occurritur, tam certus ac indubitatus foret usus,
quantus est in morbis Venereis. Antiquorum ex sententia, lupus veterior
homini evadit infestior, qui, dum viribus debilior animalia vel domestica
vel silvestria captare nequit, homini insidiatur. Ast nostris in terris, tan-
ta lupum persequutione premimus, ut haud plures veteriorum supersint,
quorum, si qui essent, illos debiliores, edentulos, & homini minus exti-
mescondos esse credimus, quam juniores & robustiores. Transmigrantibus
cæterum, & e longinquo ad nos pervenientibus lupum adnumeramus,
quem Ardennæ silvas, silvam nigram, vastasque alias egredi novimus.
Quidquod communi venatorum ex opinione, tertio quovis anno lupos,
binis

binis intermediis autem, alterutro apros, alterutro cervos, ex silvis istis provenire tenemus. Bella in primis sunt, quæ belluorum horum copiam invitant, exercitus enim, hominum animaliumque strage scatentes, insequuntur.

Maximum vero lupi furorem, Januario & Februario mensibus, quorum .x. ad .xii. per dies Veneris æstus patitur lupa, extimescendum dicunt. Omnes, tractum eundem qui inhabitant, lupi, canum instar, lupam festinantur; varios ex illis sanguine, certaminis signo, conspersos, alios autem, relicta lupa, paludibus sese obvolvunt, & aquam sanguine profluente tingentes observavere. Tanta in illam desiderio feruntur, ut vii. ad viii. per dies, & cibum, & potum, imo somnum negligendo, vestigia illius continuo premant. Falso tamen alii perhibent, quod nullus umquam lupus patrem viderit, interdum namque unicus saltem lupus, eadem regione, qua lupa commoratur. Primo ætatis anno puberes evadunt lupi. Novem plerumque per menses utero gerit lupa, & 6. ad 7. fœtus quovis partu edit, in quos vehementissimo fertur amore, & lactem illis præbendo ferocissima est. Sunt, qui addunt, imparem esse fœtum, quos utero gerit, numerum, ut 5. 7. vel novem; & decem ad .xii. per dies iisdem edendis defatigari; & novem si ediderit, nonum catulum esse, nec lupum; narrant: quod primo suo partu, unum, secundo duos, & sic porro, nono tandem novos fœtus edat, hoc peracto denique sterilecat. Ast experientia refragatur. Sic & lupos cum canibus, & canes cum lupis coitu commixtos fuisse constat. Haud tanto cæterum æstu ac lubricitate quanto canis, incitatum videbis lupum, nec tamen longiore vitæ termino illum superare observamus. Etenim & hic decimo tertio vel quarto anno occidit. Nec latratum, sed ululatum extollit, percussus autem, vel ad mortem, nullum, canis instar, clamorem extollit, sed taciturnus omnia perfert. Callidissimis interim merito adnumeratur, siquidem imminente mortis periculo, mortuum mentitur. Nos ipsi lupum ex tauri cauda nexum, & ad supplicium protractum vidimus, & per horam integram exspiratum credidimus, qui exinde, tormento bellico exploso resuscitatus, ac cruribus insiliens, omnium admiratione, alacer procurrebat. Nocturno tempore, oculi ejus candelæ splendorem imitantur; quibus homines & animalia terret; providus continuo excubias agendo, hinc inde exploratores oculos convertit. Canis autem, præ lupi timore, accedentem quum sentiat, erectis pilis ac magno ululatu aufugit; nisi arte & studio, lupi venationi adsuæfactus, robustus & acrioris sit animi. Talibus igitur canibus adhibitis jucundissimam spectabis lupi venationem, ac diutissimam, vetustior enim lupus, & silvæ cognitione instructus, vel canibus infestatus, sibi notas paludes petendo & aquam hauriendo interdum sese reficit, & per x. horas integras canibus resistit; hinc originem trahit proverbium: Miles canis instar adgrediatur, lupi instar fugiat, ac apri instar sese defendat. Cæterum lupi vestigia a vestigiis canum dignoscitur respice, num talo majori & lato, tres fossas seu cavitates terræ perarata, arenæ, vel cæno impresserit, an minus. Lupus enim talo majori, & unguibus latis ac brevibus, duobus item pedum anteriorum digitis inter se nexis, præ cane, instructus, & eadem fere constructio est pedum lupæ, quæ longiore saltem, & magis recto pede gaudet. Lupum vero capturi, vel prope ad foveam retia ipsi tendunt, foveam

cratibus obtegunt, & agnum vel avem, pro esca, ipsi supraponunt; seu frustula carnis, veneni pulvere, ut aconico, colchico aliisque conspersa, voracitati ejus exponunt.

Lupum extimescere videmus ignem, lapides, gladios, campanarum, tubæ, cornuum venatoriorum, tympani & quemvis alium sonum acutum seu penetrantem. Cujus causam Cel. *Gustavus Casimir Gabriel*, D. & Societatis Curiosorum Naturæ Sodalitatis, suo jure, singularem in modum conformato auditus sui organo tribuit; quod tanta per sonitum, violentia adficitur, ut perferre illam nequiens, citata fuga evitare quærat. Hinc & homo, noctis tempore si quem lupus esuriens persequitur, vel ignis scintillas calculorum adfrictu excitando, vel cornu inflando, vel clavium cumulum commovendo, lupum fugare potest. Adeo autem ferocitatem omnem deponit & cicuratur, ut continuo ac pacifico vel cum canibus domesticis commercio junctus vivat, dummodo a teneris adsuetus, rigorosa disciplina contineatur. Nam, ut in proverbio est: pilum, non animum mutat lupus. Teste eadem, Cel. *Gabriel* observatione, aurifex quidam Dantisci commorans, lupum catulum, annum agentem, ex catena adligatum, in horto suburbano conservaverat, hic majorem molem excrecendo nactus, & pluris quam ei præbebant, cibi adpetens, intactos quidem domini sui reliquit anseres, anates, gallinas, pavones, volatilia alia; ast noctu mirabili artificio, catena se sua liberabat, & vicinorum volatilia devorabat, redeunte autem die, suæ se catenæ restituebat. Exaugefcente igitur in dies volatilium suorum jactura, excubias agentes vicini omnes furem detexerunt, captarunt; quem, pecunia, refarcito quod intulerat damno, anatomico supplicio tradidit dominus.

Alio quodam *Ephem. Germ.* in loco relatum legimus, quod Livoniam colens pastor quidam, lupi catulum captum, agnorum lacte nutritur; quo adeo cicuratus est, ut prodeuntibus annis, non solum constanti fidelitate gregem custodierit, sed & quotidie ex villa vicina, vel caseum, vel lardum vel jusculum olla adservatum pastori, pro jentaculo adportaverit, & infantum incunabilis detentorum, imo domus gregisque custos aliquoties fuerit fidelissimus; hieme autem, canis instar, suo se tugurio recipiens, nullum umquam ex hominibus læserit. En! quanto naturam superat consuetudo.

Ebraicum ejus nomen est: *Zeeb*, Græcum: *Lucos*, Italicum: *Lupo*, Hispanicum: *Lobo*, Germanicum, Belgicum & Anglicum: *Wolff*, Suevicum: *Warg*, seu *Ulf*. Vox Gallica: *Loup* ex Latina: *Lupus*, *Louve* item seu *Loupve*, ex: *Lupa* derivanda est.

Omnes insuper lupi partes oleo quum abundant & sale volatili, totum fere animal mortuum Medicinæ usibus cedit, & tantæ utilitatis causa post mortem, quantæ jacturæ, vivum, evadit. Carnem ejus cum corde & hepate elixam, & butyro aromatibusque conditam, contra Epilepsiam, Hydropem, Pthisin & partum difficilem, celebri usu venire novimus. Alii in pulverem redactorum ℥j. ad 3j. continuato usu, commendant. Et testibus *Ephem. Germ. Tom. I. Anni 1727. pag. 91.* Vir Cel. *Gottlieb Reusnerus D.* refert, matronam quamdam nobilem, partus difficiliore, quibus laborabat, evitaturam, graviditatis sub finem, carne lupina variè condita usam, non solum feliciores postea partus effudisse, sed etiam ab epilepsia

uterina , qua infestabatur , liberatam fuisse . Intestina lupi arefacta & in pulverem redacta , dosi deinde ℥j. ad ℥ij. recepta , contra colicam flatulentam & nephriticam faciunt . Alii desiccata , eundem ob finem , cinguli instar corpori circumdare solent , ejus tamen topici virtutem suspectam habemus . Adeps lupinus calidus , resolvens , & pro nervis faciens , lini-menti instar , contra Atrophiam , membrorum Paralyfin , Rheumatismos , & morbos articulorum adhibetur . Nec non pro collyrio , contra lippitudinem & palpebrarum adfectiones venit . Ossa tandem lupina absorbentia , & vulnera detergentia , in pulverem redacta , pleuriti , schiatico & vulneribus seu contusionibus internis laborantibus , ℥j. ad ℥j. dosi , cum potionibus convenientibus præbere , moris est . Dentes denique lupi ad elicandos infantum dentes adhibentur , argento nimirum circumdatos infantibus exhibent , qui , ut solent , suis illos dentibus terendo , gingivamque aperiendo , facilius suis dentibus exitum parant . Pellis lupi conficiendis chi-rothericis , manicis , imo caligis & thoracibus arthritide laborantium , seu frigoris impatientium subditur , ejus odorem pulices profigare dicunt .

℞. Pulveris ex hepate lupino arefacto ℥j.

Hanc vini candidi scypho uno infusam integram per noctem , cinerica-lidiori committas , & postridie percoles , sic habebis potionem contra Hy-dropem , tribus diebus subsequenter , mane accipiendam atque jejune .

℞. Pulveris ex intestinis lupi arefactis ℥j.

Flor. chamomil. pug. j.

Hæc quum per noctem integram , vini candido scypho infusa , cineri-calidiori superposita fuerint , postridie colabis , ut fiat potio contra colicam flatulentam .

Vulpes . Offic. Schrod. 312. Boffch. 281. Lemer. 934. Dal. Pharm. 448. Ind. Med. 125. Gefn. de *Quadr. digit.* 966. Schvenckf. *Quadr. Siles.* 133. Aldrov. de *Quadr. digit.* 195. Jonst. de *Quadr. digit.* 92. Charl. Exerc. 15. Merr. Pinn. 167. Raii Syn. *Anim. Quadr.* 177. *Canis cauda recta longitudine corporis* , Linn. Syst. Mat. 36. *Canis silvestris* , *cauda recta extremitate alba* , Quorumd.

Anatomicam vulpis descriptionem a plerisque omissam reperies , quem quidem , partibus suis internis , canem referre adfirmant , nos tamen , quas in vulpe foemella observavimus , descriptione dignas judicavimus . *Linnæus* est , qui vulpis , Sueciæ in silvis frequentissimi , varias ibidem species re-periri docet , 1. fulvum , scilicet , qualis est & noster communis , 2. can-didum , alias Lapponiæ incolam , & pedibus quasi leporinis instructum , 3. cœruleum , 4. crucis formam in dorso gerentem , 5. rubro obscurum , seu ferrugineum . Russia etiam & Siberia nigros alit , quos summo habent in pretio . Recentiores nati muris colorem cinereum referunt . Foemella autem nunc describenda , pilo obducta erat longo , & in radice candido , tum maxima sui parte fulvo , & in apice nigro , nec ut in antiquioribus , ar-genteo . Rostro gaudebat longiusculo , variisque pilis nigris & longis , tam in regione palpebris superiore , quam in origine & extremitate ma-xillæ superioris , prope nares , atque sub mento . Guttur & maxillarum extremitatibus albidis ; auribus brevibus , latis , rectis , & interiore sua parte villosis & albidis ; lingua , dentibus & palato , caninis & lupinis , si-millimis ; cauda corporis longitudinem , seu 2. pedes & 10. digitos refe-
rente ;

rente; crassiori in origine, in medio copiosioribus pilis obducta, & incumulum pilorum albidorum exeunte. Ungulis corporis colorem imitantibus, ac iisdem, quos in lupo observavimus, digitis & unguibus. Pedem unum & tres digitos sua altitudine adtingebat, & licet recens enecata, tantum edebat foetorem, ut in horto, subdiu, dissectio ejus instituenda esset. Epiploon autem, resecto abdomine, duobus duplicaturis, instructum, observavimus, majori stomachi curvaturæ ut in homine, adhærens, exiguo adipe instructum, & omnem intestinorum superficiem, excepta vesica, obtegens. Stomachum, humano ob figuram suam, accedentem, fibris præter ea longitudinalibus, transversalibus, circularibus & bina hypochondria, una cum regione epigastrica occupantibus, compositum; pylorum fellis vesiculæ subjacentem; intestina, crassitudinis fere ejusdem, omnia; & coloris subviridis. Duodenum ex dextera sinistram, arcum efformando, transiens, ubi Jejunum, varias post contorsiones terminatur. Ileon, ubi colon ingreditur, globulum quemdam constituens. Cæcum, ranæ viridis instar, maculis conspersum, & Ilei cum Colo, (S, Romanorum literam, constituente,) unioni, superjacens; Rectum, ubi colon deficit, amplissimum, & varie contortum. Mesenterium innumeris vasculorum ramificationibus oblitum. Hepar intus & foris flavidum, sex lobis compositum, quorum maximus stomacho innititur; tertius, fellis vesiculam subflavidam & pyro similem, continet; quintus in tres denuo alios lobulos dividitur, & sextus omnium minimus est. Pancreas magnum, Duodeno innititur. Lien rubro-ferrugineus, & linguæ caninæ, quoad figuram similis, sex digitorum longitudinem profitebatur. Matrix forma sua patibulum referebat, & in contorsionem quamdam vermicularem terminabatur; Ovaria, nucis magnitudine, exiguis testiculis æqualia, matricis collum vero carne multa erat instructum. Vesiculæ pyrum depressum repræsentantis fibræ circulares, obliquæ & transversales, eadem, qua urethræ, sensibilitate gaudebant. Renum color rubro-fulvus erat, forma autem, humanis accedebant. Pectoris ex parte utraque 13. costas, 9. scilicet veras & 4. spurias numeravimus; Cartilago Xiphoidis trullam sua conformatione referebat. Pulmonum denique rubro-flavidorum dexter 4. sinister vero 3. constabat lobulis. Cordis majoris ventriculi, auriculæ & valvulæ eadem, qua in homine, ratione, erant constructi.

Magna autem astutia ac calliditate instructus vulpes, cautissimus delitescit foveis in subterraneis, quas vel ipse perfodere, vel cuniculis aliisve, quorum illæ sunt, expulsis, occupare solet.

Varios deinde ac inter se distantes sibi exitus parat, ne tensis sibi retribus, latibulum petens capiatur. Omnibus, quæ consequi potest, volatilibus, vivit, imo quadrupedibus, ut leporibus & talpis, nec non ranis, cancris, aliisve piscibus, fructibus item, & vindemiarum tempore, uvis. Continuos sibi hostes habet venatores, qui sua sibi præripere vulpem queruntur. Binis interdum vulpes venatum egrediuntur, altero scilicet prædam insequente, altero via transituram advertente. Multa insuper de calliditate vulpis, rapinam quærentis narrantur; Sic *Olaus magnus*, vulpem canis vocem imitando stabulis & tuguriis accedere, interdum & mortui instar, supinum, ea ex animantibus devorare, quæ cadaver ejus devoratum advenerant; & vesparum nido caudam superponere, tum vero arbori illam adfricare, & vespas, sic excussas deglutire, recenset. Pulices vero cor-

poris profligaturum, sensim se aquæ immergere, & lanæ glomere, ore detento, corpus a pulicibus defricu, liberare, post vero in aquam prolicere lanam. Meis ego, sic pergit *Olaus*, oculis, Norvegiam transiens, vulpem conspexi, qui rupibus immissa cauda, ex aqua caneros protrahebat & devorabat.

Lubentes quidem ab *Olao* narratis fidem adhibeamus, lubentiores tamen, tuo iudicio L. B. omnia ista committamus. Credas quantum placebit. Iidem erimus, describendo sequentia, eaque ex *Thomæ Bartholini* Medici Cel. observationibus hausta. Filium meum, sic *Casparus Bartholinus*, observati odoris violæ similis, & ex cauda vulpis prodeuntis, auctorem cognoscimus. Epistolas ejus perdidi cum utensilibus, ex quarta igitur Miscellaneorum exercitationum suarum, sequentia describamus: Quinque transversis a coccyge digitis, pilos observavimus, odorem aromaticum seu Violæ similem exhalantes. Aperta igitur pelle, radices pilorum deteximus, glandulas nempe quasdam conglomeratas, pilos præter ea & ab aliis, colore, diversos, & setæ instar, hispidos, reperivimus. Pilos vidi, glandulas observavi, odorem sentii; postea autem dubitavi, unde odoris causa deducenda esset. Glandulis instructam esse vulpis caudam numquam dubitavi, imo glandulas istas, jure conglomeratis adnumerandas observavi; ast & in aliis animalibus glandulas reperimus particulares, nec obvias in reliquis. Majori tamen adtentione dignus nobis videbatur odor ille Violaceus ex pilis effluens. Quem vel sanguini tribuendum esse censemus, ad glandes devecto, vasculorum innumerabilium ope, ibidem obviorem; vel glandulis ipsis, percolando singulari cuidam humori destinatis, ac vel pilis nutrimentum præbenti, vel salivæ materiam, quum venatorum ex observatione, frequens suam caudam vulpes delambit. Quæ si essent, urso quodammodo accederet vulpes, etenim & ille ungularum partem inferiorem delambendo, porosque illarum sic dilatando, copiosum elicit humorem serosum & lymphaticum, quo, pro nutrimento utitur.

Et hæc quidem a *Bartholino* observata, & *Schwenckfeldius* in historia *Quadrupedum Silesiæ* refert. Adfert igitur adeo singularis videndi copiam exoptavimus, quærivimus, ast in resecta vulpis nostræ cauda, primis Maii diebus enecata, nec pilos istos setosos, nec glandulas conglomeratas, nec gratum illum violæ odorem reperire, nobis contingit. Summo potius fœtore, omnibus ejus in partibus obvio, adfecti sumus. Forsan gratus odor iste mari saltem proprius est, vel si communis esse debet utrique sexui, nullo nisi quodam anni tempore, & forsan ingruenti hieme, percipi potest. Tuum est, curiose L. tramitem ingredi, nostrum, commonstrare.

Auditu cæterum acutissimo instructus, continuo arrectis auribus, aucupium facit, ut ajunt. Cuniculi instar, accessu difficillimis locis delitescit, nec sterco suum, bacillorum forma, ut canis atque lupi ejectum, obtegat; iisdem, quibus canes subjacent, morbis infestatur, eodem modo coitum perficit, imo interdum socios sibi habet. Rarior vero utero gerens capitur vulpes, etenim suæ semper regioni & latibulo inhærens, vel minimo strepitu audito, præceps fovea sua quærit securitatem. Quatuor plerumque fœtus una, utero gerit mater, eosque magno amoris adfectu amplectitur, & ab omni periculo strenua defendit. Tribus foraminibus latibuli sui fundum instructum esse volunt venatores, quorum aliud fœtibus, aliud nutri-

mentis, aliud denique excrementis recondendis destinatur. Excrefcentes vero vulpículas, mane & vespéra, foveæ sub introitu, matris cum præda adventum expectant, & pro obtinenda sua parte aliæ cum aliis conflantur. Cassi autem vulpes quum captus sit, nec aufugiendi spes ulla superfit, suis sibi dentibus ungulam morficus aufert; alias etiam casses & retia commordet; caudæ etiam agitatione & saltibus terrorem iniicere novit volatilibus domesticis, ita ut præ timore, ex perticis delabantur; tunc ex collo arrepta, spreto & hominum & canum insequentium clamore, citato cursu deportat. Sæpius canem venaticum, qui captando quovis lupo, cervo & apro sufficit, vulpem missum facere videmus, nec tamen adeo periculosus vulpis est morsus, quam reliquorum. Cujus rationem alii volunt urinæ vulpis fœtorem, canis quem supportare nequit; vulpis autem, canis persequutione pressus, quum aufugiendi locus non superest, caudam ventri subditam, urina irrigat, & irrigatam cani obventilat, eumque urina sua adspersit. Alopeciæ, seu pilorum effluvio frequentiori ac vehementissimo expositus est vulpes. Venatio cæterum vulpis jucundissimo venantibus spectaculo cedit. Imbecillitatis suæ memor apertum campum sollicite evitat, nec rectus procurrit, sed innumeris avilis tortuose deflectentibus, eadem semper silva oberrat, eisdemque arbutis delitescere quærit; canes itaque perceptis vestigiis ejus recentibus, dum eum jam adtigisse credunt, valde remoto foveam ingrediendi & tempus & spatium relinquunt.

Vulpis igitur, acerrimus volatilium hostis, hostes indefessos habet venatores, qui & jure, & duplici utilitate eum persequuntur, pellem etenim vel vestibus subdunt, vel integrum, una cum capite, pedibus, & cauda, pro manica adhibent. *Brueyrius* est, qui carnem vulpinam insipido ac nescio quonam ingrato sapore præditam, sua experientia edoctus docet; ast non solum rusticis cibo venit; sed etiam, quum hodie tantum ad perfectionis fastigium ars cibos condiendi provecta sit, ut vel saporis qui sunt subtilissimi, condimentorum copia obruti, quid comedant, sæpius ignorant; ridendi ergo, venatores nonnunquam lupum pro capreolo, vulpem pro lepore, & asinum pro apro, amicis suis adposuisse scimus.

Ubivis autem vulpes reperiri, & calidos æque ac temperatos frigidisque cœli tractus inhabitare jam supra diximus. Frequens in Gallia, frequentior tamen in regionibus Septentrionis invenitur. Cel. *Andersonio* teste, magna vulpium quantitas Islandiam opplet, haud tamen rubro, sed vel nigro vel flavo & cœruleo pilo, æstate, hieme candido induti sunt. Hieme autem pilosiores quam æstate, illa, quam hac diligentiores ab incolis quæruntur. Qui quum natura, bombardas seu sclopeta averfentur, non his, sed vel cassibus, vel alio quodam instrumento, forfici simillimo, & agno mortuo instructo, illos captare quærunt. Quum vero, alio anni tempore pellis vulpini incuriosi, vulpes, tamquam prædatores insequuntur, nuces vomicas seu venenosas, melle oblitæ eisdem obiciunt, quas vulpes, dulcedinis desiderio, avidi devorant.

Vocem vulpis latratui canis rauci adsimilabis merito. Cæterum ille facilius quam lupo, cicurari, & blanditias in dominum effundere solet. Nosmetipsi vulpem cicurem rhedatoris, rheda vecti ad pedes, canis villosi instar, resedisse vidimus.

Vestigia vulpis a vestigiis venatici canis, quibus valde accedunt, distin-

Sturum requirito, utrum magis an minus distentiarum ungularum criteria adsint. Vulpes enim, nisi rapidissima in fuga, magis compressis incedit ungulis, & pede levissimo. Quovis anni mense, si placet, vulpis ventioni accedas, satius tamen Januarium, Februarium & Martium feligas, quibus & silvæ rariores, & vulpum pelles præstantiores reperiuntur. Canibus eum cursoribus minoribus, vel sagacibus quibus torfa sunt crura, fecteris, hi eum ad latibuli fundum persequuntur; vel admoto sulphuris funiculo, fovea expulsum, sclopetorum ictibus interficias; vel adposita esca, cassi, quem Galli: *Traquenard*, dicunt, decipias; vel globulos venenosos obicias, vel laqueis irretias. Amygdala amara vulpi sunt pro veneno.

Vulpem Ebræi dicunt: *Schul*, Arabes: *Thaleb*, Græci: *Alôpex*, Itali: *Volpe*, Hispani: *Raposa*, Germani: *Fuchs*, Belgi: *Vos*, Angli: *Fox*, Sueci: *Raf*. Vox Gallica tandem: *Renard*, Menagio teste vel ex *Renald*, viri nomine, deducenda, ut *Henry*: Asinum, & simiam: *Bertrand* nominare moris est; vel ex Germanicò: *Rein*, quasi: *Reinard* provenit, quod callidum, seu astutum denotare posset. Alterum nomen ejus Gallicum: *Goupil*, Gaulicum est antiquum, ex Latino: *Vulpes* seu *Volpes* esse derivandum.

Multo vulpes sale volatili abundat, & partes ejus in Medicina usitatiores sunt: caro, adeps, cum pulmone. Caro ejus vel elixa, vel affata, contra Phtisin, aliosque pectoris morbos commendatur. Oleo præsertim vulpino præparando inservit, cujus componendi ergo animal integrum, pelle & intestinis exutum, olivarum oleo excoquant. quod fusius ex Pharmacopoeis edocebere. Hoc itaque oleum resolvendi, leniendi & nervos corroborandi facultate gaudens, contra Atrophiam, Rheumatismos, membrorum contractiones & tendinum callos adhibetur; eadem est & adipis virtus, contra membrorum tremorem, Paralytin &c. usitatissimi. Pulmonem denique ejus optimum habent specificum pro pulmone humano, & virtutem ipsi consolidantem & conservantem tribuunt. Sic Cel. *Scheinederum*, D. ægrotanti succurisse legimus, qui pulmone, sclopeti globulo perfosso laborans, frustula ejus frequentia sanguine mixta eiiciebat exscreando. Pulmonem itaque ex vulpe protractum & sanguine adhuc tinctum, aqua contra sanguinis sputationem faciente, ebullire, tum in frusta conscindere & Consolidam majorem, flores scilicet ejus atque radicem, amydon item & sarcocollam depurata, lotam & mulieris lacte nutritam, addere jussit; & felix successus medio respondit. Medii autem compositionem intuenti facile affulgebit, quod variis illud ingredientibus potius, quam hepatis vulpino effectus sit tribuendus; nos saltem hujus esse sententiæ fatemur. At tamen qua ratione pulmonibus ex vulpinis, medium contra Asthma humidum, Pthisin Catarrhas, aliasque pectoris adfectiones sit præparandum, hic loci subjungamus.

Extractos ex vulpe recenter enecato, pulmones, lavato, frustatim conscindito, & in furno pistoris exsiccato; tum hyssopo vel marrubio involvito, & loco arido recondito. Pro dosi ℥j. ad ʒj. vel ʒij. tibi veniant. His autem aliisque bechicis loochus ille constat ex pulmone vulpis, cujus tanta olim erat fama, tamque exiguus hodie superest usus, contra Asthma, tussim, ad detergenda insuper & consolidanda pectoris ulcera.

Vulpes denique, oleum vulpis Pharmacopoeiæ Parisiensis, & pulmones vulpini Loochum pulmonis vulpini, Officinæ *Lemeryanae* ingrediuntur.

℞. Pulmon. vulpin. præp.

Succ. glyzyrrh.

Folior. capill. vener.

Semin. anif.

cumin. ana ʒj.

Pulverifat. Pulverifand. m. omnia f. a. Add. $\frac{2}{3}$. sacchar. liquef. & $\frac{1}{4}$. aq. Pimpinell. & f. Looch. pro detergendis & consolidandis pulmonum ulceribus, & ad promovendam expectorationem in Asthmate humido.

℞. Olei seu adipis vulpis & castorei ana ʒij.

Olei lauri

rosmarini

succini ana ʒß.

Liquefcant omnia ignis parioris ope, & fiat linimentum pro adfricandea spina dorsi, contra Rachitism, Atrophiam, & Rheumatismos, membra quædam corripientes.

C A P R A.

QUINQUE diversas caprarum species, generico hoc sub nomine comprehendamus: 1. Capram scilicet communem. 2. Capram Alpinam. 3. Capram Africanam. 4. Gazellam Bezoardicam Orientalem. 5. Capricervam Occidentalem.

Capra. Offic. Schrod. 275. Lemer. 424. Bossch. de *Quadr.* 203. Merr. Pin. 166. Charl. Exerc. 9. Schvenckf. *Quadr.* 98. Gesn. de *Quadr.* 270. *Capra* & *Hircus*, Aldrov. de *Quadr. Bisulc.* 619. *Capra* & *hircus domestici*, Jonst. de *Quadr.* 46. *Capra domestica*, Raii Syn. *Anim. Quadr.* 77. Dal. Pharm. 435. *Capra cornibus carinatis acutis*. Linn. Syst. Nat. 42. *Capra vulgaris*, seu *villatica*. Quorumd.

In eo, ab ove, differt capra, (cujus masculum, Galli: *Bouc*, seu hircum, foetum vero: *chevreau*, *Bouquin* & *Cabril*, hædum, dicunt) quod haud lana, seu pilis induta sit, quod cornibus plerumque longioribus, nodosis, & posticus reflexis, nec circumvolutis & acutis gaudeat, naso decurtato, capite antè excavato, auribus magnis atque pendentibus, barba minuscula sub mento. Binas insuper glandes seu verrucas parallelas, atque sub collo pendentes exhibet, aliquantulum ab inferiore maxilla distantes, caudam brevem & rariori pilo obductam, corpus macilentum, crura longiuscula, vocem debilem & tremulam. Nec tamen dentibus incisoriis maxilla ejus instructa est superior, quorum binos cum *Plinio*, *Jonston* falso eidem tribuunt; his enim omnia, herbis quæ vivunt & ruminantur, destituta sunt. Ast in maxillarum inferiore 8. videbis incisorios inæquales; caninis autem utraque caret; incisoriis tandem & molaribus intermedium videbis interstitium aliquod longissimum; XII. autem in maxillarum quavis, sex namque ex parte, molares numerabis.

In sceletro capræ observabis: 1. os frontale, sutura divisum, & utrinque tuberculo, cornuum origine, munitum; 2. vertebrae spinam dorsi constituentes breviores, quam in aliis quadrupedibus haud ruminantibus, 3. Os aliquod singulare, & ossi maxillæ superioris cohærens, quod recipiendis dentibus molaribus inservit, 4. collum longissimum, quo animal pedi-

bus insistent rectis, terram pertingere possit, vertebris attamen, haud pluribus, quam alia quadrupeda, 7. scilicet, instructum, quarum secunda, corpus versum, valde producit, 5. pectus breve, angustum, & in basi cuspidatum, communi conformatione quadrupedibus cruribus seu lumbis antevertentibus, ne scilicet pectore ampliori, motus iste impediatur, 6.) 13. ex quovis latere costas, extremitatibus cartilaginosis instructas, quarum prior, fortissima, claviculæ officio fungitur, 7. vertebrae dorsales costis respondentes, apophysibus longis, angustis, & singulari modo sese invicem recipientibus, munitas; 8. os sacrum, unicum, vertebris simile, cui os utriusque coxæ nectitur; & hoc quidem os, una cum Ischio ac pubis cartilaginibus cohærendo, eandem conformationem referunt, quam in vulpe observavimus, 9.) 12. ad 13. caudæ vertebrae ossi Sacro, articulatione connexas, 10.) 3. ossa in cruribus anterioribus notabilia, quorum superius, brachio humano, secundum parti superiori adsimilabis cubiti, ubi & radius fortiter cohæret, & tria conspiciuntur officula, primæ vel secundæ articulationi respondentia; tertium tandem ex ossibus, nec in ullo quadrupedum alio obvium, appendice infra atque superius instructum, 11. tertio huic osse inferiora denuo alia officula duo, longiora, quibus ossa sesamoidæa posticus nectuntur, hisce tandem adhærentia rursus alia officula bina, unguium subtilissimorum instar, ungulam obtegentia, 12. os lumbi, humano simillimum, cujus parti utrivis bina ossa nectuntur, alterum scilicet femori & tibiæ intermedium, alterum femori adhærens, 13. Unum saltem os tibiæ, humano superius, numquam vero inferius respondens; appendice etenim, cui os tali adhæret, instructum; 14. hoc excipientia tria officula ut in pede anteriori; & os illud singulare, reliqua quo destituntur quadrupeda, cujusque summitati alia nectuntur duo officula longiora; 15. rursus alia denique officula bina, præcedentibus similia, digitorum officiiis fungentia.

Quod interiores capræ partes adtinet, eandem fere, quam in ove observabis, & nervi optici conformationem, & medullæ spinalis cum dependentiis, & uberum, & duarum venarum venæ, Azigos dictæ, officio fungentium; & placentæ, cujus 60. ad 80. & plures cotyledones numeravimus, & stomachi, & intestinorum, & hepatis, & lienis, aliorumque tam pectoris, quam abdominis intestinorum.

Primo cæterum intuitu, capræ pedes adtingendis rependo rupibus & præcipitiis ineptos judicares. Ast *Derham* in *Physio Theologia* sua, caprarum domesticarum (etenim & hæ rupes conscendere, & saltus periculosissimos edere solent) articulos crurum, fortissimos ac robustos, talum vero subtus excavatum & marginibus cuspidatis instructum esse, observavit. Eandem caprarum silvestrium esse constructionem concludit, quas quidem *Scheuchzer* in *Itinerario Alpino*, vel altissima quævis præcipia conscendere refert.

Variis est capræ domesticæ color, jam fulvus, jam niger, jam candidus, aliisque, jam variis in eadem, jam unicus. Nec tamen omnes cornibus gaudent, quibus quæ carent, reliquis plerumque anteferuntur. Frequentiores interim Septentrionales, quam reliquas Europæ regiones inhabitare, & qui illis detinentur, hirci, tanta dicuntur animi acritate, ut pro abigendo vel lupo, canibus interdum se socios jungant. Copiosissimam apud Suecos, capram esse, *Linneo* referente habemus; cæterum, quum

terras calidiores potior inhabitet, quam frigidiores, nullas in Islandia capras propagari posse docet *Anderson*, quippe quarum nutrimentum omne, ut folia tenerrima arborum & arbuſtorum, ibi terrarum deficit penitus. Caloris inſuper nimii, & frigoris perferendi impatiens, a *Narrome* ac ſecta- toribus ſuis, continua feбри laborare credebatur, quum & macilenta ſem- per videatur, & tremula ſua voce, feбри detentum hominem imitetur. Aſt parum fidei aſſerto adhibemus. Puritatis autem amica, quotidie ex- purgatum requirit ſtabulum, ſtratum poſtulat recens. Saliyam vero & ha- litum hominis abominatur; hinc herbam, vel quodvis alimentum præbi- turo, cautione opus eſt, ne halitu ſuo illam adſiciat, alias enim, niſi fa- mis vehementia coaſta, eandem tangere detrectabit.

Pruina adhuc prata tegente, in campos educare ſolent capras, nec, niſi hieme, ſeu ſumma cœli inclementia, rurfus ad ſtabula conducere. Quo- quum detineantur, vel napis, vel braſſica, variisſque herbarum & foliorum generibus nutriuntur. Summitatibus etiam runci, aliorumque arbuſtorum, ſepta plerumque conſtituentium, delectantur. Paludolis in locis quæ na- ſcuntur, herbæ, noxiis illis nutrimento veniunt. Quovis matutino tempore & vespertino, potum illis præbere ſolent, quas ab initio Septembris ad finem uſque Novembris coitum adpetere, ſcimus. Magnum vero, morſu ſuo, olivis, vitibus aliisſque damnum adferre ſolent, & pedibus poſterio- ribus innixæ magnam earum partem adtingunt, demordent. Cæterum exi- guis ſumtibus nutriuntur, nec niſi vel partu proximæ, vel brevi poſt par- tum fœnum expoſcunt. Plus lactis capra præbet, quam ovis, & ubera il- lius, 5. per meſes, binis quotidie extrahendo, ad iv. lactis pintas colli- ges, nec tamen, niſi quinto & decimo die ſaltem, poſtquam fœtus effude- rint, lac illarum extrahere ordiaris. Difficillimo autem conatu eoſdem pa- riunt; & matri nondum annuæ, fœtus ſubtrahendi, aliisſque lactatum ad- movendi ſunt. Trimulæ ſaltem, & huic unicum ex fœtibus, lactatum re- linquas, huic illa per meſem ubera præbebit; ad tamen, ſi libet, vel 15. diebus peractis, illum amoveas. Binos plerumque una edunt, quibus binis Gallicum nomen: *Befons*, ſeu *Beffens* inditum eſt. Quinto autem vel ſex- to vitæ meſe, ſi libet, hœdos caſtrare licet.

Caprarum ſpeciem igitur præſtantem ſibi comparaturo opus eſt, ut opti- mos ex hircis, optimasſque ſibi ſeligat capras. Hircum quærat corpore ma- gno prominentem, & cruribus fortioribus inſtructum, collo brevi atque carnoſo, capite gracili, pilo nigro, copioſo & molli, auribus magnis at- que pendentibus, barba longa & piloſa; qui cornibus gaudent, nimix pe- tulantiæ incuſati, reliquis inferiores habentur. Hircus tamen cornibus ca- rens, hœdos cornua gerentes, & cornua gerens pater hœdos interdum iis deſtitutos generare ſolet; idem, quod & de matribus valet. Capra autem illa optima eſt, quæ corpore magno & inceſſu levi, & uberibus turgidis, papillisſque longioribus ac dependentibus, tergo lato, lumbis fortibus, cru- ribusſque pinguibus inſtructa conſpicitur. Monſtra tandem, capras inter communia ſunt hermaphroditæ, quæ prodeunte annorum numero, copio- ſiſſimum lac præbuere. *Aldrovandus* unum, & *Ephem. Germ.* bina exempla ſubjungunt, quorum alterum, capram binos hœdos ſimul effudiſſe refert, alterum ſcilicet, more communi conformatum, qui vitam cum ætate pro- duxit; alterum vero, duplici capite & collo, quatuor oculis totidemque

auribus, duplici ventriculo conglutinato, quatuor tandem pedibus erectis, totidemque terram versus spectantibus, instructum, qui paullo ex quo natus fuit, obiit. Aliam adhuc monstruosam capram describunt, cornuum magnitudine, barbæ prolixitate, pelleque admodum pilosa, & uberibus, lacte plenis ad terram usque inter bina crura anteriora dependentibus, conspicuam. Attamen cum hirco, ibicem, Gallis: *Bouquetin*, seu hircum silvestrem confundas, caveto. Hic enim maximum quemvis hircum magnitudine superat, & fœmella masculo minor est. Uterque autem pilo fulvo & in rubrum vergente gaudet, cornibus præter ea nigris, nodorum plenis, (qui singuli singulorum vitæ annorum sunt fructus,) in extremitate recurvatis, & sesqui cubitorum aliquoties longis, ac 15. ad 16. libras, pondere, explentibus. Cruribus tenuissimis gaudent, & cursu agiles, vel in summa præcipitiorum fastigia, sempiterna glacie ac nivè obducta elutantur. Temperamenti cæterum quum calidissimi sint, vix alibi vitam & videndi facultatem conservare possent.

En, quæ *Singularium Libro 2.* scribit *Belon*: Eximia sane est Arabum facilitas, bestias varias, & in primis capras edocendi præstigias. Has enim, ceu equos, sella sternunt, tum finias pro equitibus, illis imponunt, illasque, equorum more, saltus edere & recalcitrare adfuescunt. Domesticæ Heraclæenses capræ a nostratibus differunt, etenim corporis mole minore, vix oves nostrates adtingunt, & exiguis gaudent cornibus. Pilo obteguntur albidissimo, longiusculo, & subtiliori quam crinis humanus. Nec illum detondere, sed protrahere moris est. Carnem illæ præbent delicatissimam, nec odore silvestri imbutam. Et qui præstantiores sunt panni, *Camelot* dicti omnes, harum caprarum ex lana conficiuntur.

Numquam fame periit capra, etenim herbam vel brevissimam, decerpit. Pascua tamen pinguiora & gramine abundantia, si qua reperiat, seligit. Caprarum gregi, pastor agilis opus est atque robustus, quo montes & rupes conscendentes, insequi, & a lupo aliisve eas defendere possit. Nec tamen pluribus, quam ad summum quinquagenis, ob summæ earum indocilitatem, præficiatur. Ovibus cæterum & hircus & capra amicissimi, & societate imo morborum similitudine junguntur, hinc utriusvis infirmitatem eadem sunt media. Veterum denique opinionem, & recentiorum aliqui suam fecerunt, perhibendo: quod magno odio in avem ferantur capræ, quam: *Tette-Chevre*, seu *Fresaye* dictam, ululæ sub nomine supra descripsimus, & noctu lac caprarum exsugendo, & hujus & oculorum jacturam inducere dicunt; at *Bufo alatus*, sic enim fatius dicitur, hirundinum more, insectis vivens, culpæ & vitii hujus omnino insons est.

En! quæ circa rem, de qua agitur, in *Calendario Villicorum & rusticorum*, ex Anglico in nostrum sermonem converso, cujus Auctor est *Cel. R. Bradley*, Societatis Regiæ Londinensis Sodalis, & Botanices Professor Cantabrigensis, observavit, tibi L. ut speramus, haud ingrata.

Medio, inquit, Novembre, aliquoties vero præcocior, Venerens æstus incedit capras, & ovibus diutiores, 20. scilicet per hebdomades, utero gerunt. Miror, sane, exiguum illarum numerum in Anglia, quæ montibus, quibus lubentes illæ oberrant, repletissima est. Herba vel minima ipsis cedit pro nutrimento, cedunt etiam frondes arbustorum, rupibus ipsis, & montibus interjacentium. Quosque adtingere possunt, arborum ramusculos

omnes decerpunt. Tres autem varias illarum species, curiositatis ergo, Angliæ in regionibus conservari observavi; quarum potior differentia, ex vario pilo, variaque corporis illarum figura, petenda est. Specierum igitur prima, omnium ad frigus perferendum aptissima, robustior, & pilo albidio tecta est. Barbam hircus iste, adeo prolixam ostendit, ut pili ejus vel soli, vel hircinis mixti, pro conficiendis capillamentis adhibeantur. Et unam barbam hirci annum agentis, tanti interdum venire dicunt, quanti ovis integra coemitur. Fœmellæ autem & hujus & reliquarum specierum omnium, fœcundissimæ, binos interdum ad quinos utero gerunt; ad minimum, binos edunt fœtus. Maximæ speciei hœdi, quartum vel quintum mensem agendo, qui autem minimæ adnumerantur, illi non nisi anno peracto, gratum exhibent ori saporem, & plus nidoris quam illi continent. Variis ergo modis præparatam utramque gustavi, & illas quæ sunt speciei minoris palato meo satius arrisisse confiteor. Cervuli saporem, hujus ad modum præparata, utraque imitabitur. Lactis earum usum eximius est, & conficiendis venit caseis præstantissimis. Pellis earum, quæ pluris venit, quam ovina, eadem ratione, qua cervina, præparata, hanc fortitudine æquiparando, mollitie multum superat & pulchritudine. Pilus earum brevissimus conficiendis funiculis inservit, & temporis corruptioni, & aquæ maris, imo & igni resistentibus, quorum insignis usus est navibus. Gregem denique earum constituendo satius erit, si gregem integrum emeris, quam si hinc inde collectis catervis eum componere velles; confortii etenim consuetudine diutius coalescentes, majorem tibi præbunt utilitatem.

Capras igitur emturus, pro salutis earum signo, potum si quem in die adpetunt, habeat; morbo enim conflictantes omnem abhorrent. Morbis autem celerrimis obnoxia, & nisi medio celeriori obviam eatur, mortis periculo expositæ sunt. Nec naribus, ut reliqua, sed auribus spiritum ducere capras, observaverunt. Integra sanitate gaudentes, binis per annum, fœtus parere solent. Tanto autem desiderio in propagationem, vel matris adhuc lacte nutritæ, feruntur, ut exhaustis brevi viribus, vel quinto ætatis anno sterilecant, & præcoci morte moriantur. Annum itaque agenti matri, vel bimulæ, fœtus quos edidit, subtrahas, nec, nisi trimulæ saltem, vires tum majores consequutæ, lactandos relinquas. Quos itaque bimula mater peperit, hœdi speciei majoris, primo vitæ suæ mense, secundo autem, qui ex specie minori sunt, ablactandi sunt. Exinde autem vel pro cibo mastandi, vel lacte vaccina nutriendi; mense enim denuo peracto, sua sibi quærent alimenta. Paucis enim ex quo nati fuerint, hœdi, gemmas arbuistorum decerpere peramant, quibus si fieri potest, numquam illos carere curabis. *Plinius* autem, quum trimulas jam capras sterilescere scribit: conjecturæ locus est, quod a nostratibus diversissimæ, ipsi patriæ fuerint capræ. Magno opere enim differt cælum in regionibus Europæ frigidioribus, & Meridionalibus, Asiaticis atque Barbariæ; animalia autem, hisce viventia majorem quidem perfectionis gradum, ast breviorum terminum vitæ adtingere constat. Capras igitur istas, specie quamvis a nostratibus haud differentes, dum calidiore sub cœlo vixerunt, citiores sterilescere concedimus. Aestus venerei initium, jure, sextum ætatis mensem constituit. Idem & in illis ex nostratibus observabis, quæ Martio vel Aprile nata,

natae, abundantiori & magis succulento nutrimento aluntur, quæ enim exeunte æstate nascuntur, secundo vel tertio vitæ mensæ, nec illarum fortitudinem adæquant, nec magnitudinem. Naturæ curiosus quidam est, cuius observatione novimus: primum caprarum coitum inutilem, secundum mediocrem, tertium ad quintum optimos, sextum mediocrem, & septimum denuo inutilem esse.

Quæ autem cornubus carent, & Gallis: *entêtées*, seu capite amputato gaudentes dicuntur, magna lactis copia celebres, his, quæ cornua gerunt, & nihili interdum æstimantur, jure anteponuntur. Cornibus itaque destitutas, in calidioribus terris ac temperatis, cornigeras autem in regionibus frigidis eligendas esse suadet *Columella*. Cornibus etenim annorum cognosces, ut supra edocuimus, & illis instructæ, robustiores & longæviores esse dicuntur.

Physicorum antiquiorum alii, noctu pariter ac die capram videre posse referunt. Et observatione & examine Physicorum dignam judicamus, conformationem oculorum capræ, felis, ululæ, aliorumque. Quo plura enim opera naturæ observaveris; eo distinctius singula cognosces. *Mutianum* testem habemus oculatum, quanta sit capræ agilitas. Duas scilicet capras in ponte sibi obviam euntes observavit. Quarum utraque quum pontis angustia nec ad latus declinare, nec recedere, nec fluvii rapidissimi timore, alteram transilire vellet, alterutra difficultati subventura, & humi prostrata, alteram, corpus suum transeuntem, pertulit.

Exigui autem caprarum greges, copiosioribus præoptandi sunt, etenim vel ex unius morbo pestifero, cui subjacent, quemque Gallico sermone: *Tæc*, nuncupant, totus grex reliquus eundem contrahit morbum. Quinquaginta igitur capræ ex specie maxima, ex minima autem, octoginta ad centum pro componendo grege satis numerofo sufficiant. In primis autem, ne locis humidis detineantur, caveto, pascuis etenim nimis pinguibus admotæ, febri, & morbo quodam pestifero ac epidemico correptæ, omnes, brevibus, emoriuntur. Si tamen primam & secundam, morbo infectam, reperiendi fors obtigerit, reliquarum omnium venam, pro emittendo sanguine, conscindito, nec nisi transacto diei calore, pascuo illas committito. Sic & ingruenti pesti, infectarum vel separatione, vel nece & sepultura, occurrere poteris. Quum tamen, inutili quavis cura, totus tibi grex perierit; haud statim ex eo, alium, eadem regione detineas, sed prato demum, aeris transitu expurgato; alias enim ne eodem morbo adficiatur, verendum. Nec non cuidam hydropis speciei subjacent capræ, cui subveniendus, pellem humeris inferiorem conscindas, necesse est, & liquore exinde effluxo, plagam admoto ferro candente sanabis. Morbo autem hoc laborantis pabulum sit aridissimum; eamque in regiones, arbutis spinarum albarum, seu prunis abundantes; si fieri potest, pastum, abducas.

Hæc de capra domestica Cel. *Bradley*, qui, quæ de Capra Africana seu *Gazella*, addit, inferius legito.

Græci illam *Aix* adpellant, Itali: *Capra*, Germani: *Geis*, Belgi: *Geit*, Angli: *Goat*, Sueci: autem *Get*. Vox Gallica: *Chèvre*, olim *Chievre* seu *Cabre*, ex Latino: *Capra*, & *Bouc*, quod hircum denotat, ex Germanico: *Bock*, vel Italicorum: *Becco*, ortum traxisse videtur.

Hircus autem cum capra multum salis volatilis & olei continent. Hir-

cus ætate provectior, carnem saporis ingrati atque foetentem exhibendo, nulli cuiusvis nutrimento venit; at tertium vel quartum mensem agens, dum hæc audit, carnem præbet teneriorem, gratam sapore, facile digestu, & omnibus, in primis autem his, qui viribus ex peracto morbo debilitatis laborant, convenientissimam. Sic nec capræ, nisi junioris caro cibo nostro venire solet; quippe quæ durior difficillime concoquitur. Alii sunt, qui epilepsia sæpius correptas captas, epilepsiam cum carnis suæ usu communicare dicunt; at alii hæc in dubium vocando, carnem caprinam, digestu facillimam, & vires restaurandi virtute præditam esse censent. Nostrum denique si quæris iudicium: junioris & hirci & capræ carnem optimam esse, at senescendo, utramque deterioris qualitatis evadere opinamur.

Utriusque insuper, sanguis, sebum, stercus, & urina Medicinæ usibus veniunt. Sanguis scilicet hircinus, sudorifera & resolvendi virtute instructus, contra pleuritim, ad excitanda item mulierum menstrua, ad profligandos calculos & ad dissolvendum sanguinem coagulatum, dosi ℥j. ad ℥iiij. vel boli instar, vel liquori convenienti admixtus, commendatur. Alii sunt, qui sanguini ex hirco domestico, ex silvestri proveniente anteferunt, quem ex Helvetia & Sabaudia, quarum ille montes inhabitat, ad nos deportari novimus. Sensim vero arefactus, & in pulverem redactus adservari solet & præparari; hircum scilicet, ætatis mediæ per dies aliquot domi retinent, ac pimpinella, petroselinum, malva, saxifraga, similibus nutriunt, tum arterias secant, & effluentem sanguinem, vasis argillaceis excipiunt, quo omne abeat serum, deinde vel solis calore vel parvissimo igne arefactum, probe obturatis ampullis recondunt. Quo pluribus autem spiritibus sanguis ejus abundet, singulare ei illud nutrimentum exhibent. Sanguinis tamen hircini usus contra pleuritim hodie est infrequentior, nec nisi ruri viventibus, communis; hi enim venarum incisionem extimescentes, sudorem promoventia præoptant. Quo quidem in casu exigua saltem sanguinis emissio admittenda est; vasorum etenim exhaustio nimia, nimiam relaxationem producit, eamque sanguinis tenacioris & pleuræ in hærentis resolutioni contrariam, & vires ægrotanti, pro expellendo sudore abundante necessarias, absorbentem; una autem, ad summum duæ V. S., si sanguinis hircini usus statim subsequatur, integram conservant vasorum elasticitatem, & hæc attenuando sanguini, pleuram constipanti, ac restituendæ ejus circulationi sufficit; at alia urbium est ratio, ubi sanguinis emissio, pro specifico venit universali. Sexies septiesque emissum in pleuriti sanguinem, exiguum hodie credunt; si autem hisce præmissis sanguinem hircinum ægrotanti præberes, nullus utique medio succedet effectus. Vires etenim ejus debilitatæ sunt, & vasa, elasticitate, pro expellendis pleuram constipantibus, necessaria, carent. Succumbendum est ægrotanti, nimis methodice (si dicere fas est) tractato; etenim nimiam sanguinis emissionem in pleuriti nocivam esse ac funestissimam, nostra ipsorum experientia edocti tenemus. Tutiores igitur illos procedere censemus, qui in pleuriti, duabus sanguinis emissionibus, statim sanguinis hircini usum substituant; præ his, qui non nisi repetitas venarum sectiones præcipiunt.

Sebum Hirci, ex Avernia, Neverino ac aliunde adportatum, dummodo durum, aridum, & candidum reperiatur, emollientis, solventis ac discuti-

tientis virtutis suæ ergo, unguenta nonnulla ingreditur atque emplastra. Nec non dosi ʒj. clysteribus anti-dysentericis admiscetur; & liquefactum, decoctionibus vulnerariis, ad consolidanda & detergenda intestinorum ulcera inest. *Schroderus* umbilico illitum tamquam specificum pro stranguria, & suppositorii instar, contra Hemorrhoides commendat. Frequentissimum quoque ad conficiendas candelas inservit.

Stercus hirci atque caprinum, sale volatili acri abundans, pro detergente, digestivo ac resolvente interne contra calculos, pro excitandis mulierum menstruis ac urina, pro lienis obstructionibus & hydropse; externe autem contra scabiem, & tumores frigidos, lienis etiam & hepatis inductiones, adhiberi solet. Calcinatum denique pulverem exhibet deterfivum, contra Alopeciam & lichenes.

Urina hirci, calida adhuc recepta, summa facilitate urinam excitare & calculos profligare censetur. Sic v. g. *Cel. Reiseli* D. virginem hydropicam, solius urinæ hujus usu, integram salutem recuperasse confirmat. Consentunt *Schroder*, *Ettmuller*, alii, eamque ad sanandam nephritim, item ad expurgandos a calculis & saburra meatus urinarios, conferre docent.

Lac caprinum medium tenet locum inter asininum atque vaccinum, pauciori enim sero quam illud constat, nec adeo crassum est, quam vaccæ; hinc competit omnibus, qui temperamenti sunt humidi, ac stomacho debilitato laborant; hos enim vaccinum nimis exoneraret; asininum nimis foret aquosum. Adstringendi insuper virtute instructum est, quam ex gemmis ilicis, aliisque plantis adstringentibus, capræ deliciis, accipit. Et hujus qualitatibus ergo, non solum pectoris morbo laborantibus, sed etiam tabiferis infirmitatibus detentis, si quod alvi profluvium serosum adest, omnis tandem generis profluvio alvi inveterato correptis, utilissimum est. Sic & infantibus tabidis, & adultioribus, nimium macilentis. Cautione tamen opus est, ne dum lacte utaris, aliis capra herbis vescatur, quam his, quæ benignum suppeditant succum & moderatum. Tithymalum etenim peramando, succum qui præbet causticum, faciles lac suum salibus explent acrioribus, & febrem promoventibus. Sale item imprægnatum serum caprinum, majori aperiendi & diuretica virtute gaudet, quam vaccinum. Hinc & potior hujus esse solet usus, contra arthritidem, scorbutum, & alvi constipationes; leviter, scilicet, expurgando, aperiendo, & refrigerando, (in primis, quum herbis morbo adpropriatis usum fuerit animal) sese commendat. Capræ autem si purgantia præbeas, & hujus lacte utatur nutrix, infans, quem illa lactat, dulcem & sufficientem purgationem experietur. Regimen, lacte caprino utentibus quod observandum venit, supra reperies, ubi de lactis vaccarum usu egimus.

Nec tamen Medicinæ saltem, sed & aliis artibus, varia subministrat & hircus & capra, quæ velut in transcurso hic adtingendi locus ac animus est. Pelle hircino faccos conficere solent, pro devehendo vino, oleo, Terebinthino, aliisque inservientes. Orientem tenentes, iisdem ad transnataanda flumina, & sustinendas rates, quibus ex loco in locum merces conferunt, utuntur. Imo conficiendæ alutæ, quam *Marroquin* dicunt, sive rubræ, sive nigræ, pellis hircina & caprina venit. Præstantissimam vero alutam hanc rubram, Orienti debemus, ubi lacca, aliisque tingitur herbis. Optimam alutam nigram, *Barbariæ* regiones præbent; utriusque autem

grana seu eminentiæ pulchre emineant, & tactu sit lævis, & odore grata. Quam Gallia imitatur, illa nec elegantia, nec fortitudine, Orientalibus æquiparari meretur.

Emplastrum insuper nervinum Pharmacopoeiæ *Lemeryanæ*, sebum Hirci ingreditur.

℞. Sanguin. ex hœdo pulverifat. ℥j.

Solut. in aliquantulo vini rubri tepefacti, f. potio, pro pleuriti, una vel 2. venæsectionibus præmissis, exhibenda.

℞. Sanguin. ex hœdo præp. & pulv. ℥ß.

Sal. cardui bened.

Sal. volat. oleof. *Sylvii* ana gr. x.

Bezoar. mineral. gr. viij.

Subig. cum Confect. Alkerm. ℥ß. f. bolus pani oblato involvendus, pro pleuriti, suprabibatur scyphus ptisanæ Scorfoneræ.

℞. Adipis ex epiploo hircino ℥jv.

Succi uvarum nigrarum, *Marroquins* Gallis, audientium, immaturis adhuc expressi ℥iij.

Ceræ flavidæ ℥ß.

Adipem probe abluas, tum liquefacias, & omnia admisceas, & habebis pommatum, pro emolliendis crustis, in naso obortis, item pro fissuris labiorum atque mammarum.

Capra Alpina. Offic. Dal. Pharm. 438. *Capra Alpina*, seu *Rupicapra*, Schrod. 176. *Rupicapra*. Bellon. Obs. ed. Clus. 76. Gesn. de Quadr. 292. Charl. Exerc. 9. Jonst. de Quadr. 52. Raii Syn. Anim. Quadr. 78. *Dorcas*, seu *rupicapra*. Aldrov. de Quadr. Bisulc. 725. *Caper montanus* Alberto. *Capra cornibus surrectis uncinatis*. Linn. Nat. Syst. 71. *Capra montana*; *Tragus Dorcas*; *Caprea Varroni*, Plinio, Martiali, Scaligero; *Ægagros Oppiani*; *Kemas Æliani*; *Dama Veterum*. Quorund.

Duplicem ad manus habemus damæ descriptionem, alteram *Germ. Ephem.* alteram vero *Actis Regiæ Scientiarum Academiæ* subministrantibus, quarum hanc potius, fusiolem scilicet & adcuratiorem, tecum, L. B. communicabimus.

Capræ magnitudinem, sic acta, parum excedebat dama nostra. Pedibus præ illa longioribus, breviori autem pilo gaudebat. Longissimus tamen ventrem qui obtegebat & lumbos, non nisi $4\frac{1}{2}$. digitos pertingebat, imo, qui dorsum muniebat, adhuc brevior. Duplicis generis pilo dorsum & latera obducta vidimus, præter magnum scilicet & adparentem, alius quidam, brevior sub eodem delitescibat; radices illius cingendo. In capite, ventre, & cruribus, longiorem tantum observavimus. Ubi autem longissimus, ibi paullulum crispatus erat. Dorsi superficies, & pars superior stomachi, & gutturis inferior, & latera, una cum vertice ac exteriori aurium parte, fulvo-rubrum præbebant colorem. Et zona quædam ejusdem coloris, ab auribus ad nares producta, oculos cingebat. Reliquus pilus omnis, candido-fordidum & rubicundum profitebatur.

Cauda 3. aures vero 5. digitorum longi, & intus pilo candido, obsiti, cæterum pilo omni carentes & castaneo-fulvi erant. Oculi ejus magni, palpebra quadam interna rubra, angulum minorem versus sese recipiente, gaudebant. Qua sinistre perspecta: *Albertum M.* damæ rubros tribuisse

oculos censemus. Labium superius, ut in lepore, parumper fissum erat; cornua autem nigrida, rotunda, & circulis, tamquam radiis, cincta, ex anteriore frontis parte, supra oculos, egrediebantur. *Oppianus* damam *Sterpsicoron*, seu teretibus cornibus instructam, adpellat. *Gesnerus* autem cum *Aldrovando*, vocabulum istud æquivocum interpretando, & *Oppianum* cornua posticus reflexa, nec antrosum proclivia (qualia gerit ovis Candiensis, sive *Sterpsicoros Belonii*) designare voluisse censent. Sic & damæ nostræ cornua posticus recurvata, pro teneriore autem ejus ætate, nondum eosque producta erant, quo in provectoribus, quæ sese adfricando, cornuum apicibus vel pellem sibi perforant; imo sæpius accidit, ut aciei suæ ergo, pellem transeuntia, eidem infixæ hærent adeo, ut retrahi amplius nequeant, sed fame animali sit pereundum. Ex præcipitiorum fastigiis inimum ruentes, suis se cornibus, tamquam uncis, sustentare dicuntur.

Num vero *Rupicapra* an *Caprea* a *Plinio* adpelletur, de qua nunc dicimus, dubium est; ille enim duas caprarum silvestrium species esse adserit. *Forstön* capream nostram, *Plinii* capream esse censet. *Scaliger* autem capream, damam, & capreolum Gallorum: *Chevrenil* credit. Nec *Votton* in commentationibus ad *Columellam*, nec *Aldrovandus* ullum constituunt inter utramque discrimen; sed capream, Gallis: *Chevrenil* audire putant. Et *Scaligeri* ex mente *rupicapra*, vox generica est, & ibici competit & capræ. *Rupicapram* vero antiquiorum hanc nostram esse ducimus, siquidem a *rupicapra* damam, cornibus proclivibus instructam, distinguit *Plinius*. Et alio in loco capream ramosis cornibus gaudere, addit, qualia in nostra dama videbis. *Chamois* autem, nomen ejus Gallicum, teste *Belonio*, ex Græco: *Kemas* ortum traxit; quam vero *Kematis* descriptionem traditam relinquit, *Ælianus*, illa neutiquam damæ nostræ competit; hanc enim cornibus proclivibus, & auribus multo pilo obductis instructam esse describit. *Scaliger* interim, antiquiores, jure quidem, confusionis auctores nuncupat, haud sua quibusvis animalibus dum nomina tribuerunt; ast & ipse novæ confusionis auctor evadit, Capream cum *Rupicapra* confundendo, & *Aldrovandum* ac *Gesnerum* eo abducendo, ut *Kematem*, seu ex mente sua, Gallorum *Chamois*, pro *Faon* eorumdem habuerint. *Scaliger* igitur vocis: *Kemas*, significatum diversum neglexisse videtur, quæ ex usu communi, Gallorum *Faon* denotat; *Kemas* nimirum a *Κοιπάω*, dormio, derivatur, siquidem, *Faons*, seu pulli animalium silvestrium, cavernas suas egredi vix audent, sed illis delitescentes plerumque dormiunt. Secunda autem sua significatione, teste *Æliano*, animal denotat, a pullo silvestrium, Gallice *Faon* dicto, diversissimum.

Dama igitur nostra, ruminantium instar, maxillam saltem inferiorem, 8. inæqualibus dentibus incisoriis consitam ostendebat, quorum medii extimis erant latiores. Pedes insuper bifulcos, intus excavatos, nec, ut *Gazzellæ*, carne repletos; sed carne interius recepta, omnis ungularum acutissimarum extremitas terram pertingebat.

Tum vero anterior pars epiploi, ex sinistra, primo ventriculo cohærebat, ex dextra autem procurrens tertio necebat, postea descendens partem inferiorem primi transibat, & posticus deinde ascendens, fundo ventriculi primi jungebatur; nec, ut plerumque videmus, epiploon intestinis superjacebat. Tribus gaudebat ventriculis, quorum primus ex duabus constabat membranis, interiore nimirum villosa, & exteriorem facile relin-

quente. Secundus autem minor, varias interiore sua parte, ostendebat rugas elevatas, retis figura sibi invicem superjacentes. Tertius tandem, magnitudinis mediæ, variis componebatur foliis dentatis, ut ventriculus tertius bovis. *Bartholinus*, damam describendo, bina ventriculi, (etenim non nisi unum nominat) esse dicit orificia, inter se proxima, quæ in nostra fatis longo intervallo distantia observavimus. Nec non corpusculum vidimus, tertii ventriculi membranæ internæ adhærens, membrana duriori compositum & saburra repletum. Ex *Gesnero* autem edocemur, quod damæ linguam suam ac guttur, multa plerumque pituita, ciborum nauseam excitante, obductam, glaream & saburram deglutiendo expurgent. Præter corpusculum istud alienum, ac naturaliter adhærens, alium quemdam globulum, leviter adglutinatum, ovi formam referentem, 13. lineis longum, 10. lineis latum, ac coloris olivæ deteximus, quem *Velschius*, in tractatu de globulis, in ventriculo damarum repertis, *Bezoar Germanicum*, *Cardanus* autem, *vaccæ ova* adpellat, siquidem *Plinio* teste, ejusdem generis globuli & juvencarum in stomacho reperiuntur. *Bartholinus* eorum originem in pilo & lana quærit, quem & vaccæ & oves, sese invicem delambendo, deglutiunt; quem vero in dama nostra vidimus, globulus, haud pilis, sed ligneis fibris, figura inæquali & varia crassitudine, a pilis quæ differebant, compositus videbatur. Imo & equorum in stomachis easdem obvios fuisse novimus, nec tamen equos sese delambere dicit quispiam. Hinc *Camerarius* & *Gesnerus* globulos istos seu tophos, ex durioribus ac concoctu difficilioribus herbarum fibris, & in primis *Doronici*, quod *Aconiti* species est, congestos esse censent; folia etenim *Doronici*, quamvis mollia & tenera, nervis tamen fibrosis, plantini instar, instructa sunt. Et *Plinius* huic sententiæ accedere videtur, dum damas, & conchas, veneno vesci, recenset. Quamvis namque *Doronici* naturam determinantes Botanici in diversa abeant, & num homini veneno cedat, dubitant, animalibus tamen veneno esse, omnes uno ore profitentur. Vertiginis autem evitandæ ergo, *Doronico* vesci dicuntur damæ. Et, quos in tertio ventriculo deteximus, tophos, non nisi in primo & secundo reperiri docet *Velschius*. Imo *Camerarius*, ineunte Novembre eosdem exoriri refert; nostram, Decembre, dissectioni & examini subjecimus.

Omniū præterca intestinorum; (Cæco tamen, novem digitorum, excepto,) longitudo, 40. pedibus absolvebatur. Colon 1. saltem pedem explebat. Lien rotundus atque depressus, alteram sui partem, magno ventriculo adhærentem 8. linearum altam; alteram vero, liberam, sensim crescente crassitudine, in marginem tenuissimam exeuntem, ostendebat. Hepar duobus majoribus, & tertio minore lobo constabat. Fellis vesicula medium lobi dextri occupabat. Felle autem carentibus & capras, damarum genus constituentes, adnumerat *Plinius*. Nec *Bartholinus* dissecta in dama fellis vestigium reperit. Renes insuper 2. digitorum longi, & membrana adiposa haud renum corpori juncta, sed spatium utrivis intermedium aderat, & vacuum; ut & *Bartholini* observationibus constat. Ex parte sua superiore, exiguo hepatis lobo cohærebat. Ostia matricis longissima vario modo complicata erant & recurvata. Et ostii extremitati, seu matricis tubæ in brutis, junctus conspiciebatur testiculus. Vasorum præparantium rami, non solum per testiculos & matricem, sed & ipsam vesicam

cam dispergebantur. Ligamenta autem rotunda, ex lateribus matricis, ubi tubas efformando finditur, exorta, tum vero ad inguina descendunt, dilatantur, & pedem anserinum, (sic enim artis vocabulo: digitorum inæqualitas dicitur) constituebant. Octo erant pulmonis lobi, 4. ex dextra, 3. ex sinistra, unus autem mediastini in duplicitate situs. Cordis denique longiusculi in cuspide, apophysen vidimus callosam, albidam, duram, rotundam, & apicem digiti auricularis exæquante crassitie, ex corde prominentem.

Cerebri & cerebelli, corporis ratione magni, longitudo 3. latitudo 2. digitis absolvebatur. Frequentioribus autem & magis diversis anfractibus conspiciendum erat, quam in reliquis brutorum. Cavitate itaque longissima, pro more, in dextrum atque sinistrum licet divideretur, haud tamen producta pia-matre, falcem constituebat, lineam saltem, illamque vix eminentem, & cavitati cerebri respondentem exhibebat. Plexus Choroidis, magna sanguinis adfluentis copia valde dilatabatur; & glandula pinealis, unius lineæ diametro, & figura, solito rotundiore erat. Nervus opticus extra axem, oculi globum, magis frontem versus ac genas, ab intra autem per tapetum fulvum ingrediebatur. CrySTALLINUS foris, quam intus magis convexus, partis interioris superficie, in tres divisus adparebat. Et membrana arachnoidæa dura & crassissima, facilis a crySTALLINO separabatur.

En tibi, L. descriptam, utut est, descriptionem damæ, auctoribus Viris Cel. Regiæ Academiæ Sodalibus; quorum ex *Actis ad Historiam Animalium naturalem inservientibus*, utinam pluries haurire liceret; & præstantissima sane Anatomices studiosis adponeremus. Nec tamen foraminum duorum, post cornua damæ obviorum, & in *Ephem. Germ.* descriptorum, mentionem faciunt Viri eruditissimi. Quæ quidem foramina, *Oppianus* & alii respirationi destinata habuerunt; nos tamen dubitamus, siquidem cranium in fundo foraminulorum situm, nec ullum alium ejus exitum reperivimus.

Animi timidi est dama, & rupes ac præcipitia inhabitare, summoque venatoris periculo captari solet. Illa enim insequentem hostem persentiens, summa, & hominibus æque ac canibus inaccessibilia præcipitiorum conscendit fastigia. Cæterum societate aliis junctæ pascuntur, & dum aliæ pabulum quærunt, aliæ loco eminentiore constitutæ, excubias agunt & vigiles, perspecto autem periculo, pascentes clamore elato ad aufugiendum admovent. Aliud vero pabulum quærendo, alias rupes conscensuræ, pedibus solo admotis, fundum cui obambulandum est explorant, & num lubricus sit, inquirunt. Per omnem denique Septembris mensem, æstum Veneris patiuntur, & quos 9. per menses utero gesserunt foetus, Junio plerumque effundunt; nec hos, nisi rupes conscendendi facilitate, gavisi fuerint, secum eo conducunt. Faciles autem captæ cicurantur, & quum singuli masculi singulis foemellis sufficiant, inter animalia casta referuntur.

Frequentes præterea, teste *Altmann*, Helvetiæ, Tyrolæ, aliosque montes altissimos inhabitant damæ, nec summa umquam eorum fastigia petunt, quippe quæ haud eadem facilitate, quam in capreolis miramur, saltus edere valent. Alpes interdum mediocres conscendunt, & rupes arenosas quasdam avidissimæ delambunt, quas eam ob causam: *Sulzen*, seu *Salinas*, incolæ dicunt. His itaque earum conciliabulis detectis, venatores delitescunt, & quum eo confluerint, vel vias easdem capiunt, vel enecare solent.

solent. Cornibus item nigris atque teretibus, tamquam fulcris, invia præcipitia conscendendo, uti dicuntur; æst venatorum experientia obloquitur. Nec ulla, utrumque sexum, vel magnitudinis, vel figuræ differentia interest. Rubrum sui pili colorem, æstate debiliorem, hieme autem obscuriorem evadere docet *Gesnerus*. Idem & nigro, & candido pilo tectas reperiri scribit.

Binas autem esse Damarum Helveticarum species refert, quarum altera, minor, inaccessibiles montium recessus tenendo, numquam ad planities descendit. Et miratus auctor, quam ratione hyeme, omnibus ibi herbis & arbutis nive obtectis, vivere possint atque nutriri, varias dissecuit, & stomachum earum laminis quibusdam lapideis oppletum reperit. Cujus intuitu ductus, reperiri censet montibus in illis, lapidis cujusdam fissilis speciem, terra argillacea & nitrosa constantem, ac caloris acidorumque suorum ergo, sufficienti illorum nutrimento cedentem. Interim si ex illa, per hyemem vivunt, circa finem ejus nil nisi pellem ossa obtegere posse constat. Altera autem species, major, & fulvior, nonnunquam, hieme præsertim, rupium ad pedes descendit, & gemmis arbutorum vescitur atque abietum, quo fit, ut & maximam carnis suæ partem amittant, & residua ingratisimum inducat saporem. Acutissimo interim odoratu gaudent, & magis percepto hominis odore, quam præsentia ejus, in fugam versæ ægre capiuntur; hinc venatores adverso vento illas adire solent. Æstate exeunte pinguiissimæ sunt. Frequentiorem præterea earum in stomacho, lapidis globulum, ab aliis Bezoar Germanicum dictum, videmus. Quorum quot examini subjecit, *Cel. Altmann*, Bernensium in terra repertos, tophis bovinis seu equorum similes observavit. Pilus enim quem delambendo deglutiunt, mucos quodam, sensim indurescente, obducitur. Aest *Cel. Scheuchzer*, fide dignissimus, variis plantarum fibris, stomachi actione, globi instar contortis, eosdem constare censet. Hostes sibi habent, præter homines & Lupos sic dictos cervorum, hodie ab Helvetis fere extirpatos, & aquilarum speciem, Germanis: *Laemmer-Geyer*, seu, agnorum vultures, audientes. Qui quidem aeris tiranni, singulari arte, molis majoris animalia captare solent. Quum enim vel capram vel damam montis in præcipitio pascentem conspexerint: rudiori volatu descendentes in illam irruunt, & rupis in abyssum detrudunt; quo fit, ut præda sic enecata, commodiores nanciscantur.

Et hæc quidem ex *Diario exotico*, studio & opera *Cel. Prevost*, Abbatis, nobis reddito, hausta confitemur.

Italum Damæ nomen est: *Capra Selvatica*, Hispanicum: *Cabra Montez*, Germanicum: *Gems*, Belgicum: *Alpise Geit*, Anglicum: *Shamoys*, seu *Wild Goat*. Vocem Gallicam: *Chamois*, ex Græca: *Kemas*, *Ysard* autem ex obsoletis Gallorum nominibus petendum esse, *Belon lib. I. Singularium* suorum, censet. *Menagius* silentio præterit.

Omniū interim suarum partium, oleo & sale volatili abundantium; aliquas, adipem scilicet, fel, & Egagropilem, seu tophum, item Bezoar Germanicum dictum, Medicorum usibus præbet. Continuatus v. g. adipis sui, lacte commixti usus, pthasin & pulmonis ulcera sanare solet. Fel ejus oculorum aciem exacuat, corneæ ulcera detergit, maculasque profligat, collyrii instar, adhibitum. Imo ex aliorum sententia, contra nyctalopiam

facit, Nyctalopiam vero illum dicimus oculorum morbum, quo qui afficiuntur, omnem visus aciem, sole occidente amittunt, qui tamen sole meridiano, atque diurno, probe omnia vident. Egagropiles autem, calculus quidam est nigridus, quem si fregeris, gratissimum percipies odorem. Olim quidem frequentior ejus fuit usus, & Bezoari Orientali interdum substitutus, contra contagiem, venenum &c. ad exaugendam transpirationem, ad cordis vires corroborandas, & pellem versus, sanguinis fermentum propellendum, ℞. ad ℥j. dosi, cum aqua cordiali. seu gr. iij. ad gr. vj. quantitate, præservativi instar adhibebatur. Hodie autem, Physica ars adtentior & magis edocta, multum, non dicam omne Egagropilæ pretium & æstimationem reiicit. Qui quidem topi, quum ex observatione Celeb. Geoffroy, non nisi pilis & herbarum fibris constet, ut supra diximus; nulli præter hos, quos crusta quadam bezoardica obtectos videbis, & illi quidem, exigua, gaudent virtute. Plerumque autem in stomacho ruminantium primo, aliorumque non ruminantium, ut Echini silvestris, capræ, equi & vaccæ nascuntur. Hodie igitur, deperdita sua fama, cornu cervini præparationibus plerumque postponuntur. Antiquiores scilicet tophos hosce, ex plantarum vulnerariarum & alexipharmacarum succo compositos, eadem virtute gaudere censebant. Nunc autem structuræ saltem curiosioris ergo, adservari, & naturæ singularibus adnumerari solent.

Pellis tandem Damarum mollis & calida, multiplici hominum utilitati cedit.

Animal Moschiferum. Offic. Dal. Pharm. 441. Raii Syn. Anim. Quad. 127. *Moschius*, seu *Moschi Capreolus*, Schrod. 301. Gesn. de Quadr. 786. *Capra Moschi*. Aldrov. de Quadr. Bisulc. 743. Jonst. de Quadr. 55. *Capra Mosch*, aliis *Cervus odoratus*. Charl. Exerc. 10. *Moschus*. Lemer. 581. *Capra cornibus teretibus, dimidiato-annulatis, arcuatis*. Linn. Syst. Nat. 71. *Gazella*, seu *Caprea Moschi*; *Gazella Africana*; *Tragus Strepsiceros*, *Oryx Antiquorum*; *Gazelus*; *Dorcas peregrina*, *Libica seu Moschifera*; *animal Moschi*, *Moschum gignens*, sive, ex quo *Moschum* colligitur. Nonnulli.

Amplissimam, quinque gazellarum descriptionem Anatomicam, Viris Cell. Academiæ Regiæ Scientiarum Sodalibus scriptam debemus, eamque tecum L. sequentibus communicamus.

Vario tempore gazellæ istæ ad nos portatæ fuerunt. Quarum altera masculus, altera pullus, tres reliquæ autem erant foemellæ. Primo itaque omnium maximam, foemellam scilicet cum pullo suo, a gazello quodam, in vivario Regio, quod Versalii est, enecatos, accepimus. Humerum matris sinistrum, penitus fractum, & tria pulli crura prorsus disrupta vidimus. Quæ quidem ad animum revocarunt ea, quibus Belon gazellam nostram, Orygem antiquorum credit; quam Oppianus frequentissimam & efferatam dicit. Nec tamen reliqua Orygi propria in Gazellis nostris deteximus; nec enim unicum ex descriptione Aristotelis, cornu in fronte; nec pilum ut Plinius ait, caput versus inclinatum; nec mentum barba præditum, Alberto teste; nec tantam ejus fortitudinem, secundum Oppianum deteximus, ut vel cum leone & tygro certamina inire posset. Mansueti enim erant ad spectus, & nunquam, nisi cornua ipsis tangas, ira excandescere dicuntur. Dicitur autem ab Arabibus: *Algazel*; imo & *Dorcas*, & *Strepsiceros*, nomina, eidem competere, contra Scaligerum, adfirmamus. Dorcam Lybicum cursu

curfu esse velocem, ait *Aelianus*, & ventre albo, reliquo autem corpore fulvo, notatam; albido & fulvo lateribus intermediam reperiri zonam nigram, oculos præter ea nigros, auresque esse maximos. *Strepsiceros*, ut *Plinius* loquitur, Capra est Africana, cornibus altis, rotundis, acutis, & bracchiorum lyræ instar, curvatis, seu, ut explicantem *Joannem Cajum* sequamur, jam ante, jam post se reflexis, & citarrhæ figuram referentibus. Nos tamen hanc formam lyræ, *Plinii* tempore fuisse dubitamus.

Quæ omnia in nostris 5. gazellis quum reperierimus: *Strepsicoron*, *Dorcam* & gazellam Africanam, pro iisdem posse haberi censemus. Etenim & Africam gazella nostra colebat patriam, & cruribus longis, ad currendum velocibus, gaudet. Magnitudine & forma capreolum referebat, & pilo fulvo, tota fere obtecta, non nisi ventrem & stomachum album, caudam nigradam, & zonam, ac pilum ab oculo usque ad rostrum, obscuriorem ostendebat. Sub pilo ejus brevissimo corium in proVectioribus, nigradum, in junioribus autem cinereum & splendens deteximus. Quem quidem nigredinem distinctius in auribus observaveris, hi enim magni & intus villosi sunt, villo scilicet candido, duriori item & longiori, præ hoc qui ventrem obtegit, consiti. Oculos præbebat nigros atque amplissimos, cornua nigra, radiis transversim obducta, xv. digitorum longa, x. linearum in origine crassa, cuspidata, recta, at in medio paullulum foras deflectentia, tum vero recta procurrentia, ut lyræ antiquiorum bracchiis eadem æquiparare possis. Masculus quæ gerebat, magis posticus recurvata & aliquantulum depressa, quæ autem fœmella, rotundissima erant; quæ quidem cornuum conformatio pro ratione nominis Græci: *Strepsiceros*, venisse videtur. Hoc enim cornua potius rotunda, quam teretia & circumvoluta denotare credimus; siquidem hæc saltem gazellæ sunt propria; reliquorum autem angulis instructa, qualia & in ovibus, Candiensibus exceptis, reperies; has enim suo adhuc tempore *Stripsoceros* dictas esse refert *Belonius*, quo sinistre explicato, *Strepsicoron*, ovium speciebus adnumerat *Scaliger*. Cæterum cornua in medio erant excavata, & ossæ quodam cuspidato expleta, ex quo, mediante pericranio, capiti cohærebant. Hoc pericranium insuper durissimum ac crassum, multo sanguine madebat, magna etiam ejus copia, ossi, Diploe instar, spongioso, inerat; externa autem ossis superficies solida, & ad longitudinem striata, cornuum vero striæ ad latitudinem, seu transversim productæ erant. In radice cornuum globulum quendam, pilis longissimis constantem, deteximus.

Naso, caprarum instar, recurvato, magis gazellus, quam gazella gaudebant. Ille enim rostro brevior, & capite magis rotundo, brutorum omnium instar, conspiciebatur. Palatum, pelle dura, squamarum forma, obtegebatur. Dentibus incisoriis maxillarum superior carebat, inferior autem VIII. exhibebat, illosque magnitudine valde dissimiles, bini etenim anteriores, omnem 6. reliquorum latitudinem adæquabant. Cauda fœmellæ pilo longo & nigrido obducta, & in origine depressa, priorum nodorum in regione, 2. circiter digitis lata, post vero constricta, ubi longus ille pilus, ad poplitem usque dependens exoriebatur, vix unum digitum latitudine referebat. Hoc autem masculi cauda destituta, nullo nisi longiusculo saltem & molliori pilo obtegebatur. Sic & cruribus in anterioribus, ubi genuum sunt plicaturæ, longiorem duriolemque pilum, quam

in reliqua genuum parte observavimus. Dimidius dextram, dimidiusque sinistram versus inclinabat, & duriori corio sustentatus, pulvinaris cujusdam speciem constituebat, camelorum callo simillimam. Quam vero *Fabius Columna* descripsit, gazella, majori adhuc similitudine, camelo accedit. Illa enim omni prorsus pilo, hac in regione carebat. Et pedem commonstrabat, valde fissum, duobus insuper unguibus in extremitate munitum, & denuo aliis callis duobus, cameli instar, præditum. Qui quidem pes, camelorum more, & ungue, & pelli innitebatur, quæ obtegendero inserviebat callo, in cervorum, caprarum & camelorum pedibus, alias conspiciendo. Aliud præterea in pede gazellæ observavimus singulare, pellem scilicet, cujus dilatatione ungulæ binæ a se invicem dilatantur. Nova igitur incidit animum dubitatio, utrum gazella nostra, *Kemas* sit antiquiorum Poetarum; huic enim multa tribuit in gazella nostra obvenientia *Aelianus*, & in primis eum in modum conformatos esse dicit Kematis pedes, ut illorum auxilio facilis ipsi evadat natatio. Brevior cæterum masculi in pedibus erat ista pellis, cujus nec ungulæ adeo dilatabantur, quam quidem fœmellæ.

Duobus saltem gaudebant gazellæ nostræ uberibus, unica papilla instructis. Duas præterea cavitates vidimus, seu sacculos profundiores, pilo carentes, sed aspera pelle obtectos, ex uberum lateribus, ubi inguina sunt, easque humore quodam solidiore, ac ceræ simili, repletos. Et hos *Joannes Agricola Ammonii* errori ansam præbuisse existimamus, qui selem odorariam, zibetham quam dicunt, gazellam nostram credidit.

Magna autem est utriusque differentia, & quos in gazella observamus, sacculi, magis leporinis, eadem in regione sitis, quam his, quos felis odoraria gerit, accedunt. Masculo tales erant sacculi, quales fœmellæ.

Quarta tamen gazellarum, pulvinari in regione genuum reliquarum, licet juniorum, obvii carebat; ast *Fabii Columnæ* ex descriptione, omni ibidem pilo destituta, & zona illa nigrida, utrovis in latere ornata gazella, quam & nos in gazello, & in Dorcade Lybica observavit *Aelianus*.

Partes eorum internas quod adtinet, omnium epiploon, adipe duro atque rubicundo, omnia partis ejusdem vasa, variis divisa, subsequenti & obtegenti, erat instructum. Nec tamen intestinis supranatabat epiploon, sed omnia penitus obvolvebat; in una tamen nostris ex gazellis, Ileon peritonæo, multarum fibrarum ope, cohærebat. In reliquis autem ex parte ventriculi anteriore & media, cui neciebatur, descendens, abdominis deinde fundum ingrediens, mesenterii centro adhærebat, exinde autem in altum ascendens, ad inferiorem ventriculi partem revertebatur. Cartilago Xiphoidis, quadruplo major ac in aliis, $1\frac{1}{2}$. digitorum longa, sterni ossi ex utraque parte cohærebat, postea autem conglobata, in duplicem cuspidem obtusam exhibat. Hepar ejus, humani figuram referens, binos in majores, totidemque minores lobos dividebatur; quorum lobulorum maximus, ad renem usque dextrum pertingens, dimidium obtegebat; alter vero medium spinæ occupabat. Duos præter ea ramos lymphaticos, in parte hepatis pulli concava, unius lineæ latos, observavimus, qui valvularum nodis frequentissimis confiti, venæ portæ trunco, in superiore ventriculi orificio, tamquam globuli rosarii, seu precariæ corollæ neciebantur. Hepatis substantiam glandulæ plures, aliæ granis cannabinis minores, aliæ majores, con-

constituebant. Rubri debilissimi erant coloris, & crenam aliquam rubram sanguinem, dum comprimebantur, emittentem, ostendebant in medio, Concavæ partis glandulæ, illas, quas in gibbosa observavimus, multa magnitudine superabant.

Malpighius, Medicus *Meissinensis*, quodvis parenchymum glandulis constare perhibet, nec tamen addit, quam ratione detegere obtigit, quod hepatis substantia, contigua quæ videtur & homogenea, glandulis componatur; nec earum magnitudine distincte determinat. Uvis racemi easdem similes esse pronuntiat, nec tamen addit utrum figura, an magnitudine. Hexagonas item in hepate felis, & in quovis alio differentes esse addit. Alia autem in gazella, magis conspicuæ erant glandulæ, quam in alia, alius quidquod parenchymum videbatur contiguum; cujus diversitatis rationem forsan in aliquo alio morbo quærendam esse judicamus; etenim vigente animale ac sano, spongiosæ, multo abundant sanguine, nec inter se distincte videntur. Morbo autem quovis indurescentes, & minorem sanguinis quantitatem recipientes, faciliores suo colore discernuntur, quem quidem magis albidum pars glandulosa, rubicundior vero pars glandulis intermedia exhibet. Accedit insuper, pro confirmanda *Malpighii* sententia, & figura glandularum regularis hexagona, & crenæ in medio conspicuæ; hæc enim satis adperite loquebantur, quod nulla concretionem schirrosa seu fortuito in globulos istos abierit hepatis substantia, quales in oleo congelato observabis, sed, quod quævis glandula, licet turgescens, quam natura habebat, figuram suam conservaverit.

Lien, pro figura sua ovalis, tenuissimus, totus fere parti sinistræ ventriculi adglutinatus, nec, nisi 4. saltem digiti transversis, in parte anteriore, ab eodem separatus erat; ita, ut vas quod breve dicunt, & ventriculum plerumque lieni jungit, sub membranis viscerum amborum latebat. Omnium vero lien, superius violaceum, inferius cæruleum colorem, punctaque albida frequentia, sibi suprasparsa ostendebat, quæ nisi figuram illorum consideraveris irregularem, glandulas crederes, hepaticis similes.

Gazella cæterum, ruminantibus adnumeranda, binis gaudet ventriculis, constrictione intermedia separatis. Magis tamen hi gazellæ ventriculi bini, quam quatuor, reliquorum, a se invicem distincti videntur. Non solum enim membranis, ac constrictionibus solitis, sed & valvula quadam dividebantur, & quibus constabant membranæ, illæ omnes figuras diversas, substantiasque particulares, quibus quatuor gaudent aliorum, exhibuere. Primus nimirum, maximus, amplior erat in summitate, in imo autem strictiorem figuram profitebatur. Binas præterea in eodem deteximus membranas, sibi superjacentes, quibus alias primus & secundus, seu *Koilia* & *Kekryphalos* induuntur. Harum exterior, superficiem internam constituens, & primo, qui *Aristoteli*: *Κοιλία μεγάλη* audit, propria, innumeris constabat ex particulis, verrucas repræsentantibus, & triplo longioribus, quam crassis; nec tamen acum crassitie sua superabant. Membranarum altera, huic inferior, & secundo ventriculo, quod reticulum Latini, & *Κεκύρφαλον* *Aristoteles* dicit, propria est. Reticuli nomen ab eminentiis suis accepisse videtur, & Gallicum ventriculi secundi nomen, quo *bonnet*, seu mitra, adpellatur, ex similitudine mitræ istius reticularis, oriundum, qua olim capillos suos coercabant mulieres. Hunc igitur ventriculum unum saltem dicimus, siquidem

per omnem ejus capacitatem binæ ejus membranæ extensæ erant ; ast duplex dici posset , siquidem pars ejus superior , inferiori amplior , exigua quadam constrictione ab hacce separabatur . Ubi autem Pylori in modum contrahebatur , superiore scilicet parte sua dextra , foramen aliquod deteximus , quo secundo ingressus patebat , illudque membrana quadam , seu valvula , sacci instar , obtectum , ne , quod ventriculum primum intraverit , iterum ex illo exire possit atque recedere . Hic autem ventriculus secundus ab initio suo ad medium , tertio bovis & ovium ventriculo , Omasum , quem dicunt , similis erat . Omasum ^{Exivos} dicit *Aristoteles* , Galli : *Millet* , siquidem foliis plenus est ordine dispositis , & in extremitatibus suis , eminentiis quibusdam Milii , Gallice : *Millet* granis , similibus ; quæ asperiores visæ videntur illis , a quibus Græcum nomen : *Echinos* , quod echinum significat , accepit . Istæ autem eminentiæ sensim imminutæ , in medio tandem prorsus evanescebant . Pars itaque secundi ventriculi prior , rubro-violaceum exhibendo colorem , a primo ventriculo , albido differebat . Altera tandem pars ventriculi secundi , priori amplior , quarto ruminantium ventriculo , seu Latinorum : Obomaso , respondebat ; quem *Aristoteles* : *ὄνυστον* & Galli : *Caillette* vocant , siquidem recipiendo inservit coagulo , ad coagulandum lac (Gallice : *Cailler*) a nonnullis adhibito . Nec non ille folia quædam , sed lævia ostendebat . Et ab initio , sub priori parte secundi reflexus , sacculum constituebat amplissimum , ast finem versus elevatus atque constrictus pylorum efformabat . Et hæc quidem ventriculorum in fœmellis erat constructio . Masculi autem primus , nulla in imo gaudebat cuspide , nec binarum ejus membranarum inferior , plicaturam , reticulo similem , nec valvulam ab initio secundi , sed gibbum quemdam , quo fœmellæ carebant , ostendebat .

Quod vero intestinorum in fœmellis dispositionem adtinet : Jejunum & Ileum , variis minimisque cellulis replicata , pro longitudine Colo adhærebant , quod ligaminis loco , ad retinendas plicaturas inserviebat . Colon cellulis carebat . Diametrum intestinorum exilium 4. coli autem 6. linearum esse deteximus . Masculo tandem quæ erant intestinorum alia , multas in cellulas , ut colon humanum ; alia autem tubarum instar , ad longum complicata erant , quavis plicatura , 4. circiter digitos explente . Sic & venarum mesaraicarum rami crassissimi , ope plurimorum in quos dividebantur , ramusculorum , colo neciebantur ; imo procurrens ramus quisque major , denuo alios ramusculos intestinis gracilibus distribuebat . Cæcum 7. digitos longitudine , & 1. digitum , crassitie , explebat . Renum , fere rotundorum dexter , sub hepatis lobo minori , sinister sub cuspide ventriculi , situs adparebat . Masculi autem sinister sub aorta , & dexter , 2. digitis superior erat sinistro . Sub initium arteriæ spermaticæ masculi , corpus aliquod glandulosum , & venæ cavæ trunco superjacens vidimus , quod arteriæ hujus cervicali cedebat . Matrix autem pro brutorum more , in bina cornua abiens , interiore cujusvis cornu parte , 7. ad 8. eminentias seu verrucas , & in orificio interno , carunculam quamdam , qua obtegebatur , commonstrabat . Duo præter ea aderant vasa majora ad ubera proficiscentia . Vena scilicet major , recta ad ubera tendens , nec decrecente crassitudine , nec in ramusculos abiens terminabatur ; arteria autem ad sacculum uberi proximum profecta , in 6. ad 7. ramificationes dividebatur .

Pulmoni quatuor erant lobi ex dextra, & bini ex parte sinistra. Omnes autem in gazella una, & invicem, & costis ac diaphragmati cohærebant, cui adeo fortiter adglutinatum erat hepar, ut parenchymum ejus disrumpi potius quam avelli posset. Vena, quam Azigos dicunt, cavæ crassitie æquiparabat. Cor longum in omnibus ac cuspidatum, in maxima ex gazellis $4\frac{1}{2}$. digitorum longum, $2\frac{1}{2}$. latum vidimus. Cordis ventriculi in illa, quam gazelli icu mortuam esse supra diximus, corpore quodam alieno, a substantia & vasorum separato, & carni duræ ac solidæ simili, erant oppleti. Duorum ligamentorum ope pericardium, diaphragmati & sterni immediate necëbatur. Cordis basis cartilaginem xiphoidem respiciebat. Cerebrum paucis anfractibus confutum, falcis in regione leviter excavatum in bina dividebatur. Ventriculorum superiores bini, Septi Lucidi in parte anteriore, foramine quodam $\frac{2}{3}$. lineæ diametri, invicem sibi patebant. Oculi globulum 1. digiti diametro, palpebra obtegebat interna; cornea ejus ovi formam effingebat, & uvæ tapes matris perlarum viridis colorem imitando, retinam commonstrabat, ramo venæ cujusdam ramificatæ, per transversum dissectam, sanguis vero nigridus omnia explebat. Et ramus, acus crassitiem exæquans, retinæ soliditatem ingrediebatur.

Hactenus Acta Academiæ. Quibus pace tua L. B. ea subnectimus, quæ de modo gazellas nutriendi in *Calendario Villicorum*, auctore Cel. Bradley, præcepta legimus.

Gazellas, inquit, Angliæ in oris degentes, caprarum more suos edere foetus, & diutius utero gessisse vidi. Imo divæ Annæ, Reginae, temporibus gazellum atque gazellam, in Anglia detentos, duos foetus generasse ac effudisse memini. Annum gazella ista agebat primum, alias enim 4. foetus simul utero gerentem vidi aliam. Differunt autem gazellæ cornua a caprinis, in eo, quod recta sint gazellarum, teretia autem caprina. Optandum foret, ut de propagandis in Anglia gazellis, serio cogitarent. Regiones autem calidæ magis conveniunt ipsis quam frigidiores; & matribus robustiores evaderent catuli, primis secundi, secundis tertii, & vix peracta sexta generatione, omnem cœli nostri qualitatem induerent animalia hæcce aliena. Accedunt cogitationi ea, quæ a Cel. du Bois, circa plantas exoticas alio cœlo adcommoandas relata, teneo. Hic enim diutiori experientia edoctus observat, quod plantæ omnis exoticæ in Angliam deportatæ semina, plantas exhibeant, matre robustiores, iterumque harum semina de novo fortiores, usque dum regionis cœlo sensim adsuetæ, nihil amplius habent, quod ex ejus inclementia timeant. Eandem & animalium exoticorum rationem esse credimus, dummodo calidissimas regiones si patriam habuerint, ab aeris nostri injuria tuta, & frigoris tempore, succulento nutrimento refecta, studiosius ab initio conserventur; Majoribus viribus subsequentes generatione gaudebunt, & sexta peracta vel septima, perferendi penitus cœli nostratis consuetudinem adeptæ, patriam sibi habebunt Angliam. Variæ interim gazellarum sunt species, quas summis palati deliciis cedere, imo damas saporis antœnitate superare dicunt, venantes. Nec gazella, damæ instar, cornua gerit ramosa atque proclivia. Imo eadem per omnem vitam conservat gazella, dama autem quotannis sua deiicit. Damas Veneris æstus Augusto incedit, & catuli earum subsequente Majo nascuntur; diutius ergo easdem, quam gazella & capra, utero gerere constat.

Mihi interim, sic alio loco Vir Cel., tanta & figuræ, & carnis, & pili, & cornuum, gazellæ & capræ similitudo visa est, ut eandem & nutrimenti & mediorum speciem, utrique convenientem esse habeam. Gazella ægrotans, tabaci foliis sanatur. Quidni & capra? Instituas experimentum, & epidemico caprarum morbo non solum venienti succurri, sed etiam ingravescentem præscindi posse spondeo.

Quum itaque, teste Cel. *Bradley*, vel Angliæ coelum nutriendis sufficiat gazellis; potiori nos jure, de meridionalibus Galliæ nostræ regionibus, idem adferere possumus. Italorum principes, delectationis ergo, gazellas Africanas, nutrire, scribit *Brassavola*, testis oculatus. Et in *Singularibus* suis refert *Belonius*, quod Cairi in castello gazellas viderit cicuratas, quas in desertis sterilibus & arenosis captas esse dicebant; anteriores autem gazellæ pedes, leporis instar, breviores esse posterioribus; idem ille subjungit; & alacerrimo cursu montes eam emetiri, & faciliorem adscendere, quam descendere, & strenuam campos apertos transire; rectis, ut cervus, auribus, & capræ vocem balando imitari, at barba carere; & masculi cornua fœmellæ cornibus majora esse, ac fere recta, cuspide nimirum paullulum adunca, & damæ cornibus longiora, nec non lunæ instar falcata.

Et hic quidem loci subnectendum esse judicamus, quod circa determinandam animalis Moschiferi speciem, in diversissima abeant Physici; Succedat igitur, quam in *Actis Regiæ Scientiarum Academiæ Anni 1731. pag. 443.* legimus, *Descriptio Anatomica, Animalis quod Moschum dicunt, Auctore Cel. de la Peyronnie.*

Moschi nomine animal venit, cujus descriptioni adcingor. Organo idem gaudet singulari, quo liquorem contineri novimus spissum, oleosum ac fragrantem, qui Moschi nobis nomine venit. Quum igitur in partibus animalis omnibus nihil singularis detexerim, huic præsertim organo, quo muscus continetur, disquirendo inhæreo. Quantum vero studii & diligentia in exploranda patria ejus adhibuerim; conjecturæ saltem locus superest, quod ex Senogallia adportatum regis ferarium intraverit, ubi carne cruda sibi objecta voracissimeque arrepta, nutriebatur. Nec tamen conciliandis inhærebo sententiis de origine vocabuli, seu nominis; nec constituendo illi præsertim animali, cui Moschi, seu Animalis Moschiferi nomen, potiori jure tribuatur. Arabibus etenim hoc nomine venire novimus gazellam, seu capræ silvestris speciem, in qua describenda multus est inter alios, *Lucas Schrockius, Academiæ Germanicæ Curiosorum Naturæ, Sodalis.* Moschus autem nullam, nec gazellæ istius, nec glirium moschiferorum Canadiensium similitudinem gerit. Huic potius mustelæ speciei, quam Galli: *genette* dicunt, accedit. Sic *Belonii* in observationibus, unam ex hisce delineatam videbis, eamque magna similitudine, Moschum nostrum referentem. Nec non *Francisci Hernandès in historia Novæ Hispaniæ* Damæ Americanæ figuram, quodammodo Moscho nostro accedentem reperies. Moschi corpus omnibus hisce exilius est atque agilius, cauda gaudet subalbida, & octo annulis distincta nigris, parallelis, & 3. fere linearum latis, quales felis odorariæ in cauda haud observabis. Pilo obtegitur leni & ubiviseadem longitudine; at felis dorsum omne ad caudam, pilo gaudet longiori, quam aliis in regionibus corporis. Moschus nigras cinereasque, felis autem varias exhibebat maculas & zonarum instar corpori obductas, moschi maculæ autem corporis ad longitudinem

nem parallelæ procurentes, ab humeris ad inferiorem corporis partem tendebant. Ab extremitate rostri ad caudæ originem 1. pedis & 8. digitorum longitudinem profitebatur; caudam vero 15. digitorum longam. Rostrum ejus cuspidatum, & barbis instructum pelle obtegebatur cinerea; & aures præbebat, felis auribus planiores; & hisce inferiorem armillam nigram, duas in super zonas ex utrovis latere nigras, & ex secunda armilla egredientes, in humeris autem terminatas. Nigris tandem gaudebat ungulis, quarum anteriores 4. exhibebant digitos breves, minus tamen cuspidatos ac debiliores quam felum; 5. tum in super digitum ungue carentem, nec terram pertingentem; internam pedum partem minorem ac molliori carne instructam quam in felibus, vidimus; pedibus posterioribus, omnibus quinque suis ungulis terram pertingentibus; & linguæ papillis, nec duris, nec asperis, ut felis in lingua, obversis instructus erat. Nec diutior inhærebo describendis partibus Moschi externis, has enim cognituro, sola imaginis inspectio sufficiet. Maxima cæterum differentia felis odorariæ ab Moscho, non ex partibus utriusque externis, sed a diversitate organi, cujusvis unguentum seu materiam fragrantem, subministrantis, petenda est. Et quidem in describendo felis istius organo diversissimos habemus Viros Celeb. *Perrault* & *Morand*. Imo Moschi nostri organon alia adhuc ratione constructum esse docebimus.

Hic multus est *Cel. de la Peyronnie* in describendis partibus, præparando Musco inservientibus, quæ si placet, ex ipso fonte haurias licet.

Italicum Moschi seu gazellæ nomen est: *Gazzella*, Germanicum: *Bisam-Thier*, seu: *Animal Moschi*, Anglicum: *Antilope*, seu *Musk-Animal*. Varii sunt, qui nomen ejus Arabicum: *Algazel*, Latino, Gallico & Italico originem dedisse censent. Gallica vox autem, *Musc* ex latina *Moschus*, vel *Muschus*; hæc tandem ex Araborum: *Misch*, *Mosch*, seu *Musch* descendere videtur.

Musculus autem, quo solo ex partibus gazellæ utitur Medicina, non est nisi substantia crassa, adipea & oleosa, cruori similis, coloris rubicundi obscurioris, saporis acri atque amari, odorisque gratissimi, quam in sacculis umbilico Moschi vicinis reperimus. Vesicis plerumque adservatus emitur, & illum feligas, qui bene exsiccatus, vesica pilis rarioribus confita includitur, quo plus enim fuerit pilorum, eo minus moschi habebis. Quem ex Tunquinesi regione provenientem, ex pilo fulvo cognoscimus, illi merito anteferendus est, quem Bengala mittit, quemque ex pilo vesicæ albido dijudicabis. Tanti interim quum veniat, sæpissime adulterinum pro vero venditant; & sanguinem, pilum, aliasque animalis partes admiscent. Ast facilis fraus subolebit artis perito. Candenti enim prunæ suprasparsus, verus dum sit, omnis consumetur; si adulterinus, aliquam sui partem relinquet.

Cæterum quum omnibus fere sui partibus sulphure ac sale volatili constet; naturæ est calidæ, desiccantis, adtenuantis, discutientis, cordialis, alexipharmacæ & cephalicæ. Hinc & contra palpitationes, aliasque cordis adfectiones, pro virtute, qua gaudet, spiritus vitales corroborandi & reanimandi adhibetur. Imo eadem subest ratio, quod in doloribus capitis ac nervorum ex humoribus crassis seu frigore provenientibus, & colicæ torminibus, frequentissimo usui cedat. Pro dosi autem gr. ij. ad gr. viij. venire solent. Hanc igitur probe contritam duplo seu triplo majori sacchari

chari candidi quantitati admisceas ; vel spiritus vini ope tincturam ejus extrahas , sic enim & acutiorem præbebit odorem & majorem virtutem . Tincturæ autem hujus viij. ad xv. guttas , potionibus cephalicis seu cordialibus admisceto . Quatuor tandem Elæosacchari partibus æqualibus quintam musci addendo ; habebis Elæosaccharum Moschatum , quibusvis compositionibus , sive solidæ sint , sive liquidæ , addendum .

Quum autem , qui delicatioribus spiritibus animalibus , & irritatu facili gaudent nervorum textura , ut foeminæ hystericae , & qui ad studia animum adplicant , quum , inquam , nec musci odorem nec alia fragrantia perferre possint ; muscum seu alia ejusmodi recipientibus pillularum sub forma , illa exhibeas , ne odore mediorum nimio adficiantur .

Anni sunt , quum qui Chinam & Tonquinesium regionem visitaverant , magnum atque frequentem ibi musci usum esse recenserent contra epilepsiam , maniam , aliasque nervei generis adfectiones & convulsiones . Angliæ autem & Galliæ in oris , eidem medio , nondum exoptatus respondit effectus . Novis igitur ac reiteratis experimentis opus est . Cinnabaro scilicet admixtus gr. viij. ad xv. quantitate præscribitur . Varios nosmetipsi ægrotantes , hoc medicamine , satis bene sanatos fuisse vidimus ; num vero musco , an aliis , quibus admixtus erat , salus recuperata tribuenda sit , dubitamus . Tempori & repetitis experimentis judicium relictum sit .

Externum ejus usum quod adtinet , pro dissipandis oculorum ungulis , & desiccandis eorum humoribus adhibetur . Imo surditati , aliquot musci granis , gossypio infusis , dum auribus inditur , mederi quærunt .

Muscum vero confectionem hyacinthi , & alkermis , imo pastillos odoriferos & pulverem quem lætificantem dicunt , Pharmacopœiæ Parisiensis ingredi novimus . Et tincturam ejus , aquæ mille florum , balsamo apoplectico , & balsamo *Leituriano* , officinæ ejusdem admisceri solent .

℞. Succi menthæ depurati ℥jv.

Aquæ absinthii compositæ

Aquæ cinnamomi fortis ana ℥j.

Castorei pulverisati ℥j.

Moschi gr. vj.

Sacchari candidi pulver. ℥ss.

M. f. julepus , p. cochlearia sumendus , contra cardialgiam , vomitum , atque singultum .

℞. Aq. cerasor. nigror. ℥ijss.

pæon. compos. ℥ss.

Spirit. lavand. gutt. x.

Moschi gr. vj.

Perlar. præp. ℥j.

Sacchar. cand. ℥jss.

M. f. julepus , contra tussim convulsivam infantum , cujus dosis sint ℥ij. ad ℥iij. ter , in die , recipienda .

℞. Moschi gr. viij.

Sanguin. dracon.

Sacchar. cand. in pulv. ana ℥j.

M. sub. c. fyr. rosar. sic. f. boli iij. contra vomitum , lipothymiam , & singultum , per 4. dies subsequentes , mane , jejuno stomacho , cum pane oblato , consumendi .

℞. Rad.

℞. Rad. irid. flor. ʒjss.

Moschi gr. iij.

Sacchar. cand. ʒvj.

M. f. pulvis, contra asthma, tussim, pulmonum morbos, & halitum foetentem; ter, de die, quantum cultri apex capit, præbeatur.

Capra sive Gazella Bezoardica Orientalis. Offic. Dal. Pharm. 438. *Capricerva Orientalis*, e qua *Lapis Bezoar Orientalis*, Schrod. 277. *Hircus Bezoarticus*. Charl. Exerc. 11. *Capra*, sive *Hircus Bezoarticus*. Aldrov. de Quadr. Bisulc 455. *Capra*, sive *Hircus Bezoarticus*, vel potius *Pasaharticus*. Jonst. de Quadr. 56. *Gazella Indica* cornibus rectis longissimis nigris, prope caput tantum annulatis, Raii Syn. Anim. Quadr. 79. *Caper Bezoarticus*, *Animal Bezoarticum Orientale*. Quorumd.

Magnitudine sua, ut *Raius* testatur, *Gazella Bezoardica* damam refert, & pilo gaudet cinereo, cauda autem 1. pedis longa, longissimisque pilis obsita; cornubus præter ea 3. pedum longis, rectis, nigridis, prope caput saltem annulatis, cæterum lævis. *Garcias du Jardin*, Medici qui officio penes Prætorem Lusitanorum Goensem fungebatur, in *História Pharmacoporum & Aromatum Orientalium*, succincte tantum innuit: apud Persas hircum quemdam, Persarum idiomate *Pazan* dictum, rubri coloris & magnitudinis mediæ reperiri; ast *Jacobus Bontius* in *Annotationibus* ad eundem, sequentem hirci Bezoartici addit descriptionem: a nostratibus non nisi cornibus longioribus differt ac rectis; interdum & pilo, tigris instar, variegato gaudent, ut hi, quos Bataviæ in castello observare licet. Multo autem minorem, quam vulgo creditur, virtutem, lapidi Bezoar inesse, mea experientia habeo. Cæterum tantam illi molestiam hircis facessunt & capris, quam hominibus calculi vesicæ ac renum. Et horum calculorum ex magnitudine vel parvitate, copia item vel exiguitate, vel lentiolem vel alacriorem animalium incessum pendere, res est Persarum & Armeniæ mercatoribus notissima.

Bontio igitur, optimæ notæ auctori, eo majorem hoc loco fidem adhibere juris est, siquidem suis oculis quæ scripsit, viderat. Hinc errare judicamus *Colinum*, Pharmacopolam Lugdunensem, qui in *Annotationibus* ad *du Jardin* ita: provenit autem lapis Bezoar ex animali, magnitudine sua & agilitate cervum æquiparante, ast cornibus in dorsum recurvatis, instructo; cæterum capreolo simili, ab incolis: *Capra montium* dicto, sed potius *Capricerva*, dicendo; pilo gaudet brevi cinereo & ferrugineo, & Indiam, citra Gangem, montesque Chinæ vicinos, patriam colit.

Lemery gazellam nostram agilissimam, ex rupe in rupem profilire, & captu periculosissimam, Indarum persequutione pressam, venantes sæpius enecare recenset. Caput ejus hircino simile esse subnectit, & cornua nigra, dorsum fere pertingentia, & corpus pilo cinereo in ferrugineum vergente, caprino breviori & cervino accedente obductum; & crura fortissima, pedes denique cervorum instar, esse bisulcos.

Olim vero expenso auro emebatur Bezoar; cujus naturam & sedem investigandi studio quum desudaverit Cel. *Kempfer*, hunc potius recensentem audiamus:

Pro patria, sic ille, in *Amœnitatibus Exoticis*, Bezoartis Orientalis, Laar, Persarum provinciam, aliasque regiones Persicas habeto. Provenit autem
ex

ex animale quodam, quod capræ silvestris species est, ab incolis: *Pasæn*, a nostratibus autem: *Capricerva*, dicta. Pilis idem tegitur cinereo-ferrugineis, & magnitudine sua ac barba, domesticæ capræ respondet. Fœmellæ fere nullis, hircus vero longis gaudet cornibus, quorum ex annulis, numquam fere XII. numerum excedentibus, annorum quantitatem cognoscēs. Cæterum & colore, & forma, & agilitate cervum æquiparat. Timiditatis ergo inaccessibiles montium occupat recessus, nec umquam fere ad planities descendit. Nec etiam cujusvis lapidis Bezoar eadem est virtus, eadem qualitas. Optimus erit ille, quem ex animale receperis hos montes inhabitante, qui herbis abundant resinosis ac alexipharmacis. Majores item ac frequentiores masculus præ fœmella lapides tibi præbebit. Tunc autem lapidem ipsis inesse credas, quum ætate provecti, & macilenti, collo item longiore instructi, lubentes agmen ducunt, & insidias reliquis studiosiores evitant. Alii etiam supercilia animantis nigra, certissimo, lapidis quem portat, documento cedere dicunt. Vix enecati igitur linguam dispiciunt, quæ si solito fuerit rudior, præsentis lapidis indicio ducti, lapidem in sede sua quærunt, pyloro scilicet, seu fundo ventriculi quartimuscoso, ubi, num excrescat, num aliunde devehatur, ignotum. Lapidem nonnunquam, pylori plicaturis haud satis complexum, vel eiici cum excrementis, vel dissolvi penitus censent, diutina in primis alimentorum inopia. Hic *Celeb. Jager*, Orientalium linguarum peritissimi observationi, locum faciam, qui dum Golcondæ in regno commorabatur, binis in capris Bezoarticis viventibus palpando, duos in altera, in altera autem 5. ad 6. lapides se detexisse, adfirmat. Viventes idem illos conservaturus, stabulo recondidit, ast omni prorsus nutrimento abstinentes, omnem perdidere carnem. Tunc enecari iussit, carne fere omni exutos, nec ulla amplius lapidum vestigia detexit, qui utrum ab intestinis dissoluti, an alia quadam ratione consumti fuerint, ignotum, nec tamen ne in excrementis quidem, ulla eorum vestigia aderant. Facilis autem est, censeo, lapidum in ventre animalis viventis, detentorum solutio, quippe qui, duritie ista calculosa destituti, vitellum aqua elixum, consistentia sua, referunt. Hinc etiam usui venisse censemus, quod recentem ex corpore animalis protractum lapidem, ne vel incuria frangatur, vel manuum contrectatione splendorem amittat, ore diu retineant, & adquisita duritie, gossypio involvant. Originem vero suam debere videtur materiæ resinosæ & glutinosæ, quæ herbis, animalis nutrimento, infuit. Hæc scilicet primo ventriculorum parietibus adhæret, tum vero, concoctione alimentorum peracta, ad pylorum provecta, vel calculum, vel lanæ, seu straminis festucam, vel quidquid obvenierit, circumdat; & ex hoc primo strato, nucleum circumdante, omnis pendet lapidis forma; post cavitate, cui inest, leviter compressa, superficie lævi obducitur, plurimumque conglobata, operante scilicet agitati intestini motu pristaltico, temporis tractu autem, accedentibus aliis stratis, sensim sensimque adaugetur. Rariores vero uno plures, & hos quidem exiguos, singulis in animantibus reperiri edoceor. Præstantissimos cæterum habent subvirides seu cœruleos, & rotundos, his inferiorem locum tenere censentur ovaes, ultimum cylindrici. Rariores sunt apud Persas, quam Europam colentes, vix enim Persarum quemquam nobiliorem reperi, qui non lapidum istorum aliquem inter rariora sua referret atque adservaret. Pro-

magnitudine ejus & pondere pretium crescit, illudque adeo illimitatum, ut numquam in Officinis Europæorum, lapidem Bezoar genuinum proflare censeam. Spurium etenim & alia silvestria Indica exhibent, ut caprarum, *Ahu* dictarum species, barba sua, & cornibus ramosis a cervo quæ differt, imo & simiæ. Quas autem Bataviæ in castello viderat *Bontius*, *Ahu* Capras, nec Bezoarticas fuisse memento.

En! quæ circa capras Bezoarticas Orientales, ex *Kæmpfero* hausta, brevissimi diximus. Breviores erimus in describendis Capricervis Occidentilibus, quas quidem nec vidisse, nec ab alio quodam anatomice descripta reperisse contigit. Eandem veniam dabis L. B., quum & aliorum descriptiones desiderabis; quorum quidem anatomiam detegere non licuit, quantumque fuerit & nostra disquirendi industria; & liberalitas literaria Viri Illustris *Falconet*, quem literarum studia Mæcenatem, & qui his delectantur, præstantissimum exemplar colunt.

Capricerva Occidentalis. Offic. Schrod. 278. *Cervus minor Americanus Bezoarticus*, Dal. Pharm. 439. *Mazama seu Cervus*, Hern. 324. *Cuguaçu Etè*, & *Cuguaçu-Aparà Brasiliensis*. Pison. Hist. Nat. 97. *Capreolus marinus* *Jonstonio*. Raii Syn. Anim. Quadr. 90. *Caprea Brasiliensis*; *Capricervus Americanus sive Occidentalis*. Nonnull.

Capricerva dicitur, quæ & cervi & capri ex figura participare videtur, quamque *Guilielmi Pisonis in historia naturali*, sequentibus descriptam reperies: Indigenas quasdam capras alit Brasilia, nec ab Europæis admodum differentes. Quarum quæ cornibus gaudent, *Cuguaçu-Etè*, quæ illis destituuntur autem, & minores, *Cuguaçu-Aparà* ab incolis vocari solent. Hæ pilum ostendunt splendentem, rasum, fulvo item & albo, dum juniores sunt variegatum, accedentibus enim annis, maculæ istæ recedunt. Binos in quovis pede, ungues, binosque alios minores, sibi suprapositos gerunt; caudam vero brevem; oculos nigros magnosque, & nares hiantes, & cornua haud ita magna, triplicia, pilosa, cinerea & quotannis decidencia. Castitate pariter ac fœcunditate Europæorum capris accedunt, etenim non nisi determinato anni tempore, ineunte nimirum mense pluvioso, qui verè respondet, fœmellæ recipiunt masculos; effluxo autem ardore Venereo, timidæ evadere solent. In cornibus itaque matricis conceptum, sex mensibus portant fœtum; Europæ autem in regionibus frigidioribus, ferotinae esse solent. Faciles interim cicurantur, & herbis, fructibus, foliisque vescentes ruminantur. Hinc eadem ipsis est intestinorum conformatio, quæ ruminantibus, & cornua gerentibus, & ex altera maxilla dentibus destitutis. Quum igitur antiquiorum testimonio constet, varias & aves, & animalia terrestria, cervos in primis ac capreolos, felle carere, quid mirum? quod studiose disquisitis & intestinis & hepate capricervæ, nullum tamen fel ejus reperiisse contigerit. Illud scilicet vel exiguitatis ergo, oculis percipi nequire, vel aliam quamdam materiam, explendo felli sufficientem, per aliam corporis partem diffusam esse censeo; fellis enim animalis in corpore tanta est necessitas, ut vel in capite quorundam piscium idem reponere, quam adeo præstanti viscere eos prorsus carere voluerit, provida natura. Imo *Aristoteles*, aves quidem vesica urinæ destitutas, felle tamen instructas esse, refert. Caro autem earum, quomodocumque præparata, saporem nostratium similem, & nutrimentum præstantissimum exhibet.

bet. At Medicinæ præsertim excellentius quoddam medium subministrat. Bezoar nimirum Occidentale, quod licet minoris habeatur quam Orientale, ab incolis Brasiliæ magni æstimatur contra venenum. At ipsa Capricerva difficilior lapis ejus Bezoar reperitur, ictu enim quum sese percussus sentiat, præcipi fuga salutem quærendo, illum ipsum evomit; quod nisi adcurate observaverit venator, omnis spes lapidem reperiendi excidit; id quod & mea, & aliorum experientia teneo.

Et his quidem ea absolvuntur, quæ de capricervis Brasiliensibus refert *Pison*. Circa quæ pauca adhuc monenda supersunt. *Raius* etenim dubium se esse confitetur, num diversam speciem utraque constituat; & ultimo recensitam, cui *Marcgrave*, seu potius: *Pison* cornua tribuit, pro masculo prioris habet. Faciles *Raii* sententiam amplecteremur, at dubium remanet, dum scilicet *Pison Cuguaçu-Aparà*, cornibus instructum, minorem, *Cuguaçu-Etè* autem cornibus destitutum majorem esse refert; cujus contrarium apud nos observamus. Virorum in Physicis magnorum esto: ferre judicium.

En, quæ Virum *Pierre Alonso d' Ouaglie* sequutus *Georgius Marcgrave*, in *Historia naturali Chiliensi* addit: Chilienses capricervæ, ovicamelis Peruvien-sibus, & figura corporis, & velocitate multum accedunt, nec nisi colore suo ruberrimo, & ferocitate, quæ quo numquam cicurari possint, obstat, differunt. Majorum etenim cursum nullus umquam equus exæquabit. Junio-rum caro recens, gratissimo, Antiquiorum autem sale conspersa, optimo nutrimento cedit. Stomachi sui in fundo lapidem generant Bezoar, quem contra venenum, & febres malignas, aliosque morbos, magni æstimari vi-demus. Succus autem herbarum quibus nutriuntur, saluberrimarum, mate-riam lapidi subministrat, & adutorum in stomachis adeo magnos inter-dum repertos esse novi, ut quem Italiam ipse deportavi 32. uncias, pon-dere suo, expleret. Jam igitur, quibus in locis frequentiores videbis ser-pentes, aliæque venenosa, ibi & copiosiores reperies lapides. Hinc inde scilicet cursitantes capricervæ, repetitis serpentum moribus ictæ, statim sibi salutiferas accipiunt herbas. Sic v. g. *Cujo*, provinciae viperis abun-dantissimæ, maximam Bezoaris quantitatem tribuimus. Chili autem & ve-nenosorum animalium, Bezoartis copia, eget.

Cæterum nec a Græcis neque Latinis auctoribus ullam Bezoardis men-tionem factam esse recordamur, & omnia, quæ vel de animali, vel de la-pide ejus habemus, Arabibus & recentioribus tribuenda sunt. *Gaspard Bauhin*, in tractatu suo circa Bezoar, lapidem, eruditione multa repleto, ab Arabibus & *Serapione* in primis, Bezoar dici refert: *Hager Alzbesahar* i. e. lapis alexipharmacus, *Baldzahar* etiam seu *Bedezahar*, Persice autem *Pazar*, ex quo: *Bazar*, *Bezár*, *Bezaar*, *Bezahar*, *Bezoar*, *Belzaar*, *Belzoar*, *Pezar*, per corruptionem profluxisse vides.

Utraque autem capricervarum, nullas sui partes, nisi lapidem Bezoar, Medicinæ usibus subministrant; lapidem scilicet in stomacho seu felle va-riorum animalium Indicorum, ut hirci, simiæ, apri, capræque, repertum. Sale suo volatili alcalo-sulphureo seu oleoso, & corporis acida detergit, & transpirationem promovet, malignitati humorum obstat, vertiginem, & cordis palpitationem & vermes profligat. Gr. jv. ad gr. xvj. dosi vel nudus vel potioni convenienti admixtum, imo si Occidentali utaris, tertio majorem ejus dosin recipito. Nec alia ratione, nisi pulverisatione, usibus

tuis accommodetur, dummodo omnia, quæ forsan ipsi inhæserint aliena, ut straminis, ligni &c. portiunculas, studiose separaveris.

Multa tamen sunt, quibus dubiæ & incertæ redduntur qualitates Bezoartis. Etenim raro admodum genuinum accipies, siquidem, imitatu facillimus est, & tanti coemittitur, ut non solum Indas sed vel Europæos, incedat cupido, adulterinum venditandi pro vero. Tum nimii est pretii, quam ut tanta dosi præscribi possit, quanta pro explorandis sui qualitatibus requireretur. Etenim pro determinandis istis nullum aliud medium adest. Nam nec analysis ejus, nec formatio, imò quas ex sapore elicere velles, conjecturæ, pro formando judicio nobis sufficiunt.

Nobis igitur haud ita magnæ notæ medium pro Medicina videtur; quis enim medio fidem adhibebit, quod & facillime falsificatum, & rarius usibus sit accommodandum, & vix aliquibus cognitis ac certis gaudeat virtutibus? Imo quotquot in ejus disquisitione desudarunt Medici, nullas fere medicas virtutes in illo detexerunt. Quidquod *Hildanus, Cent. 6. Obser. 89.* usum Bezoardis variorum morborum, & in primis febris quartanæ causam esse pronuntiat. Quidni igitur ea præferamus, quæ & facilius comparantur, & certiores habent effectus, ut præparata ex cornu cervi, confectio nem Hyacinthi, Antimonium Diaphoreticum, & alia alexipharmaca. Genuino tamen lapidi Bezoar majorem fortassis virtutem inesse concedimus.

℞. Bezoar. orient.

Perlar. præp.

Ocul. canc.

Ambar. cand.

Corn. cerv. calcin.

Corall. rubr. ana ʒj.

Pulver. chelar. cancr. ʒvj.

M. f. pulvis absorbens, contra indigestiones ex acrimonia stomachi provenientes, cujus dosis sit gr. vj. ad ʒß.

C A S T O R.

Castor. Offic. Schrod. 279. Lemer. 201. Bossch. 376. Rondel. de Aquat. 236. Gesn. de Quadr. digit. 309. Aldrov. de Quadr. digit. 276. Jonst. de Quadr. 102. Charl. Exerc. 18. Dal. Pharm. 445. Fiber, Bellon. de Aquat. 30. Schvenckf. Quadr. Siles. 94. Fiber seu Castor Schonev. Ichth. 34. Castor five Fiber, Raii Syn. Anim. Quadr. 209. Castor cauda ovata plana, Linn. Syst. Nat. 39. Castor Canadensis. Ind. Med. XXX. Canis Ponticus seu fluvialis. Quorumd.

Amplissimam vero Castoris descriptionem Anatomicam alteram, Auctore Cel. *VVepfer D.* in *Germ. Ephem.* alteram in *Actis Regiæ Societatis Scientiarum* relatum legimus, quarum hanc Tibi L. descriptam exhibebimus:

Necessariam vero magis descriptionem castoris anatomicam judicavimus, quippe quam nec ab antiquiorum nec recentiorum quovis conditam fuisse novimus. Noster igitur in Bibliotheca Regia Examini Anatomico subjectus, patriam habebat Canadæ partem, S. Laurentii fluvio adjacentem; lutræ similis, ast major, 30. libras, pondere, explebat. Ab extremitate rostri ad apicem caudæ 3½. pedum, & ubi latissimus erat, 12. digi-

digitos adtingebat. Duplici obtegebatur pilo, & longitudine & colore inter se differente. Longissimus itaque $1\frac{1}{2}$. digiti longus, equinum crassitudine, colorem ferrugineum & splendentem, substantiam denique adeo solidam referebat, ut ne quidem Microscopii ope aliquam cavitatem detegere liceret. Brevior autem 1. digiti longus, & frequentior, & gracilior, imo pro mollitie sua, plumis vel tenuissimis erat æquiparandus. Duplicem vero pilum istum, quem in pluribus observabis, lutræ, castori, & apro, præ aliis necessarium credimus, hi enim quum cœno sese obvolvere solent, præter pilum, corporis tegumentum, adhuc alio egent, quo cœnum excipi, & ut ad pellem usque perveniat, impediri possit. Caput ejus totum $5\frac{1}{2}$. digitorum longitudinem, & in regione ossium, genas constituentium 5. digitorum latitudinem præ se ferebat. Cujus ergo ab *Herodoto* inter *Tetragonaprosapa* animalia relatus est. Aures commonstrabat lutræ similes, breves, foris multo pilo confitos, ast intus fere omni carentes. Arbores autem, pro conficiendis sibi cellulis corrodere dicitur, cujus dentes huic usui eximie inservire videbantur. Quatuor scilicet rostri in extremitate aderant incisorii, bini nimirum in maxilla utraque. Inferiores 1. circiter digiti, ast superiores, x. saltem linearum longi, illis intergerebantur, nec e contrario erant oppositi. Anterior rotundi, extremitate gaudebant acutissima, & colore intus albido, foris rubro subflavido; ubi maxillam egrediebantur 2. in extremitate autem 1. lineæ latitudinem ostendebant. Præter hos denique 16. molares, 8. scilicet in inferiore, totidemque in superiore maxilla, quaternos ex parte quavis, & more communi, sibi invicem oppositos vidimus. Oculos disquirendi locus non erat, hos enim vel glires vel alia effoderant.

Pedum conformatio singularis, pro amphibio illum destinatum esse, satis aperte loquebatur. Posteriores enim natatui magis, quam incessui inservire videbantur; & horum quinque digiti, membrana quadam, anserini pedis instar, cohærebant: Ast anteriores membrana ista destituti, pro manibus ejus, sciuri instar, cibos ori admoventis, cedebant. Etenim & digitorum conformatione, & situ, & palmæ figura, manus hominum accuratissime referebant; & *Matthiolus*, dum castoris & simiæ manus inter se differentes pronuntiat, castorem cum lutra confundere videtur, hujus enim & anteriores pedes & posteriores, pelle continentur. Quem tamen in errorem abduxisse censemus *Plinii* adsertum, quo castorem, cauda saltem excepta, lutræ dicit esse simillimum. Pedes igitur castoris anteriores a cubito ad extremitatem digiti maximi, $6\frac{1}{2}$. ab initio manus autem ad eandem digiti maximi extremitatem usque 3. digitis absolvebantur. Pedes autem posteriores 6. digitis ab extremitate tali ad digitorum secundum seu longissimum. Præter quinque digitos istos ungulis in extremitate munitos, in parte externa pedis cujusvis, foris intusque aliquod officulum aderat, quod eminentiæ ergo sextum habuisses digitum, nisi pedi fuisset connexum, quodque non nisi robori pedis & agilitati augescendæ destinatum videtur.

Cauda castoris reliquo corpori nullatenus similis piscium potius, quam terrestrium caudæ accedere videbatur. Hanc enim epidermis obtegebatur squamis quibusdam plerumque hexagonis, $1\frac{1}{2}$. linearum longis, & membrana instar crassis composita. Superiores interim ab inferioribus non nisi
pilis

pilis quibusdam , 2. linearum longis , & inter squamas inferiores prominentibus, distinguebantur. Coloris erant cinereo-ferruginei , ast epidermidis in juncturis, paullo obscurior videbatur. Quod si autem squamis eam exuere velis, subtractis iisdem, & imaginem seu formam earumdem carni impressam , & subjacentem illis observabis substantiam candidam , Vulpi Maris substantiæ simillimam . Sic & dissecta Castoris cauda , carnem ejus pinguißimam & piscibus conformem vidimus . Longitudine sua 11. & in origine non nisi 4. digitos latitudine adtingebat. Exinde autem , ad medium usque sensim adaucta 5. digitos profitebatur, post vero ad cuspidem usque ovalem, latitudine decreſcebat . In origine 2. digitis , in medio 1. in extremitate tandem vix $5\frac{1}{2}$. lineis crassa erat . Anus caudæ & ossi pubis intermedius , duobus digitis origini caudæ superior , ossi autem $3\frac{1}{2}$. digitis inferior , & figuræ ovalis , 9. linearum longus , & 7. latus erat . Pelle nigrida , pilisque carente , cingebatur . Anus autem haud spinteris ope, ut in reliquis, sed crenæ instar, constringebatur & dilatabatur. Eadem autem apertura & urinæ & stercori eiiciendo inserviebat , in illa enim non solum anus , five finis Recti desinebat , sed etiam paullo superius, in parte ejus anteriore, virgæ extremitas prominebat.

In partibus lateralibus foraminis hujusce communis duas cavitates exiguas observavimus , ex utraque parte alterutram ; his stylum immittere tentavimus, nec tamen ille ex interiore foraminis latere immissus ad latus externum prodiit . Duas autem eminentias per transversam pellem exteriorem deteximus, easque sacculos seu crumenas, Castorei receptacula esse cognovimus, deinde peculiari cum studio disquivimus. De quo varia sunt variorum adserta . Alii enim castoris testiculos Castorei pro sede habuerunt, & *Aelianus*, castorem a persecutione venatorum, testiculis morsicus abreptis, & venatoribus relictis , se liberare recenset . Alii autem castoreum sacculis quibusdam contineri censent. Nos rei studio incitati, castorem pelle exuimus, & statim eminentiarum in regionibus, quatuor sacculos, ossi pubis inferiores , vidimus . Medii duo reliquis magis prominebant, & cordis formam repræsentando , partem supremam 1. circiter digito sub pubis osse, latera autem in circulos extensa, & in parte superiore foraminis communis, coeuntia, præbebant. Ubi latissimi erant, bini 2. fere digitos , singuli item per totam longitudinem totidem digitos adæquabant . Colorem foris cinereum , variosque circulos albidos , radiorum instar obductos, profitebantur . Tunica exterior, plana, adeo erat pellucida, ut omnem suum colorem, a subjacente membrana mutuum accepisse videretur . Dissecto autem ex sacculis uno , interiorem ejus tunicam cineream reperivimus, nec rugosam; varias præterea in sacculo carnoſo plicaturas, eisque intermediis reliquias materiæ cinereæ, foetentis, ac adeo rugis coherentis, ut partem earum constituere videretur . Per utrumque sacculum, (mediante apertura 1. digiti, & quod excurrit inter se communicantem , nec nisi fundi ope separatum) rugæ istæ extendebantur. Binorum tandem priorum in imo, binos alios, unum ex parte utravis, invenimus, quorum singuli amygdali oblongi formam , & $2\frac{1}{2}$. digitos longitudine , 10. vero lineas, latitudine, explebant. Pars horum latissima, remotissimam foraminis communis extremitatem spectabat , & in partes illius laterales abibat ita , ut bini sacculi una cum foramine V, Romanorum valde dilatatum

constituerent, cujus in medio, ut supra dictum est, priores sacculi, cordis in forma, exsurgabant. Strictissime interim priores cum posterioribus, in foraminis regione cohærebant, & castoreum ipsum ex superioribus in inferiores delatum, in his demum perfectionis suæ gradum summum adtingere censemus. Structuræ autem erant diversissimæ. Inferiores enim glandulis quibusdam, ceu renes animalium juniorum, constare videbantur, quippe quorum in superficie varia observavimus corpuscula elevata atque rotunda, & magnitudine inter se dissimilia, quæ omnia membrana sacculorum exteriori, seu continuata muscutorum membrana comuni, obtegebantur. Ipsa tandem corpuscula carne constabant spongiosa & rubicunda, cavitate insuper notabili gaudebant; ita ut denuo alii sacculi viderentur, nullo tamen liquore repleti, nullam substantiam notatu dignam ostendebant. Sacculis itaque quorum superficiei partem corpuscula ista constituebant, liquorem inesse quum judicarem; alium illorum in basi aperiebamus, & liquor aliquis profluebat, odoris ingrati, flavidus ut color mellis, oleosus ut adeps liquefactus, & Terebenthini instar combustibilis, siquidem pruinis injectus in flammam abibat. Nec tamen compressione, in sacculos superiores vel foramen commune, ut recederet liquor, efficere potuimus. Evacuato tandem omni secundi sacculi liquore, tertium in imo ejus deteximus 14. lineis longum, 6. vero latum, liquore plenum, & membrana sacculi secundi arctissime cohærentem. Hic in cuspidem exibat, & in parte laterali aperturæ communis desinebat; nec ostium in illo deteximus, quo mediante in cavitates (de quibus, foramen describendo diximus) egeretur; nil enim ex eodem compressione elicere potuimus. In superficie ejus externa, corpuscula glandulosa, qualia in sacculo secundo, vidimus. Succum vero magis flavidum magis liquidum, magis exaltatum, odoris item diversi, vitello simillimum, & nisi colore debiliorem, continebat.

Et hic quidem, ea, quæ de Castoreo ex Canada ad nos nuperrime per scripta sunt, quamvis a re nostra aliena, subjungere liceat. Castores scilicet ad excitandum, quem perdidit appetitum, hoc liquore usos esse dicunt, quem ungula sacculis admota exprimunt, retia item, quibus capiuntur, eodem, ab incolis illita, castores allicere. *Rondeletii* ex observatione frequentes illum liquorem castores delambere constat, sed cuinam usui vel ipsis vel incolis veniant, nullus iste subjungit.

Castorei sacculos igitur neutiquam esse testiculos animalis, ex dictis clare satis constat, & illis adhuc magis comprobabitur, quæ suo loco subnectamus circa testiculos Castoris.

Sextius, *Plinio* referente, in illos invehebatur, qui castorem, venatorum persequutione pressum, testiculos sibi protrahere somniarunt, siquidem illos spinæ dorsali adhærentes habet. Ast errorem errore depellere quærit, ut jure observat *Dioscorides*, siquidem inguinibus nexi sunt testiculi, nec spinæ dorsali. *Amatus Lusitanus* interim & *Matthiolus*, in *Dioscoridem* commentati, castorum, præsentibus Medicis a se dissectorum testiculos, adeo fortiter spinæ adhærentes vidisse testantur, ut vix scalpelli ope subtrahi potuerint. Et *Rondeletium* idem ille error captus tenet, quamvis leviori quadam disquisitione, & sacculos Castorei investigatus fuerit, non enim quatuor, sed duos tantum reperiri statuit. Alii autem ex recentioribus, co-

gnito, quod testiculi a sacculis differant, haud ulterius in disquirendo perrexerunt; & immerito *Dioscoridem*, testiculos castoris dum latere dicit in inguinibus, sacculos pro testiculis habuisse, incusant. Quod si autem nostri & reliquorum castorum omnium, eadem est conformatio: omnes hosce auctores errasse constat experientia nostra. Nec enim testiculi sacculis erant intimiores, sed superiores saltem, & inguinum in regione latentes, ita ut nec hi, nec virga, nisi subtracta demum pelle, conspici posset. Canis testiculorum figuræ accedebant, & longitudine 1. latitudine autem ac crassitudine, dimidium explebant digitum. Epididymis denique & reliqua generationi quæ inserviunt, vasa, illa a caninis neutiquam differre videbantur.

Quod ad virgam adtinet, hujus in extremitate balani loco, officulum quoddam 14. linearum longum, & styli instar efformatum, 2. præterea lineis in basi sua latum, statim vero exinde correptum, & in cuspidem terminatum, vidimus. Imo quum canina virga ab ossæ pubis, umbilicum versus adscenderet, hæc ad excrementorum foramen, ubi terminabatur, descendebat. Pelle autem tegitur ita, ut non, nisi subducta demum illa, sexus differentia constet. Vasa præterea spermatica in origine sua, caninis similia, imo virgam Recto superiacentem, & priores Castorei sacculos binos subeuntem; hos item ex venis & arteriis hypogastricis suas venas atque arterias recipientes, nec tandem alia vasa, Castoreo præparando inservientia observavimus, (id quod improbabile nobis videtur) nisi urethram pro eo habere velis.

Reliquis autem abdominis in partibus, si musculos abdominis quæras, si Peritonæum, Stomachum, & Vesicam, nihil a caninis diversum, nihil singulare observavimus. Intestina gracilia inter, Cœcum $2\frac{1}{2}$. digitis latum, & 10. longum, conspiciendum veniebat, ex sinistra, sub liene situm, & ad cavitates ossium ileorum descendens, in cuspidem exiens rotundam, & adpendice 1. digiti longa instructum erat. Falcata, nec rectam exhibebat figuram. Duobus præterea ligamentis instructum erat, quæ ramusculos suos intestini corpori inferebant. Binis tandem digitis sub crassiori ejus extremitate, corpus aliquod sphaericum vidimus, quod eandem, quam lien, præ se ferebat substantiam, 3. vero linearum diametrum. Reliqua tandem intestina, similitudinis suæ ergo, ac vix a colo distinguenda, 26. fere digitos explebant. In quibus octo vermes longos atque rotundos, lumbricis-que similes deteximus, quorum tres 7. ad 8. reliqui autem 4. digitos longitudine, adtingebant.

Lien sinistra stomachi parti superjacens, 8. venis totidemque arteriis, vas breve constituentibus, eidem cohærebat. Colorem ostendebat rubrum, 7. digitorum longitudinem, & 10. linearum crassitiem & latitudinem. In quinque lobos, qui colore caninos referebant, divisum vidimus hepar. Fellis insuper vesicula hepatis in parte concava, duobus ejus lobis intermedia, $2\frac{1}{2}$. digitis longa, & 1. lata erat. Per totum abdomen diffusam conspeximus bilem, quam pro causa mortis animalis habere liceat. Pancreas canino simile 10. digitorum longum, & 2. ad summum latum erat. Parum vero adipis, renum in tunica adiposa & epiploo vidimus. Renum quemvis 1. digiti crassum, 2. longum, totidemque digitorum latum, & cartilaginem Xiphoidem rotundam, 14. linearum latam, at tenuissimam & plicatu facillimam observavimus.

Reliquas partes omnes, quas aperto thorace, vidimus, caninis simillimas esse experti sumus. Sic pulmo sex lobis constabat, 3. ex dextra, 2. ex sinistra, sexto tandem, exiguo, in mediastino, prope Diaphragmatis centrum, sito. Sinistra cordis auricula, dextra major, ut in animalium variis, nec minor erat, ut in homine. Foramen illud *Botallianum*, quod non solum amphibis, sed & hominibus urinatoribus inesse recentiorum varii perhibuerunt, in corde castoris nostri frustra quæivimus. Quum vero variis annis Versalii detentus, nec ad aquam exspatiandi locus ipsi fuerat, forsan exercitii & usus inopia obturatum fuit; idem enim fœtui, uterum egresso, quum per aliquod tempus aerem respiraverit, obtigisse novimus. Imo quoddam foraminis obturati vestigium observare licuit. Vena coronaria inferiorem valvulam, quam dicunt nobilem, vidimus, integram venam cavam explentem, & ita dispositam, ut sanguini ad cor ex hepate descendenti facile cederet, nec tamen rursus adscendenti locus superesset. Cordis longitudo a basi ad cuspidem $2\frac{1}{2}$. latitudo 2. digitis absolvebatur.

In disquirendo cerebro, figura sinuum Duræ Matris singularior videbatur. Superior enim, ossis Ethmoidæi ex regione proficiscens cerebrum in partem dextram & sinistram dividebat, tum ad initium Cerebelli recta productus, idem in duos dividebat ramos, Y quasi Græcorum efformantes, & utramque cerebrum a cerebello separantes. Ex ramis binis, quatuor alii, bini nimirum ex parte profecti, occiput versus revertentes, cerebellum in tres partes inæquales dividebant, quarum media, illaque maxima 10. lineis longa, 5. lata & ovi forma comparata erat. Binæ laterales $4\frac{1}{2}$. linearum latæ, & 6. longæ conspiciebantur. Omnis vero cerebri latitudo $1\frac{1}{2}$. & longitudo 1. digito & 8. lineis absolvebatur. Retracta autem dura matre nullam sub sinu majori vidimus falcem, sed exiguam saltem cavitatem, rotunditate sinus efformatam, imo similium cavitatum vestigia, sub ramis sinuum prominentia observavimus. Omnem capitis posteriorem partem occupabat cerebellum. Paucis insuper anfractibus conspiciendum erat cerebrum, & pars ejus exterior album potius, quam cinereum colorem exhibebat. Reliqua pars cerebri omnis, more animalibus communi comparata erat. Apophyses mammillares magnæ erant, nervi optici autem, ubi cerebri substantiam egrediebantur, exigui, & junctura quadam singulari, 7. scilicet linearum longa, neciebantur. Tandem vero divisi, pro solito, ad oculos tendebant, quorum orbita non erat, nisi circulus quidam osseus. Nec tamen in carne muscutorum seu corporis reliqui, nisi caudæ, de qua diximus, singulare quidpiam observatum est.

Expositæ castoris descriptioni Anatomicæ epitomen eorum subnectere liceat, quæ iisdem in Actis, a Viro Cel. *Sarrazin*, Archiatro Canadensi observata, alibi leguntur.

Castorum maximi 3. ad 4. pedum longi, & in medio pectoris, 12. ad 15. digitorum lati esse solent, pondere 40. ad 60. libras explent, & 15. ad 20. annos habent, pro termino vitæ. Remotissimas Septentrionis plagas, qui tenent Castores, nigerrimo plerumque colore notati, nonnulli tamen & candidi sunt. Qui Canadam inhabitant, illi fulvum colorem gerunt, aut pro temperatiore cœli tractu, debiliorem, illi enim, quos Ilinensium regio alit, & Chauanonum, fere straminei sunt coloris. Fœmellæ 4. ubera gerunt, duo scilicet musculo pectorali incumbentia, mulierum instar, secun-

secundæ scilicet & terciæ costæ veræ intermedia ; duo reliqua autem in collo , 4. digitis superius sita , conspiciuntur . Fœtus per 4. menses utero gestare dicuntur , & 5. 6. ad 8. quovis partu effundere , quamvis plures quaternis reperiri numquam obtigerit . Accedit experientia Cel. Viri *Savrazin* .

Aquis , quæ terram inundaverant , decrefcentibus , fœmellæ parturientes ad domicilia redeunt , & ibidem fœtus effundunt . Masculi autem ad Junium vel Julium , menses , rusticantur , nec nisi penitus recessis aquis revertuntur . Tunc autem domuum vel ruinas reficiendo , vel prorsus novas exstruendo occupantur . Varia sunt , quibus moti alia loca pro domiciliis quærunt ; etenim vel confumtis quæ habitationi vicina erant , nutrimentis , vel nimio familiæ exauctæ numero , vel frequentiori venantium persequutione pressi , domicilia transferunt . Locum exstruendæ habitationi convenientem feligunt , qui alimentorum copia instructus , & rivulo irrigatus sit , & pro effodiendo lacu sufficiat . Hic opus ordiendo aggerem congerunt , in basi 10. ad 12. pedum diametri , post crassitudine sensim decrefcentem , & in vertice vix 2. pedum latitudinem , seu diametrum exhibentem ; altitudinis autem tantæ , quanta sufficit , pro aqua ad primam domus contiguationem elevanda . Aggerem satis longe producunt in planitiebus , seu ad flumina , tortuoso cursu procedentia ; breviorē vero relinquunt , dum in vallibus ædificia exstruendi animus est . Tum , quia maxima facilitate lignum conscindendi gaudent , ligni frustula , hominis brachium crassitiæ æquiparantia , imo excedentia , & 2. 4. 5. ad 6. pedibus longa , conscindunt ; alteram eorum extremitatem altissime terræ infigunt , alia aliis proxima defigunt , minora & flexibilia intergerunt , tandem interstitia argilla explent . Quantulumcumque operis succreverit , idem pari ratione statim perficere , & sic materie pro exstruenda domo onustis viam sternere solent . Quum tandem in tantam elevationem excreverit agger , ut retinendæ sufficiat aquæ tantæ , quanta pro irrigando primo strato domiciliū futuri requiritur , tunc laborem sistunt , nec ulterius producendo aggere allaborant . Latus aggeris , quod aquam respicit , oblique inclinatum pendet , & aquæ alluentis pondere premitur , & sensim solidius magisque compactum evadit ; latus alterum ad perpendicularum ductum est . Totum vero aggeris opus , vel hominem obambulantem ferre potest , præ soliditate , & quæcumque acciderint , ejus detrimenta , illa studiose castores argilla reficiunt . Quod si venatores operis sui observatores viderint , vel relicto per diem , labore , noctu tantummodo pergunt , vel prorsus locum pro domicilio sibi feligunt . Sic tandem congesto aggere , tuguria exstruere ordiuntur . His solidissimum fundamentum vel in insula quadam exigua , vel fluminis ripa , vel rate , ponunt ; his oblongam seu rotundam figuram conciliant , eaque in tantam altitudinem educunt , ut tertia saltem pars aquæ submersa sit , reliqua autem extra aquam promineat . Sic & portam conservant , ne glacie possit obturari . Nonnunquam & totum tugurium solo committunt , ac fossas 5. ad 6. pedum profundas , ab eo ad aquam usque producunt . Materia eadem & aggeri & tugurio exstruendo inservit ; tuguria autem parietibus ad perpendicularum ductis , & 2. plerumque pedum diametri , constant , & tecto conglobato teguntur . Cæterum , si quæ lignorum extremitates prominent , illas dentibus , vix ferræ aciei cedentibus præscindunt , deinde luto utrumque parietis latus obducunt , idque reiteratis caudæ iſtibus , tamquam pa-

vimentum cadunt. Interius tugurii spatium ceu alveare fornicatum, octo ad decem castoribus continendis infervit. Externa ejus longitudo 10. ad 12. & si ovalis figuræ fuerit, 8. ad 10. pedes latitudo ejus explere solet; interioris spatii longitudo est 5. ad 6. pedes, latitudo autem 4. ad 5. Quod si castores 15. 20. vel 30. eodem domicilio continentur, pro copia illorum major est tugurii capacitas; interdum & alia aliis adponuntur. Cel. *Sarrazin* enim ex testibus oculatis acceptum refert: vel quadringentos castores, pluribus tuguriis inter se cohærentibus, fuisse detentos. Illa autem variis contabulationibus constant, quarum in supremam sese recipiunt, excrecente aqua. Præter portam denique & locum balneo suo destinatum, alium adhuc exitum habent quo ad aquam, excrementis suis sese exoneraturi, egrediuntur.

Castores terrestres illos dicimus, qui cavernas in solo quodam ripæ eminente obvias inhabitant. Hi rupta glacie fossam, 5. ad 6. pedibus longam, & pro latitudine, uni tantum castori incedenti parem, conficiunt, tunc lacum 3. ad 4. pedibus undecumque latum effodiunt, cui quoties libet, inhærent. Post alia quadam fossa sæpius 100. pedum longa, terram conscindunt, eamque variis contabulationibus distinguunt, ut crescente aqua summam illarum conscendere possint. Locum, quo reponunt, herbis substratis sibi præparant. Hyeme autem ratibus pro stratis utuntur.

Omni eorum operi perficiendo, & in primis horum, qui regiones Septentrionales inhabitant, Augustus, mensis, ad summum, September, sufficit, exinde autem ciborum adparatum, pro hyeme, sibi comparare incipiunt. Lignorum frusta igitur, 2. ad 10. pedum longa rescant, & majorum singula, viribus variorum junctis, minora autem singuli protrahunt. Post aquæ eadem committunt, ac tot illorum sibi invicem superstruunt, quanta copię animalium illis nutriendorum sufficere censent. Sic ver. gr. octo ad decem castoribus nutriendis lignorum strues 30. pedum longa, lata, & 10. pedum alta venit. Harum quævis singulari artificio ita disposita est, ut quodlibet ligni frustulum, salva strue, protrahere possint. Nec tamen nisi illa seligunt, quæ aquæ immersa fuerant, ea comminuunt, tum comedunt, & eum tugurii in locum deportant, quo quietem capturi reponere solent; etenim si aquæ adhuc innatantia ligna conscidissent, undis illa abluerentur.

Novembri & Aprili intermedium tempus, quo frequentiore castor pilum gerit, venationi ejus destinari solet. Variis capitur modis, cassis usus tamen reliquis anteferri meretur. Castores enim, licet sufficiente lignorum adparatu instructi, magna gula in lignum recens feruntur, idque quæsitum, sæpius exspatiantur. Imo escæ illorum ligni recentis frustula veniunt. Venatores igitur satis spatiofo intervallo très quatuorve perticas in terram defigunt, illisque transversum ligni ponderosioris truncum, $\frac{1}{2}$. pede a terra elevatum supraponunt. Huic pro esca subdunt, populi ramum, 5. ad 6. pedibus longum, illumque ad alium quemdam ramusculum productum. Hic igitur adeo exacte trunco isti respondet, ut quantumcumque ramum longiorem excutiat castor, truncus tamen, non nisi conscisso ramusculo demum, terra deprimatur, sicque castori mortem adferat. Alia superest, castores captandi ratio, Gallice *à la tranche* dicta. Glaciem scilicet, vix 1. pedis altam conscindendo, castores ad respirandum eo alliciunt, quo

quo quum pervenerint, asciarum ictibus enecantur. Nonnunquam & stramine spicarum typhæ foramina ista obtegunt, sicque incautos eo prolapsos castores, ex pede arripiunt. Imo, si quis rivulus tugurio eorum fuerit vicinus, transversim ejus glaciem difsecant, reti obducunt, tum tugurium destruunt, castores omnes eo abigunt, & reti expanso captant.

Huc fere redeunt, quæ notatu digniora de Castore in *Actis Regiæ Academiæ* invenimus. Addit Vir Cel. *Lemery* in tractatu de pharmacopis universalibus, quod a rostro usque ad lumbos, gliri silvestri similis, exinde autem ad caudam aves fluviaticas palmipedes referat; quod terra detentus, fructibus, foliis & cortice arborum, aqua autem degens, cancris, aliisque piscibus vivat. Satis bono cæterum alimento cedit, & ex parte piscis, ex parte autem superiore scilicet, usque ad lumbos, pro carne habitus, jejunii diebus interdictus est. Reliqua ejus pars, piscis censetur, & vel jejunii diebus, cibo omnium cedit. Cavernas plerumque fluviorum in oris repertas, seu arborum in crenas sese recipit, & magnam ejuscopiam & Galliæ & Germaniæ & Poloniæ in ripis videbis. Frequentior tamen in Canada reperitur, & miratu dignam Rempublicam quamdam constitutam sustinet. Glirem vero silvestrem, cujus mentionem hic facit Vir Celeb. Murem Alpinum, seu Marmotam esse censemus. Ast piscibus castorem nutrir, varii sunt magni nominis Physici, qui sua experientia edocti, pernegant. Imo Virum Cel. quod pace ejus dictum sit, errare judicamus, dum Fibrum, seu *Bievre*, aliud quoddam animal esse, & multa similitudine castori accedere, censet. *Belon* castores cicuratos in Austria ac Burgundia suis se oculis vidisse adfirmat. Et *Catesby* teste, omnem Continentem Americæ Septentrionalis, a trigesimo usque ad sexagesimum gradum latitudinis, castores inhabitant nostratibus similes. In Anglia autem omne castorum genus extirpatum esse refert Cel. *Raius*.

Italicum ejus nomen est: *Castore* seu *Bevero*, Germanicum: *Biber* seu *Bieber*, ex quo & Gallicum: *Bievre* ortum esse videtur, Anglicum: *Beaver*, & Belgicum: *Bever*, Suecum: *Bæfver*, Gallicum vero: *Castor* ex Latino & Græco: *Castor* deducatur.

Quibus castor vivit terris, earum incolis pro nutrimento cedere solet. Carnem scilicet bovinæ simillimam præbet, sed crassiores, duram, & digestu difficilior. Quæque non nisi assata & multis aromatibus condita usui veniat. Cauda ejus delicatiori cederet cibo, nisi & ex odore quidquam retineret, & succum produceret crassum ac phlegmaticum. Concoctu insuper difficilis, & stomacho debilitatem inducit, & abundantior, nauseam excitare solet. *La Hontan* est, qui in *Itinerario Novo Americæ Septentrionalis*, Canadiensibus pro delitiis cedere docet castoris caudam; & *Belon*, eandem Lotharingiæ incolis, jejunii quadragesimalis tempore, cibo venire refert.

Castoris adipe autem, & pelle, item Castoreo, vel Medicina vel aliæ artes utuntur. Castoreum scilicet, seu substantia, ceræ cum melle commixtæ similis, colorem exhibet fulvum, odorem foetidum, saporem amarum atque ingratum, & binis castorum infacculis, ad inguina fitis, reperitur. Quod si menstruorum spirituosorum, oleosorum seu aquosorum ope solveris, partibus oleosis ac salis phlegmate mixtis constare, imo sal aliquis volatilis oleosus, phlegmate abundans esse videtur. Variis interim ex

regionibus , ut ex India Orientali pariter & Occidentali , Polonia item , Prussia & Moscovia , provenit , quod quidem ultimo nominatum , Dantiscum transeundo, Castorei Dantiscani nomen recipit , & omnium habetur præstantissimum. Canadiense autem, omni fere odore destitutum, pro spurio, & nullis quasi Medicinæ usibus venit. Reliquis igitur illud antefendum esto , quod odore gaudet ingrato , sapore acuto & acri , colore fulvo & adfrictui facile cedit . Inferius illi oleosum creditur & pingue . Difficilior interim fraus in imitando castoreo commissa detegitur , siquidem & illud pro diversitate cœli, quo animal nutritur, & diversitate circumstantiarum est diversissimum. Genuinum igitur jure illud habebis, cui membranas , venas & fibras immixtas observaveris . Iisdem vero quibus continetur , sacculis arefactum , amissa nimia aqua , odore fortiori imbuitur, & diutius conservari potest. Cæterum vel aere, vel fumo, seu ex igne suspensum, exsiccari solet. Magna autem & antiquioribus, & nostris temporibus Castorei fama est in Medicina. Ex sulphure etenim foetido & sale volatili , alkalinam suam acquirit naturam , cujus ergo pro desiccante & calefaciente, frigidis præsertim in morbis & ex aciditate, vel nimia solidorum relaxatione, humorumque pituitosorum languore exortis, convenit. Sic & præstantissimo cedit stimulant, ubi scilicet incisivis & resolventibus , humores viscosi , obstructionum promotores , sunt diluendi . Commendandum itaque erit contra Cacochymiam , & morbos hystericos seu hypochondriacos; ast nocivum illis, qui nimio fluidorum calore & motus agitatione laborant. Nec igitur idem illius effectus est , in morbo eodem, & quoniam saltem respectu cephalici, anti-apoplectici, anti-epileptici, anti-paralytici, carminativi, uterini, anti-hysterici & anti-spasmodici nomina mereatur, ex dictis concludere licet. Nec enim specificum uterinum seu antispasmodicum , sua natura dicendum est , sed remedio resolventi anti-acido, & viris & foeminis cedit, qui nimia solidorum relaxatione laborant, vel Cacochymia serosa & acida infestantur. Quibus collectis, varia cautione opus esse vides , circa usum ejus contra spasmos & convulsiones uteri, sic v. g. quum in morbis hysterici fuerit adhibitum, sulphure suo foetido quidem cardialgiam lenit & viscerum spasmos, ast obstinationem reddit morbum & diutiorum; quum autem exinde, levi quodam purgante humores viarum primarum peccantes expuleris, secedent dolores . Imo nimium Castorei usum uxoribus parturientibus capitis gravitatem induxisse, & somno eas privasse novimus . Quibus in unum collectis , non nisi probe cognito ægrotantis temperamento , usum ejus admittendum, & quamvis , ex qualitate sua incisiva ac resolvente optimo cedat remedio morborum ex frigida quadam causa derivandorum; illis tamen , quorum intestina calida & irritata facilia, ad humores rarefaciendos & exagitandos inclinant, illis inquam, noxium esse, intelliges.

Quoad interiorum ejus usum , dosi gr. x. ad ʒj. vel boli instar , cum syrupo aliquo subactum , vel opiat, & potionibus commixtum, exhibeatur. Cæterum & extractum, & tincturam, & oleum distillatum vel absque additione, vel cum additione, oleum tandem infusione seu coctione ex eo præpare solent. Extractus igitur cum Spiritu Vini rectificato, vel aliorum more, cum aceto, prima & reiterata ejus extractio, cum Spiritu Vini confici solet. *Avercetanus* autem, antequam fiat extractio, materiam , per 4.
ad 5.

ad 5. dies in aqua quadam destillata, ut melissæ, pæoniæ, seu alia anti-epileptica & cephalica macerari jubet. Pro dosi gr. vj. ad xij. præscribuntur. Hac tamen præparatione, quum volatilis ac essentialior pars Castorei fere omnis evaporaverit, infrequentius utuntur, & Castoreum in substantia adhibere malunt. Tincturam Castorei compositurus, castorei q. p. vasi vitrei immittat, exinde autem spiritus vini rectificati q. s. suprafundat, in balneo arenæ omnia digerat, & absque filtratione conservet. Cujus dosis sunt gutt. x. ad xij. aquæ convenienti admiscendæ. Oleum distillatum absque additione, ita præparetur: castoreum cornuæ immittas, cornuam furno tradas, tum recipiente probe obturato, ignis fortioris & gradatim admoti ope, oleum foetidum elicias, & ad usum servabis. Oleum vero cum additione fiat, dum castoreum vel aceto solutum, vel vino maceratum, pariori igne destillaveris. Quæ quidem olea summa se virtute contra Paralyfin, Lethargiam, membrorum tremores, imo morbos hystericos commendant, dummodo spinam dorsi, humeros & ventriculum eisdem adfricaveris. Reliqua olea iisdem in morbis externe adplicari solent. *Etzmullerus*, ad profligandam Lethargiam, & deliquia, ex vaporibus narcoticis oriunda, spongiam aceto, quo Castoreum solutum fuit, irrigandam, & naso admovendam esse suadet. Sic & clysteres anti-apoplecticos & anti-epilepticos intrat. Et aliquantula pars gossypii, castoreo irrigata, & auribus immissa, ad profligandum eorum tinnitum mirabili sese virtute commendat. Opio autem admixtum, pro corrigente hujus habetur, siquidem & virtutes ejus leniendi, & somnum impediendi facultate gaudet. Purgantibus item ad exaugendam horum efficaciam additur; & catharticis admixtum, nimis activorum violentiam temperat. Sic v. gr. Elleboro candido junctum, emethici & catartici lenioris instar, agere solet.

Vetustius Castoreum, *Avicenna*, *Mathiolo*, aliisque consentientibus veneno cedit, & maniam, linguæ tumorem imo febrem, uno sæpius die mortalem, excitat. Cui vomitu frequenti, Hydromele butyro mixto promovendo, postea autem Diamoro vel succo citri, medendum esse subjungunt, vel ʒij. feminis coriandri arefacti. Castoreum scilicet, substantiam oleosam animale, corruptione rancidam, alcalinam & acerrimam evadere, ac hujus ergo, veneni instar operari; butyrum vero cum Hydromele ad emolliendam ejus acrimoniam multum conferre, intelliges.

Adeps castoris seu axungia non est, nisi substantia oleosa, facculis ejus, supra descriptis, contenta; ac emolliendi & resolvendi virtute donata, cujus ergo contra Paralyfin, & Atrophias exinde natas, membrorum tremores item atque dolores, unguenti instar, adhibetur. Imo & contra convulsiones, colicam, dolores hystericos, & tormina partum difficilem comitantia, ventriculum illo adfricare solent.

Pellis castoreus, crassitudine sua, optimo contra frigus medio cedit, & ad præparandos pileos, chirothecas & tibialia venire solet. *Rondelet* sandalia ex castoris pelle confecta contra arthritidem optima esse pronuntiat; nos autem, Virum acutissimum nullam equidem virtutem anti-arthriticam singularem, sed generaliore saltem, scilicet calorem, dolores arthriticos lenientem, in pelle castoris credidisse censemus. Nec adeo creduli erimus, ut *Mario in Castorologia* fidem adhibeamus: dum mitram ex castoris pelle confectam, exaugendæ memoriæ inservire docet. Qui autem ad reprimen-

dam.

dam hemorrhaginem nasi & plagarum, pilos castoreos commendant, minoris id pretii quod illis tribuunt ergo, fecisse creduntur. Huic enim pari cum successu & lana, & alius quisvis pilus substitui potest.

Ingreditur Castoreum aquam generalem, aquam epilepticam & hysteri-
cam Officinæ Parisiensis, & Philonium Romanum, & Theriacam, & Mi-
thridatum, & Pillulas foetidas & hystericas, aliaque ejusdem Officinæ
præparata.

℞. Croci martis aperitivi gr. vj.

Pulveris castorei

viperarum ana gr. xij.

Trochiscorum alhandal gr. ij.

Subig. c. f. q. syrupi Pæon. simpl. f. bolus, contra chlorosin, bis, per
hebdomades recipiendus.

℞. Pulveris castorei ℥j.

Spiritus salis ammoniaci gutt. xij.

Laudani solidi gr. j.

Subig. c. f. q. conservæ flor. aurant. f. bolus ad excitandum sudorem,
& profligandos accessus hystericos.

℞. Aq. artemis.

Meliss. simpl. ana ℥ij.

Castor. in pulv. gr. xij.

Laudan. liquid. Sydenhamii gutt. xx.

Syrup. artemis. ℥ss.

M. f. potio hysterica, cochleatim sumenda.

℞. Galban. colat.

Assæ foetid. ana ℥j.

Castor. in pulv. ℥ij.

Add. tincturæ Castorei q. f. ut f. massa pro pillulis hysterics, quarum
c. sint ℥j. earumque ℥j. ad ℥ss. bis, de die, accipiatur.

℞. Extr. opii

Castorei

Croci pulveris. ana ℥j.

M. in mortario favillæ supraposito, & add. Extr. Juniper. q. f. f. massa
pilularum sedantium, quarum gr. j. ad gr. iiij. cubitum eundo recipiat,
quicumque accessibus hysterics, colicæ & flatuum sociis, infestatur.

℞. Ass. foetid. ℥ss.

Castor.

Camphor. ana ℥j.

Ol. succin. gutt. xij.

M. linteo rariori involv. f. Errhinum, cujus vaporem adtrahat, accessum
hysterico correpta.

E L E P H A S.

Elephas. Offic. Schrod. 285. Bossch. 150. Dal. Pharm. 442. Lemer. 332.
Charl. Exerc. 4. Herman. Cynos. 9. Schvenckf. de Quadr. Siles. 87.
Raii Syn. Anim. Quadr. 131. Elephas. Hartenf. Elephantogri. Gesn. de
Quadr. 409. Aldrov. de Quadr. 418. Jonst. de Quadr. 17. Elephas naso Cy-
lin.

Indraceo elongato. Linn. Syst. Nat. 69. *Barrus Indorum*; *Bellua Inda*; *Animalium seu Bestiarum Heros*; *Brutum non brutum*; *Luca vel Luci Bos*; *Bos Anguimanus Veterum*. Nonnull.

Brevissima est, quam *Blasio* debemus, anatomica elephantis descriptio, ex *Aristotele* hausta. *Valentiniana* non est, nisi *Hartenfelsii Elephantographia*, in compendium redacta, quæ amplissimo quidem eruditionis adparatu superbit, & methodo *Ephem. Germ.* conscripta, paucissimis tamen, quæ ad anatomiam spectant, instructa est. Quam igitur omnium & amplissimam & adcuratissimam judicamus, en tibi L. B. sequentibus, illamque ex *Actis Regiæ Scientiarum Academiæ*, ad *Historiam Naturalem Animalium inservientibus*, Auctore Cel. *Perrault*, depromimus.

Patriam elephas noster habuit Congo regnum, Africa provinciam; & quartum vitæ annum agere dicebatur, quum anno 1668. a Lusitanorum Rege ad nostrum transmitteretur. Vixit itaque decem annos & septem, anno 1681. scilicet mortuus est. Nec tamen per omne, quod Versalii commoratus est, spatium annorum, plus quam pedis incrementum accepit sua altitudo, quæ tota 7½. pedibus absolvebatur. Alium quendam, tempore eodem, Parisiis vidimus, illumque ex India natum, qui trimulus, 5. saltem pedum altitudinem pertingebat. Huic igitur, si quarto vitæ anno, nostri quadrimuli altitudinem explere voluisset, 2. pedum incrementum, unius anni spatio accedere debuisse constat. Nostro tamen, quum 13. per annos, vix unus accesserit pes magnitudine: causam negati eidem incrementi, aut in cibi ac cœli permutati differentia quærendam esse censemus; aut in eo, quod elephantis Africa citiores excrecant Indiani, quos quidem multa magnitudine illos superare novimus. Jam ad nostrum revertamur, quem Versalii vidimus, quique corporis circumferentia 12½. pedes, a fronte ad caudæ originem 8½. ex superficie dorsi ad terram 7. a ventre autem ad terram 3½. pedes, imo longitudinem altitudini fere æqualem exhibebat. Auctorum varii sunt, qui crura elephanti anteriora posterioribus longiora tribuerunt: nos autem contrarium experti, posteriora 4. pedes & 8. digitos, anteriora autem 4½. pedes longitudine adtigisse vidimus. Fatemur, longiora videntur anteriora, penitus etenim animalis corpori posteriora inhaerent, nec binis, ut reliquorum omnium, plicaturis instructa sunt. Pars scilicet illa, quam cruris nomine plerumque salutare solent, crus una cum lumbo complexa, quæque in homine non nisi unam plicaturam, genu nimirum, ostendit: eadem binis articulis gaudet in animalibus, altero ad genu, abdomini vicino, altero ad talum, illoque admodum prominente; siquidem longissima est, nec terram pertingit pars a talo & pedum malleolis ad digitos usque producta, ac cruris vocabulo denotata. Jam vero eadem illa & in homine & elephanto brevissima est, ac terram tangit; imo genu elephanti humano simillimum, haud ventri vicinum, sed spatii a ventre ad terram producti in medio, seu ista in regione situm est, quam talus occupare solet brutorum. Crura igitur elephantis, & regionis ergo quam genu tenet, & parvitas quæ pedi est, ratione, humanum exæquare intelligis. *Galenus* interim *Aristotelem* sequutus, maximum inter animalia, pedem corporis ratione habita, homini esse refert. Ipsi autem, pedis nomine non nisi illam partem venire memento, quæ terram reponitur, nec hanc, quæ a talo & pedum malleolis ad extre-

mitates digitorum percurrit. Adtamen, si pro partium pedem constituentium analogia, illum consideraveris, humanum cujusvis bruti, quidquod elephanti pedem magnitudine superare, nemo ibit inficias, nos autem *Becharu*, avem, describendo, jam observavimus.

Tanta ergo pedum nostri elephanti erat parvitas, ut vix adparerent, quippe quorum digiti crurum pelle obvolvebantur, ipsa autem crura ejusdem ubique crassitie, arboris truncum, ferra transversim dissectum repræsentabant. Censet *Aristoteles*, quod breviores sint posteriorum quam anteriorum pedum malleoli in elephanto. Nos vero sceletum ejus perlustrando eandem utrorumvis magnitudinem deteximus. At quum viveret elephas, majores utique anteriorum quam posteriorum malleoli videbantur, planta siquidem horum non nisi decem digitis, illorum vero quatuordecim abolvebatur. Sinistre igitur, qui *Aristotelem* interpretati sunt, vocem: *Sphuron*, malleolum reddidere; pedis planta dicendum fuisset, utrique etenim denotando vox Græca sufficit. Cornu istud, quo soleæ instar pedis planta muniebatur, corporis innixi gravitate, quasi explanatum prominebat & ungulas quasdam negligenter efformatas præbebat, tres quidem in nostro, licet quinque tribuant elephanto quotquot descriptionem eius condidere, & alter, quem Parisiis vidimus, in posterioribus pedibus æque ac anterioribus, quaternas exhiberet. Quinos tamen digitos in omni pede, cum *Aristotele* observavimus, illosque pelli adeo involutos, ut præter ungues vix quidquam adpareret, imo digitis ipsis neutiquam nexos vidimus ungues, quibus unguium nomen tantum non competere docet *Aristoteles*. Quartam scilicet globi partem figura sua repræsentabant, imo ex dextra suorum parte, inflexam, ac binis unguibus intermediam ad terram usque descendentem pellem exhibebant. Præter hos autem, quos anteriores appellare liceat ungues, solea quam descripsimus cornea, adhuc alias quasdam eminentias, ungues repræsentantes monstrabat. Quarum quas in pedum posterioribus vidimus, posticus reflexæ, talum cuspidatum, eminentem & 3. digitorum magnum effingebant; quas autem in anterioribus, humanæ manus digitos referebant. Bini igitur pollicis proximi, in pede sinistro; at in dextro, bini minimum excipientes prorsus cohærebant. Digitorum maximus 13. sua longitudine digitos, & unguium cohærentium latitudo 9. crassitudo autem 2. exhibebat. Nec tamen ungues proprie appellari merentur, sed potius solea pedis cornea continuata, neutiquam enim digitorum ex apice, sed latere egredientibus sinistrorsum reflectebantur, adeo ut ferra rescindendi fuerant, quippe qui elephanto incedenti cedebant impedimento. Num vero pedum elephanti nostri conformatio, naturæ quodam lusu, fuerit singularis, quomodo dijudicari potest? in tanto auctorum omnium silentio, ac deficientibus illorum repræsentationibus. Si autem, ut conjecturam facimus, fuerit monstruosa, multum accessit pedibus equi illius, qui historia teste, fuit *Julio Casari*, quemque devincendi terrarum orbis præsagium esse voluere augures; hic enim pedibus quasi humanis, & solea quinque in digitos divisa præditus fuisse dicitur. Jam vero, ut ad elephantum nostrum revertamur, dura erat qua pedes sui muniebantur, solea cornea, & solida & fere digiti unius alta, nec tenera & spinarum aculeis cedens, ut sinistre *Gillius*, alique referunt: una quidem fissa ac quasi dehiscens, at reliquæ omnes læves & continuæ, nec

secun-

secundum *Philostratum*, rugosæ, nec ex descriptione *Jonstonii*, nigrae erant, sed foris nuceum, intus vero flavum colorem repræsentabant.

Tanta interim pedum suorum est magnitudo, ut duplo hominis pedes superet, & vel lente incedendo, hominis cursum exæquare valeat. Natatu ineptum dicit *Aelianus*, pedum ejus ob formam, *Plinius* autem molis suæ ergo, & huic consentientem habemus *Aristotelem*, qui elephantum flumina transeuntem, pedibus calcare fundum, & proboscidem, qua aeri respirando ingressus pateat, supra aquam extollere dicit. Attamen recentiores Indiae descriptiones, mare transnatare docent eundem, gravior etenim aqua est maris, quam fluviorum, hinc illa quoque sustinendæ elephantis molis magis adaptata, dummodo magnitudinem & pondus illius hæc intercedat ratio, ut aquæ cui innatat, volumen, majoris sit ponderis, ac gravitas sui corporis. Jam, quum inflato turget ventre, adest, quam requiri diximus, ratio; animantia scilicet omnia, quæ vel ampliori ventre gaudent, vel juniora & crassa, instructa quum sint corpore minus solido, & aeris pleno: expeditiora natando incedere, haud adeo saltem aquæ immergi videbis, quam quidem reliqua. Jam vero & Physicorum observationibus, & nostra ipsorum experientia comprobatum est, elephanti intestina, venarum ope, ventrem ejus extendentium, admodum esse inflata: amplum igitur ejus ventrem & turgidum, nec ut *Strabo* censet, crurum ejus motum, ad natandum conferre judicamus. Ineptior scilicet horum structura, si humi prostratus fuerit, ne resurgenti quidem sufficit; qui, quæso, natanti inserviret? Quidquod testibus illis, quibus *Versalii* degentis cura fuerat commissa, priores per octo, quos vixit annos, haud ægre humum se prosternebat ac resurgebat, at quinque annis vitæ ultimis, non nisi stabuli sui parieti reclinans, nec flexis genibus, somnum capiebat, imo si quando, ex morbo, humi recubuerat, superior stabuli sui contignatio perfringendenda erat, quo fulcrorum ope adtolli posset ex terra ac elevari. Cauda illius $2\frac{1}{2}$. pedum longa, exilis item & cuspidata, 3. ad 4. digitis longum in extremitate sua præbebat fortissimi pili cumulum. Et quamvis *Aristoteles*, orificium matricis exterius, in Elephanti foemella, eandem obtinere doceat regionem, quam in animantium reliquis: nostri tamen, (erat autem foemella,) matricis orificium, in medio fere ventre ad umbilicum, deteximus. Adiacebat enim extremitatem conductus cujusdam, ab ano usque ad aperturam, eminentiam aliquam efformantis, & Clitoridem (eiusdem, hoc est $2\frac{1}{2}$. digitorum longitudinis, & 2. digitorum diametri) continentis; totum itaque conductum explere videbatur eadem ratione Clitoris, qua in masculorum plurimis virga; cujus ergo antequam nostro examini ac dissectioni subjectus fuerat, masculus, nec foemella credebatur ab omnibus. Nec sub axillis, ut cum *Aristotele*, *Aelianus* docet atque *Albertus*, sed in pectore, mulierum instar, duo ejusdem ubera vidimus, quorum papillæ exiguae hianti hinnuli elephantis gulæ, haud respondebant. Caput ejus magnum duos posticus exhibebat gibbos, quorum in medio, canalis quidam profundior, occipitis humani fossulæ, & situs & formæ respectu respondebat. Collo autem brevi gaudebat, & fronte explanata, & oculis exiguis, qui tertiam vix partem bovis oculorum, habita proportionis ratione, attingendo, non nisi 20. linearum globulum exhibebant. Rictus ejus valde exiguus, mento tantum non obtegebatur,

& ma-

& maxillarum inferior erat acutissima . Quos autem parviores adpellat , aures elephanti, *Oppianus* , nos asininis duplo majores , 3. scilicet pedibus longos, 2. digitis latos, & 2. linearum crassos , reperimus . Figura erant fere ovali, & humanorum instar, capiti adjacentes ad occiput usque producebantur. Alterius autem, Indici nimirum , aures, vix quartam aurium nostri partem, sua magnitudine quamvis explerent, cujusvis tamen brutorum aures, habita ratione , superabant.

Mortui proboscidem 5. pedum & 3. digitorum longam reperimus, quam dum viveret, pro lubitu & necessitate jam prolongabat, jam contrahebat. Diametrum illa in origine, novem, & in extremitate, trium digitorum, ostendebat, nec tamen sensim decrescente crassitudine, obelisci instar, diminuebatur, sed statim ab initio quam nata fuerat exilitatem, eadem illa ad cuspidem usque procurrebat . Superiore sua parte, rotunda, multis, iisque profundis & rarissimis rugis per transversum quasi dissecta conspiciebatur; ast inferiore parte, plana, seriem eminentiarum exiguarum, crucarum seu bombycium pedes representantium, ostendebat utrinque. Ipsa tandem extremitas vasis instar, superne dilatata, quadam quasi ora instructa erat, cujus imum sive basis, lateribus multo crassior. Superiore sua parte, ora ista, ut digiti apex producebatur, tota autem vasis instar efformata erat illius, ex quo Theam vel Caffè, potiones, haurire solent nostrates, cujus in fundo bina foramina, nares representantia observavimus. Jam vero oræ istius, ac digiti illius ope, omnia ea imitari potest, quibus nostræ alias inservire solent manus, imo, si fidem adhibere velis iis quæ a *Plinio* ac recentioribus Indiæ descriptionibus, relata leguntur, vel litteras pingere novit. Nostrium saltem, nodis implicatos funiculos extricare vidimus, & vel minima quævis apte satis ac eleganter contrectare, imo frangere, ponderosissima autem adtollere, dummodo adplicandæ oræ locum invenerit, hanc autem exantlati aeris ope, fortissime eisdem adglutinare solebat. Nec non mediante exhausto aere, potum recipit, proboscide etenim aqua repleta, extremitatem deorsum reflexam rictui indit, tum vero spiritum, quo liquorem adtraxerat, comprimendo, hunc gutturi intrudit. *Gillius* est, qui elephantum gutturis ope, liquorem sugere docet, proboscide adtractum; ast eodem tempore, ac eodem spiritu mediante, bina inter se contraria, adtractio scilicet gutturis sugentis, & impulsio spirantis proboscidis, fieri nequeunt atque effici; imo nullam prorsus suctionem admittes, si strepitum sive rumorem adtendere velis, quem ex proboscide ad gulam abiens potus producit, quemque ex impulsione saltem, nec suctione oriri posse constat. Quidquod linguam & labra sugenti inservire quum novimus, qui quæso, sugere valet elephas? hic enim eo usque proboscidem gutturi intrudit, ut vel ultra linguæ radicem extremitas illius pertingat; id quod deprimendæ epiglottidis ergo facere judicamus, ne liquor protrusus, ac magno cum impetu transiens, laryngis aperturam ingrediatur. Sic & herbam vescendo, proboscide avulsam & in fasciculos collectam, eadem illam rictui multum intrudit. Quibus inter se collatis concludere liceat, quod & lac matris sugendo elephas, pullus, proboscide extractum, ad gulam deportet. Et nescio fane, qui fiat, ut cum *Aeliano*, *Aristoteles*, elephantum gutture, nec proboscidis ope, matris ubera exsugere doceant, haud tamen vidisse recenseant; prorsus inepta videtur & uberum

matris , & pulli oris conformatio , huic autem proboscidem substitutam quum voluit esse natura : quare omnem prorsus ejus usum , elephanto vel recenti nato denegemus , quippe quem omnis generis agilitate & ad agendum aptitudine , qua prodeuntibus annis gaudet , tunc penitus carere adferit idem illa *Aristoteles* . Imo nihil omnino , nisi hianti ejus rictui iniectum , rictu ipso immediate accipere videmus elephantum , cujus ratio singularissimæ nasi ejus structuræ inest . Quum enim reliquorum nares superiores atque vicinæ adpareant parti , quæ recipiendo alimento destinata est , ut ejus qualitatem odoratu dignoscere valeat brutum : elephanto , proboscidis ope accipienda sint omnia , necesse est , quippe cujus nares proboscidis in extremitate constitutæ , longe satis ab rictu distant . Alias enim , deficiente cognitione eorum quæ obvenerint , facillimo noxii quidpiam acciperet ; jam vero , dummodo deorsum reflectit proboscidem , quæcumque rictui exhibet , examinandi & persentiendi facultate gaudet ; eadem scilicet æque arripiendi ac explorandi virtus data est proboscidi .

Plures autem elephantes fœmellas , si fides sit *Garcie ab Horto* , dentibus falcatis carere , quos vero quæ habent , illas vix spithami nnius longos commonstrare scito . Quos igitur in nostro observavimus , 2. illi pedibus longi , & in origine , 4. digitorum diametro , nec adeo cuspidati , ne tantum incurvati , quam delata ex India elephantum cornua magna , superiorem maxillam egrediebantur . *Scaliger* illos in inferiore reperiri refert , & quare in hac , nec in illa , multis rationibus defendit . *Plinius* masculorum sursum , fœmellarum deorsum inflexos esse docet . *Cardanus* utriusque deorsum recurvatos dicit , nos autem nec adeo elatos , nec multum depressos , sed fere rectos , & vix tantillum sursum respicientes invenimus . Tertium scilicet superioris maxillæ os , 5. digitis supra labiorum superius , pellem perforando egrediebantur ; quos alii dentes , alii cornua dicunt . Recentiorum varii , varia jam cum *Pausania* , jam cum *Philostrato* disputant , num dentes potius , an cornua dicenda sint . Omnia autem , quibus diversas opiniones superstruere solent , vel prorsus falsa , ut : quum nec decidere umquam cornua ista , neque renasci , & eboris instar , dentes igne mollescere dicunt ; vel haud constantia ; dum v. g. dentium radices nulla conexione jungi perhibent cavitatibus magnis , quas dentium falcatorum in radice videmus ; dum falcatos hosce quotannis excidere atque renasci volunt ; nec enim quovis anno hosce effluere , certum , est experientia comprobatum habemus , variorum dentes , ut crocodili , castoris atque apri esse excavatos . Negat omnia ista *Garcias* & pernegat , cui accedere videntur & ea , quæ de elephanto quodam capto perscripta reliquit *Philostratus* , hic enim turris figuram , quadringentis jam antea annis , in dentibus suis falcatis exaratam commonstrasse fertur ; accedit tandem & nostra ipsorum experientia , quousque enim *Versalii* adservatus fuit elephas noster , fuit autem 13. per integros annos , nullum umquam sui dentem amisit . Jam vero alii censent cum *Oppiano* , quod & situs eorum atque originis rationem habenti , nullum prorsus superesse possit dubium quod cornua sint , haud dentes . Os enim , quo illis exitus patet , satis bene distinctum est ac separatum ab hoc , quod veri dentes egrediuntur ; & magis cornu quam dentium substantiæ accedunt , hi enim ignis ope , eboris instar , nulli mollescunt . Nostro autem , irascenti , pro cornubus , ad infligendos ictus infer-

viebant ; imo duo conspeximus foramina¹, quæ pro reponendis , durante somno, dentibus suis falcatis, horum auxilio, in lapidea stabuli columna, effoderat. Jam de qualitatibus pellis singularibus agendum. Hanc *Manuel*, pilo, bovino simili obtectam esse, *Plinius* autem & *Solinus*, omni prorsus carere docet. Noster adtamen qua erat indutus, illa crines potius vel fectas, quam pilos ostendebat ; hos vero quum fectis porci exiliores statuatur *Aristoteles*, nos in nostro, vel apri fectis, (hæ autem porcinis fortiores sunt) crassiores vidimus, illosque admodum raros, nec nisi in proboscide, cauda atque palpebris densiores. Partem igitur proboscidis convexam qui ornabant, $1\frac{1}{2}$. digiti longitudinem commonstrabant. Eisdem quoque oblitam reperimus caudam, & quem in extremitate sua præbebat fasciculum, 3. ad 4. digitorum longis compositum pilis. Nullius insuper nisi hominis palpebra in utraque pilos obvios esse docet *Aristoteles*; nos autem & in *Struthii*, & vulturis magni, & simiæ ac elephantis utraque, pilum humano similem, quidquod longiorem in superiore quam inferiore observavimus. Elephantum etenim nostrum, qui in palpebrarum superiore erant, vel 8. digitis longi, qui autem in inferiore, vix uno & dimidio. Alios sese vidisse profitetur *Gillius* ex India delatos, qui vel 3. pedum longitudinem exæquabant, ex quo Indiæ elephantorum magnitudinem inire liceat. Indicus ille noster exiguus, & in regione caput excipiente, & aurium foramine, & lumbis, & cruribus, & omni fere corporis parte, ejusmodi fectas exhibebat, raras tamen adeo ultimo nominatas, ut parvitatibus ergo, vix oculos incurrerent.

Duplicis vero generis rugas pellis nostri conspiciendas præbebat, alias scilicet profundiores, quales hominis in vola videbis, alias vero elevatas, ut decrepitorum & macilentorum manus in parte externa; ea tamen differentia hæc erat inter rugas ac illas, quas hominis in manu videmus, ut hæc, quum pelli, rugis magis minusve elevatae originem debeant, pelle autem distenta prorsus evanescant: illæ e contrario, non, nisi pelle hinc inde contracta, exorta pelli omni valde deformem adspæctum conciliarent; quippe quæ epidermide jam callosa, jam adipea, jam fissuris dehiscente, oblecta videbatur, eratque. Ut igitur animalium, adspæctu elegantium, & apte conformatorum respectu, ineptiorem dicimus elephantum, qui corpore instructus est brevi ac amplissimo, & cruribus hispidis, & pedibus rotundis atque tortis, & capite vasto, oculis vero parvis, auribusque flaccidis: sic etiam adhuc inelegantior, qua indutus est, vestis, dici meretur. Lineas autem de quibus dictum est, seu rugas profundas, parum, ac ne vix quidem tales vidimus, quales esse dicunt auctorum plurimi. Omnem etenim elephantum pellem rugas decussatim ductas, & quadrata seu rhomboides efformantes transcendere docent. Nos autem utriusque adfertit falsitatem in nostro deteximus; nec in fronte scilicet, nec auribus, consentiente *Oppiano*, rugæ aderant ullæ, & transversales quidem in proboscide, nec tamen decussatæ. Attamen ubi capiti jungebatur, descendentes rugæ, aliis transversalibus dissectæ, quadrata quædam constituebant spatia; imo paullo inferius, eadem ratione sese interfecantes rugæ, vicinitatis ergo eminentias aliquas repræsentabant, & forma ac magnitudine sua, milii grana effingentes. Sub humero autem, ubi Deltoidis ad insertionem, fossula adest, rugas omnes in uno quasi centro convergentes; decussatas &

rhomboidales in natibus & lumbis; cæterum vero irregulares, ac tales fere observavimus, quales illicis vetustioris in cortice conspici licet fissuras. Utriusque tamen generis rugæ, profundæ nimirum ac elevatae, commixtæ inter se erant. Nec non epidermis chartæ crassitudine sua jam fortioris plagulam, jam 3. exæquabat lineas. Illa autem, sive tenuior, haud omne, animalium instar, pelli adhærebat, sed ea saltem ratione necessebatur, qua vesti subditus pannus. Sublata nimirum epidermide, nodulos quosdam, 3. ad 4. lineis inter se distantes, sub illo observare licebit, quorum ope, pelli cohæret epidermis. Sudor vero, si quis egreditur, pellem, hanc & epidermidem inter remanere videtur, nec effluere, nisi per fissuras epidermidis, cujus pars reliqua omnis solida, nec poris instructa est perceptibilibus. At pellis epidermide exutæ superficies innumeris eminentiis, ac quasi granulis, rotundis & magnitudine sibi similibus, iisdem quoque epidermidis superficies, at interior pars epidermidis, qua pelli cohærebat, totidem cavitatibus, eminentiis illis respondentibus, instructa erat & confita. Microscopii auxilio cavitatum istarum in marginibus admodum multa, illaque minutissima fila deteximus, quorum ope, si conjecturæ locus est, epidermis crenis eminentias interjacentibus infixæ detinetur ab initio; exsiccando autem dehiscens, non nisi nodorum auxilio, de quibus dictum est, quorumque fila fortiora cognovimus, pelli cohæreat. Imo denuo aliis conjecturis locum esse reperiet, qui epidermidem pariter ac pellem, viventes seu animatas partes ducit animalis, utraque scilicet suum recipit nutrimentum vegetatque eadem via, qua partes reliquæ animatæ, eademque functionibus suis inservientia habet organa; fibrarum scilicet, pellem epidermidi necsentium alias censemus venas, alias nervos, alias arterias. Colorem huic epidermidi rubro-ferrugineum tribuit *Aristoteles*, nostri autem, cinereo-ferrugineus, ne transeunte quidem solis luce, ullum rubri vestigium exhibebat. *Cardanum* reprehendit *Scaliger*, miratum, quod, quo calidiore sub cælo vivant elephantes, eo parcioris sint nigredinis, nec tamen ab illo adlatam argumentationem infrangit; qua eundem in pelle elephanti effectum caloris, quem in humana exigit, uterque enim & pelle & epidermide absque pilis, instructus est. Adferri posset contra *Cardanum*, quod arescendo nigredinem amittat elephanti epidermis, hujus enim partem penitus fere dealbatam adservamus, nec mirum, calorem namque vehementiorem, absorbendo humorem oleosum, transparentis nigredinis causam, epidermidem ita dealbare constat, ac telæ lintæ candorem idem illi solis splendor conciliat, qui hominis cutem exarescendo reddit nigris. Facti igitur ratio in promptu est, dummodo elephanti epidermidem, poris, pro egredienda in superficiem externam humiditate, carere, hanc vero, *Æthiopum* & *Indorum* in cute, sese expandere cogites. Quidquod emendandæ nimis epidermidis siccitatis ob causam, hos, quibus elephantorum cura injuncta est, spongia olei plena, eosdem sæpius adfricare censemus.

Altera vero, de qua diximus, epidermis, illaque crassissima, arctius adhuc pelli cohæret, cujus eminentiæ, hic quidem cuspidatæ, nec rotundæ, (quales sub epidermide altera) singulis respondent epidermidis cavitatibus. Ratio autem crassitudinis hæc est, quod duplici & triplici interdum strato, & quovis calloso, compositum sit, ita ut nullæ fere eminen-

tiarum, altera in epidermide conspiciendarum hujus in superficie externa adpareant. Idem accidit & in illis humanæ cutis adfectionibus, quibusdefumta ab elephantis pelle nomina, tribuere. Levioribus autem humanæ pellis in morbis, epidemum varias in pelliculas abire videmus atque dehiscere. Eidem etiam cameleonis pellem expositam esse experti, quidni crassius hocce epidemum, morbum aliquem habeamus elephanto communem? quum enim magna utique egeat pellis suæ per exitus, transpiratione; hisce obturatis, plurimum sui æque ac hominis morborum rationem inesse habebis; etenim pellem elephantis, non nisi epidemo tenuiore, haud penitus cum illa cohærente, natura, obtectam cogites; imo omnibus elephantis morbis, oleo cum herbis aperientibus elixo illum adfricando, Indos mederi scias. Considerandum vero, causam quærenti & originem crassifcentis epidemi, quod ubi sana videtur, pellis, nodorum exiguorum & $\frac{1}{2}$. digiti spatium distantium ope, cohæreat epidemo tenuiori; & quod fibræ minores, epidemum ab initio, pelli connectentes, ac ex spatiosis, pellis eminentias interjacentibus, egredientes, quod, inquam disruptæ sint, supponendum. Tunc sana pellis dicenda; sin minus, ea omnia, quæ filis hisce ruptis, transpirando pellem transire deberent, intrant epidemum, explent, turgidum reddunt, & in strata abeunt callentia. Jam vero infestantes elephantis pellem muscas, aculeum haud per transversum epidemum crassius infigere, sed potius epidemi tenuioris fissuris immittere credimus, quas ab illarum ictibus munitum, multo pulvere, tamquam crusta quadam, jam diligens obducere solet elephas, jam frequenti lotione sollers abluere. Nostrium scilicet, quam sæpissime potuit, aqua se abluisse, exinde autem arenæ & pulvere obvoluisse dicunt; imo, ubi nullus adhæserat, denuo arena conspersisse vidimus, & infestas sibi muscas, vel fœni pugillo, proboscide correpto, vel pulvere, ubi ictus sentiebat, satis concinne projecto abegisse, maxime enim delabentem pulverem fugiunt muscæ. Romanorum milites, *Titus Livius* refert, nullam elephantis in corpore regionem, vulneribus obnoxiam reperisse, nisi illam, quæ caudæ subest; & *Cassiodorus*, ossis duritiem pelli ejus tribuit, quam vel durissimo acinaci obsistere scribit *Oppianus*. Propior veritati accedit, fabulis relictis, *Lucianus*, quam sit poeta alias; is enim, ne sagittas quidem, elephantis pelli injectas provocare scribit sanguinem, vulneris testem. Vera sunt, dum de capitis pelle agatur, profunde namque multum huic infixæ sagittæ, nondum illud vulnus infligere, quantum infligeret aliis, infra docebimus, ubi sceletri descriptionem subministrabimus. *Plinius* est, qui facillimo posse præscindi elephantis proboscidem, in bellis a *Pyrrho* gestis, comprobatum fuisse refert, nos autem neutiquam teneriorem in hac corporis regione, quam in reliquis, pellem ejus deprehendimus; & quibus in bello Indi utuntur elephantos, ferro munitum pectus habere addit *Costa*. Nos nostri pellem arefactam quidem atque contractam, fortissimam invenimus & durissimam; recentem vero nec crassitudine nec duritie illa instructam, quam cum *Cassiodoro* ipsi tribuit *Oppianus*; utrumque ergo arefactam saltem, nec recentem elephantis pellem vidisse, accedere videtur ad veritatem. Interim *Plinius* vel recentem imo viventis elephantis pellem, pro durissima habet, quippe quam obstare censet regulæ alias generali, quod eo minori ingenio, quo duriori pelle gaudeant animalia. Et hic quidem loci, de ingenio, non dicam

eam ratione, elephantum dicendum foret, quam tot tantisque antiquorum & recentiorum testimoniis deprædicatam legimus. Nobis autem ante oculos posita quum sit lex ista, ut nulla dicamus omnino, nisi ea, quæ vel nostris ipsi oculis vidimus, vel ex testibus fide dignis accepimus: hæc subiunxisse ac retulisse saltem sufficiat, accepta ab his, quibus Versalii degentis elephantis cura fuerat iuncta.

Illusionis, isti, & joci perferendi impatientem fuisse narrant, & probe memorem, data occasione, vindictam repetiisse. Sic hominem quemdam, qui rictui ejus quidpiam sibi iniicientem simulabat, expectatione frustratum, proboscidis ictu uno percussisse, prostrasse & costarum binas contulisse dicunt; post provolvisse ad pedes, & crurum alterutro fracto, ingenua prolapsam, dentibus suis falcatis ventrem hominis perfodere voluisse, qui nimium ob intervallum, corporis ad latus utrumque terræ infigebantur. Alium quemdam, eadem ratione sibi imponentem, ad parietem compressisse & contrivisse. Pictor erat, sic narrare pergunt, qui proboscide arrecta & rictu aperto illum delineaturus, ut talem conspiceret posset, servum suum copiosos rictui ejus fructus iniicere jussit, qui quum per jocum hiantis expectationem aliquoties frustraret; clusione indignatus elephas, ac quasi cognita illius causa, desiderio scilicet pictoris, in dominum, misso servo, invehebatur, & multam aquam, proboscide contractam, chartæ in qua delineabat, adspergebat. Frequentior plerumque agilitatis suæ, quam fortitudinis erat usus; & facilis lori corrigiam, pedis vinculum, solvere, fibulæ etiam claviculum subtrahere callebat, quam cum funiculo multis intricato nodis implicarent, omnia elegantissime enodabat, nec quidquam dilacerabat. Noctis tempore quondam, soluto uti diximus, suo vinculo, stabuli sui portam, concinne adeo, si dicere fas est confregit, ut ne strepitu quidem custodem excitaret, post varia vivarii receptacula ingrediens, portas dirupit, & postes ex muro constructos, quum transeunti haud satis ample paterent, frangendo dilatavit, ac receptacula ipsa ingressus, tanto timore reliqua animantia opplevit, ut remotissima quæque vivarii loca pro latibulis, quærent. Porcos autem & averfabatur ipse, & extimescebat, audito enim vix porcelli clamore, quam longissime poterat, aufugiebat.

Quam quidem elephantum inter & porcum antipathiam jam observatam ab *Aeliano* reperimus: Mures illum extimescere dum *Plinius* & *Albertus* referunt: *Gesnerus*, nec immerito, græcum porci nomen, sinistre illos promuris habuisse ducit, multa enim similitudine utrumque sibi accedit. Et nos sæpissime, mures stabulum ejus percurrentes vidimus; ast si tanta in illos aversione ferretur, sane cautum fuisset ab istis.

Antequam vero ad ipsam partium internarum descriptionem accedamus si quæ dissecta in pelle, (ut magnitudinis ergo sperabatur,) singularia deregisse licuit, subnectenda. Nihil autem singulare videmus præter epidermum, pellis ipsa fere omnis, reliquorum pelli simillima erat, & exsiccata seu indurata 4. ad 5. lineis crassa, duplo scilicet crassior quam recens; ferra dissecta segmenti superficiem lævem exhibebat ut cornu; elixa autem duplo majorem crassitudinem nata, segment illius superficiem, filis tenuissimis, aqua expressa aliis albis, aliis cæruleis, compositam, præbebat; illa ista quum refrigerata microscopii ope disquirerentur, i. lineæ crassa,

& vitri instar pellucida, & sanguine coagulato hinc inde permixta videbantur, rarissima tandem, & substantiæ quasi glandulosæ, quæ dilatata quum fuerit & lacerata, iisdem fere ex filis composita erat. Quæ omnia, quamvis & aliorum, ut bovis, buffali, & cameli pelli, crassiori saltem inesse observemus: distinctiora tamen elephantis in pelle conspiciuntur; quippe quæ & amplior reliquis maximum obtegit ex animalibus, & ebulliendo admodum turgescens, particulas exhibet probe inter se dilatatas ac separatas.

Papillas vero pyramidales, tactus organa, ut vult *Malpighi*, (organæ etenim gustus, tactui analogi, ejusmodi verrucas esse cognovimus) frustra quærivimus, nec præter eminentias, quibus callosa seu crassior epidermis cohæret, quidpiam vidimus. Illæ quidem sub tenuiore granulorum instar, rotundæ, sub crassiore autem cuspidatæ adparent, ideo fortassis, quia pelle, filorum ope (epidermidem interstitiis excavatis neccentium,) contracta seu constricta, granula ista longiora redduntur, & crassioris epidermidis, cavitates suas, dum arescit, longiores & cuspidatas efformantis, figuræ adaptantur: neutra tamen ex granulis istis, ulla ratione linguæ verrucis adsimilanda videbantur, nec quæ utraque tegit epidermis, membranæ reticulari linguæ, cujus per poros verrucis exitus patet; licet enim cavitatibus ad recipiendas pellis eminentias gaudeat epidermis: solidam esse nec perforatam jam supra monuimus. Nec in illa, quam crassior epidermis obtegebat, pelli, nec hacce epidermide, singulare quidquam observavimus, quibus enim composita erat, strata, altera ex parte eminentiis, ex altera autem cavitatibus, illis respondentibus instructa erant ac cohærentia, ut rugas, grana pellis humanæ constituentes, omnibus pelliculis, epidermidem, (ut pellis in adfectionibus, dehiscente cute videtur,) componentibus, impressas sive incisas observare licet. Ut igitur grana hominis in cute conspicienda, superficiiei jam crenis, jam eminentiis perficitur: cuticularum variarum (quibus sua constat epidermis) cavitates & eminentiæ ita sese excipiunt, ut crassioris epidermidis strata in elephanto. Quæ quidem strata, duplo vel triplo sibi superposita, crustam quum constituerent, cortici exsiccatæ atque emortuæ similem, a pelle vera separabilem ac substantiâ diversissimam: omni prorsus subtilitate, tactus organum quam postulat, carebant, imo quam obtegebant pellem, sensibilitate, si dicere fas est, privare videbantur. Veræ igitur pellis quæ erant grana, non nisi figura sua regulariori ab illis distinguebantur, quæ aliorum in pelle observabis. Alias scilicet varie complicata ex pelle, irregularem suam figuram depromunt, illa nimirum, ubi tenuior est, excavatur, & profundiores constituit lineas, ubi fortior ibi elevatur in grana. Hæc igitur sunt, quæ omnis pellis grana & eminentias, seu carnem, ut ajunt, anserinam efformant, hæc enim glandulis originem debet prodeuntibus, prodeunt autem, dum vel frigore externo, vel alia quadam causa accedente, pars reliqua pellis relaxatur, & sanguinis, quo vasa illam constituentia fere semper abundant, quantitas diminuitur.

Ventrem vero pelle exuentes, fibrarum exiguarum ope, nexam vidimus illam duobus musculis latissimis fortissimisque, utrinque alterutro; quorum extremitas altera, costarum & sterni parte in anteriore, altera autem genu ab initio adparebat; tum vero os pubis transeundo, eidem nexos,

omnemque ventrem, una cum lumborum parte anteriore obtegentes. Tota quamvis muscoli directio fuerit recta, obliquæ tamen erant fibræ ejusdem. Auctorum varii muscas elephantum abigere dicunt sibi infestas, dum rugas & plicaturas pellis, quibus inhærent, contrahendo, easdem contundit enecatque; quæ si ita sunt, rugarum contractioni, muscoli de quibus diximus, inservire videntur. Nec tamen organa novimus eidem motui producendo in reliquis sui corporis partibus, ventris item pelle atque lumborum, adpropriata; hinc, si facta sua veritas constat, supponendum, quod qui reliquis membris sufficiunt comovendis, muscoli, & pelli ipsis cohærenti hinc inde retrahendæ veniant. Musculis insuper ventrem obtegentibus binis inferius aderat dilatatum aliquod involucrum, & supramusculos abdominis communes extensum; ac omnem occupans ventris capacitatem. Membrana autem constabat, fibris tendinosi contexta, 2. lineis crassa, itaque dura & extensa, ut vel leviter admoto scalpello, musculos sibi subiectos dilaceratos, & membranam perforatam viderimus. Extensionis causa erat venter flatibus turgescens. Eadem fere inequo observavimus. Musculi insuper abdominis communes, multis constabant fibrarum carnosarum sibi que superstratarum fasciculis, qui crassiores quidem omnes, crassissimum tamen obliquum reddebant muscolum internum. Cæterum sua quivis membrana, eaque dura ac adeo crassa, quam magnum ventris involucrum, imo simili quadam membrana reliqui omnes corporis muscoli involvebantur. Peritonæum vero, quamvis hinc inde $\frac{1}{2}$. digitum adtingeret crassitudine: & debilitatis, & texturæ levioris, & substantiæ suæ spongiosæ ob causam vel levissimæ tensioni cedebat.

Ventrem ipsum quum dissecando aperiremus, intestina, quodam quasi cum impetu erumpere vidimus, ac si tegumentis & præsertim membrana, de qua diximus, tendinosa, fortius antea retenta fuissent. Quum enim intestinorum turgidorum flatibus maxime laborare dicant elephantum, reprimendis præsertim intestinis destinata videtur ista membrana. Addas: quod tanto ventri inclusa moles tanta fulcro eget seu retentaculo, ut artis vocabulum loquitur; nec obstat, quod alia ex animalibus eadem fere ventris mole onusta, fulcro seu membrana ista careant; forsan singulari quadam cautione, circa molem elephanti tam vastam, opus esse judicavit natura provida; etenim, ut in mechanicis edocemur, haud eadem est vis inertiae & actionis in machina majori atque minori, quamvis eadem sit partium ad se invicem relatio in utraque. Campanas molis eximiae idcirco trabibus transversim subductis sustentari videmus, haud ita minores, quamvis fulcrorum ligneorum relatio ad campanæ sustinendæ molem, in utroque casu eadem fuerit observata. Imo & ad impediendam nimiam ventris pellisque tensionem membrana ista facere potest; tensa enim pellis rugas sibi necessarias perderet. Quæret quispiam: quæ ergo rugarum utilitas? Varia esse potest, vel illa, quam a *Plinio* eidem tributam legimus, vel alia adhuc ignota. Sic v. gr. pro concilianda crassitie pilorum vices explente nec partium corporis motui molesta, venire posset. Huic autem pellis explanata & crassissima obstaret, at rugosa facilis jam complicatur, jam vero extenditur, ita ut serpentis atque piscium squamæ, licet duriores, nullæ tamen corporis motum impediunt, impedit autem crusta dura & contigua, qualis v. c. testudini est. Quam solida cæterum & dura pelle

elephas tegatur, frigoris tamen impatientissimus est. Nostro enim, non solum stabulo undecumque obturato, sed etiam igne accenso opuserat per hiemem. Intestina quod obtegit, epiploon, situs singularissimi ergo, nullatenus adparebat, alias namque partem anteriorem mediamque, hic vero posteriorem ad longum, muniebat. Intestina igitur & dorsum interjacens, elephanto pedibus innixo, intestinis quasi supernatabat, ut Græcum ejus nomen: *Epiploon*, loquitur. Et sapientissime quidem omni compressione liberatam partem hancce cognosces, si eximium intestinorum pondus & ventris vastitatem consideraveris. Ipsum vero epiploon, statim ab initio non nisi membrana erat tenuissima, tum in reticulum duplex, debile, ad dimidium ventrem usque pertingens, & omni adipe, corporis instar destitutum, abibat.

Amplitudo intestinorum, respectu relationis inter illam & corpus reliquum, major erat, quam in reliquis non ruminantibus esse solet. Et *Aristoteles*, ita conformata esse dicit elephantis intestina, ut quatuor fere ventriculos repræsentare videantur; cujus causa in errorem prolapsum esse *Plinium* judicamus, vel potius illos, ex quibus suam hausit opinionem de ventriculis elephantis. Cæterum intestinorum capacitati respondens alimenterum quantitas, quotidiano suo cibo cedebat. Subministrabant enim quotidie 24. libras panis, 12. pintas vini, & altera die 2. situlas jusculi, 4. ad 5. libris panis permixti, altera autem totidem oryzae, aqua elixæ, situlas, haud supputatis spectatorum muneribus. Bellariorum loco, frumenti mergitem addebant; ille autem decerptis aristis, straminis festucas, ex otio, vel proboscidis ope, admodum eleganter comminuebat, vel in fasciculos ad abigendas muscas colligebat; & exspatiando, exspatiabatur autem quotidie, herbam proboscide avulsam, manducabat. Colon præsertim tantæ erat capacitatis, ut 2. pedum diametrum expleret. Ventrem igitur dum aperiremus, 3. pedum longam illius partem, reliqua intestina fere omnia obtegentem conspeximus, Cæcum vero & Rectum tenuiora. Gracilia intestina, ubique fere ejusdem capacitatis, 8½. digitorum diametro, & 38. pedum longa, tunicis, (& in primis carnosæ) crassissimis gaudebant. Et ab initio quidem, folia intus exhibebant, haud more communi, transversim sibi superposita, sed reticuli instar cohærentia, constabat enim tunicis, hinc inde connexis, & irregulares figuras effingentibus. Quarum membranarum seu foliorum altitudo, ad pylorum, 4. lineis absoluta, prout Ileum accedebant, decrescebat. Ileum ubi Colon inferebatur, colon ulterius productum, angiportum quemdam, (sic plateam exitu carentem proprie adpellant) seu sacculum 1½. pedis longum, & Cæcum constituentem, efformabat. Pro valvula Coli, correptum cedebat Ileum continuatum, quod Colon ingrediebatur, & ex altera introitus sui ex parte, appendicem constituebat 2. digitis longam, unius crassam, & Coli in cavitate pendentem. Omnium sane, quotquot in animalium corpore videmus, valvularum, hæc est & constructione simplicissima, & usu certissima, quæ enim ileum ingressa sunt, nulla ratione ad colon refluxere possunt atque reverti; ea scilicet quæ colo continentur, dum versus ileum adiguntur, sese motuantis intestini extremitas explanata, ilei foramen obtegit atque occludit. Colon igitur, sinistrum renem versus exortum, tum dextro accedens, post, costis sub spuriis productum, exinde sub se ipsum reflectebatur, & descen-

descendebat ad hypogastrium, hujus magnam partem occupabat, & cætera intestina fere omnia obtegens, post coarctabatur, tum dilatatum & denuo constrictum, iterum ad latus adscendebat, & duabus Ileï sub circumvolutionibus continuatum, sub ileo progrediens ventriculum versus tendebat, tum vero ileo obvolutum, & adhuc ulterius procurrens, Rectum constituebat, seu partem, quæ recta ad anum descendit. Intus vero reticulis, ut gracilia, (strictioribus tamen & tenuioribus ex tunicis confectis,) instructa erant intestina. Partem coli superiorem zona quædam 6. digitis lata, ad longitudinem ejus ducta obtegebat, ac præter portionem sui, ventre aperto conspicuam, omne in cellulas distinguebatur. Majorum intestinorum longitudo omnis 22. pedibus absolvebatur, Cæci scilicet $1\frac{1}{2}$. coli 15. & $5\frac{1}{2}$. recti. Intestinorum vero omnium, 60. Coli cæcique peripheria 5. recti autem $2\frac{1}{2}$. pedum, omnia insuper mesenterio nexa erant ac coheræntia, hujusque membranæ tenues, glandulis item & adipe destitutæ, nec non vasibus, pariter ac in homine sese distribuentibus, instructæ.

Intestinis obtectus quasi latebat ventriculus, quem œsophagus, media sui parte, nec sinistra, ut alias, ingrediebatur. Ventriculus ipse, $3\frac{1}{2}$. pedum longus, ubi latissimus, vix ibi 14. digitorum diametrum commonstrabat. Qui quum ne quidem coli capacitati accedat, nullum elephantopro recondendis cibis ventriculum esse, habuit *Aristoteles*, quam aliam ex hisce intestinorum circumvolutionibus. Illa autem fundi ejus portio, quæ partem plerumque sinistram versus, orificium superius excedit, haud rotunda, ut solet, sed in cuspidem desinens, pluribus componebatur tunicis, illisque, crassioribus, quam in quacumque alia ventriculi parte, variaque folia regularia constituentibus; Membranæ, folia componentes 1. linea crassæ, $1\frac{1}{2}$. digiti latæ ab initio, prout extremitati accedebant, frequentiores evadebant ac latiores. Quæ autem reliquam partem internam obtegebat, tunica, illa pluribus perforata erat foraminulis, quorum majuscula granulis glandulosis, qualia porcorum in stomacho vides, respondebant. Hepar longitudine 3. pedes, $2\frac{1}{2}$. latitudine, & binos lobos exhibebat, ejusdem fere magnitudinis. Dexter scilicet majusculus, hypochondrio obtectus & altera sui parte nexus erat, altera autem, nempe inferiore, solutus, spinæ superjacebat. Loborum sinister, vix ultra medium ventris procedens, & inferiore & posteriore sua parte leviolem crenam ostendebat, alteram scilicet ex parte sinistra, in media alteram, eamque venam umbilicalem producentem. Ligamenti auxilio, 4. digitis lati, pars lobi convexa diaphragmati adhærebat; & omnis hepatis color externus viridi-ferrugineus, interior cinereus, substantia autem dura erat ac arida. Increpat *Galenus Mnesitheum*, quod fellis vesiculam elephantopro denegaverit; ast, quum nec in nostro adfuerit, & auctorum omnes imo *Aristotelem*, sibi consentientes habeat *Mnesitheus*; nec in illo reperta fuerit, quem paucis abhinc examini anatomico disquisitum legimus ab Anglis; fellis vesiculam a *Galeno* repertam in elephantopro, inter singularissima naturæ portenta referendam ducimus. Vesiculæ locum, quod nostrum adtinet, canalem explere vidimus hepaticum, amplissimum, ex parte cava minoris lobi progressum, & 3. pedibus a Pyloro intestino insertum. Exinde quoque vena-porta egrediens; 14. linearum diametri erat. Ex parte tandem lobi superiore atque convexa exoriens ramus venæ-cavæ eximius, truncum ejus ingrediebatur ibi fere,

ubi diaphragma interfecat. Lien epiploi ope, ventri baseos parti inferiori nexus 3. pedes longitudine, & 7. digitos diametro explebat. *Gillius* elephantum, nostro valde minoris lienem 4. pedibus longum se detexisse refert; his tamen obstant, quæ de elephanto prodit *Aristoteles*, illum scilicet omnium minimo liene instructum esse docet. Tunica igitur, quæ lienem nostri obtegebat, dura erat, tendinosa, ac similis membranæ magnæ, ventri obductæ. Substantia erat durissima, constabat enim fibris solidis, sibi-que adeo arcte coherentibus, ut vel sanguinem spatiosis suis detentum omnem exprimerent. Pancreas Coli parti ventriculum respicienti ad longum superjacens, & fortissime nexa, 1. pedis longitudinem, ac 3. digitorum latitudinem profitebatur. Junctus canali ejus, hepaticus, conductus quemdam communem efformabat, & ope papillæ, nucis instar, intestinum ingredientem. Crassissima erat renis membrana adiposa, sed omni prorsus adipe destituta; & granula glandulosa, renis partem externam ac convexam efformantia, una cum canaliculis suis exterioribus, distinctissima adparebant. Ureter in concava renis parte obvius in varios abibat canaliculos, extremitate sua dilatatos, ac infundibuli instar, ut in homine, singulas renis papillas, complexos. Quæ tandem renem & venam cavam interjacebant, glandulæ renales, longiusculæ & constrictæ, 6. digitis longæ, & 2. digito crassæ, substantiam contiguam, colorem flavido debilem ostendebant.

Matricis orificium externum, medium fere ventrem occupabat, ac ossis pubis a foramine (huic autem vicinum adjacet in reliquis) plus quam 2. pedibus remotum erat. Illi colli ejus parti, quæ ab orificio ad os pubis usque protendebatur, superjacebat clitoris quædam, longitudine huic parti respondens, 2. digitorum diametri, & ex duobus brachiis, parti ossis pubis inferiori, ex qua oriebatur, nexa erat. Pelle cæterum obtegebatur, quæ illam una cum collo matricis ita occludebat, ut eminente saltem crassitie, dum viveret elephas, masculus, nec fœmella, videretur. Os pubis autem postquam collum matricis transferat, in angulum deflectens, ipsam tendebat matricem, solito superiorem. Colli igitur longitudo ab orificio externo usque ad interius, 3½. pedibus erat, cujus interior superficies lævisima, substantia admodum multis vasis intertexta, pars tandem exterior multis admodum fibris induta carnosus, a musculis ani & vesicæ sphincteris proficiscentibus. Orificium internum quodam margine muniebatur, duos fere digitos ultra matricis collum prominente. Ex altera autem colli interioris parte, orificium illud, binis valvulis sigmodæis, (ita dispositis, ne quidquam ingrederetur matricem,) obturatum quasi videbatur. Hanc itaque conformationem, impediendo urinæ refluxui, eique per orificium externum expellendæ destinatam censemus. Quum enim vesicæ collum brevissimum, (nec etenim 2. digitorum longitudinem superabat) orificio interno vicinum inferebatur, ab externo autem, quod urinæ egrediendæ infervit, remotius: quamvis internum plerumque probe exacteque sit obturatum, nihilotamen minus urina, vesicæ impulsu ejecta, orificio semioccluso, nisi valvulæ obstarent, facilius matricem ingrederetur, quam per collum ejus longum & reflexum deflueret. Lea & tигра, matricis collo longo quidem gaudent, ac vesica prope ad orificium illius internum inserta; nec tamen valvulis eget utraque, quippe haud recurvatum est, ut in elephantum fœmella, matricis collum. Figura matricis erat ovalis, 1½. pedis lon-

longitudo, & x. digitorum latitudo, nec non lævissima tunica interior. Duo cæterum cavitatis suæ foramina, quibus cornuum cavitas, cavitati matricis communicat, membranæ interioris appendice muniebantur; illa autem fimbriæ instar foraminula occludebat, ac ne egredi possit quidpiam illorum, quæ ex cornubus in matricem transierunt, obstabat. Cæterum & colli interioris valvulæ, & cornuum cavitatis ab initio quæ occurrunt, pro confirmanda opinione militare videntur, quod illa saltem ad conceptionem faciant, quæ matricis per cornua descendunt, nec ea, quæ collum matricis transeundo, ad cavitatem ejus adscendunt, obstant enim valvulæ colli interioris omnibus, quæ matricem ingredi possent; at cornuum valvulæ, impediendo, ne per cornua exeat, quod matricis capacitatem continetur, minime præpediunt, ut quidpiam ingrediatur. Nec tamen divaricata erant cornua, ac, ut solent, separata, sed per pedis integri spatium coherencia, medio saltem septo quodam divisa, in duo tandem brachia separabantur. Cornuum quodvis 2. pedibus & 8. digitis longum, ab initio $1\frac{1}{2}$. digiti, in medio $\frac{1}{2}$. in fine tandem $\frac{1}{4}$. crassitudinem explebant. Tuba vix duos digitos attingebat, & infundibulum dilatatum 4. suo diametro; cujus membranam, foris lævem, frequentioribusque fibris carnosissimis communitam, intus vero hispida vidimus, multisque aliis membranis, reticula efformantibus, instructam. Cornuum extremitatibus tubarum principia inferebantur, ita, ut tubas pro cornubus in longum productis, & in fine dilatatis habuisses. Quæ quidem dilatata earum extremitas vel infundibulum, testiculo superjacens, membranæ auxilio coherabat, 3. pedibus longæ, damæ cornuum instar resectæ, & frequentissimis vasis instructæ. Testiculus exiguus, depressus, & $1\frac{1}{2}$. digiti diametro, 3. vero linearum altitudine, granulis componebatur, quæ ob partis flacciditatem vix percipere licuit.

Cæterum, ut in homine diaphragmati adhærebat pericardium, & quibus interior ejus superficies perforata est, foraminula, defluenti aquæ ibidem obviæ, (sic videtur) inservientia, distinctissima conspiciebantur. Cordis rotundi ac undecumque spectati magnitudo pedem unicum exæquabat, caro mollis erat, osse autem caruisse judicamus isto, quod Galenus se invenisse gloriatur, quodque non nisi corde in frustra dissecto reperiri posse docet. Et quamvis morbus diutinus nostri, mortis suæ causa, & mollitie causæ venire posset, facilius tamen contrectando, os si quod adfuisset, detexissemus; at undecumque & præsertim aortæ in radice, sede sua, manibus explorantes, nihil reperimus, nec in animali adeo juniori adesse poterat, non enim nisi in vetustissimis obvenit; imo & suam, in quo illud reperit, elephantum maximum, id est multæ ætatis fuisse scribit Galenus. Ventriculi dextri in cavitate 4. vidimus columnas carnosissimas, & ligamentum aliquod, funiculi instar, ex ventriculi latere altero ad oppositum protensum. Minores erant sinistri ventriculi columnæ, sed numero plures, ac cavitatem hancce magis inæqualem reddebant, quam in homine, cui inæqualior est omnibus animalibus. Aorta ex corde progrediens, 3. digitorum diametrum, & tunicæ illius simul sumptæ 2. linearum crassitudinem profitebantur. Binos in lobos dividebatur pulmo, quorum sinister longissimus atque crassissimus, substantiam examini nostro exhibebat putredine correptam. Larynx 6. digitorum diametrum, aspera arteria vix trium, at 2. pedum longitudinem præbebat a larynge ad regionem, qua

pulmoni inferebatur, quaque Struthii instar, substantiam membranofam induebat. Membrana ejus exterior carnosa, interior autem granulis glandulosis, napi semini similibus obsita, & fibræ ejus decussæ, aliæ ad asperam arteriam procurrebant, aliæ per transversum ductæ erant. Caudæ tandem seu appendices diaphragmatis & venam cavam, & aortam, ad os sacrum usque obtegebant.

Cerebrum valde exiguum, uno cum cerebello non nisi 8. digitis longum, 6. digitorum latum erat, & 9. libras tantum pondere explebat. Cerebrum ut in homine, cerebello, superjacebat, illique majori, quam relationis ratione habita, sin aliis animalibus esse solet, & iisdem radiis ac finuositatibus, quibus hominis, intersecto. Dura mater crassissima, facilis binas in membranas abibat, vasa sua continentes, quorum alia eam transeundo piam matrem ingrediebantur. Oblique autem cerebri venæ, duræ matris sinibus inferebantur, & sinus laterales, eadem ratione, qua in homine siti, minus obliqui cranium egrediebantur. Plexus choroidis glandes distinctissimæ conspiciebantur; maximæ erant, & quas striata corpora dicunt, eminentiæ, & quæ nervis opticis originem largiuntur, quas vero testes adpellant & nates, ut in homine, valde erant exiguæ. Glandula pinealis crassior & mollis, nervi autem olfactui inservientes 1. digiti diametro, eximia insuper cavitate instructa erant. Nervii optici, corporis ratione exigui, 3. linearum diametrum, nec cavitatis vestigium exhibebant nullum. Quinti paris nervus digiti diametrum, nervorum exinde ad proboscidem proficiscentium, nec in aliis obviorem, numero, respondentem. Nec retia mirabilia aderant, sed carotidis cranium ingredientis, dextra sinistræ ramorum quorundam ope jungebatur. Glandem pituitariam totam duplicitate sua obtegebat dura mater, nisi ibi, ubi extremum infundibuli conductum recipiebat; glans autem cuspidata, digiti longa & ad basin 5. linearum lata conspiciebatur, quam quæ amplectebatur, duræ matris portio, lævis erat, ac omni foramine destituta. Medulla spinalis maxima, crassissimam exhibebat partem suam cineream. Descendens autem spinalis arteria, eodem fere modo tortuose deflectebatur, quo equi & tauri arteria spermatica. Viginti linearum erat diameter globi in oculo, 13. corneæ, 7. crySTALLINI, qui 5. linearum crassus, magis convexum ostendebat dorsum, quam faciem. Pupula rotunda & iris coloris erat castanei. Circa foramen scleroticæ, ubi oculi globum intrat nervus opticus, marginem observavimus durum & a sclerotica crassescente efformatum; cujus peripheriæ durior adhærebat membrana, nervum opticum vaginæ instar involvens, deinde autem orbitæ foramini nexa; & duræ matri superior. Glandulæ lacrymalis superioris locum tenebat copia granorum glandulosorum, pisa exæquantium, & cujusvis palpebræ tunici inferiori subjacentium. Canales earum excretorii tunicas transeundo, in illud spatium egerebantur, quod palpebras interest ac oculum. Glans lacrymalis inferior, magno plerumque in angulo sita; canali, calami crassitudinem referenti, & papilla extremitatem suam obturanti instructa erat, cæterum extremitate sua cohærens cartilagini planæ, 2. linearum latæ, semicirculum efformanti, globum oculi amplexæ, & per superiorem posterioremque oculi partem transeundo, ex altero ejus angulo ad alterum pertingenti. Quæ quidem explanata extremitas, membranæ substantiam induens, palpebram efformabat

bat internam, duorum musculorum ope agitandam, exortorum scilicet orbitæ in fundo; & dextrorsum alter, alter sinistrorsum deflexorum, tum superato oculo, parti superiori, internæ palpebræ ita nexorum, ut alter, angulum minorem transiens palpebram pupulæ obduceret, alter vero, majorem angulorum penetrans, palpebram reciperet. Ast nullo in alio quadrupedum, nec musculos jam descriptos, nec motum interioris palpebræ, facilem observatu in avibus, observare licuit. Utrunque insuper foramen aliquod, oculo & auris foramini intermedium, sub musculo crotaphito deteximus, quæ quidem foramina non sunt, nisi extremitates conductuum, duas egredientium glandes majores, sub quavis parte pellis immediate constitutas. Et glandes istæ conglomeratarum in numerum referendæ, rotundæ erant, ac 6. digitorum diametrum explebant; substantiam vero innumeris vasis intertextam loquebantur. Qui autem glandulam ad digiti unius profunditatem intrabat conductus, minimi ex digitis crassitudinem, ac interna sua parte frequentissimas eminentias nigras, duras, cuspidatas, & 2. fere linearum longas exhibebat. Conductas in fundo 4. ad 5. foraminula rotunda, seu ostia vidimus canaliculorum, quorum ope glans in magnum egerebatur conductum. *Strabo* autem, conductus hujusce mentionem dum iniicit, in elephanto, Veneris æstu incitato, oleosum quemdam humorem ex illo destillare docet. Lingua insuper $1\frac{1}{2}$. pedis longa, & maxillæ inferioris instar cuspidata, extremitate gaudebat deorsum reflexa. Epiglottis exigua, nec, ut solet cartilaginosa erat seu durior, qua quidem prorsus carere elephantum, mollitiei suæ ob causam, scripserunt alii. Quod in tuba definebat, palati foramen 3. erat digitorum. Linguae superficiem, bina saltem tegumenta, reticulari membrana deficiente, obtegebant; primum scilicet ex fibris mollibus, teneris, excavatis, ac linguae in radice longioribus fortioribusque, quam in extremitate, compositum; alterum vero frequentibus punctis nervosis, quæ cavitatibus fibrarum tegumenti primi inferebantur, consitum erat.

Nasus autem, singularissime constructus, ossibus carebat, quæ in aliis ossi frontali nexa videmus, quorumque vices foramen explebat majus, immediate sub osse frontali situm, & nares constituens, nec septo osseo, sed cartilagine tantum, ut infra docebimus, separatum. Rete autem insuper cartilagine magna, quasi cavitatem repræsentante, & inferius bifida, binas laminae constituyente, quæ liquori, proboscidis ope contracto, ut nasum ingrediatur, impediendo, inservire videntur. Adhærent etenim musculis perpendicularibus, qui sunt proboscidi, quique ad extollendas faciunt laminae, substantiæ igitur cartilaginosa ob elasticitatem sua se sponte deprimere videntur. Omni autem odoratus organo in his quæ respirant, ex *Aristotele*, quoddam operculum datum est, inspirando sese adtollens, respirando autem deprimens; aeris impulsu itaque ad aperiendum odoratus organum necessarium existimans, ideo nullos nos odorari amplius censet, dum nullum amplius aerem respiratione adtrahimus. Quum autem proprium saltem sit elephanto operculum istud jam elatum, jamque depressum: officium & aliis commune eidem tribui nequit. Tertia præter ea aderat cartilaginosa appendix, septi descendens instar, foramen dividendo, binos constituens narium conductus, membrana crassiori indutos, & multis glandulosisque granulis, pisorum instar, quæ foraminula in conductum evergen-

gentia commonstrabant, obfitos. Conductus cujusvis in introitu, ex sinistra, aliud aderat foramen majus, ad glandulam aliquam, nucem magnitudine, forma vero amygdalum referentem, quod conducebat. Cartilaginis cavitati superior utrinque aderat quidam quasi semitubus, cui impostum ligamentum fortius ex altera extremitatum ossi frontali cohærebat, ex altera autem plures in fibras divisum, proboscidis musculorum perpendicularium fibris immiscebatur. Interior nasus & odoratus organa immediata, cranio inclusa erant, pro more; nec nisi laminæ erant osseæ, tenuissimæ, spongiosæ, & eadem glandulosa membrana obtectæ, qua, ut in reliquis, nasi cartilagines obteguntur.

Proboscidem vero & singularissimum ejus organum, & sibi soli propriis actionibus destinatum, & singulari ratione constructam esse constat. Invenit autem transeunti & pro respiratione & pro odoratu, aeri; recipiendo item potui, & ad gulam deportando, ut supra diximus. Hæc igitur ex omni parti inflectitur, & jam produci, jam contrahi potest. *Galenus* omnes hæc proboscidis suæ actiones recensendo, causas earum miratur, nec explicat, binos saltem conductus, respirationi & odoratui inservientes describit. Fusior aliquantum *Aristoteles*, cartilaginosa dicit proboscidem; nos vero omnibus suis functionibus membranas saltem nervosas actendinosas, & carnem musculosa inservire, nec quæ aliis corporis sui partibus, ad edendos ejusmodi motus, necessaria sunt, ossa & cartilagines, in hac deteximus. Respirando itaque aeri, & accipiendo potui, duo sufficiunt conductus, proboscidis medium, ex longitudine occupantes, & finem versus, ubi angustissimi sunt, i. e. digiti latitudinem exæquantes; membrana insuper nervosa, tendinosa, lævissima, fortissimaque constructi, & proboscidis radicem versus dilatati, quo halitus impulsu, eo violentius eiiciatur liquor contentus; suum etiam conductuum extremitas strictior confert. Qui autem persuadere sibi velit, quod liquoris impulsio haud compressione peragatur & constrictione successiva, ut in œsophago & intestinis; is non nisi structuram organorum respiciat, & nullos in iisdem musculos inveniet, nec fibras carnosas, in circulum actas, compressioni autem perficiendæ necessarius foret ejusmodi situs.

Superiore autem in extremitate sua, radicem tubæ versus, occlusi conductus isti, primo sursum, postea deorsum reflexi, binos narium conductus intrabant, & liquori naribus adtracto conductus impetuosius ingredienti obtare videbantur; dum regiones hæc adtingens liquor & quasi percutiens, animal ne adtrahendo pergat, commonet, ne altius adscendens liquor nasum & odoratui inservientes membranas pertingat; eodemque tempore, relaxatis perpendicularibus musculis proboscidis, appendices nasi quæ sunt cartilagini, valvularum instar, ut diximus, nasi foramina, depressas, obtegere adparet. Bini igitur conductus, proboscidis ad longitudinem procurrentes, carne undecumque obvolvuntur, quam pelli inferius, membranofum obducit ligamentum. Omnes tamen, variæque proboscidis actiones, principalioribus duabus, productioni scilicet ac correptioni varianti absolvuntur. Quodcumque enim altera sui parte productum, altera simul corripitur, hoc in rugas abeat, necesse est. Duo itaque conductus, proboscidis corpus, una cum carne, cui involvuntur, constituentes, fibris gaudent sibi oppositis, & pro situ contrario, jam producendæ, jam corripien-

piendæ proboscidi inferentibus. Fibrarum aliæ etenim musculis constant, ex communi centro ad communem peripheriam tendentibus, extremitatis altera scilicet conductus membranæ nexis, altera autem membranæ, proboscidis involucri externo. Perpendiculares dicimus musculos istos, etenim cum conductu ex quo oriuntur, & cum membrana proboscidis externa, rectos constituunt angulos; alios parallelos nuncupamus, quippe qui quodammodo pariter distant & a membrana conductus, & externa, ab initio proboscidis namque ad finem, inter utramque procurrunt. Pars insuper perpendicularium, quos numerare nequis, pro copia, carnosa conductum spectat, tendinosa autem membranam exteriorē. Paralleli vero, & horum magna est quantitas, conductus ex membrana oriuntur, eidemque, 6. fere digitis inferius inferuntur, & horum quidem partem carnosam, exteriorē membranam versus spectare videbis; at tendinosam, conductus membranam. Ita autem dispositi conspiciuntur musculi paralleli, ut medio suo ventre coherentes musculum efforment majorem, ac quasi corrigiam 1. ad 2. lineis crassam, 8. ad 10. latam, & per totam proboscidem pertingentem. Tendines tandem musculorum oblique insertas conspeximus membranæ interiori, conductum efformanti, superioris scilicet ex dextra, inferioris autem ex sinistra directionis musculorum coherentium. Quivis itaque musculus parallelus seu compositus verticalem tenet situm, & basis ejus perpendicularem, conductui insistentem. Plures autem adsunt, quotquot nempe constituendæ proboscidis capacitati sufficiunt, hujusmodi musculi, sibi invicem adjacentes; & quadam membranâ, tendinibus perpendicularium musculorum composita, separati. Exiguorum vero musculorum, quemvis musculum parallelum compositum efformantium, tendines, in ipsa parte carnosa perpendicularium, conductui tendines recipienti vicina, delitescunt. Omnes insuper exiguos curvos esse memento, adhæret etenim utraque eorum extremitas membranæ interiori, conductum effingenti; cohæret venter membranæ externæ proboscidem obtegenti; Conservat autem curvitatē suam agendo; quum enim operante adtractione corripitur, si curvitatē amittere posset, ante adtractionem explanandus esset; ut chorda trochleæ supertensa, nisi vi hujus curvitatē conservaret, adtractioni nulla sufficeret. Musculus itaque curvam figuram retinet, non solum ideo, quia membranæ proboscidis exteriori venter ejus cohæret, sed etiam idcirco, quod membranæ necitur musculorum perpendicularium tendinibus compositæ, parallelos, ut diximus, separanti, & ventrem sustentando, pro trochleâ cordam suffulciente venienti. Quibus præstructis, facile intelligitur, quam ratione jam corripitur proboscis queat, jam produci. Agentibus scilicet musculis perpendicularibus omnibus, membranam nimirum exteriorē admoventibus, conductus autem membrana aliis aliis musculos adpropinquante, sicque decrescente crassitudine carnis, binis membranis intermediæ, in longitudinem ut excreseat necesse est; en proboscidem elongatam. Cessante item musculorum actione, & parallelis omnibus agentibus, partes membranæ quæ conductui est, quibusque tendines coherent, sibi adcedunt, & proboscis corripitur; imo prout hinc inde agunt musculi, variæ exoriuntur proboscidis contractiones, tamquam causæ diversissimarum ejus inflexionum. Hic autem notatum volumus, quod quum duplex ratio producendæ proboscidi sufficere possit, scilicet vel fibrarum

cir-

circularium actio, (quæ spincteris instar agendo, proboscidem comprimendo producere valerent) vel fibrarum perpendicularium: natura has potius præoptaverit, illæ enim contraxissent conductus, qui & respirationi, & liquoribus ibidem collectis & ad rictum deferendis pateant necesse est; hæ autem membranam, proboscidis vaginam externam intus recipiendo, simulque membranam conductuum foris protrudendo, illos dilatant potius quam constringunt; constrictio enim ad producendam proboscidem necessaria non nisi in carne, conductum & vaginam intermedia, accidit. Quæ quidem, ut clarius mente tibi sistere possis, cornu venatorii constructionem cogites. Tubum scilicet cupreum, ab initio rectissimum, ne reflexione ac incurvatione iterata, latera ejus sibi admota, angustiores reddant, plumbo liquefacto explent; hoc enim sicut complicati tubi coarctationi obstat, & latus alterum longius, alterum vero brevius reddit ac crassius: sic musculorum perpendicularium tractus, conductus latera, ne sibi accedant, impedit, & hæc producit, illa crassiora reddit ac recipit, dum cornu instar bis circumvoluti, elephantis nostri, libere respirantis proboscidem diutissime inflexam vidimus.

Plura insuper singularia ac notatu dignissima commonstrabat elephantis sceletum. Ossa ejus omnia, a dentibus falcatis, substantia differre cognovimus, nec ebori conficiendo ut alii censent, sufficientia. Cranii longitudo 2. pedibus & 4. digitis, latitudo autem 2. totidemque altitudo absolutebatur. Nec ossa separantes deteximus futuras multum conspicuas, nec, ut plurimum, dentatas, sed rectas, plurimumque imperfectas, nulla enim earum quæ incœperant, continuata perficiebatur. Omnium perfectissima erat Lambdoidæa. Sic os templorum futura transversali medium dividebatur; crustacea, parietariæ alias nexa, nulla adparebat; substantia sua saltem solidissima & templorum in ossibus lævissima, in parietaria tandem pluribus iisque minutissimis poris perforata, ossa utraque distinguebantur. Magna cæterum cranii erat crassitudo, 7. digitorum scilicet in fronte, $7\frac{1}{2}$. occipitis ex lateribus ac $3\frac{1}{2}$. in dextro templorum. Duplici autem superficie, tabulis scilicet vix $\frac{1}{2}$. lineam crassitudine pertingentibus, continebatur cranium. Interiore tabularum in parte folia vidimus ossea, dura, ac subtilissima, varias foveas magnitudinis variæ constituentia. Cranii igitur crassitudo insolita prorsus inutiles reddebat futuras, quippe quæ fracturis, ne nimium in longum procurrant, impediendis, vasis insuper transmittendis inservire creduntur; Fissuris saltem cranii, mortem animalis promoventibus obstat, imo crassitudinem pro causa habemus, ob quam teste *Lucano*, sagittæ nec sanguinem ex fronte ejus eliciunt, nec periculosum vulnus infligunt, nec enim membranas neque cerebrum offendunt, sed poros saltem cranii spongiosos ingrediuntur. Lævius etiam vulnus esse solet cranio, dum reliquorum sinuum in regione infligitur, os enim ibidem duplex, cavitatem constituit, cui nulla pars principalis includitur. Alii tamen conflictantes nonnunquam elephantos sua invicem capita ictibus sibi frangere docent. Quanta autem sit fortitudo partium, elephantis cerebrum undequaque circumdantium; medium tamen occipitis osse vix $\frac{1}{2}$. lineæ crasso munitur, ideoque vel levissimum hujus loci vulnus mortem animali adfert. Quapropter etiam, si fides auctoribus, elephantis rector, fossam in occipite furentis obviam, clavo perfodere solet, ut repentina morte sa-

vientis furorem impediat. Binæ autem fossæ aderant in osse cribroso, eæque haud adeo profundæ, rotundæ, $1\frac{1}{2}$. digitorum latæ, ac spatio distantes, multis insuper iisque jam minoribus jam majoribus foraminibus perforatæ; figura autem sua rotunda & magnitudine propius cribro accedebant fossæ, quam in ullo animalium. Nec tamen orbita, ut in quibusdam, in extremitate, occlusa, & loco tertii ossis in maxilla superiore reliquorum, os aderat in elephanto maximum, 14. digitorum longum, & 6. latum. Bina inter se juncta falsam constituebant ovalem, nec nisi per $1\frac{1}{2}$. digiti spatium excavatam, ac proboscidis basin complectentem. Dentes elephanti falcatos, quos templorum ossibus infixos esse perhibet *Cardanus*, nos iisdem ossibus, quibus proboscidem, inhærere vidimus. Ossium scilicet in extremitate foramen adest $3\frac{1}{2}$. digitorum latum, idque constituit orificium canalis profundioris, & $13\frac{1}{2}$. digitorum longi, & huic insitum reperies dentem, canalis fundum pertingentem, canalem denique ipsum lamina tenuissima, ac quasi chartacea compositum, multis præterea foraminibus perforatum. Imo dens ipse quatenus canali erat reconditus, excavatus, in cavitate sua, aliqualem præbebat carnem, laminæ canalis fundum obturanti, connexam. Hanc *Aelianus* palato bonam dijudicat; nos autem superficiem ejus, (cujus ope dentis cavitati ad longum cohærebat) indurescentem & quasi osseam deteximus. Quæ quidem quodammodo sententiæ subscribunt illorum, qui dentes falcatos elephanti, ut cervi cornua excidere dicunt & renasci; dum duritiem istam, germinantes habeas dentes renascentes. Huic tandem maxillæ superioris ossi inferiores vidimus binos utrinque dentes, illosque magnitudine diversos. Anterior longissimus atque latissimus, altitudinis respectu autem minimus, 4. digitorum longus, $1\frac{1}{2}$. latus, $\frac{1}{2}$. anteriore & $1\frac{1}{2}$. posteriore sua parte altus; alter vero sive minor 2. digitis longus, $1\frac{1}{2}$. latus, $2\frac{1}{2}$. digitorum altuserat. Basis horum omnium, qua manducando colliduntur, explanata, & lævis, ac collisione quasi lævigata dum videbatur, dentes ipsi duplici quasi ex substantia, altera albida, altera autem cinerea, constabant. Dentum majores septem, minores autem duobus ex frustulis compositi adparebant.

Partes maxillarum inferiorem, illamque ponderosissimam constituentes, binæ plerumque in brutis, in elephanto pariter ac in homine unitæ erant, crassissimæ & undecumque spectatæ 3. digitos exæquabant. Os enim illud rotundum, nec ut alias, explanatum; & maxilla ipsa superiore quidem brevior, 2. tamen pedum longa erat, totidemque digitorum; 14. nempe digitis ab angulo ad menti extremitatem, & 12. ab angulo ad articulum ejus, longitudo sua absolvebatur. Mentum in cuspidem exhibat 2. digitis longam, & tribus angulis, altero infra, binis supra, instructam. Dentes tandem, superioris dentes & substantia & numero referebant, longissimæ tamen in hac anteriores, in illa autem erant posteriores. Et *Plinius*, 4. omnino ad manducandum dentes esse docet elephanto.

Septuaginta circiter abhinc annis ossa quædam Parisiis exposita fuere, quæ magnitudinis suæ ergo, alii ex gigante, alii ex elephanto credidere. Nec tamen integra, sed frustatim conspecta, inquirentibus dignoscendi laborem exasperabant, accedente forsan exactæ ossium elephanti cognitionis defectu. Variis eo tempore in scriptis delineabantur, & quod inter alia aderat maxillæ inferioris fragmentum, ex elephanto profectum loquitur & cras-

crassitudo sua, & rotunda figura, loquitur & menti extremitas cuspidata, elephantis maxillæ propria, quibus ab humana dignoscitur. Nec tamen mentio facta est eorum, quæ plurimum ad decisionem facerent, num scilicet, pars cuspidata dentibus caruerit, nec ne, elephanto etenim nec incisorii sunt, neque canini. Ossa igitur ista ex elephanto fuisse, omnibus illius temporis Anatomix cultoribus obloquitur *Riolanus*, qui nullum unquam elephantum vidisse sese fatetur, sed ab exigua similitudine ossium istorum cum humanis argumentum deducit.

Spinæ longitudo 10. absolvebatur pedibus & 2. digitis, colli vertebrarum 1½. pede, dorfi, lumborum & ossis sacri, 5. caudæ tandem 3. pedibus & 8. digitis. Septem erant vertebræ colli, quarum binæ priores humanis similes, secunda autem apophysi odontoidæ instructa & exigua, spinosa denique 3. digitorum diametri, fortissima erat ac fere rotunda. Quinque reliquis vertebris quæ erant apophyses spinosæ, longitudinem præbebant inæqualem, & brutorum more, prout vertebris dorsalibus accedebant crescentem, reliquæ apophyses exæquabant humanas. Viginti thoracis vertebrarum apophyses spinosæ longissimæ, corpore suo, 3. digitorum longo, tres efformabant angulos, quorum unus capiti erat obversus, & in extremitate cuspidem præbebant. Trium insuper vertebrarum, lumborum apophyses transversales, exiguæ, spinosæ explanatæ, ac quadratæ erant. Nec os unum, ut in homine constituebant, tres sacri ossis vertebræ, nec quibus jungebantur, cartilagines, ossream induerant substantiam. Caudæ 31. vertebræ, & 20. erant costæ, quarum 7. veras numeravimus, sic dictas, quia immediatæ sterno cohærent earum cartilagines; magis tamen incurvatæ, quam in aliis, ampliorem, nec adeo cuspidatum reddebant thoracem. In inferiore costarum parte sinuositatem quamdam plerumque observamus, recondendis vasis, ibidem transeuntibus inservientem; præter hanc itaque aliam vidimus in parte superiore, illa profundior, ast non nisi dimidiam costam pertingentem. Sic & sternum, tribus quasi partibus constans, & adhuc cartilaginofum, substantia sua appendices costarum cartilaginosas referebat. Cartilago xiphoidis 2. digitorum longa, recta erat & crassa.

Omoplati longitudo 22. digitis, latitudo, 15. absolvebatur, nec in summo, ut solet, sed in medio fere, ubi angulum efformabat, latissimum spinam præbebat, binis apophysibus instructam, altera illaque anteriore, & acromii locum tenente, fortiore & crassa, altera tenuiore & cuspidata paululum foras deflexa. Os scapulæ 2. pedibus & 3. digitis longum, in exteriori capitis parte magnam exhibebat apophysin, in medio autem explanatum, statim evadebat latissimum. Cubitus 2. pedum, radius vero ne 3. quidem digitorum longitudinem adtingebat, longissima enim erat apophysis olecranon. Ita tandem inter se jungebantur ossa prædicta, ut motui diverso, pronationi & supinationi inservienti, haud locus supersit. Radius cubito oblique superjacens, & octo carpi ossa binis ordinibus disposita erant; ordinis primi anteriora duo insuper radio & cubito articulis nexa, posteriora duo autem a se invicem distantia, superiorum musculorum pedis anterioris tendinibus transitum permittendo, ligamentum annulare ut sustentarent, ulterius producebantur. Quatuor autem ossa secundi ordinis metacarpo & pollicis articulatim cohærebant, & ita quidem, ut tria exte-

riora, quatuor metacarpi ossibus, quantum vero interius, pollicis, non nisi duobus ossibus instructo, jungebantur. Ossa ilea, lumbos reliquorum versus plerumque adscendentia, in latitudinem tantum procurrebant, & ut in homine, haud ultra sacri ossis altitudinem elevabantur. Duorum saltem pedum spatium intererat ab altera ad alteram cujusvis ossis ilei extremitatem. Et femur, uno tantum, magno scilicet trochantere instructum 2. pedibus & 9. digitis longum, & magnum, magisque solito depressum ejus caput, & rectum, nec ex latere, ut in homine, ossi superjacens, collo destitutum immediate ossi neceebatur. Ex hac itaque diversissima conformatione ossis lumbi brutorum & hominis, clare satis adparet, quod elephantis non hominis sint ossa maxima, hinc inde obvia; fraudis ergo etenim non nisi ossa lumborum commonstrare solent, majori similitudine ac reliqua humanis accedentia, 19. digitis crurum ossis longitudo, totidemque peritonæi absolvebatur, & tarso sex saltem ossa erant, tertio, cunei formam referentium deficiente, & cuboidæo latissimo illius defectum explente. Ossa 4. modo erant metatarso, digiti autem cum pollice, ut in pedibus anterioribus, omnes nempe brevissimi, etenim & carpus, metacarpus & digiti, imo tarsus ac metatarsus una cum digitis, nondum 9. digitorum longitudinem adtingebant.

Quivis autem digitorum ossibus sesamoidæis, magnis, ac digitorum ossa fere exæquantibus instructi erant. Magnitudine insolita ducti adcuratius disquisivimus, & quinam verus sit eorum usus conjecturam fecimus. En! quæ observare licuit: superficiem, qua digitorum ossa tangunt, lævissimam; periostrum nullum neque in hac, nec in illa ossis digitorum regione, cui quodvis ossium superjacet sesamoidæorum, sed vaginam saltem cartilaginosa, qualem in articulis observavimus; alteram eorum superficiem, qua muscutorum tendinibus neceuntur, asperam & hirsutam; eadem tandem omnia & genu in rotula. Hinc concludimus, eundem quidem esse ossibus sesamoidæis & rotulæ usum, nec tamen hunc, quem vulgo censent, scilicet ut articuli corroborati, a periculo luxationis muniantur; sed ossicula ista muscutorum tendinibus agentibus inservire censemus, siquidem musculi ossiculis, tamquam trochleis, superjacent. Ut enim trochlearum usus præcipuus is est, quo minori adfrictu deterantur funiculi transeuntes, cujus ergo etiam funiculos trochleæ quasi adhærentes, unaque cum illa circumactos videbis nec trochleæ sese circumvolventes; sic etiam musculi tendo ossi sesamoidæo adhærens, os digiti, cui innititur, transit, nec tamen adfricatur; non enim nisi in ossa ulla adfrictio cadit, quæ hujus ergo lævigata, & articulorum instar, periostrum destituta observavimus. Ita quoque latior tendo, musculis cruris extensoriis constans, rotulæ jungitur, hanc enim postquam transierit, superiorem partem intrat ossis cruris, & tendine agente, rotulam adtollit, extenso cruri cedentem, & inflexo, descendentem. Quapropter etiam cavitationem anteriorem in medio articuli, cujus ope lumbi cum osse os cruris cohæret, ampliore videbis, quam pro adservanda rotula requireretur, crure licet quantum potest, extenso. Rotulæ enim jam sublata, jam depressæ spatium concedere necesse est, concedit autem tam ampla capacitas. Ex quo adparet, haud illum, quem volunt, usum esse rotulæ, quod scilicet corroborando articulo, & impediendæ luxationi veniat, seu nimix flexioni antrorsum. Qui

si foret, omnem capacitatem ut rotula expleat, genu, quantum potest, extenso, necesse esset; sic enim olecrani apophysin, cubito longissime extenso, omnem cavitatem in inferiore humeri parte obviam, explere videmus. Imo & rotula vel cruris vel lumbi ossi firmiter ut adhæreret necesse esset, sic enim apophysis Olecranon cubiti ossi contigua cohæret. Rotula enim mobilis, nec omnem cavitatem, qua continetur, explens, qui corroborando genu inservire possit, nulli videmus. Quidquod brutorum genua, eadem qua hominis, rotula quum gaudeant, ne quidem eget robore aliunde accedente etenim semper plicata videntur, nec unquam lineam rectam, ut in homine & elephanto, os lumbi constituit cum osse cruris. Omnestandem epiphyfes faciles ab ossibus separabantur, licet maximæ erant inæqualitates, quarum ope ossa epiphyfis necebantur.

Mens fuit ab initio, descriptionis fusioris epitomen saltem coarctatam tecum communicandi, L. B.; ast totam tradere maluimus, quam eorum quidquam omittere, quæ grata credidimus & utilia anatomix studiosis. Ultro excusatum habemus Cel. *Raium*, qui in *Epitome Medica, de quadrupedibus*, multus est in descriptione elephantis; hinc etiam, & si dictorum gravitatem, & methodum nostrum considerabis, veniam eo faciliores nos impetraturos esse, imo L. graviori gratum egisse, speramus.

Pisces inter balæna, ex avibus struthio, & quadrupedum maximus jure dicitur elephas, decem plerumque pedum altus, vel, teste *Julio Cesare Scalligero*, 16. ad 19. nonnunquam; quod creditu est difficillimum. Pondere suo 3500. libras communiter explet; & summam fortitudinem pedibus ejus inesse, *Plinius* testatur, ac fulcra potius quam crura referre. Hinc, quod juncturis careant; quod pedibus insistens elephas, & arbori adnexus, somnium capiat; quod illum captaturi arborem serra transcendant, quo recedente fulcro humum prostratus, resurgere nequeat. Nec nova sunt, sed jam ab *Aristotele* tradita, ex quo & *Diodorus Siculus*, & *Strabo*, & *S. Ambrosius* & *Cassiodorus*, aliique hausere. Erroris originem, crurum figuram cylindricam habemus, quæ obstat, ut juncturæ, præsertim anteriorum, distinctius incurrant in oculos; accedit juncturarum differentia a juncturis brutorum, & cum humanis similitudo; haud enim retrorsum crura sua anteriora reflectit elephas, sed paullulum deflectit ex latere sive invertit, posteriora autem aliquantulum evertit; quadrupedum vero reliqua, ut equus, camelus, dama, canis, agnus, anteriora, hominis more inflectunt, & posteriora ita, ut nos nostra brachia, humeros versus tendentia. Juncturas, nostris magis accedentes, in ranis, lacertis, crocodilis, iisque omnibus observamus, quæ pedum auxilio cibum admovent ori, ut plura eorum quæ claviculis instructa, ampliori pectore, strictioribusque humeris gaudent, uti simia, cicurus, aliaque. Verum itaque profitentur, qui elephantis juncturas haud adeo, ut in reliquis quadrupedum adparere dicunt; ast qui omni junctura illum carere perhibent, veritati, sensui & rationi obloquuntur. Nec fidem adhibeamus *Plinio*, qui tergo obverso, camelorum more, docet coire elephantos. Obstat enim partium genitalium dispositio, quam vidimus, obstat fide dignissimum testimonium, quiequorum instar, illos coire viderunt. Numquam ciborum abundantia se opplet elephas, & diutiorē sic vitam conservat; & testibus quibusdam, vel trecentessimum vitæ annum pertingit, quinto pubescit masculus ac decimo

foemella. *In tentaminibus suis de erroribus popularibus* Vir Cel. *Thomas Brown* centum usque annos elephantum vivere perhibet, & integrum per annum utero gerere, nec nisi vigesimo, in debitam sibi ad magnitudinem excrescere. Ast dubia sunt. Suam denique cuivis elephanto foemellam sufficere, illumque corivalis impatientissimum, foemellam coitu imprægnatam haud amplius adpetere dicunt Indi; & *Derham* in *Physio-Theologia*, *Transactiones Philosophicas* sequutus, uberum papillas in elephanto, pectori proximas esse ait, siquidem mater ipsa proboscidis ope ut lac exsugat, exinde autem hinnuli ori immittat necessarium censet. Nos vero & de hoc dubitamus & de illo, quod hinnulo ad octavum vitæ annum usque ubera præbeat mater.

Patriam sibi agnoscit Indiã Orientalem, & in primis Pegu & Siam regna, Ceylon insulam, & quasdam Meridionales Africæ provincias, ut Congo, Abyssiniam & Æthiopiam, quos vero India alit, omnes illi reliquos & fortitudine & magnitudine superant. Nullus ante *Alexandrum M.* in Græcia, & infrequentissimus Europæ in regionibus, præ primis Septentrionalibus, etenim & patriæ amantissimus est, & frigori perferendo impar, & natura ferus ægre capitur, & ætate provectus difficilior cicuratur; facilior tamen masculus, quam foemella. Nec tamen nisi irritatus, damnum inferre solet. Ast provocatus ad iram, proboscide, tamquam manu sese defendit, illamque serpentis instar, jam extendit & ejaculatur, jam corripit, jam hominem, si quem arripiat, eo usque proicit, quo lapis funda emissus pertingere potest. Ne fuga quidem salutem reperies, nisi motibus tortuosis, seu cursu deflectente, furorem ejus eludere possis; passuum enim valde distentorum ergo, recta via procurrendo vel equi alacerrimi cursum superabit. Quo minor fuerit ætate, eo magis furorem ejus extimescas; cæterum plus carnis uno inest elephanto, quam quatuor bovis. Nec non pro instrumento defensionis dentes illi veniunt falcati, maxillam superiorem egredientes, & magnitudinis ratione, ætati animalis respondententes. His enim jam frangunt arbores, jam extirpant. Noctu interdum villas ingrediuntur, & si quæ forsan tuguria fuerint obvia, ut nucis cortices conterunt, sic loqui liceat cum Viro Cel. *le Maire*. Herba plerumque & frumento vescuntur, quorum defectum arborum folia explent ac rami, & arbuta, & cujusvis generis fructus atque grana. Famem perferre posse dicuntur, & vel octo ad decem per dies cibo omni carere; ast ubi abundantius sit alimentum, lautius vivunt, ut damna Indorum agris illata loquuntur. Quotidianum elephanti unius nutrimentum, integræ hebdomadis spatium triginta homines satiaret, ne supputata quidem copia, pedibus incedentis contritorum. Hinc quoque summa cum cura agris illos exterminare student Indi, die agunt excubias, noctu ignes accedunt. Tabaci agros autem devastantes, gulæ pœnam vel ebrietate luunt, quam histrici quos edunt, motus ac gestus loquuntur, vel sopiti ab Indis enecantur. Nec nisi pedibus perturbatam hauriunt aquam, cameli instar & porci; & agminatim, quinquagenis ad sexagenis silvas transire solent, neque tamen, nisi ad iram provocati, hominem lædunt. Sunt qui transmigrare dicunt elephantes, & domicilia commutare & pascua, transmigraturos autem, ad fluminum oras præsertim in agmina coire, & animo illos esse forti, ac corporis moli respondentem, imo cohortatim incedentes,

ne quidem extimescere adgressus Indorum, qui nisi multum accedant, vix quidquam contra illos efficerent, pelle sua vel globulis sclopeti resistente. Cæno aliquoties, refrigerationis ergo, reclinant, & prætereuntem nequidem respiciunt, nisi vel sclopeto, vel ictu percutiantur; tunc enim irritati, acerrimi evadunt hostes, ac evitatu difficillimi. Lentiores autem, si nimio timore perterriti in fugam sese recipiunt, recedunt, & infixis oculis sibi molestum intuentur, tum bis terve edito clamore, qua cœperant via pergunt. Nautæ quidam Gallici, fluvium ascendendo elephantum conspexerant cæno immersum, & prædæ fiducia, quum multum accedere nequirent, sclopeti ictibus petendo ad furorem concitabant. Vindictæ ergo, quum nil posset aliud, aquam cœnosam proboscide contractam, imbris instar cymbæ obiciebat, illamque explebat adeo, ut, nisi repentina fuga recessissent, aquæ copia depressa cymba submersa fuisset; fluxu tandem maris, brevi succrescens aqua, elephanto nando ripam petenti sufficiebat. In itinerario suo *Atkins* natantem elephantum celerius provehi docet, quam cymbam decem remis actam. Frequentissimos autem elephantos in ora, quam eboris dicunt, reperies, frequentes & in illa quam auri oram appellant, eo enim ex medio desertorum ad ripas fluviorum confluunt, & quo parcius hominum in regione aliqua est numerus, eo copiosiores ibi feras videbis. Teste tandem *Historia itinerum universali*, terras, quas elephantis inhabitant foveis profundissimis perfodiunt Indi, has autem frondibus obtegunt. Prolapsum igitur eo elephantum multiplici instrumentorum adparatu enecant, corpus venatoribus dividunt, pelle scamna sua & sedilia induunt, caudam vero regi offerunt pro munere, qua ille pro flabello ad abigendas utitur muscas. Sic & qui Bamba, regionem, colunt, elephantum cicurandi artis experti, facillime vivum captare callent, fossas scilicet, ut diximus, ore latas, fundo autem strictiores effodiunt, ac fronde obtegunt. *Lopez* est, qui *Avanza* in oris juniorem elephantum, in foveam ejusmodi prolapsum sese vidisse scribit. Hunc ætate provectiores ut protraherent, quum & arte & viribus frustra tentassent, foveam terra opplebant, ac si enecare eum potius & sepelire, quam venatorum prædæ relinquere maluissent; nulla quidem ratione habita, nec Indorum spectantium numeri, nec illorum clamoris, nec armorum, nec ignis sibi objecti timore. Alibi autem variis insidiis decipi solent atque captari. Quum igitur agmen elephantorum prodierit, venatorum unus, corpore, illorum stercore illito, ast hastam manu tenens agmini sese immiscet, tum ventrem alicujus subrepens, alterum sub aure ut percutiat, quærit. Inflicto vulnere, antequam lædentem cognoscere possit elephas, aufugit, & stercoreis odore reliqui omnes decepti, iter suum continuant, sociumque venatori in prædam relinquunt. Quum autem vires vel pro defensione, vel ipso hostis adgressu sufficientes adhuc læso supersunt, tortuose deflectente via sese recipiat necesse est venator, usque dum vires cum sanguine & vita omnes amiserit animal. *Dapper* est, qui observat, vulnus persentientem elephantum, nihil inexpertum omittere, quo mortem inferat hosti, quo facto neutiquam cadaver lædere, sed statim fossam pro sepulchro effodere, concinne satis eo reponere, ac fronde tandem obtegere. Cautissimi autem, periculosa hac venatione qui occupantur, vulnere inflicto, diligentissime sese abscondunt, post animal insequuntur e longinquo, & auge-

augescere sensim ejus debilitate, ac incessu lentiore, jam novis feriunt vulneribus, morti tandem proximo adpropinquant & prorsus enecant.

Hostibus suis, præter homines, & tigros adnumerat & leonem, præ aliis autem rhinocerontem, de quo infra dicturi sumus; secessum enim facimus ab opinione Cel. *Linnei*, qui in *Systemate naturæ*, rhinocerontem elephantis speciem esse ducit.

Nec ingratum Naturæ studiosis censemus, quæ de duplici venatione, Regis Siam, jussu instituta, quibus & Abbas *de Choisi*, & R. P. *Tachard* interfuere, subnectimus, ea enim omnia comprobabunt, quæ ab *Aeliano*, *Arriano*, *Plinio*, *Strabone*, *Philostrato*, aliisque relata retulimus.

Matutinis hodiernis horis, sic in *Diario itineris in Siam*, Abbas *de Choisi*, elephantis venationi, spectaculo regio, interfuimus. Circus maximus viginti ad minimum milliaria, circumferentia sua capiebat. Duplici ordine accensum vidimus ignem, nocte tota, & denis passibus, binos homines hasta munitos. Alii ex aliis prodibant elephantes bellum edocti, aliaque post alia tormenta bellica minora. Circum armati intrabant, ac sensim sibi adpropinquando constringebant. Tandem elephantes, & tormenta, igne efferatis adhuc elephantis adeo accedebant, ut laqueis pedes eorum irretire possent. Irretiti ex lateribus adstant elephantes edocti, & captivitatis indociles dentium ictibus ad patiendum commonent, nec tamen lædunt. Horum alii captivos insequendo protrudunt, quos funibus undequaque homines irretiunt, tum ipsis residentes palo eoque adligant, quo omnem ferocitatem exuerint. Viginti circiter, nobis præsentibus, hac ratione capiebantur, rex autem, venationis hujus obsoletæ restaurator, edocto elephanto vectus, jussa edebat; cui duo millia elephantorum bellum edoctorum, & 45000. milites esse, ex Viro *Constantio*, regis a consilio, acceptum habeo.

Quarto unius milliarii spatio a *Luve*, sic P. R. *Tachard*, quoddam reperiens amphiteatrum, quadrati oblongi figura, & muris altissimis, quibus spectatores insistere solent, circumdatum, his interiores palos in terram defixos, & 2. inter se pedibus distantes videbis, post quos venatores sese recipiunt, insequentibus elephantis irritatis. Campum spectat amplior spatii hujus introitus, pagum vero respicit illi oppositus alter, strictior, illeque in strictiorem adhuc porticum conducens, elephantis moli vix sufficientem, & in stabulum, quo domari solet captus elephas, exeuntem. Venationis ergo, venatores arborum frondibus obtecti, elephantis foemellis insidentes, silvas intrant, tum foemellas, ut quosdam clamores edant, incitant, his autem mares adhuc feri respondent. Audita igitur horum voce, venatores revertuntur, mares autem foemellam insequentes, ipsum denique porticum intrant; tunc introitum ejus occludi vidimus, foemellas autem amphiteatrum transeundo, angustiores denique ambulacri partem ingredientibus; hujus in initio gradum quum sisteret masculus, vario modo ut pergeret, incitabatur. Sic foemellas, ex altera jam parte constitutas ad edendos clamores excitabant, & manuum plausibus, ac multiplici: *Past*, vocis, clamore, ac hastis cuspide ferrea instructis irritabant, tum vero post palos sese recipiebant. Unus ex his studio remanserat, qui dum obvium sibi elephantem conspexerit, angustiores porticum fuga petiit; premens tandem ejus vestigia elephas, duabus sese cataractis, eo tempore de-

missis, intermedium vidit atque captum. Tum vero nec recedendi, nec progrediendi, nec obvertendi locum reperiens, horribiles edidit clamores, & summa vi libertatem & exitum tentavit. Leniendæ captivitatis ergo, aquæ quantitatem corpori ejus adfundeabant, & oleum auribus, & foliis eum adfricabant, & elephantes utriusque sexus alios adducebant, proboscide illum demulcentes. Interim funibus ventrem & pedes posteriores cingebant, quo tractui obsequeretur. Post accersitus elephas cicur, captorum magister, hominis quem dorso gestabat, instinctu, jam progrediebatur, jam recedebat, ut recenter capto seu adhuc fero, exitus rationem & modum indicaret & timorem adimeret. Tunc cataracta aperta ferus cicurem sequebatur. Post duos ex latere elephantos alios ipsi jungebant, tertius vero antecedens fune ligatum, quocumque post se trahebat, & quartus illum excipiens, proboscidis ictibus ad stabulum usque adigebat. Ibi columnæ sese circumagenti, ad posterum usque diem adligabatur. Et dum columna nexus, sæviendo circumferretur, Brachmannorum unus, veste candida indutus, ac alio elephanto vectus, aqua suis ritibus consecrata, ex vase aureo, illum adspergebat. Sic cum ferocitatem exuere, & regis servitio adaptari censebant; postridie aliis junctus incedebat, & xv. dierum spatio cicurabatur.

Nec obstat moles elephanti vastissima, (quapropter ab aliis mons ambulans & animatus dicitur) quo minus industriæ ac docilitatis suæ ergo, hominis intellectui quasi accedat. Tanto enim adfectu & gratitudine est in sui magistrum, ut mortuo hocce vel macescat præ tristitia. Quem si furore abreptus forsan læserit vel enecaverit, dolore succedente vel mortem sibi inferre voluisse constat. Voces hominum seu jussa intelligit, & quæ didicit, memoria retinet. En! quæ Pekingiam transiens quidam, stabulum, quo Imperatoris elephanti adservantur, lustrando, observavit. Hi magistri sui jussu, jam tigri atque leonis, jam equi, jam tauri voces, jam oscinis Canariensis cantum, jam tubæ sonitum imitabantur. Postea legatum salutabant genibus flexis, & jam huic jam illi lateri inclinati, tandem terra resurgebant. Humum sese prostraturi, crura anteriora & posteriora extendebant, ac sensim ventre terram adtingebant. Singularis autem omnium erat magnitudo, & quorundam dentes, 6. pedum longi. Sinen-
sum Imperatori, annui tributum titulo, ab rege Siami venerant. Camboyæ regi, sic in itineribus suis *Vincentius le Blanc*, 50. circiter sunt elephanti, quorum nonnulli pretiosissimo adparatu instructi, quovis mane regem salutare edocti sunt. Hi stabulo elegantissime picto detinentur, & pabulum ex argenteis patinis hauriunt. Nec vocis sono asperiore, vel increpationibus, sui magistri in illos invehuntur, sed moderatioribus ac fere obsequii plenius vocibus eos tractant. Tantam præter ea rationem possidere videntur, ac ita prompti jussa intelligunt & explent, ut præter verba proferendi facultatem, nil ipsis deficere crederes. Quatuor elephantes candidi, illic fortissimi, sic ille pergit, sunt Regi Peguensi, quos exspatium, curru suo, quem *Telanzin* dicunt,nectere solet. Hunc quondam rhedarium suum, seu *Nangis*, accersisse conspexi, & currus præparandi curam ipsi injunxisse. Statim elephantis ex istis bini prodibant, quorum fortitudinem quum Rex, præsentis *Souaci* principi, illos laudando exposuisset, alter statim revertebatur, & brevi exinde totum regis *Telanzin* cum adparatu suo

fuos dentibus adportatum leniter in terram demisit, quamvis 5000. libras pondere expleret. Rex autem industria ejus delectatus, denas sacchari libras nutrimento suo quotidiano addi voluit. Præcipuo illorum cibo oryza lacte elixa venit, & singulis quinquagenæ circiter libræ per diem subministrantur.

Philostrati & Plinii ex testimonio, ita edocebantur elephantum, ut Rege suo conspecto, illum genibus flexis, more Orientis venerarentur. Acerrimi Indiarum regum defensores erant in bello. *Porus* elephantum vectus dicitur, qui si credere fas est, dominum suum telis perfoctum deficere quum senserit, levissime ad terram reposuit, ac tela ex vulneribus protraxit, adaucto autem sanguinis profluvio, iterum dorso exceptum ad suos reportavit. *Aelianus* Indorum principi cuidam candidum fuisse refert elephantum, qui curam domini singularissimam, reiteratis amicitiarum documentis retribuebat. Rex audita ejus præstantia, a principe illum expoposcit, qui Regis desiderium abnuens, & negatæ voluntatis poenam extimescens, in montes aufugiebat. Regis jussu eum insequiebantur, is autem rupis præcipitium occupaverat, obsidentium ictus declinabat, & lapidum ictibus illos lædebat, imo socium defensorem habebat elephantum, qui accuratissime lapidibus capita infestantium petebat. Milites tandem rupis in fastigium quum enixi essent, medios in illos furens irrupit, hos proboscide humum prostravit, illos contrivit, alios abegit, & dominum vulneribus confossum, dorso excepit ac in asylum reportavit. Argum ingrediente *Pyrrho*, militum quidam elephantum vectus, graviore vulnere confectus, in terram prolapsus est. Tunc elephas dominum amissum, copiam inimicorum evertendo quæsit, quem quum invenerit dorso suo imposuit, ac summo cum furore, quævis obvia pedibus conculeando, urbis portam repetiit.

Præter hunc humanitatis instinctum, tantas etiam vires in elephantum observabis, ut terrestrium omnium hunc dicere possis fortissimum. Olim etenim præliandi artem edocti, hostes terrore, & exercitum confusione opplebant, dato adgressus signo. Audito scilicet tympanorum sonitu & tubarum clangore, vel effusi sanguinis horrore, vel adspectu liquoris huic similis, ut uvarum succi, furentes inimicorum ordines penetrabant, & quocumque vestigia verterint, eo terrorem, confusionem ac mortem conferebant. Majori adhuc timore equos, & hinnitu suo terribili, & odore opplebant, illi enim progredi detrectabant, & alii alii ascendendo, equites excutiebant. Unicus tantum erat *Cæsari*, cum Brittorum rege, ad *Cassanottan* conflictanti, ille tamen omnem hostium exercitum evertit. Hic enim præcipuus elephantum in bello usus erat apud Persas, Syros, & qui hos imitabantur, Romanos. Nonnunquam & turres altissimas, plurium contrabulationum dorsis illorum superstruebant, ac sagittariis metæ adtingendæ peritis opplebant. *Antiocho Eupatro*, Syriæ regi, cum *Juda Maccabæo* prælianti 30. ad minimum erant elephantum, turres qui gerebant, singulis autem turribus 32. sagittarii detinebantur, & qui bestiam regeret, Indus unus. Apud Indiarum gentes, exercitus in fronte, 100. passuum interstitio disponi solent, & ad congressus signum usque, militibus pro defensione cedunt. *Porus* contra *Alexandrum* 200. elephantum una serie constituit. In stadio apud Romanos cum gladiatoribus conflictebantur elephantum ab anno 655. A. U. C. Primo quidem cum tauris saltem, exinde vero & cum ho-

minibus certabant . Sic Veneris templum consecrando *Pompejus* , Getulæ captivos contra 20. elephantes militare iussit in Circo , certamine , singulare ergo quæ nata sunt , memorando . Unus enim ex elephantis , amputatis pedibus , Getulorum cohorti adrepens , scuta illorum ipsis eripuit , tum vero tanta vi ac agilitate projecit , ut nullius lapsu , quamvis graviore , ullus spectantium læderetur . Ac si populum delectandi ergo , nec ira vel vindicta , armis illos exueret . *Cæsaris* spectaculis 500. homines contra 50. elephantos conflictantes intererant , totidem etiam institutis a *Glaudio* & *Nerone* , qui tamen turribus oneratos voluerunt elephantes . Crudelitatem ipsis contrariam crederes , non enim , nisi multum excitati ac provocati ad iram in homines irruebant . Sic princeps quidam , referente *Plinio* , 30. homines castigatum , hosex palis suspendere , tum vero totidem elephantos residente satellite in reos incitari iussit , & quamvis adgrediendi desiderium incesse , numquam tamen principis crudelitatem explebant . Hostem enim debiliorem lædere , opprobrio sibi ducit elephas omnis . Interdum hominem proboscide adtollit , & quum per tempus suspensum retinuerit , placide tandem in terram demittit . Ovium gregem transeundo , ne pedibus aliquam conculcet , proboscide præeunte sollicitè dividit . Quis autem tam vastæ moli atque ineptæ tantam inesse crederet industriam , agilitatem , & memoriam . *Mutianus* , quem tertio consulem Roma vidit , græcas litteras distinguentem , & vocabula sibi data , characteres componendo , scribentem cognovit . Alius quidam , memoria durior , nec edocta retinente , ne a magistro objurgaretur , nocturna reperitione , pensum diurnum memoriæ inculcavit . Alii tantam induerant mansuetudinem , ut vel a puero , 12. annorum , regi possent , & iussa ejus quæcumque exsequerentur . *Arrianus* , veracissimus ex antiquis , unum ex cymbalis duobus , pedibus suis annexis , proboscide , tamquam plectro , sonorum concentum elicuisse , & reliquos sibi socios concinne & sonis apto more saltasse docet .

Maximam fere partem potentiæ magni Mogolis , imo præcipuum palatii sui decus constituunt elephanti , quorum 500. nutrit & plures , magnifico sane & splendido adparatu instructos .

Multi tandem ex auctoribus tantum reliqua bruta instinctu suo elephantium superare judicant , quantum homo ratione præcellit brutis . Innumera transeamus , quæ in laudem ejus dicta sunt ; nec sexcenta adferamus eorum , quibus jam fidelitatem , jam gratitudinem , sagacitatem , prudentiam , æquitatem , gloriæ desiderium , docilitatem , obedientiam , intellectum , pudicitiam , castitatem , temperantiam , pietatem ac religionem , & nescio quas alias elephanti virtutes , comprobare voluerunt , factorum ; quæ in *Elephantographia* sua studiose collegit *Hartenfels* , quæque curiosorum desiderio satisfacturi referremus , nisi peregrinantium fides , mirabilium pruritu , esset suspecta . Nos enim remotissimi ab his , qui vel falsa historiæ naturali inspersa , innoxia , imo pulchra , & argumentum sterile exornantia credunt , omni quo adhuc contaminata est , spurio falsorum adparatu illam exuere posse optaremus ; præfixum enim nobis manet effatum poetarum nostratium maximi : *nisi verum , nihil pulchrum est* .

Nomen elephantis Ebraicum : *Behemoth* est , Arabicum : *Fil* , Æthiopicum : *Nembo* , Græcum : *Elephas* , Italicum : *Elephante* , Germanicum : *Elephant* ,

pant, *Elephant*, *Helfant*, Belgicum: *Olyfant*, Anglicum: *Elephant*, Gallicum: *Elephant*, omnia autem excepto Ebraico & Æthiopico, ex Latino seu Græco exorta videntur.

Bini dentes ejus falcati, qui superiorem maxillam egrediendo, eboris nomine veniunt, illi & artium & Medicinæ usui inserviunt. Præstantius ebur, sine dubio ex Ceylan insula, aliisque Indiæ Orientalis regionibus provenit, probæ autem suæ qualitatis signa, candorem & lævitatem esse memento. Multum complectitur olei, salis volatilis, ac terræ, ast phlegmatis parum. Virtutis suæ refrigerantis & desiccantis ergo, parum etiam adstringentis ac incisivæ, intestina corroborat, hemorrhagines sistit, ictero laborantibus levamen adfert, vermes profligat, dolores mitigat, stomachi tandem debilitati, ac epilepsiæ, ex cognatione illius exortæ medetur. In scobem reductum contra morbos, quos recensuimus, dosi ℥ss. ad ℥j. infusionibus addi solet, vel in substantia, & pulveris subtilissimi instar, ℥j. ad ℥ij. dosi, recipi. Easdem vero virtutes, quas cornu cervino, & ebori inesse credunt, iisdemque modis hoc, quibus illud præparant. Philosophice scilicet, vel cum igne, vel absque igne præparatur. Philosophice præparatum, primarum viarum acida corrigere, & sanguinis effervescentiam sedare valet, in febribus ergo malignis, sanguinis spissitudini originem debentibus, si qua adest ad sudandum dispositio, recipiatur, addito etiam antimonio diaphoretico, effectum illius promovente. Nec non contra menstrua albida veniat, ex aciditate stomachi profluentia, & ad impediendum abortum, corallarum magisterio, seu corallis rubris præparatis admisceatur. Eximio tandem usui cedit contra vermes, dosi ℥j. ad ℥ij. ut supra. Ebur igne præparatum seu calcinatum, *spodium* adpellant. Quod calcinaturi in frustra dissecant, eaque igne relecto tamdiu calcinant, usque dum nullum amplius fumum edendo, porosum factum sit, fragile, candidum, leve alcalinum, & facile in pulverem abiens. Sic nil nisi corpus mortuum eboris superest, cujus & sal volatile, & oleum, & phlegma, calcinatione abiit. Quæ eboris principia activa si conservare ac adhibere velis, cornua ebur ignis graduati ope, ad modum Chymicæ destillabis, & subtracto sale volatili, & oleo, & spiritu, quæ cornuæ in fundo subsidet, materia nigra, præparando spodio sufficit, dummodo carbonibus candentibus imposita calcinetur. Spodium optimum illud judicabis, quod intrinseco gaudet candore & extrinseco, & ruptu facile & purum sit. Quod quamvis omnibus principiis activis destitutum, sua tamen utilitate gaudet & adstringendi virtute, quapropter etiam ad sistendas hemorrhagines, gonorrhæas & alvi profluvia, ad absorbenda primarum viarum acida, & ad impediendam lactis coagulationem in stomacho adhibetur. Intus autem ℥ss. ad ℥ij. dosi recipiatur. Collyria tandem, & pro exarescendis vulneribus seu plagis remedia intrat. Qui denique distillatione ex ebore provenit, spiritus, sal volatile & oleum, eisdem usibus eadem dosi, qua tria hæc principia ex cornu cervi profecta, sufficiunt.

Sculptorum calis eximia opera ebore effingi notissimum est. Imo ollæ argillacæ calcinandum ebor immittere solent, alia deinde olla obtegere, & junctarum fissuram probe obturare, sic fuligine ascendente, rursus delapsa, nigerrimum induit colorem, deinde autem probe contritum, pictoribus pro pigmento nigerrimo inservit. Idem etiam ex cornu cervi præ-

præparare solent, & quo candidiora sunt, quæ conficiendo nigro veniunt, eo pulchriora & obscuriora ex illis proveniunt nigra.

Limatura eboris decoctionem adstringentem ingreditur, & confectionem hyacinthi, & pulverem *Hali*, *diamargariti frigidi* ac adstringentem contra abortum, trochiscos denique *Gordonianos* Pharmacopoeiæ Parisiensis. Spodium vero ejusdem Pharmacopoeiæ pulveri *Diarrhedano*, & Santalitriplicis, Loocho arido, & trochiscis camphoræ, & electuario *Psyllii*, aliisque inest.

℞. Oryzæ lotæ ℥j.

Limaturæ eboris & cornu cervi ana ℥ss.

Limatura utraque telæ linteæ indatur, tum bull. per $\frac{x}{4}$. horam cum aq. com. ℔iiij. col. f. ptisana adstringens contra diarrhæam & hæmorrhagines.

℞. Aq. artemisiæ & portulacæ ana ℥ij.

Eboris & corall. utriusque pp. ana ℥j.

Seminis contra gr. xvij.

Theriaca ℥j.

Salis ammoniaci ℥j.

Syrupi limoniorum ℥j.

M. f. potio vermifuga, uno vel duobus haustibus accipienda.

℞. Hordei mundati ℥j.

Uvarum passarum purgatarum ℥ij.

Limaturæ eboris ℥ss.

Glyzyrrhiz. ℥vj.

Seminis anneti ℥ss.

Bull. in aq. font. ℔iiij. ad remanentiam ℔ij. Col. add. succi stercoris equini ℥ij. F. Decoctio, contra Pleuritim, quarta quavis hora haurienda.

℞. Corall. rubrar. & margaritarum pp. ana ℥j.

Santali citrini

Eboris pp. ana ℥iiij.

Granorum coccini ℥ij.

Sacchari candidi pulverisati ℥ss.

Reducantur in pulverem subtilissimum omnia, & dividantur in xxxx. doses æquales, quarum unam, quovis mane, 40. subsequentes per dies, impediendi abortus ergo, cum vitello ovi elixi præscribas,

℞. Croci orientalis ℥iiij.

Eboris pp. ℥ss.

Sacchari candidi ℥j.

Reducantur in pulverem subtilissimum, & dividantur in viij. partes æquales, & habebis pulverem 8. diebus contiguus, contra icterum, accipiendum.

E Q U U S.

Generico sub nomine equi, tres ejus species, equum scilicet, asinum & mulum, omnes inter notissimos, complectimur.

Equus. Offic. Schrod. 285. Bossch. 162. Dal. Pharm. 435. Blas. 67. Lem. 341. Merr. Pin. 166. Charl. Onom. 2. Gesn. de *Quadr. Siles.* 89. Raii Syn. Anim. *Quadr.* 62. *Equus cauda undique setosa*. Linn. Faun. Suec. *Equus & equa*, *Caballus*, sive *Sonipes*. Quorumd.

Plurimi sunt Gallicorum in primis auctorum, qui equum, quadrupedum nobi-

nobilissimum, docilissimum, utilissimum, & inter omnes notissimum, imo regem præ leone, dicendum, eleganter ac plene scriptis suis descripserunt. *Valentinianæ*, & ex *Blasio* desumptæ equi descriptioni anatomicæ, quæ *Daubentoniana* fatis longe sit anteferenda, en tibi. L. hujus epitomen:

Omnium nobis describendorum, sic Vir Cel. *Daubenton*, equum & notissimum censemus, sive interiora respicias, sive externa, & summa hominis cura educatum, & motus & incessus arte, scientiaque instructum. Adeas stabula & loca, quibus edocetur, & videbis quantum quantorum habitum ac consuetudinem induat, quanta lupati & calcaris ope præstare possit. Ars itaque equum domandi, ne a regibus quidem & principibus neglecta, incessum ejus format nobilem, & gestus jucunditatem, vires & agilitatem exauget, animum addit, ardorem incitat, constantiam experitur, docilitatem ostendit, & instinctum excolit. Imo & Medicina, cujus est salutem restaurare ac corroborare, vitam hominis conservare & præpedire mortem, Medicina, inquam, & cognitionis suæ adparatum, ex cognitione equi adaugere novit, & cognita illius in usum adhibet. Hinc *Medicina*, quam *Veterinariam* dicunt; cujus est morbos equorum dijudicare, ac illis succurrere. Curam vero equorum homines gerunt singularissimam, & existentium conservationi adaptatam, & procreandorum generationi inservientem, etenim vel equum equæ admittendum sollicite distinguunt ac seligunt, nec quidquam eorum omittunt, quæ ad propagandum pulchriorum genus conferre quid possint. Tanta denique hominum in equos facta est cura, ut de re equestraria dicentibus, sua quasi propria sit ac singularis lingua.

Tres autem in partes equum dividunt; anteriorem scilicet, Gallis: *avant-main*, manus anterior, dictam, & corpus, partem denique posteriorem, Gallis: *arrière-main*. Parte anteriore complectuntur caput, collum, armum, humeros, pectus & crura anteriora; corpore, renes & ventris latera; posteriore tandem parte, dorsum, coxas, caudam, nates, lumbos, popliteum, & quæ sunt reliquæ crurum posteriorum partes. Infinita autem quum sit varietas, coloris pili respectu, cuivis colori sufficiens vocabulum reperire. Omnes interim calidiore sub cælo nati, ut quos Turcorum regiones, & Arabia, & Persia, & Barbaria alit, breviori cæteris pilo, tecti esse solent.

Capite equus gaudet oblongo, & fronte explanata, oculis inter se distantibus, naribus in extremo fere capite apertis, & ore paullulum inferiore, & labio superiore ultra inferius prominente; quæ docilitatis ac mansuetudinis speciem loquuntur. Spatii autem auribus & oculis interjacentis respectu, longa videtur pars capitis inferior, utramque maxillam cum naso complectens, ad oculos usque producta, & angustior, imo ex lateribus compressa, nasi in longitudine quasi fornicata, cui *Chanfrein*, seu columnæ striatæ nomen Galli indidere. Cæterum aures cuspidati, elati & sibi vicini, gratiam adspectui ejus conciliant; frons brevis ac angustior, & proni aures, oculosque ultra producti, ardorem loquuntur; & caput exiguum, collum autem constrictum, longum, prominens, ac crura subtilia & longa, levitatem; corpus eleganti ratione constructum & dorsum conglobatum, fortitudinem: collum denique robustum & nervosa crura, actionum certitudinem ac virium ardorem. Hæc de equo quiescente judicabis. Ast quam nobi-

nobilis & acer ipsi incessus, quam faciles & proni motus omnes, quanta celeritas, quantumque perferendi vires. Imo labore & exercitio fere consumtus, & celeritatem cum viribus adhuc conservat, ex quo internas ejus vires, externæ corporis elegantia adcurate respondere concludendum.

Antequam vero partium ejus interiorum descriptionem subjungamus, generaliore individui, observationibus nostris inservientis, dimensionem adferamus. Decrepitus dici merebatur, quum verno tempore, meo jussu, enecaretur. Ad caudæ originem ab rostri extremitate 7. pedes longitudine totus, & caput ex fine labiorum, ad regionem auribus posteriorem 1. pedem ac 8. digitos, & peripheria, supra oculos, 2 $\frac{1}{2}$. pedes, exæquabat. Collum ab omoplatto ad aures, 1. pede & 10. digitis, capiti proximum 1. pedis & 11. digitorum circumferentia, 3. denique pedum peripheria humeris proximum absolvebatur. Altitudine ab armo ad terram 4. pedes & 5. digitos, a planta pedis autem ad os coxæ, 4. pedes & 3. digitos pertingebat; & corporis circumferentia, post crura anteriora, 4. pedes & 7. digitos, maxima corporis capacitate, seu medio, 5. pedes & 4. digitos, ante crura posteriora tandem 4. pedes & 9. digitos; pondere denique fere 400. libras.

Aperto autem abdomine, nullum supra intestina epiploon adparuit, brevissimum enim ab his & stomacho obtegebatur; intestinorum saltem portiones, omnem ventris capacitatem explentes, & figura ac situ singulares vidimus. Statim ab initio enim non nisi tres crumenæ magnæ sibi superstratæ, & quatuor intestinorum portiones conspiciebantur, quas si cognoscere rite velis, canalis intestinalis descriptio, & situs & figuræ ratione antecedit, necesse. Stomachum scilicet egrediens Duodenum, ad 3. usque digitos prominente longitudine procurrit, post hepar extus reflexum, posticus coli parti superductum ad medium lateris usque producit, tum post renem dextrum, intus replicatum, ex altera parte, renem petit finistrum. Jejuni circumflectiones frequentes regionis umbilicalis in parte sinistra, inter ultimas coli circumvolutiones, & ramos sinistros arcus intestini hujus duplicis, de quo infra; Ilei autem circumvolutiones absolvebantur in regione hypogastrica, laterum dextra, & regionis umbilicalis parte, in posteriore extremitate ramorum sinistrorum arcus, coli duplicis. Cæcum oblique transit posteriorem abdominis partem, ab regione iliaca recta ad medium ventrem sinistrorsum procurrit, & nonnunquam latus dextrum occupat, interdum ex dextra sinistram petit transversim. Colon vero, spatiolo a connectione sua cum Cæco, binas efformat crumenas oblongas, constrictione aliqua saltem separatas, & longitudine fere æquales, tum pars quadam tenuior, sed crumenas longitudine adtingens, tertiæ necitur crumenæ, binas illas longitudine tantum non exæquant. Colon ex latere dextro, ubi cæco jungitur, exortum, arcus instar, totum cingit colon; & arcus hujus binæ crumenæ priores, post diaphragma, sub stomacho sinistri lateris, constrictæ dextram sinistramque occupant inferiorem abdominis partem. Arcus in extremitate & regione hypogastrica, & quasdam sinuositates constituit colon, & arcum alterum, priori supertensum, priorique cellulari quadam textura cohærentem, & parte sua dextra, in tertia crumena desinentem, cujus extremitas ad renem dextrum usque retrorsum, & sinistrorsum ad alterum renem producit. Hanc vero cru-

mēnam egrediendo, in parte sinistra Jejunī, & maxima Ileī, colon circumvolvitur, Recto tandem, curvatura eodem exorta, necitur. Quousque autem in dextro latere commoratur Cœcum, bini priores Coli arcus fere integri ex sinistra conspiciuntur. Hinc itaque patet, quomodo Cœci remotio in duplicis Coli arcus situm agere possit. In aliis aliquoties abdomine aperto, tres saltem coli portiones majores, totum illud explentes deteguntur, tunc autem posterioribus partibus trium coli portionum, superjacens Cœcum, ad sinistram ex dextra in iliaca & hypogastrica regione extenditur. Colon vero ex latere dextro, regionem petit umbilicalem, & sinistrorsum post diaphragma reflectitur, tum ex latere sinistro producitur. En binas coli crumenas priores, mediam & sinistram abdominis partem occupantes. Tunc sursum adscendit recta, & anterieus, diaphragma versus, descendit, post ad dextram replicatur, & crumena tertia per totam lateris dextri longitudinem decurrit.

Antequam vero de dimensionibus canalīs intestinalis agatur, monendum censeo in antecessum, quod intestina ac viscera animalium dimensuri, folli ope inflaverimus, ita quidem qualia materiæ contentæ præsentia esse possent nec graviori aeris compressione distenderimus.

Gracilia intestina igitur a Pyloro ad Cœcum 56. pedes longitudine, & circumferentia sua Duodenum, ubi amplissimum 6. digitos, 2. vero digitos & 3. lineas, ubi strictissimum, exæquabant. Jejunum, ubi amplissimum, 5. digitorum & 9. linearum peripheria, & multis constrictionibus distinctum erat, quarum aliæ non nisi 3. digitis, aliæ autem pedis integri spatio inter se distabant, quarum profundissimæ, ad 2. digitorum circumferentiam constringebant intestinum. Aere autem inflato omnes distendebantur & evanescebant. Ileum 7. digitorum peripheriam, cœcum 1½. pedis longitudinem, & 8. digitis ab insertionē sua cum ileo, ibi enim amplissimum, 2. pedum peripheriam ostendebat. Cœcum, ubi ileo inferebatur, 1. pedis & 10. digitorum, sub extremitate sua autem conica & cuspidata, 1. pedis & 2. ad 4. digitorum peripheria erat. Prima pars coli angiportum efformando, & litui instar incurvatam ostendebat extremitatem, quapropter cavitas ista alterum quasi Cœcum constituere videtur. Primæ igitur coli parti pedis 1. & 8. digitorum, constrictioni autem qua illa separatur a colo, 13. saltem digitorum erat peripheria, & ubi incurvabatur 2. pedum & 1. digiti longitudo; quæ autem coli partem, de qua agitur, ab intestino reliquo separabat, constriction, 4. digitorum peripheriæ erat, abhinc 1½. digito quidam quasi globulus, 8½. digitis peripheria sua, & ex latere intestini, ut videbatur, situs adparebat, quum quæ ab reliquo colo separabat, constriction, 3½. digitos circumferentia sua explebat. Nec tamen in omni individuo globulum istum reperiri constat. Ultima tandem coli portio una cum recto, 8. pedum, totum vero colon cum recto 21. pedum, gracilia tandem 56. totus itaque canalīs intestinalis, Cœco excepto, 76. pedum longitudine absolvebatur.

Quo vero distinctior stomachi situs in equo cognoscatur, humani situi illum comparabimus. Infra in utroque curvaturam magnam, & supra partem inferiorem œsophagi reperies; at, quod ab ista incurvatione ad œsophagum usque procurrat, planum, in homine ad corporis longitudinem, in equo autem transversim situm est. Superficies itaque abdominis humani muscu-

musculis opposita, diaphragmati obstat in equo. Figura sua cæterum, utri-
 culum referente, quodammodo sibi similes sunt ambo. Magis vero fini-
 stram, quam dextram situ suo respicit stomachus equi, & pars ejus fini-
 stra aliquantum elevata, intusque reflexa, dum inflaretur, dextræ ad $1\frac{1}{2}$.
 digiti distantiam, seu quod œsophagus explet, spatium accedebat. In ma-
 xima stomachi convexitate ad œsophagum 3. pedem peripheriam, & an-
 giporti ex sinistro œsophagi latere 1. pedis & $7\frac{1}{2}$. digitorum invenimus.
 Peripheria partis stomachi dextræ ad pylorum, 16. digitis, stomachi me-
 dii ex dextro latere œsophagi, 1. pede & 10. digitis; pylori 5. Duodeni
 ab initio, ubi amplissimum erat 1. pede; Oesophagi tandem ad stoma-
 chum, 4. digitis absolvebatur. Partem stomachi superiorem internemem-
 brana obtegit lævis, colore carnis, & ulterius ex sinistra quam ex dextra
 circa orificium œsophagi protensa, quæque non est nisi membrana inte-
 rior continuata. Fimbrias membranæ hujus in interioribus stomachi parie-
 tibus, dentatas & ultra reliquam membranam elevatas invenies. Magnum
 præter ea vermium numerum, 60. nonnunquam excedentem, ac sexus &
 ætatis ratione differentium cujusvis equi in stomacho deteximus. In quo-
 dam quondam 660. numeravimus, præter illos, qui ano continebantur,
 nullos tamen umquam in canali intestinali observavimus; oblongi erant,
 & minimi 3. fere linearum longi, 1. lineæ diametri, aut maximi 8. lineis
 longi, 3. lati, & 2. crassi. Alii coloris flavidi, alii, minimi præsertim,
 rubicundi. Extremitate sua anteriore minore quam posteriore, conicam
 ostendebant figuram, & 8. ad novem circulos, corpus cingentes, punctu-
 lis firmissimis obsitos. Ne autem alimentorum agitatione abripiantur, exi-
 guis quibusdam uncis in anteriore extremitate conspiciendis, punctulisque
 de quibus diximus, posticus reflexis, continentur. Frequentissimos tamen
 Duodeni ab initio ad pylorum, ordine sibi adjacentes, & parte sua ante-
 riore cavitatibus, quibus intestini parietes perforavere, infixos; imo per
 totum stomachum dispersos vidimus; variæ enim partes membranæ suæ
 interioris corrosæ ac perforatæ videbantur; & foraminula ista gangræna
 causam aliquoties evadere dicunt. Muscas vero censent, anum equi in-
 gressas, sua ova eo deponere, ex quibus vermes isti excluduntur, & totum
 canalem intestinale percurrere, tandem vero ad stomachum penetrare,
 cui quum aliquamdiu inhæserint, ad anum denique reverti. Majo enim &
 Junio anum egredientes observavimus, ut in muscas abeant, denuo alios
 vermes producturas. Nec tamen de vermibus hisce & muscis quædam sub-
 nectendi locus est, nisi ea, quæ ad equum spectant. Pluribus igitur equis
 funestissimos esse scito, illorum etenim stomachum vel ulceribus opplent,
 vel corrodunt. Olei usum illos enecari nequire dicunt, quo tot alia insecta
 moriri videmus, & vermes candidos extremitate utraque cuspidata, $\frac{1}{2}$.
 pedis longos, imo & hos, qui acus majoris figuram referunt, ac equis,
 quos interdum infestant, periculosissimi sunt, hos inquam, olei ope extir-
 pari dicunt. Ultimo dictorum nullos umquam in equo deteximus, aut alios
 frequentes, longiores, interdum etiam minores explanatos, candidissimos,
 & variis ex annulis compositos. Mercurii usum contra vermes conicos a
 variis quidem commendatum, a nemine autem, quam gravis res sit, ad-
 hibitum fuisse novimus. Stomachus tamen & intestina equi, conformatio-
 nis ratione, non solum Physicorum sed Medicorum quoque adtentione di-
 gnissi-

gnissima sunt. Singulari sane ratione digestio in illis perficiatur necesse est, etenim animalis stomachus, corporis respectu, valde exiguus, colon vero crumenis maximis, stomachi defectum explentibus, instructum est. Oesophagus enim oblique stomacho insertus, & sphinctere compressus, & margine ex parte fimbriatus, vomitui obstat; Situs item & extensio Coli & in stomachum, & equi ipsius constitutionem, actiones, morbos, reliqua, influunt.

Hepar vero pariter ex dextra ac sinistra extensum quatuor abibat in lobos, quorum unus in medio situs & Diaphragmati oppositus, in parte sua inferiore 3. crenas ostendebat profundissimas, quarum primam ligamentum suspensorium ex sinistra ingrediebatur. In sinistra unus saltem infra aderat lobe. Dextram bini constituebant, alter omnium maximus, alter vero minimus & maxime posterior. Exiguus ille crena in duas dividebatur partes inæquales, quas eminentias potius seu continuationes, quam lobum separatum existimares in pluribus. Maxima hepatis extensio erat $1\frac{1}{2}$. pedis, lobi dextri ab alto in imum $10\frac{1}{2}$. digitorum, sinistri longitudo 9. medii tandem $8\frac{1}{2}$. digitis perficiebatur. Pondere suo hepar $4\frac{1}{2}$. librarum explebat, & fellis vesicula destitutum, magno autem hepatico canali instructum, & foris ac intus nigrum erat.

Lien, sua figura triangulum Isosceles representando, oblique, basi nempe obversa & posticus reclinante, cuspide autem prona & baseos locum occupante, stomacho ex latere sinistro adclinabat; 9. præter ea digitorum ac 3. linearum longus, basi $4\frac{1}{2}$. digitis longa, 10. linearum ubi crassissimus, pondere $12\frac{1}{2}$. unciarum, foris glaucum, intus rubro-nigrum colorem ostendebat.

Pancreas renum sinistro interjacet, stomachus autem, Duodenum, hepar & prima Coli portio, tertiæ hujus crumenæ superjacent. Figuram exhibet irregularem & tres ramos, quorum primus, brevissimus in Duodeno definit, secundus sub rene dextro procurrit, tertius autem ad renem sinistrum producit. Qui omnes ubi coeunt, explanatum constituunt corpus, quod Pancreatis corpus adpellare posses, & crassitudine $\frac{1}{2}$. digitum haud superat.

Renes figura sua trifolium, & vasa eorum emulgentia caulem ejus referebant. Renum dexter sinistro anterior ac crassior, 5. digitorum longus, totidemque latus erat, & infra & supra crenam 2. digitorum profundam ostendebat. Sinister strictior in parte anteriore. Renum magnitudinis respectu, pelviculus eorum valde exiguus, cujus in parietibus utriusque verrucæ sibi necessebantur.

Valde distentum Diaphragmatis centrum nervosum, in medio 1. pede & 3. digitis, a vena cava autem ad partem sterni vicinam 9. digitis latum, ad costas spurias usque pertingebat. Tenuissimum insuper, partem carnosam centro nervoso vicinam vix lineæ unius crassam, crassiorem tamen in lateribus, exhibebat, quibus ubi superjacebat, 7. supra sternum denique 4. digitorum latitudinem profitebatur. Parastata diaphragmatis sinistra, multo minor est dextra, quarum tendines intra primam & secundam lumborum vertebra connectuntur, tendine communi in ultima desinente.

Dextro pulmoni unus saltem lobe erat, & pars hujus anterior in margine

gine inferiore dentata. Sic & sinistro non nisi unicus erat lobus, ille tamen antè in binis marginis sui infimi regionibus, dentatus. Imò tertius aderat lobus, minimus, & dextro ex parte nexus, basi cordis adjacens ac ex dextra sinistrorsum extensus.

Cor medium pectus occupando, basi obversa in altum, & cuspidè imum respiciente, quartis quintisque costis intermedium, magnum erat animalis ratione, & cuspidatissimum. Baseos circumferentia 1. pede & 3. digitis, longitudo autem a cuspidè ad arteriæ pulmonaris originem $6\frac{1}{2}$. digitis, a cuspidè tandem ad sacculum pulmonarium usque $5\frac{1}{2}$. digitis absolvebatur. Ubi autem ex corde progreditur aorta, 1. digiti & 5. digitorum diametrum explendo, in binos abit ramos.

Longa erat 1. pedis & 3. digitorum lingua, ab vinculo suo ad apicem, conglobata, tenuissima, & 2. digitorum lata, in regione autem dentibus molaribus primis intermedia, non nisi digiti 1. lata. Decem & septem circiter sulci curvati & ante convexi transcendunt palatum. Epiglottis cuspidata globulo terminatur, & gallinæ ingluviei explanatæ, accedit similitudine. Cerebrum 4. digitis & 9. lineis longum, 3. digitis & 7. lineis latum, 2. denique digitis altum, & cerebellum 2. digitis & 8. lineis longum, ubi latissimum 2. digitis & 1. linea latum, ubi altissimum 1. digito & 4. lineis altum erat. Cerebro tandem 14. uncia, & 2. erant cerebello, pondere.

Scrotum 9. ab ano digitis distans, $\frac{1}{2}$. pedis longitudine sub ventre procurrens, ab orificio præputii non nisi $3\frac{1}{2}$. digitis aberat. Quæ totidem distabat, glans contrectantium manu percipiebatur. Virga autem a bifurcatione corporis cavernosi ad extremitatem glandis, 1. pedem longitudine, virga item præputio denudata $4\frac{1}{2}$. digitos peripheria adtingebat. Præputium magnum erat ac valde rugosum. Glans figuram fere cylindricam & $\frac{1}{2}$. pedis longitudinem, 3. vero ad 4. digitorum (imò plurius in extremitate) peripheriam ostendebat; Urethræ extremitas $\frac{1}{2}$. digiti longitudine a glande separabatur. Ipsum vero præputium globulum efformat quemdam in orificio, quo virga egreditur; in hoc globulo igitur, ex parte Scroti verrucas videbis duas, $\frac{1}{2}$. circiter digito inter se distantes. Nec nisi pelle, qua obteguntur, aliquantulum elevata, & orificio obvio in medio hujus elevationis circularis, diametricque 10. linearum, quamvis minimo, verrucæ istæ distinguuntur. Quod quidem verrucæ orificium licet haud adeo multum pellem penetrat; media tamen sua cavitate incisione aperta, utriusque partis excavationem observabis. Et hæc quidem in aliquibus nec tamen omnibus, imò ne plurimis quidem detegere licuit. In aliis etenim faciles elevatione sua conspiciendas, in aliis autem nullas utique verrucas reperi. Qui quum vetustiores, præputio flaccido instructi essent, juniorum saltem in præputio recenti & sano, nec vetustiorum flaccido atque detrito, obvias esse censemus easdem. Testiculorum figura ovoidis explanata, longitudo 3. digitorum & 3. linearum, latitudo maxima 2. digitorum & 3. linearum, crassitudo tandem $1\frac{1}{2}$. digitorum; substantia interior glauca in ferrugineam vergens; epididymis vero partem anteriorem egrediens, membranæ vaginali adhærebat. Aperta epididymide distinctissima vidimus, quibus componitur, vasa, flavida, & hinc inde in cumulos congesta; ipsam vero epididymidem, in parte anteriore marginis superioris testi-

testiculi 8. in posteriore autem 5. lineis lata, ac in eodem testiculi margine 2. ad 3. linearum crassa est. Pedis 1. & 10. digitorum longus est a testiculis ad urethram canalis deferens. Bini præter ea funiculi, altera sui extremitate primis caudæ vertebrae adherentes, & sub ano, quem cingunt, coeunt; 3. linearum quibus est diameter, ad virgæ longitudinem super urethra procurunt, & in præputio desinunt. Vesica pyrum obversum figura sua, & collum ejus, ampliori parti nexum, caulem refert, & ubi latissima erat, 14. in parte sua ampliori 10. digitorum diametrum ostendebat, nonnunquam ovalem & fere cylindricam figuram exhibet. Urethra ab initio $2\frac{1}{2}$. digitis peripheria, canalis autem, ab vesica ad corporis cavernosi bifurcationem, longitudo 7. digitis absolvebatur. Vesica posteriores binæ aderant vesiculæ turgidæ, oblongæ, $\frac{1}{2}$. pedis longæ, & 4. digitorum peripheria, singulæ insuper colli sui ope, foramine latissimo, & in parte exteriori orificii canalium deferentium sito, connexæ. Vesicularum unicuique, recti ex latere, glandula superjacebat $1\frac{1}{2}$. digitis longa, 10. lineis lata, 3. ad 4. lineis crassa, & ex parte anteriore orificii cujusvis vesiculæ, urethram ingrediens, 3. abhinc digitis binæ aliæ glandes conspiciuntur in urethra, ejusdem fere qua priores, magnitudinis, urethræ autem cohærentes mediantibus orificiis pluribus, binis ordinibus dispositis, ac lineis, quæ partem urethræ ex longitudine comitantur, superpositis.

Quanta igitur sint reservatoria in partibus equi genitalibus, majora tamen adhuc aliis sunt ac ampliora, molis suæ ratione habita, ut v. gr. Porco Indico.

Jam vero & partes equæ genitales descriptione exponamus. Equam itaque undecimum annum agentem, ineunte vere enecari jussimus, & longitudinem ejus ab extremitate oris ad originem caudæ 6. pedum & 3. digitorum; corporis circumferentiam post crura anteriora, 4. pedum & 3. digitorum, in medio 4. pedum ac 11. digitorum, ante crura posteriora 4. pedum & 1. digiti; altitudinem denique a terra ad arum 4. pedum & 3. digitorum, & a terra ad apicem ossis ileorum 4. pedum & $1\frac{1}{2}$. digitorum deprehendimus, 15. linearum spatium anum intererat ac vulvam 4. digitis longam. Ubra bina 9. digitis a vulva, & binæ papillæ $1\frac{1}{2}$. digito inter se distabant. Ubrum cavitates ad servando lacti inservientes, pro copia ejus dilatantur, lac autem mamillares glandulas egreditur. Glans clitoridis 11. linearum lata, 6. linearum crassa, & 4. alta, præputio gaudebat amplissimo. Vagina 1. pedis longa, vesica autem fere rotunda ac animalis respectu exigua; urethra 16. linearum longa, & matricis orificium, rotundum, fimbria sua ad dimidium digitum vaginam ingrediebatur. Matricis longitudo ab orificio ad cornuum separationem $8\frac{1}{2}$. digitis absolvebatur, & cornua 7. digitis. Cujus cornu ab extremitate 3. digitis distabat testiculus, tuba autem lineam curvam 7. digitorum longam transiens, variis ibidem finibus efformatis, in operculo quodam desinit. Testiculus reni simillimus, & foetus equæ amnio, Chorione & membrana allantoide, diversissima ab ista quam in ruminantibus observabis, involutus est. Uracus una cum duabus arteriis, & vena una ex umbilico progreditur. Uraci orificium vero, in funiculo umbilicali, & amnio vicinum, liquorem exhibet spissum & rubicundum, & in primis dum incalcescit, urinæ odorem referentem, nec non corpusculis, consistentiæ solidissi-

ma & *Hippomanes* dictis, repletum. Quæ quidem hinnuli recentis editi in fronte conspicienda esse scripserunt alii, nos autem falsa & impossibilia dicimus, quippe nec hippomanes intra amnium & allantoidem detenti, fœtum pertingere, nec, nisi ruptis quibus detinentur, membranis egredi possunt; ast fœtu egrediente & involucri sua rumpente, hippomanes una cum liquore effluit, nec enim amnio nec allantoidi adhærens retinetur. Nec nisi eo saltem in casu, illoque rarissimo, fœtus in fronte adparere potest, dum scilicet pars quædam involucri, quæ egreditur, fronti ejus nexa adhæret. Variis autem equabus dissectis, neque numerum neque magnitudinem hippomanum constantem deteximus, jam enim pisi magnitudinem, jam 5. ad 6. uncias pondere exæquabant; substantia autem erant viscosa & colore oliveo, & variis cavitatibus inæqualibus repleti, nec tamen vasorum nec organorum corporis viventis vestigium aderat ullum, Superficiebus tandem sibi superstratis constare videbantur, & fimbriis liquori innatantibus circumcincti. Quibus collectis in unum, addito etiam liquoris colore & opacitate, pro sedimento liquoris, jure quidem, hippomanem habemus. Quem non solum in equa, sed in omnibus allantoides instructis, reperimus.

Jam sceletum equi describamus. Altitudo ejus 5. pedibus & 9. digitis absolvebatur, a terra scilicet ad apophysin spinosam vertebrarum dorsaliū, omnium longissimam, & altissimam armi ejus eminentiam constituentem.

Ossa, caput equi constituentia, humani capitis ossibus & numero, & figura sua & situ multum accedunt. Formam capitis equini, cognita maxillæ inferioris figura & proportionem facilem cogitabis. Anteriorem hujus partem mento destitutam, dentes incisarii terminant, eaque post incisarios ultimos $2\frac{1}{2}$. digitis, & ubi strictissima, 1. digito & 8. lineis lata, post vero usque ad angulos corpora & ramos intermedios, sensim dilatatur. Maxilla humana antè arcum, equina autem angulum efformat, cujus latera 1. pedis longitudinem fere attingunt, si scilicet ab extremitate anteriore ad illam regionem perrexeris, ubi sursum reflectuntur rami. Maxilla itaque inferior equi non solum longa & constricta, sed etiam antè valde depressa, posterius autem elevata est, cujus causa, occiput, faciei ejus in summitate, nares autem in imo videbis.

Nec, ut in homine, ad oculos usque maxillæ inferioris ossa pertingunt, quamvis integri pedis longa sit, si ab extremitate sua anteriore ad ossis unguis & ossis, quod, glandi nasi est, collisionem pergas. Orbitæ ovales, & os frontale constrictum, ossa tandem nasi, hominis respectu, latissima; orbitæ etiam capitis ex lateribus sitæ, os denique frontale ideo angustum est seu constrictum, quia valde exigua extensione, animalis magni respectu reliqua cranii ossa gaudent. Quam parva autem cranii in equo extensio sit, uno tamen osse, ossium hominis numerum superat, osse scilicet cincinni, triangulari, cujus basis anteriorem occipitalis partem tangit, apex autem binis parietariis intermedius est. Magni foraminis occipitalis diameter $1\frac{1}{2}$. fere digitis respondet. Sex incisarii maxillæ superioris antè ad longitudinem convexi, medii 14.; angulares tandem 11. lineis ex maxilla prominentes, omnes vero 9. linearum in extremitate lati, & 5. linearum crassi sunt. Sex incisarii inferioris maxillæ minus convexi & pa-

rum sursum recurvati, cæterum ejusdem fere longitudinis, minoris autem latitudinis sunt & crassitie. Aduncorum iv. unum scilicet ex omni cujuscunque maxillæ parte numerabis, eosque quodammodo conicos, breviores tamen incisoriis, 24. in universum equo sunt dentes molares, 6. ex utraque utriusque maxillæ parte, sese tangentes, & seriem 7. digitorum longam constituentes; ac 8. fere digitis ex alveolis suis prominentes. Os hyoidis templorum ossi adhærens, 7. forsan 9. officulis minoribus compositum est. Septem sunt colli vertebrarum, & apophyses transversales magnitudinis ergo, canis auribus, æquiparantur. Vertebrarum secunda, omnium maxima, ut in homine, suo cardine odontoidæo gaudet. Anterior vertebrarum omnium facies valde convexa, & posterior admodum concava est. Collum sceletri 2. fere pedibus longum, & columnæ vertebralis portio, quam dorsales vertebræ constituunt, 2. pedibus & 8. digitis longa, 18. denique vertebræ ac totidem costæ erant. Magis item vertebræ istæ humanis accedunt, quam cervicales; & apophyses saltem spinales equi humanis sunt multo longiores. Vertebrarum corpora, humanarum simillima, & 8. circiter linearum longa sunt, 8. veras & 10. spurias costas numeravimus, humanis æquales aut paullulum subtiliores. Sternum insuper, ex lateribus compressum ac planum per omnem suam longitudinem, quæ 16. est digitorum, convexum, ac quasi acuminatum, 5. ossibus in sceletro nostri, in alio junioris autem, 6. ossibus constare videbatur. Sex numeravimus vertebrae lumborum, 2. digitorum longas. Os sacrum denique, triangulare, quatuor utrinque foraminibus instructum, 5. ex vertebrae spuriiis, sua singulis apophysi spinosa instructis compositum videtur. Cauda autem sceletri hujus $1\frac{1}{2}$. pedis longa 13. constabat vertebrae spuriiis, in alio 15. numeravimus, & auctorum plurimi 17. esse volunt. Os innominatum iisdem quibus hominis ossibus, sed proportionem diversis, & situ suo equi actionibus respondentibus constabat, coxarum ossa enim anteriorem, ossa pubis inferiorem, & ossa ischia posteriorem situm obtinebant. Coxarum ossa triangularia, ischia autem magna sunt, & singula binis, nec, ut in homine, uno saltem ramo gaudere videntur. Ossa pubis in equo, eo tantem ab humanis differunt, quod multo minoribus eminentiis confita sint. Os innominatum $8\frac{1}{2}$. digitis latum, & ad imum a summo 7. digitis & 4. lineis longum est. Omoplatum figuræ quidem triangularis sed magis productæ, quam in homine, nec apophysi acromia, nec clavicula, instructum est. Humerus humano brevior, $12\frac{1}{2}$. digitorum longus, & ubi minimus, $6\frac{1}{2}$. digitorum peripheriæ est. Maxime autem cubiti ossa atque articuli in homine & in equo differunt. Sic multo major in equo quam hominis apophysis olecranon, $3\frac{1}{2}$. digitis longa, & ubi tenuissima, 2. digitis & 15. lineis lata, nec, ut in homine, figura posterius conglobata, sed irregulari est. Sub olecrano radio adhæret cubitus, deinde autem separatus est. Os tandem radii 14. digitis & 3. lineis longum, paullum incurvatum, antè convexum, posticus concavum, fere ut in homine, maximam, seu latissimam saltem extremitatem suam superiorem ostendit. Radii in extremitate nulla adest apophysis styloidea. Et femur equi, ab humano eadem differentia, qua utriusque humerus, diversum, 17. digitis & 9. lineis, una cum magno trochantere; corpus vero ossis $7\frac{1}{2}$. digitorum circumferentia absolvebatur. Inferior ejus extremitas, humani femoris ex-

tremitati similis, strictiores saltem cavitates, & magis prominentes exhibebat juncturas; 4. insuper digitis & 5. lineis longa, & ubi crassissima erat extremitas ista, 5. digitis & 2. lineis crassa; imo & rotula seu patella genu in equo, hominis quodammodo similis, partium singularium ratione autem, dissimilis erat. Longissima erat pars, basi patellæ hominis respondens, & latera magis prominentia, & superficies magis inæquales; Os ipsum 3. digitis longum erat & latum. Tibia, brevior quam in homine 15. fere digitorum longa, & extremitatem superiorem humanæ simillimam exhibebat, nisi quod marginibus magis eminentibus gaudeat, & stillicidio spinæ superducto, illique magis quam in homine elevata. Tibiæ partis superioris ex latere exteriori spinam observavimus peritonæum representantem. Carpum equi septem constituunt ossa binis ordinibus disposita, primo quidem quatuor, secundo autem tria continentur. Tarsus tantummodo, nec 7. ut in homine componunt ossa, magna tamen inter utrumque est similitudo. Tibiis enim posteriora sunt duo ossicula longa, & in extremitate cuspidata, quibus spinarum nomen tribuere. Jam vero si articulationes inter ossa tibiæ spinarumque, & ossa Carpi cum ossibus tarfi consideraveris; spinas interiores cujusvis tibiæ ossis, prioribus respondent ossibus Metacarpi & Metatarsi humani, spinæ autem lateris exterioris, quinto ossi istarum hominis partium. Tibiæ ossa longa & cylindrica ossibus capronarum articulatim nectuntur, quæ ossibus primæ digitorum phalangis respondent. Post articulationem ossium capronarum cum ossibus tibiæ, in cruro quovis duo adsunt ossa triangularia sibi superjacentia, & globulum efformantia, quæ sesamoidæ videntur. Os coronæ seu coronarium, secundæ digitorum phalangi respondens, & osse capronarum brevius quidem, sed latius crassiusque, exiguo pedi, articulatione, cohæret. Tertiam itaque digiti phalangem constituit, & figura sua ungulam qua circumdatum est, referendo, inferiore parte calceum equi ferreum representat. Eadem vero ferrei calcei forma in osse tertiæ phalangis digitorum manus pedibusque humani occurrit. Os autem pedis exigui valde porosum, & post articulationem ossis pedis exigui cum osse coronario aliud adhuc adest ossiculum oblongum & transversale, 2. digitorum & 2. linearum longum, 10. linearum in medio latum & $\frac{1}{2}$. digiti crassum, quod nucis ossiculum salutare solent.

Jam vero ad historiam equi naturalem progredientes, Virum Celeb. *de Buffon*, eleganter, ut solet, differentem audiamus:

Hominis cura studioque adquirentium ex primis, dubio procul, equus est acer & fugax, belli molestiarum & gloriæ præliorum socius. Hic enim equitis instar, periculum intrepide intuetur & quærit, armorum ad strepitum advolat, eundem ardorem induit, & delectationis domini particeps jam venationi, jam cursui equestri interest, anhelat, spirat. Idem ille docilis & tempore mansuetus, ardorem reprimit, motus compescit, & ductibus domini obtemperans, voluntatem ejus ac nutum scicitatur, expectat, jam sese præcipitem dat, jam gradum sistit, & illi ut satis fiat, quidquid agat, suscipit; nulla ei est, nisi hominis voluntas, nulla vita nisi desiderio ejus sufficiens; imo motus promptitudine & agilitate jussa ejus anticipat, retinet vires, impendit omnem ardorem, quidquod majores quam potest vires profundendo, mori tandem quam jussa abnuere mavult.

En igitur equum præstantissimis naturæ dotibus conspicuum, & artis præceptis jam perfectum, a teneris cura hominis educatum, post servitio ejus adfuetum, educationis ab initio libertatem amittit, violentia coactus perficitur. Vix umquam ullum in statu suo naturali relictum videbis & liberum, five enim labori perficiendo inserviat, adparatu vario est onustus; five quiescat, aliquod ex ligamentis retinet; five pascuis oberret vel servitutis signa, vel laboris & doloris vestigia secum portat crudelia; os platuris lupati flaccidum, latera plagis obducta vel calcaris cicatibus notata, corneam pedis soleam clavis reflexam, corporis motus alienos, & exercitio laboris conformes; Imo & his, qui mitiore servitute, si dicere fas est, detinentur, qui luxui saltem & magnificentiæ destinati, aureos compedes, haud ornamento sibi, sed fovendæ dominorum vanitati cedentes gerunt, his, inquam, majori opprobrio est frontis ornatus, & cristati crines, & aurum sericumque quo teguntur, quam ferra pedibus subdita. Arte quavis enim pulchrior est natura, naturæ autem pulchritudinem ubi quæso, nisi in libero motu animati reperies? En, qui in regionibus Americæ, Hispanico sceptro subjectis generantur, vivunt, equos silvestres & liberos, five incedant, five currant, five saltus edant, nihil artis, nihil violentiæ; libertate sua superbientes, hominis adspectum fugiunt, curam ejus dedignantur, suum ipsi sibi nutrimentum quærunt, & vastissimis campis oberrando, veris perpetui fecunditate succrescentia quotidie nova sibi adpropriant, ubivis oberrant, nullo tecto, nisi sereno cælo, cujus aerem, (salubriorem sane quam in stabulis nostris angustioribus reperirent,) hauriendo, & fortitudine & celeritate & pulchritudine, naturæ donis, longe superant domesticos, quibus, quid quæso præter aptitudinem & agilitatem largiri potuit artis exercitium? Nec tamen feroces, sed feri saltem sunt natura, etenim reliquis pluribus quamvis virium respectu superiores, nullum eorum adgrediuntur, imo adgressores vel removendo, vel conterendo dedignantur. Cohortim sæpius incedere solent, societatis desiderio, nec timore. Nec præter herbam & vegetantia quidquam adpetunt, quorum quum præsentissimam habeant quantitatem, nec carni animalium inhient, nullum vel aliis bellum inferunt, vel inter se alunt, etenim nec alimentorum inopia, nec prædæ alius desiderio incitati, reliquorum carni inhiantium instar, bella inter se gerunt, prælia sibi committunt; pacificam potius & quietam vivunt vitam, qui parum adpetunt, eorum vero quæ adpetere possint, nihil deest. Sic & equos ætatis tenerioris, tempore societatis ac pascui communione junctos, moribus lenioribus & societatis desiderio instructos, nulla ardoris seu virium signa, nisi æmulatione, edere videbis, & cursu alios superare, & pericula fortiter subire, flumen v. gr. transeundo seu fossam transiliendo; his itaque in exercitiis qui reliquos præeunt, vel alios suo exemplo incitare student, illi reliquos generositate & docilitate, imo edocti, vel mansuetudine superare solent.

Antiquorum varii, varia enumerant loca, quibus equi silvestres seu feri detineri censent. Sic *Herodotus* in Oris Hispanis, Scythiæ fluminis albos, & in parte Thraciæ Septentrionali, trans Danubium, alios pilo ubivis 5. digitorum longo obtectos, *Aristoteles* in Syria, in Septentrione *Plinius*, in Hispania tandem & Alpibus *Strabo*, equos silvestres detineri docent. *Cardanus*, si recentiores quæras, in Scotia & Orcadibus, *Olaus* in Moscovia,

Dapper in Cyp̄ro, insula, quam silvestres equos pulcherrimos, fortes atque celerrimos alere dicit; *Struys* in Insula Maji, Promontorii Viridis, equos silvestres valde exiguos conspici refert, & *Leo Africanus*, Africa & Arabia desertis equis silvestribus abundare, imo semetipsum Numidia in desertis, hinnulum, pilo candido & crinibus crispatis ornatum observasse testatur. Cum quo consentiens *Marmol*, varios Africa, Arabia & Lybia in desertis, exiguos, jam candidos, jam cinereos, juba crinibusque brevibus ac hirsutis, & canes ac equos domesticos cursus velocitate multum superantes reperiri, imo *Epistolæ* sic dictæ *edificantes*, apud Sineses, equos silvestres minimos inveniri confirmant. Hodie autem quum nulla Europæ pars inculta incolis careat, nullos ibi equos silvestres videbis, & qui in America reperiuntur origine Europæi, ex Hispania eo delati ac in desertis istis propagati sunt, hac nempe quadrupedum specie caruit America. Maximus enim stupor ac terror, Mexicanos & Peruvianos, equis & equitibus conspectis, incessit, & prorsus ignota hujus generis animalia loquebatur; Hispani igitur magnam equorum copiam eo transferebant, eorumque plures & in insulas & in terram continentem emittebant, qui reliquorum silvestrium instar, propagati sunt. Sic anno 1685. in America Septentrionali ad fretum S. Ludovici Celeb. *de la Salle* equos in pratis pascentes, ast homine adpropinquante, præ feritate aufugientes conspexit. Imo in historia peregrinatorum Flibustiensium, relatum legimus, quod in insula S. Domenici equi agminatim & vel quingentenis, una incedentes adpareant, conspecto homine gradum sistant omnes, tum vero ex omnibus unus, legati instar, spatii tamen determinati distantia procedat, ac nares inflet, post revertens fugam petat cum reliquis. Num ex generis sui qualitate efferati quidquam amiserint, dubium, ast, quod equis Hispanicis, a quibus descendunt, multum pulchritudine cedant, hoc certum esse auctor subjungit. Capite, sic pergit, vastissimo, cruribus fortissimis ac plerumque inæqualibus, auribus item colloque longo præditi, ab incolis facili operâ cicurari, & suo deinde labori inservire solent; funiculorum laqueis enim, quos sibi frequentibus locis tendunt, faciles irretiuntur, imo si collo istis inhæserint, ut suffocentur, periculum adest, nisi citius succurratur; post ex corpore & pedibus ad arbores adligantur, & biduo, cibo potuque carentes, docilitatem induere dicuntur, & temporis tractu tantam adquirent mansuetudinem, quantam exuerunt feritatem pristinam; ne casu quidem quum vinculis soluti fuerint, denuo animum ferum induunt, sed domini memoriam retinent, & adpropinquantem, suæque servitutis restauratorem patiuntur. Quum igitur animi mansueti, ac societatis humanæ cupidos natura equos esse adpareat; numquam stabula relinquunt camporum libertatis quærendæ ergo, sed sponte ad receptacula sua revertuntur, licet præter nutrimentum vilissimum semper idem, parciusque, nihil eos ibi exspectet; omnibus autem, imo vel penuriæ, explendis, consuetudo sufficit & acquisitus habitus. Laborum vero plaustris onustis atque defessis, quietis locus delectationi cedit, hunc desiderant, hunc vel in medio spatiosissimæ villæ cognoscunt, huic jam e longinquo anhelant, & vel libertati captivitatis quietem anteponunt. Consuetudines etiam vi ac coactione illis inductæ tandem in totidem habitus abeunt, prætis enim oberrantes equos, continuos hinnitus, præsentia signa edidisse novimus, & ad homi-

hominis vocem accucurrisse, imo quamvis vario nutrimento abundantes, deficiente solito, omnem carnem & alacritatem perdidisse. Omnes itaque equi mores ex educatione pendent, quæ multam quidem hominis curam exigit, & studium continuatum, ea tamen omnia utilitate servitutis re- pendit. Hinnulus ergo postquam 5. ad summum 7. per menses ubera matris suxerit, ab eadem removeatur, qui enim ad undecimum usque mensem eadem traxerit, illum carne quidem & corpore magis succrescere, æst reliquis virtutibus decrescere experientia testatur. Subducto autem ubere bis quotidie furem & parum fœni præbent, adaucta in dies hujusquantitate, eosque quo omnis ad matrem redeundi voluntas præterierit, stabulo detinent; postea autem, cœlo sereno in pascua conducunt; jejunitamen ut pascuant, curandum, & furfur cum potu integra hora, herbam antecedit, nec per omnem primi sui anni hiemem vel frigori fortiori vel pluviae expositi sint. Ex Majo sequentis anni, quotidie in pascua abeant, & ad finem Octobris usque in illis pernoctent, a fœno ferotino tamen, ut isto vescantur, cavendum, etenim herba teneriori adfueti, fœnum quod præcipuo eorum nutrimento destinari solet, inviti adpetent. Secundi ætatis anni per hiemem fure sustinentur, illoque hordeo seu avena contrita commixto, imo hiemis die, æstatis vero die nocteque in pascuis ad quartum vitæ annum usque degant; tum vero ex pascuo remoti, fœno arido nutriantur. Cautione tamen multiplici opus est, primo scilicet octiduo, non nisi stramen, & quæ contra vermes ex herba cruda indigesta forsan exortos facere possunt, forbilia præbeantur. Ex quo hæc hausta sunt *Cel. de Garfault*, experientiæ dubio procul consilia sua superstruit; omnium tamen equorum, sive sani sint sive ægrotantes, sive herba, seu avena & fœno nutriantur, imo asinorum, (naturæ equorum proxime accedentium) stomachos, omni tempore, tanta vermium quantitate oppletos invenimus, ut eos constitutionis partem habeamus, nec morbum ex indigesta cruda herba profectum, sed potius effectum ab alimento & digestionem eorum communi pendentem. Ablactandos insuper hinnulos stabulo separato & probe mundato, nec nimis calido immittas, ne justo magis aeris impressionibus adficientur, sæpius stratum recens subdas, & frequentiori adfrictu purges, nec nisi 3. demum ætatis anno vel vinculis onerabis vel ictibus petas, his enim perferendis subtilior pellis haud sufficit, & damnum potius, quam utilitatem exinde reciperent. Præsepium etiam, ne justo altius constitutum sit, observandum, ne nutrimentorum necessitate, capitis elevati habitum induendo, colli pulchritudinem & gratiam amittant. Duodecimo seu octavo ac decimo vitæ mense, cauda eorum amputanda, quo novos illosque hirsutiores pilos producat. Bimuli equi ab equabus separentur; alias etenim equarum desiderio incitati hinnuli, frustra enervarentur. Tertio tandem vel tertio ac dimidio anno illos edocere exordiaris, & ab initio quidem, ternis quaternisve horis per diem, sellam leviolem & gestu facilem imponas, & lupati ore recipiendi, consuetudinem inducas, pedis elevationi eos adsuafacias, ictisque frequentioribus, ac si ferrea solea induendi essent, percutias; & quos rhedæ vel plastro destinaveris, horum corpori onus & ori frenum immittas; ab initio tamen lupati loco linea veniat, nasi operculo nexa, ex qua arripias equum, & dorso suo vel sellam vel onus gerentem, in superficie terræ plana ad cursum incites; quum

vero facilis revertatur & lineæ motui obtemperet, eodem in loco illum conscendas, nec tamen, nisi quarto anno veharis, quem nisi adtigerit, equitis nimio pondere onustus incedere nequit; quarto tandem anno, frequentioribus quietis intervallis jam ad incedendum, jam ad cursum adigatur. Equum vero rhedæ destinatum, ac fellæ patientem cum alio jam edocto connectas, & lupato lineam longiorem addas, usque dum ducis manui obtemperare incipit. Tunc retrocedendi exercitium succedat, homine scilicet sibi anteriore, leniter illum retrudente, imo levissimis ictibus reprimente. Omnia tamen antequam nutrimentum commutatum acceperit, fiant, quum enim grano & stramine vescuntur, cum viribus, indocilitatem, & resistantiam adquirere solent.

Jussorum loco lupatum equo venit & calcar, illud ad compescendos, hoc vero ad accelerandos corporis motus. Ori enim, quod non nisi recipiendis gustus impressionibus a natura destinatum videtur, huic, inquam, adeo mollis est sensus ac delicatus, ut huic, nec auri nec oculo, voluntatis suæ signa homines admoveant. Vel levissimus tactus & motus lupati informando ac determinando animali sufficit, & nullum defectum, nisi oris in perfectione reperies, quippe quod sensibilitatis maximæ ergo, si rudius illa utaris, lupati monitionibus accipiendis ineptum evadit. Visus vero & auditus ejusmodi alterationis inhabiles, hac ratione deperdi nequirent, ast quæ tactum incurrunt, efficacius in animalia omnia agere videmus, quam quæ vel auribus vel oculis percipiunt, imo equiti ve lequum ducenti inconvenientissimum foret, jussa injungere equo ope eorum, quæ oculos ejus incurrunt; oculi enim antequam in terram defixi, non nisi obverso demum capite jubentis signa conspicerent. Aures autem tangentibus vocibus ac sonis, non nisi vilioris conditionis equi reguntur, & in scholis ubi equitandi artem edocentur, nullis eisdem verbis regunt, imo ne freno quidem, pro lenitate, regi videntur. Bene etiam edoctis vel levissima cruris compressio, vel minimus freni motus sufficit pro directione, calcar autem inutile fere, edendis saltem motibus violentissimis signum subdit & jussum; imo si eques ineptus admoto calcare frenum adtraxerit, saltem non remiserit, equus illo incitatus, hoc vero retentus, agendorum dubius, in posteriores pedes sese erigit, nec tamen loco secedit. Frenum vero suo loco repositum non solum pulchritudinem & adspæctum nobilem equi capiti conciliat, sed etiam determinandis incessus sui modis, minimo equitis motu ductum cedit. Cursus naturæ ejus instinctui forsan convenientissimus, ast gressus ac saltus equiti magis accommodatus, frequentior excolitur. Incedendo, dum crus antequam attollit equus, facile illud ac alacriter adtollatur, & genu valde plicetur; crus elevatum, momentulo quasi suspensum videatur, ast ad terram dum demittitur, pes omnis firmiter eam proculcet, nec ullus capitis motus eidem respondeat; crus enim extemplo terram petens, & caput eodem tempore inclinatum, reliquum crus solum, supportando corporis ponderi impar, & justo debilius loquuntur; magnus vero est iste defectus, ut & hic, dum pes terram petendo vel hac vel illac declinat; debilitatis signum est pes, primo talo, post planta desidens, pes tandem apice suo prius, quam planta solum attingens, brevi temporis spatio equum defatigare solet. Gradus celer esse debet & agilis, passus item nec nimio, nec justo minori intervallo distan-

stantes ; incessus agilitatem ex libertate humerorum pendere , & illo ex modo , quo caput incedendo gerit , cognosci posse scito . Hoc enim si elevatum & immobile est , firmum habeas incessum & agilem ; ast quum motus humerorum haud satis liber sit , crus parum ex terra elevatur , & equus facilis soli in eminentias impingit ; si denique nimis constrictorum humerorum ergo , pedum motus nulla ratione ab istis pendere videatur : tunc equus magna cum difficultate incedit , lapsui proclivis , & labori insufficiens est . Progrediendo igitur humeros adtollat , & coxam deprimat , pedem elatum temporis spatiolo suspensum teneat , & multum elevet ; Si enim iusto diutius elatum conservat pedem , vel iusto lentius in terram remittit , levitatis prærogativa omnia amittit , nec nisi adspectui & intuitui sufficit . Ast non levis solum , sed æquilibris etiam & æqualis equi motus omnis esse debet , sive progrediatur , sive retrocedat ; si namque cruribus alternis sustentato corpore , dorsum hinc inde inclinando moveatur , equiti molestum tremorem producit , idem , si iusto longius crura posteriora post se relinquit , & vestigia anteriorum transgreditur . Quem quidem defectum in his præsertim , qui breviori corpore gaudent , observabis . Qui pedibus decussatis vel incedendo sese adtingentibus progrediuntur , incerto , & qui longius deducto corpore gaudent , incessu equiti magis accommodato procedunt , ille enim a duobus motus centris , humeris scilicet & coxis remotior , minorem motus impressionem per sentit .

Quadrupeda omnia altero plerumque pede anteriore & altero posteriore simul elato incedere videmus , & jam dextrum anteriorem adtollere , quem posteriorum sinister excipit , post sinistrum anteriorem cum dextro ex posterioribus , & sic porro . Quum enim corporis eorum moles quatuor punctis , in quadratum oblongum dispositis innitatur , satior commodiorque moveri nequit , nisi binis simul in diagonalem transpositis , sic enim centrum gravitatis , non nisi minimum motum experitur , & corpus ejus directioni duorum punctorum quiescentium , tamquam fulcris , semper fere inhæret . Quæ quidem regula , & in incessu & cursu , & saltibus equi , vario modo , observatur . Incessus itaque quadruplex est motus diversus . Pedem scilicet dextrum anteriorem elatum , posteriorum sinister paullulum subsequitur , hunc sinister ex anterioribus , quem brevi exinde dexter posteriorum excipit . Primus igitur anteriorum dexter terram pertingit , secundus posteriorum sinister , tertius anteriorum sinister , & quartus dexter ex posterioribus . En motum , 4. temporum punctis & 3. intervallis absolutum , horum tamen primum ac tertium secundo sunt breviora . Cursum equi duobus temporis punctis absolvi observamus , etenim progrediente anteriore dextro , progreditur & posteriorum sinister , nec intervallum interest motui utriusque , post anteriorum sinister una cum posteriorum dextro promovetur , sic cursum duobus temporis puncto , & uno intervallo absolvi vides . Saltus denique tria temporis puncta exigit ; quum vero equi , saltus edentis , partes anteriores , haud sua virtute ab initio moveantur , sed coxarum partiumque posteriorum violentia impellantur , si anteriorum dexter sinistrum præcedat , necesse est , ut posteriorum sinister antea terram reponatur , quo proiciendorum pedum motui violentiori , fulcro venire possit & sustentaculo . Pes igitur sinister posteriorum , dum terra reponitur , primum motus punctum constituit , post dexter ex posterioribus

una cum anteriorum sinistro adtollitur & deprimitur, tandem vero terram petit anteriorum dexter, qui ex dextro posteriore & sinistro anteriore fuerat elevatus, in tertium motus punctum. Cursus itaque tribus temporis punctis & duobus intervallis perficitur, imo primo & secundo intervallo intermedium est momentum, (citius præsertim equi cursu) quo omnia quatuor equi crura simul elevata, quatuor equi soleas una ostendunt. Coxis autem & genibus flexu facilioribus dum gaudet equus, quatuor punctis absoluto, & perfectiore pollebit cursu; primum temporis punctum constituit, qui primus terram reponitur posteriorum sinister; secundum posteriorum dexter, sinistrum qui excipit; tertium, anteriorum sinister, præcedentem subsequens; quartum denique, omnium ultimus qui terram pertingit, dexter ex anterioribus:

In dextrum latus vero propensiores equos cursu ferri videbis, & saltus edere, profundiora item pedis dextri anterioris vestigia viæ imprimere, etenim & hic, & qui immediate eum excipit, posteriorum dexter, quousque currunt, sinistris anteponuntur; hi itaque, majoris ponderis onere, & reliquos quasi protrudendo, admodum defatigantur; Satius itaque existimamus, si consuetudinem equis inducerent, in utrumque latus propensos currendi, sic enim diutius adeo violenti exercitio sufficerent. Sic etiam in scholis edoceri solent, ast alia subest ratio, quum enim ibi jam dextrorsum jam sinistrorsum in gyrum adigantur, jam dextro jam sinistro lateri propensi, ut saltus edant, necesse est.

Incedentis equi crura haud ita multum elevata, terram paullulum pertingere solent, currentis denique aere detenta videntur. Incessus sit firmus, promptus, levis, agilis, atque sicurus. Cursus firmus esse debet, promptus, & æqualis. Capite elevato equus procurrat, & renibus rectis, etenim coxæ, pro quovis cursus puncto, jam adscendentes, jam vero depressæ, & tergum hinc inde jactitatum, equi debilitatem loquuntur; nec foris reflectat pedes anteriores, sed eadem linea quâ posteriores constituti sint, & posteriores anteriorum vestigia deleant. Brevissimum vero sit intervallum, binis cursus punctis intermedium, violentior enim erit motus, si posteriorum pes aliquis justo citior elatus, & defectus hujus explendi ergo, pes idem ex anterioribus diutius terra remanserit. Quam brevem autem sit illud intervallum, resistantia hæcce cursum molestiorem reddit, incessu ac saltu; incessus enim motu leniori & magis continuo, resistantia autem minori perficitur; in cursu tandem nulla prorsus adest resistantia horizontalis, equitis molestia sola, & reactio fere omnis motus anteriorum scilicet pedum, directione perpendiculari ex imo in altum perficitur. Quæ tandem genu patellis est elastica virtus, tantum facit ad saltus motum, quantum elasticitas renum. Renibus enim ad elevandas & protrudendas partes anteriores intentis, patellæ plicatura contracta, violentiam moderat ac retinet; quo facilius itaque flexu & mollior plicatura, eo proprior eo levior erit saltus quem efficiunt, motus; eo celerior rapidiorque, quo fortiores patellæ, eo firmior tandem ac diutior, quo magis equus coxis innititur, quo majori coxarum humerorumque fulcro, viscedit renum. Caterum qui saltus edendo multum crura adtollunt, saltus, reliquis commodiores edere, haud censeto, deficiente namque humerorum compressorum libertate, breviores faciunt saltus, ac sibi ipsis molestiores & defatigantes.

Præter hanc triplicem equi incessus rationem, quartam adhuc in aliquis observabis, quam gradum tolutarium dicunt, quamque primo intuitu, legibus motus contrariam, & cursu saltuque quamvis lentiolem, equo tamen molestiorem, dijudicares. Gradarius itaque equus, magis quam alius incedendo terram perstringit, & amplioribus procedit passibus; bini autem dextri, tum bini sinistri simul promoventur, & sic alternis corporis partibus fulcro destitutis, ac jam hinc jam illinc pendentibus, admodum defatigatur equus, qui rapiditate motus, vix umquam terram deferentis, violentius æquilibrium ut conservet coactus est. Hic enim, si adeo adtolleret pedes, quam vel incedendo vel currendo, tantum æquilibrium querendo, jam ex hoc jam illo latere agigaretur, ut concussione fere terram prolaberetur; terræ igitur quam pedibus radit, vicinitate, ac alternantis motus celeritate sustentatur; pes enim posterior non solum una cum anteriore promovetur, sed & 1. ad 1½. pedis spatium anterioris vestigium superat; quo majori autem spatium, eo rapidior equi motus totus, eoque præstantior gradarius dicendus est. Duobus itaque motus punctis & cursus, & gradus equi tolutarius absolvitur, hoc saltem vel bini dextri vel bini sinistri pedes una promoventur, illo autem pedes bini diagonaliter sibi oppositi. Equiti, iste incedendi modus commodus, equo autem molestissimus, nec nisi plano & æquo solo incedenti permittendus est. Ut enim cursus incommodum ex resistantia pedis anterioris pendet, posteriore elevato: in gradario deficit incommodi causa, pes scilicet anterior, eodem tempore, quo posterior, adtollitur. Qui equorum in naturam inquirunt, gradarios numquam sua sponte currere, reliquisque debiliores esse confirmant. Et hinnulos deficientibus vel præ cursu, vel saltu, viribus, ad festinandum si incitantur, hoc gradu tolutario incedere videmus; imo & optimos eorum, qui nimio laboris exercitio virium defectum commonstrare incipiunt; si ad accelerandum passum adiguntur. Incessus igitur defectum merito habemus gradum tolutarium, paucissimis saltem, iisque debiliorum proprium, ac vel fortissimos brevi viribus suis & vigore exuentem. Bini denique adhuc alii supersunt incessus equini modi, quos describere potius, quam peculiari nomine Latino denotare valemus; quorumque alter, *entrepas* apud Gallos audiens, incessu & tolutario gradu, alter vero, *aubin* Gallis, & cursu & saltu constat, vitio autem equi uterque veniens, nimium laborem & renum debilitatem pro origine habet, plaustrorum scilicet onere nimio onusti, prodeuntibus annis primo, equi autem postarum seu vecturis publicis inservientes, ad continuum cursum incitati, posteriore gradu, saltuum loco, incedere solent.

Quadrupedum vero omnium & pulcherrime conformatum esse, & probe inter se concinnis membris compositum equum nemo negabit; huic enim asinum si æquiparares, ineptum dices, si leonem, nimis vasto capite instructum, si bovem, nimis brevibus ac tenuibus pedibus, si camelum, deformem, si tandem rhinoceronem & elephantum, moles vastissimas. Maximam vero humani ac brutorum capitis differentiam ex maxillarum longitudine pendere constat, criterio omnium ignobilissimo; ast quamvis multum productæ sint equi maxillæ, hic tamen nec imbecillitatis adspectum, ut asinus, nec stupiditatis, bovis instar, refert, sed agilitatis potius, colli pulchritudine accedente. Capite equus, quod erectum portat,

qua-

quadrupedibus ac si superioritatem spiraret, hominis faciem pertingit, intrepide intuetur, & oculis superbit scintillantibus ac spatiosis, auribus elegantibus ac mediocribus, nec enim tauri brevitatem, nec asini aures longitudine, pertingunt, juba colli capitique ornatu, ac virtutem & alacritatem suam innuente; & cauda prolixa ac frequentissimis crinibus constante, nobilissimo corporis exitu, cui quæso qui comparabis cervi, elephantii aliorumque breviorum? qui pilis nudam asini, cameli, rhinocerotis &c.? Caudam equi crines longi constituunt & frequentes, quos brevissimi sui trunci ergo, ex uropygio exortos crederes; nec in altum, leoninæ instar adtolli potest, alit terram respiciens, majori ipsi cedit ornatui, & motus quo pollet, lateralis, pro abigendis muscis ipsi inservit. Etenim quanta sit pelli ejus soliditas, quanta pilorum frequentia, vel minimæ tamen impressioni cedit. Plurimum vero ad nobilem equi adspæctum colli corporisque motus faciunt & actiones, in primis, si pars colli superior ex qua crista egreditur, ubi humero exoritur, recta linea ascendat, & prout capiti accedit, ut cygni collum inflectitur, pars vero inferior, omnis curvaturæ expers, recta procedat a pectore usque ad maxillæ partem internam, & paululum prona; si pars colli superior tenuis, & crista longis, tenuioribus rarioribusque ex crinibus composita sit, si collum denique totum longum fuerit & eminens ac corporis rationi probe accommodatum; si enim justo longius est ac gracilius, capitis ictus edere solent equi, si nimis breve ac carnosum, nimium pondus est colli pro manu equitis, frons autem horizonti perpendicularem situm teneat, si facere debet ad elegantiam capitis. Caput sit macilentum & tenue, aures haud adeo distantes, exigui, recti, immobiles, strictiores, tennes & capitis summitati infixi; frons parum convexa, & angusta; fossulæ oculis imminentes, plenæ, palpebræ tennes; oculi scintillantes, magni, nec recedentes; pupilla magna; maxillæ pars interior tenuis & parciore carne obducta, nasus parum arcuatus; nares hiantes, & probe conscissæ, tenuis narium paries; tenuia labra, os mediocriter fissum, tergum probe eminens ac cuspidatum, humeri macilenti, depressi & parum constricti; dorsum contiguum sensimque arcuatum, ac ex utroque spinæ profundioris latere elevatum, latera breviora ac carnis plena, coxa rotunda multaque carne induta, caudæ truncus crassus & solidus, humeri & lumbi fortiores & carne multa obducti, genu anterius rotundum, patella ampla & excavata, tibiæ anterius tennes & ex lateribus planæ, nervus satis longe remotus, globulus exiguus, pallear fere nudum, capronæ fortes ac haud adeo longæ, corona parum elevata, cornu nigrum, contiguum, splendens; ungula alta, tali lati ac parum alti, fuscina macilenta & tenuis, solea tandem crassa & concava.

• Paucissimos tamen equos videbis, in quibus omnes, quas enumeravimus, perfectiones unitas reperiæ. Oculi enim, morbo frequentiori & cognitu difficillimo, laborant, qui si sani sint, per transversam corneam duæ ad tres maculæ, sebi colorem referentes in pupilla conspiciuntur, dummodo pellucida sit cornea, nec quibusdam quæ transparentes maculas impedire possent, conspersa. Oculi autem ægrotantis vel læsi signum & cornea est si vel duplex videtur vel ingrati coloris, & pupilla exigua, longa, strictior seu circulo circumdata albo, seu coloris cœrulei. Ex motu aurium denique naturam atque salutis statum dijudicabis, optimumque ducas illum, qui

qui prono aurium apice progreditur ; labore defatigatus aures deprimere solet ; iracundus seu malignus alterno prono, alterno reflexo incedit ; exaudito strepitui aurem porrigit, & dorso percussus aurem reponit. Obtusiori acie oculorum laborare solent, quorum oculis vel profundiores capite reconduntur, vel altero majori instructi sunt ; & qui os aridum exhibent, illis, qui humidum ac spuma irrigatum ostendunt, præferendi. Equusequistanti inserviturus, humeris depresso, motu facilibus, nec adeo pinguibus gaudeat, qui autem pro onere venit & plaustris, magnis, conglobatis, ac multa carne instructis ; ad tamen prioris humeri nimium aridi, nimis prominentia ossa præbeant, molestiæ imparem dijudicabis equum ; imo si pectore nimis eminente constructus est, cruribusve anterioribus retrorsum flexis, facilis saltando impingit & prolabitur. Sit autem corporis moli conveniens crurum longitudo, etenim anteriores si fuerint justo longiores, vacillanti nec firmo incedet gradu. Sin breviores, equitantis manum adtractione continua defatigabit ; plures vero equarum pedibus anterioribus nimium brevibus laborare, & equos admissarios præ castratis atque equabus, fortiori collo gaudere compertum est.

Equorum annos alii quidem ex fossulis, quæ oculis imminet, quæque in vetustioribus excavatæ reperiuntur, dijudicant, ast quum tales quoque sint junioribus, ex admissario vetustiori generatis, dentium intuitu, certior equi annos cognoscere poteris, equo enim in universum 40., 24. nempe molares, 4. canini & 12. incisarii, equæ autem canini nulli, ad summum, brevissimi sunt, & hujus quidem canini, nec molares ætatem cognituro pro testibus veniant.

Decimo quinto die ex quo natus fuerit hinnulus, 12. ejus dentes anteriores propullulant, illique rotundi, breves, ac haud valde solidi, sensim effluunt, aliis succedentibus ; secundo namque & dimidio vitæ anno quatuor anteriores, bini ex utraque maxilla excidunt, subsequente anno quatuor alii prioribus, tunc renovatis, contigui ; 4½. tandem anno quatuor denuo alii, succrescentibus propinqui, lactis dentes excidunt, nec tam brevi succrescentibus excipiuntur ; hi igitur, anguli alias dicti, ætatem equi loquuntur, & tertium a medio locum occupantes, cavitatem macula nigra distinctam exhibent, 4½. itaque seu quinto animalis anno parum ultra gingivam prominent & apertissimam cavitatem ostendunt, quæ a sexto ad octavum annum sensim expletur, signo illo nigro prorsus tandem evanescente. Nec amplius, octavo anno expleto, ætatis signa exhibent, quæ caninorum intuitu tunc dijudicanda venit. Hi autem ex latere illorum, de quibus sermo est, constituti, molarium instar, nec effluunt, nec effluxis succedunt, sed qui in maxilla inferiore conspiciuntur, bini 3½. plurimum vitæ anno nascuntur, & qui in superiore, quarto. Ad sextum usque annum acutissimi sunt, ast decimo emolliti, detriti ac annis recedente gingiva denudati, hinc longiores videntur, imo pro equi ætate, longitudo succrescit. Quod decimo & decimo tertio vitæ anno interest spatium, haud singularia signa exhibet, ast hocce peracto crines quosdam candidos in ciliis observare licebit, dubium tamen indicium, quippe quos & in hinnulis nonum vel decimum annum agentibus, ex admissario & equa vetustis, qui fuerunt progeniti. Quibusdam insuper equis duri sunt adeo dentes, ut nec temporis tractu deterantur, nec maculam nigram amittant

umquam; hi igitur, quos *biguts* Galli dicunt, ex dentibus excavatis, tunc vero repletis, & caninorum longitudine dijudicabis, quod quidem sæpius in equis quam equabus observavimus. Palati tandem sulci cum annisevanefcentes annorum equi signum, sed dubium atque incertum constituunt.

Secundo interim & dimidio anno quamvis equus pubescat, & equa, foemellarum instar, adhuc præcocior; hinnulos tamen non nisi debiliores & imperfectos producendi capaces; quarto saltem & dimidio anno equæ admittantur, imo ne tunc quidem nobiliores, illi saltem qui plaustris devehendis & oneribus perferendis destinati sunt; nobiliores, & præsertim admissarios Hispanicos, septimo demum anno equabus admittendos scito. Catulitionis tempus ab exeunte Martio incipit, & exeunte Junio absolvitur. Summum vero Veneris æstus per 15. tantum dies, vel 3. hebdomades patiuntur, quo quidem tempore equum equæ ut admittere negligas caveto, qui pulcher sit & elegans corpore; antea elevatus, sanus ac vicens, boni generis, ac patria; equorum optimorum fama præclara. Pulchrum si cupis equum cui veharis, admissarios alienos feligas, omnibus præoptes Arabicos & quos Andalusia, Barbaria & Turcia alit, quorum si nulla copia datur, Anglicos quoque substituas, hi enim ex illis descendentes, ob summam Anglorum circa equos curam, & pabuli præstantiam, haud ita multum degeneravere; sic & admissarii Itali & in primis Neapolitani, optimi, equas nobiliores conscendendo equos generant equitatu præstantes, iidemque equabus fortioribus admissi, eximios procreant rhedæ caballos. Apud Gallos autem Anglos aliosque, qui ex admissario Turcico vel Barbaro proveniunt, equos, parentibus majores, qui autem ex Hispanico minores esse dicunt. Rhedæ equi præstantiores ex admissario Neapolitano, Danico, vel Germanico & Belgico, ex Frisia in primis, seu Holfatia oriundo generantur. Admissarius autem producendis equis pro equitatu ille feligendus esto, qui 4. pedum & 8. ad 10. digitorum altus est; equis vero rhedæ 5. pedum altus destinatus; pulchro insuper gaudeat pili colore, cinereo, fulvo, nigro gagatino, ferrugineo, aureo & Isabellino muli radio consperso, & extremitatibus crinibusque nigris; color vero injucundus omnis ac extremitates albidæ nequiquam in admissariorum ullo reperiantur. Pulcher itaque adspectu sit admissarius, & animo fortis, & docilis, agilis, & ore sensibili, & humeris liberis, & cruribus fortibus, coxis flexu facilibus, & nervis, præsertim genuum, robustis; nec non quodam artis exercitio edoctus. Equum enim, proli omnes, quas vel natura vel arte habet, qualitates improbas pariter ac præstantes communicare observatum est. Omnem igitur equum, qui vel naturæ defectu, vel consuetudinis vitio laborat, ut equæ admittas, studiose caveto.

Nostro sub coelo qui nascuntur, equi, parum quidem elegantiae ex matre sua accipiunt, ast magnam fortassis temperamenti & corporis similitudinem, hinc equas eligas, quæ corpore ac ventre ampliori gaudent, & multum lactis præparant. Si equos cupis ad equitandum, equas Hispanicas seu Italicas, si vero equos curru subjungendos desideras, Anglicas & Normannas admissario committas. Sufficit tamen admissarius pulcher, generando ex quavis equa, hinnulo pulchro, male enim conformatus equus, male conformatos producit hinnulos, ut hominum prosapiam sæpius parentes referre videmus. Mater vero magis ad generationem filii, quam ad
equi

equi equa conferre videtur, sapius enim filius matri, quam equæ hinnulus similitudine accedit, quam si inveneris, non nisi in partibus corporis anterioribus, capite nimirum & collo observabis. Cæterum parentes inter ac filios quæ obvia est, similitudo, ut prodeuntibus saltem annis adparet; sic & in equis annorum numero evolutis parentum similitudinibus, ac excrecendo immutata saltem eorum conformatione num parentibus similes, num dissimiles sint, judicare poteris. Pubescentium enim caput longius evadit, nasus fortior & major, maxilla protruditur, pedes longiores & interdum tenuiores fiunt, ita ut peracta pubertate, adolescentem, sibi puero dissimillimum sapius reperiās. Effluxo igitur pubertatis spatio saltem, filiorum cum parentibus similitudo disquirenda venit, & tunc filios sapius patri, filias matri, sapius adhuc utrumque sobolem utrique parentum, nonnunquam avo vel aviæ, & avunculis & materteræ, omnes vero magis sibi invicem, quam ex quibus oriuntur, agnatis, singulos tandem in universum generaliori cuidam familiæ similitudini accedere observabis. Quum igitur ex equo magis generatio pendeat quam ex equa, hinnuli vel equo sunt simillimi, vel magis accedunt, quam equæ, matri, nonnunquam & avis, & equam licet pulchriorem, & admisario pulchriore imprægnatam, ast ab inferiore progenitam hinnulos edere accidit, pulchros quidem adspectu, ast prodeuntibus annis, prærogativa sua sensim amittentem, ut e contrario equæ ex pulchra progenie descendentes hinnuli, adspectu quidem viliores, ad succrescente ætate, pulcherrimi evadunt. Quæ omnia quibus contendunt, quod ad constituendam hinnuli conditionem magis faciat patris ac matris conditio, probata confirmare, vel si vera sint omnia & indubitata, nobis quidem haud videntur. Quid mirum, si admisarius, ex pluribus selectus, calidiore plerumque cœlo oriundus, lautissime pastus, & quovis laborum genere exemptus, generando, equabus communibus, frigido cœlo natis, & labore defatigatis prædominetur? Tales autem omnes sunt admisarii nostri, tales apud nos equæ omnes; & equas calidiorum terrarum, equo communi imprægnatas plus quam patres conferre censemus ad constitutionem hinnuli, ac hominum instar, parentum utrumque tantidem facere ad sobolis procreationem, etenim totidem fere hinnulos masculos, quam fœmellas generari observavimus, & generationem dimidiam, si loqui liceret, ex sexu alterutro pendere concludimus. Selecto itaque admisario, ac segregatis equabus, alium eligas equum non castratum, qui equas coitum adpetentes dignoscere, imo adgressibus suis, coitus desiderium inducere & excitare possit; hunc transeuntibus equabus adhinnire, easque adsalire videbis, congressum renuunt quas nullus æstus incescit, nec nisi coitum adpetentes adpropinquantem patiuntur. Explorata itaque equa, hunc removeas, & electum admisarium substituas. Hac igitur ratione summi æstus spatium experiri licebit, in his præsertim, qui nullos adhuc fœtus edidere, matres autem factæ, 9. post partum dies, coitum adpetere solent, nono igitur exinde die admisarium hisce admittas, & continuante Veneris æstu novenis subsequentibus omnibus, usque dum conceptione peracta, ardorem brevi exinde ut solet, evanuisse observaveris. Quæ omnia si adcurate perficere & fructus laborum & diligentia accipere velis, varia opus est cura varia cautione. Equarriam scilicet, (sic enim locum progignendis equis adaptatum, & Gallis: *Harras*, di-

dictum, barbaro vocabulo adpellare liceat) loco convenienti, & equorum quantitati sufficienti constituas, varia in loca fossis seu septis interstincta divides, equas vel utero gerentes vel lactantes pinguissimo pascuo committas, nondum imprægnatas autem cum hinnulorum fœmellis alio pascuo, illoque aridiori indas, ne nimiam adipiscantur pinguedinem, generationis impedimentum; hinnulos tandem non castratos, aridissimo & colliculorum pleno loco equarriæ recondas, ut illos conscendendo humerorum pedumque roborem sibi conquirant, separato autem a receptaculo equarum & probe munito, ne harum commercio debilitentur ac enerventur. Imo si loci vastitas patiatur, alternis annis boves & equos in pascua ista abigas, boves enim ad conservandum eorum faciunt fundum, & pascua ab equis effœta, pinguiora. Paludibus item frequentibus intersectus esse debet locus, stagnantem enim aquam satius equis conferre, profluentem vero alvi tormina excitare constat. Arbores, si quæ adsunt, eradicare caveto, æstivo enim calore gratissima equis est umbra; truncos autem terra eminentes deprimito, foramina etiam obturato, & solum, quantum fieri potest, explanato, ne sinistri quidpiam accidat. His itaque pascuis æstate equos detineto, aut hieme equas cum hinnulis stabulo adservato fœno nutrito, & sereno saltem cœlo in pascua abigito. Admissarios stabulo conservabis, & frequentiori stramine quam fœno nutribis, motu item mediocri ad catulitionis tempus usque exerceas, durante autem æstus tempore, labore exemptos, lautius, solito tamen victu pascas. Magna vero spermatis iisdem copia, & abundantissima ejus est emissio. Imo & ex equabus, quatenus Veneris æstu incitantur, emissum, seu effluentem potius liquorem spermaticum, viscosum & albidum, simulac autem conceperint, desinentem videmus; huic liquori equæ *Hippomanes*, nomen indidere, & filtri instar equo si exhibeatur, amore vel delirantem reddendi virtutem Græci adscribunt. Differt autem ab hippomanibus, fœtus equini involucri, quorum & originem & situm, & naturam, Viro Cel. *Daubenton*, inventore ac duce, fusius supra descripsimus.

Solo tandem arido & leviori, sobrios, leves, fortes, cornu item duro & pede nervis robusto instructos; aut udosis in terris ac pascuis pinguioribus, equos nasci observatum est, capite magno & graviori, corpore crasso, ungulis pilosis, cornu inferiore, & pedibus explanatis gaudentes. Quæ quum ex varietate cœli & nutrimentorum proveniant, haud mira videbuntur; miratu autem cedere existimamus, quod pro conservanda equorum specie alieni semper equi patriis equabus sint admittendi; Sic v. gr. mitiorum Galliæ regionum equabus, admissarium vel subfrigidior vel calidior cœlo natum admittas, & quo majori climatis patrii & Galliæ differentia distant, eo eximiores equi generabuntur. Ibi igitur pro admissario vel Arabs veniat, omnium præstantissimus, vel Barbarus, vel Hispanicus & Neapolitanus, vel etiam Danicus, seu ex Holsatia ac Frisia proveniens. Horum denique defectum expleat etiam Anglus quivis seu Germanicus, imo Galliæ regionibus Septentrionalibus natus, dummodo sit alienus, brevissimo enim temporis spatio omnis equorum species, quam pulchra sit, evanescet, si ejusdem speciei equos equalque commiseris. Nec non ad coloris varietatem in animalibus, multum confert climatis & pabuli sui differentia, sic silvestria ejusdem climatis omnia eundem præferre

ferre videbis colorem, pro anni temporibus, jam fortio- rem jam debilio- rem. Vario autem sub coelo viventia, & in primis domestica, multiplici colorum mixtorum varietate conspicua, & canem v. c. & equum, multiplicem, cervum vero ac leporem, semper eundem colorem exhibere videbis; qui quum ex injuria aeris semper eadem, ex nutrimento semper eodem proficiatur, hominis cura in domestica, & quo teguntur, stabu- lum, & cibi varietas, imo specierum colore differentium permixtio incon- cinna, varium, nec tamen pulchrum domesticorum efficit colorem. Ne- cessaria autem circa equorum generationem observanda, sequentibus ab- solvuntur, ut pili corporisque probe respondentis ratio habeatur, & cli- matis diversi committantur, nec, qui eodem loco nati sunt, umquam. Quum vero equarum imprægnatarum uterus, foetus pondere ingravescente turgescit, ne lædi possint, a reliquis sunt separandæ; undecim autem men- sibus & diebus aliquot utero gerunt, & in pedes erectæ, nec humum pro- statæ foetus edunt; partu etiam dum difficiliore laborant, manus auxilio foetum vel protrahere, vel reponere, vel emortuum funiculis elicere so- lent homines. Prius autem hinnuli caput, quadrupedum more egreditur, tum involucria sua rumpit, ac quæ illis detinetur, aquarum copiam effun- dit; eodem tempore frustula quædam solida, sedimento liquoris allantoï- dis composita, ac antiquioribus, ut supra notatum est, *Hippomanes* dicta, procidunt, nec tamen, ut illi perhibuere, carnis constant frustulis capiti adhærentibus, sed Amnio, membrana, ab eodem separantur. Foetus utero egressum mater delambit, nec tamen, ex sententia antiquiorum hippoma- nes devorat. Equæ vel imprægnatæ perferendo coitui sufficiunt, absque ullo superfœtationis periculo; 14. vel 15. ad summum 18. ætatis anno equæ, equi autem vicesimo effœti, imo quo juniores coitum exercuerint, hominum instar, eo citiores sterilescunt. Viliores etenim equi, quarto jam anno equabus admissi, & vita sunt breviori, & decimo quinto vitæ anno ad summum, effœti. Annorum tandem equi numerus sexies septiesve su- perat numerum excretioni suæ destinatorum, lege naturæ universali, qua- tuor annis scilicet magnitudinem omnem excrescendo attingit equus, 14. autem homo, hic ergo octoginta ad centum, ille 25. ad 30. annos vi- vere solet.

Pulcherrimos autem omnium, quos Europa vidit, Arabicos habent, Bar- baris majores ac elegantiores, ast in Gallia rarissimos. Barbari frequen- tiores sunt, & levitatis ergo, cursu celeres. Quorum altissimi 4. pedes & 8. digitos, nec ulli fere 4. pedes & 9. digitos pertingere solent. Ex Bar- baris primum locum illis adsignant, qui Marocco regnum patriam colunt, secundum qui in montium regionibus, & illis qui in Mauritania, Turcia, Persia & Armenia nascuntur, ultimum adsignant locum. Quo calidiore ex regione autem proveniunt equi, eo breviori pilo teguntur. Hispanici, nullis nisi Barbaris inferiores, in lumbis stigma seu notam equarriæ osten- dunt. Optimi horum habentur, qui ex superiore Andalusia oriuntur, ca- pitis enim justo longioris defectum frequentissimum præstantia qualitatis compensant, acritate, obedientia, celeritate & ardore, imo articulorum flexilitate Barbaros superant. Hinc & omnibus qualescumque sint, antefe- runtur, ubi de equis vel in bello, vel pro pompa, vel equitandi artem edocendis quæritur. Anglorum optimi figura sua Barbaris atque Arabibus,

ex quibus oriuntur, accedunt, celeres insuper, acres, robusti, venationi, cursui atque labori perferendo præstantes, ast exigua humerorum libertate ac gratia destituti sunt. Italici olim præstantiores, quam quidem hodie, neglecta hominum cura reperiuntur, Neapolis tamen regnum & adhuc, eximios rhedæ præsertim equos subministrat ac adspectu magnificos. Danici pulchræ conformationis & roboris ergo optimi sunt pro curru protrahendo, variis insuper pulcherrimisque coloribus conspersi. Belgici & in primis Frisia nati rhedis plerumque Gallicis inserviunt. Infrequentiores autem equos eximios in Gallia videbis, & ex illis quibus equitando vehuntur, in censum veniunt Limosinorum in terris nati, hi namque barbaricis accedunt, & venationi mirifice inserviunt, sed segnius excrescunt, nec nisi octavo demum anno ætatis, labori perferendo sufficiunt. Sic & qui ex Avernia nascuntur, ex Pictavia, & Burgundia, manni, seu equi minores haud prorsus contemnendi veniunt; ast exceptis Limosinensibus Normanni optimi dicendi, haud adeo venationi, quam bello inservientes. Sic & quos Normannia inferior alit rhedæ equi, Belgicis quodammodo præstantiores, quos autem Burgundia & Bononia, oneribus plaustrisque aptissimi sunt.

Nec apud Persas, Arabes plurimosque Indiæ populos ita ut apud Europæ Chinæque incolas, omnes fere equos castrari videmus, quippe qui castratione multum celeritatis ac roboris amittunt, nec nisi mansuetudinem cum docilitate adquirunt. *Plinius* est, qui dentes caninos equi, antequam effluerint, castrati, amplius effluere negat, nos autem adserto experientiam refragari vidimus, & dentes lactis hinnulorum, sive castrati fuerint sive minus decidere. Ab analogia decidantium cervi & capræ cornuum deductam censemus antiquiorum argumentandi rationem, cornua etenim castrati cervi vel capræ haud amplius decidere constat. Castratus itaque equus gignendi facultate licet destitutus, coitus perficiendi virtute gaudet. Semel quotannis, vere plerumque, nonnunquam etiam autumno, pilis suis, pilos gerentium instar, equus exuitur; quo quidem tempore, virium deficientium ergo, & pariori labore onerandus, & copiosiori pabulo reficiendus est. Equorum alii, ii præsertim, loca udosa & paludosa patriam qui habent, cornua sua deponere solent. Frequentior graviorque equi haud resecti, quam castrati ac equæ hinnitus est. Imo vel recentis nati maris vocem voci foemellæ fortiolem, & pubescentium adhuc graviolem audies. Dentes ostendere solet equus & ridentis visum imitari, dum vel coitus æstu, vel desiderio ciborum, vel ira incitatur, vel morfu petere quærit quempiam. Linguam bove quamvis rudior, infrequentior linctum protrudere solet equus, & asperitatis memoriam diutissime conservat, facilis autem obsequium renuit recalcitrando. Ardor enim naturalis ejus ac celeritas, statim omnes, quibus pollet vires, exigenti subministrat, ast si majores iisdem exegeris, ille indignatus renuit, bos vero lentior ac segnior, vel facultatem suam excedentes vires impendit, nec adigenti abnuat. Equus somno breviori quam homo refocillatur, & defatigatus, si sanus fuerit, per duas tresve horas terra prostratus quiescit, post vero resurgit & cibum capit, tum ex cibo capto denuo quiescit, si multo labore defatigatus fuerit. Tres vero, ad summum quatuor horæ ex quatuor & viginti somno ejus sufficiunt, imo alii numquam terra reclinant, iterum alii, jam pedibus innixi jam humo prostrati somnum capiunt; castrati autem

autem frequentiori diutioreque somno egent, quam illi, qui nulla partium refectione mutilati sunt. Vario tandem modo potum suum haurire solent quadrupeda; quamvis capite, potum versus inclinato, illum quærere necesse sit; nisi siniam excipias & manibus quæ gaudent reliqua, hæc enim vas aqua plenum manibus arripiunt, ori admovent, inclinant, liquorem effundunt & deglutiunt. Sic canem rictu hiante & lingua longa actenuissima instructum lambere vides aquam, linguam scilicet, calicis instar complicat, aqua replet, & magnam sic liquoris quantitatem haurire mavult, quam nasum bibendo irrigare. Equus autem lingua, crassitie brevitateque ergo, efformando ejusmodi calici, incongrua instructus, avidior ad tamen potum adpetens, quam cibum, os & nasum aquæ immergit, illamque solo deglutitionis motu accipit, quapropter uno ille haustu omnia, canis autem reiterato, & respirationis ergo, per intervalla bibere solet. Hinc etiam præsertim ex cursu incalescentem equum, frequenter potius, quam nimis diu bibere sinunt; Caveas autem, ne justo frigidior hauriat potum, hic enim & alvi tormina concitat, & nares aquæ frigidaë immerse, rheumatibus adficiuntur, quæ jure nostro pituitæ, equis periculossimi morbi, initia habemus, quæ, quum in membrana pituitaria sedem figere solet, non est, nisi membranæ hujus inflammatio, rheumate diutius producta.

Reliquos vero equi morbos transeamus, quippe qui naturalis historiæ ambitum, subnexa etiam animalis morborum enumeratione, nimis distentum veremur. Dolendum tamen est, quod equi, tam utilis tamque præclari salutis curam illis injunctam videmus, qui artes & scientias ne a limine quidem salutavere. Medicinæ quam Veterinariam adpellabant antiquiores, præter nomen, quid quæso nunc superest? At quanti successus felicissimi, hujus Medicinæ generis studioso responderent, quanta haberet, quæ sibi promittere posset, & incognita detecta, & cognitorum certitudinem; hoc enim Medicæ artis genus haud mere conjecturis inniteretur, nec tot tantisque cognitionis difficultatibus premeretur, omnia magis extricata reperiret, & dijudicando facilia, & sanatu leviora, & amplissimum quævis tentandi campum; sicque inventa feliciter nova, per analogiam & humani corporis cognitioni lucem, & sanitati restaurandæ modos mediaque adferrent.

Exposita hætenus & anatomica equi descriptione & historia naturali, ducibus adeo præclaris, nulla, nisi sequentia subnectenda supersunt.

Islandia, insula, quos alit equos, sic *Anderson in historia Islandiæ naturali*, exiguos reperi, breves, & molis suæ respectu, fortissimos, quales in reliquis etiam Septentrionis regionibus esse solent. (Id quod de quovis terrestrium dici posse observamus, quippe quæ calidioribus regionibus ventia, calore partes quasvis dilatante majora evadere vides, ut elephantum, camelum, rhinocerotem, reliqua, piscium maximi e contrario, ut balæna, non nisi frigidior sub cœlo inveniuntur) Celeres etiam ac robustissimi, nec non maligni sunt & mordaces. Molestissimæ cæterum vitæ destinati, parum ex quo nati fuerint, perfectionis suæ gradum pertingunt, quovis enim anni tempore, sub dio degunt, & alimenta sua & nive oblecta quærant necesse. Beneficio tamen naturæ, contra hiemis frigus, pilo valde hispido, longo ac frequenti, hieme irruente qui succrescit, induuntur.

Die 11. iduum Septembris, sic in *Diario itineris sui Septemtrionalis*, *Abbas Outhier*, primos conspeximus equos ex pascuis æstivis redeunt. Quo autem vitam agunt, modum, illum inter singularia Lapponiæ referendum ducimus. Æstate enim parcius hieme autem frequentior eorum usus est, quo trahis, & ad vitam necessaria & iter facientes deportantibus, subneantur; æstate utrique cymbæ veniunt. Majo circiter mense, dominis relictis, varias silvarum regiones, sua quasi conciliabula petunt. Varia tum in agmina coeunt, numquam cum aliis permixta, numquam inter se separata. Post singula agmina sua sibi silvæ loca pro pascuis, designant, occupant, nec horum terminos egrediuntur. Depasto tandem pascuo primo, aliud quærunt, iisdemque legibus eo detinentur. Tam probe ordinata societate ac exacte observata regula vivunt, ut numquam dominis ignota sint loca, quibus vel verno vel æstivo tempore commorantur. Quo si illis uti velint, ruricularum aliquis, jussu vecturis publicis præfecti, quem *Gifovergole* dicunt, suos, in mediis vastissimis silvis quærunt & reperit, qui peracto suo labore, sponte sua, & absque duce ad socios redeunt. Inclementiore tandem cœlo, Septembris sub initium, silvas relinquunt, & agminatim, ad suum quivis dominum revertuntur. Exigui cæterum sunt corpore & alacres, nec tamen maligni, etenim ne ex cauda quidem, gradus sistendi ergo arrepti, renuunt obsequium. Varii tamen & ex illis, quam dociles sint reliqui, jugum detrectare solent. Ex silvis itaque domum redeunt multa carne instructi solent esse ac pinguedine, æst hieme, continuo labore defatigati & parcissimo saltem nutrimento refocillati brevibus macescunt. Trahas dum protrahunt, sæpius nive hausta os suum explere, & trahis soluti, terra nive obducta, ut super herba nostrates labore peracto sese volutare peramant, & frigus vel arerrimum æque sub die ac in stabulo perferunt; imo hiemis vehementia si deficiat pabulum domi, illos in agros, ubi nix liquefcere cœpit abeunt & nutrimenta quærunt.

Prodiit nuperrime *Collectio & prosa & ligata conscriptorum quorundam, prælectorum in Academia artium humanitatis Regia, quæ Rupellæ floret*, in quo & *Schediasma* legitur de qualitatibus & natura taxi, equis veneni, auctore Viro Cel. *Girard de Villars*, *Medicinæ Doctore Societatis Regiæ laudatæ Sodali*, & *litterarum commercio Regiæ Scientiarum Academiæ juncto*. Addit alia inter Vir. Cel., quod taxum sibi venenum, animalia bifida, vomitu reiicere soleant, qui in equis locum non habeat, quippe quorum œsophagum ita constructum esse supra ostendimus, ut eminentiæ illius rhomboidales sibi invicem immissæ adscendentia alimenta haudquaquam transmittant.

Monstruosos tandem & equos, hermaphroditas præsertim vidimus; ac, homine excepto, plurimis, quam animantium quodvis, morborum generibus subjacet equus.

Nomen equi Gallicum: *Cheval*, ex Latino: *Caballus*, derivandum, & Ebraicum: *Sus*, Græco: *Hippos*, Italicum & Hispanicum: *Cavallo*, Germanicum: *Pferd*, seu *Ross*, Belgicum: *Paard*, Anglicum: *Horse*, & Suevicum: *Hiest* esse memento.

Medicinæ usibus tandem equi testiculi, verrucæ, ungulæ, stercus, imo aliis in terris, lac quoque ex equa venire solent. Testiculi equini efficacissimo medio ad expellendas secundinas, & sedandos colicos dolores cedunt,

dunt, dummodo in folia conscissi, post furno arefacti in pulverem reducuntur. Dosi igitur ℥ij. ad ℥j. vel nudi, vel croco & borace mixti, recipiatur, certissimo successu, foetum mortuum & secundinas expellit. Anneti semine ana. commixti, pro alvi torminibus veniat, præcipiente *Fonseca*, Viro Experientissimo, & *Zwelfer* croco addito, cum aquæ liliorum vehiculo, secreti instar, præscribebat eundem. Lichenes autem vel verrucæ seu callositates, in pedibus, cruribus, genubusque equorum exorti, multum salis volatilis oleique continentes, contra epilepsiam, vapores hystericos, ad provocanda menstrua, resolvendas matricis duritates, profligandos renum & vesicæ calculos & saburram, pulveris instar, ℥j. ad ℥j. dosi intus recepti, contra vapores hystericos autem fumo suo, infundibuli obversi ope, partes genitales intrante, commendantur. Ungularum fumo eadem ratione recepto, eadem tribuuntur virtutes: Alii extractum illarum eisdem contra morbos interius præcipiunt, frequentior adtamen nobis est castorei usus. Docet tandem in *Ephem. Germ. Dec. 2. Anni 5. pag. 259. Cel. Hannemann D.* violentissimo hemorrhoidum fluxu laborantem, quum frustra auxilium ab artis mediis quæsisset, ruricolæ consilio, sedili perforato supersedens fumum ex limatura ungulæ equinæ proficiscentem postquam receperit, pristinæ saluti restitutum fuisse. Nostri vero temporibus usus stercoreis equini inventus esse videtur, quod sudorem promoventis & solventis suæ virtutis ergo, interne atque externe adhiberi solet. Etenim pleuriti, Peripneumoniæ, asthmatis, colicis & interdum bilosis doloribus obstat. Pro infusione vinum veniat candidum, hoc enim ingratus illius sapor optime depellitur, tum recens equi admissarii sterco 4. unciiis vini candidi infundas, & vas, quo continetur, probe obturatum, per horas aliquot favillæ imponas. Fortiori tandem expressione colatum & adhuc calidum ægrotanti præbeas, eumque ne sudor subsequens, frigore externo impediatur, probe stratis obtegat; nonnunquam vero alvum ciendo suam virtutem exserere solet. Alii etiam aliquantulam ejus portionem nodo inditam; potui infantum variolis detentorum, ad variolas citius expellendas, induunt.

Exteriorem vero stercoreis equini usum quod adtinet, virtutis suæ discutientis ergo, mirifice contra anginam, stercorei hirundinum & canum haudquaquam inferius facit. Cataplasmatibus instar ad propellendas colli inflammationes eidem circumdatur, & hydromele & urina hominis sani mixtum, pro topico, lateri ægrotanti, pleurite laborantis adplicatur. Imo contra stranguriam & matricis suffocationem, vesicæ regioni superpositum facere docet *Schroderus*.

Lac equæ multo ex fero, pariori autem caseo & butyro constans, asinini instar, contra tussim, Asthma, Pthisin & Atrophiam facere dicitur, illo tamen infrequentius, rarius adhibetur.

Nec ullam *Hippolitharum* mentionem iniiciamus, seu calculorum equi in intestinis & vesica sæpius obviorum. Medicorum alii quidem virtutem sudorificam & alexipharmacam illis inesse, eosque vel Bezoarti Orientali substitui posse adserunt, imo ℥ss. ad ℥ij. dosi contra febres malignas, & verminosas, malignum quoque alvi profluvium, commendant. Dubiæ tamen virtutis suæ ergo, mediorum numero addi haud merentur. Dubiam & virtutem odontalgicam habemus, seu dentium dolores lenientem, quam equi

urinæ tribuit Vir Cel. *Salentin*, *D. Ephem. Germ. Vol. 9. Anni 1752. pag. 32.* Matronam nobilem, ille refert, atrocissimis dentium doloribus excruciatam, omnia & Empiricorum & Medicorum media quum frustra tentasset, ex agasone medium accepisse, quod effectū certissimum, aſt ſapore ingratiſſimum ille prædicebat. Urinam igitur equi calidam adhuc, ore aliquoties recipiendam, & quam diutiſſime poſſet, retinendam juſſit; Adhibito medio, nondum quarta horæ parte expleta, & dolores leniebantur, nec per viginti annos ſubſequentes ulli redibant. Cui ſi effectus continuo reſponderet, neſcio quantum deberet hominum genus, tam frequentibus dentium doloribus excruciatum. Nos autem alios dolorum atrocitate adductos, vel ſua ipſorum urina os expleviſſe, nec dolores tamen leniſſe vidimus, num vero major virtus equinæ ſit tribuenda, hæremus. Sit facti veritas penes auctorem, innoxium erit, ſi inutile fuerit, medium, & vel ingratiſſimi ſaporis ergo, momentaneam conſolationem præbebit.

℞. Teſticulorum equi ℥j.

Boracis rectificati ℥ſ.

Croci ʒj.

Reduc in pulverem omnia, & adde aquæ liliorum ℥vj. ut fiat potio, in binas partes æquales dividenda, quarum alterutram interjecto quatuor horarum ſpatio, ad expellendas ſecundinas, & fœtum in matrice mortuum hauriat puerpera.

℞. Succī ex ſtercore equi recentē expreſſi ℥j.

Vini candidi ℥iij.

Syrupi papaveris erratici ℥j.

M. & habebis potionem, pleurite detento, poſt aliquas ſanguinis emissiones convenientiſſimam

℞. Lichenum ex pedibus admiſſarii equi ℥ij.

Quos aqua communi ablutos, per integram noctem vino candido affundas, poſt arefacias ac reducas in pulverem, pro gangræna utiliſſimam, ſi bis per diem, ℥ſ. doſi, cum liquore quodam conveniente recipiatur.

℞. Stercoris ex equo non caſtrato q. l.

Urina mixtum exinde favillæ ſuperponas, & habebis cataplaſma, contra pleuritim, lateri doloribus adfecto adplicandum.

Jam de aſino. *Aſinus*. Offic. Schrod. 269. Lemer. 86. Boſſch. de *Quadr.* 173. Dal. Pharm. 435. Herman. Cynof. 864. Paullin. Onagr. 1. Blaſ. 1. Charl. Exerc. 4. Merr. Pinn. 166. Schvenckf. de *Quadr.* 61. Geſn. de *Quadr.* 1. Aldrov. de *Quadr.* 295. Jonſt. de *Quadr.* 12. Raii Syn. *Animal. Quadr.* 63. *Equus cauda extrema ſetosa*. Linn. Faun. Suec. 34. *Aſinus noſtras, domesticus, ſeu vulgaris*. Nonnull.

Multo equidem eruditionis adparatu ſuperbit *Franciſci Paullini*, *D. Onographia Curioſa*, ſeu *Deſcriptio aſini*, *methodo Ephemeridum Germaniæ conſcripta*; parum tamen illa, & fere nihil, de interna partium ejus conſtructione ſubneſcit. Sic & *Blaſius* in deſcribendo aſino breviſſimus eſt, aſt horum defectum abundantior explet Vir Cel. *Daubenton*, *Tomo VIII. Hiſtoriæ naturalis, tam generalis quam ſpecialis*, operis omnibus utiliſſimi, nobis autem præclari fontis.

Equum ab aſino, ſic ait Vir Celeb., vel primo intuitu dignoſces, nec unquam cum altero alterum confundes, inter binos corporis magnitudi-

tudine ac colore simillimos, Partes utriusque externas tanta tamen inter se similitudine congruere videbis, ut jure miratus fueris, qui fiat, quod partium simillarum complexus, adeo diversum utriusque adspicuum constituit; imo asini abdomine aperto, evolutis intestinis ac perspecto sceletro, equi interiora videre tibi videberis. Diutius igitur partes utriusque externas atque internas considerando, ac continuo majorem utrarumvis concentum detegendo, pro individuis ejusdem speciei diversis, & merito quidem, ambo habebis; nec enim essentialibus differentiarum signis, notæ caracteristicæ, quibus inter se distant, absolvuntur. Auribus scilicet & cauda asinus gaudet præ equo longioribus, crista autem brevior, & cauda non nisi in extremo, setosa. Ejusmodi diversitatem vero & in aliis speciei ejusdem reperimus. Magnitudinis v. c. differentia eadem, vel maximus equus ab asinorum minimo distat, qua canis Anglicus a Danico minori. Brevitas major est aurium canis venatici, sagacis aurium respectu, quam equi, ratione asini, sagacis aures flaccidas, villosi autem elatos in altum videbis, differentia haud obvia inter equum & asinum. Cani Hispanico aliisve adeo longi sunt colli crines, Danico autem & indagatori tam breves, ut satis longe varietatem excedant, inter pilum asini & equi longitudinis respectu, obviam. Caudam utriusque diversam dicis, adspice, quæso canum caudam, jam inflexam, jam rectam jam longis jam brevioribus pilis ornata, jam multiplici differentia conspicuam. Maxima sane est equi asinique similitudo, jam enim equus asinam conscendit, jam asinus equam, & partium genitalium mutua adaptationis ergo, proles quidem ex coitu provenit, at in hoc differentiam essentialem videbis; muli enim nec adeo equos nec asinos similitudine referunt, nec umquam ex mulo & mula muli generantur, (ut ex canibus speciei mixtæ, ejusdem speciei alii,) quocumque modo illos combinare velis, vel maximos minimis admittas. Major itaque canes, adparentia diversissimos similitudo intercedit, quam equos & asinos sibi simillimos. Quum igitur tantus amborum partium exteriorum & interiorum sit concentus, quænam inter illos differentia reperiatur, studiose disquirendum censemus. Nec plurimum instar, equum asino similem dixisse sufficiat; observationes specialiores in medium producantur; quæ & utriusque similitudines & dissimilitudines, non nisi partium equi & asini distinctissima ac fusiore descriptione innotescentes, loquuntur. Quæ igitur asini partes, equi partibus figura ac situ accedant, ut describamus, superfluum, mensuram saltem, quam adtigerint, addamus. Quæ denotandis & equi & reliquorum Solidipedum partibus inferviunt nomina, iisdem asini partibus competunt. Asinum denique nullas in pedibus posterioribus ungulas, at in anterioribus vestigia earum, ita fere ut equi ungulæ sita exhibere observabis; vestigia autem pelle quadam nigra, pilo destituta ac neququam cornea, denotantur; in parte tandem inferiore & posteriore globulorum pedis cujusque discus quidam adparet, pelle nigra, nec cornu compositus ullo, calcaris equini vestigiis respondens.

Frequentissimus itaque color asino est cinereus, debilioribus & in flavidum vergentibus, interdum quoque nigris maculis conspersus, aliquoties candidus, aliquoties fulvus, ferrugineus & niger. Cinereorum faciem ad 4. digitos ante nares, alba distinctam videbis macula, illaque plurimum

superiore sua parte, in zonam rufam exeunte, ornatam, labiorum extremitatem nigram, nigredinem insuper ad nares usque procurrentem, aliquoties vero binas saltem zonas nigras, illius locum tenentes; aures & nigro margine fimbriatos, & in basi ac cuspide superficiei exterioris nigris maculis conspersos; reliquam denique eorum partem cinereo rufoque colore mixtam videbis. Longum præter ea radium nigrum, ad crinium longitudinem procurrentem, armum transeuntem, ad totam denique columnam vertebralem, productum, & caudæ truncum ad extremitatem usque pertingentem. Zona autem alia transversalis nigra, armum transcindens, ex latere utroque ad medios fere humeros descendit. Anterior pars radii cristæ crinium nigrorum in medio & interior caudæ facies, ejusdem, scilicet nigri est coloris. Plurimum autem asinorum genu, globulus, suffraginis capronæ & corona in anterioribus pariter ac posterioribus pedibus rufum seu nigrum exhibent colorem; in medio aliquorum brachio anteriore, & superiore parte tibiæ pedum posteriorum semicirculum nigrum; aliorum vero in brachio anteriore, binos semicirculos nigrum, i. digiti spatio distantes, rariores tamen; at plerumque inferiorem quatuor pedum partem annulo fulvo seu nigro notatam videmus. Aures, canalem, guttur, pectus, ventrem, latera, interiorem brachiorum partem & lumbos semper candida, ad minimum debilia & candido magis accedentia conspicias, quam reliquas corporis partes omnes. Plerumque etiam oculos circulo candido vel albido circumdatos, circuli marginem vero rufum sensimque extensum atque deletum; In rufis vero seu ferrugineis asinis ut cinereis aures nigro adspersos, mediamque superficiem externam debiliorem reperies coloris quam partem corporis reliquam. Hinc nativum asini colorem cinereum, seu aurantio mixtum, & hunc præsertim silvestrium, si qui essent, fore colorem, cinereum scilicet, zonis nigris, maculisque aurantiis distinctum, concludimus. His igitur tribus coloribus varie dispositis, omnis pili asinini variatio absolveretur, quæ si circa admissarii electionem, aliaque ad generationem facientia, majorem curam adhiberemus, major futura habenda est. Nos vero crurum fortitudinem tantum, & humerorum vires respicimus, pili coloris autem curam prorsus negligimus. Cæterum frontalis in medio omnium spinam unam, (seu pilum duriores) binas insuper cristæ vicinas, pone quemvis aurem unam, nec non equino duriores longioresque asini pilum, detexi.

Pulchritudo asini ac elegantia parum in censum venit, nec nisi illi saltem, qui defectibus labori & oneribus perferendis obstantibus laborant, qui cruribus arcuatis seu ægrotis instructi, faciles incedendo impingunt, & prolabantur, quique dorso in longitudine, concavo, & minus apto pro oneribus, quam convexum, quod carpi dorsum dicunt, instructi sunt, hi saltem, inquam, asinorum numero excluduntur. Qui quum nulli infervant hominum ostentationi, sed usui saltem ac plaustis perferendis, nec de conservanda elegantiorum specie sollicitos videmus homines, imo ne regulas quidem, ad quas asinorum elegantia exigatur, habemus. Si equi deessent, majori credo cum cura & studio, elegantiam asini quæ constituunt, disquireremus, eodem saltem, quo solliciti sumus de equo, cujus vices & locum expleret asinus. Nec enim omnes, quæ equi elegantiam exponunt, regulæ, in asinum cadunt, in primis, ubi de capite, collo, dorso, coxis, humerisque

risque agitur, hæ enim utriusque partes magno inter se discrimine differunt, reliqua vero & in primis crura, majori sibi similitudine accedunt.

Variam vero esse corporis asini magnitudinem pro vario, sub quo nascitur, cœlo, infra docebimus. Nostro examini qui infervit, nostras, magnitudinis mediæ ac bene conformati erat corporis. Hic igitur ab aurium interstitio ad anum, $4\frac{1}{2}$. pedum longus, in anteriorem pedum regione 3. pedum & $4\frac{1}{2}$. digitorum, in posteriorum situ autem, 3. pedum & $5\frac{1}{2}$. digitorum altus erat; ab extremitate labrorum ad occiput 1. pede & 6. digitis longitudo capitis absolvebatur, cui si colli corporisque reliquam, ad originem caudæ addideris, 6. pedum integram asini longitudinem habebis, a cuspide rostri ad anum usque tendentem. Nec tamen una saltem dimensione omnem ejus longitudinem exigere licuit, sed binis saltem replicata, adeo etenim adtolli nequibat asini caput, ut deleta omni prorsus occipitis curvatura, una cum collo & dorso rectam exhiberet. Rostris extremitatis peripheria, inter nares labiorumque extremitatem ducta, 1. pede & 2. digitis; aperti autem oris circumferentia ab altera labrorum commissura ad alteram, 9. digitis absolvebatur. Longinquius tamen supra quam infra nares inter se distant. Angulum oculi anteriorem & labiorum finem $10\frac{1}{2}$. digitorum spatium intererat, & ab angulo posteriore auris $4\frac{1}{2}$. digitis distabat. Longitudine sua oculus, ab altero angulo ad alterum 1. digitum & 5. lineas, apertura autem 8. lineas exæquabat. Capitis peripheria, auribus anterioris, gutturi vicinam ejus mensuram exigendo, 2. pedum & 5. digitorum reperta est. Aures $8\frac{1}{2}$. digitos longitudine, & bases gibbus exterior 5. digitorum & 9. linearum latitudinem explebat, aurium bases autem 4. saltem digitis distabant. Colli longitudo a capite ad humeros 1. circiter pede, circumferentia capiti proxima 1. pede & xi. digitis, a crista usque ad gulam latitudo 9. digitis, humeris tandem proximi circumferentia 2. pedum & 3. digitorum, & 11. digitorum latum erat. Peripheria corporis post crura anteriora 3. pedibus & 8. digitis absolvebatur, 4. pedibus & 5. digitis ubi latissimum est, & ante crura posteriora 3. pedibus & 9. digitis. Abdomen 1. pede & xi. digitis a terra distabat, caudæ truncus item 1. pede & 2. digitis longus, $\frac{1}{2}$. pedis peripheriam in origine ostendebat, $11\frac{1}{2}$. digitorum a cubito ad genu, longum quod erat brachium, superius ad cubitum, 1. pedis & $\frac{1}{2}$. digiti, inferius vero, ad genu 8. digitorum diametrum ostendebat. Tibia $\frac{1}{2}$. pedis longa, 6. digitorum diametrum, globulus autem $7\frac{1}{2}$. digitorum præbebat. Suffraginis capronæ 5. digitorum diametro, 2. digitorum longæ, & coronæ diametrum cum longitudine 10. absolvebant digiti. Lumbus 1. pedis & $2\frac{1}{2}$. digitorum longus a patella genu ad plicaturam, ventri proximus 1. pedem & 8. digitos circumferentia explebat. Tibia ad globulum usque a plicatura 11. digitorum longitudinem, & $6\frac{1}{2}$. digitorum circumferentiam præbebat. Globulus 8. digitos circumferentia, suffraginis capronæ 2. digitos longitudine; corona $9\frac{1}{2}$. circumferentia; ungula tandem 5. digitos longitudine, a cuspide ad talum, coronæ vicina 10. digitos, infra autem 1. pedem circumferentia pertingebat.

Equum igitur & asinum si incedentes conspicias, asini caput amplius esse cognosces illico, & aures longiores, longiore etiam pilo obtectum frontem ac tempora, oculos magis recedentes, palpebram inferiorem magis

depressam, labrum superius magis cuspidatum, & quasi pendens, collum crassius, pectus strictius; dorsum vero convexum, spinam valde eminentem, coxas poplite altiores, tergum explanatum, caudam denique ad quartam sui partem usque pilis denudatam, cæterum vero crura præsertim anteriora utriusque sibi simillima, posteriora autem posticus aliquantum reflexa seu adunca sunt.

Stupiditatis cæterum ac imbecillitatis speciem asino conciliat caput, quo gaudet, gracile, tempora longis pilis obducta, & oculi recedentes & os in cuspide amputatum. Dulciorem vero adspæctum & docilitatis equo contraria tribuunt. Incessum ignobilem asini loquitur caput ejus ponderosum, flaccidi aures, collum explanatum, dorsum exarcuatum & quasi acuminatum, coxæ ultra poplitem eminentes, tergum depressum, cauda pilis destituta, & pedes posteriores inflexi; omnia enim ista multum faciunt ad rationem incessus sui, præsertim, si equo illum comparare velis. Alias autem animalium domesticorum utilissimus dicendus est, & eadem hominum cura circa generationem ac educationem asini si foret sollicita, quam pro equo adhibere solent, iisdem etiam, quibus ille usibus inserviret, & probe conformatos detegerent illius artus, & levitatem incessus, & instinctus sui qualitatem laudarent, ferocitati tauri, & bovis segnitiei (utriusque, deficientibus equis, vecturis inservitum, & solorum quidem, adhibendi) anteferrent. Quæ supponendo tamen nec contemptu eximere, nec equo æquiparare desideramus asinum, Physici disquisitione saltem, ita dignum innuimus quam equum. Imo partes ejus externæ sive sua inter se relatione, sive separatim perspecta mirabili modo conformata, quamvis inelegantiora dici merentur. Summam vero intestinorum partiumque interiorum equi asinique similitudinem, jure admirandam, sequentibus legito:

Asina huic examini inserviens 5. pedum & 3. digitorum, ab extremitate oris ad originem caudæ, longitudinem; & a terra ad armi gibbum 3. pedum & 1½. digiti altitudinem profitebatur, corpus, ubi amplissimum, 4. pedum circumferentia cingebatur.

Aperto autem abdomine nullum adparuit Epiploon, equi instar, haudquaquam extensum; & intestina asinæ ab equinis magnitudine saltem distinguebantur, iisdem enim quibus ista, & constrictionibus & crumenis imo & eadem longitudine, proportionis ratione tamen habita, gaudebant, ast equina multum amplitudine superant. Coli longitudo cum recto 14. pedibus absolvebatur, cui si intestinorum gracilium 32. pedes, tanta enim longitudine gaudent, addas, habebis omnem canalis intestinalis longitudinem, habebis 46. pedis. Sic & stomachus, situ figuraque equino similis multa illum capacitate superabat. Imo & vermes istos, quos in equi stomacho observavimus, in asinino reperimus; illis omnino simillimos, saltem infrequentiores, & quamvis asinorum dissectorum a nobis, numerus, haud pertingat numerum equorum, tanta tamen observavimus, quanta ad certitudinem dictis conciliandam sufficiunt. Reiteratis observationibus novæ semper experientiæ respondent, & ut equi stomachum Cel. *Bertin*, sic & nos asini, pylorum inflavimus, qui cum turgesceret, nullus œsophago exiit aer; quo equi asinique stomachum eadem prorsus ratione conformatum, ac animalium utrique, ne cibos evomere possint, eadem obstacula esse adparet, orificii scilicet superioris stomachi conformationem.

Nec non hepar asini, & colore suo, & situ, & figura, ac quantitate loborum, equino respondebat, prima saltem medii lobi fissura, mediæ in quibusdam cohærebat, alia quadam mediante, ac lobi marginem binas in laminas separante. Cæterum pondere suo hepar 3. libras, & 2½. uncias explebat, & fellis vesicula destitutum, canali Hepatico, ut equus, amplissimo, gaudebat. Aprile mense asinam quamdam disquirendo, 12. ad 14. vermes, molles, irregularis figuræ, magnitudinisque fere ejusdem, planos ac tenuissimos, in variis bilis canalibus dispersos vidimus; hi quiescendo ovalem figuram repræsentabant, 9. lineis longam & 6. latam. Medium superioris & inferioris superficiei contiguum, margines autem crispatæ, & pars anterior excavata utrinque, in medio tandem capite quodam oblongo terminata videbatur, huic lineæ unius longitudo, & in extremitate inferiorius est foraminulum. Nullum vero motum nisi rependo edere valent, & parte sua anteriore protrusa, ad digiti unius longitudinem extenduntur; latitudine ad 3. usque lineas contracta, partem posteriorem denique promovent, sicque eandem, qua ab initio gaudebant, figuram rotundam recipiunt; Cæterum, quos ovium in hepate videmus, quosque *Douves*, Galli dicunt, vermes, perfecta similitudine exæquant. Laniatorum observatione constat, sic *Diarium literatorum Gallicum*, seu: *Journal des Savants*, *Anni 1668. pag. 67.*, quod tum saltem ovium in hepate vermes isti occurrant, quum morbum ex herba quadam, *Sideritis* specie, contraxerint, cujus folia similitudine referunt vermes; Herbarum etiam aliarum foliis æquiparari possint. Num *Sideritis* glabra arvensis oves morbo adficiat, ignotum, hoc saltem pro certo adserimus, quod quæ vermibus laborabat, asina nostra, juvenis & salute vicens, nulla prorsus morbi signa ediderit. Quum ergo vermium conicorum respectu, & asini & equi in stomacho obviatorum, tantam utriusque similitudinem observaverimus, & equi in hepate illos, quos *Douves*, Gallis audire observavimus, reperiri posse concludimus, refragantibus ut videtur, *Ephemeridibus Curiosorum Naturæ*, *Anni 1675. Obs. 188.*. Variorum quidem equorum in hepate frustra illos quæsi, fateor, aut quid obstat, quo minus ultra quæsiturus reperiam. Lien asini, equino simillimum, pondere suo tres uncias & 6. drachmas explebat. Et Pancreas equinum figura ac situ referebat. Renes vero & quod exteriores & interiores eorum partes adtinet, equinis similes, & ut in equo dexter sinistrum ultra, digito uno prominebat. Sic & diaphragma & pulmones, & cor, & aorta in binos ramos divisa, & lingua, eosdem tuberculos eademque fila ostendens, singula, singulis hisce equi partibus adprime respondebant. Binas insuper in lingua equi, glandes majores, ultimis molaribus dentibus interjacentes, in asini lingua autem tres observavimus, quarum media, reliquis duabus minor erat. Imo in margine posterioris linguæ partis, denuo aliæ binæ, oblongæ & transversim striatæ glandes adparebant. Palatum 16. sulci transversim ducti ut in equo, striatiores tamen, ac magis depresso margine conspicui, occupabant. Epiglottis equinæ tantum non simillima, & cerebrum asini illius, cujus partes generationi inservientes jam describimus, 3x. & 3vj. cerebellum denique 3j. 3iiij. & gr. xxxviii. pondere explebat.

Asini hujus pondus 198. libris, longitudo ab extremitate rostri ad originem caudæ 5. pedibus & 2. digitis, corporis amplissimi peripheria 3. pedi-

pedibus & 11. digitis, altitudo tandem ab armo ad terram 3. pedibus abolvebatur. Scrotum, x. pedibus ab ano distans, ad 4. digitorum longitudinem sub abdomine procurrebat, papillæ preputii 3. digitis extremitatem ejus superabant, ac $1\frac{1}{2}$. digitis inter se distabant; singulæ 5. linearum longæ, & 4. fere linearum diametri. Virgæ longitudo ab extremitate glandis ad bifurcationem corporis cavernosi, xiii. erat digitorum, testiculis figura ovoidis depressa, epididymides figura ac situ equinas referebant, canales deferentes, in universum, 1. pedis & $3\frac{1}{2}$. digitorum longi, cæterum ut equini, & vesica fere rotunda, huic autem posteriores binæ vesiculæ aliæ ut in equo, turgescerent aderant, glandula singulæ instructæ, binæ tandem aliæ glandulæ, in urethra, omnia partium equi conformationem referentia.

Asinæ autem, de qua diximus, vulva $3\frac{1}{2}$. digitis longa, 15. lineis ab ano distabat. Ubra bina 8. digitis a vulva, ac binæ earum verrucæ $1\frac{1}{2}$. digito inter se; duplici quævis orificio gaudebat, & uberum quodvis, eodem quo in equa, situ, eademque conformatione in bina receptacula dividebatur. Glans clitoridis 9. linearum lata, 7. vero crassa, & præputium amplissimum, & clitoridis in parte superiore bina aderant foramina nexa totidem cavitatibus, 3. linearum & longis & latis, & calculus unum lentis forma ac magnitudine, copiosam insuper saburram continentibus. Vagina 13. digitorum longa & urethræ orificio posterior plicatura quædam aderat antè directâ, nec ut in equa, margine suo circuli arcum efformabat, sed in medio excavata, ex utraque parte orificii urethræ productionem triangularem constituebat. Vesica pyro obverso, pro figura, respondebat. Matricis longitudo ab orificio ad cornuum bifurcationem 6. digitis, 2. autem testiculorum distantia ab extremitate cornu abolvebatur, testiculus insuper circulo nexus, & reni similis $1\frac{1}{2}$. digiti longus & 1. digiti latus, ac equi omnino erat æqualis.

Fœtus asinini eadem sunt involucria, quæ equi hinnulo, chorion scilicet, amnios & membrana allantoidis. Idem in utroque est funiculus umbilicalis, & uracus. Imo & amnii sedimentum in utroque, natura & origine idem, colore saltem, in asina, flavido, est diversum. Sceletum asini tandem ab equino nullum prorsus differebat.

Jam vero historiam asini naturalem, auctore Cel. de Buffon pertractabimus. Is autem sequentibus: Asinum si vel adcuratius contempleris, pro equo degenerato habebis. Quid igitur, originem equus asinusque habent eundem? suntne (ut cum Nomenclatoribus loquar) ejusdem familiæ? seu suntne fueruntque diversa animalia? Unam tantummodo formam sibi præfixam habuisse, illamque omni possibili modo variare voluisse videtur, animalia dum crearet omnium moderator, ideo quidem, ut in sui admirationem ac venerationem rapiatur homo considerando simplicitatem schematis adeo magnifice amplificati. Hoc igitur respectu, non asinum tantum & equum, sed & hominem, simiam & quadrupeda quævis, una eademque familia contineri dicas. Cave autem ne concludas quod ex hac magna vastissimaque familia, solius Dei consilio delineata, ac virtute producta, aliæ adsint minores, natura delineatæ, ac tempore effectæ, aliæ quidem duobus saltem ex individuis conflatæ, ut equus & asinus, aliæ autem ex pluribus, ut martes, mustela, aliaque. Omnia enim animalia in

universum a Deo creata, & masculum ac foemellam omnium ab illo efformata fuisse sacris litteris edocemur, ac talia quidem seu fere eadem, qualia hodie conspiciuntur. Ex eo ceterum, quo ad naturam adtendere coeperunt, ab *Aristotele* ad nostra tempora, nullas umquam species novas exsurrexisse vidimus, quam rapidus sit motus, materiae partes agitans atque deperdens, quam immensus combinationum numerus per viginti secula continuatorum, quamque fortuitus saepe seu coactus animalium diversorum coitus, ex quo nulla umquam, nisi vitiata atque sterilia individua exorta sunt. Quanta igitur sit duorum animalium similitudo, imo major adhuc ista, quam equum inter & asinum videbis obviam, neutiquam tamen familia ac origine, eadem habeantur, quae si essent, iterum connecti ac de novo dissolvi possent, & quae tempore facta sunt, tempore confici. Natura igitur nescit, quas homines effinxere, istas familias, illi non sunt, nisi individua. Asinus est asinus, nec equus degeneratus, nec equus cauda nuda, nec aliunde insertus, nec spurius, sua ipsi est familia, & species, & ordo. Puro descendit sanguine, minus quidem illustri ac ignobiliore, ad tamen adeo antiquo, quam equus. Hunc igitur & tam utilem, tam patientem, tam sobrium quare tantopere spernis? Miserum sane, & illum humanarum rerum conditionem experiri oportet, censeo, hominibus enim qui nimis bene inservit, parcissimo praemio contentus, quanti habebitur? nihili, imo potius contemnetur. Equi curam, & instruendo & exercendo, habent multiplicem, asinum vel inertiae agasorum vel puerorum malignitati relinquunt. Qui igitur educatione proficere potest? deficiat, necesse, imo nisi tantas a natura acceptas haberet qualitates eximias, omnes sane rudiori qua tractatur ratione, perderet. Rusticum plerumque dominum habet ac ducem, hujus imprudentia exoneratur, inhumanitate adigitur. Deficiente equo, & sui ipsius & nostrum respectu asinus omnium primus, utilissimus imo pulcherrimus haberetur. Jam secundum occupat locum, quum primum tenere debuisset, & hujus solius ergo, omnem praestantiam, vel aestimationem amittit. Equi, non sui ipsius respectu, judicatur, inferior censetur, & omnes quibus gaudet qualitates, praetereunt, illas vero desiderant, quas in equo reperiunt, quasque non asino, sed equo proprias esse voluit natura. En equum ardoris plenum, & impetus & ferocitatis, asinum vero eo tranquilliolem, patientiorem atque submissum; constanter hic & fortiter fere ictus perfert, & sobrius est sive quantitatem ciborum respicias, sive qualitatem. Duriore ipsi herbae sufficiunt, ac insipidae, ab aliis & equo relictae. Aquam nisi limpidissimam ac ex rivulis jam sibi cognitis haurit; parum cibi & potus recipit, nec nasum aquae immergit, aurium enim sic dicunt, imaginem conspiciere timet. In pratis, carduosis praesertim obvolvi peramat, & vel onera gerendo, quoties potest, terra procumbit volutatum, reprehendens quasi magistrum, nimium sui incuriosum, numquam enim caeno sese obvolutat, ut equus, sed, ne quidem pedes irriget, lutum in via obvium quantum fieri potest, declinando evitat, pede igitur praequo puriori aridiorique gaudet. Educantium operam, docilitate sua rependit. Junior animo laetus, facetus & alacer esse solet, aetate & domini austeritate lentus ac indocilis redditur. Nullo ardore, nisi in voluptatem fertur, qua excitatus tanto furore corripitur, ut superatis quibuscvis obstaculis, ex vehementia instinctus, brevi aliquoties mo-

riatur. Cujus ergo, & summo, non dicam furenti amore in foetus suos fertur. *Plinius* enim asinam matrem, asellum sibi subductum quærendo vel medias flammæ transire docet. In dominum, quamvis plerumque sibi austerum, magna fidelitate est asinus, hunc vel e longinquo, odoratus ope, percipit, & distinguit, loca, quæ inhabitat, vias quas frequentare solet, cognoscit; oculis & odoratu & auditu præstantissimis gaudet, & hujus ergo inter timida refertur, hæc enim omnia acutissimo auditu gaudere dicuntur. Oneris sibi impositi pondus nimium capite ac auribus depressis indicat. Nimis incitatus, ore aperto labia retrahit, ac deridentis speciem induit, Si oculos ejus obtegās, nullus ultra progredietur, & ex latere reclinantis caput si humum reposueris ita, ut alter oculus claudatur, alterum vero imposito lapidis seu ligni frustulo obtexeris, nullum prorsus motum, ceu elevandi desiderium edit, immobilis permanebit. Cæterum equi cursum ac saltum, lentiores tamen & breviores imitatur, celeritatem brevissimam tantum exhibet, & violentia adactus statim defatigatur.

Hinnit equus, asinus autem rudit, dum clamorem ingratissimum, fortissimum, & alternis acutum & gravem longissime producit. Rudit vel amore vel fame incitatus. Asinæ vox clarior ac perstringens, asinique castrati debilior est. Inter pilos gerentia minime insectis nutriendis expositus, nec umquam pediculis infestatus est, cujus causam in corio suo durissimo, imo virgæ calcaribusque, præ equino, magis resistente, quærendam esse ducimus. Secundo & dimidio vitæ anno, primi dentes incisarii medii excidunt, exinde subsequentes & effluunt & succrescunt, eodem temporis spatio ac ordine, quam equini. Imo annos asini ita ut equi, ex tertiis incisariis dijudicare poteris. Secundo anno asinus pubescit, & lasciva foemella citior, nec adeo foecunda esse solet, nisi enim reiteratis ictibus, peracto coitu, voluptatis sensationem profligaveris, liquorem coitu acceptum, statim reiiceret; Catulitionis asini tempus Majo & Junio, mensibus, absolvitur. Quum vero conceperit foemella, statim ætus Veneris recedit, decimo tandem gestationis mense, ubera lacte replentur; & duodecimo foetum emittit, eiicit etiam cum liquore annii frustula, hinnuli hippomanibus similia. Septem post partum dies, denuo coitum adpetit imo perfert; unum plerumque & vix umquam binos foetus effundit, quinto insuper vel sexto aselli mense huic ubera matris subtrahenda sunt, præ primis utero gestantis, ne foetui nutrimentum deficiat. Asinus asinæ admittendus maximorum unus sit atque fortissimorum, nec plures quam decem, nec pauciores tribus annos numeret, cruribus item gaudeat longis, capite elato ac levi, corpore fetoso, oculis candentibus, naribus hiantibus, collo longiusculo, pectore lato, renibus carnosissimis, latere explanato, tergo depresso, cauda brevi, pilo autem splendente, tactu lævi, & coloris cinerei obscurioris.

Tribus ad quatuor annis, equi instar, omne sui incrementum pertingens asinus, 25. ad 30. vitæ annos, ut ille, explere solet. Asinæ asinis longæviores esse dicuntur, quippe quæ utero fere semper gerentes, haud adeo continuo laborum exercitio, quam asini defatigantur. Breviorem somnum asinus capit, quam equus, nec nisi exercitii vehementia exhaustus terra recumbit. Longævior asinus admissarius est equo non castrato, imo pro succrescentibus annis majorem ardorem ostendit, & brevibus, equo robu-

robustior, haud ita multis morbis subjacet, nec adeo quidem pituita, præter quam nullam ejus aliam infirmitatem cognoverunt antiqui. Variæ cæterum sunt species asinorum, ignotiores ob neglectam hominum circa asinos curam, omnes tamen calidiores regiones pro patria cognoscere constat. *Aristoteles* est, qui docet: Suo tempore nullos nec in Scythia, nec adjacentibus terris, ne Gaulorum quidem, asinos fuisse, & cœli sui frigiditate vel nullos prorsus nasci, vel natos degenerare, hinc etiam, quos Illyria alit, quos Thracia & Epirus, exiguos ac debiliores esse. Tales quoque Gallicos reperies, quamvis ex tanto jam tempore climatis perferendi consuetudinem induerint, imo multo mitius frigus hodie perferentiamus, dum tot per bina annorum millia, silvæ excæsa, tot paludes exsiccatae sint. In Suecia autem, aliisque Septemtrionis regionibus, incogniti prorsus & advenæ sunt. Primo igitur ex Arabia, patria, in Ægyptum, post in Græciam, deinde in Italiam, porro in Galliam, denique in Angliam, Germaniam, & sic ulterius pervenisse videntur; quo frigidiores enim sunt regiones, eo minores alunt asinos. His, quæ de migratione asinorum diximus, & peregrinantium testimonia accedere videntur. Duplicis generis asinos esse docet *Chardin*, apud Persas, hi, Persia nati, stupidiores & plaustris inservientes, illi, ex Arabia oriundi, pulcherrimi, ac omnium facile primi, pilo lævissimo & capite elato, & pedibus celeribus instructi, & incessus gravitate, non nisi equitatum inservientes; quibus clitellas supra rotundas ac planas, pro sellis, imponere, his autem magis caudam quam collum versus, residere solent. Cæterum numquam minori pretio quum 25. Galliæ pistolis, seu nummis aureis duplicibus veniunt, & equorum instar edocentur, nihil vero, nisi gradum tolutarium, cujus ergo ambo dextri & ambo sinistri pedes funiculo, distantiam pedum gradarii exequante, nectuntur, funiculus iste, ex altero quoque funiculo cingulum transeunte suspenditur, & sic homine insidente bis quotidie exerceri, imo nares transcendendi solent, quo major sit aeris respirati copia, & tanta celeritate procurrunt, quantam equus vix saltibus suis pertinget.

Vix tanta Arabum cura in asinos esse potest, quum ex tanto jam tempore, omne studium in conservandas equorum species conferunt? ast Arabiæ cœlum & equis & asinis convenientissimum esse patet. Quos vero ex Arabia receptos Barbaria alit ac Ægyptus, pulchritudinis eximiæ sunt & magnitudinis, sic & qui Indiam & Guineam occupant, vel equis ibi natis majores videntur. Maduræ ab incolis summo honore mactantur, nobilium enim animas asinorum corpora intrare censent. Frequentiores etiam asinos præ equis, in meridie a Senogallia ad Chinam, plures insuper hic Onagros, (ut Græci & Latini asinos silvestres dicunt,) quam equos silvestres invenies. Cave autem, ut cum Onagro, Gallice: *Onagre*, plurimum instar, illud animal confundas, quod *Zebre* Gallis, audit, hoc enim aliud prorsus speciei, nec figuræ adeo elegantis quam onager, cæterum vero striato pilo obductum est. Onagros & in quibusdam Archipelagi insulis, præsertim illa, quam Cerigo dicunt, nec non Lybiæ Numidiæque desertis reperies, eosque cinereos, ac cursu adeo celeres, ut nulli nisi Barbari equi illos pertingere possint. Conspecto homine clamorem edunt, sistunt gradum, & recalcitrant, accedente vero statim aufugiunt. Cassibus laqueisque capiuntur, & cohortim ad pascua & aquam procedunt, & carnem

nem incolis pro nutrimento venientem exhibent. *Marmolis* tempore, ex quo haurimus, & Sardinia onagros, Africanis tamen minores, alebat; & *Pietro della Valle*, Bassoræ onagram sese vidisse testatur, figura asinabus similem, colore saltem debiliore, & radio albo a capite ad caudam producto, distinctam; cursus celeritate autem illis superiorem. *Olearius* a Persarum rege ad jentaculum invitatus, ut scribit, cymbam, theatrum repræsentantem, regi socius conscendit, peracto jentaculo autem 32. onagros accerferi vidit, quos primus rex post autem legati sui ac principes, sclopetorum ictibus ac sagittis petiere, & asini sagittarum pleni alii in alios ruebant, jucundissimo præsentium spectaculo, confossos tandem ac enecatos omnes, regis ad pedes reponebant, post Isphahanum, regiæ mensæ adaptandos trans mittebant. Tanta autem onagrorum carnis æstimatio est apud Persas, ut vel in proverbium abierit. Nec tamen onagros hosce omnes in silvis captos, sed potius vivariis detentos, ac regio spectaculo & cibo destinatos ad servatosque fuisse credimus.

Nullos nec equos nec asinos habuit America, cujus cœlum utrique convenientissimum videretur. Qui autem ab Hispanis eo transportati & silvis immissi sunt, jam copiosissimi silvis inerrant, & equorum silvestrium instar & onagri cassibus capiuntur.

Asinus equam conscendens, mulos generat majores, equus asinam, minores, ab illis diversissimos, de quibus infra seorsim. Asinus vero, pro corporis magnitudine plura reliquis onera perfert, & parcissimo cibo contentus, nec cura hominum egens, multiplici usui venit, & equitatu inservit, commodiori nempe ac certiore gradu incedit. Terram levio rem transscissum aratro sæpius jungitur, & stercus suum, eximie soli durioris & humidi stercoreationi cedit.

Antequam vero de asino dicendis finem imponamus, ne in alios injurii, in nos autem injusti simus, fatendum: quod nulli accedamus *Viro Cel. de Buffon*, dum supra Nomenclatores Physicos istos adpellat, qui animalia, vegetabilia aliaque in classes, genera, species &c. distribuendo pertractant. Nec nostra adeo res agitur, sed potius Viri *Cel. Linnæi*, quem & nos ducem sequuti sumus; quique quæ fecit defendendi dexteritate, si placet, nobis potior pollebit. Cæterum numquam pediculis infestatum asinum dicit *Vir Cel. Aristotelem Pliniumque* sequutus, *Redus* autem, exhibita pediculi asinini figura, quam cum descriptione & *Cel. Paullini* in *Onographia* reperies, contrarium probat. Idem ille *Paullini*, & vino dulci & cicuta ebrios & præ ebrietate mortuos referentes asinos vidisse testatur, quos aquæ frigidæ adspersione in vitam revocari addit. *Matthiolus* & *Scaliger* eundem circa asinum comestæ cicutæ effectum esse docent. *Olivier de Serres* denique Italos asinorum aures, ut nos canum atque equorum, impune amputare refert, concidit igitur opinio, qua, amputatis auribus ad procreandum fœtum inhabiles fieri dicuntur.

Ebraico idiomate: *Ason* seu *Chamor* audit, Græco: *Onos*, Italico: *Asino*, Hispanico: *Asno*, Germanico & Belgico: *Esel*, Anglico: *Ass*, Suecico: *Aosna*, & Gallico: *Asne*.

Asini carnem digestu difficilem & ori ingratissimam, nullo prorsus, aselli autem quæ facile digeritur, & grati esse solet saporis, aliquanti quorundam usui cedere scito. Medicina autem ex asino, pedis ungulam, urinam

nam & stercus, ex asello, sanguinem, ex asina tandem lac depromit, & suos in usus convertit. Ungula pedis asinini, sale volatili abundans, contra adfectiones cerebri, ut spasmos, convulsiones, & epilepsiam, commendatur, alciungula substituta, & vel in pulverem redacta, vel calcinata dosi ℥j. ad ℥j. semel per omnes mensis integri dies, cum aqua Cephalica quadam recipitur. Nec non contra pellem frigore dehiscientem adhibetur, & fumus sui receptus, hystericas adfectiones profligare solet. Dale est qui pro renum morbis efficacissimam pronuntiat asini urinam, exterius adplicata autem scabiem, verrucas, callosque depellit, atrophiam etiam paralyfin & arthriticos dolores lenit. Stercus asinum adstringendi sua virtute, hemorrhagines sistit, Majo mense collectum, & probe arefactum in pulverem reducatur, ex illo autem vel ℥j. in substantia, vel ℥ij. aquæ adstringenti, infusæ & percolatæ, recipiantur. Alii etiam, ne quid ingrati saporis supersit, syrupi instar illud præparant. *Etmuller* sequens contra hemorrhaginem sanguinis, efficacissimum, ut scribit, medium commendat. Accipe sex uncias stercoris asinini, & 3. uncias musci ex ilice, quæ omnia vel solis vel ignis ope exsiccata in pulverem reducantur, ex hoc itaque parum si naso adtraxeris, statim desinet hemorrhagia. Idem ille effectus & suffumigationi cum stercore isto peractæ respondet. Aselli sanguis multo abundat sale volatili, & pro specifico habetur contra delirium, melancholiam atque maniam. Verno itaque tempore vasculorum post aures aselli unum aperias, & sanguinem lineæ telæ portiunculis excipias, has arefacias, & ad usum conserves. Frustulum igitur telæ hujus, digiti longum, & 2. circiter digitorum transversorum latum, ℥vj. decoctionis calidæ summitatum perforatæ, seu anagallidis floribus rubris, infundas, subducta tela lineæ autem in 3. partes æquales liquorem divides, & senis horis interjectis ægrotanti præbeas, qui sudorem expectans, multiplici stragulorum atque lecti adparatu caleseat. Duos tresve subsequentes per dies eadem repetatur potio, præcedentibus tamen mediis generalioribus. Medium non solum a *Doctore Michaele Hartmann*, sed & *Ephem. Germ.* & omnibus Galliæ diariis, Gallice; *Journaux*, recentioribus, iteratis commendatum.

Lac asinæ, frequentiori apud nos usu venit, reliquis parciore caseo & butyro imprægnatum, lævius, limpidius ac digestu facilius, pectorale, refrigerans, humectans restauransque habetur, & pro morbis, pectus instantibus, ut tussi, asthmate arido, pectoris oppressione, sanguinis sputatione, pulmonum ulceribus, & phtisi commendatur, humores etenim acres, pectus aliaque corporis membra adgravantes lenit, & sanat ulcera interna, pleuritim, fluxum pectoris & dysenterias excipientia, & ulcera renum & vesicæ, lenit etiam urinæ ardores; lymphæ tandem & sanguinis acrimoniam & falsedinem corrigendo, arthritidi & rheumatismis solamen adfert. Variis præter ea aliis adhuc virtutibus gaudet, morbis medetur, primis Medicinæ mediis adnumeratur, & quotidiano ejus usui inservit. Cautione tamen opus est lac asinæ usuro, stomachum enim ad lactis digestionem, & ad impediendam ejus coagulationem dispositurus, per varios dies antecedentes, parvissimo, illoque digestu facili nutrimento utatur. Post brachii vena secanda, si sanguinis abundantia adest, nec corporis expurgationem, lenissimam tamen, pectore si læso laborat, omittat,

postridie usum lactis incipiat, & quarta vel quinta matutina hora, quotidie illud hauriat. Vernalis præcipue & autumnalis tempus convenit, nec etiam prorsus inconveniens est reliquum. Ab initio non nisi octo uncias quantitatem accipias, exinde autem sensim illam ad 16. usque uncias exaugescas. Argillaceo itaque vasi calefacto excipiat, & cribro obfecto, cui si placet sacchari hordeaci, seu candidi ℥ss. seu ℥ij. superspargas, & quam citissime fieri potest, ægrotanti præbeas; is autem accepto lacte, somnum quærat, necesse est. Si difficilis sit transitus lactis, paullo ante ejus usum oculorum cancri præparatorum ℥ss. vel boli instar, vel cum aliqua aquæ hordei portione hauriat. Cæterum nullo vel parvissimo saltem vino utatur ad mensam, & pro potu usuali, ptisana ex hordeo, glycyrrhiza mixto, seu aqua oryzæ debilius cedat. Qui autem, ut sæpius accidit, interrupto somno matutino, somnum recuperare nequeunt, hi vespertina quarta vel quinta, sumpto nutrimento, illud capiant, præcocius tamen ad prandium sese conferant, & cæna abstineant, ne nimio nutrimenti adparatu onustum habeant stomachum. Sic 4. ad 6. hebdomadibus lactis usum continuabis, & clysteribus refrigerantibus facilem ventris exonerationem promovebis, in fine tandem, vel si postulat rerum ratio, & medio temporis, corpus medicamento expurgabis. Superaccedentibus vero aliis, quæ vel lactis usui obstant, vel singularem Medici curam requirunt, ut febris, violentior sanguinis sputatio, seu vehementius alvi profluvium, Medici consilium & opem quæras. Si autem stomachi dolores, aggravationem & turgescentiam efficit usus lactis, paullo ante prandium confectio hyacinthi ℥ss. accipito. Quum etiam, ut fieri solet, transire lac nolit, dimidiam jusculi seu aquæ hordeaceæ partem addito. Si ulceribus pulmo laborat, quartam admisceas partem calcis secundæ, quæ non solum acida corrigendi, sed etiam ulcera desiccandi virtute eximia gaudet. Fœminæ autem, supervenientium menstruum nulla ratione habita, lactis usum continuanto, at accedentibus doloribus cholicis, vaporibus aliisque per aliquot dies illo abstineant, & nisi corpore expurgato, illud recipiant. Ubi autem lactis asinini defectum experiaris, vaccinum substituas, aqua vel ex hordeo, vel oryza, elixa, imo alia quadam potione, ægrotanti conveniente temperatum.

Pellem denique asini durissimam ac valde elasticam, multiplici usui venire recenset *Cel. du Buffon*, & ad tympana, ad sandalia, ad pugillares & sexcenta alia conficienda inservire; imo Orientis incolæ & asini membrana, suum *Sagri*, nostratibus: *Chagrin* componere.

Ossa etiam asini præ reliquorum omnium ossibus duriora habemus, quippe quæ optimis antiquiorum tibiis conficiendis inserviisse novimus.

℞. Aquæ plantaginis ℥ij.

Syrupi myrtarum

Succi ex stercore asinino expressi ana ℥ss.

M. & fiat potio mane jejunæ per triduum accipienda, contra menstrua albida & matricis hemorrhagines.

℞. Aquæ anagallidis cum floribus rubris perforatæ ana ℥ij.

Hiscæ per aliquot horas frustulum 1. digiti longum & 3. transversorum digitorum latum, linteum, sanguine aselli irrigatum infundas, quo quum fan-

sanguis abierit, subtracto, potionem, bis ad ter in die reiterandam, contra delirium, maniam, & phrenetidem, absque febris, recipias.

Rx. Farinam hordeaceam, p. q.

Illamque lacte asinino maceratam pro epithemo contra cephalalgiam adhibeas.

Rx. Fermenti ℥iij.

Stercoris asinini arefacti & pulverisati ℥j.

Salis communis ℥jss.

M. cum aceto Sambuc. ut fiat cataplasma, capiti delirantis adplicandum.

Tandem etiam de mulo. *Mulus*. Offic. Schrod. 302. Lemer. 584. Boscch. de *Quadr.* 182. Herman. Cynos. 668. Dal. Pharm. 436. Charlet. Exerc. 4. Merr. Pinn. 166. Schvenckf. de *Quadr.* 62. Gesn. de *Quadr.* 702. Aldrov. de *Quadr.* 358. Jonst. de *Quadr.* 15. Raii Syn. *Animal. Quadr.* 64. *Equi cauda extremo setosa (sive Mulus)* Linn. Faun. Suec. 35. *Mulus & Mula, Semi-Asinus*. Quorumd.

Nullum ex auctoribus novimus, qui anatomicam muli descriptionem perscriptam reliquerit. Nec in *Anatomia Animalium* sua Vir Cel. *Blasius*, alia adfert, quam sequentia: Binarum mularum testiculos, *Stenon* adfirmat, sese disquisivisse. Alterius testiculi minores, multis tamen vasis sanguineis intertexti, nullum ovorum vestigium monstrabant. Tuba longissima multas contorsiones efformabat, proximus exteriori orificio testiculus latissimus, interior autem adeo anguste undecumque adhærebat, ut nullus aeri ingressus in matricem pateret; membrana matricis interior valde rugosa, rugis latis & superficiem versus inclinatis obsita, nec adeo stricta erat sua origo, quamvis aderant eminentiæ annulares, plerumque illam obturantes. Alius mulæ testiculi, asinæ testiculos magnitudine exæquabant, & pauca quædam ova in cavitatibus illorum obvia, & in alterutro ovum majusculum reperiiebatur, flavido liquore plenum, in altero tandem corpus quoddam oblongum, rubro-nigrum, & glandem conglomeratam structura sua exæquans, cujus altera extremitas, testiculi partem convexam respiciens, cavitatem ostendebat, altera autem partem testiculi cavam egrediebatur. Corpusculum illud undequaque liberum, nec ullius vasis seu ligamenti ope testiculo cohærebat. Intus vero rubicundæ matricis atque turgentis vasa omnia sanguinem egurgitabant. Quum itaque ovorum copia pleni sint mulæ testiculi, mulam foetus edentem cur inter miracula referant, non video. Si autem prædictioni cuidam, simultaneus mulæ partus & reipublicæ gravior eventus responderet, tunc miraculum & ego viderem. Variæ cæterum in promptu essent rationes pro sterilitate mularum, ut ovorum defectus, vel nimis profundior secessus in testiculis, vel materia ovorum, conceptioni insufficiens, & quæ reliquæ esse solent sterilitatis causæ. Cæterum si sæpius corpusculum illud in testiculis matricis reperire liceret; crederem quadrupedum aliquas dari foemellas, quarum jam in testiculis, ova, placentæ primitiis obvolvuntur.

Mulus & mula, sic *Lemery* ex equo & asina vel asino ac equa generati, ex utriusque etiam natura participant. Steriles & ad procreandam speciem sui inhabiles ducebantur, monstrorum instar, quorum speciem reperiri volunt, aut variis in locis varias, imo anno 1703. Palermi, quæ Siciliae urbs est, mulam trimulam hinnulum edidisse, ac copiosissimo suo lacte nutri-

visse constat. Sic *Diarium Trevigianum*, (*Journal de Trevoux*) mensis Octobris, anni 1703. pag. 82. recenset. Sabaudia & Avernia in montibus, sic pergit, *Jumares*, muli speciem, ex tauri cum equa congressu natos, asinum altitudine tantum non adæquantes, ast fortiores majoribusque oneribus perfendis aptos, & rostro bovino, corpore autem muli simili, auribus tamen minoribus gaudent.

Nos tamen, sic Cel. de *Maupertuis* quantacumque de jumaribus recensentur, taurum cum asina umquam coisse dubitamus. Adtamen jumarum existentiam plurium testimonio comprobata habemus. Alios inter & *Joannem Baptistam Porta* & Cel. *Prevost*, Abbatem, testes adducimus, quorum hic in *Lexico manuali* jumarem ex tauro & vel equa vel asina generatum dicit, & Avernia frequentissimum pro deportandis inservire plaustris, & vaccæ pedibus & cauda, equo pedibus renibusque similem, & cornubus pro parvitate vix conspicuis instructum.

Tres vero mulorum classes *Columella* constituit, dum alios ex equa & asino, alios ex asina & equo, alios tandem ex onagro & equa generatos, & magno coitus desiderio, licet plerumque steriles, incitari. Nec tamen coitum permittas, nisi efferatos & malignos postea illos videre velis. Tricesimum sæpe vitæ annum adtingunt, & salutis optimi, & utriusque ex quo generantur, qualitatum participes sunt. Vel maximis plaustris deportandis destinati videntur, quantacumque enim imposueris, dociles ac patientes excipiunt, perferunt, nec umquam recalcitrant. Hispani præsertim quibusvis suorum vecturis mulosnectere solent, qui intrepido providoque gradu montium præcipitia transeunt, & quævis deportanda leviter deportant. Nec non aratro & tritico terendo inserviunt, imo in Avernia equorum & boum loco veniunt. Principes urbes intrantes, fastus ergo, sequi solent, & haud ita pridem Parisiis adhuc Senatores curiam, & Medicos, ægrotantes visitatum, mulis vectos vidimus, & sane magnifica res est ac regia, muli vectura. Debiliores quidem mulis sunt mulæ, sed rectu faciliores, ac magis obsequentes. Odoratus sunt acutissimi, & animi phanthasmatum pleni, nec tamen feroces, hinc & proverbium: vel optimus mulus, malum animal, & illud: diutius conservat mulus pedisictum magistro. Quos asinus cum equa generat, his, qui ex equo & asina proveniunt, anteferendos esse volunt. En quales admissarii esse debent virtutes, si præstantiores mulos cupias: ad minimum ille trimulus sit, nec tamen plures quam 10. ad summum, annos agat; optimæ sit speciei atque præstantes; etenim mulum admissarium eximium vel 500. Galliaë taleris, quibus 200. circiter aureorum Italiaë respondent, inferiorem vero vix 100. taleris venire videbis; corporis sit pulchrioris ac elegantis, collo nimirum fortiori, lateribus latis ac fortibus, pectore amplo & musculorum pleno, lumbis cruribusque robustioribus; & coloris vel nigri, vel maculis rubicundis conspersi, vel argenteo cinerei, maculis nigris confiti; cinereus autem, omnium frequentissimus, jure reiiciendus sit. Mula nondum decimum ætatis annum absolverit necesse est, & quantum fieri potest, colore admissarium, præsertim, quum nigro sit, exæquet. Anno 1689. regio mandato interdictum est, asinos equabus xiv. palmas altitudine excedentibus admittere, sicque producendis vel optimis mulis, equæ sufficientes constitutæ, pulchriores autem, suæ speciei conservatæ sunt. Tanto
autem

autem furore corripitur asinus admissarius conspecta conscendenda, ut, nisi obvelato capite eo conduceretur, conducentes impetu abreptos vel elumbes redderet & claudicantes.

A medio Martio ad medium Junium usque equus asinæ solet admitti, quo foetus, duodecim per menses utero gestati, pascuorum abundantia & herbarum copia recentes editi fruuntur. Octo diebus antequam cum equa asinus congrediatur, quiescat, & lautius pascatur, avena scilicet in die semel, & fœni optimi quantitate. Eadem cæterum cautione reliqua, qua circa coitum equorum, & hic loci opus est; nec alia intercedit differentia nisi hæc, quod integri anni spatium utero gerat equa ab asino imprægnata, nec ultra sex menses ubera possit præbere foetui, tunc enim doloribus uberum maximis excrucietur, & hinnulus vel plane ablaetandus, vel alius uberibus admovendus est.

Robustiores sunt muli plerumque mulabus, & si de laboribus & itinerum molestiis agitur, ille, hæc autem, ubi de vectura, anteferri solet; imo ut in proverbio est: parvus sit mulus, magna autem mula. Muli perfectiones cruribus rotundis absolvuntur & fortioribus, corpore firmo, & tergo ex caudæ latere pendente; mulæ autem, corpore crasso, pedibus exiguis, cruribus macilentis, tergo pleno & lato, pectore lato, collo longo ac incurvato, capite tandem exiguo & macilento. Annorum quos agunt quantitatem ex dentibus dijudicare poteris, imo alii ex crurum altitudine, dum juniores sunt, corporis altitudinem futuram determinare posse contendunt; etenim tribus vitæ mensibus primis, in omnem sibi debitam longitudinem excresecunt, & tunc dimidiam corporis altitudinem constituere dicuntur. Hinnulorum equinorum instar edoceri solent, ast phantasmatum pleni, ut diximus, majori opus est patientia. Vini usu dociliores, & mansuetiores redduntur, & ne recalcitrandi consuetudinem induant, pedum posteriores lumbis suis alligare solent. Eadem illorum quæ equorum cura debet esse & educatio, eisdem etenim subjacent morbis, quibus eisdem etiam mediis medendum est.

Potu, asinorum instar, pinguescunt, & sese obvolutare peramant, ingratißimum autem rudendo clamorem attollunt. Novorum adspectu sæpius terrentur, & tunc quidem ductu difficillimi & periculosi evadunt; cæterum vero callidi & optima memoria instructi, quam semel transierunt viam, probe mente infixam retinent; nec non defensionis modi periti, hostem depellere norunt; Varro enim refert, lupum quondam mulorum pascuum ingredientem, ab his circulo constituto cinctum & pedum ictibus tandem enecatam fuisse. Alii autem aliena jussa renuunt, nec nisi suo domino vel duci obtemperantur. Nec frigoris perferendi adeo impatientes, quam asini, frequentiores tamen calidas ac frigidiores regiones inhabitant; imo asinum & mulum, advenas in Suecia, non nisi principum in stabulis reperiri docet *Linnaeus*.

Ebraicum Muli nomen est *Pered*, Græcum: *Hemionos*, Italicum & Hispanicum: *Mulo*, Germanicum: *Maul-Esel*, Anglicum: *Mule*, Belgicum: *Muil-Esel*, Suevicum: *Mulaosna*, Gallicum denique *Mulet*, quod ex Latino: *Mulus*, seu *Mulettus* deducendum.

Medicina tandem ungula, urina & stercore ejus, multo sale volatili & oleo abundantibus, utitur. Ungula ejus, pro reprimendo nimio menstruo-

rum, hemorrhoidum, & quarumvis hemorrhagiarum fluxu, intus, xij. gr. ad ℥ij. dosi, vel suffumigatione, sedili perforato residenti, excipienda, adhibetur. Urina cum sedimento, pedum callos propellit, & arthritidis dolores, pro fomento adhibita, lenit. Stercus tandem arefactum, & in pulverem redactum; dosi ℥j. ad ℥j. sudoriferi instar, sanguinis impuritates pellem versus protrudendo agit; & contra dysenteriam, ad reprimendum menstruorum fluxum, & leniendos dolores lienicos adhiberi solet.

C E R V U S.

Multa animalium & varia cervi vel nomen, vel notas caracteristicas gerunt. Nos autem tres saltem eorum species, in Medicina usitiores, descriptione pertractabimus, 1. scilicet, cervum, proprie sic dictum, 2. Rangiferum, 3. Alcem.

Cervus, Schrod. 281. Lemer. 223. Bossch. 221. Sever. Zoot. 387. Dal. Pharm. 439. Gesn. de *Quadr.* 326. Schvenckf. de *Quadr.* 81. Charl. Exerc. 11. Aldrov. de *Quadr. Bisulc.* 769. Jonst. de *Quadr.* 68. *Cervus* & *Cerva*. Blas. 51. Valent. *Amph.* 74. Grab. *Eleph.* 22. Hermann. *Cynof.* 2. *Cervus cornibus ramosis teretibus incurvatis*. Linn. Faun. Suec. 38. *Cervus ovis nobilis*; *Cervus*, *Cerva*, *Hinnulus*. Quorumd.

Anatomicam cervi descriptionem ne digito quidem tetigit Vir Celeber. Graba, D. in *Elaphographia* sua, quam vasto turgeat adparatu eruditionis, ab argumento alienissimæ. Nec tamen prorsus caremus anatomicis cervi cervæque descriptionibus; tales enim ex *Ephem. Germ.*, ex *Blasio*, *Severino* & *Valentini* scriptis depromere possemus. Variæ illarum amplissimæ sunt ac satis accurate conscriptæ, v. gr. illa quæ Joannem Jacobum VVepfer, D. auctorem habet. Quam vero in *Actis Regiæ Scientiar. Acad.* expositam legimus: *Descriptionem Anatomicam Cervi Canadensis & Cervæ Sardinensis*, illa nobis adeo perfecta visa est, ut eam tibi L. B. nunc exhibendo, ex fonte tam præclaro hausisse nulli erubescamus, quidquod gloriemur. Cervus Canadensis ab eo, quem Europa alit, non nisi corporis mole majori, & cornuum magnitudine, Cerva Sardinensis autem a nostrate, pelle sua variegata distinguitur.

Cervi hujus altitudo, sic Acta, ab extremitate dorsi ad terram, 4. pedibus, cornuum trunci longitudo, 3. & senorum ramusculorum longitudo 1. pede absolvebatur. Sex erant rami in quovis cornu, tot enim, testibus *Aristotele* & *Plinio*, ad summum reperiuntur, quamvis cervorum nostratium in cornibus, sæpius ad 22. ramusculos numerare liceat. Cornu totum obtegebat pellis durissima & confita, pilo brevi, copioso, colorem corporis pilorum referente, ac passim, ceu barbæ in arista, reclinato. Sinistre igitur *Plinius*, pilo huic plumarum nomen ac mollitiem tribuit. Tota autem pellis plurimis venis atque arteriis, multo sanguine turgescens intertexta erat Turgescebant enim ex latere cornu respiciente, & pro recondendis vasis ita fulcato, ut interiorern cranii partem, ad distributionem vasorum Duræ Matris, sulcatam videmus. Vix speciem veritatis secum gerit sententia *Gesneri*, qui sulcos in superficie cornu cervini obvios, ex vermibus, æstate in iisdem enatis, eaque corrodentibus oriri existimat. Nec *Plinius* satis accurate naturam cornuum cervi disquisivisse videtur, dum

dum cannæ & ferulæ similia perhibet; plantæ enim illæ vel excavatis vel medulleis stipitibus gaudent, ast cornua cervi singularis sunt soliditatis. *Democritus* adcuratior circa generationem eorum philosophatus, cervum multo sanguine abundare dicit, & ineunte æstate multa pinguedine adaugeri, naturam vero nutrimenti abundantioris partem consumere, eamque mediantibus vasis plurimis atque amplissimis ad originem cornuum transmittere. Sane, maximam sanguinis quantitatem, cornu & pelli illud obtegenti intermediam invenimus; pellem enim subtrahentibus nobis, tunicæ venarum subtilissimæ disrumpebantur.

His inducti, de varia ratione incrementi cornuum in animalibus cogitavimus. Duplicis naturæ sunt cornua, alia scilicet excavata, alia autem solida. Utraque vario modo excrescunt. Solida scilicet, ut cervina, ossi frontali immediate adhærent, & ex illo nata videntur, est enim, *Democrito* ac experientia teste, spongiosius rariusque, quam in ullo reliquorum animalium. Jam, si origo vel germinatio cornuum cervi, substantiæ cui-dam os egredienti debetur: incrementum illorum præsertim ex pelle, illa obtegente, & mediantibus vasis quæ continet, multum nutrimenti subministrante, pendebit. Cornua excavata, qualia sunt bovina, plane contrario modo generantur atque excrescunt; nec enim immediate cranio adhærent, sed quorumvis cavitati os aliquod, appendix ossis frontalis, inhæret, appendix hæcce æque ac reliqua pars cranii pericranio tegitur, quo mediante cornua cranio nectuntur, & originem suam ac incrementum illis debent, quæ a vasis pericranii accipiunt. In pericranio scilicet, appendicem ossis frontalis circumdante, crusta quædam exsurgit, transsudatione (ut videtur) materiæ alicujus, vasis membranæ istius contentæ; vasa enim ista in cavitate cornuum gazellæ multo ampliora, magis turgida sanguine, imo copiosiora vidimus, quam in reliqua pericranii parte, reliqua capitis ossa obtegente. Ut igitur cornua solida per externam suam superficiem, nutrimentum recipiunt & excrementum: sic excavata per internam. Dum enim stratum, seu crusta prima, (amplectens productionem pericranii, quod tegit appendices cuspidatas ossis frontalis) indurefcit, fere ut ungues digitorum in apicibus indurescere videmus: tunc alia crusta succedens, primæ & pericranio intermedia exoritur, primæ adglutinatur, illamque protrudendo amplificat; post denuo alia, & sic porro, ut testas concharum & limacum, ex laminis seu foliis aliis aliis superaccedentibus componi generarique docuimus. Hinc cornua excavata, testarum instar, rugosa & crispata esse solent, inque laminas varias facile separantur. Quæ quidem cornuum excavatorum generatio, nec *Aristoteli* prorsus incognita fuisse videtur, dum duri quidpiam ex cranio natum, cavitatem illorum ingredi docet, os nempe illud, quod cavitatem cornuum intrare diximus. Nec tamen pericranii mentionem iniicit, cui immediate cornu adhæret, ex quo originem & nutrimentum capere videtur. Accedit materiæ differentia, quippe quæ magis aquosa est pro cornibus cavis, magis terrestris pro solidis. Cornua cava, igni admota, statim mollescunt, horum concretio enim haud exsiccationi & consumptioni partium aquosarum, sed spissificationi materiæ illius tribuenda est, quæ frigori soliditatem consistentiæ suæ debet. Cornua solida e contrario, naturam ossis habent, ex quo nascuntur, materiæque sunt terrestris, quæ, *Plinio* & *Aristotele* testibus,

in capite cervi, solis calore indurescit. Denuo aliud subjungit *Aristoteles*, quod materiam cornu cervini, terrestrem, aridam, ac substantiæ lapidosæ esse loquitur; sæpius enim addit, in cornibus cervorum, si qui capti fuerint, lichenem, suis radicibus, ut in lapidibus producere solet, infixum, reperire. Quidquod *Physici*, in locis terræ, cui cornua cervi commissa sunt, lichenem excrecere scribunt. Accedit excretio illa cervo singularis, quam *lacrymam Cervi* nominant, & ex magno oculi angulo protuberare, ac offi (ex quo, teste *Scaligero*, nascitur) arctissime adhærere dicunt. Hæc enim tantæ est similitudinis cum lapide, ut ab aliis pro vero lapide habeatur nec ex cervo profecta credatur; quam multi sint auctores in describenda ejus generatione, eamque ex angulo oculi cervi enasci perhibeant, quum hic vermes intestinorum profigaturus, serpentes comederit, & aquæ ad oculos usque sese immerferit. Os tandem in basi cordis cervi obvium, testimonio satis firmo venit, quod succo facile in naturam osseam & quasi petrosam transeunte, cervus abundet.

Intestinorum omnium longitudo 96. pedibus, tenuiorum 66. crassiorum, excepto Cæco, 20. pedibus absolvebatur, Cæcum 1. pede & 10. digitis longum, & basin versus 6. digitis amplum, ut solet, cuspidem versus sensim decrefcebat. Quæ quidem singularis intestinorum longitudo, ventriculi magnitudini adæquata, & animalibus herba viventibus propria, nulla in his quæ carne vescuntur, occurrit. Quum scilicet herba difficilior in sanguinem commutetur, imo huic parciores materiam suppeditet, caro autem abundantior: necessaria est ventriculorum ampla capacitas, pro continenda quantitate herbarum maxima, necessaria est respondens intestinorum longitudo, quo calor naturalis satis diu agere possit in nutrimentum retentum, & varias per sinuositates conductum. Duo aderant ventriculi, alter major, alter minor, hicque Duodenum dilatatum videbatur. Ventriculus major, aere turgescens, 5. pedum peripheriam exhibebat, & ex pluribus ventriculis in unum collectis compositus videbatur; quatuor scilicet ad quinque gibbi ejus membrana quadam, eos nectente continebantur, & varias in cellulas eum separabant. Huic membrana alia superjacebat, ventriculum totum obtegens atque amplectens, posticus ventriculo adhærens, antèrîus autem, in summo saltem nexa, in parte reliqua prorsus separata, & admodum tensa, etenim non solum flatuum quantitatem, sed & ventriculum & intestina (quæ epiploi instar obtegebat) complectebatur. Pars ejus superior, ventriculum tegens, tenuis, dura, diaphana, & adipe, glandulis atque vasis apparentibus destituta erat; pars vero inferior, intestina continens, pauca quædam vasa, & parum adipis exhibebat. Lien rotundus, tenuis, ac ventriculo majori totus adhærens, 6. digitorum diametrum explebat. Vasa, *vas breve* constituentia, oculis percipi omnino nequibant. Pars gibbosa atque superior, mediantibus tribus ligamentis fortioribus diaphragmati adhærebat. Hepar, unico lobo constans, antèrîus fissum, posticus vero contiguum, ex parte dextra longius parumper productum, quam ex sinistra, cuspidem, renem versus, efformabat. Nulla erat vesicula fellis. Ren magnus, 5. nempe digitis longus, 3. autem latus erat, deficiente rene succenturiato. Virga osse omni carebat. Membrana testiculi propria, immediate cohærebat substantiæ glandulosæ, nec omnino ab illa separari poterat; innumeris præter ea vasis, san-

sanguine plenis, iisque jam rectis, & acus crassitiem exæquantibus, jam crispatis, & fidium crassitie respondentibus, intertexta conspiciebatur. Flava erat substantia glandulosa corporis testiculi, ast epidydimidis, rubro-debili-livida. Complexus vasorum præparantium, tortuose inter se conglomeratorum, tubum digiti crassum & epidydimidem producentem constituebat, hæc vero summitatem corporis testiculi, ceu calix glandem, obtegebat & amplectebatur. Quæ quidem portio, glandis formam referens, corpus quoddam, digiti crassum producebat, quod juxta corpus testiculi, cui adhærebat, descendens, imum versus, quasi papillam efformabat, deinde autem ex latere (lateri, ex quo descenderat) opposito adscendens, vas deferens, cygni plumæ pro crassitie æquiparandum, constituebat. Pulmoni, 4. lobi ex dextra, & 3. erant ex parte sinistra. Cor maximum, fere rotundum & molliusculum, ob ventriculorum amplitudinem, osse quodam, cervis proprio, instructum erat.

Jam cervæ descriptionem subjungamus, quo fatius adpareat, quanam utriusque fuerit convenientia & differentia, præter illam, quæ sexui tribuenda venit, diversitatem.

A dorso usque ad terram cervæ hujus altitudo 2. pedibus & 8. digitis; colli longitudo 1. pede, & pedis posterioris, a genu usque ad extremitatem pedis, 2. ad talum vero 1. pede absolvebatur. Quadruplicem colorem ostendebat pilus, fulvum, nigrum, album atque cinereum. Sub ventre, & interiore lumborum ac crurum regione, albus adparebat, in dorso fulvo-ferrugineus, in lateribus fulvo-Isabellinus, fulvus uterque prope truncum corporis, maculis candidis atque figura irregularibus (quarum duo ordines recta linea procurrentes ad longitudinem dorsi, reliqua pars jam hic jam illic conspersa videbatur) variegatus; ex latere utroque linea candida, ad longitudinem laterum procurrens; collum & caput cinereum; cauda tandem infra candidissima, supra autem nigra, & pilus 6. digitorum longus erat.

Epiploon peritonæo in regione umbilici adhærens, intestina tota, vel subtus, cingebat, cæterum duplex, ex membranis tenuissimis, & vasisexilibus adipe carentibus, compositum erat. Hepar exiguum, in eo hepati cervi æquiparandum duximus, quod haud in lobos separatum abiret, sed fissuram tantum, mediam summitatem alias occupantem, & denuo aliam inferiorem, dextrum latus respicientem exhiberet. Imo & vesicula fellis carebat cervæ.

Quatuor ventriculi magis quam in cervo inter se separati, distinctiores conspiciebantur. Maximi primique partem internam membrana quædam facile separanda obducebat, & externam alia, qualis in gazella. Papillarum quantitas membranæ internæ quamdam asperitatem, ruminantium more, conciliabat. Magnus ille ventriculus passim constrictus, & in varios sacculos, ut in cervo, separatus, herbis insuper repletus erat, quibus & varia frustula corii quod conficiendis calceorum soleis venit, & vel taleri argentei magnitudinem referentia, frustulaque plumbi, unguis magnitudine, detrita, ut videbantur, & corrosa, intermixta reperivimus. Conjecturæ locus est, quod istius generis animalia, raptim ac neglecto examine nutrimentum colligant in agris, ruminando autem diligentius illud fecerant & seligant. Ventriculus secundus, tertius ac quartus ovinis simillimi erant.

erant. Intestina longissima, ut in cervo, ast proportionis ergo breviora, 40. pedum omnino longa, & alia, illaque partem fere quartam constituentia, grisea, plicaturisque 6. digitorum longis inflexa, cætera autem rubro-ferruginea, & in cellulas exiguas complicata erant. Mesenterium tenuissimis ex membranis componebatur.

Lien rotundus, ac diaphragmati & ventriculo, ut in cervo, fortissime nexus, membrana dura, crassa & albescente obvolvebatur. Cornua matricis longa pluribusque anfractibus inflexa, extremitate sua testiculo exiguo superjacebant. In parte interna cornu utriusque duas reflexiones membranae interioris vidimus, quæ, ut in tertio & quarto ventriculo ruminantium, folia quædam, ad longitudinem cornu disposita efformabant. Cor eximiæ magnitudinis ac molliusculum, ventriculos, magna cruoris quantitate plenos & tenfos commonstrabat; & hepati 7. erant lobi.

Jugularis tam internæ quam externæ truncis denæ & senæ erant valvulæ, sex ordinibus, illisque binis fere digitis inter se distantibus, dispositæ. Quaternis ordinibus superioribus, ternæ valvulæ, binis inferioribus autem binæ, ast superiorum valvulis majores, continebantur. Valvularum dispositionis ratio talis erat, ut ostium sacculorum, quos illæ efformabant, capitis situm respiceret, & pro intercipiendo nimio impetu sanguinis, qui ex cerebro revertens, ramos axillares ingreditur, destinata videretur. Ex recentioribus quidam motum sanguinis, venis detenti, nescientes, omnibus horum vasorum valvulis, idem officium tribuere. Quarum tamen situs motui & cursui sanguinis (quem illi supponunt) contrarius, vero autem cursus sui modo, id est: reditui cor versum, patrocinari videtur. In una jugularium binas valvulas observavit *Bartholinus*. Et *Riolanus*, qui primus binas istas valvulas vidit, non nisi in jugulari interna easdem reperiri testatur, quas in externa pariter ac interna deteximus. Ast situs ille valvularum, circulationi sanguinis cor tendenti contrarius, nulli nisi *Amato Lusitano* innotuit; hic enim in principio venæ Azygos similes valvulas observavit, easque pro impediendo reditu sanguinis venæ Azygos, in truncum cavæ, inservire credidit. Ast quamvis idem vel millies eandem conformationem sese vidisse scribat: singularis tamen illa ac extraordinaria habeatur, omnes enim Anatomiae cultores uno ore testantur sese observasse contrarium, nec ullas valvulas detexisse in venis istis, quarum situs motui sanguinis cor versum, haud adaptatus est. In carotidibus ad longum dissectis, plures radios, ceu sectiones transversales, fibrarum, (ad longitudinem membranae interioris quæ huic arteriæ est, procurrentium) continuationem interfecantes vidimus. Quas quidem pro connectendis & corroborandis fibris destinatas esse credimus; ut fibras musculi dextri ventris, lineis transversalibus, quas *Enervationes* dicunt, interceptas observare licet. Nec idem in arteria crurali deteximus, hæc enim lævigata, æqua, nec sectionibus distincta erat.

Globus oculi $1\frac{1}{2}$. digiti diametrum, & crystallinus faciem posteriorem magis convexam exhibebat, quam anteriorem.

Hæc igitur anatomica cervi Canadensis & cervæ Sardinensis descriptio, pro cognoscendo cervo & cervæ omni, ut supra diximus, sufficit. Nunc de historia cervi naturali.

Haud incongrua nobis videtur definitio cervi, quam *Andreas Graba*, D. sup-

suppeditat. Cervus, sic ille, quadrupedibus ruminantibus adnumerandus & bisulcus, pilo jam fulvo vel rubicundo, jam ferrugineo, rarius albo tegitur, corporis figura equi hinnulum refert, pulcherrimus, timidus, alacer, cursu velox, cornua ramosa, solida & quotannis decidentia, pro armis gerens, natura silvestris, silvarum & colliculorum incola, longævus, homini utilitatem multiplicem, & Principibus, qui venationem peramant, haud vulgarem delectationem præbet. Cervam, Galli: *Biche*, hinnulum: *Faon* adpellare solent.

Pro varia cervi ætate varia nomina ipsi tribuunt Galli. Annum dicunt: *Faon*, bimulum: *Daguet*, trimulum, quadrimulum & quintum annum agentem: *Cerf à sa première, seconde, ou troisième tête*, id est: cervum, primum, secundum, tertiumve caput, sive cornu gerentem. Sextum annum dum agit, dicitur: *Cerf de dix cors jeunement*, id est: Cervus decem cornua recentia portans; si septimum: *Cerf de dix cors*, Cervus decem cornuum; si octavum: *grand Cerf*, cervus magnus, si nonum: *grand vieux Cerf*, magnus cervus senex. Secundo scilicet vitæ anno, cornua prima, Gallice: *Dagues*, protuberant; tertio, 4. 6. ad 8. ramusculi iis accedunt; quarto 8. vel 10. numerantur; quinto 10. ad 12., sexto 12. 14. ad 16., & septimo ætatis anno, integra solent esse cervi cornua, nec ramusculorum numerus exinde augetur, sed crassities saltem, prodeuntibus annis accedit. Erronea aliorum opinio docet: quod septennio primo elapso, ramusculus novus quotannis accedat cornu cervino, & ex quantitate horum facilis sit supputatio annorum vitæ. Quæ si forent, cervus adeo longævus, & testibus auctoribus vel centesimum vitæ annum pertingens, cornua vel quercus & pinus altitudinem exæquantia nonnunquam gereret. Alia habet annorum & senectutis indicia, ut caput latum atque apertum, oris circuitum amplum ac crassum, ungulam solidam & probe fulvam, reliqua.

Quod si in loco ab hostibus tuto degerit, satis commode ac lente pascit, sed oculos, ne incautus corripatur, jam huc, jam illuc convertit. Satur, sole oriente, in densissimam silvam sese recipit, via, tortuose deflectente, & in varia devia conducente, ita ut insidiis sibi infestorum illudere, & tutior quiescere possit. Antequam vero quietis locum petat, fruticeta annua, vel bimula adit, ut rore irrigatus, solis radiis sese tradere & arescere possit. Quo quum pervenerit, pronus humi recumbit, post penitus arefactus, in densiora arboreta se recipit, & diem totam quiescendo peragit. Densissima autem & virgultorum loca feligit, quo facilius muscarum ac crabronum ictus evitare possit. Timidissimus est cervus, & quidquid obvenerit, vel asinus, sive equus, aratrum, currus, vox hominis vel animalis, imo cornicis vel picæ adspectus, tamquam res novi, stuporem ejus & admirationem excitat; imo sua ipsi umbra terrorem iniicit. Regionem ex quo oritur strepitus, exploraturus, capite elato, aures arigit; & dum canum persequutionem fuga evitare studet, sæpius cursum sistit, & venantium latratui aurem præbet. Tibiæ & cornu venatorii sonos peramat, defatigatus autem capite auribusque demissis, rostrum terra deprimit, ac graves edit hinnitus; qui quo graviores fuerint, quo magis tremuli, eo plures annos cervum portare concludas. Cervus quisque defatigatus vel æger, aquam cui se immergat, quærere, imo tanta cum caliditate in eadem delitescere novit, ut canum non solum oculos sed & odo.

odoratum decipiat, siquidem nullum sui odorem indagari possunt; prætergressis tandem canibus, cervus via qua advenerat, revertitur. A canibus captum cervum si enecare cupis, cave ne ictus capitis, catulitionis tempore periculosissimos, experiaris; hos enim in planitie, & campis apertis vix evitabis, ast inter fruticeta vel in silva densiore canibus infestatum facilius enecare poteris, qui si forsan capite in te converso, cornuum ictus minetur, frondem seu arboris ramum manu tenens ruditer conquassa, & cervum timor obrepet, missum ille te faciet, ac revertetur. *Plinio* teste, cervi fluvium vel mare transnatantes, dum insulam seu silvam, coitus desiderio adeunt, in agmina se colligunt, & natatu acerrimum, agminis ducem constituunt, hujus dorso proxime succedentis caput reclinat, dorso secundi, caput tertii, & sic porro, ita enim transitus molestiam sublevant, & primi in locum, si defatigatus fuerit, alius succedit. Subdit, experientia sua edoctus, eos vel 30. milliarium spatium, mare transnatando, emitiri; cui *Jacobus de Fouilloux* suum calculum adiciere voluisse videtur; is enim cervos in silvis mari adjacentibus, canum persequutione pressos, in aquam profiliisse, deinde a piscatoribus, 10. miliaribus a ripa distantibus enecatos fuisse docet.

Mense quovis, alio pascuo vivit cervus. Januario enim ternis vel quaternis, in finibus silvarum reperitur, tunc ex agris vivit. Februario & Martio locis paludosis, pratis ac campis olerum plenis detinetur, tunc cornua sua decidunt, & solus quisque locum reficiendo capitis ornatui convenientem quærit, abstrusus degit in fruticetis, tamquam sui sibi dedecoris, ob amissionem armorum & ornatus, conscius, & tamdiu delitescit, usque dum cornua succedentia propullulaverint. Quæ quamdiu excrescunt, pelle quadam crassa, solida, tactu ardente, & pilo denso, griseo brevique confita, obteguntur, apices autem conglobatos ostendunt. Quo robustior cervus fuerit, eo citiora, eo majora fortioraque cornua propullulant. Quæ si inter excrescendum, dum tenuia sunt & pelle sua obtecta, amputaveris, multum sanguinis profluet. Ast excrescendo duritiem substantiamque osseam tota, cum magnitudine sibi debita adipiscuntur. Extremitates ultimo indurescunt; tunc pellis villosa, accedentis nutrimenti defectu inarescit, solvitur, per frustra delabatur, & cornua nuda, levia, æqua ac versicoloria prodeunt, quorum apices nunc denudati, acutiores redduntur. Quod si pellis ista haud satis cito sua sponte, abierit, cervus cornua lapidibus seu arboribus adfricando illa sese liberare annititur. Cornua cervina, sic *Jacobus de Fouilloux*, coloris sunt jam rubri, jam nigri, jam albi; varietate enim delectatur natura. Et quidem rubra, medullæ pleniora levioraque, reliquis pulchriora & majora evadere solent; nigra duriora, & parciora medullæ copia expleta; alba tandem omnium inferiora sunt ac parcissime nutrita. Cervi, qui testiculorum jacturam fecerunt, numquam cornua amittunt, nulla his umquam nova succrescunt. Si cervum castraveris antequam cornua gesserit, numquam cornua geret. Si vero cervum cornibus præditum, numquam illa decident. Si tunc, quum mollia adhuc habeat & sanguine plena, numquam arescent, numquam obscuriorem colorem induent. Sunt, qui cervum deposita cornua sollicitè in terram abscondere dicunt, ceu utilitatem illorum eximiam hominibus invidendo; ast refragatur experientia. Nam & cervi vivariis Principum detenti cornua defluxa, haud terræ

terræ committunt, & silvas cervis abundantes, frequentissima cervi cornua, hinc inde obvia, suppeditare constat.

Martio & Aprile, mensibus, in fruticetis junioribus commorantur, & nutrimenta ex pis, viciis, lentibus, aliisque ejusmodi leguminibus capiendo, arboreta, ad catulitionem usque, deferunt. Junio, Julio atque Augusto, tempore nutrimentis animalium quorumvis abundante, cervi sua in agris & fruticetis quærunt, & alimento solidiore excitatam sitim restinguendi ergo, sæpe aquam haustum abeunt. Septembre & Octobre huc illucve vagantur, tunc enim coitus æstu agitati discurrunt, & tamquam ex raptu vivunt. Catulitionis periodus 2. mensibus absolvitur, & cervi seniores pro junioribus majori æstu incitantur, magisque foemellis arridere videntur, senes juniores profligant. Quum amplior fuerit numerus cervarum, mares alii alias sequuntur, & abeunt in diversa; ast si cervæ infrequentiores fuerint, cervi vel ætate vel corporis viribus æquales, acerrimo certamine, vel ad necem, conflictantur. Quod ineundo, terram pedibus proculcando hinniunt, tum repetitis cornuum ictibus, rudibus, ac vel $\frac{1}{2}$. miliaris spatio distanti innotescantibus, eousque sese invicem petunt, quo alteruter exspiraverit. Quo quidem tempore, facile captantur, etenim cervæ desiderio, vestigia ejus, naso terram pertingente, indagantur, die illa noctuque sequuntur, nec ut solent, insidias evitare curant. Finito coitus tempore, quod in Novembrem, mensem, cadit, arboreta intrant, imo, cœli clementia, in illis pernoctant. Decembre tandem in agmina coeunt, & densissimas in silvas sese recipiunt, quibus ab injuria nivis & venti rigidi tueantur, tunc folia & gemmas arbusculorum, lichenem, similia quærunt, imo lignum exile, caprarum instar, decorticant.

Longævos cervos esse dicunt, & vel quadruplo longæviores cornicibus, quas novies humanæ vitæ spatium superare censent. Quanta fabulæ fides habenda sit, vel supputatio demonstrabit, cervo enim 3600. anni assignandi essent. Teste *Plinio*, centum annos post *Alexandrum*, cervus monile aureum, quo Rex illum donaverat, gerens, captus fuit. Idem de *Cæsare* narrant. Sæcula ex morte *Augusti* transierant, quum cervam ejus capterent, & collum ejus monili cinctum erat, in quo verba: *Noli me tangere, quia Cæsaris sum*. Eidem, id est: lubrico fundamento superstructa videntur ea, quæ de inimicitia inter cervos & viperas atque serpentes, auctores vel gravissimi, ex aliis alii recensent, dum cervos vel cavernis delitescentes serpentes indagari atque devorare scribunt. Falso *Aristoteles*, *Pliniusque* *Africam* cervis carere scribunt. Teste *Jonstonio*, Scotia cervis maximis abundantissima est, quos exstirpatum, populus interdum agminatim illos venatur, ac ad 1000. quavis venatione enecat; multi quoque in Gallia, sed rariores hodie quam olim apud Helvetos reperiuntur, decrescente in dies frequentia & numero silvarum, ob quantitatem populi. Eadem fere de omni Europa valent.

Cerva, cervo minor, plerumque cornibus caret, ast *Scaliger* cornua gerentes cervas sese vidisse refert. Et in *Ephem. Germ. Dec. 1. Anni 9. & 10.* studio *Joelis Langelotti*, D. descripta invenies cervam, cornua, cervi instar gerentem. Facilius quam cervus cicuratur, eadem utrique est velocitas cursus, eadem agilitas crurum, vox tamen cervæ debilior. Quatuor papillæ sunt uberum, ut in vacca. Octavo gestationis mense, qui plerumque

in Majum cadit, plurimum unum, rarius duos hinnulos effundit. Cervæ parturiens, vel loca ab hominibus frequentata præ silvarum recessibus, bestiarum rapacium plenis, præoptat; hinnulum quam studiosissime latentem retinet, & motuum ejus petulantiam pedum ictibus reprimit. Hic brevi excrescit, & tunc matris institutione, cursus, saltus, fugæque a canibus rationem, edocetur. *Hermann* in *Cynosura*, cervam inter acutissimos clamores foetum emittere scribit.

Nonnunquam in ventriculis cervorum atque cervarum, tophos, rupicarum Egagropilis similes, reperire; imo alium quondam ex illis, spinam pro nucleo, & moschi odorem habuisse memini. Verno tempore, prope cervi pharyngem duo sacculi carnosus conspiciuntur, situm tonsillarum hominis occupantes, & cavitationem vermibus plenam exhibentes. Vermes isti coacervati, ac vermibus nares ovium occupantibus similes, at diversissimi sunt ab iis, quos in corporibus aliorum cornua gerentium, ac tumoribus cervi carnosus observamus. Undecumque autem vermes illi, in pharynge cervi obvenientes nascantur, venatorum ex testimonio, causæ cedunt defluvii cornuum cervi. Suspecta autem nobis videtur argumentatio; etenim pro deiiciendis istis a natura destinata esse constat pellis portionem prolongatam, globulum efformantem, ac sensim turgescendo ita cornua protrudentem, ut dentes ex alveolis suis protrudi videmus. Nec vermium ope cornua decidunt. Illi autem, ut ex conformatione sua edocemur, in muscas duabus alis instructas abeunt. Hic in memoriam revoces velim ea, quæ de musca anum equi irrepente ac ova eo deponente, de musca ovis nares ingrediente constat, nec miraberis, muscam, circa productionem vermium, posteritatis suæ, adeo sollicitam providamque, hanc, inquam, & nares cervi posse intrare. Utramque tandem cavitationem sacculorum carnosorum duas quasi matrices, continendis excrescentibus vermibus muscæ, destinatas habemus. Conf. *Reaumurii Schediasmatum*, ad historiam insectorum facientium Tom. 5.

Si denique artis venatoriæ vocabula quæris, adeas librum *Jacobi du Fouilloux*, Venatoris præclari. Nimius tamen ille circa evehendam cervi venationem est, nec Lectorum auribus, uti decet, parcere solet. Vel suo loco, *Ligeri Domum Campestrum novam*.

Græci cervum nuncupant: *Elaphos*, Itali: *Cervo*, Hispani: *Ciervo*, Germani: *Hirsch*, Belgæ: *Hart*, Angli: *Stag*, seu *Hart*, Sueci: *Hort*. Nomen Gallicum: *Cerf*, Latino: *Cervus*, originem debet; *Biche*, quasi binos hinnulos edentem loquitur, interdum namque & binos effundit. Pro *Biche* olim in usu erat: *Cerfve*. Hinnuli nomen: *Faon*, seu *Fan*, pro quo olim *Biche-teau*, *Bichon*, ex Græco: *Phaôn*; recens natus, derivandum.

Partes cervi omnes multum olei, salis volatilis ac terræ continent. Caro junioris solidum atque durabile nutrimentum suppeditat, & in primis, si ex tenero, pingui, ac probe nutrito proficiscatur. Trimuli caro etenim durior, compactior, concoctu difficilis evadere, stomachum gravare, & humores crassos melancholicosque producere solet. Quod si autem ætate tener castratus fuerit, caro ejus non solum saporis excellentiam, sed & qualitatem magis temperatam, teneriorem & salubriorem nanciscitur. Quolibet tempore, carne ejus vescaris, excepto coitus intervallo, hoc enim hircinæ odorem atque saporem induit. Cæterum eam junioribus, biliosis, robu-

robusto stomacho instructis & corporis exercitio vehementiori vigentibus convenientem, ast senibus & melancholicis contrariam censemus. Cerva, qualitate inferiorem, quum teneræ sit ætatis, satis bonam, nec palato ingratam, catulitionis tempore, prorsus noxiam carnem præbet. Hinnuli carnem teneram, esu optimam, & concoctu facilem, Principum mensis reservari videmus. Sunt, qui cornua cervi recentia, dum mollia fuerint & tenera, ac Gallis: *Tête*, seu *Cru du Cerf* dicta, pro delitiis habent, & vel elixa, vel in frusta conscissa ac frixa peramant, saporem & odorem boletorum referentia. Errant, si salubre nutrimentum in illis quærunt, quippe quæ ob naturam viscosam, crassam atque terrestrem, non nisi difficillima concoctu esse possunt, & pessima.

Cæterum partes cervi quasculumque, merito quidem, alexipharmacas & diaphoreticas, & ex illis præparata, iisdem virtutibus donata reputant. Horum præcipua sunt: cornu crudum vel præparatum; gelatinæ ex cornu cervi provenientes; aqua, sal, spiritus, & oleum, destillatione elicita; os cordis, penis, sanguis, medulla, adeps, & pellis cervi.

Cornu cervi nisi maturum, id est: sua sponte effluxum, probæ qualitatis esse nequit. Cujus rei criterium ex soliditate, duritie, candore & pondere majori in his, quæ ab idibus Aprilis ad xiii. Kalend. Octobris, cervus deposuit, quam in illis, quæ ex cervis alio tempore enecatis resecta fuerunt, quæque leviora, porosa, & cruoris venarum plena sunt, ex hoc inquam, dignoscere potes. Matura non solum plus salis volatilis, spiritusque, sed quoque efficaciora utraque suppeditant. Rasa majora seu limatura eorum, pro conficiendis ptisanis, decoctis, & gelatinis adhibetur, pulveres quoque & Electuaria, in pollinem redacta ingrediuntur. Ad compescendum alvi profluvium, Dysenterias & Hæmorrhagias faciunt, corroborandi insuper, alexipharmaca & anthelmintica virtute gaudent. Pro dosi in decoctis, sint ℥ss. ad ℥j. in pulveribus & opiatis ꝑj. ad ℥jss. Et hic cornu cervini usus, simplicissimus, satis conveniens, & minime alteratus dici meretur; ita enim naturæ opificio sal volatilis oleumque cornu cervini virtutes præcipuæ conservantur, nec artis operationibus dissipatæ sunt.

Præparationes C. C. vel absque igne, vel cum igne conficiuntur. Sine igne, dum C. C. per frustula conscissum, ex capitello lambici suspendunt, quo plantæ aromaticæ & cordiales destillantur, sicque frustula virtute herbarum destillatarum imprægnare student. Huic C. C. *philosophice præparati* nomen tribuunt. Satis bona ratio illud præparandi, nobis ista videtur, nec tamen tantum habet in recessu, quantum nomen ejus promittit. Nec enim illam instituendi commodum sæpius adest, hinc limaturam, seu porphyrisationem ejus, supra descriptam, ac eadem præstantem, sufficere judicamus. Cum igne præparandum, in frustula conscindunt, eaque tamdiu comburunt & calcinant, quo in quamdam calcem candidam ac spongiosam abierint, hoc C. C. *ustum*, seu *ad candorem calcinatum*, audit.

Chymici tandem, singularium studiosi, frustula C. C. cum latice, & carbonibus candentibus stratificaturi, colorem & impressionem laticis inter calcinandum ipsi impertiri voluerunt, existimando, quod qualitatem quamdam ex terra ista nancisci possit; huic C. C. *philosophici calcinati* nomen tribuunt; nec tamen majorem virtutem inesse constat. Quomodocumque calcinatum C. C. super porphyrite, addita exigua quantitate aquæ, in pollinem

nem reducunt, trochiscos efformant, hosque arefactos f. a. u. Quod quum non sit, nisi terra mortua, seu calx omni virtute activa carens, acida saltem & humiditates primarum viarum absorbens: ad retinendum alvi profluvium, hæmorrhagias, gonorrhæam, & acida stomachi domanda adhibeatur. Ut enim præparationibus nunc expositis magis alcalinum magisque adstringens redditur C. C. sic & igne sal volatilis ejus & oleum, virtutem ejus præcipuam constituentes, dissipantur. Hinc hodie limaturam, vel destillatum cum plantis aromaticis præoptant, sic enim nihil omnino virtutis suæ amittit, imo alienæ quidpiam acquirit.

Pro conficienda gelatina, limatura C. C. c. f. q. aquæ communis, parciſſimo igne, ad consistentiam gelatinæ bull., tum fort. express. colat., deinde albumen i. cum vino candido & succo citrei probe agitatum, addito q. f. sacchari & cinnamomi, admisceatur; iterum parcius bull. ad clarificandum liquorem, denuo percol. & f. a. u. Hæc gelatina, multum nutrimenti suppeditat, vires restaurat, stomachum corroborat, compescit diarrhæam, vomitum, sanguinis sputationem. Eximia quoque virtute est in morbis febribusque malignis, humorum malignitati resistit, eamque leni transpiratione expellit. Dosis sit ʒß. ad ʒvj. bis terve de die, vel nudæ, vel in ptisana seu julepo appropriato, solutæ. Conficitur alias sine succo citri, at addito hocce non solum saporem præstantiorem, sed & majorem efficaciam, contra immoderatam sanguinis humorumque effervescentiam, præbet.

Aquam, spiritum, oleum & salem C. C. distillaturus, recipe cornuum recentiorum, verno tempore excrescentium q. v., in frustula minuta conſcinde, cucurbitæ vitreæ imitte, capitellum & recipientem adapta, & probe occlusis juncturis per B. M. vel vaporis humiditatem aquosam omnem destilla, sic habebis aquam C. C., quæ mirifice facit contra partum difficilem ex debilitate & atonia proveniente, contra palpitationem cordis, & ad provocandos variolos & morbillos infantum pariter ac adultorum. Dosis sit ʒj. ad ʒiiij. vehiculo insuper convenienti cedit, omnium alexipharmacorum, in febribus malignis adhibitorum. Quæ autem subtracta aqua, in fundo cucurbitæ desident, pro extrahendo oleo, spiritu & sale volatili sufficiunt. Eaque præparando, pari ratione procedendum, quam circa destillationem viperæ pag. 308. præscripsimus. Dosis salis volatilis sit gr. vj. ad gr. xvj. cum liquore appropriato. Spiritus autem gutt. x. ad xxx. Eadem sunt utriusque virtutes, & in febribus malignis æque ac intermittentibus, in variolis, apoplexia, paralyſi, epilepsia, affectionibus hysteris, & morſibus animalium venenosorum, haud exigua virtute sese commendant. Oleum, pro errhino, contra affectiones mulierum hystericas, & pro linimento, partibus paralyſi correptis adplicando, veniat.

Os cordis cervi, teste *Vesalio*, non est, nisi tendines musculorum cordis, in origine aortæ & venæ pulmonariæ ſiti, in cervis vetustioribus autem primo cartilaginosa, osseam denique duritiem induentes. In cervis recenter enecatis, substantiam istam mollem & cartilaginis instar flexilem esse, at aeri expositam brevi ossis duritiem atque structuram induere, scribunt alii. Seligas, quod optimum est, os candidissimum, & haud adeo magnum, ne os cordis bovini, non nisi magnitudine ab isto diversum, coemendo, decipiaris. Cervinum vero pro cordiali habetur, veneno obstat,

& hæ-

& hæmorrhagias reprimit. Pro specifico contra abortum *Ettmuller*, os illud aliquibus gr. Kermis admixtum, alii autem pro pleuritide commendant, quippe quod sale volatili, pleuram liberatum optimo, abundat. Ab omnibus multum facere creditur in morbis cor afficientibus, cujus ergo cordialia & corroborantia intrat. Dosis est ʒß. in pulvere. Amuleti instar contra hæmorrhagias violentiores adhibetur; & potui ægrotantis immittitur, in hæmorrhagia nasi autem pulverisatum naribus inflatur. Nos interim virtutes ejus limitibus angustioribus contineri censemus. Quum enim talia & in corde bovis aliorumque quadrupedum reperiantur, easdem virtutes ambobus tribuendas esse judicamus. Hæc autem non nisi qualitate quadam absorbente, primarum viarum acida detergere valent. Quum ergo cordialis & alexipharmaci instar operare debet, ex mixtis qualitatem hancce mutuam accipere putamus. Gelatinæ ex osse isto provenientes iis saltem virtutibus gaudent, quæ ex omni cervi aliorumque osse elicerentur, ast additis aliis, horum ex natura, nec ossis cervini, qualitates gelatinæ dijudicantur.

Penis cervi eximio medio contra dysenteriam & pleuritidem cedit, dummodo in pulverem reducti, ʒß. & ʒj. pro dosi, aquæ convenienti mixtam præbeas. In violentioribus dysenteriae torminibus parum Opii addatur. Alii limaturam ejus bulliendo decoctum vel gelatinam, eisdem virtutibus pollentem eliciunt. *Bartholino* auctore, penis in pulverem redactus, contra colicam facit, & adfectiones hystericas. Auctorum varii, peni cervi, catulitionis tempore enecati, sperma adaugendi, & ad generationem disponendi facultatem tribuunt, & pulveris sui ʒj. cum ovo sorbili vel cyatho vini optimi, receptæ, nescio quam mirabiles effectus respondere censent. Nos subdubitamur, & ex usu ejus illas tantum virtutes expectandas esse credimus, quas ex qualitate desiccante & absorbente pulveris, vel natura mucilaginosa & gelatinosa decocti proficisci posse novimus. Hinc si quæ forsan in morbis ex sterilitate pendentibus præstiterit, ea omnia ex admixtis, v. gr. ovis sorbilibus, aromatibus, vino, similibus repetenda, nobis quidem, videntur. Ad generandum facilitatem ipsum inducere dicunt, ast quonam fundamento nixi? ad temperamentum calidum & lascivum cervi respiciunt.

Sanguis cervinus sudorifera & resolvente virtute pollet; quem sole exficcare, & pulveris ex eo ʒß. ad ʒj. cum exigua vini portione, contra pleuritidem & arthritidem commendare, imo clysteribus, contra intestinorum ulcera & dysenterias inveteratas admiscere solent. Nobis tamen virtutes ex saltem sanguini cervino inesse videntur, quas in sanguine reliquorum invenierunt.

Medulla cervi ad sedandos dolores & sananda ulcera maligna, reliquorum medullæ præferenda dicitur; recens præsertim, tunc enim naturæ dulcis atque emollientis ergo, partes induratas emollire, arefactas humectare valet. Temporis tractu rancida, acris, inflammatoria & corrosiva evadit, & quidquid probæ qualitatis habuerit, amittit. Recens igitur vel potiones & clysteres, contra tormina intestinorum facientes ingrediatur, vel pro linimento, contra rheumatismos, arthritidem ischiaticam, fracturas, imo ad corroborandos nervos & articulationes, veniat.

Adeps cervi, emolliente, cervali & resolvente qualitate gaudens, ad

emolliendos tumores, ad consolidandas plagas, ad sanandos perniones, & ad leniendos quoscumque, imo arthriticos dolores commendatur. Imo contra procidentiam & excoriationes perinæ, pustulas item maculasque faciei; nec non in clysteribus, contra alvi profluvium & dysenterias, adhibetur. Oleum ex adipe hocce destillatum, pro quotidiana partis adfectæ frictione, contra dolores arthriticos veniat. *Hoffmanno* teste, in lintea tela extensum, & gingivæ adplicatum, eximio cum successu dentium dolores lenit, & vermes, horum auctores, nonnunquam expellit. *Ettmuller* adipem cervinum præstantissimum dicit ad consolidandas exulcerationes superficia-
rias, & contra ani procidentiam, dummodo partem calide eodem unxeris. Excoriationibus ex adfritu violentiori duarum partium, vel ex immunditie, ut in infantibus, ortis medetur. Cutim præ figure dehiscentem citissime sanat, etenim summa resolvente & penetrantissima virtute, præ omni adipe gaudet. *Cel. Næster*, D. de statu ægrotantis, si quis periclitari illi videbatur, iudicium laturus, guttulam adipis cervi, urinæ ægrotantis instillabat, quæ, si in fundum præcipitabatur, de ægrotante actum, si illa urinæ supranatabat, sperandi locum esse iudicabat. *Hippocrates* in libro de *Morbis Mulierum*, pro excitando lochiorum fluxu, lanæ portiunculam adipi cervino irrigatam, vaginæ introduci jubet; imo ibidem, pessariis contra exulcerationes matricis, eundem adipem addi suadet; quod si autem ad provocandum menstruum fluxum pessaria acria aliquamdiu adhibita fuerint, continuatis hisce, adipem cervi, vino solutum parti adplicandum præcipit. Felici cum successu igitur, externe pariter ac interne, adipe cervino utaris, ut substantiis reliquis, natura sua dulcibus & oleosis, ubi ad emollientia, humectantia, & acrimoniam corrigentia, confugiendum.

Pellis cervina, ex auctoritate *Schroderi*, cingulis conficiendis inservit, quorum ope suffocationibus uterinis medentur. Teste *Joële*, renibus adplicata, foetus exitum certissime accelerat. *Burrhus*, teste *Ettmullero*, tibialia ex pelle cervina contra podagram commendat, & suo consilio, Principi cuidam arthritide laboranti, vestis ex pelle cervina comparata fuit; ast num salus accesserit, tacet, & hoc est, quod scire cupio. Quæ tandem ex rasione pellis istius cum pumice abeunt, aceto soluta, eximio linimento contra erysipelatem cedunt. Imo lecto immisso, contra involuntarium urinæ effluvium facere dicuntur. Nos tamen quæcumque de virtutibus cervi recensuimus, pro veris haud venditamus; auctorum satis gravium testimonio constant, & facillima opera, omnis periculi expers, quantum quibusvis insit, experiri poteris.

Cornu cervi crudum inest pulveri antispasmodico & Diamargarito frigido. Limatura ejus decocto adstringenti & opiata Salamonis. Cornu cervi Philosophice præparatum ingreditur confectionem hyacinthi, pulverem chelarum canceri, pulverem pectoralem & decoctum album. Spiritus tandem & sal volatilis partem constituunt liquoris Cornu Cervi succinati, Pharmacopœiæ Parisiensis.

Rx. Rasur. corn. cerv. ℥j.

Micæ panis tritic. ℥ij.

Rad. consolid. major. lot. ℥ss.

Bull. cum aq. comm. libr. vj. ad reman. lib. iij. Col. sine expr. & colatur. add.

Syrup. cotonei ℥jss.

Et habebis liquorem, pro potu usuali, in alvi profluvio cum torminibus, & in dysenteria.

Rx. Rasur. C. C. ℥ss.

Bul. in aq. comm. sextariis iij. ad rem. dimid. col. & tertia quavis hora cyathum hujus liquoris, febris maligna detento, ad provocandum leniter sudorem, exhibeas.

Rx. C. C. philosoph. pp. & calcinat. in candor. ℥j.

Sal. volat. C. C. gr. xv.

Subig. c. extract. Junip. ℥j. F. bolus sudoriferus, cum pane oblato accipiendus.

Rx. Corall. rubr. p. ℥ss.

Spirit. volatil. C. C. gutt. xij.

Subig. c. f. q. Extr. Junip. F. bolus in febribus malignis, quæ diarrhæam sociam habent, optimus.

Rx. Aq. flor. sambuc. stil. ℥ij.

C. C. præp. sine igne ℥j.

Sal. volat. C. C. gr. iij.

Syrup. cariophyll. ℥ss.

M. F. potio sudorifera.

Rx. C. C. adusti ℥ss.

Laudan. solid. gr. j.

Aqu. plantagin. ℥ij.

M. F. potio anodyna adstringens pro dysenteria.

Rx. C. C. præpar. sine igne gr. xij.

Terræ sigillat. ℥j.

Extr. theriacal. gr. iij.

Aq. flor. sambuc. stil. ℥ij.

M. F. potio, contra diarrhæam malignam optima.

Rangifer. Offic. Barthol. Act. Hafn. 274. Dal. Pharm. 440. Charl. Exerc. 12. Gesn. de *Quadr.* 950. Aldrov. de *Quadr. Bisulc.* 859. Jonst. de *Quadr.* 64. *Rhangifer*. Olear. Mus. 16. *Cervus Rangifer*, Raii Syn. *Anim. Quadr.* 88. *Cervus cornibus ramosis teretibus, summitatibus palmatis*. Linn. Syst. Nat. 42. *Tarandus Agricolæ, Eliotæ, & Georgio Fabricio; Machlis Plinio; Rangifer, Rangus, seu Rheno Latinis recentioribus; Cervus palmatus Regionum Septemtrionalium; Cervus mirabilis, sive Hippelaphus*. Nonnulli.

Rangiferi descriptionem anatomicam, nullibi, nisi in *Actis Hafniensibus Medicis & Philosophicis Tom. I.* Auctore *Thoma Bartholino* reperies, quamque *Gerardus Blasius* æque ac *Bernardus Valentini*, de verbo ad verbum describendo, suam fecerunt. Ex ipso fonte igitur hauriamus.

Rangifero, sic *Bartholinus*, primum locum adsignare liceat inter animalia, opera *Nicolai Stenonis*, in Anatomicis præclari, vel publice vel privatim dissecta. Hic nullius examini anatomico umquam subjectus fuit, etenim rarissimus ex Norvegia deportatur, & vel deportatus in Daniam rarior ibi vitam conservat. *Petrus Greiffenfeld*, Status Secretarius, Illustris hicce literarum Mæcenas, quum *rangifer* mas & fœmella, in vivario suo per tempus nutriti, cœlo nostro perferendo impares, ex morbo tandem periissent; theatro anatomico, publicæ utilitatis studiosus, utrumque tradi-

dit. Cornua utriusque tenera & lanugine obducta, teneram utriusque ætatem loquebantur, vastiora enim cornua seniorum esse solent, qualia in adparatu curiosorum Academiae nostræ conspici licet. Errant *Gesner*, *Jonston*, dum tria cornua gerere dicunt rangiferum, non enim nisi duo portat, eaque satis conspicua, ac variis ramusculis utrinque prædita. Quæ interim in dissectione rangiferi utriusque observata fuerunt, singularia, publici juris ut fiant digna esse censeo. Cel. *Stenon*, Octobre anni 1672. dissectionem maris, & Decembre anni ejusdem, anatomicum foemellæ examen instituit. En, circa marem singularia.

In musculis dextris abdominis tres intersectiones curvilineas, inferiorem 1. digiti latam, reliquas binas autem strictiores, observavimus, ita ut intersectiones istas, tendines carni interjacentes esse constat. Cæcum $\frac{2}{3}$. ulna longum erat. Intestina superiora 7. & inferiora 9. circumvolutiones efformabant. Duplici autem, eaque diversa ratione circumvolvebantur. Alia scilicet, dum circumvolutiones aliæ aliis obvolutæ eundem in gyrum, dextrorsum respicientem, agebantur; alia, dum sacculum, manus latitudini respondentem efformabant. Intestina duplicis generis ex fibris constant, quarum exteriores juxta longitudinem, interiores autem in spiralem procurrunt. Circumvolutiones intestinorum originem ex Cæco reperient, & 44. ulnarum longitudinem pertingunt. Anastomosis venarum mesenterii, jucundissimum spectaculum exhibet. Renes succenturiati, cavitate instructi, forma sua renem, crassitie olivam repræsentant. Renes figuram rotundam & oblongam, substantiam vero tenerrimam exhibebant. Renum dexter hepati crenam imprimebat, sinister autem ex dextra parum excavatus erat, quæ num ex morbo, num ex incuria dissectionem instituentis, dubium. Intestina ipsa cingebat mesenterium, 3. ad 4. digitis latum, ubi vena-porta ultimam intestinorum replicationem cingebat, & 17. glandulæ in eadem replicatione dispositæ, aliæ oblongæ, aliæ fabis similes observabantur. Pulmonum color ex parte rubicundus, ex parte autem obscurus erat, illi autem in lobulos, membrana communi, ut in urso, seu potius, vitulo strictissime unitos, dividebantur. Tres lobi ex sinistro, & quatuor ex dextro pulmonum latere aderant, quorum in uno foramen aliquod ex dextra, superne, ante bifurcationem solitam, observavimus. Lien ventriculo & diaphragmati adhærens, $\frac{3}{16}$. ulnæ latus, & $\frac{1}{4}$. ulnæ longus erat. In peripheria epiploi duæ erant Hydatides, altera ovum gallinaceum, altera columbinum, magnitudine referens, utraque aquam limpidissimam continebat, major insuper materiam quamdam emplastri consistentiam referentem, & pisi magnitudinem, imo denuo alia vesicula lymphatica prædita erat. Hydatides istæ generi cervino propriæ videntur, ego saltem in nullo alio umquam eas observavi. Num ad cursus celeritatem quid faciant, aliis disquirendum relinquo. In eodem Rangifero, ex morbo mortuo, præter vesiculas lymphaticas varios adhuc abscessus, abdomen vitiantes observavi. Hujus enim partes inferiores putredine adeo consumptæ erant, ut nec perferendæ dissectioni sufficerent. Hepar lobos nullos, aut duas intersectiones, alteram sub rene, alteram circa mediam sui partem exhibebat. Crystallinus magnus erat, parumque depressus. Duplicis generis fibræ spirales ex utroque latere Oesophagi descendebant, tum sese decussabant. Glans cerebri superior major erat, quam in ursa; eodem tempore dissecta; majus erat

erat & tertium par tuberculorum; major tandem erat proportionis ratio inter par tertium ac quartum, quam in ursa. Plexus choroidis major, & laminæ cerebelli albidæ, crassiores erant, quam in illa. Conductus salivaris exterior, ut in vitulo, inferiorem maxillæ angulum versus descende-
bat. Striæ corporum striatorum magis conspicuæ quam in ursa, & plures striæ sensibiles in substantia secundi tuberculorum paris, alias: striatorum nervorum opticom. Linguae radici & epiglottidi intermedium vidimus spatium 2. digitorum transversorum, mediante substantia membranosa separatum. In tonsillis 9. foraminula, linea recta disposita, hisque alia, ex latere exteriori, juncta, ut in pulmonis avium vidimus. Reliqua in dissectione rangiferi utriusque, & aliorum, imo cadaveris humani nuperrime examini anatomico subiecti, observatu digniora, ex calamo Anatomici nostri, viri Celeber. *Stenon* expectanda habemus, simulac otium erit ipsi scribendi.

Rangiferi, sic *Cel. de Maupertuis*, cervorum species, cornua valde ramosa & frontem tegentia gerunt. Hi cuivis Lapporum necessitati explenda destinati videntur; eisque & equis, & vaccis, & ovibus cedunt. Rangiferum cymbæ exiguæ, anteriùsque pro findenda nive acutæ, cui *Pulka* nomen est, neant, & homo unus, ex parte sedens ex parte supinus, longissimum quodvis iter eadem perficere potest, nisi vel everfionis vel submerfionis in nive periculum, utrumque præsentissimum, extimescat. Incommoda sane itineris ratio est *Pulkarum* vectura, elapsis enim aliquot horis ossa omnia contudisse tibi videberis. Quousque nix frigore leniore nondum defederit, ac arenæ instar, leviter terræ superjacuerit, talis autem esse solet ad veris initium; rangifer, brevi pedibus foveam effodit, nivem ex quovis latere projicit, & fundo delitescentem lichenem seu muscum, quærit. Instinctu quodam singulari ductus, numquam in vanum quærere dicitur. Quum vero efficacior solis calor nivis superficiem liquefaciendo, crustam, hominibus, equis, rangiferisque ferendis parem, ipsi obdixerit, rangiferi vires pro confringenda crusta haud amplius sufficiunt, Lapporum opera accedat, nec enim nisi illa tantum, omnem rangiferorum utilitatem laboremque rependunt. Iter facientes sæpius lichenis quantitatem secum gerunt. Et Lappi eundem nive & glacie admiscendo placetas, pro potu & cibo rangiferorum præparant, quos illi avidissime corrodere solent. Pace L. fusiozem descriptionem itineris in Lapponia instituendi subnecto.

Sub hyemis initium vias præ reliquis frequentatis, ramusculis pini, utrinque in terram defixis, designant. Vix traharum atque *Pulkarum* transitu, prima nix compacta soliditatem quamdam nacta est, & nix superveniens tramites explet, ita ut a reliqua terræ parte, a fluvio & lacu distinguui non possit. Subsequentes trahæ denuo viam retegunt, sicque alternis nive superaccedente obtecta, alternis plaustrorum pondere conculcata via, quamvis reliqua terra haud superior videatur, aggerem quemdam seu pontem ex nive constituit, quo si aberraveris, vel ex dextra vel sinistra rues in abyssum. Summa igitur cum cura hanc viam tenent, & sulcum, *Pulkarum* vestigium, mediam viam scindentem, ducem plerumque sequuntur. Densiores vero silvæ recessus, infrequentiores, ejusmodi via haud distinguuntur. In his signa quædam ex arboribus constituunt. Sæ-

pius rangiferi usque ad cornua nivis submerguntur; & si forsan in itinere, nix copiosa procellæ instar delabatur, ac undecumque proveniens viam deleat, viæ vestigium amittendi periculum adest, eaque amissa vel vitæ jactura. Hinc nivis partem tentoriis quibusdam excipere moris est. Vix crederes hoc tempore montium præcipitia, abyssorum nive rectorum plena, transiri posse. Duplici tamen ratione eadem transeunt. Lappi enim, longiori exercitio adsuæti, duobus asseribus strictis & 8. pedum longis insistant, sicque nivis superficiem transeundo feriuntur. Vel rangiferis sese committunt. Hi, ut supra dictum est, cymbam illam protrahere solent, cui vir ex parte residet, ex parte supinus recumbit. Quæ, quo facilius nivem prora findere, quo expeditior eandem transire possit, cymbarum more, prora acuminata & carina cuspidata gaudet; hæc facilis quocumque vertitur, dummodo cymba vectus ad conservationem æquilibrîi fuerit attentus. Si in via conculcata & solida progrediendum, cymba, mediante linea longa, pectori rangiferi nexa est. Hic freni speciem cornibus nexa gerit. Nec tamen hoc adtracto gradum sistit, indocilis ac jussa renuens, vel viam commuttat, vel revertens, pedum ictibus ruit in rectorem. Tunc Lappi, cymbam sibi obvertere, & tamquam clypeo ictus rangiferorum evitare callent. Ego quidem, sic pergit Cel. de Maupertuis, agilitate illa, Lappis propria, destitutus, periissem antequam vel defensionis modum cogitarem. Ego igitur pro defensione bacillum manu tenebam, qui pro gubernaculo, cymbam regenti, & pro evitandis arborum truncis, *Pulka* residenti venire solet. Nec non *Pulka* detentus funibus me alligari jussi, alias enim brevi temporis spatio eadem excidissem. Alio tamen anni tempore, rangifer, mutata natura, cervus indomitus evadit, & volucris celeritatem cursu æquiparat, & quidquid rapiditatis suæ obstaculum seu impedimentum superat. Cornua eorum, tunc villosa, non sunt, nisi ossa candida & arida, ac costis animalium, diu jam emortuorum æquiparanda. Ossa tantum non pellem egrediuntur, adeo prominent, & vix 100. passus *Pulkam* protrahendi facultate illos pollere crederes. Per æstatem scilicet in Norvegiæ pascuis detinentur, & laborum expertes tantam ibi pinguedinem acquirunt, ut, statim ex quo domum redierint, nimium sit feritatis suæ periculum. Ast peracto hyemis labore frequentissimo, ob nundinas Lapporum, adeo omnem feritatem quidquod animum exuerunt, ut vel in via interdum deficere videantur. Difficilis rangifer vicens retardatur, difficilior, exhaustis viribus adigitur.

Redeunt e *Kengis*, regione in oris *Torneo*, fluvii, ob ferrifodinas præclara, *Pulkarum* agmina, per ordines iter facientia obvenere. Lappi scilicet usque ad *Pelle*, pisces & pelles, a mercatoribus Torneoensibus, mercium permutatione acceptos deportabant. Primum rangiferum Lappus incedens conducit, huic *Pulka* prima nexa est, primæ rangifer secundus, & sic porro; etenim 30. ad 40. rangiferi, suam quisque *Pulkam* in eodem sulco protrahit. Rangiferi, laborum molestia defatigati, dum stativis locum destinant Lappi, circulum constituunt, quique nive flumen obtegente recumbunt, Lappi, lichenem dividunt. Alii horum ignem accendunt, alii super flumine sese distendunt, mulieres filiique quidpiam cibi ex *Pulka* depromunt, præparant, alii tentoria, digna sane Lappi domicilia exstruunt, sunt enim stragula ex lana vilissima, & continuo fumo nigrescentia. Sæ-

pius tamen foramine quodam in centro, quo fumo exitus pateat, instructa. His voluptuosiores recumbunt, substractis urſi vel rangiferi pellibus, fumum tabaci fugunt, ac hominibus graviorum cura se occupantibus dedignantur.

Non nisi tentoriis detinentur Lappi; nullæ ipsis divitiæ præter Rangiferos, hi autem ex lichene, haud ubivis obvio, vivunt. Consumto igitur lichene omni montis in cacumine obvio, alia loca lichene plena, pro grege suo quærunt, sicque vagando modo hæc modo illa deserta tenent. Silvæ eorum, hyeme rigida & tetra, æstate sunt molestissimæ. Tunc enim muscarum exercitus innumeri aerem infectant, hominem e longinquo sentiunt, insequuntur, & si gradum sistit, agmine, ceu tenebrosa & densissima atmosphæra cingunt. Muscas evitatum nil superest, nisi ut vel continua loci mutatione agiteris, vel frondescentes arbores comburendo densissimum fumum excites, hoc muscas profligabis, sed & ipse, illarum instar, molestissime adficiaris, vel denique resina ex pino profluente, totam cutim illinas. Ictibus illæ suis maximos dolores, imo plagas multo sanguine stillantes infligunt; & furoris sui tempore, Oceani plagas Lappi cum rangiferis suis adeunt, ibi ab illis tuti esse solent.

Caro rangiferi sive recens sive arefacta, præstantissimo cibo venit. Lac ex fœmellis subacre quidem, sed pinguedinis tantæ, quantæ flos lactis vacinæ, diutissime sese conservat, & optimis caseis conficiendis sufficit, in quibus præter artis regulas & munditiem, a Lappis neglectas, nil plane desiderandum. Pellis rangiferorum omnis generis vestimenta præbet, juniorum, pilo flavescente & crispo confita, & mollis Finnorum vestibis subditur. Seniorum pilus fulvus evadit, & comparandis togis istis infervit, quas *Lappmudes* Europæi adpellant, levissimum & calidum vestium genus, satis cognitum, quarum latus villosum foras evertere solent. Pellis vetustiorum cervinæ instar præparatur, & præstantissimas chirothecas, chlamydes, & cingula suppeditat. Nervos & viscera rangiferorum, Lappi obvolvendo in fila redigunt, quod filorum genus illis usitatissimum est. Cornua tandem, ne ulla pars rangiferi inutilis superſit, Diis suis pro sacrificiis offerunt.

Corporis Lapporum figuram describendo admodum multa fabulati sunt auctores; & nimii fuerunt in recensenda eorum parvitate, aut in exponenda deformitate nimius esse nemo umquam potest. Hyemis diutissimæ rigiditas, a qua non nisi tentoriis miserrimis, fumo nigrescentibus, & igne fortissimo (alterum corporis latus fere adurente, dum alterum frigore riget) tinctis tuentur; æstatis brevitæ, qua sole torrentur; sterilitas soli, fructuum, leguminum atque frumenti prorsus carentis; hæc omnia, inquam, ad degenerationem humanæ speciei, sub cœlo isto viventis, quid contulisse videntur. Aut, quod ad corporis magnitudinem attinet, illos capite integro, satis magna differentia, nobis minores plerisque vidimus; quum auctores alii, illicque nimii, Lappos vel pygmæis pro parvitate adſimilaverint.

Addit Cel. Outhier, Abbas, in *Diario itineris Septentrionalis*, rangiferis pro equis utuntur, ubi vel via pro equis difficilior, vel horum nutrimentum deficeret, ut in Septentrione omni, a *Kengis* regione. Alii rangiferorum auribus, admoto ore, itineris suscipiendi terminum, Lappos indi-

care, fabulati sunt. Cursus sunt celerrimi, ast laborum gravitati impares; trahis annexi in via trita, vel 30. milliaria per diem absolvere possunt; ast in nive arenosa, difficulter ac lentissime procedunt. Ubivis suum sibi cibum reperiunt. Finito enim cursus penso, dominus rangiferum traha solvit, ille stratis sese involvit præ frigore, hic cominus nivem suffodit, & lichenem candidum, præcipuum sui cibum, sub eadem quærit; sic cibum sibi tantum necessarium secum gerit dominus, quem in cuspidata trahæ parte recondit. Ast *Vvardbusium* adeuntibus, ligni quantitas secum gerenda est; siquidem vastissimas terrarum plagas, silvis prorsus destitutas transeant, necesse.

Nisi brevitatis legem ante oculos positam haberemus, multa, eaque lectu dignissima de Finnis, Lappis atque rangiferis, ex Cel. *Linnaei Flora Lapponica*, Opere tanto Physico digno, depromeremus; quædam interim ex illo delibare liceat, pro confirmandis iis, quæ testibus Cell. *de Maupertuis* & *Outhier* Abbate, parum ante adduximus.

Arthritidis ne nomen quidem norunt Lappi, sed optima semper salute vigent. Vel septuagesimum annum agentes, tantæ adhuc agilitatis vidi, ut talum collo suo, juvenum instar admoverent. Frigori vehementissimo resistunt, & cum rangiferorum gregibus, hyemis diebus noctibusque totis, in silva sua oberrant, rangiferi enim nullo umquam stabulo teguntur, nec vivunt, nisi & lichene. Tibialibus egent, nec pernionibus pedes infestantur. Contra rigiditatem frigoris teguntur caligis quibusdam ad talos usque pertingentibus, sandaliis insuper tenuissimis, ambabus ex pelle rangiferorum constructis, pilosa parte foras eversa; fœno autem minutim dissecto chirothecas & sandalia adimplent. Timidissimum genus hominum, quavis re inopinata, muliercularum instar, contremiscunt, audito tonitruo terrentur, & ut olim *Tiberius* Cæsar, sub laurea, sic hi sub betula asylum, ut alias ex illa præcipua morborum media, quærunt. Scabiosi sunt omnes ex fumo densissimo, cujus ope, æstatis noctu ac die culices abigere student. Silvarum incolæ pauperes, ast hi qui montes tenent, divites dici merentur. His sæpe mille sunt rangiferi, singuli tribus florinis venientes. Abundant caseo, carne, & ferarum pellibus; vilissimo pretio pelles urforum, Castorum, materorum, similium coemunt, & harum permutatione, spiritum vini, herbam Nicotianam seu tentorium sibi comparant. Brevibus, vitam laboribus & curis liberam gerunt, & necessaria facili opera adquirunt. Quis autem dives dicendus, nisi is, qui nullius rei eget? offeras Lappis vel Crœsi divitias, palatia regia, illi tamen spretis hisce, montes nive tectos præoptabunt. Felices sane mihi videmini, o Lappi, vos innocentia, & morum simplicitate, frugalitate, salute inconcussa, longævitate, senectute vigente, & tranquillitate animi fruimini; quid divitiarum desiderandum superest? Rangiferi autem caloris impatientissimi, frigus perferre valent, nec nisi sub frigido coelo, sibi destinatum pabulum reperiunt. Æstate ex herbis vivunt, relictis autem vallibus calidioribus, montes vento expositos & nive tectos adeunt. Socios habent dominos suos atque custodes. Hyeme Lappos frigoris vehementia, & rangiferos nutrimenti defectus in valles ablegat. Tunc hi ex lichene quodam candido, insipido quidem, illis autem & nutrimento, imo pinguedini cedente vivunt, hunc nivem rostro suffodiendo reperiunt; varius esse solet

figura, plerumque cornu cervinum refert, & vix unquam digiti i. longitudinem superat. In silvis igne frequenti denudatis, ac solo sterili, facilis lichen excrescit; ast in fœcundiore frequens betula esse solet. Lichen vero sub pino melior quam sub betula germinat. Gens rustica apud Finnos, lichenem in mercis speciem vertunt, cœlo pluvioso scilicet solidiorem rastris colligunt, hyeme autem aqua irrigant, & vaccis, fatis bono nutrimento præbent. Frons, nares & pedes rangiferi durissima pelle teguntur, ac partibus hisce adeo tenaciter adhærente, ut vel mortuo animale vix possit avelli. Quæ quum & sulcata & pilo densissimo fortissimoque sit obsita, facilior glaciei & soli rigidioris incisionibus obstat. Rangiferi opes Lapporum divitiisque constituunt; hinc si de censu apud illos agitur, de rangiferorum numero quærunt, quorum qui ne centum quidem numerare possit, inferioris conditionis homo habetur, si mille possederit, dives æstimatur. Nec tamen, divitiæ apud illos nobilitant, nec aliis anteponunt, nec sapientiæ speciem conciliant, nec honores exigunt; quamvis & illæ aliquoties in censum veniant, in primis ubi de matronio agitur; rarior enim puella dives juveni fortunæ inferioris nubit, nec adolescens dives puellam pauperem ducit; ibi enim magis ad dona fortunæ, quam naturæ, moresque respiciunt, juvenis de quantitate rangiferorum, sponsæ suæ dote inquit. Hæc una cum virgine, eam ducenti traditur. Brevibus, rangiferi Lapporum opes atque divitiæ habeantur.

Innumeri generis crabronibus, muscis ac culicibus Lappi æque ac rangiferi infestantur. Vix usquam frequentiores culices reperiri posse crederem, quam in silvis Lapponiæ; magno ibi cum susurro peregrinantium manus, pedes, faciemque circumvagantur, imo guttur & nares irrepunt, ita ut, si adverso vento incedat, vel respirationis libertatem ipsi præcludant. Qui igitur sub diu ad laborem incumbunt, illi cornu bovinum unguento, ex cremore lactis & pice liquefacta composito, plenum, ex cingulo portant, & unguento isto faciem & manus contra ictus culicium illinunt. Qui autem in desertis castra posuerunt, illi pini, abietisque fumo continuo culices & sibi rangiferis suis infestos abigunt. Hinc rangiferos bis per diem pascua relinquere, ad dominos redire, ac pone eos terra recumbere videbis; hi autem ignem vento opponunt, quo fumus tota castra pertranseat. Huic & rangiferi ruminantes & tantum non somno correpti, sese exponunt; deficiente fumo autem, continua capitis agitatione muscarum ictus evitare curant, qui tamen cornua eorum mollia adhuc & villosa, innumeris foraminulis fauciando, copiosum sanguinem eliciunt. Fœmella, more cervis communi, masculi instar cornua, quamvis minora gerit; & domesticos æque ac silvestres rangiferos vidimus.

Eminet ex insectis, rangiferos infestantibus, vermis quidem major, ab illo diversus, quem sub pelle vaccarum reperiri supra docuimus. Vespa illi & forma, & magnitudine, & corpore villosa æquiparat. Capite gaudet lanuginoso, oculis magnis, splendentibus, nigris. Ostendit oculis intermediam regionem nigram atque hirsutam, partem inferiorem flavidam, collum maximum atque villosum, antèrius posteriusque flavum, in medio nigro quasi cingulo notatum, ventrem oblongum, in basi flavum, reliqua parte rufum, alas binas albas, diaphanas, dorso repositas, lumbos nigros, crura pedesque debiliores, 5. articulationibus compositos, ac duplici ungula,
acuta

acuta & subtus crustulam gerente, instructos. Caudam ex variis juncturis compositam, debilem, nec pro ictu infligendo sufficientem pro lubitu, telescopii instar, elongat. Chrysalidi oblongæ, candidæ, & caput versus nigræ originem debet. Ineunte Julio ex dorso rangiferorum musca progreditur, tunc pilos suos fere surrectos amittunt. Tota die dorsum rangiferi obvolitat, caudæque parum curvæ in extremitate ovulum album & grano sinapis, pro magnitudine accedens, gerit. Simulac recta linea dorsum rangiferi quiescentis superaverit, ovum mittit, idque inter pilos surrectos delabatur, & calore ex transpiratione proficiscente excluditur. Excludum insectum sensim pellem corrodit, corrosam penetrat, ibi commoratur, nec nimio loci frigore nec calore infestatum, totum hyemis spatium ibi terit, & vel in glandis molem excrescit, tandem egreditur, redeuntibusque diebus canicularibus avolat. Juniores rangiferi in primis, prima vitæ hyeme peracta, pluribus, interdum 6. ad 8. ejusmodi insectis laborant, quæ succum nutritium exfugendo, maciem omnibus, & vel tertiæ parti mortem adferunt. Nec provectiores prorsus liberi esse solent. Ex quo musca avolaverit, foramen, quo inclusus fuerat, occluditur, ast cicatricem, sui vestigium, in pelle relinquit. Et sane summam inter rangiferum & insectum illud sympathiam atque antipathiam miratus sum. Insectum ovis plenum insequitur rangiferum jam montium præcipitia jam valles, celerrimo cursu transeuntem & insecto fuga se erepturum; insectum nil nisi ova sua deponere meditatur; & ne tanto frigore pereat, corpus lanugine tectum gerit. Rangiferorum agmen vel numerosissimum agitari videbis, anhelare, pedibus solum proculcare, hinnire, nectiment, nisi muscam obvolitantem; quæ nisi ovo suo pilis dorsi interiecto quiescit, abit. Rangiferi planities æstate vallesque relinquunt, montes sempiterna nive tectos petunt, jam huc jam illuc instabili cursu tendunt, vix momentulo per diem, cibi capiendi ergo, quiescunt, & capite in altum obverso, oculis agitatis, muscam aere detentam, ac illos insequentem observant. Nec musca illorum insequutione desistit, nisi forsan præ lassitudine in terram procidat. Sæpius quoque cæspite viridi per breve tempus residendo quiescit, statim vero refurgit, & qua cœperat, pergit. Multum sane damni Lappis adfert insectum, etenim tertia fere pars rangiferorum juniorum ex tumoribus dorsi ab ictibus ejus proficiscentibus, morbo Lappis: *Curbma* dicto, perit; imo rangiferis, insectorum persequutione infestatis, nec pascendi tempus superest, hinc æstate proficere nequeunt, imo potius adeoque carne & pinguedine decrescunt, ut ossa ex pelle promineant. Hinc mares sive castrati sive non castrati oneribus protrahendis impares sunt, foemellæ lac nullum suppeditant, pellis haud levem jacturam experitur.

Schediasma quoddam de hoc rangiferorum insecto, Auctore Cel. *Linnaeo*, in *Actis Regiæ Scientiarum Academiæ Upsaliensis* reperies, quod, quum & nimis prolixum, & in *Diario Exotico mensis Julii 1755*, ab Abbate *Prevôt* nostro idiomate redditum legatur, ea potius adducere visum fuit, quæ in *Linnaei Flora Lapponica* de eodem leguntur, ubi: *Insectum Rangiferi Lapponici, ventre flavo*, audit. Addit *Richelet* in *Lexico*, rangifer non nisi patrio sub cœlo vitam traducere potest, 13. plerumque annos attingit, & incedendo magnum strepitum juncturis crurum elicit, quo a cervo di-

tinguitur. Unde autem hæc Auctori innotuerint, ignoramus, ast, si vera forent, nec a *Linnaeo* nec a *Cel. de Maupertuis*, Observandi artis peritissimis omissa fuisse censemus. Errat qui *Lexicon Manuale* composuit, Auctor Anonymus, dum & in America Septemtrionali rangiferos, Orignaux dictos, reperiri scribit. Hi enim in Nova Francia frequentes, non sunt nisi Alces Septemtrionis, de quibus infra. Haud ita pridem in Novis publicis relatum legimus, ossa rangiferi in territorio Monbellii sub terra fuisse inventa; sceletum ejus dimidium rupi subjacens, in strato arenæ cinereæ 3. pedum alto, latebat. Hoc stratum denuo alio ejusdem crassitie, ex terra rubra tegebatur, omnia tandem strato terræ vegetabilis, bina strata priora crassitie superante, obtegebantur. Nec tamen dispositionis ac ordinis quidquam amiserant strata prædicta, sed strias sulcosque omnes conservaverant distinctissime, quos maris fluctibus, (quibus ex Septemtrione advectum videtur animal) impressos receperant. Sub eadem rupe & hippopotami ossa, ossibus rangiferi intermixta reperiere. Singularia sane deluvii monumenta.

Rangiferum Germani adpellant: *Renner*, *Rennthier*, Belgæ: *Rendier*, Angli: *Rain-deer*, Sueci: *Rhen*, exinde reliqua ejus nomina derivanda esse videntur. Gallis audit: *Rèenne*, *Reène*, *Renne*, *Rhène*, *Rangier*, *Ranglier*, seu *Ramfier*. Obsoletum: *Rangier*, teste *Cel. Richelet*, haud incongrue, Latino-rum: *Rangifer*, pro origine habet.

Quod ad virtutes rangiferi Medicas, illæ, teste *Linnaeo*, eadem sed debiliores sunt, quas cervo communi alias tribuunt. Hinc ea repetas, quæ de illo diximus. Quum vero alienigena sit apud nostrates, nec ulla ejus præparata in officinis nostris reperiuntur.

Alce. Offic. Schrod. 267. Lemer. 23. Dal. Pharm. 440. Gesn. de *Quadr.* 1. Aldrov. de *Quadr. Bisulc.* 866. Schvenckf. de *Quadr. Siles.* 53. Jonst. de *Quadr.* 65. Charlet. Exerc. 12. Raii Syn. *Anim. Quadr.* 86. Hermann. Cyn. 12. *Alcis Cornu*, Olear. Mus. 12. *Cervus cornibus acaulibus palmatis*. Linn. Faun. Suec. 37. *Alces*, *Alce*, perperam *Onager* sive *Asinus silvestris*; *Equicervus*, *Bison*, *Magnum Animal*, seu *Magna Bestia*. Nonnull.

In diversissima abeunt Auctores circa *Alcem*. Hunc alii cum rangifero, hucusque descripto confundunt. Alii *Tarandum*, seu *Hippolaphum*, vel *Cervum Palmatum* Septemtrionis illum habent. Hunc immerito *Olaus Magnus* (sic *Aldrovandus*) cum Asino sylvestri confundit, hic enim in Asia saltem & Africa obvenit, Alces autem regiones Septemtrionales inhabitat. Nos interim descriptionem *Alcis* anatomicam, Auctoribus *Regiæ Scient. Acad. Sodalibus*, Tibi L. sequentibus exhibemus:

De *Alce* agimus, quem Auctores Septemtrionis omnes: *Animal Magnum*, & Germani: *Elend*, Physici hodierni tandem: *Alcem* dicunt. Hunc ab initio quidem diversum credidimus ab *Alce*, de quo *Cæsar* in *Commentariis*, quemque *Polybius*, *Plinius*, *Solinus*, *Pausanias*, & *Strabo*, illo auctore, descriptione diversum reddunt. Ast, quum magis inter se discrepantes variorum descriptiones, quam earum convenientiam ab *Alce* nostro alienam reperierimus: *Alcem* nostrum pro vero antiquiorum *Alce* habuimus. Nec miranda est descriptionum varietas apud antiquos, illorum enim nullus umquam *Alcis* patriam adiit. Imo *Pausanias* scribit, *Alcem* ex animalibus solum hominibus ignotum esse, qui quidem acutissimo odoratu instructus hominem jam e longinquo percipit, tunc vero aufugit. Quæcumque ne-

glecti.

glecti examinis accurati ratio subfit, varii fuerunt in describendo; alii eum pilo versicolori tectum dicunt, ut capræ; alii unius coloris pilum gerere ceu camelum; alii cornua gerentem, alii iis destitutum; alii crurum juncturis carentem, sicque nec humum se prosternendi, nec ex humo resurgendi facultate donatum, ad arborem reclinatum, somnum capessere, venatores igitur arborem ferra tantum non perfcindere, & deficiente fulcro Alcem captare, addiderunt; rursus alii omnia ista in aliud animal, cui *Machlis* nomen, cadere perhibuerunt. Quam varia igitur sint hæc omnia, nulla tamen cadunt in alcem nostrum; hinc quoque descriptiones variare vides ideo, quia ex variorum calamo profectæ erant, quorum haud omnes sibi relata satis distincte cognoverant; nec idcirco, quod variorum animalium fuerint. Pilum enim noster alces, camelo similem, id est unius coloris gerebat; attamen alio anni tempore variegatus esse solet. Nostrium hyeme examini subjecimus, quum cameli instar, fulvo-cinereum exhiberet; æstate autem, testibus scriptoribus Septentrionis, debiliorem colorem induit. Hinc quoque *Cæsarem* pilo alcis duplicem colorem tribuisse videtur, testimonio aliorum qui hyeme, & aliorum qui æstate illum viderant, ille autem sinistra rei explicatione capris illum æquiparavit, quas eodem tempore duplicis coloris pilum gerere constat. Sic *Cæsar* alci cornua esse negat, *Pausanias* tribuit, merito uterque, ille enim de fœmella, hic de mare sibi relata, perscripsit.

Crura alcis juncturis carere docuerunt varii, & recentiorum quidam ad alces Moscoviæ provocarunt; erroris originem in eo quærimus, quod & Alces Moscoviæ, & Alces *Cæsaris* & *Machlis Plinii*, tam robustis cruribus instructi dicantur, ut quamvis citissima fuga lupos evitando glaciem transeant, numquam tamen vestigiis fallant; quod tanta insit violentia ictibus pedum, ut, si forsan ictum hosti præparatum arbori inflixerint, illam vel mediam, seu, (ut loquar cum *Olao Magno*) fungi instar, confringant, & vel uno ictu pedis anterioris, totum venatoris corpus transfodere valeant. Imo ne quidem descriptiones recentiorum, nec inter se, nec cum alce nostro omnino conveniunt. Alii enim, v. gr. *Erasmus Stella* & *Sigismundus Plinium* sequuti, alcem dicunt solidipedem, & præter collum & aures, equo simillimum. *Menabannus* & *Joannes Cajus* barbam ipsi hircinam, & pilum, equino præ longitudine accedentem, tribuunt. Noster vero pedem bisulcum, & bovino similem, imo pilum non solum equino, sed vel caprino longiorem, nec ullum barbæ vestigium exhibebat. Nec illud carnis frustum sub mento noster gerebat, quod *Polybius* ipsi, referente *Strabone* tribuit; nec crines collum cingentes, quos ex aliis *Gesnerus* in imagine Alcis a *Sebastiano Munster* sibi transmissa, observasse refert. Imo, quum exceptis binis hisce, nemo umquam nec de crinibus, nec de frusto carnis mentionem fecerit, exinde diversitatem Alcis nostri & antiquorum elicere quis potest? Quidquod ea omnia, quæ ex communi omnium consensu alci insunt, ea in nostro reperivimus. Sic cervum corporis forma, aurium magnitudine, cornuum caudæque parvitate, cornuum denique absentia in fœmella, æquiparabat; at longitudine & colore pili, magnitudine labri superioris, parvitate colli, & crurum robore a cervo differebat.

Alcis noster ab apice rostri usque ad originem caudæ 2. digitis longæ, 5 $\frac{1}{2}$. longus, cornibusque (erat enim fœmella) carens, collum commonstrabat

strabat brevissimum, scilicet 9. digitis longum & latum, aures vero 9. digitis longos & 4. latos. Mirati sumus, quod hi, qui alcem auctorum ætatis mediæ, Onagrum antiquorum esse voluerunt, haud provocaverint ad magnitudinem aurium, cervinos, vaccinos atque caprinos longe superantium, & asininis multum accedentium, his enim potius, quam pedis & pili similitudine asino æquiparandus erit. Quamvis enim *Scaliger* alcis pedes asininis simillimos, quamvis *Stella* & *Sigismundus* eosdem dixerint solidos: hanc pedum alcis conformationem, si adfuerit, adeo singularem habemus, qualem v. gr. pedes equorum bisulcos & solidos porcorum, *Plinio* teste, in terris quibusdam obviorum. Pilus alcis nostri, colore suo haud adeo multum diversus erat ab asinino, etenim & hic nonnunquam cinereus est & camelino quodammodo accedit; cæterum vero multa longitudine asininum, & crassitie camelinum superabat, 3. digitorum longus, & crassitie fortissimum equi crinem æquiparans, usque ad extremitatem sensim decrescebat, & in apicem tenuissimum desinebat; nec non radicem versus tenuior, lancia scapulam efformabat. Ibi autem alius coloris, & setæ porcinae instar, diaphanus erat. In extremitate partis diaphanæ globulum, pro radice deteximus, illaque ideo tenuior flexiliorque esse videbatur, ut pilus, reliqua parte durissimus reclinare possit, nec continuo surrectus maneret. Conscissum denique pilum Microscopii ope, spongiosum, ceu juncum vidimus, quem *Gesnerus* excavatum pronuntiat. Ursinum longitudine adæquabat, sed rectior, magis reclinatus, & ubique ejusdem generis erat.

Labrum superius magnum quidem, nec gingivis nexum, haud tamen tantæ erat magnitudinis, quantam ipsi tribuit *Plinius*, dum motu reliquis contrario alcem pascere docet, ne labium dentibus intergeratur. Hæc enim ne fiant, a natura cautum vidimus dissectionem instituendo; binos enim musculos magnos & fortes, elevando labro superiori destinatos invenimus. Nec non crurum articulationes, ope ligamentorum crassiorum durorumque satis munitas deteximus. Interim, si fides adhibenda est his, quæ de alce, Epilepsiæ obnoxio scribunt, quod scilicet circa paroxysmi initium, pro avertendo eodem, pedem auri admoveat, quodque ungula alcis sit anti-epilepticum præstantissimum: juncturæ alcis flexiores sint, necesse est, quam nostri, & illorum, quos auctores contrarii suæ disquisitioni subjecerunt; aut concedendum: convulsiones, in paroxysmo epileptico alcem agitantes, articulorum ligamenta insolitis impressionibus adficere posse, ut solito magis ea producant. Quod si autem serio *Olaus Magnus* quæ scribit, adserit, scilicet, ex binis ungulis in extremitate pedis alcis cujusque obviis, externam saltem pedis recti, virtute anti-epileptica esse præditam: varietatem magis admirandam supponi jubet; nos autem medelam Epilepsiæ, tactu ungulæ alcis productam, sive mirabilis sive fidem superare dicatur, pari tamen passu ambulare adfirmabimus cum contorsione tam violenti, quantam pro ungula externa auri immitenda, menti tibi sistas, necesse est. Nos autem *Ola* illis illudendi animum fuisse ducimus, qui virtutem ungulæ alcis somniaverunt. Prudentissimus sane animum declaravit; etenim, ne aperte obloqueretur præjudiciis populi, specifica magni æstimantis, inter quæ eminet ungula alcis; & probe cognoscens Medicos hosce minoris haberi, qui mediis tamquam instrumen-

tis, pro exascianda salute, ut ita dicam, utuntur, quam illos, qui tot febrifugis, anti-pleuriticis, anti-podagricis, anti-epilepticis, morbos quasi cuilibet formæ adaptare præoptant: ille ambigua phrasi usus est, & eos, qui in errore perseverare malunt, non offendit, hos vero a præjudiciis liberos satis aperte instruit. Ut enim alias per proverbium dicunt: oculum ægotantem non nisi cubito tangas, id est nequidquam: sic & ille, non nisi ungulam pedis externam anti-epilepticam dicit, quam auri suo alces imitere potest. Imo aliis circumstantiis satis difficilibus, vel prorsus impossibilibus hancce subnectit, quo clarior mens suboleat. Sic alios sequutus requirit v. gr. ut ascixæ ictu unico rescindatur, ex animale vivente, ex mare, primo hujus æstu Venereo, die S. Galli, reliqua; docendo, quod, qui credulæ plebi, ungulas alcis vendendo imposuerant, quo frustra expectati effectus excusationem adferre possint, illi conditionum cumulum excogitaverint, quarum si una desit, inutile medium. Missis igitur ligamentis juncturarum alcis solidissimis, oculi figuram contemplati sumus; hujus angulus major, inferius quam in cervis & capricervis, & modo prorsus singulari fissus erat, crena enim haud ad longitudinem oculi producebatur, sed cum linea ex altero angulo ad alterum procurrente, angulum constituebat. Peracta dissectione cognovimus rimam hancce glandi lacrymali, $1\frac{1}{2}$. digiti longæ & 7. linearum latæ respondere.

Partes alcis internæ, & in primis quatuor ventriculi & intestina, bovinis accedebant. Attamen ventriculus primus seu maximus ex parte, membranæ sacculum efformanti inclusus erat; eumque magna vasorum copia instructum Epiploi locum tenere posse censemus. Sed pro glandibus & adipe alias in eodem obviis, in superiore parte vesiculas aere plenas, castanearum magnitudini respondentes præbebat. Intestina 48. pedum longa, & Cæcum absque appendice 13. digitis longum, & 5. latum figura sua humano simillimum erat. Hepar exiguum, 1. pedis longum & 7. digitis latum, nec lobos, nec fissuram cartilagini Xiphoidi oppositam commonstrabat, arctissime diaphragmati cohærebat, ita ut, nisi resecta parte sua convexa, nihil omnino ex eadem separari potuerit. Carebat vesicula fellis, & totum, usque ad fundum parenchymi sui, griseum lividumque colorem exhibebat. Nec non lien exiguus, nempe 8. digitis longus, & 6. digitis latus, hepatis instar, substantiam homogeneam & æqualem, commonstrabat. Renes autem in superficie externa colorem duplicem exhibendo, eminentiis obstiti videbantur, ast tactui læves innotescebant, nec mediante duplicatura perinæi lumbis adhærebat, sed vasis suis tantum nexi erant. Pulmoni terni lobi erant ex parte utraque, & unus in medio, & cavitate Mediastini. Loborum inferiorum singuli duplo majores erant superioribus. Cor 7. digitis longum, 5. digitis latum, & figura cuspidatum a basi ad apicem eminentiam quamdam oblique obversam, & separationi duorum ventriculorum respondentem, commonstrabat, ita ut circumvolutio partis externæ ventriculi dextri supra sinistrum videretur. Quæ quidem eminentia, alias vix perceptibilis, in alce admodum distincte oculos incurrebat. Septum & reliquum cordis parenchymum, ventriculum sinistrum cingens, digiti 1. crassum; annuli Asperæ-Arteriæ imperfecti; cerebrum tandem cum cerebello non nisi 4. digitis longum, & $2\frac{1}{2}$. digitis latum erat. Nos igitur considerando partis hujusce parvitatem, illamque

cum magnitudine glandis lacrymalis comparando, hæc omnia pro confirmanda eorum opinione militare duximus, qui statuunt: plurimas glandularum cerebrum circumdantium, neutiquam ex illo humores recipere quibus irrigata esse solent, sed ex arteriis, seu nervis materiam lymphæ subministrantibus. Curiosiores quæсивimus ductus recipiendis atque transmittendis humoribus destinatos, eosque in parte adeo magna, magnitudinis eximiæ futuros speravimus, ast spe frustrati sumus, siquidem per longum tempus conservatum cadaver putredine correptas habebat quascunque sui partes. Cerebri æque ac cerebelli substantia, similis, candidissima, & quamvis corruptione tacta, satis solida, ut sana fuisse videri posset in animali, valde obnoxio morbis, quorum sedem in cerebro quærunt; in animali, quod *Cardanus*, frigidissimum, humidissimum, & pituita repletissimum pronuntiat. Glandula pinealis, ut in *Dromedario*, magna, 3. linearum & quod excurrit, longa erat, sed figuræ conicæ, nec, ut in *Dromedario*, trifolium referentis. Magnitudine glandulæ eximia, (habita ratione parvitatæ cerebri) inducti, considerationes ejusmodi, pro confirmanda eorum sententia militare duximus, qui cum *Erasistrate*, varias operationes sensuum interiorum conformationi organorum cerebri varianti tribuunt. In leone scilicet, in urso, aliisque animosis & crudelibus partem istam, præ parvitate vix adparentem, in timidis autem maximam observare licet. Ut in alce, quem adeo timidum dicunt, ut vel levissimo ex vulnere, præ mortis timore, moriatur, nec umquam ex vulnere sanatur, si vel minimam sanguinis guttulam ex illo profluentem viderit. Aliam cerebri partem observavimus, cujus magnitudinem, odoratui alcis, *Pausania* teste, acutissimo respondere censemus; apophyses mammillares enim, olfactui quæ inservire creduntur, 4. linearum diametri, & majores erant, quam in animalium ullo umquam vidimus.

En tibi L. anatomicam Alcis fœmellæ descriptionem ex Actis Reg. Scient. Acad. haustam. Alia quædam ad historiam ejus naturalem & maris descriptionem facientia subnectimus, quæ in *Amphiateatro Zootomico Cel. Valentini*, sub nomine *Joannis Friderici Leopold*, D. relata leguntur.

Alces mas, cornua gerit, quæ quousque tenera fuerint & cartilaginosa, pelle molli & lanuginosa teguntur, ac eo usque a frigore tuta sunt, quo excrescendo duritiem sibi debitam adquisiverint. Ab initio 3. ad 4. digitorum spatium rotunda esse solent, deinde alæ instar, utrinque dorsum versus extenduntur, interdum vel 2. transversorum digitorum crassitiem pertingunt, & in circumferentia eminentias quasdam acuminatas, ceu digitos exhibent. Ramusculi cornuum minores sed multo latiores esse solent cervinis, 2. palmarum latitudinem excedendo, & vix 2. pedum longitudinem adtingendo. Quo latiores illi fuerint atque majores, eo pluris cornua æstimari solent, & candelis onerari, in palatiis Principum. Alcis cornua interdum 17. imo 20. ramusculos gerunt, ac in tantam vastitatem abeunt, ut duobus hominibus simul residentibus locum præbeant spatiumque. Februario & Martio omni cornibus se exuit alce, magnumque sub illis pruritum persentire videtur, cujus ergo frequentissimo arborum adfrictu, illa deponere quærit. Natura interim numquam segnis, jacturam citissime explere solet, ita ut Augusto mense, aliis jam cornibus instructum videre possis alcem. Fœmellæ, ut plurimum, cornua nulla. Frequens regiones Se-
ptem-

ptemtrionales, Lithuaniam, Moscoviam, Poloniam, Sueciam, Lapponiam, & in primis Prussiam inhabitat, ibi enim nec animalia voracia, sibi infesta timet, nec nimis frequentes hominum insidias, ob limitatam venandi facultatem, nec vehementissimum hyemis frigus, alibi herbam omnem extirpans. Humida & opaca loca, querceta & iliceta peramat, iisque & delectationem & nutrimentum conveniens reperit; ut herbam viridem, corticesque arborum. Bovis instar ac equi ruminatur, & præ aliis ex foliis ulni, betulæ, salicis, ac lichene arborum vivit, imo naturæ instinctu, humida aridaque alimenta permiscet. Hyeme, dum terram nix tegit, sic *Olaus M.* alces omnes alii alios incedendo sequuntur, & præcedentium vestigia adeo exacte premunt, ut unus tantum viam transisse videatur. Plerumque agminatim incedunt, & canes sibi infestos, pedum ictibus abigendo spernere videntur, nec nisi contra ursos, lupos, & homines, cornibus sese defendunt. Cervorum instar, eximia cum agilitate vel lacus, fluviosque spatiosos, transnatant; & præ timore venatorum, summa cum celeritate aufugiunt, ac hos pariter ac canes & lupos longe post se relinquunt. Optima gaudent salute, & eximio, in primis pedum posteriorum robore. Animi pacifici sunt, nec nisi lædentem adgrediuntur. Nec cervi instar, alces mas, foemellæ ergo certamina init, sed Augusto mense, catulitionis tempore, acutissimum clamorem, ut cervus, attollit, terram pede anteriore iteratis proculcat, & magna cum dexteritate, hujus ictibus ab hoste sese defendere novit. Exeunte Majo, vel ineunte Junio, foemella foetum plerumque unum vel duos, rarior ternos effundit, nec nisi duas gerit papillas in ubere. Hinnulus matrem per duos tresve annos insequitur, & tanto in illam fertur amore, ut, teste *Gobelio*, enecari potius, quam illam deferere malit. Et mater, percepta hominis præsentia, clamore elato hinnulos ad aufugiendum commonet, qui jussa exsequuturi statim matrem sequuntur, vel si ob virium defectum illam sequi non valent, terra recumbunt, ut visum venatoris effugiant. Hinnulos cicurandos, antequam 14. tam vitæ diem adtigerint ex silvis captant, vel una cum matre ad aquam adigunt, sicque natandi artis ignaros manibus capiunt. Deinde uberibus vaccarum illas ferentium, admoventur, sicque hominum societati admoti, facili opera cicurantur. Alcem vidimus, qui ex villa, quovis mane, cum armentis ad pascua abibat, & vespere ad stabulum redibat. Alces hunc in modum cicurati panem vel manu sibi oblatum, avenam, foenum, & quidquid leguminum exhibueris, comedunt, more domesticorum omnium. Numquam in silvis rarioribus, numquam in planitiis commoratur alce, insidias enim hominum & animalium, nimis ibi frequentes extimescit. Densissimos potius silvarum recessus, & loca remotissima adit, nec tamen ibi prorsus caret venantium insidiis. Rustica gens Lithaniæ betulas juniores ad terram deprimit, funiculisque retinet in locis ab alcibus frequentatis, qui quum herbas pastum eo pervenerint, betula relaxatur, ictusque gutturi adeo violentos infligit, ut suffocentur. Alii vel fossis excavatis, vel casse eum decipiunt, vel canibus venantur, contrario tamen vento, ne acutissimo suo odore venatorem e longinquo percipere possit. Vulneratus, lædentem incurrit, & alios cornibus perfodit, alios pedibus conculcat; hinc venator post arborem sese recipiat, necesse est, vel equi rapidissimo cursu periculum vitæ evitare studeat. Nec solum

lum a venatoribus multiplici ratione infestatur, sed & lupos sibi hostes experitur. Hi enim hyeme, fame excruciat, agminatim discurrent, alces mugitu horribili terrent, & ad certandum provocant. Nec hi certamen detrectant, sed provido naturæ instinctu, pro arena, locum glacie obdutum seligunt, cujus lubricitati, unguum suorum ope resistere valent, ast lupi suos, debilissimosque receptos retinent, hinc alces, vestigiis fallentes, sicque inermes lupos, pedum cornuumque ictibus vel enecant, vel in fugam adigunt. In montibus nivis autem alces submersos, lupos vero superiores fore censemus. Pellis ex alce chlamydis conficiendis inservit, etenim præ duritie sua atque crassitie, ferri instar, nequidem sclopeti globulos transmittit.

Quæ omnia & in *Historia Naturali Americæ Septentrionalis* Auctore Viro *Denys*, comprobata leges. Ille enim de Alce ibidem obvio, *Orignac* dicto, ita scribit: Mulum hic fortitudine & capitis forma refert, sed collo longiore, exiliore corpore, cruribus longis ac macilentis, pede bisulco, cauda brevissima atque obtusa, pilo modo candido-cinereo, modo rufo & nigro, senescens vero crispo, digiti r. longo, & pro confarciendis lectorum stragulis ac ephippiis optimo gaudet. Cornua magna atque palmata gerit, quorum alia in apice vel ulnæ latitudinem, & 150. libras pondere, explent; hæc cervorum more, quotannis demittit. Epilepsiæ frequenti subjacet, cuius sub accessum, gradum sistere, tum vero sinistro pedum posteriorum regionem post aures radere & sanguinem pro medela elicere fertur. Ungula vetustiorum vel pedis integri longa esse solet. Totum animal satis bono cibo venit, æstate mas, hyeme fœmella pinguior esse dicitur; illaque unum ad binos fœtus utero gerit. Caro ejus jam elixa, jam affata adponitur, interdum quoque sale conditur, quæ quum levissima sit numquam stomachum aggravat, imo vel ex hora postquam ejus esu satur fueris, jam concocta est, novumque sui usum instituas licet. Nidorem secum gerit, & sapore cervinam refert. In corde ejus officulum adest, quo mulieres Americanæ ad facilitandum partum utuntur, in pulverem idem reducendo, & cum jusculo ex animale proveniente, recipiendo. Quincajou, felis species pilo fulvo rubro & cauda longissima gaudet, quam elevando, bis terve in dorso obvolvitur, animal istud ungulis instructum arbores adrepat, & ad longum rami repositum, Alcis adventum expectat; qui si transeat, præceps Quincajou in illum irruit, ungulis amplexum tenet, cauda sua obvolvitur, & colli regionem sub auribus eoque corrodit, quo caput ipsum decidat, spreto & celerrimo ejus cursu, & violentiori adfrictu contra arbores, numquam tamen ille correptum faciet missum. Quod si ab illo remotior transeat Alce, haud interrupto cursu eum insequitur, & si adtigerit, dorso insilit, & ex collo arripit, collum corrodit. Sæpius alce aufugiendo aquam tendit, & in eam se proiicit, Quincajou autem aquam tangere detrectans, priusquam ad illam perventum sit, gradum vertit, a persequutione desistit. Quadriennium est, quum Quincajou vaccarum mearum unam, trimulamque corripere, ac statim collum ejus dentibus conscinderet; nos canibus illum postridie insequeremur, deteximus, nec quidquam nisi oculos vaccæ ac linguam devoratos invenimus. Sæpe & vulpi se jungit venationis socio, hic enim acutiori odoratu instructus facilius reperit ferarum vestigia; hinc silvam percurrit, & sine

strepitu Alcis latibula indagatur. Quem si detexerit eo usque dum Quincajou reperierit, sequitur; si pascentem alcem seu quiescentem viderit, statim recedit, & locum pro insidiis commodum seligit, Quincajou vulpem insequens, arboris ramum convenientem conscendit. Revertuntur vulpes, & occupata parte silvæ utraque, tertius posticus accedens, latratu suo alcem ad fugam excitat. Qui si recta via (qua Quincajou inimicum reperiet) aufugerit, vulpes ex lateribus constituti, quieti remanent; si deflectat, illum in viam rectam latratu suo redigunt; sic tandem Quincajou latibulum transiens, hujus prædæ cedat necesse est, accurrunt vulpes, & suam sibi quisque partem adpropriat.

Venandi labor olim faciliior procedebat apud populos Americæ, etenim non nisi tot animalia venabantur, quot pro cibo suo necessaria cognoverant. Hujus speciei pertæsi, aliam quærebant, carne satiati pisces captabant. Nec pelles urforum, martorum, similibus, pro merce coacervabant, sed statim suis eas usibus accommodabant. Imo plura pelle sua induta linquebant. Eo tempore, insidiis per æstatem, captabant alces. Loca silvarum ab illis frequentata adibant, & vestigia eorum facile detegebant, ex illis num maris, num fœmellæ, num veteris an junioris fuerint, imo quam longe recesserit animal, cognoscebant. His cognitis pratum aliquod proximum, quo animal recessisse probabile erat, quæritabant, eo se conferebant, ac reperto alce locum quietis cingebant, tum silentio quam fieri poterat, maximo, & vento adverso accedebant, & ex quo sagitta pertingere poterant, percutiebant. Raro sagitta una pro enecando animali sufficiente, vestigia aufugientis sequebantur, denuo aliam ipsi infligebant, iterum insequiebantur, & si ante solis occasum captandi fors non obtigerit, ejus in via somnum noctu capiebant, elucente die persequutioni denuo insistebant, & repertum telis conficiebant. Rescissis frondibus viam denotabant, & prædam domum deportandi laborem mulieribus relinquebant. Inflictis vero sagittis primis alcem cursu superare, sicque ejus gressus ad tugurium suum dirigere studebant, ubi sæpius quam pervenisset, præ lassitudine deficiebat. Æstate agminatim incedentes alces videbant, nec tamen plures uno simul venari poterant. Eadem ratio erat venationis, verno tempore; ast simulac fœmellas æstus Veneris incefferat; noctu in cymbis suis degentes, fœmellæ vocem imitabantur; necnon corticeo vase aquam hauriebant, eamque flumini instillando fœmellam urinam emittentem mentiebantur; remis quoque quam levissime fieri poterat, cymbam adigebant: sic masculus silva latens accurrebat, & simulac intra ictum teli pervenerat, jaculis enecabatur. Nox tenebrosa & ventis carens optimum venationis successum promovebat. Hyeme asserculos pedibus suis subdere solebant, quo nulla incedentium vestigia remanerent nivi impressa; tunc enim alces multum viæ tritu difficilioris emetiri nequit; venatores igitur arbores corrossas, alcis præsentis testes quæritabant, nec multum ab hisce longinquos alces reperiebant, tunc jaculo acuminato eos petiebant. Si agmen eorum adesset, illi plerumque caudis inter se obversis sese jungendo circulum vel 2. miliaria cingentem efformabant, & aufugiendo nivem proculcabant adeo, ut eidem submergi nequirent. Delassati primi in locum alius succedebat; incolæ autem callidiores arbuſtis delitescebant, sicque transeuntium alios ex aliis jaculo perfodiebant. Eo autem tempore, ut supra notavi, non nisi quan-

quantum victus necessitas postulabat, vel piscium vel animalium quærebant. Canes venaticos pro divitiis habebant, & amicis optimis illorum unum adponebant; quos inter delitias referendos volunt alii; imo hodie adhuc Gallos invitando, canes pro cibo adferunt. Canibus autem quum alces venarentur, illorum alii hac, alii illac cursitabant, quorum si unus alcis vestigia reperiisset, illa fumo cum silentio insequiebantur; tum saltu antèrùs latus, rostrum alcis arripiebat, & ululatum pro signo adgressus extollebat, alces pro defensione ictum pedis infligere meditabatur atq; statim a canibus undecumque corripiebatur, hi aures, illi rostrum petunt, adveniens venator jaculum mittit, enecat, ac viscera protracta canibus, pro præda offert.

En tibi L. eorum, quæ in Opere Viri Denys de Alce Americano, Gallis: *Orignac*, *Orignal*, seu *Orignau* dicto, leges; eaque quamquam repetitionibus, & superfluis confarta, haud adeo ingrata fore speramus, ob novitatem dictionis. Alii sunt, qui huncce *Orignac*, Alcem esse pernegant, nec tamen probant, quod nisi fecerint, nos hunc pro vero Alce antiquorum habebimus.

Magnitudinis suæ ergo dicitur: *Magna Bestia*, a Germanis: *Elend*, ex quo Gallorum: *Elan* ortum esse videtur. Belgis audit: *Eland*, Anglis: *Elk*, Danis: *Elsdieur*, Norvagis; Finnis & Lappis: *Ælg*, *Elg*, *Elgar*. Polonis, Lithuanis ac Russis: *Loff*, *Lozzi*. Nomen ejus Germanicum: *Elend*, miseriam loquitur, ipsique venisse videtur vel ideo, quia Epilepsiæ obnoxius dicitur, vel quia deserta silvarum loca ac sterilia inhabitat, vel quia timidissimus est, vel quia lugubres edere solet clamores. *Alce* seu *Alces*, nomen Latinum ex Græco: *Alkè*, id est: robur, auxilium, remedium, deducatur, siquidem & ipse fortissimus est, & hominibus varia remedia præbet.

Ars Medica cornu & ungulam Alcis, sale volatili, & oleo abundantissima, contra Epilepsiam, Spasmodum, convulsiones & membrorum tremores adhiberi jubet. Cornua Alcis, ceu cervina vel calcinantur, vel id quod satius ducimus, raduntur, & pulveris hujus ℥j. ad ʒj. pro dosi potionibus & opiatis antispasmodicis ac anti-epileptices, exhibentur. Sufficerent & gelatinis conficiendis, oleo, spiritu & sale volatili, ut ex C. C. destillandis; atq; quum alia media, eaque efficaciora ad manus sint, ista apud nos saltem, negligi videmus. Ungulæ alcis, quam specificum aliquod anti-epilepticum credunt, aliqualis usus superest. Seligenda esto ponderosior, solida, æqua, nigra & splendens, majorem quoque virtutem sinistri pedis ungulæ tribuunt; nos utrique eandem inesse censemus, eamque ex sale volatili utriusque petendam. Nec tamen exinde deducitur, sed ex eo, ut supra notavimus, quod alces circa paroxysmum Epilepsiæ, pedem sinistram auri suo immittat. Limaturam ungulæ alcis, dosi ℥j. ad ʒj. vel boli instar, vel cum aqua quadam Cephalica, ut: pæoniæ, Lili Convallii &c. eximio medio contra Epilepsiam, vertiginem, palpitationem cordis & suffocationes uterinas, cedere docent. Nec non Magisterium, ex ungula alcis, accedente aceto destillato comparatum, dosi ℥j. ad ʒij. contra morbos istos commendatur. Atq; magisteria, (id quod in transcurso dictum sit) cornuum, ossium, similibusve partium animalis solidarum, præparatu sunt difficillima, siquidem partes earum mucilaginosæ & lubricæ, menstruum illas dissoluturum, impedit. Hinc primo aqua communi, pro subtrahenda

mucilagine excoquantur, necesse est, deinde autem facili opera, in aceto destillato, spiritu salis, vel alio menstruo conveniente solvuntur. Facta tandem solutione magisterium per oleum Tartari, seu alium quemdam ejusmodi liquorem præcipitatur.

Externum usum ejus quod attinet, pro avertenda Epilepsia, particulam ejus annulo, ex digito annulari portando, ita tamen ut cutim tangat, indunt; vel ex collo pro amuleto suspendunt, vel denique carpo subligant. Nobis suspecta est virtus amuletorum. Nec contra arthritidem spasmodicam multum conferre censemus ligaturam cruris, cum nervo ex alce, quamcumque aliam ligaturam idem præstare novimus. Pellis ejus, ceu buffali, multiplici usui artificibus venit. Et caro ejus dura, coriacea, & digestu difficillima, non nisi paucissimorum palato arridet.

Ungula alcis inest pulveri arthritico & antispasmodico Pharmacopœiæ Parisiensis.

Rx. Testar. ostr. præp.

Rad. Pæon. mascul. ana ʒjss.

Ungul. alcis

Nitri purific. ana ʒj.

M. f. pulvis anti-epilepticus, cujus dosis sit ʒj. ter de die, cum vehiculo cyathi infusionis florum Tiliæ: vel

Rx. Cord. talp. arefact. num. iiij.

Cran. human.

Offis tali leporin.

Lumbric. arefact. ana ʒj.

Ungul. alc.

Visc. ilic. ana ʒss.

M. f. omnium pulvis, cujus dosis sit gr. xv. pro adulto, ante paroxysmum Epilepticum, & impediatur æger dormituriens, ne somnum capiat.

E C H I N U S.

Erinaceus. Offic. Schrod. 286. Dal. Pharm. 450. Herman. Cynof. 793. Charl. Exerc. 19. Herinaceus. Schvenckf. Quadr. Siles. 96. Herinaceus & Erinaceus. Merr. Pin. 167. Erinaceus parvus nostras. Seb. Thes. 78. Echinus seu Erinaceus terrestris Raii Syn. Anim. Quadr. 231. Echinus Blas. 63. Echinus terrestris Bossch. 313. Lemer. 330. Gesn. de Quadr. digit. 459. Jonst. de Quadr. 119. Erinaceus spinosus auriculatus Linn. Faun. Suec. 16. Ericius sive Echinus minor terrestris; Acanthochoeros seu Porcus vel Porcellus spinosus Acanthio terrestris; Echinus sive Herinaceus vulgaris; Herix, Hericius, Heritius, Herinaceus, Herinatus terrenus, Heres sive Eres. Quorumd.

Multæ sunt variorum descriptiones Erinacei anatomicæ, etenim quinque ad sex Blasio debemus, omissa adhuc Valentiniana, ex Actis Reg. Scientiar. Academiæ Parisiensis hausta. En igitur ultimo nominatam, tibi L. B.

Erinaceus mas & fœmella, examini nostro subjecti, ab apice rostri, ad extremitatem pedum posteriorum extensorum, & 2. digitis longorum, 8. digitis longi, rostrum canino potius, quam porcino simile exhibebant; & erinaceorum generi canino, nec porcino (utrumque enim esse dicit Matthiolus) adnumerandi. Quod genus alio frequentius esse videtur, ab Anglis

glis non nisi *Heggehogg*, Porcus fruticeti, & a Belgis: *Ysere Vercken*, Porcellus armatus seu ferreus dicitur. Caput, dorsum & latera utriusque aculeis confita erant; sed rostrum, guttur, venter & pedes, rarissimo brevissimo ac tenuissimo pilo tegebantur. *Hermolaus* integrum Erinacei corpus, excepto rostro & pedibus, aculeos gerere scribit, nos autem tunc saltem dicta in nostros cadere posse observavimus, quum conglomerati, rostro anum pertingerent, sicque totum animal obteceret; nec nisi unicum, scilicet cinereo-fulvo-flavescentem colorem, in pelle, pilo, & aculeis, vidimus. Aculei ejus 1½. digitorum longi, & ab aculeis hystricis diversissimi, parum scilicet compressi, & aculeis in cortice castaneæ obviis, simillimi erant. Pedes, quinque digitis constabant, 3. nempe magnis in medio, & uno minori utrinque illis juncto. Ungulas gerebant longas, acutas, & calami instar excavatas. Infra molares, tantum & incisivos dentes reperivimus; horum scilicet 2. & molaribus parum longiores. Supra incisivi deerant, aderant saltem duo canini, & horum interstitiis incisores inferiores inferebantur. Nec non caninis singulis, (præ incisiviis longioribus) recipiendis destinatum erat intervallum caninis & incisiviis maxillæ inferioris intermedium; & fœmella octo papillas, utrinque 4. ad longum ventris pectorisque dispositas exhibebat, quarum duæ supremæ musculo pectorali superjacebant.

Subtracta pelle, musculus cuticularem, ut in hystrice, ab ossibus innominatis ad regionem auri & rostro subjacentem, productum deteximus; qui quidem erinaceo, haud pro concutienda pelle, ut hystrici tunc aculeos ejaculanti, inservit, sed potius pro capite ano admovendo, dum sese in globum conglomerat, ita enim periculum, si cursu securitas nulla, avertere studet. Etenim convolutus quamcumque sui partem aculeis obtecerat canibus præbet. Addit *Plinius*, quod si nihilo tamen minus, inevitabile periculum observaverit, urina missa pellem corrumpat, sic enim aculei abeunt, & maximum ejus usum venatoribus præripit. Antiquiores scilicet, summo in pretio illam habebant, & pro scopis vestimentorum eadem utebantur.

Hepati 7. erant lobi, quorum unus bifidus, duo supremi & maximi sibi intermediam habebant fellis vesiculam, oblongam, repletissimam, lividam, & 8. lineis longam. Venæ lacteæ candidæ in mesenterio, & satis aperte adparebant, chyli receptaculum magnum, amplum, atque turgidum. Lien longus, cristæ gallinacæ instar, resectus, & rubro-nigridus, ventriculo superjacebat, & mediantibus 12. vasis brevis ramusculis adhærebat. Pancreas cui nexus erat lien, eandem figuram, sed colorem album præbebat. Intestina, ejusdem utrique crassitie & substantiæ, 4. pedum longa, Cæco carebant. Renes 1. digiti longi, & 18. lineis lati, colorem olivarum exhibebant, & dexter sinistro superiorem situm obtinebat. Vesica 1½. digitis longa, & 1. digito lata; & testiculi maris ventri inclusi erant. Hoc erinaceo proprium dicit *Aristoteles*, quippe qui omnium quadrupedum viviparorum unicus testiculos, avium more, corpori inclusos gerit. Testiculorum epididymis maxima vasa spermatica præparantia, in 4. ramos divisa, iisque separatim ab imo usque ad dimidiam longitudinem inserta, recipiebat; per totam insuper testiculi longitudinem ei adhærebat, nec, ut in hystrice, ab eodem separata erat. Vasa spermatica deferentia ex suprema parte epididymidis prodibant. Testiculus cum vasis suis ligamento

quodam, (quod, quum membrana, prope testiculum parum carnosâ esset, pro musculo cremastere habere posses) ligatum atque suspensus erat. Reliqua pars membranæ hujus, ut ligamenta matricis lata, extendebatur & dilatabatur. Multa in eadem vasa vidimus, quorum duo præcipua inter se decussata, anastomosin satis magnam constituebant; omnia autem ex vasis spermaticis præparantibus, tamquam trunco, egressa, deinde per totam membranam distribuebantur. Membrana autem, ut alæ vespertilionis, ceu in matrice, extensa erat. Jam, quum amplitudo numerusque vasorum istorum haud responderet quantitati nutrimenti, pro membrana sufficientis: credimus hunc esse hujus structuræ usum, ut arteria spermatica ad membranam hancce transmittere posset aliquam portionem sanguinis, testiculo adportati, ut in multis ramis istis præparari valeat, in quibus pars reliqua, nec membranæ nutritioni cedens, diutius retineri, sicque satius præparari videtur, ut tandem in truncum arteriæ spermaticæ refluere, & sanguini ad testiculum pergenti, immisceri possit. Nihil enim est, quod huic refluxui obstet, posito & necessario quidem, libertati ejus in omni arteria; quæ idcirco valvulis, venarum propriis, carent; imo compressio viscerum omnium, ex motu respirationis proveniens, causæ impulsivæ sufficienti refluxus hujusce venit. Ex parte utraque colli vesicæ sacculos flavidissimos, substantiæque ex parte glandulosæ, ex parte membranosæ vidimus, eosque perastatas esse credimus. Prostratæ parum illis inferiores, & ut parastatæ eximia magnitudine erant. Matricem fœmellæ & collo & duobus cornibus compositam vidimus; collum duabus membranis, externa scilicet, crassa & carnosâ, tum interna, tenuiore, membranosa atque nervosa, constabat. Cornuum sinistrum minus erat dextro, fœtum continenti. Pulmoni 3 lobi magnitudinis mediæ erant ex dextra, & ex sinistra minimusque, sic quinque in univèrsum. Minimus insuper Mediastini in cavitate reconditus apicem bifidum exhibebat. Cordis fere rotundi auricula dextra rubro nigra, sinistra autem erat subalbida. Globus oculi non nisi 2. linearum diametro, oculus quoque interna palpebra instructus erat. Humor vitrei & aquosi vestigium nullum, sed crystallinum saltem, totum globum explentem vidimus. Retina immediate crystallinum tangebatur, & ex latere fundi oculi, illi quasi adglutinata videbatur, antèrius autem cornea tegebatur crystallinus. Uvea tota nigra, nec tapetis vestigium, nec antèrius replicata iridem constituebat, ita ut, palpebris apertis, oculus non nisi nigrum exhiberet.

En tibi L. anatomicam erinaceorum descriptionem ex *Actis Reg. Scient. Acad.* depromptam. Addere liceat observationem, illius finem imponentem: *Hystrix* pariter ac *Echinus Minor* Latinis, *Oppiano: Baios Echinos* dictus, generi *Echinorum*, ob aculeorum similitudinem ab antiquis adnumerantur, nec nisi magnitudinis ratione differre censentur. Nos tamen differentias magis essentielles inter utrumque observavimus, ut patriæ, aculeorum, & figuræ corporis varietatem. *Hystrix* enim Africam, *Echinus minor* Europam patriam habet; hic minores, forma item & usu diversos gerit aculeos, diversam habet figuram pedum, rostri, partiumque interiorum. Differunt itaque inter se differentia specifica, nec magnitudine saltem sed quoque aculeorum ratione, hos enim erinaceus, genere eisdem & proportionis ratione, breviores, *hystrix* autem aculeos duros, fortioresque

in dorso & lateribus, sed in collo, capite & maxillarum lateribus, non nisi fetas longas, exiles, flexibilesque gerit.

Observatione Cel. *du Gerny* aliorumque constat, cor echini pericardio carere, & hujus vices Mediaſtinum ſubire, imo in foemella varias glandulas, ad longum vaginæ procurrentes, commonſtravit. *Schroderus*, teſte *Blasio*, quum erinaceum viventem diſſecuiſſet, ſanguinem profluentem (ut & noſmetipſi) frigidum, aquoſum & pallidum, imo cor & reliqua viſcera frigida eſſe obſervavit, quamvis pectore aperto & acie externo accedente, per tres horas integras, motu ſuo agitaretur. Tenaciſſimæ vitæ igitur erinaceum eſſe vides. Teſtatur *Rajus*, referente *Villughejo*, clamorem erinacei, pedis compreſſi vel læſi dolorem ſentientis, infantis ploratum referre, eumque igni admotum, vel aqua irrigatum, ſtatim ſeſe evolvere. Noſtra autem experientia contrarium edocti ſumus. Quondam enim erinacei foemellæ quatuor pedes totidem clavis tabulæ adfiximus, deinde vivam diſſecuiſmus, & illa quidem ſummas, quas poterat vires, pro ſui liberatione effudit, nec tamen vel minimum clamorem edidit. Eadem & ante nos ab *Olao Borrichio* obſervata fuiſſe deinde edocebamur; is enim erinacei foemellam juniorem pedes clavis perforatos, inteſtina ſcalpello diſſecta ſimilia, ceu Spartana cum conſtantia pertuliſſe, & ne gemitum quidem protuliſſe ſcribit. Alium quondam aqua fervente affudimus, igne tantum non aſſavimus, nec tamen evolvebatur, quidquid tormentorum ſuccurrebat, addidimus, ille autem magis conglomerabatur, tandem vero manibus, iſſque chirothecis ſolidiſſimis indutis divuſſum, pectus conterendo enecavimus. Impoſſibilia pronuntiamus, quæ *Georgius Agricola*, dum vulpem, tantam urinæ quantitatem in erinaceum effundere ſcribit, ut præ copia ejus ſuffocetur. Multiplici ratione, ſic apte *Gefnerus*, vulpes, aſt erinaceus unica tantum, ſed tutiſſima, ſcilicet ſeſe conglomerando defendit. Sic & ab urſo, cane, lupo, vulpe, & quocunq; hoſte tutiſſimus eſt. Sunt qui dupliciſ ſpeciei erinaceos admittunt, minorem ſcilicet & majorem, nos niſi unicam novimus, & ſive ex mole animalis ſive ex longitudine aculeorum diſtinctionis ratio putatur, nobis quidem inſufficiens videtur. Nec intelligo, quare Auctores varii binas erinaceorum terreſtrium ſpecies conſtituant, ſcilicet roſtro canino & porcino inſtructam. *Rajus* non niſi caninam in Anglia reperiri ſcribit, & de exiſtentia porcina dubitat. Rurſus alii porcina frequentiſſimam, & ſolam eſui eſſe adſerunt. Diſtinctionis originem hanc eſſe cenſeo, quod & ex porci & cani figura ſimul participans erinaceus, neglecto examine adcurato huic canis, illi autem porci ſpeciem exhibere videatur; nec quia alii ſilvis inerrent, alii autem frequentiores domibus adiaceant. Erinaceos inter mutuos amplexus ventribusque inter ſe junctis coire docent auctores, aſt quamdiu utero gerat foemella, quotve fretus ſimul effundat, reticent. Sunt qui ſcribunt, foemellam partus tempori proximam, foetum ſuum ut emittat, præ timore aculeorum, detrectare, diutiſſque retinere, aſt peſſime ſibi conſulere, dum procedente tempore, major ipſi aculeorum duriorum quantitas accedit; quæ res hodie proverbio venit illorum, qui ex mora ſua damnum ſibi parant. Aſt, num penes matrem eſt foetus exitum retardare? nonne foetus omnis ſecundinis involvitur, quæ matricis læſionem præpediunt? nonne aculei foetus matrice detenti tam molles ſunt, ut lædere eam nequeant? imo quidni abſque aculeis naſci poſſet erinaceus? In tribus embryonibus, utero foemellæ diſſectæ contentis, & ſatis bene confor-

matris, nullum aculeorum vestigium vidimus. Interim, quum plurimos aculeos subtraxissemus, totum corpus, & in primis ventrem, innumeris pulcibus rubris, hinc inde usque ad mortem animalis curstantibus, obtectum vidimus, mortuo enim illo, jam hac jam illac profiliebant; duos præter ea ricinos, pelli ventris adeo insitos, ut vix percipi oculis, difficiliusque avelli possent, vidimus.

Omnes fere Europæ regiones, alias frequentior, alias infrequentior colic erinaceus. Copiosus est, teste *Linnaeo*, in Gothia, rarus in Svecia, rarissimus in Norlandia. Callidus & timidissimus, vel aggressorem, vel hominem, canem, vel quodvis animal extimescens, si aufugendi spes nulla superest, recepto capite pedibusque globi figuram sibi comparat, & aculeos surrectos hostibus undequaque obvertit. Lentissima & imperceptibili respiratione vivit, hinc sæpius pro avertendo periculo mortuum fingit, imo, ob respirationem exiguam, facilis creditur. Alium adhuc usum aculeorum instituire callet, etenim si quos fructus uvasque in terra relictos reperierit, illis sese obvolutat, ac aculeorum aduncis magnam eorum quantitatem attractam retinet. Ciborum adparatus sibi servat, & fugaces primo consumit, nuces plerumque ultimas relinquit. Noctu plurimum, rarior interdiu expatiatur, arbores arripit; fructusque illarum excutit, herbis quoque & radicibus, quales in stomacho suo deteximus, vivit. Autumno atque vindemiarum tempore pinguis, arboreta, fruticeta, & septiceta, & vineas inhabitat; hyeme tandem in suam se foveam, seu latibulum recipit, id est crenam arboris petit, vel sub foliis arborum siccis delitescit, ex his sibi stratum componit, & gliris more, tempus somno terit. Diutissime enim cibo carere potest, & somno pinguescere videtur. Ventum pluviamque abhorrens, teste *Aristotele*, jam ex Septentrione in Meridiem, jam ex Meridie in Septentrionem, domicilium confert; imo vel ædibus detentus, pro flantis venti regione, modo hoc modo illud latus parietum adit; tunc & lac & vinum, porci instar, pro potu accipit. Ast si forsan domum egressus, virgulta seu hortum intraverit, adeo remota latibula petit, ut nequeat reperiri amplius. Inclusus fortiores odorem exhalare solet. Genus Caninum magis foetere perhibent porcino, nos dubitamus. Venationi ejus, ut foetentium quorumvis, canes sagaces inserviunt. *Ephemeridibus Germ.* sceletum erinacei debemus, quantum illud ab elephantis sceletro distat!

Gallicum ejus nomen *Herisson*, quasi animal aculeis hirsutum: (*hèrissè*) loquitur. Græci illum dicunt: *Echinos*. Itali: *Riccio*, *Rizzo*. Hispani: *Eri- zo*, Lusitani: *Ouriso*, Germani: *Igel*, *Eigel*, *Hechel*; Belgæ: *Egel*, Angli: *Urchin*. *Hedgehog*, Sveci tandem: *Igelkott*.

R. pulver, Erinac. calcin. ℥iij

ex guttur. gal. arefac, ℥j,

M. f. omn. pulv. cujus dosi sit ℥j. contra incontinentiam urinæ, ex partu difficili proveniente.

F E L I S.

Felis seu Catus. Offic. *Felis seu Catus domesticus*. Hermann. Cynos. 781. *Felis*. Boissch. de Animal. Quadr. 258. Lemer. 356. Blas. 70. *Catus seu Felis*, Dal. Pharm. 447. *Catus sylvestris & domesticus*. Schrod. 280. Schvenckf. de

de *Quadr. Silf.* 79. *Felis*, *Catus*. Merr. Pinn. 169. *Catus seu Feles*. Gesn. de *Quadr.* 344. *Felis domestica*, Aldrov. de *Quadr. Digit.* 564. Jonst. de *Quadr.* 126. Charlet. Exerc. 20. *Felis domestica seu Catus*, Raii Syn. *Animal. Quadr.* 170. *Felis cauda elongata*, auribus æqualibus. Linn. Faun. Svec. 3. *Æluros*. Græcis: *Musio*, *Isidoro*, & *Alberto*; *Catus seu Cattus murilegus*; *Bellua torquicauda* & *trahicauda*. Quorund.

Felis ubique notissima 5. digitos anteriorum & posteriorum pedum 4. ostendit; pollicemque in anterioribus ab reliquis remotiorem & altiore. Maxima digitorum pars membrana mediante cohæret, & ungulas aduncas prorsus recipere potest, pro lubitu. Capiti instructa est rotundo, facie brevi, longissimis barbæ pilis, oculo magno, pupilla oblonga, lingua cuspidibus confita & aspera tactu, cauda tandem longissima. Nec non feles silvestres alibi frequentiores, alibi autem rariores reperiuntur, domesticis majores, ac longiori hirsutioreque pilo obtectæ, & versicolores, fulvo quidem colore in dorso prædominante, albido autem sub ventre, cauda tandem alternis albido-flavis & nigris striis conspicua, & cuspidem nigra instructa. Hæ in silvis oberrant, & feles omnes silvestres natura censemus, hominum vero cura factas esse domesticas. Ex his unius descriptionem Cel. Gesnero debemus, exeunte Septembris mense in Germania captæ. Hujus longitudo a fronte ad caudæ extremitatem 3. pedibus absolvebatur, & zona nigra ad dorfi longitudinem procurrens, ac zonæ aliæ, colore eadem, in pedibus, aliisque corporis partibus conspiciebantur. Et macula nigra major, collo & pectore interjacens, reliquum vero corpus fulvum, in lateribus tamen pallidum, cinereoque accedens, & lumbi ferruginei, & pedum planta, illamque vestiens pilus niger. Cauda tandem major quam domesticarum, tribus longa palmis, & 2. seu 3. zonis circularibus ac nigris ornata. Domesticæ feles multo inter se & coloris & magnitudines discrimine differunt. Sunt enim jam fulvæ, jam candidæ, jam nigræ, jam cineræ, jam duobus, jam tribus variantibus ornata coloribus. Nullum tamen caturum tricolorem, ut dicunt, reperiri docent. Immo alias reperimus, coloris in cœruleum vergentis, ac *Cartusianorum feles* dictæ, ideo fortassis, quia primæ hujus speciei feles Cartusianis fuerunt. Quarum plures sæpius valde magnas videbis, minores tamen in Angolas, regione, obviis, quippe quæ & candore & magnitudine agnos referre dicuntur.

Quod partium felis interiorum anatomicam descriptionem spectat, en! quæ de illa & a *Elasio*, & *Valentino*, & *Severino*, aliisque relata leguntur:

Peritonæum felis tenuissimum est, & sub cartilagine Xiphoide pinguisimum; epiploon crassissimum, hepatis lobo dextro, & lieni, stomacho ac Duodeno cohærens, sacculique instar efformatum; rectum caudæ originis, ligamenti ope nexum, & glandulis, milii grana referentibus, confutum; cæcum 1. digiti longum, & cœco rectoque exceptis, reliqua intestina omnia æqualia; & nimis tortuosa inflectione, rupu facilia, si nimis justo extenduntur. In Duodeno autem, 4. digitis sub canali choledoco, vermiculum, crassitudine uretherum, deteximus. Tunica ventriculi interior valde rugosa, & rugis quidem pro ventriculi longitudine ductis, post in gyrum circumvolutis obsita. Hepar in 6. lobos divisum, & duobus lobis dextris intermedia egreditur fellis vesicula, collo varicoso, fundo autem oculi profilientis formam repræsentante, & binis tandem ramis instructa, quorum

rum alter ex hepate intrat Duodenum facium expulsiōe , alter autem ex ipsa vesicula oritur . Hepatis vena cava transacto diaphragmate , dextræ cordis auriculæ inferitur . Ex utraque insuper latere venæ cavæ , duo descendunt nervi , alter dextræ alter sinistræ diaphragmatis parti sensum adferentes . Vena parva in binos dividebatur ramos , alterum mesentericum , ad mesenterium , imo recti extremitatem usque procurrens , & spleneticum , qui splenem ingreditur , ex splenetico alius exoritur , quem celiacum dicunt , quod stomachum amplectitur . Renes amplissimi , & nucis magnitudine quibusdam sinibus seu cavitatibus instructi sunt , percolandæ urinæ inservientibus . Ex lateribus quaque Trachæ-Arteriæ singulis , singuli nervi descendunt , qui ad stomachi orificium superius procurrendo , varios & ad tracheam & pulmones delegant ramos . Semicirculi trachæ-arteriæ antè , ut in homine , divisi , postè autem binis sunt uniti membranis , alter exteriore & carnosa , interna altera , nervosa , & circulatorum extremitatem egrediente . Scissa igitur trachea varias statim in eadem glandulas crassas , exiguas , rubras , albas , cinereas , versicoloresque detegit . Nervii recurrentes ex sexto pari enati , trachæ capiti inferuntur , postea autem utrinque , aortam prope , ut in cane , deflexi , producuntur . Imò cordis ventriculos , vasa & auriculas eadem ratione , qua in cane , dispositos & constitutos vidimus . Sex sunt pulmonis lobi , & quatuor , quæ testiculos obtegunt , tunicæ , scrotum , scilicet , Dartos , Erythroidæa & immediata ; super ossi pubis sunt vasa spermatica , deferentia pariter ac præparantia quæ per duo foramina abdomen egressa , ad testiculos deferuntur ; & statim ex quo ad testiculum pervenerint , vasa præparantia , corpus efformant , cui nomen est : Epididymis . Utraque vena emulgens ex cava egreditur , sinistra autem duplo longior , ac altior est quam dextra . Ex cavitate renum enati uretheres , vesicæ urinariæ collum ingrediuntur , quod supra Peritonæo infra autem recto cohæret . Membrum genitale (cuius ex latere utroque testiculos mediante membrana , pelli nexos videbis ,) $\frac{1}{2}$ digiti longum est , ac infra duobus musculis oblongis sustinetur , altero in membri medio , altero ani in sphinctere desinente . Exsculpta fere adparet pars auris interior , nec perforatum est suum infundibulum . Tres continet ventriculos cerebrum , binos nimirum circulares . Oculo multus est humor vitreus , & aquosus , *Olao Borrichio* teste , salis saporem referens . Nec cornea antè uveæ adhærens , pupillæ jam sese dilatandi , jam constringendi facultatem impertitur . Nervus opticus quamvis infra declinans , medium tamen oculum fere pertingit . Oculus quoque avium instar , membrana crassiore , ex parte obvolvitur . Referente *Villugby* autem bina sunt in interna ani parte foramina , quæ liquor quidam fetidissimus , ac glandibus sphincteri superjacentibus percolatus egreditur . Nec tamen glandulæ istæ , ut in lepore & cuniculo vasis instructæ sunt , liquori recipiendo & continendo inservientibus . Virga haudquaquam ossea est , & posticus parum reflexa , glandulas etiam prostaticas , aut spermatica vasa nulla observavimus .

Pupillæ foramen verticaliter dissectum est , & palpebræ hanc figuram oblongam transversim superantes , adeo exacte pupillam occludunt , ut non nisi unicum lucis radium : (ut ita dicam) admittat , eademque adeo late illam distendunt , ut excepta radiorum vel debilissimorum copia magna sufficiat pro luce , quantum satis est , animali comparando . Hinc & noctu viden-

di facultate felis est instructa, etenim adeo dilatata sua pupilla magnam debilioris luminis quantitatem, fortioris defectum suppletem, excipit. Splendorem igitur felis oculorum pendere censent, vel ex retina, ubi nervum opticum cingit splendente, vel ex aliquo villoso quasi serico, oculi in fundo extenso. Difficilis autem explicatu res est, & multa Academiae Scientiarum disceptatione ventilata, quam in oculo felis aqua submersæ observabis. Iridem scilicet, illam oculi membrana esse constat, quæ colores sibi objectos ad oculum refert; seu quemdam annulum circularem, cujus medium idque vacuum est pupilla, quam lucis radii transeuntes oculum ingrediuntur. Oculo igitur multum luminis excipiente, pupilla minor evadit, iride dilatata, parciore autem lumine, pupilla dilatatur, iris corripitur. Jam si aqua felem immerferis, & caput ejus ita obverteris, ut magnæ luminis quantitate oculi expositi sint, observabis 1. tamen minus pupillam dilatari, nec corripì, deinde autem in animale ex aqua protracto ac vivente, pupilla contrahi atque constringi. 2. quod oculorum fundum, quem alias percipere nequis, quousque aquæ inhæret, distinctissime conspiciere possis.

Phænomenon prius explicaturus Cel. *Mery* censet, quod pupillæ constrictione impediatur motu spirituum animalium suspenso; phænomenon posterius autem ex quantitate radiorum, corneæ explanatæ ergo, oculum ingredientium, pendeat. Iridis fibræ, sic Vir Cel. ratiocinatur, minoribus paucioribusque spiritibus plenæ sunt dum aqua felis inhæret, hinc major est pupillæ apertura. Oculus autem aqua detentæ pellucidior seu magis illuminatus est, siquidem corneæ, aqua irrigatæ & explanatæ, partes omnes luci transitum permittunt.

Huic autem contrarius Cel. *de la Hire* censet: 1. Correptionem pupillæ pendere ex elasticitate fibrarum iridis, fibras producentis; dilatationem vero ex correptione fibrarum. 2. Quod quum haud plures lucis radii oculum aquæ inhærentem, quam extra aquam constitutum, ingrediantur, nec major eorum copia pro causa contractæ iridis possit haberi. 3. Felis aqua submersæ timorem, & in omnia quæ occurrunt adtentionem majorem, pupillam ejus apertam & dilatatam retinere; nonnunquam scilicet voluntarium supponit Vir Cel. iridis motum, continuo fere necessarium, saltem a minori majorive claritate pendentem. 4. Post demonstrare annititur, quod quæ sub aqua evenit, refractione, fundum oculi felis elevet, & spectatoris oculo magis admoveat. 5. Quum ergo latior pateat pupilla, & oculi fundus magis illuminatus sit, haud mirum habet, si conspici queat. 6. Quod, quum eo melius objectum quodvis conspicias, quo minus alieni luminis oculum, quamdiu illud intueris, ingrediatur: oculum felis sub aqua conspiciens haud adeo multum alieni luminis accipiat, ac si in aere constitutum spectaret; hinc & fundum ejus satius cognosci posse concludit.

Singularissima autem est ac observatu digna felis ac tigris ungularum conformatio. Facillime scilicet retrahi & adeo sub pelle possunt abscondi, ut nunquam terram incedendo pertingant, nec, nisi pro lubitu animalis, arripendorum seu lacerandorum ergo, progrediantur. Suum ungulæ cuique enim, ligamentum est, & ungula, ligamenti elasticitate protruditur, relaxato musculo, qui ligamento inhæret. Binorum digitorum extremitatibus intermedia est ungula quævis, nec nisi agente musculo, ligamenti antagonista, profilit. Et digitorum musculus extensorius, pro retinenda extensa ungula

gula facit , & pro corroboranda ejus actione , ligamentum . Ungulis cæterum feles pro defensione , vel hostis læsione , nec ad incedendum , nisi in via lubrica , vestigio fallendi periculum evitaturæ , utuntur . Et quum talo gaudeant , simiarum , leonum & canum instar , haud adeo a pede reliquo distante , dorso incurvato frequentes facilesque desidere solent . Lambendo bibunt , ut reliqua , quibus labrum inferius brevius est superiore .

Hic vero enodandæ quæstioni locus est : cur scilicet & feles , & hujus generis alia , ut martes , vulpes &c. ex loco elevato in terram delabentes pedibus obversis , terram , quum eo usque perventum sit , non dorso , sed pedibus pertingant ?

Sua se vi , dum aere detinentur , ac omni fulcro destitutæ , obvertere nequeunt , certum ; ast timore oppletæ spinam dorsi adeo incurvant , ut intestina in summum protrudantur , caput simul & crura , naturæ instinctu , loco illo , ex quo prolabuntur , obvertunt , quasi eum denuo quærere vellent . Sic adaucta partium actione , gravitatis centrum a figuræ centro varians redditur , & superius constituitur ; hinc autem ut Cel. *Parent* demonstrando pergit , necessario , semigyrum in aere perficiunt , & crura terræ obvertunt . Quo quidem in loco vix summa mechanicæ cognitio , meliora excogitare posset , quam hæc a cæco quodam timoris instinctu suppeditata .

Unde autem felis pili dorsales , inverso manus ductu permulsi , phosphori splendorem in tenebris referunt ? respondeo : quia corpora , partibus sulphureis vel composita vel repleta , motu quovis , ut adfrictu , impulsu , aliove agitata , splendorem edunt , id quod etiam equi in collo , vituli & vaccæ in dorso , aliisque , frigidioræ præsertim aere , observabis .

Cæterum catus est vafer , cursu celer , levis , adulator , gulosus , rapax , callidus , murium , glirium , avicularum , serpentum & lacertarum hostis acerrimus . Quam taciturnus , & cautus , aviculam captatum reptat , quam diligens , & constans , & acer muribus insidiatur ! Per diem somnum captare peramat , noctu vigilat , & omnes domuum angulos indagatur , & frequens fastigia adrepat , saltusque edit ; piscibus inhiat ; & lepores minores , imo suos interdum foetus devorat , calida loca quærit , & hieme præsertim , nimio ignis desiderio , sæpius pilos adurit , tectis flammam infert , molliter recumbere optat , & studiosus excrementa sua abscondit , & munditiei amore , omnes , quas pertingere potest corporis partes delambere solet . Vulgi est opinio , & *Carolo Stefano* & *Joanni Liebault* accepta , quod felis , pede sæpius delincto , si pluries suos aures transeat , imminentem pluviam denotet . Pedes suos irrigare pertimescit , & tanta est sua in aquam aversio , ut madefacta nisi statim arefrendi locum reperiat , vel mortis periculo exposita sit . Domum in qua educata fuit , nunquam , ne transmigrante quidem domino , deserit , canis vero suum , quocunque abierit , sequitur . Quidquod vel sacco inclusam ex domo deportes , usque tamen revertetur . Hominis manu , quem cognoscit , permulceri peramat , qua voluptate ut longius frui queat , permulcentis sub manu jam transit , jam redit , jam adstantium pedes , murmurem edendo , adfricat .

Nunquam vero omnem prorsus ferocitatem exuit , quantum hominis cura & disciplina cicurata sit , si vel ex nomine suo vocata adcurrat , vel missas faciat auriculas . Halitus ejus , si nimia cum illa familiaritate utaris , pertimescendus est , *Matthiolo* teste , qui felis halitum ore hominis acceptum ,

pulmoniaë causam evadere docet ; ac multis exemplis probare annitur ; Res quomodocumque se habeat, ad illos pertinet, qui nimio, non dicam, indecente in feles amore, faciem delambentes perferunt, imo istas exosculantur. Varios interim tanta aversione ferri in feles certum, ut conspecta, imo præsente saltem & abscondita fele, cordis oppressione corripiantur, ac frigidum sudorem effundant. Tantam etiam in feles aversionem fuisse *Henrico III.* Galliaë regi, docet *Richalet*, quod conspecta illarum una, mutaret faciem, & syncope corriperetur.

Felis rabidaë morsus periculosissimus est, nec tamen, canis instar, ex se ipsa rabiem induit, quamvis thuris seu unguentorum odore rabida evadere dicatur. Aure & odoratu acutissimo gaudet, hoc enim sæpius murem, quem non videt, indagatur, consequitur. Radicis Valerianaë aque hortensis ac campestris odore valde delectantur feles, in primis & Maro, hæc quærunt, his sese adfricant, hæc delingunt, hæc exosculantur, moribus reiteratis, & eisdem sese obvolvunt, & tripudia aliaque summi gaudii testimonia edunt ac signa.

En, quæ in Cairo paullo post adventum *Cel. Granger*, cui cum Regia Scientiarum Societate literarum commercium est, nata, & sua ipsius epistola ad *Cel. Reaumur* exarata, relata sunt. Juvenes Cophtæ quidam, poculorum focii, pro reprimenda fortioris inter illos vanitate, Opii drachmam suo vino solverant, quo citiore somno, sic enim sperabant, correptus, primi helluonis famam perderet, ac illis relinqueret. Is igitur paucis horis ex vino accepto, in delirium, post autem profundissimum soporem prolapsus est. Triumphum reportaturi focii, postridie illum visitabant, & lividum, ore occluso, pulsu venarum deficiente, brevi, moribundum reperiabant. Sacerdotem accersebant, qui & Medici vicibus fungebatur, ast in cassum abibant vel violentissima quævis media. Vocatus tandem, morientis ex desiderio, *Celeb. Granger*, advenit, ast jam emortuo. Totus morbus 15. horarum fuerat. Et statim brachia & lumbos lividis tumoribus, infantis caput exæquantibus, ac summum foetorem edentibus oblectos vidit; & en rem singularem, vel trecentæ feles vicinitatis, cohortim eo concurrebant; & pro incantatoribus transmutatis, ac deportandi cadaveris ergo advenisse habiti, jam aqua sancta, jam crucis signo, frustra tamen ad recedendum cogeabantur. Imo ne feles quidem credebantur, quanta dixerit cum sacerdote & *Cel. Granger*, usque dum porta aperta, feles avidissime corpori insilire viderint, illudque adeo delambere, ut nisi tandem abactæ, tantum non devoraverint.

Libertati felem natura destinavit. Illa enim captivitatis impatiens, quum se angustius continere senserit, furere, & nil nisi libertatem & exitus modum cogitare incipit. En dictis exemplum. Quam acer & intrepidus murium hostis sit catus, ait *Lemery*, illos ne adgredi quidem audet, nisi in plena libertate constitutus sit. Ipsemet ego quondam caveæ felem & plures inclusi mures, ast catus, nullum prædantis ne motum quidem edidit, sed graviter, ut solet, refedit. Mures ab initio, hostis adspectu perterrebantur, post autem mansuetudine ejus allecti & accedebant, imo summa tandem familiaritate cum ea colludebant, eumque moribus petebant. Ille autem haud irritatus, sed quasi admonitionis gratia, mures leviori pedis ictu petebat, quo illi, temporis per punctum oppressi, paullo post

post pristinum lufum recipiebant. Et primo quidem insultum patiens, tandem vero inquietissimus videbatur; usque dum cavea aperta, suam quisvis libertatem quæreret.

Europæ feles Januario plerumque & Febuario, Indicæ autem, integrum per annum, Veneris æstus experiuntur. Noctu præsertim, flebiles sese appellantium voces, domuum in tectis & granariis, exaudies. Coitus spatio acutissimos clamores adtollit felis, quos alii cati ungulis, alii autem spermatis ejus urenti adscribunt. Vir Cel. *Tyson*, D. est, qui in *Anatomia Serpentis tintinnabulum gerentis*, & catos & leones, ob nimium breve membrum genitale, dentibus & ungulis, coitu, foemellas retinere docet; & dolores ex moribus & ungularum læsione provenientes, nec spermatis ardorem, causam esse lugubris foemellæ ejulatus & clamoris. Nec tergo obverso, ut quidam volunt, coeunt, sed foemellam supinam conscendit catus. Illæ tamen his ardentiores censentur, quos quidem clamoribus variis advocant, adliciunt, imo nimis torpidiores seu segniores reprehendunt. Efferati autem mares, catulitionis tempore, domicilium deferunt, & jam hanc jam illam domum quærunt. Quos quo majores, mansuetioresque fiant, nec domum relinquunt, castrare moris est. Londini, in anno 1684. glirem magnum cum fele coisse, & ex illorum congressu enatos foetus, utrique similes, inter rariora regis animalia relata fuisse refert *Boyle* in *Observationibus*, 56. dierum spatio utero gestare solent feles; & quinos ad senos, teste *Aristotele*, apud nos autem, ut vult *Gesnerus*, singulos ad quaternos edere foetus. Præstantiores habent illos, qui Martio nascuntur, qui autem Augusto, quum pulicibus scateant, reiciuntur. Falso vulgo creditur, quod inter dolores concipiant, & absque doloribus foetus edant feles, nos enim feles parturientes, summos clamores præ doloribus efferre audivimus. Experientiæ etiam refragantur ea, quæ *Mizauld* & *Fonstou* docent, tantam scilicet catum inter ac felem esse sympathiam, ut enecato cato, utero gerens felis statim præcoces foetus abortu effundat. Summo autem in suos felis mater amore fertur & cura, ne vel a cato enecentur, vel ab aliis auferantur. Ideo illos gula arreptos, nec tamen læsos, sapissime ex nido in nidum transfert; unde aliorum error, quod ex ore felis, sui foetus enascantur. Quatenus ubera illis præbet mater, ne canes quidem hostes timet, sed adgreditur, dorso eorum insilit, furens illos persequitur, pilis præ furore erectis, & profligat. Nec ad ludendum pronius quidquam est feli juniori, quæ quum rem suspensam seu agitaram conspexerit, statim & saltibus eo tendit, ac gula ungulisque petit, jam progreditur, jam recedit, jam recipit, jam mittit, iterum arripit, denuo relinquit, agit, & si nihil aliud, caudam suam commordet, & cruribus interjectam concitat, nunc quasi perterrita fugit, nunc acris minansque redit, & gesticulationibus non solum puerorum delectamento cedit, sed vel virorum, laborum suorum horis & delectationis momenta interponentium.

Plinius sex annorum spatio absolvi dicit felis vitam; cati Helvetici decimum usque ad annum, imo longiorem adhuc ætatem, castrati, vivunt. Multos etiam catos ac feles decimum vitæ annum superasse novimus, & virgini cuidam, nobis cognitæ, felis est, xviii. annorum, numquam morbo correpta, & magnæ felium multitudinis mater. Nunc decimum & nonum agens, solito more cibum capit, nec abdominis quidquam, nec dentium,

tium, nec pedum, nec oculorum vires amisit, imo nuperrime unum quidem, sed pulcherrimum edidit foetum.

Varia tandem sunt & felium monstra. Sic feles bicipites, & sex pedibus instructas, & pedibus anserinis, imo bicornes viderunt. Conferas *Ephem. Germ. Dec. II. Anni V.* & reperies Observationem, *Gabriel Claudero*, D. auctore, qua felem cum sciuro coeuntem, tres feles & unicum edidisse refert sciurum, nec tamen illas matrem, neque hunc ullum retulisse patrem. Et iisdem in *Ephem. Germ. Dec. II. Anni XI. pag. 349.* ex *Rosini Lentilii*, D. observatione edoceberis: felem, cui foetus subtracti fuerant, ubera cum lacte sciuro praeuisse, ac tanto in illum amore denique latam fuisse, quantam vix suo foetui exhiberi posset. Singularis res est. Etenim sciurus gliris silvestris species, & sciuri dominis magna alias cura cavendum est, ne in praedam insidiantis abeat felis.

Varia etiam feles edocere solent, ut tibiis saltare, circulum seu baculum transilire, mortuas fingere, aliaque. Imo paucis abhinc annis nundinae in suburbio S. Germani habitae, ridiculum satis felium concentum exhibere, plures etenim feles, eadem ratione indutae totidemque stabulis repositae, chartam sibi propositam habebant, musicae signis conscriptam, habebant etiam sibi mediam simiam, pulsu suo tempus dimetientem, ad quem varias voces simul extollendo ac continuando feles, satis novum concentum componebant, cui fidium quarundam sonus jungebatur. Risum sane vel gravissimorum movebat spectaculi novitas.

Teste *Gesnero*, Helveti quidam, silvestres, nec domesticas feles, pro delitiis mensae habent, ac capite caudaque resecta, comedunt; Idem ille relatam refert: alios quosdam Gaulorum Narbonnensium, biduo fere enecatas feles aeri exponere, quo teneriorem carnem induant, exuantque foetoris violentiam, & sic praeparatas comedere. Imo nos ipsi alios, minus delicatioris palati homines, ex felibus domesticis, castratis praesertim & pinguioribus, varie praeparatis, comedisse, ac vel cuniculo seu lepori eas aequiparasse vidimus.

Peregrinantium varii volunt, quod apud Indos aliqua sit felis silvestris, ope membranae ab anterioribus pedibus ad posteriores pertingentis volans, imo in Europam pelles earum adlatas esse addunt. Nos autem hasce propellibus sciurorum volantium, seu murium alatorum majorem habemus, memores quod & Opossum saepius pro fele habuerint, quem *Cel. Brisson*, in Demonstrationibus suis ad Historiam Naturalem Viri *Celeb. Reaumur*, Tomo I. de Regno Animalium, Philandae, Gallico vocabulo, adpellat. Inter Numina Aegyptiorum locum ex primis unum occupaverat felis, quam vel sub sua, vel sub figura hominis, felis capite instructi, adorabant. Mortis poena hominem adiciebant, qui vel incuria, vel ex proposito felem enecasset. Si autem praeter aetatem quaedam decesserit, luctus plena domus, qua vixerat, supercilia abradebantur, felis vero aromatibus oppleta, involutaque, Bubassam deportabatur, & in delubro, observatis Apotheoseos ritibus quibuscumque, terrae committebatur. Tanta eorum superstitio, ut nulli operam exposcenti vel patri vel amico succurrerent, dummodo felis suae curam habere possent. Teste etiam *Herodoto*, tectorum incendio durante, aedium feles divino motu agitatae credebantur, & tecti dominus, suorum cura neglecta, felis suae motus consideratione occupabatur, & pro ejus con-

servatione nihil inexpertum relinquebat. Ast luctus eximius, si quæ flammis perierit. Quæ dementia! Homo bestiam facit deum, se ipsum bestię inferiorem.

Ebræi illam adpellant: *Catul*, Græci: *Katis*, Itali: *Gatto*, Hispani: *Gato*, Germani: *Katze*, Poloni: *Koc*, Angli: *Kat*, Sueci: *Katta*. Vox Gallica autem: *Chat*, ex Latina: *Catus* seu *Cattus* derivanda est. *Matou* autem, ut vult *Menage*, ex *Marcou*, obsoleto, ast Anjoviæ incolis adjacentibusque vel hodie in usu. *Marcou* vel ex *Marculfus*, hominis nomine, vel ex epitheto Arabico: *Malchous* deducendum.

Multum feli inest salis volatilis & olei; illaque vel integra, vel ejus adeps, usibus Medicinæ inservit. Sic plebis medio, pro pleuritide felis venire solet, quam confisso dorso, adhuc fumantem, lateri doloribus adfecto adplicare, & 15. vel 18. per horas, usque dum foetorem perferre amplius nequit ægrotans, relinquere, post proicere moris est. Sæpissime cataplasmati effectus respondet, sal enim volatilis, sanguine felis detentus, resolvendi & discutiendi virtute gaudet. Imo ex optimis contra pleuritidis mediis unum hoc est. *Eitmullerus* ægrotantia animalia sanari refert, si felle vivam aqua eo usque ebullivere jusseris, usque dum caro reliquerit ossa, decoctam vero aquam animalibus hauriendam præbueris. Observat *Ledelius*, D., ut legitur in *Ephem. Germ. Dec. III. Anni I. pag. 91.* quod virgo febris tertiana obstinatio laborans, accepto sero lactis, in quo lavata fuerat felis, multum sudoris effuderit, & salutem exinde receperit. Adeps denique felis, præsertim silvestris, frequentissimo venit Medicinæ usui; & caliditatis, ac emollientis, penetrantis solventisque suæ virtutis ergo, linimenti instar, epilepticorum umbilico adplicatur. Atrophica etiam membra eodem illinuntur, ne magis macescant, & facilius nutriantur. Ex testimonio *Lemery* tandem, in *Lexico Pharmacorum simplicium*, auris vividæ felis, digito sæpius per diem impositus, & per quartam horæ partem in eo relictus mirifice facit contra Paronychiam.

Adeps felis unguento nervino Pharmacopoeiæ *Lemeryanæ* inest.

H I P P O P O T A M U S.

Hippopotamus. Offic. Lemer. 423. Hermann. Cynof. 710. Dal. Pharm. 441. Bellon. de Aquat. 25. Gesn. de Quadr. digit. 494. Aldrov. de Quadr. digit. 181. Jonst. de Quadr. 76. Charlet. Exerc. 14. Mont. Exot. 5. Prosp. Alpin. Ægypt. 245. Raii Syn. Anim. Quadr. 123. Linn. Syst. Nat. 69. Hippopotamus Antiquorum. Column. Aquat. 28. Caballus marinus. Flor. Sin. 1. Equus sive bos marinus, equus Nili, Niloticus seu Niliacus; Equus fluviatilis, sive aquaticus; Elephas marinus; Elephantus Ægypti, Fluviaticus vel Niliacus. Quorumd.

Auctorum varii, (sic *Raius*) & ex his *Hermann* in *Cynofura Materiæ Medicæ*, Hippopotamum cum vacca marina (Gallis Americam tenentibus, suo idiomate: *Bestia magnis dentibus instructa*, reliquis autem: *Robart*, Danis & Islandiæ incolis: *Rosmarus*, Belgis tandem Bavarisque: *Walrus* dicta) imo *James* in *Lexico Medicinæ universali* cum Manati, de quo infra agendum, confundunt. Variæ etiam sunt *Aristotelis*, *Plinii*, *Aeliani* ac recentiorum descriptiones, omnium tamen accuratior illa dicenda est, quam *Fabio*

Columnæ & curiositatis & veritatis studio debemus, ac in Observationibus de Animalibus terrestribus ac aquaticis perscriptam legimus, descriptio hippopotami, ex paludibus Ægypti ad Damietum Africæ captati, & cura Nicolai Zerenphi, Chirurgi Nermienfis, sale quidem conditi, integri tamen, adportati.

Nulla vero, sic ille, hippopotamus noster similitudine equo accedebat, sed corpore potius bovi, quo tamen major erat, & crurum figura, urso. A capite ad caudam 13. digitorum longus, $4\frac{1}{2}$. latus, ventrem planum potius quam rotundum ostendebat. Corporis circumferentia longitudinem exæquabat, & crura ad ventrem a terra $3\frac{1}{2}$. pedum alta, 3. etiam pedum circumferentia, pedum singuli 1. pedis lati, ungula vero quævis 3. digitorum, & caput, corporis respectu magnum, in regione oculorum auriumque $2\frac{1}{2}$. pedum latum, 3. longum, $7\frac{1}{2}$. circumferentia erat, & rictus apertura pedis integri, rostrum quoque magnum & carnosum, ac ex arefactione, sic mihi videbatur, haud adeo aduncum; oculi exigui, digiti 1. lati, longi 2. digitorum, aures tenues, exigui, breves, nec 3. digitos excedentes; 6. præter ea dentes in maxilla inferiore, quorum bini extremi ac oppositi $\frac{1}{2}$. pedis longi, $2\frac{1}{2}$. digitorum lati, triangulares, $\frac{1}{2}$. pedis circumferentia, parum posticus pendentes, ut dentes apri prominentes, nec reflexi, nec profluentes, sed rictu aperto, satis conspicui; dentes intermedii parum ex gingiva prominentes, in cuspide triangulari desinentes, crassi, rotundi, his quos elephante gerit, similes, $\frac{1}{2}$. pedis longi, exteriusque plani; 7. ex utroque latere molares, lati, crassi, brevissimi, in maxilla superiore autem, crocodilinæ instar, mobili, 6. dentes anteriores, 6. inferioris maxillæ dentibus respondentes, cuspide obversa lævi ac splendente, ita ut rictu occluso, & singulis quiescentibus, cuspidem omnes exhibeant pyramidalem & oblique sectam, calami instar, medii autem inferiorum cuspidis haud pertingant, sed spatium rotundum binis intersit. Totidem autem supra, quam infra aderant molares, priores tamen bini exigui, rotundi, & adeo ab aliis distantes, ut medium palati, inter dentes anteriores occupare viderentur. Dentibus denique molaribus interjacens $\frac{1}{2}$. pedis spatium, lingua occupabat. Cæterum dentes sua duritie ad minimum calculis accedebant, etenim contra dorsum cultri acti, chalybis instar & pyritæ scintillas eliciebant, nullo fere tot ictuum vestigio relicto. Quæ fidem facere videntur antiquorum dictis: quod noctis in tenebris ignem, dentium collisione provocatum evomat hippopotamus. Omne cæterum suum corpus erat pinguiissimum, & caput magnum, crura brevia, pedes lati ac in quatuor, nec ut *Plinius*, duas ungulas, nigras, & fissipedum ungulis similes, divisi; talum ostendebat fissipedum instar conformatum, latum & callosum, caudam testudinis potius vel ursi, quam apri caudæ similem, in origine crassam, brevem, vix $\frac{1}{2}$. pedis longam, repente decrescendo in cuspidem exeuntem, nec ob brevitatem & crassitudinem, inflexionis capacem; pellem quoque fortissimam, durissimam nigram, rostrum leonis & felis instar, barbatum, nullum vero pilum omnino in corpore reliquo; hic igitur *Plinius* errasse videtur, qui Vitulo Marino hippopotamum pilorum dorsique respectu æquiparat.

Nec tamen ex maximis hic erat unus, mense enim exinde peracto idem ille Chirurgus Romæ alium monstravit, illumque multo majorem,

ejus dentes prominentes , aprinis similes , integrum pedem longitudine referebant, ex quo reliquam corporis molem conjectura concludere potes.

En quæ *Prosper Alpinus* in *historia Ægypti naturali* de hippopotamo:

Ex Cairo in patriam revertendi animus quum esset , quosdam adhuc Turcarum ex aula Vice Regis Ægypti , visitatum adii ; bina conspexi , quæ stramine obducebantur, animalia, figura eadem, ast magnitudine diversa, alterum enim magnitudine elephantum, alterum non nisi suam attingebat ; hoc autem ex utero matris potractum esse adserebant . Caput equino quodammodo simile , crassius tamen , & rostrum aduncum , & ritum oculisque porci exhibebat ; & equi aures , breviores tamen & latiores ; & collum breve & crassum, corpus vero nigrum , & pedes , quatuor in digitos abeuntes, & caudam brevem atque rotundam . Vivum animal illud Nili in oris ad Damietum captum fuisse perhibebant , paucis vero exinde diebus mortuum , & fœtum mortuum ex utero ejus protractum , pelles denique utriusvis brevi ad Magnum Turcarum Imperatorem, donotransmittendas esse. Hoc ego potius porcum marinum, Græcis: *Cheropotamum*, quam equum marinum crederem, quem: *Hippopotamum* dicunt. Nullos enim dentes prominentes ostendebant, quos & antiquiorum omnes hippopotamo tribuunt , & nos in pelle ejus , quam Alexandriæ conspiciendum datum fuit, conspeximus . Multum quoque suæ figuræ accedit , illa quam in *Commentario suo ad Dioscoridis Materiam Medicam* , de hippopotamo relinquit *Andreas Matthiolus*, qui *Belonium* reprehendit, de hoc animale pro hippopotamo habito , & jure quidem , deficientibus nempe & dentibus , aprinis similibus, & quavis reliqua similitudine cum equo marino , reperiis tamen quibusdam cum *Cheropotamo* similibus. Sic & verum judicasse videtur *Matthiolus*, ubi hippopotamos septem , Romæ , statuae Nili Colossæ insculptos , haud pro veris habuit hippopotamis . Multos autem ex antiquioribus eorum respectu, quæ varias Ægypti, Arabiæ, Æthiopiæ, aliarum plantas vel animalia spectant , cum peregrinantium relationibus errasse , nos autem hodie melius edoctos esse constat. Sic etiam cum hippopotamo, huic enim inter alia cristam equinam pedesque bifidos, *Aristoteles*, alique tribuunt , quæ tamen nullus umquam in hippopotamo reperit , testibus Ægyptiorum variis, ac incolis Damietæ, hippopotamorum patriæ . Falso itaque relata immerito retulisse censemus *Aristotelem* , aliosque , qui enim ex Nilo capti ac probe observati fuere hippopotami , illi faciem equi, & apri dentes prominentes, imo adeo durum corium exhibent, ut vel scutis Ægyptiorum sufficeret olim . Quis igitur est , qui hippopotamum credere nolit istud animal ? en adsunt signa omnia, & facies equi, & dentes aprini. *Petrus Gillius* est, qui *Cosmum Indopleustem*, imperante *Juliano*, Indiam Æthiopiamque describentem, testari refert, quod hippopotami dentem, 13. librarum ponderis, viderit. *Pausanias* quoque in *Arcadiæ Singularibus* , hippopotami in maxilla inferiore , dentes aprinorum instar prominentes , tantasque adserit, ut facies aureæ Cybeles statuae apud Proconnesienses , eboris loco , ex hippopotami dentibus composita esse potuerit . Hinc illum quoque maris elephantum dicunt Arabes . Corium dorsi ejus durissimum calceis, solearum loco , subdere solent Montis Sinai Religiosi & ricolæ ? Ast quid plura ? Quæ enim de hippopotamo adferunt antiquiores, ea de nostro confirmant incolæ , experientia diuturna edocti , quod

quod scilicet ille plethoræ ergo, qua labocat, pedis venam spina aperiat, hinc enim sanguis recens effusus, quem ad Nili oras sæpius observant. Est igitur Nili animal, quamvis & alias, rarior tamen reperiatur, nec, ut vult *Aristoteles*, asinum, sed elephantum mediocrem magnitudine repræsentat, & corium exhibet nigrum, ac in dorso durissimum. Caput equinum quodammodo refert, & rostrum est reflexum, oculi rotundi, aures exigui, rictus amplior, magnis multisque dentibus confitus, quorum bini ex maxilla inferiore, falcatorum apri instar, ut *Pausanias* docet, egrediuntur, collum breve ac crassum, & juba destitutum, pedes haud bifidi, sed magni, cauda brevis & venter amplissimus. Equi instar, sic incolæ referunt, hinnit. Herbis cum bove iisdem vescitur, imo & carni eum inhiare dicunt, accedente dentium copia, magnitudine & duritie, etenim dilaniandis animalibus, quorum coriacea caro, & pellis durissima est, imo frangendis ossibus destinati videntur. Communi omnium ex opinione, aqua extractus diu vivere nequit, *Petrus Gillius* tamen refert in epistola, ad Cardinalem d' *Armagnac* transmissa, quod hippopotamum ex Ægypto Byzantium, & vivum quidem adportatum viderit, cujus partes omnes ita describit, quales easdem exposuimus, & quod miratu venit, tanta illum mansuetudine dicit, ut vel permulcentem, imo rictum sibi aperiens, patiatur.

Quod partes ejus interiores adtinet, nihil a *Severino*, nihil a *Blasio*, nihil a *Valentino* relictum invenimus, qui saltem secundum antiquiores, ejus partes internas, equi seu asini partibus similes dicunt. Accipe igitur epitomen scripti cujusdam, auctore Cel. *de Jussieu*, quod in *Actis Regiæ Scientiarum Academiæ anni 1724. pag. 209. sub titulo: Observationes circa quædam ossa capitis Hippopotami: legitur.*

Hippopotamum, amphibiorum unum, quum & ignem evomere, & conscindendarum venarum auctorem credidere; adeo singularem & expectatum ab omnibus fuisse constat, ut gratiam Populi Romani olim captaturi quidam ædiles, spectaculo illum populo exhiberent. *Scaurus*, teste *Plinio*, primus, eosdem in spectacula eduxit, & multum ex eo, *Philippus* Imperator, multos simul pro celebrandis secularibus ludis, accerferi jusserat, summæ, ut scribunt, magnificentiæ testes. Iis autem, quæ de illo *Plinius* refert, quidpiam addere nequimus, quæ enim ex eo ad nos devolutorum annorum series, est ea nec mirandis, quæ de eo referuntur, nec figuræ vel naturæ ejus, quidpiam lucis adfudit. Quæcumque enim deteximus omnia, vel Anatomiam ejus spectant, vel ossium suorum usu continentur. *Belon* alium Byzanthi repertum, & vivum, & *Fabius Columna* alium, quem mortuum ex Ægypto in Italiam deportatum viderat, descriptum delineatumque relinquere, ast & describendo & delineando multum inter se differunt. Nobis tandem & capitis & pedis sceletum, ex Senogallia, superiorum Commercii Indici præfectorum jussu, adportatum fuit, ex quo sequentia depromimus, & tecum L. B. communicamus.

Quinque & quadraginta libris pondus binarum maxillarum caput constituentium, & capitis longitudo, 2. altitudo ex occipitis latere 1. pede & 4. digitis quum absolverentur, animalis magnitudinem eximiam claresatis demonstrabant. Equi sceletum quodammodo referebat, rostrum tamen magis incurvato, & naribus amplioribus ac exeuntibus utrinque in binas

protuberantias, in quibus sex anteriorum dentium alveolos detegere licet; his, inquam, ab equi sceletro distinguebatur. Novem digitis narium peripheria, 7. vero est orbitalum, eximias eminentias constituentium. Decem ad minimum numerabis in apertura omni, quam connexio zygomaticis cum nasi glandis osse efficit, ex quo concludas, plus $\frac{1}{2}$. pede crassitudinem esse musculorum crotaphitorum, eosque contractione sua, maximam maxillæ inferiori sese occludenti virtutem conciliare. Lata est maxilla inferior in parte sua anteriore 9. digitorum, & 6. digitorum alta, cujus ergo multa similitudine, superiori accedit. Utrumque ejus latus, condylo & processu corone, terminatum, valde arcuatum atque extensum, multum roboris conciliat musculis crotaphitis & masseteribus. Fortior vero inferior superiore est ideo, quia sex maximos fortissimosque animalis dentes, alveolis suis profundissimis oblique insertos, illa contineri videbis. Dentium istorum medii bini, incisiorum locum tenentes, ad horizontem constituti, cylindrici, excavati, $1\frac{1}{2}$. digiti diametro, 4. digitorum longi sunt, & 6. digitorum radicem exhibent. Quibus autem respondent in maxilla superiore, hi $\frac{1}{2}$. digiti longitudinem ostendant, 3. radicem, & 9. linearum diametrum. Longorum (de quibus loquimur in maxilla inferiore,) ex utroque latere constituti, & incisiorum vices explentes, extra non nisi $\frac{1}{2}$. digiti longitudinem & $\frac{1}{2}$. diametrum referunt, ac totidem aliis similibusque maxilla in superiore respondent. Majores tandem duo, ex alterutram maxillæ inferioris extremitatem singulæ egredientes, ut falcati dentes apri incurvati, ad 5. digitos usque prominent, & 8. in radice ostendant. Forma triangulum referunt, quovis latere $1\frac{1}{2}$. fere digitum explente. Illi autem quibus respondent, curvati & excavati, 1. digiti longitudine prominent, ac 6. habent in radice. Hi itaque quatuor dentes extremitatem maxillarum, caninorum tenent locum, & junctione ex parte sua plana, incisiorum officio funguntur. Hos qui excipiunt, spatium 3. digitorum ab ultimo adductis separati, & utrinque maxillæ cujusvis in fundo dispositi, numeroque 8. non sunt nisi molares, quorum maximi $\frac{1}{2}$. digitum usque prominent, & $1\frac{1}{2}$. digiti extensione gaudent. Mirum sane, quod tanto dentium numero, ac rictus aperturæ anteriori 2. pedum amplæ, ingluvies 4. digitorum diametri tantum respondeat. Ex quo intelligas, quod quantæ voracitatis sit hippopotamus, quem crocodilum rictu tenentem ab antiquis passim delineatum videmus, nulla, nisi dentibus multum comminuta deglutire possit. Creditu autem difficile videtur, dentium formam considerata, quod ut *Plinius*, alique, frumento in agris Nilo adjacentibus depascendo sufficiant, veniant.

Pedem denique digitis instructorum ex genere esse scito, & magnum, & jam exsiccatum plantam exhibere, quæ non nisi 9. digitos extensione, 3. longitudine & $3\frac{1}{2}$. latitudine sua refert. Digiti, quorum 4. vides brevissimi una cum ungula, quasi mediam partem constituyente, 2. tantum longitudine & 1. digitum latitudine attingunt. Imo majorem adhuc aliquoties ipsi esse pedem, alius cujusdam, quæ mihi sunt ossa, profiteri videntur.

His autem rite consideratis, succurrit, alia quædam ossa illaque petrefacta, his autem similia, Monbellii in territorio, calculis effiguratis intermixta fuisse inventa. Quæ quum præsentem *Cel. Chirac* reperta erant, nec
vero

vero equi nec bovis ossibus æquiparari possent, multis eruditorum contentione cedebant, nunc autem quin ex hippopotamo fuerint, dubitari amplius nequit. Obiicis: qui tanta animalium istorum copia Galliam pervenire potuit, quum nec hodie ullum ea contineatur, nec olim reperta usquam legantur. Hic autem ea repetenda sunt, quæ sæpius monuimus, quum vel de plantarum exoticarum vestigiis, vel de ossibus animalium Indiæ & Americæ, petrefactis & in mediis terris nostratibus repertis actum fuit. Opinionem eorum scilicet comprobare videntur, qui Galliam nostram marium undis olim obtectam fuisse censent, illasque casu quodam repentino receptas has animalium alienorum exuvias reliquisse, quas frequentiores in abditis terræ nostræ recessibus, quam quidem patriorum seu vicinorum animalium fragmenta detegimus. Ejusmodi alia etiam in Bononiæ terris, Italia, & Lisbonam adjacentibus in regionibus, Lusitania, exhibuit.

Imo falsas & Philosophorum & historiæ scriptorum gravissimorum opiniones, hisce detectis refellere licet, qui ex dentibus maximis suo tempore repertis ad magnitudinem hominum, quibus fuisse credebantur, concludendo provolaverunt, & continuata proportionem vel quarumvis partium magnitudinem & altitudinem ratiocinando deduxerunt. Quidquod considerata inferioris maxillæ dentium caninorum soliditate, duritate ac candore, succurrit, quantæ forent utilitatis arti sculptorum atque tornantium; faciles, credo, eboris instar tractari possent, alii materiæ forent rarioris illo ac præstantioris, nec adeo fragilis & flavescentis. Sic qui dentes humanis substituendos conficiunt, hippopotami pro materia seligunt, originis illorum incuriosi. Hujus enim canini præsertim, & reliquorum dentes non solum soliditate superant, sed quoque colore suo humanis proxime accedunt. Cæterum hippopotami ossium nobis adquisita cognitio multum utique facit ad cognoscenda & dijudicanda varia ossa in terra detecta ac incognita, quibus adnumerabis quæ in Comtea, suo nomine Foix dicta, reperta, pro perficiendis Turcoidibus, gemmis, veniunt; addas quoque illa, quæ in variis Germaniæ partibus, & in primis caverna Baumannia inventa, ac eboris fossilis nomine salutata, ab aliis pro cordialibus commendantur.

Recensitis igitur, quæ ad anatomiam Hippopotami spectant, supersunt alia ad historiam sui naturalem facientia; en tibi epitomen eorum, quæ in *Historiæ itinerum universalis Tom. III. pag. 327. Traductionis Prevostianæ* leguntur:

Aliud etiam, præter crocodilum, animal amphibium Africa nutrit, olim Hippopotamos, apud Græcos, hodie autem equus marinus dictum; & in fluviis Gambrae & S. Domingo, insulæ, nec non Nilo, orisque a promontorio candido ad mare rubrum pertinentibus, frequentissimum. Magnitudine sua summa, bovem tertia parte superat, aliasque partes huic, alias autem equo similes habet. Pondere nonnunquam 1200. ad 1500. libras refert, & corpore constat carnosum, pilo etiam forti, brevi, ferrugineo, in cineream cum annis degenerante obtegatur. Pellis sub aqua detenti splendens ac æqua videtur. Ille autem equi instar, aures audito strepitu, arrigit; & equi hinnitum multo acutiorem tamen, refert. Oculis gaudet acutissimis, magnis, & rectis in capite, nec non rubris ac tein-

tillantibus dum ira accensus est. Tunc intuitu est terribilis, & quamvis natura innoxius, vel vulnere, vel persequutione, vel adgressu quovis irritatus, si aqua vicina pro asylo non est, furens in persequentem vertitur, irruit. Levis quidem furor esse solet, cornibus quippe qui destitutus, non nisi pedibus dentibusque utitur pro armis, imò aufugienti facillimus evitatu. Annis prodeuntibus colli brevioris pili sensim effluunt, cui cum renibus multum roboris inest. Ungulam exhibet bovinæ similem, at suffraginis capronæ quum sustinendæ corporis moli sint impares, defectum expletura natura bina iisdem cornua exigua subdidit, quibus progrediendo innititur; vestigia itaque sua 4. punctorum signa terræ impressa relinquunt. Quare auctorum nonnulli ungulas crocodilinas ipsi tribuere. Satis celeri incedit cursu, præsertim ubi solum est æquum, at equus communis seu patriæ ex incolis unus, cursu potens, multo illum superare valet, quo quum fere omnes sint celerrimi, nulli hippopotamum adgredi dubitant, & si fieri potest, aquæ viam præscindunt, fugam enim defensionis præoptat. Fluvium vero si adtingere datur, aqua statim submersus, post autem elatus aures concitat, oculos in adgressorem infixos tenet, hinnitum edit, iterumque fundum aquæ petit. Fortior equidem magisque extimescendus est, quousque terra detinetur, quam dum aqua, levior tamen natando ac incedendo defertur. Ad flumina & oras frequentissimus est, & aquam refrigeratam peramans & prata vel agros ad requiescendum; altum vero maris rarior petit. Durissima pellis est præ primis in collo, dorso & lumbis, nec hastæ vel sagittæ ictibus, nec sclopeti globulis cedit, scutisque conficiendis inservit. Quæ autem ventrem inferius tegit, quæ regionem natibus intermediam, vulneratu facillima ab insidiantibus plerumque petitur. Nec tamen enecatu facilis est, Europæi etenim crura ejus petendo illa frangere quærunt, & in terram prolapsam denique enecare allaborant. Africani autem vel crocodilum & requiem cultris sagittisque adgredientes, hippopotamum adgredi recusant, saltem extimescunt. Quem quum læseris aqua detentum, sive superficie innatet, sive maris in fundo quiescat, sive ad respirandum altum petat, furens in hostem irruit, & vel fortissimæ cymbæ asseres dentibus eripit, deportat, quidquod ex carina arreptam secum ad abyssum abripit. Sic in anno 1731. Societatis Anglicæ præfectum quendam, cui nomen *Galand*, cum socio, hac ratione periisse novimus. Et Senegalliæ in oris accidit, ut vulneratus sclopeti globulo hippopotamus, quum cymbæ latus, pertingere nequiret, qua adgressor sui vehebatur, cymbæ fundum, 1½. pedis altum, sui pedis ictu confregerit, ut cymba petierit imum. *Jobson* tres suarum varias, hyppopotami ictibus esse perforatas, & unam dentibus ejus corrosam, aquæ copiosæ ingressum præparasse recenset. Nec abigi poterat, nisi candela accensa, quam in asseris frustulo constitutam alveo committebant. Laternam alii ex puppe cymbæ expendere solent, facilis enim ille adspectu ignis, quem timet, profligatur. Ferociores esse solent, quousque foetus suos recentes natando portant in dorso. Crocodili autem amicus & natando socius sæpe conspicitur.

Frequentior ceterum in terra quam sub aqua degit, nec ultra 4. horam aqua detineri posse creditur, post vero in terram, aeris capiendi causa progredi, tum aquis denuo immergi. Quum autem vel in paludibus fluvio vicinis, vel rivulis, aqua pariori expletis, ut solet, somnum capit,

ronchis , quos ducit , venatoribus innotescit , hi autem , levissime quam fieri potest accedunt , (subtilissimo enim aure instructus , vel minimo strepitu expergefactus statim littori adcurrit ,) & dormientem faciles enecant . Casse seu retibus eum captare frustra tentares , uno enim dentis morfu omnia conscinderet . Quem si piscatores retia sua tendente conspiciunt , piscem ei obiicere solent , ille autem , quasi exigua præda contentus adversam partem petit . Præter pisces & frumento in agris reperto omni vescitur , & stomachus robustior multa dum alimenta exigit , multum detrimenti infert agris , quibus & hippopotamos & elephantos expulsum , magnos ignes nocturnos ruricolæ accendunt . Imo & ex animalium carne sibi obvia comedit , ast cursu lentior & mole ponderosus , vix quædam ipse captabit . Incolarum opinio est , quod dormientes fœminas ac infantes devoret , & majori aversione feratur in hos , qui candida , quam illos , qui nigra pelle teguntur . Quos autem in terra edidit fœtus , suo lacte nutrit fœmella , eosque defensura incessu sequitur . Quaternos una effundere solet , jam si semel saltem in anno partus edere supponas , magnam hippopotamorum copiam nullus miraberis , quorum vel agmina 300. ad 400. passim , infrequentiora tamen Senogalliæ in oris conspicias .

Divini quidpiam in hippopotamo credunt Angola , Congo , aliasque Orientales Africae partes qui inhabitant , nec tamen esu ejus abstinere . Imo & Lusitanorum , has regiones tenentium delitiis venit , caro ejus pinguis ac optima , Europæorum tamen palato ingrata . Juniorum caro præsertim vituli nostratis accedit & præstantissima , & quamvis ex amphibio proficiatur , a Lusitanis pro pisce æstimatur . Cæterum summa sanguinis copia , & abundantissimus ipsi adeps , apoplexiæ reddunt obnoxium , ipse vero medicus sibi , prominenti enim rupis cuspidi sese adfricando , sanguinem elicit , & sufficiente copia ejus emissa , cœno sese volutando vulnus obturare solet .

Omnes etiam Gambræ partes hippopotamis plenas dicit *Moore* , quos *Malleys* nuncupant Mandingos incolæ . Natando caput elevant , & cum halitu aquam ex naribus proiciunt , ac summos hinnitus extollunt . Tantus enim est supra Barrkondam , tantorum hippopotamorum hinnitus , ut ne quidem somnum capere possis . *Stibbs* , navi præfectus , nullo umquam conspecto , ast consideratis illorum excrementis , herbis vivere illos concludit , & præ aliis adcuratius a *Pometo* descriptos esse addit . Sunt , qui ab equo fluviatili marinum distinctum volunt , sunt , qui nolunt . Horum in numerum referas *le Maire* , qui nec habita ratione summæ magnitudinis Senegallicorum , priori opinioni accedit . Qui in hoc fluvio reperiuntur equi marini , illos asinum magnitudine , & equum forma referre docet , & pellem ipsis esse durissimam & pilis carentem , & pariter in terra quam in aqua eos vivere , nec illam nisi pastum relinquere ; & multum detrimenti agris inferre , nec decimam partem decerptorum devorare , & cymbas sæpius obvertere , nec umquam homines lædere , & dentes exhibere binos illosque magnos , ac iisdem usibus quam ebur sufficientes .

Ebraicum & Suevicum ejus nomen est : *Behemoth* , Græcum vero *Hippopotamos* , ex quo & Latinum : *Hippopotamus* , & Gallorum : *Hippopotame* , & Italorum : *Ippopotamo* , originem traxisse videtur . Sinenses vero : *Hayma* dicunt , Æthiopes : *Bihat* , Germani : *See-Pferd* , & Angli : *Sea-Horse* .

Carnem ejus, quamvis durissimam, coriaceam & concoctu difficillimam, Æthiopes aliique comedunt. Medicina autem non nisi dentibus duobus, ex inferiore ejus maxilla egredientibus, ac multo oleo, sale volatili & terra constantibus, utitur. Hos in pulverem reduci jubet, & dosi ℥j. ad ℥ij. pro quavis hemorrhagine, sive externa sive interna, recipi jubet. Una saltem ejus dosi recepta, foeminam violentissimo hemorrhoidum fluxu laborantem, sanatam testatur, *Michael D.* Annulorum instar, pro amuletis, contra Epilepsiam, convulsiones, & nervorum torporem, quem crampum dicunt, portare solent, virtute nobis saltem merito suspecta. Cæterum quæ de ebore seu elephanti dentibus supra dicta fuere, hic repetenda veniunt. Eadem est materia, eadem principia, idem igitur usus.

Dentibus humanis substituendos fictitios ex his hippopotami dentibus efformare moris est, quippe qui duritiei & candoris ergo omnibus anteferuntur.

L E O.

LEO. Offic. Lemer. 491. Boffch. de Quadr. 141. Blas. 79. Valent. 32. Schvenckf. Quadr. 101. Gesn. de Quadr. digit. 572. Aldrov. de Quadr. digit. 2. Jonst. de Quadr. 78. Charlet. Exerc. 14. Raii Syn. Anim. Quadrup. 162. *Felis cauda elongata, floccosa, thorace jubato*, Linn. Syst. Nat. 5. *Felis cauda in floccum desinente*. Briss. Quadr. 267. Leo omnium auctorum; Brutum animalium terrestrium imperator, seu Quadrupedum rex. Nonnull.

Variae ad manus sunt leonis descriptiones, imo tres *Germ. Ephem.* & quatuor *Blasius* exhibet, amplissimam tamen & accuratissimam merito dicimus sequentem leonis atque leonæ descriptionem anatomicam quam ex *Actis Reg. Scient. Academ. ad historiam naturalem animalium facientibus*, haurire liceat.

Quod ad exteriores leonis nostri partes adtinet, capiti eximiam quæ gaudet, magnitudinem, & magnam carnis copiam, & ossium maxillas constituentium magnitudinem conciliare deteximus; imo pectoris latitudinem ex pili longitudine ac frequentia pendere, siquidem sternum erat angustissimum, & magis cuspidatum, quam in cane vel equo; pilum caudæ tandem, eandem ei crassitudinem induere, quippe qui brevior ab initio crassiorem carnem fortioraque ossa obtegebat, pro decrecente autem partium istarum crassitudine, sua longitudine succrescebat; & pectoris ac colli pilum a reliquo non nisi prolixitate differre vidimus. Nulla tamen ungulis erat vagina, qua ne incedendo deterantur impediri docet *Plinius*. Lubentiores enim *Plutarcho* & *Solino* adsentimur, qui ungulas suas, ne usu consumantur, inter digitos recipere volunt, & quidem articulatione singulari juncturæ ultimæ, os enim penultimum dum foras reflectitur, ultimo (cui & ipsum articulatione, & ungula necitur) in altum & ad latus flectendo facilius cedit, quam inflectendo in imum; adtrahitur enim in summum ligamento quodam tendinoso, non nisi externam, superioremque partem ossium ultimorum duorum connectente; hoc igitur, digito intus reflexo, violentius distenditur, & ultimam articulationem statim extendit, dum flectentes muscoli relaxantur, hinc musculorum extensorum actionem confirmat. Os itaque extremitatis digiti cujusvis, quum semper fere in altum reflexum sit: sequitur: haud digitorum extremitatem, sed nodum arti-

articulationis bina ultima ossa necentis, in terram reponi. Incidente jam animale ungulæ restant elevatae ac inter digitos receptæ, quæ pedibus dextris sunt, dextram cujusvis digiti partem respiciendo, quæque sinistris, sinistram; etenim non nisi ex tendinibus musculi sublimi, incedentis digitorum flectio pendet; nec musculi profundi tendines agunt, nisi tum, quum de prolongandis agitur ungulis, quæ ex digitis quibus interhærebant, ultimo articulo sese inferius flectente progrediuntur. Quæ singularis mirabilisque conformatio, haud in pollice adest, cujus ultima junctura, inferius saltem flectitur; hic enim terram siquidem nunquam pertingit, & reliquis brevior, & ut solet, ex duobus ossibus compositus erat.

Quatuordecim dentes in universum quævis exhibebat maxilla, 4. incisivos, 4. caninos, & 6. molares. Incisorii exigui, & ex caninis duo minores, duo majores erant. *Aristoteles* autem pro caninis, non nisi majores habet, $1\frac{1}{2}$. digiti longos, & apri falcatorum instar, efformatos: Socium vero caninorum majorum quivis, alium habebat minorem, cuspidatum, ex latere incisivorum, & si maxillam superiorem respicias, tanto intervallo utrinque a majori distantem, quantum sufficit pro continendo adunco canini magni, inferioris maxillæ, imo & in hac intervallum aderat, pro recipiendo canino majore superioris, amplius tamen, quo scilicet maxillæ inferiori protrudendæ locus supersit. Molarium valde inæqualium primus, caninis contiguus, saltem incisivos magnitudine, exæquabat, reliqui autem majores, tribus cuspidibus, lilii instar, terminabantur. Collum erat fortissimum, nec tamen ideo, quia uno saltem osse, constabat, ut *Plinius* & *Aristoteles* docent, sed quia vertebrarum ejus apophyses spinosæ longissimæ & adeo duris ligamentis connexæ erant, ut uno osse compositum videretur. *Scaliger* testis oculatus nobis accedit, accedere etiam videtur *Aristoteles*, dum in physionomia sua leonis corpori summam fortitudinem & articulis firmitatem tribuit. Linguae asperitas, ex punctis illis pendebat, duris & pro materia, figura, imo tantum non magnitudine, felis ungulas exæquantibus, in basi sua excavatis, versus ingluviem vero reflexis. 2. linearum longis, & in basi sua eminentias rotundas, ex pelle carnosæ lingue exhibentibus, quibus undecunque obsita erat lingua. Oculi post mortem clari ac lucentes, fundum choroidis quasi aureum per uveæ foramen conspiciendum præbebant; conjunctiva autem nigra. Apertis cæterum oculis dormire leonem, dictum fuisse credimus ideo, quia apertis quamquam palpebris eos obtegere valet membrana quadam crassa & nigrida, angulum majorem respiciente, quæ dum minorem versus extenditur, totam obtegit corneam, ut in avibus & feli observavimus; imo maximam hujus præsertim similitudinem cum leone, Alcorani fabulæ istius fundamentum habemus, qua felis ex sternutatione leonis in arca enata dicitur. Imo quæ in pedibus, dentibus, oculis & lingua leonis singularia occurrunt, ea omnia & in fele observamus, quidquod magna est partium utriusque interiorum similitudo, quantumvis pro confirmando contrario dicat *Albertus*.

Pellis autem haud adeo dura seu impenetrabilis, ut vult *Cardanus*, videbatur, quamvis frequentissimis fibris neceretur duris atque nervosis, quæ ex musculis natæ carnosum intrabant panniculum. Nec tanta erat œsophagi amplitudo, ut vel deglutiendis, ut quidam volunt, animalium,

lium membris integris sufficere possit, etenim $1\frac{1}{2}$. digiti saltem latus, diaphragmatis foramine, ut solet, constrictus, nec, ut in piscibus & serpentibus, quæcunque rictu capi possunt deglutientibus, apertus erat atque dilatatus. Ventriculus 18. digitis longus, & 6. latus, ex summo in imum situs, versus dextram inclinabat, & ad pylorum adscendebat, nec non ante supraque duos inæquales gibbos ostendebat. Intestina omnia simul sumpta 25. pedes, colon 18. digitos, & cæci appendices 3. digitos longitudine referebant. Et Pancreas, & magnæ glandes mesenterii, ab *Asellio* pancreates dictæ, eadem in leone, quales in fele & cane reperiebantur. Sic & hepar, ut in fele, 7. in lobos divisum, & ferrugineum ac fere nigrum erat & molle. Partem ejus cavam sub felle vesicula, bile, omnem ejus partiumque vicinarum substantiam occupante, plenam vidimus. Quæ quidem sola fuit ratio, quod leonem ex morbo isto mortuum judicavimus, quem ægritudinem fastidii dicit, & leonibus frequentissimum esse vult *Plinius*, sive enim captivitatis fastidium, sive ciborum intelligas, utrumque causam retentionis bilis evadere posse constat. Felle vesicula 7. digitorum longa, & $1\frac{1}{2}$. digiti lata, ut in fele, versus bilis conductus anfractuosa, & quasi in cellulas separata videbatur. Lien 1. pede longus, 2. digitis latus, dimidioque altus, hepatis nigredinem nondum adtingebat, quamvis *Galenus* lienem hepate nigridiorem esse adfirmat, præsertim in his, qui calido temperamento ac arido, dentibusque cuspidatis gaudent. Quapropter etiam nigredinem hepatis in leone nostro, singularem fuisse, & ab aliquo accidente pendidisse ducimus. Ren tandem fere rotundus, $3\frac{1}{2}$. digitorum longus, $2\frac{1}{2}$. autem latus & crassus pondere suo ℥viij. & ℥ij. explebat.

In partibus generationi inservientibus hoc singularis observare licuit, quod ureter haud inflexus, sed rectissimus a vesica ad extremitatem virgæ procurreret, & initium ligamentorum virgæ corpus constituentium, a prostaticis in initio colli vesicæ obviis, remotissimum fuerit; urethra enim quamvis XI. fuerit digitorum, ligamentis nexa ad $3\frac{1}{2}$. digitorum longitudinem saltem egrediebatur; quapropter de his, quæ *Aristoteles* de leone, subdubitamur, quem reliquis magis exporrecta gestare dicit ac eminentia sexus & potentiæ suæ signa. Rationem structuræ fundatam esse censemus in eximia latitudine ossis pubis, ad quam pro longitudine, urethra ad vesicam usque descendit, cujus fundus ossa ista transeat & partem eorum inferiorem pertingat, ex qua ligamenta virgam componentia nascuntur. Hinc etiam posticus urinam ejicit leo, nec ut *Plinius*, crure sublato, canum instar, & camelorum, leporum aliorumque more, leonæ coitu jungitur.

Aperto thorace ex singulis sterni cartilaginibus dissectis binas tresve sanguinis guttulas effluxisse vidimus, ex quo concluditur: haud adeo solidas esse partes istas, ut cavitates illarum: (sic volunt alii:) percipi nequeant, quippe quæ, ut in animalibus junioribus, intertextæ sunt vasis sanguineis. Sic & mediastinum multa vasorum quantitate constructum, & quibus constabat membranæ reticulares, inter se junctæ, ex cordis apicis diaphragma versus saltem cavitatem quandam amplissimam relinquebant; ut in feli. Pulmoni sex ex dextra, tres vero lobuli erant ex sinistra. Omnes quoque Asperæ-Arteriæ cartilagine annula-

res integros circulos constituebant, binis saltem tribusve, sub larynge, exceptis, quibus 4. digitorum peripheria, & 2. linearum apertura saltem. Tanta autem organi hujus & capacitas erat & fortitudo, ut terribilissimo cuivis rugitui responderet. Exiguus autem canalis thoracicus lacteus longo adipis filo superjacebat, quod 2. linearum latum ad longitudinem ac ex latere vertebrarum protendebatur. Cor etiam, quod aridum & aqua omni destitutum vidimus in pericardio, corporis respectu, maximum 6. scilicet digitis longum, & 4. in basi latum in acutissimam cuspidem terminabatur. Substantia, antequam aperiretur, molli videbatur, quod ex cavitate sua & carnis inopia pendere deteximus, tanta enim ventriculorum ejus amplitudo erat, ut eorum sinister ad cuspidem usque descendens, non nisi 2. linearum ibi alta carne obtegeretur, 7. Basin versus, totidemque septum. Auriculæ cordis exiguæ, dexteraque, maxima quæ esse solet, vix $\frac{1}{2}$. digiti erat. Quod vero ad ramos pertinet ex aorta ascendente proficiscentes, tantæ crassitudinis erant carotides, quantæ ramus sub sinistro claviculo, id quod parvitatibus cerebri rationem habenti, mirum videbitur. Idem fere & in feli, majorem tantum cerebri quantitatem observabis. Cerebrum enim leonis, undecunque consideratum, haud 2. digitos excedebat, & cranio occludebatur, $\frac{1}{2}$. digito crasso, ubi tenuissimum, & integri, in regione frontis. Vertex, ceu cassidis crista eminendo templorum musculis originem præbebat, hi autem utramque verticis partem obtegendo, illum in medio fronte canaliculum relinquebant, quem leoni proprium observat *Aristoteles* in physionomica. Musculorum singuli quinque digitis longi, $4\frac{1}{2}$. lati, 2. crassi, & $\frac{3}{4}$ xx. ponderis erant. Jam igitur tanta quum sit leonis capiti quantitas carnis, tantaque ossa, & structuræ & substantiæ ergo solidissima; urso autem, *Plinio* teste, caput sit adeo tenue ac debile, ut vel colapho enecari possit, leonem satis difficile interfici posse concludimus, hinc quoque *Theocritus*, *Herculem* hæc dicentem inducit: quod leonem Nemacum, clavæ auxilio stupefactum, manuum ope strangulaverit. Quod tandem in brutis occurrit os magno atque minori cerebro intermedium, ex dextro futuræ lambdoidæ latere, hic $1\frac{1}{2}$. digiti longum, 10. lineis latum, 2. crassum erat & pro figura sua magis quadrato accedebat, quam vel in cane, feli, aliisve: Glans pinealis diaphana erat ac exigua, etenim non nisi 1. lineæ longa, & in basi $\frac{2}{3}$. lineæ lata reperiebatur. Majores etiam videbantur nervi optici post sui junctionem, quam ante, quum enim haud rotunda sint foraminula, seu crenarum instar comparata, quæ transeundo orbitam ingrediuntur, explanantur & dilatantur. Qui quum orbitam egressi fuerint, ad globum oculi producti, ad $2\frac{1}{2}$. digitorum longitudinem adtingebant. Nec tamen omnis cavitas interior orbitæ ossibus constabat, sed tempora versus, inter apophyses ossis frontalis, & apophysin primi ossis maxillæ, perforata erat, nec apophyses istæ necdebantur. Globus oculi 16. fere linearum diametrum ostendebat. Cornea, in medio, $\frac{2}{3}$. lineæ crassitudinem exhibens, sensim versus circumferentiam suam crassescendo ad $\frac{1}{2}$. lineæ crassitudinem, concavæ lentis instar pertingebat. Iridis color illum pallidum referebat, quum *Isabellæ* dicunt. Choroidis aulaum flavidum in auratum vertentem, nec viridem illum exhibebat, quem in oculo leonis sese observasse volunt alii. Uvæ margo anterior niger erat, ubi cry-

stallino superjacebat; hic vero explanatus, maximam concavitatem, in-
sueti more, in parte sua anteriore, felum instar, exhibebat. CrySTALLINUS
excavatione laterali falcatus videbatur, & oculi sinistri excavatio major,
cordis figuram ipsi conciliabat; in altero crySTALLINORUM glaucoma succe-
scens observavimus, nostro, ut censemus, singulare ac proprium. Abun-
dantior humor aquosus, sextam fere partem vitrei adæquabat. Quam
quidem sui abundantiam pro causa claritatis, mortui oculis inhærentis,
habemus; deficiente enim humore, corneam externeam retinent, cornua
corripitur & corrugatur, oculi autem colorem amittunt.

Licet autem humido ætatis tempore leonis nostri dissectione occupare-
mur, & in corpore mortui ex morbo quædam ad putredinem dispositio
adesse deberet, & tantum halitus leonini dicant esse fœtorem, ut quæ-
vis vicina infectet, imo nullum aliud animal carnem a leone relictam ad-
petat: nos tamen nullum corruptionis insolitæ vestigium, nec odorem
acutiorē, hoc, quem ex cervo recenter capto percipis, invenimus, ver-
mes equidem quatruiduo peracto in carne enatos vidimus, hos vero ex
muscis provenisse judicamus, siquidem linguæ ejus aliqua pars chartæ
involuta, noctis unius spatio & ariditatem induerat, omnemque proprium
odorem amiserat. Hinc etiam, si febris, ut volunt, obnoxius est leo,
humorum corruptio non est pro causa habenda, imo & febris, quam per
omnem sui vitam constanter ei inhære dicunt, non est nisi ephemeris,
quidquod bilem animalibus pro balsamo, corruptioni resistenti cedere li-
quet, siquidem tam longævus est leo, in quo dominatur bilis.

Alia succurrit cogitatio, exiguum ejus cerebrum considerantibus, cui
tantum judicii ingenique Physici tribuunt, illud cum abundantissimo vi-
tuli cerebro comparantibus visum est, quod ex ejus inopia tutius conclu-
dere possis ad animum efferatum seu crudelem, quam ad defectum ju-
dicii. Accedit, quod in vulpe marino, 4. ante dies, nullum fere cere-
brum repertum fuerit, quam sagax ille habeatur & vafer. Astutia enim
sua, nomen conciliavit inter pisces, cerebri plerumque inopes.

Jam alius leonis descriptionem anatomicam tecum L. communicabimus,
qui licet ætatis tenerioris, magnitudine tamen summa $7\frac{1}{2}$. pedis longitu-
dine scilicet, & $4\frac{1}{2}$. altitudine erat conspicuus. Eadem fere omnia quæ in
priori, & in hoc deteximus, notabilior tamen visa est thoracis angustia,
intus enim ubi latissimum erat, 7. tantummodo digitos explebat, quo-
rum quum 4. corde occupabantur, non nisi 3. digitorum spatium pro pul-
monibus pericardio mediastino, ac vasis cordis omnibus supererat. Aqua
& suum carebat pericardium, & intestina haud 25. digitos, seu triplo cor-
pus, longitudine exsuperabant.

En, quæ in hoc singularia dereximus. Hepatis scilicet colorem in pri-
ori adeo ferrugineum, ut nigro quasi accederet, in hoc vero tam palli-
dum, ut mortua folia referret; & laryngis cartilagines annulares in illo,
licet haud adeo seni, integras, in hoc, juniore, imperfectas. Ungula-
rum denique pellem minus solidam ac teneriorem, ita ut vel ultra di-
midiam ungulam protrahi posset atque produci; (en *Plinii* vaginas:) quod
tamen num ætati sit tribuendum, dubitamus. Conservandis tamen ungu-
lis neutiquam infervire potest, pellis ista protractu facilis, ut *Plinius* docet,
quippe non nisi apices unguularum, quos pellis nulla pertingit, usu deteruntur.

Epiploi insuper singularis ac tanta erat amplitudo, ut membrana sua interiore intestina adtingeret involveretque, imo ad renes reverteretur. Nec tamen membranæ omnes contiguæ, sed fibris tenuissimis contextæ cribrum fere repræsentabant; imo renis, 4. digitorum longi & 2½. lati superficiem externam multis vasis, renis membrana obtectis intertextam vidimus. Pulmo autem arefactus & tuberculorum plenus erat. Et oculi iris rugis circularibus oppleta, quæ ex pupulæ dilatatione pendebant, hæc vero ab constrictione membranæ, iridem constituentis oriebatur. Has vero rugas in aliis non videmus, supponimus saltem, & mirum fane est, quod in nostro leone repertæ fuerint, siquidem humoris aquei quantitas, membrana ne præ ariditate corripì posset, obstabat. Vitreus fluiditate aqueo nullus cedebat, & uveæ tapetis extremitates viridis quidpiam exhibebant, quod in aliis uveæ frustra quæsitum adesse debere credidimus, quia *Charopous* leonis oculos antiquiores dixere, seu jucunditatis plenos. Retinæ etiam tantus erat candor, tanta opacitas, ut receptioni specierum obesse crederes, si ulterius progrediuntur. Ubi autem visus perficitur, regio, vase transcindebatur sanguinis pleno, & nervum opticum ingrediente, ubi cavitatem constituendo illum conductum efformare videbatur, quo, ut volunt, optici nervi conscinduntur, ut transitus pateat vel spiritibus ad oculum deferendis, vel speciebus cerebro exceptis.

Quæ tandem in superficie renis parenchymi conspiciuntur, vasa frequentissima, sequentium cogitationem induxere: vasa, quæ sunt ramusculi arteriæ & venæ emulgentis truncorum, ea comprobant, quæ jam in homine, subtracta renis membrana propria, & lactis in vasa emulgentia injectione constant, nempe: emulgentium ramos, haud in medium renis exire, ut secundum *Vesalium*, censet *Higminus*, sed ad externam superficiem usque deferri, urinæ separatio enim, percolatione quæ perficitur, sanguinem ab arteriis quam longissime potest adportandum requirit, quo eo majorem parenchymi renis crassitudinem penetrandam reperiat, & eo perfectior evadat percolatio. Post causam inquisivimus, ob quam, quæ alias in rene vix adparent, vasa, adeo adparentia in nostro subiecto fuerint; & morbum aliquem pro ratione habemus, ut inflammationem seu obstructionem, vasa ista violentius dilatantem; etenim animalis junioris partes & faciliores cedunt, & ferventium humorum major est ad dilatandum virtus. *Glisson* est, qui ramos vasorum sæpius trunco ipso ampliores, morbi pro signis habet, imo pulsatione inflammationibus supraveniente, venis oculorum, Ophthalmia innotescentibus, & glandibus, in strumosis provenientibus, omnibus hisce edocemur, quod varia antehac invisibilia morbo fiant visibilia, morbo jam adaucta, jam densiora & duriora reddita, quum olim molliora & rariora fuerunt.

Frustra autem in stomacho & pulmone leonis nostri, mortis suæ causam quærebamus, quam multo sanguini ex ore effluxo successisse dicebant. Alia tamen aliunde nobis relata, hanc cogitationem induxere, quod ex nimia plenitudine & haud perferenda animal antea debilitatum morbus provenerit, variis etenim ante mortem mensibus, nec suo stabulo egredi, nec cibi quidquam accipere voluit. Hinc varia remedia, & inter alia, juniorum animantium adhuc viventium caro proponebantur. Qui igitur sui curam sibi injunctam habebant, delicatioris præparationis ergo,

agnos vividos pelle exuebant, & deinde devoratum præbebant. Quorum ille copia sumta, vigorum & ciborum desiderium recipere videbatur. Nimum vero exinde sanguinem fuisse censemus præparatum, & nimis subtilius nutrimentum, pro eo, cui exuvias subtrahendi industriam natura negaverat, & cujus pro aviditate retinenda, pilos, lanam, plumas & reliqua, tanquam condimenta & corrigentia, cibis addita voluit natura.

Leæna autem, pro sexus sui criterio, non solum colli juba brevior gaudebat, sed quoque rostro longiori, capiti supra magis explanato, & ungulis minoribus. Trium erat pedum alta, quinque fere longa, & $2\frac{1}{4}$ pedum longam ostendebat caudam. Ungulas præsertim observavimus leonum instar plures in fibras abeuntes, & substantia constare deteximus fibrosa ac fibris quidem fortissimis, separatu tamen inter se facillimis; deficiente nimirum, quo adglutinari deberent, humore, ut lignum fibris repletum, nisi arefactum fuerit, fissu difficillimum videbis. Parcissima enim carne instructæ faciliores ungulæ in fila dividebantur, quam pinguiorum, quamvis ætate inferiorum. Etenim & ungularum radicem, & modum illum, quo ossibus extremorum pedum neciebantur, humori ungulis adportando, destinata censemus. Haud scilicet omnis ungulæ radix immediate ossi neciebatur, sed pars ejus interior cava, & substantiæ cartilagini & ligamento intermediæ plena, ab osse erat separata. En igitur omnia ad ungularum usum necessaria, hac earum constructione absoluta, si enim omnes quibus ungulæ constant, fibræ, immediate ex osse orirentur, haud sufficientem exinde humiditatem reciperent, pro constituenda connectione, ungulis soliditatem comparanti; imo si ligamentorum ope omnes ossi cohærent, neutiquam firmiter satis nexæ fuissent, cui quasi ferruminatæ, aut medio quidam fulcro destitutæ sunt.

Leonis ventriculum canino seu felis similem supra diximus, ex fundo ampliori versus orificium superius, & sensim, pylorum versus, se se constringente, leænæ autem stomachi fundus in bina separatus erat, more ruminantium. Hanc vero stomachi conformationem in binis saltem leonibus binisque leabus, in reliquis autem ventriculum canino similem deteximus. Prioris quidem leonis in ventriculo duos gibbos in parte anteriore observavimus, aut divisioni comparari nequibant, quibus reliqui in binas cavitates separantur. Intestinorum longitudo 22. pedibus & 4. digitis, recti, 4. digitis & coli, 2. pedibus absoluebatur. Collum cellulis destitutum constrictione quadam in binas partes abibat, alteram altera longiorem. Cæcum orificio imum, & fundo summum spectante 2. digitorum longum, pancreas quoque caninæ similis erat, Mesenterium glandulis lividis, pluribusque oculis, & pisi magnitudinem adtingentibus plenum, ac vasa ejus valde prominentia, & præcipue versus venas, dilatata conspeximus. Imo lacteas quoque venas in varios ramos divisas, & ad truncos in *Asellii* pancreati obvios, procurrentes. Renum alveolus glarea rubicunda erat plenus, serositatis facile refluentis causa, qua ventrem inferiorem cum thorace oppletum vidimus. Vesica, vel maxime distenta vix renem magnitudine pertingebat. Infrequentius potum haurire leones testatur *Aristoteles* & *Aelianus*, & leænas per brevissimum tempus saltem foetibus ubera præbere docet *Albertus*, deficiente humoris, pro generando lacte necessarii, quantitate. Hepar 6. lobis majoribus & septimo, minori componebatur; & majorum ex dextera, unus, me-

media sua incisura, dextro quasi reni locum præbebat, qui ut solet, sinistro superior, hac cavitate reponebatur. Fellis vesicula anfractibus & gibbis multis composita, lien oblongus ac decussatus, rami tandem vasis brevis, fundo ventriculi adhærentes, & frequentiores solito erant, & crassiores.

Matricem in bina cornua longa, latis ligamentis nexa, ut in cane divisam vidimus, & in illorum extremitate, testiculis vicinas ac inferiores appendices irregulares, extremitate quasi dilaceratas, quas fimbriis in tuba matricis fœminarum, respondere judicavimus. Hæc autem antiquiores erroris excusare videntur, cujus incusari solent, illique aliquo suo jure matricis brutorum cornua, fœminarum tubis respondentia habuisse. Quamvis enim cornua illa sint corpora concava, in quibus & concipitur & nutritur fœtus; mulierum vero tuba solida videatur, recipiendo ac in fundum matricis deportando spermati, prostatae instar, ex mente *Galenî* inserviat; imo conceptio plurimum matricis in fundo peragatur; nulla tamen differentia essentialis utriusque structuram intercedit; etenim variis exemplis conceptio in tuba peracta constat, variis quoque observationibus tubam, interdum cavitatem manifestam fuisse certum est. Cujusvis cornu in extremitate, testiculo inferius aderat corpusculum oblongum & substantia nervorum, ac pro ligamento rotundo habitum, quippe quod ad inguina descendens, pedis anserini instar, ut in mulieribus, dilatabatur. Origine saltem diversum erat, etenim in mulieribus corpus matricis egreditur, longe ab testiculo ubi incipit tuba. *Soranus* tamen, hoc ligamentum rotundum, quod testiculi muliebris cremasterum dicet, prope ad testiculum nexum in fœmina vidisse adfirmat, ut nos in læna.

Nec reticulari seu perforata, sed crassa & contigua membrana constabat mediastinum. Pulmoni ex utroque latere terni, & unus in medio, lobi; dexteri etiam sinistris majores. Scirrhum vero pulmonis parenchymum, & crassissima vena coronaria, cor autem, reliquorum cordibus minus. Ventriculi sinistri medium, ad arteriæ pulmonaris orificium, scirrhum, imo, morbus ex pulmone ad cor profectus videbatur. Singulis cordis ventriculis singuli polypi detinebantur, & basis ejus exterior substantia erat circumdata, glareosa, & gibbos varios constituyente, imo adipis, illam alias cingentis, locum explente. Lingua, ut leonis, aduncis reflexis, minoribus tamen, mollioribus, nec adeo acutis, obsita erat.

Qui cerebro erant ventriculi, amplissimi, & 10. linearum profunda erat cavitas, quam falx, cerebrum magnum in binas dividens, ingreditur. Glans pinealis ne lineam quidem pertingebat. Et crySTALLINUS, ut in leone, in altera quidem læna magis convexus ante ac posticus, in altera autem ante planus, ac post tantummodo convexus erat. Membrana quæ fundum oculi obtegendo, choroidi superstrata, tapes dicitur, Isabellini, & cœruleo-subviridis erat coloris. Facilis quoque a choroide separabatur, quæ vel subtracta membrana, tapetem constituyente, integra omnem suam crassitudinem conservabat. Nervus opticus tandem oculi ad axim vicinus, foramen sui in medio jam exhibebat, jam vero, retina scilicet ex latere penitus retracta, nec undecunque circa nervum opticum in choroidis concavitate, extensa, jam inquam, evanescebat.

Historiam vero leonis naturalem, unde potius, quam ex *historia itin-*

rum universali, ab Abbate *Prevost* eleganter Gallice reddita, hauriamus & ille autem sequentibus:

Vastissimum illud terræ Africanæ spatium, quod a promontorio candido ad Sierram Leonam pertingit, innumeris ac in primis rapacibus beluis & domicilio & receptaculo cedit. Primum ex illis dicamus leonem, ab omni tempore animalium regem. Potior ipsius patria Africa videtur, hæc enim & frequentiores, & majores fortioresque leones alit. Varii ex Phycis leonis caput, hominis faciem quodammodo referre crediderunt, quod crassum est ac multa carne, longis etiam jubæ crinibus villosum. Frontem ille exhibet quadratam, & præsertim furibundus, rugosissimam. Oculos acutissimos & scintillantes, ciliis, iisque dum agitantur, adspectu horrendis, obtectos. Nasum etiam longum, latum atque hiantem; maxillam crassiorem, & musculis, tendinibus ac nervis fortissimis instructam; linguam vero asperam, hirsutam, & cuspidibus cornu referentibus duritie, 3. ad 4. lineas longitudine, ac rictum versus inflexis, munitam; qua si pellem delinxerit, facilem corrodit, & vel parum sanguinis conspecto, nil nisi prædam devorandam spirat. Sic Gallo cuidam servus erat, qui leoni cicuri & domini in cubiculo noctem plerumque degenti, manus sæpe delambendas præbebat; spreto ille periculo, ac neglectis aliorum admonitionibus, nimium credebat animalis mansuetudini. Accidit, ut noctu strepitu exaudito dominus expergisceret, & en, servi caput, trunco devorato, leonis in unguibus. Statim ille exsurgens cubiculum petiit, & accersitis aliis, sclopetorum ictibus leonem enecari iussit.

Quam longum vero sit leonis collum, summæ tamen est fortitudinis & duritie. Leonis collum præ primis juba hispida ac longa indutum videbis, quam præ ira extollit. Et quamvis juba careat læna, leone ferocior & magis extimescenda creditur. Cruribus uterque brevibus ossibus ac flexu facillimis gaudet, & incessus gravitate, non enim, nisi prædam suam insequendo, citissime procurrit. Tanta enim est animi sui intrepidi acritas, ut inimicorum numerum vel copiam ne quidem respiciat. Haud adgressurus autem, quasi dedignando, incessu lentiori transit. Fame autem incitatus in quævis obvia irruit, resistentia magis irritatur, & accepto vulnere nisi enecatus fuerit, periculosior. Quanto superiorem sibi suum viderit hostem, numquam tamen prælium fugit. Ad fugam coactus, lentior sese posticus recipit usque dum satis remoto ex loco tutum se credit atque sicurum. Equiti Florentino mula erat, oneribus excipiendis impar, quippe quæ agasones accedentes vehementissimis pedum ictibus recalitrando abigebat, lædebat. Cujus domandæ ergo quum omnia frustra expertus dominus esset, exponendam deliberavit feris, vivario Magni Ducis detentis. Leoni itaque tradebatur, cujus mugitu omnibus terribili, mula haud terrefacta, angulo parietis caput cum pectore committebat, ut non nisi ex parte sua posteriore seu fortiore locus adgredienti supersit. Si hostem exspectabat, ex latere observabat, & sui tergum exhibebat. Ille autem, percepta adgrediendi difficultate, calliditatis & astutiæ modos omnes, ast in cassum, depromebat. Adtentior autem mula, momenti opportunitate, pedis ictu uno novem ad decem ex dentibus leonis ita infregit, ut per aerem volantia eorum frustula conspicerentur. Tum rex ille animalium, continuando prælio impar, retrorsum ut diximus, stabulum rediit, mulæ reliquit victoriam.

Alii sunt qui continua vel febris, vel magna saltem inflammatione sanguinis leonem laborare censent. Et Celeb. *du Verney* ex variis plicaturis, fellis in vesicula obviis, fellis sui abundantiam deducit. Variis plerumque vescitur animalibus minoribus, ast fame incitatus nemini pareet. Mulieres tamen & æstimare, imo aufugere dicitur. Sit fides penes testem, qui non est, nisi *Labat*, *Pauli Lucae* vestigiis inhærens. Hic enim *Tunestæ*, *Tunitanorum* metropoli vicinæ, fœminas baculis saltem armatas, vel leones abigisse, & ad reliquendam prædam, certamen renuendo, adegisse vidit. Diu aqua carere potest leo, quem semel tantum triduo seu quatrinduo potum accipere dicunt; falso tamen, bibendi enim copia data & frequentior bibet. Errant, qui galli cantu eum perterreri credunt cum vulgo, volatilia parum curat, ast serpentes admodum extimescit. Hinc etiam Indorum aliquis, leonis persequutione pressus, si nihil aliud potest, capiti fasciam, sive Turbantum, eximit, & ante leonem, serpentis instar, agit; leo autem vel adeo rudi artificio deceptus, nil præter fugam meditatur, quærit. Et equi eorum, celeritatis sui cursus alias celeberrimi, si leonem venando conspiciunt, summo præ terrore, loco movere amplius nequeunt, & canes, animo amisso, equi seu domini pedibus adrepunt, securitatem quærunt. Tunc vero equiti nil superest, nisi ut equum leonis prædæ committat, & fuga suam salutem quærat. Si autem ob nimiam leonis vicinitatem igni accedendo, (etenim illo fugatur) tempus non superest, terra provolværis observato silentio profundissimo. Tunc ille, nisi vehementiori fame excruciat, graviter transibit, sui quasi veneratione contentus.

Cæterum corpore est alto & aptius composito, & Leo Africanus equum Barbarum fere magnitudine pertingit. Et quamvis bina saltem sint ubera leonæ, quaternos imo plures, illosque oculis apertis, fœtus edere docent, quos quum lubentissimi emta suos faciant Europæi, matri auferre studere solent Indi, & si raptui supervenerit, unum ex fœtibus oblicere, quem ore receptum dum ad cavernam deportat, reliquis subducendis tempus superest.

Generositatis cæterum ac clementiæ leonis testimoniis plenæ sunt historiæ omnes. Bina in primis *Labat* subjungit, a pluribus relata. Servitute detentus Maurorum R. P. *Josephus Columbet*, Monachus Jacobita, spe fretus *Larathæ*, Lusitanorum sceptro subjacentem & vicinam adtingendi, una cum socio aufugit. Et satis sibi nota regione noctu saltem iter continuavit, die autem in arbuſtis delitescendo, frondibus pro solis ardore depellendo sese obtexit. Sic peracto biduo stagnum adtigat, primam in via aquam, & situ stimulatus uterque, leonem sibi vicinum, & stagni ripam respicientem vidit. Territi consilium ineunt, & flexis genibus ac voce flebili infortunii sui historiam leoni exponunt. Hic autem, quasi submissione eorum commotus parum ab aqua recessit, & adpropinquanti locum fecit. Animo itaque acerrimus ad stagnum descendens ampullam aqua replebat, altero precibus insistente. Nec vel desiderium nocendi leo ostendebat, cujus conspectum transeuntes, postridie, quo tetenderant, perveniebant. En aliud, Florentii natum. Vivarium Ducis egressus leo, urbem intravit, & timore omnia opplevit. Fugientium ex turba mater, filium, quem amplexa fuerat, præ timore, ex ulnis amisit. Hunc leo arreptum jam devoraturus videbatur, dum mater, amoris vehementia redux, spreto periculo, ad pedes leonis provoluta, filium exposceret. Intentis illam oculis intuebatur, &

precibus matris ac ploratu quasi commotus leo, filium illæsum in terram demisit, & se ipsum recepit. De quibus, quæ quantaque placebunt, habeas L. B., nobis saltem inutilis videtur matris planctus & preces, quum eodem auctore teste fœminas leo pertimescat. Alius quidam refert: binos Christianorum captivos anno 1614. superata custodia, *Mazagan*, Lusitanorum, petendo, leonem sub arbore, diurno suo asylo detexisse, illis incedentibus incedentem, gradum sistentibus hærentem, & quocumque abierint, eos comitantem. Statim exinde equites, aufugos receptum advenerunt, at leo illos adgrediendo fugabat, nec captivos prius relinquebat, quam dum superato periculo, *Mazagan* conspiciere poterant.

Elegantior quædam leæna in Castello *S. Ludovici* compedibus vincita, & in Galliam transmittenda adservabatur, quam dum ex morbo quodam maxillam adficiente, correpta fuisset, quem adeo periculosum pro leone habent, quam pro homine hydropem, nutrimento accipiendo impar, perdita recuperandæ salutis spe omni, catena exempta, in agrum vicinum coniciebatur. Hanc ex venatione rediens conspexit, *Compagnon* cui *Banbuti Itinerarium* debemus. Oculos commonstrabat oclusas, & rictum hiantem, imo formicis plenum. Ille autem commiseratione motus, rictum adhuc spirantis aqua eluit, & parum lactis instillavit. Medium adeo simplex, plenam ipsi salutem restituit; accedente tamen continuata hominum cura. Tanto autem amore in sui conservatorem ferebatur, ut exinde nil accipere vellet, nisi ab illius manu profectum fuerit, imo ut canis domesticus ex fune collum cingente, quævis sua vestigia premeret.

Quidquod casu fortuito & animalium debilissima vel leonem fortitudine superasse, exemplum legitur. Societatis Gallicæ, Senegalliæ commercium respicientis præfecto Viro *Brue* accidit, ut caprarum grex emtus a Mauris, ad insulam *S. Ludovici* deportaretur. Aderat leo quidam pulcherrimus, jam dudum in castello adservatus, quo conspecto omnis caprarum grex præ timore aufugit. Una tamen ex omnibus supererat, quæ acriter leonem intuita, post passu uno retrocedens, cornubus tandem depresso leonem adgrediebatur. Pluries denique repetito capræ adgressu vel leonem timor incescit, vel in debiliorem commiseratio, is enim ad crura domini provolutus capræ adgressus evitare & declinare quærebat. Tigrum, aprum aliosque vel certamina cum leone inire audent. Elephas, quanta illum mole superet, sæpissime suæ prædæ cedit. Anno etiam 1695. in palude quadam arbutis plena, prope ad Maroccam, leonem & aprum, mutuo sibi illatis vulneribus exspirantes viderunt, & arbuta vicina depresso, ac sanguine eorum tincta.

Ex animo deliberato cæterum leo hostem adgredi videtur, numquam enim recta in prædam fertur, sed deflectendo imo rependo illam adtingere quærit, post uno saltu effertur, illamque arripit: Facilis tamen tenet ætate leo cicuratur; & canis mansuetudinem induit. Plerumque autem leones captaturi Indi, foveas effodunt, illasque frondibus & ramusculis leviter obtegunt, carnis frustulo pro esca superposita, & in foveam delapsum hastis ac sagittis conficiunt, quo carne pro cibo potiantur. Pelle ejus pro lectorum strato utuntur, quæ pro ephippiis Europæorum usibus venit. *Labat* est, qui *Paulum Lucam*, idem expertum, sequutus, glires & midas, præsentia pellis leoninæ depelli posse testatur.

Quædam denique ex nostris subnectere liceat : Errant , qui *Plinium* sequuti , obverso tergo leones coire , & canum instar , elato pede , urinam emittere dicunt , etenim camelorum , leporum & felum more coeunt , ac posticus urinam , nec pede elato , eiiciunt . Nec oculis apertis somnum capiunt , nec caudam in somno agitant . Dubiam quoque censemus sibi mendendi rationem illam , qua leonem vetustiore , ac febre quartana correptum carnis ex simia usu , convalescere volunt . Cauda quidem gaudet longa , imo , ut quidam censent , vel pro palo , $\frac{1}{2}$. pedis crasso confringendo sufficiente , nec tamen aculeis confito , quorum adfrictu se ipsum ad crudelitatem excitare possit . Ossa leonis medulla destituta credebantur ab antiquioribus , quos refutat *Fallopins* , & falso etiam , pyritæ instar , ignem elicere dicuntur . Nos nullam oculorum leonis atque leonæ differentiam , nec fœmellæ pupillam maiorem & rotundiorē observavimus . Auctorum plurimi bina saltem ubera leonæ tribuunt , ast *Villoughby* Neapoli cum leone detentam leonam quinque fœtus edidisse & lactasse observavit . Qui igitur , addit *Rains* , bina matris ubera , quinque fœtibus ? Errasse censemus Physicos , & totidem leonæ , quot feli vel cani , esse ubera . Frigoris tandem perferendi impatientissimus leo , frequens calidas tenet regiones Africæ , Asiæ , Mauritaniam præsertim & Lybiam ; ast in Europa vix unquam nisi regum principumque in vivariis reperitur , & rarissime , ut tigrus , generatione multiplicatur . Magnus vero sumtus requirunt , xviii. ad xx. libras carnis bovinæ enim quotidie exposcunt , sed ad cursum & libertatem nati , haud diu vivarii captivitatem perdurare solent . Romanorum in spectaculis olim , magnificentiæ ergo , frequentes erant , & *Marcus Antoninus* primus , curru leonibus protracto vectus , omnium stupore , Romam ingressus dicitur ; *Cæsar* autem vel cccc. leonibus amphiteatrum implevisse . *Augusto* fuisse dicuntur , qui pro mansuetudine & docilitate acquisita vel leporibus colluderent ; idem quod in Byzanthio *Belonius* ut testatur , vidit . *Lampridius* refert , *Heliogabalum* , jure *Sardanapalum* Romæ dictum , delectationis ergo sæpius amicos vino opplevisse , post cubiculo inclusis & leones , leopardos , ursos aliosque dentibus tamen effractis , ungulisque resectis admisisse , & expergefactorum terrore , quum facis accensæ lumine feras cognoscerent , imo morte nonnumquam terrorem excipiente , delectatum fuisse .

Ebraico idiomate : *Ari* seu *Labi* , Græco : *Leôn* , exinde autem derivandis & Latino , & Gallico nomine : *Lion* , Italico : *Leone* , Hispanico : *Leon* , Germanico : *Loewe* , Belgico : *Loeuw* , Anglico : *Lion* , & Suevico : *Leyon* dicitur . Gallica Vox , *Lionceau* vel ex synonymica latina : *Leunculus* , vel Italica : *Lioncello* originem trahit .

Partium suarum multo oleo & sale volatili abundantium nullas , nisi cor , sanguinem ac adipem adhiberi docet Medicina . Cor scilicet exficari , in pulverem reduci , & contra epilepsiam febrimque quartanam , dosi gr. xii. ad ℥ij. vel nudum , vel in aqua quadam cephalica extensum recipi , iisdem illis virtutibus gaudens & sudorem promovens sanguis , obstat veneno , ac dosi xii. gr. ad ℥j. accipiatur . Adipis tandem frequentior usus est , quem pro emolliente , anodyno & resolvente habent , & auribus cum aliqua gossypii parte immisum , horum dolores lenire censent ; membra etiam frigore adfecta , eodem adfrices , siquidem tumores scirrhosos emol-

lit, resolvit, & perniones sanat. Cave autem, ne tumorem aliqua inflammatio comitetur, adeps enim virtute sua calida & penetrante, ex calore tumoris facilis acrem qualitatem contraheret ac causticam, inflammationem exaugescentem, nec diminuentem; nec nisi contra tumores scirrhusos & indolentes adhibetur.

L E P U S.

QUO generico sub nomine binas ejus species, multa sibi similitudine accedentes, leporem scilicet & cuniculum complectimur.

Lepus. Offic. Schrod. 299. Lemer. 495. Boffch. *Quadr.* 264. Herm. Cyn. 718. Dal. Pharm. 444. Blas. 86. Paullini Lagogr. 1. Merr. Pin. 168. Charl. Exerc. 23. Schvenckf. *Quadr.* 103. Gesn. de *Quadr. digit.* 605. Aldrov. de *Quadr. digit.* 247. Jonst. de *Quadr.* 109. Raii Syn. *Anim. Quadr.* 204. *Lepus terrestris*. Matth. 147. *Lepus cauda abrupta*, *pupillis atris*, Linn. Faun. Suec. 19. *Lepus vulgaris cinereus*. Klein. *Quadr.* 51. *Lepus caudatus*, ex cinereo rufus Briss. *Quadr.* 138. *Lepus quadrupes seu major*. Quorund.

Quem itaque omnes ubique norunt lepus, a Gallis: *lièvre*, foemella: *lievresse*, Lepius: *Hase*, lepusculus tandem: *levrault*, *levraut*, *levreau* seu *levretau*, adpellatur; & capite gaudet brevi ac rotundo, labro superiore bifido, palpebris brevissimis, nec dormientis oculos exacte obtegentibus, (quapropter etiam apertis dormire dicitur oculis) oculo profiliente, magno, & satius ex latere constituta imo posteriora, quam anteriora objecta perspiciente; binis in utraque maxilla incisoriis, nullis caninis; auribus longis, mobilibus, & vel ex longinquo minimum strepitum excipientibus; voce acuta ac latrante: collo angusto, rotundo, oblongo, debili; posterioribus cruribus longioribus, quapropter etiam facilius adscendit, quam descendit; pedibus anterioribus in 5. digitos, posterioribus in 4. abeuntibus, singulos fortissimis ungulis munitos; & pedibus infra supraque pilosis, corporis pilo autem ubivis frequenti & molli, breviusculo, & ventre candido excepto, ferrugineo, cinereo, & nigrido commixto. Differunt autem lepores, magnitudine, colore, patria & adipe. Sunt enim alii per totum corpus nigri, pedum extremitate cœrulea; alii ferruginei, alii fulvi, alii candidi auribus nigris, quorum caro, teste *Gesnero*, reliquis delicatior est; candidos autem in montibus detineri, nec in planities descendere scito, & Helvetiam, Alpes, Sueciam aliasve Septentrionis regiones tenere, & ingruente hyeme pilum, reliquis communem exuunt, & primo quidem cinereum, tandem vero candidum induunt. Color albus rapaces decipit aves, siquidem nivi, tunc terram obtegenti, respondet, & color æstivus, solo accedens, venatorem. Hi itaque lepores montium, non solum aquilam, vulturem, aliasve ex rapinæ avibus sibi hostes habent, sed etiam vulpes montium, flavido-albidi qui sunt coloris. *Plinius* Alpium lepores, ex nive, hyemis nutrimento, candorem recipere censet, herbam nive obtectam illos quærere concedimus, aut nive vesci quis crederet? *Scaliger* candoris causam ex intuitu nivis continuo, matris utero gerentis imaginationi infixio deducit, aut hæc si essent, nonne viridia forent animalium aliqua saltem, herbæ viriditate matris ante oculos obvia. Aerem ad commutandum pili colorem facere credimus, & Lubecæ vel cavea inclusum lepo-

leporum Livonicum, ingruente hieme albedinem induisse observat *Paullini*. Frequentiores ceterum in regionibus Septentrionis, ac nostris, lepores candidi. *Henricus Elli* in itinere ad fretum *Hudsonii*, cuniculos, lepores, & perdices illius regionis, exuto ferrugineo seu fulvo, alias sibi communi colore, candidum cum hyeme induere docet. Et quidem alios docere addit, quod vel pennæ vel pili obscuriores effluant, candidi autem succedant, ast ille contrarium expertus, hyemis initio apices saltem pilorum in cuniculis, albos, radices vero haud adeo frigori expositas, pristino adhuc colore conspexit.

Pro nutrimenti & pascui abundantia, vel majori vel minori pinguedinis copia, & magnitudine differunt, imo maximos interdum agnoscingunt. Immerito autem *Aristoteles* & *Aelianus* omnem prorsus adipem abjudicare leporibus, vel continui sui motus causa, vel temperamenti ariditatis; hodie enim, arte, lepores pinguescere notum; sic v. g. avena valde pinguescunt, nimis recenti tamen, *Paullino* teste, pereunt. Et habitationis respectu, alii montes, alii campos apertos, rursus alii tandem, humida loca & paludosa tenent. Priores omnibus aliis præstantiores habentur, & corporis elegantia, & nigritate, & pilorum frequentia & carnis excellentia; illi levitate ac cursus celeritate reliquos superant; hi tandem, omnibus pigriores, inferiores, & lepræ obnoxii habentur. Sunt, ut venatores volunt, alii, qui tantum sentiunt muscum, ut vel canes, illos persequendo, in furorem rapiantur. Cornibus quoque instructos existisse docet *Thomas Bartholin*, *Georgius Seger*, & *Olaus Wormius*, quorum crania inter apparatus curiosorum naturæ reposita fuere. Quorum causam in *Lagographia* sua disquirens *Paullini*, ex inopinato cervi vel capræ adspectu, utero gerenti lepori obvio, tantam putat enasci impressionem in cranio embryonis teneri, ut spiritus animales ac liquores alii eo delati coagulentur & cornuum in formam excrescant.

Quod ad cognoscendam sexus differentiam spectat, *Jacobus du Fouilloux*, marem ex terra resurgentem, anum ac si pilis exutus fuisset, albidum, & humeros plerumque fulvos, longis quibusdam pilis confitos præbere docet; brevius quoque quam foemella caput & magis rotundum, barbæ pilos longiores, aures tandem breves, albidos, latos; foemellam vero caput longius & constrictum, aures magnos & pilum humerorum cinereo-nigrum. Excrementa etiam maris aridiora, minora & magis cuspidata esse solent, foemina enim major minori nocturna obambulatione defatigatur. Mas enim regias vias, & loca aperta, foemella autem astutior, breviores conficit cursus, & arbuscula circumspatiatur; noctu etiam agros ingressa, ad longum sulcos sequitur, & ubi frugum copiam reperit, pastum commoratur, imo ad satietatem expleta reliqua decerpit, decerpta relinquit. Canum persequutione pressa, septies pluriesve latibulum suum cursu circumdat, masculus autem vix bis seu terve, post autem, quam longissime potest, latibulo relicto, aufugit.

Jam leporis descriptionem anatomicam ex *Blasio* & *Valentini* haurire liceat.

Pellem lepus ostendit tenuissimam, membranofam & transparentem, huic inferiorem panniculum carnosum subtiliorem, cum omnibus musculis humani abdominis, exceptis tamen pyramidalibus; nullum epiploon, &

ventriculum, cujus medio inferitur œsophagus, in hyponchondro sinistro, sub diaphragmate situm, oblongum, unicum, sed specie duplicem, ac duplicis generis jussula continentem, alterum scilicet ex sinistra, ubi membranæ tenuiores, humidius; alterum ex dextra, pylorum versus, ubi fortiores sunt membranæ, aridius. Quibus præfultis jam causam ruminationis in lepore quæras, quem licet uno saltem ventriculo, & dentibus incisoriis in utraque maxilla instructum, adtamen inter ruminantia refert Deuteronomion. Causam ita explicat *Mercurialis*: lepori & cuniculo, quum exiguitatis ergo, plures ventriculi esse nequirent, defectum eorum intestina gracilia explent, & Cœcum, alias exiguum, in illis vastissimum; & *Waldungus*, Mercurialem sequutus, cœcum chylo semper repletum, quarti stomachi locum, quo ultima præparatio chylo accedit, obtinere & supplere censet. Ast supplemento quid opus, quum eandem esse constet conformationem agni intestinorum. Et si spatium tantum cœco tributum fuerit, quidni potius plures ventriculi? hos enim, nec intestina, ad ruminationem facere constat. Quidquod vel concessio, quod ventriculi officio cœcum fungatur, qui ad ruminationem conferre posset? Numquam enim ex cœco ad gulam denuo manducanda alimenta readscendere possunt, obstat scilicet summum distantia utriusvis spatium, obstant & valvulæ regressum impedientes, ut valvula cœci, plures alias efformante, & ab altera ad alteram extremitatem intestini pertingente, & in spiralem circumvoluta. Colon rugosum & Cœco strictius circulis tenuissimis circumdatum; & in mesenterio renibusque obviis sæpe est adeps abundantissimus, verno iu primis & autumnii tempore. Renes magni & cavi, imo dexter sinistro altior lumbis nexus, vermibus interdum scatent, corpori maciem eximiam inducentibus. Ureteres exigui, collo vesicæ urinariæ, magnæ, oblongæ, 8. digitis longæ & 4. latæ, inferebantur. Lien exiguus, gracilis & in extremitate cuspidatus, longitudine ac latitudine digitum hominis minimum referebat. Hepar tribus constabat lobis magnis, & exigua appendice, maximus illorum fissura quadam in binas partes dividebatur, quarum maximam fellis vesiculam, pyramidalem, exiguam, & parenchymo hepatis profundissime immerfam recipiebat. Sæpius fel monstruosæ magnitudinis est, sæpius racemus hydatidum illi ex pede nexus, sæpius parenchymum glandulis plenum lenticularibus, vermes continentibus, vel ulceribus & pustulis, præsertim in lepore lepra laborante. Pancreas ex sinistra sub ventriculo procurrit, post lienem ultra dimidiam sui partem cohæret, & multum denique a canale choledico egeritur, hic autem, dimidio digito a pyloro Duodenum intrat. Vesiculæ spermaticæ orificio vesicæ urinariæ superjacent. Bini etiam sunt testiculi spermatici, abdominis tegumentis obtekti, 3. transversorum digitorum longi, 1. digiti lati & $\frac{1}{2}$. crassi, ac funiculis, lumbis qui adhærent, obvoluti atque detenti. Tunica tantum albuginea obtekti sunt, substantia autem glandulosa, nec quædam cavitas in illis adparet, ex utroque etiam latere prostata, quasi pro cervicali habent seu fulcro. Membrum genitale nervosum, cuspidatum, 9. digitis longum & anum versus reflexum est; hinc & retrorsum urinam leporis eiici constat, nec tamen, ut alii volunt, tergo obverso coit, sed ut tigris, leo, camelus, catus, alii, fœmellam supinam conscendit. Membri tandem in radice glandulosæ ac cinereæ adsunt prostatæ, nullam sui cavitatem ostendentes; & membro oppositum extra pel-

pellē, foraminulum, vulvæ simillimum, ac canale tortuosissimo continuatum, in prostates tandem egeritur. Hinc vulgi error, lepores omnes esse hermaphroditas, ut *Plinius* & *Ælianus* confirmant. Duplicem erroris fontem detegit *Sebezius*, qui & marem & foemellam simili ratione urinam reddere, ac in leporis omnis inguinibus, profluentem reperiri dicit glandem, ex qua liquor singularis destillat; quam quum in quovis lepore reperierint venatores ac pro testiculis habuerint; omnem illi leporem marem & foemellam esse crediderunt; nec tamen pro testiculis habeantur, siquidem utrique sexui communes, nec conductu, ex illis ad membrum genitale proficiscente instructi sunt. Alio etiam errore *Plinius*, quot lepori sunt anni, totidem etiam sub cauda foraminula esse adserit.

Pulmones flavidi, & cordi circumjacentes ternos utrinque in lobos separantur, quorum unus maximus, reliqui autem minores, & septimus spongiosus medium, dorsum versus, locum occupat. Cor, ratione corporis, magnum est, ut in animalibus timidis omnibus, (refragante tamen experientia,) esse vult *Plinius*. Cordis pulsu jam dudum desinente, palpitantes adhuc auriculas vidimus, imo utrumque leporis foemellæ ventriculum sclopeti globulo perforatum, illam tamen sexaginta passuum spatium peregrisse antequam mortua terram prolaberetur.

Foemellæ in perinæo binos sinus laterales reperit *Wepfer*, materia quadam ceræ simili, ac leporem fragrante expletos, materia ista ad sinum deportabatur glandula conglomerata, foraminulum in extremitate præbente; glandula enim compressa similem edidit liquorem. Eisdem sinus eademque glandulas *Willoughby* observavit, ac materia fetida, aurium foribus simili, repletas reperit. Alius quidam Anatomix peritus in lepore foemella, corpus aliquod tendinosum ac glandem referens, detexit, ac pro clitoride habet. Vagina, œsophagi instar lævis, & in orificio suo multis carunculis albidis, acuum nodos referentibus, confita erat. Et clitoris quum ultra matricis membranas proprius emereret, hanc altitudinem situ adtingere videtur ideo, ut coitu, tunicam vaginæ lævem maris genitali membro circumducatur, & ad spermā eo citius ejiciendum adigat. 5. fere transversis a vulva digitis bina foramina reperiuntur, quorum minus ad vesicam, majus autem ad matricem in duo cornua abeuntem conducit. Dextrum ex cornibus gracile & contiguum, sinistrum vero 5. nodis distinctum erat atque gibbosum. Transienti stylo facile patet cornu vacuum, plenum vero difficile. Jam vero altero cornuum vacuo, altero autem pleno reperto, facilis & frequentissima videtur superfœtatio in lepore. Matris ubi placenta adhærebat incrassescerebat, & placenta, una cum foetu excrevens, spatulæ compressione facilis a matrice separabatur, particulis tamen alteris sibi adhærentibus. Quinque ibi embryones albos, & fabæ magnitudinem explentes, membranis suis innatare vidimus; caput in his maximum, punctulum utrinque nigrum, nigro circulo circumdatum ostendebat, quod oculi propullulandi gemmam censemus. Et aures dorso adglutinati jam in apices exhibant, & in digitos distincti pedes, & latera & cauda separata conspiciebantur; abdomen ejus musculis ac pelle carens, purpureum hepatis initium ostendebat, venam umbilicalem quod excipiebat. Quam eleganter circumvoluta intestina nivea, quam facile vel minimo ex motu corruentia omnia, ac si

ex coagulo lactis composita forent, imo soli expositum totum corpus statim exarescens, albumen seu ranarum sperma, nec corpus membris instructum fuisset. Matricis testiculi magni, flaccidis & innumeris punctis nigro rubris confiti erant, quorum ille qui vacuum cornu spectabat, retentus, eandem ubivis consistentiam, eundemque quem superficies, colorem exhibebat; alter autem fœcundato cornu nexus, & quinque globulos fulvos complectens, spongiosæ erat substantiæ, alibi solidioris, alibi autem mollioris, & globulorum, in medio concavorum color internus, nucem moschatam æquiparabat. Quæ corpuscula quum numero embryonum cornu fœcundati responderent, pro folliculis seu reservatoriis ovorum fœcundatorum, quales in avibus, ovis exclusis observamus, jure habenda videntur.

Venatorum quendam paucis horis ex morte matris binos fœtus corpori ejus extraxisse & lacte vaccino nutriisse novimus. Ex quo adparet matrem fœtui supravivere posse. Matrici (cujus substantia non est, nisi crassior membrana:) detenti fœtus, pedes anteriores, auribus, hos autem dorso, & posteriores, abdomini superstratos habent. Oculos vero, capitis instar, prægrandes, exacte oclusos; dentes utriusque maxillæ anteriores jam protuberantes, chorion tenue & multis vasculis, placentæ nexis, confitum; amnion adhuc tenuius liquore plenum, funiculum umbilicalem denique quatuor ex vasis, uraco, vena & duabus arteriis compositum. Testibus *Ephemerid. Germ. Dec. II. Anni X. p. 234. George Nannæus D.* observat, in matrice fœtum, ac si bimestris fuisset, petrefactum, imo alios ex matrice in abdomen delapsos, & membrana fulva, mumia instar obvolutos fuisse repertos.

Ut autem sua experientia edoctus *Benjamin Scharff D.* hermaphroditas inter lepores reperiri docet, sic & monstra illorum existere novimus. Sic *Ulmæ* in horto *Erasmi Geutschens*, anno 1621. leporem duplici corpore, 8. pedibus & 4. auribus donatum, repertum, refert *Salomon Reiselius D.*, & ex altera sua parte fatigatum; altera pro continuando cursu, Jani instar, usum fuisse. Sic *Turckenhemiæ* ad *Sarcam*, anno 1583. leporem 3. auribus & duobus corporibus, ac octo pedibus, duobus primis in altum elatis, venatione inventum, & *Fridelshemiam*, *Electori Palatinatus Joanni Casimiro* transmissum esse docet *Georgius Sebastianus Jungius D.* Et in nundinis *Brunsvicensibus Franciscus Paullini D.* leporem 3. auribus & 8. pedibus instructum observavit. Testibus tandem *Actis Regiæ Academiæ Scientiarum Anni 1700. p. 41. Cel. Lemery* Academiæ lepusculos binos a capite ad pectus sibi nexos exhibuit. Unum illis caput & rostrum, ast quatuor erant aures; gulæ locum exigua obtinebat cavitas, apertura pro recipiendis alimentis destituta; interim vitæ producendæ modus ac ratio adfuit, etenim manu venatoris capti fuerunt. Duplex itaque animal quum silvam intraret, alius dextram, alius lepusculorum sinistram petebat. Unum ipsi cor, unus pulmo, unus stomachus, sana omnia ac bene disposita erant. Imo frequentiores sunt lepores bicipites.

Quod tandem leporis skeletum adtinet, caput ejus erat latum, os frontale etiam per medium divisum majorem ostendebat apophysin retrorsum extensam. Os occipitale & orbita oculi, & os, glandem nasi constituens maxima; & eadem erat longitudo nasi ossibus, nec tamen nares adeo ac

in aliis prominebant. His inferiora sunt ossa illa, quorum in extremitate duos videbis dentes, longos, reflexos & vel latos, vel cuspidatos, quapropter in neutra maxillarum alios dentes observabis. Septem colli vertebrae, & XII. costas laeves lataeque numeravimus, ex quibus 7. erant spuriae. Sterni partium sexta vel ultima, cartilagini hominis xiphoidi accedit vertebrae autem thoracis superiores posteriores suas habent strictiores apophyses, sensim imum tendentes, undecimae autem duodecimaeque vertebrae quae sunt apophyses, haec breviores & latiores sursum ducuntur. Singularis quoque est armi apophysiumque ejus figura, apophysi scilicet spinosae, longissimae, alia adjacet tenuissima, & coracoidae similis, lumborum vertebrae fortissimae, apophysibus inter se variantibus & diversimode transectis instructae sunt. Sex igitur vertebrarum tres superiores, 5. apophyses ante, & 5. post se exhibent, anteriorum binae primae laterales, fortissimae, latae, & bifidae sunt extremitatis; tertia autem, sive media pariter lata & longa est; una posteriorum ascendendo binas vertebrae adjacentis descendentes recipit, reliquae binae adscendentibus junguntur. Tribus vero vertebrarum reliquis apophyses eadem sunt, excepta tamen illa, quae interius ex corpore vertebrae progreditur. Vertebrae inferius os adparebit, Sacro simile, posteriore sua parte, alio quodam, illoque adscendente suffultum. Caudae in initio vertebra longa est fortisque, ac robustissima apophyse media externa instructa, qualem & secundae & tertiae vertebrarum esse observabis. Vertebrae reliquae latiores, ultimae tandem magis ovali figurae accedunt. Pedes anteriores flexiles & posterioribus longiores, infima parte quasi vulpinos referunt, nisi quod duobus saltem, nec tribus officulis, pollex sit compositus. Imo & in carpo officulum, brevius tamen, ut in vulpe & lupo, digiti instar extensum videbis.

Leporem vero animalia omnia calliditate, & vel Astrologum quemvis caeli permutationis cognitione superare dicunt. *Jacobus de Fouilloux* est qui tribus primis anni mensibus catulientes lepores, vel 8. ad decem milliarium itinere, foemellas quærere dicit, aut patriae amore, patria si foemellas alit, ea detineri. Copiosissimum autem in numerum multiplicantur, ut si vel quatuor lepores saltem, septo, antiquorum more, immiseris, brevi illud leporibus abundantissimum videris. Semel saltem ad bis quotannis leporem foemellam foetus edere falso censent alii, *Schwenckfeld* autem quovis anni tempore & coire docet lepores, & foetus edere, imo vel utero gerentes superfætationi esse obnoxias, & quovis mense binos, rarius ternos, rarissime plures emittere foetus; venatorum quoque observationibus constat, foemellam vix dum foetus ediderit, iteratum maris coitum adpetere, imo vel utero gerentem, coitu novo foecundari, & si centum captaveris, nonaginta illarum utero gerere, experieris. Constat majorem foemellarum esse numerum, quam masculorum, & invidia ductum par leporum, nullos nisi foetus suos eadem in regione perferre, alienos autem expellere, quapropter etiam quo plures venatione lepores captaveris, eo abundantior ibi copiam reperies, advenientibus scilicet alienis. Septem ad decem annos, imo adhuc plures annos vivere dicuntur masculi, quamvis sint salacissimi. Lacteis plantis uterque sexus nutritur, ut cichoreo sylvestri, lactuca sylvestri, brassica, tuberibus, pomis, uvis, similibusque,

terra autem hyemis nive oblecta, durioribus, & arborum, præsertim frugiferarum & arbustorum corticibus; acetosam quoque silvestrem seu pratensem peramare dicuntur, & inter homines educati, exuta feritate mansueti fiunt & domestici. Sic Anglus quidam cicuratum leporem ad regulas artis saltasse, & saltando pedibus posterioribus tympanum pro temporis dimensione, tetigisse, imo adeo omnem præ canibus timorem deposuisse refert, ut jam dentibus, jam unguibus ipse illos peteret. *Paullino* teste, Chirurgico quodam Prusso felis erat, quæ ex leporis coitu conceperat, quæ quum foetus edendi conatu frustra deludaret, ille operatione quam cæsariam dicunt, binas ex utero feliculas & lepusculum unum protraxit. Addit ex socio *Romelio*, ruricolam aliquem lepusculos ruri inventos domum reportasse, & feli lactandos subdidisse, felem vero singulari in illos adfectu, diutius lac eisdem præbuisse. Avo suo adeo cicuratum leporem fuisse docet *Scaliger*, ut sæpius cum canibus venationi interesset, ac sanguinem fumante ore, domum rediret. *Paullini* docet: Gubernatori Aldorfensi fuisse leporem cicurem, qui canis instar, hominum vestigia insequiebatur, jam cum canibus felibusque colludebat, jam de fenestra in plateam respiciebat, jam mensæ accumbentibus sese immiscebat, imo quavis apposita delibabat. Qui quum urinam vasi ex stanno confecto immittere solebat, deficiente quondam vase, in mensam profiliit, & patinam stanneam urina implevit. Pedum collisione cibos exposcere solebat; & strepitu tintinnabulorum, monili suo adfixorum, vel maximos quosque canes profugabat; nutrimenta manu sibi porrecta accipiebat, & canis seu felis instar, demulcentium manus patiebatur.

Leporis venationem & jucundissimam, & periculis, alias frequentibus, exemptam esse quum norint: nec omnibus lepores venandi facultatem largiti sunt Principes; hæc enim, ut exemplo dicta comprobem, Germanorum equitibus illis saltem data est, qui nec aula detinentur, nec castra sequuntur, sed prædiorum atque villarum suarum curam respiciunt; & ruricolis animalium noxiorum venatio saltem permissa est, quam si transgrediuntur, hic oculis occæcatis, illic capite truncato pœnam luunt. Sic & *Jacobus de Fouilloux* venandi artis peritissimus, leporis venationem & summo venantium delectamento cedere, & parciorebus sumtibus perfici censeret; illi enim cursu certantium canum suorum præstantissimos cognoscunt, & leporis vaserrimi astutiam canes evitando, mirantur. Quanta ac quotuplex quæso est ejus calliditas! Pluvioso enim cœlo plus quam alias recta procurrit via, & silvam adtingens non ingreditur, sed in limine subsistens transeuntes canes expectat, qui quum transierint, ille ex silva redit, quo venerat, eo revertitur. Imo si tota die frustra leporem insequuti canes postridie eodem conducantur, & eundem eadem loca transire, eodem artificio uti videbis. Ipsemet ego, sic Auctor, leporum unum illumque callidissimum observasse novi, qui exaudito cornu venatorio, latibulum relinquebat, & stagnum 2. milliariis spatio remotum natando petiebat, mediisque inter juncos requiescebat. Alium sæpius vidi, qui, vel binis horis cursu canes evitans, alium denique explorabat, & latibulum suum petendo, hospitem canibus exposuit; alios vel tria stagna transnantes, quorum brevissimum 80. pedum latitudinem exæquabat; alios post 2. horarum cursum sub porta septi gregis ovini, transeundo, jam intra

fru-

frumentum, jam medium gregem sese recipientes; alios terram intrantes exauditibus canibus, alios alteri septi lateri adrepentes, ut septo saltem intermedio a canibus separarentur; alios cursu exhaustos ruinarum fastigia conscendere, foveas intrare ac illis delitescere; alios tandem fluvium 8. fere passuum latum, vel viciis hinc inde transnatare. Illum igitur canem venaticum, & inquirendi calliditate & cursus vehementia, vel captu difficillimis feris sufficere scito, & judicato, quem leporem insectandi arte callere vides. Septembrem, Octobrem & Novembrem, menses, optimum habeas tempus, quo canes leporem venandi artem edoceantur, tunc enim & moderatior est solis cœlique calor, & lepusculi, nondum satis callidi, frequentiores canibus insectantibus obveniunt, hi autem iterato eorum adspectu satius quam fuga nimis remota edocebuntur. Frumento autem viridi dum lepores vescuntur, fortiolem, canesque magis allicientem odorem exhalant, quam reliquo anni tempore; adtamen vel natura fortiolem alii aliis nidorem spirant, & canibus gratiolem, ut lepores silvestres magni leprosi, & aquæ vicini. Qui autem ex cuniculorum genere, ferrugineum ostendunt colorem pili, hi & parciorem odorem emittunt, nec adeo desiderantur a canibus. Fortissimi plurimum sunt aliosque cursu superant, qui serpilli fasciculos pascunt. Sic & alii aliis calidiores & in primis foemellæ, breviora ac sæpius reiterata fugæ spatia constituunt, ac eo insequentes canes robustiores defatigant, qui pro suo ardore animal quærunt, in cuius persequutione omnes vires impendere possint. Quod si igitur nimis longa via defatigatum canem terram prolabi videris, vestigia leporis solo vel pulveri impressas ipse indagator; hæc vero facilis cognosces, forma enim pedis in lepore est acuta, ac cuspidem cultri referens, & ungulas suas rectas semper terræ infigit, nec umquam aperto pede seu dilatato, sed in cuspidem contracto lepus aufugit. Varium denique solum & anni tempus, canes leporis sensu privare constat, ut hyems, & planities solidæ seu pinguiore, siquidem siue pilis obductus pes, siue terræ pinguedo faciunt ad delendum vestigii odorem, & planitie nulla quum sint arbuta nulla virgulta, nec ullus relinquitur transeuntis odor. Sic quoque flores dum abundant, odor qui ex illis procedit fortior est hoc, qui ex lepore proficiscitur. Nec tamen glacie terram obducente canes venatum educas, ne soleas deterant cursu, ungulasque perdant, quidquod celerior leporis, pilosis pedibus instructi cursus tum esse solet.

Quæ omnia, cum his, quæ ad instructionem canum & ad ipsam leporis venationem spectant, fusius in *re venatoria*, auctore *Jacobo de Fouilloux*, perscripta leguntur.

Singulari tandem artificio venatorum quidam lepores adlicere se posse credunt, dum nudi pedis digitis testiculum leporis intermittunt, tum vero in prato, rore matutino adhuc irrigato, obambulant. Relicto enim testiculi odore copiosissimos lepores adcurrere censent, quod tamen haud adeo *Paullino* videtur. Vel leporis utero gerentis matricem in pulverem reducunt, ac corii frusto inspergunt, quo advolare lepores illi quidem ducunt, *Paullinus* autem dubitat.

Vox Gallica: *Lièvre* ex ablativo Latino: *lepore*, & alterum nomen: *Bouquet*, ex *Bouc*, quod hircum designat, diminutivum, lubricitatis ergo ei tributum videtur. Ebræi illum *Arnebat* dicunt, Chaldæi: *Arnaba*, Arabes: *Ernab*,

Ernab, Græci: *Lagôs* vel *Lagôos*, Itali: *Lepre* seu: *lievora*, Hispani: *Lièvre*, Germani Belgique: *Haas* vel *Hase*, Angli tandem & Sueci: *Hare*. *Levreteau* denique seu *Levrant*, Gallorum diminutiva ex Latino: *lepusculus* exorta videntur.

Omnes vero leporis partes plenæ sunt olei, plenæ salis volatilis & terræ. Nostratum palato hodie est gratissimus, & antiquorum erat delitiis, ut illud Martialis:

Inter quadrupedes, gloria prima lepus.

Junior autem, ac carne & pinguedine instructus feligatur, quamvis aliorum delitiis recentes editi veniant, quos nimium viscidos, ac saluti nocivos judicamus. Nimis vetustior lepus autem, digestu difficilis & humoris crassi ac melancholici causa, nimius, graviores & torpescientes reddit homines qui eo vescuntur. Optimo autem nutrimento horum, per hyemem venit, qui ætate vel juniores, & sanguine, vel pinguedine corporis abundant, quibus autem humorum terrestrium & melancholicorum copia est, nimio imo omni ejus usu abstinendo:

Medicinæ usibus, cor, hepar, pulmones & sanguis ex lepore veniunt, dum exsiccata ac in pulverem redacta, dosi ℥j. ad ʒj. cum aliqua aqua conveniente, ad retinendam dysenteriam & quodvis alvi profluvium, urinam menstruaque mulierum provocanda, & contra epilepsiam adhibere jubet. Externe adhibitus leporis sanguis, lenticulas maculasque faciei delere, & eo irrigata telæ lineæ portio, erysipelatem, adplicatione profligare, saltem lenire, dicitur. Renes & testiculi arefacti & in pulverem redacti dosi ℥j. ad ʒj. pro attenuando renis calculo, expellenda saburra, & vesica corroboranda veniunt. En quod D. *Lebenwald*, testis oculati testimonio comprobatum, legimus in *Ephem. Germ. Dec. II. Anni III. pag. 160.* Liber Baro Germani Imperii variis jam annis ex calculo renis & colica nephritica laborans, sæpius varios calculos cum urina reddiderat, qui canales urinæ feliciter transeundo, nulli umquam exitu fuerant impediti. Accidit, ut calculus vel solito major vel inæqualior in urethra subsisteret, & non solum doloris atrocissimi causa evaderet, nec nisi per guttas destillantem urinam emitteret, sed vel suppressionem ejus totam, accedente inflammatione, minaretur. Adhibitis in cassum omnibus, quæ ab arte iuventa vel pro relaxando urethræ canali, vel promovendo calculi egressu, vel instrumentorum ope confringendo calculo, alias adhiberi solent, jam urethræ inter cavernæ corpora incidendæ, & sic protrahendo calculo accingebantur, dum Chirurgorum aliquis sequens medium, nescio a quonam prescriptum protulit, adhibuit, sicque incisionis periculum atque dolores avertit. Vesicam scilicet leporis recentem, ac urina plenam vase quodam probe occluso calcinari curavit, & specillum oleo ex amygdalis dulcibus irrigatum huic cineri obvolvitur, sic quum urethræ introducto specillo calculus tangeret, ille confractus statim per frustra cum urinæ copia egressus est. Salus Baroni redibat, & Physicorum studio perquisitionem causæ auctor relinquit.

Fel leporis, pro linimento adhibuit oculos exacuat & corneæ maculas delet. Pilus ex lepore sanguinis vasi aperto inditus ad retinendas hemorrhagias confert. Et notissimum illud *Galen*i unguentum, pro retinendo sanguine in arteriotomia, ex partibus æqualibus pili leporini adusti, thuris, myr-

myrrharum, & aloes compositum est. Ad provocandam urinam pili leporini vase occluso calcinati gr. xii. ad 3ß. interne recipienda præscribunt. Nec non adeps ejus maturitatem adcelerans, externe tumoribus, ad promovendam suppurationem citiorem adplicatur. Coagulum quod in fundo stomachi lepusculi videbis, veneno obstat, partum accelerat, ventris profluvium reprimat, contra epilepsiam facit, & dosi 3ß. ad 3j. accipitur. Leporis tandem astragalus seu talus in pulverem reduci, & contra colicam, saburram, pleuritim, epilepsiam partumque difficiliorem, dosi gr. xx. ad ʒij. commendari solet.

Cuniculus : Offic. Schröd. 284. Lemer. 299. Boffch. 264. Herm. Cynof. 717. Blas. 58. Dal. Pharm. 444. Merr. Pin. 168. Charl. Exerc. 23. Schvenckf. de *Quadr.* 86. Gesn. de *Quadr.* digit. 362. Aldrov. de *Quadr.* dig 382. Jonst. de *Quadr.* 111. Raii Syn. *Anim. Quadr.* 205. *Lepus cauda brevissima*, pupillis rubris, Linn. Faun. Suec. 20. *Lepus caudatus*, obscure cinereus. Briss. *Quadr.* 140. *Cuniculus nostras seu vulgaris*, *Lepus minor*, *lepus parvus*, sive *lepusculus*, *Lepus terræ fessor*, seu *terram fodiens*. Nonnull.

Cuniculus, quem Galli hodie: *lapin*, olim vero: *Connil*, *Counin*, *Connin*, & *foemella*, quam hodie: *lapine* seu *hase*, olim: *Connille*, *Counille*, *Connine* seu *Counine*, & foetus, quem nunc *lapereau* seu *lapreau*, olim: *Connilleau*, vel *Counilleau* adpellavere, cuniculus inquam, ubivis frequens, & lepori similis, sed minor est. Rubra enim pupilla a lepore differt, quem alias & labio superiore conscisso, & oculorum magnitudine refert. Pedibus quibusvis in digitos 5. exeuntibus gaudet, anterioribus brevioribus quam posteriores, & planta pilosa, cauda brevi, supra nigra, subtus candida. Corporis pilus brevis, tactu mollis & jam cinereus, jam ferrugineus, sub ventre autem candidus est. En tibi cuniculum silvestrem; cicuratos autem ubique frequentes, jam fulvei coloris reperies, jam ferruginei, jam cinerei, jam albi nigrique, imo argentei-cinerei, quem magni æstimari solent. In domo rustica, cui Gallice: titulus est: *maison rustique*, Carolus Stefanus & Joannes Liebault scribunt: silvestri pilum esse fulviorum rarioremque, corpus agilius parviusque, carnem denique jucundior, nec adeo melancholicam ac domestici, qui exigui est exercitii ac cursus, & major, crassior, segniorque, quem si forsan ad silvestres abierit, vulpis aliorumque sui hostium fraudis ac artificii ignarum statim illi devorant. Silvestrem igitur ex pilo pedum & sub cauda obvio, illoque ferrugineo, cognosces; cave autem ne adustum, (ut aliis imposituri faciunt) pilum pro ferrugineo habeas, & fraudem detegendi ergo illum vel naso admoveto, vel aqua abluito. Juniorem denique dijudicabis vel ex eminentia in exteriori anteriorum pedum parte supra articulum, lenticulæ instar, obvia, vel ex naso magis cuspidato, vel auribus tenerioribus.

Nec est, quod in descriptione ejus anatomica multi fimus, siquidem omnes suas partes internas, leporis partibus simillimas dicit Paullinus in *Lagographia* sua. Addas, qui fusior de cuniculo agit, Blasium, & variorum descriptiones reperies, in primis Needhami de foetus membranis, & Regnier de Graaff historiam generationis, qui ab hora dimidia ex coitu, ad vigebmum & nonum diem qui ultimus seu penultimus ante partum est, successivam eorum perfectionem describit.

Fortior autem est lepore, & animi acrior, & ad iram provocatus diutius

tius ac acerrimum tentat certamen, & sua cura vivit, & sua sibi granaria constituit, nec vel remotissimus, eorum obliviscitur. Hinc etiam cuniculum in granario suo decedere dicit proverbium, natura enim summo in vulpes timore incitatus, foveam dum egreditur, hinc inde discurret, saltusque edendo gestit, nullus vero alios curat. Matutino tempore & vespere foveam suam egreditur, reliquo eadem delitescit, cursu celerrimus est, ast latibulo expulsus facilis captu. Voce ac auditu gaudet acutiori, & continuo excubias agens, vel minimo strepitu præceps ruit in fugam. Habitationis locum si periculosum credat, permutat, & leporis instar, ruminatur, & iisdem, quibus ille, cibis vescitur; imo tantæ est fecunditatis ut præ copia, vel agros & campos deprædetur quidquod annonæ caritatem regioni inducat, tantam enim in insulis Balearidis, hodie Majorca & Minorca dictis devastationem, imo frumenti inopiam olim cuniculos produxisse, loquitur historia, ut habitantibus transmigrandum fuerit. Terram posterioribus pedibus conculcando, ingratum edere solet sonum, & quum odio imo timore feratur in aquam, numquam fere bibit. Nuperrime littora sua Ligaris quum egrederetur, observatum est, naturæ instinctu cuniculorum plures, arborum ramos & apices pro asylo petiisse, & ex cortice vitam, usque dum aquæ recesserint conservasse, quum multis aliorum millibus aqua pereundum fuerit. Ex fecundissimis est cuniculus, & ad coitum pronus, quem vel sexto ætatis mense jam adpetit, & quovis mense fœmella silvestris, binos ad senos fœtus edere solet, dum sub cœlo calidiore vivant, quæ enim in Helvetia, teste *Gesnero*, numquam, nisi admodum leni hyeme partus effundunt. Addit *Carolus Stefanus*, bis terve quotannis domesticos, singulis vero mensibus silvestres, fœtus edere, & nostra nos experientia docet: decem imo plures una fœtus edere domesticos, eosque per 21. dierum spatium lacte uberum nutrire, simulque utero gestare, quippe quæ & faciles superfoetationem experiuntur, & fœtu vix emisso, coitus desiderio denuo accenduntur; summa sua fecunditate hermaphroditæ omnes habentur ab aliis; contrarius autem *Carolus Stefanus* animalium fœmellas non masculos, ex legibus naturæ pro concipiendo destinatas esse docet. Cuniculorum fœtus ac lepusculos vel recentes natos apertis oculis diem conspicere docent auctores, renuit experientia, eosque nono vel undecimo saltem vitæ die, visus perfectionem adtingere testatur. Summa autem cura sunt matres pro fœtuum educatione, eosque pilo ventris tenuissimo obtektos fovant, & ab insidiis masculorum recondunt; quorum aliquem si quis forsan tetigerit, mater irritata eum vel relinquit, vel contemptus ergo morsibus petit, enecat. Fœmellæ autem ætates provectiores, suos fœtus recentes natos devorare observatum est. Fœmellæ etiam masculis interdum pro causa certaminis veniunt, qui acerrimo aliquoties prælio jam sibi aures, jam pedes mutilant; interdum vel canes fugant, & acriter insequuntur. Feles cum cuniculis junioribus primo quidem colludere, post eos devorare solent. Et *Cel. de Reaumur in arte, fœmeti ope ova excludendi*, cuniculos cum gallinis sæpissime coeuntes, nec tamen ullum coitus adeo singularis effectum sese observasse refert. Aurelii tandem ex coitu felis cum cuniculo fœtus provenisse legimus, alios quidem patri, alios matri magis accedentes, cinereos, cuniculorum instar, & cicures, lactis cupidos, cæterum iisdem, quibus cuniculi, cibis contentos.

Cuniculi, quos & silvestres dicunt, arbusto quodam excæso immissi, & libertate sua fruente sua sibi quærent alimenta; arbutum illud Galli adpellant: *garenne*; domestici autem singulari quodam loco, muro circumdato, & Gallis: *clapier* dicto, nutriuntur. Silvam itaque prioribus domicilium, meridiem seu orientem versus constituito, solis enim ac caloris amicus cuniculus, terram septentrioni & occidenti expositam suffodere renuit. Solum vero, domesticorum habitationi destinatum, leve sit & param arenosum, quo sua sponte, foveas, nec tamen recedentes sibi effodere possint. Cave autem ne paludosum sit, siquidem præter humiditatem & frigus nihil magis cuniculis contrarium est. Quo vastior habitationis eorum circuitus, eo major provenientium numerus erit. Silvestrium familiam constituturus, cuniculos utero gerentes eidem silvæ immittas, nec nisi tertio demum anno, eodemque parcius eos venari incipias. Tres masculos centum fœmellis adjungas. Domesticorum vero domicilio trigenis fœmellis singulos masculos addas, quanto major enim fœmellarum numerus, tanto major cuniculorum copia aderit. Mares præsertim, quum cuniculos minores enecare solent, quo matribus uti possint, quantum fieri potest, extirpare studeo. Masculorum odii in fœtus haud nesciæ matres, illos editum, foveam, ad brachii unius longitudinem sub terra effodiunt, & illius in imo nidum sibi construunt musco ex arboribus deportato, post, uti diximus, pilos abdominis extrahunt, & fœtus illis obtektos a frigore defendunt, tum foveæ introitum vel fœno vel terra, vel quovis alio obturant, & ab insidiis masculi muniunt. Noctu iisdem degunt, ingruente autem die, cibos quæsitum exeunt, introitum obturant, imo ne ullum foraminis vestigium supersit, pedibus natibusque terram deprimunt, post ad alios revertuntur. Silvestrium fœmellæ suos nidos in viis ac aliis locis tritis construere solent, infrequentiores enim ibi degere norunt hostes sibi acerrimos, vulpes scilicet & feles silvestres. Tangere noli, si quod foramen obturatum, ubi cuniculi vivunt, detexeris, ne vel masculus idem ingressus fœtus enecare possit, vel mater, tactum nidum abhorrescens relinquat, & fœtibus sit pereundum.

Domesticorum cibo, quævis obvia veniunt, ut fœnum, fructus, plantæ, herbæ recentes, alia, silvestres autem, fructibus vivunt & foliis, corticibus radicisque plantarum, & præsertim plantis aromaticis, ut thymio, serpillio, junipero, quibus gulosissimi inhiant, & nidorem suum debent. Quum vero copiosiori eorum numero haud suffecerit herbarum quantitas, aliquantum hordei seu avenæ terræ inspergas, necesse est. Hyeme etiam fœnum adportes. Et si spectaculum aliis præparare velis jucundum, hanc illis consuetudinem inducas, ut exaudito cognito sibilo, cohortim accurrant ad cibum. Noxia autem esse solet eorum vicinia, quippe qui frumentum vel cohortatim ad caulem usque depascunt, & vitium gemmas decerpunt, quidquod sub nive, plantarum cortices & radices vel 3. pedum profundos corrodunt. Quæ evitatum satis fœni præbeas, hyeme & veris initio. Alii autem ex vineis & agris amoturi cuniculos, virgulas saliceas extremitate altera sulphure illinunt, & ex altera terræ infigunt, ac tamquam septo, præservandum agrum seu vineam cingunt, post igne accendunt virgulas, quæ quum per quatuor ad quinque dies, cuniculis exosum sulphuris odorem conservent, quaterno quovis die reiteranda venit cautio, tam
diu,

diu, quam cuniculorum voracitati, teneriores vites & progerminans frumentum subjacent. Excedentem vero cuniculorum copiam non nisi venatione, sclopetis & casse reprimere poteris.

Castratione tandem gratissimum saporem, & lepusculorum carni accedentem cuniculis induci posse docet in *Theatro Agriculturae Olivier de Serres*. Satius tamen feceris, si domesticos, peracta castratione, silvestrium numero immiseris. Fœmellæ masculis, aut fœmellis castrati cuniculi adeo anteferendi sunt, quam gallinæ gallus castratus. Facillime autem castrantur, dummodo acuminato cultro testiculos reseces, & vulnere, sebo vetustiori, probe uncto, nec consuto, ad cæteros remittas, sic enim ex semetipsis sanantur. Quocumque anni tempore illos castraveris perinde est, omni enim novos edit mater, omni recentes succrescunt. Et *Bradley* in *Ephemeridibus Operariorum*, cuniculos juniores masculos castrari docet, quo majorem & carnis & pinguedinis quantitatem induant.

Ebræi cuniculum: *Saphan* adpellant, Arabes: *Vebar*, Græci: *Dasypous*, Cœnidos, Itali: *Coniglio*, Hispani: *Conèio*, Germani: *Koeniglein*, *Kaninichen*, Belgii: *Conyn*, Angli: *Rabit* seu *Cony*, Sueci tandem: *Kanin*. Vox Gallica: *Lapin*, *Menagio* teste, ex *leporis* nomine oritur, *lapereau* autem ex *leporello*. Gaulorum vox: *Connin*, & quæ huic accedunt, reliquæ ex Latina: *Cuniculus* derivandæ sunt.

Cæterum olei & salis volatilis copia constans, frequentiore usum mensis, quam Medicinæ exhibet; dummodo carne teneriori & multa abundans, nec justo recentior, nec nimis antiquus sit, ille enim humores viscosos, hic vero carnem aridam, duram ac concoctu difficilem suppeditat. Hyeme tamen teneriorem exhibet carnem, quam quidem æstate, ac omnibus in universum, moderatior ejus usus convenientissimus est.

Medicina non nisi adipe ejus utitur; qui quum nervis conveniat & resolvendi virtute instructus sit, membra contracta, indurata & atrophata illo adfricari suadet, quo sibi restituantur; imo ad resolvendos tumores scirrhusos, & ad corroborandos articulos illum commendat.

Pellem denique & cuniculi & leporis pluris faciunt, & variis vestimentorum generibus subdere solent.

L U T R A.

Lutra. Offic. Lemer. 522. Bossch. de *Aquat.* 374. Herm. Cynos. 732. Blas. 90. Valent. Amphith. Zoot. 174. Dal. Pharm. 449. Merr. Pin. 167. Charl. Exerc. 47. Schonev. Ichth. 46. Bellon. de *Aquat.* 31. Schvenckf. *Quadr.* 107. Gesn. de *Quadr.* digit. 683. Aldrov. de *Quadr.* digit. 294. Jonst. de *Quadr.* 104. Scott. Phys. 45. Raii Syn. 186. *Lutra*, digitis omnibus æqualibus, Linn. Faun. Suec. 10. *Lutra castanei coloris*. Briss. *Quadr.* 277. *Lutris*, *Lutrix*, *Leutria*, *Lytra*, *Canir* seu *Canicula fluviatilis*; *Catus aquæ seu paludis*. Quorumd.

Lutra, amphibium vafrum & callidum felem magnitudine longitudineque superat, nec castorem attingit. Caput ejus alii canis, alii foinæ capiti adsimilant, & rostrum præbet reflexum, multos barbæ pilos in maxilla superiore & angulo gutturis, sex in utraque maxilla dentes incisivos, oculos exiguos, aures brevissimos, rotundos, & oculis inferiores; cru-

crura brevia, quinque in omni pede digitos ungulis armatos, & anserum anatumve instar, membrana cohærentes; ita ut natando quum pedes ante protrudit, digiti coeant, quum vero retrorsum, dilatati digiti atque membranae extensæ, majorem aquæ quantitatem capere, & eo violentius protrudere possint animal. Pollex digitis reliquis brevior, calcari adunco similis, & cauda longa & ab initio crassa in cuspidem exit. Corporis superficies cum cauda & digitis pilo obteguntur leni, haud adeo longo & fere castaneo; guttur autem, pectus & venter cinereo-albido.

Jam ad descriptionem ejus anatomicam, quam ex Cel. *Perault Actis ad historiam naturalem animantium inservientibus*, depromere liceat.

Sunt, sic Acta, qui cum lutra castorem, illi simillimum, permutavere, plurimi tamen utrumque probe distinguunt. Varia quibus inter se differre dicuntur, frustra quæсивimus, varia iidem ab aliis omissa deteximus. *Plinius*, *Belon* & *Physicorum* plures caudæ saltem varietatem constituunt, castoris nempe squamosæ, in lutra autem villosæ. *Georgius Agricola* & *Albertus*, quatuor lutræ pedes caninis similes, omnes alii castoris pedibus æquales esse dicunt, nos neutrum vidimus. *Herodotus* autem, testiculos castoris, lutræ, aliorumque, quæ capite quadrato instructa adpellat, communi virtute contra morbos matricis facere, sed *Brasavola* pro epilepsia, paralyti & nervorum adfectionibus venire censet; ast illi castoris testiculos cum sacculis permiscuisse videntur, non enim nisi hi tantum pro morbis nervorum ac matricis adhibentur. Sic quæ de castore *Plinius*, ea de lutra *Aristoteles* perhibet, quod scilicet tantam in hominem feratur rabie, ut dentibus arreptum ejus membrum, non, nisi exaudito fractorum ossium strepitu, tandem missum faciat. Vox Græca: *loutron*, ex qua derivandum ejus est nomen, balneum seu lavacrum denotando lutram a castore distinetam innuit, hæc enim fluvios saltem, numquam vero maris aquam, balneo seu ablutioni insufficientem, castor autem nunc maria, nunc fluvios ingreditur.

Nec non utriusque magnitudinem & membrorum rationem, aliquod discrimen intercedebat. Quem enim disquisivimus, castor, $3\frac{1}{2}$. pedis longitudinem, una cum cauda, lutra autem 3. pedum & 2. digitorum explebat, cauda autem longiore, hinc corpore multum brevior constabat. Castoris caput ab extremo rostro ad occiput $5\frac{1}{2}$. lutræ, non nisi $4\frac{1}{2}$. digitorum longum; anteriores castoris pedes a cubito ad extremitatem digitorum $6\frac{1}{2}$. lutræ autem 5. digitorum longos; posteriores tandem in castore, a talo ad apices digitorum 6. in lutra autem $3\frac{1}{2}$. digitos explere vidimus. Quam *Belon* descripsit, illi pedes fuisse dicit vulpinis similes, sed crassiores, id quod pro longitudinis ratione intelligendum esse habemus; sunt enim vulpinis multo breviores & mustelæ similes, siquidem & illa corpore longo pedibusque brevibus instructa est. Pedes posteriores castoris pedibus accedebant, 5. digitos exhibebant tenues & longos, & pedis anserini instar, membrana cohærentes, anteriores tandem posterioribus similes & castoris pedibus dissimiles erant, etenim & horum digiti membrana intermedia necgebantur, nec tamen, ut castoris, manum similitudine adtingebant. Digitorum singuli inter se æquales, ternis constabant phalangibus, nec majori spatio a reliquis pollex, quam inter se illi distabat. Rostrum, oculos & capitis formam haud adeo diversa præbebat a castore, dentes

saltem nec adeo cuspidati, nec tam fortes erant, quam castoris; hinc quoque *Aristotelem* pro castore lutram habuisse censemus, quum de morsus sui vi eximia differit. Haud enim quatuor magnos longosque incisorios, castori proprios lepori, cicuro & gliri, lutra nostra ostendebat, omnes canis seu lupi dentibus similes, & canini incisoriis longiores; dentibus igitur omnis inter lutram & canem similitudo absolvebatur, quam capite contineri testatur *Belon*, & *Ælianus* lutram dicit canem fluviatilem. Aures, ut in castore, exigui, oculis inferiores, maxillæque inferiori erant vicini.

Pilus castorei vix dimidium longitudine adtingebat, hic enim 18., lutræ autem longissimus 8. erat linearum. Aliqualis erat coloris utriusque differentia, nec tamen, ut auctores volunt, castoris pilus magis accedebat cinereo, etenim lutræ pilus sub gutture, in stomacho & ventre magis cinereus quam castoris erat. Cauda brevior ac corpus, aut longior, quam pedes, ostendebat pilum. Pilus vero reliquus omnis, ut castoreus, castaneus, & duplicis speciei, vel longioris, erectæ, fortioris & fulvioris, vel brevioris, crispæ, mollioris ac cinereæ erat. Ab omnibus vero brutis æque ac castore lutram maxime distinguit, singularissime conformatum matricis orificium externum, ibi enim ut in mulieribus & clitoridem & nymphas deteximus. Clitoris, 3. lineis longa, nympharum in parte superiore ultra earundem junctionem sita erat, & membranis constabat ac ligamentis, officulum 2. lineis longum continentibus.

Major autem partium interiorum respectu, differentia erat lutræ a castore. Sic hepar lutræ 6. castoris autem 5. lobis constabat. Lien castoris, figuræ erat cylindricæ, & gracilis, quippe qui longitudine 7. digitos, diametro autem 10. lineas adtingebat, lien e contrario lutræ 4½. digitis longus, & 1½. latus erat. Connexione autem sibi soli propria, non, ut alias ventriculo, sed epiploo adhærebat. Castoris renes vix 2. digitis longi, aut lutræ 3. longi & 2. lati, ac pro conformatione castoris renibus dissimiles, urfi renes referebant, nec nisi numero saltem renum quibus constabant, exiguorum, diversi. In urso enim 52. in lutra autem 10. renes exiguos vidimus, inter se separatos, & suo singulos parenchymo instructos, sua vena, sua arteria emulgente, imo tertio quodam vase, quod non erat, nisi ramus alveoli ex dilatatione urethræ exorti, ac decem sua brachia singulis renum exiguorum connectentis. His autem præter membranam commune involucrum, magna adhuc fibrarum copia erat, quibus quasi in unum cumulum colligebantur, renibus longiorem solito figuram conciliantem. Alius igitur ex renum parvorum numero ab reliquis remotior, & apicem figuræ hujus effingens, quasi capsulam atrabiliariam constituebat. Pancreas, ut in castore & reliquis, conglomeratis constabat glandulis, sed magis solito inter se separatis. Pulmonem denique, ut & castoris, 7. lobos constituisse observatum est, sex quidem sibi æquales, septimum vero minimum, & quasi appendicem sexti.

Frustra quæсивimus foramen illud ovale in vasibus cordis, cujus ope, utero inclusa animalia absque respiratione degere posse creduntur, illius rationem & usum, quo sanguinis scilicet circulationi exaugendæ veniunt, explendo. Jam in castore quæsilveramus, quem sub aqua detentum, ac cessante respiratione, eodem illo instructum esse oporteret; nec tamen fo-

foramen illud apertum, nec alios conductus, sanguinis circulationi patentes, nisi hos, qui sunt pulmoni, deteximus. Brevi tamen ante occlusi foraminis vestigia aderant, & quum edocti fuisset, castori diutius stabulo suo detento denegatam fuisse aquam ingrediendi facultatem; sensim foramen illud de se ipso obturatum esse, id quod in animalibus, brevi ex quo nata sunt accidere novimus, dum respirandi facultas superveniens, omnem foraminis usum aufert. In lutra e contrario nullum vestigium deteximus foraminis sanguinem ex vena cava in arteriam venosam transmittentis: confirmant observata & hæc, quæ aliorum observationibus constant, quod scilicet respirationis ergo sæpius supra aquam extollatur lutra, nec castor, qui diutius sub aqua detineri solet.

In omnibus lutræ partibus reliquis nihil singularis, nihil observatu digni reperire licuit nobis. Hactenus Acta.

Nunc autem quædam ex *Ephemeridibus Germaniæ* adferamus, ad anatomiam spectantia.

Joannes Conradus de Muralto in lutra quadam epiploon observavit magnum, ex fundo stomachi enatum, multo adipe intertextum, duplex, intestinorum complicationibus inhærens, lien tandem & pancreati connexum, intestina idem ille vidit caninis similia, & in extremitate recti, interioreque Sphincteris parte binas vesiculas oblongas, humore coagulato & casei putridi foetorem referente plenas, intus autem pellicula dura, rubicunda ac tali obductas, qualem in gallinarum ingluvie videmus; imo adhuc aliam humiditatem, vesicularum compressione variis ex foraminulis recti cavitatem respicientibus egredientem, quæ vesiculæ a sphinctere separata & aere arefacta, trium mensium spatio, humiditatem suam, animalis Zibethici materiæ similem & consistentiæ, & coloris, & odoris acutissimi ratione, reddebant. De usu vesicularum autem, & materiæ eisdem contentæ nil certi constat, forsitan liquorem istum spargendo pisces allicere quærit, etenim præparatas piscium escas, has præ aliis, materias ingredi novimus, quæ acutioris sunt odoris; & lutra in oris plerumque degens, ne fluminis medium petens, pisces ad litus accersendi medio quodam utatur, necesse est, imo speciem habet veritatis. Vesica urinaria & magnitudine & figura, felis vesicam referebat. Oblongi testiculi, ut in canibus ex abdomine pendebant; membrum genitale, osseum multas utrinque glandulas inguinales, & membranæ auxilio testiculis adhærentes ostendebat, quibus venæ abdominis deferentes, inferebantur. *George Segerus* tandem addit, membrum genitale minimi digiti longitudinem pertegisse, ex quo constat, os durum in extremitate sua divisum, recurvatum & cartilagine obductum fuisse. Quibus nostra quoque experientia suffragatur.

Sceletum lutræ caput jam prominens ut piscis, jam excavatum ostendit, & 7. vertebrae colli, 14. dorsi, 7. lumborum & 18. caudæ.

Ubi autem fluvios, lacus & stagna piscibus plenos, ibi & lutras, *Gesnero* teste invenies, & in Italia, Gallia, Germania, Helvetia, Anglia ac Scandinavia. Sæpius acrior dum prædæ insistit, retia piscatorum incurrit. Infrequentiores esse lutres apud Italos, edocemur ex *Aldrovando*. Pelle, inquit *Belon*, fortissima nec aquam transmittente tegitur lutra; loca autem quæ frequentare solet, exploraturi, ad vestigia posteriorum ejus pe-

dum, & ad excrementa, piscium spinis plena adtendunt. Lutra autem aqua degens, piscem cauda sua percutere quærit, quo ille perterritus ripam scabrosam petat, & eo facilius suæ prædæ veniat; gemmis etiam herbarum verno tempore vescitur. Prædatum vero multum mane ex habitaculo arbutis & juncis littoralibus interjacente progreditur, & contrario alveo, ad miliaris spatium, devehitur. Fame autem expleta, sensim prono alveo revertens defertur, habitaculum se recipit, & eo suos foetus reponit, quos, qui stagnorum suorum curam gerunt, & qui lutris captandis occupantur, exeunte autumnno, flaccescente herba & fronde, explorare solent atque indagantur.

Vir Cel. *Lemery junior* in *tractatu de alimentis*, fluviorum jacturam efficit lutas, quæ non solum maxima piscium quantitate se ipsas explent, sed & summam copiam secum domum deportant. Quum ergo vel antequam eo pertigerint, vel parum exinde pisces emoriantur, putrescant, & lutræ ipsi summum foetorem concilient: carnem ejus nihili plerumque æstimant, nec comedunt, sed subtracta pelle, cadaveris instar, rejicere solent.

His autem a Cel. *Lemery* dictis, & nostra experientia accedit. Sapius aquæ in superficiem egredienti respirationi opus est, & haud ita pridem aqua suffocatam reperimus lutram in rete piscatorio, quæ lucium adhuc viventem stomacho continebat. Præcipuum lutræ nutrimentum piscis esse solet, omnibus tamen, quibus potiri potest, avibus aquaticis vescitur. Piscibus omnibus celerior in aqua, ast in terra dum degit, facilem cursu canes pertingunt, hos vero suis dentibus profligare solet. Vita pariter ac pelle tenacissima gaudet, & accepto vulnere, in aquam profilit ac cum sanguine vitam amittit. Ignem pertimescit, & conspecto illo in junco fluviorum densos sese recipit; insulas exiguas, si quas pertingere potest, peramat, sin minus stagno fluvioque vicinas intrat vel salices vel alias arbores excavatas: Omnem hinc inde arborem stagno vicinam perquiras, lutræ captator, & si semel fefelleris, ibidem illam exinde certo reperiendam teneas. Ex destructione lutræ autem stagnorum conservationem pendere scito.

En tibi, L. B. curiosum illum Cel. *Joannis Loot Universitatis Lundenses*, quæ in *Scania* est, & *Academiæ Holmiensis Sodalis* methodum vivas lutas captandi, & captas pisces capiendi artem edocendi, qualis ex translatione Cel. *de Prevost*, in *Diario Exotico* mensis Junii 1755. legitur:

Lutram, amphibium, tantam fluminibus, quantam silvis ursus & vulpes desolationem inferre notum est, quæ quum pulmonibus solito majoribus & excavatis gaudeat, aeris magna quantitate adsumta, diu sub aqua degere potest. Pisces ipsi nutrimento præcipuo, quæ media ætate Veneris æstum patitur, & quos 9. circiter hebdomadibus utero gessit, ternis seu quaternis emittere solet foetus, & vel in rivuli oram, vel in stagni arbutum reponere. Pellem omni anno tempore, catulitionis spatio excepto, æstimant; hoc enim facilis abit pilus. Cæterum quum non solum magnam piscium quantitatem devorent, sed & retia piscatorum dirumpant; en, quam cogitavi artem easdem vel extirpandi, vel cicures utilesque reddendi.

Fluvii, quos frequentant, lapidibus plerumque & arborum truncis feu

tamis pleni, ac littore scabroso instructi esse solent. Quemvis vero obvium lapidem majorem lutra conscendit, suaque excrementa eo reponit, His igitur locum, quo latet, facilis deteges; illoque detecto facillime ipsas captabis. Nunc vero non nisi de lutris vel ex captatione in vita conservandis, agamus.

Captaturo igitur veniat instrumentum ferreum, forcipes seu forfices communes figura exæquans, sed magnitudine, dupla seu tripla superans. Quod quum distensum fuerit, cuivis semicirculo facculum ex rete ferreo confectum ita adnectas, ut forcipis coeuntis ope circulum efformatum habeas. Instrumentum vero frequentiore adfrictu purgare, & intestinis piscium oblinere negligas caveto. Tunc illud instrumentum lapidum uni imponas, acutiori tamen, & adeo saltem ex aqua prominenti, ut aquæ altitudo pro facculis obtegendis sufficiat. Post patellæ forcipis pisciculumnectas, imo piscium intestina & capita rescissa imponas, & quum pisciculum arripit lutra, coeunt forcipis circuli, statim vivens atque illæsa capta est. Et hac quidem ratione antiquioribus insidiæ struuntur. Juniores enim edoctis canibus capiuntur, qui rivuli lapidibus seu truncis arborum prominentibus inhærendo illas adpellando accersunt. Quorum voces audiens veterior statim aufugit, juniores vero remanent, & nisi coacti ad exeundum, suo latibulo inhærent. Si itaque nulla aufugerit, junior adest interdum una, inter dum & duæ. Detecto igitur foveæ suæ introitu rete illum obducas, & baculo ferreo seu quolibet alio lutram fovea expellas, quæ quum nullibi effugere potest, rete incurrit. Nec tamen, nisi peracto S. Romigii festo lutras juniores captare quæras: Alias enim nimis teneræ ætatis forent, & segniores edocta discerent. Captam denique ab initio studiosus alligato, & piscibus ac aqua per aliquot dies nutrito, post lacte, herbis, aliisque aquam sensim permisceto, tandem vero omnem pro nutrimento piscesubtrahito, & panem aliave substituito; nec ex pisce, nisi capita porrigito.

In loco igitur ab hominibus frequentato alligatam dum tenes lutram, cicurare illam studeas. Post machinam ex stramine conficias $\frac{1}{4}$. cubiti longam, & pro capacitate gutturi lutræ respondentem, ex utraque ejus extremitate bina ligna, $\frac{1}{4}$. cubiti longa decussim constituas, & machinam corio obtegas. Tunc funiculum haud ita latum accipias, & ex altera sua extremitate 4. ad 5. globulis, nucis magnitudine, ac quaternis cuspidibus sibi oppositis, confitis transmittas, nexo alio funiculo aliquot cubitorum longo, pro freno. Hujus ductui ut obsequium præstet, lutram hinc inde conducendo adsuefacias, & vocabulo quodam: ut hoc: accede, prolato, eo usque funiculi ope lutram accerseas, quo voci obsequatur. Post manu monile jam obvertas jam constringas, & lutram ut rictum aperiat, adigas. Accipiendam ipsi præbeas machinam, alio quodam vocabulo, ut hoc: accipe, utens, quam si missam fecerit, monilis constrictione punias; hæc vero edocta, & acceptam machinam remittere ediscat, voce: remitte, exaudita. Quæ omnia eo usque continuabis, quo vix accepto jussu, præcepta statim exsequatur. Tunc prope ad terram altera manu machinam, altera funiculum, ut diximus, teneas, illum machinæ admoveas; hanc primo retrahas, tandem vero, constricto collo, & prolato: accipe, verbo, admoveas, illique accipiendam permittas. Quum denique vel mini-

mo funiculi motui obsequium & obedientiam præstare cœperit, *accede*, dicas & funiculum adtrahas, tum: *remitte*, & prædam furripias. Machinæ aliquot post dies, vel chirothecam, vel strophium aliave substituas. Si tandem voci obtemperans, nullo amplius funiculi admonitu eget, rursus alia, gulam ei moventia substituas, & ut omnia intacta adporter, adigas. His omnibus peractis fluvium limpidi & profundi in littus tecum conducas, & pisciculos aliquot mortuos, alios item majusculos vivos deportes. Primo igitur mortuos projicias, quos quum arripuerit, revocandus & ad omittendam prædam cogendus est. Post vero vivos pari modo quum adportaverit capita his subtrahenda, pro præmio ipsi reddas. Et ejusmodi lutræ ope, quandam *Benedictum Nicsson*, Christianopolitanum, tantos quotidie pisces captasse novimus, quantos & ipse & familia pro nutrimento desiderabat. Cæterum quum & ipsæ lutræ pro nutrimento pisces quærant, summæ utilitati cederet ejusmodi earum institutio, quippe quæ non solum nullum amplius retibus detrimentum, & fluviis jacturam, sed potius utilitatem hominibus possent adferre. Edocendas autem juniores præoptes, antiquiores enim, catulitionis tempore facilis, naturæ instinctum exsequendo, educationis præcepta negligerent. Juniori autem, & anni spatium ab aqua remotæ, facilis natura alia inducitur. Quidquid ope unius lutræ cicurata, omnes ex vicinia reliquas, nullo negotio, captare poteris. Id quod illius *Nilsonii* experientia comprobatur, cujus ad hortum rivulos alluit, molam agens, hunc utrinque ripa continet altissima, ita, ut molæ alveo inclusa lutra egredi nequeat. Nec tamen nova res est, sed olim jam apud Svecos frequentissima. *Fonstom* enim in *historia animalium*, Sveciæ cocos, lutris uti docet ad adportandos ex piscinis pisces.

Lutram Græci adpellant: *Enudris*, Itali: *Lutra*, *Lodra*, *Lodria*, *Londra* seu *Lontra*, Hispani: *Nutria*, Poloni: *Widra*, Germani, Belgi, Angli: *Otter*, Sveci: *Utter*, Galli autem: *Loutre*, *Leure*, *Lueure*, *Luire*, *Louire* seu *Lutre*, nominibus, ex latino derivandis.

Omnes vero lutræ partes abundant & sale volatili & oleo. Ingratissimi cæterum saporis atque odoris sua est caro, dura, coriacea, succum crassorem & melancholicum producens, quorundam tamen cœnobiorum usui venit. Nec non delicatiorum mensis, assata præsertim adponitur, sed quomodocunque præparata, nec saporis grata evadit, nec corpori salubris.

Medicina tandem testiculis, hepate & adipe lutræ utitur. Hepar arefactum & in pulverem reductum dosi ℥j. ad ʒj. contra dysenteriam & alia alvi profluvia adhibetur. Alii per aliquot dies aceto maceratum furno arefaciunt, & multum virtutis hac præparandi ratione illi accedere censent. Testiculi contra epilepsiam facientes, castoreo tamen inferiores virtute, dosi ℥j. ad ʒj. cum aqua pœoniarum recipiuntur. Adeps tandem lutræ, pariter ac reliquorum piscium ne frigore quidem fluiditatis quidquam amittit, & quum resolvendi virtute ac degestiva gaudeat, contra dolores articulorum, corroborandos nervos, & ad flexibilitatem membrorum contractis inducendam, unguentis contra morbos articulorum digestivis mixtum adhiberi solet.

Pilus lutræ pileis conficiendis inservit, & pellem ejus variis vestimentorum generibus subdere moris est.

M A N A T I.

Manati. Offic. Schrod. 327. Gerner. 538. Hernand. 323. Charlet. de Pisc. 49. *Manatus*, Rondel. de Pisc. 490. *Manatus Rondeletii* Gesn. de Pisc. 253. *Manati Indorum*. Aldrov. de Pisc. 728. Jonst. de Pisc. 157. *Manati*, *Phocæ* genus, Clus. Exot. 132. *Manati seu Vacca Marina*, Raii Syn. Anim. Quadr. 193. Sloane Jam. 329. *Trichechus*, Arted. Jehth. 109. Linn. Syst. Nat. 50. *Manathi vel Manati*, *Incolarum Hispaniolæ & Hispanorum*; *Taurus seu Bos Marinus* Quorumd.

Cave confundas Manatum, cum Rosmaro, quem Americam tenentes Galli, *vaccam marinam*, seu *bestiam magnis dentibus instructam*, & *Phocas* nuncupat: *Canem marinum seu Vitulum maris*, nec cum *Vacca marina Belonii* seu *Phoca*. Utrique quidem magna similitudine accedit, manatus, ut infra docebimus, imo ejusdem generis esse videtur. Et quamvis non nisi binos habeat pedes, testibus auctorum omnibus, tanta tamen est similitudine quadrupedum, ut hisce illum adnumerare nulli dubitamus cum *Brissonio*, imo pedes ejus posteriores sub cauda latere, & facta dissectione detegi posse censemus.

Artedi, piscibus illum, more plurium adnumerat, & *Trichechum* dicit, nomine ex duobus vocabulis Græcis: *Thrix*, pilus, & *Jechthus*, piscis, composito, siquidem ex piscium numero ille solus pilosus sit. Longum manati corpus ille idem 10. ad 15. pedibus esse dicit, 6. ad 7. latum, & pondere 70. ad 100. libras attingere. Corporis peripheriam 3. circiter pedes exæquare, & caput esse oblongum, conglobatum, porcino simillimum, & oculos exiguos, & aurium loco foraminula in capite obvia; binos dentes utrinque prominentes spithami unius longos, & pollicis instar crassos, binas in pectore pinnas, 5. ossibus iisdemque membrana junctis, imo & digitis totidem, ternis articulis instructis compositas, nec contractionis capaces; caudam horizontalem, nec in dorso pinnam, bina in fœmellis ubera conglobata, pinnis pectoralibus interjacentia; partes genitales utriusque & umbilicum humanis similes, pellem crassam ac duram, pilos breves, rariores, ac cinereo-fulvos, fortes atque longissimos. Fluviorum freta inhabitare solet, & herba communi vel maris alga nutriri, Carnem exhibet candidam, saluti palatoque convenientem, & facilis curatur; gemitus & suspiria edit, hostes præcipuos crocodilum ac requiem habet, & diversa loca Africæ inhabitat, ut mare rubrum, Madagascar, insulam, Ceylan vicinum Manaar, insulas Moluccas, Philippinas, Antilles, Amazonarum fluvium, Brasiliam, Peru, aliaque.

Multus est in *Exoticis Crusius* circa Manati descriptionem, ex quo quum sua, hauriat *Artedi*, notatu digniora transcribamus.

Anno 1600. ex Oceano Occidentali captum piscem cetaceum, phocarum generis, Amstelodamum deportatum & vaccam maris adpellatum esse novimus. Quum enim & masculum & fœmellam enecaverant nautæ, uno eodemque anno, Amstelodami, non solum maris corium totum extensum, dorsoque ejus impositum fœtum; sed etiam aliquas fœmellæ costas, adhærente carne residua conspiciere obtigit, reliqua enim carne in itinere vescebantur nautæ. Quo facilius itaque partium inter se ratio cogno-

fceretur , foetum delineandum curavi , quem in ambulacro horti Academicæ Lugdunensis exinde suspenderunt . Inelegantissimam præ se ferre videbatur speciem , quippe qui capite vitulino , imo adhuc robustiore gaudebat , & oculis fere caninis , & pelle crassissima , dura , pilis rarioribus & cinereo-ferrugineis confita , imo 16 $\frac{1}{2}$. pedum longa ; corporis circuitu 7 $\frac{1}{2}$. pedum ; cruribus etiam prope humeros haud ita longis , pedibusque latis ac unguibus brevibus , nullo pedum posteriorum vestigio , sed cauda deformi quodammodo , lata , ac natatui ejus celerrimo , sic aiebant , inservienti ; ab umbilico etiam ad caudam sensim decresciente corpore , tum vero cauda in initio , paullulum crassiore gaudebat . In capite ejus calculos repertos esse dicebant , qui ad confringendum hominis calculum faciunt . Considerata autem in primis sua figura , Hispanorum *Manati* eum habui . En quæ in *historia naturali* cap. xxxi. *Franciscus Lopez de Gomara* , de *Manati* adfert , quæque , ubi de *Requiem* actum fuit , in *historia mediorum simplicium ex India Occidentali a Nicolao Monard adportatorum* , a me latine reddita , sequentibus adtuli : *Manati* , piscis in Europa ignotus , fluvios mariaque inhabitat , & binos tantum pedes , rotundos , ac elephanti instar in quatuor digitos exeuntes , prope humeros , & natanti inservientes ostendit . Ab umbilico ad caudam sensim decrescit . Adspectus est tremendi , & capitis bovini , rostro tamen tenuiore ac mento latiore , oculis minutissimis , nonnunquam 20. pedum longitudine , & corio durissimo , rarioribus pilis cinereis obsito . Foemellæ vaccarum more , vitulos emittunt , & binis ex uberibus lactis copiam præbent . Carnem ejus quadrupedis potius quam piscis carnem sapore refert , recens enim vituli , sale autem condita thunni saporem , sed gratiorem exhibet , imo diutius putredini obstat . Nec rancidus evadit unquam adeps suus seu sebum . Corium ejus præparatum varia utensilia incolis subministrat . Et qui in capite ejus reperiuntur calculi , contra colicam & calculos in homine adhibentur . Plerumque herbas in littore depascendo enecari , juniores quoque cassibus captari solent . Principem *Caramatexi* , per spatium 26. annorum in lacu *Guaynabo* detentum nutriisse dicunt , qui adeo cicur fuit , ut antiquorum *Delphino* nullus cederet , & vel manu sibi exhibitum cibum acciperet , & suo nomine : (quod *Mato* sonans , *Magnificum* denotat :) vocatus , aqua relicta , domum rependo petierit , ac nutrimento accepto in aquam reverteretur , comitantium spectatorum cantu exhilaratus ; interdum pueros suo dorso exciperet , & vel decies ex ripa , flumen transeundo ; ripam peteret , nec aquæ se submergeret , singulari incolis delectamento . Hispanorum unus , exploratum quanta sit corii durities , repetito ejus nomine : *Mato* , *Mato* , quondam ex aqua provocabat , & adscendentem jaculo petiebat , quo ille , quamvis levissimo tantum vulnere ictus , adeo irritabatur , ut ne quidem vocatus aquam amplius egrederetur , hominum barbatorum seu Hispanorum more indutorum adpectu . Excreto quondam fluvio *Naibonicot* , *Guaynabo* , lacum ingrediente , & ille *Manatus* una cum undis in mare deportatus fuit , principe & subditis ejus secessum ægre molesteque ferentibus . Sic & multo ante *Gomaram* , *Ferdinandus Oviedo* amplissimus fuit in describendo *manato* . Qui quum curiosa multa ac notatu digna referat , quæ in *historia naturali & generali Indiæ* Lib. 13. Cap. 10. perscripta reliquit , Latine reddita sic se habent .

Manatum piscem habemus maris, licet variis etiam in fluviis reperiat-
 tur; & requiem magnitudine latitudineque superet. Maximi illorum ad-
 spectu teterrimi, uteros similitudine adtingunt, quibus vinum dulce, Me-
 dinam, ex regionibus vicinis deportari solet. Caput manatus exhibet, bo-
 vino simillimum, & oculos corporis respectu, exiguos, binos bracchiorum
 loco, pedes, quibus natando utitur, & corpus corio obtectum nec squa-
 mis, cæterum mansuetudine tanta est, ut vel fluminum vada intret, &
 quas aqua detentus adtingere potest, herbas littoris depascatur. Quiquum
 aquæ in superficie obnatat, facilis Americæ incolarum in prædam abit, hi
 enim, cymba vecti, jaculis eum percutiunt, & funiculum longissimum,
 jaculi extremitati nexum, remittunt, simulac piscis ex vulnere accepto
 aufugit, alteri autem funis extremitati adnexum est ligni frustulum, quod
 & penitus submergenti funiculo, impedimento, & piscis præsentia signo
 cedit, ille autem effuso sanguine defatigatus & morti proximus littori ad-
 vehitur, tum vel piscator funiculo ad se recepto illum in ripam adtrahit,
 vel fluctuantibus undis eo confertur. Singulis magnitudinis ergo, protra-
 hendis vix bini boves sufficiunt. Tanta cæterum carnis suæ est præstantia,
 tantaque cum bovina similitudo, ut frustis saltem, nec integro pisce con-
 specto, & in primis recentem, pro bovina omnis haberet. Caro ejus are-
 facta seu sale conspersa diutius corruptioni resistit. Ipsemet ego anno
 1531. ejusdem aliquid ex insula S. Dominici in Hispaniam deportavi,
 quam omnes optimam bovinam Angliæ credidere, elixa autem thunni sa-
 porem referebat, quidquod superabat. Quos vero in capite suo gerunt,
 calculos, præstantissimos pro colica & nephritica habere solent. Hos enim
 calcinari, tum in pulverem reduci & cribro transmitti jubent, post autem
 varios per dies subsequentes, quovis mane, tantum pulveris, quantum
 regius Hispaniæ nummus pondere exæquat, cum vino optimo candido re-
 cipi, & dolores abire, calculus autem in glaream reductus una cum urina
 eiici dicitur. Variorum experientia comprobata teneo, quæ retuli, & ma-
 gno cum desiderio ab aliis quæsitos memini calculos istos. Bini singulis
 manatis, calculorum esse solent, nucem fere magnitudine exæquant, ast
 pro piscis mole, quantitate variantes. Alii enim vel 15. pedum longitu-
 dinem & 8. manuum transversarum crassitudinem superant; Binis quoque
 manati bracchiis brevibus seu manibus gaudet capiti proximis, ex quibus
 manati nomen derivandum esse censemus. Hispanorum idiomate enim an-
 teriores quadrupedum pedes, manus dicuntur, quum ergo manatus saltem
 anterioribus gaudeat, manuum nomine pedes ejus salutatos esse quid mi-
 rum? Aurium defectum foraminula explent auditui inservientia. Corium
 ejus, digiti r. crassum, cinereis rarissimisque pilis oblitum, vel pro cin-
 gulis, vel soleis, similibusque conficiendis inservire solet. Caudam ejus
 ubivis nervosam si in frustula dissectam, tum per 5. & plures dies sole
 arefactam frixeris, tota in adipem abit sive butyrum præstantissimum,
 neque enim rancidum evadit, nec saporem ingratum induit umquam, imo
 & lampadi nutrimentum, quidquod Medicinæ, ut alii volunt, varium ex-
 hibet usum. Bina tandem foemellæ sunt ubera in pectore, binos enim
 foetus una edit & lacte nutrit, id quod de nullo umquam pisce alio, nisi
 forsan Vitulo maris relatum reperi.

Manatum denique, antequam insula Hispanica hodie nostra, suis incolis
 de-

denudata fuerit, pisce, quem: *Reverso* dicunt, captum esse perhibent. Quæ nisi omnibus nota, cujusvis ore comprobata essent, & ego ut referam, harerem. Jam autem hunc *Reverso*, piscem esse scito unius spithamæ longum, & adspectu tetrum, animo vero acrem, ac sapius una cum reliquis captum, nec non inter delitias habitum, quippe qui carne arida ac dura nec viscosa gaudet, ut ipsimet experti sumus. Hunc itaque juvenem adhuc captum piscatores aqua maris, aliisve quæ sibi competunt alimentis nutriunt, usque dum sibi debitam magnitudinem adtigerit. Tunc tenuiori eum filo adligant, & ex cymba dum vel manatum vel piscem alium in superficie natantem conspexerint, Indorum aliquis eum manu permulcet, & suo idiomate ad fortitudinem in hostem acerrimum commonet, post vero missum facit, ille autem in testudinem vel piscem alium majorem cum impetu irruit, lateri vel ventri ejus sese adhæret ac comprimit, qui primo quidem hinc inde obversus altum maris petit, funiculo piscatoris sensim producto, & cortice in altera sui extremitate obvio piscis viam denotante, post autem deficientibus viribus natando littus petit. Tunc funiculum suum recipiendo piscator piscem seu testudinem ad cymbam adtrahit, quem vel in terram devolvere vel adhuc aqua inhærentem prorsus enecare student focii. Post etiam *Reverso* sua præda solvunt, ast multa cautione, quippe qui adeo firmiter ei nexus est, ut nimia vi dilaceraretur, nec tamen missam faceret prædam. Blanditiis igitur & gratiarum actione, eum ut desistat, commovent. *Reverso* itaque squamis per gradus dispositis, palati humani seu equini instar, spinisque acutissimis fortissimisque consitis, in maxima corporis parte & dorso in primis, nec ventre gaudet, & quia inversus seu dorso prædæ suæ nectitur, *Inverso* seu *Reverso* nomen accepit ab Hispanis. Alias autem, teste *Petro Martyre: Guaicano* dicitur. Blanditiarum suarum effectum Indi habent, satis stupidi, ea, quæ ex naturæ quodam instinctu perficit, quo sapius & testudinibus & aliis in Oceano repertis, *reverso* adhærentem videbis, qui non nisi longissimi temporis tractu abire solet.

Sufficerent ea, quæ de *Manato* & ex *Ichthyologia* Celeb. *Artedi*, & *Clusii Exoticis* hausta, hucusque adposuimus; ast quum dicta repetere, quam piscem adeo rarum in Europa ac plurimis ne quidem nomine cognitum, haud satis adcurate describere malimus: en sequentia ex viatoribus hodiernis, testibus oculatis accepta: Sic enim R. P. *Labat*, *Jacobita*, in *novo itinere suo ad insulas Americanas* I, Tom. II. pag. 200. Fretum Robertianum quum accederem, *Manati* foemellam, jaculorum ictibus confossam, qui *Viro Bouchard* erant nigri homines in terram protrahebant. Et multa quidem multoties ab eo recensita audiveram, ast primum hunc saltem meis oculis intueri licuit, frequentia hominum oras inhabitantium, infrequentissimum. Loca autem fluviis dissecta quærere solet, quippe qui semel bisve per diem, aquam fluviatilem, & herbam in fundo ejus obviam adpetit, accipitque, ast minimo strepitu exaudito aufugit, qui timore plenus, & acutiori quidem audiendi, ast obtusa admodum oculorum facultate gaudet; ut e contraria parte testudo surda acutissimam habet oculorum aciem. Hispani illum *Manati* seu *Manate*, id est: piscem manibus instructum, Galli autem: *Lamentin* adpellant, cui nos potius *vacca marinæ* nomen tribuendum esse censemus; quippe quæ & gula sua, & uberibus, imo ratione

foetus allactandi & emittendi vaccam refert . Longitudine ille 14. pedes & 9. digitos exæquabat, & capite gaudebat magno, gula lata maxillisque magnis, ac quibusdam pilis hispidis oblitis.

Oculi corporis respectu exigui, & aures bina quasi foraminula constuebant. Collum erat brevissimum ac forte, ac vix a reliquo corpore caput distinguitur. Qui autem binis pinnis collo inferioribus, & sub ventrem replicatis, manuum nomen tribuere, nullus video. Quum enim harum ope pisces reptando in terra progredi dixerint, nec sustentandæ corporis moli, sua sufficit virtus; nec ullum umquam ex sexcentis quos interrogavi, reperi, qui Manatum in terra sese vidisse profiteatur. Manus pinnae hæc ideo adpellatas credimus, quia eisdem ad deportandos & lactando retinendos foetus utitur. Testudinis pedes accurate referunt, pro mole tamen animalis majore & longiores sunt & fortiores. Jam ergo utrum pedes an manus dici debeant, tuum non nostrum erit dijudicare. Foemella ejus bina ubera 7. digitorum diametri, & 4. elevationis ostendebat, quorum papillæ, pollicis magnitudine & digiti longitudine erant seu prominentia. Ad caudam vero a capite ubique rotundus manati 8. pedes & 2. digitos circumferentia sua, & cauda palearis instar lata, 19. digitos longitudine, 15. latitudine maxima, & 3. circiter in apice, crassitudine, exæquabat. Corium in dorso fortissimum & duplo crassius bovino, sub ventre autem tenuius ostendebat, & colorem plerumque fulveum, grana hispida, pilosque rarissimos, longissimosque ejusdem coloris. Pondere suo octingentas libras explere & dicebatur, & mihi videbatur. Foetum suum simul cum matre captum, & 3. fere pedibus longum, pro cœna habuimus, latus caudæ scilicet veru assatum, reliquum corpus vero cum capite, varia ratione præparatum. Tanta autem similitudine & candoris, & saporis, & mollitiei carnem vitulinam referebat, ut nisi frustorum adhuc crudorum inspectione convictus, numquam ex pisce profectam credidissem!

Sciscitanti autem, qua captus fuerit, rationem, præsentium unus retulit, quod somno sopitum animal quum in vado fluminis Gallionum conspexisset, statim ille suum quæsi verit jaculum, funiculum & clavam. Jaculi ferrum 8. ad 9. digitis longum, & $2\frac{1}{2}$. digitis a cuspide quidam claviculus, & tubi in summo annulus aderat, cui altera funiculi extremitas necebat, ex altero ejus apice glomus ex albo ligno, cui funiculus circumvolvebatur, qui digitum crassitudine sua referebat. Quibus instructus ille absque strepitu quiescenti animali vicinus, jaculum pro viribus iniiciebat, socius alter autem funiculum remittens, glomum ad mare proiciebat. Piscis ictum persentiens, fugam petiit, quem cymbis suis & illi sequebantur, ligno aquæ supernatanti ducti. Hora tandem peracta, cessante ligni motu, mortem animalis jam defatigati, proximam cognoscentes, lignum cordæ cohærens arripiebant & cymbæ necebant; qui primum jaculo pisces transfixerat, secundum ipsi ictum, si res postulasset, præparaverat, & altera jaculi extremitate jam hinc jam illinc obversa, viam piscis denotabat, quam gubernator imitari studebat. Bini sociorum alii tandem cymbæ, pro conciliando pondere, infidebant. Percepto funis motu, fugam animal recepit, & cymbam velocius post se traxit, quam vel sex equorum rapidissimo cursu provolantem currum videris. Sic hora alia peracta,

fun-

fundum quemdam eminentiorem adtigit, ibi autem ab advenientibus piscatoribus prorsus enecatus est. Fœtus matrem sequutus, mortuæ adstabat, & uno jaculi ictui statim cedebat; hunc in cymbam contulerunt, ast matrem nimis ponderosam, fune ex cauda cymbæ adligabant, & sic aqua detentam protrahebant.

Herba vivunt 8. ad 10. digitis longa, recta, cuspidata, tenera ac elegantissime viridi, hinc inde in maribus obvia, qua & testudines nutriri observatum est. Jucundissimo autem spectaculo cedit, dum ex illo vescuntur, etenim herba inter manducandum, vel etiam dum dentibus conscinditur repentino motu in superficiem aquæ profilit.

Teste *Pometio* tandem in *historia pharmacorum generali* R. P. *du Tertre* Ordinis S. Dominici, quod descriptionem Manati, & qua capiendus sit, rationem adtinet, omnis fere cum R. P. *Labat* consentit. Nec non in *Historia Itinerum universali*, auctorem *historiæ S. Domingæ, insulæ*, observasse legimus in manate tantum non ea omnia, quæ de Sirenis atque Delphinis tradidere antiquiores; quæ tamen detectu difficillima esse addit. Sic numquam canit manatus, ast in terram protractus lacrymas effundit & moeret, cujus ergo Gallice: *Lamentin*, quasi sese lamentans adpellatur. Figura sua nullus Delphino accedit, accedit saltem maxima sua in humanum genus amicitia. Primus manatos pro Sirenis antiquorum habuit *Christophorus Columbus*; quem quidem, ut detectis majus pretium accederet, in mirabilia pronum, nemo hodie miratur, nemo sequitur. Vacca maris plerumque 16. ad 18. pedum longa, & 5. ad summum digitorum diametro, & a capite ad caudam conglobata, exinde autem per gradus depressa, caudam constituit, sua figura furni palam referentem, cæterum, ut pisces omnes dentibus destituti, valde timida est. *Manatee* nomen tot erroris causa sculptoribus evasit ac pictoribus, qui binos ipsi manus adfingunt, quum tamen non sint nisi binæ quasi pinnae, auribus vicinæ, extremitate sua latiores, quam in origine dentata, tribus divisionibus quatuor cuspideseffingentibus, quarum omnis callo quodam cornu formam repræsentante terminatur. Pro fœtibus saltem deportandis, ac ad sua ubera admovendis mater iisdem utitur, nec umquam in ripam egreditur, nec corporis moli sustinendæ adeo ficulnea fulcra sufficiunt. Imo si refluxus tempore, deficiente ab aqua in aridiore quodam loco subsederit, nec manibus istis sive brachiis vel minimum auxilium sibi adferre valet. Rictu aperto somnum capere solet, & adtenti piscatores tanto illos vulnerum numero configunt, ut faciles emoriantur & prædæ ipsis cedant. Quamdiu utero gerant, ignotum; bini tandem fœtus adhuc lactantes una cum matre captari solent.

Observat *Celeb. Raii*, quod *Diogeni*, *Platonis* de homine definitionem: *homo est animal bipes, plumis carens*, adgredienti, non ad gallum plumis exutum, sed vel ad manatum recurrisse suffecisset.

Quem itaque *Manati* vel *Manathi* dicunt Hispani, illum Ebræi adpellant: *Tachas* vel *Thachaseh*, Itali: *la Donna*, Lusitani: *Peçze-Mouller* seu *Muger*, Germani: *See-Kuhe*, Belgi: *See-Koejen*, Angli: *Manatee*, vel *Sea-Cow*, Amboinæ incolæ: *Dujung*, *Doujong*, Guianæ populi: *Cojumero*, & fluvii Amazonum oras accolentes: *Pege-Buy*. Gallicum vero ejus nomen: *Lamentin*, *Lamantin*, *Namantin*, quod lamentationis gemitusque sui frequentioris ergo inditum ipsi volunt alii, nos potius *Abbatis Prevost* auctoritate con-

confiſi, ut ille in *Lexico Manuali* ex voce Hiſpanica: *Manati* a nautis corrupta derivandum eſſe judicamus.

Caro tandem vaccæ marinæ palato optima, & ſaporis ratione thunni vel vituli fluviatilis carni accedens, ſed durior, paſſim 4. digitorum alto adipe obtegitur, iſdem, quibus porcinus uſibus inſerviente. Venit & pro butyro, dummodo liquefactus fuerit, nec adeo facilis rancidus evadit.

Medicinæ uſibus illi quatuor calculi veniunt, quos in capite ejus reperimus, oſſibusque ſimiles novimus. His enim febrem proſtigandi, & renum & veſicæ calculos reſolvendi eiiciendique, dolores tandem nephriticos leniendi virtus adjudicatur. Et doſi gr. xxi. ad ℥j. cum aliqua aqua conveniente præcipiuntur. Quos pro epilepſia commendat *Fridericus Hoffmann*. Adeps ejus emolliendi & reſolvendi facultate gaudere dicitur.

℞. Calculorum manati ℥ij.

Sanguinis dracon. ℥j.

Reducantur in pulverem, & probe miſceantur.

Febre autem tertiana verna laborans, per triduum, hora ante paroxyſmum una, pro doſi ℥j. accipiat, & tertiam partem potionis ſequentis pro vehiculo hauriat:

℞. Aquæ roſarum rubrarum ℥iij.

Succi aurant. expreſſi ℥vj.

Sacchari candidi pulveriſati ℥ß.

M. & dividas in iij. partes æquales.

M A R T E S.

TEmporum noſtrorum Phyſici ſub muſtelæ generico numero varias complectuntur ſpecies quadrupedum, corpore toto oblongo, pedibusque brevibus inſtructorum; eo enim referunt, 1. muſtelam flavam ſeu communem, 2. muſtelam candidam, ſeu Herminam, 3. riverram, 4. marterum domesticum & ſilveſtrem, marterum zibelinum, & illum Africæ pulchriorem, apud Europæos infrequentiore, & cicuratu facillimum, 5. foynam ſeu potius *Putois* Gallorum, 6. ichneumonem, glirem Pharaonis dictum, 7. muſtelam, Gallice: *Genette* dictam. Nobis autem non niſi de martero communi ſermo erit.

Martes. Offic. Lemer. 549. Boſſch. de *Quadr.* 306. Blaſ. 91. Charl. Onom. 19. Scott. Phyſ. 1068. Schvenckf. de *Quadr.* 110. Geſn. de *Quadr.* dig. 865. Aldrov. de *Quadr.* digit. 331. Jonſt. de *Quadr.* 107. *Martes*, aliis *Foyna*, Raii de *Quadr.* 200. *Mustela fulvo nigricans*, gula pallida, Linn. Faun. Suec. 7. *Martes saxorum*, non *fagorum*, ſeu domesticus. Klein. *Quad.* 64. *Mustela pilis in exortu albidis*, caſtaneo colore terminatis, veſtita, gutture albo, *Foyna*. Briff. *Quadr.* 246. *Mustela*, quæ *Martes*, quam *Foinum* vel *Foinam* dicimus; *Martes noſtras ſaxatilis*, *fugina tectorum*, domorum ſeu domestica, alba vel guttur album habens; *Mustela ſœnaria* ſeu grandior; *Marta*, *Martarus*, *Marterus*, *Marturus*, ſive *Marturellus*; *Gainus* vel *Scismus*. Nonnull.

Felem magnitudine adtingit, aſt longitudine parum ſuperat marterus, corporis etenim longitudo 1. pede & 5. digitis, caudæ autem 12. plerumque digitis abſolvitur; pedibus tamen ungulisque brevioribus gaudet. Corpus omne, gutture albido excepto, fulvus obtegit pilus, & aures ipſi
ſunt

sunt breves , lati atque rotundi , oculi noctu splendentes , nasus parum eminens ; maxillarum superior mollis , lingua lævis & longa , verrucis cuspidatis ac reflexis obsita , dentes albidissimi , asperi & inæquales , pili barbæ , ut feli , longiores , pedes in quinque digitos fere æquales divisi , undequaque pilosi , & semi-palmipedum more separati , pollex brevior , distans ac altior , cauda tandem pilo longiori & copioso composita .

Anatomicam marteri descriptionem *Bartholinus* & *Severinus* subministrabunt . Statim ab initio sub pelle extensæ adparent fibræ nervosæ , situ suo ac numero quibusvis costis respondentes ; tum membrana carnosæ , pelli fortissime cohærens , post musculi abdominis binis peritonæi membranarum intermediis ; cujus ergo & peritonæum crassissimum , & ad longum lineæ umbilico respondentis , nec ad latitudinem , nec inferiore sua parte carnosum . Deinde epiploon , inferius stomacho , lienis & intestinis adhærens ; quod sacculi instar quævis intestina complecti dicit *Bartholinus* . Post stomachus amplissimus , binis membranarum constans tenuissimis , interiore lævi , exteriori albida . Et intestina omnia inter se similia , spinæ , mediante membrana connexa , sed cæcum nullum . Et lien exiguus , rubicundus , oblongus , stomacho , ex sinistra epiploï parte adhærens . Nec non pancreas albida , & hepar pallidum 7. lobis compositum , inferiore scilicet ut gallinæ pedes , trifido , medio triangulari , & venæ cavæ parti , mediante membrana connexum . Imo renum dexter sinistro elevatior ; arteria emulgens sinistra dextræ longior ; & ex utraque parte cavæ venæ glandulæ rubicundæ vel flavæ . Spinam tandem pertingunt ramusculi plures , ex vena cava atque aorta , per musculos lumborum producti . Vasa spermatica ex medio renum descendunt in binos infra ramos distinguuntur , quorum alter abdomen egrediens ad testiculum usque producit . Quod ex ligamenti coccygis nascitur , membrum genitale , non solum cartilagineum , sed & osseum & tunicæ suæ ubi oritur firmiter adhærens , & acus instar , in extremitate perforatum est . Uretherum dexter , oblongus , exiguus , & inferior sinister , vesicæ urinariæ inseritur . Diaphragma oblique versus marginem hepatis descendit , eidemque cohæret . Pulmonem quatuor lobi minores ex dextra , ex sinistra autem , duo majores constituunt . Venæ cavæ ventriculo dextro cordis , pone dextram auriculam inserta , passim per dextram pulmonum partem dispergitur . Cor tandem mediæ est magnitudinis , nec quidquam singularis exhibet . Renum autem in alterutro , duro & cartilagineo , vermis aliquoties repertus fuit ruber , altera extremitate cuspidata ac triangulari , altera autem rotunda & molli , & longior his , quos in canis & lupi renibus inveniri observavimus .

Quod sceletum marteri spectat , capitis ossa , vulpina referunt ; & dentes , vulpis instar sex numerantur incisivi , exigui , ordine constituti , cuspidati & molles ; bini canini maximi , incisiviis paralleli , cuspidem versus convergentes ; & quinque ex utraque parte molares , quorum tres priores simplices , exigui atque dentati , reliqui bini autem latiores , asperiores & triangulares sunt , dentium numerus omnis xxxvi. est . Aurium conductus ut in fele constructus , & 7. quæ collo sunt vertebrarum prima , ut in vulpe , lepore & lupo , fortissima , latis apophysibus necitur secundæ illique fortissimæ ac longitudine primam exsuperanti , xiiii. numerantur costæ , cartilaginibus longis atque gracilibus instructæ , x. sunt veræ & reli-
quæ

quæ spuria, viii. vero ex veris sterni ossibus longis ac tenuibus neſtuntur. Tres primæ dorsi vertebræ apophyſibus gaudent externis fortiſſimis ac adſcendentibus, reliquarum omnium apophyſes ſunt graciliores. Omoplati latiffimæ, imo quædam claviculi cartilaginofæ reperiuntur. Et pedum conformatio omnis, pedibus ſimiæ caudatæ multum accedit.

Animalium foetentium nomine generaliori, omnia hujus generis animalia denotari ſolent, quippe quæ, verno præſertim & catulitionis tempore fortiſſimum quemdam odorem exhalant; & quamvis folliculi aliqui foetido liquore repleti prope ad anum ſiti reperiuntur; cave tamen credas hanc *Putois*: ſeu foetentis denominationem, cujuſvis ſpeciei martero maſculo competere. Siquidem ſingularem ſpeciem conſtituit, quem *Putois* ſeu *Putoir* item *Chat-Putois*, imo *Pitoir*, vel *Pitois* Galli, & teſte *Gefnero*, *Sa-baudiennes* *Pouttat* dicunt, hic enim aurium ſimbria & colli cingulo albido gaudet, & marterum domesticum, magnitudine, & vi, & foetore ſuperat. Hunc, foinæ inſtar, domesticum, & ab illo diverſum eſſe cenſemus, quem *Soloniam* colentes, *Putois-Pecheur* nuncupant, qui lutræ inſtar, piſcibus infeſtus, & pilo caſtaneo ſplendente obteſtus eſt.

Phyſicorum plurimi duplex marterorum genus conſtituunt, ſcilicet: domesticum, ſeu foinam, ex opinione *Gefneri* in omni Europæ terra obvium, & ſilveſtrem, ſeu Marterum proprie ſic dictum, in ſilvis & præſertim abietinis commorantem, ac ſciuri inſtar, ſuum ſibi nidum comparantem. Dignoſcitur autem a foina, collo ſuo flavido & reliquo corporis pilo obſcuriore, quapropter & *martis aurei* nomine paſſim venire ſolet. Pellem ejus foinæ pelli anteferunt, qui *Gefnero* teſte, a venatoribus rariffime quidem reperitur, aſt ſummo in pretio habetur. Pace tamen *Viri Cel.* dictum ſit, errat, errores eorum ſequutus, qui nullum in Gallia marterum verum reperiri docent, ſunt, quamvis rariores & in primis in ſilva Aurelitana. Nec haud adeo indubitata videntur quæ de coeuntibus inter ſe duabus hiſce marterorum ſpeciebus perſcripſit *Albertus M.* Nobis ex obſervatione *Gefneri* frequentiores ſunt foinæ, aſt rariffimi marteri; Septemtrionis terræ autem majorem marterorum, quam foinarum copiam alunt. Quaternis plerumque ſuos foetus mense Aprilis effundere ſolet utraque foemella.

Teſta ſpatioſiorum ædificiorum inhabitat marterus, ut caſtellarum, templorum, granariorum, gallinarum & columbarum receptacula, ſimilia. Volatilia jam e longinquo perſentit, & acerrimus columbarum & gallinarum, ex quibus vivit, hoſtis, ſtabulum ingreſſus vicinis ſanguinem exſugit, imo & ovis earum inhians, ſingulari illa agilitate ex ſtabulo ad receptaculum deportare nec frangere novit. Mures quoque & ſciuros, imo fructuum quosdam comedit; ac lutræ inſtar, mundatum locum quærit, quo excrementa emittat. Quæ quum acutiſſimum muſci odorem exhalent, facilem marterorum domicilium detegunt; & odorem iſtum ex arbuſtis quibuſdam odoriferis proficiſci, quæ præter nutrimentum ſolitum, decerpere peramant, varii cum *Ruelo* ſcripſerunt, *Gefnerus* autem cum *Aldrovando* numquam herbis ſive arbuſtis veſci perhibent marteros. Per diem; canum feliumque inſtar conglobati ſomnium capiunt, noctu autem nutrimenta quæſitum, diſcurrunt. Summo in canes timore feruntur, quorum inſidias evitatum arborum faſtigia adrepunt, quibus ſi vi expellantur, felium

more pedibus prolabendo, terram contingunt, mox incitato cursu aufugiunt. Canes itaque illos venatum scalam adrepenti artem edocentur, quo quodvis fastigium conscendentes insequi, & venatorum ictibus offerre possint, qui duplici utilitate, & volatilia hostibus liberant, & pelles enecatorum magni vendere solent; præcipue si exeunte autumno vel irruente hyeme capiantur. Variis etiam aliis rationibus, murium gliriumque instar jam enecantur, jam capiuntur, & retibus ferreis, in via qua se receperunt, tendendis, & calliditatis eorum ergo, sollicitè obtegendis occultandisque. Sæpius foinam vidimus ex pedibus unum, reti implicatum mordicus sibi abstulisse, & libertatem tanti coemisse. Vel si nulla tibi cura est pellis, spectaculi ergo, canibus admissis enecato, tenacioris enim est vitæ, & in defensione, acritatis eximiæ; quam ob causam a Latini *Martres* nomen accepit, bestia martialis, bellica & ferox habita.

Faciles cæterum, in primis a teneris domo detenti domesticantur. Sic *Gesnerus* quemdam cani socium educaverat, nec umquam, ne iter faciendo quidem, alter ab altero secessit. Vinculo, quo detinebatur solutus iste marterus, in vicina loca exspatiabatur, & domum redibat, & cum cane colludebat ac hominibus, felis more supinus. Quum vero semper naturæ dolum alunt, cautione opus est, ut dentes eorum caninos utriusque maxillæ, ferra conscindas, ac incisoriis exæquando, omne morsus periculum præscindas. Sic quemdam ruridegentem, pro delectamento, multos a teneris educasse & cicurasse novimus, quorum unus domini vestigia, canis instar, sequebatur, & summa cum eo familiaritate utebatur, conspecto tamen cane advena, ad pedes domini, vel aliud latibulum confugiebat. Singulis diebus ab Octobre ad Martium, sexta pomeridiana hora exspatians, vineas & hortos, aves captatum, transibat, decima autem vespertina domum revertebatur. Imo nosmetipsi alium quemdam educavimus, qui summa sua alacritate, & ad colludendum propensione, nec strepitus cujusvis vel prætereuntium adspectus timore singularis, sæpius dorso reclinabat, post caudam ore arreptam, pro matris ubere, exfugebat. Quam cicures tamen reddantur, ciborum odore omnem suam ferocitatem denuo induunt, hinc dum mensæ cibos adposueris, illos abigas necesse est, alias enim, negata quævis delibandi libertate, quam adpetunt, irritantur, & præsentis moribus petunt. Hinc prandii tempore ex catena ligandi & retinendi sunt. Coitus suo tempore, præsertim quum ruri degas, abeunt nec amplius revertuntur, avium more, quas cavea ante detentas, sua libertate donaveris.

Græco idiomate: *Satherion* adpellatur, Italico: *Marto*, *Martaro*, *Marturo*, *Martorello*, *Foina* seu *Fouina*, Hispanico: *Marta*, Germanico: *Dach-Marder*, *Stein-Marder*, *Haus-Marder*, *Buch-Marder*, Polono: *Kuna*, Anglico: *Martin* seu *Martlet*, Suevico: *Maord*. Vocem Gallicam: *fouino* a *fuscina*, seu *fusco* ejus pilo, seu *fagina*, quia fagis detineri peramant, ex illo autem: *fagine*, *faine*, *foine*, seu tandem ex *fulvina*, seu *fulvo* ejus colore derivare annitur *Menage*. Alii eum *Mustelam* fœnariam adpellant, quia fœni granaria inhabitat, & *foine* a fœno, quam *fouine* scribendum malunt, etymologia ex omnibus pronissima. *Marte* seu *Martre* ex Latino: *Martes* seu *Martres*, teste *Scaligero*, descendit. Forsan etiam ex Germanico: *Marder*, olim enim non: *Martre*, sed *Mardre* dicebant.

Oleo autem abundat & sale volatili. Et domesticus quidem usibus nostris carnem exhibet, optimum chylum & nutrimentum suppeditantem, aut pellis ergo, nec carnis, insidiæ ipsi struuntur. Ars medica tandem carnem marteri pro anodyna, resolvente, & nervos, suo oleo & sale volatili, confortante habet; & ut ex caniculis, coctione, cum oleo olivarum, oleum elicit, quo partes corporis rheumatismis laborantes, seu paralyti obnoxias adfricari jubet. Excrementa insuper muscum olentia, fragrantibus pulveribus immittuntur; imo, quum resolvendi facultate gaudeant, ad emolliendas & dissipandas glandulas adhibentur. Fel ejus denique cumini aqua mixtum, pro collyrio contra maculas cedit oculorum.

M E L E S.

Sub quo genere binas illius species: Taxum scilicet & Civettam, complectemur, & descriptione nostra pertractabimus.

Taxus. Offic. Schrod. 308. Dal. Pharm. 449. Ind. Med. 115. Schvenckf *Quadr.* 129. Herm. Cynof. 738. Aldrov. de *Quadr. digit.* 264. Jonst. de *Quadr.* 101. *Taxus*, etiam *Daxus*, Charl. Exerc. 18. *Talus fuillus*, *Meles*. Merr. Pin. 168. *Taxus seu Meles*. Raii Syn. *Quadr.* 185. *Meles seu Taxus*. Ephemer. Germ. Dec. II. Ann. V. pag. 55. *Melis*. Lemer. 560. *Meles*. Gesn. de *Quadr. digit.* 686. *Coati cauda brevi*; *Taxus*, *Meles*. *Coati griseus*. Klein. *Quadr.* 73. *Meles unguibus anticis longissimis*. Linn. Syst. Nat. 37. *Meles pilis ex sordide albo & nigro variegatis vestita, capite tenuis alternatim albis & nigris variegato*. Briss. *Quadr.* 253. *Tassus seu Taxo*, *Melus*, *Melo*, *Melotus*, alias *Melosum Animal*, *Blerellus*. Quorumd.

Duplicis generis taxos constituunt recentiorum plurimi, alios rostro canino, alios porcino instructos. Et Jacobus de Fouilloux primus differentiam inter utrumque, & naturæ & pili coloris respectu, constituisse videtur. Aldrovandus utriusque figuram delineatam reliquit, quæ si exacte responderet, illi, qui porcino rostro instructi sunt, aliis multo rariores forent, certum. Nos taxum porcinum nec vidisse umquam, nec admittere quidem, cum Raio & Pincarn fatemur, in quo describendo nec venatores concinnant. Quomodocumque res se habeat, nobis de taxo canino sermo est & argumentum.

Primo hic intuitu ursum referre videtur exiguum, corpore enim est brevi & crasso, $1\frac{1}{2}$. cubiti longo, 28. librarum pondere, & colore flavido albo, sub ventre saltem albido; dorso latissimo, collo brevi, pilo aspero, oblongo, setoso, flavo in dorso, pallido in radice, fulvo in medio, in apice albido, ut ex pilo ejus in cinereum abeunte, (*grisonante*;) nomen: *Crisart* originem traxisse videtur. Linnæus est, qui contrarium reliquis corpus infra album, supra autem nigrum ostendere observat. Capitis figura vulpem refert, quippe quod basi latissima & cuspide acuta triangulum constituit, & genas ostendit turgescens, ob musculorum crassitudinem. Cæterum alternis nigris albisque zonis longitudinalibus variegatum erat, & oculi capitis respectu, exigui; aures breves, rotundi, & gliris domestici auribus similes, lingua autem, nasus & dentes, caninis. Pedes anteriores breves, lati, fortes & in quinque digitos separati, ungulisque longis & fulvis instructi, quarum ope, vulpum & cuniculorum more, suas

sibi in terra foveas effodit. Cauda crassa, mollis in extremitate, & subtus fulvido pilo tecta. Singulare autem taxi est orificium aliquod amplissimum caudæ & ano intermedium, semilunaris figuræ dum constrictum fuerit, quod dilatatum, sacculum aliquem intus conglobatum ostendit, ex interiore autem sacculi superficie parum albidæ materiæ quasi exsudabat, vituli cerebrum digitis contritum, consistentia & colore referentis. Cui pommati speciei quum nullum prorsus odorem inesse reperierit & Cel. Raii & Briffon; nos tamen quum taxum nostrum, masculum hiemis initio aperiremus, odorem fortem & ingratum, foliis magnæ scrophulariæ similem persensimus. Raius est, qui exteriorem sacculi hujus superficiem undecumque glandulis conglomeratis obsitum, imo ad anum binas esse dicit glandes amplissimas, in intestinum sese egerentes. Quod ad usum sacculi spectat, sub cauda constituti, Daniel Nebelius, D. alique, eum pro recipiendo animalis rostro destinatum esse censent, dum hiemis tempore nutrimentorum defectus ergo, succum ex glandibus adipeis eo destillantem rostro exsugit. Addunt venatores, quod hyeme tota dormiendo taxus, suo se adipe nutrit, & hujus ergo, peracta hyeme, vix quidquam adipis sui ostendat. Gallia saltem quos alit taxos, omnem per hyemem dormire dubitamus, siquidem ante & post festum nativitatis, agros transeuntes, varios enecatos fuisse novimus, ex quibus alius in stomacho 19. bufones recentes deglutiti reperiiebantur.

Jam anatomicam interiorum ejus partium descriptionem subnectamus.

Taxus noster multo adipe instructus musculos rectos ut in homine vaginæ inclusos ostendebat, & epiploon multis zonis adipeis compositum, ac intestina obtegens, stomachum, dum inflaretur, humano similem; Pylorum crassissimum, ac ne quidem aeri orificium ventriculi superius exeunti egressum concedentem; omnia intestina gracilia, nullum Cœcum, colon haud ita conspiciendum, rectum vero crassius, multa carne & fibris compositum; Pancreatē ex magna stomachi curvatura flavidam, 3. pedis longam, & quasi triangularem, Lienem rubrum, 8. digitis longum, & canis linguæ similem; hepar magnum, rubrum, 6. lobis inæqualibus compositum; fellis vesiculam flavidam, piri oblongi formam referentem, & membrana fortissima obtectam; renes agnitis tantum non similes pro magnitudine, & adipi involutos; urinæ vesicam amplam, magnam, ovalem, & anseris ovum exæquantem; testiculos vero avellanam, virgam osseam, 4. digitis longam, & magnitudinis mediæ; cor ovino simile, pericardio suo detentum; pulmonem in 6. lobos divisum, 4. ex dextro, 2. ex sinistro pectoris latere, sitos, & tuberculis conspersos, quales in porco leproso videbis; xv. ex utraque thoracis parte, costas. Dum viveret ingratissimum exhalabat odorem, odori canis villosi, stercore seu cœno conspersi equiparandum, mortuus autem & pelle subtracta penitus eundem amisit, ita quidem, ut veru assatus carnem & teneram & aprinæ pro succi abundantia accedentem præberet.

Joannes de Muralto foemellæ matricis cornua ad renes usque adscendere, & in itinere, plura & ex arteria & vena spermatica vasa adsumere dicit. Caro etiam glandulosa seu spongiosa testiculorum seu ovarii substantiam constituit, & adeo turgescētes utrique conspiciuntur prope cornua, ut non nisi membranosa substantiæ crederentur.

Ubivis fere taxus reperitur, rarior tamen in Anglia & Suecia, frequentior autem in montibus Helveticis. Solum meridiei expositum, lapidosum & rarioribus arboribus confitum peramat, hic foveas sibi excavat pro latibulis, & nutrimento quærendo. Scarabæis etenim, grillis, apibus, insectis, melle, vermibusque terrestribus nutritur, imo radicibus, plantis, bufonibus, anseribus, gallinis, & autumnino, fructibus, ut pomis, pyris & in primis, uvis, magnam brevi tempore, pinguedinis quantitatem ipsi induentibus; per diem plerumque quiescit, post solis occasum vero, alimentum quæsitum egreditur. Nec haud multum a latibulo suo abit, & auditu canum seu venatorum strepitu statim eo revertitur, quamvis enim imbecilliori visu gaudeat, & odoratu sit destitutus, acutissimo tamen auditu instructus est. Voce acuta & clamore penetranti, haud canis latratum, sed potius porcorum grunnitum imitatur; obstant canum dentibus, pili valde hispidi, & vel violentissimis hominum ictibus corii sui crassitudo. Venatorum persequutionem effugiturus, capite pedibus anterioribus obtecto, & in gyrum corpore acto, ex montium scabrosis fastigiis præcipitem se dare dicitur, & ab insequentibus vel canibus vel aliis, supinus dentibus unguibusque sese defendere perhibetur.

En, quæ de taxo ex venatorum primis, *Jacobus de Fouilloux*; taxi omnis generis carne & cadaveribus vescuntur, & cuniculorum vivariis infestissimi, septa perforant, vivaria intrant. Porcellis præsertim gulosissimi inhiant; & omnis generis volatilia ut anseres, gallinas, similia, adpetunt. Quæ mea ipsius experientia constant. Cæterum lati sunt, nec moribus, ne quidem juniores canes lædere solent. Quos enim ipse ego per IV. annos cicures conservaveram, taxos, voci meæ obtemperantes adcurrisse expertus sum. Frigoris sunt impatientissimi, & præ frigore, vel medio resident igne, pedesque adurunt. Pane vescuntur & officulis, & fructibus, & quæcumque obvenerint aliis. Vel frigidioris cælo, vel aere toto ningente suis cavernis vel biduo triduove inhærere observavi. Quæ pro stratis eorum veniunt, ut stramen, fœnum, folia, quævis sollicitè congerunt, post capite suo & pedibus tantum una deportant, quantum sub axilla colligere homo valet. Canes sese insequentes frustratum, caveam ingressi, introitum obturant, & foveam denique intrantibus canibus, suppellectili omni everfa, aliam sibi foveam quærunt. Multam vivere solent vitam, & ut sæpe accidit lucem oculorum amittentem masculum, fœmellæ, fœmellam item masculi nutriunt. Lichenibus etiam ex omni pelle enascentibus pereunt, ut in canibus observatum dedi, terra lichenes producente. Hinc frequentiore canibus lotione opus est. Tenacissimæ sunt vitæ taxi, quorum ego sæpius intestina, canum moribus protracta, & tamen taxum defensionem, nec mortem meditasse observavi. Nasi autem sunt delicatioris, & summam ejus curam habere videntur, etenim vel levissimus baculi ictus naso periculosus est, & taxum enecat. Nec tanta cum constantia ac acritate vulpes, quanta taxus sese defendit a canibus, & taxi morsus canis est infestissimus. Vulpes tandem & taxos ex terra depulsurus, & ut ad minimum 3. mensium spatio revertantur impediturus, canem foveæ immittendum sulphure prius seu oleo oblinas.

Adeat, qui rationem canibus sagacibus taxos venandi relatam ac explicatam cupiat, ipsam laudati Auctoris rem venatoriam. Quantæ enim delecta-

tioni taxorum venatio cedat, hodie a dominis neglecta, & rusticis relicta est. Observationibus venatorum constat etiam, taxum ad ripas sua excrementa emittere, post autem, felum more, terra obtegere; & foemellam, quos tribus mensibus utero gessit, foetus, Novembre seu Decembre ternis vel quaternis emittere. Reliqua autem quæ de taxo narrantur, nostro jure fabulis adnumeramus. Dum v. gr. annorum vitæ numerum ex quantitate foraminulorum, sub cauda obviorum, dijudicari posse dicunt; & morsum taxi mortem conciliare, quippe qui infecta venenosa peramat, & vulpes ex odio in taxos his absentibus foveam eorum suis excrementis explorare, taxos autem, foetoris perferendi impares, sua decedere, & vulpibus eam relinquere, taxos quoque, dum extruendis domiciliis occupantur, segniores suorum supinos terra reponere, post autem terra effossa onerare, tum dentibus arreptos protrahere, & sic pro terra omni deportanda, illis tamquam plaustris uti, & binos domiciliorum introitus constituere, & flante borea, Septemtrionem respicientem obturare, flante austro tandem meridionalem; & æstivo tempore hyemis alimenta colligere, & si nimis parciora videntur, marem, quo ad satietatem se expleat foemella, impedire. Imo ipse *Fonstanius* est qui dubitat, num vera sint, quæ dicuntur, quod scilicet crescente luna adeps taxorum exaugeatur, decrecente decrescat, & novilunio prorsus nullus adsit. Nos autem lunæ phases haud ulla relatione cum adipe taxi coherere novimus.

Græcum taxi nomen est: *Melis*, Italicum: *Tasso*, Hispanicum: *Tasugo*, seu *Taxon*, Germanicum: *Tachs* seu *Dachs*, Belgicum: *Das*, Anglicum: *Badger*, *Brock* vel *Gray*, Suevicum: *Graef-svin*. *Menage* in *lexico Etymologico*, *Blaireau* vel *Blerèau*, ex *Glerellus* seu *Glirettus* teste *Saumaïse*, descendere dicit, siquidem uterque somnum capiendo pinguescit, vel ex *Melarellus*, ex *Melis*, *Melarus*, *Melarellus*, *Belarellus*, solita scilicet α M. in B. permutatione, *Blarellus*, *Blaireu*. *Taïsson*, *Taixon*, *Tasson* vel *Taxon* ex Latino: *Taxus*, *Tassus*, seu potius *Taxone*, ablativo ex *Baxo*; & quod vocem *Bedouan* adinet, illud ex *Bedou* diminutivum esse, addit, omissa hujus Etymologia, quod nos vocem antiquam Gaulorum habemus.

Taxi partes omnes oleo & sale volatili abundant. Et caro ejus saporis gratissimi est, & aprinæ multum accedit; dummodo ille junior, ac multa teneraque carne præditus sit, ut autumno, tunc enim fructibus uvisque nutritus, *Aldrovando* teste, vel optimis primorum mensis in Italia ac Germania adponitur.

Medica ars non nisi sanguine ejus & adipe utitur. Adeps itaque emolliendi & leniendi virtute gaudens, ad leniendos dolores nephriticos vel clysteres ingreditur, vel etiam juncto unguento althææ, pro renum unctione adhibetur. Cessantibus autem doloribus, unguento althææ oleum scorpionis simplex pro augendo urinæ fluxu, & profliganda saburra substituitur. Nec non pro linimento in contractionibus & debilitate membrorum, vel mammillarum fissuris adhibetur. Sanguis ejus arefactus & in pulverem reductus, cum aqua quadam, sudorem promovente, dosi ℥j. ad ʒj. pro lepra, scabie, ac quibusvis humoribus malignis, transpiratione expellendis præscribitur. Pilus tandem conficiendis pictorum penicillis venit.

Animal Zibethicum, Offic. Dal. Pharm. 449. Hernand. Hist. Mex. 580.
Raii

Raii Syn. *Quadr.* 178. *Catus Zibethicus*. Schrod. 280. Lemer. 942. *Animal Zibethi*. Charl. Exerc. 20. Aldrov. de *Quadr.* digit. 340. Jonst. de *Quadr.* 109. *Feles Zibethi*. Gesn. de *Quadr.* digit. 948. *Felis Zibethica*. Blas. 72. Valent. 157. *Hyoena veteribus nuncupata, nunc autem: Civetta*. Bellon. Obs. 94. *Hyoena odorifera*. Herm. Cyn. 42. *Hyoena odorifera Zibethum gignens, quæ Civetta vulgo adpellatur*. Castell. 1. *Coati, Civetta vulgo*. Klein. *Quadr.* 73. *Meles unguibus uniformibus cinerea*. Linn. Syst. Nat. 10. *Meles fasciis & maculis albis, nigris & rufescentibus variegata*. Briss. *Quadr.* 256. *Civetta, alias Sivetta, ex qua Zibethum colligitur. Zibethus, fera seu catus Zibethi, Mustela odorata, quam vulgus Civettam adpellat, Mustela Zibethi*. Nonnull.

Quinque sunt a Blasio collectarum anatomicarum civettæ descriptionum; priores binæ scilicet, *Thoma Bartholini* auctore, tertia Professorum Amstelodamensium, quarta *Blasii* ipsius, quinta autem *Drelincourtii*, ne adducta quidem *Petri Castelli* in tractatu quodam singulari, exposita. Nos vero, prout moris est nobis, nostram ex *Actis Regiæ Scientiarum Academiæ ad historiam naturalem facientibus*, auctore Cel. *Perrault* depromimus.

Anatomicæ nostræ disquisitioni subjectos Castorem & lutram, binæ exceperunt civettæ, paucis abhinc ex Regio vivario, quod Versalii est, decessæ. Gratissimum fuit, quod animalia inter se comparare datum fuerit, quæ communi quodam organo seu receptaculo, pro conservando liquore, vel gratissimi vel ingrati odoris donata sunt. Statim ab initio disquisivimus, num quædam adsit ratio odorum differentiæ tantæ; nec quidquam præter diversum utriusque temperamentum deteximus, alterum enim calidi atque aridioris, parum potus haurit, & calido sub cœlo vivit; alterum vero jam in terra, jam sub aqua degit, & ex natura piscium participando multum humiditatis, parum vero caloris pro digerendo, habet. Si igitur vel gratus ingratusve humoris odor ex cruditate vel perfecta coctione, a calore vel majore vel minore, proficiscente, pendet; castoris calorem naturalem humorum abundantia oppressum, coctioni non nisi imperfectiori saltem sufficere, nec nisi ingratum producere constat odorem.

Civettarum nostrarum altera masculus, altera autem erat fœmella. Tanta autem obvia inter utramque similitudo, ut nullo prorsus exteriori sexus diversi vestigio, utraque pro fœmella haberetur, prorsus enim intus recepta latebant genitalia viri, & liquoris receptaculum, cujus apertura, pro sexus sequioris nota habita fuit ab antiquioribus, in utroque simillimum erat, a rostro ad caudæ originem itaque 29. digitis longæ, & inter corrodas ambarum caudas longissima, 10. digitis longa erat, & pedes, in primis anteriores, brevissimi, a ventre ad terram non nisi 5. digitis, singula crura quinque in digitos distincta, minimum, ut ursus, intus ostendebat, nec tamen terram pertingebat. Imo aliud adhuc calcar, & suo ungue illum gaudens. Ungulæ omnes nigræ, nec aduncæ, nec haud adeo cuspidatæ; & pedum planta pelle, tactu molliori oblecta, & aures figura sua & magnitudine felis aures exæquabant, ast minores, nec adeo cuspidati, barba tandem cum feli & civettæ communis. Caput civettæ erat strictius, rostrum longum, lingua dulcis, oculi exigui, turbulenti, nigri, oblongi; dentes canini breves, & præ cuspide exigua fractis respondentes, id quod animali adeo feroci, cavæ cancellæos ferreos commordendo facile accidere posse constat. Collum denique ligamentis musculisque fortis-

simis corroborabatur, quorum plures esse civettæ, quam ulli ex animalibus observat *Bartholini*.

Pilus ejus in capite & pedibus brevissimus, in reliquo corpore, vel $4\frac{1}{2}$. digiti prolixitatem, ubi scilicet longissimus erat, adtingebat. Huic autem alius erat intermixtus brevior, crispus, & castoreo similis, ejusdemque, nempe cinereo-ferruginei coloris. Triplicis pilus ille magnus erat coloris, ac jam nigras, jam candidas, jam ferrugineas zonas maculasque consti-
tuebat. Imo pilorum alii in medio nigrum, & album jam in radice, jam in apice exhibebant. Quatuor pedes & venter, & interior pars pectoris nigrum, aliis insolitum præbebant colorem, quippe quæ pallidiore ven-
trem, quam reliquum corpus tinctum monstrare solent. Reliqua pars cor-
poris tres diversos colores sibi commixtos, prædominante nigro, refere-
bat. Duæ insuper maculæ nigræ majores ex lateribus rostri conspicieban-
tur, oculos quæ circumdando, reliquum linquebant candidissimum, na-
so, eodemque nigro, excepto. Vertex ab oculis usque ad aures cinereus
videbatur, siquidem ut diximus, cuique pilo niger erat fundus, extremi-
tas autem alba. Aures foris nigri nec nisi margine candido cincti, intus
longissimum pilum candidum ostendebant. Collum in fundo candidissimo
quatuor utrinque zonas nigras exhibebat, quæ sub auribusexortæ, oblique
stomachum versus descendebant. Medium dorsi tribus obtegebatur zonis,
media nigra, utraque laterali autem ferruginea. Humeris & lateribus fre-
quentia nigra, rariora autem ferruginea inerant punctula. Sic & in late-
ribus ejusmodi zonas nigras albidasque alternantes, seu potius maculas
haud cohærentes observavimus. Caudam denique supra nigram, infra au-
tem quadam albedine mixtam conspeximus.

Sacculus autem, qui civettæ receptaculum est, sub ano, nec sub cauda
aderat, ubi Hyænæ sacculum reperiri dicit *Aristoteles*, quam cum *Belonio*
& nos, vel civettam nostram, vel aliquam ejas speciem fuisse censemus.
Quæ si ita sint, mirum sane tantum virum, qui *Herodotum* & reprehен-
dit, quod foramen hujus sacculi pro nota fœmini sexus habuerit, & ex-
cusat, erroris ob facilitatem, hunc, inquam vel ipsum errasse, dum &
anum & partes genitales utriusque, ultra sacculum sitas esse scribit. Ille
enim ano & foraminulo cuidam intermedius, a foraminulo $2\frac{1}{2}$. digitis
distabat, at ano magis accedebat; & $2\frac{1}{2}$. digitorum latus, 3. vero lon-
gus, aperturam, seu crenam ab summo imum petentem, & $2\frac{1}{2}$. digito-
rum exhibebat. Intus & in margine pilo obductus erat brevissimo, ac in-
tus inclinante, ita ut ab intra foras progredienti manui asper videretur.
Divulsis aperturæ binis lateribus, pars interior adparebat, pro capacitate
sua, recipiendo gallinæ ovo sufficiens. Fundus extra pariter ac ex sinistra
duo foraminula digito patentia, & singula ad sacculum pelle candida ac
aspera obductum perducentia exhibebant. Quæ quidem eminentiæ ab illa
inæqualitate profectæ, totidem poris erant instructæ, quos comprimendo,
liquorem illum odoriferum, quem Arabes: *Zibet*, seu spumam dicunt,
egredi vidimus. Hunc vero spumantem exiisse liquet ex eo, quod paullo
post omnem suum candorem amittebat. Et quidem ex multis progredie-
batur glandulis, binis tunicis, sacculos constituentibus, intermediis. Quæ
autem sub sacculo majori adparebat apertura exigua, non erat, nisi in-
fertio conductus, virgam masculi continentis; in fœmella autem collum

matricis, cujus orificium internum, pro angustia sua, & resistentia dilatanti, vix stilo transitum permittebat. Orificium externum vero binis eminentiis longiusculis obtegebatur, qui coeundo angulum constituebant, tertiæ eminentiæ, forsan clitoridi superiorem. Ventre igitur aperto, sub pelle ab osse pubis ad umbilicum duæ inveniebantur eminentiæ adipeæ duræ, 1. digiti latæ ac crassæ, 4. vero longæ. Hæ ramos complectebantur ex venis atque arteriis hypogastricis, binos istos sacculos, majorem constituentes, qui ingrediebantur, & materiam liquoris odoriferi eo conferebant. Cui quidem conducendæ necessarios quos esse duxit *Bartholini* conductus particulares, quamvis studiose, frustra tamen quæsit, nobis autem præter arterias, nulli alii necessarii videntur, quum nec deportando ad ubera lacti, nec ad renes urinæ alii cedant conductus. Glandulis vero sacculo receptaculi inclusis illa singularis vis inest, qua ex arteriis, id quod constituendo liquori sufficit, segregandi, accipiendique facultate gaudent, ut uberum glandulæ, ea quæ in sanguine reperiuntur, pro lacte facientia, imbibendi virtutem habent. Quæ vasa ad sacculum receptaculi pertingentia, quum multo majora in masculo essent, ac in fœmella: fortioris gratiorisque odoris in masculi liquore, præ liquore fœmellæ rationem deteximus. Omnes interim fere contrarium dicunt, & *Quadramius* in tractatu de Theriaca, zibethum fœmellæ nisi admixtum fuerit masculino, hoc nihili fere æstimandum dicit. At nos nec conservatum diutius zibethum perfectiorem induere odorem, neque recentis adeo insupportabilem detemus, qualem censet *Amatus Lusitanus*. *Plutarchus* pantheræ non solum pellem, sed etiam ossa ac carnem gratissimi dicit odoris: nos tamen hunc civettæ odorem ad partes ejus interiores transiisse haud experti sumus.

Nomina si quæris, en tibi Græcum: *Zapetion*, en Lusitanicum: *Kato de Agali*, audi Æthiopicum: *Kankan*, & Germanicum: *Zibeth Katz*, & Belgicum: *Civet-Kat*, & Anglicum: *Civet Cat*. Vox tandem Gallica: *Civette*, denotans & Zibethum, & civettam, ex hodierna Latina: *Civetta*, hæc autem ex Arabica: *Zibeth* vel *Zebeth*, spuma, derivanda erit. Ex *Zibeth* enim vel *Zebeth*, facilis *Zivetta* *Zevetta*, exinde *Sivetta* seu *Civetta*, enata est.

Zibethum vero analysi multum olei & salis exhibet, cujus qualitates probæ hæ sunt, si nempe recens, consistentia mel sive butyrum, & colorem candidum, cum odore fortissimo, haud adeo grato, exhibuerit. Tempore flavum, imo fulvum denique colorem induit. Et adulterino caseus, butyrum, seu adeps alius additur, quod ignis ope dijudicabis, flammis etenim injecta ejus portiuncula, adipis alieni odorem, quamvis Zibethi odori mixtum facile percipies. Suffumigationum artis periti, varia addere solent, quæ, quod ingrati eidem inest, temperare ac emendare valent.

Cæterum Medicinæ usibus infrequentius Zibethum, luxui & voluptati relictum est. Sic enim providentia, ne vel pauperibus recuperandæ salutis media dcessent, medicas virtutes parciore esse voluit pharmacis, quæ magni emuntur; in ea autem larga manu contulit ac benefica, quæ ab omnibus & ubique haberi possunt. Nobis sane exemplo in hos, qui ope nostra ac auxilio egent; omnes enim & originis & malorum similitudine vere eosdem, quid quæso sæpius interest? nisi quantum vel arrogantia cupit, vel opes interponere videntur.

Sunt, qui pro doloribus infantum cholicis civettam umbilico adplicari volunt, addi interdum & Theriacam seu oleum muscati, quæ caliditate sua ac vi penetrandi, tegumenta transeunt, corporis intimum petunt, flatus & viscositates, colicæ causas, discutunt. Nec non pro leniendis hysteriis mulierum malis civettam pudendis olim adplicabant, hodie autem, cognito, quod fragrantia quævis, ut muscus, ambarum, zibethum, alia, magis exaugeant symptomatum violentiam, quam leniant, & foetidum odorem edentia e contrario, ut Galbanum, Castoreum, reliqua satius prodesse: zibethi usum ex Medicinæ adparatu proscripserunt, & ad numerum unguentorum mulierum relegaverunt.

Ingreditur tamen pulverem Cypricum, & Balsamum Apoplecticum Officinæ Lemeryana, ingreditur etiam pastillos odorantes Pharmacopœjæ Parisiensis.

M U S.

TRes sunt animalium, nemini non notissimorum, species, quas muris sub nomine genetico comprehensas, nostra jam descriptione pertractabimus, scilicet: mus, glis, & mus Alpinus, sive Marmota.

Mus. Offic. Gesn. de Quadr. Digit. 714. *Mus domesticus*. Schrod. 303. Merr. Pinn. 167. Jonst. de Quadr. 115. *Mus domesticus minor*. Dal. Pharm. 446. Schvenckf. de Quadr. 114. Aldrov. de Quadr. Digit. 417. *Mus domesticus vulgaris seu minor*. Raii Syn. Quad. 218. *Sorex*. Lemer. 827. *Sorex domesticus*. Charlet. Exer. 25. *Mus minor*. *Musculus vulgaris domesticus cauda tereti longa*. Klein. Quad. 47. *Mus minor*. Herm. Cynos. 550. *Mus cauda longa, nudiuscula, corpore cinereo-fusco, abdomine subalbescente*. Linn. Faun. Svec. 31. *Mus cauda longissima, obscure cinereus, ventre subalbescente*. Briss. Quadr. 169. *Mus domesticus parvulus*; *Mus simpliciter*; *Mus communis*; *Mus minor*; *Mus vulgati*. Nonnull.

Muris longitudinem, si ab apice oris ad originem caudæ perrexeris, 2. digitos & 9. lineas explentem habebis, videbis etiam caput oblongum, & barbas ex utraque maxillæ superioris parte singulas, illasque multis inæqualibusque pilis albis compositas; & binos in omni maxilla dentes incisorios, inferiores superioribus longiores ac magis reflexos, & oculos magnos, rotundos, nigros in aperto fronte; & aures latos, rotundos, lucemque transmittentes; & caudam 3. digitorum ac 4. linearum longam, conicam, seu decreascentem, pilo brevissimo ac pelle arctissime cohærenti obtectam; & pedibus in anterioribus quatuor digitos, fere nudos, ac exiguis, transparentibus & aduncis ungulis munitos; & pedes posteriores, anterioribus longiores, quinque digitis instructos; pilum corporis denique omnem haud adeo longum, coloris cinerei, supra, quam infra obscuriorem, & jam subalbidum, jam ferrugineum, jam candidissimum.

Dissecto autem mure, pellem ejus tenuissimam quidem & subtilissimam, attamen fortiorem in pectore deprehendimus, quam quidem in abdomine, nec non innumeris confitam nervis exiguis, ordine dispositis, ad laterales pectoris abdominisque partes procurrentibus, tandem vero musculo cutaneo seu panniculo carnosissimo insertis; vidimus etiam binos, ut in glire, claviculos; & Epiploon rubicundum, stomacho, Duodeno ac lieni

cohærens ; & stomachum amplissimum , hepate obtectum , ac duplici sua incurvatura , altera majore , minore altera , utriculi figuram referentem ; & Duodenum oblongum , rubicundum , multisque vasorum sanguineorum ramis obfitum ; albida & Jejunum , & Ileum & Mesenterium ; & Cæcum cæruleum ; capacitate sua Colon cum Recto superans ; hæc autem nodis interstincta oblongis , ab excrementis inhærentibus efformatis ; cæterum vero fili instar , tenue , & albidi coloris Rectum ; ac omnem canalis intestinalis longitudinem 1. pede ac 8. digitis absolutam ; nec non lienem deprehendimus oblongum , 4. linearum longum , & unius latum , rubrum , & Epiploa stomachoque cohærentem ; & hepar rubro-ferrugineum , septem ex lobis inæqualibus compositum , superiore sinistro omnium maximo ; & fellis vesiculam hydatidi similem , vix acus globulo majorem , flavido-pellucidam , ac binis lobis superioribus dextris intermediam ; & dextrum ex renibus superiorem sinistro , utrumque vero frumenti granum , magnitudine , phaseolum magnitudine , & rubro-ferrugineum colorem referentem , ac unum utrinque uretherem , exinde profectum & ad vesicam proficiscentem ; vesicam deteximus albidam , rotundam , pluribusque vasis sanguineis intertextam , & magnitudine majus ovum formicæ exæquantem ; binos præterea in masculo testiculos , albos atque rotundos , & bina epididymides minores quidem , ast , pariter ac vasa spermatica , & canales deferentes , satis distincte adparentes , & virgam 3. fere lineis longam , extremitate parum cartilaginosa ; & vesiculas spermaticas posteriore in parte vesicæ , ubi deferentes canales exeunt , constitutas ; & pectus XII. utrinque costis , ac totidem spinis , munitum ; & musculos pectorales , cucillum repræsentantes ; & cartilagineum xiphoidem , palæ minori mobilique similem , ac sterni extremitate inferiori superjacentem ; cor haud ita magnum , rubro-ferrugineum , pectori oblique insitum , & cuspide sinistram respiciente ; dextrum ex pulmonibus flavidis exiguisque , tres , sinistrum non nisi unum lobum exhibentem ; & cranium tenue , pelluciditate cornu simile ; & cerebrum binis ex hemisphæriis compositum , substantiæ externæ cinereæ , interioris albidæ ; & cerebellum cranii in parte posteriore obvium ; & medullam inter cerebrum & cerebellum procurrentem ; & exinde enascentes duos nervorum truncos , varios abeuntes in ramos , alios ad oculos proficiscentes , alios ad aures , alios ad organon odoratus ; & crystallinum solidum quidem , adamantinum clarum atque pellucidum .

Furetieriana , Virum Cel. *Furetiere* perhibuisse dicunt , quod muris oculus , acus cuspide perfossus , subitanæ ipsi adferat mortem . Sua experientia facti certus , sequentem ejus causam subjunxisse dicitur : quod scilicet nec tam ex dolore ictus , quam ex rudiori contrectatione muris , & violentiori manus , qua detinetur , compressione , seu muscipulæ cruciatus decedat , ut tantam quotidie avicularum copiam , vel in cavea excruciatarum , vel rudiori manu comprehensarum enecari videmus . Accedit , quod quum murem quendam levissima manu tractando , occæcaverimus , & superstitem libertate donaverimus ; eundem illum & denuo captum & iterum aufugientem conspiciere postea datum fuerit .

Quæ autem indefessus ille Vir Cel. *Malpighi* de pilorum structura observata perscripsit , sive in *Physio Theologia* sua Cel. *Derham* , eadem fere & ego in pilis felum , murium , glirium , aliorumque , eximio Microscopio ad-

adjutus observavi. Pilus muris, reliquis pellucidior non nisi tubus mihi videbatur unicus & lucem transmittens, medullamque continens, totidem ex fibris ac lineis opacis; jam transversalibus, jam spiralibus compositam. Quæ partes medullæ & opacæ non sunt nisi fibræ contortæ ac reliquis pili particulis compactiores, ac forsan humori corporis cuidam leniter evacuando inservientes. Quidni enim pilos in animalibus, & transpirationi insensibili, & frigori ac humiditati avertendæ destinatos esse censeamus?

Cæterum timidus est mus & alacer, vafer, & auditu, gustu ac odoratu acutissimo instructus, & granaria, domus, imo Cel. *Linnaeo* teste, arboreta ædibus vicina percurrit, & præ timore hominum animaliumve, sibi hostium, die delitescit, noctu exspatiatur, & victum quærendo non solum studium ac diligentiam summam impendit, sed & pericula molestiasque spernit, ac panem caseumque, sibi delicias, optimum eligit. Urgente necessitate autem, quodvis alimentum accipit, & jam frumento, jam fructibus, jam carne sale condita, & fumo arefacta vivit. Errat *Aristoteles*, perhibendo numquam muris potui aquam cedere, quem quidem non solum ex caveis avicularum pabulum & aquam furari, sed & deficiente aqua, hominum salivam, ac animalium urinam, pro potu accipere constat. Et *Richelet*, quævis obvia corrodere dicit murem, dum potus deest, & bibliopolas, libros ab ejus dentibus conservatum, aquæ plena vasa iis interponere. Felium vero martorumque insidias evitaturi mures, varia sibi latibula sub terra effodiunt, ne his quidem tuti, etenim vel intimos eorum recessus penetrant martori. Hostes præter ea & noctuarum species habent omnes, habent & homines, varia & captivitatis & mortis genera præparantes; tanta nihilo minus sunt fœcunditate, ut nec suæ vitæ brevitatis, nec frequentia hostium, quidquam illorum copię detrahere possit. Miratur *Aristoteles*, & nascentium copiam, & generationi sufficiens brevissimum tempus, haud ulli animantium reliquorum communia, ille enim, vase quodam milii pleno inclusam murem, temporis spatiolo, sex & viginti musculos relecto vase repertos, edidisse refert.

Nec tamen eorum opinioni accedimus, qui uno partu, murem duodecim, imo plures musculos effundere perhibent, saltem si de nostratibus agitur, nostra enim experientia edocti, murem plerumque quinos, rarius septenos edere novimus. Nec *Vanbelmontii* sententiæ subscribimus, dum ex frumento vel linteo putrefacto, mures efformatos enasci docet; oblectatur enim ratio, reclamitat experientia. Nec adsentimur dicto, quod salem lingentes mures concipere, seu fœcundari, habentur. Cæterum plures esse masculos quam fœmellas in familia murium, & utriusque vocem æque acutam esse deteximus; nec, ut *Plinius* & *Albertus*, ruminari mures observavimus.

Cæterum facili opera cicurati mures libertatem ne adpetere quidem videntur, nedum fuga quærunt. Varios videbis, qui, quidnam laboris suo otio substituendum sit dubii, caveis, molarum instar constructis mures inclusos spectant, & rotulam circumagentes mirantur, & motu defatigatos, suam in capsulam, sese recipientes. Alii & muribus glires substituant, eodem spectaculo inservientes, odoratu saltem ingrati, siquidem frequentissimam urinam, maximo fœtore, emittunt. Murem etiam can-

didissimum vidimus, & raritatis suæ ergo, capsula conservatum ac domini socium; hic panem & quævis alia, manu oblata accipiebat, mensæ obambulabat, sua sponte quoque capsulam intrabat. Nec tamen vel pulchritudinis, vel morum præstantia, ne hunc quidem, a dentibus felis tuita est.

En, quæ de mure, vertigine correpto, in *Ephemer. Germ. Dec. II. Anni VII. p. 378.* leguntur: Dies xxviii. Septembris volvebatur, sic *Christophorus Schelhammer*, D. quum mane musæum intrando, murem in medio pavimento constitutam, & quasi immobilem, oculis in terram defixis conspexi; propius accedentis præsentiam, animal, quam timidum alias, pertulit, nec movebatur; tandem vero rapidissime agebatur in gyrum, unius fere pedis diametro, jamque corporis agitatione desistens, non nisi tremulum caput agitabat, jam nova motus violentia, in gyrum actus, obvolvebatur. Quæ quum vel duas per horas protracta fuissent, sensim muro accedens, tandem suum se recipiebat foramen. Sic quodvis animal suæ naturæ convenientissimos morbos experitur; ast cave credas, hunc vera vertigine laborasse, qualem equos experiri censet *Gosser*; Oves interim pari impetu aliquoties agitari, & plerumque morte, agitationis fine corripere narrant, qui rura colunt, & pastores; imo porcelli nonnunquam quodam ardore invasi, nisi festinantem opem attuleris, 12. horarum spatio emoriuntur, & partem adfectam, rubram, prunæ instar, exhibent.

Hebraicum muris nomen est: *Acbar*, Chaldaicum: *Acbera*, Arabicum: *Pbir* seu *Phar*, Græcum: *Mus*, *Muarion*, *Muscos*, Italicum: *Sorca*, *Sorce*, *Sorcio*, Hispanicum: *Rat*, Germanicum: *Maus*, Belgicum: *Muis*, Polonum: *Mysf*, Anglicum: *Mouse*, Svevicum: *Mus*. Gallicum: *Souris*, olim: *Souri* vel: *Sori* ex Ablativo Latino: *Sorice* vel *Surex* pro *Sorex* derivandum judicat *Menage*. Musculus autem Gallico idiomate: *Sourceau*, *Sourisseau* & *Seurisson* adpellatur.

Mus major. Offic. Dal. Phar. 446. *Mus*. Lemer. 587. *Mus majusculus*. Blas. 92. *Mus major*, sive *Sorex*, Merr. Pin. 167. *Mus major Rattus*. Schrod. 303. *Sorex domesticus*. Charlet. Exer. 25. *Mus domesticus major*, *Rattus vulgo*. Schvenckf. Quadr. 115. *Mus*, *Rattus domesticus*. Klein. Quadr. 57. *Mus domesticus major*, sive *Rattus*, Gesn. de Quadr. Digit. 109. Aldrov. de Quadr. Digit. 417. Jonst. de Quadr. 115. Raii Syn. Quad. 217. *Mus cauda longa, subnuda, corpore fusco cinerascens*, Linn. Faun. Svec. 28. *Mus cauda longissima, obscure cinereus*, Briss. Quad. 168. *Sorex*, *Rattus vulgo dictus*; *Mus domesticus grandior*; *Rattus terrestris*, domesticus seu vulgaris. Quorund.

Rattus igitur mure quadruplo major, martorum magnitudine refert, *Schwenckfeldio* teste. Rostrum ex apice scilicet, ad originem caudæ 7. digitis longum, capite gaudet a naribus ad occiput usque 2. fere digitorum longo; & oculis prominentibus, rotundis, nigris, scintillantibus, binas præter ea barbas exhibet in labro supremo, singulas ex decem pilis inæqualibus, nigris, ac flabelli muliebris instar dispositis; aures præbet magnas, rotundas, pellucidas atque in basi rugosas; & caudam corpore longiorem, crassam, brevi ac rariori pilo obtectam, & ex sententia *Raji*, ad minimum 160. ex annulis compositam; quinque digitos in posterioribus, quatuor vero in anterioribus pedibus, & unguem exiguum, in his,

pol-

pollicis locum explentem, pilum denique corporis omnem fulvo-obscu-
rum, & muris pilo prolixiorum.

Rattum dissecantes, pellem ejus, musculumque cutaneum talem per-
speximus, qualem in mure; & musculos aurium pariter ac barbarum agi-
tationi inservientes, statim conspicuos; & membranam cineream, globum
oculi obtegentem; & cerebrum cum cerebello & medulla ut in mure, ob-
longa sed distinctiora: & duos claviculos; & stomachum magnum, figu-
ra utriculum referentem; cujus in orificio superiore, Cel. *Severini* est,
qui rugas quasdam circulares observavit, avem repræsentantes, quæ ca-
put & collum suo pectore abscondit. Lienem vidimus, muris lieni & fi-
gura & colore similem, nec nisi magnitudine potiori diversum, & ma-
gnæ stomachi curvaturæ adhærentem; vidimus & epiploon, stomacho,
lieni & colo nexum; tum hepar ferrugineum ac 7. ex lobis compositum,
quorum ex sinistra supremus omnium maximus, infimus autem ex dextra
binis constrictionibus intersectus est; nullam vero vesiculam fellis; inte-
stina gracilia omnia albida; & colon nigridum, excrementis inhærenti-
bus quasi tot globulis interstinctum; & Cœcum amplissimum, cœruleum,
ac figura porcelli ventriculum æquiparans; Urinæ vesiculam conspeximus
albam, nec adeo magnam, testiculos magnos atque rotundos; & epididymides,
prostatas, vesiculas spermaticas, canales deferentes, uretheres, &
vasa spermatica, omnia distinctissima; nec non virgam cartilagineam,
5. lineis longam, & in extremitate quasi trifidam: & renes magnos fer-
rugineosque, cor vero majusculum, cujus auriculam dextram cruoris in-
star, nigram, & sinistra multo majorem observavit *Severini*; postea pul-
mones ex sinistra simplices, ex dextra autem tribus lobis compositos;
nec non thymum, corde superiorem; & diaphragma oblongum, rotun-
dum, ac ex dimidia parte pellucidum; In fœmella quadam utero geren-
te, Vir Cel. *Severini* dextrum matricis cornu, quatuor, sinistrum vero,
duobus fœtibus expletum reperit, & suam cuiusque cornu placentam, suum
funiculum umbilicalem fuisse observavit. Testibus tandem Anatomix cul-
toribus celeberrimis, maxima ex animalibus similitudo cum homine gliri
inest, si generationi inservientes utriusque partes spectaveris. Imo rattus
ille hermaphrodita, quem testibus *Ephemer. German. Theophilus Monitor Lyn-*
cæus apud *Fabrum* dissecuit, integras utriusque sexus partes genitales ex-
hibebat, quidquod novem fœtus, formica haud majores ac palpitante
corde instructos, utero suo gerebat.

Anni sunt, ex quo tempore, Regiæ Societati Lugdunensi, scriptum
aliquod, de Bezoare seu lapide in vesica glirium obvio, exhibuit Cel.
Morand, D. Rectorque Facultatis in illustri Universitate literaria Parisiensi, &
Societatis, Lugduni quæ floret, Sodalis; Vir acutissimus in observando, &
diligentissimus in referendo ea, quæ vel Medicæ arti, vel Historiæ natu-
rali lucis quidpiam adferre possunt. Generaliora quædam igitur præfatus
de arctissimo illo vinculo, quocum Medicina & Physica, & in primis Hi-
storia naturalis continetur, hanc refutat opinionem, qua Medicinæ stu-
diosum dedecere credunt disquisitionem eorum, quæ haud directe spe-
ctant ad artem sanandi; quaque vel prorsus illum interdicunt studii adeo
ærumnosi, imo sæpius injucundi. Sic & Bezoar, de quo agitur, quamvis
non nisi ad historiam naturalem spectare videatur, aliquali tamen usui

cedit artis Medicæ ; sic enim ratiocinia docent , & ea , quæ de generatione calculi perhibentur , multum probabilitatis subjungunt . Recenset nimirum Vir Cel. *Morand* quæ pro calculi causis in homine habentur præcipua , ut stomachi constitutionem debiliorem , & usum alimenti nimis solidi difficilisque concoctu , & vitam sedentariam ; postea autem omnia ista in ratto unita reperiri explicat ; hujus stomachum scilicet tenuissimum , vel minimo aere immisso lacerari docet , rattos vero gulosissimos : (ut frustula ciborum maxima in ventriculo eorum reperta loquuntur :) & motu sæpius ac potu destitutos , nec non adipe , lardo , candelis , caseo , charta , ligno , aliisque similibus , ut solent , vescentes , cruditaribus & indigestionibus (ut cum Medicis loquar) subjectos esse atque obnoxios . Collectis itaque calculi causis , quum ratti in examine , aspera quædam in ejus vesica detexisset , & hunc calculo obnoxium esse judicavit , & perspecta denique renum substantia plerumque molli , & urina (ut in his qui calculo laborant) viscosa , crassioribusque partibus plena , binas causas remotiores calculi iterum reperit . His igitur ratiocinationibus , in ipsa rei natura fundatis , accessit observationum cumulus , & viginti rattos , masculos , ac quos habere potuit , antiquissimos examinando , dimidiam ferè eorum partem , jam calculo , jam alio urinæ viarum morbo laborantem reperit . Primo itaque rationem ac modum , quibus ille gliris calculus concrevit , ab hominis calculi origine , diversissima , post vero ipsius rationem formamque describit . Ut enim in calculi humani conformatione , quidam adest pro basi , nucleus , qui accedentibus postea stratis multiplicibus obducitur : sic gliris calculo pro basi venit lamina quædam seu folium quadratum ac tenue , splendoris sui ergo a Viro Cel. *Morand* , talco seu lapidi speculari æquiparatum , & hujus superficiei utrique saburræ partes innumeræ , aculeorum figuram referentes accedunt , adglutinantur . Diu itaque excrescens calculus cubi formam conservat , & quatuor laminæ anguli , semper prominentes , quantumvis calculi magnitudo ac moles adaugeatur , nisi aliorum calculorum præsentia adfrictuque , splendorem amittant , adamantis instar , splendentem exhibent lucem . Alium in alio ratto reperisse addit Vir Cel. qui cerasi acinum , magnitudine adtigit , alium , qui granulum cannabis , alium denique qui frumenti , imo denuo aliam vesicam 12. calculis expletam , novem scilicet coriandri grano æqualibus , tribus vero minoribus . Idem ille subnectit , tenias sæpe , seu vermes planos rattorum in hepate , sub capsula *Glissoniana* , imo antè reperiiri , illosque vel nondum dissecto hepate observari , subjacent enim punctulis quibusdam albidis , & innumeris ex annulis compositi sibi ipsis circumvoluti quiescunt .

Nobis autem non nisi de ratto communi seu domestico , & hujus præsertim historia naturali sermo est animusque dicendi . Hinc missum facimus & hunc , qui in arboretis degens corpore seu dorso flavo & ventre albido gaudet ; transeamus & campestrum magnum pilis ubique ferrugineis , & in lateribus tantum , rubicundis obtectum ; nec in censum veniat rattus Norvegiensis , cinereo-ferrugineus ; nec aquaticus , supra nigro-flavidus , subtus vero flavido-cinereus ; nec campestris minor , nigrido-flavescent in dorso , & obscuro cinereus in ventre ; nec Barbarus , Cel. *Lemery* descriptione conspiciendus , & ex sciuro pariter ac ratto participans ; nec
ille

ille quem Cel. *Briffon* genericum esse docet, & Marmotam, pro specie, complectentem quemque Galli jam: *Loir*, *Lerot*, *Loirot*, *Livot*, jam *Rat-dormant*, *Rat-reul* seu *Rat Velu* nuncupare solent; nec tandem *Rattus musci*, *Americanus*, seu *Piloris*.

Rattus autem, de quo diximus, quemque in *Svecia* frequentissimum, aut in *Lapponia* prorsus ignotum esse refert Cel. *Linnaeus*, omnibus noxæ, omnibusque exosus, duriora mollibus nutrimenta præoptat, & frumento præsertim carne, ac pane vescitur, vinum quoque oleumve, caveis recondita, haurit. Addit *Gesnerus*, quod nec terra delitescat, murium more atque talparum, nec tempore noctis conspecta luce, muris instar aufugiat, oculis nimirum splendore præstrictis; quod facilis parietes adrepat, quod tandem ex fœtore suo, carnis atque excrementorum naturam calidiorem acrioremque quam muris, dijudicare liceat. Feles autem, quamvis non nisi capita rattorum devorare dicuntur: cave concludas hos esse venenosos. Quidquod ex *Varrone* edocemur, antiquissimis *Italiae* habitatoribus rattos, studio faginosos, pro cibo cessisse, quibus gratissimum saporem tribuit *Matthiolus*. Quum autem feli cuidam binos mures sua pelle indutos, & rattum, pelle sua exutum objecissemus, illam eadem aviditate & hunc & istos devorasse vidimus. Tantum nostra constat experientia. Nec erroneæ vulgi sententiæ accedimus, qua ratti caudam recondere perhibent venenum, urinam autem, & præsertim catulientis, carnem hominis ad ossa usque corrodere, nec repentina cicatrice vulnus obduci. Sexcenta sunt, quæ de ratto fabulis atque errore recensentur. Sic *Plinius* fœmellas vel ex sale lingentes, absque coitu fœcundari perhibet. Sic *Pausanias* refert: *Mæandrum*, *Joniæ* fluvium, littora egressum, multum cœni reliquisse, hoc autem tantæ rattorum quantitati originem dedisse, ut vel aufugiendum fuerit habitantibus. Rattos vero ex putredine natos vel haud pollere generandi facultate docet *Cardanus*, vel, si gavisi fuerint, pullos tamen suos eadem destitutos esse. En, quæ *Ælianus*: Exspatiato *Nilo*, magna undique copia rattorum *Ægyptum* opplet, devastatur; contra illam quum nihil faciat hominum cura ac virtus, cœli auxilium expetendum superest. Rituum sacrorum, quos magicos fuisse censemus, virtute coacti, sic ille pergit, aciem instruunt, receptui sese accingunt, ductum anteriorem juniores constituunt, antiquiores agmen claudunt, ægrotantes atque calones præmittuntur, omnes simul gradum sistunt, omnes una promovent; & quum plures in aquam prolapsi fuerint, alternas caudas suas arripiunt, junctim aquam eluctantur. Fert *Germanorum* fere communis opinio, quod glirium societati unus plerumque intersit, cæteris major, quem regis rattorum nomine salutant, quemque folio suo residere, & cibo ab aliis adportato sustentari credunt. *Plinius* subnectit, maximam esse & reverentiam rattorum & curam in parentes suos decrepitos. Satis curiosa sunt, fateor, mallet, quod vera.

Rattos tandem candidissimos sese vidisse testatur *Cardanus*, eosque vel ex frigore, vel senectute, vel nutrimento candido, albescere perhibet. Sua experientia certus, saccharo nutritos candorem induere docet *Olaus Magnus*; sed; si res ita sese haberet, nullos, nisi candidos videremus in officinis *Aureliensibus*, quibus saccharum præparare ac dealbare solent. Sic & *Albertus*, & *Scaliger*, & *Gesnerus*, mures, nivis candorem adtingentes

tes reperiere, & oculis rubris ac scintillantibus, quos falacissimos esse refert *Albertus*, & excrementa eorum calculis candidis plena. Variorum, illorumque candidissimorum mentionem faciunt *Ephem. Germ.*, ex his alius, qui vel domini vocem distinguendi virtute gaudebat, & caveæ accedenti blandire videbatur; alius insuper, in quodam monasterio Franciscanorum degentis, & magna cum monachis familiaritatis consuetudine usi, imo reliquis rattis refectorium intrantibus, inimicissimi, quorum quot captare poterat, enecabat, nec tamen devorabat. *Fridericus Lachmund*, D. ratti mentionem iniicit, nivis candorem adtingentem, quem septennio cavea conservatum, bini ratti alii, cavea effracta, enecaverant; & animal, alias tam brevis vitæ, longævum adeo fuisse miratur, ac arefactum conservat.

Rattos vero extirpandi haud tam facilis res est, quos ne aconito quidem confici expertus *Gesnerus*, & *Belon* testis est, alium, non nisi ex semine hyosciami sumto, vitam produxisse. *Aldrovandus* denique addit: rattos penuria coactos, nec aliis parcere rattis, & vasi inclusos fortiores, deficiente nutrimento, in debiliores quosque irruere; quod si itaque hunc, qui debellatis reliquis, solus tandem superstes fuerit, libertati restitueris, tunc ille, consuetudine crudelitatis in suos, maxima strage securos mactaret, non dicam extirparet. *Mizault* est, qui docet, quod si ex ligno fraxini ignem construas, tum vero rattos binos, vase argillaceo reconditos huic supraponas, hi violentia caloris adacti, summos lugubresque clamores extollendo, rattos, quotquot vicini adfuerint reliquos convocare, hique quasi aliis opem laturo, in ignem præcipites ruere soleant. Quod quidem nos censemus numquam accidere posse. Et *Cel. Scaliger* cornu ex muli pede suffumigata loca rattis libera esse perhibet. Sunt, qui docent: quod ratti capti ex collo si aliquod crepitaculum expensum, ille autem exinde libertati restitutus fuerit, hoc reliquos omnes suo strepitu abigere valeat atque fugare. Hostes denique sibi insidiantes non solum feles habent cum mustelis, sed etiam multiplici hominum artificio captantur; jam enim machinarum variæ illos expectant, & caseus, panis, aliave quibus delectantur, pro esca expensa, alliciunt. Jam spongiæ seu carnis frustula adipe frixa, & calce viva conspersa obiciuntur, aqua pro potu adponitur, jam vitrum contusum ac farina mixtum. Præcipue tamen veneno contra rattos cedit arsenicum; hoc sumto enim haud unius horæ spatium supravivunt, imo *Aldrovando* teste, rabie correpti, in alios irruunt, morsibusque mortalibus petunt. Aquam vero arsenico adponi vetat *Gesnerus*; quum enim alias aquam, vehiculi instar, venenum eo citius cordi adportare, rattosque inflare credant, ille e contrario, aquæ copiam & veneni virtutem debilitare, & vomitum, quo pars veneni abiret, excitare docet. Magna tamen cautione circa hunc arsenici usum opus est, ne id, quod gliribus destinatum fuerit, hominibus fiat nocivum.

Vulgari tandem Græcorum vocabulo: *Rastes* seu *Riscos* audit, quem Itali: *Topo* dicunt, seu *Ratto*, Hispani: *Raton*, Germani: *Ratze*, Angli pariter ac Batavi: *Rat*, Sueci denique: *Rotta*. Quod si denique vocis Gallicæ: *Rat*, originem quæris, *Cel. Menagius* illam vel ex Latina derivat, & ex *Mus*, *muris*, *murus*, *muratus*, *ratus*, *rato*, *ratto*, ac temporis successu: *rat* exsurrexisse censet, vel ex Latino, quamvis barbaro vocabulo: *ratus*; seu tandem

ex Germanico: ratt, quod a *reissen*, *rapere* descendit, & animali rapaci, seu raptori domestico competit.

Mus itaque & rattus, oleo, phlegmate ac fale volatili abundantes, foetoris sui ergo, apud nos quidem ex numero edulium proscribuntur, ast aliorum & palato jucundi, & stomacho convenientes sunt. Nostratibus enim innata esse solet averfatio in mures, quos ad ultimum saltem, vel summa penuria accipere docuit.

Ars medica autem vel animal totum, vel sanguinem, vel stercus ejus, in suos usus convertere solet. Communi, & praesertim plebis usui cedit medium, saepius reiterandum, quo infantibus, in somnio urinam emittendi vitio laborantibus, binos tresve mures seu rattos elixos, pelle tamen exutos, ac rejectis cum capite pedibus, pro cibo exhibent. Cujus ergo alii, ut saporis injucunditati medeantur, ternos, furni ope arefactos in cinerem reducunt, hunc vero in tres partes aequales divisum, cuivis ciborum generi admiscent, & unius diei spatium consumendum pueris praebent. Idem ille cinis, verrucis & pernionibus ulceratis inspersus, citissimo cedit remedio. Sanguinem ratti, quippe qui discutiendi & resolvendi virtute gaudet, ad resolvendos tumores scrophulosos adhibere solent. Sic enim in *Ephem. Germ. Dec. II. Anni V. pag. 198.* Cel. Hangerdorn, D. strumosos virginis cujusdam tumores, dummodo calido adhuc gliris dissecti sanguine adfricarentur, abiisse refert. Paucissimis tantum temporis punctis sanguine illos unxerant, & recedebant, deinde autem ligamentum sanguine irrigatum collo ejus circumdabant, nec recipiebant usque dum de se ipso deciderit, & tumores penitus evanescere nec redire unquam. Muscerda tandem seu stercus nigrum, (sic enim Latini muris glirisque excrementa dicunt) alvum ciendi facultate sua, reliquorum omnium stercore praestantius, clysteres ingrediatur, quibus obstinatoribus ventris constipationibus succurrunt, ternis quoque sive quaternis matris lacte solvantur, & infantibus, pro purgante exhibeantur, & qui delicatioris sunt palati, senis lacte solvant, post autem linteo percolent. Nec non arefacta muscerda & in pulverem reducta, dosi gr. xii. ad 3j. pro detergendis urinæ meatibus, expellenda saburra & provocanda urina praescribitur. De exteriori muscerdæ usu teneto sequentia: aceto soluta scabiem profligat; & pulvis ejus, melle ac succo ceparum commixtus comam producit elicitque.

Rx. Mures pelle exutos ac intestinis, capite insuper pedibusque rejectis, num. iij.

Quos cum aquæ communis chopinis iij. ad remanentiam pintæ j. elixos, percolabis, & liquorem tepidum, ptisanæ instar, infantibus, morbo cathartico laborantibus, exhibebis.

Mus Alpinus. Offic. Schrod. 303. Dal. Pharm. 446. Blas. 92 Gesn. de Quadr. digit. 840. Jonst. de Quadr. 117. *Mus Alpinus*, sive *Marmota*. Aldrov. de Quadr. digit. 445. *Mus Alpinus*, *Marmota dictus*, Herm. Cynos. 735. *Mus Alpinus*, Plinio, *Marmota Italica*. Raii Syn. Quadr. 221. *Mus cauda elongata nuda*, corpore rufo, Linn. Syst. Nat. 11. Glis *Marmota Italica*, *Mus Alpinus*, Plinio, Klein. Quadr. 56. Glis pilis a fusco & flavicante mixtis vestitus, sive *Marmota Alpina*. Briss. Quadr. 165. *Marmota vulgaris Allobrogum*, *Marmon-tana*, seu *Montanella*. Quorumd.

Magnitudinis est mediæ inter leporem & cuniculum, crassitudine felem
supe-

superat, figura tandem rattum exæquat. Ab apice rostri ad originem caudæ 1½. pedes longa, & capite instructa est. 3. digitorum ac 9. linearum a naribus ad occiput usque longo; & lingua leporinæ simili; & duobus in utraque maxilla, dentibus incisoriis, longis, cuspidatis ac flavidis; & barbis, felum more, in labio superiore, hispidis nigrisque setis constantibus; & oculis magnis, nigris, nec adeo prominentibus; & auribus amputatis quasi, ac brevibus; & cauda 6. digitorum longa, interioreque pedum parte nigridis; cruribus vero brevibus crassibusque; 4. digitis in quovis pede anteriore, in posteriore omni vero quinis, quorum tres medii, extimos longitudine superant; omni denique corporis pilo hispido, longo atque frequenti, supra jam fusco, jam flavescente, subtus autem flavido.

Variae cæterum adsunt marmotæ descriptiones anatomicæ, etenim, ut, vel nostram silentio transeamus, denuo alias quatuor in promptu habemus. easque vel ex *Blasio* depromendas, vel *Ephem Germ.* vel *Actis Reg. Scient. Academ. ad naturalem animalium historiam inservientibus*, *Cel. Perrault* Auctore. quam quidem ultimo dictam reliquis anteponere, & hic adponere liceat.

Gallicum igitur marmotæ nomen, sic *Acta*, *Gesnero* teste, ex *Murmont* montium ratto, derivandum, & ab Italis inventum videtur, apud quos notissima quidem, ast non nisi in Alpibus frequentissima est. Quam ergo examini nostro subjecimus, marmotta, ab apice rostri ad extremitatem caudæ (iv. digitis longæ, ac valde prolixo pilo ornata) 21. digitorum longitudinem exæquabat. Quatuor etiam digitorum intervallo auris ab apice rostri distabat; & aures, undecumque illos dimetiatis, 7. lineas explendo, ac formam trianguli referendo, capitis pilo longissimo fere prorsus absconditi: tum vero pedes anteriores a cubito ad unguium finem 5. digitis longi erant, nec nisi quatuor saltem digitos exhibebant, longissimo omnium interiore, pollex enim deerat, & os Metacarpi, sustinendo pollicis alias destinatum, eminentiæ cujusdam sub specie, quasi resecto pollice, conspiciebatur. Posteriora autem crura integra fere, pelli adhærebant; & podex ad talum usque, urfi instar, digitis vicinum descendebat. Quæ quidem conformatio pro ratione adest, quod facillime pedibus suis posterioribus insistere possit uterque ac sustentari. Hinc quoque animal illud, quod Græcis *Arctomys*, quasi glis-ursus dictum fuit, marmotam esse judicamus, quippe quæ non solum constipato longissimoque suo pilo, & jejunii quietisque hyemalis similitudine, sed quoque usu quodam pedum posteriorum peculiari, urso accedit. Ex talo itaque ad apicem digitorum, 3. digitis pedum posteriorum longitudo absolvebatur. Quinque etiam digitorum, quibus constabant, alius, pollicis instar, quamvis extimus reliquos & longitudine & crassitudine superabat. Pes vero totus, humanæ manus figuram fere prorsus æquiparabat. Sic quoque ungulæ, posteriores pedes quæ muniebant, aduncæ & 7. linearum longæ, quæque anteriores, erant breviores ac detritæ, his enim terram pro foveis suffodiunt, & rupes adrepando sustinentur marmotæ. Quidquod teste *Gesnero*, vel inter binos parietes adscendendo eximiam altitudinem pertingere possunt, & artis caminos expurgandi magistræ fuisse videntur. Dentes ut in glire, bini erant in utraque maxilla anteriores, castoreos longitudine acieque exæquantes, & superiores quidem 10. lineis longi ac 2. lati, ast inferiores, breviores la-

tioreſque. *Matthiolus* eſt, qui ſuis ſe oculis vidiffe docet, marmotæ dentes reſectos, una nocte rediſſe. Quod quidem, ſi de dentibus inferioris maxillæ ſermo eſt, ita fieri potuit, ut quum longiſſima, ac aliquoties vel dentem ex gingiva prominentem æquiparante radice inſtructi ſint, violentius protracto dente radicis partem produxerint, quam ex alveolo, dentis longitudine prominentem, pro dente ſuccreto, incauti, habuerint. Pilus inſuper hiſpidus ac villoſus ubivis, in dorſo & collo, $1\frac{1}{2}$. digiti in ventre autem vix dimidiam iſtius longitudinem adtingebat. Interiore lumborum in parte, ſub ventre etiam, & pedum anteriorum in extremitate, fulvus, in dorſo autem cinereo-flavido & ferrugineo colore erat commixtus. Caudam denique ejus longiſſimus pilus exornabat, quo quidem a glire ſummo opere diſtinguebatur, imo nec alia ſimilitudine multum illi marmota accedit, ſi odorem ſui acutiſſimum atque ingratum, & inſiſtendi pedibus poſterioribus facilitatem excipias; quidquod vel alia, alieniſſima a ſpecie rattorum, ut: urſus, lepus, ſciuruſque erecto corpore poſterioribus ſuorum pedibus inniuntur, & caſtor, hyſtrix, & glis, quem *Loir* dicunt, dentibus, forficis vel forcipis more acuminatis, inſtructa ſunt.

Subtractis porro muſculis abdominis, duo quaſi deteximus folia adipis albi, ſolidi, 1. digito alti, ac membranis intermediis; ſingula 5. digitis longa, 4. lata, totam lumborum regionem occupantia, imo os ſacrum pertinentia, & hepar cum inteſtinis obtegentia. Quæ, ut bina epiploa ſeparata, innumeris venis arteriisſque interſparſa, & tamquam ex membrana renis adipea proficiſcentia venas ſuas venæ cavæ inferebant. His tandem inferius aliud epiploon vidimus, ſilveſtrium, curſus ſaltuſque frequentes edentium epiploo ſimillimum, paucioribus, quam priora, vaſibus inſtructum, & ventriculum maximamque partem inteſtinorum complectens. Hepati denique & diaphragmati intermedium deteximus quartum epiploon, totum hepar obtegens; & adipem exhibens, reliquorum adipe minus candidum minusque durum, vaſa autem pauciſſima & parum conſpicua. Quæ quum in binis marmotis reperta, ac ſatis ſingularia habeamus, miramur nullam eorum mentionem factam eſſe a *Severino*, qui multus alias eſt & exactiſſimus, in deſcribendo marmotæ partes internas. Tum ventriculus, 2. digitis longus, & tunicis craſſiſſimis, ſerico tenuiſſimo, glandulis tandem vix adparentibus inſtructus; ſuaque figura, humano accedens, ex altero hepatis lobo magno, duorum inter ſe proximorum ligamentorum ope ſuſpenſus, ventriculus, inquam, marmotæ tam exiguus, jure, inter ſingularia ejus referatur, quippe qui ad analogiam ruminantium, maximus, quidquod multiplex eſſe deberet, quum fructibus tantum, & parum nutrimenti præbentibus aliis, marmota vivat. Inteſtina omnia in univerſum, cæco excepto, 10. pedum longa, ac ejuſdem fere craſſitudinis erant ubique, etenim non niſi colon ab initio dilatatum, reliqua vero ſua parte, duodeni, jejuni, atque ilei capacitatem vix tantillo ſuperabat. Quæ quidem tria, ſimul ſumta, 7. pedum longitudine, triumque linearum latitudine abſolvebantur. Cæcum e contrario, 3. pedum longitudinem, $1\frac{1}{2}$. latitudinem, & cavitatem, ventriculi cavitati ampliorem exhibebat; foris ligamentiſſimum, intus vero pluribus foliis in plures cellulas diviſum. Circulus exiguus præter ea, iterata tunicæ internæ complicatione efformatus, colo pro valvula cedebat. Septem quoque ad octo numeravimus cumulos glandularum in inteſtinis obviarum,

maximos autem in ileo, foliis destituto. Post in extremitate recti tres sacculos observavimus, vacuos ab omni liquore, & cœcis illis exiguis similes, quæ in nonnullis avium reperiri supra docuimus, & quum de aquila ageretur, descripta dedimus. Septem lobos hepatis tribuit *Severinus*, nos quinque tantum deteximus, vel octo, dum scilicet maximum, quodammodo quadripartitum, non unum, sed quatuor habere velis. Vesicula autem, 1. digiti longa, & crenæ cui immissa erat, in superficie, viridis, unam ex rimis lobi maximi, dextris explebat, post vero partem ejus gibbosam egressa ad epiploon, hepar quod obtegebat, producebatur. In altera tandem ac cava lobi maximi parte, bina ligamenta, ventriculum, ut diximus, suspensum tenentia, conspiciebantur. Cæterum, si hepatis colorem quæras, ruberrimus; & si substantiam, glandulis, inter se probe separatis, ut conglomeratæ alias, constabat. Bilis conductus, ut solent, in unum denique truncum cœuntes, intestino, prope ad pylorum, inferebantur. Lienem vero, 3. digitis longum, 5. linearum latum, & 1. lineæ crassum, rotundum, & hirundinis figura esse dicit *Severinus*; hunc pluribus punctulis albis vidimus confpersum, quæ non sunt, nisi totidem extremitates fibrarum, (una cum venis atque arteriis, substantiam lienis componentibus,) texturæ constituendæ inservientium. Duplex, ut in cane, pancreas, sui canalem, sub canale bilis, intestino inferebat; & in orificio papillam præbebat exiguum. Renes magnitudine nucem referebant; & glandes renales, exigui, figuram valde irregularem. Tum uretheres, adipea quadam vagina reconditi, ubi renem egrediebantur, ut in cane, pelviculum efformabant. Quæ autem testiculos in inguine delitescentes immediate obtegebat, tunica, ex musculo cremastere oriebatur. Nec non testiculi, 10. lineis longi, & 3. lati, innumeris canaliculis, dextrorsum sinistrorsumque complicatis & sibi superjacentibus, tum vero venis atque arteriis, ope membranarum tenuissimarum canaliculis cohærentibus, nec ulla substantia alia constabant. Quam quidem testiculorum structuram, quam hodie omnibus communem docent, distinctiorem videbis in marmota & gliribus, quam in quodam reliquorum. Bina erant singularia in epididymide; alterum, quod corpore ejus neutiquam tangeret testiculum, sed membranæ cuidam neceretur, qui ex testiculo ad epididymidem producebatur. Alterum vero, quod meatum deferentem haud constitueret epididymidis extremitas, testiculi in imo, sed istius initium, prope ad insertionem meatus præparantis. Imo nec eadem ubivis crassitudine erat epididymis, sed infra quintuplo majore, ac per omnem sui longitudinem reliquam. Nec conductus deferens, ubi collo vesicæ inferebatur, dilatatus, cæterum partem gracilem epididymi, parum crassitudine superabat. Parastatæ, utrinque binæ, & 5. lineis longæ, urethræ, prope ad deferentes, inferebantur. Prostratæ autem, avellanam magnitudine adæquantes, singulæ suo tubulo, virgæ necerentur, tubulus vero, in parte interiore urethræ, 5. linearum intervallo a radice virgæ, apertus, virga tandem, 1. digiti longa, in extremitate sua cartilagine quadam exigua corroborabatur. Quinque etiam lobi, pulmonem parvum constituentes, situm obtinebant prorsus insolitum, ex sinistra scilicet non nisi unus aderat, ast magnitudine sua, tres ex dextra conspiciendos æquiparabat. Quintus denique medium, seu mediastini cavitatem occupabat. Imo cor, 1. digiti longum, & 5. linearum

latum, oblongæ hinc figuræ ac æqualis, cuspide, quam alias exhibet, carebat. Cerebri superficies æqua, nec anfractuosa. Striata corpora crassa, pluribusque lineis argenteis, tamquam radiis notata. Et glandes plexus choroïdis crassissimæ; omnis denique nervus opticus, priusquam oculi globum ingrederetur, bifidus, scleroticæ, quam transit, foramini inhærendo, coibat; nec tamen rotundum, sed ut in avibus, crenæ instar conformatum esse scito foramen scleroticæ.

Adeas succinctam *Marmotæ historiam naturalem auctore Cel. Klein*, quam in fine *Ejusdem Dissertationis de avibus transmigrantibus* reperies, & edoceberis, quod, quæ Sabaudia incolis: *Marmotæ* audiunt, ab *Ucraniæ*, *Podoliæ*, aliarumque *Russiæ* regionum incolis, *Bobacs*, seu *Baubaces* dicantur. Mira autem *Kleinio* videntur ea, quæ de his *Baubacibus*, ignota omnibus ac inextaudita, refert *Vir. Eminentissimus de Polignac*, Cardinalis; En quæ *Libro VI. Anti-Lucretii* sui leguntur:

„ Vidi, qua turbidus ire Danastris
 „ incipit, ac patulas Dacorum adlambere campos,
 „ *Ucrania* in pingui, qua non felicior olim
 „ terra fuit, dum bello acres habuere *Cofaci*,
 „ nunc stat iners, nulloque exercita vomere tellus;
 „ Vidi belligeras acies, & castra ferarum,
 „ queis color haud cunctis unus; nigrantia terga
 „ sunt aliis, fulvæque aliis per corpora setæ;
 „ (*Baubaces* patria dixerunt voce *Poloni*)
 „ vulpinum genus, innocuo ni vivere pastu
 „ mos esset, penitusque animanti ignoscere prædæ;
 „ Nam virides populantur agros, specubusque profundis
 „ suffodiunt, ac de latebris & gramine certant.
 „ Quales inter se populi, quos flumine magno
 „ dissociat *Rhenus*, campos & littora propter
 „ bella gerunt. Acuit totas hinc *Gallia* vires
 „ atque illinc toto *Germania* robore pugnat.
 „ Ergo ubi villosas pecudes excivit ad arma
 „ laudis amor ferus, & vincendi cœca libido
 „ plebem iracundam vomit undique terra cavernis.
 „ Ocius ecce fremunt. Vasto micat æquore miles.
 „ agminibus primum sparsis atque ordine nullo,
 „ tum varias ineunt, certo rectore, cohortes.
 „ Utraque in optatis metatur castra viretis,
 „ expanditque suos acies adversa maniplos:
 „ Quin & utrinque pares animos, eademque videres
 „ non sine terrifico strepitu, præludia pugnae.
 „ Ut *Mars* accensus cantu, signumque ululatus
 „ ceu tuba rauca dedit, concurritur impetu magno,
 „ miscenturque agiles turmæ, furit hostis in hostem
 „ discolor, effusoque madens rubet herba cruore.
 „ Spesque metusque modo hanc, modo partem deserit illam.
 „ O quot solertesque dolos, & fortia facta
 „ Observantum oculis adimit certaminis horror;

„ Altera pars tandem, fato meliore, triumphat,
 „ Victa fugit, secura sibi procul pabula quærens;
 „ Nec sequitur fusam, sed deserta cubilia victrix
 „ occupat, & partis grassari gaudet in arvis.
 „ Verum in captivos, dominorum provida miras
 „ sævitia exercet pœnas; mœsta agmina condunt
 „ in foveis, coguntque omnes servire per annos.
 „ Atque ubi tempestas bruma veniente, rigescit,
 „ & complenda monet secto cellaria fœno,
 „ protinus ad messem ducunt servata ferendam
 „ mancipia; inversisque solum premere atque supinis
 „ corporibus, tum crura jubent adtollere sursum,
 „ quatuor erectis persistent ut gramina palis.
 „ Inde onerant caudaque trahunt animantia plaustra
 „ erasque vias miserorum tergo verrunt.

Hactenus ille. Quæ satis magnifice quidem sonant, ac evehendæ, pro intentione poetæ, gloriæ quadrupedum cederent, si eadem facta veritas responderet, quanta inest raritas. Nec tamen ille solus in extollendis laude baubacibus tantus est, sed tales jam ante eum, Viros *Furetière*, & *Colonne*, Equitem, fuisse novimus. Ast quid mirabilius, sic pergit *Kleinius*, quam animalia, jura belli & pacis exercentia? eo potius, quum nec cornix cornicis oculos effodere, nec lupum lupus devorare solet umquam, nec marmotæ ad colligenda nutrimenta servis egeant atque mancipiis, quas octo integris anni mensibus somno detentas, nec alimentis indigere constat nec servis; quum omnis naturæ ordo inverteretur, animantia hæc plaustra ut cum poeta dicam, ex cauda, contrarioque pilo, protrahendo; quum si stramine marmotis opus est, illæ vel oris ope vel pedibus anterioribus, (etenim & posterioribus solis, urforum instar, incedere valent) quantum sufficit, congerere possunt. Sic illis, quæ in historia naturæ obscuriora supersunt, fabulæ interdum substituuntur, & præjudicia ac credulitas nimia, nimis longe vel ab his, quæ experientia quotidiana certo constant, abducunt.

Nobis interim dubium aliquod superest circa hæc, de *Kleinio* dicta; illum enim rattum Alpinum cum Baubace Ucraniensi confundere liquet. Ast *Cel. Briffon*, in hac re gravior, quinas esse docet marmotarum species, scilicet 1. Bahamensem, ferrugineam, & cuniculo nostrati paullo minorem, 2. Americanam, seu Marylondensem, cuniculo nostro æqualem, & in dorso ferrugineis obscuris, in lateribus debilibus, in ventre tandem debilissimis pilis indutam, 3. Polonicam, *Bobak* dictam, corpore flavido, cauda autem capiteque rubicundis. 4. Marmotam Alpinam, de qua actum est, 5. tandem Argentoratensem, patrio nomine: *Kornfarele* nuncupatam, magnitudinis mediæ inter glirem atque cuniculum; verticis, dorsi & caudæ cinereo-ferrugineorum, gutturis albi, ventrisque nigridi, quam multum frumenti, pro adparatu hyemali congerere dicunt. Baubacem igitur Polonicam a marmota Sabaudienfi differre constat.

Patriæ itaque nomen suum qui debet, mus Alpinus, montium rupiumque fastigia præsertim inhabitat, & qui Helvetiam ac Sabaudiam tenent, præcocioris nivis ergo, exeunte Septembre, in latibula sua recedunt; &

testibus venatoribus, plurimum imparibus, quinis, septenis, novenis undenisque, uno latibulo delitescunt, & dimidium fere per annum, ab autumno scilicet ad verem, tam profundo somno detinentur, ut nisi frustatim dissecti tandem, motus sensusque signa edere incipiant: hinc proverbium: *marmotæ instar dormire*. Ingruente hyeme ergo, fœnum ac stramen, strato sibi futura, foveas suas deportant, ac duo ibidem foramina effodiunt, utraque eodem conducentia, alterum superius, quod ingressui patet ac exitui, alterum inferius, quo excrementa conferunt. Ingravescente tandem frigore utraque obturant, & intrusorum ex longitudine, hyemis vel vehementiam vel clementiam dijudicare ac prædicere solent habitatores. Festo natalitatis jam profundissimo somno sopitæ reperiuntur marmotæ, nec nisi verni solis calore excitantur. Quoties autem latibula sua, vel delectationis ergo, vel ciborum causa egrediuntur, aliam in introitu cavernæ, excubias agentem constituunt; hæc imminente periculo quovis, acutissimum clamorem, canis latratui, vel tibix sonitui accedentem, extollit, quo percepto reliquæ cavernam concurrunt, ac se ipsas recipiunt. Cæterum futuram cœli variationem acuto clamore indicant, nec pluvia, nec tempestate, sed sereno cœlo tantum latibula sua egrediuntur; & cruribus digitisque fortissimis, mira celeritate terram suffodiunt; celerrimo quoque cursu feruntur, ex devio dum ascendunt, ast in planitie tam lento gradu procedunt, ut hominis cursu adtingi possint facillime. Nec difficili opera cicures fiunt, dummodo sint juniores, & saltare, mortuas effingere, comam domini, simiarum more, perstringere, & quidquid velis, addiscunt, & cicurata hostilem inducunt animum erga canes, eosque jam profugant, jam acerrimis moribus petunt. Utenilibus autem infestæ sunt, quæ glirium more, corrodere peramant. Cibos sibi oblatos, natibus residendo, anterioribus pedibus, sciurorum instar accipit, ori admovet marmota cicurata; ruri detenta fructibus, herbis, radicibus, scarabæisque vivit, ast ædibus degens, pane, caseo, juscule, & quidquid obvenerit, alio, vescitur; lactis præsertim amica, ronchos ducere, seu murmurare solet, quorum ergo, si *Kleinio* fides, Germanorum idiomate: *Murmel-Thier*, animal murmurans, audit. Fœmellam denique ternos ad quaternos fœtuses effundere observatum est. Summum denique, & vix perferendum fœtorem æstatis tempore exhalant marmotæ, decimum sæpius vitæ annum pertingentes.

Quæ omnia ut clariora certioraque reddantur, subjungamus ea, quæ in tractatu Viri Cel. *Altmann*, de animalibus montium Helveticorum, *Abbatis Prevost* studio, Gallice reddito, & Diario Exotico, quod *Journal Etranger* dicunt, inserto, leguntur.

Marmota igitur, sic Cel. *Prevost*, mundum peragranti Allobrogi victum quæ parat, quum non solum apud Helvetos, sed Gallos etiam Italosque Alpium accolæ, sit frequentissima: mirum est, quod nemo fuerit ante Cel. *Altmann*, qui marmotæ descriptionem *Gesnerianam*, tot tantisque variorum fabulis repletam, expurgare & integritati suæ restituere curaverit. *Altmann* igitur marmotam, carnem adipemque tot mille hominibus quæ nutrimento præbet, taxi montium speciem, utrumque vero in classem porcorum referendum esse, falso tamen, perhibet. Porcis tamen uterque & carnis, & nutrimenti figuræque ratione, multum accedit. Alpibus fere omnibus inhaerent marmotæ, frequentiores tamen in his, qui Orientem spectant ac

Meridiem, quam in illis, quæ Septemtrionem & Occidentem, detinentur. Cæterum & carnis soliditate, & pilorum similitudine atque nutrimenti, porcis accedunt. Imo enecatæ si calefeceris, naso saltem pedibusque differre a porcis, cæterum vero iis simillimas, imo eadem ratio cibo præparandos, & Cel. *Altmann* vix quidem sapore diversas esse; & quamvis montibus dum inhærent, herbis tantum atque radicibus vescantur: ineunte attamen hyeme, præ pinguedine, vel 20. libras explere constat. Res vero omnium singularissima hæc est, quod ineunte Octobre, cavernam in monte quodam effossam ingrediantur & profundissimo somno sopitæ, ad Majum usque eadem detineantur. Eadem quoque caverna nisi casu aliquo perierit, omnibus ejusdem prosapiæ marmotis habitationi cedit. Hanc enim plerumque in pede rupis saxosæ constituunt, & devastatu difficilem reddunt. Ingruente autem hyeme, singulæ sibi sua strata ex fœno componunt, 4. ad 5. digitorum intervallo distantia. Tum omnes eandem cavernam sese recipiunt, & ingressum ejus diligenter obturare, quidquod omnia ejus vestigia delere noscunt. Hinc quoque venatorum ului venisse constat, resectum adhuc ingressum jam terræ infixio bacillo, jam lapide adposito denotare. Hi ergo tribus ad quatuor primis somni hebdomadibus præterlapsis, cavernas saltem investigantur, cavent autem, ne cœlo mitiori id fiat, seu vento calidiore spirante, alias enim facillime expergefactæ marmotæ ulterius suffodiunt, ac sese recipiunt. Frigore vehementiore autem tam profundo sopore detinentur, ut ne maximo strepitu quidem excitari possint. Mirum videbatur Cel. Viro *Altmann*, quod, quum sex mensibus successivis somno fruantur, alimenta ante recepta fermentando & putrescendo haud corripiant intestina; ast ab venatoribus edocebatur, quod quindecim diebus ante recessum non solum omni prorsus cibo abstineant, sed etiam tanta aqua stomachum sibi expurgent & intestina, ut hyemis tempore dissectæ, ne minimum quidem nutrimenti residuum contineant. Idem ille Vir Cel. dubitabat, qui fieri possit, quod vel in somno continuata respiratione, quidpiam carnis remaneat; ast respondebant; nasum posteriori ventris parti infixum esse, exhalationesque denuo corpus intrare, nec in aere perire. Cæterum omni pinguedine quum careant, dum verno tempore expergiscuntur: creditu est, adipem earum sensim liquefieri, ad intestina deferri, ac pro nutrimento dormientibus cedere. Continuis autem persecutionibus avium rapacium hominumque pressa marmota, haud interruptas agit excubias, & imminente periculo quovis acutissimum sibilum extollit, quo percepto omnes reliquæ præcípites ruunt in fugam,

Græcorum idiomate: *Artomus* dicitur, Italarum: *Murmort*, *Marmota*, *Marmontana*, *Montanella*; Germanorum: *Murmel-Thier*, *Murmentle*, Batavorum: *Marmel-Dier*, seu: *Alpise Rat*, Anglorum: *Mountain-Mouse*, Suecorum denique *Mormel-Dur*.

Marmota autem multo oleo ac sale volatile abundans, Alpes colentibus pro cibo venit, & carnis porcinae instar, fumo arefacta, vel sale condita, vel additis naps vel brassica præparatur; ast robustissimo stomacho opus est, illa enim olei pinguedinisque suæ ergo, facillime cruditates generat, & humores terrestres. Quum enim omnem hyemem marmota somno perducatur, quid mirum? si justo minus rectificati liquores, producendo chylo probo nulli sufficiunt.

Adeps marmotæ, qui solus ex illa usibus Medicinæ cedit, emollientis, anodynæ & resolventis suæ virtutis ergo, contra adfectiones nervorum, & articulorum contractiones ac rigores commendatur. Optimo quoque remedio externo, contra colicam nephriticam venit, si renum regioni pro linimento adplicetur; imo contra pleuritidem; sequens enim unguentum, lateri doloribus adfecto illinendum, *Paracelso* erat secreto:

℞. Adip. ex marmot. ʒj.

Ol. amygd. dulc. ʒß.

Ol. rosat.

Chamæmill. ana ʒj.

M. f. unguentum antipleuriticum.

O V I S.

Ovis. Offic. Schrod. 303. Boffch. *Quadr.* 287. Blas. 94. Valent. 125. Herman. Cynof. 826. Lemer. 644. Dal. Pharm. 437. Charl. Onom. 6. Schvenckf. de *Quadr.* 57. Gesn. de *Quadr.* 872. Aldrov. de *Quadr.* Bisulc. 370. Jonst. de *Quadr.* 38. Ovis domestica, cujus mas, Aries, fœtus dicitur Agnus; Raii Syn. *Quadr.* 73. Ovis cornibus compressis lunatis. Linn. Faun. Suec. 43. Aries, Ovis, Vervex, Agnus, Klein. *Quadr.* 13. Aries laniger, cauda rotunda, brevi. Briss. *Quadr.* 74. Ovis vulgarior. Nonnull.

In genericum nomen abiit ovis vocabulum, & quum proprie fœmellæ denotandæ veniat, nunc & mari, quem arietem dicunt, & resecto, seu verveci, & agno seu fœtui tribuitur; nec tamen maris sed fœmellæ nomine adpellatur pecus ovinum seu ovillum, quia pluribus fœmellis, maribusque castratis conservandis student homines, quam arietibus, ex his enim aliquos tantum pro fœcundandis ovibus retinent, nec arietes ut oves atque verveces in gregem collectos reperies. Physicorum varii quidem, pecus ovinum satis notum esse dicunt, nec descriptione egere putant, ast desides, censeo, inertiae patrocinium quærunt, nulla tamen nobis ista arridet, qui communissima animalium sæpius ignotiora esse novimus. Gerardo Blasio ex alias fufiorem ovis descriptionem debemus, ex qua suam hausit Valentinus, omnibus tamen præstantiorem illam judicamus, quam in Virorum Cell. Daubenton & de Buffon historia naturali, generali ac speciali, sequentibus expressam, legimus:

Arietem cum tauro, quoad figuram, inter se comparando, exiguum, sed interiora utriusque disquirendo, maximam non dicam omnem, omnium partium similitudinem, ac eandem constructionem reperies. Intestina arietis, ab his, quæ tauro sunt, ita fere, ut equi asinique viscera, magnitudinis, (majori tamen) differentia, distinguuntur. Potius tamen est discrimen inter sceletum tauri atque arietis, & hanc ob causam tanta est similitudo figuræ utriusque, ut, si vel pilum tauri, arietis lanæ substitueres, nec figuræ convenientia huic ille accederet; huicque caput magis exiguum, rostrum strictius, collum brevius, cornua tandem ac crura longiora remanerent. Eadem insuper vocabula denotandis partibus utriusque inserviunt, saltem palea arieti nec tribuunt, nec faciei partem anteriorem sive rostrum: muffle, ut tauri, sed museau, adpellare solent Galli. Color plerumque ovibus est albo-sordidus, seu flavo-pallidus, interdum & ful-

fulvo-nigridus, vel albo-flavidis nigridisque maculis conspersus. Lanam oves gerunt, seu pilum, ab equino, asinino, & bovino diversissimum, qui filis componitur fortibus, tenuibus, flexibilibus, tactu mollibus, pinguibus, & adeo incrispatis, ut quamvis non nisi 15. linearum longitudinem ostendant, ad 3. digitos & 3. lineas, producta, præbeant, talis autem lana est, qua dorsum & iatera colli teguntur; quæ reliquam colli partem tegit, & corporis latera, & ventrem humerisque, illa longior, nec adeo crispata; quæ tandem lumbos vestit ac caudam, illa hirsutior, crassior, proluxiorque vel 5. digitorum longa; & qua caput, pars interior humerorum atque lumborum, inferiorque crurum induta sunt, hæc dura, brevis, pilo quam lanæ similior, & 9. fere linearum longa est.

Manfuetudinis ac imbecillitatis suæ signa in fronte gerit ovis, etenim oculis magnis gaudet atque inter se distantibus, & cornibus depressis, & auribus horizontaliter directis; facie producta & gracili, fronte tandem fornicata. Cornua flavida, ubi exoriuntur, paullulum ascendunt, tum retrorsum ac ex latere deflectuntur, post subtus producuntur, denique ascendunt. Imo & ovium quarundam cornua, eadem ratione, qua arietum inflexa observavi. Et quamvis cornua arietis, situ quem occupant, & ad ictus atque defensionem prorsus inutilia, & ignobilioris adspectus sint causa; verveces tamen, agni, ovesque cornibus destituti, eorum defectu, adhuc stupidiore debilioresque videntur. Quidquid agant, quomodocumque incendant, nulla vel agilitatis vel roboris, vel animi species est. Corpus mollem informem refert, quatuor cruribus aridis inæqualibusque innixam; anteriora bacillorum instar, rectissima, posteriora autem tota curva sunt; anteriùsque convexa. Cauda ad poplitem descendens, immobilis adhæret corpori. Imo vel irritatus aries, dum conflictui sese accingit, timoris potius ac pusillanimitatis, quam animi atque ardoris signa ab initio edit, caput deprimit, immobilis sese hosti offert, tandem congreditur, & fortissimis ac reiteratis frontis, baseosque cornuum ictibus petit hostem, quorum cuspide, situs ergo, illum tangere nequit; nec alius est certandi modus, nisi ut jam fronte objecta ictus excipiat, jam fronte ictus inferat; nec tamen vel acerrimo quovis certamine, oculus micat igne, vel aures cum ore moventur.

Magis autem arietum quam taurorum moles & magnitudo variat. Ille enim, cujus corporis dimensionem supra descriptam dedimus, cujusque partes molles, jam subnectemus, pondere illo suo, LVII. libras explebat. Hujus epiploon bovino vidimus simillimum, latiores tamen longitudinis respectu, ventris papillas; & reticuli figuræ, ratione altitudinis septorum suorum, magis extensæ videbantur, quam in bove. Foliorum stomachi tertii numerum inconstantem, & in alio 60. in alio autem 80. numeravimus. Hepar rubicundum, 15. uncias, pondere, explebat. Vesicula felle autem, 1½. digito ultra hepar eminendo, limpidum, & viridi-flavidum liquorem complexa, pondere suo 3j. & gr. XLIX. æquiparabat. Hepar arietis, quum vere anni 1754. dissectus esset, innumeris oppletum vidi vermicibus, quales in hepate asinæ repertos fuisse observavi, nec non meatus biliosos, imo ipsum felle liquorem occupantibus. Quorum maximi, asinæ illius vermes exæquabant, minimi filorum crassitudinem, ac 2. linearum longitudinem referebant. Tales etiam variorum arietum oviumque in hepate

pate ac felle, hepateque agnorum, vario anni tempore dissectorum, reperi. Imo quum omnia in universum, pecora ovina, quæ disquisivi, plena fuerint vermibus istis; omnes, omni tempore, cujuscvis ætatis sint, iisdem laborare concludo. Exceptos velim ovium foetus, in his enim, quam diligenter quæsiverim, nullos detexi; detexerit tamen Cel. *Fromman* in hepate foetuum, matris ventre adhuc detentorum, ut *Ephem. Germ.* testantur. Causam enim mortis, qua innumeri tauri, oves atque juvencae anno 1664. in Franconia morbo adfecti tandem decedebant, in vermibus istis, hepar animalium opplentibus quæsitam esse, ille recenset. Quæ opinio si suo fundamento gaudet: continuum morbi germen, vermes scilicet hepatis secum ferre constat. Lien rubicundus arietis nostri, pondere unam unciam, & sex drachmas explebat; cujus renes nec tuberculis constabant, ut bovini, nec figuræ triangularis erant, ut equi asinique; sed figuræ, hepatis animalium reliquorum communis. Dexter sinistrum dimidia longitudine superabat, parte ejus anteriore magis sinistrum spectante, quam quidem posteriore. Unus tantum ramus ex bifurcatione aortæ egrediebatur. Et ossa, quæ in taurorum, cervorum atque caprarum corde detexeram, quæque ruminantibus communia speraveram, frustra in ovibus arietibusque quæsivi; forsân antiquiores tantum illis instructa sunt. Pulmones denique bovinis simillimi, non nisi fissurarum profunditate, eaque varia, ab illis differebant.

Lingua, parte sua anteriore rotundis granulis glandulosis obsita, extremitatem rotundam tenuissimamque ostendebat, & in parte sua posteriore, glandulas figura diversas, quarum maximæ, $1\frac{1}{2}$. digiti diametro, medium occupabant. Maxime tamen in hoc a lingua bovina differebat arietis, quod fila partis anterioris vixdum conspicienda, mediæ etiam papillæ partis posterioris latiores planioresque fuerint, quam in lingua bovina. In palato tandem 15. sulcos transversales observavimus, fere rectos, latissimosque, ut in equo, in regione frænuli, margine insuper valde elevato instructos, ac in dentes adeo exiguos exeuntes, ut conspectis saltem bovinis utriusque similitudine, (si de palato agitur) incitatus, & hos investigari ac detegere licuerit. Omnes denique sulci, exceptis saltem aliquibus in anteriore bovini, posteriore autem arietini palati parte, canale quodam ad longitudinem ducto, transcenduntur, & per medium dividebantur. Epiglottis bovinæ quidem similis, nec tamen posticus reflexa, cerebrum denique duarum unciarum & $1\frac{1}{2}$. drachmæ, & cerebellum 3. drachmarum & 60. granorum, ponderis erant.

Binæ aietii nostro erant papillæ, ex parte utraque scroto anteriores, prominentes, & uno digito inter se distantes; in aliis arietibus ovibusque unam saltem utrinque, in alio tandem tres ex dextra, aut unam ex sinistra reperi. Glans figuræ irregularis, in extremitate sua tuberculum quemdam rubicundum, carnosam, & parti glandis superiori oblique superjacentem, $\frac{3}{4}$. digiti longum, 5. linearum latum, & unius crassum exhibebat. Et urethræ canalis, 12. ad 13. lineis ultra glandem prominens, 1. lineæ diametro erat, mollis atque solutus, supra glandem retractus, eidemque adglutinatus, reliqua pars glandis depressa in lateribus. Testiculi insuper ovi figuram & substantiam interiorem flavido-debiliorem exhibebant, imo ut testiculi tauri, nucleum quemdam ad longitudinem situm, & $\frac{1}{4}$. longitudinis testiculi

expletem. Duo sub virga ejus ligamenta adparebant, appendicium ac directionis suæ respectu, bovinis similia, virga tandem ipsa duplicem curvaturam, intermedia 1. digiti distantia, efformabat; reliquæ partes generationi inservientes prorsus eadem erant in tauro ac ariete.

Quod ad ovem adtinet, examini nostro subjectam, illa ætate provectior, medio autumno mactabatur; & ubera tantum bina, utrinque unum, $2\frac{1}{2}$. digitis inter se, & $4\frac{1}{2}$. a vulva distantia, præbebat. Vulva inferius cuspidata erat, ut in canibus; & glans clitoridis valde exigua, $1\frac{1}{2}$. digito supra cuspitem vulvæ sita, & 4. lineis profundo intervallo, a cuspide distabat. Vesicæ pars superior, in qua desinebant uretheres prominens, figuram ipsi irregularem conciliabat, in margine autem orificii matricis 3. confiximus tuberculos magnos, invicem sese tangentes; ipsum quoque orificium strictissimum, & matricis corpus valde exiguum, ac præsumma angustia, a cavitate colli, tuberculis aliis obsita, vix internoscendum. Cornua sese tangentia, membranarum ope, ut in vacca, per 15. linearum spatium continebantur, reliqua eorum parte ex latere subtus reflexa, extremitateque incurvata. Tum tubæ curva linea procurrendo, variosque sinus efformando, in quadam valvula desinebant. Et testiculorum irregularem atque oblongorum sinister dextro major, & carunculum ostendebat, seu corpusculum glandulosum, 1. lineæ altum, & 2. linearum diametri, exhibebat etiam vesiculas lymphaticas transparentes, quales & in dextro, carunculo destituto, observavimus. Sinistrum denique disseccantibus visum est, quod carunculo, partem ejus maximam occupante, dilatatus fuerit; id quod in dextro reperire nequivimus.

Accidit sæpius, ut animalium genitalia, conformationis vitio laborantia, sexum animalis dubium relinquant intuenti. Sic triennium est, ex quo arietem vidimus, quem ex ovis natura participare crediderunt, siquidem urina foramen aliquod, in perinæo obvium egrediebatur. Hic Duci de *Chaulnes*, scientiarum, quibus delectatur, incrementi studiosissimo exhibitus, ab eodem illo anatomico examini adjudicatus, Parisiosque transmissus est. Orificium præputii cum glande, situm, quem alias solent, obtinebant; glans tamen haud perforata, saltem stillicidium aliquod aderat, illudque in margine præputii exortum, ad longitudinem virgæ procurrens, testiculorum intervallum transiens, & ad caudam usque productum. In hoc stillicidio igitur, quo urina egrediebatur, foramen, parum ab ano distans, vidimus. Nec partium generationi inservientium conformatio singularis seu insolita, urethra saltem in radice virgæ terminabatur. Ubi autem foemellarum matricem reperimus, ibi duo aderant corpora carnosæ, situ ac figura, matricem oblitteratam quodammodo referentia, adcuratius autem dum disquirerentur, ab hoc intestino prorsus aliena. Cæterum & liquore spermatico bene maturo, & facultate eum per foramen perinæi emittendi, gaudebat; at virgæ canale, urinæ profluvio, & eiiciendo spermati inserviente, carebat.

Nec non involucra foetus ovini, bovinis multum accedunt, five cotyledones spectes, quibus chorion matrici adhæret, five allantoidis situm atque figuram, five sedimentum sui liquoris. Medio enim mense Aprilis, ovem utero gerentem, ac pariendi tempori proximam dissecuimus, & cotyledones 54. numeravimus, funiculum umbilicalem vero $2\frac{1}{2}$. digitis longum de-

teximus. Foetus vesicam, inflandæ allantoidis ergo, aperuimus, & multo magis producta ex altero latere videbatur membrana ista; etenim alterum ex cornibus 2. pedibus longum, & $2\frac{1}{2}$. digitorum diametri, alterum vero 1. tantum pede longum, vel 3. digitorum diametrum pertingebat; quorum illud in medio, binis constrictionibus, $3\frac{1}{2}$. digitis inter se distantibus, ad diametrum 2. linearum usque constringebatur; his constrictionibus intermedia pars allantoidis, ne quidem 4. digitorum circumferentiam, reliqua autem pars cornu, ubi amplissima, ibi 2. digitorum diametrum ostendebat. Liquori tandem allantoidis arietinæ vidimus innatantia corpuscula coagulata, viridia, & Hippomanibus, pro substantia, accedentia; liquore evaporante scilicet, sedimenta ejus restant, corpusculaque ista componunt. Plurimos quoque dentium molarium in foetu jam efformatos reperimus, incisorios autem segnius enatos, & ungulas ante cuspidatas, extremitate parum incurvata. Imo quatuor ventriculi foetus, exiguam (habita ratione adulti) abdominis partem occupabant, & quidem ex sinistra situm Obomasum, reliqui stomachi autem hepate ac diaphragmate posteriores cumulatim repositi erant. Quos quum intromisso aere explevissemus, Obomasum ut in vitulo, stomachum multa magnitudine superare; reliquos autem adutorum magnitudinis rationem conservare vidimus.

Maxima etiam dissimilitudo quæ bovinum caput atque arietinum intercedit, hæc est, quod arietis cornua & sibi invicem, & orbitis sint propiora. Nec marginem transversalem inter bina cornua constituit os frontale, nec convexum est occiput, sed concavum. Ossa nasi propria arcuata, seu ad longitudinem convexa; & ossa maxillæ superioris, in inferiore sua extremitate sunt latitudinis decrefcentis, quapropter & rostrum arietis strictius videtur bovino. Nec adeo convexa sunt maxillæ inferioris latera, nec adeo rotunda est, quam rami constituunt, circumferentia. Pars quoque maxillæ hujus anterior, una cum dentibus incisoriis supra reflexa, cæterum arietis dentes iidem sunt, quales bovi, & numero suo atque figura. Nec alia adest vertebrarum cervicalium differentia, nisi hæc; quod apophyses transversæ anteriores æque ac posteriores, quæ sunt vertebræ tertiæ & quartæ, haud satis distincte divisæ conspiciantur in ariete. Sic & anterior pars sterni magis convexa erat, quam in tauro. Nec fundus stillicidii pelvis concavam exhibebat longitudinem. Os radii antérieur paululum, pro longitudine, convexum, & os lumbi, in tauro rectum, majori quam radius, concavitate gaudebat. Radii ratione, humerus & tibia arieti sunt longiora, quam tauro, & femur brevius, & tibiæ respectu, longius os tibiæ. Cæterum, magnitudinis differentia excepta, simillimum erat arietis sceletum bovino.

Jam exponendæ historiæ ovis naturali accingimur. Vix dubitationi locus superest, sic Cel. de Buffon, quod animalia, hodie domestica, olim fuerint silvestria, sic enim & equi, & asini, taurique silvestres reperiri supra evictum dedimus. Quamvis igitur tot millia individuorum, imperio suo homo subjecerit: num vel unicæ speciei toti quidem dominatur? Utenim omnes absque ejus concursu creatæ sunt, nonne hanc illis legem inditam esse crederes: quod & absque ejus auxilio & ope crescant ac multiplicentur? Adtamen si infirmitatem ovium consideres atque stupiditatem; si cogites, animal omni prorsus defensione destitutum, ne quidem fuga salutem adqui-

adquirere posse; si addas, ovem omnium rapacium gulæ deliciis, eorumque insidiis prædæ cedere; si denique subjungas ovinum pecus nec longævum esse, nec valde fœcundum, aliaque: facilis animum incedet opinio: statim ab initio hominis providentiæ ac curæ confisam fuisse ovem, nec nisi sua cura multiplicari, & sua providentia tueri; nullas enim oves silvestres deserta alunt; & ubicumque hominis dominium haud pertingat, leonem, tigrum, & lupum crudeli ac violento imperio dominari videbis; & hæc, sanguinem quæ spirant atque rapinam, ovibus fœcundiora esse ac longæviora: & tandem, si vel adeo multiplicato ovium genere, hodie curæ ejus desisterent homines, ante oculos horum, omne ovinum pecus brevi extirpatum, ac voracitate tot hostium deletum fore quis est, qui dubitet? Non nisi hominum cura igitur & ope, ovium species conservata, conservatur & conservabitur, quidquod se ipsam conservare nequit. Prorsus omni defensione & auxilio eget ovis; & qualia sunt arietis arma, nisi debilia? quid ejus animus? petulantia potius dicenda, sibi inutilis, & aliis molesta, quæ facillime reprimitur castratione. Quidquod vel ovibus timidiores sunt agni, timoris ergo in cohortes concurrunt, vel minimo strepitu perterriti, præcipites comprimuntur; timori adstat stupiditas, etenim fugæ capiendæ nescii, situs incommoda ne perferant quidem videntur; quoquo pervenerint, desistunt, vel pluviam & nivem vehementissimam perferunt, nec nisi edocto duce præeunte, pedem movent, hujus tandem vestigia premunt, imitantur. Imo vel ipse dux una cum agmine eodem loco desideret, nisi vel a pastore vel cane, oves custodiente, incitaretur; hic pro securitate gregis excubat, hic illum defendit, hic dirigit, hic separat, hic colligit, hic deficientes necessarios motus communicat. Stupidissima animalium sunt oves, ac opem sibi ferendi ineptissima; capræ etenim multa alias similitudine illis accedentes, se ipsas conducere callent, & pericula evitare, & novorum cupidæ, statim accurrunt; ovis autem & aufugiendi & accedendi nescia, ne ad hominem quidem, quo summopere egent, lubens accurrit; imo en summam, nescio stupiditatem an timiditatem, agnum ipsi subducas, nullam defensionem mater meditabitur, nulla ira incitabitur, nulla resistet, ne balatu quidem singulariori dolorem testificabitur.

Ast quantacumque sit qualitatum internarum penuria: tanta in hominem utilitate eam rependit; sola enim ovis præcipuæ hominum necessitati sufficit, quippe quæ & victum & amictum exhibet. Nec in censum veniant, quæ ex sebo & lacte, & pelle, & intestinis, & ossibus, & stercore ejus, utilia eliciuntur, huic enim natura nihil proprium, omnia hominis usui infervientia concessisse videtur. Nec nisi Veneris æstus tantum, fortiores animum verveci subdit, tunc enim pedibus posterioribus innixus jam cum aliis certamina subit, jam pastorem ipsum adgreditur; ovis autem, ne catulitionis tempore quidem majori æstu expleta, nullo nisi tanto instinctu corripitur, quantus pro coitu perferendo, pro seligendo nutrimento, & agno suo distinguendo sufficit. Quo obtusior autem esse solet instinctus, ac si loqui liceret, quo magis innatus, eo idem ille certior atque securior, agnellus etenim vel in numerosissimo grege, suæ matris ubi quærit, arripit, exfugit, numquam errat. Cantu autem ac sono tibiarum delectari dicuntur oves, illoque audito magis assiduæ pascere, & citius pinguescere; certior tamen res est, quod leniendæ pastoris vitæ, otio solitudi-

tudineque molestæ veniat tibiæ sonus , imo his saltem ars ipsa originem debeat . Cæterum oves debilissimæ sunt naturæ , nec diutiori seu ærumnoso itineri sufficiunt , & cursu peracto palpitant , spiritumque amittunt , nec solis ardorem , nec humiditatem cœli , seu frigus & nivem perferre valent ; multis subjacent morbis , iisque facile in contagies degenerantibus ; nimio adipe jam sterilefcunt , jam emoriuntur ; & faciles foetum emittunt , sæpius tamen abortus edunt , & maximam ex domesticis animalibus , curam requirunt . Parturientem ovem quoque a reliquis sejungas & specialiori auxilio cures , necesse est , sæpe enim obversis pedibus exiturus foetus , nisi hominis ope potrahatur , vitæ periculum mater incurrit ; sublevatus ergo agnus rectus constituatur in pedes , & primum lac matris , agnoscivum , extrahatur , uberibusque denuo repletis tantum admittatur , & triduo vel quatrinduo matri vicinus detineatur , quo plenissimam ejus cognitionem inducat ; ad restaurandas quoque ovis vires nutrimento ipsi veniat foenum selectum cum hordeo contrito , seu furfur , sale mixtus ; potui autem aqua tepida , addita farina vel frumenti , vel milii , vel fabarum ; quarto tandem aut quinto vitæ die , solitæ vitæ rationi , per gradus , matrem restituas , & reliquis socia exspatietur , dummodo nimis longo itinere , ut lacti calor inducatur caveas ; post , dum acquisitas agni vires , saltus sui loquuntur , exspatiantem matrem & ille comitetur . Agnos ad spectu debiliores , lanienæ , robustiores autem , majores , & lana copiosiores , gregi constituendo destinare solent . Et agni , matris primitiæ , reliquis inferiores censentur ; & qui ab Octobre ad Februarium nascuntur , gregi dum reservandi sunt , toto hyeme stabulo detineantur , nec nisi lactis hauriendi ergo , quovis mane & vespera , campos denique , non nisi ineunte Aprile , egrediantur ; ac quo nutrimento recenti adsuescant , aliquot dies ante , herba nutriantur . Matris ubera vel quarta , satius tamen , sexta vel octava septimana vitæ subducantur ; albam insuper lanam maculisque carentem qui gerunt , nigra vel variegata indutis anteferuntur . Quinto autem vel sexto ætatis mense , quot ex agnis verveces velis , eos mitiori cœli tempore vel verno , vel autumnali castrabis ; & quidem vel incisione , qua peracta bini testiculi protrahuntur ; vel fortiter funiculo constrictis inguinibus , in regione testiculis superiore , sic enim vasa deferentia , sensim arescunt . Agnus castratione infirmus & tristis , per biduum triduumve fursure sale mixto reficiatur , ne ut sæpius accidit , nutrimentorum nausea corripatur .

Primo ovium vitæ anno dentes bini anteriores in maxilla inferiore excidunt , incisoriis enim in superiore carent ; octavo autem & decimo ætatis mense , binis istis proximi bini effluunt ; tertio denique anno omnibus effluxis substituti sunt alii , sunt æquales , sunt candidissimi ; ast senescente animale deteruntur , mollescunt , nigrescunt . Vervecis annos ex cornibus dijudicabis , quæ nisi a matre , a primo saltem ætatis anno , ad terminum vitæ , quotannis novo annulo seu nodo adaugentur . Ovium plures cornuum loco , binas prominentias osseas ostendunt , aliæ tamen duo , imo quatuor cornua gerunt , 5. ad 6. digitis longa , nec adeo teretia , ut vervecis ; quatuor quum adfuerint , exteriora bina breviora esse solent reliquis . Pubertatem aries decimo & octavo mense , ovis primo anno adtingunt , satius tamen , hæc bimula , ille trimulus demum coitui admittantur , ne præco-

ciores debilioresque foetus producant. Aries unus 25. ad 30. ovibus sufficit, dummodo ex fortissimis pulcherrimisque selectus, cornibus gaudeat, sunt enim qui cornibus destituuntur, debiliores, & propagationi haud adeo sufficientes. Capite igitur forti gaudeat & crasso, fronte explanato, oculis hiantibus ac nigris, naso retorto, auribus magnis, collo fortiori, corpore longo ac elevato, renibus & tergo latis, testiculis turgidis, cauda longa; & alba tectus sit lana, & in ventre, cauda, capite, auribus, imo oculis copiosissima. Sic edendo foetui aptissima ovis habeatur, quam lana tegit copiosior, frequentior, longior, fetosior candidiorque, quæ corpore gaudet magno, & collo crassiore, & incessu levissimo. Certiores quoque producunt, quo parciore adipe onustæ, & quamvis plerumque ab ineunte Novembre ad finem Aprilis catuliant; omni tamen anni tempore, præsertim calidiori nutrimento, ut pane cannabino, & aqua salis fruentes, fœcundantur. Coitu autem ter quaterve repetito, amovere solent arietem, proVectiores oves junioribus præferentem. Ne pluviae vel tempestati coitus tempore expositæ sint, cavendum, humidum enim cœlum, ut sperma retineant, impedit, & tonitru ictu vel uno abortum faciunt. Biduo tandem post coitum peracto, solitæ vitæ rationi reddantur, subtrahatur & aqua salis, & panis cannabinus, calidiorum enim istorum ex usu continuo abortus sequitur; sexto tandem mense, ex quo utero gesserunt, agnos ad summum, duos emittunt. Et quidem calidiore sub cœlo binis, in Gallia autem, frigidioribusque regionibus, semel pariunt in anno. Agnorum copia ut vel Januario adsit, exeunte Julio variis ovibus arietem admittunt; pluribus Septembre, Novembre, atque Octobre, hinc Febuario, Martio atque Aprile, major agnorum frequentia, qui non nisi Septembre, Octobre, atque Novembre infrequentiores esse solent. Lac per septem ad octo anni menses abundantissimum præbet ovis, optimo rura colentium ac infantum nutrimento, imo, vaccino in primis mixtum, & caseis formandis cedens. Ovi igitur, antequam in pascua abigatur, & dum redit, lac suum subducito, æstate binis, hyeme autem unica saltem vice per diem.

Cæterum prægnantes oves pluribus quam alias, cibis se reficiunt, & majorem adsequuntur pinguedinem; frequentiori etiam læsione, frequentia monstra, frequentes edunt abortus; ad tamen proba earum habita cura, per omnem vitam, id est, ad decimum vel duodecimum annum usque agnos edere solent, plerumque autem 7. jam seu octavo effœtæ sunt. Aries, decimum quartum plurimo pertingens, ultra octavum generando haud amplius sufficit, quo quum pervenerit, altero testiculorum extracto, saginationi ac lanienæ tradatur. Nihilo tamen minus saporis ingratam carnem exhibebit, mollem quoque & inspidam ovis, agnus vero præstantissimam. Gregem denique ovinum constituturus verveces ovesque bimulos vel 18. mensium coemas, & centenis præficias pastorem vigilem, vigilique cane instructum. Ille igitur gregem antecedit, edoceatque ut voci suæ obtemperetur, ut continuo vestigia sua insequatur, nec campos, agros, vineasque transeundo illis inhæreat, eos depascatur. Collibus quæ insunt planities optimis ovium pascuis cedunt, humida autem & paludosa loca noxia sunt. Hyeme stabulo detentæ fursure, naps, stramine, foliisque fraxini seu ulmi, similibus, nutriantur; & quotidie haud pastum, sed exspatium educantur, nisi summa fuerit cœli inclementia, binis nempe horis ante meridiem

diem egressæ, tertia pomeridiana, potu hausto reducantur. Autumnie contrario & veris tempore, dummodo solis calor rorem absorberit, multo mane in pascua abigantur, & solis tandem post occasum ad stabula redeant, uno saltem potu reficiantur, & pabulo, pariori tamen quam hyeme; æstate tandem omne nutrimentum in campis quærant, binis eo educatæ, binis quotidie vicibus aquam hauriant. Rore igitur delapso pascuo committantur, & quatuor vel 5. horis exinde ad stabulum vel quemvis locum opacum reductæ, 3 vel 4. pomeridiana rursus conducantur ad pascuum, nec nisi ingruente nocte recedant; satius foret si, ut apud Anglos, a lupis securæ, totam noctem sub dio degere possent; multum enim roboris ac vigoris adderetur. Nimio autem solis calore vertigine capitisque doloribus corripuntur, hinc loca soli opposita eligenda sunt, quo sub umbra pascere possint; & ne lanam suam perdant, nec rubeta, arboreta, seu senticeta transeant. Meliori quoque carne gaudent oves, quæ in locis elatis, ubi serpillum aliæque herbæ odoriferæ abundant, quam hæ, quæ in planitiibus depressis, vallibusque humidis pascuntur; nisi arenosæ ac mari vicinæ fuerint, harum enim herbæ omnes multum salis continent; sal autem & carnem & lac ovium meliora efficit, & salutem earum cedit, & palato jucundum est; hinc quoque passim saccum sale plenum, seu lapidem salis in ovili expensum, oves autem illum delambentes vidimus.

Quotannis denique senescentes & saginandas ex grege separabis, ac prorsus alia ratione tractandas, in gregem ab alio distinctum colligas; hunc igitur æstate ante solis ortum in pascua conducas, ut herba humida & rore irrigata fruantur. Summam ovibus pinguedinem adfert potus copia, nec magis quid officit ardore solis. Tertia igitur hora ante meridiem ad stabulum conducantur, & exhibito sale sitis excitetur, post quarta quintave pomeridiana pascuo, si fieri potest, humido & refrigerato, restituantur. Sic duorum vel trium mensium spatio, summam, quam possunt, pinguedinem seu turgescientiam potius, adquirunt, quæ quum ex aquæ quantitate profecta sit, brevi illas putredine adficeret, nisi statim ex eo mactarentur. Nec soliditas vel succus carni accessit, sed insipida facta est; quam si meliorem desideres, herbam rore humidam comedant, & multum aquæ hauriant, aut nutrimento simul magis succulento, quam herba, stabulo alantur. Hyeme tandem saginandas, & quandocumque velis, ovili eas committas separato, & farina hordeaceo, vel frumenti, fabarum, avenæ, aliisque sale mixtis, pro excitanda siti, nutrias; pinguedinem vero consequutas statim mactabis; numquam enim semel amissam pinguedinem denuo adquirunt, sed hepatis vermibus fere omnes emoriuntur.

Descriptionem vermium in hepate animalium frequentissimorum, & in hepate ovium boviumque repertorum, exhibet & *Diarium Eruditorum anni 1668.* & *Ephem. Germ. Tom. V. anni 1675. ac 1676.* Hos non nisi ruminantium in hepate obvios statim ab initio credebant, aut repertis a Viro Cel. *Daubenton* & in asini hepate; omnibus, pluribus saltem eisdem communes esse censemus. En! quæ de papilionibus, in hepate ovium repertis, habeo; ex epistola anno 1749. a Viro Celeb. *Gachet de Beaufort*, M. D. Gallico exarata, & ad Virum *Rouillè*, Status rerum exoticarum Ministrum & Secretarium, transmissa: Multum est, ex quo oves nostras, sive Alpinas, omnibus Europæarum præstantiores, tabe quadam aliquoties corripitur.

observatum est, & oculis albidis & concentratis, sanguine fere omni seroso, lingua arida & constricta, naso, muci flavidi, glareosi ac purulenti pleno, summa quoque debilitate, licet multo cibo sumto, laborare. Harum in hepate tandem papiliones deteximus, bombycium magnitudine, capite semi-ovali atque villosa, & alis instructos, comprimendo hepatis lobos, plures quam 70. egredientes numeravi; hepar autem in parte sua convexa, compressione dilaniabatur, nullos in arteriis, varios autem in venis observare, imo minusclos in canali cystico. Vena-porta & capsula *Glissoniana*, fere ut in homine conspiciendæ, levissimo tactui cedebant. Pulmo cum intestinis reliquis, illæsus erat, & reliqua.

Optandum foret, si fusiore descriptione papilionum suorum Vir Celeb. dubium illud præscidisset, quod vermes fuerint, hepati ovino communes, depressi, latissimi ac figura adeo singulari, ut folia quam vermes potius videantur oculo fugitivo.

Lanam vero, ovis, arietis, vervecisque indumentum, rarius binis, plerumque una vice quotannis, hic quidem, & sub rigidiore cœlo, magnis forficibus refecant, parte illius relicta, alibi autem, calidioribusque in regionibus, evellunt. Majo igitur, postquam probe lavata fuerit ovis, lana refecetur; quod si Aprile fieret, nimiae frigoris vehementiæ ovis exponeretur, si autem in Junium vel Julium differreretur, haud satis succrescendo, hyemis tegumento seu lanæ novæ tempus superesset. Agnorum lana ovina præstantior, & optima quævis ex collo & tergo; inferior ex lumbis cauda, ventre, gutture, reliquisque ovium partibus; infima tandem ex mortuis seu ægrotantibus depromitur. Candidam nigræ, fulvidæ cinereæque anteferunt, quippe illa recipiendo cuiusvis colori sufficit; & prolixam seu rectam, crispæ; crispam enim pro morbi signo habent. Stercorationi tandem eximia veniunt oves; quas si septo circumdare, & omnes per noctes æstivas in pascuo relinquere velis: suo stercore & calore ac urina, summam, vel effæcto agro, fertilitatem conciliabunt, & tantam, ut grex centum ovium uno æstate, vel octo jugeribus, per sex annos, stercoratione fecundandis sufficiat.

Omnia ruminantia sebo instructa esse docuere antiquiores; verum, quatenus de capra & agno, agninum in primis, summa sui copia, & ariditate, candore, soliditateque quodvis reliquorum superat. Differt ab adipe sebum in eo, quod ille semper liquidus, hoc vero refrigerando dure scat. Præsertim vero renes magna sebi copia circumdantur, majori etiam sinister, quam dexter; sic & epiploon & intestina multo sunt obducta sebo, at soliditate inferiore, præ illo, quod in renibus, cauda, aliisque corporis partibus obvenit. Nulla igitur ovibus, præter sebum, pinguedo adest, illumque adeo per totum corpus dominans, ut & omnes carnis extremitates eodem obsitæ, & ipse sanguis eodem oppletus, imo liquor spermaticus tanto permixtus sit, ut ab omni reliquorum spermate diversissimus videatur. Etenim & hominis, & canis, equi, asini, omnisque, sebo carentis, frigore accedente liquefit, aere diluitur, & quo diutius extra corpus detineatur, eo majorem fluiditatem induit: at liquor spermaticus arietinus, forsan & hircinus ac reliquorum sebo instructorum, aere expositus, sebi instar durefcit, accedente autem calore, liquefit. Ipsemet ego microscopii ope, liquorem arietis spermaticum, paucis momentis, postquam corpus

egressus fuerat, spissifacium observavi, ita ut pro observandis animalculis spermaticis, opus foret calefaciendo objectorum fulcro.

Pro variante cœlo, sub quo vivunt, oves, varium exhibent & carnis saporem, & sebi quantitatem, & corporis pinguedinem magnitudinemque. Sic non solum in Italia, Hispania & Anglia viventes lanam nostratium lana subtiliorem exhibent: sed vel pro diversis Galliæ regionibus, diversæ qualitates accedunt ovibus. Et Piæstaviensis regio, Provincia aliaque, oves communibus multo fortiores, majores, ac copiosiori lana rectas alunt, hæ reliquis frequentiores & binos nonnunquam agnos edunt; & hujus generis arietes ovibus communibus admissi, speciem quamdam ex utroque participantem producant. Major adhuc differentia Hispanicas Italicasque oves interest, omnes attamen quotquot Europa alit, non nisi unum idemque genus constituentes habeantur. Ab his vero diversa videntur illa Asiæ atque Africæ animalia, cauda longa lataque instructa, quibus Barbariæ agnorum nomen tribuerunt peregrinantes. Lana candida autem reliquis majori habetur in pretio, cujus ergo omnes vel nigros vel versicolores agnos statim ab initio lanienæ destinatos esse videmus; variæ tamen terrarum regiones nullos nisi nigros alunt agnos, & ubivis vel ex ariete & ove albis, nigros agnos gigni compertum est. Quos Gallia alit, illi vel albi, vel ferruginei, vel nigri maculisque conspersi sunt; Hispania autem fulvos, Scotia flavidos præbet. Quæ quidem coloris differentia non nisi inconstanti casui tribuenda est.

Et hætenus Cel. *de Buffon*, qui quum adeo adcurate ac eleganter, ut solet, & historiam ovium naturalem perscripserit, nihil prorsus rescindere ausi fuimus. Sic & *Gesneri* & *Aldrovandi* descriptiones, summo eruditionis adparatu conspicuæ sunt, imo tanta est argumenti ubertas, ut vix volumina sufficerent absolvendæ ejus pertractationi; nos tamen, ne justo proluxiores simus, non nisi sequentia subnectimus:

Haud ita pridem Viri Cel. *de Perce* animum incescit cupido, lanam gentium silvestrem quasi gregem instituendi, educandique, sic nempe illa & morbis communibus exempta, & perferendis cœli injuriis sufficientia, & carne copiosiore, & lana frequentiore melioreque, pellibus tandem fortioribus ac majoribus instructa fore, ratus est. Res ad regem delata, ille etiam quæ expetita fuerant concessit, & locum instituto sufficientem destinavit. Post, variis experimentis conceptæ spei respondentibus, mandatis quotquot fieri potuit, Rex cœpta sublevavit, & terras incultas adsignavit, regiis illas redditibus exemit, & tributa de hac re, graviora umquam exigi posse vetuit. Ast brevis erat spes quæ affulserat; paucis enim exinde, maxima pars lanigerorum periit, & superstites pristino suo statui reddere convenientius visum est.

Vir Cel. *Anderson*, in historia naturali Islandiæ, aliarumque Septemtrionis regionum lanam Islandicarum hirsutam esse ait atque hispidam, quam merito ex cœli inclementia, & nutrimenti qualitate inferiore deducit, quum leniorem cœli tractum, & pascuorum abundantiam multum, imo plurimum conferre constant, ad lenitatem pili caprini, & lanæ ovinæ. Imo natura benefica, rudiori lana, a frigoris vehementia munita esse voluit Islandiæ oves. Numquam tondentur, adtamen medio fere Junio lana nova succrescit, antiquior ex pelle abit, & contorta cohærens, pellis superficialiæ in-

Har, una subducitur. Hunc in finem collectas quasi venantur. Pastorum scilicet unus, sibi junctis canibus edoctis, colliculum conscendit, signum adgressus cornu edit, & canes in oves irruunt, & ex rupibus in quibus dispersæ pascuntur, ad campum quemdam profugant, introitu latissimo instructum, post vero sensim coarctatum. Hic vero observandum venit, omne ovinum pecus Islandiæ magnis ac teretibus cornibus esse instructum. (Nec adeo nova res est, *Olaus Magnus* enim, omne Septentrionis ovillum pecus magnis atque arcuatis cornibus gaudere, & *Martinus* idem de ovibus Scotiæ Insularum Occidentalium observat.) Imo quatuor ad octo cornua gerunt, quorum unum medio sæpius in fronte prominet rectum; cætera autem, quæ alibi cornua gerunt, hic omnibus plane destituuntur. Si causam quæris: ovibus in desertis oberrantibus cornua data fuisse habemus, ut a copiosis maximisque avibus rapacibus, sibi hostibus, sese defendant; jumenta autem cornibus onerare noluit natura, inutilibus, quippe quæ nec avium rapacium, nec animalium ferocium insidias habent, quæ extimescant. Meram ego conjecturam adpono, sic pergit auctor laudatus, veram enim singularis rei rationem detectu difficillimam cognosco. Tophos interdum ovium in stomacho reperi, seu globulum, pomi magnitudine, musco lana, aliisve plenum, & crusta, tartari duri griseique obductum. Quorum quem adparatus curiosorum meorum continet, unus, ille: *Tophus ovinus Norvagicus*, mihi audit. Hos ego tophos, ex illis, quæ indigesta remanent, exoriri, formam vero sphaericam continuo stomachi motui tribuendam esse censeo; hic enim membranis decussatis, & in diversa protrahentibus continuo agitur. Crusta tandem, ex viscositatibus stomachi, sensim materiæ tophi obductis, accedit. Et vaccarum bovumque nostratium in stomachis ejusmodi tophos, ex pilis compositos, crusta tamen carentes reperi addit traducens; hæc animalia enim maceries tuguriorum delambere videmus, pro quibus consolidandis, argillæ pilos miscere solent rustici; imo & prurientia corporis loca lingua sua hirsuta lingendo, magnam pili sua quantitatem abradunt, deglutiunt; & stomachi agitatione undecumque æquali, in globulum cogitur pilus.

Incredibilis videretur illa lanæ, carnis ac corii agnini copia, quæ annuo Anglorum commercio tantum extensionis, quantum utilitatis adfert. Quanta autem per totam Magnam Britanniā nutriatur, pecoris ovini copia, vel ex numero cumulorum lanæ, quotannis resectorum dijudicare liceat, hic enim 30000000. absolvitur, cumulorum quovis, quatuor libras suo pondere explente. Sponsio quædam ineundo ovium numero occasionem dedit, & 2. milliarius spatium circa Dorcestiam, sexcenta millia earum reperta fuerunt. Et hanc ob causam jam *Henrici IV.* Regis lege, vetitum, ut vel una ovis extra limites regni deportetur, ne propagata earum specie & alibi, Angliā, utilitate hæcenus sibi propria privaretur. Imo qui eum sequuti sunt reges, iteratis eandem legem confirmaverunt, eaque adhuc hodie obtinet. Quam qui transgressus fuerit, ille prima vice facultatum omnium possessione privatur, & integri anni spatium carcere detinetur, elapso autem anno, alterius manus resectione publica punitur, manu ex patibulo clavis adfixa, secunda vice mortis poenam luit. Et quum nusquam eximior lana, præstantissimis Anglorum officinis sufficiens reperiatur, delictum speciei adeo levis tam gravi poena mulctatum voluisse senatum credimus ideo,

quia non nisi adcuratius observato huic mandato, omnis utilitas, ex lanæ commercio proveniens, tribuenda erit.

Subjungamus & ea, quæ in *Diario Exotico mensis Februarii, anni 1755.* leguntur, quibus titulus est: *Hastferii Instructio, de educandis a que curandis optimis ovibus:*

Quæ *Varro* & *Columella* & *Virgilius*, sic ille, de agricultura scriptis condidere, ea rei rusticæ hodiernæ non nisi tantum lucis adfundunt, quam quæ *Physicis* illius temporis debemus, *Physicæ* nostræ. Illi scilicet primi methodice artem tractando, fundamenta eorum jecerunt, quæ extruenda nobis relicta sunt. Idem & in quavis re nova ac recenter inventa obtinet, progressus scilicet experientiæ remanent. Nos ab antiquis ad nos devoluta excoluimus, posterius excolent nostra. Vir ille *Jonas Alstrom*, Eques Suevicus, eorum in numerum referendus est, qui & experientiam, & studium imo opes conferunt liberalissimi in id, quo patriæ Septentrionali, summa, quæ potest perfectio, summus cultus accedat, quoque incultas hæc regiones colentes, iisdem cœli donis fruantur, quibus terrarum studio operaque cultarum incolæ; is enim ovium greges & meliores & utiliores reddere allaboravit. Ille igitur considerando, quantum Anglis accesserit utilitatis, arietibus aliunde accersitis; & falem ovibus gratum ac utilissimum in Suecia frequentissimum, nec caloris defectum ovibus esse posse contrarium, qui quidem tantus ibi est, ut solis æstivi ardori umbra, & stabuli hyemalis calori, ne ovibus molestus evaderet, alia media opponenda fuerint; tandem vero experientia edoctus, quod proba ovis qualitas, nihil faciat ad qualitatem fœtus: ex Hispania & Anglia deportatos arietes Sueciæ ovibus admisit. Lana autem frequentiore ac meliore Sueciæ oves superant hi arietes alieni. Agnus enim Suecicus 3. saltem lanæ marchas, pondere præbet, quindenis Galliæ solidis venientes, Anglicus autem 5. ad octo lanæ marchas, trigenis solidis coemendas. Decuplo major utilitas igitur ex Anglicis agnis redibat. Arietes Hispanici lana parciore quidem, sed longe eximior, præ Anglicis, instructi sunt. Ille igitur binis regni in regionibus & ovium colonias instituit, & pastorum academias, quibus juniores artem oves pascendi edocentur, nec nisi prævio examine rigorosissimo gregibus præficiuntur. Jam per totam Sueciam pastores probe edocti seliguntur; & successive ex Anglia & Hispania provenientes arietes, saltem ex talibus oriundi, ovibus admittuntur.

Quibus præmissis Vir Cel. *Hastfer* ad describendam ovium historiam naturalem descendit. Hæ temperamenti sunt phlegmatici, & cerebro tenuissimo, ac solis ardore æque ac terrore quovis perferendo insufficientes. Fortissima gaudent imaginatione, & frequenti abortus morborumque periculo subjacent. Rarissime duodecimum vitæ annum transgrediuntur, quo accedentes omnes suos dentes amittunt. Octavo & decimo quidem ætatis mense coitu perferendo sufficit; ast si quinto saltem vitæ ejus anno arietem admiseris: multo robustiores agni ex illa nascentur. Septimo plerumque anno sterilescent. Coitu convenientissimum tempus est, decimus quintus circiter dies post festum *S. Remigii*, optimus vero locus, stabulum. Utero gerentes oves magno terrore flammis conspectis, adficiuntur, & horrore signo, rubra venit agni lana. Aries unus quindecim ovibus sufficit. Quas Islandia alit, illæ sex ad octo cornua gerunt. Et arietes Anglici seu Hispa-

Hispanici Germanicis ovibus admissi, secunda saltem generatione, Anglicos seu Hispanicos agnos producant, nec nisi tertia, apud Suevos. Lac ovibus subductum lanam earum deteriore reddat. Et puritatis conservandæ ergo, secundum mensem agentibus ignis caudam amputari suadet auctor. Pestis morbo, tumoribus socio, aliisque morborum generibus variis obnoxii sunt, quorum in pertractatione, observationibus Cel. *Sauvages*, Monbelliensis, utitur auctor. Post curam ovium, & æstate & hyeme habendam, exponit; & in primis, herba rore irrigata illas pascere vetat. Hic ille, animalia silvestria, præ domesticis, sibi salubria & nociva distinguere posse subnectit; hæc quoque hominis curæ confisa, eodem instinctu ac discernendi facultate minus egere censet. Meridiei calorem, quantum fieri potest, umbra temperandum, & arboreta arida, optimum ovibus esse pascuum, docet, campos vero seu agros statim ex messe peracta, nimio ipsis alimento cedere, & pinguedinem citissimam sibi noxæ inducere. Pro potu, quamvis parcissime præbendo, aqua vel rivuli, vel fluminis cedat. Et stabula earum ex mente auctoris, in sole elevato ac arido constructa, & frigida potius, quam calida sint, 30. ovibus v. gr. 20. pedibus longum, & 9. ad 10. pedibus altum destinat stabulum, imo fenestris seu quavis apertura, ad recipiendum novum aerem, instructum. Nutrimeto ovium veniat stramen pisorum vel avenæ comminutum; & folia cujusvis arboris, exigua portione fœni admixta. Hic loci ille subnectit, paucas, illasque lautius nutritas oves, multis pariori cibo relictis, utiliores esse. Et aquam calidam, quam passim domesticis convenientissimam censent, ovibus evadere nocivam. Et præstantiores, quæ semel, quam quæ bis in anno tondentur; cujus ergo *Joannes Georgius* Elector Brandenburgensis, ex terris sceptro suo subjacentibus, ultimo dictarum speciem penitus proscripsit. Lotionem perferre nequeunt Anglicæ & Hispanicæ, quæ Germanicis ac Suevicis magno commodo cedit. Salis aqua autem non nisi damnum adferret, hinc limpida aqua, & si fieri potest, arenam transeunte laventur. Lanam vero rescindendo, summa cum cura separetur, & ovium Anglicarum, Germanicarum, & Hispanicarum, item arietum, ovium, agnorum atque vervecium, nec non pedum, humerorum dorfi, reliqua, suo quæque loco diverso reponatur. Subtilior lana non nisi multo labore purificatur. Aquæ nempe urina mixtæ iniicitur, post rastri ope diutius circumagitur. Loco humido detenta lana rufum colorem ac vermes induit. Nec nisi his saltem ovibus subducendum esse lac æstimant, quæ inferioris conditionis lanam gerunt. Hispaniæ primores quidam vel sexaginta millia ovium possident, quarum curam illi quidem uni saltem pastori, hic autem pluribus sibi subordinatis, tradit. Ipsi etiam principes, more Orientis, ovium suarum tonsuræ, una cum suis, delectationis ergo interesse solent. Multæ quoque utilitati gregi venit pastor, tibias inflandi arte peritus, sonus enim & hilariores, & obsequentes efficit oves. Tandem ille Vir Cel. de morbis ovium, illorumque remediis tractat. Et sequentem pulverem, inter alia, optimum, laudat; nempe agmen formicarum, mastice, foliis ramusculisque arborum additis farno arefaciendum, post in pulverem reduci jubet, illumque vase, quo sal conservabatur, immitti, & usus ergo, sale & avena commisceri. Sic contagie ista, qua in anno 1746. tot millia ovium periere, quæ pulvere isto præmunitæ fuerunt, sanum hepar conservavere,

reliquæ autem variis aquæ vesicis plenum exhibuere . Sal etiam urina hominis solutus , hematico , & antimonium seu sulphur , cerevisiæ facibus mixtum , laxanti cedit ovibus . Pulverem denique , quem *Pomeraniæ pulverem* , Germani & Septemtrionis incolæ adpellant , præstantiæ ergo , quotidie ovibus exhibendum suadet Vir Cel. *Hastfer* . Multus tandem est circa variolos ovium , quibus si verno tempore corripuntur , oleo , alumine & tabaco commixto adfricandas esse docet ; si autem æstare , oleo cum foliis ulni elixo .

Arietem Ebræi adpellant : *Eel* , Græci : *Crios* , Itali : *Ariete* , Hispani : *Carnero* , Germani : *VVidder* , Angli : *Ram* seu *Tup* ; Ovis nomen Ebraicum audit : *Zon* , Græcum : *Ois* seu : *Probaton* , Italicum : *Pecora* , Hispanicum : *Oveia* , Germanicum : *Schaff* , Belgicum : *Schaep* , Anglicum : *Sheepe* , & Suevicum : *Faor* , Agnus vero Hebraice nuncupatur : *Kebes* , Græco idiomate : *Arnos* , seu *Agnos* ; Italico : *Agno* , seu *Agnetto* ; Hispanico : *Cordeio* , Germanico : *Lamm* , Belgico : *Lam* ; Anglico : *Lambe* seu *Hogg* . Gallico : *Agneau* , Vervecem denique Itali : *Castrato* , seu *Montone* , Germani autem : *Hammel* dicunt . Nomen vero Gallicum vervecis , *Belier* , secundum *Menage* , ex Gallico : *bêler* , balatum edere , seu ex *Balarius* , seu *Balans* , vel ex *Vellarius* id est vellere instructus , originem ducit . Cel. *Lemery* idem ex obsoleto Gallicorum : *Belin* , fatuum pariter ac vervecem denotante derivat . *Brebis* autem , seu ovis nomen , idem ille *Menage* ex *Vervex* , pro quo & *Berbix* , *Vervix* , impuriori Latino vocabulo dicunt , *Agneau* denique ex Latino : *Agnus* , seu *Agnellus* descendere docet . *Mouton* , vervecis nomen Gallicum , idem ille vel *a monte* , cui inhærere peramant verveces , vel quia *mutillum pecus* est , vel ex *Muto* , silentii sui ergo derivandum existimat .

Multo cærerum oleo faleque volatili instructus aries , carnem præbet , foetoris sui , saporisque hircini ob causam , nullorum fere cibo adpropriatam , & concoctu difficilem . Ars medica e contrario , felle & sebo , & medulla ejus utitur . Felle ejus , purgandi virtute instructo , lanam irrigare , hanc vero , cataplasmatismis more , infantum umbilico , pro laxando eorum ventre superponere solent ; ubi scilicet hauriendæ medicinæ locus non datur . Idem lacte mulierum mixtum , ulcera aurium detergendi & sanandi facultate gaudet . Sebum denique ac medulla , emollientia , resolventia & anodina , varia unguenta ac emplastra ingrediuntur , ut unguentum sic dictum , matris , emplastrum *Minii* , telam *Gaultierianam* , aliaque .

Ovis oleo & sale volatili abundat , & carnem exhibet parciori , quamvis frequentiori usui cedentem ac arietis , etenim & insipida , & viscosa , & humores crassiores producendi capax est . Lac ejus parum feri , multum vero casei complectitur atque butyri] , cujus causa non nisi pro conficiendis caseis venit , deficiente tamen vaccino , & huic substituitur ; frequentiore vero sui usum , maculas albas in pelle producere observatum est . Medicina autem ovis adipem , oesypum , stercus , & lanam pinguem , antequam lota fuerit , usui suo accommodanda , seligit . Adeps ejus seu sebum , pro emolliente & anodyno , non solum clysteres , contra colicam & dysenteriam , sed quoque varia pommata lenientia ingreditur . Oesypum ovis dicunt mucum illum adipeum , qui ex lana ovis succida , in gutture obvia , lumbisque intersita colligitur . Hanc lanam probe lavatam excoquant , quo subtracto adipe reliquæ lanæ instar adhiberi queat . Peracta autem coctione ,

œsypum, ut spumam pinguem aquæ supernatantem videbis; hunc colligas, linteo percoles, vasi immittas, ad usum conserves, & habebis œsypum. Quem pharmacopolæ nostrates venum exponunt, ille plerumque ex Normannia, tractuque Bellovacensi, Galliæ regionibus ad nos deportatur; recentem, quantum potest, eligas, & solidum, purum, colore fulvum, odore ingratum, nec tamen tempore corruptum, tempore enim fœtorem, & saponis duritiem induit. Cæterum emolliente, anodyna & resolvente virtute gaudens, ad fortificandos articulos, & contra luxationes & contusiones adhibetur. Lanam vero succidam, æstate, ex collo, & regione lumbis interjacente subtrahunt, eamque facultatis suæ calefacientis, emollientis, & solventis ergo, contra luxationes & contusiones externe adplicant, dolores enim lenit, & transpirationem partis, cui superjacet, adauget. Sic quædam ego mulieres vidi, quæ ex mammarum vulneribus dolores experiebantur, imminente gangrænæ periculo. Hæ imposito cataplasmate lanæ ovis succidæ, malo venienti occurrebant. Stercus ovinum denique, discutiente & aperitiva virtute instructum, vel interne, dosi ℥ij. ad ℥j. contra icterum, vel externe, pro cataplasmate contra tumores lienis, callos pedum, manuum verrucas, aliosque pellis tuberculos, adhibetur.

Agnus oleo phlegmate & sale volatili abundans, carne quidem humectante, refrigerante, & copiosius nutrimentum subministrante gaudet; sed & humores generante viscosos ac crassos, in primis dum nimis teneræ ætatis animal fuerit. Qua propter junioribus tantum, qui calidæ & biliosæ sunt naturæ, competit; qui autem frigidioris sunt temperamenti atque phlegmatici, illi vel omni prorsus, vel saltem nimio ejus usu abstinendo. Ars medica ex partibus agninis, varias sèligit sibi usui, ut pulmones, coagulum in fundo stomachi obvium, & pellem. Pulmonum usus præcipuus in phtisi, aliisque pulmonis adfectionibus & vulneribus est; tunc enim lenientia juscula ex illis præparantur, qualia ex pulmone vituli seu vulpis excoquenda docuimus. Absit enim, ut sinistræ quorundam opinioni accedamus, qua easdem animalium partes eisdem hominis partibus occulta quadam connexionione competere docent, quam quidem nec tempora nec experientia nostra perferunt; qui potius non nisi leniente sua virtute pulmones agninos, humanis convenire concludimus atque docemus. Coagulum agni contra venenum facere credunt & morsus bestiarum venenosarum; ex quo partem aceto solutam recipi jubet *Schroderus*. *Ettmuller* quoque pro dissolvendo mammarum lacte coagulato, nutrices portiunculam hujus coaguli agnini capere docet. Pellis denique agnina, recens subtracta, resolvendi vi atque anodyna gaudens, corporis partibus, magna contusione adfectis adplicetur, circumdetur; & jam *Hippocrates* ventri virginum, menstruorum retentione laborantium, pellem agninam, dummodo subtracta fuerit, adplicari jubet; & frequentissima nostratium consuetudine, partes rheumate correptas pelli agninæ, inversa ejus lana, involvunt.

Agnus denique suo tempore castratus, vervex dicitur; castrationis finis autem hic est, ut carnem pinguiorem, & saponi gratiorem, & digestu faciliorem adquirat.

Vervex itaque multo oleo & sale volatili instructus, dummodo ætate tener, & mediocri adipe gaudeat, & salubribus alimentis nutritus, aere insuper puro ac sicco fructus fuerit: carnem multi ac optimi, digestuque

facilis alimentī, omnibus exhibet. Ætate provecior tamen aridam, duriorē & concoctu difficillimam.

Parcissimus vero est vervecis usus in Medicina. Sic v. gr. caput ejus & pedes aqua elixi balneum subministrant, pro atrophia & contractione membrorum; quod ungentis, penetrantisque suæ virtutis ergo, flexibilitatem membris restituit, & nutritionem eorum faciliorem reddit. Nec non jusculum ex capite vervecino, una cum lana contuso, & elixo, clysteres contra dysenteriam ac tenesmum, citissimo dolorum medio, ingreditur. Sic & constanti colicæ & dysentericæ auxilio cedit vervecis epiploon, calidum adhuc ventri adplicatum. Lana tandem vervecis, & sebum & stercus, virtute sua æque ac usu ovinis atque arietinis respondent.

℞. Jusculi ex intestinis vervecinis ℥x.

Vitellos, num. ij.

Balsami Lucatellii ℥j.

Sebi vervecini ℥ij.

M. & fiat clyster anodynus & balsamicus, contra dysenteriam ulcerosam; qui eo caloris gradu adplicandus venit, quo sebum, ut spissescere possit, impediatur; Idem & obtinebis, si una cum vitellis, diu ac probe sebum contudetis.

℞. Olei communis ℔. j.

Ceræ virginis

Axungię porcine

Butyri recentis

Sebi vervecini

Lithargyri auri, ana ℔. jss.

M. omnia, post pelvi immissa, igni superponantur, & continua spatuli agitatione misceantur eo usque, quo omnia colorem rubro-ferrugineum, & unguenti consistentiam nacta fuerint; & habebis unguentum, pro resolvendo lacte mammarum, pro emolliendis earum pariter ac abscessuum, in quocumque corporis parte exortorum, duritiis.

P H O C A.

Phoca. Offic. Lemer. 680. Dal. Pharm. 443. Charl. de Pis. 48. Blas. 284. Klein. Quadr. 93. Phoca, seu Vitulus marinus, Gesn. de Aquat. 826. Aldrov. de Pisc. 722. Jonst. de Pisc. 156. Schonev. Ichth. 56. Raii Syn. Quad. 189. Briff. Quadr. 230. Vitulus marinus. Bellon. de Aquat. 19. Rondel. de Pisc. 453. Merr. Pin. 167. Phoca dentibus caninis testis. Linn. Faun. Suec. II. Phoca, Vitulus, seu Bos marinus; Canis, seu lupus marinus. Nonnull.

Quam igitur in Actis Regiæ Scientiarum Academiæ, ad historiam naturalem animalium spectantibus, legimus, Phocæ descriptionem anatomicam, illam & Severianæ, & quæ ex hac hausta fuit, Blasianæ, & binis in Ephem. Germanor. obviis, merito quidem, antepondere, Tibique L. sequentibus exhibere liceat:

Duas esse phocarum species, docente Rondeletio novimus, alteram in Oceano, alteram in Mari Mediterraneo obviam; nec nisi corporis ratione parum diversas, hanc scilicet illa esse graciliorem; longioremque. Quam itaque examini nostro subjecimus, phoca, huic potius generi accedere videbatur. Etenim collo prolixiore, nec capite adeo humeris depresso, nec adeo

adeo decurtato corpore reliquo gaudebat, quam passim depicta phoca Oceani. Pectus quoque exhibebat dilatatum situ omoplatorum, solito magis egredientium; aliorum etenim animantium omoplata magis recedunt, ac strictius & magis acuminatum pectus constituunt. Omnis igitur ejus longitudo, ab apice rostri ad finem pedum posteriorum, naturali suo situ extensorum ac inter se connexorum, 28, digitis absolvebatur, & hæc pedum conformatio caudam piscium formam tribuere videbatur, *Aristotelis* descriptioni respondentem. Huic tamen contrarius *Cel. Rondelet*, non solum omnem phocam posterioribus pedibus carere docet, sed etiam *Aristotelem* increpat, quod phocæ pedibus posterioribus digitos tribuerit, anteriorum digitis æquales. Ex quo adparet, *Rondeletium*, cum vitulo marino, seu antiquorum Phoca confundere bovem maris Indiæ Occidentalis, huic enim pedum posteriorum loco non nisi cauda piscis, rudior conformata est, cujus ope rapidissime natando sublevatur, teste *Clusio*. Phoca autem nostra non solum duobus pedibus posterioribus instructa erat, sed cauda quoque $1\frac{1}{2}$. digitis longa, quam suo jure, cervinæ comparat *Plinius*. Negari tamen nequit, quod posteriorum digiti, nec adeo distincti adparerent, quam illi qui erant anterioribus, quodque pedes posteriores extensi & sibi invicem contigui, caudam piscis potius, quam pedes animalium referrent; mergi, avis, pedibus similes, qui avium instar, terræ parallelo corpore incedere nequeunt, sed erecto, hominis more, procedunt. Phocæ pedes manus humanas referre scribit *Aristoteles*; nos ita interpretamur: quod quum tribus partibus hominis bracchium absolvatur, bracchio, nimirum, cubito & manu, huic tantum, immediate ex pectore progredienti, respondeant phocæ pedes. Bos marinus e contrario phocæ majoris species est, & *Manati* dictus ab Hispanis, quasi *Manatus*, siquidem non nisi anterioribus pedibus, quos manus dicunt in animalibus, instructus est. Sic & in phoca nostra cubitus cum lacerto, cuti pectus obtegenti inhærebant, nec nisi manus saltem egrediebantur. Quæ quum brevissimæ essent ac inter se connexæ, foetuum suorum amplexui ineptæ nobis quidem videbantur, cui inservire docet *Oppianus*, imo bini pedum magis natatui quam incessui accommodati. *Aeliano* teste, foetus suos mater frequentissime jam terra exspatiando, jam aquæ innatando educit, ut iterato exercitio utriusque consuetudinem, superata structuræ suæ difficultate, adquirant. *Homerum* quoque phocas, *Nepodes*, dixisse videtur, nec ideo, quia pedibus carent, quod pro ratione denominationis addit *Eustathius*, sed potius quia pedum ope natant, pinnarumque auxilio incedunt. Unguibus tamen, incedenti quidem, nec tamen natanti necessariis, phocæ pedes erant instructi. Natura enim & phocam & castorem licet amphibia destinaverit; hunc tamen ob captandos sibi pisces saltem aquas ingredientem, cæterum in terra commorantem, majori facilitate incedendi, phocam vero natandi instructa voluit, organisque præcipuo vel hoc vel illo usui inservientibus, donavit. Accedit & cordis pulmonumque phocæ conformatio singularis, castori denegata, cujus ergo diutius sub aqua detineri potest phoca, ut infra docebitur.

Nec tamen capite brevi & rotundo, secundum *Rondeletii* descriptionem, sed rostro, vitulino pro longitudine accedente, gaudebat. Vitulus autem elevatos & ex capite prominentes oculos, phoca e contrario, delitescens & orbitæ, margine haud prominente instructæ quasi immerfos, & xv. li-

nearum diametrum explentes, præbebat. Palpebra etiam interna, & in angulum majorem recedens, pro obtegendo oculo aderat. Nec prolixos illos pilos oculis superiores vidimus, quos *Rondelet* & *Severinus* observatos volunt, sed aliquos tantum ex lateribus rostri, hæc autem quadrata, ac variis nodis, ordine inter se distantibus, interstincta erant. Auribus externis carebat, & avium more foramina quædam, oculis ulteriora, pro auribus internis exhibebat. Id quod ex viviparis omnibus soli phocæ proprium esse & singulare observat *Aristoteles*. Omnis ejus pellis pilo brevissimo, & vitulino simili, nec ut vult *Silvaticus* caprino, seu longiori, cinereo-fulvo, in dorso autem maculis ferrugineis, unguis magnitudinem referentibus consperso, oblecta erat. Hunc pilum, vel diutius subtracta pelle, occultam cum mari connexionem retinere docet *Plinius*, & jam maris fluxu surrigi, jam refluxu deprimi. Ast nimius ille est in asserenda facti veritate, quam ut fidem adhibere possimus. Imo flante aquilone, pilos austro flante surgentes, non solum deprimi, sed prorsus evanescere docet. Quæ quamvis fabulæ habeantur, in India veritate ac experientia constare perhibet *Cardanus*. Nos autem quom Parisiis detentam phocæ pellem variis anni temporibus observavimus, semper eandem pili altitudinem invenimus. Pelle gaudebat solida ac crassissima, ac *Plinius*, non nisi confracto capite phocam enecari posse perhibet. Manati pellem arefactam, pro crassitie sua vel soleis calceorum conficiendis sufficere dicunt, quotquot Indiæ Orientalis historiam perscribere. Dentes phocæ longissimi ac cuspidati lupinis potius quam vitulinis accedebant, quorum ergo & Hispanis atque Germanis lupum marinum audire phocam censemus. Et quum lentus atque mansuetus sit vitulus terrestris; phocam e contrario dicunt esse agilem, animi fortis, & raptu viventem, & sollertem cohortibusque junctis vel maxima maris adgredi, imo feras terrestres, ut ursum, aliaque ad certamen provocare. Quæ quum de phoca nostra & huic similibus haud valeant, illis forsan tribuenda erunt, quæ prope ad Angliam captæ, *Gesnero* teste, ursi magnitudinem pertingunt; vel his, quas 20. pedum longas & 7. latas esse, & *Gomara Oviedo*, & *Pedro Cieca*, ut ultimæ insularum Antillarum descriptiones, perhibent. Piscium denominationes autem vel ex similitudine figuræ vel morum cum aliis, desumptæ videntur. Sic e. g. ovis marina, albi sui coloris, & cornuum, ovis instar, teretium; phoca autem rapacitatis suæ ergo, lupi marini, nomen acceperunt. Potius tamen, ovis marinæ respectu, phoca ejus nomine, ovis autem marina, lupi nomine digna foret, hæc enim, *Aeliano* teste, phocis insidiatur, & quas arripere potest, devorat. Lingua phocæ vitulinæ similis, & lata, depressa, atque lævissima, & extremitate, ut *Aristoteles* docet, bifida erat, nec duplex, rotunda, gracilisque, ut in lacertis ac serpentibus, qualem docet esse *Plinius*. Larynx singulari ratione conformata, & epiglottis maxima erat, ac quam obtegerat, glottidem, $\frac{1}{2}$. digito, longitudine superabat. Quæ quidem probe occludendo introitui asperæ arteriæ, quum prædam maris in fundo devorat, & aquæ, ne pulmones ingrediatur, præpediendæ, inservire videntur.

Ventriculus, quem Struthionis ovi instar, rotundum dicit *Severinus*, longus, intestinum, versus orificia sua constrictum, referebat; & quam *Severinus* explanatam esse scribit, membrana interior, rugosa erat; rugæ scilicet ab orificio supremo ad medium ventriculi, undulatae, exinde autem usque

usque ad pylorum rectæ conspiciebantur, quadam cum ruminantibus similitudine, horum scilicet ventriculi ultimi rugæ rectæ, priorum vero obliquæ sunt & transversales. Phocæ in stomacho autem globulum deteximus herbæ marinæ, nautis dictæ: *Varec*, quæ fuci species est, nucem figura & magnitudine æquiparantem, & superius ventriculi orificium obturantem, quo ventriculi violentiore atque insolita compressione protrusus videbatur. Sex erant loborum hepar constituentium, duo scilicet infra postici, quatuor autem exigui, supra & anteriores. Vesicula fellis dextro majori posticorum, & primo exiguo ejusdem lateris anteriorum media interjacebat. *Belon* vero, *Aristotelem* sequutus, phocam felle carere docet. *Plinius* pectore illud inhærere scribit, sibi contrarius, dum exinde phocam, piscatorum insidiis pressum, fel suum evomere perhibet; hoc enim variis hominum morbis medio cedere, & phocam præter fel, nihil illos desiderare, nosse, subjungit. Etenim & evomere posse phocam, id quod pectore suo continetur, absurdum, & piscatorum desiderium intelligere, vix creditu est, nisi amphibiiis singularem illam sagacitatem tribuere velis, qua idem *Plinius*, & castorem sacculos, castorei receptacula, dentibus sibi eripere; & serpentes, exuvias verno tempore exuendas, deglutire; ranas autem præstantem quemdam liquorem, in corpore suo enatum, ne hujus ergo enecarentur, evomere quotidie dicit; Renes phocæ, lutræ renibus similes perhibet *Rondeletius*, nos vero dissimiles deteximus; lutræ renes etenim, ursinorum instar, pluribus, iisque separatis constructi sunt renibus exiguis, quorum singulis sua sunt vasa emulgentia, sui uretheres; at phocæ nostræ renes vitulinis accedebant; etenim horum instar, fissuris haud adeo profundis atque frequentioribus quam vitulini, dissecti, plurimis ex glandulis compositi videbantur. Imo præter pelviculum majorem, in parte gibba renis vitulini obvium, substantia omnis renum phocæ multis aliis pelviculis erat confita, singulis, totidem renibus exiguis, renem integrum qui constituebant, respondentibus, omnium vero parenchymo non nisi massam unam componente. Renis membrana adiposa innumeris vasibus confita erat; hinc *Rondelet* vasa emulgentia cavitatem renis phocæ haud ingredi scribit, ut in animalibus reliquis, sed per omne corpus renis esse distributa. Maximam partem vasorum renis sinistri conficiebant rami, seu potius radices venæ spermaticæ, qui coeundo tres ramos majores constituebant, hos autem venæ spermaticæ truncus, emulgentem egrediens, transeundo retinebat. Pulmoni utrinque unus tantummodo lobe erat, idemque fissura transversali, in medio dissectus. Cor rotundum ac planum, ventriculos maximos, auriculas autem valde exiguas præbebat. Aortæ truncus ad 2. digitorum longitudinem ex corde egrediebatur, antequam, pro constituendo fulcro, rediret. Nec non sub illa apertura magna, quam sanguis transit ex vena cava ad dextrum cordis ventriculum delatus, sub illa, inquam, alia aderat, ex arteria venosa, in ventriculum sinistrum, ex hoc denique aortam ingrediens; quæ in fœtu, foraminis ovi nomine venit, & anastomosin constituit, qua mediante, sanguis ex cava aortam intrat, nec pulmonem transit; quæque eidem usui phocæ cedere judicatur, etenim & hæc sub aqua detenta, absque respiratione detineri ut possit, necesse est. Quæ quum ita sint, & respirationem pro circulatione necessariam esse adparet, & sanguinem, ex altero cordis ventriculo, dilatatione

cordis ad pulmonem delatum, illius compressione ad alterum ventriculorum protrudi. Quod autem sub aqua degens phoca tamdiu carere possit respiratione, huic potius vasorum cordis atque pulmonis conformationi tribuendum videtur, quam quidem pulmonis parvitati, ut *Plinius* docet. Binæ igitur aperturæ, venæ cavæ in trunco obviæ, membrana separabantur, quam replicata interior venæ tunica constituebat. Multo tandem sanguine plenos reperivimus & ventriculos cordis atque pulmonem; quos sanguine reliquis animalibus parciore expletos esse perhibet *Plinius*.

Ossa phocæ cartilaginosa esse volunt *Plinius* & *Aristoteles*, nos autem durissima ac in primis illa, quæ cranio erant, deteximus. Dura mater adherens cranio, pro constituenda falce, duplicabatur. Cerebro autem & cerebello intermedium os aliquod vidimus, canibus rapacibusque commune; at insolitum his quæ herba vivunt, ut vitulus. Hoc autem in phoca nostra explanatum erat & cuspidatum, nec rotundum crassiusque, ut in Manati, cui quod inest, singulari virtute calculos vesicæ ac renum dissolvendi præditum esse credunt. Iisdem, quibus vitulus, cerebri anfractibus cavitatibusque, at majori cerebri quantitate gaudebat, quum piscibus alias exigua solet esse cerebri quantitas. Glandula pinealis 2. lineis longa, ac totidem fere lata erat. Phocam cæterum superata piscium stupiditate, vel maxima terrestrium calliditate pollere, observatum est. *Plinius* refert Romæ phocas adpellantis voci respondidisse, ac voce gestibusque ex theatro populum salutasse. Sic maximum quemdam Manatum, seu phocam Indiæ, cicutem, exaudita hominum voci obtemperantem ex aqua in terram egressum esse, & vel decem homines dorso exceptos ad lacum deportasse, cui principis jussu nutritus, immorabatur, hæc inquam, *Gomara* scribit. Et *Aldrovandus* alium se vidisse testatur, qui in præsentia principis Christiani cantus extollebat, præsentem autem Turcico prorsus silebat. Liquorem crystallinum, piscium more, fere sphaericum, & anteriorem ejus partem, insolita ratione, convexam exhibebat. Et omnem choroidem, substantia quadam albida & admodum opaca obducebat. Retina denique tres ramos continebat vasorum sanguineorum, oculum cum nervo optico ingredientium, & per totam membranam disperforum. Qui quidem nervus opticus, medium oculi, ex opposita crystallini parte intrabat.

Hæc autem eorum sententiæ favere videntur, qui species videndorum superficie retinæ nec choroidis, exceptas esse volunt; vasa enim per retinam dispersa quum choroidi superjaceant, opacitatis suæ ergo impediunt, quo minus ad choroidem pervenire atque transire possint objectorum species; retinæ respectu autem vasa ista nullo impedimento cedunt, hæc enim illius superficie, humorem vitreum continente & terminante, obteguntur. Accedit situs optici nervi, in axe oculi, directe objecta excipientis; nulla enim choroides in præcipuo loco objecta excipiente adest, retina autem, & nervo optico & omnibus reliquis locis supertensa, excipiendis videndorum speciebus sufficit.

Constrictus erat oculorum sinister, & multo minor dextro; purulentos enim humores ejus deteximus. Nec tamen mille colores, ex opinione Physicorum in oculis phocæ conspiciendos, reperivimus.

Subungere liceat & brevissimam phocæ junioris descriptionem, quam in *Andersenii historia Islandiæ*, sequentibus leges:

Phocam, ab incolis Americæ Septemtrionalis: maris lupum dictam, & satis apud omnes cognitam, adcuratissime descriptam reliquit Cel. *Martens*. Capite illa suo canem amputatis auribus refert; & barba gaudet ex pilo longo, hirsuto ac singulari ratione crispato, constructa; & corpore brevi, anteriùsque crasso, & stomacho, ab initio, amplissimo, post vero sensim coarctato, & tandem in cuspidem desinente. Quatuor præbet pedes, anserinorum instar brevissimos, ossibus carentes, & quodam carnis ex frustulo, pilosa cute obtecto, compositos. Quinos præterea ungues observabis in anterioribus, illosque longos, nigros & ultra marginem cutis prominentes. Cruribus caret phoca, pedum vero tanta est brevitudo, ut ne residendo quidem terram pertingant, ob figuram ventris conglobatam. Nihilotamen minus pro aduncis animali cedunt, quorum auxilio, incredibili quadam celeritate protrahitur; cæterum natanti remorum loco veniunt. Posteriores posticus respiciunt, eorum extremitas lata, & piscium more, perpendicularis est. Pilus undecumque brevis & hispidus, dorsum præterea radiis maculisque nigris, venter vero albo-flavido colore notatus est. Cauda caprinam vix longitudine superat. Et omnis ejus longitudo ab apice rostri ad finem pedis posterioris, 2. pedibus & 4. digitis Parisiensibus absolvitur. Quas autem in freto Davidico reperiere, illas vel duplo hominis longitudinem explere perhibent. Et pelli ac carni intermedium adest, 4. fere digitorum altus, optimum præbet oleum. Quum enim infrequentior hodie capiatur balæna, ne sumtus pereant, quotannis naves minores, phocas captum, Groenlandiam transmittere solent. Pellis etenim phocarum magni æstimatur, & multiplici nostratium usui venit. In superficie glaciei igitur somno correptas phocas vel fustibus ex naso percussas, vel hastis eas perforando enecant. Multiplici autem utilitati cedunt freti incolis phocæ, caro scilicet nutrimento, sanguis morborum medicamini, pellis vestibis naviumque funiculis, tendines & intestina & vitri, & velorum & filorum locum subeunt, ossa denique quævis venationis instrumenta & utensilia præbent. Tanto hominis commodo vel unicum animal sufficit; qui abutens rerum copia, mollis redditur & segnis; fames autem & abundantia defectus industriam exercent, exacuantque & pauciora quæ adsunt, quotuplici id ratione fieri potest, adhiberi, docent. Rem denique singularem, sic Cel. *Anderson*, subjungam. Auctor quidam illustris & fide dignissimus, maximam phocarum quantitatem in lacu Tartariæ magnæ, *Baikal* dicto, reperiri adserit. Hunc immerito Moscoviæ incolæ: *More* seu *Mer*, id est mare adpellant, quippe quem ex congerie fluminum enatum esse, hodie constat. Quæ igitur eodem detinentur, phocæ, illis quas Mare Balticum alit, parviores, cæterum simillimæ sunt; & glacie lacum obducente, sua sibi foramina conservant, quibus ad quærenda, quæ sub aqua haud reperiunt, solida alimenta, exspatiari queant. Has & Moscoviam & Tartariam incolentes tridentibus capiunt, ac pro lampadum suorum nutrimento, nullo oleo nisi illis substracto, utuntur. Jam sæpius mecum animo volvi, qui fieri poterit, ut & phocæ, & sturiones maximi, eodem lacu commorantes, illum ingressi fuerint? nec nimium recedere a veritate censeo, si ex mari glaciali provenientes utriusque præcos, fluvium *Denessei* dictum, ascendisse, post vero *Tunguske*, fluvium, intrasse, perhibeo, qui in lacum, de quo loquimur, egeritur; & sic tandem lacum ipsum devector, rece-

recedendique nescios eidem inhæsisse. Magis autem admiranda res est, quod aqua dulci detenta eorum posteritas & propagari, & adipem acquirere possit. Ast vel in animalibus naturam consuetudo superat; & certo, si frequentiores ejusmodi experientiæ instituerentur, satis singularia, & forsan hominibus utilissima detegeremus.

Addere liceat & ea, quæ de phoca, sub nomine lupi marini refert Cel. Denis in *Descriptione Geographica & historica orarum Americæ Septentrionalis, subnexa regionum historia naturali*.

Promontorio bisulco & promontorio arenoso intermediæ sunt insulæ plures, aliæ unius, aliæ duorum, imo trium, ad quatuor milliarium circuitus, quibus nomen est: *insulæ phocarum*. Hæ rupibus præcipitibus cinctæ, accessu difficillimæ, abietibus, betulis aliisque exilioribus arboribus confitæ & phocarum nomine adpellatæ sunt, quod in eas, phocæ suos foetus conferunt. Ingruente enim Februario mense, illos editum, eo perveniunt, rupes ascendunt, ac tandem foetus edunt, vel maximis porcis majores. Brevi in terra commorati, a parentibus ad mare conducuntur, sæpius etiam ubera matris suctum in terram redeunt. Virum d' Aunay, ex portu regio, cymbis, illas captatum homines eo transmisisse expertus sum. Hi Februario mense, eo perveniunt, & fustibus muniti insulam circumagunt, parentes præcipiti fuga ad mare ruunt, foetus segniores sequuntur, hos autem ex naso percussos enecant. Ast festinatione opus est, etenim parentes, jam oram maris tenentes summum clamorem extollunt, reliquis fugæ signum. Attamen paucissimi festinantem effugiunt, & vel octingenti per diem enecantur. Pinguissimi sunt foetus, parentes vero macilenti. Pro explendo uno olei dolio tres ad quatuor foetus sufficiunt; & oleum non solum lampadis optimo, nec foetorem edente nutrimento, sed etiam palato gratum, & cibo convenientissimum, imo facibus, reliquo piscium oleo communibus, destitutum, exhibent.

Idem ille alibi sequentia: Superest, ut de venatione phocarum pauca subjungam; quarum quum species binæ sint, missa majorum specie, *Tousquetii* in insulis, obviarum, de quibus supra dictum est, nunc de minori sermo sit. Hæ igitur, illarum more, in rupibus suos foetus edunt, & in primis incolarum persequutione premuntur, his enim caro illarum cibo, adeps autem delitiis, & comæ unguento, veniunt. Hæ ergo sæpius cœlo sereno, in littore vel rupibus, soli expositæ, dormiunt, & somno detentæ binas tresve, pro excubiis agendis relinquunt, qui conspecto vel hominis vel cymbæ adventu, excitato clamore, fugæ signum edunt; tum ad unam omnes præcipientes in aquam profiliunt, post natando ad littus redeunt, pedibus anterioribus innixæ, caput aqua extollunt, & nemine detecto partim terram petunt, partim in mare redeunt. Trecentas sæpius ex uno rupis latere repositas, & in angiportis præsertim, binis ternisve dispersas reperies, his facile accedes, facilesque enecabis. Mortali vulnere confectæ in aquam prolabuntur, & inter palpitandum facili opera capiuntur; ast ictu prorsus enecatæ, lapidis instar, statim maris fundum petunt, sæpiusque pereunt. Nec majorem olei quantitatem, quam vesicæ earum capacitate continetur, exhibent, qua adipem liquefactum, & in oleum abeuntem conservare solent incolæ. Hoc vero non solum condiendo cibo, sed & lampadis nutrimento optimo est, nec enim odorem, nec fumum producit, nec limum seu fæces in fundo relinquit.

Phocam vero, quam Sinum Bothnicum & Balthicum mare inhabitare dicit *Linnaeus*, duplicis speciei esse, idem ille subjungit, alteram Suevico idiomate: *Grao-Siael*, alteram vero: *Vvikare-Siael*, dictam, & hanc Februario, illam vero Januario suos edere foetus; hanc solitariam esse & nigram, illam e contrario albidam & cohortim incedentem. In mari nostro, addit *Cel. Raii*, in fine promontorii, de *Cornouaille* dicti, multæ phocarum reperiuntur, quas, quum sole expositæ in rupibus quiescunt, piscatores, vel naso illarum ictibus percusso, vel sclopetis enecant. Incolis si fides est, bimuli tauri magnitudinem aliquando attingunt, & versicolores, & quod mihi quidem incredibile videbatur, enecati mares statim aquæ fundum ruunt, foemellæ autem mortuæ aquæ supernatant. Idem illi regionis incolæ communi opinioni accedunt, qua phocas, sui persecutores, lapidibus post se rejectis petere, itaque se ipsas defendere perhibent; binas denique earum species distinguunt, aliasque *Sieles* vel *Seels*, alias *Soiles* adpellant, & priores ultimis minores, nec in oris nostris captandas esse adferunt.

Græcum phocæ nomen est: *Phôkè*, Italicum: *Vecchio Marino*, Hispanicum: *Lobo Marino*, Germanicum: *Meer-VVolf*, Belgicum: *Zee-Kalf*, seu *Zeebondt*; Danicum: *Saelhund*; Norvagicum: *Kaabe*, Groenlandicum: *Pusa*; Anglicum: *Sea-Calf*, vel: *Soile*, Suevicum denique: *Siael*.

Vir *Cel. Lemery* in tractatu de alimentis, phocæ carnem longe minori soliditate, quam bovis marini, gaudere, & adeo mollem, spongiosam & adipeam esse refert, ut vel manibus diu trita, fere tota lique scat. Quæ quum ita se habeant, citissime quidem famem explet, ast nauseam parit, nec nisi iniquius alimentum subministrat. Cujus ergo & paucissimis vel ex plebis sæce, cibo cedere solet.

Ars medica adipe suo utitur, illumque pro emolliente, anodyno & antihysterico commendat. Hinc quoque ad profligandos mulierum vapores, & provocanda earum menstrua, matricis regionem, adipe phocæ adfricandam esse docet. Quæ autem ex corio ejus conficiuntur sandalia, illa ab arthritide præservantia dicuntur. Quæ tamen si forent, corii duritiei saltem tribuenda esse vides, quæ obstat, quo minus frigus atque humiditas, redeuntis arthritidis causæ, penetrare possint.

R H I N O C E R O S.

Rhinoceros. Offic. Schrod. 305. Lemer. 743. Dal. Pharm. 441. Gesn. de Quadr. 842. Aldrov. de Quadr. Bisulc. 878. Jonst. de Quadr. 66. Charlet. Exerc. 12. Mont. Exot. 5. Raii Syn. Quadr. 122. Klein. Quadr. 26. Briss. Quad. 174. *Albada*, sive *Rhinoceros*. Bont. Ind. Orient. 50. *Rhinoceros cornu unico conico*. Linn. Syst. Nat. 25. *Taurus*, seu *Bos Æthiopicus*; *Quadrupes naso cornigero*; *Nasicornis*. Quorumd.

Rhinoceros quem immerito *Pausanias* taurum, seu bovem Æthiopicum dicit, & post Elephantum jure maximum ex animalibus atque singularissimum habeas: vel hodie adhuc Physicis nostris ignotus est adeo, ut nec ullam descriptionem anatomicam ejus reperiās, imo ut dubium sit, utrum unico, an binis interdum cornibus onustum habeat nasum. Alii enim peregrinantium adferunt cum *Pausania*, quod alterum cornu majus gerat ex naso egrediens, alterum vero minus, superiusque ex fronte protuberans;
alii

alii rhinocerontem marem tantummodo cornu minus in dorso, ac humer^o dextro gerere, majus vero in naso ostendere volunt; rursus alii tribus cum cornibus instructum esse dicunt, alio supra nares, alio in fronte, alio tandem in dorso. Alii, cum *Pausania*, cornua ejus haud infixata ac immobilia esse; sed hinc illinc agitari, & ira excandescente animale tantam duritiem ac asperitatem induere docent, ut arbores conquassando extirpare possint. Ex his autem liquet, *Pausaniæ* numquam rhinocerontem videndi copiam fuisse; cornibus enim hic, ut taurus probe infixis atque immobilibus gaudet, quæ, ut irascente animale, indurescere possint, omni cornu naturæ penitus obluatur. *Cosmus*, Monachus ille Ægypti, incidit in eundem errorem, & descriptionem rhinocerontis reliquit, quem tamen, ex longinquo saltem in vita conspexisse faterur, quæ enim in palatio regis exposita adparebat pellis rhinoceronti subtracta, illa fœno & stramine confarta erat. Nec Vir Eruditissimus, P. R. *Bernardus de Montfaucon* cui & Græcam & Latinam editionem operum *Cosmi* debemus, ullam de rhinoceronte ideam habuisse videtur, teste inserta ejus imagine. Alii sunt, qui rhinocerontem Africæ ab Asiatico, duplici cornu, diversum dicunt, & horum opinioni *Klein* cum *Carolo de Bergent*, D. accedere videntur. Res quomodocumque se habeat, nos certiora expectando, non nisi unius generis rhinocerontem admittimus, illumque unum cornu in naso gerentem, qualem esse dicunt & *Plinius*, & *Solinus*, *Strabo*, *Oppianus*, *Bontius*, *Scheuchzer*, *Ludolff*, alique gravis auctoritatis viri. Et cum *Cel. Brissou*, sequentes rhinocerontis notas características constituimus, scilicet: binos in utraque maxilla dentes incisivos, inter se valde distantes, 3. in omni pede digitos, unguibus instructos, & cornu, quod gerit in naso.

Bontius est, qui refert innumeros se rhinocerontes, jam stabulo detentos, jam in agris pascentes vidisse, illosque Indis audire *Abada*, & magnitudine ac corporis mole elephantos referre. Ex quo, qui sua hausisse videtur, *Dapper*, subnectit: rhinocerontem haud cedere elephantis, quamvis ille, cruribus brevior, minor videatur. Longitudine sua, si ab apice rostri ad originem caudæ perrexeris, 12. fere pedes, totidemque circumferentia mediæ corporis explebit; altitudine 6. circiter pedes. Aliquot abhinc annis rhinoceros, fœmella, Parisiis commorabatur, quæ a genibus ad terram 1. pedis altitudine erat. Capite rhinoceros gaudet oblongo, moli corporis respondente, & ex sententia *Caroli de Bergan*, D. bovinum vel triplo, crassitudine, superante; cæterum aprino simili, rostro tamen rotundo; Cibi autem capiendi ergo, maxillæ superioris pellem, aquilæ rostri instar, extendit, labrumque superius pro lubitu, jam recipit, jam protendit. Maxilla inferior 7. digitis lata est. Omnis vero maxillæ anteriorem partem depressam esse, seu potius quadratim resectam, docet *Brissou*. Os habet parum dissectum, $\frac{1}{2}$. fere pede utrinque, & binos in utraque maxilla, incisivos dentes, labiis proximos, cubos majores referentes, & angulis, quos maxillarum pars anterior & latera componunt, fere infitos. Caninis dentibus caret, alt rictus in fundo duodeni in quavis maxilla, seni scilicet ex parte, dentes adfunt molares; adeo acuti, ut & stramine & arborum ramis, quasi forfice conscindendis sufficiant. Nec adeo asperam, sed membrana, limæ instar dentata obductam habet linguam, ut vel hominem equumve lingendo, omni carne, ad ossa exuat, ut varii

cum *Bontio*, aut falso, perhibent; sed nostra potius experientia constat, foemellæ linguam, caninæ instar gracilem esse, tenuem, & ut sericum, tantu mollem; quæ quidni de masculina non valeant, nullus video; nec rhinoceronis Africani, lævem esse ut Asiatici, sed vel limam asperitate exæquare veritatis speciem præ se gerit. Cæterum oculi ejus, molis respectu, exigui, longissime a fronte, nares versum siti, recta antrorsum diriguntur, quorum ergo nulla nisi recte sibi opposita conspiciere dicitur; & illum, qui 10. saltem pedum spatio remotus jam hanc jam illam partem sese converterit, insequentis furorem facile evitare perhibent. Cæterum scintillantes sui oculi, vel minimo calore atque ira rubescunt, & inter se, 10. digitis, & ab exteriori narium extremitate, 1. pedis spatio, hæ autem $\frac{1}{2}$. pede inter se distant. Auribus vero prægrandibus, cæterum porcinos seu asininos referentibus, & 11. digitorum altis, ac motu facilibus, imo pelle tenui obtectis, gaudet. Quod vero in naso gerit cornu durum, solidum, nec intus excavatum, pro ætatis & sexus differentia varium est. Foemella quo instructa erat, illud a radice 9. digitis altum, & ab auribus 14. digitorum, ab apice producti rostri autem 9. digitorum spatio, remotum est. Capite integro tum 23. digitos, longitudine referente. Cæterum infra pellucidum, supra autem, pellis instar, ferrugineo-nigrum est, nec penitus rotundum, sed crassissimum, & parum supinum. Maris cornu e contrario, longius crassiusque 2. ad 3. pedum longitudine, & in basi 1. fere pedis diametri, & ferri duritie, & in altum recurvatum, aut magis cuspidatum est, quam cornu foemellæ. Ex observatione *Bonzii* tandem varium esse edocemur colorem cornuum, plerumque nigrum, rarius cinereum, rarissime vero album, quo quæ sunt, maximo in pretio habentur.

Pellis, qua obtegitur, durissima atque cohærens, nec, qualis ex pictorum errore, in squamas divisa, ab auribus ad initium dorsi, 3. pedum spatio, producta, postea cuculli depressi instar, versus latera procurrit ac replicatur, cujus ergo, Lusitanorum idiomate: *Monachus Indiæ*, rhinoceros audit. Fateor, sic *D. Carolus de Bergan*, antequam noverim, quod nomine isto a Lusitanis salutaretur, risum, salva tamen, qua par est, reverentia, erga Ordinem Seraphicum, risum inquam, movit adspectus rhinoceronis, quem Monachi Franciscani, vulgo Capucini figuram, satis exacte referre observavi. Prima igitur pellis in extremitate sua, globulo quodam efficto, utrinque ad abdomen descendit, & tres ex quovis latere plicaturas constituit, quæ ocrearum instar, binos animalis lumbos, ex anteriore parte, ad genua fere, obducunt. Aliud pendet ex collo corium rotundum, crassissimum, & pedis 1. longum. Ab auribus 3. pedum spatio primus globulus differt, hoc vero inferior alia pellis est, eaque crassissima, & stragulis, quibus vulnerata equorum terga teguntur, simillima; & hæc ex utroque latere procurrens, durissimo tandem globulo terminatur. Quatuor fere pedibus in dorso longa, & ex utraque ventris parte, 4. pedibus lata est. Cauda ejus 3. pedibus longa, gracilis & pluribus nodis, sibi proximis constans, octo digitorum spatio corpori animalis adhæret, & pede uno subtergo, seu secundi globuli extremitate suam captat originem. Cauda foemellæ binis corii globulis, longissimis durissimisque inferitur. Tergum rhinoceronis bini globuli majores circumdant, ab extremitate pellis secundæ exorientes, & caudam prope ad anum, pertingentes; tergum itaque me-

dium cauda dividit, semicirculi, 3. pedum circumferentiæ, forma. Bini item lumbi, fere ad genua pertingentibus ocreis rugosis detinentur. Ventrem quæ obtegit pellis, non nisi 18. digitis a terra distat, & sub extremitatibus pellis dorsum obtegentis, egreditur, etenim globuli corporineu-
tquam adhærent, sed jam uno, jam quatuor digitis ultra marginem ejus producuntur; pellis autem tenera atque subtilis & 2. pedibus lata est. Quæ quidem necessaria erant rhinoceronti, alias enim nec pellis capax foret extensionis, nec ille cibum capere, nec foetus utero gerere posset foemella. Quæ autem si adhuc latior foret, hostium adgressui facilior arriperetur, nec duris pellibus, reliquum corpus obtegentibus, defenderetur.

Rhinocerontis corium ergo cinereo-ferrugineum, ubique (capite tamen & regione abdominis excepta,) tuberculis 1. lineæ altis, consutum est. Quæ quidem rugæ ac plicaturæ, adspectum ipsi horribilem, ast tantam soliditatem ac duritiem conciliant, ut nec sclopeti globulo perforari possit, imo ex testimonio *Bontii*, ne cultro quidem venatorio Japonensi cedat. Imo & *Cel. Carolus de Bergan*, D. durissimam licet rhinocerontis pellem expertus, jure maximam ejus sensibilitatem miratur, dum foemellam, aliquot ante annos, & Germaniam transeuntem, vel levissimæ virgæ ictibus cæsam, tremore per totum corpus correptam vidit, idem ille pellistuberculos, stabuli sui asseribus rudius adfrictos, sanguinem edidisse testatur. Cæterum calva est pellis rhinocerontis, qui non nisi aures & caudam pilis obsitos exhibet. Alii sunt qui gibbum, quem in dorso camelus gerit, in ventre rhinocerontem portare, ast falso, docent. Et *Raius* pedem ipsi irregularem tribuit, & quatuor digitis anterieus respicientibus distinctum, ast hodierna experientia trifidum esse docet ejus pedem, cujus ergo *Kleinio*, *Trichelon* audit, digitorum medius enim apice corneo, nodisque pro parte reliqua gaudet; bini reliqui autem ungulas referunt. Porcinum grunnitum rhinoceronti tribuit *Bontius*, alii autem vocem, bovis astmathici balatui similem; Experientia tandem docuit haud ruminari rhinocerontem, quem excrementa equinis fere similia emittere docet *Carolus de Bergan*; hortulani autem sterminus ex rhinoceronte, reliquo omni meliorem agrorum foetationem exhibere censent.

In poemate suo de venatione *Oppianus* omnes rhinocerontes masculos, nec foemellam inter illos obviam esse, perhibet. Quæ quam absurda sint, alii tamen ex Physicis alia absurditate demonstraturi, ut conchas maris ex se ipsis oriri credunt, sic quoque rhinocerontem, vel ex se ipso, vel exterrarupibusve enasci perhibent, fabulis vix refutatu dignis. Mirabilis fane res esset, si tuberis instar ex terra nascentem videres molem rhinocerontis. Cæterum masculus quum sua conformatione ab equo & cane alienissima, elephantum referat atque camelum, *Plinius* cum *Solino* omnes quos diximus, obversis tergis coire censent, nulla tamen ullius experientia opinioni suffragatur. Teste *Samuele Bochart*, *Damir* & *Alkazuin*, scriptores Arabum, rhinocerontem foemellam vel septingentos annos vivere volunt, quinquagesimo autem pubescere, & trium spatio foetum utero gerere. Alii 25. annis suam magnitudinem excrescendo attingere, & 150. annis vivere docent. Nimii fane omnes. Etenim quo longiore temporis tractu excrescens animal eget, eo diutius illud decrescere constat. Jam experientia nostra constat, triennio rhinocerontem omnem magnitudinem suam pertingere, jam

jam & naturæ analogia, & sua cum bove similitudine in censum vocatis, jure nos nostro 20. annorum ætatem ipsi adsignamus. Binis cæterum fœmellæ uberibus non nisi una papilla est, nec nisi post partum lacte instructa, ægre alias conspiciendam papillam exhibet.

Eorum vero quæ de rhinoceronte scriptores Arabes in primis & Orientis fabulantur, tantus cumulus est, ut perscribendis vix maximum volumen sufficeret. Sic Nubiæ Geographus, *Algiabid* & *Damir* cornu rhinocerontis in medio confissum, & hominis, & pavonis, & caprarum aliorumque figuras, albis lineas delineatas repræsentare, & principum Chinæ atque Indarum solis exornandis inservire dicunt. Idem illi addunt cornu istud pro cultrorum ansis regibus venire, ac magni æstimari, quippe quæ veneni præsentiam effuso sudore indicant. Vera sunt, quæ de eximio ejus pretio apud Indas perhibentur, summa enim duritiæ gaudet, & elegantissimis utensilibus construendis veniunt; at incisæ sunt nec innatæ figuræ animantium, & quæ de sudore illius perhibentur, apertissimam fabulam redolent. Etenim nec Græcorum Latineque auctorum ullus de virtute cornu Rhinocerontis contra venenum scripserunt, nec eruditorum varii, experimenta instituendo, illam detexerunt, quæ si quibusdam fortassis infuerit, arte Charlatanorum inducta est, efficta ad similitudinem verorum, cornua, antidotis macerando. Vera sint sive falsa, ex India in Europam transferunt. Sic enim *Clementem VII.* Papam, cornu rhinocerontis, eximio ut censebat, dono, ad Galliæ regem transmississe; & Venetos olim aliud summo pretio a Judæo quodam redimisse; novimus; & Gallos, palatium *Petri de Medicis*, Magnæ Hetruriæ Ducis, depredando, detecto ibidem rhinocerontis cornu, thesaurum nactos credidisse, refert *Paulus Jovius*. Hodie autem cornua rhinocerontis, apud nos saltem, haud amplius suæ virtutis, sed raritatis ergo tantum æstimantur atque conservantur.

Neminem ex auctoribus, sive antiquis sive hodiernis novimus, qui rhinocerontem animal fictitium seu fabulosum habuerit, quidquod *Martialis* & *Artemidorus*, suis oculis illum se vidisse testantur. Haud ita cum *Unicorni*, seu Græcis: *Monoceronte*, etenim antiquiores non nisi ab aliis de illo relata referunt, & nostratibus fabula est. Imo & cornua monocerontis hinc inde obvia, ex pisce quodam cetaceo, *Narvval*, dicto proficisci demonstrat *Paulus Sachs*, D. Erroris originem hunc cogitamus, quod quum varia animalium terrestrium, quæ India & Æthiopia continet, unico tantum cornu, jam in naso, jam in fronte, jam in capite gaudeant, ut tauri, asini & capræ silvestres; hæc inter se confundendo, scriptores jam uno atque eidem id tribuere quod pluribus commune, jam vero pluribus, quod non nisi uni competit. Missis tandem quæ de existentia animalium fabulosa in utramque partem disputantur, nos lubentissimi Cel. *Samuelis Dale* sententiæ accedimus, qua ille Monocerontem ex quadrupedibus, unicum & verum, rhinocerontem esse credit.

Paulus, *Festi* epitomator, Ægyptum rhinocerontes alere docet, at omnium testimonio convictus errat. Ubi autem elephantes, ibi & rhinocerontes, ut in Africæ desertis, Abyssinia, Æthiopia, & India Orientali; & in *Quangsi*, Sinensium regione, R. P. *Dubalde*, Societatis Jesu, teste. Frequentiores autem in illis regionibus inveniuntur, quibus Magnus Mogol & rex Avæ imperat, in Bengalia, Patana, Cambaya, Jacatra, regnis, & Su-

matra, Java atque Borneo, insulis. Quam in anno 1748. & 1749. Parisiis vidimus, rhinoceros fœmella, ex Acham, quæ ad regem Avæ pertinet capta, & a nauta Belgico, primo in Bataviam, post in Germaniam, & tandem in Galliam deportata erat. Terra ubi devehendus erat, vix 20. equi interdum protinahendæ sufficiebant, & ob cœli varietatem, Europa degentis pellem ne dehisceret & induresceret, piscium oleo sæpissime perunxere. Hæc igitur cicur, mansueta, imo blandiens, continuo, quævis obvia manducat, carne tamen & piscibus exceptis. Et ciborum quantitati respondentem haurit potum. Sexaginta fœni, & viginti panis libras per diem devorare, & 14. situlas aquæ epotare dicitur. Nec non cerevisiam & vinum bibit; ac fumum tabaci, seu herbæ Nicotiani peramat, quam naribus & gutturi ejus inflare solent sui custodes. Ramusculos etiam arborum hispidos, & spinas virides manducare peramat; ut ex animalibus varia spinis delectantur, quarum cuspides, fibras ac eminentias linguæ suæ nervosas suaviter permulcent adfricantque. Varios ipsos ramusculos, rudioribus ac prælongis aculeis obsitos, sæpius ipsi præbui, sic R. P. *le Conte*, & summa illum aviditate atque aptissime eisdem complicare, & absque oris læsione manducare, conspexi; cruentam sæpius exinde linguam recipiebat, aut eadem delectatione, credo, qua sal & piper linguæ nostræ acerbata sunt. Addit alius quidam Auctor Cel., nec tam herbas plantasque flexiles, & fucci plenas, vero rhinocerontis alimento cedere, sed potius carduos, & ramusculos spinosos, in primis arboreti istius, quod junipero, figura accedit, & promontorium bonæ Spei tenentibus: rhinocerontis arboretum audit. Quæ manducando, linguam suam valde mollem atque teneram vel retrahere vel deprimere videtur; & qui diutius in Abyssinia commorati sunt, Monachi Societatis Jesu, Abyssinos studio rhinocerontes eicurare, postea autem, elephantum instar, pro omni laborum genere adhibere, referunt. Herba, ille, bovis more, vescitur, & pascua pingua peramat; imo natare dicitur, & anatis instar, aquæ se immergere; & ut porcus, cœno sese obvolvere, & molis ratione neglecta, cursus agilitate, vel 60. milliaria per diem emetiri. Caterum odoratu acutissimo gaudet, & illo potius, quam visu utitur. Etenim vel remotissima animalia, vento odorem adferente, persentit, & recta illis obvia, quævis itineris impedimenta subvertit, & occurrentem rubro vestimento indutum hominem corripit, adscendit, violentius deprimat, enecat. *Bontius* est, qui rhinocerontem, dummodo non irritatus fuerit, neminem lædere, aut ira excandescentem, obvia quævis proculcare, imo vel arbores prostertere dicit; subnectitque; *Theodorum Femmin*, Bataviæ Secretarium, ut dicunt, cum duobus sibi sociis, equis vehendo, silvam ingressum, rhinocerontem uno cum hinnulo, palude detentam reperiisse. Hæc hominum conspectu surgens, hinnulum saltus iteratos edentem, præ se agebat; sociorum unus autem præ temeritate, gladio venatorio abeuntem percutiebat matrem, quæ ictus pellem haud transeuntes eo usque perferebat, quo hinnulum suum inter densa arbusta absconderit. Tum vero grunnitu horribili in equitem conversa dentibus statim petones suos dilacerabat, ex lana factos, & dentibus animalis, statim cedentes. Equus interim, domino cautior, ruit in fugam, aut rhinoceros velocitate eximia illum insequitur; eques ad socios relictos redit, & fera, missa suo hoste, ruit in istos, qui quum post arbores

bores binas atque fortissimas vix duobus pedibus inter se distantes, sese recepissent, accidit, ut vel eorum salute, vel animalis dementia, hoc nil cogitaverit, nisi ut arbores pertransire posset, eoque frustra allaboraverit. Interim illi sclopetis minoribus frontem ejus dirumpendo, & advenientibus quibusdam mancipiis, horum etiam ope, prorsus tandem animal enecabant.

Plinius refert, naturali inimicitia in elephantum ferri rhinocerontem, & ex rupibus cornu suum, pro prælio, exacuare, & elephanti ventrem, teneriori pelle indutum, petere. De quo utriusque conflictu & *Agatharchidas* Cypricus, in *Photio*, & *Oppianus* in poemate suo de venatione, & *Aelianus* in historia animalium, & *Diodorus Siculus*, & *Martialis*, & *S. Gregorius M.* alique, multi fuere. Qui quum voracissimi, inter se de pascuis certant; pascuorum societatem perferre nequire videntur. Elephas enim callidior, ictus cornu rhinocerontis sæpius evitat, proboscide suo illum defatigat, tandem enecat & comminuit. Sæpius tamen de elephanto, fortior triumphat rhinoceros. Sic de certamine isto, quod inter fabulas varii referunt, alii autem quorum tantus cumulus est, confirmant, confirmat & testimonium eorum, qui jussu *Emanuelis*, Lusitanorum regis, cum elephanto conflictantem viderunt scripseruntque rhinocerontem marem, anno 1515. in Lusitaniam deportatum. Hunc ab *Alberto Durer*, æris inscidendi arte peritissimo, delineatum, hinc inde a curiosis adservatum reperies. Imo, quum & Monachorum ex Societate Jesu, Abyssiniam tenentium, & aliorum Orientis scriptorum testimonio constet, multos interdum elephantos, rhinocerontis cornu conscissos reperiri; non est, cur ipsum eorum certamen in dubium revocemus. Nec tamen cum *Plinio* & *Aeliano* in rupibus cornu suum exacuantem rhinocerontem, conflictui illud præparare censemus. Motu enim naturæ ductus, non solum rupibus, sed & arboribus, & solidis corporibus quibuscumque cornu suum, quasi exacuando, adfricat. Sic enim illum, qui Parisios transit, ex assere sæpius cornu, adfricando exacuisse vidimus, ast nullus aderat elephas, cum quo certandum fuisset. Nec veritatis speciem illa habet adfertio, qua elephantum cornu hostis confectum, in hunc irruere, illumque suo pondere contundere perhibent, qui quidem pro mole sua atque vigore, haud adeo facilis contundi posset.

Plures interim ex antiquioribus, qui in describendo rhinoceronte solliciti fuerunt, si quæ reliquerunt, legeris, suis illum oculis vidisse videntur. *Aristoteli* hanc facultatem negatam esse credimus, siquidem nullam prorsus ejus mentionem iniicit in *historia animalium*. Innumeris autem erroribus plenæ sunt & antiquorum & recentiorum descriptiones, quia vel illum conspiciendi copia nulla; vel illum examinantibus haud debita fuit cura atque diligentia. Hinc tot fabularum origo; inter quas & hæc locum obtinet, qua rhinoceronti vel fluminis vel fontis aquam haurienti nullum ex animalibus vicinis longe satis accedere, sed venerationis ergo, usque dum biberit, longinquius remanere. *Alkazin*, Arabiæ scriptor, primus fabulæ auctor videtur, qui si locum aliquem rhinoceros occupaverit, animalia reliqua, sui timore, ad minimum, 100. inde *parasangibus* distare, & rhinocerontem unicum totas regiones solum occupare, refert. Quod ad modum rhinocerontes captandi adtinet, hi, qui spectatum Parisios scemellam conduxerant, jam tormentis bellicis dixere illos captari; sæpius autem

summo solis ardore paludibus detentos corripere; matrem vero hujus, quam ostendebant, mensum dum ageret, Indorum sagittis enecatam, imo sagitta quadam & hujus aurem vulneratum fuisse. Ast Physicis consentientibus, dura ac solida adeo est pellis rhinocerontis, ut nulla eam sagitta penetrare possit. Tormentis quoque bellicis rhinocerontes enecari, impossibilis res est, ut enim de sumtibus ejusmodi venationis, nimis certo taceam, ante quam tormentum suo loco conduceretur & constitueretur, satis longe recedere potest rhinoceros. Meram etiam fabulam redolent, quæ *S. Gregorius*, *Isidorus*, & Theologorum alii perhibent; hi enim virginem puellam rhinoceronti exhiberi dicunt, & pectoris istius denudati adspectu, arma amittere & facile captari. Majorem veritatis habent speciem, quæ de venatione rhinocerontis Physicorum alii adferunt, hi enim rhinocerontem matrem, dum in pascua foetum eduxerit, variorum jam telis, jam sclopetis infestari, & sic enecata matre, facili prædæ cedere foetum æque defensionis ac fugæ nescium. Periculosa tamen res est, etenim rhinoceros, inflicto vulnus perferens, pacificum animum exuit, & vel medias flammæ ingreditur, imo ut cum *Bontio* loquar, quævis obvia, ut totidem pulices conterit, proculcat; masculi tamen venatio minori cum periculo perficitur. Ubi enim rhinocerontem frequentia est, venatores tugurium, in plura receptacula separatim construunt, & introitu aperto, coitus tempore, cicurem foemellam, uni receptaculorum includunt, quæ mugitu suo allicit masculum; quo quum pervenerit, januam venatores occludunt, & jam telis conficiunt, jam in vita conservandum vinciunt. Facilis quoque, teste *historia itinerum universali*, Bambæ inhabitatoribus rhinocerontis est venatio, illi enim fossas ore latas, post autem sensim angustiores effodiunt, ac frondibus cæspitibusque obtegunt, in quas quum prolapsa fuerint animalia, pedem amplius retrahere nequeunt. Eadem ratione & illi, qui promontorium bonæ spei tenent, ex profundioribus rhinocerontis flumina solita accedentis, vestigiis, ab illo frequentata loca cognoscunt, & fossas 7. pedum profundas, 4. vero diametro effodiunt, in medio earum palum cuspidatum constituunt, tantaque arte tegunt, ut ne humanis oculis quidem innotescant. In has igitur prolapsus rhinoceros, vel pectus & collum cuspidate pali statim transfigit, seu saltem illo detentus, tela ac sagittas venatorum effugere nequit.

Augustum, *Cleopatra* victa, primum, in triumpho, rhinocerontem, Romam deportasse docet, *Dion*, *Plinius* autem, gravior in historia testis, *Pompeium* primum fuisse scribit. Post autem, *Plinio* teste, frequentes rhinocerontes in circo conspiciebantur. Populus Romanus enim, illos videndi cupidissimus, jam extra certamen constitutos, curiosus mirabatur; jam cum tauris, elephantis, ursis & gladiatoribus conflictantes spectabat. Frequentissima ejusmodi spectacula, *Augustus*, teste *Svetonio*, populo indixit. Et imperante *Domitiano*, sæpius Romæ cum tauris certabant. Et *Martialis*, testis oculatus, nullum ex animalibus, arenam tanta ferocitate atque fortitudine ingredi refert, & rhinocerontem cornu suo, ceu pilam adtollere taurum; & segniorem ira excandescere, ast ira tandem correptum, acerrimum hostem evadere. Imo ursum adeo facile proicere in altum, ac taurus proiceret pilam. Sic & imperantibus *Antonino Pio*, *Gordiano* & *Helio-gabalo*, rhinocerontes Romam deportati fuerunt, ast exinde nullam amplius men-

mentionem eorum auctores iniiciunt, forsan deficiente occasione Europam illos deportandi. Post quarto & decimo seculo quum navigationem restituerent Hispani & Lusitani: primus, quem novimus, rhinoceros in Europa ille fuit, qui jussu Emmanuelis, regis, Ulyssipoli, quæ Hispaniæ caput est, anno 1515. ut diximus, cum elephanto conflictabatur; spectaculo novo, & ex Romanorum tempore, inexaudito. Post varii rhinocerontes in Hispaniam, Angliam atque Germaniam deportati fuerunt. Ast in Gallia primus ille videtur, quem in anno 1749. Parisiis vidimus, epistola anonymi descriptum, cui plurima eorum, quæ adposita sunt, debemus.

Ebraice nuncupatur: *Reem*, Chaldaice: *Karas* seu *Karasch*; Persice: *Elkerkedom*, Græce: *Rinokerôs*, Italice: *Rinoceronte*, Indice: *Abada*, *Gomela*, *Noemba*; Germanice: *Rhinocer*, Polonice: *Nizorożec*, Anglice: *Rhinoceros*, Suevice: *Eenhoerning*. Vox Gallica tandem: *Rhinoceros*, pure Græca est, & cornigerum, seu ex mente Cel. *Lemery*, cornu unum in fronte gerentem, denotat.

Itineraria docent & Indos & promontorii bonæ spei habitatores, rhinocerontis carnem pro delitiis reputare; junioris putamus, alias enim adeo coriacea est atque nervosa, ut non nisi ferreis dentibus cederet.

Ars Medica tandem sanguine & cornu & unguibus ejus, oleo & sale volatili abundantibus utitur. Sanguinem arefaciunt, exinde autem cum cornu ac unguibus in pulverem reducunt, cujus ðj. ad ðij. in morbis contagiosis, ad provocandum sudorem & repellendum venenum præbent. Cornu in primis pro eximio alexipharmaco venit, quamquam virtutem ejus præcipuam ex pretio summo, quo venit, derivandam esse censemus cum *Ludovico*; & cornu cervinum, ejusdem naturæ, iisdem ex principiis compositum, iisdem etiam virtutibus esse instructum. Cur igitur exteræ media quæramus, illa autem negligamus, quibus larga pariter ac benefica providentiæ manus dotatos nos esse voluit? Ast hominum alii decipiunt. alii decipi volunt; his divites ægrotantes adnumeramus; & quosdam ex illorum numero, beneficentiæ ergo, tacemus, utilissimam enim Medicinæ partem illi pertractant. Alii sunt qui scyphis ex cornu rhinocerontis inherens vinum, sanguinem expurgare, & infecto aeri resistere docent; quod nos quidem fabulam nec medium reputamus, contagiei tempore adhibendum,

Corium vero rhinocerontis, duritiei ergo pro cataphractis, clypeis, atrique vomeribus Indiæ & Abyssiniæ incolis venit. Et *Plinius* optimum sui temporis Lycium ex India Romam, in uteris ex pelle rhinocerontis, adportatum fuisse refert.

S I M I A.

S*imia*. Offic. Lemer. 816. Bossch. de *Quadr.* 296. Dal. Pharm. 443. Schvenck. de *Quadr.* 121. Blas. 108. Charlet. Exerc. 16. Gesn. de *Quadr.* digit. 147. Aldrov. de *Quadr.* digit. 225. Jonst. de *Quadr.* 96. Klein. *Quadr.* 85. *Simia simpliciter dicta*, cauda carens, Raii Syn. *Quadr.* 149. *Simia mammis quaternis*, capite ad aures crinito. Linn. Syst. Nat. 63. *Simia unguibus omnibus planis ac rotundis*. Brissl. 188. *Simia vel Simius cauda nulla*, *simia non caudata*. Nonnull.

Simiarum quot sint species diversæ nondum satis accurate enumeratæ, nec quibus inter se distinguuntur, criteria detecta sunt, ut *Linnaeus* testa-

tur. Et Cel. *Briffon* 38. diversas earum species recenset, quarum aliæ cauda carent, aliæ instructæ sunt, aliæ breviori, aliæ longiore rostro gaudent, rursus aliæ longiori aliæ brevissima cauda. Commode autem in quinque species separantur. Quæ enim cauda carent, & rostrum brevius exhibent, simiæ proprie sic dictæ audiunt; quæ cauda nulla & rostro longiore, *Cynocephali*; quæ cauda brevior, *Babovines*; quæ cauda longa & rostro brevi: *Cercopithec*i; quæ tandem & cauda & rostro longo, *Cercopith. ci-Cynocephali* nuncupantur. Varias sic pergit *Briffon*, ego simiarum proprie sic dictarum species, magnitudine tantum diversas vidi, & facie, auribus, unguibusque satis accurate hominem referentes. Pilus, omnes corporis partes, natibus exceptis, obtegens, flavido viridis est, viridi in superiore & flavido in inferiore corporis parte prædominante. Hæ patriam habent Africam.

Blasio aliam, aliamque simiæ descriptionem anatomicam, utramque completam, *Ephem. German* debemus, nos tamen illam reliquis anteferamus, & tecum L. B. communicabimus, quam in *Actis Regiæ Scientiarum Academiae ad historiam animalium naturalem inservientibus*, auctore Cel. *Perrault* sequentibus legimus:

Multæ sunt simiarum species. Binas tantum constituit *Plinius*, scilicet cauda instructas, eademque carentes. Hæ Latinis simiæ proprie sic dictæ audiunt. Quæ cauda gaudent, duplicis sunt speciei, aliæ enim *Cercopithec*i, aliæ rostro longiore instructæ: *Cynocephali* dicuntur. Galli denique magnitudinis ratione tantum habita, majores, siue cauda careant, siue instructæ sint, siue rostro, canis instar, longo, siue brevior gaudeant: *Singes*, minores vero: *Guenons* adpellant. Quatuor simiæ illæ, quæ nostræ nunc descriptione pertractabuntur, cauda instructæ & *Cercopithec*is adnumerandæ, sed parvitatæ suæ causa, inter minores seu: *Guenons* referendæ erant. Etenim a vertice capitis ad originem caudæ, 20. digitis longæ, non nisi 14. digitorum longitudinem profitebantur. Bracchium 4. erat digitorum, & ab cubito ad extremitatem digitorum, 6. aut 4½. digitos pro longitudine lumbi reperimus, cruris, 5. pedis denique 4. scilicet a talo usque ad extremitatem digiti longissimi. Quæ autem & illis & fere omnibus simiis communia esse observavimus, sequentibus absolvebantur: 1. ciliis instructæ erant, ex observatione *Aristotelis*, inter quadrupeda simiis propriis, ac pro exilitate, vix quidem apparentibus; 2. in utroque latere maxillæ inferioris sacculum exhibebant, ad reponenda quæ conservare cupiunt; 3. dentes erant candidissimi, & humanis simillimi, exceptis caninis, infra strictissimis, supra longissimis, cuspide destitutis, nec nisi majori longitudine, latitudineque minore ab incisoriis differentibus; 4. pedes manibus, more brutorum, fere æquales, & utriusque digiti eadem erant longitudine, nec ut in homine, cujus digiti pedum vix tertiam digitorum manus longitudinem pertingunt. Imo pedes magis quam manus, hominis manum æquiparabant, pollex etenim pedis longus, gracilis & longe a digito primo separatus; pollex vero manuum brevissimus & digito adeo connexus erat, ut fere inutilis videretur; 5. trium masculorum genitalia ab humanis differentia, nec scrotum deteximus in duobus, nec testiculi, inguinum in rugis delitescentes, adparebant; tertio quidem erat scrotum, sed brevitatæ suæ ergo, parum conspicendum; 6. pellis tandem natium regioni fortissime adhærebat.

Tres igitur mares diverso pili colore tantum differre videbantur. Quarta autem, seu foemella, Cynocephalorum generi adnumeranda videbatur, & longiori gaudebat rostro, & catello Bononienfi simili; adtamen longioris caudæ ergo, & hæc inter Cercopithecus referenda erat. Horum vero differentiam ex diverso pili colore depromebant antiquiores, & qui uno saltem gaudebant, Cercopithecus simpliciter, qui autem pluribus, illos *cepi* adpellabant, quia *Pythagora* & *Aeliano* testibus, hortorum florumque varietatem repræsentabant, Prior igitur simiorum nostrorum priori cercopithecorum generi adnumerandus, ferrugineum in subviridem vergentem colorem exhibebat; obscuriorem tamen in dorso, & in pectore & ventre debiliorem. Secundus ex ceporum genere in dorso quidem ferrugineo-subviridis cæterum vero erat cinereus. Tertius tandem cum foemella, ex *Sapajovium* seu minorum genere, & versicolores, cæterum non solum macularum colorisque varietate, sed & rostro, hujus quidem depresso, illius autem longiore distinguebantur. Masculus enim ventrem, stomachum, guttur, nates, & interiora brachiorum atque lumborum, albida exhibebat, dorsum, ab omoplati ad caudam, ferrugineo rubrum; latera, & brachiorum lumborumque exteriora, crura & verticem nigra; omnem veropilum nigrum, binis maculis rubris, in extremitate, & dimidia parte radicem spectante, candida; mentum circumdabat barba candida, cuspidata & 1. digiti longa. Pilus dorsi digito 1. colli 1½. longus, & hic adeo crispus erat, ut fraga repræsentaret. In fronte candidum frontale adparebat, & in medio ejus series pilorum nigerrimorum, cilium effingens. Oculorum iris flavido-rufa, pupula admodum dilatata, caput rotundum, & facies, humanam, naso depresso, referens. Foemellæ e contrario facies erat longior, ut cynocephalo, pilus vero jam rufus, jam cinereus, jamque castaneus. Brachia & crura ferrugineum, dorsum vero rufum castaneo mixtum præbebat, jam rufo, jam vero castaneo prædominante. Nec frontale huic, nec barba erat, in priori observata; cujus aures etiam rotundi atque adeo exigui erant, ut vix 1½. lineæ marginem exhiberent, & integri sub pilo delitescerent. Quæ quidem aurium simiæ conformatio, Physiognomiæ scriptoribus ansam dedisse videtur, aures rotundos atque exiguos animi maligni & fraudis cupidi, signum pronuntiandi.

Varii sunt auctores, ubi de partibus simiæ internis agitur. *Aristoteles* enim cum *Plinio* & *Galeno*, humanis illas simillimas, *Albertus* vero ita dissimiles esse dicit, quamvis specie sua externa simiæ multum accedant hominibus. Utramque opinionem nimiam esse observavimus; etenim & simias nostras majori partium exteriorum quam interiorum similitudine homines referre; & alia quoque animalium, extrinsecus homini magis dissimilia, eadem similitudine partes hominis internas exæquare deteximus.

Annuli seu foramina peritonæi, ut in canibus dispositi, & epiploon ab humano sequentibus erat diversum; 1. quod nulla prorsus connexione parti sinistræ coli cohærebat; 2. quod ratione alia, haud obvia in homine, cum musculis abdominis, peritonæiope, ligamentum efformantis, cohærebat; idem quod in cerva Canadensi observavimus; 3. quod vasa epiploi, in homine tantum ex ramis venæ portæ proficiscentia, etiam ex vena cava, in uno ex nostris proveniendo, & ramum hypogastricæ ramis portæ intermixtum ostenderent; 4. quod epiploon, humano majus, non solum omnia

intestina obtegebat; sed etiam variorum quadrupedum more, & in primis eorum, quæ levissimi sunt cursus atque saltus, inferiorem intestinorum partem involvebat; ac si intestina reliquaque viscerum, ab concussionibus cursus violentis defenderet & præmuniret. Membrana epiploï integræ contiguæque, ut in homine, nec ut in brutis plerumque, reticuli instar, perforatæ erant. Et hepar, humano dissimillimum, quinque lobis, ut in cane absolvebatur; binis ex dextro, binis ex sinistro latere, & quinto, in parte dextra corporis vertebrarum; illoque fissura quadam in bina folia distincto. Sic & alius hepar substantiam obscurioribus punctis conspersam, & sexangularem figuram exhibebat, id quod sæpe in brutis, at in homine numquam observavimus. Vesicula 1. digito longa & $\frac{1}{2}$. lata, alterutro loborum dextrorum cohærebat, & sui conductum crassiores, statim sub pyloro insertum, emittebat; qui, receptis tribus aliis, unicum, quem in homine hepaticum dicunt, referebat. Trium igitur conductuum rami, radicium instar, per omnes hepatis lobos dispersi erant; quatuor nimirum primi conductus radices ternæ tribus lobis dextris, una autem primo ex sinistris inhærebant; conductus vero secundi tertiique radices, secundo ex lobis sinistris. Radices istæ sub tunica hepatis, productæ apparentes, nec, ut alias in parenchymo erant absconditæ. Sapajovis hepar autem, haud ut in reliquis, debilioribus quam hepatis substantia, punctis, sed nigris confita erat. Quem nigredinem ex spongiosa rarioreque hepatis substantia profectam esse censemus; quæ quum majori sanguinis quantitate, ac reliqua pars parenchymi, imbuta esset, obscuriorem colorem, seu nigredinem loquebatur. Sic & ventriculus ab humano diversus, orificium inferius latissimum atque valde depressum exhibebat, nec ut in homine, superiori, pro situ suo æqualis erat; etenim haud situs ergo, inferior dicitur, sed ideo, quia hac apertura, ventriculus, sese exonerat. Nec intestina majori similitudine accedebant humanis, etenim in simia Sapajovi, 5. pedibus & duobus digitis, in reliquis vero 8. pedibus longa erant, & eadem fere ubivis crassitudine, & ileum brevius humano. Sic quoque cæcum appendice vermiformi carens, $\frac{1}{2}$. digitis longum, & ab initio 1. digiti diametro, & in cuspidem abiens, ut colon in homine tribus ligamentis corroboratur ac in cellulas separatur; Colon vero, quibus solet cellulis instructum, rectum erat, nec ut in homine, S, Romanorum literam, sua figura, referebat; nec tamen, humani instar, constrictum a recto separabatur. Præter cellulas autem, & folia quædam, ut in struthione, & hominis jejuno, exhibebat, quæ transversim extensa, in ligamentis ad longitudinem intestini procurrentibus, tandem desinebant; intestinum vero 13. digitis longum, & 1. digiti diametro erat. Lien, ut in homine ad longitudinem ventriculi situs, figuram in uno differentem præbebat, qualem scilicet cordi ars Heraldica tribuit. Basis ejus 1. digito absolvebatur. Pancreas non nisi figura sua, humanæ similis, connexione autem & insertionem erat dissimilis; fortius enim lieni adhærebat, & quum in homine, canalis ejus, intestino prope ad canalem bilis, inferatur; hic 2. digitorum spatium ab eodem distabat. Sic & renes figura & situ singulari, rotundi atque depressi erant, dexter quoque sinistro valde, dimidia scilicet sua latitudine, inferior situs erat; & quum omni prorsus adipe ren destitutus esset, facile conspiciendam exhibebat glandem illam albam quam capsulam

lam atrabiliariam dicunt; renis color denique ruber, & figura triangularis erat.

Genitalia simiæ caninis similia vult esse *Aristoteles*, quæ nos tamen & ab his, & ab humanis diversissima vidimus. Etenim nec ossea erat virga, ut in cane; & testiculi ut diximus, in aliis scroto destituti, ac inguinibus repositi, peculiari gaudebant figura, longa scilicet & constricta, 8. linearum longitudine, & 1. latitudine. In alio autem simio, plane erant rotundi, ac scroto detenti, eoque strictissime contra radicem virgæ appulsi. Prostata glandulosa erant exigua, parastata cirsoides autem, longæ digiti 1. maximæ; & in collo vesicæ 4. linearum lata, in altera extremitate autem non nisi 1½. ordine inverso, quam in homine; pluribusque sacculis, aliis in alios sese egerentibus constabant. Genitalia simiæ fœmellæ, jam muliebribus, jam vero caninis accedunt; orificium enim exterius, ut in cane, rotundum & strictum, nymphis carunculisque carebat. Collum vesicæ in medio matricis collo constitutum erat, & rugarum hujus ab initio, quæ non nisi in conductus extremitate, prope ad interius orificium conspiciantur. Sic & tubæ simiæ magis animantium quam mulierum tubis, majori scilicet longitudine, pluribusque contorsionibus & plicaturis accedebant. Et clitoris major, magisque conspicienda, quam mulierum, binis constabat ligamentis spongiosis atque nervosis, quæ ex parte infima ossis pubis enata, post autem lateribus ossis hujus oblique accedentia, tandemque unita, corpus, 10. lineis longum, constituebant. Hoc itaque binis prioribus, iisdemque & membrana quadam fortissima junctis constabat, & alia adhuc membrana dura atque nervosa, illa involvente, glande autem maris virgæ simili, terminabantur. Et qui ligamenti hisce adhærebant, musculi exigui, ut solent ex tuberositate ischii egrediebantur. Adeo autem spongiosæ substantiæ erant ligamenta, ut vel vento transeunti paterent, & inflato plexu venarum atque arteriarum, ibidem obviarum, facillima opera inflarentur. Plexus autem quum majoribus, (conservata tamen proportionis ratione) quam mulierum, vasibus componeretur, facilior quoque conspiciebatur; & ut solet, sub secundo pari musculorum clitoridis sita erat. Figuram pyramidalem exhibebat, basi enim latissima cuspidem attingebat, quæ ad longum tertii ligamenti procurrens, ad extremitatem illius, glandem versus, producebatur. Reliquæ genitalium partes muliebribus erant simillimæ. Sic musculis instructum erat collum matricis, magnam enim ostendebat fibrarum carnosarum quantitatem, quæ ex ani sphinctere egredientes, lateribus colli matricis necebantur; ostendebant & alias fibras similes, illasque ex sphinctere vesicæ progredientes, & eidem regioni infertas. Cæterum & ipsum matricis corpus, & membranæ ejus, & orificium internum, & ligamenta rotunda pariter ac lata, & vasa omnia muliebribus prorsus similia erant. Imo testiculi, 3. lineis longi, & 2. lati, ut in mulieribus, pluribus constabant vesiculis, iisque tubarum fimbriis adhærentibus. Ubra, fœminarum mammas & situ & substantia exæquabant. Etenim musculis pectoralibus superjacentia, corpore glanduloso, & papilla constabant.

Ubi autem vena cava in duo separata binas iliacas producit, glandula aderat, figura sua ac magnitudine oliyam exæquans, 5. scilicet linearum longa, & 3. lata, foris nigra, nigriorque intus. Humore quodam lymph-

phatico, spongiosam ejus substantiam explente, irrigata erat. Quidquod binæ aliæ glandulæ minores, cæterum vero æquales, in origine cruralium, utrinque alterutra, conspiciebantur. Magnam præter ea aquæ copiam, pectore aperto, per omnem ejus capacitatem, diffusam reperivimus; & thymum maximum, & pulmonem 7. lobis constantem, quorum terni dextram, terni partem sinistram, septimus vero mediastini cavitatem occupabat. Maxima sane differentia a pulmone humano, qui plerumque quatuor, rarius duobus, ad summum vero, quinque lobis componitur. *Vesalius* tamen, quintum, quem simiæ tribuit, pulmonis lobum, numquam in humano detexisse adserit. Et quum tantus sit simiæ loborum numerus: errare constat illos, qui brutorum pulmones pluribus lobis, quam humani idcirco constare adserunt, quia capite & pectore plerumque terram respiciente animalia incedunt, plurimum enim, hominis instar, & caput & pectus, erecta tenet simia. Sic corde quoque magis acuminato quam hominis, brutorum more, gaudebat. Et in superficie ventriculorum ejus interiore illum fibrarum & columnarum carnosarum cumulum, quem in homine observamus, ostendebat. Uvulam denique, qua alias bruta destituuntur, humanæ simillimam exhibebat.

Cranium simiæ, pro figura, humano accedens, rotundum & ex lateribus depressum, osse illo triangulari, quo brutorum cerebrum a cerebello separatur, carebat. Cerebrum corporis respectu, magnum $2\frac{1}{2}$. uncias pondere explebat; & multum prominens dura mater falcem efformabat. Et in parte quidem anteriore, simillimæ erant anfractuositates partis externæ, humanis; ast in posteriore, cerebellum versus, nullæ fere conspiciebantur; ast quantulacumque profundissimæ erant. Insuper apophyses mammillares, seu nervi majores, odoratui inservientes, duri & membranosi, nec molles erant, ut in homine. Imo solito durioris solidiorisque substantiæ nervi optici. Conica præterum figura glandula pinealis, cuspide sua occiput versus respiciente. Nec multo conspiciendum aderat rete; carotides enim ab initio cerebri constituta, unico trunco, ex utroque latere marginis sellæ sphenoidis producta duram matrem perforabat, & ut solet in basi cerebri distribuebatur.

Musculos tandem plerosque humanis simillimos deteximus; hinc illa saltem, quibus ab illis differebant, subjungimus:

Faciei musculi in cynocephalo, multum caninis accedebant, imo & reliquis varii aderant musculi, animantium musculis valde æquales. Sic v. gr. masseteres & crotaphiti, humanis majores; & musculi ossis hyoidis, linguæ, laryngis atque pharyngis, qui pro vocibus articulandis veniunt, maxime autem manuum, humanis erant simillimi; his igitur simia, quamvis voces haud proferat, homini pari aptitudine utitur; quum ergo *Anaxagoras*, *Aristoteles* & *Galenus*, scripserint, naturam homini, animalium sapientissimo, manus usum concedisse, vocis tamen articulatæ actione eum magis, quam manus usu bruta superare constat. Omnia enim ad loquelam inservientia organa data sunt simiæ, ne tribus quidem musculis caret, ex apophyse styloidea, quamvis parvissima, exorientibus. Imo experientia ista illud aliorum axioma infringere licet, quo docent: agentem agere dum agendi organis gaudet, etenim simiæ, quamvis loquelæ instrumentis instructæ, nullæ tamen loquuntur. Circa musculos capitis & colli,

nihil singularis observatum est, nisi hoc, quod muscoli flexorii, qui in homine apophyses mastoideas ingrediuntur, apophysibus mastoideis destituta simiæ capite, parti ossis occipitalis laterali & posteriori, adhærebant. Palmarius insuper ex musculis brachii, solito major; & dentatus magnus, in homine saltem ex omoplata oriens, in simia ex quarta, quinta & sexta vertebrarum colli nascebatur. Musculus dexter, qui in homine ad finem sterni definit, hic altius ascendens, sub pectorali & dentato minori progrediebatur. Et ad dimidium modo sternum carnosus, cæterum non nisi tendine constabat. Sic & ille quem pyriformem dicunt, ex quadrigemellis lumbi, huic distendendo cedentibus, minor, ac in homine, nec ex inferiore atque externa parte ossis sacri, sed ex ischio, prope ad cavitatem ejus cotyloidem egrediebatur. Præter muscolum, quem Psoas dicunt, duo alii aderant, haud in homine obvii. Quorum quivis eundem cum Psoa originem cognoscens, superiori tandem atque internæ parti ossis pubis inferebatur. Ex musculis denique cruris inflexoriis, biceps, haud, ut in homine, origine sua duplex, sed integer ex tuberositate ischii egressus, superiori peronei parti inferebatur. Pollici tandem pedis, eidem erant musculi, qui pollici manus, utrique enim est eadem actio; at in homine utrique varia est actio, varii etiam sunt musculi.

Sacculus denique in ore simiæ obviis, & membranis & glandulis, & multis insuper fibris musculosis atque carnosis constabat. In exteriori autem inferioris maxillæ parte, oblique ex medio maxillæ usque sub angulum ejus, imo ex parte, sub musculo, quem latissimum adpellant, situs, & $1\frac{1}{2}$. digiti longus, totidemque fere, in imo, latus erat. Apertura ejus ori contigua, inferiori parti genæ atque gingivæ media interjacebat. Huic conservanda iniicere solent simiæ, & quibus gaudet, fibræ musculosæ, jam constringendo, jam relaxando sacculo isto, pro recipiendis, vel emittendis conservandis quibusque inservire videntur.

Quæ adcurata pariter ac diffusa simiæ anatomica descriptio, si additionibus egeret, ea adderemus, quæ in simia minori, haud ita pridem examini nostro subiecta, deteximus, hætenus explicatis fere tota congruentia; quamque ex doloribus cholicis a volvulo exortis, mortuam esse censemus; etenim in abdomine ejus ternis replicata deteximus, jejunum & ileum, ac partes illorum contortas, rubras ac inflammatas. Ast testimonio tantorum virorum, parum ponderis nostrum subderet. Id saltem observare liceat, quod vitio huic generi communi, & irrita dominæ suæ cura, dimidiam fere caudam suam devoraverat. Adeat plura de ea sciendi cupidus: *Examen aliquarum simiæ partium*, auctore *Hunauld*; quod *Actis ejusdem Academiae*, anni 1735. pag. 379, insertum legitur.

Patriam simiæ habent & Africam & Indiam Orientalem pariter ac Occidentalem. Cæterum facilis cicuratu, principum palatiis detinentur, & gesticationibus suis risum & delectationem vel hominibus movent. Infinita essent, si omnia addere vellemus, præcipua igitur exposuisse sufficiat. Et primo quidem aliqua ex illis delibandi animus est, quæ in *historia itinerum universali* relata legantur.

Innumeram variæ speciei simiarum copiam, sic illa, in oris *Gambæ*, *Nigritiæ* fluminis, & quatuor millibus agmina constituentes videbis. Sunt, qui volunt, quod regiminis cujusdam formam exactissime inter se colant;

& ordine, majorumque ductu itinera ingrediantur; & fœmellas, fœtus unicos sub ventre gestare, secundum vero dorso imponere; & quæ agmina claudunt, selectas esse ex majoribus. Animi certo fortissimi sunt. Sic *Jobson*, flumine isto vectus, alias vidit in arbores proflire, & ramos conquassando, & confusum clamorem extollendo, quasi hominibus, sibi invis, minari. Nocturno tempore in primis jam susurrum mille loquentium, jam vocem graviolem, quam profundissimum silentium excipiebat, percepit. Imo & aliquas earum habitationes, ex arborum ramis congestas, & saltem pro avertendo solis calore sufficientes, idem ille observavit. *Lemaire* varias distinguit species simiarum Senogalliam inhabitantium, & illas, quæ longiori cauda gaudent, *Guinons*, quæ autem omni carent: *Magots*, nuncupat. Harum quidem nullam ipse vidit, ast illarum triplicem speciem conspexit, scilicet minimas, omnium pessimas, quas ploratus sui ergo, *Bevailleurs*, seu: plorantes nuncupat; reliquæ binæ, has quas *Magots*, dixit, magnitudine æquiparant. Cæterum non solum pedum manuumque conformatione, sed & gestibus atque adspectu homines quodammodo referunt. Imo Indorum opinio hæc est, quod & voces humanas proferendi capaces, sed silentii obstinatoris sint ideo, ne ad sustentandum laborem adigantur. Quæ quum mordere saltem atque obvia dilacerare solent, Senogalliæ incolæ, Gallis simias quærentibus, rattos caveæ inclusos adtulere, illosque malignitate & morsus vehementia simiis superiores esse adseruere. Ineffabile autem damnum inferunt agris, messis tempore, singulos enim quadraginta ingrediuntur, & vetustiorum una ex arbore agit excubias, reliquæ messem faciunt, illa igitur, homine conspecto, clamorem extollit, quo exaudito, singulæ cum præda aufugiunt, arbores petunt, & mira agilitate ex ramo in ramum proflunt. Quidquod ne matri quidem fœtus quem gerit onus, molestiam faceffit, agilitatem ejus reprimat. Sæpius etiam, *Frogero* teste, puellas, octavum vel nonum annum agentes, subducunt, & in altissimas arbores deportant. Indi autem, vindictæ ergo, illas enecant, & carnem comedunt. Juniores facile cicurantur; & tutissimus certissimusque illas captandi modus hic est, ut faciem earum quavis ratione lædas, tunc illæ doloris ergo, manibus eo pergunt, ramum arboris mittunt, & in terram prolabuntur. Infinita autem diversissimarum specierum copia, numquam tamen binarum quæ sunt specierum habitationis & commercii societate junguntur. Quæ autem silvis continuo detinentur, vel cinereum, vel album, vel ex rufo, albo & cinereo variegatum colorem ostendunt. Facie item nigra, ast extremitatibus genarum candidis, & barba ex mento pendente & exigua gaudent. Aliæ autem inelegantioris, quidquod horribilis sunt adspectus. Nulla tamen ejus ratione habita, omnes Indorum delitiis cedunt, & jam oryza addita excoquantur, jam vero fumo arefiunt. Ast Europæorum, quidquod nautarum stomachum movet, vel adspectus ejusmodi alimenti. Alia datur simiarum species, Lusitanis: *Elselwago*, seu silvestris, Indis autem: *Quoja-Korau* audiens, 5. pedibus longa, figura hispida, & capite, corpore brachiisque fortissimis; hanc Angli: *Champaniz*, & Javam & Borneo tenentes: *Oran-Utang* adpellant; hæc facile cicuratur, & edendo quovis servitutis generi adsuescit. Ast educationis doctrina carens, innata malignitate & robore hominem adgreditur, corripit, prostermit, oculos eruit, seu alia ratione lædit. Casses vel fortiores dentibus ungulis-

gulisque lacerant. Hinc juniores capiantur necesse est. Auribus hæ & facie humanis, ast naso valde depresso gaudent. Et foemellis pectus est, ut mulieribus, elevatum, & venter rotundus, & umbilicus profundior. Cæterum & bracchiis, manibus, cruribus, talisque accurate hominem effingunt. Sæpius quoque naturæ instinctu, nec edoctæ posterioribus pedibus solis incedunt, & hac ratione sarcinas suas deportant graviores.

Quotquot autem hujus simiarum speciei mentionem iniecere, sic *Celeb. Briffon*, nihil plane addiderunt, nisi, quod multa similitudine homini accedat, & pilo brevissimo ac molliori oblecta sit. Caput ejus, si *Bontii* delineationem respicias, prolixo pilo obtectum atque sub mento pronascente, cæterum vero nudum judicares. En, quæ de iisdem *Bontius*: Varias ego harum simiarum & mares & foemellas conspexi, rectis pedibus, hominis more incedentes, & foemellam quamdam, pudore præ hominibus ignotis, manibus sibi faciem obtegentem, & gementem, & copiosissimas lacrymas effundentem, omnes denique hominum actiones, adeo gestibus exprimentem, ut præter loquelam, omnia hominis propria ipsi tribuenda viderentur. Has vero Javam tenentes: *Ourang-Outang* seu homines silvestres, & *Bontius* simias satyras adpellat, easque ex coitu mulieris Indicæ cum Cercopithecis, simiisve cauda destitutis, ortum suum trahere dicunt; quæ nobis quidem fabulas redolere videntur.

Parisiis in anno 1740. unum ex his hominibus silvestribus, publici oculis expositum vidimus, ac sui magistris: *Kimpeze* seu *Quimpensèe*, nomine, forsan ex Anglico: *Champaniz*, secundum Clarissimum *Prevost*, Abbatem, seu: *Chimpanzee*, ut *Kleinus* censet, derivando. Hunc decimum & quartum vitæ tunc annum agere dicebant, ac mare vehementem, tantum non scorbuto, binis sociis mortali, periisse, omnes tamen suos dentes amisisse. Hic desidendo puerum sex annos agentem, figura tamen magis robusta & inepta, repræsentabat; & faciem depressam, naso destitutam, ac vetulæ rugosæ dentibusque carenti similem ostendebat. Cæterum fere nudus, non nisi pili cujusdam castanei specie, tamquam floccis indutus, & mansuetus erat atque obedientissimus, imo nobis præsentibus, vel pudoris signa edebat. Quum enim, exaudito, quod masculus esset, adstantium aliquis, sexum cogniturus, manu illum palpare vellet, statim ille curioso nimis alapam infligebat. Cujus ergo, quum a domino ictibus percuteretur, veniæ impetrandæ causa manibus junctis, lacrimas, clamoresque lugubres, infantum more effundebat. Quum vero nec suis, nec præsentium precibus & ira ictusque domini mitigarentur, tandem ille quatuor pedibus, simiarum more, aufugiebat. Lacte in primis vaccino, a Medicis ipsi præscripto, vitam sustentabat. Et ventre adeo turgescere gaudebat ac duro, quali infantes morbo; Gallis: *caveau* dicto, laborantes; imo brevi exinde obiit. Cæterum quamvis idem ex homine & bruto participare videretur, & rideret, lacrymas effunderet, aliaque quæ humana dicenda forent, ederet; simia erat atque restabat, & nimium humanitatis descriptioni ejus admiscuit *Bontius*.

La Croix in itinere Africano est, qui in plurimis Sierræ-Leonæ insulis simias, *Baris* dictas reperiri docet. Hæ dum juniores captæ fuerint, facili opera cicurantur, & fere quibusvis mancipii laboribus perficiendis sufficiunt; & rectæ hominum instar, procedunt, aquam urceis hauriunt; lapsus dolores clamoribus indicant, milium in mortariis contundunt, veru circum-

cumagunt, & sexcenta alia, jam utilitatis, jam delectationis ergo explent. Et quamvis *Jonston*, *Nierembergium* sequutus, ab illa, quam *Baris* dicunt, hanc, cui *Ourang-Ourang* nomen est, distinguere videatur: nos tamen, nostro jure ambas habemus easdem. Guinea, sic *Vincentius le Blanc*, aliquam simiarum speciem alit, quas *Baris* dicunt, illasque magnas atque fortissimas. Has incolæ, juniores præsertim, vivas captare student, & rudiori deinde disciplina, quævis servitia domestica edocent. Nihilotamen minus illæ, edulia vel potabilia suffurari solent, & carni præsertim affatæ inhiant, dum veru adfixam circumagunt, tunc enim capite undecumque converso, jucundissimo sane spectaculo, spectantes observantesque quærunt, quorum si nullus fuerit, plerumque affatæ partem sibi adjudicare solent. Sic enim quondam aliqui Lusitanorum, invitatis mercatoribus, gallum Indicum affatum adposituri, simiam veru circumagentem, bina jam ejus crura devorantem reperiebant, reliquum subtrahebant. Et servitiorum præstandorum ex necessitate, castigio exemptam quum voluisset dominus simiam; illa, dapiferi instar, prudentibus quævis servitiorum genera præstabat. jam potum exhibebat, jam scyphos eluebat, & peracto tandem prandio vel ipsa inensæ accumbebat.

Cornelius le Bruyn in itinere suo *Ægyptiaco*, singularibus in *Cairo*, urbe, repertis, & magnam ad censet simiarum ibi obviarum quantitatem, quas ex *Meccha* advenientes Mauri, natura histriones, eo conducunt, & duplicem transeuntibus delectationem exhibendo, victum conquirunt. Sexcenta sunt factorum, quæ refert, nos unicum subjungamus. Sic quondam in prandio consulis *Torelli*, de agilitate simiæ atque falconis disputabatur. Tunc ille, qui interpretis officio fungebatur, Arabum cuidam esse subjunxit simiam, maximæ virtutis atque agilitatis. Hæc domino foras exeunte, in angulo cusinæ remanere solet, & suffurentes edulia falcones abigere. Qui quum in hac urbe sint frequentissimi, ciborum igni ad motorum odore alliciuntur, in tecta se conferunt, tum vero caminos ibi valde depresso & spatiosissimos ingrediuntur, & quidquid adpetunt, subducunt. Jam dominus quondam ollæ immissa carne exspatiabatur, diutiusque foras commorabatur, & caro nimium elixa, juscule consumto, denudata, falconi in tecto commoranti affulsit, & descendenti tandem prædæ cedebat. Tum simia nimis incauta tristis respiciebat in altum, & quasi negligentia suæ pœnas a domino extimescens, artificio novo illas evitare studebat. Furem igitur devorata præda, alius deportandæ causa revertentem sperabat, & igne jam consumto, carnis loco, ollam intrabat, nudasque nates obvertebat falconi venturo; hic revertitur, & aliam ibi carnem ratus, ollæ advolat, simia autem aptissime sese obvertens, falconem corripit, & capite rescisso, ollæ immittit; Rediens deinde dominus carnis defectum minis simiæ exprobat, illa autem protracto falcone, ollam ipsam, ut antea intrat, gestibusque omnia, quæ succederant, enarrat.

Sic Magni Russorum Imperatoris legatus quum *Pekingiæ* degeret, varios vidit edoctarum simiarum dominos, qui præsentem legato jam ex cumulo vestimentorum versicolorum, modo hoc, modo illud simias protrahere, iisque se induere jubebant. Hæ autem ne quidem in eligendo vestimenti colore ullæ unquam errabant, quidquod vestimento convenientes gestus edebant, tandem jam in terra, jam chorda constitutæ tripudiabant.

Alexandri M. exercitus, ordine continuo incedens, montes quondam simiis frequentes transibat; his inhærendo quum nox transisset, postridie simiarum copiam in agmina dispositam e longinquo conspexit; & statim Macedones ad arma, prælio se accingunt. Tum vero *Taxilas*, regionis princeps, *Alexandrum* adiit, & quisnam hostis, & quomodo profligandus esset, ostendit.

Tantum autem amoris vinculo inter se continentur, quantum in reliquis animalibus vix fere invenies. Quo ea pertinent quæ in itinerrario *Indico*, *Tavernier* sequentibus: Ex Agra recedentes & Suratam tendentes, silvam transivimus, arboribus: *Mangus* dictis consitam. His plures inhærebant simiæ, & mares, & fœmellæ, fœtus brachiis amplexæ. Suus cuique nostrum currus erat, & suum sistens Anglorum Præses, itineris socius, sclopetum excellentius mihi obtulit, metam adtingendi arte perito. Servorum unus, eadem terra natus, intentum dissuadebat, dissuadebam & ego Præsidi. Ille autem spreto consilio, sclopeti ictu unam ex fœmellis enecabat, quæ arborum ramis inhærens, fœtus in terram prolabentes ex brachiis amisit. Statim quotquot aderant simiarum, præcipites ex arboribus in currum præsidis irruebant, & suffocassent censeo, nisi ingressu quovis occluso, omnes reliqui, ad profligandas simias advolassent, victæ tandem desistebant, ast ira incitatæ, vel milliaris per spatium, præsidis rhedam insequiebantur.

In insula *S. Christophori* commorantes, sic *R. P. Labat* in itineribus circum insulas *Americanas*, simiarum venationi, jucundissimo sane spectaculo inexpectato, interfuimus. Cannas primo plures loco quodam illis frequenti passim in terram defigebant. Hora circiter una ante solis occasum, hinc inde arboribus consita loca nos recipiebamus. Et statim prodeuntem vidimus simiam majorem, quæ primo ex terra, postea autem ex fastigio arboris vicinas regiones disquirebat, explorabat. Tandem uno clamore edito, sexcentas voces respondentium audivimus, & statim undecumque proficientes simias plures conspeximus. Hæ cannas defixas ex terra protrahabant, & quaternis quinive humeris impositas, vel ore receptas deportabant. Diutius tandem conspecto spectaculo, sclopetis quatuor enecavimus, quarum in numero mater, ne moriens quidem fœtum amplexibus suis emisit. Hunc educatione cicuratum, curiosissimum experti sumus. *R. P. Cabasson* scilicet, simiam istam educando, sibi continuo habebat sociam, & animal adfectu quodam singulari numquam a latere ejus recedebat; hinc quoties ille suggestum sacrum conscenderat, studio occludendum erat animal, catenis liberum. Accidit quondam, ut e suggestu dicente Patre ex carcere aufugeret, & sub suggestu eo usque delitescerebat, quo sermonem suum Pater exordiretur; tunc paullulum prodiens, dicentis gestus imitabatur. Res ridicula auditoribus movit risum, & ille quidem ab initio placide auditores reprehendit; post autem ingravescente eorum cachinno, vehementius invehebatur, in illos, quos oraculis divinis reverentiam denegare censebat. Vehementiores autem sancta ira correpti gestus, vehementioribus effingere annitebatur animal, & se suggestu dicens, aliorum denique monitu simiam, risum moventem, conspexit, imo ipse in risum prorupit, & quum illam removendi haud esset ratio, nec ipsi satis ad dicendum compositus animus, nec auditoribus ad audiendum adtentus, reliquum sermonis rescindendum fuit.

Cæterum & herba, & fructibus, & frumento, imo carne piscibusque nutriuntur simiæ, pro potu autem lac & vinum præoptant. Gustu in primis acutissimo gaudent. Et naturali instinctu omnia imitandi instructæ, non nisi hujus ob causam, utilitatem quamdam præstare valent. Indi enim nec piperem nec nuces, cocos dictas, absque simiarum ope colligere valerent. Hi igitur terræ proximos arborum ramos conscendunt, eorum extremitates, fructibus onustas decerpunt, in terram ordine disponunt, & recedunt; simiæ autem illos imitaturæ, vel summa arborum in fastigia adscendunt, fructibus eas denudant, ramosque terra reponunt, tum nocte, simiarum opera studioque collecta, Indi deportant. Eadem quoque imitandi cupidine capiuntur, etenim Indi jam vasa aquæ seu mellis plena, simiarum ex conspectu seponunt, post liquore sibi faciem iteratis oblinunt, vase tandem glutinis pleno substituto recedunt; quæ imitaturæ simiæ oculos sibi glutine implent, sese occæcant, & facili opera, fugæ impares, capiuntur. Alii ocreas in præsentia simiarum, iteratis induunt extrahuntque, post minores quasdam simiarum pedibus convenientes, & glutine plenas relinquunt, quas quum exinde pedibus suis simiæ induxere, nec extrahere amplius, nec insequentem venatorem effugere valent. Alii tandem speculis faciem suam contemplantur, aliaque substituunt, elaterio quodam contrectantes arripiente instructa, quæ quum simiæ, imitatores, adtigerint, statim manibus vincitis venatorum prædæ veniunt.

Ebræorum idiomate simia audit: *Koph*, Chaldaico: *Kophin*, Arabico: *Kataph*, Græco: *Pithêcos*, Italico: *Simia*, Hispanico: *Ximio*, Germanico: *Affe*, Belgico: *Aap*, Anglico autem: *Ape*. Nomen Gallicum: *Singe* ex Latino: *Simia* descendere docet *Nicotius*, etenim littera i, secunda, consonante facta, statim *Simje*, post *Sinje*, tandem *Singe* enatum esse censet. Cætera autem specierum diversarum nomina, vel ex Indico, vel alio extero idiomate petenda sunt, ut: *Babouin*, *Kaqui*, *Guenon*, *Magot*, *Marmot*, *Macquo*, *Makaque*, *Sagouin*, *Sapajou*, alia. Hominis tandem nomine &: *Bertrand* apud Gallos audit, qui asinum & *Henri*, seu *Martin*, arietem: *Robin*, sciurum: *Fouquet* &c. dicunt. Nomina enim humana, dicit *Menage*, seu sanctorum & animalibus tribuere visum fuit.

Oleo cæterum & sale volatili abundat, & caro ejus, adstringendi virtute gaudens, nullo usui seu cibo cedit populis cultioribus. Cor ejus assatum & pro cibo veniens, memoriam confortare dicitur. Et adeps suus resolvendi atque nervos corroborante facultate instructus contra adfectiones nervorum, membrorum quoque contractiones & rigiditates commendatur. Qui tandem in vesicula felle singularis simiarum speciei detegitur calculus, nucis magnitudine, nigrus & ovalis figuræ, magni æstimatur, magnique emitur. Hunc, si nucem exæquat magnitudine vel centum taleris venire refert *Tavernier*, & *Indos*, pretii eximii ergo, nullos in Europam transmittendos concedere. Et qui apud nos exstant, vel legatis munerum instar donatos, vel clanculum subductos eo pervenisse, addit. Hi alexipharmaca & sudorifera sua virtute, quibusvis Bezoaribus longe præstantiores habentur, & dosi gr. ij. usque ad gr. vj. contra venenum, morbosque contagiosos præscribuntur.

S U S.

Bina nunc generis porcini species, Medicinæ usibus venientes, pertractatione nostra describuntur, porcus domesticus, scilicet, & aper.

Porcus. Offic. Dal. Pharm. 440. Blas. 104. Valent. 122. Klein. de *Quadr.* 25. *Porcus sive sus.* Boffch. de *Quadr.* 232. *Sus*, Herm. Cynos. 809. Schvenckf. de *Quadr.* 123. Gesn. de *Quadr.* 872. Aldrov. de *Quadr. Bisulc.* 937. Jonst. de *Quad.* 70. Charlet. Exerc. 13. Lemer. 848. *Sus seu Porcus domesticus.* Raii Syn. *Quad.* 92. *Sus dorso antice setoso, cauda pilosa.* Linn. Syst. Nat. 28. *Sus candatus, auriculis oblongis, acutis, cauda pilosa.* Briss. *Quadr.* 106. *Sus vel Porcus villaticus, mansuetus sive cicur.* Quorumd.

Porcum, sic Cel. Daubenton, in *historia naturali*, *universali ac particulari*, Tomo 5. ait, fissipedibus adnumerant, quia binis tantum digitis pedum, terram pertingit, & ultima cujusvis digiti phalanx, substantiæ corneæ involuta, obiter saltem consideratum porci pedem, tauri, arietis, hirci, aliorumque similem esse commonstrat; ast, subtrahe pellem & diversissimum videbis, quatuor enim deteges ossa in metacarpo & metatarso, & quatuor digitos, ternis phalangibus constantes. Binos præter ea medios, reliquis longiores, & ungula terram tangente instructos; reliquos binos autem breviores, & ultimam eorum phalangem cornu obductam, ungulæ quidem simili, ast superiore, eoque loco reposito, quo tauri, hirci, arietisque calcaria videbis. Trium ego officulorum, tauri in calcare obviorum mentionem inieci, ubi de tauro actum fuit, in calcare cervi autem, tria detexi, digitorum phalangibus quæ respondere videntur; sic quoque varia ruminantium bisulcorum, quatuor digitis, porci instar, instructa diceres, licet binis bini sint imperfectiores. Ast porco plura adhuc sunt officula, bina scilicet in carpo, in tarso unum, tria tandem in metacarpo & metatarso; sic quoque os cubiti melius efformatum conspicitur, quam tauri, arietis, hirci, & cervi. Et crura porci non solum exteriori figura, sed quoque interna conformatione ab illis illorum differunt. Talus porci etenim multo inferior est, cujus quidem metatarsi & metacarpi ossa, servata tamen proportionem valde breviora sunt, quam tibiæ tauri, hirci, arietis, aliorum. Imo majori ab illis differentia, porcus, & cornibus, & in maxilla superiore incisoriis, & caninis in utraque caret; & uno saltem ventriculo gaudet, & canali intestinali valde breviori, & duabus ad minimum costis, costarum, sex vero uberibus, uberum numero solito pluribus. Varia utrique communia, varia & porco propria & singularia esse infra docebimus.

Quibus autem porcus obtegatur, setæ rectæ ac plicabiles, substantia sunt cartilaginosa, non dicam, cornea, in extremitate autem septena seu plura in fila abeunt, 6. ad 8 lineis longa. Maximæ fortissimæque ex istis in capite, collo & tergo cristam quamdam componunt; & jam albæ, jam flavidæ, jam fulvæ, jam ferrugineæ & nigre sunt. Plurimi autem porcorum ab initio vitæ candidum ostendunt colorem, & setarum extremitates postea flavidum induunt, qui ex cœno, quo obvolvuntur, obscurior videri solet. Jam quum setæ sibi superjaceant, nihil præter flavidam earum extremitatem eminet, & hujus ergo flavidum potius colorem quam candi-

dum porci ostendunt. Longissimæ autem setarum, 4. ad 5. digitis absolvuntur, & rostri apex, & capitis latera, & regiones auribus circumjacentes, & venter, guttur &c. omnibus fere setis carent, & nuda sunt.

Illa præter ea pars rostri porcini, cui nomen: *Butoir* indiderunt Galli, cartilagine quadam depresso atque rotunda constat, officulo quodam medio, de quo pluribus infra. Cartilaginem perforant nares binæ, & extremitati superioris maxillæ anterior, prominet ex lateribus, in primis vero parte superiore, marginem maxillæ obtegente. Inferioris maxillæ extremitas autem posterior est inferiori rostri, parte. Capite insuper porcus longiore gaudet, & cuspide rostri tenui, pro capitis magnitudine, parte posteriore cranii admodum elata, oculis exiguis, auribus latis, collo brevi atque robusto, & corpore crasso, cauda tenui nec adeo longa, cruribus tandem rectis atque brevioribus. Auribus præter ea proclivibus, nec, ut aper & porcus Siamensis, rectis in altum, quam quidem differentiam jam dum ubera matris fugit, porcellus, observare licet; nec tamen antequam sextam vitæ hebdomadam adtigerit, cauda porcelli incurvatur, sed recta est, postea autem sensim arcum efformando, corpori ejus accedit. Cæterum corpus domestico longius est, quam apro & Siamensi, & verres, sive porci non castrati longiore capite, & fronte minus excavata instructi sunt, quam castrati.

Imbecillitatis speciem porco & in primis domestico, aures flaccidi, & caput longum ac crassius rostrum inducunt, imo oculi adeo exigui, & physionomiæ signis adeo destituta facies est, ut præter dentes falcatos ex latere oris egredientes, ac ferocitatis speciem ipsi conciliantes, vix quidquam singularis adsit. His enim, tamquam armis acerrimis, furendo utitur. Et corpus massam adeo informem & ineptam refert, quantam stupiditatis sedem, caput, collum enim crassius atque brevissimum est, & humeros fere caput pertingit. Et quum depresso semper incedat, vix unquam pectus apertum videbis. Imo tanta est pedum anteriorum brevitās, ut incedendo, capite prono, corpori sustinendo succurrere videatur. Hinc quoque nulla motuum ejus est elegantia vel agilitas, nec nisi coactus gradum accelerat, & incedendo vix pedes ac genua flectit. Nec quidem ira & furore correptus, agilius quæ facit, edit, & quamvis dentibus suis præ ira dilaceret, perfodiat, ictusque edat, inepto tamen & lentiori motu omnia agit.

Verres igitur partium mollium descriptioni inserviens, ab apice rostri ad originem caudæ 4. pedibus, & 1. digito longus, caput præbebat ab extremitate rostri ad regionem auribus posteriorem, 1. pede & 1. digito longum, & diametri sub oculis, 11. digitorum; collum 5. digitis longum, & in medio $2\frac{1}{2}$. pedum diametri; altitudinem a terra ad armum 2. pedum & 1. digiti, & ab pedis extremitate ad os coxæ 2. pedum ac $2\frac{1}{2}$. digitorum; circumferentiam corporis denique, post crura anteriora exactam 2. pedum & 10. digitorum, in medio 3. pedem & 5. digitorum, & ante crura posteriora 2. pedum ac 11. digitorum; pondere suo 153. libras exæquabat.

Epiploon porci quidem post stomachum replicatur, post evolutum, pro magnitudine jam ad obtegendum medium abdomen, sufficit, jam ad pubem usque pertingit. Duodenum sinuositatibus quibusdam ex latere dextro per-

peractis, intus post renum dextrum replicatur, deinde ad sinistram pergir. Jejuni circumvolutiones in regione umbilicali & latere dextro perficiuntur; ilei autem in regione hypogastrica & iliaca dextra. Nec tamen semper eadem in regione cæco nectitur, hujus enim situs varius est; & jam ex dextra sinistrorsum, latus dextrum ac regionem hypogastricam ingreditur, jam oblique ex summo in imum, & ex anteriore parte posticus in latus sinistrum, vel ex dextra sinistrorsum anticus in regionem hypogastricam, imo vel recensiti situs varii sunt, intestini situs etenim varia ratione variantur, & in primis vesicæ nimio volumine, quæ dum expleta est, magnam regionis hypogastricæ partem occupando, ex dextra in sinistram Cæcum detrudit. Sic & colon, antequam ex cæco egreditur, varias convolutiones constituit, maxima ex parte ovales, ut colâ ruminantium reliquorum. Illa tamen pars porcini coli, quæ circumvolutionibus istis efformandis venit, crassior & plane alia ratione sita est; omnes etenim circumvolutiones intestinis gracilibus subjacent, & textura quadam cellulari connectuntur; & aperto abdomine innatantem ac varie sitam massam constituunt. Quibus efformatis ex dextra tandem post stomachum redit colon, & primo quidem descendens, deinde autem sese recipiens, denique rectum ingreditur. Gracilia intestina fere per totum ejusdem erant capacitatis, & cæcum colo amplius, & colon prout recto accedebat, capacitatem decrecebat. Stomachus anteriorem abdominis partem occupando tantum fere ad dextram, quantum ad sinistram, procurrebat. Exiguum insuper spatium est inter œsophagum, & angulum a dextra stomachi parte ascendente efformatum; & pars œsophagi sinistra, ejusdem fere est capacitatis, ac dextra; hinc angiportus ille magnus amplissimus, & in altum productus est, profunditate quadam in cuspidem pronam terminante. In aperto stomacho etiam membranam detexi, rugosam ac complicatam, quæ œsophagum egrediendo in spatium aliquod quadratum producitur; margines ostendit ductibus quibusdam notatos, & ex stomacho macerato sua sponte abit. Pylori in ingressu verrucæ instar, vidi eminentiam, 15. lineis longam, 7. latam, & 4. ad 5. in adultis, altam. Et vel inflatus turgescens stomachus, in parte sua superiore inter œsophagum & pylorum transversalem rugam quamdam conservabat. Recta pars ejus villico eminentissimo erat oblecta, illud tamen nec supra sinistram, nec membranam hanc quadratam extendebatur, in cujus medio œsophagi orificium conspiciendum erat. Superficies interior lævis, nec adeo crassæ erant ejus membranæ. Hepar in plurimis tantum ex dextra quantum ex sinistra, in aliis parum saltem ex sinistra procurrebat. Quatuor componebatur lobis, tribus dextris & uno sinistro, imo & superior dextrorum atque medius, partibus ac quasi lobulis minoribus constabant. Fellis vesicula in excavato sita erat lobo medio, quæ excavatio quum deest, ut nonnunquam, tunc illa lobo ipso incrustata videtur. Varium vero est hepar porcinum, & figuræ respectu, & lorum, & horum magnitudinis. Verris enim hepar, intus forisque lividum, 2. libras, 3xj. 3jß. suo pondere explebat. Et vesicula fellis oblonga, liquoris viridis 3vj. continebat. Lien vero longissimus ex dextra transversim. ex alto in imum & ex anteriore parte posticus respiciens, in aliis ad medium usque stomachum extendebatur. Eadem fere omni porcorum lieni latitudo, & duplo major longitudo est; parte inferiore strictiore &

subtiliore ; plerumque autem utraque extremitas rotunda , & nonnunquam extremitas superior in cuspidem abit. Tres ipsi sunt superficies longitudinales, una scilicet in latere exteriori, & binæ haud ita latæ, in interiori. Colore tandem ferrugineo-rubicundus, & trium unciarum & quinque drachmarum pondere erat . Pancreas ramis tribus in pyloro coeuntibus constabat , & ramorum maximus ad renem sinistrum pertingebat , minimus ad longitudinem duodeni procurrit , tertius tandem sive intermedius majori omnibus extremitate gaudebat. Sic & situs renum diversus est, & plerumque eadem linea ambo continentur, interdum vero dexter prominet ultra sinistrum ; cæterum oblongi atque depressi, & pelvis lata, & verrucæ magnæ sunt ac valde conspicuæ . Centrum quoque diaphragmatis nervosum binis gaudet brachiis, posticus tendentibus, & dextro plurimum longiore.

Pulmonum dexter quatuor lobis , tauri instar dispositis , & tertio superiore maximo, & binis ex sinistra parte constabat. Cor oblique situm, jam brevius, jam longius, jam magis minusve cuspidatum, ramos ex aorta egredientes binos exhibet . Lingua albis granulis confita , in posteriore sua parte binas glandulas depressas , 2. vel 3. lineis longas , & $1\frac{1}{2}$. lineis latas , $\frac{1}{2}$. digito inter se distantes præbet ; his vero glandulis & epiglottidi intermedium spatium , quod 2. digitorum est , verrucis tegitur conicis , acuminatis & posticus reflexis. Palatum transcendunt 22. sulci lati ac profundissimi ; & epiglottis crassior haud in cuspidem definebat, sed in margine media excavata erat , & stillicidio quodam haud adeo profundo excavatio ista cohærebat. Cerebrum vervecis denique tres uncias & $2\frac{1}{2}$. drachmas, cerebellum vero 5. drachmas pondere suo explebat.

Plurimis insuper & porcis & suibus decem in ventre sunt papillæ, quinæ ex latere quovis. In aliis ego quinas ex altera, ex altera parte autem senas, totidemque in foetibus numeravi. Cæterum genitalia verris & apri inter se similia erant.

Suis longitudo, cujus genitalia nunc describenda veniunt, a rostro ad originem caudæ, 4. pedibus, & corporis circumferentia, post crura anteriora, 2. pedibus, in regione costarum spuriarum denique 3. pedibus & 3. digitis absolvebatur . Et hujus quidem genitalia , ab his quæ apri foemellæ erant, non nisi sequentibus differebant : Vaginæ, prope matricem amplitudo erat major, & hujus orificium tuberculo in parte superiore ejus sito, denotatum, ad collum matricis, tres alii tuberculi, ordine dispositi, procurrerant, spatium 3. digitorum occupantes, & totidem externis profunditatibus respondentes . Corpus ipsum matricis arcum 3. digitis longum efformabat, intus quoque rugis transversis, & 1. digiti altis conscindebatur. Operculum membrana tenuis, 2. vel 3. digitis alta constituebat, quæ dum extenderetur, quodammodo infundibuli figuram referebat ; nec fimbriatis marginibus, & 4. ad 5. digitorum circumferentia gaudebat. Testiculis figura irregularis, substantiaque granulis rotundis pisorum magnitudine, constans erat. Horum alia pellucida flavidum liquorem continebant, alia autem glandulosa, lividum seu rubicundum colorem exhibebant. Sues autem, quarum testiculi, antequam utero gesserint, adimuntur, haud arcus figura erat matricis corpori, & parietes ab orificio usque ad cornuum bifurcationem inæquales erant ac tuberculis plenæ ; & collum strictius, & membrana matricis interior, solidior, nec tandem adeo apparentia sunt

sunt sanguinis vasa , quam in his , quæ foetus utero gestaverunt .

Octo autem foetibus in matrice suis obviis, eadem fere omnibus magnitudo, nempe a vertice ad originem caudæ 2. digitorum longitudo, caput 9. lineis longum, & rostrum penitus conformatum, cauda 7. lineis longa, longiorque erat, proportionem habita, ac in adultis. Imo pro discernenda sexus differentia, in his quidem virgam 3. lineis longam, & extremitate sua postica instructam; in illis vero clitoridis glandem observare licuit.

Denuo alius in matrice, quinos utrinque foetus deteximus, & fissis cornibus, chorion cujusvis foetus, interioribus matricis parietibus quasi adglutinatam. Foetus involucra oblonga, medio suo illum detinebant. Funiculus umbilicalis 1. digiti, foetus vero ipsi a vertice ad originem caudæ 3. digitis totidemque lineis longi, corpore gaudebant, cujus circumferentia 2. digitis & 9. lineis absolvebatur, & capite, a fronte ad rostrum 1. digito ac 3. lineis longo, & in regione, auribus oculisque intermedia, 2. digitorum & 8. linearum circumferentiæ; cauda tandem 9. lineis longa. Horum foetuum clitoris magna erat, adultarum ratione, & magis conspicua, quam virga in foetibus masculis, ungulas etiam & calcaria distinctissime adparentes vidimus, imo papillas in aliis duodenas, in aliis autem denas. Hepar denique reliquorum intestinorum respectu, maximum, & continuationem suam, sive cucullum, stomachi angiporto superjacentem distinctius exhibebat.

Jam vero historiam porcorum naturalem, præeunte Cel. *de Buffon* perillustraturi, & hunc & Cel. *Daubenton* sequentes, hæc de porco domestico, & Siamensi, & apro, ejusdem generis speciebus, subnectamus:

Solam vero speciem, sic Cel. *Buffon* hæc animalia constituere videntur, nec alias sibi æquales habet, ut v. gr. equus asinum, & capram ovis, nec tanta inter se specierum diversitate differt, quantas e. gr. in cane observabis; imo ex pluribus particeps omnibusque dissimilis est. Ut enim omnium loco, unicum saltem huic singulare adducam. adeps porcineus, ab omni animalium reliquorum adipe differt; nec consistentia solum & qualitate, sed etiam situ, quem obtinet in corpore animalis. Sic adeps hominis & eorum, quæ sebo carent, carne intermixtus est; & sebum reliquorum non nisi in extremis carnis detegitur; lardum vero porcineum nec carni suo intextum, nec in extremitatibus carnis obvium est atque collectum, sed omnem obtegit carnem, & stratum distinctum & crassum, pelli & carni intermedium constituit. Idque cum balæna aliisque piscibus cetaceis commune habet. Imo quamvis animantia reliqua & homo primos dentes incisivos ante pubertatem amittant, succedentibus statim aliis: porcus e contrario numquam suos incisivos perdit, sed per omne spatium vitæ succrescentes habet. Seni sunt dentes anteriores incisivi & cuspidati in maxilla quavis, sed imperfectione quadam, vix alias obvia, superioris maxillæ incisivi figura differunt ab his, quos inferior ostendit. Illi enim quum cuspidati ac incidentes esse deberent, longi sunt, cylindrici & cuspe molli, ita fere ut angulum fere rectum cum inferioribus, sibi respondentibus constituent, ac admodum oblique suis se tangant extremitatibus. Præter porcum vix bina alia reperies, qui dentibus falcatis gaudeant, seu caninis longioribus, ab reliquis in eo diversis, quod & foras egrediantur, & per omne vitæ spatium succrescant. Hos phoca & ele-

phas cylindricos & aliquot pedum longos præbent, aper vero cum porco ex parte circulares, depressos, acuminatos, ac vel 10. digitos, longitudine, pertingentes; profundissime alveolo infixos, & ut illi, quibus elephas gaudet suprema sua extremitate concava. Elephanti tamen & phocæ, dentes hosce non nisi in maxilla superiore gerunt, inferiore vel caninis destituta; porco autem & apro falcati sunt in utraque maxilla, imo quos inferior continet, & maiorem animali utilitatem, & præcipuum defensionis instrumentum subministrant. Utrique foemellæ pariter ac verri illi iidem quatuor canini sunt in inferiore maxilla, ast masculorum dentibus multo breviores, vix foras prominere solent.

Ex quadrupedibus vero inelegantissimus porcus, ne morum quidem concinnitate ea rependit, quæ forma ipsi denegavit. Quæcumque agit, rudia sunt, quæcumque appetit, immunda, nec alio sensu gaudet, quam fera quadam luxuria, & voracitate immoderata, qua vel nascentem sui foetum devorat. Voracitatem ejus non solum ex capacitate ventris, sed quoque ex adpetitu suo viliori, & hebetæ tactu & gustu, pendere censemus. Cui quum pilus sit tam rudis, tam dura pellis, & tantus adeps, non solum ictus nullum habet sensum, sed ne quidem mures in dorso ejus exspatiantes, imo lardum & pellem corrodescentes perferunt. Tactu igitur ac gustu obtusiore præditus est, cæteri sensus vero acutiores esse in primis apro, noscunt venatores, illum enim capturis opus est, ut nocturno silentio saltem adgrediantur, & sibi contrario vento accedant, ne sui odorem ventus ad aprum perferat, illo enim vel e longinquo percepto, statim via, quæ coeperat, aper desistit. Imo morbo sibi communi, omni sæpius gustu atque tactu privantur; cujus causam atque originem nec tam in textura suæ carnis seu pellis, quam in sorde sua & continua immunditie quærendam esse deducimus, imo in nutrimentis infectis sæpius, ac inde oriente corruptione. Etenim nec aper, fructibus similibusve plerumque vivens, nec ejusmodi immunditie oppletus, nec porcellus, quamdiu ubera fugit, huic morbo obnoxii sunt, imo & porcum domesticum si stabulo bene expurgato conservaveris, & salubri nutrimento faginaveris, a morbo isto præmunibis. Quidquod, juniorem in primis, 3. hebdomadibus, antequam mactandus esto, purgato stabulo detineas, stratum deneges, potum parcissimum, & pro nutrimento non nisi frumentum siccum exhibeas: & carnem induet sapore excellentissimum, lardum quoque solidiorem.

Plerumque igitur faginando porco magnam hordei, glandium, similium, aquæ etiam quantitatem furfure commixtæ præbent, & binorum mensium spatium, multum quidem, sed nec candidum nec solidum lardum, nec carnem, saponi adeo gratam adipiscitur. Minoribus sumtibus faginabitur, si autumno illum in silvam abigas, ut glandes ex arboribus decedentes, reliquosque fructus silvestres pro lubitu devoret, sic brevissimo tempore plurimum induet adipem, in primis, si vespera domum revertenti tepidam aquam, furfure & farina lolii mixtam, pro potu exhibeas: hic enim somnum promovebit, & tantam ipsi pinguedinem conciliabit, ut ne moveri quidem, nedum incedere valebit.

Citiorum quoque adipem refrigerato autumnæ tempore induunt porci, etenim & uberius nutrimentum tunc adest, & transpiratio minor, quam æstate, ut tantæ adipis partes abeant, impedit. Quo vetustior fuerit porcus, eo

difficilior est illum saginandi labor; & castratio, quæ saginationem antecedit, sexto plerumque ætatis mense, vel autumnii vel verno tempore suscipiatur; quæ quum plurimum incisione, rarior ligatione seu constrictione scroti instituitur, vulnus ex incisione profectum, quo citiori cicatrice obducatur, æque frigus ac calor cœli nimius obstat. Quem igitur verno tempore castraveris, illum subsequente autumno saginabis, vix enim umquam ad secundum vitæ annum usque conservantur, qui tamen quovis subsequente, majus adhuc incrementum capiunt. Imo vel sexto ætatis anno novum augmentum veris magnitudini accessisse compertum habemus. Aper igitur 25. ad 30. vitæ annos attingit. Et *Aristoteles* cuivis porco 20. annorum terminum præfigit, & peracto quinto & decimo, effectum evadere addit. Nono jam vitæ mense puberes coitui explendo & sustinendo sufficiunt, satius autem feceris, si non nisi secundo anno peracto tantum, illos admiseris. Partu enim primo, sus annum agens, & paucos, & debiles, quidquod imperfectos sæpe porcellos effundit. Quovis etiam tempore, quidquod utero gerens, coitum appetit, luxuria inter animalia, sine pari. Etenim continuos motus & agitationes violentiores edit, & non nisi cœno diutius volutata quiescit, & copiosissimum liquorum album ac spissum eiicit; quaternis mensibus porcellos utero gerit, quinto ineunte emittit, statim vero exinde denuo imprægnata, binis per annum parere solet. Sus silvestris e contrario non nisi quotannis semel, cujus ratio & nutrimenti sufficientis defectus, & lac diutius foetibus præbendum; domesticæ enim 7. ad summum 9. nec diutius quam binis hebdomadibus, lactandos tantum relinquunt, plures si adsint, hos lanienæ tradunt, & quum verres sive porci castrati potiori utilitati veniant ac sues, foetus foemininos quasi omnes vendunt, vel cum 7. ad 8. masculis saltem binas foemellas conservant.

Quem vero pro generis propagatione conservare cupias, porcus mas, ille corpore brevi atque rotundo gaudeat, necesse est, & rostro brevi atque obtuso, auribus magnis atque flaccidis, collo longo & robustiore, natibus latis, cruribus brevibus fortibusque, & fetis frequentibus & nigris, candidæ enim imbecillitatem loquuntur. Sui, foemellæ corpus esse debet longum, venter amplissimus, & ubera longa, & animus tranquillus, & progenies foecunda. Hanc dum imprægnata fuerit, a mare, ne læderetur separabis, & foetum edentem lautius reficias, & utrumque parentem, in primis patrem a porcellis devorandis arceas. Ineunte vere in primis admittuntur, quo, qui æstate nascentur foetus, autumno tandem debita sibi magnitudine gaudeant, & saginationi venire queant.

Sus vero silvestris, non nisi semel per annum foetus suos edens, Januario seu Februario imprægnatur, & Majo seu Junio illos effundit, & 3. ad 4. mensium spatio lacte nutrit, & quocumque abeant, eos sequitur, ne aberrant, & eadem cura in illos vel per triennium pergit, ita, ut sæpius suam silvestrem annorum diversorum foetus conducere videbis. Domesticos vero porcellos ad summum, per duos menses, matri lactandos sinere solent, & tertia jam vitæ septimana una cum matre in campos educere, subtracto tandem ubere omni, vel serum lactis vel aquam tepidam leguminibus elixam quovis mane & vespere exhibere. Cæterum & vermibus terræ, & radicibus, in primis, carotæ silvestris, gulosiores inhiant, quorum quarendorum ergo terram suo rostro suffodiunt. Ager igitur quum
lon-

longiori fortiorique gaudeat rostro, ac porcus domesticus, profundiores rectosque fulcos, domesticus autem jam hic jam illic levissimos tantum suffodit. Campis igitur cultis uterque exterminandus esto.

Venatoribus proprio vocabulo, aper ante tertium vitæ annum, *societatis bestia* dicitur, etenim non nisi illo demum peracto, & acquisitis contra lupos viribus sufficientibus, umquam ex aliorum societate, umquam ex latere matris secedit. Concordiæ scilicet securitatem debent, & societati, & adgredientem hostem multitudine sua depellunt, statim enim agmina componunt; & fortissimi extremum circulum efformant. Eadem quoque ratione porci domestici suorum defensionem meditantur, nec conducendis canes veniant, necesse est; quamvis morum ruditate atque animo indocili vel quinquaginta porci, uni homini satis molestiæ faceffunt. Vere itaque & autumno in silvas abigantur, ut copiosis fructibus fruantur, æstate autem in loca humida & paludosa, ut vermes atque radices sibi conquærant. Æstate igitur bis per diem in pascua abducantur, matutino rore sole consumto, post binis ante meridiem reducantur, & secunda pomeridiana iterum pascua ingressi, vespera tandem redeant. Hyeme autem semel tantum per diem, & quidem cœlo sereno exspatiantur, etenim pluvia, nebula ac tempestas naturæ eorum contraria sunt. Etenim vel suborta inter pascendum pluvia fortiori omnes undecumque discurrentes stabulum quærere videbis, & acutissimum atque frequentes juniores, provectiores vero graviorem edunt clamorem; nec tamen grunnitum, seu vocem sibi solitam, doloris signum, & jam enecandorum clamori similem. Nec tamen voracitatis suæ ratione habita, quidquam adgreditur, sive devorat porcus, licet interdum carne putrida vescatur, & nosmetipsi jam apros ex equorum carne comedentes, jam in stomacho eorum ungulas avium ac pellem caprarum detexerimus, necessitate potius, quam instinctu deglutita. Sanguini tamen & carni cruenti inhiant, etenim & suos ipsi foetus, & incunabulis detentos infantes comedunt, & humida, pinguique quævis statim delambunt, tandem vero vero devorant. Sæpius ego porcorum gregem ex pascuo redeuntem, terræ argillaceæ recenter subactæ adstititisse vidi, & quamvis parum pinguedinis contineret, hos illam avidos delinxisse, illos magnam ejus partem deglutiisse. Obtusissimo cæterum & sensu quovis & facultate distinguendi gaudent, imo porcellus, matrem nesciens, vel cujusvis suis obviæ ubera, lactatum, arripit. Interim timor & necessitas sensus eorum atque instinctum exacuare videntur, porcelli enim constantes adherent matris lateribus, imo & hæc majori adtentione illos curare videtur.

Quantulacumque autem sit ruris cognitio, nemini tamen ignota est multiplex porci utilitas. Carnem ejus tanti quanti bovinam, lardum vero duplo vel triplo coemunt. Sanguinem, intestina, viscera, caput, linguam, vario modo mensæ adpropriant. Stercus ejus autem natura sua frigidius, non nisi nimium calidis & ficcis agris stercorationi cedit. Intestinorum ac epiploï adeps axungiam præbet. Setæ multiplici variorum usui veniunt. Et caro ejus vel fale, vel nitro conspersa, carne omni diutior conservatur. Cæterum quamvis & in Europa & Asia Africaque sint frequentissimi porci, nulli tamen fuerunt in America, usque dum nigri illi ab Hispanis eo deportarentur, quorum alii jam terram firmam ac insulas occupant, alii autem in silvestres degenerati nunc silvas tenent, & apris illi nostris si-

miles, corpore brevior, rostro fortior & pelle crassiori gaudent, ac domestici; setis insuper, nigris sub cœlo calidior, omnes teguntur. Muhammedis castra sequentes porci usu, imo vel tactu abstinent, quem immundum superstitio eorum habet. Sinenses e contrario carnem porcinam inter delicias referunt, & ob illius usum interdictum, Muhammedis legem sese reiicere perhibent. Illi autem Sinensium porci nostratibus & minores sunt, & teneriore albidiorque carne gaudent, nec apud Gallos prorsus ignoti, sed passim obvii, cum reliquis speciei communis propagantur. Et quamvis nullos alant Mauri, & quotquot Muhammedis legi adhærent, nec infrequentiores apud illos sunt apri, quodvis igitur cœlum perferre possunt, aper saltem in regionibus frigidioribus in porcum domesticum commutatus alium colorem induisse videtur; sic enim in Septemtrionalibus Galliarum provinciis omnes fere porcos candidos videbis, aut in Delphinato, in Occitania, Hispania, Italia, aliisque calidioribus regionibus, nigros. Cæterum pro evidentissimo signo degenerationis habeas aures, hi enim prout magis cicuratum fuerit animal, eo magis inclinant atque flaccescunt. Jam vero comparatis apri porcique auribus, hos longiores, molliores, & flavidiore esse cognosces.

Paucissima habemus, quæ addere possimus. Haud ita pridem bezoar porcinus nobis exhibebatur, sive calculus rotundus, nucis myristicæ magnitudine, substantiæ solidæ, compactæ & levis, intus albidus, foris vero lævis atque cinereus, pondere gr. LIV. & in vesica suilla repertus; rarior nobis videbatur, quippe popinarii nemo, cui exhibitus fuit, similem quemdam unquam vidisse testatus est; cæterum ille cujus vesica detinebatur, nec adipe, nec salute reliquis erat æquiparandus. In Illyria autem, Pæonia & alibi solidipedes porcos reperiri docet *Aristoteles*, sive pede haud bisulco, sed integro gaudentes. Tales vero ubivis obvios esse addit *Linnaeus*, & *Kleinus* cervos quoque solidipedes dari refert. Et quamvis uberum matris numerus, numero foetuum respondere dicitur, suam matrem ad tamen, octo imo viginti nonnunquam foetus edere constat, quamvis non nisi duodecim gaudeat uberum papillis. *Villa nova* vel 37. porcellos uno partu suam quamdam edidisse refert; quod quidem nobis fidem excedere videtur. De superfoetatione suis denique exemplum subjungit *Linnaeus*, & in anno 1602. in villa quadam vicina, paucis diebus, postquam quaternos ediderat, octo alios edidisse recenset. Notatu etiam digna res est, quod sua mater porcellis lac præbendo, natu maximo primam papillarum, anterioribus pedibus proximam, ac lacte plenissimam exhibeat, secundam secundo, tertiam tertio, & sic porro. Suam igitur papillam omnis porcellus cognoscit, nec aliam adpetit, imo matri si unum ex illis subduxeris, statim exarescit, quæ eidem destinata erat, papilla. Advenientibus porcis alienis, domestici, & locum seu stabulum occupantes, bellum, aliquoties cruentum, inferunt, verri autem porcus castratus resistere non audet; ille enim quasi gregem ducens, nullo canum timore, vel in illos invehitur, eosque profligat, & præ ira, setis surrectis terram suffodit, spumam eiicit, quidquod hominem aggressurus videtur. Cæterum juniores ad suæ facti, ætate provectiores ex auditæ hominis adpellantis voci accurrunt; & pro detegendis tuberibus, terra tectis, adhibentur.

Porcum Ebraei adpellant: *Chasir*, Chaldæi: *Chasira*, Arabes: *Kanisir*, Græ-

Græci: *Hus* vel *Chairos*, Itali: *Porco*, Hispani: *Puerco*, Germani: *Sau* vel *Schwein*, Belgi: *Zvyn*, Angli: *Hog* & Sueci: *Svin*. Vox Gallica: *Cochon*, vel *Couchon*, ex *Cutio*, latina barbara, derivat *Menage*. *Porc*, ex latinorum: *Porcus*, *Pourceau*, olim: *Porcean*, ex porcellus; *Verrat* ex *Verres*, *Truie* denique vel *Coche*, ex latino: *Schrofa*, seu Italarum: *Troia*, foemellæ nominibus, originem ducit.

Multo cæterum oleo, sale volatili & phlegmate abundans porcus, communi omnium cibo venit ac nutrimento. Optimus vero is habebitur, qui nec adeo juvenis, nec nimium antiquus, & adipe & carne multa gaudet, & probis alimentis, ut: glandibus, fabis, napis, similibus, nutritus fuerit. Abundans corpori alimentum exhibet solidumque, sed concoctu difficile, nec nisi viscosos ac lentos humores subministrans. Cujus ergo & vetustiores & debiliori stomacho laborantes prorsus eo abstinento, nec nisi juniores, & temperamenti aridi ac biliosi, & stomacho robusto, & laborum exercitio vigentes illo utuntur. Scrofa carnem præbet haud adeo grati saporis, hinc quoque infrequentiori cibo venire solet. Porcellum vero lactantem deliciarum instar, vel primorum mensis adponunt, ast viscosam ille exhibet carnem & concoctu difficilem.

Ars Medica tandem ex porco, adipem, fel & stercus, ex scrofa autem, vulvam, quam pudendum dicunt suillum, depromit, ac in sui usum convertit. Lardum porcinum recens liquefactum pro anodyno & emolliente habetur, & calori fere omni destitutum, varia intrat pommata ac unguenta refrigerantia; imo accedit cataplasmatibus, pro resolvendis tumoribus, si inflammatio adest. Sic *Borellus* in *Centuria I. Obs. 76.* contra adustiones medio præstantissimo cedere docet: folia lauri, adipe porcino recenti, dum excoquitur, obducta, & adplicata. Et nutrices, infantum gingivas, ad eliciendos dentes, lardi crusta adfricare solent. *Ettmuller* medium sequens pro tussi, præsertim nocturna, violentiori, commendat: accipe tria capita allii, eaque contundas, & adipe porcino subigas, ut fiat unguentum. Quo plantas pedis calefactas cubitum iturus perungas, ungas quoque, postquam lectum intraveris, spinam dorsi, & vix tertia vice unguenti usum reiterabis, dum tussis profligata jam fuerit. Adeps antiquior liquefactus, optimo cedit linimento ad detergendas variolorum pustulas, & dehiscen-
tiam earum impediendam; venit quoque plagis consolidandis & detergendis. Axungia autem porcina, seu lardum ejus, tempore rancidum evadens, emollientem atque resolventem virtutem præstat. Præprimis vero axibus rotarum, quæ rhedis sunt, perungendis cedit, quarum motu continuo & ferri adfrictu, quum nigritiem induxerit; ad leniendos hemorrhoidum dolores, linimenti instar adhibeatur. Fel porcinum contra adfectiones aurium atque oculorum præstans, ulcera in his partibus exorientia detergit, sanat. Aculei instar & suppositoria, arefactum intrat. Stercus denique porcinum, discutiendi & resolvendi virtute gaudens, calidum adhuc prurienti & duris tumoribus plenæ pelli, adplicatur; imo vel suo odore, vel aqua maceratum & sic naso adtractum hujus hæmorrhaginem sistit. Pro quo & sequens:

℞. Stercoris porcini arefacti ℥iij.

Pulveris rosarum ℥ß.

Admixto succo plantaginis seu urticæ pulveres commisceas, deinde gossypii portiunculam eodem irrigatam naso intrudas. Imo stercus porcinum
fu-

fumans lintæ telæ inditum, post vero vulvæ adplicatum, contra hæmor-
rhagias matricis optimo remedio cedit. Contra febrem intermittentem,
quam sudorem excitando, profligat, *Ephem. Germ.* stercurum porcinum vino
candido infundi, & percolari, post autem trium vel quatuor cochlearium
quantitatem recipiendam commendant. Scrofæ vulvam pro specifico, con-
tra involuntarium urinæ profluvium commendant; adeas *Ephem. German.*
Dec. I. anni II. IX. & X., & Dec. II. anni VII. & vel deficientibus me-
diis aliis, huic tamen exoptatum effectum respondidisse, pluribus experi-
mentis edoceberis; quomodocumque cibo adproprietur, & quocumque re-
gimine ægrotans utatur, dum modo usum ejus per aliquot dies continua-
verit, certo veniet auxilio, imo tutiori, quam quidem ratti exigui, de
quibus supra diximus, & faciliori, siquidem illorum instar, haud nauseam
stomachumque movebit. Ægrotanti ejus usum commendare valemus, ast
effectus rationem & causam quærenti respondere nequimus.

Adeps porcinus unguentum intrat *Althææ*, pommatum florum aurantii,
unguentum rosatum, emplastra denique *Minii* & ranarum pharmacopœiæ
Parisiensis.

℞. Lardi porcini recentis ℥j.

Ostreæ testam calcinatam & pulverisatam. j.

M. exacte, & fiat linimentum, per aliquot dies hæmorrhoidibus turgi-
gidis & dolorosis cubitum eundi tempore, imponendum.

℞. Baccarum juniperi bene maturarum, q. l.

Has igitur contundito, & admixto lardo suillo recenti excoquito, post ex-
pressionem percolato, & habebis linimentum contra scabiem.

℞. Florum sulphuris ℥j.

Lardi suilli recentis ℥ij.

Succum binis malis citreis expressum & olei rosati, q. s.

Omnia denique mortario committas, & circumagendo præparabis unguen-
tum contra scabiem, cui & sequentia addas:

Pulpæ ex radicibus patientiæ silvestris ℥vj.

Styracis liquidæ ℥ij.

℞. Lardi suilli recentis ℥ij.

Mercurii præcipitati rubri ℥ij.

M. & fiat pommatum contra lichenes prurientes, quo, antequam lectum in-
grediatur ægrotans, sex subsequentes per dies, partes adfectas ungito.

*Aper. Offic. Schrod. 268. Lemer. 54. Bossch. de Quadr. 239. Herm. Cynof. 16. Schvenckf. de Quadr. 54. Dal. Pharm. 440. Gesn. de Quadr. 918. Aldrov. de Quadr. Bisulc. 1013. Jonst. de Quadr. 74. Charlet. Exerc. 13. Sus agrestis seu Aper. Raii Syn. de Quadr. 96. Sus, dorso antice setoso, cauda pilosa. Linn. Faun. Suec. 36. Aper, porcus silvestris, Klein. Quad. 25. Sus caudatus, auriculis brevi-
bus, subrotundis, cauda pilosa. Briss. Quadr. 108. Aper simpliciter, vel aper agrestis;
sus; porcus seu verres ferus vel silvaticus, sus singularis vel Monius dictus. Nonnul.*

Ejusdem ille generis aper est, sic *Celeb. Daubenton*, sub quo & porcum
domesticum & Sinensem contineri diximus, omniaque generis istius crite-
ria constantia præbet. Præter ea autem setis suis interspersum pilum bre-
vissimum, lanæ instar, crispum, & jam nigrum, jam cinereum, jam fla-
vidum, exhibet, quo omnes reliqui ex porcorum genere destituuntur. Jam
in ætate tenera multos commonstrat colores, eosque provector, perdit.

Etc.

Etenim vel in primis pilis foetuum, zonæ, alternis fulvæ & fulvo-ferrugineæ, ad omnem corporis longitudinem procurrunt, & dorsum nigrum, reliquum vero corporis ferrugineo, fulvo & albido mixtum est. Pilis istis, tamquam primis exutis, caput cinereis, rufis, nigrisque obtegitur, & fetarum longissimæ, collum quæ induunt, 4. fere digitis longæ, & maxima ex parte, nigræ, tum cinereæ & in extremitate sua rufæ sunt. Corpus autem flavum, nigridas & ferrugineas maculas commonstrat, siquidem altera cujusvis setæ pars nigra, altera autem fulva esse solet. Cauda denique fulva, extremitatem, & crura inferiorem partem nigram habent. Aper examini nostro veniens 257. libras pondere, longitudine, autem ab apice rostri ad originem caudæ, 5. pedes & 8. digitos explebat; circumferentia tandem maxima seu medio corpore, 4. pedes & 2. digitos. Rostrum ille præbuit & aures nigros, reliquum caput flavo, albo & nigro intermixtum; guttur rubicundum, in dorso etiam fetas, 3½. digitorum longas, & ab radice per 2. digitos, nigras, tum albo-flavidas, & in cuspide ferrugineo-fulvas; & posticus reclinantes, ac sese tegendo, fulvum saltem colorem conspectui exhibentes. Quibus latera & venter obsita erant setæ, illæ non nisi 3. digitis longæ, eisdemque coloribus notatæ erant, quibus reliquæ. Ast rariores & magis invicem distantes, æque album ac rufum colorem commonstrabant. Quæ axillas & inguina tegebant, rufæ, & quæ ventrem & lumborum partem interiorem, & scrotum, rariores erant, & rufæ videbantur, ad tamen plures vel illarum, albidæ, non nisi rufa extremitate gaudebant. Capiti, extremitati caudæ, & pedibus, niger erat color, & apri foemellæ caudam terminantes pili 7. digitis longi. Capite igitur aper instructus est longiore, dentibusque falcatis majoribus acutioribusque, quam porcorum reliqui, cauda vero recta & brevi. Glandem ille noster exhibebat longissimam, & nisi in extremitate prismatica, cylindricam; & virgam unico tantum corpore cavernoso constantem, & super testiculis, 4. digitis ab insertione præputii, rugas binas digito inter se divisas efformantem, in maxima quoque sua parte depressam, ast ex latere glandis conglobatam, & crassitudine decrescentem. Tum testiculos majores, & tuberculum oblongum, in extremitate illorum ab epididymide efformatum, 1½. digito longum, & 1. digito crassum seu 1½. Post vesiculas spermaticas turgidas, & vesicæ pariter ac extremitati vasorum deferentium proxima. Et prostates, ad longitudinem urethræ a vesiculis spermaticis usque ad musculos accelerantes, productas. Hæ in musculorum accelerantium regione urethræ accedebant canale quodam in extremitate sito, & in parte exteriori, musculo 2. linearum crasso, obtegebantur, binæ quoque viscosa albidæque materia plena erant, fluida quadam & lactea vesiculas spermaticas explente.

Apri foemella, cujus genitalia jam describuntur, 141. libras, pondere, & ab extremo rostro ad anum, 4½. pedes, longitudine, nec non post pedes anteriores 3. pedes & duos digitos, circumferentia sua exæquabat, in medio corpore 3½. pedes, & ante crura posteriora 2. pedes & 10. digitos. Vulvæ extremitas inferior avis rostrum cuspidatum & prominens referebat; & glans clitoridis recurvata, cuspidataque glandem virgæ in apro. Vaginæ parietes plures rugas componebant per 2. ad 3. digitorum longitudinem, ex illo latere, in quo matricis orificium adest, & hæc quidem pars vaginæ multo angustior erat illa, quæ vulvæ proxima est. Vesica pyrum
figu-

figura sua referebat. Et matricis orificium, exigua saltem ora prominente distinguebatur. Cornuum sinistrum dextro parum longius, utraque autem longissima erant, ac intestinorum instar, circumvoluta. Tubarum operculum in uno saltem puncto testiculis necebat, parte sua reliqua soluta; & testiculorum forma renum formæ similis, & vasa spermatica in profunditatis regione definebant. Quivis vero testiculorum, coloris carnei, nigrique punctulis conspersi erat.

Ut autem, separatis foetuum involucris & horum allantoidibus, veram eorum figuram cognoscerem, apri foemellam parturientem dissecai; & matrice conspecta statim ternos foetus ex dextra, binos autem ex sinistra contineri judicavi, ac membra eorum matricis figuram variam constituebant. Hanc igitur in extremitate sinistri cornu aperui, & foetum huic proximum cum involucris protraxi, nec ullam cum matrice cohaesionem, resistantiamque observavi. Tum in tabula penitus massam foetus integris ejus involucris atque liquoribus extendi, & chorionis figuram decussatam reperi, foetum quoque in regione amplissima, & dorsum ejus extus obversum, & bina cornua decussatae choroidis, decrescantis sensim capacitatis, in extremitate autem in bina brachia separata, quorum alia 3. alia 4. alia 5. digitis longa erant; alia aliis plerumque longiora & subtiliora; minimum, membrana tenuissima, flavida-subviridi, sacculumque efformante, constabat. Hunc quum immisso aere inflaremus, aer denique ad cornu decussationis perrexit, post in alterum cornu transiit, imo vel ad extremitatem hujus, extremitati, per quam aerem intromisimus, respondentem, penetrabat; Post chorion & amnion foetus in dorso laceravi, illumque involucris suis extraxi, integro tamen funiculo umbilicali; & liberior aeris transitus ex cornu in alterum conspectus est, at pars utrique intermedia, & in extremitate funiculi sita, haud majorem diametrum nacta est, quam 4. digitorum; 2. vero longitudinem. Post cornua utrinque turgescientiam aliquam; 4. digitis diametri constituebant, tum vero per $1\frac{1}{2}$. pedes, sensim decrescente amplitudine producebantur, & extremitatis diametrum non nisi $2\frac{1}{2}$. digitorum ostendebant. Et hic quidem sacculus erat allantoidis, etenim quum foetu aperto, vesicæ ejus stylum intrusissimus, ille uracum ingressus, post per totum umbilicalem funiculum, tandem sacculum, de quo dicimus, intravit. Chorion vero, more solito, amnion, allantoidem & foetum involvebat, & hujus ergo, sufflata allantoidem formam ejus accurate cognoscere nequivimus, foetum scilicet pertingebat; nec formam suam recepit allantois nisi tum demum, quum chorion & amnion, ubi dorsum foetus tegebant, aperuissimus, & involucri ista, haud tamen resecto funiculo, subtraxissemus. Orificiorum margines rugis tuberibusque confiti, hæc autem dubio procul a duplicata allantoidis membrana, in constrictionis regione, rugosa, efformabantur. Allantoidis membrana albida, tenuis & pellucida, chorion vero crassius est, ac granula rubra & mollia in exteriori superficie ostendit, quæ quum incideremus, effluentem liquorem rubicundum, & tuberculos sensim volumine decrescientes observavimus. Hos ego placentæ officio fungi, & cotyledonum speciem constituere censeo. Immediate foetum membrana quædam tenuissima & pellucida involvebat, ex umbilico proficiscens, ab amnio distinctissima, pelli immediata superjacens, & omne corpus ubicumque obtegens. Hanc igitur membra-

branam, in regione oris, ani, orificioque præputii & vulvæ interruptam transibat funiculus umbilicalis, sex digitis longus, & in origine 2. fere linearum diametri. Inflato uraco autem & funiculus ille turgescerebat, & passim vel $\frac{1}{2}$. digiti diametrum adsequebatur. Foetus longitudo a vertice ad anum usque 9. digitis, corporis circumferentia etiam 8. digitis absolvebatur, caput, ab auribus ad rostrum 3. digitis & 8. lineis longum, cauda 2. digitis longa, imo rostri margo cum dentibus falcatis satis jam distincte adparebant. Maximis illorum 3. linearum longitudo & 2. linearum latitudo erat in basi. Sulci etiam palati jam efformati & linguae impressi, imo labrum superius, pro egrediendis dentibus falcatis, segmentum 2. lineis profundum excavatumque ostendebat. Oculi penitus oclusi, & aures posticus repositi, collo superjacebant; Crura & cauda fere extensa, & quatuor cujusvis pedis ungulae candidae, longissimae, & cuspidae antice reflexa instructae erant. Imo pilus passim, in primis in vertice, collo & dorso adparebat, & distinctissimos jam primos illos colores, praesertim radium nigrum in dorso, foetus iste ostendebat, sexusque differentia, imo uberum papillae, utrinque quinque, distinctissime monstrabat; imo continuationem magni angiporti stomachalis, cuculli instar jamjam efformatum, ac sui proportionem adultorum angiportum referentem observavi.

Dentes falcati aprini, Gallis: *defenses*, porci domestici autem: *crochets* adpellantur, & figura quidem omnes iidem, aprini autem reliquis multo sunt longiores. In capite aprino $4\frac{1}{2}$. digitis longo ab extremitate ossium nasi scilicet usque ad finem occipitis, dentes falcati maxillae superioris foris oblique progrediebantur, & ex utraque sua extremitate respiciebant in altum, pars vero posterior cavitati cuidam inhærebat, ubi autem os ipsum egrediebatur, hunc locum ossea quaedam crusta transversalis obtegebat. Sinistri lateris dens longior, $1\frac{1}{2}$. digito, ex osse prominebat, & 1. digiti & 3. linearum longitudine, eidem inhærebat. Quam quidem ego partem pro radice habeo, & excavatam ac parietibus in extremitate subtilissimis instructam, reperi. Extractus vero ipse dens falcatus, $\frac{2}{3}$. circuli, cujus diameter foret 2. digitorum, & 8. linearum efformabat. In parte superiore, superficiem depressam, ac pro longitudine sua, sulco transmissam ostendebat. Ubi autem ex osse egrediebatur, $2\frac{1}{2}$. digitorum erat circumferentiae. Falcatus vero uterque maxillae inferioris, retrocedens, proclivis atque adscendens, ejusdem erat longitudinis, ossi 4. digitis inhærebat, & $2\frac{1}{2}$. saltem prominebat, imo pars ista excavata, & in extremitate sua tenuissimis parietibus instructa erat. Extractus igitur dens falcatus maxillae inferioris, $\frac{7}{8}$. circumferentiae circuli constituebat, cujus diameter foret $5\frac{1}{2}$. digitorum; tres quoque eidem erant superficies longitudinales, inferior latissima, & exterior strictissima; latissima autem 10. lineis lata, & omnis dens falcatus 2. digitorum & 10. linearum peripheriae erat. Inferioris itaque dentes ulterius prominent, quam superioris, & superficie sua posteriore anteriorem illorum tangunt. Jam maxillae inferioris motu ambo inter se adfricantur, adfrictu deteruntur; quo quum alterius pars concava, alteriusque convexa confricantur, quumque prodeuntibus apri annis & dentes isti longiores evadant, nisi eadem curvatura uterque excreverit, accidit, ut vel alteruter frangatur, vel alter alterum tangere nequeat amplius, quo facto os haud amplius occludi potest, & apro fame pereundum erit, siquidem man-

manducare nequit. Septem dentes utriusque lateris maxillares in maxilla superiore senis maxillæ inferioris dentibus respondent; totidem horum cavitatibus, totidem illorum cuspides recipientibus. Imo præter ea duo alii dentes in maxilla inferiore falcatis posteriores, a reliquis maxillaribus multo distantes, & minores jam adsunt, jam desiderantur, ne relicto quidem alveoli vestigio ullo.

Quod ad sceletum apri adtinet, illi 4. pedum & 1. digiti longitudo est ab extremitate maxillæ superioris usque ad postremam ossi sacri extremitatem; capiti post oculorum orbitas, & in angulis maxillæ inferioris est circumferentia 1. pedis & $8\frac{1}{2}$. digitorum; ast superioris faciei longitudo 1. pedis & $3\frac{1}{2}$. digitorum. Et omnia in universon apri ossa fortiora majoraque mihi visa sunt, quam porci domestici & Sinensis; cæterum nulla essentialis differentia eorum sceletra intercedebat.

Brevissimi erimus in historia apri naturali, supra ubi de porco actum fuit, ex parte jam explicata.

Catulationis tempore, sic Cel. *de Buffon*, aper foemellam quærit, sequitur, post autem 30. per dies ei socius, densissimos silvarum tractus & remotissimos tenet. Tunc solito ferocior, accedente alio apro furit, conflictatur. Foemella autem, nisi eam adgrediari, nullo furore corripitur, & more feris communi, masculus, coitus adpetitu, foemella autem post foetuum effusionem, ferociorem induit animum. Venatione autem captandus aper, vel in die fortioribus canibus, vel nocturna luna insidiis petatur, & quum vel fuga lentior, & fortissimum post se relinquit odorem, imo acriter a canum persequutione sese defendit, cave, pro capiendopro adhibeas canes cursores, cervi capræque venationi destinatos, hi enim & odoris sagacitatem amitterent, & lentioris cursus consuetudinem induerent. Nec tamen nisi antiquiores insecteris, trimuli enim longiori cursu canes effugiunt, ast vetustior spreto canum timore, sæpius conflictum ineundi ergo, gradum sistit, breviusque spatium conficit fuga. Die plerumque in fovea sua ac remotissima silvæ parte detinetur, nocte ingruente autem alimenta quæsitum exspatiatur; & frumento maturecente facilis in segetibus quibus detinetur,prehenditur. Statim autem ex quo enecatus fuerit testiculos ejus protrahere solent, qui, odore suo fortissimo, dum vel 6. horarum spatium corpori inhærent, omnem carnem imbuerent. Cæterum præter caput, ex apro vetustiore vix quidquam appetunt, qui de gustibus sententiam dicunt, ast aper nondum annuus, omnium consensu pro delitiis venit. Imo ut porcus domesticus ex castratione, omnem suam præstantiam recipit, sic quoque antiquiores apros matri subtractos castrare, post autem silvis reddere solent, hi autem excrecendo & majorem corporis molem, & saporis excellentiam acquirebant.

Adeat Viri, *Jacobi du Fouilloux rem venatoriam*, qui plura de venatione apri legere cupit. *Historia autem Academiæ Regiæ Scientiarum, anni 1719. pag. 41.* referente, testeque Cel. *Deslandes*. Africa qui vivunt apri, a nostratibus diversissimi sunt, & pelle pilo destituta atque lævissima, & leonum instar, juba longissima pedesque pertingente, dentibus tandem falcatis maxillæ superiori adhærentibus, nec ut nostrates, cuspidatis, gaudent. Qui enim Cel. Viro exhibebantur, ex apro juniore profecti, illi rotundi, in spiralem ducti, & candore eboris colorem, & longitudine 1 $\frac{1}{2}$. pedem exæquabant.

Græci aprum adpellant: *Capros* seu: *Suagros*, Itali: *Cingniale*, Hispani: *Puerco Sylvestre*, seu *Javali*, Germani: *Wild-Schwein* vel *Hauer*, Belgi: *Wild-Varken*, Angli: *Wild-Boar*, seu *Wild-Svine*, Sueci denique: *Vill-Svin*. Gallicum ejus nomen: *Sanglier*, ex singularis deducere studet *Ménage*, quia aper solus & singularis, nec porcorum domesticorum more, agminatim incedere solet. Dicitur quoque apud Gallos: *bestia nigra*, quo a porco domestico, plerumque candido, distinguatur. *Laie* seu foemellæ nomen, ex Italicorum: *Cingniale*, & *Marcaffin* seu *Marquassin*, quo foetum nondum annum adpellant, ex maculis pili ipsi inspersis, derivatur.

Multum vero olei & salis volatilis continens, & gratiorem sapor, & salubriorem, & cibo venientem exhibet carnem, dummodo ex apro juniori, tenero, probeque nutrito proficiscatur. Qui in vivariis eduntur, multo inferiores habentur illis, qui libertate fruente, silvarum & camporum fructibus vivunt. Et quamvis digestu facilius sit caro aprina, ac porcina, & illa nutrimentum senibus atque stomacho debili laborantibus nimis solidum producit. Cujus ergo iis saltem, qui vel stomachi constitutione robustiore, vel laboris exercitio vigent, usum illius concedimus.

Quæ porci domestici partibus inerant, virtutes Medicæ, easdem quoque aut excellentiores aprinis in partibus reperies. Ars medica enim sebum, dentes, virgam stercoque apri in suos usus convertit. Quod sebum spectat & stercus, ea omnia obtinent, quæ de sebo & stercore porcino paullo ante dicta fuere. Virga autem & genitalia apri, arefacta & in pulverem reducta, dosi ℥j. ad ℥ij. contra impotentiam, seu deficientem facultatem procreandi sobolem commendantur. Dentes tandem alkalina, absorbente, sudorifera, & acida corrigendi virtute gaudent, dummodo pulveris illorum ℥j. ad ℥ss. contra sanguinis sputationem, pleuritidem & anginam, vel cum potionibus convenientibus, vel aqua papaveris rubri, & cardui benedicti, præbeatur. En, quam pro pleuritide & angina probatam potionem commendat *Valeriola*:

℞. Pulveris ex dentibus apri ℥ij.

Olei amygdalorum dulcium ℥j.

Sacchari candidi ℥ij.

M. & fiat potio.

Imo & auro sive argento cincti dentes aprini, pro crepitaculo exhibentur infantibus, ut eos manducando dentium egressum reddant faciliorem. Est autem quidam aper Indicus, qui fellis sua vesicula, Bezoar, seu *calculus porci* continet. Hic nucem figura & magnitudine refert, & plerumque albo-subviridem colorem, superficiem vero tactu lævissimam præbet. Amstelodami, si quis eorum eo pervenerit, magni coemi solent, & tribus ad quatuor millibus librarum, aris Gallici venduntur, nec mercatoribus cedunt, sed privatis, qui illos, tamquam thesauros posteritati suæ traditos atque relictos volunt. Hos Indi *Mastica de Sohe* dicunt, ac veneno resistendi, febres malignas, variolos, & quosvis morbos contagiosos profligandi virtutibus, instructos esse perhibent. Nec nisi mulieribus prægnantibus infestior est ejus usus, quippe quæ, illo utentes abortum facere solent. Hi igitur, quo conservari & faciliori infusioni (talis enim est ratio qua adhibentur) venire possint, aureæ capsulæ, ubivis perforatæ immittuntur, hanc ex catena aurea expendunt, & liquori cuilibet indunt, frigido tamen;

men; post peracta hora dimidia, calculum retrahunt, & pro recipienda duritie, quam liquori infusus amiserat, ex loco arido, suspendunt. Cel. *Helvetius* senior, in tractatu de medicamentis, quum genuinum hunc calculum vix fere reperiri posse cognosceret in Gallia, compositum aliquod excogitavit, quod ejusdem effectus, continuatae diutiorique experientiae exhibendo, illi substitui potest. Accipe, sic ille, vesicularum porci maris, quot placet, aperi illas, & egredientem liquorem argillaceo & vernice oblito vasi immitte, ut eo usque evaporare possit, quo spissioris gommatis consistentiam adquisiverit; post lentiori calore furni eum exsiccato, usque dum pro duritie in pulverem subtilissimum transeat, illumque cribro transmittito. Accipe exinde pulveris hujus ℥j. & pulveris Comitissae de Kent vel pulveris viperæ communis, vel potius illius, cui & cor & hepar viperæ inest, ℥j. Mixtis exacte inter se omnibus ampullæ vitreæ immittas ac conerves. Et pro dosi infantibus gr. v. adultis vero gr. x. ad xij. veniant. Hunc igitur vel boli instar, ægotans recipiat, vel ptisana scorfonæræ mixtum, & statim exinde scyphum ptisanæ ejusdem hauriat. Post multiplicatis lecti stratis sudorem promovere studeat, & binis horis peractis, jusculum accipiat. Hoc itaque calculo porci arte facto, Vir Celeb. *Helvetius* contra febres malignas, variolos, & quosvis morbos, ubi de fermento maligno, ex massa sanguinis profligando agendum erat, felici cum successu adhibuit.

Dentes aprini pulverem contra pleuritim pharmacopoeiæ Lemeryanæ ingrediuntur.

℞. Florum sulphuris ℥ij.

Dentis aprini

Maxillæ lucii ana ℥j.

Florum papaveris erratici ℥ss.

Reducantur in pulverem quævis, & misceantur exacte; & habebis pulverem anti-pleuriticum, cujus ℥ss. vel ℥ij. binis quotidie vicibus capias.

T A L P A.

Talpa. Offic. Schrod. 308. Lemer. 855. Boffch. de Quadr. 310. Blas. 116. Valent. 183. Dal. Pharm. 450. Merr. Pin. 168. Schvenckf. de Quad. 128. Charl. Exerc. 25. Gesn. de Quadr. digit. 931. Aldrov. de Quad. dig. 451. Jonst. de Quadr. 118. Raii Syn. Quadr. 236. Herm. Cynof. 885. Talpa nostras, nigra communiter, Klein. Quadr. 60. Talpa caudata. Linn. Faun. Suec. 17. Talpa caudata nigricans, pedibus anticis & posticis pentadactylis. Briss. Quadr. 280. Talpa vulgaris; mus terrenus vel cæcus perperam. Nonnull.

Talpæ descriptionem anatomicam ex variis variorum scriptis, nostras observationes subnectendo, colligimus. Talpa igitur, notissima, quam im merito gliris speciem & cœcam credunt, ex apice nasi ad originem caudæ 5. digitis, & ad extremitatem caudæ $\frac{1}{2}$. pede longa est. Caput exhibet ab apice nasi ad occiput, $1\frac{1}{2}$. digito longum, nasum sive rostrum porcino simillimum, mobile, infra supraque fulcatum, & 4. lineis ultra maxillam prominens; plures præter ea pilos barbæ longos ex utraque parte maxillæ; & linguam, pro longitudine vix inferioris maxillæ canale detentam; dentes forma quidem dentibus muris aranei similes, cæterum vero

dissimiles, muri enim duo saltem sunt incisorii in maxilla utraque, talpæ autem feni in superiore, & octo in inferiore; oculos pilis productis obte-
 ctos, & nisi pilos sufflaveris atque removeris, delitescentes, cæterum bina
 puncta nigrida, miliique grana referentes. *Marcus Aurelius Severini, Aristotelem, Plinium & Albertum M.* sequutus, cæcam pronuntiat talpam, & pun-
 cta ista nigra potius oculorum vestigia, quam oculos credit; & nervis
 opticis pariter ac aliis ad videndum necessariis, destituta; *Georgius Seger*
 est, qui dissectos hosce oculos, nullum prorsus liquorem edere, refert, at
 siquidem nil in vanum a natura efformatum est, nec omnem videndi fa-
 cultatem iisdem negare videtur. *Olaus Borrichius* autem oculos hosce ap-
 pendice quadam nervosa cerebrum pertingente instructos dicit; & appen-
 dicis ope, pro lubitu animalis oculos jam caput egredi, jam intus recipi;
 multum quoque aquosi humoris in globulis istis rotundis, sive oculis ob-
 natate, reliquorum humorum vero non nisi levissimum vestigium obser-
 vari. *Schneider* denique addit, quod talpæ, vitam sub terra degenti, adeo
 exiguos oculos voluit esse natura, ne suffodiendæ terræ pulvere læderen-
 tur; imo & adhuc pilis obtectos atque munitos. Sui ipsis sunt humores,
 & tunica nigra, quam *uveam* dicunt; huc quoque nervus opticus, quam-
 vis insolita ratione, pertingit, occluso scilicet ibidem cranio. Sæpius ego,
 sic *Derham* in *Physio-Theologia* acutissimo microscopio oculos talparum dis-
 sectos disquisivi, & humores vitreum ac crystallinum conspexi, & liga-
 mentum ciliarium, imo mucum, atramenti nigritie, reperi; & pupulam
 rotundam, corneam vero cuspidatam seu conicam vidi. Longissime autem
 a cerebro oculus distat, & nervus opticus tenuis & longus, ex oculo pro-
 grediens, carnem intermediam transit, cerebrum intrat, ad longitudinem
 nervi olfactui inservientis, & omnium talpæ nervorum longissimi, produ-
 citur. Imo & limacis instar, talpæ facultatem oculos jam protrudendi,
 jam recipiendi esse, habeo. *Galenus*, tantus suo jam tempore in *Physicis*,
 talpæ & oculos esse dicit, & crystallinum & vitreum, tunicis suis inhæ-
 rentem. Cæterum pro aure flaccido & prominente saltem rima quædam
 collo humerisque intermedia est talpæ, qui quidem situs, accedente pilo
 frequentissimo, ab omni aeris injuria aurem defendit. Tum vero auris fo-
 ramen sive conductus longus, cartilagineus atque rotundus vel sub pel-
 lem usque transit, quem filum quoddam circumdat, & transitus in fundo
 latior ad capsulam tympani conducit. Ex altera parte igitur filum, ex al-
 tera autem minor cartilago ingressum efformat. Cerumen etiam in con-
 ductu auris observavi. Interior vero auris structura singularis, & a reli-
 quis quadrupedum pariter ac avium auribus, diversissima. Tria enim of-
 ficula cava continet, quorum auxilio actio tympani ad nervum auditus
 defertur. Primum scilicet est malleolus, in quo binæ sunt apophyses, lon-
 gitudinis fere ejusdem; longissima tympano adhæret, altera autem, bre-
 vior, capsulæ lateri, seu ossi petroso; & malleoli pars posterior, tuberculo
 eduli respondet pro sua figura. Dorso malleoli secundum ex officulis su-
 perjacet, longum, apophyse omni destitutum, quod incudem esse credi-
 mus, & figura sua illud exhauriendi instrumentum refert, quo cymbarum
 sentinam nautæ exhaurire solent; ejusque extremitas, ligamenti tenuissimi
 ope, tertio & ultimo officulorum cohæret, quod infundibulo venit anima-
 libus reliquis, hic autem non est nisi furca, basi carens; & uterque ejus
 dens

dens seu crus, in alterutra fenestra seu apertura definit. Quæ quidem foramina, fenestris ovalibus reliquorum respondentia, introitum cochleæ & canalium semi-circularium, ubi nervus auditorius extenditur, constituunt. Canales vero a tympano distantes, haud, reliquorum more, corpori osseo & crasso includuntur, sed foras progrediuntur, & in cranio siti sunt. Alter igitur dens malleoli, membrana tympani cohærebat, dorsum ejus incude, & extremitas incudis extremitati infundibuli, cujus rami seu brachia auditus nervum pertingebant; & membrana commota, omnia statim officula movebantur, & ipsum auditus nervum concutiebant. Nec molestum tibi, L. B. futurum spero, quod nimius in describendo vel talpæ adeo vilis, aure, fuerim; singulari etenim sua structura, ac prorsus a reliquis diversa, summam creatoris sapientiam loquitur; imo multum operæ & attentionis hæc disquisitio requirit, nec quantum ego quidem scio, ab alio descriptam talpæ aurem habemus.

Eadem fere sunt, quæ circa aurem talpæ observata a *Christophoro Schellhammer*, D. in *Ephem. Germ.* leguntur; subjungit idem, quod quum radiis auditus e longinquo profectis colligendis haud egeat talpa, aure exteriori careat, acutissimo tamen auditu instructa sit, ad percipienda quæ ipsi vicina sunt. Mirum sane nobis, quod idem ille Vir Cel. omnem talpæ videndi facultatem deneget, subjuncta ratione, quod punctula nigra non nisi protuberationes sint oculorum, nec ulla connexionione cum cerebro contineantur.

Talpa cæterum cruribus brevissimis gaudet, pedibusque anterioribus latioribus & terræ suffodiendæ aptissimis, siquidem manus ex latere conversæ, palmæ pro similitudine accedunt; quinque præter ea digitos in quovis pede ostendit, unguibus fortissimis, longissimis, excavatisque instructos observabis, & pilum corporis integri brevem, frequentem, lenem & nigrum. Qui quum tenuissimus esse solet, sic in *lexico Manuali Cel. Prevost*, in sericum villosum illum convertere allaboraverunt, sed nigrities exoptata deest. Cauda tandem brevissima, vix digiti r. longa, fere cylindrica, in medio crassiore, in apice molli, & pariori pilo, obsita, gaudet.

Pellis talpæ durissima & ne scalpello quidem cedens, impediendæ nimix transpirationi inservire videtur, conservando intestinorum calori, & reprimendo frigori terræ, talpæ elementi. Imo panniculus carnosus adeo exacte pelli adhæret, ut unum corpus tantum constituere videantur ambo; & ille igitur non solum movendæ pelli, sed reprimendo etiam frigori cedit. Panniculo inferior membrana quædam tenuis adest atque pellucida, abdominis totius pectorisque involucrum, & subtrahit facilis. Hanc membranam musculorum subjacentium communem adpellare posses. In abdomine tandem binos musculos rectos, membranosa sua substantia peritonæo fortissime nexos videbis, qui transversalium officio fungi videntur, abdomini truncum admoventium. Quæ autem epiploon obtegebat intestina, haud in gracilia crassioraque, reliquorum more, separata, sed ejusdem crassitudinis ubique erant, ut & *Severini*, & *Seger*, & *Schellhammer* observare, amplior tamen est extremitas recti, omniaque intestina cellulis, pro retinendo chylo transeunte, instructa erant. Nec coli vestigium aderat, nec cæci, nisi forsan cum *Segero*, vesiculam vel glandem parum ab ano distantem, cæci locum tenere credas. Canalis intestinalis passim in-

hærentia excrementa liquida & nigra ostendebat. Intestinorum longitudinem totam $2\frac{3}{4}$. cubitis, mensuræ Hafniensis absolvi refert *Segerus*. Stomachus vero, ut hepatis locus superfit, sinistrum latus occupabat. Utriculi instar constructus, & corporis respectu, maximus, interne rugosus, materiaque chylum referente & lumbricis fere concoctis, plenus erat. In pyloro quamdam crenam observavit *Schellhammer*, qua stomachus & orificium inferius tamquam dissecta videbantur. Hepar non solum dextram, sed quoque omnem superiorem ventris partem explebat, & rubicundum 5. ex lobis inæqualibus, superiore in 3. lobulos, ante fimbriatos, diviso, abibat. Et fellis vesicula, liquore subviridi plena; quem dulcem amaro mixtum saporem exhibere sua experientia edoctus docet *Schellhammer*. Idem ille quoque in mesenterio sub intestinis corpus glandulosum maximum detexit, ita ut intestinum majus, glandulis lacteis conglomeratis constans, referret. Lien immediate stomacho adhærens, rubicundus depressus, & linguæ instar productus, caninum æquiparabat. Et renes rubicundi magnitudinis respectu, magnam cavitatem ostendebant; capsulæ atrabiliaris exiguæ & albidæ, virga autem, teste *Schellhammer*, fere penitus intra recepta, & pro longitudine, fere dimidiam totius animalis longitudinem explebat. Nec pendentes erant testiculi sed pelli inclusi, & renum magnitudinem referebant. Vesicam quoque rugosam atque nervosam corpus aliquod rotundum, foris carnosum, intus vero nervosum, & virgæ superjacens circumdabat. Quod prostates esse ex situ cognovimus. Quam vile igitur atque abjectum animal videatur, non solum tanto genitalium apparatu, sed vel illa adhuc aliis muniuntur tegumentis carnosissimis, eadem contrahentibus, & materiam spermaticam ad destinata sibi loca deferentibus seu potius protrudentibus. *Schellhammer* vero talpæ in pectore, nec pericardium, nec mediastinum, cor tamen ex sinistra, & hepar ex dextra, sub corde situm reperit, situs adeo insoliti rationem cuius tribuat, nescius. Nos vero in talpa, mare, pulmones, voluminis magni instar, & quinque ex lobis compositos vidimus, quorum bini superiorem cordis partem obtegebant, quorumque dexter erat maximus; & hos quidem ferrugineis punctis notatos, cordis tandem aurículas ambas, nigridas. *Severini* quoque magnum esse docet cerebrum, pro magnitudine animalis.

Quod sceletum ejus adtinet, amplissimum & obscurioribus futuris munitum erat cranium. In maxilla superiore sex erant dentes incisarii, tum utrinque caninus acutissimus, post quaterni canini exigui, tandem terni molares. In inferiore autem octo incisarii, post dens caninus magnus, tum tres minores, totidemque molares. Varii quoque tria auditus ossicula sese detexisse profitentur. Colli, humerorum, & pectoris conformatio æque mirabilis ac singularis erat. Humeri enim strictiores videntur, siquidem muscoli, alias ex humeris nati, ex primo pectoris osse nascuntur in talpa; maxima autem ex parte ossis pectoris coherent humeri, & ad medium colli producti, lato tandem ac inæquali humero junguntur. Superior pars ossis pectoris humeris intermedia, & secundæ ejus parti, latiori, nexa, ad medium collum progreditur, ubi satis conspiciendam apophysin observavimus. Quod igitur pro humero veniat, os, illud figura clypeum refert, & pedibus fulcro cedit. Horum anteriores duplex os cubiti componit, & cubiti inferior apophysis longa, excavata, tenuis, & capite quodam

dam instructa est. Varia præter ea ossicula & carpum, & metacarpum, & digitos efformant. Ubi autem extremitati pedis nectitur cubitus, ibi ossiculum quoddam semilunaris figura, pro suffodienda terra adest. Quemvis præter ea digitorum anteriorum tres phalanges componunt, quarum ultimæ ungues nectuntur; illique longi, fortes & lati, intus excavati, foris vero rotundi. Pectus ab initio constrictum, post sensim dilatatur; vertebræ autem dorsales, & lumborum, ossa item innominata talia sunt, qualia in ratto atque sciuro. Costarum XIII. numeravimus. Et os sacrum, cui cauda nectitur, unico tantum osse constat. Pedes posteriores denique ex femure & tibia componuntur, ex quorum medioperonæum enascitur; reliqua omnia cum echino, ratto atque sciuro communia habet, imo ossiculum semilunare, de quo supra dictum est, & acutiores ungues ostendit.

Reliquum, ut habitaculo ab omni quadrupedum diverso, scilicet subteraneo talpa detinetur; sic quoque diversis & huic accommodatis organis instructa est. Nasum v. gr. tenuem, cuspidatum atque durissimum; & quæ de rostro, collo, oculis auribusque porci superius dicta sunt, ea omnia & de talpa dum agitur, obtinent. Terram suffodiendo miranda celeritate viam sibi parat; & quibuscumque vermibus, radicibusque teneris nutritur; multum igitur damni adfert agris & hortis, hinc rura colentibus maximo venit odio, multisque mediis illi extirpare quærunt, de quibus plura in libris, qui *villarum* nomine prodire. Sic *Bradley* in *Ephemeridibus agriculturarum* adserit, Decembris mense nidis detineri talpas, quos ex foliis, terra, stramine aliisque congefferunt; & solum aridum & calidum inhabitare. *Albertus*, sua experientia certus, talpæ nutrimento ranas atque bufones venire refert; etenim bufonem quondam pedibus talpæ detentum, & talpam hunc devoraturam, variisque moribus petientem conspexit. Idem ille & bufones atque ranas, talpas, si quas reperiunt, mortuas, comedere vidit. Terra autem nimio sole calefacta, aeris captandi ergo, talpæ egrediuntur, in primis Junio, & tunc faciles insidias sibi structas incurrunt. Nec tamen iis accedimus, qui coitus ergo talpis e terra procedendum esse ducunt. Prædæ cedunt, meli, vulpi, avibusque rapacibus, feles etiam illas insequuntur & enecant, nec tamen, nisi violentiori fame extimulata, comedunt. Matutino in primis & vespertino tempore, fami subventura, vel peracta pluvia, terram suffodere solet talpa, etenim & irrigata terra suffossu facilior est, & distinctior tunc lumbricorum motus observatur, & acutior eorum odor, nares talpæ pertingit. Cæterum nec muta est, sed percussa clamorem acutissimum extollit. Ea autem quorundam sententia, qua talpam ex putredine, accedente pluvia generari docent, ne digna quidem est ut refutetur. Errant & illi, qui infectis illam adnumerant; Sæpius etiam albo-flavidæ talpæ reperiuntur, illæque *Kleinio* teste alibi sunt frequentiores.

Græcum Talpæ nomen est: *Spalax*, seu *Aspalax*, Italicum: *Talpa* seu *Topinara*, Hispanicum: *Topo*, Germanicum: *Maulwurff*, seu *Mollmaus*, Belgicum: *Moll*, Polonicum: *Kret*, Anglicum: *Molle*, *Moldwarp*, *VVant*, Suevicum: *Mullvad*; & Gallicum: *Taupe*, seu *Taulpe*.

Multo cæterum sale volatili & fixo, oleoque abundat, quam vel integram, vel cor, hepar & sanguinem ejus adhiberi docet Medicina. Cinis

ex talpa calcinata, contra rheumata, lepram & strumas, vel dosi ʒss. ad ʒij. vino infusus capitur, seu melle oleove mixtus, linimento contra eosdem morbos cedit. Talpa vivens, compressione manus enecata febrem profligare dicitur, imo *Ettmuller*, manum in qua suffocata fuit talpa, strumas imo gangrænam, contactu, sanare docet. Cor talpæ arefactum & pulverisatum, quatuor subsequentes per dies receptum, hernias sanare scribit *Schroderus*. Hepar arefactum, & in pulverem reductum, vapores hystericos, & tormina partum excipientia, lenire censent. Sanguis talpæ recens, capiti illitus, comam reducere dicitur; & contra omnem, in primis vero mammarum gangrænam, commendatur. Chartam scilicet vel linteï partem eo irrigant & arefaciunt, pro usu autem aqua quadam conveniente madefaciunt, & parti adfectæ applicant. Imo mitras quoque ex pelle talparum infantum capiti, ne convulsionibus corripiantur, imponunt.

U R S U S.

U*rsus*. Offic. Schrod. 312. Lemer. 298. Boffch. de *Quad.* 198. Dal. Pharm. 447. Blas. 127. Valent. 47. Schvenckf. *Quadr.* 131. Charlet. Exerc. 14. Gesn. de *Quadr.* digit. 941. Aldrov. de *Quadr.* digit. 114. Jonst. de *Quadr.* 86. Raii Syn. *Quadr.* 171. Klein. *Quad.* 82. *Ursus cauda abrupta*. Linn. Faun. Suec. 2. *Ursus niger, cauda unicolore*. Briss. de *Quadr.* 258. *Ursus & ursa vulgo. Ursus vulgaris*. Nonnull.

Informem jure dicit *ursum Virgilius*, quippe tanto ac adeo crasso pilo corpus ejus involutum est, ut non nisi massa quædam informis videatur; imo pelle ejus subtracta, & bestiam difformem conspicias. Etenim & simiæ, inelegantissimæ bestiarum, & urfi difformitas, ex inconvenientia utriusque cum elegantissimo inter animalia petenda est, siquidem regula alias generalis veraque & hic loci obtinet: pessima est optimorum depravatio. Ex mente *Galen*i scilicet, hominis corpori maxima accedit præstantia, ex manuum pedumque conformatione, quibus ab animalibus, ut intellectu suo differt ab animabus. Jam igitur excellentiori huic hominis conformationi quodammodo similis videtur structura urfi, præcipuum tamen vel depravatum, vel prorsus deest. Commode manus atque pedis humani bina in primis venire docet *Galenus*; manus scilicet digiti omnes binis dividuntur, & quatuor adsunt homogenei, quintus vero ac separatus, arripiendis objectis, præcipuæ manus actioni, cedit; pes autem talum & quinque digitos sic sibi oppositos habet, ut pollicem, quatuor digiti manus, & figuræ proculcandorum variæ vario modo adplicatus uterque certiore firmioreque reddit incessum hominis. *Plinius* autem, conformationem pedis manusque hominis & urfi cum simia in positione cubitus & genu, inverso animalium more, consistere, falso, existimat. Ille enim reliquis animalibus genua retrorsum, & cubitos antrorsum respicientes adsignat. Omnibus scilicet animalibus una eademque ratione inversæ sunt partes illæ, quantacumque *Aristoteles* obloquatur; & differentiæ causam in errore nostro delitescere censeo, quo talos brutorum pro genibus, carpum vero habemus pro cubito. Os nempe, hominis talum constituens tam longe productum vides in brutis, ut pro crure habendum esse videatur; imo carpus, in homine ex octo officulis fere rotundis compositus, in brutis uno ex his officulis lon-

longissimo gaudet; hoc igitur, quamvis non sit, nisi carpi officulum, facile putatur crus ipsum antierius. Omnis igitur similitudo, inter hominis urisque crura & brachia in eo consistit, quod utraque sint carnosæ, qualia non nisi homini tribuit *Aristoteles*; quod os tali brevius, plantæ pedis partem constituat; quod quinque gaudeat digitis collectis ac talo oppositis, ossibus insuper carpi manuum humanis fere æqualibus; nec tamen quinto digito separato gaudet, ut pollice manus humana, maximus enim uris digitorum situm pollicis hominis contrarium, & locum digiti minimi tenet, eademque ratione & digitorum pedis maximus. Pes etiam uris numquam talo innititur, hic enim pari ratione ac reliqua pars crurum, pilis obsitus est, nec callositatibus, plantam pedis munientibus, incessus signis, præditus. Manus e contrario quemdam quasi talum exhibet, siquidem callus in palma obuius & pelle villosa interceptus, paullo superius denuo alio callo originem largitur. Et inconcinna atque inelegans est digitorum uris structura, sunt enim crassi, breues, & pedis digitorum instar, inter se vicini. Imo tam singulari substantia, quam figura constant. *Plinius* & *Plutarchus* jam suis temporibus, & *Michael Herus*, vel hodie adhuc apud Germanos, uris pedes, deliciarum instar, principum cibis cedere, docent. Hanc ejus partem illud credimus ligamentum adiposum & candidissimum, 2. fere digitis crassum, quod in media parte manuum & pedum uris observavimus, & dubitationi locus est, num forsan ex illo humor aliquis emanare possit, cujus ergo *Plinius* & *Aelianus*, ursum perhibent, vel quadraginta per dies, pedem dextrum delambendo vivere posse.

Ungues urorum nostrorum, & ratione cohesionis cum phalange ultima digitorum, & structuræ, & facultatis, incedendo sursum respiciendi, harum omnium ratione, inquam, cum unguibus leonis, supra descriptis, conveniebant. Hanc tamen facultatem uris nostri neglexisse videbantur, quorum quidem ungues ad dimidiam partem detriti erant. Nigri etiam, & minores videbantur leoninis; imo ab illis substantia, differebant, leonini etenim fibris separabilibus, & substantia heterogenea, uris autem contigua ac solidiore constabant. Dentes leoninis multo quidem minores, cæterum vero similes erant. Hinc quoque pro lacerandis venatorum laqueis, non nisi unguibus uti dicitur uris, siquidem labiorum crassities obstat, quo minus dentibus utatur. Singularis tandem figuræ sunt labia, & inferiora præsertim in extremitatibus circumvoluta, & in angulis, cristæ galli instar fissæ sunt.

Corpus uris totum ab apice sui rostri usque ad extremitatem digitorum pedis, 8. pedibus & 3. digitis, absolvebatur, ad initium caudæ 5. digitorum longæ, 5½. pedibus, & 1. pede & 5. digitis ad occiput depressum, & cum osse sincipitis, ex sinistra futuræ lambdoidæ angulum efformans, cujus in medio crista quædam elevata, aut leonina brevior, desinebat; & ubi musculus crotaphites, caput obtegens, exoriebatur. Thorax latior quam in leone, atque longissimus, 14. costis constabat, nec collum, ut dicunt, porcini instar, brevissimum, sed 9. digitis longum & 7. latum erat, aut tam prolixo, tantoque pilo circumdatum, brevius quam erat, videbatur. Os lumbi solito longius; rotula quadam, quam soli homini propriam volunt alii, cum osse cruris, articulatione, cohærebat; & corium in dorso durissimum & crassissimum, tenuius erat sub ventre; pilus denique haud

adeo fetosus, quam apri & leonis, lanæ fere similis, nec adeo crispus ut ovinus, magis tamen, quam caprinus.

Epiploon maximum, pariter ac omnes reliquæ partes corporis pinguedine omni carebant, cujus defectum morbo, mortis causæ, tribuimus, quum natura sua, & in primis, tempore hyemis, crassissimus ac pinguis esse soleat. Hepar maximum, 7. lobis erat comparatum, quorum unus reliquis omnibus minor erat. Fellis vesicula vix dimidiam magnitudinem leoninæ adtingebat, multum tamen fellis, in membranis partium circumjacentium dispersum deteximus. Oesophagus, non nisi 14. linearum diametrum exhibebat, nec versus orificium superius dilatabatur, cæterum ad ventriculum usque, multa carne gaudebat, in parte exteriori; Ventriculus, quem in urso æque ac porco, maximum esse vult *Aristoteles*, minimum reperiebamus. Originem erroris, in quem cum *Aristotele* & reliqui omnes prolapsi sunt, in eo quærimus, quod urso, quem voracissimum putavere, magnum ventriculum concedendum esse crediderint. In ursis nostris ventriculum pedis 1. longitudinem haud pertingentem, & summo 6. in medio autem $2\frac{1}{2}$. digitis latum deteximus. In medio igitur parum constrictus, procedendo denuo amplificabatur, sicque secundum ventriculum constituebat, qui $3\frac{1}{2}$. digitorum circiter, pylorum versus adscendebat. Ventriculi utriusque fundus durus erat, & 3. linearum crassus, ast ubi pyloro accedebat, ibi durior & 5. lineis crassus. Membrana eorum interna, nil aliis soliti, nil communis exhibebat, præter asperitatem illam leviolem, quam fornices dicunt. Potiori similitudine accedebat membranæ ventriculorum in ruminantibus, multis enim eminentiis (quales in *Echino* & *Reticulo* vides) figura tamen irregularioribus, obsita erat. Si quæras de intestinis, unicum fere urso tribuendum videbatur; etenim quæ in reliquorum intestinis occurrit differentia, a colore, substantia, & capacitate illorum petenda, illa hic loci haud oculos incurrebat. Nec ullum cæci, hujusque appendicium, nec circumvolutionum & cellularum coli vestigium; omnis intestinorum longitudo 40. pedibus absolvebatur, leoninorum vero 25. Ipsius intestini ursini similitudo forsan causæ fuit *Theodoro Gaza*, quod textum *Aristotelis* Latine reddendo, ubi de urso, *intestinum* scripserit, pro: *έντερα*, *intestina*. Quæ tamen ursi singularia *Scaligero* ignota fuisse videntur, dum *Theodorum* licentiæ illius ergo increpat. Lien tenuis ac exiguus, 6. nempe digitis longus, 2. latus, & ne quidem 1. digito crassus erat. Renum structura admodum singularis videbatur, figuræ erant longissimæ, 5. digitis longi, & $2\frac{1}{2}$. lati. Subtracta porro membrana adiposa, adipe omni destituta, aliam deteximus durissimam & crassissimam; nec membrana erat proprie parenchymo cohærens, sed membrana quædam, sacculi instar 56. renes exiguos continens, ita enim adpellare liceat totidem parenchymata, alia ab aliis separata, sua membrana obtecta, & opæ fibrarum ac membranarum tenuissimarum (ab illa, cui tamquam sacculo parenchymata omnia inhærent, proficiscentium) passim inter se connexa. Hoc autem de his præsertim renibus intelligas, qui in parte cava hujusce renum cumuli reperiuntur; qui enim partem gibbam tendebant, illi haudquaquam inter se juncti conspiciebantur. Pro figura sua, omnis ex renibus istis exiguis, foris basi latiori instructus, ast centrum cumuli versus constrictior videbatur; etenim ceu uvæ racemo adhærebant. Basis autem jam hexagona, ple-

rumque pentagona, imo in quibusdam quadrata erat. Nec non pro magnitudinis varietate, alii castaneam mediocrem, alii nucem avellanam referebant. Cumulus ipse haud inepte pinum probe maturum effingebat. Renes exigui quivis, mediante quadam quasi cauda necebantur cumulo; caudam autem triplicis generis ex vasis compositam crederes, nempe ramis utriusque emulgentis & uretheris, apicem renis exigui intrantibus. In illo apice autem (ut in pomo pro recipiendo caule) ramis excipiendis adaptata aderat quædam cavitas. Quod ad rationem dispositionis ramorum spectat, ramus arteriæ medium, ramus venæ autem & uretheris lateralem situm obtinebant. Suo testimonio dicta comprobatur *Riolanus*; imo situs rationem subnectit: scilicet, quo arteria uretherem pulsans, pulsatione sua continua urinam eiiciat. Truncus venæ & arteriæ emulgentis, vix calami crassitiem superans uterque, statim in binos, tum in plures alios, & tot præcise ramusculos abibant, quot renes exigui aderant. Interdum equidem bini ramusculi uni ex renibus adhærere videbantur; ast fallaciæ opticiæ causam observavimus hanc, quod bini ramusculi renem exiguum, immediate ex quo divisus fuerat, ingrederentur. Haud adeo profunde ramusculi penetrabant, sed desinebant in parenchyma, ita ut cavitas notabilior vasis extra renem exiguum, nulla amplius oculis innotesceret; vel ob divisionem ramusculorum per parenchyma disperforum fere infinitam, hinc imperceptibilem, id quod de emulgentibus renum humanorum docet *Laurentius Bellinus*; vel, quia vascula ista haud ulterius producantur, ut vult *Higmoreus*, & substantia parenchymatis spongiosa, sanguinem arteriæ statim absorbet percolatque, quo eundem purum & a serositate (per papillas destillante in pelviculos uretheris) separatum venæ adportare possit; ita fere, ut coagulum lactis, dum hoc in caseum abit, relicta parte butyrofa, caseosam pertransit; vel, uti lixivium, vasi linteis pleno infusa, linteum transit, & foramen fundi egreditur, quamvis nullo canali deferente eodem conducatur. Uretheris conformatio a conformatione vasorum emulgentium differebat in eo, quod statim ex quo membranam (sacculi instar renes exiguos omnes continentem) intraverat, dilataretur, & quum antea vix calami crassitiem æquiparaverit, nunc vel digito continendo sufficeret. Tum in binos ramos ejusdem crassitie dividebatur, hi iterum aliis origini cedebant, qui denuo minores singulos singulis renibus exiguis suppeditabant. Attamen vel ultimus hicce minimusque ramusculus crassior erat ramusculis venæ & arteriæ emulgentis, una cum illo renem ingredientibus; imo longior ultra hosce productus, in media sui parte jam in binos, jam in ternos ramusculos subdividebatur. Horum singuli parum dilatati in extremitate pelviculum, (carunculo papillam repræsentante fere expletum) efformabant; & carunculi hujus ex latere, pelviculus tribus ad quatuor foraminulis perforatus videbatur, quæ non erant, nisi sinuositates effectæ a membrana pelvici, quæ intus sese replicando denuo alios adhuc minores, & recipiendo acus globulo pares pelviculos constituere videbatur. Tales autem papillas & in renibus bovis observavimus, majores saltem sed pauciores, in bovinis enim denas, & digiti apicem exæquant, in ursi renibus vero centenas imo plures, sed frumenti grani magnitudinem tantum pertingentes reperimus. Industriam & oculos *Bartholini* hæc effugisse videntur, is enim renes ursi, bovinis, infantum recentium natorum, & *Marsovini* (præsentem

Daniæ Rege dissecti) horum, inquam renibus similes esse scribit. His quidem omnibus fissuræ sunt in superficie, quarum ergo urfinis accedere videntur; attamen parenchymate solo & continuo teguntur, & fissuræ leves tantum sunt in superficie; at 56. illi renes ursini vere divisi sunt, & singuli omnibus partibus in renibus majoribus obviis gaudent. Illi tandem, qui duce *Plinio* adserunt, virgam ursi, statim ex quo mortuus fuerit, corneam duritiem induere, illi, inquam, neglecto examine rei adcuratiore, nec ursi viventis virgam disquisivisse, nec mortui disseccuisse videntur; alias enim detexissent, hanc duritiem & in virga ursi, & canis, lupi, sciuri, Martori, aliorumque obviam, ex osse, in virgæ extremitate præsentipendere, ut jure suo notat *Aristoteles*. Os igitur ursi nostri $5\frac{1}{2}$. digitis longum, & versus os pubis 4. lineis crassum erat, ab osse pubis 5. digitorum spatio distans, & parum erat aduncum.

Pulmo ejus quinque lobos, tres ex dextra, duos ex parte sinistra ostendebat. Duo supremi partis dextræ maximi; tertius seu magnitudinis mediæ, cuspidem versus tripinnis erat. In alio urforum nostrorum, duo sinistri lateris lobi valde turgidi; superior illeque albescens multo aere tumescens; inferior autem corpore quodam heterogeneo, duorum pugnorum magnitudine, & spongiam atramenti plenam referente oppletus erat. In alio urso, ætate minimo, singularissimam Mediastini conformationem reperivimus; passim scilicet pluribus foraminulis $1\frac{1}{2}$. linea latis perforatum, innumeris etiam vasis lineæ 1. crassis consitum erat, sicque præter adipem quo carebat, quæcumque sunt epiploo propria omnia exhibebat. Cor 6. digitis longum, & 4. digitis latum, cuspidem exhibebat solidissimam, carne 1. digiti crassa compositam, sed obtusam, nec ut in leone, acuminatam. Quivis asperiæ arteriæ annuli imperfecti, nec ut in leone primo, examini nostro subjecto, integri, latiores tamen erant quam in leone, etenim 5. digitorum circumferentiam adtingebant. Lingua, ceu in fele & canine, lata erat ac tenuis, imo in superficie sua punctula carnosæ, exulante asperitate omni, commonstrabat. Nec cranium tam fragile reperivimus, ut auctores volunt; sed ferra explorantibus, durum visum est. Dimidiam tantum crassitiem leonini adtingebat, quod, ubi tenuissimum, ibi erat 6. linearum. Os quoque intus procedens, cujus ope a cerebro separatur cerebellum, tenuius, & figuræ irregularioris erat, quam in leone. Cerebrum vero quadruplo majus leonino (hoc enim ex quacumque parte spectatum est 2. digitorum) 4. digitis longum, 4. profundum, & 3. latum erat. Ut in leone, sic quoque in urso glandula pinealis minima erat, ac fere imperceptibilis. Oculus palpebra interna, in angulo majori exorta, & parum descendente tectus, minimus erat, & globum non nisi 5. linearum diametri, sicque felis oculo minorem ostendebat. Crystallinus figuram fere sphericam, crystallinus quoque oculi sinistri in maximo urforum nostrorum glaucoma, exhibebat, quo album colorem eum opacitate induerat. Situm quoque singularissimum obtinebat, haud enim foramini uveæ oppositus, sed ex latere, extra axem oculi situs erat; id quod vel ante dissectionem innotuit, mediante quodam candore, quem in parte inferiore foraminis pupillæ, intus considerata, ceu catarracta depressa, observare licuit. Cujus causa latebat & in contractione fibrarum ligamenti ciliarii, ex parte altera, & in distensione relaxationis fibrarum partis alterius. Id autem ob

pro transitum liberum specierum visibilium, per duos humores reliquos ita dispositum videbatur; hanc nempe crystallini distorsionem eadem ratione accidisse censemus, qua infantes, qui diutius tali loco repositi, ubi lumen non nisi oblique adspicere possunt, tandem luscus evadere videmus, nempe quadam dispositione, ab habitu continuo musculis oculorum inducta, & dispositionem naturalem sensim permutante, dum horum fibræ producuntur, illorum corripuntur. Quæ quum ita sint, creditum est: fibras ligamenti ciliarii capaces esse dilatationis contractionisque voluntariæ, & contractioni ac dilatationi fibrarum musculorum similis; imo actionem hancce convexitatem crystallini & adaugere posse, & imminuere, prout necessitas postulaverit, ac objectorum vel major minorve vicinia, ad distinctam eorum representationem exegerit.

Omni autem adipe quum ursi nostri carerent, experimenta de eodem instituere, eaque experiri non licuit, quæ *Aristoteles*, *Theophrastus* & *Plinius* referunt, quod scilicet per hyemem conservatus adeps, & pondere suo & mole adaugeatur. Quæ si ita se haberent, illam aliorum opinionem comprobarent, qui excrescendi facultatem inter animalia maximam, urso inesse volunt. Hic enim *Plinio* teste ac *Aristotele*, omnium minimus, muris magnitudinem, dum nascitur, pertingit, post vero excrescendo vel intermaxima locum acquirit; imo quamvis lacte matris, 40. per dies cibo abstinentis, nutriatur, *Alberto* teste, per omne vitæ spatium, ut crocodilus, continuata excretionem pergit. Tum enim *Aristoteles* ursam fœtus suos edere dicit, quum cavernæ suæ per 40. dies sese includere, & cibo omni abstinere cœperit, imo omnem ursum, quodam anni spatio, absque cibo sumtum vivere. Excrescendi igitur facultas, si vera sunt quæ de adipe narrant, vel post mortem animalis continuaretur. Consideratis rite omnibus, temperamentum ursi humidum; ex *Aristotele*, humiditatem vitæ accommodatam exhibere concludimus, quæ nec facile exarescit, nec cruditates generat, ut nimia excrementorum humiditas, imo causa evadit coctionis probæ, & quævis alimentorum genera chyli naturæ facile accommodantis. Accesserunt enim ea, quæ nostris observationibus comperta habemus. Sic e. gr. ursum licet adeo diversis ciborum generibus vescentem, jam piscibus, jam carne, jam cancris, jam insectis, jam fructibus, jam melle, quum adeo exiguo stomacho, tamque angustis intestinis gaudeat, cœco autem sit destitutus; eum, inquam; eximia digerendi virtute, & temperamenti perfectione, organorum defectum explente, instructum esse concludimus; etenim reliqua animalium, quibus multum cibi est concoquendum, diutius eundem magnis receptaculis adservant, & per conductus replicatos anfractuofosque conducunt, ut in camelo observatum est, cujus intestina, duplo longiora erant ursinis. Secundo, exigua hepatis & lienis pro capiendis excrementis capacitas, caloris sui naturalis actionem tam bene ordinatam esse loquitur, ut nec nimia sanguinem adurat, nec nimis exigua crudum relinquat, nec sanguis egeat, ut partibus, nutrimento corporis insufficientibus expurgetur, etenim si vel eximius renum numerus evacuandæ majori serositatis parti destinatus foret, nec tamen excrementi hujus quantitas, caloris debilitatem loqueretur, sed potius ex pauciori ursi transpiratione proveniret. Imo ne minor quidem transpiratio caloris defectum testatur, sive nimiam gravitatem terrestrem, ursus enim, quantæ molis videatur, &

agilitate sua atque vigore, omnibus fere majori, & copiam & subtilitatem spirituum, ex calore naturali proficiscentium, aperte satis loquitur. Tercio, summa illa excrescendi facultas humiditatem perfectissimam indicat, quippe quæ partibus extendendis, ac exaugendæ earum magnitudini sufficit, nec tamen virtutem illarum diminuit. Quas autem ex observationibus nostris collegimus conjecturas, de summa parvitate ursi nascentis, oculorum parvitati in primis superstructæ erant. Etenim, quum ex lege conformationis fere communi, tanta sit nascentis oculorum magnitudo, ut hæc tanto superet capitis magnitudinem, quantum caput magnitudinem corporis reliqui; sic, si supposueris, solitam proportionis rationem nascentis ursi oculis fuisse, respicias exiguitatem excreti ursi, & quantulum ab initio fuerit suum corpus concludere pergas, nisi rem creditu difficilem supponas, scilicet excrescente corpore, nullum amplius excrementum oculis accessisse.

Et hætenus quidem descriptio ursi anatomica, quam in *Actis Regiæ Scientiarum Academiæ, ad historiam naturalem animalium facientibus, Auctore Per-rault*, legimus; & quam præstantiæ suæ ergo, *Blasius, Valentini & Raius*, suarum descriptionem fontem atque fundamentum habuere. Addit tamen, ex observationibus *VWilloughby, Raius*, quod talo innixus procedat ursus, & hominis instar, pedem terræ reponat; & unguium radices, durissimis annulis detineantur; & fœmellæ esse dicit bina sub humeris ubera; & scelertrum ursi humano simillimum, cauda quidem claviculisque destitutum, osse coccygis tamen instructum, & utrique pectoris lateri, 14. costas; spinæ dorsi 33. & collo 7. esse vertebrae. Sic testibus *German. Ephem. Dec. 1. anni 1X. & X. pag. 403. Stefanus Lorenfinus*, D. nasi ursini, (qui odoratu forsan acutissimo gaudet ex animalibus) superficies interna, admodum extensa, plura quam triginta spatia serie disposita ostendit, ita ut quatuor ad sint series laminarum ossearum, tribus seriebus perpendicularibus, singulæ inter se distinctæ; quibus superficies, odoris impressionibus recipiendis destinatas admodum multiplicari vides.

Kleinus est, qui quatuor papillas, & nullam, sive brevissimam caudam urso tribuit; cæterum frequentiore eum esse in Septemtrione, & capite debilissimo, ast cruribus bracchiisque fortissimis gaudere subnectit; & pedibus posterioribus innixum & currere & incedere posse, & arbores pro devorando melle silvestri conscendere, & pedibus anterioribus, tamquam pugnis vel boves enecare, & calliditate vix vulpi cedere, ac malignitatis suæ ergo, periculosum esse. Variæ ursi communis species in Polonia reperiuntur, & *ursus formicarum*, nigridus, & formicis vivens, *ursus vulgaris*, mediæ magnitudinis & fulvi coloris; & minimus, quem *album*, seu *argentum* dicunt. Ubi autem a Russia alba, nigra, sive Moscovia separatur, urfos pilo nigro argenteoque mixto obteatos reperire. Cum mole autem ursus & ferocitatem ostendit. Etenim in Palatinato *Polocsciensi*, Lithuania regione, summæ magnitudinis ursum repertum fuisse novimus, qui innumeros & equos aliaque animalia enecaverat. Sic pellem enecati in Palatinato *Chelmiensi*, 6. & alius in Pomerania capti 5. bracchiorum longam fuisse scribunt. Imo sæpius ex Lithuania Dantiscum deportatæ urforum pelles, 8. pedum longitudinis sunt. In *historia naturali Islandiæ, Andersonii* cura conscripta, legimus, Groenlandiam sæpius urfos quosdam pervenire, & statim ab incolis ad mortem usque persecutione premi; hi autem capite,

lupi instar, prolongato gaudent. Imo & Islandiam, sic ille pergit, veris tempore, ex Groenlandia urfi glaciei frustis maximis vecti, perveniunt, ast studio incolarum in littore excubias agentium, detecti, omnium operâ & cura enecantur, alias etenim rupes, cuius inaccessibiles ingrederentur, & in illis multiplicati, summam molestiam ac stragem incolis dispersis inferrent. Aliud quoddam Septemtrionis itinerarium loquitur: mortuam balœnam paucis post mortem horis, putredine corripitur, & tantum foetorem edere, ut debiliores hominis accedentis oculi, inflammatione ac tanto dolore adficiantur, ac si vivam calcem insperferis. Imo & balœnæ adipem rescindentes, summo studio sibi cavent, nec illo adspargantur, etenim nervorum contractiones ex illo pertimescunt. Urfi tamen albi balœnæ mortuæ, sive adipe gaudeat, sive minus, statim accurrunt, & canum instar, avidissime ex cadavere comedunt. Tunc quoque pro pilo albo flavidum induunt, nec magni in pretio pellis eorum eo tempore habetur. *Henricus Elli* in itinere suo ad fretum *Hudsonianum*, alia inter quadrupeda ibidem singularia etiam urfos candidos reperiri scribit, eosque ab urfis communibus, varia ratione differre. Capite enim longiore colloque graciliore gaudent, & voce sua, canis rheumatici latratum imitantur; & jam majores, jam vero minores, pilum, lanæ instar, longum & lenem gerunt, & nasum, rostrum & ungues nigros exhibent, & ex alia glaciei tabula ad aliam transnatant, & delectationis ergo, iteratis aquæ immerguntur. Et qui oras tenent, balœnis mortuis, reliqui quovis alio nutrimento vescuntur. Ursus, sic in *historia naturali Americæ Septemtrionalis* *Cel. Denys*, totus niger, corporis altitudine quidem nec longitudine porcum adtingit, crassitudine superat, & pilo gaudet prolixo, capite magno atque depresso, auribus exiguis, cauda fere nulla, ungulis magnis, & arbores conscendit, & glandibus vivit, parum cadaveris delibat, & ad oras exspatiando, mari ejectos pisces devorat, nec nisi vulnere accepto, in hominem irruit; & carne gaudet eduli, & vitulinæ instar albæ, imo sapore delicatioris, spatio sex mensium hyemis integro, in crena arboris detinetur, & ex pedum (quos delingit) humore vivit. Foetus, dum quintum sextumve mensem agunt, saporis sunt præstantissimi ac delicati; Et alibi, de venatione Americanorum verba faciens, addit: hyemis tempore ursum venantur, quem venationis reliquorum ergo egredientes, sibi obvium reperiunt; etenim arbores crassiores transeundo, respiciunt, si quis halitus delitescens urfi, fumi instar, progrediatur, quo conspecto, arborem conscendunt, & telis arbori excavatæ immixtis, ursum enecant. Æstate autem vel silvas pererrantem insequuntur, vel in arboris fastigio glandibus vescentem sagitta confodiunt, tunc vero delapsum reiteratis telis perforant, ac tandem ascia ictibus conficiunt. Incedentem vero ursum si sagitta immixta vulneraverit homo, ille vel aufugit, vel in lædentem convertitur, eumque nisi alia sagitta conficiatur, amplecteretur, dilaniaret, ast homo edoctus terram sese pronus prosternit, spiritum retinet, tum naso admoto vitæ signa in homine quaerit ursus, imo supinum constituit atque obvertit, rostrum ori admovet, halitum indagatur, nec reperto, ventri ejus insidet, agit, rursusque ori rostrum admovet, tandem vero hominem facit missum, & 15. ad 20. pedum spatio recedens, diligenter observat. Quem si motumquemdam, vitæ signum edere observaverit, statim redit, iterum ventri ejus insidet, quasi

quasi illum suffocaturus, denuo ori nasum adfert, spiritum quærit, quem quousque persenserit, ventrem ejus deprimendo agitabit. Cæterum nulla ratione homini est infestus, & retento spiritu, nec edito motu, statim vindicta ejus liberaberis.

Sabaudienfes, si *Scaligero* fides est, carnem urfi, pro delitiis habent, adipem vero, nullius utilitatis ergo, reiiciunt. Et *Cel. Altmann*, ubi de *animalibus montium Helvetiæ* agit, montes lupis & urfis plenos videri quidem alienis dicit, nec tamen, nisi forsan ex Lotharingia transierint, eo pervenire, cæterum vero frequentes rei publicæ istius habitatores, copiam eorum depressoisse dicit. Alii sunt qui negant, ursum lutræ instar atque marmotæ, cavernæ inclusum, ac somno detentum, cibo omni abstinere. Cæterum, Opusculum quoddam Danicum, nuperrime editum, lupos Norvagicos antras sub rupibus, seu arboribus excavatas, ineunte hyeme intrare, & magnam musci copiam pro strato eo conferre docet, nec tamen cibi quidpiam secum eo conducere. Ineunte tamen vere dum cavernas suas egrediuntur, vix aliquod vestigium cibi hætenus sumti, in corpore eorum seu abdomine videbis. Interim nec somno detentos pronuntiare poteris, sed cavernis inclusi pedes suos exsugunt, & murmurando adgredientibus arma & ungula offerunt. Jam vero ut intelligatur, qua ratione ursus tanto temporis spatio, cibo seu alimento abstinere possit, velim adendas ad sequentia: 1. æstate voracissimus lupus, magnam cujusvis obviæ copiam devorat, exiguam vero ejus partem excrementis eiicit, & multum præparat chyli. Hinc vel 10. digitis altum adipem in pedibus & lumbis demonstrat. 2. Æstate valde spongiosam ac turgescens carnem, fibræ ejusdem chylo expletis, hinc etiam tot humoribus eo tempore abundat, & carnis saporem ingratissimum atque fœtorem æstate præbet, hyeme amittit. 3. Hyeme autem turgescens & lacteo succo plenam reperies partem pedibus subditam, quæ quum plurimis constet glandulis, tamquam papillis, hyeme suos pedes sugere solet. Lacteum igitur succum istum a sanguine circulante, in illud quasi reservatorium deportari censemus. Ex adipe autem materia subditur sanguini, hyemis tempore succum istum præparanti; hinc quoque carnem ejus vere solidiorem esse constat, quam quidem autumno. Quæres forsan: qui suo lacte vivere ac sustineri animal potest? aut lacte & aliud animal, quidni & illud ipsum, nutriatur? Multo somno per hyemem fruitur ursus, hinc digestio procedit lentior. Nec opinionem nostram, quod suo lacte vivat, experientia infringit illa, qua nulla eum excrementa eiicere novimus; hæc enim non sunt nisi ea quæ corporis nutritioni haud amplius sufficiunt, haud sunt necessaria, aut lac, quod fugit nutritioni necessarium est, ita fere, ut fœtus humanus tum demum meconio suo liberatur, postquam uterum matris egressus fuerit.

Aelianus est, qui ursum cavernam ingressum, statim ab initio, per 15. dies somno refici dicit, his effluxis autem expergefieri & solo nutrimento ex pede anteriore exsucto nutriri ac sustentari. Hodie autem notum est omnibus, sic *Cel. de la Mettrie*, in *Commentario suo ad Aphorismos Boerhavii*, quod nec adeo longus, nec continuus sit urfi somnus, etenim vel hyeme suos fœtus ursam effundere constat, & teste *Linschoten*, vel sex hebdomadam spatio ab incursionibus urforum liberos esse Belgas, in Nova Zembla commorantes, quam vehementer sit frigus, & nox perpetua. Cum quo & *Pechlinum* consentientem habemus.

Coitus urforum tempus hyemis initium esse docent *Schwenckfeld*, *Jonston*, *Plinius*, aliique nec tamen brutorum, sed hominum more, mutuis amplexibus eosdem coire. Fœmellas postea imprægnatas, rupto cum maribus commercio omni, solitudinem quærere addunt, & 30. diebus utero gestare, tandem vero jam unum, jam plures, ad summum tamen 5. fœtus emittere. Quos quum ex sententia *Plinii* præmaturos effundant, quid mirum? si non sint nisi massa informis, oculis, pilis, membrisque carens, nec nisi ungulas saltem aliquomodo distinctas exhibens. Mater autem eo usque lambendo & contrectando pergit, quo figuram ipsis debitam efformaverit. Sic antiquiores docuere; at *Schwenckfeld* atque *Jonston* fabulis ista adnumerant, experientia refragante. Ille enim ursam hyeme in caverna sua, cum tribus sui fœtibus, cæcutientibus quidem, cæterum vero prorsus efformatis, repertam esse testatur. Hos mater, canis instar, delambit, ad expurgandum quo obteguntur, humorem muscosum. Et *Jonston* ex *Matthiolo* refert, in dissecta quondam ursa prægnante fœtus, omnibus membris distincte efformatis instructos, fuisse repertos. *Aldrovandus* etiam inter rariora Senatus Bononiensis adservari docet urfi fœtum, ex matris utero protrahitum; illumque satis apte conformatum. Secundinas urfi autem tantæ crassitudinis censet esse *Camerarius*, ut non nisi diutiori matris delinctu ex fœtu abeant, quæ errori originem præbuisse censet. Quibus sua experientia fultus, Doctissimus *Dalechamp*, in *Annotationibus suis ad Plinium*, accedit. Sic alii sunt, qui ursum pro delendis suis vestigiis retrorsum ac supinum in cavernam suam sese recipere scribunt, & fœmellam quatuor mensibus integris, marem vero quadraginta diebus tantum eadem delitescere. Et *Theophrastus* eo usque processit, ut vel carnem urfi sale conspersam seu fumo arefactam eodem tempore, quo viventes reliqui pinguescunt, turgidam reddi atque excrecere dixerit. Si libet, assentiaris. Diversis vero in terris diversus est modus captandi ursos. Sic *D. Rosinus Lentilius*, testibus *Ephem. German.* Curonos sequenti stratagemate uti docet: ex utraque scilicet viæ infrequentioris parte arborem ad terram deprimunt, laqueis colligunt, & jaculum constituunt in medio, post vero fronde foliisque tegunt, ac passim cadaveris frustulis conspergunt, quibus dum inhiat ursus, misso jaculo pectus sibi suum perfodit.

Facili opera interim animum ferum exuit ursus, & cicur redditus, jam tibiis saltare, & scalam adscendere, & aquam ex puteo haurire, & ligna adportare, & currus protrahere, similiaque ediscit. Musicam in primis, seu voces sonoras peramare dicitur, illisque exauditis vel iram deponere, sonorum inconvenientia terreri; cujus ob causam & pastores, teste *Olao Magno*, rudius cornu inflantes a gregibus suis ursos detinere solent. Idem ille in variis Moscoviæ & Poloniæ terris, vel homines ursos passim abduciendo, & spectatoribus saltantes exhibendo, victum sibi conquærere addit. Et *Jonston* est, qui quondam apud Lithuanos ursum, principis palatium quovis matutino tempore adire solitum, pede portam pulsasse, post autem porrecto sibi cibo, ad silvam rediisse refert. At quamvis disciplina domestica animum cruentum deposuisse videatur ursus, cave eidem nimius credas, etenim vel levissimæ causæ ergo, malignitate retenta, furorem suum naturalem, & sanguinis cupidinem vel in dominum commonstrat, illum enecat, imo devorat. Sic quosdam præstigiatores quondam ursum, pilo

passim abrafo, pro homine silvestri, rudiori nimis fraude, spectatum exhibuisse recordamur. Varias etiam hominis actiones imitare solet ursus, & v. gr. cum canibus certando illos pedibus pro brachiis amplecti atque suffocare studet, & quam ascenderat, scalam descensurus, cautus retrorsum descendere callet, & pedibus anterioribus, ceu manibus sese sustentat. Ubivis vivit, siquidem quævis obvia pro cibo comedit, lubentior interim montes, quam planities inhabitat. Hinc etiam urforum copia scatent terræ Septentrionales, ut Germania, Polonia, Lithuania, Norvagia, Suecia atque Moscovia, ut & Montes Apennini, Alpes & Pyrenæi.

Ursum Ebræi nuncupant: *Dob*, Chaldæi: *Dubba*, Arabes: *Dubbe*, Græci: *Arctos*, Itali cum Hispanis: *Orso*, Germani: *Baer*, Bohemienses: *Medvad*, Poloni: *Wewer*, *Niedzwiedz*, Angli: *Bearn*, Sueci: *Biorne*, Galli tandem ursum, *Ours*, ursam: *Ourse*, & ursulum: *Ourson* dicunt.

Multo oleo saleque volaëili abundans, carnem, teste *Schwenckfeldio*, frigidam ac nutrimentum vilius præbentem, vix plebis fami cibo offert. Pedes interim anteriores vel principes pro deliciis habent. *Galenus* non nisi incultiores gentes ex carne ursi comedere docet, ast apud Germanorum aliquos & ursuli carnem pro cibo adponi dicunt.

Ars Medica tandem felle & adipe ursi utitur. Et fel quidem acris suæ virtutis ergo ac penetrantis, pro incidenda sufficit materia viscosa, & profliganda humorum spissitudine, tot atque tantorum morborum fonte. Et interior ejus usus contra epilepsiam, asthma & iæterum commendatur. Pro dosi, tres ad octo guttas liquori cuidam convenienti admisceas. Finnis fel urforum frequentissimum, arefactum, pro remedio universali, per sudores expellente, venit. Extrinsece autem in pulverem redactum contra ulcera gangrænosa & phagedena, contra dentium dolores & visus infirmitatem adhibetur. Adeps ursi emolliendi, penetrandi ac discutiendi virtute gaudens, resolvere solet & corroborare. Hinc contra hernias intestinales lumborum regionem spinamque dorsi eodem adfricant, ne retracta intestina denuo prolabantur. Imo contra arthritidem & rheumatismos adhibetur. Pro arthritide scilicet, prius in aqua spermatis ranarum, quo magis anodynus evadit, abluitur. Imo & pro cosmetico lævigandæ pelli inservit.

Pellis ursina eximiis tegumentis ac vestibis cedit pro frigore; & adeps unguentum martiatum, Pharmacopoeiæ Parisiensis ingreditur.

H O M O.

FInem tractationis nostræ de materia Medica descriptio hominis imponat, quem opificium creatoris merito dicimus, omnibusque animalibus longe satis præstare novimus.

Homo. Offic. Schrod. 69. Lemer. 428. Dal. Pharm. 452. Linn. Syst. Nat. 63. Et omnium auctorum. *Opus mirificum sextæ diei*. Nonnull.

Hominis patriam *Linnaeus* dicit terram omnem inhabitabilem, colorem vero diversum, Europam tenentis, scilicet, candidum, Americam, rubicundum, Asiam, flavum, & Africam, esse nigrum. Volumina sane descriptione ejus explere possemus, interim & quæ ad anatomiam, & quæ

ad

ad historiam ejus naturalem spectant, brevibus, quam fieri poterit, pertractabimus.

Corpus humanum in truncum, brachia, & extremitates dividitur. Truncum tria spatia constituunt, superius, seu caput, medium vel pectus, & inferius sive abdomen. Extremitatum aliae sunt superiores, ut brachium, cubitus, manus; aliae inferiores, ut lumbi, crura & pedes. Tegumentorum corporis universalium bina dicunt esse Anatomici nostrates, scilicet: pellem & adipem. Sub decem musculis pectoris peritonæum, maximam partem abdominis viscerum continens. Epiploon autem est membrana duplex, zonis adipeis longitudinalibus confita, stomacho, duodeno & lieni adhærens, intestinis supernatans, ac plerumque sub umbilicum descendens. Stomachus seu ventriculus, utriculi figura, in parte superiori abdominis transversim situs & sinistram magis, quam dextram respicit. Orificium superius, ubi terminatur œsophagus, & inferius, seu pylorus, corpore stomachi elatiora sunt. Quatuor ille componitur tunicis sibi quasi adglutinat, exteriori membranosa, secunda musculosa, tertia nervosa, & quarta sericosa; quales & in œsophago ac intestinis reperies. Conductus a ventriculo ad anum pergens, intestina omnia complectitur, quæ sunt vel gracilia, ut duodenum, jejunum, ileum, vel crassa ut cœcum, colon, & rectum. Intestina omnia canalem sexies corporis longitudinem superantem componunt, & nisi duodenum excipias, mesenterio adhærent, seu corpori membranoso, binis ex laminis constante, quibus intermediam reperies & texturam cellularem, & plura vasa, & plures glandulas conglobatas. Cœci in extremitate appendicem sic dictam vermiformem videbis. Et ad omnem coli longitudinem procurrentes adparent tres zonæ ligamentosæ, quæ quum breviores sint tunicis binis interioribus, rugas tunicis istis maximas inducunt. Anus, seu finis recti, musculo quodam, quem sphincterem dicunt, constringitur, & binis aliis, elevatoribus dictis, elevatur. Intestina gracilia medium tenent, & antè respiciunt; crassiora autem lateribus, & abdominis partibus superioribus æque ac inferioribus detinentur. Præter rugas istas, seu valvulas conniventes, alia quædam adest, valvula coli dicta, quæ fæces gracilium ut in crassia abeant permittit, at ut redeant, impedit. Pancreas post fundum stomachi, primam lumborum vertebra versus sita, figura canis linguam referens, & 8. ad 10. digitis longa, 2. ad 3. lata, & 1. crassa, flavido-rubicundum exhibet colorem.

Hepar est glans conglomerata voluminis magni, coloris fulvi, & substantiæ solidæ; nec maximam tantum partem hypochondri dextri, sed etiam anteriorem regionis hypogastricæ mediæ partem occupat; sæpius quoque sinistram hypochondrium attingit, præsertim in fœtu, quippe qui majori visceris capacitate gaudet, quum quidem adultus. Hepar plerumque 2. digitos transversales, magis etiam minusve ultra partem anteriorem costarum spuriarum prominet, prout scilicet diaphragma, cui adhæret, cujusque motum sequitur, vel ex latere ventris magis depressum, vel ex latere pectoris magis fuerit elevatum, & prout vel magis minusve plena sint intestina. Hepar plerumque in binos lobos abit, quorum dexter & maximus, sinister vero, minor dicitur, & magnam stomachi partem obtegit. Convexum est ac contiguum in superficie superiore, at concavam & inæquale in inferiore. Plures in parte concava adsunt profunditates, pri-

ma hepatis fissura, quia mediante lobi separantur; secundæ autem magnæque lobo anteriori inhæret vesicula fellis. Partibus sibi vicinis adhæret hepar, & præsertim diaphragmati, quatuor ligamentorum auxilio, scilicet: suspensorii, coronarii & binorum lateralium. Nec tamen ullum ex istis suspendendo hepati si verum quæris, inservit, sed saltem conservando in situ suo, ac impediendæ ejus agitationi. Plenitudine enim stomachi & intestinorum, hepar, intestina autem abdominis musculis sustinentur. Hepar enim, vacuis intestinis, suo pondere relictum, hinc inde agitur, & doloris sensum producit. Bili autem a massa sanguinis separando inservit hepar. Sanguis enim per arteriam hepaticam & venam portam hepati adfertur, venam portam autem constituunt coeuntes venæ plurium viscerum abdominis. Imo & arteriæ & venæ officio fungitur vena-porta, dum jam sanguinem hepati adfert, jam, efformata bile, & delatum, & arteriæ hepaticæ sanguinem reducit ad venam-cavam. Bilis autem in omni hepatis substantia, a massa sanguinis separata, poros biliarios egrediendo ex bile defertur. Quorum quidem canaliculorum varii minores coeundo majores constituunt, qui tandem in conductum hepaticum egeruntur, hic autem cum alio ex vesicula fellis exorto, coeundo, conductum communem seu canalem choledocum constituit, qui ad duodenum conducit bilem, eique prope ad orificium canalis pancreatici inferitur. Est autem vesicula fellis sacculus quidam membranofus, figura pyrum, & magnitudine ovulum gallinæ referens; qui colon pertingit, & colorem sui liquoris & ei impertitur. Plures autem fossulæ in superficie suprema vesiculæ deteguntur, cellulis alvearium similes, & rugis tunicæ sericosæ efformatæ. Spissescens quoque bilis, sæpius concretiones quasdam calculosas in ipso bilis liquore producit; hæ & colorem & saporem bilis retinent, & igni expositæ accenduntur, imo nonnunquam canalem cysticum & choledocum transeunt, & ex duodeno cum excrementis eiiciuntur. Quidquod bilis vesicula detenta, hujus turgescientiam sæpius efficit, quam, tumorem seu abscessum judicares ab extra. Lien est consistentiæ mollis & extensu facilis coloris livido-rubicundi, & oblique hypochondrio sinistro superjacet, sub diaphragmate inter stomachum & costas spurias; figura est ovali, & 7. ad 8. digitorum transversorum longus, 4. vero 5. latus, pars ejus costas respiciens, convexa, stomachum vero spectans, concava est, & hæc quidem stillicidio quodam in binas partes dividitur. Renes plerumque bini, dexter alter, alter sinister regionem lumborum occupant ad longum vertebrarum, & 5. ad 6. digitis transversis longi, 3. lati, & $\frac{1}{2}$. crassi, & figura sua fabam, Gallis: *haricot* dictam, adsimilare solent, sinistro plerumque paullo superiore. Triplicem præter ea substantiam ostendunt extremam, glandulosam seu corticalem, mediam vasculosam vel tubulosam, & interiorem, seu membranofam. Substantia corticalis colandæ seu separandæ urinæ, una cum sanguinis massa per arterias delatæ, inservit. Arteriæ autem in renibus distributæ emulgentes, sive renales audiunt. Una plerumque cuivis reni destinata esse solet. Eodem exteriori renis tegumento, seu ab adipe suo, membrana adipea dicto, & capsulæ atrabiliariæ, quas & renes succenturiatos, seu glandulas renales dicunt, obteguntur. Colore sunt flavido jam obscuriore, jam vero debiliore. Urether est conductus quidam membranofus, urinam ex pelviculo renis sensim separatam recipiens, deinde

autem

autem in vesicam deferens. Utrique uretheri calami est crassitudo. Et inter tunicas vesicæ progredientes ea ratione vesicæ inferuntur, qua duodeno canalus choledocus; ita ut urina vesicam quidem intrare, nec tamen eosdem per canales recedere possit. Vesica est sacculus quidam membranofus, in pelviculo recto, & ossi pubis ac recto intermedius; Vesica autem peritonæi sacculum egreditur, siquidem membrana ista non nisi in parte sua posteriore & superiore adhæret; ex quo adparet, quam ratione vesica in parte sua anteriore, extrahendi calculi ergo, possit diffecari, nec peritonæum lædatur.

Statim ex peritonæo, vesicæ fundum obtegente, tres aliæ tunicæ adparent, externa scilicet, fibris constans membranofis sive carnofis; media, quam tunicam nervosam dicunt; tertia autem interior sive sericosa. Uretheribus totidem tunicæ sunt; & collum vesicæ, quo canalus urinæ, seu urether continetur, in extremitate sua fibris carnofis circularibusque, ac sphincterem constituentibus, cingitur. Hic collum vesicæ constringendo, ut urina effluat, impedit, alias enim per guttas destillaret, prout ab uretheribus eodem deferretur. Varia cæterum & in viro & in muliere est uretheris longitudo, capacitas & directio. In viro enim 10. ad 12. digitis longus S, romanorum literam duplici sua incurvatura refert; in muliere autem vix duobus digitis longus, & una saltem incurvatura instructus est. Majoris tamen capacitatis est urether mulieris, quam viri. Uracum denique adpellant funiculum ligamentosum, quem in media superiore parte fundi vesicæ observamus; & binas arterias umbilicales dictas sibi junctas habet, quarum usus foetus respicit.

Partes præterea viri, generationi inservientes, sunt testiculi, sive binæ corpora glandulosa, plerumque extra ventrem conspicua, & scroto detenta. Figuræ sunt ovalis, & paullulum plani ex lateribus, pro magnitudine sua, in adultis columbæ ovum pertingere solent. Variis præterea involucribus testiculi obteguntur, iisque vel propriis, vel communibus. Membrana prima communis scrotum audit, quod non est nisi pellis continuata, & media dividitur linea quadam inæquali, futuram referente, unde & *raphè* audit, quæque ad ligamentum, quo cum glande præputium necitur, pertingit. Perinæum dicitur spatium scroto & ano intermedium. Intus autem membrana, dartos dicta, obducitur scrotum, & hujus quidem contractioni rugas scroti tribuendas esse scito; vel a frigore vel ex balneo orientes. Propriarum vero testiculi membranarum tres numeramus. Primam dicunt vaginalem, quæ extensione cremasteris, vel musculi suspensorii obtegitur; hic ad tunicam vaginalem descendit, & prout accedit testiculis, fibræ, quibus constat carnosæ, dilatantur, & earum expansione membrana oriri videtur, vaginali adhærens, & erythroides, seu rubra dicta. Tertia tandem propriarum testiculi membranarum, albuginea dicitur, & substantiam ejus tangit, imo producta & epididymidem, seu parastatam obtegit, vel corpus oblongum, erucæ simile, & superiori oræ testiculi superjacens. Exinde igitur canalus deferens exoritur, qui ad longitudinem vasorum spermaticorum adscendens, post partem vesicæ inferiorem posterioremque attingit, & intervallum utriusque vesiculæ seminalis, in quas conductus egeruntur, transit. Hæ sunt duo reservatoria membranosa & cellularia, 3. digitis transversalibus longa, & 1. lata, figura sua autem pyrum utrinque

depressum referunt. Bini earum conductus tenuissimi, seu ejaculatores, in urethere, prope ad collum vesicæ desinunt; postquam prostatas transiere, sive corpora illa glandulosa, quorum canales excretorii 10. ad 12. in urethra egeruntur, circum eminentiam illam in initio conductus obviam, quam veru-montanum adpellare solent. Ligamentum virgæ suspensorium, virgam alligat symphyssi ossis pubis. Cutis autem virgam obtegens, ubi in extremitate sua replicatur, præputium audit, illud freno seu filo, glandis parti inferiori cohæret. Partes vero virgæ propriæ sunt: corpus cavernosum, glans, & urethra. Illa scilicet uretheris portio, quæ a parte ossis pubis inferiore ad glandem producitur, undecumque textura quadam spongiosa involvitur, quod pluribus cellulis membranosis constat, & glandis substantiam componit, & ab initio urethræ bulbam, seu eminentiam quandam efformat.

Nec tamen texturæ hujus cellulæ cellulis cavernosi corporis respondent. Glans vero ex omnibus generationis partibus maximæ est sensibilitatis, & pars istius latissima coronæ nomen accipit. Urethra in glandis medio paullulum dilatata, & urethræ cavitas, portioni dilatatæ respondens, fossa navicularis audit. Utrique tandem virgæ lateri tres musculos esse scito: scilicet: erectorem, acceleratorem, & transversalem.

Partes vero mulieris generationi inservientes sunt: labia magna, vulva, nymphæ, clitoris, meatus urinarius, sive orificium conductus urinæ, vagina, matrix cum vasis suis ac ligamentis, tubæ Fallopiianæ atque ovaria.

Matrix autem, reliquis notabilior, est iatestinum in hypogastro, inter rectum & vesicam constitutum, quod plerumque pyrum depressum, aut matre prægnante fere globuli figuram refert. Partem ejus latissimam fundum, strictiorem vero collum appellant. Collum matricis itaque parum vaginam intrat, & foramine ovali, seu matricis orificio interno, perforatum est; matricis fundus binorum ligamentorum sic dictorum, latorum ope, cum tubis Fallopiianis, & ovariis, & regionibus iliatis connectitur, aut duorum auxilio, quæ rotunda audiunt, cum regione pubis. Tubæ Fallopiianæ in extremitatibus, scyphorum instar reflexæ, umbraculum constituunt, margine fimbriato atque resecto, quem frustulum fimbriatum dicunt, instructum. Digitis transversis 7. ad 8. longæ, latis adhærent ligamentis, horumque auxilio ovariis, quibus etiam portione frustuli fimbriati nectuntur. Ovaria autem sunt bina corpora exigua, albida, ovalia, ex lateribus matricis sita; eidemque non solum ligamentis istis latis cohærent, sed singula etiam rotundo ligamento alio, quod conductum veteres deferentem adpellavere. Densissima cæterum textura spongiosa, & pluribus componuntur vesiculis, limbo limbo liquore repletis. Hæc ova audiunt, & corticis speciem singula ex textura spongiosa accipere videntur.

Coitu utriusque sexus generatio præparatur, & actione spermatis masculini, in organa mulieris transmissi, perficitur. Etenim partes ovi in matricem delapsi, sensim evolvuntur, & non solum foetui, sed etiam placenta, funiculo umbilicali, membranisque originem largiuntur, receptaculis humorum, quibus innatat foetus.

Secundam ventris cavitatem, seu ventriculum medium, thoracem dicunt seu pectus. Hic latiore exhibet partem inferiorem, (diaphragmate fimbriatam,) quam superiorem, præcipuæ partium, quas continet, sunt cor & pul-

pulmones. Cor immediate pericardio, duobus mediastini foliis intermedio inclusum, est musculus cavus, & pro præcipuo organo circulantis sanguinis habeatur. Figura conicum est, & in media anteriore pectoris parte oblique situm adeo, ut basis ejus suprema sit, mediaque pectori respondeat, cuspide paullulum sinistram respiciente. Cordis in basi multum adipem, & quatuor videbis vasa majora, duabus cavitatibus respondentia, quas ventriculos dicunt, & pro situ suo in dextrum & sinistram, seu potius anteriorem posterioremque dividunt. Quatuor illa vasa duæ sunt venæ & duæ arteriæ, cuivis enim ventriculo alterutra vena atque arteria destinata est. Nec immediate in ventriculos egeruntur vasa, sed mediantibus reservatoriis duobus, sive auriculis; quarum altera dextro, altera autem sinistro ventriculo respondet, & utraque venarum insertionibus & orificiis ventriculorum intermedia est. Auriculæ dextræ respondens vena, vena cava audit, eidemque sanguinem ex omnibus corporis partibus proveniente adfert. Arteria pulmonaris illa dicitur, quæ sanguinem ex ventriculo dextro acceptum, pulmonibus distribuit; & vena pulmonaris illa, quæ eundem sanguinem auriculæ adfert sinistræ. Aorta denique, sive arteria magna dicitur, quæ ex ventriculo sinistro receptum sanguinem per totum corpus distribuit. Auriculæ in basi cordis constitutæ sunt bini muscoli excavati, quales ventriculi. Amplior tamen est auricula ventriculusque dexter, quam sinister. Ad tamen parietes ventriculi dextri tenuiores sunt, ac sinistri, utriusque etiam ventriculi cavitas ad cuspidem cordis protenditur, ubi tenuissimi sunt ejus parietes. Tres sunt membranarum in orificio ventriculi dextri, quas valvulas tricuspidales seu triglochines, ob figuram suam triangularem dicunt, & duæ in orificio ventriculi sinistri, seu mitrales, quia mitram obversam repræsentant. Imo in orificiis ventriculorum, arteriæ pulmonariæ & aortæ respondentium, membranæ valvularum modo dispositæ reperiuntur, ab illis & figura & cohæsiōe sua diversæ, & sigmoidæ dictæ; figuræ similitudinis ergo. Sanguinem igitur ex corde ad quasvis corporis partes deferri scito per arterias, ejusque partem per venas, iterum cordi adferri. Qui quidem continuus motus sanguinis ex corde ad omnes partes recedentis, & ex illis iterum cordi allati, sanguinis circulatio dicitur, quam primum ab *Harvæo* inventam esse volunt. Pulmones sunt duo corpora spongiosa, mediastino & corde, intermediis, separata. Dexter plerumque in ternos, sinister autem in binos separatur lobos, qui in innumeros lobulos subdividuntur. Posticus conspecti pulmones bovinum pedem referre videntur, & in infantibus rubrum, in adultis albo-cinereum, in senibus tandem cœruleum vel liveum colorem profitentur, ac membrana, pleuri adhærente, teguntur. Tracheam-arteriam illum dicunt conductum, qui in fundo oris enatus, ad partem mediam & anteriorem colli descendit, pulmones ingreditur, & innumeros in ramos ibidem dividitur. Laryngis sive partis superioris cartilago præ reliquis elevata, epiglottis audit, quippe quæ sub glottide sita est. Ubi autem quartam ex vertebriis dorsi tetigerit, trachea-arteria, in bina abit bracchia, bronchos dicta. Diaphragma dicimus septum illud musculosum, quo mediante pectus dividitur ab abdomine. Oblique autem situm anteriorem sui partem magis elevatam exhibet, quam posteriorem. Tria in eodem foramina majora observabis, scilicet: rotundum in parte ejus aponevrotica,

quod vena-cava transit; ovale, in parte ejus carnosâ, quo pars œsophagi inferior transeat; & tertium, transeunti aortæ inferiori, ac canali thoracico destinatum.

Capiti tamquam sublimiori corporis parti, non solum cerebrum, cerebellum, & medulla prolongata, cum vasis ibidem distributis, sed quoque præcipua sensuum organa, insunt. Cerebrum duplici membrana, pia matre scilicet, & dura matre involvitur. Altera ejus substantia, seu externa, cinerea vel corticalis, altera interna, alba dicitur, seu medullea. Sinus, vel anfractuositates cerebri illos nuncupant sulcos irregulares, quos in superficie substantiæ corticalis videmus. Quod vero separatim binis hemisphaeriis cerebri adparere videbis, corpus album, seu substantiam medulleam, hanc corpus callosum adpellant. Et vel nudo oculo & fugitivo ventriculos percipies, sive cavitates quasdam, in substantia cerebri excavatas, & septum lucidum, & fornicem tribus columnis innitentem, & plexum choroideum, & corpora striata, & strata nervorum opticorum, & eminentias, quas nates & testes dicunt, & glandulam pinealem, & alia his similia. Tum cerebellum sub posterioribus cerebri lobis situm, a cerebro, septo quodam, tentoriodicto, separatur; & altera substantia cinerea & corticali, altera autem alba constat seu medullea. In cerebello quoque ad longitudinem dissecto, omnem utrinque substantiam candidam, arborem quamdam, vitæ arborem dictam repræsentare videbis; & medullam allongatam sub cerebello, in parte ejus inferiore quinque eminentias, & originem 10. parium nervorum. Eminentiarum maxima annularis, vel pons varolii nuncupatur, secunda & tertia pyramidales, quarta tandem cum quinta, olivares audiunt; Ex medulla allongata autem pariter ac ea, quæ in canali spinæ continetur, varia nervorum paria proficiscuntur, dena scilicet ex medulla allongata, & tricena ex spinali.

Sceletum humanum abit in caput, truncum & extremitates. Caput cranium faciemque complectitur. Est vero cranium capsula quædam rotunda, vel parum ovalis, & ossea, quam octo ossa sequentia componunt: coronarium, seu frontale, occipitale, bina lateralia, bina temporum, sphenoides atque ethmoides. Quorum sex priora quidem ossa cranio propria, duo autem posteriora, cranio & faciei communia habentur. Et quum duriora sint in superficie sua, quam in medio crassitudinis: abeunt in tabulam externam atque internam, & partem mediam, sive Diploen, quæ substantiæ est spongiosæ. Facies autem variis partibus constat, quas sub maxillarum partibus generalioribus complectuntur; quarum altera inferior est, altera autem superior. Et hæc quidem immobilis, 13. ex ossibus constat, scilicet: binis maxillaribus iisque maximis, binis nasalibus, binis uvulæ, binis unguis, binis laminis nasi inferioribus, binis palati, & vomeris; tum vero 16. dentes continet, 4. nimirum incisivos, 2. caninos & 10. molares. Maxilla inferior non nisi unico osse constat, cui idem eorundem dentium numerus est. Truncus commode dividatur in partem communem sive spinam, & duas proprias, quæ sunt thorax sive pectus & pelvis. Spinam dicunt columnam osseam, 24. vertebri constantem, quarum aliæ sunt cervicales, aliæ dorsales, aliæque lumborum; & osse sacro, cujus extremitati os alterum seu coccyx jungitur. Thoracem 24. duodenæ utrinque costæ constituunt, quarum 7. superiores veræ, 5. inferiores autem spurias

audiunt , & sternum , ex partibus binis conflatum , & dorsales vertebrae . Pelvim bina ossa innominata seu coxarum componunt , anterior juncta , posterior vero ossi sacro adhaerentia . Sceletri extremitates in binas superiores totidemque inferiores abeunt . Superiorum quævis in brachium , humerum , cubitum & manum distinguitur . Humeri pars anterior clavculus , posterior autem omoplata audit . Brachium non nisi osse unico , quod humerum dicunt , constat . Cubitus binis absolvitur ossibus , radio scilicet & cubiti osse . Manus vero in carpum seu pugnum , 8. ex ossibus conflatum , & metacarpum , qui 4. constat ; & 5. digitos , ternis ex phalangibus compositos , dividitur . Extremitas inferior omnis in lumbum , crus & pedem distinguitur . Lumbo non nisi unicum os est , sive femur . Crus binis constat majoribus , tibia scilicet & perinæo , & exiguo uno , seu rotula . Pes tandem in tarsum , metatarsum , & digitos dividitur . Tarsus 7. ossibus constat , nempe , calcaneo seu tali osse , & naviculari , seu scaphoide , & cuboide , & tribus coneiformibus . Metatarsus quinque partibus constat , & digitorum etiam quinos numerabis , quorum maximus 2. reliqui 3. constant phalangibus . Præter ea quoque plura officula reperiuntur , quæ autem ab anatomicis sceletum conservantibus reiciuntur , ut officula auris , & os hyoides , & sesamoidæa . Numerus igitur omnium adulti ossium in capite 54. in trunco 54. (si coccyx unum , & sternum duo tibi exhibet) & 124. in extremitatibus , omnibus itaque in universum sumtis 232. absolvitur ; cui si 8. aurium officula , & tres præcipuas ossis hyoidis partes addideris , habebis 243. ossa , exceptis tamen sesamoidæis .

Supereft historia hominis naturalis , quam præeunte Cel. *Buffon* tibi L. B. exponamus .

Ex quacumque sui parte vel hominem respicias , vel aliis æquiparaveris , summam & illius præstantiam , & insignem differentiam hominis a bruto cognosces ; brutum enim ratione caret , homo instructus est , & naturæ est illi diffimillimæ , nec nisi externe accedentis . Qui autem arrepta hac similitudine materiali , reliquis omnibus missis , concludendo procedere vellet , quid ? nisi specie deciperetur , & constans reiiceret illud lumen , quo ad distinguenda ab apparentibus realia , instructos nos esse voluit clementia divina .

Præstructa igitur animæ rationalis existentia in homine , non nisi corporis sui historiam pro varia sui ætate variam perteximus .

Scire cupis , qualis præcise sit homo , respice , quæso , infantem dum nascitur , nec organorum nec sensuum ullus ipsi est usus , aliorum auxilio eget ; imago illa miseriæ & doloris , imo quovis animale imbecillior . Nascenti ex alio elemento in aliud transit , relicta enim aqua , qua utero matris detentus circumdabatur , aeri exponitur , illius impressiones in nervos odoratus , & organa respirationis experitur ; & motu quodam violentiori pectoris capacitas distenditur , aer pulmones ingreditur , & vesiculas inflat , & ad determinatum gradum rarefcit ; tum vero fibrarum dilatatarum elaterium reagendo aerem pulmonibus expellit . En principium motus & homini & animalibus adeo necessarii , ut statim desinente illo , & vitæ terminus adsit . Quanto autem cum dolore primum aerem respiret foetus , singultus gemitusque illius clare satis eloquuntur . Apertis , nec ut animalia , occlusis oculis nascitur homo , at fixis & immobilibus , nec recens na-

tus quidpiam distinguendi facultate gaudet; nullo enim objecto oculi illius inhaerent. Nec nisi quadraginta diebus saltem elapsis, risum atque ploratum edere incipit, antea enim gemitus quidem, at lacrymas nullas. Nec pedibus insistere nec sese rectum tenere valet, etenim brachia & lumbos, uti in matris utero detinebatur, adhuc complicatos ostendit; & omnimotui edendo insufficientissimus, supinus periret, nisi aliunde auxilium accederet. Plerumque recentis nati longitudo 21. digitis, & pectoris in longitudine sterni, 3. foetus vero nonum mensis agentis pondus 12. libris absolvitur. Cute gaudet tenuissima, & sanguinis transparentis ergo, rubicunda, imo albidissima tandem evadere dicitur, quæ ruberrima fuit, pelliculis. Nec iusta membrorum figura ac proportione instructus, turgescencia exhibere videtur membra. Tertio plerumque die icterus supervenit, & papillæ ejus lacte, digitis exprimendo, explentur, & pro succrescente magnitudine, partes turgidæ decrescunt. Verticem in nonnullis palpitantem videbis in regione fontanellæ, & sinuum sive cerebri arteriarum palpitacionem, manu omnibus admota, persenties. Huic fissuræ crusta interdum adeo crassa & scabiosa obducitur, ut dum arefcit, vel adfrictu sit abigenda. Ex liquore autem, qui amnio detinetur, vestigium, humor albidus viscosus in corpore infantis remanet, aliquoties vel adeo tenax, ut alio quodam liquore leniori, quo abeat irrigandus sit. Et nostro quidem sub cælo non nisi tepidos adhibere solent, at populis aliis vel frigidissimo sub cælo degentibus, moris est, ut recentes natos frigidissimæ aquæ immergant. Nivi suos immittere dicuntur Lappones, usque dum membra omnia frigore rigeant, & respiratio cesset, post vero balneo calido eos indere, bis terve etiam omnibus primi anni diebus, eadem illos ratione tractare, subsequenter autem aliquoties tantum frigida aqua lavare. Qui enim Septentrionem inhabitant, censent, frigiditate balneorum robur ac fortitudinem corpori accedere. Sane quanta sint, quibus perferendis corporis nostri vires sufficiant, quibusque limitibus terminentur, & quanta vel usu & exercitio adquiri, quantaque neglecto exercitio perdi possint, ignoramus. Sic qui Isthmum Americanum accolant, Indi, sudore obtekti, impune aquæ submerguntur, mulieres vino ebriæ, aquæ frigidæ sese immergunt, sic enim ebrietatem profligare posse censent, & matres vix edito partu, una cum illo aquam ingrediuntur; & vix unquam ex partu pereunt; nostris tamen in terris, tanta puerperarum copia decedit, quantumcumque easdem curemus.

Foetus, paucis momentis ab egressu suo ex utero, ignis calore persentito, urinam, interdum etiam meconium seu excrementa intestinis suis inhaerentia reddit, id quod jam citius, jam segnius accidit, at nisi primo vitæ die evenerit, mediis succurrendum, ne doloribus colicis infans corripatur. Meconium nigridi solet esse coloris, & omne prorsus ejectum esse ex immutato ejus colore, ac in albidum degenerante, imo foetore ejus acutiore cognoscet; dum scilicet, ut secundo vel tertio in die fieri solet, & bilis & humores amari eidem admiscentur. Nec tamen nisi duodecim horas postquam natus fuerit infans, uberibus admoveatur. Statim ex quo matris uterum relinquit, fasciis obvolvitur, quemvis sui motum impediens; nec tamen nimis constringatur, ut respirandi facultas libera supersit, & ex latere reponatur, quo ore eicienda aqua, sua sponte profluere
pos-

possit. Ast num fatius illi Africæ, Indiæ & Americæ populi, qui suos infantes haud fasciis involvunt, sed vel nudos vel pellibus aliisve obtectos, in incunabula reponunt? Nisi fatius, certius tamen, etenim pluribus incommodis nostra, quam illorum ratio infantes curandi premitur.

Vix enim tanta cum levitate fascias obducere valet quispiam, ut nullum prorsus dolorem ex constrictione infans persentiat; ille igitur quantis potest motibus violentioribus constrictioni resistere solet, ac plus damni ex hac violentia, quam ex libertate plena recipit. Pari ratione autem & inactio illa penitior, qua fasciis detinentur, noxia evadit infanti. Deficiente enim exercitio membrorum excretio retardatur, vires decrescunt, & qui fasciis nullis detinebantur, infantes, majoribus corporis viribus instructos videbis adultos. Hinc quoque Peruvianorum antiquiores incunabilis spatiosissimis reponebant infantes, & ex iis protractos largiori terræ fossæ, linteis obductæ imponebant. Cui quum medio saltem corpore detinerentur, libero brachiorum motu, absque periculo lapsus seu læsionis, gaudebant; & statim ex quo pedem terra defigendi vi quantulumcumque gaudebant, mamma e longinquo detenta ad incedendum adigebantur. Imo quum Mauræ, matres, labores perficiendo, suas mammas præbeant infantibus, hi quantum fieri potest, coxis humerisque matris adrepere & adhærere ediscunt, nec motibus ejus ac agitatione decidunt. Secundo jam vitæ mense, manibus pedibusque reptare incipiunt, & hoc exercitio eadem ratione adeo faciles ac pedibus procurrare ediscunt.

Somno quamvis multo, sæpius tamen interrupto infantes fruuntur, imo egent frequentiori nutrimento. Binis diurnis horis, & noctu, quoties evigilant, uberibus admovendi. Imo quoties clamore & gemitu opem requirunt, prompte succurrendum, & vestimenta seu lintea mundata substituenda sunt. Etenim quum Americæ incolis haud tanta sit pellium copia, quanta nobis linteæ telæ, illi tamen materia quadam substrata, sæpius subducta ac renovata, linteæ mundatæ defectum suppleant. Et in primis pulverem ex arboribus a vermibus corrosis adhibent, eumque fundo incunabulorum, pro contrahenda absorbendaque humiditate inspergunt, sæpius commutant. Has vero tot tantasque curas, adeo necessarias a matris adfectu saltem, nec nutrice, mercede conductæ, sperare poteris. Aliæ ex his infantes curæ suæ commissos, vel integras per horas deferunt; aliæ autem nullæ moventur eorum gemitu, tunc quasi desperatione incitati infantes, quantos & quousque possunt gemitus, imo clamores extollunt, & vel morbis corripuntur, vel molestiæ nimis ergo, multum ex virtute temperamenti ac animi futuri robore amittunt. Aliæ autem nimis desides atque negligentes, violentiori incunabulorum agitatione, gemitus infantum sedare solent, seu potius reprimere; hæc enim agitatio primo quidem delectationi cedit infanti, post autem vertiginis speciem, tandemque somnum inducit. Ast coactus ille somnus, remanente mali præsentis causa, brevissimus est, & nimia incunabulorum agitatio non solum vomitum, sed etiam capitis cerebrique concussionem producit. Oculi infantis clarissimum semper diem respiciunt, quo quum non nisi alteruter oculus pervenire possit, alter minori semper virtute gaudebit. Hinc incunabula tali ratione constituas, ut luce, ex pedum regione proficiscente, parique, oculus uterque adficiatur. Alias enim luscus erit infans, & *Acta Academiae Scientiarum*, anni 1743.

luscitionis causam esse perhibent dissimilem utriusque oculi virtutem. Quam robustus autem infans videatur & fortis, omni tamen omnino ejus nutrimento lac ex mammis suæ nutricis cedat, ad minimum, per tres vel quatuor menses vitæ primos. Belgicæ, Italicæ, Turcicæ & Orientales mulieres omnes, vel primo ætatis anno, nil nisi lac matris, nutrimento infantis exhibent. Canadienses vel septem annorum pueris adhuc ubera præbent. Nutrices vero nostrates, lacte parciore instructæ, ex farina & lacte vel juscule compositam pulvem vel primis vitæ diebus infantibus offerunt; quæ explendæ quidem sufficit fami, ast quum stomachus & intestina infantium vixdum aperta, digerendo alimento adeo crasso atque viscoso haud sufficiant; morbo illi & indigestionibus correpti sæpius emoriuntur. Urgente tamen necessitate & lac animale muliebri substitui potest. Etenim ruricolos vidimus, robore aliis nullos cedentes, qui nullo, nisi caprino vel ovino lacte fructi fuerant.

Secundum denique vel tertium ætatis mensem agenti solidius aliquod nutrimentum exhibeas. Panem excoctum præ aliis commendamus, quippe qui futuris nutrimentis recipiendis sensim accommodat stomachum. Dentium incisivorum germina prima plerumque conspiciuntur, septimo vel decimo imo duodecimo vitæ mensæ; interdum & præcocius, siquidem & alios infantes dentibus suis mammarum papillas commordere, imo alios, adhuc embryones, dentibus jam instructos esse constat. Dentium germina ab initio quidem alveolo detinentur, & gingiva teguntur, excrecendo autem ad fundum alveoli radices transmittunt, & ex parte gingivæ extenduntur. Dens igitur enascens sensum sensimque membranæ propior, primo eandem distendit, post dirumpit, sicque tandem transit & egreditur. Et hæc quidem actio, legibus naturæ alias in corpore agentis, contraria est, violentior scilicet, interrupta, ac dolorosa; hæc gemitus ploratusque causa evadit, & tristitiæ signa inducit, & primo quidem inflammata gingiva rubescit, post vero albescit, & continuo digiti tactu pruritus profligare quærunt infantes; cujus ergo & pro crepitaculo frustulum eboris vel alius materiæ solidioris illis exhibere solent, quod quum sua sponte ori admoveant, gingiva comprimant, violentior iste actus agenti denti oppositus, momentaneum auxilium adfert, dolorem lenit, gingivamque relaxat; & ad dirumpendam facit gingivæ membranam, plurimum tamen non nisi multo cum periculo ac labore gingiva dirumpitur. Nono vel decimo mense 4. canini, incisivos excipientes, egrediuntur. Et secundo tandem anno 16. denuo alii, molares dicti seu maxillares, quaterni ex quovis caninorum latere, procedunt. Incisorii tandem, canini ac maxillarium 4. priores, quinto, sexto vel septimo ætatis anno plerumque effluunt, alii iisdem succedunt. In quavis autem extremitate maxillarum alii quatuor adsunt dentes, in aliis seignius enascentes, in aliis autem pubertatis tempore, quos dentes sapientiæ nuncupant. Varii sunt, qui per ætatem hominis omnem dentes succrescere, & sensim majorem longitudinem adquisituros fore volunt, nisi continuo alimentorum adfrictu detererentur. Experientia autem refragari videtur, etenim, qui liquidis tantum alimentis gaudent, quamvis nulla duriora accipiant, nec tamen aliis longiores exhibent dentes, quos, si deteruntur, mutuo adfrictu potius detritos pronuntiarem.

Communis capillorum color in infantibus, flavescent seu albus est, interdum rufus, interdum niger, omnes tamen, quorum capilli vel albi, vel castanei sunt, vel debilioris vel fortioris coloris pilos, jam infantes commonstrant. Ex nimio etiam eorum ploratu herniæ vel secessus oriuntur, qui nisi ligamentorum ope reprimuntur, sanatu per totum vitæ tempus erunt difficillimi. Minus tamen frigoris sensu adficiuntur infantes, quam prodeuntibus annis, & venarum ex pulsu in infantibus frequentissimo, majorem eorum calorem dijudicare poteris. Imo vita infantis admodum incerta est, usque ad tertium ejus annum, postea autem major eidem certitudo accedit, & qui septimum vel octavum attigerit, illum præmaturæ mortis periculo exemptum habeas. Quæ enim Londini prodeunt tabulæ annuæ de hominibus quovis anno mortuis, subnexa eorum ætate, illæ, inquam satis aperte loquuntur, quod infantum eodem tempore natorum ad minimum pars quarta, primo ætatis anno, secundo jam tertia, tertio autem, ad minimum dimidia moriatur. Nec tamen, quæ idcirca Londini accidunt, ubivis accidere constat. Vir enim Cel. *Duprè S. Mauriti*, varias & suas Observationes in Gallia instituit, & dimidiam recentium natorum partem, non nisi 7. ad 8. annorum spatio tandem exstingui refert. Quod ad excretionem humani corporis spectat, in eadem observandum est illud discrimen, quod foetus, utero detentus, continua excretionem in dies adaugeatur, infans autem ad pubertatis tempus, fere nullo, tum vero repentino & brevissimo incremento omnem suam magnitudinem capiat. Cæterum quum nutricis sanitas multum dubio procul faciat ad sanitatem infantis, curandum est, ut & illæ proba corporis sanitate vigeant; sic enim morbos nutricis infantibus communicatos esse, & infantum infirmitates in nutrices transisse, imo villam integram virus venereo infectam esse novimus, quod a nutricibus quibusdam eo adportatum fuerat, quæ infantes suos aliis mulieribus lactandos commiserant. Suæ matris lac infanti convenientissimum est, & fortius ac robustius corpus producit. Infantes sunt, qui bimuli jam distincte pronuntiant, & voces imitantur, alii autem non nisi secundo & dimidio anno, imo segniores, voces articulare noscunt. Qui autem nimis segniores voces proferre incipiunt, illi numquam nec adcurate, nec facile verba pronuntiare solent.

Pubertas, adolescentiæ comes, juventutem præcedit. In infantia sæpe unicus, interdum & nullus testiculus in scroto. Nec tamen eisdem carere iudices juvenem, quamvis carere videatur. Sæpius namque testiculi abdomine continentur, vel musculorum annulis nexi sunt; & tunc superatis sensim impedimentis, situm sibi proprium descendendo occupare solent; id quod plerumque octavo vel decimo vitæ anno, vel ipso pubertatis tempore accidit. Hinc non est quod timeas de puero, in quo vel nullum vel unicum saltem testiculum observaveris. Rarissime in adultis delitescunt testiculi, & sub tempus pubertatis natura ipsa eos protrudere conatur, adjuvante nonnunquam morbo quodam, nonnunquam motu violentiori, ut saltu seu lapsu graviore. Quidquid ne illum quidem ad generandum ineptum dicas qui testiculos delitescens gerit, imo potius majori vigore pollere solet. Sæpius quoque unicus tantum testiculus adest, hic autem solito major esse solet, nec generationis obstaculo cedit. Interdum tres adeste solent testiculi, quos qui gerunt, illi summa ac singulari virtute animi,

corporisque vigore eximio pollere dicuntur. Sane, quantum ad animi fortitudinem & alacritatem partes istæ faciant, jam ex animalium intuitu ediscere potes. Adspice taurum & respice bovem, vide verrem & arietem, seu gallum & caponem. Singularis insuper nobisque ignota est connexio inter partes genitales & gutturis; Eunuchi enim barba carent, vocem quamvis fortissimam & acutam, numquam gravem edere valent. Quidquod vel in viris, dum pubescunt, vox immutatur, & fœminæ, voce fortiori gaudentes, ad Venerem propensiores habentur. Vox pubescentis nimirum, inæqualem ac raucum sonum acquirit, ac satis diu conservat, quo spatio elapso fortior, gravior pleniorque evadit, quam quidem fuerat. In pueris tamen majorem vocis mutationem observabis, quam in puellis, siquidem hæ vocem natura acutiorem habent. Hæc igitur pubertatis signa utrique sexui communia, alia autem alterutri propria sunt, ut si de puellis quæras, menstruorum eruptio, ac excretio sinus; si vero de pueris, barba & emissio liquoris spermatici. Nec tamen constantia sunt recensita pubertatis signa. Sic barba haud semper pubertatis comes dicatur, etenim vel integri populi fere prorsus imberbes reperiuntur aliorumque fœminæ pubescendo nullum sinus incrementum ostendunt. More tamen universæ generis humani speciei communi, mare citior fœmina pubertatem attingit; ast terminus eidem destinatus pro diversitate populorum varius est, & ex temperamento cœli, ac qualitate alimentorum, ex parte saltem, pendere videtur. Qui enim in urbibus vivunt, ac delicatioris vitæ commodis fruuntur, nutrimento insuper succulento & abundanti sustinentur, hi citiores, qui autem rure degunt, vel durioris suæ conditionis ergo parciore & peiori cibo aluntur, illi biennio trienniove tardiores pubescere solent. In meridionalibus Europæ plagis ac urbibus, puellæ decimo & secundo, pueri decimo & quarto vitæ anno puberes dicuntur; ast in regionibus Septentrionis & rure, puellæ vix decimo & quarto, pueri decimo & sexto. Quæ calidissimas Asiæ, Africæ & Americæ terras incolunt, puellæ, decimo, imo nono ætatis anno puberes esse solent; fluxus menstruorum citior, quamvis parciore ibi incipit, quam in terris frigidis; cujus periodus idem fere ubique, & magis diversus est respectu individuorum, quam respectu populorum. Earum enim quæ eodem sub cœlo vivunt aliæ secunda quavis hebdomade, aliæ non nisi sexta vel septima redeunte, aliæ tandem & plurimæ, quovis mense redeuntem menstruorum fluxum experiuntur.

Menstruorum quantitas ex quantitate alimentorum & transpirationis insensibilis pendere videtur. In his enim, quæ lautiores vivunt, & minori laborum exercitio defatigantur, abundantiora, in illis autem, quæ sub calidiori cœlo viventes fortiorem transpirationem insensibilem experiuntur, parciora solent esse menstrua. Fluxus ipsius periodus tribus plerumque, quatuor vel quinque, in aliis & septem vel octo diebus absolvitur. Sæpius antequam pubertatis signa ediderint, prægnantes reperiuntur; varias enim ante menstruorum eruptionem matres fuisse constat, imo aliæ nostratium, numquam menstruorum fluxum expertæ genuerunt. Gentes esse dicuntur, quarum mulieribus nulla umquam menstrua. Menstruorum fluxus, quadragesimo vel quinquagesimo anno, ut solet, desinens, haud apud omnes sterilitatis signum evadit, etenim vel sexagesimum imo septuagesimum annum agentes imprægnatas fuisse novimus. Attamen ex lege naturæ com-

muni, mulier ante eruptionem menstruorum imprægnari nequit, & cessante menstruorum fluxu effœta judicetur.

Per omne pubertatis spatium, ac annos proxime subsequentes corpus humanum omnem sibi destinatum altitudinem excrescendo acquirit. Juvenum alii peracto 14. vel 15. alii autem effluxo 22. vel 23. tandem crescere desinunt. Quo quidem tempore corporis statura gracilior atque agilior esse solet, lumbi ac crura tenuia, partes musculosæ omnes, carne sibi convenienti egent; sensim vero carnis copia succedit, muscoli procedunt, explentur intervalla, membra conglobantur, & totum corpus, ante trigesimum vitæ annum, sibi destinatum perfectionem omnem attingit. Citiores plerumque fœminæ; etenim præcocior earum pubertas, & excretio, minor quam Virorum, breviori tempore perficitur. Sui enim corporis muscoli, caro & partes reliquæ, nec fortitudine nec soliditate ac robore virilibus pares, minori temporis spatio egent, quo penitus explanari possint seu perfici, hinc vicesimo anno plerumque corpus mulieris, viri autem tricesimo saltem perfectum dicatur. Viri corpus pulcrum dicatur tum, quum latius fuerit ac ponderosum, quum musculis bene elevatis & fortiter expressis, membrorum compage rudiori, & lineamentis faciei facile innotescantibus instructum fuerit. Mulieris corpus lineamenta delicatiora, tractus leniores, formam magis conglobatam exhibet; viro enim propria est fortitudo atque majestas, mulieri autem pulcritudo ac suavitas.

Cæterum sive virum sive mulierem respicias, terræ dominium, ipsis proprium ac destinatum, vel corporis intuitu statim cognosces. Rectum se tenet homo ac elevatum, imperantis situm referendo, capite elato cœlum spectat, faciemque exhibet augustam, ac dignitatis suæ notas eidem impressas ostendit. Animæ imaginem in physionomia delineatam vides, & naturæ suæ excellentia, organa sensoria transiens, eximio ac quasi divino vigore partes faciei omnes vivificat. Corporis forma nobilis, gravis incessus, omnia dignitatis ac excellentiæ suæ indicia sunt minime dubia. Terram non nisi remotissimis sui corporis extremitatibus tangit hanc non nisi remotior conspicit, ac dignitatis suæ sibi conscius spernere videtur. Nec brachia pro sustinendo corporis pendere data sunt, nec manus ad suffodiendam terram, ne adfrictu reiterato, tactus sensum, sibi præcipuum, amittant. Nobiliori potius usui & manus inserviunt & brachia, nempe perficiendis voluntatis jussis, arripiendis quæcumque sunt remotiora, removendis obstaculis, evitandis impedimentis, quæ noxæ esse possent, attingendis tandem & retinendis omnibus iis, quæ sensuum reliquis admovenda judicabuntur.

Infantum partes superiores inferioribus longiores esse solent, lumbi enim & crura nondum dimidiam altitudinis corporis partem constituunt; prodeuntibus deinde annis majus incrementum inferioribus quam superioribus corporis partibus accedit; & cessante tandem incremento, crura cum lumbis dimidiam circiter altitudinem corporis constituere videbis. Pars anterior pectoris in mulieribus magis prominet quam in viris, ita ut plerumque capacitas pectoris a costis efformata amplior sit in mulieribus, at in viris latior, scilicet respectu partium reliquarum. Coxæ mulierum fortiores sunt, siquidem ossa coxarum & illa, quæ his juncta pelvim componunt, latiora sunt, quam quidem virorum. Quæ quidem differentia con-

formationis in pectore & pelvi obvia, statim innotescit, & pro distinguendo sceletro masculino a foeminino sufficit. Altitudo corporis humani integra admodum varia est; maxima 5. pedibus & 4. ad 5. imo 8. ad 9. digitis absolvitur; mediæ magnitudinis hominem dicunt illum qui 5. pedes & 3. ad 4. digitos adtigerit; minima denique altitudo hæc est, quæ nondum 5. pedes pertingit. Mulieres plerumque 1. ad 3. digitis breviores esse solent quam viri. Et quamvis corpus humanum delicatius videatur, quovis alio corpore animali, nervosissimum tamen est, & forsan, voluminis ratione habita, fortius quam vel animalia quæ fortissima novimus. Si forsan leonem homini æquiparare velis, cogitandum, leonis ungulas & dentes, sua arma, sinistram fortitudinis suæ opinionem nobis inducere, fortitudini ejus ea tribuimus, quæ armis suis competunt. Arma autem, quæ homini natura dedit, haud offendendi ergo accepit; licet artis auxilio, vel leoninis ungulis ferocius armatas habeat manus. Si enim accuratius hominis & reliquorum vires comparare velis, pondus respice, cui deportandæ sufficiunt. Ec bajuli Byzanthini vel 900. librarum pondus portare dicuntur. Respice quoque ad exercitii continuationem, ad agilitatem motuum, & exinde vires cognoscere poteris. Homines cursores cursus rapiditate equos superant, saltem diutiori cursui perferendo sufficiunt. Homo solito incessu progrediens, plus itineris per diem conficiet, quam equus, & homo, peracta plurium dierum via, iter continuare poterit, dum equo, viribus exhaustis, ut quiete se reficiat, opus erit. Sexcenta sunt, quæ de agili populorum silvestrium cursu enarrant; homo societatis commercio excultus suas ipse vires ignorat, vitæ mollitie perdit, nec violentiori exercitio adauget. Sæpius quidem & inter nos homines insolito robore gaudentes reperiuntur; ast quænam utilitas exinde redundare potest, dum in societatibus vivunt, ubi plus spiritus quam corpus operatur, & labor manuum non nisi infimæ conditionis hominibus relinquitur. Mulieres viribus multo sunt inferiores viris, & virium suum abusum principaliorum vir facit tum, dum mulierem, ut quidam solent, gaudiorum pariter ac molestiarum sociam, servili ratione tractare conatur. Sic illi Americæ populi mulieribus terram colendi laborem relinquunt, viri autem suo stragulo suspensio negligentes recumbunt, non nisi vel venatum vel pisces captum exspatiantur, & per integras horas erecti, stragulo suo resident. Ignorant enim, quid sit delectationis ergo exspatiari; nec intelligunt, qui fieri possit, ut recta via progrediamur, eademque via deinceps revertamur; nec mente sibi concipere valent quamobrem molestiam adeo inutilem suscipiamus? vel motum, qui nullius est usus, edamus?

Ut autem quævis naturæ corpora immutantur, deteruntur, pereunt: sic & corpus humanum, vix accepta sua perfectione, destruitur. Sub destructionis initium, nulla quidem illius indicia; ast prodeunte tempore membranæ in cartilaginosa substantiam degenerant, cartilagine in osseam, ossa solidiora, fibræ duriores evadunt, cutis arefcit, rugæ adparent, canities comæ inducitur, effluunt dentes, facies deformis redditur, corpus curvatur. Ante quadragesimum annum destructionis initia exoriuntur, tum lenta ad sexagesimum usque adaugentur, rapidiora a sexagesimo ad septuagesimum, tum caducus in dies decrefcit, fit decrepitus, & mors, senectutis ac vitæ finis plerumque ante nonagesimum seu centesimum annum sequi-

sequitur. Quum autem ossa, cartilagine, muscoli & reliquæ corporis partes molliores ac minus solidæ sint in mulieribus, quam in viris; illæ diutiori spatio egent, quo soliditatem illam, mortis causam, adquirant; hinc diutiori temporis tractu senescunt. Et si tabulas annuas mortuorum consulere velis, adparebit: fœminas, si certum vitæ terminum adtigerint, longæviores evadere viris, eosdem annos agentibus. Exinde liquet viros, qui imbecillitatis speciem exhibendo, mulierum constitutioni propiores accedunt, longæviores esse his, qui forte ac robustum corporis temperamentum, adpectu loquuntur. Imo creditu est, mulieres pariter ac viros, qui reliquis segniores excreverant, longæviores fore, in casu utroque enim ossibus, cartilaginibus & fibris omnibus segnior ille soliditatis gradus accedit, quem causam destructionis eorum esse diximus.

Summa tamen est hominum varietas; Lapponia enim & Septemtrionales Tartariæ partes, hominum genus brevissimum, figura singularissimum, & morum feritate corporis deformitati respondens, exhibent. Et quamvis a communi hominum specie degenerasse videantur, spatiosissimas tamen regiones adimplent. Hi facie obtusa & lata, naso recurvato & depresso, iride oculorum flava, fulva & nigrescente, palpebris versus regionem temporum retractis, genis valde turgescens, ore hiant, inferiore faciei parte constricta, labiis crassis & prominentibus, voce tenui, capite amplo, coma nigra atque splendens, pelle tandem fusca instructi sunt, brevissimi, macilenti, ad summum $4\frac{1}{2}$. ad minimum 4. pedibus alti. Horum omnes mulieres virorum deformitatem referunt adeo, ut vix sexus discrimen adpareat; Groenlandicæ minimæ sunt, sed aptissima membrorum conformatione gaudent, papillas insuper tam molles atque productas exhibent, ut infantibus dorso illarum inhaerentibus mammam præbere possint. Carbonis nigredinem referunt papillæ, & cutis omnis colorem oliveum. Populi isti non solum deformitatem sibi communem habent, & corporis brevitatem, & oculos ac comam eodem colore tinctos, sed etiam morum animique similitudine sibi accedunt, omnes enim superstitionis pleni, inculti, stupidi. Lappones, Danico sceptro subjacentes felem majorem nigram, penatum instar, colunt, huic secreta animi cogitata exponunt, ab hac agendorum consilia exposcunt, ex hac quærunt: num hodie venatio vel piscatio instituenda sit, nec ne? Lappones, Sueciæ parentes, tympanum, cuiusvis familiæ sacrum adservant, & hujus ope diabolum consulunt; tanta sunt timiditate, ut quamvis viribus corporis & cursu leviori gaudeant, numquam castra militum sequantur. Agminatim vulpes, martores similia, venantur, horum pelles, mercis instar, pro tabaco, & aqua vita, deliciis suis, commutant. Piscibus arefactis, vel carne rangiferi & ursi pro cibo utuntur, panem ex farina ab ossibus piscium in pulverem redactis, & cortici betulæ vel pini admixtis proficiscentem, componunt; plurimi illorum sale abstinent; potum ex oleo balænæ & aqua conficiunt, cui aliquot baccas juniperi infundunt. Nullam nec religionis, nec Entis Supremi ideam insitam habent, plurimi idololatriæ adherent, & superstitione sciant. Nudi, nec sexus, sive consanguinitatis respectu habito, balnea calidissima ingrediuntur, quibus peractis frigidissimo fluvio sese immergunt. Advenis filias suas atque mulieres offerunt, & si cum illis consuescere velis, id maximo sibi honori ducunt. Lintei usum ignorant, & per hyemem

pellibus rangiferorum, per æstatem vero pellibus avibus subtra&is sese induunt. Mulieres Novam Zemblam tenentes nasum sibi & aures perforant, iisque lapides cœruleos induunt, frontem & mentum cœruleis zonis depingunt; viri barbam in circulum refecant, nec comam gerunt. Groenlandicæ mulieres pellibus canis marini vestiuntur, faciem flavido & cœruleo colore pingunt, & auribus varia ornamentorum genera induunt. Sub terra degunt, id est in speluncis arborum, corticibus seu ossibus piscium tectis, alii tamen fossas subterraneas effodiunt, quarum ope ex caverna in cavernam transire possint. Noctem plurimum mensium experiuntur, cujus ergo lampades perpetuas conservant quarum nutrimento balænæ adeps, suus potus, venit. Nec æstas ipsis felicior est, etenim densissimo fumo obnubilati vivunt; sic scilicet copiosissimum muscarum agmen, quo infestantur, abigere quærunt. Quam tristis igitur sit vita, numquam tamen illi ægrotant, sed summam plerumque senectutem attingunt; nec senes quidpiam vigoris amisisse videntur; cæcitati saltem frequentes subjacent; quippe quorum oculi, jam splendore nivis, verno, autumnii & hyemis tempore perstringuntur, jam fumo per æstatem occæcantur.

Qui Tartariam tenent, illi ex Sinensibus & Russis Orientalibus oriundi, originis vestigia in facie gerunt; frequens enim inter Russos & faciei similitudo cum Tartaris. Russi enim, quamvis originis ejusdem, ac reliquæ Europæ gentes, multos exhibent, qui corporis forma crassiore, & lumbis fortissimis, cruribusque brevibus Tartaros referunt. Sinenses Tartaris similiores, ast animi & morum ratione dissimiles sunt, imo nec ex hisce provenire creduntur. Tartari enim animo sunt bellicoso, acri, venationis cupidi, molestias quærunt, libertatem spirant, domari nequeunt. Sinenses autem animo sunt molli, pacifici, superstitiosi, humiles, serviles, ac cæremoniis abundant; faciei notas tamen communes habent cum Tartaris, faciem latam, oculos parvos, nasum depressum, barbam fere nullam. Sinensibus Japonenses simillimi sunt, & originem communem loquuntur, nisi pellis colorem magis fuscum excipias, qui tamen ex tractu quem tenent, magis Meridiem spectante, pendet. Animum moresque cum Sinensibus communes habent, imo commune genus stultitiæ, qua mulierum pedes adeo constringere solent, ut excresci amplius nequeant, & vix sustinendo mulieris corpori sufficient.

Qui Mogoli parent, & Indiam colunt, faciei corporisque conformatione Europæ populis accedunt, ast colore ab iis differunt. Mogolis terram habitantes viri oliveo sunt colore, mulieres coloris ejusdem, frequentia balnea amant, crura & lumbos longissimos, corpus vero brevissimum, ratione nostratium oppositæ, ostendunt. Teste *Thevenotio* castissimæ sunt atque foecundissimæ, & magna cum facilitate partus edunt, imo sæpius postridie ex editu partu exspatiantur. Ceyloniæ gentes & Malabariam tenentes, auribus latis, flaccidis & pendentibus gaudent, animi mitioris signa in facie gerunt, sed agiles sunt, acres animo & fortes. Comam habent nigerriam & viri brevissimam, viri fere nudi incedunt, mulieres autem, more Indis communi, sinu relecto. Goa, urbs, caput Lusitanorum apud Indas, vel hodie adhuc multum pristini sui splendoris conservat, plurima ibi mancipia coemuntur, & ex quacumque Indiæ parte confluentes virgines atque puellas venum expositas ibi reperies, jam candidas, jam fuscas, jam

nigras, & artibus acu pingendi, & musica instrumenta tractandi peritissimas. Persæ his adjacentes multa similitudine illis accedunt, imo hodie Georgianis atque Circassis mixti, haud mediocres pulchritudinis incrementum, ex his, omnium pulcherrimis populis, acceperunt.

Omnes vero Persæ, regionum Turcicarum, Arabiæ, Ægypti ac Barbariæ populi, unam eandemque nationem cognoscunt, ex qua, Muhammedis tempore provenerunt, & vastissimas exinde terras occupando variis populis sese admiscuere. Persæ, Turci & Mauri, quodammodo cultiores dicendi, Arabes autem independentiam suam, spretis legibus conservando ceu Tartari absque regula, lege, & Societate degunt; Principes eorum ex raptu & latrocinio vivunt, sicque vitiorum immunitas populo. Virtutem spernunt, vitii gloriam quærunt, & conventionum humanarum has tantum admittunt, quas fanaticismus & superstitio sancitas cupit. Arabes punctula cœrulei coloris, brachiis, labris, aliisque corporis partibus imponunt, deinde autem acus ope pelli intrudunt, sicque stigmata sempiterna sibi imprimunt. Zelotypi esse solent Arabes, & mulieres suas, licet velare coemptas, vel raptu subductas leniter imo observanter tractant. Mulieres Comaniæ, Circassæ & Georgianæ, teste *Tavernier*, pulcherrimæ sunt sunt, ac eleganter exstructæ; vel 50. annum agentes, vix quidpiam vigoris amisisse videntur, molestias laborum constanter perferunt. Maxima etiam matrimonii libertas apud illos obtinet, vir enim, si de uxore sibi exosa primus causam dixerit apud judicem, hic uxorem publice venum exponit, marito aliam adjudicat; sic & uxor si marito prior judicem adierit, maritus venditur, uxori remanet libertas. Nec Mingreliæ gentes inferiores sunt pulchritudine, & tres populi isti, non nisi unicam hominum speciem componere videntur. Mingrelia, sic *Chardin*, mulieres pulcherrimas offert, faciei & corporis præstantia, & morum suavitate incomparabiles; oculis earum nescio quæ illecebræ insunt, vix illas adspicies, & irretieris. Quæ autem pulchritudine sunt inferiores, seu ætate provectæ, illæ multo fuso faciem & cilia obducunt. Vestimenta Persarum more gerunt, & vero verticem & sinciput obtegunt. Ingenio pollent, & urbanitatis speciem exhibent, at tamen vix perfidiæ genus excogitari potest, quo non utantur ad amicos jam comparandos, jam recuperandos, jam abigendos. Viri nil nisi furta addiscunt, exercent, gloriantur; homicidia, mendacia, latrocinia pro virtutibus habent, bigamiam, incestum, concubinatum, habitus eorum diceres; alius alius uxorem furatur, binas tresve uxores imo consanguineas suas ducunt, & concubinas quotlibet, alunt.

Viros zelotypiæ vix incusare poteris; & si quis uxorem cum adultero deprehenderit, hic porcello coemto licentiæ poenam luit, porcellus autem commune tribus ferculum evadit. Polygamiam & concubinarum multitudinem usui sibi cedere credunt, sic enim infantes nascuntur plures, quos vel pro ære numerato vendere, vel pro aliis ad vitam necessariis commutare possunt. Nec magni veniunt mancipia, etenim virum qui 25. ad 40. annos agit, 15. taleris Gallicis, & qui ætatis sunt provectioris, illos 8. ad 10. taleris; puellas pulcherrimas 13. ad 18. annorum 10. taleris, mulieres 12. infantes denique 3. ad 4. taleris venire solent.

Turci, magnam mancipiorum horum quantitatem qui coemunt, ex variis populis compositi esse videntur. Armeniam, Georgiam, Turcoman-

niamque tenentes, Arabibus, Ægyptis imo crucigerorum tempore & Europæis admiscebantur; hinc habitatores Asiæ minoris, Syriæ & reliquarum Turcici imperii regionum, quales ab origine fuerint cognoscere nequimus. Robustiores & pulchri solent esse Turci, rarissime claudicantem vel gibbosum inter illos reperiēs. Mulieres Turcicæ, pulchræ solent esse, & eximio cutis candore superbiunt, quoties enim exspatiantur, (id quod rarissime accidit) penitus velo obtectæ sunt. *Belonio* teste, nulla per totam Asiam vel ruricolæ uxor est, quin colore faciei rosam, & mollitie sericum referat. Turcicæ mulieres frequentibus balneis, suffumigiis omnibusque iis utuntur, quæ ad conservandam seu exaugendam pulchritudinem quidpiam conferre posse ducunt. Persicæ mulieres de pulchritudine sua adhuc magis sollicitæ esse dicuntur. Viri autem eam nunc cum Persis in fusco pellis colore, nunc cum Turcis in rubicundo quærunt. Qui Septemtrionalem Græciæ partem incolunt, illi candidissimi, & qui insulas, sive partes Meridionales occupant, magis fusci coloris esse solent, & mulieres Græcæ Turcicis anteferendæ, majorem alacritatem ex libertate majore, adquisivisse videntur. Græciam, Siciliam, Corsicam, Sardiniam, Hispaniamque tenentes, eadem fere sub axe cœli vivunt, coloris ejusdem & nigridiores sunt quam Angli, Galli, Germani, Poloni, Moldavienses, Circassi; reliqui Europam tenentes sive Septemtrionis & in primis Lapponiæ incolæ prorsus aliud hominum genus constituunt. Rarior est coma nigra seu castanea viris Anglicis, Batavis, & Germanis, Septemtrionem spectantibus; nulla fere in Dania, Suecia, Polonia. Uxores Suecicæ fœcundissimæ sunt, & *Rudbeckio* teste, octo plurimum ad 12. interdum vel 30. infantes pariunt; viri autem sæpe centesimum vitæ annum attingunt, interdum & 140. vivunt, imo alium 156. alium 161. annos implevisse, idem ille testatur.

Vatietatum inter homines obviarum tres causæ esse videntur. Scilicet, influxus cœli, sub quo vivunt, nutrimentum illi connexum, & vitæ ratio, quæ præcipua esse videtur.

America non nisi unicam hominum speciem continet, omnes plus minusve nigrescentes; & si Septemtrionalem ejus partem excipias, ubi Lapponis Europæ similes, & capillis candidis instructos videmus, reliquos omnes sibi simillimos, ut in Europa dissimiles videbis. Uniformitatis causam in ratione vivendi, inter omnes eadem quærimus. Omnes enim silvestrem & incultam vivunt vitam, & exiguum sane est, ex quo Mexicanis & Peruvianis cultus quidam accesserit. Originem suam, undecumque trahant, communem habere videntur, & speciei suæ propria ad hodiernum diem usque conservaverunt; etenim & cultus expertes omnes eandem fere vitæ rationem habuere, nec cœli sui tanta est dissimilitudo, quantam in reliquis terræ partibus experimur, & quum recentes terræ huic immitterentur, causæ variationum alibi conspiciendarum, haud effectus tam sensibiles, tam brevi tempore producere potuerunt. Quod vero ortum eorum primum spectat, consentientibus Theologis nostris, eundem illorum esse ducimus, qui nobis fuit; imo vel comparatis Tartaris Orientalibus & silvestribus Americæ Septemtrionalis habitatoribus, eandem esse omnium originem vel adspectus ipse docebit.

En tibi L. B. epitomen eorum, quæ in Historia hominis naturali, *Cel. de Buffon*, tanto Viro, Auctore, ea qua solet, elegantia ac doctrina, perscripta leguntur.

Ebraicum hominis nomen est : *Enosch* , Græcum : *Anthropos* , Italicum : *Huomo* , Hispanicum : *Hombre* , Germanicum : *Mensch* , Gallicum denique : *homme* .

Cæterum omnes hominis partes multum olei & falis volatilis, phlegmati & terra commixti continent. Nec solum Medicæ artis objecto, sed & subiecto cedit. Ut autem vel mortuum, vel vivum corpus hominis considerari valet ; sic & nos, quo ordine incedamus, primo ea quæ ex corpore humano vivo, tum, quæ ex cadavere ejus Medicinæ usibus veniunt, & quidem præcipua, percensebimus.

Vivi hominis comam, ungues, cerumen aurium, salivam, sanguinem, urinam & excrementa, ac in primis mulieris lac ac secundinas in suos usus convertit.

Coma adusta, subdita naso mulieris hysterica adfectione laborantis, hanc profligare dicitur. Et qui destillatione elicitur, sal volatilis acutissimus, contra epilepsiam, apoplexiam, lethargiam, aliasque adfectiones soporosas, dosi gr. vi. ad xvi. cum liquore quodam conveniente commendatur. Oleum, quod destillatione per retortam in balneo arenæ ex coma subtrahitur, admodum pro eliciendis & reducendis capillis æstimatur, si melle mixtum pro linimento adhibeatur. Cineris comæ ℥ss. ad ℥j. scypho vini infundunt, & colaturam per aliquot dies mane jejuno exhibent, quam eximio remedio contra icterum cedere dicunt.

Unguibus pedum & digitorum magna vis est & alvum ciendi & vomitum excitandi, quod medium, violentiæ suæ ergo, non nisi robustioribus exhibendum est. Sic & contra epilepsiam commendantur. Pro dosi in substantia cedat ℥j. aut per noctem vino infusorum ℥ij. *Schroderus* sequenti ratione eosdem præparari docet:

Rx. Pulver. ex limatura unguium ℥j.

Macer. in vini optim. lib. j. usque dum in mucilaginem abierit, col. add. spirit. vin. ℥j. & f. a. u. Dosis sit ℥j. ad ℥vj. contra epilepsiam, lethargiam, hydropem & febres intermittentes.

Cerumen aurium qualitate saponi simili, abstergente & detergente gaudet. Cæterum & amaritudinis & substantiæ suæ ergo, quam ex melle & cera conflata crederes pro vulnerario habetur, & suffragante experientia, contra ictus nervorum & tendinum est præstantissimum; dum vel nudum, vel balsamo sulphuris seu Peruviano mixtum, adhibeatur. *Ettmuller*, cum oleo nucibus expresso mixtum pro plagis detergendis commendat, & *Agricola* in *Chirurgia minore*, sequens unguentum, brevissimo temporis spatio inflammationes & articulorum tumores, imo abscessus sanare docet:

Rx. Ceruminis aurium ℥iij.

Sacchari saturni ℥ij.

Olei nucibus expressi, q. f.

M., & si forsan majorem consistentiam requirerent, lenioris ignis ope spissescant.

Imo & pellem circa ungues dehiscentem statim resanat cerumen aurium, cujus ℥ss. cum liquore quodam conveniente, pro specifico contra colicam commendat *Ettmuller*. *German. Ephem.* typographum vetustiore, diutius perspicillo usum, postquam angulos oculorum internos & palpebras cerumine aurium iteratis unxisset, visus sui aciem recepisse, nec amplius per-

spicillo usum fuisse docent. Nihil habemus, quod his omnibus obloquamur, interim, quum tantus adsit cumulus remediorum, haud adeo ingratum, virtute tamen eorundem, ut sperma ceti contra colicam, contra plagas nervosas balsamum Peruvianum & Copavienſe, his potius, si potes, utendum esse suademus; decentiam amat postulatque Medicina, & non solum media nimis justo pretiosa, ac charlataneriam redolentia, sed & nimium abjecta exulare jubet, ne horum contemptus & horror in Medicum ipsum redundet.

Saliva non solum est liquor aquosus, sed salis sui volatilis ammoniaci ergo, detergente, vulneraria, & variorum susceptibili gaudet virtute. Hinc contra lichenes, pruritus & pellis dehiscientiam adhibetur, imo ab hemorrhoidibus diutioribus sanatos esse novimus plures, dummodo charta, saliva irrigata, variis easdem adfricuerint. Nutrices, matutino præsertim tempore, infantum faciem, pro subtrahendis sordibus, saliva sua, irrigant, satius censemus, aquam substituerent. Multas quoque plagas suctu sanatas esse videmus quotidie, & hominis salivam dummodo sanus fuerit atque jejuna, contra morsus animalium venenosorum, optimam cognovimus. Sic D. Hunerwolff in *Ephem. Germ. Dec. II. anni III. pag. 195.* recenset, scalpello unum ex fratribus suis corneæ oculi vulnus inflixisse, & humorem aquosum elicuisse, post autem brevi sanatum fuisse oculum, quem mater jejuna, quovis matutino tempore suaviter delinxit. Imo de febri-fuga salivæ virtute, *Ephem. Dec. III. anni V. & VI. testibus, Muschel de Moschau D.* refert: hominem quemdam sæpius febrem pillulis quibusdam profligasse, quæ non nisi ex pane, sale communi adperso, in ore hominis sani atque jejuni manducato, & saliva ejus expleta, componebantur. Imo mulierem menstruis laborantem, sac panis frustulum manducatum, alii, menstruum retentione quæ laborat, exhibentem, hujus menstrua provocare adserunt omnes. Quum igitur variæ qualitates insint salivæ hominis sani, noxiæ ejus debent esse qualitates, dum ex infirmo proficiscitur. Hinc increpandus mos est nutricium, quæ quamvis valetudinariæ, omnia quæ infantibus exhibere volunt, antea delibare solent. Sic enim sanguinem infantum chylus vitiatum intrat, & morborum origo, qui languores illos corripunt, & altissimis radicibus infixam retinent, suorum causam.

Sanguis humanus destillatione aquam, spiritum, sal volatile, sal fixum & oleum præbet. Quæ ejus principia, sive nuda sint, sive aliis mixta, varia quidem Medicinæ subministrant remedia, ast effectus incerti, nec igitur frequentioris hodie usus. Hinc illa tranſeant. Sanguis humanus recens calidusque haustus, contra epilepsiam medio cedere dicitur, dummodo violentiori corporis exercitio sudorem provocare studeat ægrotans; *Ledelius, D.* e contrario, testibus *Ephem. Germ. Dec. I. anni IX. & X. pag. 324.*, varios recenset epilepticos, qui adhibita quavis necessaria cautione, sanguinem hominis recentem hauserant, nec tamen ab epilepsiæ accessibus liberabantur; imo alium ex his, triduo mortuum esse, & suspectum potius medium illud reddidisse, quidquod alios, hausto sanguine humano, nephriticos evasisse, alios item mania correptos fuisse novimus. Alia itaque media efficaciora quum adsint, quidquod ipsa humanitate reclamitante, usu ejus abſtineas, suadeo. Exteriores sanguinis usum quod spectat, hemorrhagiis & in primis nasi reprimendis eum cedere constat.

Cujus ergo vel linteam telam sanguini irrigato , & usque dum arefcat , fronti adplicatam teneto ; vel ignis ope sanguinem arefactum & in pulverem reductum naribus inspergito ; vel guttulas quasdam candente ferro excipias , & vaporem naso recipias . Glutinositati enim sua agit sanguis , & vasis reiectis vel operculi instar adhæret , vel in fronte arefciendo , capacitatem vasorum , in nares sese egerentium , constringet .

Urina est serositas quædam excrementitia , quæ in renibus separatur , post per uretheres ad vesicam descendit , tandem suo tempore , effluit . Nec tamen pure aquosa est urina , sed oleo quodam & multo sale volatili imprægnata , quem sanguinem transeundo dissolvit . His principiis itaque convenientes habet qualitates , & jam externo , jam interiori usui cedit . Interne hausta urina aperiendi , attenuandi , resolvendi & detergendi facultate gaudet , removet ventris constipationem , profligat icterum , dissipat vapores , & provocat menstrua . *Ramazzinus de morbis artificum* virgines Italicas pallido faciei colore laborantes , per aliquot tempus jejunas mane , scyphum urinæ suæ haurire docet . Imo contra hydropem , paralyfin , arthritidem , & morbos hypochondriacos utilitati eximiæ cedit . Dummodo tepidæ & recentis redditæ 3v. ad vj. matutino tempore jejunus recipias , & in primis si ex juvene sano proficiatur . Sic etiam clysteres , contra colicam ac ventris segnitiam ingreditur , sale enim suo , ceu stimulo majorem purgandi facultatem clysteribus addit . Quod ad exteriorem ejus usum spectat , dolores arthriticos leniendi facultate gaudet , sive cataplasmaticis instar , absinthio contuso admixta , sive pro fomento , sive denique lotionis instar , contra scabiem , & rheumatismos , sanguini spissescenti originem debentes , veniat ; oleo scilicet suo ac sale volatili humores fixos resolvit , qui rheumaticos dolores efficiebant . Cæterum Chymica ars , ex principiis suis quædam , ut spiritum , sale volatilem & oleum separare docet , & multiplici usui ea cedere refert . Spiritui & sali eadem virtus est , quæ contra febrem quartanam & malignam , imo obstructions conveniunt , ac sudore , urinaque expellit . Pro dosi gr. vj. ad xvj. salis , & gutt. viij. ad xx. spiritus cum aliquo liquore convenienti veniant . Binis quoque uncis aquæ-vitæ si 3ij. spiritus hujus rectificati admisceas , habebis mixturam præstantissimam , pro adfricandis membris paralyticis & pro arthritide ischiatica . Separato tandem spiritu , oleum quod filtratione superest , foetorem summum exhibet , & extrinsecus tantum pro resolvendis tumoribus frigidis , paralyfi , & ad olfaciendum mulieribus hystericis præberi solet . Sal fixum , peracta destillatione in capite mortuo remanens , nullius est usus . Phosphori tandem materiæ cedit urina , qui ex quo inventus fuit , multo sane Physicorum studio [disquirebatur , etenim compositionis ratio auctori erat inter secretis . Jam vero electrica rerum virtute detecta , omnia corpora electrica & phosphoros declarat esse Physica .

Excrementa humana , quæ *Paracelso* sulphuris occidentalis nomine veniunt , sulphuris oleique sui anodynus ergo , emolliendi , leniendi , digerendi & maturandi virtute gaudent . Illis igitur ad maturandos tumores contagiosos , teste *Etmmullero* , utuntur ; eaque cataplasmati reliquis præstantiori ad conciliandam tumorum maturitatem cessisse addit . Nec non arefacta & in pulvere redacta , deinde autem melle commixta , gutturi , contra anginam circumdari solent . Eidem morbo medentes alii , & usum pulveris hujus

hujus internum, dosi ʒß. ad ʒj. addere & commendare solent. Album Græcum & majori resolvendi virtute, & gratiori sapore instructum, nos quidem anteferendum esse censemus. Alii tandem Meconium arefactum & in pulverem redactum contra epilepsiam, continuato usu, facere volunt. Quæ autem ex stercore hominis destillatione provenit aqua & oleum, varia virtute gaudent. Sufficientem scilicet illius quantitatem aeri exponunt usque dum fere consumpta in pulverem abeat. Post retortæ induunt, & subdito statim ab initio, igne parcellissimo, post autem per gradus exaucto, oleum & aquam destillant. Tum filtratione ab illo hanc separant, & ambo balneo maris rectificant, quo rectificatione iterata sui foetoris quidpiam amittat. Et hæc quidem aqua pro ophthalmico & præstantissimo cosmetico habita, maculas corneæ, si quasdam guttulas sæpius per diem oculo instillaveris, profligat; aciemque oculorum exacuat, comam elicit, cuti splendorem & nitorem induit, asperitates ac cicatrices manuum lævigat. Et hic locum merentur illa, quæ in *Ephem. Germ. Tom. IX. Anni 1752.* a D. *Salentino* observata leges sequentibus: Matronam quandam ego nobilem cognovi, quæ usu aquæ hujus stercoralis continuo, usque ad summam senectutem, candidissimam sibi lævissimamque pellem conservaverat. En præparationis modum: Servorum quemdam juniorem & bene sanum eligebat, quæ naturæ necessitati subventurus, pelvi quodam cupreo, stanno obducto sua excrementa reddebat, statim exinde autem operculo exactissime obturabat. Ac paullo post refrigeratis omnibus, aquam operculo adhærentem, ad usum dominæ conservabat. Qua quidem illa manus sibi ac faciem lavando, ad invidiam usque pulchram pellem vel senescens retinebat. Oleosæ etiam aquæ hujus naturæ virtutem illam constare adserimus; ast quem quæso tam servilis cupido retinendæ pulchritudinis incedere potest! Oleum vero ex stercore humano destillatione proveniens, linimento cedit eximio contra scabiem, lichenes, erysipelatem ulcerosam, & gangrænam mammarum. *Paracelsus* est, qui diutiori & leni digestionem stercore humano, musci & zibethi odorem conciliari docet, quod zibethum occidentale nuncupat. Non negamus rei possibilitatem, accedente etiam experientia, quam in *historia Academia Scientiarum anni 1706. pag. 6. & 7.* relatum legimus: Quum enim Cel. *Lemery* $\frac{3}{2}$. libram Galbani, $\frac{1}{2}$. libram Sagapeni, totidem bituminis Judaici & 4. uncias Opoponagis coemisset, & omnia crumenis suis immisisset, omnia separata, Sagapenum vero & Opoponagem eodem sacculo involuta, domum denique rediens, fortissimum musci odorem secum adportabat; etenim omnia ex illis singulatim considerata summum edunt foetorem, excepto bitumine Judaico, odoris a musco diversissimi; imo omnia ista, contra vapores, ex odore musci & similium exorientes adhibentur. Sacculos ille disquisivit, & novissimos reperit, nec musco conservando adhibitos, tandem vero commixtionem horum odorum, musci odorem produxisse expertus est, & variis experimentis cognovit. Quidni igitur & sterco humanum reiterata & lenta digestionem, foetorem deponere & gratum odorem induere potest? Olea animantia ac empyreumatica foetorem suum priorem tempore amittere, & rectificationem iterata gratum odorem adquirere constat.

Lac mulierum modico butyro & caseo, ast multo sero instructum, temperans, restaurans, ac pro tabe, marasmo, ac leniendo acido sanguinis opti-

optimum habeatur. Et quum primo hominis nutrimento a natura sit destinatum, multa & similitudine corpori & temperamento nostro accedit. Ast variis iisque vix superandis difficultatibus usus lactis premitur, quamvis optimus sit judicandus; ubi enim nutrices nec iracundas, nec vinodeditas, nec dissolute viventes reperies? vitia autem talia multum faciunt ad qualitatem lactis, & lactis suctio adultis difficillima, insufficiens, imo tumorum causa evadit in papillis nutricis. His exacte respondet & opinio Cel. Cheyne in tractatu de morbis corporis & animi; hinc ille & lactis asinini seu caprini usum substituendum esse suadet:

Secundinae multum olei & salis volatilis continent; & illae quidem praestantiores habeantur, quae ex matre juniore & sana provenientes, pueri potius quam puellae involucro inserviere. Hae igitur calidae adhuc faciei applicantur, quo & lichenes, & maculae, quibus saepius notati sunt foetus, deleantur. Arefactarum pulverem vero, dosi ℥j. ad ℥ij. cum jusculo, contra epilepsiam, & pro partu accelerando, pro foetu mortuo ex utero expellendo, & sedandis uteri torminibus commendantur. Spiritus earum volatilis, destillatione rediens, contra varios mulierum morbos, ad provocanda menstrua & urinam, ad partum faciliorem reddendum, alia, mirifice cedit. Dosis sit cochleare j. ad ij. Eodem remedio & menstrua foeminae per 6. annos retenta rediisse, & Regem quemdam Poloniae epilepticum sanatum fuisse testatur Ettmuller. En destillationis modum:

Rx. Secundinas cum vasis quibuscumque suis ex muliere sana, & si fieri potest, partus primi, ejusque masculini; imitte illas Lambico, adapta recipientem, obtura quam exacte potes, juncturas, & leni digestionem relinque omnia. Sic secundinae sensim putrescent, in gelatinam quamdam abibunt; & digestionem 6. mensium ad minimum peracta, ope ignis lentioris distilla spiritum volatilem. Pro acceleranda digestionem & putrefactionem secundinarum, membranam qua teguntur, subtrahere si placet, antequam Lambico tradantur.

Cadaveris humani ex partibus: Mumia, adeps, cranium, & usnea Medicinae usibus adpropriantur.

Mumiam dicimus hominis cadaver, aromatibus expletum & arefactum. Primae Mumiae ex Aegypto ad nos delatae sunt. Antiquiores scilicet Aegyptii mortuorum cadavera, bitumine Judaico, myrrhis, similibusque, & humiditates absorbentibus, & poros ne aer ingrederetur, occludentibus, explebant. Et quamvis hodie nostrorum cadavera iisdem aromatibus expleamus, nescio qui fiat, ut nulla corruptioni adeo resistent. Illa enim, si fides auctoribus, per iij. mille annos conservata sunt, hodierna autem vix trecentos perdurant. Sic & ventorum violentia obortae arenae nubes in desertis Lybiae & Soriae proficiscentium quosdam saepius obtegunt, suffocant, corpora autem ardore solis arefacta mumiae candidae audiunt, nec ulli veniunt usui in Medicina. Cave autem credas, omnes quas pharmacopolae coemunt atque venum exponunt, mumias esse Aegyptiacas, sed cadavera mortua vel hodie adhuc aromatibus explent, post autem furni calore perficiunt. Mumia igitur sit munda, nigrida, splendens & odoris fortissimi quidem, nec tamen ingrati. Ex illa igitur destillatione oleum & sal volatile recipiunt; quod ad resolvendum sanguinem coagulatum, qui ex lapsu vel contusione exortus fuerit mirifice facit. Intus dosi ℥ss. vel ℥ij.

accepta caput expurgat, obstructions matricis, & menstrua albida profligat. Nec non tinctura, quam ex solutione ejus in spiritu vini recipiunt, qualitatibus ejus balsamicis gaudet, & dosi gutt. xij. ad xxiiij. potionibus vulnerariis additur. Mumia emplastrum oppedeltch, & stypticum Pharmacopœiæ Parisiensis intrat.

Adeps humanus anodyna, emolliente & resolvente virtute gaudet, & a variis contra marasimum & tabem, imo dissolvendum cujusdam intestini coagulatum sanguinem, commendatur. Sic Cel. *Paullinus* septimum annum agentem puellam quum ruri degeret, ex graviore lapsu de scala magnam sanguinis quantitatem evomisse, & mortuam reputatam esse scribit. Quum vero præter adipem humanum nihil sibi, Medico accedenti, ad manus esset, ille ejus ℥ij. ad ℥ijß. cum jusculo quodam exhibuit, & continuato per dies eodem medio, multum ab initio cruoris facile puella ejecit, & tandem prorsus sanata fuit. Cæterum vero extrinseco saltem usu contra rheumatismos, aliasque membrorum & nervorum adfectiones adhiberi solet, siquidem arthritidis dolores lenit; imo majoris penetrandi virtutis ergo balsamo Peruviano interdum admiscetur. Ut autem omnis generatim adeps, emollienti, detergente & anodyna virtute gaudet; sic & quilibet quædam ex natura ejus ex quo provenit, singularia, conservat, quo liquidiores autem sunt axungia istæ, eo magis penetrandi facultate gaudent, & recentes magis emollientes, vetustiores vero magis resolventes habeantur. Sic emollientibus & anodynis adnumeratur adeps anseris, anatis, canis, caponis, castoris, gallinæ, hominis, vituli, & porci; debilissimus autem est porcineus, ob frigidam humidamque porci naturam. Adeps martori, lupi, serpentis, mustelæ, viperæ, ursi & vulpis attenuantes & resolventes, adeps tamen lucii, calidioris suæ naturæ ergo, maturativus habetur atque deterisivus. Notandum, quod, quum de adipe simpliciter sermo sit, axungium intellectam esse velimus.

Cranium hominis multo sale volatili abundat, & frequens est ejus usus in epilepsiæ, apoplexiæ, aliorumque cerebri morborum sanatione. Seligas autem illud, quod ex homine forti, sano, & recenter morte violentiori enecato, nec sepulto, proficiscitur. Nulla prorsus virtus inesset cranio hominis ex morbo morto, imo valde nocivum esset si forsan virus venereum, ut solet, aliquam ejus partem pertigerit, quod exostoses obortæ faciles loquuntur. Arefactum vero in pulverem reducitur, cujus gr. xij. ad ℥ij. vel nuda, vel potioni convenienti vel opiato admixta præscribunt. Alii illud calcinandum esse docent, nobis tamen calcinatione omnem ejus sale volatilem & oleum, activa ejus principia abire videntur, ita ut cranium quod præparatum dicunt, & super porphyrite in pulverem reducunt, non sit nisi corpus mortuum insipidum, principiis activis destitutum, & non nisi virtute acida primarum viarum absorbendi præditum, aut anti-epileptica omni carens. Varii sunt, qui nullum prorsus qualitatem eidem inesse judicarunt cum *Galeno*, *Fuller*, *Erastus*, *Junker*, alii. At ut eorum opinioni & nos accedamus vetat & aliorum auctoritas, & nostra ipsorum experientia, sæpius enim nudum pulverem humani cranii contra epilepsiam, & adultis & infantibus felici cum successu exhibuimus, illa autem, quibus admixtus erat, omnia ut rad. Valerian. præon. mascul. reliqua, sine pulvere isto nullius fuerant effectus. Haud igitur ex admixtis anti epileptica ejus.

virtus petenda est, ut illi Viri Cell. volunt, & si forsan usui ab illis instituto haud respondidit effectus, vel ex nimis parciore pulveris dosi, vel virtute cum tempore abeunte seu imminuta negati effectus causam petendam esse ducimus. Quomodocumque res se habeat, nos nostra experientia comprobatum pulverem huncce, non possumus quin Tibi L. commendemus. Ex cranio humano, accedente aceto Magisterium componunt, quod composita quædam anti-epileptica intrat, dosi gr. x. ad xxx. nudum tamen parcissimi est usus, nec enim eximie virtutis esse potest, siquidem ex cranio humano calcinato, hinc principiis suis activis, ut diximus, privato, præparatur. Tandem destillatione sua spiritum, & salem volatilem, & oleum præbet, quorum bini priores, contra epilepsiam, apoplexiam, lethargiam & hystericos morbos commendantur. Ex spiritu scilicet gutt. vj. ad xxvj. & ex sale gr. vj. ad xvj. cum aqua conveniente præscribunt. Oleum resolvendi, & naso mulierum subditum, vapores hystericos profligandi virtute gaudet; imo, contra epilepsiam, gutt. j. ad vj. intus recipiantur, quamvis foetoris sui causa, infrequentiori usui veniat.

Cranium humanum inest aquæ hirundinum, & pulveribus antispasmodicis Pharmacopœiæ Parisiensis, Spiritus volatilis tandem guttas Anglicas cephalicas, & anodynas ejusdem Pharmacopœiæ ingreditur.

Usneam plantam illam dicunt, seu musci speciem, quam in cranio aeri expositorum, temporum tractu excrescere videmus. Communior est in Hibernia, fures enim ex patibulis suspensi, remanent, usque dum per frusta decidant, sic usneæ in cranio generandæ tempus relictum est. Multum illa continet olei & salis volatilis, ac tota venit usibus Medicinæ. Extrinsecus adplicata, adstringendi & sanguinem retinendi virtute gaudere censetur, dummodo aliquod frustulum ejus naso immittatur. Et Crollii unguentum sympatheticum ac magneticum ingreditur. Cæterum sale volatili cranii quum gaudeat, pro epilepsia cedere posset; ast nos *Simoni Paulo* adfentimur, qui, ubi de Usnea agit, Medicum, ex gravitate suæ artis multum derogare refert, dum usneæ usum præscribit, siquidem adstringentium cumulus est, nec cogitatu adeo horribilium, nec gustui adeo ingratorum. Conf. ea, quæ de Usnea. Tom. II. *Materiæ Medicæ*, dicta sunt.

℞. Adip. human. ℥j.

Ol. laur. ℥ss.

Piper. alb. ℥ss.

Euphorb. ℥j.

Trichitid. solut. in spir. vin. ℥ss.

Ol. essential. junip.

Ol. petreol. ana ℥j.

M. f. linimentum contra atrophiam

℞. Mumiae gr. xxiiij.

Salis succini

cornu cervini, ana gr. iij.

M. F. pulvis contra contusiones.

Vel :

℞. Mumiae

Terræ sigillatæ

Sanguinis draconis ana ℥j.

Spermatis ceti ℥j.

Rheobarbari ℥iiij.

M. F. omnium pulv. dosis sit ℥j. prævia V. S.

℞. Cranii hum.

Rad. pæon. masc. ana ℥j.

Cinnab. nativ. ℥ij.

Ol. essential. nuc. myristic. gutt. iiij.

M. f. pulvis contra morbos infantum convulsivos; dosis sit gr. viij. ad xvj. pro infante, & ℥ss. pro adulto.

℞. Adip. human.

ex serpente

} aq. cinnamom. solut. ana ℥iiij.

Rad. pyrethri

zinziber. pulveris. ana ℥ij.

Camphoræ ℥j.

Add. q. s. ol. nuc. myristic. ut f. linimentum, contra paralyfin & tumores œdomatosos, quo partem adfectam mane & vespera ungit.

℞. Usnæ ex cranio humano ℥ij.

Mumia ℥ss.

Ol. rosat.

Bol. armen. ana ℥j.

Ol. lini ℥j.

M. f. unguentum, quod *Armarium* dicunt, a *Paracelso* inventum, cui singularem virtutem plagas sanandi tribuunt.

Finis historie animalium, & totius Materiæ Medicæ.

